


Metĩndjwỳnh Kute  
Memã Kabẽn Ny Jarẽnh



New Testament in Kayapó (BR:txu:Kayapó)

**Metĩndjwỳnh Kute Memã Kabẽn Ny Jarẽnh  
New Testament in Kayapó (BR:txu:Kayapó)**

copyright © 2012 Wycliffe Bible Translators, Inc.

Language: Kayapó

Translation by: Wycliffe Bible Translators, Inc.

Kayapó [txu], Brazil

**Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Kayapó

**© 2012, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

## Contents

|                             |     |
|-----------------------------|-----|
| Matêu . . . . .             | 1   |
| Makô . . . . .              | 74  |
| Ruka . . . . .              | 114 |
| Djuão rax . . . . .         | 187 |
| Metĩndjwýnh Karô . . . . .  | 235 |
| Rôma . . . . .              | 297 |
| Kôritu kumrêx . . . . .     | 334 |
| Atãri Kôritu . . . . .      | 368 |
| Garaxa . . . . .            | 391 |
| Epexu . . . . .             | 405 |
| Pirpu . . . . .             | 418 |
| Korxi . . . . .             | 426 |
| Texarônika kumrêx . . . . . | 435 |
| Atãri Texarônika . . . . .  | 442 |
| Ximoxi kumrêx . . . . .     | 446 |
| Atãri Ximoxi . . . . .      | 456 |
| Xitu . . . . .              | 463 |
| Piremô . . . . .            | 467 |
| Mekbê idjaer . . . . .      | 469 |
| Xijagu . . . . .            | 494 |
| Pedru kumrêx . . . . .      | 503 |
| Atãri Pedru . . . . .       | 513 |
| Djuão kumrêx . . . . .      | 519 |
| Atãri Djuão . . . . .       | 528 |
| Djuãoo ino rer . . . . .    | 530 |
| Djuda . . . . .             | 532 |
| Mýjja apôx . . . . .        | 535 |

## Matêu memã Jeju'ã ujarênh ne ja.

Matêu ne prîne Jeju'ã ajarê, rwÿk djà kraxrûm ne 'ã ujarênh tèn àbir djãmã kumê. Matêubê ne Jeju kôt ba djwÿnh'õ. Nãm bënjadwÿr bajtemmã pi'ók kaprïo atom djâkam nhÿ nhym kam Jeju kum kabên nhym tu kum iren kam mã Jejukôt ajkamê. Kôt bikamênh tèm rã'ã nhym Jeju wabi. Nhym kam prîne gwaj bamã Jeju'ã pi'ók no'ók ne. Kute Jeju pykabê ar bari noo omÿnh ne amako kute mar kôt ne gwaj bamã 'ã pi'ók no'ók ne.

Matêu nhidji 'õdjwÿbê ne Rewi.

*Jeju nhingêt'ã ujarênh kadjy ne ja.*

*Ruk 3.23*

<sup>1</sup> Ba, ibê Matêu ne ba pi'ókkam ar amã ik-abên jarê. Dja ba ar amã Jeju Kritu'ã ajarê. Metîndjwÿnh ne 'ã Bënjadwÿrbê kumkati mē. Kute 'ã Bënjadwÿrbê kumkati mēnhkôt ne me Jejumã Kritu jarê. Dja ba Jeju Kritu nhingêt kumrêx'ã ar amã ajarê. Aben nHITEPã ar amã ingêt djàri arênh tē. O tèn arÿm 'ã ar amã pi'ók no'ók gar arên ama. Jeju nhingêt bē ne Dawi. Ne ingêt 'õdjwÿbê Abraão.

<sup>2</sup> Ingêt Abraão ne Idjak dji.

Idjak dji nhym arÿm kato. Katon kam arÿm abatành ne ar ba. Ar ba:n kam arÿm Djako dji.

Djako dji nhym arÿm kato. Katon kam arÿm abatành ne ar ba. Ar ba: nhym kam arÿm aben kukãm Djudamē kamy ar adjuw.

Djudamē kamy ar adjuw nhym ar arÿm apôx. Apôx ne kam arÿm abatành ne ar ba.

<sup>3</sup> Nhym kam Djuda arÿm Tamaremã Perêmê Djera ar adjuw.

Perêmê Djera ar adjuw nhym ar arÿm apôx. Apôx ne arÿm abatành ne ar ba. Ar ba: nhym kam Perê arÿm Êrõ dji.

Êrõ dji nhym arÿm kato. Katon kam arÿm abatành ne ar ba. Ar ba:n kam arÿm Arão dji.

Arão dji nhym arÿm kato. Katon kam arÿm abatành ne ar ba.

<sup>4</sup> Ar ba:n kam arÿm Amīnadabi dji.

Amīnadabi dji nhym arÿm kato. Katon kam arÿm abatành ne ar ba. Ar ba:n kam arÿm Naxõ dji.

Naxõ dji nhym arÿm kato. Katon kam arÿm abatành ne ar ba. Ar ba:n kam arÿm Xamão dji.

Xamão dji nhym arÿm kato. Katon kam arÿm abatành ne ar ba.

<sup>5</sup> Ar ba:n kam arÿm Rabemã Bôadji dji.

Bôadji dji nhym arÿm kato. Katon kam arÿm abatành ne ar ba. Ar ba:n kam arÿm Ruximã Ôbet dji.

Ôbet dji nhym arÿm kato. Katon kam arÿm abatành ne ar ba. Ar ba:n kam arÿm Djexe dji.

Djexe dji nhym arÿm kato. Katon kam arÿm abatành ne ar ba.

<sup>6</sup> Ar ba:n kam arÿm Dawi dji.

Dawi dji nhym arÿm kato. Katon kam arÿm abatành ne ar ba. Ar ba:n kam arÿm kubê bënjadwÿr rax. Ar ba:n kam arÿm Urij prômã Xaromão dji.

Xaromão dji nhym arÿm kato. Katon kam arÿm abatành ne ar ba.

<sup>7</sup> Ar ba:n kam arÿm Robowão dji.

Robowão dji nhym arÿm kato. Katon kam arÿm abatành ne ar ba. Ar ba:n arÿm Abij dji.

Abij dji nhym arÿm kato. Katon kam arÿm abatành ne ar ba. Ar ba:n arÿm Adja dji.

Adja dji nhym arÿm kato. Katon kam arÿm abatành ne ar ba.

<sup>8</sup> Ar ba:n arÿm Djoxapa dji.

Djoxapa dji nhym arÿm kato. Katon kam arÿm abatành ne ar ba. Ar ba:n arÿm Djorão dji.

Djorão dji nhym arÿm kato. Katon arÿm abatành ne ar ba. Ar ba:n arÿm Udji dji.

Udji dji nhym arÿm kato. Katon arÿm abatành ne ar ba.

<sup>9</sup> Ar ba:n arÿm Djotão dji.

Djotão dji nhym arÿm kato. Katon kam arÿm abatành ne ar ba. Djotão ar ba:n arÿm Akadji dji.

Akadji dji nhyr arým kato. Katon kam arým abatàn ne ar ba. Ar ba:n arým Edjekij dji.

Edjekij dji nhyr arým kato. Katon kam arým abatàn ne ar ba.

<sup>10</sup> Ar ba:n arým Manaxe dji.

Manaxe dji nhyr arým kato. Katon arým abatàn ne ar ba. Ar ba:n arým Amõ dji.

Amõ dji nhyr arým kato. Katon arým abatàn ne ar ba. Ar ba:n arým Djoxij dji.

Djoxij dji nhyr arým kato. Katon kam arým abatàn ne ar ba.

<sup>11</sup> Ar ba:n arým Djekonijmẽ kamy ar adjuw.

Djekonijmẽ kamy ar adjuw nhyr ar arým apõx. Apõx ne kam arým abatàn ne ar ba. Nhyr kam me kurê djwýnh arým mebê idjaer'ýr prõt ne kam me pa 'amýn meo mõ. Me pardja'ã meo mõ. Krĩraxbê Babirõnij'ýr meo mõn meo bõx.

<sup>12</sup> Nhyr me krĩraxbê Babirõnijkam ar ba: nhyr kam Djekonij arým Xarati dji.

Xarati dji nhyr arým kato. Katon kam arým abatàn ne ar ba. Ar ba:n arým Djorba dji.

Djorba dji nhyr arým kato. Katon kam arým abatàn ne ar ba.

<sup>13</sup> Ar ba:n arým Abidji dji.

Abidji dji nhyr arým kato. Katon kam arým abatàn ne ar ba. Ar ba:n arým Erijkĩ dji.

Erijkĩ dji nhyr arým kato. Katon kam arým abatàn ne ar ba. Ar ba:n arým Adjõ dji.

Adjõ dji nhyr arým kato. Katon kam arým abatàn ne ar ba.

<sup>14</sup> Ar ba:n arým Xadoki dji.

Xadoki dji nhyr arým kato. Katon arým abatàn ne ar ba. Ar ba:n arým Akĩ dji.

Akĩ dji nhyr arým kato. Katon arým abatàn ne ar ba. Ar ba:n arým Eriju dji.

Eriju dji nhyr arým kato. Katon arým abatàn ne ar ba.

<sup>15</sup> Ar ba:n arým Erijdjõ dji.

Erijdjõ dji nhyr arým kato. Katon arým abatàn ne ar ba. Ar ba:n arým Matã dji.

Matã dji nhyr arým kato. Katon arým abatàn ne ar ba. Ar ba:n arým Djako dji.

Djako dji nhyr arým kato. Katon arým abatàn ne ar ba.

<sup>16</sup> Ar ba:n arým Jõdje dji.

Jõdje dji nhyr arým kato. Katon arým abatàn ne ar ba. Ne kam arým kubê Marij mjên.

Ne kam arým Jeju'ýr o bõx. Marij kurũm ne arým Jeju kato. Katon kam arým abatàn ne ar ba.

Be, Jeju nhingêt'ã ujarên ne ja. Jejubê ne me õ Bẽnjadjwýrbê kumkati. Kubê ne Kritu.

<sup>17</sup> Be, Abraão krakam kra mã aben djõ'ã apõx. Nhyr me aben nHITEPã ar'ã akre: nhyr ar kute 14 pyrãk ne aben djõ'ã apõx nhyr me kam Dawi'ýr o bõx. Nhyr kam Dawi krakam kra mã aben djõ'ã apõx. Nhyr me aben nHITEPã ar'ã akre: nhyr ajte ar kute 14 pyrãk ne aben djõ'ã apõx. Nhyr me kam arým me kurê djwýnh kute mebê idjaer pytar'ýr o bõx. Me me utàn krĩraxbê Babirõnij'ýr meo bõx. Nhyr kam me krakam kra mã aben djõ'ã apõx. Nhyr me aben nHITEPã ar'ã akre: nhyr ajte ar kute 14 pyrãk ne aben djõ'ã apõx. Nhyr me kam arým Kritu'ýr o bõx. Metĩndjwýnh kute 'ã Bẽnjadjwýrbê kumkati mẽnkhõt ne me kum Kritu jarê.

*Jeju nã kurũm kator kadjy ne ja.*

*Ruk 1.26*

<sup>18</sup> Jakam dja ba Jeju Kritu kator'ã ajarê. Nã kurũm kator'ã ajarê. Nãbê ne Marij. Metĩndjwýnh Karõ ne Marij'ýr bõx nhyr arým tujarõ. Marij tujarõ kêttri ne Jõdje arým amim kum kabên nhyr me kunĩ kuma. Nãm amim kum kabên kajgobit. Kraxje kute o nõr kêt. Nhyr kam arým tujarõ. Tujarõ nhyr arým omũ. <sup>19</sup> Ne kam bit kute kangamã. Jõdje mexkam bit kute me kãxã kangamãn amim karõo nhýn amim,

—Ne ba ren me krãptĩ nhipõkri kanga nhyr ren me arým kam ngryk ne. Ba me krãptĩ kãxã kanga. Nãm ã mexkam amim

ane. <sup>20</sup> Nãm ã amim anhÿro nhÿn kam nõn arÿm ngõr. Ngõr nhym aerbê Bẽnjadwÿr djwÿnh kadjy mrãnh djwÿnh'õ arÿm 'ÿr bõx nhym õtkam arÿm omũ. Nhym kum,

—Jõdje, Dawi tãmdjwÿ, arÿm aprõ tujarõkam kwãrĩk wãnh adjumar punu kêt. Mrãmri dja ga ã tu 'ÿr amõrkumrêx. Djãm axwe? Kati. Metĩndjwÿnh Karõ ne 'ÿr bõx nhym arÿm tujarõ. <sup>21</sup> Dja kra ruw ga kam kum Jeju jarê. Mÿkam dja ga kum ja jarê? Bir, dja õ me wÿnh axwebê me utà. Kam dja ga kum Jeju jarê. Nãm ã Metĩndjwÿnh kadjy mrãnh djwÿnh'õ Jõdjemã ane. Mÿj'ã ne idjibê Jeju amijakre? Bir, me utàr djwÿnh'ã ne amijakre.

<sup>22-23</sup> Amrêbê: ne Bẽnjadwÿr djwÿnh Jeju nã tujarõ'ã ajarê. Kabên jarênh djwÿnhmã 'ã ajarê. Nhym arÿm kukwakam me bakukãmãremã kum,

“Me kurerer'õ, me'õ kraxje kute o nõr kêtja dja arÿm tujarõ nhym ã kra ruw.

Nhym me arÿm idji'ã abenmã kum, ‘Emane’, anhÿro ba.”

Nãm ã kabên jarênh djwÿnh Bẽnjadwÿr djwÿnh kukwakam me bakukãmãremã ane. Nhym kam me aben djõ'ã arêho mõ:n arêho mõr tãmtã arÿm 'ÿr o bõx. Tũ:mrãm me bakamingrãnyrekam Jeju nã katon arÿm abatãnh ne ar ba. Ar ba:n arÿm tujarõkumrêx. Kraxje me'õ kute o nõr kêtka arÿm tujarõkumrêx. Me kute me bakukãmãremã 'ã ujarênh kõt arÿm ã tujarõo ane. Kabên jarênh djwÿnh ne me bakukãmãremã kum,

—Nhym me arÿm idji'ã abenmã kum, “Emane”, anhÿro ba. Be, ne ren me me bakabênkõt idjibê Emane'ã abenmã kum,

—Kubê ne me banhõ Metĩndjwÿnh. Me banhõ Metĩndjwÿnh arÿm me baro'ã ar ba. Nãm ã kabên jarênh djwÿnh me bakukãmãremã ane.

<sup>24</sup> Metĩndjwÿnh kadjy mrãnh djwÿnh prõ'ã Jõdjemã karõn arÿm kum karõ pa. Nhym arÿm krã kato. Ne kam arÿm kabên kõt prõ'ÿr mõ. <sup>25</sup> Nãm 'ÿr mõr kajgon ikõ'ã ikwã kêt. Kra rwÿkkambit ne ikõ'ã ikwã. Nãm 'ÿr mõr kajgo nhym kam arÿm kra kutewa ruw nhym kumÿ. Kumÿ nhym arÿm kum Jeju jarê.

## 2

*Ar kute kanhêtire mar'ã ujarênh kadjy ne ja.*

<sup>1</sup> Ar kute kanhêtire mar ne ar myt apõx djã kurũm tẽ. Tẽ: nhym arÿm akati krãptĩ apêx nhym ar arÿm Djeruxarêkam bõx. Pykabê Djudêjakam krĩrãxbê Berêkam ne Jeju ruw. Bẽnjadwÿr rãxbê Erodji memã ÿrri ne ruw. <sup>2</sup> Ar kute kanhêtire mar Djeruxarêkam bõx ne arÿm me kukjêro tẽ. Ar memã kum,

—Nhÿnh ne me'õ prĩreja? Dja kubê mebê idjaer nhõ Bẽnjadwÿr rax. Kanhêtire kute rwÿk'ã amijakre ne bar arÿm omũ. Myt apõx djã'ãnh ne bar omũn kam amrê 'ÿr tẽn arÿm bõx. Ije kum rax jarênhmã bõx, ane. Nãm ar ã memã anhÿro tẽmo ane. <sup>3</sup> Memã anhÿro tẽ: nhym arÿm bẽnjadwÿr rãxbê Erodji kuma, me kute ar arênhja ma. Kuman arÿm axwe: umar ne. Djeruxarêkam me kunĩdjwÿ axwe: umar ne. <sup>4</sup> Nhym kam Erodji arÿm amiwÿr me rũnh 'uw. Me kadjy Metĩndjwÿnh mar djwÿnh nhõ bẽnjadwÿrmẽ Mõjdjê kukràdjã mar djwÿnhmẽ amiwÿr me ku'uw ne amijã meo akuprõ. Ne kam arÿm abej me kukjêro nhÿn memã kum,

—Nhÿnh ne Kritu rwÿkmã? Nhÿnh ne Kritu rwÿk djãja? ane. Metĩndjwÿnh kute 'ã Bẽnjadwÿrbê kumkati mênhkõt ne me kum Kritu jarê. <sup>5</sup> Nãm Erodji memã ane nhym me kum,

—Pykabê Djudêjakam krĩbê Berêkam ne rwÿk djã. <sup>6</sup> Amrêbê: ne Metĩndjwÿnh kabên jarênh djwÿnhmã arê. Kritu rwÿk djã'ã kum ajarê. Nhym kukwakam me bakukãmãremã 'ã ajarê. Me krĩmã arên kum,

“Pykabê Djudêjakam krĩbê Berê, amã ne ba ikabên ne. Djãm Djudêjakam akajgo got?

Abê bẽnjadwÿr rax pyrãk. Djudêjakam me bẽnjadwÿr kunĩ dja amã arax jarê. Mÿkam?

Bir, akam dja me'õ prĩre ruw ne ã arÿm bẽnjadwÿr rax. Ne arÿm inhõ mebê idjaer pumũn meo ba.

Dja meo ba kute mrãmri ne mrykĩ'ãtomtio ba djwÿnh kute õ mryo ba pyrãk”, ane.

Nãm kabên jarênh djwýnh ã me bakukãmãremã anen arým 'ã pi'òk no'òk ne. Ga, Berêkam Kritu rwýkja pumũ. Pi'òk jakôt ne bar arým omũ. Nãm me rûnh ã Erodjimã ane. <sup>7</sup>Nhym kam bënjadwýr Erodji amipdjun amiwýr ar kute kanhêtire mar 'uw nhym ar arým 'ýr bôx. 'Ýr bôx nhym me kãxã arkum,

—Nhýnhjakam ne kanhêtire amirít djà? Mýj ne kanhêtire kute amirít'ã amex kute? ane. Nhym ar arým prîne kum arê. <sup>8</sup>Nhym kam arým Berêmã ar anon arkum,

—Aje. Dja gar tèn prîne me'õ prîre jabej ne kum akato. Kum akaton on amrê iwýr tèn imã 'ã ajarê. Badjwý 'ýr itêm ne ije kum rax jarênh prãmkumrêx. Aj mã, ane.

<sup>9</sup> Nhym ar bënjadwýr rax kabên mar pan arým 'ýr tẽ. 'Ýr tẽ: nhym ar aêrbê kanhêtireja mõ. Tãm ne ar myt apôx djà'ãnh omũ. Arým ar kukãm mõ. Nãm ar kukãm mõ:n arým iby arek wajêt. Prîre rwýkja nhiby arek wajêt nhym ar arým omũ. <sup>10</sup> Omũn arým kî:nhkumrêx. <sup>11</sup> Ne kôt tẽ:n arým ûrkwã'ýr bôx. Ne kam arým wadjàn prîreja pumũ. Nã Marij ne kumýn o nhý nhym ar omũ. Ne kam amikajgo man arým amijo ngriren parbê tu mýrbê rôrôk ne. Parbê kum rax jarêho ikwã. Ne kam arým kãjmã krîñ arým nêkrêx 'ãpre bôn kum adjuw. Kên karýrmẽ pî djur, me kute kuwykam rênh nhym kudjýjamẽ me kudjý djábê mirajamẽ ne ar kum adjuw. <sup>12</sup> Ne kam kãjmã djan pry 'õdjwý kôt akubyn ar õ pykamã tẽ. Me'õ ne ar biptirkam arkum,

—Kwãrîk wãnh akubyn Erodji'ýr atêm kêt, ane nhym kam ar akubyn Erodji jaã'ã tẽ. Tẽ:n arým ar õ pykakam bôx.

*Jôdje kute Edjitu'ýr Jejuo kator kadjy ne ja.*

<sup>13</sup> Nãm ar kute kanhêtire marja tẽ nhym kam Jôdje arým ngõr. Ngõr nhym ã, arým Metîndjwýnh kadjy mrãnh djwýnh'õ bôx ne kum,

—Kãjmã djan amibêx ne prîremẽ nã aro akaton amũ pykabê Edjítumã aro tẽ. Erodji kute prîre bînmã kute abej 'ýr. Dja gar Edjítumã tèn bôx ne arek kam ar aba. Ije amã arênhkambit dja gar akubyn tẽ, ane.

<sup>14</sup> Nãm kum ane nhym arým kãjmã dja. Nhym akamãt kô rã'ã nhym arým prîremẽ

ãã aro tẽ. Pykabê Edjitu'ýr ne aro tèn aro bôx. Ne kam ar arek kam ar ba. <sup>15</sup> Amrêbê: ne Bënjadwýr djwýnh ar Edjitu'ýr tèm'ã ajarê. Kabên jarênh djwýnhmã 'ã ajarê. Nhym arým kukwakam me bakukãmãremã kum,

“Bënjadwýr djwýnh ne me amã, ‘Ba ne ba ikra 'uw nhym arým Edjitu kurũm kato.’ Nãm ã me amã ane.”

Nãm ã kabên jarênh djwýnh me bakukãmãremã ane. Nhym kam me aben djô'ã arêho mõ:n arêho mõr tãmtã arým 'ýr o bôx. Tũ:mrãm me bakamingrãnyrekam Jôdje ar arým Edjitu'ýr tẽ. Me bakukãmãremã 'ã ujarênh kôt ar arým Edjitu'ýr tẽ. Arým Erodji tykkambit dja ar akubyn Edjitu kurũm tẽ.

<sup>16</sup> Jôdje ar Edjitu'ýr tẽ nhym Erodji arým ar kute kanhêtire marja ma. Ne kam amim,

—Je tô mýkam ne ar imã 'êx ne iwýr bôx kêt? ane. Nãm anen arým ngry:k ne. Ne amim,

—Amũ akati ja'ã ne ar kute kanhêtire mar imã, “Bënjadwýr rwýk ny'ã kanhêtire katorja'ã ne arým amex amãnhkrut apêx bar omũ”, ane. Be, kanhêtire kator'ã amex amãnhkrut apêx kôt godja bënjadwýr rwýk ny'ã arým amex amãnhkrut ne apêx jabej. Nãm ã amim anen arým õ krãkamngõnhmã kum,

—Me on Berêkam me prîre nhimex. Bu'ã Berê nhõ pyka kunîkôtdjwý dja ga me me prîre nhimex. Mybit dja ga me kunî nhimex. Me prîre rwýk'ã amex amãnhkrut apêx nhijukribit dja ga me me imex kêt, ane. Erodji õ krãkamngõnhmã ane nhym me arým me prîre'ýr mõn me imexo mõ. Me imexo mõn arým me imex pa. Nhym me arým amak djãje mýro kumex. <sup>17</sup> Amrêbê: ne Metîndjwýnh me mýr kumex'ã ajarê. Kabên jarênh djwýnhbê Djermimã 'ã ajarê. Nhym arým kukwakam me bakukãmãremã kum,

<sup>18</sup> “Ota krîbê Ramakam me mu:w ne kàj bê amra:.

Rakeu krao amak djãje me mu:w.

Kra arým kubê kêt kam ne me te kute memã kaprî kwý ngrimã.”

Nãm ã kabên jarênh djwýnh Metîndjwýnh kukwakam me bakukãmãremã ane. Nhym kam me aben djô'ã arêho mõ:n arêho mõr

tãmtã arým 'ÿr o bôx. Tũ:mràm me bakam-ingrãnyrekam ne me arým mÿro kumex. Krãkamngônã arým me prĩre nhimex ne nhym me arým amak djãje mÿro kumex. Djeremi kute me bakukãmãremã 'ã ujarẽnh kôt me arým ã mÿro ane.

*Nadjare'ÿr akẽx'ã ujarẽnh.*

<sup>19</sup> Jôdje ar Edjitukam ar ba: nhym kam Erodji arým ty. Ty nhym kam Jôdje arým biptiro nõ. Biptiro nõ nhym Metĩndjwÿnh kadjy mrãnh djwÿnh'õ arým kum amijo amirĩt ne kum,

<sup>20</sup>—Kãjmã djan prĩremẽ nã aro tẽ. Me abẽ idjaer nhõ pyka'ÿr aro tẽ. Me kute bit prĩre bĩn prãmja ne me arým ty, ane. <sup>21</sup> Nhym kam Jôdje arým kãjmã djan prĩremẽ nã aro tẽ. Aro tẽn amũ mebẽ idjaer nhõ pyka'ÿr aro tẽ. 'ÿr aro tẽ:n arým 'ÿr aro bôx. <sup>22</sup> 'ÿr aro bôx nhym me arým kum,

—Erodji kra Akireu arým pykabẽ Djudêjakam bãm pãnh memã bẽnjadjwÿr, ane. Nãm me Jôdjemã ane nhym arým kum uman Djudêja'ÿr tẽm prãm kêt. Ne kam õtkam me'õ arým nẽje kukrà. Nhym kuman arým pykabẽ Djudêja nhibej tẽn kam pykabẽ Garrêjakam bôx. <sup>23</sup> Ne ajte tẽ:n arým krĩraxbẽ Nadjarekam bôx ne kam ar ba. Kam ar ba: nhym kam Jeju arým kam abatãnh ne. Amrẽbẽ: ne Metĩndjwÿnh ja'ã ajarẽ. Jeju Nadjarekam abatãnh'ã ajarẽ. Kabẽn jarẽnh djwÿnhmã 'ã ajarẽ. Nhym arým kukwakam me bakukãmãremã kum, “Dja me abenmã 'ã, ‘Nadjarekam ne abatãnh djã’, anhÿro ba.”

Nãm ã ujarẽnh djwÿnh Metĩndjwÿnh kukwakam me bakukãmãremã ane. Nhym kam me aben djô'ã arẽnhõ mõ:n arẽnhõ mõr tãmtã arým 'ÿr o bôx. Tũ:mràm me bakamingrãnyrekam arým 'ÿr o bôx nhym Jeju arým Nadjarekam abatãnh ne. Me bakukãmãremã 'ã ujarẽnh kôt ne arým Nadjarekam abatãnh ne.

### 3

*Djuão kute Jeju kutêp me akre'ã ujarẽnh. Mak 1.1; Ruk 3.1; Dju r 1.19*

<sup>1</sup> Jeju Nadjarekam ar ba: nhym kam ngõmã me angjẽnh djwÿnhbẽ Djuão arým bôx. Pykabẽ Djudêjakam kapôt kukritkam

ne Djuão me akreo ba. Me ta ne me 'ÿr ban bôxo kumex nhym ar me akreo ba. <sup>2</sup> Nãm memã kum,

—Me amikam akaprĩren wãnh ajaxwemã anhiren Metĩndjwÿnh'ÿr amijo akẽx. Arým kãjkwakam Bẽnjadjwÿr djwÿnh kute pykakam amim me utãr ne ar meo ba 'ÿr. Nãm ã Djuão memã ane. <sup>3</sup> Amrẽbẽ: ne Metĩndjwÿnh Djuão kukãm 'ã ajarẽ. 'ã ujarẽnh djwÿnhbẽ Idjaijmã 'ã ajarẽ. Nhym arým kukwakam me bakukãmãremã kum, “Me'õ dja kapôt kukritkam memã kabẽn ne. Kãj bẽ dja me akren memã kum, ‘Me apa. Ê, on Bẽnjadjwÿr djwÿnh kutêp wãnh ajaxwemã anhiren katãt amijo aba. Kute mrãmri ne me kute bẽnjadjwÿr rax kutêp pryõ mex ne kute kum katãt pry jadjwÿrja pyrãk’, ane.

Dja ã ujarẽnh djwÿnh Bẽnjadjwÿr djwÿnh'ã memã ane.”

Nãm ã Idjaij Djuão'ã me bakukãmãremã ane. Nhym kam me aben djô'ã arẽnhõ mõ:n arẽnhõ mõr tãmtã arým 'ÿr o bôx. Tũmràm 'ÿr o bôx nhym Djuão arým kato. Me bakamingrãnyrekam katon arým ã me akreo bao ane. Metĩndjwÿnh kute me bakukãmãremã 'ã ujarẽnh kôt Djuão arým katon ã me akreo ane.

<sup>4</sup> Be, Djuão ne mry jabatãnhbẽ kameru kĩ nhipẽxo kubẽkãnh angij ne mry kão amikrax pren krytkanhẽ kun menh kangõo ikõ.

<sup>5</sup> Nhym kam krĩraxbẽ Djeruxarẽkam me ja Djuão'ÿr bôxo dja. Bu'ã pykabẽ Djudêjakam me jadjwÿ Djuão'ÿr bôxo dja. Ngõbẽ Djodão bu'ã pykakam me jadjwÿ 'ÿr bôxo kume:x ne. Nãm me Djuão'ÿr ban bô:xo dja. <sup>6</sup> Ne kam amijaxwe kôt amijarẽn memã kum,

—Be, mrãmri ne ba ijaxwe tũm krãptĩ. Arým imã kĩnh kêt ne wãnh kum inhire, ane. Nhym kam ngõ raxbẽ Djodãokam mã Metĩndjwÿnhmã me angij.

<sup>7</sup> Nhym kam mebẽ pardjẽumẽ mebẽ xadjudjẽumẽ krãptĩ arým Djuão'ÿr bôxo dja. Nhym me omũn memã kum,

—Me akamingrãny ne ga me abẽ iry. Mÿj me'õ got ne me amã Metĩndjwÿnh ngryk nhõ akati jarẽ ga me umaje iwÿr aprõt kajgo? <sup>8</sup> On katãt amijo aba gẽ me mrãmri me amex jabej me amã kato. Mrãmri ga me amikam akaprĩren wãnh ajaxwemã



anhirern aje Metĩndjwýnh'ýr amijo akêx jabej gê me me amã kato. Ne kam me akam kĩnhkumrêx kute mrãmri ne me kute pidjô djô mexmã apôx ne kam kĩnhja pyrãk. <sup>9</sup> Kwãrik wãnh me anhõkre kadjwýnhbê anhingêt kukãmãre Abraãoo adjãmra kêt ne amim,

—Me ba ne ba me ibê Abraão tãmdjwý. Dja Metĩndjwýnh me ikam ngryk kêt. Dja ba me te ijaxwe nhym kam me inhingêt kukãmãre Abraãokôt Metĩndjwýnh kum me ijabê ne me ijaxwekam me ijo bikênh kêtumrêx, ane. Kwãrik wãnh ga me ã anhýr ar aba kêt. Kati. Ê, ba me amã arê. Dja ga me te abê Abraão tãmdjwý nhym Metĩndjwýnh tu me ajo ajkê, me ajaxwe pãnh tu me ajo ajkê. Ne ren kute ajte Abraão tãmdjwý prãm jabej ren tu kênjao itun o amim Abraão tãmdjwý nhipêx nhym me ren tu katon kumex. <sup>10</sup> Ê, mrãmri arým 'ýr. Metĩndjwýnh kute memã axwe pãnh jarênh nhõ akati arým 'ýr. Kute mrãmri ne pidjô apýnh abenkam ô kêt nhym me kute kãr ne o mrãnh ne kute kuwykam rênhja pyrãk. Arým ne Metĩndjwýnh me ajã pidjô djô kêt jakren arým me ajaxwe pãnh kute me ajo bikênh 'ýr. Dja me ajo mõn kuwykam me amê. Arým 'ýr. Kute mrãmri ne me'õ kute pidjômã 'yr kadjy kute parbê kãxkrãkô mýnh ne o ãm pyrãk.

<sup>11</sup> Mrãmri ba ne ba ngômãbit me ajangij. Ga me amikam akaprĩren wãnh ajaxwemã anhiren Metĩndjwýnh'ýr amijo akêx ba ngômãbit me ajangij. Nhym be, itotokbê ne me'õ bõxmã. Me'õ tãm ne raxo kute amũ ijakrenh, kute ijakrenh mexi. Nã bãm te irax ne 'ýr ibikamênh prãmje. Nã bãm te irax ne 'ã inhibõn ije kum parkã 'ã pre bõnh ne o itêm prãmje. Be, ãm irax ba ren arým kum apê. Nhym be, kati. ãm ingrire. Nãm raxo ijakrenh mex ne. Tãm ne arým bõx 'ýr. Djãm ngômã kute me ajangjênhmã? Kati. Tãm dja bõx ne kam me awýr Metĩndjwýnh Karõ jano. Katàt me aje amijo ababit'ýr dja ano kute me ajo bamã. Ne kam me ajaxweja kute kuwymã me arênhmã. <sup>12</sup> Gêdja bõx ne kam kute mrãmri ne me kute kôtyk byr ne o kute bàygogore ka'uk ne kute kam mũm 'ynhĩ, 'y mexjao atom ne kam kute 'ykãjao

têm ne kute kuwykam mênh nhym xêtja pyrãk. Dja me'õja bõx ne ã me axweo anen kuwykam me kurê. Nhym kuwyja dja pôk rã'ã: rã'ãn apêx kêtumrêx. Nhym be, me mex, me katàt kute amijo baja'ã gêdja 'y mex jakren mũm meo atom. Meo atom ne kãjkwakam õ pykamã meo mõ gê me kam kam kĩnhkumrêx ne ar ba. Arým kute meo anhýr 'ýr. Nãm ã Djuão mebê pardjêumã ane.

*Djuão kute ngômã Jeju jadjãr.*

*Mak 1.9; Ruk 3.21; Dju r 1.32*

<sup>13</sup> Kam Jeju arým pykabê Garrêja kurũm tẽ. Tẽ:n arým ngõbê Djodão'ýr bõx. Nãm 'ýr bõx ne arým Djuão'ýr bõx. Kute Metĩndjwýnhmã ngômã adjãrmã ne 'ýr bõx.

<sup>14</sup> Nhym kum,

—Djãm ba ije ngômã ajadjãrmã? Kati. Ba ne ga ren Metĩndjwýnhmã ngômã ijadjã, ane.

<sup>15</sup> Nhym kum,

—Kati, kwãrik rã'ã. Metĩndjwýnh kute gu bamã katàt baje amijo baba'ã karõ kôt dja gu prĩne katàt amijo baba. Kam dja kĩnhkumrêx. Kam dja ga on ngômã ijadjã, ane.

<sup>16</sup> Nhym arým ngômã adjã. Nhym kam wabin dja nhym aêrbê kãjkwã arým aben bê ajkij. Aben bê ajkij nhym me kute omũnh kadjy Metĩndjwýnh Karõ kute tut pyrãk arým 'ýr ruw ne 'ã tým. 'Ã tým nhym Djuão arým omũ. <sup>17</sup> Nhym ê, arým kãjkwã kurũm Metĩndjwýnh memã kabên ne memã kum,

—Ikra ne wã. Imã abê:kumrêx. Ba kam kam ikĩnhkumrêx. Nãm ã Metĩndjwýnh Kra'ã memã ane.

## 4

*Xatanaj te kute axwe'ã Jejumã àpnênh.*

*Ruk 4.1; Mak 1.12; Idja 2.18, 4.15*

<sup>1</sup> Nhym kam Metĩndjwýnh Karõ kapôt kukritmã Jejuo katon o mõ. Dja Xatanaj te kute axwe'ã mênhmã kum apnê. Ja kadjy ne o mõ. <sup>2</sup> Nhym kam Jeju Metĩndjwýnhmã amijajbu. Nãm amijajburo dja: nhym 'ã akatibê 40 apêx. Nhym kam arým kum prã:m ne. <sup>3</sup> Nhym kam me axwe'ã memã àpnênh djwýnhbê Xatanaj arým 'ýr tẽn 'ýr bõx. Nãm bit kute amikôt o ba nhym kôt axwemã 'ýr bõx. Ne kam kum,

—Ë, goja abê Metîndjwýnh Krakumrêx jabej ne goja kênjamã akabên gê goja kubê djwý ga krê, ane. Nãm Xatanaj ã Jejumã ane. <sup>4</sup>Nhym kam kum,

—Kati. Mýkam? Bir, Metîndjwýnh ne amrêbê: me ikukãmãremã kum, “Djãm djwýobit dja me amityx ne tîn ne ar ba?

Kati. Metîndjwýnh kabênodjwý dja me amityx ne tîn ne ar ba, kabên kunîo.” Nãm ã Metîndjwýnh me ikukãmãremã ane nhym me arým 'ã pi'ók no'ók ne. Ije Metîndjwýnh kabên ja markam ije akabênkôt kêno djwý prãm kêt. Nãm ã Jeju kum ane.

<sup>5</sup>Nhym kam Xatanaj Djeruxarê'ýr o tên o bôx. Krîrax jamã ne me kum, “Metîndjwýnh nhô krîrax”, ane. Nãm o bôx ne o tên Metîndjwýnh nhô kikreti'ýr o bôx. Ne kam o tên o wabin kikreti nhimök'ýr o bôx ne anhá'ã kudja. <sup>6</sup>Ne kam kum,

—Ë, goja abê Metîndjwýnh Krakumrêx jabej goja rûm tên ato. Amrêbê: ne me akukãmãre amã arê. Metîndjwýnh kukwakam amã arên amã, “Dja ba ajã ikadjy mrãnh djwýnhmã karô. Dja me atêmkôt amã ikra dja gê kên'ô apar ngãnh kêtumrêx.”

Nãm ã Metîndjwýnh me akukãmãre amã ane nhym me arým 'ã pi'ók no'ók ne. Ajrã, rûm tên ato gê goja me atêmkôt amã ikra dja, ane. <sup>7</sup>Nhym Jeju kum,

—Kati. Mýkam? Bir, ba ajte amã arê ga ama. Amrêbê: ne me ikukãmãre memã arê. Metîndjwýnh kukwakam memã arên memã kum,

“Kwãrîk wãnh Bênjadjwýr djwýnh, Atîndjwýnh kabi kêt, kute ajãno ãm jabej kabi kêt”, ane.

Nãm ã Metîndjwýnh me ikukãmãremã ane nhym me arým 'ã pi'ók no'ók ne. Ije Metîndjwýnh kabên ja markam ne ba ije akabênkôt rûm itêm ne idjator prãm kêt, ane.

<sup>8</sup>Nhym Xatanaj ajte o tên krãnh prêkti nhimök'ýr o wabi nhym dja. Nhym kam apýnh pyka djari nhym Xatanaj arým kum kunî jakreo dja. Ne apýnh bēnjadjwýr kute meo ba djari kum me kunî jakreo dja. Nhym apýnh me ò mýjja rûnh ne uma djari

nhym kum me kunî jakreo dja nhym arým kunî pumû. <sup>9</sup>Nhym kam kum,

—Ba amã ja kunî kanga. Ba amã me ò mýjja rûnh ne uma kunî kanga. Dja ga amijo angrin ikuka kôn timerão nhýn imã irax jarê ba arým amã kungã. Ba amã kunî ngã ga arým idjô'ã o aminhôn ar o aba, ane.

<sup>10</sup>Nhym Jeju kum,

—Kati, Xatanaj, on rûm imã akàx. Djãm ije akuka kôn timerão inhýrmã ne ije amã arax jarênhmã? Arkati. Mýkam? Bir, amrêbê: me ikukãmãre memã arê. Metîndjwýnh kukwakam memã arên memã kum,

“Bēnjadjwýr djwýnh, Atîndjwýnhmãbit dja ga amijo angrin kum rax jarên ajbitmã apê.

Kwãrîk wãnh atemã 'ômã rax jarên timerão kêt.” Nãm ã Metîndjwýnh me ikukãmãremã ane nhym me 'ã pi'ók no'ók ne. Ije Metîndjwýnh kabên ja markam ne ba ije akuka kôn timerão inhýr ne ije amã arax jarên timerão prãm kêt, ane.

<sup>11</sup>Nhym kam Xatanaj arým kum kàx ne mã tē. Nhym kam kadjy mrãnh djwýnh ar arým 'ýr bôx ne o djuw mex.

*Jeju kute me akremo krax.*

*Mak 1.14; Ruk 4.14*

<sup>12</sup>Nhym kam Jeju arým tē. Tē:n pykabê Garrêjakam bôx. Me arým kute Djuãoo tým ne kubê ijêkam ne Garrêjakam bôx. <sup>13</sup>Nãm Garrêjakam krîraxbê Nadjarekam bôx. Ne kam kurûm katon kam amû krîraxbê Kapanakam tên bôx ne nhý. Imôti mýrri ne Kapana dja. Me kute Kapana bu'ã pykamã Djeburômê Naptar jarên timerão. Kam ne krîraxbê Kapana dja. <sup>14</sup>Amrêbê: ne ujarên timerão nhbê Idjaij me bakukãmãremã arê. Jeju Kapanajakam bôx jarê. Metîndjwýnh kukwakam ne Idjaij memã arên memã kum,

<sup>15</sup>“Pykabê Djeburô, pykabê Naptar. Imôti'ýr pyka. Ngôbê Djodão nhikjêbê pyka.

Me bajtem nhô pyka jamã ne me kum Garrêja jarê.

<sup>16</sup>Pyka jakam ne me axwe:. Me mrãnh punu:re kute mrãmri ne akamãt kô tykkam me mrãnh punu pyràk.

Me ja ne me arým me'õ me:xkumrêx pumũ kute mrãmri ne me kute memã irã djà rax pumũnh pyrãk.

Pyka jakam ne me kaprĩre ne ar ba. Kute mrãmri ne me on tyk karõ kaprĩn ar ba pyrãk.

Me ja ne me arým me'õ me:xkumrêx pumũn kĩnhkumrêx ne. Me kĩnhkumrêx kute mrãmri ne ajte arngrokam me kĩnh pyrãk”, ane.

Nãm Idjaij ã me bakukãmãremã ane. Nhym kam me aben djô'ã arênhõ mõ:n arênhõ mõr tãmtã arým 'ÿr o bõx. Tũ:mrãm me bakamingrãnyrekam Jeju arým Kapanakam bõx. Me:xkumrêx ne arým kam bõx. Idjaij kute me bakukãmãremã 'ã ujarênh kõt ne bõx.

<sup>17</sup> Ne kam arým kãj bê me akremo krax. Ne amijã memã kum,

—Amikam akaprĩren wãnh ajaxwemã anhiren Metĩndjwýnh'ÿr amijo akêx. Arým kãjkwakam Bẽnjadjwýr djwýnh kute pykakam amim me utãr ne ar meo ba 'ÿr. Nãm ã Jeju me akreo ane.

*Jeju kute amikõt me kamênh.*

*Mak 1.16; Ruk 5.1*

<sup>18</sup> Nhym kam Garrêjakam Jeju imõti mýrbê tẽ. Nhym Ximãomẽ ãngre ar axikõt katorja ngõkam ar kryre rênho ba nhym arým ar omũ. Ximãomã ne me Pedru jarẽ. Ar kubê tep pynênh djwýnh tũm. <sup>19</sup> Nãm ar ar kryre rênho ba nhym Jeju arkum,

—On ar mã ikõt ajkamẽ. Jakam dja gar ikõt me kamênhõ aba kute mrãmri ne ar aje tep pynênhõ aba pyrãk, ane. <sup>20</sup> Nhym ar on amikõt kryre mên arým mã Jeju kõt ajkamẽ.

<sup>21</sup> Nhym ãm ajbir tẽ nhym Xijagumẽ Djuã ar kãkam nhỹ nhym arým ar omũ. Ar axikõt kator. Djebedêu ne ar adjuw. Djebedêumẽ ne ar amim kryreo mexo nhỹ. Nãm ar omũn arým kãj bê amikõt ar ku'uw. <sup>22</sup> Nhym bãm Djebedêu kãkam nhỹ nhym ar arým wãnh kum iren mã Jeju kõt ajkamẽ.

*Jeju kute me punuo mex.*

*Mak 3.7; Ruk 6.17*

<sup>23</sup> Nhym kam Jeju Garrêjakam pyka kunikõt memã kukràdjã jarênhõ ba. Apýnh mebê idjaer bikprõnh djãri memã arênhõ ba. Ne kãj bê ujarênh ny jarênhõ ba.

Bẽnjadjwýr djwýnh kute pykakam amim me utãr ne ar meo ba'ã memã ujarênh ar ba. Ne kam arým apýnh me kanêmẽ me punuo mexo ba. <sup>24</sup> Nhym me arým arênh kumex. Pykabê Xirijkam ne me prĩne me kunĩmã arênhõ ipõk ne. Arênhõ ipõk nhym me kunĩ arým Jeju jarênh ma. Ne kam arým 'ÿr me punu kunĩõ bõx. Apýnh me kanê djãri meo bõx. Ajte apýnh me tokry djãri meo bõx. Nhym me kwý me karõ punu kute meo baja nhym me meo bõx. Nhym me kwý me tyk kute meo baja nhym me meo bõx. Nhym me kwý akry nhym me meo bõx. Nhym kam arým me kunĩõ mex. <sup>25</sup> Nhym kam me krãptĩ: arým 'ÿr bõx ne kõt ar ba. Pykabê Garrêja kurũm, pyka nhidjibê Krĩraxbê 10 kurũm, krĩraxbê Djeruxarẽ kurũm, pykabê Djudêja kurũm, ngõbê Djodãõ nhijukri pyka kurũm ne me bõx ne kõt ar ba.

## 5

*Me kĩnh'ã ujarênh.*

*Ruk 6.20*

<sup>1</sup> Kam ne me krãptĩ: Jeju kõt ar ba nhym me omũ. Ne kam arým krãnh'ã tẽn wabi. Wabin arým nhỹ. Nhỹ nhym kõt ba djwýnh ar arým 'ÿr bõx ne nhỹ. <sup>2</sup> Nhym arým arkum amikabên jarênhõ krax ne kum,

<sup>3</sup> —Ë, djãm me kute amim, “Ikajgo”, anhỹro baja djãm me kaprĩ got? Kati. Mýkam? Bir, me wã dja kãjkwakam Bẽnjadjwýr djwýnh amim me utãn meo ba. Kam dja me kĩ:nhkumrêx.

<sup>4</sup> Djãm me mýr baja kaprĩ got? Kati. Mýkam? Bir, me wã dja Metĩndjwýnh ã meo kĩnhkumrêx. Kam dja me kĩ:nhkumrêx.

<sup>5</sup> Djãm me kabõt katija kaprĩ got? Kati. Mýkam? Bir, me wã dja me ã pykakam mýjja kunĩõ õ. Kam dja me kĩ:nhkumrêx.

<sup>6</sup> Me kute memã kum, “Ba on Metĩndjwýnhmã ijaxwe kêt”, anhỹro ba ne kute katãt amijo ba prã:mja djãm me kaprĩ got? Kati. Mýkam? Bir, me wã dja me ã axwe kêt'ÿr bõxkumrêx ne arým prĩne Metĩndjwýnhmã mexkumrêx. Kam dja me kĩ:nhkumrêx.

<sup>7</sup> Djãm me ukaprĩja kaprĩ got? Kati. Mýkam? Bir, me wã dja Metĩndjwýnh

kum me kaprîkumrêx. Kam dja me kî:nhkumrêx.

<sup>8</sup> Djâm me kute amikam axwe'õ mar kêtja kaprî got? Kati. Mýkam? Bir, me wã dja me Metîndjwýnh pumû. Kam dja me kî:nhkumrêx.

<sup>9</sup> Djâm me kute aben nêje me kukràò baja kaprî got? Kati. Mýkam? Bir, me wã'ã dja me abenmã kum, “Metîndjwýnh kra ne wã”, ane. Kam dja me kî:nhkumrêx.

<sup>10</sup> Me katàt kute amijo baja dja me te katàt nhym me arým meo ajkê. Me katàt kute amijo bakam meo ajkê. Djâm kam me kaprî got? Kati. Mýkam? Bir, me wã dja kàjkwakam Bënjadjwýr djwýnh arým amim me utàn ar meo ba. Kam dja me kî:nhkumrêx.

<sup>11</sup> Ar ga dja gar ikabën markumrêx ne kôt ar amijo aba nhym me te wãnh ar amã akij ne te ar ajo ajkên te ar ajaxweo ar apytà, apýnh ar ajaxwe djario ar apytà. Djâm kam ar akaprî got? Kati, Mýkam? Bir, kàjkwakam akính djà raxkam. <sup>12</sup> Dja gar tu akínhkumrêx ne kam akính kati. Mýkam? Bir, dja Metîndjwýnh ar amã o pãnh rax ne. Kàjkwakam gédja amã o pãnh mex ne. Kàjkwakam kute ar amã o pãnh mex ja dja gar amikukãm aman kam akính kati. Nãm me tùmre ã axwe anen me kamingrãny kajmã'ã ã Metîndjwýnh kabën jarënh djwýnho bikënho bao ane. Ga, arým kam kàjkwakam me kínhkumrêxja pumû, ane.

*Kadjwanhîmê kurwý djà'ã ujarënh.*

*Mak 9.50; Ruk 14.34*

<sup>13</sup> Ne kam ajte arkum,

—Ar aje kadjwanhî pyræk. Kadjwanhî kute õmrõo mex pyræk ar gadjwý dja gar ajmã akute kêt ne akabën mexkumrêx ne ar aba nhym ar abu'ã me ja kwý ar akudjwa arým mex jabej. Dja kadjwanhîkam akry apêx jabej mýj dja ajte akry kadjy kam nê? Arkati. Arým mýjja akry kadjy punukumrêx. Godja punukam me kum kính kêt ne arým rûm kapî. Kapî nhym me arým 'ã mrãn paro kajy. Ar gadjwý godja gar memã kum, “Ba ne ba ije Jeju mar”, ane. Ne ate kam ar ajaxwe gar arým apunu. Apunu nhym me arým

kum ar akính kêt ne ar apunukôt kum Metîndjwýnhdjwý kính kêt.

<sup>14</sup> Ar aje mrãmri ne pyka kunîkôt me kurwý djà pyræk. Ga, krîraxja pumû. Djâm krãnhre'ã me kute krîrax nhipêxkam me kute o bipdjurmã? Arkati. Ar gadjwý kwãrîk wãnh ikam apijàm kêt ne ikôt adjukaprî. <sup>15</sup> Ngõnhpôkdjwý. Djâm me kute kum angjênh ne kute mýjja 'õkôt o bipdjur got? Kãnoipôko 'ã pro got? Kati. Ngõnhpôk ne me kum angij ne tu parkam, kênhkam umjuw nhym me kunîmã kikre kre kurwýo ku'ê. <sup>16</sup> Ar gadjwý kwãrîk wãnh ikam apijàm kêt. Ar abê me kurwý djà pyræk ne ar adjukaprî. Dja me ar adjukaprî pumûn arým kàjkwakam ar Abãmmã rax jarê. Nãm ã Jeju arkum ane.

*Môjdjê kukràdjà'ã ujarënh.*

*Ruk 16.16*

<sup>17</sup> Ne kam ajte arkum,

—Kwãrîk wãnh ijã amim, “Be, mýj kadjy ne Jeju bõx? Bir, kute memã kum, ‘Kwãrîk wãnh jakam Môjdjê kabënja mar kêt. Ne Metîndjwýnh kukwakam kabën jarënh djwýnh 'õdjwý kabënja kwãrîk wãnh mar kêt.’ Kute ã memã anhýro ba kadjy ne bõx”, ane. Kwãrîk wãnh ijã ã amim anhýr kêt. Djâm ije ja jarënhmã? Kati. Mýkam? Bir, me amrêbê: me bakukãmãremã ijã ajarê. Nhym me aben djô'ã arënhõ mõ:. Arënhõ mõr tãmtã arým iwýr o bõx. Ba kam arým me kute amrêbê: ijã ujarënh kôt ar amijo iba. Me kute ikukãm ijã ujarënh kôt ije amijo anhýr kadjy ne ba bõx. Kam ije ar kabën markumrêx ne ije ar'ã anhýr prãm kêt. <sup>18</sup> Dja te Metîndjwýnh kabën kukràdjà kwý'ã pi'ók no'ók kryre ne te apýnh mýrbê kyx djari'ã pi'ók no'ók kryre djãm 'õ kajgomã? Kati. Dja 'õ kajgo kêt. Kabën'ã pi'ók no'ók kôt dja mýjja apôxkumrêx. Kôt dja mýjja kunî apôx tê:n prîne apôx mexkumrêx. Kabën 'õ dja kajgo kêtumrêx. Nhym kam kàjkwamê pyka arým apêx. Mrãmri ne ba ar amã ja jarënhkumrêx.

<sup>19</sup> Godja me'õ Metîndjwýnh kabën ngrire 'õmã kajgo jarën kam 'ã memã kum, “Kabën ja dja ga me mar rerekre”, anhýro ba jabej, dja me adjwýnhdjwýmã kum, “Akajgo”, ane. Kàjkwakam Bënjadjwýr

djwÿnh kute pykakam amim me utàr ne ar meo bakam dja me kunĩ kum, “Akajgo”, anhÿro kumex. Nhym be, dja me'õ Metĩndjwÿnh kabēn man kôt ar amijo ban kam memã kabēn jarēnho ba. Me'õ jamã dja me kum, “Araxkumrēx”, ane. Kàjkwakam Bēnjadjwÿr djwÿnh kute pykakam amim me utàr ne ar meo bakam dja me kum, “Araxkumrēx”, ane. <sup>20</sup> Kam, ba ar amã arē gar ama. Djãm mrãmri Mòjdjê kukràdjà mar djwÿnhmē me bē pardjêu mexkumrēx? Kati. Mrãmri ar aje katàt amijo abakam ne o aje me akrenhkambit dja kàjkwakam Bēnjadjwÿr djwÿnh amim ar apytà gar kôt ar amijo aba. Nãm ã Jeju arkum ane.

*Me ngryk'ã ujarēnh.*

*Rô 12.19; Ep 4.26; Xim k 2.8; Xij 1.19*

<sup>21</sup> Ne kam ajte arkum,

—Amrēbê: me bakukãmāre memã kum, “Kwārĩk wānh me par kêt”, anen ajte,

“Dja me me'õnh bĩ nhym me arÿm kum axwe pānh jarē”, ane.

Tãm ne me ar amã arē gar arÿm ama.

<sup>22</sup> Nhym be, ba dja ba ar amã arē gar ama. Djã ne me me'õnh bĩ nhym me arÿm kambit kum axwe pānh jarē? Kati. Me kute me'õkam ngrykkamdjwÿ. Dja me axwe jabej kukjêr kêt ne tu kam ngryk. Nhym kam me arÿm kum axwe pānh jarē. Ba ajte ar amã arē gar ama. Me kute ikukwakam abeno kamyja godja me kum kamy kurêkam kum, “Apunure”, anhÿr jabej nhym kam me arÿm 'ã meo akuprô. Memã axwe pānh jarēnh djwÿnh krãptĩbê 70 jao akuprô nhym me arÿm memã amikôt amijarē. Nhym be, godja me kamymã kum, “No kêt”, anhÿr jabej ne kam arÿm me biknor tokry djàkam kuwykam mōr jabej.

<sup>23</sup> Kam godja ga Metĩndjwÿnh nhõ ki'ÿr kĩnh djào abôx jabej. O abôxo tēn kam akamy ma. Aje o akamyja kute ajã, “Nãm ijo ajkē”, anhÿrja ga ama. Akam kaprĩja ga ama. Djãm kam aje on Metĩndjwÿnhmã kĩnh djàja nhõrmã? Kati. Dja akamy akam kaprĩ ga Metĩndjwÿnhmã kĩnh djàjao bôx nhym Metĩndjwÿnh arÿm kum kĩnh djàja kĩnh kêt. <sup>24</sup> Kam dja ga wānh ki kabem kĩnh djàjamã anhiren akamy kumrēx'ÿr tēn kam kum

akabēn mex jarē gē akubyn akam kĩnh. Akubyn akam kĩnhkam dja ga akubyn tēn kam kĩnh djàja mÿn Metĩndjwÿnhmã angã.

<sup>25</sup> Dja me'õ mÿjjakam kum akurēn memã axwe pānh jarēnh djà'ÿr ajo tēm jabej. 'ÿr ajo tēmri dja ga on o anhōbikwa. O anhōbikwa nhym arÿm memã axwe pānh jarēnh djà'ÿr ajo tēm kêt. Nok ga ren o anhōbikwa kêt nhym ren memã axwe pānh jarēnh djwÿnhmã akanga nhym ren me bē ijē djwÿnhmã akanga. Nhym kam ren me bē ijē djàkam abē ijē. <sup>26</sup> Ga ren kam akator kêt. Prĩne aje amijo pānh mex inomã mēnhkambit ren akato. Nãm ã Jeju arkum ane.

*Me kute abenbê prōmē mjēnmēo àkĩnh.*

*Mat 19.3; Mak 10.2*

<sup>27</sup> Ne kam ajte arkum,

—Nãm me ar amã,

“Kwārĩk wānh me bē prō, nàr mjēno adjàkĩnh kêt”, ane.

Ja ne me ar amã arē gar ama. <sup>28</sup> Nhym be, ba dja ba ar amã arē gar ama. Mrãmri ro'ã anōrkam ajaxwe. Djãm kambit ne ajaxwe? Kati. Dja gar me'õ nire pumūn arÿm amã o anōr prãm ne. Jabit. Kam arÿm akad-jwÿnhbē amim o adjàkĩnh'ã karō. Kamdjwÿ arÿm ajaxwe. Nãm ã Jeju arkum ane.

<sup>29</sup> Ne kam Ar kubê axwe puma. Ga, me kute apÿnh kukràdjào àpēnh jaxwe prãmja pumū. Me kute àpēnh jaxweo krã'ÿrmã ne Jeju Ar kubê axwe pyman arkum,

—Ne ga ren ano djubôko ajaxwe prãm ga ren on kaban mūm amibê amē. Ren te ano nhikjê kêt ne ren Metĩndjwÿnh kôt atĩn ne ar aba rã'ã, kam ren akĩnhkumrēx. Ne ren ano amānhkrut rã'ã nhym Metĩndjwÿnh ren me biknor tokry djàkam amē. Ga ren kam akaprĩkumrēx. <sup>30</sup> Ne ga ren anhikra djubôko ajaxwe prãm ga ren on krãtan mūm amibê amē. Ren te anhikra nhikjê kêt ne ren Metĩndjwÿnhkôt atĩn ne ar aba rã'ã kam, ren akĩnhkumrēx. Ne ren anhikra amānhkrut rã'ã nhym Metĩndjwÿnh ren me biknor tokry djàkam amē. Ga ren kam akaprĩkumrēx, ane. Djãm mrãmri ne me kute amino kadjarmã ne Jeju arkum karō? Kati. Djãm mrãmri ar kute aminhikra krã'ÿrmã arkum karō? Kati. Me kute

àpênh jaxweo krã'ymã ne Jeju Ar kubê axwe puma.

<sup>31</sup> Ne kam ajte arkum,

—Me ar amã,

“Me kute prô kangamã gê me 'ã pi'ók no'ók ne kum kungân kam kanga”, ane.

Nãm me ã ar amã ane, gar ama. <sup>32</sup> Nhyim be, ba dja ba ar amã arê gar ama. Gêdja me'ô prô djwýnh kangan kam arým axwemã ngrêk. Gêdja prô djwýnhja pãnh me'ô mymã kabên nhyim arým 'ýr mō. Nhyim kam nija arým o akîn kam axwe. Nhyim kam my jadjwý arým o akîn kam ad-jwýnhdjwý axwekumrêx. Nhyim be, prôja krô'ã mjênkambit nhyim myja kute kangakam axwe kêt. Nãm ã Jeju arkum ane.

<sup>33</sup> Ne kam ajte arkum,

—Kam, amrêbê: me bakukãmãre memã kum,

“Dja gar memã akabên jarên amã me kute amar pydji prãm jabej kum,

‘Metîndjwýnh ne amybým kute imar. Ije amã ikabên pydjín arênhkôt kute imar’, anhýrkam kwãrîk wãnh 'ã ad-jukanga kêt.

Dja gar aje memã akabên jarên kôt ar amijo abakumrêx. Nok ren ga kôt ar amijo aba kêt ne ren arým Metîndjwýnh jarên kajgon ren o kum amikurêtuw”, ane.

Nãm me bakukãmãre ã memã ane gar arým ama. <sup>34</sup> Nhyim be, ba dja ba ar amã arê gar ama. Djãm ar aje memã akabên jarênkam aje ajte kôt Metîndjwýnh nâr ò myjja'ô jarênhmã? Kati. Mrãmri dja gar memã akabên pýnhbit jarê. Kwãrîk wãnh aje memã akabên pydjín arênhkôt ajte memã kàjkwa jarên kêt. Metîndjwýnh kam ýrkam memã arên kêt. <sup>35</sup> Kwãrîk wãnh ar aje memã akabên pydjín arênhkôt ajte memã pyka jarên kêt. Metîndjwýnh pykakam par djãm djakam memã arên kêt. Nâr, kwãrîk wãnh ar aje memã akabên pydjín arênhkôt ajte memã Djeruxarê jarên kêt. Kubê Bênjadjwýr rax djwýnh nhô krîraxkam memã arên kêt. <sup>36</sup> Nâr, kwãrîk wãnh ar aje memã akabên pydjín arênhkôt ajte akrã jarên kêt. Mýj ne gar aje omã? Djãm ar ga aje akrãkam akî 'ôo akamã nâr akî 'ôo kakrãtykmã? Arkati. Te aje akîo anhýrmã. <sup>37</sup> Kam, memã akabên pýnhbit

jarê. Aje mrãmri myjjao anhýrmã. Kambit memã kum, “Nà. Dja ba ã o ane”, ane. Nâr, aje myjjao anhýr kêtã. Kam memã kum, “Kati. Dja ba o anhýr kêt”, ane. Jabit memã arê. Memã akabên pýnhbit jarê. Godja gar memã akabên jarê ne me kute ar amar pydji kadjy ajte kôt memã apýnh myjja jarên arým akabên punu. Kute mrãmri ne me axwe nhô bênjadjwýr jajkwa kurüm akabên kator pyrãk. Nãm ã Jeju arkum ane.

*Kute ar amipãnh nêje ar akre.*

*Ruk 6.29*

<sup>38</sup> Ne kam ajte arkum,

—Me ar amã,

“Amrêbê: ne me bakukãmãre memã kum, ‘Dja me me'ô no katök gê me o aben man kam pãnh no katök. Nâr, dja me me'ô djwa kwýr gê me pãnh wa kwýr’, ane.

Me bakukãmãre ã memã ane.”

Nãm me ã ar amã ane. <sup>39</sup> Nhyim be, ba dja ba ar amã arê gar ama. Djãm ar aje amipãnh meo abikênhmã? Kati. Kwãrîk wãnh. Dja me ar ajo ajkê gar amipãnh meo abikên kêt. Godja me ikra poo anhine djubôkbê ar akurwanh jabej tu me'ýr anhine nhikjêo apa gê kurwa. <sup>40</sup> Nhyim godja me arým pykakam me bênjadjwýr'ýr ajo tén 'ýr ajo bôx ne kum, “Me'ôja ne ijo ajkê. Kum arê gê imã o pãnh”, ane. Nhyim bênjadjwýr arým amã “Pãnh dja ga kum anhô kubêkà'ô pydjín angã”, ane. Djãm aje kubê nêhmã? Kati. Dja ga tu kam anhôdjãnh ne kum anhô kubêkào amãnhkrut ne angã. <sup>41</sup> Dja me kôt atêmmã amã krã tỳ:x ne amã, “Ga dja ga ikôt tē nhyim ajã kirometu pydji apêx”, ane. Ga kam kabênkôt tē. Kôt atêmo kirometu pydji apêx. Ga kam ikabên kôt amã kînh ne ajte ijukri kôt tē nhyim ajã kirometu 'ôdjwý apêx. <sup>42</sup> Godja me ar amã, “Imã angã”, anhýr jabej tu kum angã. Godja me ar amã, “Imã angã. Ba kam i amã kungã”, anhýr jabej. Kwãrîk wãnh kubê nê kêt. Ba ne ba ã ar amã ane. Nãm ã Jeju arkum ane.

*Arkum kurê djwýnh jabêmã kute arkum arênh.*

*Ruk 6.27, 23.34; Kar 7.60; Rô 12.14*

<sup>43</sup> Ne kam ajte arkum,

—Me ar amã,

“Me bakukãmãre ne memã kum,

‘Ar amã amibu’ã me ja jabên kam amã akurê djwýnh kurê’, ane.

Me ã memã ane.”

Nãm me ã ar amã ane. <sup>44</sup> Nhyim be, ba dja ba ar amã arê gar ama. Djãm ar amã akurê djwýnh kurêmã? Kati. Dja gar amã akurê djwýnh jabê. Me kute ar ajo Metĩndjwýnhmã à'wýr ne kum, “Dja ga o ajkê”, anhýro baja dja gar meo Metĩndjwýnhmã a'wý ne kum, “Dja ga o djuw mex”, ane. Amã akurê djwýnh kaprĩ. Me kute ar amã kabên punuo baja ne kute ar ajo bikênho baja dja gar meo Metĩndjwýnhmã a'uw. <sup>45</sup> Ar amã akurê djwýnh jabên arým Abãm kôt amijo tẽ. Aje amijo kãkwakam Abãm krakumrêx kadjy dja gar Abãm kôt amijo tẽ. Ga, Abãm kute me axwemê me mex'ã myto apôxja pumũ. Ne kute me katát kute amijo bamê me ate kute amijo ba'ã nao bixadjwýrja pumũ.

<sup>46</sup> Godja gar amã me kum ajabêjabit jabê djãm kam Metĩndjwýnh kute ar amã mex jarênhmã? Kati. Mýkam? Bir, ar amã me kum ar ajabêjabit jabêkam. Amã akurê djwýnh jabê kêtka. Djori kam amex? Kati. Nãm ã me bẽnjadjwýr bajtemmã pi'ók kaprĩo atom djwýnh djãkĩnhĩ meo ane. Me kum kurê djwýnh jabê kêt. Djori kam me mex? Kati. Metĩndjwýnh ne memã axwe jarê. <sup>47</sup> Godja gar anhõbikwamãbit akabên mex jarê djãm kam ar amexkumrêx? Kati. Mýkam? Bir, ar aje anhõbikwamãbit akabên mex jarênhkam. Aje akurê djwýnhmã akabên mex jarênh kêtka. Nãm ã me bẽnjadjwýr bajtemmã pi'ók kaprĩo atom djwýnh meo ane. Me kute kurê djwýnhmã kabên mex jarênh kêt. Djori kam me mex. Kati. Metĩndjwýnh ne memã axwe jarê. <sup>48</sup> Kam ar ga dja gar amextire. Kãkwakam ar Abãm prĩne mextirekumrêx. Kudjwa ã ar amextireo anen amã akurê djwýnh jabê. Nãm ã Jeju arkum ane.

## 6

*Kute ar ukaprĩ'ã arkum karõ.*

<sup>1</sup> Ne kam ajte arkum,

—Dja gar mekam adjukaprĩ. Djãm kam ar aje amim, “Ba memã amibên ne mekam idjukaprĩ gê ibu'ã me ja imã idjukaprĩ jarê”, anhýrmã? Kati. Kwãrĩk wãnh amim

anhýr kêt. Dja gar memã amibên nhyim me ar amã adjukaprĩ jarê. Djãm kam dja Metĩndjwýnh ar amã akĩnh djã ngã? Ar aje memã amibênkam djãm ar amã akĩnh djã ngã? Kati. Kam ar aje memã amibênkam dja ar amã akĩnh djã nhõr kêt.

<sup>2</sup> Kam ar aje me õ mýjja kêtma ar anhõ mýjja nhõr kadjy. Djãm kam ar aje me kute amijo 'êx ne ta kute amijo Metĩndjwýnh mar mexja kudjwamã? Nãm me kute memã amibên nhyim me kute memã ukaprĩ jarênh kadjy amijo õ'i kakõ. Me bikprõnh djãkam nãr pry kôt amijo õ'i kakõro ba. Djãm ar aje me kudjwamã? Kati. Kwãrĩk wãnh me kudjwa kêt. Mrãmri ar aje amibênkam dja pykakam me ja ar amã ukaprĩ jarê. Djãm Metĩndjwýnh dja ar amã akĩnh djã ngã? Kati. Ar aje memã amibênkam dja ar akam kĩnh kêtkaumrêx ne ar amã akĩnh djã nhõr kêt. Mrãmri ije ar amã ja jarênhkumrêx. <sup>3</sup> Nhyim be, ar ga ar aje me õ mýjja kêtma mýjja nhõrmã tu udju gê me ar abu'ã ar amar kêt. Gê ar aje memã õrkôt me ar abu'ã ar amar kêt. Dja gar memã angãn kwãrĩk wãnh amim, “Arým ne ba kum kungã. Idjukaprĩkumrêx”, kwãrĩk wãnh amim anhýro aba kêt. <sup>4</sup> Dja gar mebê udju nhyim ar Abãm djwýnh arým ar aman ta arým ar amã akĩnh djã ngã. Nhyim kam me kunĩ ar apumũ. Nãm ã Jeju arkum ane.

*Metĩndjwýnhmã ar kabên'ã arkum ujarênh.*

*Ruk 11.1*

<sup>5</sup> Ne kam ajte arkum,

—Metĩndjwýnhmã ar akabênkam djãm aje me kute amijo 'êx ne ta kute amijo Metĩndjwýnh mar mexja kudjwamã? Me kute memã amibên nhyim me kute memã mex jarênh kadjy ne me me bikprõnh djãkam nãr pry bikjêrkam Metĩndjwýnhmã kabêno ku'ê. Djãm ar aje me kudjwamã? Kati. Kwãrĩk wãnh me kudjwa kêt. Mrãmri me kute amibênkam dja pykakam me ja memã mex jarê. Djãm Metĩndjwýnh kute memã mex jarênhmã? Kati. Me kute memã amibênkam ne Metĩndjwýnh mekam kĩnh kêtkaumrêx. Kam dja memã mex jarênh kêtkaumrêx. <sup>6</sup> Ar aje mrãmri kum akabênmã djãm ar aje memã amibên kadjy me ipõkri adjãmmã? Kati. Kwãrĩk wãnh. Dja gar me

kàxã ar anhõ kumoka'ê djwýnhmã wadjàn amijã ijê. Ar Abãm djwýnh ne bipdjur. Nãm te bipdjurn kute mýjja bipdjur kunĩ pumũnh. Dja gar amijã ijê. Ne kam arým kum akabên jarê nhym arým ar apumũn ar ama. Ar aman arým ar amã akĩnh djà ngã nhym kam me kunĩ ar apumũ. <sup>7</sup> Dja gar Metĩndjwýnhmã amikabên jarê. Kwãrĩk wãnh me kwý kudjwa kêt. Me kwý kute apýnh mýjjao metĩndjwýnh karõ nhípêx ne marja ne me 'êx ne arĩk mýjjamã amikabên krãptĩ jarênh kajgoo ba. Ne arĩk amim, “Dja ba kum amijarênh krãptĩ gê ikabên krãptĩ man arým imarkumrêx”, ane. <sup>8</sup> Kwãrĩk wãnh me kwý ja kudjwa kêt. Djãm we ar aje Metĩndjwýnhkumrêxmã akabên krãptĩ jarênh nhym kôt we kute amarmã? Kati. Ar Abãm djwýnh, kubê Metĩndjwýnhkumrêx, djã ne mýjjao metĩndjwýnh karõ nhípêxja kudjwa amakkre kêt? Kati. Metĩndjwýnhkumrêx ne amak me:xkumrêx ne tu kute ar amar. Ar anhõ mýjja kêtja tu kute mar. Ar aje kum mýjjao adjã'wýr kêttri arým kute ar amar.

<sup>9</sup> Ate gêdja gar ikabên kôt kum akabên jarê ne kum,

“Djũnwã, ga ne ga kàjkwakam nhỹ ba arým ama.

Gê me amexo apymaja man amim ajarê abenmã ajarê.

<sup>10</sup> On me kadjy abênjadjwýr ne ar meo aba. Ga, kàjkwakam me kute akabên marn kôt kute ar amijo baja pumũ.

Gê me pykakamdjwý on me kudjwa ã akabên marn kôt ar amijo bao ane.

<sup>11</sup> Akati jakam ar ijajkwa mãnhkutã ar imã inhõ kwý krên djà ngã.

<sup>12</sup> Ar ijaxwe maro akno. Godja me'õ ar ikam axwe bar o ibiknor jabej ga gadjwý ar ijaxwe maro akno.

<sup>13</sup> Me kute ar imã axwe'ã àpnênh kunĩkôt ga ga ar ijo tỳx bar mebê idjãm tỳx ne ijaxwe kêt. Dja ga ajte Xatanajbê mã ar ipytãro aba.

Mýkam ne bar ã amã ane? Bir, abê Bênjadjwýr djwýnh. Ga apydji ajity:x ne ara:x rã'ã: rã'ã ne. Tãm ne ja”, ane.

Dja gar ã Metĩndjwýnhmã akabêno ane.

<sup>14</sup> Nã bãm ar amã, “Dja me'õ ar akam axwe gar tu wãnh axwe maro aknon kam

angryk kêt”, ane. Mýkam? Bir, godja gar me axwe maro aknon kam angryk kêt nhym kàjkwakam Abãmdjwý ar ajaxwe maro aknon akam ngryk kêt. <sup>15</sup> Nhym be, godja gar me axwe mar rã'ãn me kam angryk rã'ã jabej ar Abãmdjwý dja ar ajaxwe mar rã'ãn ar akam ngryk rã'ã. Kam ne ba ar amã, “Dja me'õ ar akam axwe gar axwe maro aknon kam angryk kêt.” Nãm ã Jeju arkum ane.

<sup>16</sup> Ne kam ajte arkum,

—Ne kam ar aje Metĩndjwýnhmã amijajbur jabej djãm ar aje me kute amijo 'êx ne ta kute amijo Metĩndjwýnh mar mexja kudjwamã? Me kute amijajburo amirĩt ne memã amibên kadjy ne me amijo nokre kaprĩn aminokreo àpnu. Djãm ar aje me kudjwamã? Kati. Kwãrĩk wãnh me kudjwa kêt. Mrãmri me kute amibênkam dja pykakam me memã mex jarê. Djãm kam Metĩndjwýnh kute memã mex jarênhmã? Kati. Me kute memã amibênkam Metĩndjwýnh mekam kĩnh kêtumrêx ne memã me kĩnh djà nhõr kêt.

<sup>17</sup> Nhym be, ar ga ar aje kum amijajburkam on amikrã ngràn aminokre põ. <sup>18</sup> Ar aje amijajbur'ã memã amijo amirĩt kêt kadjy ã memã amijo ane. Ar Abãm djwýnhbê Metĩndjwýnh ne bipdjur. Nãm te apdjurn kute mýjja bipdjur kunĩ pumũnh. Dja gar ã anen arým kum amijajbu nhym ar apumũn ar ama. Ar aman arým ar amã akĩnh djà ngã nhym kam me kunĩ ar apumũ. Nãm ã Jeju arkum ane.

*Kàjkwakam ar õ nèkrêx'ã arkum ujarênh.*

*Ruk 12.33; A Xim 4.8; Ped k 1.4; Idja 10.34*

<sup>19</sup> Ne kam ajte arkum,

—Kwãrĩk wãnh amim pykakam ar anhõ nèkrêx rax jadjwýr kêt. Kam ne kanêremê 'òk arým abê o àpnu nhym me àkĩnhĩ arým 'ã òpòk ne o akĩ. <sup>20</sup> Ate dja gar Metĩndjwýnhmã apê nhym arým pãnh kàjkwakam ar amã nèkrêx rax jadjuw. Kam ne 'òk kute ar abê o àpnu kêt nhym kanêre kute o àpnu kêt nhym me àkĩnhĩ kute 'ã òpòk ne o àkĩnh kêt. <sup>21</sup> Mýkam dja kàjkwakam anhõ nèkrêx? Bir, ar aje anhõ nèkrêxkôt ajamak bën prãmkam. Dja kàjkwakam ar anhõ nèkrêx rax gar arým kàjkwakam mýjjakôt ar ajamak bẽno aba. Nãm ã Jeju arkum ane.



<sup>22</sup> Nhym me nodjwÿ. Me noo ne me kute mÿjja pumũnh. Dja gar ano mex ne ajmã ano kute kêt jabej arÿm mrãmri arÿt tÿxkumrêx ne mÿjja pumũ. Aje mrãmri ne me a'uri mrãnh mex pyrãk. <sup>23</sup> Nhym be, dja ano rã, ano ajmã kute gar arÿm arÿt kêt ne aje mÿjja pumũnh kêt. Aje mrãmri ne me akamãt kô tykkam mrãnh punuja pyrãk. Gêdja gar Metĩndjwÿnh kôt aje amijo aba kêt jabej kute ar amã amikukràdjã jarênhja kôt aje amijo aba kêt jabej arÿm ar aje me'õ akamãtkam ba pyrãk, aje me'õ akamãt kô tyk tÿxkam mrãnh punuja pyrãk.

<sup>24</sup> Ê, nhÿnh ne me'õ amê õ bēnjadjwÿr ajkrut ne kum apê? Kati, gēdja o anen kam te o ane. Gēdja kum ja kurēn kam kum ja jabê. Nār kon, gēdja kum ja kīnh ne kumābit apê ne kam kum ja kurēn kum āpēnh kêt ne. Dja gar amã Metĩndjwÿnh kīnh ne ajte amã nēkrêxo atom raxja kīnh ne kam kute bēnjadjwÿr amānhkrutmã adjāpēnh pyrãk. Dja gar te o ane, ane.

*Amikam umar punu kêt 'ã kute arkum karõ.*

*Ruk 16.13; Pir 4.6; Ped k 5.7*

<sup>25</sup> Ne kam Jeju ajte arkum,

—Kwãrĩk wãnh amikam adjumar punun amim, “Mÿj dja ba kukrê, mÿj dja ba o ikõ, mÿj dja ba adjã?” Kwãrĩk wãnh ã adjumar punuo anhÿr kêt. Djãm Metĩndjwÿnh kute ar akudjwa djwÿmê kubêkãbit maro ba? Kati. Kute ar gajbit ar amar tÿx. Kute ar amar tÿxkam dja ta arÿm ar amã ar anhõ kwÿ krēn djãmê ar anhõ kubêkãmê kungã. Kam, kwãrĩk wãnh amikam adjumar punu kêt. <sup>26</sup> Ga, kÿjrũm kwēnhja pumũ. Djãm kwēnh kute pur kre nār bāygogo djê nār o atom ne kute õ kikrekam adjwÿr? Kati. Kwēnh kute ã o anhÿr kêt nhym kãjkwakam Abãm tu o djuw mex. Metĩndjwÿnh ne kum kwēnh kīnh ngrire. Ar gajbit kum ar akĩnhkumrêx. Kam ar gajbit dja ar ajo djuw mexkumrêx. Kam kwãrĩk wãnh amikam adjumar punun amim, “Mÿj dja ba kukrê”? anhÿr kêt. <sup>27</sup> Djãm amikam ar adjumar punun arÿm ar adjumar punuo ar aje amũ atyk kêtãmã aminhõ akati kamēnhmã? Kati. Ar aje te o anhÿrmã.

<sup>28</sup> Mÿkam ne gar anhõ kubêkã prãmje amikam adjumar punu? Ga, kapõtkam

pidjõrãja pumũ. Mÿj ne pidjõrã abatãnh on? Djãm pidjõrã āpēnh nār djãm kute õ kubêkã kayr? Kati. <sup>29</sup> Bēnjadjwÿr raxbê Xaromão nhõ kubêkã me:xkumrêx ne kume:x. Djãm mexo kute pidjõrã pyrãk? Arkati. Pidjõrã ne mexo kute Xaromão nhõ kubêkã jakrenh me:xi. <sup>30</sup> Metĩndjwÿnh ne pidjõrã kre nhym abatãnh ne arÿm mexkumrêx. Akatija tãmkam ne mex nhym akati nhym me arÿm kaban kuwykam kurê nhym arÿm xêr. Ga, Metĩndjwÿnh kute prĩne pidjõrão djuw mex nhym mexkumrêxja pumũ. Mÿkam ne gar amim Metĩndjwÿnh mar rerekre? Kum pidjõrã kīnh ngrire. Nhym be, ar gajbit Metĩndjwÿnh kum ar akĩnhkumrêx. Tãm dja gar ama. Djãm kute ar ajo djuw mex kêtãmã got? Dja ar ajo djuw mexkumrêx gar arÿm anhõ kubêkã.

<sup>31</sup> Kam kwãrĩk wãnh ar anhõ mÿjja prãmje amikam ar adjumar punu kêt. Kwãrĩk wãnh amim, “Mÿj dja ba kukrê”? nār, “Mÿj dja ba o ikõ”? nār, “Mÿj dja ba angij”? kwãrĩk wãnh amim anhÿr kêt. <sup>32</sup> Apÿnh pyka djãri me kute Metĩndjwÿnh mar kêtja kute mÿjja jakõtbit amak bēn ne. Djãm ar aje me kudjwamã? Kati. Kwãrĩk wãnh. Kãjkwakam ar Abãm kute ar amar. Ar anhõ mÿjja kêtja kunĩkôt kute ar amar. <sup>33</sup> Nhym be, ar ga, djãm ar amã mÿjja ja kīnhmã? Kati. Kwãrĩk wãnh. Bir, mÿj dja gar amã kīnh? Bir, Metĩndjwÿnh kute ar apytār ne kute ar ajo bajabit dja gar kumrêx amikam mar tÿx. Ne kôt ar ajaxwe kêtjwÿ dja gar mar 'ãno dja. Ja dja gar amã kīnh nhym kam arÿm ar amã mÿjja kīnhja kunĩ ar amã kungã. <sup>34</sup> Kwãrĩk wãnh ar amikukãm adjumar punu'õ mar kêt ne amim, “Godja akatibê idjumar punu djã'õ iwÿr bõx jabej mã gēdja ba nē”? anhÿr kêt. Djãm akati 'õkam Metĩndjwÿnh kute ar ajo djuw mex kêtãmã? Kati. Akati kunĩkôt kute ar ajo djuw mex. Dja akati nhym Metĩndjwÿnh ta arÿm ar ajo djuw mex. Ar adjumar punu ar awÿr bõx jabej ajbit dja gar amikam ama. Kwãrĩk wãnh amũ amikukãm adjumar punu'õ maro atēm kêt. Nãm ã Jeju arkum ane.

*Ar kute me'ã axwe rēnh nêje kute ar akre.  
Ruk 6.37; Rô 2.1; Kô k 4.5; Xij 4.11*

<sup>1</sup> Ne kam ajte arkum,

—Ar aje me axwe jabej me kukjêr kêt kam mỳkam ne gar tu me'ã amim, “Axwe”, anhỹro aba? Kwãrĩk wãnh. Dja gar me'ã axwe rēnh aba nhym me arỳm amipãnh ar ajã axwe rē nàr Metĩndjwỳnh arỳm ar amã ajaxwe jarē. <sup>2</sup> Godja gar me'ã mỳjja'õ man kôt tu 'ã, “Axwe”, ane. Djãm kam me nàr Metĩndjwỳnh akam kĩnh? Kati. Dja gar me'ã ane nhym me nàr Metĩndjwỳnh arỳm ar gadjwỳ ar ajã mỳjja tãm man kôt ar ajã axwe mē. Dja gar Metĩndjwỳnh kudjwa memã õr rũnh nhym kam me akubyn ar aje memã õr 'ãnh ar amã kungã, ane.

<sup>3</sup> Mỳkam ne gar akamy nokam pyka jaũmbit pumũn kam ar anokam pĩponhtija pumũnh kêt ne? <sup>4</sup> Djãm ar aje akamymã kum, “Akmere, amrē ba amã anokam pyka jaũmwã kaba”, anhỹrmã? Ne kam ar anokam pĩponhtiwã pumũnh kêt kumrēx ne. Ar aje aminokam pĩponh pumũnh kêt kam we ã kum ane. <sup>5</sup> Kê. Mrãmri ne gar apunu rax ne kam ajajkwakambit amimexo amra. Akumrēx gēdja gar aminokam pĩponhtiwã kaban kam arĩt mex ne arỳm kôt ar akamy nokam pyka jaũm ngrire wã kaba. Kam dja gar akumrēx wãnh ajaxwemã anhire. Ne kam arỳm aje aminokam pĩponhti kadjàr pyræk. Ar ga dja gar akumrēx wãnh ajaxwemã anhire ne kam arỳm amex ne ajaxwe kêt ne ar akamy jaxwe nêje kukrà kadjy arỳm amex. Amex kute arỳm ar akamy nokam pĩ jaũm kadjàr kadjy kute arĩt mex pyræk.

<sup>6</sup> Me kwỳ ne me kum axwe kĩ:nh ne kam axwe'ã maje kum Metĩndjwỳnh kĩnh kêt. Djãm me jamã aje Metĩndjwỳnh kabēn jarēnhmã? Kati. Ga ren me jamã arē ne ren aje mrãmri me kute ropremã Metĩndjwỳnh nhõ mỳjja rēnh pyræk nàr me kute angrõ jamymã kryt karỳr rēnh pyræk. Kwãrĩk wãnh o anhỹr kêt. Ga ren o ane nhym ren me kum Metĩndjwỳnh kabēn kurēn o ajkēn akēx ne gadjwỳ ajo ajkē. Kute mrãmri ne ropre kute mỳjja mex nhirēnh nhym angrõ jamy ituo kryt karỳr ngãnhja pyræk. Nãm ã Jeju arkum ane.

*Ar kute Metĩndjwỳnh 'wỳr'ã arkum ujarēnh.*

*Mak 11.24; Dju r 14.13; Ruk 11.9; Tex k 5.17*

<sup>7</sup> Ne kam ajte arkum,

—Dja gar tu mỳjja'ã 'uw, mã mỳjja'ã 'wỳro tē nhym Metĩndjwỳnh arỳm ar amã kungã. Ga, ar aje mã mỳjja jabej ne kam arỳm kum ajapõxja pumũ. Ne kam mã kikre jajkwa krekremã akabēno aku'ê nhym arỳm me kute ar amã 'ã rēnhja pumũ. Dja gar ã Metĩndjwỳnh 'wỳro ane. <sup>8</sup> Be, me kute mỳjja'ã 'wỳr 'ãno ãm gēdja Metĩndjwỳnh arỳm memã kungã. Ga, me kute mỳjja jabej ne kum apõxja pumũ. Ne kam me kute kikre jajkwa krekremã kabēno ku'ê nhym arỳm me kute memã kikre'ã rēnhja pumũ. Dja gar gadjwỳ ã mỳjja'ã Metĩndjwỳnh 'wỳro ane nhym arỳm amã o amirĩt. <sup>9</sup> Nhỹnh ne ar akra'õ tēn djwỳ'ã ar ajuw gar kum kēn ngã? <sup>10</sup> Ne tep'ã ar ajuw gar kum kangã ngã. Arkati. <sup>11</sup> Be, gar ajaxwekam aje akramã mỳjja mex nhõrja pumũ. Nhym be, kàjkwakam ar Abãm mextire ta gēdja ar amã amũ mỳjja mex nhõro ar ajakre.

<sup>12</sup> Kam gar aje amibu'ã me'ã amim “Gē me imã mex”, “Gē me imã mex”, anhỹro aba. Kute aje me'ã amim anhỹro aba pyræk ar gadjwỳ dja gar amikabēn kôt ã memã amexo ane. Dja ga ã memã amexo anen arỳm Metĩndjwỳnh kabēn kukràdjà kôtdjwỳ aje amijo aba mexkumrēx. Mõdjé kute kabēn jarēnh kôt aje amijo aba mexkumrēx. Me kute Metĩndjwỳnh kukwakam memã kabēn jarēnhdjwỳ aje kôt amijo aba mexkumrēx. Nãm ã Jeju arkum ane.

*Apỹnh pry'ã arkum ujarēnh.*

*Ruk 13.24*

<sup>13</sup> Nhym kam mrãmri me kute mỳjja mar ne kôt ar amijo ba ne kute pry pyræk. 'ã ne Jeju arkum,

—Ikôt dja gar amijo aban arỳm abē tỳx kute mrãmri ne pry kre ngrire mebē tỳx pyræk. Nhym be, dja gar me kum ikĩnh kêtja kôt ar amijo aban arỳm amã rerekre. Amã tỳx kêt kute mrãmri ne pry kre raxkôt me mrãnh memã tỳx kêt pyræk. Kwãrĩk wãnh me kum ikĩnh kêtja kôt ar amijo aba kêt. Aje pry jajkwa krekre ngrirekôt adjàr mãn

prabê dja ga on amim iman ikôt ar amijo aba. Me kräpti ne me me kum ikĩnh kêtja kôt ar amijo ba. Memã tỳx kêtê kute mrãmri ne me kute pry jajkwa krekre raxkôt ngjêx nhym memã tỳx kêt pyræk. Kute pry kre rax kôt me mör memã tỳx kêt pyræk. Dja gar me kum ikĩnh kêt kôt ar amijo aban arým akuno. Me biknor tokry djækam akuno. <sup>14</sup> Nhym be, me ngrêrebit ne me imã apôx ne amim imaro ba. Me kute mrãmri ne me ngrêre pry jajkwa kre kre ngriremê pry kre ngriremã apôx pyræk. Ar ga dja gar imã akaton amim imaro aban arým atĩn ne, Metĩndjwỳnhkôt atĩn ne ar aba rã'ã: rã'ã ne. Nãm ã Jeju arkum ane.

*Ar amijã no tỳx'ã arkum ujarênh.*

<sup>15</sup> Ne kam ajte arkum,

—Me kute amijo 'êx ne memã, “Ba ne ba ibê Metĩndjwỳnh kukwakam kabên jarênh djwỳnh”, anhỹro bajabê amijã ano tỳx. Nãm me kute mrãmri ne rop krori kute amijo mrykĩ'ãtomti kà jangjênh ne bôx pyræk. Me ta ne me kute amijo imar mex ne ar awỳr bôx. Nhym be, kati. Nãm me ar anoo akno. Me kà kadjwỳnhbê ne me kute mrãmri ne rop jamrex pyræk. Me axwe. Ne kute ar amã Metĩndjwỳnh'ã 'êx ne kabên kêt jarênhmã ne ar awỳr bôx. Kute o ibê amiwỳr ar ajo akêx ne ar ajo bamã ne ar awỳr bôx. <sup>16</sup> Mỳj dja gar me omũnh ne memã akator on? Bir, mỳj dja gar pidjôjadjwỳ mar on? Bir, ô ne parbê rôrôk ne ikwãn o bàrio amirĩt nhym me kôt kum apôx. Ga, rojtikam tyrti apôx kêtja pumũ. Ar gadjwỳ dja me apỳnh kabên punu jarên àpênh jaxwe gar me omũn arým memã akaton amim, “Be, ga, axweja pumũ. Kabên kajgo. Nãm Metĩndjwỳnh'ã 'êx ne kabên kêt jarênh ba”, ane. Djãm mrỳnhĩkam me kute akrô djôbê uba rênh? Kati. Nàr, djãm prêxkam me kute pidjôbê pigu rênh? Kati. <sup>17</sup> Bàri mexkam ne ô mex arij. Nhym be, bàri punukam ne ô punu arij. <sup>18</sup> Bàri mexkam ne ô punu arij prãm kêtumrêx. Nàr, bàri punukam ô mex arij prãm kêtumrêx. <sup>19</sup> Bàrikam ô punu jariija kunĩ ne me kute akàr ne kuwykam rênh. Dja me ã kute Metĩndjwỳnh'ã 'êx ne kabên kêt jarênh ba. <sup>20</sup> Be, me àpênh jaxwe dja gar omũn arým kôt kum akato.

Me kute Metĩndjwỳnh kabên kêt jarênhja dja gar ama. 'Ã ne ba ar amã, “Ga, rojtikam tyrti apôx kêtja pumũ”, ane.

<sup>21</sup> Me kute arĩk imã, “Ga abê inhõ Bênjadjwỳr djwỳnh. Ga ne ga ijo aba”, anhỹrja. Djãm me ja kunĩ kàjkwakam Bênjadjwỳr djwỳnh kute amim me utàr ne ar meo bamã? Kati. Me kute amim kàjkwakam Ibãm kabên mar ne kôt kute amijo babit. Me jabit dja Bênjadjwỳr djwỳnh amim me utàn ar meo ba. <sup>22</sup> Ije memã axwe pãnh jarênh nhõ akati wãkam dja me kräpti aminêje imã, “Bênjadjwỳr djwỳnh. Djãm akukwakam ije memã akabên jarênh kêt got ga ikanga? Djãm akukwakam ije me karõ punu kujaêk kêt got ga ikanga? Djãm akukwakam ije mỳjja pumũnh kêt nhipêx kêt got ga ikanga? Mỳjja rũnh, mỳjja kräpti ne ba ipêx ga ikanga”, ane. Ije memã axwe pãnh jarênh djã nhõ akatikam dja me ã imã ane. <sup>23</sup> Kam dja ba irã ipôkri me kunĩmã kum, “Kati. Djãm ikukwakam ne ga mỳjja nhipêx? Kati. Wãnh amikukwakam ne ga mỳjja nhipêx. Ba ije amar kêt. Rũm imã akãx. Me adjápênh jaxwe”, ane. Dja ba ã memã ane. Nãm ã Jeju arkum ane.

*Me kute apỳnh kikre nhipêx'ã arkum ujarênh.*

*Ruk 6.47*

<sup>24</sup> Ne kam ajte arkum,

—Me kunĩ kute ikabênja mar ne kôt kute amijo baja ne me kute mrãmri ne me'õ jamak mex pyræk. Me'õ jamak mexja kênkam amim kikre. <sup>25</sup> Nhym kam te 'ã na axidjuw ne te 'ã ngô tãm ne te kôk djábêr tỳx kikre karngro nhym tỳm kêt. Kênkam kute ipêxkam ne tỳm kêt. <sup>26</sup> Nhym be, me kunĩ kute ikabênja mar kajgon kôt kute amijo ba kêt ne me kute mrãmri ne me'õ bèn kati pyræk. Me'õ bèn kati pykatikam amim kikre. <sup>27</sup> Nhym kam 'ã na axidjuw ne 'ã ngô tãm ne kôk djábêr tỳx kikre karngro nhym arým tỳm. Djã nãm kàjbê ban tỳm got? Kati. Nãm tu ban gru: ane.

<sup>28-29</sup> Nãm ã Jeju memã anen arým memã amikukràdjã jarênh pa. Nhym me kabên man kam ari ar aben pumũn kam abenmã kum,

—Tô mỳj kabēn ny gotja? Nām prīne kute amimarkôt katàt memã amikukràdjà jarēnhkumrēx. Nām ã me bēnjadjwỳr rūnh kwỳ kabēn mex anen ar prīne kabēno meo atomo ba, ane. Djã nām ã Môjdjê kukràdjà mar djwỳnh memã arēnho ane? Kati, nām me ari no prôt ne ari kukràdjà jarēnh'ã umju:w ne kute arēnh katàt kêtikumrēx.

## 8

*Me'õ ã kajêkam tê'ã ujarēnh.*

*Mak 1.40; Ruk 5.12*

<sup>1</sup> Nhyam kam krānh'ã arỳm rwỳk tē. Nām rwỳk tē:n arỳm ruw. Nhyam me krāptī: kôt mō. <sup>2</sup> Nhyam kam me'õ ã kajêkam tēja 'ỳr bōx ne parbé kōnkrão nhỳn kum rax jarēn kum,

—Bēnjadjwỳr djwỳnh, ga aje inhī kajêkam itêkôt aje ipumūnh ne aje mar. Aje ijo mex prām jabej ba ren arỳm imex ne, ane.

<sup>3</sup> Nhyam arỳm 'ỳr ikran kupên kum,

—Ije ajo mex prām. On amex, ane. Nhyam arỳm 'ã ã kajêkam tēja apêx nhyam arỳm mex ne. Kute o ãm tãmkam tēmbê kà mex ne.

<sup>4</sup> Nhyam kum,

—Kwārīk wānh ga amijarēnh kêt. Dja ga tu katàt mã me kadjy Metīndjwỳnh mar djwỳnh'ỳr tēn kum amibē, kum amikà bē. Ne kam kum mry ngã gē akadjy Môjdjê kukràdjà kôt Metīndjwỳnhmã mry gan kum kungã. Arỳm akà mexkam dja ga kum mrywã ngã gē me kunī apumū, arỳm akà mexkôt apumū. Nām ã Jeju me'õmã ane.

*Kute amybỳm me'õo mex.*

*Ruk 7.1*

<sup>5</sup> Ne kam arỳm tēn krīraxbê Kapanamã wadjà. Nhyam krākamngōnh krāptī kubê 100 nhō bēnjadjwỳr arỳm 'ỳr bōx ne kum ò àpēnho no katon kum arēn kum,

<sup>6</sup> —Bēnjadjwỳr djwỳnh, inhō àpēnh arỳm akryn tokry rax ne kikrekam arek nō, ane.

<sup>7</sup> Nhyam Jeju kum, “Ba 'ỳrn o mex”, ane.

<sup>8</sup> Nhyam krākamngōnh nhō bēnjadjwỳr kum,

—Djãm imex got ga inhūrkwãmã tē? Kwārīk wānh. Dja ga akabēnbit jarē nhyam arỳm inhō àpēnh mex ne. <sup>9</sup> Inhō bēnjadjwỳr kute raxo ijakrenhja ne imã kabēn ba kabēn man kôt ar amijo iba. Ne kam ba ibē me krākamngōnhre nhō bēnjadjwỳrkam ba memã ikabēn nhyam me ikabēn kôt ar amijo

ba. Ba 'õmã kum, “'Ỳr tē”, ane nhyam arỳm 'ỳr tē. Ba kam ajte 'òdjwỳmã kum, “Amrē tē”, ane nhyam arỳm amrē tē. Ba inhō àpēnhmã kum, “On mỳjja kupê”, ane nhyam arỳm kupê. Kam ne ba amã, “Abēnjadjwỳr djwỳnhkam dja ga akabēn nhyam arỳm akabēnkôt mex ne”, ane. Krākamngōnh nhō bēnjadjwỳrbê ne me bajtem.

<sup>10</sup> Nām Jejumã ane nhyam kuman arỳm kam no tyn djan kôt ba djwỳnh arkum,

—Be, me'õ bajtemja kute tu amim imar mexkumrēx. Mebê idjaerkumrēx ren kudjwa ã amim imaro ane. Nhyam be, kati. Me kute kudjwa ã amim imaro anhỳr kêt. Pydji bajtemkam kute amim imar me:xkumrēx. Mrāmri ne ba ar amã ja jarēnhkumrēx. <sup>11</sup> Ë, ba ar amã arē gar ama. Kàjkwakam Bēnjadjwỳr djwỳnh arỳm kute pykakam amim me utàr ne ar meo bakam dja gwaj me bakukãmāremē ro'ã banhō kwỳ krē. Abraãomē Idjakmē Djakomē ro'ã banhō kwỳ krēn mexo nhỹ. Nhyam kam dja me bajtem krāptī: ban bōx, myt apōx djārūm bōx ne myt ngjêx djārūm bōx. Bōx ne arỳm gwaj baro'ã ò kwỳ krēno nhỹ. <sup>12</sup> Nhyam be, mebê idjaerkumrēxja dja Metīndjwỳnh arỳm bōm me kumē.

Bēnjadjwỳr djwỳnh bit kute amim me utàr ne ar meo baja, me tãm dja arỳm bōm me kumē. Bōm mebê idjaer mē nhyam me wānh akamàt kō tykkam ar ba. Wānh ne me amim ngryk ne tokry djaje amijanên ar àmra ba. Nām ã Jeju arkum ane.

<sup>13</sup> Ne kam me krākamngōnh nhō bēnjadjwỳrmã kum,

—Aj mã. Ga ne ga tu amim imarkumrēx. Kôt dja ba arỳm amã ã o ane, ane. Nhyam myt tãmkam arỳm ò àpēnh mex ne.

*Kute me punu krāptiõ mex.*

*Mak 1.29; Ruk 4.38*

<sup>14</sup> Nhyam kam Jeju arỳm Pedru nhō kikrekam bōx nhyam Pedru djupānhdjwỳ kanên nō. <sup>15</sup> Nhyam 'ỳr bōx ne arỳm ikra kupê. Kupê nhyam kanê arỳm kum ire. Kum ire nhyam arỳm kàjmã djan arỳm mex ne. Ne kam arỳm aro djuw mexo ba.

<sup>16</sup> Nhyam kam ar'ã para nhyam me arỳm 'ỳr me krāptiõ bōx. Me karō punu kute meo baja tãm ne me'ỳr meo bōx. Nhyam mã me'ã kabēnbit jarē nhyam mã me karō

punu umaje mō. Memã iren mã mō. Jeju arým mã me kunĩkam me karō punu kujate. Ne kam ajte me punudjwý kunĩ mex. <sup>17</sup> Amrêbê: ne ujarênh djwýnhbê Idjaij Jeju'ã ajarê. Kute meo mex'ã ajarê. Nãm Metĩndjwýnh kukwakam 'ã ajarê. Nãm me bakukãmãremã kum,

“Apýnh me bapunu djàri, apýnh me bakanê djàri nhym kute amijã me bamar.

Kute mrãmri ne me kute jênh pytĩo bakam kute amijã mar pyræk. Nãm ã amijã me bamaro ane.”

Nãm ã Idjaij me bakukãmãremã ane. Jeju kute meo mex'ã ne memã arê. Nhym kam me aben djô'ã arênh mō. Arênh mōr tãmtã arým 'ýr o bōx. Tũ:mrãm, me bakam-ingrãnyrekam Jeju arým kato. Katon kam arým abatãnh ne ar ba. Ne kam arým me punuo mexo ba. Metĩndjwýnh kukwakam Idjaij kute me bakukãmãremã 'ã ujarênh kôt Jeju arým ã meo mexo bao ane.

*Ar'õ bit kute Jeju kôt amijo bikamênh.*

*Ruk 9.57*

<sup>18</sup> Jeju me punuo mex ne arým amibu'ã me krãptĩ: pumũ. Ne kam arým arkum, —Gwaj on akãx nhikjê mã rê, ane.

<sup>19</sup> Nhym kam Mōjdjê kukràdjã mar djwýnh'õ 'ýr bōx ne kum,

—Ë, ujarênh djwýnh, ba arek akôt tẽ. Dja ga nhĩ'ãm amrãnh kunĩkôt ba akôt mrã, ane.

<sup>20</sup> Nhym kam kum,

—Ë, ga, djoti pykakam kreja pumũ. Ne kwênh kýjrũm aêja pumũ. Mrymê kwênhbit ne ôt djã kute amim kre pumũnhkôt kam ôt djã. Nhym be kati. Ba ne ba inhõ kikre kêt. Inhikwã djã kêt. Ije amijo inhĩ ne me awýr irwýk nhýnh ne ba inhũrkwãja? Kon, gop ga amiman kam ikôt atêm jabej nãr kon, arek dja, ane.

<sup>21</sup> Nhym kam me'õ ja kute Jejukôt bamã ne kum,

—Bênjadjwýr djwýnh, ba ibãm kumrêx jadjà. Ne kam arým akôt ar iba, ane. Nhym kum,

<sup>22</sup> —Kati. Amrê on ikôt ar aba. Gê me kute Metĩndjwýnh mar kêt wãnh me tyk jadjà. Me kute mar kêt ne me kute mrãmri ne me tyk jamakkre kêt pyræk. Gê me wãnh õbikwa tyk jadjà. Nãm ã Jeju kum ane.

*Jeju kôkmã bẽnh tỳx.*

*Mak 4.35; Ruk 8.22*

<sup>23</sup> Ne kam ar kà'ýr tẽnh 'ýr bōx. Nhym Jeju arým kãkam nhý nhym kôt ba djwýnh ar arým kôt nhý. Nhym kam ar arým kà kujaten amũ tẽ. <sup>24</sup> Tẽ: nhym ar aêrbê na 'itỳx ruw nhym kôk 'itỳx wabê. Nhym ngô arým aben pumjuw ne kã nhiby ato. Nhym be, Jeju wãnh arek õto nõ. <sup>25</sup> Nhym kam kôt ba djwýnh ar 'ýr tẽnh arým tok ne kum,

—Bênjadjwýr djwýnh, gop ar ipytã. Arým gwaj badjãr 'ýr, ane.

<sup>26</sup> Nhym arkum,

—Nã gãm ar amim imar rere:kre. Mýkam ne gar atĩn prãm? ane. Ne kam kãjmã djan kôkmã bẽnh tỳx. Nhym arým tu ngô mên nõ.

<sup>27</sup> Nhym ar te kute marmã kam no tyn djan abenmã kum,

—Mýj got on nhym kôkmẽ ngô raxmẽ tu kabẽnh kôt ã amijo ane? ane. Nãm ar ã abenmã ane.

*Me karõ punu krãptĩ: kute ar me'õo ba.*

*Mak 5.1; Ruk 8.26*

<sup>28</sup> Nhym kam Jeju arým ngô nhikjê mã bōx ne wabi. Kam ne pyka nhidjibê Djeradja. Nãm wabi nhym me'õ amãnhkrut ar arým kajpa. Me karõ punu ne ari aro ba. Me tykmã kikre kurũm ne ar mō. Ar àkrê: nhym me te ar umaje ne te ar'ãnh tẽmmã. <sup>29</sup> Nãm ar Jeju kajpan arým kãj bê amran aminêje kum,

—Mýj nã Metĩndjwýnh Kra? Djãm me inhõ akati kêttri dja ga me imã me itokry jadjà? ane.

<sup>30</sup> Nhym nĩjar angrô jamy krãptĩ: àkur mō.

<sup>31</sup> Nhym kam me karõ punu kum amijo a'uw ne kum,

—Aje me ikujaêk prãm jabej ba me angrô jamy krãptĩ:wãmã wadjã, ane.

<sup>32</sup> Nhym kum, “Aj mã”, ane. Nhym me arým kato. Katon arým angrô jamy krãptĩ:mã wadjã. Wadjã nhym arým angrô jamy kunĩ prõt ne. Pyka krã'yr'ã aparmã prõt tỳ:x ne arým imôtikam nox ne amin-himex ne. <sup>33</sup> Nhym angrô jamy pumũnh djwýnh ar omũn arým krĩraxmã prõt ne. Prõt ne arým bōx. Bōx ne arým prĩne memã mýjja kunĩ'ã ajarê. Ne ajte me karõ punu kute ar o baja'ã ajarê. <sup>34</sup> Nhym krĩraxkam

me kräptĩ kute Jeju pumũnhmã 'yr mō. Ne kam arým omũn kam anon kum,  
—Gop me inhō pyka kurũm akato, ane.

## 9

*Kute me'õ jakryo mex.*

*Mak 2.1; Ruk 5.17*

<sup>1</sup> Nhyam kam Jeju ar arým kàkam wadjàn nox ne arým akàx nhikjêmã rê. Ne kam wabin krĩraxkam ar ba tũmjamã tẽn bõx.

<sup>2</sup> Nhyam ar kwỳ kum me'õ jakryo bõx. Ikwã djàkam nõr rã'ã nhyam ar kum o bõx. Nhyam amim,

—Be, ar ja ne ar tu amim ikamnhĩxkumrẽx, ane. Ne me'õ jakryjamã kum,

—Akmere, on akĩnh. Jakam ne ba arým ajaxwe kunĩ maro aknon kam ingyk kêt ne, ane. Djã nãm tẽmbê me'õ jakryo mex got? Kati, nãm amidjêje nẽn kum jabit jarẽ nhyam êje nõ. Jeju ta ne axweo akno.

<sup>3</sup> Nhyam wãnh Môjdjê kukràdjã mar djwýnh kwỳ arým amim,

—E kum be, me'õ ja ne ajmãn Metĩndjwýnh japrýo djan amijo Metĩndjwýnhõ dja. Metĩndjwýnh pydji ne kute me axweo biknorn mekam ngryk kêt, ane. <sup>4</sup> Nãm me ã õkre kadjwýnhbê anhýro kumex nhyam arým tu me kuman memã kum,

—Mýkam ne ga me anhõkre kadjwýnhbê ijo kajgon ijaprýo akumex? <sup>5</sup> Ê, ba me amã mýjja amãnhkrut jarẽ. Mýj ne amirĩt, nẽn? Ba ren kum, “Ba arým ajaxwe maro aknon akam ingyk kêt”, ane. Nãr kon, “On kàjmã djan tẽ”, ane. Mýj ne ren amirĩt, nẽn? Nã bãm ren kum, “Ba arým ajaxwe maro aknon akam ingyk kêt”, ane nhyam amirĩt kêt kumrẽx ne. Tãmbit ne amirĩt kêt.

Nhyam be, kàjmã me ku'ê, ije ren me'õmã kum, “Kàjmã djan tẽ”, ane nhyam ren arým amirĩt. Tãmbit ne amirĩtkumrẽx. <sup>6</sup> Dja ba kum, “Kàjmã djan tẽ”, anen arým o mex ga me arým omũn arým amim, “Be ga, Jeju kute me'õ jakryo mexja pumũ. Be, djãm kute me axweo biknor kêt got? Mrãmri ne Metĩndjwýnh arým amijo ĩ ne pyka jakam amikabẽnkõt ari me axweo biknoro ba”, ane. Me aje amim ja jarẽnh kadji dja ba me'õ jakryjao mex. Nãm ã Môjdjê kukràdjã mar djwýnhmã anen arým tu me'õ jakryja'yr akẽx ne kum,

—On kàjmã djan anhikwã djã mýn anhũrkwãmã o tẽ, ane. <sup>7</sup> Nhyam kam arým me aerbê kàjmã djan ikwã djã mýn ũrkwãmã o tẽ. <sup>8</sup> Nhyam me kräptĩ omũn kam no tyn kumex ne amim,

—Ë, arým ne djãm mrãmri o mex nhyam mrãnh mexja pumũ. Mrãmri ne kabẽnkumrẽx. Djãm kute me axweo biknor kêt got? Mrãmri kute Metĩndjwýnh kabẽnkõt me axweo biknorkumrẽx. Ga, kute kam me'õo mex nhyam mrãnh mexkumrẽxja pumũ. Metĩndjwýnh mexkumrẽx, ane. Nãm me kräptĩ: ã amim ane.

*Kute amikõt Matêu kamẽnh.*

*Mak 2.13-15; Ruk 5.27-29*

<sup>9</sup> Nhyam kam Jeju arým tẽ. Tẽ: nhyam me'õ bẽnjadjwýr bajtemmã pi'õk kaprĩo atom djàkam nhỹ. Idjibê ne Matêu. Nhỹ nhyam arým omũn kum, “Amrẽ mã ikõt ajkamẽ”, ane. Nãm kum ane nhyam Matêu arým amim kabẽn man kàjmã dja. Kàjmã djan arým kõt ajkamẽ.

<sup>10</sup> Nhyam kam arým Matêu nhũrkwãkam tẽn bõx ne arým õ kwỳ krẽno nhỹ. Nhyam bẽnjadjwýr bajtemmã pi'õk kaprĩo atom djwýnh kräptĩ bõx ne Jejumẽ ro'ã nhỹ. Nhyam we me axwedjwý ikõ'ã nhỹ. Me kräptĩ ne me nhỹ. Jeju kõt ba djwýnh ne ar Matêumẽ ro'ã nhỹ. <sup>11</sup> Nhyam mebê pardjêu arým me ja pumũn arým Jejukõt ba djwýnh arkum,

—Je tô, djãm me wã axwe ngri got? Mýkam ne ar anhõ ujarẽnh djwýnh me ro'ã õ kwỳ krẽno nhỹ? Bẽnjadjwýr bajtemmã pi'õk kaprĩo atom djwýnhmẽ me axwemẽ ro'ã õ kwỳ krẽno nhỹ, ane.

<sup>12-13</sup> Nhyam Jeju arým ar kabẽn ma. Ar kute,

—Djãm me wã axwe ngri got? anhýrja Jeju arým kuman arkum,

—Djãm me mex'yr ne me kane djwýnh mrã? Kati, me kanê'ýrbit ne me kane djwýnh mrã. Badjwý ne ba me axwe'yr tẽ. Djãm we me amex'yr ne ba tẽ? Kati, me axwe'yr ne ba tẽ. Me tãm ne ba amiwýr me ku'uw. Me amikam kaprĩren wãnh axwemã irern iwýr amijo akẽxmã ne ba amiwýr me ku'uw. Nhyam be, amrêbê: ne Metĩndjwýnh me bakukãmãremã kum,

“Djãm me aje imã mry bôr djãm imã kïnh? Kati. Me amã me kaprî. Ja ne imã kïnh”, ane. Mÿj'ã ne Metïndjwÿnh me bakukãmãmẽ ja jarê? Ja dja gar tẽn ama. Mÿkam? Bir, me axwe ne ba amikôt me ku'uw. Nãm ã Jeju mebê pardjêumã ane.

*Me kukràdjà tùm'ã ujarẽnh.  
Mak 2.18; Ruk 5.33*

<sup>14</sup> Nhyam kam Djuão. Kubê ngômã me angjênh djwÿnh. Djuãokôt ba djwÿnh ar arÿm Jeju 'ÿr bôx ne kum,

—Ar ba ne bar ije Metïndjwÿnhmã amijajbur kumex. Mebê pardjêudjwÿ ne me kute kum amijajbur kumex. Nhyam be, akôt ba djwÿnh ne ar kute kum amijajbur kêt. Mÿkam? ane.

<sup>15</sup> Nhyam Jeju tu amijã mjên jarên amikôt ba djwÿnh ar'ã mjênmẽ ro'ã ar ar ba jarên arkum,

—Ga, me kute abenã mjênmẽ prômẽ rênha pumũ. Djãm ar mjênmẽ ro'ã ar baja kaprînh mÿr got? Arkati. Ar kïnhkumrêx ne ar ò kwÿ krên rax. Adjÿm, dja apÿnh akati amrê mörjakam me Ar kubê mjêno tÿm ne mã o mõ. Nhyam kam gêdja ar kaprîren arÿm Metïndjwÿnhmã amijajburo ba. Nãm ã Jeju Djuãokôt ba djwÿnh arkum ane. Amijã ne mjên jarê. Ne amikôt ba djwÿnh'ã ne mjênmẽ ro'ã ar ar baja jarên arÿm ã arkum ane. Mÿj'ã ne me kute Ar kubê mjêno tÿmjã jarê? Bir, ta amijã ne arê. Jeju dja meo tÿm ne mã o mõ. Kambit dja kôt ba djwÿnh amijajburo ba.

<sup>16</sup> Be, ga, me kute jãm amim Jeju kukràdjà ny mar ne ajte kute jãm amim me kukràdjà tùm marja pumũ. Me kute amẽ kukràdjà maro bakam umar mex kêt. Me kute mrãmri ne kubêkà ny kubêkà tùm'ã ir pyræk ne ajte kute pidjô kangô ny mrykào ngôn nh tùm kam runh pyræk. 'Ã ne Jeju ajte memã kum,

—Ga, me'õ nhõ kubêkà tùm ne arÿm 'yrja pumũ. Nhyam kam arÿm kubêkà nyn pôn nh kêt. Djã ne me tùmja'ã kudji? Kati. Mÿkam? Bir, dja me kupõ nhyam arÿm nykam ê abenmã wangij. Abenmã wangij ne arÿm tùmja kadjô. Nhyam kam arÿm 'yr nyja kute 'yr tùmja jakrenh mex ne.

<sup>17</sup> Ga, me'õ nhõ mrykào ngôn nhja pumũ. Me

bakukãmãmẽ ne me ò mrykào ngôn nh. Ga, mrykào ngôn nh arÿm tùm ne ngrãja pumũ. Djã ne kam uba kangô ny ru? Kati. Mÿkam? Bir, dja nör 'ätüm nhyam uba kangô arÿm kadjàn ajmrô nhyam ngôn nh arÿm igot tẽn arÿm ajkatör. Nhyam arÿm kangô ajkapï nhyam ngôn nh arÿm punu ne. Be, kam mex rã'ã kadjy ne me kute mry kào ngôn nh ny, kà rerekrekambit kangô ny runh prãm. Nãm ã Jeju arkum ane. Gêdja me amim Jeju kukràdjà nybit maro ban arÿm mar mexkumrêx. Nhyam be, gêdja me amim me kukràdjà tùm djwÿ mar prãm ne arÿm umar mex kêt kumrêx. 'Ã ne Jeju memã ajarê.

*Kute akubyn bënjadjwÿr krao tïn.  
Mak 5.21; Ruk 8.40*

<sup>18</sup> Kute memã ja jarên ho ãmkam ne me'õ bënjadjwÿr 'ÿr bôx ne kute kum rax jarên kadjy tu parbê tÿm. Ne arÿm kum rax jarên kum,

—Arÿm godja ikra ni ty. Dja ga ikôt 'ÿr tẽn 'ã anhikra dji gê arÿm tïn ne, ane. <sup>19</sup> Nhyam arÿm kàjmã djan kôt tẽ. Kôt ba djwÿnh djwÿ ne arkôt tẽ.

<sup>20</sup> Tẽ: nhyam me'õ nire kôt bôx. Kamrô apôx'ã ne arÿm amexbê 12 apêx. Nãm kôt bôx ne tu Jeju nhübũm kôt 'ã kubêkà jabu djãbit kupê. <sup>21</sup> Kute o anhÿr djwÿnh rãm ne ta arÿm amim,

—Ba gop 'ã kubêkàbit mãn kupên arÿm imex ne, ane.

<sup>22</sup> Nhyam kam Jeju arÿm akêx ne omün kum,

—Àpnhîre, on akïnh. Ga ne ga tu amim ikamnhîxkumrêx ne arÿm amex ne, ane. Nhyam kam myt tãm kam mex ne.

<sup>23</sup> Nhyam kam Jeju ar tẽ. Tẽ:n kam arÿm bënjadjwÿr nhürkwã 'ÿr bôx ne arÿm wadjã. Nhyam wãnh me kwÿ pore kakôro dja nhyam me kangao kumex. <sup>24</sup> Nhyam memã kum,

—Me on ajmã. Djã nãm kurerer wã ty got? Kati. Nãm ôto nõ, ane. Nhyam me arÿm 'ã keketo kumex. <sup>25</sup> Ne arÿm kato. Nhyam kam arÿm 'ÿr tẽn 'ÿr bôx ne kurerer nhikra 'amÿ. Nhyam arÿm tïn ne kàjmã dja. <sup>26</sup> Nhyam kam me arÿm pyka kunîkôt arên ho ipök ne.

*Kute me punuo mex.*

<sup>27</sup> Nhyam kam Jeju arÿm amũ tẽ. Tẽ: nhyam me'õ no rã ar amãnhkrut arÿm kõt tẽ. Nãm ar kàj bê kum amijo àmra tẽn mã kum,

—Dawi tàmdjwÿ gop amã ar ikaprĩ, ane.

<sup>28</sup> Nhyam arÿm kikremã wadjà nhyam ar no rã arÿm 'ÿr bõx. Nhyam ar kukij ne arkum,

—Djã ne gãm ar tu amim imarkumrẽx? Ije ar ajo mex marja djãm mrãmri ar aje tu amim ja markumrẽx? ane.

Nhyam ar kum, “Nà, Bẽnjadjwÿr djwÿnh”, ane.

<sup>29</sup> Nhyam kam arÿm ar no kupê ne arkum,

—Ar aje tu amim imarkumrẽx kõt dja ba ã ar ajo ane, ane. <sup>30</sup> Nhyam kam ar arÿm rĩt mex ne. Nhyam Jeju nêje arkum 'ã karõn kàj bê arkum,

—Kwãrĩk wãnh me'õmã ijarẽnh kêt, ane.

<sup>31</sup> Nhyam ate ar katon arÿm pyka kunĩkõt arẽho ipõk ne.

<sup>32</sup> Nhyam kam me Jeju'ÿr me'õo bõx. Me karõ punu ne ar me'õo ba nhyam ô'ã kabẽn kêt nhyam me 'ÿr o bõx. <sup>33</sup> Nhyam arÿm me karõ janon kujate nhyam arÿm me aêrbê kabẽn mexkumrẽx. Nhyam me krãptĩ: kam no tyn kumex ne abenmã kum,

—Mÿj me'õ ne kute me babê idjaerkam mÿjja pumũnh kêt ja'õ pumũnh? Arkati, ane.

<sup>34</sup> Nhyam be, mebê pardjêu ne me memã kum,

—Me karõ punu nhõ bẽnjadjwÿr kabẽnkõt ne kute me karõ kujaêko ba, ane. Nãm mebê pardjêu ã Jeju'ã memã ane.

*Kum me krãptĩ kaprĩ.*

*Mak 6.34*

<sup>35</sup> Jeju ne krĩrax kunĩkõt memã ujarẽnh ny jarẽho tẽ. Krĩraxmẽ krĩ kryre kunĩkõt memã arẽho tẽ. Me bikprõnh djakam memã arẽho tẽ. Bẽnjadjwÿr djwÿnh kute amim me utar ne ar meo ba'ã ujarẽnh nyja ne kàj bê memã arẽho tẽ. Ne ajte me punumẽ me kanê kunĩo mexo tẽ.

<sup>36</sup> Ne kam me krãptĩ: pumũ. Nãm me omũn arÿm kum me kaprĩ. Mÿkam? Bir, me katyk ne ate ar bakam. Me kute mrãmri ne kute mrykĩ'atomtio djuw mex djwÿnh kêt kam katyk ne ate ar ba pyrãk. <sup>37</sup> Ne kam kõt ba djwÿnhmã kum,

—Me kute Metĩndjwÿnh mar prãmja ne me kumex. Nãm me kute mrãmri ne bày arÿm abõr tyk ne kumexja pyrãk.

Nhyam be, Metĩndjwÿnh'ã ujarẽnh djwÿnh ne me ngrêre kute bàykam me àpênh djwÿnh ngrêreja pyrãk. <sup>38</sup> Kam dja gar me kadjy Metĩndjwÿnh 'uw gê me'ÿr 'ã ujarẽnh djwÿnh jano gê me memã arẽ nhyam me kuman kam arÿm tu amim markumrẽx ne. Kute mrãmri ne me mrãnh ne kute me õ purkam bày pumũnh ne mrãnh ne bõx ne kute kadjy me õ pur djwÿnhmã arẽnh nhyam me kute amũ kadjy memã arẽnh nhyam me ban kute memã ê ja pyrãk. Dja gar ã me kadjy Metĩndjwÿnh 'wÿro ane.

## 10

*Kute ar kubê 12 janor.*

*Mak 6.7; Ruk 9.1*

<sup>1</sup> Nhyam kam amiwÿr kõt ba djwÿnh Ar kubê 12 'uw nhyam ar bõx. Nhyam ar kute kabẽnkõt me karõ punu janor ne kujaêk kadjy arkum amipyma jadjà. Nhyam apÿnh me punu djari. Nhyam apÿnh me kanê djari. Nhyam ar kute kabẽnkõt meo mex kadjy arkum tÿx jadjà. Ne kam arÿm ar ano.

<sup>2</sup> Apÿnh kute ar anorbê 12 nhidji jarẽnh kadjy ne ja.

Ximão. Idji 'õdjwÿ ne Pedru.

Ångre. Kamybê ne Pedru.

Xijagu. Djebedêu ne kudji.

Djuão. Kamybê ne Xijagu.

<sup>3</sup> Piripi.

Batormê.

Tõme.

Matêu. Kubê ne bẽnjadjwÿr bajtemmã pi'õk kaprĩo atom djwÿnh.

Xijagu 'õdjwÿ. Aupêu ne kudji.

Tadêu.

<sup>4</sup> Ximão 'õdjwÿ. Mekõt ne me kukràdjà'ã no tÿx.

Djuda. Idji nhikjêbê ne Ikadji. Tãmja ne Jeju kurê djwÿnhmã kanga.

Apÿnh kute ar anorbê 12 nhidji ne ja.

<sup>5</sup> Ar ja ne Jeju ar ano. Nãm ar àpênh djà'ã arkum karõn ar ano. Nãm arkum,

—Kwãrĩk wãnh me bajtemmã ar amõr kêt ne kwãrĩk wãnh pykabê Xamarijkam krĩ'õmã ar adjar kêt. <sup>6</sup> Mebê idjaer ne me no akunon ate ar ba kute mrãmri ne mrykĩ'atomti no biknor pyrãk. Me ja'ÿr dja gar mõ. <sup>7</sup> Ne me'ÿr bõx ne kàj bê memã kum, “Arÿm kàjkwakam Bẽnjadjwÿr djwÿnh kute pykabê amim õ me utar ne ar meo ba



'ÿr", ane. <sup>8</sup> Dja gar me kanêo mex ne ajte me ï kajêkam têo mex ne ajte akubyn me tyko tîn. Ne ajte mekam me karô punu janon kujate. Ba ne ba tu kajgo ar amã adjâpênh djâ'ã karô gar maro aba. Ikudjwa tu kajgo meo mexo aba. Kwãrîk wãnh memã pãnh jarênh kêt. <sup>9</sup> Kwãrîk wãnh kên karÿr nâr kryt jaka nâr kryt kamrêkbê kobri me kute o ò pi'òk kaprija kwãrîk wãnh byr ne ar anhô katôk'y djâkam ir kêt. <sup>10</sup> Kwãrîk wãnh ar anhô xakuo amôr kêt. Ar akà krâkà pÿnh ne ar aparkà amãnhkrut ne ar anhô kô pÿnh dja gar o mõi. Jabit dja gar o mõi. Ar anhô mÿjja ja'õ'ã kâtâm kwãrîk wãnh o amôr kêt. Ar adjâpênh pãnh dja me ta ar amã ar anhô mÿjja ngã. Nãm ã arkum karôo ane.

<sup>11</sup> Ne kam ajte arkum,

—Dja gar krîrax 'ômã wadjàn me'õ mexja jabej. Kum ar akînh dja gar abej. Dja ar amã aminhûrkwã jarê gar kambit anhikwã. Me kurûm ar akatorkambit ajte anhûrkwã 'ôdjwÿ jabej. <sup>12</sup> Dja gar me ûrkwã 'ômã wadjàn memã umar mex jarê. <sup>13</sup> Dja me mex ne kum ar akînh gar memã umar mex jarê nhym me arÿm ar akabên kôt mrãmri umar mexkumrêx. Nâr godja me kum ar akînh kêt jabej dja me umar mex kêt ne. <sup>14</sup> Godja me'õ kum ar akînh kêt ne kute akabên mar prãm kêt jabej aparkà'ã me ò pyka ka'u. Me ûrkwã kurûm nâr me ò krîrax kurûm ar akator kutã ar aparkà'ã me ò pyka ka'u. Aje me kute akabên mar prãm kêtjao amirît nhym Metîndjwÿnh kute omûnh ne amû 'õkam kute memã pãnh jarênh kadjy me ò pyka ka'u. <sup>15</sup> Ba ar amã arê gar ama. Amrêbê: me bakukãmãrekam ne me krîraxbê Xôtômamê Gomorakam axwekumrêx. Dja ï Metîndjwÿnh kute me axwemã pãnh jarênh kadjy akati bõx nhym me arÿm tokry. Dja ajbir krîrax jakamdjwÿ me axwe pãnh tokry:. Ne tokryo Xôtômakam me jamê Gomorakam me ja jakrenh me:x ne. Mrãmri ne ba ar amã arênhkumrêx, ane. Jeju ã arkum 'ã karôo ane.

<sup>16</sup> Ne kam ajte arkum,

—Dja ba ar ajano gar arÿm aje mrãmri ne mrykî'ãtomti kute rop djâkrê katikôt ar ba pyrâk. Amijã ano tÿx kute mrãmri ne kangã amijã no tÿx pyrâk. Ne ar ajaxwe kêt kute mrãmri ne tut axwe kêt pyrâk.

<sup>17</sup> Aminêje rît. Mÿkam. Bir, godja me ar ajo rôrôk ne ar ajo mõi. Nhym kam me krãptî kute ar akukjêr kadjy arÿm ar ajã akuprô. Ar ajã akuprô nhym me arÿm ar akaprêprêk. Mebê idjaer bikprônh djâkam ar akaprêprêk. Mry kà punuo ar akaprêprêk ne. <sup>18</sup> Imã ar adjâpênhkam dja me ar ajo rôrôk ne ar apa 'amÿn arÿm me bënjadwÿr kabem ar apumjuw. Ne me bënjadwÿr rûnh kabem ar apumjuw gar arÿm ijã memã amijarê. Nhym me me bajtem kabem ar apumjuw gar arÿm ijã memã amijarê. <sup>19</sup> Godja me ar ajo rôrôk ne ar ajo mõi me kabem ar apumjuw kwãrîk wãnh ar amikukãm amim, "Mÿj dja ba aminêje memã ikabên on"? anhÿr kêt. Mÿkam? Bir, myt tãm kam dja ar amã akabên jangij. <sup>20</sup> Djãm ar ga dja gar amikabên jarê? Kati. Ar Abãm djwÿnh Karô dja ar amã amikabên jarê gar arÿm amû memã arê. Nãm Jeju ã arkum 'ã karôo ane.

<sup>21</sup> Ne kam ajte arkum,

—Me kamy dja kurê djwÿnhmã kamy kanga nhym me arÿm me kupa. Nhym me bãmdjwÿ dja kurê djwÿnhmã kra kanga. Nhym me kra dja me kum bãmmê nã kurê ne memã ar kanga nhym me ar kupa. <sup>22</sup> Imã adjâpênhkôt dja me kunî kum ar akurê. Dja gar ikôt ar aba tÿx rã'ã:n ijã adjukanga kêt ne kam 'ã aminhinomã amimê ba arÿm ar apytã. <sup>23</sup> Godja me krîrax 'õkam kum ar akurê ar ajo ajkê gar krîrax 'ôdjwÿmã aprôt. Dja gar apÿnh mebê idjaer nhô krîraxkam me akreo tê:n o atêm nhinomã mênh kêt ba arÿm bõx. Ba ije amijo inhî ba arÿm ar awÿr bõx. Nãm Jeju ã arkum 'ã karôo ane.

<sup>24</sup> Ne kam ajte arkum,

—Ê, djãm ar kute kabên mar ar o baja kute raxo ar ò ujarênh djwÿnh jakrenh? Kati. Nâr, djãm ò àpênh kute raxo ò bënjadwÿr jakrenh? Kati. <sup>25</sup> Kute kabên mar ar o baja kute ar ò ujarênh djwÿnh kôt ar amijo bakambit ne mex. Ò àpênh kute ò bënjadwÿr kôt ar amijo bakambit ne mex. Ga, me kum ikurê ne imã me karô punubê Bedjêbu jarêho baja pumû. Djãm me kum ar akurê kêt mã? Kati. Ar gadjwÿ dja me ar amã mÿjja punu jarênh kume:x. Ar aje araxo ijakrenh kêt kam ne

ikôt ar amijo abakam dja me ar gadjwỳ ar amã mỳjja punu jarēnh kume:x.

<sup>26</sup> Djã nãm me kadjwỳnhbê axweja bipdjur rã'ãmã? Kati, dja ì amirīt ne. Nhỹnh ne mỳjja bipdjur'õ me kute omũnh kêt mã? Ne nhỹnh ne me kute mỳjja pudjur'õ mar kêt mã? Adjỹm, dja ì kunĩ amirīt ne. Mỳjja pudjur, mỳjjao bipdjurja dja ì kunĩ amirīt ne. <sup>27</sup> Ije akamãtkam ar amã mỳjja jarēnh dja gar a'uri kàj bê memã arē. Ije ar ajamakri ijajkwa momokkam mỳjja jarēnh dja gar kikre nhimõk po'ã djan kàj bê memã arē. <sup>28</sup> Ne kwãrĩk wãnh gar amã me kute ar aparja pyma kêt. Me ja gêdja me ar akrãkãbit par kajgon kam ijukri kute ar akadjwỳnhbê ajmã ar ajo kêt. Kati, ba ar amã arē. Me'õ pydji dja ga ar amã uma. Kute me bĩn ne ijukri me biknor tokry djãkam me rēnh jabit dja ga ar amã uma. Be, ba ar amã arē. Metĩndjwỳnhbit dja gar amã uma. <sup>29</sup> Kwēnhne amãnhkrut ne pãnh ngrire, pãnh ngõnhponh pydji. Nhym kam kwēnh pydji pykabê tỹm ne arỹm ty. Djãm Abãm djwỳnh kute mar kêt? Kati. Kute kwēnh mar. <sup>30</sup> Ne ar akĩdjwỳ kute mar. Arỹm Abãm djwỳnh kute ar amã abenã ar akĩ'ã akre mar. <sup>31</sup> Kam, djãm ar atĩn prãmmã? Kati. Kwãrĩk wãnh. Te kwēnh krãptĩ: nhym kum kwēnh kĩnh ngrire. Nhym be, ar gajbit. Metĩndjwỳnh kum ar akĩnhkumrēx. Tãm dja gar aman atĩn prãm kêt. Nãm Jeju ã arkum karõo ane.

<sup>32</sup> Ne kam ajte arkum,

—Kam me'õ kute amijo ipytãr ne me ipõkri memã kum, “Ba ne ba ije amim Jeju mar”, anhỹro baja. Badjwỳ dja ba tãmwã'ã kàjkwakam Ibãmmã kum, “Nà, ba inhõbikwa ne wã”, ane. <sup>33</sup> Nà, dja me'õ me ipõkri memã kum, “Kati. Ije Jeju mar kêt”, ane. Badjwỳ dja ba tãmwã'ã kàjkwakam Ibãmmã kum, “Kati. Ije tãmwã mar kêt”, ane.

<sup>34</sup> Djãm ibõx nhym ikam me umar mexmã? Kati. Dja ba bõx nhym me arỹm imỳr jabej abeno kurê djwỳnh ne aben pa.

<sup>35</sup> Amrēbê: ne me me bakukãmãremã kum, “Dja me'õ my kum bãm kurê.

Nhym me'õ nire kum nã kurê.

Nhym prõ kum umrengêx kurê.

<sup>36</sup> Me'õ nhũrkwãkam dja ta õbikwa kum aben kurê.”

Nãm me ã me bakukãmãremã ane. Jakam dja me imỳr jabej ã abeno ane. Me kute me bakukãmãremã arēnh kôt dja me ã abeno ane.

<sup>37</sup> Godja gar ajõ imã, “Ba akôt apê”, anen amã abãmbit nãr amã anãbit kĩnh ne amã ikĩnh ngrire ba arỹm imã ikôt adjãpēnh kĩnh kêt. Godja amã akra mybit nãr amã akra nibit kĩnh ne amã ikĩnh ngrire ba arỹm imã ikôt adjãpēnh kĩnh kêt. <sup>38</sup> Dja gar ajõ amã ikôt atokry pyma ne ikôt aje anhõ pĩte'y mỳnh prãm kêt ne ikôt abikamēnh prãm kêt jabej ba kam imã ikôt adjãpēnhja kĩnh kêt. <sup>39</sup> Dja gar ajõ atĩnmã aminēn arỹm akuno. Nãr gar ibê aminē kêt nhym me arỹm abĩ. Imã adjãpēnhkam arỹm abĩ. Kwãrĩk wãnh rã'ã. Metĩndjwỳnh dja arỹm atĩnkumrēx kadjy apytã ga arỹm kôt atĩn ne ar aba rã'ã: rã'ã ne. Nãm ã Jeju arkum 'ã karõo ane.

<sup>40</sup> Ne kam ajte arkum,

—Dja gar me'yr bõx nhym me kum ar akĩnh. Me kum ar akĩnh o arỹm kum badjwỳ ikĩnh. Ne kum ikĩnh o arỹm kum kute ijanor djwỳnhdjwỳ kĩnh. <sup>41</sup> Dja Metĩndjwỳnh kukwakam memã kabēn jarēnh djwỳnh me'yr bõx nhym me kum kĩnh. Kubê Metĩndjwỳnh kukwakam memã kabēn jarēnh djwỳnhkam kum kĩnh. Metĩndjwỳnh dja kam arỹm memã o pãnh ne. Metĩndjwỳnh kute kukwakam ujarēnh djwỳnhmã ãpēnho pãnh kôt dja arỹm memã o pãnh. Dja me'õ katãt kute amijo bakumrēx me'yr bõx nhym me kum kĩnh. Me'õ katãt kute amijo bakam me kum kĩnh. Metĩndjwỳnh dja arỹm memã o pãnh ne. Metĩndjwỳnh kute me'õ katãt kute amijo bajamã o pãnh kôt dja memã o pãnh. <sup>42</sup> Dja me'õ ikôt ba djwỳnh rax kêt'õ bõx nhym me kum ngõ ngã. Me'õja kute ikôt bakam kum ngõ ngã. Ba dja ba mrãmri o pãnh mex. Me kute o djuw mex ngrire jao pãnh mex. Nãm ã Jeju arkum 'ã karõo ane.

## 11

*Djuãõ'ã ujarēnh.*

*Ruk 7.18*

<sup>1</sup> Ne arỹm kôt ba djwỳnh Ar kubê 12mã 'ã karõ pa. Arkum 'ã karõ pan kam arỹm amũ tẽ. Pykabê Garrējakam apỹnh krĩ rũnh djãri

kute memã kukràdjà jarênh ne kute kàj bê 'ã me akre kadjy ne amũ tẽ.

<sup>2</sup> Nhym kam me Djuãomã Jeju jarẽ. Djuãobê ne ngômã me angjênh djwýnh. Me kute arým Djuãobê ijêkam ne me kum Jeju jarẽ. Nãm me Djuãomã kum,

—Jeju ne arým apýnh mýjja pumũnh kêt nhípêx, ane nhym arým kuma. Kuman arým Jeju'ýr amikôt ba djwýnh ar amãnhkrut jano. <sup>3</sup> Ar kute Jeju kukjêrmã ne Djuão ar ano nhym ar arým 'ýr tẽn 'ýr bôx ne Jejumã kum,

—Metĩndjwýnh kute me imã me'õ janor nhym bôxmã, kute me imã arênhja djãm ga? Nàr kon godja gwaj me'õkam ama? Nãm ar ã Jejumã ane.

<sup>4</sup> Nhym Jeju arkum,

—Dja gar akubyn Djuão'ýr tẽn kum arẽ. Aje ajbir mýjja mar ne omũnhja kum arên kum, <sup>5</sup> “Me no rã arým rít mex. Nhym me mrãnh kêt arým mrãnh mex. Nhym me ã kajêkam tê arým mex. Nhym me amakkre kêt arým amak mex. Nhym me tyk akubyn tĩn ne. Nhym me õ mýjja kêtja nhym me kàj bê memã ujarênh ny jarênh ba”, ane. Tãm dja gar aman Djuãomã arẽ gê kuma. <sup>6</sup> Dja me memã ijarê nhym me ãbê amijo akêx kêt, me ja ne me kĩnhkumrêx. Nãm ã Jeju Djuãokôt ba djwýnh arkum ane. Nhym ar kuman arým katon tẽ.

<sup>7</sup> Nhym kam Jeju arým me krãptĩ:mã kum,

—Mýj ne ga me aje kapôt kukritkam omũnhmã mõi? Djãm Djuão kute bõti kók djábêrkam ari amijadjwýr pyrãk? Djãm ari memã kabên jadjuw? Kati. Nãm katàt memã kabên jadjwýrkumrêx. <sup>8</sup> Bir, mýj ne ga me aje omũnhmã mõi? Djãm Djuão ne kubêkà pãnh rax ne akrita jangij? Kati. Nãm kubêkà pãnh ngrire jangij. Bẽnjadjwýr rũnh nhõ kikretikam ne me kubêkà jakrita jangij. Nhym be, Djuão ã kà kute anhýr kêt. <sup>9</sup> Nhym bir, mýj ne ga me aje omũnhmã mõi? Djãm Metĩndjwýnh kukwakam memã ujarênh djwýnh? Nà. Tãm. Nhym be, Djuão ne raxo kute Metĩndjwýnh kukwakam memã ujarênh djwýnh kunĩ jakrenh. <sup>10</sup> Amrêbê: ne Metĩndjwýnh imã 'ã ajarẽ. Djuão'ã imã ajarẽ. Nãm imã,

“Ota ba akukãm ajã ujarênh djwýnh'õ jano kute akukãm me akre nhym me kute mar ne akutêp kute axwemã irern katàt amijo bamã.

Kute mrãmri ne me kute me bẽnjadjwýr rũnh kutêp katàt 'ã pry jadjwýrja pyrãk.”

Nãm ã Metĩndjwýnh Djuão'ã imã ane. Amrêbê: me bakukãmãre ar bari. Nhym me arým kabên man 'ã pi'ók no'ók ne. Ne kam me aben djô'ã arênh mõi:n arênh mõi tãmã arým 'ýr o bôx. Tũ:mrãm me bakamingrãnyrekam Djuão arým kato. Katon arým abatãnh ne. Abatãnh ne arým ijã memã ujarênh ar ba. Me kute amrêbê Metĩndjwýnh kabên'ã pi'ók no'ók kôt ne Djuão ijã ujarênh ar ba. Ikukãm meo mexo ba.

<sup>11</sup> Ngômã me angjênh djwýnhbê Djuão ne jakam raxo kute pykakam me kunĩ jakrenh. Djãm me'õ pykakam ar ba 'õ raxo kute Djuão jakrenh? Kati. Mrãmri ne ba me amã ja jarênhkumrêx. Nhym be, dja ã kãjkwakam Bẽnjadjwýr djwýnh amim me utãn meo ba. Nhym kam dja me kunĩ raxo Djuão jakre. <sup>12</sup> Nhym be, on jakam Djuão ra:x. Nãm memã arênh ban memã kum, “Kãjkwakam Bẽnjadjwýr djwýnh kute amim me utãn ne ar meo ba 'ýr”, anhýro ba. Nhym kam me krãptĩ kuman amim Bẽnjadjwýr djwýnh mar prã:m. Me kute mrãmri ne me krãptĩ kute kikre ngriremã ngjêx prãm ne kute 'ã kute aben nhingãnhja pyrãk. Me kute ari 'ã ikjêo aben rênh ne 'ã kute aben nhingãnh kumex ja pyrãk. Ne jakam me kute o anhýr rã'ã. <sup>13</sup> Amrêbê: me me bakukãmãremã Bẽnjadjwýr djwýnh bôxmã arẽ. Metĩndjwýnh kukwakam ujarênh djwýnh aben kukãm Bẽnjadjwýr djwýnh bôxmã arẽ. Mõjdjêdjwý arẽ: nhym kam me bakamingrãnyrekam Djuão arým katon ajte tãm jarẽ. Bẽnjadjwýr djwýnh bôx jarẽ. <sup>14</sup> Amrêbê: ne me me bakukãmãremã kum, “Dja me'õ kute Erij pyrãk bôx”, ane. Ba on ar amã me'õ jarẽ gar ama. Djuão ne kute Erij pyrãk ne arým bôx. Ar aje imar prãm jabej dja gar arým ima. Nàr ar aje imar prãm kêt jabej arým imar kêt. <sup>15</sup> Gop ar ajamak mex jabej tu amim ikabên ja markumrêx. Nãm ã Jeju me krãptĩmã ane.

16 Ne kam ajte memã kum,

—Je tô mÿj got ba me akamingrãny'ã akre? Mÿj ne ga me aje uràk? Nã gãm me aje me prĩre mÿjja kam kĩnh kêt pyrãk. Ga me, me prĩre kikre kabem krĩn kute abeno bixaêr baja pumũ. 17 Ar ja ne ar ar jamã kabên ne arkum, “Gwaj bakĩnh katio dja, gwaj babixaêro dja ne ngôtãx à'ak”, ane.

Nhym ar kum, “Waj, ar ibixaêr prãm kêtê. Ar itor prãm kêtê. Ar imã wã kĩnh kêtê”, ane.

Nhym ajte arkum, “Gwaj bamÿr kati mãn o nhÿ”, ane.

Nhym ar, “Kê, wajre. Ar imã kĩnh kêtê. Ar imÿr prãm kêtê”, ane.

Be, nã gãm me aje me prĩre pyrãk ne amã ja kĩnh kêt ne ajte amã jadjwÿ kĩnh kêt.

18 Djuãobê ngômã me angjênh djwÿnh ne me awÿr bõx. Nãm amijajbu:n kute uba kangô kôm kêt ne ar ba ga me amã kĩnh kêt ne kam we, “Nãm ajbã. Me karõ punu ne ar o ba nhym ajbã”, ane. 19 Nhym be, ba ne ba mrãmri gêt amijo inhĩ ne me awÿr bõx ne me akam idjàkur iban kôt ikôm iba ga me amã ikĩnh kêt ne we ijã, “Kê, tãmwã ne kute àkur rũnhbit mar, kum uba kangô djãnhiti”, ane. Ne we ajte ijã, “Me kute bẽnjadjwÿr bajtemmã pi'ók kaprĩo atom djwÿnhmẽ me axweo bit ne õbikwa ne”, anhÿr ar o aba. Nhym be, djãm Metĩndjwÿnh amak punu got? Amak me:xkumrẽx ne prĩne kute amikukãm mÿjja kunĩ mar ne Djuão kute amijajbur ne ar bamã ano. Ne ajte amikukãm umarkam badjwÿ ijano. Ije amijajbur kêtã ijano. Nhym kôt me amak mex ne amikukãm umar, ar ipumũn kam õkre kadjwÿnhbê amim, “Mrãmri ne Metĩndjwÿnh mexkumrẽx ne amẽ ar ano.” Nãm ã Jeju memã ane. Tãm ne ja.

*Kute krĩraxmã watĩre jarênh.*

*Mat 12.38; Ruk 10.13, 11.29*

20 Nĩjar krĩraxkam ne Jeju mÿjja pumũnh kêt ngrêre nhipêx nhym me krãptĩ tu amim markumrẽx. Nhym kam arÿm me wãmã kabên'õ jarênh kêt. Nhym be, amiwÿr krĩraxkam me ja ne Jeju arÿm memã kabên ne. Krĩrax jakam ne arÿm mÿjja pumũnh kêt krãptĩ nhipêx ne me punu krãptĩo mex. Djã ne me amikam kaprĩren wãnh axwemã iren 'ÿr amijo akẽx? Kati. Me kute 'ÿr amijo

akẽx kêt. Kam ne arÿm krĩrax jakam memã kabên ne memã kum,

21—ÿ, watĩ:re Koradjikam me wã. Watĩ:re Bexadakam me wã. Dja ga me atokry rax ne. Ba ren me bajtem nhõ pykabê Xirumẽ Xidõkam ren mÿjja rũnhja, mÿjja pumũnh kêtja kwÿ nhipêx nhym ren me omũn ren arÿm amrêbê amim katon ren amikam kaprĩren wãnh axwemã ire. Ne ren kute kum irero amirĩt kadjy kubêkã kukrebê exopa jangjênh ren amijã mro prã kapĩ. Ne ren kam iwÿr ren amijo akẽx. Nhym be kati, inhõ me wÿnhkam me ga, Koradjikam me gamẽ Bexadakam me gamẽ me akam ne ba te mÿjja pumũnh kêt kwÿ rax ne ipêx ga me omũnh kajgo. Omũnh kajgon amikam akaprĩre kêt ne wãnh ajaxwemã anhirer kêtikumrẽx ne aje iwÿr amijo akẽx kêtikumrẽx ne. 22 Ba me amã arẽ ga me ama. Dja ã kute me axwemã pãnh jarênh nhõ akati bõx nhym Metĩndjwÿnh me ajaxwemã pãnh jarê. Ga me kam arÿm pãnh atokry me rĩnã jakrenh mex. Ga me atokryo krĩraxbê Xirumẽ Xidõ jakrenh mex ne.

23 Ne kam krĩraxbê Kapanakam me gadjwÿ djãm mrãmri me abẽnjadjwÿr rũnhõ kãjkwa'ÿr abõxmã? Kati, aparmãbit dja ga me me biknor tokry djãmã wadjã. Krĩraxbê Xõtõmakam me axwe: nhym Metĩndjwÿnh arÿm meo akno. Ba ren mekam mÿjja pumũnh kêt nhipêx kute me akam ije mÿjja pumũnh kêt nhipêx ja pyrãk nhym ren me wãnh axwemã ire nhym ren krĩrax arek ãm rã'ã. Krĩraxbê Xõtõma ren arek ãm rã'ã. Nhym be, kati. 24 Ba me amã arẽ ga me ama. Dja ã kute me axwemã pãnh jarênh kadjy õ akati bõx. Dja Metĩndjwÿnh memã pãnh jarê ga me kam arÿm atokry raxo Xõtõmakam me ja jakrenh mex ne. Nãm ã Jeju krĩraxkam me jamã ane.

*Me katykmã 'ã ujarênh.*

25-26 Nhym kam Jeju Bãmmã kum,

—Djũnwã, ota ga anhõ kãjkwa, anhõ pyka djwÿnh. Amã ne ba amikĩnh jarê. Nã gãm me amikukãm umarmẽ me kute mÿjja mar rũnhjabê mÿjja ja pudju. Ne kam me kute amijo prĩre prãbê amijo rũnh kêtjamã mÿjjao amirĩt ne. Mrãmri Djũnwã, nã gãm ã aje anhÿrkam mrãmri mexkumrẽx. Ga adjukaprĩkam ne ga amim me'ã karõn arÿm

ã meo ane. Ba kam badjwý ikĩnhkumrêx ne wãm amã amikĩnh jarê, ane.

<sup>27</sup> Ne kam ajte me krãptĩmã kum,

—Arým ne Ibãm imã õ mýjja kunĩ kanga. Ba ibê Metĩndjwýnh Kra. Djãm me'õ ne kute prĩne imar? Kati. Ibãmbit ne kute imar. Djãm me'õ ne kute prĩne Ibãm mar? Kati. Bajbit ne ba ije prĩne mar. Ije me'õmã Ibãmo amirĩt prãmja adjwýnhdjwý kute mar.

<sup>28</sup> Pykakam me akukràdjã punu ne ga me aman kõt ar amijo aba. Ne kam arým akaprĩre kute mrãmri ne me jênh pytĩ turn o ban kam kaprĩja pyrãk. Kam ne ga me akatyn akaprĩ:re. Amrê me akunĩ iwýr tẽn ikam atyk djã kêt ne ikam akõkam kõt. <sup>29-30</sup> Nãm me mry bàri kute jênh bjêro mrãnh kadjy ne umar mex kadjy mutbê pĩo kapa. Ikukràdjã mex ne kute mry mutbê pĩo kapaja pyrãk. Dja ga me amim ikukràdjã mex man kõt ar amijo aba kute mrãmri ne me kute mry bàri mutbê pĩo kapa ja pyrãk. Djãm aje ikukràdjã kõt ar amijo abakam adjumar punumã? Kati. Kam adjumar mexkumrêx. Adjumar mex kute mrãmri ne me kute mry mutbê pĩ kajkrito kapa ja pyrãk. Djãm ije me amã ino katormã? Djãm ije amijo idjãmramã? Kati. Ba ne ba memã iprĩ mex ne meo iban ije amijo ingrire kadjy amimar. Kam dja ga me ikukràdjã kõt ar amijo aba nhym me abê tỳx kêtumrêx ne. Kute mrãmri ne jênh kajkrit mrybê utĩ kêt pyrãk. Kam dja ga me ikukràdjã kõt ar amijo aban arým akadjwýnhbê atyk djã kêt. Nãm ã Jeju me krãptĩmã ane.

## 12

*Pi'òk rãrãr mýr jabej me kum kurê.*

*Mak 2.23; Ruk 6.1*

<sup>1</sup> Ne kam pi'òk rãrãrkam Jeju pur katikõt tẽ. Nhym kõt ba djwýnh ar kõt mõn arým kum prãm ne mõrmã bàygogo 'y nhikẽn mrãnhkõt ngãnh ne amijajkwamã rẽnho mõ. <sup>2</sup> Nhym kam mebê pardjêu ar omũn kum,

—Je tõe mã ne akõt ba djwýnh ar arým nẽ? Pi'òk rãrãrkam ne me tyk djã kêt djã. Me kute pi'òk rãrãrjakam mýjja jao anhýr kêt. Me tũmre ne me ta kukràdjãkõt mã me babê

uma. Me kute pi'òk rãrãrkam mýjja kupênh kêt. Kambit ne me tyk djã kêt djã. Mýkam ne akõt ba djwýnh ar ã ar o anhýro ba? ane.

<sup>3</sup> Nhym kam Jeju memã kum,

—Kê, djãm me aje Metĩndjwýnh kabẽn'ã pi'òk no'òkjadjwý pumũnh kêt? Djãm me aje me bakukãmãrebê Dawi'ã ujarênhja pumũnh kêt? Ë, Dawi arkum prã:m.

<sup>4</sup> Kum prã:m nhym Dawi arým Metĩndjwýnh nhũrkwãmã wadjàn djwý byn kukrẽn kam kõt ar tẽn jamãdjwý kungã nhym ar arým kukrê. Djwý me kute Metĩndjwýnhmã õrja tãm ne kubyn kukrẽn arkum kungã. Metĩndjwýnh nhõ djwý ja ne me kãtãm kute kur kêtumrêx. Me kadjy Metĩndjwýnh mar djwýnhbit ne kute kur. Nhym be, Dawi ta ne tu kukrê. Nhym kam me kute kum axwe jarênh kêt. Djãm me aje ja mar kêt? Ga, me kute Dawimã axwe jarênh kêtja pumũ. Ne kam ikõt ba djwýnhmẽbit ar imã ar ijaxwe jarê. Je tõe mýkam?

<sup>5</sup> Ba ajte me amã arẽ ga me ama. Mýj ne me kadjy Metĩndjwýnh mar djwýnh pi'òk rãrãrkam nẽ? Mýj ne me me tyk djã kêt djã nhõ akatikam nẽ. Djãm me aje me'ã Mõjdjê kukràdjã mar kêt got? Djãm me aje 'ã pi'òk no'òk pumũnh kêt got ga me imã akabẽn ne? Nãm me pi'òk rãrãrkam Metĩndjwýnh nhõ kikretikam tu àpênh ba. Ne kadjy kum mry bõro bao tu àpênh ar ba. Djã ne Metĩndjwýnh kam memã axwe jarê? Kati. Ga, me kute me kadjy Metĩndjwýnh mar djwýnhmã axwe jarênh kêtja pumũ. Ne kam ikõt ba djwýnhmẽbit ar imã ar ijaxwe jarê. Je tõe mýkam?

<sup>6</sup> Ba ajte me amã arẽ ga me ama. Ba ne ba Metĩndjwýnh nhõ kikretikam ipydji irax ne ije kam me àpênh'ã memã karõ djwýnh. <sup>7</sup> Ga me ren Metĩndjwýnh kute me bakukãmãremã kabẽn jarênhja ma. Nãm memã kum,

“Djãm me aje imã mry bõr djãm imã kĩnh?

Kati. Me amã me kaprĩ. Ja ne imã kĩnh.”

Nãm ã Metĩndjwýnh me bakukãmãremã ane. Ga me ren Metĩndjwýnh kabẽn ja man ren amã me kaprĩ. Ne ren amã me kaprĩkumrêx ne ren ar axwe kêtjamã axwe jarênh kêt.

<sup>8</sup> Ba me amã arẽ ga me ama. Ba ije amijo inhĩ ne me awýr irwýk ne ba inhõ pi'òk rãrãr djwýnh. Kam gédja ba memã,

“Kwârîk wân̄h ga me kam mȳjja kupênh kêt nâr kon, dja ga me jakam apên nâr kam mȳjja kupênh kêt ne arek akrî”, ane. Tãm ne ja. Nãm ã Jeju memã ane. <sup>9</sup> Ne kam ar̄ym amũ tên mebê pardjêu nhõ me bikprõnh djãmã wadjã. <sup>10</sup> Nhȳm me'õ nhikra nhikjê jarõxja me ikõ'ã nhỹ. Nhȳm me ja kute 'ã axwe nhõr kadjy Jeju kukij ne kum,

—Djãm Môjdjê kukràdjã kôt ne me me tyk djã kêt djã nhõ akatikam meo mexo ba? Pi'ók ràràrkam meo mexo ba? ane.

<sup>11</sup> Nhȳm memã kum,

—Ba me amã arê ga me ama. Godja me ajõ anhõ mrykĩ'ãtomti nhȳm pi'ók ràràrkam ar̄ym kre'ókam t̄ym. Djãm ate akrãmã? Kati. Dja ga amã kaprîn 'am̄yn kaba. <sup>12</sup> Nhȳm be, Metĩndjw̄ynh kum mrykĩ'ãtomti kĩnh ngrire. Nhȳm be, gu me ba ne kum me bakĩnhkumrêx. Kam me kute pi'ók ràràrkam meo mexkam Metĩndjw̄ynh kute memã axwe jarênh prãm kêt. Mrãmri, me kute pi'ók ràràrkam meo mexkam ne me kute kukràdjã kôt amijo ba mexkumrêx. Nãm ã Jeju memã ane.

<sup>13</sup> Ne kam ar̄ym me'õ nhikra jarõxjamã kum, “Amrê anhikra katàt”, ane. Nhȳm 'yr ikra katàto dja nhȳm ar̄ym kum mex ne. Kum ikra mex kute ikra nhikjê mexja pyrãk. <sup>14</sup> Nhȳm mebê pardjêu ar mã apõx ne o aben man abenmã kum,

—M̄yj godja gwaj baje Jeju bĩn kadjy on? ane. Nãm me ã Jeju'ã abenmã ane.

*Memã pr̄ire'ã ujarênh.*

*Mat 11.29; Ruk 22.25; Dju r 13.1; Pir 2.5*

<sup>15</sup> Nhȳm Jeju ar̄ym ar kuman pyka wã kurũm kato. Kato nhȳm me krãptĩ: ar̄ym kôt m̄õ nhȳm ar̄ym me kunĩõ mex. <sup>16</sup> Ne kam mã memã kum, “Dja ga me ipudju”, ane. <sup>17</sup> Amrêbê: ne Metĩndjw̄ynh Jeju 'ã ajarê. Jeju dja memã pr̄i mex ne memã kukràdjã jarê. Nhȳm kam kabên jarênh djw̄ynh Metĩndjw̄ynh kukwakam amũ me bakukãmãremã 'ã ajarên memã kum, “Metĩndjw̄ynh ne memã kum,

<sup>18</sup> ‘Ota, ba ar̄ym amijo inhõ àpênh pytà. Imã abê. Imã kĩnhkumrêx.

Dja ba kum Ikarõ jano nhȳm ar̄ym o ba. Nhȳm ar̄ym ap̄ynh me bajtem ba djãri memã 'ã ajarê. Ije meo mex

nhȳm me imã axwe kêtja 'ã memã ajarê.

<sup>19</sup> Ne mekmê kabêno aben japanho ku'ê kêt. Ne memã àkjêro ku'ê kêt. Djãm kãj bê kabên nhȳm me kute prykôt òkre marmã? Kati.

<sup>20</sup> Me kapr̄ire kute mrãmri ne bõti kajyr kapr̄ire pyrãk djãm kute meo bikênhmã? Kati. Dja memã t̄yx jadjã nhȳm me kam ar̄ym kĩnh ne.

Me kute amim imar rerekre kute mrãmri ne ngõnhpõk nhõ kadjãtnhĩ kũm tyk ne akrax rerekreja pyrãk.

Djãm kute memã àkjêr nhȳm me 'ã ukangamã? Kati. Dja memã kabên mex jarê nhȳm me ar̄ym amim mar t̄yx. Ne memã axweo àpanho tê:n kam ar̄ym meo mexkumrêx.

<sup>21</sup> Nhȳm kam ap̄ynh me ba djãkam me bajtem ar̄ym tu amim markumrêx.' Nãm ã Metĩndjw̄ynh memã ane.”

Nãm ã Idjaij me bakukãmãremã ane nhȳm me ar̄ym aben djõ'ã arênhõ m̄õ:n arênhõ m̄õr tãmtã ar̄ym 'yr o bõx. Tũ:mrãm me bakamingrãnyrekam Jeju ar̄ym katon kam ar̄ym abatãnh ne ar ba. Ne kam ar̄ym memã pr̄i mex ne memã kukràdjã jarênhõ ba. Idjaij kute me bakukãmãremã 'ã ujarênh kôt ne memã pr̄i mex ne memã kukràdjã jarênhõ ban kam memã kum,

—Dja gar ipudju. Nãm ã Jeju memã ane.

*Me kute Jejumã Xatanaj nhõ àpênh jarênh.*

*Mak 3.20; Ruk 11.14*

<sup>22</sup> Nhȳm kam me karõ punu kute me'õõ baja me ar̄ym 'yr o bõx. Me karõ kute o bakam ne no rãn kabên kêtumrêx. Nhȳm kam ar̄ym o mex nhȳm me aêrbê ar̄ym kabên ne rĩt mex. <sup>23</sup> Nhȳm me kunĩ kam no tyn abenmã kum,

—Bãrãm mrãmri got we kubê Dawi tàmdjw̄ykumrêx, ane.

<sup>24</sup> Nhȳm be, mebê pardjêu ar̄ym me kabên man ar̄ym abenmã kum,

—Djãm Metĩndjw̄ynh kukwakam ne Jeju bõm ar me karõ punu rênho ba? Kati. Me karõ punu nhõ bēnjadjw̄yrbê Bedjêbu. Bedjêbu kukwakam ne bõm ar me karõ punu rênho ba, ane. Xatanaj'ã ne me Bedjêbu jarên ã abenmã ane.

<sup>25</sup> Nhyam kam Jeju tu me kadjwýnhbê me kabên man memã kum,

—Me karõ punu ne Xatanajmã àpênh ar ba. Djãm mrãmri ne ba we Xatanaj kukwakam õ àpênh kujaêko iba? Kati. Dja me aben djwýnh tãm kum aben kurê nhyam kurê djwýnh arým meo apêx. Nâr, me õ krĩrax tãm kam nâr õ kikre tãm kam me krĩja godja me ja tãm kum aben kurê jabej mýj dja me kam nê? Bir, kam dja me arým aben ngràn abenbê ajmã. Djãm mrãmri ne ba we Xatanaj kukwakam õ àpênh kujaêko iba? Kati. Djãm Xatanaj kum õ àpênh kurê? Kati. <sup>26</sup> Be, Xatanaj ren kum õ àpênh kurên kujate nhyam ren õ àpênh arým aben ngràn abenbê ajmã. Ren me abenbê ajmã nhyam ren arým kubê me õ bënjadjwýr kêt. Nhyam be, kati. Xatanaj kum õ àpênh kurê prãm kêt. Ba ren we Xatanaj kukwakam õ àpênh kujate nhyam ren Xatanajdjwý kum õ àpênh kurê. Nhyam be, kati. Xatanaj kum õ àpênh kurê prãm kêt. <sup>27</sup> Ba ren Bedjêbu kabênkôt ren bõm ar me karõ punu rênho iba nhyam ren mýj kabênkôt ne anhõ àpênh bõm ar me karõ rênho ba? Me jadjwý ne me bõm me karõ punu rênho ba. Djãm me adjwýnhdjwý ne me we Xatanaj kabênkôt ar bõm me karõ rênho ba? Ga me ren memã ja jarê nhyam ren me amã, “Je tô djãm Xatanaj ta kute õ àpênho bikênho ba got”? ane. <sup>28</sup> Nhyam be kati, Metĩndjwýnh puma puroobit ne ba ar bõm me karõ rênho iba. Ga, kôt arým Metĩndjwýnh me awýr bõxja pumũ. Metĩndjwýnh kute me apytãr ne me akadjy bënjadjwýr ne kute me ajo bamã me awýr bõxja pumũ. Ja dja ga me ama. Nãm ã Jeju memã ane.

<sup>29</sup> Ne kam memã kum,

—Nâr, mýj dja me me'õ tỳx nhũrkwãmã àr on? Kute kubê nêkrêxo prõt kadjy me'õ tỳx nhũrkwãmã àr on. Bir, dja me me'õo tỳm ne uwpre. Ne kam arým ũrkwãmã wadjãn kubê nêkrêxo prõt ne, ane. Mýj'ã ne me'õ tỳx jarê? Bir, Xatanaj'ã. Dja me Xatanaj kumrêx djuwpren kam arým amim õ me ja pytã. Ja'ã ne Jeju ã memã ane.

<sup>30</sup> Ne kam ajte memã kum,

—Me'õ kum ikĩnh kêt ne arým mrãmri ijo kurê djwýnh ne. Ne ar ikôt ba kêt ne arým kam amijã, “Ba dja ba ate ikrãn ar

mrã. Amidjwýnhbit dja ba amiman amijo mrã”, anen ate ar ba. <sup>31</sup> Kam ba me amã arê ga me ama. Me kute mýjjaõ bikên kunĩkôt Metĩndjwýnh kute me axweo biknor prãm. Ne me kute Metĩndjwýnh japry kunĩkôt kute me axweo biknor prãm. Metĩndjwýnh kute me axweo biknor ne wãnh mekam ngrykmã irer prãm. Nhyam be, me kute Metĩndjwýnh Karõ japrykambit ne Metĩndjwýnh mekam ngryk rã'ã ne. <sup>32</sup> Godja me'õ ijã kabên punu jarênh jabej ije amijo inhĩ'ã kabên punu jarênh jabej Metĩndjwýnh dja axweo akno ne kam ngryk kêt. Nhyam be, godja Karõ'ã kabên punu jarênh jabej Metĩndjwýnh dja axweo biknor kêt ne. Ne kam kam ngryk rã'ã ne. Jakam dja ngryk rã'ã. Amrê akubyn Kra bõx'ã akati mõrkamdjwý dja kam ngryk rã'ã.

<sup>33</sup> Djãm pidjõ punukam pidjõ djãnh apõx got? Nâr kon, djãm pidjõ mex, pidjõ djãnhjakam pidjõ punu apõx got? Kati, apýnh pidjõ bàri djãri ne kam ô apõx. Ô ne parbê rôrõk ne ikwãn kam bàrio amirĩt nhyam me kôt kum apõx. <sup>34</sup> Me akamin-grãnyre ne ga me abê iry. Me ajaxwekam djãm me aje akabên mex 'õ jarênh prãm? Arkati. Ê, me õkre kadjwýnhbê ne me mýjja kumex ma nhyam kam amrê bõm ajkwa krekremê õto'ýr apõx nhyam me kam arênho ba. Arênho ban kam arým memã amijo amirĩt. Mex nâr axwe jao memã amijo amirĩt. Kute mýjja ô kute pidjõ bàrio amirĩt ja pyrãk. <sup>35</sup> Nãm me õkre kadjwýnhbê kabên punu kumex man arým kabên punuo memã amijo amirĩt. Nhyam me ajte õkre kadjwýnhbê kabên mex kumex man arým kabên mexo memã amijo amirĩt. <sup>36</sup> Ba me amã arê ga me ama. Amrê memã axwe pãnh jarênh djã nhõ akati mõrkam dja ga me amikôt Metĩndjwýnhmã amijarê. Me aje amrêbê akabên kajgo, akabên punu jarênh kunĩkôt kum arê nhyam arým me ama. <sup>37</sup> Kam amrêbê me akabên mex jabej dja akabên mex kôt me amã amex jarê. Nâr, amrêbê akabên punu jabej dja akabên punu kôt me amã ajaxwe jarê ga me arým me biknor tokry djãkam akuno. Nãm ã Jeju me krãptĩmã ane.

*Me kute kum mýjja pumũnh kêt nhipêx'ã*

'wÿr.

*Mak 8.11; Ruk 11.29*

<sup>38</sup> Nhyr kam Môjdjê kukràdjâ mar djwÿnhmê mebê pardjêu kwÿ Jejumã kum,

—Ujarênh djwÿnh, dja ga mÿjja pumÿnh kêt'õ nhípêx ba me omÿn kôt ama, ane. Nhyr memã kum,

<sup>39</sup> —Me akamingrãnyre ne ga me ajaxwen mÿjjakôt ari Metÿndjwÿnhbê amijo akêxo aba. Ga, me kwÿ kum prô djwÿnh kÿnh ngriren kute ar mebê prôo àkÿnho baja pumÿ. Me gadjwÿ ne ga me amã Metÿndjwÿnh kÿnh ngriren mÿjjakôt ari kubê amijo akêxo aba. Ne ate kam ije me amã mÿjja pumÿnh kêt nhípêxja'ã ijwÿro aba. Kati. Ije me amã ipêx ga me aje omÿnh prãm kêtukumrêx. Dja ba amijo kute Metÿndjwÿnh kukwakam ujarênh djwÿnhbê Djônaj pyrâk. Tãm dja ga me omÿn imã akator jabej. <sup>40</sup> Me bakukãmãre Djônaj ne tep rax tikkrekam nõ nhyr 'ã akatin akatin akati nhyr arÿm kato. Badjwÿ dja ba ã amijo anen kênkrekam nõ nhyr ijã akatin akatin akati ba arÿm ikato. Ba ne ba amijo inhÿ ne bôx. Dja ba ã amijo ane. Jabit dja ga me omÿ.

<sup>41</sup> Djônaj ne krÿrãxbê Niniwekam me akreo tẽ nhyr me arÿm amikam kaprÿren wãnh axwemã iren Metÿndjwÿnh'ÿr amijo akêx. Nhyr be, ba ije iraxo Djônaj jakrenh mex ne ba jakam me akuri djan te me amã idjujarênh ar iba. Djã ne ga me me kudjwa amikam akaprÿn wãnh ajaxwemã anhiren Metÿndjwÿnh'ÿr amijo akêx? Kati. Me aje wãnh ajaxwemã anhirer kêtukumrêx dja Niniwekam me wã arÿm pãnh me amã ajaxwe jarê. Me akamingrãnymã arê ga me me biknor tokry djâkam akuno.

<sup>42</sup> Be ga, aparmã onÿj pyka 'ôdjwÿkam bënjadjwÿr rax nija pumÿ. Bënjadjwÿr ni Xaromão'ÿr tẽ; 'ÿr tẽm 'iry:n arÿm 'ÿr bôx. Kute krã mexkôt marmã 'ÿr bôx ne arÿm kuma. Nhyr be, ba ije iraxo Xaromão jakrenh me:x ne ba jakam me akuri djan te me amã idjujarênh ar iba. Djã ne ga bënjadjwÿr ni kudjwa ajamak mex ne ima? Kati. Ga me aje imar kêtukumrêx. Me aje imar kêtukumrêx dja bënjadjwÿr ni ÿ arÿm pãnh me amã ajaxwe jarê. Me akamingrãnymã

arê ga me me biknor tokry djâkam akuno, ane.

<sup>43</sup> Ne kam ajte me karô punu'ã ajarênh memã kum,

—Me karô pydjïn kute ar me'ôo baja ne arÿm kurÿm katon tẽ. Ne kam te ar mrã, ngô kêtukumrêx ar mrã, te ajte me'ômã àr ne tyk djã kêtumã ar mrã. <sup>44</sup> Ne kam amim,

—Ba inhÿrkwã kurÿm ikatorja'ÿr tẽ, ane.

<sup>45</sup> Ne kam amim badjã tÿmjja'ÿr tẽn 'ÿr bôx ne omÿ nhyr arÿm mexkumrêx. Me karô'õ kute o ba kêt nhyr prÿne kre mex nhyr arÿm kam mÿjja katât. Nhyr kam kadjy mã me karô punu'ÿr tẽ. Ne kam mekam me kwÿ japrôn 'ÿr meo môn meo bôx. Nãm me karôbê 7 ne o bôx ne me'ôjamã meo wangij nhyr kam mekam ar ba. Kute me karô punubê 7 ne o bôx tãm ne axweo kute ôbê pydji kute ar o ba tÿmjja jakrenh mex ne kam arÿm o punu rax ne. Kãjbê punuri ne kãjbê punu nhyr be, kute kubê 7 ne o bôxja ne arÿm o punu rax ne. Dja ã me akamingrãnyre ajaxwekam me karô punu me ajo ane, ane. Nãm Jeju ã memã ane.

*Nãmê kamyre'ã ujarênh.*

*Mak 3.31; Ruk 8.19*

<sup>46</sup> Jeju me krãptÿ:mã kabêno dja nhyr nãmê kamyre ar axikôt apôx ar bôx ne bôm ku'ê. Ne kute kum kabên jarênhmã.

<sup>47</sup> Nhyr me'õ 'ÿr tẽn kum,

—Ë, onÿj anãmê akamy ar amã kabên, ane.

<sup>48</sup> Nhyr Jeju me'ômã kum,

—Be, ije me'ômã inãmê ikamy jarênh kadjy mÿj dja arkam kute? ane. <sup>49</sup> Ne kam kôt ba djwÿnhmã kum,

—Ota, inãmê ikamy ne ja. <sup>50</sup> Dja gar Metÿndjwÿnh kÿnh kadjy kabên man kôt ar amijo aba. Ba kam arÿm ar amã ikamyre nar ikanikwÿnh nar inã jarê. Nãm ã Jeju arkum ane.

## 13

*Bàygogo'ã ujarênh.*

*Mak 4.1; Ruk 8.4*

<sup>1</sup> Ne kam akati tãmkam Jeju kikre kurÿm katon tẽn arÿm imôti mÿrri nhÿ. <sup>2</sup> Nhyr kam me krãptÿ: 'ã akuprô. Nhyr kam arÿm mebê tẽn kâkam nhÿ nhyr me krãptÿ: arÿm ngô mÿrri kum dja. <sup>3</sup> Nhyr kam arÿm



apÿnh kukràdjà djàri'ã memã mÿjja jakren memã 'ã ajarë. Ne memã kum,

—Ë, ò pur djwÿnh ne kute ò purkam bàygogo kremã 'ÿr o tẽ. 'ÿr o tẽn o bôx ne kam ar 'yo ukabêr mrã, ane. Nãm me kute mÿjja kre kadjy tu mÿjja 'yo akabê, bàygogo 'yja ne me kute purkam kremã o mrãn kam purkam o ukabêr mrã. Kute mrãmri ne me kute katëbàri 'yo ukabêr mrãnhja pyràk.

<sup>4</sup> Jeju memã kum,

—Be, me'ò ne ar bàygogo 'yo ukabêr mrã. Nhyim 'y kwÿ prykam rôrôk. Nhyim kwênh prÿne kuku. <sup>5</sup> Nhyim kwÿ kën po'ã pyka purorrekam rôrôk. Nhyim kam pyka purorrekam ingrôt kukrà kêtumrëx. <sup>6</sup> Nhyim kam kÿjrÿm myt nhÿn arÿm 'y nhingrôt ga nhyim kajot ne arÿm ty. Arê jabjê kêtumrëx ne ty. <sup>7</sup> Nhyim 'y kwÿ mrÿnhÿkam rôrôk ne kam mrÿnhÿmẽ ro'ã ingrôt. Nhyim kam prÿne o akno. <sup>8</sup> Nhyim 'y kwÿ pyka mexkam rôrôk ne ingrôt ne kam abatãnh ne. Ne arÿm apÿnh bàri ku'ê djàri nhyim kwÿ iyy jabjê nhyim kam 'y mexti:re. Nhyim kam 'y'ã akre kubê 100. Nhyim kwÿ iyy mexkumrëx nhyim 'y'ã akre kubê 60. Nhyim kwÿ kàjbê iyy mex nhyim 'y'ã akre kubê 30. Nãm ã Jeju Metÿndjwÿnh kukràdjà 'ã apÿnh mÿjja jakren 'ã ujarëho ane. <sup>9</sup> Ne ajte memã kum,

—Gop me ajõ ar ajamak mex jabej tu amim ikabën markumrëx, ane.

<sup>10</sup> Nhyim kam kôt ba djwÿnh ar 'ÿr bôx ne kum,

—Mÿkam ne ga apÿnh kukràdjà djàri'ã memã mÿjja jakren memã mÿjjabit'ã ajarë? ane.

<sup>11</sup> Nhyim arkum,

—Bir, djãm me kunÿ kute ikukràdjà marmã? Kàjkwakam Bënjadjwÿr djwÿnh kute pykakam amim me utàr ne ar meo ba'ã ikabën kukràdjà ja djãm me kunÿ kute marmã? Kati. Ar gajbit ije ar amã arëho amirÿt gar aje marmã. Nhyim be, me wãbê ne ba udju ne. <sup>12</sup> Be, me kwÿ kute ikukràdjà markumrëx ja dja ba mã memã mÿjja krãptÿ jarë nhyim me arÿm mÿjja krãptÿ ma. Nhyim me kwÿ mã kute ikukràdjà mar kajgojabê dja ba ikukràdjào apdju. Kute ikukràdjà mar kajgojao apdju. <sup>13</sup> Me wã kute mar kajgokam ne ba memã mÿjjabit 'ã ajarë. Ba apÿnh kukràdjà djàri'ã

memã mÿjja jakren memã mÿjjabit'ã ajarë. Me kute ikukràdjà mar kajgo wã ne me amrëbê: me bakukãmãremã arën memã kum,

“Me te memã mÿjja jakre nhyim me omÿnh kajgon mã amim omÿnhkumrëx kêt.

Nhyim me te memã mÿjja jarë nhyim me me kabën maro krÿn mã mar kêt. Mã mÿjja'ã me kabën kute amijakreja mar kêt ne.”

Nãm me ã me wã'ã me bakukãmãremã ane. Me kute ikukràdjà mar kajgo'ã ne memã arë. <sup>14</sup> Me bakukãmãre Idjaij ne amrëbê: me kute imar kajgowãmã kabën jarë. Nãm Metÿndjwÿnh kukwakam memã kum,

“Dja ga me maro aku'ën mã mar kêt. Mã kukràdjà'ã mÿjja kute amijakreja mar kêt. Ne omÿnh kajgon mã amim omÿnhkumrëx kêt. Mÿkam?”

<sup>15</sup> Bir, arÿm ga me adjumar djàkam ajamakre kêt. Me aje ajamako mar kêt mã ne ga me arÿm ajamakre jadu.

Ne aje anoo omÿnh kêt mã tu ano ngõr.

Nã gãm me aje mar kêt mã ã ibê amijo ane. Aje ikukràdjà'ã mÿjja kute amijakreja mar kêt mã ã ibê amijo ane.

Ne aje adjumar djàkam mar kêt mã ã ibê amijo ane. Me aje iwÿr amijo akëx ba ije me ajo mex kêt mã ã ibê amijo ane.”

Nãm ã me bakukãmãre Idjaij me kute ikabën mar kajgomã ane. Nhyim me bakukãmãre aben djô'ã arëho mõ:n arëho mõr tãmtã arÿm me wã'ÿr o bôx. Tÿ:mrãm me bakamingrãnyrekam ne me wã ã ikukràdjà mar kajgoo ane. <sup>16</sup> Nhyim be, djãm ar ga ne gar ã anomë ajamako ane? Kati. Ar ga ne gar ano atemã ne aje omÿnhkumrëx. Ajamakre ne atemã ne aje markumrëx. Kam ar akÿnhkumrëx.

<sup>17</sup> Ba ar amã arë gar ama. Djãm ar aje mÿjja pumÿnh ja ne me bakukãmãre kute omÿnh? Djã ne Metÿndjwÿnh kukwakam ujarënh djwÿnhmẽ me katàt kute amijo bamê kute omÿnh? Kati. Djãm ar aje mÿjja mar ja ne me kute mar? Kati. Me krãptÿ ne amrëbê te kute omÿnh ne mar prãmje. Kam, ar gajbit ne gar aje omÿnh ne aje mar. Mrãmri ne ba ar amã arënhkumrëx.

18 Kam ba ar amã arẽ gar ama. Ije ikabên kukràdjà'ã me'õ kute bàygogo 'yo ukabêr jakreja dja gar ama. 19 Kàjkwakam Běnjadjwýr djwýnh kabên ne me arým me'õmã arẽ. Metĩndjwýnh kute amim me utàr ne kute ar meo ba'ã kaběnja kum arẽ nhym arým mar kêt ne. Mýj'ã kute kabên jakreja mar kêt ne. Nhym ate Xatanaj jãm meo amijakren mebê Metĩndjwýnh kaběno akno. Me kute tu amim markumrêx nhym Metĩndjwýnh kute kubê me utàr karõ ne jãm meo amijakren mebê Metĩndjwýnh kaběno akno. Bàygogo 'y kwý prykam rôrôk ne ja.

20 Kěnkam 'y rôrôk ja ne me kute amim Metĩndjwýnh kabên mar 'iry kêt ne kangaja'ã amijakre. Nãm me myt tãnkam Metĩndjwýnh kabên man bit kum kĩnhkumrêxo tēm kajgo. 21 Kute tu amim markumrêx kêtê. Ajkwaobit ne kute mar. Kute 'y nhingrôt ne arê jabjê kêt kam tēmbê tykja pyræk. Kute amim mar 'iry kêt nhym ate apýnh me kaprĩ djari 'ýr bôx nhym arým kanga.

22 Mrýnhĩkam 'y rôrôkja ne me kute Metĩndjwýnh kabên mar ne kam ate ajte kute jãm mýjja marja'ã amijakre. Nãm me arým Metĩndjwýnh kabên man kam 'ãno ãm kêt ne amim, “Mýj dja ba nēn inhõ kwý krēn mex ne inhõ kuběkà mex? Ikanêkam mýj dja ba nē”? ane. Nãm pykakam mýjjabitkam ar no katon axwe umar. Ne kam amim pi'ók kaprĩo atom rax prã:m ne ajte nēkrêxo atom rax prã:m. Djãm kute amim mýjjao atom raxkam mrãmri umar mex? Kati. Bir, me arým õ mýjja rũnhkam mrãmri umar punukumrêx. Ga, mrýnhĩ kute bàygogoo bikēnh nhym kam iij kětja pumũ.

23 Ga, me'õ bàygogo 'yo ukabêr tē nhym ajte kwý pyka mexkam rôrôkja pumũ. Nhym kam arým ingrôt ne abatành ne. Abatành ne arým iijkam 'y kume:x. Me kwýdjwý ne me memã Běnjadjwýr djwýnh'ã kabên jarē nhym me arým tu amim markumrêx. Ne kam maro amũ amikamēn arým mar rax ne. Mar rax ne arým ukaprĩkumrêx. Me kwý ne me ukaprĩti:re kute mrãmri ne bàri kwýkam iij mexti:re nhym kam 'y kubê 100 pyræk. Nhym me kwý kàjbê ukaprĩ kute mrãmri ne bàri

kwýkam iij mexkumrêx nhym kam 'y kubê 60 pyræk. Nhym me kwý kàjbê ukaprĩ kryre kute mrãmri ne bàri kwýkam iij mex nhym kam 'y kubê 30 pyræk. Me ukaprĩkumrêx nhym Metĩndjwýnh arým mekam kĩnhkumrêx. Mekam kaprĩre kêtumrêx. Nãm ã Jeju arkum ane.

*'Ê 'y'ã ujarēnh.*

24 Ne kam Jeju ajte kabên kukràdjà'ã pur 'õdjwý jakren memã 'ã ajarēn memã kum, —Kàjkwakam Běnjadjwýr djwýnh dja pykakam amim me kwý pytàn ar meo ba. Kam dja meo ajkij. 'Ã ne pur amijakre. Purkam ne me'õ 'y mex rēnhõ tē. Ne o tē:n arým kre pa. 25 Ne kadjy ate krã. Nhym me õt mýrri kurê djwýnh arým pur'ýr bôx. 'Ýr bôx ne kam 'ê 'ymē bõ nhijymē akrô 'ymē rēnhõ tē. Bàygogo 'y mex nhiby 'ê 'y rēnhõ tē:n arým kre pa. Kre pan arým mã tē. 26 Nhym kam bàygogo ingrôt ne abatành ne iij ajkapĩ. Nhym 'êdjwý arým kam kume:x ne.

27 Nhym kam õ àpēnh ar arým õ pur djwýnh'ýr bôx ne kum, “Běnjadjwýr, 'y mexbit ne ga purkam arēn kre. Mýj ne arým ajmã pur kam nē nhym kam 'ê kume:x”? ane.

28 Nhym arkum, “Gwaj bakurê djwýnh'õ ne kam 'ê 'y rē”, ane. Nhym õ àpēnh ar kum, “Dja bar 'ê kaba”, ane.

29 Nhym arkum, “Kati. Gar ren 'ēmē ro'ã bàygogo kaba. 30 Kwãrĩk wãnh ro'ã abatành gē prý ngrà ba 'ýr ê djwýnh jano. Kam dja ba ê djwýnh arkum, ‘Dja gar 'ê kumrêx karwàn 'ãpren kum adjà gē xêr. Nhym be, bàygogo dja gar o atom ne inhõ bàygogo nhõ kikremã o wadjàn adjwý’, ane. Dja ba ã kum ane.” Nãm ã õ pur djwýnh arkum ane. Nãm ã Jeju memã ujarēnhõ ane.

*Metĩndjwýnh kute me utàr ne meo ba.*

*Ruk 13.18*

31 Ne kam ajte kabên kukràdjà'ã motadu 'y jakren memã kum,

—Kàjkwakam Běnjadjwýr djwýnh kute pykakam amim me utàr ne ar meo ba ne kute mrãmri ne me'õ arým õ purkam motadu 'y kre nhym abatành pyræk.

32 Motadu 'y ne kryreo kute apýnh 'y jakrenh. Nhym be, arým abatànhkam abatànhõ kute purkam djwý kunĩ jakrenh.

Arým abatàn kute pĩ pyræk. Nhym arým àkmẽ kwênh apÿnh pa'ã ku'ê. Nãm ã Jeju arkum ane. Me kute amim Jeju marmã nhym arým ja pydjín kadjy amima nhym arým ja kadjy amiman 'ã tÿm nhym ja kôt 'ã tÿm nhym ja 'ã tÿm nhym arým 'ã krãptĩ ne. 'Ã ne 'y kryre ja jakre.

<sup>33</sup> Ne kam ajte kabên kukràdjà'ã djwÿ nhigot djà jakren memã kum,

—Kàjkwakam Bënjadwÿr djwÿnh kute pykakam amim me utàr ne ar meo ba ne kute mrãmri ne djwÿ nhigot djà djwÿkam bimàn tēm pyræk. Me'õ nire ne djwÿ nhigot djà byn arým djwÿ djôm raxkam kapĩ. Djwÿ'ã akreo amãnhkrut ne ikjêkêt. Nãm djwÿkam kapĩn o akà nhym arým prĩne djwÿkam ajmã, ane. Jejudjwÿ dja amim me utàro tēn kam arým pyka kunĩkôt amim me kwÿ pytàn ar meo ba.

<sup>34</sup> Jeju kute memã mÿjja'ã ujarēnhja kunĩ ne kukràdjà'ã akre. Ne kam me krãptĩ:jamã mÿjjabit'ã ajarē. Djãm kute kukràdjà 'õ'ã mÿjja jakre kêt ne tu kukràdjabit memã arē? Kati. Nãm kukràdjà'ã memã mÿjjabit jakren memã 'ã ajarē. <sup>35</sup> Me bakukãmãre ne Metĩndjwÿnh kukwakam memã ja'ã ajarē. Jeju memã ujarēnh ja'ã ajarē. Amrēbê: ne memã kum,

“Kukràdjà'ã dja ba memã mÿjjabit jakren memã 'ã ajarē.

Adjàkam mÿjja bipdjur ne bipdjur rã'ã dja ba arým 'ã ajarē”, ane.

Nãm ã me bakukãmãre Metĩndjwÿnh kukwakam memã ane. Ne kam me aben djô'ã arēnhõ mō:n arēnhõ mōr tãmtã arým 'ÿr o bôx. Tũ:mràm me bakamingrãnyrekam ne Jeju katon arým ã memã ujarēnhõ ane. Me bakukãmãre kute memã ujarēnh kôt ne Jeju arým amikabên kukràdjà'ã mÿjjabit jakren memã mÿjjabit 'ã ajarē.

<sup>36</sup> Ne kam arým me krãptĩ jano nhym me mã mō nhym arým kikremã wadjã. Nhym kôt ba djwÿnh ar arým 'ÿr bôx ne kukijn kum,

—Ajbir me kute purkam bàygogo 'y mex nhiby 'ê 'y rēnhõ tēm'ã adjujarēnhja mÿj'ã ne amijakre? Ar imã arē bar kuma, ane.

<sup>37</sup> Nhym arkum,

—Bir, ba ne ba amijo inhĩ ne ruw. Ba ijã ne me'õ kute purkam 'y mex rēnh ja.

Ijã ne me'õja amijakre. <sup>38</sup> Pyka kunĩkôt me kunĩ'ã ne pur amijakre. Me kute Bënjadwÿr djwÿnh mar'ã ne 'y mex amijakre. Me kute Xatanaj kôt ar amijo baja'ã ne 'ê amijakre. <sup>39</sup> Xatanaj'ã ne kurê djwÿnh kute purkam 'ê 'y rēnhja amijakre. Mÿjja kunĩ kute aminhinomã amimēnh djà nhõ akati'ã ne bàygogo atom djà nhõ akati amijakre. Metĩndjwÿnh kadjy mrãnh djwÿnh'ã ne me kute bàygogo djê djwÿnhja amijakre.

<sup>40</sup> Kute ê djwÿnh kute 'ê jarēnh ne o atom ne kum adjàr nhym xêt pyræk, dja Metĩndjwÿnh kadjy mrãnh djwÿnh ã me axweo ane. Me kute aminhinomã amimēnh djà nhõ akatikam me axweo ane. <sup>41</sup> Ba ije amijo inhĩ dja ba amũ ikadjy mrãnh djwÿnh jano nhym me arým me axweo kunĩo atom. Bënjadwÿr djwÿnh kute pykakam meo bajakam me axweo kunĩo atom. Me kute me axwe'ã memã àpnēnhmẽ me axweo kunĩo atom. <sup>42</sup> Ne kam me arým me biknor tokry djàkam me kumẽ. Wãnh ne me amim ngryk ne tokry djaje amijanēn ar àmra ba. <sup>43</sup> Kam dja me Bãm djwÿnh amim me katàt kute amijo baja pytàn ar meo ba. Nhym kam me axweja kuràm dja me arým me:xkumrēx nhym me kum me kĩ:nhkumrēx kute mrãmri ne arým myt katorkam me kum kĩnh pyræk. Gop me ajõ ar ajamak mex jabej tu amim ikabēnja markumrēx. Nãm ã Jeju arkum ane.

#### *Apÿnh mÿjja'ã ujarēnh.*

<sup>44</sup> Ne kam ajte arkum,

—Kàjkwakam Bënjadwÿr djwÿnh kute pykakam amim me utàr ne ar meo ba ne me kum kĩnh. Kute mrãmri ne kute me kum nêkrēx pãnh rax kĩnh pyræk. 'Ã ne nêkrēx pãnh rax amijakre. Pykakam ne me'õ nêkrēx pãnh rax jadjàn o apdju nhym atemã me'õja arým 'ÿr bôx ne kum katon kaban kam kĩnhkumrēx. Me'õja nêkrēx pãnh raxkam kĩnhkumrēx ne ajte pyka tãm kam nêkrēx pãnh rax jadjàn o apdju. Me'õ kute kubê o àkĩnh karõ o apdju. Ne amim, “Ba on pykao inhõn kam ije nêkrēx pãnh rax jadjàr djào inhõ pyka”, ane. Ne kam arým õ mÿjja kunĩo atom ne memã kungãn pãnh pi'òk kaprĩ by. Ne kam arým pi'òk kaprĩo amim pyka byn o õ. Ne urokam kute kam nêkrēx pãnh rax jadjàrjao õ.

<sup>45</sup> Kam, ajte kàjkwakam Bēnjadjwÿr djwÿnh kute pykakam amim me utàr ne ar meo ba ne me kum kĭnh. Kute mrāmri ne kute me kum nēkrēx pānh rax kĭnh pyrāk. 'Ā ne angà pānh raxdjwÿ amijakre. Kam ne me'ō kute angà byrmā abej ar mrā. <sup>46</sup> Ne kam arÿm angàja pānh ra:xmā kato. Ne amim, "Ba on angà pānh raxjao aminhō", ane. Ne kam amÿ tēn ò mÿjja kunĭo atom ne memā kungān pānh pi'ōk kaprĭ by. Ne kam angàja pānh rax pānh memā pi'ōk kaprĭ ngān arÿm o ò. Nām ā Jeju arkum ane.

<sup>47</sup> Ne kam ajte arkum,

—Kàjkwakam Bēnjadjwÿr djwÿnh dja pykakam amim me utàn ar meo ba. Kam, dja me axwemā pānh jarē. 'Ā ne kryreti amijakre. Imōtikam ne me kryreti mē nhym arÿm apÿnh tep krāptĭ kum wangij nhym me arÿm unē. <sup>48</sup> Ne arÿm ipukam bjēro mōn akàx'ā kumē. Ne kam arÿm tep kabio nhÿ. Nām tep mex ne karwàn kaxnokaikam o atom. Nhym be, tep punu ne me rŭm kurēn kanga. <sup>49</sup> Mÿjja kunĭ kute aminhinomā amimēnh djā nhō akatikam dja me ā meo ane. Dja Metĭndjwÿnh kadjy mrānh djwÿnh apōx ne me'ÿr bōx ne meo ajkij. Me axweja me katāt kute amijo bajabē meo ajkij. <sup>50</sup> Ne kam arÿm kuwy djākam me axwe mē. Kam dja me amim ngryk ne tokry djāje amijanēn ar àmra ba, ane.

<sup>51</sup> Ne kam arkum,

—Djā ne gar arÿm mÿjja markumrēx? Mÿjja'ā ije apÿnh mÿjja jakreja djā ne gar arÿm markumrēx? ane.

Nhym ar kum,

—Nà. Mÿjja'ā apÿnh mÿjja kute amijakreja bar ije markumrēx, ane.

<sup>52</sup> Nhym kam arkum,

—Aj, tām ne ja. Arÿm ne ba mÿjja krāptĭ'ā ajarē gar ama. Kàjkwakam Bēnjadjwÿr djwÿnh kute pykakam amim me utār ar meo ba'ā ne ba mÿjja krāptĭ jakren ar amā 'ā ajarē gar arÿm ama. Arÿm ar aje markam ar aje ò kikre djwÿnh pyrāk. Ò kikre djwÿnh ne ò nēkrēx jadjwÿr djākam mÿjja nymē mÿjja tūmo pōx. Ar aje urāk. Ar abē memā kukrādjà jarēnh djwÿnh ne gar arÿm memā kukrādjà ny jarēn ajte memā kukrādjà tūm jarē. Tām ne ja. Nām ā Jeju arkum ane.

*Õ pyka djwÿnhkam bōx.*

*Mak 6.1; Ruk 4.16*

<sup>53</sup> Jeju apÿnh kukrādjà'ā memā mÿjja ja jakren memā 'ā ajarēn kam arÿm o ino re. Ne kam arÿm mā tē. <sup>54</sup> Ne kam arÿm ò pyka djwÿnhkam tēn bōx. Bōx ne arÿm me bikprōnh djākam tēn wadjā. Ne kam arÿm memā kukrādjà jarē. Memā arē nhym me arÿm kam no tyn kumex ne abenmā kum, —Tō, mÿj me'ō ne kum me kukrādjà ja jarē nhym arÿm ā amak mexo ane. Mÿj me'ō ne kum arē nhym arÿm ā mÿjja nhipēxo ane. Mÿjja pumŭnh kētkumrēx ne arÿm ipēx nhym kumex. <sup>55</sup> Be, kubē ne pĭ kēnh djwÿnh kajgo kra. Marij kurŭm ne kato. Kōt ar apōxjabē Xijagumē Jōdjemē Ximāomē Djudamē. <sup>56</sup> Kanikwÿnhdjwÿ ar me baro'ā ar ba. Tō mÿj me'ō ne kum kukrādjà ja jarē nhym maro ba? ane. <sup>57</sup> Me ā abenmā anhÿro ban kam kubē kĭnh no kati.

Nhym Jeju amijā memā kum,

—Metĭndjwÿnh kukwakam memā ujarēnh djwÿnh dja pyka kunĭkōt ba nhym me kum mex jarēnho ba prām ne. Nhym be, ò pyka djwÿnhkam me jabit ne me ari aprÿo ba. Ōbikwa djwÿnhkam ar ajbit dja me ari aprÿo ba, ane.

<sup>58</sup> Ne kam arÿm te kute ò pyka djwÿnhkam me krāptĭo mex prāmje. Me kute amim tu kamnhĭxkumrēx kētkam te kute meo mex prāmje.

## 14

*Me kute Djuāo mut krā'ÿr.*

*Mak 6.14*

<sup>1</sup> Nhym kam me amÿ Jeju jarēnho ipōk ne. Nhym kam mebē idjaer nhō bēnjadjwÿr raxbē Erodji arÿm me kute Jeju jarēnhja ma. <sup>2</sup> Ne kam arĭk Jejuo Djuāo ne ò àpēnhmā kum,

—Ngōmā me angjēnh djwÿnhbē Djuāo arÿm akubyn tĭn ne ar ba. Be, tyk ne akubyn tĭnkam ne arÿm mÿjja pumŭnh kēt nhipēxo ba, ane.

<sup>3-4</sup> Be, Erodji kute bĭn kētri ne Djuāo Erodjij'ā kum kabēn ne. Erodji ne Erodjijo prō. Nām 'ā kum kabēn ne kum,

—Metĭndjwÿnh kukrādjà kupa'ā ne ga akamyrebē prō'ÿr mō, ane. Nhym kuman arÿm ngryk ne. Ne arÿm 'ÿr me

krâkamngôn hano nhyim me arým o tým ne kubê ijê. <sup>5</sup> Nhyim kam bit kute me anor nhyim me kute bĩnmã. Nhyim be, kati. Me krãptĩ: ne me 'ã abenmã kum,

—Djuãobê ne Metĩndjwýnh kukwakam memã ujarênh djwýnh, ane. Me krãptĩ kute ã anhýrkam ne Erodji arým kum me krãptĩ pyman Djuão bĩn kêt.

<sup>6</sup> Nhyim kam Erodji rwýk djã nhõ akati arým bõx. Bõx nhyim me arým ro'ã àkuro nhý. Nhyim Erodji kra arým memã to. Memã to nhyim Erodji kum kĩnhkumrêx.

<sup>7</sup> Kum kĩnhkam ne kum,

—Mýj ne ga amã kĩnh? On imã mýjja'õ jarê ba arým amã kungã. Amã ikabên kajgo kêtumrêx. Metĩndjwýnh ne arým ima, ane.

<sup>8</sup> Kraja kum tor djwýnhram ne nã arým Djuão krã'ã kum karõn kum,

—Dja kum akĩnh ga Djuão krã'ã kum apnê, ane. Nhyim kam arým kum to nhyim kum kĩnh. Kum kĩnh ne kum mýjja jarênh mãmdji nhyim arým kuma. Ne nã kabên man arým Erodjimã kum,

—Dja ga ngõmã me angjênh djwýnhbê Djuãoja ngôn purortikam krã djãn o bõx ne imã angã, ane. <sup>9</sup> Nhyim kam bẽnjadjwýr rax arým kuman kaprĩren amim,

—Je, arým ne ba mrãmri kum ikabên jarênh mãmdji nhyim Metĩndjwýnh arým ima. Ba arým kam te ije kum, “Kati”, anhýr prãmje. Ibu'ã me jadjwý ne me arým mrãmri ikabênkumrêx ma, ane. Ne kam arým õ àpênhmã kum, “Me kum angã”, ane.

<sup>10</sup> Ne 'ýr me ano nhyim me mebê ijê djã'ýr mõn arým 'ýr bõx. Ne kam arým mut krãta.

<sup>11</sup> Mut krãtan ngôn purortikam krã djãn o tẽn arým kurerermã kungã. Nhyim kumýn o tẽn arým nãmã kungã. <sup>12</sup> Nhyim kam Djuãokõt ba djwýnh ar 'ýr tẽn 'ýr bõx. Ne kam Djuão nhĩ mýn o tẽn arým adjã. Ne kam Jeju'ýr tẽn 'ýr bõx ne kum arê nhyim arým kuma.

*Kute mebê 5.000o djuw mex.*

*Mak 6.30; Ruk 9.10; Dju r 6.1*

<sup>13</sup> Nhyim kam ate arwãkam ýr kadji kãkam nhýn arým nox ne. Nhyim kam me arým arênh ma. Arênh man arým krĩrax kurũm kõt mõ. Pykakõt ar ibej mõ. Ar ibej mõ:n arým akãx nhikjêkam Jeju kutêp akuprõ. <sup>14</sup> Nhyim Jeju ar ngõkõt mõn arým

akãx'ýr bõx. 'Ýr bõx ne arým kã dji. Nhyim kam Jeju arým wabin me krãptĩ: pumũ. Me omũn arým kum me kaprĩ: Kum me kaprĩn arým me kanêo mexo dja.

<sup>15</sup> Meo djan kam arým amykry mex ne. Nhyim Jeju kõt ba djwýnh arým 'ýr bõx ne kum,

—Arwãkam ne gwaj ar baba nhyim arým amykry mex ne. On me krãptĩmã arên kum, “Me amũ krĩ kryremã mõn djwý jamýn anhõ kwý krê”, ane. Dja ga ã memã ane, ane.

<sup>16</sup> Nhyim arkum,

—Kati. Kwãrĩk wãnh amũ me mõr kêt. Ar ga dja gar memã mýjja ngã nhyim me arým kukrê, ane.

<sup>17</sup> Nhyim ar kum,

—Jakam ne djwý kubê 5bit ne tep amãnhkrutbit, ane.

<sup>18</sup> Nhyim arkum, “Amrê imã o tẽn”, ane. Nhyim kam ar arým 'ýr o bõx. <sup>19</sup> Nhyim kam me bõkam ýrmã memã arê. Ne kam arým djwý kubê 5mê tep amãnhkrutja jamý. Amýn kãjmã kãjkwa pumũn djwýmê tepo Metĩndjwýnhmã amikĩnh jarê. Kum amikĩnh jarên arým djwý kokij. Djwý kokjêro dja:n mã kõt ba djwýnh arkum õro dja. Arkum õro dja: nhyim ar mã memã õro mrã. <sup>20</sup> Memã õro mrã: nhyim kam me kunĩ kukrên arým ajne. Nhyim kam ar arým aũm karwãho mrã. O mrãn arým kaxnokaikam kungij ne o ipu. O ipun arým 'ã akre. Kam kaxnokai ipu kubê 12 ne 'ã kãtãm ne dja. <sup>21</sup> Be, me my kute krên 'ã akre kubê 5.000. Ne ijukri me niremê me prĩre'ã akre kêt. Be, me kunĩ ne me arým õ kwý krên mex ne arým ajne.

*Ngõ'ã tẽn.*

*Mak 6.45; Dju r 6.15*

<sup>22</sup> Nhyim kam Jeju kõt ba djwýnh arkum,

—Aj mã, kãkam nhý. Dja gar ikukãm akãx nhikjêrmã rê. Ba 'ýr me ano gê me mã mõ, ane. Nhyim ar arým kãkam nox ne mõ.

<sup>23</sup> Nhyim arým me krãptĩ'ýr tẽn memã kum,

—Aje, me on ajmã. Ba on, ane. Ne kam Metĩndjwýnhmã kabên kadji krãnh'ã tẽn wabi. Nhyim kam arým akamãt nhyim ate krãnhkam nhý. <sup>24</sup> Nhyim ar kãkam mõrja arým imõti nhipõkri mõ. Mõ: nhyim kõt ar

kutã àbêr tỳx. Àbêr tỳx nhym ngô arỳm ar'ã kà japĩno mō.

<sup>25</sup> Apĩno mō: nhym arỳm òkrên'ãnh kà. Òkrên'ãnh kàr pydji nhym Jeju arỳm tu ngô rax'ã arkôt tẽ. <sup>26</sup> Ngô'ã arkôt tẽ nhym kôt ba djwỳnh ar arỳm omũ. Ngô'ã tẽmkôt omũn arỳm madjà kretin abenmã kum,

—Ota amrẽ me karõ'õ gwaj bakôt mō, anen arỳm umaje amra.

<sup>27</sup> Nhym kam arkum,

—E kum, ba ne ba wãm ar akôt tẽ. On ar akĩnh ne ar atĩn prãm kêt, ane.

<sup>28</sup> Nhym Pedru kum,

—Djãm mrãmri gakumrẽx? Ga atẽmkumrẽx jabej amiwỳr ijwỳ ba wãm akudjwa ngô'ã awỳr tẽ, ane.

<sup>29</sup> Nhym kum, “Amrẽ iwỳr tẽ”, ane.

Nhym Pedru arỳm Jeju'ỳr tẽmmã ngôkam ruw ne arỳm ngô'ã tẽ. <sup>30</sup> Ngô'ã tẽn arỳm ngô pumũ. Kôk djàbêr tỳx kute ngô djàkà tỳxkôt omũn arỳm tĩn prãm. Tĩn prãm ne arỳm àr tẽ. Ngômã àr tẽn arỳm amran kum, “Bênjadwỳr djwỳnh, gop ipytã”, ane.

<sup>31</sup> Nhym Jeju on pa 'amỳn kum,

—Aje amim imar rere:kre. Mỳkam ne ga amim, “Djãm mrãmri ne Jeju kute ngô ja mar”, anen amim imar rerekre?

<sup>32</sup> Nãm ã kum ane nhym ar arỳm kà'ỳr bôx. Ne kam arỳm wabi. Wabi nhym kôk djàbêr on amikrãtan anhikrê ne.

<sup>33</sup> Amikrãta nhym kàkam ar ỳrja arỳm parbê kônkrão nhỹn rax ma:ro nhỹ. Ne arỳm kum, —Mrãmri abê Metĩndjwỳnh Krakumrẽx, ane.

<sup>34</sup> Ne kam ar arỳm akàx nhikjẽmã rên kam arỳm kà dji. Ar pykabê Djene'ã kà dji.

<sup>35</sup> Nhym kam me arỳm Jeju nokre pumũn amũ memã arẽ. Nhym kam me arỳm bu'ã pyka kunĩkôt me'ỳr me ano nhym me me'ỳr mō. Me'ỳr mōn memã arẽ nhym me arỳm kuman Jeju'ỳr me punu kunĩo bôx. <sup>36</sup> Nhym me arỳm kum,

—Ba me akà japkredit kupên arỳm imex ne, ane. Ne me kunĩ kute kupênhja arỳm prĩne mex ne.

## 15

*Tu mỳjja krên'ã ujarẽnh.  
Mak 7.1*

<sup>1</sup> Nhym kam mebê pardjẽumẽ Môjdjẽ kukràdjã mar djwỳnh krĩraxbê Djeruxarẽ kurũm mōn Jeju'ỳr bôx. Me ò kwỳ krên kadji ne me aminhikra pônho ba. Me kukãmãkjẽ kukràdjã kôt me we Metĩndjwỳnhmã mex kadji ne me kum aminhikra pônho ba. 'Ã ne me Jejumã kabên ne kum,

<sup>2</sup> —Mỳkam ne akôt ba djwỳnh ar me kukãmãkjẽ kukràdjã mar kêt ne kam amikrà ar o ba? Nãm ar kute aminhikra pônho kêt ne tu aku, ane.

<sup>3</sup> Nhym Jeju memã kum,

—Djãm mrãmri Metĩndjwỳnh kukràdjã kôt ne ga me me akukãmãkjẽ kukràdjãja jarẽ? Kati. Atemã. Ga me Atemã akukãmãkjẽ kukràdjã ja'ã ano tỳx ne Metĩndjwỳnh kukràdjã mar kêt. Ne kam arỳm kam amikrà ar o aba. <sup>4</sup> Ba me amã arẽ gar ama. Metĩndjwỳnh ne me bakukãmãremã 'ã karôn memã kum, “Me amã abãmmẽ anã jabên ar kabên ma”, ane.

Ne ajte memã kum,

“Me'õ arỳm bãm'ã nàr nã'ã, ‘Gê Metĩndjwỳnh o ajkẽ’, anhỹr jabej gẽ me tu kubĩ”, ane.

Me kum bãmmẽ nã ar abẽmã ne Metĩndjwỳnh ã me bakukãmãremã ane.

<sup>5</sup> Nhym be, djãm me ga ne ga me amã abãmmẽ anã jabê? Kati. Ga me akukràdjã kôt arĩk memã kum, “Me ajõ godja anã nàr abãm mỳjja'ã ajwỳr jabej. Ne aje kubê anhõ mỳjja nẽ prãm jabej kum, ‘Be, ba te ije amã òrmã. Aje mỳjja 'ã ijwỳr ba arỳm o Metĩndjwỳnh nhõ mỳjja. Kam ba te ije amã òrmã’, ane. Dja ga me ã kum anen arỳm kubê nẽ nhym kam arỳm pijãm ne”, ane. <sup>6</sup> Ga me aje ã memã 'ã karõo anhỹrkam arỳm me nãmẽ bãmbê òdjỳ'ã memã adjãpnênho aba. Me kum ar abê kêt'ã memã adjãpnênho aba. Metĩndjwỳnh te memã 'ã karôn memã kum, “Me amã abãmmẽ anã jabên ar kabên ma”, ane.

Nãm te memã ane ga me arỳm Metĩndjwỳnh kabên jao me kukràdjã kajgon kupa'ã memã akukràdjã punu ja jarên arỳm nãmẽ bãmbê òdjỳ'ã memã adjãpnênho aba.

<sup>7</sup> Me ga ne ga me amijo ajẽx ne ar amijo Metĩndjwỳnh mar mexo aba. Mrãmri ne me bakukãmãre Idjaij me ajã kabên ne.

Nãm Metĩndjwỳnh kukwakam me ajã me bakukãmãremã kum,

<sup>8</sup> “Be, me ja ne me arĩk 'êx ne ajkwa kajgokam imã imex jarẽho ban õkre kadjwỳnhbê jãm ate ibê krãn ba.

<sup>9</sup> Ne arĩk imã irax jarẽnh kajgoo ban 'êx ne me ta kukràdjã'ã memã kum, 'Metĩndjwỳnh kukràdjã', anhỹro ba.”

Nãm ã Idjaij me ajã ane ga me akam-ingrãnyre ajêx ne akukràdjã kajgoo Metĩndjwỳnh kukràdjã memã arẽho aba. Mrãmri ne me ajã arẽnhkumrêx. Nãm Jeju ã mebê pardjêu arkum ane.

<sup>10</sup> Ne kam amiwỳr me krãptĩ 'uw ne memã kum,

—Ë, dja ga me akunĩ iman ikabẽn markumrêx. <sup>11</sup> Me kute apỳnh mỳjja'ã memã kum, “Ja dja ga ãm omũ. Dja ga krẽn arỳm ajaxwe”, anhỹro ba. Nhym be, djãm me'õ mỳjja 'õ krẽ nhym Metĩndjwỳnh arỳm kum, “Ja ne ga krẽ. Arỳm ajaxwe”, ane? Kati. Me kabẽn punukam ne memã axwe jarẽ. Me àkĩnhĩkam ne memã arẽ. Me ari prõ, mjên kupa'ã kurẽ bakam ne memã arẽ. Me 'êxnhĩkam ne memã arẽ. Apỳnh axwe 'õkam ne Metĩndjwỳnh memã axwe jarẽ. Nãm ã Jeju memã ane.

<sup>12</sup> Kam kõt ba djwỳnh ar 'ỳr bõx ne Jejumã kum,

—Ë, mebê pardjêu kute akabẽn markam arỳm ngryk ne, ane.

Nhym me'ã arkum,

<sup>13-14</sup> —Ga, me no rã ne me amikukãm rĩt kêtja pumũ. Kam me kute amipry mar kêt. Kam godja me no rã me no rã japrõ kute meo ba jabej nhym arỳm amẽ kre'õkam tỳm. Mebê pardjêu ne me kute me uràk. Nãm me 'êx ne memã, “Ba ne ba ije Metĩndjwỳnh mar”, anhỹro ba. Nhym be, kati. Me kute mar kêt. Ne kam te memã Metĩndjwỳnh'ã ujarẽnh ar ba nhym me adjwỳnhdjwỳ kute Metĩndjwỳnh mar kêt. Mebê pardjêu 'êx ne kute memã anhỹro bakam dja Ibãm arỳm memã o pãnh ne me biknor tokry djakam me kumẽ kute mrãmri ne me kute 'ê kadjar ne rũm mẽn pyræk. Kwãrĩk wãnh me rã'ã. Nãm ã Jeju mebê pardjêu'ã ane.

<sup>15</sup> Nhym Pedru kum,

—Nã gãm ar imã, “Djãm me mỳjja 'õ krẽ nhym Metĩndjwỳnh kum, ‘Ja ne ga krẽn arỳm ajaxwe’, ane? Kati”, ane. Tãm ne ga arẽ nhym ar ibê bipdjur rã'ã ne. Mỳj'ã ne ga akabẽn jarẽ? Ar imã arẽ bar kuma. Nãm ã Pedru Jejumã ane.

<sup>16</sup> Nhym Jeju arkum,

—Djãm ar gadjwỳ ar aje mỳjja mar kêt rã'ã? <sup>17</sup> Mỳjja me kute krẽn ne me tikkam-bit wangij. Ne kam atykmã arỳm apõx.

<sup>18</sup> Nhym be, me ajkwa kurũm me kabẽn punu apõxja ne me kute amim mỳjja'ã karõ djã kurũm apõx. Kam Metĩndjwỳnh arỳm memã axwe jarẽ. <sup>19</sup> Me kute amim mỳjja'ã karõ djakam amim mỳjja punu'ã karõn arỳm me kurũm apõx.

Nãm me kute me par'ã amim karõ.

Ne kute me prõ puro nãr me mjên puroo àkĩnh ne ro'ã ikwãja'ã amim karõ.

Ne prõ djwỳnh nãr mjên djwỳnh kupa'ã kurẽ'ã amim karõ.

Ne kute mỳjjao àkĩnh'ã amim karõ.

Ne memã 'êx'ã amim karõ.

Ne kute Metĩndjwỳnh japrỳ'ã amim karõ.

<sup>20</sup> Me axweja kunĩ ne me kurũm apõx nhym Metĩndjwỳnh arỳm memã axwe jarẽ. Nhym be, me kute aminhikra põnh kêt ne kute õ kwỳ krẽn ja ne Metĩndjwỳnh kute memã axwe jarẽnh kêt. Djãm ar aje ja mar kêt? Nãm ã Jeju kõt ba djwỳnh arkum ane.

*Me'õ nire bajtem kute tu amim kamnhĩxkumrêx'ã ujarẽnh.*

*Mak 7.24*

<sup>21</sup> Ne kam Jeju arỳm mebê tẽ. Tẽ:n kam krĩraxbê Xirumẽ Xidõ bu'ã pyka'ỳr bõx.

<sup>22</sup> Nhym pykabê Kanaãkam me'õ nire pyka wãkam ar ba. Mebê idjaer ne me wão me bajtem. Me'õ nire kam ar ban arỳm Jeju'ỳr bõx. Ne kam kàj bê kum,

—Bẽnjadjwỳr djwỳnh, Dawi tãmdjwỳ, gop amã ikaprĩ. Me karõ punu ne ari ikrao bikẽnho ba, ane.

<sup>23</sup> Nhym tu kubê anhikrên itõ ne. Nhym kõt ba djwỳnh ar 'ỳr bõx ne kum,

—Dja ga amũ ano gê tẽ. Nãm ari gwaj bakõt àmra tẽ, ane.

<sup>24</sup> Nhym arkum,

—Djãm me bajtem'ỳr ne Metĩndjwỳnh ijano ba tẽ? Kati. Mebê idjaer'ỳr ne ijano ba tẽ. Mebê idjaer ne me kute mrãmri ne

mrykĩ'ãtomti no biknor pyrãk ne ate ar ba. Me ate ar ba ja'ÿr ne ijano ba tẽ, ane.

<sup>25</sup> Nhyam kam arÿm ni bajtemja 'ÿr bõx. 'ÿr bõx ne arÿm parbẽ kõnkrão nhÿn ra:x man kum,

—Bẽnjadjwÿr djwÿnh gop ikõt o kangõn ikrao mex, ane.

<sup>26</sup> Nhyam õ mebẽ idjaer'ã me prĩre jakren kum,

—Nok ba ren rop kraremã me prĩre nhõ djwÿ rẽ nhyam ren kam punure, ane. Djãm mrãmri ne djwÿ'ã ajarẽ? Kati. Kute meo mex djã'ã ne djwÿ jakren kum 'ã ajarẽ. Bir, Jeju ne jakam kute me bajtemo mex prãm kêt. Õ mebẽ idjaer'ÿr ne Metĩndjwÿnh Jeju jano. Kute õ mebẽ idjaerbit kumrẽxo mexo bamã. Kam ne nimã kum,

—Nok ba ren rop kraremã me prĩre nhõ djwÿ rẽ nhyam ren kam punure, ane.

<sup>27</sup> Nhyam nija arÿm amim,

—Ijã ne rop krare jarẽ, anen arÿm kum,

—Tukwa, mrãmri Bẽnjadjwÿr djwÿnh. Kõt ne ga arẽ. Nhyam be, godja wãnh õ wÿnh nhõ pĩponh krakri djwÿ jaũm rôrõk. Aũmbit dja rop krare kukrẽ. Kam gop badjwÿ ibẽ rop krare pyrãk tu imã ikrao mex, ane.

<sup>28</sup> Nhyam Jeju kum,

—Me'õ nire, ga ne ga tu amim ikamnhĩx me:xkumrẽx. Akabẽn kõt ne ba arÿm akrao mex, ane. Nhyam myt tãm kam kra arÿm mex ne.

*Kute mebẽ 4.000o djuw mex.*

*Mak 8.1*

<sup>29</sup> Nhyam kam Jeju arÿm pyka ja kurũm tẽn imõtibẽ Garrẽja'ÿr tẽn 'ÿr bõx. Ne kam arÿm krãnh'ã tẽn wabin nhÿ. <sup>30</sup> Nhyam me krãptĩ: arÿm 'ÿr bõx. Nãm me 'ÿr me punuo mõn 'ÿr meo bõx. Me mrãnh kêtme me no rãmẽ me kabẽn kêtme apÿnh me kukrãdjã punumẽ apÿnh me punu djã 'õdjwÿ krãptĩ:ja ne me 'ÿr meo mõn meo bõx ne Jeju parbẽ me adju:w nhyam arÿm meo mex ne. <sup>31</sup> Jeju meo mex nhyam me krãptĩ: arÿm me omũ. Me kabẽn kêt arÿm kabẽn mex. Me apÿnh kukrãdjã punu arÿm kukrãdjã mex ne. Me mrãnh kêt arÿm mrãnh mex ne. Me no rã arÿm rĩt mex ne. Nhyam me arÿm me omũn te kute marmã mekam no tyn kumex. Ne kam arÿm mebẽ idjaero ba djwÿnhmã rax jarẽ. Metĩndjwÿnhmã rax jarẽho kume:x.

<sup>32</sup> Nhyam kam arÿm amiwÿr kõt ba djwÿnh ar ku'uw nhyam ar bõx nhyam arkum,

—Imã me krãptĩ:ja kaprĩ. Me iro'ã krĩ'ã arÿm akati amãnhkrut ne ikjêkêt apêx. Ne kam arÿm me õ mÿjja kêt. Nok ba ren me kum prãm kam ren amũ me ÿrkwãmã me ano nhyam ren pry konenh ren me arÿm rerekre nhyam ren tyk djã me kupa, ane.

<sup>33</sup> Nhyam kõt ba djwÿnh ar kum,

—Kapõt kukrit jakam ne gwaj te me krãptĩ:ja kadjy djwÿ kume:x prãmje. Mÿj got gwaj me kadjy nẽ? ane.

<sup>34</sup> Nhyam Jeju arkum,

—Mÿj ne ar anhõ djwÿ kute? ane. Nhyam ar kum,

—Djwÿ kubẽ 7. Tepprãredjwÿ ngrẽre, ane.

<sup>35</sup> Nhyam kam arÿm me krãptĩmã 'ã karõn kum,

—Pykabẽ dja ga me nhÿ, ane. Nhyam me kam arÿm nhÿ. <sup>36</sup> Nhyam kam arÿm djwÿ kubẽ 7 jamÿn tepprãre jamÿn o Metĩndjwÿnhmã amikĩnh jarẽ. Ne kam kokij ne mã kõt ba djwÿnh arkum kungã nhyam ar mã me krãptĩmã adjuw. <sup>37</sup> Nhyam kam me kunĩ kwÿ krẽn arÿm ajne. Nhyam kam me arÿm aũm karwãn kaxnokaikam kungij. Kungij nhyam arÿm kaxnokai ipubẽ 7 ne 'ã kãtãm. <sup>38</sup> Be, me my kubẽ 4.000 ne õ kwÿ krẽ nhyam me niremẽ me prĩre'ã akre kêt. <sup>39</sup> Nhyam kam arÿm amũ me anon kam kã'õkam nhÿ. Ne kam nox ne pykabẽ Madara'ÿr mõn 'ÿr bõx.

## 16

*Kute kãjkwa kurũm mÿjja'õ nhipêx'ã me kum à'wÿr.*

*Mat 12.39; Mak 8.11*

<sup>1</sup> Nhyam mebẽ pardjêumẽ mebẽ xadjudjêumẽ Jeju'ÿr bõx ne mrãmri kubẽ Metĩndjwÿnh Krakumrẽx jabej kum,

—Goja kãjkwa kurũm mÿjja pumũnh kêt'õ nhipêx bar omũn kõt ama, ane.

<sup>2</sup> Nhyam memã kum,

—Arÿm myt djãrmã nhyam myt ngjêx djãkam kãjkwa kamrêk. Ga me kam 'ã abenmã kum, “Dja kryrãm kãjkwa mex”, ane. <sup>3</sup> Nãr, arÿm myt katormã nhyam myt apõx djãkam kãjkwa kamrêk ne kakrã kumex ga me kam 'ã abenmã kum, “Akati



jakam dja na kumex”, ane. Me ga ne ga me amijo ajêx ne amijo Metîndjwýnh mar mex. Aje kâjkwa mex mar nâr aje kâjkwa punu mar. Mýkam ne ba me akam ar ibari mýjja pumũnh kêt kwý nhípêx ne me amã mýjja amirîto iba ga me ja mar kêt ne? Ga me omũnh kajgon amim, “Je tô mýj'ã”? anhyr kajgon mar kêt kumrêx. <sup>4</sup> Me ga akamingrânyre ne ga me ajaxwen mýjjakôt ari Metîndjwýnhbê amijo akêxo aba. Ga, me kwý kute kum prô djwýnh kînh ngriren kute mebê prôo âkînhô baja pumũ. Me gadjwý ne ga me amã Metîndjwýnh kînh ngriren ari kubê amijo akêxo aba. Ne kam me aje omũnh kadjy ije me amã mýjja pumũnh kêt nhípêx jabej. Djãm kam ije me amã ipêxmã? Kati. Ije me amã ipêx me aje omũnh prãm kêt kumrêx. Dja ba ï amijo Metîndjwýnh kukwakam ujarênh djwýnhbê Djônaj pyrâk. Dja ga me jabit pumũ, ane. Tyk ne akubyn tîn'ã ne ã Jeju memã ane. Ne kam arým mebê akêx ne mã tẽ.

*Djwý nhigot djã'ã ujarênh.*

*Mak 8.14*

<sup>5</sup> Ne kam ar imôti'ã rên akàx nhikjê mã bôx. Nhy m kôt ba djwýnh ar djwýo amak kêt katin arým Jejumã arê. <sup>6</sup> Nhy m arým me kukràdjã kajgo kôt ar amijo ba kêt kadjy arkum kabên ne arkum,

—Ga, me kute djwý nhigot djã djwý djôm kam kapînja pumũ. Nhy m arým djwý týx me:x ne. Ar gadjwý dja gar me kukràdjã man kôt ar amijo aban arým ajaxwe mex ne. Mebê pardjêu kukràdjã nâr mebê xadjudjêu kukràdjã dja gar aman kôt ar amijo aban arým ajaxwe me:x ne. Ar amijã ano týx ne me kukràdjã mar kêt ne kôt ar amijo aba kêt. Nãm ã Jeju nêje ar kukrào ane.

<sup>7</sup> Nhy m kam ar ari 'ã aben kukij ne arîk abenmã kum,

—Gwaj baje djwý byr kêt kam ne ã gwaj bamã ane, ane.

<sup>8</sup> Nhy m Jeju arým ar kabên man arkum,

—Ar aje amim imar ngri:re. Mýkam ne gar aben kukij ne abenmã kum, “Gwaj baje djwý byr kêt kam ne ã gwaj bamã ane”, ane? <sup>9</sup> Djãm ar aje mýjja mar kêt rã'ã? Mýj'ã ikabên kute amijakreja djãm aje mar kêt rã'ã? Ar akubyn amijo tẽn ije djwý kubê 5o mebê 5.000o djuw mex'ýr amijo

bôx. Mýj ne ar aje djwý janhy karwànhkam kaxnokai ipu kute n'ã kâtãm ne? <sup>10</sup> Ar akubyn amijo tẽn ije djwý kubê 7o mebê 4.000o djuw mex'ýr amijo bôx. Mýj ne gar aje djwý janhy karwànhkam kaxnokai ipu kute? Ga, djwý kume:xo ije meo djuw mexja pumũ. Djãm arým ne gar o ajamak kêt kati? <sup>11</sup> Djãm djwý'ã ne ba ar amã arê? Djãm 'ã ne ba ar amã, “Ari amijã ano týx. Kwârîk wãnh mebê pardjêu kukràdjã, nâr mebê xadjudjêu kukràdjã, kute djwý nhigot djã pyrâk kwârîk wãnh kôt ar amijo aba kêt”, ane? Kati. Djwý'ã ije ar amã ja jarênh kêt. Mýkam ne gar aje ja mar kêt? Nãm ã Jeju arkum ane. <sup>12</sup> Nhy m kam ar arým kuma. Kute Ar kubê me kukràdjã puma. Kute Ar kubê mebê pardjêumẽ mebê xadjudjêu kukràdjã puma. 'Ã ne djwý nhigot djã amijakre. Tãm ne ar arým jakam kuma.

*Pedru kute Jejumã Bẽnjadjwýrbê kumkati jarênh.*

*Mak 8.27; Ruk 9.18*

<sup>13</sup> Be, Piripi nhô krîraxbê Xedjare bu'ã ne apýnh me ô krî djãri. 'Ýr ne Jejumẽ kôt ba djwýnh ar mõi. Ar 'ýr mõi kôt nhy m Jeju arkum,

—Ë, ar imã ijã me ujarênh jarê ba kuma, ane.

<sup>14</sup> Nhy m ar arým kum,

—Nãm me kwý ajã, “Ngômã me angjênh djwýnhbê Djuão. Ta ne akubyn tîn ne ar ba”, ane. Nhy m me kwý ajã, “Me bakukãmãre Erij. Metîndjwýnh kukwakam ujarênh djwýnh raxbê Erij”, ane. Nhy m me kwý ajã, “Me bakukãmãre Djermi. Metîndjwýnh kukwakam ujarênh djwýnhbê Djermi”, ane. Nhy m me kwý ajã, “Me bakukãmãrekam Metîndjwýnh kukwakam ujarênh djwýnh ar 'õ.” Nãm me ã abenmã ajã ane. Nãm ã ar Jejumã ane.

<sup>15</sup> Nhy m ajte arkum,

—Ne ar gadjwý mã ne gar imar on? Mýj'ã ne gar ijakre? ane.

<sup>16</sup> Nhy m Pedru kum,

—Abê me inhô Bẽnjadjwýrbê kumkatibê Kritu. Abê Metîndjwýnh tîn ne ar baja Kra, ane.

<sup>17</sup> Nhy m Jeju Pedrumã kum,

—Ximão, Djônaj kra. Djâm pykakam me'ô ar ba ne amã ijarê ga ima? Kati. Kâjkwakam Ibâm ne amã ijo amirîť ga ima. Kam ne ga akî:nhkumrêx ne. <sup>18</sup> Ga ne ga imã, “Abê me inhô Bênjadjwýrbê kumkatibê Kritu. Kadjy ne Metîndjwýnh ajano ga bôx. Ga abê Metîndjwýnh tîn ne ar baja kra”, ane. Ba amã arê ga ama. Ga abê Pedru. Mrâmri, kên'ã ne anhidji amijakre. Akabên mex jakôt ne ga arým atýx ne aje kên pyrâk. Dja me akudjwa ã amim imaro ane ba arým amim me utà nhym me arým akudjwa týt kute kên týt pyrâk. Me kute amim imar kunĵa dja me týt:nhym arým Xatanaj nhô me âpênh te kute meo âpanhmã ne te kute me biknor tokry djâkam meo biknormã. <sup>19</sup> Dja ga aje mrâmri ne me'ô kute bēnjadjwýr nhô kikrekam o kajkep djào ba pyrâk. Me'ô kikre'ã kuta nhym me arým wadjâ nâr kikre'ã ijê týt ne arým mebê aptâ nhym me âr kêtumrêx. Aje me'ôja pyrâk. Dja me amim imar kêt ga arým mebê aptâ. Nhym kam kâjkwakam Ibâmdjwý arým akôt amikabên dĵin arým mebê aptân amim me utâr kêt ne ar meo ba kêt. Nâr, dja me amim ima ga memã kum, “Ajrã. Kôt ar aba”, ane nhym kâjkwakam Ibâmdjwý arým akôt amikabên dĵin memã kum, “Ajrã. Ikôt ar aba”, anen arým amim me utân ar meo ba. Nãm ã Jeju Pedrumã ane. <sup>20</sup> Ne kam amijã kôt ba djwýnh arkum karô. Metîndjwýnh ne arým mebê idjaer kadjy Jeju'ã Bēnjadjwýrbê kumkati mē. 'Ã ne me kum Kritu jarê. Nãm amijã arkum karôn arkum,

—Kwârĵk wãnh me'ômã kum, “Jejubê ne Kritu. Kubê ne me banhô Bēnjadjwýrbê kumkati”, anhýr kêt. Nãm ã Jeju arkum ane.

*Amikukãm amityk'ã ujarênh.*

*Mak 8.31; Ruk 9.22*

<sup>21</sup> Ne kam ja nhĵukri arým kôt ba djwýnh arkum,

—Krĵrâxbê Djeruxarêkam itokry kumexmã ne Metîndjwýnh ijano ba arým 'ýr itēmmã. Dja ba kam bôx nhym mebēngētmē me kadjy Metîndjwýnh mar djwýnh nhô bēnjadjwýrmē Mōjdjê kukrãdjâ mar djwýnhmē ijo bikēnh kumex nhym me arým ibĵ. Nhym ijã akatin akatin akati ba akubyn itĵn ne, ane.

<sup>22</sup> Nhym kam Pedru arým Ar kubê Jeju tēn ar kãxã nēje kum bēn týtmo krax ne kum,

—Bēnjadjwýr djwýnh, gop gē Metîndjwýnh kum akaprĵ. Djâm ga dja me abĵ? Arkati, ane.

<sup>23</sup> Nhym Jeju akēx ne Pedrumã kum,

—Arým akabên kute Xatanaj kabên pyrâk. Amũ imã akre rax ne dja. Aje Metîndjwýnh bē ijo akēx prãm pyrâk. Metîndjwýnhkôt adjumar kêt. Me kum ikĵnh kêtja kôt ne ga adjumar djâ dĵi, ane.

<sup>24</sup> Nhym kam Jeju kôt ba djwýnh arkum,

—Gêdja gar ajô mã ikôt abikamēnh prãm jabej kwârĵk wãnh amidjwýnhbit mar kêt. Dja ga amim, “Djâm ba ije amĵo ikĵnhmã? Kati”, ane. Dja ba ityk kadjy inhô pĵte'y mýn itokry:. Dja ga ijã amĵakren aje anhô pĵte'y mýnh mãn prábê amã atokry pĵma kêt ne amã ijabê rã'ã ne mã ikôt ajkamē. <sup>25</sup> Me kute amidjwýnhbit mar ne me kum tokry pĵma, me tãm gêdja me tyn kam ĵukri me biknor tokry djâkam tē. Nhym be, me kum ijabêkumrêx ne kute amidjwýnhbit mar kêt nhym me kute me bĵn jabej me tãm gêdja me amĵtân ar tĵn ne ba rã'ã: rã'ã ne. <sup>26</sup> Ne ren me'ô pykabê mýĵja mexja kunĵ, nēkrêx kunĵa ren ari o atom ne o ban kam ren ty. Je, mã dja kam nē? Kati, nãm ren ty nhym ren ô nēkrêxja ren wãnh kumex. Nhym mýĵ pãnh ne ne ren Metîndjwýnhmã arê nhym ren akubyn o tĵn nhym ren kum amĵo pãnh? Arkati. Dja te kum pãnh jarê nhym akubyn o tĵn prãm kêtumrêx.

<sup>27</sup> Ba ije amĵo inhĵ ne me'ýr irwýk dja ba Ibâm jadjēnhmē umao ĵpĵma:n me'ýr bôx. Kadjy mrãnh djwýnh pĵma:mē ro'ã me'ýr bôx. Ne kam me ĵ pýnhkôt me kunĵmã o pãnh ne. Me axwe kôt nâr me kute katât amĵo ba kôt memã o pãnh ne. <sup>28</sup> Ba ar amã arê. Ije amĵo inhĵ ne ar awýr ĵbôx. Ibâm dja ijã bēnjadjwýr rax mē. Dja ba bôx ne ĵpĵmao ar apýtân ar ar ajo ĵba. Dja gar adjãmja akwý atĵnri iraxkôt ĵpĵmũ, ar akadjy ĵbēnjadjwýr rax ne ĵpĵmakôt ĵpĵmũ. Mrâmri ne ba ikabēnja. Nãm ã Jeju arkum ane.

## 17

*Kute amĵo atemã'ã ujarênh.*

*Mak 9.2; Ruk 9.28*

<sup>1</sup> Jeju memã ane nhym kam ar'ã akati amãnhkrut ne amãnhkrut ne amãnhkrut apêx. Nhym kam Jeju arým Pedrumê Xijagumê Djuão ar aprôn aro tẽn krãnh prêkti'ã aro wabin ate ar ro'ã me kãxã dja. <sup>2</sup> Ne kam arým ar kabem amijo atemã. Ne nokre jadjênh kute myt jadjênh pyrãk. Nhym ô kubêkã arým aka:n kam adjê:nh. <sup>3</sup> Nhym kam me bakukãmãrebê Môjdjêmê Erijmê arým arkum amijo amirît ne. Ar Jejumê abenmã ujarênh dja nhym ar arým ar omũ.

<sup>4</sup> Nhym kam Pedru Jejumã kum,  
—Bênjadwýr djwýnh, jakam arým gwaj bakĩnhkumrêx. Amã kĩnh jabej dja bar ar amã kikre kryre nhipêx. Dja bar amã 'ô nhipêx ne Môjdjêmã 'ô nhipêx ne Erijmã 'ô nhipêx, ane.

<sup>5</sup> Nãm kum kabêno dja nhym kakrã jadjênh arým ar nokrekam kato. Ar nokrekam katon arým ar kuno. Nhym ar aêrbê Metĩndjwýnh kakrã kurũm kabên nhym ar kabên ma. Nhym arkum,

—Ikra ne wã. Imã abê:kumrêx. Ba kam kam ikĩnhkumrêx. Tãmwã dja gar kabên man kôt ar amijo aba, ane.

<sup>6</sup> Ar kabên ja man arým madjã kreti. Madjã kretin tu mýrbê tým ne nõ. <sup>7</sup> Nhym Jeju ar'ýr bõx ne ar kupên arkum,

—Kãjmã ar dja. Kwãrĩk wãnh ar atĩn prãm kêt, ane. <sup>8</sup> Nhym ar kãjmã rĩt nhym arým Jeju pydjibit dja nhym ar omũ. Arým ne Môjdjê ar ar aêrbê mã tẽn arým amirît kêt ne.

<sup>9</sup> Nhym kam ar arým krãnh prêkti'ã rwýk tẽ. Rwýk tẽ nhym Jeju arým arkum 'ã karõn arkum,

—Ar aje ipumũnhja kwãrĩk wãnh on me'õmã 'ã adjujarênh kêt. Ba ije amijo inhĩa ityk ne akubyn itĩnkambit dja gar 'ã ajarê, ane.

<sup>10</sup> Nhym kôt ba djwýnh ar Erij jabej Jeju kukij ne kum,

—Mýkam ne Môjdjê kukràdjã mar djwýnh memã kum, “Erij kumrêx dja bõx nhym kam Metĩndjwýnh ar meo ba”, ane? Mýkam ne me memã ja jarê? ane.

<sup>11</sup> Nhym Jeju arkum,

—Be, mrãmri, gêdja me'õ kute Erij pyrãk kumrêx bõx ne akubyn Metĩndjwýnh'ýr me kunõ akêx ne. Meo akêx nhym me arým

amim maro ba. <sup>12</sup> Ba ar amã arê gar ama. Me'õ kute mrãmri ne Erij pyrãk arým bõx nhym me kute mar kêt ne arým amikĩnhje o bikênh ba. Badjwý ije amijo inhĩa dja me ijo bikênh ba ba itokry ne, ane. <sup>13</sup> Nhym kam kôt ba djwýnh ar amim,

—Be, ngômã me angjênh djwýnhbê Djuão'ã ne ar imã ane, ane.

*Me karõ punumã àkjêr.  
Mak 9.14; Ruk 9.37*

<sup>14</sup> Kam Jeju ar arým krãnh'ã rwýk tẽ. 'Ã rwýk tẽ:n arým me krãptĩja'ýr bõx. Nhym kam me'õ 'ýr bõx ne parbê kõnkrão nhýn <sup>15</sup> kum,

—Bênjadwýr djwýnh, amã ikra kaprĩ. Ikra ibê tyk ar ban amijo bikênh krãptĩ. Nãm mã tyn kuwykam rôrõk ne ngõkam nox. <sup>16</sup> Nã bãm akôt ba djwýnh ar'ýr o bõx nhym ar te kute o mexmã o ane, ane.

<sup>17</sup> Nhym kam Jeju me'ýr akêx ne memã kum,

—Je, me akamingrãny aje amim ikamnhĩx kêtumrêx ne ajaxwe. Mýj dja ijã akati, akamãt kô kute ba me akam arek ar iba? Nã bãm me awýr bõx ga me ajamakkre kêtumrêx ne prĩne akabêno ikaty. Nã bãm te amiwýr me akam ama ga me arĩk ar aba, ane. Ne kam bãmjamã kabên ne kum,

—Amrê akrao tẽ, ane. <sup>18</sup> Nhym arým 'ýr o tẽn o bõx nhym Jeju arým kum akij. Me karõ punu kute kra bõktio bajamã akij nhym arým kum iren kurũm katon mã tẽ. Nhym arým myt tãmkam mex ne.

<sup>19</sup> Nhym kam Jeju tẽn ate dja nhym kôt ba djwýnh ar arým 'ýr bõx ne kum,

—Mýkam ne bar te: ije me karõ punu kujaêkmã o ane? ane.

<sup>20</sup> Nhym Jeju arkum,

—Djãm ar aje kujaêk kadjy tu amim Metĩndjwýnh kamnhĩxkumrêx? Kati. Ar aje kadjy tu amim kamnhĩxkumrêx kêt. Dja gar tu amim kamnhĩxkumrêx. Be, me kute tu amim Metĩndjwýnh kamnhĩxkumrêxkam me kute rerekre pyrãk. Ga, pidjõbê motadu 'ydwý ngri:ren rere:kreja pumũ. Nhym be, kati. Motadu 'y arým krekam ingrõt ne abatãnh ne kam arým abatã:nh ne. Ar gadjwý dja gar tu amim Metĩndjwýnh kamnhĩxkumrêx ne kam kute arerekre pyrãk nhym arým ar amã mýjja jabatãnh

nhipêx. Kute mỳjja rũnh kunĩ nhipêx mar. Gar ren kadjy tu amim Metĩndjwỳnh kamnhĩxkumrêx ne ren krãnhjamã kum, “Krãnh, amũ ajkamẽ”, ane nhym ren arỳm amũ ajkamẽ. Djã ne gar ren te aje mỳjja 'õo anhỹrmã? Kati. Ne gar ren apỳnh mỳjja kadjy tu amim Metĩndjwỳnh kamnhĩxkumrêx nhym ren arỳm ar amã ipêx ne. Nhym be, kati. Ar aje tu amim kamnhĩxkumrêx kêt. Mrãmri ne ba ar amã ja jarẽnhkumrêx. <sup>21</sup> Nhym be, me karõ punu kute bõktio baja mebê tỳ:x. Me kute Metĩndjwỳnhmã o à'wỳr ne kum amijajburkambit arỳm apõx. Nãm ã Jeju arkum ane.

<sup>22</sup> Nhym kam ar arỳm pykabê Garrêjakam ar ba. Nhym kam Jeju arkum,

—Ba ije amijo inhĩ dja me'õ ibê amijo akêx ne memã ikanga. <sup>23</sup> Nhym me kam arỳm ibĩ. Nhym ijã akatin akatin akati ba akubyn itĩn, ane. Nhym kam kõt ba djwỳnh ar arỳm kaprĩre ne.

*Pi'òk kaprĩo atom djwỳnh'ã ujarẽnh.*

<sup>24</sup> Nhym kam ar krĩraxbê Kapana'ỳr tẽn 'ỳr bõx. Nhym kam pi'òk kaprĩo atom djwỳnh ar ba. Ar kute Metĩndjwỳnh nhõ kikretio mex kadjy pi'òk kaprĩo atomo ba. Ne kam ar Pedru'ỳr bõx ne Jeju jabej kukij ne kum,

—Djãm ar anhõ ujarẽnh djwỳnh kute Metĩndjwỳnh nhõ kikreti kadjy memã pi'òk kaprĩ nhõrmã? ane.

<sup>25</sup> Nhym arkum,

—Nà. Dja ar amã kungã, ane. Ne kam kikremã wadjàn Jeju'ỳr bõx ne amikabẽn mar tõtãm nhym Jeju kumrêx kum,

—Ximão, mỳj ne ga kam mar on? Mỳj xêbê gêdja pykakam me bẽnjadjwỳr pi'òk kaprĩo atomo ba? Pi'òk kaprĩbê ipõxuo atom nàr pi'òk kaprĩbê kributuo atom. Mỳj xêjabê dja o atom? Djãm ta kra Ar kubê dja o atom nàr djãm õ àpẽn kadjobê o atom? ane.

<sup>26</sup> Nhym Pedru kum,

—Õ àpẽn kadjobê dja pi'òk kaprĩo atom, ane.

Nhym Jeju kum,

—Mrãmri, õ àpẽn kadjobê dja o atom. Kute kra Ar kubê pi'òk kaprĩo atom kêt.

<sup>27</sup> Bir be, gu babê Metĩndjwỳnh kra. Kam Metĩndjwỳnh gu babê pi'òk kaprĩo atom

kêt. Gê te gu babê pi'òk kaprĩ byr kêt gu ba dja gu tu o atom djwỳnh arkum kungã. Metĩndjwỳnh nhõ kikreti kadjy o atom djwỳnhmã kungã. Gwaj ren arkum õr kêt nhym ren me abenmã gwaj bajã kabê:n ne. Aje, imõt'i'ỳr dja ga tẽn 'ỳr bõx. Ne kam kum anhõ kadjat mẽ. Dja tep'õ kumrêx 'ã wajêt ga o wabin abyn ajkwa põt. Ajkwakam dja ga ngõnhponho pi'òk kaprĩ pumũ. Tãm dja ga aby gu amikadjy arkum kungã, ane. Nhym kam arỳm ã anen arỳm arkum kungã.

## 18

*Ar kute amirax jabej Jeju kukjêr.*

*Mak 9.33; Ruk 9.46; Pir 2.3; Ped k 5.5*

<sup>1</sup> Nhym kamã kõt ba djwỳnh 'õdjwỳ ar 'ỳr bõx ne kukij ne kum,

—Kàjkwakam Bẽnjadjwỳr djwỳnh kute pykakam amim me utàr ne ar meo bakam nhỹnh ar ijõ dja bar iraxo aben jakre? ane.

<sup>2</sup> Nhym amiwỳr me'õ prĩre 'uw nhym 'ỳr bõx nhym ar ipõkri kudja. <sup>3</sup> Ne arkum,

—Dja gar on amirax jabejja kangan amijo angriren amijo akåtãm. Amijo angrire kute me prĩre pyræk. Godja gar amirax jabej rã'ã djãm kàjkwakam Bẽnjadjwỳr djwỳnh kõt ar abamã? Kati. Kàjkwakam Bẽnjadjwỳr djwỳnh kute pykakam amim me utàr ne ar meo bakam kõt ar abã prãm kêtumrêx. Mrãmri ne ba ar amã ja jarẽnhkumrêx. <sup>4</sup> Kam me kute amijo ngrire kute me prĩre ja pyræk tãm ne raxo kute me kunĩ jakrenh. Kàjkwakam Bẽnjadjwỳr djwỳnh kute pykakam amim me utàr ne ar meo bakam ne raxo kute me kunĩ jakrenh.

<sup>5</sup> Nhym kam me kute ikukwakam kum me prĩre kute ja pyræk kĩnh, kum me'õ kåtãmja kĩnh ne kam arỳm badjwỳ kum ikĩnh.

<sup>6</sup> Nhym be, me'õ kute me prĩre pyræk ne ajbir kute amim imar ny nhym kam ren ate me'õja axwe'ã kum apnê nhym ren arỳm kõt axwe nhym kam ren pãnh me mut'ã kẽnpoti nhõ, kute kum axwe'ã àpnẽn djwỳnhja mut'ã ren kẽn jabatàn nhõ ne ren ngõnhmã kumẽ, ngõ jabatàn nhipõkri kumẽ nhym ren ngõ kubĩ. Ja ne kàjbê tokry. Tokry ngrire. Nhym be kati, dja prĩne Metĩndjwỳnh o ajkê nhym tokry ra:x ne. <sup>7</sup> Ý, watĩ:re. Pykakam me kute

me axwe'ã memã àpnênhja dja me tokry ra:x ne. Mrãmri dja me axwe'ã memã àpnênh ba. Nhyim be, kute 'ã memã àpnênh djwýnhja watí:re. Dja tokry ra:x ne. Nãm ã Jeju arkum ane.

<sup>8</sup> Ga, me kute apýnh amikukràdjào àpênh jaxwe prãmja pumũ. Ar kute àpênh jaxwe krã'yrn kangamã ne Jeju Ar kubê axwe pyman arkum,

—Ne ga ren ar ajaxwe kadjy anhkra nhikjêo aje mýjja punu kupênh prãm nàr ar apar nhikjêo mýjja punu'ýr amrãnh prãm mýj ne gar ren on? Bir, ga ren ar on krãtan rũm amibê amẽ. Ne ren kam te anhkra nhikjê kêt nàr apar nhikjê kêt ne ren atĩnkam ren akĩnhkumrẽx. Metĩndjwýnhkôt atĩn ne ar abakam ren akĩ:nhkumrẽx. Ne ren aktã anhkra rã'ã nàr aktã apar rã'ã nhyim Metĩndjwýnh ren kuwykam ar amẽ. Kuwy pôk rã'ã: rã'ãkam ren ar amẽ gar ren kam atokry ra:x ne.

<sup>9</sup> Ne gar ren ajaxwe kadjy ano nhikjêo aje mýjja punu pumũnh prãm mýj ne gar ren on? Bir, ga ren ar on kaban rũm amibê amẽ. Ne ren kam te ano nhikjê kêt ne ren atĩnkam ren akĩnhkumrẽx. Metĩndjwýnhkôt atĩn ne ar abakam ren akĩ:nhkumrẽx. Ne ren aktã ano rã'ãn ren atokry ra:x ne. Ne ga ren ar me biknor tokry djakam kuwykam tẽn ren kam akaprĩkumrẽx, ane. Djãm mrãmri ne ar kute aminoo pôx ne aminhkra krãkàr ne amipar krãkàrmã Jeju arkum 'ã karõ? Kati, ar kute àpênh jaxwe krã'yrn kangamã ne Jeju 'ã arkum ar kute amibê amikukràdjã krãkàrmã arẽ.

*Mrykĩ'ãtomti biknor'ã ujarênh.*

*Ruk 15.4*

<sup>10</sup> Ne kam ajte arkum,

—Me'õ kute me prĩre pyrãk djãm ar amã kurên aje kum kajgo jarênhmã? Kati. Kwãrĩk wãnh. Mýkam? Bir, djãm kajgo? Kati. Mýkam? Bir, kadjy mrãnh djwýnh kute me prĩreo djuw mex djwýnhja ne kute kãkwakam Ibãm pumũnh rã'ãkam. Ba ne ba ar amã ja jarẽ.

<sup>11</sup> Be, ije me axwe pytãrmã ne ba tẽ. Kadjy ne ba amijo inhĩ ne me awýr ruw, ije me axwekam me biknorja pytãrmã. <sup>12</sup> Ar gadjwý dja gar adjukaprĩ. Godja me'õ nhõ mrykĩ'ãtomti krãptĩ kubê 100 nhyim kam

pydji kubê màt ne biknorja. Mýj dja me'õja on? Bir, dja mry krãptĩbê 99jamã ire gẽ wãnh kutêp kumex, nhyim kam krãnh'ýr kôt tẽ, pydji biknorjakôt tẽ. <sup>13</sup> Godja kum kator jabej ne kam arým kĩ:nhkumrẽx. Kute pydji biknorjamã katorkam dja kĩ:nhkumrẽx. Ne mry'ã kàtambê 99 biknor kêtjakam dja kĩnh ngrire. Ba ne ba mrãmri ar amã ja jarênhkumrẽx. Be, ije ar amã idjujarênhjakam mýj dja gar kam ama? <sup>14</sup> Bir, kãkwakam Abãm djwýnhdjwý, djãm me'õ prĩre kute ãnja pyrãk pydji biknor nhyim kam kĩnh got? Arkati. Kam kĩnh kêtumrẽx. Ukaprĩkam kam kĩnh kêtumrẽx. Tãm dja ga amim aman kudjwa adjukaprĩ. Nãm ã Jeju arkum ane.

*Kute me'õ jaxwe'ã arkum karõ.*

*Ruk 17.3; Gar 6.1; A Tex 3.15*

<sup>15</sup> Ne kam ajte arkum,

—Kam, aje me'õo akamy'õ godja ajo bikênh jabej ne arým axwe jabej. Ga dja ga adjukaprĩn akumrẽx 'ýr tẽn me kãxã kukjan kum akabên. Godja kute amar ne axwemã irer jabej ga ne ga arým Metĩndjwýnh'ýr o akẽx nhyim ajte kôt ba. <sup>16</sup> Nhyim godja kute amar prãm kêt ne mã axwe jabej. Kam dja ga me'õ pydji nàr amãnhkrut 'ýr aro tẽn. 'Ýr aro tẽn 'ýr aro bõx. Ne kam kukjan kum akabên gẽ ar amã amijarẽ gar ama. Gar ajamãnhkrut nàr ar ajamãnhkrut ne ikjêkêt dja gar arým ama. Amrêbê: Metĩndjwýnh kabên kôt dja gar ã maro ane. Nãm me bakukãmãremã kum, “Dja me'õ amijarênh jabej. Gẽ ar amãnhkrut nàr ar amãnhkrut ne ikjêkêt kabên kôt memã arẽ.

Ar kute kabên mar kôt arẽ nhyim me arým kuma. Ar axikôt kabênkam dja me ar kabên man arým abenmã kum,

‘Mrãmri me'õja kute amijarênh nhyim ar kute kabên kôt arênhkumrẽx’, ane. Dja me ã abenmã ane.”

Nãm ã Metĩndjwýnh me bakukãmãremã ane. Metĩndjwýnh kabên jakôt dja gar ajamãnhkrut ne ikjêkêt ne me'õja'ýr tẽn 'ýr bõx ne ama. <sup>17</sup> Godja gar gadjwý te kukjan kum akabên nhyim kute ar amar prãm kêt ne mã axwe prãm jabej gar me kute amim imarjamã arẽ. Me kute aben pydjikam memã arẽ. Nhyim godja me kute

amim imar aben pydjikam te kukjan kum kabên nhym kute me mar prâm kêt ne mã axwe prâm jabej gar abenmã kum, “Kute Metîndjwýnh mar kêt. Ga, axwe prâm rá'ãja pumũ”, ane. Dja gar ã abenmã anen arým o kute me bēnjadjwýr bajtemmã pi'ók kaprîo atom djwýnh jaxwe pyræk. Nãm ã Jeju arkum ane.

<sup>18</sup> Ne kam ajte arkum,

—Ba ar amã arê gar ama. Dja me amim imar kêt gar mebê aptà nhym kàjkwakam Ibãmdjwý dja ar akôt amikabên dji. Nàr, dja me amim ima gar memã kum, “Ajrã”, ane, kàjkwakam Ibãmdjwý dja ar akôt amikabên dji. Mrãmri ne ba ar amã ja jarēnhkumrēx.

<sup>19</sup> Ba ajte ar amã arê gar ama. Godja gar ajamānhkrut pykakam kum mýjjao a'uw nàr kum me'õo a'uw ne axikôt 'ã ar akabên dji, kàjkwakam Ibãm dja arým ar aman ar akabên kôt ã anen ar amã mýjja ngã nàr me'õ kaprîmã kînh jadjàn nàr me'õo mex. Ar akabên kôt dja ã ane. <sup>20</sup> Mýkam? Bir, godja me'õ ar amānhkrut nàr ar amānhkrut ne ikjêkêt ikabēnkôt bikprōnh jabej badjwý dja ba ar ro'ã akuprō. Kam dja Ibãm ar akabên kôt ã ar amã o ane. Nãm ã Jeju arkum ane.

*Me'õ ukapri kêt'ã ujarēnh.*

*Mat 6.14; Ruk 17.4; Ep 4.32; Kor 3.13*

<sup>21</sup> Kam, Pedru Jeju'ýr bōx ne kum,

—Ije me'õo ikamy godja ari ikam axweo ba jabej. Mýj dja ba kam ingyryk kêt on? Djãm kam ingyryk kêt 'ikrân ne kubê 7? Nàr kon? ane.

<sup>22</sup> Nhym Jeju kum,

—Kati. Dja ga kam angryk kêt ry typdji. Dja ga kam angryk kêt bē 70 ne ajte kubê 70 ne ajte kubê 70 ne ajte kubê 70 ne ajte kubê 70. Dja ga ã kam angryk kêt ry typdjio ane.

<sup>23</sup> Kàjkwakam Bēnjadjwýr djwýnh dja pykakam amim me utàn ar meo ba. Kam dja kum me kaprî. Gwaj badjwý ne gwaj ren bamã me kaprî. 'Ã dja ba idjujarēnh jakre gar ama. Pykakam bēnjadjwýr rax'õ. Nhym ò àpēnh kwý. Amrēbê ne bēnjadjwýr ò àpēnh kwýmã pi'ók kaprî ngã nhym ar kum o ba. Nhym jakam arým kute akubyn Ar kubê ò pi'ók kaprîo atommã.

<sup>24</sup> Ne kam kute amikraxmã ne arým 'ýr

me àpēnh'ã me omũnh djwýnh jano. Ò àpēnh ja'ýr me àpēnh'ã me omũnh djwýnh jano. Nhym 'ýr tēn arým 'ýr bōx. Ne kam bēnjadjwýr'ýr ò àpēnhjao tēn o bōx. Be, amrēbê ne bēnjadjwýr ò àpēnh jamã pi'ók kaprî kumex ngã nhym kum o ba. Pi'ók kaprî kume:x kubê 10.000 ne kum kungã nhym o ba. Kum ar o ba:n arým nhýnh o akno nhym arým pi'ók kaprî kêt ne.

<sup>25</sup> Ò me àpēnh'ã me omũnh djwýnh bēnjadjwýr'ýr ò àpēnhjao bōx nhym te kute akubyn ò bēnjadjwýrmã pi'ók kaprî nhōrmã. Te o ane nhym arým kam ngryk ne. Ngryk ne arým ò me àpēnh'ã me omũnh djwýnhmã kum, “Inhō àpēnh ja ne ibê inhō pi'ók kaprî kume:x ar o ban nhýnh o akno. Gu akubyn kubê inhō pi'ók kaprî byrkumrēx. Dja ga kubê ò mýjja kunî byn me kâtammã angã gē me kubyn pānh amã pi'ók kaprî ngã. Nhym ò mýjja kêt ga ajte me kâtammã ta ï djwýnh ngã gē memã àpēnh ar ba nhym me pānh arým amã pi'ók kaprî ngã. Ga kam ajte memã prōmē kra ar kungã gē ar memã apē nhym me pānh arým amã pi'ók kaprî ngã. Kam dja ga me kute amã pi'ók kaprî nhōr kunîo atom ne iwýr o bōx ne imã angã. Ba kam arým akubyn inhō pi'ók kaprî byrkumrēx. Inhō àpēnhja kute ibê pi'ók kaprîo biknor pānh dja ba arým akubyn amim byrkumrēx”, ane nhym me àpēnh'ã me omũnh djwýnh kum, “Gē tô, ba 'ýr”, ane.

<sup>26</sup> Nhym ò àpēnhja arým ò bēnjadjwýr kabên man umaje parbê tým ne kōnkrão nhýn aminêje kum, “Bēnjadjwýr, gop adjy amimar tô. Dja ba ï akubyn anhō pi'ók kaprî pānh amã pi'ók kaprî kunî ngã”, ane.

<sup>27</sup> Nhym bēnjadjwýrja arým kum ò àpēnhja kaprî: ne kum, “Aje, jakam dja ga imã o pānh kêt. Arým ba maro aknon akam ingyryk kêt”, anen arým kum ire nhym kato.

<sup>28</sup> Kute ò bēnjadjwýrbê pi'ók kaprî ra:xo biknor ja katon arým ro'ã àpēnh'õ jabej. Amrēbê ro'ã ar baja jabej. Bēnjadjwýr nhō àpēnh ja ne amrēbê ro'ã àpēnh jamã pi'ók kaprî ngrire kubê 100bit ngã nhym kum kubyn ar o ba. Nãm ro'ã àpēnhja jabe:j ne arým kum kato. Kum katon arým mut 'amýn òkreny janên kum, “Aje imã pi'ók kaprîo abaja on akubyn imã angã”, ane.

<sup>29</sup> Nhyim ro'ã àpênhja arým umaje parbê tým ne kônkrão nhỹ. Nhỹn arým aminêje amijo a'uw ne kum, “Adjy amimar tô. Dja ba ï amã kunĩo pãnh”, ane. <sup>30</sup> Nhyim kute bënjadwýrbê pi'ók kaprĩ kumexo biknorja arým ro'ã àpênhkam ngry:k ne. Ne kum kaprĩ kêt ne kum, “Kati. On dja ga imã kunĩo pãnh ne”, ane. Ne kam on krākamngônhmã arê nhyim me arým kabênkôt kubê ijê. Kute mebê ijê djakam ãm ne o pãnhkambit katormã ne me kubê ijê. Nãm ã ro'ã àpênho ane. On kute kum ò pi'ók kaprĩ ngrirebato pãnh kêtka ã ro'ã àpênhja o ane.

<sup>31</sup> Nhyim kam amũ bënjadwýr nhõ àpênh kwý 'òdjwý arým 'ã omũn kam ar arým kam kaprĩ:re ne. Ukaprĩ kêtka arým kam kaprĩ:re ne. Ne kam bënjadwýr'ýr tẽn arým prĩne kum 'ã ajarê. Ò àpênhja kute kubê pi'ók kaprĩ kumexo biknorja'ã kum ajarê. Ukaprĩ kêt'ã kum ajarê.

<sup>32</sup> Nhyim kam bënjadwýr amiwýr ò àpênhja 'uw nhyim bõx nhyim kum, “Inhõ àpênh, ga ne ga ajaxwe:. Ga inhõ pi'ók kaprĩ kumexo aban ibê o akno ba amã, 'Imã o pãnh', ane. Ga te aje imã o pãnhmãn arým aminêje imã akabên. Ba imã akaprĩn arým amã, 'Aj. Jakam dja ga imã o pãnh kêt. Arým ba maro aknon akam ingyryk kêt', ane. Imã akaprĩkam ne ba ã akam ingyryk kêt o ane. <sup>33</sup> Ga ren ikudjwa ã amã aro'ã àpênhja kaprĩo anen kam ren ã ingyryk kêt o ane. Nhyim be, kati. Aro'ã àpênh ja amã anhõ pi'ók kaprĩ ngrirebato ba. O ba ga kam anhõ pi'ók kaprĩ jabej kum akabên. Nhyim kam te kute akubyn amã òrmãn aminêje amã kabên. Djã ne ga ikudjwa amã kaprĩ? Kati. Ga tu kam ingyryk ne memã kanga nhyim me arým kubê ijê.” Nãm ã bënjadwýr ò àpênhjamã ane. <sup>34</sup> Ne kam arým kam ngrykkumrêx ne. Bënjadwýr nhõ àpênh kute ro'ã àpênhkam ingyryk ne kum kaprĩ kêtja pãnh ò bënjadwýr arým kam ngrykkumrêx ne. Ne kam arým me kamjêr djwýnhmã kanga. Kute tokry kumexmã kamjêr nhyim on kute o pãnh mex kadjy kum kanga. Nãm ã o ane. <sup>35</sup> Ne kam ar gadjwý, apýnh ar anhĩ djari, godja ar aje me'õo akamyja ar akam axwe jabej ar ga dja gar amã kaprĩ. Mrãmri tu amã

kaprĩkumrêx ne axwe maro aknon tu kam ingyryk kêt. Godja gar amã kaprĩ kêt ne kam ingyryk rã'ã jabej kãjkwakam Ibãmdjwý dja kum ar akaprĩ kêt ar akam ngry:k ne. Ije ar amã pykakam bënjadwýr'ã idjujarênhja kôt dja ar akam ngry:k ne.

## 19

*Me kute prõ kanga'ã ujarênh.*

*Mat 5.31; Mak 10.1; Ruk 16.18; Kô k 7.10*

<sup>1</sup> Jezu arkum ja jarênh pan arým pykabê Garrêja kurũm katon tẽn. Nãm tẽn: n arým ngôbê Djodão nhikjê mã rên pykabê Djudêja'ýr bõx. <sup>2</sup> Nhyim me krãptĩ: ne me kôt mõ. Nhyim tẽn bõx ne kam arým kam meo mexo dja.

<sup>3</sup> Nhyim kam mebê pardjêu 'ýr bõx ne kute we kabên kajgo jabej kukjêrmã ne kum,

—Djãm Metĩndjwýnh kukrãdjã kôt me kute myjja ngrirekôt tu prõ kangamã? ane.

<sup>4-5</sup> Nhyim memã kum,

—Adjakamã ne myjja kunĩ nhipêx djwýnh mymẽ ni ar ipêx ne memã kum,

“Kam dja me my prõ kadjy arým bãmmẽ nã arkum iren kam arým prõbit'ã ngrã ne.

Nhyim kam ar ï abenã tým ne kam kute ï typdji pyrãk”, ane.

Djãm ar aje anhõ pi'ókka ja pumũnh kêt?

<sup>6</sup> Djãm ar ï amãnhkrut rã'ã? Kati, ar kute ï typdji pyrãk. Be ga, Metĩndjwýnh kute abenã ar mênhja pumũ. Kwãrĩk wãnh me'õ abenbê aro bikjêr kêt. Nãm ã Jezu mebê pardjêumã ane.

<sup>7</sup> Nhyim me kum,

—Mýkam ne me bakukãmãre Mõjdjê memã 'ã karõn memã kum,

“Gê me prõ'ã pi'ók no'ók ne kam kanga”? ane.

Mýkam ne Mõjdjê ã memã ane? ane.

<sup>8</sup> Nhyim memã kum,

—Bir, me amakkre kêtka ne memã prõ kanga jarê. Nhyim djãm adjakamã ne me ã prõo ane? Kati. <sup>9</sup> Ba dja ba ar amã arê gar ama. Gêdja me'õ prõ djwýnh kangan kam atemã akãxbê me'õmã kabên ne kam 'ýr mõn kam arým mrãmri krõ'ã o prõn arým axwekumrêx. Nhyim be, prõja krõ'ã mjênkambit nhyim myja kute kangakam axwe kêt. Nhyim kam godja atemã me'õ

my jadjwÿ arÿm prô kangaja'ÿr môr jabej. 'ÿr mörkam arÿm o akîn ajte adjwÿnhdjwÿ axwekumrêx. Nãm ã Jeju memã ane.

<sup>10</sup> Nhy m kôt ba djwÿnh ar kum,

—Djã nãm ã me prökam ane? Nãm ren me kum amijã man ren kam kuprÿn ar ba, ane.

<sup>11</sup> Nhy m arkum,

—Be, me kwÿ kukràdjã kôt ne aje arênhja. Me kwÿ tÿxkam ne me kum amijã ma. Me jabit ne me prô kêt. Nhy m be, me kwÿ ne me tÿx kêt ne kam kum amijã ma kêt ne arÿm prô'ÿr mō. <sup>12</sup> Nhy m be, me nã tikkrekam ne me kwÿ amijo ajkê. Me nire kadjy kukràdjã amijo ajkên kam kurê kêt ne. Nhy m irãri me me kwÿo ajkê nhy m kam me kurê kêt ne. Nhy m me kwÿ kute kàjkwakam Bênjadjwÿr djwÿnh'ã nopdji kadjy ta kum amijã ma. Kum amijã man arÿm kum me nire kÿnh kêt ne. Dja gar amã amijã ma kadjy atÿx jabej amã amijã man amã me nire kÿnh kêt. Nãm ã Jeju arkum ane.

*Kum me prÿre kÿnh'ã ujarênh.*

*Mak 10.13; Ruk 18.15*

<sup>13</sup> Nhy m kam me arÿm 'ÿr me prÿreo bōx. Kute me'ã ikra jadjwÿr ne Metÿndjwÿnhmã meo à'wÿr kadjy ne me Jeju'ÿr meo bōx nhy m kôt ba djwÿnh ar arÿm nêje memã bën tÿx.

<sup>14</sup> Nhy m Jeju arkum,

—Kwãrÿk wãnh arek amrê me prÿre iwÿr mō, ane. Kwãrÿk wãnh mebê adjaptàr kêt gè me arek amrê mō. Me kute amijo me prÿre pyrãk ne amijo kàtàmjabit gèdja kàjkwakam ìbãm me utàn me kadjy bēnjadjwÿr ne ar meo ba, ane. <sup>15</sup> Ne kam arÿm me prÿre'ã ikra jadjuw. Ne kam arÿm mã me kurũm tē.

*Me'ō nêkrêx kumex'ã ujarênh.*

*Mak 10.17; Ruk 18.18; Xij 5.2*

<sup>16</sup> Tē: nhy m me'ō 'ÿr bōx ne kum,

—Ujarênh djwÿnh, ga ne ga amexkumrêx. Mÿj dja ba Metÿndjwÿnhmã amijo ne gêt kôt itÿn ne ar iba rã'ã: rã'ã ne? ane.

<sup>17</sup> Nhy m kam kum arê. Kute Jejubê Metÿndjwÿnh Kramã kator kadjy ne Jeju arÿm kum,

—Mÿkam ne ga mÿjja mex jabej ikukij? Me'ō pykakam mex kêtumrêx. Metÿndjwÿnh pydjibit mex. Metÿndjwÿnh

me katàt kute amijo ba'ã memã karökôt kukràdjã dja ga aman kôt ar amijo aban kam arÿm kôt atÿn ne ar aba rã'ã: rã'ã ne, ane.

<sup>18</sup> Nhy m kum,

—Nhÿnh kukràdjãkôt dja ba amijo iba? ane.

Nhy m kum,

“Kwãrÿk wãnh me par kêt.

Kwãrÿk wãnh mebê prôo adjãkÿnh kêt.

Kwãrÿk wãnh adjãkÿnhÿ kêt.

Kwãrÿk wãnh ajêx ne me kãmex jarênh kêt.

<sup>19</sup> Amã abãmmê anã jabên ar kabên ma.

Amã amibu'ã me ja jabê. Kute mrãmri ne ga amã amijabêja pyrãk dja ga ã amibu'ã amã me ja jabêo ane”, ane.

Metÿndjwÿnh kute me bakukãmãremã 'ã karökam kabênja dja ga aman kôt katàt amijo aba ne kam atÿn ne ar aba rã'ã: rã'ã ne. Nãm ã Jeju kum ane.

<sup>20</sup> Nãm me'ōja ajbir abatàn ne. Nhy m Jeju kum ane nhy m kam kum,

—Nà, arÿm ne ba ja kunÿ man kôt katàt ar amijo iba. Ibòktikam ne ba kôt katàt amijo iban kam kôt ije katàt ar amijo iba rã'ã. Mÿj dja ba ajte nèn kam itÿn ne ar iba rã'ã: rã'ã ne? ane.

<sup>21</sup> Nhy m Jeju kum,

—Be, prÿne amex kadjy on tèn memã anhō mÿjja wã ngãn pãnh pi'òk kaprÿ byn me 'uwti, me ò mÿjja kêtjamã angãn o meo kÿnh ne kam amrê iwÿr tèn mã ikôt ajkamê. Dja ga ã anen kam arÿm kàjkwakam anhō mÿjja mex kumex, ane.

<sup>22</sup> Nhy m arÿm kuman kam akêx ne mã tē. Kaprÿ:re ne tē. Be, ò nêkrêx ne kume:x. 'Ã maje ne mã kaprÿ:ren tē.

<sup>23</sup> Nhy m Jeju arÿm kôt ba djwÿnh arkum,

—Nêkrêx ne kute me kukrà prãmã. Me ò nêkrêx kumex gèdja me te kàjkwakam Bēnjadjwÿr kute amim me utàr ne ar meo baja'ÿr bōxmã. Mrãmri ne ba ar amã arênhkumrêx. <sup>24</sup> Ba ajte ar amã arê gar ama. Be, ga mry jabatànhebê kameru te: kute aguja tekrax kremã ngjêxmãja pumũ. Me ò nêkrêx rÿnhdjwÿr kute uràk. Nãm me te Metÿndjwÿnh kute amim me utàr ne ar meo baja'ÿr bōxmã nhy m nêkrêx utà: ne, ane.

<sup>25</sup> Kôt ba djwÿnh ar kute ja markam te kute marmã kam no tyn ku'ên arÿm abenmã kum,



—Je nhym mỳj me'õ gêdja Metĩndjwỳnh amim me utà? ane.

<sup>26</sup> Nhym Jeju arỳm ar omũho djan arkum,

—Be, me ne me te: kute amipytār prāmje. Nhym be, Metĩndjwỳnh kute mỳjja kunĩ mar. Kumābit ne amirĩt ne. Ta ne kute me utār kôt kute mar, ane.

<sup>27</sup> Nhym kam Pedru kum,

—Ē, arỳm ne bar inhõ mỳjja kunĩmā inhiren kam mā akôt ajkamē. Mỳj dja bar pānh kubyn o aminhõ? ane.

<sup>28</sup> Nhym Jeju arkum,

—Ba ar amā arē gar ama. Ar ga ne gar arỳm mā ikôt ajkamē. Amrē mỳjja kunĩ ny mōrkam dja ba ipyma. Ije amijo inhĩ dja ba imexo ipyma:n ikrĩ dja raxkam memā nhỹ. Ar gadjwỳ, ikôt ar abaja dja gar apỳnh anhĩ djari ar abēnjadjwỳr rũnh ne akrĩ dja rũnhbē 12kam memā akrĩ. Apỳnh mebē idjaer ba djari kubē 12 dja gar memā akrĩ, memā axwe pānh jarēho akrĩ. Mrāmri ne ba ar amā ja jarēnhkumrēx.

<sup>29</sup> Kam godja me'õ imā àpēnh kadjy arỳm õ mỳjjamā irer jabej nār õbikwamā irer jabej. Õ kikre nār kamy nār kanikwỳnh nār bām nār nā nār prõ nār kra nār õ pykamā irer jabej. Godja arỳm õ mỳjja ja'õmā irer jabej ba dja ba kum o pānh ra:x ne pānh kum õ mỳjja akrenh mex ne kum kungā ne pānh kum õbikwao akrenh mex ne kum kungā. Kum õ mỳjjamē õbikwamē krāptĩ: kubē 100 ngā. Nhym kam arỳm Metĩndjwỳnh kôt tĩn ne ar ba rā'ā: rā'ā ne. <sup>30</sup> Nhym be, jakam me rũho kutewaja djām me kute memā wa rā'āmā? Kati. Me ja krāptĩ gêdja me kajgo mex ne me katē tē. Nhym be, jakam me kajgo mex ne me katēn tēmja krāptĩ gêdja me pānh rũho kutewa. Nām ā Jeju kôt ba djwỳnh arkum ane.

## 20

### *Pidjôkôkam me àpēnh'ã ujarēnh.*

<sup>1</sup> Ne kam ajte arkum,

—Kajkwakam Bēnjadjwỳr djwỳnh kute pykakam amim me utār ne ar meo bakam dja memā o pānh. 'Ā dja ba õ pidjôkô djwỳnh jakren 'ã ajarē gar ama. Õ pidjôkô djwỳnh ne kry:rām aminhũrkwā kurũm kato. Ne tē:n me abej. Kute õ pidjôkôkam

kum àpēnh kadjy me abej. <sup>2</sup> Ne kam ar ja'yr bôx ne arkum, “Dja ba ar adjapēnh pānh apỳnh ar anhĩ djari ar amā pi'ók kaprĩ pỳnh ne kungā”, ane. Nhym ar kum, “Mrāmri”, ane. Nhym arỳm amũ õ pidjôkômā ar ano nhym ar arỳm 'yr tē. 'Yr tēn 'yr bôx ne kam arỳm àpēnh 'amỳ.

<sup>3</sup> Nhym kam arỳm kàjmā myt nhỹrbē 9 ora nhym õ pidjôkô djwỳnh ajte kato. Katon arỳm amũ me kute mỳjja nhõr djabē mekadukam tēn bôx. Nhym ar ja àpēnh kêt ne dja nhym arỳm ar omũ. <sup>4</sup> Ne ar'yr bôx ne arkum, “Ē, ar gadjwỳ inhõ pidjôkôkam tēn apē. Dja gar apē ba arỳm ar amā o pānh katāt”, ane. <sup>5</sup> Nhym ar arỳm kabēn kôt amũ 'yr tēn 'yr bôx. Ne kam àpēnh 'amỳ.

Nhym kam mēdjikkam ajte katon tēn ajte tām ne àpēnh'yr me kwỳ 'õdjwỳ jano. Ne kam myt nhibôbē 3 orakam ajte katon tēn ajte tām ne àpēnh'yr me kwỳ 'õdjwỳ jano. <sup>6</sup> Nhym kam arỳm amykry mexbē 5 ora nhym ajte katon tē. Nhym ar ja àpēnh kêt ne dja nhym arkum, “Mỳkam ne gar adjapēnh kêt nhym arỳm ar ajā amykry”? ane.

<sup>7</sup> Nhym ar kum, “Bir, me'õ kute ar imā idjapēnh jarēnh kêt kam”, ane.

Nhym arkum, “Ar gadjwỳ dja gar tēn inhõ pidjôkôkam apē. Dja ba katāt ar amā adjapēnh pānh”, ane. Nhym ar arỳm 'yr tē.

<sup>8</sup> Nhym kam arỳm para nhym õ pidjôkô djwỳnh amiwỳr me àpēnh'ã me omũnh djwỳnh 'uw nhym arỳm bôx. Nhym kum, “Inhõ àpēnh kunĩmā akabēn gé ar bôx ga arkum àpēnh pānh. Dja ga ar kute àpēnh'yr ar katē mōrjamā o pānh kumrēx. Ne ar kunĩmā o pānh tē: nhym ar kumrēx àpēnh'yr bôxja dja ga arkum o pānh ne o pānh ino re”, ane. Nhym me àpēnh'ã me omũnh djwỳnh kum, “Gē tō. Ba akabēnkôt memā o pānh.” Nām ā õ bēnjadjwỳrmā ane. Õ pidjôkô djwỳnhmā anen arỳm amiwỳr õ àpēnh 'uw. Ar ku'uw nhym ar arỳm 'yr bôxo dja.

<sup>9</sup> Kam ar ja kumrēx 'yr bôx. Ar amykry mexkam 5 orakam àpēnh'yr mōrja kumrēx 'yr bôx. 'Yr bôx nhym arỳm apỳnh ar ĩ djari pi'ók kaprĩ pỳnh ne arkum kungā. <sup>10</sup> Nhym amũ ar jadjwỳ aben totokmā 'yr bôx. 'Yr bôxo dja: nhym arỳm arkum

o pânho tẽ. Arkum o pânho tẽ: nhym kam ar kumrêx àpênh djà'ÿr bôxja arÿm 'ÿr bôx. Ar ja ne ar amim, “Jakam dja ar imã kàjmã pânkh kamẽ”, ane. Ar 'ÿr bôx nhym kam arÿm pi'òk kaprĩ tãm ne arkum kungã. Pi'òk kaprĩ pÿnhbit ne arkum kungã. Nhym apÿnh ar ï djari pi'òk kaprĩ pÿnhbit jamÿ. <sup>11</sup> Amÿn arÿm ò pidjòkò djwÿnh'ã kabên kume:x ne arẽ. <sup>12</sup> Ne kam kum, “Ë, amykrykam ar kute ar ikatẽ àpênh'ÿr bôxwã àpênh ngrire ne 'ã ora pydjibit apêx. Ar bajbit ne bar arngro tÿxkam idjapênh 'iry ne. Djã ne ga katat ar imã o pânkh ne? Kati. Ga ren ar imã kàjmã pânkh kamên ren ar imã pi'òk kaprĩ rax ne ar imã angã. Ne ren ar wãmã ngrire ne angã. Ga arÿm aro ar ipyrak ne arÿm arkum pi'òk kaprĩ pÿnh ne arkum angã”, ane.

<sup>13</sup> Nhym arÿm ar 'òmã kum, “Akmere, djã ne ba amã ijêx ne anoo akno ga akabên ne? Kati. Kryrãm ne ba amã, ‘Pi'òk kaprĩ pÿnh dja ba adjapênh pânkh amã kungã’, ane. Ga kam imã, ‘Mrãmri, dja ga ã imã òro ane’, anen arÿm adjapênh'ÿr mō. <sup>14</sup> Kam dja ga on akrãmã anhō pi'òk kaprĩ jamÿn o tẽ. Mrãmri ne pidjòkò'ÿr ar kute akatên bôxja ije arkum o pânho kute apyrak. Mrãmri ije amã òr kôt ije arkum pÿnh ne òrkumrêx. <sup>15</sup> Inhō ne pi'òk kaprĩ djwÿnh. Ba dja ba amim me'ã karō kôt memã kungã. Djãm kam ijaxwe? Kati. Imã ar ja kaprĩkam ga ren akĩnh ne. Nhym be, kati. Angryk. Me'ō nhō mÿjja pro prãmje angryk ne. Kwãrĩk wãnh.” Nãm ã ò pidjòkò djwÿnh ane. Tãm ne ja. Be, dja ã Bënjadwÿr djwÿnh kute pykakam amim me utarn ar meo bakam memã o pânho ane, ane. Jeju ã kôt ba djwÿnh arkum ane. <sup>16</sup> Ne kam ajte arkum,

—Jakam me kajgo mex ne me katẽ tẽmja djãm me katẽ tẽm rã'ãmã? Kati. Me ja dja me ï rũho kutewa. Nhym be, me rũho kutewaja gèdja me pânkh kajgo mex ne me katẽ tẽ. Mÿkam? Bir, Metĩndjwÿnh ne amiwÿr me krãptĩ 'uw. Nhym be, kute mekam me ngrêrebit amijo me utar. Nãm ã Jeju arkum ane.

*Ajte amityk'ã ujarênh.*

*Mak 10.32; Ruk 18.31*

<sup>17</sup> Ne kam ajte prykôt mō. Kôt ba djwÿnhbê 12 ne aro mō. Krĩraxbê

Djeruxarê'ÿr ar àbir tẽ nhym arÿm me kàxã aro tèn arkum,

<sup>18</sup> —Ë, ota gwaj arÿm Djeruxarê'ÿr badjãbirn babôxmã. Nhym kam ba ije amijo inhĩ dja me apÿnh me rũnhmã ikanga. Dja me me kadjy Metĩndjwÿnh mar djwÿnh nhō bënjadwÿr arkum ikangan Mōjdjê kukràdjã mar djwÿnhmãdjwÿ ikanga. Kam dja me ikã mex jarên ijã abenmã kum, “Axwekumrêx. Gê me pânkh tu bĩnkumrêx”, ane. <sup>19</sup> Ne kam me bajtemmã ikanga nhym me arÿm ijã bẽno ajkên mry kà punuo ikaprêprê:k ne. Ne kam arÿm pĩte'y'ã inhō ba arÿm ty. Nhym kam ijã akatin akatin akati ba kam akubyn itĩn ne. Nãm ã Jeju arkum ane.

*Ar kute ajte amirax jabej.*

*Mak 10.35; Ruk 22.24*

<sup>20</sup> Nhym kam Djebedêu prō Jeju'ÿr kra aro tẽ. Ne kam 'ÿr aro bôx ne parbê kônkrão nhÿn kum rax jarẽ. Kute mÿjja'ã 'wÿrmã ne 'ÿr bôx.

<sup>21</sup> Nhym kum, “Mÿj nã”? ane.

Nhym kum,

—Me kadjy abënjadwÿr ne aje amim me utar ne aje meo abakam gê ikra amãnhkrutja ar rax ne anhikô'ã memã nhÿ. Gê ja adjubôk'ãnh nhÿ nhym ja adjuge'ãnh nhÿ, ane.

<sup>22</sup> Nhym Jeju kum,

—Gêt kon. Ë, nã gãm arĩk amim 'ã karōn imã arẽ. Ba ar amã arẽ gar ama. Dja ba ngônhrã kam kangô jao ikō. Djãm ar aje ipyrak ne kangô jao akōmmã? Dja me ngômã ijadja. Djãm ar aje ipyrak nhym ngômã me kute ar ajadjarmã? Nãm ã arkum ane. Bir, mÿj'ã ne kangô jao kōm ne ngômã adjarja jakre? Bir, amitokry kume:x'ã ne akre. Nhym ar kute urak jabej ne ar kukij. Ar tokryo kute Jeju tokry pyrak jabej ne ar kukij. Nhym ar Jejumã kum,

—Nã. Kadjy ar ije apyrak, ane.

<sup>23</sup> Nhym Jeju arkum,

—Mrãmri dja gar aje ipyrak ne atokry kumex ma. Mrãmri dja gar kangô jao ikō nhym me ngômã ar ajadja. Be, djãm ba ne ba ar amã inhikô'ã ar anhÿrmã arẽ got? Be, Ibãm kute amrêbê: amijo me'ō ar utar, ar ta dja ar inhikô'ã memã nhÿ. Nãm ã Xijagumẽ Djuão arkum ane.

24 Nhyam kôt ba djwýnh Ar kubê 10 arým ar kabên man arým arkum àkrê. Ar arým kamy amãnhkrutja, Xijagumê Djuão arkum àkrê ne. 25 Nhyam Jeju amiwýr ar ku'uw ne arkum,

—Me bajtemkam me bënjadwýr ne me àpênh'ã memã àpnênh ne memã bën tỳx ar o ba. Nãm ã me bajtemkam me rũnh ar meo bao ane. Gar arým ama. 26 Djãm ar ga gar aje me kudjwamã? Kati. Ar ga dja gar ã anhýr kêtumrêx ne. Ar ajõ abenkam arax prãm jabej gêdja amijo kajgon tu ar amã àpênh ar ba. 27 Ga kam ar ajõ aben kadjy abênjadwýr rax prãm jabej gêdja tu amijo kátam ne tu ar amã àpênh kajgo ba. 28 Ba ije amijo inhĩ djãm me imã àpênh kadjy ne ba amrê tẽ? Kati, ba dja ba memã apê. Me ren ta amijaxwe pãnh tokryn arým ty. Nhyam be kati. Me krãptĩ jaxwe pãnh ba dja ba itokryn arým ty. Memã idjapênh ja kadjy ne ba amrê tẽ. Nãm ã Jeju arkum ane.

### *Me'õ no rã akubyn rĩt.*

29 Nhyam kam ar krĩraxbê Djeriko kurũm kator tẽ nhyam me krãptĩ: arým arkôt mõ. 30 Nhyam ar no rã amãnhkrutja pry japkre'ã nhỹ. Nhyam me abenmã kum, “Jeju ne tẽ”, anhýro kumex nhyam ar arým kuman kam kum amijo akij,

—Ë, amã ar ikaprĩ, Bênjadwýr djwýnh, Dawi tàmdjwý 'õ, ane.

31 Nhyam me krãptĩ mõrja arkum bën tỳx ne arkum,

—E kum ar anhikrê, ane. Nhyam kam ar tu kum àkjêro bën kum,

—Ë, gop amã ar ikaprĩ, Bênjadwýr djwýnh. Dawi tàmdjwý 'õ, ane.

32 Nhyam Jeju ar kabên man arým arek arkum dja. Arkum djan amiwýr ar ku'uw nhyam ar 'ýr bõx. Nhyam arým arkum,

—Mýj ne ba ije ar ajomã? ane.

33 Nhyam ar kum,

—Bênjadwýr djwýnh, bar on irĩt, ane.

34 Nhyam Jeju arým kum ar kaprĩn ar no kupê. Nhyam ar no kupênhmê ro'ã ar rĩt ne arým kôt tẽ.

## 21

*Jeju rax ne Djeruxarêmã àr.  
Mak 11.1; Ruk 19.28; Dju r 12.12*

1-2 Nhyam Jejumê ar prykôt mõ:n kam krĩraxbê Djeruxarê kuri krĩngrire ja'ýr bõx. Krãnhrebê Oriwêre'ã rwýkbê ne krĩngrire jabê Bepadjê. Ar krĩngrire ja'ýr bõx nhyam arým kôt ba djwýnh amãnhkrutmã kum,

—Pry ja'ã dja gar arek katàt krĩwãmã tẽ. Nhyam ar akutã pry kator kraxkam dja gar mry'ã krĩwã pumũ, djumêtuwã pumũ. Kraremê dja gar omũ. Nhyam me kute mrywã pĩ maktã krã djê nhyam amê ãmwã dja gar 'ãpre bõn amrê amêo tẽ.

3 Godja me'õ 'ã ar amã kabên jabej gar kum, “Bênjadwýr 'ã tẽm prãm. Dja 'ã tẽn kam akuby:n amã ano”, ane. Nhyam kam dja on ar amã, “Ajrà, 'ýr o tẽ.” Nãm ã Jeju arkum ane.

4 Mýkam ne ã arkum ane? Bir, amrêbê: ne ujarênh djwýnh me bakukãmãremã 'ã ajarê. Jeju djumêtu'ã tẽm'ã ajarê. Metĩndjwýnh kukwakam memã 'ã ajarê.

5 Ne memã kum,

“Dja ga Xijãokam me jamã kum”,

Krĩraxbê Djeruxarê'ã ne memã Xijão jarê. Nãm memã kum,

“Dja ga Xijãokam me jamã kum,

‘Ota me anhõ Bênjadwýr rax me awýr bõxmã. Nãm kabôt katin mry jabatãnh nyre'ã nhỹ. Mry'ã krĩ kra'ã ne nhýn me awýr bõx’, ane.

Dja ga ã Xijãokam me jamã ane.”

Nãm ã ujarênh djwýnh me bakukãmãremã ane nhyam me arým aben djô'ã abenmã arênhõ mõ:. Arênhõ mõr tãmtã arým 'ýr o bõx. Tũ:mrãm Jeju arým me bakam-ingrãnyrekam kato. Ne ar ban kam kute arým mry'ã krĩja'ýr kôt ba djwýnh janorja'ýr o bõx. Ujarênh djwýnh kute me bakukãmãremã ujarênh kôt ne mry'ã krĩja'ýr arým ar ano.

6 Nhyam kam ar arým 'ýr tẽn 'ýr bõx. Jeju kute arkum 'ã karõ kôt ar 'ýr tẽn 'ýr bõx. Ne kam mrymê krare 'ãpre bõ. 7 Ne kam akubyn 'ýr o bõx. Ne kam arým aminhõ kubêkà krãkào põx ne o amê mry nhibũm'ã kum aty. Nhyam arým krare'ã nhýn arým tẽ. 8 Nhyam kam me krãptĩ: aminhõ kubêkà krãkào põx ne arým kukãm kum pry'ã o atyo mõ. 'ã tẽn kadjy kum pry'ã kum atyo mõ. Nhyam me kwý pi'õ nhikên arým kukãm pry'ã kum atyo mõ. Me ta kukràdjã kôt ne me ã Bênjadwýr rax kukãm pryõ ane.

Me kukâm pry'ã kum atyo mõ. <sup>9</sup> Nhyim me krãptĩ: kukâm mõ, o àkjêr mõ nhyim ajte me krãptĩ: kôt o àkjêr mõ. Nãm me o àkjêr mõn kàj bê abenmã kum, Metĩndjwýnhmã kum,

—Jejubê me inhõ Bẽnjadjwýr rax. Bẽnjadjwýr raxbê Dawi tãmdjwý. ãm mexkumrêx. Kam me ikĩ:nhkumrêx. Gê on me ipytã. Gê Metĩndjwýnh o kĩnh rax. Metĩndjwýnh kukwakam ne arým me bakadjy bôx. Gê me kàjkwakamdjwý Metĩndjwýnhmã mextire jarêno kumex. Gê on me ipytã. Nãm me ã Jejuo àkjêro mõro ane.

<sup>10</sup> Nhyim kam arým Djeruxarêmã wadjã. Nhyim kam krĩraxkam me kunĩ te no katon 'ã aben kukjêro kumex ne abenmã kum,

—Mýj me'õ ne bôx? Mýj me'õ ne bôx? anhýro kumex.

<sup>11</sup> Nhyim me krãptĩ: memã kum, —Jeju ne bôx. Metĩndjwýnh kukwakam ne ar me bamã 'ã ujarênh ba. Pykabê Garrêjakam krĩraxbê Nadjarekam ne Jeju abatãnh djã. Nãm ã me krãptĩ memã ane.

*Kute kikreti nêje me anor.*

*Mak 11.15; Ruk 19.45*

<sup>12</sup> Nhyim kam Jeju Metĩndjwýnh nhõ kikretimã tẽn wadjã. Nhyim me kute memã mýjja nhõr djwýnh kam kumex. Nhyim me kute memã mýjjao pãnh ne amim byr kadjy ne me me'ã kumex. Nhyim arým bõm me rênho tẽ. Nhyim me kute me õ pi'ók kaprĩ pãnh memã kikreti nhõ pi'ók kaprĩ nhõr kadjy ne me kumex nhyim mebê pĩponho àpanho tẽ. Nhyim me kute tut nhõr djwýnhdjwý kumex nhyim mebê krĩ djã nhikõ rênho tẽ. <sup>13</sup> Ne kam memã kum,

—Amrêbê: ne me bakukãmãre Metĩndjwýnh kabên'ã pi'ók no'ók ne. Kamã ne Metĩndjwýnh ta memã kum,

“Inhõ kikreti ja'ã djã me abenmã kum, ‘Me kute Metĩndjwýnhmã kabên kadjy ne õ kikreti wã’, ane.

Djã me ã inhõ kikreti'ã abenmã ane.”

Nãm ã Metĩndjwýnh pi'ókkam ane. Nhyim be, me ga ne ga me kam ajte me àkĩnhõ aben pydji djã. Nãm ã Jeju memã ane. <sup>14</sup> Nhyim kam Metĩndjwýnh nhõ kikretikam me no rãmê me mrãnh punu 'ýr bôxo kumex nhyim arým meo mex.

<sup>15</sup> Nhyim kam me kadjy Metĩndjwýnh

mar djwýnh nhõ bẽnjadjwýrmê Môjdjê kukràdjã mar djwýnhmê ne me Jeju djãpênh me:xkumrêxja pumün ajte me prĩre pumũ. Me prĩre ne me kikretikam kàj bê o akij ne kum,

—Jejubê me inhõ bẽnjadjwýr rax. Bẽnjadjwýr raxbê Dawi tãmdjwý. ãm mexkumrêx. Kam me ikĩnhkumrêx. Gê on me ipytã, ane. Nhyim me me omün me kuman arým ngryk ne.

<sup>16</sup> Ngryk ne arým Jejumã kum,

—Djãm ajte me prĩre kabênja mar kêt? ane.

Nhyim memã kum,

—Nã, arým ba kuma. Ba ar amã arê gar ama. Me bakukãmãre ne amrêbê: Metĩndjwýnhmã me prĩre ja'ã ajarê. Me kum,

“Me prĩremê me karãremê ne ga memã me kabên mexmã 'ã karõ nhyim me arým amã mextire jarênh mexkumrêx.”

Nãm ã me bakukãmãre Metĩndjwýnhmã ane. Nhyim me arým kuman amũ aben djõ'ã abenmã arêno mõ:. Arêno mõr tãmtã arým iwýr o bôx. Tũmrãm me bakam-ingrãnyrekam me prĩre arým imã amikĩnh jarêno kumex. Me bakukãmãre kute Metĩndjwýnhmã me prĩre ja'ã ujarênh kôt ne me prĩre arým imã amikĩnh jarê. Nãm ã Jeju memã ane.

<sup>17</sup> Nãm memã anen kam arým memã kàx ne krĩrax kurũm katon tẽ. Ne tẽ:n arým krĩ ngrirebê Betanha'ýr bôx. Ne kam arým kam ngõr.

*Ar kute tu amim Metĩndjwýnh kamnhĩxkumrêxmã 'ã ujarênh.*

*Mak 11.20; Dju r 14.13; Xij 1.6*

<sup>18</sup> Nhyim 'ã akati nhyim ajte akubyn krĩraxbê Djeruxarêmã tẽ. Nãm 'ýr tẽ:n kam arým kum prãm. <sup>19</sup> Ne arým prykôt pidjõbê pigêre pumün 'ýr tẽn 'ýr bôx. Ne te õ jabej. 'Óbit ne kumex. Ne kam kum,

—Gê ajte adjõ'õ jêt kêtumrêx, ane. Nhyim arým tẽmbê ngrã.

<sup>20</sup> Nhyim kam kôt ba djwýnh ar arým omün kam no tyn abenmã kum,

—Je, mã ne bàrio nhyim myt tãm kam ngrã? ane. <sup>21</sup> Nhyim Jeju arkum,

—Ba ar amã arê gar ama. Dja gar kadjy tu amim Metîndjwýnh kamnhĩxkumrêx. Kwãrĩk wãnh anhõkre kadjwýnhbê amim,

—Kon, birãm dja ipêx, kon, anhÿr kêt. Gar ren tu amim kamnhĩxkumrêx ne ren arÿm ã pidjõbê pigêremã ane nhym ren arÿm ã ngrào ane. Djãm jabit? Kati, gar ren krãnhwãmã kum, “On amikaban ngõ jabatãnh mÿjakam mõn tÿm”, ane. Nhym ren arÿm akabên kôt mrãmri ã amijo ane. <sup>22</sup> Dja gar mÿjjao Metîndjwýnhmã a'uw ne tu kadjy amim kamnhĩxkumrêx nhym arÿm ar akabên kôt ã ar amã mÿjjao ane. Mrãmri ne ba ar amã ja jarênhkumrêx. Nãm ã Jeju arkum ane.

*Me kute rax jabej Jeju kukjêr.  
Mak 11.27; Ruk 20.1*

<sup>23</sup> Ne kam arÿm Metîndjwýnh nhõ kikreti'ÿr bõx ne kum wadjã. Ne kam arÿm kam memã Metîndjwýnh kukràdjã'ã ujarênhõ dja. Nhym me rÿnh arÿm 'ÿr bõx. Me kadjy Metîndjwýnh mar djwýnh nhõ bënjadjwÿrmê mebêngêtmê 'ÿr bõx. 'ÿr bõx ne amÿja'ã kute kikreti kurÿm me anorja jabej kukij ne kum,

—Mÿj me'õ kabênkôt ne ga ar ã meo anhÿro aba? Mÿj me'õ ne amã me'ã karõ ga kam amÿ õ'ã bõm ar me rênho aba? ane.

<sup>24</sup> Nhym Jeju memã kum,

—Badjwÿ dja ba mÿjja jabej me akukja. Me akumrêx dja ga me imã arê. Ba kam arÿm badjwÿ ije mÿj me'õ kabênkôt ar me anoro ibaja me amã arê. <sup>25</sup> Djuão kute ngõmã me angjênhja djãm me kabên kôt ne arĩk ar ngõmã me angjênhõ ba? Nãr djãm Metîndjwýnh kabênkôt? Imã arê, ane.

Nhym kam me abenkam kangan abenmã kum,

—Je mÿj dja gwaj kum nê? Dja gwaj kum “Metîndjwýnh kabênkôt”, ane nhym kam gwaj bamã kabên 'õ jarên gwaj bamã, “Bir be, mÿkam ne ga me amim Djuão kabênja mar kêt ne”? ane.

<sup>26</sup> Nãr dja gwaj kum, “Me kabênkôt ne tu arĩk ar ngõmã me angjênhõ ba”, ane nhym kam me krãptĩ ren o ngryk ne kum gwaj bakurê gwaj ren kam bamã me uma ne. Me kãtãm ja ne me arÿm Djuão kabên man kum kĩnh ne ne o Metîndjwýnh kabên jarênh

djwýnh ne. Dja gwaj kam ane nhym me arÿm o ngryk ne, ane.

<sup>27</sup> Nãm me ã abenmã anen kam Jejumã kum,

—Kon ne. Me ije mar kêt. Mÿj me'õ kabênkôt Djuão kute ngõmã me angjênhja me ije mar kêtê, ane.

Nhym kam memã kum,

—Bir be, dja ba badjwÿ me amã arênh kêt ne. Mÿj me'õ kabênkôt ije ar meo iba ja dja ba me amã arênh kêt ne, ane.

*Me'õ kra amãnhkrut'ã ujarênh.*

<sup>28</sup> Ne kam ajte memã kum,

—Be, mÿj ne ga me me'õ krakam ama? Me'õ kra amãnhkrut. Ne kam arÿm kutewa'ÿr tẽn kum, “Akmere, akati jakam dja ga gu banhõ pidjõkõkam apê”, ane.

<sup>29</sup> Nhym kum, “Kê, kati”, ane. Ne kam tẽn. Arÿm amimaro tẽn arÿm amim ngryk ne, ne amim, “Kati. Dja ba pidjõkõ'ÿr tẽn”, ane. Ne arÿm 'ÿr tẽn.

<sup>30</sup> Nhym kam bãm kutapu'ÿr tẽn àpênh'ÿr ano. Nhym kum, “Djÿnwã, dja ba arÿm akabên kôt 'ÿr tẽn”, ane. Ne kam atekam arek nhÿn 'ÿr tẽn kêt. Be, tãm ne ja. <sup>31</sup> Ba me amã arê. Nhÿnh ja ne bãm kabên man kôt amijo tẽn? Nãm ã Jeju me rÿnhmã ane.

Kutewa kute bãmmã, “Kati”, anhÿr ne kam kute amimarja ne Jeju kute me axwe'ã akre. Kute mrãmri ne me axwe pyrãk. Nãm arÿm amima. Amiman kam arÿm Metîndjwýnh'ÿr amijo akêx ne tu amim markumrêx. Nhym be, kutapu kute bãmmã 'êx ne Jeju kute me rÿnh'ã akre. Kute mrãmri ne me rÿnh pyrãk. Me kute Metîndjwýnh kôt kabên djir kajgon kam kute kabên mar kêt ne. Nãm Jeju me rÿnh kukij ne memã kum,

—Nhÿnhja ne bãm kabên man kôt amijo tẽn?

Nhym me kum, “Kutewaja”, ane.

Nhym memã kum,

—Ba me amã arê ga me ama. Djãm me arÿnhja dja ga me akumrêx kãjkwakam Bënjadjwÿr djwýnh kôt dja nhym me ajo ba? Kati. Pykakam me bënjadjwÿr bajtemmã pi'õk kaprĩo atom djwýnhmê me nire kuprÿmê, me aje memã axwe jarênhja dja me kãjkwakam Bënjadjwÿr djwýnh kôt dja nhym arÿm ar meo ba. Ga me kam

arým wãnh dja. <sup>32</sup> Mýkam? Bir, Djuão ne me awýr bôx. Kute katàt me amã pry jakre kadjy me awýr bôx. Kôt ga me Metĩndjwýnhmã amex kadjy me awýr bôx. Ga me kam amim Djuão mar kêt. Nhym be, pykakam me bēnjadjwýr bajtemmã pi'òk kaprĩo atom djwýnhmē me nire kuprýmē ne me tu amim Djuão markumrēx. Ga me kam arým me omũ. Ne te me omũ. Me ga ne ga me wãnh ajaxwemã anhirer ne amim mar kêt. Mrãmri ne ba me amã ja jarēnhkumrēx. Nãm ã Jeju me rũnhmã ane.

<sup>33</sup> Ne kam ajte memã atemã mýjja'ã ujarēnh jakreo tēn memã kum,

—Ē, jadjwý dja ga me ama. Me'õ ne pur rax ne kudjin kam kam amim pidjô kumex ne kadjy bu'ã kēno kôkayr kum o ipòk ne. Ne kam pidjô janēnh djãmã kren ipēx. Ne pidjô pumũnh djwýnh ku'ê djà'ã par prēkti nhipēx. Ne kam me kwýmã kum,

—Gora me imã o djuw mex. Gora gē abatãnh ne ô ga amim kwýo atom ne imã mũm kwýo atom. Nãm ã me rũnhmã ane. Mebē idjaer'ã ne Jeju pidjô jakren me rũnh'ã pidjôo djuw mex djwýnh jakren Metĩndjwýnh'ã õ pidjôkô djwýnh jakren kam arek memã ã ujarēnho djan memã kum,

—Õ pidjôkô djwýnh ã memã anen kam atemã pyka 'õmã tē. Ne kam kam wãnh ar ba. <sup>34</sup> Nhym arým pidjôja tuk ne kumex. Nhym kam õ pidjôkô djwýnhja arým 'ã my-tyrwý jakren kam 'ýr õ àpēnh kwý jano. Ar kute memã arēnh nhym me kute kum pidjô kwýo atom ne kute arkôt anor kadjy ne 'ýr ar ano. <sup>35</sup> Nhym kam ar 'ýr tēn bôx nhym kam me kute pidjôo djuw mexja ate ar 'õja kaprēprē:k ne ar'õnh bĩn ar 'õ kēno titik. <sup>36</sup> Nhym kam ajte memã õ àpēnh krãptĩ jano nhym me ajte ã aro ane. <sup>37</sup> Nhym kam tekrekam me'ýr kra jano. Nãm amim, “Godja ikra me'ýr bôx nhym me arým mar jabej”, ane. Ne arým me'ýr kra jano nhym me'ýr bôx.

<sup>38</sup> Nhym o djuw mex djwýnh arým kra pumũn abenmã kum, “Be, kra ne wã. Gwaj on kubĩ. Tãmja dja bãm kum mýjja kunĩ ngã, õ nēkrēx kunĩ kanga. Gwaj on tãmja bĩn kam amim õ nēkrēx, õ mýjja, õ pidjôja kunĩo aminhõ”, ane. <sup>39</sup> Ne kam arým o tým. O tým

ne pidjôkô kurũm bõm kumēn arým kubĩ. Tãm ne ja, ane. Me rũnh'ã ne Jeju pidjô pumũnh djwýnh jakre. Me kute mrãmri ne me rũnh pyrãk. Ne kam ajte memã kum,

<sup>40</sup> —Mýj gēdja õ pidjôkô djwýnhja bôx ne ajmã pidjô pumũnh djwýnh on? Nãm Jeju ã me rũnhmã ane.

<sup>41</sup> Nhym me kum,

—Bir, dja prĩne me axwejao ajkēn me imex ne kam õ pidjôkôja atemã me ja'õmã kungã nhym me arým pidjô tukkam arým kum pidjô nhõrkumrēx, ane.

<sup>42</sup> Nhym kam Jeju ajte memã me kukãmãre kabēn jarēn memã kum,

—Amrēbē: ne me bakukãmãre Metĩndjwýnh kabēn jarēn memã kum,

“E kum kēn ja ne me kute kikreo ãm djwýnhja kute kikremã armã te omũn kam bõm kumē.

Kēn ja ne arým kute kikremã o kajpar, kum o kajpar týxi.

Bēnjadjwýr djwýnh ta ne ã kēno ane gu me omũ nhym kam gu bamã mexkumrēx.”

Nãm ã me bakukãmãre memã anen arým 'ã pi'òk no'òk ne. Djãm me aje omũnh ne mar kêt? Nãm Jeju ã me rũnhmã ane. Nãm amijã kēn jakre. Ne me rũnh'ã kikreo ãm djwýnh jakre. Me rũnh kute mrãmri ne kikreo ãm djwýnh pyrãk ne arým Jeju kanga. Me rũnh kute kanga'ã ne Jeju me rũnhmã ja jarē.

<sup>43</sup> Ne kam ajte memã kum,

—Ba me amã arē ga me ama. Metĩndjwýnh bit kute amim me apytãr ne ar me ajo bamã. Nhym be, kati. Dja me akangan me apãnh amim me bajtem pytãn meo ba. Nhym me kam arým kute pidjô djô mex pyrãk ne imã mexkumrēx ne axwe kêt. Nãm Jeju ã me rũnhmã ane. <sup>44</sup> Ne kam ajte memã kum,

—Ē, kēn ja gēdja ga me ajõ 'ã tým ne prĩne 'ã amikrakrak ne. Nhym be, ta gēdja me ajõ nhiby tým ne prĩne angãn prĩne pyka mē ajo amrà, ane.

<sup>45</sup> Jeju memã ja jarē. Me kadjy Metĩndjwýnh mar djwýnh nhõ bēnjadjwýrmē mebē pardjēumã ja jarē nhym me arým kuman amim,

—Be, me bajã ne pidjôo djuw mex djwýnhmē kikreo ãm djwýnh jakren me bamã 'ã ajarē, ane. <sup>46</sup> Ne kam me bit kute

o tÿmmã te 'ã amijakre. Me krãptĩ ne me Jeju'ã amim,

—Be, Metĩndjwÿnh kukwakam memã 'ã ujarẽnh ba, ane. Nhyim kam me me umaje te 'ã amijakre.

## 22

*Bẽnjadjwÿr rax kute abenã ar mẽn.*

*Ruk 14.16*

<sup>1</sup> Nhyim kam Jeju ajte apÿnh kukràdjã djãri'ã memã mÿjja jakren memã 'ã ajarẽnh memã kum,

<sup>2</sup> —Kàjkwakam Bẽnjadjwÿr djwÿnh kute amim me utàr ne ar meo ba'ã dja ba bẽnjadjwÿr rax'õ jakren 'ã ajarẽ gar ama. Be, bẽnjadjwÿr rax arÿm kute kra'ã prõ mẽnhmã. Amrêbê ne kadjy memã arẽ. <sup>3</sup> Ne kam arÿm kute amrêbê memã arẽnhja'ÿr õ àpênh ar ano. Kute abenã ar mẽn djã'ÿr me 'wÿr kadjy ar ano. Nhyim ar me'ÿr bõx ne memã arẽ. Nhyim me arÿm arkum,

—Kati, 'ÿr ar imõr prãm kêt, ane. Nhyim kam ar akubyn bẽnjadjwÿr'ÿr bõx ne arÿm kum arẽ.

<sup>4</sup> Nhyim kam õ àpênh 'õdjwÿ arkum,

—Dja gar amrêbê ije memã arẽnhjamã ikabẽn jarẽnh memã kum, “È, arÿm ne ba me akadjy inhõ jadjuw nhyim kumex. Inhõ mrytimẽ abatàn nyre twÿmtijamẽ ne me arÿm kupa. Arÿm ne ba mÿjja kunõ mex. Dja ga me amrê abenã ar mẽn djã'ÿr mõ”, ane. Dja gar ã memã ane. Nãm ã bẽnjadjwÿr arkum ane. Nhyim ar arÿm me'ÿr tẽn kôt memã arẽ.

<sup>5</sup> Nhyim me ate krã. Me kwÿ ja ne me õ purmã mõ nhyim me kwÿ ja õ nèkrêx'ÿr mõ.

<sup>6</sup> Nhyim me kwÿ ja ne me arÿm aro rôrõk ne aro ajkẽn arÿm ar kupa. <sup>7</sup> Nhyim kam bẽnjadjwÿr rax arÿm arẽnh man arÿm ngryk ne. Ne kam arÿm õ krãkamngõnh krãptĩmã 'ã karõn me'ÿr me ano. Nhyim me arÿm kabẽnkôt me'ÿr mõn arÿm me'ÿr bõx. Me'ÿr bõx ne arÿm me kupan mebê krĩraxmã adjã nhyim arÿm xêr.

<sup>8</sup> Nhyim kam ajte bẽnjadjwÿrja õ àpênh arkum,

—Ije abenã ar mẽn kadjy ne ba arÿm prĩne mÿjjao mex nhyim nõ. Nhyim be, ije memã arẽnhja ne me kadjy mex kêt.

<sup>9</sup> Jakam dja gar apÿnh pry bikjêr djãri kôt

tẽn ar aje me omũnh kunĩ memã akrã gẽ me amrê mõ gwaj baro'ã banhõ kwÿ krẽ gwaj bakĩnh kati, ane. <sup>10</sup> Kam, õ àpênh ar arÿm apÿnh pry djãri kôt tẽn arÿm kute me omũnh kunõ atomo tẽ. Me mex nàr me punu kunõ atomo tẽ:n meo bõx. Nhyim me kam prĩne abenã ar mẽn djãkam kikre kre jaê.

<sup>11</sup> Nhyim kam arÿm bẽnjadjwÿr rax wadjàn me omũnhõ tẽ. Nhyim wãnh me'õ dja. Kute abenã me rẽnh'ÿr me ngjêx kadjy me õ kubêkã jadjãr kêt ne dja. <sup>12</sup> Nhyim arÿm omũn kum,

—Akmere, nã gãm abenã me rẽnh'ÿr me ngjêx kadjy me õ kubêkã jadjãr kêt ne wadjã. Mÿj ne ga nẽn wadjã? ane. Nhyim arÿm te kute aminêje kum kabẽn'õ jarẽnhmã.

<sup>13</sup> Nhyim kam bẽnjadjwÿr rax õ àpênhmã kum,

—Dja gar inÿx 'ãpren te 'ãpren amũ o tẽn bõm amẽ. Wãnh ne me akamãt kô tykkam amim ngryk ne mÿro kumex ne tokry djãje amijanênho kumex. Me ikõ'ã dja gar amẽ, ane. Nhyim me ã me'õo ane. Tãm ne ja.

<sup>14</sup> Be, Metĩndjwÿnh ne amiwÿr me krãptĩ 'uw. Nhyim be, kute mekam me ngrêrebit amijo me utàr. Nãm Jeju ã memã ane.

*Me kute Xedjamã pi'õk kaprĩ nhõr.*

*Mak 12.13; Ruk 20.20; Rô 12.1*

<sup>15</sup> Nhyim kam mebê pardjêu arÿm mã tẽn Jejuo aben ma. Nãm me abenmã kum,

—Mÿj gẽdja gwaj Jejumã arẽ nhyim arÿm gwaj bamã bẽnjadjwÿr'ã kabẽn punu'õ jarẽ? Dja bẽnjadjwÿr'ã kabẽn punu jabej nhyim me arÿm kum axwe jarẽ, ane. <sup>16</sup> Nãm me aben man kam arÿm 'ÿr õ me ja kwÿ jano. Erodji nhõ me ja kwÿ ne me adjwÿnhdjwÿ 'ÿr me ano. Nhyim me 'ÿr bõx ne kum,

—Ujarẽnh djwÿnh, bar arÿm ama. Ga ne ga akabẽn katãtkumrêx ne Metĩndjwÿnh kabẽn kôt me kute amijo ba'ã memã adju-jarẽnh katãtkumrêx. Amã me rũnh pyma kêt. Me rũnhmẽ me kajgomẽ ne ga memã akabẽno aben pyrãk. <sup>17</sup> Ba me akukja ga me imã arẽ. Me rũnh kunĩ nhõ bẽnjadjwÿr raxbê Xedja. Mebê idjaer kute o me ba-jtemja. Djãm Metĩndjwÿnh kukràdjã kôt ne gu me baje bẽnjadjwÿr Xedjamã pi'õk kaprĩ

nhõrmã? Nàr kon? Goja on me imã arẽ, ane.

<sup>18</sup> Nhyim Jeju arým me axwe kôt tu me kuman memã kum,

—Me ga ne ga me amijo ajêx ne amijo Metĩndjwýnh mar mexo aba. Nok ba ren me amã, “Metĩndjwýnh kabẽn kupa'ã ne me kum õro ba”, ane ga me ren memã kum, “Be, Jeju axwekumrẽx. Ga, kute bẽnjadjwýr raxbê Xedjabê pi'ók kaprĩ nê prãmja pumũ”, ane. Ga me ren memã anen ren arým memã ikurêtuw. Nã gãm me ajêx ne aje Metĩndjwýnh mar. <sup>19</sup> Amrẽ imã pi'ók kaprĩo tẽ, me aje kum õrja o tẽ ba me amã omũ, ane. Nhyim me arým 'ýr ngõnhponho pi'ók kaprĩ pydjio tẽn kum kungã. <sup>20</sup> Nhyim memã kum,

—Mýj me'õ ne 'ã karõja? Ne mýj me'õ ne 'ã idji jêtja?

<sup>21</sup> Nhyim me kum,

—E kum be Xedja karõ, ane.

Nhyim memã kum,

—Bir be, õ pi'ók kaprĩ. Dja ga me kum angã. Nhyim be, Metĩndjwýnh nhõ mýjjabit dja ga me Metĩndjwýnhmã angã. Nãm Jeju ã memã ane nhyim me arým kabẽn ma.

<sup>22</sup> Ne arým te kute mýjja'õ jarẽnhmã kam no tyn dja. Ne kam arým kum kàx ne mã tẽ.

*Me tyk akubyn tĩn mýr jabej me Jejumã kabẽn.*

*Mak 12.18; Ruk 20.27; Tex k 4.16; Ap 20.4*

<sup>23</sup> Nhyim kam myt tãm kam me bẽ xadjudjêu kwý 'ýr bõx. Me bẽ xadjudjêu ne me arĩk memã kum,

—Be, me tyk akubyn tĩn prãm kêt kumrẽx, anhýr ar o ba. Nãm me 'ýr bõx ne kukij ne kum,

<sup>24</sup> —Ujarẽnh djwýnh, me bakukãmãre Mõjdjê ne amrẽbê: me bamã,

“Godja me'õ prõ'ýr mõn kra kêt rã'ã tyk jabej mýj dja me nẽ?

Bir, dja kamymẽ ar aben djakam ikwãja'õ 'ýr mõ. Ne kum kra djĩn kukrij nhyim abatãnh ne.

Me kute 'ã abenmã kum, ‘Be, kamy tyk kra ne wã’, anhýr ne kute kamy tyk mar týx rã'ã kadjy.”

Nãm ã me bakukãmãre Mõjdjê me bamã ane, ane. Me bẽ xadjudjêu ne me ã Jejumã ane. <sup>25</sup> Ne kôt arĩk kum,

—Be, ar my aben djakam ikwãbê 7. Ne kam kutewa prõ'ýr mõ. Ne kam kra kêt rã'ã ty. Nhyim prõja arým 'uwttĩ. Nhyim kam atãri kamyreja 'ýr mõ. Ne kam ã ane, kra kêt rã'ã ty. <sup>26</sup> Nhyim aben totokmã Ar kubê 7 kunĩ kudjwa ã anen 'ýr ban kra kêt rã'ã ty. <sup>27</sup> Nhyim kam ar prõjadjwý arým ar o ino ren ty. Ja ne ba me kuman amã arẽ. <sup>28</sup> Ar kubê 7 ne ar aben totokmã kamy prõ'ýr ba. Godja we ar kunĩ akubyn tĩn ne àbir jabej we àbirkam nhýnh kamyja dja ajte 'ýr mõ? ane. Me ta kute we me tyk akubyn tĩn kêt jarẽnh mýr jabej ne me ã Jejumã ane. Me kute o àpanh nhyim binhikrẽnh kadjy nàrãm ne me bẽ xadjudjêu ã kum ane.

<sup>29</sup> Nhyim Jeju arým memã kum,

—Me aje Metĩndjwýnh kabẽn'ã pi'ók no'ók mar kêt ne me aje Metĩndjwýnh tý:xkumrẽx mar kêt. Nã gãm me arĩk Metĩndjwýnh kupa'ã memã 'ã adjujarẽnh aba. <sup>30</sup> Be, me tyk ne akubyn tĩnkam djãm me ajte abenwýr ba? Kati, akubyn me tĩnkam dja me abenwýr ba prãm kêt kumrẽx. Kam dja me kute Metĩndjwýnh kadjy mrãnh djwýnh pyrãk. <sup>31</sup> Be, mrãmri me tyk akubyn tĩnkumrẽx. Amrẽbê: Metĩndjwýnh kute me bakukãmãremã kabẽn jarẽnh. Me tyk akubyn tĩn'ã kute kabẽn jarẽnh nhyim me kute 'ã pi'ók no'ók djãm me aje amim arẽnh kêt? <sup>32</sup> Nãm me bakukãmãremã kum, “Ibê Abraãomẽ Idjakmẽ Djako ar õ Metĩndjwýnh”, ane.

Bir be, ar tyk tũmja Metĩndjwýnhmã tĩn ne ar ba nĩj pumũ. Djãm Metĩndjwýnhbê me tyk nhõ Metĩndjwýnh? Kati. Metĩndjwýnh ne me tĩn nhõ Metĩndjwýnh. Me tyk kunĩ ne me kum tĩn. Kam ne ba me amã,

—Metĩndjwýnh ne kubê me tĩn nhõ Metĩndjwýnh. Nãm Jeju ã me bẽ xadjudjêumã ane. <sup>33</sup> Nhyim me krãptĩ: kuman te kute mýjja'õ jarẽnhmã kam no tyn kumex.

*Me kute kukràdjã jabej Jeju kukjêr.*

*Mak 12.28; Ruk 10.25*

<sup>34</sup> Jeju me bẽ xadjudjêumã ane nhyim me amijã maje arým anhikrê. Amijã maje anhikrê nhyim me bẽ pardjêu arým arẽnh man arým akuprõ. <sup>35</sup> Me'õbê ne Mõjdjê kukràdjã mar djwýnh. Tãm ne Jeju'ýr bõx ne kute amak mex jabej kabimã. Kute



Môjdjê kukràdjà jabej kukjêrmã. Jeju kute kukràdjà kupa'ã arênh kadjy nàràm ne kum kabên ne kum,

<sup>36</sup> —Ujarênh djwýnh, Môjdjê kute Metíndjwýnh kukwakam kabên kukràdjà jarênh, kute kam me kute katàt amijo ba'ã memã karôja nhýnh kabênja ne mexo kute kunĩ jakrenh? ane.

<sup>37</sup> Nhyr Jeju kum,

—Be, nãm memã kum,

“Me anhõ Bënjadjwýr djwýnh, me Atíndjwýnh dja ga me amã kĩnh, amã abêo katàt me kunĩ, mýjja kunĩ jakre.

Djãm ajajkwaobit amã Metíndjwýnh jabêmã? Kati. Ajamak, akad-jwýnhbê, akukràdjà kunĩo dja ga me amã abê:”, ane.

<sup>38</sup> Be, tãm ne ja. Metíndjwýnh kabên mexo kute kabên kunĩ jakrenh ne ja. <sup>39</sup> Ne kam atãri Môjdjê ajte 'õ kute uràk memã arên memã kum,

“Me amã amibu'ã me ja jabê. Kute mrãmri ne ga me amã amijabêja pyràk dja ga me ã amã amibu'ã me ja jabêo ane”, ane.

<sup>40</sup> Be, ba arým amã Môjdjê kabên kukràdjà ja jarên ajte amã ja jarê. Dja ga amê kabên ja man kôt ar amijo aba jabej ne mrãmri tu arým Metíndjwýnh kabên kukràdjà kunĩkôt ar amijo aba mexkumrêx. Môjdjê kute Metíndjwýnh kukwakam kabên jarênhjamê kukwakam memã 'ã ujarênh djwýnh 'õdjwý kute kabên jarênhjamê ne ga arým kunĩkôt ar amijo aba mexkumrêx. Nãm ã Jeju kum ane.

*Kritubê mýj me'õ tàmdjwý jabej me kute kukjêr.*

*Mak 12.35; Ruk 20.41*

<sup>41</sup> Mebê pardjêu kute abeno bikprônhrri Jeju amijabej me kukij ne memã kum,

<sup>42</sup> —Mýj ne ga me Kritukam ama? ane. Metíndjwýnh ne arým mebê idjaer kadjy Jeju'ã Bënjadjwýrbê kumkati mē. Kumã ne me Kritu jarê. Nãm Jeju amijã memã kum,

—Mýj ne ga me Kritukam ama? Mýj me'õ tàmdjwýbê ne Kritu? ane.

Nhyr me kum,

—Me bakukãmãre Dawi tàmdjwý. Bënjadjwýr raxbê Dawi tàmdjwý, ane.

<sup>43-44</sup> Nhyr kam Jeju ta kubê Bënjadjwýr Kritu'ã memã kum,

—Ne kam ajte kubê Dawi nhõ Bënjadjwýr. Mýj ne arým kubê Dawi tàmdjwýnh ajte õ Bënjadjwýr kadjy nē? ane. Ne kam Jeju memã me bakukãmãre Dawi kabên jarên memã kum,

—Be ga, me bakukãmãre Dawi ta kute memã 'ã ujarênhja pumũ. Metíndjwýnh Karõ kukwakam kute memã Kritu'ã ujarênhja pumũ. Nãm memã kum,

“Inhõ Bënjadjwýrmã ne Bënjadjwýr djwýnh kabên ne kum,

'Amrê idjubôk'ãnh nhý, Abënjadjwýr raxkam idjubôk'ãnh nhý.

Ikam ama ba amrê awýr akurê djwýnhomõ ga me kwýo apardjan me kwýnhimex.'

Nãm ã Metíndjwýnh inhõ Bënjadjwýrmã ane”, ane.

Bir be ga, Dawi kute kum “Abënjadjwýr rax”, anhýrja pumũ. <sup>45</sup> Mýkam ne me Dawi tàmdjwý kajgo jarê? Djã nãm o tàmdjwý kajgo? Kati, Dawi ta ne kute o õ Bënjadjwýr rax. Nãm ã Jeju mebê pardjêumã ane. <sup>46</sup> Nhyr me'õ te kute kutã kabên'õ jarênhmã te amijo ane. Kabên mex pymaje me kute ajte mýjja 'õ jabej kukjêr kêtikumrêx.

## 23

*Watĩrebê 7'ã ujarênh.*

*Mak 12.38; Ruk 11.46*

<sup>1</sup> Nhyr kam Jeju me krãptĩ:mē kôt ba djwýnhmã kum,

<sup>2</sup> —Be, Môjdjê kukràdjà mar djwýnhmē mebê pardjêumē ne me Môjdjê pãnh ar amã Metíndjwýnh kukràdjà jarênhomõ krĩ. <sup>3</sup> Kam dja me Metíndjwýnh kabên kôt ar amã kabên jarê gar prĩne me kabên kunĩ man kôt ar amijo aba. Nhyr be, me ta ne me arĩk ar ba. Nãm me ajkwakambit ar amã Metíndjwýnh kabên jarên kam ta kute amikabên mar ne kôt kute ar amijo ba kêt ne arĩk ar ba. Kwãrĩk wãnh mekôt ar amijo aba kêt. <sup>4</sup> Nãm me ajte kabên kajgoobit ar memã we Metíndjwýnh kabên jarênhomõ ba. Djãm Metíndjwýnh kabên? Kati, me ta kabêno ne me ar me anoro ba. Ne kam kôt kute amijo ba kêt ne. Nhyr me te amijo anen kam, “Je mýj dja ba me nē”? ane. Me kute ã meo anhýrkam ne kute mrãmri ne me kute me kadjybit jênh rũnhomõ atom

ne me mut'ã anhôr ne kam kute memã tur kêtukumrêx ja pyrâk. Nãm ã Jeju memã ane.

Ne kam ajte arkum,

<sup>5</sup>—Me kute memã amibên nhym me kute memã mex jarênh kadjy ne me amijo ba. Mòjdjê kukràdjà'ã pi'òk no'òk kwý ne me 'ã ikôn amikrãmê amipamã aktã 'ãpre. Ne 'ã ikô poti:reo ane. Mýj kadjy? Bir, me kute memã amibên kadjy. Dja we me me omün memã mex jarê. Ja kadjy ne me 'ã ikô poti:reo anen amikrãmê amipamã aktã 'ãpre. Ne kam ajte 'ã kubêkà jabu djã ã abjêo ane. Mýj kadjy? Bir, me kute memã amibên kadjy. Dja we me me omün memã mex jarê. Ja kadjy ne me 'ã kubêkà jabu djã jabjên 'ã ar ba. <sup>6</sup> Me krãpti nhikô'ã me ò kwý krênkam ne me me rünh krí djâkam krí prãmkumrêx. Kute memã amibên kadjy me rünh krí djâkam krí prãmkumrêx. Ne mebê idjaer bikprônã djâkam ne me memã wan krí prãmkumrêx. <sup>7</sup> Ne ajte me krãpti bikarêr nhipôkri, mekadu nhipôkri kute memã amibên nhym me kute memã rünh jarênh ne kute memã kum, “Ujarênh djwýnh, djãm ga? djãm ga?” anhýrja. Ja ne me kum kínhkumrêx.

<sup>8</sup> Nhym be, ar ga me kute ar amã, “Ujarênh djwýnh”, anhýrmã djãm ar amã ja kínhmã? Kati. Mýkam? Bir, atemã ar anhô ujarênh djwýnh pydjii. Kam dja gar abeno akamybit. <sup>9</sup> Ne kam djãm ar aje pykakam me'ò raxmã, “Djünwã”, anhýrmã? Kati. Mýkam? Bir, ar Abãm pydji. Kàjkwakam ar Abãm djwýnh pydjii. <sup>10</sup> Djãm me kute ar amã, “Bênjadjwýr”, anhýrmã? Djãm ar amã ja kínhmã? Kati. Mýkam? Bir, ar anhô Bênjadjwýr pydjii. Metíndjwýnh ne arým 'ã me ò Bênjadjwýrbê kumkati mẽ. Kubê ne Kritu.

<sup>11</sup> Ar ajô abenkam araxo kutewa prãm jabej gêdja amijo kajgon tu ar amã àpênã ar ba. <sup>12</sup> Mýkam? Bir, me kute amijo rünh prãmja gêdja ã kajgo mex ne. Nhym be, me kute amijo kajgo mex ne akrãnmã kute amijo baja gêdja Metíndjwýnh arým pãnh meo rünh ne. Nãm ã Jeju arkum ane. Ne kam Mòjdjê kukràdjã mar djwýnhmê mebê pardjêumã kum,

<sup>13</sup> —Be, me abê Mòjdjê kukràdjã mar djwýnhmê me abê pardjêumê ne ga me amijo ajêx ne ar amijo Metíndjwýnh mar

mexo aba. Ý, watíre. Dja ga me ã me biknor tokry djâkam tu amòrkumrêx. Mýkam? Bir, me aje mebê adjãptãrkam. Me bit kute kàjkwakam Bênjadjwýr djwýnh kôt ãm ne kôt ar amijo ba prãm ga me kupa'ã memã arê. Ne Bênjadjwýr djwýnh nêje aje memã atemã kukràdjã jarênh aban arým o mebê utã. Ga me kam ga Metíndjwýnh mar kêt ne ajte me jadjwýbê aptã.

<sup>14</sup> Be, me abê Mòjdjê kukràdjã mar djwýnhmê me abê pardjêumê ne ga me amijo ajêx ne ar amijo Metíndjwýnh mar mexo aba. Ý, watí:re, dja ga me ã me biknor tokry djâkam tu amòrkumrêx. Mýkam? Nã gãm me me 'uwtí krão apan mebê mýjja kunõ akí ne kam ajajkwaobit Metíndjwýnhmã akabên rünh ne, ne kum akabên 'ijabjêo aku'ê. Bir, nã gãm me ajêx ne amijo amex ne kum akabêno aku'ê. Be kati, me ajaxwekumrêx. Kam gêdja Metíndjwýnh me kurãm me amã pãnh rax jarênh príne me kurãm me ajo ajkê.

<sup>15</sup> Be, me abê Mòjdjê kukràdjã mar djwýnhmê me abê pardjêumê ne ga me amijo ajêx ne ar amijo Metíndjwýnh mar mexo aba. Ý, watí:re. Dja ga me ã me biknor tokry djâkam tu amòrkumrêx. Mýkam? Bir ga, me aje arík memã kum, “Ba me Metíndjwýnh'ýr meo akêx gê me amim maro ba”, anhýrja pumü. Djãm mrãmri ne ga me akabên? Kati, me aje amiwýr me'ò pydjio akêx kadjy ngômê pykakôt aba 'ijabjê:. Nhym arým me awýr amijo akêx ga me kam arým amikôt axwe 'ã mênã mex ne. Amikôt axwe 'ã mênã mex nhym arým axweo me ajakrenã mex ne. Nhym arým me akôt biknor prãmkumrêx. Djãm Metíndjwýnh'ýr ne ga me meo akêx nhym me amim kuma got? Kati. Nãm ã Jeju Mòjdjê kukràdjã mar djwýnhmê mebê pardjêumã ane.

<sup>16</sup> Ne kam ajte memã kum,

—Ý, watí:re. Dja ga me ã me biknor tokry djâkam tu amòrkumrêx. Me aje mrãmri ne me no rã kute arík meo ba pyrâk. Mýkam? Bir, me aje arík memã Mòjdjê kukràdjã jarênh punukam. Nãm ã Jeju memã ane. Bir, Mòjdjê kukràdjã kôt ne mebê idjaer memã amikabên jarênh ajte memã kum,

—Nã bãm amã ikabên pydjín arê, anen ajte kôt memã Metĩndjwýnh nhõ mýjja jarê. Mýj kadjy ne kôt memã Metĩndjwýnh nhõ mýjja jarê? Bir, kute kabên maro âmja kute mar pydji kadjy ne me Metĩndjwýnh nhõ mýjja jarê. Gêdja amikabên jarênhja 'êx ne kam Metĩndjwýnh nhõ mýjja jarên kam arým o Metĩndjwýnhmã amikurêtuw. Amikurêtuw nhym Metĩndjwýnh arým kute maro âmjao ngrykmã. Nãm me ã Môjdjê kukràdjã kôt memã amikabên jarênh o ane. Nãm Jeju Môjdjê kukràdjã jarênh djwýnh arkum,

—Me ajte mrãmri ne me no rã kute arĩk meo ba pyrãk. Mýkam? Bir, me ajte arĩk memã Môjdjê kukràdjã jarênh punukam. Nã gãm me memã kum, “Dja ga me memã amikabên jarên memã kum, ‘Nã bãm amã ikabên pydjín arê. Ê, Metĩndjwýnh nhõ kikretija ma’, ane. Gêdja ga me memã ajêx prãm jabej ne Metĩndjwýnh nhõ kikretibit jarê ne kam o amikurê'uk kêt. Dja Metĩndjwýnh me'õ kute akabên maro âmjao ngryk kêt ne me ajo bikênh kêt.

Nhym be, dja ga me memã amikabên jarên memã kum, ‘Nã bãm amã ikabên pydjín arê. Ê, Metĩndjwýnh nhõ kikretikam kên karýrja ma’, ane. Aje kên karýr jarênhkam dja ga akabênkumrêx. Aje memã amikabên jarênh kôt dja ga amijo anhýrkumrêx. Dja ga memã ajêx ne kam kên karýr jarên arým o Metĩndjwýnhmã amikurêtuw” ane. Me abê Môjdjê kukràdjã mar djwýnh ne ga me arĩk ã memã kukràdjã jarênh punuo ane. <sup>17</sup> Me no rã ne me kute amikukãm rĩt kêt. Kam me kute amipry mar kêt. Me ajte me urãk ne amijo ajêx ne memã, “Ba ne ba ije Metĩndjwýnh mar mex”, anhýr ar o aba. Nhym be, kati. Me ajte mar kêt ne te memã Metĩndjwýnh'ã adjujarênh ar aba nhym me adjwýnhdjwý kute mar kêt. Be, me amãbit ne kên karýr kute mexo kikreti jakrenh. Djãm mrãmri? Kati. Kikreti ne kute mexo kên karýr jakrenh. Kikreti kukwakambit ne kên karýr mex. Metĩndjwýnhmã mex. Nãm Jeju ã Môjdjê kukràdjã mar djwýnhmã ane.

<sup>18</sup> Ne ajte memã kum,

—Ga me arĩk memã kum, “Dja ga me memã amikabên jarên memã kum, ‘Nã

bãm amã ikabên pydjín arê. Ê, Metĩndjwýnh nhõ ngônho kija ma’, ane. Gêdja ga me amã memã ajêx prãm jabej ne Metĩndjwýnh nhõ ngônho kibit jarê ne kam o amikurê'uk kêt. Dja Metĩndjwýnh me'õ kute akabên maro âmjao ngryk kêt ne me ajo bikênh kêt.

Nhym be, dja ga me memã amikabên jarên memã kum, ‘Nã bãm amã ikabên pydjín arê. Ê, Metĩndjwýnh nhõ ngônho kikam mry nørja ma’, ane. Aje mry nør jarênhkam dja ga akabênkumrêx. Aje memã amikabên jarênh kôt dja ga amijo anhýrkumrêx. Dja ga memã ajêx ne kam mry nør jarên arým o Metĩndjwýnhmã amikurêtuw”, ane. Me abê Môjdjê kukràdjã mar djwýnh ne ga me arĩk ã memã kukràdjã jarênh punuo ane. <sup>19</sup> Me ajte me no rã pyrãk. Djãm mrãmri mry kute mexo Metĩndjwýnh nhõ ki jakrenh? Kati. Õ ki ne kute mexo mry jakrenh. Õ kikam me kute mry jadjwýrkambit ne kum mex, Metĩndjwýnhmã mex. Nãm Jeju ã memã ane.

<sup>20</sup> Ne kam ajte memã kum,

—Kam, me kute memã amikabên jarênh ne kôt ajte kute Metĩndjwýnh nhõ ki jarênhkam djãm kute õ kibit jarênh? Kati. Nãm me kute õ ki jarênh ne ajte kute kam mýjja kunĩ ikwãdjwý jarênh. <sup>21</sup> Ne ajtekam me kute memã amikabên jarênh ne kôt ajte kute Metĩndjwýnh nhõ kikreti jarênhkam djãm kute kikretibit jarênh? Kati. Nãm me kute kikreti jarênh ne ajte kute Metĩndjwýnh kam ýr jarênh. <sup>22</sup> Ne ajtekam, me kute memã amikabên jarênh ne kôt ajte kute kãjkwa jarênh. Djãm kute kãjkwabit jarênh? Kati. Nãm kute kãjkwa jarênh ne ajte kute Metĩndjwýnh nhõ krĩ djã rax jarênh ne ajte kute 'ã krĩ djwýnhbê Metĩndjwýnh jarênh. Kam, dja me memã kabên pýnh ne arên kôt amijo anhýrkumrêx. Nãm ã Jeju memã ane.

<sup>23</sup> Ne kam ajte memã kum,

—Be, me abê Môjdjê kukràdjã mar djwýnhmẽ me abê pardjêumẽ ne ga me amijo ajêx ne ar amijo Metĩndjwýnh mar mexo aba. Ý, watĩ:re. Dja ga me ĩ me biknor tokry djãkam tu amõrkumrêx. Mýkam? Bir, me ajte Metĩndjwýnhmã mýjja kakritbit nhõr ne kam mýjjabê kumkatija ajte kum õr kêtumrêxkam. Nã gãm me mýjja kakrit,

õmrõ djành djà, pi'ômẽ õmrõ djành djà 'õdjwýmẽ Metĩndjwýnhmã ikjê rên kum kryre ne angã. Ne kam kukràdjà kôt ar amijo aba kêt ne katàt meo aba kêt kumrêx ne amã me kaprĩ kêt kumrêx ne amim Metĩndjwýnh mar kêt ne. Aje kum kryre ne òrja ne mrãmri tu mexkumrêx. Mýkam ne ga me kum mýjjabê kumkatijadjwý kum òr kêt ne? Mýkam ne ga me amã Metĩndjwýnh jabên katàt meo abaja kêt ne? Ja ne ga me aje marmãn ate mýjja kakritbit ma.

<sup>24</sup> Ba me amã arẽ ga me ama. Dja me anhõ õmrõkam pure'õ tým ga me pure ngrire'ã ano tỳ:x ne kaban mũm amẽ. Nhyim be, mry jabatãnhbê kameru ja ne anhõ õmrõkam dja, ga me ate akrãn tu ro'ã krẽ. Be, mýj'ã ne ba amã ikabên ja jarẽ? Bir, mýjja kryre ne ga me'ã ano tỳ:x ne ma:ro aba. Nhyim be, mýjja bê kumkati, mýjja kabênkumrêx ne ga me aje mar kêt. Metĩndjwýnh kabên kute me ajaxwe nêje me akukràja ne ga me aje mar kêt ne ate akrãn ajaxwe rax rã'ã. 'Ã ne ba me amã, "Ga me pure ngrire'ãbit ano tỳx ne kaban mũm amên tu kameru raxja õmrõmẽ ro'ã krẽ", ane. Kam ne ga me aje meo ba djwýnh no rã pyrãk. Nãm Jeju ã memã ane.

Ne kam ajte memã kum,

<sup>25</sup> —Be, me abê Mõjdjê kukràdjà mar djwýnhmẽ me abê pardjêumẽ ne ga me amijo ajêx ne ar amijo Metĩndjwýnh mar mexo aba. Ý, watĩ:re. Dja ga me ì me biknor tokry djakam tu amõrkumrêx. Mýkam? Bir, nã gãm me aje mrãmri ne me kute ngõnhkrãmẽ ngõnh puror nhĩbũmbit põnh ne kre põnh kêt nhyim krekam mýjja kakràtyk pyrãk. Be, nã gãm me ã we katàt amijo abao ane. Nhyim kam me me akrãkãbit pumũ nhyim kam kute me amex pyrãk. Nhyim be kati, me akadjwýnhbê ne ga me apunu rã'ã. Me akadjwýnhbê ne me amã me õ nêkrêx prãm ne 'ã angryk ne aje mebê mýjjao adjãkĩnh'ã aje amim karõ rã'ã. Kam ne ga me akadjwýnhbê apunu rã'ãja. <sup>26</sup> Me abê pardjêu ne ga me aje me no rã pyrãk. Dja ga me akadjwýnhbê kumrêx wãnh ajaxwemã anhire. Ne kam arým mrãmri abu'ã memã amexkumrêx. Ne kam aje mrãmri ne me kute ngõnh puror, kremẽ ibũm põnh nhyim prĩne mex pyrãk.

<sup>27</sup> Be, me abê Mõjdjê kukràdjà mar djwýnhmẽ me abê pardjêumẽ ne ga me amijo ajêx ne ar amijo Metĩndjwýnh mar mexo aba. Ý, watĩ:re. Dja ga me ì me biknor tokry djakam amõrkumrêx. Mýkam? Bir, ga me aje mrãmri ne me kute me tykmã kikre krãkã jaka pyrãk. Krãkãkambit ne kute memã mexti:re pyrãk. Nhyim be, kadjwýnhbê ne mýjja punu:re. Kadjwýnhbê me tyk 'imẽ mýjja punu kunĩ. <sup>28</sup> Ga me aje urãk. Abu'ã memã ajaxwe kêt pyrãk. Nhyim be, kati. Metĩndjwýnh ne me akadjwýnhbê me aje mýjja marja kunĩ kute mar. Me ga ne ga me amijo ajêx ne ar amijo Metĩndjwýnh mar mexo aban aje ajaxwebit mar. Nãm ã Jeju memã ane.

Ne kam ajte memã kum,

<sup>29</sup> —Be, me abê Mõjdjê kukràdjà mar djwýnhmẽ me abê pardjêumẽ ne ga me amijo ajêx ne ar amijo Metĩndjwýnh mar mexo aba. Ý, watĩ:re. Dja ga me ì me biknor tokry djakam amõrkumrêx. Mýkam? Bir, amrêbê: me bakukãmãrekam ne Metĩndjwýnh kabên jarênh djwýnh arým ty nhyim me amrêbê: me angij. Ga me akamingrãnyre ne ga me me tyk tũmjamã kikren me katàt kute amijo ba tũm nhõ pyka krã kunhêro aba. <sup>30</sup> Ne kam arĩk memã kum, "Ne ba me ren amrêbê: me bakukãmãre, me banhingêt kator nyri ren me ro'ã ikator ne ar iba ne ren me banhingêt kudjwa ã anhýr kêt kumrêx ne. Ne ren Metĩndjwýnh kabên jarênh djwýnh par kêt kumrêx ne." Nã gãm me ã memã ane. <sup>31</sup> Me aje ã memã anhýrkam arým amikõt amijarẽ. Me abê me par djwýnh tàmdjwý, Metĩndjwýnh kabên jarênh djwýnh kanê tàmdjwý. Arým ne ga me amikõt amijarẽ. <sup>32</sup> Metĩndjwýnh ne me anhingêt kam ngryk. Aje, me rã'ã ne me anhingêt kôt ã ajaxweo anen ar badjwý ar ipa. Ar badjwý ar ipa gê Metĩndjwýnh on me akam ngryk me:x ne. Nãm ã Jeju memã ane.

Ne kam ajte memã kum,

<sup>33</sup> —Me akamingrãnyre ne ga me abê kangã, me abê iry. Djãm me ga ne ga me aje abiknorbê amipytãrmã? Kati. Me biknor tokry djabê me aje amipytãr prãm kêt kumrêx. <sup>34</sup> Kam arým ije me awýr me anormã. Ije me awýr ikabên jarênh

djwÿnh janormã. Ije ajte me awÿr me no mex janormã. Ije ajte me awÿr me kukràdjà mar djwÿnhkumrêx janormã. Dja ga me kam arÿm me kwÿ pa, pÿte'y'ã me kwÿmo iten me kupa. Ne me abikprônh djàkam mry kà punuo me kwÿ kaprêprêk. Ne aje meo abikênh kadjy me abej mō, apÿnh krÿrax djari kôt me abej mō. <sup>35</sup> Me akukãmãremê nã gãm me me katàt kute amijo ba kunĩ paro tē. Paro tēn paro tēn arek me kamrō kapÿn o tē. NhyM Metÿndjwÿnh arÿm meo ngryk ne kam gormã me ajabatànhmã pãnh jarē. Me akukãmãre ne me Abeu jaxwe kêtja bÿno kurêtuw ne kam ijukri me ja paro tēm tãmtã: arek o tē ne kam Djakarij, Berakij kute irja'y'r bōx ne kam Metÿndjwÿnh nhō kikretimē ò ngònho ki kaêxkam\* kubĩ.

<sup>36</sup> Ê, ba me amã arē. Metÿndjwÿnh ne arÿm meo ngryk ne. Ne kam me akam-ingrãnymã arÿm pãnh jarē. Me ga dja Metÿndjwÿnh me akukãmãre kute me imex tÿmja pãnh me ajo ajkē. Mrãmri ne ba me amã arēnhkumrêx. Nãm ã Jeju memã ane. <sup>37</sup> Ne kam krÿraxmã kum,

—Djeruxarē, Djeruxarē, mÿkam ne akra kute Metÿndjwÿnh kabēn jarēnh djwÿnh par prãm ne? Mÿkam ne me kēno me titik ne me kupa, Metÿndjwÿnh kute me awÿr me anorja pa? Je nã bãm te ije me ajo ibikprônh ne ije me ajo atommã. Kute mrãmri ne òkrēn'ãnh kute arao noreo bikprônhja pyræk. Ba ren ã me ajo ane. Nãm bãm te ije me ajo anhÿrmã ga me amã ikÿnh kêt. <sup>38</sup> Ê, jakam me amōr djà ja gêdja kukrit mex ne kaprÿn nō. <sup>39</sup> Ê, ba me amã arē ga me ama. Jakam dja ga me ipumÿnh kêtumrêx ne. Ipumÿnh kêt rã'ã: nhyM inhō akati ijo rãm ne jao tē ga me abenmã kum, “Ê, ota arÿm Metÿndjwÿnh kabēnkôt tãmja bōxmã. Me:xkumrêx”, ane. Dja ga me ã abenmã ane ba kam arÿm me awÿr bōx. Nãm ã Jeju memã ane.

## 24

*Akubyn bōx kukãm mÿjja apōx'ã ujarēnh. Mak 13.1; Ruk 21.5; Xim k 4.1; A Xim 3.1*

<sup>1</sup> Ne kam Metÿndjwÿnh nhō kikreti kurÿm kato. NhyM kôt ba djwÿnh 'ÿr bōx. Ar kute

kikretikam apÿnh kum kikre jakre kadjy 'ÿr bōx. <sup>2</sup> Ne kam ar arÿm kum akre nhyM Jeju arkum,

—Ar mÿjja kunĩ pumÿnho dja. Ê, ba ar amã katàt arē. Be, dja ã me kurê djwÿnh prÿne kikreti ngrà. Dja me kēn aben nhiby ikwã kunĩ nhikô rē. NhyM kam kēn'ō aben nhiby nōr kêtumrêx, ane.

<sup>3</sup> Ne kam ar tēn kam krãnhbê Oriwêre'ã wabi nhyM arÿm ate nhÿ. NhyM kam kôt ba djwÿnh 'ÿr bōx ne me kãxã kum,

—Dja ga ar imã kikreti ngrãnh'ã ajarē. Nhÿnh amex 'òkam dja me bakurê djwÿnh me bawÿr bōx ne kikreti ngrà? Dja ga akubyn bōx nhyM mÿjja kunĩ arÿm pyka kôt amingrà nhyM me kunĩ arÿm pykakam ar ba'ã aminhinomã amimē. Mÿj gêdja kukãm apōx? Dja bar omÿn kam kôt ò akatimã ikaton ò akati ma.

<sup>4</sup> NhyM kam Jeju arkum apÿnh mÿjja kukãm apōxmã arkum 'ã ajarēn arkum,

—Ar amijã ano tÿx gē me'ō ar amã 'êx ne ar anoo biknor ne Metÿndjwÿnhbê ar ajo akêx kêt. <sup>5</sup> Be, me krãptĩ dja ã aben totokmã me'y'r bōx ne arÿm amijo 'êx ne amijã imē. Amijã imēn arÿm memã kum, “Me anhō Bēnjadjwÿrbê kumkati kadjy ne Metÿndjwÿnh ijano ba tēn bōx. Ba ibê Kritu”, ane. Ne kam arÿm me krãptĩ noo aknon Metÿndjwÿnhbê meo akêx.

<sup>6</sup> Be, kam dja gar me kute abenwÿr prôt man amybÿm me kute abenwÿr prôt jarēnh ma. Kwãrÿk wãnh kam ar atÿn prãm kêt. Ba ne ba kukãm ar amã 'ã ajarē gar arÿm ama. Ja kumrêx gêdja me ã o anhÿro tē. Kraxje kute inomã mēnh kêt, kute 'ÿr o tēm rã'ã, ane. <sup>7</sup> Nã, apÿnh me ba djari gêdja me abenwÿr prôt ne aben nhimexo ba. NhyM apÿnh bēnjadjwÿr rÿnh nhō àpēnhja abeno kurê djwÿnh ne aben nhimexo ba. NhyM prãmdjwÿ me kwÿ nhimex. Apÿnh pyka djari gêdja kam pyka terte:t ne. <sup>8</sup> Be, me tokry krax ne ja. Ga me nire kra àja pumÿ. Adjÿm. Dja kra à:n kam arÿm à ra:x ne. Me adjwÿnhdjwÿ dja me tokry mō:n kam arÿm tokry ra:x ne. Be, me tokry krax ne ja. Nãm ã Jeju arkum ane.

Ne kam ajte arkum,

\* 23:35 ipôokri

<sup>9</sup> —Dja me tokry: nhym kam me arým memã ar akanga. Me kute ar ajo bikênho ba kadjy ar akanga. Nhym me arým ar apa. Apÿnh me bajtem ba djã kunîkôt dja me kum ar akuré. Ikôt ar abikamênhkam dja me kum ar akuré. <sup>10</sup> Kam dja me krãptî ibê amijo akêx. Ne kam me kurê djwÿnhmã aben kangan kum aben kurê. <sup>11</sup> Me krãptî dja me ta amijo 'êx ne amijã Metîndjwÿnh kabên jarênh djwÿnh rê. Amijã kurên memã kum, “Metîndjwÿnh kukwakam ne ba ar amã arê”, anhÿro ba. Dja me ã amijo 'êxo anen arým me krãptî noo aknon Metîndjwÿnhbê meo akêx. <sup>12</sup> Me krãptî kum Metîndjwÿnh kÿnhja dja me arým kum kÿnh apêx. Pyka kunîkôt me krãptî axweo kume:x. Me axweo kumexkam dja me arým kum kÿnh apêx.

<sup>13</sup> Nhym be, dja mÿjja kunî kute amin-gràn nhõ akati bõx. Me kunî kute aminhinomã amimên nhõ akati bõx. Nhym kam me 'ã ukanga kêt ne kum kÿnh tÿx rã'ãja dja Metîndjwÿnh arým me utã. <sup>14</sup> Mÿjja kute amingràn kêttri dja me apÿnh pyka kunîkôt memã arê. Bënjadjwÿr djwÿnh'ã ujarênh nyja memã arê. Apÿnh me ba djã kunîkôt me kute ujarênh mar kadjy memã arê. Nhym kam akati arým bõx. Me kunî kute aminhinomã amimên nhõ akati arým bõx. Ba ne ba kukãm ar amã 'ã ajarê gar arým ama. Nãm ã Jeju arkum ane.

Ne kam ajte arkum,

<sup>15</sup> —Be, ar aje ajbir imã, “Dja ga ar imã kikreti ngràn'h'ã ajarê”, anhÿrja ba ar amã arê gar ama. Dja mÿjja kute amingràn'h 'ÿr nhym kam arým mÿjja punutija dja. Metîndjwÿnh nhõ kikretikam dja. Gar arým omũ. Mÿjja punuti djô'ã dja me mÿjja kunîo ajkê ne kungrà. Me bakukãmãre Danijeu ne amrêbê: 'ã ajarê. Metîndjwÿnh kukwakam memã 'ã ajarê. Danijeu ne arým memã mÿjja punuti ja'ã ajarên 'ã pi'ók no'ók. Dja gar pi'ók no'ókwã pumün kam mÿjja punuti pumün kam kôt ama. <sup>16</sup> Kam gêdja Djeruxarê bu'ã pyka ja nhidjibê Djudêjakam me ja amijã maje krãnh'ÿr prõt ne. <sup>17</sup> Gêdja me kikre nhimök po'ã ãm jabej kwãrîk wãnh akubyn ùrkwãkam nêkrêx'ÿr àr ne byr ne o tēm kêt. <sup>18</sup> Gê purkam me ar ba jabej tu umaje prõt.

Kwãrîk wãnh me kute kubêkã jamÿnhmã 'ÿr akêx kêt. Dja tu me ãm kamã amũ prõt.

<sup>19</sup> ÿ, watî:re, akati wãkam me tujarômê me kra karã dja me tokry:. Mÿj gêdja me ja mÿjja punutija pymaje prõtja on? <sup>20</sup> Dja gar Metîndjwÿnhmã amijo a'uw gê na raxkam umaje ar aprõt kêtã. Nâr, gê pi'ók rârãrbê me tyk djã kêt nhõ akatikam ar aprõt kêtã.

<sup>21</sup> Be, dja me kam tokry kumex. Dja gar akubyn amijo tēn mÿjja kunîmo krax djã'ÿr amijo bõx ne ama. Me akukãmãre aben kukãm tokrykôt dja gar maro tē. Me tokry tūm maro tē:n amiwÿr me tokry maro bõx. Ga, me tokry kume:xja pumũ. Be, amrê mÿjja punuti nhõ akati bõxkam dja me tokryo katãt me tokry tūmwã kunî jakre. Ne amrê me'ã akati mörkam me tokry nydjwÿ dja me tokryo mÿjja punuti'ã me tokryja tēp kêtumrêx. <sup>22</sup> Metîndjwÿnh ren tokry'ã akati kwÿ ngri kêt nhym me'õ ren tÿn kêtumrêx. Be, Metîndjwÿnh kute amijo me utãrja kadjy dja arým 'ã akati wã kwÿ ngri.

<sup>23</sup> Godja me'õ 'êx ne ar amã, “Ota, jakam arým Kritu bõx ne nhÿ. Arým ne Metîndjwÿnh 'ã me õ Bënjadjwÿrbê kumkati mē nhym jakam arým memã nhÿ”, anhÿr jabej nâr me'õ ajte 'êx ne ar amã, “Ota, jakam arým Kritu bõx ne nhÿ. Arým ne Metîndjwÿnh 'ã me õ Bënjadjwÿrbê kumkati mē nhym jakam arým memã nhÿ”, anhÿr jabej. Djãm ar aje me ja marmã? Kati. Kwãrîk wãnh amim me ja mar kêt. <sup>24</sup> Be, apÿnh me 'êx ne ta kute amijo Kritu, ta kute amijo Bënjadjwÿrbê kumkati dja me apõx. Nhym amũ me jadjwÿ dja me apõx ne 'êx ne memã kum, “Ba ne ba Metîndjwÿnh kukwakam me amã idjujarênh iba”, anhÿro ba. Dja me me aêrbê mÿjja pumünh kêt kwÿ nhipêx, kute me noo biknor nhym me kute me'ã abenmã kum, “Mrãmri ne djãm Metîndjwÿnh kukwakam me kabênkumrêx”, anhÿr kadjy. Godja me me noo biknor ne Metîndjwÿnhbê meo akêx jabej, Metîndjwÿnh kute amrêbê amijo me utãrja kubê meo akêx ne kute meo ba jabej. Me 'êxnhÿ no tÿxo kute me akrenh jabej godja kubê me kwÿo akêx ne meo ba jabej. <sup>25</sup> Ba ne ba mÿjja apõx kêttri kukãm ar amã

'ã ajarê gar arým ama. Nãm ã Jeju arkum ane.

Ne kam ajte arkum,

<sup>26</sup> —Kam godja me'õ ar amã, “Ë, onñ kapôt kukritkam arým bõx ne ar ba”, anhÿr jabej. Djãm 'ÿr ar amõrmã? Kati, dja gar tu ate akrãn 'ÿr amõr kêt. Nâr, godja me'õ ar amã, “Ë, kikre jakam ne apdjun nhÿ”, ane. Djãm ar aje amim me marmã? Kati. Kwârîk wãnh amim me mar kêt. <sup>27</sup> Djãm ibõx ne mebê ibipdjur? Kati. Ga, kàjkwakam na krak ne adjênhja pumũ. Na jadjênh prõt ne arým myt ngjêx djãmã ngjêxja pumũ. Adjênh kute kàjkwa kunĩ kurwÿja pumũ. Dja ba ã ibõxo ane. Ije amijo inhĩ dja ba ã ibõxo ane nhym me kunĩ arým ipumũ. Nãm ã Jeju arkum ane. <sup>28</sup> Nhym kôt ba djwÿnh bõx djà jabej kukij ne kum,

—Bênjadwÿr, nhÿnh jakam dja ga bõx, ane?

Nhym arkum,

—Ga me, nhõnh ne mry tyk'ã bikprõnh ne kumex ne kute o amirõtja pumũ, ane. Dja ã Jeju akubyn bõx kutã mÿjja apõx ne bõx djào amirõto ane. Nãm ã Jeju arkum ane.

Ne kam ajte arkum,

<sup>29</sup> —Nhym me tokryo ku'êwã'ã akati kwÿ apêxkam dja on mÿjja rÿnh apõx.

“Dja myt amijo akamãt kô tyk nhym mytyrwÿ irã kêt.

Nhym kanhêti kàjkwa kurũm rôrõk nhym kàjkwakam apÿnh mÿjja tÿ:x amingrêk ne.”

<sup>30</sup> Ba kam ije amijo inhĩ dja ba kàjkwakam amirõt nhym me arým ipumũ. Nhym kam pyka kunĩkôt me ba djakam me kunĩ arým mu:w. Ba kam ije amijo inhĩ dja ba arým itÿ:x ne prïne imextire ne ipyma:. Ne kam kàjkwakam kakrãkôt bõx nhym me kunĩ: arým ibõxkôt ipumũ. <sup>31</sup> Dja ba ikadjy mrãnh djwÿnh jano nhym me arým õ'i kakôr tÿ:x ne. Kakôr tÿx ne arým ije amijo me utârja kunĩo atom. Dja me kàjkwa krax'ãm mõn meo atomo mõ. Ne kàjkwa 'ênhõt'ãm mõn meo atomo mõ. Ne aktã kàjkwa nhirê'ãm mõn meo atomo mõ. Ne apÿnh pyka kunĩkôt inhõ me ja kunĩ: abenwÿr meo atomo mõn meo aben pydji. Ba ne ba kukãm ar amã 'ã ajarê. Gora abej ajkam ama.

<sup>32</sup> Be, akubyn ibõx djà nhõ akatija'ã ne ba ije pidjõbê pigêre jakremã. Gora ije 'ã mÿjja jakreja ma. Ba ar amã arê gar ama. Be, dja pidjõ pakà nokà tukam 'õ nhingrã kadjy arým ingrã apõx gar kam arým amexmã kamnhÿx nhym kam arým amex. <sup>33</sup> Bir be, gêdja ba ije ar amã mÿjja jarênhja ã apõx mõr ane gar me kam arým ijabej rît ne ijabej ajkam ama. Akubyn ibõx djà arým 'ÿr. 'ÿr dja mÿjja apõxja. Amex kutã gêdja pi'õ ingrã. Nhym be, ibõx kutã gêdja mÿjja pymatija apõx mõ.

<sup>34</sup> Nà, mrãmri ne ba ar amã kôt arê. Ar anhõ pykakam me kamingrãny ja gêdja me tyk par kêttri mÿjja ja kunĩ apõx. Mrãmri ne ba ar amã arê. <sup>35</sup> Ikabên kajgo kêtikumrêx. Gêdja pykamê kàjkwa ï apêx nhym be, ba ikabên gêdja 'õ biknor kêtikumrêx. Mrãmri gêdja ba ije mÿjja jarênh ja kunĩ apõx nhym me omũ.

*Me kute bõx djà nhõ myt mar kêt.*

*Ruk 12.37; Kar 1.6; Tex k 5.2*

<sup>36</sup> Ne kam ajte arkum,

—Be, ba akubyn ibõx djà nhõ akati nâr myt djãm me'õ kute mar? Kati, me'õ kute mar kêtikumrêx. Metĩndjwÿnh kadjy mrãnh djwÿnhdjwÿ kute mar kêt. Ibãmbit ne kute mar. <sup>37</sup> Be ga, amrêbê me bakukãmãre Nõwe pykakam ar bari me ate krãn ar baja pumũ. Dja ba ibõx 'ÿr nhym me ã ane. Ije amijo inhĩ dja ba akubyn ibõx 'ÿr nhym me ate krãn ar ba. <sup>38</sup> Amrêbê: ngõ kute pykao bikamÿr kêttri ne me bakukãmãre ate krãn ar õ kwÿ krênbit ba ne ar kõmbit ba. Ne abenwÿr babit ar ba. Nãm me me mymã kra jarê ne memã kum,

—Nà, jakam dja ga arým tu ikra'ÿr mõ, anhÿro ba nhym me arým me'ÿr ba. Nãm me mÿjja jabit kôt amak bẽno ba: nhym kam Nõwe arým kã raxmã wadjã. <sup>39</sup> Nãm me amikukãm mÿjja mar kêtikumrêx ne ar ba: nhym me aêrbê ngõ tam mõn me kunĩo mõn prïne meo akno. Ije amijo inhĩ dja ba akubyn ibõx 'ÿr nhym me ã anen ate krã nhym mÿjja arým ã meo ane. <sup>40</sup> Nhym me'õ my ar amê kapõtkam tẽ. Ba ikjê pa 'amÿ nhym ikjê arek wakrekam dja. <sup>41</sup> Nhym me'õ nire ar amê à'uko nhÿ. Ba ikjêbit pa 'amÿn o tẽ nhym ikjêja arek wakrekam nhÿ.

<sup>42</sup> Kam dja gar arek ijabej ajkam ama. Mýkam? Bir, ar aje akubyn ibôx'ã myt mar kêt kam. Ba ibê ar anhô Běnjadjwýr djwýnh ar aje akubyn ibôx'ã myt mar kêt kam. <sup>43</sup> Dja gar ikaběn ma. Ba ajte ar amã 'ôdjwý jarě gar ama. Ne ren ô kikre djwýnhja ren me àkĩnhĩ bôx djà man ren kam ren arek kam amako nhỹ. Nhyr ren bôx ne kikre'ã 'yr ne kum àr kêt kumrêx. Badjwý dja ba ije me àkĩnhĩ pyràk ne me ajaêrbê bôx. <sup>44</sup> Kam gêdja gar gadjwý mã ikam amako nhỹ. Ba ije amijo inhĩ ne me awýr ibôx ba gêdja ba ajte akubyn bôx. Ar aje nhỹnh myt nhỹr 'ôkam aje ibôx djà mar kêt. Kam gêdja ba tu ar ajaêrbê bôx. Nãm ã Jeju arkum amibôx djà jarěho ane. Ne kam ajte arkum,

<sup>45</sup> —Me ô bĕnjadjwýr ne ô àpĕnhmã kabĕn ne kum, “Ga dja ga me àpĕnh'ã me omũ ne prĩne 'ã meo djuw mex. Ne myt kunĩkôt memã ô kwý krĕn djà ngãn akrànmã memã ôro aba.” Nãm ã ô àpĕnhmã me'ã karôo ane. Kute akrànmã me àpĕnh'ã me omũnh ne kute 'ã meo djuw mex katàtmã ã kum me'ã karôo ane.

Nhyr ô àpĕnh kum, “Nà, gêdja ba mrãmri ã anen kam me 'ãno dja”, ane. Nhyr kam ô bĕnjadjwýr mã nhĩ'ãm tĕ. Nhyr kam ô àpĕnhja kabĕnkumrêx. Nãm katàt ar memã mýjja nhôro ba, me kanga kêt kumrêx ne ar meo ba.

<sup>46</sup> Nhyr kam bĕnjadjwýr akubyn bôx ne kam ô àpĕnhjamã kato. Kute amrêbê kum kabĕn jarĕnhja kôt ne mrãmri meo djuw mexkumrêx nhyr kam arým kum kato. Kam dja ô àpĕnhjadjwý tu amikam kĩnhkumrêx.

<sup>47</sup> Ě, ba ar amã kôt arĕ. Bĕnjadjwýrja dja ô àpĕnh ja'ã bĕnjadjwýr mĕ. Kute nĕkrĕxmĕ mýjja kunĩ pumũnhmã dja 'ã bĕnjadjwýr mĕ. Nhyr kam ô àpĕnhja kĩnhkumrêx ne. <sup>48</sup> Nãm ren ô àpĕnhja axwen ren ôkre kadjwýnhbê ô bĕnjadjwýrja'ã ren, “Be, nãm nhĩ'ãm bĕnjadjwýr tĕn arým amikrà. Jakam dja ba on tu arĩk ar iba”, ane. <sup>49</sup> Ne kam ren ar ô àpĕnhja titiko ba, me ro'ã àpĕnhja ren ar me titiko ba. Ren ô kwý krĕnbit ban me bibãnhkôt ren kadjwati kangôo\* kômo ba. <sup>50</sup> Nhyr kam ô bĕnjadjwýrja aêrbê

bôx. Ô àpĕnhja kute amim ô bĕnjadjwýrja bôx djàkôt mar kêt. Nhỹnh akati 'ôkam bôx djàmã kute mar kêt ne nhỹnh myt nhỹr 'ôkam bôx djàmã kute mar kêt kam ne aêrbê bôx. <sup>51</sup> Nãm bôx ne kam ô àpĕnh arĩk ar bajakam ngryk ne. Ngryk ne kam o ajkapôn bôm kumĕ. Me kute amijo 'êx ne ta kute amijo Metĩndjwýnh mar mexjamĕ ro'ã ãm kadjy bôm kumĕ. Wãnh ne me amim ngryk ne tokry djaje amijanĕn ar àmra ba, ane. Nãm Jeju ã kôt ba djwýnhmã ane.

## 25

### *Me prĩtirebê 10'ã ujarĕnh.*

<sup>1</sup> Ne kam ajte arkum,

—Kàjkwakam Bĕnjadjwýr djwýnh dja akubyn bôx ne amim me utàn ar meo ba. 'ã dja ba me prĩtirebê 10 jakren 'ã ar amã ajarĕ. Be, mjĕn kumrêx ne arým prô nhũrkwã'ýr tĕn 'ýr bôx ne arým aminhũrkwã'ýr kute prôo bôxmã. Me kute abenã ar mĕnhmã ne aminhũrkwã'ýr kute prôo bôxmã. Nhyr nĩjar me prĩtirebê 10 arkam ama. Ar ro'ã kĩnh kadjy arkam ama. Arkam ama:n kam arým kute ar kajpar kadjy arým katon ar'ýr ngônhpôko mō. <sup>2</sup> Ar prĩtirebê 5 ne ar no rerekre nhyr Ar kubê 5 ne ar no mexkumrêx. <sup>3</sup> Ar no rerekreja ngônhpôkkambit kangôo mōn ngônhpôk kangô 'ôdjwýo mōr kêt. <sup>4</sup> Nhyr be, ar amak mexja ne ar ngônhpôko mōn ajte ngôn 'ôdjwýkam ajte kangô 'ôdjwýo mō. Ar amũ mjĕnmĕ prô ar'ýr ngônhpôko mō:. <sup>5</sup> Nhyr mjĕn ar amikrà nhyr prĩtireja ar arým ôtdjwan dja:n arým nōn kam arým ngōr.

<sup>6</sup> Nhyr akamàt kô ipôkri nhyr me'ô arým ar aêrbê mjĕn aro aki:j ne arkum, “Ě, arým ne prôo bôx. Amrĕ ar aprôt ne ar kajpa”, ane.

<sup>7</sup> Nhyr kam ar prĩtire kunĩ krã katon arým ngônhpôko mex. <sup>8</sup> Nhyr no rerekre arja arým amak mex ar jamã kum, “Ar imã ar anhô kuwy kangô kwý ru. Arým ar inhô ngônhpôk àtyk mō”, ane.

<sup>9</sup> Nhyr ar arkum, “Kati. Ngrire. Ba ren ar ar amã kangô kwý ru nhyr ren kangô gwaj banhô ngônhpôk'ýr ren bôx kêt.

\* **24:49** Mýjja me kute o kôm ne kôot bibãnh kunĩja, kadjwati kangôomĕ uba kangôomĕ, mýjja kangôo kunĩ ne me kum kadjwati kangôo jarĕ.



Ar ngônhpôk kangô nhôr djwýnh'ýr môn amim kwý kôpra”, ane.

<sup>10</sup> Nhyam kam ar no rerekre arým kôpra djà'ýr mō. 'Ýr mōrram nhyam arým mjênme prō ar bōx. Nhyam kam ar prítire, ar ô ngônhpôk kangôja arým mjênme arkôt wadjà. Me kute prō'ã mēnh djakam kikremã wadjà. Mjênme prōmē ro'ã ar ô kwý krēn kīnh kadjy ne ar prítire ar kôt kikremã wadjà. Nhyam kam me arým ar pānh kikre'ã ijē.

<sup>11</sup> Nhyam kam ajmã nhyam ar prítire no rerekreja bōx. Ar arým kuwy kangô kôpra djakam tēn kangô kôpran arým akubyn bōx. Ne kam mjênme prō nhō kikre'ýr bōx ne kum, “Bēnjadjwýr, bēnjadjwýr, gop ar imã kikre'ã ta”, ane.

<sup>12</sup> Nhyam arkum, “Kati. Ije ar amar kêt. Mrāmri ne ba ar amã arēnhkumrēx.” Nãm ã bēnjadjwýr arkum ane. Tãm ne ja. Nãm ã Jeju kôt ba djwýnh arkum ane.

<sup>13</sup> Ne kam 'ã ajte arkum,

—Dja ba ije mjēnwã bōx pyrāk. Kam dja gar ijabej ajkam ama. Ba ije amijo inhīja ar aje ibōx'ã akati nār myt mar kêt. Nãm ã Jeju arkum ane.

*Pi'ôk kaprîbê tarētu nhôr'ã ujarēnh.*

*Ruk 19.11*

<sup>14</sup> Ne kam ajte arkum,

—Kàjkwakam Bēnjadjwýr djwýnh dja akubyn bōx ne arým amim me utàn ar meo ba. 'Ã dja ba me'ō jakren 'ã ar amã ajarē. Me'ōja ne anhýr bê pyka 'ōmã tēmmã, ne amiwýr ô àpēnh ar ku'uw. Nhyam kam ar bōx nhyam arým arkum ô mýjja ngã.

<sup>15</sup> Apýnh ar kum àpēnh mexkôt ne arkum ô mýjja ngã. Ar kute kutēp kum kàjmã 'ã kamēnhmã ne arkum kungã. Ô àpēnh no mexjamã ne pi'ôk kaprî rax ngã. Pi'ôk kaprîbê tarētubê 5 ne kum kungã. Ne kam ajte kàjbê no mexjamã pi'ôk kaprîo amānhkrut ne kungã. Ne kam ajte no rerekre jamã pydjin kungã. Ne kam arým mã pyka 'ōmã tē. <sup>16</sup> Nhyam kam kute pi'ôk kaprîbê 5 byrja arým o nēkrēx kumex by. Ne kam pi'ôk kaprî pānh arým memã ôro dja. Memã ôro dja: nhyam me pānh kum pi'ôk kaprî rax nhōro dja. Nhyam amýn arým 'ã akre. 'Ã akre:n arým 'ã akrebê 5 ne kuby ne kam ijukri 'ã akre: ne o 5

ne kuby. <sup>17</sup> Nhyam kam kute pi'ôk kaprîo amānhkrut byrja ã o anen o nēkrēx kumex by. Ne kam pi'ôk kaprî pānh arým memã ôro dja. Memã ôro dja: nhyam me pānh ajte kum pi'ôk kaprî rax nhōro dja. Nhyam amýn arým 'ã akre. 'Ã akre:n arým 'ã akreo pi'ôk kaprîo amānhkrut ne kuby ne kam ijukri 'ã akre: ne kam o amānhkrut ne kuby. <sup>18</sup> Nhyam be, kute pi'ôk kaprî pydji byrja ne mã o tēn kam kum kren tu kam adjà. Nãm kàjmã kum 'ã akre bikamēnh kêt.

<sup>19</sup> Nhyam kam ajmã:kam ar àpēnh nhō bēnjadjwýrja bōx ne amiwýr ar ku'uw nhyam ar 'ýr bōx. Kute akubyn ô pi'ôk kaprî jamýnh ne 'ã akre kadjy amiwýr aro bōx.

<sup>20</sup> Nhyam kute pi'ôk kaprîbê 5 byrja ne kum o bōx ne kum ajte ijukri 5 ne o bōx ne kum kungān kum, “Bēnjadjwýr, ije amã omūnh kadjy ne ga imã 5 ne angã. Ota, ba arým kàjmã amã 'ã akre kamē nhyam arým kubê 10. Mĩ, anhō pi'ôk kaprîbê 10”, ane.

<sup>21</sup> Nhyam ô bēnjadjwýr kum, “Mexkumrēx. Ga ne ga adjàpēnh mexkumrēx. Ak-abēnkumrēx. Nã bãm amã mýjja ngrire ngã ga prīne ikutēp imã o djuw mex ne 'ã adjukanga kêt. Pānh gēdja ba amã inhō mýjja rax jarē. Ga kam amũ idjô'ã ar o aba. On dja ga ikôt akīnhkumrēx”, ane.

<sup>22</sup> Nhyam kam kute pi'ôk kaprî amānhkrut byrja ne ajte 'ýr bōx ne kum, “Bēnjadjwýr, ije amã omūnh kadjy aje imã o amānhkrut ne ôrja ne ba arým kàjmã amã 'ã akre kamē nhyam arým kubê 4. Mĩ, anhō pi'ôk kaprîbê 4”, ane.

<sup>23</sup> Nhyam ô bēnjadjwýr kum, “Mexkumrēx. Ga ne ga adjàpēnh mexkumrēx. Ak-abēnkumrēx. Nã bãm amã mýjja ngrire ngã ga prīne ikutēp imã o djuw mex ne 'ã adjukanga kêt. Pānh gēdja ba amã inhō mýjja rax jarē. Ga kam amũ idjô'ã ar o aba. On dja ga ikôt akīnhkumrēx”, ane.

<sup>24</sup> Nhyam kam kute pi'ôk kaprî pydji byrja ne 'ýr bōx ne kum, “Bēnjadjwýr, nã gãm ajamakkre kêt. Nã gãm adjàkre kētkam ar mebê djwýo atomo aba. Ne aje amim mýjja kunĩ jadjwýr kētkam ar mebê jām o amijakren o atomo aba. <sup>25</sup> Ba kam ije amã kupēnh prām kētkam prīne kum kren kam adjà nhyam nō. Imã apymakam. Mĩ, anhō pi'ôk kaprî”, ane.

<sup>26</sup> Nhyam kam ò bēnjadjwÿr kum, “Ga ne ga ajaxwekumrēx. Amā djukangakumrēx. Djā nā bām idjākre kētkam ar mebē djwÿo atomo iba ne ije amim mÿjja kunī jadjwÿr kētkam ar mebē jām o amijakren o atomo iba? <sup>27</sup> Bir be, ga kam we ga aje amim ipumũnhkôt ren inhô pi'ôk kaprī jao tēn ren me kute pi'ôk kaprī marmā angā nhyam ren abenā rôrôk tēn rax ba ren arÿm 'ÿr bôx ne arÿm ren kuby.” Nām ò bēnjadjwÿr ā kum ane.

<sup>28</sup> Ne kam memā kum, “Aj, amū me ajō kubē pi'ôk kaprīwā byn o tēn kute imā pi'ôk kaprīo àptār nhyam kubē 10wāmā angā”, ane. <sup>29</sup> Mÿkam? Bir, arÿm me ò mÿjja gēdja Metīndjwÿnh iby memā kungā nhyam kam arÿm me ò mÿjja kumex. Nhyam be, me ò mÿjja kêt, kute memā òr nhyam me kute kum o djuw mex kêtjabē gēdja Metīndjwÿnh mÿjja ngrireja kunī by.

Ë, ba ar amā arē gar ama. Me kute tu amim imarkumrēx jamā dja Ibām ijo amirīto tē gē me amim imar rax. Nhyam be, me ajkwaobit kute amim imarjabē dja Ibām ijo apdju. Dja prīne inēje me no nhyam tyn mebē ijo apdju.

<sup>30</sup> Be, nhyam kam bēnjadjwÿr memā kum, “Aje, me bōm inhô àpēnh punuwā mē gē wānh akamāt kô tykkam ar me ikô'ā ba. Wānh ne me tokry djaje amijanēn ar àmra ba. Nām ā bēnjadjwÿr memā ane nhyam me arÿm bōm kumē. Tām ne ja.” Nām ā Jeju arkum ane.

*Mrykī'ātomtimē mokaàk'ā ujarēnh.  
Mat 13.36, 22.13; Ap 20.11*

<sup>31</sup> Ne kam ajte arkum,

—Ba ije amijo inhī dja ba prīne imex ne ipyma:n arÿm akubyn bôx. Ne amikôt Metīndjwÿnh kadjy mrānh djwÿnh kunīo bôx. Ne kam kàjkwakam imexo ime:xkumrēx ne ipyma:kumrēx ne arÿm ikrī djā raxkam nhÿ. <sup>32</sup> Nhyam kam apÿnh me ba djā kunīkôt dja me ikabem akuprō ba arÿm meo ajkij. Kute mryo ba djwÿnh kute ò mryo bikjēr pyrāk. Kute aben bē mrykī'ātomtimē mokaàko bikjēr pyrāk. Dja ba arÿm ā aben bē meo ibikjēro ane. <sup>33</sup> Ne inhô me mex kute mrykī'ātomti pyrāk ja dja ba amidjubôk'ānh me umjuw. Ne me axwe

kute mokaàk pyrāk ja dja ba amidjuge'ānh me umjuw.

<sup>34</sup> Ne kam ba Ibēnjadjwÿr rax idjubôk'ānh me mex ku'ējamā kum, “Amrē me iwÿr mōn ikôt aku'ē. Ba ibē me anhō Bēnjadjwÿr djwÿnh dja ba arÿm me ajo ibakumrēx. Amrēbē: mÿjja kunī kator djā kraxkam ne Ibām arÿm amijo me apytàn me ajo djuw mex. Ije amim me apytār ne ije me ajo iba kadjy amijo me apytà. <sup>35</sup> Mÿj ne ga me nē ba kam arÿm amikôt me apumjuw? Bir, arÿm imā prām ga me imā mÿjja'ō ngā ba kukrē. Arÿm imā kôr ga me imā mÿjja 'ō ngā ba o ikō. Nām me ijo me bajtem ga me arÿm imā anhūrkwā jarē ba kam inhikwā. <sup>36</sup> Arÿm ikà kêt ga me arÿm imā kubēkà ngā ba adjà. Arÿm ikanē ga me arÿm ikane. Arÿm me ibē ijē ga me arÿm iwÿr bôx ba ikīnh. Kam ne ba arÿm amikôt me apumjuw”, ane. Akubyn ibôxkam dja ba ā idjubôk'ānh me katāt kute amijo bajamā ane.

<sup>37</sup> Nhyam kam dja me imā, “Bēnjadjwÿr djwÿnh, nhÿnh ne ga amā prām ba me apumūn amā mÿjja ngā ga krē? Nhÿnh ne ga amā kôr ba me amā mÿjja'ō ngā ga o ikō? <sup>38</sup> Nhÿnh ne me kute ajo me bajtem ba me apumūn amā inhūrkwā jarē ga kam anhikwā? Nhÿnh ne ga akà kêt ba me amā kubēkà ngā ga adjà? <sup>39</sup> Nhÿnh ne akanē ba me apumū? Nhyam nhÿnh ne me abē ijē ba me awÿr bôx ga akīnh”? ane.

<sup>40</sup> Kam, ba Ibēnjadjwÿr rax dja ba memā kum, “Ije meo ikamy'ō nhyam me kum kurē. Nhyam arÿm ò mÿjja kêt. Ga me kam arÿm o djuw mex. Aje o djuw mex o aje ba ijo djuw mex pyrāk. Mrāmri aje o djuw mexkam aje ba ijo djuw mex mexkumrēx”, ane. Dja ba ā akubyn ibôxkam me mexmā ane.

<sup>41</sup> Kam dja ba idjuge'ānh me axwe ku'ējamā kum, “Me apunu:re. Me rūm imā akàx. Kuwy pōk rā'ā: rā'ājamā me mō. Ije Xatanajmē kadjy mrānh djwÿnh kadjy kuwy nhipēxjamā me mō. <sup>42</sup> Mÿj ne ga me nē ba me amā, ‘Me rūm imā akàx?’ ane. Bir, imā prām ga me aje imā mÿjja nhōr kêt. Imā kôr ga me aje imā ngô'ō nhōr kêt. <sup>43</sup> Me kute ijo me bajtem ga me aje imā anhūrkwā jarēnh kêt. Ikà kêt ga me aje imā kubēkà nhōr kêt. Ikanē ga me iwÿr abôx kêt nhyam

me ibê ijê ga me iwÿr abôx kêt. Ga me ã ane ba kam me amã, ‘Me rÿm imã akàx’, ane.” Dja ba ã idjuge'ãnh me axwe ku'êjamã ane.

<sup>44</sup> Me axwewãdjwÿ dja me imã, “Bênjadjwÿr djwÿnh, nhÿnh ne ga amã prãm nàr amã kôr nàr me ajo me bajtem nàr akà kêt nàr akanê nàr me abê ijê ba me ajo djuw mex kêt”? ane.

<sup>45</sup> Kam dja ba memã kum, “Bir, ikamy 'õ me kum kurê nhym õ mÿjja kêt ga me aje o djuw mex kêt. Aje o djuw mex kêt o ne aje ba ijo djuw mex kêt pyræk”, ane. Mrãmri, ba me amã ja jarênhkumrêx. Dja ba ã akubyn ibôxkam me axwemã ane.

<sup>46</sup> Kam dja me arÿm mã môn tokry rã'ã: rã'ã ne. Nhym be, me katàt kute amijo baja dja me Metĩndjwÿnhkôt tĩn ne ar ba rã'ã: rã'ã ne. Nãm ã Jeju memã ane.

## 26

*Me kute Jeju bĩn kadjy kute o aben mar.  
Mak 14.1; Ruk 22.2; Dju r 11.47*

<sup>1</sup> Jeju arkum kabên jarênh pan kam arÿm kôt ba djwÿnh arkum,

<sup>2</sup>—Arÿm ne Metĩndjwÿnh me bakukãmãre nhirôbê mrãnh djà nhõ akati 'ÿr. Mebê idjaer krãptĩ kute aben kajmã'ã me irôbê mrãnh djà mar kadjy ne me kute aben pydji 'ÿr. Arÿm nêje akati pydji. Tãm ne gar arÿm ama. Kam ba ije amijo inhĩja dja me memã ikanga nhym me arÿm pĩte'y'ã inhôn ibĩ, ane.

<sup>3</sup> Nãm arkum ane nhym wãnh me kadjy Metĩndjwÿnh mar djwÿnh nhõ bênjadjwÿr rax nhÿ. Idjibê ne Kajbaj. Õ kikretikam ne nhÿ nhym me rÿnh arÿm kam akuprõ. Me kadjy Metĩndjwÿnh mar djwÿnh nhõ bênjadjwÿrmê Môjdjê kukràdjã mar djwÿnhmê mebêngêtmê akuprõ. <sup>4</sup> Nãm me akuprôn abenmã kum,

—Mÿj godja gwaj me krãptĩ kàxã Jejuo tÿm ne bĩn kadjy on? ane. <sup>5</sup> Ne kam abenmã kum,

—Kwãrĩk wãnh gwaj me kute aben pydji djà nhõ akatijakam o batÿm kêt. Ne gwaj ren o ane nhym me krãptĩ ren o ngryk ne ren kangao kumex, ane.

*Me'õ nire kute Jeju nhimõk'ã kangô kapĩ.  
Mak 14.3; Dju r 12.1*

<sup>6</sup> Be, krĩ ngrirebê Betanhakam ne Jeju nhÿ. Kamã ne me'õ ã kajêkam tê arÿm mex. Idjibê ne Ximão. <sup>7</sup> Ximão nhÿrkwãkam ne Jeju õ kwÿ krêno nhÿ. Õ kwÿ krêno nhÿ: nhym me'õ nire arÿm 'ÿr tẽn 'ÿr bôx. Nãm 'ÿr kên jakareo ngôn byn o tẽn. Be, ngônkhkam ne me kudjÿ djà kangô ipu. Nãm me prĩne ipêx mex nhym pãnh raxkumrêx. Nãm ngônho tẽn kam Jeju nhimõk'ã kangô kapĩ.

<sup>8</sup> Nhym kôt ba djwÿnh ar arÿm omũ. Ne kam nokà nhàn abenmã kum,

—Je tô mÿkam ne arÿm me kudjÿ djào ajkê? <sup>9</sup> Gwaj ren pi'ók kaprĩ kadjy ren memã kungã ne ren pãnh pi'ók kaprĩ rax ne ren kubyn ren me õ mÿjja kêt mã kungrà. Mÿkam ne arÿm o ajkê? ane.

<sup>10</sup> Nhym Jeju arÿm tu ar kabên man arkum,

—Mÿkam ne gar kum kaprĩ jadjã? Djãm kute ijã kapĩnkam punu got? Kati, mexkumrêx. <sup>11</sup> Be, akati kunĩkôt ne ar abu'ã me õ mÿjja kêt ar ba rã'ã. Nhym djãm arek gwaj baro'ã ar baba rã'ãmã? Kati.

<sup>12</sup> Dja ba ty nhym me arÿm ijadjã. Me kute ijadjãr kadjy ne ijã me kudjÿ djà kapĩ. <sup>13</sup> Ba ar amã arê gar ama. Dja me kàj bê pyka kunĩkôt mã ijã memã ujarênh ny jarên mã nijadjwÿ 'ã ajarê. Kute ijã me kudjÿ djà kapĩ'ã ajarê. Ne kam aben djô'ã nija mar rã'ã ne. Mrãmri ne ba ar amã arênhkumrêx. Nãm ã Jeju arkum ane.

*Djuda kute memã kangamã kute memã arênh.*

*Mak 14.10; Ruk 22.3*

<sup>14</sup> Nhym kam Jejukôt ba djwÿnhbê 12 ja 'õ, idjibê Djuda Ikadji ne me kadjy Metĩndjwÿnh mar djwÿnh nhõ bênjadjwÿr 'ÿr tẽn. <sup>15</sup> Nãm ar'ÿr tẽn ar'ÿr bôx ne arkum,

—Arÿm ne ba ije ar amã Jeju kangamã. Mÿj dja gar pãnh imã angã? Ba kam arÿm ar amã kanga, ane. Nhym kam ar arÿm kum kryt jakao ngônphonho pi'ók kaprĩ jarê. Nãm ar kute 'ã akrebê 30 ne kum kungã nhym kubyn o tẽn. <sup>16</sup> Ne kam amim,

—Mÿj dja ba ije arkum Jeju kanga kadjy on? Nãm ã amim anhÿro ba.

*Ar kute ro'ã ar õ kwÿ krêno ino rer.  
Mak 14.12; Ruk 22.7*

17 Nhyam kam mebê idjaer kukràdjàkôt me kute djwýponhbit kur nhõ akati arým kutewa nhyam kôt ba djwýnh ar Jeju'ýr bõx ne kum,

—Metíndjwýnh me irôbê mrãnh nhõ akatikam gwaj banhõ kwý krën kadjy jãm dja bar tèn akutêp gwaj banhõ kwý krën djà jadjwýr mex? ane.

18 Nhyam arkum,

—Dja gar kríraxkam tèn me'õ 'ýr bõx ne kum, “Ujarênh djwýnh ne amã, ‘Arým ne inhõ akati iwýr bõx. Dja bar Metíndjwýnh me irôbê mrãnh nhõ akatikam me kukràdjà kôt inhõ kwý krë. Bamë ikôt ba djwýnhmë dja bar anhürkwãkam inhõ kwý krë’, ane. Dja gar ã kum ane.” Nãm Jeju ã kôt ba djwýnh arkum ane. 19 Nhyam kam ar arým Jeju kute arkum 'ã karõ kôt 'ýr tẽ. Ne me'õ ja'ýr bõx ne kum Jeju kabên jarë nhyam arkum, “Ã”, ane. Nhyam kam ar arým ürkwãkam kutêp ar õ kwý krën djà jadjwýr mex. Metíndjwýnh me irôbê mrãnh nhõ akati kadjy ne ar õ kwý krën djà jadjwýr mex. Ne kam akubyn Jeju kutã tẽ. 20 Nhyam kam ar'ã para nhyam ar me'õ kute arkum ürkwã jarênhja nhürkwã'ýr tẽ. Kam ar õ kwý krënmã 'ýr tèn 'ýr bõx. Ne kam nhý. Ar kubê 12ja ne ar Jejumë ro'ã nhý ne arým õ kwý krëno nhý. 21 O nhý: nhyam Jeju arkum,

—Be, ar ajõ dja ga ikurê djwýnhmã ikanga. Mrãmri ne ba ar amã arênhkumrëx, ane.

22 Nhyam kam ar arým kaprî:ren apýnh ar ï djàri aben totokmã kum,

—Bënjadjwýr djwýnh, djãm ba? Bënjadjwýr djwýnh, djãm ba? ane.

23 Nhyam arkum,

—Be, kute ikôt ngônhrãtikam djwýr jadjãrja tãm dja memã ikanga. 24 Be, me bakukãmãre kute ba ije amijõ inhõ ijã pi'òk no'òk, kute Metíndjwýnh kukwakam ijã pi'òk no'òkkôt ne me arým jakam ar ã ijo anhýro ba. Nhyam be, kute ikurê djwýnhmã ikanga djwýnhja dja ï kute memã ikanga pãnh tokry ra:xi. Ý, watî:re. Tãmja ne ren rwýk kêt ne. Nãm ã Jeju arkum ane.

\* 26:28 Mrãmri ne Jeju kamrõo prõt nhyam Metíndjwýnh arým 'ã memã kum, “Arým ne ikra tyn kamrõo prõt ne. Jakam dja me tu amim ikra markumrëx ba kam arým me axwe maro aknon me kam ingyk kêt ne.” Nãm ã Metíndjwýnh memã ane.

25 Nhyam Djuda, kute kurê djwýnhmã kanga djwýnhja kum,

—Ujarênh djwýnh, djãm ba dja ba ajo ane? Arkati, ane.

Nhyam kum,

—Arým ga, “Ba”, ane. Amikôt ne ga arým amijarênhkumrëx, ane. 26 Nhyam ar àkuro nhý: nhyam Jeju arým djwý'õ byn kam o Metíndjwýnhmã mextire jarë. Kum mextire jarën arým kôt ba djwýnh arkum kokij ne apýnh arkum kungã. Ne kam aminhî'ã djwý jakren arkum,

—Inhî ne ja. Ar abyn krë, ane.

27 Ne kam ngônhrãkam pidjõ kangôjadjwý byn kam o Metíndjwýnhmã mextire jarë. Amikamrõ'ã ne pidjõ kangô jakren arkum,

—Ar akunî dja gar o ikõ. 28 Ikamrõ ne ja. Me krãptî jaxwe pãnh dja ikamrõ prõt nhyam kam Metíndjwýnh memã kabên ny jarênh mãmdjin me axwe maro aknon me kam ngryk kêt.\* 29 Ba ar amã arë gar ama. Ije pidjõ kangôo ikõmo krã'yr ne ja. Ibãm kute amim õ me ja kunî pytãr ne kute meo bakambit dja ba ajte pidjõ kangô nyo ikõ. Gwaj baro'ã o ikõ. Nãm Jeju ã arkum ane.

30 Nhyam kam ar ngre. Ngren arým o ino re. O ino ren arým amü krãnhbê Oriwêre'ýr mõ.

*Pedru 'ëxnhî kukãm kute kum arënh.  
Mak 14.27; Ruk 22.31; Dju r 13.36*

31 Ar 'ýr mõ: nhyam Jeju arkum,

—Be, akamãtja tãmkam dja me ijo ajkë gar me umaje aprõt ne ajmã. Amrëbê: ne me bakukãmãre ar aprõt ne abimãnh'ã ajarë. Metíndjwýnh kukwakam ne me arën memã kum,

“Be, dja ba mrykî'ãtomtio ba djwýnh titik nhyam mry umaje prõt ne ajmã”, anen

arým 'ã pi'òk no'òk ne.

Be, akamãtja tãmkam dja gar me umaje aprõt ne ajmã. Me bakukãmãre kute ar ajã ujarênh kôt dja gar aprõt ne ibê ajmã.

32 Ibê ajmã nhyam me arým ibî. Ba ityk ne akubyn itînkam dja ba ar akukãm pykabê Garrëjamã tẽ. Nãm ã Jeju arkum ane.

33 Nhyam Pedru kum,

—Godja ar kunî prôt ne bimành jabej ba dja ba arkôt iprôt kêt-kumrêx, ane.

<sup>34</sup> Nhyem Jeju kum,

—Kati, mrãmri dja ga arkôt aprôt. Ba amã arê ga ama. Akamàtja tãmkam ôkrên'ãnh kâr kêtri dja ga amijã maje ajêxo amãnhkrut ne ikjêkêt ne memã kum, “Kati, ije me'owã pumũnh kêt-kumrêx”, ane. Mrãmri ne ba amã ja jarênhkumrêx. Nãm ã Jeju kum ane.

<sup>35</sup> Nhyem Pedru kum,

—Kati, gê me gu baro'ã gu babĩn jabej ba ije aminêje ajã ijêx prãm kêt-kumrêx, ane. Nhyem kam kôt ba djwýnh ar kunî kabên kôt kum arê.

*Pidjôkôkam Bãmmã amijo à'wýr.*

*Mak 14.32; Ruk 22.40*

<sup>36</sup> Ne kam mō:n kam Jeju kôt pidjôkôbê Djexema'ýr bôx. Nhyem kam kôt ba djwýnhmã kum,

—Jakam dja gar ikutêp nhỹ. Ba mũm tẽn Metĩndjwýnhmã amijo a'wý, ane. <sup>37</sup> Ne kam Pedrumê Djebedêu kra ar amãnhkrut japrôn aro tẽ. Ne kam tokry rax pymaje madja kreti:n arým kaprĩ rax ne. <sup>38</sup> Ne kam arkum,

—Arým ne ba ikaprĩ:re. Arým ikaprĩ kute ibĩn 'ýr. Jãnh mãn ar idjêje nhỹ gwaj baro'ã aminêje barĩt o nhỹ, ane.

<sup>39</sup> Ne kam amũ tẽ. Tẽmo rãm ne jan tu myrbê tým. Tým ne arým Metĩndjwýnhmã amijo a'uw ne kum,

—Djũnwã, aje itokry, ikaprĩjabê ipytàr prãm jabej ipytà. Nàr kon, kwãrĩk wãnh rã'ã ba tu itokry. Djãm ba ne ba amimarkôt ar amijo iba? Kati, akabênkôt ne ba ar amijo iba, ane.

<sup>40</sup> Ne kam kãmã djan kôt ba djwýnh ar'ýr akêx ne tẽn ar'ýr bôx. Nhyem arek ar ôto ikwã. Nhyem Pedrumã kum,

—Je, kraxje kô 'iry kêt ne gar anhôto anhikwã. Mýkam ne gar iro'ã aminêje arĩto anhýr kêt ne? <sup>41</sup> Ar aminêje rĩt ne Metĩndjwýnhmã amijo a'wý. Gêdja me te ar ajaxwe'ã ar amã apnê gar mekôt ajaxwe kêt. Ja kadjy dja gar kum amijo a'wý. Be, ar anhôkre kadjwýnhbê ne gar amã ikabênja kĩnh. Nhyem be, ar aminêje arĩtbê ne gar arerekren anhôtdjwa ne, ane.

<sup>42</sup> Ne kam ajte amũ tẽn Metĩndjwýnhmã amijo a'uw ne kum,

—Djũnwã, aje itokry, ikaprĩjabê ipytàr prãm kêt jabej kwãrĩk wãnh rã'ã ba tu itokry ne akabên man kôt ar amijo iba, ane.

<sup>43</sup> Ne kam ajte akubyn ar'ýr akêx ne tẽn ar'ýr bôx. Nhyem ar nokà bã mex ne ajte arek ôto ikwã. Rerek mex ne arek ôto ikwã nhyem ar omũ. <sup>44</sup> Ne kam ajte akêx ne amũ tẽn Metĩndjwýnhmã amijo a'uw. Ôbê kute kum kabên jarênh jakôt ajte kum tãm jarê.

<sup>45</sup> Ne kam ajte kôt ba djwýnh ar 'ýr akêx ne ar'ýr tẽn ar'ýr bôx ne arkum,

—Je, djãm arek ar anhôto anhikwã rã'ãã, akôkam kôto anhikwã? Aj, arým itokry djã iwýr bôx 'ýr. Ota, arým kute me axwemã ikangamã, ije amijo inhĩa ne kute memã ikangamã. <sup>46</sup> Kãmã ar dja. Gwaj on me'ýr. Ota, arým kute memã ikanga djwýnh bôx. Nãm ã Jeju arkum ane.

*Me kute Jejuo tým.*

*Mak 14.43; Ruk 22.47; Dju r 18.3*

<sup>47</sup> Ne kute arkum anhýro ãm rã'ã nhyem Djuda arým 'ýr tẽn 'ýr bôx. Jeju kôt ba djwýnhbê 12 'õ ne kubê Djuda. Nãm 'ýr bôx nhyem me krãptĩ me:x ne kôt mōn 'ýr bôx. Nãm me kãxdjwa kajgomê kô jamýn kôt 'ýr o mōn o bôx. Me rũnh ne me me ano. Me kadjy Metĩndjwýnh mar djwýnh nhô bẽnjadjwýrmê mebêngêtmê ne me me ano nhyem me 'ýr bôx. <sup>48</sup> Me 'ýr mōr kêtri ne kute memã kanga djwýnhbê Djuda memã kum,

—Be, ije me'õ nhine kaôrkôt dja ga me omũn o tým ne pa 'amý. Nãm ã memã ane. <sup>49</sup> Nãm Jeju'ýr bôx ne kum,

—Ujarênh djwýnh, djãm amexkumrêx? anen arým ine kaô.

<sup>50</sup> Nhyem Jeju kum,

—Akmere, mýj kadjy ne ga iwýr bôx? ane.

Nhyem kam me arým 'ýr mōn o tým ne pa 'amý. <sup>51</sup> Nhyem kam bẽnjadjwýr nhô àpênh'õ ne mekôt tẽ. Me kadjy Metĩndjwýnh mar djwýnh nhô bẽnjadjwýr rax nhô àpênh mekôt tẽ. Nhyem Jejumê ro'ã ar ku'êja 'õ ne arým õ kãxdjwa kajgo kaban o me'õjamã akabên amak ta, bẽnjadjwýr nhô àpênhja jamak ta.

<sup>52</sup> Nhyem Jeju nêje kukràn kum,

—Kwārīk wānh. Akubyn àkam adjà. Ga, me kute kàxdjwa kajgoo pôx ne kute o aben parja pumũ. Ja dja ga amikam ama, ane. Mýj'ã ne kum kabên ja jarê? Bir, djãm me kute me par prãm umar mexmã? Kati. Dja kurê djwýnh ï arým kubĩ. 'Ã ne Jeju kum,

—Ga, me kute kàxdjwa kajgoo pôx ne kute o aben parja pumũ, ane.

<sup>53</sup> Ne kam ajte kum,

—Djã nã gãm ijã amim, “Dja te Bãm 'uw nhym kum òr kêt”, ane? Kati, ba ren me'ã Ibãm 'uw nhym ren imã kadjy mrãnh djwýnh krãptĩ: jano. Ren imã redjiãobê 12 jano nhym me ren ipytã. Me redjiãobê 12kam me krãkamngôn'h'ã akre nhym me kubê 72.000. Me krãptĩ: <sup>54</sup> Ne me ren ipytã ba ren kam me bakukãmãre kute Metĩndjwýnh kabên'ã pi'òk no'òk kôt amijo itêm kêt. Nhym be, kati. Mrãmri ne ba kabên kôt amijo itêmkumrêx, ane.

<sup>55</sup> Nãm ã Jeju kum anen kam me krãptĩjamã kum,

—Je djãm idjãkĩnhĩ ne ga me aje ijo atým kadjy iwýr anhõ kômê anhõ kàxdjwa kajgomê o mõi? Myt kunĩkôt ne ba Metĩndjwýnh nhõ kikretikam ikrĩ, memã idjujarênho ikrĩ ga me kam kam ijo atým kêt ne. <sup>56</sup> Mýkam ne ga me ijo tým? Bir, amrêbê: ne Metĩndjwýnh kukwakam kabên jarênh djwýnh me bakukãmãremã me ajã ajarê. Me aje ijo atým'ã ajarên arým 'ã pi'òk no'òk ne. Nhym me arým aben djô'ã arênho mõi. Arênho mõi tãmtã arým iwýr o bõx. Tũ:mrãm me bakamingrãnyrekam arým iwýr o bõx. Ba ar iba: ga me arým jakam ã ijo ane. Me kute me bakukãmãremã me ajã ujarênh kôt ne ga me arým jakam ã ijo atýmõ ane. Nãm ã Jeju me krãptĩmã ane. Nhym kam kôt ba djwýnh kunĩ mã amijã maje prõt ne.

*Me kute we axwe jabej kukjêr.*

*Mak 14.55; Ruk 22.66; Dju r 18.12*

<sup>57</sup> Nhym me kute pa 'amýnh djwýnhja o mõi:n arým Kajbaj'ýr o bõx. Me kadjy Metĩndjwýnh mar djwýnh nhõ bẽnjadjwýr raxbê ne Kajbaj. Nhym Môjdjê kukràdjã mar djwýnhmê mebêngêtmê ne me arým akuprõ nhym me me'ýr o bõx. <sup>58</sup> Nhym be, Pedru ne Jeju kôt tẽ, nĩjar kum kre rax ne tẽ. Nhym me kadjy Metĩndjwýnh mar djwýnh

nhõ bẽnjadjwýr rax nhõ kikre nhipõkri kênh ngrire nhym Pedru arým Jejukôt wadjã. Me kute ajmã Jeju o jabej kute omũnhmã arým nhỹ, bẽnjadjwýr nhõ krãkamngôn'hmê ro'ã nhỹ.

<sup>59</sup> Nãm me me'ýr Jejuo bõx nhym kam me rũnh arým me 'êxnhĩ jabej. Me kadjy Metĩndjwýnh mar djwýnh nhõ bẽnjadjwýrmê mebêngêtmê me rũnh kunĩ ne me me 'êxnhĩ jabej. Dja me amãnhkrut Jeju'ã 'êx ne memã kum,

—Ba ne ba axwe kôt omũ. Nãm ã ane ba omũ, ane. Dja me ane nhym me arým me kabên man arým we axwe 'õ pãnh kubĩ. Kadjy ne me me 'êxnhĩ jabej. <sup>60</sup> Ne te abejo dja. Me'õ ar amãnhkrut kute axikôt 'ã kabênja ne me te abejo dja:.. Nhym me 'êxnhĩ krãptĩ kãjmã ku'ên arĩk aben kupa'ãbit axwe jarênho kumex. Nhym me te ar amãnhkrut axikôt 'ã kabênja jabejo dja: nhym kam ar 'êxnhĩ amãnhkrutja arým kãjmã djan axikôt 'ã kabên jarê. <sup>61</sup> Nãm ar'ã 'êx ne memã kum,

—Tãmwã ne memã kum, “Ba ne ba ije Metĩndjwýnh nhõ kikreti ngrãnh ne ije akubyn ipêx kadjy ijityxo 'ýr ibõx mexkumrêx. Akubyn ije ipêx'ã dja akati amãnhkrut ne ikjêkêtbit apêx ba arým ipêx pa.” Nãm Jeju ã memã ane bar arým kuma. Nãm ar 'êxnhĩja ã Jeju'ã memã ane. Ar axikôt ã memã arênho ane.

<sup>62</sup> Nhym me kadjy Metĩndjwýnh mar djwýnh nhõ bẽnjadjwýr raxja arým kãjmã djan kum,

—Ga ar kabênjama. Djãm aje aminêje akabên'õ jarênh prãm kêtumrêx. On imã amikôt amijarê, ane. <sup>63</sup> Nhym Jeju tu an-hikrê.

Nhym me kadjy Metĩndjwýnh mar djwýnh nhõ bẽnjadjwýr rax ajte kum,

—Metĩndjwýnh tĩn ne ar baja ne arým gu bapumũnhõ nhỹ. Kwārīk wānh nokrekam ajêxnhĩ kêt. On me imã amijarê. Djãm abê me babê idjaer nhõ Bẽnjadjwýrbê kumkati, nẽn? Djãm mrãmri abê Kritu? Djãm abê Metĩndjwýnh Kra? On me imã amijarê, ane.

<sup>64</sup> Nhym Jeju kum,

—Kôt ne ga imã arê. Ba ar amã arê gar ama. Gêdja ba ï Metĩndjwýnh py-mati djubõk'ãnh nhỹ. Ije amijo inhĩ ne ibẽnjadjwýr raxkam ubõk'ãnh nhỹ gar arým

ipumũ. Ne kam ajte kakrākôt amrê kàjkwa kurũm itẽmkôt ipumũ, ane.

<sup>65</sup> Nhyam kam me kadjy Metĩndjwýnh mar djwýnh nhõ bẽnjadjwýr rax kute memã amingryko amirĩt kadjy arým amibê kà kadjô. Amibê kà kadjôn arým memã kum,

—Ë, arým ne Metĩndjwýnh japry. E kum kwãrik wãnh gwaj ijukri axwe kôt omũnh djwýnh'õ jabej kêt. Gwaj bakunĩ ne gwaj arým kute Metĩndjwýnh japryja ma. Ta ne amijo Metĩndjwýnh rax pytàn arým o aprý gwaj kôt kuma. Kute gwaj bamã, “Metĩndjwýnh djubôk'ãnh inhýrkôt dja gar ipumũ”, anhýrkôt ne gwaj arým kuma.

<sup>66</sup> Arým ne gar ama. Mýj dja gwaj nẽ? ane.

Nhyam me kupãhntã 'ã kum,

—Gê me on kubĩ. Gê me on kubĩ, ane.

<sup>67-68</sup> Nhyam kam me kwý nokre kutôn ikra krão tak nhyam me kwý ikra poo tak ne kum,

—We me inhõ Bẽnjadjwýrbê kumkati kadjy ne Metĩndjwýnh ajano, abê Kritu kadjy ajano ga bõx. Aj, goja abê Kritu jabej goja me'õ kute akurwanhjakôt omũ. Goja tu aman me imã arẽ. Nãm me ã Jeju'ã bẽno bikẽho ane.

*Pedru aminêje 'êx.*

*Mak 14.66; Ruk 22.55; Dju r 18.15*

<sup>69</sup> Nhyam Pedru arým me kadjy Metĩndjwýnh mar djwýnh nhõ bẽnjadjwýr rax nhõ kikre nhipôkri kênh ngrirekam nhỹ. Nhỹ: nhyam bẽnjadjwýr nhõ ãpênh ni arým 'ýr bõx ne omũn kum,

—Tukwa, gadjwý ne ga Jeju kôt ar aba. Pykabê Garrêjakam Jejukôt ar aba, ane.

<sup>70</sup> Nhyam me kunĩ nhipôkri arĩk aminêje 'êx ne kum,

—Kati, ije akabẽnwã mar kêtumrêx, ane.

<sup>71</sup> Ne kam kikreti'ýr ãrmã katon kre tã dja. Nhyam bẽnjadjwýr nhõ ãpênh ni 'õdjwý omũn memã kum,

—Tãmwãdjwý ne Jejukôt ar ba, Nadjarekam Jejukôt ar ba, ane.

<sup>72</sup> Nhyam ajte aminêje 'êx ne memã kum,

—Aje mýj me'õ jarẽnhwã ije omũnh kêt. Djãm ijẽxnhĩ? Kati. Metĩndjwýnh ne arým ijẽxnhĩ kêtôt ima, ane.

<sup>73</sup> Nhyam kãjbê 'ãtũm nhyam kam me'õ 'ýr tẽn kum,

—Be, mrãmri ne gadjwý kôt ar aba. Abê pykabê Garrêja kra'õ. Garrêjakam me kabẽn kôt ne ga akabẽn bar kôt aman arým amã ikato, ane.

<sup>74</sup> Nhyam memã kum,

—Kati, mrãmri ije me'õwã pumũnh kêtumrêx, ane. Ne me'õ kute kum anhýr kêtã arým amikangrôn memã kum,

—Dja ba ijẽxnhĩ jabej gê Metĩndjwýnh pãnh ijo akno. Ta ne arým ijẽxnhĩ kêt kôt ima, ane. Nãm anhýr 'iry kêt nhyam arým ôkrẽn'ãnh kã. <sup>75</sup> Nhyam kam Pedru ôkrẽn'ãnh kãr man akubyn amimaro tẽ. Amimaro tẽn arým amũja'ã Jeju kute kum kabẽn jarẽnhja'ýr amimaro bõx ne amijã kabẽn ma. Kute kum,

—Ôkrẽn'ãnh kãr kêttri dja ga aminêje ajêxo amãnhkrut ne ikjê kêt ne memã kum, “Kati, ije tãmwã pumũnh kêt”, anhýr ja ne arým kuma. Nãm maro dja nhyam arým rerek 'ýr bõx. Rerek 'ýr bõx nhyam arým katon mu:w.

## 27

*Me Piratu'ýr o môn o bõx.*

*Mak 15.1; Ruk 23.1; Dju r 18.28*

<sup>1</sup> Nhyam kam kryrãm me kadjy Metĩndjwýnh mar djwýnh nhõ bẽnjadjwýr kunĩmẽ mebê idjaer bẽngêt arým Jejuo aben ma. O aben man arým abenmã 'ã karõn abenmã kum,

—Mrãmri dja me on tu bĩnkumrêx, ane.

<sup>2</sup> Ne kam arým uwpren Piratu'ýr o môn o bõx. O bõx ne kum kanga. Piratubê bẽnjadjwýr bajtem. <sup>3</sup> Me kute bĩnmã 'ýr o mõrkam ne Djuda arým omũ. Djuda kute kurê djwýnhmã kanga djwýnhja arým omũ. Ne kam arým amim ngyr:k ne. Amim ngyr ne arým amim,

—Je tô mýkam ne ba memã Jeju kanga? ane. Amim ngyrko tẽn akubyn me rũnh'ýr kryt jakao ngõnhponho pi'ók kapribê 30o tẽn arým me'ýr o bõx. Me kadjy Metĩndjwýnh mar djwýnh nhõ bẽnjadjwýrmẽ mebẽngêt'ýr ne o bõx ne arým memã kum,

<sup>4</sup> —Axwe kêtumrêxkam ne ba me amã kanga ga me arým aje bĩnmã. Ba kam arým ijaxwe:, ane. Ne memã kum, “Mĩ”, ane.

Nhyam me kum,

—Djãm me ba ne ba me o amaro iba? Kati, ga ne ga o me ima, ane.

<sup>5</sup> Nhyam kam arým Metĩndjwýnh nhõ kikreti'ýr tẽn 'ýr bõx ne kikreti kadjwýnhbê ngõnhponh mẽn arým mã tẽ. Mã tẽn kam ta pi'ã amimut djên amibĩn arým ty.

<sup>6</sup> Nhyam kam me kadjy Metĩndjwýnh mar djwýnh nhõ bẽnjadjwýr ar 'ýr tẽn ngõnhponho atom ne abenmã kum,

—Djãm Metĩndjwýnh nhõ kikreti nhõ pi'ók kaprĩo atom djakam gwaj baje ngõnhponh djirmã? Kati. Djuda kute gwaj bamã Jeju kanga nhyam me kute bĩn nhyam kamrõ prõt pãnh ne ngõnhponho pi'ók kaprĩa. Gwaj ren Metĩndjwýnh nhõ kikretikam pi'ók kaprĩ djin ren kam Môjdjê kukràdjã kupa'ã amijo tẽ, ane. <sup>7</sup> Ne kam aben man abenmã kum,

—Gwaj ngõnhponho ngybõr nhõ pyka by. Me kute kam me bajtem tyk jangjênh kadjy pyka by, ane. Ne kam arým ngõnhponho pyka by. <sup>8</sup> Kam ne me arým pykamã pyka kamrõre jarẽ. Akatija tãmkam ne me kute kum arênh rã'ã. <sup>9-10</sup> Amrêbê: ne me bakukãmãre Djermi memã 'ã ajarẽ. Me kute ngõnhponho ngybõr nhõ pyka byr'ã ajarẽ. Djermi Metĩndjwýnh kukwakam me bakukãmãremã 'ã ajarên memã kum,

“Nãm me kam arým kryt jakao ngõnhponho pi'ók kaprĩbê 30 by. Mebê idjaer kute me'õ'ã kum,

'Dja ba me me'õ pãnh amã ã pi'ók kaprĩo ane', anhýr kõt ne me arým kubê 30 by.

Ne kam arým o ngybõr nhõ pyka by. Bẽnjadjwýr djwýnh kute imã arênh kõt ne me kuby.”

Nãm ã Djermi me bakukãmãremã ane. Nhyam me kam arým aben djõ'ã arê.. Arênhõ mõr tãmtã arým 'ýr o bõx. Tũ:mràm me bakamingrãnyrekam me rũnh arým ngõnhponho ngybõr nhõ pyka byrkumrêx. Djermi kute amrêbê: me bakukãmãremã 'ã ujarênh kõt ne me arým pyka byrkumrêx.

*Piratu kute we axwe jabej kujêr.*

*Mak 15.2; Ruk 23.3; Dju r 18.28*

<sup>11</sup> Me kute pyka byr djwýnhràmm ne me rũnh arým bẽnjadjwýr Piratu'ýr Jejuo mõn o bõx. O bõx nhyam arým kabem dja nhyam kum,

—Djãm abê mebê idjaer nhõ bẽnjadjwýr rax? ane.

Nhyam Jeju kum,

—Kõt ne ga aje arênhwã, ane.

<sup>12</sup> Nhyam kam me kadjy Metĩndjwýnh mar djwýnh nhõ bẽnjadjwýrmê mebêngêtmê arĩk Jeju'ã axwe janhô. Nhyam tu anhikrê.

<sup>13</sup> Nhyam Piratu kum,

—Djãm ajaxwe krãre ne me amã arê? Djãm aje mar kêt? ane.

<sup>14</sup> Nhyam kum kabên'õ jarênh kêtikumrêx. Nhyam bẽnjadjwýr Piratu te kute marmã kam no tyn omũnhõ nhý. <sup>15</sup> Be, akatija tãmkam ne mebê idjaer krãptĩ: arým aben pydji. Me kute aben kajmã'ã Metĩndjwýnh me kukãmãre nhirõbê mrãnh djã mar kadjy aben pydji. Amex kunĩkõt ne bẽnjadjwýr raxbê Piratu akati jakam mebê ijê djã kurũm me pýnh ne meo pôx nhyam me mã mrã, mebê ijêjao pôx nhyam me mã mrã. Me kute me'õ'ã à'wýrja ne me kĩnh kadjy bõm kumê. <sup>16</sup> Mebê ijê djakam ne me arým me'õ axwe:jabê ijê. Idjibê ne Baraba. <sup>17</sup> Me krãptĩ ne me akati jakam akuprõ nhyam Piratu memã kum,

—Mýj me'õ dja ba me amã kaban ano? Dja ba Baraba kaban ano. Nãr, dja ba Jejumã inhiren ano, me kute kum Kritu jarênhjamã inhiren ano, ane. <sup>18</sup> Nãm anhýr djwýnhràmm amim,

—Jeju'ã me krãptĩkam ne me rũnh 'ã ngyrk ne imã kanga, ane. Ne kam arým kute Jejumã irer ne kute anor prãm.

<sup>19</sup> Piratu arek memã axwe pãnh jarênh djakam nhý nhyam prõ amũ kum kabên janon kum,

—Kwãrĩk wãnh ajmã me'õwão kêt. Axwe kêtikumrêxkam ajmã o kêt. Akatija tãmkam ne ba ibiptirkam omũn arým kam axwe idjumar, ane.

<sup>20</sup> Kam ne Piratu kute kum irer ne kute anor prãm ne me krãptĩmã kum,

—Mýj me'õ dja ba kum inhiren ano? ane. Nhyam me kadjy Metĩndjwýnh mar djwýnh nhõ bẽnjadjwýrmê mebêngêtmê me krãptĩmã kum,

—Baraba dja ga me amã kĩnh. Jeju'ã dja ga me kum, “Abĩ, abĩ.” Nãm me ã memã ane.

<sup>21</sup> Nhyam kam bẽnjadjwýr Piratu ajte me krãptĩmã kum,



—Ar amãnhkrutja. Nhÿnhja dja ba kum inhiren ano? ane.

Nhym me kum, “Baraba”, ane.

<sup>22</sup> Nhym memã kum,

—Mÿj dja ba Jejudjwÿ on? Me kute kum Kritu jarênhja mÿj dja ba on? ane.

Nhym me kunĩ kum, “Pĩte'y'ã anhô”, ane.

<sup>23</sup> Nhym Piratu memã kum,

—Tô mÿkam? Mã ne kute? Djãm axwe? ane.

Nhym me kàj bê kum, “Pĩte'y'ã anhô”, ane.

<sup>24</sup> Nhym Piratu amim,

—Je, jakim ne ba arÿm te meo ane. Nhym me ngry:k ne kangao kumex, ane. Ne kam ta kute we memã amijaxwe kêtô amirĩt kadjy arÿm ngô byn me kunĩ nokrekam aminhikra pôn memã kum,

—Djãm ije me'ô axwe kêtja kamrô kapĩnkam ba ijaxwe? Kati, me ga ne ga me 'ã imã apnê ba arÿm ije bĩnmã. Me ga ne ga me ajaxwe, ane.

<sup>25</sup> Nhym me kunĩ kum,

—Nã. Tãm. Me ba dja ba me ijaxwe. Me ikramê ikrakam itãmdjwÿmê dja ba me ijaxwe. Me ba ne ba me imã bĩn prãm ne kam aje bĩnmã amã 'ã apnê, ane.

<sup>26</sup> Nhym kam arÿm Baraba kaban ano nhym ta arÿm arek ar mekôt ba. Nãm kum iren anon kam memã Jeju jarê. Nhym me arÿm mrykà punuo kaprêprê:k ne. Nhym kam me kute pĩte'y'ã nhôr kadjy memã arê.

*Krãkamngônh kute 'ã bẽno bikênh.*

*Mak 15.16; Dju r 19.2*

<sup>27</sup> Nhym kam bẽnjadjwÿr Piratu nhô krãkamngônh kikretimã Jejuo môn o wadjã. Kumoka'ê nhidjibê Pretorimã o môn o wadjã. O wadjàn arÿm kadjy me krãkamngônh kâtãm kunĩo akprô. O akprô nhym me kunĩ arÿm bôx ne Jeju'ã aben pydji. Me kute aprÿn 'ã bẽno bikênh kadjy 'ã aben pydji. <sup>28</sup> Ne kam kubê kubêkà kaban inôkà ryti kamrêk kute me bẽnjadjwÿr rÿnh nhinôkà pyrækja kum adjã. <sup>29</sup> Ne kam mrÿnhĩo kajkep ne ikãnh ne, ne kum kutu. Nãm me me bẽnjadjwÿr rÿnh nhô krãdjê'ã mrÿnhĩ jakren arÿm kum kutu. Ne kam ikra djubôkmã po'ê jadjã nhym kuby. Me bẽnjadjwÿr djãbêr djã'ã ne me po'ê jakren ikramã adjã nhym kuby o nhÿ. Nhym

me parbê ari rôrôk ne kônkrão krĩn 'ã bẽno ajkêñ apÿnh kum,

—Ga we abê mebê idjaer nhô bẽnjadjwÿr rax. Gora kribêm atĩn 'iry, anhÿro kumex.

<sup>30</sup> Ne kam apÿnh kutôn apÿnh po'ê byn arĩk o krã môre. <sup>31</sup> Ne kam arÿm 'ã bẽno bikênhja inomã kumên kam arÿm kubê inôkà ryti kamrêk kaban akubyn kum ô kubêkà djwÿnhja jadjã. Ne kam kute pĩte'y'ã nhômã o katon o mō.

*Me kute pĩte'ykam nhôr.*

*Mak 15.21; Ruk 23.33; Dju r 19.17*

<sup>32</sup> O môn arÿm me'ôbê Ximão kajpa. Pykabê Xirenikam me kra 'ô. Nhym me krãkamngônh arÿm Jeju nhô pĩte'y'ã kum àpnênh tÿx nhym arÿm kum ikreio kumÿn o mō. <sup>33</sup> Krãnhrebê Gogota'ÿr ne me Jejuo mō. Me bakabênkam ne gu me ren krãnhremã me krã'i jarê. Nãm me 'ÿr o môn arÿm 'ÿr o bôx. <sup>34</sup> Ne kam pidjô kangô kadjãmê pidjyo akàn arÿm Jejumã kungã. Nhym te kakin kanga. <sup>35</sup> Nhym kam me arÿm pĩte'y'ã kunhō nhym wajêt.

Nhym kam me apÿnh kute ô kubêkà jamÿnh kadjy kên kryre rê. Me kute kên rênhkôt ne me amijo kubêkà pytà. Amrêbê: ne ujarênh djwÿnh 'ã ajarê. Me kute abenmã ô kubêkà ngrãnh'ã ajarê. Metĩndjwÿnh kukwakam ne 'ã ajarên me bakukãmãremã kum,

“Metĩndjwÿnh Kra ne memã kum,

‘Arÿm ne me abenmã ikà ngrà.

Nãm me ikà ja'ã kên kryre rên arÿm amijo utã.’ Nãm ã memã ane.”

Nãm ã me bakukãmãremã ane nhym me arÿm aben djô'ã arênhô mō:n arênhô môr tãmtã arÿm 'ÿr o bôx. Tũ:mrãm me bakamingrãnyrekam 'ÿr o bôx nhym me arÿm abenmã Jeju kà ngrãnhkumrêx. Metĩndjwÿnh kukwakam ujarênh djwÿnh kute me bakukãmãremã 'ã ujarênh kôt ne me arÿm abenmã Jeju kà ngrãnhkumrêx.

<sup>36</sup> Ne kam arÿm nhÿ, nêje rĩto nhÿ. <sup>37</sup> Ne kam 'ã pi'ôk no'ôk ne. Pi'ôkkam ne memã kum,

—Jeju ne ja. Mebê idjaer nhô bẽnjadjwÿr rax ne ja, ane. Me kunĩ kute omÿnh kadjy ne me Jeju nhimôkri kunhō. Me kute we Jeju jaxwe 'ô pãnh pĩte'y'ã jêta pumÿnh ne kute mar kadjy ne me pi'ôk no'ôk ne imôkri

kunhò. <sup>38</sup> Ne kam ar àkĩnhĩ amãnhkrutja Jeju nhikjê'ã pĩte'y'ã ar kunhò. Nhym arým ar arij. Jeju òkredjàkòt wajêt nhym aktã ar axweja ijèn wajêt. <sup>39</sup> Nhym me 'ãnh mòrja nokà nhàn kum kabèn punu:re ne kum,

<sup>40</sup> —Be, ga: ne ga we aje Metĩndjwýnh nhò kikreti kadjwýnhbê kubêkàtija ta amikadjò. Nãm nhòr djà'ãnh amikrax ne e y: ne kraxmã amimê. Nhym pyka arým amingrêk ne. Nhym apýnh kèn amikokij. <sup>52</sup> Nhym apýnh pyka krã amijã kurê. Nhym me tyk krãptĩ, Metĩndjwýnh nhò me ja krãptĩ, arým ì tã akubyn tĩn ne kato <sup>53</sup> ne arým Jeju akubyn tĩn nhijukri Djeruxarêmã mò, krĩrax tãmmã ne me kute Metĩndjwýnh nhò krĩrax mextire jarènh ja, kumã ne me mòn me krãptĩmã amijo amirít.

<sup>41</sup> Nhym kam me rũnh arĩk 'ã bẽno ajkê. Me kadjy Metĩndjwýnh mar djwýnh nhò bẽnjadjwýrmê Mòjdjê kukràdjã mar djwýnhmê mebêngêtmê ne me arĩk 'ã bẽno ajkèn abenmã kum,

<sup>42</sup> —Amũbit ne me utà. Ne kam te kute amipytar prãmje. Goja gê mrãmri mebê idjaer nhò bẽnjadjwýr raxkumrêx jabej on pĩte'y kurũm rwý. Gê goja rwý gwaj goja rwýkkòt omũn arým tu amim markumrêx. <sup>43</sup> Tãmwã ne we Metĩndjwýnh kanàrrãm ar ba. Gê Metĩndjwýnh mrãmri kum kĩnh jabej on utà. Tãmwã ne 'êx ne memã kum, “Ìbê Metĩndjwýnh Kra”, anhýr ar o ba. Nãm me ã abenmã ane. <sup>44</sup> Nhym ar àkĩnhĩ aktã pĩte'y'ã jêtjadjwý kum àkjêro wajêt.

*Tyk kadjy ne ja.*

*Mak 15.33; Ruk 23.44; Dju r 19.28*

<sup>45</sup> Nhym arým kàjkwa nhipòkri myt nhý. Nhym kam tu akamàt kò tyk ne. Pyka kunĩkòt ne me'ã akamàt kò tyk ne. Nãm me'ã akamàt kò tykkam myt kyn kyn kyn ky: nhym 3 orakam, amykrykambit arým ajte myt no pòt ne. Arým ajte myt kato. <sup>46</sup> Myt kato nhym Jeju mebê idjaer kabènkam kàj bê kabèn ne Bãmmã kum,

—Eroi: Eroi: rama xabatani, ane. Nãm ren me bakabèn kam kum,

—Inhò Metĩndjwý:nh, Inhò Metĩndjwý:nh, mykam ne ga arým ikanga? ane.

<sup>47</sup> Nhym parbê me ku'êja kabèn man arĩk abenmã kum, “È, me'òwã ne Erijmã kabèn”, ane.

<sup>48</sup> Nhym kam me'ò pròt ne ngònh puror pònh djã jakrita byn pidjò kangò kadjãmã adjã. Nhym kam kangò ipu nhym pĩ nhidjamã adjàn kàjmã kum kungã, kute kaòr kadjy. <sup>49</sup> Nhym me'ò ar kum,

—Adjým, gê goja me bakukãmãrebê Erij 'ýr bòx ne goja utà, ane.

<sup>50</sup> Nhym kam Jeju kàj bê ajte kabèn ne arým ty.

<sup>51</sup> Be, nhym arým Metĩndjwýnh nhò kikreti kadjwýnhbê kubêkàtija ta amikadjò. Nãm nhòr djà'ãnh amikrax ne e y: ne kraxmã amimê. Nhym pyka arým amingrêk ne. Nhym apýnh kèn amikokij.

<sup>52</sup> Nhym apýnh pyka krã amijã kurê. Nhym me tyk krãptĩ, Metĩndjwýnh nhò me ja krãptĩ, arým ì tã akubyn tĩn ne kato <sup>53</sup> ne arým Jeju akubyn tĩn nhijukri Djeruxarêmã mò, krĩrax tãmmã ne me kute Metĩndjwýnh nhò krĩrax mextire jarènh ja, kumã ne me mòn me krãptĩmã amijo amirít.

<sup>54</sup> Pyka amingrêk nhym mýjja kwý ã amijo ane. Nhym krãkamngònh krãptĩ: kubê 100 nhò bẽnjadjwýrmê ro'ã Jeju nêje rĩto ku'êja arým omũ. Mýjja pumũn arým tĩn prã:m ne abenmã kum,

—Be, mrãmri ne me'ò jabê Metĩndjwýnh Krakumrêx, ane.

<sup>55</sup> Nhym me niredjwý krãptĩ amybým omũnho dja. Amrêbê Jeju pykabê Garrèjakam ar bari ne me nire ja mã kòt ban o djuw mexo ba. Ne Jeju ajbir krĩraxbê Djeruxarê'ýr tẽmkam kòt ajte mòn bòx.

<sup>56</sup> Me nire ja nhikò'ã ne Marij Madarena dja. Nhym Marij 'òdjwý dja. Kurũm ne Xijagumê Jòdje ar apòx. Nhym Djebedêu kute kum ar adjwýrja nãdjwý dja.

*Arým adjãr kadjy ne ja.*

*Mak 15.42; Ruk 23.50; Dju r 19.38*

<sup>57</sup> Nãm Jeju ty nhym kam amykry mex ne. Nhym Jòdje arým bòx. Krĩraxbê Armatèkam ne Jòdje abatãnh djã. Ò nèkrêx rax. Adjwýnhdjwý ne arým Jeju kòt ba. <sup>58</sup> Nãm Piratu'ýr tẽn bòx ne Jeju nhĩ'ã kuma. Nhym Piratu memã kum, “Aje, me kum angã”, ane. <sup>59</sup> Nhym kam Jòdje kadjy kubêkã mexbê rinhu byn 'ýr o tẽ. 'Ýr o tẽn arým pĩte'y kurũm o ruw. Ne kam arým kubêkào kupu. <sup>60-61</sup> Nhym wãnh ta ò me tyk nhò kènkreja. Ta kabèn kòt ne me ajbir kènkre kakruw. Nhym arým Jeju o mòn kam adjãro dja. Ne adjãr pan kam kènpoti jabatãnhja ajkwa krekre'ã kudjan kam arým

mã tẽ. Nhyim Marij Madarenamẽ Marij 'õdjwýmẽ ar kẽnkre kônho omũho nhỹ.

*Kẽnkre nêje ku'ê djwýnh'ã ujarẽnh.*

<sup>62</sup> Pi'ók rårår nêje akatikam ne me adjà. Akati jakam ne me me tyk djà kêt djà nhõ akati bõx kêttri aminhõ mýjja kupênho kumex. Nhyim kam arým pi'ók rårår bõx. Me tyk djà kêt djà nhõ akati bõx. Nãm te pi'ók rårår nhyim me rũnh akati mar kêt ne tu Piratu'ýr tẽ. Me kadjy Metĩndjwýnh mar djwýnh nhõ bẽnjadjwýrmẽ mebê pardjêu Piratu'ýr tẽn 'ýr bõx ne Jeju'ã kum,

<sup>63</sup> —Bẽnjadjwýr, me'õ 'êxnhĩja tĩn ne ar bari ne memã kum, “Dja ba ty nhyim ijã akatin akatin akati ba kam akubyn itĩn”, ane. Tãm ne bar ma:ro iba. <sup>64</sup> Kam bar amã arẽ. Godja kôt ba djwýnh ar akamãtkam kẽnkre 'ýr bõx ne arým ão akĩn mã o mõ. Ne kam arĩk memã 'êx ne memã kum, “Arým ne akubyn tĩn ne”, anhỹro ba. Jeju ta ne amrêbê me noo biknoro ba. Dja ar ijukri akubyn tĩn jarẽ nhyim me abenmã arẽn arým abennoo biknor me:x ne. Me 'êx kêt kadjy dja ga anhõ krãkamngõnh janon memã kum, “Me 'ýr mõn kẽnkre kuri dja”, ane nhyim ar te kute ão àkĩnhmã. Gê 'ã akati amãnhkrut ne ikjêkêt apêxkambit me ajte ate krã ba. Nãm me rũnh ã Piratumã ane.

<sup>65</sup> Nhyim memã kum,

—Gêto. 'Ýr krãkamngõnh kwýo mõ gê me kẽnkre nêje djan rĩt tỳ:xo dja, ane. <sup>66</sup> Nhyim kam me arým kẽnkre'ýr meo mõn meo bõx. Ne kam arým kẽnkre'ã kẽnpotio yn kam kre nêje krãkamngõnh pumjuw nhyim me arým nêje djan rĩt tỳ:xo dja.

## 28

*Akubyn tĩn kadjy ne ja.*

*Mak 16.1; Ruk 24.1; Dju r 20.1*

<sup>1</sup> Nhyim me tyk djà kêt djà nhõ akati arým apêx nhyim arým pi'ók kamrêkkam akati tẽ. Nhyim kam Marij Madarenamẽ Marij 'õdjwý ar arým kute kẽnkre pumũnhmã 'ýr tẽ.

<sup>2</sup> 'Ýr tẽ: nhyim arým pyka amingrêk tỳ:x ne. Bẽnjadjwýr djwýnh kadjy mrãnh djwýnh 'õ ne kãjwa kurũm ruw nhyim kam pyka amingrêk tỳ:x ne. Nhyim kadjy mrãnh djwýnh arým kẽnkre'ýr tẽn 'ýr bõx. Bõx ne arým ajkwa krekre'ã jãm kẽnpoti dja. Jãm

kudjan arým 'ã nhỹ. <sup>3</sup> Nãm nokre jadjê:nh kute mrãmri ne na jadjênhkam pòk tỳxja pyrãk. Nhyim õ kubêkãja jaka: kute mrãmri ne kakũm arngrokam akaja pyrãk. <sup>4</sup> Nhyim kre nêje ku'ê djwýnhja arým omũ. Omũn arým umaje terte:t ne arým rôròk ne. Ne kam arým wãnh kute me tyk pyrãk ne ikwã.

<sup>5</sup> Nhyim ar nire kẽnkre'ýr tẽn bõx nhyim kadjy mrãnh djwýnhja arkum,

—Kwãrĩk wãnh ar atĩn prãm kêt. Jeju ne gar abej. Arým ne ba ar ama. Me kute pĩte'y'ã nhõr ne bĩnja ne gar abej tẽ. <sup>6</sup> Jakam ne arým nõr kêt. Nãm akubyn tĩn ne kato, kute ar amã arẽn kôt. Amrẽ ar tẽn nõr djà kaprýja pumũ. <sup>7</sup> Dja gar omũn kam amikrà kêt ne tẽn kôt ba djwýnhmã arẽ. Dja gar arkum, “Arým ne akubyn tĩn ne ar akukãm pykabê Garrêja'ýr tẽmmã. Dja gar kam tẽn arým omũ” ane. Dja gar ã arkum ane. Ba ne ba arým ar amã arẽ gar arým ama. Nãm ã kadjy mrãnh djwýnh arkum ane.

<sup>8</sup> Nhyim ar nire kabẽn man arým amikrà kêt ne mã kẽnkre kurũm prõt ne. Tĩn prãmmẽ kĩnhmẽ akàn prõt ne. <sup>9</sup> Ar kute kôt ba djwýnh arkum arẽnhmã prõt ne. Prõt nhyim ar aêrbê Jeju ar kajpan arkum, “Àpnhĩre ar”, ane. Nhyim ar arým 'ýr bõx ne paro tỳm ne kum rax jarẽnho nõ. <sup>10</sup> Nhyim Jeju arkum,

—Kwãrĩk wãnh ar atĩn prãm kêt. Tẽn ikamy arkum ikabẽn jarẽn arkum, “Ar Garrêja'ýr mõ. Dja gar kam bõx ne arým omũ”, ane. Dja gar ã arkum ane. Nãm ã Jeju arkum ane. Nhyim ar nire arým ar'ýr mõ.

*Kẽnkre nêje ku'ê djwýnh'ã ujarẽnh.*

<sup>11</sup> Ar'ýr mõ nhyim wãnh kre nêje ku'ê djwýnh kwýja arým kãmã djan amũ krĩraxmã mõn bõx. Bõx ne arým me kadjy Metĩndjwýnh mar djwýnh nhõ bẽnjadjwýrmã prĩne amijarẽn arkum,

—E kum, pyka ne amingrêk nhyim kadjy mrãnh djwýnh arým ruw ne kẽnkre'ýr tẽ. 'Ýr tẽn arým ajkwa krekre'ã jãm kẽnpoti djan 'ã nhỹ. Nokre adjê:nh ne nhỹ. Bar omũn itĩn prã:m, ane. <sup>12</sup> Nhyim ar arým kuman mebêngêt'ýr tẽn 'ýr bõx ne mekmẽ akuprõ. Ne kam arým o aben ma. O aben mar pan kam arým krãkamngõnh'ýr bõx ne arkum,

13 —Kwārīk wānh memã wã jarēnh kêt. Dja gar memã ajêx ne memã kum, “Akamâtkam ar inhôt tykkam arým kôt ba djwýnh ar bôx. Bôx ne arým Jejuo akĩn mã nhĩ'ãm o mō”, ane. Dja gar ã memã ajêxo ane bar pãnh arým ar amã pi'ôk kaprĩ kumex ngã. <sup>14</sup> Nhym godja me kâtàm arým ar anhõ bēnjadjwýr Piratumã ar ajarēnh jabej ne kum, “Nãm anhõ krākamngõnh kre nêje rīt'ã ngõr nhym kôt ba djwýnh ar arým Jejuo akĩ”, anhýr jabej. Nhym ar akam ngryk jabej. Ar ba dja bar arým ar anêje kum ikabēn ne ar apytà. Mĩ, pi'ôk kaprĩ. Dja gar ã memã ajêxo ane. Nãm ã me rũnh krākamngõnh arkum ane. <sup>15</sup> Nhym kam ar arým amim pi'ôk kaprĩ jamýn ã memã 'êxo bao ane. Ar kute arkum 'ã karõ kôt ã memã 'êxo bao ane. Nhym kam mebê idjaer arým arēnh kumex ne arēnh ipôk ne. Ne akati jakam kute we ar kute Jejuo àkĩnhja jarēnh rã'ã ne.

rã'ã: rã'ã ne nhym pykakam me kute amin-hinomã amimēnh djà nhõ akati arým bôx. Nãm ã Jejuo arkum ane. Tãm ne ja.

*Ar àpēnh djà'ã arkum karõ.*

*Mak 16.14; Ruk 24.46; Dju r 20.19; Kar*

*1.6*

<sup>16</sup> Nhym kam kôt ba djwýnh Ar kubê 11ja amũ pykabê Garrêja'ýr mõn bôx. Jeju kute arkum krãnh jarēnhja'ýr ne ar bôx. <sup>17</sup> Ne kam arým Jejuo pumũn parbê kõnkrão nhýn kum rax jarēn kum,

—Mrãmri ne ga arým akubyn atĩn ne, ane. Nhym be, ar kwý ne ar abenmã kum,

—Djãm mrãmri Jejukumrêx ne dja? Djãm mrãmri akubyn tĩn ne? Kon ne, ane.

<sup>18</sup> Nhym Jejuo arým ar'ýr bôx ne arkum,

—Kãjkwamẽ pykamẽ kam mýjja kunĩ ne ba ije o iba kadjy arým ibēnjadjwýr rax.

<sup>19</sup> Kam dja gar mõn me kunĩmã arẽ. Apýnh me ba djà kunĩkôt memã arẽ gê me ikabēn man kôt ar amijo ba. Dja me ikabēn man kôt ar amijo ba gar Metĩndjwýnhmã ngômã me angij. Dja gar memã kum, “Arým ne ga tu amim Bãm markumrêx ne ajte tu amim Kra markumrêx ne ajte tu amim Metĩndjwýnh Karõ markumrêx. Ba kam arým ar kukwakam ngômã ajadjà”, ane. Dja gar ã memã anen arým ngômã me angij. <sup>20</sup> Ije ar amã katàt ar amijo aba'ã karõkam ikabēn kunĩja memã arẽ gê me ikabēn kunĩ man kôt ar amijo ba. Dja ba kam akati kunĩkôt ar amẽ amijo ikajkep

## Makô memã Jeju'ã ujarênh ne ja.

Makôdjwý ne prĩne Jeju'ã ajarê. Arým abatànħ ne kute memã amijo amirĩt'ã pi'òk ja nhipêxmo krax ne 'ã ujarênh tẽn tyk ne akubyn tĩn ne àbir djãmã kumẽ. Nãm Pau-rmẽ Pedru arkôt mrã. Nħym Pedrudjwý Makôo òbikwa nħym ô'ã prĩne gwaj bamã Jeju'ã pi'òk no'òk ne.

*Djuão kute Jeju kutêp me akre'ã ujarênh kadjy ne ja.*

*Mat 3.1-12; Ruk 3.1-18; Dju r 1.19-28*

<sup>1</sup> Ba ibê Makô ne ba pi'òk kam me amã ik-abên jarê. Me ujarênh ny kraxkôt ne ba me amã arê. Jeju. Kubê ne Metĩndjwýnh Kra. Metĩndjwýnh arým 'ã Bẽnjadjwýrbê kumkati mẽ. Jejubê Bẽnjadjwýrbê kumkatikôt ne me kum Kritu jarê. <sup>2</sup> Idjaij ne amrêbê Metĩndjwýnh kukwakam kabên. Kabênkam ne Metĩndjwýnh Kramã kum,

“Ota ba akukãm ajã ujarênh djwýnh'õ jano kute akutêp me akre nħym me kute mar ne adjwýnhřãm axwemã iren katàt kute amijo bamã.

Kute mrãmri ne me kute me bẽnjadjwýr rũnh kutêp katàt pry jadjwýrja pyràk”, ane.

<sup>3</sup> Ne ajte me bakukãmãremã kum,

“Me'õ dja kapôt kukritkam memã kabên ne. Kàj bê dja me akren memã kum,

'Me apa. Ê, on Bẽnjadjwýr djwýnh kutêp wãnh ajaxwemã anħiren katàt amijo aba.

Kute mrãmri ne me kute bẽnjadjwýr rũnh kutêp pry mex ne kute kum katàt pry jadjwýrja pyràk', ane.

Dja ã me'õ Bẽnjadjwýr djwýnh'ã memã ane.”

Nãm ã Idjaij me bakukãmãremã ane nħym me arým 'ã pi'òk no'òk ne. Nħym kam me aben djô'ã arênho mō:n arênho mōr tãmtã arým 'yr o bõx. Tũ:mrãm 'yr o bõx nħym Djuão arým kato. Me bakamingrãnyrekam katon arým abatànħ ne. Abatànħ ne arým ã Kritu kukãm memã ujarênh ar bao ane. Metĩndjwýnh kute me bakukãmãremã 'ã

ujarênh kôt arým katon ã wýnhřãm ar me akreo bao ane.

<sup>4</sup> Nãm kapôt kukritmã kato. Katon arým ngômã me angjênh ar o ban ar me akreo ba. Nãm memã kum,

—Me ga ne ga me ajaxweo aba tũm. On me amikam akaprĩren wãnh ajaxwemã anħiren Metĩndjwýnh'yr amijo akêx. Dja ga me ane nħym Metĩndjwýnh arým me ajaxwe maro aknon arým ngryk kêt. Ba kam arým Metĩndjwýnhmã ngômã me ajangij. Nãm ã memã anħyr ar o ba.

<sup>5</sup> Nħym kam pykabê Djudêjakam me jamê krĩraxbê Djeruxarêkam me jamê aben to-tokmã Djuão'yr ban bõxo dja. Bõx ne tu me ipòkri amijaxwe kôt amijarên kum,

—Be mrãmri, ba ijaxwe: ar iba. Arým imã kĩnh kêt ne wãnh kum inħire, ane.

Nħym Djuão arým ngô raxbê Djodãokam Metĩndjwýnhmã ngômã me kunĩ jangij.

<sup>6</sup> Be, Djuão ne mry jabatànħbê kameru kĩ nhipêxo kubêkà jangij ne mry kào amikrax pren mýjja kute krytkanhê pyràk kun menħ kangôo ikõ.

<sup>7</sup> Nãm kàj bê memã Jeju'ã ajarên memã kum,

—Itotokbê ne me'õ bõxmã. Me'õ tãm ne raxo kute ijakrenħ, kute ijakrenħ mexi. Nã bãm te irax ne 'yr ibikamênħ prãmje. Nã bãm te irax ne 'ã inħibôn ije kum parkà 'ãpre bõnh ne o itêm prãmje. Be, ãm irax ba ren arým kum apê. Nħym be kati. Æm ingrire. Nãm raxo ijakrenħ mex ne. Tãmja ne arým bõx 'yr. <sup>8</sup> Ba ne ba ngômãbit me ajangij. Djãm tãmwã kute ngômã me ajangjênhmã? Kati. Tãm dja bõx ne kam me awýr Metĩndjwýnh Karõ jano. Nãm ã Djuão memã ane.

*Kute ngômã Jeju jadjàr'ã ujarênh kadjy ne ja.*

*Mat 3.13-17; Ruk 3.21-22*

<sup>9</sup> Nħym kam pykabê Garrêjakam krĩraxbê Nadjare. Kurũm arým Jeju tẽ. Tẽ:n kam arým Djuão'yr bõx. Nħym kam arým ngô raxbê Djodãokam ngômã Jeju jadjà, Metĩndjwýnhmã adjà. <sup>10</sup> Nħym arým ngô kurũm kator tẽ nħym aêrbê kàjkwa abenbê ajkij nħym arým omũ. Nħym Metĩndjwýnh Karõ kute tut pyràk 'ã ruw. Me kute omũnh kadjy ne amijo tut pyràk ne 'ã ruw. <sup>11</sup> Nħym

arým kàjkwa kurũm Metĩndjwýnh Jejumã kabên ne kum,

—Mrãmri abê ikrakumrêx. Imã ajabê:kumrêx. Ba akam ikĩnhkumrêx, ane.

*Xatanaj kute axwe'ã kum àpnênh kadjy ne ja.*

*Mat 4.1-11; Ruk 4.1-13*

<sup>12</sup> Ne kam adjynkêt ne Metĩndjwýnh Karô kabêno amũ Jeju kujaten kapôt kukritmã o mõn o bõx ne ipôkri o ba. <sup>13</sup> Nhyim kapôt kukritkam rop mõi djâkam ar ba. Nhyim kam me axwe nhõ bẽnjadjwýrbê Xatanaj te kute axwe'ã Jeju mẽnhmã kum àpnênho dja nhyim 'ã akatibê 40 apêx. Nhyim kam kadjy mrãnh djwýnh arým Jeju'ýr bõx ne o djuw mex.

*Jeju kute amikôt ar 'wýr kadjy ne ja.*

*Mat 4.12-22; Ruk 5.1-11*

<sup>14</sup> Nhyim kam Jeju arým tẽ. Tẽ:n pykabê Garrêjakam bõx. Me arým kute Djuãoo tým ne kubê ijêkam ne Jeju kam bõx. Bõx ne kàj bê memã ujarênh ny jarênho ba. <sup>15</sup> Nãm memã kum,

—Be, Metĩndjwýnh kute amrêbê me bakukãmãremã arênh kôt arým õ akati bõx 'ýr. Kute amim me utàr ne ar meo ba 'ýr. Me on amikam akaprĩren wãnh ajaxwemã anhiren Metĩndjwýnh'ýr amijo akêx ne tu amim ujarênh ny markumrêx, ane.

<sup>16</sup> Ne kam Garrêjakam imôti mýrbê tẽ. Nhyim Ximãomẽ Ængre ar axikôt katorja ngõnhkam ar kryre rênho ba. Ar kubê tep pynênh djwýnh tũm. <sup>17</sup> Ar kryre rênho ar o ba nhyim Jeju arkum kabên ne arkum,

—Amrê ar mã ikôt ajkamẽ ba ar amã ar adjapênh djâ ny jarê gar ar o aba. Dja gar mã ikôt me kamênh ar o aba. Kute mrãmri ne gar aje tep pynênho abaja pyrâk dja gar mã ikôt me kamênh ar o aba, ane.

<sup>18</sup> Nhyim ar arým amikôt kryre mên mã Jeju kôt ajkamẽ.

<sup>19</sup> Nhyim ajbir tẽ nhyim Xijagumẽ Djuão ar axikôt apôxja kâkam amim kryreo mexo nhỹ nhyim arým ar omũ. Djebedêu ne ar adjuw. <sup>20</sup> Nãm ar omũ nhyim adjynkêt nhyim amikôt ar ku'uw. Nhyim Bãm Djebedêumẽ õ àpênhmẽ ar kâkam nhỹ. Nhyim Xijagu ar arým wãnh ar wãmã iren mã Jejukôt ajkamẽ.

*Jeju kute me krãptĩo mex.*

*Ruk 4.31-37*

<sup>21</sup> Jejumẽ ar mõi:n arým krĩraxbê Kapanakam bõx. Nhyim kam ar'ã pi'ók rârâr. Ar'ã me tyk djâ kêt djâ nhõ akati nhyim kam ar mebê idjaer bikprõnh djãmã wadjâ. Nhyim kam arým memã 'ã ujarênho dja. <sup>22</sup> Nhyim me Jejukam no tyn kumex ne kam abenmã kum,

—Tõ mýj kabên ny got ja? Nãm prĩne kute amimarkôt katã:t memã amikukràdjâ jarênhkumrêx. Nãm ã me bẽnjadjwýr rũnh kwý kabên mex anen ar prĩne kabêno meo atomo ba, ane. Djã nãm ã Mõj djê kukràdjâ mar djwýnh memã arênho ane? Kati. Nãm me ari no prõt ne ari kukràdjâ jarênh'ã umju:w ne kute arênh katãt kêtikumrêx.

<sup>23</sup> Jeju memã 'ã ujarênho dja nhyim me'õja me bikprõnh djâkam nhỹ. Me karõ punu ne me'õjao ba tũm. Nãm nhỹ nhyim me karõ punu kute o baja kàj bê Jejumã kabên ne kum,

<sup>24</sup> —Krĩraxbê Nadjarekam Jeju, mýj ne ga aje me ijomã? Tõ djãm aje me ijo abiknormã? Ba me ije apumũnh tũm. Metĩndjwýnh mexo ne ga amex. Õ kàjkwa kurũm ne ga ruwn ar aba, ane.

<sup>25</sup> Nhyim kam Jeju kum bẽn tỳx ne kum,

—Anhikrên me'õja kurũm akato, ane.

<sup>26</sup> Nhyim arým me karõ punu me'õja bã nhyim tyko nõ. Nãm kubĩn amran arým kum iren katon mã tẽ. Nhyim arým mex ne. <sup>27</sup> Nhyim arým me kunĩ te kute marmã kam no tyn kumex ne te ari aben kukij ne abenmã kum,

—Mýj ne kute? Djãm me kukràdjâ ny 'õ ne wã? Nãm kute amimar kôt tu me karõ punumã kabên nhyim arým kum uman kabên kôt mã tẽ, ane.

<sup>28</sup> Nhyim kam me pykabê Garrêja kunĩkôt abenmã Jeju jarênho ipók ne.

<sup>29</sup> Nhyim kam Jejumẽ Xijagumẽ Djuão ar mebê idjaer bikprõnh djâ kurũm kato. Ne kam ar Ximãomẽ Ængre ar ũrkwãmã mõi bõx. <sup>30</sup> Nhyim Ximão djupãnhdjwý kanên nõ. Ar wadjâ nhyim ar Jejumã kum,

—Ximão djupãnhdjwý kanê kubĩ nhyim nõ, ane.

<sup>31</sup> Nhyim arým 'ýr tẽn 'ýr bõx ne ikra 'amýn kàjmã ýr. Nhyim ar aêrbê kanê kum ire

nhym arÿm kàjmã dja. Kàjmã djan kam arÿm aro djuw mexo ba.

<sup>32</sup> Nhym arÿm ar'ã myt wadjã. Nhym me kanêmê me punumê me karô punu kute meo ba tùmja nhym me aben totokmã Jeju'ÿr me ja kunĩ bôx. <sup>33</sup> Nãm krĩraxja tãmkam me kunĩ 'ã akuprô, ùrkwã jajkwa krekre'ã akuprô. <sup>34</sup> Nhym kam apÿnh me kanê djari kute me parja Jeju arÿm me ja krãptĩ mex. Ne me karô punu krãptĩ kute ar meo baja arÿm ano nhym arÿm memã ire. Nhym kute anoro ãmri mã me karô punumã kum, "Anhikrê", ane. Mÿkam? Bir, me karô kute Jeju pumũnh tùmkam ã kum anhÿro ba. Nhym kam ar'ã akamãt nhym ar arÿm ngôr.

*Arwãmã katorn Metĩndjwÿnhmã kabên.*

*Ruk 4.42-44*

<sup>35</sup> Ôto nõ: nhym kam, Jeju ôkrên'ãnh kàr pydjikam krã katon amũ arwãmã kato. Ne tẽn arÿm Metĩndjwÿnhmã kabêno nhÿ.

<sup>36</sup> Nhym kam Ximão ar abej mõ. <sup>37</sup> Abej mõn kam arÿm kum katon kam kum,

—E kum, me kunĩ ne me ajabej ar ba, ane.

<sup>38</sup> Nhym arkum,

—Gwaj on amũ bu'ã krĩ kwÿkamdjwÿ tẽ ba me kamdjwÿ kàj bê memã arẽ. Me wãdjwÿ kadjy ne ba ikato, ane.

<sup>39</sup> Ne kam Garrêjakam pyka kunĩkôt kàj bê memã arênho ba. Apÿnh mebê idjaer bikprônã djakam memã arênho ba. Ne me karô punu kute ar meo baja janoro ba nhym arÿm memã iren mã mrã.

*Kute me'õ ï kajêkam têjao mex.*

*Mat 8.1-4; Ruk 5.12-16*

<sup>40</sup> Nhym kam me'õ ï kajêkam têja 'ÿr bôx ne parbê kõnkrão nhÿn kum rax jarên kum,

—Bênjadjwÿr djwÿnh, ga aje inhĩ kajêkam itêkôt ipumũnh ne aje mar. Aje ijo mex prãm jabej ba ren arÿm imex ne, ane.

<sup>41</sup> Nhym arÿm kum kaprĩn 'ÿr ikran kupên kum,

—Ije ajo mex prãm. On amex, ane.

<sup>42</sup> Nhym arÿm 'ã ï kajêkam têja apêx ne arÿm mex ne. Kute o ãm tãmkam tẽmbê kà mex ne. <sup>43-44</sup> Nhym kum,

—Kwãrĩk wãnh ga memã amijarênã kêt. Dja ga tu katãt mã me kadjy Metĩndjwÿnh mar djwÿnh'ÿr tẽn kum amibê, kum amikã

bê. Ne kam kum mry ngã gẽ akadjy Môjdjê kukràdjã kôt Metĩndjwÿnhmã mry gan kum kungã. Arÿm akã mexkam dja ga kum mrywã ngã gẽ me kunĩ apumũ, arÿm akã mexkôt apumũ, ane. <sup>45</sup> Nãm te kum ane nhym arÿm tu memã amijã ujarênã ar bamo krax ne kam memã amijã ujarênã ipôk ne. Nhym kam Jeju te irã ipôkri krĩrax'ômã àrn ar ba prãmje ne arÿm arwãkambit ar ba. Nãm arwãkam ar ba nhym me arÿm bu'ã pyka kunĩkôt 'ÿr ban bôxo dja.

## 2

*Jeju kute me'õ jakryo mex.*

*Mat 9.1-8; Ruk 5.17-26*

<sup>1</sup> Nhym kam 'ã akati kwÿ apêx nhym Jeju krĩraxbê Kapanakam tẽn bôx. Nhym kam me abenmã kum,

—Arÿm ne ajte õ kikrekam bôx. Arÿm ne ajte õ kikrekam bôx, ane.

<sup>2</sup> Nhym kam me itepato 'ã akuprô. Me krãptĩ: 'ã akuprô nhym arÿm kikre kre'ã me kãtãm abenbê krãptĩ. Ne prĩne kikre jajkwa krekre pytãr mex ne. Nhym arÿm kàj bê memã Metĩndjwÿnh kabên jarênho dja. <sup>3</sup> Nhym ar 'õ amãnhkrut ne amãnhkrut me'õ jakryja mÿn o tẽn o bôx. <sup>4</sup> Ne kam me krãptĩkam te: Jeju'ÿr àrmã. Ne kam kikre nhimôk'ÿr o wabi. Kikre nhimôk po'ÿr ne o wabin arÿm Jeju nhiby kikre nhimôk'ã kuprã ne kôt 'ã jãm ngybôr jadjuw ne kôt 'ÿr o ruw. Akryja ikwã djakam nõr rã'ã nhym ar o ruw ne arÿm kabem kudji. <sup>5</sup> Nhym kam Jeju amim,

—Ar ja ne ar tu amim ikamnhĩxkumrêx, ane.

Ne kam me'õ jakrymã kum,

—Akmere, jakam ne ba arÿm ajaxwe kunĩ maro aknon akam ingyk kêt ne, ane. Djã nãm tẽmbê me'õ jakryo mex got? Kati, nãm amidjêje nẽn kum jabit jarẽ nhym êje nõ. Jeju ta ne axweo akno.

<sup>6</sup> Nhym wãnh Môjdjê kukràdjã mar djwÿnh kwÿ nhÿn arÿm amim,

<sup>7</sup> —E kum be me'õ ja ne ajmãn Metĩndjwÿnh japrÿo djan amijo Metĩndjwÿnh dja. Metĩndjwÿnh pydji ne kute me axweo biknorn mekam ngyk kêt, ane. <sup>8</sup> Nãm me ã ôkre kadjwÿnhbê anhÿro kumex nhym arÿm tu kuman memã kum,

—Mýkam ne ga me anhõkre kadjwýnhbê ijo kajgon ijapryõ akumex? ane. <sup>9</sup> Ë, ba me amã mýjja amãnhkrut jarê. Mýj ne amirít? Ba ren me'õ jakryjamã kum, “Ba arým ajaxwe maro aknon akam ingyryk kêt”, ane. Nàr kon, “On kàjmã djan anhiqwã djã mýn o tẽ”, ane. Mýj ne ren amirít, nẽn? Nã bãm ren kum, “Ba arým ajaxwe maro aknon akam ingyryk kêt”, ane nhyam amirít kêt kumrẽx ne. Tãmbit ne amirít kêt. Nhyam be, kàjmã me ku'ê, ije ren me'õmã kum, “Kàjmã djan tẽ”, ane nhyam ren amirít. Tãmbit ne amirít kumrẽx. <sup>10</sup> Dja ba kum, “Kàjmã djan anhiqwã djã mýn o tẽ”, anen arým o mex gar arým omũn arým amim, “Be ga, Jeju kute me'õ jakryo mexja pumũ. Be, djãm kute me axweo biknor kêt got? Mrãmri ne Metĩndjwýnh arým amijo ï ne pyka jakam amikabẽn kôt ari me axweo biknor ba”, ane. Me aje amim ja jarẽnh kadjy dja ba me'õ jakryjao mex. Nãm ã Môjdjê kukràdjã mar djwýnhmã anen arým tu me'õ jakryja'yr akẽx ne kum,

<sup>11</sup> —Amã ne ba ikabẽn ne. On kàjmã djan anhiqwã djã mýn anhũrkwãmã o tẽ, ane. <sup>12</sup> Nhyam kam me aêrbê me ipõkri kàjmã dja nhyam me kunĩ arým omũ. Nãm kàjmã djan ikwã djã mýn mã o katon o tẽ. Nhyam me krãptĩ kam no tyn kumex ne abenmã kum, —Mýj me'õ got mýjja mex ja'õ pumũ. Arkati, anen amim,

—Ë, arým ne djãm mrãmri o mex nhyam mrãnh mexja pumũ. Mrãmri ne kabẽnkumrẽx. Djãm kute me axweo biknor kêt got? Mrãmri kute me axweo biknorkumrẽx. Ga, kute kam me'õo mex nhyam mrãnh mexkumrẽxja pumũ. Metĩndjwýnh mexkumrẽx, ane. Mrãmri ne Jeju kute me axweo biknorkumrẽx. Me kute ja mar kadjy ne Jeju arým me'õ jakryo mex. Tãm ne ja.

*Kute amikôt Rewi kamẽnh.  
Mat 9.9-13; Ruk 5.27-32*

<sup>13</sup> Nhyam kam Jeju arým katon ajte imõti mýrbê tẽ. Nhyam kam me itepato 'ã akuprõ nhyam arým memã 'ã ujarẽho dja. <sup>14</sup> Ne kam amũ tẽ. Tẽ: nhyam kam Rewi, Aupêu kute irja nhỹ. Kubê ne Matêu. Bẽnjadjwýr bajtemmã pi'õk kaprĩõ atom djãkam ne nhỹ nhyam arým omũ. Ne kam 'yr tẽn kum,

—Amrẽ on mã ikôt ajkamẽ, ane.

Nãm kum ane nhyam amim kuman arým kàjmã dja. Kàjmã djan arým mã kôt ajkamẽ. <sup>15</sup> Nhyam kam Jeju Rewi nhõ kikrekam õ kwý krẽno nhỹ. Nhyam bẽnjadjwýr bajtemmã pi'õk kaprĩõ atom djwýnh krãptĩ Jejumẽ ro'ã nhỹ. Nhyam we me axwedjwý ikõ'ã nhỹ. Me krãptĩ ne me nhỹ. Be, me ja krãptĩ ne me arým amim Jeju man kôt ba. Nhyam kôt ba djwýnh tũmdjwý Jejumẽ ro'ã nhỹ. <sup>16</sup> Nhyam mebê pardjêukôt Môjdjê kukràdjã mar djwýnh arým me omũ. Pi'õk kaprĩõ atom djwýnhmẽ me we axwe ar Jejumẽ ro'ã õ kwý krẽno nhỹ nhyam me arým me omũ. Ne kam arým kôt ba djwýnhmã kum,

—Be, gar bẽnjadjwýr bajtemmã pi'õk kaprĩõ atom djwýnhmẽ me axwe ar omũ. Je tô, djãm me wã axwe ngri got ne Jeju me ro'ã õ kwý krẽno nhỹ? ane.

<sup>17</sup> Nhyam Jeju arým me kabẽn ma. Me kute,

—Djãm me wã axwe ngri got? anhýrja Jeju kuman memã kum,

—Djãm me mex'yr ne me kane djwýnh mrã? Kati, me kanê'yrbit ne me kane djwýnh mrã. Badjwý ne ba me axwe'yr tẽ. Djãm we me amex'yr ne ba tẽ? Kati, me axwe'yr ne ba tẽ. Me tãm ne ba amiwýr me ku'uw. Me amikam kaprĩren wãnh axwemã irern kute iwýr amijo akẽxmã ne ba amiwýr me ku'uw. Nãm ã Jeju mebê pardjêumã ane.

*Me kukràdjã tũm'ã ujarẽnh.  
Mat 9.14-17; Ruk 5.33-39*

<sup>18</sup> Nhyam kam Djuãokôt ba djwýnhja ne ar Metĩndjwýnhmã amijajburo ba. Djuãobê ngõmã me angjẽnh djwýnhja. Nãm ar amijajburo ba. Mebê pardjêu nhõ me jadjwý ne me amijajburo ba. Nhyam kam me Jeju'yr mõn 'yr bõx ne kukij ne kum,

—Be, Djuãokôt me ba djwýnhmẽ mebê pardjêu nhõ me jamẽ ne me amijajburo ba. Je tô, mýkam ne akôt ba djwýnh ar kute amijajbur kêt mex ne ar ba, ane?

<sup>19</sup> Nhyam Jeju tu amijã me'õ mjên jarẽn amikôt ba djwýnh ar'ã mjênmẽ ro'ã ar ar ba jarẽn memã kum,

—Ga, me kute abenã prõmẽ mjên rẽnhja pumũ. Djãm mjênmẽ ro'ã ar ar baja kute



amijajbur got? <sup>20</sup> Arkati. Mjênemê ro'ã ar ar baja ar kînhkumrêx ne kute amijajbur kêt. Ar õ kwý krên rax. Adjým, akati amrê mörjakam dja me Ar kubê mjêno tým ne mã o mõ. Kam gêdja ar kapriren arým Metîndjwýnhmã amijajburo ba, ane. Mýj'ã ne me kute Ar kubê mjêno tým jarê? Bir, ta amijã ne arê. Jeju dja me o tým ne mã o mõ. Kambit dja kôt ba djwýnh amijajburo ba.

<sup>21</sup> Be ga, me kute jãm amim Jeju kukràdjã ny mar ne ajte jãm amim kukràdjã tùm marja pumũ. Me kute amim amê kukràdjã maro bakam ne me umar mex kêt. Me kute mrãmri ne kubêkà ny tùm'ã ir pyrãk. Ne me ajte ãm mrãmri ne kute pidjô kangô ny ngôn timerkam runh pyrãk. 'Ã ne Jeju ajte memã kum,

—Ga, me'õ nhõ kubêkà tùm ne 'yrja pumũ. Nhym kam arým kubêkà ny, pôn timer kêt. Djã ne tùm'ã kudji? Kati. Mýkam? Bir, dja me kupõ. Nhym kam arým pôn timer nykam ê abenmã wangij. Abenmã wangij nhym arým tùmja kadjô. Nhym kam arým 'yr nyja kute 'yr tùmja jakrenh mex ne.

<sup>22</sup> Ga, me'õ nhõ mrykào ngôn timer. Me bakukãmãre ne me mrykào ngôn timer. Mrykào ngôn timer arým tùm ne ngrãja pumũ. Djã ne kam uba kangô ny ru? Kati. Mýkam? Bir, ãm 'ãtùm timerkam arým uba kangô kadjã ajmrô nhym ngôn timer igot tẽn arým ajkatôr. Nhym arým kangô ajkapî nhym ngôn timer punu ne. Be, kam mex rã'ã kadjy mrykào ngôn timer ny, kã rerekrekambit me kute kangô ny runh prãm. Nhym kam amê mex rã'ã. Nãm ã Jeju memã ane. Gêdja me amim kukràdjã nybit maro ban arým umar mexkumrêx. Nhym be, gêdja me amim me kukràdjã tùm timer ny mar prãm ne arým umar mex kêt timerkam. 'Ã ne Jeju memã ajarê.

*Pi'ók rãrãr mýr jabej me kum kabẽn.*

*Mat 12.1-8; Ruk 6.1-5*

<sup>23</sup> Ne kam pi'ók rãrãrkam pur katikôt tẽn. Nhym kôt ba djwýnh arkôt mõ. Kôt mõn arým kum prãm ne mõrkôt bãygogo 'y nhikẽn mrãnhkôt ngãnh ne amijajkwamã rẽn timer mõ. <sup>24</sup> Nhym kam mebê pardjêu ar omũn kum,

—Je tô mýj ne akôt ba djwýnh ar arým nẽn? Pi'ók rãrãrkam ne me tyk djã kêt djã. Me

kute pi'ók rãrãr jakam mýjja jao anhýr kêt. Me tùm timer ne me ta kukràdjãkôt mã me babê uma. Me kute pi'ók rãrãrkam mýjja kupên timer kêt. Kam ne me tyk djã kêt djãbit. Mýkam ne akôt ba djwýnh ar ã anhýro ba? ane.

<sup>25</sup> Nhym kam Jeju memã kum,

—Kê, djãm me aje Metîndjwýnh kabẽn'ã pi'ók no'ók timer ny pumũ timer kêt? Djãm me aje me bakukãmãrebê Dawi'ã ujarên timer ny pumũ timer kêt? Ê, Dawi arkum prãm. <sup>26</sup> Kum prãm ne arým Metîndjwýnh nhürkwãmã wadjã. Amrêbê: me kadjy Metîndjwýnh timer ny djwýnh nhõ bẽn timer ny rax ne kubê Abijta. Metîndjwýnh nhürkwãmã ne me bakukãmãremã nhý. Nhym Dawi ar Metîndjwýnh nhürkwãmã wadjã timer ny djwý byn kukrên timer ny kôt ar tẽn timer ny jamã timer ny kungã timer ny ar arým kukrê. Djwý me kute Metîndjwýnhmã ôrja tãm ne kubyn timer ny kukrên timer ny arkum kungã. Metîndjwýnh nhõ timer ny djwý ne me kãtãm kute kur kêt timer ny kumrêx. Me kadjy Metîndjwýnh timer ny djwýnh timer ny bit ne kute kur. Nhym be, Dawi ta ne tu kubê kukrê. Nhym kam me kute kum axwe jarên timer ny kêt. Djãm me aje ja timer ny mar kêt? Ga, me kute Dawimã axwe jarên timer ny kêt timer ny pumũ. Ne kam ikôt ba djwýnhmẽbit ar imã ar axwe jarê. Je tô mýkam? Nãm ã Jeju mebê pardjêumã ane.

<sup>27</sup> Ne kam ajte memã kum,

—Djãm me kute pi'ók rãrãr ajbit maro ba kadjy ne Metîndjwýnh timer ny me ipêx? Kati. Me týt djã kadjy ne Metîndjwýnh akati ja jarê timer ny wajêt. <sup>28</sup> Ba me amã arê ga me ama. Ba ije amijo inhî ne me awýr timer ny irwýk ne ba inhõ pi'ók rãrãr djwýnh. Kam gêdja ba memã, “Kwãrik wãnh ga me kam mýjja kupên timer ny kêt nãr timer ny kon, dja ga me jakam apên nãr timer ny kam mýjja kupên timer ny kêt ne arek akrî”, ane. Tãm ne ja. Nãm ã Jeju memã ane.

### 3

<sup>1</sup> Nhym kam ajte ar'ã pi'ók rãrãr timer ny nhym kam ar me bikprôn timer ny djã 'yr bõx ne wadjã. Nhym me'õ nhikra nhikjê jarõxja me ikõ'ã nhý. <sup>2</sup> Nhym kam me kam krîja amim,

—Adjým, dja te me tyk djã kêt djã nhõ akati timer ny nhym arým me'õ timer ny jao mex, ane.

Ne kam Jeju kam no tyn timer ny kumex. Kute me'õ timer ny jao mex jabej rîto timer ny kumex. Adjým. Dja

me'ôo mex nhym me arÿm 'ã axwe nhôn memã kum,

—Tãmwã ne kum me bakukràdjà kurêkumrêx ne pi'ôk ràràrkam meo mexo ba, ane. <sup>3</sup>Nãm me kam no tyn kumex nhym Jeju arÿm me'ôo nhikra jarôxjamã kabên ne kum,

—Amrê tèn me ipôkri dja, ane.

<sup>4</sup>Ne kam me kukij ne memã kum,

—Amrêbê: ne me bakukãmãre Môjdjê pi'ôk ràràr'ã memã karô. Mÿj godja me kam nê? Godja me kam àpênh mex jabej nâr godja me kam àpênh punu jabej. Nâr godja me kam me utâr jabej nâr godja me kam me par jabej. Mÿj godja me pi'ôk ràràrkam nê? Be, ba dja ba me'ôjao mex. Djãm kôt me aje imã ijaxwe jarênhmã? ane. Nãm ane nhym me arÿm bèn kêt mex ne nhÿ.

<sup>5</sup>Nhym me kute kabên mar prãm kêt kam arÿm mekam kaprî:re ne. Ne kam arÿm nokà nhàn me omũ. Ne kam tu me'ôo nhikra jarôxmã kum, “Amrê anhkra katàt”, ane.

Nhym 'ÿr ikra katàt tèm puron arÿm ikra mex ne. Arÿm prîne kum mex ne. <sup>6</sup>Nhym mebê pardjêu arÿm ngryk ne mã apôx. Ne kam on Erodjikôt me ba djwÿnh'ÿr môn me'ÿr bôx. Ne kam arÿm Jejuo aben man abenmã kum,

—Mÿj godja gwaj baje Jeju bïn kadjy on? ane.

#### *Kute me krãptiô mex.*

<sup>7-8</sup>Nhym kam Jejumê kôt ba djwÿnh ar me kurũm kato. Katon arÿm imôti'ÿr mō. 'ÿr mōn arÿm 'ÿr bôx. Nhym me krãpti: apÿnh pyka djari kurũm arkôt mōn bôx. Garrêja kurũm ne me kwÿ bôx. Nhym Djudêja kurũm me kwÿ bôx. Nhym me kwÿ krĩrãxbê Djeruxarê kurũm bôx. Nhym me kwÿ Idumêja kurũm bôx. Nhym me kwÿ ngôbê Djodão nhikjêbê apÿnh kikre djari kurũm bôx. Nhym me kwÿ krĩrãxbê Xirumê Xidô kurũm mōn bôx. Jeju kute apÿnh mÿjja pumũnh kêt nhipêx djari ne me arÿm omũn amũ memã 'ã ajarê nhym me arÿm kuma. Ne kam arÿm itepato arkôt mōn bôx. Me krãpti: bôx. <sup>9</sup>Nhym kam Jeju arÿm kôt ba djwÿnh arkum,

—Gar ikuri kà'ô dji. Godja me ijo bikamÿr jabej ba on mebê kàkam nhÿ, ane.

<sup>10</sup>Bir, kute me krãptiô mexkam ne apÿnh me punu djari kute kupênh prãm. Me krãpti: te kupênh prãmje ari Jeju kôt bikamênho ku'ên ingânho kumex. Kam ne ar kute kuri kà'ô djirmã arkum kà jarê.

<sup>11</sup>Nhym mekôt apÿnh me karô punu kute ar meo ba. Nhym me Jeju parbê rôrôk. Me karô kute Jeju pumũnhkam ne me mã: parbê rôrôk ne mã: kàj bê kum kabên ne kum,

—Ga abê Metĩndjwÿnh Kra, ane.

<sup>12</sup>Nhym kam mã me karô punumã bèn tÿx ne kum,

—Dja ga me ipudju, ane.

#### *Kute ar kubê 12 janor:*

#### *Mat 10.1-4; Ruk 6.12-16*

<sup>13</sup>Ne kam arÿm krãnh'ã wabi. 'ã wabin arÿm amikôt ar ku'uw. Kum ar kĩnh djari ar ku'uw nhym ar arÿm 'ÿr bôx. <sup>14-15</sup>Nhym kam arÿm amikôt ar umjuw. Ar kubê 12 pumjuw. Dja mã amimê aro ba nhym ar arÿm ÿtãri omũn kabên maro ba. Nhym kam kute ar anorn kute arkum,

—Dja gar kàj bê memã ijã adjujarênh ar aban kam ikukwakam me punuo mexo aban kam me karô punu janor ne kujaêko aba, anhÿrmã. Dja ã Jeju Ar kubê 12mã ane. Ja kadjy ne amikôt ar umjuw. Nhym kam me aben djô'ã ar'ã abenmã kum,

—Kute ar anorja, anhÿro ba.

<sup>16-17</sup>Be, kute amikôt Ar kubê 12 pymjÿr nhidji jarênh kadjy ne ja.

Ximão. Ajbir ne Jeju kum Pedru jarê.

Xijagu. Djebedêu ne Xijagu dji.

Djuão. Xijagumê ne Djuão ar axikôt kator.

Ajbir ne ar amêmã Bôanedu jarê. Na krikrit'ã ne ar idji amijakre.

<sup>18</sup>Ångre.

Piripi.

Batormê.

Matêu.

Tôme.

Xijagu 'ôdjwÿ. Aupêu ne Xijagu ja dji.

Tadêu

Ximão 'ôdjwÿ. Idji nhikjêbê ne Xerodji.

<sup>19</sup>Djuda. Idji nhikjêbê ne Ikadjy. Ta dja kurê djwÿnhmã Jeju kanga.

Be, Ar kubê 12 nhidji ne ja. Jeju kute amikôt Ar kubê 12 pymjÿr ne kute ar anor ne ja.

*Me kute kum Xatanaj nhô àpênh jarênh.*

*Mat 12.22-32; Ruk 11.14-23, 12.10*

<sup>20</sup> Nhyam kam Jeju ar mōn arým kikre 'ômā wadjā. Nhyam kam me krāptī: ajte ar'ā akuprō. Nhyam kam ar te kute ō kwỳ krēn mexmā.

<sup>21</sup> Nhyam Jeju kute meo ōbikwaja arým me krāptī: jarēnh man abenmā kum, “Bārām arým ajbā”, ane. Ne kam kute o tým ne pa 'amýnhmā kôt tē.

<sup>22</sup> Nhyam Mōjdjê kukràdjā mar djwýnh kwỳ ne me arým krīraxbê Djeruxarē kurūm tēn mekôt bōx. Ne kam arīk Jeju'ā memā kum,

—Be, djām Metīndjwýnh kukwakam ne me karō punu kujaêko ba? Kati. Me karō punubê Bedjēbu ne o ba. Me karō punu nhô bēnjadjwýr kukwakam kute me karō punu janor ne kujaêko ba. Nām me ā Jeju'ā memā ane.

<sup>23</sup> Nhyam kam amiwýr me ku'uw ne apýnh kukràdjā djāri'ā memā mýjja jakren 'ā memā ajarēn memā kum,

—Djām mrāmri ne ba we Xatanaj kukwakam ō àpênh kujaêko iba? Kati. <sup>24</sup> Me aben djwýnh tām kum aben kurêkam ne kurê djwýnh arým meo apêx. <sup>25</sup> Nār, ō kikre tām kam me krī godja me ta kum aben kurê jabej nhyam me arým aben bê me kungrà. Djām mrāmri ne ba we Xatanaj kukwakam ō àpênh kujaêko iba? Kati. Djām Xatanaj kum ō àpênh kurê? Kati. <sup>26</sup> Be, Xatanaj ren kum ō àpênh kurēn kujate nhyam ren ō me arým aben bê ajmā nhyam ren arým bēnjadjwýr'ā aminhinomā amimē. Nhyam be, kati. Xatanaj kum ō àpênh kurê prām kêt. Ne ba ren Xatanaj kukwakam ō àpênh kujate nhyam ren Xatanajdjwý kum ō àpênh kurê. Nhyam be, kati. Xatanaj kum ō àpênh kurê prām kêt.

<sup>27</sup> Ga, me'ō tỳx nhūrkwāja pumū. Mýj dja me kute ō nêkrêxo prôt kadjy me'ō tỳx nhūrkwāmā àr on? Bir, dja me me'ō tỳx kumrêxo tým ne uwpre. Ne kam arým ūrkwāmā wadjān kubê nêkrêxo prôt ne, ane. Mýj'ā ne Jeju me'ō tỳx jarê? Bir, Xatanaj'ā. Dja me Xatanaj kumrêxo tým ne uwpre kam arým amim ō me ja pytà. Nām ā Jeju memā ane. <sup>28</sup> Ne kam ajte memā kum,

—Kam ba me amā arē ga me ama. Me kute mýjjaio bikēnh kunīkôt ne Metīndjwýnh me axweo aknon mekam ngryk kêt. Me kute Metīndjwýnh japrýkam dja o aknon me kam ngryk kêt. <sup>29</sup> Nhyam be, dja me Metīndjwýnh Karō japrý nhyam arým mekam ngryk rā'ā ne memā axwe jarēnh rā'ā: rā'ā ne. Nām ā Jeju memā ane. Mýkam ne ā memā ane?

<sup>30</sup> Bir, Metīndjwýnh Karō ne mā Jejuo ba nhyam me arīk 'ā memā kum,

—Me karō punu ne ar o ba, ane. Nhyam kam arým Metīndjwýnh Karō'ā me kabēn punu nēje me kukrà.

*Nā ar'ā ujarēnh.*

*Mat 12.46-50; Ruk 8.19-21*

<sup>31</sup> Nhyam kam Jeju nhōbikwa ar kute o tým ne pa 'amýnhmā kôt mō. Jeju nāmē kamyre ar axikôt apōx ar Jejukôt tēn kam arým mekôt bōx. Ne kam ar arek bōm ku'ê. Arek ku'ên arým 'ýr me'ō jano. Kute amiwýr 'wýr kadjy 'ýr ano. <sup>32</sup> Nhyam me krāptī: bu'ā ku'ê nhyam me'ōja 'ýr bōx ne kum,

—E kum, bōm anāmē atōnhre ar amā kabēn, ane.

<sup>33</sup> Nhyam kum,

—Be, mýj dja mekam kute ba kum, “Nhirwa”, ane nār kum, “Akmere”, ane? ane.

<sup>34</sup> Ne kam ari me bu'ā ku'êkôt krān memā kum,

—Ota, ināmē ikamy ne ja. <sup>35</sup> Dja gar Metīndjwýnh kīnh kadjy kabēn man kôt ar amijo aba. Ba kam arým ar amā, “Akmere” nār amā, “Àpnhīre”, ane nār amā, “Nhirwa.” Nām ā Jeju arkum ane.

## 4

*Bàygogo'ā ujarēnh.*

*Mat 13.1-9; Ruk 8.4-8*

<sup>1</sup> Ne kam akati tām kam tēn arým imōti mýrri nhỹ. <sup>2</sup> Nhyam kam me krāptī: 'ā akuprō. Nhyam kam arým mebê tēn kākam nhỹ nhyam me krāptī: arým ngō mýrri kum dja. <sup>3</sup> Nhyam kam arým apýnh kukràdjā djāri'ā memā mýjja jakren memā 'ā ajarē. Ne memā kum,

—Ē, ō pur djwýnh ne kute ō purkam bàygogo kremā 'ýr o tē. 'Ýr o tēn o bōx ne kam ar 'yo ukabêr mrā, ane. Nām me kute

mýjja kre kadjy tu mýjja 'yo ukabê, bàygogo 'yja ne me kute purkam kremã o mrãn kam purkam o ukabêr mrã. Kute mrãmri ne me kute katêbàri 'yo ukabêr mrãnhja pyrãk.

<sup>4</sup> Nãm Jeju memã kum,

—Be, me'õ ne ar bàygogo 'yo ukabêr mrã. Nhyim 'y kwý prykam rôrôk. Nhyim kwênh prĩne kuku. <sup>5</sup> Nhyim kwý kênpo'ã pyka purorrekam rôrôk. Nhyim kam pyka purorrekam ingrôt kukrà kêtumrêx. <sup>6</sup> Nhyim kam kýjrũm myt nhÿn arÿm 'y nhingrôt ga nhyim kajot ne arÿm ty. Arê jabjê kêtgam ne ty. <sup>7</sup> Nhyim 'y kwý mrÿnhĩkam rôrôk ne kam mrÿnhĩmê ro'ã ingrôt ne. Nhyim kam prĩne o akno nhyim arÿm bàygogo 'y kêt ne. <sup>8</sup> Nhyim 'y kwý pyka mexkam rôrôk ne ingrôt ne kam abatãnh ne. Ne arÿm apÿnh bàri ku'ê djàri nhyim kwý'ã kàjbê iyy mex nhyim 'y'ã akre kubê 30. Nhyim kwý iyy mexkumrêx nhyim 'y'ã akre kubê 60. Nhyim kwý iyy jabjê nhyim 'y mexti:re ne kam 'y'ã akre kubê 100. Nãm ã Jeju Metĩndjwÿnh kukràdjã'ã apÿnh mýjja jakreo ane. <sup>9</sup> Ne ajte memã kum,

—Gop me ajõ ajamak mex jabej tu amim ikabên markumrêx, ane.

<sup>10</sup> Nhyim kam me krãptĩ mã mō. Mã mō nhyim Jeju ar arÿm ate nhÿ. Nhyim bu'ã ar jamê kôt ba djwÿnhbê 12 ar arÿm kukij ne kum,

—Mýkam ne ga apÿnh kukràdjã djàri'ã mýjja jakren memã ajbit jarê? ane.

<sup>11</sup> Nhyim arkum,

—Bir, djãm me kunĩ kute ikukràdjã marmã? Kàjkwakam Bẽnjadjwÿr djwÿnh kute amim me utar ne ar meo ba'ã ikabên kukràdjã djãm me kunĩ kute marmã? Kati. Ar gajbit ije ar amã arênho amirĩt gar aje marmã. Nhyim be, me wãbê ne ba udju ne. <sup>12</sup> Me wã kute mar kajgokam ne ba apÿnh kukràdjã djàri'ã memã mýjja jakren memã mýjjabit'ã ajarê. Me kute ikukràdjã mar kajgo wã ne amrêbê: me bakukãmãre memã arên memã kum,

“Me te memã mýjja jakre nhyim me omũnh kajgon mã amim omũnhkumrêx kêt.

Nhyim me te memã mýjja jarê nhyim me me kabên maro krĩn mã mar kêt. Mã kukràdjã'ã mýjja kute amijakreja mar kêt.

Kute Metĩndjwÿnh'ÿr amijo akêx kêt nhyim me axwekam ngryk rã'ãmã.”

Nãm me bakukãmãre ã me wã'ã memã ane. Kam ne ba apÿnh kukràdjã'ã apÿnh mýjja jakren memã mýjjabit'ã ajarê. Me wã kute mar kajgokam.

<sup>13</sup> Ne kam ajte arkum,

—Be, ikukràdjã ije ajbir 'ã me'õ kute bàygogo 'yo ukabêr jakreja djãm ar aje mar kêt? Be, dja ba apÿnh ikukràdjã'ã mýjja jakre rã'ã. Mýj godja gar amũ ikukràdjã ja mar on. <sup>14</sup> Be, Metĩndjwÿnh kabên'ã ujarênh djwÿnh ne arÿm memã arê nhyim me kuma. <sup>15</sup> Kuma kute mrãmri ne 'y kwý prykam rôrôk pyrãk. Nhyim ate Xatanaj totokbê jãm mebê o amijakren mebê Metĩndjwÿnh kabêno akno.

<sup>16</sup> Kênkam 'y rôrôkja ne me kute amim Metĩndjwÿnh kabên mar 'iry kêt ne kangaja'ã amijakre. Nãm me myt tãmkam Metĩndjwÿnh kabên man bit kum kĩnhkumrêxo tẽm kajgo. <sup>17</sup> Kute tu amim markumrêx kêtê. Ajkwaobit ne kute mar. Kute 'y nhingrôt ne arê kêtgam tẽmbê tykja pyrãk. Kute amim mar 'iry kêt nhyim ate apÿnh me kaprĩ djàri me'ÿr bõx nhyim me arÿm kanga.

<sup>18</sup> Mrÿnhĩkam 'y rôrôkja ne me kute Metĩndjwÿnh kabên mar ne kam ate ajte kute jãm mýjja marja'ã amijakre. Nãm me arÿm Metĩndjwÿnh kabên man <sup>19</sup> kam 'ãno ãm kêt ne amim, “Mýj dja ba nẽn inhõ kwý krên mex ne inhõ kubêkà mex? Ikanêkam mýj dja ba nẽ”? ane. Nãm pykakam mýjjabitkam ar no katon axwe umar. Ne kam amim pi'ók kaprĩo atom rax prã:m ne ajte apÿnh mýjjao atom rax prã:m. Djãm kute amim mýjjao atom raxkam mrãmri umar mex? Kati. Bir, me arÿm õ mýjja rũnhkam mrãmri umar punukumrêx. Ga, mrÿnhĩ kute bàygogoo bikênh nhyim kam iyy kêtja pumũ.

<sup>20</sup> Ga, me'õ bàygogo 'yo ukabêr tẽ nhyim ajte kwý pyka mexkam rôrôkja pumũ. Nhyim arÿm ingrôt ne abatãnh ne. Abatãnh ne arÿm iyykam 'y kume:x. Me kwýdjwÿ ne me memã Metĩndjwÿnh kabên jarê nhyim me arÿm tu amim markumrêx. Ne kam maro amũ amikamên arÿm mar rax ne. Mar rax ne arÿm ukaprĩkumrêx. Me kwý ne me kàjbê ukaprĩ kryre kute mrãmri ne

bàri kwýkam iyy mex nhym kam 'y kubê 30 pyrâk. Nhym me kwý ukaprîkumrêx kute mrâmri ne bàri kwýkam iyy mexkumrêx nhym kam 'y kubê 60 pyrâk. Nhym me kwý ukaprîti:re kute mrâmri ne bàri kwýkam iyy mexti:re nhym kam 'y kubê 100 pyrâk. Me ukaprîkumrêx nhym Metîndjwýnh arým mekam kînhkumrêx. Mekam kaprîre kêtumrêx. Nãm ã Jeju arkum ane.

*Kute amikukràdjà'ã ngônhpôk jakre.*

*Ruk 8.16-18*

<sup>21</sup> Ne kam arkum,

—Be, godja me me'yr ngônhpôko bôx jabej djâm me kute mýjja 'ôkôt o bipdjur got, kute kânoipôko 'ã pro got? Nâr djâm me ikwã djà krakri me kute umjýr got? Kati. Ngônhpôk ne me kum angij ne tu parkam kênhkam umjuw. <sup>22</sup> Ba ar amã arê gar ama. Ikabên kukràdjà ije 'ã apýnh mýjja jakren mebê udjurja dja ĩ me kunĩmã amirîtkumrêx nhym me kunĩ kuma. <sup>23</sup> Gop ar ajamakkre mex jabej tu amim ikabên markumrêx. Nãm ã Jeju arkum ane. <sup>24</sup> Ne kam ajte arkum,

—Ar ikabên mar 'ãno dja. Ar ajamakkre mex kôt dja ba ar amã ikabên jarê. Dja gar tu amim ikabên markumrêx ba arým ar amã ikabên kumex jarê. <sup>25</sup> Mýkam? Bir, me kute tu amim ikabên markumrêx jamã dja ba mã kwý rax ne arênho tē nhym me arým kwý rax ne kuma. Nhym be, me kute ikabên mar kajgoja dja Metîndjwýnh arým mebê o akno, mebê ikabên mar kajgo jao akno. Nãm ã Jeju kôt ba djwýnhmã ane.

*Mýjja 'y'ã ujarênh.*

<sup>26</sup> Me kute memã Metîndjwýnh kabên jarênh nhym ta kute arým memã amak bôn nhym me kute amũ mar kamênh ne kute arým mar rax ne. 'Ã ne Jeju memã kum,

—Be, Metîndjwýnh kute amim me utâr ne ar meo baja'ã ne bågogo amijakre. Be, me'õ ne bågogo 'yo ukabêro tē:n arým 'y kre pa. <sup>27</sup> Ne kam akati kunîkôt ate kadjy krã. Nhym kam 'y ingrôt ne abatânh tēn arým prîti. Nhym kam kre djwýnh amim, "Je, mýj ne abatânh kadjy amijon"? ane.

<sup>28</sup> Be, bågogo ta ne pykakam abatânh ne arým ô. 'Y kumrêx ne pykakam ikwã.

Ne kam arým ingrôt. Ne abatânh tē:n arým prîti. Prîtin arým tujarô. Tujarôn arým iyy ajkapĩ. <sup>29</sup> Ajkapĩn kam arým prý ngrã. Nhym me'õja arým 'ãno djan éo mō. Be, Metîndjwýnh kute ar meo ba ja ne me bågogo kôt ã amijo ane. Nãm ã Jeju memã ane.

<sup>30</sup> Ne kam ajte memã kum,

—Metîndjwýnh kute amim me utâr ne ar meo baja. Mýj ne kute me urâk? Ba ar amã arê gar ama. <sup>31</sup> Me amikraxkam kajgo kute motadu 'y kajgo pyrâk. Pykakam 'y bimânhkam 'y kryre. Apýnh pidjô 'y djari kam 'y ne kute rûnho motadu 'y jakrenh mex ne. <sup>32</sup> Pykakam motadu 'y rôrôk ne kam arým ingrôt. Ingrôt ne arým rûnh mō. Rûnh mōn arým amipân pidjô bàri kunĩ rē. Ne arým pa koror mex ne. Nhym kwênh arým amykrâkôt apýnh pakam ku'ê. Nãm ã Jeju memã ane. Me kute amim Jeju marmã nhym arým ja pydjín kadjy amima nhym arým ja kadjy amiman 'ã tým nhym ja kôt 'ã tým nhym ja 'ã tým nhym arým 'ã krãptĩ ne. 'Ã ne 'y kryre ja jakre.

<sup>33</sup> Mýjja kute ajbir ja pyrâk krãptĩ ne Jeju memã kukràdjà'ã akren memã 'ã ajarê. Me amakkre mex kôt ne memã 'ã ajarê.

<sup>34</sup> Ne apýnh mýjjabit'ã ajarê. Nãm kute Metîndjwýnh kukràdjà'ã mýjja jakrebit ne memã 'ã ujarênh ar ba. Ne kam arým kôt ba djwýnh ar ate ýrkam prîne arkum kukràdjà jarênh mex. Kukràdjà'ã mýjja kute amijakreja prîne arkum arênh mex.

*Kôkmã bēn tỳx.*

*Mat 8.23-27; Ruk 8.22-25*

<sup>35</sup> Nhym akati tãm kam arým ar'ã myt wadjà nhym Jeju arkum,

—Gwaj on ne ikjêmã rê, ane. <sup>36</sup> Nhym kam ar me krãptĩmã kum,

—Me on ajmã, ane. Nhym Jeju kôknhökakam ýr rã'ã nhym ar tu amimē o mō. Nhym me kwý kà kwýkam arkôt mō. <sup>37</sup> Nhym kam na 'itýx ar'ã ruw nhym kôk 'itýx wabê nhym kam ngô arým aben pumjuw ne kà nhíby aton arým kà kre kam bikapĩno mō. Kà kre kam bikapĩno mō nhym arým ipu 'ýr. <sup>38</sup> Nhym wãnh Jeju kà katêkam krã japar djà'ã krã djín ôto nō. Ôto nōr mex katikôt nhym kôt ba djwýnh ar arým tok ne kum,

—E kum, ujarēnh djwýnh, ngô kute gwaj banhimex 'ýr ga ate akrān anhōto nō, ane.

<sup>39</sup> Nhyam arým kàjmā djan kôkmā bēn tỳx. Kum bēn tỳx ne ngômā kum,\*

—Anhikrê, on akubyn aminê, ane.

Nhyam arým kôk djâbêr amikrâta nhyam ngô arým tu mê ne nō. <sup>40</sup> Nhyam kam arkum,

—Je tô mýkam ne gar ã atīn prāmo ane? Mýkam ne gar tu amim imarkumrēx kêt? ane.

<sup>41</sup> Nhyam ar madjà kretin abenmā kum,

—Je tô mýj me'ō got ja? Nām tu gêt kôkmā kabēn nhyam tu kabēn kôt anhikrê, ane.

## 5

*Me karō punu krāptī kute ar me'ōo ba.*

*Mat 8.28-34; Ruk 8.26-39*

<sup>1</sup> Ne kam imōti nhikjēmā bōx. Kam ne mebê Djeradja nhō pyka.

<sup>2</sup> Nhyam kam Jeju ar akàxkam bōx ne arým wabin dja. Nhyam adjynkêt ne me'ōja pyka krā kurūm katon 'ýr tē. Me karō punu ne ar o ba. <sup>3</sup> Pyka krākam ne ar ba tūm. Nhyam me te kàxirāxo ari uwpreo ba. <sup>4</sup> Nām me te kadjy kàxirāxo te djê djâmē kàxirāxo kàkrā djê djâ mýn te o uwpre nhyam mā ari kàkrā djê djâ rēho ba. Ne mā ari kàxirāxo te djê djâ kukēho ba. Nhyam me kute unēnh mex kadjy te: me tỳxo kute uràk'ō prāmje.

<sup>5</sup> Nhyam akati kunīkôt ne akamāt kunīkôt me'ōja krānhre'ã ar ba. Ne me tykmā kikre mē amijo kajkepo ba. Nām ari àmra ban ari kēno amijayro ba. <sup>6</sup> Me'ōja katon arým amybým Jeju pumū. Omūn arým tu 'ýr prôt ne. Prôt ne 'ýr bōx ne arým ibôn nhý. Kute kum amijo à'wýr kadjy ne parbê ibôn nhý.

<sup>7-8</sup> Nhyam kam kum kabēn ne kum,

—Me karō, apunure. On kum anhire, ane.

Nhyam me'ō me karō punu kukwakam arým kum kabēn ne. Kàj bê kum àmrakam kum kabēn ne kum,

—E kum, mýj nā Jeju? Abê kàjkwakam Metīndjwýnh Kra. Mýj ne ga aje ijo mā? Dja ga Metīndjwýnhmā akabēn pydjīn jarēn ijā kum, “Dja ba kamjêr kêt”, ane. Dja ga ã Metīndjwýnhmā anen arým ikamjêr kêt ba arým itokry kêt. Nām ã me'ō kum ane.

<sup>9</sup> Nhyam kum, “Mýj ne anhidji kute”? ane. Nhyam kum,

—Me ikrāptī:kam, inhidjibê ne krāptītire, ane.

<sup>10</sup> Ne kam amijo a'uw ne kum,

—Kwārīk wānh me ja mōr djâ kurūm me ijanor kêt, ane.

<sup>11</sup> Nhyam wānh angrô jamy krāptī: krānhrekam àkur mō. <sup>12</sup> Nhyam me karō punu krāptī amijo a'uw ne kum,

—Gop angrô jamymā me ijano ba me kum wadjà, ane.

<sup>13</sup> Nhyam memā kum, “Aj mā”, ane.

Nhyam me karō punu krāptī arým me'ōmā iren kurūm kato. Katon arým angrô jamymā wadjà. Nhyam angrô jamy arým amibêx ne tu pyka krā'yr'ã aparmā prôt. Prôt ne arým imôtikam nox. Nox ne arým ngôo aminhimex ne arým kunī ty. Angrô jamy kubê 2.000 ne ty.

<sup>14</sup> Nhyam wānh angrô jamyo djuw mex djwýnh ar arek omūho dja. Ne kam mā krīraxmā tēn arým memā arē. Arwākam me jamē ne memā arē. Nhyam me kute mýjja pumūnhmā amū 'ýr mō. <sup>15</sup> Jeju 'ýr mōn 'ýr bōx. Nhyam me'ō me karō kute kum irerja arým arek nhý. Nām arým kà jadjān no mextiren nhý. Nhyam me kum uma ne. <sup>16</sup> Nhyam ar kumrēx kute omūnhja arým me'ōja'ã ajarē. Ne ar ajte angrô jamy'ã ajarē. <sup>17</sup> Nhyam kam me Jejumā à'wýrmo krax ne kum,

—Gop on me inhō pyka kurūm akato, ane.

<sup>18</sup> Nhyam Jeju ajte kàkam ýrmā tē nhyam me'ō me karō kute kum irerja kum amijo a'uw ne kum,

—Ba mā akôt ajkamē, ane.

<sup>19</sup> Nhyam kum,

—Kati, mā. Akubyn anhūrkwā 'ýr tē. Aje meo anhōbikwa wā'ýr tē. Memā Bēnjadjwýr djwýnh'ã ajarē. Kum akaprīn kute ajo mex'ã ajarē, ane.

<sup>20</sup> Nhyam kam arým mā tēn amū pyka nhidjibê Krīraxbê 10'ýr bōx. Ne kam Jeju kute o mex'ã me kunīmā ujarēnh ar ba. Nhyam me kunī te kute mýjja marmā kam no tyn ku'ê.

\* **4:39** Adjakam kute kabēno mýjja kunī nhipekôt arým kôkmā bēn tỳx.

*Me'ô kurerer tyk'ã ujarênh.*

*Mat 9.18-19; Ruk 8.40-42*

<sup>21</sup> Nhyam kam Jeju ajte kâkam nox ne akâx nhikjêmã mō:n kam bôx. Ne kam wabin dja. Nhyam kam ajte me krâptî: 'ã akuprô.

<sup>22</sup> Nhyam me'ôbê Djajru 'ÿr tē. Mebê idjaer bikprôn̄h djâkam kubê bēnjadjwÿr'ô. Nãm 'ÿr tēn arÿm omũ. Omũn kute kum rax jarēnh kadjy tu parbê tÿm ne nō. <sup>23</sup> Ne krao a'u:w ne kum,

—Wānh ne ikra prîtire nōn arÿm tyk 'ÿr. Gu 'ÿr ga 'ã anhkra dji gē à kêt ne imã tÿn, ane.

<sup>24</sup> Nhyam arÿm kôt tē. Tē: nhyam me krâptî: prîne aēr mex ne kôt mō. <sup>25</sup> Nhyam wānh me'ô nire kôt tē. Kamrô mã: apôx'ã ne arÿm amex kubê 12 apêx. <sup>26</sup> Nhyam kamã me ta kute amijo mÿjja marja krâptî aben totokmã te kaneo ba. Djâm kam arÿm mex got? Kati. Me ô'ã ãm mã tokryo tokry. Ne mã memã o pānh'ã arÿm ô pi'ôk kaprî kunî krē. Ne kam mex kêt ne ãm punu mex mō.

<sup>27</sup> Ne kam me kute Jeju'ã ujarēnh man arÿm 'ÿr tē. Me krâptî: Jejukôt mō: nhyam nija mekôt amibêx mex ne arÿm kôt bôx. Kôt bôx ne tu Jeju nhibũmkôt 'ã kubêkà kupê. <sup>28</sup> Be, kute o anhÿr kêtri ne amim,

—Ba 'ã kubêkàbit kupên arÿm imex ne, ane.

<sup>29</sup> Nãm 'ã kubêkà kupên kupênhmē ro'ã nhyam arÿm kamrô ngrà nhyam arÿm amikam amimex ma. <sup>30</sup> Nhyam Jeju on kute o mexkôt amikam kuman arÿm me ipôkri akubyn akêx ne memã kum,

—Nhyam ne ijã kubêkà kupê? ane.

<sup>31</sup> Nhyam kôt ba djwÿnh kum,

—Djâm me krâre ne me akuno ga, “Nhyam ne ikupê”? ane, ane.

<sup>32</sup> Nhyam kute me'ômã katormã ari mekôt krã. <sup>33</sup> Nhyam nija arÿm kute amimex markam 'ÿr bôx. Nãm umaje tertet ne tu parbê tÿm. Parbê tÿm ne arÿm prîne kum amijarēn kum,

—Mrāmri, ba ne ba akã kupê ga arÿm ijo mex ne, ane.

<sup>34</sup> Nhyam kam kum,

—Àpnhîre, ga ne ga tu amim ikamnhîxkumrêx, ane. Arÿm amexkumrêx, ane.

<sup>35</sup> Nãm ã kum anhÿro dja nhyam me kwÿ bēnjadjwÿr Djajru nhûrkwã kurũm tēn ar kajpan arÿm Djajrumã kum,

—Arÿm ne akadjwÿx akuno. Kwārîk wānh ijukri ujarēnh djwÿnh kunor kêt, ane.

<sup>36</sup> Nhyam Jeju Ar kubê ate krân arÿm Djajrumã kum,

—Kwārîk wānh amã akra tyk puma kêt. Djã gãm tu amim ikamnhîxkumrêx, ane.

<sup>37</sup> Ne kam Pedrumē Xijagumē Djuão arkum,

—Ar gajbit dja gar ikôt tē, ane.

Ne bu'ã me ku'émã kum,

—Me arek jakam dja, ane.

Djuãoomē ne Xijagu ar axikôt kato.

<sup>38</sup> Nãm memã anen kam ar Djajru nhûrkwãmã tēn bôx. Nhyam wānh me kangao kumex. Me muw ne abej àmrao kumex nhyam Jeju arÿm me omũ. <sup>39</sup> Ne kam arÿm me'ÿr wadjàn memã kum,

—Mÿkam ne ga me akangao akumex ne muw? Djã nãm prîtija ty? Kati. Nãm ôto nō, ane. Kute akubyn o tÿnmã. Kam ne ã memã ane.

<sup>40</sup> Nãm memã ane nhyam me arÿm 'ã bēno ajkēn keketo kumex. Nhyam kam arÿm bôm me ano nhyam me kunî kato. Ne kam bāmmē nāmē kôt ba djwÿnh ar ajbito mōn prîti nhikwã djà'ÿr aro wadjà. <sup>41</sup> Ne kam prîti nhikra 'amÿn kum, “Tarita kumî”, ane.

Nãm ren me bakabēnkam kum,

—Prîtire, amã ne ba ikabēn. Kàjmã dja, ane.

<sup>42</sup> Nãm kum ane nhyam arÿm ar aêrbê kàjmã djan ar mrã. Nhyam ar arÿm kôt madjà kreti. Prîti'ã ne amex kubê 12.

<sup>43</sup> Nhyam kam arkum kabēn ne amijã arkum karōn arkum, “Djã gãm ar ipudju”, ane.

Ne ajte arkum,

—Ar kum mÿjja'ô ngã gē kukrē, ane.

## 6

*Ô pyka djwÿnhkam bôx.*

*Mat 13.53-58; Ruk 4.16-30*

<sup>1</sup> Ne kam arÿm memã kâx ne amũ ô pyka djwÿnhmã tē. Nhyam kôt ba djwÿnh ar kôt mō. Nhyam kam arÿm 'ÿr bôx. <sup>2</sup> Nhyam ar'ã arÿm pi'ôk rârâr. Nhyam arÿm mebê idjaer bikprôn̄h djà'ÿr tēn kam 'ÿr bôx ne arÿm wadjà. Ne kam kute memã amikukràdjà

jarênh kadjy arÿm amikrax ne. Nhym me krãptĩ kabên man kam no tyn kumex ne ari abenmã kum,

—Je tô nhym nã kum me kukràdjà ja jarê nhym ã kabên mexo ane. Nhym ne kum àpênh'ã karô nhym ã mÿjja nhipêxo ane. Mÿjja pumũnh kêt kumrêx ne ipêx nhym kumex. <sup>3</sup> Be, Jejubê ne pĩ kênh djwÿnh ka-jgo. Marij kurũm ne kato. Kôt ar apôxjabê ne Xijagumê Jôdjemê Djudamê Ximãomê. Be, ar axikôt apôx ne ja. Kanikwÿnhdjwÿ ar me baro'ã ar ba. Djãm atemã me'ô? Kati. Tãm. Me bajô tãm. Ne kam ã àpênho ane. Nãm me ã ari abenmã anen kam arÿm kubê Jeju kĩnh no kati. <sup>4</sup> Nhym kam amijã memã kum,

—Pyka kunĩkôt me Metĩndjwÿnh kukwakam ujarênh djwÿnhmã kãjmã rax kamênho ba. Nhym be, ô pyka djwÿnhkam me jabit ne me ar prãro ba. Ôbikwa djwÿnhkam ar ja, ô kikre djwÿnhkam ar ja ne me ar prãro ba, ane.

<sup>5</sup> Ne kam te kute ô pyka djwÿnhkam mÿjja pumũnh kêt krãptĩ nhipêx prãmje. Te me krãptĩo mex prãmje. Me kute aparmã rax kamênho prãmkam. Nãm me punu ngrêrebit'ã ikra jadjuw ne meo mex. <sup>6</sup> Ne mekam no tyn djan amim,

—Je tô mÿkam ne me kute inhô pyka djwÿnhkambit amim imar kêt kumrêx, ane.

*Kute Ar kubê 12 janor.*

*Mat 10.1-15; Ruk 9.1-6*

Ne kam arÿm tẽ. Apÿnh krĩkôt tẽ. Memã amikukràdjà jarênho tẽ. <sup>7</sup> Ne kam amiwÿr Ar kubê 12 'uw nhym ar arÿm 'ÿr bôx. 'ÿr bôx nhym kute amũ ar anor kadjy arÿm aro aben nhikjê. Ne ar kute kukwakam me karô punu janor ne kujaêk kadjy arkum amipyma jadjà. <sup>8</sup> Ne kamã arkum 'ã karôn arkum,

—Ar amôr kadjy kwãrĩk wãnh mÿjja krãptĩ byr kêt. Dja gar akajpar djãbit by. Kwãrĩk wãnh mokà byr kêt. Kwãrĩk wãnh djwÿ byr kêt. Kwãrĩk wãnh anhô katôk'y djãkam pi'ôk kaprĩ byr kêt. <sup>9</sup> Ne ar aparkã ponh jangjên ar anhinôkã pÿnhbit jangjê, ane.

<sup>10</sup> Ne kam ajte arkum,

—Dja gar apÿnh krĩ'ÿr mō. Nhym me'ô arÿm ar amã aminhũrkwã jarê. Kumã

dja gar wadjàn kambit anhikwã. Ne kam me ô krĩrax kurũm ar amôr kambit dja gar anhũrkwã 'ôdjwÿ jabej. <sup>11</sup> Nhym godja me ar abê aminhũrkwã nê jabej ne kute ar amar prãm kêt jabej gar mebê aparkà'ã me ô pyka ka'u. Me kurũm akatorkam pyka ka'u. Aje me kangao amirĩt kadjy. Ba ar amã arê gar ama. Amrêbê: krĩraxbê Xôtômamê Gomorakam me axwekumrêx. Dja ĩ Metĩndjwÿnh kute memã axwe pãnh jarênh kadjy akati bôx. Nhym be, ajbir me krĩ jakam dja me axwe pãnh amrêbê me tũm wã jakre. Me kute ar abê aminêkam dja me axwe pãnh me tũmwã jakre. Nãm ã arkum karôo ane.

<sup>12</sup> Nhym kam ar amũ mōn kàj bê me akreo ban memã kum,

—On me amikam akaprĩren wãnh ajaxwemã anhiren Metĩndjwÿnh'ÿr amijo akêx, ane.

<sup>13</sup> Ne arÿm me karô punu krãptĩ kute ar meo ba jano nhym arÿm memã iren mã mō. Nhym ar me kanê krãptĩ kungrà. Mÿjja kangô kute rōny kangô pyrako me kungràn meo mexo ba.

*Djuão'ã ujarênh.*

*Mat 14.1-12; Ruk 9.7-9*

<sup>14</sup> Nhym kam me amũ Jeju jarênho ipôk. Nhym kam mebê idjaer nhô bēnjadjwÿr rax nhidjibê ne Erodji. Arÿm ne me kute Jeju jarênhja ma. Ne kam arĩk Jejuo Djuão ne memã kum,

—Ngômã me angjênh djwÿnhbê Djuão arÿm akubyn tĩn ne ar ba. Be, tyk ne akubyn tĩnkam ne mã mÿjja pumũnh kêt nhipêxo ba, mã me punuo mexo ba, ane.

<sup>15</sup> Nhym me ja arĩk Jeju'ã memã kum,

—Be, kubê Metĩndjwÿnh kukwakam ujarênh djwÿnhbê Erij, ane.

Nhym amũ me ja 'ã memã kum,

—Be, kubê ne Metĩndjwÿnh kukwakam ujarênh djwÿnh'ô. Nãr, kute amrêbê: Metĩndjwÿnh kukwakam ujarênh djwÿnh'ô pyrãk, ane.

<sup>16</sup> Nhym bēnjadjwÿr rax Erodji kute Jeju jarênh markam 'ã memã kum,

—Be, Djuão ne wã. Ba ije kadjy me anor nhym me kute mut krã'ÿr, arÿm akubyn tĩn ne ar ba, ane.



17-18 Be, me kute Djuão bîn kêtri ne Erodji kamyre. Idjibê ne Piripi. Piripi prô nhidjibê ne Erodjij. Nhyam kam Erodji arým kamyrebê prô pytàn ar o ba. Nhyam kam Djuão nêje kum kabên ne kum,

—Metĩndjwýnh kukràdjà kupa'ã ne ga akamyrebê prô pytà, ane.

Nhyam Erodjij kuman arým Erodjimã apnê. Djuão'ã kum apnê nhyam arým 'ýr me krâkamngôn jano. Nhyam me arým o tým ne kubê ijê. 19 Nhyam kam Erodjij ari kum Djuão kurêo ban te kute bĩnmã 'ã amijakreo ba. 20 Erodji kum Djuão pymakam Erodjij te 'ã amijakreo ba. Erodji mã 'ã amim,

—Djuão ne katàt ar amijo ban Metĩndjwýnh mexo mex, ane. Nãm mã amim anen ar Erodjijbê utàr mexo ba.

Djuão kute Erodjimã Metĩndjwýnh jarêho ýr kunĩkôt Erodji ari amim,

—Je tô mýj dja ba amijon? anen te kute kabên mar ne kôt kute amijo anhýr prãmje. Nhyam be, kum Djuão kabên mar prãmã.

21 Erodjij kum Djuão kurêo ba nhyam kam arým mrãmri kute bîn kadjy ò akati bôx. Erodji rwýk djâkam ò akati arým bôx. Nhyam ò akatikam arým bu'ã bēnjadjwýrreja ro'ã àkuro nhý. Apýnh ò me rũnh djari, ò krâkamngôn nhô bēnjadjwýr djari, ò pykabê Garrêjakam me ò nêkrêx rũnh djari, me kunĩ ò akati kadjy Erodji'ã akuprô. 22 Ne ò kwý krêno nhý nhyam Erodjij kra kurerer arým me'ýr wadjà. Ne kam memã to nhyam me arým kum kĩnh. Erodjimê me ro'ã ýrja kum kĩnhĩ. Nhyam kam Erodji kurerermã kum,

—Mýj ne ga amã kĩnh? Dja ga amã mýjja'õ kĩnh ne imã arê ba arým amã kungã, ane.

23 Nãm kum kabên jarênh mãmdjin kum,

—Be, amã ikabên kajgo kêtumrêx nhyam Metĩndjwýnh arým ima. Dja ga amã mýjja'õ kĩnh ne imã arê ba arým amã òrkumrêx. Nàr godja amã inhô pyka kuto katê kĩnh jabej ba arým amã kungã. Mrãmri ne ba tu amã ikabên jarênhkumrêx, ane.

24 Nhyam kam arým katon nã kukij ne kum, “Ô mýj dja ba kum arê”? ane.

Nhyam kum,

—Xô, ngômã me angjênh djwýnhbê Djuão krã'ã dja ga 'wý, ane.

25 Nhyam amibêx ne ajte bēnjadjwýr rax'ýr wadjàn kum,

—Ô kum amikrà kêt ne ngômã me angjênh djwýnhbê Djuão krã dja ga imã angã. Ngôn purortikam adjàn o bôx ne imã angã, ane.

26 Nhyam kam bēnjadjwýr rax arým kaprîren òkre kadjwýnhbê amim,

—Je, arým ne ba mrãmri kum ikabên jarênh mãmdji nhyam Metĩndjwýnh arým ima. Jakam ba te ije kum, “Kati”, anhýr prãmje. Inhô me rũnh mrãmri ikabênkumrêx jabej ikam no tyn kumex, ane.

27 Ne kam on me par djwýnhmã kabên ne kum,

—Amrê Djuão krão aprôt, ane.

28 Nhyam arým mebê ijê djà'ýr tēn wadjàn arým Djuão mut krãtan kam arým ngôn purortikam krã djà. Ne kam kurerermã o tēn o bôx ne arým kum kungã. Nhyam arým nãmã kungã.

29 Nhyam kam Djuãookôt ba djwýnh ar arênh man arým 'ýr tē. 'Ýr tēn 'ýr bôx ne kam arým Djuão nhĩ mýn o tēn arým kēnkrekam adjà. Be, me kute Djuão bîn'ã ujarênh ne ja.

*Kute mebê 5.000o djuw mex.*

*Mat 14.13-21; Ruk 9.10-17; Dju r 6.1-14*

30 Ne kam Jeju kute ar anorja ne arým apýnh krĩkôt tē:n kam arým akubyn Jeju'ýr tēn 'ýr bôx ne 'ã akuprô. Ne kam kum amijã ajarê. Kute mýjja nhipêx kunĩ'ã kum ajarê. Kute memã kukràdjà jarênh kunĩja kum 'ã ajarê. 31 Nhyam me krãptĩ: Jeju ar'ã aben japanho dja. Ar 'ã aben japanho dja nhyam ar te ò kwý krēn kadjy amijo ane. Nhyam kam Jeju arkum,

—Gwaj on arwãmã mebê tēn kam bôx ne bakôkam kôto nhý, ane.

32 Nhyam kam ar ate arwãkam ýr kadjy kâkam nhýn arým nox ne. 33 Nhyam me krãptĩ ar mörkôt amim nokre pumün arým ar ibej prôt ne. Krĩ kunĩ kurüm ne me pykakôt ar ibej prôt ne. Ibej prôt ne arým akàx nhikjêbê ar kukãm akuprô. 34 Nhyam kam ar kà dji nhyam Jeju wabi. Wabin arým me krãptĩ me:xja pumũ. Ne kam amim,

—E kum, nãm me kute mryo ba djwýnh kêtumrêx mrykĩ'ãtomti krãptĩ ta kajgo ba

pyràk, ane. Kam ne arým kum me kaprĩn arým memã kukràdjã krãptĩ jarẽnhmo krax ne. <sup>35</sup> Nãm memã arẽho dja: nhym kam arým 'ã myt ibô. Nhym kam kôt ba djwýnh ar arým 'ýr bôx ne kum,

—Arwã jakam mýjja kêt nhym arým amykry mex ne. <sup>36</sup> Me ano gè me amũ apýnh kikremã mõn amũ apýnh krĩmã mõ. Dja me amim õ kwý krẽn dja jamý, ane. <sup>37</sup> Nhym arkum,

—Ar ga dja gar memã mýjja ngã gè me kukrẽ, ane.

Nhym ar kum,

—Djãm gwaj baje pi'òk kaprĩ kumexjao djwý jamýnhmã? Denarju kubê 200jao djwý jamýnhmã? Djãm gwaj baje memã òr nhym me kute krẽnãmã? ane. <sup>38</sup> Nhym arkum,

—Mýj ne ar anhõ djwý kute? Tẽn omũ, ane.

Nhym ar arým bu'ã me ku'è kôt tẽn omũ. Ne akubyn 'ýr bôx ne kum,

—Ë, djwý amãnhkrut ne amãnhkrut ne ikjêkêt. Ne tepdjwý amãnhkrut, ane. <sup>39</sup> Nhym kam arkum,

—Ar memã arẽ gè me apýnh bõre ngrãngrãkam krĩ mõ, ane.

Nhym ar arým apýnh me krĩ kadjy memã karõ. <sup>40</sup> Nhym me apýnh me krĩ kadjy me'ã akre. Nhym me kwý kubê 100'ã kabẽn ne krĩ mõ. Nhym me kwý kubê 50'ã kabẽn ne krĩ mõ.

<sup>41</sup> Nhym djwý amãnhkrut ne amãnhkrut ne ikjêkêt jamý. Ne tep amãnhkrutja by. Ne kãjmã o kãkwa jabẽn Metĩndjwýnhmã o amikĩnh jarẽ. Ne kam djwý kokij ne kôt ba djwýnhmã kungã nhym ar memã òro mõ. Ne kôt tepdjwý ã o anen arým me kunĩmã kungã. <sup>42</sup> Nhym kam me kunĩ õ kwý krẽn arým ajne. <sup>43</sup> Nhym kam me arým tepmẽ djwý janhy ngij ne 'ã akre. Nhym arým 'ã akrekam kaxnokai ipubê 12 ne 'ã kãtãm. <sup>44</sup> Be, me my kute djwý krẽn'ã akrekam kubê 5.000. Ne ijukri me niremẽ me prĩre'ã akre kêt.

*Ngô'ã tẽn.*

*Mat 14.22-33; Dju r 6.15-21*

<sup>45</sup> Nhym kam Jeju urokam kôt ba djwýnhmã kum,

—Aje, on ar mõn kàkam nhýn ikukãm akàx nhikjêmã rên krĩbê Bexadamã tẽn. Ba me ano gè me on mã mõ, ane.

<sup>46</sup> Ne kam me krãptĩ'ýr tẽn memã kum,

—Aje, on me ajmã. Ba on, ane. Ne kam arým Metĩndjwýnhmã kabẽn kadjy krãnh'ã tẽn wabi.

<sup>47</sup> Nhym kam ar'ã akamãt nhym ar arým kàkam ngò nhipòkri mõ nhym Jeju ate atýxã dja. <sup>48</sup> Nhym kam ar kutã arým kòk djábêr týt. Àbêr týt nhym ar kute kutã ngò rẽn kurêje àpênh raxo nhý. Àpênh ra:x nhym arým ar omũ. Ne òkrên'ãnh kãr pydjikam arým arkôt tẽn. Ngô'ã arkôt tẽn. Tẽn kam bit ar'ãnh tẽnãmã. <sup>49</sup> Nhym ar arým ngô'ã tẽnkôt omũn abenmã kum,

—Ota, amrẽ me karõ'õ mõ. Ar anen amra.

<sup>50</sup> Ar kunĩ omũn arým madjã kreti. Nhym adjynkêt nhym arým arkum,

—E kum, ba ne ba wãm tẽn. On ar akĩnh ne atĩn prãm kêt, ane.

<sup>51</sup> Ne arým arkôt kàkam nhý. Kàkam nhý nhym arým kòk djábêr anhikrẽ. Nhym ar òkre kadjwýnhbê amikabẽn kudjan te kute mýjja marmã kam no tyn nhý. <sup>52</sup> Be, amũja'ã ne Jeju te me krãptĩ:mã djwý ngã nhym ar kute kum kator kêt. Kubê Metĩndjwýnh Krajamã kator kêt. Nhym kam ar te kute marmã kam no tyn nhý. Ar amakkre kêt kam.

<sup>53</sup> Ne kàkam ngô'ã mõn kam ar arým pykabê Djenekam akàx nhikjêmã bôx ne kã dji. <sup>54</sup> Nhym kam ar wabi nhym me arým amim Jeju nokre pumũ. <sup>55</sup> Ne kam me bu'ã pykawã kunĩkôt prõt ne arẽ. Nhym me arým kute memã Jeju bôx djã jarẽnhja'ýr meo bôxmõ krax ne. Me punu nhikwã djãkam ikwã rã'ãja ne me Jeju'ýr meo prõt ne meo bôx. <sup>56</sup> Ne kam mã kikre kabem me punu jadjuw. Krĩ kryrekam nãr krĩraxkam nãr arwãkam Jeju ku'è djã kunĩkôt mã kikre kabem me punu jadjuw. Nhym me mã Jeju tẽnkôt kum amijo a'uw ne kum,

—Ba gop akã japkredit kupê. Ba gop akã japkredit kupênh, ane. Ne me kute kupênh kunĩkôt arým mex ne.

## 7

*Tu mýjja krẽn'ã ujarẽn.*  
*Mat 15.1-9*

<sup>1</sup> Ne kam mebê pardjêumê Môjdjê kukràdjà mar djwýnh kwý krĩrãxbê Djeruxarê kurũm mōn Jeju'ã akuprō.

<sup>2</sup> Nhyim Jejukôt ba djwýnh kwý tu ikra pōnh kêt kam ō kwý krê nhyim me arým ar omũ. Ne ar'ã kabēn ne Jejumã kum,

—Mýkam ne akôt ba djwýnh me bakukãmãkjê kukràdjà kupa'ã ikra punu rã'ã tu àkur ba? Dja me o ane nhyim Metĩndjwýnh arým memã axwe jarê, ane.

<sup>3</sup> Bir, mebê pardjêumê mebê idjaer kunĩ ne me mã me kukãmãkjê kukràdjà'ã no tỳx ne kam arĩk abenmã kum,

—Me kute prĩne aminhikra pōnhkambit dja me aku. Kambit dja Metĩndjwýnh memã axwe kêt jarê, ane. <sup>4</sup> Ne me me ō djwý jamýnh djã kurũm ban bōx. Ne kam kute ngōo amiku'ōnhkambit aku. Be, apýnh me kukãmãkjê kukràdjà kajgo kute ja pyrãk ne krãptĩ. Nhyim me 'ã no tỳx ne mã apýnh mýjja ku'ō. Ngōnhkrãmê ngyo ngōnhmê ngōnh tykmê ne me mã ku'ōn arĩk amim,

—Dja ba o ane nhyim Metĩndjwýnh imã imex jarê, ane.

<sup>5</sup> Kamã ne mebê pardjêumê Môjdjê kukràdjà mar djwýnhmê Jejumã kum,

—Mýkam ne akôt ba djwýnh me bakukãmãkjê kukràdjà kupa'ã ikra punu rã'ã àkur ba? ane.

<sup>6</sup> Nhyim memã kum,

—Me ga ne ga me amijo ajêx ne ar amijo Metĩndjwýnh mar mexo aba. Mrãmri ne Idjaij Metĩndjwýnh kukwakam me ajã pi'òk no'òkkumrêx. Nãm me bakukãmãremã kum, “Metĩndjwýnh ne me amã,

‘Be, me ja ne me arĩk 'êx ne ajkwa kajgokam imã imex jarēho ban jãm ate ibê krãn ban

<sup>7</sup> imã irax jarēnh kajgoo ban kam ta kukràdjào ikukràdjàn memã arēnh ba. Ne kam ta kukràdjà'ã memã kum, Metĩndjwýnh kukràdjà, anhýro ba.’

Nãm ã Metĩndjwýnh me amã ane.”

Nãm ã Idjaij me ajã ane. Ga me akamin-grãnyre arým akabēn kajgoo Metĩndjwýnh kukràdjàn memã arēnh ba. Mrãmri ne me ajã arēnhkumrêx. <sup>8</sup> Be, Metĩndjwýnh ne me kute katàt amijo ba'ã memã karō ga me kam kubê amijo akêxo aba. Ne kam mã me akukãmãkjê kukràdjà'ã ano tỳx ne ar o

aba. Ne kam ngyo ngōnhmê ngōnhkrã ku'ō. Apýnh me akukràdjà kajgo kute ja pyrãk krãptĩ ga me 'ã ano tỳx ne ar o aba. Ne kam arĩk 'ã abenmã kum, “Dja Metĩndjwýnh kôt imã ijaxwe kêt jarê.” <sup>9</sup> Nãm ã Jeju memã ane.

Ne kam ajte memã kum,

—Be, Metĩndjwýnh kute katàt amijo aba'ã me amã karō ga me arým kabēn ma. Djãm mrãmri Metĩndjwýnh kukràdjà kôt ne ga me akukãmãkjê kukràdjà jarê? Kati. Atemã. Atemã ne ga me akukãmãkjê kukràdjà ja'ã ano tỳx ne Metĩndjwýnh kukràdjà mar kêt ne arým o abikēho aba. Djãm kam me ano mex got? <sup>10</sup> Ba me amã arê ga me ama. Môjdjê ne Metĩndjwýnh kukwakam me bakukãmãremã karōn memã kukràdjà jarēn memã kum,

“Me amã abãmmê anã jabēn ar kabēn ma”, ane.

Ne ajte memã kum,

“Me'ō arým bãm'ã nàr nã'ã, ‘Gê Metĩndjwýnh o ajkê’, anhýr jabej gê me tu kubĩ”, ane.

Me kum bãmmê nã ar abēmã ne Metĩndjwýnh ã me bakukãmãremã ane.

<sup>11</sup> Nhyim be, djãm me ga ne ga me amã abãmmê anã jabê? Kati. Ga me akukràdjà kôt arĩk memã kum, “Me ajō godja anã nàr abãm mýjja'ã ajwýr ga aje kubê anhō mýjja nê prãm jabej. Ne kum, ‘Be, ba te ije amã òrmã. Aje mýjja 'ã ijwýr ba arým o Metĩndjwýnh nhō mýjja. Kam ba te ije amã òrmã’, ane. Dja ga me ã kum anen arým kubê nê nhyim kam arým pijàm ne akubyn 'ã ajwýr kêt”, ane. <sup>12</sup> Ga me aje ã memã 'ã karōo anhýrkam arým me nãmê bãmbê òdjý'ã memã adjàpnēnh aba. <sup>13</sup> Me kum ar abê kêt'ã memã adjàpnēnh ba. Metĩndjwýnh te memã kum,

“Me amã abãmmê anã jabēn ar kabēn ma”, ane

ga me arým Metĩndjwýnh kabēno me kukràdjà kajgon akukràdjào arým nãmê bãmbê òdjý'ã memã adjàpnēnh ba. Aje Metĩndjwýnh kukràdjào me kukràdjà kajgo ne ajte kupa'ã memã akukràdjà punu ja jarê. Nãm ã Jeju memã ane.

<sup>14</sup> Ne kam ajte amiwýr me kunĩ 'uw ne memã kum,

—Ë, dja ga me akunĩ imaro nhýn ikabēn markumrêx. <sup>15</sup> Me kute apýnh mýjja'ã

memã kum, “Ja dja ga ãm omũ. Dja ga krĕn arÿm ajaxwe”, anhÿro ba. Nhym be, Metĭndjwÿnh, djã ne me mÿjja 'õ krĕ nhym arÿm kum, “Ja ne ga krĕn arÿm ajaxwe”, ane? Kati. Me kabĕn punukam ne memã axwe jarĕ. Me ãkĭnhĭkam ne memã arĕ. Me ari prõ, mjĕn kupa'ã kurĕ bakam ne memã arĕ. Me 'ĕxnhĭkam ne memã arĕ. Axwe'õkambit ne Metĭndjwÿnh memã axwe jarĕ. <sup>16</sup> Gop me ajamak mex jabej tu amim ikabĕn markumrĕx. Nãm ã Jeju memã ane.

<sup>17</sup> Ne kam arÿm mebĕ kikremã wadjã. Nhym kôt ba djwÿnh arÿm kukij ne kum,

—Nã gãm ar imã, “Djã ne me mÿjja 'õ krĕ nhym Metĭndjwÿnh kum, ‘Ja ne ga krĕn arÿm ajaxwe’, ane? Kati”, ane. Tãm ne ga arĕ nhym ar ibĕ bipdjur rã'ã ne, ane.

<sup>18</sup> Nhym kam arkum,

—Je tô djãm ar gadjwÿ ajamakre kĕt? Be, mrãmri ne me kute mÿjja'õ krĕnkôt Metĭndjwÿnh memã axwe jarĕnh kĕt. Djãm ar aje ja mar kĕt? <sup>19</sup> Be, aparmã ne mÿjja mrãn me tikkremãbit wangij. Mÿjja'õ kurja ne me kute amim mÿjja'ã karõ djãkam ngjĕx kĕtkumrĕx. Me tikkremãbit ne wangij ne kam atykmã arÿm apõx. Me kute amim mÿjja'ã karõ djãmã ngjĕx kĕtkam Metĭndjwÿnh kute kôt memã axwe jarĕnh prãm kĕt, ane. Jeju kute ã arkum anhÿro arÿm me õ mÿjja krĕnja kunĩ mex jarĕ.

<sup>20</sup> Ne kam ajte arkum,

—Me kurũm me kabĕn punu apõx ne me ãpĕnh punukam ne Metĭndjwÿnh memã axwe jarĕ. <sup>21</sup> Me kadjwÿnhbĕ, me amim mÿjja'ã karõ djãkam ne me amim axwe'ã karõ nhym arÿm me kurũm apõx. Me kute amim axwe'ã karõkam ne me kute me prõ puro nãr me mjĕn puroo ãkĭnh ne ro'ã ikwãja'ã amim karõ.

Ne prõ djwÿnh nãr mjĕn djwÿnh kupa'ã kurĕ'ã amim karõ.

Ne kute me par'ã amim karõ.

<sup>22</sup> Ne kute mebĕ mÿjjao ãkĭnh'ã amim karõ.

Ne kute mÿjjao atom rũnh'ã amim karõ.

Ne kute meo bikĕnh'ã amim karõ.

Ne memã 'ĕx ne kute me noo biknor'ã amim karõ.

Ne kurĕ ba'ã amim karõ.

Ne te ta kute me urãk prãmje ngryk.

Ne me'ã kabĕn punu'ã amim karõ.

Ne amijo àmrati.

Ne bĕn kati.

Me kute amim axwe'ã karõ ne ja. <sup>23</sup> Me axweja kunĩ ne me kurũm apõx. Nhym kam kôt Metĭndjwÿnh memã axwe jarĕ. Nãm ã Jeju kôt ba djwÿnh arkum ane.

*Me'õ nire bajtem kute tu amim kamnhĭxkumrĕx.*

*Mat 15.21-28*

<sup>24</sup> Ne kam arÿm mebĕ tĕ. Tĕ:n kam krĭraxbĕ Xirumĕ krĭraxbĕ Xidõ kuri pykaja'ÿr bõx. Ne kam arÿm kikre'õmã wadjãnh nhÿ. Ne bit kute me'õmã amijo amirĭt kĕtmã. Ne kam te kute mebĕ amijo bipdjurmã. <sup>25</sup> Nhym me'õ nire arÿm arĕnh ma. Kubĕ ne me bajtembĕ kregu'õ. Pykabĕ Xirij Penixijkam ne rwÿk djã. Me karõ punu ne kra prĭtio ba. Nãm arĕnh man arÿm 'ÿr tĕn parbĕ ibõn nhÿ. <sup>26</sup> Ne arÿm Jejumã krao a'uw ne kum,

—Amrĕ tĕn me karõ punu kute ikra prĭtio baja jano gĕ kum ire, ane.

<sup>27</sup> Bir, Jeju ne jakam me bajtemo mex prãm kĕt. Nãm kute õ mebĕ idjaerbit kumrĕx o mexo bamã. 'Ã kute kum ujarĕnh nhym kôt kute marmã ne õ mebĕ idjaer'ã me prĭre jakren kum,

—Gĕ me prĭre kumrĕx djwÿo amityxmã. Nok ba ren me prĭre nhõ djwÿ rop kraremã kurĕ nhym ren kam punure, ane. Djãm mrãmri ne djwÿ'ã ajarĕ? Kati. Kute meo mex'ã ne djwÿ jakren kum 'ã ajarĕ. Nãm,

—Nok ba ren me prĭre nhõ djwÿ rop kraremã kurĕ nhym ren kam arÿm punure, ane.

<sup>28</sup> Nhym nija arÿm amim,

—Ijã ne rop krare jarĕ, anen arÿm kum,

—Tukwa, mrãmri Bĕnjadjwÿr djwÿnh. Kôt ne ga arĕ. Nhym be, godja wãnh pĭponh krakri djwÿ jaũm rôrõk. Aũmbit dja rop krare arÿm kukrĕ. Kam gop badjwÿ ibĕ rop krare pyrãk tu imã ikrao mex, ane.

<sup>29</sup> Nhym kôt kum,

—Be, aje imã akabĕn wã jarĕnhkam adjumar mex ne tĕ. Arÿm ne me karõ punu akramã ire, ane.

<sup>30</sup> Nhym kam arÿm ũrkwãmã akĕx ne 'ÿr bõx. Nhym wÿnhram me arÿm me ikwã djãkam kra prĭti dji nhym nõ. Me karõ punu arÿm kum ire nhym arek nõ nhym arÿm omũ.

*Kute me'ô jamakkre kêt ne kabên tô mex.*

<sup>31</sup> Nhyam kam krĩraxbê Xirumê Xidökuri pykaja kurũm tẽ. Tẽ:n kam amũ pyka nhidjibê Krĩraxbê 10jakôt tẽ. Ne tẽ:n kam arým imôtibê Garrêja'yr bõx. <sup>32</sup> Nhyam wãnh me'ô jamakkre kêt ne kabên tôja. Nhyam me arým 'yr o bõx ne kum, “Gop 'ã anhikra dji”, ane.

<sup>33</sup> Nhyam ate kute o ãm kadjy amũ me krãptĩ bê o tẽ. Ne kam aktã amakkremã aminhikra'i jadjàn aptôn ôtodywý kupê. <sup>34</sup> Ne kàjkwa jabên kum kaprĩkam arým amityk djã mẽ. Ne kum, “Epata”, ane. Nãm ren me bakabênkam kum, “On ajamakkre kajrer”, ane. <sup>35</sup> Nãm kum ane nhyam arým amakkre kajrer ne kabên mex ne. Nhyam kam akubyn me'yr o bõx.

<sup>36</sup> Ne memã 'ã karõn memã kum, “Gora ipudju”, ane. Be, nãm te mã: memã anhỹro ba nhyam me ate mã: pyka kunĩkôt abenmã arênho ba. <sup>37</sup> Nãm me'õo mex nhyam me te kute marmã kam no tyn ku'ê ne abenmã kum,

—Nãm apỹnh me kanê djãri me kunõ mexkumrêx. Nãm me umar kêtõ mex nhyam arým akubyn amak mex ne. Nãm me kabên kêtodywýo mex nhyam arým akubyn kabên mex ne, ane.

## 8

*Kute mebê 4.000o djuw mex.*

*Mat 15.32-39*

<sup>1</sup> Nhyam kam me krãptĩ: ajte Jeju'ã akuprõn 'ã akuprõn me'ã õ kwý krên djã kêt. Nhyam kam arým amiwýr kôt ba djwýnh ar ku'uw nhyam ar bõx nhyam arkum,

<sup>2</sup> —Imã me krãptĩ:ja kaprĩ. Me iro'ã krĩ'ã arým akati amãnhkrut ne ikjêkêt apêx. Ne kam arým me õ mýjja kêt. <sup>3</sup> Nok ba ren me kum prãmka ren amũ me ũrkwãmã me ano nhyam me ren pry konenh ren rerekre ne. Ren me rerekre nhyam ren me tyk djã me kupa. Djãm jãnh got. Onĩj me ũrkwã. Nãm ã Jeju arkum ane.

<sup>4</sup> Nhyam kôt ba djwýnh ar kum,

—Kapôt kukrit jakam ne gwaj te me krãptĩ:ja kadjy djwý kumex prãmje. Mýj got gwaj me kadjy nê? ane.

<sup>5</sup> Nhyam Jeju arkum,

—Mýj ne ar anhõ djwý kute? ane.

Nhyam ar kum, “Djwýbê 7”, ane.

<sup>6</sup> Nhyam kam me krãptĩmã kum,

—Pykabê dja ga me nhỹ, ane. Nhyam kam me arým nhỹ. Nhyam kam arým djwýbê 7 jamýn o Metĩndjwýnhmã amikĩnh jarê. Ne kam kokij ne mã kôt ba djwýnh arkum kungã nhyam ar mã me krãptĩmã adjuw. Nãm ar memã adjuwýro mõn kam arým adjuwýr pa.

<sup>7</sup> Ne kam ar õ tepprãre ngrêre nhyam o Metĩndjwýnhmã amikĩnh jarê. Ne kam arkum,

—Dja gar memã jadjwý jadjwý, ane.

<sup>8</sup> Nhyam kam ar memã adjuwýro mõn adjuwýr pa. Nhyam kam me arým kukrên arým ajne. Nhyam kam me arým aũm ngij ne 'ã akre nhyam kaxnokai ipubê 7 'ã kãtãm. <sup>9</sup> Be, me my kubê 4.000 ne õ kwý krê.

Nhyam kam memã kum, “Aje, on me ajmã”, ane. <sup>10</sup> Ne on kôt ba djwýnhmẽ ro'ã kãmã wadjàn nhỹ. Nhyam ar arým nox ne rê:n kam arým pykabê Tamanu'ãnh kã djin wabi.

*Kute kàjkwa kurũm mýjja'õ nhipêxmã ne me kum 'ã à'wýr.*

*Mat 16.1-4*

<sup>11</sup> Nhyam mebê pardjêumẽ mebê xadjudjêumẽ Jeju'yr bõx ne kukij ne mrãmri kubê Metĩndjwýnh Kra ne kute mýjja pumũnh kêt'õ nhipêx jabej 'ã kum apnên kum,

—Goja kàjkwa kurũm mýjja pumũnh kêt'õ nhipêx bar omũn kôt ama, ane.

<sup>12</sup> Nhyam amikadjwýnhbê tyk djã mên memã kum,

—Je tô mýkam ne ga me akamingrãnyre mýjja'ã ijuw? Ije me amã mýjja pumũnh kêt'õ nhipêx ga me aje omũnh prãm kêtumrêx. Mrãmri ne ba me amã ikabênkumrêx, ane. <sup>13</sup> Ne kam arým mebê akêx ne tẽn ajte kãmã wadjã. Wadjàn akãx nhikjêmã rêr kadjy arým nox ne.

<sup>14</sup> Nhyam kam djwý ar kumãnhkutã nhyam kôt ba djwýnh kute byrmãn arým o amak kêt kati. Nhyam wãnh kãkam djwý pydjibit nõ. <sup>15</sup> Nhyam kam Jeju me kute me kukrãdjã kajgo mar kêt kadjy ne kôt kute ar amijo ba kêt kadjy arkum kabên ne arkum,

—Ga, me kute djwý nhigot djã djwý djômka kapĩnja pumũ. Nhyam arým djwý

tÿx me:x ne. Ar gadjwÿ dja gar me kukràdjà man kôt ar amijo aban arÿm ajaxwe me:x ne. Mebê pardjêu kukràdjà nàr Erodji kukràdjà dja gar aman kôt ar amijo aban arÿm ajaxwe me:x ne. Ar amijã ano tÿx ne me kukràdjà mar kêt ne kôt ar amijo aba kêt, ane.

<sup>16</sup> Nhyam kam ar ari 'ã aben kukij. Ne kam arÿk abenmã kum,

—Gwaj baje djwÿ byr kêt kam ne ã ar imã ane, ane.

<sup>17</sup> Be, Jeju kute me kukràdjà kajgo'ã djwÿ nhigot djà jakre nhyam ar kute mar kêt. Nhyam kam arÿm ar kabên man arkum,

—Mÿkam ne gar abenmã, “Gwaj baje djwÿ byr kêt kam ne ã ar imã ane”, ane? Djãm kraxje ar aje omũnh kêt rã'ã? Djãm kraxje ar aje mÿjja mar kêt rã'ã? Mÿj'ã ikabên kute amijakre ar aje mar kêt rã'ã? Djãm ar ajamakreja kêt? <sup>18</sup> Jãm ne gar anon omũnh kêt ne. Jãm ne gar ajamak ne mar kêt ne. Be, ije djwÿ ngrireo me krãptiõ djuw mexja djã ne gar arÿm o ajamak kêt kati? <sup>19</sup> Akubyn amijo tẽn ije mebê 5.000mã djwÿ kubê 5 kokjêr'ÿr amijo bõx. Ar aje djwÿ janhyo atomkam mÿj ne kam kaxnokai ipu kute? ane.

Nhyam ar Jejumã kum, “Kaxnokai ipubê 12”, ane.

<sup>20</sup> Nhyam ajte arkum,

—Ajte akubyn amijo tẽn ije mebê 4.000 kadjy djwÿbê 7djwÿ kokjêr'ÿr amijo bõx. Ar aje kam djwÿ jaũmo atomkam mÿj ne kam kaxnokai ipu kute? ane.

Nhyam ar kum, “Kaxnokai ipu kubê 7”, ane.

<sup>21</sup> Nhyam kam arkum,

—Djãm djwÿ'ã ne ba ar amã arê? Djãm 'ã ne ba ar amã, “Ari amijã ano tÿx”, ane? Kati. Djwÿ'ã ne ba ije ar amã ja jarênh kêt. Mÿkam ne gar aje ja mar kêt rã'ã? ane.

*Kute me'õ no rão mex.*

<sup>22</sup> Ne kam ar arÿm krÿrãxbê Bexadamã tẽn bõx. Nhyam kam me Jeju'ÿr me'õ no rão mõn o bõx ne kum, “Gop kupê gê mex”, ane.

<sup>23</sup> Nhyam arÿm me'õ no rã nhikra 'amÿn krÿ kurũm o katon atyk mã o tẽ. Ne kam no kutõn 'ã ikra djin kukij ne kum,

—Djãm arÿm ga mÿjja'õ pumũ? ane.

<sup>24</sup> Nhyam kãmã krãn kum,

—Arÿm ne me kute pÿ pyrãk ne mrã ba omũ, ane.

<sup>25</sup> Nhyam ajte no'ã ikra djin kãmã kum krã nhyam arÿm no mex. No mex ne arÿm kute me kunÿ pumũnh mexkumrêx.

<sup>26</sup> Nhyam kum,

—Aj mã. Dja ga katãt anhÿrkwãmã tẽ. Kwãrÿk wãnh krÿmã atẽm kêt. Ne kwãrÿk wãnh krÿkam me'õmã ijarênh kêt, ane.

*Pedru kute Jejubê Krituo amirÿt.*

*Mat 16.13-20; Ruk 9.18-21*

<sup>27</sup> Be, bënjadjwÿr rãxbê Piripi nhõ krÿrãxbê Xedjare bu'ã ne apÿnh me õ krÿ djari. 'ÿr ne Jejumê kôt ba djwÿnhmẽ ar mõ. 'ÿr mõ nhyam Jeju arÿm arkum,

—Ë, ar imã ijã me ujarênh jarê ba kuma, ane.

<sup>28</sup> Nhyam ar arÿm kum,

—Nãm me kwÿ ajã, “Ngõmã me angjênh djwÿnhbê Djuãõ”, ane. Nhyam me kwÿ ajã, “Me bakukãmãre Erij. Metÿndjwÿnh kukwakam ujarênh djwÿnh rãxbê Erij”, ane. Nhyam me kwÿ ajã, “Me bakukãmãrekam Metÿndjwÿnh kukwakam ujarênh djwÿnh ar 'õ.” Nãm me ã abenmã ajã ane. Nãm ã ar Jejumã ane.

<sup>29</sup> Nhyam ajte arkum,

—Ne ar gadjwÿ mã ne gar imar on? Mÿj'ã ne gar ijakre? ane.

Nhyam Pedru kum,

—Abê ne Kritu. Abê me inhõ Bënjadjwÿrbê kumkati, Metÿndjwÿnh tÿn ne ar bakumrêxja Kra. Amrêbê ne me bakukãmãremã ajarê. Aje me ipytãr ne aje ar me ijo abamã ajarê. Amrêbê me imã ajarê ba me akam amako iba nhyam arÿm Metÿndjwÿnh ajano ga arÿm bõx, ane.

<sup>30</sup> Nhyam arkum,

—Kwãrÿk wãnh me'õmã ja jarênh kêt, ane.

*Kute amikukãm me kute bÿn'ã amijarênh.*

*Mat 16.21-28; Ruk 9.22-27*

<sup>31</sup> Ne kam amijã arkum ajarênh arkum,

—Ba ije amijo inhÿ ne ar awÿr irwÿkja ije mrãmri itokry kumex mar kadjy ne Metÿndjwÿnh ijano ba tẽ. Dja me rũnh ikanga. Mebêngêtmẽ me kadjy Metÿndjwÿnh mar djwÿnh nhõ bënjadjwÿrmẽ Mõjdjê kukràdjà mar djwÿnhmẽ dja me memã ikanga nhyam me arÿm ibÿ. Nhyam ijã akatin akatin akati ba

akubyn itîn ne, ane. <sup>32</sup> Nãm Jeju arkum ja jarêno amirîtkumrêx. NhyM Pedru arÿm Ar kubê o tẽn ar kàxã nêje kum bẽn tÿxmo krax.

<sup>33</sup> NhyM kam arÿm kôt ba djwÿnh'ÿr akêx ne ar omÿn Pedrumã bẽn tÿx ne kum,

—Arÿm akabẽn kute Xatanaj kabẽn pyræk. Amÿ imã akre rax ne dja. Ga Metîndjwÿnh kôt adjumar kêt. Me kâtàm kôt ari adjumar, ane.

<sup>34</sup> Ne kam me krãptî:mê kôt ba djwÿnhmê amiwÿr me ku'uw. NhyM me arÿm 'ÿr bôx nhyM memã kum,

—Gêdja ga me ajô mã ikôt abikamênh prãm jabej kwãrîk wãnh amidjwÿnhbit mar kêt ne mã amim, “Djãm ba ije amijo kînhmã? Kati”, ane. Dja ba ityk kadjy inhô pîte'y mÿn itokry:. Dja ga ijã amijakren aje anhô pîte'y mÿnh mãn prãbê amã atokry pyma kêt ne amã ijabê rã'ã ne mã ikôt ajkamê. <sup>35</sup> Me kute amidjwÿnhbit mar ne me kum tokry pyma. Me tãm gêdja me tyn kam ijukri me biknor tokry djækam tẽ. NhyM be, me kum ijabêkumrêx ne kute amidjwÿnhbit mar kêt nhyM me kute me bîn jabej me tãm gêdja me amiptàn ar tîn ne ba rã'ã: rã'ã ne. <sup>36</sup> NhyM ren me'ô pykabê mÿjja mexja kunî, nêkrêx kunîja ari o atom ne o ban kam ren ty, je mã dja kam nê? Kati, nãm ren ty nhyM ren ô nêkrêxja ren wãnh kumex. <sup>37</sup> NhyM mÿj pãnh ne ne ren Metîndjwÿnhmã arê nhyM ren akubyn o tîn nhyM ren kum amijo pãnh ne? Arkati. Dja ga te kum pãnh jarê nhyM akubyn ajo tîn prãm kêtumrêx ne.

<sup>38</sup> Be, me kamingrãny ja ne me axwe:kumrêx ne ari mÿjjakôt ibê amijo akêxo ba. Ga, me kwÿ kum prô djwÿnh kînh kêt ne mebê prôo àkînho baja pumÿ. Me jadjwÿ ne me kum ikînh kêt ne ate ibê jãm krã. Kam godja me'ô ikam pijàm ne ikukràdjækam pijàm jabej ba badjwÿ gêdja ba amipãnh kam ipijàm. Ba ije amijo inhî ne me awÿr irwÿk dja ba Ibãm jadjênhmê umao ipyma:n ar awÿr bôx. Kadjy mrãnh djwÿnh pyma:mê ro'ã ar awÿr bôx. Ibê kumkatio bôx nhyM tãmja ikam pijàmja ba badjwÿ arÿm amipãnh kam ipijàm ne. Nãm ã Jeju me krãptîmã ane.

## 9

*Jeju jadjênh'ã ujarênh.*  
*Mat 17.1-13; Ruk 9.28-36*

<sup>1</sup> Ne kam arkum,

—Ba ar amã arê. Ibãm dja ijã bẽnjadjwÿr rax mẽ. Dja ba bôx ne ipymao me apytàn ar me ajo iba. Dja gar adjãmja akwÿ atîni iraxkôt ipumÿ, me akadjy ibẽnjadjwÿr rax ne ipymakôt ipumÿ. Mrãmri ne ba ikabênja, ane.

<sup>2</sup> NhyM kam akati amãnhkrut ne amãnhkrut ne amãnhkrut ar'ã apêx nhyM Jeju arÿm krãnh prêkti'ã wabi. Nãm Pedrumê Xijagumê Djuão ar aprôn aro wabin ate ar ro'ã me kàxã dja. Ne kam arÿm ar kuka kôn timerã aminhipêx. <sup>3</sup> Ne ô kubêkà arÿm adjênh ne aka: kute kakÿm arngrokam aka pyræk. Ren kubêkà pôn djwÿnh'ô kubêkà'ô pôn ren kubêkà jakao kute Jeju kà jaka tẽp kêtumrêx. <sup>4</sup> NhyM kam me kukãmãrebê Erijmê Môjdjê arÿm arkum amijo amirî ne. Nãm ar Jejumê abenmã kabêno dja nhyM ar ar omÿ.

<sup>5</sup> NhyM Pedru kum,

—Be, ujarênh djwÿnh, jakam ne gwaj arÿm bakînhkumrêx. Dja bar ar amã kikre'ã irôx nhipêx. Dja bar amã 'ô nhipêx, Môjdjê mã 'ô nhipêx, Erijmã 'ô nhipêx, ane. <sup>6</sup> Ar madjã kretikam ne Pedru umaje Jejumã kabên kajgo jarê.

<sup>7</sup> NhyM kam kakrã'ô arÿm amirî ne ar kuno. Ar kuno nhyM Metîndjwÿnh arÿm kakrã kurÿm kabên nhyM ar arÿm kuma. NhyM arkum,

—Ikra ne wã. Imã abê:. Tãmwã dja gar kabên man kôt ar amijo aba, ane.

<sup>8</sup> NhyM ar te ar abej amibu'ã rî. NhyM Jeju pydjibit dja nhyM ar omÿ. Arÿm ne Môjdjê ar ar aêrbê mã tẽn arÿm amirî kêt ne.

<sup>9</sup> NhyM kam ar arÿm krãnh prêkti'ã rwÿk tẽ. Rwÿk tẽ nhyM Jeju arÿm ar kute omÿnh'ã arkum karôn arkum,

—Ar aje omÿnhja kwãrîk wãnh jakam me'ômã 'ã adjujarênh kêt. Ba ije amijo inhî ne ibôxja ityk ne akubyn itînkambit dja ga memã 'ã ajarê, ane.

<sup>10</sup> NhyM kam ar arÿm 'ã ujarênh kêt. Ne rwÿk tẽn kam aben kukij ne abenmã kum,

—Jeju kute gwaj bamã, “Ityk ne akubyn itĩn”, anhÿrja. Mÿj'ã ne amijakre? ane.

<sup>11</sup> Ne kam Jejumã kum,

—Mÿkam ne Môjdjê kukràdjà mar djwÿnh memã kum, “Erij kumrêx dja bôx. Nhyim kam totokbê Metĩndjwÿnh bôx ne ar meo ba”? ane. Mÿkam ne me mã memã ja jarê? ane.

<sup>12</sup> Nhyim Jeju arkum,

—Be, gêdja me'õ kute Erij pyrãk kumrêx bôx ne akubyn Metĩndjwÿnh'ÿr me kunĩ akêx ne. Meo akêx nhyim me arÿm amim maro ba. Mÿkam ne ba ije amijo inhĩ ne ibôxja badjwÿ amrêbê: me ijã me bakukãmãremã kum,

“Dja arÿm tokry kumex ma nhyim me memã kanga”, ane?

Nãm me ã ijã anen arÿm 'ã pi'òk no'òk ne. Nãm ã Jeju arkum ane.

<sup>13</sup> Ne kam ngômã me angjênh djwÿnhbê Djuão'ã arkum,

—Ba ar amã arê gar ama. Mrãmri, me'õ kute Erij pyrãk ne arÿm bôx. Nhyim kam me arÿm mar kêt ne amikĩnhje o bikênh ba. Amrêbê: me bakukãmãre kute Metĩndjwÿnh kabên'ã pi'òk no'òkkam me kute o anhÿrmã kôt ne me arÿm ã o ane, ane. Nãm krãnh'ã rwÿk tẽmkôt ne Jeju ã arkum ane.

*Kute me karõ punumã àkjêr.*

*Mat 17.14; Ruk 9.37*

<sup>14</sup> Ar rwÿk tẽn kam arÿm kôt ba djwÿnh kwÿ aro rãm ne ja. Ar arkôt krãnh'ã àbir kêtjao rãm ne ja. Nhyim me krãptĩ ar'ã akuprõ. Nhyim Môjdjê kukràdjà mar djwÿnhmê ar aktã kabêno aben japanho dja nhyim Jeju arÿm me omũ. <sup>15</sup> Ne me aêrbê bôx nhyim me kunĩ kam no tyn kumex ne 'ÿr prõt ne kum,

—Djãm arÿm ne ga bôx? Djãm arÿm ne ga bôx? ane.

<sup>16</sup> Nhyim kam abej Môjdjê kukràdjà mar djwÿnh kukij ne memã kum,

—Mÿkam ne ga me akabêno aben japanho dja? ane.

<sup>17</sup> Nhyim kam me krãptĩkôt me'õ ãmja kum,

—Ujarênh djwÿnh, awÿr ne ba bit ikrao itẽmmã. Me karõ punu ne o ba nhyim ibê kabên kêtumrêx. <sup>18</sup> Nhyim apÿnh kute par djari pyka'ã kurê nhyim ajmrõ prõt ne

àpjãnh ne àpnhirêno nõ. Awÿr ne ba bit o itẽmmã ga adjãm kêt. Ba kam tu akôt ba djwÿnh'ÿr o bôx ne arkum,

—Dja gar ano gê kum ire, ane. Nhyim ar te kute kujaêkmã o dja. Nãm ã me'õ Jejumã ane.

<sup>19</sup> Nhyim kam Jeju me'ÿr akêx ne memã kum,

—Je, me akamingrãny aje amim ikamnhĩx kêtumrêx ne ajaxwe. Mÿj dja ijã akati, akamãt kô kute ba me akam arek ar iba? Nã bãm me awÿr bôx ga me ajamakkre kêtumrêx ne prĩne akabêno ikaty. Nã bãm te amiwÿr me akam ama ga me arĩk ar aba, ane. Ne kam bãmjamã kabên ne kum,

—Amrê akrao tẽ, ane.

<sup>20</sup> Nhyim me arÿm 'ÿr o bôx. 'ÿr o bôx nhyim me karõ arÿm Jeju pumũn ajte me'õ kraja bĩ. Kubĩ nhyim arÿm pykabê tÿm ne àpnhirêno nõn ajmrõ prõtõ nõ.

<sup>21</sup> Nhyim Jeju arÿm bãm kukij ne kum,

—Mÿj ne kute bĩn kraxkam 'ã amex kute? ane.

Nhyim kum,

—Prĩrekam ne kum o krax. <sup>22</sup> Nãm te: kute bĩn mexmã ar o ba. Nãm kute kuwymê ngòkam rênh krãptĩ. Aje me karõbê utàr mar jabej utà. Amã ar ikaprĩn utà, ane.

<sup>23</sup> Nhyim Jeju kum,

—Be, Metĩndjwÿnh umaro kute mÿjja kunĩ jakrenh mexi. Me tu amim kamnhĩxkumrêx nhyim arÿm meo mex. Dja ga tu amim kamnhĩxkumrêx nhyim arÿm amã akrao mex, ane.

<sup>24</sup> Nhyim kam bãm no kangô prõtme ro'ã on kàj bê kum,

—Bênjadjwÿr djwÿnh, arÿm ba amim kamnhĩx. Gop ga imã 'ityx jadjà ba gop tu amim kamnhĩxkumrêx, ane.

<sup>25</sup> Nhyim me arÿm itepato prõt ne 'ã bikprõnh dja nhyim Jeju arÿm me omũ. Ne arÿm me karõ punumã bèn tÿx ne kum,

—Me karõ, aje me'õ bôktimã kabên kêtme amakkre kêt jadjàr. Ba ne ba amã ikabên ne. On kum anhiren kwãrĩk wãnh ajte o aba kêtumrêx, ane.

<sup>26</sup> Nhyim arÿm amran bĩno bê mex ne arÿm kurũm kato. Nhyim arÿm kute tyk pyrãk ne nõ. Nhyim me krãptĩ 'ã abenmã kum,

—Arÿm ne akuno. Arÿm ne akuno, ane.



<sup>27</sup> Nhyim Jeju arým ikra 'amýn kàjmã aro tẽ nhyim arým kàjmã dja.

<sup>28</sup> Nhyim Jeju arým tẽn kikremã wadjà. Nhyim me kàxã kôt ba djwýnh ar arým me karõ jabej kukij ne kum,

—Mýkam ne bar te ije me karõ punu kujaêkmã o ane? ane.

<sup>29</sup> Nhyim arkum,

—Bir, me karõ punu kute wã pyrãk ne 'ity:xi. Dja me Metĩndjwýnhmã amijo a'uw ne kum amijajbu. Kambit dja me me karõ wã jano nhyim arým memã ire, ane.

*Amikukãm tyk'ã ujarẽnh.*

*Mat 17.22; Ruk 9.43*

<sup>30-31</sup> Ne kam ar arým me kurũm tẽn amũ pykabê Garrêjakôt tẽ. Nãm mebê amijo bipdjuro tẽ. Jeju kute me kàxã kôt ba djwýnh arkum amijã ujarẽnh prãm. Ne kam mebê amijo bipdjuro tẽ. Tẽn kam arým arkum,

—Ba ije amijo inhĩ ne ibôxja dja me memã ikanga nhyim me arým ibĩ. Nhyim kam dja ityk'ã akati amãnhkrut ne ikjêkêt apêx. Ba kam akubyn itĩn, ane.

*Ar kute amirax jabej Jeju kukjêr.*

*Mat 18.1; Ruk 9.46*

<sup>32</sup> Nhyim ar amim,

—Je tô, mýj'ã ne kabẽn ja jarẽ? ane. Ne kam ar kute kukjêr kêt. Jeju kute arkum kabẽn pymaje ar kute kukjêr kêt.

<sup>33</sup> Ne kam mõi:n kam arým krĩrãxbê Kapanã'yr bõx ne kikremã wadjà. Nhyim kam Jeju arkum,

—Pry'ã ar amõrkôt ne gar aktã akabẽno aben japanho mõi. Mýj'ã ne gar abenmã akabẽn ne? ane.

<sup>34</sup> Nhyim ar arým anihkrê ne. Be, prykôt ne ar amirax mýr jabej abenmã kabẽn mõi. Kam ne Jeju 'ã ar kukij nhyim ar arým pijãm ne anihkrê ne.

<sup>35</sup> Nhyim kam nhýn amiwýr ar ku'uw. Kôt ba djwýnhbê 12ja 'uw ne arkum,

—Gar ajõ araxo kutewa prãm jabej gêdja amijo kajgon me katẽ tẽn kam tu me kunĩmã àpênh ba, ane.

<sup>36</sup> Ne kam arým me prĩre'õ nhikra 'amýn o tẽn ar ipõkri kudja. Ne kam kute o kĩnh kadjy kumýn arkum,

<sup>37</sup> —Ë, ga, me'õ prĩreja pumũ, kàtãm mexja pumũ. Dja me'õ ikukwakam kum

me'õ kute prĩre ja pyrãk kĩnh, kum me'õ kàtãmja kĩnh ne kam arým badjwý kum ikĩnh. Djãm bajbit kum ikĩnhmã? Kati, dja me'õ kum ikĩnh ne kam kum ibãmdjwý kĩnh, ibãm kute ijanorjadjwý kum kĩnh. Nãm ã Jeju arkum ane.

<sup>38</sup> Nhyim Djuão arým kum,

—Ujarẽnh djwýnh, ba amã arẽ. Me'õ gwaj bakôt ba kêt'õ tu me karõ punu kute meo ba'ã anhidji jarẽ. 'Ã anhidji jarẽn me karõmã kum, “Ba Jeju kukwakam amã ikabẽn ne. On kum anhire.” Nãm ã anhyro dja bar arým omũ. Ne kam gwaj bakôt ba kêt kam kum, “Kwãrĩk wãnh”, ane.

<sup>39</sup> Nhyim Jeju arkum,

—Kwãrĩk wãnh kubê adjãptãr kêt. Be, godja me ikukwakam mýjja pumũnh kêt nhipêx, godja me'õ punuo mex, me ja ne me te kute ijã kabẽn punu jarẽnhmã. <sup>40</sup> Be, me kum gwaj bakurê kêtja ne gwaj bajo õbikwa. Kam kwãrĩk wãnh kubê adjãptãr kêt. <sup>41</sup> Ba ne ba ibê Kritu. Gar ikôt abakam godja me'õ ar amã ngõnhkrãkam ngõ nhõr jabej. Ba dja ba mrãmri kum àpênh mexjao pãnhkumrêx. Mrãmri ne ba ar amã arẽnhkumrêx.

<sup>42</sup> Nhyim be, me'õ kute me prĩre pyrãk ne ajbir kute amim imar ny nhyim kam ren ate me'õja axwe'ã kum apnê nhyim ren arým kôt axwe nhyim kam ren me õkre'ã kênpoti nhõ. Kute memã axwe'ã àpnênh djwýnhja nhõkre'ã kên jabatãnh nhõ ne ren ngõ jabatãnhmã kumẽ nhyim ren ngõ kubĩ, ja ne kãjbê tokry. Tokry ngri. Nhyim be kati, Metĩndjwýnh dja prĩne o ajkê nhyim tokry ra:x ne. Nãm ã Jeju arkum ane.

<sup>43</sup> Ga, me kute apýnh amikukràdjão àpênh jaxwe prãmja pumũ. Me kute àpênh jaxwe kangamã ne Jeju mebê uman memã kum,

—Ne gar ren ajaxwe kadjy anihkra nhikjêo mýjja punu kupênh prãm mýj ne gar ren on? Bir, gar ren on krãta. Ne kam ren te anihkra nhikjê kêt ne ren atĩnkam ren akĩnhkumrêx. Metĩndjwýnhkôt atĩn ne ar abakam ren akĩnhkumrêx. Ne ren aktã anihkra rã'ãn ren me biknor tokry djãkam tẽn ren atokry ra:x ne. Kam ne kuwy pôk rã'ã: rã'ãn àtyk kêt kumrêx. <sup>44</sup> Kam kôp kute me kakwýrja tyk kêt nhyim me kute kuwy pôkjadjwý par kêt. <sup>45</sup> Ne gar ren ajaxwe kadjy apar nhikjêo mýjja punu'yr amrãnh

prãm mỳj ne gar ren on? Bir, gar ren on krãta. Ne kam ren te apar nhikjê kêt ne ren atĩnkam ren akĩnhkumrêx. Metĩndjwỳnhkôt atĩn ne ar abakam ren akĩ:nhkumrêx. Ne ren aktã apar rã'ãn ren me biknor tokry djakam tẽn ren atokry ra:x ne. Kam kuwy pòk rã'ã: rã'ãn àtyk kêtumrêx. <sup>46</sup> Kam kòp kute me kakwỳrja tyk kêt nhy m me kute kuwy pòkjadjwỳ par kêt. <sup>47</sup> Ne gar ren ajaxwe kadjy ano nhikjêo aje mỳjja punu pumũnh tỳx prãm mỳj ne gar ren on? Bir, gar ren on kaba. Ne ren kam te ano nhikjê kêt ne ren akĩnhkumrêx. Metĩndjwỳnh kute me utar ne ar me kadjy bẽnjadwỳr ne kute ar meo baja'ỳr abòxkam ren akĩ:nhkumrêx. Ne ren aktã ano rã'ãn ren me biknor tokry djakam kuwykam tẽn ren atokry ra:x ne. <sup>48</sup> Me bakukãmãre ne amrêbê: 'ã memã kum, “Kòp kute me kakwỳrja tyk kêt nhy m me kute kuwy pòkjadjwỳ par kêt.”

Nãm ã Jeju arkum ane. Djãm mrãmri ne ar kute aminhikra, amipar jakarmã? Djãm mrãmri ne ar kute aminoo pòxmã? Kati, ar kute àpênh jaxwe krã'yr ne kangamã ne Jeju 'ã arkum ar kute amibê amikukràdjã jakarmã arê.

<sup>49</sup> Ne kam arkum,

—Be, kuwykam gêdja me kunĩ tokry. Kute mrãmri ne me kute Metĩndjwỳnhmã mry parkam kadjwanhĩ mry kunĩ kangar pyrãk, ane. Dja me ã tokryo tuknĩo ane.

<sup>50</sup> Ne kam ar'ã kadjwanhĩ jakre ne arkum,

—Be, kadjwanhĩ mexkumrêx. Godja kadjwanhĩ ta amikam akry apêx jabej arỳm o mỳjja jakry kadjy punukumrêx ne. On ar aje kadjwanhĩ mex pyrãk ne abenmã akabên mex, ane.

## 10

*Me kute prõ kanga'ã ujarênh.*

*Mat 5.31, 19.1; Ruk 16.18*

<sup>1</sup> Ne kam arỳm krĩrãxbê Kapanakam me jamã kàx. Ne tẽn arỳm ngòbê Djodão nhikjê mã rên arỳm pykabê Djudêja'ỳr bõx. Bõx nhy m kam me krãptĩ: ajte 'ã bikprõnhõ dja. Nhy m kam ajte memã ujarênhõ dja.

<sup>2</sup> Nhy m me bê pardjêu arỳm 'ỳr bõx ne kute we kabên kajgo jabej kukjêrmã ne kum,

—Djãm Metĩndjwỳnh kukràdjã kôt me kute tu prõ kangamã? Nãm me Jeju kute kabên kajgo jarênh kadjy nàrà m ã kum ane.

<sup>3</sup> Nhy m memã kum,

—Be, Mòjdjê ne amrêbê: me bakukãmãremã 'ã karõ. Mỳj ne memã arê? ane.

<sup>4</sup> Nhy m me kum,

—Mòjdjê ne memã kum, “Gê me prõ'ã pi'òk no'òk ne kam kanga”, ane.

<sup>5</sup> Nhy m memã kum,

—Bir, me amakkre kêt kam ne memã prõ kanga jarê. Nhy m djãm adjakamã ne me ã prõo ane? Kati. <sup>6-7</sup> Adjakamã, kute mỳjja kunĩ nhipêxkam ne Metĩndjwỳnh mymê ni ar ipêx ne memã kum,

“Kamã dja me my prõ kadjy arỳm bãmmê nã arkum iren kam arỳm prõbit'ã ngrã ne.

<sup>8</sup> Nhy m kam ar ã abenã tỳm ne kam kute ã typdji pyrãk.”

Nãm ã Metĩndjwỳnh memã ane. Kam, djãm ar ã amãnhkrut rã'ã? Kati, ar kute ã pydji pyrãk. <sup>9</sup> Be ga, Metĩndjwỳnh kute abenã ar mênhja pumũ. Kwãrĩk wãnh me'õ abenbê aro bikjêr kêt. Nãm ã Jeju me bê pardjêumã ane.

<sup>10</sup> Nhy m kam ar akubyn kikrekam tẽn nhỹ. Nhy m kôt ba djwỳnh arỳm Jeju kute memã kabên jarênhja jabej kukij. <sup>11</sup> Nhy m arỳm arkum,

—Gêdja me'õ prõ djwỳnh kangan kam atemã akãxbê me'õmã kabên ne 'ỳr mõn kam arỳm mrãmri krõ'ã o prõn arỳm axwekumrêx, prõkam axwekumrêx.

<sup>12</sup> Nhy m me niredjwỳ gêdja me mjên kanga nhy m kam atemã me'õ akãxbê 'ỳr mõ nhy m kam arỳm mrãmri krõ'ã o mjên ne arỳm axwekumrêx. Nãm ã arkum ane.

*Kum me prĩre kĩnh'ã ujarênh.*

*Mat 19.13; Ruk 18.15*

<sup>13</sup> Nhy m kam ar ja arỳm Jeju'ỳr me prĩreo mõn o bõx. Kute me kupênhmã ne ar 'ỳr meo mõ. Nhy m kôt ba djwỳnh ar arỳm nêje memã bẽn tỳx. <sup>14</sup> Nhy m Jeju arỳm ar omũn arỳm no kà nhàn arkum,

—Kwãrĩk wãnh arek amrê me prĩre iwỳr mõ, ane. Kwãrĩk wãnh gar me bê adjãptar kêt gê me arek amrê mõ. ã me kute amijo anhỹrbit gêdja Metĩndjwỳnh me utàn me kadjy bẽnjadwỳr ne ar meo ba.

15 Ě, me kute me přire pyrāk ne amijo kātāmjabit gédja Metīndjwýnh me utàn me kadjy bēnjadjwýr ne ar meo ba. Be, me přire kute ta amim imarja pumũ. Ā me kute amijo anhýr gédja Metīndjwýnh me utàn me kadjy bēnjadjwýr ne ar meo ba. Mrāmri ne ba me amā katāt arē. Nām ā Jeju arkum ane. <sup>16</sup> Ne kam aben totokmā me přire jamýn me'ā ikra jadjuw ne memā kum,

—Gê Metīndjwýnh ajo djuw mex. Gê Metīndjwýnh ajo djuw mex, ane.

*Me'ō nhō nêkrêx kumex'ā ujarēnh.*

*Mat 19.16; Ruk 18.18; Xim k 6.6; Xij 5.1*

<sup>17</sup> Ne kam arým memā kàx ne ajte prykôt tē. Tē: nhym me'ō arým 'ýr prôt ne arým parbê kōnkrāo nhýn kum,

—Ujarēnh djwýnh, ga ne ga amexkumrêx. Itīn rā'ā rā'āmā mýj gédja ba Metīndjwýnh kadjy nē? ane.

<sup>18</sup> Nhym Jejubê Metīndjwýnh Kra nhym ta kute kôt kum kator kadjy Jeju kum,

—Mýkam ne ga imā imex jarē? Me'ō pykakam mex kêtumrêx. Metīndjwýnh pydjibit mex. <sup>19</sup> Metīndjwýnh kukrādja ne ga arým ama. Me kute katāt amijo ba'ā kute memā karōkôt kukrādja ne ga arým ama. Nām memā kum,

“Kwārīk wānh me par kêt.

Kwārīk wānh mebê prōo adjākīnh kêt.

Kwārīk wānh adjākīnhī kêt.

Kwārīk wānh ajêx ne me kāmex jarēnh kêt.

Kwārīk wānh aje me'ō nhō mýjja o aminhō kadjy kwārīk wānh ajêxnhī kêt.

Me amā abāmmē anā jabên ar kabên ma”, ane.

Ja kunī ne ga arým ama. Nām ā Jeju kum ane.

<sup>20</sup> Nhym kum,

—Nà, ujarēnh djwýnh, arým ne ba ibôktikam ja kunī ma. Ne kam kôt ije ar amijo iba rā'ā:n arým ijabatānh ne, ane.

<sup>21</sup> Nhym Jeju arek omũho djan kam kum kīnhkumrêx ne kum,

—Be, mýjja pydji ne kute akukrà rā'ā. On tēn memā anhō mýjja wā ngràn pānh pi'ók kaprī byn me 'uwťi, me ō mýjja kêtjamā angān o me kīnh. Ne kam amrē iwýr tēn mā ikôt ajkamē. Dja ga ā anen kam arým kākjakam anhō mýjja mex kumex. Ne kam ijā amijakren aje pīte'y mýnh mān pràbê

amā atokry pyma kêt ne amā ijabê rā'ā ne mā ikôt ajkamē.

<sup>22</sup> Jeju ā kum ane nhym arým kam kaprī:re ne. Ne kam akêx ne mā tē. Kaprī:re ne tē. Be, ō nêkrêx ne kume:x. 'Ā maje ne mā kaprīren tē.

<sup>23</sup> Nhym kam Jeju kôt ba djwýnh ar'ýr akêx ne arkum,

—Nêkrêx ne kute me kukrà prāmā. Me ō nêkrêx kumex gédja me te Metīndjwýnh kute amim me utār ne ar meo baja'ýr bôxmā, ane.

<sup>24</sup> Nhym kôt ba djwýnh te kute marmā kam no tyn ku'ê nhym Jeju arým arkum,

—Akmere ar, me ō nêkrêx kanàrrām ar baja ne me te Metīndjwýnh kute amim me utār ne ar meo baja'ýr bôxmā. <sup>25</sup> Ba ar amā arē gar ama. Be ga, mry jabatānhbê kameru te: kute aguja tekrax kremā ngjêxmāja pumũ. Me ō nêkrêx rūnhdjwý kute urāk. Me te Metīndjwýnh kute amim me utār ne ar meo baja'ýr bôxmā nhym nêkrêx utā: ne. Nām Jeju ā arkum ane. <sup>26</sup> Nhym kôt ba djwýnh ja man kam no tyn djan kam kum,

—Je, nhym mýj me'ō gédja Metīndjwýnh amim utā? ane.

<sup>27</sup> Nhym Jeju arým ar omũho djan arkum,

—Be, me ne me te: kute amipytār prāmje nhym be, Metīndjwýnh kute mýjja kunī mar. Kumābit ne amirīt ne. Ta ne kute me utārkôt kute mar, ane.

<sup>28</sup> Nhym kam Pedru kum,

—Ě, arým ne bar inhō mýjja kunīmā inhiren mā akôt ajkamē, ane.

<sup>29-30</sup> Nhym Jeju arkum,

—Ě, godja me'ō imā àpēnh ne memā ijā ujarēnh tēm kadjy arým ō mýjjamā irer jabej, ōbikwamā irer jabej. Ō kikre nār kamy nār kanikwýnh nār nā nār bām nār prō nār kra nār ō pykamā irer jabej ba dja ba kum o pānh ra:x ne. Ne pānh pyka jakam kum ō mýjjao akrenh mex ne kum kungā. Ne pānh ōbikwao akrenh mex ne kum kungā. Dja ba kum krāptī: kubé 100 ngā nhym pānh ō kikre, kamy, kanikwýnh, nā, kra, ō pyka krāptī mex ne. Kamdjwý dja me kātām me'ō jao bikēho ba. Dja ā pykakam ane. Nhym ije pykao nykam

gêdja Metĩndjwýnhkôt tĩn ne ar ba rã'ã: rã'ã ne. Mrãmri ne ba ar amã arẽnhkumrẽx, ane. <sup>31</sup> Nhyim be, jakam me rũnho kutewaja djãm me kute memã wa rã'ãmã? Kati. Me ja krãptĩ gêdja me kajgo mex ne me katẽn tẽ. Nhyim be, me kajgo mex ne me katẽn tẽmja gêdja me pãnh rũnho kutewa. Nãm ã Jeju kôt ba djwýnh arkum ane.

*Ajte amikukãm amityk'ã ujarẽnh.*  
*Mat 20.17; Ruk 18.31*

<sup>32</sup> Ne kam ar ajte Jejumẽ ro'ã prykôt mō. Krĩraxbê Djeruxarẽ'ýr àbir mō nhyim Jeju tu kum me uma kêt ne ar kukãm tẽ. Nhyim ar te kute marmã kam no tyn mōn arým tĩn prãm. Nhyim kam arým me kãxã aro tẽn arkum amijã ujarẽnh tẽ. Kôt ba djwýnhbê 12jamã ne amijã ujarẽnh tẽn kum,

<sup>33</sup> —Ë, ota gwaj arým Djeruxarẽ'ýr badjãbirn babōxmã. Nhyim kam ba ije amijo inhĩ dja me apýnh me rũnhmã ikanga, me kadjy Metĩndjwýnh mar djwýnh nhō bẽnjadjwýr arkum ikangan Mōjdjê kukràdjã mar djwýnhmãdjwý ikanga. Nhyim kam me ikã mex jarẽn ijã abenmã kum, “Axwekumrẽx. Gê me pãnh tu bĩnkumrẽx”, ane. Ne kam me bajtemmã ikanga. <sup>34</sup> Nhyim me arým ijã bẽno ajkẽn ikutõn mry kã punuo ikaprẽprẽ:k ne. Ne kam arým ibĩ nhyim ijã akatin akatin akati ba akubyn itĩn ne. Nãm ã arkum ane.

*Ar kute ajte amirax jabej.*  
*Mat 20.20; Ruk 22.24*

<sup>35</sup> Nhyim kam Xijagumẽ Djuão ar arým 'ýr bōx. Djebedêu kute ar irja 'ýr bōx ne kum, —Ujarẽnh djwýnh, bar amã arẽ ga prĩne kôt ã ar ijo ane, ane.

<sup>36</sup> Nhyim arkum,  
—Mýj ne ba ije ar ajomã? ane.

<sup>37</sup> Nhyim ar kum,  
—Be, dja ga ĩ anhō me ja kunĩo amiptàn prĩne amexkumrẽx ne apyma. Memã anhýrkam bar irax ne anhikô'ã memã nhý, bar ijō adjubôk'ãnh nhý nhyim ar ijō adjudge'ãnh nhý. Dja ga ã ar ijo ane, ane.

<sup>38</sup> Nhyim Jeju arkum,  
—Gêt kon. Nã gãm ar arĩk amim 'ã karõn imã arẽ. Ba ar amã arẽ gar ama. Dja ba ngõnhkrã kam kangô jao ikō. Djãm ar aje ipyrak ne kangô jao akõm mã? Dja me

ngõmã ijadja. Djãm ar aje ipyrak nhyim ngõmã me kute ar ajadjarmã? Nãm ã arkum ane. Bir, mýj'ã ne kangô jao kõm ne ngõmã adjarmã akre? Bir, amitokry kume:x'ã ne akre. Ar kute urak jabej ne ar kukij. Ar tokryo kute Jeju tokry pyrak jabej ne ar kukij.

<sup>39</sup> Nhyim ar kum,  
—Nà. Kadjy ar ije apyrak, ane.

Nhyim Jeju arkum,  
—Mrãmri dja gar aje ipyrak ne atokry kumex ma. Mrãmri dja gar kangô jao ikō nhyim me ngõmã ar ajadjã. <sup>40</sup> Be, djãm ba ne ba ar amã inhikô'ã ar anhýrmã arẽ got? Be, Ibãm kute amrêbê: amijo me'õ ar utar ar ta dja ar inhikô'ã memã nhý. Nãm ã Xijagumẽ Djuão arkum ane.

<sup>41</sup> Nhyim kôt ba djwýnhbê 10 arým ar kabẽn ma. Ne kam arým Xijagumẽ Djuão arkum àkrê ne. <sup>42</sup> Nhyim Jeju amiwýr ar ku'uw ne arkum,

—Me bajtemkam me bẽnjadjwýr ne me ari àpẽn'ã memã àpnẽn ne memã bẽn tỳx ba. Nãm ã me bajtemkam me rũnh kute meo bao ane gar arým ama. <sup>43</sup> Djãm ar ga aje me kudjwamã? Kati. Ar ga dja gar ã anhýr kêtumrẽx ne. Ar ajō abenkam arax prãm jabej amijo akajgon arkum adjapẽn ar aba. <sup>44</sup> Ne kam ar ajō aben kadjy abẽnjadjwýr rax prãm jabej tu amijo akatãm ne me kunĩmã adjapẽn kajgo aba. <sup>45</sup> Ba ije amijo inhĩ djãm imã me àpẽn kadjy ne ba amrẽ tẽ? Kati, ba dja ba memã apê. Me ren ta amijaxwe pãnh tokryn arým ty. Nhyim be kati. Me krãptĩ jaxwe pãnh ba dja ba itokryn arým ty. Memã idjapẽn ja kadjy ne ba amrẽ tẽ. Nãm ã Jeju arkum ane.

*Me'õ no rã akubyn rĩt.*  
*Ruk 18.35*

<sup>46</sup> Nhyim kam ar ajte tẽ:n kam krĩraxbê Djerikokam bōx. Bōx ne kam kato. Nhyim kam Jejumẽ kôt ba djwýnhmẽ me krãptĩmẽ ne me Djeriko kurũm kator mō. Kator mō nhyim wãnh Baximêu no rãja pry japkre'ã nhý, amijo à'wýro nhý. Ximêu ne kudji.

<sup>47</sup> Nhyim me abenmã kum,  
—Nadjarekam Jeju ne tẽmja, anhýro kumex. Nhyim arým kuman arým kum amijo akij ne kum,

—Ë, Jeju, Dawi tàmdjwý 'õ. Gop amã ikaprĩ, ane.

<sup>48</sup> Nhyim me krãptĩ arým kum bën tỳx ne kum, “E kum anhikrê”, ane. Nhyim kam tu kum àkjêro bën kum,

—Dawi tàmdjwý 'õ, gop amã ikaprĩ, ane.

<sup>49</sup> Nhyim Jeju arek kum djan memã kum, —Me ajõ tẽn kum arẽ gê amrẽ iwýr tẽn, ane.

Nhyim me 'ýr tẽn kum arẽn kum,

—On akĩnh ne on kàjmã dja. Onĩj amiwýr ajuw, ane. <sup>50</sup> Nhyim arým wãnh inòkàti mẽn ekruux ne kàjmã dja. Kàjmã djan arým Jeju'ýr tẽn. 'Ýr tẽn arým 'ýr bõx.

<sup>51</sup> Nhyim Jeju kum,

—Mýj ne ba ije ajomã? ane.

Nhyim no rãja kum,

—Bẽnjadjwýr, aje inoo mex ba irĩtmã, ane.

<sup>52</sup> Nhyim Jeju kum,

—Ga ne ga arĩt kadjy tu amim ikamnhĩxkumrẽx ne iwýr bõx. Kam dja ba arým ajo mex. Aj mã, ane.

Nhyim kum kabẽnme ro'ã arým rĩt mex ne arým Jejukõt pry'ã tẽn.

## 11

*Jeju rax ne Djeruxarẽmã àr.*

*Mat 21.1; Ruk 19.28; Dju r 12.12*

<sup>1</sup> Nhyim Jejumẽ ar prykõt mõ:n kam krĩraxbê Djeruxarẽ kuri krĩ ngrire ja'ýr bõx. Krãnhrebê Oriwêre'ã rwýkbê ne krĩ ngrire jabê Bepadjẽmẽ Betanhamẽ. 'Ýr bõx nhyim kõt ba djwýnh amãnhkrutmã kum,

<sup>2</sup> —Pry ja'ã dja gar arek katàt krĩwãmã tẽn. Nhyim ar akutã pry kator kraxkam dja gar mry'ã krĩ jabatãnh nyrewã pumũ. Nhyim me kute pĩ maktã òkre djê nhyim ãmwã. Kraxje me'õ mry wã'ã krĩ kêt. Dja gar 'ãpre bõn amrẽ o tẽn. <sup>3</sup> Godja me'õ 'ã ar amã kabẽn jabej ne ar amã, “Mýj kadjy”? ane gar kum, “Bẽnjadjwýr 'ã tẽn prãm. Dja 'ã tẽn kam akuby:n amã ano.” Nãm ã Jeju arkum ane.

<sup>4</sup> Nhyim kam ar 'ýr tẽn. Tẽn kam arým mrymã kato. Kikre'õ jajkwa krekre tãri ne me mry 'ãpre nhyim dja. Pry kênhkam ne mry dja nhyim ar arým 'ãpre bõ. <sup>5</sup> Nhyim ar bu'ã me ku'êja ar kukij ne arkum,

—Mýj kadjy ne gar mry 'ãpre bõ? ane.

<sup>6</sup> Nhyim Jeju kute arkum 'ã karõ kõt ne ar ã

memã ane. Nhyim me arým arkum, “Ajrã”, ane.

<sup>7</sup> Nhyim ar arým Jeju'ýr mryo tẽn o bõx. Ne kam ar aminhõ kubêkào kum mry'ã aty. Nhyim kam 'ã nhỹ. <sup>8</sup> Nhyim kam me krãptĩdjwý kukãm kum pry'ã atyo mõ. Aminhõ kubêkào kum atyo mõ. Nhyim me kwý bu'ã kapõt'ýr mõn pi'õ nhikẽn o bõx ne kukãm kum pry'ã o atyo mõ. Nhyim arým 'ã tẽn. <sup>9</sup> Nhyim me kwý kukãm mõ, o àkjêr mõ nhyim me kwý kõt o àkjêr mõ. Nãm me o àkjêr mõn kàj bê abenmã kum, Metĩndjwýnhmã kum,

—Jejubê me inhõ Bẽnjadjwýr rax. ãm mexkumrẽx. Kam me ikĩ:nhkumrẽx. Gê on me ipytã. Gê Metĩndjwýnh o kĩnh rax. Metĩndjwýnh kukwakam ne arým me bakadjy bõx. <sup>10</sup> Arým me bakukãmãre Dawi kudjwa kute me ijo ba kadjy ne bõx. Gê me kàjkwakamdjwý Metĩndjwýnhmã mextire jarẽnho kumex. Gê on me ipytã, ane.

<sup>11</sup> Nhyim arým krĩraxbê Djeruxarẽkam bõx. Bõx ne kam Metĩndjwýnh nhõ kikretimã wadjã. Ne kam amibu'ã mýjja kunĩ pumũnhõ tẽn. Nhyim kam arým 'ã amykry mex ne. Nhyim kam kõt ba djwýnhbê 12mẽ amũ krĩ ngrirebê Betanha'ýr tẽn. 'Ýr tẽn:n kam bõx.

*Ar kute tu amim Metĩndjwýnh kamnhĩxkumrẽxmã 'ã ujarẽn.*

*Mat 21.18*

<sup>12</sup> Nhyim ar'ã akati nhyim arým Betanha kurũm tẽn. Ne kam kum prãm ne. <sup>13</sup> Nhyim wãnh pidjõbê pigêre'õ dja nhyim amybým 'õ pumũ. Ne kute ò jabej kadjy 'ýr tẽn 'ýr bõx. Ne te ò jabej nhyim ò kêt ne 'õbit nhyim arým omũ. Kraxje ò'ã mytyrwý kator kêt rã'ãkam ne ò kêt. <sup>14</sup> Nãm omũn tu pidjõmã kum,

—Jakam dja ga adjõ kêtumrẽx nhyim me adjõ krẽn kêt ne, ane. Nhyim kõt ba djwýnh arým kuma.

*Kute kikreti nêje me anor.*

*Mat 21.12; Ruk 19.45*

<sup>15</sup> Nhyim kam ar tẽn:n kam krĩraxbê Djeruxarẽkam bõx. Kam bõx nhyim kam Jeju Metĩndjwýnh nhõ kikretimã tẽn wadjã. Nhyim me kute memã mýjja nhõr djwýnh kumex. Nhyim me kute memã mýjjaõ pãnh ne amim byr kadjy 'ã kumex. Nhyim arým bõm me rẽnho dja. Nhyim me kute me ò

pi'ôk kaprî pãnh memã kikreti nhõ pi'ôk kaprî nhõr kadjy me kumex nhym mebê pïponho àpanho tẽ. Nhym me kute tut nhõr djwýnhdjwý kumex nhym mebê krî djã nhikô rênho tẽ. <sup>16</sup> Ne mã mebê àptàro djan memã kum,

—Kwãrîk wãnh on Metîndjwýnh nhõ kikreti katikôt me ajênho aba kêt, ane. <sup>17</sup> Ne kam memã kum,

—Amrêbê: ne me bakukãmãre Metîndjwýnh kabên'ã pi'ôk no'ôk ne. Kamã Metîndjwýnh ta memã kum,

“Inhõ kikreti ja'ã dja me abenmã kum, 'Apýnh me õ pyka kunîkôt me kute Metîndjwýnhmã kabên kadjy ne õ kikreti wã', ane.

Dja me ã inhõ kikreti'ã abenmã ane.”

Nãm ã Metîndjwýnh pi'ôkkam ane. Nhym be, me ga ne ga me aje kam me àkînhîo aben pydji djã. Nãm ã Jeju memã ane.

<sup>18</sup> Nhym Môjdjê kukràdjã mar djwýnhmẽ me kadjy Metîndjwýnh mar djwýnh nhõ bënjadjwýrmẽ arým Jeju kabên ma. Ne kam 'ã aben maro nhýn abenmã kum,

—Je tô mýj dja gwaj baje Jeju bînmã on? ane. Me kum umakam ã abenmã ane. Me kâtãm kunî Jejukam no tyn kum kabên kînh ne kumex. Nhym kam me rûnhja kum uma.

<sup>19</sup> Nhym kam Jeju ar'ã para nhym ar arým krîrax kurûm katon tẽ.

*Ar kute tu amim Metîndjwýnh kamnhîxkumrêx kam 'ã ujarênh.*

*Dju r 14.13; Xij 1.6; Dju k 5.14*

<sup>20</sup> Nhym ar'ã akati nhym ar ajte pidjôbê pigêre 'ãnh tẽn omũ. Nhym arým arêmẽ kunî ngrà ne. <sup>21</sup> Nhym Pedru akubyn amijo tẽn Jeju kabên man kum,

—Ujarênh djwýnh ota, aje pidjôbê pigêre kangrônha arým ngràn dja, ane.

<sup>22</sup> Nhym kam arkum,

—Gora ar tu amim Metîndjwýnh kamnhîxkumrêx. <sup>23</sup> Ba ar amã arẽ gar ama. Gorên me'õ krãnhwãmã kum, “On amikaban ngô jabatàn mûjakam mõn tým”, ane. Ne ren ôkre kadjwýnhbê amim,

“Kon, birãm dja ipêx, kon”, anhýr kêt ne tu kadjy amim kamnhîxkumrêx ne ren amim, “Be, mrãmri dja ikabên kôt ã imã o ane”, ane. Kute ren ã amim anhýrkam ren

krãnh mrãmri ã amijo ane. Mrãmri ne ba ar amã arênhkumrêx.

<sup>24</sup> Kam aje mýjja kunîo Metîndjwýnhmã adjã'wýrja dja gar tu kadjy amim kamnhîxkumrêx nhym arým ar akabên kôt ã ar amã o ane. <sup>25</sup> Ga kam ar aje Metîndjwýnhmã adjã'wýro adjãmkam amimaro dja. Me'ôkam angryk jabej amimaro dja. Godja gar me'ôkam angryk jabej on kam angryk wãnh kum anhiren kam angryk kêt. Dja gar kam angryk kêt nhym kãjkwakam ar Abãmdjwý arým ar gadjwý ar ajaxwe maro aknon ar akam ngryk kêt. <sup>26</sup> Be, godja gar me'õ, axwe'õ mar rã'ã jabej ne kam angryk rã'ã jabej nhym ar Abãmdjwý ar ajaxwe mar rã'ãn ar akam ngryk rã'ã ne. Nãm ã Jeju kôt ba djwýnhmã ane.

*Me kute rax jabej Jeju kukjêr.*

*Mat 21.23; Ruk 20.1*

<sup>27</sup> Nhym ar tẽn kam Djeruxarêkam bõx. Nhym kam Jeju ajte Metîndjwýnh nhõ kikretikam bõx ne kam ar mrã. Nhym me rûnh arým 'ýr bõx. Me kadjy Metîndjwýnh mar djwýnh nhõ bënjadjwýrmẽ Môjdjê kukràdjã mar djwýnhmẽ mebêngêtmẽ ne me 'ýr bõx. <sup>28</sup> 'Ýr bõx ne amũja'ã kute kikreti kurûm me anorja jabej kukij ne kum,

—Mýj me'õ kabênkôt ne ga ar ã meo anhýro aba? Mýj me'õ ne amã me'ã karõ ga kam amũ ô'ã bõm ar me rênho aba? ane.

<sup>29</sup> Nhym Jeju memã kum,

—Badjwý dja ba mýjja jabej me akukja. Me akumrêx dja ga me imã arẽ. Ba kam arým badjwý ije mýj me'õ kabênkôt ar me anoro ibaja me amã arẽ. <sup>30</sup> Djuão kute ngômã me angjênhja djãm me kabên kôt ne arîk ar ngômã me angjênho ba? Nàr djãm Metîndjwýnh kabênkôt? Goja imã arẽ, ane.

<sup>31</sup> Nhym kam me abenkam kangan abenmã kum,

—Je mýj dja gwaj kum nẽ? Dja gwaj kum “Metîndjwýnh kabênkôt”, ane nhym kam gwaj bamã kabên 'õ jarênh gwaj bamã, “Bir be, mýkam ne ga me amim Djuão kabênja mar kêt ne”? ane.

<sup>32</sup> Nàr dja gwaj kum, “Me kabên kôt ne tu arîk ar ngômã me angjênho ba”, ane nhym kam me krãptî ren o ngryk ne kum gwaj bakurê gwaj ren kam bamã me uma ne.

Me kâtâm ja ne me arÿm Djuão kabên man kum kînh ne, ne o Metîndjwÿnh kukwakam kabên jarênh djwÿnh ne. Dja gwaj kum ane nhym me arÿm o ngryk ne.

<sup>33</sup> Nãm me ã abenmã anen kam Jejumã kum,

—Kon ne. Ar ije mar kêt. Mÿj me'õ kabênkôt Djuão kute ngômã me angjênhja ar ije kôt mar kêtê, ane.

Nhym kam memã kum,

—Bir be, dja ba badjwÿ me amã arênh kêt ne. Mÿj me'õ kabênkôt ije ar meo iba ja dja ba me amã arênh kêt ne, ane.

## 12

*Pidjôo djuw mex djwÿnh jaxwe'ã ujarênh.  
Mat 21.33; Ruk 20.9*

<sup>1</sup> Ne kam memã apÿnh kukràdjã djãri'ã memã mÿjja jakren memã 'ã ajarênh memã kum,

—Be, me'õ arÿm amim pidjô kwÿ kren kadjy bu'ã kêno kôkayro kum o ipôk ne. Ne kam pidjô janênh djãmã kren ipêx. Ne pidjô pumÿnh djwÿnh ku'ê djã'ã par prêkti nhipêx. Ne kam me kwÿmã kum, “Gora me imã o djuw mex. Gora gê abatàn ne ô ga amim kwÿo atom ne imã mÿm kwÿo atom.” Nãm ã me kwÿmã ane. Mebê idjaer'ã ne Jeju pidjô jakren me rÿnh'ã pidjôo djuw mex djwÿnh jakren Metîndjwÿnh'ã ò pidjôkô djwÿnh jakren kam arek memã 'ã ujarênh djan memã kum,

—Õ pidjôkô djwÿnh ã me kwÿmã anen kam atemã pyka 'õmã tẽ. Ne kam kam wãnh ar ba. <sup>2</sup> Nhym arÿm pidjôja tuk ne kumex. Nhym kam ò pidjôkô djwÿnhja arÿm 'ã mytyrwÿ jakren kam 'ÿr ò àpênh jano. Kute memã arênh nhym me kute kum pidjô kwÿo atom ne kute kôt anor kadjy ne 'ÿr ano. <sup>3</sup> Nhym kam 'ÿr tẽn bôx nhym kam me kute pidjôo djuw mexja ate me'õjao tÿm ne kaprêprê:k ne. Nhym mã akubyn 'ÿr ÿkam tẽn 'ÿr bôx. <sup>4</sup> Nhym ajte ò pidjôkô djwÿnhja pãnh 'ÿr me'õjadjwÿ jano nhym 'ÿr tẽn 'ÿr bôx nhym me bîn punun kum pijãm jadjàn ano. <sup>5</sup> Nhym kam ò pidjôkô djwÿnh 'ÿr ajte ò àpênh 'õ jano nhym 'ÿr tẽn 'ÿr bôx. Tãmwãdjwÿ ne me tu kubĩ. Nhym kam aben totokmã me'ÿr

ò àpênh krãptĩ jano nhym me kwÿ titik ne kwÿ pa.

<sup>6</sup> Nhym kra djwÿnh pydji, kum kra jabêja 'ã ne arÿm amim, “Godja ikra me'ÿr bôx nhym me arÿm mar jabej”, ane. Ne arÿm me'ÿr ano nhym me'ÿr bôx.

<sup>7</sup> Nhym kam me abenmã kum,

—Be, kra ne wã. Gwaj on kubĩ. Tãmwã dja bãm kum mÿjja kunĩ ngã, ò nèkrêx kunĩ kanga, ane. Gwaj on tãmwã bîn kam amim ò nèkrêx, ò mÿjja, ò pidjôja kunĩo aminhõ, ane. <sup>8</sup> Ne kam o tÿm ne kubîn arÿm pidjôkô kurÿm bõm kumê.

<sup>9</sup> Be, mÿj gêdja ò pidjôkô djwÿnhja me ja on? Bir, dja me'ÿr tẽn me'ÿr bôx ne me imex ne kam ò pidjôkôja atemã me ja'õmã kungã. Nãm ã Jeju me rÿnhmã ane. Amijã ne ò pidjôkô djwÿnh kra jakren Metîndjwÿnh kukwakam kabên jarênh djwÿnh'ã ne ò àpênh jakre. <sup>10</sup> Nhym kam Jeju ajte memã me kukãmãre kabên jarên memã kum,

—Amrêbê: ne me bakukãmãre memã Metîndjwÿnh kabên jarên memã kum,

“E kum kên ja ne me kute kikreo ãm djwÿnhja kute kikremã armã te omÿn kam bõm kumê.

Kên ja ne arÿm kute kikremã o kajpar, kum o kajpar tÿxi.

<sup>11</sup> Bênjadjwÿr djwÿnh ta ne ã kêno ane gu me omÿn kam bamã mexkumrêx”.

Nãm ã me bakukãmãre memã anen arÿm 'ã pi'òk no'òk ne. Djãm me aje omÿnh ne mar kêt? Nãm Jeju ã me rÿnhmã ane. Nãm amijã kên jakre. Ne me rÿnh'ã kikreo ãm djwÿnh jakre. Mrãmri ne me rÿnh kute kikreo ãm djwÿnh pyrãk ne arÿm Jeju kanga. Me rÿnh kute kanga'ã ne Jeju me rÿnhmã ja jarê.

<sup>12</sup> Nhym me amim,

—Be, gwaj bajã ne pidjôo djuw mex djwÿnhmê kikreo ãm djwÿnh jakre, ane. Ne bit kute o tÿmmã te 'ã amijakre. Me krãptĩ pymaje ne me te 'ã amijakren arÿm mã tẽ.

*Xedjamã pi'òk kaprĩ nhõr'ã ujarênh.*

*Mat 22.15; Ruk 20.20; Rô 12.1*

<sup>13</sup> Ne kam Jeju'ÿr mebê pardjêu kwÿmê Erodji nhõ me ja kwÿ jano. Jeju bēnjadjwÿr'ã kabên punu jabej ne me me ja jano. Godja bēnjadjwÿr'ã kabên punu'õ jarê nhym me arÿm bēnjadjwÿrmã arê. Kadjy ne me Jeju'ÿr bôx ne kum,

14 —Ujarênh djwýnh, ba me arým ama. Ga ne ga akabên katátkumrêx. Amã me rûnh puma kêt. Me rûnhmê me kajgomê ne ga memã akabêno aben pyrâk ne me imã Metîndjwýnh kukràdjâ'ã adjujarênh mexkumrêx. Me bënjadwýr rûnh kunî nhõ bënjadwýr raxbê Xedja. Mebê idjaer kute o me bajtemja. Djãm Metîndjwýnh kukràdjâ kôt ne gu me baje bënjadwýr Xedjamã pi'ók kaprî nhõrmã? Nâr kon. Goja on ar imã arê. 15 Dja gu me kum kungã nâr dja gu me kubê nê? Nãm me ã Jejumã ane.

Nhym arým me 'êxnhîkôt tu me kuman memã kum,

—Nok ba ren me amã, “Metîndjwýnh kabên kupa'ã ne me kum òro ba”, ane ga me ren memã kum, “Be, Jeju axwekumrêx. Ga, kute bënjadwýr raxbê Xedjabê pi'ók kaprî nê prãmja pumû”, ane. Amrê imã ngônphonho pi'ók kaprîo tē ba me amã omû, ane. 16 Nhym me kum o tēn kungã nhym arým memã kum,

—Mýj me'õ ne 'ã karõja? Ne mýj me'õ ne 'ã idji jêtja? ane.

Nhym me kum,

—E kum be, Xedja nhõ, ane.

17 Nhym Jeju memã kum,

—Bir be, õ pi'ók kaprî. Dja ga me kum angã nhym be, Metîndjwýnh nhõ mýjjabit dja ga me Metîndjwýnhmã angã, ane. Nãm memã ane nhym me te kute kutã mýjja'õ jarênhmã kam no tyn dja. Ne kam arým kum kàx ne mã mō.

*Me tyk akubyn tîn mýr jabej me Jejumã kabên.*

*Mat 22.23; Ruk 20.27; Tex k 4.16; Ap 20.4*

18 Nhym kam mebê xadjudjêu kwý 'ýr bõx. Mebê xadjudjêu ne me arîk memã kum,

—Be, me tyk akubyn tîn prãm kêtumrêx, anhýr ar o ba. Me ja ne me 'ýr bõx ne kukij ne kum,

19 —Ujarênh djwýnh, me bakukãmãre Môjdjê ne amrêbê: me bamã, “Godja me'õ prõ'ýr mōn kra kêt rã'ãn tyk jabej mýj dja me nê?

Bir, dja kamymê ar aben djâkam ikwãja'õ 'ýr mō. Ne kam kum kra djin kukrij nhym abatãnh ne.

Me kute 'ã abenmã kum, ‘Be, kamy tyk kra ne wã’, anhýr ne kute kamy tyk mar týt rã'ã kadjy.”

Nãm ã me bakukãmãre Môjdjê me bamã ane. Nãm mebê xadjudjêu ã Jejumã ane.

20 Ne ajte kum,

—Be, kamybê 7 ne axikôt apõx. Nhym kutewaja prõ'ýr mō. Prõ'ýr mōn kra kêt ne ty. 21 Nhym atãrija pãnh 'ýr mōn kam ajte ty. Nhym pãnh atãrija 'ýr mōn kam kra kêt rã'ãn ajte ty. 22 Be, nãm ar ã o anhýro tēm tãmtã: nhym arým kutapureja aro ino ren 'ýr mōn adjwýnhdjwý ty, kra kêt ne ty. Nhym arým ar prõja arkôt ty, kra kêt rã'ãn ty. 23 Ar kubê 7 ne ar aben totokmã kamy prõ'ýr ba. Godja we ar kunî akubyn tîn ne àbir jabej we àbirkam nhýnh kamyja dja 'ýr mō? ane. Me ta kute we me tyk akubyn tîn kêt jarênh mýr jabej ne me ã Jejumã ane. Me kute o àpanh nhym binhikrênh kadjy nãrãm ne mebê xadjudjêu ã kum ane.

24 Nhym Jeju arým memã kum,

—Me aje Metîndjwýnh kabên'ã pi'ók no'ók mar kêt ne me aje Metîndjwýnh týt:kumrêx mar kêt. Nã gãm me arîk Metîndjwýnh kupa'ã memã 'ã ajarê. 25 Be, me tyk ne akubyn tînkam djã ne me ajte abenwýr ba? Kati, akubyn me tînkam ne me abenwýr ba prãm kêtumrêx. Kam dja me kute kàjkwakam kadjy mrãnh djwýnh pyrâk. 26 Be, mrãmri me tyk akubyn tînkumrêx. Amrêbê: ne Metîndjwýnh me bakukãmãre Môjdjê mã kabên jarê. Me tyk akubyn tîn'ã kabên jarê nhym 'ã pi'ók no'ók. Djãm me aje pi'ókkam omũnh kêt, akaok pôk ne tu mex ne ãm'ã ujarênhkam Metîndjwýnh kute kum, “Ibê Abraãomê Idjakmê Djako ar õ Metîndjwýnh”, anhýrja, djãm me aje pi'ókkam amim arênh kêt?

Arým Abraão ar tyk 'ãtũmkam ne Metîndjwýnh ã me bakukãmãremã ane.

27 Bir be, ar tyk tũmja Metîndjwýnhmã tîn ne ar ba nîj pumû. Djãm Metîndjwýnhbê me tyk nhõ Metîndjwýnh? Kati. Metîndjwýnh ne me tîn nhõ Metîndjwýnh. Me tyk kunî ne me kum tîn. Kam ne ba me amã, “Metîndjwýnh ne kubê me tîn nhõ Metîndjwýnh”, ane. Nã gãm me kupa'ã memã 'ã ajarê. Nãm Jeju ã mebê xadjudjêumã ane.



*Me kute kukràdjà jabej Jeju kukjêr.*

*Mat 22.34; Ruk 10.25*

<sup>28</sup> Jejumê mebê xadjudjêumê aktâ kabêno aben japanho dja nhym Môjdjê kukràdjà mar djwýnh'ô arým me'ÿr bôx. Ne Jeju katàt kute memã Metĩndjwýnh kabên jarênhkôt arým kuman kam kukij ne kum,

—Metĩndjwýnh kute katàt me kute amijo ba'ã memã karôkam kabên jarênhja kute aben nhipetã memã kabên jarênhja dja ga amim maro tẽ. Nhýnh kabênja'ô ne mexo kute kunĩ jakrenh? ane. <sup>29</sup> Nhym kum,

—Be, Metĩndjwýnh kabên'ô kumrêx mexo kute kunĩ jakrenhja ba amã arẽ ga ama. Metĩndjwýnh memã kum,

“Ë, mebê idjaer, gora ikabên ma. Bênjadjwýr djwýnh, kubê ne Metĩndjwýnh. Bênjadjwýr djwýnh pydji.

<sup>30</sup> Me anhô Bênjadjwýr djwýnh, me Atĩndjwýnh dja ga me amã kĩnh, amã abêo katàt me kunĩ, mýjja kunĩ jakre.

Djãm ajakwaobit amã Metĩndjwýnh jabêmã? Kati. Ajamak, akad-jwýnhbê, akukràdjà kunĩo dja ga me amã abê:.”

Nãm ã Metĩndjwýnh memã ane. Be, tãm ne ja. Metĩndjwýnh kabên'ô kumrêx mexo kute kabên kunĩ jakrenh ne ja. <sup>31</sup> Ne kam atãri Metĩndjwýnh ajte memã kum,

“Me amã amibu'ã me ja jabê. Kute mrãmri ne ga me amã amijabêja pyrãk dja ga me ã amã amibu'ã me ja jabêo ane.”

Nãm ã Metĩndjwýnh memã ane. Atemã kabên'ô mexo kute ja jakrenh kêt. Nãm ã Jeju kum ane.

<sup>32</sup> Nhym Môjdjê kukràdjà mar djwýnh kum,

—Ujarênh djwýnh, kôt ne ga arẽ. Mrãmri Metĩndjwýnh pydjibit. Atemã'ô kêtumrêx.

<sup>33</sup> Dja me kum kĩnh, kum abêo katàt me kunĩ, mýjja kunĩ jakre. Djãm ajkwaobit kum Metĩndjwýnh jabêmã? Kati. Amak, kadjwýnhbê, kukràdjà kunĩo dja me kum abê: Ne kum amibu'ã me ja jabê. Kute mrãmri ne me kum amijabêja pyrãk dja me ã kum amibu'ã me ja jabêo ane. Ak-abên ja ne mexo Môjdjê kabên kunĩ jakre. Dja me Metĩndjwýnh kabênja man kôt ar amijo ban arým mexkumrêx nhym me

kute Metĩndjwýnhmã mry bôrja mexo me tẽp kêtumrêx. Me kute kum apýnh mýjja nhôr kunĩja mexo me tẽp kêtumrêx. Nãm ã Môjdjê kukràdjà mar djwýnhja Jejumã ane.

<sup>34</sup> Nhym kam ôkre kadjwýnhbê amim,

—Be, tãmwã ne ikabên kôt kabên mexkumrêx, ane. Ne kum,

—Be, Metĩndjwýnh kute amim apytãr ne ar ajo ba 'ÿr, ane. Nhym me ajte ijukri Jeju kukjêr kêt. Kabên mex pymaje ne ajte kukjêr kêt.

*Kritubê mýj me'ô tãmdjwý jabej kute me kukjêr.*

*Mat 22.41; Ruk 20.41*

<sup>35</sup> Nhym kam Jeju ajte Metĩndjwýnh nhô kikretikam tẽn bôx ne memã Metĩndjwýnh kukràdjà'ã ujarênho djan kam memã kum,

—Be, Môjdjê kukràdjà mar djwýnh ne me memã kum, “Kritubê ne Dawi tãmdjwý”, anhýr ar o ba. Be, djãm Kritubê Dawi tãmdjwýbit? Kati, kubê ne Dawi nhô Bênjadjwýrdjwý, ane. <sup>36</sup> Ne kam memã me kukãmãre Dawi kabên jarên memã kum,

—Be ga, me bakukãmãre Dawi ta kute memã 'ã ujarênhja pumũ. Metĩndjwýnh Karô kukwakam kute memã Kritu'ã ujarênhja pumũ. Nãm memã kum,

“Inhô Bênjadjwýrmã ne Bênjadjwýr djwýnh kabên ne kum,

‘Amrê idjubôk'ãnh nhý, Abênjadjwýr raxkam idjubôk'ãnh nhý.

Ikam ama ba amrê awýr akurê djwýnhomõ ga me kwýo apardjan me kwý nhimex.’

Nãm ã Metĩndjwýnh inhô Bênjadjwýrmã ane”, ane.

Bir be ga, Dawi kute kum “Abênjadjwýr rax”, anhýrja pumũ. <sup>37</sup> Mýkam ne me

'ã Dawi tãmdjwý kajgo jarê? Djã nãm o tãmdjwý kajgo? Kati, Dawi ta ne kute o ò Bênjadjwýr rax. Nãm Jeju ã memã ane nhym me krãptítija kum kabên kĩ:nhkumrêx ne.

<sup>38</sup> Nhym arek memã ujarênho dja:n memã kum,

—Gora me aminêje me omũ. Aminêje Môjdjê kukràdjà mar djwýnhwã pumũ. Be, me ja ne me kute amibên kadjy kute kubêkã jabjêtibit jangjênh prãmumrêx. Ne ajte me krãptĩ nhipôkri kute memã amibên nhym me kute memã rũnh jarênh ne kute

memã kum, “Bênjadwÿr, djãm ga, djãm ga”? anhÿrja. Ja ne me kum kÿnhkumrêx. <sup>39</sup> Ne mebê idjaer bikprõnh djakam nàr me krãpti àkuro krïkam ne memã wan krï prãmikumrêx. Me kute amibên kadjy ne me me rÿnh krï djakam krï prãmikumrêx. Kwãrïk wãnh gar me kudjwa kêt. <sup>40</sup> Nãm me me 'uwti krão apan mebê mÿjja kunio akï ne kam ajkwaobit Metïndjwÿnhmã kabên rÿnh ne, ne kum kabên 'ijabjêo ku'ê. Nãm me 'êx ne amijo mex ne kum kabên. Be kati, me axwekumrêx. Kam gêdja Metïndjwÿnh me kuràm memã pãnh rax jarên prïne me kuràm meo ajkê. Nãm ã Jeju memã ane.

*Me'õ 'uwti kute õ pi'òk kaprï ngrire nhõr. Ruk 21.1*

<sup>41</sup> Nhyam kam me kwÿ itepato mõn bõx. Me kute amikutã Metïndjwÿnhmã pi'òk kaprï kwÿ nhõr kadjy ne me mõ. Nhyam Jeju arÿm tèn pi'òk kaprï nhõr djã kõnh nhÿn me omũnho nhÿ. Me õ nèkrêx rÿnh krãpti ne me aben totokmã kam pi'òk kaprï rÿnh ne kurê. <sup>42</sup> Nhyam kam me'õ nija 'uwti kubê mjên tyk nhyam õ mÿjja kêtja ngõnhponhreo pi'òk kaprïo amãnhkrut ne kubyn o tèn kam kumê. Ngõnhponhreja ne abenã rênhkam kubê pi'òk kaprï 'õ pydji, ngri:re.

<sup>43</sup> Nhyam kam Jeju amiwÿr kôt ba djwÿnh ar ku'uw nhyam ar 'ÿr bõx. Nhyam arkum,

—Ba ar amã arê, me'õ 'uwti ja ne õ mÿjja kêt ne tu me kuràm õ pi'òk kaprï raxo tèn Metïndjwÿnhmã kungã. Me kunï kuràm pi'òk kaprï raxo tèn kum kungã. <sup>44</sup> Me ja ne me õ pi'òk kaprï kumex ne kam 'ã kàtàm ne kumex. Ne kam 'ã kàtàmja Metïndjwÿnhmã kungã. Nhyam be, me'õ nija ne õ pi'òk kaprï kêtê, pi'òk kaprï ngrire ne tu kum kunï ngã. O kute amikadjy mÿjja byr ne krên ne tÿn kadjy Metïndjwÿnhmã kunï ngã. Kum 'õ nõr kêtê. Kam ne ba me amã,

—Nãm me kuràm pi'òk kaprï rax ne kum kungã. Mrãmri ne ba ar amã arê. Nãm ã Jeju kôt ba djwÿnh arkum ane.

### 13

*Akubyn bõx kukãm mÿjja apõx'ã ujarênh. Mat 24.1; Ruk 21.5*

<sup>1</sup> Ne kam Metïndjwÿnh nhõ kikreti kurũm kato. Nhyam kôt ba djwÿnh'õ kum,

—Ë, Ujarênh djwÿnh ga, këntio me kute kikreti kwÿ nhipêxja pumũ. Kënmê kikre ã ti:re ane, ane.

<sup>2</sup> Nhyam Jeju arÿm arkum,

—Be, ar kikretija pumũ. Dja ã me kurê djwÿnh prïne kikreti ngràn kên aben nhiby ikwã kunï nhikô rê. Nhyam kam kên'õ aben nhiby nõr kêtikumrêx, ane. <sup>3</sup> Nhyam kam ar tẽ:n kam krãnhbê Oriwêre'ã wabi. Nhyam Jeju arÿm amybÿm Metïndjwÿnh nhõ kikreti kõnh nhÿ. Nhyam Pedrumê Xi-jagumê Djuãomê Ængre ar me kãxã kukij ne kum,

<sup>4</sup> —Ë, ar imã kikreti ngràn'hã ajarê. Nhÿnh amex 'òkam dja me bakurê djwÿnh me bawÿr bõx ne kikreti ngràn ãm djã kapõ? Mÿj gêdja kukãm apõx? Dja bar omũn kam kôt õ akatimã ikaton õ akati ma.

<sup>5</sup> Nhyam kam Jeju arkum apÿnh mÿjja kukãm apõxmã arkum 'ã ajarên arkum,

—Gora ar amijã ano tÿx gê me'õ ar amã 'êx ne ar anoo biknor ne Metïndjwÿnhbê ar ajo akêx kêt. <sup>6</sup> Be, me krãpti dja ã aben totokmã me'ÿr bõx ne arÿm amijo 'êx. Amijo 'êx ne arÿm amijã imê. Amijã imên arÿm memã kum, “Me anhõ Bênjadwÿrbê kumkati kadjy ne Metïndjwÿnh ijano ba tèn bõx. Ba ibê Kritu”, ane. Ne kam arÿm me krãpti noo aknon Metïndjwÿnhbê meo akêx.

<sup>7</sup> Be, kam dja gar me kute abenwÿr prõt man amybÿm me kute abenwÿr prõt jarên ma. Kwãrïk wãnh kam ar atÿn prãm kêt. Ba ne ba kukãm ar amã 'ã ajarê gar arÿm ama. Ja kumrêx gêdja me ã o anhÿro tẽ. Kraxje kute inomã mênh kêt, kute 'ÿr o tèm rã'ã. <sup>8</sup> Nã, apÿnh me ba djãri gêdja me abenwÿr prõt ne aben nhimexo ba. Nhyam apÿnh bënjadwÿr rÿnh nhõ me dja me abeno kurê djwÿnh ne aben nhimexo ba. Apÿnh pyka djãri gêdja kam pyka terte:t ne. Nhyam prãmdjwÿ me kwÿ nhimex. Be, me tokry krax ne ja. Ga, me nire kra àja pumũ. Adjÿm. Dja kra à:n kam arÿm à ra:x ne. Me adjwÿnhdjwÿ dja me tokry mõ:n kam arÿm tokry ra:x ne. Be, me tokry krax ne ja.

<sup>9</sup> Be, ar ga dja gar ajaxwe kêt kadjy amijãno dja. Dja me apÿnh me rÿnhmã ar akangan me bikprõnh djakam ar atitik ne. Ar aje ijã adjujarênh ar abakam dja me apÿnh me bënjadwÿr rÿnhmê me bënjadwÿr

kry'ÿr ar ajo mō. Ar ajo mō gar me kabem aku'ê. Memã ijã adjujarēnh nhym me kute mar kadjy me kabem aku'ê. <sup>10</sup> Nhym be, me kute amim imar dja me apÿnh me ba djã kunîkôt ijã ujarēnh ny jarēnh kumrêx.

<sup>11</sup> Dja me ar ajo rôrôk ne kute memã ar akukjêr kadjy me rûnhmã ar akanga. Kwârîk wãnh gar kam amikukãm akabên 'ô'ã karô kêt ne kwârîk wãnh amikukãm anhökre kadjwÿnhbê amim, “Je tô mÿj gêdja ba aminêje memã ikabên ja on”? anhÿr kêt. Be, me kute memã ar akukjêr majmã dja Metîndjwÿnh Karô ta ar amã ar akabên mex jarê gar aman arÿm memã arê. Kute ar amã ar akabên jarēnh ja dja gar memã arê. Djãm ar ga dja gar memã akabên jarê got? Kati. Karô ta dja memã kabên jarê.

<sup>12</sup> Nhym mÿjja kunî pyka kôt amingràn kadjy dja me kute abeno ôbikwa djwÿnh abenmã àkrê. Me rûnh kute me par kadjy dja me memã kamy kanga. Dja bãm memã kra kanga. Dja kra kum nã nâr bãm kurên me rûnhmã ar kanga. Me rûnh kute ar par kadjy ar kanga. <sup>13</sup> Ikôt ar abikamēnhkam dja me kunî kum ar akurê. Ne te kum ar akurê gar ijã adjukanga kêt ne amã ikînh tÿx rã'ã ba arÿm ar apytã. Dja me kunî kute aminhinomã amimēnh nhô akati bôx gar amã ikînh tÿx rã'ã ba arÿm ar apytã. Nãm ã Jeju arkum ane.

<sup>14</sup> Ne kam ajte arkum,

—Be, ar aje ajbir imã, “Ar imã kikreti ngràn'h'ã ajarê”, anhÿrja ba ar amã arê gar ama. Dja mÿjja amingràn h'ÿr nhym kam arÿm mÿjja punutija dja. Metîndjwÿnh nhô kikretikam dja. Djãm mÿjja punuti Metîndjwÿnh nhô kikretikam âm kam mex got? Dja kam dja gar arÿm omû. Mÿjja punuti djô'ã dja me mÿjja kunîo ajkên kungrà. Me bakukãmãre Danijeu ne amrêbê: 'ã ajarê. Metîndjwÿnh kukwakam memã 'ã ajarê. Danijeu ne arÿm memã mÿjja punuti ja'ã ajarēn 'ã pi'ôk no'ôk. Dja gar pi'ôk no'ôkwã pumûn kam mÿjja punuti pumûn kam kôt ama. Kam gêdja Djeruxarê bu'ã pyka ja nhidjibê Djudêjakam me ja amijã maje krãnh'ÿr prôt ne.

<sup>15</sup> Gêdja me'ô kikre nhimök po'ã ãm jabej kwârîk wãnh akubyn ûrkwãmã nêkrêx'ÿr àr ne byr ne o tēm kêt.

<sup>16</sup> Gê purkam ar ba jabej tu umaje prôt. Kwârîk wãnh kute kubêkã jamÿnhmã 'ÿr akêx kêt. Dja tu me ãm kamã amû prôt.

<sup>17</sup> Watî:re, akati wãkam me tujarômê me kra karã dja me tokry:. Me mÿjja punuti pymaje prôt ne kam arÿm tokry:. <sup>18</sup> Dja gar Metîndjwÿnhmã amijo a'uw gê na raxkam umaje ar aprôt kêt mã.

<sup>19</sup> Be, dja me kam tokry kume:xi. Akubyn amijo tēn mÿjja kunîmo krax djã'ÿr amijo bôx ne ama. Me akukãmãre aben kukãm tokrykôt dja gar me maro tē. Dja gar me tokry tūm maro tē:n amiwÿr me tokry maro bôx. Ga, me tokry kume:xja pumû. Be, amrê mÿjja punuti nhô akati bôxkam dja me tokryô katat me tokry tūm wã kunî jakre. Ne amrê me'ã akati mörkam me tokry nydjwÿ dja me tokryô mÿjja punuti'ã me tokryja tēp kêt kumrêx. <sup>20</sup> Metîndjwÿnh ren tokry'ã akati kwÿ ngri kêt nhym me'ô ren tîn kêt kumrêx. Be, Metîndjwÿnh kute amim ô me ja'ã karô ne kute amijo me utârja kadjy dja arÿm 'ã akati wã kwÿ ngri.

<sup>21</sup> Godja me'ô 'êx ne ar amã, “Ota, jakam arÿm Kritu bôx ne nhÿ. Arÿm ne Metîndjwÿnh 'ã me ô Bēnjadjwÿrbê kumkati mē nhym jakam arÿm memã nhÿ”, anhÿr jabej. Nâr me'ô ajte 'êx ne ar amã, “Ota, jakam arÿm Kritu bôx ne nhÿ. Arÿm ne Metîndjwÿnh 'ã me ô Bēnjadjwÿrbê kumkati mē nhym jakam arÿm memã nhÿ”, anhÿr jabej. Djãm ar aje me ja marmã? Kati, kwârîk wãnh amim me ja mar kêt.

<sup>22</sup> Be, apÿnh me ta kute amijo Kritu pyrãk dja me amijo amirît ne. Nhym amû me jadjwÿ amijo amirît ne 'êx ne memã kum, “Ba ne ba Metîndjwÿnh kukwakam me amã idjujarēnh iba”, anhÿro ba. Dja me me aêrbê mÿjja pumûnh kêt kwÿ nhipêx, kute me noo biknor nhym me kute me'ã abenmã kum, “Mrãmri ne djãm Metîndjwÿnh kukwakam me kabēnkumrêx”, anhÿr kadjy. Godja me o me noo biknor ne Metîndjwÿnhbê meo akêx jabej. Metîndjwÿnh kute amrêbê amijo me utârja kubê meo akêx ne kute meo ba jabej. Me 'êxnhÿ no tÿxo kute me akrenh jabej, godja kubê me kwÿo akêx ne meo ba jabej. <sup>23</sup> Be, ar ga dja gar amijã ano tÿx ne. Ba ne ba mÿjja apôx kêttri kukãm ar amã arê gar arÿm ama. Nãm ã Jeju arkum ane.

24 Ne kam ajte arkum,  
—Nhyim me tokryo ku'êwã'ã akati apêxkam dja mÿjja rûnh apôx.

“Nhyim myt amijo akamât kô tyk nhyim mytyrwÿ irã kêt.

25 Nhyim kanhêti kâjkwa kurûm rôrôk nhyim kâjkwakam apÿnh mÿjja tÿ:x amingrêk ne.”

26 Ba kam ije amijo inhÿ dja ba arÿm prÿne itÿ:x ne prÿne imextire ne ipyma:. Ne kam kakrâkôt bôx nhyim me kunÿ: arÿm ibôxkôt ipumÿ. 27 Ba kam ikadjy mrânh djwÿnh jano nhyim me arÿm inhô me ja o atom. Ije amijo me utârja kunÿo atom. Dja me kwÿ kâjkwa krax'âm môn meo atomo mô. Nhyim me kwÿ kâjkwa 'ênhôt'âm môn meo atomo mô. Nhyim me kwÿ aktã kâjkwa nhirê'âm môn meo atomo mô. Dja me apÿnh pyka kunÿkôt inhô me ja kunÿ:o atom. Ba ne ba kukâm ar amã 'ã ajarê. Gora abej ajkam ama.

28 Be, akubyn ibôx djã nhô akatija'ã ne ba ije pidjôbê pigêre jakremã. Gora ije 'ã mÿjja jakreja ma. Ba ar amã arê gar ama. Dja pidjô pakà nokà tukam 'ô nhingrã kadjy arÿm INGRã apôx gar kam arÿm amexmã kamnhÿx nhyim kam arÿm amex. 29 Bir be, gêdja ba ije ar amã mÿjja jarênhja ã apôx môr ane gar kam arÿm ijabej rÿt ne ijabej ajkam ama. Akubyn ibôx djã arÿm 'ÿr. 'ÿr dja mÿjja apôxja. Amex kutã gêdja pi'ô INGRã. Nhyim be, ibôx kutã gêdja mÿjja pymatija apôx mô.

30 Nã, mrãmri ne ba ar amã kôt arê. Me akamingrãnyre ja gêdja gar atyk par kêtiri mÿjja ja kunÿ apôx. Mrãmri ne ba ar amã arê. 31 Ikabên kajgo kêtumrêx. Gêdja pykamê kâjkwa ï apêx. Nhyim be, ba ikabên gêdja 'ô biknor kêtumrêx. Mrãmri gêdja ba ije mÿjja jarênh ja kunÿ apôx nhyim me omÿ, ane.

*Me kute bôx djã nhô myt mar kêt.*

*Mat 24.36; Ruk 12.37; Tex k 5.2*

32 Ne kam ajte arkum,

—Be, ba akubyn ibôx djã nhô akati nâr myt djãm me'ô kute mar? Kati, me'ô kute mar kêtumrêx. Kâjkwakam kadjy mrânh djwÿnhdjwÿ kute mar kêt. Ibãmbit ne kute mar. 33 Dja gar ajaxwebê amijãno djan arek ijabej ajkam ama ne Metÿndjwÿnhmã amijo a'wÿ. Mÿkam? Bir, ar aje akubyn ibôx

djã'ã myt mar kêtum. 34 Ar aje akubyn ibôx djãkam myt mar kêt kute ô kikre djwÿnh nhô àpênh pyrâk. Ba ar amã arê gar ama. Be, ô kikre djwÿnh ne arÿm kurûm anhÿr bê tēmã. Ne kam ô àpênhmã kikre'ã karôn arkum apÿnh àpênh djã'ã karô. Ne kre nêje ku'ê djwÿnhmã kum, “Gora arek ijabej ajkam ama”, ane. Ne kam arÿm mã tē.

35 Kam dja gar gadjwÿ arek ijabej ajkam ama. Ba ne ba ije ô kikre djwÿnh pyrâk. Ar aje ibôx'ã myt mar kêt. Godja ba parakam ibôx jabej nâr akamât kô ipôkri ibôx jabej nâr ôkrên'ãnh kârkam ibôx jabej nâr kryrâm ibôx jabej. 36 Ar arek ijabej ajkam ama. Dja gar ate akrã ba ar ajaêrbê bôx gar ajmã nê. 37 Ar amã ne ba arÿm ibôx djã'ã karô. Jakam ne ba me kunÿmã 'ã karô. Me arek ijabej ajkam ama. Nãm ã Jeju me kukâm mÿjja apôx'ã arkum ane.

## 14

*Me'ô nire kute Jeju nhimôkkam kangô runh.*

*Mat 26.6; Dju r 12.1*

1 Be, Metÿndjwÿnh me irôbê mrânh nhô akati nêje arÿm akati pydji. Kam ne mebê idjaer kunÿ amex kunÿkôt aben pydji. Amrêbê: Metÿndjwÿnh me kukãmãre nhirôbê mrânh nhyim me kute aben kajmã'ã mar kadjy ne me aben pydji. Kamãdjwÿ ne me kute djwÿponhredit kur. Metÿndjwÿnh me irôbê mrânh nhô akati nêje akati pydji nhyim me kadjy Metÿndjwÿnh mar djwÿnh nhô bënjadjwÿrmê Môjdjê kukràdjã mar djwÿnhmê arÿm abenmã kum,

—Mÿj godja gwaj baje me krãptÿ kãxã Jejuo batÿm ne bÿnmã on? ane. 2 Ne ajte abenmã kum,

—Kwãrÿk wãnh gwaj me kute aben pydji djã nhô akatikam o batÿm kêt. Gwaj ren o ane nhyim me krãptÿ ren o ngryk ne ren kangao kumex, ane. Metÿndjwÿnh me irôbê mrânh nhô akatikam me krãptÿ bôxja ne me kuman ã Jeju'ã abenmã ane.

3 Be, krÿ ngrirebê Betanhakam ne Jeju nhÿ. Kamã ne me'ô ï kajêkam tē arÿm mex. Idjibê ne Ximão. Ûrkwãkam ne Jeju ô kwÿ krêno nhÿ. Ô kwÿ krêno nhÿ: nhyim me'ô ni arÿm 'ÿr tēn 'ÿr bôx. Nãm 'ÿr kēn jakareo

ngôn h byno tẽ. Ngôn h kam ne me kudjy dja kangôo ipu. Idjibê ne nadu. Nãm me prĩne ipêx mex nhym pãnh raxkumrêx. Nãm o tẽn o bôx ne 'ã kutan arým Jeju nhimôkkam kapĩ.

<sup>4</sup> Nhym bu'ã me ku'ê kwý kôt nokà nhàn abenmã kum,

—Je tô mýkam ne arým me kudjy djào ajkê? <sup>5</sup> Gwaj ren pi'ók kaprĩ kadjy ren memã kungã ne ren pãnh pi'ók kaprĩ rax ne ren kuby. Ren 'ã akrekam pãnhô denarju kubê 300 jakre. Gwaj ren pi'ók kaprĩ rax byn ren me ô mýjja kêt mã kungrà. Mýkam ne arým o ajkê? ane.

<sup>6</sup> Nãm ar anen nijamã akij. Nhym Jeju arým tu ar kabên man arkum,

—Kwãrĩk wãnh rã'ã. Mýkam ne gar kum kaprĩ jadjã? Djãm kute ijã kapĩnkam punu got? Kati, mexkumrêx. <sup>7</sup> Be, akati kunĩkôt ne ar abu'ã me ô mýjja kêt ar ba rã'ã. Ar aje memã mýjja nhôr prãm tu memã angã. Nhym djãm arek gwaj baro'ã ar baba rã'ãmã? Ba ar amã arê gar ama. <sup>8</sup> Dja ba ty nhym me arým ijadjã. Me kute ijadjãrmã ne nija kuma. Kuman arým kum ikaprĩn ijã me kudjy dja kapĩ. Nãm te kute mýjja mexo kute imex pyrãk ne kute imã ôrmãn arým tu ijã me kudjy dja kapĩ. <sup>9</sup> Ba ar amã arê gar ama. Dja me kàj bê pyka kunĩkôt mã memã ijã ujarênh ny jarên mã nijadjwý 'ã ajarê. Kute ijã me kudjy dja kapĩn'ã ajarê. Gédja me kam aben djô'ã nija mar rã'ã ne. Mrãmri ne ba ar amã arênhkumrêx. Nãm ã Jeju arkum ane.

<sup>10</sup> Nhym kam Djuda Ikadji, Jejukôt ba djwýnhbê 12 'ô ne me kadjy Metĩndjwýnh mar djwýnh nhô bẽnjadjwýr ar'ýr tẽ. Kute arkum Jeju kanga kadjy ne tẽ. <sup>11</sup> Ar'ýr tẽn ar'ýr bôx ne arkum,

—Arým ba ije ar amã Jeju kangamã. Nãm ã arkum ane nhym ar kuman arým kĩnhkumrêx ne. Ne arým kum kabên jarênh mãmdjin kum,

—Dja ga ã Jejuo ane bar kam arým amã pãnh pi'ók kaprĩ ngã, ane. Nhym kam amim,

—Mýj dja ba ije arkum Jeju kanga kadjy on? Nãm ã Djuda amim anhýro ba.

*Ar kute ro'ã ô kwý krêno ino rer.  
Mat 26.17; Ruk 22.7*

<sup>12</sup> Nhym kam mebê idjaer kukràdjãkôt me kute djwýponhbit kur nhô akati arým kutewa. Kam ne me apýnh úrkwãkam Metĩndjwýnhmã mrykĩ'ãtomti pan kuku. Amrêbê: Metĩndjwýnh me irôbê mrãnhja ne me kute kôt mar kadjy ã o ane. Nhym kôt ba djwýnh ar Jejumã kum,

—Metĩndjwýnh me irôbê mrãnh nhô akatikam gwaj banhô kwý krên kadjy jãm dja bar tẽn ar akutêp gwaj banhô kwý krên dja jadjwýr mex? ane. <sup>13</sup> Nhym arým kôt ba djwýnh amãnhkrutmã 'ã karôn arkum,

—Dja gar krĩraxkam tẽ. Nhym arým me'ô ngyo ngôn h kam ngô mýn o tẽ gar omũ. <sup>14</sup> Nhym arým kikremã wadjã gar kôt tẽn wadjã. Wadjàn ô kikre djwýnhmã kum, “Ujarênh djwýnh ne amã kabên ne amã, ‘Bamê ikôt ba djwýnhmẽ ne bar inhô kwý krên mã. Nãr kadjy inhô kumoka'ê? Aje me bôx nymã kumoka'ê jarênhja, nãr? Dja bar Metĩndjwýnh me irôbê mrãnh nhô akati mar kadjy mrykĩ'ãtomti krê.’ Nãm ã Bẽnjadjwýr amã ane”, ane. Be, dja gar ã ô kikre djwýnhmã ane. <sup>15</sup> Nhym kam kôjrũm kumoka'ê jabatãnh'ýr ar ajo tẽn ar amã akre. Kam ne gwaj bakutêp mýjja kunĩ nôr pro. Dja gar kam ikutêp gwaj banhô kwý krên dja jadjwýr mex. Nãm ã Jeju arkum 'ã karôo ane.

<sup>16</sup> Nhym kam kôt ba djwýnh 'ýr tẽ. Ne Jeju kute arkum kabên kôt arým mýjja kunĩmã katon arým kam mrykĩ'ãtomti gan ô kwý krên dja jadjwýr mex.

<sup>17</sup> Nhym arým ar'ã para nhym Jejumẽ Ar kubê 12 ro'ã kikre'ýr tẽn 'ýr bôx. <sup>18</sup> Ne kam arým nhỹ. Àkuro nhỹ nhym kam Jeju arkum,

—Ar ajô ikôt adjãkuro anhýrja dja ga ikurê djwýnhmã ikanga. Mrãmri ne ba ar amã arênhkumrêx, ane.

<sup>19</sup> Nhym kam ar arým kaprĩren apýnh ar ã djãri aben totokmã kum,

—Djãm ba? Djãm ba? ane.

<sup>20</sup> Nhym arým arkum,

—Be, ar abê 12ja 'ô, aje ikôt ngôn hkrãtikam mry kangômã djwý jadjãro anhýrja'ô dja ga memã ikanga. <sup>21</sup> Be, ba ije amijo inhĩ ne amrêbê me bakukãmãre ijã Metĩndjwýnh kabên no'ók nhym pi'ókkam me kute ijo anhýrmã arênh kôt ne me arým jakam

ar ã ijo anhÿro ba. Nhym be, kute ikurê djwÿnhmã ikanga djwÿnhja dja ï kute memã ikanga pãnh tokry rax ne. ÿ, watÿ:re. Tãmja ne ren rwÿk kêt ne. Nãm ã Jeju arkum ane. <sup>22</sup> Nhym ar àkuro nhÿ: nhym Jeju arÿm djwÿ'õ byn kam o Metÿndjwÿnhmã mextire jarê. Kum mextire jarên arÿm kokij ne apÿnh arkum kungã. Ne kam aminhÿ'ã djwÿ jakren arkum,

—Inhÿ ne ja. Ar abyn krê, ane.

<sup>23</sup> Ne kam ngônhrãkam pidjô kangôjadjwÿ byn kam o Metÿndjwÿnhmã mextire jarên arkum kungã. Nhym ar kunÿ o ikô.

<sup>24</sup> Nhym kam amikamrô'ã pidjô kangô jakren arkum,

—Ikamrô ne ja. Me krãptÿ kadjy dja ikamrô prôt. Metÿndjwÿnh ne arÿm ikamrô prôt'ã memã kabên ny jarên mãm dji, ane.\*

<sup>25</sup> Ba ar amã arê gar ama. Ije pidjô kangô ikômo krã'yr ne ja. Metÿndjwÿnh kute amim ò me ja kunÿ pytâr ne kute meo bakambit dja ba pidjô kangô nyo ikô. Mrãmri ne ba ar amã arênhkumrêx. Nãm ã Jeju arkum ane.

<sup>26</sup> Nhym kam ar ngre. Ngrén arÿm o ino re. Ngrero ino ren arÿm amÿ krãnhbê Oriwêre'ÿr mō.

*Pedru 'êx kukãm kute kum arênh.  
Mat 26.31; Ruk 22.31; Dju r 13.37*

<sup>27</sup> ÿr mō: nhym Jeju arkum,

—Be, akamãtja tãm kam dja me ijo ajkê gar me umaje aprôt ne ajmã. Amrêbê: ne me bakukãmãre ar aprôt ne ar abimãnh'ã ajarê. Metÿndjwÿnh kukwakam ne me ar ajã ajarên memã kum,

“Be, dja ba mrykÿ'ãtomtio ba djwÿnh titik nhym mry umaje prôt ne ajmã.”

Nãm me ã ar ajã ujarênho anen arÿm 'ã pi'òk no'òk ne. Be, akamãtja tãm kam dja gar me umaje aprôt ne ajmã. Me bakukãmãre kute ar ajã ujarên kôt dja gar aprôt ne ajmã. <sup>28</sup> Nhym kam me arÿm ibÿ. Ba ityk ne akubyn itÿnkam dja ba ar akukãm pykabê Garrêjamã tẽ, ane.

<sup>29</sup> Nhym Pedru kum,

—Godja ar kunÿ prôt ne bimãnh jabej ba dja ba arkôt iprôt ne imãt kêt ne, ane.

<sup>30</sup> Nhym Jeju kum,

—Kati, mrãmri dja ga arkôt aprôt. Ba amã arê ga ama. Akamãtja tãm kam ôkrên'ãnh kâr kêttri dja ga amijã maje ajêx pydji, nhym arÿm kã. Ga kam ajte amijã maje ajêxo amãnhkrut ne ijã memã kum, “Kati, ije me'õwã pumÿnh kêt kumrêx”, ane. Nhym ajte kã. Dja ga ã ijã memã ane. Mrãmri ne ba amã arênhkumrêx. Nãm ã Jeju kum ane. <sup>31</sup> Nhym Pedru kãj bê ajte kum,

—Gê me gu baro'ã gu babÿn jabej ba ije amijã maje ijêx prãm kêt kumrêx, ane. Nhym kam ar kunÿ ã kum ane.

*Pidjôkôkam Bãmmã amijo à'wÿr.*

*Mat 26.36; Ruk 22.40*

<sup>32</sup> Ne kam mō:n kam Jeju kôt pidjôkôbê Djexema'ÿr bôx. Nhym kam kôt ba djwÿnhmã kum,

—Jakam dja gar ikutêp nhÿ. Ba 'ÿr Metÿndjwÿnhmã amijo a'wÿ, ane. <sup>33</sup> Ne kam Pedrumê Xijagumê Djuão ar aprôn aro mō. Ne kam madjã kreti:n arÿm kaprÿ rax ne.

<sup>34</sup> Ne kam arkum,

—Ikaprÿ:re. Arÿm ikaprÿ kute ibÿn 'ÿr. Jãnh mãn ar idjêje nhÿ gwaj baro'ã aminêje barÿto nhÿ, ane.

<sup>35</sup> Ne kam amÿ tẽ. Tẽmo rãm ne ja ne tu mÿrbê tÿm. Tÿm ne arÿm Metÿndjwÿnhmã amijo a'uw. Kute tokry, kaprÿbê utâr prãm jabej kum amijo a'uw. Tokry 'ÿr bôx kêt jabej kum amijo a'uw. <sup>36</sup> Ne kum,

—Djÿnwã, djãm abê mÿjja'õ bipdjur? Kati. Aje mÿjja kunÿ nhipêx mar. Itokry, ikaprÿjabê ipytã. Nâr kon, kwãrÿk wãnh rã'ã ba tu itokry. Djãm ba ne ba amimarkôt ar amijo iba? Kati, akabênkôt ne ba ar amijo iba, ane.

<sup>37</sup> Ne kam kãjmã djan ar amãnhkrut ne ikjêkêtja'ÿr akêx ne tèn ar'ÿr bôx. Nhym arek ar ôto ikwã. Nhym Pedrumã kum,

—Je, Ximão, djã nã gãm arek anhôto nõ? Kraxje kô 'iry kêt ne ga anhôto nõ, ane.

<sup>38</sup> Ne ar kunÿmã kum,

—Ar aminêje rÿt ne Metÿndjwÿnhmã amijo a'wÿ. Gêdja me te axwe'ã ar amã apnê gar mekôt ajaxwe kêt. Ja kadjy dja gar kum amijo a'wÿ. Be, ar anhôkre kadjwÿnhbê ne gar amã ikabênja kÿnh. Nhym

\* **14:24** Mrãmri ne Jeju kamrô prôt nhym Metÿndjwÿnh arÿm 'ã memã kum, “Arÿm ne ikra tyn kamrô prôt. Jakam dja me tu amim ikra markumrêx ba kam arÿm me axwe maro aknon mekam ingyk kêt ne.” Nãm ã Metÿndjwÿnh memã ane.

be, ar aminêje arîtbê ne gar arerekren anhôtdjwa ne, ane.

<sup>39</sup> Ne kam ajte amũ tẽn Metîndjwýnhmã amijo a'uw ne kute ôbê kum kabên jarênhja kôt ajte kum tãm jarê. <sup>40</sup> Ne kam ajte akubyn ar'ÿr akêx ne tẽn ar'ÿr bôx. Nhyim ar nokà bã mex ne. Ajte arek ôto ikwã. Rerek mex ne arek ôto ikwã nhyim ar tok nhyim ar te kute kum kabênmã umaro nhÿ.

<sup>41</sup> Nhyim kam ajte amũ tẽn Metîndjwýnhmã amijo a'uw. Kum amijo a'uw ne ajte ar'ÿr akêx ne ar'ÿr tẽn ar'ÿr bôx. Ne arkum,

—Je, djãm arek ar anhôto anhikwã rã'ãã, akôkam kôto anhikwã? Aj, arÿm itokry djã iwÿr bôx 'ÿr. Ota, arÿm kute me axwemã ikangamã, ije amijo inhÿja ne kute memã ikangamã. <sup>42</sup> Kàjmã ar dja. Gwaj on me'ÿr. Ota, arÿm kute memã ikanga djwýnh bôx, ane.

*Me kute Jejuo tÿm.*

*Mat 26.47; Ruk 22.47; Dju r 18.3*

<sup>43</sup> Ne kute arkum anhÿro ãm rã'ã nhyim Djuda arÿm 'ÿr bôx. Jeju kôt ba djwýnhbê 12 'ô ne kubê Djuda. Nãm 'ÿr bôx nhyim me krãpti me:x ne kôt môn 'ÿr bôx. Nãm me kàxdjwa kajgomê kô jamÿn kadjy o môn o bôx. Me rÿnh ne me me ano. Me kadjy Metîndjwýnh mar djwýnh nhô bënjadjwÿrmê mebêngêtmê ne me me ano nhyim me 'ÿr bôx. <sup>44</sup> Me 'ÿr môr kêtiri ne kute memã kanga djwýnhbê Djudaja memã kum,

—Be, ije me'ô nhine kaôrkôt dja ga me omÿn arÿm o tÿm ne pa 'amÿ. Nãm Djuda arÿm ã memã ane. <sup>45</sup> Ne kam 'ÿr tẽn 'ÿr bôx ne kum, “Ujarênh djwýnh”, anen arÿm ine kaô.

<sup>46</sup> Nhyim kam me arÿm 'ÿr môn 'ÿr bôx ne o tÿm ne arÿm pa 'amÿ. <sup>47</sup> Nhyim me kadjy Metîndjwýnh mar djwýnh nhô bënjadjwÿr raxja nhô àpênh mekôt tẽ. Nhyim bu'ã me ku'êja 'ô ne arÿm ô kàxdjwa kajgo kaban o me'ôjamã akabên amak ta, bënjadjwÿr nhô àpênhja jamak ta.

<sup>48</sup> Nhyim kam Jeju me krãptijamã kum,

—Je djãm idjàkĩnhÿ ne ga me aje ijo atÿm kadjy iwÿr anhô kômê anhô kàxdjwa kajgomêo mō? Myt kunikôt ne ba ar Metîndjwýnh nhô kikretikam ikrÿ, ar memã idjujarênh o ikrÿ ga me kam kam ijo atÿm

kêt ne. <sup>49</sup> Mÿkam ne ga me ijo tÿm? Bir, amrêbê: ne Metîndjwýnh kukwakam kabên jarênh djwýnh me bakukãmãremã me ajã ajarê. Me aje ijo atÿm'ã ajarên arÿm 'ã pi'ôk no'ôk ne. Nhyim me arÿm aben djô'ã arênh o mō. Arênh o môr tãmtã arÿm iwÿr o bôx. Tũ:mrãm me bakamin-grãnyrekam arÿm iwÿr o bôx. Ba ar iba: ga me arÿm jakam ã ijo ane. Me kute me bakukãmãremã me ajã ujarênh kôt ne ga me arÿm jakam ã ijo atÿmo ane. Nãm ã Jeju me krãptimã ane.

<sup>50</sup> Nhyim kam kôt ba djwýnh kunÿ mã amijã maje prôt ne. <sup>51</sup> Me'ô abatãnh ny ne kute kubêkã pydjio amikupuja Jeju kôt tẽ. Rinhuo ne kubêkã. Nhyim me kwÿ adjwýnhdjwÿo tÿm ne kubê kubêkã 'amÿnh tÿx. <sup>52</sup> Nhyim arÿm amikaban amikôt kubêkãmã iren tu kajgo mã prôt ne.

*Me kute axwe jabej kukjêr.*

*Mat 26.57; Ruk 22.66; Dju r 18.12*

<sup>53</sup> Nhyim me arÿm Jejuo mō. Me kadjy Metîndjwýnh mar djwýnh nhô bënjadjwÿr rax'ÿr ne me o mō. Nhyim arÿm me rÿnh kunÿ abeno akuprô. Me kadjy Metîndjwýnh mar djwýnh nhô bënjadjwÿrmê mebêngêtmê Môjdjê kukràdjã mar djwýnhmê ne me arÿm akuprô. Nhyim me Jejuo môn o bôx ne arÿm me rÿnh kabem kudja. <sup>54</sup> Nhyim be, Pedru ne Jeju kôt tẽ, nÿjar kum kre rax ne tẽ. Nhyim me kadjy Metîndjwýnh mar djwýnh nhô bënjadjwÿr rax nhô kikre nhipôkri kênh ngrire nhyim Pedru arÿm Jejukôt wadjã. Ne arÿm bënjadjwÿr nhô krãkamngônemê ro'ã ànhÿho nhÿ.

<sup>55</sup> Nãm me me'ÿr Jejuo bôx nhyim kam me rÿnh arÿm me 'êxnhÿ jabej. Me kadjy Metîndjwýnh mar djwýnh nhô bënjadjwÿrmê mebêngêtmê me rÿnh kunÿ ne me me 'êxnhÿ jabej. Dja me amãnhkrut Jeju'ã 'êx ne memã kum,

—Ba ne ba axwe kôt omũ. Nãm ã ane ba omũ, ane. Dja me ane nhyim me arÿm me kabên man arÿm we axwe'ô pãnh kubÿ. Kadjy ne me me 'êxnhÿ jabej. Ne te abejo dja. Me'ô ar amãnhkrut kute axikôt 'ã kabênja ne me te abejo dja. <sup>56</sup> Nhyim me 'êxnhÿ krãpti ne me kãjmã ku'ên arÿk aben kupa'ãbit axwe jarênh o kumex.

<sup>57</sup> Nhyam kam me'ô ar ja arým kàjmã djan 'êx ne 'ã kabên jarên memã kum,

<sup>58</sup> —Tãmwã ne memã kum, “Be, me kute ikrao Metĩndjwýnh nhõ kikreti nhípêxja dja ba kungrà. Ne kam Metĩndjwýnh nhõ kikreti 'ôdjwý nhípêx. Me kute ikrao ipêx kêtja'ô dja ba ipêx. Nhyam ije ipêxo idjãm'ã akati amãnhkrut ne ikjêkêtbit apêx ba ipêx pa.” Nãm ã Jeju memã ane bar arým kuma, ane. <sup>59</sup> Ne kam ar jadjwý kute memã arênhkam axikôt Jeju'ã kabên jarênh kêt ne arĩk aben kupa'ãbit arê.

<sup>60</sup> Nhyam kam me kadjy Metĩndjwýnh mar djwýnh nhõ bẽnjadjwýr raxja arým kàjmã djan me ipôkri djan Jeju kukijn kum,

—Ga, ar kabênja ma. Djãm aje aminêje akabên'ô jarênh prãm kêtikumrêx? On imã amikôt amijarê, ane. <sup>61</sup> Nhyam tu anhikrê.

Nhyam me kadjy Metĩndjwýnh mar djwýnh nhõ bẽnjadjwýr rax aje kukijn kum,

—Djãm abê me babê idjaer nhõ Bẽnjadjwýrbê kumkati, nêñ? Djãm mrãmri abê Kritu? Djãm abê Metĩndjwýnh Kra? ane.

<sup>62</sup> Nhyam Jeju kum,

—Kôt ne ga imã arê. Ba ar amã arê gar ama. Gêdja ba ã Metĩndjwýnh pymati djubôk'ãnh nhỹ. Ba ije amijo inhĩ gêdja ba ubôk'ãnh nhỹ. Ibẽnjadjwýr raxkam ubôk'ãnh nhỹ gar ipumũ. Ne kam aje kakrãkôt amrê kãjkwa kurũm itêmkôt ipumũ, ane.

<sup>63</sup> Nhyam kam me kadjy Metĩndjwýnh mar djwýnh nhõ bẽnjadjwýr rax kute memã amingryko amirĩt kadjy arým amibê kà kadjô. Amibê kà kadjôn arým memã kum,

—Ë, arým ne Metĩndjwýnh japrý. E kum kwãrĩk wãnh gwaj ijukri me'ô kute axwe kôt omũnhja jabej kêt. <sup>64</sup> Gwaj bakunĩ ne gwaj arým kute Metĩndjwýnh japrýja ma. Ta ne amijo Metĩndjwýnh rax pytãn arým o aprý gwaj kuma. Kute gwaj bamã, “Metĩndjwýnh djubôk'ãnh inhỹrkôt dja gar ipumũ”, anhỹrkôt ne gwaj arým kuma. Arým ne gar ama. Mýj dja gwaj nê? ane.

Nhyam me kupãnhã 'ã kum,

—Gê me on kubĩ. Gê me on kubĩ, ane.

<sup>65</sup> Nhyam kam me kwý nokre kutôn rĩtbê nokre'ã pron aje nokrebê tak ne. Ne kute takmê ro'ã kum,

—Nhyam ne akurwa? Goja me'ô pumũn imã arê, ane. Nhyam krãkamngôn arým 'ã akuprôn tako kumex.

*Pedru aminêje 'êx.*

*Mat 26.69; Ruk 22.55; Dju r 18.15*

<sup>66</sup> Nhyam wãnh Pedru kikreti parbê ànhũho nhỹ. Ànhũho nhỹ: nhyam me kadjy Metĩndjwýnh mar djwýnh nhõ bẽnjadjwýr rax nhõ àpênh nija arým 'yr bôx.

<sup>67</sup> Ne omũn prĩne omũnh mex ne kum,

—Tukwa, gadjwý ne ga Jeju kôt ar aba. Krĩraxbê Nadjarekam Jejukôt ar aba, ane.

<sup>68</sup> Nhyam aminêje 'êx ne kum,

—Kati, ije akabênwã mar kêtikumrêx, ane. Ne kam tẽn kre tã dja nhyam kôt arým ôkrên'ãnh kà. <sup>69</sup> Nhyam bẽnjadjwýr nhõ àpênh nija aje omũn bu'ã me ku'êmã kum,

—Tãmwãdjwý ne kôt ar ba, ane. <sup>70</sup> Nhyam aje aminêje 'êx ne kum, “Kati”, ane. Nhyam kãjbê 'ãtũm nhyam bu'ã me ku'êja kum,

—Be, mrãmri ne ga kôt ar aba, ane. Abê pykabê Garrêja kra'ô. Garrêjakam me kabên kôt akabênja ma. Bar kôt aman arým amã ikato, ane. <sup>71</sup> Nhyam memã kum,

—Kati. Mrãmri ije me'ôwã pumũnh kêtikumrêx. Aje me'ô jarênhwã ije omũnh kêt, ane. Ne kam me'ô kute kum anhỹr kêt mã amikangrôn memã kum,

—Dja ba ijêxnhĩ jabej gê Metĩndjwýnh pãnh ijo akno. Ta ne arým ijêxnhĩ kêt kôt ima, ane. <sup>72</sup> Nãm ane nhyam totokbê aje ôkrên'ãnh kà. Nhyam kam Pedru akubyn amijo tẽn amrêbê Jeju kute kum kabên jarênhja ma. Kute kum,

—Ôkrên'ãnh kãr kêttri dja ga amijã maje ajêx pydji nhyam arým kà. Ga kam amijã maje ajêxo amãnhkrut ne ijã memã kum, “Kati, ije tãmwã pumũnh kêt”, ane nhyam aje kà, anhỹrja ne arým kuma. Nãm maro dja nhyam arým rerekre 'yr bôx. Rerekre 'yr bôx nhyam arým mu:w.

## 15

*Piratu kute we axwe jabej kukjêr.*

*Mat 27.1; Ruk 23.1; Dju r 18.28*



1 Nhyam kam me'ã akati, kryràm nhyam apÿnh me rÿnh djari akuprôn arÿm aben kabên ma. Me kadjy Metÿndjwÿnh mar djwÿnh nhô bÿnjadjwÿrmê mebêngêtmê Môjdjê kukràdjà mar djwÿnhmê me rÿnh kunÿmê ne me Jejuo aben ma. Ne kam arÿm uwpreu Piratu'ÿr o môn 'ÿr o bôx. 'ÿr o bôx ne kum kanga. 2 Nhyam kam Piratu arÿm kukij ne kum,

—Djãm abê mebê idjaer nhô bÿnjadjwÿr rax? ane.

Nhyam kum,

—Kôt ne ga aje arênhwã, ane.

3 Nhyam kam me kadjy Metÿndjwÿnh mar djwÿnh nhô bÿnjadjwÿr ar arÿk Jeju'ã axwe krãptÿ janhô. 4 Nhyam tu anhikrê. Nhyam Piratu kum,

—Ë ama. Djãm ajaxwe krãre ne me amã arê? Djãm aje aminêje akabên'ô jarênh kêtumrêx? ane.

5 Nhyam kum kabên 'ô jarênh kêtumrêx. Nhyam Piratu te kute marmã kam no tyn nhÿ.

6 Be, me irôbê mrãnh nhô akatija tãmkam ne mebê idjaer krãptÿ: arÿm aben pydji. Me kute aben kajmã'ã Metÿndjwÿnh me kukãmãre nhirôbê mrãnh mar kadjy ne me aben pydji. Amex kunÿkôt ne bÿnjadjwÿr raxbê Piratu akati jakam mebê ijê djà kurÿm mebê ijê pÿnh ne meo pôx nhyam me mã mrã. Me kute me'ô'ã à'wÿrja ne me kÿnh kadjy bôm kumê. 7 Ajbir me'ôbê ijê ne idjibê Baraba. Me kute kubê ijê kÿtri ne me jakôt me bÿnjadjwÿr'ÿr prôt ne me kwÿ pa. Nhyam kam me arÿm kubê ijê.

8 Nãm Piratu Jeju kukjêro dja: nhyam kam me krãptÿ: arÿm kàj bê Piratumã me'ôbê ijê jarê ne kum,

—Aje mekbê ijêwã'ô kaba gê arek ar me ikôt ba, ane.

9 Nhyam arÿm Jeju'ã memã kum,

—Me abê idjaer, we me anhô bÿnjadjwÿr rax ne ja djãm ije me amã kum inhirermã? ane. 10 Be, Piratu kute memã ja jarênh kÿtri ne arÿm me kadjy Metÿndjwÿnh mar djwÿnh nhô bÿnjadjwÿr ma. Nãm ar'ã amim,

—Jeju'ã me krãptÿkam ne me rÿnh 'ã ngryk ne imã kanga, ane. Ne kam bit kute kum irermã ã me krãptÿmã ane. 11 Nãm 'ã memã kum,

—Djãm ije me anhô bÿnjadjwÿrmã inhirermã? ane. Nhyam me kadjy Metÿndjwÿnh mar djwÿnh nhô bÿnjadjwÿr ar memã kum,

—Kwãrÿk wãnh me amã Jeju kÿnh kêt. Dja ga me kum Baraba jarê gê kaba, ane. Nhyam me kàtàm krãptÿ Piratumã kum,

—Kwãrÿk wãnh Jejumã anhirer kêt. Baraba dja ga kaba, ane.

12 Nhyam kam Piratu memã kum,

—Be, ga me abê idjaer, aje tãmwãmã anhô bÿnjadjwÿr rax jarênhja mÿj dja ba kam on? ane.

13 Nhyam me kàj bê kum, “Pÿte'y'ã anhô”, ane.

14 Nhyam Piratu memã kum,

—Mÿkam? Mÿj ne ajmã o ne ba ije pÿte'y'ã nhôrmã? ane.

Nhyam me kàj bê kum,

—Pÿte'y'ã anhô. Pÿte'y'ã anhô, ane.

15 Nhyam kam me kÿnhmã Piratu Baraba kaba nhyam arÿm arek ar mekôt ba. Nhyam kam Piratu krãkamngônhamã Jeju jarê. Me kute kaprêprêk kadjy memã arê. Nhyam me arÿm mrykà punuo kaprêprê:k ne. Kaprêprêk nhyam Piratu arÿm memã kangan memã arê. Me kute pÿte'y'ã nhô kadjy memã arê.

*Krãkamngôn kute 'ã bÿno bikênh.*

*Mat 27.27; Dju r 19.2*

16 Nhyam kam me krãkamngôn amÿ bÿnjadjwÿr nhô kikretimã Jejuo môn o wadjà. Kumoka'ê nhidjibê Pretorimã o môn o wadjà. Ne kam me krãkamngôn kàtàm kunÿ jadjwÿ o akprô nhyam me kunÿ arÿm 'ã aben pydji. 17 Me kute 'ã bÿno bikênh kadjy ne me 'ã akuprô. Ne kam inôkà ryti kamrêkja byn arÿm Jejumã adjà. Ne mrÿnhÿo kajkep ne ikãx ne kum kutu. Nãm me arÿk bÿnjadjwÿr rax krãdjê'ã mrÿnhÿ jakren ikãx ne arÿm kum kutu.

18 Ne kum kabêno kute me rÿnhmã me kabên pyrãk ne kum,

—Ga we abê mebê idjaer nhô bÿnjadjwÿr rax, gora kribêm atÿn 'iry, anhÿrkôt 19 po'êo krã môn kutôn parbê kônkrão krÿ. Nãm me parbê kônkrão krÿo kute me bÿnjadjwÿr rÿnh parbê kônkrão krÿja pyrãk. 20 Ne kam arÿm 'ã bÿno ajkÿn inomã kumÿn arÿm kubê inôkà ryti kamrêkja kaban akubyn kum ô kubêkà djwÿnhja jadjà. Ne kam kute pÿte'y'ã nhôrmã o katon o mÿ.

*Me kute pîte'ykam nhôr.*

*Mat 27.32; Ruk 23.26; Dju r 19.17*

<sup>21</sup> Nhyim me'ôbê Ximão tē. Pykabê Xireni kra 'ô. Kute Arexārimē Rupu ar ir. Arwā kurūm ne tēn bit me'ānh tēmā. Nhyim me krākamngôn arým Jeju nhô pîte'y'ã kum àpnēnh tỳx. Kum 'ã àpnēnh tỳx nhyim arým kadjy kumỳn o mō. <sup>22</sup> Nām me krānhrebê Gogota'yr Jejuo mōn 'yr o bōx. Me bakabēnkam ne gu me ren krānhremā me krā'i jarē. <sup>23</sup> Nhyim kam me pidjô kangôkam pīdjybê mirao akān Jejumā kungā nhyim arým kanga. <sup>24</sup> Nhyim kam me pîte'y'ã kunhō nhyim wajêt. Nhyim kam me apỳnh kute ô kubêkà jamỳnh kadjy kēn kryre rē. Me kute ari kēn rēnhkôt ne me amijo kubêkà pytà.

<sup>25</sup> Arým kājimā myt nhỹrkam. 9 orakam ne me pîte'y'ã kunhō. <sup>26</sup> Ne kam 'ã pi'ôk no'ôk ne. Pi'ôkkam ne me memā kum,

—Mebê idjaer nhô bēnjadjwỳr rax ne ja, ane. Me kunī kute omũnh kadjy ne me Jeju nhimôkri kunhō. Me kute we Jeju jaxwe 'ô pānh pîte'y'ã jêtja pumũnh ne kute mar kadjy ne me pi'ôk no'ôk ne imôkri kunhō. <sup>27</sup> Ne kam ar àkĩnhĩ amānhkrutja Jeju nhikrebê pîte'y'ã ar kunhō. Nhyim arým ar wajêt. Jeju ôkredjākôt wajêt nhyim aktā ar axweja ijēn wajêt. <sup>28</sup> Amrēbê: ne me bakukāmāre'ô memā ja jarēn 'ã pi'ôk no'ôk ne. Nām memā kum,

“Dja me 'ã abenmā kum, ‘Nām me o axwen me axwemē ro'ã kubī’, anhỹro dja.”

Nām ā pi'ôkkam memā ane. Nhyim kam me aben djô'ã arē. Arēnho mōr tām̄tā tũ:mrām arým 'yr o bōx. Me bakukāmāre kute memā arēnh kôt ne me arým ar axwejamē ro'ã ar anhôrkumrēx nhyim me arým 'ã arēnhkumrēx. <sup>29</sup> Nhyim me 'ānh mōrja nokā nhān kum kabēn punu:re ne kum,

—Be, ga: ne ga we aje Metīndjwỳnh nhô kikreti ngrānh ne akubyn ipēxmā. Nhyim aje ipēxo adjām'ã akati amānhkrut ne ikjêkēt we aje ipēx parmā. <sup>30</sup> Goja amiptān pîte'y kurūm rwỳ, ane.

<sup>31</sup> Nhyim kam me rũnh arīk 'ã bēno ajkē. Me kadjy Metīndjwỳnh mar djwỳnh nhô bēnjadjwỳrmē Mōjdjê kukrādja mar djwỳnhmē ne me arīk 'ã bēno ajkēn abenmā kum,

—Amūbit ne me utā. Ne kam te kute amiptār prāmje. <sup>32</sup> Goja gē mrāmri kubê Kritukumrēx jabej goja mrāmri kubê mebê idjaer nhô Bēnjadjwỳrbê kumkatikumrēx jabej on pîte'y kurūm rwỳ. Gwaj goja kôt omũn arým tu amim markumrēx. Nām me rũnh ā abenmā ane. Nhyim ar aktā pîte'y'ã jêtjadjwỳ Jejumā àkjêro wajêt.

*Tyk kadjy ne ja.*

*Mat 27.45; Ruk 23.44; Dju r 19.28*

<sup>33</sup> Nhyim arým kājkwā nhipôkri myt nhỹ. Nhyim kam tu akamāt kô tyk ne. Pyka kunīkôt me'ã akamāt kô tyk ne. Nām me'ã akamāt kô tykkam myt kyn kyn kyn ky: nhyim 3 orakam, amykrykambit arým ajte myt no pôt ne. Arým ajte myt kato. <sup>34</sup> Kato nhyim mebê idjaer kabēnkam Jeju kāj bē kabēn ne Bāmmā kum,

—Eroi: Eroi: rama xabatani, ane. Nām ren me bakabēn kam kum,

—Inhō Metīndjwỳ:nh, inhō Metīndjwỳ:nh, mykam ne ga arým ikanga? ane.

<sup>35</sup> Nhyim parbê me ku'ēja kabēn man arīk abenmā kum, “Ē, Erijmā ne kabēn”, ane.

<sup>36</sup> Nhyim kam me'ô prôt ne ngôn puror pōnh djā jakritaja byn pidjô kangô kadjāmā adjā. Nhyim kam kangô ipu nhyim pī nhidjamā adjān kājimā kum kungā, kute kaôr kadjy. Nhyim me'ô ar kum,

—Adjỹm, gē goja me bakukāmārebê Erij 'yr bōx ne goja o rwỳk jabej, ane.

<sup>37</sup> Nhyim kam Jeju kāj bē kabēn ne ate ty.

<sup>38</sup> Be, nhyim kam arým Metīndjwỳnh nhô kikreti kadjwỳnhbê kubêkātija ta amikadjô. Nām nhôr djā'ānh amikrax ne e y: ne kraxmā amimē.

<sup>39</sup> Nhyim krākamngôn krāptī: kubê 100 nhô bēnjadjwỳr pîte'y parbê dja. Nhyim Jeju kāj bē kabēn ne ty nhyim arým omũ. Omũn arým memā kum,

—Be, mrāmri ne me'ô jabê Metīndjwỳnh Krakumrēx, ane.

<sup>40</sup> Nhyim me niredjwỳ amybỳm omũnho dja. Nhyim Marij Madarenamē Marij, kurūm Jôdjemē Xijagu ar apôxjamē Xirôwemē ne ar me ikô'ã dja. <sup>41</sup> Amrēbê, Jeju pykabê Garrêjakam ar bari ne ar nireja mā kôt ajkamēn o djuw mexo ba. Nhyim ar ja bu'ã me nire krāptīdjwỳ amybỳm omũnho

dja. Jeju ajbir krîraxbê Djeruxarê'ÿr tēm kam ne me nireja kôt mōn bōx.

*Arÿm adjār kadjy ne ja.*

*Mat 27.57; Ruk 23.50; Dju r 19.38*

<sup>42</sup> Jeju ty. Ty nhy m kam amykry mex ne. Amykry mex nhy m me arÿm no katon ò mÿjja kupênhō kumex. Pi'òk rārār djwÿnh rām ò mÿjja kupênhō kumex. <sup>43</sup> Nhy m Jòdje arÿm bōx. Krîraxbê Armatêkam ne Jòdje abatānh djā. Nām me rÿnh bikprōnh djākam me kôt rax nhy m me kum kÿnh. Nām amiwÿr Metÿndjwÿnh kamnhÿx ne. Metÿndjwÿnh bōx ne me kadjy bēnjadjwÿr ne kute ar meo bamā ja ne amiwÿr kamnhÿx ne. Jòdje kum Piratu puma kêt ne 'ÿr tēn 'ÿr bōx ne Jeju 'ā kuma. <sup>44</sup> Nhy m arÿm kam no tyn nhÿn kum, “Je, djām arÿm ne ty”? ane. Ne kam amiwÿr krākamngōnh nhō bēnjadjwÿr 'uw nhy m bōx. Bōx nhy m arÿm kukij ne kum, “Djām arÿm ne ty”? ane. <sup>45</sup> Nhy m kum, “Nā”, ane. Nhy m kam arÿm Jòdjemā Jeju jarē. <sup>46</sup> Nhy m kam rinhuo kubēkà 'ò byn 'ÿr o tē. 'ÿr o tēn 'ÿr o bōx. Ne kam arÿm pîte'y kurūm Jejuo ruw. O ruw ne arÿm kubēkào kupun kam kēnkre'ÿr o tē. Me kute kēnkre kakrwÿnhja'ÿr o tēn kam arÿm kam adjā. Ne kam kēnpoti ajkwa krekre'ā kudja. <sup>47</sup> Nhy m Marij Madarenamē Marij kurūm Jòdje katorja arÿm omū.

## 16

*Akubyn tÿn kadjy ne ja.*

*Mat 28.1; Ruk 24.1; Dju r 20.1*

<sup>1</sup> Nhy m kam pi'òk rārār, me tyk djā kêt djā nhō akati apêx nhy m ar arÿm pi'òk kaprÿ pānh me tyk nhō pÿdjÿ kwÿ by. Marij Madarenamē Marij kurūm Xijagu katorjamē Xirōwemē ne ar kadjy pÿdjÿ kwÿ by. Kēnkre'ÿr tēm ne kute o Jeju djymā ne ar kadjy kwÿ by. <sup>2</sup> Nhy m kry:rām, pi'òk kamrēkkam, kraxje akati mex kêt kam ar kēnkre'ÿr tē. Tē: nhy m arÿm myt kato nhy m ar arÿm o rām ne ja. <sup>3</sup> O rām ne jan arÿm abenmā kum,

—Mÿj me'ò dja gwaj bamā jām ajkwa krekre'ā kēnpoti dja? ane. Kēn jabatānhkam ne ar ā abenmā ane.

<sup>4</sup> Abenmā anen kam rÿt ne omū nhy m arÿm amijā kuta. <sup>5</sup> Nhy m kam ar 'ÿr tēn

arÿm kēnkremā wadjā. Nhy m kadjy mrānh djwÿnh'ò kute me'ò jabatānh ny pyrāk ne nhÿ. Nām inòkà jaka ryti jadjān nōr djā djubòk'ānh nhÿ. Nhy m ar wadjān arÿm omū. Ne te umaje.

<sup>6</sup> Nhy m arkum,

—Kwārÿk wānh ikam ar atÿn prām kêt. Jeju Nadjarekam abatānh ja me kute pîte'y'ā nhōr ne bÿnja ne gar abej tē. Jakam arÿm nōr kêt. Nām akubyn tÿn ne kato. Gar nōr djā kaprÿja pumū. <sup>7</sup> Be, amū ar tēn kôt ba djwÿnhmā arē. Ne arkôt Pedrumā arē. Ne arkum, “Arÿm ne ar akukām pykabē Garrēja'ÿr tēm mā. Dja gar kam tēn arÿm omū”, ane. Dja gar ā arkum ane. Amrēbē kute ar amā arēnh kôt ba arÿm ar amā arē. Nām ā kadjy mrānh djwÿnh ar niremā ane.

<sup>8</sup> Nhy m ar katon mā kēnkre kurūm prōt ne. Te umaje tertetkam prōt ne. Tÿn prām kam ne me'òmā kabēn kêt ne tē.

<sup>9</sup> Be, akubyn tÿn kam kryrām, pi'òk kamrēkkam ne Jeju Marij Madarena kumrēxmā amijo amirÿt ne. Be, me karō punubē 7 ne Marijo ba nhy m Jeju amrēbē ano nhy m kum ire. <sup>10</sup> Nām Marijmā amijo amirÿt nhy m arÿm kôt ba djwÿnh'ÿr tēn ar'ÿr bōx. Nhy m ar kaprÿ:ren mÿro nhÿ. Nhy m arÿm ar'ÿr bōx ne arkum 'ā ajarē. <sup>11</sup> Nām arkum Jeju tÿn jarēn kute omūnh'ā ajarē. Nhy m ar kuman arÿm abenmā kum, “Nām 'êx”, ane.

<sup>12</sup> Nhy m kam ajte ar jamā kute amijo amirÿtmā tē. Nām kôt ba djwÿnh amānhkrut arwāmā tē. Tē nhy m arÿm atemā aminhipêx. Ne kam kute atemā me'ò pyrāk ne arkum amijo amirÿt ne arkôt tē. <sup>13</sup> Nhy m kam ar akubyn Djeruxarē'ÿr tē. Kôt ba djwÿnh'ā kàtāmja'ÿr tēn ar'ÿr bōx ne arkum 'ā ajarē. Nhy m ar abenmā kum, “Kati, nām ar 'êx”, ane. <sup>14</sup> Nhy m kam ajte Ar kubē 11mā amijo amirÿt. Ar ò kwÿ krēno nhÿ nhy m arkum amijo amirÿt ne arkum bēn tÿx ne arkum,

—Nām ar akubyn itÿnkôt ipumūn ar amā ijā ajarē gar ar'ā abenmā kum, “Nām ar 'êx”, ane. Tô mÿkam ne gar tu amim imarkumrēx kêt? Djām ar ajamakkreja kêt? ane.

<sup>15</sup> Ne kam ajte arkum,

—Apÿnh me ba djà kunĩkôt dja gar mõn kàj bê me kunĩmã ijã adjujarẽnh ny jarẽnho mõi. <sup>16</sup> Dja me tu amim imarkumrẽx nhym me Metĩndjwÿnhmã ngõmã me angij. Nhym arÿm me utà. Nhym be, me kute amim imar kêt dja Metĩndjwÿnh arÿm pãnh me kanga. <sup>17</sup> Nhym me kute tu amim ikamnhĩxkumrẽx dja me mÿjja pumũnh kêt nhipêx. Me kute Metĩndjwÿnh raxmã katõr kadjy ipêx. Ne me karõ punu kute meo baja jano nhym me karõ memã ire. Dja me apÿnh me bajtem kabẽnkam kabẽn. <sup>18</sup> Godja me kangã djàkrê by. Me kute mar kêt kam kangã djàkrê by nhym arÿm ajmã meo kêt. Nàr, te mÿjja kanêo ikõ nhym ajmã meo kêt. Dja me me kanê krã'ã ikra jadjuw nhym me arÿm à kêt ne, ane.

<sup>19</sup> Bẽnjadjwÿr djwÿnh Jeju memã ane nhym Metĩndjwÿnh arÿm kàjkwamã amiwÿr o wabi. Nhym arÿm ra:x ne Metĩndjwÿnh djubõk'ãnh nhÿ. <sup>20</sup> Nhym kam kôt ba djwÿnh arÿm amũ mõi pyka kunĩkôt kàj bê memã 'ã ujarẽnh mõi. Nhym Bẽnjadjwÿr djwÿnh mã arkum tÿx jangij nhym ar arÿm mÿjja pumũnh kêt nhipêxo mõi. Me kute ar'ã abenmã kum,

—Mrãmri ne djãm ar Metĩndjwÿnh kôt kabẽnkumrẽx? anhÿr kadjy ne ar mÿjja pumũnh kêt nhipêxo mõi.

## Ruka Teopiremã Jeju'ã ujarēnh ne ja.

Rukadjwý ne prīne Jeju'ã ajarē. Rwyk krax kurūm ne 'ã ujarēnh tēn àbir'ānh o ino re. Rukabē ne me kane djwýnh. Nhym Paur Jeju'ã ujarēnh kadjy apýnh me ò pyka djàri'ýr mrã. Nhym Ruka kôt ar mrã. Ne kam me'òbē Teopiremã me bakunī kadjy pi'òk no'òk ne. Teopirebē idjaerkam me'ò kêt. Kumã ne Ruka Jeju'ã pi'òk no'òk ne. Nãm prīne me kute Jeju'ã ujarēnh kunīkôt kuman prīne kabin kam 'ã kum pi'òk no'òk ne. Adjwýnhdjwýmã pi'òkbē *Metīndjwýnh Karõ Kute Meo Baja'ã* kum pi'òk no'òk ne.

### *Ruka Teopiremã amijarē.*

<sup>1-4</sup> Aj, Teopire, ba ne ba wãm amã pi'òk no'òk ne. Ba ibē Ruka ne ba wãm amã pi'òk no'òk ne. Me kunī ne me kum akīnh ne amex jarē ba badjwý imã akīnh ne wãm amã pi'òk no'òk ne.

Me krãptī ne me arým 'ã pi'òk no'òk ne, Jeju me ikam ar ba'ã ne me pi'òk no'òk ne. Me kute kraxrūm noo Jeju pumūnh ne memã kabēn'ã ujarēnh, me tãm ne me me imã arē nhym me amũ me ijuk'ã 'ã pi'òk no'òk ne.

Ba kam badjwý inhõkre kadjwýnhbē,

—Be, mexkumrēx. Badjwý dja ba 'ã pi'òk no'òk nhym kam mexkumrēx, ane.

Mrãmri ne ba me'ýr tē, me kute noo Jeju pumūnhja'ýr tē. Me'ýr tēn prīne abej me kukij ne kam Jeju kraxrūm prīne mýjja kunī maro tēn inomã kumēn mar týx ne. Mar týx ne kam amã 'ã pi'òk no'òk ne. Dja ba prīne mýjja kraxrūm amã kôt 'ã idjujarēnh tē, aje prīne marmã. Me kute òbē amã arēnh ga aje katàt maro atēmmã ne ba badjwý mekôt amã 'ã pi'òk no'òko tē, aje omūnh ne aje amim,

—Mrãmri ne me katàt imã Jeju jarē, anhýr kadjy. Kadjy ne ba amã 'ã pi'òk no'òk ne.

### *Djakarij krabē Djuão rwykmã.*

<sup>5</sup> Be, ē, ije amã katàt Jeju'ã idjujarēnh kadjy dja ba amã Djakarij kumrēx jarēn kam ijukri amã Jeju jarē. Mekbē idjaer nhõ pykabē Djudējakam me kadjy Metīndjwýnh

mar djwýnh 'õ nhidjibē ne Djakarij. Nhym Djakarij nhingēt kukãmã nhidjibē ne Abij. Ne kam prōdjwý idjibē Ixabeu, kubē ne Arão tàmdjwý 'õ. Nhym bep me ò bēnjadjwýr nhidjibē ne Erodji ne memã nhý. <sup>6</sup> Nhym Djakarijmē prō ar amē mrãnh katàt nhym Metīndjwýnh arkam kīnhkumrēx ne. Nãm ar prīne Metīndjwýnh kabēnkôt amijo ba, Metīndjwýnh kute memã me katàt amijo ba'ã karõjakôt amijo ban kute 'õ kudjar kêtumrēx. ãm ar mexkumrēx. <sup>7</sup> Nhym bep Ixabeu kra kêt ne te kra prãme ar ba, mjēnmē ro'ã te ar ari kra prãme ba ne arým kubēngē:tte.

<sup>8-9</sup> Be, me kute me kadjy Metīndjwýnh mar ne me Metīndjwýnh nhõ kikretikam àpēnh tē, apýnh me ingēt me kajmã'ã àpēnh'ýr ngiēnh djàri ne me me kudjwa Metīndjwýnhmã àpēnh tē. Nãm me ja kumrēx mytyrwý 'òkam 'ýr wadjàn kam apē:n kato. Nhym pãnh me ja ajte mytyrwý 'òkam 'ýr wadjàn kam kum apē:n kam kato. Nãm ã meo anhýro tē. Nhym kam mekbē Abij me ja pãnh 'ýr wadjàn Metīndjwýnhmã àpēnh ba. Nhym Djakarij, kubē me kadjy Metīndjwýnh mar djwýnhkam mekôt Metīndjwýnhmã àpēnh ku'ê. Nhym me kute Metīndjwýnhmã kikre kudjý djà bõr kadjy kēn mēre à'ak ne kurēn kôt 'ýr wangij nhym Djakarij kukràdjà jakôt ate Metīndjwýnh nhõ kikretimã wadjà, kute kikre kudjý djà bõrmã. Ate ne me kudjwa 'ýr wadjà ne kum kubõ.

<sup>10</sup> Nhym kute kum bõrkôt me kunī kikreti kabem Metīndjwýnhmã kabēno ku'ê. <sup>11</sup> Nhym Djakarij bõro dja nhym aērbē Metīndjwýnh kadjy mrãnh djwýnh 'õ nokam kato. Nãm tu kikre kudjý djà bõr djà jakýxkôt 'ýr kato. <sup>12</sup> Nhym omūn kam umar punuren kum uma ne, kute ajmã o karõ ne kum uma. <sup>13</sup> Nhym kam kum,

—Djakarij, kwārīk wānh atīn prãm kêt. Arým ne Metīndjwýnh aje amijo adjà'wýr ma. Dja on aprõbē Ixabeu tujarõ gar amim akra my mý. Akra my mýn kam kum idji Djuão jarē. <sup>14</sup> Dja gar tu akī:nhkumrēx ne. Nhym me krãptī ar akôt kīnhkumrēx, ar akra rwykkam kīnhkumrēx. <sup>15</sup> Nhym Metīndjwýnh kadjy godja akra rax ne kam kabēn mexkumrēx ne. Godja uba

kangô djâkrêo kôm kêt, nâr atemã kadjwati kangô\* 'ôo kôm kêt. NhyM Metîndjwýnh Karô raxo akra kadjwýnhbê nhÿn ar o ba, nã tikkrekam jêt rã'ã dja Metîndjwýnh Karô mrãmri o ba.

<sup>16</sup> NhyM mekbê idjaer krãptĩ dja me ô Bënjadjwýr Metîndjwýnh 'ÿr amijo akêx, akra kabênkôt 'ÿr amijo akêx. <sup>17</sup> NhyM akra dja Bënjadjwýr kukãm tẽ, kute memã bôx djã'ã ujarênh nhyM me kute kadjy amijo mexmã dja kukãm tẽ. NhyM Metîndjwýnh Karô dja mrãmri o ba nhyM uma ne, kute mrãmri ne Metîndjwýnh Karô kute Erijo ba nhyM umaja pyrâk. Dja akra memã arê nhyM me nãmê me bãm akubyn kum kra jabê. NhyM ate ajte memã arê nhyM me amakkre kêtja dja me akubyn katât mrãn arÿm ajte kabên mexkumrêx. Dja akra ã memã ane nhyM me arÿm Metîndjwýnh kadjy amijo mex. Nãm ã kadjy mrãnh djwýnh Djakarijmã kabên jarênh o ane.

<sup>18</sup> NhyM kam kum,

—Gêt kon ne. Mÿjkôt dja ba akabên ma? Arÿm iprômê ar ibêngette. Djãm ar ijabatãnh ny godja bar ikra mÿ?

<sup>19</sup> NhyM kam kum,

—Ba ibê Gabrijeu ne ba Metîndjwýnh kabem dja. Ije amã kabên jarênhmã ne ijano ba awÿr tẽ. Mÿjja mextire ije amã arênhmã ne ijano ga ate “Kon ne” ane. <sup>20</sup> Aje amim ikabên mar kêtumrêx pãnh gêdja ga akabên kêt nhyM akra ruw. Dja akra nhô akati 'ÿr bôx nhyM ruw ga kam ijukri akabên, ane. Nãm ã Gabrijeu kum ane.

<sup>21</sup> NhyM me kam kapôtã te Djakarij kam ama:, te bôx nhyM me kute kukràdjã 'ô marmãnh kam abenmã kum,

—Ije tô mÿj got ar o ba? ane.

<sup>22</sup> NhyM kam arÿm katon te kute memã kabênmã. NhyM me,

—Arÿm ne Metîndjwýnh nhô kikretikam mÿjja 'ô pumũ, ane.

NhyM tu ikrao memã ujakreo djan kabên kêt mex ne.

<sup>23</sup> Ne kam ar âpênh ba:n arÿm inomã kumên kam katon akubyn ûrkwãmã tẽnh bôx. <sup>24-25</sup> Bôx nhyM kãjbê 'âtũm nhyM kam prôbê Ixabeu tujarôn kam pijãm ne kam

kikre bu'ãbit mrã. Kute amirît kêt'ã mytyrwÿ amãnhkrut ne amãnhkrut ne ikjêkêt, pijãm djãje, tujarôkam. Nãm,

—Ota Bënjadjwýr ipumũn kum ikaprĩn arÿm ijo mex. Jakam dja me ijã kabên kêt ne, ane.

*Marij kurũm Jeju rwÿkmã kum arê.*

<sup>26-27</sup> NhyM kam arÿm tujarô'ã mytyrwÿ amãnhkrut ne amãnhkrut ne amãnhkrut nhyM Metîndjwýnh ajte kadjy mrãnh djwýnhbê Gabrijeu jano, Marij'ÿr ano. Marij kurererkam ne kra kêtumrêx, me'ô 'ÿr môr kêtum. NhyM bep me'ôbê Jôdje ne kum kabên kajgo, kraxje 'ÿr môr kêt. NhyM bep Jôdje nhingêt ne Dawi. Apÿnh ne me ô pyka nhyM bep tu pyka abenã tÿm nhidjibê ne Garrêja. NhyM bep kam krĩ 'ô nhidjibê ne Nadjare. Krĩ jakam ne Metîndjwýnh Marij'ÿr Gabrijeu jano. <sup>28</sup> NhyM arÿm 'ÿr tẽnh bôx ne kum,

—Marij, djãm ga? Metîndjwýnh ne arÿm akam ukaprĩn ajo ba, ane.

<sup>29</sup> NhyM Marij Gabrijeu kabên man axwe amikam umar ne ôkre kadjwýnhbê amim,

—Mÿj kabên got ja? ane.

<sup>30</sup> NhyM kam kum,

—Kwãrĩk wãnh, Marij, atĩn prãm kêt. Mrãmri ne Metîndjwýnh akam kĩnhkumrêx.

<sup>31</sup> Ota, dja ga on atujarôn kam akra mymÿn kam kum Jeju jarê. <sup>32</sup> Godja akra bënjadjwýr rax ne ar meo ba nhyM kam me 'ã abenmã kum, “Metîndjwýnh pymati kra”, ar o ba. Gêdja Bënjadjwýr Metîndjwýnh Jeju'ã bënjadjwýr rax mẽ nhyM kam ar meo ba. Ingêtbê Dawi bënjadjwýr rax djô'ã dja rax ne ar meo ba. <sup>33</sup> Tãm godja tũmrãm mekbê idjaer kadjy bënjadjwýr ne ar meo ba. Dja bënjadjwýr rã'ã rã'ãn ar meo ban o ino rer kêtumrêx, ane. Nãm ã kadjy mrãnh djwýnh kum ane. <sup>34</sup> NhyM kam kum,

—Godjãm me'ô iwÿr môr kêtjakam ba ije ikra mynhmã. Mÿj godja imã ikra dji? ane.

<sup>35</sup> NhyM kam kum,

—Metîndjwýnh Karô dja awÿr ruw. Metîndjwýnh pymati Karô dja awÿr ruw. Djãm tãwãbê mÿjja tÿx? Ta gêdja tu amã akra jadjã nhyM akurũm kato. Ne kam prĩrerũm mrãmri mexo tuknĩn mexkumrêx.

\* **1:15** Mÿjja me kute o kôm ne kôt bibãnh kunĩja, kadjwati kangômê uba kangômê, mÿjja kangô kunĩ ne me kum kadjwati kangô jarê.

Kam axwe 'õ kêtukumrêx. Nhyim me kam kum Metĩndjwýnh Kra jarê.

<sup>36</sup> Ota anhõbikwa Ixabeu te kubêngêtte ne arým tujarõ. Me kute Ixabeumã kra kêt jarênh ar o baja ne arým tujarõ. Adjwýnhdjwý ne kra my wajêt nhyim arým jêt'ã mytyrwý amãnhkrut ne amãnhkrut ne amãnhkrut. <sup>37</sup> Djãm Metĩndjwýnhbê mýjja 'õ bipdjur got? ane. Nãm ã kadjy mrãnh djwýnh kum ane. <sup>38</sup> Nhyim kam kum,

—Ã, mrãmri. Ibê Metĩndjwýnh nhõ àpênh tũm. Gora gê akabênkõt ã ijo ane, ane. Marij ã kum ane nhyim arým mã kurũm tẽ.

### *Marij Ixabeu'ýr bõx.*

<sup>39-40</sup> Nhyim kam Marij no kator mex ne mã Ixabeu'ýr tẽ, kute omũnhmã 'ýr tẽ. Pykabê Djudêjakam krĩ 'õ'ýr tẽ. Kam ne krãnh kumex. Nhyim tẽn bõx ne Djakarijmẽ Ixabeu ar ũrkwãmã wadjàn kam Ixabeumã kabên. <sup>41</sup> Kum kabên nhyim Ixabeu kute kabên marmẽ ro'ã kraja Marij kabên man kam kĩnh ne kàjmã amijã te. Nã tikkrekam kàjmã amijã te.

Nhyim kam Metĩndjwýnh Karõ raxo Ixabeu kadjwýnhbê nhýn ar o ba <sup>42</sup> nhyim kàj bê kabên ne kum,

—Metĩndjwýnh ne arým ajo kĩnh, me nire kunĩ kurãm ajo kĩnh ne. Ne atikkrekam akra jêtjadjwý o kĩnhkumrêx ne. <sup>43</sup> Xô kum djãm ibênjadjwýr rax ne Metĩndjwýnh kute ijo kĩnhmã iwýr inhõ Bênjadjwýr nã jano? ane. Arým ne inhõ Bênjadjwýr nã iwýr bõx ba arým ikĩnhkumrêx ne. <sup>44</sup> Ê, ga imã akabên, ba akabên ma nhyim kam ikra kĩnhkumrêx. Itikkrekam jêtja kĩnhkumrêx ne kam kàjmã amijã te, ba kam amã ikabên jarê. <sup>45</sup> Ô kwep akĩnhkumrêx. Bênjadjwýr ne arým amã kabên ga tu amijã akra kamnhĩxkumrêx ne amim, “Mrãmri, Metĩndjwýnh kabênkõt dja ikra rwýkkumrêx”, ane. Kam ne ga akĩnhkumrêx ne. Nãm ã Ixabeu Marijãm ane.

### *Marij kute Metĩndjwýnhmã mex jarênh.*

<sup>46-47</sup> Nhyim kam Marij kutã kum kabên ne kàjmã Metĩndjwýnhmã rax jarênhõ dja, ne, —Dja ba mã Bênjadjwýrbê Metĩndjwýnhmã rax jarênh kõt kum amikĩnh jarê.

Metĩndjwýnhbê ipytàr djwýnhkam ne ba ikĩnh raxkumrêx, ikadjwýnhbê ikĩnh ne kam kum amijarê.

<sup>48</sup> Metĩndjwýnh ta ne kum ikaprĩn ijo amiptàn kam imã kĩnh jadjà.

Djãm adjàkam irax tũm? Xô kum kati, ingrire. Æm ibê õ àpênh kajgokumrêx. Ingridre nhyim kam tu Bênjadjwýr ijo amiptàn kam imã ikĩnh rax jadjà.

Jakam dja kamingrãny amũ aben nhijuk'ã abenmã ikĩnh jarênhõ tẽ, ikĩnh rax jarênhõ tẽ.

<sup>49</sup> Ga prĩne kute ijo kĩnhja pumũ. Djãm Metĩndjwýnh rerek got? Axwe týx. Ga kute mýjja pumũnh kêt imã o amirĩtja pumũ.

O ne imã ikĩnh jadjà. Mrãmri ne tãwã mexkumrêx. Nãm mexo uma.

<sup>50</sup> Ne mekam ukaprĩkumrêx. Me kute Metĩndjwýnh kabên mar ne kõt kute ar amijo baja mekam ne ukaprĩ.

Nhyim kamingrãny amũ me banhijuk'ã amũ maro tẽ nhyim Metĩndjwýnh me kamdjwý ukaprĩ, me banhijuk'ã me kamdjwý ukaprĩ tẽ.

<sup>51</sup> Bep me kute amijo àmraja, me kute õkre kadjwýnhbê,

“Ba ne ba ibênjadjwýr rax, ba ne ba irax”, anhýrja, memã ne arým amimao pôx ne kàjbê me kumẽ.

<sup>52</sup> Ne me bènjadjwýr rũnh memã ýrja me tãm ne tu arým meo kàtãm ne, ne kam pãnh me kute amijo kàtãmja, me kute amijo àmra kêtjao bènjadjwýr rũnh ne.

<sup>53</sup> Ne kam ajte me õ mýjja kêt, me kum prãmja ne mýjja mextireo memã ajne ne o me kĩnhõ ba.

Ne kam pãnh me õ pi'òk kaprĩ rũnh, me õ djwý krãptĩja arým meo ajkên aminêje me ano nhyim me ýkam ar ba.

<sup>54</sup> Metĩndjwýnh kute amrêbê me bakukãmãremã katat arênhkõt ne arým me baman kum me bakaprĩ.

Ne me babê idjaer, me babê õ àpênhja ne kum me bakaprĩn me bawýr ruw ne amikõt me bajo mõn me bajo djuw mex ne ar me bajo ba.

<sup>55</sup> Amrêbê ne me banhingêt Abraãomã kabên ne kum kaprĩ, me bakajmã'ã

kum kaprĩ ne kam kôpdji'ã me baman kum me bakaprĩ. Dja kum me bakaprĩ rã'ã rã'ã ne.

Nãm ã Marij kum kabẽno ane. <sup>56</sup> Ne kam Ixabeu kuri dja: nhym kam 'ã mytyrwý amãnhkrut ne ikjêkêt nhym arým mã tẽ, mã õ pykamã tẽn bõx.

*Djuão rwýk'ã ujarẽnh.*

<sup>57</sup> Nhym kam Ixabeu kra rwýk djã nhõ akati arým 'ýr bõx nhym kam kra my ruw. <sup>58</sup> Nhym kam õbikwa kuman arým kĩnhkumrẽx. Nhym atãri ar ùrkwãkam me jadjwý kuman kam kôt kĩnhkumrẽx. Metĩndjwýnh kam ukaprĩ raxkôt kuman kam kudjwa kĩnhkumrẽx ne. <sup>59-60</sup> Nhym kam arým kra rwýk'ã pi'ók kamrêk pydji nhym me kute my nhinhu kà krã'ymã bit kute kum Djakarij jarẽnhmã, bit kute kum bãm nhidji jarẽnhmã nhym nã memã kum,

—Xô kum kati, idjibê ne Djuão, ane.

<sup>61-62</sup> Nhym me kam kum,

—Je tô mykam? Nhýnh ne anhõbikwa 'õ ã idji ane? anen kam bãm'ýr akẽx ne kum ikrao ajakre. Idji jabej kukjêr kadjy ne me bãmmã ikrao ajakre.

—Mã ne aje kum idji jarẽnhja kute? ane.

<sup>63</sup> Nhym kam bãmja kute memã idji no'ók kadjy myjja'ã me ku'uw nhym kam me kum o tẽ nhym kam memã idji no'ók ne,

—Idjibê ne Djuão.

Nhym me omũn kam ari aben pumũn abenmã kum,

—Je tô mykam? Mýj got ja? ane.

<sup>64</sup> Nhym Djakarij kute idji no'ók mẽ ro'ã arým ajte kabẽn ne kam Metĩndjwýnhmã mextire jarẽho dja. <sup>65</sup> Nhym kam ar õ krõkam me ja tĩn prãm ne kam abenmã arẽho ipõk ne. Pykabê Djudêjakam apýnh krãnhrekam me õ krĩkam ne me abenmã arẽho ipõk ne. <sup>66</sup> Nhym me kam kuma:n ar o ba, Metĩndjwýnh kute ar krao bakam ne me mar ar o ban kam abenmã kum,

—Mã gẽdja abatãnh ne kute? ane.

*Djakarij kute Metĩndjwýnhmã mex jarẽnh.*

<sup>67</sup> Nhym kam Metĩndjwýnh Karõ raxo bãmbê Djakarij kadjwýnhbê nhýn ar o ba nhym amũ Metĩndjwýnh djõ'ã kabẽn jarẽho dja ne Jeju kumrẽx'ã ajarẽ. Jejubê bẽnjadjwýr rax ne kubê mekbê idjaer pytãr djwýnh'ã ajarẽ. Ne kam ijukri Djuão

jarẽ. Nhym bep Jeju kumrẽx ne 'ã ajarẽ ne memã kum,

<sup>68</sup> —E kum me babê idjaer nhõ Bẽnjadjwýr mexkumrẽx. Ba gop me amã me banhõ Bẽnjadjwýr, me banhõ Metĩndjwýnh mextire jarẽ.

Mýkam? Bir, nãm ta õ me ba djwýnh'ýr ruw, kute me bapytãrmã ne me bawýr ruw.

<sup>69</sup> Kute umao ar me bapytãr ne me bajo ba kadjy ne arým me bamã me bapytãr djwýnh jano. Ingêt kukãmãre ne Dawi, õ ãpẽn tũmja.

Ingêt kukãmãrebê Dawi jabatãnh djãkam ne me bakadjy nõ.

Abatãnh ne kute umao me bapytãr ne ar me bajo ba kadjy arým ingêt jabatãnh djãkam nõ.

<sup>70</sup> Me kute Metĩndjwýnh kabẽn jarẽnh djwýnh kabẽn kôtõ.

Amrêbê ne Metĩndjwýnh kute kabẽn jarẽnh djwýnh mexkumrẽx jamã kabẽn jarẽnh kôt ne arým me bamã ano.

<sup>71</sup> Kute me bakurê djwýnhbê me bapytãrmã, me kum me bakurê ne kute me bajo bajabê me bapytãrmã ne Metĩndjwýnh me bawýr ano.

<sup>72</sup> Nãm me bakukãmãremã kabẽn pydjın arẽn memã kum,

“Dja ba imã me akaprĩ”, ane.

Dja ba amikabẽn mexja mã kuman o ibi-knor kêt, ane ne kam kôt me bawýr ano.

<sup>73</sup> Nãm ã me bakukãmãrebê Abraãomã kabẽn pydjın arẽho anen kam katãt kôt kuma.

<sup>74</sup> Kute me bakurê djwýnhbê me bapytãr, gu me badjumar mex ne arek ar baban kum badjãpẽnã.

<sup>75</sup> Me bamextire ne katãt bamrãnh ne kum badjãpẽnã. Me batĩnri Metĩndjwýnh kabem kribêm ar me babao rãm ne mũ jamã ne kum arẽ.

Nãm ã Abraãomã kabẽn jarẽho anen kam katãt kôt kuman me bawýr me bapytãr djwýnh jano, Bẽnjadjwýr jano, ane.

Nãm ã Djakarij memã Jeju jarẽho anen kam ajte kramã kabẽn jarẽ, krabê Djuãomã 'ã karõ, Djuão Jeju kukãm tẽmmã 'ã kum karõ ne kum,



76 —Bep ga, akmere, ga dja ga Běnjadjwỳr kukām těn kutěp me akre gē me kuman Běnjadjwỳr kam amakbē katāt amijo ba.

Kute mrāmri ne me kute me běnjadjwỳrmā katāt pry djirja pyrāk. Gēdja me ajā, “Metīndjwỳnh Pymati kaběn jarěnh djwỳnh ne ja”, ane.

77 Nā, ga dja ga kukām těn memā arē. Ta kute ō me ja pytār ne ar meo bamā memā arē. Mā ne me bapytār o?

Apỳnh me bajaxwe djāri kute tu o bingrānh ne me bakam ngryk kētmā. Kute ā ukaprikōt me bapytāro anhyrmā.

78 Mrāmri ne me Batīn djwỳnh kum me bakapri rax ne. Ne kam kājkwā kurūm me bapytār djwỳnh me bawỳr ano.

Kute me bamā irā djā pyrāk. Kute mrāmri ne myt kute me bamā irān kute me bakurwỳja pyrāk ne me bawỳr ano.

79 Me kum tyk pyma, me tīn prāmja ne me kute mrāmri ne me akamāt kō tykkam me krīja pyrāk.

Nhym bep me bapytār djwỳnh dja me jamā tīn prāmo ajngra. Ga akati kute akamāt kō nhipōnhja pumū.

Dja ā me bamā me batīn prām, me bamā batyk pyma ā o bingrānhō ane gu me kam badjumar mexkumrēx ne ar baba. Tām ne ja.

Nām ā Djakarij kramā 'ā karōo ane, Jeju kukām tēm ne kute kutěp me akremā.

80 Nhym kam kra arỳm kāj mā krā těn kam Metīndjwỳnh kabēnkōt amijo ba. Kute kōt amijo ba rā'ān abatānh. Ne kam kapōt kukritkam ar ba. Ō akati kutěp ne kapōt kukritkam ar ba. Kute mekbē idjaermā amijo amirīt nhō akati amiwỳr kam amakbē kapōt kukritkam ar ba.

## 2

### *Jeju rwỳk'ā ujarěnh.*

#### *Mat 1.18*

1 Nhym kam běnjadjwỳr raxbē Xedja Agujtu memā kaběn jarē. Xedja Agujtu ne me kunīmā nhỹ. Nām memā kaběn jarěn memā kum,

—Me akunī, pyka kunīkōt dja ga me anhingēt nhō pyka'ỳr aba gē me me anhidji'ā

pi'ōk no'ōk, ba ije me ajā akre kadjy, ane.

2 Me kute me idji'ā pi'ōk no'ōko kutewa kadjy ne ja. Nhym Xirēnhu, běnjadjwỳr bajtem, pykabē Xirijkam memā nhỹ. Kam ne me kute běnjadjwỳr raxbē Xedja Agujtu kabēnkōt me idji'ā no'ōkmā.

3 Nhym kam me kunī apỳnh krī djāri'ỳr ajmā. Apỳnh me ingēt nhō pykakam abatānh djāri'ỳr ajmān kam bōx. Bōx nhym me kam me idji'ā pi'ōk no'ōko tē.

4-5 Nhym kam Jōdjemē Marij ar adjwỳnhdjwỳ me kudjwa ingēt nhō pyka'ỳr tē, ingētbē Dawi rwỳk djā'ỳr ne ar tē. Arỳm ne kum kaběn ne. Kraxje 'ỳr mōr kēt rā'ā. Nām kum kaběn kajgo. Tu pyka abenā mēnh nhidjibē ne Garrēja ne kam apỳnh ne krī djāri idji. Garrėjakam krī nhidjibē ne Nadjare. Kurūm ne ar tē. Marij arỳm tujarō tỳx nhym ar tē. Atemā ajte pyka 'ō tu abenā tỳm nhidjibē ne Djudēja. 'Ỳr ne ar wabi ne kam tē:n kam krībē Berē'ỳr bōx. Ingētbē Dawi rwỳk djāmā těn bōx, ō pyka nhidjibē Berēmā těn bōx, me kute ar idji'ā pi'ōk no'ōkmā. 6-7 Nhym kam me kumex ne prīne Ar kubē kikre kre jaē. Nhym kam kra rwỳk djā nhō akati arỳm 'ỳr bōx nhym kra my ruw. Kra kutewa ne ruw. Nhym Marij kubēkào kupun o těn mryti djākur djākam kudji, me kute prīne Ar kubē kikre kre jaērkam.

### *Mry pumūnh djwỳnh Jeju'ỳr bōx.*

8 Nhym krī nokā'ā ne mry nhō kapōt. Nhym arỳm akamāt. Nhym kam mry nhō kapōtkam ar kute mry pumūnh djwỳnhja ō krit pumūnhō dja. 9 Nhym kam Metīndjwỳnh kadjy mrānh djwỳnh ar nokrekam kato nhym Metīndjwỳnh jadjēnh prīne ar kurwỳ ne arkum ipōk ne. Nhym arkum uma ne kam madjā tertet ne.

10 Nhym kam kadjy mrānh djwỳnh arkum,

—Kwārīk wānh, ar amā uma kēt. Ota ba ije ar amā mỳjja mex jarēnhmā tē. Ē, me akīnh djā ne arỳm me akadjy kato. Me akunī akīnh kadjy, akīnh raxmā. 11 Ē, akamāt ja tām kam ne me apytār djwỳnh arỳm me akadjy ruw. Dawi nhō pykakam ne ruw. Kubē ne Kritu, kubē ne Běnjadjwỳr djwỳnh. 12 Tām ne ajbir rwỳk nhym nā kute

kubêkào kupun mryti djàkur djàkam irwã. Kute kubêkào kupun mryti djàkur djàkam irkôt dja gar kum akaton kam omũ, ane. Nãm ã Metĩndjwýnh kadjy mrãnh djwýnh arkum ane.

<sup>13</sup> Nhyam kam ar aêrbê kàjkwa kurũm Metĩndjwýnh me ano, amikadjy mrãnh djwýnh jano nhyam katon kumex, kumrêx kator jakôt ne me katon kumex ne kam Metĩndjwýnhmã mextire jarêho kumex ne mry pumũnh djwýnhmã o amra,

<sup>14</sup>—Kàjkwakam ne Metĩndjwýnh me:xkumrêx, tỳ:xkumrêx, uma:kumrêx.

Gora gê me kunĩ kàjmã kum mex jarêho tẽ. Arým ne pykakam me wãmã umar mex jarê.

Gora gê ò me wãkam kĩnhwã umar mex ne ar ba, ane.

<sup>15</sup> Nãm ã Metĩndjwýnh kadjy mrãnh djwýnh anen kam mã ar kurũm kàjkwamã wabi. Nhyam kam ate mry pumũnh djwýnh abenmã kum,

—Gêtò gwaj gop Berẽmã mõn goja karàkôt omũ. Bẽnjadjwýr djwýnh kute gwaj bamã arênhja pumũ, anen kam 'ýr prõt ne.

<sup>16</sup> Prõt ne Marijmẽ Jòdje ar'ýr kato nhyam mryti djàkur djàkam nõ, ngrire ne nõ nhyam ar omũ. <sup>17</sup> Nõrkôt omũn kam memã arêho ajkate. Kadjy mrãnh djwýnh kute mry pumũnh djwýnhmã arênhja, kute Marij kra jarênhja ne me memã arêho ajkate.

<sup>18</sup> Nhyam me kuman kam abenkam no tyn kumex ne abenmã kum,

—Mýj gotja? Mýkam got Metĩndjwýnh kadjy mrãnh djwýnhja katon kumex? anen ari aben pumũnho akêx. <sup>19</sup> Nhyam bep ãm Marij ta kute kraxkôt mar ne amikam mýjja kunĩ ma:ro tẽn 'õo biknor kêt ne.

<sup>20</sup> Be, nhyam kam mry pumũnh djwýnh kapôtã akêx. Kadjy mrãnh djwýnh kute arkum arênhkôt ne ar karà nõrkôt omũ. Kõnh ne arkum kudji nhyam ar mýjja kunĩ pumũn kuman kam Metĩndjwýnhmã mex jarêho mõ. Ne kàjmã kum rax jarêho mõn kum,

—Metĩndjwýnh, gajbit ne ga apydjin adjukapri, amex, arax, atýx, anhýro mõ.

*Ar kute Metĩndjwýnhmã Jeju djar.*

<sup>21</sup> Nhyam kam arým 'ã akati amãnhkrut ne amãnhkrut ne amãnhkrut nhyam ar my nhinhu kà krãtan kam ajte

kum idji Jeju jarê. Tikkrekam jêt kêtri Metĩndjwýnh kadjy mrãnh djwýnh kute kum idji jarênhja ne kum arê. <sup>22-24</sup> Nhyam kam akati krãptĩ nhyam ar krĩraxbê Djeruxarê'ýr o tẽ. Ar kute Bẽnjadjwýr djwýnhbê Metĩndjwýnhmã armã ne ar o tẽ. Metĩndjwýnh kabên'ã pi'òk no'òkkam ne memã,

“Me akra my kutewa gêdja axidjuw ga me Bẽnjadjwýr djwýnhmã me umjuw, kute o aminhõmã”, ane.

Kôt ne ar kute Djeruxarẽmã Jejuo tẽm ne kum armã. Ar adjwýnhdjwý kute Metĩndjwýnhmã mry bõmã. Arým ne Marij kamrò ngràn kam kute Mòjdjê kukràdjakôt Metĩndjwýnhmã mry djàr ne kum òrmã. Amrêbê ne Mòjdjê Metĩndjwýnh kabên'ã pi'òk no'òk ne memã kum,

“Ë, dja ga me akamrò ngràn kam Bẽnjadjwýr djwýnhmã tutte amẽ agan kum angã, nàr tutti no tỳr nyre amẽ abĩn kum aga”, ane.

Jakôt ne ar kute kum àr ne òr nhyam nãja akubyn Metĩndjwýnhmã mex ne ò kikretimã àrmã Djeruxarẽmã o tẽ.

<sup>25</sup> Nhyam bep Djeruxarẽkam me'õ mybê Ximião. Mrãnh katàt ne Metĩndjwýnh kabênkôt ar amijo ba. Nãm arek mekbê idjaer pytàr djwýnh, memã kapri rênh djwýnh, Kritukam ama. Nhyam Metĩndjwýnh Karõ ar o ba. <sup>26</sup> Ar o ban kam arým kum,

—Ë, atĩn rã'ã dja ga Metĩndjwýnh kute anorja'ýr bõx ne omũ. Kute me apytàrmã ne ano, kubê ne Kritu, tãm dja ga omũ, anhýtã 'ýr bõx ne anoo omũ, ane. Nãm ã Metĩndjwýnh Karõ Ximiãomã ane nhyam kuman ar o ba.

<sup>27</sup> Ne kam Metĩndjwýnh nhõ kikreti'ýr tẽ. Metĩndjwýnh Karõ ne ano nhyam tẽ. Kumrêx ne ar kukãm tẽn bõx. Nhyam Jeju nãmẽ bãm arkôt 'ýr o bõx. Ar kute me amikukràdjà tũmkôt Metĩndjwýnhmã armã ne ar 'ýr o tẽn o wadjà. <sup>28</sup> Nhyam Ximião omũn kumýn kam Metĩndjwýnhmã mextire jarên kum amikĩnh jarên kum,

<sup>29</sup> —Bẽnjadjwýr djwýnh, jakam dja ga on imã ityk nhõ akati jarê, ba ibê anhõ àpênh dja ba wãm awýr tẽ, aje imã arênhkôt.

Arým ne ba omũn arým ikĩnhkumrẽx  
ne arým idjumar mexkumrẽx ne.  
Jakam dja ba idjumar mexbê ty, aje  
imã arẽnhkõt.

<sup>30</sup> Ga ga arým me utàr djwýnh jano ba inoo  
omũ.

<sup>31</sup> Anhÿr djwýnhràr aje arẽnhja ne ga arým  
memã o akato nhym me kunĩ pyka  
kunĩkõt omũ.

<sup>32</sup> Me utàr djwýnhja ne kute a'u pyràk. Dja  
apÿnh me bajtemja no bô nhym me  
katàt mrã.

Nhym kam ajte me ibê idjaermãdjwý kĩnh  
jadjà. Kõt dja me me imã me ikĩnh  
jarẽ, me irax jarẽ, ane.

Nãm ã Ximiã Jeju'ã ujarẽnh ane. <sup>33</sup> Nhym  
kam bãmmẽ nã ar kuman kam abenkam no  
tyn aben pumũho dja.

<sup>34</sup> Nhym kam Ximiã jãm aro akẽx ne  
Metĩndjwýnhmã aro a'uw ne kum,

—Dja ga aro kĩnh ne adjukaprĩkõt aro  
djuw mex ne arkum umar mex jarẽ gẽ ar  
umar mex ne ar ba, ane. Ne kam ajte jãm  
nãjao akẽx ne kum,

—Ota arým akra kute meo bikjẽrmã bôx.  
Me babê idjaer kwý dja me kum kurẽn  
kam kõt amijo ajkẽ. Dja te kute memã  
Metĩndjwýnho amirĩtmã nhym me mã aprý.  
Nhym bep me bakwý dja gu me mã bamã  
abẽn kam amiptàn kõt ar amijo baba.  
<sup>35</sup> Nhym akra ta dja ar mekmã apôx ba.  
Godja me ôkre kadjwýnhbê amim mÿjja'ã  
karõ nhym akra ta tu ar memã apôx ba.  
Ga gadjwý akra djô'ã akaprĩ rax ne akra  
ma: ne. Kute mrãmri ne nãnhre kute gad-  
jwý anhõpõkkam akaprĩ pyràk, ane. Nãm ã  
Ximiã anhÿr djwýnhràr kum arẽho ane.

<sup>36-37</sup> Nhym kam me'õ nibê Ana ad-  
jwýnhdjwý ar'ÿr bôx. Kubê Metĩndjwýnh  
kabẽn jarẽnh djwýnh 'õ, Panuwe kra,  
mekbê Axer 'õ. Nãm 'uwtĩ. Amrêbê ne  
mjẽn 'ÿr mõ nhym 'ã amex amãnhkrut ne  
amãnhkrut ne amãnhkrut ne ikjêkêt nhym  
arým kubê ty. Nhym kam 'uwtĩn arým  
kubêngê:xte. Arým 'ã amexbê 84. Nãm  
Metĩndjwýnh nhõ kikretikam ku'ẽn kator  
kêtkumrẽx ne tu Metĩndjwýnhmã àpẽnho  
dja. Akamàtmẽ akati kunĩkõt ne kum  
kabẽn ku'ẽn kadjy amijajbu. <sup>38</sup> Ne kam  
kum ajmã ar'ÿr bôx ne Jeju pumũn kam  
Metĩndjwýnhmã amikĩnh jarẽn kum ukaprĩ

jarẽ ne kam ajte me kute kam amakjamã  
Jeju jarẽ. Me utàr djwýnh bôx ne kute  
me kurê djwýnhbê akubyn me õ krĩraxbê  
Djeruxarẽ pytãrmã ne me kam ama. Memã  
ne Ana,

—Arým ne bôx. Arým ne me bapytãr  
djwýnh bôx, ane. Nãm ã Ana me kute  
kam amakjamã arẽho anen kam ajte mã  
wadjà.

<sup>39</sup> Nhym kam Marijmẽ Jõdje ar Bẽnjadjwýr  
djwýnh kukràdjã kunĩkõt arým mÿjjao  
tẽn inomã kumẽn kam akubyn pykabê  
Garrêja'ÿr tẽn kam ar õ krĩbê Nadjarekam  
bôx. <sup>40</sup> Nhym kam kra kãjmã krã tẽn kam  
ĩ tÿx tẽ. Tẽn tẽn ã arým abatãnh ne kam no  
mexkumrẽx nhym kam Metĩndjwýnh kam  
kĩnhkumrẽx ne mã o djuw mex.

### *Jeju Bãm nhõ kikretikam ÿr.*

<sup>41</sup> Nhym na mẽ gaga mrãnh kunĩkõt Jeju  
nãmẽ bãr ar Djeruxarẽmã mrã. Me kute  
aben pydjìn kute Metĩndjwýnh me irôbê  
mrãnh nhõ akati mar ne õ kwý krẽn rax  
kadjy ne ar 'ÿr mrã. <sup>42-43</sup> Nhym ajbir Jeju  
nõrny. Arým 'ã amexbê 12. Nhym ar kunĩ  
mekõt ajte me kute aben pydji'ÿr wabin  
me'ÿr bôx ne mekõt ar õ kwý krẽn ba,  
Jejumẽ. Nhym me kam o ino re nhym  
nãmẽ bãr ar akubyn õ krĩmã tẽ. Tẽn kam  
pry konenh te abej aprã. Nhym be nãm  
nõrnyja, arek Djeruxarẽkam ar ba nhym  
nãmẽ bãr ar kute mar kêt. <sup>44</sup> Nãm kute  
atemã me'õ arkõt mã tẽm pyràk. Nhym 'ã  
akati pydji nhym ar te õbikwakam abej aprã.  
<sup>45</sup> Ne kam kute Djeruxarẽkam ajte abejmã  
akubyn tẽ. Tẽn bôx ne kam te: ajte abej  
nhym 'ã akamàt. <sup>46</sup> Nhym akati kêt nhym  
ar te ajte abej.

Nhym kam akati nhym kam ar  
Metĩndjwýnh nhõ kikretikam kum kato.  
Nhym me ipõkri nhÿ, Mõjdjê kukràdjã  
jarẽnh djwýnh nhipõkri nhÿ, me kabẽn  
maro nhÿn kam me kukjêro nhÿ. <sup>47</sup> Nhym  
me Jejukam no tyn nhÿ. Nãm tu me aêrbê  
prĩne mÿjja ma. Nhym me jadjwý mÿjja  
jabej kukjêro nhÿ nhym no mekõt katàt  
memã mÿjja jarẽnh nhÿ. Kam ne me kam  
no tyn nhÿ. <sup>48</sup> Nhym nãmẽ bãr ar mekõt  
omũn kam mekõt kam no tyn dja. Nhym  
nã kum,

—Akmere, mỳkam ne ga ar ibê ã anhÿr aba? Nã bãm abãmmẽ ar te ajabej aprãn axwe akam idjumar ne kam ajabej ar mrã, ane.

<sup>49</sup> Nhyam kam kum,

—Mỳkam ne gar ijabej ar mrã? Djãm ar aje imarja kêt? Arym ne ba Ibãm nhũrkwão inhũrkwãn kam idjapênhmã, ane. <sup>50</sup> Nhyam ar kute kabênja mar kêtumrẽx. Ne te kute marmãn kam ôkre kadjwÿnhbê,

—Mỳj kabên got ja? ane.

<sup>51</sup> Nhyam kam arkôt tẽ, arkôt Nadjarekam tẽn bõx ne kam ar kabênkôt ar amijo ba. Nhyam bep nãja ne mỳjja kunĩ man kum kĩnh ne. <sup>52</sup> Nhyam bep Jeju ta adjakamã no mex tũm ne amũ no mexo amikamênho tẽn kam ĩ abatãnh mex ne. Nhyam Metĩndjwÿnh kam kĩnhkumrẽx. Nhyam mebêngôkredjwÿ\* kam kĩnhkumrẽx ne.

### 3

*Ngômã me angjênh djwÿnhbê Djuão.*

*Mat 3.1; Mak 1.1; Dju r 1.19*

<sup>1-2</sup> Nhyam bep Djuão kapôt kukritkam ar ba. Djuão, Djakarij kraja ne kapôt kukritkam ar ba. Nhyam kam Metĩndjwÿnh kum kabên ne.

Be, nhyam bep bẽnjadwÿr raxbê Xiberu Xedja. Me bẽnjadwÿr kunĩ kurãm rax ne me kunĩmã nhÿ. Ne kam amidjô'ã me kwÿ'ã bẽnjadwÿr rẽ. Nãm pykabê Djudêjakam me ja kadjy Põxu Piratu'ã bẽnjadwÿr mẽ, kubajtem. Ne kam ajte pykabê Garrêjakam me ja kadjy Erodji'ã bẽnjadwÿr mẽ. Ne kam ajte pykabê Iturejmẽ Tarakôniam me ja kadjy Piripi'ã bẽnjadwÿr mẽ. Erodji kamybê Piripi'ã bẽnjadwÿr mẽ. Ne kam ajte pykabê Abirênkam me ja kadjy Rixanij'ã bẽnjadwÿr mẽ. Nhyam ar kute me kadjy Metĩndjwÿnh mar djwÿnh nhõ bẽnjadwÿr raxbê Ananhmẽ Kajbajmẽ ar ar meo ba. Nhyam arÿm Xiberu Xedja memã ÿr'ã amexbê 15 nhyam ô'ã ar bẽnjadwÿr nyreja arÿm memã krĩ.

Nhyam kam Metĩndjwÿnh Djuãomã kabên ne. Djuão kapôt kukritkam ar bajamã kabên ne. <sup>3</sup> Nhyam kam kabênkôt ngôbê

Djodãokam ar mrã. Ne kam ar me akreo ba. Me akreo ban memã kum,

—On me amim akaton wãnh ajaxwemã anhiren Metĩndjwÿnh'ÿr amijo akẽx gẽ me ajaxweo aknon me akam ngryk kêt. Ba kam on ngõnhmã me ajangjê, me aje ajaxwemã anhirerkôt me kute me amar kadjy, ane.

<sup>4</sup> Amrêbê ne anhÿr djwÿnhràmmetĩndjwÿnh kabên jarênh djwÿnhbê Idjaij ne 'ã pi'ók no'ók ne memã kum,

“Me'õ dja kapôt kukritkam memã kabên ne. Kàj bẽ dja me akren memã kum,

‘Me apa. Ë, me on Bẽnjadwÿr djwÿnh kutêp wãnh ajaxwemã anhiren katàt amijo aba. Kute mrãmri ne me kute me bẽnjadwÿr rũnh kutêp pry mex ne kute memã katàt pry jadjwÿrja pyrãk.

<sup>5</sup> Nãm me inuw kunĩo amrà ne kam krãnhre rũnhmẽ kryremẽ, kunĩ abenãnh imõk rê nhyam pyka aben pyrãk ne ikwã.

Nhyam pry nhirõ nhyam me katàt adjuw. Ne pyka karõtdjwÿ prĩne katen o aben pyrãk nhyam mẽkumrẽx ne ikwãja pyrãk.

Dja me ã Bẽnjadwÿr djwÿnhràmmetĩndjwÿr axwemã irer ne katàt amijo bao ane.

<sup>6</sup> Nhyam me kunĩ dja me Metĩndjwÿnh kute me utarkôt me omũ', ane.”

Nãm ã anhÿr djwÿnhràmmetĩndjwÿr Idjaij memã arênho ane. Kôt ne Djuão Bẽnjadwÿr kukãm katon me akre ar o ba, nhyam me kwÿ rax ne me mrãmri axwemã iren katàt amijo ba.

<sup>7</sup> Nãm Djuão me akre ar o ba nhyam me itepato 'ÿr bao ku'ê. Kute ngõnhmã me angjênhmã ne me 'ÿr bao ku'ê. Nhyam kam memã kum,

—Me akamingrãny ne ga me abê iry. Me ajaxwekam abê kangã. Mỳj me'õ ne me amã Metĩndjwÿnh ngryk nhõ akati jarẽ ga me umaje iwÿr aprõt kajgo? <sup>8</sup> Gop on me katàt Metĩndjwÿnhkôt amijo aba gẽ me mrãmri me amex jabej me amã kato. Mrãmri me amim akator ne aje wãnh ajaxwemã anhirer ne aje Metĩndjwÿnh'ÿr amijo akẽx jabej gẽ me on me amã kato.

\* **2:52** Jeju nhõ pykakam me kunĩ bêngõkre kute mrãmri ne apÿnh me õ pyka djari kunikôt me kunĩ bêngõkre pyrãk. Kubẽ kã jakamẽ me kakrãtykmẽ me babêngõkremẽ ne me kunĩ bêngõkre.

Gê me me amexmã katon me akam kĩho kute mrãmri ne me kute pidjô djô mexmã apôx ne kam kĩnhja pyræk. Kwãrĩk wãnh me anhõkre kadjwýnhbê anhingêt kukãmãre Abraão adjãmra kêt ne amim, “Me ba ne ba me ibê Abraão tàmdjwý. Dja Metĩndjwýnh me ikam ngryk kêt. Dja ba me te ijaxwe nhym kam me inhingêt kukãmãre Abraão kôt Metĩndjwýnh kum me ijabê ne me ijaxwekam me ijo bikênh kêt kumrêx”, anhÿr kêt. Kwãrĩk wãnh ga me ã anhÿr ar aba kêt. Kati. Ê, ba me amã arê. Dja ga me te abê Abraão tàmdjwý nhym Metĩndjwýnh tu me ajo ajkê, me ajaxwe pãnh tu me ajo ajkê. Ne ren kum ajte Abraão tàmdjwý prãm jabej ren tu kênjao itun o amim Abraão tàmdjwý nhipêx nhym me ren tu katon kumex.

<sup>9</sup> Ê, mrãmri arým 'ÿr. Metĩndjwýnh kute me axwe pãnh memã akati jarênh arým 'ÿr. Kute mrãmri ne pidjô apýnh abenkam ô kêt nhym me kute kâr ne o mrãnh ne kute kuwykam rênhja pyræk. Arým ne Metĩndjwýnh me ajã pidjô djô kêt jakren arým me ajaxwe pãnh kute me ajo bikênh 'ÿr. Dja me ajo môn kuwykam me amê. Arým 'ÿr. Kute mrãmri ne me'ô kute pidjômã 'ÿr kadjy kute parbê kàxkrækô mýnh ne o ãm pyræk, ane. Nãm ã Djuão me krãptĩmã arênhho ane.

<sup>10</sup> Nhym me kam kum,

—Ije tô mã dja ba me nê? ane. Metĩndjwýnh kute me ijo bikênh kêt kadjy, mã dja ba me nê?

<sup>11</sup> Nhym memã kum,

—Dja ga me ajô nhõ kubêkà amãnhkrut ne kam me'ô nhõ kubêkà kêt mã ikjê ngã. Nhym me'ôdjwý ò kwý krên djã krãptĩn kam me'ô nhõ djwý kêt mã amikutã kwý ngã, ane.

<sup>12</sup> Nhym me kute bẽnjadjwýr bajtemmã pi'ók kaprĩo atom djwýnh me kudjwa Djuão'ÿr bõx, kute ngõnhmã me angjênhmã. 'ÿr bõx ne kum,

—Bẽnjadjwýr, mã gédja ba me nê? ane.

<sup>13</sup> Nhym kam memã kum,

—Ê, me anhõ bẽnjadjwýr kute me amã pi'ók kaprĩ jarênhja 'ãnhbit dja ga me kum o atom. Kwãrĩk wãnh ga me ga amũ amim

pi'ók kaprĩ kamênh ne amýnh kêt. Dja ga me tu 'ãnh jamý, ane.

<sup>14</sup> Nhym me krãkamngõnhredjwý kum,

—Ne me badjwý, mã dja ba me nê? ane.

Nhym kam memã kum,

—Ê, kwãrĩk wãnh ga me me pa 'amýnh ne mekbê mýjjao aprôt kêt. Ne kwãrĩk wãnh ga me me kâtãm'ã axwe rênh ne me axweo me utâr ne mekbê ijên me ò mýjjao aprôt kêt. Nhym bep ga adjãpênh pãnh dja ga pi'ók kaprĩ byn tu akĩnh ne. Kwãrĩk wãnh ga me adjãkrê kêt, ane. Nãm ã Djuão memã kabên jarênhho ane. <sup>15</sup> Nhym me kunĩ Bẽnjadjwýrbê kumkati jabej ajkam aman kam òkre kadjwýnhbê amim,

—Bep birãm tãm ne ja. Birãm Djuão got Metĩndjwýnh me bawýr ano, me bakadjy Bẽnjadjwýrbê kumkatimã me bawýr ano, ane. Birãm Kritu ne ja, ane.

<sup>16</sup> Nhym kam Djuão me kunĩmã kum,

—Mrãmri ba ne ba ngõnhmãbit me ajangij. Nhym bep itotokbê me'ô bõxja. Me'ô tãm ne raxo kute ijakrenh, kute ijakrenh mexi. Bãm te irax ne 'ã inhõn ije kum parkà 'ãpre bõnh ne o itêm prãme. Bep ãm ren irax ne ba ren arým kum apê. Nhym bep kati, ãm ingrire. Nãm raxo ijakrenh mex ne. Tãm ne arým bõx 'ÿr. Djãm ngõnhmã kute me ajangjênhmã? Kati. Tãm dja bõx ne kam me awýr Metĩndjwýnh Karõ jano, me katât amrãnhbit'ÿr dja ano, kute ar me ajo bamã. Ne kam me ajaxweja kute kuwymã me arênhmã. <sup>17</sup> Gédja bõx ne kam kute mrãmri ne me kute kôtyk byr ne o kute bãyogore ka'uk ne kute kam mũm 'y mexjao atom ne kam kute 'y kãjao tẽm ne kute kuwykam ÿr nhym xêtja pyræk. Dja me'ôja bõx ne ã me axweo anen kuwykam me kurê. Nhym kuwyja dja pók rã'ã: rã'ãn apêx kêt kumrêx. Nhym bep bãyogogo 'y mex'ã ne me mexja jakren mũm meo atom ne. Ne kãjkwakam ò pykamã meo mō gê me kam kam kĩnhkumrêx ne ar ba. Arým kute ã meo anhÿr 'ÿr.

<sup>18</sup> Nãm ã Djuão memã ane. Ne kam arek memã kabên jarênhho tẽ. Nãm atemã kukràdjã krãptĩo me akre. Ne mã kabên nyo, kabên mexo ar me akreo ba.

<sup>19-20</sup> Nhym bep bẽnjadjwýrbê Erodji ne axwekumrêx. Nãm axwe aben nhiby

kumexo mō, aben nhiby adjwÿro mōn kam ajte Djuão mekbê ijê djakam iby kumê. Nãm kamybê upãnh'ÿr mō, upãnhbê Erodjij'ÿr mō. Nhyam kam Djuão arÿm kum kabên jarên kum,

—Kati, kwãrĩk wãnh, ane.

Nhyam kam Erodji tu amakkre kêt ne Djuãobê ijê.

*Kute ngômã Jeju jadjàr.*

*Mat 3.13; Mak 1.9; Dju r 1.32*

<sup>21-22</sup> Anhÿr djwÿnhràm me kute kubê ijê kêttri ne Djuão ngônhmã me kunĩ jangij ne kam ajte Jeju ngônhmã adjà. Ngônhmã adjà nhyam kam Bãmmã kabêno dja. Kum kabêno ãm rá'ã nhyam kàjkwa abenbê ajkij. Abenbê ajkij nhyam Metĩndjwÿnh Karō 'ÿr ruw ne 'ã tÿm. Amijo tut ne 'ÿr ruw ne 'ã tÿm. Nhyam kàjkwa kurũm kabên ne kum,

—Mrãmri abê ikrakumrêx. Imã ajabê. Ba akam ikĩnhkumrêx, ane.

<sup>23-38</sup> Nhyam kam Jeju arÿm ta àpênhmã o krax ne. Arÿm 'ã amexbê 30 ne kum o krax ne.

*Jeju nhingêt nhidji.*

*Mat 1.1*

Nhyam me we Jôdjeo Jeju bãm.

Nhyam Jôdje bãm ne Eri.

Nhyam Eri bãm ne Matat.

Nhyam Matat bãm ne Rewi.

Nhyam Rewi bãm ne Marki.

Nhyam Marki bãm ne Djananh.

Nhyam Djananh bãm ne Jôdje.

Nhyam Jôdje bãm ne Mataxij.

Nhyam Mataxij bãm ne Amox.

Nhyam Amox bãm ne Naũ.

Nhyam Naũ bãm ne Exi.

Nhyam Exi bãm ne Naganh.

Nhyam Naganh bãm ne Ma'at.

Nhyam Ma'at bãm ne Mataxij.

Nhyam Mataxij bãm ne Xemê.

Nhyam Xemê bãm ne Jôdje.

Nhyam Jôdje bãm ne Djoda.

Nhyam Djoda bãm ne Djôwanã.

Nhyam Djôwanã bãm ne Rexa.

Nhyam Rexa bãm ne Djorba.

Nhyam Djorba bãm ne Xarati.

Nhyam Xarati bãm ne Neri.

Nhyam Neri bãm ne Marki.

Nhyam Marki bãm ne Adji.

Nhyam Adji bãm ne Kodjã.

Nhyam Kodjã bãm ne Erma.

Nhyam Erma bãm ne Êr.

Nhyam Êr bãm ne Djodjuwe.

Nhyam Djodjuwe bãm ne Eridjê.

Nhyam Eridjê bãm ne Djorĩ.

Nhyam Djorĩ bãm ne Matat.

Nhyam Matat bãm ne Rewi.

Nhyam Rewi bãm ne Ximião.

Nhyam Ximião bãm ne Djuda.

Nhyam Djuda bãm ne Jôdje.

Nhyam Jôdje bãm ne Djônã.

Nhyam Djônã bãm ne Erikkĩ.

Nhyam Erikkĩ bãm ne Merja.

Nhyam Merja bãm ne Mena.

Nhyam Mena bãm ne Matata.

Nhyam Matata bãm ne Natã.

Nhyam Natã bãm ne Dawi.

Nhyam Dawi bãm ne Djexe.

Nhyam Djexe bãm ne Ôbet.

Nhyam Ôbet bãm ne Bôadji.

Nhyam Bôadji bãm ne Xara.

Nhyam Xara bãm ne Naxõ.

Nhyam Naxõ bãm ne Amĩnadabi.

Nhyam Amĩnadabi bãm ne Adjimĩ.

Nhyam Adjimĩ bãm ne Ani.

Nhyam Ani bãm ne Êrõ.

Nhyam Êrõ bãm ne Perê.

Nhyam Perê bãm ne Djuda.

Nhyam Djuda bãm ne Djako.

Nhyam Djako bãm ne Idjak.

Nhyam Idjak bãm ne Abraão.

Nhyam Abraão bãm ne Tera.

Nhyam Tera bãm ne Nakô.

Nhyam Nakô bãm ne Xeruk.

Nhyam Xeruk bãm ne Ragau.

Nhyam Ragau bãm ne Parek.

Nhyam Parek bãm ne Ebe.

Nhyam Ebe bãm ne Xara.

Nhyam Xara bãm ne Kajnã.

Nhyam Kajnã bãm ne Arpaxa.

Nhyam Arpaxa bãm ne Xê.

Nhyam Xê bãm ne Nôwe.

Nhyam Nôwe bãm ne Ramek.

Nhyam Ramek bãm ne Mexare.

Nhyam Mexare bãm ne Enoki.

Nhyam Enoki bãm ne Djarexi.

Nhyam Djarexi bãm ne Mareju.

Nhyam Mareju bãm ne Kajnã.

Nhyam Kajnã bãm ne Inox.

Nhyam Inox bãm ne Xexi.

Nhym Xexi bãm ne Adão.  
Nhym Adão bãm ne Metĩndjwýnh.

## 4

*Xatanaj te Jejumã axwe'ã àpnênh.*  
*Mat 4.1; Mak 1.12; Idja 2.18, 4.15*

<sup>1-2</sup> Arým Djuão kute ngônhmã Jeju jadjar nhym Metĩndjwýnh Karõ kute amijo tut ne rwýk ne 'ã tým nhym Bãm kute kum kabênja kurũm Jeju tẽ. Ngõbê Djodão kurũm ne arým Jeju tẽ. Nhym Metĩndjwýnh Karõ raxo kadjwýnhbê nhýn ar o ban kam kapõt kukrit'ýr o bõx nhym kam kam ar ba. Nhym kam Xatanaj 'ýr bõx ne te kum mýjja'ã apnê. Kute kabênkõt amijo ba jabej kum mýjja'ã àpnênh tẽ. Te kum mýjja'ã àpnênh'ã akatibê 40. Akati krãptĩ. Kute ã kum anhýrkam kute mýjja krên kêtumrêx. Nhym kam akati apêx nhym prãm prĩne kubĩ. <sup>3</sup> Nhym kam Xatanaj kum,

—Ë, goja abê Metĩndjwýnh krakumrêx jabej goja kênjamã akabên gê goja kubê djwý ga krê.

<sup>4</sup> Nhym kam kum,

—Kati, Metĩndjwýnh kabên'ã pi'òk no'òkkam ne,

“Djãm djwýobit ne me kute amityx ne ar tĩn ne ba? Kati, Metĩndjwýnh kabêno djwý dja me amityx ne tĩn ne ba”, ane.

<sup>5</sup> Nhym kam Xatanaj krãnh nhimõk'ýr Jejuo tẽn o bõx ne kum pyka kunĩkõt me akreo dja. Apýnh bẽnjadjwýr kute meo ba djari kum me kunĩ jakreo dja. Nãm tebê kum krĩ jakre, kukrà kêt mex ne tebê kum akre. Ne ajte kum bãmê kapõtmê krĩ rũnhmê mýjja kunĩ jakre nhym omũ nhym kum,

<sup>6</sup> —Ë, ba inhõ. Amã dja ba ja kunĩ kanga. Pyka kunĩkõt apýnh me ba djari dja ba amã me kunĩ ngã ga me ja kunĩ kadjy abẽnjadwýr rax. Djãm mýjja kakrit, djãm mýjja punu got. Mýjja mexjakam. Mýjja krãptĩ, mýjja puma. Ba inhõ. Djãm me'õ nhõ? Ba inhõ dja ba imã me'õ kĩnhkõt amidjõ'ã kum kungã nàr amã kungã. <sup>7</sup> Dja ga amijo angrin ikuka kõnh akõnkrão nhýn imã irax jarê ba arým amã kunĩ kanga ga arým amũ idjõ'ã o aminhõn ar o aba, ane.

<sup>8</sup> Nhym kam Jeju kum,

—Kati, Metĩndjwýnh kute pi'òk no'òkkam ne,  
“Bẽnjadwýr djwýnh, Atĩndjwýnhmãbit dja ga amijo angrin kum rax jarên ajbitmã apê. Kwãrĩk wãnh atemã me'õmã rax jarên kêt”, ane.

<sup>9</sup> Nhym kam Djeruxarêmã Jejuo tẽn Metĩndjwýnh nhõ kikreti nhimõk'ýr o wabin anhà'ã kudjan kum,

—Ë, goja abê Metĩndjwýnh krakumrêx jabej goja rũm tẽn ato. <sup>10</sup> Nãm we Metĩndjwýnh kute pi'òk no'òkkam amã,  
“Dja ba ikadjy mrãnh djwýnhmã ajarê gê anêje mýjja punu kajpa”, ane.

<sup>11</sup> Ne ajte we Metĩndjwýnh kute pi'òk no'òkkam we,

“Dja ba ajã ikadjy mrãnh djwýnhmã karõ. Dja me atêmkõt amã ikra dja gê kên 'õ apar ngãnh kêtumrêx”, ane.

<sup>12</sup> Nhym kam Jeju amipãnh kum,

—Kati, Metĩndjwýnh kabên'ã pi'òk no'òkkam ne,

“Kwãrĩk wãnh, Bẽnjadwýr Atĩndjwýnh kabi kêt, kute ajãno ãm jabej kabi kêt”, ane.

<sup>13</sup> Nhym kam Xatanaj arým mýjja'ã kum àpnênh pa. Nãm te kute Metĩndjwýnh kabên kangan Xatanaj kabênkõt kute ar amijo bamã 'ã kum àpnênh dja. Apýnh mýjja djari kunĩ'ã te kum àpnênh djan 'ã kum àpnênh pan kam mã kurũm tẽ. Ajte akati 'õ kadjy mã kurũm tẽ.

*Krĩraxbê Nadjarekam me kute Jeju kanga.*

*Mat 4.12; Mak 1.14*

<sup>14</sup> Nhym kam Jeju akubyn pykabê Garrêja'ýr tẽn. Metĩndjwýnh Karõ arým kum týx jadjà, Metĩndjwýnhmã àpênh mex kadjy kum týx jadjà nhym týxkumrêx ne kam akubyn tẽn bõx.

Nhym kam me abenmã Jeju jarênh ajkate, pyka kunĩkõt ne me abenmã arênh ajkate. <sup>15</sup> Nhym Jeju apýnh mekbê idjaer bikprõnh djakam ar memã Metĩndjwýnh kukràdjà'ã ujarênh ba. Memã 'ã ujarênh ba nhym me kunĩ abenmã Jeju mex jarênh ipòk ne.

<sup>16</sup> Nhym bep krĩraxbê Nadjarekam ne me atemã kabên. Nhym kam Jeju Nadjarekam bõx, abatành djà'ýr tẽn bõx nhym arým

pi'ók ràràr. Pi'ók ràràr kunìkòt ne Jeju mekòt mekbê idjaer bikprònh djà'yr mràn wangijn krī. Ne kam arým kàjmã dja. Kute Metĩndjwýnh kabèn'ã pi'ók no'ók jarènhmã kàjmã dja. <sup>17</sup> Nhyr me kum kungã nhyr kubyn o ajkij. Metĩndjwýnh kabèn jarènh djwýnhbê Idjaij kute pi'ók no'ókjao ajkijn kam kadjy amijã no'ókjamã kato. Kum katon kam memã arènh djan memã kum,

<sup>18-19</sup> “Metĩndjwýnh Karõ ne mã ijo ba. Arým ne amijo ipytã, ije me õ mýjja kêt mã kabèn mex, kabèn ny kàj bê arènh nhyr me kínhmã. Kadjy ne ar ijo ba. Ne kam ajte mekbê ijê kadjy ijano. Ije kàj bê memã kum, ‘On me akato. Me kute me abê ijêja on me akato’, anhýrmã ne ijano ba tẽ.

Ne ajte ije kàj bê me no rãmã kum, ‘On me arīt mex’, anhýrmã. Kadjy ne ijano ba tẽ.

Ne ajte ije kàj bê me 'uwtĩmẽ me kute meo bikènh nhyr me kaprĩn mràn mãmã kum, ‘On me akĩnh ne adjumar mex ne ar aba. Jakam dja me me ajo bikènh kêt’, anhýrmã ne ijano ba tẽ.

Ne ajte ije kàj bê memã kum, ‘Ë, amex jakam dja on Bènjadjwýr mekam ukapri kato’, anhýrmã ne ijano ba tẽ”, ane.

<sup>20</sup> Nãm ã Jeju memã pi'ók no'ókkòt ami-jarènh ãmo anen pi'ók abenã kudjin akubyn kute pi'òko atom djwýnhmã kungãn kam nhý. Nhyr kam me kunĩ Jejukam no tyn kumex, me bikprònh djakam ne me Jejukam no tyn kumex.

<sup>21</sup> Nhyr kam ajte ujarènhmo krax ne memã kum,

—Amrèbê Metĩndjwýnh kute kabèn'ã pi'ók no'ók ja ne arým kato. Mrãmri ne kònh kum kudji nhyr ajbir jakam kato. Me aje maro anhýrjakam ne arým kato, ane.

<sup>22</sup> Nhyr me kam abenmã Jeju mex jarènh kumex kajgo ne abenmã,

—Je kum bep mexkumrèx. Ga kabèn mexja pumũ, Jòdje kra ne ajmãn me bajaèrbê kabèn mexkumrèx jarè. Jòdje kra, me baje Jòdje pumũnh tũmja tãm ne kra dji nhyr kabèn mexkumrèx jarènh tẽ, ane. Nãm me ã kabèn jarènh ane.

<sup>23</sup> Nhyr kam Jeju memã kum,

—Birãm me aje imã me banhingêxê kabèn tũm jarènhmã ne ga me anhòkre kadjwýnhbê imã arènh nhý, ba arým kuma. Birãm me aje imã, “Goja abê me kane djwýnh jabej on amikanen amex”, anhýrmã. Goja aje mýjja 'õ pumũnh jabej nàr aje mýjja 'õ mar jabej goja on ipèx, ba me ikunĩ omũ, me inokam ipèx ba me ikunĩ omũ. Rĩnakambit, krībê Kapanakambit ne ga ar mýjja nhipèxo aba. Nhyr 'ã ujarènh me iwýr bõx ba me kuma. Goja on jakam, anhõ pyka djwýnhkam mýjja pumũnh kêt 'õ nhipèx ba me omũ. Birãm me aje ã imã anhýrmã ne ga me anhòkre kadjwýnhbê amim ijã karõ.

<sup>24</sup> Ë, ba me amã mýjja jarè. Mrãmri ikabèn. Ë, got ren Metĩndjwýnh kabèn jarènh djwýnh atemã pyka 'òkam tẽ nhyr me ren arým kabèn ma. Nhyr bep kati, õ pyka djwýnhkam me kute kukràdjakòt omũnh ne kute kabèn mar kêt. Æm me kute kukràdjakòt mar kêt ne me tu ate krã. Me ga, me banhõ kròkam me ga ne ga me ã ijo anen tu ãm imar kêt kumrèx ne.

<sup>25-26</sup> Ë, gora me ikabèn ma. Mrãmri ikabèn. Me Metĩndjwýnh kabèn jarènh djwýnhbê Erij ja ma. Amrèbê ne me'ã na kêt kumrèx. Arým na kêt'ã amex amãnhkrut ne ikjèkêt apèx nhyr na rwýk kêt kumrèx ne. Nhyr ajte na tỹnkam ajte na kêt ne. Nhyr me prãm kam ar ba. Pyka kunìkòt djwý kêt kumrèx. Nhyr prãm me imex ne. Nhyr mekbê idjaer nhõ pykakam axwe me nire 'uwtĩ krãptĩ. Djãm me'yr ne Metĩndjwýnh Erij jano, me kute o djuw mexmã? Arkati, me bajtem, mekbê idjaer kêt'yr ne ano. Mekbê idjaer kêt nire 'uwtĩ'õ'yr ne ano. Pyka typydji nhidjibê ne Xidõ. Nhyr bep krī nhidjibê ne Xarepta. 'Yr ne ano. Nhyr me'õ ni bajtemja o djuw mex ar o ba. <sup>27</sup> Ajte Metĩndjwýnh kabèn jarènh djwýnh 'õbê Eridjèu ja ma. Mekbê idjaer nhõ pykakam axwe me krãptĩ ì kajèkam tẽ. Nhyr bep Eridjèu kute me jao mex kêt kumrèx. Kubajtem, kubê idjaer kêt pydji ne o mex. Pykabê Xirij kurũm me'õbê Namãbit ne o mex ne, ane.

Nãm ã Jeju memã arènh ane. Djãm ta õ pykakambit ne mekbê idjaerkam kute me ajbitmã mýjja pumũnh kêt 'õ nhipèxmã?



Kati, ta dja ukabikôt amũ pyka mũjakam mýjja kwý 'yro mō. Nār kon ta kute amimarkôt ô pyka djwýnhkam mýjja pumũnh kêt 'ô nhípêx. Ne ta ukaprîkôt amũ me mũ jakamdjwý mýjja kwý nhípêx.

<sup>28</sup> Nhy m me kuman kam kam ngryk ne. Me bikprõnh djakam me ja kunĩ ne me Jejukam ngry:k ne. <sup>29-30</sup> Ne kam pa 'amýn bõm kumê. Nãm meo mõn krãnhre nhimõk'ýr o wabi. Krãnhre konenh ne krîbê Nadjare. Kam ne me Jeju pa 'amýn krãnh nhimõk'ýr o mõn o bõx. Ne bit kute amũ aparmã mēnh nhy m tým ne tykmã o mō nhy m kam mekbê amikaban kam me ôêxo tēn katon mã tē.

*Kute me'ô nêje me karõ punu janor:*

*Mak 1.21*

<sup>31</sup> Mã tēn kam krîraxbê Kapanakam bõx. Pykabê Garrêjakam krîraxbê Kapanakam bõx. Bõx ne memã Metĩndjwýnh kukràdjã'ã ujarēho dja. Pi'ók rārarkam ne memã 'ã ujarēho dja. <sup>32</sup> Nhy m me kabēn man kam ari ar aben pumũn kam abenmã kum,

—Tô mýj kabēn ny got ja? Kabēn mexkumrêx. Nãm ã me bēnjadjwýr rũnh kwý kabēn mex anen ar prĩne kabēno meo atomo ba, ane. Nãm Jeju prĩne kute amimar kôt katã:t memã amikukràdjã jarēnhkumrêx.

<sup>33</sup> Ne me bikprõnh djakam memã 'ã ujarēho ãm rã'ã nhy m kam me'ô my kum akij. Me karõ punu'ô ne ar o ba nhy m kum akij. <sup>34</sup> Me karõ punu'ô kute me'ô my ar o baja tãm ne akij. Djãm me'ô bēngõkre\* ne kum akij? Kati, e kum me'ô kadjwýnhbê, me'ô bēngõkre kadjwýnhbê, me karõ punu'ô ne Jejumã akij. Kubēngõkre ja ta àkjêr kêt. ãm me karõ'ô ne kum akij ne kam kute kubēngõkre mãn kute kum àkjêr pyrãk. Ne kum,

—Ã, tô mã ne ga aje me ijomã? Ë, Jeju, Nadjare kra'õ, djãm aje me iparmã ne ga bõx. Arým ne ba me prĩne apumũ, ga ne Metĩndjwýnh arým amim adja, ga kam amexo apýma, ane.

<sup>35</sup> Nhy m kam kum bēn týt ne kum,

—On anhikrēn akato, ane.

\* **4:34** Jeju nhõ pykakam me kunĩ bēngõkre kute mrãmri ne apýnh me ô pyka djãri kunĩkôt me kunĩ bēngõkre pyrãk. Kubê kã jakamē me kakrãtykmē me babēngõkremē ne me kunĩ bēngõkre.

Nhy m me karõ punu ikõta. Me ipõkri ikõtan kurũm kato. Kute kubēngõkre ajmã o kêtumrêx. Me karõ punu kute me'ôo baja kator kutã ajmã o kêtumrêx. Nãm ikõ'ýr kajgon kam mã kurũm katon tē.

<sup>36</sup> Nhy m me kunĩ ari aben pumũn abenmã kum,

—Mýj kabēn gotja? Mã got on? Nãm tu kabēno, umao bõm me karõ punu mē nhy m mã tē. Djãm rerek got. Me bakãtãm'ô baje ã mýjja ja'õo anhýr kêtumrêx. Py-dji ne tu kabēno bõm me karõ punu mē nhy m mã tē, ane. <sup>37</sup> Ne kam abenmã Jeju jarēho kumex. Bu'ã pykakam me ja ne me abenmã arēho kumex.

*Kute me punu krãptĩo mex.*

*Mat 8.14; Mak 1.29*

<sup>38</sup> Nhy m kam Jeju me bikprõnh djã kurũm tēn kam Ximão nhũrkwãmã wadjã. Nhy m Ximão djupãnhdjwýja kanēn nõ. Kanē kubĩ nhy m nõ. Nhy m me kum arē, kute o mexmã. <sup>39</sup> Nhy m 'ýr tēn irãn kanēmã bēn týt nhy m arým kum ire. Nhy m arým à kêt ne kãjmã dja. Kãjmã djan kam aro djuw mex ar o ba.

<sup>40</sup> Nhy m arým para. Nhy m me Jeju'ýr bao dja. Me kunĩ ne me 'ýr õbikwa kanéo bao dja. Apýnh me õbikwa kanē djãri ne me Jeju'ýr meo ban meo bõx. Nhy m me pýnhkôt me'ã ikra jadjuw nhy m me kunĩ arým mex ne. <sup>41</sup> Nhy m me karõ punudjwý me krãptĩ kurũm apõx ne Jejumã kum,

—Abê Metĩndjwýnh kra, anhýro ba.

Nhy m kam tu memã bēn týt ne memã kum,

—On me anhikrēn mã amũ mō, ane.

Nhy m me karõ punu tu anhikrēn mã mō. Me karõ punu kute Jeju pumũnh. Kute Metĩndjwýnh kute amim Jeju Bēnjadjwýrbê kumkati kadjy ar ne anorkôt omũnh. Kute Jejubê Kritu kôt omũnh. Kam ne me karõ punu bit kute irãri memã Jeju jarēnhmã nhy m kubē aptãn ano.

<sup>42</sup> Nhy m akati kêt nhy m krĩ kurũm arwãmã tēn kam ar ba. Nhy m me abej mō. Abej mõn 'ýr kato. 'Ýr katon bit kute kubē àptãrmã, arek mekam ãmmã ne me bit kute kubē àptãrmã <sup>43</sup> nhy m memã kum,

—Ĕ, djām me amābit ne ba Metīndjwýnh'ã idjujarēnh tē? Kati, ije krī kunīkôt kàj bê memã arēnhmã ne ba me'ýr tē. Kadjy ne Metīndjwýnh ijano ba tē. Ije memã amijã idjujarēnh ny jarēnhmã. Metīndjwýnh me kadjy Bēnjadjwýr ne kute ar meo bamã ja ne ba ije krī kunīkôt memã arēnhmã. Kadjy ne ijano ba me'ýr tē, ane. <sup>44</sup> Anen kam mã memã Metīndjwýnh'ã ujarēnh mō. Apýnh krī djari ne kàj bê memã 'ã ujarēnh mō. Ne kam ajte amũ tēn krī 'ōkam bōx ne me bikprōnh djakam ajte memã Metīndjwýnh kukràdjã'ã ujarēnho dja. Nãm ã pykabē Djudêjakam memã 'ã ujarēnho ane.

## 5

*Ximão ar mã Jejukôt bikamēnh.*

*Mat 4.18; Mak 1.16*

<sup>1</sup> Ne akati 'ōkam memã arēnho dja, memã Metīndjwýnh kabēn jarēnho dja. Imōti nhidjibē Gēnexare mýrri ne memã arēnho dja. Nhyam kam me 'ã akuprōn maro kumex. Nhyam me kwý nính mrān te kute marmān kam jām 'ã me kamē. Me kamēn te kute marmān kam 'ã aben nhingānho kumex ne Jejudjwý nhingānho mō. <sup>2</sup> Nhyam kam me umaje kãmã wadjã. Nãm ar kute tep pynēnh djwýnhja kà dji. Kà djin kam katon kam kryre pōnho dja. Nhyam amē kà nō. <sup>3</sup> Nhyam kam ikjējamã wadjàn kam ò kà djwýnhjamã kum, Ximãomã kum,

—Amũ kamē, amũ kamēnh ngrire, ane.

Nhyam kam amũ kamē. Kamēnh ngrire nhyam kam kam nhýn memã Metīndjwýnh'ã ujarēnho nhý.

<sup>4</sup> Ne memã 'ã ujarēnh pan kam Ximãomã kum,

—Ĕ, gop amũ ubýmwa'ýr kà kamēn kam mān kryre mēn kam tep kwý pynē, ane.

<sup>5</sup> Nhyam Ximão kum,

—Je kum bēnjadjwýr, nã bām ar te ari ar kryre rēnho iba ri nhyam akati. Ām tep kēt. Ba gop tu akabēnkôt kumē, ane.

<sup>6</sup> Nhyam kam ar kumēn kam tu kam tep kwý pynē:nhkumrēx. Nhyam arým tep kute kryre rēnh 'ýr. <sup>7</sup> Nhyam kam ar te o no katon kà nhikjējamã ikra bēno dja, ar kute 'ýr kào tēmmã. Nhyam ar 'ýr kào tē nhyam kam ar aprakamã kākam tepo ipu. Nhyam kam arým amē àr 'ýr.

<sup>8-10</sup> Nhyam kam Ximão Pedrumē ar ja ari aben pumũ. Ar kute amijaêrbē tep kwý pynē:nhkam ne ar abenkam no tyn ku'ê. Nhyam Ximãomē ar ro'ã kute tep pynēnh ar o baja kubē Xijagumē Djuão, Djebedēu kute ar irja, ar jadjwý ne ar abenkam no tyn ku'ê.

Nhyam Ximão Pedru mýjja kunī pumũn kam umaje Jeju kabem kōnkrão nhýn kum,

—Bēnjadjwýr, on mã ikurũm tē. Ga ne ga mrāmri amexkumrēx. Nhyam bep ām ba, ba ne ba ijaxwe, ane.

Nhyam kam kum,

—Kwārīk wānh amã ipyma kēt ne atīn prām kēt. Jakam gēdja ga on mebēngōkrebato atom ne memã ijarē gē me amim iman amim ikamnhīx. Jakam dja ga tep pynēnh kēt ne kam mebēngōkrebato akprō, ane. <sup>11</sup> Nhyam ar kam kà djin wabin kam mýjja kunīmã iren kam mrāmri Jeju'ābit ngrã: ne. 'Ā ngrã týx ne mã kôt ajkamē.

*Kute me'ō nhī kajēkam tēo mex.*

<sup>12</sup> Nhyam kam akati 'ōkam Jeju tēn krī 'ōkam bōx. Nhyam me'ō ĩ kajēkam tēja prīne kào ajkē, prīne o tuknī. Nhyam Jeju'ýr bōx ne omũn kam pijàm djaje tēn tu mýrbē tým. Ne kam nōrkam kum amijarēnho nōn kum,

—Bēnjadjwýr, aje inhī kajēkam itē markôt, aje ijo mex prām jabej, ijo mex, ane.

<sup>13</sup> Nhyam kam 'ýr ikra mōn kupēn kam kum,

—Ije, ije ajo mex prāmã. On akà mex, ane. Nhyam gēt ajmã kà nēn kà mex ne. Kute o ām tām kam tebē kà mex ne.

<sup>14</sup> Nhyam kum,

—Kwārīk wānh ga memã amijarēnh kēt. Dja ga tu katāt mã me kadjy Metīndjwýnh mar djwýnh'ýr tēn kum amibē, kum amikà bē. Ne kam kum mry ngã gē akadjy Môjdjē kukràdjakôt Metīndjwýnhmã mry gan kungã. Arým akà mexkam dja ga kum mrywã ngã gē me kunī apumũ, arým akà mexkôt apumũ, ane.

<sup>15</sup> Aje, jakam ne me arým abenmã Jeju jarēnho ajkate:n apýnh abenmã arēnho ba.

Nhyam kam me itepato 'ýr mōn 'ã akuprō. Me kute kabēn mar nhyam kute me kanéo mexmã ne me 'ã akuprō. <sup>16</sup> Nhyam bep

ta ne mã arwãmã tẽn kam Metĩndjwỳnhmã kabẽnno dja, kum amijarẽnho dja.

*Kute me'õ jakryo mex.*

*Mat 9.1; Mak 2.1*

<sup>17</sup> Nhyam kam ajte akati 'õkam Jeju memã Metĩndjwỳnh'ã ujarẽnho dja. Nhyam me arek maro nhỹ. Mekbê pardjêumẽ me kute Mõjdjê kukràdjã jarẽnho djwỳnhmẽ ne me arek maro nhỹ. Mỳj pyka kurũm? Pykabê Garrêjamẽ pykabê Djudêja kunĩkam apỳnh krĩ djari ne me kurũm kwỳ bõx. Nhyam Djeruxarẽ kurũmdjwỳ me kwỳ bõx. Nhyam Metĩndjwỳnh prĩne Jejuo tỳx, kute tỳxo meo mexmã.

<sup>18-19</sup> Me'õ jakryja arek nõr djakam nõr rã'ã nhyam õbikwa 'ỳr o mõn o bõx ne te kute kikremã o àrmã. Te kute Jeju'ỳr o bikamẽnho ne kute parbê ir nhyam kute o mexmã. Nhyam me kikre jajkwa krekre pytar mex ne. Nhyam kam ar tu ibej o wabi. O wabin kikre nhimõkkõt 'ã ngy tỳx katen jãm ngybõr jadjuwn kam me'õ jakry nõr djakam nõr rã'ã o ruw nhyam me ipõkri Jeju parbê nõ.

<sup>20</sup> Nhyam Jeju amim ar omũ. Ar kute tu amim kamnhĩxkumrẽxja pumũ ne kam õbikwa jakryjamã kum,

—Akmere jakam ne ba ajaxwe kunĩo aknon arỳm akam ingyryk kêt ne, ane. Jeju ta ne axweo akno. <sup>21</sup> Nhyam wãnh Mõjdjê kukràdjã mar djwỳnhmẽ mekbê pardjêu õkre kadjwỳnhbê arỳm amim,

—E kum bep me'õja ne ajmãn Metĩndjwỳnh japryõ djan amijo Metĩndjwỳnhho dja. Metĩndjwỳnh pydji ne kute me axweo biknorn mekam ngyryk kêt, ane. <sup>22</sup> Nãm me ã õkre kadjwỳnhbê anhỹro kumex nhyam arỳm tu kuman memã kum,

—Mỳkam ne ga me anhõkre kadjwỳnhbê ijo ikajgon ijapryõ akumex? ane. <sup>23</sup> Ë, ba me amã mỳjja amãnhkrut jarẽ. Mỳj ne amirĩt ne? Ba ren me'õ jakryjamã kum, “Ba arỳm ajaxweo aknon akam ingyryk kêt”, ane, nàr kon, “On kãjmã djan tẽn”. Mỳj ne ren amirĩt, nẽn? Nã bãm ren kum, “Arỳm ne ba ajaxweo aknon akam ingyryk kêt”, ane nhyam amirĩt kêtumrẽx ne. Tãmbit ne amirĩt kêt. Nhyam bep kãjmã me ku'ê, ije ren me'õmã kum, “Kãjmã djan tẽn” nhyam ren amirĩt ne. Tãmbit ne amirĩtkumrẽx. <sup>24</sup> Dja

ba kum, “Kãjmã djan anhikwã djã mỳn o tẽn”, anen arỳm o mex ga me arỳm omũn arỳm abenmã, “Be, ga Jeju kute me'õ jakryo mexja pumũ. Be, djãm kute me axweo biknor kêt got. Mrãmri ne Metĩndjwỳnh arỳm amijo ã ne pyka jakam amikabẽnkõt ar me axweo biknoro ba”, ane. Me aje abenmã ja jarẽnho kadjy dja ba me'õ jakryjao mex, ane.

Nãm ã Mõjdjê kukràdjã mar djwỳnhmã anen arỳm tu me'õ jakryja'ỳr akẽx ne kum,

—Amã ne ba ikabẽn ne. On kãjmã djan anhikwã djã mỳn anhũrkwãmã o tẽn, ane.

<sup>25</sup> Nhyam me ipõkri ekruux ne kãjmã djan nõr djã mỳn mã ùrkwãmã o tẽn, Metĩndjwỳnhmã mexmẽ õdjãnhmẽ rax jarẽnho tẽn. <sup>26</sup> Nhyam me kunĩ omũn kam ari aben pumũho kumex ne kõt Metĩndjwỳnhmã mexmẽ rax jarẽnho kumex ne kam arỳm kum Metĩndjwỳnh pyman abenmã kum,

—Atemã mỳjja mexkumrẽx ne gu me arỳm jakam omũ, ane.

*Rewi mã Jejukõt bikamẽnho.*

*Mat 9.9; Mak 2.13*

<sup>27</sup> Nhyam kam Jeju me kurũm tẽn. Tẽn kute pi'õk kaprĩo atom djwỳnh'ỳr bõx ne omũ. Idjibê Rewi. Pi'õk kaprĩ nhũrkwãkam ne bẽnjadwỳr bajtemmã pi'õk kaprĩo atomo nhỹ. Nhyam Jeju 'ỳr bõx ne omũn kum,

—Gop amrẽ ikõt ajkamẽn gop ikõt ar aba, ane. <sup>28</sup> Nhyam tu ekruux ne kãjmã djan mỳjja kunĩ kangan mã kõt ajkamẽn. <sup>29</sup> Ne kam me krãptĩmẽ ro'ã õ kwỳ krẽn rax kadjy memã djwỳmẽ mry gan kadjy memã arẽ. Nhyam me kute bẽnjadwỳr bajtemmã pi'õk kaprĩo atom djwỳnh krãptĩn bõx nhyam ajte atemã me jadjwỳ kwỳ bõx, Rewi nhũrkwãkam bõx ne õ kwỳ krẽnno kumex, ar kutã õ kwỳ krẽnno kumex.

<sup>30</sup> Nhyam kam mekbê pardjêumẽ me kute Mõjdjê kukràdjã mar djwỳnh omũn bẽn prĩkam kabẽnno krĩ, Jejukõt ba djwỳnh'ã kabẽn ne kum,

—Mỳkam ne gar me kute pi'õk kaprĩo atom djwỳnhmẽ me axwemẽ akàn aro'ã anhõ kwỳ krẽnno akumex ne kõt akõmo akumex? ane. <sup>31</sup> Nhyam kam Jeju memã kum,

—Djãm me mex'ỳr ne me kane djwỳnh mrã? Kati, me kanê'ỳrbit ne me kane djwỳnh mrã. <sup>32</sup> Badjwỳ ne ba me axwe'ỳr

tê. Djãm we me katàt mrãnh'ÿr ne ba tê? Kati, me axwe'ÿr ne ba tê, ije amiwÿr me 'wÿrmã. Me kute ikabên mar ne amim kator ne wãnh axwemã irer ne kute iwÿr amijo akëxmã ne ba me'ÿr tê, ane.

*Me kute amijajbur jabej Jeju kukjêr.*

*Mat 9.14; Mak 2.18*

<sup>33</sup> Nhyr me ajte kum,

—Ota Djuãokôt ba djwÿnh kute Metïndjwÿnhmã amijarênh kadjy amijajbun ba. Nhyr mekbê pardjêu nhô me ja me kudjwa ã ane nhyr bep akôt ba djwÿnhbit ne mã akun kôt kôm ar ba, ane. Ar kute Metïndjwÿnhmã amijajbur kêt, ane.

<sup>34</sup> Nhyr kam Jeju memã kum,

—Nã, ikôt ba djwÿnh dja mã aku. Ga me kute abenã me rênhkam me àkur rÿnhja pumû. Djãm me kute abenã me rênhkam me àkur ngy got? Me kute abenã me rênhkam ne me mrãmri àkur rÿnhkumrêx. Abenkam kÿnh ne ô kwÿ krêno kumex. Djãm me kute mÿjja jakam amijajbur got? Djãm me mjênme abentã ku'êri àkur punu got? <sup>35</sup> Nhyr bep amû akati 'ôkam, dja me me aêrbê mekbê mjêno tÿm ne pa 'amÿn mã o tê. Nhyr me arÿm kam kaprÿre ne kam amijajbun ajbit ma, kôtbit amak bê:no nhÿn ô kwÿ krênja kêtumrêx ne. Nãm ã Jeju amijã me mjên jakreo ane.

<sup>36</sup> Ne kam ajte memã amikukràdjã ny'ã memã mÿjja jakren arê.

—Nhÿnh got me'ô inôkã ny 'ô byn kadjô, mex katikôt kadjôn kute tÿmja'ã ir ne kute o mexmã? Kati, nãm ren o anen ren amibê nyo ajkê nhyr nymê tÿmja ren aben pyrãk kêt ne. <sup>37</sup> Ne ajte nhÿnh got me'ô mrykã tÿm, mekbê idjaer kukãmãre ne me mrykão ngôn nhinhujabjêti, nhÿnh got me'ô mrykã tÿm, mrykã kadjãkam pidjô kangô ny ru, pidjôbê uba kangô ru. Nãm ren ane nhyr ren ajkatôr ne ajkapÿ. Kangô nymê tÿm kute abenkam o bikâr ne runhkam ne ren ajkatôr ne ajkapÿ, nhyr mrykãdjwÿ arÿm punu. <sup>38</sup> Kati, mrykã nykam dja pidjô kangô nyja ru.

<sup>39</sup> Nhyr ajte nhÿnh got me'ô kute pidjô kangô tÿmbito kômo ban ny kakin kum ny djãnh? Kati, arÿm tÿmbito amiprãk ne kam, “Ije bep kangô tÿmbit ne ành”, ane. Nãm ã Jeju kute memã kukràdjã tÿm'ã pidjô

kangô tÿm jakren kute kukràdjã ny'ã pidjô kangô ny jakreo anen kam memã arênh pa.

## 6

*Memã pi'ôk ràràr'ã ujarênh.*

*Mat 12.1; Mak 2.23*

<sup>1</sup> Ne kam pi'ôk ràràrkam Jeju pur katikôt tê. Nhyr kôt ba djwÿnh kôt mō. Kôt mōn arÿm kum prãm ne mōrmã bàygogo 'y nhikên mōrkôt ngãnh ne amijajkwamã rênho mō. <sup>2</sup> Nhyr kam mekbê pardjêu ar omÿn arkum,

—Ije tô mã ne gar arÿm nê? Pi'ôk ràràrkam ne me tyk djã kêt djã. Me kute pi'ôk ràràrkam mÿjja anhyr kêt. Me tÿmre ne me ta kukràdjãkôt mã me babê uma. Me kute pi'ôk ràràrkam mÿjja kupênh kêt. Kambit ne me tyk djã kêt djã. Mÿkam ne gar ã ar o anhyro aba?

<sup>3</sup> Nhyr kam Jeju memã kum,

—Kê, djãm me aje Metïndjwÿnh kabên'ã pi'ôk no'ôkjadjwÿ pumÿnh kêt? Djãm me aje me bakukãmãrebê Dawi'ã ujarênhja pumÿnh kêt, Metïndjwÿnh kabênkam me aje Dawi'ã ujarênhja pumÿnh kêt?

Ë, Dawi arkum prã:mã. <sup>4</sup> Nhyr Dawi Metïndjwÿnh nhÿrkwãmã wadjãn djwÿ byn kukrên kam kôt ar tēm jamãdjwÿ kungã, nhyr ar kukrê. Djwÿ me kute Metïndjwÿnhmã ôrja tãm ne kubyn kukrên arkum kungã. Metïndjwÿnh nhô djwÿ ne me kâtãm kute kur kêtumrêx. Me kadjy Metïndjwÿnh mar djwÿnhbit ne kute kur. Nhyr bep Dawi ta ne tu kubê kukrê. Nhyr kam me kute kum axwe jarênh kêt. Djãm me aje ja mar kêt? Ga me aje Dawimã axwe jarênh kêtja pumû ne kam ikôt ba djwÿnhmêbit ar imã ar ijaxwe jarê.

<sup>5</sup> Bep kati, ba ije amijo inhÿ ne me awÿr irwÿk ne ba inhô pi'ôk ràràr djwÿnh. Kam gêdja ba memã, “Kwãrÿk wãnh ga me kam mÿjja kupênh kêt, nãr kon, dja ga me jakam apên, nãr kam mÿjja kupênh kêt ne arek akrÿ”, ane. Tãm ne ja, ane.

<sup>6</sup> Nhyr kam ajte pi'ôk ràràr 'ôkamdjwÿ me bikprôn dhãmã wadjãn kam kam memã Metïndjwÿnh'ã ujarênh dja. Nhyr me'ô nhikra jarôxja nhÿ. Ubôk ne arôx ne. <sup>7</sup> Nhyr mekbê pardjêumê me kute Môjdjê kukràdjã mar djwÿnh arek Jejukam no tyn

krī. Nhyṁ pi'ók rārarkam kute ikrao mex nhyṁ me kute kôt kum kator ne kute kum,

—Arÿm ne ga Môjdjê kukràdjâkôt amijo aba kêt, anhÿrmã ne me arek kam no tyn omũho krī. Mekbê pardjêumẽ me kute Môjdjê kukràdjâ mar djwÿnh ne me ã Jujukam no tyn ar krī ba ane. <sup>8</sup> Nhyṁ bep ta, Jeju ta ne arÿm me kute ôkre kadjwÿnhbê amim 'ã karôja arÿm kuma ne kam me'ô nhikra jarôxjamã,

—Amrẽ tẽn me ipôkri dja, ane.

Nhyṁ kâjmã djan 'ÿr tẽ. <sup>9</sup> Nhyṁ kam memã kum,

—Ë, ba me bakukràdjâ jabej me akukja. Nhÿnhja ne me bakukãmãre me bamã arẽ? Djãm pi'ók rārarkam me baje mÿjja mex nhipêxmã nâr kon kam me baje mÿjja punu nhipêxmã? Djãm kam me baje me utâr nâr kon kam me baje me parmã, nẽn? ane. <sup>10</sup> Ne kam ari ar me omũn kam ate ikra jarôxjamã,

—On anhikra katât, ane.

Nhyṁ kam ikra katât ne. Arÿm ne ikra mexkumrẽx. Arÿm ajte ikra katât ne ikrakumrẽx. <sup>11</sup> Nhyṁ kam ajte mekbê pardjêu ngry:k ne. Ngryk tÿ:x ne. Ne kam Jeju'ã abenmã karôo kumex.

### *Kute Ar kubê 12 janor.*

#### *Mak 3.13*

<sup>12</sup> Nhyṁ kam akati 'ôkam krãnhre'ÿr tẽn 'ã wabin nhÿ, kute Bãmmã kabẽnmã, Metĩndjwÿnhmã kabẽnmã. Kum kabẽno ÿr ri nhyṁ akati. <sup>13-16</sup> Akati nhyṁ kam amiwÿr kôt ba djwÿnh 'uwn amijo ar kwÿ pytàn amim ar umjuwn arkum,

—Ba dja ba ar ajano, gar memã ijã adju-jarẽho ajmã. Ar abê inhô àpênh, ane. Nãm kute ar anor kadjy ar o 12 ne amijo ar utàn kam tũmràm ar ano.

Ximão. Jeju kute kum Pedru jarẽnhja.

Ångre. Ximãomẽ Ångre ar aben djâkam ikwã.

Xijagu.

Djuão.

Piripi.

Batormê.

Matêu.

Tôme.

Xijagu 'ôdjwÿ. Kubê ne Aupêu kra.

Ximão 'ôdjwÿ. Ximão tãm ne kum me bajtemja kurêkumrẽx, me bajtem kute meo baja kum me kurêkumrẽx.

Djuda. Xijagu kraja.

Djuda Ikadji. Kute Jeju kurê djwÿnhmã kanga djwÿnhja.

Be, Jeju kute tũmràm ar anor ne ja. <sup>17</sup> Ne kam kôt ba djwÿnhbê 12jamẽ ro'ã ruw ne pyka kênh'ÿr bôx ne kam kam meo dja. Nhyṁ me kôt ba kajgo ne me 'ã kumex. Nhyṁ me kâtãmjadjwÿ Jeju'ÿr môn bôx ne 'ã kumex. Pykabê Djudêja kurũm me krãptĩmẽ krĩraxbê Djeruxarẽ kurũm me krãptĩmẽ ngô rax nokã'ã pykabê Xirumẽ Xidômẽ kurũm me krãptĩmẽ. Me tãm ne me akàn Jeju'ã kumex. Me ja ne me 'ÿr akuprô. 'ÿr bikprônh ne kute kabẽn mar nhyṁ kute apÿnh me kanê djari meo mexmã ne me 'ã akuprô.

<sup>18</sup> Nhyṁ me karô punu kute meo bajad-jwÿ mekôt 'ÿr môn bôx nhyṁ kam mekam me karô punuja jano nhyṁ me arÿm mex ne. <sup>19</sup> Nhyṁ me itepato kute Jeju kupênh prãm. Nãm Jeju tu tÿxkumrẽx nhyṁ kurũm uma apôx ne me kunĩo mex. Kam ne me kunĩ kute Jeju kupênh prãmã.

*Kute arkum kÿnh jarẽnh ne ajte kute arkum kaprĩ jarẽnh.*

#### *Mat 5.1*

<sup>20</sup> Nhyṁ kam meo mex pan kam kôt ba djwÿnh pumũn arkum,

—Ë ar anhô nêkrêx kêtwã, ar ga ne gar akĩnhkumrẽx. Mÿkam? Bir, ar ga ne Metĩndjwÿnh ar akadjy bẽnjadjwÿr ne ar ar ajo ba.

<sup>21</sup> Ë, ar jakam amã prãmwã, ar ga ne gar akĩnhkumrẽx. Mÿkam? Bir, ar ga dja gar ajajnekumrẽx ne.

Ë, ar jakam amÿrwã, ar ga ne gar akĩnhkumrẽx. Mÿkam? Bir, ar ga dja gar akeket ne.

<sup>22</sup> Ë, jakam me kum ar akurêja, ar ga dja gar akĩnhkumrẽx ne. Ba ne ba amijo inhĩ ne me awÿr ruw ne kam ar me ajo iba. Ga me akwÿ amã ikĩnh ne iwÿr akuprô ba kam ar ar ajo iba. Nhyṁ me kam kum ikurên kam ikôt kum ar akurê ne. Gar mã ikôt abikamênhkamdjwÿ me kum ar akurê. Gêdja me te wãnh kum ar

akurên bõm ar arên ar ajaprÿn ar ajaxweo ar apytà,  
 23 gar tu akĩnhkumrêx ne ate akĩnh katin amijara tatak ne.

Mÿkam? Bir, dja Metĩndjwÿnh ar amã o pãnh rax ne. Kàjkwakam gêdja ar amã o pãnh mex ne. Kàjkwakam kute ar amã o pãnh mex ja dja gar amikukãm aman ate akĩnh kati. Nãm me tũmre ã axwe anen me kamingrãny kajmã'ã ã Metĩndjwÿnh kabên jarênh djwÿnho bikênho bao ane. Gar arÿm kam kàjkwakam me kĩnhkumrêx ne ar baja pumũ, ane.

Nãm ã Jeju arkum ane. Ne kam ajte me õ nêkrêx kumexjamã kabên ne memã kum,

24 —NhyM bep me anhõ nêkrêx krãptiwã me ga dja ga me akaprĩ rax ne. Bir, mÿkam? Jakambit akĩnh djà kajgokam. Gêdja ï apêx ne ajte amũ kêtikumrêx.

25 Ne me jakam ajajnewã, me ga dja ga me akaprĩ rax ne. Mÿkam? Bir, me ga dja ga me amã prãm ne.

Ne me jakam akeketwã, me ga dja ga me akaprĩ rax ne. Mÿkam? Bir, me ga dja ga me abixangrin kam amÿro akumex.

26 Ne me kunĩ kute abenmã me amex jarênh kumexja me ga dja ga me akaprĩ rax ne. Mÿkam? Ga me axwe pumũ. Ga me kum me axwebit kĩnh ne kute abenmã me mex jarênh kumexja pumũ. Nãm me tũmre ã axwe o anen me kamingrãny kajmã'ã kum me 'êxnhĩbit kĩnh. Me 'êx ne kute amijo Metĩndjwÿnh kabên jarênho bajabit ne me kum me kĩnh ne abenmã ã me mex jarênh kumexo ane. Kam ne me kamingrãny me tũmre kôpdji'ã kum me axwe, me 'êxnhĩbit kĩnh ne kute abenmã me mex jarênh kumexja.

Nãm ã Jeju memã anen kam kôt ba djwÿnhmã kum,

*Jeju kute arkum, “Amã akurê djwÿnh jabê” jarênh.*

*Mat 5.38; Ruk 23.34; Kar 7.60; Rô 12.14*

27 —Ë, ba ajte ar amã ikabên 'õ jarê, gora ar ikabên ma. Gora gar tu amã akurê djwÿnh jabê. Gora me kum ar akurêja dja

me te ar ajo ajkê gar akrànãmã amã me abên ar meo aba. 28 Gora ar me kute ar adjũnwãmã tu akabên mex jarê. Gora ar me kute ar ajo bikênhja tu Metĩndjwÿnhmã me arê gê meo djuw mex. 29 Gêdja me'õ ar ajõ nhinebê kurwa ga 'ÿr akêx gê aktã anhinebê kurwa. Gêdja me'õ ar ajõbê inôkã by ga tu kum kanga. NhyM ajte akã 'õ'ã ajwÿ ga ajte akã 'õdjwÿ byn kôt kum angã. 30 Gêdja me'õ mÿjja 'ã ajwÿ ga tu kum kanga. Gêdja me'õ abê anhõ mÿjja 'õ by ga tu kum kangakumrêx. Kwãrĩk wãnh ga akubyn 'ã 'wÿr kêt. 31 Djã nãm me ar ajõo ajkê ga akĩnh ne? Kati, nã gãm akaprĩre. Bir be, kam dja gar ã me jao anhÿr kêtikumrêx gê me adjwÿnhdjwÿ kaprĩ kêt. Nãr kon, djã nãm me ar ajõkam mex ga akaprĩ? Kati, nãm me ar akam mex gar akĩnhkumrêx ne. Bir be, kam dja gar ã me jakam amexo ane gê me adjwÿnhdjwÿ kĩnhkumrêx.

32 Ë, ba ar amã arê. Me kum ar ajabê gar amipãnh amã me abêikumrêxja bãrãm kam dja ba ar amex jarênh jabej? Kati, ã, me axwe ne me kum õbikwabit jabê, kum aktã aben jabê ne kam kum me kâtãmja kĩnh kêtikumrêx. Be, dja gar gadjwÿ amã anhõbikwabit jabê, djori kam mex? Kati, ar ikôt aba djwÿnhkam gêdja gar tu amã me abêo tuknĩ. Ar amã anhõbikwa jabên kam kôt amã akurê djwÿnhdjwÿ jabê. 33 NhyM ajte me ar akam ukaprĩ gar amipãnh mekam adjukaprĩ, bãrãm kam dja ba ar amex jarênh jabej? Kati, ã, me axwe ne me õbikwakambit ukaprĩ, aktã abenkam ukaprĩ ne kam me kâtãmjakam ukaprĩ kêtikumrêx. Be, dja gar gadjwÿ anhõbikwakambit adjukaprĩ, djori kam mex? Kati, ar ikôt aba djwÿnhkam gêdja gar tu me kunĩkam adjukaprĩo tuknĩ, anhõbikwakam adjukaprĩn kam kôt akurê djwÿnhdjwÿ kam adjukaprĩ.

34 NhyM ajte me ar amã mÿjja ngã gar kam amipãnh memã mÿjja ngã, bãrãm kam dja ba ar amex jarênh jabej? Kati, ã, me axwe ne me aktã aben pãnh abenmã mÿjja nhõro ba. Nãm me akubyn abenmã 'ãnh õro ba. Be, dja gar gadjwÿ me kute akubyn ar amã mÿjja nhõrmãbit mÿjja ngã, djori kam mex? Kati, ar ga, ar ikôt aba djwÿnhja dja gar tu memã mÿjja nhõrkumrêx ne kam pãnhkam amak kêt.

<sup>35</sup> Bir be, ar ga dja gar amã akurê djwýnh jabêkumrêx ne kam adjukaprĩ ne tu kum mýjja kajgo ngã. Kute akubyn amã pãnh mýjja 'õ nhõrmã pãnh kam amak kêt. Metĩndjwýnh pymati tãm gêdja ar amã o pãnh ra:x ne. Gar kam arým abê Metĩndjwýnh krakumrêx. Mýkam dja gar ã meo ane? Bir, Metĩndjwýnh ne tu me õdjý, me axwekam ukaprĩ. <sup>36</sup> Kam dja gar kãjkwakam Abãm'ã amijakren mekam adjukaprĩ.

*Mete me'ã axwe rênh nêje memã kabên.*  
*Mat 7.1; Rô 2.1; Xij 4.11*

<sup>37</sup> Kwãrĩk wãnh gar me'ã axwe rênh kêt. Dja gar me'ã axwe rê nhym me amipãnh ar ajã axwe rê, nãr Metĩndjwýnh ar amã axwe jarê. Kwãrĩk wãnh gar me axwemã akator kêt ne memã pãnh jarênh kêt. Dja gar me axwemã akato ne memã pãnh jarê nhym me amipãnh ar ajaxwemã katon ar amã pãnh jarê, nãr Metĩndjwýnh ar amã pãnh jarê. Nhym bep kati, gêdja me kute ar akam amikràja gar tu o abiknorkumrêx gê me amipãnh ar gadjwý tu ar ajaxweo biknorkumrêx ne. <sup>38</sup> Gora ar memã anhõdjãnh ne tu memã angã. Gê me kam amipãnh ar amã õdjãnhkumrêx ne ar amã mýjja ngã. Dja Metĩndjwýnh ar amã o pãnh rax ne. Kute mrãmri ne me kute akubyn abenmã djwý ngrã nhõr kadjy kute ngõnhkam ngjênh ne ajte kute à'ak ne kum o'uk ne iby ngjênh nhym akà'ã bikapĩnja pyrãk. Dja ã Metĩndjwýnh ar amã õr raxo ane. Bir be, kam dja gar Metĩndjwýnh kudjwa memã õr rũnh nhym kam me akubyn ar aje memã õr 'ãnh ar amã kungã, ane. Nãm Jeju ã kôt ba djwýnhmã arênho ane.

<sup>39</sup> Ne kam ajte apýnh mýjja djãri arkum 'ã ujarênh jakreo tẽ. Ne kam arkum,

—Djãm me'õ no rãja kute me'õ no rãjamã kum, “Amrê, ba amã kô 'amýn katàt ajo tẽ”, anhýrmã? Kati, gorên kum kô 'amýn o mõn ren ar ro'ã krekam tým, ane.

Be, me axwe rã'ãkam dja me amũ me jamã axwe jarênh kêt. Me axwekam ne me kute me no rã pyrãk. <sup>40</sup> Djãm me'õ kute mýjja mar kêtja kute me'õ kute mýjja mar raxja jakrenh got? Kati, nhym bep djãm

me'õ kute marja pĩne kum arên kum akre nhym kam arým ar aben pyrãk ne.

Bir be, ar aje Metĩndjwýnh kukràdjã mar tũmja amijãno dja. Dja me nyre ar ajã amijakren kam kute ar apyrãk.

<sup>41</sup> Mýkam ne ga akamy nokam pyka jaũmjabit pumũn kam ga anokam pĩponhtija pumũnh kêt ne? <sup>42</sup> Djãm aje akamymã kum, “Akmere, amrê ba amã anokam pyka jaũmwã kaba”, anhýrmã? Ne kam ga anokam pĩponhtiwã pumũnh kêtumrêx ne. Aje aminokam pĩponh pumũnh kêtumrêx we ã kum ane. Kê. Mrãmri ne ga apunu rax ne kam ajajkwakambit ajte amimexo amra. Akumrêx gêdja ga aminokam pĩponhtiwã kaban kam arĩt mex ne arým amikôt akamy nokam pyka jaũm ngrire wã kaba.

<sup>43</sup> Ne ajte jadjwý, ã, djãm pidjô mex, pidjô djãnhjakam pidjô punu apõx got? Nãr kon, djãm pidjô punukam pidjô djãnh apõx got? Kati, apýnh pidjô bàri djãri ne kam ô apõx. <sup>44</sup> Ô ne parbê rôrôk ne ikwãn kam o bàrio amirĩt nhym me kôt kum apõx. Pidjô punukam ô punu apõx, nhym ate pidjô mexkam ô mex apõx. Ga rojkãkrekam tyrti apõx kêtja pumũ. Ga ajte prêxkamdjwý katêbãri apõx kêtja pumũ. <sup>45</sup> Bir be, nãm ã mebêngokredjwý\* ane. Nãm me õkre kadjwýnhbê kabên mex man arým kabên mexo memã amijo amirĩt. Nhym me ajte õkre kadjwýnhbê kabên punu man arým kabên punuo memã amijo amirĩt. Nãm me õkre kadjwýnhbê mýjja kumex ma nhym kam amrê bõm ajkwa krekremê õto'ýr apõx nhym me kam arênho ba. Arênho ban kam arým memã amijo amirĩt. Mex nãr axwe ja o memã amijo amirĩt. Kute mýjja ô kute bàrio amirĩt ja pyrãk.

*Me'õ ar kute kikre'ã amijakremã memã arênh.*

*Mat 7.24*

<sup>46</sup> Ë, ba ajte ar amã ja jarê. Mýkam ne gar imã “Bênjadjwýr, Bênjadjwýr” anhýro aban ajte ikabênkôt ar amijo aba kêt ne. <sup>47-48</sup> Ë, ba ar amã arên kikre'ã me ajakre. Me'õ iwýr akêx ne kute ikabên markumrêx ne ikabênkôt kute ar amijo baja ne kute mrãmri ne me kute kikremã kre jabjê:n kam kam

\* **6:45** Jeju nhõ pykakam me kunĩ bêngokre kute mrãmri ne apýnh me õ pyka djãri kunĩkôt me kunĩ bêngokre pyrãk.

par pymjÿr ne kam iby kënme pyka rënh ne kute kum o'uk ne 'ã kute kikre nhym te ngô tàm ne kute kangõnh nhym mrãmri ku'ê tÿxja pyræk. Kum kre jabjekam ne mrãmri ãm tÿx ne. Nãm ã me kute amim ikabën mar tÿx ã ane.

<sup>49</sup> Nhym bep me'õ kute ikabën mar ka-jgo, kute ikabënkõt amijo ba këtja ne kute mrãmri ne me kute tu pyka kräkà'ã par pymjÿr. Kre krãnne kam kute par pymjÿr ne kute 'ã kikre pyræk. Nhym 'ã ngô tàm ne kute kàjbê me'ã rënh nhym rôrøkja pyræk. Djã nãm kàjbê kukê nhym ban rôrøk got? Kati, nãm tu ator nhym ban gru: ane. Dja me'õ kute ikabën mar kët'õ ã ane, ane. Nãm ã Jeju arkum ujarënh ãmo anen memã ujarënh pa.

## 7

*Kräkamngõnh nhõ bënjadwÿr kute tu amim Jeju kamnhÿxkumrëx.*

*Mat 8.5*

<sup>1</sup> Ne kam ate krïbê Kapana'ÿr tẽ. Mã 'ÿr tẽn bõx. <sup>2-3</sup> Bõx nhym kräkamngõnh nhõ bënjadwÿr arÿm kuma, kubê ne kräkamngõnhre krãptïbê 100 nhõ bënjadwÿr arÿm kuma, bõxkõt kuma. Kubajtem. Arÿm kuman kam 'ÿr mebêngëtte kwÿ jano. 'ÿr mebêngëttebê idjaer kwÿ jano. Õ àpênh ne kanê tÿx ne nõ. Arÿm tyk'ÿr. Arÿm arkatin nõ. Kum õ àpênh jabëkumrëx ja ne kubê kanên nõ nhym kam kadja Jeju'ÿr ar ano. Ar kute kum arënh nhym 'ÿr tẽm ne kute kum õ àpênho mexmã ne 'ÿr ar ano.

<sup>4-5</sup> Nhym ar mõn Jeju'ÿr bõx ne kam kum o no katon kum,

—E kum bep tãmja ne mexkumrëx. Mrãmri dja ga 'ÿr tẽn kum õ àpênh pytã. Nãm kum me bakïnhkumrëx ne arÿm me bamã me babikprõnh djã nhípêx ne. Dja ga on 'ÿr tẽ, anhÿro ku'ê.

<sup>6-7</sup> Nhym kam 'ÿr tẽ. Bit 'ÿr tẽn 'ÿr kikre tẽpo tẽ nhym kräkamngõnh nhõ bënjadwÿrja ajte kutã õbikwa kwÿ jano. Nhym ar kutã tẽn kajpan kum,

—Bënjadwÿr, on dja ga akëx ne. Kräkamngõnh nhõ bënjadwÿr ne ar imã, “Ar tẽn kum arê gẽ on amũ akëx”, ane. Bar kam akutã tẽ. Nãm amã, “Ibënjadwÿr kaàk, ibënjadwÿr ngrirekam ne ga inhÿrkwãmã

adjär ba ipijàm karõ amã ane. Ingridre, ikätàm kam ne ba ba akutã itẽm kêt ne, amikam ipijàm kam. Dja ga tu akabënobit inhõ àpênho mex nhym arÿm mexkumrëx ne. <sup>8</sup> Inhõ bënjadwÿr ne imã kabën, kute raxo ijakrenhja ne imã kabën ba kabën man kõt amijo iba. Ne kam ajte ba ibê me kräkamngõnhre nhõ bënjadwÿrkam ba memã ikabën nhym me ikabënkõt amijo ba. Ba me'õmã kum, “ÿr tẽ”, ane nhym arÿm 'ÿr tẽ. Ba kam ajte me'õmãdjwÿ, ‘Amrẽ tẽ’, ane nhym arÿm amrẽ tẽ. Ba inhõ àpênhmã, ‘On mÿjja kupê’, ane nhym arÿm mÿjja kupê. Kam ne ba amã, ‘Abënjadwÿr djwÿnhkam dja ga akabënobit o mex ne’, ane.” Nãm ã kräkamngõnh nhõ bënjadwÿr amã ane, ane.

<sup>9</sup> Nhym Jeju ar kabën man kam arkam no tyn djan õkre kadwÿnhbê amim,

—E kum be nãm tu amim ikamnhÿxkumrëx ne, ane. Ne kam me itepato kõt mõrja'ÿr akëx ne memã kum,

—Ë, ba me amã arê. Nhÿnh ne me babê idjaer 'õ ã kute tu amim imaro anhÿr? Kati, kêt kumrëx. Nhym be nãm tãwã, tãwã kubajtem ne gêt tu amim ikamnhÿxkumrëx ne, ane. <sup>10</sup> Nhym kam kräkamngõnh nhõ bënjadwÿr nhõbikwaja akubyn kikremã tẽ. Kikremã tẽn bõx ne kanên nõrja pumũ. Nhym mexkumrëx ne, arÿm à kêt ne nhÿ. Tãm ne ja.

*Kute me'õ tyk akubyn o tïn.*

<sup>11</sup> Nhym kam akati ngrêre nhym Jeju krï 'õmã tẽ. Krï nhidjibê Naïmã tẽ. Nhym kõt ba djwÿnhmẽ me kätàm krãptï kõt mõ.

<sup>12</sup> Nhym kam Jeju meo mõ. Meo mõn ï krï tẽpo mõ. Nãm bit krïo rãm ne jao mõ nhym Ar kubê kra tykjao mõn o kajpa. Kikre bu'ã këno kô kayr jajkwa krekremã o aben kajpa. Amrêbê me'õbê mjên tyk nhym kam kraja adjwÿnhdjwÿ kõt kubê ty. Kute amikamã kra pydjïn irja ne kubê ty. Nhym me kam kënkre'ÿr o mõn o kajpa. Me krãptï ne me kënkre'ÿr bit o mõ, bit kute mekbê idjaer kukràdjãkõt kënkrekam adjärmã. <sup>13</sup> Nhym Jeju me'õ nija pumũn kam kum kaprï: ne kum,

—Kwãrïk wãnh ga amÿr kêt, ane.

<sup>14</sup> Ne kam 'ÿr tẽ. 'ÿr tẽn kam 'ã nõr djãbit kupê. Nhym ar kute o mõrja, tyko mõrja,



o mör tÿx katikôt kum o dja. Nhym kum kabên ne kum,

—Akmere, ba amã arê. Ë, on kàjmã nhÿ, ane. <sup>15</sup> Nhym ekruX ne kàjmã nhÿn kam kabêno nhÿ. Nhym Jeju nãmã kungã. <sup>16</sup> Nhym me kunĩ madjà kreti ne kum uman kam Metĩndjwÿnhmã raxmê mex jarênho kumex ne abenmã kum,

—Ota Metĩndjwÿnh kabên jarênh djwÿnh rax 'õ me bakam kato, ane.

Ne ajte,

—Metĩndjwÿnh ne arÿm õ me baja 'ÿr bôx, ane. <sup>17</sup> Nhym me kam abenmã Jeju jarênho kumex ne amũ abenmã arênho prôt ne. Nhym pykabê Djudêjakam me ja kuma. Nhym amũ bu'ã pyka ja kunĩkôt me abenmã arên kuma.

*Djuão'ã ujarênh.*

*Mat 11.2*

<sup>18-19</sup> Nhym Djuão kôt ba djwÿnhdjwÿ arÿm kuman Djuãomã arê. Nhym adjwÿnhdjwÿ kuma. Mekbê ijê djâkam nör rã'âkam ne ar kum mÿjja ja kunĩ jarê nhym kuma. Kuman kam amiwÿr ar ku'uw, amiwÿr kôt ba djwÿnh 'uw, ar amãnhkrut ne ar ku'uw ne arkum,

—Ë, ar Jeju'ÿr tẽn kum, “Djãm ga ne Metĩndjwÿnh amrêbê me imã ajarê ga arÿm bôx. Nâr kon, dja ba me atemã 'õdjwÿ jabej ajkam ama”? ane. Djuão ne ã arkum anen kam ar ano. Bênjadjwÿr djwÿnh'ÿr ar ano. Ar kute omũnh ne tẽn ne kute Djuãomã arênhmã ne 'ÿr ar ano.

Nhym ar 'ÿr tẽn bôx. <sup>20</sup> Bôx ne kum,

—Djuão kute ngônhmã me angjênh djwÿnh ne awÿr ar ijano ne ar imã, “Ar tẽn kum, ‘Djãm ga ne Metĩndjwÿnh amrêbê me imã ajarê ga arÿm bôx? Nâr kon, dja ba me atemã 'õdjwÿ jabej ajkam ama’? ane.” Nãm ã arkum ane.

<sup>21</sup> Nhym kam Jeju arek me utàro dja. Me apÿnh kanê djàrimê, apÿnh me tokry djàrimê, me karõ punu kute meo bamê, me no rãmê, me ja ne meo mexo dja. Me krãptĩ ne meo mexo dja. Djuão kôt ba djwÿnh kute omũnh ne akubyn 'ÿr tẽn ne kute kôt kum arênh nhym kute marmã ne arek me utàro dja. <sup>22</sup> Ne kam arkum,

—Ar'ÿr tẽn Djuãomã arê. Ba ne ba arÿm me'ÿr bôx ne me utàro dja nhym me no

rã arÿm rît, me te jakry arÿm mrã, me ï kajêkam tê arÿm kã mex, me amakkre kêt arÿm amakkre mex ne ajkam ama, nhym me tykjadjwÿ arÿm akubyn tÿn ne, nhym me me õ mÿjja kêt jamãdjwÿ kabên mex, kabên ny kàj bê arê. Bir be, ar aje ije meo mexkôt ipumũnhja dja gar tẽn kôt Djuãomã arê, ane.

Ne ajte kum,

<sup>23</sup>—Me'õ kute tu amim imar ne kute ôkre kadjwÿnhbê ijã amim, “Djãm tãm, nâr kon atemã”, anhÿr kêt, tãm dja kÿnhkumrêx, ane. Nãm ã Jeju Djuão kôt ba djwÿnhjamã ane. Nhym ar kuman kam mã 'ÿr akubyn tẽn.

<sup>24</sup> Ar tẽn tekrekam memã Djuão jarênho dja. Me krãptĩjamã arênho djan memã kum,

—Nã gãm me aje Djuão pumũnhmã mō, kapôt kukritkam mō. Mã ne kute? Me bōreja pumũ. Bōre ne kōk o wabên ari ar adjuw. Mũm wabên adjuw. Nhym pãnh wabên mũm adjuw. Ne ari ar adjuw. Djãm ã Djuão kute anhÿr? Djã nãm ã memã kabên jarênho ane? Djã nãm me jamã kabên 'õ jarê ne kam ajte me umaje amũ me jamã atemã kabên 'õ jarê? Kati, nãm tu katàt memã kabên jarênhkumrêx ne, tu kum me uma kêt ne kabên pydji memã arênho tẽn, kabên tãm jarênho tẽn. <sup>25</sup> Djã nã gãm me aje Djuão pumũnhmã 'ÿr aba nhym kubêkã mex jangij ne o ba? Kê, me kute kubêkã mexbit jangjênh ne kute 'ã amibêno baja ne me bênjadjwÿr rax nhō kikretikam-bit ar ba, ikra kêt, àpênh kêt mex ne ar ba.

<sup>26</sup> Bir be, nhym mÿj ne ga me aje omũnhmã mō? Djãm Metĩndjwÿnh kabên jarênh djwÿnh 'õ ne ga me aje omũnhmã mō? Nà, tãm. Tãm. Ba me amã arê. Djuão ne Metĩndjwÿnh kabên jarênh djwÿnh kunĩ kuràm raxi. <sup>27</sup> 'ã ne amrêbê Metĩndjwÿnh pi'òk no'òkkam me amã,

“Ota ba akukãm ajã ujarênh djwÿnh 'õ jano, kute akukãm me akre nhym me kute mar ne akutêp kute axwemã irern katàt amijo bamã.

Kute mrãmri ne me kute me bênjadjwÿr rũnh kutêp katàt pry jadjwÿrja pyrãk”, ane.

<sup>28</sup> Ba me amã arê. Djuão ne me kunĩ kuràm raxi. Nhÿnh ne me'õ nã tikkre kurùm katòr'õ raxo kute Djuão jakrenh? Kati, bep

Metĩndjwýnh me kadjy bēnjadjwýr ne kute ar me utàr ne meo baja, me ja'õ ne te kàtàm mex ne kute raxo Djuão jakrenh mexi.

<sup>29</sup> Nà, Djuão ne rax nhym me kunĩ Djuão kabēn ma. Nhym me axweja, me kute bēnjadjwýr bajtemmã pi'òk kaprĩo atom djwýnhdjwý me kudjwa kabēn ma. Nãm me Djuão kabēn man òkre kadjwýnhbē amim, “Mrãmri ne Metĩndjwýnh katàt meo ba”, ane. Nhym Djuão arým ngònhmã me angij.

<sup>30</sup> Nhym bep mekbē pardjēumē me kute Mòjdjē kukràdjà mar djwýnhmē, me ja ne me Metĩndjwýnhbē amikati. Metĩndjwýnh kute amim me'ã karõ ne me mar kêt ne ar kubē amikatio ba. Nhym Djuão kute ngònhmã me angjēnhmã nhym me ate ar kubē amikatio ba.

<sup>31</sup> Ije tō mýj'ã got ba me akamingrãny jakre? Mýj ne ga me aje uràk? <sup>32</sup> Nã gãm me aje me prĩre mýjja kam kĩnh kêt pyràk. Ga me me prĩre kikre kabem krĩn kute abeno bixaēr baja pumũ. Ar ja ne ar ar jamã kabēn ne arkum, “Gwaj bakĩnh katio dja, gwaj babixaēro dja ne ngòtãx à'ak”, ane.

Nhym ar kum, “Waj, ar ibixaēr prãm kêtē. Ar itor prãm kêtē. Ar imã wã kĩnh kêtē.”

Nhym ajte arkum, “Gwaj bamýr kati mãn o nhý.”

Nhym ar, “Kê, wajre. Ar imã kĩnh kêtē. Ar imýr prãm kêtē.” <sup>33</sup> Djuão kute ngònhmã me angjēnh djwýnh ne me awýr bõx. Nãm amijajbu:n kute uba kangõo kòm kêt ne ar ba, ga me amã kĩnh kêt ne kam we, “Nãm ajbã. Me karõ punun ar o ba nhym ajbã”, ane.

Be, nã gãm me aje me prĩre pyràk ne amã ja kĩnh kêt ne ajte amã jadjwý kĩnh kêt ne.

<sup>34</sup> Nhym bep ba ne ba mrãmri gêt amijo inhĩ ne me awýr bõx ne me akam idjãkur iban kôt ikòm iba ga me kam amã ikĩnh kêt ne we ijã, “Kê, tãwã ne kum prãm̃ti, kum uba kangõ djãnhti.” Ne we ajte ijã, “Me kute bēnjadjwýr bajtemmã pi'òk kaprĩo atom djwýnhmē me axweobit ne òbikwa”, anhýr ar o aba.

<sup>35</sup> Djãm Metĩndjwýnh jamak punu got? Axwe amak mex ne prĩne kute amikukãm mýjja kunĩ mar ne Djuão kute amijajbur ne ar bamã ano. Ne ajte amikukãm umarkam badjwý ijano. Ije amijajbur

kêtmã ijano. Nhym kôt me amak mex, me amikukãm umar, ar ipumũn kam òkre kadjwýnhbē amim, “Mrãmri ne Metĩndjwýnh mexkumrēx ne amē ar ano”, ane. Nãm ã Jeju memã ane. Tãm ne ja.

*Me'õ ni jaxwe kute me kudjý djào Jeju par kudjý.*

<sup>36</sup> Nhym kam mekbē pardjēu'õ nhidjibē Ximão ne Jejumã kum,

—Amrē tēn ikutã anhõ kwý krē, ane.

Nhym kam kutã ò kwý krēmã tēn bõx ne nhý. Nhym me abenmã arē. <sup>37</sup> Nhym me'õ nire arým kuma. Me'õ nija ne axwe ne krĩ tãm kam arĩk ar ban kam Jeju tēm ne mekbē pardjēu'õ nhũrkwãkam ò kwý krēno ýrkôt arým kuma. Arým kuman kam 'ýr tē. Nãm ngònh mexte, kēn jakareo ngònhkam me kudjý djào ipun kubyn 'ýr o tēn o bõx.

<sup>38</sup> O bõx ne burũm ibôn mýro nhý. Parbē mýro nhý nhym no kangõ prĩne Jeju par kumrã. Par kumrã nhym kam ta amikĩo par ngrã. Kum Jeju kĩnhkam 'ýr tēn bõx ne omũn kam amikam pijãm ne kam muw ne prĩne no kangõo par kumrãn kam amikĩo par ngrã. Ne kam par kaõ. Kum abēkam par kaõn kam me kudjý djào par kudjý. <sup>39</sup> Nhym mekbē pardjēu'õ kutã Jeju ò kwý krēno ýrja arým omũ. Arým omũn kam òkre kadjwýnhbē amim,

—Be, Jeju kute mar kêt. Bep Metĩndjwýnh kabēn jarēnh djwýnhkumrēx ne ren arým kuma. Mýj me'õ niwã ma, arĩk ar baja ren arým kôt kuma, me'õ axwe kute kupēnhkôt ren arým kuma. Ren kuman ren am-inēje ano. Bep kati kute mar kêt. Kute Metĩndjwýnh kabēn jarēnh mar kêt, kàtàm.

Nãm ã òkre kadjwýnhbē amim ane.

<sup>40</sup> Nãm ã ane nhym Jeju arým kuman kam kum,

—Ximão ba amã ikabēn jarē, ane.

Nhym,

—Ã, bēnjadjwýr, aj rã'ã, ane.

<sup>41</sup> Nhym kum,

—Ë, me'õ ne ar amãnhkrutjamã pi'òk kaprĩre ngã. Nãm jamã pi'òk kaprĩ ngrireo 50 ne kungã. Ne ajte jamãdjwý pi'òk kaprĩ raxo 500 ne kungã. <sup>42</sup> Nhym ar ja amē te akubyn kute kum o pãnhmã. Te o ane nhym kam kute arkum pi'òk kaprĩ nhõr djwýnhja

arkum, “Kwārīk wānh imã o pānh kêt. Dja ba tu o akno”, ane.

Bir be, nhym gêdja kum abê rax ne? ane.

<sup>43</sup> Nhym kam Ximão Jejumã kum,

—Kon, birãm tãwã, kute kum rax ne òr ne kute pānh tu o biknorwã gêdja kum kīnh rax ne, ane.

Nhym kum,

—Nà, kôt ne ga aje arēnhwã, ane. Nija ne axwe rax. Ba arým axwe kunĩo aknon kum pānh jarēnh kêt ne. Kam ne kum ikīnh rax ne, ane. <sup>44</sup> Ne kam nija'yr akēx ne Ximãomã kum,

—Ë, djã nã gãm nija pumũ? Be, nã bãm anhũrkwãmã wadjã ga aje imã ngô nhõr kêt, ije amipar ku'õnh kadjy aje imã òr kêt. Nhym bep tãmja ne no kangõo ipar kumrãn kam amikĩo ipar ngrã. <sup>45</sup> Ga ne ga amã ikīnh kêt kam aje inhine kaõr kêt nhym bep tãmja ne ibõx totokbê arek ipar kaõro nhỹ. <sup>46</sup> Ga ne ga aje ikrã ngrãnh kêt nhym bep tãmja ne me kudjy djão ipar kungrà. Tãmja ne kum ijabêkumrēx ne prĩne ijo djuw mex ne. <sup>47</sup> Kam ne ba amã, “Tãmja ne axwe krãptĩ ba arým tu kunĩo ibiknorkumrēx ne. Ga kum ijabê raxja pumũ. Nhym bep ije me'õ jaxwe ngrireo ibiknor ne amipānh kum ikīnh ngrire”, ane.

<sup>48</sup> Ne kam nijamã kum,

—Arým ne ba ajaxwe djãri arým kunĩo akno, ane.

<sup>49</sup> Nhym kam me Jejumẽ ro'ã õ kwỳ krẽno kumexja abenmã kum,

—Djijãk tõ mỳj me'õ ne gêt me axweo biknoro ba? ane.

<sup>50</sup> Nhym bep Jeju ne nijamã kum,

—Ga ne ga mrãmri aje tu amim ikamnhĩxkumrēx nhym kam Metĩndjwỳnh arým apytã, on adjumar mex ne tẽ, ane. Tãm ne ja.

## 8

### *Ar nire kute Jejuo djuw mexo ba.*

<sup>1</sup> Nhym kam tũmbê Jeju ajte pyka kunĩkõt ipõko mõ. Krĩ rũnhmẽ krĩ kryre kunĩkõt memã Metĩndjwỳnh kukràdjã'ã ujarēnh ipõko mõ. Ne kãj bê memã kabēn ny, kabēn mex'ã ujarēnh mõ. Mỳj kabēn mex'ã? Bir, Metĩndjwỳnh kute me utãr ne me kadjy bēnjadjwỳr ne kute ar meo bamã tãm. Tãm

ne memã arēnh ipõko mõ. Nhym kõt ba djwỳnhbê 12 kõt mõ.

<sup>2</sup> Nhym me niredjwỳ kõt mõ. Mỳj me nire nã? Bir, me karõ punumẽ apỹnh me kanẽ djãri kute kubê me utãrjadwỳ ne me kõt mõ.

Marij me kute kum Madarena anhỹrja, kurũm ne Jeju kute me karõ punuo 7 ne apõx ne anorja.

<sup>3</sup> Õbê ne Djõwanã, Kudja prõ. Kudja ne kubê bēnjadjwỳr raxbê Erodji nhõ nēkrēx pumũnh djwỳnh.

Õbê ne Xudjana. Nhym ajte me kwỳ rax ne me kõt mõ. Be, me nire tãm ne me kõt mõn õ pi'õk kaprĩreo aro djuw mexo mõ, o arkum mỳjja jamỹnh mõ.

*Kute bàygogore 'y'ã Metĩndjwỳnh kabēn jakre.*

*Mat 13.1; Mak 4.1*

<sup>4</sup> Nhym me apỹnh pyka kunĩkõt Jeju'yr mõn bõx ne 'ã kumex. Me krãptĩ ne me 'ã akuprõ nhym kam Jeju Metĩndjwỳnh kukràdjã'ã memã mỳjja jakre. <sup>5</sup> Nãm mekmã kum,

—Ë, õ pur djwỳnh ne kute õ purkam bàygogore kremã 'yr o tẽ. 'Yr o tẽn o bõx ne kam ar 'yo ukabêr mrã, ane. Nãm mekbê idjaer kute mỳjja kre kadjy tu mỳjja 'yo akabê, bàymẽ bàygogore 'ymẽ, ja ne me kute purkam kremã o mrãn kam purkam o ukabêr mrã. Kute mrãmri ne me kute katēbãri 'yo ukabêr mrãnhja pyrãk.

—Be, me'õ ne ar bàygogore 'yo ukabêr mrã. Nhym 'y kwỳ prykam rôrõk ne. Nhym me paro pykamã angij nhym te ingrõtmã nhym me prĩne paro pykamã angij. Nhym kwēnhdjwỳ mã prĩne kuku.

<sup>6</sup> Nhym 'y kwỳ kēnpõ'ã rôrõk ne ingrõt totokbê tu ingrõt mjõ. Mrãmri ne kēn'ã pyka prorrekam 'y rôrõk ne 'êx ne ingrã mex ne te kēnmã arẽo ingãn arým ty.

<sup>7</sup> Nhym 'y kwỳ mrỹnhĩkam rôrõk ne kam mrỹnhĩmẽ ro'ã ingrõt ne. Nhym kam prĩne o akno.

<sup>8</sup> Nhym bep 'y kwỳ ne pyka mexkam rôrõk ne kam ingrõt ne abatãnh ne ijjy rũnh ne 'y krãptĩkumrēx. Ijy kam 'yja amũ o amijakren kam 'y pỹnhkõt kubê 100 ne. Tãm ne ja, ane. Nãm ã Jeju memã anen kam ajte kãj bê memã kum,

—Godja ga me ajõ ajamakkre mex jabej, on ama, ane.

<sup>9</sup> Nhyam kam kôt ba djwýnh abej kukij ne kum,

—Mýj'ã ne ga bàygogore kre jakre? ane.

<sup>10</sup> Nhyam arkum,

—Bep ar amãbit dja ba mýjja bipdjuro amirít ne. Metíndjwýnh kute ar apytâr ne ar akadry bñjadjwýr ne kute ar ar ajo baja, ar amãbit dja ba kukràdjào amirít ne. Nhyam bep me jamã dja ba kukràdjà'ã mýjja jakren memã arê,

“gê me te kute mýjja pumũnhmã ari ar abej rít ne te kute mýjja marmã te ari ar amako akêx ne mar kêtumrêx ne.”

<sup>11</sup> Nã, ar amã dja ba kukràdjà jarê. Ije kukràdjà'ã mýjja jakreja jarê.

'Yja, me'õ kute 'yo ukabêrjabê ne Metíndjwýnh kabên. <sup>12</sup> 'Y prykam rôrôkja ne me kute Metíndjwýnh kabên mar kajgoja'ã akre. Bit me kute amim Metíndjwýnh kabên markumrêx ne 'ã ngrà tỳxmã nhyam ate Xatanaj jãm meo amijakren mekbê Metíndjwýnh kabêno akno. Me kute tu amim markumrêx nhyam Metíndjwýnh kute kubê me utâr karõ ne jãm meo amijakren mekbê Metíndjwýnh kabêno akno.

<sup>13</sup> Kênkam 'y rôrôkja ne me kute amim Metíndjwýnh kabên mar 'iry kêt ne kangaja'ã akre. Nãm me Metíndjwýnh kabên man bit kum kñhkumrêx o tēm kajgo. Kute mrãmri tu amim markumrêx kêtê. Ajkwao-bit ne kute mar. Kute 'y nhingrôt ne arê kêtka te bêt tykja pyræk. Kute amim mar 'iry kêt nhyam ate apýnh me kaprĩ djari kute ikò'ymã 'yr bôx nhyam arým kanga.

<sup>14</sup> Mrýnhĩkam 'y rôrôkja ne me kute Metíndjwýnh kabên mar ne kam ate ajte kute jãm mýjja marja'ã akre. Nãm me arým amim Metíndjwýnh kabên man kam 'ãno ãm kêt ne. Djã nãm me Metíndjwýnhbit man ar o ba? Kati, nãm me jãm umar punu djã 'õmê nêkrêxmê mýjja me kute o amikñhjamê mýjja jakôtbit amak bën ne ne kam amũ amim Metíndjwýnh kabên maro àrwý kêtumrêx ne. Kute mrýnhĩ kute prĩne bàygogo nhingrôto bikênh nhyam kam ijj kêt mexja pyræk.

<sup>15</sup> Nhyam bep pyka mexkam 'y rôrôkja ne me kute tu amim markumrêx ja'ã akre. Nãm me tu amim Metíndjwýnh kabên

markumrêx ne tu 'ã ngrà tỳx ne kam mũm ate ibej mýjja 'õ mar kêt ne tu mrãmri 'ãno djan mã kôt ajkamê. Kute 'y nhingrôt ne abatanh ne ijj mexkumrêx ne kumex ja pyræk. Tãm ne ja.

*Kute ngõnhpõk'ã memã Metíndjwýnh kabên jarênh djwýnh jakre.*

*Mak 4.21*

<sup>16</sup> Ba ajte ar amã 'õdjwý jarê. Djãm me kute ngõnhpõkmã angjênh ne kute ngõno 'ã pro got? Ne kute ikwã djã krakri umjýr got? Kati, ngõnhpõk ne me kum angij ne tu kênhkam umjuw nhyam memã kikre kre kurwýo ku'ê. Nhyam me mrãn wangij nhyam prĩne memã irã. Dja gar ã abê ngõnhpõk mãn prãbê ã memã Metíndjwýnh jarêno ane gê me kuma.

<sup>17</sup> Ê, amũ akati 'õkam dja mýjja bipdjur kunĩ amirít ne. Nhyam mýjja pudjurdjwý amirít nhyam me kunĩ kuma. <sup>18</sup> Kam gêdja gar mýjja kunĩ kute amirít kêttri prĩne ik-abên ma. Gora ar amim aprĩn ikabên ma. Me kute tu amim imarkumrêxmã dja Ibãm ijo amirító tẽ gê me amim imar rax. Nhyam bep me ajkwaobit kute amim imarjabê dja Ibãm ijo apdju. Dja prĩne inêje me no'ã pron mekbê ijo apdju. Tãm ne ja, ane. Nãm ã Jeju arkum amijarêno ane.

*Jeju kamymê nã te 'yr àrmã.*

*Mat 12.46; Mak 3.31*

<sup>19</sup> Nhyam kam Jeju nãmê kamy ar 'yr tẽ. Ar kute omũnhmã ne ar 'yr tẽ. Nhyam me 'ã kumex. Nhyam ar te 'yr bikamênhmã te 'ã meo ane. Nhyam me 'ã ãptĩ: ane. Prĩne Ar kubê utã. <sup>20</sup> Nhyam kam me'õ Jejumã kum, —Ota anãmê akamy ar amrêbê awýr bôx ne akuri ku'ê, te kute apumũnhmã kikre kabem ku'ê, ane.

<sup>21</sup> Nhyam kam kum,

—Me kute Metíndjwýnh kabên mar ne kute kabênkôt amijo baja, o ne ba inã, o ne ba ikamy, o ne ba inhõbikwakumrêx, ane.

*Kute kôkmã bën tỳx.*

*Mat 8.23; Mak 4.35*

<sup>22</sup> Ne kam amũ akati jakam kôt ba djwýnhmê ro'ã kàkam wadjàn nhý. Nhyam kam arkum,

—Gwaj gop imôti nhikjê mã rê, ane.

Nhyam kam ar kum,

—Gêto, ane.

Nhym kam ar mō. <sup>23</sup> Kôknhōkākam ne ar mō. Mō: nhym kam Jeju ōto nō. Nhym kam arým kōk wabê. Àbêr tỳx nhym arým kam ngô aben mok ne. Nhym kam ngô kute aben mokkam arým kākam ngô ipu ne. Ne arým ar 'ỳr. <sup>24</sup> Nhym Jeju arek ōto nō. Arek ōto nō nhym kam kôt ba djwỳnh 'ỳr prôt ne tok ne kum,

—Meo ba djwỳnh, meo ba djwỳnh, gop ano tỳx, ota gwaj arým badjâr 'ỳr, ane.

Nhym kam ekruux ne kàjmã dja. Ne kam kōkmã bēn tỳx ne ngô kute aben moktijamã bēn tỳx nhym arým ngô anhikrê nhym arým kōk djábêr anhikrê. Nhym arým ngô anhikrên nō. <sup>25</sup> Nhym kam Jeju arkum,

—Mỳkam ne gar imar kêt ne tu amim ikamnhĩxkumrêx kêt ne? ane.

Nhym kam ar madjakam e tuk anen kam ari aben pumũho kumex ne kam abenmã kum,

—Ije tô mỳj me'ō got ja? Nãm tu gêt kōkmã kabēn ne ngômã kabēn nhym tu kabēnkôt anhikrê, ane. Arým ne Jeju kōkmê ngômã kabēn nhym anhikrên nō.

*Me karō punu krãptĩ kute me'ōo ba.*

*Mat 8.28; Mak 5.1*

<sup>26</sup> Nhym kam ar mō. Mō:n arým ikjêmã rê. Mekbê Djeradja nhō pyka'ỳr rê. Aben kōnh ne pykabê Garrêjamê mekbê Djeradja nhō pyka. Aben kōnh ne aktã akàx nhikjê'ã krĩ. Nhym kam arým ar ikjê'ã mekbê Djeradja nhō pyka'ỳr rê. <sup>27</sup> Nhym kam Jeju wabi. Krĩbê Djeradjakam me kra 'ō ne me karō punu ar o ba nhym kam Jeju bōx nhym omũn kam 'ỳr prôt ne. Amrêbê me karō punu kute ar o ba tũmkam ne ar kubêkà jangjênh kêt ne ba. Kênkrekambit ba. Kikremã bōx kêt. Kênkrekambit ne ar ba, me kute kênkrekam me angjênh jakambit ne ar ba. <sup>28-29</sup> Me karō punu kute ar o baja ne me te kute uwpre kubê ijêmã te o ane. Nhym me karō punu kute ar o bakam mrãmri 'itỳxkumrêx ne. Nãm me te pa djuwpre te te djuwpre nhym tu amijã kàxiràx kukê. Nhym me karō punu mã arwã'ỳr kujaêko ba, mã 'ỳr kangō. Nãm ã me karō punu ar o anhỹro ba. Be, tãm ne Jeju pumũn kam 'ỳr prôt ne. 'Ỳr prôt ne

parbê tu mỳrbê tỳm ne amra. Nhym Jeju arým me karōjamã kum,

—Me karō punu on akato, ane.

Nhym kam arým amra ne. Ne kam kàj bê kum kabēn ne kum,

—Jeju, Metĩndjwỳnh pymao kubê kumkati kra, mỳj ne ga aje ijomã? Kwãrĩk wãnh ijo abikênh kêt, ane.

<sup>30</sup> Nhym kam Jeju kukij ne kum,

—Mã ne anhidji kute? ane.

Nhym kum,

—Ibê ne Krãptĩtire, ane. Me karō krãptĩ: kute ar o ba'ã ne,

—Ibê ne Krãptĩtire, ane. <sup>31</sup> Kwãrĩk wãnh ga mũm me ijanor kêt, ane. Ne kàj bê kum kabēn ne, aminêje kum kabēn ne, ne kum,

—Kwãrĩk wãnh ga kre ry typydjija'ỳr me ijanor kêt. Kwãrĩk wãnh kam me ijo abikênh kêt ba me itokry kêt, anhỹro nhỹ.

<sup>32-33</sup> Nhym kum ajmã angrô jamyre krãnhrekam kumex. Kute pi'ō pyrãk ne àkuro kumex. Nhym kam me karō punu Jejumã kum,

—Dja ga angrô jamyre'ỳr me ijano. Dja ga angrô jamyre'ỳr me ijano ba me kum wangjê, ane.

Nhym kam memã,

—Rã'ã, ane. Nhym kam me karō punu arým kum iren mã kurũm katon angrô jamy'ỳr mōn kum wangij. Nhym angrô jamyre umaje bōm tỳm ne pyka krã'yrcam mōn ngô to do: ane, akàx prêk'ã ne mōn nox nhym kam ngô kunĩ nhimex ne.

<sup>34</sup> Nhym kam me kute ō krito djuw mex djwỳnhja omũho dja. Omũho djan prôt ne kam bōx ne memã arê. Me ō krĩkam me jamã arên bu'ã krĩkam me jamãdjwỳ arê.

<sup>35</sup> Nhym kam me Jeju'ỳr prôt ne. Kute omũnhmã 'ỳr prôt ne. Nhym kam me karō punu kute ar me'ōo baja arým mexkumrêx ne Jeju parbê nhỹ. Kubêkà jangij ne nhỹ. Arým umar mexkumrêx ne nhỹ. Nhym me omũn kam tĩn prãm ne. <sup>36</sup> Nhym kam me kute Jeju pumũnh djwỳnhja mekôt prôt ne ajte katon kam memã arênho dja, Jeju kute me'ōkam me karō punu janorja memã arênho dja. <sup>37</sup> Kam pykabê Djeradjakam me jamê bu'ã krĩ krykam me ja ne me Jejumã kabēn ne kum,

—On me ikurũm tẽ, on mã me ikurũm tẽ, ane.

Me kum uma tỳxkam ne me ã aminêje anoro ane. Nhyim kam Jeju kãmã wadjã.  
<sup>38</sup> Nhyim kam Jeju kute me karõ punubê me'õ pytarja te kôt krã ne kum,

—Ba akôt tẽ. Ba akôt tẽ, ane.

Nãm te ane nhyim aminêje nên kum,

<sup>39</sup> —Kati, arek dja. Mã akubyn tẽn anhũrkwãkam memã amijarẽ, Metĩndjwỳnh kum akaprĩn kute apytãrkôt memã amijarẽ, ane.

Nhyim kam ã anen kam mã akubyn tẽn kam arỳm kikre kunĩkôt kikrepdjitã memã ar amijarẽnho ba, Jeju kum kaprĩn kute utãrkôt ar memã amijarẽnho ba.

*Kute me'õ kurerer akubyn o tĩn.*

*Mat 9.18; Mak 5.21*

<sup>40</sup> Nhyim kam Jeju kãmã wadjã ajte akubyn ikjẽmã mõn rê. Nhyim me kam amako krĩ nhyim arỳm bõx nhyim me kam kĩnhkumrẽx ne. <sup>41-42</sup> Nhyim kam me'õbê Djajru Jeju'ỳr tẽn bõx. Djajrubê bẽnjadjwỳr'õ, me bikprõnh djãkam bẽnjadjwỳr'õ. Ne kam Jeju'ỳr tẽn bõx ne kabem tu mỳrbê tỳm ne kam kum,

—Dja ga inhũrkwãmã tẽ, ane. Ne kam kum krao no katoro dja. Kra pydji, kra prĩti ne kanên nõ. Arỳm tyk 'ỳ:r ne nõ nhyim kam kum o no kato. Nhyim kam Jeju kôt tẽ. Me krãptĩ Jeju'ã aõ ne kunoro mõ.

<sup>43-44</sup> Nhyim kam tẽmkôt me'õ nija kôt bõx ne 'ã kubẽkã nhidja kupê. Nãm ar kamrõ apõx ba. Amrẽbê ne ar kamrõ apõx ba. Arỳm 'ã amexbê 12. Nãm prĩne amijã amibê pi'õk kaprĩ kunĩ krẽn kajgon mex kêt rã'ã ne. Nãm te me kane djwỳnh o ane. Nhyim bep Jeju tẽmkôt ne 'ã kubẽkã nhidjabit kupên, tãmkam arỳm kamrõ ngrã, arỳm mex ne. <sup>45</sup> Nhyim kam Jeju memã kum,

—Mỳj me'õ ne ikupê? ane.

Nhyim me kunĩ aminêje kum,

—Kati, kon, me'õ, me'õ, anhỹro kumex.

Nhyim kam Pedru kum,

—Bẽnjadjwỳr, djãm me krãre: got ga “Mỳj me'õ ne ijã kubẽkã kupê”, ane. Me kute gwaj bamã ipõk mex ne kute gwaj bakunoro mõrjakam ga, ane.

<sup>46</sup> Nhyim kum,

—Nã, arỳm ne me'õwã ikupê. Ipymao ne ba arỳm me'õwão mex ne arỳm kuma, ane.

<sup>47</sup> Nhyim nija te kute kubê amipdjurmãn kam ta amim,

—Kati, arỳm ne kuma, anen kam 'ỳr tẽ. 'Ỳr tertet tẽ. Umaje tertet tẽn tu mỳrbê tỳm ne kum amijarẽ. Me ipõkri tu kum amijarẽnho nõ. Kute 'ã kubẽkã kupênh ne tãm kam mexkôt kum amijarẽnho nõ. <sup>48</sup> Nhyim kum,

—Àpnhĩre nã gãm tu amim ikamnhĩxkumrẽx ne. Aje amim ikamnhĩxkumrẽx kôt ne ba arỳm apytã. On adjumar mex ne mã akubyn tẽ, ane. <sup>49</sup> Kum kabẽno ãm rã'ã nhyim bẽnjadjwỳr nhũrkwã kurũm me'õja tẽn kajpan kum,

—Onĩj arỳm akra ty. Kwãrĩk wãnh ga memã ujarênh djwỳnhmã akrao ano kator kêt, ane.

<sup>50</sup> Nhyim Jeju arỳm kuman kum,

—Kwãrĩk wãnh ga akaprĩ kêt ne akrakam adjumar punu kêt. Dja ga tu akra'ã ikamnhĩxkumrẽx nhyim arỳm akubyn mex ne, ane.

<sup>51-53</sup> Nãm ã anen kam mã 'ỳr tẽ. Tẽn kam ùrkwãmã bõx. Nhyim me arek abej ãmrao kumex. Nhyim kam mekmã kum,

—Kwãrĩk wãnh ga me amỳr kêt. Kati, tyk kêtê, nãm õto nõ, ane.

Nhyim me arỳm tyk mexkôt omũn kam Jeju'ã keketo kumex ne aprỳo kumex, ne we,

—Be nãm we, “Nãm õto nõ”, ane.

Nhyim kam aminêje me ja nê, mekôt mõrjamẽ me kute tyk jabej ãmrao kumex-jamẽ aminêje me nê. Nhyim bep Pedrumẽ Djuãomẽ Xijagumẽ tyk ne nõrja nãmẽ bãmmẽ ar ajbit ne ar kôt wadjã.

<sup>54</sup> Nhyim kam Jeju ikra 'amỳn kum,

—Àpnhĩre, kãjmã nhỹ, ane.

<sup>55</sup> Nhyim kam karõ akubyn kum wadjã nhyim akubyn tĩn ne ekrux ne kãjmã nhỹ. Nhyim kam Jeju nãmẽ bãm arkum,

—Ar kum mỳjja 'õ ngã gẽ kukrẽ, ane.

<sup>56</sup> Nhyim nãmẽ bãm ar abenkam no tyn dja. Nhyim kam arkum,

—Kwãrĩk wãnh gar memã arênh kêt. Dja gar tu mekbê udju, ane.

## 9

*Kute Ar kubê 12 janor.*

*Mat 10.5; Mak 6.7*

<sup>1</sup> Nhyam kam akati 'ökam Jeju amikôt ba djwýnho akprô. Kôt ba djwýnhbê 12ja ne aro akprô. Apýnh me ô pyka djâri kute 'ýr ar anormã ne aro akprôn arkum,

—Ë, ikabênkôt dja gar me nêje me karô punu jano. Ne apýnh me kanê djâri me utâro mō. Ba dja ba ar amã ipyama jadjã gar kam ipyamao apýnh me kanê djâri meo mexo mōn me karô punu kute meo ba djâri kubê me utâro mō.

<sup>2-5</sup> Ar apa, ã, ba ar amã arê. Kwãrîk wãnh gar anhō mýjja'ô byr ne o amôr kêt, akajpar djã'ô byr ne o amôr kêt, ajênh tur ne o amôr kêt, anhō kwý krên djã, anhō pi'ôk kaprî, anhō kubêkã'ô kwãrîk wãnh gar o atêm kêt. Dja gar tu anhýkam mō. Mōn kam apýnh me ô pyka djâri me 'ýr ajmã. Dja gar me'ô nhûrkwãkam bôx ne nhý, kwãrîk wãnh ajte amũ amã me'ô nhûrkwã 'ô kînh ne 'ýr amôr kêt. Dja gar tu bôx ne kikrekam abôxwã tãmkam tu arek kam anhikwão dja. Dja gar memã arênh pan kam arým ajte amũ pyka 'ô'ýr tèn ajte kikre 'ökam tãm ne. Ne ajte amũ tèn 'ökam tãm ne. Ne ajte 'ökam tãm ne.

Dja gar krî 'ökam bôx nhyam me kum ar akînh kêt ne kute ar akabên mar prãm kêt jabej, gar kam arým tu amörkumrêx ne. Tu amörkumrêx kadjy amiparkã'ã pykawã tatak ne. Aje me kute akabên mar prãm kêtjao amirît nhyam Metîndjwýnh kute omũnh ne amũ 'ökam kute memã pãnh jarênh kadjy dja gar amiparkã'ã pykawã tatak ne. Dja gar kãj bê memã kum, “Onîj Metîndjwýnh kute ar me bapytãr ne me bakadjy bënjadjwýr ne kute ar me bajo bamã”, anhýro mō. Ne kam kôt meo mexo mō, ane. Nãm ã Jeju kôt ba djwýnhmã me'ã karôo anen kam mã me'ýr ar ano.

<sup>6</sup> Ar ano nhyam kam ar arým krî kunîkôt ajmã ne kãj bê memã Jeju'ã ujarênh ny jarêho mōn kôt meo mexo mō, apýnh krî kunîkôt ne ar ajmã ba.

<sup>7-8</sup> Nhyam kam bënjadjwýr raxbê Erodji arým Jeju'ã ujarênh man kôt ba djwýnh kute meo mexo mörja arým adjwýnhdjwý ma, ne kam te kute marmã. Nãm me apýnh kabêno noo biknor mex ne. Nhyam te kute mýjja marmã. Jeju'ã ne me ari kabên kwý jarê: ne abenmã kum,

—Bep Djuão kute ngônhmã me angjênhja ne we ajte tîn ne kato, ane.

Nhyam ajte me kwý we,

—Me bakukãmãrebê Erij ne ajte kato, ane.

Nhyam ajte we me kwý,

—Bep Metîndjwýnh kabên jarênh djwýnh amrêbê tyk ne ajte we tîn ne kato, ane.

Nhyam kam Erodji te kute apýnh me kabên ja marmã. <sup>9</sup> Ne kam ta amim,

—Ije bep Djuão ne ba arým mut krãta. Nhyam mýj me'ô got ja ba arým 'ã ujarênh ma, ane. Ne kam te kute Jeju pumũnh prãme.

*Kute tepmê djwýo meo djuw mex.*

*Mat 14.13; Mak 6.30; Dju r 6.1*

<sup>10</sup> Nhyam kam arým Jeju kute ar anor nhyam ar mörja ajte akubyn 'ýr mōn bôx ne kum amijarê. Nhyam kam krîmã me umaje ar ajbit aro tẽ. Krî nhidjibê Bexadamã ne aro tẽ. <sup>11</sup> Ar ajbit kute o mormã nhyam ate ajte me kãtãmjã kôt krãptî:n bôx. Nãm me abenmã Jeju mörkôt arên kam ajte kôt mō. Djã nãm Jeju me krãptî pumũn memã àkrê? Kati, nãm me krãptî pumũn kam tu memã kabên mex jarê. Nãm Metîndjwýnh me kadjy bënjadjwýr ne kute me utãr ne ar meo bamã memã arê ne kam ajte kôt me kanê pytãro dja.

<sup>12</sup> Nhyam kam arým me'ã amykry tẽ. Nhyam kam kôt ba djwýnhbê 12ja 'ýr tẽ. Jeju'ýr tèn kum,

—Ije gop on me ano. Gop on me krãptîja me ano gê me apýnh krîmã ajmã bu'ã krî kryremãdjwý mōn wãnh kam ô kwý krên wãnh kam nōn ta amikadjy mýjja by. Nhyam nhýnh ne mýjja 'ô ne me kute krênmã ne me jakam ar ba. Arwãkam ne gwaj ar baba, ane. <sup>13</sup> Nhyam kam Jeju kôt ba djwýnhmã kum,

—Ar ga dja gar mekmã mýjja ngã gê me kukrê, ane.

Nhyam ar kam kum,

—Ije kati, ar inhō djwýbê 5 ne tepdjwý amãnhkrut. Jabit. Be, djãm mýjja rax? Nãr djãm ar imôr ne ije gwaj banhō pi'ôk kaprîo me krãptîja kadjy ije djwý byrmã? ane.

<sup>14</sup> E kum bep me krãptîkumrêx. Me my'ã akrebê 5.000. Nhyam kam arkum,

—Ë, dja gar meo 50'ã kabên ne me krîo tẽ.

15 Nhyam kam kôt ba djwýnh meo 50'ã kabên ne me krîo tên me krî pa. 16 Nhyam kam Jeju djwýbê 5ja byn tep amê kubyn kàjmã krân kàjkwa pumûn Metîndjwýnhmã ôdjânh jarê. Ne kam djwýmê tep kokij ne kam kôt ba djwýnhmã kungã. Nhyam kam amû memã kungã, me krãptîjamã kungã. 17 Nhyam me kam kukrê. Nhyam kam me kunî ô kwý krên kam ajnekumrêx. Nhyam kam djwýmê tepja'ã kâtâm. Nhyam kam kôt ba djwýnh anhyjao atom ne. Djwýmê tep janhyjao atom nhyam kam 'ã kâbê 12. Djãm djwýmê tep ngri got.

*Pedru kute Jejubê Krituo amirît.*  
*Mat 16.13; Mak 8.27*

18 Nhyam kam 'ökam Jeju ate mekbê tên kam Metîndjwýnhmã amijarêho nhÿ. Nhyam kôt ba djwýnhbit kuri krî. Nhyam kam Jeju kute amijã ujarênh marmã abej ar kukij.

—Ë, ar imã ijã me ujarênh jarê ba kuma, ane.

19 Nhyam ar kam kum,

—Ije kum be nãm we me ajo Djuão kute ngônhmã me angjênh djwýnhja, nhyam me kwý ajo me bakukãmãrebê Erij, nhyam me kwý ajo Metîndjwýnh kabên jarênh djwýnh tûm ajte akubyn tîn ja'ô, ane.

20 Nhyam kam arkum,

—Ne ar gadjwý mã ne gar imar on? Mýj'ã ne gar ijakre? ane.

Nhyam kam Pedru kum,

—Kati, abê ne Kritu. Abê me inhô Bênjadjwýrbê kumkati. Metîndjwýnh amrêbê kute me bakukãmãremã ajarênh ga aje me ipytâr ne aje ar me ijo abamã amrêbê kute me imã ajarênh ba me ije ar akam amako iba, ne arým Metîndjwýnh ajano ga arým bôx, ane.

21 Nhyam kam arkum,

—Nã, kôtô. Kwãrîk wãnh gar memã ja jarênh kêt. Dja gar tu mekbê ipudjurkumrêx ne, ane. Ar kute udjurmã ã arkum arênh tÿxo ane. 22 Ne ajte arkum,

—Ë, dja me prîne ijo ajkê, ba itokry rax ne. Ba ije amijo inhî ne me awÿr irwÿk ba dja ba itokry rax ne. Dja mebêngêtemê me kadjy Metîndjwýnh mar djwýnh nhô bënjadjwýrmê Môjdjê kukràdjã mar djwýnhmê kum ikînh kêt ne ikanga ne

kam tu ibî nhyam ijã akati amãnhkrut ne ikjêkêt ba kam akubyn itîn ne, ane.

23 Ne kam ajte me kunîmã kum,

—Gêdja ga me ajô mã ikôt abikamênh prãm jabej kwãrîk wãnh amidjwýnhbit mar ne amijo kînh kêt. Dja ba ityk kadjy inhô pîte'y mÿn itokry: ne. Dja ga me ajô ijã amijakren aje pîte'y mÿnh mãn pràbê amã atokry puma kêt ne amã ijabê rã'ân kam myt kunîkôt ikadjy amiman mã ikôt ajkamê. 24 Me kute amidjwýnhbit mar ne me kum tokry puma, me tãm gêdja me tyn kam me biknor tokry djakam tê. Nhyam bep me kum ijabêkumrêx ne kute amidjwýnhbit mar kêt nhyam me kute me par jabej me tãm gêdja me amiptàn ar tîn ne ba rã'ã: rã'ã.

25 Ne ren me'ô pykabê mÿjja mexja kunî, nèkrêx kunî ren ari o atom ne o ban kam ren ty, je mã dja kam nê? Kati, nãm ren ty nhyam ren ô nèkrêxja ren wãnh kumex.

26 Godja me'ô ikam pijàm ne ikabênkam pijàm jabej ba badjwý amipãnh kam ipijàm ne. Ba ije amijo inhî ne me awÿr irwÿk gêdja ba amipãnh tãwãkam ipijàm ne. Dja ba ajte iraxo me awÿr bôx. Ibãmmê kadjy mrãnh djwýnh jadjênhmê umao ipyma:n me awÿr bôx. Ibê kumkatio bôx nhyam tãmja ikam pijàmja ba badjwý arým amipãnh kam ipijàm ne.

27 Ba me amã arê. Ibãm dja ijã bënjadjwýr rax mē ba ipymao me apytàn ar me ajo iba. Dja gar adjãmja akwý atînri iraxkôt ipumû, me akadjy ibênjadjwýr rax ne ipy-makôt ipumû. Mrãmri ne ba ikabênja, ane. Nãm ã Jeju memã kabên jarêho ane.

*Jeju adjêho kute amijo amirît.*  
*Mat 17.1; Mak 9.2*

28 Nhyam 'ã pi'ök kamrêk pydji nhyam aro tē, Pedrumê, Xijagumê, Djuão aro tē, krãnh'ÿr aro tēn imôkmã aro bôx. Kute Bãmmã amijarênhmã ne 'ÿr aro bôx. Ne kam Bãmmã amijarê. 29 Bãmmã amijarêho dja nhyam ajmã nokre o nhyam atemã nokre nhyam 'ã kubêkàdjwý aka: ne. Akakam adjênh ne.

30-31 Nhyam ar my amãnhkrut ne kum kabêno dja. Môjdjê Erij ar amrêbê tyk, ar tãm ne ar katon kum kabêno dja. Nãm ar adjênh ne uma:kumrêx ne kum kabêno dja. Jejumê ne ar abenmã kabêno



dja. Jeju tyk'ã ne ar abenmã ujarêho dja. Krîraxbê Djeruxarêkam me kute bînmã ne ar abenmã arêho dja. Metîndjwýnh kute tykmã kum 'ã karôkôt ne ajte ar 'ÿr bôx ne kôt abenmã arêho dja.

<sup>32</sup> Nhyh Pedru ar ôtdjwakumrêx ne arek ôto ikwã. Ne kam no tÿx ne kam Jeju pyma, adjênhkôt omÿ nhyh amê ar kuri âmjadjwÿ tãm ne. Kam kubêkà jadjênh ne kam mexkumrêx ne ku'ê. <sup>33</sup> Nhyh arÿm ar amê tēm 'ÿr dja nhyh Pedru Jejumã kum,

—Bênjadjwÿr, mrãmri ne bar jakam bôx ne akuri nhÿ nhyh mexkumrêx ne. Bar apÿnh ar amã kikre'ã irôx nhîpêx, ga anhômê, Môjdjê nhômê, Erij nhômê. Amãnhkrut ne ikjêkêt dja bar ar amã ipêx, ane.

Kute amikabên'ô mar kêt. Pedru ta ne amikabên'ô mar kêt kam âm tu arîk kabên ja jarê. <sup>34</sup> Kum kabêno âm rã'ã nhyh kam kakrã arÿm prîne aro akno. Nãm kakrã kute prîne aro biknorkam arÿm ar tîn prãm ne.

<sup>35</sup> Nhyh kam kakrã kurÿm Metîndjwýnh arkum kabên ne arkum,

—Be, ikra ne wã. Ar omÿ. Ikra ja ne ba àpênh kadjy amijo utàn amim kudja. Tãwã dja gar kabên man kabênkôt mrã, ane.

*Jeju me karô punumã bën tÿx.*

*Mat 17.14; Mak 9.14*

<sup>36-37</sup> Nãm ã arkum kabên anen anhîkrê nhyh kam Jejumê kôt ba djwýnh ar ate ku'ê. Amê ar myja arÿm mã nhî'ãm tē.

Nhyh akati nhyh kam Jeju akubyn krãnhre kurÿm aro ruw. Aro ruw ne kam mã aro mō. Aro mō nhyh me krãptî ar kutã mōn ar kajpa. Djãm kam got ar kute Jeju jadjênhkôt omÿnhja memã arê? Kati, Jeju ar pykabê bari ne ar mekbê udju ne.

<sup>38</sup> Nhyh me ar kajpa nhyh me ipôkri me'ô myja kàj bê kum akij,

—Bênjadjwÿr, gop ikraja pumÿ. Ikra myja ne pydjii. <sup>39</sup> Ota me karô punu'ô ar ibê ikra paro ba. Nãm 'ÿr ban bôx nhyh ar ijaêrbê tu amra: ne. Nãm amran rôrôk ne àmnhîrêho ikwã, ajmrô prôto ikwã. Ne kam kute amijo pyka titik kurêje prîne amingã. Kute kum irer prãm kêtumrêx.

<sup>40</sup> Nãm bãm te akôt ba djwýnhjamã ikrao a'uw nhyh kute imã ikra pytâr kêtumrêx, te kute imã utarmã te o ane, ane. Nãm ã

Jejumã kra jarêho ane. <sup>41</sup> Nhyh kam Jeju me'ÿr akêx ne memã kum,

—Ije me akamingrãny aje amim ikamnhîx kêtumrêx. Me ajaxwe. Mã dja ijã akati, akamât kô kute ba me akam arek ar iba. Nãm bãm me awÿr bôx ga me ajamakre kêtumrêx ne prîne akabêno ikaty. Nãm bãm te amiwÿr me akam ama ga me arîk ar aba, ane. Ne ajte bãmjamã kabên ne kum,

—Amrê akrao tē, ane.

<sup>42</sup> Nhyh kam 'ÿr tēn pa 'amÿn Jeju'ÿr o tē. 'ÿr o tēmram nhyh ajte me karô punuja o pyka kôpênât ne. Krajao pyka kôpênât nhyh àmnhîrêho nō. Nhyh Jeju me karô punujamã bën tÿx nhyh umaje bôm tÿm. Nhyh kam Jeju kum krao mex ne akubyn bãm mã kungã. <sup>43</sup> Nhyh me kôt omÿ, Jeju kute Metîndjwýnh pymao o mexja me kôt omÿ ne ari aben pumÿho kumex. Djãm Metîndjwýnh pyma ngri got. Nhyh me Jekum no tyn kumex rã'ã nhyh Jeju kôt ba djwýnhmã kum,

<sup>44</sup> —Gora ar amijamakrekam ikabên janhô. Ê, ba ije amijo inhî ne me awÿr irwÿk gêdja me memã ikanga, ikurê djwýnhmã ikanga, ane. <sup>45</sup> Nhyh ar kute kabênja mar kêtumrêx. Nãm ar ajmã amakre nē, te kute marmã. Ne kam te kute kukjêrmãn kam pijãm ne.

*Jejukôt ba djwýnh kute abenbê bênjadjwÿr pytâr tē.*

*Mat 18.1; Mak 9.33; Pir 2.3*

<sup>46</sup> Ne kam kabêno aben japanho mō, kôt ba djwýnhja kabêno aben japanho mō. Mÿj mÿr jabej? Bir, nhÿnh kôt ba djwýnhja 'ô gêdja bênjadjwÿr raxo aben jakre. Ja mÿr jabej ne me kabêno aben japanho mō.

<sup>47</sup> Nhyh Jeju kôt ba djwýnh kute kabêno aben japanho mōrja kute ar tãri amako mar kêt. Nãm tu mÿm kuma ne kam me'ô prîne pa 'amÿn amijakÿxkôt kudja. <sup>48</sup> Kudjan arkum,

—Ê, gar me'ô prîreja pumÿ, kâtãm mexja pumÿ. Dja me'ô ikôpdji'ã kum me'ô prîreja, me'ô kâtãmja kînh ne kam arÿm badjwÿ kum ikînh ne. Dja me'ô kum ikînh ne kam kum Ibãmdjwÿ kînh ne, Ibãm kute ijanorjadjwÿ kum kînh ne. Ê, me'ô kâtãm mex gêdja ja pãnh bênjadjwÿr rax ne, ane.

Nām ã Jeju kôt ba djwýnh kute amijo rax prãmjamã kabên jarênho ane.

<sup>49</sup> Nhyam kam Djuão kum,

—Bênjadwýr, ba amã arê. Me'õ gwaj bakôt ba kêt'õ ne tu me karõ punu kute me'õo bamã anhidji jarê. Kum anhidji jarên me karõmã kum, “Ba Jeju kukwakam amã ikabên. On kum anhire”, ane. Nām ã kum anhýro dja, bar arým omũ. Ne kam gwaj bakôt ba kêt kam bar kum, “Kwãrîk wãnh”, ane. Nām ã Djuão kum ane.

<sup>50</sup> Nhyam kam kum,

—Kati, kwãrîk wãnh 'ã kum akabên kêt. Ba ar amã arê. Me'õ kute ar ajo kurê djwýnh kêt ne arým tu mrãmri ar ajo õbikwa, ane. Nām ã Jeju kum ane.

*Pykabê Xamarijkam me ja kute Jeju kanga.*

<sup>51</sup> Nhyam arým Bãm kute kàjkwamã o àbirmã arým õ akati 'ýr bõx 'ýr. Nhyam kam krîrãxbê Djeruxarêmã krà. Nām te kam mýjja puma, mýjja tokry nhyam tu 'ýr tẽmmã kràn kam 'ýr tẽ. <sup>52</sup> Ne kam 'ýr tẽmkôt amikukãm kôt ba djwýnh kwý jano. Ar mrãnh ne me bajtem, Xamarijkam me jakam bõx ne kam kute Jeju kutêp ikwã djã jabej ne kum õ kwý krên djã jabej nhyam bõx ne kam kam õ kwý krên ne kam nõr kadjy nãrãm amikukãm 'ýr ar ano. 'Ýr ar ano nhyam ar mrãn bõx. <sup>53</sup> Bõx nhyam kam Xamarijkam me ja aminêje ar ano. Jejumẽ kôt ba djwýnh Ar kubê idjaerkam. Ne mekbê idjaer nhõ pykabê Djeruxarê'ýr mõrkam. Kam ne Xamarijkam me ja kum ar kurêkumrêx, me kute abeno kurê djwýnh tũmkam. Kam ne me kum ar kurên kum ar kînh kêt ne tu aminêje ar ano. <sup>54</sup> Nhyam kam kôt ba djwýnhbê Xijagumẽ Djuão ar me omũn kam Jejumã kum,

—Bênjadwýr, dja bar kuwy'ã Abãm 'wý gê kàjkwa kurũm kuwy tým ne prîne me kuga gê me xêr, nẽn, ane.

<sup>55</sup> Nhyam ar'ýr akêx ne ar omũn arkum bẽn týt ne,

—Kati, kwãrîk wãnh, ane.

<sup>56</sup> Nhyam ar kunĩ ajte tu atemã krĩ 'õ'ýr mõ.

*Me kute tu Metĩndjwýnh maro mõrkumrêxmã.*

*Mat 8.18*

<sup>57</sup> Ýr mõ nhyam me'õ kum,

—Ë, ba arek akôt tẽ. Dja ga nhĩ'ãm amrãnh katã ba akôt mrã, ane.

<sup>58</sup> Nhyam kam kum,

—Ë, ga djoti pykakam kreja pumũ. Ne kwênh kýjrũm aêja pumũ. Mrymẽ kwênhbit ne õt djã, kute amim pyka kre pumũnhkôt kam õt djã, nhyam bep kati, ba ne ba inhõ kikre kêt, inhikwã djã kêt. Ije amijo inhĩ ne me awýr irwýk nhýnh ne inhõ kikre ja? Nhýnh ne inhikwã djã ja? Kati. Kon, gop ga amiman kam ikôt atẽm jabej nãr kon arek dja, ane.

<sup>59</sup> Ne kam ajte ta me'õmã,

—Ikôt tẽ. Ikôt tẽn mã ikôt ajkamẽ, ane.

Nhyam kam kum,

—Adjým, Bênjadwýr, ibãm kumrêx gêdja ba akubyn tẽn adjã. Ibãm ne ajbir ibê ty, ane.

<sup>60</sup> Nhyam Jeju kum,

—Gê me kute Metĩndjwýnh mar kêt wãnh me tyk jadjã. Me kute mar kêt ne me kute mrãmri ne me tyk jamakkre kêt pyrãk. Gê me wãnh õbikwa tyk jadjã, ane. Nhyam bep ga dja ga ikôt Metĩndjwýnh'ã adjujarênh tẽ, Metĩndjwýnh me akadjy bênjadwýr ne kute ar me ajo bamã gêdja ga 'ã adjujarênh tẽ, ane. Nām ã Jeju kum ane.

<sup>61</sup> Nhyam me'õjadwý Jejumã kum,

—Bênjadwýr, ba dja ba akôt tẽ. Inhũrkwã kumrêxkam dja ba inhõbikwamã amijarên kam akôt tẽ, ane.

<sup>62</sup> Nhyam kum,

—Djãm me purkam àpênh katêri kute kum irer got? Kati, mýjja wãkam ne me apên àpênh mrãn tu àpênh in-omã rênhkumrêx ne. Djãm me kute Metĩndjwýnhdjwý maro ban konenh krãkãr got? Kati, dja ga tu amim maro tẽn tu maro atẽmkumrêx ne. Dja ga maro mõn mar konenh krãtan kam Metĩndjwýnh nhõ pyka'ýr abõx kêtumrêx ne. Metĩndjwýnh kute me utàr ne me kadjy bênjadwýr ne kute ar meo baja dja ga 'ýr abõx kêt ne, ane. Nām ã Bênjadwýr Jeju arkum ane.

## 10

*Kute Ar kubê 70 janor.*

<sup>1</sup> Nhyam kam Jeju kute arkum arênh nhi-jukri ajte amim ar kwý rax ne ar umjuw. Me kwýo 70 ne amim ar umjuw. Nām

amim aro aben nhikjê'ã kabên ne amim ar umjuw, kute ar anor kadjy. Kute ar anor nhym ar kukãm mör ne kumrêx pyka kunîkôt, krî kunîkôt mörmã. Dja î Jeju ar kudjwa ã ane, ar kudjwa krî kunîkôt bôx mō.

<sup>2</sup> Ne kam kute ar anor nhym ar mör kutã prîne me'ã arkum karō ne arkum,

—Me kute Metîndjwýnh mar prãmja ne me kumex. Nãm me kute mrãmri ne bãy arým abôr tyk ne kumexja pyrãk. Nhym bep Metîndjwýnh'ã ujarênh djwýnh ne ngrêre kute bãykam me âpênh djwýnh ngrêre ja pyrãk. Kam dja gar me kadjy Metîndjwýnh 'uw gê me'ýr 'ã ujarênh djwýnh jano gê me kuman kam tu amim kamnhîxkumrêx. Kute mrãmri ne me mrãnh ne kute me õ purkam bãy pumũnh ne mrãnh ne bôx ne kute kadjy me õ pur djwýnhmã arênh nhym me kute amũ kadjy me kwýmã arênh nhym me ban kute memã ê ja pyrãk. Dja gar ã me kadjy Metîndjwýnh 'wýro ane.

<sup>3</sup> Ê, on dja gar mō. Arým ne ba ije me'ýr ar ajanormã. Ar aje memã ijarênhmã ne ba ar ajano. Dja gar me kam bôx nhym me ikôpdji'ã ar ajo kurê djwýnh ne kum ar apar prãm kumrêx ne. Kute mrãmri ne rop kute mrykî'ãtomti kra par prãm kumrêx ja pyrãk. <sup>4</sup> Ê, dja gar tu anhýkam mō. Kwãrîk wãnh gar anhō katök'y djã jamãnh kêt ne ajênh tur ne o amör kêt. Ne aparkã 'õ byr kêt. Dja gar ajamãnhkrut'ã kabên ne pyka kunîkôt aben ngrã. Kwãrîk wãnh gar apýnh krî djãri kôt ajmã gê me'õ ar ajō kajpan amã kabêno akukrão ãm kêt. Dja gar tu amrãnhkôt me'õmã akabên jarênh tên tu mã tẽ.

<sup>5</sup> Dja gar mrãn bôx ne me'õ nhürkwãmã wadjàn kam kum, “Gora adjumar mex ne ar aba”, ã ane. <sup>6</sup> Dja umar mex prãm jabej arým mrãmri akabênkôt umar mexkumrêx ne. Nhym bep djãm kum umar mex prãm kêt ne kam ürkwãkam me jamẽ ro'ã umar punu mex ne ar ba. Me jabit dja me umar punu. Gar kam gajbit adjumar mex ne ar aba. <sup>7</sup> Dja gar kikrekam abôxwã tãm kam tu arek kam anhikwão dja. Kwãrîk wãnh gar bôx ne kikrekôt ar aba kêt. Dja gar kikrekam abôxwã tãm kam gê me ar ajo djuw mex ne ar amã mýjja

ngã gar krê, tu kam apijãm kêt kumrêx ne krên kôt ikôn adjumar mexkumrêx. Ar aje memã Metîndjwýnh'ã adjujarênh pãnh, ar aje memã 'ã adjujarênh aku'ên atyk djã pãnh dja gar tu anhō kwý krê.

<sup>8</sup> Dja gar krî 'õkam bôx gê me kum ar akînh ne ar akam ukaprî jabej ar amã mýjja ngã gar tu krê. <sup>9</sup> Krîwãkam ar abôxwã, kam me kute ar amã kabên mex jarênh tãm kam gêdja gar me kanê pytãn memã kum, “Arým ne Metîndjwýnh me akadjy bënjadjwýr ne kute me apytãr ne kute ar me ajo ba 'ýr. Arým ne me ajo rãm ne ja”, ane. Dja gar ã memã ane. <sup>10</sup> Nhym bep djã gãm ar krî 'õkam bôx nhym me kum ar akînh kêt ne aminêje ar ajano gar kam tu me ipôkri memã akabên jarênh tẽ. Ne memã kum,

<sup>11</sup> “Ê, dja bar me abê me anhō pyka ja amiparkã'ã tatak ne. Ar ije me ajaxweo amirît ga me aje omũnh kadjy. Gora me ar ikabênja ma. Ê, arým ne Metîndjwýnh me akadjy bënjadjwýr ne kute me apytãr ne kute ar me ajo bamã ga me ate amã kînh kêt ne ar imã, ‘Kati, me ije akabênwã mar prãm kêt kumrêx’, ane. Me aje ã ar imã anhýrkam ne bar me abê me anhō pykaja amiparkã'ã tatak ne.” <sup>12</sup> Dja gar ã memã akabên jarênh tẽ. Ê, ba ar amã arê. Krî wãkam me wã ar aje mebê amiparkã'ã me õ pyka tatakja me tãm gêdja me tokry rax ne. Metîndjwýnh kute memã axwe pãnh jarênh nhō akatikam godja krîwãkam me wã meo bikênh raxo Xôtômakam me ja jakrenh mex ne.

<sup>13</sup> Watî:re Koradjikam me wã. Watî:re Bexadakam me wã. Dja ga me atokry rax ne. Ba ren me bajtem nhō pykabê Xirumẽ Xidökam ren mýjja rũnhja, mýjja pumũnh kêt ja kwý 'y nhym ren me omũn ren arým amrêbê amim katon ren wãnh amijaxwemã ire. Ne ren kute kum irero amirît kadjy kubêkãbê exopa jangijn ren amijã mro prã tatak ne. Ne ren kam iwýr amijo akêx. Nhym bep kati, inhō me wýnhkam me ga, Koradjikam me gamẽ Bexadakam me gamẽ me akam ne ba te mýjja pumũnh kêt kwý rax ne ipêx ga me omũnh kajgon kam ajaxwemã anhirer kêt ne iwýr amijo akêx kêt kumrêx ne. <sup>14</sup> Metîndjwýnh kute memã axwe pãnh jarênh nhō akatikam godja me

ajo bikēnh raxo me bajtem nhō pykabê Xirumē Xidōkam me ja jakrenh mex ne.

<sup>15</sup> Krīraxbê Kapanakam me gadjwý djām me aje amijo adjāmran aje amijo raxmā? Djām me aje amijo rax ne aje araxo aje kàjkwa tēpmā? Kati, dja Metīndjwýnh aparmā me biknor tokry djāmā me amē ga kam me atokrybit ma.

<sup>16</sup> Nā, dja gar aben nhikjê'ā kabēn ne pyka kunīkôt ajmān memā ijarē. Godja me'ō ar akabēn man badjwý ikabēn ma. Nhyh ate me'ō kum ar akurēn ar akabēn mar kêt ne badjwý kum ikurēn ikabēn mar kêt ne. Dja me'ō badjwý kum ikurēn ikabēn mar kêt ne ne Ibām kute ijanor djwýnhjadjwý kum kurēn kabēn mar prām kêt ne, ane.

Nām ā Jeju aro 70 ne kute ar anor kutā arkum kabēn jarēnho anen kam aro aben nhikjê'ā kabēn ne ar ano, pyka kunīkôt ar bimānhmā ar ano.

<sup>17</sup> Nhyh ar mōn memā Metīndjwýnh'ā ujarēnh mōn me kanēbē me utāro mō:n kam akubyn mō, kīnhkumrēx ne akubyn mō. Mōn bōx ne kam Jejumā kum,

—Bēnjadjwýr, nā bām ar akabēnkôt me karō punu jano nhyh me karō punu anhidji jarēnh kajgokambit apymaje prōt ne, ane.

<sup>18</sup> Nhyh kam arkum,

—Ā, me karō punu ne gar ano. Nhyh bep arým ne me karō nhō bēnjadjwýrbē Xatanaj kàjkwa kurūm tēn tým ba arým omū. Nām amikrà kêt mex ne tým kute na jadjēnh tamikrà kêt mex ne rōrōk ja pyrāk. Gar aje Xatanaj nhō àpēnh kujaēko amōro aje arým pa nhikjê 'yr rax mexja pumū. <sup>19</sup> Be, arým ne ba ar amā ipyma jadjà gar te kangāmē makmē mry kakrit djàkrēja kunī 'ā aku'ē nhyh mýjja ipymaje ajmā ar ajo kêtumrēx ne. Nhyh te me bakurē djwýnh pyma gar ipymao tu kujate nhyh ajmā ar ajo kêtumrēx ne. <sup>20</sup> Be, ja ne kajgo. Me karō punu ar akabēn pymaje prōt ja ne kajgo. Tām ne ngrire. Nhyh bep kàjkwakam Metīndjwýnh kute ar anhidji'ā pi'ōk no'ōk ja ne mrāmri rax. Tām ne kubē kumkatikumrēx. Kam dja gar tu akīnhkumrēx.

<sup>21</sup> Nām ā Jeju kôt ba djwýnhmā anen kam arým kīnhkumrēx ne. Metīndjwýnh Karō ne

kum kīnh jadjà nhyh kam kīnh rax kato. Ne kam Bāmmā amikīnh jarēn kum,

—Djūnwā, ota ga anhō kàjkwan anhō pyka djwýnh. Amā ne ba amikīnh jarē. Nā gām me amikukām umarmē me kute mýjja mar rūnhjabē mýjja ja pudju ne kam me kute amijo prīre pràbē amijo rūnh kêtjamā mýjjao amirīt ne. Mrāmri Djūnwā, nā gām ā aje anhýrkam mrāmri mexkumrēx. Adjukaprikam ne ga amim me'ā karō ne arým ā meo ane. Ba kam badjwý ikīnhkumrēx ne wām amā amikīnh jarē. Nām ā Bāmmā amijarēnho ane.

<sup>22</sup> Ne kam ajte kôt ba djwýnhmā kum,

—Ibām ne imā kukràdjà kunī jarē ba kam ar o iba. Nhýnh ne jakam me'ō prīne idjātari? Kati, Ibāmbit ne prīne kute imar ne kute arým prīne idjātari. Nhyh Ibāmdjwý. Nhýnh ne me'ō kute ikudjwa noo Ibām pumūnh ne kute kukràdjàkôt mar? Kati, bajbit. Bajbit ne ba prīne inoo Ibām pumūnh kam idjukabikôt me kwýmā kukràdjà'ā idjujarēnh tē. O me kwýmā o amirīt nhyh me arým prīne ikôt kuma, ane.

<sup>23</sup> Ne kam kôt ba djwýnh'ýrbit akēx ne me kàxā ar amakri arkum arēn arkum,

—Ar ga ne gar akīnhkumrēx. Ar ga ne gar anoo mýjja pumū. <sup>24</sup> Ba gop ar amā arē. Me kute Metīndjwýnh kabēn jarēnh djwýnh tūmmē me bēnjadjwýr tūmdjwý krāptī te kute omūnh prāme, ar anoo aje mýjja pumūnhja te kute omūnh prāme, ne ar ajamako aje mýjja marja te kute marmā. Nhyh bep kati, ar gajbit ne gar anoo mýjja pumūnh kêt kwý pumūnh mýjja ma. Ar ga ne gar akīnhkumrēx ne, ane.

*Me'ō kum kurē djwýnh kaprīn o djuw mex.*

<sup>25</sup> Nhyh kam akati 'ōkam Mōjdjê kukràdjà mar djwýnh'ō Jeju kabēn maro nhý. Kabēn maro nhýn kàjmā dja. Mōjdjê kukràdjà mar djwýnhja kàjmā dja. Kute Jeju no mex jabej kabimā kàjmā dja. Kute Mōjdjê kukràdjà jabej Jeju kukjērmā, Jeju kute kukràdjà kupa'ā arēnh kadjy nārām ne amikadjy kàjmā 'ýr djan kum kabēn ne kum,

—Bēnjadjwýr, mā gēdja ba amijo nhyh kam Metīndjwýnh pānh imā itīn rā'ā rā'āo itīnmā imā arē? ane.

Nhyh kam kum,

26 —Mã ne Môj djê kukràdjà'ã pi'òk no'òk kute? Mỳj ne ga kam omũn arỳm ama? ane.

27 Nhym kam Môj djê kukràdjà mar djwỳnh Jejumã kum,

—Nãm,

“Me anhõ Bẽnjadwỳr djwỳnh, me Atĩndjwỳnh dja ga amã kĩnh, amã abêo katàt me kunĩ, mỳjja kunĩ jakre.

Djãm ajajkwaobit amã Metĩndjwỳnh jabêmã? Kati, ajamak, akadjwỳnhbê, akukràdjà kunĩo dja ga me amã abê.

Ne ajte amã amibu'ã me ja jabê. Kute ga amã amijabêja pyræk dja ga ã amã amibu'ã me ja jabêo ane”, ane.

Nãm ã Môj djê kukràdjà'ã me bamã pi'òk no'òko ane.

28 Nhym Jeju kum,

—Nà, kòt ne ga arê. Dja ga ã ar o anhỳro aban kam arỳm tu atĩnkumrêx ne, ane.

29 Nhym kam Môj djê kukràdjà mar djwỳnh òkre kadjwỳnhbê amim,

—E kum kati, imã Metĩndjwỳnh jabê rax kêtê, ne imã ibu'ã me ja jabê rax kêtê, ane.

Ne kam pijàm ne amijã maje,

—Nhym ne ibu'ã dja ba imã abê? ane.

30 Nãm Jeju kukij nhym kam kum,

—Ë, me'ò ne Djeruxarê kurũm krĩraxbê Djeriko'ỳr ruw. Ne kam tẽ. Tẽ nhym kam arỳm me àkĩnhĩ wỳnhrà m kum nõn tẽmràm o arĩn kubê kubêkãmê kubê mỳjja kunĩo pròt ne kam titik ne mã pròt ne. Nhym kam wãnh wakrekam tyko nõ. 31 Tyko nõ nhym kam me kadjy Metĩndjwỳnh mar djwỳnh'ò pry'ã tẽ. Tẽn omũn kam iròbê apan mã tẽ. 32 Nhym mekbê Rewi'ò, adjwỳnhdjwỳ Metĩndjwỳnhmã àpênh'ò kòt tẽn adjwỳnhdjwỳ tãm ne. Nãm 'ỳr tẽn irãn omũn tẽn iròbê apan mã tẽ.

33 Nhym bep me'ò, Xamarij kam me ja 'ò ne arkòt tẽ. Xamarij kam me ja kute me bajo kurê djwỳnh ja 'ò ne arkòt tẽ. Arkòt tẽn 'ỳr bòx ne omũn kam kum kaprĩ ne. Omũn kam rerek ne kum kaprĩ. 34 Ne kam me kute o tỳm ne kute titik kurêje kute apỳnh kà rênhja kum oy. Kadjwati kangôo kum oyn kam ajte mỳjja kute rõny kangôo pyræk kum oy. Ne kam kubêkào kupu. Prĩne kupun kam ta ò mryja'ã kudjin o tẽn. O tẽn atemã me'ò nhũrkwã'ỳr o bòx ne kam prĩne o djuw mexo dja.

35 Nhym akati nhym kam pi'òk kaprĩ raxja amê kaba. Ò kikre djwỳnhjamã kaban kum kungãn kum, “Ë, dja ga prĩne imã tãmjao djuw mexo dja, prĩne ikutêp imã o djuw mexo dja. Dja ga 'ã aje pi'òk kaprĩ krẽn jabej ba kam bòx ne arỳm ajte amã o pãnh, ajte akubyn ibòxkam”, ane.

Be, tãm ne ja. Nãm ã Xamarij kam me ja'ò kum kurê djwỳnh kaprĩn o djuw mexo ane. 36 Gop imã arê. Nhỹnh ar 'òja ne kute o kamy? Djãm tẽn ne kute omũnh ne iròbê àpanhja? Nàr kon, djãm kòt tẽnja? Nàr kon djãm Xamarij kam me ja'ò?

37 Nhym kam kum,

—Nà, me'ò kum kaprĩja. Me'ò kum kaprĩja ne o kamy, ane.

Nhym kam kum,

—Nà, kòtò. Nà, ga kam gadjwỳ tẽn ã kudjwa akurê djwỳnhho anhỳro aba, ane. Nãm ã Jeju Xamarij kam me ja'ò ukaprĩkòt kute kurê djwỳnhho kamyja'ã ujarênho ane.

### *Matamê Marij'ã ujarênh.*

38 Nhym kam Jeju ar mã mõn kam atemã krĩ 'òkam bòx. Kam ne me'ò nire nhidjibê Mata. Mata ne ukaprĩkumrêx ne kam Jejumã kum,

—Amrê inhũrkwãmã tẽn kam anhõ kwỳ krẽn kam nõn akòkam kòt, ane.

Nhym kam kum,

—À, aj mã, ba kam wãm akòt tẽn, anen kam ùrkwãmã tẽn. Ùrkwãmã tẽn kam 'ỳr wadjàn nhỹ. 39 Nhym Mata kanikwỳnhbê Marijja nhỹ. Arek Bẽnjadwỳr'ỳr tẽn parbê nhỹn kam kàjmã kòt òkren kabên maro nhỹ.

40 Nhym Mata àpênh ra:x ne. Jeju ò kwỳ krẽn mex kadjy ne àpênh raxo djan kam Marijmã kabên ne. Marij kute kòt kum mỳjja 'ò kupênhmã. Ne kam Jeju'ỳr tẽn kum, —Bẽnjadwỳr, djãm aje imar kêt? Ikanikwỳnh ne ikòt àpênhmãn ate ari akuri ba. Ba kam bajbit ar mỳjja kupênhho iba. On amrê ano gê tẽn gop ikòt apê, ane.

41 Nhym kam Bẽnjadwỳr kum,

—Àpnhĩre, àpnhĩre Mata. Nã gãm ari mỳjja man kam akabên wã jarê. Nã gãm mỳjja krãptĩ kupê ne kòt mar ar o aban kam adju-mar punu. 42 Nhym bep mrãmri mỳjja pydji ne mexkumrêx. Tãm ne arỳm Marij o nhỹ. Nãm ikabên maro nhỹ. Ja ne mexkumrêx.

Kwārīk wānh arek ikabēn maro nhỹ. Wām ije awýr anor prām kêtê. Gêdja arek ikabēn maro nhỹn prīne ikabēn man kam o biknor kêt-kumrēx, ane. Nām ā Jeju ane. Tām ne ja.

## 11

*Ar kute Metīndjwýnhmā kabēn'ā arkum karō.*

*Mat 6.9*

<sup>1</sup> Nhyr kam Jeju akati 'ōkam Metīndjwýnhmā amijarēho dja. Kum amijarēho djan kum amijarēnh pa nhyr kam kôt ba djwýnh'ō kum,

—Bēnjadjwýr, gop ar imā arē. Ar ije Abāmmā amijarēnh kadjy gop ar imā arē. Mā dja bar kum ikabēn ja o? Djuāobit ne kôt ba djwýnhmā kabēn'ā karō. Gadjwý dja ga ar imā 'ā karō bar akudjwa Abāmmā amijarēho iba, ane.

<sup>2</sup> Nhyr kam arkum,

—Ē, dja ga goja ar aje Metīndjwýnhmā amijarēnh kadjy kum,

“Djūnwā, gē me ame:xo amex man amim ajarēn abenmā ajarē.

On me kadjy abēnjadjwýr ne ar meo aba.

<sup>3</sup> Myt kunīkôt ar ijajkwa mánhikutā mā ar imā inhō kwý krēn djā ngā.

<sup>4</sup> Dja bar akam ijaxwe ga tu ar ijaxweo akno. Ar badjwý dja me'ō ar ikam amikrà bar akôt tu o akno. Kam dja ga ar ijaxweo akno.

Godja me kute ar imā axwe'ā àpnēnh katā ga ga ar ijo tỳx bar mebē idjām tỳx ne ijaxwe kêt. Tām ne ja.”

Dja gar ā kum anhỹr ar aba, ane.

<sup>5-6</sup> Ne kam ajte ar kute Metīndjwýnhmā amijarēnh 'āno ām kadjy arkum kabēn jarēn arkum,

—Ga ren ar ajō anhōbikwa'ō ajbir bōx, akamāt kō ipōkri bōx ga ren aje kadjy mýjja'ō byrmā tēn ren anhōbikwa'ōmā kum, “Nār, imā angā, anhō djwý 'āmro amānhkrut ne ikjēkēt imā 'ō ngā gē inhōbikwa kukrē. Nām iwýr y:n kam ajbir bōx. Ba kam kadjy mýjja jabej tē. Kadjy inhō mýjja kêt-kumrēx ba kam kadjy ije akutā djwý kwý byrmā tē. Gop on imā angā.”

<sup>7</sup> Nhyr ren anhōbikwaja arek ōto nōr prāme ren amā,

—Kati, inhōtdjwaa. Ije amā ōr prām kêt. Arým ne ba kikre'ā ijē ne arek ikrao inhikwā. Kāj mā idjām prām kêtê. Amū dja ga tē gē me'ō amā 'ō ngā, ane.

<sup>8</sup> Bir be, ba ar amā arē. Ga kam ren arek 'ā adjā 'wýro dja, mā 'ā 'uw nhyr kam ren arým kāj mā djan ren, “Ba on kum kungā gē wām o tē ba gop ikujrēnh kêt ne gēt arek inhōto nō”, ane.

Djām ar aje abeno anhōbikwakam ne amā kungā? E kum kati, ē, aje mā 'ā 'wýrkam ne amā kungā. Apijām kêt ne aje 'ā 'wýr 'āno adjām kam ne amā kungā, ar atu mánhikutā amā kungā.

<sup>9</sup> Bir be, kam ne ba ar amā, “Dja gar tu mýjja 'ā 'uw, mā mýjja'ā 'wýro tē nhyr Metīndjwýnh arým ar amā kungā. Gar aje mā mýjja jabej ne kam arým kum akatorja pumū. Ne kam ajte mā kikre kabem ō kikre djwýnhmā akabēno aku'ē nhyr arým kute ar amā kikre 'ā 'yrja pumū.” Dja gar ā Metīndjwýnh 'wýro ane. <sup>10</sup> Be, me kute mýjja'ā 'wýr 'āno āmja dja arým Metīndjwýnh memā kungā. Gar me kute mýjja jabej ne kum apōxja pumū. Ne kam ajte me kute kikre jajkwa krekremā kabēno ku'ē nhyr arým me kute memā kikre'ā rēnhja pumū. Dja gar gadjwý ā mýjja'ā Metīndjwýnh 'wýro ane nhyr arým ar amā kungā.

<sup>11</sup> Nhỹnh ne ar akra'ō tēn tep'ā ar ajuw gar kum kangā ngā? <sup>12</sup> Ne ōkrēnē'ānh ngre'ā ajuw gar kum makre ngā? Arkati.

<sup>13</sup> Be, gar ajaxwekam aje akramā mýjja mex nhōrja pumū. Nhyr bep kājkwakam ar Abām mextire ta gēdja ar amā amū mýjja mex nhōro ar ajakren ar amā Amikarō ngā. Gēdja gar Metīndjwýnh Karō'ā 'uw nhyr tu ar amā kungā, ta mextire ne ar baja gēdja ar amā Amikarō ngā, ar amā Amikarō jano, ane. Nām ā Jeju me kute mýjja'ā Bām 'wýr nhyr ōdjānhkôt kute memā Amikarō nhōrmā ā memā 'ā ujarēho ane.

*Me kute Jejuo Xatanaj nhō àpēnh.*

*Mat 12.22; Mak 3.20*

<sup>14</sup> Nhyr kam me karō punu ar me'ōo ba nhyr kabēn kêt-kumrēx ne. Me karō ajmā ajkwa o nhyr kabēn kêt-kumrēx ne. Nhyr kam Jeju bōm kumē. Bōm kumē nhyr arým mā tē nhyr arým kabēn ne. Nhyr me kam ari aben pumūn Jejukam no

tyn kumex. <sup>15</sup> Nhyh bep me kwỳ ne me abenmã kum,

—Kê, djãm Metĩndjwỳnh kabẽnkõt? Kati, Bedjêbu. Me karõ punu nhõ bẽnjadjwỳrbê Bedjêbu kabẽnkõt uma proo ne ar bõm me karõ rẽnho ba, ane. Xatanaj nhidji 'õbê ne Bedjêbu.

<sup>16</sup> Nhyh ate me kwỳ kum,

—Goja on mỳjja'õ nhipêx ba me omũ, Metĩndjwỳnh puma proo mỳjja pumũnh kêt goja 'õ nhipêx ba me omũ, ane. Jeju kute Metĩndjwỳnh puma proo kute mỳjja pumũnh kêt'õ nhipêx mar jabej ne me kute kabimã kum ane. <sup>17</sup> Nhyh Jeju ta prĩne me òkre kadjwỳnhbê me kabẽn ma, me kute Bedjêbu puma proo ne ar bõm me karõ rẽnho ba anhỳrja me kadjwỳnhbê prĩne kuman kam memã kum,

—Godja me õ pyka tãm kam abeno kurê djwỳnh mã ne ren me kam nẽ? Nãm ren ã me anen kam ren arỳm amijo ajkê. Nhyh ren me ta ùrkwã tãm kam abeno kurê djwỳnh mã ne ren me kam nẽ? Nãm ren ã me anen kam ren arỳm abeno apêx.

<sup>18</sup> Bir be, Xatanajdjwỳ ta õ àpênhmẽ ne ren abeno ajkij ne ren abeno kurê djwỳnh, mã ne ren me kam nẽ? Mã ne ren Xatanaj nẽ? Nãm ren anen kam ren arỳm abeno apêx. Nã gãm me we ijã, “Bep Bedjêbu puma proo ne ar bõm me karõ punu rẽnho ba”, ane. Ije gêdjãm Xatanaj ta ajte jãm õ àpênho akêx ne ar bõm rẽnho ba. <sup>19</sup> Ba ren Bedjêbu kabẽnkõt ren bõm ar me karõ punu rẽnho iba nhyh ren mỳj me'õ kabẽnkõt ne me anhõ àpênh bõm ar me karõ rẽnho ba? Ar jadjwỳ ne ar bõm me karõ rẽnho ar o ba. Djãm ar adjwỳnhdjwỳ ne ar we Xatanaj kabẽnkõt ar bõm me karõ rẽnho ba. Ga ren me arkum ja jarê nhyh ren ar me amã, “Ije tô djãm Xatanaj ta kute õ àpênho bikẽnho ba got.”

<sup>20</sup> Nhyh bep kati, Metĩndjwỳnh puma proobit ne ba ar bõm me karõ punu rẽnho iba. Ga kõt arỳm Metĩndjwỳnh me awỳr bõxja pumũ. Metĩndjwỳnh kute me apytàr ne me akadjy bẽnjadjwỳr ne kute me ajo bamã me awỳr bõxja pumũ. <sup>21</sup> Ba ajte atemã me'õ'ã amijakre ga me ama.

Me'õ ne õ kikrekam kruwmẽ rop'io nhỹ ne o õ nêkrêx pytàn o nhỹ. Umao amim

õ nêkrêx pytàn o nhỹ. Nhyh me'õ ajmã kute õ nêkrêx o kêt kumrêx. <sup>22</sup> Nhyh bep atemã me'õ kute umao akrenh mex ne tu bõx ne kruw tã o tỳm ne kubê kunĩo pôx ne kam kubê nêkrêxo prõt ne, kubê mỳjja kunĩo prõt ne. Kute umao õ nêkrêx pytàn ne o ýrja tu kubê o prõt ne memã kungrà. Ba ne ba ipymao Xatanaj jakrenh mex ne kam amijo aptàn kubê õ krito iprõt ne.

<sup>23</sup> Me'õ kum ikĩnh kêt ne arỳm mrãmri ijo kurê djwỳnh ne. Ne ikõt àpênh prãm kêt ne arỳm Xatanajkõt apê. Dja me'õ kum ikĩnh kêt ne kam ajte kum Xatanaj kĩnh kêt ne kam amijã, “Ba dja ba ate ikrãn ar mrã, amidjwỳnhbit man ar o mrã”, anen arỳm Xatanajkõt apê, ane. Nãm ã Jeju memã ane.

<sup>24</sup> Ne kam ajte me karõ punu'ã ajarên memã kum,

—Me karõ punu pydjìn kute ar me'õo baja ne arỳm kurũm katon tẽ. Ne kam te ar mrã, ngò kêt kam ar mrã, te ajte kute me'õmã àr ne tyk djã kêt mã ar mrãn kam akubyn kute ar me'õo ba tũmjja'ỳr tẽ. Ne kam amim, “Ba gop inhũrkwã kurũm ika-torja ajte 'ỳr tẽ”, ane. Kute ar me'õo ba tũm'ã ne ùrkwã jarê. <sup>25</sup> Ne kam amim ba djã tũmjja'ỳr tẽn bõx ne omũ nhyh arỳm mexkumrêx. Me karõ 'õ kute o ba kêt nhyh prĩne kadjwỳnhbê mex ne arỳm kam mỳjja katat. <sup>26</sup> Nhyh kam kadjy mã me karõ punu'ỳr tẽ. Ne kam mekam me kwỳ japrôn 'ỳr meo mõn meo bõx. Nãm me karõo 7 ne o bõx ne me'õ jamã meo wangij nhyh kam me kam ar ba. Kute me karõ punuo 7 ne o bõx tãm ne axweo kute õbê pydji kute ar o ba tũmjja jakrenh mex ne kam arỳm o punu rax ne. Kàjbê punuri ne kàjbê punu nhyh bep kute o 7 ne o bõxja ne arỳm o punu rax ne. Nãm ã Jeju me karõ punu'ã ujarẽnho ane.

<sup>27</sup> Nãm memã kabẽnno ãm rã'ã nhyh me ipòkri me'õ nire kàj bê kum kabẽn ne kum,

—Ô kum anãbit ne kĩnhkumrêx. Abê bẽnjadjwỳr raxkam ne ga anã tikkremã wadjàn ruw ne anã kã kaõ nhyh anã kĩnhkumrêx ne, ane.

<sup>28</sup> Nhyh kum,

—Bep me kute Metĩndjwỳnh kabẽn mar ne 'ãno ãm ne kute kõt amijo baja, me tãm gêdja me mrãmri kĩnhkumrêx ne, ane.

*Me kute Jeju kute mỳjja pumũnh kêt'õ nhipêx jabej.*

*Mat 12.38*

<sup>29-30</sup> Nhyim kam me Jeju'yr ban bôxo dja. 'Yr ban bôxo djan 'ã aben pydjio mõn o mõn o mõn ï 'ã uti: ane. Me kute õbê kum,

—Goja on mỳjja pumũnh kêt'õ nhipêx ba me omũ, anh'yr jamã ne Jeju,

—Me akamingrãny ne ga me ajaxwekumrêx. —Djãm me kute ngõnhpõkmã angjênh ne Nã gãm me abentã ijuw ne imã, “Mỳjja pumũnh kêt'õ nhipêx. Ba me goja omũn kam tu amim amarkumrêx”, ane. Bep kati, djã bãm me amã ipêx kêtumrêx ne. Ê, mỳjja pydji dja ga me omũ. Gêdja ba ty. Nhyim ijã akati amãnhkrut ne ikjêkêt ba akubyn itĩn ne ikato ne kam me amã Metĩndjwýnh raxo amirĩt ne. Ga me me bakukãmãrebê Djõnaj tep tikkrekam nõrja pumũ. Tep tikkrekam nõr nhyim 'ã akati amãnhkrut ne ikjêkêt nhyim ajte tep tikkre kurũm kator ne kam pykabê Niniwekam me ja'yr tẽm ne kute memã Metĩndjwýnh raxo amirĩtja pumũ.

Badjwý ije amijo inhĩ ne me aw'yr ibõx gêdja ba ty ne akubyn itĩn ne ikato ga kam me akamingrãny amim Metĩndjwýnh raxkõt ama.

<sup>31</sup> Godja Metĩndjwýnh kute memã axwe pãnh jarênh nhõ akati kato nhyim kãjkwa nhirê kurũm bẽnjadjw'yr ni ajte katon kam me akamingrãny, me amymã axwe jarê. Mỳkam? Bir, amrêbê ne me bakukãmãrebê Xaromão no mexkumrêx ne kute prĩne mỳjja mar. Bẽnjadjw'yr rax. Nhyim arým bẽnjadjw'yr nija arým 'ã ujarênh ma. Arým Xaromão'ã ujarênh man kam kute omũnh prãm ne. Ne kam nĩnh kãjkwa nhirê kurũm 'yr tẽn bõx. 'Yr bõx ne kam prĩne kabẽn ma. Ê, ba ne ba Xaromão kurãm irax. Nã bãm iraxo bõx, jakam, me akam bõx ga me imar kêt ne, ikanga mex ne. Kam dja bẽnjadjw'yr nija me amã axwe jarê.

<sup>32</sup> Nhyim Niniwekam me jadjwý me amã axwe jarê. Godja Metĩndjwýnh kute memã axwe pãnh jarênh nhõ akati kato nhyim Niniwekam me ja ajte apõx ne kam me akamingrãnymã axwe jarê. Mỳkam? Bir, Djõnaj ne kãj bê memã Metĩndjwýnh'ã ajarê nhyim Niniwekam me ja kuman amim katon wãnh axwemã iren Metĩndjwýnh'yr amijo akêx ne. Ê, ba ne ba iraxo Djõnaj

jakrenh mex ne. Ga me tu ate akrãn ikanga mex ne. Kam ne ba me amã, “Me ja dja me akubyn apõx ne arým me amã axwe jarê”, ane. Nãm ã Jeju memã ane.

*Me kute Metĩndjwýnh kabẽn kõt amijo ba'ã ne a'u jakre.*

*Mat 5.15, 6.22*

<sup>33</sup> Ne kam ajte memã irã jarê ne memã, —Djãm me kute ngõnhpõkmã angjênh ne kute mỳjja 'õkõt o bipdjur got? Ne kute kào 'ã pro got? Kati, ngõnhpõk ne me kum angij ne tu kênhkam umjuw nhyim memã kikre kre kurwýo ku'ê. Nhyim me mrãnh wangij nhyim memã irãkumrêx.

<sup>34</sup> Nhyim me nodjwý. Me noo ne me kute mỳjja pumũnh. Dja ga me ajõ ano mex, ajmã ano kute kêt jabej arým mrãmri arĩt tỳxkumrêx ne aje mỳjja pumũnh. Aje mrãmri ne me a'uri mrãnh mex pyrãk. Nhyim bep dja ga ano rã, ano punukumrêx jabej arým arĩt kêt ne aje mỳjja pumũnh kêt. Aje mrãmri ne me akamãt kô tykkam mrãnh punu, mrãnho bikar mrãnh ja pyrãk.

<sup>35</sup> Gora me amijãno djan Metĩndjwýnh kute me amã amikukràdjã jarênhkõt amijo aba. Gêdja ga me kõt amijo aba kêt jabej, kute me amã amikukràdjã jarênhja kõt amijo aba kêt jabej arým aje me'õ akamãtkam ba pyrãk, me aje me'õ akamãt kô tyk tỳxkam mrãnho bikar mrãnh ja pyrãk. <sup>36</sup> Nhyim bep dja ga me mrãmri Metĩndjwýnh kabẽn kunĩkõt amijo abakumrêx ne kam me aje me'õ mrãmri ngõnhpõkti nhirãkambit mrãnh ne kam akamãt kô tykkam mrãnh kêtumrêx ja pyrãk.

*Jeju mekbê pardjêumã bẽn tỳx.*

*Mat 23.1; Mak 12.38*

<sup>37</sup> Nãm memã arênh pa nhyim kam mekbê pardjêu'õ kum,

—Amrê ikõt tẽn ikutã anhõ kwý krê, ane.

Nhyim Jeju kum “Ã” anen kam kõt tẽn ũrkwãmã wadjãnh nhỹ. <sup>38</sup> Kute aminhikra ku'õnh kêt ne nhỹ nhyim omũn kam õkre kadjwýnhbê amim,

—Ije tõ mỳj nã? Ije kum bep kute me bakukràdjãkõt aminhikra ku'õnh kêt. Õ kwý krênh kadjy kute aminhikra ku'õnh kêt, ane.

<sup>39</sup> Nhyim kam Bẽnjadjw'yr kum,



—Kê, me abê pardjêu ne ga me ijã akabên ne anhökre kadjwýnhbê amim, “Kute me bakukràdjãkôt aminhikra ku'õnh kêt”, ane. Bep me ga ne ga me ajêx ne we amijo akabên mex. Nã gãm me aje mrãmri ne me kute ngõnh krãmẽ ngõnh puror nhibũmbit põnh ne kute kre põnh kêt nhym krekam mýjja kakrãtyk pyrãk. Be, nã gãm me ã we katãt amijo abao ane. Nhym kam me me akrãkãbit pumũ nhym kam kute me amex pyrãk. Nhym bep kati, me akadjwýnhbê ne ga me apunu rã'ã. Me akadjwýnhbê ne me amã me õ nèkrêx prãm ne 'ã angryk ne ajaxwe'ãbit aje amim karõ rã'ã. Kam ne ga me akadjwýnhbê apunu rã'ãja. <sup>40</sup> Me ano kêtukumrêx. Djã nãm me anhipêx djwýnh me akrãkãbit 'y? E kum kati, nãm me akadjwýnhdjwý 'y. Kam ne kute prĩne me akadjwýnhbê me apumũnh ne kum me akadjwýnhbê me amex prãmukumrêxja. <sup>41</sup> Nã gãm me we amijo akabên mex ne, ne amijo katãt amrãnh, bep kati, me akadjwýnhbê apunu. Dja ga me me 'uwtĩmãdjwý anhõdjãnh ne me 'uwtĩkam adjukaprĩn memã mýjja ngãnh kam arým akadjwýnhbêdjwý amexukumrêx ne, akrãkãmẽ akadjwýnh kunĩ mexukumrêx ne, me 'uwtĩkam me adjukaprĩkam.

<sup>42</sup> Me abê pardjêu dja ga me ĩ me biknor tokry djãkam mõ. Watĩ:re. Mýkam? Me aje Metĩndjwýnhmã mýjja kakritbit nhõr ne kam aje mýjjabê kumkatija aje kum õr kêtka. Nã gãm me mýjja kakrit, õmrõ djãnh djã, pi'õmẽ djwý kakrit kunĩ ne ga me Metĩndjwýnhmã ikjê rên kum kryre ne angã. Ne kam ga abêngõkreja amã abê kêt ne katãt meo aba kêtukumrêx ne. Me aje kum kryre ne õrja ne mrãmri tu mexukumrêx. Mýkam ne ga me mýjja raxjadjwý kum õr kêt ne? Mýkam ne ga me amã Metĩndjwýnh jabên katãt meo abaja kêt ne. Ja ne ga me aje marmãn ate mýjja kakritbit ma.

<sup>43</sup> Me abê pardjêu dja ga me ĩ me biknor tokry djãkam mõ. Watĩ:re. Mýkam? Me aje amijo rũnhbit mar prãmka. Me kute aben pydji djãkam me amã me bẽnjadjwýr rũnh krĩ djãbit kĩnhkam. Nhym me me ipõkri me kute me amã kabên ne me amã rũnh jarẽnh kumex jabit ne ga me amã kĩnh.

<sup>44</sup> Me ga dja ga me ĩ me biknor tokry

djãkam mõ. Watĩ:re. Mýkam? Me aje pyka krã pyrãkkam. Nã gãm me aje pyka krã arým biknor ne pyka mẽ bimrãk ne kute pykakumrêx pyrãk. Nhym me kute mar kêt ne tu iby mrãnhja pyrãk. Ne kam kadjwýnhbê ne punu, kadjwýnhbê ne mýjja kro. Nã gãm me ã akadjwýnhbê apunu ane nhym me kute me amar kêt. Nãm mýjja 'êx ne krãkãbit mex ne kam kadjwýnhbê ã punu ane. Nãm ã Jeju mekbê pardjêu jaxweo amirĩto ane.

<sup>45</sup> Nhym kam me kute Mõjdjê kukràdjã mar djwýnh'õ Jejumã kum,

—Ë, bẽnjadjwýr, nã gãm me badjwý me ijapry. Nã gãm akabên jao me badjwý ã me ijo ane, ane.

<sup>46</sup> Nhym kam Jeju kum,

—Ije nã, me aje Mõjdjê kukràdjã mar djwýnhdjwý dja ga me ĩ me biknor tokry djãkam mõ. Watĩ:re. Nã gãm me akabên kajgoobit ar memã Metĩndjwýnh kabên jarẽnhõ aba. Djãm Metĩndjwýnh kabên? Kati, me ga akabẽno ne ga me ar me anoro aba. Ga kam me ga kôt ar aba kêt ne. Nhym me te amijo anen kam, “Ije mã dja ba me nõ”? ane. Me aje ã meo anhýrkam ne kute mrãmri ne me kute me kadjybit jẽnh rũnhõ atom ne kam kute kãjmã memã arĩ kêtukumrêx ne kute memã tur kêtukumrêx ne kute me ibũm nõje kum katy kêtukumrêx ja pyrãk.

<sup>47-48</sup> Me ga dja ga me ĩ me biknor tokry djãkam mõ. Watĩ:re. Mýkam? Me amã Metĩndjwýnh kabên jarẽnh djwýnh par prãmka. Me akukãmãre ne Metĩndjwýnh kabên jarẽnh djwýnh kwý pa:, ga me kam anhingêt nhimry krã prĩne kum o djuw mex ne. Me anhingêtbe Metĩndjwýnh kabên jarẽnh djwýnh par djwýnhmẽ me aje aben pyrãk. Me akukãmãre kute me parja ne ga me omũn kam kôt amijo mõn kam we imry krã prĩne kum o djuw mex ne.

<sup>49</sup> Kwãrĩk rã'ã. Metĩndjwýnh ta ne no mexkôt, ta kute amim 'ã karõkôt arým me amã, “Ë, dja ba me amã ikabên jarẽnh djwýnh janon inhõ àpẽnã jano ga me kwý pan kwýo ajkẽ”, ane. Djã nãm kupa'ã arẽ? Kati, kõnh ne kum kudji. Ga me aje me paro amõrja pumũ. Kam ne Metĩndjwýnh arým pãnh jarẽ. <sup>50</sup> Me akukãmãremẽ ne ga

me me kraxrũm Metĩndjwýnh kabĕn jarĕnh djwýnh paro tĕ. Paro tĕn paro tĕn arek me kamrô kapĩn o tĕ. NhyM Metĩndjwýnh arým meo ngryk ne kam gormã me ajabatãnhmã pãnh jarĕ. <sup>51</sup> Nã gãm me akukãmãre Abeu bĩno kurĕtuw ne kam ijukri me ja paro tĕm tãmtã: jakam arek o tĕ ne kam Djakarij'ýr bôx ne kam Metĩndjwýnh nhô kikretimĕ ô ngônho ki kaĕxkam kubĩ.

Nã, ĕ, ba me amã arĕ. Metĩndjwýnh ne arým meo ngryk ne. Ne kam me akam-ingrãnymã arým pãnh jarĕ. Me ga dja Metĩndjwýnh me akukãmãre kute me imex tũmja pãnh me ajo ajkĕ.

<sup>52</sup> Me aje Môjdjĕ kukràdjã mar djwýnh dja ga me ĩ me biknor tokry djãkam mō. Watĩ:re. Ga me aje memã Metĩndjwýnh kabĕno amirĩto atĕmmãn ate ajte mekbĕ udju. NhyM me te kute amim Metĩndjwýnh marmã. Nã gãm me aje mrãmri ne me kute mekbĕ kikre'ã ijĕn nhĩ'ãm kam o kajkep djã rĕnh nhyM me te kute kikre'ã rĕnh ne ngjĕnh prãme kapôtã ku'ĕja pyrãk. Ga me kam ga Metĩndjwýnh mar kĕt ne ajte me jadjwýbĕ aptã, ane. Nãm ã Jeju memã bĕn tỳxo anen kam katon mã tĕ.

<sup>53-54</sup> NhyM kam mekbĕ pardjĕumĕ me kute Môjdjĕ kukràdjã mar djwýnhmĕ Jeju jabej rĩt mō. Jeju kute Môjdjĕ kukràdjã'ô kupa'ã arĕnh jabej ne me umaro dja. Ne kam mã kukijn mã kukijn mã kabĕn'ã kum apnĕn ajte kum,

—Goja rã'ã ajte arĕ, ba me kuma, ane.

Jeju kute kupa'ã arĕnh nhyM me kute o tým ne bĩnmã ne me ã ane. Nãm me te kute Jeju'ã kabĕn punu nhôrmã. Kute kabĕn punu 'ô jarĕnh nhyM me kute 'ã kabĕn punu nhôrmã te abej umaro dja.

## 12

*Kute memã kum, “Amã me uma kĕt” jarĕnh.*

*Mat 10.26*

<sup>1</sup> NhyM me Jeju'ã bikprõnho dja. 'Ã bikprõnho djan o djan o djan ĩ 'ã utĩ: ane. Kute pi'ô pyrãk. Ne ĩ ãm ta aben par'ã ku'ĕn ĩ ta ikjĕo aben rĕ, me krãptĩkam. NhyM kam Jeju amikôt ba djwýnh kumrĕxmã kum,

—Gora ar aminĕje me wã pumũ, aminĕje mekbĕ pardjĕu jaxwe 'ãno dja. Nãm me 'ĕx

ne kute mex pyrãk. NhyM bep kati, me kadjwýnhbĕ ne me punukumrĕx. Me ôkre kadjwýnhbĕ ne me axwebit kute mar ne 'ã amim karô. Me axwe kute djwý nhigot djã pyrãk. Gĕdja amũ me'ô'ýr bôx ne amũ me'ô'ýr bôx ne amũ me'ô'ýr bôx ne ĩ mekmĕ amrã ne ĩ me kunĩo tuknĩ. Kam ne ba ar amã, “Gora ar aminĕje me wã pumũ”, ane.

<sup>2</sup> Djã nãm me kadjwýnhbĕ axweja bipdjur rã'ãmã? Kati, dja ĩ amirĩt ne. Nhýnh ne mýjja bipdjur'ô me kute omũnh kĕtmã? Ne me kute mýjja pudjur'ô mar kĕtmã? Adjým, dja ĩ kunĩ amirĩt ne. Dja mýjja pudjur, mýjja o bipdjurja ĩ kunĩ amirĩt ne. <sup>3</sup> Dja gar te akamãt kô tykkam abĕn prĩkam abenmã mýjja jarĕ nhyM me ĩ tu irãri arĕnho kumex. Dja gar te amijã ijĕ, kikre kadjwýnhbĕ amijã ijĕn ajte aben jamakri ajajkwa momokkam abenmã mýjja jarĕ nhyM me tu kãj bĕ abenmã arĕ. Dja amirĩt ne. Dja me kuman kam kãj bĕ abenmã arĕ, kikrekôt arĕnho ipôk ne, ne ngãbĕ abenmã arĕ.

<sup>4</sup> Ĕ, ar apa, inhôbikwa ar, ba ar amã arĕ. Kwãrĩk wãnh ga ar amã me kute ar aparja puma kĕt. Me ja gĕdja me ar akrãkãbit par kajgon kam ijukri kute ar akadjwýnhbĕ ajmã ar ajo kĕt. <sup>5</sup> Kati, ba ar amã arĕ. Me'ô pydji dja ga ar amã uma. Kute me bĩn ne kute ijukri me biknor tokry djãkam me rĕnh, jabit dja ga ar amã uma. Be, ba ar amã arĕ, Metĩndjwýnhbit dja ga ar amã uma.

<sup>6</sup> Ĕ, mã ne kwĕnhne pãnh kute? Kwĕnhne ne pãnh ngri:re. Kwĕnhne ne amãnhkrut ne amãnhkrut ne ikjĕkĕt kam pãnh birãm ngônho pi'ôk kaprĩ amãnhkrut. Nã, tãm. Nhýnh ne Metĩndjwýnh kwĕnhne jao akno? Djã nãm o akno? Kati, nãm te mýjja kakrit, te kubĕ kwĕnhne nhyM prĩne o djuw mex ne. <sup>7</sup> Be, ar ja man atĩn prãm kĕt. Ar ga ne gar kwĕnhne kurãm abĕ kumkati. Ar ga ne gar abĕngôkre ne anhi pýnhkôt kwĕnhne krãptĩ kurãm arax. Be, kute kwĕnhneo djuw mexja pumũ. NhyM bep ar ga. Ar ga dja prĩne ar ajo djuw mex ne. Ga prĩne kute me bamar ne kute me bajãno ãmja pumũ. Mýjja'ô kubĕ biknor kĕt. Nhýnh ne mýjja'ô kubĕ akuno? Ga kute me bakĩ'ã akreja pumũ. Kam ne ba ar amã, “Kwãrĩk wãnh

ga ar adjumar punu kêt ne amã mỳjja pyma kêt”, ane.

<sup>8</sup> Ba ar amã mỳjja 'odjwỳ jarẽ. Me kute amijo ipytàr ne kute me krãptĩ nhipôkri kute, “Nà, ba ne ba arỳm amijo Jeju pytà”, anhỳrja gêdja ba badjwỳ ije amijo inhĩ ne me awỳr irwỳk badjwỳ Metĩndjwỳnh kadjy mrãnh djwỳnh nhipôkri, “Nà, ba inhôbikwa ne wã”, ane. Dja ba ã ane. <sup>9</sup> Nhym bep me kute imar kêt ne kum ikĩnh kêt, me kute, “Ije bep ije tãwã mar kêt”, anhỳr, me tãm gêdja ba badjwỳ amipãnh Metĩndjwỳnh kadjy mrãnh djwỳnh nhipôkri, “Ije tãwã mar kêt”, ane.

<sup>10</sup> Ë, gêdja me'õ ijã kabên ba ije amijo inhĩ ne me awỳr irwỳk, dja me'õ ijã kabên nhym Metĩndjwỳnh tu o aknon mar kêt ne. Nhym bep me'õ kute Metĩndjwỳnh Karõ japry, tãm gêdja Metĩndjwỳnh mar rã'ã rã'ã ne, mã kam ngyrk ne.

<sup>11</sup> Dja me ĩ ar ajo ajkẽ. Gêdja me ar apa 'amỳn mekbê idjaer bikprõnh djà'ỳr ar ajo bõx. Ne kam ajte me bẽnjadjwỳr krĩ djà'ỳr ar ajo mõ. Dja me ar apa 'amỳn ar ajo mõn amikabem ar apumjuw ne ar ajaxwe jabej ar akukjêro nhỹ. Kwãrĩk wãnh gar ajõ, “Ije, mỳj dja ba ikabên nẽ? Mỳj dja ba arẽ? Mã gêdja ba gêt ikabên on arẽ”, anhỳr kêt. Dja gar tu ate akrãn amikam atĩn prãm kêt. <sup>12</sup> Metĩndjwỳnh Karõ ta dja ar amã kabên jarẽ. Me kabem adjãmkam dja amã kabên jarẽ gar kam kabêno akabên ne memã akabên jarẽ. Nãm ã Jeju kôt ba djwỳnhmã kabên jarêno ane. Me kute kôt ba djwỳnho bikên nhym ar kute memã kabên jarênhmã ã arkum anhỳr djwỳnhram kabên jarêno ane.

*Me'õ nhõ mỳjja raxmã Jeju kute kabên jarênh.*

<sup>13</sup> Nhym kam me krãptĩ nhipôkri ne me'õ kàj bê kum,

—Bẽnjadjwỳr, gop ikamymã arẽ gê imã nèkrêx kwỳ ngã. Ibãm tyk kutã ne ar imã nèkrêx'ã karõ bar ije ar o ibamã nhym ikamy bõx ne tu jãm o amijakren utàn mã o mõ. Kute imã kwỳ nhõr kêtukumrêx, ane.

<sup>14</sup> Nhym kam Jeju kum,

—Ije mỳj me'õ kabênkôt gêdja ba aben nêje ar akukrà. Ne mỳj me'õ kabênkôt gêdja ba akamy kutã nèkrêx kwỳ byn amã

kungã? Djãm kadjy ne ba me awỳr tẽ? Kati, ane.

<sup>15</sup> Ne kam me kunĩmã kum,

—Gora me amijãno djan amã nèkrêx prãm kêt. Kwãrĩk wãnh ga me anhõ nèkrêx rũnh ne anhõ nèkrêxo adjãptàr ne ar o aba kêt. Djãm me kute amim nèkrêxo ãptàr ne o bakam umar mex got, kôt me kĩnh got? ane.

<sup>16</sup> Ne kam memã me'õ'ã ujarênh jakreo tẽn memã,

—Me'õ ne õ nèkrêx krãptĩ ne õ purkamdjwỳ djwỳ krãptĩ. Bàygogoremẽ bãyemê djwỳ kunĩ ingrõt ne kumex. <sup>17</sup> Nhym kam, “Ije, mã dja ba on? Nhỹnh gêdja ba inhõ bãygogomẽ bãy kumexjao atom ne 'ã man ar o iba”? ane. <sup>18</sup> Ne kam amim, “Goja, nà, gêdja ba bãygogo nhõ kikre kryreja ngràn kam ajte akàjbê rũnh nhipêx ne kam kam o atom ne kumex ne. <sup>19</sup> Ije nà, dja ba o ane nhym arỳm mrãmri inhõ nèkrêx kumex. Mrãmri ne ba arỳm amimex ne. Gêdja 'ã amex krãptĩn kumex rã'ã ne. Jakam gêdja ba idjãpênh krãtan ikôkam kôt ne inhõ kwỳ krên kôt ikôn kam ikĩnh katibit ma”, ane.

<sup>20</sup> Nhym Metĩndjwỳnh kum, “Nã gãm ajbã. Akamàt ja tãmkam gêdja ga ty. Nã bãm te amexmã akabi ga atemã. Nhym nãr anhõ nèkrêxwã? Mỳj kadjy ne ga anhõ nèkrêx ar o aba? Nhym gêdja amỳrbê ar o ba”? ane.

<sup>21</sup> Bir be, nãm ã me kute amim Metĩndjwỳnh mar kêt ne kam kute õ nèkrêxbit mar ne kute amim o atommã o atom kajgoo ane. Nãm amimex ne kam Metĩndjwỳnhmã mex kêtukumrêx ne, ane.

*Amikam umar punu nêje arkum karõ.*

*Mat 6.25*

<sup>22</sup> Ne kam ajte kôt ba djwỳnhmã kum,

—Bir, kam ne ba ar amã, “Kwãrĩk wãnh gar amikam adjumar punu kêt ne anhõ kre kadjwỳnhbê amim, ‘Mỳj dja ba kukrẽ’?”

Nàr kubèkà'ã, ‘Mỳj kubèkà dja ba angij’? anhỳr kêt.” <sup>23</sup> Metĩndjwỳnh ta ne gwaj bajo tĩn ne, ga gwaj batĩn ne ar babaja pumũ. Ja ne gwaj bamã mex, ja ne mrãmri wỳnhĩ. Nhym bep me õ ne kajgo, djwỳ ne kàjbê. Nhym bep Metĩndjwỳnh ne gwaj banhipêx. Ja ne gwaj bamã mex, ja ne mrãmri wỳnhĩ. Nhym bep kubèkà ne kajgo. Kubèkà ne kàjbê. Kwãrĩk wãnh ar amikam adjumar punu kêt.

<sup>24</sup> Ë, gop ar bårire ja pumũ. Kute amim pur jadjwýr kêt. Kute amim djwý kre kêt. Kute amim mýjjao atom kêt. Nhýnh got õ báy nhõ kikre, nàr o atom djà? Kati, kwênhne ne ta ar ba, nhym kam Metĩndjwýnh prĩne o djuw mex ne. Kwênh kute amim djwýo atom kêtja pumũ. Ar ga ne gar kwênhne kuràm amexkumrêx. Ne ar araxo kwênhne jakrenh mex ne. Dja Metĩndjwýnh kwênhne kuràm prĩne ar ajo djuw mex ne.

<sup>25</sup> Nhýnh ne me'õ ta ajkwao, mýjja kam umar punuo, amũ tyk kêtma aminhõ akati kamê? Kati. <sup>26</sup> Gar aje mýjja ngrire te o anhýrja pumũ. Gar aje mýjja ngrire ja mar kêtja pumũ. Metĩndjwýnhbit ne kute mar. Ajbit kute me tĩn nhijukri kute amidjar mar, kumãbit ne amirĩtkumrêx. Ne kute me bajo djuw mexjadjwý mar, prĩne kute mar, kumã ne mrãmri amirĩtkumrêx. Kam gêdja me bajo djuw mexkumrêx. Bir be, mýkam ne gar amikam atĩn prãm ne amikam adjumar punu? Kwãrĩk wãnh gar amikam adjumar punu kêt.

<sup>27</sup> Ë, ar kapõtkam pidjõrãja pumũ. Pidjõrã ne ta ingrõt ne kumex. Àpênh kêtumrêx. Ne kute amim kubêkà kayr kêt. Ë, ba ar amã arê, bēnjadjwýr raxbê Xaromão ne kute kubêkà mextire jangjênhkam kĩ:nhkumrêx. Nhym bep pidjõrãja ne mex, kĩho Xaromão jakrenh mex ne. <sup>28</sup> Metĩndjwýnh ta ne pidjõrã nhípêx nhym kam mexkumrêx ne. Rã abenon kumex ne kam kĩnhkumrêx. Nhym akati nhym me arým kadjy bõremã adjà nhym xêr. Te mýjja kakrit tebê apêx ba nhym Metĩndjwýnh prĩne o djuw mex ne. Ar ga ne gar pidjõrã kuràm abêngõkre ne amexkumrêx. Dja Metĩndjwýnh pidjõrã kuràm prĩne ar ajo djuw mex ne ar amã ar akãdjwý ngã. Be, kam gêdja gar tu amim Metĩndjwýnh kamnhĩxkumrêx. Nhym mýkam ne gar amim kamnhĩx kêt ne kãjbê amim kamnhĩx ne.

<sup>29</sup> Kwãrĩk wãnh gar amikam adjumar punu kêt ne anhõ kwý krēn ne kõt akõmkõtbit ajamak bēn kêt. <sup>30</sup> Apýnh pyka djari me kute amim Metĩndjwýnh mar kêt ne me ar mýjja ja jabej ba. Nhym bep kati, ar Abãm kute prĩne ar amar ne ar

anhõ mýjja kêt kõt kute ar amar. Kam gêdja prĩne ar ajo djuw mex ne. <sup>31</sup> Metĩndjwýnh kumrêx dja gar mar ar o aba, Metĩndjwýnh kukràdjãmê dja gar kumrêx ma. Nhym kam ijukri dja arým ar amã mýjja ja ngã.

<sup>32</sup> Ë, inhõ kritte, inhõ àpênh ngrêreja, kwãrĩk wãnh gar atĩn prãm kêt. Ar Abãm ne arým amim ar ajã karõ. Kute meo atom ne me kadjy bēnjadjwýr ne kute ar meo bakam kute ar ajã bēnjadjwýr mēnh gar aje ro'ã meo abamã arým ar ajã amim karõ.

<sup>33</sup> Ë, kwãrĩk wãnh pykabê anhõ nêkrêxja'ã ano tỳx ne 'ã angràn ar o aba kêt. Dja gar anhõ nêkrêx me'õmã angã gê pãnh ar amã pi'õk kaprĩre ngã gar abyn kam me õ mýjja kêtjamã angã. Bep kati, kãjkwakam dja Metĩndjwýnh ar amã anhõ mýjjao atom, nhym tũmràm ar amã mexkumrêx gar o aba. Tũmràm rerek ne punu kêtumrêx. Ar aje amim kãjkwakam mýjja mextireo atomja gêdja kàpo, mýjja'õ ar abê o bikēnh kêtumrêx nhym me àkĩnhĩ'õ 'ýr bõx kêtumrêx, gar ar o aba. Kwãrĩk wãnh gar pykabê mýjja ja mar ne o atom ne ar o aba kêt. <sup>34</sup> Be, nok ga ren ar pykabê amim mýjjao atom ne kam ren kõt pykabê ar anhõ mýjjabit man ar o aba. Nhym bep dja kãjkwakam Metĩndjwýnh ar amã mýjjao atom gar kam kõt arým kãjkwakam anhõ mýjja man ar o aba.

*Jeju me aêrbê akubyn bõx.*

*Mat 24.42; Mak 13.35; Ruk 21.34; Tex k 5.4*

<sup>35-36</sup> Dja ba tyn akubyn itĩn ne kãjkwakumrêxmã wabi. Ne kam arým ajte akubyn bõx. Ar ga dja gar ikam ama. Ne ikutêp amijãno dja. Iikutêp amijãno djan ar amijo aba. Kute mrãmri ne me õ bēnjadjwýr me kute abenã me rēnh'ýr mrãnh nhym õ àpênh kutêp kikrekam krĩn kute kubêkà jangjênh rã'ãn õt kêt ne kute ngõnhpõkmã angjênh rã'ãn kutêp no tỳx ne kam amako krĩ. Nhym kam me õ bēnjadjwýr akubyn mrãn bõx ne kam õ àpēnhmã kabēn ne. Ne arkum, “Kikre'ã ta”, ane.

Nhym ar tebê kum kikre'ã kuta nhym arým wadjà. Ar õ bēnjadjwýrja arým bõx. <sup>37</sup> Ar no tỳx ne kute kam amak rã'ã nhym bõx nhym kam ar kĩnhkumrêx ja pyrãk. Nhym kam ar õ bēnjadjwýrdjwý arkam

kĩnhkumrēx ne. Ō àpēnhkam kĩnhkumrēxkam gēdja kute arkum ōmrōmā kadjy amidjē. Mrāmri ne ba ar amā katāt arē. Dja amidjēn kam ar'yr tēn kam arkum, “Ar nhỹ. Ar nhỹ ba ar amā ar anhō kwỳ krēn djā nhipēx gar krē”, ane. <sup>38</sup> Dja te akamāt kō ipōkri nār te akati maktā bōx nhym ō àpēnhja no tỳx ne kam amako krī rā'ā ne. Kam gēdja ar ō bēnjadjwỳr arkam kĩnhkumrēx ne, nhym ar jadjwỳ kĩnhkumrēx ne. Dja gar ā bēnjadjwỳr nhō àpēnh'ā amijakren arek ikam amako akrīo ane. Gēdja gar ikam amak rā'ā jabej ba ar akam ikĩnhkumrēx ne.

<sup>39</sup> Gop ar ikabēn ma. Ba ajte ar amā 'ōdjwỳ jarē gar ama. Ne ren ō kikre djwỳnhja ren me àkĩnhĩ bōx djā man kam ren arek kam amako nhỹ. Nhym ren bōx ne kikre'ā 'yr ne kum àr kētkumrēx ne. Badjwỳ dja ba ije me àkĩnhĩ pyrāk ne me ajaērbē bōx. <sup>40</sup> Kam gēdja gar gadjwỳ mā ikam amako akrī. Ba ije amijo inhĩ ne me awỳr ibōx ba gēdja ba ajte akubyn bōx. Ar aje nhỹnh myt nhỹr 'ōkam aje ibōx djā mar kēt. Kam gēdja ba tu ar ajaērbē bōx, ane. Nām ā Jeju arkum amibōx djā jarēnho anen kam arkum kabēn jarēnh pa.

<sup>41</sup> Nhym Pedru kum,

—Djām ar imābit ne ga arē, ar ije akam amakmā, djām ar imābit ne ga arē, nār kon, djām me kunĩmā ne ga arē? ane.

<sup>42</sup> Nhym kam kum,

—Be, me kute amikajmā'ā imar kunĩ dja me arīk ikam amā ne kam kute mrāmri ne me àpēnh djwỳnh kute ō bēnjadjwỳr kam amakja pyrāk. Me ō bēnjadjwỳr ne ō àpēnhmā kabēn ne ne kum, “Ga dja ga me àpēnh'ā me omũ, ane, ne prīne 'ā meo djuw mex. Dja ga myt kunīkōt memā ō kwỳ krēn djā ngān akrānmā memā ōro aba. Ne me'ā akren memā angā.” Nām ā ō àpēnhmā me'ā karōo ane. Kute akrānmā me àpēnh'ā me omũnh ne kute 'ā meo djuw mex katātmā ā kum me'ā karōo ane.

Nhym ō àpēnh kum, “Nà, gēdja ba mrāmri ā anen kam me 'āno dja”, ane.

Nhym kam ō bēnjadjwỳr mā nhĩ'ām tē. Nhym kam ō àpēnhja kabēnkumrēx. Nām no mexkumrēx ne katāt ar memā mỳjja nhōro ba, me kanga kētkumrēx ne ar meo ba.

<sup>43</sup> Nhym kam bēnjadjwỳr akubyn bōx ne kam ō àpēnhjamā kato. Kute amrēbē kum kabēn jarēnhja kōt mrāmri meo djuw mex nhym kam arỳm kum kato. Kam dja ō àpēnhjadjwỳ tu amikam kĩnhkumrēx ne.

<sup>44</sup> Ē, ba ar amā kōt arē. Bēnjadjwỳrja dja ō àpēnh ja'ā bēnjadjwỳr mē. Kute nēkrēxmē mỳjja kunĩ pumũnhmā dja 'ā bēnjadjwỳr mē. Nhym kam ō àpēnhja kĩnhkumrēx ne. <sup>45</sup> Nām ren ō àpēnhja ōkre kadjwỳnhbē, ō bēnjadjwỳrja'ā ren, “Be, nām nhĩ'ām bēnjadjwỳr tēn arỳm amikrà. Jakam dja ba on tu arīk ar iba, inomā arwāri”, ane. Ne kam ren ar ō àpēnhja titiko ba, ō àpēnh mymē ō àpēnh nimē ren ar titiko ba. Ren ō kwỳ krēnbit ban kōt kadjwati kangōo\* ikōn kam ren kam ajbān ar ba. <sup>46</sup> Nhym kam ō bēnjadjwỳrja aērbē bōx. Ō àpēnhja kute amim ō bēnjadjwỳrja bōx djākōt mar kēt. Nhỹnh akati 'ōkam bōx djāmā kute mar kēt ne nhỹnh myt nhỹr 'ōkam bōx djāmā kute mar kētkam ne aērbē bōx. Nām bōx ne kam ō àpēnh arīk ar bajakam ngryk ne. Ngryk ne kam o ajkapōn bōm kumē. Me amakkre kētkamē ro'ā bōm kumē.

<sup>47</sup> Bir be, dja ā me bēnjadjwỳr ane. Me kute ō àpēnhmā prīne mỳjja'ā karō nhym me ren ām mar kajgo ne kam ren ate krān ar ba ne ren kabēnkōt amijo ba kētkumrēx ne. Nhym ren me ō bēnjadjwỳrja bōx ne prīne ren meo ajkē, me kaprēprē:k ne. Kute arỳm memā 'ā karō kajgo nhym me kute kabēn mar kētkam.

<sup>48</sup> Nhym bep ō àpēnhja kute ō bēnjadjwỳrja kabēn mar kēt, me'ō kute memā kabēn jarēnh kētkam, ne ren arīk ar ba, kam ne ren ō bēnjadjwỳrja bōx ne kam ren me kaprēprēk ngrire, meo bikēnh ngri mex ne. Nām me ren te mar mex ne tu ate krān ar ba nhym ren prīne meo ajkē. Nhym bep kati, me kute mar kēt, kam ne bōx ne ām meo bikēnh ngri mex ne.

Metīndjwỳnh ne apỹnh ar amā mỳjja ngā, ne ar amā ar adjē mex, ar ano mex, ar aja-mak mex ar amā kungā, o ar kum adjàpēnh kadjy. Dja abej ar akukij ne ar amā, “Nār, ije ar amā ar ano mex, ar adjē mex nhōrja, mā ne gar kam nē? Djā ne gar o adjàpēnh mex ne?”

\* **12:45** Mỳjja me kute o kōm ne kōt bibānh kunĩja, kadjwati kangōmē uba kangōmē, mỳjja kangō kunĩ ne me kum kadjwati kangō jarē.

Kute me'ômã mỳjja kàjbê rax nhõrja gêdja o kum kàjbê àpênh rax jabej kukij. Nhym bep kute me'ômã mỳjja ra:x nhõrja gêdja o kum àpênh ra:x jabej kukij.

*Jeju kute meo bikjêr jarênh kadjy.*  
*Mat 10.34*

<sup>49</sup> Ê, mỳj kadjy ne ba jakam tèn bõx. Ije me axweo apêxmã ne ba pyka jakam bõx. Ga kuwy kute mỳjja kakrit kunõ apêxja pumũ. Dja ba ï ibê kuwy mãn prãbê ã o anen me axwemã ikaton memã pãnh jarênh kam me imex ne. Gora gê on õ akati 'yr bõx. <sup>50</sup> Nhym bep dja ba itokry rax kumrêxi. Dja ba itokry rax ne kute mrãmri ne me wýrkam ngoo tuknĩ ja pyrãk. Dja ï itokry ã prĩne ijo tuknõ ane. Dja ba itokry ra:x nhym me ibĩ. Kadjy ne ba tẽ. Gora gê on inhõ akati iwýr bõx ba gop itokry rax gê gop on apêx. Ba kam arým ije amimarja arým apêx.

<sup>51</sup> Djãm ije pykabê me jamã umar mexmẽ me typydjin ar ba jarênhmã ne ba me'yr tẽ. Arkati, ê, ba ar amã arẽ. Me kute imýr jabej abeno bikjêrmã ne ba me'yr tẽ. <sup>52</sup> Jakam dja me kikre tãmkam imýr jabej abeno kurê djwýnh ne. Me ta õbikwamẽ dja me ï abeno kurê djwýnh ne abeno ajkij. Dja ar amãnhkrut ne ikjêkêtja amẽ ar jao kurê djwýnh nhym amẽ ar ja amipãnh ar amãnhkrut ne ikjêkêt jao kurê djwýnh ne. Arým ne ar abeno ajkij. <sup>53</sup> Bãmja dja imýr jabej kra myo kurê djwýnh ne. Nhym kra my amipãnh bãmo kurê djwýnh ne. Nhym ate nãja dja kra nio kurê djwýnh nhym kra nijadjwý amipãnh não kurê djwýnh ne. Nhym ate umrengêxja dja wýnh nio kurê djwýnh nhym wýnh nija amipãnh umrengêxo kurê djwýnh ne. Dja me ã imýr jabej abeno kurê djwýnh ne abeno bikjêro ane. Tãm ne ja. Nãm ã Jeju kõt ba djwýnhmã kabên jarênhõ anen arkum kabên jarênh pa.

<sup>54</sup> Ne kam ajte me krãptĩtjamã kum,

—Nã gãm me kàjkwa nhõt kurũm kakrã amrẽ bikamênh baja pumũn kam abenmã kum, “Gêdja na ruw”, ane. Ga me mrãmri tu kônkh kum irkumrêx, nhym arým ruw. <sup>55</sup> Nã gãm me kòk djàbêr tỳxja pumũ, kàjkwa nhirê kurũm kòk djàbêr pumũn kam abenmã

kum, “Gêdja on amex nhym kam arým arngro tỳ:x ne”, ane. Ga me tu mrãmri kônkh kum irkumrêx nhym ã ane.

<sup>56</sup> Kê, nã gãm me ajêx ne mỳjja mar kajgo ar o aba. Kàjkwamẽ kòk djàbêrbit ne ga me aje mar ne omũnh. Mýkam ne ba me akam ar ibari mỳjja pumũnh kêt kwý 'yn me amã mỳjjao amirĩto iba ga me ja mar kêt ne omũnh kajgon amim, “Ije tó mýj'ã”? anhýr kajgon mar kêt kumrêx ne. <sup>57</sup> Nhym mýkam ne ga me amimar ne amijaxwemã akator ne Metĩndjwýnhmã amijarênh kêt ne? Ja ne katãt. Mýkam ne ga me ã anhýr kêt ne? <sup>58</sup> Gêdja ga me Metĩndjwýnh nhõ akati bõx kêttri kum amijo a'wý gê me ajo mex. Ba me amã arênh me'õ'ã me ajakre. Birãm me'õ amã, “Ga ne ga ibê mýjjao ajkên ar ikam amikrão aba. Aje imã o pãnh kêt kam gêdja ba bẽnjadjwýr kute me axwemã apõx'yr ajo tẽ gê amã pãnh jarê”, ane. Gêdja ga amibêx ne kute 'yr ajo bõx kêttri kum amijarênh kum o pãnh. Kute memã axwe pãnh jarênh djwýnhmã apa 'amýnh ne abjêro tẽm nhym kute krãkamngõnhmã akanga nhym me kute abê ijê kêttri. Kute ã ajo anhýr kêttri gêdja ga atêmbê kum o pãnh. Dja ga ã o anen kum o pãnh kêt nhym arým mekbê ijê djakam amẽ ga kam kum o pãnh ra:xo dja. <sup>59</sup> Gêdja ga kum pãnhõ dja:n kum pãnhõ ino rer jabej arým akato. Nhym be djã gãm kum pãnhõ ino rer kêt ne mrãmri arek aku'ê. Gêdja ga me ã anen Metĩndjwýnh kute memã axwe pãnh jarênh nhõ akati kator kêttri Metĩndjwýnh'yr amijo akêx ne kum amijo a'wý gê me ajo mex, ane. Nãm ã Jeju memã arênhõ ane.

## 13

*Kute me kute abenmã axwe kukrà kêt mex ne arênh nêje me kukrà.*

<sup>1</sup> Ne kam memã kabên ja jarênh pa nhym me kam kum pykabê Garrêjakam me ja jarê. Nãm me Metĩndjwýnhmã mry pan kubõ. Kum bõro ku'ê rã'ã nhym Piratu õ àpênh krãkamngõnhre me'yr ano nhym me prĩne me imex ne, me kute mry bõro ku'ê ja ne me me imex ne, ne mry kamrõmẽ me kamrõo akã. Nhym me omũn kam Jejumã arẽ. <sup>2</sup> Nhym kam memã kum,

—Birām gām me we, “Be nām me õ pykakam me ja axweo me tñja jakrenh mex ne kam ty.”

<sup>3</sup> Arkati. Ba me amã arẽ. Me gadjwý dja ga me amim akator ne wãnh ajaxwemã anhirer ne Metĩndjwýnh'ýr amijo akẽx kêt kam me kudjwa tu abiknorkumrẽx ne, me akunĩ, ane. Nãm ã Jeju ane. <sup>4</sup> Nhy m krĩraxbẽ Djeruxarẽkamdjwý kikre prẽktibẽ Xirõwe me imex ne. Nãm me'ã tým ne meo 18 ne me imex ne. Nhy m me adjwýnhdjwý pumũn kam Jejumã arẽ. Nhy m kam ajte memã kum,

—Birām gām me we, “Be nām Djeruxarẽkam me ja kute Metĩndjwýnhkam amikrào me tñja jakrenh mex ne kam ty.”

<sup>5</sup> Arkati. Ba me amã arẽ. Me gadjwý dja ga me amim akator ne wãnh ajaxwemã anhirer ne Metĩndjwýnh'ýr amijo akẽx kêt kam me kudjwa tu abiknorkumrẽx ne, me akunĩ, ane. Tãm ne ja, ane. Nãm ã Jeju memã ane. Nãm me abenmã axwe kukrà kêt mex ne arẽ nhy m kam ã memã ane.

<sup>6-7</sup> Ne kam ajte memã atemã mýjja 'ã ujarẽnh jakreo tẽ. Me kute abenmã axwe kukrà kêt mex ne arẽnhbẽ ne memã kum,

—Atemã pidjõbẽ pigẽre ne õ àpẽnh kute õ bẽnjadjwýrjamã kremã o tẽ. O tẽn kum kre. Pidjõkõ nhipõkri kum kre. Nhy m arým ingrõt ne abatãnh ne. Nhy m õ pidjõ djwýnhja kute ô jabejmã 'ýr tẽ. Ne te ô jabej nhy m amex nhy m te ô jabej nhy m ajte amũ amex nhy m te ô jabej, ô jabej te aprãn kam õ àpẽnhmã kum, “Ota aje pidjõ kreja ô kêt ne. Arým 'ã amex amãnhkrut ne ikjêkêt ba te ô jabej. On tẽn kum ta. Mýj kadjy ne mõn inhõ purkam ãm kajgoo dja”? ane.

<sup>8</sup> Nhy m õ àpẽnhja kum, “Adjým bẽnjadjwýr. Gẽ arek djan 'ã amex pydji ba kam bu'ã kakuwn kum mry nhĩno ipõk ne o kane. Mry nhĩno dja ba kanen kam gop ô jabej. <sup>9</sup> Dja ô mex ne kam arek dja. Gẽdja ô kêt ba tu kum kuta”, ane. Tãm ne ja.

Metĩndjwýnh on kute memã pãnh jarẽnh kêt. Tũmrãm dja ã memã pãnh jarẽ. Me kute axwemã irer ne kute tũmrãm 'ýr amijo akẽx kadjy ne tũmrãm memã pãnh jarẽn meo ajkẽ. 'Ã ne kute memã ujarẽnh jakreja.

*Kute me'õ nire punuo mex.*

<sup>10</sup> Ne kam pi'õk rårår 'õkam me kute abeno bikprõnh djåkam memã Metĩndjwýnh'ã ujarẽho dja. <sup>11</sup> Nhy m kam me'õ nija wadjã. Me karõ punu'õ ne mã o ba nhy m kam ibõn mrã. Ibõn mrãnh'ã amex krãptĩ. Arým 'ã 18. Nãm te katåt kãjmã ãmmãnh katåt kêt mex ne. <sup>12</sup> Nhy m kam Jeju omũn kam amiwýr ku'uw ne kam kum,

—Àpnhĩre, me karõ'õ kute ajo baja ne arým amã ire, ane.

<sup>13</sup> Ne kam 'ã ikra dji. 'Ã ikra dji nhy m tebẽ kãjmã dja, arým katåt ne dja. Ne kam Metĩndjwýnhmã mextire jarẽho dja. <sup>14</sup> Nhy m bep me bikprõnh djåkam bẽnjadjwýrja ne 'ã ngryk ne. Pi'õk rårårkam Jeju kute meo mexo ãmkam ne 'ã ngryk ne. Ne kam memã,

—Pi'õk rårår ne ja. Pi'õk tykkambit ne me àpẽnh djå. Pi'õk tyk amãnhkrut ne amãnhkrut ne amãnhkrutkambit ne me àpẽnh djå. Kam dja ga me amrẽ mõ gẽ me ajo mex. Kwãrĩk wãnh ga me pi'õk rårårkam amrẽ 'ýr abao adjãm kêt, ane.

<sup>15</sup> Nhy m kam Bẽnjadjwýr djwýnh kum,

—Kẽ, nã gãm me ajẽx ne ajajkwakambit amimex jarẽ, ar amimex jarẽho aba kajgo. Nhýnh ne ga me ajõ pi'õk rårårkam anhõ krit'õ kõm kêt ne, anhõ mryti nãr mry'ã krĩja krãdjẽ djå 'ãpre bõn ùrkwã kurũm o akaton o tẽ nhy m kõm kêt ne? Kati, nã gãm me pi'õk rårårkam anhõ krito aba nhy m kõm ba. <sup>16</sup> Ije nhy m mýkam gẽdja ba me'õ ni, Abraão tãmdjwýja 'ãpre bõnh kêt ne? Me ga ne ga me pi'õk rårårkam anhõ krit 'ãpre bõ. Nhy m mýkam gẽdja ba kubẽngõkreja 'ãpre bõnh kêt ne, Xatanaj kute uwpre'ã amex krãptĩ, arým 'ã amexbẽ 18ja 'ãpre bõnh kêt ne? Kati, dja ba 'ãpre bõ gẽ kãjmã dja, ane.

<sup>17</sup> ã kum ane nhy m kam kurẽ djwýnhja amikam pijãm ne. Nhy m bep me ja, me kunĩ ne me tu kam kĩnhkumrẽx ne. Nãm Jeju memã mýjja krãptĩõ põx nhy m mexkumrẽx nhy m me kam kam kĩnhkumrẽx ne.

*Metĩndjwýnh kute me utår ne meo ba.*

<sup>18</sup> Nhy m kam ajte Jeju memã kum,

—Ë, Metĩndjwýnh kute me utår ne me kadjy bẽnjadjwýr ne kute ar meo baja, mýj ne kute uråk? Mýj'ã ne ba ije akremã?

19 E kum nãm kute pidjô 'y kryre ja pyrâk. Pidjô 'y kryrebê motadu. Me'ô ne amim 'y kryreja by ne kam o tẽn ô purkam kre nhym tebê abatânh ne. Abatânh mexkumrêx nhym kam kwênhne apÿnh pa'ã aê, ane.

Me kute amim Jeju marmã nhym arÿm ja pydji kadjy amima, nhym arÿm ja kadjy amiman 'ã tÿm, nhym ja kôt 'ã tÿm, nhym ja 'ã tÿm, nhym ja 'ã tÿm nhym arÿm 'ã krãptĩ ne. 'Ã ne 'y kryre ja jakre.

20 Ne kam ajte memã kum,

—Metĩndjwÿnh kute me utâr ne me kadjy bẽnjadjwÿr ne kute ar meo baja mÿj ne ba ije 'ã akremã? 21 E kum nãm kute djwÿ nhigot djâ pyrâk. Me'ô nire ne djwÿ djôm byn ngônhkam kumên kam ajte iby o amãnhkrut ne kumê ne kam kadjy djwÿ nhigot djâ ngri:re ja by. Ne kam o akân kudji nhym nôn kam arÿm igot mō. Igot mō:n arÿm rax ne kam prĩne djwÿo tuknĩ, ane. Nãm ã me kute Metĩndjwÿnh mar amũ abendjô'ã abenmã Metĩndjwÿnh jarênh ane nhym arÿm me pyka kunĩkôt arênh ajmã nhym arÿm pyka kunĩkôt me kute Metĩndjwÿnh mar krãptĩ ne. 'Ã ne memã djwÿ nhigot djâ jakren arê.

*Kikre jajkwa krekre ngrire'ã ujarênh.*

*Mat 7.13*

22 Ne kam tu Djeruxarê'ÿr krâkumrêx ne. Ne kam apÿnh krĩ rûnhmê krĩ kryre kôt mō. Kam memã Metĩndjwÿnh'ã ujarênh mō. 23 Djeruxarê'ÿr me mōrkôt ne memã 'ã ujarênh mō nhym kam me'ô kum,

—Bẽnjadjwÿr, djãm Metĩndjwÿnh kute me utârja djãm me ngrêrebit? ane.

24 Nhym kam memã,

—Ë, kwârĩk wãnh ga amũ me ja mar kêt. Nhym bep Metĩndjwÿnh dja ga amikajmã'ã ama. Ga me kikre jajkwa krekre ngrire kôn timerãnh, kôn timerãnh ngjênhmã mrãnh tÿx ne kute ikjêo aben rênh ne mrãnh ne ngjêxja pumũ. Gadjwÿ dja ga ã amikam atÿxo anen Metĩndjwÿnh nhõ pyka'ÿr bõx. Ba me amã arê. Nãm me krãptĩ te 'ÿr àrmã. Dja me te o anen te o anen 'ÿr àr kêt ne. Kute mrãmri ne me te kikremã àr prãme ja pyrâk.

25 Dja ô kikre djwÿnh 'ÿr tẽn kikre'ã ijê, me abê kikre'ã ijê. Ga me kam wãnh kapôtã akumex. Ne kam 'ã ijê djâ môro akumex.

Te 'ã ijê djâ môro akumex ne kam kum, “Bẽnjadjwÿr, amrê me imã kikre'ã ta ba me wãm wadjâ”, anhyro akumex. Te kum ane. Nhym kam me amã, “Kê waj, ije me amar kêt. Ije mÿjwã kurũm me ajapôx djâkôt me amar kêt”, ane.

26 Dja ga me te kum, “Tô gêt anhikô'ã ne ba me inhõ kwÿ krên kôt ikõ ga me inhürkwã kabe'ã me akreo mō”, anhyro akumex.

27 Nhym kam me amã, “Ba me amã arê ga me ikabên ma. Ije mÿjwã kurũm me ajapôx djâkôt me amar kêt. Rũm mãn me mō, me aje ajaxwebit markam dja ga me rũm mō”, ane. Dja ã ô kikre djwÿnh me kapôtã akumexjamã ane.

28 Æ me amã ane ga me kam amran amim angryk ne wãnh amijanên amijo pyka titik ar o aba. Abraãomê Idjakmê Djakomê Metĩndjwÿnh kabên jarênh djwÿnh kunĩmê dja me Metĩndjwÿnh nhõ pykakam ar ba, ga me te me omũ. Metĩndjwÿnh arÿm kute me utâr ne me kadjy bẽnjadjwÿr ne kute ar meo ba, ô pykakam kute ar meo baja dja ga me te me omũ, amybÿm me omũ ne kam ajte jãm amipumũn kam amikam angryk ne. Metĩndjwÿnh kute bõm me arênhkam gêdja ga me ã amim angryk o anen amran amijanên ar amijo pyka titik o aba.

29 Bir be, dja me apÿnh pyka kunĩkôt Metĩndjwÿnh'ÿr akuprôn kam kutã ô kwÿ krêno kumex. Kâjkwa kraxrũm me jamê, kâjkwa nhôt kurũm me jamê, aktã kâjkwa nhirê'ãnh me jamê, me tãm dja me 'ÿr bõx ne kutã ô kwÿ krêno kumex. Nhym bep Metĩndjwÿnh dja me ja kadjy bẽnjadjwÿr ne meo ba.

30 Nhym kam pykabê me 'uwtĩ, me kâtãm ar baja gêdja me kumrêx Metĩndjwÿnh nhõ pyka'ÿr bõx. Nhym bep jakam me kute amirũnhbit mar ne kute amirũnh mar kanàrrãm baja gêdja me pãnh me katên mrã, ane. Nãm ã Jeju memã Bãm nhõ pyka jarênh ane.

*Jeju Djeruxarêkam me jakam kaprĩ.*

*Mat 23.37*

31 Nãm memã kabên jarênh pa nhym kam mebê pardjêu kwÿ 'ÿr bõx ne kam kum,

—On ja kurũm tẽ, ane. On ja kurũm tẽ. Arÿm ne Erodji kute abĩnmã akangrô, ane.



<sup>32</sup> Nhyam kam memã kum,

—Ăm me mōn kukōnhwãmã arĕ, axwere wãmã arĕ, “Ota ba akati jakam arek me karō punubĕ me utaro djan me kanĕo mexo dja. Gĕdja akati ba ajte tãm ne. Nhyam ijã akati amãnhkrut ne ikjĕkĕt ba arÿm inom kumĕ.” Dja ga me ã kum ane.

<sup>33</sup> Nã, mrãmri ne ba arÿm Djeruxarĕ'ÿr itĕmkumrĕxmã. Dja ba akati jakam meo mexo tĕn nō nhyam akati kĕt ba ajte amũ tĕn 'ÿr nō nhyam akati ba arÿm 'ÿr bōx, Djeruxarĕkam bōx. Nhÿnh ne me kute atemã krĭrax 'ōkam Metĭndjwÿnh kabĕn jarĕnh djwÿnh par djã 'ō got ba 'ÿr tĕ? Kati, Djeruxarĕ pydjii. Pydji ne ba arÿm 'ÿr itĕmmã. Kam gĕdja me ibĩ, ane. Nãm ã Jeju mekbĕ pardjĕumã ane. Ne kam ajte Djeruxarĕkam me ja'ã,

<sup>34</sup> —ÿ, Djeruxarĕ, Djeruxarĕ, mÿkam ne akra Metĭndjwÿnh kabĕn jarĕnh djwÿnh par prãm ne? Mÿkam ne kĕno me titik ne me kupa, Metĭndjwÿnh kute me awÿr me anorja pa? Ije nã bãm te ije me ajo ibikprōnh ne ije me ajo atommã. Kute mrãmri ne ōkrĕnĕ'ãnh kute arao krao bikprōnhja pyrãk. Ba ren ã me ajo ane. Nã bãm te ije ã me ajo anhÿrmã ga me. <sup>35</sup> Ĕ, jakam me amōr djã ja gĕdja kukrit mex ne kaprÿn nō. Ĕ, ba me amã arĕ, jakam dja ga me ipumũnh kĕtkumrĕx ne. Ipumũnh kĕt rã'ã: nhyam inhō akati ijo rãm ne jao tĕ ga me abenmã kum,

“Ĕ, ota arÿm Metĭndjwÿnh kabĕnkōt tãmja bōxmã. Gĕ Metĭndjwÿnh o kĭnh.”

Ga me ã abenmã ane ba kam arÿm me awÿr bōx, ane.

## 14

*Jeju kute me'ōbĕ pardjĕu nhÿrkwãkam ō kwÿ krĕn.*

<sup>1</sup> Nãm memã kabĕn jarĕnh pan kam ajte tĕ. Nhyam ajte pi'ōk rārār nhyam mekbĕ pardjĕu nhō bĕnjadjwÿr ngri'ō kum,

—Amrĕ ikōt tĕn inhÿrkwãkam ikutã anhō kwÿ krĕ, ane.

Nhyam kum “Ă” anen kōt tĕn kutã ō kwÿ krĕ nhyam me arek kam no tyn omũnh nhÿ.

<sup>2</sup> Nhyam Jeju kutã me'ō my nhÿ. Nãm prĭne igoto tuknĩ. <sup>3</sup> Nhyam mekbĕ pardjĕumĕ me kute Mōdjĕ kukrãdjã mar djwÿnh arek Jeju

pumũnh nhÿ. Kute o mex jabej ne me ikō'ã nhÿn omũnh nhÿ. Nhyam kam memã,

—Djãm ori me kute pi'ōk rārār kam meo mexkam punu? Djori kam punu? ane.

<sup>4</sup> Nhyam me pijãm djãje anhikrĕ:n nhÿ. Nhyam kam pa'ã byn kãjmã kudjan o mex ne kam ano. <sup>5</sup> Ne kam memã kum,

—Gĕdja me ajō kra'ō, me ajō nhō krit'ō pi'ōk rārār kam tĕn kreti, ngōmkwatikam tÿm, mã gĕdja ga on? Djãm aje arek pi'ōk rārār kam omũnh kajgoo adjãmmã? Omũnh kajgoo adjãm nhyam tykmã? Kati, gĕdja ga pi'ōk rārār kam o wabi, ngō kute bĭn kĕtri, ane.

<sup>6</sup> Nhyam me ajte anhikrĕ:n nhÿ, ne te kute amipãnh kum kabĕn'ō jarĕnhmãn mrãmri nhÿ. <sup>7</sup> Nhyam me ō kwÿ krĕno ÿrja, bĕnjadjwÿr kute memã arĕnh nhyam me ō kwÿ krĕnmã ÿrja ne me kwÿ amijo rũnh prãm ne mekbĕ amijo me rũnh krĭ djã pytã. Nhyam Jeju me omũn kam nĕje memã kabĕn kadjy memã mÿjja'ã ajarĕ ne memã kum,

<sup>8-9</sup> —Me kute abenã me rĕnhkam ne me àkur rũnhĩ. Nhyam kute abenã me rĕnh djwÿnhja amã kabĕn jabej ne amã, “Amrĕ tĕn me kutã anhō kwÿ krĕ”, ane. Ga kam tĕn ũrkwãmã wadjãn kam kwãrĭk wãnh ga amijo me rũnh krĭ djã pytãr ne kam anhÿr kĕt. Dja me bĕnjadjwÿr'ō akōt bōx, kute raxo ajakrenh'ō akōt bōx nhyam kam abenã me rĕnhdjwÿnh amã, “On kãjmã dja. On kãjmã dja gĕ tãwã nhÿ. Tãwã ne kute raxo ajakrenh. Ga dja ga tĕn me burũm nhÿ, me wã nhikō'ã nhÿ”, ane ga kam apijãm ne. Kute me ipōkri amã anhÿrkam dja ga apijãm rax ne.

<sup>10</sup> Bep kati, dja ga anhō kwÿ krĕn kadjy wadjãn tu me burũm nhÿ, me kãtãm ja nhikō'ã nhÿ nhyam kam ta, abenã me rĕnhdjwÿnh ta gĕdja amã, “Kati, Bĕpbãmre, amrĕ tĕn me rũnh krĭ djãkam nhÿn anhō kwÿ krĕn mex”, ane. Ga kam arÿm 'ÿr tĕ. Ta gĕdja arÿm me ipōkri ajo rax. Nhyam me kunĩ arÿm araxkōt apumũ. Me aro'ã anhō kwÿ krĕno anhÿrja dja me araxkōt apumũ.

<sup>11</sup> E kum ĕ, me kute amijo rũnh prãmja gĕdja me ĩ pijãm ne. Nhyam bep me amikam pijãm ne akrãnmã ar kute amijo baja gĕdja arÿm Metĭndjwÿnh pãnh meo rũnh ne, ane.

12 Nãm ã Jeju me ro'ã õ kwỳ krěno ýrjamã anen kam ajte bënjadwýrjamã kaběn ne. Ne kum,

—Gêdja anhõ djwỳ kumex, anhõ mry kumex jabej ga arỳm anhõ kwỳ krěn rax ne. Kàjkwa nhipôkri myt nhýrkam nàr kon amykrykam anhõ kwỳ krěn rax ne. Kwãrĩk wãnh anhõbikwamẽ akamymẽ anhõbikwa 'õmẽ me kute amimexjamẽ me jamã arěnh kêt, anhõ kwỳ krěn djaja jarěnh kêt. Me kute akubyn amã o pãnh karõ me jamã arěnh kêt. Mýkam? Bir, ga ren anhõbikwamã mýjja ngã nhym ren arỳm amipãnh amã mýjja ngã.

13 Nhym bep kati, dja ga anhõ kwỳ krěn rax kutã, kadjy me õ mýjja kêt, me kute amijo bikěnh, me akry, me no rã, me jamã akaběn gê me akutã õ kwỳ krě.

14 Metĩndjwýnh dja pãnh ajo kĩnh ne. Me 'uwtĩja dja me te kute amã o pãnhmã. Nhym bep Metĩndjwýnh dja amã o pãnh ne, me katat mrãnh ne tyk ne akubyn tĩn nhõ akatikam gêdja arỳm amã o pãnh ne, ane. Nãm ã Jeju kum kaběn jarěho ane.

*Metĩndjwýnh kute amiwýr me 'wýr'ã me õ kwỳ krěn jakre.*

*Mat 22.1*

15 Nhym kam Jejumẽ ro'ã me õ kwỳ krěno ýr ja'õ kuman kum,

—Be, godja me'õ Metĩndjwýnh nhõ kàjkwa'ýr bõx ne kutã õ kwỳ krěn jabej, dja mrãmri kĩnhkumrěx ne, ane.

16 Nhym kam kum,

—Me'õ ne arỳm kute memã djwỳ nhije djarmã djwýmẽ mry nhijeo nhỹ. Ne arỳm kadjy me krãptĩmã arě ne arỳm memã djwýmẽ mry ga nhym arỳm xêr. 17 Arỳm xêr nhym kam kadjy õ àpěnhmã arěn kum, “Mã tẽn ar wãmã arě. Ar wãmã arě gê amrě ar mõ. Dja ga arkum, ‘Arỳm ne xêr gwaj on 'ýr banhõ kwỳ krě’, ane.”

Amrěbê ne kadjy memã arě ne kam ajte kadjy me'ýr õ àpěnh jano. Nhym kam õ àpěnhja tẽn bõx ne te kadjy memã arě.

18 Nhym kam ar kunĩ apýnh kukràdjãkõt kubê amikati ne. Ja kumrěx ne kum, “Kati, ajbir ne ba amim pur byn kam ije omũnhmã 'ýr tẽ. 'Ýr tẽn kum ijarě. Dja ba wãm itēm kêt ne. Kwãrĩk wãnh gê ikam ngryk kêt”, ane. “Něn”, ane.

19 Nhym atãri ja kum, “Ota ba ajbir mryti krãptĩbê 10o bõx ne kam ije gop àpěnh mex jabej, tỳx jabej ije kabimã 'ýr tẽ. 'Ýr tẽn kum ijarě. Dja ba wãm itēm kêt ne. Kwãrĩk wãnh gê ikam ngryk kêt”, ane. “Něn”, ane.

20 Nhym kam kute o ino rerja kum, “Ajbir ne ba iprõ ne kam te ije kum inhirer ne wãm itēmã”, ane. Nãm ar ã kubê amikatio ane.

21 Nhym kam õ àpěnhja tẽn bõx ne kum arě, õ bënjadwýrjamã arě. Nhym kam ngryk ne, õ bënjadwýrja ngry:k ne. Ne kam kum, “Amibêx ne amũ aprõt ne ajte me abej. Ngõo pry kamũn kikre bu kamũ. Ne amrě me õ mýjja kêt, me kute amijo bikěnh, me no rã, me akrywã kunõo mõ”, ane.

22 Nhym kam õ àpěnh meo bõx ne kam, “Be, ota ga aje imã me arěnhja ba arỳm meo bõx nhym me kute kikre jaêr kêt rã'ãã”, ane.

23 Nhym kam õ bënjadwýrja kum, “Ajte akubyn me'ýr tẽn prykõt me abej ne purkamdjwỳ ajte me abej, ane. Memã arěn me pa 'amýn amrě meo mõ. Amrě meo mõn meo bõx gê me prĩne inhũrkwã kre jaê”, ane. 24 Ba me amã arě, ije kumrěx 'wýrja gêdja mrãmri ikutã õ kwỳ krěn kêtumrěx ne. Tãm ne ja, ane. Nãm ã Jeju mekbê pardjêumã anen kàjkwamã 'ýr me bõx kêtã ã arěho ane.

*Kute mã me Jejukõt bikaměnhmã memã arěnh.*

*Mat 10.37; Mak 8.34; Ruk 9.23; Dju r 12.26*

25 Ne kam ajte Djeruxarě'ýr krà. Nhym kam me itepato kõt mõ. Kõt mõ: nhym kam me'ýr akěx ne memã kum,

26 —Dja ga me ajõ mã ikõt abikaměnh prãm jabej gora amã ijabê tỳxo, amã ikĩnh tỳxo amã anhõbikwa kĩnhja jakrenh mex ne. Dja ga amã abãmmẽ anãmẽ aprõmẽ akramẽ akamymẽ akanikwýnhmẽ kĩnh kêt ne kam ga amã aminhĩdjwỳ kĩnh kêt ne kam bajbit amã ijabê tỳx ne kam arỳm abê inhõ àpěnhkumrěx. 27 Ne kam ajte dja ga me ajõ amã atokry pyma jabej kam arỳm ikõt aba djwýnh kêtumrěx. Nhym bep kati, dja ga ijã amijakren ikudjwa aje anhõ pĩte'y mýnh mãn prãbê atokry rax ne amã ijabê rã'ã nhym me kute abĩn jabej ga ikanga kêt ne tu mã ikõt ajkaměnh kam arỳm mrãmri ikõt

aba djwýnhkumrêx, ane. Nãm ã Jeju memã anen kam ajte memã kum,

<sup>28</sup> —Nà, dja ga me ajō aje kikreti nhipêx jabej gêdja ga kadjy amikadjwýnhbê amim 'ã karō ne amim 'ã pi'ók kaprĩ jakre kumrêx ne. <sup>29</sup> Got ga ren 'ã pi'ók kaprĩ jakre kêt ne ren ipêxo mō nhym ren kam abê 'yr pi'ók kaprĩ atãk ne. Ga ren kam kum parbit pumjuw. Kum parbit pumjuw ne kam te aje inomã mēnhmãn kam ren tu katēri krãta. Nhym kam ren me kãtãmja ajã keket ne ren kam ajapry,

<sup>30</sup> “Tãwã ne kute kike nhipêxo tēm ne inomã mēnhmã ar o ban kam katēri krãta”, ane. Ga ren kam apijãm ne. Bir be, ã me kute ajã anhÿr kêt bē gêdja ga pi'ók kaprĩ kumrêx 'ã akre.

Bir be, gêdja me'ō mã ikôt bikamēnh prãm jabej, amim ijã karō kumrêx ne kam amim, “Ije ba on mã Jejukôt ajkamē ne kôt ar iba, o ino rer kêt, katēri krã'yr kêt. Dja ba tu kôt ar ibakumrêx ne”, ane. Dja ga ã me ajō ijã amim karōo anen kam mã ikôt ajkamē, ane.

<sup>31-32</sup> Ba me amã ajte 'ōdjwý jarē. Bēnjadjwýr ja ne arým kurê djwýnh'yr ō àpēnh jao mō. Nhym ō àpēnhja krãptĩ ne. Ō àpēnh ne kubê 20.000. Nhym kum ŷrja nhō àpēnh ngrêre. Kubê 10.000. Nhym bēnjadjwýr ja kute nĩnh 'yr ō àpēnh mōr ja ne kum ŷr nhō àpēnhja jakrenh mex ne. Nhym kam kum ŷrja bit kurê djwýnh kutã ō àpēnh mōn kam ajte amikam ajkam aman te kurê djwýnh'ã ō àpēnh jakren kam amim, “Ije, mÿj dja ba nē? Ije ba me'yr inhō àpēnh jano, nĩjar me mōr rã'ãri gē ikãã mekmã ijã aprã. Bar arek apÿnh nhÿn idjumar mex”, ane. Nãm me ja bit kute me ja'yr prōtmãn kam te amikabin amikam ajkam aman tu akubyn akêx ne.

<sup>33</sup> Be, dja ga ã amim ijã karō kumrêxo ane. Aje arek o atēm ne aje inomã mēnh kadjy, katēri krã'yr kêt kadjy. Dja ga amikabi kumrêx ne kam anhō nêkrêx, anhō mÿjja kunĩ'ã ano tÿx kêt ne tu amibê kanga ne kam mrãmri ikôt aba djwýnhkumrêx. Nhym bep kati, dja ga anhō nêkrêx 'amÿnh tÿx ne kam arým ikôt aba djwýnh kêt kumrêx.

<sup>34</sup> Ě, kadjwanhĩ. Kadjwanhĩ ne mexri anhkumrêx, akrykumrêx. Nhym bep arým

tũmkam ành kêt, akry kêt nhym me kute ajte o mex kêt kumrêx. Me te o ane. Mrãmri tu akry kêt. Mÿj kadjy ne ga ar o aba kajgo? Kajgo mexi. <sup>35</sup> O me kute djwý kane kêt ne kute mry nhĩnmē o bikar ne kute o pidjōjadjwý kane kêt. Nãm me tu o ban mũm kurē. Arým mrãmri akry kêt. Kajgo mexi. Gop me ajamakkre jabej, gop on ama, ane. Nãm ã me'ō kute amijo Jeju pytãr ne kôt tēm ne katēri kubê akêxkam ã kajgo ane, kum ō nêkrêx kĩnhkam kute kubê akêxkam ã kajgo ane. Djã nãm mrãmri mã Jejukôt ajkamē got? Kati, nãm 'êx ne kôt ar ba kajgo.

## 15

*Mrykĩ'ãtomti pydji biknor.*

*Mat 18.12*

<sup>1</sup> Nhym kam me kute bēnjadjwýr ba-jtemmã pi'ók kaprĩo atom djwýnhmē me axwe ajte Jeju'ã akuprōn kuri kumex, me kute kabēn marmã ne me 'ã akuprōn kuri kumex. <sup>2</sup> Nhym kam mekbê pardjēumē me kute Mōjdjē kukrãdjã mar djwýnhmē ne me kãã kabēn ne, bēn prĩkam kabēn ne abenmã,

—Djidjãk, tãwã ne kum me axwebit kĩnh ne ajte ro'ã mōn ō kwý krēno nhÿ, ane.

<sup>3</sup> Nhym kam atemã memã mÿjja'ã ujarēnh jakreo tēn memã,

<sup>4</sup> —Birãm me ajō nhō krit, mrykĩ'ãtomti krãptĩbē 100. Dja abē pydji akuno ga kam mã dja ga on? Dja ga tu anhō mrykĩ'ãtomti krãptĩbē 99jamã anhire gē wãnh akutēp kumex, kapôt kukritkam kumex ga kam pydji biknorja jabej tē. Abej tē:n arým kum akaton aprōn o tēn o bōx. <sup>5</sup> Aprōn o tēn o bōx ne kam akĩnh ra:x ne. <sup>6</sup> Akĩnh rax ne kam anhōbikwamē anhũrkwã nhitepã me jao akuprōn kam memã kum, “Ota ba arým inhō krit ibē biknorja japrōn o tēn o bōx. Dja ga me idjō'ã akĩnh ne akĩnh rax”, ane.

<sup>7</sup> Bir be, gêdja ã kãjkwakam me kĩho ane. Me'ō pydji gêdja amim katon wãnh axwemã iren Metĩndjwýnh'yr amijo akêx nhym kam me kĩnhkumrêx. Me'ō pydjikam dja kãjkwakam me kĩnh rax ne. Kam kĩnh raxo me mex, me krãptĩkam kĩnhja jakrenh mex ne. Me kute, “Bep ba ne ba katãt mrãn imexkumrêx”, anhÿr ne ajkwaobit

kute amimex jarēnhja ne Metīndjwýnh kute meo mex kêtê. Nhyam kam kàjkwakam me jadjwý mekam kīnh kêt ne.

*Ngônhponho pi'ôk kaprī pydji biknor:*

<sup>8</sup> Ba ajte me amā 'ôdjwý jarē. Me'ô nire nhô kryt jakao ngônhponho pi'ôk kaprībê 10 ne pydjīn kubê akuno, pānh ra:xkam. Mā dja on? Dja ngônhpôktimā adjān kam prī:ne ar abej kapônhho ban kam kum kato. <sup>9</sup> Kum katon kam ôbikwamē itepā kikrejakam me jao akprôn memā kum, “Me ikôt akīnh. Ota ba arým ije pi'ôk kaprīo ibiknorjamā ikato”, ane.

<sup>10</sup> Bir be, ba me amā arē. Dja Metīndjwýnh kadjy mrānh djwýnh ā kīnh ane. Me'ô pydjīn amim kator ne kute wānh axwemā irern kam kute Metīndjwýnh'ýr amijo akēx nhyam kam ā kadjy mrānh djwýnh kam kīnh ane. Nām ā Jeju memā ujarēnh ane.

*Me'ô kra biknor ne akubyn bām'ýr akēx.*

<sup>11-12</sup> Ne kam ajte memā 'ôdjwý jarēn memā,

—Me'ô my kra amānhkrut nhyam kam kutapureja bāmmā kum, “Djūnwā, gop on ar imā anhō nêkrêx kwýo ajkjê. Aje ar imā atyk kutā nêkrêxo abikjêrmā arēnhja on atīnri ar imā o ajkjê, ar ije kam amak kêt kadjy”, ane.

Nhyam kam kum “Ā” anen kam arkum o ajkijīn kutapure jamā kungān kutewajamā kungā.

<sup>13</sup> Nhyam kam bām kute kum ôrja arým amim kuby, kutapureja amim kuby. Nhyam kam 'ā akati ngrêre nhyam kam arým mā o mō, ô myjja kunō atom ne o mōn ajbubê o tým, pyka 'ôkam o mōn o bôx ne kam arī:k ar o ba. Tu arīk ar ba'ā pi'ôk kaprī krêno tē:n kam krên pa. <sup>14</sup> Prīne 'ā pi'ôk kaprī krên mex ne, ne kam arým arīk ar ba. Nhyam kam pykawākam arým djwý kêtikumrêx, nhyam me prām kam ar ba. Nhyam kam pi'ôk kaprī krên pan kam tu arīk ar ba, prām kam ba.

<sup>15</sup> Ne kam bēnjadjwýr 'ô'ýr tēn kam kum, “Ba amā apê”, ane. Kum àpēnh nhyam kute kum pi'ôk kaprī nhôr nhyam kute o myjja

byr ne krēnmā. Nhyam kam bēnjadjwýrja “Ā” anen kam ô mry nhô kapôtmā ano, kute angrô jamyre pumūnh ne kute kum o djuw mexmā. Nhyam kam kum omūnhho dja.

<sup>16</sup> Nhyam kam angrô jamyre bāy kakô kuro ba nhyam kubêngôkreja\* arým prām bīn mex nhyam te kute angrô jamyre kutā bāy kakô kwý krēnmā. Nhýnh ne me'ô got kute kum myjja 'ô nhôr nhyam kute krēnmā? Arkati. <sup>17</sup> Nām ar ban kam amim katon kam amim, “Ije, djā nām ā ibām nhô àpēnhja anen ar prām kam ba? Djūnwā ne prīne ô àpēnhho djuw mex nhyam kam djwý kumex. Djwý kumex ne kam 'ā kātām ne kumex. Mykam ne ba bajbit ar prām kam iba. <sup>18</sup> Ba gêt on akubyn ibām'ýr tēn kum, ‘Djūnwā, ota ba Metīndjwýnhkam ar amikrào iba, ne gadjwý akam ar amikrào iba. <sup>19</sup> Djām imex ne ga aje ijo akra rā'āmā. Dja ga tu ijo anhō àpēnh, ijo ajtem ne. Ba kam amā apê.’ Gêdja ba ā Djūnwā'ýr tēn kum ane.”

<sup>20</sup> Ne kam ekruy ne kām mā djan kam bām'ýr tē. Bām'ýr tē: nhyam kam bāmja amybym omū, kraja pumū. Ne kam rerek ne, tik ngyo nhýn kum kaprī ne. Ne kam prôt ne kajpan o tým ne kam abej muw.

<sup>21-22</sup> Nhyam kam bāmmā kum, “Djūnwā, ota ba Metīndjwýnhmē ar akam ar amikrào iba. Djām imex got ga aje ijo akra rā'āmā”, anhýr konenh nhyam bāmja ô àpēnhmā kum, “Amū ar ajō aprôt ne kubêkà mexwāmē ikrakam rāxwāmē parkāwāmē amrē amýn o aprôt ne kum angjê, ane. <sup>23</sup> Ne ām ar ajō aprôt ne ije kutêp mryti jabatānh nyre nhīptī'ā ma nhyam āmwā japrôn amrē o tēn abī. Gwaj banhō kwý krên rax ne bakīnh kadjy. <sup>24</sup> Ota ikra. Be, ikra djwýnh ja ne ibê tyn ajte akubyn tīn ne. Nām akunon arým akubyn imā kato”, ane.

Nhyam kam me kīnh rax kato. Kīnhkumrêx ne ô kwý krêno kumex.

<sup>25-26</sup> Nhyam kam kutewaja purkam àpēnhho dja. Àpēnhho dja:n àpēnhho ino ren kam kurūm tē. Tēn kam kikre tēpo tēn me kanga ma. Me toro dja nhyam me ngrer man kam amikutā bām nhô àpēnh 'uw. Nhyam kutā tēn kajpa nhyam kum, “Mýj nā”? ane.

\* **15:16** Jeju nhô pykakam me kunī bêngôkre kute mrāmri ne apýnh me ô pyka djāri kunīkôt me kunī bêngôkre pyrāk.

<sup>27</sup> Nhyam kam kum, “Ije atõnhre ne arým bõx. Nhyam kam abãm kadjy mryti jabatãnh nyreja bĩ, twýmtyja bĩ. Nhyam abãm kĩnhkumrêx ne. Amrêbê: atõnhre tẽm ne arým bõxkam ne abãm kĩnhkumrêx ne. Mýjja kute ajmã o kêt, umar mex ne ar ban arým bõx, kam ne abãm kĩnhkumrêx ne”, ane.

<sup>28</sup> Nhyam kam tu ngry:k ne kikremã àr kêtumrêx ne. Ne kam kapõtã arek ngryk ne dja. Dja nhyam bãm 'ýr katon te kum kabẽn ne, te kum me tor'ã apnẽn kum, “Amrê tẽn anhõ kwý krẽn me kudjwa akĩnh”, ane. <sup>29</sup> Nãm te kum ane nhyam kam kum, “Kê wajre. Nã bãm amã idjãpê:nh ar iba. Arým idjãpê:nh'ã amex krãptĩ. Djã nã bãm abê amikati? Ga mýjja 'ýr ijano ba 'Kê wajre' ane? Kati, nã gãm mýjja 'ýr ijano ba akrãnmã amã 'ýr mrã. Djã ne ga kam mãn imã anhõ mokaak'õnh bĩ bar inhõbikwamẽ ro'ã kwý krẽno nhýn ikĩnhkumrêx ne? <sup>30</sup> Nhyam bep akamrerre ne anhõ nêkrêxo mõn me kuprý'ã kukrẽn mõn ajbir bõx ga kum gu banhõ mryti twýmtyja bĩ”, ane.

<sup>31</sup> Nhyam kam bãmjã kum, “Akmere ga ne ga arek ikuri dja. Ne inhõ mýjja kunõ anhõ”, ane. <sup>32</sup> Mrãmri ne bar ikĩnhkumrêx ne. Mrãmri ne bar ikĩnh ne itor inhýrja. E kum mrãmri ne atõnhre gu babê tyn ajte akubyn tĩn ne. Nãm akunon arým akubyn kato, ane. Nãm ã bãm kutewajãmã ane. Tãm ne ja.

Be, nãm ã Jeju mekbê pardjêumã ujarẽnh ane. Metĩndjwýnh kum me axwedjwý jabẽn kute me abej ne kute me utar nhyam me õ'ã kĩnh'ã ujarẽnh ne ja.

## 16

### *Õ àpênh kute õ bẽnjadjwýr noo biknor.*

<sup>1</sup> Nhyam kam Jeju ajte kute kõt ba djwýnhmã mýjja 'õ'ã kabẽn jakremã arkum,

—Me'õ bẽnjadjwýr ne õ pi'ók kaprĩ kumex. Nhyam kam õ àpênh ne kum kam àpênhõ dja. Pi'ók kaprĩmẽ nêkrêxja kunĩkam kum àpênh ar ba. Nhyam kam me kátãm ne me kum õ àpênhja jarẽn kum, “Ë, ota anhõ àpênh arým abê amijã anhõ pi'ók kaprĩ krẽno mõ, ane. Arým abê o apêx mexo mõ”, ane.

<sup>2</sup> Nhyam kam arým õ bẽnjadjwýrja amiwýr ku'uw ne kum, “Mýj nã? Mýj ne ga ajmã o nhyam me imã ajarẽ? On amrê inhõ nêkrêx'ã pi'ók no'ókwaõ akato ba omũ. Jakam dja ga imã adjãpênh kêtumrêx ne”, ane.

<sup>3</sup> Nhyam kam kabẽn ja man kam õkre kadjwýnhbê amim, “Ije tõ mã dja ba nẽ? Arým ne inhõ bẽnjadjwýr bõm imẽ. Mã dja ba nẽ? ãm arngro týxkam purkam idjãpênhbê irerekre ne kikre kabe'ã idjã'wýr imrãnhbê ipijãmã”, ane. <sup>4</sup> Nãm ja jarẽn nhýn kam ajkam aman kam,

—E kum ã ane. Arým ne ba kuma. Jakam dja ba ar jamã ikabẽn jarẽ nhyam arým inhõ bẽnjadjwýr kute bõm imênhkam ar ja arým ijo õbikwan amiwýr ijo wadjã, ane. <sup>5</sup> Ne kam ar kute bẽnjadjwýrmã pãnh kêtja amiwýr ar ku'uw. Amiwýr ar ku'uwn arkum, “Mã ne ga aje mýjjao pãnh kêtja kute?”

<sup>6</sup> Nhyam kam kum, “Ngõnh krõkrõktibê 100. Rõny kangõ'ã nõnh krõkrõktibê 100 ne ba kum o pãnh kêt ne”, ane.

Nhyam kam kum, “Mĩ. Aje pi'ók no'ók tũmja byn on o nhýn 100ja ngrãn pãnh 50 nhõ”, ane. Ajêx ne kum ngrêre jarẽn kum 50 nhõ, ane.

Nhyam kam ã anen kam kĩnhkumrêx ne kunhõn mã tẽ. <sup>7</sup> Nhyam kam ajte abej ja kukij ne kum, “Mã ne ga aje mýjjao pãnh kêtja kute?” ane.

Nhyam kam kum, “Bãygogore'ã xakubê 100”, ane.

Nhyam kam kum, “Mĩ. Anhõ pi'ók no'ók tũmja by gẽ arĩk wãnh 100 nõ, ga pãnh kum 80 nhõ, ane. Ajêx ne 'ã kum kãjbê krãptibê 80 nhõ”, ane.

Nhyam kam ã anen kunhõn kam kĩnhkumrêx ne mã tẽ. Nãm ã arkum o anhýro tẽ. Õ àpênhja arkum õ bẽnjadjwýrja noo biknoro anhýro tẽ. We arkum kĩnh ne kute amipãnh o õbikwamã ne ã arkum o anhýro tẽ.

<sup>8</sup> Nhyam õ nêkrêx djwýnh ne õ àpênhja no mex jarẽ. Àkĩnhĩkam ne kum no mex jarẽ. Nã, mrãmri ne amikadjy no mexkumrêx. Nã, mrãmri ne pykabê me ar baja ne me mrãmri amikadjy no mexkumrêx ne o Metĩndjwýnh nhõ me ja jakrenh mex ne. Nhyam bep Metĩndjwýnh nhõ me ja ne

Metĩndjwýnh kadjy amak mex ne kam kute a'uri me mrãnhja pyrãk.

<sup>9</sup> Djãm ã ar aje õ àpênh kudjwa me noo abiknoro anhÿrmã ne ba ije ar amã arênhja? Djãm ar adjãkĩnhĩ, ar ajêxnhĩkõt aje meo anhõbikwamã got. Djãm ar aje pi'ók kaprĩkõt meo anhõbikwa nhym atykkam kute amikõt kãjkwamã ajo àbirmã got. Djãm me ja kute kãjkwamã ajo àbir gar atĩn rã'ã rã'ãmã got. <sup>10</sup> Arkati. Gêdja me'õ mÿjja kakritte kumrêx, mÿjja ngrire kam àpênhõ djan prĩne o djuw mex ne o àkĩnh kêt, me'õ tãm gêdja arÿm ajte amũ ijukri mÿjja rũnhdjwýo djuw mex. Nhym bep kati, gêdja me'õ mÿjja kakrittekam àpênhõ djan arÿm o akĩ ne kam ajte mÿjja raxkamdjwý àpênhõ djan adjwýnhdjwýo akĩ.

<sup>11</sup> Bir be, tãm. Dja gar pykabê mÿjja kakrit, pi'ók kaprĩjao akĩ djãm Metĩndjwýnh kute kãjkwakam õ mÿjja rũnh, õ mÿjja mex-tire kute ar amã õrmã got? Kati, arÿm ne ar akabi. <sup>12</sup> Dja gar ari me õ nèkrêx prokam amikràn o adjãkĩnhõ aban ar mekbê o abikênhõ aba, djãm Metĩndjwýnh kute ar amã anhõ mÿjja nhõrmã, anhõ nèkrêx djwýnh kute ar amã õrmã? Arkati.

<sup>13</sup> Ë, nhÿnh ne me'õ õ bẽnjadjwýr amãnhkrut'õ amẽ arkum àpênh ar ba? Kati, gêdja o anen kam te o ane. Gêdja kum ja kurên kam kum ja jabê. Nàr kon, gêdja kum ja kĩnh ne kumãbit apê ne kam kum ja kurên kum àpênh kêt ne. Dja ga amã Metĩndjwýnh kĩnh ne ajte amã nèkrêx kĩnh ne kam kute bẽnjadjwýr amãnhkrutmã adjãpênh pyrãk. Gêdja ga te o ane, ane.

<sup>14</sup> Nhym bep mekbê pardjêu ne me Jeju kabên maro nhÿn aprÿo kumex. Me kum pi'ók kaprĩ kĩnhkam, kam ne arẽ nhym kam me aprÿo kumex. <sup>15</sup> Nhym kam Jeju memã kum,

—Me ga ne ga we me amijo katàt amrãnh ne. Me kunĩ kute we me amex pumũnh ne kute me amã me amex jarênhmã ne ga we me amijo katàt amrãnh ne. Nhym bep kati, Metĩndjwýnh ne kute prĩne me akadjwýnhbê me apumũnh. Me aje amim mÿjja'ã karõjakõt ne me akadjwýnhbê prĩne me apumũ. Be, mebêngõkre ne me me akrãkãbit pumũ, ga me kam kute amex pyrãk nhym me me amex jarê. Bep kati,

Metĩndjwýnh kute prĩne me akadjwýnhbê me apumũnh nhym mÿjja punubit me akadjwýnhbê ikwãkam kum me amex kêt. Mrãmri me apunukumrêx.

<sup>16</sup> Amrêbê ne me Mõjdjê kukràdjãkõt ar amijo ba. Metĩndjwýnh kabên jarênh djwýnh kabênkõtme ar amijo ba. Ar kõt me kute amijo ba rã'ã nhym arÿm Djuão ajte adjwýnhdjwý bõx. Djuão kute ngõnhmã me angjênhja adjwýnhdjwý bõx. Ajbir ne Djuão tũmrãm bõx ne ar memã 'ã ujarênh ny jarênhõ ba. Me kute axwemã ir-ern kute Metĩndjwýnh'ÿr amijo akêx nhym Metĩndjwýnh kute me utàr ne me kadjy bẽnjadjwýr ne ar kute meo ba'ã ne memã ujarênh tẽ. Nhym me krãptĩ arÿm kute 'ÿr amijo akêx prãmukumrêx, kute mrãmri ne me krãptĩ kikre ngriremã ngjênh prãm ne kam 'ã kute aben nhingãnhja pyrãk. Me kute ari 'ã ikjêo aben rênh ne 'ã kute aben nhingãnhõ kumexja pyrãk. Nãm me ã kute Metĩndjwýnh'ÿr amijo akêx prãm kam ã ane.

<sup>17</sup> Nhym Metĩndjwýnh kukràdjã tũmja, kute me mrãnh mex'ã memã karõja, djãm arÿm tũm ne apêxmã? Kati, gêdja rã'ã ne. Pykamẽ kãjkwabit dja apêx nhym bep Metĩndjwýnh kabên dja tũmrãm rã'ã rã'ã ne. Nhÿnh ne mÿjja ngrire, mÿrbê itaja 'õ biknormã? ane.

<sup>18</sup> Ne kam ajte Metĩndjwýnh kukràdjã 'õ jarê. Me kute tu prõ'ÿr bakumrêx ne kute kanga kêtme memã arẽ ne memã kum,

—Gêdja me'õ prõ'ÿr mõn ar o ban kanga ne kam pãnh atemã me'õ'ÿr mõn kam kute krõ'ã prõ pyrãk. Mjênja ne axwe. Nhym kam ajte me'õ ne prõ kanga nhym kam me'õja ne me'õ kute prõ kangaja'ÿr mõn kam arÿm kute me'õbê prõo àkĩnh pyrãk, ane.

*Radjaru mõn me'õ bẽnjadjwýr 'wÿro nhÿ.*

<sup>19</sup> Nãm ã Jeju memã anen kam ajte memã mÿjja 'õ'ã karõ ne memã,

—Me'õ ne õ nèkrêx kumex ne kute amid-jwýnhbit mar. Nãm kubêkã mex, kubêkã pãnh raxbit jangij ne õ kwý krên djã mexbit kute mar. Myt kunĩkõt ne ã o anen õ kwý krên rax ne. <sup>20-21</sup> Nhym kikre jajkwa krekremã me'õ bikênhja ikwã. Myt kunĩkõt kikre jajkwa krekremã ikwã. Ne te kute õ anhy krên prãme. Me'õ kute myt kunĩkõt

kubêkà mex, kubêkà pãnh rax jangjênh ne 'ã mrãnhja tãm ne te kute ò anhy krêmã kuri ikwã ne te 'ã 'wÿro ikwã. Idjibê ne Radjaru. Tãm ne prĩne karÿr tÿx ne, tēmê prĩne tÿx ne. Karÿrmê tê tÿx nhym ta ikwã. Nhym bep roprebit ne 'ÿr màt ne karÿr kunuw, tê kunuw.

<sup>22</sup> Nhym ò mÿjja kêtja, Radjaru, arÿm ty nhym kam kadjy mrãnh djwÿnh kumÿn kàjkwamã Abraão'ÿr o tēn o bôx. Nhym kam ar ingêt kukãmãre Abraômê ro'ã ar ba. Nhym me'õ nhõ nêkrêx kumexjadjwÿ ty nhym me kam o mōn adjà. <sup>23</sup> O mōn adjà nhym kam me tyk nhõ pykakam bôx ne kam tokry rax ne. Tokry: ne, ne kam tokry pymaje kàjmã rīt ne amybÿm Abraão pumū. Nhym ar Radjarumê ro'ã ar ba. Ar umar mexkumrêx ne kĩnhkumrêx ne ar ba.

<sup>24</sup> Nhym kam Abraão pumūn kam kum amijo akijn kum, “Ngêtwo, ngêtwo Abraão, gop amrê amã ikaprĩn iwÿr Radjaru jano gê amrê iwÿr tēn ngômã ikra nhôttebit jadjàn o inhôto ngo, ane. Ota ba kuwyjakam itokry bit itokry”, ane.

<sup>25</sup> Nhym Abraão kum, “Bir be, krãny, omū. Atĩnri ne ga mÿjja mexbito amikĩnh ne. Nhym bep Radjaru ne kaprĩ, tĩnri kaprĩn ar ba. Ne kam arÿm jakam kĩnhkumrêx ne. Ga ne ga arÿm pãnh atokryn akaprĩre. <sup>26</sup> Ě, mÿjja 'òdjwÿ. Djãm jãnh ne wãm awÿr tēm ne kute ajmã ajomã? Nãm me banêje inuwti: nõ, ne kam abenmã kre raxi. Ne kam jakam me ijõ'õ me awÿr itēm prãm kêtê. Ga me ajõ nĩnh pãnh me ikam abôx prãm kêtê. Aprakamã ne gwaj banêje inuwti: nõ”, ane.

<sup>27-28</sup> Nhym kam kum, “E kum ã ne. Ě, ngêtwo, gora ibãm nhũrkwã'ÿr Radjaru jano. Kam ne ikamy amãnhkrut ne amãnhkrut ne ikjêkêt. Ar'ÿr dja Radjaru tēn arkum arēn arkum tĩn jadjà gē ar jakam, me tokry rax djàjamã ikôt bôx kêt”, ane.

<sup>29</sup> Nhym Abraão kum, “Kati. Arkati, amrêbê ne Môjdjêmê Metĩndjwÿnh kabēn jarēnh djwÿnh ar 'ã pi'òk no'òk ne te memã arē. Gē ar Môjdjê ar kabēn ma”, ane.

<sup>30</sup> Nhym kam kum, “Kati, ngêtwo Abraão, got ren me'õ me tyk kurūm me'ÿr katon bôx ne memã arē nhym ren me arÿm kôt amim katon kam ren wãnh axwemã iren

Metĩndjwÿnh'ÿr amijo akēx ne jakam bôx kêt ne”, ane.

<sup>31</sup> Nhym Abraão kum, “Kati, dja me Môjdjêmê Metĩndjwÿnh kabēn jarēnh djwÿnh kabēn mar prãm kêt, nhym ajte me'õ me tyk kurūm katon te memã amijo amirīt ne te memã arē nhym ren ajte tãm ne. Te ren omūn tu ate krã”, ane. Nãm ã Abraão me'õ nhõ nêkrêx kumexjamã ane. Tãm ne ja, ane.

Be, nãm ã Jeju memã ujarēnh ane.

## 17

*Me'õ me'õkam axwe nhym tu axweo bi-knormã.*

<sup>1-2</sup> Ne kam ajte kôt ba djwÿnhmã,

—Wãnh ne me axwe pro ar akukãm rax ne nõ. Nhym bep me kute memã axwe'ã àpnēnhja gēdja me tokry ra:x ne. Watĩ:re. Dja prĩne Metĩndjwÿnh meo ajkē nhym me tokry ra:x ne. Me'õ kute me prĩre pyræk ne ajbir kute amim imar nyja nhym ren me'õ axwe'ã kum apnē nhym ren arÿm kôt axwe nhym kam ren me kute kum axwe'ã àpnēnh djwÿnhja nhõkre'ã kēnpoti nhô ne ren ngônhmã kumē, ngô raxbê pyka kêtã kumē nhym ren kubĩ, ja ne kãjbê tokry. Tokry ngri. Nhym bep kati, dja prĩne Metĩndjwÿnh o ajkē nhym tokry ra:x ne.

<sup>3</sup> Gora ar amijã ano tÿx ne amijãno dja. Dja ar akamy'õ axwe jabej gar ajõ kum akabēn'õ jarē. Kum akabēn'õ jarē gē axwekam amim ngryk ne amim kato ga kam tu o akno. <sup>4</sup> Gēdja mã akam axwe jabej ga kam tu o abiknorkumrêx. Dja myt pydjikam akam axwe amãnhkrut ne amãnhkrut ne amãnhkrut ne ikjêkêt ne kam awÿr tēm ne kute amã, “Arÿm ne ba ijaxwekam amim ingryk ne”, anhÿr amãnhkrut ne amãnhkrut ne amãnhkrut ne ikjêkêt jabej ga kam tu o akno, ane. Nãm ã Jeju arkum ane.

*Tu amim kamnhĩxkumrêx.*

*Mat 17.20; Mak 11.23*

<sup>5</sup> Nhym kute ar anor nhym ar mōrja Bēnjadjwÿrmã kum,

—Ar ba ne bar ije amim amar ngrire. Gop on ar ikadjwÿnhbê ar ijo tÿx ne ar ikadjwÿnhbê akabēn wadjà bar amim amar rax.

<sup>6</sup> Nhym kam Bēnjadjwÿr arkum,

—Ga ren ar amim ikamnhix ngrireo kute motadu 'y kryre ja pyrak ne ren arym pyjamã akabên ne ren kum, “On amikaban ngô raxbê pyka kêt mû jakam mân ajte dja”, ane.

Nhym ren tèn ngô rax nijkam dja. Ar aje tu amim ikamnhixkumrëxkam ren tèn nïjar ngô raxkam dja. Nhym bep kati, âm ar aje amim ikamnhixkumrëx kêtê, ane. 'Ybê motadu ne kryre kute karnhô nhijy pyrak. Nhym Jeju ajte arkum,

*Me tu akrãnmã Metïndjwÿnhmã àpênhmã.*

<sup>7</sup> Ga we ar ajô abënjadjwÿr rax ne nhÿ. Nhym kam anhô àpên purkam àpênhmã tẽ, nâr kon kute mrykï'ãtomtio djuw mexmã 'ÿr tẽ. Ne kam wãnh purkam àpênho dja. Àpênho dja:n arym àpênho ino ren bôx. Djãm aje kum, “Amibêx ne nhÿn atyk djà kêt ne kam anhô kwÿ krẽ”, anhÿrmã got.

<sup>8</sup> Bep kati, dja ga ajte tu ano ne kum, “On imã ômrôn kam kadjy tèn kubêkà mex jadjàn amrê imã ômrôo tẽ ba kukrê. Ne ngôdjwÿ imã kwÿ jadjà. Dja ba inhô kwÿ krên kôt ikô, ane. Ba ikumrëx inhô kwÿ krên pa ga kam ikudjwa anhô kwÿ krên kôt ikô”, ane.

<sup>9</sup> Djã nãm bënjadwÿrja ô àpên djàpênho amra got. Djã nãm ô àpên djàpênho pumûn kum mex jarênho ba got. Kute kabên mar ne kute kôt amijo bakam, djã nãm kum mex jarên kam kum amikïnh jarên ar o ba? Kati, mrãmri ne ô àpên. Ô àpên kute ô bënjadwÿr kabên mar ne kute kôt kum mÿjja kupên.

<sup>10</sup> Bir be, ar gadwÿ dja gar Metïndjwÿnh kute ar amã mÿjja jarênhja kunï kupên amidjapênho pumûn kam, “Ije, djã nãm bãm ar Bënjadwÿrmã idjapênho mex ar iba got ar ijo amra? Kati, dji Bënjadwÿr kute me anor nhym ô àpênho kute kum àpênhmäkêt. Kôt ne Bënjadwÿr ar ijano bar kum idjapênho iban ikïnhkumrëx ne, ane. Djãm kute ar idjapênho àmra kadjy ne bar kum apê? Kati, nãm bãm ar tu akrãnmã kum idjapênho iban kam ikïnhkumrëx ne”, ane. Dja gar ã ane. Be, nãm ã Jeju kôt ba djwÿnhmã arênho ane.

*Me ï kajêkam tẽ kubê 10.*

<sup>11</sup> Ne kam ajte Djeruxarê'ÿr kràn tèn pry pnã, aben nêje a'ÿr. Nãm mûm pykabê Xamarïj ne amrê pykabê Garrêja nhym pyka 'ÿr nhôkre djakôt pry ja'ã tẽ, 'ã Djeruxarê'ÿr tẽ. <sup>12-13</sup> Nãm pry'ã tèn kam ï krï 'ômã àr tẽ. Krï 'ômã àr tẽ nhym me ï kajêkam tẽ kutã mõi. Me ï kajêkam tẽbê 10 ne kutã mõi kajpan kam nïjar ku'ê, târi ku'ê kêtê, nïjar ku'ên kam kaj bê kum kabên ne kum,

—Jeju, Bënjadwÿr, gop amã me ikapri, ane.

<sup>14</sup> Nhym Jeju me omûn kam memã,

—On me mõi me kadjy Metïndjwÿnh mar djwÿnhmã amibê, ane.

Nhym me mõi pro akëx ne mã Metïndjwÿnh mar djwÿnh'ÿr mõi mõi rãm arym kà mex ne.

<sup>15</sup> Nhym kam pydjïn amimex pumûn kam akubyn Jeju'ÿr tẽ. Metïndjwÿnhmã ukapri, mex jarênho tẽ. Kàj bê kum arênho tèn kam Jeju'ÿr bôx. <sup>16</sup> Jeju'ÿr bôx ne kam tu mÿrbê tÿm ne kum amikïnh jarênho nõi kum mex jarênho nõ. Me bajtem'ô, Xamarïkam me ja'ô. Tãm ne akubyn tèn Jejumã mex jarê. <sup>17-18</sup> Nhym kam Jeju memã,

—Ije, nhâr me? Nãm bãm mebê 10o mex nhym me 'ô akubyn iwÿr tèm kêt ne. Mÿkam ne kubajtemjabit akubyn iwÿr tẽ? Mÿkam ne me wã akubyn kudjwa mõi ne Metïndjwÿnhmã mex jarênho kêt ne?

<sup>19</sup> Ne kam kum,

—Aj, on kãmã djan tẽ. Nãm gãm tu amim ikamnhixkumrëx ne. Nhym kam arym Metïndjwÿnh apytã, ane. Nãm ã Jeju kum ane nhym kam mã tẽ.

*Akubyn bôx djà kutã dja me ate krãn ar ba jarênho kadjy.*

*Mat 24.23; Mak 13.21*

<sup>20</sup> Nhym kam mebê pardjêu Jejumã,

—Mÿj akatikam dja Metïndjwÿnh me bawÿr Bënjadwÿrbê kumkati jano nhym kute me bakurê djwÿnhbê me bapytãr ne kute ar me bajo bamã?

Nhym kam memã,

—Kute me apytãr ne ar me ajo ba kadjy, djãm Bënjadwÿrbê kumkati mÿjja 'ômê ro'ã bôx ga me aje kôt omûnh ne aje abenmã bôx jarênho akumexmã? Kati, me kute mÿjja 'ôkôt omûnh kêt. <sup>21</sup> Me



kute jakam mỳjja pumũnh ne kute abenmã, “Ota, Bẽnjadwỳr arỳm bõx”, anhỳr kêt.

Nàr kon, me kute nỳjar omũnh ne kute abenmã, “Orĩnã, arỳm Bẽnjadwỳr amrẽ tẽ”, anhỳr kêt.

Mỳkam? Bir, anhõ Bẽnjadwỳrbê kumkati kute ar me apytàr ne me akadjy bẽnjadwỳr ne kute ar me ajo bamã ne arỳm me awỳr bõx, arỳm me anhipõkri bõx, me anhipõkri ar ba, ga me omũnh kêt kumrẽx, ane. <sup>22</sup> Ne kam ate kõt ba djwỳnhmã,

—Adjỳm, dja ĩ ar akaprĩ djà ar awỳr bõx. Ar akaprĩ djà nhjukri dja gar te ikuka kre jabej rĩt. Ne kam abenmã, “Gora gẽ on ajte akubyn bõx gwaj omũ. Amrẽbê kute gwaj bakadjy amijo ĩ ne gwaj bawỳr rwỳkja gora gẽ akati pydjikam ajte rwỳk jabej gwaj gop ajte omũ”, ane. Dja gar te aje ipumũnh prãme. <sup>23</sup> Nhy m me ar amã,

—Ota arỳm bõx, ota arỳm jakam bõx, anhỳr jabej, nàr me ar amã, “È, onĩj arỳm bõx”, anhỳr jabej ga kam ar tu ate akrãn 'ỳr amõr kêt ne mekõt 'ỳr aprõt kêt.

<sup>24</sup> Nhy m bep kati, ibõx djà gẽdja amirĩ:tkumrẽx ne. Amirĩtkumrẽx nhy m me kunĩ omũ. Ba ije amijo inhĩ dja ba akubyn bõx nhy m me kunĩ ipumũ. Ga na jadjẽnh ne kute prĩne kàjkwa kurwỳo tuknĩja pumũ. Dja ã akubyn ibõx djà nhõ akatikam ije amijo amirĩto kàjkwa kunĩ kurwỳo ane.

<sup>25</sup> Nhy m bep itokry rax kumrẽxi. Me kamingrãny ja dja me prĩne ijo ajkẽ ba kam itokry rax ne. <sup>26</sup> Nhy m bep akubyn ibõx 'ỳr djà me ate krãn ar ba. Ba ije amijo inhĩ dja ba akubyn ibõx 'ỳr nhy m me ate ar krãn ba. Me kute amrẽbê me bakukãmã Nõwekam me ja pyræk ne ate ar krãn ba. <sup>27</sup> Nãm me õ kwỳ krẽn kõt ikõn abenwỳr babit ar o ba rã'ã nhy m arỳm Nõwe kà raxmã wadjà nhy m me aẽrbê ngõ me iby ajkapĩn me imex ne.

<sup>28</sup> Ne kam ajte kute amrẽbê me bakukãmãre Rokam me ja pyræk ne ate krãn ar ba ne õ kwỳ krẽn kõt ikõn abenmã mỳjja ngãn abenmã mỳjja o pãnh ne purkam mỳjja kren amim kikren jabit ar kuman o ba. <sup>29</sup> Ar ã anhỳr ba rã'ã nhy m arỳm Ro krĩbê Xõtõma kurũm tẽ. Aje. Nhy m arỳm wakrekam kuwy me aẽrbê mekam

ajka'u ne me imex ne. Kẽn ngrãngrã põkmẽ me'ã akàn kam me imex ne.

<sup>30</sup> Dja ba ã akubyn ibõx djào ane. Gẽdja me ate ar krãn ba. Ba kam ba ije amijo inhĩja dja akubyn ibõx djà me aẽrbê ã amirĩto ane. <sup>31</sup> Kam, ibõx djàjakam, gẽdja me'õ kre tã nhỹ ne akubyn õ nèkrẽx'ỳr àr kêt. Kwãrĩk wãnh akubyn ùrkwãkam nèkrẽx'ỳr àr ne byr ne o tẽm kêt. Nhy m me'õdjwỳ ar purkam ba. Ba bõx gẽ arĩk wãnh õ kikremã õ nèkrẽx'ỳr kwỳr kêt. <sup>32</sup> Gar Ro prõja ma. Ro prõ ne õ nèkrẽxo amak djaje amipãnh krã tẽn ty.

<sup>33</sup> Me kute amidjwỳnhbit mar ne pykakam mỳjja jakõtbit amak bẽnja gẽdja me tyn kam ijukri tĩn kêt kumrẽx. Nhy m bep me kute amidjwỳnh mar kêt ne amibê õ mỳjja kanga, me tãm gẽdja me amiptàn ar tĩn ne ba, jakam ar tĩn ne ban kam tyk nhjukri tĩn rã'ã rã'ã. Tãm ne ja.

<sup>34</sup> Nhy m bep kati. È, ba ar amã arẽ, dja ba akamàtkam ibõx jabej nhy m me'õ my ar amãnhkrut aben nhikõ'ã nõ. Ba ikjẽbito tẽ nhy m ikjẽ arek wakrekam nõ. <sup>35</sup> Nhy m me'õ nire ar amẽ à'uko nhỹ. Ba ikjẽbit pa 'amỳn o tẽ nhy m ikjẽja arek wakrekam nhỹ. <sup>36</sup> Nhy m me'õ my ar amẽ kapõtka m tẽ ba ikjẽ pa 'amỳ nhy m ikjẽ arek wakrekam dja, ane. Nãm ã Jeju ane. <sup>37</sup> Nhy m kõt ba djwỳnh bõx djà jabej kukij ne kum,

—Bẽnjadwỳr, nhỹnh jakam dja ga bõx?

Nhy m arkum,

—Gar nhõnhne mry tyk'ã bikprõnh ne kumex ne kute o amirĩtja pumũ, ane. Dja ã Jeju akubyn bõx kutã mỳjja apõx ne bõx djào amirĩto ane.

## 18

*Me'õ nire kute kabẽno bẽnjadwỳr katyk.*

<sup>1</sup> Nhy m kam ajte kõt ba djwỳnhmã atemã mỳjja'ã ujarẽnh jakreo tẽ. Mete Metĩndjwỳnhmã kabẽn 'ãno ãm ne kute kanga kêt'ã ne arkum arẽn arkum,

<sup>2</sup> —Atemã pyka 'õkam ne memã axwe pãnh jarẽnh djwỳnh kum Metĩndjwỳnh pyma kêt kumrẽx ne mebẽngõkredjwỳ mar kêt kumrẽx. <sup>3</sup> Nhy m pyka tãmka m me'õ ni 'uwtĩre kubê mjẽn tyk nhy m me'õ ar o bikẽnho ba, 'uwtĩkam ar o bikẽnho ba. Nhy m kam akati kunĩkõt mã 'ỳr mrãn kum

arēn kum, “On ijo angryk”, ane. “On ikurê djwýnhmã arê gê on imã o pãnh”, ane.

<sup>4-5</sup> Ne mã kum 'ã apnê. Te kum 'ã apnê nhym ate krãn ar ba. Nhym mã kum arê nhym kam, “Ije. Ije ba gop on 'uwtiwão ingyryk ne kute kum o pãnh kadjy kurê djwýnhmã ikabēn 'õ jarê gê gop on arek wãnh nhỹ ba ityk djã kêt. Djã nã bãm imã Metĩndjwýnh pyman imã mebēngõkre pyman got ba o ingyryk? Kati, nãm mã ikujrê ba gop on o ingyryk gê gop on anhikrēn kabēno ikatyk ngri”, ane.

<sup>6</sup> Jeju ne arek arkum ujarēho dja ne arkum,

—Memã axwe pãnh jarēnh djwýnh ja ne axwekam me'õ 'uwtio ngryk ne. Amijã maje ne o ngryk ne. <sup>7</sup> Djãm ã Metĩndjwýnh kute anhỹr got? Kati, Metĩndjwýnh ta ne amijo me bapytãn kam õ me jabê ate krãn ar ba kêtikumrēx. Nãm õ me ja mar 'ãno dja. Nhym me kum amijarēnh ry typydji. Akamãtkammē a'urimē ne me kum amijarēnh ry typydji.

Nhym arým me kuma. Djã nãm amikrà:n gormã õ me jao ngryk got. <sup>8</sup> Kati, ē, ba ar amã arê. Dja õ me jao ngryk kukrà kêt ne. Ba ije amijo inhĩ gēdjã ba akubyn pyka jamã bõx, ije meo ingyryk kadjy akubyn bõx, djã nãm me ja akubyn ibõxmã ikamnhĩx got? Kati, dja me ate krãn ar pyka jabê ba rã'ã ba akubyn bõx, ane. Nãm ã Jeju kôt ba djwýnhmã ane.

*Me'õ ar amãnhkrut kute Metĩndjwýnhmã amijarēnhmã.*

<sup>9</sup> Ne kam ajte memã atemã mýjja'ã ujarēnh jakreo tē. Me ãm ta axwekam we katãt mrãnh ne ajkwaobit kute ar amimex jarēho ban kam mũm me ja'ãbit ar axwe rēho baja, me ja'ã ne memã mýjja jarēn memã,

<sup>10</sup> —Me'õ ar amãnhkrut ne ar kute Metĩndjwýnh nhõ kikretikam kum amijarēnhmã tē. Nhym jabê pardjēu'õ nhym jabê bēnjadjwýr bajtemmã pi'õk kaprĩo atom djwýnh, àkĩnhĩre.

<sup>11</sup> Nhym kam pardjēuja tēn wadjãn djan kam Metĩndjwýnhmã amijarēnhkam amijo àmrao djan kum, “Metĩndjwýnh, ba amã amikĩnh jarē, ane. Ije me urãk kêtgam ne ba ikĩnhkumrēx. Me ne me àkĩnhĩ,

axwe, abenbê prõo akĩ. Nhym bep kati, ba ne ba ajmã ikute kêtê. Ije tãwã pyrãk kêtê. Ije àkĩnhĩwã, kute pi'õk kaprĩo atom djwýnhwã pyrãk kêtê, kam ne ba ikĩnhkumrēx. <sup>12</sup> Nhym bep ba ne ba amã ikabēn kadjy amijajburo amãnhkrut ne, pi'õk tyk nhõkre djãkõtmē pi'õk rãrãrmēkam. Ne ajte amã apýnh inhõ mýjja djãri kwý rax ne kungã. Nã bãm apýnh inhõ mýjja djãri kunĩ aben kadjy kryre ne amýn o aptãn rax ne amã kungã. Tãm ne ja”, ane.

<sup>13</sup> Nhym bep ate ne pi'õk kaprĩo atom djwýnh. Nĩjar ne dja, pijãm djãje ibõn djan kãjmã kãjkwa'ýr krã kêt ne amititiko dja. Amijaxwekam kaprĩn pijã:m ne. Ne kam Metĩndjwýnhmã kum, “Dja ga adjukaprĩkôt ikam adjukaprĩ, ane. Nã, mrãmri ne ba ijaxwe ga kam tu amã ikaprĩ”, ane. Nãm ã pi'õk kaprĩo atom djwýnh Metĩndjwýnhmã ane.

<sup>14</sup> Be, ba me amã arê. Mrãmri ne arým Metĩndjwýnh tãmja jaxwekam ngryk kêt ne arým kum axwe kêt jarê. Nãm tu axweo aknon kum kabēn mex jarê nhym arým umar mexkumrēx ne mã ũrkwãmã tē.

Nhym bep me'õbê pardjēuja ne kute kum axwe kêt jarēnh kêt. Mýkam? Bir, me kute amijo rax kadjy kute ar amimex jarēho baja gēdjã me ĩ kãtãm ne. Nhym bep me kãtãm, me akrãnmã kute amijo ban pijãm ne ar baja gēdjã ĩ Metĩndjwýnh meo rax ne. Nãm ã Jeju memã arēho ane.

*Kute me prĩreo kĩnh.*

*Mat 19.13; Mak 10.13*

<sup>15</sup> Nhym me Jeju'ýr me prĩredjwýo mõ, me prĩredjwý jamýn 'ýr meo mõ, kute me'ã ikra jadjwýr ne kute meo kĩnhmã. Nhym kôt ba djwýnh me omũn kam nēje me kajpan memã bēn týx ne. <sup>16</sup> Nhym bep Jeju ne amiwýr me prĩre 'uw ne kam kôt ba djwýnhmã kum,

—Kwãrik wãnh arek amrē me prĩre iwýr mõ, ane. Kwãrik wãnh gar mebē adjãptãr kêt gê me arek amrē mõ. ã me kute amijo anhỹrbit gēdjã Metĩndjwýnh me utãn me kadjy bēnjadjwýr ne ar meo ba. <sup>17</sup> Ē, mrãmri ne ba ar amã katãt arê. Me kute me prĩre pyrãk ne amijo kãtãmjabit gēdjã Metĩndjwýnh me utãn me kadjy bēnjadjwýr ne ar meo ba. Be, me prĩre kute ta amim

imarja pumũ. Ā me kute amijo anhÿr gêdja Metĩndjwÿnh me utàn me kadjy bēnjadjwÿr ne ar meo ba, ane. Nām ā Jeju arkum ane.

*Jeju me'ō bēnjadjwÿr ngrirebē nēkrēx pymā.*

*Mat 19.16; Mak 10.17; Xim k 6.6; Xij 5.1*

<sup>18</sup> Nhyam kam me'ō, bēnjadjwÿr ngri'ō Jējumā,

—Bēnjadjwÿr, ga ne ga amexkumrēx. Mā gēdja ba amijo? Itĩn rā'ā rā'āmā, mā gēdja ba kadjy amijon? ane.

<sup>19</sup> Nhyam kam kum,

—Mÿkam ne ga imā imex jarē? Djām mrāmri aje amim imex marmā got ga imā imex jarē. Me ne me mex kêt, nhyam bep Metĩndjwÿnh pydji ne mex. <sup>20</sup> Arÿm aje Metĩndjwÿnh kukrādja marjakam ajte ikukij. Kute me mrānh katāt'ā memā karōkôt kukrādja ne ga arÿm ama. Aje mebē prōo adjākĩnh kêt ne aje me par kêt ne adjākĩnhĩ kêt ne ajēx ne aje me kāmex jarēnh kêt. Ne ajte aje abāmmē anā ar kabēn mar ne ar kabēnkôt amijo abaja ne ga arÿm ama. Ja kunĩ ne ga arÿm ama, ane.

<sup>21</sup> Nhyam bēnjadjwÿr ngrija kum,

—Nā, arÿm ne ba ibōktikam ja kunĩ ma. Ne kam kôt ar amijo iba rā'ā:n arÿm ija-batānh ne, ane.

<sup>22</sup> Nhyam Jeju kabēn ja man kum,

—Mÿjja pydji ne kute akukrà rā'āā. On tēn memā anhō mÿjja wā ngrān pānh pi'ōk kaprĩ byn me 'uwtĩ, me ō mÿjja kêtjamā angān o me kĩnh ne kam amrē iwÿr tēn mā ikôt ajkamē. Dja ga ā anen kam arÿm kàjkwakam anhō mÿjja mex kumex, ane.

<sup>23</sup> Nhyam kam kuman kam kaprĩ:re. Ō nēkrēx kume:xkôt amak bēn ne kam kaprĩre ne dja. <sup>24</sup> Nhyam kam Jeju kaprĩ pumũn kam memā,

—Nēkrēx ne kute me kukrà prāmā. Me ō nēkrēx kumex gēdja me te Metĩndjwÿnh nhō pyka'ÿr bōxmā, te Metĩndjwÿnh kute meo baja'ÿr bōxmā. <sup>25</sup> Be, ga mry jaba-tānhbē kameru te: kute aguja tekrax kremā ngiēnhmāja pumũ. Me ō nēkrēx rũnhdjwÿ kute urāk. Nām te Metĩndjwÿnh nhō pyka'ÿr bōxmā, te Metĩndjwÿnh kute meo baja'ÿr bōxmā nhyam nēkrēx utā: ne, ane.

<sup>26</sup> Nhyam me kabēnja man kam kum,

—Ije nhyam mÿj me'ō gēdja Metĩndjwÿnh amim utā? ane.

<sup>27</sup> Nhyam memā,

—Mebēngōkre te kute mÿjjao anhÿrja ne Metĩndjwÿnhmābit amirĩt ne. Metĩndjwÿnh kute me ō nēkrēx kumexja kute me utārkôt mar, ane.

<sup>28</sup> Nhyam kam Pedru kum,

—Ē, arÿm ne bar inhōbikwa kunĩmā inhiren kam mā akôt ajkamē, ane.

<sup>29-30</sup> Nhyam kam arkum,

—Nā. Mrāmri ne ba katāt ar amā arē. Godja me'ō arÿm ō mÿjjamā irer jabej, nār ōbikwamā irer jabej, ō kikre, nār prō, nār kamy nār nāmē bām, nār kramā irer jabej. Godja arÿm ō mÿjja ja 'ōmā irer, ne kute memā Metĩndjwÿnh'ā ujarēnh nhyam kute me utār ne kute meo ba kadjy kum irer jabej, ba dja ba kum o pānh ra:x ne. Dja ba pānh on pyka jakam kum mÿjjao akrenh mex ne kum kungā. Nhyam ije pykao nykam gēdja tĩn rā'ā rā'ā ne, ane. Nām ā Jeju arkum ane.

*Jeju ajte kôt ba djwÿnhmā amityk jarē.*

*Mat 20.17; Mak 10.32*

<sup>31</sup> Ne kam kôt ba djwÿnhbē 12o aben pydjin kam aro mōn arkum,

—Ē, ota gwaj arÿm Djeruxarē'ÿr badjābir ne kam babōxmā. Kam gēdja me ajmā ijo. Ba ije amijo inhĩ ne me awÿr ibōxja dja me ajmā ijo. Metĩndjwÿnh kabēn jarēnh djwÿnh kute ijā pi'ōk no'ōk tũmja kôt dja me ā ijo anhÿro tē:n kam inomā kumē. <sup>32-33</sup> Dja gwaj bōx nhyam kam me me bajtemmā ikanga nhyam kam me ijā bēno ajkēn ijo axēn ijapryñ ikutōn ikaprēprē:k ne kam ibĩ. Nhyam kam ijā akati amānhkrut ne ikjēkēt ba kam ajte akubyn itĩn ne ikato, pi'ōk no'ōk tũmja kôt, ane.

<sup>34</sup> Nām ā Jeju kôt ba djwÿnhmā amijā karōn arkum amijarēho ane. Nhyam ar kute kabēn ja mar kêtikumrēx. Kabēn ja ne Ar kubē bipdjur nhyam ar kam te kute marmā.

*Me'ō no rā akubyn rĩt.*

*Mak 10.46*

<sup>35</sup> Nhyam kam Jeju kôt ba djwÿnho mō ne kam krĩraxbē Djeriko tēpo mō. Nhyam me'ō no rāja pry jakākam nhÿ ne à'wÿro nhÿ.

<sup>36</sup> Nhyam me itepato 'ānh mō nhyam kam me kanga man memā,

—Mýkam ne ga me akanga mō? ane.

<sup>37</sup> Nhyam kam me kum,

—Jeju, ane. Nadjarekam Jeju ne me ijo mō, ane.

<sup>38</sup> Nhyam kam kum amijo akij ne kum,

—Ē, Jeju, Dawi tãmdjwý 'õ, gop amã ikaprĩ, ane.

<sup>39</sup> Nhyam me wamã mōrja kum bēn tỳx ne kum,

—E kum anihkrē, ane.

Nhyam kam tu kum àkjēro bēn kum,

—Dawi tãmdjwý'õ, gop amã ikaprĩ, ane.

<sup>40</sup> Nhyam kam Jeju tēm tỳx katikôt djan kam amiwýr ku'uw. Nhyam kam me'õ 'ýr tēn kum,

—Aje, onĩ arým amiwýr ajuw, anen kam pa 'amýn o tēn 'ýr o bōx. <sup>41</sup> Nhyam kam kum,

—Nār, mýj nā? Mā ne ba ije ajomā?

Nhyam kam kum,

—Bēnjadjwýr, aje inoo mex ba irĩtmã.

<sup>42</sup> Nhyam kam kum,

—Nā, on rīt. Tu aje amim ikamnhĩxkumrēx kam ne ga arým amex, ane.

<sup>43</sup> Nhyam kam tebē rīt. Ne kam Jejukôt tē, mekôt tē, ne Metĩndjwýnhmã ukaprĩmē amikĩnh jarēho tē. Nhyam kam me kunĩ omũn kôt Metĩndjwýnhmã mex jarē.

## 19

### *Djakij Jejuo aminhō.*

<sup>1-2</sup> Nhyam kam Jeju krĩbē Djeriko'ýr meo mōn meo bōx ne kam bit kajōnhkôt ka-tormã. Nhyam me Jeju'ã kumex ne prĩne an-grĩn o mō. Nhyam kam me'õbē Djakij. Djakij ne bēnjadjwýr bajtemmã pi'ók kaprĩo atom djwýnh nhō bēnjadjwýr. Kam ne õ nēkrēx ra:x ne. <sup>3</sup> Nhyam me prĩne Jeju jangrĩn o mō, kunoro mō. Nhyam kam te Djakij kute omũnhmã 'ã aminhinô ryo tē. Mýj me'õbē Jejuja kute omũnhmã te 'ã aminhinô ryo tē. Djakij krô krĩkam ne te kute omũnhmã nhyam me prĩne kubē utà.

<sup>4</sup> Nhyam kam kukãm prõt ne. Kukãm prõt ne kutēp wabi. Pidjô'ã wabi. Amrē tēm nhyam kute omũnhmã kutēp pidjô'ã wabi.

<sup>5</sup> Nhyam kam Jeju 'ýr tēn bōx ne parbē djan kãmã krãn kam kum,

—Djakij, amrē aparmã aprõt. Jakam dja ba akôt tēn anhũrkwākam nō, ane.

<sup>6</sup> Nhyam kam tebē aparmã prõt ne ruw ne kam kĩ:nhkumrēx ne ũrkwãmã Jejuo tēn o wadjà. <sup>7</sup> ũrkwãmã o tēn o wadjà nhyam me omũn kam kangãngãn abenmã ajkwa momoko kumex, ne,

—Djijak, me axwe'ýr ne mōn wadjà, ane. Djãm tãwã mex, ane.

<sup>8</sup> Nhyam Djakij Bēnjadjwýr kuka kōnh djan kam kum,

—Bēnjadjwýr, ba inhō mýjja kōnho ajkjen me bikēnhmã kungã, ane. Ne ije me'õbē pi'ók kaprĩo idjãkĩnh jabej akubyn me'õmã inhō jao amãnhkrut ne o amãnhkrut ne kungã.

<sup>9</sup> Nhyam kam Jeju kum,

—Akati jakam ne arým Metĩndjwýnh apytà, anhũrkwākam ar wãmē ro'ã. Mrãmri gadjwý ne ga abē Abraão tãmdjwý'õ nhyam Metĩndjwýnh arým apytà, ane. <sup>10</sup> Be, ja kadjy ne ba tē. Ije me axwe jabej ne ije me utarmã ne ba tē. Kadjy ne ba amijo inhĩ ne me awýr ruw, ije me axwekam biknorja jabej ne ije me utarmã, ane. Nãm ã Jeju kum ane.

*Me'õ bēnjadjwýr kute õ àpēnhmã pi'ók kaprĩ nhōr.*

*Mat 25.14*

<sup>11</sup> Nhyam me kute maro ãm rã'ã nhyam ajte memã mýjja 'õ'ã ujarēnh jakreo tē.

Nãm Jeju arým Djeruxarēkam bōx 'ýr nhyam kam me amim,

—Jakam dja Jeju Djeruxarēkam bōx ne on me bakadjy Bēnjadjwýrbē kumkatin me bakurē djwýnhbē me bapytàn ar me bajo ba, ane. Me ta ne me kute amim àtari kētkam tỳx amim kamnhĩx. Nhyam bep Jeju ne kute katàt memã arēnhmã. <sup>12</sup> Kadjy ne memã mýjja 'õ'ã ujarēnh jakreo tēn memã,

—Ē, bēnjadjwýr kra'õ ne me kute nĩjar atemã pyka 'ókam 'ã bēnjadjwýr mēnhmã tē. 'Ā bēnjadjwýr mēnh nhyam ajte akubyn õ pykamã me'ýr tēmã. <sup>13</sup> Ne kam tēm kutã amiwýr õ àpēnh 'uw. Ő àpēnhbē 10 ne amiwýr ar ku'uw ne kam arkum ngōnho pi'ók kaprĩre ngã. Pãnh raxkam. Ő àpēnh kunĩmã pi'ók kaprĩ pýnh'ã kabēn ne arkum kungãn kam arkum, “Dja gar ikutēp imã jao aptà. Dja ba amrē akubyn 'ýr tē”, ane.

14 Nhyr bep ò pyka djwýnhkam me ja ne me kum kînh kêt ne, kum kurê ne kam kôt me kwý jano nhyr me nîjar kôt bôx ne kam memã, “Kwãrik wãnh tãmjã'ã bënjadjwýr mênh kêt. Me ba ne ba me imã tãwã kînh kêtê. Kwãrik wãnh gê tãmjã me ijo ba kêt”, ane.

15 Nhyr me tu ate krãh 'ã bënjadjwýr mē. 'Ã bënjadjwýr mē nhyr akubyn ò pykamã bôx ne kam amiwýr ò àpênh 'uw ne arkum, “Nãr, djãm arým ne ba ije ar amã pi'òk kaprî nhôrã gar ikutêp imã o aptã”? ane.

16 Nhyr kam ja kumrêx 'ýr o bôx ne kam kum, “Bënjadjwýr, ota ba anhõ pi'òk kaprî pydjija ar o iban arým amã o aptã. Amã o aptã abenã kumê nhyr arým kubê 10”, ane.

17 Nhyr kam kum, “Mexkumrêx. Ga ne ga adjãpênh mexkumrêx. Nã bãm amã mýjja ngrire ngã ga prîne imã o djuw mex ne, ikutêp imã o djuw mex ne aje kanga kêt. Pãnh gêdja ba amã krî krãptî jarê, krîbê 10 jarê. Ga kam abënjadjwýr rax ne amũ idjô'ã ar kam meo aba”, ane.

18 Nhyr atãri ja 'ýr o bôx ne kum, “Bënjadjwýr, ota ga aje imã pi'òk kaprî nhôrja ba ar o iban arým amã o aptã nhyr kubê 5”, ane.

19 Nhyr kam kum, “Gadjwý ne ga amexkumrêx. Jakam dja ba amãdjwý krî krãptî jarê, krîbê 5 jarê, ga kam abënjadjwýr rax ne amũ idjô'ã ar kam meo aba”, ane.

20-21 Nhyr kam atãri ja 'ýr o bôx ne kam kum, “Bënjadjwýr, mî, anhõ pi'òk kaprî. Nã bãm ije amã kupênh prãm kêtka prîne amã kubêkào kupun kudji. Imã apymakam. Nã gãm apyma ne. Nã gãm aje amim mýjja kunî jadjwýr kêtka ar mebê jãm o amijakren o atomo aba. Ne ga adjãkre kêtka ar mebê djwýo atomo aba”, ane.

22-23 Nhyr kam kum, “Ga ne ga ajaxwekumrêx ne imã adjãpênh prãm kêt ne. Akabên jakôt gêdja ba ã ajo ane. Djã nã bãm ipyma? Ne ije amim mýjja kunî jadjwýr kêtka ar jãm mebê o amijakren o atomo iba ne idjãkre kêtka ar mebê djwýo atomo iba? Bir be, ga kam we ga aje amim ipumũnhkôt ren inhõ pi'òk kaprî jao tèn me kute pi'òk kaprî marmã angã nhyr ren abenã rôròk tèn rax ba ren arým 'ýr bôx ne kuby”, ane.

24 Ne kam me kute arek omũho ku'êjamã, “Aj, amũ me ajõ kubê pi'òk kaprîwã byn o tèn kute imã pi'òk kaprîo àptãr nhyr kubê 10wãmã angã”, ane.

25 Nhyr me kam kum, “Kati, bënjadjwýr, arým tãwã nhõ pi'òk kaprîre raxi. Arým ò 10”, ane.

26 Nhyr kam memã, “Bir be, ba me amã arê. Arým me ò mýjja gêdja ajte Metîndjwýnh iby memã kungã. Nhyr bep me ò mýjja kêt, kute memã òr nhyr me kute kum o djuw mex kêtjabê gêdja Metîndjwýnh mýjja ngrireja kunî by”, ane.

27 —Ë, ikurê djwýnh kute ijã “Kwãrik wãnh gê tãmjã me ijo ba kêt”, anhýrja gêdja ga me amrê meo môn ikuka kônne me imex, ane. Be, tãm ne ja. Nãm ã Jeju kãjkwamã tēm ne akubyn pykamã bôx ne kute ar meo bamã ã amijarênh ane.

*Jeju Djeruxarēmã bôx.*

*Mat 21.1; Mak 11.1; Dju r 12.12*

28 Memã arênh pan kam ate meo mõ, Djeruxarê'ýr kãjmã meo mõn <sup>29</sup> kam arým amê krî ngrireja tēpo mõ. Krãnh nhidjibê Oriwêre parbê amê krîja tēpo mõ. Krî nhidjibê Bepadjēmê Betanha tēpo mõn kam amikukãm kôt ba djwýnh amãnhkrut janon arkum,

30 —Pry ja'ã dja gar arek katãt krîwãmã tē. Nhyr ar akutã pry kator kraxkam me kute mry jabatãnh nyre pî maktã kum òkre djê nhyr ãmwã. Me 'ã krî kêtã. Tãm gêdja gar amrê 'ãpre bôn o tē. <sup>31</sup> Gêdja gar 'ãpre bônho dja nhyr me'õ ar amã, “Mýkam ne gar 'ãpre bônho dja”? ane.

Gar kam kum, “Bënjadjwýr 'ã tēm kadjy”, ane.

32 Nhyr kam Jeju kute ar anorja mã ar tèn 'ýr bôx ne kam kum kato. Kute arkum arênh kôt kum kato. <sup>33</sup> Kum katon 'ãpre bônho dja nhyr kam ò mry djwýnhja arkum,

—Mýkam ne gar mry 'ãpre bônho dja? ane.

34 Nhyr kam ar kum,

—Bënjadjwýr 'ã tēm kadjy, ane. <sup>35-36</sup> Ne kam Jeju kutã o tèn o bôx ne kam kum 'ã kubêkã rē, 'ã ýr kadjy. Ne kam kum ikra dja nhyr ar ikrakam par djan kãjmã 'ã arîh arým ate 'ã tē. Nhyr kam me arým prykôt kum kubêkã rēnh mõ. Nãm mebê idjaer

ã me bĕnjadjwÿr raxmã mÿjja rĕnh nhym 'ã tĕmmã ã kum prykôt kubĕkà rĕnho mōro ane. <sup>37</sup> Nhym kam arÿm Jeju Djeruxarĕ tĕpo mō. Krãnhrebĕ Oriwĕre ja'ã rwÿkbĕ arÿm Djeruxarĕ tĕpo mō. Nhym arÿm kôt ba djwÿnhjamĕ, mekôt mōr, me itepato kôt mōrja arÿm kĭnhkumrĕx, kĭnh ra:x ne arÿm àkjĕr mō. Jeju ne mÿjja pumÿnh kĕt kwÿ rax ne ipĕx ne, nhym me kute ipĕxkôt omÿn kam kĭnhkumrĕx ne Metĭndjwÿnhmã mex jarĕnho mō, àkjĕr mō. <sup>38</sup> Ne kam abenmã,

—Gĕ Metĭndjwÿnh bĕnjadjwÿr jao kĭnh rax. Bĕnjadjwÿr djwÿnh kukwakam ne arÿm me bakadjy bōx. Gora gĕ me kàjkwakamdjwÿ umar mex ne kĭnh rax. Gora gĕ me kàjkwakamdjwÿ Metĭndjwÿnhmã mextire jarĕnho kumex, ane.

<sup>39</sup> Nãm me ã anhÿro kumex nhym kam mebĕ pardjĕumĕ me krãptĭ akàn Jejukôt mō. Nhym kam mebĕ pardjĕu Jejumã,

—Bĕnjadjwÿr gop akôt ba djwÿnhmã akabĕn gĕ anhikrĕ, ane.

<sup>40</sup> Nhym kam memã,

—Ba me amã arĕ. Nãm ren me anhikrĕ nhym ren kĕnja ijo àkjĕro nhÿ, ikam kĭnh ne ren ijo àkjĕro nhÿ, ane. <sup>41</sup> Anen kam arÿm Djeruxarĕ'ÿr mō. 'ÿr mōn arÿm irã. Irãn omÿn kam ate me abej muw. Me kute amibĕ Jeju kangan amibĕ kurĕn kute bĭn nhym Metĭndjwÿnh kute pãnh prĭne meo bikĕnhmã ne kôt amak bĕn ne me abej muw, ne,

<sup>42</sup> —Ga ren me ga aje amidjumar mex djà mar ren akati ja tãmkam ren adjumar mex ne ar aba. Nhym bep kati, mÿjwã ne adjumar djà'ã, mÿjwã ne me ajãn kam me abĕ o akno. <sup>43</sup> Adjÿm, dja ĭ me ajo bikĕnh djà nhō akati me awÿr bōx. Dja ĭ me akurĕ djwÿnh me awÿr bōx ne me amã ipōk ne prĭne pykao me abĕ ka'ĕn prĭne me abĕ ijĕn me amã ipōk me:x ne me ajo dja. <sup>44</sup> Dja me aminhikra kraxkam me akrã jadjuw ne prĭne me anhimex ne kam me anhō kikre prĭne kungràn ikō rĕnho mō, ne me abĕngōkredjwÿo pyka tako mō, akramĕ. Dja me prĭne me ajo mōr djà kaprã. Nhÿnh gĕdja par'ō dja? Nhÿnh dja mÿjja'ō nō? Mÿkam? Bir, me aje amim Metĭndjwÿnh mar prãm kĕtkam. Nãm arÿm Metĭndjwÿnh me awÿr bōx kute me amã

me adjumar mex jarĕnh ga me adjumar mex ne ar abamãn amã Metĭndjwÿnh mar prãm kĕt ne, ane. Nãm ã Jeju ane, anhÿr djwÿnhràn Djeruxarĕ kurĕ djwÿnh kute o bikĕnhmã ã memã arĕnho ane.

*Kute kikreti nĕje me anor.*

*Mat 21.12; Mak 11.15*

<sup>45</sup> Ne kam Djeruxarĕkam bōx. Kam bōx ne kam Metĭndjwÿnh nhō kikretimã tĕn wadjà, Bãm nhÿrkwãmã tĕn wadjà. Nhym arÿm me kam pi'òk kaprĭ pãnh memã mry nhōro ku'ĕ. Nhym kam arÿm bōm nĕje me rĕnho tĕ, Bãm nhō kikre nĕje bōm me rĕnho tĕ. <sup>46</sup> Ne memã,

—Metĭndjwÿnh ne ò pi'òk no'òkkam memã, “Me kute imã kabĕn kadjybit ne inhō kikretiwã.

Nhym bep me ga ne ga me kam aje me àkĭnhĭo aben pydji djà”, ane.

Nãm ã Jeju memã anen bōm me kurĕ.

<sup>47</sup> Ne kam kam akati kunĭkôt memã Metĭndjwÿnh kukràdjà'ã ujarĕnho ku'ĕ. Nhym kam me kadjy Metĭndjwÿnh mar djwÿnh nhō bĕnjadjwÿrmĕ Mōjdjĕ kukràdjà mar djwÿnhmĕ ar kute meo ba djwÿnhmĕ te kute bĭn prãme. <sup>48</sup> Te kute ajmã on kute bĭnmã nhym me kunĭ kum kabĕn kĭ:nhkumrĕx ne maro kumex. Kabĕn 'ãno djan kam no tyn maro nhÿ.

## 20

*Jeju Djuão jabej me kukij.*

*Mat 21.23; Mak 11.27*

<sup>1</sup> Nhym kam akati 'òkam Jeju Metĭndjwÿnh nhō kikretikam memã 'ã ujarĕnho dja. Ne kam Metĭndjwÿnh'ã ujarĕnh ny memã arĕnho dja. Nhym kam me kadjy Metĭndjwÿnh mar djwÿnh nhō bĕnjadjwÿrmĕ Mōjdjĕ kukràdjà mar djwÿnhmĕ mebĕngĕttemĕ ne me ro'ã Jeju'ÿr bōx ne kam kum,

<sup>2</sup> —Goja on me imã arĕ. Mÿj me'ò kabĕnkôt ne ga ar ã meo anhÿro aba? Mÿj me'ò ne amã me'ã karō ga kam amÿ o'ã bōm ar me rĕnho aba? Goja on me imã arĕ, ane.

<sup>3</sup> Nhym kam amipãnh memã, —Badjwÿ dja ba mÿjja jabej me akukij. Me akumrĕx dja ga me imã arĕ ba kam arÿm badjwÿ me amã arĕ, ane. <sup>4</sup> Djuão kute

ngônhmã me angjênhja, djãm me bêngôkre kabênkôt ne arîk ar ngônhmã me angjênhba? Nàr djãm Metîndjwýnh kabênkôt? Gop me imã arê, ane.

<sup>5</sup> Nhyam kam me abenkam kangan abenmã,

—Ije mã dja gwaj kum nê? Dja gwaj kum, “Metîndjwýnh kabênkôt”, ane nhyam kam gwaj bamã kabên'ô jarê, gwaj bamã,

—Bir be, mýkam ne ga me Djuão kabênja mar kêt ne? ane.

<sup>6</sup> Nàr dja gwaj kum,

—Me kabênkôt ne tu arîk ar ngônhmã me angjênhba, ane nhyam me kunî arým kêno gwaj batitik ne gwaj bapa. Me kâtãm ja ne me arým Djuão kabên man kum kînh ne, ne o Metîndjwýnh kabên jarênh djwýnh ne. Dja gwaj ane nhyam me o ngryk ne gwaj bapa, ane.

<sup>7</sup> Nãm me ã abenmã anen kam Jejumã kum,

—Kon ne. Ar ije mar kêt. Mýj me'ô kabênkôt Djuão kute ngônhmã me angjênhja ar ije kôt mar kêtê, ane.

<sup>8</sup> Nhyam kam memã,

—Bir be, dja ba badjwý me amã arênh kêt ne. Mýj me'ô kabênkôt ije ar meo ibaja dja ba me amã arênh kêt ne, ane.

*Pidjôo djuw mex djwýnh jaxwe.*

*Mat 21.33; Mak 12.1*

<sup>9</sup> Anen kam memã atemã mýjja'ã ujarênh jakreo tên memã,

—Me'ô ne pur rax djin kam kam amim pidjô kumex ne. Ne kam me kwýmã kum, “Gora me imã o djuw mex. Gora gê djan abatãnh ne ô ga amim kwýo atom ne imã mũm kwýo atom”, ane. Nãm ã memã anen kam atemã pyka 'ômã tē. Ne kam kam wãnh ar ba. Ar ban kam kà'ã ngrà: ne.

<sup>10</sup> Nhyam arým pidjôja tuk ne kumex. Nhyam kam ô pidjô djwýnhja arým 'ã mytyrwý jakren kam 'ýr ô ãpênh jano. Kute memã arênh nhyam me kute kum pidjô kwýo atom ne kute kôt anor kadjy ne 'ýr ano. Nhyam kam 'ýr tên bôx nhyam kam me kute pidjôo djuw mexja ate kaprêprê:k ne. Nhyam mã akubyn 'ýr ýkam tên bôx.

<sup>11</sup> Nhyam ajte ô pidjô djwýnhja pãnh 'ýr me'ôjadjwý jano nhyam 'ýr tên bôx nhyam me ajte tãm ne, kaprêprêk ne prîne o ajkên kum

pijãm jadjàr mex ne ano nhyam akubyn 'ýr ýkam tên bôx.

<sup>12</sup> Nhyam ajte ô pidjô djwýnh 'ýr ajte ô ãpênh 'ô jano nhyam 'ýr tên bôx. Adjwýnhdjwý ne me prîne o ajkên bîn punun bôm kumê nhyam 'ýr tên bôx.

<sup>13</sup> Nhyam kam ô pidjô djwýnhja amim, “Ije, mã gêdja ba nê? Mýj gêdja ba on? Jakam dja ba 'ýr ikra jano, ikra djwýnh imã abêja dja ba 'ýr ano gê gop me mar jabej.” Nãm ã amim anen kam me'ýr kra djwýnhja jano nhyam me'ýr tên bôx.

<sup>14</sup> Nhyam kam me kute puro djuw mex djwýnhja kra pumũn kam abenmã 'ã karô ne abenmã, “Be, kra ne wã. Ajrã, gu me on kubî. Tãwã dja bãm kum mýjja kunî ngã, ô nêkrêx kunî kanga ane. Gu me on tãwã bîn kam amim ô nêkrêx, ô mýjja, ô pidjôja kunîo aminhõ”, ane. <sup>15</sup> Ne kam pidjôkô kurũm bôm kumên kubî. Bir be, mã gêdja ô pidjô djwýnhja kute me ja omã? <sup>16</sup> Bir be, dja ô pidjô djwýnhja me'ýr tên bôx ne me imex ne kam ô pidjôkôja atemã me ja'ômã kungã, ane.

Nhyam me kute maro ku'êja kuman kam kum,

—Kati, gora gê ã o anhýr kêt, ane.

<sup>17</sup> Nhyam kam Jeju arek mekam no tyn djan kam memã,

—Mrãmri, ane. Mýj'ã ne Metîndjwýnh pi'ôk no'ôkkam memã ja jakre?

“E kum kên ja ne me kute kikreo ãm djwýnhja kute kikremã armã te omũn kam bôm kumê.

Kên ja ne kute kikremã o kajpar, kum o kajpar tÿxi”, ane.

Mýj'ã ne Metîndjwýnh kabên ja, nênh? ane.

<sup>18</sup> Ê, kên ja gêdja ga me ajô 'ã tÿm ne prîne 'ã amikrakrak ne. Nhyam bep ta gêdja me ajô nhiby tÿm ne prîne angãnh prîne pyka mẽ ajo amrà, ane. Nãm ã Jeju kute prîne kurê djwýnh nhimexmã ã amijã kên jakreo ane.

<sup>19</sup> Nhyam kam Môjdjê kukràdjã mar djwýnhmê me kadjy Metîndjwýnh mar djwýnh nhõ bënjadjwýr te kute memã 'ã ujarênh ãmri kute o tÿm nhyam me kute bînmã te 'ã amijakre. Jeju kute puro djuw mex djwýnh'ã me akrekam. Nhyam me kuman kam kam ngryk ne. Ne te kute o tÿm nhyam me kute bînmã, ne kum me uma ne, kum me krãptitija pyma ne.

*Me kute Xedjamã pi'ôk kaprĩ nhõrmã.*

*Mat 22.15; Mak 12.13; Rô 12.1*

<sup>20</sup> Nãm te me kute Jeju bĩnmã o anen kam amim amã, kute kabẽn 'õ kupa'ã arẽnh nhym me kute on o tỹm ne bĩnmã ne me amim amã.

Kam ne me Jeju'yr ar kwỳ jano. Ar kute amijo kabẽn mex ne kute amijo Jeju kabẽn mar prãm ne kute mỳjja jabej kukjêr kadjy ne me Jeju'yr ar ano. Ar kute pa 'amỹnh ne kute o tẽm ne me bajtem nhõ bẽnjadjwỳrjamã arẽnh nhym kute bĩnmã ne ar ã o ane.

<sup>21</sup> Ar ja, ar 'êx ne kute amijo Jeju kabẽn mar prãmja ne ar kum,

—Bẽnjadjwỳr, nã gãm katàt me imã mỳjja jarẽnh mexkumrẽx ne, ne katàt adjujarẽho dja. Djã nã gãm te me mũja pymaje ne me mũjamã akabẽn mex jarẽ? Kati, nã gãm katàt me imã arẽho aben pyræk ne, me imã Metĩndjwỳnh kukràdjà'ã adjujarẽnh mexkumrẽxo dja. Bar arỹm kuma. <sup>22</sup> Ë, djãm Metĩndjwỳnh kukràdjækôt ne gu me baje bẽnjadjwỳr Xedjamã pi'ôk kaprĩ nhõrmã? Nàr kon. Goja on ar imã arẽ, ane.

<sup>23</sup> Bẽnjadjwỳrbê Xedja ne me kunĩmã nhỹ ne mebê idjaero aminhõ ne pi'ôk kaprĩ'ã ar me 'wỳro ba. Me kute kum òr nhym kute we me utarmã. Ja jabej ne we ar amijo kabẽn mex ne Jeju kukij. Kute “Kati, kwãrĩk wãnh kubajtemmã pi'ôk kaprĩ nhõr kêt,” anhỹr nhym Xedja nhõ krãkamngõnhre kute o tỹmmã, nàr kon kute, “Nà, kum angã,” anhỹr nhym me ja kute o tỹmmã, ne ar kukij ne kum,

—Djãm mrãmri ne gu me baje bẽnjadjwỳr Xedjamã pi'ôk kaprĩ nhõrmã, nàr kon? ane.

Nhym bep kati, Jeju ne tu ar omũ, ar kadjwỳnhbê tu ar omũn kam arkum,

<sup>24</sup> —Goja amrẽ ngõnhponho pi'ôk kaprĩwão tẽ ba omũ, ane.

Nhym kam ar kum o tẽn kungã. Nhym kam arkum kubê ne arkum,

—Mỳj me'õ ne 'ã karõja? Ne mỳj me'õ ne 'ã idji jêtja?

Nhym ar kum,

—E kum bep Xedja karõ, ane.

<sup>25</sup> Nhym kam arkum,

—Bir be, õ pi'ôk kaprĩ. Dja gar kum angã nhym bep Metĩndjwỳnh nhõ mỳjjabit dja gar Metĩndjwỳnhmã angã, ane.

<sup>26</sup> Nãm prĩne arkum arẽnh mexkumrẽx nhym kam ar abenmã,

—Ije tô mã ne gwaj baje omã? Djãm nopnu: got kute mỳjja'õ kupa'ã arẽnh gwaj baje ajmã omã, ane. Nãm ar te me ipõkri Jejumã nõ, kute kabẽn'õ jarẽnh nhym ar kute o tỹmmã te me ipõkri kum nõ nhym mrãmri kabẽn kôt arẽ. Nhym kam ar tu anhikrê, pijàm djaje anhikrê.

*Me tyk ne akubyn tĩn jabej me Jeju kukij.*

*Mat 22.23; Mak 12.18; Tex k 4.16*

<sup>27</sup> Nhym pãnh me ja 'yr bõx. Mekbê xadjudjêu ne me kwỳ 'yr bõx. Nãm we me,

—Kati, me tyk ne akubyn tĩn kêt, ane. Nãm tu me tykkumrẽx ne, ane. Me ja kwỳ ne me 'yr bõx ne kute mỳjja jabej kukjêrmã 'êx ne kum,

<sup>28</sup> —Bẽnjadjwỳr, we Mõjdjê ne me bamã me badjupãnh'ã karõ ne 'ã pi'ôk no'ok ne. Me'õ prõ'yr mõi ne kra kêt ne tyk nhym atãri kamy'õ pãnh 'yr mõi ne kute kum kra djirmã arẽ, ane. Kamy kumrẽx 'yr mõi kute kum kra djir nhym kam kra kutewaja we kute bãm kamy kumrẽx tykja nhõ mỳjjao aminhõmã. Nhym bep atãri ja ne kute we bãm tĩn nhõ mỳjja jao aminhõmã. Nãm ã we Mõjdjê 'ã me bamã karõo ane.

<sup>29</sup> Be, kamybê 7 ne axikôt apõx. Nhym kutewaja prõ'yr mõ. Prõ'yr mõn kra kêt ne ty. <sup>30</sup> Nhym atãrija pãnh 'yr mõn kam ajte ty. <sup>31</sup> Nhym pãnh atãrija 'yr mõn kam kra kêt rã'ã ajte ty. Be, nãm ar ã o anhỹro tẽm tãmtã: nhym arỹm kutapureja aro ino ren 'yr mõn adjwỳnhdjwỳ ty, kra kêt ne ty. <sup>32</sup> Nhym arỹm ar prõja arkôt ty, kra kêt rã'ã ty.

<sup>33</sup> Be, nija, mã gêdja me akubyn tĩnkam ar on? Nhym ne kute o kubajtem ne kute o prõ kêt dja 'yr mõ? Ar kunĩ ne ar axikôt 'yr ban ty, ane. Nãm ã mebê xadjudjêu Jejumã anhỹro dja.

<sup>34</sup> Nhym kam memã,

—Ë, pyka jabê me ar bari ne me prõ'yr ba nhym me nire mjên. <sup>35</sup> Nhym bep me akubyn tĩnkam gêdja me abenwỳr ba kêtumrẽx ne. Metĩndjwỳnh kute me'ã mex



nhôr nhym me tyk nhjukri akubyn tîn me tãm gêdja me abenwÿr ba kêtukumrêx ne. Me my prô'ÿr ba kêt nhym me nire mjên kêt. <sup>36</sup> Nãm me akubyn tyk prãm kêtukumrêx ne abenwÿr ba kêt ne. Kam ne me kute kadjy mrãnh djwÿnh pyrãk. Ne arÿm akubyn tînkam dja me kubê Metîndjwÿnh krakumrêx ne tu tîn ne ajte tyk kêt.

<sup>37</sup> Mòjdjêdjwÿ ne me tyk ne akubyn tînja memã o amirît ne. Ga me akaôk pôk ne tu mex ne ãm'ã ujarênhkam kute, “Ibê Abraãomê Idjakmê Djako ar ô Metîndjwÿnh”, anhÿrja pumû.

Bênjadjwÿr'ã, Metîndjwÿnh'ã ne ã ane. <sup>38</sup> Bir be, ar tyk tûmjã Metîndjwÿnhmã tîn ne ar ba nÿj pumû. Djãm Metîndjwÿnhbê me tyk nhô Metîndjwÿnh? Kati, Metîndjwÿnh ne me tîn nhô Metîndjwÿnh. Me tyk kunî ne me kum tîn. Me tykkumrêx kêt. Metîndjwÿnh ne akubyn meo tîn. Kam ne ba me amã, “Metîndjwÿnh ne kubê me tîn nhô Metîndjwÿnh”, ane.

<sup>39</sup> Nhym kam Mòjdjê kukràdjã mar djwÿnh kwÿ ne kum,

—Be, bênjadjwÿr, nã gãm me wãmã arênh mexkumrêx ne, ane.

Mòjdjê kukràdjã mar djwÿnh ne me kum mebê xadjudjêu kînh kêt nhym Jeju kabêno me jao apa nhym me arÿm anhikrê. Nhym kam Mòjdjê kukràdjã mar djwÿnh arÿm kôt omûn kînhkumrêx. <sup>40</sup> Nhym kam me kunî arÿm kum Jeju pyman mÿjja'ô jabej kukjêr kêt ne arÿm tu anhikrê.

*Kritubê mÿj me'ô tãmdjwÿ jabej me kukij.  
Mat 22.41; Mak 12.35*

<sup>41-42</sup> Nhym kam Jeju amipãnh me kukij. Kute memã amijã ujarênh nhym me kute mar ne kute kôt kum kator kadjy. Amrêbê ne Metîndjwÿnh memã Bênjadjwÿrbê kumkati jarê, kute memã anormã. Ne kam memã Bênjadjwÿrbê kumkati jarêh arêh arêh arÿm memã ano. Metîndjwÿnh ta ne memã Jeju jano, nhym kute memã amijarêho ãm nhym me kute kum katormã, me kute kubê Bênjadjwÿrbê kumkati kôt kum kator kadjy ne memã,

—Nãm we me Bênjadjwÿrbê kumkati dja kubê Dawi tãmdjwÿ'ô, ane. Metîndjwÿnh kute me bamã anorja dja kubê Dawi tãmdjwÿ. Mÿkam ne me kum Dawi tãmdjwÿ

ane? Be, djãm Kritubê ne Dawi tãmdjwÿbit? Kati, kubê ne Dawi nhô Bênjadjwÿrdjwÿ, ane. Dawi ta ne o ô Bênjadjwÿr ne me ngrer'ã pi'ôk no'ôkkam ajte ta, Dawi ta ne,

“Inhô Bênjadjwÿrmã ne Bênjadjwÿr djwÿnh kabên ne kum, ‘Amrê idjubôk'ãnh nhÿ, Abênjadjwÿr raxkam idjubôk'ãnh nhÿ.

<sup>43</sup> Ikutêp nhÿ ba 'ÿr amrê awÿr akurê djwÿnho mō ga kwÿo apardjan kwÿ nhimex', ane. Nãm ã Metîndjwÿnh inhô Bênjadjwÿrmã arêho ane”, ane.

<sup>44</sup> Bir be, ga Dawi kute kum “Abênjadjwÿr rax” anhÿrja pumû. Mÿkam ne me Dawi tãmdjwÿ kajgo jarê? Djã nãm o tãmdjwÿ kajgo? Kati, Dawi ta ne kute o ô Bênjadjwÿr rax, ane. Nãm ã Jeju memã amijarêho anen o me unê nhym me kute ajte kukjêr kêtukumrêx.

<sup>45</sup> Nhym me itepato Jeju kabên maro kumex. Nhym kam Jeju me ipôkri kôt ba djwÿnhmã,

<sup>46</sup> —Gora ar aminêje me omû, ane. Aminêje Mòjdjê kukràdjã mar djwÿnhwã pumû, ane. Me wã ne me kute amibên kadjy kute kubêkã jabjêti jangjêh ne 'ã ba prãmukumrêx. Nhym me ajte me krãptî nhipôkri kute me mexo àmran kute memã rûnh jarêh ne kute memã, “Bênjadjwÿr, djãm ga, djãm ga”, anhÿr jabit ne me kum kînh. Ne mebê idjaer bikprônh djakam kute abeno krî djakam kute amijo rûnh ne kute mebê me rûnh krî djã pytãr prãmukumrêx. Ne kam ajte me krãptî kute abeno bikprônh ne àkuro krî katã kute mebê me rûnh krî djã pytãr prãmukumrêx, ne kute mÿjja rûnh, mÿjja mexbit kur prãmukumrêx.

<sup>47</sup> Nãm ã me amijo rûnho bao anen kam ate ajte me 'uwitî krão apan mebê mÿjja kunîo akî ne kam ajte ajkwaobit Metîndjwÿnhmã kabên rûnh ne, ne kum kabên jabjêo ku'ê. Nãm me 'êx ne amijo mex ne kum kabên ne. Bep kati, me axwekumrêx. Kam gêdja Metîndjwÿnh me kurãm memã pãnh rax jarêh prîne me kurãm meo ajkê. Kam ne ba ar amã, “Gora ar aminêje me wã pumû”, ane. Nãm ã Jeju kôt ba djwÿnhmã me kute amijo mex, amijo rûnh ne kute amijaxweo bipdjurja'ã ã arkum karôo ane.

## 21

*Me'õ 'uwtĩ kute õ pi'òk kaprĩ nhõr.*

*Mak 12.41*

<sup>1</sup>Metĩndjwỳnh nhõ kikretikam ÿr rã'ãkam ne ã arkum anhỹro nhỹ, arkum 'ã ujarẽnh nhỹn 'ã ujarẽnh pan kam ibõn nhỹn kàjmã krãn arỳm ari ar me omũ. Nhyr me õ nẽkrẽx krãptĩ, õ pi'òk kaprĩ krãptĩja Metĩndjwỳnhmã me kute pi'òk kaprĩ nhõr djakam kum pi'òk kaprĩ rẽnh kumex, aben nwhitepã kum kam rẽnh kumex.

<sup>2</sup>Nhyr kam me'õ nija, me'õ ni 'uwtĩ kubẽ mjẽn tyk nhyr õ mỳjja kõtja ngõnhponhreo pi'òk kaprĩ byn o tẽn kam kum kumẽ. Amãnhkrutkam pãnh ngrire ne amẽ kubyn o tẽn kam kumẽ. <sup>3</sup>Nhyr Jeju arek omũnh nhỹn kam arkum,

—Ba ar amã arẽ, me'õ 'uwtĩ ja ne õ mỳjja kõt, ne tu me kurãm õ pi'òk kaprĩ raxo tẽn Metĩndjwỳnhmã kungã. Me kunĩ kurãm pi'òk kaprĩ raxo tẽn kum kungã. <sup>4</sup>Me ja ne me õ pi'òk kaprĩ kumex ne kam 'ã kãtãm ne kumex. Ne kam 'ã kãtãmja Metĩndjwỳnhmã kungã. Nhyr bep me'õ nija ne õ pi'òk kaprĩ kõtẽ, pi'òk kaprĩ ngrire ne tu kum kunĩ ngã. O kute amikadjy mỳjja byr ne krẽn ne tĩn kadjy Metĩndjwỳnhmã kunĩ ngã. Kum 'õ nõr kõtẽ. Kam ne ba ar amã, “Nãm me kurãm pi'òk kaprĩ rax ne kum kungã. Mrãmri ne ba ar amã arẽ”, ane.

*Akubyn bõx djã kukãm mỳjja apõx tẽ.*

*Mat 24.1; Mak 13.1; Xim k 4.1; A Xim 3.1*

<sup>5</sup>Nhyr ar kwỳ abenmã Metĩndjwỳnh nhõ kikretija jarẽnh mõ. Ne abenmã,

—Kẽn ja ne mexkumrẽx. Nhyr me o kikre nhyr kĩnhkumrẽx. Ja ne kikre jao kĩnh ne. Ë, nhyr me kwỳ kute Metĩndjwỳnh nhõ kikretio kĩnh kadjy kute apỹnh mỳjja aben kadjy òrkam kute o kikre ja kĩnhkumrẽxja pumũ, ane.

<sup>6</sup>Nhyr kam arkum,

—Bir be, ar omũ. Ar aje omũnhwã gẽdja õ akati, o bikẽn dhã nhõ akati 'ỳr bõx nhyr me kurẽ djwỳnh prĩne kikreti ngrã. Dja me kẽn aben nhiby ikwã kunĩ nhikõ rê. Nhyr kam kẽn'õ aben nhiby nõr kõtumrẽx, ane.

<sup>7</sup>Nhyr ar kum,

—Bẽnjadjwỳr, nhỹnh amex 'òkam dja me kurẽ djwỳnh o ane? Mỳj gẽdja kukãm apõx

bar omũn kam kõt õ akatimã ikaton õ akati ma? ane.

<sup>8</sup>Nhyr kam arkum,

—Ar amijã ano tỳx, gẽ me'õ ar amã 'ẽx ne ar anoo biknor ne Metĩndjwỳnhbẽ ar ajo akẽx kõt. Be, me krãptĩ dja ã aben totokmã me'ỳr bõx ne arỳm amijo 'ẽx. Amijo 'ẽx ne arỳm amijã imẽ. Amijã imẽn arỳm memã, “Me anhõ Bẽnjadjwỳrbẽ kumkati kadjy ne Metĩndjwỳnh ijano ba tẽn bõx. Ba ibẽ Kritu”, ane.

Ne kam ajte,

—Ota arỳm akubyn bõx dhã nhõ akati kato, ane. Kwãrĩk wãnh gar me wã kabẽn mar ne mã mekõt abikamẽn ne ar mekõt aba kõt. Dja gar tu ate akrã.

<sup>9</sup>Gẽdja me abeno kurẽ djwỳnh ne abenwỳr prõt ne aben nhimexo ba gar omũn kõt ama. Nhyr ajte me kwỳ ta õ pykakam õ bẽnjadjwỳro kurẽ djwỳnh ne ta ajte jãm abeno kukan aben paro ba. Dja gar mỳjja ja man atĩn prãm kõt ne amã uma kõt. Ja kumrẽx gẽdja me ã o anhỹro tẽ. Kraxje kute inomã mẽn kõt, kute 'ỳr o tẽn rã'ã, ane.

<sup>10</sup>Nãm ã Jeju arkum 'ã karõo anen kam ajte arkum,

—Nã, apỹnh me ba dhãri gẽdja me abenwỳr prõt ne aben nhimexo ba. Nhyr apỹnh pyka abenã rõtõk dhãri dja me abeno kurẽ djwỳnh ne aben nhimexo ba. <sup>11</sup>Apỹnh pyka dhãri gẽdja kam pyka tertẽt ne, tertet rax ne. Nhyr prãmdjwỳ me kwỳ nhimex. Nhyr apỹnh me kanẽ dhãri me kwỳ nhimex ne. Nhyr mỳjja rũnh, mỳjja pymadjwỳ kãjkwa kurũm apõ:x ne kumex.

<sup>12</sup>Nhyr bep mỳjja ja apõx kõttri gẽdja me ar ajo rõtõk ne prĩne ar ajo ajkẽ. Ne me bikprõnh dhã'ỳr ar apa 'amỳn ar ajo mõn me bẽnjadjwỳrmã ar ajo 'ẽx ne ar ajaxweo ar apytãn mebẽ ijẽ djakam ar arẽ. Ar amã ijabẽ ne amã ikĩnhkõt gẽdja me me bẽnjadjwỳr'ỳr ar apa 'amỳn ar ajo mrã. Me bẽnjadjwỳr krymẽ me bẽnjadjwỳr rũnh'ỳr ar ajo mrã. <sup>13</sup>Kam, kamã gẽdja gar memã ikukràdhã ny'ã ajarẽ gẽ me kuma. <sup>14</sup>Kam gẽdja gar adjumar punu kõt ne amim, “Mỳj ikabẽn gẽdja me amiwỳr ijo tẽ ba arẽ”? anhỹr kõt. Ne, “Mã dja ba gõt memã amijã idjãprãmã ikabẽn ja on”? anhỹr kõt.

Kwārīk wānh gar ã amim anhÿr kêt, anhÿr djwÿnhràm ã amim anhÿr kêt.

<sup>15</sup> Bep kati, ba gêdja ba ar ajamakmã ikabên wadjà. Ba gêdja ba ar amã ikabên jarê gar kam ikabên ja tãm memã arê nhym kam ar akurê djwÿnh te ar amã ãm tÿx ne kute kabên'õ mar ne kute bëno ar ajapanhmãn tu anhikrê. <sup>16</sup> E kum ã, ar abãmmê, ar anã, ar akamy, ar anhõbikwaja tãm gêdja me ar akurê djwÿnh'ÿr ar apa 'amÿn ar ajo mrã nhym me ar akwÿ pa. <sup>17</sup> Ikôt ar abikamênhkam dja me kunĩ kum ar akurê ne.

<sup>18</sup> Nhym bep Metĩndjwÿnh ta gêdja prĩne ar ajo djuw mex ne ar apumũnh 'ãno dja. Djãm kum ar apumũnh kangamã got? Kati, gêdjãm prĩne ar apumũnh 'ãno dja. <sup>19</sup> Gora ar memã adjãm tÿx. Dja gar adjãm tÿx ne 'ãno djan arÿm tu atĩnkumrêx.

<sup>20</sup> Gêdja krãkamngõnh Djeruxarêmã ipôk mō ne 'ã aben krãkà proo mō gar kam omũn arÿm kôt ama. Mrãmri ne arÿm õ akati têpo tẽ, Djeruxarêo bikênh djà nhõ akati têpo tẽ, me kute me amõr djà ngrànñ ne kute prĩne kapõnhmã ne arÿm têpo mō. <sup>21</sup> Kam gêdja Djeruxarê bu'ã pyka ja nhidjibê Djudejakam me ja amijã maje krãnh'ÿr prõt ne. Nhym bep krĩbê me ja gêdja me amikrà kêt mex ne amijã maje kurũm kato. Nhym purkam me jamê, bàkam me jamê gêdja me ajte akubyn ùrkwãmã mōr kêt. Dja me tu ãm kamã ajmã, apÿnh krãnh'ÿr ba. Akubyn krĩmã mōr ne bõx ne ajte akubyn prõt kêt. Tu ãm kamã amũ prõt ne.

<sup>22</sup> Be, akati kaprĩ ne ja. Akati kĩnh kê:tkumrêx ne ja. Mrãmri gêdja Metĩndjwÿnh me axwekam ngryk ne me axwe pãnh prĩ:ne meo ajkê. Anhÿr djwÿnhràm ne Metĩndjwÿnh pi'ók no'òkkam ja kunĩ'ã ajarê. Dja õ akati 'ÿr bõx, anhÿr djwÿnhràm Metĩndjwÿnh kute pi'ók no'òkkam arênh jakôt dja 'ÿr bõx ne kam kôt ã o anhÿro tẽ.

<sup>23-24</sup> Be, akati ja dja kaprĩ ra:x ne. Watĩre me nire tujaró, watĩre me nire kute kra karàre jamÿnhja. Mã gêdja me ja krãkamngõnh pymaje prõtja on? Metĩndjwÿnh gêdja pyka jakam me jakam ngry:k ne. Ne prĩne kam meo ajkê, me axwekam. Metĩndjwÿnh ta gêdja pyka ja'ÿr me kurê djwÿnh jano nhym me me'ÿr

bõx ne Djeruxarêmã ipôk ne kam prĩne me imexo mō. Kãxdjwa kajgoo me kwÿ nhimex ne kam amipardja'ã me kwÿ pa 'amÿn kam apÿnh me bajtem nhõ pykakôt me kungrà. Krãkamngõnhre bajtem ja gêdja prĩne Djeruxarêo ajkê, prĩne o ajkên kungràn jãm o mrãn kurên kam arÿm mÿrbê kam ajkarê. Kam bikarêr rã'ã: nhym arÿm me kute meo bikênh djà nhõ akati apêx. Arÿm me bajtem nhõ akati ja apêx nhym arÿm me mã mō.

<sup>25</sup> Nhym kãjkwakam mÿjja pumũnh kêt kwÿ rax dja apôx. Mytmê mytyrwÿmê kanhêtirekam gêdja mÿjja apôx ne kumex. Nhym pykabêdjwÿ ngô rax dja tãm ne aben pumjuw ne mÿja bê abenã ajkapĩ ne kam rãrã:ko nō. Dja me apÿnh õ pyka djari omũn kam abenmã,

—Mÿj got ja? Mÿkam? anen kam umar punure. Te kute mÿjja'õ marmãn mÿjja'õ mar kêtumrêx ne kam axwe umarre. <sup>26</sup> Ne kam terteto kumex. Mÿjja puma kator ne kute prĩne pykao bikamÿr ne kute prĩne meo bikênh pymaje ne me terteto kumex. Nãm me amijã ja kamnhix ne kam tĩn prã:m ne. Te tĩn prãme ne kam terteto:kumex. Djãm mÿjja puma ngri: ne apôxmã got me umaje tertet kêt ne. Kãjkwakam apÿnh mÿjja tÿ:x dja amingrêk ne.

<sup>27</sup> Kam gêdja ba me'ÿr bõx nhym kam me kunĩ ipumũ. Ije amijo inhĩ dja ba imex-tire ne itÿxkumrêx ne ipuma:kumrêx ne. Kam dja ba kãjkwakam kakrà kôt bõx nhym me kunĩ: arÿm ibôxkôt ipumũ. <sup>28</sup> Kukãm ne mÿjja apôxja. Bir be, gêdja mÿjja ja arÿm apôxmo krax ga kam ar amikam atÿx. Amikam atÿx ne akĩnh ne. Arÿm ije ar apytãrmã me awÿr ibõx 'ÿr, ane.

<sup>29</sup> Ne kam ajte arkum atemã mÿjja 'õ'ã ujarênh jakreo tẽn arkum,

—Gop ar pidjõbê pigêremê ràmtãxtemê pĩ kunĩ ma. <sup>30</sup> Amex kutã gêdja 'õ ingrã gar kam arÿm amexmã kamnhix nhym kam arÿm amex ne.

<sup>31</sup> Bir be, gêdja ba ije ar amã mÿjja jarênhja ã apôx mōr ane gar kam arÿm ijabej rĩt ne ijabej ajkam ama. Akubyn ibõx ne me kadjy ibênjadjwÿr rax ne ipymao ije me utàr ne ar meo ibamã arÿm 'ÿr. 'ÿr dja mÿjja apôx tẽ. Amex kutã gêdja pi'õ ingrã,

nhym bep ibôx kutã gêdja mỳjja pymatija apôx mō.

<sup>32</sup> Nã, mrãmri ne ba ar amã kôt arê. Ar anhō krôkam me kamingrãny ja gêdja me tyk par kêtri mỳjja ja kunĩ apôx. Mrãmri ne ba ar amã arê. <sup>33</sup> Ikabên kajgo kêt-kumrêx. Gêdja pykamê kãjkwa ĩ apêx nhym bep ba ikabên gêdja 'õ biknor kêt-kumrêx. Mrãmri gêdja ba ije mỳjja jarênh ja kunĩ apôx nhym me omũ.

<sup>34</sup> Gora ar ikam amakbê amijã ano tỳx ne amijãno dja. Gar mrãmri akukràdjã mexbito atêm rã'ã. Kwãrĩk wãnh gar kad-jwati kangôkôbit\* ar aban o akôm nhym kute bôm ar ano rênh ne prĩne kute ar ano kamrêkwã wãm nõ. Ne kôt arĩk ar abawã gêdja wãm nõ. Kwãrĩk wãnh gar pyka jabêbit adjumar punukôbit ajamak bën ne o aba kêt. Dja gar ã ar anhÿr aba ba kam ar ajaêrbê bôx gar kam ajmã imã amijarênh on? <sup>35</sup> Kute mrãmri ne me mrymã krĩn kute aêrbê parja pyrãk. Be, dja ba ã anen ar ajaêrbê bôx, pyka kunĩkôt dja ba ã ar ajaêrbê ibôxo ane, ar akunĩ jaêrbê ibôxo ane.

<sup>36</sup> Kukãm dja ĩ mỳjja kunĩ apôx tẽ. Kadjy ne ba ar amã, “Gop ar arek ijabej ajkam aman amijãno dja. Mã amijãno djan arek Metĩndjwỳnhmã amijo adjã'wỳr rã'ã gê ar ajo tỳx. Gar atỳx ne mỳjja punu apôxkam ijãno djan ikanga kêt. Ne akubyn ibôxkam amikam apijãm kêt ne ikabem aku'ê. Ba ije amijo inhĩ ne me awỳr ibôxja ikabem amikam apijãm kêt ne aku'ê.” Nãm ã Jeju arkum bôx djã nhõ akatimê kukãm mỳjja apôx djã nhõ akatimê arkum arênhõ ane.

<sup>37-38</sup> Ne kam akati kunĩkôt memã Metĩndjwỳnh kukràdjã'ã ujarênh tẽ. Metĩndjwỳnh nhõ kikretikam memã 'ã ujarênh tẽ. Nhym amykry nhym kam krãnhbê Oriwêre'ỳr tẽn kam ikwã. Nhym akati nhym ajte akubyn Metĩndjwỳnh nhõ kikreti'ỳr tẽn kam ajte memã 'ã ujarênhõ dja. Nhym me kryrãm 'ỳr ban bôx ne ujarênh ma nhym amykry nhym me mã ba. Nãm ã akati kunĩkôt ã o anhÿro tẽ.

## 22

*Me kute Jeju bĩn kadjy o aben maro ÿr.  
Mat 26.14; Mak 14.10*

<sup>1</sup> Arỳm ne Metĩndjwỳnh nhõ akati, amrêbê Metĩndjwỳnh me irôbê mrãnh nhym me mã kôt kute mar nhõ akati arỳm o rãm ne ja o mō. Kam ne me djwỳponhreibit ku.

<sup>2</sup> Nhym kam me kadjy Metĩndjwỳnh mar djwỳnh nhõ bẽnjadjwỳrmê Mõjdjê kukràdjã mar djwỳnhmê ne me abenmã Jeju'ã karõo mō. Mete bĩnmã ne me abenmã 'ã karõo mō. Ne kam me kum me kãtamja pyma ne. Me kãtam ja ne me kunĩ kum Jeju kĩnhĩ. Nhym bep me ja, me kadjy Metĩndjwỳnh mar djwỳnh nhõ bẽnjadjwỳrmê Mõjdjê kukràdjã mar djwỳnhmê ne me kum kurê ne kam kute bĩnmã abenmã 'ã karõo mōn kam kum me kãtamja pyma ne.

<sup>3</sup> Nhym kam Xatanaj Djudamã wadjã. Jeju kôt ba djwỳnhbê 12'õ ne Djuda. Idji 'õ ne Ikadji. Kumã ne Xatanaj wadjã. <sup>4</sup> Arỳm Djudamã wadjã nhym kam arỳm mã me'ỳr tẽ. Me kadjy Metĩndjwỳnh mar djwỳnh nhõ bẽnjadjwỳrmê Metĩndjwỳnh nhõ kikretikam krãkamngôn nhõ bẽnjadjwỳrmê me'ỳr tẽ. Me'ỳr tẽn bôx nhym me abenmã 'ã ãpnênhõ nhÿ. Nhym kam me kum,

—Ije ba gop on me amã Jeju kanga ga me abĩn amã kurê kêt, ane.

<sup>5</sup> Nhym kam arỳm me kĩnhkumrêx. Kĩnhkumrêx ne kam kum,

—Mexkumrêx. Gêdja bar kam pãnh amã pi'ôk kaprĩre ngã, ane.

<sup>6</sup> Nhym kam “Ã” ane. Nhym kam me arỳm kum pi'ôk kaprĩre ngã nhym kam amim kubyn kam ate kato. Katon kam arỳm Jeju'ã amim karõo tẽ. Me 'ã bikprõnh kêtri, me no prãri ne kute me kum kangamã amã.

*Me kute Jeju bĩn kêtri kôt ba djwỳnhmê ro'ã õ kwỳ krên mex.*

*Mat 26.17; Mak 14.12*

<sup>7</sup> Nhym kam mebê idjaer kukràdjãkôt mete djwỳponhreibit kur nhõ akati arỳm kato. Kam ne me apỳnh ùrkwãkam Metĩndjwỳnhmã mrykĩ'ãtomti pan kubôn kuku. Amrêbê Metĩndjwỳnh me irôbê mrãnh nhõ akati me kute kôt mar kadjy ne me ã o ane. <sup>8</sup> Kam ne Jeju kôt ba djwỳnh jano. Nãm Pedrumê Djuão ar anon arkum,

\* **21:34** Mỳjja me kute o kôm ne kôt bibãnh kunĩja, kadjwati kangômê uba kangômê, mỳjja kangô kunĩ ne me kum kadjwati kangô jarê.

—Ar tēn ar ikutēp mrykī'ātomti jabatàn̄h nyrewã bīn aga. Bar wãm bôx gwaj kukrē. Gwaj baje Metīndjwýnh me irôbê mrānh nhô akati mar kadjy mrykī'ātomti krē, ane.

<sup>9</sup> Nhy m ar kum,

—Nhýnh gédja bar ar akutēp mry ga? ane.

<sup>10-11</sup> Nhy m kam arkum,

—Ē, ba ar amã arē. Gédja gar tēn krī'yr bôx nhy m me'ô my ngô tēn ar akajpa. Ga kam ar kôt tē nhy m ūrkwãmã wadjã. Gar kôt wadjàn kam ô kikre djwýnhjamã kum, “Bēnjadjwýr ne amã, ‘Nhýnh kumoka'ê ja ne me bôx ny kadjy, dja ba ikôt ba djwýnhmē ro'ã bôx ne kam inhô kwý krē? Ar ije Metīndjwýnh me irôbê mrānh nhô akati mar kadjy mrykī'ātomti krē?” <sup>12</sup> Dja gar ã kum ane nhy m kam ar amã kumoka'ê rax jakre, kýjrũm imôkkam kumoka'ê raxwã jakre, kapõnh pro, arým o mex pro, kam gédja gar ar ikutēp agan adji, ane.

<sup>13</sup> Nhy m kam ar tēn kam kajpa. Kute arkum arēnh kôtô. Kute arkum arēnh kôt ne ar tēn me'ôja pumũn kam kôt tēn ūrkwãmã wadjàn kam ar kutēp mry ga.

<sup>14</sup> Nhy m Jeju kute kôt ba djwýnhô mörja'ã arým apajrũm myt tē. Nhy m ar bôx ne kam ro'ã ô kwý krēnmã arým nhý. <sup>15</sup> Nhý nhy m Jeju arkum, kôt ba djwýnhbê 12mã,

—Ba ne ba imã gwaj baro'ã banhô kwý krēn prãm kumrēx. Itokry kētri gwaj baro'ã baje Metīndjwýnh me irôbê mrānh nhô akati mar kadjy mrykī'ātomti krēn prãmã.

<sup>16</sup> Ē, ba ar amã arē. Ja dja ba krēn o ino re. Ne kam ajte krēn kêt 'iry:n kam Metīndjwýnh me kadjy bēnjadjwýr ne kute me utār ne kute ar meo bakambit gédja ba ajte inhô kwý krēn djã djwýnhja krē, ane.

<sup>17</sup> Ne ngõnhkrākam uba kangôjadwý byn 'ã Metīndjwýnhmã ôdjàn̄h jarēn kam arkum,

—Mĩ, ar jao ikõ, aben nwhitepã o akõmo mō. <sup>18</sup> Ba ar amã arē, gar ama. Ije pidjô kangô ikõmo krã'yr ne ja. Metīndjwýnh kute amim ô me ja kunĩ pytār ne kute meo bakambit dja ba ajte pidjô kangô nyo ikõ.

<sup>19</sup> Ne kam ajte djwý ja byn 'ã Metīndjwýnhmã ôdjàn̄h jarēn kam kokijn apýnh arkum kungãn arkum,

—Ē, inhĩ ne ja. Inhĩ'ã ne ba djwý jakren ar amã kokij. Ar akadjy dja ba ty. Dja me

pĩte'y'ã inhôn ibĩ. Dja gar akuprõn inhĩ ja'ã djwý jakren krē. Dja gar krēn ã imaro anen imar rã'ã ne, ane.

<sup>20</sup> Nhy m ar ô kwý krēn pa nhy m kam ajte uba kangô byn kam arkum,

—Ikamrô'ã ne ba pidjôbê uba kangô jakre. Dja me ibĩ nhy m kam ityk jakôt dja ikamrô ã me akadjy prõt ne bixabjêr ane. Ikamrô jakôt gédja Metīndjwýnh me amã kukràdjã ny, kabēn ny jarēnh mãm̄dji.

<sup>21-22</sup> Ē, ikuri ýr ne ô kwý krēno ýr ja gédja ikurê djwýnhmã ikanga. Mrãmri dja me ibĩ. Amrēbê ne Metīndjwýnh me kute ibĩn kadjy amim ijã karõ. Kute amim ijã karõjakôt gédja me ibĩ. Ba ije amijo inhĩ ne me awýr ibôxja gédja me ibĩ. Watĩre kute ikurê djwýnhmã ikanga djwýnhwã. Ta gédja tokry ra:x ne, ane.

<sup>23</sup> Nãm ã Jeju arkum ane nhy m kam kôt ba djwýnhja abenmã,

—Ije, mýj gwaj bajõ dja gwaj kurê djwýnhmã kanga? ane. <sup>24</sup> Ne abenkam kangao kumex ne kam adjwýnhdjwý abenbê bēnjadjwýr pytãro kumex. Ne abenmã,

—Ba gédja ba gop ibēnjadjwýr raxo ar ajakre, anhýro kumex.

<sup>25</sup> Nhy m kam Jeju arkum,

—Me bajtemkam ne me bēnjadjwýr rũnh kabēno meo atom ne ar meo ba. Nãm we memã, “Idjukaprikôt ne ba amim me ajo atom ne amim ar me ajo iba. Me akadjy ne ba ibēnjadjwýr rax”, ane. Nãm we ã me bajtemkam me bēnjadjwýr we ã ane.

<sup>26</sup> Bep kati, ar ga dja gar ã anhýr kêt kumrēx ne. Dja gar ajõ abenkam arax jabej, djã gãm aje me kutapure pyrãk ne me katēn tē. Ne ar ajõ amikam aben kadjy abēnjadjwýr jabej gédja ga tu ar memã adjãpēnh aba. <sup>27</sup> Nhy m ne bēnjadjwýr raxo kute aben jakrenh? Djãm kum ýr nhy m kute 'ýr õmrõo tēmja? Nār kon djãm kum ãpēnh ne kute kum õmrõ ne o tēmja? Kum ýrja. Bep kati, ba ne ba te ibēnjadjwýr raxo me bēnjadjwýr kunĩ jakren tu amijo ikåtãm ne ar ar amã idjãpēnh iba. Dja gar ã ikudjwa ane.

<sup>28</sup> Ē, ar ga ne gar amexkumrēx. Nãm me te kum ikurēn ijo ajkē gar mã ijã angrã tỳx ne. <sup>29-30</sup> Kam gédja ba akati 'õkam arým ar

ajã bĕnjadjwÿr rĕ. Ibãm ne ijã bĕnjadjwÿr mĕ ba kam badjwÿ amidjô'ã ar ajã bĕnjadjwÿr rĕ. Kam dja gar inhô pyka djwÿnhkam ar akadjy ibĕnjadjwÿr ne ije ar ajo ibakam ikôt anhô kwÿ krĕn kôt ikô. Kam dja gar me bĕnjadjwÿr rÿnh krĭ djâkam memã akrĭn ar meo aba, apÿnh me kute mekbê idjaermã idji jarĕnh djâri kubê 12jamã akrĭn ar meo aba, ane.

<sup>31</sup> Ý, Ximão, Ximão, ota arÿm Xatanaj ar ajã Ibãm ma, kute ar akabimã, mrãmri ar amã ikĭnh ne ijã angrã tÿx ne ar ikôt aba jabej. Kute mrãmri ne me kute bày 'ykã katĕk ne kute djwÿ kapĭn djâkam krĭn kute kapĭn ja pyrãk. Dja ã Xatanaj kute ar akabimã ã ar ajo ane. <sup>32</sup> Ę, Ximão, ba ne ba arÿm Ibãmmã ajo a'uw. Ijã angrã tÿx ne mã ikôt abikamĕnh ne ar ikôt aba kadjy. Dja ga mekôt ikangan kam akubyn aje iwÿr amijo akĕxkam gora akamydjwÿo tÿx, ane.

<sup>33</sup> Nhym kam Pedru kum,

—Kati, Bĕnjadjwÿr, ba dja ba apymaje iprôt kĕtkumrĕx ne. Gĕdja me kute abĕ ijĕ jabej akôt ibĕ ijĕ. Ne kute abĭn o mör jabej akôt ibĭ, ane.

<sup>34</sup> Nhym kam Jeju kum,

—Kati, ba amã arĕ, Pedru. Akamãt ja tãmkam ôkrĕnĕ'ãnh kãr kĕtri dja ga amijã maje memã ajĕxo dja. Memã aminĕje ajĕxo adjãmo amãnhkrut ne ikjĕkĕt ne memã, “Kati, ije tãwã pumÿnh kĕt”, ane. Be, dja ga ã memã ijã ane. Ba arÿm amã arĕ, ane.

<sup>35</sup> Nãm Jeju ã Pedrumã anen kam ajte arkum,

—Ije ôbĕ ar ajanor gar anhÿkam amör ne aje anhô katôk'y djã, aparkã 'ô byr ne o amör kĕt ne ajĕnh 'ô aje tur ne o amör kĕtja, djori kam ar anhô mÿjja kĕt? Ne kam ar anhô kwÿ krĕn djã kĕt? ane.

Nhym ar kum,

—Kati, kam ar inhô mÿjja, kam ar inhô kwÿ krĕn djã. Me ne me ar imã kungã, ane.

<sup>36</sup> Nhym kam arkum,

—Nhym bep jakam ne atemã. Jakam dja gar anhô katôk'y djãwã jamã ne ajĕnhdjwÿ'ô tun o mō. Ne anhô kãxdjwa kajgo kĕt jabej on kadjy aminhinôkãtiwã ngãn pãnh pi'ók kaprĭ byn amim o 'ô byn ar o mrã. <sup>37</sup> Ba ar amã arĕ. Arÿm ne me kute ibĭnmã arÿm ijo rã:m ne jao tĕ. Amrĕbĕ

me kute Metĭndjwÿnh kabĕnkam ijã pi'ók no'ókkam kute,

“Nãm me o axwen me axwemĕ ro'ã kubĭ”, anhÿr ja arÿm kator 'ÿ:r. Amrĕbĕ me kute ijã pi'ók no'ók ja gĕdja mrãmri on kato nhym me omũ, ane.

<sup>38</sup> Nhym ar kam kum,

—Bĕnjadjwÿr, omũ, ota ar inhô kãxdjwa kajgo amãnhkrut, ane.

Nhym kam arkum,

—Ã, aj, anũ, ane.

*Pidjôkôkam Bãmmã amijarĕho Ýr.*

*Mat 26.36; Mak 14.32*

<sup>39</sup> Nãm arkum “Anũ” anen ate kikre kurũm katon krãnhbĕ Oriwĕre'ÿr kôt ba djwÿnhho mō. Kute 'ÿr aro mör tũmja 'ÿr ne ajte aro mō. <sup>40</sup> 'ÿr aro mōn aro bôx ne kam arkum,

—Ar Metĭndjwÿnhmã amijo a'wÿ. Gĕdja me te ar ajaxwe'ã ar amã apnĕ, gar mekôt ajaxwe kĕt. Ja kadjy dja gar kum amijo a'wÿ, ane.

<sup>41</sup> Arkum anen ate tĕn Ýro rãm ne nĭj. Nãm kôt ba djwÿnhmã iren tĕn Ýro rãm ne nĭj ne kônkrão nhÿ. Ne kam arek Bãmmã kabĕno nhÿ. <sup>42</sup> Ne kum,

—Djũnwã, aje ibĕ ikaprĭja kadjãr jabej on ibĕ kaba. Aje ibĕ ikaprĭ kadjãr nhym me kute ibĭn kĕtmã ne ba amã amijarĕ. Nãr kon, dja ga mrãmri ibĕ kadjãr kĕt jabej ba tu mrãmri itokryo itĕm rã'ã. Djãm ba ne ba amimar kôt ar amijo iba? Kati, akabĕnkôt ne ba amijo iba, ane.

<sup>43</sup> Nhym kam kãjkwa kurũm kadjy mrãnh djwÿnh 'ÿr ruw ne kam o tÿx ne. <sup>44</sup> Nhym kam akubyn Bãmmã amijarĕho nhÿ. Kaprĭ ra:xkam ajte akubyn prĭne kum amikôt amijarĕho nhÿ. Kaprĭ raxkam ne ô djâkam tokry. Tokry raxkam ne arÿm 'ã ngô pepeko dja. Djãm 'ã ngô? Kati, kamrô ne prôto dja, pykakam totoko dja.

<sup>45</sup> Ne Bãmmã amijarĕho nhÿn kam kum amijarĕnh pan kãjmã djan kam akubyn kôt ba djwÿnh'ÿr tĕ. Nhym kôt ba djwÿnh arek ôto kumex. Kaprĭ raxkam arek ôto kumex.

<sup>46</sup> Nhym kam arkum,

—Mÿkam ne gar arek anhôto akumex? On ar kãjmã djan Metĭndjwÿnhmã amijo a'wÿ. Gĕdja me te ar ajaxwe'ã ar amã apnĕ,

gar mekôt ajaxwe kêt. Ja kadjy dja gar kum amijo a'wỳ, ane.

*Me kute Jejuo tỳm.*

*Mat 26.47; Mak 14.43; Dju r 18.3*

<sup>47</sup> Arkum kabêno âm rã'ã nhyr arỳm me kute pa 'amỳnh ne o mōrmã arỳm 'ỳr bōx. Me krãptĩ ne me arỳm 'ỳr bōx. Djuda, Jeju kôt ba djwỳnhbê 12ja'õ ne 'ỳr meo mō. Ne kam kute o tỳm ne kute ine kaôrmã 'ỳr tẽ.

<sup>48</sup> Nhyr kam kum,

—Djuda, djãm aje inhine kaôro atēm pro aje memã ijo atỳmmã ne ga iwỳr tẽ? Nã gãm ajêx ne ije amijo inhĩ ne me awỳr ibōxja ijo anhōbikwan inhine kaô, ane.

<sup>49</sup> Nhyr kam Jeju nhõ àpênh bu'ã ku'êja arỳm kuma, tu amikam kuman kum,

—Bênjadwỳr, djãm ar ije kãxdjwa kajgoo me ja parmã? ane. <sup>50</sup> Nhyr ate ar'õ me'õjamã akabê, me kadjy Metĩndjwỳnh mar djwỳnh nhõ bênjadwỳr rax nhõ àpênh ja'õmã akabên toxy anen arỳm amak nhikjê ta, amak djubôk ne kuta. Nãm tu amak toprik ane nhyr wãnh amak tỳm.

<sup>51</sup> Nhyr kam Jeju,

—Aje, anũ, arek ar dja, ane. Ne kam amak djãm djã kupê nhyr arỳm ajte amak mex ne.

<sup>52</sup> Nhyr kam me kute pa 'amỳnhmã 'ỳr mōrjamã, me kadjy Metĩndjwỳnh mar djwỳnh nhõ bênjadwỳrmẽ Metĩndjwỳnh nhõ kikretikam krãkamngōnhmẽ mebêngêttemã,

—Ije djãm idjãkĩnhĩ ne ga me aje ibĩnmã iwỳr anhõ kômẽ anhõ kãxdjwa kajgomẽ o mō? ane. <sup>53</sup> Myt kunĩkôt ne ba me akam ar Metĩndjwỳnh nhõ kikretikam iba ga me kam kam ijo atỳm kêt ne. Nã, mrãmri me anhõ akati ne ja. Me ajaxwe rax ne kute akamãt kô tyk pyrãk. Nãm prĩne me bajo ajkamuw. Kam ne ga me aje ipa 'amỳnhmã iwỳr mō, ane.

*Pedru aminêje 'êx.*

*Mat 26.69; Mak 14.66; Dju r 18.15*

<sup>54</sup> Nãm ã memã ane nhyr kam me pa 'amỳn kam me kadjy Metĩndjwỳnh mar djwỳnh nhõ bênjadwỳr rax nhõ kikre'ỳr o mō. 'Ỳr o mō nhyr kam Pedru mekôt tẽ, nĩjar memã kre rax ne tẽ. <sup>55</sup> Nhyr me arỳm Jejuo mōn o bōx, me kute pa 'amỳnhja ne me arỳm o mōn o bōx ne kam kikre nhipôkri kênh ngrire jakam amim kuton

kam 'ã ànhũho kumex. Nhyr kam Pedru mekôt tẽn 'ỳr wadjàn kam me ikô'ã nhỹ. <sup>56</sup> Nhyr bênjadwỳr nhõ àpênh kurererja kuwy pōkmã omũ ne kam 'ỳr tẽn kam no tyn djan kam memã,

—Tãwãdjwỳ ne arkôt ba, ane.

<sup>57</sup> Nhyr kam Pedru aminêje 'êx ne kum, —Kati, arkati. Ije tãwã pumũnh kêt, ane.

<sup>58</sup> Nhyr adjynkêt ne me'õ mydjwỳ 'ỳr bōx ne omũn kam kum,

—Gadjwỳ ne ga abê õ àpênh'õ, ane.

Nhyr kam kum,

—Kati, arkati. Ibê õ àpênh kêtê, ane.

<sup>59</sup> Nhyr 'ãtũm nhyr ajte me'õ myjadwỳ 'ỳr bōx ne 'ã no tỳx mex ne 'ãno djan memã arẽn memã,

—Mrãmri ne tãwãdjwỳ arkôt ba. Kubê pykabê Garrêja kra'õ, ane.

<sup>60</sup> Nhyr kam kum,

—Kati, ije akabênwã mar kêt. Ije akabênwã mar prãm kêtumrêx, ane. Ne kam kabêno ỳr rã'ã nhyr 'ã ôkrênê'ãnh kã.

<sup>61</sup> Nhyr kam Bênjadwỳr 'ỳr akêx ne omũ. Nãm ar aktã aben pumũ. Nhyr kam arỳm Pedru Bênjadwỳr kabên ma. Kute anhỹr djwỳnhram kum kabên jarênh ja ne arỳm kuma. Kute kum,

—Akamãt ja tãmkam ôkrênê'ãnh kãr kêttri dja ga aminêje ajêxo amãnhkrut ne ikjê kêt ne memã, “Kati, ije tãwã pumũnh kêt”, anhỹr ja ne arỳm kuma. <sup>62</sup> Ne kam katon mu:w. Kaprĩ raxkam ne mỳr rax ne.

*Krãkamngōnh kute Jeju'ã bẽno bikêho âm.*

*Mat 26.67; Mak 14.65*

<sup>63</sup> Nhyr me kute Jeju pumũho ku'êja kam bẽno ajkên tak ne. <sup>64</sup> Nãm me no'ã pron kam apỳnh tak ne kam kum,

—Aj, goja me'õ kute akurwanhjakôt omũ. Goja tu aman me imã arẽ, ane. <sup>65</sup> Nãm me prĩ:ne o ajkê. Nãm me aprỳ:o kumex.

*Me rũnh kute Jeju axwe jabej kukjêr.*

*Mat 26.57; Mak 14.55; Dju r 18.12*

<sup>66</sup> Nhyr arỳm akati nhyr kam me bẽ idjaer bêngêtmẽ me kadjy Metĩndjwỳnh mar djwỳnh nhõ bênjadwỳrmẽ me kute Mōjdjê kukràdjã mar djwỳnhmẽ, me ta ne me aben pydjĩn amiwỳr Jeju 'uw. Nhyr kam me me'ỳr Jejuo mōn o bōx ne me kabem kudja.

<sup>67</sup> Me kabem kudja nhyr me kum,

—Goja on me imã amijarê. Djãm abê me babê idjaer nhõ Bënjadjwýrbê kumkati, nêñ? Goja on me imã amijarê, ane.

Nhym kam memã,

—Got ba ren me amã amijarê ga ren me amim imar kêtumrêx ne. <sup>68</sup> Ba ren badjwý me akukij ga ren me imã arênh kêt ne. <sup>69</sup> Nhym bep jakam gêdja ba on Metĩndjwýnh pymati djubôk'ãnh nhỹ. Ba ije amijo inhĩ ne ibënjadjwýr raxkam gêdja ba ubôk'ãnh nhỹ, ane.

<sup>70</sup> Nhym kam me kunĩ kukij ne kum,

—Djãm abê Metĩndjwýnh kra? ane.

Nhym kam memã,

—Ãã, kôt ne ga me aje arênhwã, ane.

<sup>71</sup> Nhym kam me abenmã,

—Bir be, arým ta kute amijo Metĩndjwýnhja ma. Mýj kadjy dja gu me ajte me'odjwý kukij? Kati, ta ne arým amijarê gu me arým kuma, ane.

## 23

*Piratu kute Jeju axwe jabej kukjêr.*

*Mat 27.1; Mak 15.1; Dju r 18.28*

<sup>1</sup> Nhym kam me rũnhja eku:n kãjmã djan mũjar Piratu'ýr o mõn o bõx. <sup>2</sup> O bõx ne kam Piratumã Jeju kãmex jarên kum,

—Ë, tãmja ne axwere. Tãwã ne ar me ibê idjaer noo biknoro ba. Ba meo tým ne awýr o mõ. Nãm we me imã, “Kwãrĩk wãnh ga me bënjadjwýr raxbê Xedja me kunĩmã ýr djwýnhmã pi'ok kaprĩ nhõr kêt”, ane. Ibê me anhõ Bënjadjwýrbê kumkatikam gêdja ba ipymao ar me apytàn me ajo iba, ane. Nãm we ã me inoo biknoro ane, ane. Nãm ã me Jejuo 'êxo ane.

<sup>3</sup> Nhym kam Piratu Jejumã,

—Djãm abê mebê idjaer nhõ bënjadjwýr rax? ane.

Nhym kam kum,

—Ãã, kôt ne ga me aje arênhwã, ane.

<sup>4</sup> Nhym kam Piratu me kadjy Metĩndjwýnh mar djwýnh nhõ bënjadjwýrmê me krãptĩmã,

—Nã bãm te kukij. Ajmã kute kêt. Axwe kêtumrêx, ane.

<sup>5</sup> Nhym kam me mã kum 'ã apnê. Kum 'ã apnê:n kum,

—Kati, nãm prĩne aben kadjy memã 'êx mõ. Nãm Garrêja kurũm tẽn Djudêjakam

bõx ne aben kadjy memã 'êx. Nãm krĩ 'okam bõx ne aben kadjy memã 'êx. Ne ajte amũ krĩ 'okam bõx ne aben kadjy memã 'êx. Ne ajte amũ 'okam bõx ne aben kadjy memã 'êx ne ajte amũ 'okam bõx ne aben kadjy memã 'êx. Ne jakam arým bõx, ane.

*Erodji kute Jeju axwe jabej kukjêr.*

<sup>6</sup> Nhym Piratu me kabên ja man kam abej me kukij ne memã,

—Djãm Garrêjakam me kra'õ? ane.

<sup>7</sup> Nhym me kum “Ãã” ane. Garrêjakam me ja nhõ bënjadjwýr nhidjibê ne Erodji. Ajbir Djeruxarêkam bõx. Kam ne Piratu Erodji'ýr Jeju jano, Erodji kute Piratu kudjwa Jeju kukjêrmã. Jejubê Garrêja krakam ne kum ano. Nhym me arým 'ýr o bõx. <sup>8</sup> Nhym Erodji Jeju pumũn kam kĩnhkumrêx ne. Amrêbê ne Jeju'ã ujarênh man kam te kute tãri omũnh prãme. Nhym kam me arým 'ýr Jejuo mõn o bõx nhym kam kĩnhkumrêx ne. Kute kum mýjja pumũnh kêt'õ nhipêx nhym kute omũnhmã ne bit 'ã kamnhĩx ne. <sup>9</sup> Ne kam te Jeju kukjêr krãptĩ ne. Nhym mrãmri bën kêt mex ne dja.

<sup>10</sup> Nhym bep me kadjy Metĩndjwýnh mar djwýnh nhõ bënjadjwýrmê Mõjdjê kukràdjã mar djwýnhmê ne me Jeju kurĩ ku'ên kam mã kum arê. Kum kàtãm jarênh ku'ê. Djã nãm me akrãnmã kum arê? Kati, nãm me tu Erodjimã Jeju jarênhõ bê: ne. <sup>11</sup> Nhym kam Erodji õ krãkamngõnhremê ro'ã Jeju japrý ne 'ã keket ne kam kum me bënjadjwýr kã jadjàn kam akubyn ajte Piratu'ýr ano nhym me ajte akubyn 'ýr o mõn o bõx.

<sup>12</sup> Nhym Erodjimê Piratu ar myt tãmkam abeno õbikwa. Jejukôt ne ar abeno õbikwa. Amrêbê ne arkum aben kurê ne kam ajbir arým Jejukôt abeno õbikwa. Piratu kute Erodji'ýr Jeju janorkam ne ar arým abeno õbikwa.

*Piratu kute Jeju bĩn kadjy memã kanga.*

*Mat 27.15; Mak 15.6; Dju r 18.39*

<sup>13</sup> Nhym me akubyn Piratu'ýr Jejuo mõn o bõx. O bõx nhym kam Piratu me kadjy Metĩndjwýnh mar djwýnh nhõ bënjadjwýrmê me kute meo ba djwýnhmê me kàtãmmê meo akprõn kam memã,

<sup>14</sup> —Ë, tãm ne ga me iwýr o mõn o bõx ne kam imã, “Tãmja ne ar me inoo biknoro



ba”, ane. Ba kam te kukij, te me anhipôkri kukij, nhym ajmã kute kêtukumrêx. Mexkumrêx. Nã gãm me ajêx ne arîk kàmex jarê. <sup>15</sup> Nhym Erodjidjwý te ikudjwa kukij nhym mexkumrêx. Ga kute ajte akubyn me bawýr anorja pumũ. Be, mýj kadjy dja ba kubĩ? Ije bñn prãm kêtê. <sup>16</sup> Kam dja ba tu kaprêprêk kajgon ano, ane.

<sup>17-19</sup> Nhym kam me kunĩ axikôt kum 'ã àpnênho kumex. Ne kum,

—Kati, on o tẽn abñn me imã Baraba bõm amẽ, ane.

Nãm Piratu me kute Metĩndjwýnh me irôbê mrãnh nhõ akati mar kunĩkôt me pýnh ne bõm me rênho tẽ. Me axwe nhym kute mebê ijêja ne bõm me rênho tẽ. Baraba ne axwekumrêx. Nãm me bẽnjadjwýr kadjy memã 'êx nhym me me bẽnjadjwýr'ýr prõt ne, nhym ta adjwýnhdjwý me kwý pa. Tãm ne Piratu kubê ijê. 'Ã ne me ku'uw ne kum,

—On rũm tãwã o tẽn abñn pãnh me imã Baraba kaba, ane.

<sup>20</sup> Nhym Piratu te kute Jejumã irer prãme. Ne kadjy ajte memã kabẽn ne memã,

—Ba kum inhiren ano, ane.

<sup>21</sup> Nhym me kãj bê: 'ã kum apnên kum,

—On pĩte'y'ã anhô. On pĩte'y'ã anhô, anhýro kumex.

<sup>22</sup> Nhym kam ajte memã,

—Tô mýkam? Mã ne kute dja ba kubĩ? Djãm axwe? Nã bãm te kukij nhym axwe kêtukumrêx. Kam ne ba ije bñn prãm kêtê. Dja ba tu kaprêprêk kajgon kam akubyn ano, ane. Nãm te memã anen te memã anen kam arým ajte te memã ane.

<sup>23</sup> Nhym me mã 'ã kum apnê. Nãm me kãj bê kum 'ã àpnênho kumex ne kum,

—On pĩte'y'ã anhô, on pĩte'y'ã anhô, ane. Nãm me týxo Piratu jakrenh mex ne prĩne kabẽnno katy. <sup>24</sup> Nhym kam me umaje “Ã” anen tu memã kanga. <sup>25</sup> Nhym me'õ kute bẽnjadjwýr kadjy memã 'êx ne ta kute me kwý parja Piratu kaba. Me kute Piratumã “Me imã Baraba bõm amẽ”, anhýr ja ne kaban anon kam pãnh memã Jeju kanga, krãkamngônhre kute Jeju bñnmã memã kanga. Me kum kurêkam ne me 'ã Piratumã apnê, kute bñnmã. Nãm me kum 'ã àpnênho katyk mex ne. Nhym kam arým me kute bñnmã memã kanga.

*Me kute pĩte'y'ã Jeju nhôr.*

*Mat 27.32; Mak 15.21; Dju r 19.17*

<sup>26</sup> Nhym kam krãkamngônhre arým o mõ. O mõ nhym kam me'õja tẽn me kajpa. Me'õ nhidjibê Ximão, pykabê Xireni kra'õ. Arwã kurũm ne tẽn me kajpa nhym me pa 'amýn ikreikam pĩte'y djin kam kum,

—Kum amý, ane.

Nhym kam kum kumýn o Jeju katẽn o mõ. <sup>27</sup> Nhym me itepato kôt mõ. Nhym me niredjwý kôt mõ. Mõrkôt abej mýr mõ, kãj bê abej àmra mõ. <sup>28</sup> Nhym Jeju me'ýr akêx ne memã,

—Ê, àpnhĩre ar, Djeruxarêkam me kra, kwãrîk wãnh ga me ijabej amýr kêt. Bep me akra jabejbit dja ga me muw, ne ga amijabej muw. <sup>29</sup> Dja ĩ meo bikênh djã nhõ akati me awýr bõx. Dja me awýr bõx nhym me abenmã, “Ý, me nire kra kêtja ne me mrãmri kĩnhkumrêx. Ne me kute kra jamýnh kêtjwý kĩnhkumrêx. Ne me kute krao kaôr kêtjwý kĩnhkumrêx”, ane. Me jabit dja me mã prõt ne kato.

<sup>30</sup> “Ne ajte kamã tokry pymaje krãnhmã, ‘On amrê me inhiby arôrök ne me inhimex’, ane.

Ne kam ajte krãnh kryre jamã,

‘On amrê me inhiby arôrök ne me ijo apdju’, ane.”

<sup>31</sup> Ga me kute ã pĩ ngoo anhýrja pumũ. Godja arým pĩ ngrã nhym mã dja me ajte on? Ba ne ba ajmã ikute kêtukumrêx ne itokry rax ne. Nhym bep mrãmri me axweja, mã dja Metĩndjwýnh me on, Djeruxarêkam me ajaxweja on? ane. Nãm ã Jeju mýjja kute meo bikênh djã nhõ akati djwýnhhrãm ã memã arênho anen ta amijaxwe kêt'ã pĩ ngo jakren me axwe'ã pĩ ngrã jakre.

<sup>32</sup> Nhym me amẽ ar kâtãmja Jejukôt aro tẽ, me kute pĩ'ã Jejukôt ar nhôr kadjy. Ar kute mekam ar amikrão baja ne me kute Jejumẽ ro'ã ar parmã aro mõ. <sup>33</sup> Aro mõn aro bõx. Krãnhbê me krã'i'ýr ne me Jeju aro bõx. Aro bõx ne kam apýnh pĩte'y'ã ar adjuw. Ne kam ar ikramã kãxirãxo iten ar parjamo iten kam kãjmã krekam ar umjuw. Nhym arým ar arij. Jeju ôkredjãkôt wajêt nhym aktã ar axweja ijên o wajêt.

<sup>34</sup> Nhym kam Jeju me nêje Bãmã kabẽn ne,

—Djünwã, dja ga tu imar krãtan mekam angryk kêt. Me kute ibĩnja dja ga tu mar krãta. Me kute ibĩnja ne me kute gu bakukràdjã mar kêtukumrêx, ane.

Nhym kam me abenmã kàja ngrã. Nãm me apỹnh kute kà jamỹnh kadjy kên kryre rê. Me kute ari kên kryre rênkhôt ne me amijo kubêkã pytãn amý.

<sup>35</sup> Nhym me kunĩ no ma mõn Jeju pumũho dja. Nhym me bẽnjadjwýrdjwý aprýo dja. Nãm me abenmã,

—Amũbit ne me utã. Goja gê ta amiptã. Goja gê Metĩndjwýnh kute anor nhym kubê me banhõ Bẽnjadjwýrbê kumkatikumrêx jabej goja on amiptã, Metĩndjwýnh kute amijo utãr jabej goja on amiptã, anhỹro kumex.

<sup>36-37</sup> Nhym me krãkamngõnhredjwý 'ã keket ne aprýo kumex. Nãm me 'ýr bõx ne kum pidjõ kangõ kadjã bẽn kum,

—Ajrã, goja on amiptã. Goja abê mebê idjaer nhõ bẽnjadjwýr rax jabej goja on amiptã, anhỹro dja. <sup>38</sup> Ne kam ajte Jeju nhimõkri pi'ók no'ók nhípêx ne kunhõ. Me kute omũnh ne kam kute,

—Mebê idjaer nhõ bẽnjadjwýr rax ne ja, anhỹr kadjy ne me imõkri kunhõ. <sup>39</sup> Nhym kam me kute Jeju nhikõ'ã amê ar axwe nhõrja ikjêja Jeju japrýo wajêt. Ne kum,

—Goja abê mebê idjaer nhõ Bẽnjadjwýrbê kumkatikumrêx ne goja on amiptãn ar badjwý ar ipytã, ane.

<sup>40</sup> Nhym kam ikjêja kum bẽn tỳx ne kum,

—Kwãrĩk wãnh. Birãm amã Metĩndjwýnh pyma kêtukumrêx. Me kute gwaj bajanhõr ga arým gadjwý atyk 'ýrja pumũ ne kam ajmãn amã Metĩndjwýnh pyma kêt mex ne.

<sup>41</sup> Mrãmri ne me kute arým gu babĩnmã arým ã gu bajo ane. Gu ba ne gu ar mekam amikrào baba nhym arým me kute pãnh gu babĩnmã. Nhym bep tãmja ne kute ajmã mýjja 'õo kêtukumrêx, ane. <sup>42</sup> Ne kam ajte Jejumã,

—Jeju, gora anhõ me ja kunĩ kadjy abẽnjadjwýr ne aje ar meo abakam gora badjwý ima, ibiknor kêt kadjy ima, ane.

<sup>43</sup> Nhym kam Jeju kum,

—Myt ja tãmkam dja gu baro'ã kàjkwakam Ibãm nhõ pyka'ýr bõx. Mrãmri ne ba arým amã ikabên pydjĩn arê, ane.

<sup>44-45</sup> Nhym arým kàjkwa nhípõkri myt nhỹ. Nhym kam tu akamãt kô tyk ne. Pyka kunĩkôt me'ã akamãt kô tyk ne, arngro kêtukumrêx ne. Nãm me'ã akamãt kô tykkam myt kyn kyn kyn ky: nhym 3 orakam, amykrykambit arým ajte kàjkwa no pôt ne. Arým ajte myt kato. Nhym arým Metĩndjwýnh nhõ kikreti kadjwýnhbê kubêkãtija ta amikadjõ. Nãm kõnh e ty:k ane. <sup>46</sup> Nhym kam Jeju Bãmã amijarê. Kãj bê kum amijo akij ne kum,

—Djünwã, ba wãm awýr ikarõ jano, ane.

Nãm ã kum anen kum amikarõ janon ate ty. <sup>47</sup> Nhym krãkamngõnhre krãptĩbê 100 nhõ bẽnjadjwýr Jeju tykkôt omũn kam Metĩndjwýnhmã rax jarê, ne,

—Mrãmri ne djãm tãmja axwe kêtê. Mexkumrêx, ane.

<sup>48</sup> Nhym me itepato kute Jeju tykkôt omũnhmã mõrja arým mýjja kunĩ pumũn kam akubyn mõn kaprĩkam aminhõkôt titiko mõ, ùrkwã'ýr binhirênh mõ. <sup>49</sup> Nhym bep õbikwa kunĩmê, Garrêja kurũm me nire kôt mõrjamê, me tãm ne me arek omũho dja, kum kre rax ne omũho dja.

*Me kute Jeju jadjãr.*

*Mat 27.57; Mak 15.42; Dju r 19.38*

<sup>50-52</sup> Nhym kam me'õ nhidjibê Jõdje ne Piratu'ýr tẽ. Mebê idjaer nhõ krĩ'õ nhidjibê Armatêkam kra'õ. Nãm me rũnh bikprõnh djãkam mekôt mrã. Kabên mexkumrêx, katãt ne mrã. Nhym me kute Jeju bĩnmã amim 'ã karõo nhỹ nhym kam te nêje me kukrà. Atemã ne kabên. Me ja kabênkôt kabên kêtê. Nãm amim Metĩndjwýnh kamnhĩx ne. Metĩndjwýnh bõx ne me kadjy bẽnjadjwýr ne kute ar meo bamã ja ne amim kamnhĩx ne. Tãm ne Piratu'ýr tẽn bõx ne Jeju'ã kuma. Kute Jejuo rwýk ne adjãrmã ne 'ýr tẽn bõx ne 'ã kuma.

<sup>53</sup> Nhym kam kum "Ã" anen kam kum kanga. Nhym kam pĩte'y'ýr tẽn kam Jejuo ruw, kute adjãrmã. Ne kam kadjy kubêkã mexja byn kam prĩne o kupun kam kênkrekam adjã. Me kute kênkre kakrwýnh nyjakam adjã. Kraxje me kute kam me'õ jadjãr kêtukumrêx. Kam ne adjã. <sup>54</sup> Pi'ók rãrãr nêje akati jakam ne adjã. Akati jakam ne me no katon õ mýjja kupênho kumex.

Pi'ók ràràr kètri ò mýjja kupênho kumex. Akati jakam ne adjà.

<sup>55-56</sup> Nhyim me nire Garrêja kurũm Jeju kôt mōrja mekôt mōn omũ. Nãm me kute kēnkrekam adjàrkôt omũn kam akubyn ũrkwãmã mōn bōx. Bōx ne kam me kudjy djãmē pidjy nhĩnmē kubyn abenkam o akàn kam kadjy kudji. Nhyim pi'ók ràràr nhyim arým me nire tyk djà kēto kumex, Mōjdjē kukràdjàkôt ne me pi'ók ràràrkam tyk djà kēto kumex.

## 24

*Jeju akubyn tĩn.*

*Mat 28.1; Mak 16.1; Dju r 20.1*

<sup>1</sup> Nhyim arým pi'ók kamrèk. Nhyim ar nire kry:ràm kô rãã kute me kudjy djà abenkam o birēnh ne irja byn 'yr o mō, kēnkre'yr o mō. Ar kute kēnkrekam adjàrja'yr o mō. <sup>2</sup> Nãm ar bit Jeju'yr o mō, ar kute o kudjymã ne ar bit 'yr o mōr kajgo. Nhyim arým me kute kēnpotio 'ã ijêja arým amijã kutan kre jakà'ã amidjan dja. Me'õ ne o mōn kudja nhyim dja. <sup>3</sup> Nhyim ar nireja 'yr mōn kēnkremã wangij ne kam te Jeju nōr djà kamũ nhyim nōr kêt ne.

<sup>4</sup> Nhyim ar te kute mýjja'õ marmã o dja nhyim adjynkêt ne ar my amãnhkrutja ar aèrbê kato. Tu ar nokam kato. Ò kubêkà jadjê:nh ne ar kuri dja. <sup>5</sup> Nhyim ar te tĩn prãme ne rôròk ne ponh ne ikwã. Nhyim kam arkum,

—Mýkam ne gar me tykkam me'õ akubyn tĩnja jabej mō? <sup>6-7</sup> Ë, ar nōr kêtja pumũ. Arým ne akubyn tĩn ne kato. Djã ne gar kabēnja ma. Amrèbê ne ar amã, Garrêjakam ar ba rããkam ar amã, “Gédja me me axwemã ikanga. Ba ije amijo inhĩ dja me me axwemã ikanga nhyim me pĩte'y'ã inhô ba ty ne ijã akati amãnhkrut ne ikjêkêt ne akubyn itĩn ne”, ane, ã ar amã ane. ã ar amã ane gar ajte abej mō, ane. Nãm ã kadjy mrãnh djwýnh arkum ane.

<sup>8-10</sup> Nhyim kam ar nire arým Jeju kabēn ja ma. Kabēn ja man kam akubyn kēnkre kurũm mō. Mōn bōx ne kam Jeju kôt ba djwýnhmã mýjja kunĩ jarē. Kôt ba djwýnhbê 11mē òbikwaja kunĩmã mýjja jarē. Marij Madarenamē Djôwanãmē Xijagu nãbê Marijmē ar ro'ã mōrjamē. Ar ja ne Jeju'yr mōn te

nōr djà kaprãn bōx ne memã arē, Jeju kute tũmrãm ar anorjamã arē. <sup>11</sup> Nhyim bep nãm me ate krã. Nãm me o kabēn kajgon kam tu ate krãn amim kamnhĩx kêt ne. <sup>12</sup> Nhyim bep Pedrubit ne ekrux ne kãjmã djan kam kēnkre'yr prôt ne 'yr bōx ne kam te 'ã ibôn ýmkjêro nō. Te abej rĩto nō. Nhyim kupu djàbit ate nō. Nhyim omũn kam akubyn tē, te kute amikam mýjja'õ marmã umar tē. Tēn ũrkwãkam bōx.

*Imau'yr Jejukôt ba djwýnh tē nhyim ar nokam amirít.*

*Mak 16.12*

<sup>13</sup> Nhyim myt tãmkam kôt ba djwýnh amãnhkrut ne krĩ ngrire 'õ'yr tē. Krĩ ngrirebê Imau'yr ne ar tē. Djãm mũjar got. Tãm ne ja. Djeruxarē kurũm pry'ã akrebê 11 kiometu 'yr ne ar tē. <sup>14</sup> Ne kam abenmã kabēn tē, abenmã Jeju bĩnmē mýjja ja kunĩ jarēnh tē. <sup>15</sup> Abenmã arēnh tēm rãã nhyim Jeju arkôt bōx. Arkôt bōx ne arým ro'ã mō. <sup>16</sup> Nãm ar omũnh kajgo. Bãrãm mýjja ne ar no'ã nhyim ar te kute omũnhmã. Jeju ta ne aminéje ar no nhity ne kam arkum,

<sup>17</sup> —Ije tô mýj ne gar abenmã arēnh tē? ane.

Nãm arkum kabēn nhyim ar tēm tỳx katikôt djan kam kaprĩre, nokre kaprĩre ne dja. <sup>18</sup> Nhyim kam ikjêja idjibê Kreôpa kum,

—Ije birãm apydji ne ga aje mýjja mar kêt, mýjja ajbir katorja mar kêt ne. Djeruxarèkam me kunĩ ne me kuma, ane.

<sup>19</sup> Nhyim kam kum,

—Ije nhyim mýj nã? Nhyim mýj ne gar abenmã arēnh tē?

Nhyim amē ar ja kum,

—Ije tô gêt Nadjarekam me kra'õ nhidjibê Jeju. Metĩndjwýnh kabēn jarēnh djwýnh'õ. Kabēn mexkumrèx. Nãm katàt memã Metĩndjwýnh kukràdjà'ã ujarēnh mexkumrèx ne. Ne ar memã mýjja pumũnh kêt kwý 'yro ba. Mýjja kwý nhípèx mexkumrèxo ba. Kam ne Metĩndjwýnh kam kĩnhkumrèx nhyim me kàtàmdjwý kam kĩnhkumrèx.

<sup>20</sup> Nhyim bep me kadjy Metĩndjwýnh mar djwýnh nhõ bēnjadjwýrmē me banhõ bēnjadjwýrmē, me ja ne me me kute bĩnmã memã kanga nhyim me pĩte'ykam kubĩ. <sup>21</sup> Ý, kute me bakurê djwýnhbê me bapytàrmã,

me babê idjaer pytârmã ne bar bajbit amim kamnhîx ne, nhym arÿm ty. Nãm me arÿm kubî nhym kam arÿm 'ã akati amãnhkrut ne ikjêkêt. <sup>22-23</sup> Nhym ar nire ar ikôt Jejumã àpênh ja ar ijaê. Kry:ràm ne ar kênkre'ÿr môn te abej ne kam akubyn bôx ne kam we ar imã, “Arÿm ne bar mÿj me'ôja pumû. Birãm kadjy mrãnh djwÿnh got bar omû. Nhym ar imã, ‘Jeju ne arÿm akubyn tîn ne’, ane.”

Nã, nãm ã ar nire ar ijaêro ane. <sup>24</sup> Nhym kam ar ijô kênkre'ÿr tèn te kam abej. Nhym kênkre kaprÿ ne. Mrãmri ne ar nire kôt arê. Nhym bep Jeju ta ne amirît kêtumrêx, ane. Æ kum ane. Nãm ã Jeju kôt ba djwÿnh Jejuo atemã me'ôn ã kum kabên ane.

<sup>25</sup> Nhym kam Jeju ta arkum,

—E kum ar ano kêt. Mÿkam ne amrêbê Metîndjwÿnh kabên jarênh djwÿnh me amã mÿjja ja jarê ga me tu amim mar ne amija-makkrekam kunî nhôr ne ar o aba kêt ne. <sup>26</sup> Mrãmri ne arÿm Bênjadjwÿrbê kumkati tokryn arÿm kâjkwamã tēmmã. Amrêbê Metîndjwÿnh kabên jarênh djwÿnh kute arênh kôtô. Dja tokry kumrêx ne kam arÿm bênjadjwÿr rax kadjy kâjkwamã tē, ane.

<sup>27</sup> Ne kam prîne arkum Metîndjwÿnh kabên'ã ujarênh tē, Metîndjwÿnh kabênkam ta amijã ujarênhja ne kunî arkum 'ã ujarênh tē. Nãm Môj djê kumrêx memã 'ã pi'ôk no'ôkmo krax nhym kam atãri Metîndjwÿnh kabên jarênh djwÿnh memã 'ã pi'ôk no'ôk ne. Nhym kam ta amijã ujarênh tēm tãmtã ï amû 'ã ujarênh tē.

<sup>28-29</sup> Nhym kam ar ro'ã mō. Ar krî'ÿr tēmja'ÿr ne ar ro'ã mōn kam arÿm tēpo mō. Nhym kam bit Jeju mã tēmmã. Nhym ar kabêno nê ne kum,

—Jãnh ar inhûrkwãkam ar inhikô'ã nō. Arÿm ne apajrûm myt nhÿ. Arÿm akamàt 'ÿr, ane.

Nhym kam tu arkôt wadjã. <sup>30</sup> Ne kam bit ô kwÿ krēnmã nhÿ. Ô kwÿ krēnmã nhÿn kam djwÿ byn Metîndjwÿnhmã amikînh jarên kam ipôn arkum kungã. <sup>31</sup> Nhym kam ar amak e tyk anen arÿm Jeju ma nhym kam tu ar nokam akuno. <sup>32</sup> Tu ar nokam akuno nhym kam ar abenmã,

—E kum tãm. Ga pry'ã kute gu bamã Metîndjwÿnh kabên'ã pi'ôk no'ôk jarênh

tēm gu bakînh ne bakrãkà 'ô nhÿnhja pumû, ane.

<sup>33-34</sup> Ne ekruX ne kãjmã djan kam ajte akubyn Djeruxarēmã tē, Jeju kôt ba djwÿnh'ÿr tē. Jeju kôt ba djwÿnhbê 11mē ôbikwamē ne ar ro'ã aben pydjîn nhÿ. Nhym kam ar ar ja'ÿr bôx. Bôx nhym ar aben pydjîn ÿr ja ar kutã arkum arê,

—Mrãmri ne arÿm Bênjadjwÿr akubyn tîn ne katon Ximãomã amijo amirît ne, ane. Ar kutã ne ar arkum arê.

<sup>35</sup> Nhym kam ar nînh tēmjadjwÿ amipãnh arkum arê. Pry'ã ar tēm nhym Bênjadjwÿr Jeju arkôt bôx ne ro'ã mōr ne kikrekam ÿr nhym kute djwÿ nhipônne ne 'ã Metîndjwÿnh 'wÿr ne arkum ôr nhym ar kute kôt kum kator ja ar amipãnh arkum arê.

*Kute kôt ba djwÿnhmã aminhî kamjÿr rã bēn.*

*Mat 28.16; Mak 16.14; Dju r 20.19*

<sup>36</sup> Nãm ar arkum arênhô ãm rã'ã nhym Bênjadjwÿr ta ajte tu ar nokam katon ar ipôkri dja. Ar ipôkri djan arkum,

—On ar adjumar mex ne ar aba, ane.

<sup>37</sup> Nhym kam ar tîn prãm ne kum uma: ne. Nãm ar Jejuo me karôn kam kum uma: ne. <sup>38</sup> Nhym kam arkum,

—Mÿkam ne gar amikam atîn prãm ne anhôkre kadjwÿnhbê amim, “Mÿj ne ja? Birãm me karô ne ja”, anhÿro akumex? <sup>39</sup> Ê, ar inhikramē iparkam kàxiràx djwakreja pumû. Ba. Atemã me'ô kêt. Gop ar ikupên ipumû. Djãm ã me karô kute anhÿr? Me karô ã kute anhÿr kêt. Gop ar inhîmē ijija pumû. Djãm me karô ã 'imē ï kute anhÿr got, ane.

<sup>40</sup> Æ arkum anen kam arkum aminhikramē amipar bēn kam ari arkum o apa.

<sup>41</sup> Nhym ar omûn kam kînhkumrêx ne. Ne kam kînhkam amim,

—Ije, djãm tãm? Kati, atemã me'ô. Nàr kon tãmÿ, anhÿro kumex. Nãm ar kînh rax ne kam te kute marmã o dja. Nhym kam Jeju arkum,

—Djori mÿjja ba kukrê, ane.

<sup>42-43</sup> Nhym kam ar kum tep djàr kwÿ tan kungã nhym kubyn kukrê. Nhym ar arek 'ã omûnhô nhÿ.

<sup>44</sup> Nhym kam arkum,

—Ë, ar ikabën ja ma. Ar akam ar ibari ikabën ja gop ar ama. Nã bãm anhÿr djwÿnhrãm ar amã,

“Me kute ijã pi'òk no'òkja kunĩ dja apòx gar omũ. Mòjdjêmẽ me Metĩndjwÿnh kabën jarënh djwÿnh kute ijã pi'òk no'òk nhym me ijã ngrerdjwÿ 'ã pi'òk no'òkja kunĩ dja apòx gar omũ”, ane. Nã bãm ã ar amã ane nhym arÿm apòx gar arÿm omũ, ane.

<sup>45</sup> Nãm ã arkum anen kam arkum Metĩndjwÿnh kabën'ã pi'òk no'òkja kunĩ jarëho tën kadjy ar amak bõ nhym ar kam kuma. <sup>46</sup> Nãm arkum,

—Metĩndjwÿnh kabën'ã pi'òk no'òkkam ne, “Bënjadjwÿrbê kumkati dja tokryn tyn 'ã akati amãnhkrut ne ikjê kêt ne akubyn tĩn ne kato”, ane. <sup>47</sup> Kam dja me pyka kunĩkõt kàj bê 'ã ujarënh mō gē me amim katon wãnh axwemã iren Metĩndjwÿnh'ÿr amijo akēx gē Metĩndjwÿnh me axweo aknon mekam ngryk kêt. Djeruxarēkam dja me memã arënhmo krax ne. Ne kam apÿnh pyka kunĩkõt memã arënhõ ajmã. Nãm ã me anhÿr djwÿnhrãm Metĩndjwÿnh kabënkam 'ã pi'òk no'òko ane. <sup>48</sup> Nhym arÿm apòx gar ga anoo prĩne omũ. <sup>49</sup> Jakam dja ba ar amã Ibãm Karõ jano. Ibãm kute ar amã kabën pydjin arënhja tãm, kute ar amã Amikarõ jarënh tãm dja ba amrē ar amã ano. Gora ar arek krĩraxbê Djeruxarēwākam arek djan kam ama. Adjãm rã'ã gē arÿm ar awÿr bõx. Dja kàjkwa kurũm ar awÿr ruw ne kam ar ajo ban kam ar ajo tÿx gar kam atÿxkumrēx ne kam pyka kunĩkõt 'ã adjujarënh mō, ane. Nãm ã arkum ane.

*Jeju kàjkwamã àbir.*

*Mak 16.19; Kar 1.9*

<sup>50</sup> Ne kam krĩbê Betanhamã aro mōn aro bõx. Djeruxarē kurũm aro mōn aro bõx ne kam aro kĩnh ne. Kute aro kĩnh kadjy ne arkum ikra bën arkum kabën ne. <sup>51</sup> Arkum kabëno ãm rã'ã, tu kabën konenh mebē kàjkwamã wabin kam arÿm kàjkwakam õ pykamã bõx.

<sup>52</sup> Nhym kam kõt ba djwÿnhja kum mex, rax jarënhõ kumex. Ne kam akubyn Djeruxarēmã arÿm mōn bõx. Kĩnhkumrēx ne mōn bõx. <sup>53</sup> Ne kam Metĩndjwÿnh nhõ kikretikam ar mã Metĩndjwÿnhmã mex, rax jarënhõ ba. Mrãmri. Tãm ne ja.

## Djuão memã Jeju'ã ujarēnh rax ne ja.

Djuão ne Jeju'ã ajarē. Jeju kute amijo ĩ ne rwýk kētri Bämmē ro'ã kàjkwakam ar bari kumrēx memã arē. Ne kam atāri Jeju kute amijo amirīt ne kute meo mex ne kute memã amikabēn jarēnh ja'ã ujarēnh tēn àbir djāmā kumē. Nām prīne gwaj bamã Jeju kabēn jarē. Jeju kute kukrādja'ã mýjja jakre kunī ne arē. Me kute tu amim Jeju kamnhīxkumrēx ne kam tīn rā'ã rā'āmā ne gwaj bamã arē.

Djuão mē kamybē Xijagu ne Ar kubē tep pynēnh djwýnh nhym Jeju arkum kabēn nhym ar tu mýjja kunīmā iren Jeju kōt mōn kōt bikamēnh rā'ã nhym Jeju wabi. Nhym memã Jeju jarē nhym me kōt kum kurēn pa 'ābyn apēxtimā kumē. Kamā ne ajte memã *Mýjja Apōx Kētri Kukām 'ã Ujarēnh jadjwý'ã pī'ōk no'ōk* ne.

*Me'ō nhidjibē kabēn'ã ujarēnh kadjy ne ja.*

*Kar 10.36; Pir 2.6; Kor 2.9; Idja 1.2*

<sup>1</sup> Mýjja kunī kētri ne arým me'ō nhidjibē Kabēn. Me'ō nhidjibē Kabēn kàjkwakam Metīndjwýnhmē ro'ã nhýn adjwýnhdjwý kubē Metīndjwýnh. <sup>2</sup> Ta ne mýjja kunī kētri Metīndjwýnhmē ro'ã nhý.

<sup>3</sup> Kubē ne mýjja kunī nhípēx djwýnh. Ne ren kēt nhym ren mýjja katorjadjwý kunī ren kētkumrēx. <sup>4</sup> Me'ō nhidjibē Kabēnjabē ne mýjja kunī tīn djwýnhkumrēx. Ne kam kōt kute mrāmri ne me kurwý djà pyrāk. Ga, ngōnhpōk kute akamàt kō tyk kurwý nhym me kute akamàtkam mýjja kunī pumūnh ne katàt mrānhja pumū. Me jadjwý ne me axwen kam mrānh punu. Nhym kam me memã me'ō nhidjibē Kabēnja'ã ajarē nhym me kwý arým amim tu markumrēx. Kubē mýjja kunī tīn djwýnhkam ne me kwý amim tu markumrēx ne kam arým axwe kēt ne katàt amijo ba. <sup>5</sup> Ga, akamàt kō tykkam me kute mýjja pumūnh kēt ne ba punuja pumū. Me kwý jadjwý ne me axwen ba punu. Nhym kam me memã me'ō nhidjibē Kabēnja'ã ajarē. Memã 'ã ajarē nhym me

axweja kute akamàt kō tykkam baja pyrāk ne me amim mar kēt.

<sup>6</sup> Be, atemã me'ōbē ne Djuão. Ngômã me angjēnh djwýnhja. Metīndjwýnh ne Djuão jano nhym arým kukwakam ujarēnh tē.

<sup>7</sup> Me'ō nhidjibē Kabēnja kute mrāmri ne me kurwý djà pyrāk nhym Djuão arým 'ã ujarēnh tē. Kōt me kunī kute tu amim me'ōbē Kabēnja markumrēx kadjy ne 'ã ujarēnh tē. <sup>8</sup> Be, djām Djuão ta kute me kurwý djà pyrāk? Kati. Kukām kute 'ã ujarēnh kadjy ne tē. <sup>9</sup> Me'ō nhidjibē Kabēnja ne mrāmri kute amijo ba mexkumrēx ne katàt kute memã kabēn jarēnhkumrēx. Nām me kunīmā arēnhkumrēx. Kute mrāmri ne me kurwý djà kute memã pry kurwý pyrāk.

<sup>10</sup> Me'ō nhidjibē Kabēnja ne amikadjy me kunī nhípēx ne tūmrām me'ýr bōx ne me ro'ã ar ba. Ta ne amikadjy me kunī nhípēx. Nām te me ipēx ne te me ro'ã ar ba nhym me kute amim mar kēt. <sup>11</sup> Ō me wýnh'ýr ne bōx nhym ō me wýnh kute o aminhō bēnjadjwýr kēt. <sup>12</sup> Nhym be, me kwý ne me apýnh ĩ djāri arým o aminhō bēnjadjwýrkumrēx. Me ja ne me me'ō nhidjibē Kabēnja'ã amim,

—Mrāmri ne kubē Metīndjwýnh Krakumrēx, ane. Nām me amim anen arým o aminhōkumrēx. Nhym kam arým apýnh me ĩ djāri memã kum,

—Mrāmri ne arým abē Metīndjwýnh krakumrēx, ane. <sup>13</sup> Mebē Metīndjwýnh krakam arým umar djà ny. Umar djà nyo kute mrāmri ne me prīre bixadjwýr nykam umar djà ny pyrāk. Djām me my kute me niremã kra jadjwýrkōt me umar djà ny? Kati. Nār, djām me my kute me nireo ikwā prāmkōt ne me umar djà ny? Kati. Nār, djām me kute kra'ã amim karōkōt me umar djà ny? Kati. Metīndjwýnh kute memã amak bōnhkōt me umar djà ny.

<sup>14</sup> Be, me'ō nhidjibē Kabēnja ne arým amijo ĩ ne me baro'ã ar ba. Nām mexo uman ar ba. Ar ba ne bar prīne mexo umakōt omūnhō iba. Bām puma o ne uma. Kubē Metīndjwýnh Kra djwýnh. Pydji. Kam ne prīne mexo uma. Ta ne tu kum me

kaprĩ:kumrẽx\* ne kabẽn p̃ynh ne arẽn me baro'ã ar ba.

<sup>15</sup> Be, ngômã me angjênh djwýnhbê Djuão ne kàj bê 'ã ajarẽn memã kum,

—Arým ne ba ar amã me'õ ja'ã ajarẽn 'ã ar amã, “Me'õ dja ikôt bôx. Nãm raxo katàt ijakre. Be, mýkam? Bir, amrêbê: ikêtri ne ar ba tũm. Kam ne raxo katàt ijakre”, ane. Arým ne ba ã ar amã ane. Nãm ã Djuão memã ane. <sup>16</sup> Be, mýjja kunĩ ne õ. Ta ne ukaprĩo ukaprĩn õ mýjja kunĩmẽ me bakunĩo djuw mexo nhỹ. <sup>17</sup> Môjdjê ne Metĩndjwýnh kukwakam me kute katàt amijo ba'ã memã karõ. Me axwe kêt kadjy memã karõ. Nhym be, Jeju Kritu ta ne tu kum me kaprĩn kabẽn p̃ynh ne arẽ. <sup>18</sup> Be, djãm me'õ ne kute Metĩndjwýnh pumũnh got? Arkati. Kra djwýnh pydjibit ne kute omũnh. Bãmmẽ ro'ã ne nhỹ. Krabit kute omũnh ne arým memã 'ã ajarẽ.

*Djuão kute memã amijarênh kadjy ne ja.  
Mat 3.1; Mak 1.1; Ruk 3.1*

<sup>19</sup> Be, Djeruxarêkam mebê idjaer rũnhja ne me Djuãomã me kwý jano. Ne me kadjy Metĩndjwýnh mar djwýnh kwý jano. Ne mebê Rewidjwý kwý jano. Me kute abej Djuão kukjêr kadjy ne me me kwýja jano nhym me arým 'ýr mõ. 'Ýr mõ:n kam arým 'ýr bôx ne kum,

—Mýj me ajõ ga nã? Djãm abê me inhõ Bẽnjadjwýrbê kumkatibê Kritu? ane.

<sup>20</sup> Nhym Djuão memã 'êx kêt ne mrãmri tu memã arênhkumrẽx ne memã kum,

—Ba ibê Kritu kêt. Metĩndjwýnh kute ijã me õ Bẽnjadjwýrbê kumkati mênh kêt, ane.

<sup>21</sup> Nhym me kum,

—Be, abê Kritu kêt kam mýj me ajõ ga nã? Djãm abê Metĩndjwýnh kukwakam kabẽn jarênh djwýnh? Djãm abê Erij? ane.

Nhym memã kum, “Kati”, ane.

Nhym me kum,

—Metĩndjwýnh kute me imã kukwakam kabẽn jarênh djwýnh'õ janormã. Djãm ga? ane.

Nhym memã kum, “Kati”, ane.

<sup>22</sup> Nhym me kum,

—Bir, dja ga me imã amijarẽ. Me ije memã akabẽn jarênh kadjy. Me kute awýr

me ijanor ba me ije memã akabẽn jarênh nhym me kute amar kadjy on me imã amijarẽ, ane.

<sup>23</sup> Nhym memã kum,

—Be, amrêbê: ne Metĩndjwýnh kukwakam kabẽn jarênh djwýnhbê Idjaij ijã kabẽn jarẽn me bakukãmãremã kum,

“Kapôt kukritkam dja me'õ kàj bê me akren memã kum,

'Bẽnjadjwýr djwýnh kutêp wãnh ajaxwemã anhiren kum amex. Kute mrãmri ne me kute me bẽnjadjwýr rũnhmã katàt pry jadjwýr nhym mexja pyrãk. Dja gar ã kutêp amexo ane', ane.”

Ba ijã ne Idjaij memã ane, ane. Djuão ã memã ane.

<sup>24</sup> Be, mebê idjaer rũnh kute Djuão'ýr me kwý janorja, kute kukjêrjabê ne mebê pardjêu. <sup>25</sup> Djuão amijã memã ane nhym me kum,

—Be, abê Bẽnjadjwýrbê kumkatibê Kritu kêt ne abê Erij kêt ne abê Metĩndjwýnh kukwakam kabẽn jarênh djwýnh'õ kêt ne kam Metĩndjwýnhmã ngômã me angjêho aba. Mýkam? ane.

<sup>26</sup> Nhym memã kum,

—Bir, ba ikajgo me:xi. Ije Metĩndjwýnhmã me arênh kadjy ba ngômãbit me angjêho iba. Ikajgo nhym be, me'õ ra:x arým bôx. Ne kam ar me banhipôkri ba ga me aje mar kêt. <sup>27</sup> Tãmwã 'ã ne ba me amã, “Me'õ gêdja ikôt bôx. Nãm raxo katàt ijakre”, ane. Bãm te irax ne 'ã inhibôn ije kum parkà 'ãpre bônne o itêm prãmje. Be, ãm irax ba ren arým kum apê. Nhym be, kati. ãm ingrire. Nãm raxo ijakrenh mex ne. Nãm ã Djuão memã ane.

<sup>28</sup> Ngõ raxbê Djodão nhikjê'ã krĩbê Betanhakam ne ã memã ane. Ngômã kute me angjênh djakam ne ã memã ane. Djeruxarê kurũm me bôxjamã ã ane.

*Djuão kute arkum Metĩndjwýnh Kra jakre kadjy ne ja.*

*Mat 3.11; Mak 1.10; Ruk 3.22*

<sup>29</sup> Nhym kam arým akamãt ne akati. Nhym Djuão ar jãnh dja nhym nĩnh Jeju Djuão kutã tẽ. Nhym omũn 'ã memã kum,

—Ota, Metĩndjwýnh nhõ Mrykĩ'ãtomti jabatãnh ny tẽ. Tãm ne Metĩndjwýnh me

\* **1:14** Djãm me ta ne me axwe kêt nhym pãnh kum me kaprĩ Kati. Me ta te axwe kêt mã nhym ta arým tu kum me kaprĩ.

bawÿr ano nhyr me kute bñn nhyr kute me kunĩ jaxweo pãnhmã. <sup>30</sup> Tãmwã 'ã ne ba ar amã, “Me'õ dja ikõt bõx. Nãm raxo katàt ijakre. Be, mÿkam? Bir, amrëbê: ikëtri ar ba tũm. Kam ne raxo katàt ijakre”, ane. <sup>31</sup> Be, djãm ba ne ba amrëbê nokre pumũ? Kati. Ije amrëbê omũnh kêt. Metĩndjwÿnh kabënkõt ije me abê idjaermã Kritu'ã idjujarënh ga me aje marmã. Jabit ne ba kuma. Me aje Kritu marmã ne ba ngômã me ajangjêho iba, ane.

<sup>32-33</sup> Ne kam Djuão ajte memã kum,

—Djãm amrëbê ije nokre pumũnh got? Kati. Metĩndjwÿnh amrëbê ngômã me angjênh'ã imã karõ. Ne kam ije Kritu nokre pumũnh kadjy ta ajte imã, “Be, me'õ'ã dja Ikarõ ruw ne arek kam nhÿ ga omũ. Tãmja ta gëdja memã Ikarõ jano nhyr arÿm meo ba”, ane. Kute imã anhÿr kõt ne ba kam arÿm nokre pumũ. Metĩndjwÿnh Karõ kute tut pyrãk arÿm Jeju'ã ruw ne arek kam nhÿ ba arÿm omũn kam nokre pumũ. <sup>34</sup> Ije nokre pumũnhkam ba arÿm memã arënhkumrëx ne memã kum, “Be, mrãmri tãmwãbê Metĩndjwÿnh Krakumrëx”, ane. Jeju kutã tëm kam Djuão ã memã ane.

*Ar kumrëx kute Jeju kõt amijo bikamënh'ã ujarënh.*

<sup>35-36</sup> Nhyr kam ajte akati nhyr Djuãomë kõt ba djwÿnh amãnhkrut ar Jeju tëm kõt omũho dja nhyr arÿm arkum,

—Ota, Metĩndjwÿnh nhõ Mrykĩ'ãtomti jabatàn ny tẽ, ane. <sup>37</sup> Nhyr Djuãokõt ba djwÿnh ar kuman mã Jeju kõt ajkamë. <sup>38</sup> Nhyr Jeju ar'ÿr akëx nhyr ar kõt tẽ nhyr ar omũn arkum,

—Mÿj nã? Mÿj ne gar amã kñnh ne ikõt tẽ? ane.

Nhyr ar kum,

—Rabi, nhÿnh ne ga anhÿrkwãja? ane. Ujarënh djwÿnh'ã ne ar kum, “Rabi”, ane.

<sup>39</sup> Nãm ar ùrkwã jabej kukij nhyr arkum, —Amrë ar ikõt tẽn omũ, ane.

Nhyr ar arÿm kõt tẽ. Kõt tẽ:n arÿm ùrkwã'ÿr bõx ne arÿm omũ. Ne kam arek kam nhÿ. Arÿm ar'ã amykrykam ar arek kam nhÿ. Nhÿ: nhyr ar'ã akati.

<sup>40</sup> Be, ar amãnhkrut kute Djuão kabën mar ne mã Jeju kõt bikamënhja nhikjê nhidjibê ne Ängre. Ängremë Ximão Pedru

ar axikõt apõx. <sup>41</sup> Nãm ar ÿr'ã akati nhyr Ängre kamy Ximão kumrëx jabej tẽn arÿm kum katon kum,

—Arÿm ne bar Mexijmã ikato, ane. Me õ Bënjadjwÿrbê kumkatibê Kritu'ã ne me kum Mexij jarë.

<sup>42</sup> Nãm Ximãomã anen arÿm Jeju'ÿr o tẽn 'ÿr o bõx ne kum akre. Nhyr kam Jeju arek omũho djan kum,

—Ga abê Ximão. Djõnaj ne adji. Dja ba jakam amã Xepa jarë, ane. Be, kën'ã ne kum Xepa jarë. Me bakabënkam ne kum Pedru jarë.

<sup>43</sup> Nhyr ajte ar'ã akati nhyr Jeju pykabë Garrëja'ÿr tëm mã. Ne 'ÿr tẽm këttri Piripi kumrëxmã katon kum,

—Amrë mã ikõt ajkamë, ane.

<sup>44</sup> Krĩraxbê Bexadakam ne Piripi nhÿrkwã. Kamdjwÿ ne Ängremë Pedru ar ùrkwã. <sup>45</sup> Nãm Jeju Piripimã kabën nhyr kam arÿm tẽn Natanajeumã kum,

—Arÿm ne bar kum ikato. Me bakukãmãre Mõjdjê kute me bakukràdjã'ã pi'òk no'òkkam kute tãmwã'ã pi'òk no'òk. Metĩndjwÿnh kukwakam kabën jarënh djwÿnh 'õdjwÿ ar kute tãmwã'ã pi'òk no'òk. Bar pi'òk kõt kum ikato. Kubê ne Nadjarekam Jeju, ane.

<sup>46</sup> Nhyr Natanajeu kum,

—Tõ nhÿnh, djãm Nadjare kurũm mÿjja mex'õ kator prãm got? ane.

Nhyr kum, “Amrë ikõt tẽn omũ”, ane.

<sup>47</sup> Ne kam arÿm 'ÿr o tẽ. 'ÿr o tẽ:n 'ÿr o bõx. Nhyr Jeju arÿm Natanajeu tëm kõt omũn kum,

—Be, ga abê idjaerkumrëx. Ajëxnhĩ kët kumrëx, ane.

<sup>48</sup> Nhyr Natanajeu kum,

—Je, nhÿnh ne ga arÿm ima? ane.

Nhyr kum,

—Be, Piripi kute iwÿr ajwÿr këttri ne ba arÿm apumũ. Pĩbê pigëre parbê anhÿrri ne ba arÿm apumũ, ane.

<sup>49</sup> Nhyr kum,

—Ujarënh djwÿnh, mrãmri ne abê Metĩndjwÿnh Krakumrëx. Abê mebê idjaer nhõ bënjadjwÿr rax, ane.

<sup>50</sup> Nhyr Jeju kum,

—Ba ije amã, “Pigëre parbê anhÿrri ba arÿm apumũ”, anhÿrbit. Ga kam arÿm



tu amim imarkumrêx. Adjÿm, dja ba ajte mÿjja pumÿnh kêt kwÿ nhipê:x ga omÿ. Mÿjja raxo kute ajbir ije amã arênhja jakrenh mex dja ga omÿ, ane. <sup>51</sup> Ne kam ajte kum,

—Ba ije amijo inhÿ dja ÿ ijã kàjkwa abenbê ajkij nhym Metÿndjwÿnh kadjy mrãnh djwÿnh arÿm ikurÿm wabin ijã axidjuw gar arÿm omÿ. Mrãmri ne ba ar amã ja jarênhkumrêx, ane.

## 2

### *Kute ngôo pidjô kangô.*

<sup>1</sup> Nhym akatin akatin akati nhym onÿj Garrêjakam krÿraxbê Kanakam me'ô myja me'ô nire'ÿr mormã. Nhym me me kukràdjã kôt arÿm ar'ã akuprôn kute abenã ar mênhmã o dja. Nhym Jeju nã me kôt kam ar ba. <sup>2</sup> Nhym me Jejumê kôt ba djwÿnh arkum krã nhym ar arÿm me'ÿr bôx. <sup>3</sup> Me'ÿr bôx nhym uba kangô arÿm mebê apêx. Nhym nãja Jejumã kum,

—Uba kangô ne arÿm mebê apêx, ane.

<sup>4</sup> Nhym kum,

—Adjÿm me'ô nire. Djãm arÿm idjãpênh'ã myt bôx got ga imã arê? ane.

<sup>5</sup> Nhym kam nã kikrekam me ô àpênhmã kum,

—Gêdja ar amã arê gar kabên kôt apê. Nãm ã nã arkum ane.

<sup>6</sup> Nhym kam kêno ngônhbê 6 ne ku'ê. Me kute amiku'ôn h djã kadjy ne ngôn hja. Mebê idjaer kute Metÿndjwÿnhmã amiku'ôn h djã kadjy. Ngôn h kre rÿnh kute ngôn hti pyrãk. Kêno ngôn h pydji kre'ã akrekam ne kute ngôn hkrôkrôkti ipuo amãnhkrut ne amãnhkrut pyrãk.

<sup>7</sup> Nã me àpênh djwÿnhmã kabên nhym kam Jeju arkum, “Ar ngôo ipu”, ane. Nhym kam ar ngô runho tèn o ipu mex ne.

<sup>8</sup> Nhym arkum,

—Ar kwÿ run memã ÿr djwÿnhmã o tẽ, ane.

<sup>9</sup> Nhym arÿm ar kwÿ run memã ÿr djwÿnhmã o tẽ nhym arÿm kakin amim,

—Je tô, nhÿnh ne uba kangôja? ane. Ne kam amiwÿr me'ô my kute ni'ÿr môrja 'uw nhym 'ÿr bôx nhym kum,

<sup>10</sup> —E kum, uba kangô mexkumrêx ne ga o apdjun ajbir o akato. Djãm me kute

ã o anhÿr got? Kati. Me kute abenã me rên h kam ne me kute memã kangô djãnhkumrêxja kumrêxo apôx. Ne me kute o kôm kumexkambit kute memã kãjbê kangô djãnh o apôx. Be, ga ne ga atemã ne ajbir kangô djãnhkumrêx jao akato, ane.

<sup>11</sup> Be, me kute raxmã kator kadjy mÿjja pumÿnh kêt nhipêx krax ne ja. Garrêjakam krÿraxbê Kanakam ne ngô kajgoo uba kangô nhipêx ne o memã amiraxo amirÿt. Nhym kam kôt ba djwÿnh ar kute omÿnhkam tu amim markumrêx.

<sup>12</sup> Nhym kam Jeju krÿraxbê Kapanã'ÿr rwÿk tẽ. Nãmê kamymê kôt ba djwÿnhmê ne ar kôt mō. Ar 'ÿr rwÿk mō:n arÿm 'ÿr bôx. Ne Kapanakam ar ba: nhym ar'ã akati ngrêrebit apêx. Nhym kam ar ajte mō.

*Kute Metÿndjwÿnh nhô kikreti nêje me anor.*

*Mat 21.12; Mak 11.15; Ruk 19.45*

<sup>13</sup> Djeruxarêkam mebê idjaer kute aben pydji 'ÿr. Me kute aben kajmã'ã Metÿndjwÿnh me bê idjaer kukãmãre nhirôbê mrãnhja mar kadjy ne me aben pydji 'ÿr. Nhym Jeju arÿm mekôt 'ÿr tẽ. 'ÿr tẽ:n kam arÿm 'ÿr bôx. <sup>14</sup> Ne kam Metÿndjwÿnh nhô kikretimã wadjã. Nhym me kumex. Me kute pi'ôk kaprÿ pãnh memã mry nhôr djwÿnh kumex. Mry bàri, mrykÿ'ãtomti, tut nhôr djwÿnh kumex. Nhym me kute me ô pi'ôk kaprÿ pãnh memã kikreti nhô pi'ôk kaprÿja nhôr kadjy me kumex. Nhym arÿm me omÿ. <sup>15</sup> Ne kam me kadjy arÿm djudjêdjêo me kaprêprêk djã nhipêx ne arÿm me aêro tèn bôm me kurê. Nãm me kunÿmê me ô mrykÿ'ãtomtimê me ô mry bàri jano. Nãm me kute me ô pi'ôk kaprÿ pãnh memã kikreti nhô pi'ôk kaprÿ nhôr djwÿnhjabê pi'ôk kaprÿ ngràn mebê pÿponh ikjêo rênho tẽ. <sup>16</sup> Ne tut nhôr djwÿnhmã kum,

—Mÿm me mÿjjao akato. Djãm Ibãm nhô kikreo bikên h got ga me kikre kreo àpnu? Kwãrÿk wãnh Ibãm nhô kikrekam mÿjja pãnh abenmã pi'ôk kaprÿ nhôr kêt, ane.

<sup>17</sup> Nhym kôt ba djwÿnh omÿn arÿm pi'ôkkam Metÿndjwÿnh kabên ma. Amrêbê: Kra kute Bãmmã kum, “Dja ba anhô kikre'ã ino tÿx nhym me arÿm ibÿ”,

anhÿr ja ne ar arÿm kuma.

<sup>18</sup> Nhyim kam mebê idjaer rÿnh Jejumã kum,

—Goja on mÿjja pumÿnh kêt'õ nhipêx bar omÿ. Ne kam arÿm abênjadwÿr rax ma. Aje mÿj me'õ kabênkôt kikretikam me anoro abaja ma, ane.

<sup>19</sup> Nhyim memã kum,

—Ã. Dja ba ï me amã mÿjja pumÿnh kêt'õ nhipêx. Dja me Metÿndjwÿnh nhõ kikretija ngrã ba kam akubyn ipêx. Ije ipêxo idjãm'ã gêdja akati amãnhkrut ne ikjêkêt apêx ba arÿm ipêx pa, ane.

<sup>20</sup> Nhyim me kum,

—Tô nhÿnh? Djãm kikre ja nhipêx'ã akati amãnhkrut ne ikjêkêt apêx got? Kati. Be, me kute kikreti ja nhipêxo ku'ê'ã amex krãpti:bê 46 apêx nhyim me arÿm ipêx pa, ane. <sup>21</sup> Be, djãm Metÿndjwÿnh nhõ kikreti wã'ã ne memã kabên jarê? Kati. Aminhÿ'ã ne Metÿndjwÿnh nhõ kikreti jakren memã arê. Be, Jeju nhÿ kute mrãmri ne Metÿndjwÿnh nhõ kikre pyrãk. Dja ty nhyim me adjã. <sup>22</sup> Nhyim kam arÿm akubyn tÿn. Nhyim kôt ba djwÿnh akubyn tÿnkôt omÿn akubyn amijo tÿn arÿm Jeju kabên ja ma. Kute aminhÿ'ã kikreti jakreja man amim,

—Be, mrãmri ne Metÿndjwÿnh amrêbê: pi'ôkkam Jeju kôn timer kabên dji. Mrãmri ne Jeju kabênkumrêx, ane. Dja kôt ba djwÿnh ar kikreti'ã kabên man ã amim ane.

<sup>23</sup> Me krãpti kute aben pydji djã nhõ akatikam ne Jeju Djeruxarêkam ar ba. Me kute aben kajmã'ã Metÿndjwÿnh me bê idjaer kukãmãre nhirôbê mrãnhja mar kadjy ne me aben pydji. Nhyim Jeju mekam ar ban arÿm mÿjja pumÿnh kêt kwÿ nhipêx. Nãm me punu krãpti:o mex nhyim me arÿm omÿ. Me krãpti ne me omÿn arÿm amim,

—Be, mrãmri ne Jejubê Metÿndjwÿnh Krakumrêx. Mrãmri kubê me banhõ Bênjadjwÿrbê kumkatibê Kritukumrêx, ane. <sup>24</sup> Nhyim Jeju arÿm me kabên man amim,

—Be, djãm mrãmri me krãptija kute tu amim imarkumrêx got, ba on meo iba? Kati. Me krãpti kabên kajgo, ane. Be, djãm Jeju kute me mar kêt got? Nãm kute me kunÿ mar. <sup>25</sup> Djãm kute me'ômã, “Mÿj ne me kuma”? anhÿr prãm got? Kati. Kute prÿne

me ôkre kadjwÿnhbê me kabên mar. Kute me kwÿ kabên kajgo mar.

### 3

*Nikodemumã umar djã ny'ã ujarênh.*

<sup>1</sup> Be, me'õ, idjibê Nikodemu. Kubê pardjêu'õ. Me rÿnhmê ro'ã ne mebê idjaer kunÿmã nhÿ. <sup>2</sup> Akamãtkam ne Jeju'ÿr tÿn 'ÿr bôx ne kum,

—Ujarênh djwÿnh, mrãmri ne Metÿndjwÿnh ajano. Aje memã kukràdjã'ã adjujarênh kadjy ajano ga bôx. Arÿm ba me ije amar. Ga ne ga aje mÿjja pumÿnh kêt kwÿ nhipêx, me punu krãpti:o mex. Kam ne ba me arÿm kôt ije amar. Djãm me'õ kajgo kute ã meo anhÿrmã got? Kati. Be, Metÿndjwÿnh amê amijo kajkep. Kam ne ga ã meo ane. Nãm ã Nikodemu Jejumã ane.

<sup>3</sup> Nhyim kum,

—Ë, djãm aje Metÿndjwÿnh rax ne kute meo bajamã akator ne aje marmã ne ga tÿ? Be, ga ne ga te aje kum akatormã. Adjumar djã nykambit. Adjumar djã ny kute me prÿre bixadjwÿr nykam umar djã ny pyrãk. Kambit dja ga kum akaton ama. Mrãmri ne ba amã ja jarênhkumrêx, ane.

<sup>4</sup> Nhyim kum,

—Je, mÿj dja ba idjumar djã ny kadjy on? Djãm arÿm ijabatãnhkam ije inã tikkremã idjãr ne ajte ikator got ba idjumar djã nymã? ane.

<sup>5</sup> Nhyim kum,

—Djãm ja ne ba amã arê? Kati. Dja me amim Metÿndjwÿnh kabên ma. Metÿndjwÿnh kabên ne kute ngô pyrãk. Dja me amim kabên ma nhyim Karô arÿm memã amak bô nhyim me arÿm umar djã ny kute me prÿre bixadjwÿr nykam umar djã ny pyrãk. Nhyim kam Metÿndjwÿnh arÿm amim me utãn ar meo ba. Mrãmri ne ba amã ja jarênhkumrêx.

<sup>6</sup> Djãm me my kute memã kra jadjwÿr nhyim me bixadjwÿrkam Metÿndjwÿnh kôt umar? Kati. Me kôt umar kêtumrêx. Nhyim be, Metÿndjwÿnh Karô kute meo ny kôt ne me mrãmri umar djã nykumrêx ne arÿm kôt umar. <sup>7</sup> Ba amã, “Dja ga adju-mar djã ny kute mrãmri ne me prÿre bixadjwÿr nykam umar djã ny pyrãk”, ane. Ije amã anhÿrkam kwãrik wãnh te aje marmã

ikam ano tyk ne anhÿr kêt. <sup>8</sup> Be, ga, kôkreja pumũ. Djãm ga aje àbêrja kraxkôt omũnh ne nhĩ'ãm prôtôt aje omũnh? Kati. Metĩndjwÿnh Karôdjwÿ djãm aje omũnh? Kati. Kute memã umar djã ny jangjêndjwÿ djãm aje kôt omũnh? Kati. Aje kôt omũnh ne mar kêtumrêx, ane.

<sup>9</sup> Nhyim Nikodemu kum,

—Kon. Bir, mÿj dja kute memã umar djã ny jangjênh on? ane.

<sup>10</sup> Nhyim kum,

—Be, ga ne ga mebê idjaerkam me kukràdjã'ã adjujarênh djwÿnh ne ren aje ikabên mar. Nhyim be, kati. Aje imar kêt, ane. <sup>11</sup> Mrãmri amrêbê ar ije mÿjja mar ne omũnhkumrêx. Ne kam arÿm me amã arê ga me kam aje amim ar imar kêt rã'ã. <sup>12</sup> Pykakam me kukràdjã kôt ba arÿm amã ikabên jarê ga aje amim imar kêt. Ne ba ren kàjkwakam ikukràdjã kôt amã ikabên jarê. Djãm kam ga ren tu amim imarkumrêx? Kati. Ga ren kamdjwÿ aje amim imar kêtumrêx.

<sup>13</sup> Be, nhÿnh ne me'ô kute kàjkwakam kukràdjã marmã 'ÿr wabin 'ÿr bôx? Ne kuman akubyn ruwn arÿm memã arê. Kati. Pykakam me'ô kute kadjy àbir kêtumrêx. Ba ije amijo inhĩbit ne ba arÿm kàjkwa kurũm ruw. Ba ne ba kam inhÿr tũm. Ne kam arÿm me amã arê.

<sup>14</sup> Be, me bakukãmãre Môjdjê kapôt kukritkam kryto kangã karô nhípêx. Ipêx ne pĩ'ã kunhôn arÿm kàjmã kudja. Kudja nhyim kangã karô kÿjrũm pĩ'ã wajêt. Badjwÿ, ije amijo inhĩdjwÿ, dja me pĩ'ã inhô ba arÿm kÿjrũm ã ijêto ane. <sup>15</sup> Mÿj kadjy dja ba kÿjrũm wajêt? Bir, dja me kwÿ ã pÿnhkôt tu amim imarkumrêx ne arÿm Metĩndjwÿnh kôt tĩn ne ar ba rã'ã: rã'ã ne. Ja kadjy dja ba kÿjrũm wajêt. Nãm ã Jeju Nikodemumã ane.

<sup>16</sup> Metĩndjwÿnh ne kum pykakam me kunĩ jabê:. Mÿj ne kum me abê on? Bir, nãm me kadjy Kra djwÿnh jano. Kra pydji jano nhyim arÿm pykamã bôx ne me kadjy ty. Mÿj kadjy ne ty? Bir, dja me kwÿ ã pÿnhkôt tu amim Kra markumrêx nhyim arÿm me utã. Dja me biknor tokry djãkam me biknorbê me utã nhyim kam me Metĩndjwÿnhkôt tĩn ne ar ba rã'ã: rã'ã ne. Ja

kadjy ne ty. Nãm ã Metĩndjwÿnh kum me kunĩ jabêo ane.

<sup>17</sup> Mÿj kadjy ne Metĩndjwÿnh pykamã Kra jano? Djãm kute memã axwe pãnh jarênh nhyim me me biknor tokry djãkam biknor kadjy? Kati. Kute kubê me kunĩ pytàrmã ne ano. <sup>18</sup> Be, me kute arÿm tu amim Kra markumrêxja Metĩndjwÿnh kute memã axwe pãnh jarênh kêtumrêx nhyim me me biknor kadjy kêtumrêx. Nhyim be, me kute amim mar prãm kêtjamã ne arÿm kute memã axwe pãnh jarênhkumrêx. Arÿm kute me'ã amim,

—Tãmwã dja axwe pãnh me biknor tokry djãkam akuno, anhÿrkumrêx. Mÿkam? Bir, Metĩndjwÿnh Kra djwÿnh me kute amim mar prãm kêtumrêx dja me arÿm akuno.

<sup>19</sup> Mÿj ne Metĩndjwÿnh amim arên kam arÿm memã me biknor tokry djãkam biknor jarê? Bir, nãm amim,

—Ba arÿm pykakam memã Jeju jano nhyim bôx. Jeju ne kute memã pry kurwÿ djã pyrãk. Jejukôt me katãt amijo ban tĩnkumrêx. Nã bãm memã ano nhyim me kum kĩnh kêt. Ga, akamãt kô tykkam me kute mÿjja pumũnh kêt ne ba punuja pumũ. Me jadjwÿ ne me kum arĩk ar baja kĩnh. Mÿkam? Bir, me axwe'ã maje kum katãt amijo ba kĩnh kêt. Nãm ã me'ã amim ane.

<sup>20</sup> Ga, me kunĩ arĩk ar baja kum Jeju kurê ja pumũ. Jeju kute memã pry kurwÿ djã pyrãk me kum kurê. Djãm me kute amim Jeju mar ne kôt kute amijo ba prãm? Kati. Ren me amim Jeju ma nhyim ren arÿm memã apÿnh axwe jarê. Axwe pãnh kute memã bèn tÿx pymaje ne me kute amim mar prãm kêt. <sup>21</sup> Nhyim be, me katãt kute amijo baja ne me kute Jeju kôt amijo ba prãm. Jeju kute memã pry kurwÿ djã pyrãk ja ne me kute kôt amijo ba prãm. Mÿj kadjy? Bir, dja me kôt ar amijo ba nhyim me arÿm omũ. Kôt me ukaprija pumũ. Metĩndjwÿnh djukapri kôt me ukapri dja memã amirĩtkumrêx nhyim me arÿm omũ. Ja kadjy ne me kute Jeju kôt amijo ba prãm.

### *Djuão Jeju'ã ujarênh.*

<sup>22</sup> Jeju Nikodemumã kabên pan kam kôt ba djwÿnhmê arÿm ar tẽ. Tẽ:n kam arÿm pykabê Djudêjakam bôx. Bôx ne arek ar kam ba. Metĩndjwÿnhmã ngômã

me angjêho ba. <sup>23</sup> NhyM Djuãodjwý amũ ngômã me angjêho ba. Amũ krĩraxbê Xarĩ kuri pykabê Inõkam ne ngômã me angjêho ba. Kam ngô kumexkam ne meo ba. NhyM me 'yr bõxo ku'ê nhyM ngômã me angjêho ku'ê. <sup>24</sup> Me kute Djuãobê ijê kêttri ne meo ku'ê.

<sup>25</sup> NhyM kam Djuãokõt ba djwýnhmẽ mebê idjaermẽ ar arým aktã kabẽno aben japanho dja. Nãm ar abenmã kum,

—Mýj godja me ngõo me on nhyM Metĩndjwýnh memã mex jarê? anen <sup>26</sup> arým Djuão'yr tẽn 'yr bõx ne Jeju'ã kum,

—Ë, ujarênh djwýnh, aje ngõbê Djodão nhjukri me'õmẽ ro'ã aban aje 'ã adjujarênh ar aba. Be, adjwýnhdjwý arým ngômã me angjêho ba nhyM me kunĩ arým mũm abê tẽn 'ã kume:x, ane.

<sup>27</sup> NhyM Djuão memã kum,

—Kwãrĩk wãnh rã'ã. Metĩndjwýnh kute me'ã kum karõja ne me arým mũm 'yr bõx. <sup>28</sup> Ba arým me amã amijarê ga me ikabên ma. Ba me amã, “Djãm ibê me banhõ Bẽnjadjwýrbê kumkati got? Djãm ibê Kritu got? Kati. Kukãm ne Metĩndjwýnh ijano ba tẽ”, ane. Ba arým me amã ja jarê ga me arým ama.

<sup>29</sup> Djãm me wã ne inhõ me? Kati. Me wã ne Jeju nhõ me. Ga, me mjênbit kute prõo baja pumũ. Jeju kute prõo ba mãn prãbê me wão ba. Jejubit ne me wão aminhõn meo ba. Ba ne inhõ me kêt. Be, ba ne ba amybým kam ikĩnhkumrêx. Ga, me mjên prõ'yr baja pumũ. NhyM amybým mjên nhõbikwa kajgo arým mjên kabên ma. Kabên man kam arým kĩnhkumrêx ne. Jeju'ã me krãptĩkam ne ba arým ã ikĩnho ane. <sup>30</sup> Mrãmri dja raxo amũ ijakrenho tẽ. Nãm ã Djuão memã ane.

<sup>31</sup> Kãjkwa kurũm rwýkja ne raxo kute me kunĩ jakrenh. NhyM be, pykabê me bixadjwýrja ne me pykabê ar ba. Pykabê ar ban pykabê mýjjabit jarê. NhyM be, kãjkwa kurũm rwýkja raxo kute me kunĩ jakrenh.

<sup>32</sup> Kute kãjkwakam mýjja pumũnh ne mar ne memã 'ã amijarêho ba. NhyM me krãptĩ: kute amim kabên mar kêt. <sup>33</sup> NhyM be, me kwý kute amim,

—Mrãmri ne Jeju kabên katãtkumrêx, anhýrkam djãm Jejubit ne me amim kuma?

Kati. Kãjkwakam Metĩndjwýnhdjwý ne me amim kuma. Nãm me amim,

—Mrãmri ne Metĩndjwýnh kabên katãtkumrêx, ane.

<sup>34</sup> Metĩndjwýnh kute anorkam ne Kra arým Metĩndjwýnh kukwakam kabên jarêho ba. Kute kubê Karõ nê kêtumrêx nhyM kute 'amýnh týx ne o ba.

<sup>35</sup> Kãjkwakam Bãm kum Kra jabê. Ne kam arým Kramã õ mýjja'ã kum karõn kam kum kunĩ kanga nhyM ar o ba. <sup>36</sup> Kra Bãm nhõ mýjja kunõ ba nhyM kam me kute tu amim Kra markumrêxja arým Metĩndjwýnhkõt tĩn ne ar ba rã'ã: rã'ã ne. NhyM be, me kute amim Kra mar kêtja dja me tĩnkumrêx'yr bõx kêtumrêx. Metĩndjwýnh dja mekam ngryk rã'ã ne.

## 4

### *Xamarijka me'õ nire ja'ã ujarênh.*

<sup>1-3</sup> NhyM kam Bẽnjadjwýr djwýnh Jeju arým pykabê Djudêja kurũm tẽ. Mýkam ne tẽ? Bir, arým kute õ me jao Djuão jakrenhkam. Jeju amikõt me kamên ngômã me angij nhyM me arým kume:x. NhyM mebê pardjêu arým me kumex jarênh ma. NhyM kam arým amim,

—Be, me arým kute ijã me kumex jarênh mar. Ba on, ane. Ne kam arým mebê tẽ. Djãm Jeju ta ne ngômã me angjêho ba? Kati. Kõt ba djwýnh ne ar ngômã me angjêho ba. Nãm Jeju Djudêja kurũm tẽn kam ajte pykabê Garrêja'yr tẽmmã.

<sup>4</sup> Ne kam arým tu Garrêja'yr pykabê Xamarijkõt tẽm prãm. <sup>5</sup> Nãm Xamarijkõt tẽ:n kam arým krĩrax'õ'yr bõx. Idjibê ne Xika. Kuri ne Jõdje nhõ pyka. Amrêbê: me bakukãmãre Djako kra Jõdjemã pyka kwý tan kum kungã. <sup>6</sup> Õ pykakam ne Djako nhõ ngõmkwati. Nãm Jeju krĩrax'yr bõx ne arým pykakõt tẽm kurêje katy. Ne kam tẽn arým ngõmkwati jakã'ã nhý. Arým kãjkwa nhipõkri myt nhýrkam ne 'ã nhý.

<sup>7</sup> Nhý: nhyM nĩnh Xamarijka me'õ nire arým 'yr tẽ. Kute kam ngõ kwý jadjãrmã ne 'yr tẽn 'yr bõx. NhyM kam kum, “Ba ikõ”, ane. <sup>8</sup> Be, arým kõt ba djwýnh mã krĩraxmã mõrkam. Kute ar õ kwý krên djã byrmã ne ar tẽ.

<sup>9</sup> Nãm kum, “Ba ikõ”, ane.

Nhym kum,

—E 'õ. Mýkam ne ga me ajõbê idjaerkam ngõ'ã ijuw? Ba ibê pykabê Xamarijakam me'õ nire ne ga ngõ'ã ijuw, ane. Be, mebê idjaer ne me kum mebê Xamarij kĩnh kêt.

<sup>10</sup> Nãm nireja ã kum ane nhym Jeju kum,

—Ga aje Metĩndjwýnh kute meo kĩnh djà mar kêt ne ba ije ngõ'ã ajwýr djwýnh aje imar kêt. Ne ga ren iman ren ba ngõ'ã ijuw ba ren amã me tĩnkumrêx kadjy ngõ ren amã kungã, ane.

<sup>11</sup> Nhym kum,

—Ô kum bẽnjadjwýr, anhõ ngõo àbir djà kêt nhym ngõmkwati kre ry:. Nhýnh ne me tĩnkumrêx kadjy anhõ ngõja? <sup>12</sup> Me banhingêt kukãmãre Djako kukwakam ne ngõmkwatija. Ta ne kute kam o kõmo ku'ê nhym kramê õ mrymê kute kam o kõmo ku'ê. Djãm araxo aje me banhingêt Djako jakrenh? ane.

<sup>13</sup> Nhym kum,

—Gêdja me ngõ kajgo jao ikõn akubyn kum kôr. <sup>14</sup> Nhym be, ba ije amã ngõ jarênhja gêdja me kwý ã pýnhkõt o ikõn akubyn kum kôr kêtumrêx. Ije amã ngõ jarênh ja gêdja me o ikõ nhym mã mekam apõx kute mrãmri ne ngõmkwaticam ngõ mã apõx pyræk. Nhym kam me arým Metĩndjwýnhkõt tĩn ne ar ba rã'ã: rã'ã ne, ane.

<sup>15</sup> Nhym kam kum,

—Bẽnjadjwýr goja amrê imã aje ngõ jarênhwã ngã ba o ikõn goja imã kôr kêt ne amrê ngõo imrãnh kêt, ane. Djãm ngõkumrêx'ã ne kute kum me tĩnkumrêx kadjy ngõ 'ã ajarê? Kati. Metĩndjwýnh Karõ'ã ne ngõ jakren kum 'ã ajarê. Nãm ã nire ngõ'ã Jeju 'wýro ane. <sup>16</sup> Nhym kum,

—Tèn amjênãmã arê gê amrê tẽ, ane.

<sup>17</sup> Nhym kum, “Imjên kêt”, ane.

Nhym kum,

—Nà. Mrãmri amjênkumrêx kêt.

<sup>18</sup> Amrêbê ne aben totokmã amjên amãnhkrut ne amãnhkrut ne ikjêkêt ga kanga. Ne kam ajbir awýr bao ku'êja ne kubê amjên kêt. 'Ã ne aje mrãmri imã, “Imjên kêt”, anhýrja.

<sup>19</sup> Nhym kum,

—Bẽnjadjwýr, ga abê Metĩndjwýnh kukwakam kabên jarênh djwýnh'õ ba arým

ama. <sup>20</sup> Krãnh wã'ã ne me ikukãmãre kute Metĩndjwýnhmã rax jarênh djà. Nhym me abê idjaer ne ga me atemã ne aje memã kum,

—Krĩrãxbê Djeruxarêkambit ne me kute Metĩndjwýnhmã amijarênh djà, anhýro aba, ane.

<sup>21</sup> Nhym Jeju kum,

—Djãm me aje krãnh wã'ã me Bãm djwýnhmã rax jarênh rã'ãmã? Nàr djãm me aje Djeruxarêkam kum amijarênh rã'ãmã? Kati. Gêdja ga me ã kam kum amijarênh kêt. Kam kum amijarênh kêt'ã ne amrê akati mör rã'ã. Mrãmri ne ba ije amã arênhkumrêx. Dja ga tu amim ikabênja markumrêx. <sup>22</sup> Me abê pykabê Xamarijakam me kra ne ga me aje we apytàr djwýnhja, aje kum rax jarênhja aje mar kêt. Nhym be, me ibê idjaerkam ne ba me ije Metĩndjwýnhmã amijarênhja arým ije mar. Ije me utàr djwýnhkumrêx mar. Me ibê idjaerkam ne me utàr djwýnh kato. Kam ne ba me ije mar.

<sup>23</sup> Me kute markumrêx dja me ã me Bãm djwýnhmã rax jarênhkumrêx ne 'êx kêtumrêx. Me kadjwýnhbê Metĩndjwýnh Karõ kõt dja me mrãmri amijo ngriren raxmã katorkumrêx ne kum rax jarênhkumrêx. 'Ã akati amrê mör rã'ãn arým bõx 'ýr. Me Bãm djwýnh kum me ja kĩnh. <sup>24</sup> Djãm kãjkwakam Metĩndjwýnh kute me bapyràk? Djãm ãmê 'imê kute me bapyràk? Kati. Karõbit. Nhym me kute omũnh kêtumrêx. Me kute omũnh kêtumrêx dja me tu amikadjwýnhbê karõ kõt mrãmri amijo ngriren raxmã katorkumrêx. Kum katorkumrêx ne kum rax jarênhkumrêx. Nãm Jeju ã me'õ niremã ane.

<sup>25</sup> Jejubê ne Bẽnjadjwýrbê kumkatibê Kritu nhym kute mar kêt. Kritu nhidji 'õdjwýbê ne Mexij. Me'õ nire kute mar kêt ne kum,

—Tukwa, gêdja Mexij bõx ne me imã mýjja kunĩ jarê ba me kuma. Ja ne ba arým ije mar, ane.

<sup>26</sup> Nhym kum,

—E kum, ba ne ba arým amã ikabêno nhý. Ibê ne Mexij, ane.

<sup>27</sup> Nãm nirejamã ja jarênhõ nhý nhym kõt ba djwýnh arým 'ýr bõx ne ar omũ. Jeju kute kum kabêno ýrkõt arým ar omũ. Ne

te kute ar marmã arkam no tyn dja. Ne bit kute nija'ã kukjêr ne kute kum,

—Mÿj ne ga kum arêno nhÿ? Mÿkam ne ga kum akabêno nhÿ? anhÿrmã ne arkum uman arek ku'ê.

<sup>28</sup> Nãm kôt ba djwÿnh Jeju'ÿr bôx nhym nire arÿm ò ngyo ngônã iren mã: krÿraxbê Xikamã tèn wadjà. Ne kam memã kum,

<sup>29</sup> —Ô kum onÿj me'õ. Ije amijo ibaja kunÿkôt ipumÿn imã arê. Bãrãm mrãmri kubê me banhõ Bënjadwÿrbê kumkatibê Kritukumrêx. Gwaj 'ÿr gar omÿ, ane.

<sup>30</sup> Nhym me arÿm krÿrax kurÿm katon 'ÿr tèn arÿm 'ÿr bôx.

<sup>31</sup> Me 'ÿr bôx kêtri ne kôt ba djwÿnh arÿm kum,

—Ujarênh djwÿnh, gop anhõ kwÿ krê, ane.

<sup>32</sup> Nhym arkum,

—Be, atemã inhõ kwÿ krên djaja ar aje mar kêt, ane. Be, djãm mrãmri ò kwÿ krên'ã ne arkum ane? Kati. Nãm Metÿndjwÿnhmã àpênho ò kwÿ krên djà. Metÿndjwÿnhmã àpên ar ba'ã ne arkum ane. <sup>33</sup> Nãm arkum ane nhym ar arÿm abenmã kum,

—Djã ne me'õ arÿm kum mÿjja'õ ngã nhym kukrê? ane.

<sup>34</sup> Nhym arkum,

—Be, kàkwakam Metÿndjwÿnh kute amrê pykamã ijanor arÿm ijã amim karõ. Kute idjâpên djà'ã amim karõ kôt dja ba amijo iban arÿm inomã kumê. Be, idjâpên jakam ikÿnho inhõ kwÿ krênkam ikÿnh jakrenh mex ne. 'Ã ne ba ije ar amã, “Atemã inhõ kwÿ krên djà”, anhÿrja. Nãm ã Jeju arkum ane.

<sup>35</sup> Ne kam ajte arkum,

—Kwãrÿk wãnh gar amim, “Dja bàygogo'ã mytyrwÿ amãnhkrut ne amãnhkrut apêx bar kam êo mõ”, anhÿr kêt. Be, ba ne ba ar amã, “Ar kãmã akrãn me kute ikabên mar prãmja pumÿ. Me krãptÿ kute bàygogo pyrãk wã pumÿ. Dja gar memã ijã ajarê nhym me arÿm tu amim imarkumrêx. Ja kadjy ne me mexkumrêx. Me mexkumrêx kute mrãmri ne bàygogo prÿ ngràn akakam ê kadjy mexja pyrãk.

<sup>36</sup> Dja gar on jakam memã arê nhym me amim ima ba arÿm ar amã o pãnh. Nhym

kam me ikôt tÿn ne ar ba rã'ã: rã'ã ne. Ba ar amã o pãnh gar arÿm akÿnh rã'ã: rã'ã ne. Djãm ar gajbit dja gar akÿnh? Kati. Me kute amrêbê memã arêndjwÿ dja me ar aro'ã kÿnh. Ga, me kumrêx kute bàygogo kre nhym ate me ja kute tÿmrãm bàygogo djêja pumÿ. Me kute ê parkam me ro'ã kÿnhkumrêx. Inhõ àpên tÿmmê dja gar aro'ã akÿnhkumrêx.

<sup>37</sup> Be, me memã kum, ‘Gêdja me'õ 'y kre nhym me'õ arÿm ê’, anhÿro ba. Be, ikabênja kôn ne me kabên ja dji. <sup>38</sup> Ar aje o atom ne êmã ne ba 'ÿr ar ajano. Amrêbê ne gar bàygogokam adjâpên kêt. Me'õ kumrêx ne arÿm kam apên kam 'y krebite ba. Gar inhõ me àpên tÿm kôt ajbir adjâpên ‘amÿ’, ane. Ar kute memã 'ã ujarênhmã nhym me kute tu amim markumrêxmã ne Jeju ã kôt ba djwÿnhmã ane.

<sup>39</sup> Nãm me'õ nire krÿraxbê Xikakam Xamarij kramã kum,

—Nãm prÿne ije amijo iba kunÿkôt imã arênh mex, anhÿro tẽ. Nhym me krãptÿ kuman arÿm tu amim Jeju markumrêx. <sup>40</sup> Ne kam Jeju'ÿr tèn 'ÿr bôx ne kum,

—Gop arek me iro'ã ar aba, ane. Nhym arÿm arek mekam ar ba. Ar ba nhym arÿm 'ã akati amãnhkrut apêx. <sup>41</sup> Nhym kam me kute Jeju ta kabên markam ne krãptÿ tu amim markumrêx.

<sup>42</sup> Ne kam nijamã kum,

—Jakam bar tu amim Jeju markumrêx. Djã ne bar akabênbit man amim tu markumrêx? Kati. Arÿm ne bar Jeju ta kabên kôt amim kuman amim, “Be, mrãmri ne Jejubê Bënjadwÿrbê kumkatibê Kritukumrêx. Mrãmri kubê pykakam me axwe kunÿ pytãr djwÿnhkumrêx.” Nã bãm ar ã amim ane. Nãm me ã nire jamã ane.

*Kute me'õ bënjadwÿr krao mex.*

<sup>43</sup> Be, Jeju'ã akati amãnhkrut apêx nhym arÿm amÿ ajte tẽ. Tèn arÿm abatãnh djà, ò pykabê Garrêjakam bôx. <sup>44</sup> Jeju ta ne amrêbê memã kum,

—Djãm Metÿndjwÿnh kukwakam kabên jarênh djwÿnh'õ ne abatãnh djakam bôx nhym me kum rax jarênh got? Kati. Nãm me aprÿ, ane. <sup>45</sup> Jeju abatãnh djãbê Garrêja jakam bôx.

Nhym kam me kum kabên mex jarê. Me kute amrêbê amÿ Djeruxarêkam Jeju

pumũnhkam ne me kum kabẽn mex jarẽ. Me krãptĩ kute amikukràdjã tũm mar kadjy aben pydji djã nhõ akatikam ne me Djeruxarẽ'yr tẽn 'yr bõx. 'Yr bõx ne arým kam mekõt Jeju pumũ. Nhyim mýjja pumũnh kêt krãptĩ nhípêx nhyim me arým omũ. Omũn kam akubyn Garrêjakam bõx. Nhyim Jejudjwý kam bõx ne me'yr bõx. Nhyim me kam kum kabẽn mex jarẽ.

<sup>46</sup> Jeju Garrêjakam bõx ne ajte krĩraxbê Kanakam bõx. Kam ne amrêbê kute ngô kajgoo uba kangô nhípêx. Jeju bõx nhyim onĩj Kapanakam me'õ bẽnjadjwýr kra arým kanê. <sup>47</sup> Nhyim me arým bẽnjadjwýrmã arẽn kum,

—Onĩj, Jeju arým Djudêja kurũm katon Garrêjakam bõx, ane.

Nhyim kuman arým Kana'yr tẽn kam Jeju'yr bõx. 'Yr bõx ne kum,

—Ê, gu 'yr ga imã ikrao mex gê kanê kum ire, ane. Nãm mã 'yr kum krã. Arým kra tyk 'yrkam ne mã 'yr kum krã.

<sup>48</sup> Nhyim Jeju kum,

—Ga me aje amim imar kêt kumrêx. Ije mýjja pumũnh kêt nhípêx ga me aje omũnhkambit ne amim ima. Mýkam? ane.

<sup>49</sup> Nhyim bẽnjadjwýr Jejumã kum,

—Bẽnjadjwýr, amibêx, tyk kêttri gu 'yr tẽn, ane.

<sup>50</sup> Nhyim kum,

—Aj mã. Arým ne akra tĩn ne, ane. Nhyim arým tu amim kabẽn markumrêx ne arým 'yr tẽn. Amim kamnhĩxo tẽn. <sup>51</sup> Tẽn: nhyim kam arým 'ã akamãt. Nhyim akati nhyim ajte tẽn: nhyim õ àpênh ar arým kutã tẽn kajpa. Ne kum, “Arým ne akra tĩn ne”, ane.

<sup>52</sup> Nhyim arkum,

—Nhỹnh ne myt nhỹ nhyim mexmo krax ne? ane.

Nhyim kum,

—Amũja'ã myt akêxkam ne arým kanê kum ire, ane.

<sup>53</sup> Nhyim amim,

—Be, Jeju kute imã, “Arým ne akra tĩn”, anhỹr majmã ne arým kanê kum ire, ane. Ne arým tu amim Jeju markumrêx. Õ kikrekam ar kunĩdjwý tu amim markumrêx.

<sup>54</sup> Jeju Djudêja kurũm tẽn Garrêjakam bõxkam ne ajte mýjja pumũnh kêt ja nhípêx.

Me kute raxmã kator kadjy ne arým bẽnjadjwýr krao mex.

## 5

*Ngô mýrri me'õ punu nõr.*

<sup>1</sup> Jeju bẽnjadjwýr krao mex. Nhyim kam onĩj krĩraxbê Djeruxarêkam arým mebê idjaer kute aben pydji djã nhõ akati 'yr. Nhyim Jeju arým 'yr tẽn. 'Yr tẽn kam arým 'yr bõx.

<sup>2</sup> Be, Djeruxarêkam ne ngô'õ nõ. Me kute krĩraxmã mrykĩ'ãtomtio ngjêx djã kuri ne ngô'õ nõ. Mebê idjaer kabẽnkam ne me ngômã Bexeda jarẽ. Ngô bu'ã ne kikre kre kênh amãnhkrut ne amãnhkrut ne ikjêkêt.

<sup>3</sup> Kikrekam ne me punu krãptĩ ikwã. Me no rãmẽ me mrãnh punumẽ me akrymẽ ikwã. Ngô kute amingrêk ne me kam amako ikwã. <sup>4</sup> Mýjkõt ne ngô amingrêk? Bir, Metĩndjwýnh kadjy mrãnh djwýnh ne ngô'yr ban me aêrbê ngômã wangij, ngômã ngjêx pýnh. Nhyim arým kõt ngô amingrêk ne. Amingrêk nhyim me'õ punu kumrêx kute memã wan noxja ne arým mex ne. Pydjibit mex.

<sup>5</sup> Be, Jeju Djeruxarẽ'yr bõx ne ngô ja'yr bõx. Nhyim me'õja me punu kõt nõ. Punu'ã ne amex krãptĩ:bê 38 apêx. <sup>6</sup> Nhyim arým omũn amim,

—Be, amrêbê ne me'õwã punu, ane. Ne kam kum, “Djãm amã amex prãm”? ane.

<sup>7</sup> Nhyim punuja kum,

—Be, ngô kute amingrêkkam djãm inhõbikwa'õ got ijo tẽn ngômã imẽ ba on imex ne? Kati. Nã bãm te ngô'yr amibêx ne nhyim arým me'õ imã wan nox ne. Ba kam imex prãm kêt ne, ane.

<sup>8</sup> Nhyim kum,

—Be, kãmã djan anhikwã djã krãn amýn o tẽn, ane. <sup>9</sup> Nhyim arým kabẽnmẽ ro'ã mex ne ikwã djã krãn kumýn o tẽn. Pi'ók rãrãrkam, me tyk djã kêt djã nhõ akatikam ne mex ne.

<sup>10</sup> Nhyim mebê idjaer rũnh omũn kum kabẽn ne kum,

—E kum pi'ók rãrãr ne ja. Djãm aje kam kukràdjã mar kêt ne ate anhikwã djã mýn o tẽn? ane.

<sup>11</sup> Nhyim aminêje memã kum,

—Me'õ kute ijo mex ne imã, “Anhikwã djà krãn amÿn o tẽ”, anhÿr kôt ne ba arÿm inhikwã djà mÿn o tẽ, ane.

<sup>12</sup> NhyM me kum,

—Mÿj me'õ ne amã, “Anhikwã djà krãn amÿn o tẽ”, ane ga kam o tẽ? ane. <sup>13</sup> NhyM, “Kon, ije mar kêt”, ane. Be, ar bu'ã ne me krãptĩ: ajkarê. NhyM Jeju arÿm me katikôt mã tẽ nhyM arÿm omÿnh kêt ne.

<sup>14</sup> NhyM kam Jeju Metĩndjwÿnh nhõ kikitrikam kum katon kum,

—Ë, arÿm amexkam on ajaxwe krãta. Dja ga ajte ajaxwe nhyM mÿjja'õ ajte ajo ajkê. Mÿjja punu kute apunu tÿm jakrenh mex dja ajte ajo ajkê, ane. <sup>15</sup> NhyM arÿm me bẽ idjaer rÿnh'ÿr tẽn memã arẽn memã kum,

—Be, Jeju ne ijo mex, ane.

*Kute me rÿnhmã amikôt amijarẽh.*

*Dju r 10.30*

<sup>16</sup> Jeju kute pi'õk rãrãrkam meo mexo bakam ne me bẽ idjaer rÿnh kum kurẽo ba. Ne kam arÿm abenmã kum, “Gwaj on kubĩ”, anhÿro ba. <sup>17</sup> NhyM Jeju arÿm memã kum,

—Be, Ibãm ne pi'õk rãrãrkam àpẽnh ar ba. Ba kudjwa kam idjãpẽnh ar iba, ane.

<sup>18</sup> NhyM me arÿm abenmã kum,

—Be, Jeju gwaj bapãnh pi'õk rãrãrkam àpẽnh ba. Djãm jabit? Kati. Tãmwã ta ne amijo 'ẽx ne Metĩndjwÿnho bãm ne raxo amiptãro ba, ane. Me abenmã anen arÿm we Metĩndjwÿnho ngryk ne kute Jeju bĩnmã kangrõnh tÿx ne.

<sup>19</sup> NhyM kam Jeju amipãnh memã kum,

—E kum, mrãmri ne ba ibẽ Metĩndjwÿnh Krakumrẽx. Djãm ba ipydji ne ba idjãpẽnh got? Kati. Ibãmmẽ ne bar idjãpẽnh'ã ajkrut. Ne ba ren ipydjin ren ije meo mex kêt. Ibãm djãpẽnh ne ba omÿn arÿm àpẽnh o idjãpẽnh. Ibãm djãpẽnh kunĩkôt ne ba kudjwa ã idjãpẽnho ane. <sup>20</sup> Be, mÿkam? Bir, Ibãm kum ijabẽkam. Ne kam arÿm imã amidjãpẽnh kunĩ jakre ba kôt ipẽx. Dja ã imã mÿjja pumÿnh kêt ra:x kwÿ jakre ba arÿm ipẽx ne. Dja mÿjja raxo ajbir ije ipẽxja jakrenh mex ne. Dja ba ipẽx ga me te aje marmã kam ano tyn aku'ê. <sup>21</sup> Ba Ibãm kôt akubyn me tyko tĩn. Kute Ibãm ta kute akubyn me tyko tĩn pyrãk ne ba ã meo ane. Dja ba imã me tyk akubyn o tĩn kĩnh ne

arÿm ã meo ane nhyM me arÿm akubyn tĩn. <sup>22</sup> Dja ba me axwe kukjan memã ikaton kam memã axwe pãnh jarẽnhdjwÿ. Ibãm kute me'õmã axwe pãnh jarẽnh kêt. Ta ne imã,

“Ga dja ga me kunĩmã axwe pãnh jarẽ”, ane.

<sup>23</sup> Be, mÿj kadjy ne ijã memã axwe pãnh jarẽnh djwÿnh mẽ? Bir, dja ba memã axwe pãnh jarẽ nhyM me arÿm ijo bẽnjadjwÿr ra:x ne. Dja me ijo bẽnjadjwÿr ra:x mrãmri me kute Ibãmo bẽnjadjwÿr rax pyrãk. Ja kadjy ne ijã memã axwe pãnh jarẽnh djwÿnh mẽ. Be, djãm me kute imã ikajgo jarẽnhkam kute Ibãmmã rax jarẽnh got? Kati. Dja me imã irax jarẽnh kêt ne arÿm Ibãmdjwÿmã rax jarẽnh kêt. Ta ne ijano ba tẽ.

<sup>24</sup> Dja me tu amim ikabẽn markumrẽx ne tu amim kute ijanor djwÿnh markumrẽx ne arÿm kunĩ Metĩndjwÿnhkôt tĩn ne ar ba rã'ã: rã'ã ne. Dja ba me jamã axwe jarẽnh kêtumrẽx. Amrẽbẽ ne me ja Metĩndjwÿnhbẽ amakkre kêt kute mrãmri ne me tyk amakkre kêt pyrãk. Ne kam arÿm jakam Metĩndjwÿnhkôt tĩn ne ar ba rã'ã: rã'ã ne. Mrãmri ne ba me amã ja jarẽnhkumrẽx.

<sup>25</sup> Dja me tyk ã ikabẽn ma. Ibẽ Metĩndjwÿnh Kraja ikabẽn ma. Ne kam me kute ikabẽn mar kunĩ dja me akubyn tĩn. 'Ã akati arÿm me bajo rãm ne ja. Arÿm ije kum o kraxmã. Mrãmri ne ba me amã ja jarẽnhkumrẽx.

<sup>26</sup> Be, mÿj ne ikam kute ba memã ikabẽn nhyM me akubyn tĩn? Bir Ibãmmẽ ije aben pyrãk. Kam ne ba memã ikabẽn nhyM me akubyn tĩn. Ibãm ta ne tĩn ne ta kute mÿjja kunĩmã tĩn jangjẽnho ba. Ibãm kabẽn kôt ne ba kudjwa itĩn ne ije mÿjja kunĩmã tĩn jangjẽnho iba. <sup>27</sup> Ne Ibãm kabẽnkôt dja ba memã axwe pãnh jarẽnhdjwÿ. Arÿm ije amijo inhĩkam dja ba ã meo ane.

<sup>28</sup> Be, ije me amã, “Dja me tyk ikabẽn man akubyn tĩn”, anhÿrkam kwãrik wãnh te aje marmã ikam ano tyk kêt. Mrãmri dja pyka krãkam me tyk kunĩ ikabẽn man akubyn kato. <sup>29</sup> Me mex ne ukapri dja me akubyn tĩn. Dja me Metĩndjwÿnhkôt tĩn ne ar ba rã'ã: rã'ã ne. NhyM me axwedjwÿ dja me akubyn tĩn. Ije memã axwe pãnh jarẽnh kadjy dja me akubyn tĩn.



<sup>30</sup> Be, djām ipydji ne ba ar iba? Kati. Ba ipydji, idjâpênh ne ikabên kêt. Ibâm kabên o ne ba ikabên. Ibâm ne imã me axwe jakre ba kôt me axwemã ikaton kam memã pãnh jarê. Djām ije amidjwýnhbito kïnhmã? Kati. Ibâm kute ijanor ne ba ije o kïnhmã. Kabênkôt ije katât me axwemã ikatorn kam pãnh jarênhkumrêx.

<sup>31</sup> Be, djām ipydji ne ba me amã amijarê? Kati. Ba ren ipydjin me amã amijarê ga me ren mrãmri ijã, “Kati. Kabên kajgo”, ane.

<sup>32</sup> Nhym be, kati. Me'ôdjwý ne ikukãm ijã me amã ujarênhkumrêx. Katât me amã ijã ujarênhkumrêx. Ja ne ba arým ije mar.

<sup>33</sup> Be, me ga ne ga me amrêbê Djuão'ýr me akwý jano. Nhym me Djuão'ýr bôx ne kukij. Nhym arým katât me amã ijã ujarênhkumrêx ga me arým ama. <sup>34</sup> Be, djām kute kabêno Ibâm jakrenh got ba me amã Djuão jarê? Kati. Pykakam me'ô kute kabêno Ibâm jakrenh kêt. Be, mýj kadji ne ba me amã Djuão jarê? Bir, me aje amijã Djuão kabên markumrêx nhym Metïndjwýnh kute me ajaxwebê me apytãrmã ne ba me amã arê. <sup>35</sup> Djuão ne kute mrãmri ne ngônhpôk nhirã pyrãk ne ar ba. Nãm me amã kabên mex jarêno ba. Ga me ren tu amim kabên markumrêx ne ren amijo aba mex rã'ã. Nhym be, kati. Djuão kute me amã arêno bakam ga me aje mar 'ikrãn ne akïnh 'ikrãn ne.

<sup>36</sup> Be, Ibãmdjwý ne kute imã,

“Ije amã adjâpênh djã jarênhja dja ga in-omã amê”, anhýr ne kute prïne imã 'ã karô ba arým kôt idjâpênh iba. Ba mýjja pumũnh kêt nhípêxo iba ga me arým omũ. Idjâpênh ja kute iraxo amirïto Djuão jakrenh mex. Ga me ren aje idjâpênh pumũnhkam ren arým mrãmri iraxmã akatorkumrêx. Ibâm kute ijanorkôt ne ga me ren imã akatorkumrêx.

<sup>37</sup> Ibãm ta kute ijanor ne arým ijã ajarê. Djām me aje ôkre mar ne ï pumũnh got? Arkati. <sup>38</sup> Ga me ren aje amim Ibâm kabên mar prãm ne ren tu amim imarkumrêx. Nhym be, kati. Ibâm kute ijanor djwýnh ta ne arým mã amã ijã ajarê ga me aje amim kabên 'amýnh kêt ne mar prãm kêt. <sup>39</sup> Goja prïne Metïndjwýnh kabên'ã pi'ôk no'ôk pumũ. Me ga ne ga me 'ã amim, “Dja ba arêno iban Metïndjwýnhkôt itïn

ne ar iba rã'ã: rã'ã ne”, anhýro aba. Me aje amim anhýrkam goja prïne amim omũn ama. Pi'ôk tãmkam ne Metïndjwýnh ba ijã ajarê. <sup>40</sup> Nãm te pi'ôkkam ijã ajarê ga me ikôt abikamênh kêt. Ga me ren Metïndjwýnhkôt atïn kadji ren ikôt ajkamê. Nhym be, kati. Me aje ikôt abikamênh prãm kêtumrêx.

<sup>41</sup> Djām me aje imã, “Araxkumrêx”, anhýrmã? Djām irax ja ne ba abej? Kati.

<sup>42</sup> Be, mýkam? Bir, me amã kãjkwakam Metïndjwýnh jabê kêtumrêx ije irax ja jabej kêt. Arým ije me amar. <sup>43</sup> Ibãm kukwakam ba tēn me awýr bôx ga me aje amim imar kêt. Me'ô katãm ta dja tēn me awýr bôx ne ta amiraxo àmra ar ba ga me arým tu amim markumrêx.

<sup>44</sup> Be, me ga ne ga me amirax jabej mã amim, “Ba gêt ba amibên gê me imã irax jarê”, anhýro aba. Ne kam aje amim, “Ba Metïndjwýnhmãbit amijarê gê ta ijo rax”, anhýr kêtumrêx. Aje amim, “Ba gêt irax. Ba gêt irax”, anhýro abakam aje amim Metïndjwýnh mar prãm kêtumrêx.

<sup>45</sup> Djām ba dja ba Ibãmmã me ajaxwe jarê? Kati. Ga me akukãmãre Môjdjê kanàrrãm ar amijo aba. Ta ne arým Metïndjwýnhmã me ajaxwe jarêno dja.

<sup>46</sup> Djām mrãmri ne ga me aje tu amim akukãmãre Môjdjê kabên markumrêx? Kati. Ga me ren tu amim Môjdjê kabên markumrêx ne ren badjwý tu amim imarkumrêx. Ta ne ikukãm ijã ajarêno ijã pi'ôk no'ôk. Kam ga me ren amim kabên jarêno ren tu amim imarkumrêx.

<sup>47</sup> Nhym be, kati. Me aje amim Môjdjê kabên mar kêt ne aje kôt amim badjwý ikabên mar kêt. Nãm ã Jeju pi'ôk rãrãrkam kute me'ô punuo mexkam mebê idjaer rũnhmã ane.

## 6

*Kute djwýo mebê 5.000o djuw mex.*

*Mat 14.13; Mak 6.30; Ruk 9.10*

<sup>1</sup> Nãm memã anen kam arým amũ tē. Tē:n kam arým imôtibê Garrêja nhikjêrnã rê. Imôti nhidji 'ôdjwýbê Xiberij. <sup>2</sup> Nhym kam me krãptï kôt mō. Ôbê Jeju kute mýjja pumũnh kêt kwý nhípêx nhym me kute omũnhkam ne me kôt mō. Nãm me punu krãptïo mex nhym me omũn arým

kôt mō. <sup>3</sup> Kôt mō nhym Jejumē kôt ba djwýnh ar me kukãm mō. Mō:n krãnh'ã wabi. Àbir tē:n arým kam nhỹ. <sup>4</sup> Be, arým ne Djeruxarēkam mebê idjaer kute aben pydji djà nhõ akatija bõx 'yr. Me kute Metĩndjwýnh me kukãmãre nhirõbê mrãnhja mar kadjy ne arým õ akati 'yr.

<sup>5</sup> Ar krãnh'ã nhỹ nhym kam Jeju amipãnh rīt. Nhym nĩnh me krãptĩ: kôt mō nhym me omũ. Ne kam Piripimã kum,

—Jãm dja gwaj tēn me kadjy djwý kwý by? ane. <sup>6</sup> Be, djãm kute amikukãm amimar kêt ne Piripi kukij? Kati. Kute prĩne amikukãm amimar. Be, mýkam ne kukij? Bir, Piripi kute mrãmri amim tu markumrēx jabej ne kukij. <sup>7</sup> Nãm kukij nhym Piripi kum,

—Tõ gêt kon. Gwaj banhõ pi'ók kaprĩ'ã akrekam kubê denarjuo 200bit. Ne gwaj ren pi'ók kaprĩ jao ren me kadjy djwý by nhym ren me krãptĩ abenmã kokjêr kryre nhym ren me krãptĩ: 'ã djwý kêt, ane.

<sup>8</sup> Nhym Jejukôt ba djwýnh 'õdjwýja nhidjibê Ængre. Ximão Pedrumē ar axikôt apõx. Ængreja kum,

<sup>9</sup> —Ota jakam me'õ bõktire nhõ djwýmē tepprãremē. Xewadao djwý nhipêx amãnhkrut ne amãnhkrut ne ikjêkêt. Ne tepprãre amãnhkrut. Nhym be, me krãptĩ: Mýj dja gwaj djwý ngrirejao me on? ane.

<sup>10</sup> Nhym Jeju arkum,

—Ar memã arē gē me nhỹ, ane. Be, bõre ne pyka wãkam kumex ne. Jeju arkum ane nhym ar arým memã arē. Nhym me arým bõrekam nhỹ. Me krãptĩ: kubê 5.000 ne me nhỹ. <sup>11</sup> Nhym kam Jeju arým djwý jamý. Ne kam arým o Metĩndjwýnhmã amikĩnh jarē. O kum amikĩnh jarēn arým kôt ba djwýnhmã kungã. Nhym ar me krãptĩmã kungã. Nãm ã tepprãredjwýo ane.

<sup>12</sup> Nhym me õ kwý krē:n arým ajne. Nhym Jeju kôt ba djwýnhmã kum,

—Dja gar djwý janhy karwà. O bikēnh kêt kadjy, ane. <sup>13</sup> Nhym kam ar karwàn kaxnokai pýnh djari kam kungij. Nhym kam kaxnokaibê 12 ipu. Be, xewadao djwý amãnhkrut ne amãnhkrut ne ikjêkêt janhy 'ã kàtãm ne ja.

<sup>14</sup> Nhym me arým kute mýjja pumũnh kêtja pumũnhkam abenmã kum,

—Be, Metĩndjwýnh kukwakam kabēn jarēnh djwýnh ja ne me amrēbê arē. Me memã kum, “Dja pykamã bõx”, anhỹro ba. Be, kôt ne Jeju arým jakam bõxkumrēx, ane.

<sup>15</sup> Nhym Jeju arým me kuman amim,

—Got ba ren arek dja nhym ren me tu ijo tým ne ijã bēnjadjwýr rax mē. Djãm on pykakam memã inhỹr prãm got? ane. Ne kam arým mebê tēn amũ krãnh'ã wabin ate ar ba.

<sup>16</sup> Nhym kam arým para. Nhym kôt ba djwýnh tēn arým imõti'yr ruw. <sup>17</sup> Ne kam arým kà'õkam wadjàn nox ne. Amũ akàx nhikjēmã krĩraxbê Kapana'yr mõrmã ar arým nox ne. 'Yr mō: nhym ar'ã arým akamàt ne. Nhym kraxje Jeju ar'yr bõx kêt rã'ã.

<sup>18</sup> Ar mō: nhym arým kôk 'itýx wabê nhym kam ngõ amijapĩn týx ne. <sup>19</sup> Nhym ar ngõ rēnho mōn arým ajbubê tým ne. Ar mõr'ã arým kirometubê 5 apêx. Nhym Jeju nĩnh arkôt tu ngõ'ã tē nhym ar omũ. Nhym arým aro rãm ne ja nhym ar arým tĩn prãm ne. <sup>20</sup> Nhym arkum,

—Ar atĩn prãm kêt. Ba ne ba ar akôt tē, ane. <sup>21</sup> Nhym ar kabēn man arým kĩnh ne. Ne kum,

—Amrē ar ikôt kãmã wadjà, ane. Nhym arým wadjàn nhỹ. Nhym ýrmē ro'ã ar arým akàx nhikjê'yr bõx. Kapanakam ar bõx.

<sup>22</sup> Jeju ar akàx nhikjêkam bõx nhym arým ar'ã akati. Nhym kam amũ akàx nhikjêbê me te ar õ kà jabej. Me krãptĩ kute amũja'ã djwý krēnja ne te ar õ kà jabej ne abenmã kum,

—Be, amũja'ã kà pydjibit nõ nhym ar o mō. Kôt ba djwýnhbit mã o mō nhym Jeju arkôt kàkam ýr kêt. Nãm me krãptĩ te ar õ kà jabejn kam ã abenmã ane.

<sup>23-24</sup> Ne kam me kute Jeju ar omũnh kêtka arým ar'yr mō. Me kà kwýkam wadjàn akàx nhikjēmã Kapana'yr nox ne mō. Be, nhỹnh kà ja'õkam ne me mō? Bir, krĩraxbê Xiberijkam kà 'õkam ne me mō. Xiberijkam kà kwý arým me ku'ê djà'ãnh mō. Bēnjadjwýr djwýnh kute Metĩndjwýnhmã amikĩnh jarēnh nhym me kute djwý krēn djà'ãnh ne arým kà mō. Kà kwý jamã ne me wadjàn amũ kôt mō. Me kute Jeju jabej kadjy ne me Kapana'yr mō.

*Kute amijã djwý jakren 'ã ujarênh.*

<sup>25</sup> 'Yr mō:n kam imōti nhikjêmã bōx. Bōx ne abej ne arým kum kato. Jejumã katon arým kum,

—Ujarênh djwýnh, tô nhýnh ne myt nhý ga jakam bōx? ane.

<sup>26</sup> Nhyr memã kum,

—Be, mykam ne ga me ijabej mō? Djãm amũja'ã ije myjja pumũnh kêt kwý nhipêx ga me aje omũnhkam? Djãm arým me aje kôt iraxmã akatorkam? Djãm me aje ajte irax marmã ne ga me ijabej mō? Arkati. Be, me ajajnekam. Me aje djwý krên ne me ajajnekam ne ga me ijabej mō. Mrãmri ne ba me amã ja jarênhkumrêx.

<sup>27</sup> Kwãrĩk wãnh djwýkôtbit ajamak bën kêt. Tãm dja akuno. Nhyr be, atemã myjja kute djwý pyrãk. Jakôt dja ga me ajamak bën. Tãm ne mex rã'ã nhyr ô'ã me Metĩndjwýnhkôt tĩn ne ar ba rã'ã: rã'ã ne. Ba ije amijo inhĩ dja ba me amã kungã ga me atĩn ne ar aba rã'ã: rã'ã ne. Bir, Ibãm kute imã 'ã karō. Kabênkôt dja ba me amã kungã. Kàjkwakam Ibãm, Metĩndjwýnh ta ne mrãmri kute 'ã imã karō mãmđji, ane.

<sup>28</sup> Nhyr me kum,

—Be, myj dja ba me Metĩndjwýnhmã idjãpênh o nhyr arým kum me ikĩnh? ane.

<sup>29</sup> Nhyr,

—Metĩndjwýnh ne ijano ba tẽ. Kôt dja ga tu amim imarkumrêx. Kum adjãpênh ne ja. Dja ga me ã ane nhyr arým kum me akĩnh, ane.

<sup>30</sup> Nhyr me kum,

—Goja myjja pumũnh kêt'õ nhipêx ba me omũ. Ba me ije araxmã ikator kady omũn kam goja tu amim amarkumrêx. <sup>31</sup> Be, me bakukãmãre ne me kapôt kukritkam djwýbê myj ne ja krẽ. Me bakukãmãre ne me 'ã pi'ók no'ók ne kamã memã kum, “Me kute krên kady ne memã kàjkwa kurũm djwý ngã”, ane.

Goja kudjwa ã me imã o ane ba me omũ, ane.

<sup>32-33</sup> Nhyr amijã djwýkumrêx jakren memã kum,

—Be, Mōđđe kute me akukãmãremã kàjkwa kurũm djwý nhõr kêt. Nhyr be, Ibãm kute me amã kàjkwa kurũm atemã djwýkumrêx nhõr. Me'õ ne arým kàjkwa kurũm ruw ne kute me kunĩmã tĩn

jangjênh. Kute memã tĩn jangjênh nhyr me tĩn ne ar ba rã'ã: rã'ã ne. 'Á ne ije me amã,

—Metĩndjwýnh kute me amã atemã djwýkumrêx nhõr, anhýr. Mrãmri ne ba me amã ja jarênhkumrêx. Nãm Jeju ã memã ane.

<sup>34</sup> Nhyr me kum,

—Bênjadjwýr djwýnh, goja mã me imã djwý ja nhõro nhý, ane.

<sup>35</sup> Nhyr Jeju memã kum,

—E kum, ba. Ba ne ba ije atemã djwý pyrãk. Ba ne ba ije memã tĩn jangjênh nhyr me tĩn ne ar ba rã'ã: rã'ã ne. Dja me mã ikôt ajkamên arým kĩnhkumrêx rã'ã kute mrãmri ne me arým kum prãm kêt kam kĩnh pyrãk. Dja me tu amim imarkumrêx ne arým kĩnhkumrêx rã'ã kute mrãmri ne me arým kum kôr kêt kam kĩnh pyrãk. <sup>36</sup> Be, djãm me aje tu amim imarkumrêx got? Kati. Ba ne ba arým me amã, “Nã gãm me te ipumũn amim imar kêt”, ane.

<sup>37</sup> Be, Ibãm kute ikady memã amak bõnhja kunĩ dja me tu amim imarkumrêx ne arým mã ikôt ajkamê. Ba kam me'õ kanga kêt kumrêx. <sup>38</sup> Mykam dja ba me'õ kanga kêt kumrêx? Bir, Ibãm kute me'ã imã karō kôt dja ba me'õ kanga kêt. Be, djãm ba ije amijã amim karō kôt ne ba kàjkwa kurũm ruw ne ar iba? Kati. Ibãm kute ijanor djwýnh kabên kôt ne ba ruw ne ar iba.

<sup>39</sup> Ibãm kute ijanor djwýnh ta ne ijã amim karõn amim, “Be, ije kady memã amak bõnhja dja ikra mã meo ban 'õo biknor kêt nhyr me akubyn tĩn ne. Pykakam me kunĩ kute aminhinomã amimênh djã nhõ akatikam dja ikra akubyn õ me jao tĩn”, ane. <sup>40</sup> Ibãm kute ijanor djwýnh ajte ijã amim karõn amim, “Me kute ikra pumũnh ne tu amim markumrêxja dja me kunĩ ikôt tĩn ne ar ba rã'ã: rã'ã ne”, ane. Ibãm kute ijã amim karõ ne ja. Pykakam me kunĩ kute aminhinomã amimênh djã nhõ akatikam dja ba akubyn inhõ me jao tĩn, ane.

<sup>41</sup> Nhyr kam mebê idjaer rũnh arým kãxã kabên kumex ne arẽ. Kute memã, “Ba ibê kàjkwa kurũm djwý”, anhýrkam ne me kabên kumex jarẽ. <sup>42</sup> Ne abenmã kum,

—Be, djãm kubê Metĩndjwýnh Kra got? Kati. Jôđje ne kudji. Idjibê ne Jeju. Ba me

ije nãmê bãm pumũnh tũm. Nhyam amijo 'êx ne gwaj bamã,

—Kàjkwa kurũm ne ba ruw, anhỹro ba. Kati. Nãm 'êx. Nãm me ã abenmã ane.

<sup>43</sup> Nhyam Jeju me kabẽn man memã kum,

—Kwãrĩk wãnh ikàxã akabẽn kumex ne arẽn h kêt. <sup>44</sup> Be, djãm me ga dja ga me ikôt ajkamê? Kati. Ibãm kute ijanor djwỹnh kute memã amak bõnhkambit ne me mã ikôt ajkamê. Mã ikôt ajkamê ba arỹm akubyn meo tĩn. Pykakam me kunĩ kute aminhinomã amimẽn h djã nhõ akatikam dja ba akubyn meo tĩn.

<sup>45</sup> Amrêbê: ne me bakukãmãre Metĩndjwỹnh kukwakam kabẽn jarẽn memã kum,

“Metĩndjwỹnh ta dja memã amikabẽn jarẽn nhyam me arỹm kabẽn markumrêx”, ane.

Be, me bakukãmãre kute memã anhỹr ne 'ã pi'ók no'ók kôt mỳj xê dja mã ikôt ajkamê? Bir, Ibãm kute memã kabẽn jarẽn h nhyam me arỹm kute kabẽn markumrêx. Me kute mỳjja'ã kute kabẽn jarẽn hja markumrêx. Me ja dja me mã ikôt amijo bikamẽn h kumrêx. Nãm ã Jeju memã ane.

<sup>46</sup> Ne kam ajte memã kum,

—Be, djãm me'õ ne arỹm Ibãm pumũ got? Kati. Bajbit ne ba arỹm kàjkwakam Metĩndjwỹnh pumũn arỹm kurũm tẽn bõx. Bajbit ne ba arỹm Ibãm pumũ. <sup>47</sup> Me kute tu amim imarkumrêx arỹm Metĩndjwỹnhkôt tĩn ne ar ba rã'ã rã'ã ne. Mrãmri ne ba me amã ja jarẽn h kumrêx. <sup>48</sup> Ba ne ba ije atemã djwỹ pyrãk. Ba ne ba memã tĩn jangij nhyam me Metĩndjwỹnhkôt tĩn ne ar ba rã'ã rã'ã ne.

<sup>49</sup> Be, me bakukãmãre ne me kapôt kukritkam djwỹbê mỳj ne ja ku nhyam mebêngêt tũmrãm me kupa. <sup>50</sup> Ije me amã atemã djwỹ jarẽn hja ne kubê kàjkwa kurũm djwỹ. Dja me kukun tyk kêt. <sup>51</sup> Ba ne ba ije atemã djwỹ pyrãk. Ba ne ba memã tĩn jangij. Dja me djwỹ ja krẽn Metĩndjwỹnhkôt tĩn ne ar ba rã'ã: rã'ã ne. Djwỹ ije memã õrja ne kubê inhĩ. Me kunĩ tĩn kadjy dja ba memã kungã, ane.

<sup>52</sup> Nhyam kam mebê idjaer rũnh arỹm kabẽn aben japan abenmã kum,

—Je tô, mỳj dja memã aminhĩ nhõr on nhyam me ajmã krẽn ja on? ane.

<sup>53</sup> Be, djãm mrãmri ne me kute ikumrêx krẽn mã? Kati. Atemã. Be, mrãmri me kute tu amim Jeju markumrêxo bamã. 'Ã ne Jeju me kute ĩ krẽn jakren 'ã me kute kamrõo kõm jakre. 'Ã ne memã kum,

—Be, ba ije amijo inhĩ dja ga me inhĩ krẽn kêt ne ikamrõo akõm kêt ne kam atĩnkumrêx prãm kêt. Mrãmri ne ba me amã ja jarẽn h kumrêx. <sup>54</sup> Me kute inhĩ krẽn ne ikamrõo kõm ne me mrãmri Metĩndjwỹnhkôt tĩn ne ar ba rã'ã: rã'ã ne. Pykakam me kunĩ kute aminhinomã amimẽn h djã nhõ akatikam dja ba akubyn meo tĩn. <sup>55</sup> Mrãmri ne inhĩbê djwỹ ne ikamrõbê me kõm djã. <sup>56</sup> Me kute inhĩ kur ne ikamrõo kõmja, me jamê ne ba me ije aben mar tỳx ne ije aben jamỹnh tỳx ne abenã idjukanga kêt ne ar abeno iba. <sup>57</sup> Mrãmri Ibãm tĩnkumrêx ne ijano ba tẽ. Kam ne ba Ibãm tĩn o itĩnkumrêx. Nhyam me kute inhĩ kurdjwỹ dja me ba itĩn jao tĩnkumrêx.

<sup>58</sup> Ije amã atemã djwỹ jarẽn h ja ne kàjkwa kurũm ruw. Djãm kute djwỹbê mỳj ne ja pyrãk? Kati. Nãm me te mỳj ne ja ku nhyam mebêngêt arỹm me kupa. Nhyam be, ate dja me atemã djwỹ ja kun arỹm Metĩndjwỹnhkôt tĩn ne ar ba rã'ã: rã'ã ne. Nãm ã Jeju memã ane.

<sup>59</sup> Mebê idjaer bikprõnh djãkam ne Jeju memã ja jarê. Kapanakam me bikprõnh djãkam. <sup>60</sup> Kute memã aminhĩ'ã djwỹ jarẽn h ne memã 'ã ujarẽn h kam ne me kôt baja krãptĩ arỹm amim,

—Je, djãm me ije kabẽn wã mar got? ane.

*Me krãptĩ kute Jeju kanga.*

<sup>61</sup> Nhyam Jeju ta arỹm me kuman memã kum,

—Ba arỹm me amã atemã djwỹ jarê ga me aje amim imar kêt ne arỹm apijãm ne. <sup>62</sup> Dja ba ĩ ikrĩ djã tũmmã wabi ga me idjãbirkôt ipumũ. Mỳj dja ga me arỹm kam nê? <sup>63</sup> Be, atemã kàjkwakam ikabẽn kukrãdjã ne ba me amã arê. Metĩndjwỹnh Karõ kute meo bakambit ne me kute ikabẽn mar. Me ga ne ga me aje amidjwỹnh kĩnh prãm. Kam me aje imar kêtumrêx. Nã bãm me amã ikabẽn jarê, me amã Metĩndjwỹnh Karõ jarê. Tãm ne

kute meo ban memã tĩn jangij nhym me Metĩndjwýnhkõt tĩn ne ar ba rá'ã: rá'ã ne.

<sup>64</sup> Be, djãm me akunĩ ne ga me aje tu amim imarkumrẽx? Kati. Me akwý ne ga me aje amim imar kêt, ane. Nãm Jeju ã memã ane. Be, mýj ne me mar on kam ã memã ane? Bir, amrêbê mýjja kunĩ kêttri ne Jeju kute amikukãm me mar. Apýnh me ĩ djari kute amim mar kêtja arým kute me mar. Djudadjwý dja ĩ kurê djwýnhmã Jeju kanga. Nhym arým kute adjwýnhdjwý mar. Kukãm kute mar. <sup>65</sup> Ne kam memã kum,

—Me akwý ne ga me aje amim imar kêt. Ba kam arým me amã, “Djãm me ga dja ga me ikõt ajkamẽ? Kati. Ibãm kute memã amak bõnhkambit dja me mã ikõt ajkamẽ.” Nãm ã Jeju memã ane.

<sup>66</sup> Nhym kam me kõt baja krãptĩ arým kubê amijo akẽx ne ajte kõt ba kêt.

<sup>67</sup> Nhym kam Jeju kute ar anorjabê 12mã kum,

—Djãm ar gadjwý dja gar ikanga? ane.

<sup>68</sup> Nhym ar 'õbê Ximão Pedru kum,

—Kati. Bẽnjadjwýr djwýnh, mýj me'õkõt dja bar ar iba? Arkati. Gajbit ne ga akabẽno meo tĩn ne 'ã ar imã adjujarẽnh ar aba. Metĩndjwýnhkõt me tĩn ne ar ba rá'ã: rá'ãja'ã ar imã adjujarẽnh ar aba.

<sup>69</sup> Ar ba ne bar tu amim amarkumrẽx. Mrãmri abê me inhõ Bẽnjadjwýrbê kumkat-ibê Kritu. Mrãmri abê Metĩndjwýnh Kra. Metĩndjwýnh tĩnkumrẽx Kra. Ar ba ne bar tu amim amarkumrẽx.

<sup>70</sup> Nhym Jeju arkum,

—Be, mrãmri ne ba amijo ar apytarkumrẽx. Ije ar ajanorbê 12 ne ba amijo ar apytarkumrẽx. Be, djãm ar akunĩ ne gar amex? Kati. Ar ajõ apydji ne abê Xatanaj nhõ àpênh, ane. <sup>71</sup> Djuda'ã ne kabẽn. Djuda Ikadji. Ximão 'õdjwý kute irja. Dja ĩ kurê djwýnhmã Jeju kanga. Kute ar anorjabê 12'õ ja dja kanga.

## 7

### *Djeruxarẽkam me krãptĩmã 'ã ujarẽnh.*

<sup>1</sup> Jeju memã anen kam arek Garrêjakambit ar ba. Be, mýkam ne Djudêjakam arek ar ba kêt? Bir, mebê idjaer kute kam bĩnmã ar abej bakam. <sup>2</sup> Nhym kam arým Djeruxarẽkam mebê idjaer krãptĩ kute

aben pydji djã nhõ akati 'ýr. Me kute aben kajmã'ã me bakukãmãre kukràdjã mar kadji bõ mjýrkam krĩ djã nhõ akati 'ýr.

<sup>3</sup> Nhym kam Jeju kamy ar axikõt apõxja kum,

—E kum, goja amũ pykabê Djudêja'ýr tẽ. Dja wãkam akõt me ba djwýnh adjapênh kõt apumũ. <sup>4</sup> Djãm me'õ kute me kunĩmã amiraxo amirĩt prãm kam kute mebê amijo bipdjur prãm got? Aje mrãmri mýjja pumũnh kêt nhípêx jabej goja pyka kunĩkõt me kunĩmã amijo amirĩt, ane. <sup>5</sup> Be, nãm ar te Jejumẽ axikõt apõx ne amim mar kêt. Kam ne ar ã kum ane.

<sup>6</sup> Nhym Jeju arým arkum,

—Je djãm kraxje me kute ijo tým djã nhõ akati iwýr bõx kêtjakam gar kam imã arẽ? Kati. Ar gajbit akati kunĩkõt ar adjumar mex rá'ã. <sup>7</sup> Nhýnh ne pykakam me axwe 'õ kum akurêmã? Arkati. Nhym be, ba, me kum ikurêkumrẽx. Ije me axwe'ã memã idjujarẽnh ar ibakam me kum ikurêkumrẽx.

<sup>8</sup> Ar gajbit dja gar Djeruxarẽkam me krãptĩ kute aben pydji djã'ýr mõ. Inhõ akati iwýr bõx kêt rá'ãkam 'ýr itẽm prãm kêt. <sup>9</sup> Nãm arkum anen arek Garrêjakam ar ba.

<sup>10</sup> Nhym kam kamy ar arým tẽ. Nhym ar ba:n kam amipdjun arým me kute aben pydji djã'ýr tẽ. 'Ýr tẽ:n arým 'ýr bõx. <sup>11</sup> Nhym arým 'ã me kute aben pydji djã nhõ akati bõx nhym mebê idjaer rũnh arým abej ne memã kum, “Nhýnh ne Jeju dja”? ane. Nhym me “Kon”, ane.

<sup>12</sup> Nhym me me kãxã abenmã Jeju jarẽho kumex. Me kwý ne me abenmã kum, “Kati. Jeju mexkumrẽx”, ane.

Nhym me kwý arĩk abenmã kum,

—Kati. Nãm Jeju amijo 'êx ne me noo biknoro ba, ane. <sup>13</sup> Nhym be, nãm me me ipõkri memã Jeju'ã ujarẽho amirĩt kêt ne. Mebê idjaer rũnh pymaje ne me me ipõkri 'ã ujarẽho amirĩt kêt ne.

<sup>14</sup> Nhym kam arým me kute aben pydji djã nhõ akati nhõkre djã kõt Jeju arým Metĩndjwýnh nhõ kikreti'ýr tẽn wadjãn kam arým memã kukràdjã jarẽho dja. <sup>15</sup> Nhym kam mebê idjaer rũnh te kute Jeju marmã kam no tyn kumex ne abenmã kum,

—Je tô djãm tãmwã kute mekôt pi'ôk jarênh tũm got ã me kukràdjà jarênh mexo ane?

<sup>16</sup> NhyM Jeju memã kum,

—Djãm ba ikukràdjà ne ba me amã arênhõ iba? Kati. Kute ijanor djwýnh kukràdjà ne ba me amã arênhõ iba. <sup>17</sup> Gêdja ga me ajõ ga aje kukràdjà kôt amijo aba prãm jabej arým ama. Me'õ kute ikukràdjà jarênhmo krax djwýnhja dja ga me ama. Djãm ba ne ba ije me amã ikukràdjà jarênhmo krax djwýnh? Kati. Kàjkwakam Metĩndjwýnh ne kute arênhmo krax ba kam kôt me amã arê. Ja dja ga me ama. Me aje kukràdjà kôt amijo aba prãm jabej ama. <sup>18</sup> Ne ga ren me ajõ ga amirax jabej ne ren 'ã memã amijarên memã amijo adjãmra ar aba. NhyM be, kati. Kute ijanor djwýnh ne ba ije rax jarênh. Ije ajbit rax jarênh ne kam katàt ije ikabên jarênhkumrêx ne ijêxnhĩ kêtumrêx.

<sup>19</sup> Me bakukãmãre Môjdjê kute me amã Metĩndjwýnh kukràdjà jarênhja djã ne ga me kôt ar amijo aba? Kati. Ga me ajõ aje kukràdjà kôt ar amijo aba kêt. Ne kam aje ibĩnmã ijabej ar aba. Mýkam? ane.

<sup>20</sup> NhyM me kum,

—Je tô nhýnh me'õja ne kute abĩnmã ajabej ar ba? Be, me karõ punu'õ ne ajo ba, ane.

<sup>21</sup> NhyM Jeju arým memã kum,

—Be, ba amrêbê me'õ punu pydjio mex ga me te aje mýjja marmã ikam ano tyn akumex. <sup>22-23</sup> Nã bãm pi'ôk råràrkam me'õ mex ga me arík ijã abenmã kum,

—Pi'ôk råràrkam ne apê. Axwekumrêx, anhýro aban arým ikam angyrk ne. Djãm bajbit ne ba kam idjápênh iba ga me bajbit imã ijaxwe jarê? Kati. Me gadjwý ne ga me pi'ôk råràrkam adjápênh aba. Môjdjê ne me amã me my nhinhu kà rênh jarê. Djãm ta ne kumrêx arê? Kati. Me bakukãmãre Abraão ar kumrêx ne ar arê. Ga me kam aje katàt Môjdjê kukràdjà kôt amijo aba kadjy pi'ôk råràrkam adjápênh ne me my kà rênho aba. Mýkam ne ga me bajbit imã ijaxwe jarê? Ije kam prĩne me'õ punuo mexkam imã ijaxwe jarê. Ga me ren imã ijaxwe jarênh kêt. <sup>24</sup> Kwãrik wãnh ga me arík me axwe kêt'ã axwe janhõr kêt. Dja ga me mrãmri me axwekumrêxkôt memã

ajapôxkumrêx ne kam arým katàt memã axwe jarênhkumrêx. Nãm ã Jeju memã ane.

*Mebê idjaer kum kurê.*

<sup>25</sup> NhyM kam Djeruxarêkam me ar ba tũm kwý Jeju jabej aben kukij ne abenmã kum,

—Je, djãm mrãmri me kute tãmwã bĩnmã ar abej ba? <sup>26</sup> NhyM kam kum me uma kêt ne memã kabên ne. NhyM me arým kutã kute kum mýjja'õ jarênh prãm kêtumrêx. Bãrãm me rũnh arým kute tãmwã'ã amim, “Jejubê ne me banhõ Bẽnjadjwýrbê kumkatibê Kritu”, anhýrkam ne me anhikrên kabên maro dja. <sup>27</sup> Tô nhýnh? Be, kati. Djãm me kute kraxkôt Bẽnjadjwýrbê kumkatibê Kritu mar got? Kati. Me kute kraxkôt mar kêtumrêx. NhyM be, bãm kute Jeju djir ne gu me baje arým omũnh. Kôt ne gu me arým Jeju 'êxnhĩmã bakato. Nãm me kwý ã Jeju'ã abenmã ane.

<sup>28</sup> NhyM kam Jeju kute Metĩndjwýnh nhõ kikretikam memã kukràdjà jarênhõ ãmkam kàj bê memã kum,

—Be, mrãmri ne ga me aje imar. Nhýnhja kurũm ne ba itêm ne ibõx ja ne ga me arým aje mar. Djãm ba ne ba amikabên kôt amrê tẽ? Kati. Me'õ kute ijanor djwýnh ne mrãmri. Tãmwã ne ga me aje mar kêt. <sup>29</sup> NhyM be, ba ne ba ije omũnh tũm. Tãm ne ijano ba amrê kurũm tẽn bõx, ane.

<sup>30</sup> NhyM kam me bit kute o tým ne pa 'amýnhmã. Ne te: o ane. Me kute o tým'ã myt bõx kêt rã'ãkam ne me te: o ane. <sup>31</sup> NhyM me kwý krãptĩ arým tu amim markumrêx ne abenmã kum,

—Me baje raxmã bakator kadjy ne Jeju arým mýjja pumũnh kêt krãptĩ nhipêx ne. Me punu krãptĩo mex. Djãm me'õdjwý bõx ne kute àpênh mexo kute akrenh got? Kati. Be, mrãmri tãmwãbê ne me banhõ Bẽnjadjwýrbê kumkatibê Kritukumrêx, ane.

<sup>32</sup> Me rũnh kàxã ne me ã abenmã anhýro ku'ê nhyM mebê pardjêumê me kadjy Metĩndjwýnh mar djwýnh nhõ bẽnjadjwýr arým me kuma. Me kuman arým Jeju'ýr me krãkamngõnh kwý jano. Me kute pa 'amýnhmã ne me me ano.

<sup>33</sup> NhyM kam Jeju arým memã kum,

—Be, me aro'ã ar iba ne arým 'ã akati ngrêre. Dja ba kam arým kute ijanor djwýnh'ýr tẽ. <sup>34</sup> Ga me kam arým te ijabej. Te ijabej ne imã akator kêt. Ne kam ikrĩ djà'ýr te abôx prãmje, ane.

<sup>35</sup> Nhyr me bẽ idjaer rũnh abenmã kum,

—Je tũ, jãm dja tẽ gu me kum bakator kêt. Djãm apýnh me bajtem ba djakam me bimãnh tũm'ýr ne tẽmmã? Djãm kam kute me bajtemmã kukràdjã jarẽnhmã? <sup>36</sup> Kute me bamã, “Dja ba tẽ ga me arým te ijabej. Te ijabej ne imã akator kêt. Ne kam ikrĩ djà'ýr te abôx prãmje”, anhýr. Mýj gẽdja kam nẽ? ane.

<sup>37</sup> Nhyr kam me kute amikukràdjã kõt amijo mõr ne kute 'ã aminhinomã amimẽnh nhõ akati arým bõx. Akati raxja bõx. Me kukãmãre kukràdjã kõt me kute bõ mjýrkam krĩ'ã aminhinomã amimẽnh kadjy akati ne arým bõx. Nhyr Jeju arým kãmã djan memã kum,

—Me ajõ ar amã kõr jabej amrẽ iwýr tẽn ikõ. <sup>38</sup> Me kute tu amim imarkumrẽxja gẽdja ã me kadjwýnhbẽ ngõ kute meo tĩnja mã mekam apõx. Me bakukãmãre kute pi'õkkam memã arẽnh kõt ne ba ar amã arẽ.

<sup>39</sup> Nãm Jeju Metĩndjwýnh Karõ'ã ã memã ane. Dja me tu amim Jeju markumrẽx nhyr Metĩndjwýnh Karõ arým me'ýr bõx ne meo ba. Djãm arým ne meo ba? Kati. Metĩndjwýnh kute memã Karõ janor djwýnh rãm ne Jeju memã ane. Dja Metĩndjwýnh amiwýr Jejuo wabin akubyn o rax. Ne kambit arým memã Karõ jano nhyr bõx ne meo ba.

<sup>40</sup> Jeju memã ane nhyr me krãptĩ kute kabẽnja markam 'ã abenmã kum,

—Be, mrãmri ne tãmwãbẽ Metĩndjwýnh kukwakam kabẽnh jarẽnh djwýnh. Me bakukãmãre ne me amrẽbẽ: arẽ, ane.

<sup>41</sup> Nhyr me kwý Jeju'ã abenmã kum,

—Be, tãmwã ne mrãmri kubẽ Kritukumrẽx. Mrãmri kubẽ me banhõ Bẽnjadjwýrbẽ kumkatibẽ Kritukumrẽx, ane.

Nhyr me kwý arĩk 'ã abenmã kum,

—Be kati. Jejubẽ ne Bẽnjadjwýrbẽ kumkatibẽ Kritu kêt. Abatãnh djã ne pykabẽ Garrêja. <sup>42</sup> Nhyr be, me banhõ Bẽnjadjwýrbẽ kumkatibẽ Kritukumrẽx krĩbẽ Berẽkam abatãnh. Kubẽ ne me bakukãmãre Dawi tãm djwý. Bẽnjadjwýr rax

Dawi jabatãnh djakam ne Kritu abatãnh djã. Amrẽbẽ: ne me bakukãmãre pi'õkkam arẽ. Nhyr be, kati. Djãm Jejubẽ Bẽnjadjwýrbẽ kumkatibẽ Kritu got? Jeju ate Garrêjakam abatãnh, ane. <sup>43</sup> Me kute ã abenmã anhýrkam me kute Jeju'ã axikõt kabẽnh jadjwýr kêt. <sup>44</sup> Nhyr me ja kwý bit kute o tým ne pa 'amýnhmã. Ne kam te: kute o anhýrmã.

<sup>45</sup> Nhyr kam me krãkamngõnh kikreti nẽje ku'êja me rũnh'ýr akẽx ne me'ýr bõx. Metĩndjwýnh mar djwýnh nhõ bẽnjadjwýrmẽ me bẽ pardjẽu'ýr bõx. Nhyr kam me rũnh me krãkamngõnhmã kum,

—Je tũ mýkam ne ga me Jejuo abõx kêt? ane.

<sup>46</sup> Nhyr me krãkamngõnh memã kum,

—Djãm me'õ pykakam kabẽnh mexo kute tãm wã pyrãk? Kati. Nãm prĩne kabẽnh mexo kute katãt me kunĩ jakrenh. Ba me kam te ije o itým ne pa 'amýnhmã, ane.

<sup>47</sup> Nhyr me bẽ pardjẽu memã kum,

—Je tũ djãm arým ne me gadjwý me anoo akno? <sup>48</sup> Ë, ba me amã arẽ. Djãm me irax'õ, nãr me ibẽ pardjẽu'õ ije amim tãm wã mar got? Kati. <sup>49</sup> Be, djãm me kãtãm wã kute Mõjdjẽ kukràdjã mar got? Me kute me bakukãmãre kukràdjã mar kêt kam dja Metĩndjwýnh arým me kanga, ane.

<sup>50</sup> Nhyr Nikodemu. Tãm ne akamãtkam Jeju'ýr tẽ. Kubẽ ne me bẽ pardjẽu'õ. Nãm arým memã kum,

<sup>51</sup> —Je gẽdja gwãm kraxje me baje axwe jabej me kukjẽr kêt kam memã axwe jarẽ? Kati. Be, Jeju kute kraxje me bamã amijarẽnh kêt kam gu me arým 'ã axwe nhõro nhỹ, me bakukràdjã kupa'ã ne gu me 'ã nhõro nhỹ, ane.

<sup>52</sup> Nhyr me arĩk kum,

—Djãm gadjwý pykabẽ Garrêjakam ajabatãnh djã ne ga nẽje akabẽno dja? Be, pi'õkkam ne Metĩndjwýnh kukwakam kabẽnh jarẽnh djwýnh'õ Garrêjakam abatãnh kêt kam rãm. Dja ga amim pi'õk jarẽnh arým kõt ikabẽnkumrẽxmã akato. Jejubẽ Bẽnjadjwýrbẽ kumkati kêt. Tãm dja ga pi'õk jarẽnh ama, ane.

<sup>53</sup> Nhyr kam me kunĩ ajmãn aminhũrkãmã apẽx.

## 8

*Me'õ nire kute me'õbê mjêno àkĩnh.*

<sup>1</sup> Jeju arým krãnhbê Oriwêre 'ÿr tẽ. Tẽ:n arým 'ÿr bõx nhym 'ã akamât nhym nõ. Nõ: nhym arým õkrên'ãnh kà. <sup>2</sup> Nhym kam Metĩndjwýnh nhõ kikreti'ÿr tẽn kam bõx. Nhym kam me kunĩ ajte 'ÿr bõx nhym arým nhỹ. Nhỹn arým memã kukràdjà jarênho nhỹ. <sup>3</sup> Nhym kam me arým Jeju'ÿr me 'õ nireo bõx ne me ipõkri kudja. Arým ne mjên ne kam ajte me'õbê mjêno akĩn ar ro'ã nõ. Nhym me arým omũn o tým ne pa 'amýn Jeju'ÿr o bõx. <sup>4</sup> Ne kum,

—Ë, ujarênh djwýnh. Be, me'õ nire ja arým mjên ne arým me'õ myo akĩn ar ro'ã nõ. Ba me ar nõrkõt ar omũn aro tým ne arým awýr o bõx. <sup>5</sup> Be, me ja jaxwe pãnh ne Mõjdjê arým memã arê. Kute me bakukràdjà jarênhkam Mõjdjê arým 'ã memã kum,

—Ga me axwe pãnh kẽno titik ne abĩ gẽ ty, ane. Be, gadjwý ar imã axwe pãnh'õ jarẽ bar kuma. Mýj gẽdja bar on? Nãm me ã Jejumã ane.

<sup>6</sup> Mýj kadjy ne me kum ane? Bir, godja kukràdjà kupa'ã mýjja jarênh jabej nhym me arým kõt kum axwe jarẽ. Ja kadjy ne me kum ane.

Nhym Jeju ate idjao nhỹn arek ikrao pyka no'õko nhỹ. <sup>7</sup> Nhym me mã kum tãmja jarẽ nhym arek pyka no'õko nhỹ. Nhym kam kãmã djan memã kum,

—Goja me ajõ apydji ajaxwe kêtumrêx jabej ga akumrêx kên'õ byn o titik ne abĩ, ane. <sup>8</sup> Nãm anen ajte nhỹ, pyka no'õko nhỹ.

<sup>9</sup> Nhym me arým amima:ro djan amijaxwedjwý ma. Ne kam arým pijãm ne mã apõxo dja. Me abatãnhja kumrêx ne me kato. Nhym mekõt me abatãnh nydjwý apõxo dja. Nhym ajbir abatãnh nyre meo ino ren kato. Arým ne me kunĩ apêx. Nhym kam Jeju arým ate nhỹ nhym niredjwý arým ate dja. <sup>10</sup> Nhym kãmã djan nire ate ãmkõt omũn kum,

—Me'õ nire, nhỹnh ne me kute amã ajaxwe jarênhja ku'ê? Djãm me'õ kute ajaxwe pãnh kẽno atitik prãm kêtumrêx? ane. <sup>11</sup> Nhym kum,

—Ã bẽnjadjwýr. Me'õ kute pãnh ititik prãm kêt, ane.

Nhym kum,

—Badjwý. Ajaxwe pãnh ije kẽno atitik prãm kêt. Aj mã. Kwãrĩk wãnh ga ajte ajaxwe kêt, ane.

*Kute katàt memã amijarênh.*

*Dju r 1.4; Rô 13.12; Ep 5.8; Tex k 5.5*

<sup>12</sup> Nhym kam Jeju ajte memã kum,

—Be, apýnh me ba djà kunĩkõt me axwe kunĩ katàt kute amijo ba kadjy ne ije mrãmri ne memã pry kurwý djà pyrãk. Ga, me kurwý djà kute akamãtkam memã pry kurwý nhym me kute akamãtkam mýjja kunĩ pumũnh ne katàt baja pumũ. Badjwý dja me tu amim imarkumrêx ne arým katàt amijo ba. Ga, akamãt kô tykkam me kute mýjja pumũnh kêt ne ba punuja pumũ. Me axwedjwý ne me kute mýjja mar kêt ne amijo ba punu. Djãm me kute tu amim imarkam axwe ne amijo ba punu? Kati. Ba ije mrãmri ne memã pry kurwý djà pyrãk. Dja me tu amim imarkumrêx ne arým katàt amijo ban kam arým ikõt tĩn ne ar ba rã'ã: rã'ã ne, ane.

<sup>13</sup> Nhym mebê pardjêu kum,

—Je, djã nãm me'õ akõt kabẽn dji? Kati. Ga apydji aje memã amijarênho aba nhym me'õ kute akõt kabẽn djir kêt. Ba me kam arým amã akabẽn kajgo jarẽ. Akabẽn kajgo nhym me kute amar kêt, ane.

<sup>14</sup> Nhym memã kum,

—Kati. Ipydji ije memã amijarênhkam ije memã amijarênh kajgo kêt. Kãjkwakam Metĩndjwýnh ne ijano ba amrê kabẽn kõt tẽ. Be, 'ÿr dja ba akubyn tẽ. Ja ne ije markumrêx. Kam ikabẽn kajgo kêt. Nhym be, me ga ne ga me aje imar kêt. Nhỹnhja kurũm ne ba itẽmja ne ga me aje mar kêt. Nhĩ'ãm itẽmdjwý ga me aje mar kêt.

<sup>15</sup> Me ga ne ga me aje amidjwýnhõ kĩnh prãm ne aje memã axwe jarênho aba. Djãm ba ne ba ije amidjwýnhõ kĩnh prãm ne memã axwe jarênh got? Kati. <sup>16</sup> Godja ba memã axwe jarênh jabej arým katàt memã arênhkumrêx. Djãm ipydji dja ba arê? Kati. Ibãm kute ijanor djwýnhmẽ dja bar axikõt ikabẽn ne memã axwe jarẽ. Kam ne ije katàt memã axwe jarênhkumrêx.

<sup>17</sup> Nhym be, amrêbê: me bakukãmãre kute me akukràdjà'ã pi'õk no'õkdjwý. Me akukràdjaja kõt ba ije Ibãmmẽ axikõt memã



amijarêhno iba. Me akukràdjà jakam me'ò ar amãnhkrut ne kute me omũnhkòt kute axikòt me arênh nhyim me kunĩ kute mar ne kute memã kum, “Mrãmri katàt ar kute me arênhkumrêx”, anhÿrmã. Ja ne ga me arÿm aje mar.

<sup>18</sup> Be, ja kòt ne ba Ibãmmẽ ã me amã amijarêhno ane. Ba ije me amã amijarênh. Nhyim Ibãm kute ijanor djwÿnh ikòt kute me amã ijarênh. Ba Ibãmmẽ ar ije axikòt me amã amijarênhkam ne ga me ren me akukràdjà kòt ijã, “Mrãmri ne katàt kute memã amijarênhkumrêx”, ane. Ba Ibãmmẽ ar ije axikòt me amã amijarênhkam dja ga me ar ikabên katàtjamã akaton ama. Me akukràdjà'ã pi'òk no'òk kòt dja ga me ima, ane.

<sup>19</sup> Nãm ã Jeju memã ane nhyim me arÿm kum,

—Tò nhÿnh ne abãmja? ane.

Nhyim memã kum,

—Me aje imar kêt ne aje Ibãmdjwÿ mar kêt. Ne ga me ren iman ren Ibãmdjwÿ ma. Nhyim be, kati. Aje mar kêt, ane. <sup>20</sup> Be, Metĩndjwÿnh nhõ kikretikam me kute Metĩndjwÿnhmã pi'òk kaprĩo atom djakam ne Jeju ã memã ane. Nhyim me'ò kute o tÿm ne pa 'amÿnh kêtumrêx. Pa 'amÿnh'ã myt bòx kêt rã'akam.

<sup>21</sup> Nhyim kam ajte memã kum,

—Dja ba ì mã tẽ ga me arÿm te ijabej. Te ijabej ne kam arÿm ty. Nhyim kam Metĩndjwÿnh me amã ajaxwe jarênh rã'ã. Mũm itẽmmã 'ÿr ikràja dja ga me te ikòt 'ÿr atẽm ne 'ÿr abòx prãmje, ane.

<sup>22</sup> Nhyim mebê idjaer rũnh abenmã kum,

—Je tò mÿj dja nẽ? Birãm, dja amibĩ. Nãm me ã abenmã ane. Kute memã kum,

—Dja ba ì mã tẽ ga me arÿm te ijabej, anhÿrkam ne me ã abenmã ane.

<sup>23</sup> Nhyim memã kum,

—Be, me ga ne ga me pykakam ajapòx ne ar aba. Nhyim be, ba ne ba kÿjrũm kàjkwakam ar iba tũm. Me ga ne ga me aje pykakam mÿjjabit mar. Ba ne ba ije kàjkwakam mÿjja mar. <sup>24</sup> Me aje pykakam mÿjjabit markam ne ba me amã, “Dja ga me ty nhyim Metĩndjwÿnh amã ajaxwe jarênh rã'ã”, ane. Ne me amã, “E kum ba. Ba ne ba arÿm bòx”, ane. Dja ga me kam amim imar

kêt rã'ã jabej arÿm ty nhyim Metĩndjwÿnh me amã ajaxwe jarênh rã'ã, ane.

<sup>25</sup> Nhyim me kum,

—Bir, mÿj me ajõ ga nã? Gop me imã amijarênhkumrêx, ba me ama, ane.

Nhyim Jeju memã kum,

—Be, amrêbê ne ba me amã amijarêhno iba. Nãm bãm me amã, <sup>26</sup> “Be, ije me ajaxwe kumex markam ba ren memã me ajaxwe jarênh ajte me amã pãnh jarê. Be, ijanor djwÿnh kute katàt kabên jarênhkòt ne ba me kunĩmã arêhno iba.” Nãm bãm ã me amã ane, ane.

<sup>27</sup> Kute memã kum, “Kute ijanor djwÿnh”, anhÿrkam me kute mar kêt. Kute memã Bãm jarênhja me kute mar kêt.

<sup>28</sup> Nhyim kam Jeju memã kum,

—Ba ije amijo inhĩ ne ibòxja dja ga me kÿjrũm inhò. Kam dja ga me arÿm ima. Ba ije amikabênkòt amijo iba kêtumrêx. Ibãm kute imã kabên jarênh kòt ne ba memã arêhno iba. Ja dja ga me aje kÿjrũm inhòrkam ama. <sup>29</sup> Kute ijanor djwÿnh ne imẽ amijo kajkep. Djã nãm imã kàx ba ate ar iba? Kati. Be, mÿkam ne imã kàx kêt? Bir, ije o kĩnh kadjy ne ba kum idjapênh mex rã'ã. Kam imã kàx kêt. Nãm ã Jeju memã ane. <sup>30</sup> Kute memã ja jarênhkam ne me kumex arÿm tu amim markumrêx.

### *Abraão tàmdjwÿ'ã ujarênh.*

<sup>31</sup> Nhyim kam mebê idjaer kute tu amim markumrêxja Jeju memã kum,

—Dja ga me mã ikabên kòt ar amijo aban 'ã adjukanga kêt ne arÿm me abê ikòt aba djwÿnhkumrêx. <sup>32</sup> Ne kam arÿm mrãmri ikabênkumrêxmã akaton ijã amim, “Be, mrãmri ne kabên katàtkumrêx”, anhÿro aba. Ne kam ikabên katàtkumrêxmã akato ba kam arÿm me apytà. Me'òja kute me apa 'amÿnh ga me kum adjapênh kajgoo abaja ba kubê me apytà. Ga me kam ikòt adjumar mexkumrêx ne ar aba. Nãm ã Jeju me axwe nhõ bẽnjadjwÿr'ã memã ane.

<sup>33</sup> Nhyim ajte me kwÿ kum,

—Tò nhÿnh ne kam me'ò kute me ipa 'amÿnh ba me kum idjapênh kajgoo ibaja? Kati. Me ba ne ba me ibê me bakukãmãre Abraão tàmdjwÿ. Nhyim kam me'ò kute me ipa 'amÿnh kêtumrêx. Mÿkam ne ga,

—Ba me'òbê me apytà? ane.

<sup>34</sup> Nhyim Jeju memã kum,

—Mrãmri me ajaxwe prãmkam ne me ajo ba djwýnhja arým kute me apa 'amýnh ga me arým kum adjápênh kajgokumrêx.

<sup>35</sup> Ba me amã arê ga me ama. Djãm me'õ nhõ kikrekam õ àpênh djwýnh djãm kubê õ àpênhkam kum àpênh rá'ãmã? Kati. Gêdja í atemã me'õmã apê. Nhyim be, kam me'õ krakumrêxja dja kam kra rá'ã ne. <sup>36</sup> Ba ibê Metĩndjwýnh Kra rá'ãkam ibê me apytàr djwýnh. Me apa 'amýnh djwýnhbê me apytàr djwýnh. Dja ba me apa 'amýnh djwýnhbê me apytà ga me kam mrãmri ad-jumar mexkumrêx ne ar aba.

<sup>37</sup> We me abê Abraão tàmdjwý, ba ije kôt me amar. Ga we me te abê Abraão tàmdjwý ne me aje ibĩnmã. Me amã ikabên kĩnh kêtikumrêxkam ne ga me aje ibĩnmã. <sup>38</sup> Be, Ibãmmê ro'ã ar ibari ije mýjja pumũnh ne mar. Tãm ne ba me amã arê. Me ga ne ga me anhingêt kute amã arênh kôt ar amijo aba.

<sup>39</sup> Nhyim me kum,

—Be, mrãmri me inhingêtbê Abraãokumrêx, ane.

Nhyim memã kum,

—Ga ren me abê Abraão tàmdjwýkumrêx ne ren Abraão djápênh kôt adjápênh ar aba. <sup>40</sup> Nhyim be, kati. Ga me jakam aje ibĩnmã. Kàjkwakam Metĩndjwýnh kute imã kabên katàt jarênh kôt ije katàt me amã arênhkumrêxkam ne ga me aje ibĩnmã. Djãm ã Abraão meo ane? Kati. <sup>41</sup> Ne ren Abraãobê me anhingêtkumrêx ga ren me adjápênh mex. Nhyim be, kati. Atemã me anhingêt djápênh kôt ne ga me atemã adjápênh ar aba.

Nhyim me kum,

—Djãm krô'ã me'õ kute akudjwa me ijad-jwýr? Kati. Be, me Ibãm djwýnh pydji. Kàjkwakam Metĩndjwýnh, ane.

*Kute memã Xatanaj tàmdjwý jarênh.*

<sup>42</sup> Nhyim Jeju memã kum,

—Ne ga me ren mrãmri kàjkwakam Metĩndjwýnho Abãm ne ren amã ijabê. Be, mýkam? Bir, kàjkwakam Metĩndjwýnh kurũm ne ba tẽn bõx. Be, djãm ba ne ba tẽ? Kati. Tãm ne ijano ba amrê tẽ. Kam ga me ren amã ijabê. <sup>43</sup> Be, mýkam ne ga me aje ikabên mar kêt? Bir, me ajamakke

kêt prãmkam. <sup>44</sup> Be, me anhingêtbê Xatanaj ne ar me ajo ba. Me anhingêt kum axwe prãm kôt ne ga me amã ajaxwe prãm. Kute amikrax totokbê kubê me par djwýnh. Ta kabên katàt kêtikum kute Metĩndjwýnh kabên katàt 'amýnh týx kêt ne kôt kute amijo ba kêt. Ta 'êxnhĩ kôt memã 'êx ba. Mrãmri 'êxnhĩkumrêxkam kubê me 'êxnhĩ nhingêt. <sup>45</sup> Kubê me 'êxnhĩ nhingêtkam ba te me amã katàt ikabên jarênhkumrêx ga me aje amim imar kêt. <sup>46</sup> Be, mýj me ajõ ga ne ga me aje mrãmri ijaxwe'õmã akator kumrêx? Kati. Ga me te: aje ijaxwe'õmã akator prãmje. Ijaxwe'õ kêtikum mýkam ne ga me aje imar kêt? Ba te ije me amã katàt Metĩndjwýnh kabên jarênhkumrêx ga me aje imar kêt. Be, mýkam? <sup>47</sup> Bir, ne ga ren me abê Metĩndjwýnh kra ne ren amim kabên markumrêx. Nhyim be, kati. Me abê Metĩndjwýnh kra kêtikum ne ga me aje amim kabên mar kêt. Nãm ã mebê idjaer rũnhmã ane.

*Kute mebê idjaer rũnhmã amijarênh.*

<sup>48</sup> Nhyim mebê idjaer rũnh arĩk kum,

—Be, abê pykabê Xamarijkam me kra'õ ba me arým ama. Me karõ punu ne ari ajo ba, ane.

<sup>49</sup> Nhyim Jeju memã kum,

—Kati. Me karõ punu kute ijo ba kêt. Ba ne ba Ibãm rax jarênhõ iba. Ga me kam imã ikajgo jarênhõ aba. <sup>50</sup> Be, djãm ba ne ba amirax jabej? Kati. Atemã 'õ kute irax jabej ne kute me ajaxwe mar. <sup>51</sup> Mrãmri dja me ikabên man kôt ar amijo ban arým tykkumrêx'ýr bõx prãm kêt. Mrãmri ne ba me amã ja jarênhkumrêx. Nãm ã Jeju memã ane.

<sup>52</sup> Nhyim mebê idjaer rũnh kum,

—Tõ nhýnh? Be, me bakukãmãre Abraão arým ty. Metĩndjwýnh kukwakam kabên jarênh djwýnhdjwý ne me arým aben kukãm ty. Tõ nhýnh dja me akabên man kôt ar amijo ban tyk kêt? Akabên jakôt ba me arým amã ikaton amarkumrêx. Mrãmri ne me karõ punu ajo ba. <sup>53</sup> Djãm aje araxo me bakukãmãre Abraão jakrenh ne ga aje, “Dja me ikabên man kôt ar amijo ban tyk kêt”, anhýr? Abraão arým ty. Metĩndjwýnh kukwakam kabên jarênh djwýnh ar arým ty. Mýj me'õ rax ne ga arĩk o amiptarn 'ã amimênhõ dja? ane.

<sup>54</sup> Nhyim Jeju memã kum,

—Ne ba ren arík amijã me'õ rax mën ren mrãmri ikajgo. Nhyim be, kati. Ibãm ne kute ijã irax mënkhkumrëx. 'Ã ne ga me aje abenmã, “Me Batĩndjwýnh”, anhÿr kajgoo aban <sup>55</sup> aje mar kêtikumrëx. Nhyim be, bajbit ije markumrëx. Ne ren ijëxnhĩ ne ren me amã, “Ije mar kêt”, ane. Ne kam ren me akudjwa memã ijëx iba. Nhyim be, kati. Mrãmri ije markumrëx ne kabën kôt ar amijo iban ijëxnhĩ kêt. <sup>56</sup> Be, me anhingët Abraão arÿm amikukãm iman arÿm ikam kĩnhkumrëx, ane.

<sup>57</sup> Nhyim mebê idjaer rũnh kum,

—Je tô, djãm krazje ajã amex krãptĩbê 50 apêx kêtjakam djãm ga ne ga arÿm me bakukãmãre Abraão pumũ got? ane.

<sup>58</sup> Nhyim Jeju memã kum,

—Be, me akukãmãre Abraão amirĩt këtiri ne ba ar iba tũm, ane. <sup>59</sup> Nhyim me arÿm kën kwÿ jamÿ, kute o titik ne bĩn kadjy. Nhyim Jeju arÿm amijo apdjun mã tẽ. Metĩndjwýnh nhõ kikreti kurũm katon mã tẽ.

## 9

*Kute me'õ adjakamã no rãjao mex.*

<sup>1</sup> Tẽ: nhyim arÿm me'õ no rã nhÿ. Adjakamã ne me'õ no rã. Nãm nhÿ nhyim arÿm omũ. <sup>2</sup> Nhyim kôt ba djwýnhdjwÿ omũn Jeju kukij ne kum,

—Ujarënh djwýnh, mÿkam ne me'õja adjakamã no rã? Djãm ta axwe pãnh ne adjakamã no rã? Nãr nãmẽ bãm ar axwe djô'ã ne no rã? Mÿj ne kam kute? ane.

<sup>3</sup> Nhyim arkum,

—Kati. Ta axwe pãnh no rã kêt. Ne nãmẽ bãm ar axwe djô'ã no rã kêt. Be, Metĩndjwýnh kute no rãkam àpënh nhyim me kute kôt raxmã kator kadjy ne no rã.

<sup>4</sup> Be, jakam imexri idjãpënh prãmikumrëx kute mrãmri ne a'uri me àpënh prãm pyrãk. Kute ijanor djwýnh kute idjãpënh'ã imã karõ kôt idjãpënh prãmikumrëx. Adjÿm, dja me ï ijo bikënhõ tën ibĩ ba te idjãpënh prãmje. Kute mrãmri ne me akamãt kô tykkam te àpënh prãm pyrãk. <sup>5</sup> Pykakam me axwemẽ ro'ã ar ibari ba ije mrãmri memã pry kurwÿ djã pyrãk. Ga, me kute akamãtkam memã pry kurwÿ nhyim me katãt baja pumũ. Badjwÿ ne ba memã

Metĩndjwýnh kabën jarë nhyim me arÿm kôt katãt ar amijo ba. Ne tu amim kabën markumrëx ne arÿm katãt ar amijo ba.

<sup>6</sup> Nãm anen arÿm pykakam aptõn kam o ajrën arÿm o me'õ no rãja no dÿj. Ne kam kum,

<sup>7</sup> —'ÿr tën ngô nhidjibê Xirôwekam amino ku'õ, ane. Me bakabënkam ne me ren ngômã, kute anor jarë. Nãm kum ane nhyim arÿm 'ÿr tën kam amino ku'õ. Ku'õn arÿm no mex ne. No mex ne kam ùrkwã'ÿr tën arÿm 'ÿr bõx.

<sup>8</sup> Nhyim ùrkwã bu'ã me krĩ kute me'õ no rã pumũnh tũm abenmã kum,

—Djãm tãmwã ne amijo à'wÿro krĩ? ane.

<sup>9</sup> Nhyim me kwÿ memã kum, “Nà, tãm”, ane. Nhyim me kwÿ memã kum,

—Kon, kute tãmwã pyrãk, ane.

Nhyim ta memã kum, “Nà, ba”, ane.

<sup>10</sup> Nhyim me kum,

—Tô mÿj me'õ ne amã ano mex jadjà? ane.

<sup>11</sup> Nhyim memã kum,

—Be, me'õbê Jeju ne pykakam aptõn kam o ajrën arÿm o ino dÿj. Ino djyn arÿm imã, “'ÿr tën ngôbê Xirôwekam amino ku'õ”, ane. Ba kam 'ÿr tën amino ku'õn arÿm ino mex ne irĩt mexikumrëx, ane.

<sup>12</sup> Nhyim me kum, “Nhÿnh ne dja”? ane.

Nhyim memã kum, “Kon”, ane.

<sup>13</sup> Nhyim kam me arÿm mebê pardjêu'ÿr o bõx. Me'ÿr me'õ no rãn arÿm no mexjao bõx. <sup>14</sup> Be, me tyk djã kêt djã nhõ akatikam, pi'ók rãrãrkam ne Jeju pykakam aptõn o ajrën o me'õ no djyn o noo mex. <sup>15</sup> Nãm me mebê pardjêu'ÿr o bõx nhyim me ajte kukij ne kum,

—Mÿj ne ga arĩt mex kadjy nẽ? ane.

Nhyim memã kum,

—Nãm pykakam aptõn o ajrën o ino dÿj ba ku'õn arÿm ino mex ne irĩt mexikumrëx, ane.

<sup>16</sup> Nhyim mebê pardjêu kwÿ abenmã kum,

—Djãm Metĩndjwýnh ne tãmwã jano got? Be, me bakukràdjã pãnh ne pi'ók rãrãrkam ari àpënh ba. Axweikumrëx, ane.

Nhyim me kwÿ 'ã abenmã kum,

—Nhyim bê ne me'õ jaxwe kute ã mÿjja pumũnh kêt nhípêxo anhÿr. Kute ã me'õ no rão mexo anhÿr. Nãm me ã Jeju'ã kabëno

aben japanho ane. <sup>17</sup> Ne kam me'õ no rãn arým no mexjamã kum,

—Kute amã anoo mexkam 'ã akabën'õ jarẽ ba me ama, ane.

Nhym memã kum,

—Be, kubê Metĩndjwýnh kukwakam kabën jarënh djwýnh'õ, ane.

<sup>18</sup> Nhym mebê idjaer rũnh amim mar kêt ne. Nãm me amim,

—Je tô djãm mrãmri ne me'õja adjàkamã no rã? Be, kati, ane. Ne kam arým bãmmẽ nã ar'ýr me ano. Nhym me ar'ýr tẽn arým aro bõx.

<sup>19</sup> Nhym me arkum,

—Be, gar memã kum, “Ikra adjàkamã no rã”, anhýro aba. Djãm tãm ne ja? Mýj ne rít mex kadjy nẽ? ane.

<sup>20</sup> Nhym ar memã kum,

—Be, mrãmri ar ikrakumrẽx ne ja. Mrãmri ne adjàkamã no rãkumrẽx. <sup>21</sup> Ne kam mýj ne arým no mex on, ar ije mar kêt. Mýj me'õ ne kum noo mex nhym rít mex, ar ije mar kêt. Be, ta ne arým abatành ne. Dja ga me kukja nhym arým me amã amijarẽ, ane. <sup>22</sup> Be, mýkam ne ar kute memã kum,

—Jeju ne ar ikra noo mex, anhýr kêt? Bir, arkum mebê idjaer rũnh pymakam. Nãm me arým abenmã Jeju'ã kabën djín abenmã kum,

—Dja me'õ memã kum, “Be, mrãmri ne Jejubê me banhõ Bẽnjadjwýrbê kumkatibê Kritukumrẽx”, ane gwaj kôt me nêje kanga gê ajte me bikprõnh djàkam me baro'ã krĩ kêt, ane. <sup>23</sup> Kam ne me kute ar kanga pymaje ar memã,

—Be, ta ne arým abatành. Dja ga me tãmwã kukja, ane.

<sup>24</sup> Nhym kam me ajte amiwýr me'õ no rãn arým no mexja 'uw nhym arým 'ýr bõx. 'Ýr bõx nhym kum,

—Be, me ba ne ba me ije Jeju jaxwekôt mar. Kwãrĩk wãnh ga mex jarënh kêt. Kãjkwakam Metĩndjwýnh ta ne anoo mex. Tãm dja ga kum mex jarẽ, ane.

<sup>25</sup> Nhym memã kum,

—Be, mýj Jeju axwe nã? Ije mar kêt. Mrãmri ne arým ino rãkumrẽx. Ne arým jakam ba mrãmri irít mexkumrẽx. Jabit ne ba mrãmri ije markumrẽx, ane.

<sup>26</sup> Nhym kam me ajte kum,

—Mýj ne ajo, ga arým ano mex ne arít mex ne? ane.

<sup>27</sup> Nhym memã kum,

—Je, arým ne ba me amã arẽ. Djãm me aje imar kêt got ga me ajte: ikukij? Be, mýj kadjy dja ba ajte me amã arẽ ga me ajte ama. Djãm me aje me kudjwa mã kôt abikamënhmã got ga me ikukjêro dja? ane.

<sup>28</sup> Nhym me arým kum kurên kum,

—Be, kati. Ga ne ga arým kôt aba djwýnh. Me ba ne ba me atemã. Me bakukãmãre Môjdjêkôt ne ba me amijo iba.

<sup>29</sup> Be, Metĩndjwýnh mrãmri me bakukãmãre Môjdjêmã kabënkumrẽx. Ja ne ba me ije markumrẽx. Nhym be, tãmwã. Djãm me kute kator djà mar got? ane.

<sup>30</sup> Nhym amipãnh memã kum,

—Be:, Jeju ne imã irít mex jadjà ga me aje kator djà mar kêtja pumũ. Djãm me ano mex got? <sup>31</sup> Ba me amã arẽ ga me ama. Djãm me axwe ne Metĩndjwýnh kute me mar ne kôt àpênh? Kati. Ja ne gu me arým baje mar. Nhym be, me kute mrãmri Metĩndjwýnhmã rax jarënh ne kute kabën mar ne kôt kute amijo bakumrẽxja Metĩndjwýnh arým kute me mar ne me kôt àpênhkumrẽx. <sup>32</sup> Be, djãm Metĩndjwýnh Jeju kôt àpênh ngri got ga me 'ã akabën ne? Mýj me'õ ne adjàkamã no rã nhym me arým kute kum rít mex jadjàr ga me amrêbê aje mar? Kati. Me bakukãmãre kute arënh kêt. Me kunĩ kute arënh kêtikumrẽx. Jejubit ne ajbir bajbit ijo mex ga me arým aje ipumũnh. <sup>33</sup> Metĩndjwýnh ren kute anor kêt nhym ren kabënkôt àpênh kêt ba ren ino mex kêt ne. Nhym be, kati. Mrãmri Metĩndjwýnh kute anorkumrẽx.

<sup>34</sup> Nhym me kum,

—Be, djãm akudjwa adjàkamã me ijaxwe? Djãm ajaxwekam aje me ijakre got? ane. Nãm me kum anen kangan arým me nêje bõm kumẽ.

<sup>35</sup> Nhym kam Jeju me kute bõm mënkhôt arým kuman 'ýr tẽn kum katon kum,

—Djãm arým ga tu amim Metĩndjwýnh Kra markumrẽx? ane.

<sup>36</sup> Nhym kum,

—Bẽnjadjwýr, dja ga imã Metĩndjwýnh Kra jakre ba tu amim markumrẽx, ane.

<sup>37</sup> Nhym kum,

—Arým ga ipumũ. Ba. Ba ne ba amã ikabêno dja, ane.

<sup>38</sup> Nhyum kum,

—Nã, Běnjadjwyr djwýnh, arým ne ba tu amim amarkumrêx, ane. Ne arým kute Metĩndjwýnh Kramã katorkam amikajgo man parbê ibôn nhỹ.

<sup>39</sup> Nhyum Jeju memã kum,

—Be, mýj kadjy ne ba pykakam bôx ne ar iba? Bir, dja ba me kukijn me axwemã ikaton arým memã pãnh jarê. Be, me kwý kute amijo àmran arĩk amim, “Djãm ije Metĩndjwýnh kaběn mar ngri got”? anhýrja dja ba te memã kukràdjã jarê nhyum me arým mar kêt ne arým amakkre kêt mex ne ar ba. Me kute mrãmri ne me rĩt mex arým no rãn ba pyrãk. Nhyum be, me kwý kute kukràdjã mar kêt ne mar prãm dja ba memã arê nhyum me arým tu amim markumrêx. Tu amim markumrêx ne arým kôt kute amijo ba mexkumrêx. Me kute mrãmri ne me no rã arým rĩt mex ne katàt ba pyrãk. Ja kadjy ne ba pykakam bôx ne ar iba, ane.

<sup>40</sup> Nhyum mebê pardjêu bu'ã ku'êja arým kaběn man kum,

—Je, djãm me badjwý ne ba me ije me no rã pyrãk? Kati. Djãm me ije Metĩndjwýnh kukràdjã mar ngri got? ane.

<sup>41</sup> Nhyum memã kum,

—Ne ga ren me aje Metĩndjwýnh kukràdjã mar prãm ne ren aje mrãmri ne me no rã rĩt mex prãm pyrãk. Ne kam ren ajaxwe kêt ne. Nhyum be, kati. Me aje, “Me badjwý djãm me ije Metĩndjwýnh kukràdjã mar ngri got”? anhýrkam me ajaxwe rã'ã. Nãm ã Jeju memã ane.

## 10

*Mrykĩ'ãtomtio ba djwýnh'ã ujarěnh.*

*Idja 13.20; Ped k 5.4*

<sup>1</sup> Ne kam mrykĩ'ãtomti'ã memã ajarěn õ me ja'ã mrykĩ'ãtomti jakren memã kum,

—Be, õ kôkayrkam mrykĩ'ãtomti ar bakam nhyum me ngjêx prãmkam me kwý ajkwa krekrekôt ngjêx kêt ne ate kôkayr nhĩbũm kôt wangij. Be, me ja ne me mryo àkĩnh prãm nhyum me me'ã memã kum, “Me àkĩnhĩ”, ane nãr, “Mebê mýjjao prôt djwýnh”, ane. Mrãmri ne ba me amã ja jarěnhkumrêx. <sup>2</sup> Nhyum be, me kute katàt

ajkwa krekrekôt ngjêxjabê ne õ mryo ba djwýnhkumrêx.

<sup>3</sup> Nhyum 'ã ijê djã nêje ku'ê djwýnh arým o ba djwýnhmã 'ã ijê djã'ã kurê nhyum arým wangij. Ne kam mrymã kaběn nhyum arým amim kaběn ma. Kute apýnh mrymã idji jarěnh djãri aben totokmã mrymã arê nhyum arým kute apýnh aminhidji jarěnh mar kôt bõm rôrôk. Bõm rôrôk nhyum o ba djwýnh arým kapôtmã mryo apôx. <sup>4</sup> Mryo apôx ne arým mry kukãm mrã nhyum mry arým kôt ba. Kute amim o ba djwýnh kaběn markam kôt ba. Nãm mry ã o ba djwýnh kôt ane. <sup>5</sup> Nhyum be, atemã me bajtem mry'ýr bôx ne te mrymã kaběn nhyum kôt ba kêt ne tu mã kubê prôt ne. Kute amim me bajtem kaběn mar kêt kam amijã no tỳx ne tu mã kubê prôt ne. Mrãmri ne ba me amã ja jarěnhkumrêx, ane.

<sup>6</sup> Be, mrykĩ'ãtomti'ã ujarěnhja ne Jeju kute amikaběn kukràdjã'ã akre nhyum me mrybit man kukràdjã mar kêt. Nãm me te: kute mýj'ã ujarěnh kute amijakre marmãn te: kute kukràdjã marmã.

<sup>7-9</sup> Nhyum ajte memã kum,

—Mrãmri ije mrykĩ'ãtomti nhõ kôkayrkôt ajkwa krekre pydji pyrãk. Ga, mryo ba djwýnh kute ajkwa krekrekôt mryo ngjêxa pumũ. Nhyum kôkayr tỳx arým kute mýjja djãkrêbê mry pytãr nhyum umar mexja pumũ. Badjwý ije ajkwa krekre pydjimãn prãbê dja me tu amim imarkumrêx ba arým axwebê me utà. Nhyum kam me arým ikôt tĩn ne ar ba rã'ã: rã'ã ne. Atemã me'õkôt ne me tĩn kêtumrêx. Dja me tu amim bajbit imarkumrêx ba arým me utà.

Ga, mryo ba djwýnh kute kôkayr kurũm mryo apôxja pumũ. Nhyum mry àkur ban ajte akubyn ngjêxa pumũ. Badjwý dja ba me utàro iba nhyum me ikôt umar mex ne ar ba.

Nhyum be, amrêbê ibôx kêttri ne me kwý Metĩndjwýnh'ã 'êx ne memã kum, “Metĩndjwýnh ne imã arê ba kukwakam amã kaběn jarěnhõ iba”, ane. Me Metĩndjwýnh'ã 'êxja kunĩ ne me àkĩnhĩ. Me kute amiwýr inhõ me jao akêxmãn te meo ane nhyum me kute me kaběn mar kêt. <sup>10</sup> Be, me àkĩnhĩ ne me kute mryo àkĩnh ne par kadjy bôx. Nhyum be, kati. Ba ne ba atemã.

Me tĩnkumrêx ne umar mexkumrêx kadjy ne ba bôx.

<sup>11</sup> Ije me kute mrykĩ'átomtio ba djwýnh mex pyræk. Dja ba me kadjy ty. Ije me utàr kadjy ty. <sup>12</sup> Nhyim be, me mrykam àpênh djwýnh ne me atemã. Gêdja rop'ô mry'ýr bôx nhyim arým tĩn prãmje tu mry kangan prôt ne. Kubê ô mry djwýnh kêt kam ne tu mry kangan mã prôt ne. Nhyim rop arým mryo rôrök nhyim mry abenbê ajmã. <sup>13</sup> Me mrykam àpênh djwýnh kute pi'ók kapribit markam ne me kum mry jabê kêt. Nhyim kam rop bôx nhyim kum mry jabê kêt kam arým mry kangan prôt ne.

<sup>14-15</sup> Ba ije me kute mryo ba djwýnh mex pyræk. Ibãm kute imarkumrêx. Badjwý ije Ibãm markumrêx. Inhõ me jadjwý ije ã me maro ane. Nhyim inhõ me jadjwý kute imar. Ba dja ba me kadjy ty. Ije me utàr kadjy ty. <sup>16</sup> Djãm kôkayr jakambit inhõ krit? Kati. Onij inhõ krit rã'ã. Me wãdjwý dja me amim ikabên ma. Dja ba inhõ me jamê me wãdjwýo aben pydji. Kam arým inhõ me kunõ iba. <sup>17</sup> Be, mýkam ne Ibãm kum ijabê? Bir, ije kabên kôt amijo ibakam. Kam ne kum ijabê. Ba dja ba ty. Akubyn itĩn kadjy dja ba ty. <sup>18</sup> Djãm me ta dja me ibi? Kati. Ba dja ba amikabênkôt tyn kam amikabênkôt akubyn itĩn ne. Ibãm ta ne ityk ne akubyn itĩn'ã imã karõ, ane.

<sup>19</sup> Nãm Jeju memã ane nhyim kam mebê idjaer rũnh ajte kabêno aben japanho dja. <sup>20</sup> Me krãptĩ ja ne me arĩk memã kum,

—Be, me karõ punu ne o ba. Ga, kute kukwakam kabên kajgo krãptĩ jarênhja pumũ. Mýkam ne ga me kabên maro dja? ane.

<sup>21</sup> Nhyim me kwý ja ne memã kum,

—Nhyim bê ne me karõ punu kute o ba nhyim ã kabên kute anhýr. Be, kati. Kabên mexkumrêx. Djãm me karõ punu kute me no rã noo mex mar got? ane.

*Mebê idjaer rũnh kum kurê'ã ujarênh.*

*Dju r 5.18, 8.59, 12.32*

<sup>22</sup> Be, krĩraxbê Djeruxarêkam, me krãptĩ kute aben pydji djã nhõ akatikam, arým na nhõ mytyrwykam, Jeju me'ýr tẽn bôx ne arým Metĩndjwýnh nhõ kikretikam ar mrã. Me kute aben kajmã'ã me bakukãmãre kute amrêbê: Metĩndjwýnhmã kikreti ny

nhipêx mar kadjy ne me krãptĩ akati jakam aben pydji.

<sup>23</sup> Jeju kikreti bu'ã kikre kre kênhkam ar mrã. Kikre kre kênhjamã ne me kum, “Xaromão nhõ”, ane. <sup>24</sup> Nãm kam ar mrã nhyim mebê idjaer rũnh arým omũn kam kum ipók ne kum,

—Aje. Ga mrãmri abê me inhõ Bênjadjwýrbê kumkatibê Kritukumrêx jabej tu me imã amijarênhõ amirĩtkumrêx. Mýkam ne ga me ibê amipdju? ane.

<sup>25</sup> Nhyim Jeju memã kum,

—E kum arým ne ba me amã amijo amirĩt ga me aje amim imar kêt. Ibãm kukwakam ije apýnh mýjja pumũnh kêt nhipêx djãri. Tãm ne kute me amã ijo amirĩt mexkumrêx ga me aje amim imar kêt. <sup>26</sup> Be, me abê inhõ krit kêt kam ne ga me aje amim imar kêt. Arým ba me amã ja jarê ga me arým ama. <sup>27</sup> Inhõ krit ar kute amim ikabên mar. Badjwý ije inhõ krit ar mar nhyim ar mã ikôt ar amijo ba. <sup>28</sup> Dja ba memã tĩn jadjã nhyim me Metĩndjwýnhkôt tĩn ne ar ba rã'ã: rã'ã ne. Ne me biknor tokry djãkam biknor kêt kumrêx. Ba mã meo iba nhyim me'õ kute ibê me pa 'amýnh ne ibê me ikô rênh prãm kêt.

<sup>29</sup> Ibãm kute ikôt me kamênhja ne týxo kute me kunĩ jakrenh. Tãm ne mã meo ba nhyim me'õ kute kubê me pa 'amýnh ne kubê me ikô rênh prãm kêt. <sup>30</sup> Ibãmmê ro'ã ne bar itipdjín ar iba. Nãm ã memã ane.

<sup>31</sup> Nhyim mebê idjaer rũnh ajte kadjy kên jamý. Kute o titik ne bĩnmã kên jamý.

<sup>32</sup> Nhyim memã kum,

—Ibãm kukwakam ne ba mýjja mex krãptĩ nhipêx ne me amã o amirĩt ga me omũ. Nhýnh idjãpênh mexja pãnh dja ga me kêno ititik ne ibi? ane.

<sup>33</sup> Nhyim me kum,

—Djãm adjãpênh mex pãnh ne ba me ije kêno atitik ne abĩnmã? Kati. Metĩndjwýnh ne ga arým aprý. Abê pykakam me'ókam ne ga ga amijo ajêx ne amijo Metĩndjwýnh Kra ne amijo Metĩndjwýnh pyræk. Aje Metĩndjwýnh raxo amiptãrkam ne ba me arým Metĩndjwýnhõ ingyryk ne ije abĩnmã, ane. <sup>34</sup> Nhyim amipãnh memã kum,

—Tô nhÿnh ne ba aprÿ? Be, kukwakam kabên jarên djwÿnh ne me bakukâmãremã Metîndjwÿnh kabên jarên memã kum, “Nã bãm memã kum, ‘Me abê metîndjwÿnh’, ane.”

Nãm ã me bakukâmãremã anen arÿm 'ã pi'ôk no'ôk ne. <sup>35</sup> Metîndjwÿnh kabên ne ga me te akabêno aje o adjàpanhmã. Ga, Metîndjwÿnh ta kute memã kum, “Me abê metîndjwÿnh”, anhÿrja pumũ. <sup>36</sup> Metîndjwÿnh ta ne imã idjâpênh djà jarên pykamã ijano ba kabên kôt amrê tèn bôx. Djori kam ibê Metîndjwÿnh Kra kêt? Kati, ibê Metîndjwÿnh Krakumrêx. Djori kam ba aprÿ. Arkati.

<sup>37</sup> Ne ba ren Ibãm djâpênh o idjâpênh kêt ga ren me aje katàt imã ikaigo jarênhkumrêx. <sup>38</sup> Nhym be, kati. Mrãmri Ibãm djâpênh o idjâpênhkumrêx. Kam ga me ren amim idjâpênhbit ma. Aje amim ba imar kêtka ga ren idjâpênhbit man ren Ibãm djâpênh o idjâpênhja man ren arÿm kam ima. Ibãmmê ne bar itipdjìn ar iba ga me ren kam arÿm ama, ane. <sup>39</sup> Nãm memã ane nhym me arÿm kute pa 'amÿnhmã te o ane nhym mã mebê katon tẽ.

<sup>40</sup> Ne kam arÿm mã ngô raxbê Djodão nhjukri tẽ. Tẽ:n arÿm Djuão kute ngômã me angjênhmo krax djâkam bôx ne arek kam ar ba. <sup>41</sup> Ar ba nhym me krãptĩ 'ÿr bôx ne abenmã kum,

—Be, Djuão ne me kute raxmã kator kadjy kute mÿjja pumũnh kêt'ô nhipêx kêt. Kute me punuo mex kêt. Ne kam mrãmri katàt me'ôja kukãm 'ã ujarênhkumrêx. Nhym kam arÿm kute kukãm 'ã ujarênh kôt prïne kôt amijo bakumrêx, ane. <sup>42</sup> Nhym kam me krãptĩ pyka jakam tu amim Jeju markumrêx.

## 11

### *Kute akubyn Radjaruo tÿn.*

<sup>1</sup> Be, me'ô nhidjibê Radjaru ne arÿm kanê bÿno mō. Kanikwÿnh ne ar amãnhkrut. Ar idjibê ne Marijmê Mata ar. Ne ar kunĩ krĩbê Betanhakam ũrkwã. <sup>2</sup> Marij ja kute Bënjadwÿr djwÿnh par'ã me kudjÿ djà kangô kapĩ. 'Ã me tyk kadjy kudjÿ djà kangô kapĩn kam kute amikĩo 'ã kangô ngrã tãm. <sup>3</sup> Nãm kamy Radjaru arÿm

kanê bÿno mō: nhym kanikwÿnh ar arÿm Bënjadwÿr djwÿnh'ÿr me'ô jano. Onĩj. Nhym arÿm 'ÿr tẽ:n 'ÿr bôx ne arÿm kum arên kum,

—Bënjadwÿr djwÿnh, onĩ amã anhōbikwa jabêja arÿm kanê: nhym kanikwÿnh ar amã arê, ane.

<sup>4</sup> Nhym Jeju arÿm kuman kum,

—Djãm tu tyk rã'ã kadjy ne kanêja? Kati. Dja me kàjkwakam Metîndjwÿnh raxmã katon ba ibê Metîndjwÿnh Kra iraxmã kato. Ja kadjy ne kanê raxja, ane. <sup>5</sup> Be, Matamê kanikwÿnhmê Radjarumê ne Jeju kum ar abê. <sup>6</sup> Nãm Jeju kabên man kam tu arek ÿr djâkam nhÿ nhym 'ã akati amãnhkrut apêx.

<sup>7</sup> Nhym kam kôt ba djwÿnhmã kum,

—Gwaj on pykabê Djudêjamã tẽ, ane.

<sup>8</sup> Nhym ar kum,

—E kum, ujarênh djwÿnh, wãkam ajbir mebê idjaer rÿnh kute keno atitik ne abĩnmã ga ajte 'ÿr atemmã, ane.

<sup>9</sup> Nhym Jeju arkum,

—Djãm arngro pydjikam kàxdjâkên pa ipôkbê 12bit. Nã tãm. Djãm ori me arngrokam mrã nhym mÿjja'ô me par tok? Kati. Arngrokam ne mÿjja amirĩt nhym me omũn aã'ã mrã. <sup>10</sup> Nhym be, akamãtkambit ne me ba punu, arĩk rôrôk ba, me nokrekam irã kêtka, ane. Me kute o tÿm ne bĩn kêttri tẽmbê kute àpênh inomã mênhmã ne amijã arngro jakreo tèn me kute o tÿm ne bĩn'ã akamãt jakre.

<sup>11</sup> Nãm arkum anen kam arkum,

—Be, gwaj banhōbikwa Radjaru arÿm ôto nõ. Arÿm ba ije tokmã ne ba 'ÿr tẽ, ane.

<sup>12</sup> Nhym ar kum,

—Dja ôto nõrkam akubyn mex, ane. <sup>13</sup> Be, djãm mrãmri ôtkumrêx'ã ne arkum ane? Be, kati. Arÿm tyk'ã ne arkum ane. Nhym ar arĩk amim,

—Be, ôtkam tyk djà kêt'ã ne ã ar imã ane, ane.

<sup>14</sup> Nhym kam arkum arênho amirĩtkumrêx ne arkum,

—Be, Radjaru ne arÿm ty. <sup>15</sup> Wãkam idjãm kêt nhym arÿm ty. Kam idjãm kêtka ar akadajy ikĩnh. Jakam dja gwaj wãkam tèn bôx gar arÿm mÿjja pumũn arÿm tu amim imarkumrêx. Ar akadajy ne ikĩnh. Aj gwaj on 'ÿr, ane.

16 Nhym kam Jejukôt ba djwýnh 'ô nhidjibê Tôme Djidjimuja kôt ba djwýnh 'ôdjwýmã kum,

—Gwaj on badjwý kôt ty, ane.

17 Nhym kam Jeju ar arým 'ýr tē. 'Ýr tē:n arým 'ýr bôx.

Nhym me arým kum arēn kum,

—Be, arým ne ty ba me adjã. Nhym arým 'ã akati amãnhkrut ne amãnhkrut apêx ga bôx, ane. 18 Be, krîbê Betanhamê krîraxbê Djeruxarēmê ne aben jatãri. Abenwýr pry'ã akrebê kiometu amãnhkrut ne ikjêkêbit. 19 Kam ne mebê idjaer krãpti Matamê Marij ar'ýr bôx. Ar kamy arým tykkam me kute ar kapri, ar mýr, ar amakbê arkum kabēnmã ar'ýr bôx. 20 Nhym Jeju ar bôx 'ýr nhym me'ô arým Matamã arê. Nhym kãjmã djan ate kutã tē. Nhym be, Marij arek nhỹ.

21 Mata Jeju kutã tēn arým kajpan kum,

—Bēnjadjwýr djwýnh, ga ren pyka jakam arek ar aba nhym ren ikamy tyk kêt kumrêx.

22 Gêdja ga mýjja'ôo Metĩndjwýnhmã a'uw nhym arým akabēn man prĩne akabēn kôt ipêx ne. Tãm ne arým ije mar, ane.

Nhym kum,

23 —Dja atõ akubyn tĩn, ane.

Nhym kum,

24 —Nã, me kunĩ kute aminhinomã amimēnh djã nhõ akatikam dja me tyk akubyn tĩn. Nhym mekôt dja ikamy akubyn tĩn. Tãm ne arým ije mar, ane.

Nhym kum,

25 —E kum, ba ne ba ibê akubyn me tyko tĩn djwýnh ne ije memã tĩn jangjēnh djwýnh. Me kute tu amim ikamnhĩxkumrêx dja me tĩn ne. Dja te tyn Metĩndjwýnhkôt tĩn ne ar ba rã'ã: rã'ã ne. 26 Nhym me tĩn ne ar ba kute tu amim ikamnhĩxkumrêx dja me Metĩndjwýnhkôt tĩn ne tyk kêt kumrêx. Djã ne ga tu amim ikabēnja markumrêx? ane.

Nhym kum,

27 —Nã, Bēnjadjwýr djwýnh, abê Kritukumrêx. Mrãmri ne Metĩndjwýnh ajã me inhõ Bēnjadjwýrbê kumkati mēnhkumrêx. Me bakukãmãre kute amrêbê: memã kum, “Gêdja i Metĩndjwýnh Kra pykamã bôx”, anhýr kôt ga arým bôx ne kam abê Metĩndjwýnh Krakumrêx. Tãm ne ba tu amim markumrêx.

28 Nãm ã kum anen kam akubyn kanikwýnh'ýr tē. 'Ýr tē:n arým 'ýr bôx ne me kãxã kum,

—Arým ne memã ujarēnh djwýnh bôx ne amã kabēn. 29 Nãm kum ane nhym kãjmã djan amibêx ne 'ýr tē. 30 Be, kraxje Jeju krĩmã àr kêt. Nãm arek Mata kute kajpar djãkam arek dja. 31 Nhym Marij kãjmã djan amibêx ne tē nhym kikrekam mebê idjaer kute ar kapribê arkum kabēno ãmja arým abenmã kum,

—Be, ar mýrmã ne ar kēnkre'ýr tē, ane. Nãm me anen arým kôt tē.

32 Nhym be, Marij Jeju'ýr tē nhym arek kam dja nhym arým 'ýr bôx. Ne omũn arým kōnkrão nhỹn kum,

—Bēnjadjwýr djwýnh, ga ren pyka jakam ar aba nhym ren ikamy tyk kêt kumrêx, ane.

33 Nãm mýro nhỹ nhym kôt mebê idjaer mōrja kôt mýro dja. Nhym Jeju me omũn arým rerekren tik ngyo dja. 34 Ne kam memã kum,

—Nhỹnh ne ga me adjã? ane.

Nhym me kum,

—Bēnjadjwýr djwýnh, amrê ar ikôt tēn omũ, ane.

35 Nhym Jeju arým muw.

36 Nhym mebê idjaer abenmã kum,

—Be, kum abêkumrêx. Ga, arým mýrja pumũ, ane.

37 Nhym me kwý abenmã kum,

—E kum, me no rãmã ne rĩt mex jangij. Nok ren Radjarudjwýo mex nhym ren tyk kêt ne, ane.

38 Nhym kam Jeju 'ýr tik ngy tēn arým kēnkre'ýr bôx. Kēnpotio ne me arým kēnkre'ã ijê. 39 Nãm kēnkre'ýr bôx ne memã kum, “Me 'ã kēnpoti kaba”, ane.

Nhym tyk kanikwýnh Mataja kum,

—Ô kum arým kro:. Tyk'ã arým akati amãnhkrut ne amãnhkrut apêx, ane.

40 Nhym Jeju kum,

—Ë, arým ne ba amã, “Dja ga tu amim ikamnhĩxkumrêx ne arým Metĩndjwýnh raxmã akato”, ane.

41 Nhym me arým kēnkre'ã jãm kēnpoti dja. Nhym Jeju kãjmã krãn kãjkwa jabēn Bãmmã kum,

—Djũnwã. Ga ne ga arým aje ikabēn mar. Kam ikĩnhkumrêx. 42 Amã ikabēn



kunĩkôt ne ga arým aje ikabên mar. Be, me ibu'ã ku'ê ja amã ikabênkôt kute imar kadjy ne ba amã ikabên. Dja me tu amim imarkumrêx ne ijã amim, “Be, mrãmri ne Metĩndjwýnh kute anorkumrêx”, anhýro ba. Ja kadjy ne ba amã ikabên, ane.

<sup>43</sup> Nãm anen arým kàj bê kabên ne kum, “Radjaru, amrê akato”, ane. <sup>44</sup> Nhyim arým me aêrbê akubyn tĩn ne kato. Arým tu tykkumrêx ne jakam arým akubyn tĩn ne kato. Prĩne kubêkào ikramê par'ã kupu rã'ãn kato. Kubêkào nokre kupu rã'ãn kato.

Nhyim Jeju memã kum,  
—Me 'ã kubêkà bô gê tẽ, ane.

*Me kute bĩn kadjy kute o aben mar.*

*Mat 12.14; Ruk 6.11*

<sup>45</sup> Jeju akubyn Radjaruo tĩn nhyim mebê idjaer omũ nhyim arým kwý krãptĩ tu amim Jeju markumrêx. Marijkôt me môrja tu amim markumrêx. <sup>46</sup> Nhyim me kwý ja arým amũ mebê pardjêu'ýr mõn memã Jeju jarê.

<sup>47</sup> Nhyim kam me kadjy Metĩndjwýnh mar djwýnh nhõ bẽnjadjwýrmẽ mebê pardjêu arým me rũho akuprõ. Nhyim kam me abenmã kum,

—Be, mýjja pumũnh kêt kwý rax ne ipêx. Me kute raxmã kator kadjy ne ipêx. Nãm me punu krãptĩo mex ne akubyn me tyko tĩn. Mýj dja gu me nẽ? <sup>48</sup> Dja gu me amitõ nhyim me kunĩ arým tu amim markumrêx ne kôt ar amijo ba. Dja me ane nhyim krĩraxbê Rõmakam me õ me ja arým me bawýr prõt ne pyka mẽ Metĩndjwýnh nhõ kikretio amràn aben bê me babê idjaer kunĩ ngrà, ane.

<sup>49</sup> Nhyim me kadjy Metĩndjwýnh mar djwýnh nhõ bẽnjadjwýr raxbê Kajbajja ne amexja tãmkam memã nhỹ. Kajbaj memã kum,

—E kum, me aje mýjja mar kêt. <sup>50</sup> Me'õ pydji dja me babê idjaer kunĩ pãnh ty. Kam dja me abenbê me bangràn kêt gu me arým badjumar mex. Me aje ja mar kêt, ane.

<sup>51</sup> Be, djãm Kajbaj ta ne amikabên jarê? Kati. Metĩndjwýnh kukwakam ne kabên jarê. Amexja tãmkam ne kubê me kadjy Metĩndjwýnh mar djwýnh nhõ bẽnjadjwýr rax. Bẽnjadjwýr rax ne Metĩndjwýnh mar

djwýnh kunĩmã nhỹ. Kunĩmã ýrkam ne arým memã Metĩndjwýnh kabên jarê. Kute memã Jeju mebê idjaer kunĩ pãnh tyk jarênhkam ne memã Metĩndjwýnh kabên jarê. <sup>52</sup> Be, djãm mebê idjaerbit pãnh dja ty? Kati. Metĩndjwýnh kraja amrêbê abenbê me bimành. Apýnh me bajtem ba djakam me bimành. Jeju kute amikôt me jao aben pydjimã. Me jadjwý pãnh dja ty. 'Ã ne Kajbaj kute Metĩndjwýnh kukwakam kabên jarênhja.

<sup>53</sup> Be, krax ne ja. Me kute Jeju bĩn kadjy kute aben kabên marmo krax djã ne ja. Jeju kute akubyn Radjaruo tĩn nhõ akati jakam.

<sup>54</sup> Nhyim kam Jeju kute ja nhijukri mebê idjaer rũnhmã amijo amirĩto ba kêt. Kapôt kukrit nokà'ã ar bamã ne arým tẽ. Kam ne arým krĩbê Epraĩmã tẽn bõx ne kôt ba djwýnhmẽ ro'ã kam ar ba.

<sup>55</sup> Nhyim kam mebê idjaer kute aben pydji djã 'ýr. Me kute me kukãmãre nhirõbê mrãnhja mar kadjy arým õ akati 'ýr. Kam ne me krãptĩ: kadjy krĩraxbê Djeruxarê'ýr àbir mõ. Me kute Mõjdjê kukràdjã kôt Metĩndjwýnhmã amijaxwe jarênhmã ne me mõ. <sup>56</sup> Ne kam arým bõxo dja nhyim me rũnh arým Jeju jabej. Ne Metĩndjwýnh nhõ kikretikam abenmã kum,

—Djãm me krãptĩ kute aben pydji djã nhõ akati kadjy mekôt bõxmã? Djã ne ga me ajõ ama? ane. <sup>57</sup> Be, arým me kute Jeju'ã memã karõ. Me kadjy Metĩndjwýnh mar djwýnh nhõ bẽnjadjwýrmẽ mebê pardjêumẽ ne me arým 'ã memã karõn memã kum,

—Dja ga me ajõ Jeju pumũn me imã arẽ ba me pa 'amý, ane.

## 12

*Marij kute par'ã kangõ pãnh rax kapĩn.*

*Mat 26.6; Mak 14.3*

<sup>1</sup> Me Djeruxarêkam Jeju jabej nhyim arým ajte krĩbê Betanhakam bõx. Betanhakam ne Radjaru ar ba. Amrêbê ne ty nhyim Jeju 'ýr bõx ne akubyn o tĩn. Ne jakam Jeju ajte Betanhakam bõx. Nhyim amũ Djeruxarêkam Metĩndjwýnh me irõbê mrãnh nhõ akati bõx 'ýr. Dja akati

amãnhkrut ne amãnhkrut ne amãnhkrut apêx nhym arým akati bôx.

<sup>2</sup> Nãm Jeju Betanhakam bôx nhym arým amykry. Nhym Mata ar arým kum ô kwý krên djà nhípêx. Ipêx nhym Jeju ar krêno nhỹ. Mata ne arkum ô kwý krên djà nhôro dja. Radjarumê ro'ã ne ar àkuro nhỹ. <sup>3</sup> Àkuro nhỹ nhym Marij arým me kudjý djà kangô ipuja by. Me tyk kadjy ne kudjý djà. Kangô nhidjibê ne nadu. Utĩ'ã akrekam ne kubê kiru kute o katê 'yr ne kam pãnh raxkumrêx. Nãm ar àkuro nhỹ nhym Marij arým kangôja byn Jeju par'ã kapĩ. 'Ã kapĩ ne amikĩo arým par'ã kangô kwý ngrà. Nhym kam arým amũ kikre krekôt kudjý prôt ne.

<sup>4</sup> Nhym Djuda Ikadji. Ximão kute ir ja. Jejukôt ba djwýnhja. Tãmja dja kurê djwýnhmã Jeju kanga. <sup>5</sup> Marij Jeju par'ã kangô kapĩ nhym Djuda arkum,

—Je tô, mýkam ne arým kangô mexjao akno? Ne ga ren ar memã kangô ngãn ren pãnh pi'ók kaprĩ kumex ne aby. Ne ren pãnh'ã akrekam denarju kubê 300 ne ren abyn kam ren me ô mýjja kêt mã angrà, ane. <sup>6</sup> Be, djãm Djuda kum me bikênh kaprĩkam ne ã arkum ane? Kati. Àkĩnhĩkam. Kubê ar ô pi'ók kaprĩo ba djwýnhkam. Ne kam ta amim kwýo àkĩho ba. Kam ne ã arkum ane.

<sup>7</sup> Nhym Jeju arkum,

—Kwãrĩk wãnh rã'ã. Mýj kadjy ne amim kangô dji? Bir, dja ba ty nhym me arým ijadjã. Kute ijã kangô kapĩnkam dja ba ikudjý nhym me ijadjã. Ja kadjy ne amim kangô dji. <sup>8</sup> Ar aje memã mýjja nhôrmã wãnh ne me ô mýjja kêt ar abu'ã ar ba rã'ã. Dja gar anen arým memã mýjja ngã. Badjwý. Djãm arek gwaj baro'ã ar baba rã'ãmã? Kati. Nãm ã Jeju arkum ane.

<sup>9</sup> Jeju Betanhakam ar ba: nhym kam mebê idjaer krãptĩ arým kuman 'yr bôx. Djãm me kute Jejubit pumũnhmã ne me 'yr bôx? Kati. Radjarudjwý. Jeju kute Radjaru tyk akubyn o tĩnkam ne me kute adjwýnhdjwý pumũnhmã 'yr bôx. <sup>10</sup> Nhym be, me kadjy Metĩndjwýnh mar djwýnh nhô bẽnjadjwýr ne ar atemã. Nãm ar bit kute Radjaru bĩnmã 'ã aben maro nhỹ. <sup>11</sup> Be, mýkam? Bir, Jeju kute akubyn Radjaruo

tĩnkôt mebê idjaer krãptĩ arým omũn tu amim Jeju markumrêx. Nhym kam me kute omũnh kêt kadjy ar kute Radjarudjwý bĩnmã. Nhym Jeju Betanhakam ar ba nhym kam 'ã akati. 'Ã akati nhym Jeju amũ Djeruxarê'yr tẽ.

*Jeju rax ne Djeruxarê mã àr.*

*Mat 21.1; Mak 11.1; Ruk 19.28*

<sup>12</sup> Nhym kam me Djeruxarêkam kukãm abenmã kum,

—Arým Jeju bôx 'yr. Arým Jeju bôx 'yr, ane. Me krãptĩ kute aben pydji djà nhô akati kadjy bôxja ne me ã abenmã ane.

<sup>13</sup> Ne kam mõn bô kwý nhikê. Me kute o Jeju kajpar kadjy ne me arým kutã mō. Ne kãj bê abenmã Jeju mexo àkjêr mõn mã memã kum,

—Jejubê ne me banhõ bẽnjadjwýr rax. ãm mexkumrêx. Kam me bakĩ:nhkumrêx. Gê on me bapytà. Gê Bẽnjadjwýr djwýnh o kĩnh rax. Kukwakam ne arým me bakadjy bôx. ãm mexkumrêx. Me babê idjaer nhô bẽnjadjwýr rax ne arým bôx, ane.

<sup>14</sup> Me kute o anhýr kêttri ne Jeju mry'ã nhỹ. Nãm mry'ã krĩ jabatãnh nyremã katon 'ã nhỹ. Amrêbê: ne me Metĩndjwýnh kukwakam me bakukãmãmãmã ja jarênh memã kum,

<sup>15</sup> “È krĩraxbê Xijãokam me ja, kwãrĩk wãnh me atĩn prãm kêt.

Ota, me anhõ bẽnjadjwýr rax bôxmã. Dja mry'ã krĩ jabatãnh nyre'ã nhỹn me awýr bôx.”

Nãm me ã me bakukãmãmãmã anen arým 'ã pi'ók no'ók ne. Nhym me aben djô'ã arêno mō:n arêno mōr tãmtã tũ:mrãm me bakam-ingrãnyrekam arým 'yr o bôx. Jeju mry'ã nhỹn arým Djeruxarê'yr bôxmã tẽmkumrêx. Djeruxarê nhidji nhikjêbê ne Xijão.

<sup>16</sup> Nãm 'yr tẽ nhym me o àkjêr mō. Nhym kôt ba djwýnh ar kute omũnh totokbê amim,

—Je tô, mýj'ã ne me kute Jejuo àkjêrja? anen mar kêt ne. Arým Jeju àbir ne ra:xkambit dja ar akubyn pi'ók kôt amijo tẽn arým kuma. Be, pi'ókkam me kute Jejuo anhýrmã kôt ne me arým jakam ã Jejuo ane. Ja dja ar kuma.

<sup>17</sup> Be, Jeju kutã me mōrja ne me amrêbê Jeju kute akubyn Radjaruo tĩnkôt omũ.

Kute kum kabën nhym kênkre kurũm katorkõt ne me omũ. Ne kam amũ memã 'ã ajarẽ. <sup>18</sup> Nhym me krãptĩ arým kute akubyn o tĩnja man kam arým adjwýnhdjwý mekõt Jeju kutã mõn kajpa. <sup>19</sup> Me krãptĩ: Jeju kutã mõn kajpa. Nhym kam mebê pardjêu arým abenmã kum,

—Be ga, pyka kunĩkõt me kunĩ arým kute 'yr amijo akẽxja pumũ. Me baje te: mebê Jeju pyma nhym me mã kum kĩnhja pumũ, ane.

*Amikukãm amityk'ã ujarẽnh.*

*Mak 8.34*

<sup>20</sup> Nhym kam me bajtembê kreguja kwý ne me me krãptĩ kõt ar ba. Me kute mekõt me kute aben pydji djã nhõ akatikam Metĩndjwýnhmã rax jarẽnh kadjy ne me bõx ne mekõt ar ba. <sup>21</sup> Ne kam arým Piripi'yr bõx ne kum, “Ba me Jeju pumũ”, ane. Piripi ne pykabê Garrêjakam krĩraxbê Bexadakam abatãnh djã. <sup>22</sup> Me kum ane nhym amũ Ængre'yr bõx ne kum arẽ. Nhym kam ar ro'ã Jeju'yr tẽn kum arẽ.

<sup>23</sup> Nhym Jeju arkum,

—Be, arým ityk'ã akati bõx 'yr. Dja ba me kadjy tyn akubyn itĩn. Ne kam arým ira:xkumrẽx ne ipyma:. <sup>24</sup> Ga, me kute bãygogo 'y krekam arým tyk pyrãk. Djãm mrãmri ne arým ty? Kati. Ga, 'y ingrõt ne abatãnh nhym arým 'ã ô kumexja pumũ. Ne ren me 'y kre kêt nhym ren 'y kajgo rã'ãn àptãr kêtumrẽx. Ba ije bãygogo 'y pyrãk. Badjwý dja ba ty nhym me arým ijadjã. Nhym kam ityk djô'ã arým me krãptĩ tĩn. Mrãmri ne ba ar amã ja jarẽnhkumrẽx.

<sup>25</sup> Be, me arek pykabêbit ar ba kadjy kute amimarja dja me arým tyn akuno. Nãr me kadjy kute amimar kêtja, arek pykabêbit ar ba kadjy kute amimar kêtja dja Metĩndjwýnh me utã nhym me arým kõt tĩn ne ar ba rã'ã: rã'ã ne. <sup>26</sup> Be, me imã àpênhja gẽ me mã ikõt amijo bakumrẽx. Kam dja ba nhĩ'ãm ar iba nhym inhõ àpênh arek ikõt ar ba. Dja imã apê nhym Ibãm arým kãjmã kum rax kamẽ, ane.

<sup>27</sup> Ne ajte arkum,

—Be, arým idjumar punu iwýr bõx. Be, mýj dja ba nẽ? Djãm ije kum, “Djũnwã, arým itokry'ã myt bõx 'yr. Itokrybê ipytã”, anhýrmã? Kati. Ije itokry ja markumrẽx

kadjy ne ba arým tẽn bõx. Nãm ã arkum ane. <sup>28</sup> Ne ajte Bãmmã kum,

—Djũnwã, jakam dja ga memã amiraxo amirĩt gẽ me araxmã kato, ane.

Nhym ar arým kãjkwa kurũm Bãm kabën ma nhym kum,

—Arým ne ba memã iraxo amirĩt. Dja ba ajte memã iraxo amirĩt, ane.

<sup>29</sup> Nhym ar bu'ã me ku'ẽ kwý arĩk abenmã kum,

—E kum, na ne krikrit, ane.

Nhym me kwý arĩk abenmã kum,

—Metĩndjwýnh kadjy mrãnh djwýnh'õ ne kum kabën, ane.

<sup>30</sup> Nhym Jeju memã kum,

—Djãm ba ije kabën mar kadjy ne kabën kato? Kati. Me ga aje kabën mar kadjy.

<sup>31</sup> Be, jakam dja Metĩndjwýnh me kunĩ axwemã kato. Me ã pýnhkõt me axwe djãri kum kato. Jakam dja ba pykakam me axwe nhõ bẽnjadjwýro apan kujaten kumẽ. <sup>32</sup> Dja me kýjrũm inhõ ba arým amiwýr me kunõ akẽx, ane. <sup>33</sup> Pĩte'y'ã jêt'ã ne ã memã ane.

<sup>34</sup> Nhym me kum,

—Nhym bê ne me kute me inhõ Bẽnjadjwýrbê kumkatibê Kritukumrẽx bĩnmã. Kritu ne tyk kêtumrẽxmã nhym me me imã arẽ, Mõjdjê kukrãdjã'ã pi'õk no'õk kõt ne me imã arẽ ba me kuma. Be, ga ne ga atemã. Aje me imã, “Ba ije amijo inhĩja dja me kýjrũm inhõ”, anhýr kõt ba me arým akajgo ma. Be, we aje amijo anhĩjakam mýj me ajõ ga nã? ane.

<sup>35</sup> Nhym Jeju memã kum,

—Ga, akamãt kô tykkam me ba punuja pumũ. Me kute amikukãm mýjja pumũnh kêtumrẽx ne me ba punure. Ba ije memã pry kurwý djã pyrãk ne memã Metĩndjwýnh kabën jarẽnh nhym me arým tu amim markumrẽx ne ba mexkumrẽx. Arek me aro'ã ar ibari dja ga me tu amim imarkumrẽx ne ikabën kõt ar amijo aba. Nok ga ren kõt amijo aba kêt ne ren me axwe kõt ajaxwen arým aje ajte me akamãt kô tykkam ba punu pyrãk. <sup>36</sup> Arek me aro'ã ar ibari dja ga me tu amim imarkumrẽx. Ne kam arým aje mrãmri ne pry kurwý djãkõt me ba mex pyrãk, ane. Nãm Jeju memã anen arým mã tẽn mebê amijo apdju.

*Me kute amim Jeju mar kêt.*

<sup>37</sup> Kute amijo bipdjur kêtri ne me nokrekam mÿjja krãptĩ nhípêx. Nãm te me punu krãptĩo mex nhym me kute amim mar kêt-kumrêx. <sup>38</sup> Be, amrêbê: Metĩndjwÿnh kukwakam kabên jarênh djwÿnhbê Idjaij kute me bakukãmãremã arênh kôt ne me kute amim mar kêt. Nãm memã kum, “Bênjadjwÿr djwÿnh, mÿj me'õ ne kute amim ar ikabên mar got?”

Mÿj me'õ ne kute Bênjadjwÿr djwÿnh djãpênh pumũnhkam amim mar got?”

Nãm ã me bakukãmãremã ane. Nhym me arÿm aben djô'ã arênho mõ:n arênho mõr tãmtã arÿm tũ:mrãm me bakamin-grãnyrekam arÿm 'ÿr o bõx. Jeju te me punu krãptĩo mex nhym me me omũn amim Jeju mar kêt-kumrêx.

<sup>39</sup> Idjaij kute me bakukãmãremã arênh kôt ne me me omũn amim Jeju mar kêt. Be, djãm me ta ne me kute tu amim markumrêxmã? Kati. Me ta ne me te: kute amim marmã. Be, mÿkam? Bir, Metĩndjwÿnh ta kute me nomê me amako bimrãkkam. Kôt ne Idjaij ajte me bakukãmãremã kum,

<sup>40</sup> “Metĩndjwÿnh ne mebê nomê amako amrà.

Nhym kam me te memã mÿjja jakre nhym me kukràdjã pumũnh kajgon mã omũnhkumrêx kêt.

Nhym me te memã mÿjja jarê nhym me mar kumrêx kêt ne. Mã kukràdjã'ã mÿjja kute amijakreja mar kêt. Ne kam iwÿr amijo akêx kêt ba kam memã axwe jarênh rã'ã ne kam ije meo mex kêt.

Me amakkre kêt prãmkam ne ã meo ane”, ane.

<sup>41</sup> Idjaij ne Jeju mexo umakôt omũ ne 'ã me bakukãmãremã ujarênh ba. Ne kam ã memã ane. Kam me ta te kute amim Jeju marmã.

<sup>42-43</sup> Be, djãm me rũnh kunĩ ne me amakkre kêt prãm? Kati. Me kwÿ kute tu amim markumrêx. Djãm me kwÿ ja kute memã amijo amirĩt? Djãm me kute memã kum,

—Arÿm ne ba tu amim Jeju markumrêx, anhÿro amijo amirĩt? Kati. Mebê pardjêu

kabên pymaje ne me kute memã amijarênh kêt. Be, mÿkam? Bir, me amim,

—Dja ba amijarênh kêt nhym me imã imex jarênh rã'ã. Ba ren Jeju'ã memã amijarê nhym ren me arÿm imã ijaxwe jarênh me nêje bõm imê. Ne ren kam ajte me bikprõnh djãkam me ro'ã ikrĩ kêt, anhÿro ba. Me kute amim anhÿrkam ne me kute memã amijarênh kêt ne. Djã ne Metĩndjwÿnhbit kute memã mex jarênhja me kum kĩnh? Kati. Pykakam me axwe kute memã mex jarênhja ne me kum kĩnh. Jabit ne me kum kĩnh.

<sup>44</sup> Nhym kam Jeju kãj bê memã kum,

—Djãm me aje tu amim imarkumrêxkam ne ga me aje bajbit imar? Kati. Me aje amim imar o ne ga me aje amim ijanor djwÿnh mar. <sup>45</sup> Me aje ipumũnh o ne ga me aje ijanor djwÿnhdjwÿ pumũnh. <sup>46</sup> Ga, me kute akamãt kô tykkam pry kurwÿ nhym pry arÿm amirĩtkumrêxja pumũ. Nhym me arÿm ba mexkumrêx. Badjwÿ ne ba memã Metĩndjwÿnh kabên jarê. Nhym me kwÿ ï pÿnhkôt kute tu amim kabên markumrêx ne kôt kute amijo baja ne me arÿm axwe kêt ne kute amijo ba mexkumrêx. Ne ajte kute akamãt kô tykkam me ba punuja pyrãk prãm kêt-kumrêx.

<sup>47</sup> Me ajõ aje ikabên mar kajgon amim imar kêt-kam djãm on ije amã ajaxwe pãnh jarênhmã? Me anhĩ pÿnhkôt ajaxwe djãri pãnh jarênhmã? Djãm on pãnh atokrymã? Kati. Djãm ije memã axwe pãnh jarênh nhym me pãnh tokrymã ne ba bõx? Kati. Ije pykakam me kunĩ axwebê me utãrmã ne ba bõx. <sup>48</sup> Be, me ajõ aje ikangan amim ikabên mar kêt-kam me'õ dja amã ajaxwe pãnh jarê. Me kunĩ kute aminhinomã amimênh djã nhõ akatikam dja kãjkwakam Metĩndjwÿnh amã, “Aje amim Ikra mar kêt-kam ajaxwekumrêx”, ane. Dja amã ane ga arÿm ajaxwe pãnh atokry.

<sup>49</sup> Mÿkam dja ã amã ane? Bir, djãm ba ikabên ne ba me amã arê? Kati. Ibãm ne ikabên'ã imã karõ ba arÿm me amã arê. Kam dja Ibãm ta amikabêno ngryk ne me ajõmã ajaxwe pãnh jarê. <sup>50</sup> Ibãm ne imã, “Dja me tu amim amarkumrêx ne arÿm ikôt tĩn ne ar ba rã'ã: rã'ã ne”, ane. Tãm ne ba ije markumrêx. Kam Ibãm kute imã

kabën jarënh kôt ne ba memã arë. Nãm ã Jeju memã ane.

## 13

### *Kute ar par ku'õnh.*

<sup>1</sup> Be, arým Metĩndjwýnh me bakukãmãre nhirôbê mrãnh nhõ akati 'ýr. Mebê idjaer kunĩ kute aben kajmã'ã me irôbê mrãnh djã mar kadjy aben pydji djã nhõ akati 'ýr. Jeju arým kute pykakam mebê àbir 'ýr. Bãm'ýr àbir 'ýr. Ja ne arým kute mar. Arým ne kum pykakam õ me ja jabê:. Nhyr te me amakkre kêt arým kute bĩn 'ýr nhyr kum õ me abê rã'ã.

<sup>2</sup> Arým ar kute õ kwý krën parkam nhyr Djuda kute Jeju kanga 'ýr. Ximão ne Djuda dji. Djuda ja nhidji nhikjêbê ne Ikadji. Nãm kute kurê djwýnhmã kanga 'ýr. Xatanaj ne 'ã kum apné nhyr kute memã kanga 'ýr.

<sup>3</sup> Bãm arým kute Jejumã õ mýjja kunĩ kanga nhyr arým Bãmbê Metĩndjwýnh kurúm rwýk ne kam akubyn 'ýr àbir 'ýr. Ja ne Jeju arým kute mar. <sup>4</sup> Nãm kuman kam kãmã djã. Ar õ kwý krën parkam kãmã djan õ kubêkã krãkão pôx ne adjuw. Ne me'ã ngõ ngrã djã byn arým o amikrax kupu. <sup>5</sup> Ne kam arým ngõnh purortikam ngõ run kam arým kôt ba djwýnh par ku'õnhmo krax. Ar par ku'õnh tẽ:n mã me'ã ngõ ngrã djão ar par'ã ngõ ngrã. O amikrax kupu rã'ãn o ar par'ã ngõ ngrã.

<sup>6</sup> Nãm ar par ku'õnh tẽ:n kam arým Ximão Pedru'ýr bõx. Nhyr kum,

—Je, djãm ba dja ga ipar ku'õ? ane.

<sup>7</sup> Nhyr Jeju kum,

—Jakam aje idjãpênh mar kêt. Dja ba ã amã arë ga ama, ane.

<sup>8</sup> Nhyr kum,

—Be kati. Aje ipar ku'õnh prãm kêtumrêx, ane.

Nhyr kum,

—Dja ba apar ku'õnh kêt ga arým ikôt aba kêt, ane.

<sup>9</sup> Nhyr kum,

—Bënjadjwýr djwýnh. Djãm iparbit? In-hikramẽ ikrãdjwý dja ga ku'õ, ane.

<sup>10</sup> Nhyr kum,

—Be, gar arým adjwýrkam arým ar anhĩ mex ba kam ije ar aparbit ku'õnhmã, ane. Ne kam ar axwe kêt'ã arkum,

—Be, arým ar amex. Djãm ar akunĩ ne gar amex? Kati. Ar ajõ apydji ne ga amex kêt, ane. <sup>11</sup> Arým kute amikukãm kurê djwýnhmã kanga djwýnh markam ne arkum,

—Djãm ar akunĩ ne gar amex? Kati, ane.

<sup>12</sup> Ne kam arým ar par ku'õnh pan kam kã jangijn kam nhýn arkum,

—Be, mýkam ne ba ar apar ku'õ? Djã ne gar ama? <sup>13</sup> Bir, gar imã, “Ujarënh djwýnh, Bënjadjwýr djwýnh”, anhýro aba. Be, mrãmri ne gar imã arë. Ibê tãm. <sup>14</sup> Ibê ar anhõ Bënjadjwýr djwýnh ne ibê ar anhõ ujarënh djwýnhkam ne ba arým amijo ingrin amijo ikãtãm ne arým ar amã apê. Ar akajgo mex, ar akãtãmmã ne ba apên arým ar apar ku'õ. Djãm ar ajõ aje, “Be, ba ne ba irax. Ije me kajgomã idjãpênh prãm kêt”, anhýrmã? Kati. Ar gadjwý aben par ku'õ.

<sup>15</sup> Be, mýj kadjy ne ba ar apar ku'õ? Bir, dja gar ipumũn ikudjwa arým amijo angriren akãtãm ne abenmã apê. Ja kadjy ne ba ar apar ku'õ. <sup>16</sup> Imã adjãpênhkam djãm aje araxo ijakrenh got? Ije ajanorkam djãm aje araxo ijakrenh got? <sup>17</sup> Ar aje araxo ijakrenh kêt kam dja gar amijã ije ar apar ku'õnhja man ikudjwa amijo angriren amijo akãtãm ne abenmã apê. Dja gar amijo anen arým akĩnhkumrêx.

*Djuda kute memã Jeju kanga kukãm arkum 'ã ujarënh.*

*Mat 26.21; Mak 14.18; Ruk 22.21*

<sup>18</sup> Be, djã ne ba ar akunĩmã ikabën jarë? Kati. Djãm ar akunĩ amex? Kati. Ije ar anhĩ pýnhkôt amijo ar apytãr ba arým ije ar amar. Nhyr be, ar ajõ dja ga amã ikurê. Amrêbê: ije amikukãm arënh kôt dja ga amã ikurê. Nã bãm me bakukãmãremã kum,

“Gwaj baro'ã badjãkur'õ dja kum ikurê”, ane.

Nã bãm ã memã ane nhyr me arým 'ã pi'ók no'ók ne. Nhyr me aben djõ'ã arënhomõ:. Arënhomõr tãmã tũ:mrãm arým iwýr o bõx. Gwaj baro'ã badjãkur'õ dja kum ikurê. <sup>19</sup> Ar ajõ amã ikurê kêttri ba arým pi'ökkam ar amã ikabën jarë.

Be, mýj kadjy? Bir, dja gar ajõ amã ikurê kôt arým omũn kam arým akubyn amijo tẽn pi'ökkam ikabënja ma. Anhýr djwýnhram

ikabên ja ma. Ne kam arým amim, “Mrãmri kôt ne amikukãm arênhkumrêx. Jejubê ne Bênjadjwÿrbê kumkatibê Kritukumrêx”, ane. Dja gar ã anen tu amim imarkumrêx.

<sup>20</sup> Be, godja ba amũ me ano nhym me me'ÿr bôx nhym me arým amim me kabên man kam arým kôt badjwÿ amim ima. Ne kam arým kôt amim kute ijanor djwÿnhdjwÿ ma. Mrãmri ne ba ar amã ja jarênhkumrêx, ane.

<sup>21</sup> Jeju arkum anen arým umar punure ne. Ne kam arkum arênh amirĩtkumrêx ne arkum,

—Be, mrãmri dja gar ajõ ikurê djwÿnhmã ikanga. Mrãmri ne ba ar amã ja jarênhkumrêx, ane.

<sup>22</sup> Nhym kôt ba djwÿnh te kute marmã abenkam no tyn nhÿn amim,

—Je tô, mÿj me'õ'ã ne ane? ane. <sup>23</sup> Be, kôt ba djwÿnh'õ ne Jeju târi nhÿ. Jeju kum abêja. <sup>24</sup> Nhym Ximão Pedru jãnh nhÿn amũ Jeju târi ÿrja'ÿr akêx ne ar aktã aben pumũ. Ne kam kute ar 'õ jabej Jeju kukjêrmã Pedru kum inhuo Jeju jakre.

<sup>25</sup> Nhym arým Jeju'ÿr ajkamên kum,

—Bênjadjwÿr djwÿnh, nhym nã? Ar imã arê bar kuma, ane.

<sup>26</sup> Nhym kum,

—Dja ba õmrõmã djwÿ jadjàn amũ kum kungã ga arým ar 'õ pumũ, ane. Ne kam arým kum adjàn amũ Djudamã kungã. Djuda nhidji 'õdjwÿbê ne Ikadji. Ximão 'õdjwÿ ne Djuda dji. <sup>27</sup> Nãm kum kungã nhym Xatanaj arým Djudamã wadjàn 'amÿnh tÿx ne. Nhym kam Jeju arým kum, “Ajrã, amibêx”, ane.

<sup>28</sup> Nhym kôt ba djwÿnh kute kabên mar kajgon mÿjja'ã Jeju kute kum kabên jarênhja ar kute mar kêt. <sup>29</sup> Djudabê ne ar õ pi'ók kaprõo ba djwÿnh. Ne kam ar kwÿ arĩk amim,

—Bãrãm kute gwaj banhõ kwÿ krên djà'õ byrmã ne ano. Me krãptĩ kute aben pydji djà nhõ akati kadjy kute mÿjja byrmã ne ano. Nãr, kute me õ mÿjja kêt mã mÿjja kwÿ nhõrmã ne ano, ane. <sup>30</sup> Nãm Jeju kum djwÿ ngã nhym arým kubyn mã kadjy katon tẽ. Arým akamãtkam ne tẽ.

*Pedru 'êxnhĩ kukãm kute kum arênh.  
Mat 26.31; Mak 14.26; Ruk 22.31*

<sup>31</sup> Djuda kato nhym Jeju arým kôt ba djwÿnhmã kum,

—Ije amijo inhĩ ne ar ibaja dja me jakam arým iraxmã kato ba memã irax. Nhym kam me arým ikôt kãjkwakam Metĩndjwÿnh raxmã kato. <sup>32</sup> Nhym kam arým memã ra:x ne uma:n kam arým amiraxo badjwÿ ijo rax. On dja ijo ra:x ba ipyma:.

<sup>33</sup> Akmere ar, gwaj baro'ã ar babaja arým kêt 'ÿr. Dja gar ijabej ar aban te idjãm djà'ÿr abôx prãmje. Nã bãm ã mebê idjaer rũnhmãdjwÿ ane. Ar gadjwÿ ba arým ã ar amã ane.

<sup>34</sup> Be, ba ar amã 'ã karõ. Ikabên ny ne ba ije ar amã arênhmã. Dja gar aman mã kôt amijo aba mex ne amã aben jabê. Kute imã ar ajabê pyrãk ã ar amã aben jabêo ane. <sup>35</sup> Nhym kam me kãtãm kunĩ arým ar ajã abenmã kum, “Be, Jejukôt ba djwÿnhkumrêx ne wã. Ga, arkum aben jabêwã pumũ.” Dja me ã ar ajã abenmã ane. Nãm ã Jeju arkum ane.

<sup>36</sup> Nhym Ximão Pedru kum,

—Bênjadjwÿr djwÿnh, jãm ne ga atêmmã? ane.

Nhym kum,

—Bir, dja ba tẽ ga arým te on idjãm djà'ÿr ikôt atê prãmje. Kam dja ga tũmrãm arým ikôt tẽ, ane.

<sup>37</sup> Nhym Pedru arĩk kum,

—Bênjadjwÿr djwÿnh, mÿkam dja ba te on adjãm djà'ÿr akôt itê prãmje? Dja me kum abĩn prãm ne ikumrêx ibĩn kam abĩ, ane.

<sup>38</sup> Nhym kum,

—Djãm me kute akumrêx abĩn ne kam ibĩnmã got? Be, dja me ijo mõ, ga õkrên'ãnh kãr kêt ri amijã maje ajêxo amãnhkrut ne ikjêkêt ne ijã memã kum, “Kati. Ije me'õwã pumũnh kêt kumrêx”, ane. Nhym arým ajã õkrên'ãnh kã. Mrãmri ne ba amã ja jarênhkumrêx. Nãm ã kum ane.

## 14

*Kute kôt ba djwÿnhmã tÿx jadjàr.*

<sup>1</sup> Ne kam ajte arkum,

—Kwãrĩk wãnh ba ar akadjy tẽ gar axwe amikam adjumar kêt. Dja gar tu amim Metĩndjwÿnh markumrêx. Badjwÿ dja gar tu amim imarkumrêx. <sup>2</sup> Onĩj Ibãm nhõ kikretikam me ÿrkwã krãptĩ. Djã ne ren kêt ba ren arým ar amã, “Kati, kêt”, ane.

Nhym be, kati. Mrãmri ne Ibãm nhõ kikretikam me ùrkwã krãptĩkumrêx. Ba arým 'yr itëmmã. Dja ba 'yr tën 'yr bõx ne arým ar akutêp ar amã anhũrkwão mex. <sup>3</sup> Dja ba ar anhũrkwão mex kadjy tē:n kam akubyn ajte ar awýr bõx. Ne kam arým mã amikõt ar adjan ar ajo tē. Be, mýj kadjy? Bir gwaj arek baro'ã ar baba kadjy. <sup>4</sup> Be, idjãm djà gar arým ama. 'Yr ipry gar arým ama. Kwãrĩk wãnh axwe amikam adjumar kêt, ane.

*Memã pry'ã ujarênh.*

*Kar 4.12*

<sup>5</sup> Nhym Tôme arým kum,

—Jãm atëmmã ja ar ije mar kêt ne ar ije apry kraxdjwý omũnh kêt. Mýj dja bar nën kum ikato? ane.

<sup>6</sup> Nhym Jeju kum,

—Bir, ba mrãmri ije 'yr me pry pyrãk. Dja me tu amim imarkumrêx ba arým Ibãm'yr meo bõx. Bajbit ije memã katãt ikabên jarênhkumrêx ne ije memã tĩn jangjênh nhym me Ibãm kõt tĩn ne ar ba rã'ã: rã'ã ne. Djãm Ibãm'yr me o bõx kadjy me'õdjwý? Kati. Bajbit ne ba 'yr meo bõx. <sup>7</sup> Ne ga ren ar aje imarkumrêx ne ren arým Ibãmdjwý ma. Be, arým ba ar amã arê gar arým aman omũ, ane.

<sup>8</sup> Nhym Piripi kum,

—Bênjadjwýr djwýnh, ar imã Abãm jakre bar omũ. Ne kam arým ikĩnh ne, ane.

<sup>9</sup> Nhym Jeju kum,

—E kum Piripi, djãm gormã ne ga ikõt ar aban aje imarn ipumũnhja kêt? Be, me kute ipumũnh o ne me arým Ibãmdjwý pumũ. Mýkam ne ga imã, “Ar imã Abãm jakre bar omũ?” ane. <sup>10</sup> Be, Ibãmmê ne bar itipdjìn ar iba. Djãm aje amim imar kêt? Ije ar amã ikabên jarênhja ba ba ije arênh kêt. Djãm ba ne ba idjãpênh ar iba? Kati. Ibãm ne ar ijo ban àpênh ar ba. <sup>11</sup> Be, Ibãmmê ne bar abenã itypdjìn ar iba. Ja dja gar aman tu amim imarkumrêx. Nãr idjãpênhkõt imã akaton tu amim imarkumrêx.

<sup>12</sup> Me kute tu amim ikamnhĩxkumrêx gêdja me idjãpênh o apê. Gêdja me àpênh o ijakre. Be, mýkam? Bir, arým Ibãm'yr itëmkam dja me àpênh o ijakrenh mex ne. Mrãmri ne ba ar amã ja jarênhkumrêx.

<sup>13</sup> Dja gar amijo Metĩndjwýnh mã a'wý. Tu

amim imarkumrêx ne kum amijo a'wý ba kam ar aje kum arênh kõt ã ar amã o ane. Be, mýj kadjy? Bir, dja ba kõt memã Ibãm ra:xo amirĩt. Ja kadjy dja ba ar aje kum arênh kõt ã ar amã o ane. <sup>14</sup> Ikukwakam dja gar kum mýjja kunĩo a'wý ba kam ar aje kum arênh kõt ã ar amã o ane.

*Arkum Metĩndjwýnh Karõ'ã ujarênh.*

*Kar 2.2*

<sup>15</sup> Gar mrãmri amã ijabê jabej mã ikabên man kõt ar amijo aba. Ije amrãnh mex'ã ar amã karõ kõt dja gar amijo aba. <sup>16</sup> Dja ba kam arým ar ajo Ibãmmã a'uw nhym arým ar amã ajo kĩnh djwýnh 'õdjwý jano. Nhym kam arým arek ar aro'ã ar ba rã'ã: rã'ã ne. <sup>17</sup> Karõ dja ar amã ano. Karõ kute katãt memã ikabên jarênhkumrêx. Me kum Metĩndjwýnh kĩnh kêtjamã dja Karõ janor kêt. Be, mýkam? Bir, mebê Karõ bipdjur nhym me kute mar kêt kam dja memã anor kêt. Ar ga ne gar atemã. Arým aje mar. Karõ arek ar aro'ã ar bakam aje mar. Dja arek ar aro'ã ar ba rã'ã.

<sup>18</sup> Djãm ije ar amã inhírer gar aje me 'uwtĩ pyrãk ne akaprĩn ar abamã? Kati. Ba dja ba mrãmri ar awýr ibõxkumrêx.

<sup>19</sup> Dja ijã akati ngrêre ba arým me kum ikĩnh kêtjabê amijo apdju. Ar gajbit dja ba ar abê amijo ibipdjur kêt. Itĩnkõt dja gar gadjwý atĩnkumrêx. <sup>20</sup> Kam dja gar amim, “Be, mrãmri ne Jeju Bãmmê tipdjìn ar ba. Badjwý ne ba Jejumê itipdjìn ar iba. Jejudjwý ne imê tipdjìn ar ba.” Djã gãm ar ã amim ane. <sup>21</sup> Mýj me'õ ne mrãmri kum ijabêkumrêx? Bir, ba ne ba me kute katãt amijo ba'ã memã karõ. Dja me kam amim ikabên man kõt ar amijo ba. Me ja ne me mrãmri kum ijabêkumrêx. Dja me mrãmri kum ijabêkumrêx nhym Ibãmdjwý arým kum me abê. Badjwý dja ba imã me abên arým ikabêno memã amijo amirĩt nhym me arým mrãmri imarkumrêx, ane.

<sup>22</sup> Nhym Djuda 'õdjwý. Djãm Djuda Ikadji? Kati. Djuda 'õdjwý Jejumã kum,

—Be, mýkam dja ga ar bajbit ar imã amijo amirĩt? Mýkam dja ga me kunĩmã amijo amirĩt kêt? ane.

<sup>23</sup> Nhym Jeju kum,

—Bir, me kum ijabê dja me ikabên man kõt ar amijo ba. Nhym kam Ibãm arým kum me abê bar kam arým me'yr bõx ne ar

meo iba. <sup>24</sup> Nhyim be, me kum ijabê kêtja dja me ikabên mar kêt ne kôt amijo ba kêt ne tu ate krân amidjwýnhbit ma. Be, ije ar amã ikabên jarênh gar aje marja djãm ba ikabên? Kati. Ibãm kute ijanor djwýnh kabên ne ja.

<sup>25</sup> Gwaj baro'ã ar babari ne ba ar amã ikabên ja jarê. <sup>26</sup> Dja ba mã tẽ nhyim ar ajo kînh djwýnh arým ar amã ikabên jarê. Metîndjwýnh Karôja tãm dja arým ar amã arê. Ije amrêbê ar amã ikabên jarênh ja kunîkôt dja ar amã arê. Kàjkwakam Ibãm dja ar amã Karô jano nhyim arým bôx ne ar amã ikabên jarê. <sup>27</sup> Itêm tekrekam dja gar ikabênkôt adjumar mex. Idjumar mex kôt adjumar mex. Djãm me kum ikînh kêtja kabênkôt adjumar mexmã? Kati. Tãm ne kajgo. Ba ikabên kôt dja gar adjumar mex ne mrãmri adjumar mexkumrêx. Kwãrîk wãnh amikukãm axwe adjumar ne atîh prãm kêt.

<sup>28</sup> Ôbê ne ba arým ar amã, “Dja ba mã tẽn kam akubyn ajte ar awýr tẽn bôx”, ane. Ga ren ar mrãmri amã ijabêkumrêx ne ren akînhkumrêx. Ije ar amã Ibãm'ýr idjãbir jarênh ar aje markam ne gar ren akînhkumrêx. Be, mýkam? Bir, kàjkwakam Ibãm kute raxo ijakrenhkam. <sup>29</sup> Be, jakam ba arým ar amã arê. Idjãbir kêttri ba ar amã arê. Dja ba wabi gar kam ikabênja man arým tu amim imarkumrêx.

<sup>30</sup> Jakam dja ba arým ar amã ikabên jarênh kwý ngri. Be, mýkam? Bir, arým Xatanaj bôx 'ýr. Me kum ikînh kêtja nhõ bënjadjwýr iwýr bôx 'ýr. Djãm iwýr bôxkam kute ijo bamã? Arkati. <sup>31</sup> Dja ba Ibãm kabên kôt ar amijo iba. Ibãm kute imã 'ã karô kôt ar amijo iba nhyim kam me kum ikînh kêtja arým ima. Dja me amim, “Mrãmri kum Bãm jabêkumrêx”, ane. Tãm dja me kuma. Kàjmã ar dja. Gwaj on 'ýr. Nãm Jeju ã kôt ba djwýnhmã ane.

## 15

*Kute amikukràdjà'ã akrô jakren 'ã ujarênh.*

<sup>1</sup> Ne kam apýnh akrô kukràdjà'ã ajarên arkum,

—Be ga, atemã akrô djôja pumũ. Ba ne ba ije akrô bàri pyræk. Ibãm ne kute akrô

djuw mex djwýnh pyræk. Ar ga ne gar aje akrô bàrikam apýnh pa pyræk.

<sup>2</sup> Ga, akrô djuw mex djwýnh kute akrô pa kajgo rênhja pumũ. Pakam ô kêtka ne kurê. Ibãmdjwý kum me kute imar kajgo kînh kêt ne wãnh me kanga. Mýkam? Bir, me kute imar kajgo ne ukaprî kêt ne axwe ar ba. Kute mrãmri ne akrô pakam ô kêt pyræk. Kam ne wãnh me kanga. Ga, akrô pa kwýkam ôja pumũ. Nhyim o djuw mex djwýnh kute 'ã ingrà kajgodjwý rênh. Akrô pakam ôbit krãptî kadjy ne kurê. Ibãmdjwý kum me kute tu amim imarkumrêxja kînh. Ne kam arým mebê mýjja kajgo kunî kurê. Mýj kadjy? Bir, dja me amim imar 'ãno djan mýjja kajgo mar kêt. Ne kam arým ukaprî:n katàt ar amijo ba. Ne kam mexkumrêx kute akrô pakam ô kumexkam mexkumrêx pyræk. Ja kadjy ne mebê mýjja kajgo kunî kurê.

<sup>3</sup> Be, ar aje akrô bàrikam apýnh pa pyræk. Arým ar amex. Ije ar amã ikabên jarênhkôt arým ar amex. <sup>4</sup> Dja gar arek ijamýnh týxkumrêx ne tu amim imar týxkumrêx ne ijã adjukanga kêtka ne kurê. Badjwý dja ba arek ar ajamýnh týxkumrêx. Djãm akrô pa arek akrô bàri 'amýnh kêtka ne got? Arkati. Ar gadjwý dja gar ijamýnh kêt ne ijã adjukanga djãm kam amex? Kati. Te amex prãmje kute akrô pakam ô kêtka ne kurê.

<sup>5</sup> Ba ije akrô bàri pyræk. Ar ga ne gar aje bàrikam apýnh pa pyræk. Dja gar arek ijamýnh týx ne tu amim imar týxkumrêx ne ijã adjukanga kêtka ne kurê. Ba badjwý dja ba arek ar ajamýnh týx. Kam dja gar katàt ar amijo aban adjukaprî:n amexkumrêx kute akrô pakam ô mexkumrêx ne kumexja pyræk. Djãm aje amim imar kêtka ne kurê prãm got? Dja ga ijã adjukangan arým te amex prãmje. <sup>6</sup> Dja me amim imar rerekren ijã ukanga nhyim Metîndjwýnh arým wãnh me kanga. Ga, akrô pa ate bàri'ã arij nhyim o djuw mex djwýnh kute rênh ne wãnh rênh nhyim arým ngràja pumũ. Nhyim kam me kute o atom ne kuwykam rênh nhyim xêtja pumũ.

<sup>7</sup> Gédja gar arek ijamýnh týx ne tu amim imarkumrêx ne ijã adjukanga kêt ne tu amim ikabên mar týxkumrêx nhyim kam



Ibãm arým akabënkôt ã amã o ane. Dja gar amã mýjja kĩnh ne kum o a'uw nhym arým akabënkôt ã amã o ane. <sup>8</sup> Dja gar amexkumrëx ne katàt ar amijo aban adjukaprĩ kute akrô pakam ô mexkumrëx ne kumexja pyræk. Nhym me amex ja pumũn arým Ibãm raxmã kato. Dja gar ã amijo anen arým abê ikôt aba djwýnhkumrëx.

<sup>9</sup> Imã ar ajabê kute mrãmri ne Ibãm kum ijabê pyræk. Dja gar tu imã ar ajabêja markumrëx ne ar amã ijabê'ã adjukanga kêt. <sup>10</sup> Gêdja gar mã ikabënja man kôt ar amijo aba. Ije ar amã katàt aje amijo aba'ã karôkam ikabënja man kôt ar amijo aba. Ne kam arým ar amã ijabê'ã adjukanga kêt. Ga, ije Ibãm kabën kôt amijo ibaja pumũ. Ba kam imã Ibãm jabê'ã idjukanga kêt.

<sup>11</sup> Be, mýj kadjy ne ba ar amã ikabën ja jarê? Bir, dja gar ikabën man arým ikĩnh akĩnh. Akĩnh ne akĩnh rã'ãn akĩnhtire. <sup>12</sup> Be, ar amã aben jabêmã ne ba abenã ar amã karô. Amã aben jabê kute mrãmri ne imã ar ajabê pyræk. <sup>13</sup> Djãm ije inhôbikwa kadjy itykkam imã inhôbikwa jabê ngri got? Imã abêo katàt me kunĩ jakre. <sup>14</sup> Dja ba ar amã katàt aje amijo aba'ã karô gar ikabën man kunĩkôt ar amijo aba ba arým ar ajo inhôbikwakumrëx.

<sup>15</sup> Djãm jakam ije ar amã, “Inhô àpênh”, anhýrmã? Kati. Ne ga ren ar abê inhô àpênhbit ba ren ar amã adjàpênh djàbit jarê gar ren jabit man ren kam aje ikabën kunĩ mar kêt. Nhym be, kati. Ibãm kute imã kabën jarënh ja ba arým ar amã kunĩ jarê. Ije ar amã Ibãm kabën kunĩ jarënhkam arým ije jakam ar amã, “Inhôbikwa”, anhýrmã.

<sup>16</sup> Djãm ar ga ne gar amijo ipytà? Kati. Ba ne ba amijo ar apytàn arým ar adjàpênh djà'ã ar amã karô. Be, mýj kadjy? Bir, dja gar katàt ar amijo aban adjukaprĩkumrëx ne memã ijã adjujarënh mō. Ne kam arým Metĩndjwýnhmã amexkumrëx rã'ã. Kum amexkumrëx rã'ã ne arým aje mrãmri ne akrô pakam ô mexkumrëx ne kumexja pyræk. Ja kadjy ne ba adjàpênh djà'ã ar amã karô. Mýj kadjy dja gar ã amexo ane? Bir, dja gar ikukwakam mýjja'ã Ibãmmã a'uw nhym arým ã ar amã o ane. Ar aje kum arënh kôt ã ar amã o ane. Ja kadjy dja gar

ã kum amexo ane. <sup>17</sup> Ar amã aben jabêmã ne ba abenã ar amã karô.

*Me kum Metĩndjwýnh kĩnh kêtja'ã ujarënh. Mat 10.16,22; Dju r 7.7; Pir 1.29; A Xim 3.12; Dju k 3.13*

<sup>18</sup> Be, dja me kum Metĩndjwýnh kĩnh kêtja kum ar akurê jabej. Ikumrëx ne me ã kum ikurêo ane. Ja dja gar ama. <sup>19</sup> Ne ga ren ar me kum ikĩnh kêtja jaxwe kôt ajaxwe nhym ren me kum ar ajabê ne. Nhym be, kati. Me axwe kôt ajaxwe kêt. Ba ne ba amijo ar apytàn mebê amikôt ar apumjuw. Kam ne me kum ikĩnh kêtja kum ar akurê.

<sup>20</sup> Ba arým ar amã, “Ar abê inhô àpênhkam djãm aje araxo ijakrenh got”? ane. Djãm ar aje araxo ijakrenh got gar amim, “Kati. Dja me ijo bikënh kêt”, anhýro aba? Kati. Ikôt dja me ar ajo bikënhkumrëx. Nhym be, me kwý kute amim ikabën mar kôt dja me amim ar akabëndjwý ma. <sup>21</sup> Be, mýkam dja me ar ajo ajkê? Bir, ikôt ar abakam. Me kute ijanor djwýnh mar kêtka dja me ar ajo ajkê. <sup>22</sup> Ne ba ren me'ýr ibôx kêt ne ren memã ikabën jarënh kêt nhym Metĩndjwýnh ren memã axwe jarënh kêt. Nhym be, kati. Arým ne ba me'ýr bôx ne memã ikabën jarë nhym me kute amim imar kêt. Kam dja mrãmri memã axwe jarënhkumrëx. Jakam dja me te Metĩndjwýnhmã kum, “Kati. Ijaxwe kêt”, anhýrmã.

<sup>23</sup> Be, me kum ikurêja kum Ibãmdjwý kurê. <sup>24</sup> Ne ba ren ije me nokrekam mýjja pumũnh kêt kwý nhipêx kêt nhym ren me omũnh kêt nhym Metĩndjwýnh ren memã axwe jarënh kêt. Nhym be, kati. Arým me kute omũnhkam ne me kum ikurên kum Ibãmdjwý kurê.

<sup>25</sup> Me kum ikurêja'ã ne me bakukãmãre amrêbê: pi'ók no'ók ne. Ba ne ba kam amikukãm memã kum, “Ajmã ije meo kêtka ne me kum ikurê.” Nã bãm ã memã ane nhym me arým kukràdjakam 'ã pi'ók no'ók ne. Nhym kam me aben djô'ã arënh mō:n arënh mōr tãmtã arým iwýr o bôx. Tũ:mrãm iwýr o bôx. Nhym me kamingrãnyre arým kum ikurê. Ajmã ije meo kêtka me kum ikurê.

<sup>26</sup> Be, dja ba Ibãm 'ýr wabin 'ýr bôx ne arým ar amã ar ajo kĩnh djwýnh jano, ar

amã Metĩndjwýnh Karõ jano. Ta dja katàt memã kabēn jarēnhkumrēx. Ibãm kurũm dja tē. Dja ba ar amã ano nhym bõx. Ne kam kute ipumũnh kõt arým ar amã ijã ajarē. <sup>27</sup> Ar gadjwý gēdja gar ijã memã adjujarēnh aba. Idjãpēnh kraxkõt iro'ã ar abakam aje ipumũnh kõt memã ijã adjujarēnh aba.

## 16

<sup>1</sup> Ar aje ibē amijo akēx kēt kadjy ne ba ar amã ikabēn jarē. <sup>2</sup> Me bikprõnh djakam dja me ar akangan me nēje bõm ar amē. Ne arĩk ar ajã amim, “Dja ba ar kupa nhym kõt Metĩndjwýnh arým kum ikĩnhkumrēx”, anen arým ar abĩ. <sup>3</sup> Me kute Ibãmmē ar imar kētkam dja me ã ar ajo ane.

<sup>4</sup> Djãm amrēbē ne ba ar amã ikabēn ja jarēnh tē? Kati. Gwaj baro'ã ar babari ne ije ar amã arēnh kēt. Ajbir ne ba ar abē idjãbir kutã ar amã arē. Dja ba wabi nhym me arým ar ajo bikēnh ba. Kam dja gar akubyn ije ar amã ikabēn jarēnh ja'ýr amijo bõx ne arým aman amim, “Be, mrãmri kute imã arēnh kõt ne me arým jakam ã ijo bikēnh bao ane”, ane.

### *Metĩndjwýnh Karõ kute õ me jao bamã.*

<sup>5</sup> Jakam ba arým kute ijanor djwýnh'ýr idjãbirmã. Kam ne gar aje imã, “Jãm dja ga tē”? anhýr kēt. <sup>6</sup> Be, mýkam? Bir, ba ije ar amã idjãbir jarēnh gar akaprĩ raxkam ne gar aje ikukjēr kēt. <sup>7</sup> Kwãrĩk wãnh ar akaprĩ kēt. Dja ba wabin arým ar amã ajo kĩnh djwýnh 'õdjwý jano. Metĩndjwýnh Karõ jano nhym ar awýr bõx gar adjumar mexkumrēx. Ba ren idjãbir kēt nhym ren Karõ ar awýr bõx kēt. Nhym be, kati. Dja ba idjãbirkumrēx ne ar awýr anorkumrēx. Mrãmri ne ba ar amã ja jarēnhkumrēx.

<sup>8-11</sup> Mrãmri dja Metĩndjwýnh Karõ pykakam bõxkumrēx. Ne kam ta arým mã pykakam me axwemã kum, “Mrãmri ajaxwekumrēx”, anhýro ba. Nhym kam me arým kõt amijaxwe maro ba. Be, mýkam? Bir, me kute amim imar kētkam ne me axwe. Dja Metĩndjwýnh Karõ ta arým mã memã kum, “Jeju katàt kute amijo bakumrēx”, anhýro ba. Nhym kam me arým kõt ikatàtkumrēx maro ba.

Be, mýkam? Bir, Ibãm'ýr idjãbir gar aje ipumũnh kētkam dja me mrãmri ikatàtkumrēx maro ba. Dja Metĩndjwýnh Karõ ta arým mã memã kum, “Dja ga ajaxwe pãnh atokry”, ane. Nhym kam me arým kõt amimaro ba. Be, mýkam? Bir, dja me kum ikĩnh kētja nhõ bēnjadjwýrbē Xatanaj tokry. Axwe pãnh tokry. Dja me ja man arým amimaro ba, amijaxwekam pãnh tokry mã maro ba.

<sup>12</sup> Be, ba te ije ar amã ikukràdjã kumex jarēnh prãmje. Ar aje ikukràdjã kumex mar kadjy ne gar ajamak mex kēt rã'ã. <sup>13</sup> Kwãrĩk wãnh rã'ã. Dja ĩ Metĩndjwýnh Karõ bõx. Kute memã katàt kabēn jarēnhkumrēxja bõx. Ne kam arým ar ajo ba gar ikabēn katàt kunĩ ma. Djãm ta ne kute amikabēn jarēnhmã? Kati. Ba dja ba kum arē nhym arým ar amã kute ikabēn marja jarē gar arým ama. Dja ar akukãm apýnh mýjja apõx djwýnh rãm ar amã arē gar arým ama. <sup>14</sup> Ba dja ba kum ikabēn jarē nhym kuman arým ar amã arē. Kute ar amã ikabēn jarēnhkam dja ijo rax gar arým ira:xmã akaton ama. <sup>15</sup> Be, ba Ibãm kabēn o ikabēnkam ne ba ar amã, “Ba dja ba Karõmã ikabēn jarē nhym kuman arým ar amã arē”, ane.

<sup>16</sup> Arým itēm 'ýr. Dja ba tē gar arým ipumũnh kēt. Nhym kam ijã akati ngrēre gar ajte ipumũ. Ibãm'ýr idjãbir 'ýr. Kam dja gar ajte ipumũ. Nãm ã Jeju kõt ba djwýnhmã ane.

### *Ar'ýr ar kĩnh djã bõx kadjy kute arkum arēnh.*

<sup>17</sup> Nhym kõt ba djwýnh kwý ar abenmã kum,

—Nãm gwaj bamã, “Arým itēm 'ýr. Dja ba tē gar arým ipumũnh kēt. Nhym kam ijã akati ngrēre gar arým ajte ipumũ”, ane. Ne, “Ibãm'ýr idjãbir 'ýr. Kam dja gar ajte ipumũ”, ane. Be, mýj'ã ne gwaj bamã ja jarē? ane. <sup>18</sup> Ne kam,

—Kute gwaj bamã, “Akati ngrēre”, anhýrkam mýj'ã ne kute gwaj bamã ja jarē? Gwaj te baje mar prãmje, ane.

<sup>19</sup> Be, ar kute kukjēr prãmkõt ne Jeju arým ar kuma. Ne kam arkum,

—Djã ne gar bit aje ikukjērmã? Ije ar amã, “Arým itēm 'ýr. Dja ba tē gar arým ipumũnh kēt. Kam dja ijã akati ngrēre

gar arým ajte ipumũ”, anhÿr. Ije ar amã anhÿrkam djã ne gar aje bit abej ikukjêrmã?

<sup>20</sup> Ba ar amã arê gar ama. Dja gar muw ne akaprî rax. Nhyr be, me kum ikînh kêtja dja me kînh. Dja gar akaprî tèn kam ï arým akînhkumrêx. Mrãmri ne ba ar amã ja jarênhkumrêx.

<sup>21</sup> Be, me nire kra àkam kaprîre. Me kra bixadjwÿr 'ÿr nhyr me kaprîre. Ne kam me kra bixadjwÿrkam arým kaprîo aknon mar kêt ne. Me kînhkam ne me arým kaprîo akno. <sup>22</sup> Dja gar ã akaprîn ajte akînho ane. Jakam gar akaprî. Kwârîk wãnh rã'ã. Dja gwaj ajte aben pumũ gar akînhkumrêx. Nhyr kam me arým te kute ar amã akaprî jadjãr prãmje.

<sup>23</sup> Gwaj baje ajte aben pumũnhkam dja gar imã adjà'wÿr prãm kêt. Ne kam ikukwakam Ibãm tamã mÿjjao a'uw nhyr arým ã ar amã o ane. Mÿjja kunïo ikukwakam kum adjà'wÿrja dja ã ar amã o ane. Mrãmri ne ba ar amã ja jarênhkumrêx. <sup>24</sup> Kraxje ar aje ikukwakam Ibãmmã adjà'wÿr kêt rã'ã. Ikukwakam kum a'wÿ nhyr arým ã ar amã o ane. Ar akînhkumrêx kadjy dja ã ar amã o ane.

<sup>25</sup> Be, Ibãm kukràdjã'ã ne ba pykakam apÿnh mÿjja jakren ar amã arê nhyr kukràdjã kwÿ ar abê bipdjur. Adjÿm, dja ba ï ar amã ã arênho anhÿr kêt. Dja ba ar amã Ibãm kukràdjã jarê nhyr ar amã amirîtkumrêx ne ar abê bipdjur kêt. <sup>26</sup> Amrê akati mörjakam ije ar ajo Ibãmmã idjã'wÿr prãm kêt. Ar ga dja gar ikukwakam kum a'uw nhyr arým ar ama.

<sup>27</sup> Be, mÿkam? Bir, ta kum ar ajabêkam. Ar amã ijabêkam ne ta kum ar ajabê. Ije ar amã, “Ta ne ijano ba tẽ”, anhÿr gar aje tu amim ikabên markumrêxkam ne ta kum ar ajabê. Dja gar kum a'uw nhyr ta arým ar ama. <sup>28</sup> Ibãm kurüm ne ba amrê tèn pykamã bôx. Dja ba jakam pyka kurüm Ibãm'ÿr tèn arým 'ÿr bôx, ane.

<sup>29</sup> Nhyr kôt ba djwÿnh kum,

—Be, jakam ne ga arým imã akabên jarênho amirîtkumrêx. Aje akukràdjã'ã pykakam mÿjja'ã adjujarênhja jakre kêt. Ga tu akukràdjã jarênho amirîtkumrêx.

<sup>30</sup> Jakam bar arým amim ama. Mrãmri ne aje mÿjja kunï markumrêx. Jakam ar ije ajte akabên jabej akukjêr prãm kêtumrêx.

Be, mrãmri ne ga kàjkwakam Metîndjwÿnh kurüm tèn abôxkumrêx, ane.

<sup>31</sup> Nhyr Jeju arkum,

—Djãm jakam ne gar mrãmri tu amim imar tÿxkumrêx? Kati. <sup>32</sup> Adjÿm, dja gar amidjwÿnhbit man ï ibê ajmã. Me umaje ibê ajmã ba arým ate dja. Be, djãm mrãmri ba ate idjãmmã? Kati. Ibãm kute imê amijo kajkepkam dja ba ate idjãm kêt.

<sup>33</sup> Be, mÿj kadjy ne ba ã ar amã ane? Bir, dja gar ï ije ar amã ikabên jarênhja man arým tu amim markumrêx. Ne kam arým ikanàrràm adjumar mex ne ar aba. Be, me kum ikînh kêtja kôt dja gar arek ar aba nhyr me ar ajo bikênho ba. Kwârîk wãnh kam ar akaprî kêt. Ba ne ba itÿxo ije me kum ikînh kêtja jakrenh mex ne. Nãm ã Jeju kôt ba djwÿnhmã ane.

## 17

### *Jeju Metîndjwÿnhmã amijo à'wÿr.*

<sup>1</sup> Nãm arkum anen kam kãjmã ôkren kàjkwa jabên Bãmmã kum,

—Djünwã, arým itokry'ã myt bôx. Dja ga memã iraxo amirît gê me iraxmã kato. Dja me iraxmã kato ba arým memã araxo amirît nhyr me gadjwÿ araxmã kato.

<sup>2</sup> Be, mÿjkôt dja me gu baraxmã kato. Bir, aje me kadjy ijã Bënjadjwÿr djwÿnh mênhkôt. Apÿnh pyka djãri kunïkôt dja ba me kunïmã nhÿ. Ne kam arým me kwÿmã tîn jadjã. Aje mã ikôt me kamênhja kunïmã tîn jadjã nhyr me arým gu bakôt tîn ne ar ba rã'ã: rã'ã ne. Ja kadjy ne ga ijã Bënjadjwÿr djwÿnh mẽ. Kôt dja me kum gu bakînhkumrêx.

<sup>3</sup> Be, mÿj ne me kute marmãn arým gu bakôt tîn ne ar ba rã'ã: rã'ã ne? Bir, dja me amim, “Kàjkwakam Metîndjwÿnh pydji. Mrãmri ne kubê Metîndjwÿnhkumrêx. Mrãmri ne kute pykamã Jeju janorkumrêx”, anhÿro ba. Ja ne me kute marmã. Me kute mar ne tu amim gu bamarkumrêxmã. Dja me tu amim gu bamarkumrêx ne arým gu bakôt tîn ne ar ba rã'ã: rã'ã ne.

<sup>4</sup> Pykakam ar ibari ba arým memã araxo amirît nhyr me kwÿ arým kum akînhkumrêx. Aje adjãpênh djã'ã imã karô kôt ba apên arým 'ã aminhinomã amimê.

<sup>5</sup> Jakam badjwý dja ga memã iraxo amirít gê me ira:xmã kato. Adjâkam mýjja kuní kator kêttri gu ar baba. Kam gu bara:x. Amrêbê: gu baraxja kôt dja ga jakam ijo rax.

*Kute Bãmmã kôt ba djwýnho à'wýr.*

<sup>6</sup> Ga ne ga arým mebê anhõ me kwýo akêx. Me kum akính kêtja bê anhõ me kwýo akêx ne mã ikôt me kamê. Ba kam arým memã ajo amirítkumrêx ne. Nhyim kam me arým akabên man kôt ar amijo ba. <sup>7</sup> Arým me kute imarn arým ijã amim, “Jeju ne Metíndjwýnh kukwakambit âpênh ne kabên jarênho ba”, anhýro ba. Ja ne me kute mar. <sup>8</sup> Aje akabên'ã imã karõ kôt ba memã arê nhyim me arým tu amim markumrêx ne mã kôt ar amijo ba. Ne mã ijã amim, “Mrãmri kâjkwakam Metíndjwýnh kurüm ne tèn bôx. Mrãmri ta ne kute anorkumrêx nhyim arým tèn bôx”, ane.

<sup>9</sup> Djãm pykakam me kum akính kêtjao ne ba amã a'uw? Kati. Aje ikôt me kamênhjao ne ba amã a'uw. <sup>10</sup> Ga ne ga arým inhõ me kunío anhõ. Badjwý ne ba arým anhõ me kunío inhõ. Gu baro'ã arým meo banhõ. Nhyim me arým memã iraxo amirít. <sup>11</sup> Djünwã, amexti:ren akatátkumrêx. Jakam dja ba arým awýr tèn arým pykakam me kum akính kêtjamê ro'ã ar iba kêt. Nhyim be, gu banhõ me ne me pykakam me kum akính kêtjamê ro'ã ar ba rã'ã.

Djünwã, príne amexkam dja ga amim gu banhõ me utàn meo aba. Ga ne ga ikôt me kamê. Me kum aben jabên axikôt kabên kadjy dja ga me utàn meo aba. Gu bamã aben jabên baje axikôt bakabên pyrâk gê me ã kum aben jabên ã axikôt kabêno ane. <sup>12</sup> Pykakam me kum akính kêtjamê ro'ã ar ibari ne ba akukwakam me utàn ar meo iba. Aje ikôt me kamênhja ne ba me utàn ar meo iba nhyim 'õ biknor kêtikumrêx. Ikôt ba djwýnhbê Djuda pydji ne axwekumrêx. Pydjibit dja arým akuno. Amrêbê me ikukãmãre kute 'ã pi'ók no'ók kôt dja akuno.

<sup>13</sup> Be, jakam ne ba arým awýr idjâbir 'ýr. Pykakam ar ibari ba amã ikabên ja jarê. Me kute amã ikabênja mar kadjy ba amã arê. Dja me kuman arým mrãmri ikínho

kínhkumrêx. <sup>14</sup> Arým me kum akính kêtja kum gu banhõ me kurê. Be, mýkam? Bir, nã bãm memã akabên jarê nhyim me arým tu amim markumrêx. Ne kam arým ate mebê amijo ba. Me kum akính kêtjabê amijo ba. Ije ate mebê amijo iba kôt ne me ate mebê amijo ba. Kam ne me kum akính kêtja kum gu banhõ me kurê.

<sup>15</sup> Djãm ije amã, “Me kum akính kêtja bê dja ga amim gu banhõ meo wabi”, anhýrmã? Kati. Dja me arek me ro'ã ar ba. Dja ga mã me utàn ar meo aba gê gu banhõ me ja me axwe kôt axwe kêt. <sup>16</sup> Me arým mebê amijo ba. Me kum akính kêtja bê amijo ba. Ate ije mebê amijo iba kôt ne me ate mebê amijo ba.

<sup>17</sup> Mrãmri akabên katátkumrêx. Aje memã akabên katât jarênkôt dja ga amimexo meo mex gê me katât ar amijo ba. <sup>18</sup> Ga ne ga arým idjâpênh djã'ã imã karôn arým pykakam me kum akính kêtja'ýr ijano ba tẽ. Badjwý ne ba akudjwa arým me âpênh djã'ã gu banhõ me jamã karôn arým me kum akính kêtja'ýr me ano. <sup>19</sup> Imã me abêkam ne ba itykmã. Dja ba akabênkôt me kadjy ty nhyim me arým amexo mex. Dja me tu amim ikabên katât markumrêx ne arým amexo mex.

*Kute Bãmmã me kute mar kunío à'wýr.*

<sup>20</sup> Djãm me jabit ne ba amã meo a'uw? Kati. Dja me ã amũ memã ikabên jarê nhyim me kwý ikabên man tu amim imarkumrêx. Amũ me jaodjwý ba amã a'uw.

<sup>21</sup> Be, mýj kadjy ne ba amã meo a'uw? Bir, dja ga ikabên man arým memã amak bô nhyim me arým akabênkôt kum aben jabên axikôt kabên. Dja me axikôt kabên kute gu bamã aben jabên axikôt bakabên pyrâk. Be, mýj kadjy dja me kum aben jabên axikôt kabên? Bir, gêdja amũ me kum akính kêtja me omün arým kum gu bakính ne arým tu amim imarkumrêx. Ne kam ijã amim, “Be, mrãmri ne Metíndjwýnh Jeju jano nhyim arým pykakam bôx ne ar ba”, ane. Ja kadjy dja me kum aben jabê.

<sup>22</sup> Ga ne ga ijo rax ba arým gu banhõ meo rax. Nã bãm memã gu bakukràdjã jarê nhyim me arým tu amim markumrêx ar o ba. Ar o ba:n arým rax ne. Be, mýj kadjy ne ba meo rax? Bir, dja me

kum aben jabên axikôt kabên kute gu bamã aben jabên axikôt bakabên pyrâk. Ja kadjy ne ba meo rax. <sup>23</sup> Bamê gu banhô me jamê ne me itipdjîn ar iba. Gu badjwÿ batipdjîn ar baba. Gora gê me prîne kum aben jabên axikôt kabên. Nhym kam me kum akĩnh kêtja me omün arÿm amim, “Mrãmri ne Metĩndjwÿnh Jeju jano nhym arÿm pykakam bôx ne ar ba. Ga, Metĩndjwÿnh kum me abêja pumũ. Kum me abê kute kum Jeju jabê pyrâk”, ane. Dja me kum akĩnh kêtja me omün ã amim ane.

<sup>24</sup> Djũnwã, mÿjja kunĩ kator kêttri ne ga amã ijabê. Kam dja ba wabi ga arÿm ijo ra:x ne. Aje mã ikôt me kamênhdjwÿ dja ga o wabi gê me iro'ã ar ba. Dja me iro'ã ar ba:n irax pumũnh ar o ba. Ja ne ba imã kĩnh.

<sup>25</sup> Djũnwã, ga ne ga akatât ne ajaxwe kêtumrêx nhym me kum akĩnh kêtja kute amar kêt. Bajbit ije amar nhym me jadjwÿ arÿm kute amim, “Mrãmri ne Metĩndjwÿnh Jeju jano nhym arÿm pykakam bôx ne ar ba”, anhÿro ba. Tãm ne me kute amim tu markumrêx. <sup>26</sup> Ba kam arÿm memã ajã ajarê. Dja ba memã ajã idjujarênh rã'ã ne. Be, mÿj kadjy dja ba memã ajã idjujarênh rã'ã? Bir, amã me abê kute amã ijabê pyrâk. Amã me abêja'ã dja ba memã idjujarênh rã'ã nhym me arÿm mar rã'ãn kam arÿm kum ajabê:. Ba kam arÿm meo iba. Ja kadjy dja ba memã ajã idjujarênh rã'ã. Nãm ã Jeju Bãmmã kabêno ane.

## 18

*Me kute Jeju pa 'amÿnh ne o mõi.  
Mat 26.47; Mak 14.43; Ruk 22.47*

<sup>1</sup> Jeju Bãmmã kabên pan kam arÿm kôt ba djwÿnhmê ro'ã katon mõi. Mõi:n kam arÿm pakretibê Kedô'ÿr bôx ne 'ã rê. Ne kam mõi pidjôkô'ÿr bôx ne arÿm 'ÿr wadjàn kam nhÿ.

<sup>2</sup> Nhym onĩ Djuda dja. Kute Jeju kurê djwÿnhmã kangaja dja. Djuda ne arÿm kute ar ÿr djã pumũnh. Amrêbê ne Jenumê kôt ba djwÿnh ar pidjôkô'ÿr mrãnhoku'ê nhym kam Djuda arÿm kute ar ÿr djã pumũnh. <sup>3</sup> Kam ne arÿm me rũnh'ÿr bôx ne memã arê. Nhym me arÿm aminhõ krãkamngônmmê aminhõ àpênmmã kum,

—Me Djudakôt mõi Jeju pa 'amÿn amrê o mõi o bôx. Nãm ã me kadjy Metĩndjwÿnh mar djwÿnh nhõ bënjadjwÿrmê mebê pardjêumê memã ane. Nhym Djuda arÿm kute omũnhkôt katât Jeju'ÿr meo mõi. Nãm me Jeju kadjy ngônhpôkmê kuwymê àbêr djãmêo mõi. Me 'ÿr o mõi:n arÿm pidjôkô'ÿr o bôx.

<sup>4</sup> Nhym Jeju ta kãjmã djan me'ÿr kato. Ta ne kute amikukãm mÿjja kunĩ markam amikukãm me krãkamngônmmã ma. Ta me'ÿr katon memã kum,

—Mÿj me'õ jabej ne ga me mõi? ane.

<sup>5</sup> Nhym kam me kum,

—Be, Nadjarekam Jeju jabej ne ba me mõi, ane.

Nhym Jeju memã kum, “E kum, ba”, ane. Be, Djuda ne krãkamngônmmê ro'ã dja.

<sup>6</sup> Nãm Jeju, “E kum, ba”, ane. Nhym me tu umaje ajkran akubyn ajkamên arÿm tÿm ne nõ.

<sup>7</sup> Nhym kam ajte me kukij ne memã kum,

—Mÿj me'õ jabej ne ga me mõi? ane.

Nhym me kum,

—Be, Nadjarekam Jeju jabej ne ba me mõi, ane.

<sup>8</sup> Nhym memã kum,

—E kum, arÿm ne ba me amã, “Ba”, ane. Kwãrĩk wãnh ga me bajbit ijabej gê ar ja mã tẽ, ane. Be, mÿkam ne Jeju ã krãkamngônmmã ane? <sup>9</sup> Bir, kute ajbir Bãmmã kabênkam ar'ã ujarênh kôt. Kute kum,

—Aje ikôt me kamênhja ne ba ije 'õo ibi-knor kêt, anhÿr kôtô. Kôt ne Jeju jakam ar nêje me krãkamngônmmã kabên ne arÿm o mebê ar utã.

<sup>10</sup> Nhym kam Ximão Pedru, Jejukôt ba djwÿnhja arÿm õ kãxdjwa kajgo. Ne kam arÿm kaban o akabên arÿm o bënjadjwÿr nhõ àpênh jamak ta. Me kadjy Metĩndjwÿnh mar djwÿnh nhõ bënjadjwÿr rax nhõ àpênhja jamak ta. Bënjadjwÿr rax nhõ àpênh nhidjibê ne Maku.

<sup>11</sup> Nãm bënjadjwÿr rax nhõ àpênh jamak ta nhym Jeju arÿm Pedrumã kum,

—Kwãrĩk wãnh. Akubyn àkam anhõ kãx jadjã. Djãm itokry kêtmmã ne ga inêje me tak ne? Ibãm kute itokry'ã imã karõ kôt dja ba itokry, ane.

12 Nhyam kam me arým Jeju pa 'amýn uwpre. Me krākamngônhmê me õ bēnjadjwýr ar pa 'amý. Mebê idjaer rúnh nhõ àpēnhdjwýr pa 'amý.

*Me kute bēnjadjwýr Ananh'ýr o bõx.*

13 Nãm me uwpre kam arým bēnjadjwýr rax Ananh kumrêx'ýr o mõi. Bēnjadjwýr rax Kajbaj ne Ananho umrengêt. Kajbaj ne amex tãm kam kubê me kadjy Metĩndjwýnh mar djwýnh nhõ bēnjadjwýr rax. 14 Amrêbê ne Jeju'ã memã kabēn jarēn memã kum,

—Me'õ pydji dja me babê idjaer kunĩ pãnh ty. Kam dja gu me arým badjumar mex, ane. Be, me krākamngônh bēnjadjwýr rax Ananh kumrêx'ýr Jejuo mõi. O mõi arým õ kikreti'ýr o wadjà.

*Pedru kute aminêje memã 'êx.*

*Mat 26.69; Mak 14.66; Ruk 22.55*

15 Nhyam Ximão Pedru kõt tē. Jejukõt ba djwýnh 'õdjwýmê ro'ã ne ar Jeju kõt tē. Kõt tē:n arým kre tã dja. Nhyam Pedru nhikjêja memã kum,

—Ba wadjà. Bēnjadjwýr kute ipumũnh tũmũ, ane. Ne kam arým Jeju kõt wadjà. Bēnjadjwýr nhõ kikreti nhipôkri ne kēnh ngrire. Kam ne wadjàn dja. 16 Nhyam Pedru bõm kre tã arek dja. Nhyam Pedru nhikjêja akubyn 'ýr akêx ne. Ne kam bēnjadjwýr nhõ àpēnh nire kre tã ku'ê djwýnhjamã Pedru jarē. Ne kam amikõt Pedruo wadjà.

17 Nhyam kam bēnjadjwýr nhõ àpēnh nija tēn Pedrumã kabēn ne kum,

—Djãm ga ne ga abê Jejukõt aba djwýnh 'õ? ane.

Nhyam kum, “Kati”, ane.

18 Nhyam wãnh me ànhũho kumex. Bēnjadjwýr nhõ àpēnhmê õ me krākamngônh ànhũho kumex. Me arek kryje pĩ prào amim kuton ànhũho kumex. Nhyam Pedru me'ýr tēn mekõt ànhũho dja.

*Bēnjadjwýr rax kute axwe'õ jabej kukjêr.*

*Mat 26.59; Mak 14.55; Ruk 22.66*

19 Nhyam kam me arým bēnjadjwýr rax'ýr Jejuo bõx. Me kadjy Metĩndjwýnh mar djwýnh nhõ bēnjadjwýr rax'ýr ne o bõx nhyam arým kabem dja. Nhyam kam arým kukij ne kum,

—Imã akõt me ba djwýnh'ã ajarē. Mýj akukràdjà ne ga memã arēho aba? ane.

20 Nhyam kum,

—Djãm me kãxã ne ba memã ikukràdjà jarē? Kati. Arým ne ba me kunĩmã ikukràdjà jarēho amirĩt ne. Ne apýnh me bikprõnh djãmê Metĩndjwýnh nhõ kikretikam arê. Kikretikam ne mebê idjaer kunĩ bikprõnh djã. Ba arým kunĩkõt memã ikukràdjà jarēho amirĩt ne. 21 Mýj kadjy ne ga ba ikukij? Me wã dja ga me kukja nhyam me arým kute ikabēn mar kõt arým amã arê, ane.

22 Jeju bēnjadjwýrmã ane nhyam krākamngônh'õ, kuri ãnja ikra poo Jeju kurwan kum,

—Djãm me ã bēnjadjwýr raxmã kabēn kute anhýr? Me kadjy Metĩndjwýnh mar djwýnh nhõ bēnjadjwýr raxmã ne ga akabēn ne, ane.

23 Nhyam Jeju kum,

—Ikabēn punu kêt ne ga ikurwa. Ne ba ren ikabēn punu ga ren aje mýj ikabēn punu'õ markõt ren memã ijarēho amirĩt ne kõt ren arým ikurwa. Nhyam be, kati. Ikabēn katãt ne ba arê ga ikurwa, ane. 24 Nãm ane nhyam Ananh amũ Metĩndjwýnh mar djwýnh nhõ bēnjadjwýr raxbê Kajbajja'ýr Jeju jano. Uwpre rã'ã ne ano. Nhyam me arým Kajbaj'ýr o mõi o bõx.

*Pedru ajte aminêje 'êx ne ajte aminêje 'êx.*

*Mat 26.71; Mak 14.69; Ruk 22.58*

25 Nhyam Ximão Pedru wãnh me krākamngônh kõt ànhũho dja. Ànhũho dja: nhyam me arým kukij ne kum,

—Djãm gadjwý abê Jeju kõt ba djwýnh'õ? ane.

Nhyam memã kum, “Kati”, ane.

26 Nhyam kam bēnjadjwýr nhõ àpēnh'õ ajte kum kabēn ne kum,

—E kum, amũ pidjôkôkam Jejukõt me'õja anokre o nokre ba arým omũ. Djãm ga? ane. Pedru kute me'õbê õbikwa jamak 'yrja ã Pedrumã ane. Nãm, “Djãm ga”? ane.

27 Nhyam Pedru ajte kum, “Kati”, ane. Nãm kum anhýr totokbê nhyam õkrēn'ãnh arým kã.

*Me kute Piratu'ýr o bõx.*

*Mat 27.1; Mak 15.1; Ruk 23.1*

28 Nãm õkrēn'ãnh kã nhyam me arým Kajbaj kurũm Jejuo mõi. O mõi:n kam kikreti 'õdjwýr'ýr o bõx. Piratu nhõ kikreti'ýr o

bôx. Me bajtemkam bēnjadjwÿr nhidjibê Piratu. Kikreti jakam ne Piratu kute memã axwe pãnh jarēnh djà. Nãm me Piratu nhõ kikreti'ÿr Jejuo bôx ne amijã maje bõm arek kumex. Nãm me abenmã kum,

—Kwãrik wãnh gu me Piratu nhõ kikretimã badjãr kêt. Dja gu me me bajtem nhõ kikremã wadjàn arÿm bapunuren te baje mry krēnmã. Me kute Metĩndjwÿnhmã mrykĩ'ãtomti bĩnja te baje krēnmã, ane. Me kute aben bê me bajtem nhõ kikre py-makam ne me ã abenmã anen bõm arek kumex. <sup>29</sup> Me bõm kumex nhym kam bēnjadjwÿr Piratu arÿm me'ÿr katon dja. Ne kam Jeju'ã memã kum,

—Be, mÿj ne me'õja axwe kute? Mÿj ne o ajkê? ane.

<sup>30</sup> Nhym me kum,

—Je, ne ren axwe kêt ba me ren amã arēnh kêtumrēx. Nhym be, kati. Mrãmri axwekumrēx, ane.

<sup>31</sup> Nhym Piratu memã kum,

—Me ga dja ga me amũ o mõn me akukràdjã kôt mÿj axwe'õmã akaton kam arÿm pãnh ajmã on, ane.

Nhym mebê idjaer rũnh kum,

—Be, kati. Me akukràdjã kôt me ije me axwe pãnh me'õ par kêt. Ga ne ga aje me axwe pãnh me par djwÿnh, ane. <sup>32</sup> Be, amrēbê Jeju kute amikukãm memã, “Dja me pĩte'y'ã inhô ba kÿjrũm wajêt”, anhÿr kôt ne me arÿm jakam ã Jeju'ã Piratumã àpnēnh ane. Kute pĩte'y'ã nhôr ne bĩn'ã ne me kum apnê.

<sup>33</sup> Nhym kam Piratu arÿm õ kikretimã wadjã. Ne kam amiwÿr Jeju 'uw nhym 'ÿr bôx. Nhym arÿm kukij ne kum,

—Djãm abê mebê idjaer nhõ bēnjadjwÿr rax? ane.

<sup>34</sup> Nhym kum,

—Djãm ga ne ga ima? Nãr kon. Djãm me'õ ne amã ijarê ga ikukij? ane.

<sup>35</sup> Nhym ajte kukij ne kum,

—Djãm ibê me abê idjaer'õ got? Anhõ me wÿnhmẽ me kadjy Metĩndjwÿnh mar djwÿnh nhõ bēnjadjwÿrmẽ ne me imã akanga, ane.

<sup>36</sup> Nhym kum,

—Be, djãm ibēnjadjwÿr rax kute pykakam me bēnjadjwÿr rax pyrãk? Kati. Ne ba ren amijo ane nhym ren inhõ àpēnh arÿm inēje

me'ÿr prõt ne. Kam ren mebê idjaerkam me rũnhbê aptã. Nhym be, kati. Ibēnjadjwÿr rax kute pykakam me bēnjadjwÿr rax pyrãk kêt, ane.

<sup>37</sup> Æ kute kum anhÿrkam Piratu kum,

—Djãm kam mrãmri abê bēnjadjwÿr rax'õ? ane.

Nhym kum,

—Ga ne ga arÿm imã ibēnjadjwÿr rax jarê. Be, mrãmri. Kadjy ne ba pykakam me'ÿr bôx ne inã kurũm ruw. Ije mrãmri katãt memã ikabēn jarēnh kadjy ne ba bôx. Nhym me kum ikabēn kĩnhja ne me ikabēn man kôt ar amijo ba.

<sup>38</sup> Nhym kum,

—Tõ nhÿnh ne me kabēn katãt'õ? ane. Nãm kum anen arÿm ajte mebê idjaer'ÿr katon Jeju'ã memã kum,

—Be, axwe kêtumrēx ba arÿm kuma.

<sup>39</sup> Ba we me abê idjaer nhõ bēnjadjwÿr rax-jamã inhiren ano gē ta arek ar me aro'ã ba. Me irôbê mrãnh nhõ akati jakam me akukràdjã kôt dja ba kum inhiren ano. Amex pÿnhkôt ne ba me pÿnh ne me'ã kurēn bõm me kurê. Metĩndjwÿnh me irôbê mrãnh nhõ akatikam me akukràdjã kôt ne ba bõm me kurê, ane.

<sup>40</sup> Nhym me ajte kãj bê kum kabēn ne kum,

—Kati. Kwãrik wãnh. Be, atemã Baraba dja ga kum anhiren ano, ane. Be, Baraba ne àkĩnhĩ, axwe, nēkrēxmẽ pi'òk kaprĩ prãmje kute me paro ba.

## 19

*Me kute pĩte'y'ã nhôr'ã Piratumã àpnēnh.*

*Mat 27.27; Mak 15.16*

<sup>1</sup> Nãm me Piratumã ane nhym kam arÿm krãkamngõnhmã Jeju jarê. Me kute kaprēprêk kadjy memã arê. Nhym me o tēn arÿm mrykã punuo kaprēprêk kumex ne. <sup>2</sup> Ne kam mrÿnhõ kajkep ne ikãnh ne o kute bēnjadjwÿr rax krãdjê pyrãk ne kum kutu. Ne kam inôkã ryti kamrêk kute me bēnjadjwÿr rax kã pyrãk kum adjã. <sup>3</sup> Ne kam arĩk kum kabēno kute me me rũnhmã kabēn pyrãk ne kum,

—Be, ga we abê mebê idjaer nhõ bēnjadjwÿr rax. Goja kribēm atĩn 'iry, ane. Ne ikrao titik ne. Nãm me ã 'ã bēno bikēno ane.

4 Nhyam kam Piratu ajte me'yr katon memã kum,

—Be, ije kam axwe'õ mar kêt. Axwe kêt. Kam ba ije ajte me amã o ikatormã. Dja ba o ikato ga me kam arým ama. Axwe kêtja ma, ane. 5 Nhyam Jeju arým kato. Mrýnhõ krãdjẽmẽ inõkà ryti kamrêk rã'ã ne 'ã kato. Nhyam Piratu memã kum,

—Ota, tãm ne ja, ane.

6 Nhyam me kadjy Metĩndjwýnh mar djwýnh nhõ bẽnjadjwýrmẽ mebê idjaerkam me krãkamngõnhmẽ omũn arým kãj bê Piratumã kum,

—Pĩte'y'ã anhõ, ane.

Nhyam memã kum,

—Kati. Djã ne ba kam axwe'õmã ikato got ba pĩte'y'ã kunhõ? Kati. Me ga dja ga me o tẽn pĩte'y'ã anhõ, ane.

7 Nhyam mebê idjaer rũnh kum,

—Be, axwekumrẽx. Kute amijo 'êx ne memã kum, “Ibê Metĩndjwýnh Kra”, anhýro bakam axwekumrẽx. Nãm Metĩndjwýnhbê raxo amiptãro ba. Me ikukrãdjã kõt me axwe ja pãnh ne me kute me par, ane.

8 Nãm Piratu me kabẽn ja man arým tĩn prã:m. 9 Ne kam akubyn õ kikretimã wadjã Jeju kukij ne kum,

—Nhýnh ne akator djã kraxja? ane.

Nhyam Jeju tu anhikrê.

10 Nhyam kum,

—Je tõ, djãm ikajgo ne ga imã amijarẽnh kêt? Djãm aje imar kêt? Be, ba ikabẽnkõt nhyam me kute pĩte'y'ã anhõr jabej nãr ba ikabẽnkõt nhyam me amã irer jabej. Djãm aje imar kêt? ane.

11 Nhyam Jeju kum,

—Be, Metĩndjwýnh amybým ren kute ajã bẽnjadjwýr mẽnẽh kêt ga ren akajgon ren akabẽn kêt mex ne. Kam me'õ kute amã ikanga djwýnh axweo ajakrenh mex ne, ane.

12 Nãm kum ane nhyam Piratu arým kam kum irer jabej. Ne ajte me'yr katon te memã kabẽn nhyam mebê idjaer kum,

—E kum be, Jeju ne arĩk Xedjabê bẽnjadjwýr raxo amiptã. Djãm Xedja akam ngryk kêt mã ne ga aje Jejumã anhirermã? ane. Xedjabê ne me bẽnjadjwýr rũnh kunĩ nhõ bẽnjadjwýr.

13 Nãm me ã Piratumã ane nhyam arým amijã kuman kam ajte memã Jejuo kato.

Ne kam arým me axwe pãnh jarẽnh djãkam nhý. Me krĩ djã jamã ne me Kẽnpoti jarẽ. Mebê idjaer kabẽnkam ne me me krĩ djã jamã Gabata jarẽ. 14 Arým me irõbê mrãnh nhõ akati nẽje akatikam ne me Jejuo kato. Me kute amim mýjja kupẽnho kumex djã nhõ akatikam. Kýjrũm myt nhýrkam. Nãm me axwe pãnh jarẽnh djãkam nhýn kam mebê idjaermã kum,

—Be, ota me anhõ bẽnjadjwýr rax, ane.

15 Nhyam me kãj bê kum,

—Rũm o tẽn. Rũm o tẽn pĩte'y'ã anhõ, ane.

Nhyam memã kum,

—Djãm me anhõ bẽnjadjwýr rax ije pĩte'y'ã nhõrmã? ane.

Nhyam me kadjy Metĩndjwýnh mar djwýnh nhõ bẽnjadjwýr ar kum,

—Djãm me inhõ bẽnjadjwýr rax ne wã? Arkati. Atemã. Me inhõ bẽnjadjwýr raxbê ne Xedja. Pydji. Ajte 'õdjwý kêt kumrẽx, ane.

16 Nhyam kam me kute pĩte'y'ã nhõrmã arým kadjy õ me jamã arẽ.

*Me kute pĩte'y'ã nhõr.*

*Mat 27.32; Mak 15.21; Ruk 23.26*

Nhyam kam me Jeju pa 'amýn mã o mõ.

17 Ne kam me kum ikrei'ã pĩte'y dji nhyam arým ta amikadjy kumýn o mõ, krãnhre'ýr o mõ. Krãnhrebê me krã'i'ýr ne o mõ. Mebê idjaer kabẽnkam ne me me krã'imã Gogota jarẽ. 18 Nãm me o mõn arým kam o bõx ne arým pĩte'y'ã Jejumã o iten kãjmã kudja nhyam wajêt. Nhyam kam me pĩte'y'ã ar ja amãnhkrutmo ite nhyam ar aktã Jeju nhijẽn wajêt.

19 Nhyam Piratu mýj Jeju axweja'ã pi'õk no'õk ne. Nãm pi'õkkam memã kum,

—Mebê idjaer nhõ bẽnjadjwýr rax ne ja. Krĩraxbê Nadjarekam Jeju. Nãm ã pi'õkkam no'õko ane. Nhyam me kunĩ kute omũnh kadjy me Jeju nhimõkri kunhõ.

20 Nhyam kam mebê idjaer krãptĩ pi'õk pumũn arẽ. Krĩrax kuri ne me kute pĩte'y'ã Jeju nhõr djã. Nhyam kam me krãptĩ 'ýr ban bõx ne pi'õk jarẽ. Apýnh me kabẽnkam ne no'õk. Mebê idjaer kabẽnkam no'õk ne mebê kregu kabẽnkam no'õk ne me kabẽnbe Raxinakam no'õk. 21 Nhyam kam mebê idjaer kadjy Metĩndjwýnh mar djwýnh nhõ bẽnjadjwýr Piratumã kum,



—Kwārīk wānh pi'ôkkam memã kum, “Mebê idjaer nhõ Bēnjadjwyr rax”, anhÿr kêt. Ate gédja ga pi'ôkkam memã kum, “Nãm amijo 'êx ne memã kum, 'Ibê mebê idjaer nhõ bēnjadjwyr rax', anhÿro ba.” Dja ga ã pi'ôk no'ôkkam memã anen 'ã anhô gê me omũ, ane.

<sup>22</sup> Nhyim Piratu arkum,

—Kati. Arÿm ne ba mrãmri 'ã pi'ôk no'ôk ne. Kwārīk wānh rã'ã, ane.

<sup>23</sup> Nãm me krākamngônh ar pïte'ykam Jeju nhõ. Ne kam ar kute abenmã õ kubêkã ngrānhmã. Nhyim ar 'õ amijo õ kubêkã ja pytà. Nhyim ar 'õ amijo ja pytà. Nhyim ar 'õ amijo ja pytà. Nhyim ar 'õ amijo ja pytà. Ne kam ar inôkãti ja'ÿr bõx. Ne ar kunĩ kum kīnh. Nhyim inôkãti pydji. <sup>24</sup> Nhyim ar abenmã kum,

—Kwārīk wānh gwaj abenmã kokjêr kêt. Gwaj pykakam kēn kryre rēn kôt kuman bajõ amim inôkãti by, ane.

Amrêbê: ne me bakukãmãre ja jarê. Me Metĩndjwÿnh Kra kabēn jarēn memã kum, “Dja me abenmã ikã ngrān ikã ja'ã kēn kryre rēn kôt 'õ amim kuby.”

Nãm me bakukãmãre ã memã anen arÿm 'ã pi'ôk no'ôk ne. Nhyim me aben djõ'ã arēnho mõ:. Arēnho mör tãmtã arÿm 'ÿr o bõx. Tũ:mrãm me bakamingrãnyrekam ne arÿm 'ÿr o bõx nhyim me arÿm ã Jeju nhõ kubêkão anhÿrkumrêx.

<sup>25</sup> Nhyim nã kanikwÿnh, nãmē ar axikôt apôxjadwÿ dja. Nhyim Marij 'õdjwÿ, mjēn nhidjibê Krõpa adjwÿnhdjwÿ dja. Nhyim Marij Madarenadjwÿ dja. <sup>26</sup> Nhyim Jeju arÿm nã, kurũm katorja pumũ. Nhyim kôt ba djwÿnh, kum abêja nã kuri dja nhyim omũ. Nhyim arÿm kôt ba djwÿnh ja'ã nãmã kum,

—Ë, me'õ nire. Be, tãmwãbê ne arÿm akra, ane. <sup>27</sup> Ne kam kôt ba djwÿnhmã kum,

—Ë, tãmwãbê ne arÿm anã, ane. Nhyim kam arÿm õ kikremã o mōn arÿm o djuw mex ar o ba.

*Tyk'ã ujarēnh.*

*Mat 27.45; Mak 15.33; Ruk 23.44*

<sup>28</sup> Nhyim kam arÿm kute inomã ãpēnh djã mēnhkam memã kum, “Arÿm imã kôr”, ane. Amrêbê: ne me bakukãmãre Jeju kabēn ja jarēn memã kum,

“Arÿm imã kôr.”

Nãm me ã anen arÿm 'ã pi'ôk no'ôk ne. Nhyim me aben djõ'ã arēnho mõ:. Arēnho mör tãmtã arÿm 'ÿr o bõx. Tũ:mrãm me bakamingrãnyrekam ne Jeju arÿm kum kôr-kumrêx ne arÿm memã kum, “Arÿm imã kôr”, ane. <sup>29</sup> Nhyim wānh pidjõ kangô kadjã ngônh'ôkam ipun dja. Nhyim me ngônh puror pōnh djã jakritaja kangômã adjã nhyim kam ipu. Nhyim me pibê ixõpu idjamã adjã kam kãmã kum kungãn ajk-wamã adjã. <sup>30</sup> Nhyim arÿm kaõn pidjõ kangô kadjão ikõ. Ne kam memã kum,

—Arÿm ne ba idjãpēnho tēn inomã kumē, ane. Ne kam ta aparmã krãn tu amitĩnmã iren ta arÿm ty.

<sup>31</sup> Be, pi'ôk rãrãr nêje arÿm akamãt 'ÿr nhyim mebê idjaer arÿm êje õ mÿjja kupēnho kumex. Nhyim kam mekam me kwÿ Piratu'ÿr mōn kum,

—Ë, dja me pïte'y'ã ar arija 'i kukê gê ar on ty. Dja ar on ty nhyim me on ar adjã. Ne kam pi'ôk rãrãro bikēnh kêt, ane. <sup>32</sup> Nhyim arÿm 'ÿr me krākamngônh jano nhyim me 'ÿr mōn 'ÿr bõx. 'ÿr bõx ne kumrêx ja te'i kukê ne ajte ja te'i kukê.

<sup>33</sup> Nhyim ar ipôkri Jeju wajêt nhyim me 'ÿr bõx. Nhyim amrêbê tyn wajêt nhyim me arÿm omũ. Ne kam kute te'i kukēnh kêt. <sup>34</sup> Nhyim arÿm krākamngônh'õ õ kãxo nãnh jarĩn arÿm o pēnãt'ãnh kanhuw. Kanhuw nhyim kamrômē ngômē akàn arÿm prõt ne.

<sup>35</sup> Ba ne ba omũn me amã kôt 'ã ajarê. Mrãmri katãt me amã 'ã idjujarēnhkumrêx. Mrãmri ije omũnhkumrêx ne kôt me amã 'ã ajarê. Me aje tu amim markumrêxmã ne ba me amã arê. <sup>36</sup> Amrêbê: ne me bakukãmãre tãmja jarēn memã kum,

“Be, 'i'õ dja me kwÿnh kêt-kumrêx”, ane.

<sup>37</sup> Ne kam ajte arēn memã kum,

“Dja me kanhuw ne arÿm omũnho dja”, ane.

Metĩndjwÿnh kukwakam ne me memã anen arÿm 'ã pi'ôk no'ôk ne. Nhyim me aben djõ'ã arēnho mõ:. Arēnho mör tãmtã arÿm 'ÿr o bõx. Tũ:mrãm me bakamingrãnyrekam ne 'ÿr o bõx. Nãm me te'i kukēnh kêt ne arÿm kanhuw. Me bakukãmãre kute 'ã pi'ôk no'ôk kôtõ.

*Me kute adjà.*

*Mat 27.57; Mak 15.42; Ruk 23.50*

<sup>38-39</sup> Nhyim kam Jòdje Armatê, kubê ne Jeju kôt ba djwýnh'ô. Mebê idjaer rûnh pymaje kute memã amijarênh kêt ne. Kubê Jejukôt ba djwýnh'ã kute memã amijarênh kêt ne. Ne kam arým Piratu'ýr tèn kum,

—Ba Jeju kaban o rwýn o tèn adjà, ane. Nhyim Piratu kum, “Ajrã”, ane. Nhyim kam arým amũ tẽ. Amũ Nikodemu'ýr tèn 'ýr bôx. Nikodemu ne amrêbê akamãtkam Jeju'ýr bôx nhyim ar abenmã kabêno nhỹ. Nikodemu ja'ýr ne Jòdje bôx nhyim ar ro'ã Jeju'ýr tẽ. 'Ýr tẽm kêtri ne Nikodemu arým Jeju kadjy kudjy djào atomkumrêx. Utĩ'ã akrekam utĩ: kute 50 kiru pyrãk. Miramê arômê ne abenkam o akà. Nãm kudjy djà tun arým Jòdjemê ro'ã Jeju'ýr o tèn 'ýr o bôx.

<sup>40</sup> Ne kam arým pĩte'y kurũm Jeju kaban o ruwn arým kudji. Ne kam rinhuo kubêkào prĩne o kupu. Ar kupu djãkôt me kudjy djà jadjuw ne o kupu. Mebê idjaer kukràdjã kôt ne me ã me tyko ane. <sup>41</sup> Nhyim wãnh me kute pĩte'y'ã nhôr djà kuri pidjôkô'ô. Ne kam kênkre'ô. Kênkre ny. Kraxje me kute kam me'ô jadjãr kêt rã'ã. <sup>42</sup> Nãm ar Jeju kupun kumýn o tẽ. O tèn arým kênkrekam adjà. Arým pi'ók rãrãr bôx 'ýr nhyim kam ar amibêx ne me kute nhôr djà kuri kênkrekam adjà. Kênkrekam adjà nhyim ar'ã akamãt ne. Nhyim kam ajte akati. Nhyim kam ajte akamãt ne.

## 20

*Akubyn tĩn ne kator.*

*Mat 28.1; Mak 16.1; Ruk 24.1*

<sup>1</sup> Nhyim ajte akati 'ýr, pi'ók kamrêk 'ýr nhyim Marij Madarena arým kênkre'ýr tèn 'ýr bôx. 'Ýr bôx nhyim me kute kênpo kênkre'ã ijêja arým amijã kutan kre jakàja'ã dja nhyim Marij arým omũ. <sup>2</sup> Ne kam akubyn prôt ne arým Ximão Pedru'ýr bôx ne kôt ba djwýnh'ô jadjwý 'ýr bôx. Jeju kum abêja 'ýr bôx ne arkum,

—Arým ne me kênkre kurũm Bẽnjadjwýr djwýnh'o kato. Nãm me nhỹnh o mõn kudji, ane.

<sup>3-4</sup> Nãm kum ane nhyim kam Pedrumê kôt ba djwýnh 'ôdjwý ar arým tu kênkre'ýr prôt ne. Nhyim kam kôt ba djwýnh 'ôja arým

Pedru ren kumrêx kênkre'ýr bôx. <sup>5</sup> 'Ýr bôx ne kênkre'ã ibôn te kre kamũnh'o dja. Nhyim rinhuo kubêkãbit nõ nhyim omũ. Ne kam kênkremã ãr kêt.

<sup>6</sup> Nhyim kam Pedru arým kôt bôx ne tu kênkremã 'ýr wadjã. Ne kam rinhuo kubêkã pumũn krã kupu djãja pumũ. <sup>7</sup> Nhyim krã kupu djãja rinhuo kubêkãmê ro'ã nõr kêt. Jeju ne prĩne krã kupu djã krã mex ne kudji nhyim ate nõ.

<sup>8-9</sup> Nhyim kam kôt ba djwýnh kumrêx bôxja kênkremã wadjã arým omũ. Omũn arým amim,

—E kum, mrãmri ne akubyn tĩn ne, ane. Ne tu amim Jeju markumrêx. Bir, ar kute omũnh kêtri ne ar amim,

—Mrãmri ne arým tyn akubyn tĩn kêt, anhỹro ba. Ne ren mrãmri Metĩndjwýnh kabên'ã pi'ók no'ók markumrêx ne ren amim,

—Be, mrãmri dja akubyn tĩn, anhỹro ba. Nhyim be, kati. Ar kute pi'ók mar kêt. Kam ne ar kute kupu djã nõrkôt omũnh kêtri amim, “Akubyn tĩn kêt”, anhỹro ba. Ne kam kênkremã 'ýr wadjã arým omũn amim,

—E kum, mrãmri ne akubyn tĩn ne, ane. Ne tu amim Jeju markumrêx.

*Kute Marijmã amijo amirĩt.*

*Mat 28.9; Mak 16.9*

<sup>10</sup> Nãm ar kênkre kamũn kam akubyn ar ô kikremã tẽ. <sup>11-12</sup> Nhyim Marij ar pãnh kênkre'ýr bôx ne bõm arek mýro dja. Nãm mýro djan arým kênkre'ã ibô. Nhyim kênkre kadjwýnhbê Metĩndjwýnh kadjy mrãnh djwýnh amãnhkrut nhỹ. Ar ô kubêkã jaka. Jeju nõr djã'ã ar nhỹ. Nhyim ja krã nõr djã'ã nhỹ nhyim ja te nõr djã'ã nhỹ. Nhyim Marij kênkre'ã ibôn arým ar omũ.

<sup>13</sup> Nhyim ar kum,

—Me'ô nire, mýkam ne ga amýro dja? ane.

Nhyim arkum,

—Inhõ Bẽnjadjwýr djwýnh ne me'ô kênkre kurũm o katon o mõn nhỹnh kudji. Ije ir djãkôt omũnh kêt kam ne ba imýro dja, ane.

<sup>14</sup> Nãm arkum anen arým mũm akêx. Mũm akêx ne arým Jeju pumũ. Djã ne tu omũ? Kati. Kute omũnh kêt.

<sup>15</sup> Nhyim kum,

—Mýkam ne ga amýro dja? Mýj me'ô ne ga abej? ane.

Nhym Jejuo kute pidjôkô pumũnh djwýnh pyræk ne kum,

—Ô kum, ga aje nhýnh o amõr ne ir jabej imã akre. Dja ba 'ýr tẽn arým amrẽ o tẽ, ane.

<sup>16</sup> Nhym kum, “Marij”, ane.

Nhym kam 'ýr akẽx ne kum, “Rabi”, ane. Be, me bakabẽnkam ne gu me ren kum, “Ujarẽnh djwýnh”, ane. Nãm kum, “Rabi”, anen arým o tým.

<sup>17</sup> Nhym kum,

—Kwãrĩk wãnh ijo atým kêt. Imã anhire. Kraxje Ibãm'ýr idjãbir kêt ne ga ijo tým. Tẽn ikamyre arkum ikabẽn jarẽn arkum, “Jeju ne ar amã, 'Arým Ibãm'ýr idjãbirmã. Ibãmbê ne ar Abãm. Arým Itĩndjwýnh'ýr idjãbir ne itẽmmã. Itĩndjwýnhbê ne ar Atĩndjwýnh', ane. Dja ga tẽn ã ikamy arkum ane.” Nãm ã Jeju Marij Madarenamã ane.

<sup>18</sup> Nhym arým kôt ba djwýnh'ýr tẽn ar'ýr bõx. Ne arkum,

—Arým ne ba Bẽnjadjwýr djwýnh pumũ, ane. Ne kam Jeju ajbir kute kum kabẽn jarẽnhja kôt arým arkum arẽ.

*Kôt ba djwýnhmã kute amijo amirĩt.*

*Mat 28.16; Mak 16.14; Ruk 24.36*

<sup>19</sup> Nhym kam arým pi'ók kamrẽkkam akamãt. Nhym kam kôt ba djwýnh ar arým prĩne amijã ijên nhỹ. Mebê idjaer rũnh pymaje ne ar ar bikprõnh djækam amijã ijên nhỹ. Nhym kam Jeju bõx ne tu ar aêrbê ar'ýr wadjàn ar ipõkri dja. Djan arým arkum, “On ar adjumar mex”, ane. <sup>20</sup> Nãm arkum anen arým arkum ikrakam kàxiràx djwa kre jakren ajte pẽnàt'ãnh kàxdjwa kre jakre. Nhym ar kute mrãmri ar õ Bẽnjadjwýr djwýnh pumũnhkumrẽxkam kĩnhkumrẽx ne.

<sup>21</sup> Nhym kam ajte arkum,

—On ar adjumar mex. Amrêbê ne Ibãm me'ã imã karõ. Pykakam me kum kĩnh kêtja'ýr itẽm'ã ne imã karõ ba amrẽ tẽ. Dja badjwý Ibãm kudjwa jakam me'ã ar amã karõ. Ar aje ikudjwa me'ýr atẽmmã ne ba ar amã me'ã karõ, ane. <sup>22</sup> Nãm arkum anen arým ar akõn arkum,

—Gê on Metĩndjwýnh Karõ ar ajo ba. <sup>23</sup> Dja ar ajo ba gar kôt me kwý axwe maro akno. Nhym kam Metĩndjwýnh ar akôt me axwe maro akno. Nàr gar me kwý axwe maro abiknor kêt nhym kam Metĩndjwýnh

me axwe maro biknor kêt. Nãm Jeju ã arkum anen arým mã tẽ.

*Tõmemã kute amijo amirĩt.*

<sup>24</sup> Nhym Tôme Djidjimu. Jejukôt ba djwýnhbê 12'õ. Tôme ne kute ar bikprõnh djækam arkôt 'ýr kêt ne kute Jeju pumũnh kêt. Jeju mã tẽ nhym kam ar Tômemã kum, <sup>25</sup> —Arým ne bar Bẽnjadjwýr djwýnh pumũ, ane.

Nhym arkum,

—Tô nhýnh? Ne ba ren ikrakam kàxiràx djwa kre pumũn ren kôt inhikra'i jadjàn ren pẽnàt'ãnh krekôt inhikra jadjã. Be, kambit ne ba ren tu amim markumrẽx ne amim, “Mrãmri ne akubyn tĩnkumrẽx”, ane. Nhym be, kati. Akubyn tĩn kêt. Nãm ã Tôme arkum ane. <sup>26</sup> Nhym kam arým ar'ã akatibê 8 apêx nhym kôt ba djwýnh ar ajte bikprõnh djækam nhỹ. Nhym Tômedjwý arým ar ikõ'ã nhỹ. Nhym ar ajte prĩne mebê kikre'ã ijê. Ar nhỹ nhym kam Jeju ajte tu wadjàn arým ar ipõkri djan arkum, “On ar adjumar mex”, ane. <sup>27</sup> Ne arým Tômemã kum,

—Ajrã. Amrẽ anhikra 'io goja inhikra kupên omũ. Ne amrẽ ipẽnãtkam krekôt goja anhikra jadjã. Kwãrĩk wãnh ijã amim, “Kati. Nãm 'êx”, anhýr kêt. On tu amim imarkumrẽx, ane.

<sup>28</sup> Nhym Tôme kum,

—Inhõ Bẽnjadjwýr djwýnh, Itĩndjwýnh, ane.

<sup>29</sup> Nhym kum,

—Tõme, ga aje ipumũnhkôt ne ga arým tu amim imarkumrẽx. Nhym be, me kute ipumũnh kêt djwý. Djãm me kute ipumũnh kêt ne tu amim imarkumrẽxkam kaprĩmã? Kati. Dja me te ipumũnh kêt ne tu amim imarkumrẽx ne arým kĩnhkumrẽx. Ne kĩho katãt ajakre. Nãm ã Jeju kum ane.

<sup>30</sup> Be, kôt ba djwýnh kute omũnh ne kute raxmã kator kadjy ne Jeju kute mýjja pumũnh kêt krãptĩ nhípêx. Ne me punu krãptĩo mex. Ije ar amã mýjja kwý'ã idjujarẽnh ne ije 'ã pi'ók no'ók ne ja. Djãm kunĩ'ã ne ba pi'ók no'ók? Kati. Pi'ók jakam ne ba kwýbit'ã pi'ók no'ók ne. <sup>31</sup> Be, mýj kadjy ne ba ar amã pi'ók no'ók ne? Bir, dja gar pi'ók jarẽn aman arým tu amim Jeju markumrẽx ne amim,

—Mrãmri ne Jejubê gwaj banhõ Bẽnjadjwýrbê kumkatikumrêx. Mrãmri kubê Kritukumrêx. Mrãmri kubê Metĩndjwýnh Krakumrêx, ane. Ja dja gar pi'òkkam arên aman tu amim markumrêx. Tu amim markumrêx ne arým Jejukôt atĩn ne ar aba rã'ã: rã'ã ne. Ja kadjy ne ba ar amã 'ã pi'òk no'òk ne. Tãm ne ja.

## 21

*Kôt ba djwýnh kute kabênkôt tep kumex pynênh.*

<sup>1</sup> Nãm Jeju ã kôt ba djwýnhmã amijo amirĩto ane. Tyk ne akubyn tĩnkam ã arkum amijo amirĩto ane. Ne kam ajte kute imôtibê Xiberij'ãnh kute arkum amijo amirĩt kadjy. <sup>2</sup> Nhyh kôt ba djwýnh kwý imô nokà'ã ar ba. Ximão Pedrumê Tôme Djidjimumê Natanajeumê Djebedêu kute ar adjwýrmê kôt ba djwýnh amãnhkrut 'òdjwý ar ba. Natanajeu ne pykabê Garrêjakam krĩbê Kanakam abatãnh djã. <sup>3</sup> Ar ngô nokà'ã ar ba: nhyh Ximão Pedru arkum,

—Ba on tep kwý pynê, ane.

Nhyh ar kum,

—Bar akôt tẽ, ane. Ne kam tẽn kàkam nhýn kam nox ne. Ne kam ar kryreti rênho ba. Ne ar rênho ba: nhyh ar'ã akamãt. Nhyh ar ar o ba: nhyh arým ar'ã akati tẽ nhyh tep kêt mex ne.

<sup>4</sup> Ar'ã akati tẽ nhyh Jeju arým bôx ne akàx'ã dja. Nhyh ar kute nokre pumũnh kêt ne.

<sup>5</sup> Jeju akàx'ã dja:n kam amũ arkum kabên ne arkum,

—Akmerer ar, djã ne gar tep'õ pynê? ane.

Nhyh ar kum, “Kati”, ane.

<sup>6</sup> Nhyh arkum,

—Ar kà djubôk'ãnh ajte kryreti mên arým kwý pynê, ane. Nhyh kam ar arým kà djubôk'ãnh kryreti mẽ. Nhyh arým tep kume:x ne. Nãm ar arým tep kumex pynê ne arým te: kute o àbirmã nhyh utĩ: ne.

<sup>7</sup> Nhyh kôt ba djwýnhja, Jeju kum abêja, Pedrumã kum,

—E kum be, Bẽnjadjwýr djwýnh ne dja, ane. Nhyh Pedru kuman amikajgo pumũn arým õ inôkãti jadjàn kam tu Jeju'ýr nox ne 'ýr bôx. <sup>8</sup> Nhyh kôt ba djwýnh 'òdjwý ar kã ngrire 'òkam arým akàx'ýr mõi. Akàx'ýr tep

kamênho mõi. Amybým ne akàx nhyh ar ar tepo ba. Akàx'ýr 'ã akrebê 90 metu. <sup>9</sup> Nãm ar tep kamênho mõi:n arým akàx'ýr o bôx. 'Ýr o bôx ne arým o wabi. Nhyh arým kute tep prã'ã bôr ikwã nhyh ar omũ. Nhyh djwýdjwý kuri ikwã nhyh ar omũ.

<sup>10</sup> Nhyh kam Jeju arkum,

—Amrê ar aje tep pynênh kwýo tẽ, ane.

<sup>11</sup> Nhyh Pedru arým 'ýr tẽ. Kryretikam tep rũnh krãptĩ. 'Ýr ne tẽ nhyh kryretikam tep rã'ã nhyh bjêro mõi:n akàx'ã arým kumê. Nhyh tep'ã akrekam kubê 153. Nãm te tep rũnh krãptĩn kute kryreti rênho kêt ne. <sup>12</sup> Nhyh kam Jeju arkum,

—Amrê ar mõi anho kwý krê, ane.

Nhyh ar 'ýr mõi arek dja. Ar arým kute amim õ Bẽnjadjwýr djwýnhkôt kute markam ar 'õ kute kum, “Bẽnjadjwýr djwýnh, djãm ga”? anhýr prãm kêtikumrêx. Nãm ar arek umaje dja. <sup>13</sup> Nhyh kam Jeju arým ar'ýr tẽn arkum djwýmê tep ngã. Nãm ã Jeju arkum amijo amirĩto ane. <sup>14</sup> Be, Jeju akubyn tĩn nhijukri ne amũja'ã arkum amijo amirĩt. Ne ajte arkum amijo amirĩt. Ne akati jakam ajte kute arkum amijo amirĩt ne ja.

*Kute Pedrumã akubyn kum àpênh kadjy kabênjarênh.*

<sup>15</sup> Jeju arkum kungã nhyh ar arým o nhý, õ kwý krêno nhý. Ne kam õ kwý krên pa nhyh Jeju arým Ximão Pedru kukij. Djõnaj kute Ximão djirja. Nãm kukij ne kum,

—Ë Ximão. Djãm amã ijabê? Djãm amã ijabêo aje ar ja kunĩ jakrenh? ane.

Nhyh kum,

—Nã Bẽnjadjwýr djwýnh, imã ajabê. Ga arým ama, ane.

Nhyh kum,

—Inhõ me ne me kute mrykĩ'ãtomti krare pyrãk. Dja ga memã ikabên jarênho aba. Dja ga memã ikabên jarênho kute mrãmri ne mrykĩ'ãtomtio ba djwýnh kute õ krito djuw mexo ba pyrãk. ã memã ikabên jarênho ane, ane.

<sup>16</sup> Ne kam ajte kum,

—Ë Ximão, djãm amã ijabê? ane.

Nhyh kum,

—Nã Bẽnjadjwýr djwýnh, imã ajabê ga arým ama, ane.

Nhym kum,

—Inhõ me kute mrykĩ'átomti pyræk dja ga ar meo aba, ane.

<sup>17</sup> Ne kam ajte: kum,

—Ë Ximão, Djônaj kra, djãm amã ijabê? ane.

Nhym arým kaprĩre. Kute kum, “Djãm amã ijabê”? anhyro amãnhkrut ne ikjêkêtkam ne arým kaprĩre ne.

Nãm Jeju kum ane nhym kum,

—Bênjadjwyr djwýnh, ga ne ga aje mýjja kunĩ mar. Imã ajabê ga arým ama, ane.

Nhym Jeju kum,

—Inhõ me kute mrykĩ'átomti pyrækja dja ga memã ikabên jarênho aba. <sup>18</sup> Be, aja-batàn nykam ne ga amipre djào amipren kam ga aje amim pry'ã karõ kôt mrã. Nhym be, abêngêttekam dja ga me'õmã apa bẽ nhym apren apa 'amýn 'ýr ajo tẽ. Te atẽm prãm kêt nhym 'ýr ajo tẽ, ane. <sup>19</sup> Be, me kute Ximão Pedru bĩn kukãm ne Jeju ã kum ane. Pedru dja me kubĩ nhym arým ty. Dja ã tyko ane nhym me arým kôt Metĩndjwýnh raxmã kato. Nãm kum anen ajte kum,

—Be, dja ga mã ikôt ajkamẽ, ane.

<sup>20</sup> Nãm Ximão Pedrumã ane nhym arým akẽx ne kôt ba djwýnh 'õdjwý pumũ. Jeju kum abêja pumũ. Tãm ne amrêbê ar àkuro ýrkam Jeju'ýr ajkamên kum,

—Bênjadjwyr djwýnh, mýj me'õ ne kute akurê djwýnhmã akangamã? ane. <sup>21</sup> Nãm Pedru kôt ba djwýnh ja pumũn kam 'ã Jelumã kum,

—Bênjadjwyr djwýnh, mýj dja tãmwãdjwý kam nẽ? ane.

<sup>22</sup> Nhym Jeju Pedrumã kum,

—Be, dja ba akubyn bõx nhym tĩn rã'ã jabej. Kwãrĩk wãnh rã'ã. Nhym be, ije adjápênh djà'ã amã karõja dja ga kôtbit ajamak bẽn ne o aba. Ba dja ga mã ikôt ajkamẽ, ane. <sup>23</sup> Nhym kam Jeju kukwakam me kute abeno kamyja kute Jeju kabên mar kêt ne arĩk 'ã abenmã kum,

—Be, dja kôt ba djwýnh wã tyk kêtumrẽx, ane. Nhym be, kati. Djã ne kum, “Dja tyk kêt”, ane? Kati. Nãm Pedrumã kum,

—Be, dja ba akubyn bõx nhym tĩn rã'ã jabej. Kwãrĩk wãnh rã'ã. Nhym be, ije

adjápênh djà'ã amã karõ dja ga kôtbit ajamak bẽn ne mã ikôt ajkamẽ, ane. Jabit Jeju Pedrumã arẽ. Tãm ne ja.

<sup>24</sup> Ba Jeju kôt iba djwýnh ne ba me amã Jeju djápênh'ã ajarẽ. Ije àpênh pumũnhkôt ne ba katàt me amã 'ã idjujarênhkumrẽx ne arým 'ã pi'òk no'òk ne. Tãm ne bar ije markumrẽx.

<sup>25</sup> Djãm ije apýnh àpênh djà'ã pi'òk no'òkja djãm jabit ne Jeju ipêx? Kati. Ije pi'òk no'òk kêttri ne ba amim,

—Ne ba ren àpênh kunĩ'ã pi'òk no'òk nhym ren arým pi'òk kume:x. Ne ren apýnh pyka djari kunĩkôt ren pi'òk me akrenh mex ne. Nhym be, kati. Jeju djápênh jabit ne ba 'ã pi'òk no'òk ne. Tãm ne ja.

## Metĩndjwŷnh Karõ kute meo ba'ã ujarēnh ne ja.

Ruka ne ajte me bakunĩ kadjy Teopiremã pi'òk no'òk ne. Òbê ja ne kum Jeju'ã ujarēnh tēn àbir djãmã kumē. Ne kam jakam ajte Jeju àbirkõt arē ne kam Metĩndjwŷnh kute Amikarõ janor nhym kute me 'amŷnh tŷx'ã ajarē. Jeju pykabê ar bari kute ò me jao atom ne kam arŷm kàjkwamã àbirkam kute ar meo ba rã'ã ne kute memã Amikarõ janor ne o meo tŷx ar o ba nhym me kute Jeju puma proobit mŷjja pumŷnh kêt kwŷ nhipêx ar o baja'ã ujarēnh tē. Jejukõt ba djwŷnh ne uma proo arkum me uma kêt mex ne memã 'ã ujarēnh ba nhym me tu amim markumrêx ne 'ã bikprõnho dja. Be, nhym Ruka ja kunĩ'ã ajarē ne kam ajte Pedru'ã ajarē ne kam atãri Paur'ã ajarē. Djãm Jeju kute amim mebê idjaerbit pytãr ne ar meo bamã? Kati, kute pyka kunĩkõt me ja kunĩ pytãrmã. Pedru ne memo krax nhym kam Paur mrãmri apŷnh me ò pyka djãri kunĩkõt me'ŷr mrãn prĩne memã 'ã ujarēnh ba. Amrêbê ne Paur kum Jeju nhõ me ja kurêkumrêx ne prĩne meo bikēnh ar o ba nhym kam Jeju kum amijo amirĩt nhym arŷm tu amim Jeju markumrêx ne kum abēn kam kabēnkõt pyka kunĩkõt me'ŷr mrãn memã Jeju'ã ajarē nhym kam me tu amim markumrêx ne kam 'ã akuprõ.

*Jeju djàbir'ã ujarēnh kadjy ne ja.*

*Mat 28.16; Mak 16.14; Ruk 24.46*

<sup>1</sup> Be, ga Teopire, amã ne ba amrêbê pi'òk no'òk ne. Pi'òk wãkam ne ba Jeju djàpēnh kraxkurŷm, kabēn kraxkurŷm prĩne amã 'ã idjujarēnh tēn 'ã amã pi'òk no'òk ne. <sup>2</sup> Pi'òk no'òko tē:n kam arŷm àbir'ãnh amã 'ã ajarēn arŷm 'ãnh pi'òk no'òk krãta. Be, Jeju kumrêx ne amijo me kwŷ pytã. Amijo me kwŷ pytãn arŷm àpēnh djã'ã arkum karõ. Metĩndjwŷnh Karõ kukwakam 'ã arkum karõn ar anon arŷm kàjkwa djwŷnhmã wabi. <sup>3</sup> Be, àbir kētri ne tokryn tyn akubyn tŷn ne arŷm arkum amijo amirĩt ar o ba. Mŷj kadjy ne arkum amijo amirĩt ar o ba? Bir, dja ar tŷnkõt omŷn arŷm mã memã kum,

—Mrãmri ne akubyn tŷn. Ar ba ne bar akubyn tŷnkõt omŷnh krãptĩ, anhŷro ba. Ar kute ã memã anhŷro ba kadjy ne arkum amijo amirĩt ar o ba. Nãm arkum amijo amirĩt ne mã arkum ujarēnh ba. Metĩndjwŷnh kute amim me utãrn ar meo ba'ã arkum ujarēnh ba. Akubyn tŷn'ã arkum amijarēnh ar o ba: nhym arŷm 'ã arngrobê 40 apêx. <sup>4</sup> 'ã arngro apêx kētri ne ar ajte Jejumē ro'ã abeno akuprõ nhym arkum 'ã karõn arkum,

—Kwãrĩk wãnh Djeruxarē kurŷm ar akator kêt ne ije amrêbê ar amã gwaj Babãm kabēn jarēnh kõt Metĩndjwŷnh Karõ jabej ajkam ama. <sup>5</sup> Be, Djuão Metĩndjwŷnhmã ngômãbit me angij. Nhym be, dja ar ajã arngro krãptĩ apêx kêt nhym Metĩndjwŷnh arŷm ar amã Karõ jano nhym raxo ar akad-jwŷnhbê nhŷn ar ajo ba. Nãm ã Jeju arkum ane.

<sup>6</sup> Nhym kõt ba djwŷnh Jeju àbir kutã 'ã akuprõ. Be, me bajtemmã ne mebê idjaer àpēnh tŷm. Ar 'ã akuprõn kukij ne kum,

—Ë, Bēnjadjwŷr djwŷnh, djãm jakam dja ga me bajtembê me babê idjaero amiptãn ar me ijo aba? ane.

<sup>7</sup> Nhym arkum,

—Bir, gwaj Babãm djwŷnh ta ne kute mar. Kabēnkõt dja aje arēnhwã'ã akati nãr 'ã mytyrwŷ bõx. Kute ar amã 'ã akati jarēnh ar aje mar prãm kêtumrêx. <sup>8</sup> Nhym be, dja Metĩndjwŷnh Karõ ar akam ruw ne ar amã tŷx jadjã gar arŷm kukwakam atŷx ne. Ne kam ijã memã adjujarēnh ar aba. Krĩraxbê Djeruxarêkam ijã memã adjujarēnh ar aba. Ne amibu'ã pykabê Djudêjakam apŷnh me krĩ djãri kunĩkõt ijã memã adjujarēnh ar aba. Ne amũ pykabê Xamarijkam apŷnh me krĩ djãri kunĩkõt ijã memã adjujarēnh ar aba. Ne amũ: pyka kunĩ kõt aba:n apŷnh me ba djã kunĩkõt me'ŷr aban bõx ne memã ijã adjujarēnh ar aba.

<sup>9</sup> Nãm ã Jeju arkum anen arŷm kãjmã tē. Kãjmã tē nhym ar omŷnho ku'ê. Nhym kakrã arŷm o akno nhym ar arŷm omŷnh kêt ne.

<sup>10</sup> Abej rĩto ku'ê rã'ã nhym arŷm Metĩndjwŷnh kadjy mrãnh djwŷnh amãnhkrut tu ar kuri dja. Ar ò kubêkã jaka.

<sup>11</sup> Ar kuri djan arŷm arkum,

—Ë, pykabê Garrêjakam ar ajabatàn, mýkam ne gar kàjkwa jabêno aku'ê? Arým ne Jeju ar abê kàjkwa djwýnhmã wabi gar omũ. Dja gar akubyn rwýkkõt djwý ã omũho ane. Nãm ã Metĩndjwýnh kadjy mrãnh djwýnh arkum ane.

*Maxij kute Djuda tykkam pãnh àpênh djà 'amýnh ne ja.*

<sup>12</sup> Nhyam kam ar ar ku'ê djà kurũm, krãnhbê Oriwêre kurũm akubyn Djeruxarê'ýr tẽ. Mebê idjaer ne me amikukràdjã kõt me tyk djà kêt djãkam pi'òk ràràrkam nĩjar mrãnh kêt. Me mrãnh'ã akreo kirometu pydjibit. Me kukràdjã kõt ar akubyn Djeruxarê'ýr tẽmo kute kirometu pydji pyrãk. <sup>13</sup> Ne kam bõx. Bõx ne kýjrũm kumoka'ê'ýr wabi. Ar bikprõnh djãmã wabin nhỹ. Pedrumẽ Djuãomẽ Xijagumẽ Ængremẽ Piripimẽ Tõmemẽ Batormemẽ Matêumẽ Xijagumẽ Ximãomẽ Djuda ar nhỹ. Aupêu ne Xijagu ja dji. Ximão ja ne idji kakritbê Xerodji. Djuda ja ne Xijagumẽ ar axikõt apõx. <sup>14</sup> Ar ja kunĩ axikõt amim Jeju maro nhỹn mã Metĩndjwýnhmã kabêno nhỹ. Mã kum meo à'wýro nhỹ. Nhyam me niredjwý kwý nhỹ. Jeju nãbê Marijdjwý nhỹ. Jeju kamy ar axikõt ar apõxja ar adjwýnhdjwý nhỹ.

<sup>15</sup> Nhỹ: nhyam ar'ã akati kwý apêx nhyam Pedru arým kãjmã Jejukõt ba djwýnh nhipõkri dja. Arým ne me krãptĩbê 120. Kãjmã djan memã kum,

<sup>16</sup> —Akmeremẽ àpnhĩre ar, dja gar ikabênja ma. Be, Djuda ne Jeju'ýr meo mõ nhyam kam me pa 'amý. Amrêbê: ne me bakukãmãre Djuda'ã ajarẽ. Metĩndjwýnh Karõ kukwakam Djuda'ã ajarẽ. 'Ã ajarẽ nhyam me arým 'ã pi'òk no'òk ne. Nhyam me aben djõ'ã arêno mõ:. Arêno mõr tãmtã arým 'ýr o bõx. Me bakamingrãnyrekam Djuda arým Jeju'ýr meo mõrkumrêx nhyam me arým pa 'amý. Me bakukãmãre Dawi kute 'ã ujarênh kõtõ arým 'ýr meo mõrkumrêx. <sup>17</sup> Be, Djuda kute 'ýr meo mõr kêttri ne Jeju arým amijo utã. Ar iro'ã amijo ar ipytàn arým ano bar kumẽ ro'ã apê.

<sup>18</sup> Jeju te amijo utã nhyam kam kurê djwýnhmã kanga nhyam me arým pãnh kum ngõnhponho pi'òk kaprĩ ngã. Nhyam kam pi'òk kaprĩja pãnh amim pyka'õ by.

Nãm pyka byn arým kam tým ne ajkatõr nhym krêx kunĩ ajkapĩ. <sup>19</sup> Nhyam kam Djeruxarêkam me ja kunĩ abenmã arêno ipòk ne. Ne kam amikabên djwýnhkam õ pykamã Axêdjama jarẽ. Nãm ã Pedru memã ane. Me bakabênkam ne gwaj ren Djuda nhõ pykamã pyka kamrõre jarẽ.

<sup>20</sup> Nãm memã anen kam itepã ajte memã kum,

—Be, Djuda tyk ja'ã ne me bakukãmãre amrêbê: mebê idjaer nhõ me ngrer tũm'ã pi'òk no'òk ne memã kum,

“Kwãrĩk wãnh krĩ djà ja kaprý. Gê me'õ kam krĩ kêtumrêx”, ane.

Ne kamã ajte 'ã memã kum,

“Àpênh djãkam dja me'õ pãnh apê”, ane.

Nãm me bakukãmãre ã Metĩndjwýnh kukwakam pi'òkkam ane. <sup>21</sup> Ije ar amã Metĩndjwýnh kabên jarênhja kõt gê me'õ Djuda djãpênh djà 'amý. Ë, bar Jejumẽ ro'ã ar iba. Ar gadjwý ar akwý ne gar Jeju kõt ar aba. Be, Jejumẽ ro'ã ar baba 'õ, dja àpênh djãkam apê. <sup>22</sup> Gwaj baro'ã babamo kraxkam ne Djuão Metĩndjwýnhmã ngõmã me angjêno ba. Gwaj arým kam Jeju pumũ. Gwaj baro'ã ar baba: nhyam kam Jeju arým wabi gwaj kam omũho ino re. Gê Metĩndjwýnh kabên kõt ar ajõ gwaj baro'ã apê. Gwaj baro'ã baje Jeju pumũnhkam dja ar ajõ gwaj baro'ã apê gwaj kam Jeju akubyn tĩnkõt memã badjujarênh ar baba. Nãm ã Pedru arkum ane.

<sup>23</sup> Nhyam me arkum,

—Be, ar wã, Jõdje Baxabamẽ Maxijmẽ ne ar aro'ã Jeju pumũ, ane. Jõdje Baxaba nhidji 'õdjwýbê ne Juxu.

<sup>24-25</sup> Nhyam ar arým Metĩndjwýnhmã ar arên kum,

—Ga abê Bẽnjadjwýr djwýnh. Me kunĩ nhõkre kadjwýnhbê ne ga aje me kabên mar. Ne arým ar amãnhkrutja pumũ. Jeju ne amrêbê ar ijano bar 'ã memã idjujarênh ar iba. Gê ar ja'õ Djuda pãnh ar iro'ã 'ã ujarênh ar ba. Ga aje amijo ar ja'õ pytãrkõt ar imã o amirĩt. Djuda ne axwekõt Jeju kute ar ijanorjabê amijo kuka. Kwãrĩk wãnh me biknor tokry djãkam wãnh akuno. Nãm ar ã Metĩndjwýnhmã ane. <sup>26</sup> Ne kam ar idji'ã kên kryre no'òk. Ne kam kumẽ.

Ne kam 'ã idji kute amirĩtkõt ar arým amijo Maxij pytà. Nhym kam me Maxijmã Jeju kute anor'õ jarẽ. Jeju kute Ar kubẽ 11 janor kõt ne me arkum arẽ.

## 2

*Karõ raxo me kadjwýnhbẽ ýrn meo ba kadjy ne ja.*

*Kar 4.31, 8.15, 10.44, 19.2*

<sup>1</sup> Arým ne mebẽ idjaer bikprõnh djà nhõ akati nhidjibẽ Pẽxiko. Kam arým Jejukõt ba djwýnh kunĩ axikõt amim Jeju man ro'ã nhỹ. <sup>2</sup> Ro'ã nhỹ: nhym ar aerbẽ arým kàjkwa kurũm mýjja rãrãk ne arým kikremã wadjã. Mýjja rãrãk kute kõk 'itýx rãrãk pyrãk nhym arým me kunĩ kuma. <sup>3</sup> Nhym arým mýjja kute kuwy pyrãk amirĩt. Amirĩto kute me õto bikjêr pyrãk. Ne kam mýj kuwyja arým ar'ã arij. Ar ĩ pýnhkõt ar'ã arij nhym ar arým abenã omũ.

<sup>4</sup> Kam ne Metĩndjwýnh Karõ arým ar ĩ pýnhkõt raxo ar kadjwýnhbẽ nhýn ar ar o ba. Nhym ar arým apýnh me bajtem ba djãkam me kabẽno kabẽn ne arým arẽnhõ dja. Metĩndjwýnh Karõ ta arkum me kabẽn jangij nhym kam ar arẽnhõ dja.

<sup>5</sup> Metĩndjwýnh Karõ kute ar ar o ba kẽtri ne me ja apýnh me bajtem ba djã kunĩkõt aben kurũm ban bõx. Ne arým myt tãmkam krĩraxbẽ Djeruxarẽkam ar ba. Me bõx ny ja ne me mebẽ idjaer kukràdjão kukràdjãn kute ar o ba tũm. <sup>6</sup> Nãm me Djeruxarẽkam ar ba: nhym arým mýjja rãrãk kato. Nhym me amybým mýjja man itepato ar'ã aben pydji. Me krãptĩ: bõx. Bõx nhym Jeju kõt ba djwýnh ar arým apýnh me bajtem kabẽnkam kabẽn jarẽnh mexkumrẽxo ku'ẽ. Ar kute me bõx ny kabẽn bajtem jarẽnh mexkumrẽx. Apýnh me bõx ny jabatãnh djãkam me kabẽnjakam ar kabẽn jarẽnh mexkumrẽx nhym me kunĩ arým amikabẽn djwýnh ma. <sup>7</sup> Amikabẽn djwýnh man kam te kute kraxkõt ar marmã arkam no tyn kumex ne abenmã kum,

—Je, me kabẽnja ma. Me ja kunĩ ne me pykabẽ Garrẽjakam abatãnh. Me kute me bakabẽn mar kẽtkumrẽx ne arým kam kabẽn jarẽnh mexkumrẽx. <sup>8</sup> Amrẽbẽ me

bapřiri apýnh me bakabẽn djwýnh gu me arým jakam maro dja. Mýj ne me ja me bakabẽnkam kabẽn kadjy amijon? <sup>9-10</sup> Be, apýnh me bajabatãnh djãbẽ ne pykabẽ

Paxijmẽ

Medjijmẽ

Erãomẽ

Mexomimẽ

Djudẽjamẽ

Kapadõmẽ

Põtumẽ

Adjijmẽ

Bridjamẽ

Papirijmẽ

Edjitemẽ.

Apýnh me bajabatãnh djã ne ja.

Ribijkam pykabẽ Xireni kuridjwý me bajabatãnh djã'õ.

Krĩraxbẽ Rõma kurũm me babõxdjwý bakwý babẽ idjaerkumrẽx.

Nhym me bakwý amrẽbẽ baje mebẽ idjaer kukràdjão kukràdjã.

<sup>11</sup> Kretamẽ Arabijmẽ ne me bajabatãnh djã 'õdjwý.

Be, apýnh me bajabatãnh djã ne ja. Nhym me tu me bajaerbẽ apýnh me bakabẽn djwýnh kunĩkõt kabẽn jarẽnh mex. Me bakabẽn jarẽnh mex ne arým kam Metĩndjwýnh rax'ã ujarẽnhõ kumex gu me arým ar kuma. Nãm me bõx ny ã Jejukõt ba djwýnh ar'ã abenmã ane. <sup>12</sup> Ne arým te kute kraxkõt ar marmã arkam no tyn kumex ne ar umaje umar punuren abenmã kum,

—E kum, mýj'ã ne gu me baje me kabẽn marja amijakre? ane.

<sup>13</sup> Nhym me kwý arkam bẽno ajkẽn abenmã kum,

—Kadjwati kangõ\* kumexkam ne me ajbã, ane.

*Pedru kute kàj bẽ me krãptĩmã Metĩndjwýnh kabẽn jarẽnh.*

<sup>14</sup> Nhym kam Pedru arým kãjmã dja. Jeju kute ar anorbẽ 11mẽ ar ro'ã kãjmã djan arým kàj bẽ memã kabẽn ne memã kum,

—Me abẽ idjaer, krĩraxbẽ Djeruxarẽkam me ar aba kunĩ, dja ga me ikabẽn 'ãno djan ama. <sup>15</sup> Be, me amãbit ne bar ije kadjwati kangõkam ibibãnh pyrãk. Nhym

\* **2:13** Mýjja me kute o kõm ne kõt bibãnh kunĩja, kadjwati kangõmẽ uba kangõmẽ, mýjja kangõ kunĩ ne me kum kadjwati kangõ jarẽ.



be, kati. Ota, kýjrũm myt nhỹ. Nhỹnh got kýjrũm myt nhỹrkam kadjwati kangõkam me bibãnh'õ amirĩt ne? Arkati. Ar ba ne bar ibibãnh prãm kêt kumrẽx. <sup>16</sup> Bar me amã arẽ ga me ama. Bar apýnh me aba djari me akabẽnkam ikabẽn jarẽnh mex ga me ama. Be, amrẽbẽ: Metĩndjwýnh kukwakam kabẽn jarẽnh djwýnhbẽ Djõwe kute ar ijã ujarẽnh kõt ne bar ã ikabẽno ane. <sup>17</sup> Nãm me bakukãmãremã kum,

“Metĩndjwýnh me bamã, ‘Dja mýjja kunĩ pykakõt amingrãnh ‘ýr nhym me kunĩ aminhinomã amimẽnh ‘ýr ba arým me kunĩmã Ikarõ jano nhym arým meo tuknĩn meo ba.

Me ĩ pýnhkõt me kunĩo tuknĩn meo ba. Meo tuknĩ kute mrãmri ne me kute me iby ngõ kapĩ nhym kute meo tuknĩ pyrãk.

Dja ba Ikarõ jano nhym akamrer ar, akad-jwýx ar ikukwakam kabẽn jarẽ.

Nhym me abatãnh ny nokam mýjja pumũnh kêt kwý amirĩt nhym me omũ.

Nhym mebẽngẽt mýjja kwý pyti.

<sup>18</sup> Apýnh akati djari wãkam dja ba inhõ àpẽnh mymẽ inhõ àpẽnh nimã Ikarõ jano nhym arým meo tuknĩ. Nhym me arým ikukwakam ikabẽn jarẽ.

<sup>19</sup> Nhym me te kute mýjja marmã kam no tyn kumex kadjy dja ba kãkwakam mýjja pumũnh kêt kwý nhípẽx. Ne me kute iraxmã kator kadjy pykakamdjwý mýjja pumũnh kêt kwý nhípẽx. Dja ba kam me kamrõmẽ kuwymẽ kũm tyk nhípẽx.

<sup>20</sup> Ne myt nokam akamãt kô tyk ne mytyrwýo me kamrõ. Bẽnjadjwýr djwýnh kute me axwemã pãnh jarẽnh nhõ akati bõx ‘ýr. Kam dja memã ra:xi ne memã umati:re. Dja bõx ‘ýr ba kam arým ã mýjjao ane.

<sup>21</sup> Kam dja me kwý ĩ pýnhkõt Bẽnjadjwýr djwýnhmã amijo a'uw nhym arým me utã. Me ĩ pýnhkõt me kunĩ pytã.’ Nãm Metĩndjwýnh ã me bamã ane.”

Nãm ã Djõwe Metĩndjwýnh kukwakam ar ijã ane. Be, djãm ar ibibãnh got? Kati. Ga, me bakukãmãre Djõwe kute ar ijã ujarẽnhja pumũ. Djõwe kute ar ijã ujarẽnh kõt bar

arým apýnh me akabẽnkam ikabẽn jarẽnh mex. Nãm ã Pedru memã ane.

<sup>22</sup> Ne ajte itepã memã kum,

—Me abẽ idjaer, dja ga me ikabẽnja ma. Metĩndjwýnh ne krĩrãxbẽ Nadjarekam Jejujao ba nhym kukwakam arým mýjja pumũnh kêt nhípẽxo ba. Me punuo mexo ba. Te me aje marmã kam ano tyk ne aku'ẽ kadjy ne kõt aje raxmã akator kadjy ipẽxo ba. Metĩndjwýnh ta ne o ba nhym arým kabẽnkõt me akam mýjjao ba. Me ga ne ga me amrẽbẽ kõt omũn ama. <sup>23</sup> Tãm ne Metĩndjwýnh kum ire. Me abẽ idjaermã kum ire. Mýjja kunĩ kẽtri kute amikukãm mýjja kunĩ mar kõt ne kum ire. Me kẽtri ne arým amim 'ã karõ mãm dji. Kute amim 'ã karõkõt ne arým me amã Jejumã ire. Nhym me axwe me akabẽn kõt pĩte'ykam kunhõn kubĩ ga me mekõt ajaxwe.

<sup>24</sup> Ga, me arým tu tykkumrẽxja pumũ. Mýj me'õ ta dja akubyn meo tĩn nhym me ajte mekõt ar ba? Arkati. Me arým tu tykkumrẽx. Kam me kute mrãmri ne me kute me uwpre týxkam me te: kator prãmje kute amikjẽnhõ bakam tokryja pyrãk. Jejudjwý ne mrãmri tu tykkumrẽx. Nhym be, djãm tyk rã'ã? Kati. Tyk rã'ã prãm kêt kumrẽx. Metĩndjwýnh ne arým akubyn o tĩn ne. Metĩndjwýnh ne o kute mrãmri ne me kute me uwpre týxkam arým 'ãpre bõnh pyrãk nhym akubyn me ta ajte mekõt ar ba pyrãk. <sup>25</sup> Amrẽbẽ: Kritu ta Metĩndjwýnhmã amijarẽ. Tyk rã'ã kêt'ã kum amijarẽ. Nhym me bakukãmãre Dawi arým kõt arẽ gu me pi'õkkam omũ. Nãm Metĩndjwýnhmã kum,

“Bẽnjadjwýr djwýnh, inokrekam ga amirĩt rã'ã. Ga imẽ amijo akajkepkam dja me te: idjumar punumã ingrẽkmã.

<sup>26</sup> Ba kam arým inhõkre kadjwýnhbẽ ikĩnhkumrẽx ne ikĩnh'ã memã amijarẽ. Dja ba inhĩkumrẽx ne akubyn itĩn ne ar iba. Ja kadjy dja ba tu amim akamnhĩxkumrẽx ne ate ikrã.

<sup>27</sup> Dja ba tyn me tyk ba djãkam ar iba. Djãm kam dja ga ikanga? Kati. Djãm inhĩ rerekãmã? Kati. Ba ne ba amexo imex. Kam dja ga ikanga kêt kumrẽx. Kam ne ba ikĩnhkumrẽx.

<sup>28</sup> Mýj dja ba itykkam nẽ? Bir, ga ne ga arým imã arẽ. Dja ba akubyn itĩn ne akõt

ar iba rã'ã: rã'ã ne. Dja ga ikuri dja. Kam dja ba ikĩnhkumrẽx ne.”  
Nãm ã Dawi ane nhym Pedru arỳm kõt memã arẽ. Kritu tyk rã'ã kêt'ã memã arẽ.

<sup>29</sup> Ne kam itepã Kritu tĩn'ã memã kum,  
—Akmere, ba prĩne me amã me bakukãmãre Dawi kabẽn'ã ajarẽ ga me prĩne ama. Djãm amijã ne kabẽnja jarẽ got? Kati. Dawi ne amrẽbê: ty nhym me arỳm me tyk nhõ kikrekam adjã gu me baje kikre pumũnh rã'ã. <sup>30-31</sup> Be, Kritu akubyn tĩn'ã ne kabẽn jarẽ. Dawibê Metĩndjwỳnh kukwakam kabẽn jarẽnh djwỳnh'õ. Nhym kam Metĩndjwỳnh kum kabẽn jarẽnh mãmđjin kum,

“Dja atãmdjwỳ ar aben djõ'ã apõx. Aben djõ'ã apõx tãmtã nhym tũmrãm dja atãmdjwỳja kato. Tãmja dja kubê Kritu. Apãnh dja memã nhỹn arỳm kubê Bẽnjadjwỳrbê kumkati. Ikabẽn pydji ne ba arẽ.” Nãm Metĩndjwỳnh ã Dawimã ane nhym arỳm kuma. Kute amidjõ'ã Kritu kator markam ne Dawi Metĩndjwỳnhmã Kritu kabẽn jarẽnh kum,

“Dja ba tyn me tyk ba djãkam ar iba. Djãm kam dja ga ikanga? Kati. Djãm inhĩ rerekmã? Kati. Dja ga ikanga kêtumrẽx”, ane. Djãm amijã ne Dawi kabẽn ja jarẽ? Kati. Kritu'ã ne arẽ. Bẽnjadjwỳrbê kumkati'ã ne arẽ. Kritu dja ã rerek kêt ne akubyn tĩn.

<sup>32</sup> Be, Jeju ne Metĩndjwỳnh akubyn o tĩn. Ar ikunĩ ne bar omũ. Jejubê ne Bẽnjadjwỳrbê kumkati. Kubê ne Kritu. <sup>33</sup> Nãm akubyn o tĩn nhym kam wabin arỳm ra:x ne Metĩndjwỳnh djubõk'ãnh me kunĩmã nhỹ. Nhỹ nhym Bãm arỳm kum Karõ ngã. Amrẽbê kute kum arẽnhkõt ne kum kungã nhym kam ajbir ar imã ano. Nhym kam ar ikam ruw ne arỳm ar ijo ba bar arỳm kukwakam me bajtem kabẽn jarẽnh mexkumrẽx ga me arỳm ar ima.

<sup>34</sup> Be, mrãmri ne Jeju arỳm wabi. Nhym be, Dawi ne kãjkwa djwỳnhmã àbir kêt. Nãm amrẽbê: me bakukãmãremã kum,  
“Inhõ Bẽnjadjwỳrmã ne Bẽnjadjwỳr djwỳnh kabẽn ne kum, ‘Amrẽ idjubõk'ãnh nhỹ, Abẽnjadjwỳr raxkam idjubõk'ãnh nhỹ.

<sup>35</sup> Ikam ama ba amrẽ awỳr akurẽ djwỳnhomõ ga me kwỳo apardjan me kwỳ nhimex.’ Nãm Metĩndjwỳnh ã Kriumã ane.”

Nãm ã Dawi me bakukãmãremã ane. <sup>36</sup> Me abê idjaer kunĩ dja ga me Dawi kabẽnja man 'ã ikabẽn mar pydji. Mrãmri ne Metĩndjwỳnh Jeju'ã Bẽnjadjwỳrbê kumkati mẽnkhkumrẽx. Kubê ne Kritukumrẽx, me aje pĩte'y'ã nhõrja tãm. Ja dja ga me amim mar pydji. Nãm ã Pedru memã ane.

<sup>37</sup> Nhym me kute ja markam arỳm amim ngryk ne kaprĩre ne. Ne kam arỳm Pedrumẽ Jeju kute ar anorja kunĩmã kum,  
—Akmere ar, mỳj dja ba me kam amijon? ane.

<sup>38</sup> Nhym Pedru memã kum,  
—Me on amikam akaprĩren wãnh ajaxwemã anhiren Jeju Kritu'yr amijo akẽx. Bar kam arỳm kukwakam kum ngõmã me ajangij. Nhym Metĩndjwỳnh arỳm me ajaxwe maro aknon me akam ngryk kêt ne arỳm me amã Karõ jano nhym ar me ajo ba. <sup>39</sup> Be, Metĩndjwỳnh ne amrẽbê me amã Karõ jarẽ. Ne ajte me akramẽ atãmdjwỳmã arẽ. Ne ajte anhỹr bê me mõr wãmã arẽ. Kute amiwỳr me 'wỳr kunĩ ne Metĩndjwỳnh arỳm memã Karõ jarẽ. Nãm ã Pedru memã ane.

<sup>40</sup> Ne kam ajte memã Metĩndjwỳnh kabẽn kumex jarẽnh axwe nẽje me akre:n ajte memã karõ:. Nãm memã kum,

—Me kamingrãny ja ne me axwekumrẽx. Dja me ã me biknor tokry djãkam akuno. Me gop mekõt abiknor kêt kadji amipytã, ane. <sup>41</sup> Nhym kam me kum kabẽn kĩnh ne tu amim markumrẽx. Nhym kam me arỳm Metĩndjwỳnhmã ngõmã me krãptĩ jangij. Mebê 3.000 ne me angij nhym me arỳm mekõt tu amim Jeju markumrẽxo ba.

*Me kute Jeju mar kute abeno õbikwa.*

*Kar 4.32*

<sup>42</sup> Nhym me mã Jeju kute ar anorja kukràdjã man kõt ar amijo ba. Ne aben tã akuprõ. Ne Jeju kute aminhĩ'ã djwỳ jakren kokjêrja tãm ne ajte kute 'ã akren kokjêro krĩ, aben tã, me kute tyk mar rã'ã kadji. Ne aben tã Metĩndjwỳnhmã kabẽno krĩ. <sup>43</sup> Nhym me te kute mỳjja marmã kam no tyk ne kute Metĩndjwỳnh raxmã kator kadji Jeju kute ar anorja me aêrbê mỳjja

pumũnh kêt krãptĩ nhipêxo ba nhym me kunĩ arým madjà kreti.

<sup>44</sup> Nhym me kute amim Jeju mar kunĩ ro'ã ar ban kute abenbê mýjja'õ nê kêt ne abenmã abennhõ mýjjao ba. <sup>45</sup> Ne amũ memã apýnh aminhõ pykamẽ aminhõ mýjja ngãn pãnh pi'ók kaprĩ jamý. Ne kam apýnh me õ mýjja kêt mã pi'ók kaprĩ ngã. <sup>46</sup> Ne kam akati kunĩkõt Metĩndjwýnh nhõ kikretikam axikõt Jeju maro krĩ. Ne kam apýnh me ũrkwã kõt Jeju kute aminhĩ'ã djwý jakren kokjêrja tãm ne ajte kute 'ã akren kokjêro krĩ. Ne kĩnhhtiren tu aben markumrêx ne ro'ã õ kwý krêno kumex. <sup>47</sup> Ne mã Metĩndjwýnhmã kum,

—Imã akĩnhkumrêx. Amexiti:re, anhýro kumex. Nhym bu'ã me kunĩ kum me kĩnh. Nhym Bẽnjadjwýr djwýnh akati kunĩkõt amiwýr me kwýo akêx. Aben totokmã amiwýr meo akêx ne me axwebê me utà. Ne arým me kute amim Jeju mar kõt me umjuw nhym me arým mekõt ar aben py-djo ba.

### 3

#### *Pedru kute me'õ mrãnh kêtõ mex.*

<sup>1</sup> Ne kam akati 'õkam arým myt ibõ, arým 3 ora nhym Pedrumẽ Djuãõ ar Metĩndjwýnh nhõ kikreti'ýr tẽ. Akati kunĩkõt, myt ibõkam ne mebê idjaer kikretikam Metĩndjwýnhmã kabẽno krĩ. Nãm ar 'ýr tẽn 'ýr bõx nhym me me'õ mýn o tẽ. <sup>2</sup> Adjãkam ne mrãnh kêt nhym me mýn o ba. Akati kunĩkõt ne meo ban kikreti jajkwa krekre kuri krĩ. Ajkwa krekre ja nhidjibê ne Kĩnhhtire. Nãm me o ban krĩ nhym kam me ngjêx kunĩkõt pi'ók kaprĩ'ã me 'wýro krĩ.

<sup>3</sup> Be, nãm me kumýn o tẽn kam ýr. Nhym Pedrumẽ Djuãõmẽ mekõt àrmã tẽ nhym ar omũn arým pi'ók kaprĩ'ã ar ku'uw. <sup>4</sup> Nhym Pedrumẽ Djuãõmẽ 'ýr akêx ne omũ, omũnh týt ne kum, “Amrê ar ipumũ”, ane. <sup>5</sup> Nhym arým ar kuman mýjja jabej ar'ýr akêx ne ar omũnho nhý.

<sup>6</sup> Nhym Pedru kum,

—Inhõ kryt jakao pi'ók kaprĩ kêt ne inhõ kên karýro pi'ók kaprĩ kêt. Nhym be, atemã inhõ mýjja ba amã arê. Be, Nadjarekam Jeju Kritu kukwakam on kãjmã djan on mrã, ane. <sup>7</sup> Nãm anen tu

ubõk'ãnh ikra 'amýn kãjmã aro tẽ. Nhym on parmẽ parkõn mex <sup>8</sup> ne ekruux ne kãjmã dja. Ne arým tẽ. Ne kam arkõt Metĩndjwýnh nhõ kikretimã wadjã. Nãm arkõt arĩ tẽ, kĩnhkumrêxkam arkõt àtor tẽn Metĩndjwýnhmã mextire jarêno tẽ. <sup>9</sup> Nãm kum mextire jarêno tẽ nhym me kunĩ arým omũ. <sup>10</sup> Omũn kam amim nokre pumũn arým abenmã kum,

—E kum, tãmwã ne kikreti jajkwa krekrebê Kĩnhhtire kuri amijo à'wýro krĩ. Je tô mýj ne arým kam nê? anen te aben kukijn kam no tyn kumex.

#### *Me krãptĩmã Jeju'ã ujarênh.*

<sup>11</sup> Nhym mrãnh kêt ne arým mexja arým Pedrumẽ Djuãõ aro tým ne aro dja. Metĩndjwýnh nhõ kikreti janhãkam kikre kre kênhkam ne ar dja. Me kute kum Xaromãõ nhõ kikre kre kên jarênhja. Nãm aro dja nhym me kunĩ arým kam ar'ã akuprõn te kute marmã arkam no tyn kumex. <sup>12</sup> Nhym Pedru arým memã kum,

—Ga me abê idjaer, mýkam ne ga me te aje marmã me'õjakam ano tyn akumex ne ar ijã ano mao akumex? Djãm ar ba ne bar me'õjamã mrãnh mex jadjã? Kati. Ar ba ne bar ije o mex mar kêt. Djãm ar amimexo ne bar kum mrãnh mex jadjã? Arkati. Jeju ne paro mex ne kum mrãnh mex jadjã.

<sup>13</sup> Ba me amã arê ga me ama. Metĩndjwýnh kute Abraãõmẽ Idjakmẽ Djakomẽ me bakukãmãre kunõ ba djwýnh arým jakam amirax kõt Kra Jejuo ra:xi. Tãmwã ne ga me amrêbê Piratumã kanga. Nhym kam bit kute kum irermã. Ta kute arek me aro'ã ar ban umar mex kadjy bit kute kum irermã ga me kum, “Kati, Kati”, ane. <sup>14</sup> Be, Jeju ne Metĩndjwýnh mexo mex ne katãt ar amijo ban axwe kêtumrêx ga me kanga. Ne kam me'õ jaxwe kute me parja'ã Piratumã kum, “Tãmwã dja ga kum anhiren ano gẽ ta me ikõt arek ar ban umar mex”, ane. <sup>15</sup> Ne kam kute mýjja kunĩmã tĩn jangjênh djwýnhja bã. Nã gãm me bã'n'ã memã apnê nhym me kubĩ.

Nhym be, Metĩndjwýnh ne arým akubyn o tĩn. Ar ba ne bar omũn me amã kõt 'ã idju-jarênh ar iba. <sup>16</sup> Be, Metĩndjwýnh ne amikõt Jejuo rax bar kam arým tu amim Jeju kamnhĩxkumrêx. Tu amim kamnhĩxkumrêx

nhym arým me'õjamã týx jadjàn o mex ne. Jeju ta ne ar imã ijamak bõ bar arým tu amim kamnhĩxkumrẽx nhym arým prĩne me'õjao mex ne. O mex nhym arým me anhipõkri dja ga me akunĩ arým omũ.

<sup>17</sup> Be, akmere ar, ba me amã arẽ ga me ama. Anhõ bẽnjadjwýrmẽ ne ga me ajamakre kêtka Jeju bĩ ba arým kuma. <sup>18</sup> Nhym be, amrẽbê: ne Metĩndjwýnh kukwakam kabẽn jarẽnh djwýnh kunĩ me bakukãmãremã kum, “Dja Kritu tokry. Metĩndjwýnh kute Kra'ã Bẽnjadjwýrbẽ kumkati mẽnhja dja tokry.” Nãm me ã me bakukãmãremã ane. Nhym me aben djõ'ã arẽnho mõ:n arẽnho mõr tãmtã: arým 'ýr o bõx. Tũ:mràm me akamingrãnyre amã kurẽ nhym arým Kritu tokry. Me bakukãmãre kute arẽnh kõt Kritu tokry. Nãm ã Pedru memã ane.

<sup>19</sup> Ne kam itepã memã kum,

—Kam me on amikam akaprĩren wãnh ajaxwemã anhiren Bẽnjadjwýr djwýnh'ýr amijo akẽx ne katàt kabẽn man kõt ar amijo aba. Dja ga me ã amijo ane nhym arým me ajo kĩnh ne. Ga, me kum kõrkam kaprĩja pumũ. Ne ajte kute ngõo kõmkam kĩnhja pumũ. Dja ã me ajaxwekam akaprĩkam me ajo kĩnho ane.

<sup>20</sup> Dja ga me ã amijo ane nhym arým akubyn me amã Kritu jano. Amrẽbê: me kute kàj bê me amã 'ã ujarẽnhja dja me amã ano. Bẽnjadjwýrbẽ kumkatibẽ ne Jeju. Kritubẽ ne Jeju. <sup>21</sup> Dja arek kàjkwa djwýnhkam ar ba:n kam akubyn ruw. Kute akubyn mýjja kunĩo ny kadjy akubyn ruw. Metĩndjwýnh kukwakam kabẽn jarẽnh djwýnhja kunĩ ne me amrẽbê: me bakukãmãremã ja jarẽnhkumrẽx. <sup>22</sup> Mrãmri ne Mõjdjê me bakukãmãremã kum,

“Ba ne ba Metĩndjwýnh kukwakam me amã ikabẽn jarẽnho iba.

Dja Metĩndjwýnh ĩ me akadjy amijo me anhõbikwa'õ pytã nhym arým ĩ ikudjwa ã me amã kabẽn jarẽnho ane.

Dja me amã kabẽn jarẽ ga me prĩne aman kõt ar amijo aba.

<sup>23</sup> Nhym me'õ kute kabẽn mar kêtja dja me o ajkẽ nhym ajte õ me wýnhkõt amirĩt kêtikumrẽx ne.”

Nãm ã Mõjdjê ane nhym Pedru kõt memã arẽ.

<sup>24</sup> Ne kam itepã memã kum,

—Mrãmri ne amrẽbê Metĩndjwýnh kukwakam kabẽn jarẽnh djwýnh kunĩ apýnh mýjja apõxmã 'ã ajarẽ. Me ajte Kritu katormã 'ã ajarẽ. Nhym jakam mýjja arým amirĩt nhym Kritu arým kato. Dja ga pi'õk kõt akubyn arẽnho tẽn Xamuwe'ýr o bõx. Metĩndjwýnh kukwakam kabẽn jarẽnh djwýnh ne aben nwhitepã apõx tẽ. Kunĩ'ã dja ga pi'õkkam ujarẽnh jarẽnho tẽ:n arým kõt ama. Kukwakam kabẽn jarẽnh djwýnh kunĩ ne me Kritu'ã memã ajarẽ. Ja dja ga me kõt ama. <sup>25</sup> Ga me Metĩndjwýnh kukwakam kabẽn jarẽnh djwýnh kabẽnjao abarã'ã ne. Metĩndjwýnhmẽ me bakukãmãremẽ arým abenmã kabẽn jarẽnh mãmdji ga me kabẽno aba rã'ã. Nãm Metĩndjwýnh Abraãomã kum,

“Dja akrakam kra aben djõ'ã apõx. Aben djõ'ã apõx krãptĩ:

Atãmdjwý ja'õ dja meo kĩnh. Dja apýnh pyka kunĩkõt meo kĩnh nhym me arým kĩ:nhkumrẽx.”

Nãm ã Abraãomã kabẽn pydjĩn arẽnho ane.

<sup>26</sup> Be, ba me amã arẽ ga me ama. Kute meo kĩnh kadjy ne Metĩndjwýnh amijo Kra pytãn me akumrẽxmã ano. Dja me anhĩ pýnhkõt me ajaxwebẽ me ajo akẽx ne arým me ajo kĩnh. Ja kadjy ne me amã ano. Nãm ã Pedru memã ane.

## 4

### *Pedru me rũnh krãptĩmã Jeju'ã ujarẽnh.*

<sup>1</sup> Nãm ar memã kabẽno dja nhym me rũnh arým ar'ýr bõx. Me kadjy Metĩndjwýnh mar djwýnh ar'ýr bõx. Metĩndjwýnh nhõ kikretĩ nêje ku'ẽ djwýnho ba djwýnhjadjwý mekõt ar'ýr bõx. Mebê xadjudjẽumẽ mekõt ar'ýr bõx. <sup>2</sup> Pedru ar kàj bê memã Jeju tyk ne akubyn tĩn'ã ujarẽnho dja. Ne kam ajte kàj bê me kute amim Jeju mar tykja kunĩ akubyn tĩn'ã ujarẽnho dja. Jeju akubyn tĩn kõt me tĩn'ã ujarẽnho dja. Kam ne me rũnhja ngry:k ne arým ar'ýr bõx. <sup>3</sup> Nãm me ar'ýr bõx ne arým aro tým ne ar pa 'amýn aro tẽn Ar kubẽ ijẽ. Arým me'ã akamàt 'ýr. Nhym kam me akati kadjy Ar kubẽ ijẽ. <sup>4</sup> Nhym be, me kute Ar kubẽ ijẽ kêtĩri ne me kute ar kabẽn marja krãptĩ: arým tu amim

Jeju markumrêx. Ôbê me kute tu amim markumrêxjamê ajbir me krãptĩjamê ne me abenã mênhkam krãptĩ:kumrêx. Me my ne mebê 5.000.

<sup>5-6</sup> Nãm me akati kadjy Ar kubê ijê nhym kam me'ã akati nhym me rũnh ar'ã akuprõ. Mebêngêtmê Môjdjê kukràdjã mar djwỳnhmê ar'ã akuprõ. Nhym me kadjy Metĩndjwỳnh mar djwỳnh nhõ bẽnjadjwỳr raxbê Ananh mekõt nhỹ. Nhym Kajbajmê Djuãomê Arexãrimê Ananh nhõbikwa kunĩ ar'ã akuprõ. Me rũnh ja ne me krĩraxbê Djeruxarêkam ar'ã akuprõ. <sup>7</sup> Nhym me arỳm aro katon me ipõkri ar kudja. Nhym kam me ar kukij ne arkum,

—Mỳj me'õ kukwakam ne gar mrãnh kêtjao mex? Mỳj ne idji kute? ane.

<sup>8</sup> Nhym kam Metĩndjwỳnh Karõ arỳm raxo Pedru kadjwỳnhbê nhỹn ar o ba. Nhym kam memã kum,

—Mebê idjaerkam me abẽnjadjwỳrmê ar abêngêt ar, <sup>9</sup> mỳjkõt ne bar imã me'õ punuja kaprĩn o mex ga me abej ar ikukij. <sup>10</sup> Dja bar me amã arê ga me ama. Me gamê mebê idjaer kunĩ dja ga me ikabên ma. Nadjarekam Jeju Kritu, me aje pĩte'y'ã nhõr ne bĩn nhym Metĩndjwỳnh akubyn o tĩnja. Jeju ja kukwakam ne me'õ mrãnh kêtja arỳm mex. Mex ne me anhipõkri dja ga me arỳm omũ. <sup>11</sup> Amrêbê: ne me bakukãmãre Jeju'ã ajarên memã kum, “E kum kên ja ne me kute kikreo ãm djwỳnhja kute kikremã armã te omũn bõm kumê.

Kên ja ne arỳm kute kikremã o kajpar, kum o kajpar tỳxi.”

Nãm ã me bakukãmãre memã anen arỳm 'ã pi'õk no'õk ne. Me aje kikreo ãm djwỳnhwã pyrãk. Amã Jeju kurê nhym arỳm kute kênwã pyrãk ne arỳm kãjkwa djwỳnhkam me bakunĩmã nhỹ. <sup>12</sup> Djãm ikrebê me'õ kute me bajaxwebê me bapytãr? Arkati. Me'õ kute me bapytãr kêtikumrêx. Mrãmri ne kute me bapytãr kadjy Metĩndjwỳnh memã Jeju pydji jarê. Nhym pyka kunĩkõt me bakadjy me'õdjwỳ kêtikumrêx. Nãm ã Pedru memã ane.

<sup>13</sup> Be, Pedrumê Djuão ar memã kabênkam me rũnh abenmã kum,

—E kum, arkum gwaj bapyma kêtikumrêx. Be, ar kute me bakukràdjã mar

kêt, ar kajgo mexi. Mỳj got ar nẽn ã kabên mexo ane, ane. Ne kam arỳm ar kuman abenmã kum,

—Be, ar Jejukõt ba tũmkam ne ar ã kabên mexo ane, ane. <sup>14</sup> Nhym ar kute me'õo mexjadjwỳ ar ro'ã dja nhym me omũ. Ne te kute abenmã, “Nãm ar 'êx”, anhỹr prãmje.

<sup>15</sup> Ne kam me rũnh me bikprõnh djã nêje ar ano nhym ar tẽ. Nhym me ar kãxã aro aben maro nhỹ. <sup>16</sup> Ne abenmã kum,

—Mỳj dja gwaj ar on? Me kute Metĩndjwỳnh raxmã kator kadjy ar mrãmri mỳjja pumũnh kêt raxja nhipêx. Me'õ punu mex nhym ar arỳm o mex. Nhym Djeruxarêkam me ja kunĩ arỳm omũ. Kam gwaj baje te memã, “Nãm ar 'êx”, anhỹr prãmje. <sup>17</sup> Be, gwaj ar kangrõnh tỳx gê ar ajte Jeju'ã ujarên kêt. Gêdja amũ me bu'ã me wã mar kêt. Nãm me ã abenmã ane.

<sup>18</sup> Ne kam amiwỳr ar ku'uw nhym ar bõx nhym me arkum,

—Kwãrĩk wãnh ajte Jeju kukwakam memã kabên jarên kêt. Ne kwãrĩk wãnh 'ã memã adjujarên kêt, ane. <sup>19</sup> Nhym Pedrumê Djuão ar memã kum,

—Be, mỳj dja bar nê? Metĩndjwỳnh kute ar imã ar imex jarên kadjy mỳj dja bar nê? Djãm me akabênkõt ar ije Jeju'ã idjujarên kêtã? Nãr kon, djãm Metĩndjwỳnh kabênkõt ar ije Jeju 'ã idjujarênhmã? Me gadjwỳ amikadjy ama. <sup>20</sup> Be, ar ije Jeju akubyn tĩnkõt omũnh ne ar ije kabên mar. 'ã dja bar bir idjujarênhkumrêx ar iba. Te 'ã idjujarên kêtã, ane.

<sup>21</sup> Nhym kam me ajte ar kangrõn arkum ire nhym ar arỳm mã tẽ. Me rũnh ne me te: kute aro aben mar nhym me kute mỳj ar axwe'õ pãnh kute aro bikênhmã. Ar kute me'õo mexkam ne me kãtãm kunĩ Metĩndjwỳnhmã ra:x jarên kum ar kĩnh. Me rũnh ren aro ajkê nhym ren bu'ã me kãtãm ren kum me kurê. Kam ne me rũnh te: kute aro bikênhmã. <sup>22</sup> Be, te me'õ jakryja abatãnh mex nhym ar arỳm o mex. 'ã amexbê 40 nhijukri ne ajte amex rã'ã arỳm 'ã apêx nhym ar o mex. Djã ne me mỳjja ja'õ pumũ? Arkati.

*Me kute Jeju mar kute Metĩndjwỳnhmã rax jarên.*

<sup>23</sup> Nãm me rũnh Pedrumẽ Djuão arkum ire nhym ar mã tẽn kam arým aminhõ me ja'ýr bõx. Ne kam me rũnh kute arkum kabẽn kõt memã arẽ. Me kadjy Metĩndjwýnh mar djwýnh nhõ bẽnjadjwýrmẽ mebêngêtmẽ kabẽn kõt arẽ nhym me arým kuma. <sup>24</sup> Ne kam axikõt Metĩndjwýnhmã kabẽn ne kum,

—Bẽnjadjwýr djwýnh, abê Metĩndjwýnh. Ga ne ga kàjkwa nhípêx ne pyka nhípêx ne ngõ raxbê pyka kêt nhípêx ne kam mýjja ar baja kunĩ nhípêx. <sup>25</sup> Be, anhõ àpênh Dawi ne akukwakam memã kum,

“E kum, mýkam ne apýnh me ba djakam me bajtem àkrêo kumex? Mýkam ne me amim mýjja'ã karõ kajgoo kumex?”

<sup>26</sup> Pykakam me bẽnjadjwýr rũnh ar arým kàjmã dja. Kute Bẽnjadjwýr djwýnhbê àptarmã arým kàjmã djan itepato abeno akuprõ.

Õ Kritudjwý me arým kute kubê àptarmã kàjmã dja. Me õ Bẽnjadjwýrbê kumkatibê àptarmã kàjmã dja.”

Nãm ã me bakukãmãre Dawi ane. <sup>27</sup> Be, Bẽnjadjwýr djwýnh, mrãmri ne Dawi kabẽnkumrẽx. Arým ne me kute Jejubê àptarmã akuprõ. Akra Jeju ne amexo mex. Ga ne ga arým 'ã Bẽnjadjwýrbê kumkati mẽ. Nhym Erodjimẽ Põxu Piratumẽ apýnh me ba djakam me bajtemmẽ mebê idjaermẽ me kunĩ kute kubê àptarmã arým abeno akuprõ. <sup>28</sup> Ga ne ga amrêbê me kेत्रi arým amim me'ã karõn amybým meo aba. Meo aba: nhym kam me arým ã Jejuo ane. <sup>29</sup> Me kute Jejubê àptarmã akuprõ. Bẽnjadjwýr djwýnh, jakam dja ga me kute ar ikangrõnhja ma. Ne kam ar imã itýx jadjà bar imã me uma kêt ne me kunĩmã akabẽn jarẽ. Ar ibê anhõ àpênh. <sup>30</sup> Dja ga ar imã týx jadjà bar me punuo mex ne akra kukwakam me aêrbê mýjja pumũnh kêt nhípêx. Me te kute mýjja marmã kam no tyk ne ku'ên araxmã kator kadjy bar mýjja pumũnh kêt nhípêx. Akra ne mexti:ren axwe kêtumrẽx, ane.

<sup>31</sup> Nãm me Metĩndjwýnhmã kabẽn pa nhym me bikprõnh djã arým amingrêk ne. Nhym Metĩndjwýnh Karõ arým me ï pýnhkõt raxo me kadjwýnhbê nhýn ar meo

ba. Nhym me arým kum me uma kêt ne memã Metĩndjwýnh kabẽn jarẽ.

*Me kute abenmã õ mýjja nhõr.*

*Kar 2.42*

<sup>32</sup> Nhym kam me kute amim Jeju mar krãptĩ: kum aben jabê. Me ï pýnhkõt kum aben jabên kum Jejuo kĩnh prãm. Ne aminhõ mýjja kunĩo aminhõ kêt ne amikutã abenmã kwý ngã. <sup>33</sup> Nhym Jeju kute ar anorja mã memã kum,

—Bẽnjadjwýr djwýnh Jeju akubyn tĩn. Ar ba ne bar tĩnkõt omũ, anen mã memã 'ã ujarênh ar ba. Metĩndjwýnh ne arkum týx jadjà nhym ar tý:x ne memã 'ã ujarênh ar ba. Nhym Metĩndjwýnh arým tu me kunĩmã ukaprĩ jadjà nhym me arým ukaprĩ:kumrẽx. <sup>34</sup> Nhym kam me'õ kum mýjja'õ prãm kêtumrẽx. Mýkam? Bir, apýnh me ï djãri ne me õ pyka nãr õ kikre. Ne kam aben totokmã amũ memã kungã. Ne kam pãnh amim pi'ók kaprĩ byn o tẽn <sup>35</sup> mã Jeju kute ar anorjamã kungã. Nhym kam ar mã me õ mýjja kêt mã pi'ók kaprĩ ngã. Me õ mýjja kêt kõt memã kungã nhym me kam o mã amim mýjja jamý. Ne kam me'õ kum prãm kêt.

<sup>36</sup> Kamã ne me'õ nhidjibê Jõdje. Jeju kute ar anorja ne kum idji ny jarẽ. Kum Banabe jarẽ. Me kaprĩreo kĩnh djwýnh'ã ne ar kum idji jakren kum arẽ. Kubê ne mebê Rewi'õ. Apêxtibê Xiprekam ne abatãnh djã. <sup>37</sup> Banabe ne arým õ pyka. Ne kam pãnh kadjy arým amũ memã kungã. Ne kam amim pi'ók kaprĩ byn o tẽn arým Jeju kute ar anorjamã kungã. Nãm arkum 'êx kêt ne arkum kungã.

## 5

*Ananijmẽ Xapire ar 'êx.*

<sup>1</sup> Nhym be, Ananijmẽ prõ Xapire ne ar õ pyka. Ne kam amũ memã kungãn kam pãnh amim pi'ók kaprĩ by. Ne kam 'êx.

<sup>2</sup> Nhym my prõmã kum,

—Gu amim kwýo apdju, ane. Nhym, “Ã”, ane. Nhym kwýbito tẽn Jeju kute ar anorjamã o tẽn o bõx ne 'êx ne arkum,

—Mĩ, bar inhõ pyka pãnh pi'ók kaprĩ jabit by, ane. Ne kam arým arkum kungã.

<sup>3</sup> Nhym Pedru kum,

—Ananij, mýkam ne Xatanaj arým ajo ba ga arým Metĩndjwýnh Karõmã ajêx? Arým

ne ga amim pi'òk kaprĩ kwýo apdju. <sup>4</sup> Ga ren anhõ pyka nhõr kêt nhym ren anhõ pyka rã'ã ga ren amexkumrêx. Nàr, aje memã òrkam ga ren pi'òk kaprĩõ aba rã'ãn ren amexkumrêx. Mýkam ne ga amim ajêxja'ã karõ? Djãm ar imãbit ne ga ajêx got? Kati. Metĩndjwýnhmãdjwý ne ga ajêx. Nãm ã Pedru kum ane.

<sup>5</sup> NhyM Ananij kabên man arým tým ne ty. NhyM kam me kute arênh mar kunĩ arým umaje madjà kreti ne. <sup>6</sup> NhyM kam me abatãnh ny kwý kãmã djan Ananijo kupun o mõn arým adjã.

<sup>7</sup> NhyM 'ã myt kwýr kãjbê 'iry. 'Ã 3 ora apêx. NhyM prõja kute mjên tyk mar kêt rã'ã. Ne kam arým me'ýr wadjã. <sup>8</sup> NhyM kam Pedru kum,

—Aje, on imã arê. Mýj ne gar pyka pãnh pi'òk kaprĩ on aby? Djãm jabit? ane.

NhyM mjên kôt kum 'êx ne kum,

—Ô nã. Bar amim ã pi'òk kaprĩ byro ane, ane.

<sup>9</sup> NhyM Pedru kum,

—Mýkam ne ga aje Bẽnjadjwýr djwýnh Karõmã amikurê'uk kadjy amjênme aben kôt akabên dji? Ota, amjên jadjãr djwýnh ar arým akubyn kikre jãkwa krekre'ýr mõ. Dja ar rûm gadjwý ajo mõ, ane.

<sup>10</sup> NhyM on parbê tým ne arým ty. NhyM ar abatãnh nyre arým wadjã. NhyM arým ty nhym ar omũ. Ne kam o mõn mjên kuri adjã. <sup>11</sup> NhyM me kute amim Jeju mar ne kôt ar aben pydjio baja kunĩ arým umaje madjà kreti. Me kute ar tyk jarênh mar kunĩ arým umaje madjà kreti.

### *Pedru ar kute me krãptĩõ mex.*

<sup>12</sup> NhyM Pedrumê Jeju kute ar anorja kunĩ mýjja pumũnh kêt krãptĩ nhípêxo ba. Me te kute mýjja marmã kam nõ tyk ne ku'ên kute Metĩndjwýnh raxmã kator kadjy ne ar mýjja nhípêxo ba. Xaromãõ nhõ kikre kre kênhkam ne me kunĩ axikôt Jeju maro krĩ. <sup>13</sup> NhyM me kãtãm te me umaje ne te me ikõ'ã krĩ prãmje ne amybým abenmã me mexkumrêx jarênho kumex. <sup>14</sup> NhyM kam me krãptĩ kum Bẽnjadjwýr djwýnh kĩnh ne arým tu amim markumrêxo kumex. Amim maro kumex ne arým mekôt akuprõ. NhyM kam me kute amim marja arým

krãptĩ: tẽ. Me mymẽ me niremẽ arým krãptĩ: ne.

<sup>15</sup> NhyM Jeju kute ar anorja mýjja pumũnh kêt nhípêxo ba. NhyM me me punuo apõx ne Pedru kukãm pry jakã'ã me adjwýro mõ. Me ikwã djãkam nãr aty djãkam me adjwýro mõ. Dja Pedru tẽmkôt karõbit me kwý'ã rôrõk nhym me arým mex. Ja kadjy ne me kukãm me adjwýro mõ. <sup>16</sup> NhyM Djeruxarê bu'ã me krĩ djãri me jadjwý me krãptĩ: 'ã akuprõ. Me aben totokmã 'ýr me punu jamýn o ban o bõx. Me karõ punu kute meo badjwý nhym me aben totokmã 'ýr meo ban meo bõx. NhyM Metĩndjwýnh arým me kunĩõ mex ne.

### *Me kum ar kurê.*

<sup>17</sup> NhyM kam me rûnh kwý arým Pedru arkam ngryk ne. Me kadjy Metĩndjwýnh mar djwýnh nhõ bẽnjadjwýr raxmẽ ro'ã mebê xadjudjêu krĩ kunĩ arkam ngry:k ne.

<sup>18</sup> Jeju kute ar anorjakam ngryk ne ar'ýr mõn ar'ýr bõx ne arým aro tým. Ne kam Ar kubê ijê nhym kam me kunĩ ar omũ.

<sup>19</sup> NhyM Bẽnjadjwýr djwýnh kadjy mrãnh djwýnh 'õ akamãtkam ar'ýr bõx ne arým arkum kikre'ã ijê djã'ã kuta. 'Ã kutan arým aro katon arkum,

<sup>20</sup>—Dja gar Metĩndjwýnh nhõ kikretikam tẽn adjujarênho dja. Dja me tu amim Jeju markumrêx ne arým kôt tĩn ne ar ba rã'ã: rã'ã ne. Tãm dja gar memã 'ã adjujarênho dja, ane.

<sup>21</sup> NhyM ar kadjy mrãnh djwýnh kabên man kam myt katorkam arým Metĩndjwýnh nhõ kikretimã wadjã. Wadjãn arým 'ã memã ujarênho dja. Memã ujarênho dja nhym wãnh me kadjy Metĩndjwýnh mar djwýnh nhõ bẽnjadjwýr rax ar arým me rûnh bikprõnh djãkam bõx. Bõx ne arým amiwýr õ me rûnhõ akuprõ. Mebê id-jaerkam me rûnh kunĩõ akuprõ. Me rûnhõ akuprõ nhym arým mebê ijê djãmã ar'ýr me krãkamngõnh jano nhym me 'ýr mõ. <sup>22</sup> 'Ýr mõn arým mebê ijê djã'ýr bõx ne te ar abej. Te: ar abej ne arým ar abej aprã. Ne kam akêx ne me rûnh'ýr mõn 'ýr bõx ne memã kum,

<sup>23</sup>—Mebê ijê djã'ã ijê tỳx mex nhym kre'ã ku'ê djwýnh ar bõm 'ã ijê djã kabem dja ba me ar omũ. Ne kam 'ã ijê djã'ã kurên

te kadjwỳnhbê ar abej aprã, ane. <sup>24</sup> Nhyr me rũnh arỳm me kabẽn ma. Metĩndjwỳnh nhõ kikreti nêje ku'ê djwỳnhho ba djwỳnh me kabẽn ma. Me kadjy Metĩndjwỳnh mar djwỳnh nhõ bẽnjadjwỳr me kabẽn ma. Ne te aben kukij ne abenmã kum,

—Je, mỳj dja ar ijukri nê? ane.

<sup>25</sup> Nhyr kam me'õ me'ỳr bõx ne memã kum,

—E kum, onĩj me aje Ar kubê ijêja Metĩndjwỳnh nhõ kikretikam memã ujarẽnho dja, ane. <sup>26</sup> Nhyr kam kikreti nêje ku'ê djwỳnhho ba djwỳnhja ar'ỳr õ me jao mõn ar'ỳr bõx. Ne arỳm arkum prĩre ne akubyn me rũnh'ỳr aro bõx. Kum me kàtàm krãptĩ pymakam. Ar'ỳr tẽm kẽtri ne me abenmã kum,

—Gu me ren aro ajkẽ nhyr me ren pãnh kẽno me batitik ne me bapa, ane.

<sup>27</sup> Kam ne me arkum prĩre ne arỳm me rũnh'ỳr aro bõx. Aro bõx nhyr ar arỳm me kabem dja. Nhyr kam me kadjy Metĩndjwỳnh mar djwỳnh nhõ bẽnjadjwỳr rax kukij ne arkum,

<sup>28</sup> —Bar arỳm ar amã ikabẽn ne. Jeju kukwakam memã 'ã adjujarẽn kêt kadjy ar amã ikabẽn gar ajte 'ã adjujarẽn ar aba nhyr arỳm krĩraxabê Djeruxarẽ kunĩkõt me abenmã ar akukràdjã jarẽnho ipõk ne. Gar kam aje bit ar ijã ar ijaxwe nhõrmã memã ar ije Jeju bĩn djwỳnh jarẽnho aba, ane.

<sup>29</sup> Nhyr Pedrumẽ Jeju kute ar anorja kunĩ memã kum,

—Bar me amã arẽ ga me ama. Be, dja Metĩndjwỳnh ar imã 'ã karõ bar mrãmri ajbit kabẽn markumrẽx ne kõt ar amijo iba. Nhyr be, dja me te ar imã atemã kabẽn jarẽ bar mar kêt ne. <sup>30</sup> Be, Metĩndjwỳnh kute me bakukãmãreo ba ja ne arỳm akubyn Jeju tĩn ne. Me ga ne ga me pĩ'ã anhõn arỳm abĩ. Nhyr Metĩndjwỳnh arỳm akubyn o tĩn ne.

<sup>31</sup> Be, tãm ne Metĩndjwỳnh arỳm o wabi nhyr arỳm ubõk'ãnh bẽnjadjwỳr rax ne memã nhỹ. Kute me utãr kadjy memã nhỹ. Dja mebê idjaermã amakbõ nhyr me arỳm amikam kaprĩren wãnh axwemã iren Metĩndjwỳnh'ỳr amijo akẽx. Nhyr kam Metĩndjwỳnh arỳm me axwe maro aknon mekam ngryk kêt. Ja kadjy ne Metĩndjwỳnh

arỳm Jeju wabi nhyr memã nhỹ. <sup>32</sup> Ar ba ne bar omũn memã 'ã idjujarẽn ar iba. Metĩndjwỳnh Karõdjwỳ ne omũ. Me kute kabẽn mar ne kõt ar amijo baja ne Metĩndjwỳnh arỳm memã Karõ jano nhyr arỳm meo ba. Nãm ã Pedru ar memã ane.

<sup>33</sup> Nhyr me arỳm ar kabẽn man arkam ngryk ne àkrẽo kumex. Ne bit kute ar parmã. <sup>34</sup> Nhyr Gamarij raxja arỳm me rũnh nhipõkri kãjmã dja. Kubê ne mebê pardjẽu'õ ne kubê mebê idjaer kukràdjã mar djwỳnh'õ. Nhyr me kunĩ kum kĩnh. Gamarij kãjmã djan Pedru ar'ã memã kum,

—Ar o akator ngrire, ane. Nhyr me arỳm aro kato. <sup>35</sup> Nhyr Gamarij arỳm ar kãxã memã kum,

—Ba ar amã arẽ. Kwãrĩk wãnh ajmã aro kêt. Dja gar ar par jabej mỳj dja gar ijukri nê?

<sup>36</sup> Ba ar amã arẽ gar ama. Amrẽbê me'õbê Teuda ari memã amiraxo àmra ar ba. Nhyr me krãptĩ kute 400 pyrãk mã kõt ajkamẽ. Nhyr kam me arỳm kubĩ nhyr me kunĩ kõt baja arỳm ajmã nhyr arỳm kêt ne.

<sup>37</sup> Nhyr kam me'õbê Djuda memã amijo amirĩt ne. Bẽnjadjwỳr bajtem amrẽbê kute me idji'ã pi'õk no'õko ãmri ne Djuda memã amijo amirĩt ne. Pykabê Garrẽjakam ne abatãnh djã. Djuda amijo amirĩt ne amikõt me krãptĩ kamẽ. Ne kam adjwỳnhdjwỳ arỳm ty nhyr me kunĩ kõt bajadjwỳ arỳm ajmã.

<sup>38</sup> Be, Teudamẽ Djudakõt me krãptĩ ba. Ne kam me ta arỳm bimãnhja dja gar ama. Pedru arkum anhkra karo gẽ ar ta mekõt ar ba. Godja ar ta amikabẽnkõt meo ba jabej nhyr me ta ã ajmã. Amrẽbê me ja kõt dja me ta ã bimãnhho ane. <sup>39</sup> Nãr, godja ar mrãmri Metĩndjwỳnh kabẽnkõt meo bakumrẽx jabej gwaj te aro àpanh ne aben bê me ngrãnh prãmje. Gwaj ren aro ajkẽn arỳm ren Metĩndjwỳnhmã amikurẽtuw.

<sup>40</sup> Nãm ã memã ane nhyr me arỳm kõt amikabẽn dji. Ne kam amiwỳr Jeju kute ar anorja 'uw nhyr ar arỳm bõx. Nhyr kam me ar titik ne arkum,

—Kwãrĩk wãnh Jeju kukwakam memã adjujarẽn kêt, ane. Ne kam arỳm arkum ire nhyr ar tẽ.



<sup>41</sup> Djãm ar kaprĩre ne ar tẽ? Kati. Ar kĩnhkumrẽx ne me rũnhbê tẽ. Mýkam ne ar kĩnh? Bir, ar amim,

—Be, Metĩndjwýnh ta ne amim ar ijã karõn amim, “Be, me kum Jeju kurê. Dja kõt me kum ar adjwýnhdjwý kurê.” Nãm ã amim ar ijã karõo ane. Nãm ar ã amim anen arým kĩnhkumrẽx. Metĩndjwýnh ta kute amim ar'ã karõkõt ar tokrykam ar kĩnhkumrẽx ne me rũnhbê tẽ. <sup>42</sup> Ne kam akati kunĩkõt kãj bê memã Jeju kukràdjã'ã ujarẽnh ar ba. Metĩndjwýnh nhõ kikretikam o ba. Me õ kikre kunĩ kõt o ban memã kum,

—Mrãmri ne Jejubê Kritukumrẽx. Mrãmri ne Metĩndjwýnh Jeju'ã me banhõ Bẽnjadjwýrbê kumkati mẽnkhkumrẽx, anhýro ba.

## 6

### *Me kute amijo Ar kubê 7 pytãr.*

<sup>1</sup> Nhykam Jejukõt me ba djwýnh arým krãptĩ: Ne kam me kwý me bajtembê kregu kabẽnkam kabẽn nhykam me kwý mebê idjaer kabẽnkam kabẽn. Nhykam kregukam me kwý kabẽnja idjaerkam me kwý kabẽnjakam kaprĩre ne. Nãm me Jeju kute ar anorjabê 12'ã abenmã kum,

—Be, Pedru ar akati kunĩkõt me 'uwtĩ djuw mex nhykam me bakam me 'uwtĩ kwý 'ã kãtãm, ane. <sup>2</sup> Nhykam Pedru ar arým kuman arým amiwýr Jeju kõt me ba djwýnh krãptĩ:ja 'uw. Nhykam me ar'ã akuprõ nhykam ar arým memã kum,

—Godja bar memã mýjja nhõrbito iban arým te ije Metĩndjwýnh kabẽn'ã memã idjujarẽnh prãmje. Nhykam arým ar akaprĩre ne.

<sup>3</sup> Be, mýj dja gwaj nẽ? Bir, akmere, àpnhĩre ar, dja gar me kwýo aben man me'ã aben kukij ne abenmã kum, “Djãm me kunĩ kute ar mex jarẽ? Djãm Metĩndjwýnh Karõ raxo ar kadjwýnhbê nhýn aro ba? Djãm ar krã mex”? ane. Dja gar ã me kabio ane. Nhykam me kwý ã mexo ane, gar mekam amijo Ar kubê 7 pytãn ar imã ar arẽ. Ar imã ar arẽ bar arým ar'ã meo djuw mex djwýnh rẽ. <sup>4</sup> Ne kam meo djuw mex kêt ne ate ikrã. Ate ikrãn arým Metĩndjwýnhmã ikabẽn 'ãno djan memã kabẽn jarẽnh 'ãno djan ar o iba, ane.

<sup>5</sup> Nãm ar ane nhykam me kunĩ arým kum ar kabẽn kĩnh ne. Ne kam arým amijo Exewão pytã. Nãm mrãmri tu amim Metĩndjwýnh markumrẽx. Nhykam Metĩndjwýnh Karõ raxo kadjwýnhbê nhýn ar o ba. Nhykam me amijo me kwý pytã. Piripimẽ Prokorumẽ Nikanõmẽ Ximõmẽ Pamena-jmẽ Nikoraumẽ ne me amijo ar utã. Nikorau ja ne amrêbê kubê me bajtem. Krĩraxbê Æxikikam ne abatãnh djã. Ne kam arým mebê idjaer kukràdjã man kõt ar amijo ba. Ne kam arým tu amim Jeju markumrẽx. Mebê kregu kabẽnkam ne kabẽn. <sup>6</sup> Nãm me amijo ar utãn arým Jeju kute ar anorja kabem aro akuprõ. Nhykam ar arým aro Metĩndjwýnhmã a'uw ne ar'ã ikra jadjuw.

<sup>7</sup> Nhykam me kute Jeju mar arým amũ memã Metĩndjwýnh kabẽn jarẽnhokumex. Nhykam me kãtãm krãptĩ arým tu amim Jeju markumrẽx. Nhykam Jejukõt me ba djwýnh arým Djeruxarẽkam àptãr mex ne. Nhykam me kadjy Metĩndjwýnh mar djwýnhdjwý krãptĩ: tu amim Jeju markumrẽx ne kabẽn man kõt ar amijo ba.

### *Me kute Exewão pa 'amýnh.*

<sup>8</sup> Exewão ne tu amim Metĩndjwýnh mar tý:xkumrẽx nhykam Metĩndjwýnh arým kum tý:x jadjã. Kum týx jadjã nhykam arým me ipõkri mýjja pumũnh kêt rũnh nhípẽxo ba. Me punu mex nhykam meo mexo ba. Me te kute mýjja marmã kam no tyk ne ku'ẽn kute Metĩndjwýnh raxmã kator kadjy ne ipẽxo ba. <sup>9</sup> Nhykam ate me kwý kam kabẽn punun arým Exewãomẽ aktã kabẽno aben japanho dja. Mebê idjaer bikprõnh djã 'õ kurũm ne me mõ. Me bikprõnh djã jamã ne me kum,

—Me ta ar ban ta amim àpẽnh ar ba ne ja, ane. Krĩraxbê Xirenimẽ Arexã kurũm ne me ja mõ. Nhykam pykabê Xirx-ijmẽ Adjij kurũm me jadjwý mõ. Ne kam Exewãomẽ aktã kabẽno aben japanho dja: <sup>10</sup> nhykam Metĩndjwýnh Karõ kukwakam memã kabẽn ne kabẽn katãto me akrenh mex ne. Nhykam me te: kute kabẽno itymã o ku'ẽ.

<sup>11</sup> Te: kute kabẽno itymã o ku'ẽn kam tẽn arým me kãxã me kwýmã pi'õk kaprĩ jarẽ. Nhykam me arým me'ýr bõx ne memã 'ẽx. Pi'õk kaprĩ pãnh arým memã Exewão'ã 'ẽx ne me kunĩmã kum,

—Be, Exewão ne arým me bakukãmãkjê Mõjdjẽmẽ Metĩndjwýnh japry bar arým kuma. Nãm me ã anen mebê Exewão kurêo dja.

<sup>12</sup> Mebê kurêo djan arým memã kurêtuw. Mebêngêtmẽ Mõjdjê kukràdjã mar djwýnhmã kurêtuw. Nhym me arým kam àkrêo kumex ne 'yr prõt ne o tým ne pa 'amý. Nhym me rũnh krãptĩ arým kutêp akuprõ nhym me arým me 'yr o bõx.

<sup>13</sup> Ne kam me rũnh kabem me 'êxnhĩ kwý dja. Nhym me arým me rũnhmã Exewão'ã 'êx ne memã kum,

—Me'õ ja ne mã Metĩndjwýnh nhõ kikreti japryõ ban mã Mõjdjê kukràdjã japryõ ba.

<sup>14</sup> Nãm mã memã kum, “Nadjarekam Jeju dja ĩ Metĩndjwýnh nhõ kikretio ajkẽn pyka mẽ o amrà. Mõjdjê kute me bakukãmãremã kukràdjã jarẽnhja dja pãnh me bamã kukràdjã 'õdjwý jarẽ gwaj baje we mar ne kõt amijo babamã.” Nãm ã memã anhỹro ba bar arým kuma. Nãm me 'êx ne ã me rũnhmã arẽho ane.

<sup>15</sup> Nhym kam me rũnh kunĩ Exewãokam no ty. Kam no ty nhym nokre arým amijo Metĩndjwýnh kadjy mrãnh djwýnh nokre pyràk nhym me arým nokre pumũ.

## 7

*Exewão me rũnh krãptĩmã me kukãmãkjê'ã ujarẽnh.*

<sup>1</sup> Nhym kam me kadjy Metĩndjwýnh mar djwýnh nhõ bẽnjadjwýr rax kum kabẽn ne kum,

—Djãm kõt ne me arẽ? ane.

<sup>2</sup> Nhym tu me kukãmãre'ã ajarẽn memã kum,

—Akmere, mebêngê ar, dja ga me ik-abẽnja ma. Metĩndjwýnh ne me bakukãmãre Abraõomã amijo amirĩt. Prĩne me:xkumrẽx ne uma: ne arým kum amijo amirĩt ne. Pykabê Arãkam ar ba kêttri Mexomikam ar bari ne Metĩndjwýnh arým Abraõomã amijo amirĩt ne. <sup>3</sup> Ne kam kum, “Anhõ pyka kurũm akato. Kam anhõbikwa ar baja Ar kubê akato.

Dja ga tẽ: ba kam ĩ amã pyka 'õdjwý jakre ga kam 'yr tẽn 'yr bõx”, ane.

<sup>4</sup> Nhym kam kabẽn kõt pykabê Kaudjêkam me ja nhõ pyka kurũm katon tẽ. Tẽ:n kam arým pykabê Arã'yr bõx ne kam ar ba.

Nhym kam bãm kute irja arým kam kubê ty. Nhym kam Metĩndjwýnh arým pykaja tãmmã ano nhym 'yr tẽn arým 'yr bõx. Kam ne ga me ar aba. <sup>5</sup> Djã ne Metĩndjwýnh pyka jakam kum pyka 'õ ta nhym arým o aminhõ? Kati. Kute kam kum pyka'õ 'yr kêtikumrẽx. Kum 'yr kêt ne arým kukãm kum arẽnhbit ne kum, “Dja ba ĩ anhõ kadjy amã pyka ja kanga. Dja akrakam kra aben djõ'ã apõx ne arým atãmdjwý krãptĩ: Me jamẽ me amã dja ba kanga ga me arým o aminhõ.” Nãm ã kraxje kra'õ kêt rã'ãkam ã kum ane. <sup>6</sup> Ne kam Metĩndjwýnh ajte Abraõomã kum,

“Atãmdjwý krãptĩ dja me me bajtem nhõ pykakam ar ba. Ne kam arým memã àpẽnh kajgo ar ba. Ar ba nhym me arým àpẽnh pytĩo me kamjêro ba. Meo ba: nhym pyka wãkam arým me'ã amex krãptĩ: kubê 400 apêx.

<sup>7</sup> Dja ba kam me tokry pãnh meo ajkẽ. Me bajtem kute me àpẽnh'ã memã àpnẽnh djwýnhõ ajkẽ. Kam dja atãmdjwý ar katon arým pyka jakam bõx ne imã àpẽnh ar ba.”

Nãm ã Metĩndjwýnh Abraõomã ane. Nhym Exewão kõt memã arẽ. <sup>8</sup> Ne kam itepã memã kum,

—Ne kam Metĩndjwýnhmẽ Abraõo ar abenmã kabẽn jarẽnh mãmdji nhym kamã Metĩndjwýnh kum, “Dja ga me aben djõ'ã me my nhinhu kã rê”, ane. Nhym kam arým Idjak dji nhym ruw. Nhym 'ã akatibê 8 nhym arým kra my nhinhu kã krãta. Nhym kam abatãnh ne arým Djako dji nhym ruw. Ne kam abatãnh ne kam me bakukãmãre kubê 12 jadjuw. Nãm ar aben jatãri apõx tẽ ne arým abatãnh ne.

<sup>9</sup> Ne kam te kute Jõdje pyràk prãmje arým kam ngryk ne. Kam ngryk ne pi'õk kaprĩ kadjy arým me bajtemmã kanga. Nhym kam me pykabê Edjitukam kum ire nhym kam memã àpẽnh kajgo ar ba. Nhym be, Metĩndjwýnh ne mã Jõdje mẽ amijo kajkep <sup>10</sup> ne kaprĩ djã kunĩbê utã. Nãm kum krã mex jadjã nhym bẽnjadjwýr arým kum kĩnh. Edjitukam me õ bẽnjadjwýr rax nhid-jibê Parao kum kĩnh ne arým 'ã bẽnjadjwýr mẽ. Nhym kam pykabê Edjitukam Parao

nhõ me kunĩmã nhỹn kum õ mỳjja kunĩ pumũnho ba.

<sup>11</sup> Nhym kam Edjitukam me jamẽ pykabẽ Kanaãkam me ja kunĩbẽ djwỳ kêt. Nhym prãm arỳm me pa:ro dja nhym me arỳm kaprĩ:ren kumex. Nhym me bakukãmãre ar te amityx djã jabej aprã. <sup>12</sup> Ne kam abenmã kum, “Edjitukam ne me djwỳo atom nhym kumex”, ane. Nhym Djako me kabẽn man arỳm djwỳ'ỳr me bakukãmãre ar ano. <sup>13</sup> Nhym ar Edjitu'ỳr tẽn arỳm 'ỳr bõx. Ne kam akẽx ne arỳm akubyn aminhõ pyka'ỳr bõx. Ne kam ajte 'ỳr tẽn 'ỳr bõx. Nhym kam kamy arkum amijarẽnho amirĩtkumrẽx ne arkum, “Ba. Axikõt gwaj bajapõx”, ane. Nhym kam me Paraomã Jõdje nhõbikwa jarẽ nhym kuma.

<sup>14</sup> Nhym kam Jõdje arỳm bãm Djakomẽ ar'ỳr kamy ar ano. Õbikwa kunĩ'ỳr ano. Me abenã ar mẽnhkam ne ar krãptĩkumrẽxbẽ 75. <sup>15</sup> Nhym kam Djako ar Edjitu'ỳr tẽn kam 'ỳr bõx ne kam arek kam ar ba. Nhym kam Djako kubẽngẽtte kubĩ. Nhym kam me bakukãmãre arkubẽngẽtte ar kupa. Aben nhitepã ar paro tẽ. <sup>16</sup> Nhym me amũ krĩraxbẽ Xikĩkam aro ban arỳm kẽnkrekam ar angij. Amrẽbẽ: ne ar kukãmãre Abraõo kute me tyk jangjẽn kadjy mebẽ kẽnkre by. Xikĩkam Imõ tãmdjwỳmã ne ngõnhponho pĩ'õk kaprĩ ngãn pãnh kẽnkre ja by. Kẽnkre jakam ne me ar angij.

<sup>17</sup> Nhym tũmrãm Metĩndjwỳnh arỳm kute memã pyka kanga kadjy amikabẽn tũm ma. Kute amrẽbẽ: Abraõomã pyka jarẽnhja arỳm kute memã kanga kadjy amikabẽn tũm ma. Nhym Edjitukam arỳm me àptàr mex mõ. <sup>18</sup> Me àptàr mõ nhym atemã bẽnjadjwỳr rax me kadjy kato. Bẽnjadjwỳr ja ne kute me kukãmãre Jõdje'ã ujarẽn mar kêt. <sup>19</sup> Nãm me kadjy katon arỳm me banhõ me wỳnhmã 'ẽx ban ar meo bikẽnho ba. Nãm me bakukãmãremã me prĩre'ã karõn memã kum, “Dja me prĩre axidjuw ga me bõm arẽ gẽ ty”, ane.

<sup>20</sup> Nhym kam Mõjdjẽ ruw. Nhym Metĩndjwỳnh kum kĩnh. Nhym kam nã ta ùrkwãkam o kaõro krĩ nhym arỳm 'ã mytyrwỳ amãnhkrut ne ikjẽkêt apẽx. <sup>21</sup> Nhym kam me bõm kudji. Nhym Parao kra ni arỳm amim kumỳn kra'ã amim o

djuw mex. <sup>22</sup> Nhym kam me kum pykabẽ Edjitu nhõ me ja kukràdjã kunĩ jarẽ nhym arỳm kuma. Ne kute me kabẽn jarẽn kadjy kabẽn mexkumrẽx ne àpẽn mex kadjy tỳxkumrẽx.

<sup>23</sup> Ne arỳm abatàn mex ne. Rwỳk'ã amexbẽ 40 apẽx nhym amim, “Ba 'ỳr inhõ me wỳnhbẽ idjaer pumũ”, ane. <sup>24</sup> Ne me'ỳr tẽn kam me'ỳr bõx. Nhym Edjitukam me kra'õ mebẽ idjaer'õo bikẽnho dja nhym omũn arỳm o ngryk ne kubĩ. <sup>25</sup> Be, kute bĩn kेत्री ne amim, “Be, Metĩndjwỳnh kukwakam dja ba me utã. Godja me kõt ima”, ane. Nhym kam me kute mar kêt. <sup>26</sup> Nãm Edjitukam me kra'õnh bĩ nhym 'ã akati nhym õ me wỳnh ar aben tako dja. Nhym bit kute aro mexmã aben nẽje arkum kabẽn ne arkum, “È, ar ikabẽn ma. Ar aje abeno anhõbikwajakam aben tako dja”, ane.

<sup>27</sup> Nhym kute ikjẽo bikẽnho ãmja arỳm amũ Mõjdjẽ kujaten kum, “Nhỹnh ne me'õ me ikadjy ajã bẽnjadjwỳr mẽ, ga aben nẽje ar imã akabẽn ne? <sup>28</sup> Ga ne ga amũja'ã Edjitukam me kra'õnh bĩ. Djãm aje ã ijo anhỹrmã”? ane. <sup>29</sup> Nhym arỳm kuman amijã maje atemã pykabẽ Midjijãmã prõt ne. Prõt ne kam 'ỳr bõx ne arỳm me bajtemwãkam ar ba. Ar ba:n kam arỳm kra ja dji nhym ruw. Nhym ajte ja dji nhym ruw.

<sup>30</sup> Nhym kam ar ba: nhym 'ã amex krãptĩbẽ 40 apẽx. Nhym akati 'õkam arỳm kapõt kukritkam ar ba. Krãnhbẽ Xinaj bu'ã kapõtka ar ba: nhym akaõk tu põko dja. Nhym kuwykam Bẽnjadjwỳr djwỳnh kadjy mrãnh djwỳnh kum amijõ amirĩt ne. <sup>31</sup> Nhym te kute marmã kam no tyn djan amim, “Je tõ, mỳj ne wã”? ane. Ne kute omũnh mexmã 'ỳr bikamẽn tẽn nhym Bẽnjadjwỳr djwỳnh kum,

<sup>32</sup> “Ba ne ba ibẽ me akukãmãre nhõ Metĩndjwỳnh.

Ibẽ Abraõomẽ Idjakmẽ Djako ar õ Metĩndjwỳnh.”

Nãm ã Bẽnjadjwỳr djwỳnh kum ane. Nhym Mõjdjẽ umaje tertet ne ibõn djan te kãjmã 'ỳr krãn kute omũnhmã.

<sup>33</sup> Nhym Bẽnjadjwỳr djwỳnh kum,

“Ë, aparkà kaba. Inhõ pykakam ne ga adjãm wã. Kwãrĩk wãnh o abikẽnh kêt.

<sup>34</sup> Ë, pykabê Edjitukam me kra ne inhõ me jao bikẽnhõ ba ba arým mrãmri me tokrykõt omũn me kangãngã ma.

Ije me utàr kadjy ne ba ruw. Amrẽ tẽ ba Edjitumã ajano.”

Nãm ã Môjdjê mã ane.

<sup>35</sup> Be, Môjdjê ja ne me amrêbê kangan kum,

—Nhýnh ne me'õ ajã bẽnjadjwýr mẽ ne ga aben nêje ar imã akabẽn ne? ane. Be, me te kanga nhym Metĩndjwýnh ta arým me kadjy ano. Memã bẽnjadjwýr kadjy ne ano. Kute me utàr kadjy ne ano. Bẽnjadjwýr djwýnh kadjy mrãnh djwýnh ne akaõk tu põkkam kum amijo amirĩt nhym arým me kadjy ano. <sup>36</sup> Nhym kam Môjdjê Edjitu kurũm meo mõ. Kamã ne me aêrbê mýjja pumũnh kêt kwý nhipêx. Me te kute mýjja marmã kam no tyk ne ku'ên Metĩndjwýnh raxmã kator kadjy mýjja kwý nhipêx. Edjitukam ipêx ne ajte ngõ ra:x nhidjibê Kamrêkrekam ipêx. Ne kam kapõt kukritkam meo ba: nhym amex krãptĩbê 40 me'ã apêx. Nãm ã Exewão memã ane.

<sup>37</sup> Ne itepã ajte memã kum,

—Môjdjê ja ne mebê idjaermã kum,

“Ba ne ba Metĩndjwýnh kukwakam me amã kabẽn jarẽnhõ iba. Dja Metĩndjwýnh ã me akadjy amijo me anhõbikwa 'õ pytà. Amijo utà nhym arým ikudjwa ã me amã kabẽn jarẽnhõ ane.”

Nãm ã Môjdjê memã ane.

<sup>38</sup> Be, Môjdjê ja ne kapõt kukritkam ar meo aben pydjın meo ba. Nhym kam krãnhbê Xinajkam Bẽnjadjwýr djwýnh kadjy mrãnh djwýnh kum kukràdjã jarẽ. Me kute katàt amijo ba'ã Metĩndjwýnh kute memã karõkam kukràdjã ja ne kum arẽ. Me kute mar ne tĩn ne ar bamã ne kum arẽ. Nhym arým me bakukãmãremã arẽ. Nhym me aben djõ'ã abenmã arẽ gu me bakamingrãnyre arým baje mar ne o baba.

<sup>39</sup> Nhym be, me bakukãmãre ne me kum kabẽn mar prãm kêt. Me aminhirõ bê kabẽn rẽn arým te akubyn Edjitumã mõrmã bikraro nhý. <sup>40</sup> Môjdjê krãnh nhimõk'ã kute amikràkam ne me arým Arãomã kum,

“Môjdjêwã, kute Edjitu kurũm me bajo kator ne kute me bajo mõr djwýnhwã birãm mýjwã ne arým ajmã on. Nhym got omũ. Ýr aprõt ne me batĩndjwýnh karõ kwý nhipêx gẽ me bakukãm ba.”

Nãm me ã Arãomã ane. <sup>41</sup> Ne kam arým mrybãri krare karõ nhipêx ne o we Metĩndjwýnh. Ne kam arým we mry karõ kĩnh djã'ã mryo bõx. O bõx ne parbê kudjin arým kum kubĩ. Ne arým kute ikrao mýjja nhipêxjakam kĩnh katio dja. <sup>42</sup> Nhym Metĩndjwýnh arým mebê amijo akẽx ne wãnh memã ire. Me ta wãnh kute kanhêti krãptĩmã rax jarẽnhõ ba kadjy memã ire. Ije amã arẽnh kõt ne Metĩndjwýnh kukwakam kabẽn jarẽnh djwýnh kabẽn'ã pi'õk no'õk. Kamã ne Metĩndjwýnh memã kum,

“Ga me abê idjaer, djãm imã ne ga me mry paro aba? Me aje mýjjamã mry paro aba nhym 'ã amex krãptĩbê 40 apêxja djãm imã ne ga me mry pa got? Arkati.

<sup>43</sup> Ate ne ga me mýjjao metĩndjwýnh karõ nhipêx ne kum rax jarẽnhõ aba. Ne mã me karõbê Morkimã kikreo aba. Ne me anhõ metĩndjwýnhbê Rẽnpãnh nhõ kanhêti karõo aba. Aje ikupa'ã amijo aba prãm kam dja ba arým me anhõ pyka djwýnh bê me akujate. Dja ba me bajtem nhõ krĩraxbê Babirõnij nhijukri me akujate.”

Nãm ã Metĩndjwýnh memã ane. Nhym Exewão arým kõt me rũnhmã arẽ.

<sup>44</sup> Ne itepã ajte memã kum,

—Mrykão kikre ne me bakukãmãre kapõt kukritkam ar o ba. Metĩndjwýnh kute memã amijo amirĩt nhym me kute mar kadjy ar o ba. Ta ne Môjdjê mã 'ã karõn kum, “Ije kikre'ã amã karõ kõt dja ga ipêx.” Nãm ã Môjdjê mã 'ã karõo ane. Nhym arým kõt ipêx nhym me ar o ba. <sup>45</sup> Nhym kam ô'ã me bakukãmãremẽ Djodjuwemẽ ar kikreo ba:n arým apýnh me bajtem nhõ pyka djãri'ýr o bõx. Nhym Metĩndjwýnh arým apýnh me bajtem ba djãrio apan me kujate. Me kujate nhym me arým me pãnh pykakam ar ba. Nhym mebêngêt aben kukãm me paro mõ. Me paro mõ nhym me tàmdjwý arým aben djõ'ã mrykão

kikreo krĩ. O krĩ: nhym kam tũ:mràm Dawi arým me kadjy katon kam me kadjy bēnjadjwýr. <sup>46</sup> Nhym kam Metĩndjwýnh kam kĩnh. Nhym kum, “Metĩndjwýnh, abē Djakoo aba djwýnh. Ba amã anhũrkwã nhipêx”, ane. <sup>47</sup> Nhym be, Dawi ne kute kum kikre nhipêx kêt. Nhym be, krabê Xaromão ne arým kum kikre nhipêx.

<sup>48</sup> Nhym be, djãm me kute ikrao kum kikretikam Metĩndjwýnhbê kumkati krĩ prãm got? Arkati. Me bakukãmãre kabēn kôt ne ba ikabēn jarē. Amrēbê: ne me Metĩndjwýnh kukwakam memã kum,

“Bēnjadjwýr djwýnh ne me amã,

<sup>49</sup> ‘Be, kute me bēnjadjwýr rũnh krĩ djà pyræk ne ã kýrũm kàjkwakam ikrĩ djà ã imã nõr ane. Kàjkwabê ne ikrĩ djà.

Kute me par ku'ê djà pyræk ne pyka ã iparbê imã nõr ane.

Be, djãm me kute imã kikreti'õ nhipêx nhym imãnhkutãmã? Arkati.

Djãm me kute imã ikrĩ djà'õ nhipêx ba kam inhýr ne ityk djà kêtãmã? Arkati.

<sup>50</sup> Ba ne ba inhikrao kàjkwamē pyka nhipêx. Djã ne ga me ja ma?’

Nãm ã Bēnjadjwýr djwýnh me amã ane.”

Nãm kukwakam kabēn jarēnh djwýnh ã memã ane. Ga, me kute ikrao kum kikreti nhipêxjakam Metĩndjwýnhbê kumkati kam krĩ kêtja pumũ. Nãm ã Exewão memã ane.

<sup>51</sup> Ne kam itepã ajte memã kum,

—Ba me amã arē ga me ama. Be, me akukãmãre kwý kute arĩk amijo ba'ã ne ga me amijakren arĩk ar amijo aban mã aminhirõbê Metĩndjwýnh kabēn rēn anhõkre kadjwýnhbê ajaxwe ar aba. Ne kam ajamakkre kêtumrēx ne mã aminēje Metĩndjwýnh Karõbê adjaptar aba. <sup>52</sup> Nhýnh got Metĩndjwýnh kukwakam kabēn jarēnh djwýnh'õ nhym me akukãmãre kute o bikēnh kêt? Nãm me mã aben kukãm me kupa. Metĩndjwýnh kukwakam kabēn jarēnh djwýnh mã me bakukãmãremã kum, “Kritu ne katàt ne axwe kêtumrēx. Mrãmri dja bõxkumrēx.” Nãm me mã ã memã ane nhym kam me mã me kupa. Tãm ne ajbir jakam bõx ga me arým kangan abĩ. <sup>53</sup> Be, kadjy mrãnh djwýnh ne me kadjy Mõjdjemã Metĩndjwýnh kabēn jarē. Me kute katàt amijo ba'ã kabēn jarē ga me aben djõ'ã

o aba kajgon mar kêt ne kôt amijo aba kêtumrēx. Nãm ã Exewão memã ane.

*Me kute Exewão bĩn.*

<sup>54</sup> Nhym me kute amijã kabēn markam arým ngryk tỳx mex ne. <sup>55</sup> Nhym be, Metĩndjwýnh Karõ arým raxo Exewão kadjwýnhbê nhýn ar o ba. Ar o ba nhym arým kãmã krãn kàjkwa pumũn kam Metĩndjwýnh pumũ. Prĩne me:xkumrēx ne uma: nhym omũ. Nhym Jeju Metĩndjwýnh djubõk'ãnh dja nhym omũ. <sup>56</sup> Nãm Exewão ar omũn arým memã kum,

—Ë ota, arým ne kàjkwa abenbê ajkij. Kute amijo ĩ ne bõxja ne arým ra:x ne Metĩndjwýnh djubõk'ãnh dja, ba arým omũ, ane.

<sup>57</sup> Nhym kam me tu kàj bê amran amijamak'ã pron itepato 'ýr prõt ne. 'Ýr prõt ne o tỳm ne <sup>58</sup> arým krĩrax kurũm o kato, atykmã o katon kumē. Kumēn kam kēno titik ar o ba. Anhýr djwýnhram ne me'õ abatãnh nybê Xaur dja. Nhym me aminhõ kubêkào pôx ne parbê adjuw.

<sup>59</sup> Nãm me Exewão titik ar o ba nhym arým amijo Metĩndjwýnhmã a'uw ne kum,

—Bēnjadjwýr djwýnh Jeju, amim ikarõo wabi, ane. <sup>60</sup> Ne kam kõnkrão nhýn kàj bê àmrao kum kabēn ne kum,

—Bēnjadjwýr djwýnh, dja ga me kute ibĩn pãnh jarēnh kêt. Nãm ã ane nhym me arým kubĩ nhym arým ty.

## 8

*Me kute Jeju nhõ me jao bikēnhõ mõr nhym me bimãnh.*

<sup>1</sup> Be, me kute Exewão bĩn kētri ne Xaur memã kum, “Rã'ã me abĩ”, ane.

Nhym me kubĩn kam arým me krãptĩo bikēnhmo krax ne. Me kute amim Jeju mar ne kôt ar aben pydjio bajao bikēnhmo krax ne. Nãm me Djeruxarēkam meo bikēnhõ mõ:n me krãptĩ:o ajkē. Nhym me me umaje arým ajmã. Pykabê Djudējakam pyka kunĩkôt ajmã. Ne pykabê Xamar-ijkam pyka kunĩkôt ajmã. Jeju kute ar anorjabit ne ar arek Djeruxarēkam ar ba.

<sup>2</sup> Nhym me kwý kum Metĩndjwýnh jabêja ne Exewão mýn o mõn arým adjã. Ne kam abej mu:w. <sup>3</sup> Nhym be, Xaur arým àkrēn ari me kute amim Jeju maro bikēnhõ ba. Me kute

Jejukõt ar aben pydjio bajao bikẽnho ba:n kikre kunĩkõt mrãn wangij ne me bjẽro mrãn meo apõx. Nãm me mymẽ me nireo mõn arým mebẽ ijẽ.

*Piripi Xamarijkam bõx ne Jeju'ã memã ujarẽnh.*

<sup>4</sup> Nhyim me amũ bimãnhja ne me arým memã Metĩndjwýnh kabẽn jarẽnho mõ. Apýnh me ba djãri memã arẽnho mõ. <sup>5</sup> Kamã ne Piripi krĩraxbẽ Xamarijmã tẽn bõx. Ne kam arým kãj bẽ Kritu'ã memã ujarẽnh tẽ. <sup>6</sup> Nhyim me itepato arým kabẽn ma, me krãptĩ: kabẽn ma. Nãm myjja pumũnh kêt kwý nhipẽx nhyim me arým omũn kam kunĩ kabẽn mar 'ãno dja. <sup>7</sup> Be, me karõ punu me krãptĩo ba nhyim arým ano nhyim me karõ amran memã iren arým mã mõ. Nhyim ajte me akrymẽ me mrãnh kêt krãptĩo mex. <sup>8</sup> Nhyim kam me arým krĩrax wãkam kĩnhti:re ne.

*Ximãobẽ wãngare'ã ujarẽnh.*

<sup>9</sup> Nhyim krĩrax tãmkam ne me'õ. Me kum Ximão jarẽ. Ta ne kute amijo myjja mar pytãr, amijo apýnh myjja mar pytãr ne ari amijo wãngao ba. Nãm me noo biknor ar o ba nhyim me kam no tyn kumex. Nhyim mã amijo rax ne memã kum,

—Ë, ba ne ba iraxkumrẽx, anhỹro ba. <sup>10</sup> Nhyim me kãtãmmẽ me rũnh kunĩ ma:r ar o ban abenmã kum,

—Tãmwã ne Metĩndjwýnh pymao uman tỳ:x ne, ane. <sup>11</sup> Be, amrẽbẽ ne amijo apýnh myjja mar ne me kupẽnh ne me noo biknor ar o ba nhyim me arým maro ba. <sup>12</sup> Mar ar o ba: nhyim kam Piripi arým memã kabẽn jarẽ. Memã Metĩndjwýnh kute amim me utãr ne ar meo bakam kabẽn jarẽ. Ne Jeju Kritu'ã memã ajarẽ nhyim me arým kuman tu amim Jeju markumrẽx. Nhyim arým Metĩndjwýnhmã ngõmã me angij. Me mymẽ me nireo jangij.

<sup>13</sup> Nhyim kam Ximãodjwý arým mekõt amim kuma. Amim kuma nhyim me arým Metĩndjwýnhmã ngõmã adjã. Nhyim kam arým mã Piripi kõt ajkamẽ. Nhyim Piripi me aẽrbẽ myjja pumũnh kêt rũnh nhipẽxo ba. Me te kute myjja marmã kam no tyk ne kute Metĩndjwýnh raxmã kator kadjy ne

ipẽxo ba. Nhyim Ximão amim omũnho ban te kute marmã kam no tyn ku'ẽ.

<sup>14</sup> Nhyim kam me amũ Djeruxarẽkam memã kum,

—Be, pykabẽ Xamarijkam ne me arým amim Metĩndjwýnh kabẽn markumrẽx, ane. Nhyim Jeju kute ar anorja arým kuma. Kuman arým me'yr Pedrumẽ Djuão ar ano.

<sup>15</sup> Nhyim ar me'yr tẽn me'yr bõx. Ne kam Metĩndjwýnhmã meo a'uw ne kum,

—Dja ga memã Akarõ jano gẽ me 'amýn meo ba, ane. <sup>16</sup> Be, kraxje Metĩndjwýnh Karõ mekam rwýk kêt rã'ã. Nãm me Bẽnjadjwýr djwýnh Jeju kukwakam Metĩndjwýnhmã ngõmãbit me angij.

<sup>17</sup> Nhyim Pedru ar Metĩndjwýnhmã meo a'uw ne me'ã ikra jadjuw nhyim Metĩndjwýnh Karõ arým me 'amýn meo ba. <sup>18-19</sup> Pedru ar kute me'ã ikra jadjwýrkõt Metĩndjwýnh Karõ me 'amý nhyim Ximão arým amim omũn arkum,

—Ota pi'õk kaprĩ. Dja gar amikudjwa imã akre. Ba badjwý ar akudjwa maro iba ne me'ã aminhikra jadjwýro iba gẽ Metĩndjwýnh Karõ me 'amýn meo ba, ane.

<sup>20</sup> Nhyim Pedru kum,

—Metĩndjwýnh kute tu memã kajgo Amikarõ janorjakam ga arĩk amim, “Dja ba pi'õk kaprĩ pãnh Metĩndjwýnh Karõ man ar o iba”, ane. Kam gẽ Metĩndjwýnh me biknor tokry djãmã ajano ga anhõ pi'õk kaprĩmẽ ro'ã akuno. <sup>21</sup> Be, Metĩndjwýnhmã akadjwýnhbẽ ajaxwe rã'ãn kum amex kêt rã'ã. Kam ne ga aje Karõ mar prãm kêtumrẽx.

<sup>22</sup> On amikam akaprĩn wãnh ajaxwejamã anhiren Metĩndjwýnhmã amijo a'wý. Gẽ kute ajaxweo biknor ne akam ngryk kêt jabej. Aje Metĩndjwýnh Karõ'ã amim karõ punujao biknor ne akam ngryk kêt jabej kum amijo a'wý. <sup>23</sup> Be, arým ne ba apumũ. Ajaxwe kute ajamýnh tỳx ne kute ajo ba rã'ã. Nãm ã Pedru Ximãomã ane.

<sup>24</sup> Nhyim Ximão kum,

—Inẽje Bẽnjadjwýr djwýnhmã akabẽn gẽ aje imã akabẽn jarẽnhja kõt ijo anhỹr kêt, ane.

<sup>25</sup> Nhyim kam Pedrumẽ Djuão ar Bẽnjadjwýr djwýnh'ã memã amijarẽnho djan kabẽn'ã kãj bẽ memã ujarẽnho djan kam arým o ino re. Ne kam arým

Djeruxarēmã akēx ne. 'Yr mō:n mōr kōt memã Kritu'ã ujarēnh ny jarēnh mō. Pykabē Xamarijkam me ja apýnh me ba djari krāptĩ memã arēnh mō.

*Exopijkam me'õjamã Piripi Jeju'ã ujarēnh.*

<sup>26</sup> Nhyam kam Piripi arek Xamarijkam ar ba. Kam ar ba nhyam Bēnjadjwýr djwýnh kadjy mrānh djwýnh'õ arým 'yr bōx ne kum, —Kajmã djan amũ aparmã tē. Ga, Djeruxarēmē, krĩraxbē Gadjamē abenmã pry mēnhja pumũ. Pry 'ānh ne kapōt kukrit. Dja ga 'yr tēn 'yr bōx, ane. <sup>27</sup> Nhyam arým kajmã djan 'yr tē:n arým 'yr bōx. Nhyam me'õ pry'ã tē nhyam omũ. Õ pyka djwýnhbē ne Exopij. Kubē eunuku'õ. Exopijkam bēnjadjwýr rax nibē Kādjidji. Nhyam kukwakam ra:xi. Kubē õ nēkrēx kunĩ pumũnh djwýnh. Djeruxarē kurũm ne tē. Arým ne Metĩndjwýnhmã rax jarēn kam tē. <sup>28</sup> Ne kam kurũm akubyn õ pyka'yr tē. Õ kāmranhtýx, mry kute bjērjakam tē. Ne kam pi'ók jarēnh nhỹ. Metĩndjwýnh kukwakam kabēn jarēnh djwýnhbē Idjaij nhõ pi'ók ne arēnh nhỹ.

<sup>29</sup> Piripi me'õ ja pumũ nhyam Metĩndjwýnh Karõ kum,

—'Yr aprōt ne kāmranhtýxmē ro'ã tē, ane.

<sup>30</sup> Nhyam arým 'yr prōt ne ro'ã tē. Nhyam Idjaij nhõ pi'ók jarēnh nhỹ nhyam arým kuma. Ne kam kum,

—Ē, djã ne ga arým me kabēnwã ma? Mýj'ã ne kabēn amijakre? ane.

<sup>31</sup> Nhyam kum,

—Djãm ije mýjja mar godja ba mýjja'ã kute amijakreja ma. Kon, me'õ dja imã kraxkōt arē ba arým kōt kuma. Iwýr wabin inhikõ'ã nhỹ, ane.

<sup>32</sup> Me bakukãmãre Idjaij kabēn ne eunuku arēnh nhỹ. Nãm amim,

“Me kute bĩnmã o tē nhyam uwbōre kute mrãmri ne mrykĩ'ãtomti djuwbōre pyrãk. Ne kute mrãmri ne me arým kĩ jakãro ãmkam mrykĩ'ãtomti jabatãnh nyre bēn kēt pyrãk. Nãm ã aminēje kabēn kēto ane.

<sup>33</sup> Nãm me 'ex ne o kãtãm ne 'ã, ‘Tãmwã ne axwekumrēx. Tãmwã ne axwekumrēx’, ane. Axwe kētkumrēx nhyam me arým tu kum mýj axwe

pãnh jarē. Nhyam arým tyn wabi nhyam kute ô'ã me'õ kēt pyrãk”, ane. Tãm ne eunuku pi'ók kam arēnh nhỹ.

<sup>34</sup> Nhyam Piripi 'yr wabin ikõ'ã nhỹ nhyam kum,

—Imã arē. Mýj me'õ'ã ne Metĩndjwýnh kukwakam kabēn jarēnh djwýnh ja jarē? Djãm amijã nãr me'õ'ã? ane. <sup>35</sup> Nhyam kam Piripi eunuku kute pi'ók jarēnh kōt arým kum Jeju'ã ujarēnhmo krax ne arek 'ã ujarēnh tē.

<sup>36</sup> O tē:n kam arým ngõ'yr bōx nhyam eunukuja kum,

—Ota ngõ. Mýj dja ba nē ga Metĩndjwýnhmã ngõmã ijadjã? ane.

<sup>37</sup> Nhyam Piripi kum,

—Mrãmri aje tu amim Jeju markumrēx jabej ba kam arým ngõmã ajadjã, ane. Nhyam kum,

—Nã. Ba mrãmri tu amim Jeju Kritu markumrēx. Mrãmri kubē Metĩndjwýnh Krakumrēx, ane.

<sup>38</sup> Nhyam eunuku mry kute kã bjērmã kabēn nhyam arým dja. Nhyam kam ar ngõ'yr ruw ne arým nox ne. Nhyam kam Piripi arým Metĩndjwýnhmã ngõmã adjã.

<sup>39</sup> Ne kam ar wabin dja. Nhyam kam Bēnjadjwýr djwýnh Karõ tu Piripi byn mã o tē. Nhyam eunuku arým ijukri omũnh kētkumrēx. Ne kam õ pykamã tē. Arým kĩntiren tē. <sup>40</sup> Nhyam kam krĩraxbē Oxotokam ajte Piripi amirĩt ne. Ne kam bu'ã krĩ kunĩkōt memã 'ã ujarēnh tē. Tē:n kam krĩraxbē Xedjare'yr bōx.

## 9

*Xaur Jeju'yr amijo akēx.*

*Kar 22.3, 26.9*

<sup>1</sup> Nhyam kam Xaurja kute ari meo bikēnho baja kute me kangrōnh rã'ã. Kute Bēnjadjwýr djwýnhkōt me ba djwýnh kangrōnh rã'ã. Nãm mã me'ã memã kum,

—Gē me tu me kupa. Gē me tu me kupa, ane. Nãm memã anhýr rã'ãn arým me kadjy Metĩndjwýnh mar djwýnh nhõ bēnjadjwýr rax'yr tēn arým 'yr bōx ne kum,

<sup>2</sup> —Ba krĩraxbē Tamagukam me rũnh'yr tē. Dja ga me kute amim Jeju mar'ã pi'ók no'ók ne imã angã ba memã o tē. Ba apýnh mebē idjaer bikprōnh djakam me

rũnh kunĩkõt memã akreo tẽ. Dja me ak-abẽnkõt me kute amim Jeju mar jabej ne memã katon arým imã me kanga. Ba me uwpre amrẽ Djeruxarẽ'ýr meo tẽn awýr meo bõx, ane. Nhyam kam arým me'ã memã pi'õk no'õk nhyam arým kubyn me'ýr o tẽ. <sup>3</sup> Me 'ýr o tẽn kam arým krĩraxbẽ Tamagu tẽpo tẽ. Tẽpo tẽ nhyam tu aerbẽ kàjkwa kurým mýjja adjẽnhja prĩne kurwý. <sup>4</sup> Nhyam arým tu pykabẽ tým ne arým me'õ kabẽn ma. Nhyam kum,

—Xaur, Xaur, mýkam ne ga me kute amim imaro abikẽnho aba? Aje ba mãn ijo abikẽn pyrãk ane.

<sup>5</sup> Nhyam Xaur kum,

—Bẽnjadjwýr, mýj me ajõ ga ne ga imã akabẽn? ane.

Nhyam kum,

—Ba, ibẽ Jeju. Nã gãm me kute amim imaro abikẽnho aba ne aje ba mãn ijo abikẽnho aba pyrãk. Ne kam te adjumar mex prãmje. Ga, mry kute jẽnh bjẽrja pumũ. Me kute mýjja djwa mexo mry kamjýr nhyam arým umaje prõt týtýja pumũ. Nhyam kwý amakkre kêt kam tu amikamjýr djã kanã ne arým tokry ne. Gadjwý dja ga ari ijo abikẽnho aban arým atokry:. Nãm Jeju ã kum ane.

<sup>6</sup> Nhyam kam kum,

—Bẽnjadjwýr djwýnh, mýj ne ga amã kĩnh? Dja ba ã amã o ane, ane.

Nhyam kum,

—On kãjmã djan amũ krĩraxmã wadjã. Kam dja me amã 'ã karõ. Dja ga mrãmri katãt me kabẽn man kõt amijo abakumrẽx, ane.

<sup>7</sup> Nhyam Xaurkõt ar mõrja me'õ kabẽn man kam ar kute ã pumũnh kêt kumrẽx. Ne kam te: umaje te kabẽn mã. <sup>8</sup> Nhyam kam Xaur kãjmã djan no põt kajgon arým rĩt kêt ne. Nhyam kam ar pa 'amýn o tẽn arým krĩraxbẽ Tamagumã wadjã. <sup>9</sup> Nhyam rĩt kêt kumrẽx ne. Ne kam kute mýjja krẽn kêt ne kõm kêt'ã akati amãnhkrut ne ikjẽkêt apêx.

<sup>10</sup> Nhyam kam krĩraxbẽ Tamagukam ne me'õbẽ Ananij. Bẽnjadjwýr djwýnh ne Ananij nokrekam amirĩt nhyam arým omũ. Nhyam kum, “Ananij”, ane.

Nhyam kum, “Bẽnjadjwýr djwýnh, mýj nã”? ane.

<sup>11</sup> Nhyam kum,

—Kãjmã djan tẽn pry nhidjibẽ Katãt'ãnh tẽn Djuda nhũrkwã'ýr bõx. Kam Xaur jabej me kukja. Krĩraxbẽ Taxukam ne abatãnh djã. Dja ga abej me kukja. Wãkam ne Xaur Metĩndjwýnh mã amijo à'wýro nhý. <sup>12</sup> Be, ga ne ga arým amikukãm nokrekam amirĩt nhyam akarõ pumũ. Ga ne ga arým 'ýr wadjãn 'ã anhikra dji nhyam arým akubyn rĩt mex ne. Nãm ã apumũnho ane. Nãm ã Bẽnjadjwýr djwýnh Ananij mã ane.

<sup>13</sup> Nhyam kum,

—Je, Bẽnjadjwýr djwýnh, mýkam? Xaur wã ne umakumrẽx. Nãm arým Djeruxarẽkam anhõ me ja krãptĩ ajkẽ nhyam me krãptĩ arým imã arẽ. <sup>14</sup> Ne jakam arým me kadjy Metĩndjwýnh mar djwýnh nhõ bẽnjadjwýr ar me ijã pi'õk no'õk nhyam amrẽ o tẽ. Me ije amã amijarẽnhja kunĩ kadjy arým amrẽ pi'õko tẽ. Kute me idjuwpre kadjy ne o tẽ, ane.

<sup>15</sup> Nhyam Bẽnjadjwýr djwýnh kum,

—'Ýr tẽ. Ba ne ba inhõ àpẽn kadjy amijo utã. Dja me bajtemmã ijã ajarẽn me bẽnjadjwýr rũnh mã ijã ajarẽn mebẽ id-jaermã ijã ajarẽ. Ja kadjy ne ba amijo utã. <sup>16</sup> Dja ba ã kum, “Dja ga ã ijã adjujarẽn djõ'ã atokry kumex.” Nãm ã Xaur'ã Ananij mã ane.

<sup>17</sup> Nhyam kam arým 'ýr tẽ. 'Ýr tẽn kam arým Djuda nhũrkwãmã wadjãn Xaur'ýr bõx. Ne kam arým 'ã kute ikra djirkam kum,

—Xaur, akmere, gu banhõ Bẽnjadjwýr djwýnh Jeju ne ijano ba arým awýr bõx. Pry'ã atẽm nhyam kute amã amijo amirĩt ja tãm ne ijano ba awýr tẽ. Dja ga akubyn arĩt mex nhyam Metĩndjwýnh Karõ arým raxo akadjwýnhbẽ nhýn ar ajo ba. Ja kadjy ne ijano ba tẽ. Nãm Ananij ã kum ane. <sup>18</sup> Nhyam aerbẽ no kurým mýjja kute tepkã pyrãk rõrõk ne. Nhyam akubyn rĩt mex ne. Ne kam kãjmã dja nhyam kam arým Metĩndjwýnh mã ngõmã adjã. <sup>19</sup> Nhyam kam ajte õ kwý krẽn arým akubyn týtýx ne.

*Xaur memã Jeju'ã ujarẽnh nhyam me kum kurẽ.*

*A Kõ 11.32*

Ne kam arek Tamagukam Jejukõt me ba djwýnhmẽ ro'ã ar ba nhyam 'ã akati kwý



apêx. <sup>20</sup> Tamagukam ar bari ne apýnh mebé idjaer bikprõnh djakam kàj bê memã ujarênh tẽ. Nãm memã kum,

—Mrãmri ne Jejubê Bẽnjadjwýrbê kumkatikumrêx. Kubê Kritikumrêx. Kubê Metĩndjwýnh Krakumrêx, anhýr tẽ.

<sup>21</sup> Nhyim me kunĩ kute kabên markam te kute kraxkõt marn kam no tyn kumex ne aben kukij ne abenmã kum,

—Bãrãm tãmja ne Djeruxarêkam ari meo bikênhõ ba. Me kute Jeju Kritumã ami-jarênhjao bikênhõ ba. Bãrãm tãmja ne kute ajte me uwpre kadjy amrê tẽ. Kute me kadjy Metĩndjwýnh mar djwýnh nhõ bẽnjadjwýr ar'ýr meo bõx kadjy amrê tẽ, ane. <sup>22</sup> Nhyim kam Xaur kabên mexo amũ amikamênhõ tẽn arým kute memã Jeju jarênh mar me: xkumrêx. Nãm Tamagukam mebé idjaermê aktã kabêno aben japa nhyim me arým kabên kõt Jejubê Kritu ma. Mrãmri Jejubê Bẽnjadjwýrbê kumkatikumrêx man arým te kute kum kabên'õ jarênh prãmje. Te o anen õkre kadjwýnhbê arík amikabên kwý jarênhõ kumex.

<sup>23</sup> Nãm ã memã anhýr tẽ nhyim 'ã akati krãptĩ apêx. Nhyim kam mebé idjaer kwý arým o aben maro nhýn abenmã kum,

—Mýj dja gwaj Xaur on arým kubĩ? ane. Nhyim kam me arým amũ Xaurmã arê nhyim arým kuma. <sup>24</sup> Me õ krĩrax nêje ne bu'ã pyka tỳx nhípêx jabatànha nhyim kam apýnh ajkwa krekre djari. Nhyim me kute Xaur katorkõt bĩnmã ajkwa krekre kunĩ'ã ku'ên omũnh'ã rĩtkumrêx ne. Nhyim Xaur arým me kuma. <sup>25</sup> Nhyim kam akamãt nhyim Jejukõt me ba djwýnh krĩrax nêje pyka tỳx'ã Xauro wabin djan kadjy djudjêdjêo kaxnokai akà 'ãpren kam Xaur nhýr. Ne kam djudjêdjê 'amýn pyka tỳx burũm aparmã kumên o rwýko tẽn arým pykabê kudja. Nhyim kam kãjmã djan mã mebé katon tẽ.

<sup>26</sup> Tẽ:n kam arým akubyn Djeruxarêkam bõx. Ne kam bit Jejukõt me ba djwýnhmê ro'ã ýrmã. Nhyim me kum uman 'ã abenmã kum,

—E kum nhýnh ne tãmwã Jeju ma ne kõt ba? Godja ajte me bakwýo ajkê, ane.

<sup>27</sup> Nhyim kam Banabe o tẽn Jeju kute ar anorja'ýr o bõx. Ne 'ã arkum,

—Be, nãm prykõt tẽn arým Bẽnjadjwýr djwýnh pumũ nhyim kum kabên jarê. Nhyim kam arým krĩraxbê Tamagukam Jeju'ã memã ujarênh ba. Nãm kum me uma kêt ne kàj bê 'ã memã ujarênh ba, ane.

<sup>28</sup> Nãm arkum ane nhyim kam me arým kum uma kêt ne. Nhyim kam Djeruxarêkam Jejukõt me ba djwýnhmê ro'ã ar ba. <sup>29</sup> Ar ba:n kum me uma kêt ne Bẽnjadjwýr djwýnh kukwakam memã ujarênh ar ba. Nhyim mebé idjaer kwý ne me me bajtembé kregu kabênkam kabên. Nhyim Xaur arým me jamê aktã kabêno aben japanho dja. Aben japanho dja nhyim kam me bit kute Xaur bĩnmã.

<sup>30</sup> Nhyim Jeju kukwakam me kute abeno kamy arým me kuma. Ne kam Xauro tẽn krĩraxbê Xedjaremã o tẽn o bõx. Ne kam krĩraxbê Taxumã ano nhyim arým 'ýr tẽ.

<sup>31</sup> Nhyim kam me arým me kute amim Jeju marjao bikênhõ ino re. Apýnh me ja kute Jejukõt ar aben pydjio ba djari meo bikênhõ ino re. Pykabê Djudêjakam o ino re. Ne pykabê Garrêjakam o ino re. Ne pykabê Xamarijkam o ino re. Kunĩkõt ne me meo bikênhõ ino re. Nhyim me arým akubyn umar mex ne. Ne kam Metĩndjwýnh maro amũ amikamênhõ tẽn arým mar ra:x ne. Ne me kum Metĩndjwýnh pymakam katãt kabên kõt ar amijo ba. Nhyim Metĩndjwýnh Karõ memã kĩnh jadjã nhyim me arým kĩnhkumrêx. Nhyim me kãtãm krãptĩ arým tu amim Jeju markumrêx ne arým mekõt ajkamê. Nhyim kam me arým krãptĩ: tẽ.

*Pedru kute Anêjao mex nhyim Dokre tyk nhyim akubyn o tĩn.*

<sup>32</sup> Nhyim kam Pedru pyka kunĩkõt kute me omũnh kadjy tẽ. Me omũnhõ tẽ:n kam krĩbê Ridjakam me jadjwý'ýr bõx. Jeju nhõ me ja'ýr bõx. <sup>33</sup> Nhyim kamã me'õbê Anêja amrêbê akryn arek ikwã. Akry'ã arým amexbê 8 apêx. Nhyim Pedru arým omũ.

<sup>34</sup> Ne kam kum,

—Ë, Anêja, Jeju Kritu arým ajo mex ne. On kãjmã djan anhikwã djãwãõ mex, ane. Nhyim me aêrbê arým kãjmã dja. <sup>35</sup> Nhyim krĩbê Ridjamê krĩbê Xaronakam me ja kunĩ arým omũ. Ne kam arým Bẽnjadjwýr djwýnh'ýr amijo akêxo kumex.

<sup>36</sup> Pedru krĩbê Ridjakam arek ar ba. Nhyam kam krĩbê Djopekam Jejukõt ba djwýnh ni'õ ar ba. Idjibê ne Tabita. Mebê kregu kabẽnkam ne me kum Dokre jarẽ. Ukaprĩkumrẽx ne mã me õ mýjja kêtõ djuw mexo ba. <sup>37</sup> Ne kam kanẽn arým ty. Nhyam me amikukràdjãkõt ku'õn kikre tãmka kýjrũm kumoka'ẽkam kudji nhyam nõ. <sup>38</sup> Krĩbê Ridja ne krĩbê Djopeo rãm ne ja. Dokre ty nhyam kam me kum,

—Pedru ne Ridjakam ar ba, ane. Nhyam Jejukõt me ba djwýnh arým kuman Pedru'ýr ar amãnhkrut jano. Nhyam ar 'ýr tẽn kam 'ýr bõx ne kum,

—Ë, amikrà kêt ne Ridja'ýr tẽn, ane.

<sup>39</sup> Nhyam amibẽx ne 'ýr arkõt tẽn. Tẽn kam arým 'ýr bõx. Nhyam ar Pedruo tẽn kýjrũm kumoka'ẽ'ýr o wabi. Nhyam kam me 'uwtĩ kunĩ 'ýr bõx ne muw. Ne Dokre tĩnri kute apýnh me inõkãti, apýnh kubẽkã nhipẽx djãri mã: kum akreo ku'ẽ.

<sup>40</sup> Nhyam Pedru arým bõm me kunĩ jano. Ne kam kõnkrãõ nhýn arým Metĩndjwýnhmã o a'uw. Ne kam tykja'ýr akẽx ne kum,

—Ë Tabita, kãjmã nhý, ane. Nhyam arým no põt ne Pedru pumũn arým kãjmã nhý.

<sup>41</sup> Nhyam 'ýr ikran arým ikra 'amýn kãjmã kudja. Ne kam memã kabẽn nhyam me arým 'ýr bõx. Jeju nhõ me jamẽ me 'uwtĩmẽ ne me bõx nhyam arým memã kum,

—Ota, arým akubyn tĩn ne, ane. <sup>42</sup> Nhyam me arým krĩbê Djopekam kikrepdjitã abenmã arẽnho ipõk ne. Nhyam me krãptĩ arým tu amim Jeju markumrẽx ne. <sup>43</sup> Nhyam kam Pedru arek krĩbê Djopekam ar ba. Me'õbê Ximãõ nhũrkwãkam ne nhý. Ximãõbê ne mry kãõ mex djwýnh'õ. Pedru krĩ wãkam ar ba nhyam arým 'ã akati krãptĩ apẽx.

## 10

### *Me'õ bajtembê Koneru'ã ujarẽn.*

<sup>1</sup> Pedru Djopekam ar ba nhyam krĩraxbê Xedjarekam me'õbê Koneru ar ba. Kubê ne krãkamngõnhre krãptĩ: kubê 100 nhõ bẽnjadjwýr. Me kute krãkamngõnh ja'ã memã kum,

—Pykabê Itarij kurũm me ja, anhýro ba.

<sup>2</sup> Koneru katãt Metĩndjwýnh kabẽn man kõt ar amijo ba. Konerumẽ ũrkwãkam ar krĩja

kunĩ ne arkum Metĩndjwýnh rax pyma. Nãm me õ mýjja kêtkaõ õdjãnhkumrẽx ne mã Metĩndjwýnhmã kabẽn ar ba.

<sup>3</sup> Nhyam kam arým myt akẽxkam, 3 orakam, Metĩndjwýnh kadjy mrãnh djwýnh'õ nokrekam amirĩt nhyam arým omũnho nhý. Nhyam kum, “Ë, Koneru”, ane. <sup>4</sup> Nhyam kute omũnhkam madjã kretin kum, “Bẽnjadjwýr djwýnh mýj mã”? ane. Nhyam kum,

—Ga Metĩndjwýnhmã akabẽn nhyam arým ama. Ga me õ mýjja kêtkaõ anhõdjãnh nhyam arým apumũ. <sup>5</sup> Jakam dja ga krĩbê Djopemã anhõ me ja kwý jano. Kam ne me'õbê Ximãõ Pedru. Gê ar tẽn kum arẽn awýr o bõx. <sup>6</sup> Imõti mýrri ne nhý. Mrykãõ mex djwýnhbê Ximãõmẽ ro'ã ne ar nhý. Dja ar tẽn kum arẽn amrẽ awýr o tẽn o bõx nhyam arým amã arẽ ga kabẽn kõt ã amijo ane.

Nãm ã Metĩndjwýnh kadjy mrãnh djwýnh Konerumã ane. <sup>7</sup> Ne kam mã tẽn. Nhyam arým amiwýr ar amãnhkrut ne ikjêkêt 'uw. Me kute ar amãnhkrut pa 'amýnhja ne kum àpẽn kajgo ar ba. Nhyam pydji ja ne kubê õ krãkamngõnh. Adjwýnhdjwý ne katãt Metĩndjwýnh kabẽn man kõt ar amijo ba. Ne kam Koneru tãri kum àpẽn ar ba. Nãm amiwýr ar ja 'uw nhyam ar arým bõx. <sup>8</sup> Nhyam kam prĩne arkum kadjy mrãnh djwýnh'ã ajarẽn arým krĩbê Djopemã ar ano.

*Mýjja kute Pedru nokrekam amirĩt nhyam kute omũnh.*

### *Kar 11.5*

<sup>9</sup> Nhyam ar'ã akati nhyam ar arým 'ýr tẽn. 'Ýr tẽn: n arým krĩ tẽpo tẽn. Nhyam arkum ajmã Pedru krĩraxkam kikre'ã wabin imõk'ã nhý, imõk ngrengrer'ã nhý. Mebê idjaer ne me tu õ kikre nhimõk po. 'Ýr ne wabin nhý. Ne kam Metĩndjwýnhmã kabẽno nhý. Kãjkwa nhipõkri myt nhýrkam. <sup>10</sup> Ne kam kum prãm ne bit kute õ kwý krẽn mã. Nhyam ar arým kum õmrõõ dja. O dja nhyam Pedru jaerbê mýjja amirĩt nhyam omũ. <sup>11</sup> Kãjkwa ne abenbê ajkij nhyam omũ. Nhyam mýjja kute kubẽkãti pyrãk rwýk mõ. Idja amãnhkrut ne amãnhkrut. Nhyam mýjja idja kunĩ 'amýn o rwýko mõ. <sup>12</sup> Kadjwýnhbê ne apýnh pykakam mry kunĩ. Apýnh rop, apýnh mry ngãngãõ mrãnh, apýnh àk, mry kunĩ

kubêkàti kadjwýnhbê ikwã nhym omũ.  
<sup>13</sup> Nhym kam arým me'õ kum kabên nhym kuma. Nhym kum,

—Ë, Pedru kàjmã djan 'õnh bĩn krë, ane.

<sup>14</sup> Nhym Pedru kum,

—Kati, Bẽnjadjwýr djwýnh. Mõjdjê kute me ibê mýjja kakrit pyma ja ne ije kur kêtumrëx, ane.

<sup>15</sup> Nhym ajte kum,

—Be, Metĩndjwýnh kute mýjjao mex kwãrĩk wãnh kum kakrit jarënh kêt, ane.

<sup>16</sup> Be, me'õ kum kabên ne ajte kum kabên ne ajte kum kabên nhym aêrbê mýjja akubyn kàjkwamã wabi.

<sup>17</sup> Nhym Pedru amim,

—Je, mýj'ã ne ije mýjja pumũnhja amijakre? ane. Nãm amim anhýro dja nhym Koneru kute ar anorja kikre jabej me kukij nhym me arým arkum arë. Nhym ar 'ýr tẽn arým ajkwa krekre tãri bõx ne dja. Ne arým abej me kukij <sup>18</sup> ne kàj bê memã kum,

—Ximão Pedru, djori kikre wãkam nhý? ane.

<sup>19</sup> Nhym wãnh Pedru kute mýjja pumũnh'ã arek amikabên maro nhý nhym Metĩndjwýnh Karõ arým kum,

—Ë, ar amãnhkrut ne ikjêkêt ne ar ajabej akukij. <sup>20</sup> Kàjmã djan ar'ýr rwýn arkõt tẽ. Kwãrĩk wãnh ar kubajtemkam axwe amikam adjumar kêt. Ba ne ba ar ano nhym ar tẽ, ane.

<sup>21</sup> Nhym Pedru arým ar'ýr ruw ne ar'ýr bõx ne arkum,

—Ë, ba, ba ne gar ijabej. Mýj ne gar amã kĩnh ne iwýr tẽ? ane.

<sup>22</sup> Nhym ar kum,

—Krãkamngõnh krãptĩ: kubê 100 nhõ bẽnjadjwýr'õ ne ar ijano bar awýr tẽ. Idjibê ne Koneru. Nãm katãt amijo ban kum Metĩndjwýnh rax pyma. Nhym mebê idjaer kunĩ kum mex jarë. Metĩndjwýnh kadjy mrãnh djwýnhja ne kum karõn kum, “Pedru'ýr ar 'õ jano gẽ amrë awýr tẽn amã kabên jarë. Dja ga prĩne kabên ma”, ane.

<sup>23</sup> Nãm ar Pedrumã ane nhym arým arkum, “Amrë ar ikõt wadjã”, ane. Ne kam arkum aminhũrkwã jarë nhym ar arým kam nhý.

### *Pedru Koneru nhũrkwãkam bõx.*

Nhym ar'ã akati nhym Pedru arkõt arým 'ýr tẽ. Djopekam Jeju kukwakam me kamy

kwý ne arkõt tẽ. <sup>24</sup> Amũ Xedjare'ýr tẽn 'ýr bõx. Nhym Koneru arým arkam amako nhý. Nãm arým amijã õbikwamë kute meo õbikwao akuprõ. <sup>25</sup> Nhym ar me'ýr bõx nhym Pedru kikremã àr tẽn nhym Koneru arým kajpa. Ne umaje amijo ngriren parbê tým ne ibõ. <sup>26</sup> Nhym Pedru pa 'amýn kàjmã kudjan kum,

—E kum, kàjmã dja badjwý ibê pykabê me'õ, ane.

<sup>27</sup> Ne kam kum kabên tẽn wadjã. Nhym me krãptĩ akuprõ nhym arým me omũ.

<sup>28</sup> Ne kam memã kum,

—Be, me ba ne ba me me bajtemmë ibikprõnh kêtumrëx. Me ibê idjaerkam ikukràdjã kõt ba me me bajtem nhũrkwãmã idjãr kêtumrëx. Arým ga me ama. Nhym kam Metĩndjwýnh imã ikukràdjã ny jarë. Imã me kunĩ kĩnhmã ne imã arë. Ne ije me'õmã kakrit jarënh kêtã ne imã arë. Ije me'õo me bajtem kêtã ne imã arë. <sup>29</sup> Kam aje imã ar anorja iwýr bõx ne ar kute imã akabên jarënhkam ba aminêje ikabên kêt ne tu arkõt awýr tẽn bõx. Bõx ne arým me anhũrkwãmã wadjãn me anhikõ'ã nhý. Kam ba me amã arë. Mýj kadjy ne ga me ijo bõx? Mýj ne ga me amã kĩnh? Nãm ã Pedru memã ane.

<sup>30</sup> Nhym Koneru kum,

—Amũja'ã, arým 'ã arngrobê 4 apêx ba amijajburo nhý. Nhym ã myt ibõ ane, 3 orakam ba inhũrkwãkam Metĩndjwýnhmã ikabëno nhý. Nhym ijaêrbê me'õ ikuka kõnh dja nhym õ kubêkã jadjënh ne.

<sup>31</sup> Nhym imã, “Ë Koneru, ga Metĩndjwýnhmã akabên nhym arým ama. Ga me õ mýjja kêtãkam anhõdjãnh nhym arým apumũ.

<sup>32</sup> Jakam dja ga krĩraxbê Djopemã anhõ me ja kwý jano. Kam ne me'õbê Ximão Pedru. Gẽ ar tẽn kum arën awýr o bõx. Imõti mýrri ne me'õ mrykào mex djwýnhbê Ximão nhũrkwã. Kam ne ro'ã nhý. Pedru dja awýr bõx ne amã arë.” Nãm ã me'õ imã ane. <sup>33</sup> Ba kam amikrà kêt ne awýr ar ano. Be, arým ga bõx ba me ikĩnhkumrëx ne. Ne jakam ba me ikunĩ Metĩndjwýnh parbê nhý. Metĩndjwýnh kute kabên'ã amã karõ kunĩ me ije mar kadjy ne ba me nhý. Nãm ã Koneru Pedrumã ane.

<sup>34</sup> Nhym kam Pedru kum,

—Mrãmri ne Metĩndjwýnh kum me kunĩ kĩho aben pyræk. Ja arým imã amirĩtkumrẽx ne. <sup>35</sup> Be, mebê idjaer nàr me bajtem. Apýnh me ba djà kunĩkõt me kunĩ. Me apýnh kum Metĩndjwýnh rax pyman katàt kute amijo baja, Metĩndjwýnh kum me ja kunĩ kĩnh. <sup>36</sup> Ba me amã kabẽn jarẽ ga me ama. Be, Metĩndjwýnh ne mebê idjaermã me umar mex jarẽ. Dja me tu amim Jeju Kritu markumrẽx ne arým umar mex. Kubê ne me kunĩ nhõ Bẽnjadjwýr djwýnh. Metĩndjwýnh ne mebê idjaermã ujarẽnh ny ja jano. <sup>37</sup> Me ga ne ga me arým 'ã ujarẽnh ma. Djuão kute 'ã memã ujarẽnhkam ngõmã me angjênhkam ne me Garrêjakam Jeju'ã ujarẽnhmo krax. Ne kam Djudêja kunĩkõt me 'ã ujarẽnh ar ba ga me arým ama.

<sup>38</sup> Be, Metĩndjwýnh ne Nadjarekam Jekumã ta Karõ jano nhym arým raxo kadjwýnhbê nhýn ar o ba nhym arým kukwakam tỳx ne. Ne kam àpênh mex ar ba. Nhym Xatanaj meo ba nhym me umar punu:re nhym Jeju arým me kunõ mex. Metĩndjwýnh kute kumẽ amijo kajkepkam ne mã meo mex ar o ba.

<sup>39</sup> Kute mýjja kunĩ nhípêxkõt ne bar omũ. Mebê idjaer nhõ pykakam bar omũn krĩraxbê Djeruxarẽkam omũn arým 'ã memã idjujarẽnh ar iba. Nãm me pĩte'y'ã kunhõn kubĩ. <sup>40</sup> Nhym kam 'ã akatin akatin akati nhym Metĩndjwýnh akubyn o tĩn. Ne irãri o amirĩt bar omũ. <sup>41</sup> Me kunĩmã ne o amirĩt kêt. Metĩndjwýnh ta kute amrêbê amijo me utàr jamã ne o amirĩt ne. Me kute omũnhkõt memã 'ã ujarẽnh kadjy ne memã o amirĩt. Ar imã ne arým o amirĩt ne. Ar ba ne bar akubyn tĩnkam ro'ã inhõ kwý krên kõt ikõ.

<sup>42</sup> Nhym ta ar imã karõn ar imã, “Mrãmri ne Metĩndjwýnh arým amijo ipytã. Dja ba memã axwe pãnh jarẽ. Me tĩn ne ar bajamã axwe pãnh jarẽ. Me tykjãmã axwe pãnh jarẽ. Ja kadjy ne amijo ipytã. Tãm dja gar kàj bê memã arẽho aba. Arým ar aje ipumũnhkõt memã 'ã adjujarẽnh ar aba.” Nãm ã ar imã ane. <sup>43</sup> Be, Metĩndjwýnh kukwakam kabẽn jarẽnh djwýnh kunĩ ne me amrêbê: me bakukãmãremã kum, “Jeju arým tyk ne akubyn tĩnkam dja me kwý ĩ pýnhkõt tu amim markumrẽx

nhym Metĩndjwýnh arým me axwe maro aknon mekam ngryk kêt.” Nãm me ã me bakukãmãremã ane, ane.

<sup>44</sup> Pedru memã ja jarẽho dja nhym Metĩndjwýnh Karõ arým me kunĩkam ruw ne ar meo ba. Me kute kabẽn maro ýrja kunĩkam ruw ne ar meo ba <sup>45-46</sup> nhym me arým apýnh me ba djakam me kabẽnkam kabẽno kumex. Me kute me kabẽn mar kêtjakam ne me kabẽno kumex. Ne apýnh me kabẽnkam Metĩndjwýnh rax jarẽho kumex. Nhym Pedrukõt ar bõxja arým kuma. Kõt ar bõx jamã ne me kum me my kà rênhne jarẽ. Ar ja ne ar amrêbê tu amim Jeju markumrẽx. Nãm ar me kabẽn man arým mekam no tyn djan abenmã kum,

—Je, amrêbê me babê idjaermãbit ne Metĩndjwýnh kute Karõ janor. Ne kam arým jakam tu me bajtemmã Karõ jano, ane.

Nhym Pedru arkum,

<sup>47</sup> —Be, amrêbê Metĩndjwýnh kute me bamã Karõ janorkõt ne arým jakam ã me bajtemmã anoro ane. Me babê idjaer ren amrêbê abenmã, “Kwãrĩk wãnh ngõmã me bajtemja jangjênh kêt”, ane. Nhym be, jakam Metĩndjwýnh kute memã Karõ janorkam me baje ngõmã me angjênh kadjy amimar, ane. <sup>48</sup> Ne kam arkum,

—Arým ne me tu amim Bẽnjadjwýr djwýnh markumrẽx. Ar Metĩndjwýnhmã ngõmã me angij, ane. Nhym ar arým ã meo ane. Nhym kam me amijã Pedru nẽn kum,

—Dja ga arek me ikam ar aba gẽ ajã akati kwý apêx ga kam ajte tẽ, ane.

## 11

*Pedru kute Djeruxarẽkam me jamã amikõt amijarẽnh.*

*Kar 10.9*

<sup>1</sup> Nhym kam me bajtemdjwý arým tu amim Metĩndjwýnh kabẽn markumrẽx nhym me kwý arým amũ memã arẽho ipõk ne. Nhym pykabê Djudêjakam Jeju kute ar anorja arým me arẽnh ma. Nhym Jeju kukwakam me kute abeno kamydjwý me arẽnh ma. <sup>2</sup> Nhym kam Pedru arým akubyn krĩraxbê Djeruxarẽmã tẽn bõx. Nhym me kute amim Jeju mar kwý mebê idjaer kukràdjã tũm'ã no tỳxi. 'Ã ne me memã me my kà rênhne jarẽ. Pedru bõx

nhym me my kà rênhne arým Pedrumẽ aktã kabẽno aben japanho dja. <sup>3</sup> Ne kum,

—Ga ne ga me bajtem nhũrkwãmã wangij ne me ro'ã adjàkuro akrĩ, ane.

<sup>4</sup> Nhym Pedru akubyn amijo tẽn krax kurũm prĩne 'ã memã ajarẽn memã kum,

<sup>5</sup> —Be, krĩraxbê Djopekam ne ba Metĩndjwýnhmã ikabẽno nhỹ. Nhym mýjja ijaêrbê inokrekam amirĩt ba omũno nhỹ. Mýjja kute kubêkàti pyrãk. Nhym mýjja idja kunĩ 'ãnh 'amýn iwýr o rwýko mõ. Ne arým iwýr o bõx. <sup>6</sup> Ba kam arým omũno dja nhym apýnh pykakam mry kunĩ, ropmẽ mry ngãngão mrãnhmẽ àkmẽ kadjwýnhbê nõ ba omũ. <sup>7</sup> Nhym kam kàjkwa kurũm me'õ kabẽn ba kuma. Nhym imã, “È Pedru kàjmã djan 'õnh bĩn krẽ”, ane.

<sup>8</sup> Ba kuman arým kum, “Bẽnjadwýr djwýnh, kati. Mõdjê kute mýjja kakrit, mýjja punu wã nêje me imã kabẽn kõt ije kur kêtumrẽx”, ane.

<sup>9</sup> Nhym kàjkwa kurũm me'õ ajte imã, “Be, Metĩndjwýnh kute mýjjao mex kwãrĩk wãnh ga kum kakrit jarẽn kêt”, ane. <sup>10</sup> Be, me'õ imã kabẽn ne ajte imã kabẽn ne ajte imã kabẽn nhym arým mýjja kunĩ akubyn kàjkwãmã wabi.

<sup>11</sup> Nhym ijaêrbê ar amãnhkrut ne ikjêkêt kikrekam inhýrja'ýr bõx. Krĩraxbê Xedjare kurũm me'õ imã ar ano nhym ar tẽn bõx. <sup>12</sup> Nhym Metĩndjwýnh Karõ imã, “Dja ga arkõt tẽ. Kwãrĩk wãnh ga Ar kubê me bajtemkam axwe adjumar kêt”, ane. Ba kam arkõt tẽ. Nhym Jeju kukwakam gwaj bakamy Ar kubê 6ja arým ikõt tẽ. Bar 'ýr tẽ:n kam Koneru nhũrkwãkam bõx ne arým 'ýr wadjã.

<sup>13-14</sup> Nhym kam ar imã 'ã ajarẽ. Nãm ar imã, “Metĩndjwýnh kadjy mrãnh djwýnh'õ inhũrkwãkam dja ba omũ. Nhym imã, ‘Dja ga anhõ me ja kwý krĩraxbê Djopemã ano. Me'õbê Ximão Pedru ne kam ar ba. Gê ar kum arẽn amrẽ awýr o bõx. Ta dja amã kabẽn jarẽ. Gamẽ anhõbikwa kunĩmẽ dja gar kabẽn ma nhym Metĩndjwýnh arým ar ajaxwebê ar apytã.’ Nãm ã kadjy mrãnh djwýnh imã ane.” Nãm Koneru ã ar imã ane. Nãm ã Pedru me kukràdjã tũm'ã me no tỳxjamã ane.

Ne kam ajte memã kum,

<sup>15</sup> —Ba kam memã ikabẽn kraxbit jarẽnho dja. Nhym Metĩndjwýnh Karõ arým mekam ruw ne meo ba. Amrẽbê kute me bajo ba kõt ne ã wãkamdjwý arým meo bao ane. <sup>16</sup> Ba kam akubyn amijo tẽn arým amijã Bẽnjadwýr djwýnh kabẽn ma. Nãm me bamã, “Be, Djuão Metĩndjwýnhmã ngõmãbit me angij. Nhym be, dja ba ar amã Metĩndjwýnh Karõ jano nhym arým ar ajo ba”, ane. Nã bãm Bẽnjadwýr djwýnh kabẽn ja man kõt ar amã arẽ. <sup>17</sup> Be, gu me baje tu amim Bẽnjadwýr djwýnhbê Jeju Kritu markumrẽxkam ne amrẽbê me bamã Karõ jano. Jakam ne me bajtemdjwý me bakõt tu amim markumrẽx nhym arým ã memãdjwý Karõ janoro ane. Kam ba ar amã arẽ gar ama. Djã ne ba iraxo Metĩndjwýnh jakre got ba kubê aptã? Kati. Nãm ã Pedru memã ane.

<sup>18</sup> Nhym me arým amijã kabẽn man Pedrumã kabẽn krãta. Ne arým abenmã Metĩndjwýnh rax jarẽn abenmã kum,

—Be, me bajtemdjwý ne Metĩndjwýnh arým kum me kĩnh ne arým memã amak bõ. Memã amak bõ nhym me arým amikam kaprĩre wãnh axwemã iren Jeju'ýr amijo akẽx. Jakam dja me kõt tũn ne ar ba rã'ã: rã'ã ne, ane.

*Ãxikikam me kute Jeju mar'ã ujarẽn.*

<sup>19</sup> Be, amrẽbê me kute Exewão bĩnkam ne me me kute amim Jeju marjao bikẽnho mõ. Nhym kam me arým ajmã. Ajmã:n kam me kwý amũ pykabê Penixijmã bõx. Nhym me kwý amũ apêxtibê Xipremã bõx. Nhym me kwý krĩraxbê Ãxikimã bõx. Me ja ne me kàj bê mebê idjaermãbit 'ã ujarẽn tẽ. <sup>20</sup> Nhym be, me kwý ja ne me apêxtibê Xiprekam abatãnh djã nhym me kwý pykabê Xirenikam abatãnh djã. Me kwý ja ne me Ãxiki'ýr bõx ne arým me bajtembê kregumã arẽ. Memã Bẽnjadwýr djwýnh Jeju'ã ujarẽn ny jarẽ. <sup>21</sup> Nãm me me bajtemmã arẽ nhym Bẽnjadwýr djwýnh mekmẽ amijo kajkep. Me kute memã Jeju jarẽn jamẽ amijo kajkep nhym me arým kabẽn mexkumrẽx ne. Nhym me bajtem krãptĩ: tu amim Bẽnjadwýr djwýnh markumrẽx ne arým 'ýr amijo akẽx.

<sup>22</sup> Nhym me arým amũ me arẽ. Nhym onj krĩraxbê Djeruxarẽkam me kute amim

Jeju mar ne kõt ar aben pydjio baja arỳm me arēnh ma. Ne kam Āxikimã Banabe jano. Nhyr 'ỳr tē:n kam <sup>23</sup> 'ỳr bõx ne arỳm me omũn amim,

—Be, mrãmri ne Metĩndjwỳnh tu kum me kaprĩ:kumrēx\* ane. Ne kam arỳm mekam kĩnhkumrēx ne memã 'ã karõn memã kum,

—Dja gar amã Bēnjadjwỳr djwỳnh jabē:n kabēn man arek kõt amijo abakumrēx. Kwārĩk wānh 'ã adjukanga kēt. Nãm ã memã anhỹro bao ane. <sup>24</sup> Be, Banabe ne mexkumrēx nhyr Metĩndjwỳnh Karõ arỳm raxo kadjwỳnhbē nhỹn ar o ba nhyr mrãmri tu amim Metĩndjwỳnh mar tỳ:xkumrēx. Nhyr ô'ã arỳm me krãptĩ Bēnjadjwỳr djwỳnh'ỳr amijo akēx ne tu amim markumrēx.

<sup>25</sup> Nhyr kam Banabe amũ krĩraxbē Taxumã tē. Kute kam Xaur jabej kadjy ne tē. Nãm 'ỳr tē:n arỳm 'ỳr bõx. <sup>26</sup> 'Ỳr bõx ne kam abej ne arỳm kum kato. Ne kam akubyn Āxiki'ỳr o bõx. Nhyr kam ar arỳm me kute amim Jeju mar ne kõt ar aben pydjio bajamē ro'ã akuprõ. Aben tã me ro'ã akuprõ. Me krãptĩ:mã Metĩndjwỳnh kabēn jarēho ku'ê: nhyr ar'ã amexmē na apēx. Be, krĩraxbē Āxikikam ne me Jejukõt me ba djwỳnhja kumrēxmã me kute amim Kritu mar jarē.

<sup>27</sup> Nhyr kam Metĩndjwỳnh kukwakam kabēn jarēnh djwỳnh kwỳ bõx. Krĩraxbē Djeruxarē kurũm Āxiki'ỳr bõx. <sup>28</sup> Nhyr kam ar 'õ kàjmã me ipõkri dja. Idjibē ne Agabu. Agabu kàjmã djan Metĩndjwỳnh Karõ kukwakam memã kum,

—Dja apỹnh me ba djari pyka kunĩkõt mebē djwỳ kēt. Nhyr me kunĩ kum prã:m, ane. Nhyr tũmrãm arỳm kato. Bēnjadjwỳr raxbē Kraõdjõ memã ỳrri ne arỳm kato nhyr me arỳm kum prã:m. <sup>29</sup> Nhyr memã prãm kētri Āxikikam Jejukõt me ba djwỳnh kunĩ arỳm abenmã kabēn djin abenmã kum,

—Gwaj amikutã memã banhõ mỳjja kwỳ jano. Jeju kukwakam me bakamy pykabē Djudējakam ar bajamã ano, ane.

Nhyr me abenmã kum,

—Dja gwaj ã memã o ane. Dja gwaj ã memã o ane, ane. <sup>30</sup> Nhyr kam Banabemē Xaur ar kute memã o tēmmã nhyr me arỳm arkum aminhõ mỳjja ngã. Ne arkum,

—Dja gar me kute Jeju nhõ me jao ba djwỳnhmã angã nhyr me arỳm memã kungrã, ane.

## 12

### *Pedru mebē ijē djà kurũm kator:*

<sup>1</sup> Āxikikam me kute memã mỳjja nhõrmã o dja: nhyr onỹ pykabē Djudējakam bēnjadjwỳr raxbē Erodji arỳm àkrē:. Àkrēn arỳm õ me ja jano nhyr me me kute amim Jeju mar kwỳo rõrõk ne. Me kute Jejukõt ar aben pydjio baja kwỳo rõrõk ne. Kute meo bikēnh kadjy meo rõrõk ne. <sup>2</sup> Ne kam arỳm kàxdjwa kajgoo Xijagu bĩ. Xijagumē Djuão ar axikõt apõx. <sup>3</sup> Nãm me Xijagu bĩ nhyr mebē idjaer arỳm kam kĩnhkumrēx. Nhyr Erodji arỳm mekam kĩnhkõt omũn kam kute Pedruo tỳm kadjy memã arē. Me kute djwỳponhbit kur djà nhõ akatikam ne memã arē.

<sup>4</sup> Nhyr kam me arỳm o tỳm ne kubē ijē. Nhyr kam Erodji 'ỳr õ krãkamngõnhbē 16 jano. Nhyr me kute Pedru pumũnh kadjy me arỳm meo aben nhikjê'ã kabēn. Me kunĩbē 4'ã kabēn. Nhyr kam me 'ã aben japanho dja. Metĩndjwỳnh me irõbē mrãnh djà nhõ akati apēx totokbē Erodji bit kute memã o katormã. Kute memã kukjêr nhyr me kute bĩnmã bit kute memã o katormã. <sup>5</sup> Kam ne me arek mebē ijē djakam Pedruo dja. Nhyr me kute amim Jeju mar ne kõt ar aben pydjio baja ne me Pedruo Metĩndjwỳnhmã à'wỳr'ã rĩtkumrēx.

<sup>6</sup> Nhyr nēje akamãtkam Erodji amim,

—Gē kryrãm, ba memã Pedruo ikato, ane. Nhyr Pedru arek õto nõ. Nhyr krãkamngõnh amãnhkrut ne aktã ijēn o nhỹ. Kàxirãxo ne krãkamngõnh Pedrumē aktã amijãpre. Nhyr kre'ã ku'ê djwỳnh ar 'ã ijē djà kuri dja. Arek kre nēje dja. <sup>7</sup> Nhyr Pedru õto nõ: nhyr Bēnjadjwỳr djwỳnh kadjy mrãnh djwỳnh'õ arỳm 'ỳr wadjã. Nhyr arỳm mebē ijē djà kadjwỳnhbē irã.

\* **11:23** Djãm me ta ne me axwe kēt nhyr pãnh kum me kaprĩ Kati. Me ta te axwe kētmã nhyr ta arỳm tu kum me kaprĩ.

Nhym arým Pedru nhikre'i nhikjêbê kurwan kàjmã kangõn kum,

—Amikrà kêt ne kàjmã dja, ane. Nhym kàjmã dja nhym kàxiràxo inýx 'ãpre djã arým tu rôrõk ne.

<sup>8</sup> Nhym kadjy mrãnh djwýnh kum,

—On amipren aparkã ponh jadjã, ane nhym arým ã amijo ane. Nhym ajte kum,

—Anhõ kubêkã krãkão amikupun ikõt tẽ, ane nhym arým amikupu. <sup>9</sup> Nhym mã kator tẽ nhym arým kõt tẽ. Ne kute amimar kêt kam amim we,

—Be, nãm mýjja kute ijo anhýr kajgo. Nã bãm amiptir kajgoo nõ, ane. <sup>10</sup> Nhym ar arým amipãnh 'ã ijê djã ja mẽ. Kam ne kre'ã ku'ê djwýnh ar ja dja. Nhym ar ajte amipãnh 'ã ijê djã ja mẽ. Kam ne kre'ã ku'ê djwýnh ar jadjwý dja. Nhym kam ar arým krĩrax 'ýr kàxirãxtio 'ã ijê djã ja tẽpo tẽ nhym ta arkum amijã kuta. Nhym arým ar kato. Ne pry ja kumrẽx'ã tẽn amipãnh kumẽ nhym kadjy mrãnh djwýnh arým mã kubê tẽ.

<sup>11</sup> Nhym Pedru arým kute amiptir kêtja man amim,

—Je, mrãmri ne Bẽnjadjwýr djwýnh Jeju imã kadjy mrãnh djwýnh jano nhym Erodjibê arým ipytã. Mebê idjaer kute ibĩnmã kam amak kajgo nhym arým mebê ipytã, ane.

<sup>12</sup> Ne arek amimaro tẽn kam arým Marij nhũrkwã'ýr bõx. Djuão Makõ ne Marij kurũm kato. Kikre jakam ne me krãptĩ Metĩndjwýnh mã kabẽno nhý. <sup>13</sup> Nhym Pedru bõx ne arým kikre'ã ijê djã mõ. Nhym me õ àpẽn nija àmõr man arým kute me'õ pumũnh mã 'ýr tẽ. Idjibê ne Rodji. <sup>14</sup> 'Ýr tẽn arým 'ã ijê djã'ýr bõx. Nhym Pedru kabẽn nhym arým mrãmri Pedrukumrẽx kabẽn ma. Ne arým kĩnhkam tu kikre'ã ijê djã'ã 'yr kêt ne akubyn me'ýr wadjãn memã kum,

—Õ kum, Pedru kikre'ã ijê djã tãri dja, ane.

<sup>15</sup> Nhym me tu kum, “Ajbã”, ane. Nhym, “Kati, mrãmri”, ane. Nhym me arĩk kum,

—Be, kadjy mrãnh djwýnh kute mã Pedruo baja ne dja, ane.

<sup>16</sup> Nhym wãnh Pedru arek 'ã ijê djã mõro dja nhym kam me kum 'ã kutan arým omũ. Omũn kam arým te kute mýjja marmã

kam no tyn kumex. <sup>17</sup> Nhym memã am-inhikra bẽno dja nhym me arým anhikrê. Nhym kam arým Bẽnjadjwýr djwýnh Jeju kute mebê ijê djã kurũm o kator'ã memã ajarẽ. Ne kam memã kum,

—Aje, dja gar tẽn Xijagumẽ Jeju kukwakam me kute abeno kamy arkum ijã ajarẽ. Ba on, ane. Ne kam arým amũ kikre 'õ'ýr tẽ.

<sup>18</sup> Nhym kam akati. Nhym arým krãkamngõnh abenkam kangao kumex. Bẽnjadjwýr mekam ngryk karõ abenkam kangao kumex. Ne abenmã kum, “Nãr Pedru? Nãr Pedru?” ane. <sup>19</sup> Nhym kam Erodji Pedru'ýr me ano. Nhym me abe;j ne te abej aprã. Nhym arým prĩne kre'ã ku'ê djwýnh ar kukij. Nhym me te: aminêje kum kabẽn ne. Nhym arým memã arẽn memã kum,

—Pedru kator pãnh me kupa, ane. Nhym me arým me kupa.

Nhym kam Erodji arým pykabê Djudêja kurũm amũ tẽn arým krĩraxbê Xedjare'ýr bõx. Ne kam arek kam ar ba.

<sup>20</sup> Arým krĩraxbê Xirukam me jamẽ krĩraxbê Xidõkam me jakam ngryk mex ne. Nhym me arým axikõt 'ýr bõx. Me bõx djwýnh rãm ne me Erodji nhõ àpẽn rax'õmã amijarẽ. Idjibê ne Bradju. Kubê ne Erodji nhõ kumoka'ê, kam õt djã, nêje omũnh djwýnh. Kute me nêje Erodjimã kabẽn kadjy ne me Bradjumã amijarẽ. Amrêbê ne me kute Erodji nhõ pykakam õ djwý jamýnho ku'ê. Ne kam mebê djwý kêt karõ Bradjumã amijarẽ nhym arým me nêje bẽnjadjwýr Erodjimã kabẽn jarẽ.

<sup>21</sup> Nhym kam Erodji kute memã kabẽn kadjy akati'õ jarẽ. Nhym arým 'ã akati bõx. Nhym Erodji arým õ kubêkã rũho prĩne amijo mex ne õ krĩ djã rax'ýr bõx ne kam nhý. Nhýn arým memã kabẽno nhý.

<sup>22</sup> Nhym kam me arým abenmã o akij ne abenmã kum,

—Djãm pykakam me'õ kabẽn got? Be, kubê ne kãkwakam metĩndjwýnh'õ, ane.

<sup>23</sup> Nhym totokbê arým Bẽnjadjwýr djwýnh kadjy mrãnh djwýnh mýj kanêjao kubĩ. Nhym kõp arým kakuw nhym arým ty. Be, mýkam? Bir, me kute kum metĩndjwýnh jarẽn nhym kute aminêje memã kum,

“Kati”, anhÿr kêt kam. Kute memã kum, “Kati, atemã kàjkwakam Metĩndjwýnh pydji”, anhÿr kêt kam ne kadjy mrãnh djwýnh mÿj kanê punure jao kubĩ nhym arÿm ty.

<sup>24</sup> Nhym kam me amũ memã Metĩndjwýnh kabên jarênho kumex nhym me krãptĩ arÿm kum kĩnh. Nhym me kute tu amim Jeju markumrêxja arÿm krãptĩ: mō.

<sup>25</sup> Be, amrêbê ne Āxikikam me kute memã me õ mÿjja kwÿ janormã. Djeruxarêkam me õ mÿjja kêtjamã me kute anormã. Nhym Banabemẽ Xaur ar arÿm amũ me kadjy o mōn memã o bōx ne arÿm memã kungã. Memã kungãn arÿm akubyn kurũm akêx ne tẽ. Ar Djuão Makô japrôn o tẽ. Tẽ:n arÿm akubyn Āxikikam bōx.

### 13

*Me kute Jeju mar kute amũ Banabemẽ Xaur ar anor.*

<sup>1</sup> Be, Āxikikam me kute amim Jeju mar ne kôt ar aben pydjio bajakam ne me kwÿbê Metĩndjwýnh kukwakam kabên jarên djwýnh. Nhym me kwÿbê memã kukràdjã'ã ujarên djwýnh. Ar idjibê ne Banabemẽ Ximião Nidjê mẽ Ruxumẽ Manaũmmẽ. Krĩraxbê Xirenikam ne Ruxu abatãnh. Manaũm ne bẽnjadwÿr raxbê Erodjimẽ ro'ã abatãnh ne kute o kamy. <sup>2</sup> Ar Metĩndjwýnhmã rax jarê ne kum amijajburo nhÿ. Nhym Metĩndjwýnh Karõ arkum,

—Dja gar imã Banabemẽ Xaur aro aben nhikjê. Ba arÿm ar àpên djã ny kadjy aro amiptã, ane. <sup>3</sup> Nhym kam ar amijajburo nhÿn Metĩndjwýnhmã aro à'wÿro nhÿ. Ne kam ar krã'ã aminhikra djin amũ ar ano.

<sup>4</sup> Metĩndjwýnh Karõ ã kute ar anoro anhÿrkam ne ar arÿm krĩraxbê Xerxij'ÿr tẽ:n kam 'ÿr bōx. Ne kam kàraxkam ngô raxbê pyka kêt kôt tẽ. Apêxtibê Xipre'ÿr tẽ:n kam arÿm 'ÿr bōx. <sup>5</sup> Krĩraxbê Xarami'ÿr ne ar bōx. Ne kam wabin tẽ. Apÿnh mebê idjaer bikprõnh djãkam kàj bê memã Metĩndjwýnh kabên jarênho tẽ. Djuão Makôdjwÿ ne ar aprôn o tẽ. Arkum àpênhmã ne ar o tẽ.

<sup>6</sup> Ne kam pykakôt krĩraxbê Papu'ÿr tẽn 'ÿr bōx. Ne kam arÿm me'õbê Bajaju kajpa. Kubê ne mebê idjaer'õ. Ta ne amijo apÿnh mÿjja mar mexo ban me kupênho

ban amijo wajangao ba. Ne kam ta amijo Metĩndjwýnh mar mex ne amijo 'êx ne we kukwakam memã kabên jarênho ba.

<sup>7</sup> Nãm pyka tãm kam bẽnjadwÿrmã àpên ar ba. Bẽnjadwÿr nhidjibê ne Xedju Paur. Bẽnjadwÿr krã mexkumrêx. Banabemẽ Xaur ar Papu'ÿr bōx nhym bẽnjadwÿr amiwÿr ar ku'uw ne arkum,

—Imã Metĩndjwýnh kabên jarê. Ije mar prãm, ane.

<sup>8</sup> Nhym kam Erimanh, kubê ne Bajajuja. Me bakabênkam ne gu me ren kum wajanga jarê. Nhym be, me bajtem kabênkam ne me kum Erimanh jarê. Nãm bit kute Paur Ar kubê àptãrmã. Erimanh bit kute õ bẽnjadwÿr nêje Metĩndjwýnh kabên pytãrmã ne arÿm kabêno Xaur ar apanho dja.

<sup>9</sup> Nhym Xaur, idji nhikjêbê ne Paur. Metĩndjwýnh Karõ raxo Paur kadjwýnhbê nhÿn ar o ba nhym arÿm wajanga'ÿr akêx ne kam no tyn omũnho djan <sup>10</sup> kum,

—'Êxnhĩti, axweti, Xatanaj tãmdjwÿ. Nãm me axwe kêt prãm, ga mã amã me kurê. Bẽnjadwÿr djwýnh memã 'ã karõ katãtkumrêx ga kam ga kupa'ã ar memã arênho aba nhym me arÿm aman Metĩndjwýnh kupa'ã amijo ba. Je tô mÿkam ne ga akabên punu jao krã'ÿr kêt kumrêx?

<sup>11</sup> Jakam arÿm Bẽnjadwÿr djwýnh kute ajaxwe pãnh ajo bikênhmã. Dja ga arÿm ano rãn arngro pumũnh kêt nhym ajã akati krãptĩ apêx, ane.

Nhym totokbê arÿm no rãn kam nokrekam akamãt kô tyk pytĩ. Nhym arÿm me'õ jabej àpên mō. Me'õ kute pa 'amÿnh ne o tẽmmã ne mekôt me'õ jabej àpên mō. <sup>12</sup> Nhym bẽnjadwÿr Xedju Paur kute wajanga no rã pumũnhkam arÿm tu amim Bẽnjadwÿr djwýnh markumrêx. Nãm anhÿr djwýnhram amim,

—E kum, Bẽnjadwÿr djwýnh'ã ar kabên kukràdjã mexkumrêx, anen kam tu amim markumrêx.

*Paur Āxiki 'õdjwÿkam memã Jeju'ã ujarên ne ja.*

<sup>13</sup> Nhym kam Paurmẽ ro'ã ar tẽmja ar kàraxmã wadjàn nox ne arÿm amipãnh krĩraxbê Papu mẽ. Ne tẽ:n kam arÿm pykabê Papirijkam krĩraxbê Pedji'ÿr bōx.



Nhym kam Djuão Makõ arým ar kangan Djeruxarẽ'ýr akẽx ne.

<sup>14</sup> Nhym kam ar amipãnh krĩraxbê Pedji mẽ. Ne tẽ:n kam pykabê Pidjijkam krĩraxbê Āxiki 'õdjwý'ýr bõx. Nhym kam arým ar'ã pi'õk råràr nhym ar arým mebé idjaer bikprõnh djãmã wadjàn nhỹ. <sup>15</sup> Nhym me'õ pi'õk jarẽho dja. Mõjdjê kukràdjãmẽ Metĩndjwýnh kukwakam kabẽn jarẽnh djwýnh 'õdjwýmẽ kabẽn jarẽho dja. Ne kam arým arẽnh pa. Nhym me bikprõnh djakam bẽnjadjwýr ar Paurmã kabẽn kadjy memã arẽ. Nhym me amũ abenmã arẽn arým kum arẽn kum,

—Bẽnjadjwýr ar ar amã kabẽn ne ar amã, “Be, akmere ar, ar ajõ aje memã akabẽn jarẽnh prãm jabej arẽ”, ane.

<sup>16</sup> Nhym kam Paur arým kàjmã dja. Ne memã aminhikra bẽ nhym me arým anhikrê. Nhym memã kum,

—Gar abê idjaer ar, ar akunĩ amã Metĩndjwýnh pyma ar, dja gar ikabẽn ma. <sup>17</sup> Me babê idjaero ba djwýnhbê ne Metĩndjwýnh. Nãm arým amijo me bakukãmãre pytà. Nhym kam me pykabê Edjitukam ar ba nhym Edjitukam me ja ar meo kubajtemo ba. Nhym kam Metĩndjwýnh me bakukãmãreo krãptĩ:n o ra:x. Ne kam tỳx me:xkõt arým meo kato. <sup>18</sup> Meo kato nhym me kapõt kukritkam ar ba. Nhym me mã kam amikràõ ba nhym mã kum me kaprĩn meo ba. Nhym kam me'ã amexbê 40 apêx. <sup>19</sup> Nhym kam Metĩndjwýnh pykabê Kanaãkam me ar ba tũmjao apêx. Apýnh me bajtem ba djàribê 7 nhym arým memã meo apêx. Ne kam memã me õ pyka nhirê ne memã kungã.

<sup>20</sup> Ne kam aben totokmã memã me kute memã axwe pãnh jarẽnh djwýnh jarẽ nhym me aben kukãm ar meo ba. Nhym kam me'ã amex krãptĩ:o kute 450 pyrãk apêx nhym Metĩndjwýnh kukwakam kabẽn jarẽnh djwýnhbê Xamuwe me kadjy kato. <sup>21</sup> Nhym kam me amikadjy Metĩndjwýnhmã bẽnjadjwýr raxo a'uw. Nhym arým memã Xau, Ki kute irja jarẽ. Nhym memã bẽnjadjwýr'ã amexbê 40 apêx. Xaubê ne Bẽnjamĩn djõ'ã me'õ.

<sup>22</sup> Nhym kam Metĩndjwýnh bõm Xau mẽn pãnh arým me kadjy Dawi jarẽ nhym arým

ar meo ba. Nhym Metĩndjwýnh arým 'ã memã kum,

“Dawi ne ba arým kum ikato. Dja ba 'ã kum karõ nhym arým katàt ikabẽn kunĩ man kõt ar amijo ba. Djexe ne Dawi dji.” Nãm ã Metĩndjwýnh memã ane.

<sup>23</sup> Ne kam amrêbê kute me bakukãmãremã arẽnh kõt arým tũmrãm me babê idjaer kamingrãny kadjy Jeju jano. Dawija tãm djõ'ã ne kato. Jejubê ne õ kàjkwa kadjy me utàr djwýnh. <sup>24</sup> Jeju kute àpênhmo krax kêtri ne Djuão me babê idjaer kunĩ jakren me bamã, “Me amikam akaprĩren wãnh ajaxwemã anhiren Metĩndjwýnh'ýr amijo akẽx. Ba kam kum ngõmã me ajangij”, ane.

<sup>25</sup> Ne kam kute àpênh'ã aminhinomã amimẽnh 'ýr ne me bamã, “Ga me Kritu bõxmã kam amako aba. Djãm ibê tãmwã got? Kati, ibê atemã. Nhym be, itotokbê me'õ bõxja ne raxo kute ijakrenh, kute ijakrenh mexi. Nã bãm te irax ne 'ã inihõn ije kum parkà 'ãpre bõnh prãmje. Be, ãm irax ba ren arým kum apê. Nhym be, kati, ãm ingrire. Nãm raxo ijakrenh mex ne.” Nãm ã Djuão memã ane. Nãm ã Paur memã ane.

<sup>26</sup> Ne itepã ajte memã kum,

—Be, akmere ar, gar abê Abraão tãmdjwý ar, ar akunĩ ar amã Metĩndjwýnh rax pyma ar. Be, Metĩndjwýnh arým me bamã kabẽn jano. Jeju kute me utàr'ã kabẽn jano. Ba arým ar amã kabẽn jarẽho dja.

<sup>27</sup> Djeruxarẽkam me jamẽ kam me bẽnjadjwýrmẽ ne me kute Jeju raxkõt mar kêt. Amrêbê: ne Metĩndjwýnh kukwakam kabẽn jarẽnh djwýnh me bakukãmãremã arẽ. Me kute Kritu'ã axwe nhõr ne bĩnmã arẽ. Nhym me aben djõ'ã kabẽn jarẽnh djwýnh kabẽn jarẽ. Pi'õk råràr kunĩkõt kabẽn jarẽho mõr tãmtã. Nãm me te arẽn mýjja'ã kabẽn kute amijakreja mar kêt. Jeju'ã kabẽn kute amijakreja mar kêt. Ne kabẽn jarẽho mõr tãmtã arým 'ýr o bõx. Tũmrãm me kamingrãnyre kute mar kêt rã'ãn arým Jeju'ã axwe nhõn bĩnmã arẽ. Amrêbê: Jeju rwýk kêtri kukwakam kabẽn jarẽnh djwýnh kute arẽnh kõt arým tu bĩnmã arẽ. <sup>28</sup> Ne te: kute axwe'õ jabej ne kum kator ne pãnh kute bĩnmã te me kukij nhym axwe kêtumrêx. Te Jeju axwe kêt nhym me tu mrãmri kute bĩnkumrêxmã

Piratumã o a'uw. <sup>29</sup> Ne kam amrêbê: me bakukãmãre kute pi'òkkam Kritu'ã kabên jarênh kôt ã Jejuo ane. Kabên kunĩkôt me kute o anhýrmã kôt ne me kamingrãnyre arým ã Jejuo ane. ã Jejuo ane nhym arým ty. Ty nhym kam me arým pĩte'y kurũm kaban o ruw ne me tyk nhõ kênkrekam adjã nhym nõ. <sup>30</sup> Nhym be, Metĩndjwýnh akubyn o tĩn. <sup>31</sup> Nhym kam kôt ba djwýnhmã amijo amirĩt ar o ba nhym arým 'ã akati krãptĩ apêx. Jeju tyk kêtri ne ar pykabê Garrêja kurũm ro'ã tẽ, Djeruxarê'y r tẽ. Nãm arkum amijo amirĩto ba nhym kam jakam ar Jeju'ã ujarênh ar ba. Ar kute Jeju akubyn tĩn pumũnhkôt memã 'ã ujarênh ar ba. Nãm ã Paur memã ane.

<sup>32-33</sup> Ne kam itepã memã kum,

—Metĩndjwýnh ne amrêbê: me bakukãmãre kum, “Dja ba akubyn Krituo tĩn”, ane nhym me aben djô'ã arênhõ mõ:. Arênhõ mõr tãmtã arým 'yr o bõx. Me bakamin-grãnyrekam Jeju ty nhym Metĩndjwýnh arým akubyn o tĩn. Tãm ne bar ar amã arênhõ dja. 'ã ne me bakukãmãre amrêbê: me bẽ idjaer nhõ me ngrer tũmbê 2'ã pi'òk no'òk. Kamã Metĩndjwýnh arým kramã kum,

“Mrãmri abê ikrakumrêx. Jakam ga arým ijo Abãm kumrêx”, ane.

Kute Kramã anhýrkôt ne arým akubyn o tĩn ne. <sup>34</sup> Nhym amrêbê: me pi'òk 'òdjwý no'òk. Kamã Metĩndjwýnh kute akubyn o tĩn nhym ĩ rerek prãm kêt'ã ajte kum,

“Ije angêt Dawimã ajarênh kôt dja ba ã ajo djuw mexo ane”, ane.

<sup>35</sup> Nhym me me bẽ idjaer nhõ me ngrer tũm 'òdjwý'ã pi'òk no'òk. Kamã ne Dawi Metĩndjwýnhmã kum,

“Djãm inhĩ rerekmã? Kati. Ba ne ba amexo imex. Kam dja ga ikanga kêtkumrêx”, ane.

Amrêbê: me kute pi'òk no'òk kôt ne Jeju tyn ĩ rerek kêt ne akubyn tĩn ne. Nãm ã Paur memã ane.

<sup>36</sup> Ne kam itepã ajte memã kum,

—Nhym be, djãm Dawi nhĩ rerek kêt? Kati. Dawi tyn arým ĩ rerek ne. Metĩndjwýnh kabênkôt ne Dawi kum apê: nhym kam kubêngêt arým kubĩ nhym ty nhym me arým adjã. Dawi akubyn tĩn

kêt nhym arým ĩ rerek ne. <sup>37</sup> Nhym be, djãm Jeju nhĩ rerek? Kati. ĩ rerek kêt. Metĩndjwýnh kute akubyn o tĩnkam ne ĩ rerek kêt. Nãm ã Paur memã ane.

<sup>38</sup> Ne kam ajte memã kum,

—Be, akmere ar, ba ar amã arê gar ama. Jeju tyk ne akubyn tĩnkam Metĩndjwýnh arým me axweo aknon mekam ngryk kêt. Ja'ã ne bar kãj bẽ ar amã idju-jarênhõ dja. <sup>39</sup> Mõjdjê kute me kute katãt amijo ba'ã memã karõkam kukràdjã gu me te baje mar ne katãt kôt amijo baba prãmje ne kam bajaxwe rã'ã. Nhym be, dja me tu amim Jeju markumrêx nhym Metĩndjwýnh arým me axwe kunĩ maro akno. O aknon tu memã axwe kêt jarê nhym me arým kum mexkumrêx ne.

<sup>40-41</sup> Amrêbê: ne Metĩndjwýnh kukwakam kabên jarênh djwýnh me bakukãmãremã kum,

“Ë, me atĩn ne ar abari dja ba mýjja pumũnh kêt nhipêx.

Nhym me te me amã 'ã ajarê ga me mar prãm kêtkumrêx.

Ë, me aje ijapry prãm wã dja ga me te aje mýjja marmã kam ano tyn aku'ên arým me biknor tokry djãkam akuno”, ane.

Ga, me kute mar prãm kêtkam me biknor tokry djãkam biknorja pumũ. Kwãrĩk wãnh mekôt ã amijo anhýr kêt. Ar ga dja gar tu amim Jeju markumrêx. Nãm ã Paur memã ane.

<sup>42</sup> Nhym kam me bikprõnh djã kurũm me kator mõrkam ne me Paur arkum,

—Dja gar amrê pi'òk rãrãr mõrkam ajte ar imã me kabên ja jarê, ane. <sup>43</sup> Nhym arým me bimãnhkam me krãptĩ Paurmẽ Banabe arkôt tẽ. Me bẽ idjaermẽ me bajtem kute me bẽ idjaer kukràdjã mar ne kôt kute amijo bajamẽ ne me arkôt tẽ. Nhym ar memã kabên ne memã kum,

—Metĩndjwýnh ta kum ar akaprĩkumrêx\* Dja gar tu amim markumrêx ne 'ã adjukanga kêt, ane.

<sup>44</sup> Nhym kam ajte pi'òk rãrãr nhym me ajte ar'ã akuprõ. Me kute Metĩndjwýnh kabên marmã ne krĩrax wãkam me kunĩ ar'ã akuprõ. <sup>45</sup> Nhym me bẽ idjaer kwý

\* **13:43** Djãm me ta ne me axwe kêt nhym pãnh kum me kaprĩ Kati. Me ta te axwe kêtmã nhym ta arým tu kum me kaprĩ.

arỳm ar'ã me krãptĩja pumũn arỳm me'ã ngrý:k ne. Ta te kute uràk prãmje arỳm Paur japryõ kumex.

<sup>46</sup> Nhyam kam Paurmẽ Banabe arkum me uma kêt ne memã kabẽn ne memã kum,

—Me abê idjaerkam bar ije me akumrẽxmã Metĩndjwỳnh kabẽn jarẽn prãm kumrẽx. Be, jakam ne ga me am-inhirõbê kabẽn mẽn kam amim, “Djãm Metĩndjwỳnhkõt itĩn rã'ãmã? Kati. Ja ne imã kĩnh kêt”, ane. Kam dja bar arỳm memã idjujarẽn kadjy me bajtem'ỳr amijo akẽx ne. <sup>47</sup> Metĩndjwỳnh kute pi'õk kõt ar imã me bajtem'ã karõ kõt dja bar ã amijo ane. Kamã ne Kritumã kum,

“Ga, akamãt kô tykkam me kute mỳjja pumũnh kêt ne mrãnh punuja pumũ. Nhyam me kute memã pry kurwỳ nhyam me arỳm irãkam katãt mrã. Me bajtemdjwỳ ne me mrãnh punun axwe. Ga dja ga memã ikabẽn jarẽ.

Ja kadjy ne ba arỳm ajano. Dja me amim ikabẽn man arỳm gadjwỳ ama. Aje me axwebê me utãr djwỳnh dja me ama. Aje pyka kunĩkõt me axwebê me utãr kadjy ne ba ajano.”

Nãm ã Kritumã ane. Ar badjwỳ ne bar arỳm kabẽnkõt me bajtemmã akẽx ne. Nãm ã Paur memã ane. <sup>48</sup> Nhyam me bajtem kute ar markam arỳm kĩnhkumrẽx ne abenmã kum,

—Metĩndjwỳnh kabẽn mexkumrẽx. Metĩndjwỳnh kabẽn mexkumrẽx, ane. Ne kam Metĩndjwỳnh kute me kêtĩ amijo me utãrja, kute kõt tĩn ne ar ba rã'ã kadjy amijo me utãrja arỳm tu amim Jeju markumrẽx ne.

<sup>49</sup> Nhyam kam me pykaja kunĩkõt arỳm memã Bẽnjadjwỳr djwỳnh kabẽn jarẽnho ba. <sup>50</sup> Nhyam mebê idjaer arỳm Paurmẽ Banabe ar'ã memã apnê. Me nire kwỳ rũnh kute mebê idjaer kukràdjã mar ne kõt amijo bajamã ne me ar'ã apnê. Ne me my bẽnjadjwỳrdjwỳmã ar'ã apnê. Krĩraxbê ãxikikam me jamã apnê. Nhyam kam me ari memã ar kurêtuw. Ne arỳm amibê ar kujate. <sup>51</sup> Nhyam ar kute me kangao amirĩt kadjy mebê amiparkã'ã me õ pyka ka'u. Ne

kam amũ krĩraxbê Ikõni'ỳr tẽ. 'Ỳr tẽ:n arỳm 'ỳr bõx. <sup>52</sup> Nhyam Jejukõt me ba djwỳnh arỳm kĩnhkumrẽx ne. Nhyam Metĩndjwỳnh Karõ arỳm raxo me kadjwỳnhbê nhỹn ar meo ba.

## 14

### *Ikõnikam Paur ar memã Jeju'ã ujarẽn.*

<sup>1</sup> Nhyam kam Ikõnikam Paurmẽ Banabe ar arỳm mebê idjaer bikprõnh djã'ỳr tẽn wadjãn kam memã ujarẽnho dja. Ne memã kabẽn mexkumrẽxo dja. Nhyam kam me krãptĩ: kum kĩnh ne arỳm tu amim Jeju markumrẽx. Mebê idjaermẽ me bajtembê kregu krãptĩ: tu amim markumrẽx. <sup>2</sup> Nhyam kam mebê idjaer kwỳ amakkre kêt ne kute Jeju mar prãm kêtja arỳm me bajtemmã me kurêtuw. Memã Jeju kukwakam me kute abeno kamy kurêtuw nhyam me kum me kurêo ba.

<sup>3</sup> Nhyam kam Paurmẽ Banabe ar arek mekam ar ba. Arkum me uma kêt ne Bẽnjadjwỳr djwỳnh'ã memã 'ã ujarẽn ar ba nhyam ar'ã arỳm arngro krãptĩ: apẽx. Metĩndjwỳnh ta kute tu kum me kaprĩ'ã memã ujarẽn ar ban\* Bẽnjadjwỳr djwỳnh kukwakam me aêrbê mỳjja pumũnh kêt kwỳ nhipêx. Me te kute mỳjja marmã kam no tyk ne kute Metĩndjwỳnh raxmã kator kadjy mỳjja pumũnh kêt kwỳ nhipêx. Nãm ar me punu kwỳo mex. Me kute abenmã kum,

—Mrãmri ne Metĩndjwỳnh kõt ar kabẽnkumrẽx, anhỹr kadjy ar ipẽx.

<sup>4</sup> Nhyam kam krĩraxkam me apỹnh kabẽn. Me kwỳ mebê idjaer kõt kabẽn. Nhyam me kwỳ Jeju kute ar anorja kõt kabẽn. <sup>5</sup> Nhyam kam me bajtemmẽ mebê idjaermẽ mekam me bẽnjadjwỳrmẽ arỳm abenmã ar'ã karõn abenmã kum,

—Gwaj arkum akjan kẽno ar titik gê ar ty, ane. <sup>6-7</sup> Nhyam kam ar arỳm me kuman arỳm mã mebê tẽ. Mebê tẽ:n kam arỳm pykabê Rikaõkam bõx. Ne kam krĩraxbê Rix-akam bõx ne memã arẽ. Ne kam krĩraxbê Tebikam bõx ne memã arẽ. Ne bu'ã pyka kunĩkõt memã arẽnho ba. Kritu'ã ujarẽn nyja ne memã arẽnho ba.

\* **14:3** Djãm me ta ne me axwe kêt nhyam pãnh kum me kaprĩ Kati. Me ne me te: axwe kêt mã nhyam Metĩndjwỳnh ta arỳm tu kum me kaprĩ.

*Rixakam Paur ar memã 'ã ujarẽnh.*

<sup>8</sup> Nhyim krĩraxbẽ Rixakam me'õ mrãnh kêt. Adjãkam ne par punuren mrãnh kêt rã'ã ne arým abatãnh ne. <sup>9</sup> Nhyim kam Paur memã ujarẽnhõ dja nhyim par punuja kabẽn maro nhỹ. Ne mex kadjy arým tu amim Metĩndjwýnh kamnhĩxkumrẽx. Nhyim Paur kam no djar tỳx ne arým kute amim kamnhĩxkõt omũ. <sup>10</sup> Nãm omũn kàj bê kum, “Kajmã dja”, ane. Nhyim arým ekruux ne kàjmã djan arým mrãnh mex.

<sup>11</sup> Nhyim me krãptĩ arým Paur kute o mexkõt omũn kàj bê abenmã o akij. Nhyim be, Paur ar kute me kabẽn mar kêt. Me õ pykabẽ Rikaõkam me kabẽn kõt ne me kabẽn. Nãm me abenmã o akij ne abenmã kum,

—Apýnh me batĩndjwýnh ar amijo me bapyràk ne arým pykamã ruw ne ar ba, ane nhyim ar kute me kabẽn mar kêt.

<sup>12</sup> Nhyim me Banabemã Djupite jarẽ. Ne Paur kute kabẽno Banabe jakrenhkam kum Mekuju jarẽ. Me õ metĩndjwýnh kajgo kõt ne me arkum idji jarẽ. <sup>13</sup> Krĩrax jajkwa krekre 'ỳr ne me kute me õ metĩndjwýnh kajgomã amijarẽnh djã. Me õ metĩndjwýnh jamã ne we kum Djupite jarẽ. 'Ỳr ne kute mar djwýnh arým mrybãri kwỳo bõx. Nãm me pidjõrã nhipẽxo ipõk nhyim mry arým upij. Be, me krãptĩmẽ Djupite mar djwýnhmẽ ne me Paur aro õ metĩndjwýnh kajgon bit kute arkum mry bĩnmã. Bit kute arkum amijarẽnh kadjy arkum mry bĩnmã.

<sup>14</sup> Nhyim Jeju kute ar anorjabẽ Banabemẽ Paur ar arým me omũn arým kuma. Ne kute amikapriõ amirĩt kadjy amikã kadjõn me'ỳr prõt ne. Ne me krãptĩ katikõt aminẽje kàj bê: memã kabẽn tẽ. Me kute arkum mry bĩn nẽje kàj bê: memã kabẽn tẽn memã kum,

<sup>15</sup> —Ë, mỳkam ne ga me aje ar imã amijarẽnhmã? Djãm ar ibẽ Metĩndjwýnh? Kati. Ar ije me apyrãk. Me aje wãnh mỳjja kajgo jamã anhirermã ne bar kàj bê me ajakreo iba. Metĩndjwýnh ne tĩn ne ar ba. Ta ne arým kàjkwa nhipẽx ne ajte pyka nhipẽx ne ajte ngõ raxbẽ pyka kêt nhipẽx ne ajte kam mỳjja kunĩ nhipẽx. Tãm dja ga me amim maro aba. <sup>16</sup> Amrẽbẽ: apýnh me ba djãkam

ne me ta kute amidjwýnhbit marn amikõt amijo ba kajgo nhyim Metĩndjwýnh ate krã.

<sup>17</sup> Djãm ate krãkam kute me bamã amijo amirĩt kêt? Kati. Kute me bamã amijo amirĩt rã'ã. Ga, kute me bakunĩõ djuw mex rã'ãja pumũ. Nãm mã djwỳ nhõ mytyrwỳ kõt apýnh djwỳ djãri pykakam o apõx rã'ã. Ne kam djwỳo mã me bajo djuw mexkumrẽx ne o me bajo kĩnhkumrẽx. Ne kute me bajo anhỹr rã'ã ne. Ga, Metĩndjwýnhkumrẽx ne kute me bakunĩõ djuw mex rã'ãja pumũ. Nãm Paur ar ã aminẽje memã ane. <sup>18</sup> Nãm ar te memã ane nhyim me krãptĩja ar'ã ajkẽ. Ne me kute arkum amijarẽnh kadjy kute mry bĩn prãm rã'ãn kam arým kanga.

<sup>19</sup> Nhyim kam mebẽ idjaer kwỳ bõx. Æxiki kurũm me kwỳ bõx. Ajte Ikõni kurũm me kwỳ bõx. Ne kam memã ar kurẽtuw nhyim me arým kẽno Paur titiko djan arým 'ã abenmã, “Arým ne ty”, ane. Ne kam arým krĩrax nẽje bjẽro mõn o katon atykmã kumẽ. <sup>20</sup> Nhyim kam Jejukõt me ba djwýnh bõx ne kum ipõk ne. Nhyim kam kàjmã djan arým akubyn krĩraxmã wadjã. Nhyim kam me'ã akati nhyim Banabemẽ Paur ar arým krĩraxbẽ Tebi'ỳr tẽ.

*Ar arým amipry krax'ỳr akẽx.*

<sup>21</sup> 'Ỳr tẽn kam 'ỳr bõx. Ne kam krĩrax tãmkam kàj bê memã ujarẽnh ny jarẽnhõ ba nhyim me krãptĩ arým tu amim Jeju markumrẽx. Nhyim kam ar akubyn krĩraxbẽ Rixa'ỳr tẽn 'ỳr bõx ne kam Ikõni'ỳr tẽn 'ỳr bõx ne kam Æxiki'ỳr tẽn 'ỳr bõx. <sup>22</sup> Ne krĩ kunĩkõt Jeju kõt me ba djwýnhmã 'ã karõo tẽn memã kum,

—Dja gar tu amim Jeju markumrẽx rã'ãn 'ã adjukanga kêt. Dja me kãtãm gwaj bajo bikẽnh ar o ba gwaj batokry kumex ma. Nhyim kam Metĩndjwýnh ýtã amikõt gwaj bapymjýrkumrẽx. Arým õ me ja kunĩmã bẽnjadjwýrkam dja ã gwaj bajo ane. Nãm Paur ar ã memã anhỹro tẽmo ane.

<sup>23</sup> Ne kam apýnh me kute amim Jeju mar djãri kunĩkõt tẽ. Me kute Jejukõt ar aben pydjio ba djãri kunĩkõt tẽn me kwỳ'ã meo ba djwýnh rẽ. Ne kam Metĩndjwýnhmã meo a'uw ne kum amijajbun arým memã kum,

—Gar arým tu amim Běnjadjwýr djwýnh markumrěx. Bar kum ar ajo a'uw gē mā ar ajo djuw mex ne ar ajo ba, ane. <sup>24</sup> Ne kam arým tē. Pykabē Pidjijkōt tē:n kam arým pykabē Papirij'ýr bōx. <sup>25</sup> Ne tē:n kam krĩraxbē Pedji'ýr bōx. Ne kam kàj bē memā Metĩndjwýnh kaběn jarē. Memā arěn kam ajte tē. Tē:n kam krĩraxbē Atarij'ýr bōx.

<sup>26</sup> Ne kam ajte ngō raxbē pyka kētkōt akubyn krĩraxbē Āxiki 'ōdjwý'ýr tēmā. Krĩrax jakam ne me amrēbē Metĩndjwýnhmā aro a'uw ne kum,

—Amā ar àpēnh kadjy dja ga tu amā ar kaprĩkumrěx ne aro djuw mexo aba, ane. Nām me kum aro a'uw ne kam amũ ar ano. Nym ar arým amũ krĩrax krāptĩkōt ujarēnh ba. Ne kam arým inomā amidjāpēnh djā mēn ajte akubyn Āxiki ja'ýr tēmā. <sup>27</sup> Ýr tē:n kam arým 'ýr bōx. Bōx ne me kute amim Jeju marjao aben pydjĩn arým memā amijā ajarē. Metĩndjwýnh kukwakam ar àpēnh kunĩkōt memā 'ā ajarēn memā kum,

—Be, Metĩndjwýnh ne arým apýnh me bajtem ba djākam memā amak bō nym me krāptĩ: arým tu amim Jeju markumrěx, ane. <sup>28</sup> Ne kam arek Jejukōt me ba djwýnhja kōt ar ba 'ā tũm.

## 15

*Djeruxarēkam me kute kukràdjāo aben mar.*

<sup>1</sup> Nām ar arek Āxikikam ar ba: nym kam me kwý arým pykabē Djudēja kurũm bōx. Ne kam 'ēx ne Jeju kukwakam me kamymā kaběn. Me bajtemmā kaběn ne memā kum,

—Gē me Mōjdjē kukràdjā kōt me amy nhĩhu kà rē. Dja me me amy nhĩhu kà rēnh kēt nym Metĩndjwýnh kute ō kàjkwa kadjy me apytār prām kēt. Nām me 'ēx ne ā memā ane.

<sup>2</sup> Nym kam Paurmē Banabe ar arým Djudēja kurũm me bōxjamē aktā kabēno aben japa:nho dja. Nym kam me abenmā kum,

—Gē Paurmē Banabemē me bakwýdjwý Djeruxarēmā tē. Gē ar Jeju kute ar anorjamē me kute Jeju nhō me jao ba djwýnh'ýr bōx ne me my kà rēnh jabej me kukja, ane. <sup>3</sup> Ne kam me kute amim Jeju mar ne kōt ar aben pydjio baja arým amũ ar

ano nym ar tē. Tē:n pykabē Penixijkōt tē. Ne tē:n pykabē Xamarijkōt tē. Ne tēmkōt Jeju kukwakam me kute abeno kamymā ujarēnh tēn memā kum,

—Apýnh me bajtem ba djākam ne me arým Běnjadjwýr djwýnh'ýr amijo akēx ne tu amim markumrěx. Nām ar ā memā anhýr tē. Nym kam me kunĩ arým kĩnhĩtirkumrěx.

<sup>4</sup> Nym ar tē:n kam arým Djeruxarē'ýr bōx. Nym kam me kute amim Jeju mar ne kōt ar aben pydjio baja ar pa krij ne arkum kaběn mextire jarē. Mekam Jeju kute ar anor jadjwý, meo ba djwýnhdjwý ne ar ā aro ane. Nym kam ar memā amijā ajarē. Metĩndjwýnh kukwakam ar àpēnh kunĩkōt ar memā 'ā ajarē.

<sup>5</sup> Nym kam mebē pardjēu kwý kàjmā dja. Adjwýnhdjwý ne ar tu amim Jeju markumrěx. Ar kàjmā djan memā kum,

—Gē me me my kà rē. Me bajtem kute amim Jeju marja my kà rē. Dja me me bakukràdjā'ā memā karōn memā kum, “Djā gām me katāt Mōjdjē kukràdjā man kōt ar amijo aba”, ane. Dja me ā me bajtemmā ane. Nām ā mebē pardjēu memā ane.

<sup>6</sup> Nym kam me kute 'ā aben marmā Jeju kute ar anorjamē me kute Jeju nhō me jao ba djwýnhmē akuprō. <sup>7</sup> Ne kam aktā kabēno aben japanho kumex. Nym kam Pedru kàjmā djan memā kum,

—Be, akmere ar, ba ar amā arē. Metĩndjwýnh ne amrēbē ar akurām amijo ipytā. Ije me bajtemmā idjujarēnh kadjy amijo ipytā. Ije memā Kritu'ā ujarēnh ny jarēnh nym me kute tu amim markumrěx kadjy. Ja kadjy ne amijo ipytā. Ja ne gar arým aje mar.

<sup>8</sup> Metĩndjwýnh ne kute me ōkre kadjwýnhbē me kaběn kunĩ mar. Nām kum me bajtem kĩnh ne arým memā ta Karõ jano. O ne arým gwaj bamā kum me kĩnho amirĩt ne. Amrēbē ne gwaj bamā anon kam arým jakam ā memā anoro ane. <sup>9</sup> Djām kum me babē idjaerbit kĩnh ne kum me bajtem kĩnh kēt? Kati. Me tu amim markumrěx nym arým me ōkre kadjwýnhbē memā axweo ajngrā. Kam arým kum me bajtemdjwý kĩnh. Nām kum me kunĩ kĩnho aben pyrāk.

<sup>10</sup> Ar akwý ne gar aje, “Dja me bajtem Mōjdjē kukràdjā kōt amijo ba mex”, anhýro

aba. Je tô, mýkam ne gar akabēn jao Metĩndjwýnhmã amikurê'uko aba? Djãm Môjdjê kukràdjà kôt ne me bakukãmãre kute amijo ba mex got? Gwaj badjwý djãm kôt ne gwaj amijo baba mex got? Kati. Gwaj bajaxwekam ne gwaj te: baje Môjdjê kukràdjàkôt amijo baba mexmã. Kam kwãrĩk wãnh me bajtemmã ja jarēnh kêt. Me kute Môjdjê kukràdjà kôt amijo ba mexmã kwãrĩk wãnh memã arēnh kêt.

11 Be, mrãmri Bēnjadjwýr djwýnhbê Jeju Kritu ta ne tu kum gwaj bakaprĩkumrēx.\* Kam ta ne õ kàjkwa kadjy gwaj bapytã. Gwaj amrēbê tu amim ja markumrēx. Ta ne tu kum me bajtemdjwý kaprĩn ã me utãro ane. Nãm ã Pedru memã ane.

12 Nhym me krãptĩja arým kabēn krãta. Nhym kam Banabemē Paur ar arým memã kum,

—Be, me kute Metĩndjwýnh raxmã kator kadjy bar kukwakam mýjja pumũnh kêt kwý nhipêx. Nã bãm ar me punu kwýo mex nhym me te kute marmã kam no tyn kumex, ane. Nãm ar memã anen 'ã memã ujarēnhõ dja.

13 Nhym me arek ar maro nhỹ: nhym kam ar arým anihkrê. Nhym kam Xijagudjwý memã kabēn. Memã kabēnkam ne Pedrumã Ximão jarē. Nãm memã kum,

—Akmere ar, dja gar ikabēn ja ma. 14 Be, Ximão arým ar amã arē. Metĩndjwýnh arým kum me bajtem kaprĩn kute amim me kwý pytãr kraxkôt ne ar amã arē.

15 Me bakukãmãredjwý tãm jarē. Metĩndjwýnh kute amim me bajtem kwý pytãr jarē. Amrēbê: Metĩndjwýnh kukwakam kabēn jarēnh djwýnh tãm jarēn arým 'ã pi'òk no'òk ne. Dawimē kramē tãmdjwý ar kute aben djô'ã mebê idjaermã krĩn meo ba. Metĩndjwýnh me'ã Dawi nhõ kikre jakren memã kum,

16 “Kam dja ba bõx ne akubyn Dawi tãmdjwý'ã bēnjadjwýr mē. Mrãmri ne me kute akubyn kum õ kikre nhipêx pyrãk. Kikre kukràdjà tũmja ne amrēbê amingrà. Dja ba kãjmã kudjan ipêx ne.

17 Dja ba ã tãmdjwýo ane gē me anhy ijabej. Gē mebê idjaer bu'ã me bajtemdjwý ijabej. Me bajtem kute tu amim imarkumrēxja kunĩ ijabej. Ba Ibēnjadjwýr djwýnh dja ba ã meo ane.”

Nãm ã Metĩndjwýnh memã ane. Dawi tãmdjwýmē me bajtem'ã memã ane. Ga, kute amim me bajtem kwý pytãr jarēnhja pumũ. 18 Adjãkam kute amikukãm mýjja kunĩ markôt ne ã memã ane. Nãm ã Xijagu memã ane.

19 Ne ajte itepã memã kum,

—Ga, me bajtem kute Bēnjadjwýr djwýnhõ aminhõ Bēnjadjwýrja pumũ nhym kute me bajtemõ aminhõ meja pumũ. Ba ar amã arē. Me bajtem kwý ne ajbir arým Metĩndjwýnh'ýr amijo akēx ne tu amim markumrēx. Kwãrĩk wãnh Môjdjê kukràdjà kunõ me kunor kêt. 20 Gwaj memã Môjdjê kabēn ngrērebit'ã pi'òk no'òk ne memã arē. Gwaj memã kum, “Me kute mýjjao metĩndjwýnh karõ nhipêxjamã mry parja kwãrĩk wãnh krēn kêt. Kwãrĩk wãnh aprõ djwýnh kupa'ã nãr amjēn djwýnh kupa'ã akurē aba kêt. Mry me kute mut djēo parja kwãrĩk wãnh àr ne krēn kêt. Kwãrĩk wãnh kamrõ krēn kêt”, ane. Gwaj ã memã ane.

21 Gwaj me bajtemmã Môjdjê kukràdjà jabit jarē. Gwaj ren memã arēnh kêt nhym ren me kute mar kêt nhym ren kam mebê idjaer kum me kurê. Me Môjdjê kabēn'ã no tỳxkam kum me kurê. Be, me õ krĩ kunĩkôt ne me Môjdjê kabēn'ã no tỳx ne kàj bê memã arēnhõ ku'ê. Pi'òk rãrãr kunĩkôt ne me kute me bikprõnh djãkam mýjja ja'ã pi'òk no'òk jarēnhõ ku'ê. Amrēbê: ne me me bakukãmãremã arēn ajbir me kute arēnh rã'ã. Kam dja gwaj me bajtemmã Môjdjê kukràdjà ngrēre jabit jarē gē me kuman kôt ar amijo ba nhym kam mebê idjaer arým kum me kurê kêt. Nãm Xijagu ã memã ane.

*Me kute me bajtemmã pi'òk no'òk.*

22 Nhym kam me abenmã kum,

—Gwaj Paurmē Banabe arkôt krĩraxbē Æxikimã gwaj banhõ me ja kwý jano, ane. Nhym Jeju kute ar anorjamē me kute Jeju nhõ me jao ba djwýnhmē me kute kôt ar

\* 15:11 Djãm gwaj ba ne gwaj bajaxwe kêt nhym pãnh kum gwaj bakaprĩ Kati. Gwaj ba ne gwaj te: bajaxwe kêtã. Nhym be, Jeju Kritu ta ne tu kum gwaj bakaprĩkumrēx.

aben pydjio baja kunĩmẽ ne me abenmã kum,

—Be, mextire. Dja gwaj arkõt ar'õ jano, ane. Ne kute arkõt ar anor kadjy amijo Djuda Baxabamẽ Xira ar utà. Ar amẽ ne ar Jeju kukwakam me kamy kuràm rax. Ar ja arkõt mõrmã. <sup>23</sup> Nhym kam me arým pi'òk no'òk ne. Ar kute o mõi kadjy ne me pi'òk no'òk ne. Ne kamã me bajtemmã kum,

“Me ba Jeju kute me ijanor tũm ja ne ba me me amã ikabẽn jarẽ. Me ije Jeju nhõ me jao iba djwýnhdjwý ne ba me me amã ikabẽn jarẽ. Me ibẽ Jeju kukwakam me kamydjwý ne ba me me amã ikabẽn jarẽ. Ga me apýnh me bajtem ba djakam ar aba, krĩraxbẽ Āxikimẽ pykabẽ Xirijmẽ pykabẽ Xirixikam ar aba. Ba me Jeju kukwakam me ajo ikamy. Wãm ne ba me ikabẽn mex'ã me amã pi'òk no'òk ne. Dja ga me me ikabẽn jarẽn ama.

<sup>24</sup> Be, wãm me kwý kumrẽx mõi wã ne me arým me amã 'èx. Me ikurũm mõi me awýr bõx ne me amã 'èx. Ne me ikukràdjã tũmo me akunoro ban arĩk me amã, 'Gẽ me Mõjdjẽ kukràdjã kõt me amy nhinhu kà rê. Dja me me amy nhinhu kà rênh kêt nhym Metĩndjwýnh arým kute õ kàjkwa kadjy me apytàr prãm kêt', ane. Be, me kute me amã anhýr djõ'ã ne ga me te: aje katàt Metĩndjwýnh kabẽn marmã. Arým ne Paur ar amrẽ tẽn me imã ja jarẽ ba me kuman arým wãm me amã ikabẽn jarẽ. Djãm me ba ne ba me wãm me 'èxnhĩwã jano got? Kati. <sup>25</sup> Be, ba me ije me ajarênh markam arým axikõt ikabẽn ne me akadjy amijo me ijõ ar utà. Amijo ar utàn Banabemẽ Paur arkõt me awýr ar ano. Gu me bamã bakamy Banabemẽ Paur ar kĩnhja kõt ar ano.

<sup>26</sup> Be, me kum Metĩndjwýnh kĩnh kêt ja ne me te ar kangrõnho ba nhym ar mã memã Jeju'ã ujarênh ar ba. Kum me uma kêt ne tu memã banhõ Bẽnjadjwýr djwýnhbẽ Jeju Kritu'ã memã ujarênh ar ba.

<sup>27</sup> Me ije arkõt me amã ar anorjabẽ ne Djudamẽ Xira ar. Dja ga me pi'òk jakam me ikabẽn jarẽn ama. Nhym ar wã dja ar ajkwakumrẽxkõt ajte me amã tãm jarẽ ga me mrãmri ajte kõt aman mar pydji.

<sup>28-29</sup> Mõjdjẽ kukràdjã ngrêrebit dja ba me me amã arẽ ga me aman katàt kõt ar amijo aba. Ba me me amã, 'Me kute mýjjao metĩndjwýnh karõ nhipèxjamã mry parja kwãrĩk wãnh krên kêt. Kwãrĩk wãnh mry kamrõ krên kêt. Mry me kute mut djẽo parja kwãrĩk wãnh àr ne krên kêt. Kwãrĩk wãnh aprõ djwýnh kupa'ã nàr amjên djwýnh kupa'ã akurẽ aba kêt', ane. Jabit ne ba me me amã arẽ. Dja ga me katàt Mõjdjẽ kukràdjã ngrêre jabit man kõt ar amijo aban arým amrãnh mex. Ba me ren me amã itepã kukràdjã 'õdjwý jarẽ ga me ren te: aje mar ne katàt kõt amijo aba prãmje. Be, Metĩndjwýnh Karõ ne me ikõt amikabẽn dji ba me me amã ikabẽn jarẽ. Tãm ne ja.”

Nãm me ã me bajtemmã pi'òk no'òkkam kabẽn jarênho ane.

<sup>30</sup> Nãm me memã pi'òk no'òk ne kam arým Paur arkum kungãn arkum, “Aj mã”, ane. Nhym ar arým Āxiki'ýr o tẽn kam 'ýr o bõx. Ne kam me krãptĩ:o akuprõn arým memã pi'òk no'òk ngã. <sup>31</sup> Nhym me memã pi'òk jarẽ nhym me arým kuma. Kabẽn mextire man arým kĩnhkumrẽx ne.

<sup>32</sup> Nhym Djudamẽ Xira Ar kubẽ Metĩndjwýnh kukwakam kabẽn jarênh djwýnh ne arým memã 'ã karõ kumex ne memã kum,

—Dja ga me tu amim Jeju mar týxkumrẽx rã'ãn 'ã adjukanga kêtumrẽx. Nãm ar ã memã 'ã karõo ane. <sup>33</sup> Ne arek kam ar ba nhym ar'ã arým akati kwý apèx. Nhym kam ar memã kum,

—Bar akubyn Jeju kute ar anorja'ýr tẽn, ane. Nhym Jeju kukwakam ar kute abeno kamy arkum,

—Aj mã. Ar adjumar mex ne tẽn, ane.

<sup>34</sup> Nhym kam Xira memã kum,

—Ba arek me akam ar iba, ane.

<sup>35</sup> Paurmẽ Banabe ar adjwýnhdjwý arek Āxikikam ar ba. Arek me krãptĩ ro'ã kàj bẽ memã Bẽnjadjwýr djwýnh kabẽn jarẽn 'ã memã ajarẽ.

*Paurmẽ Banabe kute abeno bikjêr.*

<sup>36</sup> Nhym kam ar'ã akati kwý apèx nhym Paur Banabemã kum,

—Gu baje õbẽ apýnh krĩraxkõt Bẽnjadjwýr djwýnh'ã memã badjujarênhja gu akubyn

kunĩkõt tẽ. Gu baje Jeju kukwakam meo bakamy pumũho tẽ. Me katåt kute amijo ba jabej me omũho tẽ, ane. <sup>37</sup> Nhyam arkõt tẽm kadjy Banabe kum Djuão Makõ kĩnh.

<sup>38</sup> Nhyam be, Paur ne kum o tẽm kĩnh kêt. Õbẽ kute pykabẽ Papirijkam kute ar kangan arkõt apẽnh'ýr tẽm kêt kam ne kum o tẽm kĩnh kêt. <sup>39</sup> Nhyam kam ar kabẽno aben japan arým abenkam kaprĩre ne. Ne kam arým abenbẽ ajkij. Nhyam kam Banabe arým Makõo tẽn ngõkõt apẽxtibẽ Xipre'ýr o tẽ.

<sup>40</sup> Nhyam Paur amijo Xira pytà. Nhyam kam Jeju kukwakam ar kute abeno kamy ar'ã Metĩndjwýnhmã kum,

—Ga ne ga adjukaprĩ:kumrẽx. Kam tu amã ar kaprĩkumrẽx ne ar o aba, ane. Nhyam kam ar mã tẽ. <sup>41</sup> Ne pykabẽ Xirijmẽ pykabẽ Xirxijkam tẽ. Apýnh me kute amim Jeju mar djari kõt ba. Me kute Jejukõt ar aben pydjio ba djari kõt ba. Ne memã týx jangjẽho tẽ. Nãm ar memã kum,

—Dja gar tu amim Jeju mar týxkumrẽx rã'ãn 'ã adjukanga kêt kumrẽx, anhýro tẽ.

## 16

### *Paur kute mã amikõt Ximoxio ba.*

<sup>1</sup> Ne kam tẽ:n kam arým krĩrãxbẽ Tebi'ýr bõx ne ajte tẽ:n kam krĩrãxbẽ Rixa'ýr bõx. Nhyam Jejukõt me ba djwýnh'õ nhidjibẽ Ximoxi kam ar ba. Nã kurũm katorja ne kubẽ mebẽ idjaer'õ. Nãm nãja kumrẽx tu amim Jeju markumrẽx. Nhyam bãm kute irjabẽ me bajtembẽ kregu'õ. <sup>2</sup> Krĩrãxbẽ Rixakammẽ krĩrãxbẽ Ikõnikamdjwý Jeju kukwakam me kamy mã: memã Ximoxi mexkumrẽx jarẽho ba.

<sup>3</sup> Nhyam Paur Ximoxi'ýr bõx ne omũn kam kum ar ro'ã ba prãm ne. Kum ar ro'ã ba prãm nhyam be ar kukãm pyka kunĩkõt mebẽ idjaer krãptĩ ar ba. Me kute Ximoxi mar tũm. Ximoxi bãmbẽ me bajtembẽ kreguja me kute mar tũm. Ximoxi my kã krã'ýr kêt me kute ajte mar. Nhyam kam mebẽ idjaer kum Ximoxi kurẽ kêt mã Paur arým kum my nhinhu kã krãta.

<sup>4</sup> Nhyam kam ar tẽ. Apýnh krĩrãxkõt tẽn kunĩkõt me kute amim Jeju marmã

kabẽn jarẽho tẽ. Djeruxarẽkam Jeju kute ar anorjamẽ me kute Jeju nhõ me jao ba djwýnhmẽ ar kabẽn ne memã arẽho tẽ. Me kute mar ne katåt kõt kute amijo bamã ar memã arẽho tẽ. <sup>5</sup> Nhyam kam ar ô'ã apýnh me kute amim Jeju mar kute ar Jejukõt aben pydjio ba djari tu amim Jeju mar tý:xkumrẽx. Nhyam akati kunĩkõt me kwý kute Jeju mar kêtja me kõt arým tu amim markumrẽx. Nhyam kam arým me krãptĩ.

<sup>6</sup> Nhyam ar pykabẽ Bridjakõt tẽn pykabẽ Garaxakõt tẽ. Nhyam Metĩndjwýnh Karõ arkum,

—Kwãrĩk wãnh pykabẽ Adjijkam memã Metĩndjwýnh kabẽn jarẽnh kêt, ane. <sup>7</sup> Nhyam kam ar tẽ:n arým pykabẽ Midjij tẽpo tẽ. Ne bit kute pykabẽ Bixinij katikõt tẽmmã. Nhyam Metĩndjwýnh Karõ akubyn ar nẽ.

<sup>8</sup> Nhyam kam ar arek tẽ:n kam amipãnh pykabẽ Midjij mẽ. Ne tẽ:n kam krĩrãxbẽ Krõwadji'ýr bõx. <sup>9</sup> Nhyam ar'ã akamãt ne. Nhyam Metĩndjwýnh Paurmã me'õ karõ bẽ nhyam omũ. Pykabẽ Matenikam me'õ amiwýr Paur 'uw nhyam omũ. Nhyam kum,

—Amrẽ pykabẽ Matenikam tẽn me ikõt apẽ, ane. <sup>10</sup> Be, Paur kute me'õ pumũnhkam bar\* on pykabẽ Mateni'ýr itẽm kadjy amiman abenmã,

—Be, mrãmri ne Bẽnjadjwýr djwýnh gwaj bajuw. Gwaj baje kãj bẽ memã Kritu'ã ujarẽnh ny jarẽnh kadjy gwaj bajuw, ane.

### *Ridjij kute tu amim Jeju markumrẽx.*

<sup>11</sup> Ne kam Krõwadji kurũm ikaton arým inox ne. Ne ngõkõt Xamokra'ýr tẽ. 'Ýr tẽ:n arým 'ýr bõx. Ne ajte tẽ: nhyam kam ar ijã akati. Bar kam ajte tẽ:n kam arým krĩrãxbẽ Nêjapõr'ýr bõx ne 'ã kã nhõ. <sup>12</sup> Ne wabin kam ajte Nêjapõr kurũm pykakõt tẽ. Tẽ:n kam arým krĩrãxbẽ Pirpu'ýr bõx, pykabẽ Matenikam ne krĩrãxbẽ Piripuja. Krĩrãx ja ne kute raxo krĩrãx kwý jakrenh. Myt apõx djã kutã pykabẽ Mateni nhikjê'ã kute krĩrãx kunĩ jakrenh. Krĩrãxbẽ Rõma nhõ me ja ne me krĩrãx jao djuw mex. Bar arek kam ar iba: nhyam kam ar ijã akati kwý apẽx.

<sup>13</sup> Nhyam kam ar ijã pi'õk rãrãr. Bar kam krĩrãxbẽ tẽn ngõ rax'ýr bõx. Kam ne mebẽ idjaer kute Metĩndjwýnhmã kabẽn djã. Me

\* **16:10** Pi'õk ja no'õk djwýnh nhidjibẽ ne Ruka. Jakam ne Ruka arkõt tẽmmo krax. 'Ã ne kute, "Bar" jarẽnhja. Paurmẽ amijã arẽ.



nire kwŷ arŷm kam akuprō. Bar me'ŷr tēn arŷm me ikō'ā nhŷn kam memā idjujarēnho dja. <sup>14</sup> Nhyŷ mekōt me'ō nire, idjibē ne Ridjij. Krīraxbē Xixira kra 'ō. Kubē ne kubēkà nhōr djwŷnh. Ta ne kubēkà 'ōk nhyŷ kamrēk. Nhyŷ kam pi'ōk kaprī kadjy memā ōro ku'ê. Nām Môjdjê kukràdjà kōt mǎ Metindjwŷnhmǎ rax jarēnho ba. Bar memā idjujarēnho dja nhyŷ Ridjij ar ikabēn maro nhŷ. Nhyŷ kam Metindjwŷnh arŷm kum amak bō nhyŷ arŷm tu amim Jeju markumrēx. <sup>15</sup> Bar kam Ridjijmē ō kikrekam ōbikwa kunīdjwŷ Metindjwŷnhmǎ ngōmǎ ar angij. Nhyŷ kam ar imǎ krà ne ar imǎ,

—Ar aje ijǎ amim, “Mrāmri kute tu amim Bēnjadjwŷr djwŷnh markumrēx”, anhyŷr jabej dja gar on ikōt tēn inhŷrkwākam anhikwǎ, ane. Ne kam ar imǎ krào dja. Bar kam kōt tēn ŷrkwākam inhikwǎ.

#### *Me kute Paurmē Xira Ar kubē ijē.*

<sup>16</sup> Arek ŷrkwākam inhikwǎ:n kam Metindjwŷnhmǎ kabēn djǎ'ŷr tē. Nhyŷ me prīti'ō ar ikajpa. Me karō punu ne ar o ba. Nhyŷ me mǎ amikukām mŷjja kute apōx'ǎ prītijā kukij nhyŷ me karō punu mǎ kum arē. Kum arē nhyŷ ō'ǎ prītijā mǎ memā mŷjja'ǎ ajarē. Nhyŷ kam me arŷm pānh kum pi'ōk kaprī ngǎ. Nhyŷ kam prītijā nhō bēnjadjwŷr ar arŷm kubē pi'ōk kaprī kumex jamŷ. Ta ne arkum kungǎ nhyŷ ar arŷm kubē amŷ.

<sup>17</sup> Nām Paurmē ar ikajpan ar ikōt arŷm ar ijo memā àkjêr tē. Nām àkjêrkam memā kum,

—Ota, ar ja ne ar Metindjwŷnhbē kumkatimǎ àpēnh ar ba. Ne me amǎ Jeju kute me apytàr'ǎ ujarēnh ba, ane. <sup>18</sup> Nām akati kunīkōt memā anhŷro tē nhyŷ kam arŷm ar ijǎ akati krāptī apēx. Nhyŷ kam Paur me karō punumǎ àkrēn arŷm 'ŷr akēx ne kum,

—Ē, Jeju Kritu kukwakam ba amǎ ikabēn ne. On prītijamǎ anhiren kurŷm akato, ane. Nhyŷ kum kabēn majmǎ nhyŷ arŷm kum iren mǎ tē.

<sup>19</sup> Nhyŷ o ba djwŷnh ar arŷm omŷn abenmǎ kum,

—Je, jakam prītijā arŷm kute gwaj bamǎ pi'ōk kaprī jamŷnh prām kêt, anen kam ar

arŷm Paurmē Xira aro tŷm ne ar pa 'amŷ. Ne kam me rŷnh'ŷr ar bjêro mōn aro bōx. Me krāptī kute djwŷ jamŷnh djākam ne me bikprōnh djǎ. <sup>20</sup> 'ŷr ne ar aro bōx ne arŷm me rŷnh kabem ar kudjan memā 'êx ne memā kum,

—Ar kubē idjaer ja ne ar me banhō krīraxkam me kunīmǎ umar punu jangjēnho ba nhyŷ me arŷm kangao kumex. <sup>21</sup> Nām ar me bamǎ atemǎ kukràdjà jarēnho ba. Krīraxbē Rōmakam me ja kute me bajo aminhō. Ne gu me ren ar kukràdjà wǎ man kōt ar amijo baba nhyŷ ren me bakam me bēnjadjwŷr rŷnh ren me bakam ngryk ne. Nām ar ā memā ane.

<sup>22</sup> Ne kam me bu'ǎ me krāptī: amim ar kurētuw. Nhyŷ me rŷnh arŷm ar'ǎ memǎ apnē. Me kute Ar kubē kubēkà o pōx ne kōo ar titik kadjy ne ar'ǎ memǎ apnē. <sup>23</sup> Nhyŷ me arīk ar titik ne. Ne kam arŷm me bē ijē djāmǎ aro tēn kam aro bōx. Ne kam me bē ijē djwŷnhmǎ kum,

—Dja ga omŷnh 'āno dja gē ar kator kêt, ane. <sup>24</sup> Nām me kum ane nhyŷ arŷm me bē ijē djǎ nhipōkri kumoka'êkam ar ŷr. Ne kam pīponh amānhkrut aktǎ me temǎ nàtjao ar te janē nhyŷ ar wǎnh nhŷ.

<sup>25</sup> Wǎnh nhŷ: nhyŷ arŷm ar'ǎ akamāt kō ipōkri. Nhyŷ ar Metindjwŷnhmǎ kabēn ne kum ngrero nhŷ. Nhyŷ bu'ǎ me bē ijē krāptī ar maro ikwǎ. <sup>26</sup> Nhyŷ me aērbē arŷm pyka amingrēk tŷ:x nhyŷ ō'ǎ arŷm me bē ijē djǎ par krax amingrēk ne. Amingrēk nhyŷ on 'ǎ ijē djǎ kunī jām amijǎ kurê. Nhyŷ me kunī'ǎ apŷnh me unēnh djǎja arŷm amijǎ kurê. <sup>27</sup> Nhyŷ me bē ijē djwŷnh arŷm no tŷx ne. Ne kam me bē ijē djǎ'ǎ ijē djǎ jām kute amijǎ rēnhkōt omŷ. Ne kam amim,

—Je, arŷm ne me bē ijē kunī kato, ane. Ne kam ō kàxdjwa kajgo kaban bit kute o amibīnmǎ amijo dja. <sup>28</sup> Nhyŷ Paur kǎj bē kum,

—Kwārīk wǎnh amibīn kêt. Ota, ba me ikunī inhŷr rǎ'ǎ, ane.

<sup>29</sup> Nhyŷ kam ngōnhpōk'ǎ me ku'uw ne me bē ijē djāmǎ prōt ne wadjǎ. Wadjàn umaje tertet ne arŷm Paurmē Xira ar parbē tŷm. <sup>30</sup> Ne kam aro katon arkum,

—Ë, bēnjadjwỳr ar, mỳj dja ba amijon arỳm ijaxwebê amipytà? ane.

<sup>31</sup> Nhyr ar kum,

—Dja ga tu amim Bēnjadjwỳr djwỳnhbê Jeju Kritu markumrēx nhyr arỳm ajaxwebê apytà. Anhõ kikrekam anhõbikwadjwỳ gē ar tu amim markumrēx, ane. <sup>32</sup> Ne kam arỳm arkum Metĩndjwỳnh kabēn jarē, õ kikrekam ar ỳr kunĩdjwỳmã arē. <sup>33</sup> Nhyr kam akamàt tãmkam Paurmē Xira arkum igot ku'õ. Nhyr kam urokam ar arỳm Metĩndjwỳnhmã ngõmã ar angij. Mebê ijē djwỳnhmē õbikwa ar angij.

<sup>34</sup> Nhyr kam aminhũrkwãmã aro tē. Ne kam arkum õmrõ jarē nhyr ar õ kwỳ krēno nhỹ. Nhyr ar kunĩ arỳm kĩnhkumrēx ne. Ar kute amim Metĩndjwỳnh markam ne ar kĩnhkumrēx ne.

<sup>35</sup> Nhyr kam ar'ã akati. Nhyr me rũnh arỳm Paur ar'ỳr krākamngõnh ar ano. Nhyr ar ar'ỳr mõn mebê ijē djwỳnh kumrēx'ỳr bõx ne kum,

—Me rũnh ne me arỳm amã, “Arkum anhire gē ar tē.” Nãm me ã amã ane, ane.

<sup>36</sup> Nhyr kam mebê ijē djwỳnh Paur'ỳr tēn kum arēn kum,

—Me rũnh ne me arỳm ar ajã imã, “Arkum anhire gē ar tē”, ane. Kam dja gar akaton tēn adjumar mex, ane.

<sup>37</sup> Nhyr kam Paur krākamngõnh arkum,

—Krĩraxbê Rõmakam me ja ne me ar ijo aminhõ. Nhyr me kute ar ijaxwe jabej ar ikukjēr kētkam tu me ipõkri ar ititik ne. Ne kam tu ar ibē ijē. Ne kam bit kute me kãxã bõm ar imēnhmã. Djãm me kute ã krĩraxbê Rõma nhõ me jao anhỹr got? Be, kati. Me kute ã Rõma nhõ me jao anhỹr kēt. Gē me ta amrē tēn ar ijo kato, ane.

<sup>38</sup> Nhyr kam krākamngõnh ar akubyn tēn me rũnhmã ar kabēn jarē. Nhyr me kute Rõmakam me ja kute aro aminhõ markam arỳm ar umaje tĩn prãm. <sup>39</sup> Ne kam arỳm ar'ỳr tēn aminēje arkum kabēn ne arkum,

—Gop ar ijarēnh kēt, ane. Ne kam arỳm aro katon ajte arkum,

—Gop krĩrax jabē mã tē, ane. <sup>40</sup> Nhyr kam ar mebê ijē djã kurũm katon Ridjij nhũrkwãmã tēn bõx. Ne kam Jeju kukwakam me kamy pumũn arỳm memã 'ã karõn meo kĩnh. Ne kam mã ajte tē.

## 17

*Texarõnikakam memã Jeju'ã ujarēnh.*

<sup>1</sup> Tē:n kam krĩraxbê Āporij'ỳr bõx ne amipãnh kumē. Ne tē:n kam krĩraxbê Apõnij'ỳr bõx ne amipãnh kumē. Ne tē:n kam krĩraxbê Texarõnika'ỳr bõx. Kam ne mebê idjaer bikprõnh djã'õ. <sup>2</sup> Nhyr kam Paur ajte tãm ne pi'õk rãrãrkam me bikprõnh djãkam tēn arỳm pi'õkkõt memã 'ã ajarēn me kukij ne 'ã memã karõ. Nhyr ajte pi'õk rãrãr nhyr ajte kam tēn pi'õkkõt memã 'ã ajarē. Nhyr ajte pi'õk rãrãr nhyr ajte kam tēn pi'õkkõt memã 'ã ajarē.

<sup>3</sup> Nãm memã kum,

—Be, amrēbē me bakukãmãre kute pi'õk no'õk ne. Pi'õkkam ne mrãmri Kritu tokryn tyk ne akubyn tĩnmã. Be, pi'õkkam Kritu kute amijo anhỹrmã kõt arỳm Jeju ã amijo ane. Mrãmri ne Metĩndjwỳnh Jeju'ã me banhõ Bēnjadjwỳrbē kumkati mēnhkumrēx. Ja dja ga me pi'õk kõt ama. Ga, mrãmri kubē Kritukumrēxja pumũ. Jejuja tãm ne ba kãj bē memã arēnhõ iba. Nãm ã memã anhỹro ku'ê.

<sup>4</sup> Nhyr kam me kwỳ 'ã amim,

—Be mrãmri. Kõt ne arē, anen arỳm mã Paurmē Xira arkõt ajkamē. Me bajtembē kregu kute Metĩndjwỳnhmã amijarēnhõ baja krãptĩ: arkõt ajkamē. Me nire rũnhdjwỳ krãptĩ arkõt ajkamē.

<sup>5</sup> Nhyr mebê idjaer kwỳ kute amim Jeju mar kētja arỳm 'ã ngryk ne. Me te kute ar urãk prãmje arkam ngryk ne. Ar'ã me krãptĩkam arkam ngryk ne. Nhyr me kwỳ axwekam ate ar ba. Nhyr mebê idjaer me jamã kum,

—Paur ar axwekumrēx. Gwaj me kunĩbē ar kurē, ane. Nhyr kam me kwỳja krĩraxkam me krãptĩmã ar kurētuw nhyr me arỳm arkam kangao kumex. Ne kam Djaxõ nhũrkwã'ỳr prõt ne. Me kute kam Paur ar abej ne arkum kator ne me krãptĩmã aro katormã ne me ũrkwã'ỳr prõt ne.

<sup>6</sup> Ne te: ar abej. Ne kam ar pãnh Djaxõmē Jeju kukwakam ar kute abeno kamy kwỳ pa 'amỳn aro katon krĩraxkam me rũnh'ỳr aro mõn me'ỳr aro bõx. Ne ar'ã 'êx ne kãj bē memã kum,

—Paurmẽ Xira ar pyka kunĩkõt abenmã me kurê'uko ba nhym me kangao kumex. Nhym kam ar arým jakamdjwý bõx. <sup>7</sup> Nhym kam Djaxõ arkum aminhũrkwã jarẽn aro djuw mex. Ar ja kunĩ ne arkum bẽnjadjwýr raxbê Xedja kabẽn kurê. Xedjabê ne me bẽnjadjwýr rũnh kunĩ nhõ bẽnjadjwýr. Arkum kabẽn kurê. Ne mã memã kum, “Bẽnjadjwýr rax 'õdjwý kute kabẽno Xedja jakrenh ne kubê Jeju.” Nãm ar ã memã anhýr ba, ane. Be, nãm me ã ar'ã me rũnhmã ane.

<sup>8</sup> Nhym kam me krãptĩmẽ krĩraxkam me rũnh kute ja markam arým arkam ngryk ne àkrêo kumex. <sup>9</sup> Ne kam Djaxõ Ar kubê pi'òk kaprĩ kumex byn arkum,

—Paur ar ano gẽ ar mã tẽ. Ar mã tẽm nhjukribit dja bar akubyn ar amã anhõ pi'òk kaprĩ ngã, ane. Ne kam arkum ire nhym ar akubyn ũrkwãmã tẽ.

*Berêjakam memã Jeju'ã ujarẽnh.*

<sup>10</sup> Nhym kam Jeju kukwakam me kamy akamãt tãmkam amũ Paurmẽ Xira ar ano. Krĩraxbê Berêjamã ar ano. Nhym ar'ýr tẽ:n kam 'ýr bõx. Ne kam mebê idjaer bikprõnh djã'ýr tẽ. <sup>11</sup> Berêjakam me ja ne me kute amak mexo krĩraxbê Texarõnikakam me ja jakrenh. Paur ar ajkwao memã Metĩndjwýnh kabẽn jarẽ nhym me arým kum kabẽn kĩnh. Kum kabẽn kĩnh ne kam akati kunĩkõt amim pi'òk jarẽ. Metĩndjwýnh kabẽn'ã pi'òk no'òk jarẽn amim,

—Djãm Paur ar katãt amikabẽn jarẽnhkumrẽx? Djãm ar Metĩndjwýnh kabẽn'ã pi'òk no'òk kõt amikabẽn jarẽnhkumrẽx? ane. Me kute Paur ar mrãmri Metĩndjwýnh kabẽn kõt kabẽn jabej ã amim pi'òk jarẽnh ne maro ane. <sup>12</sup> Me kum kabẽn kĩnhkam ne me krãptĩ tu amim Jeju markumrẽx. Me ni bajtem rũnhbê kregujamẽ me my bajtemdjwý krãptĩ tu amim markumrẽx.

<sup>13</sup> Krĩraxbê Berêjakam Paur kãj bê memã Metĩndjwýnh kabẽn jarẽho ba: nhym amybým krĩraxbê Texarõnikakam mebê idjaer arým arẽnh ma. Ne kam 'ýr tẽ:n arým kõt bõx. Ne wãkamdjwý me krãptĩmã ar kurêtuw nhym me arým kangao kumex.

<sup>14</sup> Nhym kam Jeju kukwakam me kute abeno kamy ngõ raxbê pyka kêt'ýr Paur jano. Nhym Xiramẽ Ximoxi ar arek

Berêjakam ar ba. <sup>15</sup> Nhym me kamy kwý Pauro tẽ. O tẽ:n kam arým krĩraxbê Atẽna'ýr o bõx. Nhym kam Paur arkum,

—Dja gar Xiramẽ Ximoxi ar'ýr tẽn ar'ýr bõx ne arkum ikabẽn jarẽ gẽ ar amrẽ tẽ, ane. Nhym ar arým akubyn Berêja'ýr akẽx ne.

*Atẽnakam memã Jeju'ã ujarẽnh.*

<sup>16</sup> Nhym kam Paur arek krĩraxbê Atẽnakam arkam amako nhý. Arkam amako nhýn kam arým mekam kaprĩ:re ne. Be, me kute kum amijarẽnh kadjy ne me apýnh metĩndjwýnh karõ krãptĩ nhipêx ne krĩrax tãmkam kikre kunĩkõt umjuw. Nhym arým omũn mekam kaprĩre ne. <sup>17</sup> Ne kam mebê idjaer bikprõnh djãkam memã kabẽno ku'ê. Me kukjêro ku'ê. Memã 'ã karõo ku'ê. Me bajtem kute Mõjdjê kabẽnkõt amim Metĩndjwýnh mar jadjwýmã 'ã ujarẽho ku'ê. Ne akati kunĩkõt me krãptĩ kute djwý jamýnh djãkam memã 'ã ujarẽho ku'ê.

<sup>18</sup> Nhym kam apýnh me kukrãdjã tũm'ã ujarẽnh djwýnh arým Paur'ýr bõx ne kabẽn ma. Me ja ne me mebê epikurêju kukrãdjã'ã ujarẽnh ar ba. Nhym ate me jadjwý ne mebê exoko kukrãdjã'ã ujarẽnh ar ba. Amẽ me ja ne me Paur'ýr bõx ne kabẽn man kam arým abenmã kum,

—Je tô, mýj ne kabẽn krãptĩja bit kute me bamã arẽnhmã? ane. Nhym me kwý 'ã abenmã kum,

—Bãrãm metĩndjwýnh bajtem'ã memã ujarẽnh ar ba, ane. Mýkam ne me ã abenmã ane? Bir, Paur kute kãj bê memã Jeju'ã ujarẽnh ny jarẽho bakam. Ne kute kãj bê me tyk akubyn tĩn'ã ujarẽnh ar bakam. Kam ne me ã abenmã ane.

<sup>19</sup> Me ja ne me Paur kabẽn man kam kum krãn arým o tẽn krãnhbê Apaku nhimõk'ýr o bõx. Kam ne me kute aben pydji djã. <sup>20-21</sup> Nãm me me aben pydji djãkam Pauro bõx ne arým kum,

—Dja ga prĩne me imã arẽ. Aje memã me kukrãdjã ny jarẽnhja mýj ne kraxkam kute? Be, ga bõx ne atemã me kukrãdjã jarẽ. Mýj'ã ne ga arẽ? ane. Be, krĩraxbê Atẽnakam me krĩ tũm kunĩmẽ me bõx ny kunĩmẽ ne me mã akati kunĩkõt abenmã ujarẽnhbit. Me abenmã apýnh me ujarẽnh

ny jarẽnhõ babit nàr me me maro krĩbit. Ne atemã mýjja kupẽnh kêt.

<sup>22</sup> Nãm me Paur kukij nhym arým me aben pydji djabê Apaku nhipõkri kàjmã djan memã kum,

—Krĩraxbê Atẽnakam me akrĩ ga me aje apýnh me anhõ we metĩndjwýnh krãptĩ mar prãm kumrẽx. Arým ne ba omũ.

<sup>23</sup> Be, nã bãm me anhõ kikre kabe'ã tẽn apýnh me õ mýjjamã kute amijarẽnh djã kumexja pumũnho tẽn kam kẽn ja'ýr ikato. Me anhõ we metĩndjwýnh mar djã'ã kẽn jamã ikato. Ga me akabẽn'ã kẽn no'õk ne. Kamã ne ga me, “Gu me baje metĩndjwýnh mar kêtjamã rax jarẽnh djã kadjy ne gu me kẽn ja dji”, ane. Be, me ga ne ga me kum kẽn djir kajgo. Aje Metĩndjwýnh kumrẽx mar kêt kam ne ga me aje kẽnja djir kajgon kum amijarẽnh kajgo. Be, ba ne ba arým ije tãmja mar. Ije Metĩndjwýnh kumrẽx mar. Dja ba Metĩndjwýnh kumrẽx'ã me amã ajarẽ ga me ama.

<sup>24</sup> Be, ta ne pykamẽ kam mýjja kunĩ nhipêx. Pykakam mýjjamẽ kãjkwakam mýjjamẽ kunĩmã Bẽnjadjwýr djwýnh ne kute o ýr. Kunĩmã Bẽnjadjwýr djwýnhkam djãm me kute kum kikre nhym Metĩndjwýnh kam ýrmã got? <sup>25</sup> Nàr djãm mýjja 'õ Metĩndjwýnh nhõ kêt ga me kam aje kum õrmã? Kati. Be, ta ne kute memã tĩn jangjẽnh ne memã àkõr jangjẽnh nhym me ar ba. Ta ne memã mýjja kunĩ nhõro nhỹ.

<sup>26</sup> Apýnh me ba djã kunĩkõt me bakunĩ me banhingêt djwýnh pydji nhym Metĩndjwýnh adjakamã ipêx. Nhym kam õ'ã pyka kunĩkõt me ajmàn kam ar ba. Metĩndjwýnh amim me kukãm apýnh me bixadjwýr djã'ã karõ. Amim apýnh akati'ã karõ nhym kõt me aben kukãm apõx. Nhym me kukãm amim apýnh me ba djã'ã karõ nhym me kam aben kukãm apõx ne arým kam ar ba.

<sup>27</sup> Mýj kadjy ne me ipêx? Bir, me kute Bẽnjadjwýr djwýnh jabejmã ne me ipêx. Me gop kute amim mar ne kum katormã ne me ipêx. Djãm kute me bajõmã kre rax got? Kati. <sup>28</sup> Metĩndjwýnh me bamẽ amijo kajkep. Kute me bamẽ amijo kajkepkam ne gu me batĩn ne amingrẽk ne amirĩto baba. Ikabẽnja kõt me akukràdjã jarẽnh djwýnh

kwý amrêbê: ã memã ane. Ne memã kum, “Gu me babê Metĩndjwýnh kra”, ane.

<sup>29</sup> Be, ta ne kute me banhipêx gu me babê ta krakam kwãrĩk wãnh ga me amim, “Be, me ê mex ne umarkõt ne me kute Metĩndjwýnh karõ nhipêx. Kẽn karýro nàr kryt jakao nàr kẽnõ me kute ipêx mex”, kwãrĩk wãnh ga me ã amim anhýr kêt. Metĩndjwýnh ta kute me banhipêxkam kwãrĩk wãnh ga me amim anhýr kêt. <sup>30</sup> Be, amrêbê me kute mar kêt kam ne me ã amim anhýro ba nhym Metĩndjwýnh ate krã. Ne kam ajbir jakam pyka kunĩkõt me kunĩmã kum, “Me on amikam akaprĩren wãnh ajaxwemã anhiren iwýr amijo akêx”, ane.

<sup>31</sup> Be, dja ĩ pyka kunĩkõt me kunĩmã axwe pãnh jarẽn katãt memã o pãnh kumrẽx. Kute kukwakam memã axwe pãnh jarẽnh kadjy ne arým amijo Jeju pytã. Arým kadjy kukãm'ã akati jarẽnh mãm dji. Me kunĩ kute kum kator ne mar kadjy ne Metĩndjwýnh arým akubyn o tĩn. Me kute tãmwã kute memã axwe pãnh jarẽnh djwýnhkõt mar kadjy ne arým akubyn o tĩn.

<sup>32</sup> Nãm ã Paur memã ane nhym me arým aprý. Me kute me tyk akubyn tĩn jarẽnh markam ne me kwý arým aprýo dja. Nhym me kwý kum,

—Dja ba me ĩ ajte 'ã ama, ane. <sup>33</sup> Nhym kam Paur mã mebê tẽ.

<sup>34</sup> Be, tẽn kêt ri nhym me kwý mã kõt ajkamẽn tu amim Jeju markumrẽx. Me'õja nhidjibê ne Dijoni. Nãm Apakukam me rũnh bikprõnh djakam me ro'ã rax. Me'õ nire jadjwý idjibê Tamari. Nhym me kwýdjwý ar jakõt tu amim Jeju markumrẽx.

## 18

*Kõritukam memã Jeju'ã ujarẽnh kadjy ne ja.*

<sup>1</sup> Nhym kam Paur amipãnh krĩraxbê Atẽna mẽn arým krĩraxbê Kõritu'ýr tẽ. 'Ýr tẽ:n 'ýr bõx. <sup>2</sup> Ne kam me'õbê idjaer, idjibê Akwire'ýr bõx. Pykabê Põtukam ne rwýk djã. Amrêbê ne krĩraxbê Rõmakam prõmẽ ro'ã ar ba. Pykabê Itarijkam ne krĩraxbê Rõma. Prõbê Prixira. Ar kam ar ba: nhym kam bẽnjadjwýr raxbê Kraõdjõ mebê idjaer kunĩ jano. Krĩraxbê Rõma kurũm me ano nhym Akwiremẽ prõ ar arým mekõt katon

tẽ. Tẽ:n arým Kõritukam bõx. Ne kam ar ba. Ar ba: nhym kam Paur arým Akwire ar'ýr bõx. Ne kam ar ýrkwãkam tẽ.

<sup>3</sup> Paurmẽ Akwire ar ãpênh djã kute aben pyrãk. Ar kubê kubêkãtio kikre nhípêx djwýnh. Kam Paur arým ar ýrkwãkam tẽn arek kam krĩn ar ro'ã kikre nhípêxo ba. <sup>4</sup> Ipêxo ban kam pi'õk rãrãr kunĩkõt mebê idjaer bikprõnh djã'ýr ban memã 'ã ujarêno ku'ê. Nãm mebê idjaermẽ me bajtembê kregudjwýmã 'ã ujarêno ku'ê. Me kukjêro ku'ê, memã 'ã karõo ku'ê. Me kute tu amim Jeju markumrẽxmã memã 'ã karõo ku'ê.

<sup>5</sup> Nhym kam Xiramẽ Ximoxi ar pykabê Mateni kurũm kõt bõx. Nhym Paur no kato:n memã arênh prã:mkumrẽx ne mã mebê idjaermã kum,

—Mrãmri Jejubê me banhõ Bẽnjadjwýrbê kumkatibê Kritukumrẽx anhýro ba. <sup>6</sup> Nãm memã arênh prã:m nhym mebê idjaer arým kabêno apanh ne aprýo ku'ê. Nhym kam Paur kute me kangao amirĩt kadjy amijã kubêkã karngrõn memã kum,

—Ba te me abê idjaermã Metĩndjwýnh kabên jarê ga me mã akabêno ijapanho aku'ê. Jakam dja ga me te aje Metĩndjwýnhmã kum, “Be, Paur kute me imã arênh kêtka ne ba me biknor tokry djãkam itokry”, anhýrmã. Jakam dja ba me bajtemmã tẽn memã arê.

<sup>7</sup> Nãm ã memã anen kam arým mebê tẽn me'õbê Juxu nhũrkwãmã wadjãn kam nhỹ. Juxu ne amrêbê Metĩndjwýnhmã rax jarêno ba. Mebê idjaer bikprõnh djã kuri ne ýrkwã. <sup>8</sup> Me bikprõnh djã jakam me õ bẽnjadjwýrbê Kripu. Paur Juxu nhũrkwãkam ikwã: nhym kam Kripu arým tu amim Bẽnjadjwýr djwýnh markumrẽx. Õ kikrekam õbikwa kunĩdjwý tu amim markumrẽx. Nhym bu'ã krĩrãxbê Kõritukam me krãptĩ Paur kabên man kam tu amim Jeju markumrẽx. Nhym me arým Metĩndjwýnhmã ngõmã me angij.

<sup>9</sup> Nhym kam akamãtkam Bẽnjadjwýr djwýnh Paur nokam amirĩt nhym omũ. Nhym kum,

—Kwãrĩk wãnh me umaje abinhikrênh kêt. Dja ga memã akabên jarênh rã'ã. <sup>10</sup> Ba ne ba amẽ amijo ikajkep. Me'õ kute awýr

prõt ne ajo bikênh prãm kêtumrẽx. Be, krĩrãx jakam inhõ me ja krãptĩkam ne me'õ kute ajo bikênh prãm kêtumrẽx. Nãm ã Bẽnjadjwýr djwýnh kum ane. <sup>11</sup> Nhym kam arek Kõritukam memã Metĩndjwýnh kabên jarêno ba nhym arým 'ã amex ne 'ã nan ajte 'ã amex apêx.

<sup>12</sup> Nhym akati 'õkam mebê idjaer arým akuprõ. Gariju pykabê Akajakam memã bẽnjadjwýrkam ne me akuprõn kam abenmã Paur kurêtuw. Abenmã kurêtuw ne arým 'ýr prõt. 'Ýr prõt ne o tým ne pa 'amýn arým me kute memã axwe pãnh jarênh djãkam o bõx. <sup>13</sup> Ne kam me rũnhmã kum,

—Me'õ ja ne me ibê ikukràdjã kurêo ban me imã, “Be, ikukràdjã jakõt dja ga Metĩndjwýnhmã rax jarêno aba”, ane.

<sup>14-16</sup> Nhym Paur kum amijarênh 'ýr nhym Gariju kumrẽx ne memã kum,

—Je, me'õja ren axwekumrẽx. Ren me'õnh bã, nãr ren mýjjao akĩ ba ren arým 'ã me akabên ma. Nhym be, ate ga me abê idjaer me akabênbito angryk ne me anhidjibito angryk ne me akukràdjã tũmbito angryk ne arým o ikunoro aba. Djãm ba ije mýjja kajgo jakõt memã axwe pãnh jarênh got? Rũm me mõn wãnh me akukràdjão aba. Nãm ã Gariju mebê idjaermã anen arým me anon bõm me kurê. <sup>17</sup> Nhym kam me bajtembê kregu kunĩ Xoxinio tým. Xoxinibê ne mebê idjaer bikprõnh djãkam memã bẽnjadjwýr rax. Nãm me o tým ne arým me kute memã axwe pãnh jarênh djãja kabem titik ne. Nhym Gariju ate krã nhỹ.

#### *Prixiramẽ Akwiremẽ Apõr ar'ã ujarênh.*

<sup>18</sup> Nhym kam Paur krĩrãxbê Kõritu tãmka arek ar ba 'ãtũm ne. Ne kam arým Jeju kukwakam me kute abeno kamy arkum, “Ba on”, ane. Ne kam arým Prixiramẽ Akwire ar aprõn aro tẽ. Ar pykabê Xirij'ýr tẽmmã. Ne krĩrãxbê Xekrere kumrẽx'ýr tẽn 'ýr bõx. Bõx kêttri ne Paur Metĩndjwýnhmã amikabên pydjın arê. Ne kam amikabên kõt amijo tẽn arým aminhinomã amimẽ nhym me arým kum krãnh kê, mebê idjaer kukràdjã kõt. Nhym kam ar nox ne.

19 Ne tẽ:n kam arým krĩraxbê Epexu'ýr bõx. Nhyam kam Prixiramẽ Akwire ar arek Epexukam ar ba kadjy Paur arkum ire. Arkum iren kam tu arým mebê idjaer bikprõnh djakam tẽn memã Jeju'ã ujarẽho dja. Me kukjêro dja, memã 'ã karõo dja. 20-21 Nhyam me kum,

—Dja ga arek jakam ar aba. Gê kàjbê ajätüm ga kam amũ tẽ, ane.

Nhyam memã kum,

—Kati. Djeruxarẽkam mebê idjaer krãptĩ kute aben kajmã'ã amikukràdjã tùm mar kadjy arým aben pydji 'ýr. Ije me aben pydji djã nhõ akati majmã ibõxmã. Ba on me'ýr. Nhyam kam Metĩndjwýnh kum akubyn itẽm kĩnh jabej ba kam ajte akubyn me awýr tẽ. Aj, ba on, ane. Ne kam arým krĩraxbê Epexu kurüm tẽ. Ngõkõt tẽ.

22 Tẽ nhyam kam me arým krĩraxbê Xed-jarekam kã nhõ nhyam kam wabi, krĩraxbê Djeruxarẽ'ýr wabin kam 'ýr bõx. Ne kam me kute amim Jeju mar pa krij. Me kute amim Jeju mar ne kõt ar aben pydjio baja pa krij ne memã kabẽn mex jarẽ. Ne kam krĩraxbê ãxiki'ýr tẽ. 'Ýr tẽ:n arým 'ýr bõx.

23 Ne kam kam ar ba kàjbê 'ätüm ne ajte tẽ. Tẽ:n kam pykabê Garaxakõt tẽ. Ne kam pykabê Bridjakõt tẽn apýnh Jejukõt me ba djwýnh djari kunĩkõt memã týtjangjẽho tẽn mã memã kum,

—Gora tu amim Jeju mar týtjukumrẽx. Kwãrĩk wãnh 'ã adjukanga kêt, anhýro tẽ.

24 Nhyam kam mebê idjaer'õ nhid-jibê Apõr arým krĩraxbê Epexukam bõx. Krĩraxbê Arexãkam ne rwýk djã. Nãm kabẽn mexkumrẽx ne kute Metĩndjwýnh kabẽn'ã pi'õk no'õk mar mexkumrẽx. Kute memã arẽnh mexkumrẽx nhyam me kätãm te kute kabẽno itymãn kam kutã amik-abẽno biknoro nhý. 25 Apõr Bẽnjadjwýr djwýnh Jeju'ã prĩne me bakukãmãre kabẽn kukràdjã mar mexkumrẽx. Ne kam no kator mex ne prĩne katãt memã kabẽn jarẽnh mexkumrẽx. Ne kam Djuão kute Metĩndjwýnhmã ngõmã me angjẽnhkam me kabẽnbit ne kute mar. Kute ja nhjukri Jeju'ã ujarẽnh kunĩ mar kêt.

26 Apõr ja ne Epexukam bõx ne kam mebê idjaer bikprõnh djã 'ýr tẽn 'ýr wadjãn arým memã 'ã ujarẽho dja. Nãm kum me

uma kêt ne memã 'ã ujarẽho dja. Nhyam kam Akwiremẽ Prixira ar arým 'ã ujarẽnh man arým o tẽn kum arẽnh mex. Apõr kute Jeju'ã ujarẽnh mar kêtja kum arẽnh mex.

27 Nhyam kam kute pykabê Akajamã tẽmmã nhyam Jeju kukwakam me kute abeno kamy arým memã pi'õk no'õk ne. Kute Akajakam Jejukõt me ba djwýnhmã õr kadjy ne memã pi'õk no'õk ne arým Apõrmã kungã. Pi'õkkam ne me memã 'ã karõn memã kum,

—Dja ga me tu Apõro anhõbikwakumrẽx, ane. Nhyam kam Apõr me'ýr tẽn me'ýr bõx. Ne kam arým me kute amim Jeju marjamã Metĩndjwýnh kabẽn jarẽ. Nhyam kam me arým tu Apõro õbikwakumrẽx. Amrẽbê ne Metĩndjwýnh tu kum me kaprĩkumrẽx ne memã amak bõ nhyam kam me arým tu amim Jeju markumrẽx. Nãm me Apõro õbikwakumrẽx nhyam kam memã Metĩndjwýnh kabẽn jarẽ: nhyam kam me arým amũ amim mar kamẽn kabẽn mar rax ne.

28 Nãm mã mebê idjaermã me kukãmãre kute Kritu'ã pi'õk no'õk jarẽn mã memã kum,

—Be, pi'õkkam Bẽnjadjwýrbê kumkatibê Kritu kute amijo anhýrmã kõt ne Jeju arým ã amijo ane. Be ga, mrãmri pi'õk kõt Jejubê me banhõ Bẽnjadjwýrbê kumkatikumrẽxja pumũ. Mrãmri kubê Kritukumrẽxja pumũ, ane. Nãm me krãptĩ nhipõkri ã memã kabẽn mex jarẽho ane nhyam mebê idjaer te: kute kabẽno itymã te o anen amikabẽno biknoro nhý.

## 19

### *Paur Epexukam Jeju'ã ujarẽnh.*

1 Nhyam Apõr arek krĩraxbê Kõritukam ar ba nhyam Paur arým atýt kõt tẽ. Tẽ:n kam krĩraxbê Epexu'ýr bõx. Ne kam Kritu nhõ me ja kwý'ýr bõx. Ar ja ne ar kute Metĩndjwýnhmã ngõmã me angjẽnh djwýnhbê Djuão kabẽnbit mar. 2 Nãm ar'ýr bõx ne arkum,

—Ar aje tu amim Kritu markumrẽxkam djã ne Metĩndjwýnh Karõ ar ajamýn ar ajo ba? ane.

Nhyam ar kum,

—Kraxje me'õ kute ar imã Metĩndjwýnh Karõ'ã ujarēnh kētkam ne bar ije mar kētkumrēx, ane.

Nhym Paur arkum,

<sup>3</sup> —Be, me kute Metĩndjwýnhmã ngômã ar ajangjēnhkam mýj ne me kute o amirĩt kadjy ngômã ar ajangij? ane.

Nhym ar kum,

—Be, nã bãm ar arým amikam ikaprĩren wãnh ijaxwemã inhiren Metĩndjwýnh'ýr amijo akēx. Kute jao amirĩt kadjy me ngômã ar ijangij. Nãm ã Djuão ngômã me angjēho ane, ane.

<sup>4</sup> Nhym kam Paur arkum,

—Mrãmri ne me amikam kaprĩren wãnh axwemã iren Metĩndjwýnh'ýr amijo akēx. Jao amirĩt kadjy Djuão ngômã me angij. Kamã ne memã kum, “Be, itotokbē ne me'õ bõxmã. Tãmwã dja ga me tu amim markumrēx”, ane. Kritubē Jeju'ã ne ã memã ane. Nãm ã Paur arkum ane <sup>5</sup> nhym ar arým kuma. Ne kam ar tu amim Bēnjadjwýr djwýnh Jeju markumrēx nhym arým kum ngômã ar angij.

<sup>6</sup> Ne kam ar krã'ã aminhikra jadjuw nhym Metĩndjwýnh Karõ arým ar 'amý. Nhym ar arým apýnh ar kute me kabēn mar kētkam kabēn jarēho dja, Metĩndjwýnh kukwakam kabēn jarēho dja. <sup>7</sup> Kute ngômã ar angjēnh ja ne Ar kubē 12 pyrãk.

<sup>8</sup> Nhym kam Paur aben tã mebē idjaer bikprõnh djãkam tēn kum me uma kēt ne memã 'ã ujarēho ku'ê. Nãm aben tã Metĩndjwýnh kute amim me utar ne ar meo ba'ã memã ujarēho ku'ê, memã 'ã karõo ku'ê. Nhym me kwý amim, “Mrãmri kabēnkumrēx”, anhýro krĩ. Nhym arým 'ã mytyrwýbē 3 apēx. <sup>9</sup> Nhym ate, me kwý ta arým amakkre kēt ne arým kabēn mar kēt ne me krãptĩ nhipõkri kabēn punuo dja. Ne memã kum,

—Djãm Jejukõt me kute amijo bakam mex got? Arkati, anhýro ku'ê. Nhym kam Paur mebē Jeju nhõ me jao tēn arým me kãxã meo krĩ. Me'õbē Xiranu kute memã me kukrãdjã jarēnh djãkam meo krĩ. Akati kunĩkõt memã ujarēho krĩ. <sup>10</sup> Nãm aben tã meo krĩ nhym me'ã amex ne ajte 'ã na ne ajte 'ã amex ne ajte 'ã na apēx. Apēx nhym kam pykabē Adjijkam me õ krĩ kunĩkõt ne

me arým Paur kabēn ma. Mebē idjaermē me bajtembē kregudjwý ne me Bēnjadjwýr djwýnh Jeju'ã ujarēnh ma.

<sup>11</sup> Nhym Paur Metĩndjwýnh kukwakam arým apýnh mýjja pumũnh kēt djãri ipēxo ba. Nãm me punuo mexo ba. <sup>12</sup> Nãm ipēxo ba nhym me me ĩjarop kukõnh djã, nar me õ kubēkã Paurmã o mõn o kupē. Ne kam apýnh me punu djãri memã o mõ nhym me punu kunĩ arým mex ne. Nhym me karõ punu kunĩ arým memã ire.

<sup>13-14</sup> Nhym mebē idjaer kwýja ne ar Epexukam ate ar babit ne arek krĩ kēt. Me kadjy Metĩndjwýnh mar djwýnh nhõ bēnjadjwýr'õ nhidjibē Xewa ne ar kunĩ jadjuw. Ar kubē 7. Xewabē ne mebē idjaer'õ. Kra ar ta ne amijo me karõ mar mexo ba. Ar me karõ punu kute meo ba'ã Bēnjadjwýr djwýnh Jeju nhidji jarēn kum,

—Bar Jeju kukwakam amã ikabēn. Paur kute kãj bē Jeju'ã memã ujarēnhja ba kukwakam amã ikabēn. On kum anhire. Nãm ar ã memã anhýro ba.

<sup>15</sup> Ne kam ar bit kute me'õ jakam me karõ punu janormã kum Jeju nhidji jarēnh kajgo. Nhym me karõ punu arým ar aērbē arkum,

—Jeju ije kabēn mar ne Paur ije kabēn mar. Nhym be, ar ga djãm ije ar akabēn mar got? ane. <sup>16</sup> Nhym me'õja me karõ punu kute o baja arým tu aro arĩ ne ar titiko tē. Nãm aro tēn prĩne ar õm ne. Ne arým Ar kubē ar õ kubēkã kadjõn o põx. Ne ar par punu nhym ar kajgo mã kikre kurũm prõt ne.

<sup>17</sup> Nhym kam me ar arēho ipõk ne. Nhym me kunĩ arým kuma. Mebē idjaermē me bajtembē kregumē krĩraxbē Epexukam me ja kunĩ arým kuma. Me kunĩ arým umaje madjã kretin Bēnjadjwýr djwýnh Jeju ra:xkumrēxmã kato. <sup>18</sup> Nhym kam me krãptĩ kute tu amim Jeju markumrēxja bõx ne tu amijaxwe djãri arēho amirĩtkumrēx.

<sup>19</sup> Nhym kam mebē wajanga krãptĩ aben totokmã amidjudjy'ã pi'õk no'õk jao bõx. Ne kam me kute amidjudjy kangao amirĩt kadjy me ipõkri kum kuton kam kurē nhym kumex ne. Mýj ne pi'õk pãnh kute nhym me kum kuto? Bir, pãnh ra:x. Kryt jakao ngõnhponho pi'õk kaprĩ krãptĩ, aben 'ã akre kubē 50.000. Nhym me tu kum pi'õk

kurên arým kuwykam kunĩ rē nhym xêr.  
<sup>20</sup> Nhym kam me arým tỳx ne amũ memã Metĩndjwýnh kabên jarênho kumex nhym me krãptĩ kum kĩnh nhym me kute tu amim Jeju markumrêxja arým krãptĩ: ne.

<sup>21</sup> Nãm me ã o ane nhym Paur õkre kadjwýnhbê arým amim pry karõ djã djirkumrêx ne amim,

—Ba pykabê Matenimẽ Akajamẽ 'ỳr tẽn kam me omũ. Dja ba anen kam arým Djeruxarêmã tẽ. Ne kam krĩraxbê Rômamãdjwý itẽm prãm kumrêx, ane.

<sup>22</sup> Ne kam amikukãm Matenimã õ àpênh amãnhkrut jano. Nãm Ximoximẽ Eraxu ar ano. Ne kam arek pykabê Adjikkam ar ba rã'ã.

*Temexu kute me krãptĩ:mã Paur kurê'uk.*

<sup>23</sup> Paur ar ba: nhym kam krĩraxbê Epexukam me krãptĩ arým ngryk ne kangao kumex. Be, Temexu kute me krãptĩbê me kute amim Jeju mar kurêkam me arým ngryk ne. <sup>24</sup> Temexubê kryt jakao kikre kryre nhipêx djwýnh tũm. Kute kikreti pyrãk ne kikre kryre nhipêxo ba. Kikretikam ne me amrêbê Djijanamã amijarênh djã. Djijanabê ne me õ metĩndjwýnh kajgo'õ. Nãm kryt jakao kikre kryre nhipêxo ba. Ne kam kute memã õr pãnh pi'õk kaprĩ jamýn õ àpênhmã kungã. Pi'õk kaprĩ rũ:nh ne amýn memã kungã.

<sup>25</sup> Nhym me krãptĩ jadjwý kute ar mýjjao metĩndjwýnh karõ nhipêxo ba. Nhym Temexu õ àpênh jao akuprõn metĩndjwýnh karõ nhipêx djwýnh krãptĩ jadjwýo akuprõn memã kum,

—Ë, ar ikabên ma. Gwaj badjãpênh djã ja djõ'ã ne gwaj mã banhõ pi'õk kaprĩ kumex jamý. Tãm ne gar arým ama.

<sup>26</sup> Ë, arým ne gar Paur kute ar amijo ba kõt omũn arým kabên kõt ama. Djãm krĩrax jabê Epexukambit ne ar kabên ba? Kati, pykabê Adjijja kunĩkõt ne me krãptĩ:bê metĩndjwýnh karõ nhipêxja kurêo ban kubê ar meo akêxo ba. Nãm arĩk memã kum, “Djãm metĩndjwýnh karõ nhipêxjabê Metĩndjwýnhkumrêx? Arkati. Kubê Metĩndjwýnh kêt kumrêx”, anhýr o ba.

<sup>27</sup> Be, dja Paur memã ja jarênho ba rã'ã nhym me krãptĩ arým me baje metĩndjwýnh

karõ nhipêxja kanga. Djijana nhõ kikretidjwý dja me kum kĩnh kêt. Be, Djijanabê me banhõ metĩndjwýnh raxkumrêx. Pykabê Adjij kunĩ, kam me kunĩ kum rax jarênho ba. Pyka kunĩkõt apýnh me ba djãkam me kunĩ: kum amijarênho ba. Dja me Paur kabên man kõt ar amijo ban arým Djijanamã amijarênh krãta. Nãm ã Temexu memã ane.

<sup>28</sup> Nhym me kute amijã kabên ja markam arým ngry:k ne kãj bê abenmã kum,

—Epexukam me batĩndjwýnhbê ne Djijana. Djijana raxkumrêx. Epexukam me banhõ metĩndjwýnhbê ne Djijana. Djijana raxkumrêx anhýro kumex. <sup>29</sup> Nhym me kam me ja djõ'ã kikrepdjitã abenkam kanga:o kumex. Ne kam arým Gajumẽ Arxaku ar pa 'amý. Pykabê Matenikam ne ar abatãnh djã. Paurmẽ ro'ã ar Epexukam bõx. Nhym me ar pa 'amýn aro tẽn me bikprõnh djãtimã aro wadjã.

<sup>30</sup> Nhym Paur kute aben nêje me akre kadjy bit me kanga katikõt ãrmã. Nhym Jejukõt me ba djwýnh arým akubyn Paur nê. <sup>31</sup> Be, pykabê Adjikkam me bẽnjadjwýr kwý Pauro õbikwa tũm. Ar jadjwý Paur nên kum,

—Kwãrĩk wãnh me bikprõnh djãtimã adjãr kêt, ane. Me kute o bikênh karõ ne ar nê.

<sup>32</sup> Nhym me bikprõnhja ar kanga prõt ne ba. Djãm me krãptĩ kute me kanga kraxkõt mar got? Kati. Nãm me apýnh kabên ne. Me kwý 'ã me kabên ja jarênho amra. Nhym me kwý 'ã atemã me kabên ja jarênho amra.

<sup>33</sup> Nhym mebê idjaer arým Arexãrimã 'ã karõ. Kute me nêje me kunĩ kukrãmã ne me kum 'ã karõ. Nhym me binhikrênh kadjy te: memã ikra bẽno dja. Nãm bit kute mebê idjaer nêje me bajtemmã kabênmã.

<sup>34</sup> Nhym me arým Arexãribê mebê idjaer'õ kõt omũ. Omũn arým kãj bê kabẽno tuknĩn mã abenmã kum,

—Epexukam me banhõ metĩndjwýnhbê Djijana raxkumrêx. Nãm me ã anhýro kumex nhym arým me'ã myt ky:n me'ã ora amãnhkrut apêx.

<sup>35</sup> Nhym kam krĩraxkam me'ã pi'õk no'õk djwýnh raxja arým bõx ne memã kabên nhym me arým anhikrê. Nhym kam memã kum,



—Krĩraxbê Epexukam me ar abaja, gu me ba ne gu me babê metĩndjwýnh raxbê Djijana nhõ kikretio djuw mex djwýnh. Djijana karõ ne mrãmri kàjkwa kurũm ruw. <sup>36</sup> Gu me babê o djuw mex djwýnh nhym pyka kunĩkõt me kute me bamar. Me kute me bamarkam ga me ren tu anhikrên adjàkrê kêtumrêx.

<sup>37</sup> Be, ga me jakam aro abõxja djã ne ar me banhõ metĩndjwýnh nhõ kikretikam mýjja'õo akĩnh got? Nàr djãm ar kute me banhõ metĩndjwýnh'ã kabên punu'õ jarênh got ga me ar'ã ajatom ne? Kati. Nã gãm me jakam ar jao abõx kajgo. <sup>38</sup> Be, dja Temexumê metĩndjwýnh karõ nhipêx djwýnh ar kute ar arênh prãm, wãnh ne memã axwe pãnh jarênh djã dja. Myt ja tãmkam ne memã pãnh jarênh djwýnh kam memã nhỹ. Gê Temexu ar 'ýr aro bõx ne kum ar arê. Kam ne me kunĩ kute abenmã axwe jarênh djã.

<sup>39</sup> Nàr me aje mýjja 'õdjwýo aben mar prãm jabej dja ga me tu me bakukràdjã kõtbit akuprõn o aben ma. <sup>40</sup> Be, jakam me banhõ bẽnjadjwýr rax arým me bamã uma. Me bakangatikam kute me bamã pãnh jarênh arým me bamã umakumrêx. Godja bẽnjadjwýr rax abej me bakukjêr jabej gu me bakangati ja'ã te: baje kum amijarênhmã, te: aminêje kum bakabênmã. <sup>41</sup> Nãm ã me'ã pi'õk no'õk djwýnh rax memã ane. Ne kam memã kum,

—Aje, me on ajmã, ane. Nhym me arým ajmã.

## 20

*Paur Matenikam tẽm ne kam Krexakam bõx 'ã ujarênh.*

<sup>1</sup> Me kangati apêxkam Paur arým amiwýr Jejukõt ba djwýnh 'uw nhym me arým bõx. Nhym kam meo rôrõk ne memã kum,

—Ba on pykabê Mateni 'ýr. Gora ar amim Jeju mar tỳx ne 'ã adjukanga kêt, ane. Ne kam me kurũm pykabê Mateni'ýr tẽ. <sup>2</sup> Nãm 'ýr tẽ:n kam apýnh Jejukõt me ba djãri me omũho tẽn me tỳxmã memã 'ã karõn memã kum,

—Dja gar tu amim Jeju mar tỳxkumrêx, anhýro tẽ. Nãm ã memã anhýr kumexo tẽ. Ne tẽ:n kam arým pykabê Kresa'ýr bõx.

<sup>3</sup> Ne kam arek kam ar ba nhym 'ã mytyrwý amãnhkrut ne ikjêkêt apêx. Nhym kam bit kute ngõkõt pykabê Xirij'ýr tẽmmã. Nhym mebê idjaer bit kute kam o arĩmã. Nhym kam ate pykabê Matenikõt amipry karõ djã dji.

<sup>4</sup> Nhym kam me kwý Paur kõt tẽmmã. Pykabê Mateni katikõt tẽmmã. Pykabê Xirij'ýr ne kõt tẽmmã. Xopatu Paur kõt tẽmmã. Piju ne Xopatu dji. Krĩraxbê Berêjakam ne abatãnh djã. Nhym Arxakumê Xekunu arkõt tẽmmã. Krĩraxbê Texarõnikakam ne ar abatãnh djã. Nhym ajte Gajudjwý kõt tẽmmã. Krĩraxbê Tebikam ne abatãnh djã. Nhym ajte Ximoxidjwý kõt tẽmmã. Nhym ajte Xikikumê Krõpimu ar adjwýnhdjwý kõt tẽmmã. Pykabê Adjikkam ne ar abatãnh djã. Paurkõt ar mõr ne ja. <sup>5</sup> Xopatu ar ar ikukãm tẽn krĩraxbê Krõwadjikam ar ikam ama. Badjwý Paur kõt tẽ. Ba ibê Ruka.

<sup>6</sup> Apýnh akati wãkam ne mebê idjaer amikukràdjã kõt djwýponhbit kuro ba. Nhym ar ijã akati wã apêx bar krĩraxbê Pirpu kurũm, pykabê Matenikam krĩraxbê Pirpu kurũm inox ne tẽ. Tẽ: nhym kam ar ijã akatibê 5 apêx. Bar kam krĩraxbê Krõwadjikam Xopatu ar'ýr bõx. Ne kam ar iba: nhym kam ar ijã akatibê 7 apêx.

*Juxiku tỳm ne tyk nhym kute akubyn o tĩn.*

<sup>7</sup> Nhym arým ar ijã pi'õk kamrêk ne. Nhym Jejukõt me ba djwýnh arým akuprõ, djwý kokjêr kadjy. Jeju kute aminhĩ'ã djwý jakren kokjêrja tãm ne ajte kute 'ã akren kokjêr ne krên kadjy akuprõ. Nhym Paur arým kàj bê memã 'ã ujarênhõ dja. Akati nhym tẽm kadjy ne 'ã ujarênh 'iryõ dja. 'ã ujarênhõ dja: nhym kam me'ã akamãt kõt ipõkri.

<sup>8</sup> Atemã kikrekam ne me bikprõnh djã. Kikre amãnhkrut ne ikjêkêt ne me aben nhiby ipêx. Kýjrũm kumoka'êkam ne me nhỹ nhym me õ ngõnhpõk krãptĩ. <sup>9</sup> Nhym me'ã akamãt kõt 'iry: nhym me'õ nõrny nhidjibê Juxiku kre krã'yr'ã nhỹ. Paur memã ujarênh 'iry: nhym Juxiku arým õtdjwa bĩn mex ne. Nhym arým õt mex ne e u:n mõn tu:k ane. Pykabê mõn tỳm nhym me 'ýr ruw ne kumý nhym arým ty.

<sup>10</sup> NhyM Paur arým 'ýr ruw. Ne tu tykja nhiby tým ne 'amýnh týx ne. Ne memã,

—Kwãrĩk wãnh ga me kam atĩn prãm kêt. Arým ajte tĩn ne, ane. <sup>11</sup> Ne kam akubyn wabin arým djwý kokijn õ kwý krẽno nhý. Õ kwý krẽn pan ajte memã ujarẽnhmo krax. Ne o nhý: nhyM arým me'ã õkrẽn'ãnh kàr mex ne. NhyM kam arým tẽ. <sup>12</sup> NhyM me ũrkwãmã nõrny akubyn tĩnjao tẽ nhyM arým mexkumrẽx ne. NhyM kam me arým kĩ:nhkumrẽx ne.

*Paur kute Epexukam meo ba djwýnhmã amijarẽnh.*

<sup>13</sup> NhyM kam Paur kute bamẽ Xopatumẽ ar ijo mõrmã ar imã 'ã karõ. Ba ibê Ruka. Nãm ar imã,

—Ba dja ba pykakõt krĩraxbê Axõ'ýr tẽ. Dja ba 'ýr bõx ne arým ar akõt kàraxkam amũ tẽ, ane. Ne kam pykakõt tẽ. Ar ba ne bar kàraxkam tẽ. <sup>14</sup> Tẽ:n kam arým krĩraxbê Axõ'ýr bõx nhyM arým ar ikõt bõx. Ne kam ar ikõt kàraxmã wadjà. Bar kam krĩraxbê Mixini'ýr tẽ:n kam 'ýr bõx.

<sup>15</sup> Ne kam ajte ngõkõt tẽ. Tẽ: nhyM ar ijã akati. Bar ajte tẽ:n arým apêxtibê Kuju'ãnh tẽ. Ne ajte tẽ: nhyM ajte ar ijã akati. Bar tẽ:n arým apêxtibê Xamu'ãnh tẽ. Tẽ:n kam arým krĩraxbê Krodjirkam bõx. Ne kam amikrà:n kam ajte ngõkõt inox ne mõ. NhyM ajte ar ijã akati. Bar kam tẽ:n arým krĩraxbê Miretukam bõx. <sup>16</sup> Ar ibõx kêttri Paur ar imã,

—Gwaj krĩraxbê Epexu jaà'ã tẽ. Ba ren kam tẽn pykabê Adjijkam amikrà:, ane. Adjijkam ne krĩraxbê Epexu. Nãm mebê idjaer bikprõnh djã nhõ akatibê Pẽxiko majmã Djeruxarẽ'ýr bõxmã. Kam ne amikrà kêt ne tẽ.

<sup>17</sup> Bar krĩraxbê Miretukam bõx nhyM Paur arým amũ krĩraxbê Epexukam memã amikabẽn jano. Nãm memã kum,

—Gê amrẽ me kute Jeju nhõ me jao ba djwýnh mõ. Me kute amim Jeju mar ne kõt ar aben pydjio bajao ba djwýnh amrẽ mõn ipumũ, ane. <sup>18</sup> NhyM me arým wãm kabẽno tẽn o bõx ne memã arẽ nhyM me arým kuma. Ne kam arým Paur'ýr tẽn 'ýr bõx. NhyM memã kum,

—Be, akmere ar, jakam dja ba tẽ. Ne kam arým ar amã ikabẽn jarẽ. Be, nã bãm katat

ar amijo iba rã'ã gar arým ipumũn ima. Me anhõ pykabê Adjijkam ibõx totokbê gar katat ije amijo ibakõt ipumũnhmo krax ne jakam aje ikatãt kõt ipumũnh rã'ã.

<sup>19</sup> Djã nã bãm Bẽnjadjwýr djwýnhmã idjãpênh kêt? Nã bãm amijo ingrin akrãnmã kum idjãpênh rã'ã ne. Ba kum idjãpênh ar iba nhyM me axwekam irerek iwýr bõx ba mekam imýr iba. NhyM mebê idjaer mã: amim ijã karõn ar ijo bikẽho ba, ba kam itokry kumex.

<sup>20</sup> Djã ne ba ar abê Metĩndjwýnh kabẽn'õ nẽn ar amã arẽnh kêt got? Kati. Ar aje mar mexo amũ amikamẽnhmã ne ba ar amã Metĩndjwýnh kabẽn kunĩ jarẽ. Nã bãm ar akrãptĩ nhipõkri ar amã arẽ. Ne ajte ar anhũrkwãkõt ar amã arẽho iba.

<sup>21</sup> Nã bãm me abê idjaermã arẽn ajte me abajtembê kregumã arẽ. Ne mã: ar amã, “Ar amikam akaprĩren wãnh ajaxwemã anhiren Metĩndjwýnh'ýr amijo akẽx ne tu amim Bẽnjadjwýr djwýnhbê Jeju Kritu markumrẽx.” Nã bãm ã ar amã ane.

<sup>22</sup> NhyM arým jakam Metĩndjwýnh Karõ mã: Djeruxarẽ'ýr itẽm'ã imã karõo dja ba te imãtmã. Mýj dja wãkam ikam nẽ? Kon. Ije mar kêt. <sup>23</sup> Be, krĩrax kunĩkõt ne me Metĩndjwýnh Karõ kukwakam imã kabẽn jarẽn imã, “Dja me mrãmri abê ijẽ ga mrãmri amitokry kumex ma”, ane. Jabit ne ba amikadjy kuma.

<sup>24</sup> Be, me kute imã ja jarẽnhkam ne ba ate ikrã. Djãm ba ne ba imã pykakam itĩn kĩnh got? Amrẽbê ne Bẽnjadjwýr djwýnh Jeju imã idjãpênh djã'ã karõ. Nãm imã, “Metĩndjwýnh tu kum me kaprĩ. Djãm me ta ne me axwe kêt nhyM pãnh kum me kaprĩ? Kati. Me te axwe kêt mã nhyM ta arým tu kum me kaprĩn memã ijano ba me axwebê me utãro iba. Tãm dja ga memã arẽho aba gê me kuma.” Nãm Jeju ã imã idjãpênh'ã karõo ane ba kam ije idjãpênh djã inomã mẽn prã:m. Jabit imã kĩnh. Dja ba inomã kumẽn arým ikĩnhkumrẽx. Djãm imã pykakam itĩn kĩnh got? Kati. Jabit imã kĩnh.

<sup>25</sup> Amrẽbê ne ba ar amã, “Arým ne Metĩndjwýnh kute amim me utãr ne ar meo ba 'ýr”, anhýr ne 'ã kãj bẽ ar amã idju-jarẽnh ar iba. Be, jakam dja gar akunĩ ajte

ipumũnh kêt. Ja ne ba kuman 'ã ar amã amijarẽ.

<sup>26-27</sup> Be, djã ne ba ar amã Metĩndjwýnh kabẽn kwýbit jarẽ? Kati. Ba ne ba ar amã kabẽn kunĩ jarẽ. Be, mýj me ajõ ga dja gar ĩ ijã Metĩndjwýnhmã kum, “Be, Paur kute imã arẽnh kêt kam ne ba me biknor tokry djãkam akuno”? ane. Be, kati. Ar aje te Metĩndjwýnhmã ja jarẽnhmã. Ba ne ba ar akunĩmã kabẽn kunĩ jarẽ. Ja dja gar akati jakam aman o abiknor kêt.

<sup>28</sup> Ije ar amã ja jarẽnhkam dja gar ajaxwe kêt kadjy amijãno djan me axwe kêt kadjy me omũnh 'ãno dja. Metĩndjwýnh Karõ ne arým ar ajã meo ba djwýnh rẽ. Ar ajã me kute Jeju maro ba djwýnh rẽ. Ga, mrykĩ'ãtomti pumũnh djwýnh mã mryo djuw mexo baja pumũ. Ar abê me kute Jeju maro aba djwýnhkam dja gar omũnh djwýnh kudjwa mã memã kabẽn jarẽnh aba. Kamrõ prõtkam ne Metĩndjwýnh arým me axweo pãnh. Ta kute o pãnhkam dja gar ikabẽn kôt me omũnh 'ãno dja.

<sup>29</sup> Be, dja ba tẽ nhym itekrekam dja me axwe ar awýr bõx gar abenkam akã. Ga, rop djãkrẽ mrykĩ'ãtomti katikôt ngjêxja pumũ. Nãm kwý pa nhym umaje kunĩ ajmã. Me axwedjwý dja me wangij ne Jeju bê ar akwýo akẽx gar akwý mekôt ajaxwe. <sup>30</sup> Djãm me kãtãmbit kute ã ar ajo anhýrmã? Kati. Ar akwý dja gar Jeju bê amijo akẽx ne arým ajaxwen Metĩndjwýnh kupa'ã memã 'ã ajarẽ. Nhym kam me kwý arým ar amaro ban arým ar akôt axwe.

<sup>31</sup> Kam, me kute amiwýr ar ajõo akẽx kêt kadjy dja gar me 'ãno dja. Kwãrĩk wãnh ikabẽno ajamak kêt kati kêt. Nã bãm akatikam ar abê me uma. Ne ajte akamãtkam ar abê me uma. Ne ajte imýrkam ar abê me uma. Ne ar akunĩbê me umao iku'ê: nhym arým amexbê 3 apêx. Kwãrĩk wãnh ikabẽno ajamak kêt kati kêt.

<sup>32</sup> Be, akmere ar arým itẽm 'ýr. Jakam ba arým Metĩndjwýnhmã ar ajo a'uw. Gédja ar ajo bakumrẽx. Dja gar kabẽn ma nhym arým ar amã ajamak mex jangij gar mar mexo amũ amikamẽn arým mar rax ne. Metĩndjwýnh tu kum gwaj bakapri.\*

\* **20:32** Djãm gwaj ba ne gwaj bajaxwe kêt nhym pãnh kum gwaj bakapri Kati. Gwaj ba ne gwaj te bajaxwe kêt mã. Nhym be, ta ne tu kum gwaj bakapri.

Ukapri'ã dja gar kabẽn man arým ajamak mexo amũ amikamẽn mar rax ne. Be, dja ĩ Metĩndjwýnh õ me jamã mýjja ngã. Dja gar kabẽn ma nhym kute memã mýjja nhõrmã kôt arým ar amã kungã. Ja kadjy ne ba kum ar ajo a'uw.

<sup>33</sup> Be, djãm ba ne ba imã me'õ nhõ mýjja puro prãm? Kati. Me'õ nhõ kryt jaka nãr kẽn karýr nãr me'õ nhõ kubêkã ne imã prãm kêt kumrẽx. <sup>34</sup> Be, ba ne ba in-hikrao idjãpẽnho iku'ê. Bamẽ iro'ã ar ar bamẽ ne bar imã mýjja prãm jabej ba ba inhõ pi'õk kapriõ ar amim kuby. <sup>35</sup> Mýj kadjy ne ba ã idjãpẽnho ane? Bir, dja gar iman arým ikudjwa ã adjãpẽnho anen kam amikutã me õ mýjja kêt mã mýjja nhõro aba. Dja gar kam Bẽnjadjwýr djwýnh kabẽn ma. Nãm memã kum, “Ga amikutã memã mýjja ngãn kam arým akĩnh ne. Kam akĩnh me kute mebê mýjja jamýnhkam kĩnhja jakrenh mex”, ane. Be, ije me amã ikabẽn jarẽnh ne ja. Tãm ne ja.

<sup>36</sup> Nãm ã Paur memã anen kam arým kõnkrão nhýn Metĩndjwýnhmã kabẽn. Nhym me kunĩdjwý Metĩndjwýnhmã kabẽno nhý. <sup>37</sup> Nhym kam me Paurkam mýro kumex ne aben nhitepã o rôrõk ne ine kaõ. <sup>38</sup> Paur kute memã kum,

—Jakam dja gar akunĩ ajte ipumũnh kêt, anhýrkam ne me kapri:re. Ne kam kã nhikwã djã'ýr kôt mõ.

## 21

### *Paur akubyn Djeruxarẽ'ýr tẽm.*

<sup>1</sup> Bar kam mebê tẽn kãraxmã wadjãn amũ mebê inox ne. Ne kam apêxtibê Kux kõnh tẽ. Ne tẽ:n arým 'ýr bõx. Nhym kam ar ijã akati. Bar ajte tẽ:n kam apêxtibê Rodji'ýr bõx. Ne ajte tẽ:n kam krĩraxbê Patara'ýr bõx. <sup>2</sup> Ne kam wabin kãrax 'õdjwý jabej ne arým kum ikato. Pykabê Penixij'ýr ne kãrax mõrmã. Bar kum wadjãn ajte inox ne. <sup>3</sup> Ne tẽ:n kam amybým apêxtibê Xipre pumũ. Ne kam tẽ:n ar idjuge'ãnh amipãnh Xipre mẽn tẽ:n arým pykabê Xirij tẽpo tẽ. Ne tẽ:n arým krĩraxbê Xiru'ýr bõx. Kam ne kãraxkam me kute kãkam jẽnh kadjãrmã.

<sup>4</sup> Bar kam wabin Jejukõt me ba djwýnh jabej mõn arým me kwýmã ikato. Ne kam mekam ar iba: nhym kam ar ijã akat-ibê 7 apêx. Ar ijã akati apêx kêtri ne me Metĩndjwýnh Karõ kukwakam Paurmã kum,

—Kwãrĩk wãnh Djeruxarẽmã àbir kêt, ane.

<sup>5</sup> Nhym arým ar ijã akati apêx bar tẽ. Nhym me kunĩ ar ikõt kàrax'ýr tẽ. Me mymẽ me niremẽ me prĩremẽ ne me ar ikõt mõ. Ba me mõn arým krĩrax kurũm ikato. Ne kam ngõ mýrri ikõnkrão nhýn Metĩndjwýnhmã ikabẽn. <sup>6</sup> Bar kam memã kum, “Bar on”, anen kam arým kàraxmã wadjàn nhý. Nhym me akubyn ùrkwãmã akêx ne.

<sup>7</sup> Bar kam amipãnh krĩraxbê Xiru mẽ. Ne tẽ:n kam arým krĩraxbê Tomedja'ýr bõx. Ne kam ar ije Jeju kukwakam me kute abeno kamy pumũnh kadjy arým wabi. Nhym ar ijã akati pydji apêx. <sup>8</sup> Nhym akati bar arým mebê tẽ. Ne tẽ:n arým krĩraxbê Xedjare'ýr bõx. Ne kam wabin arým Piripi nhũrkwãmã wadjà. Amrêbê ne Piripibê me kute amim Jeju mar o djuw mex djwýnh'õ. Ar kubê 7 kõt kubê meo djuw mex djwýnh'õ. Piripi ajte me kute mar kêtjamã Jeju'ã ujarẽnh ar ba. <sup>9</sup> Kra ni ne amãnhkrut ne amãnhkrut. Kraxje ar mjên kêt rã'ã. Ar kubê Metĩndjwýnh kukwakam kabẽn jarẽnh djwýnh.

<sup>10</sup> Bar Piripi nhũrkwãmã nhý: nhym ar ijã akati krãptĩ apêx. Nhym arým pykabê Djudêja kurũm me'õbê Agabu bõx. Kubê ne Metĩndjwýnh kukwakam kabẽn jarẽnh djwýnh'õ. <sup>11</sup> Agabu ar iwýr bõx ne arým Paur pre djà bõn kuby. Ne kam o amin-hinýmẽ amite djuwpre. Ne kam ar imã,

—Be, Metĩndjwýnh Karõ ar amã, “Djeruxarẽkam mebê idjaer dja me ã pre djà djwýnhja djuwpreo ane. Ne kam arým me bajtemmã kanga.” Nãm ã ar amã ane. Nãm ã Agabu ar imã ane.

<sup>12</sup> Bar kuman arým tu Paurmã kum,

—Kwãrĩk wãnh Djeruxarẽmã atẽm kêt, ane. Nhym Jejukõt me ba djwýnh, Xedjarekam ar ba tũmjadjwý ar ikõt ã kum ane.

<sup>13</sup> Nhym Paur ar imã,

—Mýkam ne gar amýro imã ikaprĩ jadjàro dja? Kwãrĩk wãnh me idjuwpre. Godja

me wãkam ibĩn jabej. Bẽnjadjwýr djwýnh Jejumã idjãpênhkam ibĩn jabej. Kwãrĩk wãnh rã'ã, ane.

<sup>14</sup> Nã bãm ar te: nèn kam kum,

—Aj, Bẽnjadjwýr djwýnh kute amim ajã karõ kõt gẽ ã ajo tẽmo ane, anen arým anhikrê.

<sup>15</sup> Nhym ar ijã akati ja kwý apêx bar arým amijo atom ne arým Djeruxarẽ'ýr tẽ.

<sup>16</sup> Nhym Xedjarekam Jejukõt me ba djwýnh kwý ne ar ikõt tẽ. Ar me'õbê Maxõ japrõn ar ikõt o tẽ. Apêxtibê Xiprekam ne abatàn djà. Jejukõt ba tũm. Djeruxarẽkam ne õ kikre. Õ kikrekam ar inhýr kadjy ne ar aprõn aro mõ.

*Djeruxarẽkam bõx ne kute Metĩndjwýnhmã amijo mex.*

<sup>17</sup> Bar Djeruxarẽ'ýr tẽ:n kam arým 'ýr bõx. Nhym Jeju kukwakam ar ikamy ar ipumũn kam kĩnhkumrêx ne ar imã kabẽn mex jarê. <sup>18</sup> Nhym ar ijã akati. Bar kam ije Xijagu pumũnh kadjy Paurkõt 'ýr tẽn 'ýr bõx. Nhym me kute Jeju nhõ me jao ba djwýnh kunĩ kam nhý. <sup>19</sup> Nhym Paur arým arkum kabẽn mex tire jarê. Ne kam arkum apýnh me bajtemkam àpênh'ã ajarê. Kute apýnh mýjja nhipêx'ã prĩne ajarê.

<sup>20</sup> Nhym ar kute ja markam arým Metĩndjwýnhmã rax jarê. Ne kam arým Paurmã kum,

—Be, akmere, ga, mebê idjaer kute tu amim Jeju markumrêxja arým krãptĩja pumũ. Me me'ã akrekam ne mebê 1.000'ã akre krãptĩkumrêx. Ne kam me kunĩ Mõjdjê kukràdjà'ã notý:x. <sup>21</sup> 'Ã no týt nhym me kwý arým ajã 'êx ne memã ajarê. Ne memã kum, “Paur arĩk apýnh me bajtemkõt ban mebê idjaerbê Mõjdjê kukràdjà kurêo ba. Ne mã memã kum, ‘Kwãrĩk wãnh me akra my nhinhu kà rênh kêt ne kwãrĩk wãnh me bakukãmãre kukràdjà mar ne kõt amijo aba kêt’, anhýro ba.” Nãm me kwý ã memã ajã 'êxo ane.

<sup>22</sup> Be, me kwý kute ajã 'êxo anhýrkam dja me mrãmri abõx jarẽnh man arým akadjy akuprõ. <sup>23</sup> Be, djãm aje mebê idjaerbê Mõjdjê kukràdjà kurêo aba? Kati. Gad-jwý ne aje katàt mar ne kõt ar amijo aba. Me kute katàt aje amijo abakõt amã kator kadjy dja ga ar ikabẽn man kõt amijo tẽ. Be,

me babê idjaer ar amãnhkrut ne amãnhkrut arým Metĩndjwýnhmã amijarẽn kum, “Bar Mõjdjê kabẽn kõt amã amijo mex.” Nãm ar ã kum anen kam arým amijo mex.

<sup>24</sup> Dja ga ar kudjwa Metĩndjwýnhmã amijo mex ne Mõjdjê kukràdjà kõt ar aro'ã akrãnh kênh ne. Dja ga anen kam memã ar akrãnh kênh kunĩo pãnh. Dja mebê idjaer kute amim Jeju mar arým kõt apumũn ajã abenmã kum, “Be kati. Nãm me Paur'ã 'êx. Ga, me bakõt kute katãt Mõjdjê kabẽn mar ne kõt amijo tẽmja pumũ”, ane. Dja me ã ajã anen arým akubyn akam kĩnh ne.

<sup>25</sup> Be, mrãmri dja gu me babê idjaerbit katãt Mõjdjê kabẽn man kõt ar amijo baba. Nhy m be, me bajtem kute amim Jeju mar dja me me babê idjaer kõt ar amijo ba kêt. Gwaj amrêbê arým me kadjy Mõjdjê kabẽn ngrêrebit'ã pi'õk no'õk ne memã kum, “Me kute mýjjao metĩndjwýnh karõ nhípêxjamã mry bĩn kwãrĩk wãnh krẽn kêt. Kwãrĩk wãnh mry kamrõ krẽn kêt. Mry me kute mut djêo bĩn kwãrĩk wãnh àr ne krẽn kêt. Kwãrĩk wãnh aprõ djwýnh kupa'ã akurê aba kêt. Nãr, kwãrĩk wãnh amjên djwýnh kupa'ã akurê aba kêt”, ane. Gwaj ã memã ane. Kam dja me Mõjdjê kabẽn ngrêre jakõtbit amijo ba. Nãm Xijagu ar ã Paurmã ane.

<sup>26</sup> Nhy m me'ã akati nhy m Paur arým me kabẽn man kõt amijo tẽ. Nãm ar amãnhkrut ne amãnhkruto tẽn ar ro'ã Metĩndjwýnhmã amijo mexmo krax ne. Ne kam ar Metĩndjwýnh nhõ kikretimã wadjãn me kadjy Metĩndjwýnh mar djwýnhmã kum,

—Ar ijã akatibê 7 apêxkam dja bar arým amijo mexo ino re. Kam dja bar me kute Metĩndjwýnhmã mry bĩn kadjy mryo bõx, ane.

*Me kute Paur pa 'amýnh ne uwpre.*

<sup>27</sup> Nhy m kam ar'ã akatibê 7 apêx 'ýr nhy m mebê idjaer pykabê Adjij kurũm bõxja arým Paur pumũ. Metĩndjwýnh nhõ kikretikam ar ba nhy m me omũ. Ne kam me me kunĩmã kurêtuw ne arým pa 'amý. <sup>28</sup> Pa 'amýn o djan 'ã 'êx ne kãj bê memã kum,

—Ë me abê idjaer, amibêx ne ar ikõt o kangõ. Ota, me'õ ja ne bar arým ar amã arẽ. Nãm mebê ar inhõ me wýnh kurêo ba.

Nãm ajte mebê Mõjdjê kukràdjà kurêo ba. Nãm ajte mebê kikreti ja kurêo ba. Nãm apýnh me ba djari kunĩkõt me kunĩbê kurêo ba. Ne kam arým Metĩndjwýnh nhõ kikreti kreo àpnu. Nãm arým amikõt me bajtembê kreguo wadjà nhy m Metĩndjwýnhbê arým kikreti kre punure ne. Nãm me ã Paur'ã 'êxo ane.

<sup>29</sup> Be, amũ jakam ne Paur krĩraxbê Djeruxarêja tãm kam me'õ bajtemmẽ ro'ã tẽ. Idjibê ne Krõpimu. Me bajtem nhõ krĩraxbê Epexukam ne Krõpimu abatãnh djà. Amũ jakam ne kubajtemjamẽ ar ro'ã tẽ nhy m me arým ar omũ. Ne jakam Paur kikretikam ar ba nhy m me arým omũn arĩk 'ã abenmã kum,

—Be, arým ne Paur Metĩndjwýnh nhõ kikretimã me bajtemo wadjã. Nhy m Metĩndjwýnhbê arým kikreti kre punure ne, ane.

<sup>30</sup> Nãm me anen kam arým krĩraxkam me kunĩmã Paur kurêtuw. Nhy m me arým prõt ne 'ã akuprõ. Ne arým Paur pa 'amýn Metĩndjwýnh nhõ kikreti kurũm bjêro mõn o katon kam pãnh 'ã ijê. <sup>31</sup> Ne kam bit kute Paur bĩnmã o dja. Nhy m me'õ arým krãkamngõnh nhõ bẽnjadjwýr'ýr tẽ. Bẽnjadjwýr ja ne me krãptĩ: kubê 1.000mã nhý. Nhy m me'õ arým bẽnjadjwýrja'ýr tẽn kum,

—Ë, bẽnjadjwýr, krĩraxbê Djeruxarê jakam me kunĩ arým kangao kumex, ane.

<sup>32</sup> Nhy m bẽnjadjwýr amikrà kêt ne õ krãkamngõnho mõn meo ba djwýnhmẽ ro'ã meo mõ. Meo ba djwýnh ne krãkamngõnh krãptĩ: kubê 100o ba. Nhy m bẽnjadjwýr meo mõn me'ýr prõt ne. Nhy m me krãptĩ arým krãkamngõnh pumũn umaje Paur titik krãta.

<sup>33</sup> Nhy m krãkamngõnh nhõ bẽnjadjwýr Paur'ýr bõx ne pa 'amýn õ krãkamngõnhmã 'ã karõn kum, “Kãxirãx amãnhkruto uwpre”, ane. Nhy m me arým uwpre. Nhy m arým bu'ã me ku'ê kukij ne memã kum,

—Mýj me'õ ne ja? Mýj ne o ajkê? ane.

<sup>34</sup> Nhy m me kãj bê 'ã kum apýnh kabẽn kwý jarẽ. Nhy m me kangao kumexkam te: kute me mar mexmã. Ne kam õ krãkamngõnhmã 'ã karõn kum,

—Me banhõ kikretimã o wadjã, ane.

<sup>35</sup> Nhy m me o mõn arým kikreti'ã me àbir

djà'ýr bôx. Ne arým 'amýn kàjmã mebê arîn o mō. Me àkrê kumexkam ne me kàjmã mebê Paur jarîn o mōn o wabi. <sup>36</sup> Me krãptî: ne me kôt mōn kàj bê memã kum, “Me tu abî. Me tu abî”, anhÿro mō.

*Kute me krãptî:mã amijarēnh.*

<sup>37</sup> Nhyam kam me bit kute aminhō kikretimã Pauro àr 'ýr nhyam mebê kregu kabēnkam arým krākamngōnh nhō bēnjadjwýrmã kum, “Ba amã ikabēn jarē”, ane.

Nhyam kum,

—Je, djãm mebê kregu kabēnkam ne ga akabēn mex? <sup>38</sup> Djãm abê Edjitungam me'ōwã kêt? Ōbê ne me krãptîmã bēnjadjwýr kurêtuw nhyam me arým kangao kume:x ne. Nhyam kam kapôt kukritmã me àprār krãptî: kubê 4.000o kato. Djãm abê tãmwã kêt? ane.

<sup>39</sup> Nhyam Paur kum,

—Kati. Ibê mebê idjaer'ō. Krĩraxbê Taxukam ne irwýk djà. Taxu raxo kute pykabê Xirxijkam apýnh krĩrax djàri krãptî jakrenh mex. Me ja ne ijo ō me wýnh. Ba me krãptî ren kute ibĩnjamã ikabēn jarē, ane.

<sup>40</sup> Nhyam kum, “Ajrã”, ane. Nhyam àbir djà'ã djan me binhikrēnh kadjy arým memã aminhikra bê. Nhyam kam me arým binhikrēnhkumrēx. Nhyam arým mebê idjaer kabēnkam memã kabēn jarē.

## 22

*Paur me krãptîmã kabēn.*

*Kar 9.3, 26.13*

<sup>1</sup> Memã kabēn ne memã kum,

—Akmere ar, ba aminêje me amã ikabēn jarē. Dja ga me ikabēn ma, ane.

<sup>2</sup> Paur ne mebê idjaer kabēn djwýnhkam memã kabēn jarē nhyam me arým tu binhikrēnhkumrēx ne.

<sup>3</sup> Nhyam kam ajte memã kum,

—Ibê ne mebê idjaerkumrēx. Ba pykabê Xirxijkam krĩraxbê Taxukam ruw. Ne kam krĩraxbê Djeruxarēja tãmkam ijabatànhdjà. Gamarij ne prĩne imã me bakukãmãkjê kukràdjã jarē ba prĩne mar mexkumrēx ne. Nã bãm Metindjwýnh kabēn'ã ino tÿx ne. Mytja tãmkam ne gar akunĩdjwý ã kabēn'ã ano tÿxo ane. <sup>4</sup> Ba 'ã ino tÿx ne kam me kute amim Jeju maro ibikēnh oiba. Me kute me

par kadjy ne ba meo ibikēnh oiba. Ne mã me mymē me nire djuwpren mã mebê ijē djãmã meo mrã.

<sup>5</sup> Be, me rũnh dja ar amã, “Be, kôt ne Paur arē”, ane. Me kadjy Metindjwýnh mar djwýnh nhō bēnjadjwýr raxmē apýnh me rũnhmē dja me ã me amã ane. Me ta ne me me'ã pi'òk no'òk ne imã kungã. Ba kam krĩraxbê Tamagumã o tē. Nã bãm bit ije kam mebê idjaer rũnhmã o itēmmã. Ne bit kam me kute amim Jeju mar djuwpren ije Djeruxarēmã meo imōrmã nhyam me kute kam me axwe pãnh jarēnhmã. Ja kadjy ne ba bit ije memã pi'òko itēmmã.

<sup>6</sup> Nã bãm me'ýr o tēn arým krĩraxbê Tamagu tēpo tē. Nhyam arým kàjkwa nhipòkri myt nhÿ nhyam ijaerbê arým kàjkwa kurũm mÿjja adjēnh o prĩne ikurwý. <sup>7</sup> Ba kam arým tu pykabê tÿm ne me'ō kabēn ma. Nhyam imã, “Xaur, Xaur mÿkam ne ga me kute amim imaro abikēnh oiba? Nã gãm aje ba mãn ijo abikēnh oiba pyrãk”, ane.

<sup>8</sup> Ba kam kum, “Bēnjadjwýr, mÿj me ajō ga ne ga imã akabēn”? ane.

Nhyam imã, “Ba ibê Jeju. Krĩraxbê Nadjarekam ijabatànhdjà. Nã gãm me kute amim imaro abikēnh oiba ne aje ba mãn ijo abikēnh oiba pyrãk”, ane. <sup>9</sup> Nhyam ar ikôt mōrja ne ar mrãmri adjēnh pumũn arým kam tĩn prãm ne. Nhyam be, kabēnja ne ar kute mar kêt. <sup>10</sup> Jeju imã ane ba kam kum, “Bēnjadjwýr djwýnh, mÿj dja ba nē”? ane.

Nhyam Bēnjadjwýr djwýnh imã, “On kàjmã djan amũ krĩraxbê Tamagumã wadjã. Kam dja me'ō awýr bôx. Ba ne ba arým amim ajã karōn arým kum arē. Tãm dja ikukwakam amã ikabēn jarēn amã 'ã karō. Dja ga ikabēn man kôt ar amijo aba.” Nãm ã Bēnjadjwýr djwýnh imã ane.

<sup>11</sup> Be, mÿjja inokam adjēnh tÿx ba kam arým ino rã. Nhyam ar ikôt mōrja arým inhikra 'amýn ijo mō ba arým Tamagu'ýr bôx.

<sup>12</sup> Nhyam kam me'ōbê Ananij arým iwýr bôx. Ananij ne katàt Mōjdjê kukràdjã man kôt ar amijo ba nhyam Tamagukam mebê idjaerja kunĩ mex jarē. <sup>13</sup> Ananij iwýr bôx ne djan imã, “Akmere Xaur, on akubyn arĩt mex”, ane. Ba kam arým myt tãmkam akubyn irĩt mex ne kàjmã ikrãn omũ.

14 Nhyim imã, “Metĩndjwýnh kute me bakukãmãkjêo ba djwýnh ne arým amijo apytã. Arým ne amim ajã karõ. Tãm dja ga ama. Arým ne ga me'õ katãt kute amijo ban axwe kêtumrêxja pumũ. Arým ne ga Jeju pumũn kabên ma. Ja kadjy ne arým amijo apytã. 15 Ga dja ga aje mýjja pumũnh ne mar kõt me kunĩmã 'ã ajarê. 16 Be, mýj kadjy ne ga nhý? Aje, kãjmã dja. Ba Metĩndjwýnhmã ngõmã ajadjã. Ga, me ngrã tykkam me kute amipõnh ne arým mexja pumũ. Gadjwý dja ga Bẽnjadjwýr djwýnhmã amijo a'uw gê amã axwe kêt jarê ga kum amex.” Nãm ã Ananij imã ane. Nãm ã Paur me krãptĩmã 'ã ujarênhõ ane.

17-18 Ne kam itepã ajte memã kum,

—Ba kam akubyn Djeruxarêkam bõx. Ne kam Metĩndjwýnh nhõ kikretimã wadjã arým Metĩndjwýnhmã ikabêno nhý. Kum ikabêno nhý nhyim arým Bẽnjadjwýr djwýnh inokrekam amirĩt ba omũ. Nhyim imã, “Aje, amikrà kêt ne on Djeruxarê kurũm akato. Dja ga te memã ijã adjujarênh ar aba nhyim me amim amar kêtumrêx”, ane.

19 Ba kam kum, “Kati Bẽnjadjwýr djwýnh, dja me ima. Ba ne ba apýnh mebê idjaer bikprõnh djãkam mrãn me kute amim amar jabej mõ. Ne me titik ne mebê ijêo iba. 20 Nhyim me kute ajã ujarênh djwýnh Exewão bĩno mõ ba arek me kuri dja. Ne memã kum, ‘Ajrã me on abĩ’, anhýro djan kam memã kubêkã jamýn o dja. Nã bãm ã imã me kurêo ane nhyim me kunĩ kute imar”, ane.

21 Nhyim imã, “Kati, on akato. Dja ba amũ: apýnh me bajtem ba djãri me'ýr ajano ga me'ýr mrã.” Nãm ã Bẽnjadjwýr djwýnh imã ane. Nãm ã Paur memã ane.

*Me krãptĩja ajte Paurkam ngryk.*

22 Nãm me arek maro dja nhyim kam me bajtemmã amitêmja jarê. Nhyim kam me arým tu ngryk ne. Ngryk ne on kãj bê kabêno kumex ne krãkamngõnhmã kum,

—On me abĩ. Axwekumrêx. Tĩn ne ar bakam ne punukumrêx, ane.

23 Nãm me kãj bê kabêno djan arým aminhõ kubêkã krãkão pôx ne kurên kãjmã pyka rênho dja. Me ngryk tý:xkam ne me ã amijo ane. 24 Nhyim kam krãkamngõnh

nhõ bẽnjadjwýr me omũn arým õ me jamã 'ã karõn kum,

—Me kikretimã Pauro wadjã. Mrykã punuo kaprêprêk gê tokry pymaje axwe'õ kõt amijarê. Ba gop me 'ã kabêno kumex kraxkõt kuma, ane. 25 Nhyim me arým kadjy djudjêdjêo uwpreo dja. O dja nhyim Paur arým mebê 100o ba djwýnhjamã kum,

—Ê, dja ga me ikukjan ima. Krĩraxbê Rõmakam me ja ne me ijo aminhõ. Me bakukràdjã kõt ne me kute me axwekumrêx jabej me kukjêr kumrêx. Me kute me axwe markambit ne me kute me kaprêprêk. Kraxje me aje imar kêtam ne ga me tu ikaprêprêko mõ, ane.

26 Nhyim meo ba djwýnh kuman arým uwpre kangan krãkamngõnh nhõ bẽnjadjwýr rax'ýr tẽn kum,

—Ê, aminêje Paur kukja. Gwaj ren bakukràdjã kupa'ã o ajkê. Be, krĩraxbê Rõmakam me ja ne me Pauro aminhõ, ane.

27 Nhyim krãkamngõnh nhõ bẽnjadjwýr rax arým 'ýr tẽn 'ýr bõx ne kum,

—Djãm mrãmri ne krĩraxbê Rõmakam me ja ajo aminhõkumrêx? ane.

Nhyim kum, “Nã”, ane.

28 Nhyim bẽnjadjwýr kum,

—Be, Rõmakam me ja kute ijo aminhõ kadjy ne ba arým pãnh pi'õk kaprĩ kumex ne memã kungã. Mýj ne ga gadjwý memã nê? ane.

Nhyim Paur kum,

—Rõmakam me ja ne me ibãm kute idjiro aminhõ. Ibãm kõt ne me ijo aminhõ, ane.

29 Nhyim me bit kute kaprêprêk 'ýrja arým umaje kum kre rax ne dja. Nhyim krãkamngõnh nhõ bẽnjadjwýr raxdjwý kute Rõmakam me ja kute Pauro aminhõja markam arým umaje tĩn prãm. Kabênkõt me kute uwprekam ne umaje tĩn prãm.

*Paur kute me rũnh krãptĩmã amijarênh.*

30 Nhyim kam me'ã akati nhyim bẽnjadjwýr bit kute kraxkõt marmã. Bit kute mebê idjaer kute Paurmã axwe jarênh kraxkõt marmã. Nãm arým 'ã kãxirãx bõn kum ire. Ne kam me kadjy Metĩndjwýnh mar djwýnh nhõ bẽnjadjwýrmê me rũnh kunĩmã amikabên jano. Me Paur'ã bikprõnhmã ano. Nhyim me arým 'ã

akuprõ. Nhym kam me Pauro tẽn me ipõkri kudja.

## 23

<sup>1</sup> Nhym kam Paur me rũnhkam no djar tỳxkumrẽx ne memã kum,

—Akmere ar, ije amimarkam ne ba akubyn amimaro tẽn kam amiwýr amijo bõx ne arým amim, “Djã ne ba amikam mýjja'õ ma nhym me ibê ijê? Kati. Ije amikam mýjja'õ mar kêt ne katàt Metĩndjwýnhmã idjãpênh ar iba. Akati jakam ne ba katàt kum idjãpênh rã'ã ne. Metĩndjwýnh ne prĩne ipumũn ima.” Nã bãm ã amimaro ane.

<sup>2</sup> Nhym kam me kadjy Metĩndjwýnh mar djwýnh nhõ bẽnjadjwýr rax Ananij Paur bu'ã me ku'êmã 'ã karõn kum,

—Me on ajkwabê kurwa, ane. Nhym me arým kurwa.

<sup>3</sup> Nhym Paur kum,

—Ga ne ga ajêx ne amijo Metĩndjwýnh maro aba. Metĩndjwýnh dja ã gadjwý akurwa. Dja ã amã ajaxwe pãnh jarê. Nã gãm me bakukràdjã kõt aje ikukjêr ne imã mýj ijaxwe pãnh jarênhmãn ate me bakukràdjã kupa'ã ijã memã apnê nhym me ikurwa, ane.

<sup>4</sup> Nhym kam bu'ã me ku'ê kum,

—Me kadjy Metĩndjwýnh mar djwýnh nhõ bẽnjadjwýr raxmã ne ga adjãkjêro dja. Djãm ã me kute kum anhýr got? ane.

<sup>5</sup> Nhym Paur memã kum,

—Akmere ar, kubê me kadjy Metĩndjwýnh mar djwýnh nhõ bẽnjadjwýr raxkõt ije mar kêt. Ba ren ja man ren ã kum anhýr kêt. Be, Metĩndjwýnh ne memã kum, “Kwãrĩk wãnh me bẽnjadjwýrmã adjãkjêr kêt”, ane nhym me arým 'ã pi'õk no'õk ne. Kam ba ren kum idjãkjêr kêt. Nãm ã Paur memã ane.

<sup>6-8</sup> Ne kam õkre kadjwýnhbê amim,

—Be, ibu'ã me ku'ê jabê ne mebê xadjudjêu nhym jabê mebê pardjêu, ane. Be, mebê xadjudjêu ne me amikukràdjã kõt mã memã kum,

—Me tyk akubyn tĩn kêt ne Metĩndjwýnh kadjy mrãnh djwýnh kêt ne me karõ kêt, anhýro ba. Nhym be, mebê pardjêu ne me mã memã kum,

—Kati. Mrãmri me tyk akubyn tĩnkumrẽx. Mrãmri Metĩndjwýnh kadjy

mrãnh djwýnhkumrẽx. Mrãmri me karõkumrẽx, anhýro ba. Paur apýnh me ja kukràdjã ja man arým mebê pardjêu kõt amikabẽn djin kãj bê me rũnhmã kum,

—Be, akmere ar, ibê mebê pardjêu'õ. Ibãm kute idjirbê mebê pardjêu'õ. Be, mrãmri dja Metĩndjwýnh akubyn me tyko tĩnkumrẽx. Ja ne ba tu amim markumrẽx. Ije mrãmri me tyk akubyn tĩnja jarêho ibakõt ne gar imã ijaxwe jarên we ijaxwe jabej ikukjêro nhý. Nãm ã memã ane nhym mebê pardjêumẽ mebê xadjudjêumẽ aben kukràdjã mýr jabej arým abenkam ngryk ne aktã kabẽno aben japanho kumex. Nhym kõt me krãptĩ: apýnh kabẽno kumex.

<sup>9</sup> Ne kam kangao kumex. Nhym mebê idjaer kukràdjã mar djwýnh kwý kãjmã dja. Ar kute mebê pardjêu kukràdjãkõt amijo baja kãjmã djan arým Paur nêje memã bẽn tỳx ne memã kum,

—Djãm me karõ mex kukwakam nãr Metĩndjwýnh kadjy mrãnh djwýnh kukwakam me akubyn tĩn jarênhkam axwe got? Kati, axwe kêt. Gwaj ren 'ã axwe nhõn ren kam Metĩndjwýnh bakurê djwýnh. Nãm ar ã memã ane <sup>10</sup> nhym me arým kabẽn mýr jabej kangao kumex. Nhym kam krãkamngõnh nhõ bẽnjadjwýr rax amim,

—Je, me kute arým abenmã Paur nhirênh 'ýr pyrãk, anen arým krãkamngõnhmã kum,

—On me 'ýr rwýn pa 'amýn o katon me banhõ kikretimã o wadjã, ane. Nhym me arým o wadjã.

<sup>11</sup> Nhym arým me'ã akamãt nhym Bẽnjadjwýr djwýnh arým tẽn kuri djan kum,

—On atỳx ne akĩnh. Ga arým mrãmri Djeruxarê jakam ijã memã adjujarênhkumrẽx. Dja ga ã krĩraxbê Rõmakamdjwý ã adjujarêho ane, ane.

*Me kute Paur bĩn kadjy kute o aben mar.*

<sup>12</sup> Nhym arým 'ã akati nhym mebê idjaer kwý me kãxã aben kõt kabẽn djin abenmã kum,

—Dja gwaj baja mrãmri Paur bĩnkumrẽx kadjy amijajbu. Dja gwaj bajõ Paur bĩn kêttri mýjja'õ krê nãr ikõ gora gẽ Metĩndjwýnh gwaj bajõnh bĩ. Gwaj bakabẽn kajgo pãnh gwaj bajõnh bĩ, ane. <sup>13</sup> Me



krãptĩbê 40 ne ijukri ajmã kute ne me ã abenmã Paur'ã karõo ane. <sup>14</sup> Ne kam me rũnh'ýr bõx. Me kadjy Metĩndjwýnh mar djwýnh nhõ bẽnjadjwýrmẽ mebẽngêt'ýr bõx. Ne kam memã kum,

—Ba me ije Paur bĩnkumrẽx kadjy arým aben kõt ikabẽn djirkumrẽx ne abenmã kum, “Kwãrĩk wãnh gwaj mýjja'õ krẽn ne kõt bakõm kêt. Gwaj baje Paur bĩnkambit dja gwaj banhõ kwý krẽn kõt ikõ. Dja gwaj bajõ bajẽx ne mýjja 'õ krẽn kõt ikõ nhym arým Metĩndjwýnh gwaj bajõnh bĩ. Gwaj bakabẽn kajgo pãnh gwaj bajõnh bĩ.” Nã bãm me ã abenmã ane. <sup>15</sup> Kam ne ba me me amã arẽ. Me ije bĩnkumrẽx kadjy dja ga me krãkamngõnh nhõ bẽnjadjwýr'ýr tẽ. Gamẽ me rũnh 'õdjwýmẽ 'ýr tẽn kum Paur'ã a'uw ne kum, “Ajte akatikam me imã Pauro rwý ba me prĩne kukjẽr mex”, ane. Dja ga me ã kum ane. Nhym arým o kato ba me arým kubĩ. Me awýr bõx kẽtri ba me tu bĩnkumrẽx. Nãm me ã me rũnhmã ane.

<sup>16</sup> Nhym kam Paur tãmdjwý arým me kute ingêt kangrõnh jarẽnh ma. Ne kam me krãkamngõnh nhõ kikretimã wadjàn arým Paurmã me arẽ.

<sup>17</sup> Nhym kam Paur amiwýr me krãkamngõnh krãptĩ: kubê 100o ba djwýnh'õja 'uw nhym bõx. Nhym kum,

—Ë, anhõ bẽnjadjwýr'ýr bõktijao tẽ. Nãm kute kum mýjja'õ jarẽnhmã, ane.

<sup>18</sup> Nhym arým 'ýr o tẽn õ bẽnjadjwýr'ýr o bõx. Bẽnjadjwýr nhidjibê ne Kraõdjõ Rixijanh. Nãm 'ýr o bõx ne kum,

—Aje me'õbê ijê nhidjibê Paur ne amiwýr ijuw ne imã, “Ë, anhõ bẽnjadjwýrmã bõktijao tẽ. Nãm kute kum mýjja'õ jarẽnhmã.” Nãm ã Paur imã ane, ane.

<sup>19</sup> Nãm meo ba djwýnh kum ane nhym arým bõkti pa 'ãbyn amũ o tẽn me kãxã kum,

—Mýj ne ga aje imã arẽnhmã? ane.

<sup>20</sup> Nhym kum,

—Mebê idjaer arým aben kõt kabẽn dji. Me kute amã arẽnh ga aje me rũnhmã ajte ngêtwa Pauro akator nhym me we kute prĩne kukjẽr mexmã. <sup>21</sup> Kwãrĩk wãnh ga memã o akator kêt. Me kubê 40 ne ijukri ajmã kute ne me ngêtwakam amako nhỹ. Me kute tu bĩnkumrẽx kadjy arým abenmã kum, “Kwãrĩk wãnh gwaj mýjja'õ krẽn ne

kõt bakõm kêt. Gwaj baje Paur bĩnkambit dja gwaj banhõ kwý krẽn kõt ikõ. Dja gwaj bajõ 'ẽx ne mýjja 'õ krẽn kõt ikõ nhym arým Metĩndjwýnh gwaj bajõnh bĩ. Gwaj bakabẽn kajgo pãnh gwaj bajõnh bĩ” Nãm me ã abenmã ane. Ne kam jakam me kute bĩn kadjy akabẽnkam amako nhỹ. Nãm ã bõkti bẽnjadjwýrmã ane.

<sup>22</sup> Nhym krãkamngõnh nhõ bẽnjadjwýr rax arým kum,

—Aj, aje imã arẽnhja kwãrĩk wãnh me'õmã arẽnh kêtumrẽx. Aj mã, ane.

### *Me kute Xedjare'ýr Pauro mõi.*

<sup>23</sup> Ne kam amiwýr krãkamngõnh kubê 100o ba djwýnh amãnhkrut 'uw ne arkum,

—Gar krãkamngõnh kubê 200mã arẽ gẽ me amijo atom. Me ajã kãjbê kõ 'irykam, 21 orakam dja ga me krĩraxbê Xedjare'ýr mõi. Mebê 70djwý dja me kawaru'ã 'ýr mõi. Mebê 200djwý dja me kãxo nãnh jamýn 'ýr o mõi. <sup>24</sup> Paurdjwý kadjy dja gar kawaru kwýo mõi. Gar me krãptĩo mõi mebê idjaerbê Paur pytãr mex ne bẽnjadjwýrbê Perimã o bõx. Nãm bẽnjadjwýr ã meo ba djwýnh arkum ane.

<sup>25</sup> Ne kam amũ bẽnjadjwýr raxbê Perimã amikabẽn'ã pi'õk no'õk ne kum,

<sup>26</sup> “Ba ibê Kraõdjõ Rixijanh. Bẽnjadjwýr Peri, araxkumrẽx. Ba ne ba amã pi'õk no'õkkõt wãm amã ikabẽn mex jarẽ.

<sup>27</sup> Pi'õk jakõt ba amã me'õbê Paur jano. Ajbir ne mebê idjaer o tým ne pa 'amýn bit kute bĩn 'ýr. Ba kam arým krĩraxbê Rõmakam me ja kute Pauro aminhõja man 'ýr inhõ krãkamngõnhõ mõi mebê utã. <sup>28</sup> Ne kam me kute axwe jarẽnh kraxkõt bit ije marmã. Ne kam kadjy mebê idjaer nhõ me rũnh'ýr o bõx. <sup>29</sup> Ne kam arým kuman amim, ‘Be, mebê idjaer ta kukràdjã kõt ne me kum axwe jarẽ’, ane. Nhym kute me babê Rõma kukràdjã'õo bikẽnh kêt. Kam pãnh me baje bĩn nãr pãnh baje kubê ijê kadjy kêt.

<sup>30</sup> Nhym mebê idjaer bit kute bĩn kadjy aben kõt kabẽn djin arým prykõt kum nõn kam amako nõ. Nhym me imã arẽ ba on wãm ano. Ne me kute kum axwe jarẽnh djwýnhmãdjwý arým memã 'ã karõn memã kum, ‘Bẽnjadjwýr rax

kuka kônĥ dja gar kum axwe'õ jarẽ', ane.  
Be, tãm ne ja."

Nãm ã krãkamngônĥ nhõ bẽnjadjwýr pi'õkkam Perimã ane. Ne me kute 'ýr o mõr kadjy arým memã pi'õk ngã.

<sup>31</sup> Nĥym kam me'ã akamãt. Nĥym me krãkamngônĥ arým bẽnjadjwýr kabẽnkõt Djeruxarẽ kurũm Pauro katon o mõ. Akamãt kõkam mõ:n kam arým krĩraxbẽ Pakrir'ýr o bõx. <sup>32</sup> O bõx nĥym kam arým me'ã akati. Nĥym me krãkamngônĥ pykabẽ mrãnhja akubyn aminhõ kikretimã akẽx ne.

Nĥym me kawaru'ã mõrja amũ Pauro mõ. <sup>33</sup> Ne o mõ:n kam arým krĩraxbẽ Xedjare'ýr o bõx. Ne kam bẽnjadjwýr Perimã pi'õk ngãn kam kum, "Ota, Paur ne ja", ane.

<sup>34</sup> Nĥym arým amim pi'õk jarẽn kabẽn ma. Ne kam kukij ne kum,

—Nĥýnh pykajakam ne arwýk djã? Mýj ne idji kute? ane. Nĥym kum, "Xirxijkam ne ba irwýk djã", ane. <sup>35</sup> Nĥym kum,

—Gẽ me kute amã axwe jarẽnh djwýnh bõxmã ba kam arým akabẽn ma, ane. Ne kam õ krãkamngõnhmã kum,

—Bẽnjadjwýr rax Erodji nhõ kikrekam dja gar Pauro nhý, ane.

## 24

### *Kute bẽnjadjwýr Perimã amijarẽnh.*

<sup>1</sup> Nĥym me'ã akatibẽ 5 apẽx nĥym mebẽ idjaer rũnh arým Xedjare'ýr bõx. Me kadjy Metĩndjwýnh mar djwýnh nhõ bẽnjadjwýr rax Ananijmẽ mebẽngẽtmẽ me kadjy me kabẽn jarẽnh djwýnhbẽ Teturmẽ ne me arým Xedjare'ýr bõx. Ne kam arým bẽnjadjwýr Peri'ýr tẽn 'ýr bõx. 'Ýr bõx ne arým Paur kãxã 'ã axwe janhõ nĥym bẽnjadjwýr Peri kuma. <sup>2</sup> Kuman arým Paur'ýr õ apẽnh jano nĥym me o bõx.

Nĥym Tetur arým 'ã axwe nhõrmo krax ne bẽnjadjwýr rax Perimã kum,

—Be, ga me imã abẽnjadjwýr raxkam ne ba me idjumar mexkumrẽx. Ga me imã mýjja kumexo mex. <sup>3</sup> Be, me imã akĩnh ne pyka kunĩkõt amã amikĩnh jarẽnh rã'ã. <sup>4</sup> Dja ba akunor ngri ne amã ikabẽn 'ikrãnebit jarẽ ga ikabẽn ma.

<sup>5</sup> Ba me me'õja axwekumrẽxmã ikato. Nãm apýnh me ba djã kunĩkõt mebẽ idjaer

kunĩmã me banhõ bẽnjadjwýr kurẽ'uko ba nĥym me arým kangao kumex. Kubẽ meo ba djwýnh'õ. Krĩraxbẽ Nadjarekam Jejuwã kukràdjã kõt ne õ me jao ba. <sup>6</sup> Ne kam kute Metĩndjwýnh nhõ kikretio àpnumã ba meo tým ne pa 'amý. Ne bit ije kum pãnh jarẽnhmã o mõ. Me ikukràdjã kõt ne ije kum axwe pãnh jarẽnhmã o mõ.

<sup>7</sup> Nĥym kam krãkamngônĥ nhõ bẽnjadjwýrbẽ Rixijanh bõx ne me imã àkrẽ:. Ne arým me ibẽ Paur pytàn mã o mõ. <sup>8</sup> Ne kam me kute kum axwe jarẽnh djwýnhmã 'ã karõn memã kum, "Bẽnjadjwýr rax'ýr dja gar tẽn kum arẽ", ane. Be, ga dja ga abej kukjan arým ama. Me ije me'õjamã axwe jarẽnh kõt dja ga ama. Nãm ã Tetur Perimã ane.

<sup>9</sup> Nĥym mebẽ idjaer kunĩ 'ẽx ne kum,  
—Be, mrãmri ne kõt arẽ. Mrãmri ne kõt arẽ, ane.

<sup>10</sup> Nĥym bẽnjadjwýr Peri arým Paur'ýr akẽx ne inhuo akre. Paur kute kum amijarẽnhmã akre nĥym kam kum,

—Ga ne ga pyka jakam aje memã axwe pãnh jarẽnhõ aba nĥym arým jakam ajã amex krãptĩ apẽx. Ba arým kõt aman akam ikĩnh ne arým aminẽje amã ikabẽn jarẽ.

<sup>11</sup> Be, ba ne ba ajbir Djeruxarẽmã wabin 'ýr bõx. Ije Metĩndjwýnhmã rax jarẽnh kadjy ne ba wabi nĥym arým jakam akatibẽ 12bit apẽx. Ga dja ga me kukja gẽ me arým kute ipumũnh kõt amã, "Be, mrãmri ne akati kõt arẽ", ane. <sup>12</sup> Ajbir ne ba bõx ne ije Metĩndjwýnh nhõ kikretikam me'õmẽ aktã ikabẽno aben japanĥ kêtikumrẽx ne ije amijã me krãptĩo ibikprõnh kêtikumrẽx. Apýnh me bikprõnh djãkam ije meo anhýr kêt ne krĩraxkam ije meo anhýr kêtikumrẽx. Nĥym mebẽ idjaer rũnh akabem ýrja kõt kute imã kator ne ipumũnh kêtikumrẽx. Ije mebẽ bẽnjadjwýr kurẽkõt me kute imã kator ne ipumũnh kêtikumrẽx.

<sup>13</sup> Kam me kute ijarẽnhja kõt ga te aje mýj ijaxwe'õmã akator ne marmã. <sup>14</sup> Dja ba amã amijarẽ ga imarkumrẽx. Be, Jeju kõt ne ba amijo iba. Kõt ne ba me ikukãmãreo ba djwýnhmã rax jarẽnhõ iba, Metĩndjwýnhmã rax jarẽnhõ iba. Nĥym mebẽ idjaer kwý 'ẽx ne ijã abenmã kum, "Metĩndjwýnh kupa'ã ne amijo ba", ane. Nĥym be, kati. Ba ne ba mrãmri tu amim

Mõjdjê kukràdjà markumrêx ne tu amim Metĩndjwýnh kukwakam kabên jarênh djwýnh kunĩ kabên markumrêx ne kõt ar amijo iba. Me kabên'ã pi'òk no'òk kõt ne ba amijo iba.

<sup>15</sup> Be, mrãmri dja Metĩndjwýnh akubyn me tyko tĩn. Me axwe kêtjao tĩn. Me axwe-jao tĩn. Ja ne ba tu amim markumrêx. Be, me rũnh nhýr jadjwý ne me amim ã maro ane. <sup>16</sup> Mrãmri ne me tyk kunĩ akubyn tĩnmã. Ba kam ijaxwe kêt kadjy amijãno dja. Metĩndjwýnh kute imã ijaxwe jarênh karõn ibu'ã me kunĩdjwý kute imã ijaxwe jarênh karõ amijãno idjãm rã'ã: ne.

<sup>17</sup> Be, amrêbê ne ba apýnh me ba djakam ar iba nhym ijã amex krãptĩ apêx. Ba kam akubyn inhõ me wýnh'ýr bõx. Mebê idjaer'ýr bõx. Ibõx kêttri ne me bajtem me õ mýjja kêt kadjy imã pi'òk kaprĩ ngã ba arým o bõx ne memã kungã. Ne me kute ikadjy Metĩndjwýnhmã mry bĩn kadjy me 'ýr bõx. <sup>18</sup> Ne kam arým me ikukràdjà kõt Metĩndjwýnhmã amijo mex ne arým Metĩndjwýnh nhõ kikretimã wadjà. Nhym mebê idjaer kwý arým pykabê Adjij kurũm bõx. Kikretikam bõx ne arým ipumũ. Ipumũ ba amijã me krãptĩo ibikprõnh kêt ne ije memã me bẽnjadjwýr'õ kurê'uk kêt nhym me kam kangati kêtumrêx.

<sup>19</sup> Adjij kurũm me bõxwã kute Metĩndjwýnh nhõ kikretikam ipumũnhkõt ren awýr bõx. Ne ren me kute mýj ijaxwe'õ markõt ren amã ijarê. <sup>20</sup> Nàr gê akuka kõnh me ýrwã'õ kute Djeruxarêkam ipumũnhkõt amã ijarê. Mebê idjaer rũnh kute Djeruxarêkam ijaxwe jabej ikukjêrkõt gê me'õ kute ipumũnh jabej amã ijarê. Me kute mýj ijaxwe'õmã katorkõt amã ijarê.

<sup>21</sup> Ba amã amijarê ga ama. Ba Djeruxarêkam me ipõkri idjãmkam kàj bê memã kum, “Ije mrãmri me tyk akubyn tĩn jarênhõ ibakõt ne gar akati jakam mýj ijaxwe'õ jabej ikukjêro nhý”, ane. Djãm ori ije ja jarênhkam ijaxwe'õ? Kati. Tãm ne ja. Nãm ã Paur Perimã ane.

<sup>22</sup> Nhym Peri kute Paur kabên markam arým kadjy akati 'õdjwý jarê. Amrêbê ne Peri Jeju'ã ujarênh ma. Nãm kadjy akati 'õ jarênh memã kum,

—Dja krãkamngõnh nhõ bẽnjadjwýr Rix-ijanh amrê tẽ. Ba kam arým prĩne ajã ujarênh ma, ane. <sup>23</sup> Ne kam krãkamngõnh krãptĩ: kubê 100 nhõ bẽnjadjwýrjamã Paur'ã karõn kum,

—Dja ga omũ gê ta ar mrã. Gê õbikwa ta 'ýr wangij ne o djuw mex. Nãm ã Peri anen kam mã tẽ.

<sup>24-25</sup> Nhym arým 'ã akati kwý apêx nhym Peri akubyn bõx. Prõ nhidjibê Kruxire ne o bõx. Kubê mebê idjaer'õ. Nhym kam Paur'ýr õ me ja jano nhym me kum o bõx. Nhym kam arkum ujarênhõ djan arkum,

—Metĩndjwýnh ne arým mrãmri Jeju'ã me banhõ Bẽnjadjwýrbê kumkati mẽ. Kubê ne Kritu. Djã gãm ar tu amim Jeju markumrêx nhym Metĩndjwýnh arým ar amã ajaxwe kêt jarê gar arým kum amexkumrêx. Djã gãm ar ajaxwe kêt kadjy amijãno dja. Dja Metĩndjwýnh ã me kunĩmã axwe pãnh jarê. Kadjy amrê akati mõr rã'ã, ane.

Nãm prĩne ã kum 'ã ujarênhõ ane nhym kabên pymaje Peri arým madjã kretin kum,

—Aj mã. Gê idjãpênh'õ kêtka ba ajte amã arê. Ga ajte imã arê ba kuma, ane.

<sup>26</sup> Nãm anen õkre kadjwýnhbê amim,

—Dja Paur imã pi'òk kaprĩ nhõr jabej ba arým kum inhire gê tẽ, ane. Ne kam pi'òk kaprĩ jabej aben tã amiwýr Paur 'uw ne kum kabêno krĩ.

<sup>27</sup> Paur mebê ijê djakam nhý nhym arým 'ã amex amãnhkrut apêx. Nhym arým Peri kato nhym Poxu Pexu arým pãnh memã bẽnjadjwýr rax. Peri kator kêttri ne kute mebê idjaero kĩnh kadjy tu wãnh mebê ijê djakam Paurmã irerkumrêx nhym wãnh krĩ rã'ã.

## 25

### *Kute bẽnjadjwýr Pexumã amijarênh.*

<sup>1</sup> Pexu pykabê Djudêja'ýr bõx ne kam krĩraxbê Xedjarekam bõx. Nhym kam 'ã akatin akatin akati nhym krĩraxbê Xedjare kurũm katon Djeruxarê'ýr tẽ. Tẽ:n kam 'ýr bõx. <sup>2</sup> Nhym kam me rũnh Pexumã Paur jarê. Me kadjy Metĩndjwýnh mar djwýnh nhõ bẽnjadjwýr raxmẽ mebê idjaer nhõ me rũnh 'õdjwýmẽ ne me kum arê <sup>3</sup> ne kum,

—Ë, amã me ikĩnh jabej gop amrê Djeruxarêmã Pauro bôx, ane. Me kute kum arênh kêtri ne me abenmã kum,

—Gêdja me amrê pry'ã Pauro mō gwaj kubĩ, ane. <sup>4-5</sup>Nãm me rũnh ã Pexumã Paur jarênh ane nhym kam memã kum,

—Kati, gê wãnh Xedjarekam me arek o nhỹ. Badjwý arým 'ýr itêm 'ýr. Gê ar anhõ me rũnh'õ ar ikôt 'ýr tẽn axwe'õ jabej kukja gê kum amijarê gê kam kum axwe jarênhkumrêx, ane.

<sup>6</sup> Nhym me'ã akatibê 10 ne ajmã kute apêx nhym kam arým Xedjare'ýr tẽn 'ýr bôx. Nhym akati nhym arým tẽn memã axwe pãnh jarênh djakam memã nhỹ. Ne arým Paur'ýr õ me ja jano nhym me o mōn 'ýr o bôx. <sup>7</sup> O bôx nhym arým Djeruxarê kurũm mebê idjaer kwý 'ýr bôx ne Paurmã ipôk ne. Ne kam Pexumã Paur jarênh dja. Nãm me kum axwe krãptĩ: jarênh dja. Djãm axwe kryre ne arê? Kati, Axwe rũ:nh ne arê. Me kute axwekôt omũnh kêt ne tu arĩk kum axwe jarênh dja. Nhym Pexu me kabên ma:n kam mrãmri Paur jaxwe'õmã kator ne mar kêtumrêx.

<sup>8</sup> Nhym Paur aminêje Pexumã kum,

—Be, ba ne ba ije mebê idjaer kukràdjã 'õo ibikênh kêt ne Metĩndjwýnh nhõ kikretio ibikênh kêt ne mebê bẽnjadjwýr raxbê Xedja kurê kêt, ane. Xedja ne me bẽnjadjwýr rũnh kunĩ kurãm rax.

<sup>9</sup> Nhym be, Pexu bit kute mebê idjaerjao kĩnhmã ne arým Paurmã kum,

—Djãm Djeruxarêkam atêm prãm? Dja ba kam mrãmri ajã me ja kabênkumrêx jabej, ane.

<sup>10</sup> Nhym Paur kum,

—Kati. Bẽnjadjwýr raxbê Xedja kabênkôt aje me axwe jabej me kukjêr djã ne ja. Jakam dja ga ima. Mýj kadjy dja ga Djeruxarêmã ijo tẽn nhym me ikukij? Ba ne ba mebê idjaer 'õo ibikênh kêtumrêx ga arým ama. <sup>11</sup> Be, me ren ijaxwe'õmã kato ne ren pãnh tu ibĩ, ba ren aminêje ikabên 'õ jarênh kêt ne. Nhym be, me 'êx ne kute imã ijaxwe jarênh kajgokam ne ga te aje memã ikangamã. Ba bẽnjadjwýr raxbê Xedja'ýr tẽn aminêje kum ikabên jarê. Nãm ã Paur kum ane.

<sup>12</sup> Nhym kam Pexu amibu'ã me rũnhmã kabên nhym me Pauro aben ma. Nhym kam kum,

—Nã gãm imã, “Ba bẽnjadjwýr raxbê Xedja'ýr tẽn aminêje kum ikabên jarê”, ane. Be, jakam dja ga mrãmri amũ Xedja'ýr atêmkumrêx, ane.

### *Pexu kute Paur'ã Angripa kabên mar.*

<sup>13</sup> Nhym 'ã akati kwý apêx nhym bẽnjadjwýr raxbê Angripamê prõbê Berni ar krĩraxbê Xedjare'ýr bôx. Ar kute Pexumã kabên mex jarênh kadjy ne ar bôx. <sup>14</sup> Ne kam arek kam ar ba nhym ar'ã akati kwý apêxmã. Nhym Pexu arým bẽnjadjwýr raxmã Paur'ã ajarên kum,

—Peri mebê ijê djakam me'õmã iren arým mã tẽn. <sup>15</sup> Ba krĩraxbê Djeruxarêkam ar ibari nhym mebê idjaer nhõ me rũnh arým imã Paur jarê. Me õ mebêngêtmê me kadjy Metĩndjwýnh mar djwýnh nhõ bẽnjadjwýrmê imã arê ba arým kuma. Me imã, “Dja ga kum axwe pãnh jarên abĩ”, ane.

<sup>16</sup> Ba memã kum, “Be, djãm Rômakam me ja kukràdjã kôt ne ba me ije me axwe jabej me kukjêr kêtum tu me par? Kati. Ba me me axwe jabej me kukjêr kumrêx. Nhym me me kuka kôn axwe jarênh kumrêx ba me me kuma. Nhym kam me me imã amijã aprã ba me arým kuma. Me ije me axwemã ijapôxkambit ne ba me arým pãnh me kupa.” Nã bãm ã memã ane.

<sup>17</sup> Ne kam mebê idjaer arým amrê Xedjare jakam bôx. Nhym me'ã akati ba amikrà kêt ne ije memã axwe pãnh jarênh djakam bôx ne memã nhỹ. Ba kam Paur'ýr inhõ me ja jano nhym me o bôx. <sup>18</sup> O bôx ba arĩk 'ã amim, “Be, mrãmri axwekumrêx”, ane. Nhym me kwý kãjmã ku'ên kam 'ã imã kabên kajgobit jarênh ku'ê.

<sup>19</sup> Nãm me 'ã imã, “Paur kum me ikukràdjã kurê”, ane. Ne me'õ nhidjibê Jeju jarê. Nãm me Jeju tyk jarênh nhym be, Paur ne Jeju tĩn jarê. Nãm me ã Paur'ã kabên kajgo jarênh ane. <sup>20</sup> Ba amim, “Je, djãm ije me kukràdjã mar got”? ane. Ne kam kum, “Djãm Djeruxarêkam atêm prãm? Dja ba kam ajã me ja mrãmri kabênkumrêx jabej”, ane.

<sup>21</sup> Nhyam kam Paur imã, “Ba gop tẽn aminêje bẽnjadjwýr raxbê Xedjamã ikabẽn jarẽ”, ane. Ba krãkamngõnhmã kum, “Dja gar o nhý ba kam ĩ arým Xedjamã ano.” Nã bãm ã memã ane. Nãm ã Pexu Angripamã ane.

<sup>22</sup> Nhyam kum,

—Badjwý me'õja kabẽn ma, ane.

Nhyam kum,

—Gê akatimã ga kam arým kabẽn ma, ane.

*Paur Angripa kabem ãm ne kute kum amijarẽnh.*

<sup>23</sup> Nhyam arým ar'ã akati nhyam Angripamẽ Berni ar õ nêkrêxo prĩne amikunhêr ne me axwemã pãnh jarẽnh djãmã wadjã. Krãkamngõnh nhõ bẽnjadjwýrmẽ krĩraxkam me rũnh ja arkõt wadjã. Nhyam Pexu arým Paur'ýr õ me ja jano nhyam me o bõx.

<sup>24</sup> Nhyam Pexu Angripamã kum,

—Bẽnjadjwýr raxbê Angripamẽ me akatãmjamẽ, djã ne ga me me'õja pumũ? Krĩraxbê Djeruxarêkam mebê idjaer kunĩmẽ krĩrax jakamdjwý mebê idjaer kunĩmẽ ne me imã me'õja jarẽnh ku'ên kam kãj bê imã, “On abĩ. On abĩ”, anhýro kumex.

<sup>25</sup> Ba kam te ije axwe'õmã ikator nhyam me kute pãnh bĩnmã te kukij nhyam axwe kêtê. Nhyam ta imã, “Ba gop tẽn aminêje bẽnjadjwýr raxbê Xedjamã ikabẽn jarẽ. Ta ne kute raxo me kunĩ jakrenh”, ane. Kam dja ba 'ýr anorkumrêx. <sup>26</sup> Dja ba anen kam te ije me banhõ bẽnjadjwýr raxmã Paur jaxwe'ã pi'õk no'õkmã. Ba kam amã o ikato. Ga, bẽnjadjwýr rax Angripa, akumrêx ne ba aman amã o ikato. Ga dja ga axwe'õ jabej kukjan ama ba arým 'ã pi'õk no'õk ne. <sup>27</sup> Ba ren me'õ bê ijêja jano ne ren ije kõt axwe'ã pi'õk no'õk janor kêt ne ren Xedjamã kute ibẽno ibikẽnh pyrãk. Nãm ã Pexu Angripamã ane.

## 26

<sup>1</sup> Nhyam kam Angripa arým Paurmã kum,  
—Ajrã. Aminêje akabẽn jarẽ, ane.

Nhyam memã aminhikra bẽn arým aminêje kum,

<sup>2</sup> —Bẽnjadjwýr rax Angripa, arým mebê idjaer ijã axwe krãptĩ janhõ ba kam aminêje amã ikabẽn jarẽ. Myt ja tãmkam aje ikabẽn mar prãmkam ne ba ikĩnhkumrêx. <sup>3</sup> Ga ne ga aje prĩne mebê idjaer kukràdjã mar. Me kute kukràdjã jabej aben kukjêrdjwý aje prĩne mar. Aje markam ne ba ikĩnhkumrêx. Dja ba amã amijã ajarẽ. Gop amijamãr 'iryndjã ikabẽnja kunĩ ma.

<sup>4</sup> Be, inhõ pyka djwýnhkam, krĩraxbê Djeruxarêkam ne me kute ipumũnh. Iprĩrũm ne mebê idjaer kunĩ ipumũ. <sup>5</sup> Me kute ipumũnhkõt ren ijã amã ajarẽ. Ba mebê pardjêu kukràdjã man kõt ar amijo iba. Mebê pardjêu ne me prĩne kute me ikukãmãkjê kukràdjã marn kõt amijo ba mex. Prĩne kute kõt amijo ba mexo kute mebê idjaer kunĩ jakrenh. Me ja kõt ne ba amijo iba. <sup>6</sup> Ne kam jakam arým akabem dja ga ijaxwe jabej ikukjêro nhý. Be, Metĩndjwýnh me ikukãmãkjê mã kum, “Dja ba mrãmri akubyn me tyko tĩn”, ane. Kute akubyn me tyko tĩnja ne me tu amiwýr kamnhĩxkumrêx.

<sup>7</sup> Me ikukãmãkjê Djako ne krabê 12 jadjuw. Krabê 12 ja ne ar aben djõ'ã apýnh tãmdjwý ba djãri kubê 12, apýnh me krãptĩ: ba djãri kubê 12. Apýnh me ikukãmãkjê ba ja ne me akatikammẽ akamãtkammẽ mã Metĩndjwýnhmã amijarẽnh kumex. Ne mã kum àpẽnho kumex ne mã amim, “Mrãmri dja Metĩndjwýnh akubyn me tyko tĩn”, ane. Ne mã me akubyn tĩn nhõ akati bõx jabej ajkam ama.

Ba ne ba mekõt tu amim kamnhĩxkumrêx ne mã me kunĩmã kum, “Mrãmri dja Metĩndjwýnh akubyn me tyko tĩn”, ane. Nhyam kõt mebê idjaer kamingrãnyre imã ijaxwe jarẽ ga kam ijaxwe'õ jabej ikukjêro nhý. <sup>8</sup> Be, djãm aje mekõt amim, “Metĩndjwýnh te kute akubyn me tyko tĩnmã”? ane. Djãm aje amim anhýr got? Kati. Ga ne ga aje ã amim anhýr prãm kêt. Nãm ã Paur Angripamã ane.

<sup>9</sup> Ne kam ajte kum,

—Be, badjwý amrêbê ne ba mekõt amim, “Kê, Nadjarekam Jeju wã. Ba 'ã me kabẽn bẽ idjãptãrkumrêx gê me ĩ maro ba”, ane. <sup>10</sup> Ne kam kõt mrãmri Djeruxarêkam ã mebê idjãptãro ane. Ne me kadjy Metĩndjwýnh

mar djwýnh nhõ bẽnjadjwýr ar kabẽnkõt me krãptĩbẽ ijẽ. Jeju nhõ me jabẽ ijẽ. Nhyr me kute me parmã ba mekõt memã kum, “Ajrã. Me abi”, ane. <sup>11</sup> Ne mã me bikprõnh djã kunĩkõt meo ibikẽnho iba. Me tokry pymaje kute Jeju japrýn kanga jabej ne ba mã meo ibikẽnho iba. Meo ibikẽnho iba:n kam amũ apýnh krĩrax bajtem djãridjwý me'ýr mrãn bõx.

<sup>12</sup> Kamã ne ba krĩraxbẽ Tamagu'ýr tẽ. 'Ýr itẽm kẽtri ne me kadjy Metĩndjwýnh mar djwýnh nhõ bẽnjadjwýr ar me kadjy imã pi'õk no'õk ne. <sup>13</sup> Bẽnjadjwýr rax Angripa, nã bãm me'ýr pi'õk no'õko tẽ: nhyr arým ijã kãjkwa nhipõkri myt nhỹ. Nhyr kãjkwa kurũm mýjja jadjẽnh prĩne ikurwý ba arým omũ. Adjẽnh týxo kute arngro jakrenh. Nhyr ikõt me mõrdjwý mýjja jadjẽnh me kurwý.

<sup>14</sup> Bar ikunĩ pykabẽ irõrõk ne. Ba kam me'õ kabẽn ma. Nhyr mebẽ idjaerkam ikabẽn djwýnhkõt imã kabẽn ne imã, “Xaur, Xaur, mýkam ne ga me kute amim imaro abikẽnh ar o aba? Nã gãm aje ba mãn ijo abikẽnho aba pyrãk. Ga ari aje ijo abikẽnho abakam te adjumar mex prãmje. Ga, mry kute jẽnh bjẽrja pumũ. Me kute mýjja djwa mexo mry kamjýr nhyr arým umaje prõt týxja pumũ. Nhyr kwý amakkre kẽtkam tu amikamjýr djã kanãn arým tokry ne. Gadjwý dja ga ari ijo abikẽnho aban arým atokry: ne”, ane.

<sup>15</sup> Ba kum, “Bẽnjadjwýr mýj me ajõ ga ne ga imã akabẽn ne”? ane.

Nhyr imã, “Ba ibẽ Jeju. Nã gãm me kute amim imarjao abikẽnho aban aje ba mãn ijo abikẽnh pyrãk. <sup>16</sup> Be, amibẽx ne kãjmã dja. Ije ajã inhõ àpẽnh djwýnh mẽnh kadjy ne ba amã amijo amirĩt. Aje ajbir ipumũnh'ã dja ga memã ajarẽ. Dja ba ã mýjja kwý nhipẽx ne kõt amã amijo amirĩt ga ipumũ. Jadjwý dja ga 'ã memã ajarẽ. <sup>17</sup> Jakam dja ba me bajtemmã ajanon mã me bajtembẽ apytã nhyr me kute abĩn kõt. Ne mebẽ idjaerdjwýbẽ apytã nhyr me kute abĩn kõt.

<sup>18</sup> Ga, me no mjõtkam kute mýjja pumũnh kõt ne arĩk ba punuja pumũ. Nhyr be, me no põt ne me mýjja kunĩ pumũn kam katãt ba. Ga ajte, akamãt kõ tykkam me

kute mýjja pumũnh kõt ne ba punuja pumũ. Nhyr me memã mýjja kurwý nhyr me arým mýjja kunĩ pumũn katãt ba.

Me bajtemdjwý ne me arĩk ar ban axwe. Dja ba memã ajano ga memã ikabẽn jarẽ. Memã arẽ nhyr me arým tu amim imarkumrẽx ne arým katãt amijo ban axwe kõt ne ar ba. Xatanaj ne kute meo ba tũm. Kubẽ dja ga Metĩndjwýnh'ýr meo akẽx nhyr me arým tu amim imarkumrẽx. Nhyr Metĩndjwýnh arým me axwe maro aknon mekam ngryk kõt. Mekam ngryk kõt ne arým mekõt me umjuw. Ta kute amimexo meo mexja kõt me umjuw. Dja me tu amim imarkumrẽx nhyr Metĩndjwýnh arým me axwebẽ me utã. Ja kadjy dja ba me bajtemmã ajano.” Nãm ã Jeju imã ane. Nãm ã Paur Angripamã ane.

Ne kam ajte kum,

<sup>19</sup> —Kam, Bẽnjadjwýr raxbẽ Angripa, Jeju kute kãjkwa kurũm imã amijo amirĩtkam ne ije omũnhkam djãm ijamakkre kõt ne ije mar kõt? Kati. Arým ne ba tu amim markumrẽx ne katãt kabẽn man kõt ar amijo iba. <sup>20</sup> Kam ne ba krĩraxbẽ Tamagu kumrẽxkam memã 'ã ajarẽ. Ne kam Djeruxarẽmẽ pykabẽ Djudeja kunĩkõt memã 'ã ajarẽ. Ne kam apýnh me bajtem ba djãkam memã 'ã ajarẽ. Ne memã kum, “Dja gar amikam akaprĩren wãnh ajaxwemã anhiren Metĩndjwýnh'ýr amijo akẽx. Ne kabẽn man kõt ar amijo aba gẽ me ar apumũn arým amim, ‘Be, mrãmri ne ar kute Metĩndjwýnh'ýr amijo akẽxkumrẽx’, ane. Gẽ me ar apumũn ã amim ane”, ane.

<sup>21</sup> Amrẽbẽ ije memã ja jarẽnho ibakam ne me arým ijo tým, mebẽ idjaer ne me Metĩndjwýnh nhõ kikretikam ijo tým ne ipa 'amýn bit kute ibĩnmã. <sup>22-23</sup> Nhyr Metĩndjwýnh mã: mebẽ ipytã ba memã idjujarẽnho itẽm rã'ãn arým myt ja'ýr bõx. Nã bãm me kãtãmmẽ me rũnhmã 'ã idjujarẽnh itẽm rã'ã ne. Mõjdjẽmẽ Metĩndjwýnh kukwakam kabẽn jarẽnh djwýnh ar amrẽbẽ me bakukãmãremã kum, “Dja me banhõ Bẽnjadjwýrbẽ kumkatibẽ Kritu tokryn tyn akubyn tĩn ne. Akubyn tĩno me bamã wa. Ne kam kãj bẽ mebẽ idjaermã amijarẽ. Ne ajte me bajtemmã amijarẽ. Ne memã kum, ‘Ga, ityk ne akubyn itĩnja pumũ. Dja

ga me tu amim imarkumrêx ne arým ikõt atyk nhjukri akubyn atĩn', ane. Nãm ã memã anhÿro ba. Kabên ja ne kute memã pry kurwý djà pyræk. Kõt ne me katàt amijo ban tĩnkumrêx." Nãm ã Môj djê ar me bakukãmãremã ane. Me kabên jabit ne ba memã arênho iba.

Nãm ã Paur Angripamã ane. <sup>24</sup> Nãm kum ja jarênho dja nhym Pexu tu o kapêr tan kàj bê kum,

—Paur, nã gãm ajbã. Aje pi'òk nhidji jarênh krãptĩkam ne ga ajbã, ane.

<sup>25</sup> Nhym kum,

—Bênjadwýr Pexu, kati. Ibibãnh kêt. Mrãmri ne ba katàt ikabên jarênhkumrêx ne ibêno ibikênh kêt. <sup>26</sup> Bênjadwýr raxbê Angripa kute imarkumrêx. Kam ne ije amipudjur kêt ne tu aminêje kum ikabên jarênhkumrêx. Djãm me kute mýjjao bipdjur ne o ba? Kati. <sup>27</sup> Nãm me tu irãri o ba nhym me kunĩ kute omũnh ne mar. Kam Angripadwý arým prĩne kute mar. Ba ne ba ja ma, ane.

Nãm anen arým Angripa'ýr akêx ne kum,

—Bênjadwýr rax Angripa, djãm ga ne ga arým Metĩndjwýnh kukwakam kabên jarênh djwýnh'ã amim, "Mrãmri Metĩndjwýnh kõt me kabênkumrêx"? ane. Arým ba ama. Mrãmri ne ga ã amim ane. Nãm ã Paur kum ane.

<sup>28</sup> Nhym Angripa kum,

—Aje Kritu'ýr ijo akêx'ýr, ane.

<sup>29</sup> Nhym Paur kum,

—Ga ren 'ýr amijo akêx 'ýr nàr ga ren ikudjwa tu amim Kritu markumrêx ba ren kam ikĩnhkumrêx. Me kunĩ kute jakam imaro ýrdjwý ren ikudjwa tu amim markumrêx ba ren mekam ikĩnhkumrêx. Jao ne ba Metĩndjwýnhmã a'uw. Nhym ren me kute ikudjwa adjuwprekambit ne ba ren ikĩnh kêt.

<sup>30</sup> Nãm Paur ã Angripamã ane. Nhym kam bênjadwýr rax Angripamê bênjadwýr Pexumê Bernimê ar ja nhikô'ã me ýrjamê arým kàjmã dja. <sup>31</sup> Kàjmã djan kubê akêx ne mõn kàxã o aben maro djan abenmã kum,

—Ne ren axwe gwaj ren kubĩ nàr kubê ijê. Nhym be, kati. Axwe kêtumrêx, ane.

<sup>32</sup> Nhym kam Angripa Pexumã kum,

—Ren kute amã arênh kêt ne ren kute amã, "Ba gop bênjadwýr raxbê Xedjamã

aminêje ikabên jarê", anhÿr kêt, gwaj ren arým kum banhire nhym ren ta mekõt ar ba, ane.

## 27

*Me kute krĩraxbê Rômamã Pauro mõi.*

<sup>1</sup> Nhym kam bênjadwýr ar memã kum,

—Me on ngòkõt pykabê Itarij'ýr mebê ijêjao mõi, ane. Ne kam arým krãkamngõho ba djwýnh nhidjibê Jurmã Paur ar arê. Paurmê mebê ijê kwýmê ne meo ba djwýnhmã arê. Kum arê nhym arým kute pykabê Itarij'ýr meo mõi. Jurbê ne bênjadwýr raxbê Xedja nhõ krãkamngõnh krãptĩ: kubê 100 nhõ bênjadwýr 'õ. Ba ibê Ruka ne ba ajte mekõt tẽ.

<sup>2</sup> Ba me kam pykabê Itarij'ýr imõrmãnh kam krĩraxbê Amitukam me ja nhõ kàraxmã wadjàn arým inox ne. Pykabê Adjij'ãnh ne me kute kàraxo mõi. Me'õ nhidjibê Arxaku ne me ikõt tẽ. Pykabê Matenikam krĩraxbê Texarõnikakam ne abatãnh djà.

<sup>3</sup> Ba me kàraxkam mõi: nhym me ijã akati. Ba me kam krĩraxbê Xidõ'ã kàrax nhõ. Nhym Jur kum Paur kaprĩn kum,

—Ajrã. Anhõbikwa'ýr wabi gê ar ajo djuw mex, ane. Nhym ar'ýr wabin ar ikõ'ã nhÿ:n kam ajte akubyn kàraxmã wadjà. <sup>4</sup> Ba me kam inox ne. Ne apêxtibê Xipre tekre'ãnh mõi, kòk me ikutã àbêrkam. <sup>5</sup> Ne kam pykabê Xirxij'ãnh mõi:n kam amipãnh kumê. Ne pykabê Papirij'ãnh mõi:n kam amipãnh kumê. Ne kam arým pykabê Rixijkam krĩraxbê Mire'ýr bõx ne kam kàrax nhõ.

<sup>6</sup> Nhym kam krãkamngõnh kubê 100 nhõ bênjadwýr arým kàrax 'õdjwýmã kato. Nãm krĩraxbê Arexãkam me ja nhõ kàraxmã kato. Kà wãkam ne me kute pykabê Itarij'ýr mõi. Nhym kam me ijo tẽ ba me kà wãmã wadjà. <sup>7</sup> Ne kam inox ne mõi. Ne iprĩ'ã mõi: nhym arým me ijã akati kwý apêx. Ba me kam krĩraxbê Nidju tẽpo mõi. Nhym kòk djàbêr tÿ:x me ibê aptà ba me kam aparmã apêxtibê Kreta'ýr mõi. Mõi:n kam Kretakam krãnh krã'yrbê Xamona'ãnh mõi. <sup>8</sup> Ne kam iprĩ'ã mõi:n kam arým amipãnh Xamona mõi. Ne kam kàrax nhikwã djà nhidjibê Kà jarij djà mexte'ýr bõx ne 'ã kàrax nhõ. Krĩraxbê Raxêr kuri ne nõ.

<sup>9</sup> Nhyam kam me ijã akati krãptĩ apêx. Nhyam Paur amim,

—E kum, arým ne ba me amikrà nhyam arým na 'itýx 'ýr. Na 'itýx'ã mytyrwý bõx 'ýr. Be, arým me kute amijajbur'ã akati apêx. Me ibê idjaer kute Metĩndjwýnhmã amijajbur djã nhõ akatija apêxkam na 'itýx kumex. Arým na 'itýx kumexkam ne ba me imã imõr puma:, ngõ raxbê pyka kêt kam me imõrja puma:, ane. Ne kam memã kum,

<sup>10</sup> —Ikabên dja gar ama. Dja gwaj ngõ raxbê pyka kêt kam mõi nhyam na arým gwaj bajo ajkê. Ne arým kãkam me jênhmê kãraxo bikên mex ne. Ja ne ba gwaj bakukãm kuma. Nãm ã Paur memã ane. <sup>11</sup> Nhyam krãkamngõnh nhõ bẽnjadwýrja Paur kõt kabên djir kêt. Nãm kào akêx djwýnhmê õ kãrax djwýnh kõt kabên dji. <sup>12</sup> Ne kam me kute na 'itýx apêx jamãrbê kãrax nhikwã djã punure. Nhyam me bẽn 'ãtom ne abenmã kum,

—Gwaj on banox ne amũ krĩraxbê Penixij'ýr babõxmã. Ne kam kam na 'itýx apêx kam ama, ane. Be, apêxtibê Kreta tãm kam ne krĩraxbê Penixij. Penixijkam kã nhikwã djãkam dja aparmã kõt 'itýx wabê nãr kãjmã wabê nhyam bu'ã akãx kõkbê aptã nhyam kãrax nõr mex ne.

*Kõt tỳ:x kute tu kãrax rênho mõi.*

<sup>13</sup> Nãm me bẽn 'ãtom nhyam kõkdjwý arým aparmã kãjbê wabê. Nhyam me arým abenmã kum,

—Aje. Jakam arým 'ýr me banox kadjy mexkumrêx, ane. Ne kam arým djudjêdjêti'ã kên 'ãprejao wabin kãraxkam kudji. Ba me kam mõi. Apêxtibê Kreta 'ãnh mõi. <sup>14</sup> Nhyam kãjbê 'ãtũm nhyam kõt arým àbêr tỳx ne. Kõt djãbêr tỳx jamã ne me kum Juraku jarê. <sup>15</sup> Nhyam arým kõt djãbêr tỳ:x ne tu kãrax rênho mõi. Rênho mõi: ba me kam arým tu kum inhire nhyam kõt arek o mõi.

<sup>16-17</sup> Nhyam kam kã arým kõt djãbêr kõt apêxti nhidjibê Kraõdja tekre'ãnh mõi. Amrêbê ne ba me kãrax katê'ã kã ngrire nhõn o mõi. Ne kam arým jakam idjãpênh rax ne kã ngrireo wabin kãraxkam kudji. Nhyam kam me djudjêdjêtio ibũmkõt kãrax'ã kajngãro tẽ. Ngõ tỳ:x kute kãrax ka'êk kêt kadjy ne me 'ã kajngãr. Kõknhõkã raxkam

ne ba me mõi. Kõknhõkã raxkam ne me par kwý pumjuw nhyam ku'ê tũm. Nhyam me apýnh pĩõ krãbê o kapan ajte kraxbê o kapa. Ne pĩ'ã apýnh kubêkãti janhõ. Kõt kute o mõi tỳx kadjy ne me 'ã anhõ. Ba me mõi: nhyam kõt me ijo mõi tỳ:x ne. Nhyam kute arerek'õ'ã kãrax mênh karõ ne me arým par'ã wabin kubêkãtimê kukràdjã kunĩ bõn arým o ruwn kudjin kam nhý. Nhyam kõt arek kãraxo mõi. Nhyam arým kã kajgon prĩ'ã mõi. Arerek wã nhidjibê ne Xixi.

<sup>18</sup> Nhyam kõt djãbêr tỳ:x ne me ijo àbêr tỳ:x. Nhyam kãrax amijadjwýr tỳxo mõi: nhyam 'ã akati. Nhyam me kãrax kajkritmã arým ngõnhmã kãkam me jênh kwý rê. <sup>19</sup> Nhyam kam arým me inox'ã akatibê 3 apêx ba me arým ngõnhmã kãraxkam apýnh kukràdjã kwý rê. <sup>20</sup> Ne kam mõi: nhyam arngromê kanhêti amirĩt kêt'ã arým akati krãptĩ apêx. Nhyam kõt 'itý:x me ijo mõi tỳx rã'ã ne. Ba me te: amipytãr djã'õ jabej ar irĩt ne arým idjumar punure ne.

<sup>21</sup> Ne mõi arým inhõ kwý krên kêt 'ãtũm ne. Nhyam kam Paur kãkam me àpênh'ýr tẽn arým me ipõkri djan memã kum,

—Ë, ba ar amã arê gar ama. Nã gãm ren ar amũja'ã ikõt akabên dji gwaj ren apêxtibê Kreta'ãnh arek wajêt. Ne ren kam badjumar mex nhyam ren myjja'õ biknor kêt. <sup>22</sup> Jakam dja gar akubyn adjumar mex ne atýx. Dja te kãrax wadjã nhyam ngõ kute gwaj bajõnh bĩn prãm kêt kumrêx.

<sup>23</sup> Be, akamãtkam Metĩndjwýnh kadjy mrãnh djwýnh'õ iwýr bõx ne ikuri dja. Metĩndjwýnh ta ne mã ijo ba, ba kum idjãpênh ar iba. <sup>24</sup> Kadjy mrãnh djwýnhja ne imã, “Paur, on atĩn prãm kêt. Dja ga bẽnjadwýr raxbê Xedja kabem adjãm kumrêx. Nhyam aro'ã me mõi wã ne Metĩndjwýnh arým akõt me kunĩ dja. Akõt dja me tyk kêt kumrêx”, ane.

<sup>25</sup> Be, ã kute imã anhýrkam dja gar adjumar mex. Mrãmri dja amikabên kõt ngõbê gwaj bapytãrkumrêx. Metĩndjwýnh kute gwaj bapytãrja ne ba tu amim kamnhĩxkumrêx. <sup>26</sup> Nhyam kam mrãmri kõt 'itýx dja apêxti'õ'ã gwaj bamênhkumrêx. Kãraxmê ro'ã gwaj bamênhkumrêx, ane.

*Kãrax bika'êk'ã ujarênh.*



<sup>27</sup> Nhyam kam arým me inox'ã akatibê 14 apêx nhyam akamàtkam ngô raxbê pyka kêt nhidjibê Angrikukam kôk 'itýx ari: kàraxo ba. Nhyam akamàt kô ipôkri kàkam me àpênh abenmã kum,

—È, kute akàx'ýr kà arým mör pyrak, ane.

<sup>28</sup> Ne kam koror jabej ngô'ã kadjàt'ã tu jakre nhyam 'ã djudjêdjêbê 30 metu apêx. Nhyam me kam amak ngriren ajte 'ã kadjàt jakre. Nhyam arým kàjbê krãn 'ã 27 metu apêx.

<sup>29</sup> Nhyam kàrax kên'ã bika'êk karõ me arým ngônhamã djudjêdjêti mē. Djudjêdjêti'ã kên 'ãpreja mēn ajte ja mēn ajte ja mēn ajte ja mē. Nhyam kên arým akubyn kàrax pynê. Nhyam me'ã akatio wajêt ne arým axwe umar. <sup>30</sup> Nhyam kam kàraxkam me àpênh bit kute mebê amipdjur ne amijã maje kàrax kurũm katormã. Nãm me 'êx ne memã kum,

—Ba me kà ngrirekam djudjêdjêti'ã kên 'ãpreja'õ nhýr ne o ikaton kà krwýt'ãnh kumê gê akubyn kà krwýt pynê, ane. Ne kam djudjêdjêti'ã kà ngrireo ruwn bit ngônhamã mēnhmã. <sup>31</sup> Nhyam Paur arým me krākamngônhamē mebê 100 nhõ bēnjadjwýr'ýr tēn memã kum,

—Dja me wã mōn arým utar djà kêt ne me gadjwý apytar djà kêt, ane. <sup>32</sup> Nhyam me krākamngônham arým 'ýr mōn 'ã djudjêdjêti kunĩ jakà. Nhyam arým kà ngrire mebê ngônhamã nox ne akuno.

<sup>33</sup> Nhyam arým akati tē nhyam Paur arým memã arēn memã kum,

—Nã gãm ar kôk apêxkam amakbê amijabu nhyam arým ar ajã pi'ók kamrêk amãnhkrut apêx. <sup>34</sup> Ar atýx kadjy gop on ar anhõ kwý krē. Ngô kute ar apar prãm kêtumrêx.

<sup>35</sup> Nãm ã memã anen arým djwý'õ by. Ne me kunĩ nhipôkri Metĩndjwýnhmã amikĩnh jarēn kokij ne arým krēnmo krax ne. <sup>36</sup> Nhyam kam me kunĩ akubyn kĩnh ne adjwýnhdjwý õ kwý krēno kumex.

<sup>37</sup> Kàraxkam me ikunĩ ne me ikrãptĩ. Me kute me ijã akrebê 276. <sup>38</sup> Nhyam me õ kwý krēn arým ajne. Ne kam kàrax kajkritmã ngônhamã jēnh rē. Atemã bãygogo 'yo jēnh rē.

<sup>39</sup> Nhyam arým akati. Nhyam me arým pyka pumũ. Nhyam me'õ kute amrêbê pyka

pumũnh kêtumrêx. Nhyam wãnh pyka kute aktã ngô nhijêkam ngô binhikrēnhja. Nhyam me arým amybym kàrax kadjy omũ. Ne kam abenmã kum,

—E kum, gwaj 'ýr kam mãn kàraxo wadjà gê umar mex, ane.

<sup>40</sup> Ne kam arým kên kunĩ'ã djudjêdjêti 'ãpre bôn tu kum ire. Ne kà katē pynēnh djà'ã djudjêdjê 'ãpre bô. Ne kam kà krwýt'ãnh par'ã kubêkatio wabin 'ã kunhõ, kôk kute kàraxo mör týx kadjy. Ne arým akàx'ýr kàrax krão akêx ne. <sup>41</sup> Nhyam kam kàrax arým ngô kute aben mok djà'ýr bôx. Kam ne kororre. Ne mōn 'ã nōn arým 'ã nōr týx mex ne. Nhyam ngô djàkà 'itý:x arým kàrax katē titik ne ka'êko mō.

<sup>42</sup> Nhyam krākamngônham ar abenmã kum,

—Mebê ijê tũm nox ne akàxmã rēr ne atýxã àbir ne mã prõt kētri gwaj me kupa, ane. <sup>43</sup> Nhyam krākamngônham nhõ bēnjadjwýr Paur'ã maje akubyn me unēn memã kum,

—Kwãrik wãnh. Gê me rērja kumrêx tu nox ne rēn akàx'ã wabi. <sup>44</sup> Gê me rēr kêt pĩponh jamý nar ngô kute kà ka'êk jamýn 'ã mekõt rē, ane. Ba me kam ikunĩ arým inox ne. Ne kam ikunĩ arým akàx'ã wabi.

## 28

### *Apêxtibê Matãkam ar ba.*

<sup>1</sup> Ba me arým wabi nhyam me bajtem apêxtikam ar baja me imã,

—Apêxti ja nhidjibê ne Matã, ane. Ba me kam kuma. <sup>2</sup> Nhyam kam namē krykam apêxtikam me bajtemja kum me ikaprĩkumrêx. Ne kam arým me imã kuton me imã kabēn mextire.

<sup>3</sup> Nhyam Paur arým pĩ ngrã kwý karwãn kuwykam adjuw. Nhyam kangã djàkrê kuwy pymaje pĩ ngrã kurũm katon arým Paur nhikra nhãn 'ã wajêt. <sup>4</sup> Nhyam me arým ikra'ã kangã jêtkôt omũn abenmã kum,

—Be, tãmwãbê ne me par djwýnh'õ. Jakam dja ty. Ngô ne kute bĩn kêt nhyam be, kangã dja kubĩ. Axwe pãnh dja ty, ane. <sup>5</sup> Nhyam kangã ikra'ã wajêt nhyam tu kum ikra wabê nhyam arým kuwykam tým. Nhyam kam tokry kêt ne. <sup>6</sup> Nhyam me te Paur nhigot jabej. Nãr, me aêrbê tyk ne tým karõ te 'ã ajkam ama. Te kam ama:n omũno kumex. Omũnh 'ãtũm nhyam ajmã kute

kêtkumrêx. Nhyam kam me atemã kabên djin abenmã kum,

—Be, kubê ne metĩndjwýnh'õ, ane.

<sup>7</sup> Apêxti tãmkam bēnjadjwýr nhidjibê Pubriju. Õ pyka kuri ne ba me dja. Pubriju me imã,

—Inhõ kikrekam dja gar nhỹ, ane. Bar kam 'yr mōn kam nhỹ nhyam arým me ijo djuw mex mexkumrêx. Ba me kam kam inhỹr'ã akati amãnhkrut ne ikjêkê apêx.

<sup>8</sup> Nhyam kam Pubriju bãm kute ir djwýnhja kà kangron iku:w. Nhyam Paur arým 'yr wadjàn Metĩndjwýnhmã o a'uw ne krã'ã ikra djin arým o mex ne. <sup>9</sup> Nãm Paur ã o ane nhyam kam apêxtikam me punu kunĩ 'yr bõx nhyam arým me o mex ne. <sup>10</sup> Nhyam kam me me imã mýjja kumex ngã. Ba me kam arým inoxmã. Nhyam me arým apýnh me imã mýjja kĩnh djari kàraxkam kumex ne.

*Krĩraxbê Rõma'yr mōrn bõx.*

<sup>11</sup> Me inox kêtri ne apêxtikam me ijã mytyrwýbê amãnhkrut ne ikjêkê apêx. Ba me arým inox ne. Krĩraxbê Arexãkam me õ kàraxkam inox ne. Nãm me amrêbê amex jamãrbê apêxti'ãnh kàraxja nhõ. Kàrax krwýt'ã ne me karõ amãnhkrut wajêt. Ja nhidjibê ne Kaxu. Nhyam ja nhidjibê Põr.

<sup>12</sup> Ba me inox ne mō:n kam krĩraxbê Xiraku'ãnh kàrax nhõ. Nhyam me ijã akati amãnhkrut ne ikjêkê apêx.

<sup>13</sup> Ne kam ajte inox ne pyka 'ãnh mō:n kam krĩraxbê Reguju'yr bõx. Ne kam me aã'ã mō: nhyam me ijã akati. Nhyam kam kãjmã kôk wabê ba me ajte akatikam krĩraxbê Poteroj'yr bõx ne 'ãnh kà nhõ.

<sup>14</sup> Bar kam wabin Jeju kukwakam me kute abeno kamy kwý jabej ne memã ikato. Nhyam me ar imã,

—Dja gar inhũrkwãkam nhỹ, ane. Bar kam nhỹ. Nhyam ar ijã akatibê 7 apêx. Bar kam itekôt krĩraxbê Rõma'yr mō.

<sup>15</sup> Nhyam kam me amũ krĩraxbê Rõmakam Jeju kukwakam me kute abeno kamymã ar ijarê. Nhyam me arým ar ikutã mō, kute ar ikajpar kadjy. Ne kam Apiju'ãnh djwý jamýnh djãmê me õt djãbê 3mê kam bõx. Bar kam me'yr bõx. Nhyam kam Paur me omũn arým Metĩndjwýnhmã amikĩnh jarêh akubyn týt ne.

<sup>16</sup> Ba me kam mō:n arým krĩraxbê Rõma'yr bõx. Nhyam kam krãkamngõnh krãpti: kubê 100 nhõ bēnjadjwýrja mebê ijê tũmo bõx. Me nêje ku'ê djwýnh nhõ bēnjadjwýrmã mebê ijê tũm kunõ bõx. Nhyam arým mebê ijê djãkam mebê ijê. Nhyam be, me Paurmã kum,

—Ga dja ga anhõ kikrekam nhỹ. Krãkamngõnh pydjibit dja anêje nhỹ, ane. Nhyam kam me'õ nhũrkwã purokam nhỹ.

*Kute Rõmakam mebê idjaermã amijarêh.*

<sup>17</sup> Nhyam kam arým Paur'ã akatin akatin akati nhyam arým amiwýr mebê idjaer rũnh 'uw nhyam me 'yr bõx ne arým 'ã akuprõ. Nhyam kam memã kum,

—Akmere ar, djãm me babê idjaerkam ne ijaxwe'õ? Nãr djã ne ba me bakukãmãkjê kukràdjã'õo ajkê? Arkati. Ijaxwe kêt nhyam Djeruxarêkam me arým ibê ijên krĩraxbê Rõmakam me jamã ikanga.

<sup>18</sup> Nhyam me prĩne ijaxwe jabej ikukij ne ima. Nhyam bēnjadjwýr ar ijã abenmã kum, “Ren bĩn kadjy axwekumrêx gwaj ren arým kubĩ. Nhyam be, kati. Axwe kêtkumrêx”, ane. Ne bit kute imã ikra karo ba itēmã.

<sup>19-20</sup> Nhyam mebê idjaer mã kabêno bēnjadjwýr ar apa. Ba kam aminêje arkum, “Ba gop bēnjadjwýr raxbê Xedjamã aminêje ikabên jarê”, ane. Nhyam ar arým amrê 'yr ijano ba tēn bõx. Dja ba aminêje Xedjamã ikabên jarê. Djãm ije kum inhõ me wýnhbê idjaer jaxwe'õ jarēnhmã? Arkati. Imã inhõ me wýnh jabêkam ne ba amiwýr ar ajuw. Ije ar apumũnh ne ar amã ikabēnmã ne ba amiwýr ar ajuw. Ë, ba ar amã arê gar ama. Dja Metĩndjwýnh akubyn me tyko tĩn. Mebê idjaer ne me tu amiwýr me akubyn tĩn kamnhĩxkumrêx. Badjwý ne ba tu amiwýr kamnhĩxkumrêx. Ije amiwýr kamnhĩxkam ne me arým kàxirãx jao idjuwpre. Nãm ã Paur memã ane.

<sup>21</sup> Nhyam kam me kum,

—Pykabê Djudêjakam ne me nĩnh ar imã ajã pi'õk no'õk kêt. Nhyam mebê idjaer'õ nĩnh bõx ne kute ajã mýjja'õ jarêh kêt.

<sup>22</sup> Be, pyka kunĩkôt me kute me kukràdjãja japryõ ba. Jabit ne bar kuma. Nhyam be, ar ba ne bar ije 'ã adjujarêh mar prãm, ane.

<sup>23</sup> Ne kam kute mar kadjy kum akati'õ jarê. Nhyam kam me kute kum akati jarêh

bõx nhym me krãptĩ Paur nhũrkwãmã wadjã. Nhym kam kryrãm memã ujarẽnhmo krax ne akamãtkam o ino re. Metĩndjwỳnh kute amim me utàr ne ar meo ba'ã memã ajarẽ. Nãm memã Mõjdjê kukràdjã jarẽnh Metĩndjwỳnh kukwakam kabẽnh jarẽnh djwỳnh kunĩ kabẽnh jarẽ. Ne me kabẽnh kõt memã kum,

—Ga, pi'òk kõt Jejubê me banhõ Bẽnjadjwỳrbê kumkatija pumũ. Kubê Krituja pumũ. Dja gar tu amim Jeju markumrẽx. Nãm ã memã anhỹro nhỹ.

<sup>24</sup> Nhym me kwỳ tu amim kabẽnh markumrẽx. Nhym me kwỳ amim kabẽnh mar kêt. <sup>25</sup> Ne arỳm kabẽno aben japanho kumex ne arỳm ajmã. Nhym me bimành kêtri Paur memã kum,

—Idjaij ne amrêbê: Metĩndjwỳnh Karõ kukwakam me akwỳ'ã kabẽnh jarẽ. Mrãmri ne arẽnhkumrẽx. Nãm me bakukãmãremã kum,

<sup>26</sup> “Me'ỳr tẽn memã ikabẽnh jarẽnh memã kum,

‘Dja ga me maro aku'ê kajgon mar kêt ne, kukràdjã'ã mỳjja kute amijakreja mar kêt ne. Ne omũnh kajgon amim omũnhkumrẽx kêt.’ Mỳkam?

<sup>27</sup> Bir, arỳm ne ga me adjumar djãkam ajamakkre kêt ne ajamakkre jaduj ne tu ano ngõr. Nã gãm me arĩk ã ibê amijo abao ane. Mỳkam?

Bir, aje anoo omũnh kêtãmã ne aje ajamako mar kêtãmã ne aje ikukràdjã'ã mỳjja kute amijakreja adjumar djãkam mar kêtãmã ne aje iwỳr amijo akẽx ba ije me ajo mex kêtãmã. Nã gãm me ibê ã ajamakkre kêtãmẽ ano kêtõ ane.”

Nãm ã me bakukãmãre Idjaij ane. Nhym me bakukãmãre aben djõ'ã arẽnhõ mõ:. Arẽnhõ mõr tãmtã arỳm me awỳr o bõx. Tũ:mrãm ga me akamingrãnyre ã ikabẽnh mar kajgoo ane.

<sup>28</sup> Me aje ikabẽnh mar kajgokam dja Metĩndjwỳnh arỳm me bajtemmã ijano. Dja ba memã Metĩndjwỳnh kute me utàr'ã ajarẽ nhym me arỳm tu amim markumrẽx nhym kam arỳm me axwebê me utà. Nãm ã memã ane.

<sup>29</sup> Paur mebê idjaermã arẽnh pa nhym me arỳm mã kubê mõ. Ne aktã kabẽno aben japanho mõ.

<sup>30</sup> Nhym kam Paur ta aminhũrkwãmã arek krĩ nhym 'ã amex ne ajte 'ã amex. Paur ta õ pi'òk kaprĩõ õ kikre djwỳnhmã ũrkwãõ pãnh. Nãm ũrkwãmã nhỹ nhym me mã 'ỳr ban bõx nhym mã kam me kunĩ djuw mex. <sup>31</sup> Ne kàj bê Metĩndjwỳnh kute amim me utàr ne ar meo baja'ã memã ujarẽnhõ krĩ. Ne mã memã Bẽnjadjwỳr djwỳnhbê Jeju Kritu'ã kukràdjã jarẽnhõ krĩ. Nãm kum me uma kêt ne ã memã arẽnhõ ane. Nhym me'õ kubê àptàr kêtumrẽx. Tãm ne ja.

## Paur kute Rômakam me jamã pi'ôk no'ôk ne ja.

Paur ne krĩraxbê Rômakam me jamã pi'ôk no'ôk ne. Nãm krĩraxbê Rôma'ÿr tẽm kutã memã pi'ôk no'ôk ne. Nãm 'ÿr tẽm kêt rã'ã, kute Rôma pumũnh kêt rã'ã ne kam 'ÿr tẽmmã krã ne kam amikukãm memã pi'ôk no'ôk jano. Me kute Jeju mar kute omũnh ne kam ôkre kadjwũnhbê kute amim,

—Nà mrãmri ne Metĩndjwũnh kute Paur janor. Nãm prĩne kute Metĩndjwũnh kukrãdjã marja pumũ, anhÿr kadjy. Kam ne Paur memã Metĩndjwũnh kukrãdjã'ã ajarẽn memã kum,

—Me kunĩ ne me axwe, ane. Mebê idjaer nãr, pyka kunĩkôt me kunĩ axwekam mexo kute Metĩndjwũnh tẽp kêtukumrẽx. Nhym be Metĩndjwũnh ukaprĩkôt arÿm me bamã me bapytãr djwũnh jano. Me bamã kurê rã'ãkam, bamã bajaxwe kĩnh rã'ãkam me bawÿr me utãr djwũnh jano. Nhym kam me kunĩ, mebê idjaer, nãr kon pyka kunĩkôt me kunĩ dja me tu amim Jeju markumrẽx nhym Metĩndjwũnh arÿm meo kra ne meo tÿx, axwebê meo tÿx nhym me arÿm katãt ar amijo ba. Nhym Metĩndjwũnh dja kum me abê rã'ã rã'ã rã'ã. Ne kam ajte amũ akati 'õ kam dja ajte mebê idjaero tÿx nhym me arÿm 'ÿr amijo akẽx. Nãm ã Paur memã ane. Tãm ne ja.

<sup>1</sup> Ba ibê Paur. Ibê Jeju Kritu nhõ àpênh. Ta ne amiwÿr ijuw ne arÿm mebê amim ipytãn ar ijo ba. Ijo ban arÿm ijano ba arÿm Kritu'ã ujarẽnh ny jarẽnhõ iba. <sup>2</sup> Amrêbê: ne kukwakam memã kabẽn jarẽnh djwũnh ar me bakukãmãremã ujarẽnh ny jarẽn mã memã kum,

“Dja Metĩndjwũnh ã memã ujarẽnh ny jarẽ.” Nãm me ã Metĩndjwũnh nhõ pi'ôkkam memã ane. <sup>3</sup> Kra'ã ne ujarẽnh nyja. Krabê Jeju Kritu'ã ne ujarẽnh nyja. Me banhõ Bẽnjadjwÿrbê kumkati'ã ne ujarẽnh nyja. Nãm Kra amijo ã ne nã kurũm kato. Nã kurũm katon arÿm kôt kubê me bakukãmãre Dawi tãmdjwÿ. <sup>4</sup> Ne kam tyn

akubyn tĩn nhym kam Metĩndjwũnh Karõ arÿm memã tÿx jadjã nhym me arÿm tÿx. Tÿx ne arÿm memã Jeju'ã ujarẽnh ar ba. Ne memã kum,

—Mrãmri, Jejubê Metĩndjwũnh Krakumrẽx.

Ga, tyk ne akubyn tĩnja pumũ, anhÿro ba. <sup>5</sup> Ta ne tu kum ikaprĩn ijano ba arÿm memã 'ã idjujarẽnh ar iba. Gêdja apÿnh me ba djã kunĩkôt me idjujarẽnh man arÿm tu amim Jeju markumrẽx ne arÿm katãt kabẽn man kôt ar amijo ba. Ja kadjy ne ijano ba Jeju'ã idjujarẽnh ar iba. <sup>6</sup> Ga, ar gadjwÿ Jeju Kritu kute amiwÿr ar ajwÿr ne ar ajo baja pumũ.

<sup>7</sup> Krĩraxbê Rômakam Metĩndjwũnh kum ar ajabê. Kute ar ajo aminhõ kadjy arÿm amiwÿr ar ajuw ne ar ajo ba. Ar akunĩmã ne ba pi'ôk no'ôkjakam ikabẽn jarẽ.

Gê Metĩndjwũnh tu kum ar akaprĩ. Kubê ne me Babãm. Ne kam Bẽnjadjwÿr djwũnhbê ne Jeju Kritu. Gê ar tu kum ar akaprĩn\* ar ajo ba gar adjumar mex rã'ã ne.

*Paur kute Rômakam me omũnh prãm'ã amijarẽnh ne ja.*

<sup>8</sup> Ba mã ijo ba djwũnh, Metĩndjwũnh kumrẽxmã ar ajarẽn mã kum ar akunĩkam amikĩnh jarẽ. Apÿnh me ba djã kunĩkôt ne me ar ajã abenmã kum,

—Onĩj, Krĩraxbê Rômakam me arÿm tu amim Jeju markumrẽx, anhÿro ba. Ba kam ar akam ikĩnhkumrẽx.

<sup>9-10</sup> Ne Metĩndjwũnhmã ar ajarẽnh rã'ã ne. Kum idjã'wÿr kunĩkôt ne ba mã kum ar ajarẽ. Ba ar awÿr itẽm kadjy mã kum amijo a'uw ne kum,

—Djũnwã, ba jakam krĩraxbê Rômakam ar'ÿr tẽn ar'ÿr bõx, idjumar mex ne ar'ÿr bõx. Ga mrãmri aje ar'ÿr ibõx'ã amim karõ jabej ba jakam ar'ÿr ibõxkumrẽx. Nã bãm ã kum amijo idjã'wÿro ane. Mrãmri ne ba ar awÿr ikrã ne. Djã nã bãm ar amã ijẽx? Metĩndjwũnh ta ne kute ar amã ijẽx kêt kôt kute imar. Djãm kum idjãpênh kêt got? Mrãmri Kra'ã ujarẽnh ny ne ba kãj bê memã arẽnhõ ibakumrẽx. Kam ne ba mrãmri ar amã arẽnhkumrẽx.

<sup>11</sup> Mÿkam ne ba ã kum idjã'wÿro ane? Bir, ije ar apumũnh prã:mkam. Dja ba ar akam bõx ne Metĩndjwũnh kadjy arÿm ar

\* **1:7** Djãm gwaj ba ne gwaj bajaxwe kêt nhym pãnh kum gwaj bakaprĩ Kati. Gwaj ba ne gwaj te bajaxwe kêtãm. Nhym be, ta ne tu kum gwaj bakaprĩ.

amã adjapênh djà'ô'ã karô. Metĩndjwýnh Karô kukwakam ar amã 'ã karô gar arým maro aban arým Jejukôt ar amijo aba. Kôt ar amijo aban arým 'ã angrà tỳx ne 'ã adjukanga kêt kumrêx. <sup>12</sup> Gwaj kam baje tu amim Jeju markumrêx'ã aben pumũn arým aben man kam tu amim Jeju mar tỳ:xkumrêx ne bakĩnhkumrêx.

<sup>13</sup> Bir, ar awýr itẽmmã ne ba mã amim 'ã karô krãptĩ nhym apýnh mýjja mã ibê aptà. Ar aje imar kêt karô ne ba ar amã ja jarê. Imã ar awýr ibôx prãm. Ga, me kute bàygogo djêo baja pumũ. Arým me kute ê parkam kĩnhkumrêx. Badjwý dja ba ar akam bôx ne Jeju'ýr me kwýo akêx nhym me arým tu amim markumrêx. Tu amim markumrêx ba kam arým ikĩnhkumrêx. Ije me akam Jeju'ýr meo akêx prãm kute mrãmri ne ba ije pyka 'ôkamdjwý arým 'ýr meo akêxja pyræk. Kute arým ije amũ me bajtem 'ôdjwýkam 'ýr meo akêx pyræk. Me ibê idjaer ne ba me mebê idjaer kêt me bajtemo iba. Ba ne ba ije Metĩndjwýnh'ýr me bajtemo akêx prãm kumrêx.

<sup>14</sup> Jeju imã me kunĩ'ã karôkôt ne ba ije me kunĩmã 'ã ujarênh ny jarênh prãm. Me krôr tũmbê kregujamẽ me krôr nyjamã ije arênh prãm. Ne me krã mexmẽ me krã mex kêt mã ije arênh prãm. Ije Jeju'ýr meo akêx kadjy ne ba ije memã arênh prãm. <sup>15</sup> Kam krĩraxbê Rômakam me gadjwýmã ije Kritu'ã ujarênh ny jarênh prãm:kam ne ba dja.

<sup>16</sup> Bir, djãm ije Kritu'ã ujarênh ny jarênhbê ipijàm? Kati. Ba arênhkumrêx nhym me arým kwý ì pýnhkôt tu amim markumrêx nhym kam Metĩndjwýnh arým me utà. Tỳxkôt me utà. Mebê idjaer kumrêx ne me utà. Ne kam me bajtembê kregujadjwý me utà. Kam ne ba ije arênhbê ipijàm kêt kumrêx. <sup>17</sup> Ujarênh nykam ne Metĩndjwýnh kute memã axwe kêt jarênhjao amirĩt gwaj arým kam kuma. Dja me tu amim markumrêx nhym arým memã axwe kêt jarê nhym me arým kum mex. Dja me tu amim markumrêx ne amim marbê ar ba rã'ã: ne. Me bakukãmãre kabên kôt ne ba ar amã arê. Amrêbê: me bakukãmãre memã kum,

“Metĩndjwýnh kute memã axwe kêt jarênh nhym me arým kum mexja dja me tu

amikajmã'ã markumrêx ne arým tĩn ne ar ba”, ane.

Amrêbê: ne me bakukãmãre memã ja jarê nhym me arým 'ã pi'òk no'òk ne. Kam mrãmri dja me tu amim Kritu markumrêx nhym Metĩndjwýnh arým memã axwe kêt jarênhkumrêx nhym me arým kum mexkumrêx ne. Nãm ã meo ane ba kam krĩraxbê Rômakam ar aje amim Jeju marjamã arê.

*Paur kute memã Metĩndjwýnh mekam ngryk jarênh ne ja.*

<sup>18</sup> Nhym be, atemã mýjja ne Metĩndjwýnh kute me axwemã o amirĩt. Amingryk ne memã o amirĩt. Me kute Metĩndjwýnh mar prãm kêt ne axweja kunĩkam ne ngryk ne. Me axwekam kute amim,

—Kati. Ije kabên katátwã mar prãm kêt, anhýro bajamã ne mekam ngryko amirĩt ne. <sup>19-20</sup> Godja me kwý amim,

—Mýkam ne Metĩndjwýnh ikam ngryk ne? Djãm arým imã amijo amirĩt ba kuma? Kati. Ta kute imã amijo amirĩt kêt kam ne tu ikam ngryk ne, ane. Djãm mrãmri ne me kwý kabênja? Kati. Nãm me 'êx. Arým ne me Metĩndjwýnh man mar kajgo. Me te kute noo omũnh kêt nhym Metĩndjwýnh arým prĩne memã amijã mýjja kwýo amirĩt ne nhym me arým kuma. Tỳ:xi ne tỳx rã'ã: rã'ã ne. Kubê me kunĩmẽ mýjja kunĩ tĩn djwýnhkumrêx. Ja ne o amirĩt nhym me arým kuma. Adjakamã ne mýjja kunĩ: nhipêx nhym me arým omũ. Jakamdjwý mýjja rã'ã nhym me arým omũ. Mýjja rũnh, mýjja puma, mýjja tĩn nhym me arým prĩne omũn arým apôkmã amim,

—Be, Metĩndjwýnh tỳ:xi ne tỳx rã'ã: rã'ã ne. Kubê ne mýjja kunĩ, me kunĩ tĩn djwýnhkumrêx. Nãm me ã amim anen arým Metĩndjwýnh man kam mar kajgo.

<sup>21</sup> Djãm me kute markam kum,

—Metĩndjwýnh ara:x ne apuma:kumrêx. Me imã akĩ:nhkumrêx? ane. Arkati. Nãm me te Metĩndjwýnh man kum rax jarênh kêt ne ate kubê krã. Ate kubê krãkam ne me arým arĩk amim mýjja'ã karô punuo ba. Bẽn katikumrêxkam ne me arým no kêt ne kam arým umar djakam kute akamãt kô tyk pyræk. <sup>22</sup> Me ta ne me amijo krã mex ne amikajmã ar ba. Ne kam mrãmri arým

no kêtukumrêx. <sup>23</sup> Ne kam arÿm Metîndjwÿnh raxo kubê kumkatija mar kangan kum amijarênh kanga, Metîndjwÿnh tîno kubê kumkatija kanga. Ne ate kam pânĥ apÿnh mebêngôkre,† àk, mry, mry ngângão mrânĥ, apÿnh mÿjja tîn 'ikrân maro ba. Maro ban arÿm karô nhipêx ne o Metîndjwÿnh ne kum amijarênh ba.

<sup>24</sup> Nĥm kam Metîndjwÿnh arÿm wânĥ memã ire. Me kum mÿjja punu prãmja ta kute wânĥ ar o ba kadjy wânĥ memã ire. Me ta kute wânĥ ari prô, mjên kupa'ã kurê ba kadjy. Me ta kute aben nhïo àpnu kadjy. Ja kadjy ne wânĥ memã ire. <sup>25</sup> Mrãmri Metîndjwÿnh katât amikabên jarênhkumrêx nĥm me arÿm aminhirôbê kabên rê. Aminhirôbê kabên rên arÿm pânĥ me 'êxnhï kabên'ÿr amijo akêx ne kôt ar amijo ba. Me ren mÿjja kunï nhipêx djwÿnh maro ban ren kum rax jarênh ba ren kum àpênĥ ar ba rã'ã ne. Nĥm be, kati. Nãm me kangan arÿm mÿjja nhipêxmãbit rax jarênh ba kum àpênĥ ar ba. Nĥm be, mrãmri ne mÿjja kunï nhipêx djwÿnh ra:xi. Me kute amim marja kute kum rax jarênh rã'ã: rã'ã ne. Mrãmri ne ba ar amã arênhkumrêx.

<sup>26</sup> Nĥm be, me axwe ne me Metîndjwÿnh kanga. Nĥm kam Metîndjwÿnh arÿm wânĥ memã ire. Me kum mÿjja punu prãm ta kute wânĥ ar o ba kadjy ne wânĥ memã ire. Nĥm me arÿm pijàm kêt ne axwe amijo ban kam abenbê me kupênĥ ba prã:m. Me nire axwe amijo ban me my kangan arÿm amikupa'ã me nire kupênĥ ba. <sup>27</sup> Nĥm me mydjwÿ axwe amijo ban me ni kangan aktã kurê prã:mkam pijàm kêt kam amikupa'ã me my kupênĥ ba. Kam Metîndjwÿnh arÿm memã axwe pânĥ jarênh katât. Me ta ne me amijo bikênh mex ne.

<sup>28</sup> Metîndjwÿnh ne kute ô mÿjjakôt arÿm memã amijo amirît nĥm me arÿm kuma. Ne kute mar rã'amã ne ate kam ajte amim,

—Kati. Ije mar prãm kêtukumrêx, anhÿro ba. Mã me kute ã amim anhÿro bakam ne Metîndjwÿnh arÿm wânĥ memã ire. Nĥm kam me arÿm mÿjja punubit man arÿm axwe amijo ba.

<sup>29</sup> Ne kam apÿnh axwe kunïo ba tÿ:x ne.

† 1:23 Apÿnh me ô pyka djari kunikôt ne me kunï bêngôkre.

Ne ajte ari prô, mjên kupa'ã kurê ba prã:mikumrêx ne.

Ne ajte meo bikênh kume:x.

Ne ajte kute amim mÿjja rûnĥo atom prã:m.

Ne ajte amim meo bikênh'ã karô prã:m.

Ne ajte me ô mÿjja'ã ngryk prã:m.

Me axwe amijo bakam ne me ajte aben par prã:m.

Ne ajte kute kabêno aben japanĥ prã:m.

Ne ajte memã 'êx ne me noo biknor prã:m.

Ne ajte kum me kurê:.

Ne ajte kute me kãxã me arênh prã:m ne.

<sup>30</sup> Me axwe amijo bakam ne me ajte memã me kurê'uk prã:m ne.

Ne ajte kum Metîndjwÿnh kurê:o ba.

Ne ajte tu memã àkjêr prã:m ne.

Ne amijo àmra prã:m ne.

Ne ajte amibên prã:m ne.

Ne ajte apÿnh axwe kumex'ã amim karôo ba prã:m ne.

Nĥm me bãmmê me nã ar te ar me akre: nĥm me ajte amakkre kêt prã:m ne.

<sup>31</sup> Me axwe kute amijo bakam ne me ajte no kêt ne.

Ne ajte 'êx ne we memã kabên pydjîn arênh nĥm me me mar pydji. Mar pydji nĥm me atekam ajte,

—Kati. Dja ba ipêx kêt ne, anen ajte kabên 'ôdjwÿo ikjên kabên pydji mar kêtukumrêx ne.

Ne ajte kum me abê kêtukumrêx ne.

Ne ajte ukaprï kêtukumrêx.

<sup>32</sup> Me kute ã amijo anhÿro bajamã ne Metîndjwÿnh arÿm memã axwe pânĥ jarê. Me axwejakam me biknormã. Tãm ne arÿm memã arê nĥm me arÿm prïne kuma. Nãm me te kuman axwe amijo ba rã'ã ne. Djãm me axwe amijo babit? Kati. Nãm me ajte apÿnh axwe ja'ã amũ memã kum,

—Ã amijo ane. Kam ne me kum me akînhkumrêx, anhÿro ba. Nãm me ã axweo ane ba kam arÿm wãm Rômakam me amã arê. Tãm ne ja.

## 2

*Metîndjwÿnh kute memã axwe pânĥ jarênh.*

*Mat 13.41; Ruk 13.3; Idja 9.27*

<sup>1</sup> Me akwỳ ne ga me amũ memãbit axwe jarêno aba. Djãm me gadjwỳ ajaxwe kêt got ga me amũ me wã'ã amim,

—Me axwekumrêx. Dja Metĩndjwỳnh me axwe pãnh me kanga, ane? Me aje me'ã amim, “Dja me axwe pãnh me kanga”, anhỹr kôt dja Metĩndjwỳnh me gadjwỳ arỳm me akanga. Mỳkam? Bir, me gadjwỳ me ajaxwekam. Me ajaxwe kute mrãmri ne amũ me wã axwe pyræk. Me axwe kôt me ajaxwekam dja me gadjwỳ pãnh me akanga. Djãm me aje Metĩndjwỳnhmã kum,

—Ijaxwe kêt. Ga ren ikanga kêt, anhỹrmã? Kati. Me gadjwỳ me axwe kôt ajaxwekam ne ga me aje te kum anhỹrmã.

<sup>2</sup> Nhym be, me kute ã axweo bao anhỹrja'ã ne Metĩndjwỳnh katà:t memã kum,

—Pãnh dja me biknor tokry djækam akuno, ane. Tãm ne gwaj baje markumrêx.

<sup>3</sup> Me abê pykakam me ĩ kajgo. Akajgokam aje amũ me wãbit'ã amim, “Dja Metĩndjwỳnh pãnh kanga”, anhỹro aba. Ne kam ajte mekôt ã ajaxweo ane. Mekôt ã ajaxweo anhỹrkam djãm apydji Metĩndjwỳnh kute akanga kêtã? Kati. Gadjwỳ. Dja katàt amã ajaxwe jarê ne kam arỳm pãnh akangakumrêx.

<sup>4</sup> Nàr, ga me te ã ajaxweo ane nhym Metĩndjwỳnh ukaprĩ ra:x ne ngryk tô:n kute amijã ngryk nê 'ätũ:m. Djã ne ga me ukaprĩ'ã amim, “Kê, djãm mỳjja mex”? ane? Kati. Kwãrĩk wãnh ã amim anhỹr kêt. Metĩndjwỳnh kute me ajaxwebê amiwỳr ajo akêxmã ne kum me akaprĩ:. Me aje 'ỳr amijo akêxmã kum me akaprĩ. Djãm me aje amijã ja mar kêt?

<sup>5</sup> Ga me atekam ajte kubê ajamakkre kêt ne 'ỳr amijo akêx prãm kêt. Be ga, me mã kute amim mỳjja atomja pumũ. Me mã amim adjuw nhym arỳm mã kãjmã ajkamên arỳm kum ra:xja pumũ. Ga me aje me uræk ne mã ajaxwe nhym mã me akam ngryk ne mã kãjmã me akam ngryk ajkamê. Nhym kam dja õ akati arỳm me awỳr bôx. Kute katàt memã axwe pãnh jarênh djã nhõ akati me awỳr bôx nhym arỳm me akam ngry:k ne. Me ajamakkre kêt kam me akam ngry:k ne.

<sup>6</sup> Dja Metĩndjwỳnh katàt memã o pãnh. Dja katàt apỳnh me kute mỳjja o ba kôt memã o pãnh. Me ĩ pỳnhkôt katàt memã o pãnh. <sup>7</sup> Me kute arek katàt amijo bajamã dja katàt memã o pãnh. Metĩndjwỳnh kute ta amimexo meo mex kadjy, ne kute memã, “Amexkumrêx”, anhỹr kadjy, ne kute memã ĩ ny, ĩ punu prãm kêtja nhõr kadjy ne me arek katàt amijo ba. Nhym kam Metĩndjwỳnh katàt memã o pãnh nhym me arỳm Metĩndjwỳnh kôt tĩn ne ar ba rã'ã: rã'ã ne.

<sup>8</sup> Nhym be, me kute amidjwỳnhbit mar ne kute kabên katàt kangan me axwe kôt axwe. Dja katàt me jadjwỳmã o pãnh ne arỳm mekam ngry:k ne. Nhym kam arỳm mỳjja puma: mekam apôx. <sup>9</sup> Me me axwe kôt axweja dja me arỳm ĩ pỳnhkôt umar punure ne tĩn prã:m. Mebê idjaer kumrêx dja ã ane. Nhym kam me bajtemdjwỳ ã ane.

<sup>10</sup> Nhym be, me mex kôt me mexja dja me arỳm me:xkumrêx nhym Metĩndjwỳnh arỳm kum me kĩ:nhkumrêx. Nhym kam me arỳm umar me:xkumrêx. Mebê idjaer kumrêx dja ã umar mexo ane. Nhym kam me bajtemdjwỳ ã ane. <sup>11</sup> Mỳkam dja me ã ane? Bir, djãm Metĩndjwỳnhmã me'õ pyman kute kum 'ã mamã? Arkati. Nãm me kunõ kute aben pyræk ne katàt kute memã o pãnhkumrêxmã.

<sup>12</sup> Metĩndjwỳnh ne me bakukãmãre Mõjdjê mã kukràdjã jarê. Me kute katàt amijo ba kadjy kukràdjã jarê nhym amũ mebê idjaermã arê. Nhym kam me aben djõ'ã kukràdjã'ã, “Mõjdjê kukràdjã, Mõjdjê kukràdjã”, anhỹro ba. Dja Metĩndjwỳnh katàt memã axwe pãnh jarêno nhỹ.

Nhym me bajtem, memã me kute Mõjdjê kukràdjã jarênh kêtja. Godja me bajtemja kwỳ kam axwe jabej arỳm axwe pãnh akuno. Djãm kam Metĩndjwỳnh kute memã kum,

—Aje Mõjdjê kukràdjã kôt amijo aba kêt kam dja ga akuno, anhỹrmã? Kati. Mỳkam? Bir, me kute memã Mõjdjê kukràdjã jarênh kêt nhym me kam kute mar kêt. Kam dja ã memã anhỹr kêt. Nhym kam me arỳm axwe pãnh akuno. Me biknor tokry djækam akuno.

Nhym mebê idjaerdjwÿ, memã me kute Mòjdjê kukràdjà jarènh tùmja. Godja me kwÿ kam axwe jabej Metĩndjwÿnh dja arÿm memã kum,

—Aje Mòjdjê kukràdjà kòt amijo aba kètkam dja ga akuno, ane. Me kute kukràdjà mar ne kòt amijo ba kètkam dja ã memã ane. Nhym kam me arÿm axwe pãnh akuno. Me biknor tokry djàkam akuno. <sup>13</sup> Djãm me kute memã kukràdjà jarènh nhym me kute mar kajgoja djãm Metĩndjwÿnh kute memã axwe kèt jarènh? Kati. Me kute amim kukràdjà markumrêx ne kòt amijo ba jabit dja memã axwe kèt jarè nhym me arÿm kum mex ne.

<sup>14</sup> Me bajtemmã me kute Mòjdjê kukràdjà jarènh kètja. Me kwÿ ta ne me tu kute amikadjwÿnhbê kukràdjà mar ne tu kòt ar amijo ba. Kam me kwÿ ta tu kute mar mexkumrêx ne tu kòt amijo ba mexkumrêx. Te me kute memã Mòjdjê kukràdjà jarènh kèt nhym me ta tu kute mar ne kòt ar amijo ba mexkumrêx. <sup>15</sup> Me tu kadjwÿnhbê kabèn mexkumrêx ne kute mrãmri ne umar djàkam arÿm Metĩndjwÿnh kukràdjà no'òk pyræk. Me ta kute amikadjwÿnhbê markam ta tu kute axwe nêje amikukrà. Ne kam axwekam kute amim, “Mrãmri ijaxwe”, nàr axwe kètkam kute amim, “Kati, imexkumrêx”, anhÿr.

<sup>16</sup> Me kwÿ tu kute kukràdjà kòt amijo ba ja dja Metĩndjwÿnh ï memã axwe kèt jarè nhym me arÿm kum mex ne. Amrê ò akati mörn bòxkam dja ã me kwÿmã ane. Nhym be me kwÿ kute mex pyræk ne te amikadjwÿnhbê axwe pudju nhym tu me kuman arÿm memã pãnh jarènhkumrêx. Jeju Krituo dja memã axwe pãnh jarènhkumrêx. Ja ne ba ujarènh nykam memã arènhõ iba.

*Paur kute memã me kute mex o me akrenh kèt jarènh.*

<sup>17</sup> Be, me ga ne ga me memã kum, “Ba ibê idjaer”, anhÿro aba. Ga me ajte memã kum,

—Ba ne ba Mòjdjê kukràdjà kòt ar amijo iba nhym kam Metĩndjwÿnh kum ikĩnhkumrêx, anhÿro aba. Ne ajêx ne amijo amran memã kum,

—Me bajbit ne ba me ije Metĩndjwÿnh mar mexkumrêx, anhÿro aba. <sup>18</sup> Nhym me

me amã Mòjdjê kukràdjà jarè ga me we aje prĩne markam we aje Metĩndjwÿnh kute amim me'ã karõ kòt mar ne mÿjja kabin we amijo mÿjja mexbit pytàn memã arê. <sup>19</sup> Ne kam ajte we aje amimarkòt amim,

—Me no rã katàt pry'ã mrãnh kadjy ne me kute me pa 'amÿnh ne kute meo mrãnh katàt. Ba ije me uræk ne mrãmri ibê katàt me no kèto iba djwÿnhkumrêx, anhÿro aba. Ne ajte amim,

—Me axwe ne me kute mrãmri ne akamàt kò tykkòt me ar ba pyræk. Ije mrãmri ne memã pry kurwÿ djwÿnh pyræk. Ba ne ba ibê me axwe kèt kadjy me akre djwÿnh, anhÿro aba. <sup>20</sup> Ne me'ã amim,

—Ba ne ba ibê me no rerekremã kukràdjà jarènh djwÿnh. Me kute me kra karàre pyræk ne me no rerekre. Ba ne ba me no tÿx kadjy memã kukràdjà'ã idjujarènh djwÿnhkumrêx, anhÿro aba. We aje Metĩndjwÿnh kukràdjà katàtkumrêxja kunĩ maro abakam ne ga ã 'ã amijo adjàmrao ane.

<sup>21</sup> Ba me amã arê. Me aje amũ me akren ã amim anhÿrkam mÿkam ga: ne ga amijakre kèt? Aje amũ me àkĩnhĩ kèt kadjy me akrekam mÿkam ga: ne ga adjàkĩnhĩ? <sup>22</sup> Aje memã kum,

—Kwãrĩk wãnh mebê prõo adjàkĩnh kèt, anhÿro abakam mÿkam ga: ne ga mebê prõo adjàkĩnhõ aba? Ga we amã mÿjjao metĩndjwÿnh karõ nhipêx kurê:o aba. Mÿkam ga: ne ga mÿjjao metĩndjwÿnh karõ nhipêx nhõ kikrekam ar aba? Mÿkam ga: ne ga mebê adjàkĩnh kadjy kam ar aba? <sup>23</sup> Aje Mòjdjê kukràdjà'ã memã kum, “Kukràdjàja ne mexkumrêx”, anhÿro abakam mÿkam ga ne ga ajte ari kukràdjàkam amikràò aba? Ga kukràdjàkam amikràò aba nhym me arÿm adjò'ã abenmã kum, “Metĩndjwÿnh kajgo”, anhÿro ba.

<sup>24</sup> Amrêbê: ne me bakukãmãre Metĩndjwÿnh kukwakam me ajã kabèn jarèn kum,

“Apÿnh me bajtem ba djari ne me me ajaxwekòt Metĩndjwÿnh japry:.”

Nãm me ã me ajã me bakukãmãremã anen arÿm 'ã pi'òk no'òk ne. Ga me kukràdjào abikènhõ aba nhym me arÿm ã me ajaxwe djò'ã Metĩndjwÿnh japryò ane.



<sup>25</sup> Me abê idjaer, mÿj kadjy ne me me amy kà nhinhu rê. Bir, me aje amy kà rênh mar ne aje 'ã amim, “Arÿm ne Metĩndjwÿnh ijo aminhõ”, anhÿr kadjy. Djãm me bamy kà rênhkambit nhym arÿm me bajo aminhõ? Kati. Gu me baje ajte Metĩndjwÿnh kukràdjà marn kôt ar amijo babakam ne arÿm me bajo aminhõ. Nhym be, godja ga me kukràdjakam ajaxwe jabej arÿm me amy kà rênh kajgo. <sup>26</sup> Kam me my kà tãja, me bajtemja, godja me ta kute amikam katàt kukràdjà marn kôt amijo ba jabej nhym Metĩndjwÿnh arÿm meo aminhõ. Te me my kà tã nhym arÿm meo aminhõ.

<sup>27</sup> Kam, dja me my kà tãja, kubê me bajtemja arÿm me abê idjaermã ajaxwe jarê. Ta te kute Môj djê kukràdjà 'ã pi'òk no'òk mar kêt kam dja arÿm me amã ajaxwe jarê. Ta tu kute katàt kôt amijo bakam dja me amã arê. Me aje Metĩndjwÿnh kukràdjà 'ã pi'òk no'òk mar kajgon amy kà rênh kajgon kukràdjakam amikrà ar o aba. Nhym kam me ta arÿm me apumÿn me amã ajaxwe jarê.

<sup>28</sup> Mÿj xêjabê ne Metĩndjwÿnh nhõ me jakumrêx? Djãm me kute amibên ne ajkwa kajgokam memã kum, “Ibê idjaer, ibê idjaer”, anhÿrbit? Djã ne me kute amijo anhÿrbit ne kam mrãmri me bêt Metĩndjwÿnh nhõ me jakumrêx? Kati. Djã ne me me my kà nhinhubit rê nhym kam arÿm me mrãmri kubê Metĩndjwÿnh nhõ me jakumrêx? Kati. <sup>29</sup> Me kute mrãmri kadjwÿnhbê Metĩndjwÿnh kabên mar ne kôt amijo babit. Me jabit ne me bêt ò me jakumrêx. Me kute amikadjwÿnhbê amim mÿjja 'ã karõ djakam kute Metĩndjwÿnh Karõ mar ne kum amijã maja me jabê ne ò me jakumrêx.

Nhym be, me kute kukràdjà 'ã no'òk mar kajgon me my kàbit rênhja me jabê ne ò me ja kêt. Me kute Metĩndjwÿnh Karõ mar ne kum amijã maja djãm pykakam me ar baja gêdja memã mex jarê? Kati. Metĩndjwÿnh dja memã mex jarê nhym arÿm me bêt ò me jakumrêx.

### 3

*Kute memã Metĩndjwÿnh 'êxnhÿ kêt ne kabên kajgo kêt jarênh.*

<sup>1</sup> Nhym kam mÿj kadjy dja me bêt idjaer? Kam ajte mÿj kadjy dja me me my kà nhinhu rê? Djãm me bêt idjaer kute mÿjja maro kute me bajtem jakrenh?

<sup>2</sup> Nà. Me kute mÿjja maro kute me akrenh me:xi. Bir, me kute Metĩndjwÿnh kabên mar. Metĩndjwÿnh kute me kute katàt amijo ba 'ã memã karõkôt amikabên 'ã pi'òk no'òkja ne me kute mar ne o ba.

<sup>3</sup> Me kwÿ kute amim Metĩndjwÿnh kabên mar kêt kam mÿj gêdja kam kute? Djãm me kute kabên mar kêt kam ne Metĩndjwÿnh arÿm kabên kajgo? <sup>4</sup> Arkati. Dja te me kunÿ 'êxnhÿn kabên kajgo. Nhym be, Metĩndjwÿnh ne kabên kajgo kêt kumrêx. Amrêbê: ne me bakukãmãre Metĩndjwÿnhmã kabên kajgo kêt kumrêx jarên kum,

“Dja me te ajã amim, ‘Kabên kajgo’, anen kam mrãmri akabên kumrêxmã katorkumrêx.”

Nãm me bakukãmãre ã Metĩndjwÿnhmã ane nhym me arÿm 'ã pi'òk no'òk ne. Nhym me arÿm aben djô 'ã arênhõ mō:n arênhõ mōr tãmtã gu me bakamingrãnyredjwÿ baje arênh rã'ã. Mrãmri ne me arênhkumrêx. Metĩndjwÿnh kabên kajgo kêt kumrêx.

*Metĩndjwÿnh me axwekam ngrykkam ne katàt.*

<sup>5</sup> Nhym be, pykakam me kajgo ta ren kabên kajgokam ren abenmã kum,

—Metĩndjwÿnh ren gwaj bajaxwekam ngryk kêt. Ga, gwaj bajaxwekôt me kum Metĩndjwÿnh kÿnhja pumÿ. Me kute gwaj bajã, “Tãmwã ne axwe:. Ba ne ba imã me axwe kÿnh kêt kumrêx. Ba dja ba atemã ne imã Metĩndjwÿnhbit kÿnh”, ane. Be ga, gwaj bajaxwe nhym me kum gwaj bakÿnh kêtja pumÿ. Ne kam kôt kum Metĩndjwÿnh kÿnh. Gwaj bajaxwekôt me kum kÿnhkam Metĩndjwÿnh ren gwaj bakam kÿnh, ane. Me ta ren ã kabên kajgo jarênhõ ane.

<sup>6</sup> Djãm mrãmri me kabên? Kati. Ne ren Metĩndjwÿnh gwaj bajaxwekam kÿnh ne ren kam gwaj bamã bajaxwe pãnh jarênh kêt. Ne ren apÿnh me ba djã kunÿkôt djwÿ ren memã axwe pãnh jarênh kêt. <sup>7</sup> Nhym ren ajte me ta ajte kabên kajgokam memã kum,

—Metĩndjwÿnh ren ijêxnhÿkam ngryk kêt ne. Ga, ijêxnhÿkôt me kum Metĩndjwÿnh kÿnhja pumÿ. Me kute ijã, “Tãmwã ne

'êxnhĩ. Djãm ba dja ba kôt ijêxnhĩ? Kati. Ba dja ba imã kôt ijêxnhĩ kĩnh kêtumrêx. Metĩndjwýnhbit dja ba imã kĩnhkumrêx”, ane. Be ga, ijêxnhĩ nhym me kum ikĩnh kêt ne kam kôt me kum Metĩndjwýnh kĩnhja pumũ. Ijêxnhĩkôt me kum kĩnhkam ne ren ikam kĩnh ne ren imã ijaxwe jarênh kêt ne ijêxnhĩ pãnh ikanga kêt ne. Ne ren me kabên kajgokam ã ren memã ane.

<sup>8</sup> Me'õ ar ta ne arĩk ijã,

—Paur memã kum, “Gwaj bajaxwe baba nhym gwaj bajaxwekôt arým mýjja mex apôx”. Nãm ã memã anhýro bao ane, ane. Kati. Nãm me arĩk ikabên kêt jarê. Ne ren mrãmri Metĩndjwýnh me axwekam kĩnh bar ren ã memã ane. Nhym be, kati. Mrãmri me axwekam ngryk ne kute me kangakumrêx. Me kute ar ikabên kêt jarênh ja dja Metĩndjwýnh pãnh me kanga. Kute me kangaja katát, punu kêt, nhym Metĩndjwýnhdjwý katát.

*Kute memã me kunĩ kupãhntã axwe jarênh.*

*Kar 17.30; Kô k 6.9; Gar 3.22; Xit 3.3*

<sup>9</sup> Mýj dja gu me babê idjaer abenmã nê? Djãm gu me baje,

—Gu me ba ne gu me bamexo me bajtem jakre, anhýrmã? Kati. Ba ibê Paur ne ba arým me kunĩ'ã,

—Mebê idjaermẽ me bajtemmẽ ne me kute aben pyrãk. Me kupãhntã axwe:n ta te: axwe kêt prãmje, ane. <sup>10</sup> Me bakukãmãre kabên kôt ne ba me amã arê. Amrêbê: me bakukãmãre memã kum,

“Djãm me'õ axwe kêt? Arkati. Me'õ axwe kêtja kêtumrêx. <sup>11</sup> Me'õ kute mar kêtumrêx. Me'õ kute Metĩndjwýnh jabej kêtumrêx.

<sup>12</sup> Me ta amiprykôt binhirên ban kunĩ kupãhntã Metĩndjwýnhbê punu:re. Djãm me'õ pydji ne àpênh mex? Arkati. Me'õ mex kêtumrêx.”

Nãm me bakukãmãre ã amrêbê: memã ane. <sup>13</sup> Ne kam ajte memã kum,

“Me ajkwakam me kabên apôx ne kute mrãmri ne me kute arým pyka krã'ã kuprãr nhym kurũm mýjja punu

prôt pyrãk. Nãm me ã kabên punuo ane.

Me kute memã 'êxkôt ne me me noo bi-knoro ba.

Me kabên ne kute kangã djwakam tokry djãja pyrãk.

<sup>14</sup> Me kute me ùn kume:x ne me kabên djã kume:x.”

Nãm me bakukãmãre ã amrêbê: memã ane.

<sup>15</sup> Ne kam ajte memã kum,

“Nãm me amikrà kêt ne tu me paro ba.

<sup>16</sup> Ne ari meo bikênho ba: nhym me me ô'ã tokry kume:x ne umar mex kêtumrêx.

<sup>17</sup> Mýj dja me umar mex kadjy nê? Ja ne me kute mar kêtumrêx.

<sup>18</sup> Me kum Metĩndjwýnh pyma kêtumrêx.”

Nãm me bakukãmãre ã amrêbê: memã ane nhym me arým 'ã pi'ók no'ók ne. Nhym me aben djô'ã arênh mō:n arênh mōr tãmtã gu me bakamingrãnyredjwý baje arênh rã'ã. Mrãmri ne me arênhkumrêx. Me kupãhntã axwen ta te axwe kêt prãmje.

<sup>19</sup> Be, mebê idjaermã ne Metĩndjwýnh kukràdjã kunĩ jarê. Me kute kukràdjã maro baja, me jamã ne arê. Mýj kadjy ne memã arê? Bir, me kute kukràdjã maro ban ta te kute kôt amijo anhýrmã.\* Ne kam kôt kute amijaxwemã katormã. Ja kadjy ne memã kukràdjã jarê. Kam dja me kunĩ ajte Metĩndjwýnh me axwekam ngryk ma. Dja me amim,

—Metĩndjwýnh ne ijaxwekam ngryk, ane. Tãm dja me arým kam kuma. Apýnh me ba djã kunĩ dja me ngryk markumrêx. Ja kadjy ne memã kukràdjã jarê. Tãm ne gu me baje arým mar.

<sup>20</sup> Kam djãm me kute kukràdjã mar ne kute kôt amijo anhýro ba nhym Metĩndjwýnh arým kute memã kum, “Be, ajaxwe kêt”, anhýrmã? Kati. Nhym be, mýj kadjy ne memã kukràdjã jarê? Bir, me kute amijaxwemã kator kadjy ne memã kukràdjã jarê.

*Metĩndjwýnh ta kute memã axwe kêt jarênhja'ã ujarênh.*

*Gar 2.16; Xit 3.5*

\* **3:19** Djãm pi'ók jarênh'ã ne me kute kukràdjã mar ne kôt kute amijo anhýr ja jarênh Kati. Kute memã kum, “Kwãrĩk wãnh ajaxwe kêt”, anhýr nhym me kôt kute ã amijo anhýr ne axwe kêtumrêx. Ja'ã ne kute me kute mar ne kôt amijo anhýr ja jarênh.

<sup>21</sup> Nhyim be, jakam atemã me'õ kôt Metĩndjwýnh kute memã axwe kêt jarênh nhyim me arým kum mex ne. Djãm me kute Metĩndjwýnh kukràdjà mar ne ta kute kôt amijo anhýro ba nhyim kôt kute memã axwe kêt jarênhmã? Kati. Atemã me'õ kôt ne kute memã axwe kêt jarênh. Amrêbê: kute Mõjdjemã kukràdjà jarênhkam Metĩndjwýnh arým memã Kritu'ã ajarê. Kukwakam kabên jarênh djwýnhdjwý ne me arým memã 'ã ajarê. <sup>22</sup> Me kute tu amim Jeju Kritu markumrêx kôt ne Metĩndjwýnh kute memã axwe kêt jarênh nhyim me arým kum mex ne. Me ĩ pýnhkôt kwý kute tu amim Kritu markumrêxja nhyim kute tu memã axwe kêt jarênh. Mýkam?

Bir, me kunĩ ne me axweo kute aben pyrãk. <sup>23</sup> Djãm me'õ ta mexo Metĩndjwýnh mãnhkutã? Arkati. Me kunĩ kupãhntã axwe. <sup>24</sup> Nhyim kam tu memã axwe kêt jarê nhyim me arým kum mex ne. Djã ne me kukràdjà maro ban kôt amijo anhýro ba nhyim pãnh arým memã axwe kêt jarê? Kati. Ta ne tu kum me kaprĩn ta memã arê. Kritu Jeju ta ne arým me axweo pãnh mex nhyim kam kôt ta memã axwe kêt jarê nhyim me arým kum mex ne.

<sup>25</sup> Metĩndjwýnh ne amim Jeju dja nhyim kam arým me axwe pãnh pĩte'y'ã wajêt nhyim kamrô prõt nhyim arým ty. Nhyim kam me kute tu amim markumrêxja Metĩndjwýnh arým me ja jaxwekam ngryk kêt. Be, ja kadjy ne pĩte'y'ã wajêt. Ne mýjja 'õdjwý kadjy ne Jeju pĩte'y'ã wajêt. Me kute Metĩndjwýnh kute katàt meo baja mar kadjy. Kute katàt memã axweo pãnhkumrêx ja mar kadjy. Amrêbê: pĩte'y'ã jêt kêttri ne me axwe: nhyim Metĩndjwýnh ren mekam ngry:k ne ren me biknor tokry djãkam me kumên kam ren arým katàt memã axweo pãnh kumrêx. Nhyim be, kati. Nãm amijã ngryk nê:n tu me axwe maro akno. Djãm ã kute memã anhýrkam katàt kute meo bakumrêx? Nà, mrãmri katàt.

<sup>26</sup> Mýj ne me kam kuman kam Metĩndjwýnh katàtja ma? Bir, jakam ne Metĩndjwýnh Jejumã me axwe pãnh jarê nhyim kam Jeju me pãnh tyn arým Metĩndjwýnhmã me axweo pãnh. Nhyim

kam me arým Metĩndjwýnh kute katàt memã o pãnhja man arým kum kato. Jeju kute me axweo pãnhjamã kato. Nhyim kam me tu kute amim Jeju markumrêxja ne Metĩndjwýnh arým katàt kute memã axwe kêt jarênhkumrêx.

<sup>27</sup> Djãm kam gwaj ba ne gwaj baje, —Metĩndjwýnh kukràdjà kôt ne ba amijo anhýro iba. Imexkumrêxja pumũ, anhýrmã? Kati. Djãm gwaj bajõ bamex? Arkati. Nhyim be, dja gwaj tu amim Jejubit markumrêx nhyim Metĩndjwýnh tu gwaj bamã axwe kêt jarê gwaj arým kum bamexkumrêx ne.

<sup>28</sup> Kam, djãm me kute Metĩndjwýnh kukràdjà mar ne kute kôt amijo anhýro ba nhyim kam kute kôt memã axwe kêt jarênh? Kati. Atemã ne wã. Nhyim be, me kute tu amim Jeju markumrêxbit. Kôtbit ne kute memã axwe kêt jarênh nhyim me arým kum mexkumrêx.

<sup>29</sup> Djãm Metĩndjwýnh kute mebê idjaerbito ba? Djãm kute me bajtemo ba kêt? Kati. Kute me bajtemdjwýo ba. <sup>30</sup> Mýkam? Bir, Metĩndjwýnh pydji:. Kam dja mebê idjaerbê me my nhinhu kà rênha tu amim Jeju markumrêx nhyim kôt arým memã axwe kêt jarê. Nhyim me bajtembê me my kà tãjadjwý dja me ajte tãm. Dja me tu amim Jeju markumrêx nhyim kôt arým me adjwýnhdjwýmã axwe kêt jarê. <sup>31</sup> Djãm gwaj baje tu amim Jeju markumrêxkam ne gwaj baje Metĩndjwýnh kukràdjà kôt amijo anhýrja kangamã? Kati. Nhyim bê ne gwaj baje kukràdjà kanga prãm. Gwaj ba baje tu amim Jeju markumrêxkam ne gwaj baje kukràdjà kôt amijo anhýr prãm kumrêx.

## 4

*Kute Abraãomã axwe kêt jarênh'ã ujarênh. Gar 3.6; Xij 2.23*

<sup>1</sup> Kam gwaj akubyn amijo tẽn me bakukãmãre Abraão'ã ujarênh ma. Mýj ne ta amikam kuma? Djãm ta ne mex? Kati. <sup>2</sup> Djãm Abraão kute amijo ba mex pãnh Metĩndjwýnh kum axwe kêt jarê? Kati. Kute amijo ba mex pãnh kute kum axwe kêt jarênh kêt. Ren kute amijo ba mex pãnh ren kum axwe kêt jarê nhyim ren amimexo àmra ar ba. Nhyim be, kati. Metĩndjwýnhmã

ne amimexo àmra kêt. <sup>3</sup> Mýkam? Bir, djãm Abraão ta axwe kêt? Kati. Metĩndjwýnh ne tu kum axwe kêt jarẽ nhym me arým 'ã ajarẽ. Me bakukãmãre amrêbê: memã kum,

“Abraão ne tu amim Metĩndjwýnh kamnhĩxkumrêx nhym 'ã amim,

‘Be, nãm tu amim ikamnhĩxkumrêx ba kam ba tu kum axwe kêt jarẽ nhym arým imã mex.’ Nãm Metĩndjwýnh ã Abraão'ã amim ane.”

Nãm me bakukãmãre ã Abraão'ã memã ane. Nãm tu amim Metĩndjwýnh kamnhĩxkumrêx nhym ta tu kum axwe kêt jarẽ.

<sup>4</sup> Be ga, me'õ me bẽnjadjwýr'õmã àpênhja pumũ. Kute amim pi'ók kaprĩ kwý byr kadjy bẽnjadjwýrmã apê. Nãm kadjy kum apê:n arým o ino re. Nhym kam bẽnjadjwýr arým kum pi'ók kaprĩ ngã. Àpênh pãnh ne kum pi'ók kaprĩ ngã. Djãm kajgo got? Kati. Àpênh pãnh ne kum kungã.

<sup>5</sup> Nhym be, djãm me kute amijo ba mex pãnh Metĩndjwýnh kute memã axwe kêt jarênh? Kati. Me kute amijo ba mex pãnh kute memã axwe kêt jarênh kêt. Me tu kute amim Metĩndjwýnhbit markumrêx nhym kôtbit arým kute memã axwe kêt jarênh. Metĩndjwýnh kute me axwemã axwe kêt jarênh djwýnh ta kute ã memã anhýr nhym me arým kum mexkumrêx. <sup>6</sup> Me bakukãmãre Dawidjwý ne amrêbê: ja tãm jarẽ. Metĩndjwýnh kute tu memã axwe kêt jarênh nhym me arým kum mexkumrêx. Me ja ne me kĩnhkumrêx. Me kute kukràdjã kôt amijo ba mex pãnh ne Metĩndjwýnh kute memã axwe kêt jarênh kêt. Tãm ne me bakukãmãre Dawi 'ã ajarẽ. <sup>7</sup> Nãm memã kum,

“Metĩndjwýnh kute wãnh me axweo biknor ne me kam ngryk kêt ne kute me axweo bipdjur ja ne me kĩ:nhkumrêx.

<sup>8</sup> Bẽnjadjwýr djwýnh kute tu memã axwe kêt jarênh ja ne me kĩnhti:re ne.”

Nãm me bakukãmãre Dawi ã memã ane nhym me aben djô'ã arênhõ mō:n arênhõ mōr tãmtã gu me bakamingrãnyre baje arênh rã'ã. Mrãmri ne arênhkumrêx. Mrãmri Metĩndjwýnh kute tu memã axwe kêt jarênhkam ne me kĩnhkumrêx.

<sup>9</sup> Djãm kute mebê idjaermãbit arênh? Djãm kute mebê idjaerbê me my kà rênh jamãbit arênh? Kati. Me bajtembê me my kà tãjadjwý.

Ga, Abraãodjwý ja ma. Abraão ne tu amim Metĩndjwýnh kamnhĩxkumrêx nhym 'ã amim,

—Abraão ne tu amim ikamnhĩxkumrêx ba kam arým tu kum axwe kêt jarẽ, ane. Tãm ne gwaj arým kuma. <sup>10</sup> Mýj ne kute kum axwe kêt jarênhkam kute? Djã ne kumrêx kum amimy nhinhu kà krãta nhym kam arým kum axwe kêt jarẽ? Kati. Kute amimy kà krã'yr kêttri ne kum axwe kêt jarẽ nhym arým kum mexkumrêx.

<sup>11</sup> Nhym kam Metĩndjwýnh arým kum my kà krã'yr'ã kum karõ. Nhym kabênkôt arým amijo tẽn arým amimy kà krãtan kam arým amijã maro ba. Nãm mar kunĩkôt amim,

—Be, amrêbê ne ba tu amim Metĩndjwýnh kamnhĩxkumrêx nhym arým tu imã ijaxwe kêt jarênhkumrêx. Ga, imy kà krã'yrja pumũ, anhýro ba. Amrêbê kute my kà krã'yr kêttri ne Abraão tu amim Metĩndjwýnh kamnhĩxkumrêx nhym arým tu kum axwe kêt jarênhkumrêx.

Nhym kam tũmrãm amimy kà krãtan arým ã amim anhýro ba. ã amimy kà krã'yr'ã amim anhýro ba. Mýj kadjy ne kute my kà krã'yr kêttri kum axwe kêt jarẽ? Bir, me bajtem my kà tãja kunĩ kajmã'ã ne kum axwe kêt jarẽ. Abraãobê me kute amikajmã'ã Metĩndjwýnh marja kunĩ nhingêt kadjy. Dja me tu amim markumrêx nhym arým tu memã axwe kêt jarênhkumrêx. <sup>12</sup> Abraãobê ne me my kà rênhja nhingêt. Djãm Abraãobê ne me my kà rênhbit nhingêt? Kati. Abraão kute amimy kà krã'yr kêttri kute tu amim Metĩndjwýnh kamnhĩxkumrêx. Nhym me kute Abraão kudjwa tu amim Metĩndjwýnh kamnhĩxkumrêxja me ajbit Abraãobê me ingêt.

<sup>13</sup> Nhym ajtekam Metĩndjwýnh arým tu Abraãomẽ ô'ã tãmdjwý arkum ar kute meo aminhõn meo bamã arênhkumrêx ne arkum,

—Gamẽ adjô'ã atãmdjwýmẽ dja gar apýnh me ba djã kunĩkôt meo aminhõn meo aba. Meo aminhõn meo aba kute mrãmri ne me tãmdjwý ingêt nhõ nêkrêxo

aminhôn o ba pyrək. Nãm ã tu Abraãomê ô'ã tãmdjwýmã kabên pydjın arênho ane. Djãm ar kute Mòjdjê kukràdjà mar ne kôt kute amijo anhÿro ba pãnh kute arkum ar kute meo bamã arênh got? Kati. Nãm ar tu amim Metĩndjwýnh kamnhĩxkumrêx nhym arým tu arkum axwe kêt jarên kam arým kôt arkum kute meo bamã arê. Kabên pydjın arê.

<sup>14</sup> Ne ren memã me kute Mòjdjê kukràdjà maro ba pãnh ren memã kute meo bamã arê nhym kam me ren kute Mòjdjê kukràdjà maro ba nhibej ren amim Metĩndjwýnh kamnhĩx kêt. Nhym kam ren kabênja jarênh kajgo. Nhym be, kati. Djãm me kute kukràdjà mar ne kôt kute amijo anhÿro ba pãnh memã me kute meo bamã arê? Kati. Ja pãnh kute memã me kute meo aminhõ jarênh kêt. <sup>15</sup> Me kute Mòjdjê kukràdjàbit maro baja ne Metĩndjwýnh mekam ngrykbit. Mýkam ne mekam ngrykbit? Bir, me kute kukràdjàkam amikrào ba prãm kam ne mekam ngrykbit. Nhym be, memã me kute Mòjdjê kukràdjà jarênh kêt nhym me kute mar kêt jabit ne me kute kukràdjàkam amikrà kêt. Ren me arým memã arê nhym ren me arým kuma, kambit me kute kam amikrà. Nhym be, me kute mar kêt kam ne me kute kukràdjàkam amikrà kêt.

<sup>16</sup> Kam, me kute tu amim markumrêxja ne Metĩndjwýnh memã me kute meo bamã arê. Mýkam? Bir, dja Abraão djô'ã tãmdjwý kunĩ tu amim markumrêx nhym Metĩndjwýnh ta arým tu kum me kaprĩ. Tu kum me kaprĩkam gêdja arým mrãmri tãmdjwý kunĩmã apýnh me ba djàkam me ja nhõrkumrêx nhym me arým ar meo ba. Djãm mebê idjaer kute Mòjdjê kukràdjà mar jabit dja meo ba? Kati. Me kute Abraão kudjwa tu amim Metĩndjwýnh markumrêxja kunĩ dja me meo ba. Mrãmri ne kute me ja kunĩmã kute meo bamã arênhkumrêx. Abraãobê ne me bakunĩ nhingêt.

<sup>17</sup> Metĩndjwýnh ne amrêbê: me bakukãmãre Abraãomã ja jarê. Kum me bakunĩ nhingêt jarê. Metĩndjwýnh kum, “Apýnh me ba djà krãptĩ:kam me jamã ne ba arým ajo me ingêt.”

Nãm ã Abraãomã ane. Nhym me arým 'ã pi'ók no'ók ne. Nhym me aben djô'ã arênho mõ:n arênho mõr tãmtã gu me bakamin-grãnyredjwý baje arênh rã'ã ne. Ga, mrãmri Abraão kubê me banhingêt kumrêxja pumũ. Abraão kute tu amim kamnhĩxkumrêxja ne arým Metĩndjwýnh nokrekam kubê me banhingêt kumrêx. Metĩndjwýnh ta ne kute akubyn me tyko tĩn ne mýjja kukãm 'ã ajarê. Mýjja kator kêt rã'ã nhym memãbit kute kator prãm kêt pyrək. Nhym be, Metĩndjwýnhmãbit arým mýjja amirĩt nhym arým kukãm 'ã ajarê. Ga, mrãmri Abraão kubê me banhingêt kumrêxja pumũ.

<sup>18</sup> Ne ren atemã me'õ ne ren te amiwýr kute meo aminhõja kator kam ama ne ren 'ã ukanga. Nhym be, kati. Nãm Abraão kute meo aminhõmã tu amiwýr kam amako tẽmkumrêx ne me kady tu amim Metĩndjwýnh kamnhĩxkumrêx. Ne kam arým meo aminhõkumrêx, arým kubê me ingêt. Kubê apýnh me ba djà krãptĩkam me ja nhingêt. Metĩndjwýnh kute kum anhÿr kôt. Kute kum, “Dja ã atãmdjwý krãptĩo ane”, anhÿr kôt ne Abraão arým tu amiwýr me kamnhĩxkumrêx. <sup>19</sup> Nãm te amim,

—Arým Xaramê ar ibêngê:tte. Nã bãm te ar ikra'õ prã:mje. Mrãmri ar ije me tykkam kra prãm kêtja pyrək, ane. Nãm te amim anen tu amim kamnhĩxo tẽmkumrêx. Arým ne Abraão'ã amex krãptĩ: kubê 100 pyrək. <sup>20</sup> Djã ne Metĩndjwýnh kum kabên jarê nhym we amim,

—Dja ijo anhÿr jabej. Nàr kon. Dja ijo anhÿr kêt jabej? ane. Kati. Nãm tu amim kamnhĩx týxkumrêxo tẽ. Ne kam o Metĩndjwýnhmã ra:x jarê. <sup>21</sup> Nãm amim,

—Djãm Metĩndjwýnh 'irere:k got? Mrãmri kute imã ikra jarênh kôt dja imã ikra nhõrkumrêx, ane. <sup>22</sup> Kute ã amim anhÿrkam ne Metĩndjwýnh arým 'ã amim,

—Ba tu kum axwe kêt jarê nhym arým imã mex ne, ane. <sup>23</sup> Djã ne Abraãobit man amim, “Ba tu kum axwe kêt jarê”, ane nhym me'ã pi'ók no'ók ne? Kati. <sup>24</sup> Gwaj badjwý ne arým gwaj bama. Dja gwaj tu amim Metĩndjwýnh kamnhĩxkumrêx nhym arým gwaj bamãdjwý axwe kêt jarê. Metĩndjwýnh kute akubyn gwaj banhõ

Bĕnjadjwÿr djwÿnh Jejuo tĭn djwÿnh dja gwaj tu amim kamnhĭxkumrĕx, tu amim markumrĕx nhym arÿm gwaj bamădjwÿ axwe kĕt jarĕ gwaj kam arÿm kum bamex ne. <sup>25</sup> Năm me memă Jeju kanga nhym me arÿm kubĭ. Mÿj kadjy? Bir, kute gwaj bajaxweo pănh kadjy ne me Jeju kanga nhym me arÿm kubĭ. Kubĭ nhym arÿm akubyn o tĭn. Kute gwaj bamă axwe kĕt jarĕnh kadjy ne akubyn o tĭn.

## 5

*Kritu tykkôt me umar mex ne kĭnh.*  
*Mat 5.12; A Kô 4.8; Pir 1.28; Ped k 4.13*

<sup>1</sup> Gwaj baje tu amim Jeju markumrĕxkam ne Metĭndjwÿnh arÿm gwaj bamă axwe kĕt jarĕ. Kute gwaj bamă axwe kĕt jarĕnhkam arÿm gwaj bakam ngryk kĕt ne. Bĕnjadjwÿr djwÿnhbĕ Jeju Kritu gwaj bajaxwe pănh tokrykam ne gwaj bakam ngryk kĕt. Gwaj bakam ngryk kĕtkam ne gwaj arÿm badjumar me:xkumrĕx ne ar baba. <sup>2</sup> Jejukôt ne Metĭndjwÿnh arÿm kute gwaj ba mar. Gwaj tu amim Jeju markumrĕx nhym arÿm kute gwaj bamarkumrĕx. Gwaj kum amijarĕ nhym arÿm tu kum gwaj bakaprĭkumrĕx.\* Tu kum gwaj bakaprĭkumrĕx gwaj arÿm kôt badjăm tÿx. Dja gwaj ĭ Metĭndjwÿnh mexkumrĕx pumŭ. Baje Metĭndjwÿnh me:xkumrĕx pumŭnhkam amakbĕ gwaj bakĭnhkumrĕx.

<sup>3</sup> Ne kam te apÿnh gwaj badjumar punu, batokry djari gwaj bawÿr bôx gwaj bakĭnhkumrĕx. Gwaj badjumar punu, batokry japôkmă bakĭnhkumrĕx. Mÿkam? Bir, gwaj kam amim,

—Dja ba te itokryn mă Jeju kôt ar amijo iban 'ă idjukanga kĕt. <sup>4</sup> Mă kôt ar amijo iba:n kam arÿm kum imexkumrĕx. Kum imexkumrĕx ne kam arÿm tu amiwÿr kamnhĭxkumrĕx. Nă gwăm ă amim anen kuman arÿm bakĭnhkumrĕx.

<sup>5</sup> Baje omŭnhkumrĕxkam amakbĕ mÿj dja gwaj amikam kuman kôt batÿx. Bir, kum gwaj bajabĕ:. Năm gwaj bamă Karô jano nhym arÿm gwaj bamă arĕnh ba. Gwaj bamă,

—Ga, Metĭndjwÿnh kum ajabĕ:ja pumŭ, anhÿro ba. Ne kum gwaj bajabĕja prĭne gwaj bamă o amirĭt mex gwaj arÿm amikam kuma. Ja ne gwaj kuman arÿm baje kam amakjakam batÿx. Baje Metĭndjwÿnh pumŭnhkumrĕxkam amakjakam batÿx.

<sup>6</sup> Amrĕbĕ ne gwaj te: kum bamex prămje ne mă: bajaxwe ră'ă ne nhym arÿm ô akati bôx nhym arÿm Kritu gwaj bapănh ty. Metĭndjwÿnh kute amrĕbĕ tyk nhô akati'ă kum karô kôt ne akati wajĕt nhym Kritu arÿm gwaj bapănh ty. Gwaj ba ne gwaj bamă Metĭndjwÿnh kĭnh kĕt ne ar baba nhym arÿm gwaj bapănh ty.

<sup>7</sup> Djăm gwaj bajô ne gwaj ren baje me'ô jaxwe pytăr kadjy ty? Kati. Djă ne gwaj ren bajô baje me'ô kute katăt amijo baja pytăr kadjy ren batyk prăm? Kon. Gwaj baje me'ô djukaprĭ pytăr kadjy mrămri ren batyk prăm jabej.

<sup>8</sup> Nhym be, djăm gwaj ba ne gwaj katăt amijo baba năr badjukaprĭ? Kati. Gwaj ba ne gwaj bajaxwe: nhym Kritu arÿm kute gwaj bapytăr kadjy ty. Năm Metĭndjwÿnh ă kum gwaj bajabĕo amirĭto ane.

<sup>9</sup> Kamrô prôt ne tykja kam ne Metĭndjwÿnh arÿm gwaj bamă axwe kĕt jarĕ gwaj arÿm kum bamex ne. Gwaj baje ja markam ne gwaj amim,

—Mrămri ne Kritu kute Metĭndjwÿnh ngrykbĕ ipytăr mexkumrĕx, ane.

<sup>10</sup> Amrĕbĕ ne gwaj Metĭndjwÿnho bakurĕ djwÿnh nhym Kra arÿm ty. Ty nhym Metĭndjwÿnh arÿm gwaj bajo ôbikwa. Kute gwaj bajo ôbikwakam ne gwaj arÿm amim,

—Mrămri dja amim ipytăr me:xkumrĕx. Arÿm tyn akubyn tĭn ne. Kam dja ipytăr mexkumrĕx, ane. <sup>11</sup> Djăm jabit? Kati. Ajte. Gwaj Metĭndjwÿnhkam bakĭ:nhkumrĕx. Bĕnjadjwÿr djwÿnhbĕ Jeju Kritu djăpĕnhkôt kam bakĭnhkumrĕx. Kute gwaj bajaxweo pănhkôt bakĭ:nhkumrĕx.

*Me kute tu amim Kritu markumrĕxja tĭn.*  
*Kô k 15.21*

<sup>12</sup> Nhym be, Adăo pydji me kukăm axwe nhym kam me kunĭ kudjwa arÿm axwen arÿm ty. Me kunĭ Adăo kudjwa axwekam

\* **5:2** Djăm gwaj ba ne gwaj bajaxwe kĕt nhym pănh kum gwaj bakaprĭ Kati. Gwaj ba ne gwaj te bajaxwe kĕtmă. Nhym be, ta ne tu kum gwaj bakaprĭ.

arým kunĩ ty. <sup>13</sup> Mÿj ne me axwekam kute? Bir, Metĩndjwýnh kute Mõj djemã kukràdjà jarēnh nhym amũ amidjõ'ã kute memã arēnh kētri ne me arým pykakam axwe ar ba. Nhym be, djãm kute memã kukràdjà jarēnh kētri Metĩndjwýnh kute memã kum, “Ajaxwe”, anhÿr? Kati. Kute memã kukràdjà jarēnh kētri nhym me kute mar kētri ne kute memã axwe jarēnh kēt. <sup>14</sup> Nhym be, kute pidjõ krēn kēt kadjy kabēn ja ne Adão arým kam axwe. Djã ne me kunĩ Adão kõt ã axweo ane? Djã ne me ã Metĩndjwýnh kabēnkam amikràõ ane? Kati. Me te Metĩndjwýnh kabēnkam amikrà kēt ne arým axwe. Ne kam arým ty. Axwekam aben djõ'ã ty: nhym kam arým Metĩndjwýnh Mõj djemã kukràdjà jarē. Adão kumrēx axwe nhym me kunĩ kudjwa axwe. Nhym be, me'õdjwÿ amrē mõrmã ne atemã ne ukaprĩ. Jeju ne ukaprĩ.

<sup>15</sup> Gwaj Adãomē Jeju Kritumē abenã ar maro nhÿ. Adão axwe nhym Jeju Kritu ukaprĩ. Adão pydji axwekam ne me krãptĩ: ty. Aben djõ'ã ty. Nhym be, Jeju Kritu pydji tu kum me kaprĩ:kumrēxkam† ne arým amim me krãptĩ: pytã. Metĩndjwýnh tu kum me kaprĩ nhym Jeju Kritudjwÿ ukaprĩ ne arým me axwe krãptĩ: pytã. <sup>16</sup> Adão pydji axwekõt mÿjja kator nhym be, Jeju djukaprĩkõt mÿjja kator. Apÿnh mÿjja kator. Adão pydji axwe kõt Metĩndjwýnh arým kam ngryk ne pãnh memã biknor jarē nhym me arým me biknor tokry djakam akuno. Nhym be, te apÿnh me axwe djari krãptĩ nhym Metĩndjwýnh kute memã Jeju nhõr kõt memã axwe kēt jarē nhym me arým kum mex ne. <sup>17</sup> Adão pydji axwekõt me kunĩ aben djõ'ã ty. Nhym be, Metĩndjwýnh tu kum me kaprĩn tu memã axwe kēt jarē nhym me arým kum mex ne. Kute memã axwe kēt jarēnhkõt dja me tĩn. Nãm me Jejuo aminhõ nhym Metĩndjwýnh arým kum me kaprĩ:kumrēx nhym me tĩn. Adãokõt ne me ty. Nhym be, Jeju Kritu pydjikõt ne me tĩn ne ar ba rã'ã: rã'ã ne.

<sup>18</sup> Adão kute pidjõ krēnkõt axwe. Axweja pydji kõt ne Metĩndjwýnh arým me kunĩmã biknor jarē nhym me arým me biknor

tokry djakam akuno. Nhym be, Jeju Kritu me axwe pãnh ty. Ja pydjikõt ne Metĩndjwýnh arým memã axwe kēt jarē nhym me arým kum mex ne. Me kum axwe kētkam me kunĩ arým Metĩndjwýnh kõt tĩn ne ar ba rã'ã: rã'ã ne. <sup>19</sup> Bir, me'õ pydji kute Metĩndjwýnh kabēn kangakam Metĩndjwýnh arým me krãptĩmã axwe jarē. Nhym be, me'õ pydji kute Metĩndjwýnh kabēn markumrēxkam dja Metĩndjwýnh arým me krãptĩmã axwe kēt jarē nhym me arým kum mex ne.

<sup>20</sup> Nhym ajtekam Metĩndjwýnh arým memã Mõj djē kukràdjà jarē. Apÿnh me axwe djario krãptĩ: kadjy ne memã kukràdjà jarē. Nhym be, te apÿnh me axwe djari krãptĩ: nhym ukaprĩ:. Me te mã axwe nhym mã ukaprĩ:. Ukaprĩõ amũ amikamēn arým ukaprĩ ra:x ne. <sup>21</sup> Mÿj kadjy? Bir, me mã axwe:n te axwe kēt prãmje. Ne kam arým me biknor tokry djakam akuno. Nhym be, Metĩndjwýnh tu kum me kaprĩ:kumrēx ne memã axwe kēt jarē ne kam arým meo ba. Meo ban memã tĩn jangij nhym me kõt tĩn ne ar ba rã'ã: rã'ã ne. Nãm me tu amim me banhõ Bēnjadjwÿr djwýnhbē Jeju Kritu markumrēx ne kam arým Metĩndjwýnhkõt tĩn ne ar ba rã'ã: rã'ã ne.

## 6

*Me Kritumē ro'ã tyk ne akubyn tĩn.*

*A Kõ 5.17; Gar 2.20; Kor 2.13*

<sup>1</sup> Te gwaj bajaxwe nhym Metĩndjwýnh tu kum gwaj bakaprĩ. Djãm tu kum gwaj bakaprĩkam dja gwaj we abenmã kum, —Gwaj mã bajaxwe ar baba rã'ã. Gēdja kam Metĩndjwýnh tu kum gwaj bakaprĩ:kumrēx, ane? Djãm gwaj baje ã abenmã anhÿrmã? <sup>2</sup> Arkati. Arým gwaj tu bajaxwe kangakumrēx. Baje mrãmri ne me tyk kute tu axwe kangakumrēx pyrãk. Djãm kam gwaj bajaxwe rã'ãmã? Arkati. <sup>3</sup> Me kute ngõmã gwaj bajangjēnhja kunĩ gwaj amim,

—Ba Kritu Jejumē itypdji. Ne kam arým kute mrãmri ne Kritumē ro'ã ityk ne ijadjar pyrãk. Nã gwãm ã amim ane. Djãm ar aje ja mar kēt?

† 5:15 Djãm me ta ne me axwe kēt nhym arým pãnh kum me kaprĩ Kati. Me ta ne me te: axwe kētmã nhym ta arým tu kum me kaprĩ.

<sup>4</sup> Kam, me kute ngômã gwaj bajangjênhkam ne kute gwaj Kritumê ro'ã batyk ne bajadjâr pyrâk. Ga, Bãm mexo uma:n arým akubyn Krituo tînja pumũ. Gwaj badjwý baje mrãmri ne Kritumê ro'ã akubyn batîn pyrâk. Gwaj ã amimaro ane. Kam dja gwaj atemã amijo baba nyo amijo baban katàt amijo baba.

<sup>5</sup> Godja gwaj kumê batipdjikam baje ro'ã batyk pyrâk jabej dja gwaj kam kumê baje mrãmri ne ro'ã akubyn batîn pyrâk. <sup>6</sup> Bir, amrêbê ne gwaj ar bajaxwe: baba. Ne kam Jejumê batipdjin arým kute ro'ã pîte'y'ã arým bajarij pyrâk. Ne kute bajaxwe wãnh arij pyrâk. Gwaj ã amimaro ane. Gwaj kam arým bamã bajaxwe prãm kêt. Arým gwaj Jejumê batypdji. Ne kam baje bajaxweo krã'yr mar mexkumrêx. <sup>7</sup> Ga, arým me tykkam me ajte axwe kêtja pumũ. Gwaj badjwý arým baje Jejumê ro'ã batyk pyrâk ne bamã bajaxwe prãm kêt.

<sup>8</sup> Godja gwaj baje ro'ã batyk pyrâk mar jabej ne kam arým baje ro'ã akubyn batîn pyrâk jadjwý mar ar o baba. Tãm ne gwaj baje tu amim markumrêx. <sup>9</sup> Mýkam? Bir, Kritu arým mrãmri akubyn tînkam ajte tyk'yr bôx prãm kêtumrêx. Dja ajte tyk prãm kêtumrêx. Tãm ne gwaj baje ajte markumrêx. <sup>10</sup> Mýkam? Bir, tykkam ne arým gwaj bajaxwe pãnh tyk mãmdji. Nhyim be, jakam ne akubyn tîn ne ar ba. Metîndjwýnh kabên kôt ar amijo ba kadjy tîn ne ar ba.

*Me kute wãnh axwemã irerkumrêxmã.  
Rô 8.4; Ep 4.17; Kor 3.5; Ped k 4.1*

<sup>11</sup> Tãm dja gar amijã aman amim,

—Badjwý ne ba ije me'õ tyk pyrâk ne tu wãnh ijaxwemã inhirerkumrêx. Nhyim be, jakam ije Metîndjwýnhkôt katàt ar amijo iba kadjy ne ba ije me'õ tyk ne akubyn tîn pyrâk ne ar iba, ane. Dja gar ã amim ane. Gwaj banhõ Bênjadjwýr djwýnhbê Jeju Kritumê batipdji kôt dja gar ã amim ane.

<sup>12</sup> Ba ar amã me'õ'ã ajarê gar ama. Me'õja ne õ bēnjadjwýrmã àpēnh ar ba ne kubê uti:n amim,

—Ba te ije bēnjadjwýr kangan ikator ne ate ikrân ityk djã kêt prãmje. Nhyim ijã no tỳx ne mã ijãno djan idjãpēnh'ã inê ne, ane. Ar gadjwý ar ajte me'õja pyrâk ne te ajaxwe

kêt prãmje ne ajaxwe rã'ã. Kwãrîk wãnh ajte amã ajaxwe prãm kêt. Jakam akubyn kubê aminê gê ar anhõ ba kêt, ar anhî tyk prãmjao ba kêt. <sup>13</sup> Kwãrîk wãnh kum adjãpēnhmã me axwe nhõ bēnjadjwýrmã amijarēnh kêt. Kwãrîk wãnh kum aminhikra, amipar, amino, amidjumar djã jarēnh kêt. Dja gar kôt ajaxwe. Kubê aminê. Nhyim be, ajte me'õ tyk ne akubyn tîn pyrâk djã gar Metîndjwýnhmã amijarê, kum aminihikra, amipar, amino, amidjumar djã jarê. Ne kam arým kôt katàt amijo aba.

<sup>14</sup> Amrêbê ne gar amim,

—Ba dja ba Môjdjê kukràdjã man kôt amijo anhýro iban arým kôt Metîndjwýnhmã ijaxwe kêt, anhýro aban te kôt amijo anhýr prãmje ne ajaxwe rã'ã. Nhyim be, jakam ne gar amim,

—Metîndjwýnh djukaprîtire ta ne tu ijo mex, anhýro aban arým tu amim markumrêxo aba. Kam ar ajte wãnh ajaxwemã anhirer kadjy atỳx.

*Me kute Metîndjwýnhõ bēnjadjwýrn kum àpēnhmã.*

*Kô k 7.22; Gar 5.1*

<sup>15</sup> Gwaj baje Môjdjê kukràdjã marn kôt amijo anhýro babakôt Metîndjwýnh kute gwaj bajo mex kêt. Nhyim be, tu kum gwaj bakaprîkôt ta kute gwaj bajo mex. Djãm kam gwaj baje we amim,

—Ba gêt ijaxwe rã'ã. Tu kum ikaprîkam ba gêt ijaxwe rã'ã. Dja imã ijaxwe pãnh jarēnh kêt, anhýr ne kam kôt bajaxwe rã'ãmã? Kati.

<sup>16</sup> Godja gar me axwe nhõ bēnjadjwýrmã kum,

—Ã. Ba amã apê ga arým ijo aba, anhýr jabej gar arým kum adjãpēnhkumrêx. Ne kam arým ajaxwen kam ô'ã arým akuno, me biknor tokry djãkam akuno. Nhyim be godja gar Metîndjwýnhmã kum,

—Ba akabên kôt amã idjãpēnhkumrêx, anhýr jabej ne arým Metîndjwýnhõ ar anhõ bēnjadjwýrkumrêx jabej arým ajte kabên marn kôt amijo anhýro aba. Ne kam arým ô'ã ajaxwe kêt ne akatàt. Djãm ar ajte ja mar kêt?

<sup>17</sup> Nhyim be, ba Metîndjwýnhmã ar akam amikînh jarê. Gar amrêbê me axwe nhõ bēnjadjwýrmã apê. Kum adjãpēnhri te



katàt aje amijo abamãan arerekre. Ne arým jakam mrãmri aje Metĩndjwýnh kabẽn markumrẽx. Me kute ar amã Metĩndjwýnh kabẽn jarẽnhja amã kĩnh. Ne kam mrãmri aje mar ne kôt amijo anhýro abakumrẽx. <sup>18</sup>Ne kam arým ajaxwe kêt mã atýx ne arým akatàt. Abê Metĩndjwýnh nhõ àpẽnh ne arým kôt katàt ar amijo aba.

<sup>19</sup>Ar ano rerekren ar ajamak mex kêt kam ne ba tu pykakam me kukràdjà kôt ar amã ikabẽn jarẽ. Amrêbê ne gar aje me axwe nhõ bẽnjadjwýrmã adjàpẽnh kadjy kum amijarẽ, kum aminhikra, amipar, amino, amidjumar djà jarẽ. Aje amũ ajaxweo amikamẽnh kadjy kum amijarẽ nhym ar ajo ba. Gar kum apên te katàt amijo abamãan arým arerekre. Nhym be, jakam dja gar Metĩndjwýnh ar anhõ bẽnjadjwýr ne kum adjàpẽnhkumrẽx. Ne kam aje katàt amijo abamã arým atýx ne. Dja gar kum atýx ne arým katàt amijo aban amũ kum amexo amikamẽho mõi.

<sup>20</sup>Me axwe nhõ bẽnjadjwýrmã adjàpẽnhri Metĩndjwýnh kute ar ajo ba kêt kumrẽx gar te katàt kôt amrãnh mex prãmje. <sup>21</sup>Jakam dja gar akubyn amijo tẽn amima. Kam amikam apijàm ne. Amrêbê ate ar abakam mýj got gar me axwe nhõ bẽnjadjwýrkam amim aby. Arkati. Ar ga ne gar ar mekôt aba kajgo. Me ate ar ba djô'ã ne me me biknor tokry djàkam akuno. <sup>22</sup>Nhym be, jakam ne Metĩndjwýnh arým me axwe nhõ bẽnjadjwýrbê ar apytà gar kum adjàpẽnh ar aban arým ô'ã amexkumrẽx. Ne amũ amexo amikamẽho mõi kam ô'ã arým Metĩndjwýnhkôt atĩn ne ar aba rã'ã: rã'ã ne.

<sup>23</sup>Tãm ne ja. Me axwe pãnh ne me arým me biknor tokry djàkam akuno. Nhym be, Metĩndjwýnh ne kute memã tĩn jangjẽnh nhym me arým kôt tĩn ar ba rã'ã: rã'ã ne. Djãm me kute kum o pãnhkam kute memã angjẽnh? Kati. Me kute kum o pãnh kêt kam tu kute memã angjẽnh. Me kute tu amim gwaj banhõ Bẽnjadjwýr djwýnhbê Jeju Kritu markumrẽx nhym arým ta kum me kaprĩn kute memã kôt tĩn jangjẽnh.

## 7

*Me kute Kritubit marn kôt amijo bamã*

*kute arẽnh.*

*Rô 8.2; Gar 4.1; Ep 2.2; Kor 3.7*

<sup>1</sup>Akmere, àpnhĩre ar, Metĩndjwýnh kute Mõjdjẽmã kukràdjà jarẽnh gar aje mar mexja, ar amã ne ba ikabẽn. Me tĩnri ne me kute kukràdjà mar ne kôt kute amijo anhýro bamã. Nhym be, djãm me arým tykkam kute kôt amijo bamã? Kati. Arým me tykkam me kute kôt amijo ba kêt. Djãm ar aje ja mar kêt got?

<sup>2</sup>Ba ar amã arẽ. Me'õ nire arým mjênkam dja arek mjên'ã ngrà. Metĩndjwýnh kukràdjàkôt arek mjên'ã ngrà. Mjên tĩnri 'ã ngrà. Godja mjên'ã ngrà kêt jabej arým Metĩndjwýnh kukràdjàkam amikràn arým axwe. Nà, dja mjên tĩnri 'ã ngrà. Nhym be, arým kubê mjên tykkambit dja arým 'ã ngrà kêt.

<sup>3</sup>Godja mjên tĩnri me'õdjwý'ýr mõi jabej nhym me arým kum mjênkam axwe jarẽ. Arým ne me'õjao akĩ. Nhym be, godja mjên arým kubê ty nhym my 'õmẽ arkum aben kĩnh kwãrĩk wãnh ar abenwýr mõi. Djã ne kam ar Metĩndjwýnh kukràdjàkam amikrà? Kati. Arým mjên kubê tykkam nhym ar kute abenwýr mõi kam kute kukràdjàkam amikrà kêt. Me kute kum mjênkam axwe jarẽnh prãm kêt kumrẽx. Tãm dja gar ama.

<sup>4</sup>Mjên tykkam kukràdjà mýj'ã ne ba ar amã arẽ? Mýj ne gar aje kam marmã? Bir, amrêbê ne gwaj Metĩndjwýnhmã bamex kadjy Mõjdjẽ kukràdjà man kôt amijo anhýro baba. Tãm ne kute mrãmri ne gwaj bamjên arým tyk pyræk. Jakam ne gwaj baje kukràdjà kôt amijo baba prãm kêt. Jakam arým Kritu tyn akubyn tĩn ne. Kritumẽ batipdjikam ne gwaj baje Mõjdjẽ kukràdjà marn kôt amijo anhýro baba prãm kêt. Kam Metĩndjwýnhmã bamex kadjy gwaj Kritubit man kôt ar amijo baba. Ja'ã ne ba ar amã mjên tykkam kukràdjà jarẽ. Kritu tyk ne akubyn tĩnjãmẽ batipdji kadjy ne gwaj Kritu man kôt ar amijo baba. Metĩndjwýnhmã bamexkumrẽx kadjy gwaj Kritu man kôt ar amijo baba.

<sup>5</sup>Amrêbê gwaj ba baje amidjwýnhbit o kĩnh prãm kam ne gwaj tu bajaxwe:. Me te Mõjdjẽ kukràdjào gwaj bajaxwe nẽje gwaj bajakre gwaj bajamakre kêt ne kam bajaxwe: ne. Metĩndjwýnhkam bajaxwe: ne.

Nhym bit kute me biknor tokry djâkam gwaj bamēnhmã. <sup>6</sup> Amrêbê ne gwaj baje te Môjdjê kukràdjà marn te kôt amijo anhÿro baba. Ne amim,

—Dja ba Môjdjê kukràdjà man kôt amijo anhÿro iban arÿm Metĩndjwÿnhmã ijaxwe kêt, anhÿro baba. Ne kam kôt te bajaxwe kêt prãmje.

Nhym be, jakam arÿm gwaj Kritumê batipdjikam baje ro'ã batyk pyrâk ne arÿm baje ajte Môjdjê kukràdjà tũm'ã pi'òk no'òkja mar prãm kêt. Djãm gwaj baje ajte amim,

—Dja ba Môjdjê kukràdjà man kôt amijo anhÿro iban arÿm Metĩndjwÿnhmã ijaxwe kêt, anhÿrmã? Kati. Gwaj baje amim anhÿr kêt-kumrêx. Jakam ne gwaj mÿjja ny man amim,

—Arÿm ne Metĩndjwÿnh Karõ iwÿr bôx ne ijo ba. Ta ne kute Metĩndjwÿnhmã ijo mexo ba, anhÿro baba.

*Dja me Môjdjê kukràdjà man kôt amijaxwe ma.*

*Rô 3.20, 5.20*

<sup>7</sup> Metĩndjwÿnhmã gwaj bajaxwe kêt kadjy ne gwaj ajte Môjdjê kukràdjà kôt amijo anhÿro baba kêt. Kam, djãm gwaj we baje amim,

—Môjdjê kukràdjà punu, anhÿr jabej? Arkati. Ne ba ren Môjdjê kukràdjà mar kêt ne ren amijaxwemã ikator kêt ne ren ajte amijaxwe mar kêt. Ë, ren me Môjdjê kukràdjào nêje ikukrà kêt, imã me'õ nhõ mÿjja pro kĩnh ne amim 'ã karõ kêt kadjy ren ikukrà kêt ba ren tu imã me õ mÿjja pro kĩnh ne 'ã amim karõo iban kam ren kam amijaxwe ja mar kêt. Me kute nêje ikukrà kêt-kam ne ba ren kam amijaxwe mar kêt.

<sup>8</sup> Nhym be, kati. Arÿm ne me Môjdjê kukràdjào nêje ikukrà. Ba kam arÿm amijaxwe ma. Ba kàjbê imã me'õ nhõ mÿjja puro kĩnh nhym me Môjdjê kukràdjào mã imã,

—Kwãrĩk wãnh amã me õ mÿjja puro prãmje ar aba kêt, ane. Ba kam ba arÿm imã me õ mÿjja pro kĩ:nh. Ne kam arÿm me õ mÿjja puro prãmje ar iba. Ne arÿm imã apÿnh me õ mÿjja puro kĩ:nh ne arÿm ijaxweo imõr me:x ne. Ne ren Môjdjê kukràdjà kêt nhym ren me mar kêt nhym

ren me axwe ren kute kajgo pyrâk. Kam ne ba ren badjwÿ ren amijaxwe mar kêt ne. Nhym be, kati. Arÿm ne ba kukràdjà man ajte kôt ijaxwe ma.

<sup>9</sup> Amrêbê ije Môjdjê kukràdjà mar kêtri ne ba ate ikrãn amim,

—Dja ba Metĩndjwÿnhkôt itĩn ne ar iba rã'ã: rã'ã ne, anhÿro iba. Ne kam kute itĩn pyrâk ne ar iba. Ne kam arÿm Môjdjê kukràdjà man amim,

—Je, arÿm ijaxwe:. Ijaxwe pãnh dja Metĩndjwÿnh arÿm ikangan me biknor tokry djâkam imê, ane. Ba kam arÿm ityk pyrâk. <sup>10</sup> Ba arĩk amim,

—Dja ba Môjdjê kukràdjà mextire man kôt amijo anhÿro iban arÿm Metĩndjwÿnh kôt itĩn ne ar iba rã'ã: rã'ã ne, ane. Ne kam te ije kôt amijo anhÿrmãnh kam arÿm amim,

—Ijaxwe:. Dja Metĩndjwÿnh ikangan me biknor tokry djâkam imê. Nã bãm ã amim ane. Ne kam ije Môjdjê kukràdjà mextire markam amityk ma.

<sup>11</sup> Mÿkam? Bir, ba ne ba amim ijêx ne aminoo aknon amim,

—Dja ba Môjdjê kukràdjà man kôt amijo anhÿro iban Metĩndjwÿnh kôt itĩn ne ar iba rã'ã: rã'ã ne, ane. Nhym be, kati. Me kunĩ te kute kukràdjà marn kôt amijo anhÿr prãmje, ne kam kam amikràò ba. Badjwÿ ne ba kam amikràò iba. Ne kam aminoo aknon arĩk amim,

—Dja ba Môjdjê kukràdjà man kôt amijo anhÿro iban arÿm Metĩndjwÿnh kôt itĩn ne ar iba rã'ã: rã'ã ne, ane. Nhym be, kati. Ije kukràdjâkam amikràkam dja Metĩndjwÿnh me biknor tokry djâkam imê. <sup>12</sup> Djãm kam Môjdjê kukràdjà punu? Kati. Mexkumrêx. Metĩndjwÿnh kukwakam ne Môjdjê kute memã kukràdjà jarênh. Môjdjê kute kam me axwe kêt kadjy me akre katàtkumrêx. Kukràdjà mexkumrêx.

<sup>13</sup> Djãm Môjdjê kukràdjà mex kôt ije amijo anhÿr djô'ã ne ijaxwen me biknor tokry djâkam itêmmã? Arkati. Ba kukràdjà maro iban kam arÿm amijaxwemã ikaton amima. Ne kam te kukràdjà kôt amijo anen mã ijaxwen kam arÿm mã amim,

—Dja Metĩndjwÿnh ijaxwe pãnh me biknor tokry djâkam imê. Be, ijaxwe ne punu:re, anhÿro iba.

*Ta te: axwe kêt prāmje mā axwe'ã kute amijarēnh.*

*Gar 5.17*

<sup>14</sup> Metĩndjwýnh Karõ ne Mõjdjê kukràdjà jarē. Nhyṁ be, jakam djê ne ba mā Metĩndjwýnh Karõ ma? Kati. Imã ijaxwe prā:m ne te ijaxwe kêt prāmje. <sup>15</sup> Djām imã mýjja kĩnhja ne ba o iba? Kati. Imã mýjja kĩnh kêtja ne ba o iba. Mýkam ne ba o iba? Kon. Ije mar kêt. <sup>16</sup> Imã mýjja kĩnh kêtõ ibakam ba arým amim,

—Mrāmri, Mõjdjê kukràdjà mexkumrēx, ane. <sup>17</sup> Djām kam ba ne ba o iba, imã mýjja kĩnh kêtjao iba? Kati. Ikadjwýnhbê ijaxwe ja ne 'ã imã apnēn ijo ba. <sup>18</sup> Djām imex got? Ije amidjwýnhbito kĩnh prāmkam djām imex got? Ije mýjja mexo iba kadjy te imã mýjja mexbit kĩnh. Kam, ije mýjja mexbito iba kadjy mýj dja ba amijon? Kon. Ije amikam mar kêtumrēx. <sup>19</sup> Imã mýjja mex kĩnhja djām tām ne ba o iba? Kati. Imã ijaxwe kĩnh kêtja ijaxwe ja ne ba o iba. Te imã ijaxwe kĩnh kêt mā o iba. <sup>20</sup> Kam, imã ijaxwe kĩnh kêtjao ibakam djām ba ne ba o iba? Kati. Ikadjwýnhbê ijaxwe ja ne ijaxwe'ã imã apnēn ijo ba.

<sup>21</sup> Kam, djā ne ba mrāmri mýjja mexo ibakumrēx? Kati. Bit ije mýjja mexo iba kunĩkõt ne ba mā mýjja punu o iba. <sup>22</sup> Ba ne ba imã Metĩndjwýnh kukràdjà kĩnh. <sup>23</sup> Nhyṁ be, ikadjwýnhbê ijaxwe ja ne ijaxwe'ã imã apnē. Ba amim, “Ba on imexbit”, ane. Ne kam mā ijaxwen te ijaxwe kêt prāmje. Ije mýjja mexo iba prām kunĩkõt mā ijaxwe. <sup>24</sup> Ba amim,

—ÿ, watĩre. Ikadjwýnhbê ijaxwe ja ne ijaxwemã ingrēk prām ba arým me biknor tokry djākam itēmmā. Mýj me'õ dja ikadjwýnhbê ijaxwe jabē ipytā? Nā bām ā amim ane. <sup>25</sup> Bir, gwaj banhõ Bēnjadjwýr djwýnhbê Jeju Kritu dja ikadjwýnhbê ijaxwebē ipytā. Ba kam mā Metĩndjwýnhmā amikĩnh jarē. Tām ne ja.

Ba kam mā amim,

—Ba on Metĩndjwýnh kabēn kõtbit amijo iba, ane. Nhyṁ be, ikadjwýnhbê ijaxwe mā kute ijo ba prāmkumrēx. Tām ne ja.

## 8

*Me kute Metĩndjwýnh Karõ marja tĩn.*

<sup>1</sup> Kritu Jejumē gwaj batipdji nhyṁ arým kute gwaj bakadjwýnhbê bajaxweo apēxmā. Kam, Metĩndjwýnh kute gwaj bamā bajaxwe pānh jarēnh kêt gwaj me biknor tokry djākam babiknor kêtumrēx. Baje amidjwýnhbito kĩnh kadjy bajaxweo baba kêtja, baje Metĩndjwýnh Karõ kõt amijo babaja, gwaj ba dja gwaj me biknor tokry djākam babiknor kêtumrēx.

<sup>2</sup> Mýkam? Bir, gwaj mā bajaxwekam arým me biknor tokry djākam batēmmā. Nhyṁ be, gwaj arým tu amim Kritu Jeju markumrēx nhyṁ Metĩndjwýnh Karõ gwaj babē bajaxwe kurēn kubē gwaj bamā týx jadjà gwaj kam arým katāt amijo baba kadjy batýx. Ne kam babiknor kêtumrēx ne Metĩndjwýnhkõt batĩn ne ar baba rā'ā: rā'ā ne. <sup>3</sup> Bir, gwaj baje amidjwýnhbito kĩnh kadjy bajaxweo babakam ne gwaj te: katāt baje amijo baba prāmje ne te baje Mõjdjê kukràdjà mar ne te kõt baje amijo baba mexmā. Nhyṁ kam Metĩndjwýnh pykamā ta Kra pydji jano nhyṁ ta amijo kute me axwe nhĩ pyrāk ne ar ba. Nām aminhĩ tā pĩte'y'ā wajēt nhyṁ Metĩndjwýnh arým gwaj bamā týx jadjà. Katāt baje amijo baba kadjy arým gwaj bamā týx jadjà nhyṁ gwaj bajaxweja arým gwaj bamā rerekren ajte kute gwaj bajo ba kêt.

<sup>4</sup> Dja gwaj amidjwýnhbito kĩnh kêt ne bajaxweo baba kêt ne Metĩndjwýnh Karõ man kõt ar amijo baba. Nhyṁ kam arým gwaj bamā týx jadjà. Gwaj bajaxwe kêt kadjy bamā týx jadjà. Gwaj kam arým kum bajaxwe kêt ne katāt ar amijo baba. Ne kam arým tu Mõjdjê kukràdjà kõt katāt ar amijo baba.

*Me ta kute amidjwýnhbito kĩnh.*

*Gar 5.16*

<sup>5</sup> Bir, me ta kute amidjwýnhbito kĩnhja ne me kum axwe mar prām. Nhyṁ be, me kute Metĩndjwýnh Karõ kõt amijo baja ne me kum Karõ mar prām. <sup>6</sup> Nhyṁ me mā kum axwe mar prām ja dja me me biknor tokry djākam akuno. Nhyṁ be, me kum Karõ mar prām dja me Metĩndjwýnhkõt tĩn ne ar ba rā'ā: rā'ā ne umar mexkumrēx.

<sup>7</sup> Mýkam ne me mā: kum axwe mar prām akuno? Bir, me kum Metĩndjwýnh kurēkam. Me ja ne me kute Metĩndjwýnh kukràdjà

kôt amijo ba prãm kêt. Nãm me te: kôt amijo ane. <sup>8</sup> Me ja, me kute amidjwýnhbito kĩnh kadjy axweo ba prãmja ne me te kute Metĩndjwýnhho kĩnhmã.

*Me kum Metĩndjwýnh Karõ mar prãm'ã ujarẽnh.*

*Dju r 7.38*

<sup>9</sup> Nhy m be, djãm ar ga ne gar amã ajaxwe maro aba prãm? Kati. Ar ga ne gar amã Karõ mar prãm. Mrãmri ar akam Metĩndjwýnh Karõ ýrkumrẽx jabej ar amã Karõ mar prãm. Nhy m be, me'õkam Kritu Karõ ýr kêtja Metĩndjwýnh kute o aminhõ kêt kumrẽx.

<sup>10</sup> Nhy m be, mrãmri Kritu ar akam ýrkumrẽx jabej ar anhĩbit dja ty. Me axwe djõ'ã me baty kjakam dja ar anhĩbit ty. Nhy m be, Metĩndjwýnh kute ar amã axwe kêt jarẽnh nhy m Karõ kute ar ajo bakam dja gar kôt atĩn ne ar aba rã'ã: rã'ã ne.

<sup>11</sup> Nhy m kam Metĩndjwýnh arým Karõ akubyn Jejuo tĩn. Karõ ja ar akam ýr jabej dja ar gadjwý ar ajo tĩn. Krituo tĩn djwýnh ar ajo tĩn. Dja gar te arým ty nhy m akubyn ar gadjwý ar ajo tĩn. Ar akam Karõ ýr jao akubyn ar ajo tĩn.

<sup>12</sup> Kam, djãm gwaj baje amidjwýnhbito kĩnh kadjy mã bajaxweo babamã? Kati.

<sup>13</sup> Dja gar arek ajaxweo aban arým akuno. Me biknor tokry djakam akuno. Nhy m be, dja gar apýnh ajaxwe krãta. Aparo ajaxwe ýr amrãnh, anhikrao aje ajaxwe nhipe x, anoo aje ajaxwe pumũnh, adjumar djakam aje ajaxwe mar, ajajkwao aje mýjja punu jarẽnh ajaxweja kunĩ krãta kute mrãmri ne me kute mýjja bĩnkam arým àpẽnho krã'yr pyrãk. Dja gar Metĩndjwýnh Karõ maro ajaxwe krãtan arým Metĩndjwýnhkõt atĩn ne ar aba rã'ã: rã'ã ne.

<sup>14</sup> Mýkam? Bir, me kute Metĩndjwýnh Karõ maro ba nhy m kute meo baja ne me mrãmri kubê Metĩndjwýnh krakumrẽx.

<sup>15</sup> Karõ kute ar ajo bakam djãm Metĩndjwýnh ar ajo õ àpẽn kajgon kum ar akurẽn ar ajo ajkẽ gar amã uma: ar aba? Kati. Karõ kute ar ajo bakam Metĩndjwýnh arým ar ajo krakumrẽx gar amã kĩ:nhkumrẽx. Ne kam kum, "Djũnwã", ane. Mebê idjaer kabẽnkõt ne me kum,

"Aba", ane. Nhy m be, me bakabẽnkõt ne gwaj kum, "Djũnwã", ane.

<sup>16</sup> Metĩndjwýnh Karõ ta ne gwaj bakad-jwýnhbê gwaj bamã,

—Be, omũ. Mrãmri abê Metĩndjwýnh krakumrẽxja pumũ, anhýro ba. Kam, gwaj babê Metĩndjwýnh krakumrẽx. Tãm ne gwaj baje markumrẽx. <sup>17</sup> Arým gwaj babê krakam dja gwaj arým Metĩndjwýnh nhõ mýjja o aminhõ. Kritumẽ ro'ã dja gwaj õ mýjja o aminhõn ar o baba. Kõt batokry jabej o aminhõ. Kritukõt mrãmri batokry jabej dja gwaj õ mýjja o aminhõn arým ro'ã bame:xkumrẽx.

*Me kute amimexkumrẽx kam amak.*

*Dju r 17.22; A Kõ 4.17; Kor 3.4*

<sup>18</sup> Bir, mýj dja gwaj batokry jakam kuma? Bir, 'ã dja gwaj amim,

—Jakam ba itokry ne kute itokry rax pyrãk. Nhy m be, dja ba ĩ Kritumẽ ro'ã ime:xkumrẽx nhy m me kunĩ arým ipumũ. Dja ba kam ikĩnh. Ne ikĩnhkam ajbir itokry ja mar kêt, ane. Gwaj ã batokry'ã amim ane. <sup>19</sup> Dja gwaj babê Metĩndjwýnh krakõt bakato. Dja amrẽ õ akati bõx gwaj kam arým bakato. Djãm kam dja gwaj bapunu: got? Kati. Dja gwaj kam bame:xkumrẽx. Mýjja kunĩ Metĩndjwýnh kute ipẽx ja ne amiwýr gwaj bakatorkam ama:. Mry mẽ bãmẽ pykamẽ mýjja kunĩ amiwýr gwaj bakatorkam ama:.

<sup>20</sup> Mýkam ne amiwýr gwaj bakam ama:? Bir, Metĩndjwýnh kute mýjja kunĩ nhipe x ja ne amrẽbê amijo ajkẽn arým punu. Pykakam 'ê kumex ne mýjja djãkrẽ kumex kato. Djãm mýjja ta ne amijo ajkẽ? Kati. Metĩndjwýnh kabẽnkõt ne ã mýjja amijo bikẽnho ane. Nhy m be, ajmãkam dja mýjja kunĩ mexkumrẽx. Mýjja kunĩ amiwýr amimexkam ama:.

<sup>21</sup> Mýkam? Bir, jakam ne mýjja punu prãm, kã rerek prãm, kro prãm, apõk prãm. Nhy m be, mýjja kute amijo mexkam dja punu prãm kêt, kã rerek prãm kêt, kro prãm kêt, apõk prãm kêt kumrẽx. Gwaj babê Metĩndjwýnh kramẽ ro'ã dja mýjja me:xkumrẽx ne kĩ:nhkumrẽx. Dja ĩ gwaj babê Metĩndjwýnh kra amirĩt. Ne kam bamexkumrẽx ne bakĩnhkumrẽx. Nhy m kam me baro'ã mýjja kunĩdjwý

mexkumrêx. Kam ne mỳjja kunĩ amiwỳr amimexkam ama:.

<sup>22</sup> Jakam ne mỳjja kunĩ: tokry pymaje kangãngã. Kute mrãmri ne me nire kra àn tokry pymaje kangãngã pyræk ne kute kra bixadjwỳrkam ama:k pyræk. Amrêbê: ne mỳjja kangãngã jakam kangãngã rã'ã ne.

<sup>23</sup> Gwaj badjwỳ ne gwaj banhĩ nykam ama:. Gwaj badjwỳ baje arỳm amijã Metĩndjwỳnh Karõ kakinhja ne gwaj banhĩ nykam ama:. Dja gwaj babê Metĩndjwỳnh krakumrêx amirĩt. Nhyam akubyn bõxkam dja gwaj bamã banhĩ ny ngã. Dja gwaj banhĩ nyja rerek prãm kêt ne apêx prãm kêt ne ny rã'ã. Banhĩ nykam amakbê bakangãngã. Banhĩja punu prãm kam ba-tokry pymaje bakangãngã.

<sup>24</sup> Gwaj amiwỳr banhĩ ny kam ama: nhyam arỳm Metĩndjwỳnh amim gwaj bapytà. Nhyam be, djãm arỳm ne gwaj banhĩ nyja pumũ? Kati. Gwaj ren arỳm banhĩ ny pumũn ren amiwỳr kam amak kêtumrêx ne ren ate bakrãn ar baba. <sup>25</sup> Nhyam be, kati. Kute gwaj bamã banhĩ ny jadjar kêtiri ne gwaj amiwỳr kam ama:n kam akrãnmã amiwỳr amãr 'iry.

<sup>26</sup> Gwaj banhĩ nykam amakbê Metĩndjwỳnh Karõ kum gwaj bakaprĩ:. Gwaj bakaprĩn barerekrekam ne Karõ kum gwaj bakaprĩ:. Ne Metĩndjwỳnhmã gwaj bajo a'u:w. Gwaj bakaprĩn barerekrekam dja gwaj amim,

—Mỳj dja ba ikaprĩkam Metĩndjwỳnhmã ikabên jarênh on? anen te baje Metĩndjwỳnhmã amijarênhmã. Nhyam kam Karõ kute pykakam gwaj bajo ba arỳm gwaj bama. Gwaj baman arỳm kum gwaj bakaprĩ:. Kum gwaj bakaprĩn arỳm amũ kàjkwakam Metĩndjwỳnhmã gwaj bajo a'u:w. Djãm gwaj bakabênkam ne gwaj bajo a'uw? Kati. Ta kabên mar kêt kam. Kum gwaj bakaprĩ:kam ne kabêno kangãngã gwaj bajo a'u:w. Nãm ã Karõ amybỳm amũ kàjkwakam Metĩndjwỳnhmã gwaj bajo à'wỳro ane.

<sup>27</sup> Metĩndjwỳnh ne kute me kunĩ djumar djakam me kabên mar mexkumrêx ne kam arỳm kute prĩne Karõ kabên mar mex. Karõ ta ne arỳm kute gwaj bajã Metĩndjwỳnh kabên mar. Kute gwaj bajã amim karõkam kabên ja kute mar ne kabên kêt kute kum

gwaj bajo à'wỳr. Jeju kute arỳm gwaj bajo õ me ja, Karõ kute Metĩndjwỳnhmã gwaj bajo à'wỳr. Metĩndjwỳnh kabên kêt kute kum gwaj bajo à'wỳr. Nhyam kam Metĩndjwỳnh arỳm kute prĩne kabên mar mex.

*Kra mex kêt me mex.*

*Rô 8.37; Pir 1.12; Ped k 5.10*

<sup>28</sup> Be, nhyam apỳnh mỳjja kute gwaj bajo baja. Mỳjja kunĩkêt. Apỳnh gwaj bakaprĩ djari nar apỳnh gwaj bakĩnh djari kute gwaj bajo baja. O ne Metĩndjwỳnh amim gwaj bajo mexo tẽ. Gwaj bamã abêja ne gwaj bajo mexo tẽ. Metĩndjwỳnh ne amrêbê: gwaj bakukãm amim gwaj bajã karõn arỳm kêt amiwỳr gwaj bajuw ne ar gwaj bajo ba. Ne kam arỳm apỳnh mỳjjao gwaj bajo mexo tẽ. Ja ne gwaj arỳm baje mar.

<sup>29</sup> Mỳj kadjy ne gwaj bajo mexo tẽ? Bir, Kra mex kêt gwaj bamex kadjy. Mỳjja kunĩ kêtiri ne kute me kukãm õ me ja kunĩ mar ne arỳm amijo me utà. Kra mex kêt kute meo mex kadjy ne amijo me utà. Krakêt kute õ me ja kunĩo mexo tẽmkam ne kute mrãmri ne me kra kutewa apõx nhyam kêt aben nwhitepã kamy kunĩ apõx pyræk. Kra kute kamy krãptĩ:mã wa kadjy ne Kra mex kêt gwaj bajo mexo tẽ. <sup>30</sup> Kute amijo me utar ja ne amiwỳr me ku'uw ne meo ba. Kute amiwỳr me 'wỳr ja ne memã axwe kêt jarê nhyam me arỳm kum mex ne. Kute memã axwe kêt jarênh ja dja meo me: xkumrêx. Nhyam me arỳm kàjkwakam Kra mex kêt mrãmri me: xkumrêx. Dja gwaj kàjkwakam kêt arỳm bame: xkumrêx.

*Metĩndjwỳnh kum me abê ne me'ã ukanga kêt.*

<sup>31</sup> Metĩndjwỳnh arỳm gwaj bamã axwe kêt jarê. Ne kam dja ã Kra kêt prĩne gwaj bajo mex. Kam, djãm me'õ kute Metĩndjwỳnh bê gwaj bajo akêx gwaj kêt bajaxwemã? Kati. Metĩndjwỳnh ã kum gwaj bajabêo anhỳrkam dja me'õ kubê gwaj bajo akêx kêtumrêx.

<sup>32</sup> Nãm amijã Kra djwỳnh pydji nê kêt ne gwaj bakunĩ kadjy kanga nhyam arỳm gwaj bapãnh ty. Djãm kute gwaj bakadjy Kra kangakam kute gwaj babê mỳjja mex'õ nênmã? Arkati. Kute gwaj bamã mỳjja mex kunĩ nhõrmã.

<sup>33</sup> Mỳj me'õ dja gwaj bamã axwe jarê? Kati. Metĩndjwỳnh kute amijo gwaj

bapytârja dja gwaj bamã axwe jarênh kêt. Ta ne arým gwaj bamã axwe kêt jarê gwaj arým kum bamex ne. Kam dja te me'õ kute gwaj bamã axwe jarênhmã.

<sup>34</sup> Mÿj me'õ dja gwaj bamã me biknor tokry djâkam babiknormã arê? Kati. Kritu Jeju ne tyn akubyn tîn ne ajte Metîndjwÿnh djubôk'ân nhÿ. Metîndjwÿnh djubôk'ân nhÿn ajte gwaj banêje kum kabêno nhÿ. Kam dja te me'õ kute gwaj bamã babiknormã arênhmã. <sup>35</sup> Kritu kum gwaj bajabê:

Dja te me'õ gwaj bajo ajkê nhym Kritu kum gwaj bajabê rã'ã:n gwaj bajo ba rã'ã: ne.

Dja te apÿnh gwaj bakaprî djâri ajte gwaj bajo ba nhym Kritu kum gwaj bajabê rã'ã.

Dja te apÿnh mÿjja tÿx ajte gwaj bajo ba.

Dja te me ajte kum gwaj bakurê. Kritumã badjâpênhkam te kum gwaj bakurê.

Dja te ajte gwaj bamã præ:m.

Dja te ajte gwaj bakà kêt kam bamã kry:.

Dja te apÿnh mÿjja puma ajte gwaj bajã apôx.

Dja me ajte te kàxo gwaj bapa. Nhym Kritu mã: kum gwaj bajabê rã'ã:n gwaj bajo ba rã'ã: ne.

<sup>36</sup> Apÿnh gwaj bakaprî djâri kute gwaj bajo ba kôt ne me bakukãmãre amrêbê: Metîndjwÿnhmã amijarên kum,

“Be, amã ar idjâpênhkam ne me kute ar ibîn pyrâk. Myt kunîkôt ne me kute ar ibîn pyrâk. Nãm me ar ijo mrykî'âtomi pyrâk ne kum ar ibîn præm.”

Nãm ã me bakukãmãre Metîndjwÿnhmã anen arým 'ã pi'ók no'ók ne. Kam gwaj badjwÿ bakamingrãnyre dja gwaj mrãmri mekôt ã apÿnh bakaprî djâri maro ane. Jejumã badjâpênhkam ã apÿnh bakaprî djâri maro ane.

<sup>37</sup> Jeju ne gwaj bajã ukanga kêt ne kum gwaj bajabê rã'ã:. Kam te apÿnh mÿjja pumaja gwaj bajo ba gwaj amim Jeju mar tÿx ne arým kubê amijo akêx kêt kumrêx.

<sup>38</sup> Djãm gwaj batykkam kum gwaj bajabê kêt ne gwaj bajã ukangamã? Kati.

Nâr, djãm gwaj batîn ne ar babakam kum gwaj bajabê kêt ne gwaj bajã ukangamã? Kati.

Nâr, djãm kadjy mrãnh djwÿnh 'õ kute gwaj bajo bikênh nhym kum gwaj bajabê kêt ne gwaj bajã ukangamã? Kati.

Nâr, djãm me karõ punu,

nâr djãm jakam apÿnh mÿjja apôx,

nâr djãm amrê apÿnh mÿjja apôx mör,

nâr djãm apÿnh mÿjja 'itÿx gwaj bajo bikênh nhym kum gwaj bajabê kêt ne gwaj bajã ukangamã? Kati.

<sup>39</sup> Nâr, djãm kâjkwa kurüm mÿjja apôx,

nâr djãm pyka krakri mÿjja apôx,

nâr djãm Metîndjwÿnh kute amü apÿnh mÿjja kunî nhipêx'õ kute gwaj bajo bikênh nhym kum gwaj bajabê kêt ne gwaj bajã ukangamã? Arkati.

Apÿnh mÿjja puma te gwaj bajo ajkê nhym Metîndjwÿnh kum gwaj bajabê:n gwaj bajo ba rã'ã:.

Nãm ã kum gwaj bajabêo ane. Gwaj baje Kritu Jejuo banhõ Bênjadjwÿr djwÿnhkôt ã kum gwaj bajabêo ane. Tãm ne ba tu amim markumrêx.

## 9

### *Metîndjwÿnh ta kute amijo me utâr.*

<sup>1-2</sup> Djãm gwaj baje Môjdjê kukràdjã mar ne kôt baje amijo babakam ne Metîndjwÿnh kute gwaj bamã axwe kêt jarênh gwaj arým kum bamex ne? Kati. Nã gwãm tu amim Jeju markumrêx nhym arým gwaj bamã axwe kêt jarê gwaj arým kum bamex ne. Nhym be, inhõ me wÿnh, inhõbikwabê mebê idjaer djãm me kute tu amim Jeju markumrêx? Kati. Me kute amim Jeju mar kêt. Nãm me amim,

—Ba Môjdjê kukràdjã man kôt ar amijo iba nhym Metîndjwÿnh arým imã ijaxwe kêt jarê ba arým kum imex, ane. Me kute amim Jeju mar kêt kam dja Metîndjwÿnh arým pãnh me kanga. Kam ne ba ikadjwÿnhbê ikaprîn iban imÿr rã'ã: ne. Kritu kôt ne ba katât ikaprî'ã ar amã amijarênhkumrêx. Metîndjwÿnh Karõ ta ne ajte idjumar djã kadjwÿnhbê imã,

—Mrãmri 'ã ajêx kêt kumrêx, ane. Mrãmri ikaprîkumrêx. <sup>3</sup> Inhõ me wÿnh, inhõbikwabê mebê idjaer ne me kute amim Jeju mar kêt. Ba ren me kadjy Metîndjwÿnhmã kum,

—Kwãrîk wãnh mebê idjaer kanga kêt. Ba dja ga me pãnh ikanga, ane. Nhym

ren me kam arým tu amim Jeju Kritu markumrêx ba ren arým ã Metĩndjwýnhmã ane. Nhy m be, kati. Me kute amim Jeju mar kêt. Kam ne ba mekam ikaprĩ:re. <sup>4</sup> Mebê idjaerkumrêx. Metĩndjwýnh ne amrêbê meo kra nhy m Metĩndjwýnh rax djô'ã me ra:x. Ne kam ajmã kuten amim Jeju mar kêt ba arým mekam ikaprĩre ne. Metĩndjwýnhmê ne me kute aktã abenmã amijarênh mãm dji nhy m arým memã kum,

—Ba dja ba me ajo djuw mex rã'ã: rã'ã ne, ane. Ne arým memã Môjdjê kukràdjã jarê nhy m me o ba. Ne kukràdjã kôt kum apê ne kum amijarênh ba. Nhy m kute memã mýjja jarênh mãm dji. Me kukãm apýnh mýjja mex apôxmã kute memã arênh mãm dji. Nhy m me ajmã ne Jeju mar kêt ne ar ba. Ba kam mekam ikaprĩre ne.

<sup>5</sup> Me bakukãmãre ne me me babê idjaer kukãmãrekumrêx nhy m Jeju Kritu arým mekam amijo ĩ ne kato. Kubê ne apýnh me ba djã kunĩkôt me kunĩ, mýjja kunĩ Tĩndjwýnh. Pydji ne me:xkumrêx ne ra:x. Mex ne rax rã'ã: rã'ã ne. Mrãmri ne ba ar amã arênhkumrêx. Jeju Kritu me ibê idjaer kurũm kato nhy m kam me ajmã ne Jeju mar kêt ne ba. Ba kam mekam ikaprĩ:re ne imã me kaprĩ:kumrêx.

<sup>6</sup> Metĩndjwýnh kute mebê idjaero kran kute memã, “Me abê ikra”, anhyrkam ne me kwý arým kanga. Me kwý kute kangakam djãm arým kam Metĩndjwýnh kabên kajgo? Kati. Metĩndjwýnh kabênkôt me kwýbê Metĩndjwýnh krakumrêx. Djãm mebê idjaer kunĩ ne Metĩndjwýnh kute meo kra? Kati. Me kwýbit. <sup>7</sup> Nãr, djãm Abraão djô'ã me ar ba kunĩ ne Metĩndjwýnh kute memã,

—Me abê Abraão tãmdjwýkumrêx, anhyro ba? Kati. Me kwýmãbit. Nãm Abraõmã kum,

—Idjak kurũm dja atãmdjwý apôx, ane.

<sup>8</sup> Mýj'ã ne gwaj kabên ja ma? Bir, amrêbê: me bakukãmãre Abraão ta ne amikabênkôt õ àpênh kajgomã Imaêr dji nhy m kato. Djãm kra Imaêrmê ô'ã tãmdjwý apôxmê djã ne Metĩndjwýnh me jao krakumrêx? Kati. Metĩndjwýnh kute kabên pydjin arênh kôt ne prökumrêxmã Idjak dji nhy m arým kato. Nhy m kam Metĩndjwýnh arým o krakumrêx. Kra Idjakmê kam

tãmdjwý apôxmê ne Metĩndjwýnh meo krakumrêx. <sup>9</sup> Arým ne Abraõmã kum,

—Dja ba ĩ bôx nhy m Xara arým kra, ane. Metĩndjwýnh kute kabên pydjin arênh ne ja. Nhy m kam arým kra kato nhy m Metĩndjwýnh amikabênkôt arým o kra.

<sup>10</sup> Nhy m ajtekam me banhingêt Idjak Rebekamã kra ar kudji nhy m tujarô rã'ãkam Metĩndjwýnh arým kra ar'ã amim karõ. <sup>11-13</sup> Ar rwýk kêttri. Ar mex nãr ar axwe kêttri ne arým ar'ã amim karõn Rebekamã kum, “Kutewa dja kutapumã apê”, ane.

Pi'òkkam kute me bakukãmãremã ar arênh kôt ne ã Rebekamã ane. Ne memã kum, “Imã Djako kĩnh. Nhy m be, imã Ixau kĩnh kêt”, ane.

Djãm mexkam ne kum Djako kĩnh? Kati. Djãm axwekam ne kum Ixau kĩnh kêt? Kati. Kute ar'ã amim karõ kôt kum Djako kĩnh ne kum Ixau kĩnh kêt. Idjujarênhja ne me kunĩ'ã amijakre. Mýj dja gwaj me kunĩ'ã amim arênh kuma? Bir, dja gwaj amim,

—Be, Metĩndjwýnh ne amikabên kôt arým amijo me utã. Kute me kêttri me'ã amim karõ kôt ne arým amijo me utã. Djãm me ta mexkôt ne amijo me utã? Kati. Amikabên kôt. Kute amiwýr me 'wýr djwýnh ta amikabên kôt ne kute amijo me utãr, ane. Tãm dja gwaj idjujarênh ja markam amim arênh maro baba.

<sup>14</sup> Metĩndjwýnh ta kute amijo me utãr. Me kator kêttri kute amijo me utãr. Kute amim me'ã karõ kôt kute amijo me utãr. Djãm kam gwaj ba baje amim,

—Be ga, Metĩndjwýnh kute katãt amijo ba kêtja pumũ, anhyrmã? Arkati. Metĩndjwýnh katãt ry tipdji. <sup>15</sup> Ga, Metĩndjwýnh amrêbê: me bakukãmãre Môjdjê mãm kum,

“Ba dja ba amim me'õ'ã karõn tu imã kaprĩ. Ba dja ba amim me'õ'ã karõn tu imã kĩnh.”

Nãm ã Metĩndjwýnh me bakukãmãremã ane.

<sup>16</sup> Mýj ne gwaj kabên ja burũm kuma? Bir, djãm me'õ ta kum kĩnh nhy m kum kaprĩ? Kati. Nãr, djãm me'õ ta kum apê nhy m kum kaprĩ? Kati. Metĩndjwýnh ta ne tu kum me kaprĩ. Tãm ne gwaj Metĩndjwýnh kabênja burũm kuma. <sup>17</sup> Amrêbê: me bakukãmãre ar bari ne Metĩndjwýnh

Parao'ã amakkre kêt mên ajte o bikênho dja. 'Ã amakkre kêt mênho âmri ne kum, "Mÿj kadjy ne ga anã kurûm ruw ba ajo ikato? Bir, ije ajã ajamakkre kêt mênh ne ajo ibikênh kadjy. Ije me kunĩmã akam itỳxo amirĩt kadjy ne ba ajo ikato.

Apÿnh pyka kunĩkôt dja me iraxmã katon abenmã irax ne ipyma jarẽ. Ja kadjy ne ba ajo ikato. Me kute ipyma: mar kadjy. Kadjy ne ba ajo ikato."

Nãm ã Paraomã ane nhym me arÿm 'ã pi'ók no'ók ne. <sup>18</sup> Arÿm ne ba Rebeka'ã ajarên ajte Môjdjê'ã ajarên ajte Parao'ã ajarẽ.

Mÿj dja gwaj Metĩndjwÿnh kute kam arkum kabên jarênh burûm kuma? Mÿj'ã ne amijakre? Bir, Metĩndjwÿnh ta ne amim me'ã karõ. Ne kam amikabênkôt arÿm tu kum me kwÿ kaprĩ. Tãm ne gwaj kute Rebekamã kabên jarênh ne ajte Môjdjê'mã kute kabên jarênh burûm kuma. Ba kam ajte Parao'ã ajarẽ. Mÿj dja gwaj Metĩndjwÿnh kute kum kabên jarênhja burûm kuma? Bir, Metĩndjwÿnh ta ne amim me'ã karõ. Ne kam ta amikabênkôt ajte tu me kwÿ'ã amakkre kêt rẽ. Tãm dja gwaj Paraomã kabên burûm kuma.

<sup>19</sup> Djãm ar ajõ imã,

—Metĩndjwÿnh kute ã amim me'ã karõ anhÿrkam mÿj me'õ ne kubê àptarmã? Arkati. Metĩndjwÿnh ta kute me'ã amakkre kêt mênhkam ne ren memã axwe jarênh kêt. Mÿkam ne memã axwe jarẽ? ane. Djãm aje ã imã anhÿrmã? <sup>20</sup> Kati. Kwãrĩk wãnh mÿjwã wã jarênh kêt. Pykabê ne ga ar aban angri:re ga we ajte akabêno aje Metĩndjwÿnh japanhmã. Nã bãm me bakukãmãre kabên kôt amã ane. Amrêbê ne me memã kum,

"Djãm arÿm mÿjja nhípêx kute ipêx djwÿnhmã kum,

'Mÿkam ne ga ga inhipêx prãm ne kam ã ijo ane'? anhÿrmã? Kati."

Nãm ã me bakukãmãre memã ane. Mrãmri ne me bakukãmãre memã arênhkumrêx. <sup>21</sup> Ga, ngyo ngôn nhípêx djwÿnh ta kute amim 'ã karõ kôt kute ngy kajgo jamÿnh ne o ngôn nhípêxja pumũ. Ta mÿjja mex kadjy ngôn nhípêx. Nãr, ajte ta mÿjja punu kadjy ngôn nhípêx. Metĩndjwÿnhdjwÿ, kute me ipêx djwÿnh ta amikabênkôt tu ã

meo ane. Djãm kam gwaj baje bakabêno apanhmã? Kati.

<sup>22</sup> Ta amikabênkôt tu ã meo ane. Mekam ngryk ne tu kute meo biknorkumrêx kadjy ne me ipêx. Me kwÿ ja'ã ne ta amim karõn amim,

—Dja ba ã me kwÿkam ingryko amirĩt ne. Nhym me kunĩ ipumũn arÿm 'itỳx ma, ane. Ne kam ajte amijã ngryk nêñ amiwÿr me amãr 'iry.

<sup>23</sup> Ne kam mekam ukaprĩ kadjy me kwÿ nhípêx. Amrêbê: ne ta me'ã amim karõn amim,

—Me ja dja ba amimexo meo me:xkumrêx. Ne me kunĩmã mekam idjukaprĩo amirĩt. Me kunĩ dja me 'ã ipumũn ime:xkumrêx ma. Ja kadjy dja ba amimexo meo me:xkumrêx, ane. Djãm ta kute amim me'ã karõn ajte ã me ipêxo anhÿrkam djãm katàt kute amijo ba kêt? Kati. Katàt ne amijo ba. <sup>24</sup> Ta ne tu ã gwaj badjwÿ gwaj bajo mexo ane. Ta ne amiwÿr gwaj bajuw ne gwaj bajo ba. Djãm me ibê idjaerbato ba? Kati. Me abajtemdjwÿo ba.

<sup>25</sup> Metĩndjwÿnh ta ne amim me'ã karõ. Ne kam ta amikabênkôt arÿm amijo me utàn ar meo ba. Me bakukãmãre Ôdjêja amrêbê: ja jarẽ. Metĩndjwÿnh ta amikabênkôt kute amijo me kwÿ pytãrja jarẽ. Metĩndjwÿnh ne Ôdjêjamã kabên jarẽ nhym me bakukãmãremã kum,

"Metĩndjwÿnh ne me amã,

'Amrêbê ije me kwÿo inhõ kêt. Nhym be, jakam dja ba memã inhõ me ja jarẽ.

Me kwÿ amrêbê imã me kĩnh kêt. Nhym be, jakam dja ba imã me kĩnh.'

Nãm ã Metĩndjwÿnh me amã ane."

Nãm ã me bakukãmãre Ôdjêja memã ane nhym me arÿm kabên'ã pi'ók no'ók ne. Ga, Metĩndjwÿnh ta kute amijo me bajtem kwÿ pytãrja pumũ. <sup>26</sup> Nhym kam ta ajte memã kum,

"Metĩndjwÿnh ne me amã,

'Pyka 'ókam me'ã ne ba memã kum,

Ije meo ikra kêt ne ja, ane. Pyka tãm kam dja me ã memã kum,

Me abê Metĩndjwÿnh tĩn ne ar baja kra ar, ane. Dja me ã memã ane', ane.

Metĩndjwÿnh ã me amã ane."



Nãm ã me bakukãmãre Ôdjêja memã ane nhym me arÿm 'ã pi'òk no'òk ne. Ga, ajte Metĩndjwÿnh ta kute amijo me bajtem kwÿ pytãrja pumũ.

<sup>27</sup> Nhym kam me bakukãmãre Idjaij ajte amrêbê: tãm jarê. Metĩndjwÿnh ta amikabênkôt kute amijo me kwÿ pytãrja jarê. Idjaij mebê idjaer'ã kàj bê memã kum, "Dja mebê idjaer krãptĩ: kute mrãmri ne ngô raxbê pyka kêt kam pykati 'ykã krãptĩ pyrãk.

Dja te me krãptĩ nhym arÿm amim me ngrêrebit pytã. Me anhybit me utã. Me kute amim mar me utã.

<sup>28</sup> Nhym me kute Metĩndjwÿnh mar kêt djwÿ. Mÿj dja me on?

Bir, Bênjadjwÿr djwÿnhbê Metĩndjwÿnh kute pykabê me axwemã pãnh jarênhmã. Dja meo kukrà kêt kumrêx ne katãt memã pãnh jarênhkumrêx ne on inomã kumê."

Nãm ã me bakukãmãre Idjaij memã ane nhym me arÿm 'ã pi'òk no'òk ne. Ga, ajte Metĩndjwÿnh ta kute amijo me kwÿ pytãrja pumũ.

<sup>29</sup> Nhym kam Idjaij ajte tãm'ã ajarên memã kum,

"Bênjadjwÿr djwÿnh 'itÿxo kubê kumkati amrêbê: me axwe raxkam arÿm krĩraxbê Xôtômamê krĩraxbê Gomora gan pyka mê o amrà.

Ne ren kum me bajã ma kêt gu ren me badjwÿ arÿm mekôt bakêt. Nhym be, kati. Nãm kum me bajã ma nhym kam me badjô'ã me anhy rã'ã, me kwÿ rã'ã ne."

Nãm ã me bakukãmãre Idjaij memã ane. Ga, me bakukãmãre kabênja kunĩ kôt Metĩndjwÿnh ta amikabênkôt kute amijo me kwÿ pytãr ne meo baja pumũ.

### *Mebê idjaer kute Kritu mar kêt.*

<sup>30</sup> Mÿj dja gwaj jakam abenmã arê? Bir, me bajtem ne me amrêbê kute Metĩndjwÿnhmã amijo mex jabej kêt. Nãm me te kum amijo mex jabej kêt nhym Metĩndjwÿnh ta arÿm kum me kaprĩn memã axwe kêt jarê. Me tu amim Jeju Kritu markumrêx nhym Metĩndjwÿnh arÿm tu memã axwe kêt jarê nhym me arÿm kum mex ne.

<sup>31</sup> Nhym be, mebê idjaer kute Metĩndjwÿnh kukràdjã marn kôt amijo bakam djãm me arÿm kum axwe kêt? Kati. <sup>32</sup> Mÿkam? Bir, me kute amim Kritu mar kêt kam. Me kute amim,

—Djãm ba dja ba amim Jeju ma got? Ba Môjdjê kukràdjã man kôt ar amijo iban arÿm Metĩndjwÿnhmã ijaxwe kêt, ane. Me kute amim anhÿro bakam ne me axwe rã'ã ne. Kam ne me kute kên me par tok nhym me rôrôk pyrãk. Me kute amim Jeju mar kêt. <sup>33</sup> Metĩndjwÿnh ne amrêbê me bakukãmãremã kum,

"Ota, ba Xijãokam kên'õ nhÿr. Kên wã kute me par tokkam me rôrôk prãm kumrêx. Kam dja me kum kên wã kurê.

Nhym be, dja me kwÿ ĩ pÿnhkôt tu amim markumrêx ne arÿm pijãm kadjy kêt kumrêx."

Nãm Metĩndjwÿnh ã memã ane nhym me arÿm 'ã pi'òk no'òk ne. Kritu'ã ne kên jakren arê nhym me kum kurêmã. Nhym kôt mebê idjaer ã kum kurên mar kêt ane.

## 10

<sup>1</sup> Akmere, àpnhĩre ar, imã mebê idjaer kĩ:nh. Mebê inhôbikwakam imã me kĩnh. Metĩndjwÿnh ren amim mebê idjaer kunĩ pytã ba ren mekam ikĩnhkumrêx. Nã bãm mã Metĩndjwÿnhmã kum,

—Gop amim me utã. Gop amim me utã, anhÿro iba.

<sup>2</sup> Ba ne ba amrêbê mekam ar iban prĩne me omũ. Kam djãm me Metĩndjwÿnhmã àpênh prãm ngri got? Me kum àpênh prã:m. Me te kum àpênh prãm ne kute Metĩndjwÿnh mar kêt. Me arĩk ar kupa'ã ba.

<sup>3</sup> Metĩndjwÿnh ta ne memã kum,

—Me kute amim Kritu markam dja ba memã axwe kêt jarê nhym me arÿm imã mex ne, ane. Nhym me atekam ajte mar kêt ne amim,

—Djãm ba ije amim Jeju marmã got? Kati. Ba dja ba ijaxwe kêt. Ba dja ba Môjdjê kukràdjã man kôt ar amijo iban arÿm ijaxwe kêt ne Metĩndjwÿnhmã imex ne, anhÿro ba.

<sup>4</sup> Djãm gwaj ba baje amim,

—Djãm ba ije amim Jeju marmã got? Kati. Ba dja ba Môjdjê kukràdjã man

kôt ar amijo iban arÿm Metĩndjwÿnhmã ijaxwe kêt, anhÿrmã? Djãm gwaj baje ã amim anhÿrmã? Kati. Kritu ta ne gwaj bakadjy prĩne kukràdjã man kôt amijo ba me:xkumrëx. Gwaj baje Kritubit mar ne tu amim markumrëx nhym Metĩndjwÿnh arÿm tu gwaj bamã axwe kêt jarë gwaj arÿm kum bamex ne.

*Mÿj dja me nën arÿm axwe kêt?*

<sup>5</sup> Me bakukãmãrebê Môjdjê ne amrëbê: memã kum,

“Dja me katàt kukràdjã man kôt amijo ban kam arÿm tĩn ne ar ba rã'ã: rã'ã ne”, ane.

Kute memã ja jarënhkam mÿj dja me nën arÿm axwe kêt? Bir, dja me katàt kukràdjã man kôt ar amijo ban arÿm axwe kêt. Ja ne Môjdjê amrëbê memã arë. <sup>6</sup> Nhym be, ajbir jakam me kute tu amim Jeju markumrëx, nhym Metĩndjwÿnh arÿm tu memã axwe kêt jarë nhym me arÿm kum mex ne. Gar akwÿ ne gar arĩk amim,

—Mÿj me'õ godja kàjkwa djwÿnhmã wabi? Ne ren me'õ kàjkwamã wabin ren iwÿr Krituo ruw ba ren kôt omũn tu amim markumrëx, ane. Kwãrĩk wãnh ja jarënh kêt. <sup>7</sup> Gar akwÿ ajte arĩk amim,

—Mÿj me'õ godja me tyk ba djãkam ruw? Ne ren me'õ me tyk ba djãkam Kritu'ÿr ruw ne ren iwÿr o wabin iwÿr o bõx ba ren tu amim markumrëx, ane. Kwãrĩk wãnh ja jarënh kêt. Mÿkam dja gar ja jarënh kêt? Bir, arÿm ne me ar amã Kritu'ã ajarë gar arÿm ama. Ne kam ajte tu amim markumrëx kêt.

<sup>8</sup> Metĩndjwÿnh ne me bakukãmãremã kum, “Djãm onĩj ikabën nõ? Kati, arÿm ne akadjwÿnhbê nõ. Ajajkwa kôt ne ga memã arë nhym ajajkwakam nõn adjumar djã kadjwÿnhbê nõ”, ane.

Kabën ja ne bar kàj bê memã arë. Dja me kwÿ tu amim kabënja mar ne amim Kritu markumrëx. Ja kadjy ne bar memã kabën ja jarë. <sup>9</sup> Nã bãm ar memã kum,

—Dja gar amibu'ã memã amijarën memã kum, “Mrãmri Jejubê inhõ Bënjadjwÿr djwÿnhkumrëx”, anen ajte ar adjumar djã kadjwÿnhbê amim, “Mrãmri ne Metĩndjwÿnh akubyn Jejuo tĩnkumrëx”, ane nhym arÿm amim ar apytã, ane. Ar ikabën ja ne bar memã arë. <sup>10</sup> Mÿkam? Bir,

me umar djã kadjwÿnhbê ne me tu amim markumrëx nhym arÿm tu memã axwe kêt jarë nhym me arÿm kum mex ne. Ne kam amibu'ã memã amijarën memã kum,

—Arÿm ba tu amim Jeju markumrëx, ane nhym arÿm amim me utã. <sup>11</sup> Me bakukãmãre kabën kôt ne ba ar amã ikabën ja jarë. Amrëbê: ne me bakukãmãre memã kum,

“Djãm me kute tu amim markumrëx nhym Metĩndjwÿnh kute amim me utãr kêt nhym me arÿm pijãm? Kati.

Djãm me kute amim, ‘Ba arÿm tu amim Metĩndjwÿnh markumrëx nhym arÿm ibé kajgo’, anhÿrmã? Kati. Me kwÿ ï pÿnhkôt kute tu amim markumrëxja dja Metĩndjwÿnh arÿm me utãrkumrëx.”

Nãm ã me bakukãmãre memã ane nhym me arÿm 'ã pi'òk no'òk ne. Ga, me kute tu amim markumrëx nhym kute amim me utãrja pumũ. Mrãmri me kabënkumrëx. Ba kôt ar amã ikabën jarë.

<sup>12</sup> Djãm kam kute mebê idjaerbit pytãr ne kute amũ me bajtembê kreguja pytãr kêt? Kati. Kute me bajtemdjwÿr pytãr. Mÿkam? Bir, Bënjadjwÿr djwÿnh ne pydji:n me kunĩmã bënjadjwÿr rax. Mebê idjaermã Bënjadjwÿr ra:xi. Me bajtemmã Bënjadjwÿr ra:xi. Me ï pÿnh kôt me kute kum amijo à'wÿrja ne Bënjadjwÿr djwÿnh kute apÿnh meo djuw mex. Õ mÿjja kume:xo meo djuw mex. <sup>13</sup> Me bakukãmãre ne me amrëbê: ã memã ane. Nãm me memã kum,

“Me kwÿ ï pÿnhkôt dja me Bënjadjwÿr djwÿnhmã amijo a'uw ne kum, ‘Ipytã’, ane nhym arÿm me utã.”

Nãm ã me bakukãmãre memã ane. Ga, me bajtemdjwÿr kute tu amim Jeju markumrëxja pumũ. Metĩndjwÿnh kute amim me adjwÿnhdjwÿr pytãrja pumũ. Mrãmri ne me kabënkumrëx ba me amã arënhkumrëx.

<sup>14</sup> Nhym be, me kute amim Jeju kamnhĩx kêtka djãm me kute kum, “Jeju ipytã”, anhÿrmã? Kati. Ne ajte kam me kute Jeju'ã ujarënhja mar kêtka djãm me kute amim kamnhĩxmã? Kati. Ne ajte kam kraxje me kute memã Jeju'ã ujarënh kêtka djãm me kute marmã? Kati. <sup>15</sup> Ne ajte kam me kute me'ÿr me anor kêtka djãm me

kute memã Jeju'ã ujarënhmã? Kati. Nhym be, Metïndjwýnh arým me'ýr me kwý jano nhym me arým kaj bê memã 'ã ajarë nhym me kum kî:nhkumrëx. Me bakukãmãre kabën kôt ne ba ar amã ja jarë. Amrëbê: me bakukãmãre memã kum,

“Kritu'ã ujarënh ny, kôt me umar mexja. Apýnh mýjja mex'ã me ujarënh nyja. Ujarënhkam me kî:nhkumrëxja. Djãm kute memã 'ã ujarënh ny jao mrãnh djwýnh mex ngri got? Me'ýr bôxkam me kum kî:nhkumrëx.”

Nãm ã me bakukãmãre memã ane. Ga, me kwý kum kînhkumrëxja pumû. Mrãmri me kabënkumrëx.

<sup>16</sup> Nhym be, djãm mebê idjaer kunĩ ne me arým Kritu'ã ujarënh ny ma? Djãm me kunĩ arým Krituo aminhõ? Kati. Mebê idjaer kunĩ kute Krituo aminhõ kêt. Me bakukãmãre Idjaij ne amrëbê: me arë. Me kute amim mar kêtja jarë. Nãm memã kum, “Nhýnh got me'õ kute tu amim ar ikabën markumrëx?”

Nãm me bakukãmãre ã mebê idjaer jarënh ane. Ga, me kute amim mar kêtja pumû.

<sup>17</sup> Bir be, kam me kute memã Metïndjwýnh kabën jarënhkambit ne me arým kuman tu amim markumrëx. <sup>18</sup> Djãm arým ne me mebê idjaermã 'ã ujarënh ny jarë nhym me arým kuma? Nà, arým. Amrëbê: ne me bakukãmãre memã arë nhym me arým kuma. Nãm me memã kum,

“Apýnh me ba djã kunĩkôt ne me me kabën ma. Djãm jakambit ne me kuma? Kati. Orĩ:nãdjwý ne me arým kuma.

Apýnh me ba djã kunĩkôt ne me arým me'ýr kabëno bôx ne arým memã arë nhym me arým kuma.”

Nãm me bakukãmãre ã memã ane. Ga, mebê idjaer arým kute Kritu'ã ujarënh ny marja pumû. <sup>19</sup> Ba ajte me amã arë. Mýj'ã ujarënh ny kute amijakreja djãm me kute mar? Nà. Me kute mar. Ne kam me kute mar kajgo. Metïndjwýnh ne amrëbê mebê idjaermã amikabën jarë. Me bajtem'ã memã amikabën jarë. Nhym Mõjdjê arým kabën man amũ Metïndjwýnh kukwakam me bakukãmãremã arën memã kum,

“Metïndjwýnh ne me amã,

‘Me aje me'ã, Me kakrit, anhýrja. Me ja dja ba amim me utã. Dja ga me kam te

ga aje me urak prãmje angryk ne. Ne aje me'ã, Me no kêt, anhýr ja. Me ja dja ba amim me utã. Dja ga me kam te ga aje me urak prãmje amim angry:k ne.’

Nãm ã Metïndjwýnh me amã ane.”

Nãm ã me bakukãmãre Mõjdjê mebê idjaermã ane. <sup>20</sup> Ne kam me bakukãmãre Idjaijdjwý kum mebê idjaer puma kêt ne ajte me bajtem'ã memã ajarë. Metïndjwýnh ne kum amikabën jarë nhym kukwakam arým me bakukãmãremã kum,

“Metïndjwýnh ne me amã,

‘Me kute ijabej kêt ja ne me arým imã kato. Ba ne ba memã amijo amirít nhym me arým imã kato. Me kute ijabej me kukjêr kêtjamã ne ba amijo amirít.’

Nãm ã Metïndjwýnh me amã ane.”

Nãm ã Idjaij me bajtem'ã mebê idjaermã ane. <sup>21</sup> Nhym Metïndjwýnh ajte mebê idjaer'ã memã kum,

“Me kute aminhirôbê ikabën rënh ne amakkre kêt. Me jamã ne ba kryrãm te ipa koror ne amiwýr me kam amako iku'ê: nhym ijã akamãt nhym me kute imar kêtumrëx.”

Nãm ã Metïndjwýnh mebê idjaermã ane. Be ga, mebê idjaer arým kute Kritu'ã ujarënh ny mar ne mar kajgoja pumû.

## 11

*Metïndjwýnh kute amijo me anhybit pytãr.*

<sup>1</sup> Kam djãm arým ne Metïndjwýnh õ mebê idjaer kunĩ kanga? Arkati. Ga, badjwý ibê mebê idjaer 'õja pumû. Nhym bê ne badjwý kute ikanga. Ibê Abraão tãmdjwý'õ. Tãmdjwý Bënjamĩn djõ'ã ne ba ikato. Ba ibê idjaerkumrëx nhym kute ikanga kêt. <sup>2</sup> Metïndjwýnh ne me kunĩ kêttri amijo me kwý pytã. Kute amijo mebê idjaer kwý pytãr ja ne kute me kanga kêt. Me bakukãmãre Erij ne amrëbê Metïndjwýnhmã mebê idjaer'ã kabën ne 'ã ajarë. Nhym me arým kabën'ã pi'ók no'ók. Erij kabën dja gar ama. Nãm arĩk amim,

—Arým ne me kunĩ Metïndjwýnh kanga, ane. <sup>3</sup> Ne kam Metïndjwýnhmã kum,

“Bënjadjwýr djwýnh, arým ne me akukwakam kabën jarënh djwýnh kunĩ

pa. Ne arým apÿnh anhõ ki djari kungrà. Ba kam ipydjin ar iba nhym me kute badjwÿ ibĩnmã ijabej ar ba.”

Nãm ã Erij kum ane nhym me arým 'ã pi'òk no'òk ne. <sup>4</sup> Nhym mÿj ne Metĩndjwÿnh me bakukãmãre Erijmã arẽ? Bir, nãm kum,

“Ba ne ba amim me krãptĩ: pytà. Me'ã akre kubê 7.000 kute bajbit amim imarkam ne me Baaumã kõnkrão krĩ kêt ne kute kum amijarẽnh kêtumrẽx ba arým amim me utà.”

Nãm ã Metĩndjwÿnh me bakukãmãre Erijmã ane nhym me arým 'ã pi'òk no'òk ne. Be ga, amrêbê: mebê idjaer kwÿ kute amim Metĩndjwÿnh mar tÿxja pumũ. Me anhy kute amim mar tÿx. <sup>5</sup> Ajbir jakamdjwÿ mebê idjaer janhy kute amim Jeju Kritu mar tÿx. Ta ne me kêtri tu kum me anhy kaprĩn amijo me utà nhym kam me kute amim mar tÿx. <sup>6</sup> Djãm me ta kute katàt kabên mar ne kôt kute amijo ba pãnh ne Metĩndjwÿnh amijo me utà? Kati. Ta ne me kêtri tu kum me kaprĩn arým amijo me utà. Nãm ren me kute arým kum o pãnhkam ren amijo me utà djã ne ren kam tu kum me kaprĩ? Kati. Kam ren tu kum me kaprĩ kêt. Nhym be, kati. Tu kum me kaprĩkumrẽxkam ne me kute kum o pãnh kêt.

*Mebê idjaer krãptĩ jamakkre kêt.*

<sup>7</sup> Kam, djãm gwaj baje amim,

—Metĩndjwÿnh ne arým õ mebê idjaer kanga, anhÿrmã? Kati. Mebê idjaer ta te kute Metĩndjwÿnhmã amijo mex jabej ar ban axwe rã'ã ne. Ne kam Metĩndjwÿnhmã mex kêt ne. Nhym be, Metĩndjwÿnh kute me kêtri amijo mebê idjaer kwÿ pytàr ja ne me arým Metĩndjwÿnhmã mex ne. Nhym kam mebê idjaer 'ã kàtãmja Metĩndjwÿnh arým me'ã amakkre kêt mẽ. <sup>8</sup> Me bakukãmãre kute amrêbê: me'ã pi'òk no'òk kôt Metĩndjwÿnh ã meo ane. Kamã ne me bakukãmãre memã kum,

“Metĩndjwÿnh ne me'ã kãptĩ mẽ. Nãm me te non no kêt. Te me amak kreken kute mar kêt.”

Nãm ã me bakukãmãre memã ane nhym me jakam amakkre kêt rã'ã. <sup>9</sup> Nhym me bakukãmãre Dawi ajte memã tãm jarẽ. Me amakkre kêt nhym 'ã memã kum,

“Me kute ate krãn àkur raxbit markam gê Metĩndjwÿnh me aêrbê memã axweo pãnh.

Gê me te: aminêje amijo ane. Kute mrãmri ne mrybê ka'ê aêrbê kute unênh pyræk, nhym kute kên me aêrbê kute me tok nhym me rôrøk pyræk.

<sup>10</sup> Gê me amakkre kêt ne no kêt gê me kaprĩ pymaje ibôn mrãnh rã'ã: rã'ã ne.”

Nãm ã me bakukãmãre Dawi me amakkre kêt'ã memã ane.

*Kute me'ã pidjô jakren 'ã memã ujarẽnh.*

<sup>11</sup> Ba kam ar amã arẽ. Mebê idjaer ne me kum Jeju kĩnh kêt ne arým axwe. Kute mrãmri ne kute kên me par tok nhym me rôrøk pyræk. Me kum kĩnh kêtum djãm Metĩndjwÿnh tu kute me kangakumrẽxmã? Arkati.

Nhym be, arým me kum Jeju kĩnh kêtum ne Metĩndjwÿnh arým me bajtem'ÿr akêx ne arým amim me utàro dja. Mebê idjaer ne mebê idjaer kêtjamã me bajtem jarẽho ba nhym Metĩndjwÿnh arým me'ÿr akêx ne me utàro dja. Dja amim me bajtem pytàro dja nhym mebê idjaer arým omũ. Kute me bajtem pytàrkôt omũ:n arým amim ngryk ne. Me te ta kute me uræk prãmje amim ngryk ne. Ne amim,

—Je tô mÿkam ne ba me imã Jeju kĩnh kêt? Ga, Metĩndjwÿnh kute me bajtembit pytàrja pumũ, ane. <sup>12</sup> Nãm me kum Jeju kĩnh kêt nhym me kute Jeju mar arým amũ me bajtemjamã Jeju'ã ajarẽ. Apÿnh me ba djã kunĩkôt ne me memã arẽ nhym me arým tu amim markumrẽx. Nhym kam Metĩndjwÿnh arým amim me utà. Nhym kam me arým kĩ:nhkumrẽx. Nhym be, mebê idjaer kum Jeju kĩnh kêtum ne me kĩnh kêtumrẽx.

Nhym be, mebê idjaer kute meo me bajtembit, me bajtembit ne Metĩndjwÿnh amim me utà. Kute amim me utàrkam ne me kĩ:nhkumrẽx. Kam godja mebê idjaer amim ngryk ne ã akubyn Metĩndjwÿnh'ÿr amijo akêx jabej ne tu amim Jeju markumrẽx jabej. Me kute tu amim Jeju markumrẽxkam dja me kĩ:nhkumrẽx. Dja me kĩnho me bajtem jakrenh me:x ne.

<sup>13</sup> Me abajtemmã ne ba ikabên. Kritu ne me abajtemmã ijano. Ije me amã Kritu'ã idjujarẽnh kadjy ijano. Ije me amã Kritu'ã

idjujarênhkam ikĩnh ne mebê idjaermã me akam ikĩnh jarênh kume:x. <sup>14</sup>Nã bãm inhõ me wýnhmã me ajarên memã kum,

—Ba me bajtemmã Kritu jarênhõ iba nhym me krãptĩ: arým tu amim markumrêx nhym Metĩndjwýnh arým me krãptĩ: pytà, anhýro iba. Ba ã memã anhýro ibao ane. Nhym godja me te: ta kute me uràk prãmje amim,

—Ga, Metĩndjwýnh kute arým ikangaja pumũ. Nãm me bajtembit me utàro ba. Jakam dja ba tu amim Jeju markumrêx gê Metĩndjwýnh arým amim ipytà, anhýr jabej. Godja me amim ngryk ne arým tu amim Jeju markumrêx jabej nhym Metĩndjwýnh arým me utà.

<sup>15</sup> Nhym be, jakam mebê idjaer kute amim Jeju mar kêt. Kam Metĩndjwýnh arým me kanga. Nãm me bajtem'ýr amijo akêx ne arým amim me utàro ba. Me kute tu amim Jeju markumrêxkam ne amim me utàro ba. Nhym be, godja mebê idjaer amim ngryk jabej ne tu amim Jeju markumrêx jabej nhym Metĩndjwýnh arým amim me utà. Kam, arým kute me utàrkam mýj dja me kam nê? Bir, dja me kute mrãmri ne arým me tyk ne akubyn tĩn pyràk. Kam dja me kunĩ kĩnhkumrêx.

<sup>16</sup> Amrêbê: ne me abenmã kum,

—Be, me kukãmãkjê kukràdjà kôt ne me kute Metĩndjwýnh kumrêxmã djwý kwý rênh ne kum òr. Godja djwý kumrêx me kute kum rênhja kum mex jabej nhym kôt djwý kunĩdjwý kum mex. Nàr, godja pidjô jarê kum mex jabej nhym apýnh padjwý kum mex, ane. Mrãmri ne me kute abenmã arênhkumrêx. Me bakukãmãre Abraão ne kute uràk. Abraão arým Metĩndjwýnhmã mex. Kam, dja ô'ã mebê idjaerdjwý Metĩndjwýnhmã mex.

<sup>17</sup> Ba me amã arê ga me ama. Mebê idjaer ne kute pidjô djujabê pa pyràk. Me abajtem ne ga me aje pidjô djujabê kêt pa pyràk. Mebê idjaer kute Jeju mar kêt kam ne Metĩndjwýnh arým me kangan kam arým me abajtem pytà me ajo aminhõ. Kute mrãmri ne me'õ kute pidjô bàrikam pa djujabê mok ne kute pãnh pa djujabê kêt jadjàr pyràk. Me ga ne ga me arým jakam tu amim Jeju markumrêx nhym Metĩndjwýnh

arým me apytà me ajo aminhõn me ajo djuw mex. Me aje mrãmri ne pidjô djujabê kêt pa kute pidjô djujabê jarêkam kangô mex kaôro arija pyràk. Mebê idjaer djwýnh kwý kute amim Jeju marmê ro'ã ne Metĩndjwýnh arým me ajo djuw mex. <sup>18</sup> Djãm me amã mebê idjaer kurêmã? Djãm me aje amijo adjàmran amim,

—Be, ga, Metĩndjwýnh arým mebê idjaer kangan kum me bajbit ikĩnhja pumũ, anhýrmã? Kwãrĩk wãnh amijo adjàmra kêt. Ga me abajtem dja ga me mrãmri amijã ikabên ma. Djãm ga ne ga Metĩndjwýnhmã týtangij got? Arkati. Ta ne amã týtangij kute mrãmri ne pidjô jarê bàrimê pamã týtangjênh pyràk.

<sup>19</sup> Ga me ren amim,

—Be, Metĩndjwýnh ne mebê idjaer kangan arým me ibajtembit ipytà. Nãm me kanga kute mrãmri ne me'õ kute pidjô djujabê pa mok ne kanga pyràk. Ne kam arým pãnh pidjô djujabê kêt pao tèn pidjô djujabê bàrikam adjà. Nãm Metĩndjwýnh ã me ijo ane, ane.

<sup>20-21</sup> Mrãmri ne Metĩndjwýnh arým amim me apytàro ba. Nhym be, kwãrĩk wãnh amijo adjàmra kêt ne amim,

—Te me ibajtem nhym Metĩndjwýnh arým me ijo kra. Me bajbit kum me imexkumrêx, anhýr kêt. Kwãrĩk wãnh ã amijo adjàmrao anhýr kêt. Dja ga amã Metĩndjwýnh puma. Mebê idjaer kute Jeju mar kêt kam ne Metĩndjwýnh arým me kanga. Nãm me kanga kute mrãmri ne me kute pidjô pa djwýnh mok ne kanga pyràk. Me ren Jeju kanga kêt nhym ren arým amim me utà. Me ga ne ga me tu amim Jeju markumrêx nhym arým amim me apytà. Kam, dja ga me akubyn amijo tèn amiman amidjwýnhõ adjàmra kêt. Metĩndjwýnh ta kum me akaprĩkam ne arým me apytà. Dja ga me amidjwýnhõ amra nhym arým me gadjwý akanga.

<sup>22</sup> Dja ga me Metĩndjwýnh kum me kaprĩja ma:ro aba. Ne uma:djwý ma:ro aba. Mebê idjaer ne me kute amim Jeju mar kêt ne arým Metĩndjwýnhbê amijo akêx. Kam ne arým mekam ngryk. Nhym be, me ga ne arým tu kum me akaprĩ. Dja ga me ukaprĩ ma:ro aba. Godja ga me ukaprĩja mar

kêt jabej nhym arÿm me akanga. Dja me akanga kute mrãmri ne me kute pidjô pa mok ne wãnh kanga pyræk.

<sup>23</sup> Mebê idjaer arÿm kute Jeju mar kêt djwÿ godja me kwÿ arÿm Jeju'ÿr amijo akêx jabej ne tu amim markumrêx jabej. Metĩndjwÿnh dja ajte meo kran me utà mrãmri ne kute amim me abajtem pytarja pyræk. Kute akubyn me utàr mar mexkumrêx.

<sup>24</sup> Ga, me abajtem Metĩndjwÿnh kute me apytàr ne ajo kraja pumũ. Nãm amim me apytà kute mrãmri ne me kute pidjô djujabê kêt paja pidjô djujabêkam adjàr pyræk. Kute ã kum me akaprĩ anhÿrkam djãm kum mebê idjaer kaprĩ prãm kêt? Kati. Mebê idjaer ne me kute mrãmri ne pidjô djujabê pa pyræk. Kum me kaprĩ prãm kumrêx. Kum ajte meo kra prãm kumrêx ne kum amim me utàr prãm kumrêx. Kam dja me ajte kubê Metĩndjwÿnh krakumrêx kute mrãmri ne amrêbê me kukãmãrebê Metĩndjwÿnh krakumrêxja pyræk.

*Metĩndjwÿnh kute tũmrãm mebê idjaer kunĩ pytar.*

<sup>25</sup> Akmere ar, mebê idjaer kwÿ rax ne me amakkre kêt ba arÿm me amã me arê. Me aje mar kadjy ne ba me amã arê. Dja ga me aman arÿm amijo adjãmra kêt. Dja mebê idjaer djwÿnh amakkre kêt ar ba:. Nhym kam me bajtem Metĩndjwÿnh 'ÿr amijo akêx ne kôt ar amijo ba. Metĩndjwÿnh ne me kêttri arÿm amijo me bajtem kwÿ pytà. Kute amijo me utàrja kunĩ dja 'ÿr amijo akêx ne tu amim Jeju markumrêx nhym arÿm me utà.

<sup>26</sup> Dja me utà nhym kam mebê idjaerdjwÿ arÿm tu amim Jeju markumrêx, kunĩ: tu amim markumrêx nhym Metĩndjwÿnh arÿm amim me kunĩ pytà. Ije me amã ja jarênh ne me kute mar kêt kumrêx. Mar kêt kumrêx ba arÿm me amã arê. Dja ga me aman arÿm amijo adjãmra kêt. Me bakukãmãre kute amrêbê: 'ã pi'òk no'òk kôt dja ã me adjwÿnhdjwÿ pytaro ane. Kamã ne Metĩndjwÿnh memã kum,

“Dja me utàr djwÿnh krĩraxbê Xijão kurũm katon amim mebê idjaer pytà. Djako djô'ã ne mebê idjaer apôx.

Dja amim me utà nhym me arÿm Metĩndjwÿnhmã axwe kêt.

<sup>27</sup> Bamê mebê idjaer kukãmãremê ne bar aktã abenmã ikabên jarênh mãm dji. Nã bãm memã kum, 'Ije memã ikabên jarênh kôt dja ba arÿm me axwe maro aknon arÿm me kam ingryk kêt ne.'

Nã bãm ã memã ane.”

Nãm ã Metĩndjwÿnh me bakukãmãremã ane. Ga, kute mebê idjaerdjwÿ pytarmãja pumũ.

<sup>28</sup> Nãm me mebê idjaermã Kritu'ã ujarênh ny jarê nhym me kum kĩnh kêt. Me kum kĩnh kêt kam ne me arÿm Metĩndjwÿnh kurê djwÿnh. O kurê djwÿnh nhym arÿm mebê amijo akêx ne arÿm amim me utàr kêt. Nãm mebê amijo akêx ne arÿm amim me bajtem pytà. Nhym be, kum me ikukãmãre kĩnh. Kum me kĩnh kôt ne kum me ibê idjaer kwÿ kĩnh rã'ã ne. Kute me kêttri amijo me ipytàrja kum me ikĩnh rã'ã.

<sup>29</sup> Amrêbê ne me bakukãmãremã apÿnh mÿjja jarê. Ne ajte kute meo ba kadjy amiwÿr me ku'uw. Djãm kute kabên jarênh ne ajte atemã kabên 'õ jarênhmã? Kati. Djãm kute kabên tũm japanh ne o biknormã? Kati. Mrãmri ne tu kabên jarênhkumrêx. Kam ne kum mebê idjaer kwÿ kĩnh rã'ã.

<sup>30</sup> Ga me abajtem ne ga me amim Metĩndjwÿnh mar kêt. Amim mar kêt nhym kam arÿm tu kum me akaprĩn amim me apytà. Mebê idjaer ne me amim mar kêt nhym kam arÿm mebê amijo akêx ne arÿm tu kum me akaprĩn amim me apytà. <sup>31</sup> Nã, mebê idjaerdjwÿ ne me kute jakam amim mar kêt. Dja me amim mar kêt nhym Metĩndjwÿnh kum me akaprĩ kôt ajte kum me kaprĩ. <sup>32</sup> Nãm mebê idjaermê me bajtemmê arÿm axikôt amakkre kêt. Amrêbê: ne me Metĩndjwÿnh kabênkôt amakkre kêt ne ta te amak mexmã. Mÿj kadjy ne me amakkre kêt? Bir, Metĩndjwÿnh kum me kunĩ kaprĩ kadjy ne me amakkre kêt.

*Metĩndjwÿnh rax'ã ujarênh.*

*Ep 3.20; Kor 1.16*

<sup>33</sup> E kum, Metĩndjwÿnh ne kute mÿjja mar me:xkumrêx. Kute amim me'ã karõ mar me:xkumrêx. Kute me mar mexo me barer

me:x ne. Mÿj me'õ ne kute kum kator ne kute mar? Djãm me'õ amak mexo 'ÿr bõx? Ari:kati. Umaro memã kre ra:x ne me'õ umaro 'ÿr bõx kêtumrêx. Kute me kunõ ba me:xkumrêx. Mÿj me'õ ne kute uråk? Ari:kati. <sup>34</sup> Me bakukãmãre ne me amrêbê: Metĩndjwÿnh djumar'ã ajarên memã kum, "Bênjadjwÿr djwÿnh kute apÿnh mÿjja marja djãm arÿm ne me'õ kute mar? Djãm arÿm ne me'õ kumrêx kum mÿjja'ã karõ nhym arÿm kõt kute mar? Ari:kati."

<sup>35</sup> "Nàr djãm Metĩndjwÿnh we me'õmã kum, 'Ga ne ga akumrêx imã angã. Dja ba kam amã o pãnh ne', ane? Ari:kati."

Nãm ã me bakukãmãre Metĩndjwÿnh djumar'ã ujarênho ane. <sup>36</sup> Ta ne kumrêx amim mÿjja kunĩ'ã karõ nhym kõt mÿjja kunĩ apõx. Ta ne mÿjja kunĩ nhipêx nhym apõx. Amikadju ne ipêx ne. Gê me kunĩ 'ã kum rax jarênh rã'ã: rã'ã ne. Mrãmri ne ba ar amã arênhkumrêx.

## 12

*Me kute Metĩndjwÿnhmã aminhõr'ã memã karõ.*

*Kor 1.10; Tex k 4.1; Ped k 2.11*

<sup>1</sup> Akmere, àpnhĩre ar, Metĩndjwÿnh kum gwaj bakaprĩ:kumrêx. Kum ar akaprĩ:kam dja gar kum amingã. Ga, Jeju kute Metĩndjwÿnhmã aminhõrja pumũ. Nãm kum amingãn pĩte'y'ã wajêt ne arÿm ty. Ar gadjwÿ dja gar kudjwa kum amingã. Djãm me kute abĩn ne kute kum anhõrmã? Kati. Ar ga dja gar atĩn ne prĩne kum amijã ma gê ar akam kĩnh ne ar ajo aminhõn ar ajo ba. ã kum aminhõro anen kam arÿm katàt Metĩndjwÿnh kabên markumrêx ne kõt amijo abakumrêx. Ja ne mexkumrêx.

<sup>2</sup> Djãm me kum Metĩndjwÿnh kĩnh kêtja kute ar ajo amipyræk ne amikukràdjã punu kõt kute ar ajo bamã? Kati. Kwãrĩk wãnh mekõt amijo aba kêt. Dja gar mebê adjumar djã nyn atemã akabên nybit ma. Mÿj kadju? Bir, Metĩndjwÿnh ne arÿm ar ajã kabên mex jarê. Nãm amim ar ajã karõn kabên mex jarê. Dja gar atemã akabên nybit man arÿm amijã Metĩndjwÿnh kabên mexja ma. Ne kam kabên mex kõt ar amijo aban prĩne kum amex. Kum amex nhym arÿm akam kĩnhkumrêx. Ja kadju dja gar

mebê atemã adjumar djã nyn atemã akabên nybit ma.

<sup>3</sup> Ba ar akunĩmã ikabên jarê. Djãm amikukwakam ne ba ar amã arê? Kati. Metĩndjwÿnh ta ne tu kum ikaprĩn arÿm imã ikabên'ã karõ. Kõt ne ba ar amã ikabên jarê. Ar anhĩ pÿnhkõt ar amã arê. Ar gadjwÿ ne Metĩndjwÿnh arÿm ar amã adjapênh djã'ã karõ. Ar aje adjapênh djã markam dja gar mã amim Metĩndjwÿnh rax ma. Kwãrĩk wãnh arĩk amim, "Be, iraxkumrêx", anhÿr kêt. Dja gar katàt amim,

—Be, nã bãm tu amim Metĩndjwÿnh markumrêx nhym arÿm imã idjapênh djã ja'ã karõ ba kabênkõt maro iba, ane. Djã gãm me ã amimaro ane.

<sup>4</sup> Ga, gwaj banhĩ pÿnhja pumũ. Gwaj banhĩ pÿnhkõt badjapênh djã krãptĩ. Gwaj baparkam bamrãnh djã. Gwaj banhikrao baje mÿjja kupênh djã. Ne gwaj bakrãkam banhõ mÿjja mar djã. Ne gwaj banokam baje mÿjja pumũnh djã. Ne gwaj bajamakkrekam baje mÿjja mar ne kupênh djã. Gwaj banhĩkam badjapênh djã krãptĩ. <sup>5</sup> Ga, Kritudjwÿ. Te gwaj bakrãptĩ gwaj baje amim Kritu markam baje kumê banhĩ pydji pyræk. Djãm gwaj bamã aben jabê kêtã? Djãm gwaj apÿnh ar babamã? Kati. Gwaj banhĩ pÿnhkõt abeno banhõbikwa.

<sup>6</sup> Metĩndjwÿnh tu kum gwaj bakaprĩkam gwaj abeno banhõbikwan banhĩ pÿnhkõt apÿnh badjapênh djã. Metĩndjwÿnh ta ne gwaj bamã badjapênh djã'ã karõ gwaj maro baba. Gwaj banhĩ pÿnhkõt apÿnh Metĩndjwÿnhmã badjapênh djã kum badjapênh ar baba.

Godja me'õ Metĩndjwÿnh kukwakam kabên jarênha mar jabej gê kute amim Metĩndjwÿnh mar kõt memã arê. <sup>7</sup> Nàr, godja me'õ me kadju mÿjja 'õ kupênh mar jabej gê me kadju kupê. Nàr, godja me'õ memã Metĩndjwÿnh kukràdjã jarênh mar jabej gê arê. <sup>8</sup> Nàr, godja me'õ kute 'ã memã karõ mar jabej. Me kute amim Jeju mar rerekre jamã 'ã karõ mar jabej. Me kute amim mar tÿx'ã memã karõ mar jabej. Gê memã 'ã karõ ba gê me amim mar tÿx. Nàr, godja me'õ memã mÿjja nhõr jabej gê õdjãnh ne memã kungã. Nàr, godja me'õ kute meo ba mar jabej gê meo ba 'ãno djan

'ã ukanga kêt. Nâr, godja me'õ kum me kaprî mar jabej. Djâm nokre kaprîn kum me kaprîmã? Kati. Dja nokre kînh ne kum me kaprî.

*Me kum me abê'ã memã karõ.  
Dju r 13.34; Xim k 1.5; Idja 13.1*

<sup>9</sup> Dja gar amã me abê. Kwârîk wãnh amijo ajêx kêt. Dja gar mrâmri amã me abê katàtkumrêx.

Godja me abenkam axwe nâr amijo axweo ba, ar ga dja gar amã axwe kînh kê:tkumrêx. Nâr, godja me abenkam mex nâr amijo ba mex ar ga dja gar amã mex kînh ne 'ã angrà: ne.

<sup>10</sup> Kute ar amã akamy jabê pyrâk ne abenmã aprî:ren amã aben jabê.

Kwârîk wãnh gar me'ã amim,

—Gê me kumrêx imã imex jarê. Ba kam amipãnh ã memã mex jarêho ane, anhÿr kêt. Ar ga akumrêx dja gar memã wan tu memã mex jarêho aba. Memã mex jarêho aban kàjmã memã rax kamêho aba.

<sup>11</sup> Metîndjwÿnh kadjy mÿjja'õo aba'ã ar adjukanga kêt ne atÿx. Dja gar Karõ man kôt amã Metîndjwÿnh jabê:n arek kadjy mÿjjao aba.

<sup>12</sup> Dja gar amiwÿr Metîndjwÿnh nhõ mÿjja mexja kamnhîxkumrêx. Aje amiwÿr kamnhîxkôt akînhkumrêx.

Dja te apÿnh ar akaprî djâri ar ajo ba arek amim Jeju mar tÿx rã'ãn 'ã adjukanga kêt. 'Ã adjukanga kêt ne Metîndjwÿnhmã amijo adjà'wÿr rã'ã ne.

<sup>13</sup> Godja Jeju nhõ me ja õ mÿjja kêt jabej ar amã me kaprî amikutã memã mÿjja kwÿ ngã.

Gê me ar awÿr wangjê gar meo djuw mex. Ja dja gar amã kînh.

<sup>14</sup> Godja me'õ ar ajo bikênh jabej gar Metîndjwÿnhmã o a'uw ne kum,

—Dja ga o djuw mex, ane. 'Ã kadjy kum ane. Kwârîk wãnh kum,

—Dja ga ijo angryk ne o ajkê, anhÿr kêt.

<sup>15</sup> Godja me'õ kînh jabej ar gadjwÿ kôt akînh.

Godja me'õ muw ar gadjwÿ kôt akaprî muw.

<sup>16</sup> Dja gar axikôt akabên man axikôt arê.

Kwârîk wãnh amijo araxmã amijo adjamra kêt. Ar amã me kajgo kînh ne ro'ã ar aba.

Kwârîk wãnh amim,

—Ba ne ba ijamak mex'ã ipydji, anhÿr kêt.

<sup>17</sup> Godja me'õ ar ajo ajkê kwârîk wãnh amipãnh o abikênh kêt.

Dja gar akabên katàt ne katàt amijo aba gê me amim ajã,

—Be, mrâmri, tãmwã ne katàt kute amijo bakumrêx, ane.

<sup>18</sup> Ar ga dja gar me kunîmê abenmã akabên mexkumrêx jarê ne 'ã adjukanga kêt. Nâr gar te me'õmã akabên mex jarê nhym tu ar ajapa. Kwârîk wãnh rã'ã.

<sup>19</sup> Akmere, àpnhîre ar, imã ar akînhkam ne ba ar amã ikabên jarê. Kwârîk wãnh amipãnh kêt. Dja gar Bênjadjwÿr djwÿnhkam ama gê ta ar ajo ngryk.

Metîndjwÿnh ne amrêbê: me bakukãmãremã kum,

“Ba ne ba ibê memã o pãnh djwÿnh. Ba dja ba ajo ingryk ne o pãnh. Kwârîk wãnh amipãnh kêt.”

Nãm ã Bênjadjwÿr djwÿnh memã ane. Kam dja gar kam ama. <sup>20</sup> Nhym kam ajte memã kum,

“Kam godja akurê djwÿnh kum prãm jabej ga kum mÿjja ngã gê kukrê. Godja kum kôr jabej ga kum ngô ru gê o ikõ.

Dja ga ane nhym ta arÿm amiman amim ngryk jabej ne ajo õbikwa jabej.”

Nãm Bênjadjwÿr djwÿnh ã me bakukãmãremã ane. Kam kwârîk wãnh amipãnh kêt.

<sup>21</sup> Me kute ar ajo bikênhkam djâm mekôt ajaxwemã? Kwârîk wãnh mekôt ajaxwe kêt. Ar ga dja gar adjukaprîo meo djuw mex.

## 13

*Me kute me bēnjadjwÿr kabēn kôt amijo ba'ã memã karõ.*

*Xit 3.1; Ped k 2.13*

<sup>1</sup> Pykakam me bēnjadjwÿr rÿnh me kute katàt amijo ba'ã kute memã karõkam dja gar me kabên mar tÿx ne kôt ar amijo aba. Nhÿnh ne bēnjadjwÿr'õ Metîndjwÿnh kute ar kêt. Nãm me bēnjadjwÿr kunî pumjuw.

<sup>2</sup> Gêdja me'õ kum õ bēnjadjwÿr kurê jabej. Djâm õ bēnjadjwÿr kajgo ne kum kurê? Kati.



Kajgo kêt. Metîndjwÿnh ne 'ã bënjadjwÿr mē. Me kum kurê dja Metîndjwÿnh arÿm memã axwe pãnh jarē.

<sup>3</sup> Djãm me mexkam kum krãkamngôn nhõ bënjadjwÿr puma? Kati. Me axwekam-bit kum uma. Ar amã uma kêt kadjy mÿj dja gar nē? Bir, dja gar amextiren ar aba nhym arÿm ar amã mextire jarē.

<sup>4</sup> Mÿj kadjy dja gar kabēn ma? Bir, ar amextiren ar aba kadjy ne me ar amã krī. Metîndjwÿnh ne ar akadjy me'ã õ àpēnh rē nhym me ar amã krī. Nhym be, godja gar ajaxwe jabej on atîn prãm. Djãm kute amijã kãxdjwa kajgo nhõrn kute o ba kajgo? Kati. Metîndjwÿnh ne me àpēnh'ã me kurē kute kukwakam àpēnhmã, me badjumar mex kadjy àpēnhmã. Kam dja me'õ axwe nhym arÿm kam ngryk nhym arÿm tokry. Kadjy ne me bënjadjwÿr nhõ kãxdjwa kajgo.

<sup>5</sup> Kam dja gar tu me kabēn ma. Djãm ar amã umakambit? Djãm kambit dja gar kabēn ma? Kati. Ar ga ne gar aje anhõkre kadjwÿnhbê 'ã amim,

—Pykakam anhõ bënjadjwÿr kabēn ma, anhÿro aba. Ar akabēnja kôt dja gar me bënjadjwÿr kabēn ma.

<sup>6</sup> Kam dja gar aje amikutã me bënjadjwÿrmã ar anhõ pi'òk kaprī kwÿ ngã. Me kute ar amã ìpõxu'ã karõ kôt memã kwÿ ngã. Mÿkam? Bir, me mã ar akadjy bënjadjwÿrkam àpēnhkam. Metîndjwÿnh ne me'ã õ àpēnh djwÿnh rē. Gora ar memã angã. <sup>7</sup> Me kute 'ã ar amã karõ kôt ar anhõ bënjadjwÿrmã angã. Ar aje adjàpēnh pãnh pi'òk kaprī jamÿnhja ar aje kum kwÿ nhõrmã. Aje me kabēnkôt amikutã kwÿ ngriren 'yr ne aje kum õrmã. Kwãrīk wãnh kubê nê kêt. Ar kum angã. Nàr, gar pi'òk kaprī pãnh me'õbê nêkrêx jamÿ. Nhym me ar amã,

—Ar aje nêkrêx jamÿnh pãnh'ã akreja kôt dja gar pi'òk kaprī kwÿ ngã. Amikutã me bënjadjwÿrmã kwÿ ngã, ane. Kwãrīk wãnh kubê nê kêt. Ar kum angã. Nàr, dja me ar amã,

—Dja gar amã me bënjadjwÿr puma, ane. Tu ar amã uma. Nàr, dja me ar amã,

—Dja gar kãjmã me bënjadjwÿrmã rax kamē, ane. Tu kãjmã kum rax kamē.

*Akubyn bõxkam amakbê me kum aben jabê'ã memã karõ.*

*Mat 22.39; Dju r 15.12; Ped k 1.22*

<sup>8</sup> Ar aje amikutã memã anhõ mÿjja'õ nhõrmã kwãrīk wãnh mebê nê kêt. Ar amã me abêmãdjwÿ kwãrīk wãnh mebê aminê kêt. Dja gar mrãmri amã me abêkumrêx ne arÿm aje Metîndjwÿnh kukràdjã marn kôt amijo aba mexkumrêx. Me kute katàt amijo ba'ã kute memã karõkôt kukràdjã kôt gar arÿm amijo aba mexkumrêx.

<sup>9</sup> Me bakukãmãre ne Metîndjwÿnh kukwakam memã kabēn kukràdjã jarēn memã kum,

“Kwãrīk wãnh mebê prõ nàr mjêno adjãkīnh kêt.

Kwãrīk wãnh me'õnh bīn kêt. Kwãrīk wãnh adjãkīnhī kêt.

Kwãrīk wãnh me'ã ajêx kêt.

Kwãrīk wãnh me amã me'õ nhõ mÿjja puro kīnh ne 'ã amim karõ kêt.”

Nãm ã memã anen kam ajte memã kum,

“Me amã amibu'ã me ja jabê. Kute mrãmri ne ga me amã amijabêja pyrãk dja ga me ã amã amibu'ã me ja jabêo ane.”

Nãm ã memã ane. Ja dja gar aman ar amã me abê. Ar amã me abêkam ne gar tu Metîndjwÿnh kukràdjã kôt amijo aba mex. Me kute katàt amijo ba'ã kute memã karõkôt kukràdjã kunīkôt gar tu amijo aba mex. Kukràdjã 'õ ne 'ã kãtãm kêt. Ar amã me abêkam gar aje kukràdjã kunī marn kôt amijo aba mexkumrêx.

<sup>10</sup> Nhym bê ne me kum me abêkam kute meo bikēnh. Kati. Dja gar mã amã me abêjabit man arÿm urokam Metîndjwÿnh kabēn kukràdjã kunīkôt amijo aba mexkumrêx.

<sup>11</sup> Kam, ba ajte ar amã arē. Arÿm 'ÿr. Mÿkam ne gar ate akrã? Ar aje mrãmri ne me õto nõr pyrãk. On ar ano tÿx. Gwaj baje tu amim Kritu kamnhĩxkumrêxmo kraxkam akubyn bõxja kute onĳ pyrãk. Nhym be, kati. Gwaj bawÿr bõx ne kute amim gwaj bapytãr nhõ akatija arÿm 'ÿr.

<sup>12</sup> Arÿm akamãt kêt 'ÿr. Me axwe kumexkam kute pykakam akamãt pyrãk. A'u ne gwaj bajo rãm ne ja. Dja Kritu bõx nhym arÿm me mexkumrêx. Me mexkumrêxkam dja kute pykakam a'u pyrãk. Kam gwaj on wãnh badjãpēnh punu

kute akamàt kô tyk pyràk ja kanga. Kute mrāmri ne me krākamngônh kute amipytār kadjy ô kàxo kubèkà jangjênh pyràk. Gwaj Kritu kukwakam batÿx ne katàt ar amijo baba. Kritu kute gwaj bajaxwebê bamã tÿx jadjàr. Dja gwaj bamã tÿx jadjà gwaj arÿm katàt ar amijo baba. Kukwakam katàt ar amijo baba ne arÿm baje mrāmri ne me kute a'ukam mrānh pyràk.

<sup>13</sup> Gwaj memã katàt ar amijo baba kute a'uri me katàt ba pyràk. Djām mekôt ar abixaêr punumã? Djām kadjwati kangôkam\* ar abibānhmã? Djām mekôt aprô kupa'ã, amjên kupa'ã akurê abamã? Djām mekôt ar abixaêr tÿ:x ne tu apunu raxmã? Djām ar aje abenmã akabên punu abamã? Djām ar aje aben nhô mÿjja puro'ã angrykmã? Kati. Kwārîk wānh. <sup>14</sup> Bēnjadjwÿr djwÿnhbê Jeju Kritu mextire kôt dja gar amextiren ar aba. Ar amex ja dja gar ama. Kwārîk wānh ar aje amidjwÿnhbito kÿnh kadjy ar ajaxwe aba kêt.

## 14

*Me kute Jeju mar rerekreja'ã memã ujarênh.*

*Mat 7.1; Rô 2.1; Xij 4.11*

<sup>1</sup> Me kwÿ kute amim Jeju mar rerekreja dja gar o anhôbikwa. Kwārîk wānh mÿjja'ô mÿr jabej ar amã kurê kêt ne 'ã amim, “Axwe”, anhÿr kêt. <sup>2</sup> Me kute ar amã,

—Dja gar ãm mry pumũ, anhÿro ba. Ga kam aje amim Jeju mar tÿxkam amim,

—Kati. Ba dja ba mÿjja kunĩ kuro iban kam Metĩndjwÿnhmã imex rã'ã, anhÿro aba. Nhym me kwÿ kute amim Jeju mar rerekren kum mry pyman djwÿbit kuro ba.

<sup>3</sup> Kwārîk wānh ar amã kurê kêt. Ar aje mÿjja kunĩ kuro abakam kwārîk wānh ar amã me'ô kute djwÿbit kurja kurê kêt. Nàr ar akwÿ aje djwÿbit kurja kwārîk wānh me kute mÿjja kunĩ kur'ã akabên kêt ne amim, “Me axwe”, anhÿr kêt. Mÿkam? Bir, Metĩndjwÿnh ta kute arÿm o krakam. Kwārîk wānh mÿjja kur mÿr jabej ar amã aben kurê kêt. <sup>4</sup> Me axwekam djām ar ga dja gar memã axwe pānh jarê? Kati.

\* **13:13** Mÿjja me kute o kôm ne kôt bibānh kunĩja, kadjwati kangômê uba kangômê, mÿjja kangô kunĩ ne me kum kadjwati kangô jarê.

Metĩndjwÿnh dja memã axwe pānh jarê. Nàr, me mexkam djām ar ga dja gar memã kÿnh djà ngã? Kati. Metĩndjwÿnh dja memã kÿnh djà ngã. Djām ar ga ne gar meo aba? Kati. Metĩndjwÿnh ne meo ban me axwebê memã tÿx jangjêho ba. Kam kwārîk wānh ar amã kurê kêt.

<sup>5</sup> Amrêbê me bakukāmāre ne me kute apÿnh akati maro ba. Nhym ajbir jakam dja me kute amim Jeju mar kwÿ amim, “Akati punu ne ja”, anhÿro ba. Nhym ajtekam me kwÿ kute amim Jeju mar kute akati mar kêt ne amim,

—Kati. Akati kunĩ ne mex ne 'ô kute aben japanh kêt, anhÿro ba. Gê kam me kunĩ ta ï pÿnhkôt prĩne akatio amiman ta akati ma nàr ta mar kêt. Kwārîk wānh akati'ô mÿr jabej ar amã aben kurê kêt.

<sup>6</sup> Me'ô kute akati marja ta kute Bēnjadjwÿr djwÿnh markam kute akati mar. Nàr, me'ô kute akati mar kêtja ta kute Bēnjadjwÿr djwÿnh markam kute akati mar kêt. Ajte me'ô kute mÿjja kunĩ kurja ta kute Bēnjadjwÿr djwÿnh markam kute kur. Ga, ta kute 'ã Metĩndjwÿnhmã amikÿnh jarênhkam kute kurja pumũ. Nàr, me'ô kute djwÿbit kurja ta kute Bēnjadjwÿr djwÿnh markam kute djwÿbit kurja pumũ. Ga, kute djwÿbit kurkam kute 'ã Metĩndjwÿnhmã amikÿnh jarênh ne kute kurja pumũ.

<sup>7</sup> Gwaj baje amim Jeju mar kunĩ djām gwaj baje amidjwÿnhbit maro babamã? Kati. Dja gwaj Metĩndjwÿnh maro baban ajte gwaj babu'ã me ar baja maro baba. Gwaj batĩnri dja gwaj Metĩndjwÿnh maro baba nàr gwaj tyn Metĩndjwÿnh ma. <sup>8</sup> Bēnjadjwÿr djwÿnh ne gwaj baje markumrêx. Dja gwaj batĩn ne ar babari Bēnjadjwÿr djwÿnh maro baba. Ne tyn Bēnjadjwÿr djwÿnh ma. Kam dja gwaj batĩn ne ar baba jabej nàr batyk jabej. Kwārîk wānh rã'ã. Bēnjadjwÿr djwÿnh ne gwaj baje mar nhym arÿm gwaj bajo kra.

<sup>9</sup> Mÿj kadjy ne Kritu tyn akubyn tĩn ne? Bir, kute me tykmê me tĩn kunĩmã Bēnjadjwÿr djwÿnh ne meo ba kadjy. Ja kadjy ne tyn akubyn tĩn ne.

<sup>10</sup> Ga kam ar aje Jeju kukwakam me'ôo ar akamyja mỳkam dja gar mỳjja'ô mỳr jabej ar akamymã axwe jarēn ar amã kurêo aba? Djãm ar abê memã axwe pãnh jarēnh djwỳnh got? Kati. Dja gwaj bakunĩ Kritu kabem dja nhym ta arỳm gwaj bamã bajaxwe pãnh jarēnho nhỹ. Kwãrĩk wãnh ga akamymã axwe jarēnh kêt. <sup>11</sup> Amrêbê me bakukãmãre kute 'ã pi'ôk no'ôk kôt dja gwaj kabem djan amikôt kum amijarê. Nãm memã kum,

“Bēnjadjwỳr djwỳnh ne memã arēn memã kum,

Itĩn ne ar iba. Djãm itĩn ne ar iba kêt ne ba ikabēn kajgo? Itĩn ne ar ibakumrêx ne ba me amã ikabēn ne. Me kunĩ dja me ikabem kônkrão nhỹn kunĩ amikôt imã amijarê.’

Nãm ã Bēnjadjwỳr djwỳnh ane.”

Nãm me bakukãmãre ã memã anen arỳm 'ã pi'ôk no'ôk ne. <sup>12</sup> Ga, pi'ôk no'ôkja kôt gwaj banhĩ pỳnh kôt gwaj baje Metĩndjwỳnhmã amikôt amijarēnhmãja pumũ.

<sup>13</sup> Dja gar aje meo akamy kwỳja ma. Me kwỳ kute amim Jeju mar rerekreja ma. Kwãrĩk wãnh mỳjja'ô mỳr jabej ar amã kurê kêt. Dja gar atemã amijo tēn ar akamy'ã amim,

—Ba on Metĩndjwỳnhmã amijangri tỳx. Ikamy ne ipumũnho ba. Nok ba ren tu ikamy nokrekam mỳjjao iban ren Metĩndjwỳnhbê ikamyo akêx. Ba on amijangri tỳx. Ba ren kubê o akêx ne ren kam ije mrãmri ne mỳjja kute me par tok nhym me rôrôk pyrãk, ane. Dja gar ã amim anen ã ar akamy maro ane.

<sup>14</sup> Nhym me kute mỳjja kurdjwỳ. Djãm me kute mỳjja'ô krēn arỳm Metĩndjwỳnhmã axwe? Arkati. Ja ne ba ije Bēnjadjwỳr djwỳnh Jeju kabēnkôt markumrêx. Nhym be, dja ar akamy kwỳ mỳjja 'ô'ã amim,

—Dja ba kukrēn Metĩndjwỳnhmã ijaxwe, anhỹro ba. Be, akamy jamã ne mrãmri mỳjja punu. <sup>15</sup> Ga kam tu akamy nokrekam mỳjja ja krē nhym kôt arỳm akam kaprĩre ne. Godja ajã amim,

—Nãm mỳjja punure krēn arỳm Metĩndjwỳnhbê amijo ajkê, ane. Godja ã akamy anen arỳm kaprĩ:re ne. Djãm amã akamy kĩnhkam ne ga tu nokrekam mỳjja krê? Kati. Aje amidjwỳnhbit mar. Kritu

kum akamy kĩnh ne kam kadjy ty. Gadjwỳ ga ren amã kĩnh ne ren nokrekam mỳjja krēn kêt. Nhym be, kati. Ga amidjwỳnhbit man amã akamy kĩnh kêt ne tu nokrekam mỳjja krēn arỳm akamyo ajkê. Kwãrĩk wãnh o anhỹr kêt. <sup>16</sup> Dja ga te mỳjja 'ô'ã amim,

—Kati. Imã ne mexkumrêx, ane. Nhym me kute ajã, “Axwe”, anhỹr prãm kwãrĩk wãnh nõ. Dja ga ãm mỳjja pumũ gê me ajã anhỹr kêt.

<sup>17</sup> Metĩndjwỳnh kute gwaj bajo bakam djã ne gwaj baje mỳjja kuro babaja mar tỳx? Nãr, djãm gwaj baje mỳjjao bakôm mar tỳx? Kati. Gwaj baje mar kajgo. Nhym be, kute gwaj bajo bakam gwaj baje bajaxwe kêt kadjy amimar. Gwaj badjumar mex kadjy baje amimar. Gwaj bakĩnh kadjy baje amimar. Gwaj baje Metĩndjwỳnh Karô maro babakam ne gwaj bakĩnh kadjy baje amimar. Metĩndjwỳnh kute gwaj bajo bakam mỳjja mex ja kadjy gwaj baje amimar tỳxkumrêx. <sup>18</sup> Mỳkam? Bir, me mỳjja mex jao ba ne me Kritumã àpēnho ba ne arỳm kàjkwakam Metĩndjwỳnho kĩnh nhym pykakam me ar badjwỳ kum me kĩnh.

<sup>19</sup> Gwaj abenmã bakabēn mex ne badjumar mex kadjy amima. Gwaj abenmã Jeju'ã ajarēn arỳm mar mexo amũ abenkamê. Ja kadjy dja gwaj amima. <sup>20</sup> Djãm ar aje me'ôo akamyja mar kêt ne ar aje adjakurbit mar ne o ar aje Metĩndjwỳnh bê o akêxmã? Akamybê Metĩndjwỳnh nhõ àpēnh. Kwãrĩk wãnh kubê o akêx kêt. Mrãmri ne me kute mỳjja kunĩ kurkam Metĩndjwỳnhmã mex.

Nhym be, godja gar akamy mar kêt ne amidjwỳnhbit man arỳm tu nokrekam mỳjja'ô krē ne kam arỳm o Metĩndjwỳnh bê o akêx. Aje kubê o akêxkam arỳm ajaxwe.

<sup>21</sup> Djãm aje tu mỳjjao aba ne aje tu mry'ô kuro abamã? Nãr djãm ar aje tu uba kangôo akômo abamã? Nãr djãm ar aje apỳnh mỳjja 'ôdjwỳo abamã? Nãr djãm ar aje mỳjjao abakôt ar amã Metĩndjwỳnh bê akamyo akêx pyma kêt? Aje o abakôt aje o kubê o akêx pymakam kwãrĩk wãnh o aba kêt. Dja gar akamy man kwãrĩk wãnh o aba kêt. Nãr djãm ar aje mỳjja 'ôo abakôt ar aje akamymã kaprĩ jadjãr jabej nãr ar aje akamymã Metĩndjwỳnh mar rerekre jadjãr

jabej? Kwārīk wānh o aba kêt. Dja gar akamy ma. Kwārīk wānh o aba kêt.

<sup>22</sup> Apÿnh mÿjja'ã ne gar amim,

—Ije amim Metĩndjwÿnh markam ne mÿjja ja ajmã kute kêt. Ba ren o iba ne ren ijaxwe kêt, anhÿr jabej. Amimãbit dja gar arẽ gê Metĩndjwÿnhbit ama. Nok gar ren ar akamy mar kêt ne ren tu mÿjjao abao anen ren amim angrÿk ne ren amim,

—Mÿkam ne ba o iban Metĩndjwÿnh bê ikamy akẽx? ane. Nhym be ar aje amikam ajaxwe'õ mar kêt kam dja gar adjumar mextire. <sup>23</sup> Godja me'õ kute mÿjja'õ krẽnmã amim,

—Kon. Dja ba kukrẽn arÿm ijaxwe jabej, anen atekam tu krẽn jabej. Djori kam mex? Kati. Arÿm axwe. Mÿkam? Bir, kute Metĩndjwÿnh mar kêt ne tu krẽnkam. Me kute mÿjjao ba kunĩkôt dja me kumrẽx o Metĩndjwÿnh ma. Ne kam arÿm o ba. Godja me Metĩndjwÿnh mar kêt ne tu mÿjjao ba jabej arÿm axwe.

## 15

*Me kute Jeju mar rerekreja'ã memã ujarẽnh rã'ã.*

*Mak 10.45; Kô k 10.24; Pir 2.4*

<sup>1</sup> Kam, gwaj baje amim Jeju mar tÿx jabej ne gwaj ren me kute amim mar rerekre jamã baprĩre. Djãm gwaj baje amidjwÿnhbito bakĩho babamã? Kati. Gwaj meo kĩnh. <sup>2</sup> Gwaj bakunĩ banhĩ pÿnhkôt amibu'ã meo kĩnh. Mÿj kadjy? Bir, me mexmã. Me kute Jeju mar mexo kute amũ amikamẽnh ne mar raxmã.

<sup>3</sup> Ga, Kritudjwÿ kute amidjwÿnhho kĩnh kêtja pumũ. Kute amidjwÿnhho kĩnh kêt kôt ne me bakukãmãre Kritu kabẽn jarẽ. Nãm Kritu Bãmmã kum,

“Me kum akurê kôt ne me kum ikurê.” Nãm ã Kritu Bãmmã ane nhym me bakukãmãre memã arẽ nhym me arÿm 'ã pi'ók no'ók ne. Nhym kam tũ:mrãm me bakamingrãnyrekam Kritu katon ar ba nhym me arÿm kum kurê. Kum kurê nhym arÿm amidjwÿnhho kĩnh kêt. Gwaj badjwÿ kwārīk wānh amidjwÿnhbito kĩnh kêt.

<sup>4</sup> Metĩndjwÿnh ne mã me bakukãmãreo djuw mexo ba nhym me mã me'ã ajarẽn mã me'ã pi'ók no'óko ba. Mÿj kadjy? Bir, dja gwaj pi'ók jarẽn mã amijã kabẽn kunĩ

maro baba. Ja kadjy ne me 'ã pi'ók no'ók ne. Dja gwaj amijã kabẽn kunĩ man arÿm tu amim Jeju mar tÿx ne. Nhym kam te apÿnh gwaj bakaprĩ djari gwaj bajo ba gwaj tu amim Jeju mar tÿx rã'an 'ã badjukanga kêt. Ne kam mã amijã kabẽn kunĩ man te bakaprĩn akubyn bakĩnh ne. Bakĩnh ne arÿm amiwÿr kamnhĩx tÿx. Ja kadjy ne me me bakukãmãre'ã ajarẽn me'ã pi'ók no'ók ne.

<sup>5</sup> Metĩndjwÿnh ne kute amijamãr 'iry ne kute memã tÿx jangjẽnh nhym me kute amim mar tÿx ne kĩnh. Nãm bãm mã kum ar ajo a'uw gê ar amã akabẽn mextire jadja. Ar aje Jeju Kritu kôt ar amijo abakam gê ar amã akabẽn mextire jadja gar axikôt abenmã akabẽn mextire jarẽ. <sup>6</sup> Ne kam axikôt anhõkre kadjwÿnhbê Metĩndjwÿnh ra:x ne uma:ja man arÿm me kunĩmã arẽho amirĩt ne. Ja kadjy ne ba ã Metĩndjwÿnhmã ar ajo idjã'wÿro ane. Metĩndjwÿnhbê ne Bẽnjadjwÿr djwÿnhbê Jeju Kritu Bãm.

*Metĩndjwÿnh kum me bajtemdjwÿ kĩnh.*

*Kar 10.34; Rô 9.24; Gar 3.28; Ep 2.16*

<sup>7</sup> Kam dja gar abeno anhõbikwa kute Kritu gwaj bajo õbikwa pyrãk. Ar aje memã Metĩndjwÿnh raxo amirĩt kadjy ar abeno anhõbikwa.

<sup>8</sup> Ba kam ajte ar amã arẽ gar ama. Kàjkwakam Metĩndjwÿnh ne amrẽbê mebê idjaer kukãmãremã mÿjja jarẽ. Me my kà rẽnhjamã arẽ. Nãm memã apÿnh mÿjja jarẽnh mãmdji. Nhym kam kôt Jeju Kritu nã kurũm katon ar ba. Me bakamingrãnyrekam ar ba. Ar ba:n arÿm mebê idjaermã àpẽnh ar ba. Metĩndjwÿnh kute me bakukãmãremã apÿnh mÿjja jarẽnh kôt ne memã àpẽnh ar ban mÿjja nhipêxo ba. Nhym me arÿm omũn amim,

—Mrãmri ne Metĩndjwÿnh kabẽnkumrẽx. Ga, Jeju arÿm kôt memã àpẽnh ar baja pumũ. Metĩndjwÿnh kute me bakukãmãremã arẽnh kôt àpẽnh ar baja pumũ. Nãm me Jeju pumũn arÿm ã amim ane.

<sup>9</sup> Jeju memã mÿjja pumũnh kêt nhipêxo ba:, me punuo mexo ba: nhym me bajtemdjwÿ arÿm omũ. Me kute Metĩndjwÿnh raxmã kator ne abenmã kum,

—Djãm Metĩndjwýnh ukaprĩ ngri got? Mrãmri ne ukaprĩ:kumrẽx, anhýr kadjy. Ja kadjy ne me bajtemdjwý arým mýjja pumũnh kêt kwý pumũ:. Djãm mebê idjaerbit ne me kute Metĩndjwýnh raxmã katorn kum rax jarẽnhmã? Kati. Me bajtemdjwý ne me kute raxmã katorn kum rax jarẽnhmã. Me bakukãmãre ne amrêbê: ja jarẽ. Me bajtem kute Metĩndjwýnhmã rax jarẽhja jarẽ. Kritu kàjkwakam Bãmmã amijarẽn kum,

“Me bajtem nhipôkri dja ba memã ajã idjujarẽho amirĩt ne apymã'ã ngre.”

Nãm ã Kritu Bãmmã me bajtem jarẽho ane nhym me arým 'ã pi'ôk no'ôk ne. <sup>10</sup> Nhym kam me bakukãmãre 'ôdjwý me bajtemmã kum,

“Me abajtem, me on õ me wýnh kôt akĩnhkumrẽx.”

Nãm ã memã ane nhym me arým 'ã pi'ôk no'ôk ne. <sup>11</sup> Nhym kam me bakukãmãre 'ôdjwý me bajtemmã kum,

“Me abajtem kunĩ dja ga me Bẽnjadjwýr djwýnhmã mextire jarẽ.

Apýnh me aba djã kunĩkôt ar abaja kum mextire jarẽ.”

Nãm ã me bajtemmã ane nhym me ajte 'ã pi'ôk no'ôk ne. <sup>12</sup> Nhym kam Idjaijdjwý me bakukãmãremã me ajarẽ. Nãm Kritu'ã arẽnhingrôt jakren memã kum,

“Dja me bakukãmãre Djexe tãmdjwý'õ kato. Tũ:mrãm me kamingrãnyrekam kato. Me kute mrãmri ne pĩ 'yr nhym tũmrãm ajte arêkam ingrãn abatãnh pyrãk.

Dja ã tãmdjwý'õ katorn ar bao anen arým kubê Bẽnjadjwýrbê kumkati. Ne kam arým apýnh me ba djãri meo ba. Nhym kam me bajtem arým tu amim kamnhĩxkumrẽx.”

Nãm ã Idjaij me bakukãmãremã ane. Me bakukãmãreja kunĩ ne me me bajtem jarẽ. Metĩndjwýnh kum me kaprĩ nhym me kute kum rax jarẽnhmãja jarẽ.

<sup>13</sup> Metĩndjwýnh ne kute memã amak bõnh nhym me kute amiwýr õ mýjja mex kamnhĩxo ba. Gê ar amã ajamak bõ gar tu amim Kritu markumrẽx. Ne kam arým kôt ar akĩnhti:ren ar adjumar mexti:re. Nhym kam Metĩndjwýnh Karõ ar amã atýx jadjã

gar amiwýr kamnhĩx týx ne. Ja kadjy ne ba ã kum ar ajo idjã'wýro ane.

*Paur kute me bajtem kadjy àpênh'ã amijarẽnh.*

<sup>14</sup> Akmere, àpnhĩre ar, djãm ar amex kêt ne ba ar amã ikabên? Kati. Ar ga ne gar arým amextire ne ar aje Metĩndjwýnh mar mexkumrẽx. Ne kam aje abenmã 'ã karõ mar mexkumrẽx. Tãm ne ba arým ije markumrẽx. <sup>15</sup> Ije ar amã pi'ôk no'ôkkam ne ba itýx ne ar amã 'ã karõ. Te ar aje arým ikabên mar jabej ba akubyn ar amã arẽ gar ajte ama. Metĩndjwýnh ne tu kum ikaprĩn tu imã idjãpênh djã'ã karõ ba arým kabên kôt ar amã ikabên jarẽ.

<sup>16</sup> Ije me bajtemmã Metĩndjwýnh'ã ujarẽnh ny jarẽho iba kadjy ne imã Kritu Jejumã idjãpênh'ã karõ. Mýj kadjy? Bir, ije Metĩndjwýnh kĩnh kadjy. Ije 'ýr me bajtemo akẽx nhym me kum mexmã. Dja me tu amim Jeju markumrẽx nhym Metĩndjwýnh Karõ arým meo mex. Tãm dja Metĩndjwýnh kĩnhkumrẽx.

<sup>17</sup> Kritu Jeju kute imã týx jadjãrkam ne ba me bajtemmã Metĩndjwýnh kabên jarẽho iba. Idjãpênh djã jakam ne ba ikĩnhkumrẽx ne ar amã 'ã amijarẽho amirĩtkumrẽx.

<sup>18</sup> Kum idjãpênhkam ne ba Kritu kukwakam mýjja pumũnh kêt kumex nhipêx. Kritu kukwakam ije mýjja nhipêxbit dja ba 'ã amijarẽ. Me bajtem kute kabên mar ne kôt amijo ba kadjy ne ba memã kabên jarẽ. Nã bãm memã kabên jarẽn kôt mýjja kwý nhipêx nhym me arým omũ. Omũn arým kabên man kôt ar amijo ba.

<sup>19</sup> Metĩndjwýnh Karõ 'itýxkôt ne ba mýjja pumũnh kêt kwý nhipêx. Ne me punuo mex. Nhym me karõ punu meo ba ba me nêje me ano nhym me arým memã ire. Nã bãm mýjja pumũnh kêt kwý nhipêx nhym me te kute marmã kam no tyn kume:x ne arým Metĩndjwýnh raxmã kato. Ba kam kàj bê memã Kritu'ã ujarẽnh ny jarẽho iba:. Djeruxarêkam arẽho iba:n amũ apýnh pykakam me ba djãri kunĩ kôt o iba:n o inhipôk ne. Ne arẽho iba:n arým pykabê Irrij'ýr arẽho bõx.

<sup>20</sup> Ba ne ba me kute Kritu mar kêtjamã arẽ. Me kute memã Kritu'ã ujarẽnh ny jarẽnh kêtjamã ne ba ije kàj bê memã arẽnh

prã:mkmrêx. Me'ô kumrêx kute memã 'ã ujarênh ny jarênh nhym me arým kute mar. Me jamã ne ije arênh prãm ngrire. Me ujarênh nhiby ije ajte memã arênh prãm ngrire. Amũ me kute mar kêt jamãbit ije kãj bê memã arênh prãmkmrêx. Ga, me'ô arým kute kikre nhipeꝑmo kraxja pumũ. Nhym kam me'ôdjwý arým 'ýr bôx ne omũ. Omũn ajte iby ipêx prãm kêt. Badjwý ije me arým kute mar jamã ajte arênh prãm ngrire. Me kute mar kêt jamãbit ne ije arênh prãmkmrêx. <sup>21</sup> Ije me amã ja jarênh kôt ne me amrêbê: me bakukãmãremã arênh memã kum,

“Me kute memã 'ã ujarênh kêt jamã dja me memã 'ã ajarê nhym me arým kuma. Me kute mar kêt ja dja me arým kraxkôt prĩne amijã kuma.”

Nãm me ã me bakukãmãremã ane nhym me arým 'ã pi'ôk no'ôk ne. Ba 'ã pi'ôk no'ôk pumũn arým ije me kute mar kêt jamã arênh prãmkmrêx. <sup>22</sup> Me kute memã arênh kêt jamã ije arênh prãm kam ne ba pyka jakam amikrà ar o iban te ar awýr ikrã krãptĩ ne.

*Me ô krĩrãxbê Rôma'ýr tẽm kadjy kute memã amijarênh.*

<sup>23</sup> Nhym be, jakam arým ne ba pyka ja kunĩkôt memã Kritu'ã ajarênh arým inomã kumẽ nhym me arým kuma. Amrêbê ne ba ar awýr ikrã nhym ijã amex krãptĩ apêx. Jakam dja ba wãm ar awýr tẽn bôx ne <sup>24</sup> ar akam dja. Dja gwaj kam abeno bakĩnho bakrĩ:n bakrĩ kãjbê 'iry.

Ba kam arým amũ pykabê Êpanha'ýr tẽ. Êpanha'ýr itẽm kadjy dja gar ikôt o kangõn 'ýr ijano. Ba kam arým 'ýr tẽ. Ja kadjy ne ba amima. <sup>25</sup> Nhym be, ajbir jakam dja ba Djeruxarê'ýr itẽm ne ibôx kumrêx ne Jeju nhõ me jamã pi'ôk kaprĩ ngã.

<sup>26</sup> Matenimẽ Akajakam Jeju nhõ me ja ne me kute amũ memã ô pi'ôk kaprĩ kwý janormã. Djeruxarêkam me kute amim Jeju mar kwý ne me ô mýjja kêt ne ar ba nhym me kute memã anormã. <sup>27</sup> Me ta ne me kute memã anormã. Mrãmri me kute memã ôr prãm kam mexkmrêx. Djeruxarêkam me kute amim Jeju mar ja ne me kumrêx Kritu'ã ujarênh nyo ban amũ me bajtemmã arê. Mebê idjaer ne me amũ

me bajtemmã Kritu jarê nhym me arým tu amim markumrêx ne kĩnhkmrêx. Ne kam me kute amikutã memã ô pi'ôk kaprĩ janor prãmkmrêx.

<sup>28</sup> Dja ba me'ýr pi'ôk kaprĩo bôx ne memã kungã. Me kĩnh djã ja memã kungãn arým akubyn tẽ. Akubyn pykabê Êpanha'ýr tẽ. 'Ýr tẽ:n krĩrãxbê Rôma kumrêxkam ar akam bôx. Ne kam amũ pykabê Êpanha'ýr tẽ. <sup>29</sup> Ije Kritu mar raxkôt ikĩ:nhkmrêx. Ar akam ibôx ne ije prĩne ar amã Kritu'ã ujarênh ny jarênhkam dja gar ikudjwa akĩnhkmrêx. Tãm ne ba arým kuma.

<sup>30</sup> Akmere, àpnhĩre ar, Bẽnjadjwýr djwýnhbê Jeju Kritu kabẽnkôt, Metĩndjwýnh Karõ kum gwaj bajabêja kabẽnkôt ne ba ar amã arê. Dja gar Metĩndjwýnhmã ijo adjã'wýr 'ãno dja. Ba ne ba idjãpênh týt ar iba. Kum ijo adjã'wýr 'ãno djan o iro'ã apên ikôt o kangõ.

<sup>31-32</sup> Dja gar kum,

—Djũnwã, arým Paur pykabê Djudêjakam tẽmmã. Kam me kwý kute amar kêt ne ar ba. Dja ga mebê utã. Gêdja krĩrãxbê Djeruxarêkam tẽn Jeju nhõ me jamã me ô pi'ôk kaprĩ ngã. Dja ga memã kĩnh jadjã gê me kum me kĩnh ne amim me ô pi'ôk kaprĩ by. Djũnwã, aje mrãmri Paur ar ikam bôx'ã amim karõ jabej amrê ar iwýr ano gê kĩnh ne ar ikam bôxkmrêx. Dja bar kam Paur kôt abenmã týt jangijn Jeju kôt ar amijo iban 'ã idjukanga kêt, ane. Dja ga ã kum ijo adjã'wýro ane. <sup>33</sup> Metĩndjwýnh ne kute memã umar mex jangjênh djwýnh. Jakam ba kam ar ajo a'uw gê ar akunĩ mẽ amijo kajkep rã'ã ne. Tãm ne ja.

## 16

*Kute apýnh õbikwãmã kute amikabẽn mex janor.*

<sup>1</sup> Gwaj bakanikwýnh Bebi ije ar amã arênhmã. Bebi ne mexkmrêx ne krĩrãxbê Xekrerekam me kute amim Jeju mar kadjy àpênh ba. Me kute Jejukôt ar aben pydjio baja kadjy àpênh ba. <sup>2</sup> Dja gar amã kĩnh ne kum akabẽn mex jarê. Bẽnjadjwýr djwýnh Jeju nhõ me ja ne me kum aben jabê. Dja gar me kudjwa amã Bebi jabê. Godja gar àpênh'ô'ã omũ nhym Bebi kum ar aje kôt o kangõnh prãm jabej tu kôt o kangõ. Ta ne

me krãptĩ:kôt o kangõ. Badjwỳ ikôt o kangõ. Dja gar pãnh kôt o kangõ.

<sup>3</sup> Ne ajte amũ Pnixiramẽ Akwire arkum ikabẽn mex jarẽ. Nãm ar iro'ã Kritu Jejumã àpẽn ba. <sup>4</sup> Ar ta ne ar inêje memã kabẽn. Nãm me te umati tã nhym arkum amijã ma kêt ne tu me'yr tẽn inêje memã kabẽn. 'Ã ne ba arkum ukaprĩ: jarẽ. Me bajtem kute amim Jeju mar kunĩ, apỹnh me kute Jejukôt ar aben pydjio ba djãri ne me ajte arkum ukaprĩ jarẽ.

<sup>5</sup> Ar õ kikrekam me kute amim Jeju mar ne ar aben pydjio bawãdjwỳ. Me wãmãdjwỳ dja gar ikabẽn mex jarẽ. Wãkam imã inhõbikwa kĩnh. Kubê Epenexu. Dja gar kum ikabẽn mex jarẽ. Pykabê Adjikkam ne Epenexu kumrẽx Kritu'yr amijo akẽx.

<sup>6</sup> Dja gar ajte Marijmã ikabẽn mex jarẽ. Marij ne gwaj bakadjy àpẽn rax.

<sup>7</sup> Dja gar ajte wãkam inhõbikwa Tônikumẽ Djunijmẽ arkum ikabẽn mex jarẽ. Ar wã ne me ar iro'ã ar ibê ijê. Jeju kute ar anorja ne ar abenmã Tônikumẽ Djunij ar arẽ:n kute ar mar tỳx. Ar kumrẽx Kritu'yr amijo akẽx. Ba kam badjwỳ 'yr amijo akẽx.

<sup>8</sup> ãpritumẽ ne bar imã Bẽnjadwỳr djwỳnh jabê. Kam imã ãpritu jabê. Ar kum ikabẽn mex jarẽ.

<sup>9</sup> Ne ajte Ubanumã ikabẽn mex jarẽ. Ubanu Kritu kadjy gwaj bakôt àpẽn ar ba. Etakidjwỳ imã kĩnh. Dja gar ajte kum ikabẽn mex jarẽ.

<sup>10</sup> Ne ajte Aperimãdjwỳ ikabẽn mex jarẽ. Aperi ne Kritumã àpẽn mexkumrẽx nhym me arỳm kôt kuma. Dja gar ajte Artobur nhõ kikrekam ar wãdjwỳmã ikabẽn mex jarẽ.

<sup>11</sup> Ne ajte inhõbikwa Erodjiãomã ikabẽn mex jarẽ. Ne Naxixu nhõ kikrekam ar kute Bẽnjadwỳr djwỳnh marjamã ajte ikabẽn mex jarẽ.

<sup>12</sup> Gwaj bakanikwỳnh Kripenamẽ bakanikwỳnh Kripodjamã dja gar ajte arkum ikabẽn mex jarẽ. Nãm ar Bẽnjadwỳr djwỳnhmã àpẽn ar ba. Dja gar ajte Pexirmã kum ikabẽn mex jarẽ. Me kum me bakanikwỳnh kĩnh. Pexir ne Bẽnjadwỳr djwỳnhmã àpẽn ra:x.

<sup>13</sup> Nhym Rupumẽ nã ar. Badjwỳ ne ba o inã. Dja gar ajte arkum ikabẽn mex jarẽ.

Bẽnjadwỳr djwỳnh ne amijo Rupu pytãn ar o ba.

<sup>14</sup> Dja gar ajte Axikritumẽ Prekõtĩmẽ Erimanhmẽ Patubamẽ Erimijmẽ ar ro'ã gwaj baje aro bakamyja arkum ikabẽn mex jarẽ.

<sup>15</sup> Ne Pirogumẽ Djurijmẽ Nerumẽ Neru kanikwỳnhmẽ Orĩpamẽ ar ro'ã Jeju nhõ me ja kunĩmẽ dja gar arkum ikabẽn mex jarẽ.

<sup>16</sup> Ne abenwỳr bõx ne abeno arõrõk ne aben pa krij. Apỹnh me kute amim Kritu mar ne kôt ar aben pydjio ba djãri ne me ar amã kabẽn mex jarẽ.

*Me kute aminêje me 'ãno ãm'ã memã karõ.*

<sup>17</sup> Akmere, àpnhĩre ar, gora ikabẽn ma. Arỳm ne gar ajte Metĩndjwỳnh kabẽn kukrãdjã mar katãt. Dja me'õ ar bõx ne kupa'ã ajte ar amã atemã mỳjja'õ jarẽ. Ne abenbê ar ajo bikjêr prãm ne Metĩndjwỳnhbê ar ajo akẽx prãm. Gora ar aminêje me 'ãno djan memã akãx.

<sup>18</sup> Mỳkam? Bir, djãm me wã ne me gwaj banhõ Bẽnjadwỳr djwỳnhbê Kritumã apê? Kati. Nãm me amidjwỳnhbit man mã axwe. Ne kute me noo biknor kadjy prĩne memã me kabẽn irõ mex. Ne memã 'êx ne kabẽn mexkumrẽx. Nhym me no rerekreja kum me kabẽn kĩnhkumrẽx.

<sup>19</sup> Nhym be ar ga ne gar ajte Metĩndjwỳnh mar mex nhym me kunĩ kute abenmã ar ajarẽho ipõk ba ar ama. Ne kam ar akam ikĩnhkumrẽx. Kam, dja gar mỳjja mexbit ma. Kwãrĩk wãnh mỳjja punu mar kêt.

<sup>20</sup> Metĩndjwỳnhkôt me umar mexkumrẽx. Ta dja ar amã tỳx jadjã nhym Xatanaj te ar amã apnê. Kôt ar ajaxwemã te ar amã apnê gar amijãno dja. Arỳm aje Xatanajmã rerek jadjãrmã. Aje mrãmri ne aparo Xatanaj krã kajyr pyrãk. Arỳm aje Xatanajmã rerek jadjãr 'yr.

Gê Bẽnjadwỳrbê Jeju tu kum ar akaprĩn ar ajo ba. Tãm ne ja.

<sup>21</sup> Ximoxi ikôt àpẽnha ne ar amã kabẽn mex jarẽ. Inhõbikwa Juxumẽ Djaxõmẽ Xopatudjwỳ ar amã kabẽn mex jarẽ.

<sup>22</sup> Ba ibê Texu ne ba Paur kukwakam pi'õk ja no'õk. Nã bãm tu amim Bẽnjadwỳr djwỳnh markumrẽx. Ne amũ ar amã ikabẽn mex jarẽ.

<sup>23</sup> Gajudjwỳ ne ar amã kabẽn mex jarẽ. Jakam ar ije amim Jeju mar ne kôt ar

aben pydjio ibaja kunĩ ne bar mã Gaju nhõ kikrekam bõx nhym mã ar ikunĩo djuw mex.

Eraxumẽ gwaj bakamy Kwatu ar amã kabẽn mex jarẽ. Eraxu ne kute krĩrax jakam bẽnjadjwýmã pi'òk kaprĩ pumũnh djwýnh. <sup>24</sup> Gê Bẽnjadjwýr djwýnhbê Jeju Kritu tu kum ar akunĩ kaprĩ:kumrẽx ne ar ajo ba.

<sup>25</sup> Dja ar amã tỳx jadjà. Amrẽbê ne ba kàj bê memã Jeju Kritu'ã ajarẽ nhym 'ã ujarẽnh arým ar awýr bõx gar tu amim markumrẽx. Ar aje tu amim markumrẽxkam dja ar amã tỳx jadjà gar kõt ar amijo aban 'ã adjukanga kêt. Amrẽbê ne Kritu'ã ujarẽnh nyja me bakukãmãrebê bipdjur tũm. Nhym kam me kute arẽnh kêtumrẽx. <sup>26</sup> Nhym kam ajbir jakam Metĩndjwýnh arým gwaj bamã Kritu'ã ujarẽnho amirĩtkumrẽx. Amrẽbê: ne Metĩndjwýnh kukwakam kabẽn jarẽnh djwýnh Kritu'ã pi'òk no'òk gwaj jakam, 'ãtũ:mkam amim arẽn arým kuma. Metĩndjwýnh tĩn ne ar ba rã'ã: rã'ã ne. Kabẽn kõt ne gwaj apýnh pyka djàri kunĩkõt memã Kritu'ã ajarẽ nhym kunĩkõt me arým 'ã ujarẽnh ma. Dja me kwý tu amim Kritu markumrẽx ne kabẽn markumrẽx ne kõt ar amijo ba. Ja kadjy ne gwaj memã 'ã ajarẽ.

<sup>27</sup> Metĩndjwýnh pydji ne amak me:xkumrẽx ne no me:xkumrẽx. Ba kum meo a'uw gê memã amak bõ. Me kute tu amim Jeju Kritu markumrẽxkõt gê memã amak bõ. Dja memã amak bõ nhym me kunĩ arým kum rax jarẽnh rã'ã: rã'ã ne. Tãm ne ja.



## Paur kute Kôritukam me jamã pi'ôk kumrêx no'ôk ne ja.

Paur ne krîraxbê Kôritukam me jamã pi'ôk no'ôk ne. Nãm arým pyka kunĩ'ÿr mrãnhkôt me'ÿr bôx ne memã Jeju jarê nhyr me kwÿ arým tu amim markumrêx ne 'ã abeno akprô. Nhyr kam Paur arým mã me jad-jwÿ'ÿr tẽ nhyr tekrekam me amijo ajkê. Nãm me abenmã kum,

—Djã nãm mrãmri Jeju Paur jano nãr kon, ane ne kam ajte abenbê bikjêro kumex. Ne kam ajte kute Jeju tyk marmãn kam ajte bibãnh ar mrãn abenbê djwÿ pytãro ba. Ne kam ajte me kãtãm nhipôkri aben japry ar o ba. Nhyr kam ajte me'ô bãmbê prôo akĩ nhyr me tu ate krãn ar ban kute nêje kukrà kêt. Ne kam ajte abenmã kum,

—Kati, me akubyn tĩn kêt. Nãm me tu tykkumrêx, anhÿr ar o ba. Ne kam ajte,

—Mã dja gwaj nê? Djãm gwaj baje mry me kute mÿjjao Metĩndjwÿnh karô nhipêxmã bôrja kurmã nãr kon? ane. Ne kam ajte,

—Me kupry ne ar babit ne mex, nãr kon me abenwÿr môrbit mex, ane. Be, nhyr Paur mÿjja ja kunĩ man kam prĩne pi'ôk no'ôkkôt memã 'ã karô.

<sup>1</sup> Ba ne ba ibê Paur. Kritu Jeju ne amiwÿr ijuw. Metĩndjwÿnh kute amim ijã karô kôt Jeju amiwÿr ijuw ne ar ijo ban ijano. Ba kam arým 'ã memã idjujarênh ar iba. Me bakamy Xoxinidjwÿ ne ikôt dja.

<sup>2</sup> Krîraxbê Kôritukam ar aje Metĩndjwÿnh mar ne kôt aje ar aben pydjio abaja ba ar amã ikabên jarê. Kritu Jeju ne arým amimexo ar ajo mex. Arým amiwÿr ar ajuw gar tu amim markumrêx. Kute ar ajo ô me ja kadjy ne amiwÿr ar ajuw. Nãm amiwÿr gwaj bakunĩ 'uw. Apÿnh gwaj baba djãri bakunĩ 'uw. Gwaj baje banhô Bẽnjadjwÿr djwÿnhbê Jeju Kritumã amijo badjã'wÿrja kunĩ 'uw. Kute gwaj bajo ô me ja kadjy ne gwaj bakunĩ 'uw. Amũ

\* **1:3** Djãm ar ga ne gar ajaxwe kêt nhyr pãnh kum ar akaprĩ Kati. Ar ga ne gar te ajaxwe kêt mã. Nhyr be, ta ne tu kum ar akaprĩ.

me wãmê gwaj bamê ne Jeju arým amiwÿr gwaj bakunĩ 'uw. Ar amã ne ba ikabên jarê.

<sup>3</sup> Metĩndjwÿnhbê ne me Babãm. Ne Bẽnjadjwÿr djwÿnhbê ne Jeju Kritu. Gê ar tu kum ar akaprĩn\* ar ajo ba gar adjumar mex rã'ã ne.

*Kute Metĩndjwÿnhmã mekam amikĩnh jarênh ne ja.*

<sup>4</sup> Ba mã ijo ba djwÿnh, Metĩndjwÿnhmã ar akam amikĩnh jarê. Metĩndjwÿnh tu kum ar akaprĩ. Gar tu amim Jeju Kritu markumrêx nhyr arým kum ar akaprĩ. Kam ne ba mã kum ar akam amikĩnh jarê. <sup>5</sup> Nãm kum ar akaprĩn prĩne ar ajo djuw mex. Mÿj ne ar ajo djuw mex on? Bir, nãm ar amã apÿnh akĩnh djã, adjãpênh djã'ã karô gar maro aban kam arým kôt aje memã kukràdjã jarênh me:xkumrêx ne aje mÿjja mar me:xkumrêx. <sup>6</sup> Ar ba ne bar ar amã Kritu jarê. Ar ije omũnh kôt bar ar amã arê: gar arým amim,

—Mrãmri Paur ar kabên katãtkumrêx, ane. Nã gãm ar amim anen kam arým tu amim Kritu markumrêx.

<sup>7</sup> Ne kam aje ãpênh djã kunĩ mar ne o aba. Metĩndjwÿnh Karô ne ar amã ãpênh djã kunĩ'ã karô gar aje mar ne akubyn bôxkam amako aba. Bẽnjadjwÿr djwÿnhbê Jeju Kritu bôxkam amako aba. Kam ne ba mã Metĩndjwÿnhmã ar akam amikĩnh jarê.

<sup>8</sup> Ta dja mã ar amã tÿx jadjã gar mã amim mar tÿx rã'ã: nhyr Bẽnjadjwÿr djwÿnhbê Jeju Kritu arým bôx. Ne kam ar amã ajaxwe jarênh kêtumrêx gar arým kum ajaxwe kêt ne amextire ne dja. <sup>9</sup> Metĩndjwÿnh ne mrãmri kabênkumrêx. Kabên kôt dja gwaj bajo djuw mexkumrêx. Ta ne arým kra'ÿr ar ajuw. Bẽnjadjwÿr djwÿnhbê Jeju Kritu'ÿr ar ajuw ne ar ajo ba. Gar kam arým o anhôbikwakumrêx. Mrãmri kabênkumrêx.

*Me kabêno aben japanho ku'ê nhyr nêje memã kabên.*

*Rô 15.5; A Kô 13.11; Pir 2.2; Ped k 3.8*

<sup>10</sup> Akmere, ãpnhĩre ar, ba ar amã arê gar ama. On abenmã akabên pydjĩn arê. Bẽnjadjwÿr djwÿnhbê Jeju Kritu kukwakam ne ba ar amã amex'ã karô. Kwãrĩk wãnh

apÿnh mÿj xêjakôt adjâm ne abenã akabên kêt. Ate dja gar axikôt akabênjabit man axikôt akabên jarên kôt prïne amex. <sup>11</sup> Akmere, àpnhîre ar, Krôre nhô kikre wâkam ar kwÿ arÿm nînh iwÿr bôx ne ar arÿm ar ajã imã,

—Onÿj, me kabêno aben japanho kumex, ane. Ba arÿm ar kabên man arÿm wãm ar amã arê. <sup>12</sup> Gar we akwÿ amã me kînh kêt ne memã kum,

—Ba ne ba Paur kôt ar iba, anhÿro aba. Nhym ar akwÿ ajte amã me kînh kêt ne memã kum,

—Be, ba ne ba Apôr kôt ar iba, anhÿro aba. Nhym ar akwÿ ajte amã me kînh kêt ne memã kum,

—Be, ba ne ba Xepa kôt ar iba, anhÿro aba. Nhym ar akwÿ ajte amã me kînh kêt ne memã kum,

—Be, ba ne ba Kritu kôt ar iba, anhÿro aba. Nã gãm ar ã ari aben bê abikjêrn amã aben kînh kêtone ane nhym me arÿm imã arê ba arÿm kuma.

<sup>13</sup> Nã gãm ar arÿm apÿnh mÿj xêja kôt aku'ên arÿm abenã akabê:n ne. Nã gãm ar arÿm aje abenmã Kritu nhirên pyrâk. Djâm ba ne me arÿm pîte'y'ã inhô gar we ikôt ar aba? Djâm imã ne me arÿm ngômã ajadjà gar we ikôt ar aba? Kati:

<sup>14-16</sup> Djâm ba ne ba ngômã ar ajangij? Kati. Ije ngômã ar ajangjênh kêt. Kam ne ba ikînh ne Metîndjwÿnhmã amikînh jarê. Mÿkam ne ba kam ikînh? Bir, ba ren ngômã ar ajangij nhym ren ar ajô arîk ijã amim,

—Ba ne ba tu amim Paur markumrêx. Nãm arÿm amim ngômã ijadjà, ane ba ren kam ikaprîre ne. Nhym be, kati. Kripumê Gajubit ne ba ngômã ar adjà. Exepa nhô kikrekam ar jadjwÿ ba ngômã ar angij. Nhym me'ôdjwÿ ije mar kêt. Ar ngrêre jabit ne ba ngômã ar angij.

<sup>17</sup> Djâm ije ngômã me angjênh kadjy ne Kritu ijano ba têt? Kati. Kâj bê ije memã Kritu'ã ujarênh ny jarênh kadjy ne ijano ba têt. Me kum Metîndjwÿnh kînh kêtja me ta krã mexja djâm me ta krã mexo ikrã mex ne ikabên mex ne ba ar amã arê? Kati. Me kum Metîndjwÿnh kînh kêtja krã mexo ikrã mex kêt. Ba ren me krã mexo ikrã mex ne ren ar amã ikabên mex jarên ren arÿm o amibê Kritu'ã ikabênja kuno. Kritu

pîte'ykam tyk'ã ikabên ja ne ba ren o kuno. Nhym kam ren me arÿm Kritu mar kêt ne.

*Me ta krã mex'ã ujarênh.*

*Kô k 3.19*

<sup>18</sup> Nhym be, kati. Kritu pîte'ykam tykbit ne ba kâj bê ar amã 'ã ajarê nhym arÿm ar amã amirîtkumrêx. Nhym kam me biknor tokry djâkam me biknor prãmja ikabên man amim,

—Kê. Djâm katât kute amikabên jadjwÿr got? Nãm krã punu, ane. Nhym be, gwaj ba, Jeju kute gwaj bajo bakumrêxja gwaj amim,

—Mrãmri, Paur kute Kritu pîte'ykam tyk'ã ujarênhkumrêx. Nãm 'ã ajarê nhym me tu amim Kritu markumrêx. Nhym kam Metîndjwÿnh arÿm 'ityxo me utàn ar meo bakumrêx, ane. <sup>19</sup> Amrêbê: Metîndjwÿnh kute me bakukâmãremã arênh ne ja. Nãm memã kum,

“Me ta krã mex ne kute memã kabên mexja dja ba mebê kabêno akno. Nhym kam me arÿm kabên kajgo me:xi.

Nhym me ta amak mex ne kute prïne memã mÿjja'ã karô mex ne kute mar ja dja ba mebê amak mexo akno nhym me arÿm kabên kajgokumrêx.”

Nãm Metîndjwÿnh ã me bakukâmãremã ane nhym me arÿm 'ã pi'ôk no'ôk ne. Nhym kam me arÿm aben djô'ã arêho mô:n arêho môr tâmtã arÿm 'ÿr o bôx. Tû:mrâm me bakamingrãnyrekam Jeju Kritu arÿm pîte'y'ã wajêt ne kam ty. Ty nhym Metîndjwÿnh arÿm o gwaj bapytàn kam arÿm mebê amak mexo akno. Nhym kam me arÿm kabên kajgo me:x ne.

<sup>20</sup> Nhÿnh ne me'ô ta krã mex? Nhÿnh ne me kum Metîndjwÿnh kînh kêtja ta krã mex? Kati. Nhÿnh ne me'ô ta kute prïne me kukràdjà mar? Kati. Nhÿnh ne me'ô ta krã mex ne kute kabên mexo kute me apanh mar? Kati. Me kum Metîndjwÿnh kînh kêtja ne me krã mex kêt. Me kabên kajgo me:xi.

<sup>21</sup> Mÿkam ne me kabên kajgo mexi? Bir, Metîndjwÿnh ta kute katât me'ã amikabên djirkumrêx ne amim,

—Djâm me kum ikînh kêtja ta kute imarmã? Djâm me ta krã mex ne kute imarmã? Arkati. Me kute kâj bê memã Kritu pîte'ykam tykja'ã ujarênh nhym me

kute me'ã, “Me krã punu”, anhÿrja. Me kute anhÿrkam gê inhõ àpênh ar kàj bê memã Kritu pîte'ykam tyk'ã ujarênhkumrêx. Nhyim kam me kwÿ kute tu amim Kritu markumrêx ba arÿm me utàn ar meo iba. Ja ne imã kÿnhkumrêx. Nãm ã Metÿndjwÿnh me'ã amim ane. Kute amim anhÿrkam ne me kabên kajgo me:xi. Me kum Metÿndjwÿnh kÿnh kêt ta krã mexja ne me kabên kajgo me:xi.

<sup>22</sup> Be, mebê idjaer ne me ar imã,

—Goja mÿjja pumÿnh kêt'õ nhipeÿx ba me omÿn kam arÿm amim Kritu'ã akabên markumrêx, anhÿro ba. Nhyim be, me bajtembê kregu ne me kute ar imã,

—Goja me krã mex o akrã mex ne akabên mex ne arÿm imã Kritu 'ã ajarê. Dja ba me aman kam arÿm amim Kritu'ã akabên markumrêx, anhÿro ba. <sup>23</sup> Bar kàj bê memã kum,

—Metÿndjwÿnh ne Jeju'ã Bënjadjwÿrbê kumkatibê Krituja mẽ nhyim arÿm pîte'y'ã wajêt ne ty, ane. Nhyim mebê idjaer arÿm kôt kum Jeju kurê kute mrãmri ne kên me par tok nhyim me rôrôk ne arÿm kum kurêja pyrâk. Nhyim be, me bajtem kwÿ ne me abenmã,

—Nãm ar ari kabên kwÿ jadju:w. Nãm ar krã punu, anhÿro ba.

<sup>24</sup> Nhyim be, bar katàt me kwÿmã 'ã ajarê. Metÿndjwÿnh kute arÿm amiwÿr me kwÿ 'wÿr ne ar meo bajamã 'ã ajarê. Mebê idjaerja nâr me bajtemja bar katàt me jamã 'ã ajarê. Katàt Kritu pîte'ykam tyk'ã memã ajarê. Nhyim me abenmã kum,

—Djãm Metÿndjwÿnh 'irere:k got? 'Itÿxo kute me kunÿ rer me:xi. Djãm Metÿndjwÿnh kute ari kabên jadjwÿr got? Metÿndjwÿnh kute no mexo, kabên mexo me kunÿ rer me:xi, anhÿro ba.

<sup>25</sup> Mÿkam me ã abenmã anhÿro ba? Bir, Metÿndjwÿnh kute krã mexo, 'itÿxo kute me kunÿ rer mexkam. Nãm me kute Metÿndjwÿnh'ã amim, “Krã punure”, anhÿr, me ta ne me krã punure. Nhyim be, Metÿndjwÿnhbit ne krã me:xkumrêx. Nâr, nãm me kute, “Irerekre”, anhÿr, me ta ne me 'irerekre. Nhyim be, Metÿndjwÿnh 'itÿxo kute me rer me:xi.

<sup>26</sup> Aj, mÿj gêdja ga me kam amikadjy ama? Bir, mÿj ne ga me kam akute nhyim

Metÿndjwÿnh arÿm amiwÿr me ajuw ne me ajo ba? Bir, djãm me akrãptÿ akrã mexkam ne amiwÿr me ajuw ne me ajo ba? Kati. Djãm me akrãptÿ ajitÿx nhyim kam arÿm amiwÿr me ajuw ne me ajo ba? Kati. Djãm me akrãptÿ arÿnh nhyim kam arÿm amiwÿr me ajuw ne me ajo ba? Kati.

<sup>27</sup> Nhyim be, me kum Metÿndjwÿnh kÿnh kêt kute me'ã, “Me krã punure”, anhÿr Metÿndjwÿnh arÿm amijo me we krã punure ja pytàn meo ba. Mÿj kadjy? Bir, dja meo ban arÿm meo me we krã mexjao apa. Me ta kute amijo krã mexjao apa nhyim me arÿm pijàm ne. Me kum Metÿndjwÿnh kÿnh kêtja kute me'ã, “Me rerekre”, anhÿrja Metÿndjwÿnh arÿm amijo me we rerekre ja pytàn meo ba. Mÿj kadjy? Bir, dja meo ban arÿm meo me we 'itÿx jao apa. Me ta kute amijo 'itÿxjao apa nhyim me arÿm pijàm ne. <sup>28</sup> Me kum Metÿndjwÿnh kÿnh kêtja kute me'ã,

—Me kajgo. Me kum me kÿnh kêtumrêx, anhÿro ba. Me kajgo ja Metÿndjwÿnh arÿm amijo me utàn meo ba.

Mÿj kadjy? Bir, dja meo ban arÿm meo me rÿnho apa nhyim me arÿm pijàm ne kajgo ne. <sup>29</sup> Dja meo ba nhyim me kunÿ arÿm Metÿndjwÿnhmã amijo àmra kêt. <sup>30</sup> Nhyim be, ar ga ne Metÿndjwÿnh arÿm amijo ar apytàn Kritu Jeju kôt ar ajo ba. Ne arÿm gwaj bamã Kritu jano nhyim bôx ne arÿm gwaj bamã katàt kabên jarênhkumrêx. Gwaj kam arÿm markumrêx ne kôt arÿm bakrã mexkumrêx. Nhyim Metÿndjwÿnh ajte Kritu kôt arÿm gwaj bamã axwe kêt jarê gwaj arÿm ta mexo bamex ne. Nhyim ajte Krituo gwaj bajaxweo pãnh mex.

<sup>31</sup> Amrêbê: me kute me bakukãmãremã arênh kôt ne ba ar amã arê. Nãm memã kum,

“Djãm amijo adjãmra prãm? Kwãrÿk wãnh amijo adjãmra kêt.

Dja ga Bënjadjwÿr djwÿnho amra.”

Nãm ã memã ane nhyim me arÿm 'ã pi'òk no'òk ne. Kam, dja gwaj Jeju Kritubito amra. Tãm ne ja.

## 2

<sup>1</sup> Akmere, àpnhÿre ar, amrêbê ne ba ar awÿr bôx ne Metÿndjwÿnh kukwakam ar amã kabên jarê. Djã nã bãm me kum

Metîndjwýnh kính kêtja krã mexo ikrã mex ne arým mekôt prîne ikabên jarênh mex, prîne mekôt ar amã ikabên jarênh mex gar arým amã ikabên kínhkumrêx? Kati. Mýkam? <sup>2</sup> Bir, ba ar awýr ibôx kêttri amim,

—Dja ba arkam bôx ne Jeju Kritubit man arkum 'ã ajarê. Kritu pîte'y'ã jêt ne tyk'ã dja ba ajarê. Kwãrîk wãnh ba arkum atemã mýjja'ô jarênh kêt. Nã bãm ã amim ane.

<sup>3</sup> Ne kam ar awýr bôx ne amikam irerekre ma. Ba irerekre man arým ar apy-maje itertet kumex. <sup>4</sup> Djã nã bãm amim,

—Ba me krã mex o ikrã mex ne prîne arkum ikabên jarênh mex gê ar arým ikabên mex man kôt ar amijo ba, ane? Djã nã bãm amim anen arým ã ar amã arênh ane? Kati. Metîndjwýnh Karô ne ijo ba gar arým ipumũ. Ba kam arým ar amã ikabên jarê gar arým ama. <sup>5</sup> Mýj kadjy ne ba ã ar amã ikabên jarênh ane? Bir, ar aje me ta krã mex mar kêt kadjy. Nhym be, Metîndjwýnh ne 'itý:x. Ar aje tu amim Metîndjwýnh markumrêx kadjy ne ba ã ar amã ikabên jarênh ane.

*Me kute Metîndjwýnh Karô marbit ne me krã mex.*

*Mat 7.6; Dju r 14.22*

<sup>6</sup> Be, djã nã bãm ar ikrã punun kôt ikabêndjwý punu? Kati, nã bãm ar ikrã mex ne kôt ikabên mex. Me amak mexjamã ne bar prîne memã arê. Nhym be, me kum Metîndjwýnh kính kêtja kabên kôt ne bar ije ikabên jadjwýr kêt. Nãr, me rûnh kwý kum Metîndjwýnh kính kêtja kabênkôt ne bar ije ikabên jadjwýr kêt. Me ja dja me ï kêtumrêx.

<sup>7</sup> Nhym be, Metîndjwýnh kute katàt kabên jadjwýrkumrêx. Kabên ja ne bar ije memã arênh. Mýjja kunĩ kêttri ne Metîndjwýnh kute tu amim kabên'ã karôkumrêx. Kute prîne amimexo gwaj bajo mex kadjy amim kabên'ã karô. Ne kam kute me bakukãmãremã arênh kêt. Ne kam ajbir ar imã kabên jarê bar arým jakam memã arênh iba.

<sup>8</sup> Djãm pykakam me rûnh'ô kute kabênja mar? Kati. Ne ren me rûnh kuman ren pîte'y'ã Jeju nhôr kêt. Bênjadjwýr djwýnh Jeju ne prîne mex ne umakumrêx. Ren me kute pîte'y'ã nhôr kêtumrêx. <sup>9</sup> Mrãmri me'ô ta kute kabênja mar kêtumrêx. Ije

ar amã arênh kôt ne me amrêbê: me bakukãmãremã arê. Me memã kum, “Metîndjwýnh ne arým me kadjy amim mýjja mex'ã karô.

Djãm me'ô ta kute omũnh? Kati. Me'ô ta kute omũnh kêt.

Djãm me'ô ta kute mar? Kati. Me'ô ta kute mar kêt.

Djãm pykakam me'ô ta kute amim 'ã karô? Kati. Me'ô ta kute amim 'ã karô kêt.

Me kum abêja kadjy ne Metîndjwýnh amim mýjja mex'ã karôn memã kudji. Nhym kam me'ô ta kute mar kêtumrêx.”

Nãm me ã me bakukãmãremã ane nhym arým 'ã pi'ók no'ók ne.

<sup>10</sup> Ga, me ta te kute marmãja pumũ. Nhym be, Metîndjwýnh ta ne arým gwaj bamã o amirîtkumrêx. Karôo kute gwaj bamã kabêno amirîtkumrêx. Karô kute prîne mýjja mar. Metîndjwýnh kute ôkre kadjwýnhbê amim mýjja'ã karôja kunĩ ne Karô kute prîne mar mex. <sup>11</sup> Djãm gwaj babu'ã me'ô kute gwaj bakadjwýnhbê bakabên mar? Kati. Gwaj bajbit ne gwaj baje banhôkre kadjwýnhbê bakabên mar. Metîndjwýnhdjwý ôkre kadjwýnhbê kabênja me'ô kute mar kêtumrêx. Metîndjwýnh Karôbit arým kute mar.

<sup>12</sup> Djãm me kum kính kêtja karô ne Metîndjwýnh gwaj bamã ano nhym gwaj bajo ba? Kati. Ta Karô ne gwaj bamã ano. Gwaj baje bakînh djã mar kadjy ne gwaj bamã ano. Metîndjwýnh ta gwaj bamã apýnh bakînh djã ngã, kajgo gwaj bamã kungã. Gwaj ba ne baje bakînh djãjao pãnh kêt. <sup>13</sup> Bar memã gwaj bakînh djã'ã idju-jarênh ar iba. Djãm me kum Metîndjwýnh kính kêt ja ne ar imã 'ã ajarê, ta krã mexkôt ar imã 'ã ajarê? Kati. Metîndjwýnh Karô ne ar imã 'ã ajarê. 'ã ajarê bar ije mar ne arým memã 'ã idjujarênh ar iba. Karô kute katàt kabên jadjwýrkumrêx ar ije mar ne Karô kabên kôt memã 'ã ajarê.

<sup>14</sup> Nhym be, me ja, Metîndjwýnh Karô kute meo ba kêtja djãm me kute amim Metîndjwýnh Karô kabên mar prãm? Kati. Mýkam? Bir, nãm me aprýn amim,

—Djãm kute amikabên jadjwýr mex got? Nãm krã punu, ane. Ne kam amim,

—Ba gêt mekôt kabên ma, ane. Ne kam 'ÿr tèn gwaj bakôt maro krîn mar kajgo. Mar kajgon arÿm amim,

—Je, mÿj'ã ne kabên jarê? ane. Ne te 'ã amijakren te kute marmã.

<sup>15</sup> Nhym be, gwaj ba ne gwaj baje Metîndjwÿnh kabên kunî mar kadjy bamex. Gwaj baje Metîndjwÿnh Karô markôt kadjy bamex. Nhym be, me kute Karô mar kêtja ne me te kute Metîndjwÿnh kabên marmã. Ne kute gwaj badjwÿ gwaj bamar kêt.

<sup>16</sup> Ikabênja kôt ne me amrêbê: me bakukãmãremã kum, “Bênjadjwÿr djwÿnh kute mÿjja'ã amim karô djãm me'õ kute mar? Kati.

Kam, djãm me'õ kute Metîndjwÿnhmã mÿjja'ã karômã ne kum, ‘Gêdja ga ã ane’? ane. Arkati. Metîndjwÿnh ajbit ne kute mÿjja kunî mar.”

Nãm me ã me bakukãmãremã ane. Nhym be, gwaj bajbit ne gwaj Karô kôt Kritu dju-marô badjumar ne arÿm baje mar. Kute amikabên'ã amim karôja gwaj arÿm baje mar. Tãm ne ja.

### 3

*Me kute me prîre pyrâk nhym kute memã arênh.*

*Kô k 14.20; Ep 4.14; Idja 5.11*

<sup>1</sup> Akmere, àpnhîre ar, djãm ije ar amã ikabên kunî jarênhmã? Djãm arÿm ar ajamak mex got ije ar amã ikabên kunî jarênhmã? Kati. Ar aje Metîndjwÿnh Karô mar kêt rã'ã. Me kum Metîndjwÿnh kÿnh kêt kukràdjaja ne ar aje mar tÿx rã'ã. Ar aje me prîre bixadjwÿr nyre pyrâk.

<sup>2</sup> Ga, me prîre bixadjwÿr nyrekam kute mÿjja tÿx kur kêtja pumû. Ar gadjwÿ Metîndjwÿnh kabên kwÿbit ne ba ar amã arê. Amirîtbit ne ba ar amã arê. Ije ar amã kunî jarênh kêt. Metîndjwÿnh kabên kwÿ ne mebê bipdjur ne mebê tÿx. Me kute Metîndjwÿnh Karô marjabit ne kute kabên bipdjur mar. Djãm ije ar amã kabên bipdjur jarênh prãm? Kati. Amrêbê ne ar aje Karô mar mex kêt. Gar kam ajte jakam aje Karô mar mex kêt rã'ã. Ba kam te ije ar amã Metîndjwÿnh kabên kunî jarênh prãmje.

<sup>3</sup> Ar aje amidjwÿnhbito kÿnh kadjy amimar tÿx rã'ã ne. Ne kam te aje me urâk prãmje angryk ne ari akabêno aben japanho aku'ê. Ne kam arÿm apÿnh mÿj xê jakôt aku'ê ne arÿm abenã akabê:n ne. Djãm kam ar aje me kum Metîndjwÿnh kÿnh kêtja kukràdjaja mar kêt got? Djãm mekôt ar aje amijo aba kêt got? Mrãmri me kum Metîndjwÿnh kÿnh kêtbit ar aje amijo abakumrêx. <sup>4</sup> Ar akwÿ ar amã me kwÿ kÿnh kêt ne memã kum,

—Ba ne ba Paur kôt ar amijo iba, anhÿro aba. Nhym ar akwÿ ajte tãm ne memã kum,

—Ba ne ba Apôr kôt ar amijo iba, anhÿro aba. Gar kam aktã ar amã aben kÿnh kêtô aban mÿj xêja kôt aku'ên ã aben bê akêxo ane. Djãm me kum Metîndjwÿnh kÿnh kêtja kôt adjumar kêt got? Ar aje me kum Metîndjwÿnh kÿnh kêtja kôt adju-markumrêx.

<sup>5</sup> Djãm Apôrmê ar irax got gar ar ikôt aben bê abikjêr prãm? Kati. Ar irax kêt ne ingrire ne ibê Metîndjwÿnh nhô àpênhbit. Ar ikabên kôt ne gar tu amim Jeju markumrêx. Kute ar imã apÿnh ar idjapênh djà'ã karô kôt ne bar kum idjapênho iba.

<sup>6</sup> Bar ije puro djuw mex djwÿnh pyrâk. Ba ne ba ije pur kre djwÿnh pyrâk. Nhym Apôr kute ngo djwÿnh pyrâk. Nhym be, Metîndjwÿnhbê djwÿ kunîmã rÿnh jangjênh djwÿnh. Ba ikumrêx ne ba ar amã Jeju'ã ajarê gar arÿm 'ÿr amijo akêx ne kôt ar amijo aba. Nhym kam Apôr bôx ne ar amã Metîndjwÿnh kabên ra:x ne arê gar ama. Nhym be, Metîndjwÿnhbit ne ar amã ajamak bô gar arÿm amû maro amikamê. <sup>7</sup> Kam ne ba ikajgokumrêx. Nhym Apôrdjwÿ kajgokumrêx. Nhym be, Metîndjwÿnhbit ne raxkumrêx. Kute memã amak bônham ne raxkumrêx.

<sup>8</sup> Djwÿ abatãnhmã ne kre djwÿnh pur kre nhym ajte ngo djwÿnh pur ngo. Ar badjwÿ ne ar aje Jeju mar raxmã bar ar amã arê. Ar ije ar amã arênh mex kôt dja Metîndjwÿnh ar inhî pÿnhkôt ar imã o pãnh ne. <sup>9</sup> Ar iro'ã ne bar Metîndjwÿnhmã idjapênh ar iba. Ar ga ne gar aje Metîndjwÿnh nhô pur pyrâk. Ar aje Metîndjwÿnh mar ne kôt amijo aba kadjy ne bar ar akam apê kute mrãmri ne me kute purkam àpênh pyrâk. Ne ar aje mrãmri ne kute Metîndjwÿnh nhô kikre

pyràk. Kute kên kräptïo kikre pyràk. Ar akräptï nhyM Metïndjwýnh arým amijo ar apytàn ar ajo kra.

*Kikre'ã memã ujarênh.*

*A Kô 6.16; Ep 2.20; Ped k 2.5*

<sup>10</sup> Metïndjwýnh tu kum ikaprïkam ne ba prïne ar amã Metïndjwýnh kukràdjà jarênh mex. Kute mrãmri ne me kute prïne kikre nhípêx mexja pyràk ne ba ar amã kukràdjà jarênh mex. Ba ne ba ikumrêx ar amã kukràdjà jarê gar ama. Kute mrãmri ne me kute kikremã pyka nhípônho tēm, katà:t pyka nhípônho tēm ne kam kam kên kapïn ne kam iby pyka tÿx kapïnja pyràk ne ba ikumrêx ar amã arênh mex. Me'õ ne arým ar awÿr bôx ne ajte ar amã kukràdjà 'õdjwÿ jarê. Kute mrãmri ne me'õdjwÿ kute pyka kadjwýnhbê kên ja nhiby kikre pyràk ne me'õ ar amã kukràdjà 'õdjwÿ jarê. Ije ar amã kukràdjà jarênh nhijukri ar amã arê. Gora gê ikôt bôxja ikudjwa ajte Metïndjwýnh kukràdjà jarênh 'ãno djan prïne katàt ar amã arênh mex. Kute mrãmri ne me kute kikre 'ãno ãm ne prïne katàt ipêx mexja pyràk gora gê me katàt ar amã arênh mex.

<sup>11</sup> Djãm me kute pyka kadjwýnhbê kên ngràn ne kupa'ã kute ajte 'õdjwÿ nhípêxkam mex got? Kati. Kritudjwÿ. Djãm me'õ kute katàt memã Kritu'ã ujarênh nhyM ajte me'õdjwÿ bôx ne kute memã kupa'ã 'ã ujarênhkam mex got?

<sup>12</sup> Ë, gop ajte kikre ma. Djãm me kute mÿjja tÿxo, mÿjja pãnh raxo kikrekam punu got? Me kute kên karÿro ipêx nàr kute kryt jakao ipêx nàr kute kên pãnh rax 'õdjwÿo ipêx. Tãm dja punu kadjy kêt ne tũmrãm mex rã'ã ne. Me'õ kute ar amã Metïndjwýnh kabên jarênhjadjwÿ godja ar amã katàt Metïndjwýnh kabênkumrêx jarê gar ama. NhyM kam kute mÿjja pãnh raxo kikre pyràk. Gar kam arým Metïndjwýnhmã amex rã'ã ne tu amim Jeju markumrêx rã'ã ne.

Ë, gop ajte kikre ma. Djãm me kute mÿjja rerekre, mÿjja pãnh kryo kikrekam mex got? Me kute pïo ipêx nàr kute bõo ipêx nàr kute bõo ipêx. Tãm dja tēmbê punu. Me'õ kute ar amã Metïndjwýnh kabên jarênhjadjwÿ godja bôx ne Metïndjwýnh kabên kupa'ã ar amã arê, Metïndjwýnh

kabên kêt jarê, ta kabên ar amã arê gar ama. NhyM kam kute mÿjja rerekreo kikre nhípêx pyràk. Dja ar amã arê gar ama. Ne kam arým Metïndjwýnhmã amex kêt ne tēmbê apunu ne tu amim Jeju markumrêx kêt.

<sup>13</sup> Dja Jeju arým bôx 'ÿr nhyM arým apÿnh me umar punu djari ban bôx. Kute mrãmri ne kuwy kikre'ÿr bôx pyràk. NhyM kam me arým me omũ. Me'õ kute memã kabên jarênh mex kôt dja me arým omũ. Nàr me'õ kute memã kabên jarênh punu kôt dja me arým omũ. Godja me'õ arým katàt memã kabên jarênhkumrêx jabej nhyM te me umar punu djà me'ÿr bôx nhyM me mex rã'ã ne. Dja me kute mrãmri ne kuwy kikre'ÿr bôx ne xêt kêt ne umar mex mex ne ku'ê pyràk. Nàr, godja me'õ kupa'ã memã ta kabên jarênh jabej. NhyM kam me umar punu djà me'ÿr bôx. NhyM kam me arým mex kêt ne Jeju bê amijo akêx. Dja me kute mrãmri ne kuwy kikre'ÿr bôx nhyM pòk ne xêt pyràk.

<sup>14</sup> Godja me'õ katàt memã Metïndjwýnh kabên jarênhkumrêx jabej nhyM me arým Jeju mar tÿx rã'ã. NhyM kam Metïndjwýnh arým me'õjamã pãnh mextire ngã.

<sup>15</sup> Nàr godja me'õ memã arênh punu jabej nhyM me arým Jeju bê amijo akêx. NhyM kam me'õja arým umar punure. Kute pãnh'õ byr kêt kam dja umar punure. NhyM be, dja Metïndjwýnh arým me'õja pytà. Kute mrãmri ne me kute kikre pòk katikôt kute me pa 'amÿnh ne meo kator pyràk.

<sup>16</sup> Metïndjwýnh Karõ ar akam ÿrkam ar aje mrãmri ne Metïndjwýnh nhõ kikreti pyràk. Djãm ar aje ja mar kêt? <sup>17</sup> Metïndjwýnh nhõ kikreti ne ta mexo mex ne uma:. Gêdja me'õ õ kikretio bikênh jabej nhyM kam pãnh o bikênh rax ne. Ar gadjwÿ ar aje Jeju markam aje mrãmri ne õ kikreti pyràk ne ta mexo amex. Gêdja me'õ ar abê Metïndjwýnh kurên kubê ar ajo akêx jabej nhyM kam pãnh o bikênh rax ne.

<sup>18</sup> Gar ajõ we aje prïne me kukràdjà mar. We aje me kum Metïndjwýnh kïnh kêt kukràdjàja mar ne mekôt ar amijo aba. Ba amã arê ga ama. Kwãrïk wãnh amim ajêx ne aminoo abiknor kêt ne amim,

—Ba ne ba mekôt ikrã mexkumrêx, anhÿr kêt. Djãm mrãmri akrã mexkumrêx? Kati. Ate dja ga amim, “Ikrã punu”, ane. Mÿj kadjy dja ga ã amim ane? Bir, dja ga amim anen kôt amim Metîndjwÿnh man arÿm kôt akrã mexkumrêx.

<sup>19</sup> Me kum Metîndjwÿnh kÿnh kêtja kute amikukràdjà punu kôt amijo ban kute amim, “Ba ikrã mexkumrêx”, anhÿrja, me jamã ne Metîndjwÿnh memã krã punu jarê. Ije ar amã arênh ja ne me amrêbê: me bakukãmãremã arênh memã kum,

“Ga, me kute mry kukràdjà mar kute kum ka'ên kam kute kum ò mry janhôrja pumû. Nhy mry ta amikukràdjà kôt amijo ba tãmtã ò mry'ÿr bôx ne ta arÿm amipynê.

Nhy m me kum Metîndjwÿnh kÿnh kêtjwÿ we ta krã mexkam dja me amikukràdjà punu kôt amijo môr tãmtã arÿm ta amijo bikênh mex ne.”

Nãm me ã me bakukãmãremã ane nhy m me arÿm 'ã pi'òk no'òk ne. <sup>20</sup> Nhy m me ajte kam memã kum,

“We me krã mex. Me kum Metîndjwÿnh kÿnh kêtja we me krã mexja. Me ta umar kôt ne me amim 'ã karô.

Nhy m Bênjadjwÿr djwÿnh arÿm me kabêh man kam arÿm amim,

‘Me kabêh mrãmri kajgokumrêx.’

Nãm ã amim ane.”

Nãm me ã me bakukãmãremã ane nhy m me arÿm 'ã pi'òk no'òk ne.

<sup>21</sup> Kam, djãm ar aje mekôt we me krã mexjao adjãmramã? Kati. Kwãrÿk wãnh mekôt we me krã mexjao adjãmra kêt. Mÿkam? Bir, mÿjja kunÿ ne ar anhô mÿjjakam. <sup>22-23</sup> Metîndjwÿnh ne Krituo Kra nhy m arÿm ar ajo kamy. Ar aje tu amim markumrêxkam arÿm ar ajo kamy. Nhy m kam Metîndjwÿnhdjwÿ arÿm ar ajo kran kam arÿm ar amã mÿjja kunÿ ngã. Ne kam ba arÿm ibê ar anhô àpênh. Nâr, kam Apôr arÿm kubê ar anhô àpênh. Nâr, kam Pedru arÿm kubê ar anhô àpênh. Kritu kute ar ajo krakam pykakam mÿjja kunÿ ne ar anhô mÿjja. Gar arek mekôt atÿn ne ar aba nâr ty. Te tyn arÿm Metîndjwÿnh kôt atÿn ne ar aba rã'ã: rã'ã. Kam mÿjja kunÿ ne ar anhô mÿjja. Ajbir jakam mÿjja ne ar anhô mÿjja. Nâr amrê gwaj bawÿr mÿjja apôxdjwÿ ne ar

anhô mÿjja. Kritu kute ar amã mÿjja kunÿo bakam mÿjja kunÿ ne ar anhô mÿjja.

## 4

*Paur kute Kritumã àpênh'ã memã amijarênh.*

### *Rô 14.4*

<sup>1</sup> Kam gê me ar ijã abenmã kum,

—Ar wãbê ne Kritu nhô àpênh ne ar gwaj bamã Metîndjwÿnh kabêh jarênh ba. Amrêbê memã kabêh jarênh kêtja ne ar arÿm jakam gwaj bamã arênh ba, ane.

<sup>2</sup> Bir, mÿj dja memã kabêh jarênh djwÿnh memã arênh on? Bir, dja memã arênh katât. Metîndjwÿnh kute kum arênh kôt dja memã arênh katât.

<sup>3</sup> Nhy m be, ba. Ar ga ar aje te idjapênh jaxwemã akator prãmkam djãm kam itÿn prãmmã? Kati. Djãm ije idjapênh jaxwe'ômã ikatorn mar? Kati. Ije amikam ijaxwe'ô mar kêt. <sup>4</sup> Ne kam djãm ije amikam ijaxwe'ô mar kêt kam ije amim, “Ijaxwe kêt kumrêx”, anhÿrmã? Kati. Bênjadjwÿr djwÿnh ne kute imar. Ta ne kute idjapênh jaxwe'ô pumÿnh jabej ne kute imar.

<sup>5</sup> Kam, kwãrÿk wãnh me'ômã axwe jarênh kêt. Nâr, kum axwe kêt jarênh kêt. Gwaj Bênjadjwÿr djwÿnh nhô akatikam ama. Ta dja bôx ne me mex nâr me axweo amirÿt ne mÿjja kunÿo amirÿt. Ga, me kute akamãt kô tykkam mÿjjao bipdjurja pumû. Nhy m a'ukam amirÿt nhy m me kunÿ arÿm omû. Bênjadjwÿr djwÿnhdjwÿ dja mÿjja kunÿo amirÿt, me kute mÿjja pudjurja kunÿo amirÿt gê me kunÿ kuma. Me kute umar djã kadjwÿnhbê amim mÿjja'ã karôjao amirÿt gê me kunÿ kuma. Kam gêdja me ï pÿnhkôt me mex jabej memã mex jarê. Nâr, me axwe jabej memã axwe jarê.

<sup>6</sup> Akmere, àpnhÿre ar, ba ar amã,

—Kwãrÿk wãnh me'ô'ã, “Axwe” nâr “Mexkumrêx”, anhÿro aba kêt. Ja ne ba ajte Apôrmê ar amijã arê. Ar akadjy ne bar amijã arê. Dja gar kam ar iman arÿm ar ijôo adjãmra kêt. Ne kam arÿm Metîndjwÿnh kabêhbit mar rax. Kute me'ã kabêh jarênh jabit mar rax. Ne kam arÿm me'ôo adjãmran ate amû amã me'ô kurê kadjy kêt.

<sup>7</sup> Mÿj me'ô ne ar amã arê gar amim,

—Ba ne ba imexkumrêx, anhÿro aba? Nhÿnh ne ar amex'ôja? Nhÿnh ne ar anhô mÿjja'ôja? Kati. Metîndjwÿnh ta ne ar amâ kungâ gar kam amijo amran amim,

—Djâm me'ô ne imâ kungâ? Kati. Ba ne ba imex. Ba ne ba inhô mÿjja, anhÿro aba.

<sup>8</sup> Nâ gãm ar aje mrâmri ne kute me ajne pyrâk. Nâ gãm ar amim,

—Arÿm jakam imexkumrêx. Ije imexo amÿ amikamênh prâm kêt. Arÿm jakam iraxkumrêx ne ije mrâmri ne ibênjadjwÿr rax pyrâk. Arÿm ne ba amipânh Paur ar kumê. Nâ gãm ar ã amim anhÿro aba. Djâm mrâmri ne akabênwâ? Kati. Ga ren ar mrâmri araxkumrêx ba ren ikînhkumrêx. Gar ren kam amipânh ar ijô mênh kêtumrêx. Ar ba ne bar ren ar aro'ã ren irax.

<sup>9</sup> Nhym be, kati. Kritu kute ar ijanorja djâm ar ba ne bar irax? Kati. Ga, me kute me par kadjy kute me ipôkri me umjÿr nhym me kunÿ kute me omÿnhja pumÿ. Ar badjwÿ. Bar memâ Metîndjwÿnh kabên jarêho iban kam memâbit ar ije mÿjja pyrâk. Nhym kam me kunÿ 'ã ar ipumÿ. Nhym me kute ar ibîn prâm. Pykakam me ja 'ã ar ipumÿ. Nhym Metîndjwÿnh kadjy mrânhdjwÿnhdjwÿ 'ã ar ipumÿ.

<sup>10</sup> Bar Kritumâ apê nhym me arÿm ar ijã, “Nâm ar krã punu”, ane. Nhym be, ar ga ne gar amim,

—Ba tu amim Kritu markumrêx ne ikrã mexkumrêx, anhÿro aba. Ar ijã ne me, “Ar rerekre”, ane. Nhym be, ar ga ne gar amim,

—Ba ne ba itÿ:xkumrêx, anhÿro aba. Nhym be, ar ijã ne me, “Ar ngrire”, ane.

<sup>11</sup> Apÿnh myt djari ne bar prâmkam, kôrkam ar iba. Ne ajte inhô kubêkâ punuren iba. Nhym me ajte ar ikam àkrê kumex ne ar ititik ne. Bar ajte arek ar inhÿr djâ kêt ne ar ibaobit iba. <sup>12</sup> Bar ajte inhikrao idjâpênhtÿx. Me te ar imâ,

—Gora gê Metîndjwÿnh ajo ajkê, ane bar mã memâ kum,

—Gê Metîndjwÿnh ajo djuw mex, ane. Me te ar ijo ajkê bar arek memâ dja. <sup>13</sup> Me te mã memâ ar ijã kabên punu bar mã memâ iprîren nêje me kukrà. Me kubê ar ikînh no kati. Kute mrâmri ne mÿjja arÿm punurekam me kubê kînh no kati pyrâk. Ga, me kute mÿjja kro janhÿnh ne mÿm

rênhja pumÿ. Nâm me ã ar ijo ane. Akati jakam me kubê ar ikînh no kati rã'ã. Be, djâm kam ar irax?

<sup>14</sup> Djâm ije ar amâ apijâm jadjâr kadjy ne ba ã ar amâ amijarêho ane? Kati. Nâ bãm ar abê akabên kajgo pymao dja. Me kum kra jabêja pyrâk ne ba imâ ar ajabê. Imâ ar ajabêkam ne ba ar abê akabên kajgo pymao dja.

<sup>15</sup> Ga, me bãm kute kra jadjwÿr nhym apôxja pumÿ. Badjwÿ ne ba ar amâ Kritu Jeju jarê gar ikabênkôt tu amim markumrêx ne kôt ar amijo aba. Ba kam ba ije ar abãm pyrâk. Gar Kritu man kôt ar amijo aba nhym kam me krãptÿ aben totokmâ ar awÿr bôx. Ar awÿr bôx ne ar amâ arê gar arÿm me krãptÿ kabên ma. Nhym be, djâm me kute ipyrâk? Kati. Djâm me kumrêx ar amâ arê? Kati. Ba ikumrêx ne ba ar amâ arê. Kam me kute ar abãm pyrâk kêt. Ba ikumrêx ne ba ar amâ Kritu'ã ujarênh ny jarê gar ikôt arÿm tu amim markumrêx. <sup>16</sup> Kam ne ba arÿm ar amâ 'ã karô. Dja gar ijã amijakren ikôt ar amijo aba.

<sup>17</sup> Ar aje ijã amijakren mã ikôt amijo abamâ ne ba arÿm ar amâ Ximoxi jano nhym ar awÿr tẽ. Imâ ikra Ximoxi jabê. Ba ikumrêx ne ba kum Bênjadjwÿr djwÿnh'ã ajarê nhym arÿm tu amim markumrêx ne arÿm katât kabên man kôt ar amijo ba. Ba kam arÿm o ikra. Nâ bãm katât Kritu markumrêx ne kabên kôt ar amijo iba. Me kute katât Kritu mar ne kabên kôt amijo bamâ ne ba memâ arêho iba. Me kute amim Jeju mar ne kôt ar aben pydjio baja kunimâ ne ba memâ arêho iba. Tãm dja Ximoxi ar amâ arê gar ajte ama. Dja gar kam ikudjwa katât Kritu markumrêx ne kabên kôt ar amijo aba.

<sup>18</sup> Be, kute ar awÿr ibôx kêt pyrâk gar akwÿ amijo adjâmra ar aba. <sup>19</sup> Bênjadjwÿr djwÿnh mrâmri ar awÿr itêm'ã kute amim karô jabej dja ba amikrà kêt ne ar awÿr tẽ. Ar awÿr tẽn ar awÿr bôx ne me kute amibên prâmja kabên kôt me kuma. Djâm me kabênjabit dja ba kuma? Kati. Dja ba mrâmri me âpênhtÿxkumrêx jabej memâ ikato. Djâm mrâmri ne we Metîndjwÿnh me wãmã tÿx jadjâ? Kon. Dja ba bôx ne goja me omÿ.



<sup>20</sup> Metîndjwýnh kute meo bakam djâm me kabênbit? Kati. Mrâmri kute meo bakumrêxkam kute memã tÿx jadjârdjwÿ. <sup>21</sup> Mÿj dja ba ar awÿr ibôxkam gar amã kÿnh? Ga, me kute me âbêr djào me kaprêprêk nhym me tokryja pumÿ. Me kute memã bën tÿxkamdjwÿ me tokry. Djâm ba ar awÿr ibôx ne ar amã ibën tÿxmã gar atokrymã? Nàr ar awÿr ibôx ne imã ar ajabêkam ije ibën prïo ar amã ikabên. Djâm tãm ne gar amã kÿnh?

## 5

*Me kute bôm me'ô jaxwe mênh'ã memã karô.*

<sup>1</sup> Me ar akurÿm iwÿr tën bôx ne imã ar akam me'ô jarê. Ne imã,

—Me'ô ne bãmbê prô pytàn o ikwã. Nãm me ã imã ar akam me'ô jarênho ane ba kuman arÿm ar amã arên ajte ar amã me'ôja axwe jarê. Me kute Jeju mar kêt'ô kute bãmbê prô pytâr kêt. Wãkambit we me'ô kute Jeju mar arÿm bãmbê prô pytã. <sup>2</sup> Gar kam apijâm kêt. Me'ôja bãmbê prô pytã gar mÿjja 'ô jarên kêt ne ate ar akrân arÿm amijo adjâm rabbit. Ne ga ren ar amikam akaprï:ren ren aminêje bôm me'ôja mē gē ar akôt krï kêt.

<sup>3</sup> Mrâmri ne ba jakam idjâmkam ar amar 'ãno djan arÿm mrâmri me'ô jaxwe wã'ã ikabên djirkumrêx. <sup>4</sup> Dja gar Bënjadjwÿr djwÿnhbê Jeju Kritu kute gwaj bamã arên kôt me'ô'ã akuprô. Kute bãmbê prô pytârja'ã akuprôn amim kukjan kam kum axwe pãnh jarê. Dja ba ar akãxã ar amaro nhÿn arÿm ar akôt ikabên dji. Bënjadjwÿr djwÿnhbê Jeju Kritu ne gwaj bajo ban arÿm àpênh tÿx. Kam dja gar katàt me'ôja'ã ar akabên djirkumrêx ba arÿm ar akôt ikabên dji. <sup>5</sup> Axwekam 'ã ar akabên djirkumrêx ne on Xatanajmã kanga gē ar o ban arÿm o ajkē. Dja o ajkē nhym arÿm ty. Nhym kam Jeju arÿm amikôt karô dja. Ô akatikam dja Bënjadjwÿr djwÿnhbê Jeju Kritu bôx ne arÿm amikôt karô dja nhym arÿm biknor kêt.

<sup>6</sup> Gar ate akrân amijo adjâm rakam mex kêtumrêx. Ga, me kute djwÿ nhigot djã ngrire djwÿkam rênhkam arÿm djwÿ kunÿ'ÿr bôx nhym igotja pumÿ. Me'ô jaxwejadjwÿ. Dja gar ate akrã nhym me'ô amijo tēm

tãmtã gar akrãptÿ arÿm amã axwe kÿnh ne kôt ajaxwe.

<sup>7</sup> Ga, mebê idjaer kukràdjã kôt ne me kute djwÿ nhigot djã tÿm kunÿ kapÿnja pumÿ. Nhym kam arÿm djwÿ nykam igot djã kêt. Dja gar aminêje me'ô jaxwe jano gē mã tē gar kam arÿm ajaxwe kêt. Ga, me kute me irôbê mrãnh nhô akatikam me axwe pãnh mrykÿ'átomti parja pumÿ. Kritu ne ã anen arÿm ta gwaj bajaxwe pãnh ty. Nhym kam Metîndjwÿnh arÿm gwaj bamã axwe kêt jarê gwaj arÿm kum bamex.

<sup>8</sup> Ga, Metîndjwÿnh me irôbê mrãnh nhô akatikam me kute katàt Metîndjwÿnh mar kadjy kute djwÿponhbit kurja pumÿ. Kritu gwaj bajaxwe pãnh tykkam gwaj badjwÿ dja gwaj katàt Metîndjwÿnh maro baba. Ga, me kute djwÿ nhigot djã tÿm kur kêtja pumÿ. Gwaj badjwÿ dja gwaj bajaxwe tÿm kunÿ kangan bamã aben kurêja kangan arÿm katàt Metîndjwÿnh maro baba. Me kute djwÿkam djwÿ nhigot djã kêtjabit kur, kute djwÿponhbit kur. Gwaj badjwÿ dja gwaj bajêx kêtumrêx ne bakabênkumrêx ne katàt Metîndjwÿnh maro baba.

*Djâm me axwemê ro'ã me ar bamã?*

*A Tex 3.6*

<sup>9</sup> Amrêbê ne ba ar amã pi'ôk no'ôk ne ar amã,

—Me mjên djwÿnh kupa'ã nàr prô djwÿnh kupa'ã kurê ba kwãrÿk wãnh ro'ã ar aba kêt, ane. <sup>10</sup> Djâm me kum Metîndjwÿnh kÿnh kêtja'ã ne ba ar amã ane? Djâm ar aje me kum Metîndjwÿnh kÿnh kêtme ro'ã aba kêtme? Kati. Pyka kunÿkôt me kum Metîndjwÿnh kÿnh kêtja krãptÿ gwaj te memã bakãxmã. Me mjên djwÿnh kupa'ã nàr prô djwÿnh kupa'ã kurê baja, me kute amim mÿjjao atom rÿnh prã:mja, me kute me noo biknor ne kute mebê mÿjjao àkÿnh prãmja, me kute mÿjjao metîndjwÿnh karô nhipêxmã amijarên prãmja. Pyka kunÿkôt me axweja krãptÿ gwaj te memã bakãxmã.

<sup>11</sup> Nhym be, me'ô ta kute amijo Jeju mar, ta kute amijo gwaj bakamy'ô. Dja kum axwe kÿnh rá'ã djâm ro'ã ar abamã? Kati. Me ja'ã ne ba ar amã,

—Kwãrÿk wãnh me ro'ã ar aba kêt, ane. Godja me'ô mjên djwÿnh kupa'ã nàr prô djwÿnh kupa'ã kurê ba prãm nàr

amim mỳjja rũnho atom prãm nàr mỳjjao metĩndjwỳnh karõ nhipêxmã amijarênh prãm nàr kute mebê me kurê prãm nàr kadjwati kangôkam\* bibãnh prãm nàr kute me noo biknorn mebê mỳjjao àkĩnh prãm godja me'õ ta kute amijo Jeju mar ne ã axwe prãm rã'ão ane kwãrĩk wãnh ro'ã aba kêt. Kwãrĩk wãnh ro'ã anhõ kwỳ krêndjwỳ kêt.

12-13 Me kum Metĩndjwỳnh kĩnh kêtja djãm on gwaj baje memã axwe pãnh jarênh babamã? Kati. Metĩndjwỳnh ta dja me kum kĩnh kêtjamã axwe pãnh jarê. Nhym be, gwaj ba baje amim Jeju mar bajaxwe jabej baje abenmã axwe pãnh jarênh babamã. Kam, ba ar amã arê. Ar akam me'õ jaxwe ja dja gar kum axwe pãnh jarênhkumrêx ne arỳm aminêje bõm amẽ gê ar aro'ã bikprõnh kêt. Tãm ne ja.

## 6

### *Me kute memã axwe pãnh jarênh.*

1 Be, jakam ije ar amã mỳjja 'õdjwỳ jarênhmã. Be, ar akam me kute Jeju mar'õ ajmã ajon axwe. Axwe gar arỳm pa 'amỳn tu apijàm kêt ne me kute Jeju mar kêt'ỳr o mrã. Kute kukjêr ne kum axwe pãnh jarênhmã 'ỳr o mrã. Mỳkam ne gar kute amim Jeju mar'õ'ỳr o amrãnh kêt?

2 Be, dja gu me baje amim Jeju mar ì pykakam me kunĩ kukij ne memã axwe pãnh jarê. Jeju akubyn bõxkam gu me babê Metĩndjwỳnh nhõ me ja dja gu me me kunĩmã axwe pãnh jarê. Kam ar ga ne gar ren jakamdjwỳ me kute amim Jeju mar jaxwe ja'ã akuprõ ne kum axwe pãnh jarê. Djãm ar aje amim Jeju markam ajõ akrã mex kêtgam ne gar amikupa'ã me kute Jeju mar kêtãm meo mrã?

3 Be, Metĩndjwỳnh kadjy mrãnh djwỳnh kwỳ axwe. Dja gwaj ì memã axwe pãnh jarê. Kam ar ga ne gar ren jakamdjwỳ ren me kute amim Jeju mar'ỳr meo mrã. Nhym be, kati. Amikupa'ã ne gar me kute Jeju mar kêtãm meo mrã nhym me kute Jeju mar kêtgam arỳm memã axwe pãnh jarê.

4 Dja me kute amim Jeju mar'õ ajmã ne axwe jabej, kadjy dja gar me'õ kute amim

Jeju marjao amiptà. Ar akam rax kêt'õo amiptà gê ar amã kukjan kum axwe pãnh jarê.

5 Ga ren ar amikam apijàm ne. Ar aje me kute Jeju mar kêtjamã me kute amim Jeju maro amrãnh prãmkam ga ren ar amikam apijàm ne. Nhym be, kati. Amikam ar apijàm kêtgam ne ba ar amã ikabên ne. Ar ga ne gar aje amim Jeju markam ar akrã mex ne ate me kute Jeju mar kêt'ỳr meo mrã. Kwãrĩk wãnh. Ar ga ne gar ren me kute amim Jeju mar'õ jaxwe'ã akuprõ ne ren arỳm amim kukij ne ren arỳm kum axwe pãnh jarê.

6 Nhym be, kati. Ar aje amim Jeju mar ne gar me kute Jeju mar kêt'ỳr meo mrã. Ar aje Jeju kukwakam meo akamyja me'ỳr meo mrã nhym me arỳm memã axwe pãnh jarênh krĩ. Nhym kam me kute Jeju mar kêtja me'ã ar apumũnho kumex. Kam ne ba ipijã:m ne.

7 Ar aje amikupa'ã me kute Jeju mar kêt'ỳr meo amrãnhkam ne gar arỳm axwe amijo mrã. Axwe amijo amrãnhkam ga ren ar arỳm ate akrã. Me kute amim Jeju mar ren te ar anoo akno ga ren ar ate akrã. Me ren te ar abê mỳjjao akno ga ren ar ate akrã ren me kute Jeju mar kêt'ỳr meo amrãnh kêt. 8 Nhym be, kati. Ar ga ne gar me noo abiknor ne mebê mỳjjao abiknoro aba. Ar akamy ne gar ã aro ane.

9 Kwãrĩk wãnh gar amim,

—Dja ba te ijaxwe rã'ã nhym Metĩndjwỳnh arỳm amiwỳr ijo wabin ijo ba, anhỳr kêt. Kwãrĩk wãnh ã amim ajêx ne aminoo abiknoro anhỳr kêt. Mỳj xê dja Metĩndjwỳnh meo ba kêt?

Bir, me kute mjên djwỳnh kupa'ã nàr prõ djwỳnh kupa'ã kurê ba prãmja.

Nàr me kute mỳjjao metĩndjwỳnh karõ nhipêxmã amijarênh prãmja.

Nàr me kute mebê prõo àkĩnh nàr mjêno àkĩnhja. Metĩndjwỳnh kute me jao ba prãm kêt.

Nàr me kute me kupênh ikwã kadjy me my kute amijo me nire pyrækja.

Nàr me my kute me my kupênh ikwãja nàr me nire kute me nire kupênh

\* 5:11 Mỳjja me kute o kõm ne kõt bibãnh kunĩja, kadjwati kangômẽ uba kangômẽ, mỳjja kangõ kunĩ ne me kum kadjwati kangõ jarê.

ikwâja. Metîndjwýnh kute me jao ba prâm kêt.

<sup>10</sup> Nâr me àkînhîja.

Nâr me kute amim mýjjao atom rûnh prâmja.

Nâr me kute kadjwati kangôkam\* bibânh prâmja. Metîndjwýnh kute me jao ba prâm kêt.

Nâr me kute mebê me kurê kadjy me'ã kabên punu prâmja.

Nâr me kute me noo biknor ne mebê mýjjao prôt prâmja.

Metîndjwýnh kute ò kàjkwakam me ja'õo ba prâm kêt kumrêx. Kwârîk wânh amim ajêx ne aminoo abiknor kêt ne amim,

—Dja ba te imã ijaxwe prâm rã'ã nhym Metîndjwýnh arým amiwýr ijo wabin ijo ba, anhýr kêt.

<sup>11</sup> Amrêbê gar akwý mekôt ã amijo ane. Nhym kam Metîndjwýnh arým ar ajo kute mrâmri ne me kute me pôn timer nhym me arým mextire pyrâk. Nãm arým amimexo ar ajo mex ne arým ar amã axwe kêt jarê gar arým kum amexkumrêx. Ar aje tu amim Bênjadjwýr djwýnhbê Jeju Kritu markam ne arým ã ar ajo ane. Metîndjwýnh Karõo arým ã ar ajo ane.

*Me ari prô, mjên kupa'ã kurê ba nêje kute me akre.*

*Mat 5.27; Ep 5.3; Kor 3.5*

<sup>12</sup> Nã gãm ar abenmã,

—Apýnh imã mýjja kînh djâri dja ba kunõo iba nhym Metîndjwýnh ajmã ijo kêt kumrêx, anhýr ar o aba. Djâm ba ne ba amim anhýr ar o iba? Kati. Djâm apýnh imã mýjja kînh djâri dja ba kunõo iban arým amijo mex? Kati. Gar amim,

—Apýnh imã mýjja kînh djâri dja ba kunõo iba nhym Metîndjwýnh ajmã ijo kêt kumrêx, anhýr ar o aba. Djâm ba ne ba amim anhýr ar o iba? Kati. Dja ba imã mýjja kînh ne arým ije o ibamã ne kam arým amiman amim,

—Kati. Dja ba mýjja wão iban kam arým te ije kangamã, ane. Dja ba ã amimaro anen kam arým o iba kêt ne. Te imã kînh ba o iba kêt ne.

<sup>13</sup> Nã gãm ar abenmã,

—Me tik kadjy ne djwý. Djwýo me ajne kadjy ne me tik, anhýr ar o aba. Nhym be, djwýmê me tik kajgo. Metîndjwýnh dja pyka mē o amrà nhym kêt ne. Nhym be, gwaj ba, djâm gwaj bakajgo? Kati. Mýj kadjy ne gwaj ar baba? Bir, gwaj baje Bênjadjwýr djwýnh mar nhym kute ar gwaj bajo ba kadjy ne gwaj ar baba. Mýj kadjy ne gwaj banhipêx? Djâm ga aje amjên djwýnh kupa'ã ar akurê aba, nâr gwaj baje baprô djwýnh kupa'ã ar bakurê babamã? Djâm ja kadjy ne Metîndjwýnh gwaj banhipêx? Kati. Ta amikadjy ne gwaj banhipêx.

<sup>14</sup> Metîndjwýnh týxo arým akubyn Bênjadjwýr djwýnhho tîn ne. Ne kam gêdja gwaj badjwý kôt akubyn gwaj bajo tîn.

<sup>15</sup> Be, Kritu ne arým gwaj bajo kute apýnh amikukràdjâ pyrâk. Kute arým ijo amikukràdjâ pyrâkkam djâm ije me kuprý mjên prâmjao inõrmã? Kati. Djâm me ni kuprýja mex? Kati. Kam ije me kuprýo inõr prâm kêt kumrêx. Kritu kute arým ijo amikukràdjâ pyrâkkam ije me kuprýo inõr prâm kêt kumrêx. <sup>16</sup> Amrêbê ne me bakukãmãre memã kum,

“Ar ï abenã tým ne kam kute ï pydji pyrâk.” Nãm ã me bakukãmãre memã ane. Ga, me kute me kuprý mjên prâmjao ikwâkam abenã tým ne kam kute mrâmri ne ï typdji pyrâk ja pumû. Ja ne Kritumã mex kêt. <sup>17</sup> Nhym be, me Bênjadjwýr djwýnhmê typdjija ne me arým ta Karõkôt typdji.

<sup>18</sup> Ar aje me'õ kuprýo anõrmã on kum akàx ne kubê aprôt ne. Dja ga me kuprýo anhikwân arým aminhõ abikênh rax ne. Nhym be, aje mýjjao adjâkînhkam ne ga amibu'ã meo ajkê. Nâr aje me'õnh bînkam nâr aje memã ajêxkam ne ga amibu'ã meo ajkê. Nâr, apýnh me àpênh jaxwe 'õdjwýkam me kute amibu'ã meo bikênh. Nhym be, me kute me kuprýo ikwâkambit ne me kute aminhõ bikênh rax ne.

<sup>19</sup> Djâm ar aje amimar kêt? Ga, Metîndjwýnh ò kikretikam ýrja pumû. Metîndjwýnh Karõ ne ar akamdjwý nhý. Mexti:re ne axwe kêt kumrêx ne ar akam nhý. Kàjkwakam Metîndjwýnh ne ar amã ano nhym nhý. Djâm ar aje ja mar kêt? Djâm ar ga dja gar amijo aba? Kati.

\* **6:10** Mýjja me kute o kôm ne kôt bibânh kunîja, kadjwati kangômê uba kangômê, mýjja kangô kunî ne me kum kadjwati kangô jarê.

<sup>20</sup> Metîndjwýnh arým pãnh raxo ar ajo pãnh ne ar ajo ba. Ga, kute Kra janor nhym pîte'ykam tyk ne kute o ar ajaxweo pãnhja pumû. Kute pãnh ra:xo ar ajo pãnh ne ar ajo ba. Kam, dja gar katàt ar amijo aban adjukaprî nhym kam me arým ar apumûn amim,

—Be ga, me kute katàt Metîndjwýnh mar ne kôt kute amijo baja pumû. Me ukaprîkumrêx. Kam, ne me mrãmri Metîndjwýnh'ã ujarênhkumrêx ne. Arým imã kînhkumrêx, ane. Dja me ã ar akatàt pumûnhkam ane.

## 7

*Me abenwýr mör'ã ujarênh.  
Ep 5.22; Kor 3.18; Idja 13.4*

<sup>1</sup> Ar aje amrêbê nînh imã pi'ôk no'ôkkam ne gar mýjja kwý jabej ikukij. Me kute abenwýr mör jabej ikukij. Jakam dja ba arým kôt ar amã arê gar ama. Be, me abenwýr mör kêt kam ne me kwý mexkumrêx.

<sup>2</sup> Nhym be, ar amy kunîkôt ren aprô nhym ar anire kunîkôt ren amjên. Mýkam? Bir, me krãptî kute mjên djwýnh kupa'ã nâr prô djwýnh kupa'ã kurê ba prãm kam. <sup>3</sup> Ne kam ar amy, kwãrîk wãnh ate anhikwãn aprôbê aminê kêt. Ar aniredjwý, kwãrîk wãnh amjênbê ate anhikwãn kubê aminê kêt. <sup>4</sup> Mýkam? Bir, djãm me abenwýr bakam akubyn kuprýkam kute amijo baja kôt kute amijo ba rã'ãn kute amidjwýnhbit mar ne kute o bamã? Arým prô'ýr bakam gédja prôdjwý maro ba. Nhym prôdjwý amipãnh mjên maro ba.

<sup>5</sup> Kam kwãrîk wãnh aben bê ate ar anhikwãn aben bê aminê kêt. Ar aje abenmã akabên mex jarênhkambit dja gar apýnh anhikwã. Nãm me kwý kute Metîndjwýnhmã amijajbur ne kum kabên'ã rît kadjy apýnh ikwã kryre. Ne kam ajte ro'ã ikwã. Me kute aben bê aminê'ã akati krãptîkam tỳx kêt. Tỳx kêt kam Xatanaj ren axwe'ã memã apné nhym me ren arým rerekren ren arým prô djwýnh kupa'ã amijo tẽ. Nâr mjên djwýnh kupa'ã amijo tẽ. Nhym be, kati. Dja gar apýnh anhikwã: nhym ajã akati ngrêrebit apêx gar kam ajte aro'ã anhikwã.

<sup>6</sup> Djãm ar akunî abenwýr amörmã ne ba ar amã 'ã karõ? Kati. Ar akwý amã amijo anhýr prãm kêt jabej amã amijã ma. <sup>7</sup> Ba iprô kêtja pumû. Ba amim,

—Me kunî ren kute ipyràk ne ren me mexkumrêx, ane. Metîndjwýnh ne me kwýmã tỳx jangij nhym me kum amijã ma rã'ã. Nhym me kwý tỳx kêt ne kum amijã ma kêt. Gédja me ta kute amimar kôt abenwýr ba nâr abenwýr ba kêt jabej.

<sup>8</sup> Ne kam ar aprô kêt. Nâr, ar amjên kêt. Nâr ar anhikjê arým ty. Ba ar amã arê. Ga ren ar arã'ã ne ren aje ipyràk ne ren kam amexkumrêx. <sup>9</sup> Nhym be, te amã amijã mamã ne abenwýr amör prãm. Abenwýr ar amör prãm kam dja gar tu abenwýr mō. Abenwýr ar amörkam amexkumrêx. Ar amã aben prãm kajgo ne mex kêt.

<sup>10</sup> Nhym be, ar ajô arým abenwýr amörkam ba arým 'ã ar amã karökumrêx. Bênjadjwýr djwýnh kumrêx ne imã arê ba kôt ar amã arê. Ar anire, kwãrîk wãnh amjên kanga kêt. <sup>11</sup> Nâr kon, godja ar ajô aje arým amjên kanga jabej ne ajte amã amjên prãm jabej. Dja ga amã akubyn amjên tûm kînh gê akubyn awýr mō. Nâr dja ga te o ane nhym kum akînh kêt kwãrîk wãnh atemã amjên 'ôdjwý jabej kêt. Me amydjwý, kwãrîk wãnh aprô kanga kêt.

<sup>12</sup> Ne kam ar ajô anhikjê kute Jeju mar kêt dja ba ar amã arê. Djãm Bênjadjwýr djwýnh ne imã arê ba arým ije ar amã arênhmã? Kati. Ba ije markam dja ba ar amã arê. Ga abê Jeju kukwakam ikamy'ô arým aprô nhym kute Jeju mar kêt. Ne kam ar aro'ã ar aba kadjy kum akînh. Kwãrîk wãnh kanga kêt. <sup>13</sup> Ar anidjwý arým amjên nhym kute Jeju mar kêt. Ne kam ar aro'ã ar aba kadjy kum akînh. Kwãrîk wãnh kanga kêt. <sup>14</sup> Mýkam? Bir, amjên kute Jeju mar kêtja ne Metîndjwýnh arým amiwýr o tẽ. Akôt ne amiwýr o tẽ. Nhym ar ajô aprô kute Jeju mar kêtja ne Metîndjwýnh arým amiwýr o tẽ. Akôt amiwýr o tẽ. Ne ren amiwýr o tẽm kêt nhym ren akradjwý Metîndjwýnh nokrekam mex kêt. Nhym be, kati. Akôt akradjwý Metîndjwýnhmã mex.

<sup>15</sup> Nâr, gédja kute Jeju mar kêtja akanga jabej. Kwãrîk wãnh wãm tẽ. Akmere, àphîre ar, djãm aje arek 'ã angràn akaprî

rã'ãmã? Kati. Arÿm kute akangakam on ate akrã. Gwaj badjumar mexmã ne Metîndjwÿnh amiwÿr gwaj bajuw ne gwaj bajo ba. <sup>16</sup> Me nire ar, djãm mrãmri ar aje Jeju'ÿr ar amjêno akêxmã? Djãm arÿm aje mar? Kati. Aje mar kêt. Nâr, me my ar, djãm mrãmri ar aje Jeju kôt ar aprõo akêxmã? Djãm arÿm aje mar? Kati. Aje mar kêt.

<sup>17</sup> Metîndjwÿnh kute amiwÿr ar ajwÿr ne ar ajo bakam djãm aje aba djà kangamã? Kati. Djãm aje aprõ, amjên kangamã? Kati. Akuprÿkam djãm aje me'õ'ÿr amõrmã? Kati. Djãm aje adjâpênh djà kangamã? Kati. Ba ar amã arê gar ama. Dja gar arek apÿnh aba djà, adjâpênh djajakam amrãnh katàt rã'ã. Ja'ã ne ba me kute amim Jeju mar kunîmã karõn memã arê. Apÿnh me kute Jejukôt ar aben pydjio ba djàrija kunîkôt memã arê.

<sup>18</sup> Djãm arÿm ar amy nhinhu kà rênh nhym Metîndjwÿnh arÿm amiwÿr ar ajuw ne ar ajo ba? Kwãrîk wãnh ar amy kà rênho bimræk kêt. Kwãrîk wãnh memã,

—Imy nhinhu kào akuprõn 'ã kay gé kam arÿm kute adjakamã imy kà djwÿnh pyræk, anhÿr kêt. Tu ar amy kà rênh rã'ã ne ar abê idjaer rã'ã. Djãm ar amy nhinhu kà tã nhym Metîndjwÿnh arÿm amiwÿr ar ajuw ne ar ajo ba? Kwãrîk wãnh ar amy kà rênh kêt. <sup>19</sup> Djãm me kute amimy kà nhinhu rênh nhym Metîndjwÿnh arÿm me kam kînh? Kati. Djãm me amimy kà tã nhym arÿm me kam kînh? Kati. Nhym be, dja gar kabên man kôt ar amijo aba. Kute me kute katàt amijo ba'ã memã karõkôt, kabênja kôt dja gar amijo aba nhym kambit arÿm ar akam kînhkumrêx.

<sup>20</sup> Apÿnh ar adjâpênh djà tûm, ar aba djà tûm nhym Metîndjwÿnh kute kam amiwÿr ar ajwÿr ne ar ajo ba. Kam ar ajo bakam kwãrîk wãnh ar aba djà tûm kanga kêt. Dja gar mã Metîndjwÿnh man arek ar aba djà tûm, ar adjâpênh djà tûmkam ar aba rã'ã ne.

<sup>21</sup> Djãm me kute apa 'amÿnh ga tu memã adjâpênh kajgo ar aba nhym Metîndjwÿnh arÿm amiwÿr ajuw ne ar ajo ba? Kwãrîk wãnh adjâpênh pãnh kêt kam adjumar punu kêt. Adjumar mex ne arek kam adjâpênh rã'ã. Nhym kam me amã,

—Arÿm me kute amã ikra karomã, ane.

Dja ga kum,

—Ã. Bon ba arek mekôt ar iba, ane. Nhym me arÿm amã ikra karo ga arÿm ga arek mekôt ar aban amim apê. <sup>22</sup> Kam, ar akwÿ ne me arÿm ar apa 'amÿ gar tu memã adjâpênh kajgo ar abaja. Kwãrîk wãnh kam ar akaprî kêt. Kritu ne arÿm amiwÿr ar ajuw ne ar ajo ba. Gar kam ga kôt ar amijo aban akînhkumrêx. Nâr, ar akwÿ me'õ kute ar apa 'amÿnh kêt gar amim adjâpênh ar abaja. Kritu ne arÿm amiwÿr ar ajuw ne ar ajo ba kute mrãmri ne me'õ bënjadjwÿr kute me pa 'amÿnh nhym me kute katàt kabên kôt ar amijo ba pyræk. Kritu ne arÿm ar ajo ba gar katàt kabên kôt ar amijo aba.

<sup>23</sup> Ga, me kute arÿm me'õ pa 'amÿnhja pumû. Nhym me'õja arÿm 'ÿr bõx ne arÿm o pãnh ne o katon o aminhõ. Nhym kam arÿm kum âpênh ar ba. Metîndjwÿnhdjwÿ ne kute pãnh raxo ar ajo pãnh ne ar ajo katon arÿm amim ar ajo ba. Ga, kute Kra janor nhym kute pîte'ykam tyk ne kute o ar ajaxweo pãnhja pumû. Pãnh ra:xja pumû. Kam me kum Metîndjwÿnh kînh kêt kukràdjaja kwãrîk wãnh ar amã kînh kêt gé me amikôt ar ajo ba kêt. Ga ren ar amã kînh nhym ren me amikôt ar ajo ba ga ren ar arÿm aje mrãmri ne me'õ pa 'amÿnh ne mekôt ba pyræk.

<sup>24</sup> Akmere ar, apÿnh ar adjâpênh djà tûm, aba djà tûm nhym Metîndjwÿnh kute kam amiwÿr ar ajo akêx. Kam kute amiwÿr ar ajo akêxkam kwãrîk wãnh ar aba djà tûm kanga kêt. Dja gar tu amim Metîndjwÿnh mar tÿxkumrêx ne arek ar aba djà tûmkam ar aba rã'ã ne.

<sup>25</sup> Me nire kraxje me'õ kute 'ÿr mör kêt rã'ã. Me'ã ne ije ar amã karõmã. Ba ije markam dja ba me'ã ar amã karõ. Djãm Bënjadjwÿr djwÿnh ne imã arê ba arÿm ije ar amã arênhmã? Kati. Ba ije markam dja ba ar amã 'ã ikabên jarê. Bënjadjwÿr djwÿnh kum ikaprîkam ne arÿm ije ikabên jarênh katàt kadjy ijo mex. Ba kam ba katàt ar amã arênhkumrêx.

<sup>26-27</sup> Me kute gwaj baje amim Jeju marjao bikênh kumex gwaj batokry kumex. Kam, djãm arÿm amjên nâr arÿm aprõ? Dja ga arã'ã. Kwãrîk wãnh kanga kêt. Nâr, djãm amjên kêt rã'ã nâr djãm aprõ kêt rã'ã? Dja

ga arã'ã. Kwãrîk wãnh amjên nàr aprõ jabej kêt.

<sup>28</sup> Nàr, ga kam arým me'õ nire'ýr mõ. Djãm kam ga arým amijo ajkên ajaxwe? Kati. Nhyr me my'õ 'ýr mörkam djãm nire axwe? Kati. Djãm arým amijo ajkên axwe? Kati. Ba ar amã arë gar ama. Dja gar abenwýr mõn arým amikam ar adjumar punu, ar atokry kumex ma. Ar ajamãnhkrutkam ne ajte ar akrakam dja gar amikam adjumar punu kumex ma. Nàr, dja gar abenwýr amõr kêt ne arým ar adjumar punu kumex mar kêt. Apydjikam adjumar punun aje atokry kumex mar kêt. Ar adjumar punun ar atokry karõ ne ba kukãm ijamak bën bit abenwýr ar amõr nêje ar akukrà.

<sup>29-31</sup> Akmere àpnhîre ar, ba ar amã arë gar ama. Pykakam mýjja kunî dja ï kêt ne. Gwaj mýjjao baba 'ikrãn ne. Kam, dja gwaj pykakam gwaj banhõ mýjja kunîkõt bajamak bën tÿx kêt. Godja arým aprõ. Djãm aje o aba rã'ãmã? Kati. Dja ga o aba 'ikrãn ne. Kam kwãrîk wãnh kõt ajamak bën tÿx kêt. Nàr, godja arým amýr jabej. Djãm amýr rã'ãmã? Kati. Dja ga amýr 'ikrãn ne. Kam, kwãrîk wãnh kõt ajamak bën tÿx kêt. Nàr, godja arým akînh jabej. Djãm akînh rã'ãmã? Kati. Dja ga akînh 'ikrãn ne. Kam kwãrîk wãnh kõt ajamak bën tÿx kêt. Nàr godja ga arým pi'ók kaprî pãnh mýjja mex'õ byr jabej. Djãm o aba rã'ãmã? Kati. Dja ga o aba 'ikrãn ne. Kam, kwãrîk wãnh kõt ajamak bën tÿx kêt. Gwaj pykakam gwaj banhõ mýjja kunîkõt bajamak bën tÿx kêt. Djãm gwaj baje o baba rã'ãmã? Kati. Dja gwaj o baba 'ikrãn ne.

<sup>32</sup> Mýkam ne ba ar amã ikabën ja jarë? Bir, dja gar ikabën ja man arým pykakam mýjja kõt ajamak bën tÿx kêt ne adjumar punu kêt.

Me prõ kêt ne me kute kàjkwakam Bënjadwýr djwýnhmã àpênh kadjy amimar. O kînh kadjy kute amimar. <sup>33</sup> Me arým prõ ne me kute pykakam mýjja kadjy àpênh kadjy amimar. Kute prõo kînh kadjy kute amimar.

<sup>34</sup> Me nire arým mjênja ne atemã umar nhyr me nire me'õ kute 'ýr mör kêtja ne atemã umar. Me apýnh umar. Mjên kêtja Bënjadwýr djwýnhmã àpênh kadjy

kute amimar. Nãm prîne kum amijã man Bënjadwýr djwýnh mar 'ãno dja. Nhyr be, arým mjênja pykakam mýjja kadjy àpênh kadjy kute amimar. Nãm kute mjêno kînh kadjy kute amimar.

<sup>35</sup> Djãm ar akunî akuprýmã ne ba ar amã ja jarë? Nàr, gar arým aprõkam nàr gar arým amjênkam, djãm kam ar akaprímã ne ba ar amã ja jarë? Kati. Bënjadwýr djwýnhmã prîne ar amexmã ne ba ar amã arë. Dja gar ikabënja man arým kum adjapênh 'ãno dja. 'ãno dja nhyr mýjja'õ arým ar akunor kêt. Ja kadjy ne ba ar amã arë.

<sup>36</sup> Nàr, akra nhyr mjên kêt rã'ã jabej ga arým kam adjumar mex kêt ne ar o aba. Arým abatàn mex tèn kum mjên prãm. Arým aje mjênãm arënh ne òr prãm jabej kum angã. Ga kam amex. Kwãrîk wãnh ar abenwýr mõ. <sup>37</sup> Nàr kon, akra kum me my prãm kêt ne aje me'õmã òr prãm kêt. Aje amim akra'ã karõn amim,

—Kati. Ba arek ikrao iba, ane. Jadwý ne mex. <sup>38</sup> Kam ne me kute mebê kra nê mexo me kute memã òr jakrenh.

<sup>39</sup> Metîndjwýnh kukràdjã kõt dja prõ mjên'a ngrã. Mjên tînrî 'ã ngrã. Nhyr kam godja arým mýjja'õ kubê kubî nhyr tyk jabej. Dja kum me my 'õdjwý 'ýr mör prãm jabej arým 'ýr mõ. Dja me'õ kute amim Jeju marbit 'ýr mõ. <sup>40</sup> Ba kam bajbit 'ã amim,

—Nãm ren mjên kêt rã'ã nhyr ren umar mex. Arým ajte mjênkam umar mex ngrîre, ane. Nã bãm ã amim ane. Metîndjwýnh Karõ kute ijo bakam ba badjwý 'ã katàt ikabën jarë. Ja ne ba kuma. Tãm ne ja.

## 8

*Me kute mýjjao metîndjwýnh karõ nhipêxmã mry bõrja'ã ujarënh.*

*Kô k 13.2; Gar 5.13; Ped k 4.8; Dju k 3.18*

<sup>1</sup> Me kute mýjjao metîndjwýnh karõ nhipêxmã mry bõrja krëndjwý. Jadwý ne gar abej ikukij. Gar imã,

—Djãm ar ije amim Jeju mar mýjja karõmã mry bõrja kurmã? Nàr djãm ar ije kur kêtãmã? ane. Jakam ije 'ã ar amã ikabën jarënhmã. Ar ga ne gar we,

—Djãm ar ino kêt? Djãm ar ijamakre kêt? Arým ar ije mýjja mar, ane. Nã, gwaj

bakunî baje mÿjja kwÿ mar. Badjwÿ dja ba ar amã arê. Gwaj baje mÿjja kumex markam ne gwaj baje amibên prãm. Nhym be, gwaj bamã aben jabêkam baje abenmã tÿx jangjêno tèn kam baje amim Jeju mar mexo amũ aben kamên arÿm mar rax ne.

<sup>2</sup> Be, me kute mÿjja maro amibên prãm kam djãm mrãmri kute mÿjja markumrêx? Kati. Kraxje kute mÿjja mar mex kêt rã'ã. <sup>3</sup> Nhym be, me'õ kum Metĩndjwÿnh jabê jabej, tãmja dja Metĩndjwÿnh amipãnh kuma.

<sup>4</sup> Kam, me kute mÿjjao metĩndjwÿnh karõ nhipêxmã mry bôr kurja mÿj dja gwaj mar on? Mÿjjao metĩndjwÿnh karõ nhipêx kunî ne kajgokumrêx. Nhym be, Metĩndjwÿnh pydji. 'Õdjwÿ kêtumrêx. Ja ne gwaj kam kuma. <sup>5</sup> Mrãmri me kute arík apÿnh mÿjjamã metĩndjwÿnh jarênh. Kàjkwakam nâr pykakam mÿjja krãptíkumrêx nhym me kute arík kum metĩndjwÿnh, bënjadjwÿr djwÿnh jarêno ba.

<sup>6</sup> Nãm me te mÿjja kumexmã metĩndjwÿnh jarê gwaj bamã ne Metĩndjwÿnh pydjibit. Me Babãm djwÿnh. Tãm ne kute mÿjja kunî nhipêx. Kute amikadjy gwaj banhipêx. Bënjadjwÿr djwÿnhbê Jeju Kritu pydji. Kôt ne mÿjja kunî kato. Gwaj badjwÿ kôt bakato. Ja ne ar aje mar. Badjwÿ ije mar.

<sup>7</sup> Metĩndjwÿnh pydjibit. Nhym kam mÿjjao metĩndjwÿnh karõ nhipêx ja ne kajgo. Ne kam djãm me kunî kute amim, "Mÿjjao metĩndjwÿnh karõ nhipêx ne kajgo", anhÿro ba? Kati. Me kwÿ ja ne me arík amim,

—Be, mÿjjao metĩndjwÿnh karõ nhipêxbê metĩndjwÿnh'õ. Nãm me kwÿ ã amim ane, kute Metĩndjwÿnhkumrêx mar rerekre rã'ãkam. Ne kam arÿm mry bôrja krê. Ne kam arÿm amim,

—Be, mÿjjao metĩndjwÿnh karõ nhipêxmã ne me kute mry bôrja. Kubê ne metĩndjwÿnh'õ. Ba arÿm mekôt mryja krê. Arÿm ne ba Metĩndjwÿnhkumrêxkam ijaxwe ne, ane. Me kute Metĩndjwÿnhkumrêx mar rerekre rã'ãkam me ã amim ane.

<sup>8</sup> Nhym be, djãm gwaj baje Metĩndjwÿnh mar tÿxkam ã amim ane? Kati. Gwaj ã amim anhÿr kêt. Gwaj baje mÿjja kunî krên kajgokumrêx nhym ajmã kute kêt.

Djãm gwaj baje mÿjja'õ krêno Metĩndjwÿnh kôt ajkamê? Kati. Nâr, djãm gwaj baje krênkam ne Metĩndjwÿnh gwaj bamã punu jarê? Kati. Nâr, djãm gwaj baje krên kêt kam ne gwaj bamã mex jarê? Kati. Mÿjja kunî ne me kute krên kajgo. Kam ajmã kute kêt.

<sup>9</sup> Nhym be, gora amijãno dja. Dja gar amidjwÿnhbit maro aban arÿm tu mÿjja karõ nhõ mry krêno aba. Nok ga ren tu õ mry krêno abao ren me'õo akêx jabej. Nok ga ren me'õ kute amim Jeju mar rerekreja Metĩndjwÿnhbê o akêx jabej nhym ren ate ar ba jabej. Kam gora amijãno dja. Nok ga ren o me'õo akêx ne ren kam aje mÿjja kute me par tok nhym me rôrôk pyrãk.

<sup>10</sup> Ga amim,

—Djãm ije mÿjjao metĩndjwÿnh karõ nhipêx nhõ mry krênkam Metĩndjwÿnhbê ajmã ikuten ijaxwe? Kati. Ije krênkam ajmã ikute kêt. Mÿjjao metĩndjwÿnh karõ nhipêx ne kajgo. Õ mrydjwÿ ne kajgo, anhÿro aba. Aje amim anhÿro abakam ne ga tu mÿjjao metĩndjwÿnh karõ nhipêx nhõ kikretikam tèn me ikô'ã nhÿ. Nhÿ:n arÿm õ mry krê. Nhym arÿm me'õ kute amim Jeju mar rerekre awÿr bôx ne arÿm amim omũ. Djãm kute 'ã amim karõ kêt mã got? Kati. Dja amim,

—Je, ba badjwÿ krêno iba, ane. Kute Metĩndjwÿnh mar rerekreja dja amim anen arÿm krêno ba.

<sup>11</sup> Ga amim,

—Djãm ije mÿjjao metĩndjwÿnh karõ nhipêx nhõ mry krênkam Metĩndjwÿnhkumrêxbê ajmã ikuten ijaxwe? Kati. Ije mry krênkam ajmã ikute kêt. Mÿjjao metĩndjwÿnh karõ nhipêx ne kajgo. Õ mry ne kajgo, anhÿro aba. Ne kam tu mÿjja karõ nhõ mry krê. Nhym kam aje me'õo akamyja kute Metĩndjwÿnh mar rerekreja arÿm apumũ. Ta kute anhÿr djwÿnhrà m arík amim,

—Mÿjjao metĩndjwÿnh karõ nhipêxbê metĩndjwÿnh'õ. Dja ba õ mry krên arÿm Metĩndjwÿnhkumrêxbê ajmã ikuten arÿm ijaxwe, anhÿro ba. Ta kute arík amim anhÿro ba ja ga arÿm tu nokrekam mÿjja karõ nhõ mry krê. Nhym arÿm apumũn amim,

—Ga, me'õ kute Metĩndjwÿnh mar tÿx kute mÿjja karõ nhõ mry krênja pumũ. Je,

ba badjwÿ kuro iba, ane. Ne kam arÿm tu mÿjja karõ nhõ mry krê. Kritu kute utâr kadjy arÿm axwe pân̄h ty. Akamy kute amim Jeju mar rerekre jaxwe pân̄h ty. Ga krê nhym arÿm akudjwa kukrê. Kukrên arÿm arîk amim, “Ijaxwe”, anhÿro ba.

<sup>12</sup> Akamy kute amim Jeju mar rerekreja ta kute arîk amim,

—Dja ba mÿjja karõ nhõ mry'õ krên kam ajmã ikuten ijaxwe, anhÿro ba. Ga mÿjja karõ nhõ mry krê nhym arÿm akudjwa kwÿ krên arÿm arîk amim, “Ijaxwe”, anhÿro ba. Nhym kam Kritu arÿm ga amã, “Ajaxwe”, ane. Ga ren krên kêt nhym Kritu ren amã ajaxwe jarên̄h kêt. Nhym be, kati. Ga krê nhym Kritu arÿm amã, “Ajaxwe”, ane. <sup>13</sup> Kam mÿj ne ba ren ba nê. Bir, ba ren mÿjja karõ nhõ mry krê nhym me'õ kute amim Jeju mar rerekre ren ikudjwa kukrên ren amim, “Ijaxwe”, ane ba ren kam ajte krên kêt kumrêx. Me kute ipumûnh ne ikudjwan kute amim, “Ijaxwe”, anhÿr karõ dja ba ajte krên kêt kumrêx.

## 9

*Jeju kute Paur janor'ã kute memã amijarên̄h.*

<sup>1</sup> Djãm mrãmri ne ba we imã mÿjja kînh ne ije o ibamã nhym me we ipa 'amÿ ba we te ije o ibamã? Kati. Ba ne ba ije o iba kêt. Djãm mrãmri ne we Jeju ta kute ijanor kêt? Kati. Mrãmri ne ta kute ijanorkumrêx. Djãm mrãmri ne ba we ije gwaj banhõ Bênjadjwÿr djwÿnh pumûnh kêt? Kati. Mrãmri ije omûnhkumrêx. Kum idjâpên̄hkam djãm 'ÿr ije ar ajo akêx kêt got? Ba ne ba Jeju'ÿr ar ajo akêxkumrêx.

<sup>2</sup> Wãnh ar abu'ã me wã ijã,

—Kati. Jeju kute Paur janor kêt, ane. Ije Kritu'ÿr me wão akêx kêt kam ne me ã ijã ane. Djãm ar ga ne gar ijã ane? Kati. Ar ga ne gar aje ijã anhÿr kêt. Mÿkam? Bir, ba ne ba Kritu'ÿr ar ajo akêx. Dja gar akubyn amikôt amijo tèn ba ije Kritu'ÿr ar ajo akêxja ma. Ne arÿm amim,

—Mrãmri ne Kritu kute Paur janorkumrêx. Ga, Paur kute Kritu'ÿr ijo akêxja pumû, ane. Dja gar ã amim ijã ane.

*Me kute ren Paurdjwÿo djuw mex'ã kute memã amijarên̄h.*

<sup>3</sup> Ar akwÿ ne gar we abenmã,

—Djãm gwaj baje Paur aro djuw mexmã? Ar kute gwaj bamã kukràdjã jarên̄h pân̄h aro djuw mexmã? Kati. Kwãrîk wãnh gwaj o pân̄h kêt. Djãm Jeju ne Paur jano got? Kwãrîk wãnh gwaj Paurmã o pân̄h kêt, ane. Ar akwÿ ã ijã ane. Me kwÿ jamã ije jakam amijarên̄hmã.

<sup>4</sup> Jeju kute ar 'õdjwÿ janorja ar awÿr bõx ne ar amã kukràdjã jarê. Gar kam pân̄h arkum mÿjja ngã nhym ar kukrên o ikõ. Nhym be, ar ba, djãm ar bajbit ne gar ren ar imã o pân̄h kêt got? Ar ije amã kukràdjã jarên̄hja gar ren ar imã o pân̄hkumrêx.

<sup>5</sup> Ar kute ni kute amim Jeju mar'ÿr mõr ne mã amikôt o ba. Djãm kam bajbit ren iprõ'ÿr imõr kêt got? Ba ren iprõ'ÿr imõrkumrêx. Wãnh ne Jeju kute ar anor 'õdjwÿ ar memã arên̄ho ban mã prõ japrôn o ba. Jeju kôt axikôt ar apõxdjwÿ. Pedrudjwÿ. Idji 'õdjwÿbê ne Xepa. Wãnh ne ar mã prõ japrôn o ba.

<sup>6</sup> Jeju kute ar 'õdjwÿ janorja ar ar awÿr bõx ne ar amã arê gar arÿm memã kabêno pân̄h. Nhym be, bamê Banabemê ne bar ije ar amã pân̄h'ã idjã'wÿr kêt. Ar idjã'ÿr pân̄h ne bar amim inhõ pi'òk kaprî jamÿ. Djã ne ba ren ar amã ikabên pân̄h'ã idjã'wÿr kêt? Kati. Ba ren ar amã ikabên pân̄h'ã idjã'wÿrkumrêx.

<sup>7</sup> Ga, me krâkamngôn̄hja pumû. Nhÿnh got krâkamngôn̄h'õ me 'ÿr prõt ba ne ta õ pi'òk kaprîo kute amim djwÿ, mÿjja jamÿnh? Kati, kute anor djwÿnh nhõ pi'òk kaprîo ne amim mÿjja jamÿ. Kute me aêro ba nhym kute pân̄h memã pi'òk kaprî nhõro ne me amim mÿjja jamÿ. Ga, ajte me kute pidjô kre nhym nep nhym me kute kurja pumû. Djãm pidjô nep nhym me kute kur kêt got? Ga, nep nhym me kute kre pân̄h kute krên̄ja pumû. Ga, ajte me kute mrykî'ãtomtio djuw mexo baja pumû. Djãm kute kã kangô kwÿo kôm kêt got? Kute kwÿo kôm kumrêx. Kute o djuw mex pân̄h kute kwÿo kôm kumrêx.

<sup>8</sup> Ba ibê pykabê me'õ kajgo ne ba ar amã ja jarê. Nhym kôt Metîndjwÿnhdjwÿ ar amã arê. <sup>9</sup> Kamã ne amrêbê: me bakukãmãre Môjdjê memã 'ã karõ. Nãm Metîndjwÿnh kukwakam memã 'ã karôn̄ memã kum,



“Mryti kute ituo me amã bãygogo ngãnh  
têmkam kwãrĩk wãnh ajkwabê ijê djã  
inhumã adjàr kêt.

Kwãrĩk wãnh ta àpênh pãnh ò kwý krê.”

Nãm ã memã ane. Djãm Metĩndjwýnh kute  
mrybit mar? <sup>10</sup> Djãm kute gwaj bamar  
kêt? Kati. Kute gwaj badjwý gwaj ba-  
mar. Gwaj bajã ne kabên jarê. Kam,  
gê pur kre djwýnh àpênh ar bakam tu  
amim djwý kwý kamnhĩxkumrêx ne djwý  
týxkam amim kwý byrkumrêx. Kute kre  
pãnh kwý byrkumrêx. Gê djwý ngãnh  
djwýnhdjwý àpênh ar bakam tu amim djwý  
kamnhĩxkumrêx. Ne àpênh pãnh amim kwý  
byrkumrêx.

<sup>11</sup> Ar badjwý ne bar arým ar amã  
Metĩndjwýnh kabên jarê. Bar ren ar abê  
pãnh byrkumrêx. Ar ije mrãmri ne me kute  
purkam 'y kre pyrãk. 'Y ingrôt ne abatãnh  
ne arým ngrã. Nhym kam me êo mõn arým  
amim kwý by. Ar badjwý ne bar ar amã  
Metĩndjwýnh kabên jarê. Djãm ba ren ar ije  
pãnh ar akutã mýjja'õ byr kêt got? Ba ren  
ar ije ar abê pãnh byrkumrêx. <sup>12</sup> Me'õdjwý  
ne me ar awýr bõx ne ar amã Metĩndjwýnh  
kabên jarê. Ne kam ajte ar amã pãnh'ã a'uw  
gar tu memã mýjja ngã. Me kute ar amã  
arênh pãnh tu memã mýjja ngã. Ar badjwý  
ar ibê ar anhõbikwakumrêx ne bar ar amã  
Metĩndjwýnh kabên jarê. Mýkam ne gar ren  
ar ibê pãnh nê? Djã ne bar ren ar amã 'ã  
a'uw gar ren ar ibê pãnh nê? Kati. Gar ren  
ar ibê nê kêt. Gar ren ar ikabên pãnh ar imã  
mýjja ngã bar ren ar abê byrkumrêx.

Nhym be, kati. Ar ba ne bar ije ar abê  
pãnh byr kêt. Te mýjja prãm ar ikangõ. Te  
ar idjà'wýr ar ikangõ. Bar amim,

—Kati. Ba ren ar memã Kritu'ã ujarênh  
ny jarên iby ren memã pãnh jarê nhym  
ren me abenmã, “Je, mýkam ne Paur gwaj  
bamã Kritu'ã ujarênh ny jarên ajte gwaj  
bamã pãnh jarê”, ane. Ne ren abenmã ja  
jarên ren arým Kritu mar rerekre. Nã bãm  
ar ã amim anen kam ar ikabên pãnh jarênh  
kêt ne.

<sup>13</sup> Be ga, Metĩndjwýnh nhõ kikretikam me  
àpênh ku'êja pumũ. Me kute kikretikam  
mýjjao memã àpênh pãnh. Me kute  
kikretikam Metĩndjwýnhmã mry par ne  
kute bõro ku'êja kute àpênh pãnh amim mry

kwý 'yr. Ja ne gar arým aje mar. <sup>14</sup> Kôt  
ne Bẽnjadjwýr djwýnh arým memã 'ã karõn  
memã kum,

—Gê me kute memã ujarênh ny jarênhja  
pãnh amim me kutã mýjja kwý byn ò kwý  
krên mex, ane.

<sup>15</sup> Nhym be, ba ne ba ije ar amã 'ã idjà'wýr  
kêt. Nàr djãm arým jakam ije ar amã  
idjà'wýr kadjy ne ba ã ar amã ikabêno anen  
ã ar amã pi'ók no'òko ane? Kati. Ba ne ba  
memã Kritu'ã ujarênh ny jarên pãnh jarênh  
kêt. Ne kam ikĩnhkumrêx. Gar ren imã  
o pãnh ba ren arým ikĩnh kêt ne ren kam  
ikaprĩre.

*Metĩndjwýnhmã àpênh'ã kute memã ami-  
jarênh.*

<sup>16</sup> Nhym be, kàj bê ije ar amã ujarênh  
ny jarênh ibakam djãm ba ne ba amim 'ã  
karõn amim,

—Ba dja ba memã arê, ane? Kati.  
Mýkam? Bir, Metĩndjwýnh ta ne imã  
idjàpênh djã'ã karõ ba te akubyn ije  
aminêmã. Ba ren aminên amim,

—Kati, ba memã ujarênh ny jarênh kêt,  
ane nhym ren pãnh arým imã kaprĩ jadjã  
ba ren kam ikaprĩkumrêx. <sup>17</sup> Godja ba imã  
memã arênh kĩnhkôt memã arê nhym pãnh  
arým imã ikĩnh djã ngã. Nhym be, dja  
ba imã memã arênh kĩnh kêt kam tu memã  
arênh iba. Mýkam? Bir, Metĩndjwýnh ta  
kute tu imã 'ã karõkumrêxkam. Kam ne ba  
tu memã arênhkumrêx.

<sup>18</sup> Ije ikabên pãnh jabej kêt kam mýj dja  
ijo kĩnh? Bir, ije memã Kritu'ã ujarênh ny  
jarênh ne memã pãnh jarênh kêt kam ne ba  
ikĩnhkumrêx. Me kute amã amijo à'wýrja ne  
me amijo a'uw nhym be, bajbit ne ba ije  
amijo idjà'wýr kêt. Kam ne ba ikĩnh.

<sup>19</sup> Djãm pykakam me'õ ne ipa 'amý ba  
kum apên arým memã Jeju jarênh iba?  
Kati. Me'õ ne kute ipa 'amýnh kêt. Ba ne ba  
memã arênh iba. Te me'õ kute ipa 'amýnh  
kêt ba imã me kĩnh. Imã me kunĩ kĩnh ne ije  
memã arênh iba. Ije mrãmri ne me'õ kute  
amijo me kunĩ nhõ àpênh djwýnh pyrãk.  
Imã me kunĩ kĩnh ne me kunĩmã arênh  
iba. Dja ba me kunĩmã arên arým Jeju'ýr me  
krãptĩo akêx.

<sup>20</sup> Dja mebê idjaer jabej ba ba amijo  
mebê idjaer pyrãk. Ije Jeju'ýr mebê idjaer  
kwýo akêx kadjy ba ã amijo ane. Me kute

Môjdjê kukràdjà mar tỳx jabej ba ba amijo ije Môjdjê kukràdjà mar tỳx. Ije me kwỳo akêx kadjy ba ã amijo ane.

<sup>21</sup> Nàr me kute mebê idjaer kukràdjà mar kêt jabej ba ba amijo ije mebê idjaer kukràdjà mar kêt. Ije me kwỳo akêx kadjy ba ã amijo ane. Djãm kam ije Metĩndjwỳnh kukràdjà 'amỳnh rerekre? Kati. Ije Metĩndjwỳnh kukràdjà 'amỳnh tỳx ne Kritu kukràdjà 'amỳnh tỳxkumrêx.

<sup>22</sup> Me rerekremã ba ba amijo irerekre pyræk. Ije me rerekre kwỳo akêx kadjy ba ã memã amijo ane. Me kunĩmã ije amijo me uræk. Ije amijo me uræk kunĩkôt dja ba Jeju'yr me kwỳo akêx jabej. <sup>23</sup> Dja ba amijo me uræk ne memã ujarênh ny jarê nhym me arỳm amim kuma. Ba kam arỳm amim ikĩnh djà by, Metĩndjwỳnh kute memã me kĩnh djà nhôrja amim kuby, me ro'ã kuby.

<sup>24</sup> Be ga, me kute aben rer djàja pumũ. Kam me kute aben rer kadjy me kunĩ prôt. Nhym be, me'õ pydjibit me kunĩ ren arỳm amim kĩnh djà by. Krãdjêja by. Djãm ar aje ja mar kêt? Ar gadjwỳ dja gar Jeju man kôt ar amijo aba. Atỳx ne kôt amijo aba ne amã djukanga kêt. Dja ga anen arỳm akĩnh djà byrkumrêx. Metĩndjwỳnh kute memã kĩnh djà nhôrja byrkumrêx. <sup>25</sup> Nhym kam me kute me rer prãmja kunĩ ne me kadjy amijangri tỳx. Kute kĩnh djà punu byrmã. Kute pi'õo krãdjê byrmã amijangri tỳx. Nhym be, gwaj ba ne gwaj baje bakĩnh djà punu prãm kêtja byrmã. Kadjy gwaj Metĩndjwỳnhmã amijangri tỳx ne katàt ar amijo baba. Nok gwaj ren kum amijangri kêt ne ren Metĩndjwỳnhmã bamex kêt nhym ren gwaj bamã kĩnh djà nhôr kêt.

<sup>26</sup> Djãm ije mrãmri ne me arĩk prôt pyræk ne amikukãm ikĩnh djà mar kêt got? Ba amikukãm ikĩnh djà mar 'ãno djan Metĩndjwỳnhmã apê. Djãm me ajbit ije me akre? Djãm ije amijakre kêt got? Ne ba ren amijakre kêt ne ren ije mrãmri ne me bit kute ikra krão me titikmãn kôkremã ukabêr kajgo pyræk ne ren ikajgo mexi. <sup>27</sup> Nhym be, kati. Nã bãm mã amijakren mã amikukràn amim,

—Je, djãm ije amidjwỳnhbito kĩnh ne ijaxwemã? Kati. Kwãrĩk wãnh ijaxwe kêt, anen mã akubyn aminê. Ne kam ije mrãmri

ne me ta kute amititik pyræk. Ne mã amijakren arỳm amiman katàt amikabênh kôt ar amijo iba. Ije mrãmri ne me kute me pa 'amỳnh nhym me kute katàt me kabênh mar ne mekôt amijo ba pyræk. Ne ba ren me ajbit jakren ren amijakre kêt ne ren arỳm ate amijo iba. Nhym kam Metĩndjwỳnh ren arỳm imã,

—Djãm amã dja ba kĩnh djà ngã? Kati. Ije amã òr prãm kêtumrêx, ane.

## 10

*Memã mebê idjaer tũm'ã ujarênh.  
Idja 3.8; Djuda 5*

<sup>1</sup> Be, akmere, àpnhĩre ar, ar aje mar kêt karõ ne ba ije ar amã me bakukãmãre'ã idjujarênhmã. Amrêbê: ne me bakukãmãre kapôt kukritkam mõ. Metĩndjwỳnh ne me kadjy kakrà nhípêx nhym me kunĩ kakrà parbê mõ. Nhym kam ngô raxbê pyka kêt aprakamã memã ajkij nhym me kam ngô bikjêrkôt mõn rê. <sup>2</sup> Me kunĩ Môjdjê kôt ar amijo ba. Ga, me kute ngômã gwaj bajangjênhja pumũ. Nhym me gwaj bajã amim,

—Ga, me arỳm kute Jeju mar ne kôt amijo baja pumũ, ane. Me bakukãmãredjwỳ kunĩ Môjdjê kôt ar amijo ba ne kakrà parbê mõn ajte ngô parbê mõn rê. <sup>3</sup> Metĩndjwỳnh memã djwỳ jano nhym axidjuw nhym me kunĩ djwỳ jabit kuro ba. Nhym ta ajte memã ngôo kato nhym me kunĩ ngô jabito kôm ar o ba. <sup>4</sup> Metĩndjwỳnh nhõ kên ne mekôt ar ba nhym me kôt ngôo kôm ar o ba. Kên ja ne Kritu'ã amijakre.

<sup>5</sup> Nãm Metĩndjwỳnh te meo djuw mexo ban me kunĩkam kĩnh kêt. Nãm me kwỳ ngrêrebitkam kĩnh. Ne me krãptĩkam kĩnh kêt nhym kam me arỳm ty. Nhym wãnh me kapôt kukrit kunĩkôt me tyk jangij nhym me krã wãnh kumex. Me tykkôt ne gwaj Metĩndjwỳnh mekam kĩnh kêtja ma.

<sup>6</sup> Mỳj kadjy ne gwaj baje me bakukãmãre marmã? Bir, dja gwaj me kuman arỳm me kudjwa ã anhỳr kêt ne bamã mỳjja punu prãm kêt.

<sup>7</sup> Kam kwãrĩk wãnh me kwỳ kudjwa kêt ne mỳjjao metĩndjwỳnh karõ nhípêxmã amijarênhõ aba kêt. Amrêbê: ne me me bakukãmãre'ã ajarênh memã kum,

“Me mry karômã mry bôn kukrên kam kôt kômo nhÿ. O nhÿ:n kam kâjmã dja. Kâjmã djan ajte mry karômã tor ne kam kînh katio nhÿ”, ane.

Ga, me kute amrêbê: memã 'ã ujarênh nhym me bakukâmãre kute 'ã pi'ôk no'ôkja pumũ.

<sup>8</sup> Nãm me mjên djwÿnh kupa'ã nâr prô djwÿnh kupa'ã kurê ba. Kwârîk wãnh gwaj me kudjwa kêt. Me bakukâmãre kwÿ ã anen kam akati pydjikam arÿm ty. Krãptî: kubê 23.000 arÿm ty.

<sup>9</sup> Nãm me kwÿ ajte amim,

—Ba ijaxwe mex gê goja ijo ajkê. Goja Metîndjwÿnh mrãmri kute ipumũnh jabej goja ijo ajkê, anhÿro ba. Nãm me amim anhÿro ba: nhym kangã krãptî arÿm bôx ne me imex ne. Kwârîk wãnh gwaj me kudjwa ã bakabêno anhÿr kêt.

<sup>10</sup> Me kwÿ Bênjadjwÿr djwÿnhmê ò àpênh ar'ã kabên ar ba. Bêñ prîkam 'ã kabên ar ba. Kwârîk wãnh me kudjwa kêt. Nãm me'ã kabên ar ba: nhym Metîndjwÿnh arÿm me'ÿr kadjy mrãnh djwÿnh jano nhym me arÿm me'ÿr bôx ne arÿm me imex ne.

<sup>11</sup> Mÿkam ne mÿjja ã me bakukâmãreo anhÿro ba? Bir, gwaj baje amijã mÿjja mar kadjy. Nãm me me'ã pi'ôk no'ôk gwaj arênh maro baba. Arÿm pykakam me kute aminhinomã amimênh djã nhô akati bôx 'ÿr gwaj mÿjja'ã pi'ôk no'ôk jarênhja maro baba. Dja gwaj amikajmãtã mÿjja man arÿm bamã bajaxwe puma. Me kute gwaj babê bajaxwe puma kadjy ne me arÿm me'ã pi'ôk no'ôk ne. <sup>12</sup> Dja gar amijã ano tÿx. Nok ga ren ar ajô amim,

—Ba ne ba itÿxkumrêx. Ije me kudjwa ã ijaxweo anhÿr prãm kêt, anhÿro aba. Nok ga ren ar te amitÿx jarêñ ren arÿm me kudjwa ren ajaxwe ar aba.

<sup>13</sup> Nhym be, jakam ne me ar ajaxwe'ã ar amã àpnênh ba. Djãm ar gajbit ar ajaxwe'ã ar amã àpnênh ba? Kati. Nãm ar ajaxwe'ã ar amã àpnênh ban tãm'ã me kunîmã àpnênh ba. Nhym be, Metîndjwÿnh ne kute gwaj bamar ne kabênkumrêx. Amikabên kôt dja mrãmri gwaj bajo djuw mexkumrêx ne gwaj bajã ukanga kêt. Dja me te axwe'ã ar amã àpnênh ba nhym arÿm ar amã tÿx jadjà nhym kam me tÿxo kute ajakrenh

prãm kêt. Gar kam arÿm memã akàx ne ajmã akute kêt.

*Me kute mÿjja karômã amijarênh nêje kute me akre.*

*Ap 9.20*

<sup>14</sup> Kam akmere ar, imã ar ajabêkam ne ba ar amã ikabên jarê. Godja me mÿjjao metîndjwÿnh karô nhîpêxmã amijarênh prãm kwârîk wãnh mekôt amijo anhÿr kêt ne on memã akàx. <sup>15</sup> Ar akrã mexkam ne ba ar amã ikabên jarê. Goja ije kôt arênh jabej dja ga ikabên mexmã akato.

<sup>16</sup> Gwaj baje ngônhrãkam pidjô kangô'ã Metîndjwÿnhmã amikînh jarêno bakrî nhym kôt gwaj bajo djuw mex gwaj bakînhkumrêx. Gwaj baje o bakômkam arÿm Kritu kamrô'ã kangô jakre. Ne kam arÿm Kritu kamrô prôt ne tyk baje mar pydji. Ne baje djwÿ kokjêr ne krênkam arÿm Kritu nhî'ã djwÿ jakre. Ne kam arÿm me kute Kritu pîte'y'ã nhôr nhym tykja baje mar pydji. Mrãmri ikabênkumrêx. <sup>17</sup> Gwaj Kritu pydji'ã djwÿ jakren pydjîn kubyn bakunî kukrê. Te bakrãptîñ kute gwaj banhî pydji pyrãk. Ne kam baje djwÿ pydjija kwÿ krênkôt baro'ã Kritu mar pydji.

<sup>18</sup> Ga, me bakukâmãrebê idjaerjadjwÿ pumũ. Me kunî Metîndjwÿnhmã mry bôrja krê. Me kute krênkam arÿm ro'ã mar pydji.

<sup>19</sup> Mÿj ne ba ije me kute mÿjjao metîndjwÿnh karô nhîpêx'ã ar amã arênhmã? Bir, mÿjjao metîndjwÿnh karô nhîpêx tîn ne ar ba kêt ne kajgo. Me kute kum mry bôrdjwÿ me kute kur kajgo.

<sup>20</sup> Nhym be, me kute Metîndjwÿnh mar kêtja ne me mÿjjao metîndjwÿnh karô nhîpêxmã mry bôr ne kum amijarêno ba. Djãm Metîndjwÿnhmã ne me amijarêno ba? Kati. Me karô punu ar bajamã ne me amijarêno ba, Xatanaj nhô àpênhjamã amijarêno ba. Me mÿjjao metîndjwÿnh karô nhîpêxmã amijarêno ban kam me karô punu ar bajamã amijarêno ban kam arÿm mar pydji. Ne kam 'ã typdji. Djãm kam ar aje me kudjwa me karô punu mar pydjîn 'ã atypdji prãm? Kati. Ja ne ba ar abê uma. <sup>21</sup> Djãm ar aje Bênjadjwÿr djwÿnh nhô ngônhrãkam pidjô kangôo akôm prãm ne ajte me karô punu nhô ngônhrãkam pidjô kangôo akôm prãm? Kati. Djãm aje

Bênjadjwÿr djwÿnh nhõ djwÿmã akrĩ prãm ne ajte me karõ punu nhõ mrymã akrĩ prãm? Kati. Kwãrĩk wãnh. <sup>22</sup> Dja gwaj ari amijo akêxo ane nhym Bênjadjwÿr djwÿnh arÿm gwaj bakam ngryk ne. Te ta gwaj bajã pydji prãmje arÿm ngryk ne. Djãm gwaj batÿxo baje akrenh got?

*Me katàt ar amijo ban ukaprĩã kute memã karõ.*

*Mat 20.28; Rô 15.1; Pir 2.4*

<sup>23</sup> Nã gãm ar abenmã,

—Ba apÿnh imã mÿjja kĩnh djãri kunõ iba nhym Metĩndjwÿnh ajmã ijo kêt-kumrêx, anhÿro aba. Djãm ba ne ba ije amim anhÿr? Kati. Djãm apÿnh imã mÿjja kĩnh djãri dja ba kunõ iban arÿm amijo mex? Kati. Gwaj bamã mÿjja kĩnh kunõ babakam djãm kunĩkõt baje amim Jeju mar mex? Djãm kõt gwaj baje mar mexo amũ amikamênh? Kati. Kunĩkõt gwaj baje amũ amikamênh kêt. <sup>24</sup> Kwãrĩk wãnh amidjwÿnhbit mar kêt. Ne aje mÿjjao abamã ar amibu'ã me ama. Me aman kam mÿjja man amim,

—Ba ren o iba nhym ren me arÿm 'ã ipumũ ne ren arÿm Jeju mar prãm kêt. Kam, dja ba o iba kêt-kumrêx, ane. Dja ga ã me maro anen arÿm o aba kêt-kumrêx. Nãr, ga amim,

—Dja ba o iba nhym me arÿm 'ã ipumũn arÿm kum Jeju mar prãm-kumrêx. Kam, tãm dja ba o ibakumrêx, ane. Dja ga ã me maro anen kam arÿm o abakumrêx.

<sup>25</sup> Ga, me kute memã mry nhõr djãja pumũ. Kam ne me mÿjjao metĩndjwÿnh karõ nhipêx nhõ mry memã kungã ne mry kajgo tu o akàn kungã. Ga kam mry nhõr djãkam bõx. Aje mry'õ byrmã bõx. Tu mry byn krê. Kwãrĩk wãnh amim me kukjêr ne memã kum,

—Djãm mÿjjao metĩndjwÿnh karõ nhipêx nhõ mry? anhÿr kêt. <sup>26</sup> Amrêbê: ne me bakukãmãre memã kum,

“Pykamê pykakam mÿjja kunĩdjwÿ, mÿjja kunĩ ne Metĩndjwÿnh nhõ mÿjja”, ane.

Ja dja ga aman me kukjêr kêt. Tu abyn krê. Kwãrĩk wãnh amã uma kêt.

<sup>27</sup> Nãr, ajtekam godja me'õ kute amim Jeju mar kêtja amã kràn amã,

—Dja ga ikutã anhõ kwÿ krê, ane ga kum, “Ã”, ane. Tu kute amã mÿjja jarênh kunĩ krê. Kwãrĩk wãnh kum,

—Djãm me karõ nhõ? anhÿr kêt. Dja ga amim,

—Mÿjja kunĩ ne Metĩndjwÿnh nhõ, ane. Dja ga amim anen tu krê.

<sup>28</sup> Nhym be, godja amũ me'õdjwÿ nĩnh bõx ne amã,

—Be, ja ne me mÿjjao metĩndjwÿnh karõ nhipêxmã kubõ ga krê, ane. Kwãrĩk wãnh kam krên kêt. Me'õja ne arĩk amim,

—Dja ba me karõ nhõ mry krên arÿm ajmã ikuten ijaxwe, anhÿro ba. Ga ren omũnh nhiràm arek mÿjja karõ nhõ mry krê nhym ren arÿm akudjwa kwÿ krê. Ren kwÿ krên ren arÿm amim, “Ijaxwe”, anhÿro ba. Mrãmri ne pykamê kam mÿjja kunĩdjwÿ, mÿjja kunĩ ne Metĩndjwÿnh nhõ mÿjja. <sup>29-30</sup> Nhym be, djãm aje amidjwÿnhbit marmã? Kati. Me'õjadjwÿ dja ga aman omũnh nhiràm krên kêt. Nok ren akudjwa kwÿ krên ren arÿm amim, “Ijaxwe”, anhÿro ba. Ga ren amidjwÿnhbit ma nhym ren me'õ bõx ne amã kabên ga ren amim,

—Je tõ mÿkam ne me'õ imã kabên ne ikunoro dja? Arÿm ba mry ja'ã Metĩndjwÿnhmã amikĩnh jarê. Ba tu omũnh nhiràm kukrê, ane. Kwãrĩk wãnh amidjwÿnhbit mar ne omũnh nhiràm krên kêt.

<sup>31</sup> Ga dja ga katàt ar amijo aban adjukaprĩ. Aje anhõ kwÿ krên ne akõmkõt nãr aje anhõ mÿjja kunõ abakõt katàt ar amijo aban adjukaprĩ. Nhym kam me arÿm apumũn amim,

—Be ga, me kute katàt Metĩndjwÿnh mar ne kõt amijo baja pumũ. Me ukaprĩkumrêx. Kam, mrãmri ne me Metĩndjwÿnh'ã ujarênhkumrêx. Arÿm imã kĩnhkumrêx, ane. Kam, dja me kum Metĩndjwÿnh kĩnhkumrêx.

<sup>32</sup> Kwãrĩk wãnh amidjwÿnhbit maro aba kêt. Dja ga amidjwÿnhbit maro aban arÿm Metĩndjwÿnh bê me'õo akêx. Mebê idjaer nãr me bajtem nãr me kute amim Jeju mar ne kõt ar aben pydjio baja. Kwãrĩk wãnh aje amidjwÿnhbit maro Metĩndjwÿnh bê me'õjao akêx kêt. Nok ga ren me'õo akêx ne ren kam aje mrãmri ne mÿjja kute me

par tok nhyr me rôrôk pyrâk. <sup>33</sup> Ba ije me kunîo kînh kadjy ije amimar ne katât ar amijo iba. Ije mÿjjao iba kunîkôt katât ar amijo iba. Djâm ije amidjwÿnhbit mar? Kati. Ije me krâptî mex kadjy amimar. Ije Metîndjwÿnh'ÿr meo akêx nhyr kute me utâr nhyr me mex kadjy amimar.

## 11

*Mjên dja prôo ba nhyr kâjmã kum rax kamê.*

*Ep 5.22; Xim k 2.9; Ped k 3.1*

<sup>1</sup> Nã bãm Kritu'ã amijakren kôt ar amijo iba. Ar gadjwÿ dja gar ijã amijakren ikôt ar amijo aba.

<sup>2</sup> Be, ije amrêbê ar amã ikabên jarênh gar aje mar râ'ã ne ikabên kunîkôt ar amijo aba. Kam ne ba mrâmri ar amã amex jarê.

<sup>3</sup> Me kute me bikprôn timer djâkam amikrã'ã prodjwÿ. Jadjwÿ ne gar abej ikukij. Gar imã,

—Dja bar me bikprôn timer djâkam ikrã'ã pro jabej. Nâr, dja bar 'ã pro kêt. Mÿj dja bar nê? Nã gãm ar ã imã ane. Jakam ije ar amã ikabên jarênhmã. Ga, me krãja pumû. Me krâkam ne me umar ne kam kukwakam amû ikrao apê nâr parkam mrã. Me krã ne amû me kukràdjã kunî ngrêk ne meo ba. Kritudjwÿ ne gwaj bakunîo ba kute mrâmri ne me krã kute meo ba pyrâk. Gwaj bamydjwÿ ne gwaj baprôo baba kute mrâmri ne me krã kute meo ba pyrâk. Metîndjwÿnhdjwÿ ne Krituo ba kute mrâmri ne me krã kute meo ba pyrâk.

<sup>4</sup> Godja me my mekôt akuprôn Metîndjwÿnhmã kabên nâr kukwakam memã kabên jarê djâm kute amikrãdjê tur ne o amikrã'ã pro? Kati. Kam kute amikrã'ã prokam mex kêt. <sup>5</sup> Nhyr be, godja me nire Metîndjwÿnhmã kabên nâr kukwakam memã kabên jarê djâm amikrã'ã pro? Nã. Me nire kute amikrã'ã prokam mex. Ren kam amikrã'ã pro kêt nhyr ren me arÿm kam pijâm ne. Ren me kam pijâm kute mrâmri ne me nire prîne krã kênhkam ren me arÿm kam pijâm pyrâk.

<sup>6</sup> Dja me nire amikrã'ã pro prãm kêt nhyr ren me kum krãnh kê. Mÿj kadjy ren me kum krãnh kê? Bir, pijâm kadjy. Nhyr be, kati. Me nire krãnh kênhkam nâr kî

jakârkam mex kêt. Mex kêt kam gê me nire amikrã'ã pro.

<sup>7</sup> Adjâkamã ne Metîndjwÿnh amimekôt, amipymakôt me my nhîpêx nhyr arÿm mexkumrêx ne uma. Kute amikôt ipêxkam me my kute amikrã'ã pro kêt. Nhyr be, djâm Metîndjwÿnh amimexo me nire nhîpêx? Kati. Kute amimexo me nire nhîpêx kêt. Nãm me my mexo me nire nhîpêx. Kam dja me nire amikrã'ã pro. <sup>8</sup> Djâm me'ô nireo ne Metîndjwÿnh my nhîpêx? Kati. My nhôkwao ne ni nhîpêx. <sup>9</sup> Djâm me my me nirekôt ba kadjy ne my nhîpêx? Kati. Mykôt ba kadjy ne ni nhîpêx.

<sup>10</sup> Kam dja me nire me my kabên man kôt ar amijo ba. Kamdjwÿ dja me nire arÿm amikrã'ã pro. Amikrã'ã pron arÿm memã amijo amirît. Mrâmri kute mjên kabên mar ne kôt amijo bakumrêxja dja memã o amirît nhyr me arÿm omû. Dja amikrã'ã pron Metîndjwÿnh kadjy mrãnh djwÿnhmãdjwÿ amijo amirît nhyr me arÿm omû.

<sup>11</sup> Nhyr arÿm me kute Bênjadjwÿr djwÿnh markam djâm me nire ta ar ban kum me my mar prãm kêt ne ar ba? Kati. Nâr, djâm me my ta ar ban kum me nire mar prãm kêt ne ar ba? Kati. Ar ta ne ar ar ba kêt. Arkum aben mar prãm. <sup>12</sup> My nhôkwao ne ni nhîpêx nhyr me nire kurûmdjwÿ arÿm me my apôx. Nhyr be, Metîndjwÿnh rax ne mÿjja kunî nhîpêx. <sup>13</sup> Be, godja me nire amikrã'ã pro kêt ne Metîndjwÿnhmã kabên jabej djâm kam mex? Ar ga dja gar amim mex jabej kabi.

<sup>14-15</sup> Me my kî jabjekam mex kêt. Nhyr be, me nire kî jabjekam me kum me kînhkumrêx. Me krã'ã pro kadjy ne mexkumrêx. <sup>16</sup> Nhyr dja ar ajô aje me nire krã kajgo mÿr jabej akabêno ijapanh prãm. Kwârîk wãnh râ'ã. Djâm ar ikam me nire kute amikrã'ã pro kêt? Nâr djâm amû me kute amim Jeju mar ne kôt ar aben pydjio baja apÿnh ba djâkam me nire kute amikrã'ã pro kêt? Arkati. Me nire amikrã'ã pro. Tãm dja gar ama. Tãm ne ja.

*Me kute Jeju'ã djwÿ jakren kute kur.*

<sup>17</sup> Gar abikprôn timer ne aje amim Jeju mar kadjy djwÿ krê. Be, djã ne gar akuprôn arÿm Jeju man aje mar mexo amû aben

kamê? Kati. Ar aje Jeju'ã djwý krên ne aje Jeju marmã akuprôn ate aben kam amex kêt ne. Djãm kam we ije ar amã mex jarênhmã? Kati. Kam ar amex kêt kumrêx.

<sup>18</sup> Ar aje amim Jeju mar ar aje aben pydjio abakam gar we arým apýnh mýj xêjakôt akrî ne arým abenã akabê:n ne. Ja ne me nînh imã arê ba arým kuma. Birãm mrãmri ne me kabênkumrêx. <sup>19</sup> Mrãmri gêdja ar akam me kwý abenã kabê:n ne. Nhym be, mýj xêja dja mrãmri Metîndjwýnhmã mex? Djãm me ajkwa kajgokambit memã kum,

—Ba ne ba ije amim Jeju mar, anhÿro ba ne kute katát kôt amijo ba kêt? Djãm kam me arým Metîndjwýnhmã mex? Kati. Me kum mex kêt kumrêx. Nhym be, me kute tu amim Jeju markumrêx ne katát Jeju kôt ar amijo ba. Be, me ja ne me mrãmri Metîndjwýnhmã mexkumrêx.

<sup>20</sup> Ar abikprônhkam djãm ar aje Bênjadjwýr djwýnh mar kadjy ne gar anhõ kwý krê? Kati. Ar aje amidjwýnhbit mar kadjy ar anhõ kwý krê. <sup>21</sup> Nã gãm ar apýnh aben bê anhõ djwý jamýn o aprôt ne o akrî. Nhym me kwý kum prãm ne te 'ã ar apumũ. Gar akwý atekam anhõ kwý krên raxkam ajbã. <sup>22</sup> Djãm ar aje anhõ kwý krên ne akõm kadjy ar anhûrkwã kêt kam ne gar aben bê djwýo aprôt? Djãm ar amã me kute amim Metîndjwýnh mar ne kôt ar aben pydjio baja kurên me õ mýjja kêtja kanga nhym me arým pijàm ne? Mýj dja ba kam ar amã arê? Djãm kam ije ar amã amex jarênhmã? Kati. Kam ar amex kêt kumrêx.

<sup>23</sup> Nhym be, gwaj babikprônh ne baje djwý krên ne baje Jeju tyk marmã. Bênjadjwýr djwýnh ta ne imã tãm'ã karõ ba kuman arým amrêbê ar amã arê. Ne jakam ije ajte kôt ar amã tãm jarênhmã. Bênjadjwýr djwýnh Jeju arým djwý by. Djuda ate tēm ne kute kurê djwýnhmã kangao âmri nhym akamát tãm kam arým djwý byn <sup>24</sup> 'ã Metîndjwýnhmã amikînh jarê. Ne kam arým kôt ba djwýnh arkum djwý kokij ne 'ã aminhî jakre. Ne arkum,

—Ar abyn krê. Inhî ne ja. Dja me pîte'y'ã inhôn ibî. Dja gar akuprôn inhî'ã djwý jakren krê. Dja gar ã imaro anen imar rã'ã ne. Nãm ã Jeju arkum anen arkum kungã

nhym ar arým kukrê. <sup>25</sup> Kukrên arým krên pa.

Nhym kam arým ngônhrãdjwý by. Ngônhrãkam pidjô kangô byn arým arkum,

—Pidjô kangô ja ne ikamrô prôt ne ityk'ã amijakre. Arým ikamrô prôt ne itykkôt gêdja Metîndjwýnh arým memã kabên ny jarênh mãm dji. Gêdja memã kum, “Dja gar tu amim ikra markumrêx ba arým ajaxwe maro aknon akam ingyk kêt”, ane. Kabên ny ne ja. Dja gar akuprôn ikamrô'ã pidjô kangô jakren o ikôn ã imaro anen imar rã'ã ne. Nãm ã Jeju arkum ane. <sup>26</sup> Kam dja gar akuprôn 'ã djwý krên 'ã pidjô kangôo ikôn ã maro ane. Ar aje ã maro anhÿr kunîkôt gar arým memã Bênjadjwýr djwýnh tyko amirî. Dja gar memã o amirîto akrî tãm tã nhym ï akubyn bõx.

<sup>27</sup> Kam me kute Bênjadjwýr djwýnh nhõ djwýo mýjja kajgon kute krênja ne me arým axwe. Me kute Bênjadjwýr djwýnh nhõ pidjô kangôo mýjja kajgon kute o kômja ne me arým axwe. Kute Bênjadjwýr djwýnh tyk mar kêt kam ne axwe. Axwe kute mrãmri ne me kute Jejuo bikênh ne kamrômã ôpõkkam me axwe ja pyræk.

<sup>28</sup> Kam dja gar amijaxwe jabej adjumaro nhÿn arým amima. Amiman amijaxwe kôt Metîndjwýnhmã amijarê. Ne kam arým Jeju'ã djwý krên 'ã pidjô kangôo ikõ. <sup>29</sup> Dja gar ajõ Bênjadjwýr djwýnh tyk mar kêt ne tu djwý krê ne tu pidjô kangôo ikõ nhym kam Metîndjwýnh arým ajo ajkê.

<sup>30</sup> Ga, ar akrãptî aje Bênjadjwýr djwýnh mar kêt kam tu ar aje krên ne o akõmja pumũ. Kam arým ar akrãptî arerekren akanê nhym me kwý arým ty. <sup>31</sup> Gwaj ren bakumrêx bajaxwe jabej badjumaro nhÿn ren arým amijaxwe ma. Ne kam ren arým amijaxwe kôt Metîndjwýnhmã amijarê. Nhym kam ren Metîndjwýnh arým gwaj bajaxwe pãnh gwaj bajo bikênh kêt. <sup>32</sup> Bênjadjwýr djwýnh kute gwaj babê bajaxwe kurê. Kute gwaj babê kurê kadjy ne gwaj bajo ajkê. Ne ren gwaj babê bajaxwe kurê kêt gwaj ren arým akuno. Nhym be, kati. Me axwe kôt me biknor tokry djakam babiknor kêt kadjy ne gwaj babê bajaxwe kurê.

<sup>33</sup> Kam akmere ar, dja gar Bênjadjwÿr djwÿnh tyk mar kadjy akuprôn abenkam amako nhÿ. Kwârîk wânh aben bê anhô djwÿ 'amÿnh ne tu o aprôt kêt. Dja gar abenkam amako nhÿ. <sup>34</sup> Nhy me'ô kum prâm gê ûrkwâkam ô kwÿ krên mex. Ô kwÿ krên mexkam gê ar awÿr bôx ne ar aro'ã nhÿ. Ne kam arÿm Bênjadjwÿr djwÿnh tyk mar katât ne arÿm djwÿ krên kangôo ikô. Mÿkam? Bir, kute pân timer meo bikên timer kêt kadjy. Me kute Bênjadjwÿr djwÿnh tyk mar kêt ne tu kute krên ne o kôm kam ne Metîndjwÿnh kute pân timer meo bikên timer puma.

Be, ije ar amã mÿjja kwÿ'ã idjujarên timer prâm rã'ã. Ba wâm itêm ne ar akam îbôxkambit dja ba ar amã arê.

## 12

*Karôkôt me apÿnh Metîndjwÿnhmã àpên timer djà.*

*Dju k 4.1*

<sup>1</sup> Ar ga ne gar Metîndjwÿnh Karôkôt adjâpên timer jabej ikukij, ba arÿm kuma. Ba ar amã 'ã ajarê gar ama. <sup>2</sup> Amrêbê ar aje amim Jeju mar kêt timer ne me amã,

—Dja gar mÿjja metîndjwÿnh karô nhîpêxmã amîjarên timer aba. Nâm me ã ar amã ane gar arÿm ari mekôt apÿnh mÿjja metîndjwÿnh karô nhîpêx jamakkre kêtjamã amîjarên timer aba nhîm kute ar amar kêt kumrêx. Kam ne gar Metîndjwÿnh Karô djâpên timer mar kêt. Ja ne gar aje mar.

<sup>3</sup> Kam, ar aje Metîndjwÿnh Karô djâpên timer mar kadjy ba jakam ar amã arê. Me'ô kute Metîndjwÿnh Karô kukwakam kabên'ô jarên timer kam djâm kute memã kum,

—Djâm Jeju mex? Kati, punure, anhÿro ba? Arkati. Metîndjwÿnh Karô kukwakam ne me kute Jeju'ã kabên timer mexbit jarên timer ba. Ne kam ajte me'ô kute memã kum,

—Mrâmri Jejubê Bênjadjwÿr djwÿnh timer kumrêx, anhÿro ba, Metîndjwÿnh Karôbit kukwakam kute arên timer ba.

<sup>4</sup> Kam, mÿj ne Metîndjwÿnh Karô djâpên timer kute? Bir, nâm apÿnh mÿjja'ã memã karô nhîm me arÿm kôt kute mar ne arÿm kam kum àpên timer ar ba. Djâm kam apÿnh karô kute apÿnh mÿjja'ã memã karô? Kati. Metîndjwÿnh Karô ta pydji. Pydji kute 'ã memã karô. <sup>5</sup> Bênjadjwÿr

djwÿnh kadjy gwaj apÿnh badjâpên timer djâri maro baba. Djâm kam apÿnh Bênjadjwÿr djwÿnh? Kati. Bênjadjwÿr djwÿnh ta pydji. <sup>6</sup> Metîndjwÿnh apÿnh gwaj bajo ô àpên timer ne kam kum badjâpên timer kadjy apÿnh gwaj bamã bano mex, bajamak mex, badjê mex jarê. Djâm kam apÿnh Metîndjwÿnh? Kati. Metîndjwÿnh ta pydji.

<sup>7</sup> Metîndjwÿnh Karô kute gwaj bakôt amîjo amîrî timer kadjy arÿm gwaj bakunîmã 'ã karô. Gwaj badjâpên timer djâ'ã gwaj bamã karô. Dja gwaj bakunî apÿnh badjâpên timer djâ kôt kum apên arÿm abenmã Metîndjwÿnh raxo amîrî timer ne kam bakunî arÿm ra:x ma. Rax man arÿm katâ:t kôt ar amîjo baba nhîm arÿm gwaj bakam kînh timer kumrêx.

<sup>8</sup> Kute gwaj bakunîmã àpên timer djâ'ã karô kôt ne Karô gwaj bakam me kwÿmã amak mex jadja. Nhy kam arÿm kute memã kabên timer katât jarên timer mar mex kumrêx.

Metîndjwÿnh Karô ta ajte gwaj bakam me kwÿmã apÿnh mÿjja mar kêt jarê nhîm me arÿm kôt kute mar ne kute gwaj bamã arên timer mar mex.

<sup>9</sup> Metîndjwÿnh Karô ta ajte gwaj bakam me kwÿmã Metîndjwÿnh raxo amîrî nhîm me arÿm kôt tu amim Metîndjwÿnh markumrêx.

Metîndjwÿnh Karô ta ajte gwaj bakam me kwÿmã me punuo mex'ã kum karô nhîm me arÿm kôt kute me punuo mex mar mex.

<sup>10</sup> Nhy ajte gwaj bakam me kwÿmã mÿjja pumûnh kêt nhîpêx'ã kum karô nhîm me arÿm kôt kute mÿjja pumûnh kêt nhîpêxja mar mex.

Nhy ajte gwaj bakam me kwÿmã kabên jarên timer ba nhîm kam me arÿm kôt kute Metîndjwÿnh kukwakam kabên jarên timer mar mex. Nâm ã gwaj bamã ane gwaj kam baje apÿnh mÿjja mar mex ne arÿm o kum badjâpên timer ar baba.

Nhy be, me'ô Metîndjwÿnhmã àpên timer gêdja gwaj bawÿr bôx. Nâr kon, me'ô me karô punumã àpên timer gêdja gwaj bawÿr bôx. Kute mex pyrâk gêdja gwaj bawÿr bôx. Mÿj dja gwaj me'ômã bakator on? Bir, Metîndjwÿnh Karô ajte gwaj bakam me kwÿmã me'ô jarên timer nhîm me arÿm kôt kute kum kator mar mex. Me'ô Metîndjwÿnhmã àpên timer kumrêx gwaj bawÿr bôx nhîm me arÿm kuman gwaj bamã,

—Metîndjwýnhmã àpênhkumrêx ne wã, ane. Nàr, me'ò me karõ punumã àpênhja gwaj bawýr bõx nhym me arým kuman gwaj bamã,

—Me karõ punumã àpênh ne wã, ane. Gwaj bakwý Metîndjwýnh Karõkõt badjapênh djà 'òdjwý ne ja.

Nhym kam ajte Metîndjwýnh Karõ gwaj bakam me kwýmã me kabên'ã karõ nhym me arým kõt kute me bajtem kabên mar kêtja jarênh mar mex.

Nhym kam ajte Metîndjwýnh Karõ gwaj bakwýmã me kabên'ã karõ nhym kõt me kute gwaj bakabên djwýnhkõt amũ gwaj bamã me bajtem kabên mar kêtja jarênh mar mex. Metîndjwýnh Karõkõt gwaj bakwý badjapênh djà 'òdjwý ne ja.

<sup>11</sup> Metîndjwýnh Karõ ta ne kute gwaj bamã apýnh badjapênh djàri arênh ne ja. Gwaj banhĩ pýnhkõt kute gwaj bamã arênh. Ta kute gwaj bajã amim karõn arým kõt gwaj bamã badjapênh djà jarênh ne ja.

*Gwaj baje Kritumẽ banhõ typdji pyrãk.  
Rô 12.4; Ep 4.16; Kor 3.15*

<sup>12</sup> Ga, gwaj banhĩja pumũ. Gwaj banhĩkam apýnh badjapênh djà krãptĩ. Gwaj baparkam bamrãnh djà. Ne banhikrao baje mýjja kupênh djà. Ne bakrãkam banhõ mýjja mar djà. Ne banokam baje mýjja pumũnh djà. Ne bajamakkrekam baje mýjja mar ne kupênh djà. Be, gwaj banhĩkam apýnh badjapênh djà krãptĩja pumũ. Kritudjwý gwaj baje amim mar nhym kute gwaj bajo õbikwakam gwaj baje kumẽ banhĩ pydji pyrãk. Nekam gwaj banhĩ pýnhkõt apýnh badjapênh djà krãptĩ, badjumar djà krãptĩ.

<sup>13</sup> Metîndjwýnh Karõ ne pydji. Ne kam gwaj bakunõ ban Kritu pydji'ã gwaj bamẽ. 'Ã ne me ngõmã gwaj bajangjênh jakre. Gwaj te babê idjaer nàr te gwaj babajtem nhym arým Metîndjwýnh Karõ Kritu pydji'ã gwaj bamẽ. Nàr, me arým gwaj bakam ar kwý pa 'amý nhym ar memã àpênh kajgo ar ba. Metîndjwýnh Karõ arým ar o ban Kritu pydji'ã ar kumẽ. Nàr, gwaj bakam ar kwý me kute ar pa 'amýnh kêtja nhym ar arek mekõt ar ban umar mex. Kwãrĩk wãnh rã'ã. Metîndjwýnh Karõ pydji arým gwaj bakunõ ban Kritu pydji'ã gwaj bamẽ. Metîndjwýnh

Karõ kute ngõ pyrãk gwaj bakunĩ baje pydjio bakõm pyrãk.

<sup>14</sup> Ga, gwaj banhĩja pumũ. Djãm gwaj badjapênh djà pydjibit? Kati. Gwaj banhĩkam apýnh badjapênh djà krãptĩ, badjumar djà krãptĩ. Kritudjwý gwaj baje amim mar nhym kute gwaj bajo õbikwakam kumẽ banhĩ pydji pyrãk. Ba ar amã arẽ gar ama. Kritu mẽ gwaj baje banhĩ pydji pyrãk.

<sup>15</sup> Birãm Kritukam gwaj bajõ djapênh djà kute gwaj bapar djapênh djà pyrãk ne kajgo. Ne kam kum àpênh djà kĩnh kêt. Kum me'ò djapênh djà kĩnh, àpênh djà mexkumrêx kute me ikra djapênh djaja pyrãk kum kĩnh. Ne kam ren amim,

—Tãmwã ne àpênh djà mexkumrêx. Me kum kĩnhkumrêx. Nhym be, me kum ba idjapênh djà kĩnh ngrire. Mýkam ne Metîndjwýnh Karõ imã idjapênh djà ja'ã karõ? Kute Kritu ijo õbikwa kêt pyrãk. Kute kadjy idjapênh kêt pyrãk, ane. Djãm kute amim anhýrkam djãm mrãmri Kritu kute o õbikwa kêt? Kati. Mrãmri kute o õbikwakumrêx.

<sup>16</sup> Ne birãm atekam Kritukam gwaj bajõdjwý djapênh djà kute me amak djapênh djà pyrãk. Ne kam kum àpênh djà kĩnh kêt. Kum me'ò djapênh djà kĩnh, àpênh djà mexkumrêx kute me no djapênh djaja pyrãk kum kĩnh. Ne kam ren amim,

—Tãmwã ne àpênh djà mexkumrêx. Me kum kĩnhkumrêx. Nhym be, me kum ba idjapênh djà kĩnh ngrire. Mýkam ne Metîndjwýnh Karõ imã idjapênh djà ja'ã karõ? Kute Kritu ijo õbikwa kêt pyrãk. Kute kadjy idjapênh kêt pyrãk, ane. Djãm kute amim anhýrkam djãm mrãmri Kritu kute o õbikwa kêt? Kati. Mrãmri, kute o õbikwakumrêx. <sup>17</sup> Ne ren gwaj banobit ne ren gwaj bajamakkẽ bajamakkre kêt mýjo ne gwaj ren badjumar? Ne ren gwaj bajamakbit ne ren banhijãkre kre kêt mýjo ne gwaj ren badjubãr?

<sup>18</sup> Nhym be, kati. Metîndjwýnh ta gwaj bakadjy apýnh gwaj bakukràdjã, gwaj badjapênh djà nhipêx. Ta ne kute amim gwaj badjapênh djà'ã karõ kõt arým apýnh gwaj badjapênh djà nhipêx. Kritudjwý. Gwaj baje amim mar nhym kute gwaj bajo õbikwakam ne gwaj apýnh kõt badjapênh djario baba.



19 Nhym be, Metĩndjwýnh ren gwaj banhijäkreibit nhipêx gwaj ren badjàkur kêt, badjàpênh kêt, bamrãnh kêt. Ren gwaj bakukràdjà'õ pydjibit nhipêx mýj ne gwaj ren nê? Ne ren gwaj banhijäkreibit nhipêx ne ren gwaj bajajkwa nhipêx kêt gwaj ren badjàkur kêt. Ne ren gwaj banhikra nhipêx kêt gwaj ren badjàpênh kêt. Ne ren gwaj bapar nhipêx kêt gwaj ren bamrãnh kêt. Mýj ne gwaj ren kam nê? Gwaj ren kam ajmã nê.

20 Nhym be, kati. Gwaj bakukràdjà kunĩ. Gwaj badjàpênh djà krãptĩ. Nhym be, gwaj banhĩ pýnhbit. Kritudjwý gwaj baje amim mar nhym kute gwaj bajo õbikwakam kute kumê gwaj baje banhĩ pydji pyrãk. Nhym be, apýnh gwaj badjàpênh djà krãptĩ. Kam kwãrĩk wãnh ar amã adjàpênh djà kurê kêt.

*Me kute abeno õbikwan kum aben jabê'ã memã karõ.*

*Rõ 12.10; Pir 2.3; Ped k 2.17*

21 Ba ar amã mýjja jarê gar ama. Djãm gwaj bamã bano kĩnh ne ate bamã banhikra kurê? Kati. Gwaj bamã bano kĩnh ne bamã banhikra kĩnh ne bamã bakukràdjà kunĩ kĩnh. Metĩndjwýnh Karõ ne kute gwaj bamã apýnh badjàpênh djà'ã karõ gwaj o baba ne kam bamã badjàpênh djàdjwý kunĩ kĩnhmã. Djãm gwaj baje me kabên mar kêtja jarênh djãm jabit ne gwaj bamã kĩnhmã? Djãm me punuo mex ne gwaj bamã kĩnh kêtã? Kati. Dja gwaj bamã badjàpênh djà kunĩ kĩnhõ aben pyrãk.

22 Gwaj bakukràdjàdjwý kwý rerekre. Gwaj bakĩ, gwaj bajamak, gwaj bajai, gwaj bakukràdjà kwý rerekre. Te kwý rerekre gwaj bamã kĩ:nhkumrêx ne. Ne ren kêt gwaj ren ajmã nê? 23 Nhym gwaj bakukràdjà kwý me kum kĩnh kêt jabej gwaj amim o mex. Gwaj o mex ne kãjmã kamê nhym me arým kum kĩnh. 24 Gwaj bakukràdjà me kum kĩnhja gwaj o mex kêt ne kãjmã kamênh kêt.

Metĩndjwýnhdjwý ne Kritu nhõ àpênh aro aben pyrãk ne kum ar kunĩ kĩnhõ aben pyrãk. Nãm mã me kum õ àpênh kĩnh kêtjao mex ne kãjmã kum mex kamê. Nhym kam me arým kum õ àpênh kunĩ kĩnhõ aben pyrãk. 25 Mýkam ne õ àpênhõ aben pyrãk? Bir, ne ren meo aben pyrãk kêt nhym ren

me amirax mýr jabej abenmã kabên ne. Nhym be, kati. Me kute abenmã anhýr kêt kadjy ne arým õ àpênhõ aben pyrãk nhym kam me arým abeno djuw mex'ã kabên.

26 Nhym kam godja gwaj bajõ tokry jabej gwaj bakunĩ arým ô'ã batokry. Nãr godja me kãjmã kum rax kamê nhym arým kĩnh. Kĩnhkam gwaj arým ô'ã bakĩnh ne. 27 Ar aje tu amim Kritu markam nhym kute ar ajo õbikwakam ar aje mrãmri ne kumê anhĩ kute pydji pyrãk. Nhym arým ar ajo õ àpênh.

28 Me baje amim Jeju mar kunĩ ne kôt ar aben pydjio babaja ne Metĩndjwýnh kute aben nHITEPã me bajã àpênh rênh. Nãm me bakwý'ã memã wa djwýnh mẽ. Jeju ne amrêbê ar ijano bar 'ã idjujarênh ar iba. Ar ikumrêx. Nhym me bakwý'ã ajte kukwakam kabên jarênh djwýnh mẽ nhym me ar ijatãri. Nhym me bakwý'ã memã kukràdjà'ã ujarênh djwýnh mẽ nhym me me atãri. Nhym kam ajte me bakwý'ã mýjja pumũnh kêt nhipêx djwýnh mẽ. Ne kam ajte me bakwýmã me punuo mex'ã karõ gu me baje mar. Nhym kam ajte me bakwýmã me àpênhkôt o kangõnh'ã karõ gu me baje mar. Nhym kam me kwýmã meo ba djwýnh'ã kum karõ nhym me kute mar. Nhym kam me bakwýmã me kabên'ã karõ gu me kôt baje me bajtem kabên mar kêtja jarênh mar.

29 Djãm kam me bakunĩbê Jeju kute ar anorja? Kati. Me bakwýbit. Djãm kam me bakunĩbê Metĩndjwýnh kukwakam kabên jarênh djwýnh? Kati. Me bakwýbit. Djãm me bakunĩbê memã kukràdjà'ã ujarênh djwýnh? Kati. Me bakwýbit. Djãm me bakunĩ baje mýjja pumũnh kêt nhipêx mar, baje me punuo mex mar? Kati. Me bakwýbit. 30 Djãm me bakunĩ baje me bajtem kabên mar kêtja jarênh mar? Kati. Me bakwýbit. Djãm me bakunĩ baje me kabên djwýnhkôt amũ memã me kabên mar kêtja jarênh mar? Kati. Me bakwýbit. 31 Kam ar adjàpênh djàja'õ mexo kute kunĩ jakrenh dja gar amã kĩnh. Mex ja dja gar abej týx.

Ne kam mýj dja gar nênh kam apê? Bir, dja gar amã me abên kam apê. Gwaj bamã me abê kêtka badjàpênh kajgo. Gwaj bamã me abêkambit mrãmri badjàpênh mexkumrêx.

## 13

### *Me kum me abê'ã ujarênh.*

<sup>1</sup> Gwaj bamã me abêkambit ne mrãmri gwaj badjâpênh mexkumrêx. Ne ren gwaj bakam me'õ ren pykakam apÿnh me bajtem kabên mar kêtja jarê nar ren kâjkwakam Metîndjwÿnh kadjy mrãnh djwÿnh kabên mar kêtja jarê. Ne ren kum me abê kêt. Djãm kam mex? Kati. Kum me abê kêt kam kabên kajgokumrêx. Kum me abê kêt kam kabên jarênh kajgo kute mrãmri ne me ngôn krôkrôkti titikkam kanga kajgo pyrâk.

<sup>2</sup> Nhyim ren gwaj bakam me'õ kute Metîndjwÿnh kukwakam kabên jarênh mar. Ne ren kute mÿjja bipdjur tûm kunïo amirît mar. Ne ren me kute mÿjja marja kunï ren mar. Ne kam ren kum me abê kêt. Djãm me'õja rax? Kati. Kum me abê kêt kam ne kajgo me:xi.

Nhyim ren gwaj bakam me'õ ren mrãmri kute Metîndjwÿnh rax markumrêx. Ne ren mÿjja nhîpêx kadjy amim kamnhîx mexkumrêx. Ne ren kum,

—Djûnwã, dja ga imã krãnhwã kaba, ane. Nhyim ren arÿm kum kadjârkumrêx. Nhyim kam ren me'õja kum me abê kêt. Djãm me'õja rax? Kati. Kum me abê kêt kam ne kajgokumrêx.

<sup>3</sup> Nhyim ren gwaj bakam me'õ ren ò mÿjja kunï me bikênhmã kungrà. Ne ren kum me abê kêt, mã ne kute? Kati, Kute memã mÿjja nhôrja kajgo mexi, kum me abê kêt kam.

Nhyim ren kam me'õ kute me'õ pytãr kadjy memã kum,

—Kwãrîk wãnh kuwyo tãmwã bîn kêt. Ba dja ga pãnh kuwyo ibî, ane. Nhyim ren me arÿm kabênkôt pãnh kubî. Kubî nhyim tykjao ren arÿm me'õ pytã. Nhyim be, ren tykja anhÿr djwÿnh rãm kum me abê kêt, mã ne kute? Kati, tykja kajgo mexi, kum me abê kêt kam.

<sup>4</sup> Gwaj bamã me abêkam dja gwaj memã bano kator kêt ne amijamãr 'iry.

Ne bamã me kaprî.

Ne me ò mÿjja'ã bangryk kêt.

Ne bamã me abêkam babên kati kêt.

Ne amijo badjãmra kêt.

<sup>5</sup> Ne memã baprire ne memã bakabên jarê. Ne bamã me abêkam amidjwÿnh bit mar kêt.

Ne amijã bangryk nê.

Nhyim me'õ gwaj bajo ajkê gwaj amipãnh kadjy mar kêt kumrêx.

<sup>6</sup> Ne bamã me abêkam me axwekam bakînh kêt kumrêx.

Ne me kute katãt amijo bakam bakînh kumrêx.

<sup>7</sup> Ne memã me arênh prãm kêt.

Ne bamã me abêkam tu amim me markumrêx ne amim, “Mrãmri kabên kumrêx”, anen amiwÿr mÿjja kamnhîx kumrêx.

Ne mekôt badjãm tÿx kumrêx ne 'ã badjukanga kêt.

<sup>8</sup> Ne bamã me abêkam arÿm Metîndjwÿnh kadjy badjâpênh kumrêx ne bakajgo kêt kumrêx. Nhyim be, Metîndjwÿnh Karõ kute apÿnh memã âpênh djã jarênhja djã ï kêt. Djã kukwakam kabên jarênh djwÿnh ï memã arênh kêt. Nhyim me ï me bajtem kabên mar kêtja jarênh kêt. Nhyim me kute apÿnh mÿjja mar djwÿnh ï mar kêt. Nhyim be, djãm me kum me abên kam kum me abê kêt mã? Arkati. Djã me kum me abê rã'ã. Ne kam kajgo kêt rã'ã ne. <sup>9</sup> Jakam gwaj mÿjja kwÿbit man Metîndjwÿnh kukwakam kabên kwÿbit jarê. Gwaj baje kabên kunï mar kêt. <sup>10</sup> Nhyim be, djã ï mÿjja kunï kute amirît djã nhõ akati bõx gwaj arÿm prîne mÿjja kunï ma nhyim me:x kumrêx. Nhyim mÿjja kãjbê mexja arÿm kêt ne.

<sup>11</sup> Amrêbê iprîri ikabên kute me prîne kabên pyrâk. Iprîri ije mÿjja mar kute me prîne kute mÿjja mar pyrâk. Ne ije amim mÿjja'ã karõ kute me prîne amim mÿjja'ã karõ pyrâk. Ba kam arÿm ijabatãnh ne arÿm iprîne prãm kêt. Ba arÿm iprîne kam amijo ibaja kanga.

<sup>12</sup> Jakam gwaj baje Metîndjwÿnh nhõ mÿjja pumÿnh mex kêt kute mrãmri ne ïxe punukam me kute mÿjja pumÿnh mex kêt pyrâk. Djã gwaj ã omÿnh ane:n kam ï arÿm kuka kôn omÿnh mexkumrêx. Jakam gwaj baje mÿjja kwÿbit mar. Djã gwaj ã maro ane:n kam ï arÿm prîne mar mexkumrêx. Djã gwaj maro kute mrãmri ne ta kute prîne gwaj bamar pyrâk.

<sup>13</sup> Jakam gwaj tu amim Metîndjwÿnh markumrêx rã'ã. Ne amiwÿr kamnhîx kumrêx rã'ã. Ne bamã me abê rã'ã. Ne kam gwaj baje tu amim markumrêxja ne kãjbê mex. Gwaj amiwÿr kamnhîx djwÿ ne kãjbê mex.

Nhym be, gwaj bamã me abêja ne mexo kute kunĩ jakrenh.

## 14

*Aben kabên djwýnhkôt me kute abenmã arênh'ã memã karô.*

<sup>1</sup> Dja gar mã amã me abê. Ne kam ajte ar amã apýnh adjápênh djâdjwý kînhkumrêx. Metîndjwýnh Karô kute 'ã ar amã karôja dja gar amã kînh. Ne kam ar adjápênh djâ'ã abê Metîndjwýnh kukwakam kabên jarênh djwýnhja dja gar amã kînhkumrêx. Abê kukwakam kabên jarênh djwýnhkam aje me aben djwýnh kabênkôt memã arênh. Tãm dja ga amã kînhkumrêx.

<sup>2</sup> Nhym be, me'ô kute me bajtem kabên mar kêt jarênhkam djãm gwaj bajômã ne arê? Kati. Gwaj bajô baje mar kêt. Metîndjwýnhmã ne arê. Me'ô ta ne mýjja mar kêt jarê. <sup>3</sup> Nhym be, me'ô kute gwaj bakabênkôt Metîndjwýnh kukwakam kabên jarênhja ne mex. Gwaj baje markam ne mex. Nãm gwaj bamã arê gwaj kam bajamak mexo amũ amikamênho tèn arým Metîndjwýnh mar rax ne. Nãm gwaj bamã 'ã karôn gwaj bajo kînh. <sup>4</sup> Nhym be, me'ô kute me bajtem kabên mar kêtja jarênh ne amidjwýnhmãbit arên kam ajbit arým amak mexo amũ amikamê. Me'ôdjwý kute mar kêt. Nhym be, me'ô kute me aben djwýnh kabênkôt Metîndjwýnh kukwakam kabên jarênhja. Ja ne me kute amim Jeju marja kunĩmã arê nhym me arým kuma. Ne kam arým amak mexo amũ amikamên arým Metîndjwýnh mar rax ne.

<sup>5</sup> Ar akunĩ ren me bajtem kabên mar kêtja jarê ba ren kam ikînh ngrire. Nhym be, ren ar akunĩ me bakabênkôt Metîndjwýnh kukwakam kabên jarê ba ren kam ikînhkumrêx ne. Mýkam? Bir, ar aje kukwakam kabên jarênhkam ne gar amexkumrêx. Nhym me'ô kute me bajtem kabên mar kêt jarênhja kâjbê mex. Nâr, godja me'ô ar amã me kabên mar kêtja jarênh jabej. Nhym me'ôdjwý me bakabênkam amũ ar amã me'ô kabên jarê gar arým kabên mar jabej. Kambit dja mexkumrêx. Ar aje kabên markam mexkumrêx. Ne kam arým ajamak mexo amũ amikamên arým mar rax ne. Ar aje

amim Jeju mar ne kôt ar aben pydjio baja kunĩ arým mar rax ne.

<sup>6</sup> Akmere, àpnhîre ar, ba ren ar awýr bôx ne ren ar amã me bajtem kabên mar kêtja jarê djã ne ga ren ar amim aman akînh? Kati. Dja ba ar awýr bôx ne me bakabênkôt ar amã arê gar arým amim aman arým akînh ne. Metîndjwýnh kute imã mýjja ny jarênh dja ba me bakabên kôt ar amã arê gar arým amim aman arým akînh. Nâr ije mýjja'ô bipdjur tûm mar dja ba me bakabênkôt ar amã arê gar arým amim aman arým akînh ne. Nâr, dja ba me bakabênkôt Metîndjwýnh kukwakam ar amã kabên jarê gar arým amim aman arým akînh ne. Nâr, dja ba me bakabênkôt ar amã Metîndjwýnh kukràdjã jarê gar kam arým amim aman arým akînh ne.

<sup>7</sup> Nhym be, aje memã me bajtem kabên mar kêtja jarênhkam aje mrãmri ne me kute me ô'i kakôr punu pyrâk. Nhym kam me abenmã kum,

—Je tô mýj ne kute kakôr punuja? ane. Ar aje me bajtem kabên mar kêtja jarênhkam aje mrãmri ne me kute pîjâbârekam ngrer punu pyrâk. Nhym kam me abenmã kum,

—Je tô mýj ngrer punu ja? ane. <sup>8</sup> Me krâkamngôn apýnh prôt djâri ô me ngrer. Ô'ikam me ngrer. Ne ren me me ngrer kupa'ã ô'i kakô djã ne ren krâkamngôn me ngrer man kurê djwýnhmê aben kutã prôt kadjy akuprô? Kati.

<sup>9</sup> Kam ar gadjwý ga ren ar memã akabên djwýnh jarênh kêt djã ne me ren akabên ma? Kati. Ne ga ren ar aje kôkmã akabên nhym kute akabên mar kêt pyrâk. <sup>10</sup> Apýnh me ba djâkam apýnh me kabên krãptĩ. Ne kam me kute aben djwýnh kabênkôt kute aben kabên kunĩ mar. <sup>11</sup> Gwaj ren me kabên mar kêtjakam abenmã bakabên ne ren abeno me bajtem.

<sup>12</sup> Ar gadjwý ne gar ã aje aben kabên mar kêtka ã abeno me bajtemo ane. Kam, me bakabênkôt dja gar memã akabên jarê. Metîndjwýnh Karô kute ar amã apýnh ar adjápênh djã jarênh dja gar me bakabênkôt memã akabên jarên kôt apê nhym me arým ar akabên markumrêx. Ne kam arým amak mexo amũ amikamên arým mar rax ne. Me

kute amim Jeju mar ne ar aben pydjio baja kunî arým mar rax ne. Ar adjâpênh djâ ja'ô dja gar amã kînhkumrêx.

<sup>13</sup> Kam, ar ajô aje me bajtem kabên mar kêtja jarênh markam dja ga Metîndjwýnhmã amijo a'uw ne kum,

—Me ikabênkam dja ga ajte imã arê, ane. Dja ga ã kum ane gê me bakabênkam ajte amã arê. Ga kam arým amũ me bakabênkam memã arê nhym me arým ama. Tãm ne ja. <sup>14</sup> Metîndjwýnhmã gwaj bakabênkamdjwý. Godja gwaj kum me bajtem kabên mar kêtja jarên arým baje mýj kabên jarênhja mar kêt. Gwaj bajajkwakambit ne gwaj arê ne kam bajamakjao baje mar kêt ne.

<sup>15</sup> Mýj godja gwaj kam nê? Bir, dja gwaj me bajtem kabên mar kêtjao kum bakabên jarên mã bakabên djwýnhkôt kum bakabên jarên arým amikabên ma. Dja gwaj mã me kabên mar kêtjao kum ngren mã bakabên djwýnhkôt kum ngren arým amikabên ma. <sup>16</sup> Godja gar me bajtem kabên mar kêtôkbit kum mex jarê mýj godja ar abu'ã me ja kute akôt kum, “Mrãmri”, anhÿr on? Me kute akabên mar kêtja mýj godja me akôt nê? Me kute akabên mar kêtumrêx. <sup>17</sup> Mrãmri ga me bajtem kabênkôt kum mex jarê. Nhym be, abu'ã me ja dja me amim amar kêt ne amak mexo amũ amikamênh kêt.

<sup>18</sup> Ba ne ba ije apýnh me bajtem kabên mar kêtja jarênh kumex. Ije me bajtem kabên mar kêtja jarênh ar akunî jakrenh mex ne. Kam ne ba Metîndjwýnhmã amikînh jarê. <sup>19</sup> Ne kam me kute amim Jeju mar kute aben pydjikam djãm mekam ije me bajtem kabên mar kêtja jarênh prãm? Kati. Nhym be, me kabên djwýnh ije arênh prãmumrêx. Ije memã Metîndjwýnh kukràdjâ jarênh nhym me kute mar kadjy ije me kabên djwýnh jarênh prãmumrêx. Ne ba ren me bakabên djwýnhkôt ikabên ngrêrebê 5bit jarên ren imã ikabênja kînhkumrêx. Nhym be, ne ba ren me bajtem kabên mar kêtja kabên krãptî: kubê 10.000 jarên ren kam imã ikabên ja kînh ngri:re ne.

<sup>20</sup> Akmere, àpnhîre ar, kwârîk wãnh ar aprîre kêt ne arîk amim akabên kajgo jarênh kêt. Dja gar ajabatãnh ne amim akabênkumrêx jarê. Dja gar me prîre ma.

Prî:rekam me axwe kêt dja gar aman me kudjwa ajaxwe kêt ne katât ar amijo aba.

<sup>21</sup> Be, amrêbê: ne Bênjadjwýr djwýnh me bakukãmãre Môjdjemã 'ã karô nhym kukwakam memã 'ã karô. Nãm te memã 'ã karô nhym me kute mar kêt ne amakkre kêt rã'ã ne. Nhym kam arým memã kabên ne memã kum,

“Me kabên mar kêtôk, me bajtem kabênkôt dja ba jakam memã ikabên jarê.

Dja ba te memã arê nhym me amim ikabên mar kêt rã'ã ne.”

Nãm me amakkre kêtka Bênjadjwýr djwýnh ã me bakukãmãre'ã ane nhym me arým 'ã pi'ók no'ók ne.

<sup>22</sup> Kam, ba ar amã arê. Mýj xê kadjy ne me kute me bajtem kabên mar kêt jarênh? Djãm me kute tu amim Metîndjwýnh markumrêxja kadjy ne me kute arênh? Kati. Me kute amim Jeju mar kêtja kadjy ne me kute arênh. Nhym be, mýj xê kadjy ne me kute Metîndjwýnh kukwakam kabên jarênh, kute me bakabên djwýnhkôt kabên jarênh? Djãm me kute amim Jeju mar kêtja kadjy ne me kute kabên jarênh? Kati. Me kute amim Jeju marja kadjy ne me kute kabên jarênh. <sup>23</sup> Kam, godja gar akunî aben pydjia akunî arým me bajtem kabên mar kêtjakam akabên jarênh jabej. Nhym me kute Metîndjwýnh kabên mar prãmja ar akôt wadjâ. Nâr me kute amim Jeju mar kêtja ar akôt wadjân ar akabên ma. Gar me bajtem kabên mar kêt jarênh akumexkam mýj dja me ar ajã abenmã arê? Bir, dja me abenmã abibãnh jarê.

<sup>24</sup> Nhym be, dja gar akunî abikprôn timerakam akabên djwýnhkôt Metîndjwýnh kabên jarê. Aben totokmã arê. Nhym kam me'ô kute amim Jeju mar kêtja ar akôt wadjâ. Nâr me'ô kute Metîndjwýnh kabên mar prãmja ar akôt wadjâ. Ne kam arým amijã akabên ma:ro nhÿ. Maro nhÿn arým amiman arým amim,

—Mrãmri ne ba mekôt ajmã ikuten ijaxwe, anhÿro nhÿ. Amimaro nhÿ:n arým amim kator mex ne. <sup>25</sup> Dja gar akunî akabên djwýnhkôt ã arênh ane nhym arým prîne amima. Kute apýnh mýjja punu nhipêx ne kute amikam o bipdjur djâri amikam kuma. Ne kam Metîndjwýnh

pymaje arým tu mÿrbê tÿm ne kum rax jarê.  
Ne kam arým ar ajã me kunĩmã kum,

—Be, mrãmri Metĩndjwÿnh mekmê amijo kajkepkumrêx, ane.

*Me kabên'ã atom ne kute arênh nêje me akre.*

*Kar 2.42; Idja 10.25*

<sup>26</sup> Akmere ar, ba apÿnh ar adjapênh djã'ã ar amã karõ gar ama. Me kute amim Jeju mar rax kadjy dja gar memã akabên jarê. Me kute amim mar mexo amũ amikamênhmã dja gar memã arê. Kwãrĩk wãnh ar akabên kajgo jarênh kêt. Arým ar abikprõnhkam ar aje memã apÿnh anhõ me ngrer jarênhmã nàr memã kukràdjã'õ jarênhmã me kute amim Jeju mar rax kadjy dja gar memã arê. Nàr ar aje me bajtem kabên mar kêt kam akabên jarênhmã nàr Metĩndjwÿnh kute ar amã mÿjja 'õo amirĩtja ar aje memã arênhmã me kute amim Jeju mar rax kadjy dja gar memã arê. Nàr, ar aje me bajtem kabên mar kêtja akabên djwÿnhkõt memã arênhmã me kute amim Jeju mar rax kadjy dja gar memã arê. Kwãrĩk wãnh ar akabên kajgo jarênh kêt.

<sup>27</sup> Nhym kam ar akam me'õ ar me bajtem kabên mar kêtja jarênh jabej. Djãm ar krãptĩ kute arênhmã? Kati. Gê ar amãnhkrut nàr ar amãnhkrut ne ikjêkêt arê. Ar jabit. Djãm me kute kabên jarênh'ã atom\* ne aben mar kêt mã? Kati. Kwãrĩk wãnh. Gê ar aben nHITEPã pÿnh ne memã arênhõ tẽ. Nhym kam gêdja me'õ me bakabên kõt amũ memã arênhkumrêx. <sup>28</sup> Nàr kon, dja me me bajtem kabên mar kêtja jarê nhym me'õ kute me bakabênkõt amũ ar amã arênh mar kêt. Kute mar kêt kam kwãrĩk wãnh me me bajtem kabên jarênh kêt. Me'õ kute me ijuk'ã ar amã arênh mar kêt kam gê me ja anhikrê. Ar aje aben pydjikam anhikrê. Gê me bixam-arkam amimãbit me kabên mar kêt jarênh Metĩndjwÿnhmã bit arê.

<sup>29</sup> Nhym kam me'õ ar kute Metĩndjwÿnh kabên jarênhmã. Djãm tu ar krãptĩ kute arênhmã? Kati. Gê ar amãnhkrut nàr kon ar amãnhkrut ne ikjêkêt ne arê. Aben nHITEPã pÿnh ne arênhõ tẽ gê kam ar bu'ã me ja ar

maro krĩ. Mrãmri Metĩndjwÿnh kabên kõt ar kabên katãtkumrêx jabej ar maro krĩ.

<sup>30</sup> Gê ar aben nHITEPã memã kabên jarênhõ tẽ. Nhym kam wãnh me'õdjwÿ nhÿ nhym Metĩndjwÿnh arým kum mÿjja 'õo amirĩt nhym kuma. Gê kumrêx kabên jarênhõ ãmja kum anhikrê. Nhym kam me'õ ÿrja kajmã djan pãnh memã kabên jarê. <sup>31</sup> Gêdja gar akunĩ aben nHITEPã apÿnh ne Metĩndjwÿnh kabên jarênhõ tẽ gê me kunĩ arým amim ar akabên ma. Ar akabên man arým amim Jeju mar mexo amũ amikamên arým kõt kĩnh.

<sup>32</sup> Metĩndjwÿnh kabên jarênh djwÿnh ne me kute amimexkumrêx. Dja gar aminên ar apÿnh ne aben nHITEPã memã akabên jarê. <sup>33</sup> Djãm ar aje akabên'ã atom ne aje aben kabên mar kêt mã? Djãm Metĩndjwÿnh kute ar amã ar akangaja jadjãrmã? Kati. Nãm kute memã me umar mexbit jadjãrmã. Nãm ã apÿnh me kute amim Jeju mar ne kõt ar aben pydjio ba djãri umar mexo ane.

<sup>34</sup> Nhym kam me niredjwÿ. Mÿj dja ga me abikprõnh djãkam nê? Djãm me nire kute memã arênhmã? Kati. Dja me anhikrên me my kabên ma. Djãm apÿnh me kute amim Jeju mar ne ar aben pydjio ba djãri me nire kute kam memã kabên 'õ jarênh? Kati. Kunĩkõt me anhikrê. Ar akam me niredjwÿ, gê me me kudjwa anhikrên me my kabên ma. Me bakukãmãre kute Metĩndjwÿnh kukràdjã'ã pi'õk no'õkkõt ne me nire kute me abikprõnh djãkam me my kabên mar ne kute kõt amijo bamã. <sup>35</sup> Ne me kute mÿjja'õ marmã, djãm me aben pydji djãkam kute me kukjêrmã? Kati. Gê me akrãnmã aminhũrkwãkam mjên kukja. Me kute amim Jeju mar aben pydjikam me nire kute kabên'õ jarênhkam ne mex kêt ne.

<sup>36</sup> Djãm ar ajõ aje akabêno ijapanhmã? Djãm ar akumrêx ne gar aje Metĩndjwÿnh kabên jarênhmo krax djwÿnh? Djãm ar gajbit ne Metĩndjwÿnh kabên ar awÿr bõx? Kati. <sup>37</sup> Godja me'õ we,

—Ibê Metĩndjwÿnh kukwakam kabên jarênh djwÿnh, ane. Nàr,

—Ije Metĩndjwÿnh Karõ mar, ane. Gê tãm wã ikumrêx iman ijã ar amã,

\* 14:27 'ã krãptĩ

—Paur kabênkumrêx. Kute gwaj bamã kabên'ã pi'ôk no'ôk ja ne mrãmri Bênjadjwÿr djwÿnh kute kum arênhkumrêx, ane. Dja ã ar amã ane gwaj kam arÿm me'ôja markumrêx. <sup>38</sup> Nâr, dja me'ô amakkre kêt prãm kwãrîk wãnh me'ô kabênja mar kêt.

<sup>39</sup> Kam, akmere ar, ar akabên djwÿnhkôt aje Metîndjwÿnh kabên jarênhja amã kînh. Nhyim be, dja ar akam me'ô kute me bajtem kabên mar kêtjakam kabên'ô jarênh prãm jabej. Kwãrîk wãnh kubê adjãptâr kêt. <sup>40</sup> Ne kam ar akabên jarênh'ã atom kêt gê mex. Nhyim be, apÿnh dja gar aben nwhitepã akabêno aku'ê. Ije Metîndjwÿnh Karôkôt ar adjãpênh'ã idjujarênhho ino rer ne ja. Tãm ne ja.

## 15

*Jeju tyk ne akubyn tîn'ã ujarênh.  
Kar 2.23, 10.39, 13.29*

<sup>1</sup> Jakam ba ajte ar amã Kritu'ã ujarênh ny jarê. Ije amrêbê ar amã 'ã ujarênh ny jarênh gar arÿm tu amim markumrêx ne 'ã adjukanga kêt. Ba ajte ar amã tãm jarê. <sup>2</sup> Ar aje amim 'ã ujarênh nyja markôt Metîndjwÿnh arÿm ar apytã. Tãm dja ba ajte kãj bê ar amã arê. Ar aje kam tu amim mar tÿx rã'ã jabej arÿm ar apytã. Nâr ar aje mar kajgo jabej.

<sup>3</sup> Metîndjwÿnh ne kute imã kabên mex jarênhja ba arÿm ar amã arê. Kritu ne arÿm gwaj bajaxwe pãnh ty. Amrêbê: Metîndjwÿnh kute me bakukãmãremã 'ã ujarênh nhyim me kute 'ã pi'ôk no'ôk kôt Kritu arÿm gwaj bajaxwe pãnh ty. <sup>4</sup> Ty nhyim me arÿm adjã. Nhyim me kute ajte 'ã pi'ôk no'ôk kôt 'ã akatin akatin akati nhyim arÿm akubyn tîn ne. <sup>5</sup> Nãm akubyn tîn nhyim kam Pedru arÿm omũ. Pedru nhidji 'ôdjwÿbê ne Xepa. Nhyim kam Jeju kute ar anorbê 12djwÿ arÿm omũ.

<sup>6</sup> Nhyim kam ajte arngro pydjikam gwaj baje meo bakamy krãpti kubê 500 ne kam ajmã ijukri 'ã akre kuteja adjwÿnhdjwÿ arÿm omũ. Me kute omũnhja krãpti ne akati jakam tîn ne ar ba rã'ã ne. Nhyim me kwÿbit arÿm ty. <sup>7</sup> Nãm me omũ nhyim kam ajte Xijagu omũ. Nhyim kam Jeju kute ar

anorja kunĩ omũ. <sup>8</sup> Kam ne ba ba me tekren arÿm omũ. Ije mrãmri ne me prîre nhô akati nhôkre djã kôt me aêrbê bixadjwÿr pyrãk. Imã Jeju kurê:o iba. Nhyim kam memã amijo amirîto ba nhyim me omũho ba. Omũho ba ba kam badjwÿ arÿm omũ. Nãm ijaêrbê imã amijo amirît ba me tokbê arÿm omũ.

<sup>9</sup> Jeju kute ar anorja djwÿ ar rûnho kute ijakrenh mex. Bajbit mekam ikajgo pyrãk. Mrãmri ne me ren kute ijã memã kum, “Jeju ne Paur jano”, anhÿr kêt. Ije me kute amim Jeju marjao ibikênhho ibakam ne me ren ijã anhÿr ar ba kêt.

<sup>10</sup> Nhyim be, kati. Metîndjwÿnh tu kum ikaprî kôt\* Jeju arÿm ijano ba arÿm 'ã idjujarênh ar iba. Djãm kum ikaprî kajgo? Kati. Ba ne ba kum idjãpênhho ar kunĩ jakrenh mex. Djãm ba ne ba apê? Kati. Metîndjwÿnh ta ne tu kum ikaprînh ikadjwÿnhbê djan ijo ba. Ijo ban ikam apê ba arÿm kum apê. <sup>11</sup> Nhyim ar wãdjwÿ kãj bê memã 'ã ujarênh ar ba. Badjwÿ ba kãj bê memã 'ã idjujarênh ar iba. Bar aktã Kritu'ã memã ajarê gar kam arÿm tu amim markumrêx.

*Medjwÿ tyk ne akubyn tîn.*

*Ruk 20.37*

<sup>12</sup> Me arÿm kãj bê Kritu akubyn tîn'ã ar amã ajarê gar arÿm aje mar. Mÿkam ne ga ate ar akwÿ ajte memã kum,

—Kati. Me tyk akubyn tîn prãm kêtumrêx, anhÿro aba? <sup>13</sup> Ne ren mrãmri me tyk akubyn tîn kêt nhyim Kritudjwÿ ren akubyn tîn kêt ne. <sup>14</sup> Ne ren mrãmri akubyn tîn kêt ba ren ar kãj bê 'ã ar amã idjujarênh ar iba kajgo. Ga ren ar gadjwÿ ren amim maro aba nhyim ren arÿm kajgo:kumrêx. <sup>15-16</sup> Ne ren mrãmri me tyk akubyn tîn kêt nhyim Kritudjwÿ ren akubyn tîn kêt ne. Ba ren ar kam me kunĩmã Metîndjwÿnh jarênh'ã ijêxnhô iban memã,

—Metîndjwÿnh arÿm akubyn Krituo tîn, anhÿro iba. <sup>17</sup> Ne ren mrãmri Kritu akubyn tîn kêt ga ren ar amim maro aba nhyim ren arÿm kajgo:kumrêx. Gar kam ren ajaxwe tûm rã'ã ne.

<sup>18</sup> Nhyim me kute Kritu mar arÿm tykdjwÿ ren akubyn tîn kêt ne ren mrãmri tu

\* **15:10** Djãm ba ne ba ijaxwe kêt nhyim pãnh kum ikaprî Kati. Ba ne ba te ijaxwe kêtã. Nhyim be, ta ne tu kum ikaprî.

biknorkumrêx. <sup>19</sup> Gwaj ren batînri amim Kritu kamnhîx ne ren kam arÿm ty. Ne ren kam akubyn gwaj batîn kêt djâ ne gwaj ren kam bakînh? Kati. Gwaj ren kam bakaprikumrêx. Ne ren bakapriô katât me kunî jakrenh mex ne.

<sup>20</sup> Nhyim be, kati. Mrâmri ne Metîndjwÿnh akubyn Krituo tînkumrêx. Kam me kute amim Kritu mar tyk kunîdjwÿ dja me Kritu kôt akubyn tîn ne. <sup>21</sup> Pykakam me'ô djô'â ne me arÿm ty. Ne kam akubyn tîndjwÿ pykakam me'ôdjwÿ djô'â akubyn tîn. <sup>22</sup> Adão kôt me ja kunî Adão djô'â ty. Nhyim Kritu kôt me ja kunî ajte Kritu djô'â akubyn tîn.

<sup>23</sup> Djâm me kumrêx akubyn tîn? Kati. Kritu arÿm tyn kam kumrêx akubyn tîn ne wabi. Dja î akubyn bôx. Akubyn bôx kambit dja akubyn ô me jao tîn.

<sup>24</sup> Nhyim kam arÿm pykakam mÿjja kunî aminhinomã amimê. Kam dja Kritu arÿm Bâmmã me kanga. Kute meo baja kunî arÿm Bâmmã me kanga. Kute kum me kanga djwÿnhrà m dja pykakam me bënjadwÿr kunîo kajgo. Me 'ityx kunîo kajgo. Nhyim kam me arÿm meo ba kêt ne arÿm rerekre. Kam dja Kritu arÿm Bâmmã ô me ja kunî kanga nhyim arÿm me kunîo ba. <sup>25</sup> Bir, ajbir jakam ne Kritu Metîndjwÿnh kabênkôt arek meo ba. Dja meo ba:n arÿm kurê djwÿnh kunîmã rerek jadjâ. Ga, me kum bënjadwÿr rûnh pymakam rerekren parbê rôrôkja pumû. Kurê djwÿnh kunîdjwÿ dja Kritu pymaje rere:kre.

<sup>26</sup> Gwaj badjwÿ. Mÿj dja gwaj bajon? Bir, dja gwaj bajo ban arÿm akubyn gwaj bajo tîn. Gwaj kam batyk kêtikumrêx. Gwaj bakurê djwÿnhbê batykjadwÿ dja kêtikumrêx. Gwaj bakurê djwÿnh ino rer ne ja. <sup>27</sup> Nà, dja Kritu kurê djwÿnh kunîmã rerek jadjâ. Amrêbê ne me me bakukâmâremã 'ã ajarên memã kum, "Arÿm ne me kunîmã rerek jadjâ nhyim me kunî arÿm umaje parbê kum rôrôk ne",

ane. Amrêbê me ã Kritu'ã ane. Me bakukâmâremã ane. Kam dja Kritu arÿm me kunîmã rerek jadjâ. Djâm kam Metîndjwÿnh ta Kritumã rerekre? Kati. Mÿjja kunî, me kunî Metîndjwÿnhmã

rerekren kam arÿm Kritumã rerekre. <sup>28</sup> Kute me kunîmã rerek jadjâr nhyim me kute o bënjadwÿr raxkam dja Kra ta arÿm Bâmmã bënjadwÿr rax jarê. Nhyim kam Bâm arÿm me kunîmã rax'ã pydji. Ta ne Kra kadjy mÿjja kunîmã rerek jadjâ.

<sup>29</sup> Ê, jadjwÿ. Me kute me tînri ngômã me angjênh kêt nhyim me arÿm tyk. Nhyim me kute me tykja mar kadjy ne me âm djâkam ngômã me tînja jangjênh ba. Ne ren mrâmri me tyk we akubyn tîn kêt nhyim ren me ngômã me angjênh kajgo. Nhyim be, kati. Mrâmri me tyk akubyn tînkumrêx.

<sup>30</sup> Badjwÿ myt kunîkôt imã me kute ibîn puma. <sup>31</sup> Akati kunîkôt imã me kute ibîn pyman mã kum idjâpênh ar iba. Ne ren me tyk akubyn tîn kêt ba ren ã idjâpênh anhÿr kêt nhyim ren me kute ibîn prãm kêt. Ba ren kam imã ibîn puma kêt. Ba ne ba Bënjadwÿr djwÿnhbê Kritu Jeju'ã ajarê gar 'ÿr amijo akêx. Kam ikînhkumrêx ne mã ar ajo amra. Ne ren me tyk akubyn tîn kêt ba ren ar amã Kritu'ã idjujarênh kêt gar ren kam amim mar kêt. Ba ren kam ã ar akam ikînho anhÿr kêt. Nhyim be, kati. Me tyk akubyn tînkumrêx.

<sup>32</sup> Krîrâxbê Epexu jakam me kute ibîn prãm. Ga, me kute rop djâkrêo kê nhyim kute me par prãmja pumû. Nã bãm memã Kritu'ã ajarê nhyim me arÿm imã àkrê:n ibîn prãm. Ne ren me tyk akubyn tîn kêt ba ren ba akubyn itîn kêt ne ren ajmã nê. Ren me Epexukam ibî ba ren akubyn itîn kêt ne ren ajmã nê. Nhyim be, kati. Dja me ibîn ba akubyn itînkumrêx. Nhyim be, amrêbê ne me arîk abenmã kum,

"Dja akatibê gwaj batyk ne babiknor jabej. Gwaj kam on batînri amijo kînhbit. Gwaj banhô kwÿ krên bakôm rax ne bakînh kati", anhÿro ba.

Ne ren gwaj batyk ne akubyn batîn kêt ba ren mekôt ã ikabêno ane. Nhyim be, kati. Me tyk akubyn tînkumrêx. <sup>33</sup> Kwârîk wãnh gê me ar amã 'êx ne ar anoo biknor kêt. Amrêbê me memã kum,

—Dja me mexja me axweo ôbikwan kôt ar ban î arÿm me axweo axwe, ane. Kôt ne me kute arênhja. Kam kwârîk wãnh gê me ar anoo biknor kêt. Ga ren ar amim me kabên man ren arÿm me kôt ajaxwe. <sup>34</sup> Wâkam me kwÿ kute Metîndjwÿnh mar kêt. Gora

ar amiman amijãno djan ajaxwe kêt. Ar apijãmmã ne ba ar amã ja jarẽ.

*Akubyn me tĩnkam mỳj dja me ĩkam kute?  
A Kô 5.1; Pir 3.21*

<sup>35</sup> Godja ar ajõ ikukij ne imã,

—Arỳm gwaj batykkam mỳj dja gwaj akubyn batĩn on? Mỳj godja gwaj banhĩkam kute? ane.

<sup>36</sup> Ajbã. Purkam aje mỳjja 'y kreo amõrkam ne gar aje mỳjja 'y jangjẽho kute me tyk jangjẽnh pyrãk. Gar ren aje 'y jadjãr kêt nhym ren ingrõt ne abatãnh kêt. Gwaj badjwỳ ren batyk kêt gwaj ren akubyn batĩn kêt. <sup>37</sup> Gar bãygogo 'y nãr atemã 'y 'õdjwỳ kre nhym kam ingrõt ne kam bàri abatãnh ne. Djãm bàri jabatãnh pro ne ga kre? Kati. 'Ybit. Djãm bàri jabatãnh kute 'y pyrãk? Kati. Atemã. <sup>38</sup> Apỳnh mỳjja djãri ne Metĩndjwỳnh kute 'y kadjy bàri nhipêx. Kute amim 'ã karõ kôt kute ipêx. Pi'y kadjy ne kute pi'y bàri nhipêx. Katẽbãri 'y kadjy ne kute katẽbãri bàri nhipêx. Apỳnh mỳjja djãri ne kute 'y kadjy bàri nhipêx.

<sup>39</sup> Djãm axikõt ne mỳjja nhĩ? Kati. Apỳnh me banhĩmẽ mry nhĩmẽ àk nhĩmẽ tep nhĩmẽ. Apỳnh mỳjja nhĩ. <sup>40</sup> Me apỳnh kàjkwakam mỳjja pumũn kam kum kĩnh. Myt pumũ, mytyrwỳ pumũ, kanhêtire pumũn kam kum kĩnh. Apỳnh me kum mỳjja kĩnh djãri ne me omũn kum kĩnh. Ne apỳnh pykakam mỳjja pumũn kam kum kĩnh. Mry pumũn, tep pumũn, bã pumũn kam kum kĩnh. Apỳnh me kum mỳjja kĩnh djãri ne me omũn kum kĩnh. Kàjkwakam mỳjjamẽ pykakam mỳjja ne me apỳnh kum mỳjja kĩnh djãri. <sup>41</sup> Me kute myt pumũnhkam kum kĩnhkumrêx. Ne kute mytyrwỳ pumũnhkam kum kĩnhkumrêx. Ne kute kanhêtire pumũnhkam kum kĩnhkumrêx. Apỳnh kanhêtire djãri ne me omũn kum kĩnhkumrêx.

<sup>42</sup> Me tyk akubyn tĩnkamdjwỳ. Me tyk jangjẽnhja myt tãmkam punu. Nhym be, akubyn me tĩnkam arỳm punu prãm kêtumrêx. <sup>43</sup> Me kute me angjẽnhkam me kum me kĩnh kêt. Nhym be, akubyn me tĩnkam me arỳm kum me kĩnhkumrêx. Me kute me angjẽnhkam tỳx kêt. Nhym be, akubyn tĩnkam me arỳm 'itỳxkumrêx.

<sup>44</sup> Pykakam me ĩ. Kàjkwakam atemã me

ĩ. Pykakam me ne me ĩ jangij. Nhym be, akubyn me tĩnkam ne me atemã ĩ. Me kàjkwakam me ĩjao ĩ.

Pykakam me ĩ nhym kàjkwakamdjwỳ atemã me ĩ. <sup>45</sup> Ikabẽnja kôt ne me amrêbê: memã kum,

“Me banhingêt Adão kumrêx ne Metĩndjwỳnh ipêx ne akôn o tĩn nhym arỳm tĩn ne.”

Nãm me amrêbê ã me bakukãmãremã ane. Nhym be, Adão kôt Adão 'õdjwỳ ne kubê Jeju. Ne kute mỳjja kunĩ tĩno ba.

<sup>46</sup> Metĩndjwỳnh kute pykakam me ipêxkam djãm kàjkwakam me ĩo ne me ĩ? Kati. Pykakam me ĩ jao ne me ĩ. <sup>47</sup> Adãoja kumrêx ne Metĩndjwỳnh pykao kum ĩ. Nhym be, Jeju, Adão 'õdjwỳja ne kàjkwakam me ĩo ĩ. <sup>48</sup> Adão nhĩja kumrêxo pykabê me bakunĩ nhĩ. Kàjkwakam Adão 'õdjwỳ nhĩo ne kàjkwakam me ja kunĩ nhĩ. <sup>49</sup> Nhym be, arỳm gwaj batyk ne akubyn batĩn ne badjãbirkam mỳj dja gwaj banhĩkam kute? Djãm Adão nhĩo gwaj banhĩmã? Kati. Dja gwaj atemã banhĩ kute kàjkwakam Jeju nhĩ pyrãk.

*Dja meo kukrà kêt ne meo ny.*

*Tex k 4.16*

<sup>50</sup> Djãm me banhĩ, me bakamrõ jao dja Metĩndjwỳnh kàjkwakam me bajo ba? Kati. Me banhĩ ja rã'ã, Metĩndjwỳnh kute me bajo ba prãm kêt. Me banhĩ punu prãmkam. Nhym be, kàjkwakam mỳjja punu prãm kêt.

<sup>51</sup> Ba ar amã mỳjja bipdjur tũm jarẽ gar ama. Djãm gwaj bakunĩ dja gwaj ty? Kati. Gwaj bakwỳ dja gwaj batyk kêt. Nhym be, gwaj bakunĩmã dja Metĩndjwỳnh atemã gwaj banhĩ nhipêx. <sup>52</sup> Dja gwaj banhipêxo kukrà kêtõ kute gwaj bano bikraro kukrà kêtja pyrãk. Dja me kunĩ, mỳjja kunĩ aminhinomã amimẽ nhym kadjy mrãnh djwỳnh arỳm õ'i kakõ. Nhym kam Metĩndjwỳnh akubyn me tyko tĩn ne. Dja me ĩ punu prãm kêtõ akubyn meo tĩn ne. Ne kam arỳm gwaj badjwỳ atemã gwaj banhĩ nhipêx.

<sup>53</sup> Gwaj banhĩ tũmja ne punu prãm nhym be me ĩ punu prãm kêtõ dja gwaj banhĩ ny. Jakam gwaj batyk prãm nhym be dja gwaj ĩ batyk prãm kêt ne batĩn rã'ã: rã'ã ne. <sup>54</sup> Dja gwaj banhĩ punu prãm kêt ne batyk prãm kêt ne Metĩndjwỳnh kôt batĩn ne ar baba rã'ã: rã'ã ne. Nhym kam me kute amrêbê:



mÿjja jarênhja dja katorkumrêx. Amrêbê:  
ne me memã kum,

“Arÿm me tyk kêt. Arÿm akubyn meo tîn  
nhym me arÿm tyk kêt kumrêx. Ne tu  
tîn râ'ã: râ'ã ne.”

Nãm me amrêbê ã me bakukãmãremã ane  
nhym me arÿm 'ã pi'òk no'òk ne. <sup>55</sup> Nhy  
kam me ajte memã kum,

“Ga, mÿjja kakrit kute me kamjÿr nhym me  
arÿm tykja pumũ.

Dja Bênjadjwÿr djwÿnh me batykjao apêx  
kute mrãmri ne me kute mÿjja kakrit  
perey jakâr nhym kute arÿm me  
kamjÿr kêt pyrãk.

Bênjadjwÿr djwÿnh dja akubyn me tyko  
tîn. Nhy kam nhÿnhjakam me ajte  
tykmã? Kati. Arÿm me tyk kadjy  
kêt kumrêx.

Ga, me tÿx kute me pa 'amÿnh ne kute meo  
baja pumũ. Nhy me te kator ne te  
ta ar ba prãmje.

Me kunÿdjwÿ ne me aben djô'ã tyn te tîn ne  
ar ba râ'ã prãmje.

Nhy be, Bênjadjwÿr djwÿnh dja akubyn  
me tyko tîn. Nhy kam nhÿnhjakam  
me ajte tykmã? Arkati. Arÿm me tyk  
kêt kumrêx.”

Nãm me amrêbê ã me bakukãmãremã ane  
nhym me arÿm 'ã pi'òk no'òk ne. Nhy  
kam me aben djô'ã arê:n arêho môr tãmtã.  
Me bakamingrãnyre dja gu me ajte arêho  
bamôr tãmtã: arÿm 'ÿr o bôx. Mrãmri me  
batyk kêt kumrêx 'ÿr o babôxkumrêx.

<sup>56</sup> Mÿjja kakrit kute me kamjÿrkôt ne me  
ty. Me axwekôtdjwÿ ne me tyn arÿm me  
biknor tokry djãkam akuno. Ne kam mÿj  
ne me kute amijaxwe mar on? Bir, me  
memã Môjdjê kukràdjã jarê nhym me arÿm  
amijã kuman amijaxwe ma. Ne kam arÿm  
te axwe kêt prãmje. Te: axwe kêt prãmje ar  
ba:n arÿm axwe pãnh tyn kam me biknor  
tokry djãkam akuno.

<sup>57</sup> Nhy be, Metÿndjwÿnh ne ukaprikumrêx  
ne arÿm Bênjadjwÿr djwÿnhbê Jeju Kri  
jano. Nhy kam arÿm gwaj bajaxwe  
pãnh tyn akubyn tîn. Dja gwaj kôt te  
tyn akubyn batîn. Akubyn batîn ne ajte  
batyk kadjy kêt kumrêx, bajaxwe kadjy  
kêt kumrêx. <sup>58</sup> Kam, akmere, àpnhÿre, dja  
gar arek Bênjadjwÿr djwÿnhkôt adjãm tÿx  
ne tu amim mar tÿxkumrêx. Kwãrÿk wãnh

'ã adjukanga kêt. Mÿjja 'òkôt 'ã adjukanga  
kêt. Kum adjapênh kumex râ'ã. Bênjadjwÿr  
djwÿnhkôt adjapênhja kajgo kêt kumrêx.

## 16

*Metÿndjwÿnh nhô me ja kadjy pi'òk kaprÿã  
kute memã karô ne ja.*

*Kar 11.29; Rô 15.25; A Kô 8.1; Xim k 6.18*

<sup>1</sup> Jakam Metÿndjwÿnh nhô me ja kadjy  
pi'òk kaprÿã ije ar amã karômã. Dja gar  
Jeju nhô me jamã pi'òk kaprÿ jano. Ije  
krÿrãx bê Garaxakam me kute amim Jeju  
marjamã arênh kôt dja gar memã pi'òk  
kaprÿ jano.

<sup>2</sup> Pi'òk kamrêk kunÿkôt dja gar akuñi me  
kadjy anhô pi'òk kaprÿ kwÿ jadjuw. Apÿnh  
ar anhô pi'òk kaprÿja nhidji kôt dja gar me  
kadjy kwÿ jadjuw. Ar anhô pi'òk kaprÿ rax  
jabej ar anhô rax kwÿ tan me kadjy adjuw.  
Nàr ar anhô ngrire jabej ngrire kwÿ tan me  
kadjy adjuw. Adjuw ne o atom. Dja ba  
bôx nhym arÿm o atom pro. O atom pro ba  
kubyn kam 'ã idjà'wÿr ar iba kêt.

<sup>3</sup> Dja ba bôx gar amim amikam me'ô  
aro amiptàn imã ar arê. Ba kam ar'ã  
pi'òk no'òk ne arkum kungãn arÿm krÿrãx bê  
Djeruxarê'ÿr ar ano. Gê ar pi'òko tèn anhô  
pi'òk kaprÿo tẽ. Ne Djeruxarê'ÿr o tèn o bôx  
ne memã kungã gê me omũ. Ne kam arÿm  
ar mar katàt. <sup>4</sup> Nàr kon, gar me'ÿr ijanor  
prãm jabej ba dja ba me'ÿr aro tèn aro bôx.  
Dja gar ã pi'òk kaprÿo ane. Tãm ne ja.

<sup>5</sup> Jakam dja ba ar awÿr itêm'ã ajarê. Wãm  
ar awÿr gêdja ba ï tèn ar apumũ. Gêdja ba  
pykabê Mateni kumrêxkam tẽ:n kam ajte  
amũ ar awÿr tèn bôx. <sup>6</sup> Ne kam ar akam  
arek idjãm jabej ar akam ijã na apêx jabej.  
Gar kam amũ itêm kadjy ikôt o kangôn  
ijano. Ba kam o ajte amũ itêm kadjy 'itÿx  
ne. <sup>7</sup> Djãm jakam dja ba ar awÿr tèn bôx?  
Kati. Ne ba ren jakam ar awÿr tèn ren  
ar akam idjãm 'iry kêt ne ren ajte amũ  
tẽ. Arek ar akam idjãm 'iry kadjy ne ba  
amima. Metÿndjwÿnh kute amim ijã karô  
kôt ikabênkumrêx jabej dja ba arÿm ã ar  
akam ane.

<sup>8-9</sup> Nhy be, krÿrãx bê Epexujakam ne ba  
idjapênh mexkumrêx. Me kum idjujarênh  
kÿnh. Nãm me kute mrãmri ne me kute  
memã 'ã ijê djã'ã 'ÿr ne memã, “Ajrã amrê

wadjà”, anhÿr pyræk ne me kum idjujarênh kî:nh. Ba memã Kritu'ã ajarê nhym me ma:ro kumex. Nhym me kwÿ krãptîdjwÿ kute ikapêrkâr ne ibê àptâr prãm kumrêx. Gêdja ba kam arek jakam ar iba. Ar iba: nhym me bikprôn h djà nhõ akatibê Pêxiko ijã apêx ba kam arÿm wãm itêmmã.

<sup>10</sup> Nhym godja Ximoxi ar akam bôx jabej dja gar kam kum akabên mexbit jarê. Abenmã ikabên ja jarê gê ar akam bôx gar amã abê. Ne kam kum akabên mexo akabên gê umar mex. Mÿkam dja gar ã kum ane? Bir, nãm ikudjwa mã Bênjadjwÿr djwÿnhmã àpênh ba. Kam dja gar ã kum ane. <sup>11</sup> Kwârîk wãnh ar ajõ amã kurê kêt. Ne amrê ajte tèm kadjy dja gar kôt o kangõ gê tÿx ne umar mex ne amrê tẽ. Nã bãm amiwÿr kam amak ar o iba. Gwaj baje aro bakamy Ximoxikôt mõrjadwÿr ne ba amiwÿr arkam amak ar o iba.

<sup>12</sup> Apôrdjwÿr ne ba o ikamy. Nã bãm te ar awÿr tèm mã kum ikabên mex jarê nhym mã imã,

—Kati. Jakam me'ÿr itèm prãm kêt, ane. Ta dja 'õkam arÿm ar awÿr tẽ.

<sup>13</sup> Ar ajaxwebê amijã ano tÿx. Kritukôt adjãm tÿx ne tu amim mar tÿxo aba. Me kum Metîndjwÿnh kînh kêtja dja gar amã me uma kêt ne atÿx. <sup>14</sup> Amã me abêbit. Amrãnh kunîkôt amã me kunî jabê.

<sup>15</sup> Nhym kam Exepa nhõ kikrekam ar ja ne ar amrêbê Metîndjwÿnh'ÿr amijo akêx. Pykabê Akajakam ar kumrêx 'ÿr amijo akêx. Ja ne gar arÿm aje mar. Nãm ar mã Jeju nhõ me ja kôt o kangõnh ar o ba. Arkum me kôt o kangõnh kînhkumrêx. <sup>16</sup> Dja gar ar kabên ma. Ne me kute ar kudjwa Metîndjwÿnhmã àpênh tÿx ar o bajadjwÿr kabên ma. <sup>17</sup> Exepamê Potunamê Akaku ar arÿm amrê iwÿr bôx ba arÿm ikînhkumrêx. Gar amrê iwÿr abôx kêt ne ikôt o kangõnh kêt. Nhym kam ar arÿm iwÿr bôx ne ikôt o kangõ. <sup>18</sup> Ba kam arÿm ikînhkumrêx ne. Wãkam ar gadjwÿr amybÿm dja gar arÿm aman idjô'ã akînhkumrêx. Dja ar wãm tèn bôx gar ar aman abenmã ar mex jarê.

*Kute apÿnh õbikwa djàri kum amikabên mex janor.*

<sup>19</sup> Pykabê Adjijjakam apÿnh me kute amim Jeju mar ne ar aben pydjio ba djàri ne me ar amã kabên mex jarê. Ba me kuman arÿm pi'õk jakam wãm ar amã arê. Akwiremê PRIXIRA ar amã kabên mex jarê. Arkum ar ajabê ne ar amã amijarê. Ar ùrkwãkam me kute amim Jeju mar ne ar aben pydjio bajadjwÿr ne me ar amã kabên mex jarê. Ba me kuman arÿm pi'õk jakam wãm ar amã arê. <sup>20</sup> Jakam gwaj bakamy kunî ar amã kabên mex jarê ba kuman arÿm wãm ar amã arê. Dja gar abenwÿr abôxkam abeno arôrök ne aben pa krij.

<sup>21</sup> Ba ibê Paur ne ba inhikrao ar amã ikabên mex ja'ã pi'õk no'õk ne.

<sup>22</sup> Godja ar akam me'õ kum Bênjadjwÿr djwÿnh jabê kêt jabej Metîndjwÿnh dja o ajkê nhym arÿm me biknor tokry djâkam akuno. Gêdja Bênjadjwÿr djwÿnh bôxkumrêx. <sup>23</sup> Gê Bênjadjwÿrbê Jeju tu kum ar akaprî.\*

<sup>24</sup> Ota, jakam ba imã ar ajabêkumrêx. Kritu Jeju kum ar ajabê. Ba kôt imã ar akunî jabêkumrêx. Tãm ne ja.

\* **16:23** Djãm ar ga ne gar adjukaprî nhym pãnh arÿm kum ar akaprî Kati. Ta ne tu kum ar akaprîkumrêx.

## Paur kute Kôritukam me jamã atãri pi'ôk no'ôk ne ja.

Paur ajte krĩraxbê Kôritukam me jamã pi'ôk no'ôk ne. Paur kum me abê nhym be me ja ne me Paur japrÿn 'ã abenmã kum,

—Kati, Metĩndjwÿnh kute Paur janor kêt. Ta ne arĩk ar ba, ane. Kam ne Paur kaprĩ rax ne ajte memã pi'ôk no'ôk ne memã kum,

—E kum be mrãmri ne Metĩndjwÿnh tu amim idjarkumrêx ne apÿnh pyka kunĩkôt me ja'ÿr ijano, ane. Ne kam prĩne memã amijã ajarê. Amitokry djã kunĩkôt memã arê. Be, Metĩndjwÿnh ne tokry japôkmã, umar punu japôkmã tu o tÿx ne nêje mÿjja punuo ajngrã. Xatanaj ne memã mÿjja punu ngã nhym be Metĩndjwÿnh ne raxo Xatanaj jakre ne tu me nêje mÿjja punuo bingrãnho ba. Nãm ã Metĩndjwÿnh umao kute nêje mÿjja punuo bingrãnho bao ane nhym Paur memã amijarên kam ajte memã apÿnh mÿjja'ã karõ.

<sup>1</sup> Ba ibê Paur. Kritu Jeju ne ijano ba memã 'ã idjujarênh ar iba. Metĩndjwÿnh kabênkôt ne ijano ba 'ã idjujarênh ar iba. Ximoxidjwÿ ne ikôt dja. Gwaj baje Ximoxio bakamy. Ba ne ba pi'ôk no'ôkkam ar amã ikabên jarê. Krĩraxbê Kôritukam ar aje amim Jeju mar ne kôt ar aben pydjio abaja ne ba ar amã ikabên. Bu'ã pykabê Akaja kunĩkôtdjwÿ Metĩndjwÿnh kute ar ajo õ me ja ba ar amã ikabên. <sup>2</sup> Metĩndjwÿnhbê ne me Babãm. Ne Bênjadjwÿr djwÿnhbê ne Jeju Kritu. Gê ar tu kum ar akaprĩn\* ar ajo ba gar adjumar mex rã'ã ne.

*Apÿnh me kaprĩ djãri nhym Metĩndjwÿnh akubyn meo kĩnh.*

*Kor 1.11; A Tex 2.16*

<sup>3</sup> Metĩndjwÿnhbê Jeju Kritu Bãm. Kubê gwaj banhõ Bênjadjwÿr djwÿnhbê Jeju Kritu Bãm. Ba kum mextire jarê. Mÿkam ne ba kum mextire jarê? Bir, me Babãm djwÿnh ne ukaprĩkumrêx. Ga, me kaprĩ nhym Metĩndjwÿnh kute me kunĩmã kĩnh

jangjênhja pumũ. <sup>4</sup> Ar ba ne bar apÿnh ar ikaprĩ djãri kuma. Bar amikanê man me Jeju'ã kum ar ikurê man apÿnh ikaprĩ ja ma nhym Metĩndjwÿnh arÿm kunĩkôt akubyn ar ijo kĩnh. Mÿj kadjy ne ã ar ijo kĩnho ane? Bir, dja me'ôdjwÿ kaprĩ jabej bar amikudjwa akubyn o kĩnh nhym arÿm ar ikudjwa kĩnh. Metĩndjwÿnh ta kute ar ijo kĩnh o dja bar ajte me'õo kĩnh. Ja kadjy ne ã ar ijo kĩnho ane.

<sup>5</sup> Amrêbê Kritu tokry: bar kôt arÿm itokry kumex ma. Memã 'ã idjujarênhkôt itokry ma nhym Kritu arÿm mã ar ijo kĩnh bar ikĩnhkumrêx. <sup>6</sup> Mÿj kadjy ne bar itokry? Bir, dja bar itokry gar arÿm amim Metĩndjwÿnh ma nhym arÿm ar apytã. Gar kam akubyn akĩnh. Te atokryn akubyn akĩnh ne. Nãr, godja bar akubyn ikĩnh jabej. Mÿj kadjy dja bar akubyn ikĩnh? Bir, ar gadjwÿ dja gar kam akubyn akĩnh ne arÿm atokrykam atÿx. Ne kam aje amim Jeju mar'ã adjukanga kêt. Godja gar atokry kute ar itokry pyrãk jabej ne kam arÿm ar ima. Ne kam ar ikudjwa atokrykam atÿx ne aje amim Jeju mar'ã adjukanga kêt. Ja kadjy dja bar akubyn ikĩnh. <sup>7</sup> Itokryn mã: ikĩnh. Ne kam ar ajã amim,

—Godja ar ikudjwa tokry jabej ne kam ikudjwa ã kĩnho ane. Bar amim anen kam tu amim ar akĩnh kamnhĩxkumrêx.

<sup>8</sup> Akmere, àpnhĩre ar, bar ar amã pykabê Adjijkam itokry jarê gar ama. Ar itokry kume:x. Bar te: ikatormã te: amijo anen kam arÿm amikukãm itykbitkam ama. <sup>9</sup> Mrãmri ne bar mã amim,

—Dja me ibĩ. Dja me ibĩ, anhÿr ar ibakumrêx. Mÿj ne bar kam kuma? Bir, dja me ar ikangrõnho ba, bar arÿm amikanãrrãm ar iba kêt ne arÿm tu amim Metĩndjwÿnhbit kamnhĩxkumrêx. Ta kute akubyn me tyko tĩn djwÿnh dja bar tu amim kamnhĩx tÿxkumrêx. <sup>10</sup> Ta ne kute ar ityk jabê ar ipytãr. Ar ityk pymatijabê ar ipytãr ne kute kubê ar ipytãr rã'ã. Ba tu amim kamnhĩxkumrêx ne amim,

—Mrãmri dja kubê ar ipytãr rã'ã ne, ane. <sup>11</sup> Ar gadjwÿ dja gar ar ikôt o kangõn Metĩndjwÿnhmã ar ijo a'wÿ. O dja gar ar ikôt o kangõ. Ar ikadjy Metĩndjwÿnh 'wÿr ar o

\* 1:2 Djãm ar ga ne gar adjukaprĩ nhym ar pãnh arÿm kum ar akaprĩ Kati. Ar ta ne ar tu kum ar akaprĩkumrêx.

aban o ar ikôt o kangô. Nhym kam arým ar akabên man ar akabênkôt kum ar ikaprîn ar ipytà. Gar kam akînho akumex ne ar ikôt Metîndjwýnhmã amikîn jarê.

*Paur kute memã 'êx kêt'ã amijarênh.*

<sup>12</sup> Wãkam me kwý ar ijã memã kum, “Paur ar 'êxnhĩkumrêx”, ane. Djãm mrãmri me kabênkumrêx? Kati. Bar akubyn amijo tèn amrêbê ar akam ar ibaja'ýr amijo bôx ne amiman amim,

—Kati. Nãm me ijã 'êx. Nhym bê ne ba mekam ijêxnhĩ ar iba. Kati. Ba ne ba Metîndjwýnh mexo imex ne mekam ar iba. Metîndjwýnh kôt ijêxnhĩ kêtumrêx ne mekam ar iba. Ibu'ã me kum Metîndjwýnh kîn kêtja ba memã ijêx kêt. Nãr, me kute amim Jeju marmã ijêx kêtumrêx ne mekam ar iba. Nã bãm ã amimaro anen arým amikôt ar amã amijarê. Djãm me kute amidjwýnhbito kînha we krã mex kôt ne bar ikrã mex ne ar akam ar iba? Kati. Ba ne ba ikrã mex kêt. Nhym be, Metîndjwýnh ta ne tu kum ikaprĩ ba arým ikrã mex ne ar akam ar iba. Ba ar amã amikôt amijarênh amikam ikînkhkumrêx. Amikam ikaprĩre kêt.

<sup>13</sup> Ije ar amã pi'ók no'òkkam ikabên jarêndjwý. Djãm ikabên krãptĩ? Kati. Ba ikabên pýnh ne arên 'ã pi'ók no'ók gar arým omũn ama. Ba kam ar ajã amim,

—Dja me ï imar pydji. Ne imar pydji rã'ã ne. <sup>14</sup> Be, kraxje me kute prĩne imar mex kêt rã'ã. Godja me ï imar pydji. Nã bãm ã ar ajã amim ane. Dja gar ï iman ikam akînkhkumrêx kute mrãmri ne ije ar akam ikîn pyrãk. Dja Bênjadjwýr djwýnh akubyn bôx ba ar akam ikînkhkumrêx. Nã bãm ã ar amaro ane.

<sup>15</sup> Ar ije ã ar amaro anhýrkam ne ba bit tẽmbê ar awýr itẽm ne ibôx ne ije ar amã arênh gar aje amim Jeju mar mexo amũ amikamênhmã. Kam ne ba bit ajte akubyn ar akam ibôx ne ije ajte ar amã arênh gar ajte o amũ amikamênhmã. <sup>16</sup> Ba ar ajã amim,

—Dja ba me kumrêx 'ýr bôx. Krĩraxbê Kôritukam me'ýr bôx ne mekam ar iban amũ pykabê Mateni'ýr tẽ. Ne kam Mateni kurũm akubyn tèn ajte mekam bôx. Nhym kam ajte amũ pykabê Djudeja'ýr itẽm kadji godja me ikôt o kangô ba arým 'itýx ne

tẽ. Nã bãm ã ar ajã amim ane. Nhym be, kati. Ar akam ibôx kêt. <sup>17</sup> Djã nã bãm bit ar akam ibôxmã ne arík ikabên dji? Kati. Djã nã bãm me kum Metîndjwýnh kîn kêtja kudjwa ikabên amãnhkrut ne ar amã,

—Nã. Dja ba ar awýr bôx, anen atekam ajte amim,

—Kati. Dja ba ar'ýr ibôx kêt, ane? Kati. Ikabên amãnhkrut kêt.

<sup>18</sup> Metîndjwýnh kute kabên pýnh ne arênh ba ije kudjwa ikabên pýnh ne arênh. <sup>19</sup> Bamê Xibanumê Ximoximê ne bar kãj bê ar amã,

—Metîndjwýnh Krabê Jeju Kritu dja gar tu amim markumrêx nhym arým ar apytà, ane. Djã ne bar atekam ajte ar amã, “Kati. Dja ar apytàr kêt”, ane? Kati. Dja gar tu amim markumrêx nhym mrãmri arým ar apytàrkumrêx. <sup>20</sup> Metîndjwýnh ne gwaj bamã,

—Dja ba ï ar amã apýnh mýjja mex ngã. Ar aje tu amim Kritu markam dja ba ï ar amã kungã. Dja gar ikôt atĩn ne ar aba rã'ã: rã'ã ne. Mýjja kumex dja ba ar amã kungã. Nãm ã gwaj bamã anen kam kabên pýnh ne arê. Kabên pýnh ne arê gwaj arým mar pýnh ne abenmã kum,

—Mrãmri ne arênhkumrêx, ane. Gwaj ã abenmã ane nhym Metîndjwýnh arým gwaj bakam kînkhkumrêx.

<sup>21</sup> Kritu ne kute gwaj bamã týx jangjênh. Ar bamê ar gamê kute gwaj bamã týx jangjênh gwaj tu amim mar týxkumrêx ne 'ã badjukanga kêtumrêx. Nãm gwaj bamã Karô jano nhym arým ar gwaj bajo ba.

<sup>22</sup> Ga, me kute mýjja 'ã aminhidji nhôr nhym arým amirĩtkumrêxja pumũ. Gwaj badjwý arým ne gwaj bamã Karô jano nhym arým gwaj bakam nhýn gwaj bajo ba. Gwaj kam arým amikam Karô man amim,

—Mrãmri ne Metîndjwýnh arým ijo krakumrêx. Ga, arým kute imã Karô janor nhym kute ijo bakumrêxja pumũ, ane.

Gwaj amim anen arým kuma. Arým Metîndjwýnh gwaj bajo kra. Ja ne gwaj kuma. Karô kute gwaj bajo bakôt ne gwaj kuma. Ga, me kute memã mýjja rũnh nhôrmãnh kute kukãm memã kryre nhôrja pumũ. Nhym me amim kryre jamýn arým amiwýr rũnh kamnhĩxkumrêx. Gwaj badjwý Metîndjwýnh arým gwaj bamã Karô

jano nhym arým gwaj bajo ba. Gwaj kam arým amim,

—Ga, Metīndjwýnh arým kute imā Karō janorja pumū. Ga, kute ijo baja pumū. Mrāmri dja ba kàjkwakam kôt itīn ne ar iba rā'ā: rā'ā ne, ane. Karō gwaj bajo ba gwaj kam amim anen kam arým baje mrāmri ja markumrēx. Mrāmri kàjkwakam Metīndjwýnhkôt batīn rā'ā: rā'āja markumrēx ne amiwýr kamnhīxkumrēx.

<sup>23</sup> Amrēbē ne ba pi'ôkkam ar amā me'ō jaxwe jarē. Me'ō jaxwe: ar akam ar ba gar ate akrā nhym arek ar akam axweo ba rā'ā. Ba ren on ar awýr bōx ne ren arým 'ā ar amā ikabēn ne ren ar amā kaprī jadjà. Ije ar amā akaprī jadjà karō ne ba on ajte Kōritukam ar awýr ibōx kêt. Mrāmri ne ba ar amā amijarēnhkumrēx. Metīndjwýnh ne kute imar. Nok ba ren ar amā ijēx nhym ren ajmā ijon. Mrāmri ne ba ar amā amikôt amijarēnhkumrēx.

<sup>24</sup> Ar aje amim Bēnjadjwýr djwýnh Jeju marmā ne bar ar awýr ibōxmā. Djām ar ije ar akam amijo ibēnjadjwýr ne ibamā? Kati. Ar ba ne bar ije ar amā kàjmā akīnh kamēnhmā. Kritu pydjibit ar aje tu amim markumrēxmā. Tām dja ar ajaxwebē ar amā tỳx jadjà gar mā kôt ar amijo aban 'ā adjukanga kêt.

## 2

<sup>1</sup> Ar akaprī karō ne ba amim,

—On me'ýr itēm prām kêt. Nok ba ren me'ýr bōx ne ren memā kaprī jadjàr mex ne, ane. <sup>2</sup> Nā bām ren ar amā kaprī jadjàr mex nhym mýj me'ōja ren ijo kīnh? Gar ren akaprīkam te aje ijo kīnhmā.

<sup>3</sup> Kam ne ba amrēbē amikukām ar amā pi'ôk no'ôkkam ikabēn jarē. Ar aje ikutēp abeno mexmā ne ba ar amā arē. Ba ar awýr itēm ne ibōx ne ije ar apumūnh ne idjumar punu kêt kadjy ne ba ar amā arē. Ar aje ijo kīnhmā ne ba bit tēmbē ar awýr itēm ne ar awýr ibōxmā nhym ren ate ar akwý imā idjumar punu jadjà. Ar akwýkam idjumar punu karō ne ba amrēbē amikukām ar amā pi'ôk no'ôk ne. Nā bām ar amexkam amakbē amim ar akunī kamnhīx ne. Ba ar awýr bōx gar iro'ā akīnh kadjy ba tu amim ar amex kamnhīxkumrēx ne. <sup>4</sup> Nā bām ar akam idjumar punu rax ne ikadjwýnhbē

itokry kumex man mu:w. Djām ije ar amā ar akaprī jadjàr kadjy ne ba ar amā pi'ôk no'ôk? Kati. Ar aje imar kadjy. Imā ar ajabē:ē. Ar aje imar kadjy ne ba ā amrēbē amikukām ar amā pi'ôkkam ane.

*Me kute me'ō axwe maro biknor'ā kute memā karō.*

*Ruk 17.3; Gar 6.1; Ep 4.32*

<sup>5</sup> Ije amrēbē pi'ôkkam ar amā me'ō jaxwe: jarēnhja djām bajbit ne imā ikaprī jadjà? Kati. Ar gadjwý ne ar akunīmā kaprī jadjà. Ba ar amā iprīren ar amā me'ō jaxwe jarē.

<sup>6</sup> Aje, kwārīk wānh ajte ijukri me'ōjamā kaprī jadjàr kêt. Mrāmri amrēbē me'ōja axwen kam arým kaprīre. Ar akrāptī arým axwe pānh kum kaprī jadjà. Jao dja gar krāta. Kwārīk wānh ajte kum kaprī jadjàr kêt.

<sup>7</sup> Jakam dja gar on me'ōja jaxweo aknon ajte mar kêt. Ne kam tu o kīnh gē akubyn tỳx ne. Gar ren kum kaprī jadjàr rā'ā nhym ren kaprībē te amijo anen arým rerek mex ne. <sup>8</sup> Dja gar ajte kum,

—Mrāmri ar imā ajabēkumrēx, ane. Dja gar kum ane gē on kaprī kêt.

<sup>9</sup> Be, ije amrēbē ar amā ikabēn'ā pi'ôk no'ôkja ije ar amar kadjy ne ba 'ā pi'ôk no'ôk. Ije 'ā pi'ôk no'ôk kadjy ba amikabēn man amim,

—Ba arkum ikabēn mex jarē gē ar iman goja ikabēn kôt amijo ba jabej, ane. Ar aje ikabēn kunī mar ne kôt amijo aba jabej ne ba ar amā pi'ôk no'ôk. <sup>10</sup> Godja gar me'ō axwe'ōo abiknor jabej ba badjwý arým axweo aknon mar kêt ne. Mrāmri me'ōja axwekumrēx jabej ba arým axweo akno, ar adjumar mex kadjy arým o akno. Kritu kukwakam ba arým axweo aknon arým mar kêt ne. <sup>11</sup> Djām ije axwe mar rā'ā? Kati. Arým ba o aknon mar kêt. Ba ren axwe mar rā'ā nhym ren Xatanaj arým gwaj banoo akno. Nām me noo biknoro ba. Ja ne gwaj baje prīne mar.

<sup>12</sup> Be, ba amrēbē krīraxbē Krôwadji'ýr tēn 'ýr bōx. Ije kàj bē memā Kritu'ā ujarēnh ny jarēnh kadjy ba Krôwadji'ýr tēn 'ýr bōx. Ne kam memā Kritu jarē nhym kam me kum kīnh ne ma:ro kumex. Nām me kute mrāmri ne me kute memā kikre'ā ijē djā'ā rēnh ne memā, “Ajrā amrē wadjà”, anhyr

pyràk. <sup>13</sup> Nãm me ã kum Kritu'ã ujarênh ny kïnh ane. Me te kum kïnh ba idjumar punu rã'ã ne. Nã bãm kam bôx ne te ikamy Xitu jabej ne kum ikator kêt. Xituo ne ba ikamy. Kum ikator kêt kam idjumar punu. Ne kam memã, “Ba on”, anen arým amũ pykabê Mateni'ÿr Xitu jabej tẽ.

*Me kudjÿ djào me kurwÿk mörja Paur kute amijã akre.*

*Ep 5.2; Pir 4.18*

<sup>14</sup> Bar te idjumar punun mã Metïndjwÿnh mã ar amikïnh jarẽ. Mÿkam? Bir, ta ne ar ijo djuw mex bar mã Kritu kôt ar amijo iban mã ikïnh. Ikïnh kute mrãmri ne me kute me kurê djwÿnh'ÿr meo ban kute 'ã aprãrn akubyn ôbikwa têpo ban kurwÿko pôx ne kïnhja pyràk. Nãm ã Kritu kôt amijo ibakam ikïnh ane.

Ga, me krãkamngôn krãpti: akubyn kurê djwÿnh kurũm ban kurwÿko pôx nhym me kute kukãm prykôt pidjôrã rênh ne kute kudjÿ djã kudjÿ tÿx bôr nhym kudjÿ:ja pumũ. Nhym kam ardjành me kunikôt prôt ne kute me kunio bikamÿr ja pumũ. Ar badjwÿ ne bar pyka kunikôt Kritu'ã memã idjujarênh iba nhym me arým pyka kunikôt 'ã idjujarênh ma. Kritu ta kute kudjÿ djã mextire pyràk bar me kunimã 'ã ajarẽ.

<sup>15</sup> Nã bãm ar ã anen kam arým Metïndjwÿnh kïnh. Kute mrãmri ne me kute kum kudjÿ djã mextire bôr nhym ardjành 'ÿr àbir nhym kute bãrn kïnhja pyràk. Nã bãm ar ã kum anen kam arým me jamãdjwÿ ã ane. Metïndjwÿnh kute amim me utàrjamẽ kute me kangajamẽ amẽ me jamã ne bar ije mÿjja kudjÿ mextire pyràk ne memã Kritu'ã idjujarênh iba.

<sup>16</sup> Nhym be, me ja ne me kum Kritu 'ã ar idjujarênhja kïnh kêt. Ar ije mÿjja kudjÿ mextire ja pyràk me kum kïnh kêt. Metïndjwÿnh kute me kanga nhym me me biknor tokry djãkam biknor ja kadjy ne me kum kïnh kêt. Nhym be, ate me ja ne me kum Kritu'ã ar idjujarênhja kïnh. Ar ije mÿjja kudjÿ mextire ja pyràk me kum kïnh. Metïndjwÿnh kôt me tïn ne ar ba kadjy ne me kum kïnh. Be, mÿj me'õ ta ne àpênh djã ja kadjy tÿx? Kritu'ã ujarênh kadjy tÿx. Djãm ar ba? Arkati. Nhym be, Metïndjwÿnh ne ar ijo ban ar imã tÿx jangij bar me

kunimã 'ã idjujarênh ar iba. <sup>17</sup> Nhym kam me krãpti kute arik Metïndjwÿnh kupa'ã kabên jarênh punu. Djã ne bar me kudjwa ã arênh ane? Kati. Ar ba ne bar amijãno djan Metïndjwÿnh kukwakam katãt arênhkumrêx. Metïndjwÿnh ta ne ar ipumũnh nhÿ. Ar ije kupa'ã arênh nhym kute ar imã o pãnh karõ ne bar ã katãt arênh ane. Kritu ar imẽ amijo kajkep bar katãt arênhkumrêx ne.

### 3

*Paur ta kute amimex'ã amijarênh kêt.*

<sup>1</sup> Djãm mrãmri ne ba ije ajte ar amã amimex jarênhmo kraxja? Kati. Ar ba ne bar ije amimex jarênh kêt. Djã ne bar me kwÿ kudjwa memã, nãr kon ar amã,

—Memã ar imex'ã pi'ók no'ók ne ar imã angã bar memã o tèn o bôx. O bôx gẽ me arên arým ar imex man kum ar ikïnh, ane? Ne kam ar amã pi'oko tèn o bôx gar arên kôt arým ar imex man ar amã ar ikïnh? Kati. Ar ba ne bar imã imex'ã pi'ók no'ók prãm kêt. Me kwÿ ne me mrãmri kum amimex'ã pi'ók no'ók prãm kumrêx. Nhym be, ar ba ne bar imã prãm kêt.

<sup>2</sup> Mÿkam ne ar bajbit ar imã amimex'ã pi'ók no'ók prãm kêt? Bir, ar ga ne gar aje ar imex'ã pi'ók no'ók pyràk. Ar ba ne bar ar amã Kritu jarẽ gar ar idjô'ã 'ÿr amijo akêx. 'ÿr amijo akêx nhym arým ar ajo mex ne. Ar idjô'ã ne gar amex. Nhym kam me kunĩ kute ar idjô'ã ar amex pumũnh ne kute ar amar. Ne kam jãm kute ar badjwÿ ar imex mar. Me kute ar apumũnh kute mrãmri ne me kute ar imex'ã pi'ók no'ók pumũnh pyràk. Tãm ne bar kuman ar amã,

—Ar ga ne gar aje ar imex'ã pi'ók no'ók pyràk, ane. Ar badjwÿ ar ije ar amex pumũnh ne ije ar amar ne arým imã ar ajabê:ê. Me kunĩ ne me kute ar amar.

<sup>3</sup> Kritu ta ne ar amã ajamak bô gar adjumar djã ny. Nãm ar ajo kute mrãmri ne me kute pi'ók no'ók pyràk. Ar ba ne bar amã Kritu'ã ajarẽ gar arým tu amim markumrêx. Nhym kam arým ar amã ajamak bô gar adjumar djã ny. Ga, Metïndjwÿnh Karõ tïn ne ar baja ne kute ar amã ajamak bôn gar adjumar djã nyja pumũ. Kritu ne Karõ ar amã ajamak bô.

Ga, me bakukãmãre kute mÿjja tÿxo kÿnpo'ã no'òkja pumũ. Djãm ã Kritu ar ajo ane? Kati. Bar ar amã Kritu'ã ajarë gar arÿm tu amim markumrëx ne arÿm adjumar djã ny.

<sup>4</sup> Ar ba ne bar ar amã arë nhym Kritu arÿm ar ajo mex. Tãm ne bar ije markumrëx nhym mrãmri Metĩndjwÿnhdjwÿ kute ar imar. <sup>5</sup> Djãm kam ar ba ne bar ije amim,

—Ba ne ba ije aro mex, anhÿro iba? Kati. Metĩndjwÿnh ta ne ar imã 'ã karõ bar arÿm ar amã Kritu'ã ajarë nhym kam ta arÿm ar amã ajamak bõ.

*Metĩndjwÿnh kute Kritu'ã kabën ny jarënh mãmdji.*

<sup>6</sup> Ta ne me kadjy ar imã ijamak mex jadjã bar memã arënhõ iba. Metĩndjwÿnh ne kute Kritu'ã kabën ny jarënh mãmdji bar arÿm kuman memã arënhõ iba. Djã nã bãm Mõjdjê kudjwa memã kabën'ã kÿnpoti no'òk tũmja jarënhõ iba? Kati. Metĩndjwÿnh Karõ ne bar memã arënhõ iba. Mÿkam ne bar memã kabën tũm jarënh kêt? Bir, ba ren ar memã tũm jarë nhym ren me te: kute katãt kõt amijo ba prãmje ne ren ta amikõt axwe rã'ã ne. Ne kam ren arÿm pãnh me biknor tokry djãkam akuno. Nhym be, kati. Bar memã Metĩndjwÿnh Karõ jarë nhym me arÿm maro ba nhym ta arÿm katãt meo ba. Nhym kam me arÿm Karõkõt tĩn ne ar ba rã'ã: rã'ã ne.

<sup>7</sup> Me memã kÿnpotikam kabën jarënhõ ba nhym me arÿm mar kajgon ta amikõt axwe rã'ã. Ne kam pãnh arÿm akuno. Metĩndjwÿnh mÿjja tÿxo kÿnpoti tÿx no'òk ne. Nhym kam Metĩndjwÿnh mexo umakõt Mõjdjê nokre jadjënh ne arÿm kÿnpoti mÿn memã o bõx. Ne kam memã Metĩndjwÿnh kabën jarënhõ dja nhym kabën me:xkumrëx nhym me maro dja. Maro djan te kute nokre 'ãno ãm ne omũnhmã. Metĩndjwÿnh mexo uma djõ'ã ne Mõjdjê nokre jadjënh nhym me te kute omũnhmã. Nhym kam adjënh apêx tẽ:n arÿm tu apêxkumrëx. Nhym Metĩndjwÿnh kute Mõjdjëmã kabën jarënh tũmjadjwÿ. Djãm me kute kabën tũm kõt katãt amijo bamã? Kati. Me ta te: katãtmãnh axwe rã'ã ne.

<sup>8</sup> Nhym be, Metĩndjwÿnh Karõ ne gwaj bamã kabën ny jarë. Kute gwaj bamã arënh ja ne mexo kute Mõjdjê kabën tũm jakrenh mex ne. <sup>9</sup> Djãm Metĩndjwÿnh kute Mõjdjëmã kabën jarënh tũm punu? Kati. Mexkumrëx. Nhym be, nãm me te memã Mõjdjê kabën tũm jarë nhym me axwe rã'ã ne. Me ta amikõt axwe rã'ã ne. Axwe rã'ãnh kam pãnh arÿm me biknor tokry djãkam akuno. Nhym be, gwaj Karõ kabën ma nhym arÿm gwaj bamã tÿx jadjã gwaj arÿm katãt kõt ar amijo baba. Kam ne Metĩndjwÿnh Karõ kabën nyja arÿm mexo Mõjdjê kabën tũm jakrenh mex ne.

<sup>10</sup> Kabën nyja kute tũmja jakrenh mex nhym tũmja me arÿm kute kum kĩnh kêt pyrãk. <sup>11</sup> Tũmja me kute 'ã ukangan mar kêtãmã. Nhym be, pãnh kabën nyja dja me mar rã'ã ne kõt amijo ba rã'ã ne. Kam nyja ne mexo kute tũmja jakrenh me:xi.

<sup>12-13</sup> Bar Karõ kabën ny mar rã'ãnh tu amiwÿr kute mÿjja jarënhja kamnhixkumrëx ne irãri memã kabën ny jarënhõ amirĩtkumrëx. Nhym be, Mõjdjê ta ne kubëkào aminokre'ã pro. Metĩndjwÿnh mexo uma djõ'ã nokre jadjënh ne kam mebê idjaer kute omũnh kêt kadjy aminokre'ã pro. Nhym kam adjënh arÿm apêx. <sup>14-16</sup> Me abendjõ'ã Metĩndjwÿnh kabën tũm jarë. Ne akati jakam kute arënh rã'ã ne.

Nhym be, me kam amakkre kêt tẽ:n amakkre kêt rã'ã. Akati jakam me amakkre kêt rã'ã. Ga, gwaj baje kubëkào banokre'ã prokam baje mÿjja ngrirebit pumũnhja pumũ. Mebê idjaerdjwÿ ne me kute Metĩndjwÿnh mar ngrire. Nhym be, me kwÿ arÿm Bënjadjwÿr djwÿnh'ÿr amijo akëx ne kõt ar amijo ba. Kõt ar amijo ban arÿm mar rax ne.

Ga, gwaj baje kubëkào banokre'ã pro kêtãkam baje mÿjja pumũnh rũnhja pumũ. Mebê idjaer kwÿdjwÿ ne me Metĩndjwÿnh mar rũnh. Nãm me Bënjadjwÿr djwÿnh'ÿr amijo akëx ne kõt ar amijo ba. Ne kam arÿm Metĩndjwÿnh mar rũnh ne. Nhym be, me kute Bënjadjwÿr djwÿnhkõt amijo ba kêtja ne me kute Metĩndjwÿnh mar kryre. Me amakkre kêtãkam.

<sup>17</sup> Be, Bënjadjwÿr djwÿnhjabê ne Metĩndjwÿnh Karõ. Bënjadjwÿr djwÿnh Karõ

arým gwaj bamẽ amijo kajkep. Djã ne gwaj kam arek amim,

—Ba katàt Môjdjê kabên man kôt ar amijo iban arým Metĩndjwýnhmã ijaxwe kêt, anhÿro baba? Kati. Gwaj baje amim anhÿr kêt. Metĩndjwýnh ta ne gwaj bamã axwe kêt jarẽ gwaj arým kum bamex ne.

<sup>18</sup> Ga, me kute kubêkào aminokre'ã pro kêt kam kute mÿjja pumũnh rũnhja pumũ. Gwaj badjwý baje Bẽnjadjwýr djwýnh mex mar rax. Ga, me kute ixekam mÿjja kumex pumũnh mexja pumũ. Gwaj badjwý ã Metĩndjwýnh mar mexo ane. Ne maro baba:n arým kôt ar amijo baba. Ta kute amijo ba pyrãk kôt ar amijo baba. Kôt ar amijo baba: nhym arým amikôt gwaj bajo mexo tẽ. Gwaj kam arým bamexo amũ amikamên arým ta mexo bamex ne. Mÿj me'õ ne kute gwaj bajo mex? Bir, Bẽnjadjwýr djwýnh Karõ ne kute gwaj bajo mex.

## 4

*Paur kute memã Kritu'ã ujarênh'ã amijarênh.*

*A Kô 1.12; Tex k 2.1*

<sup>1</sup> Metĩndjwýnh kum ar ikaprĩkam ne ar imã me'ã karõn ar imã,

—Dja ga memã Bẽnjadjwýr djwýnhbê Kritu'ã ujarênh nyja jarênho aba, ane. Kam ne bar arým memã arênho iba. Djã ne bar memã arênh'ã idjukanga? Kati. Bar memã arênh'ã idjukanga kêt kumrêx ne memã arênh ar o iba. <sup>2</sup> Djã ne bar memã arên ate mebê amipdjun mebê mÿjja kupênho iba? Kati. Amrêbê: ne ba mebê amipdjun mebê mÿjja kupênhja kanga. Djã ne bar ari memã ijêx ne me noo ibiknoro iba? Nâr ijêxnhĩn ari me noo ibiknor ne Metĩndjwýnh kabên kupa'ã memã mÿjja kwý jarênho iba? Arkati. Ar ba ne bar katàt memã arênho iba. Ar ije memã Kritu kabên jarênhkam djã ne bar ajmã ikuten kupa'ã amijo iba? Kati. Kritu kôt ne bar katàt ar amijo iba. Metĩndjwýnh ta ne kute ar ipumũnh. Bar katàt ar amijo iban kam katàt memã arê nhym me arým amim,

—Nã. Nãm ar katàt me bamã arênhkumrêx. Ga, katàt ar kute amijo baja pumũ. Ar mexkumrêx. Dja ba amim ar

kabên ma, ane. Dja me kunĩ ar ipumũnh kwý arým ã amim ane.

<sup>3</sup> Bar memã Kritu'ã ujarênh ny jarênho iba. Djãm kam mrãmri we Kritu'ã ar idjujarênhja bipdjurkumrêx? Kon. Mrãmri, me kwý biknor prãmjabê bipdjurkumrêx. Ga, me kute kubêkào aminokre'ã pron mÿjja pumũnh kêtja pumũ. Mÿjja mebê bipdjur. Me biknor prãmdjwý mebê ikabên bipdjurkumrêx.

<sup>4</sup> Kritumẽ Metĩndjwýnh ar. Djãm ja ne uma rax nhym ikjê uma ngrire? Kati. Ar umao kute aben pyrãk. Me kum amẽ ar uma:. Bar memã Kritu'ã ujarênh ny jarẽ. Ujarênh ny kute mrãmri ne memã irã djã pyrãk. Gwaj baje amim Kritu markam gwaj baje mrãmri ne me kute irãkam mÿjja kunĩ pumũnh mex pyrãk. Nhym be, nã bãm ar me biknor prãmmã ujarênh ny jarẽ nhym mebê bipdjur nhym me kute amim mar kêtê. Me kute mrãmri ne me no rã kute mÿjja pumũnh kêt pyrãk, ne te: kute marmã. Me kum Metĩndjwýnhkumrêx kĩnh kêtja nhõ metĩndjwýnh, Xatanaj ne arým memã amakkre kêt jadjã nhym me arým ajbit maro ba. Nhym kam arým mebê Kritu'ã ujarênh nyja pytãro ba. Kam ne Kritu'ã ujarênh nyja mebê bipdjurkumrêx.

<sup>5</sup> Djã nã bãm ar memã,

—Ar ba dja gar tu amim ar imarkumrêx bar kam arým ar apytã, anhÿro iba? Kati. Bar kãj bê memã kum,

—Jeju Kritubê ne me kunĩ nhõ Bẽnjadjwýr djwýnh. Tãm dja gar tu amim markumrêx nhym arým ar apytã, anhÿro iba. ã Jejumã ar idjãpênh kute anhÿrkam ne bar ar amã idjãpênh ar iba.

<sup>6</sup> Be, adjãkamã Metĩndjwýnh ta kabên ne, “Akamãt kô tykbit. Gê on a'u. Gê a'u akamãt kurwý”, ane.

Ga, a'u kute mÿjja kunĩ kurwýkam mÿjja kunĩ arým memã amirĩt mexja pumũ. Metĩndjwýnhdjwý ne arým gwaj bamã bajamak bó gwaj arým Kritu mar mex ne. Metĩndjwýnh ne kute mexo, umao me kunĩ jakrenh. Tãm ne gwaj arým kuma. Kritu ne kute amijo ba mexkumrêx gwaj arým 'ã ujarênh ma. Gwaj baje Kritu mar o ne gwaj baje arým Metĩndjwýnh mar. Metĩndjwýnh



ne kute mexo, umao me kunĩ jakrenh. Tãm ne gwaj baje Kritu mar o kuma.

*Me kute ngyo ngõnh pyræk nhym Metĩndjwýnh mekam ýr.*

*A Kô 11.23; Kor 1.11*

<sup>7</sup> Nhym be, gwaj ba ne gwaj baje mrãmri ne ngyo ngõnh pãnh ngrire pyræk. Gwaj bapãnh ngrire. Te gwaj bapãnh ngrire nhym gwaj bakam Metĩndjwýnh nhỹ. Metĩndjwýnhbê kumkati nhỹ. Mýj kadjy ne gwaj bakam nhỹ? Bir, Metĩndjwýnh ta dja gwaj bakam amityxo amirĩt nhym me arým ajbit rax ma. Dja me gwaj bamar kêt ne arým Metĩndjwýnh ajbit ma. Ja kadjy ne gwaj bakam nhỹ.

<sup>8</sup> Ar ije ngyo ngõnh pãnh ngrire pyræk. Me arĩk ar ibu'ã ar ijã kabên punu krãptĩ. Me ã kabên pytĩ: ane. Djã ne kam bar Jejumã idjãpênh'ã idjukanga? Kati. Bar 'ã idjukanga kêt ne kum idjãpênh rã'ã. Ne mã amim,

—Mýj godja bar amijon? Mýj godja bar amijon? ane. Djã nã bãm ar kam amim Metĩndjwýnh kamnhĩx kêt got? Bar tu amim kamnhĩxkumrêx.

<sup>9</sup> Me ar ijo bikênh ba. Djãm kam Metĩndjwýnh kute ar ikanga got? Kute ar ikanga kêtumrêx. Nhym me arým pyka'ã ar imê bar nõ. Djãm kam bar arým ty? Kati. Ar itĩn ne ar iba.

<sup>10</sup> Akati kunĩkôt me kute ar ibĩn puma. Kute mrãmri ne amrêbê Jeju akati kunĩkôt me kute bĩn puma pyræk. Nã bãm ã ar ije amikam me kute ar ibĩn puma maro ane. Dja te me kute ar ibĩn puma nhym Jeju mã ar ikam tĩn ne ar ijo ba. Bar kam itĩn ne nhym me arým ar ijã abenmã kum,

—Ga, ar tĩn rã'ãja pumũ. Mrãmri Jeju tĩn ne ar ba. Tãm ne ar utãr ar o ba, ane.

<sup>11</sup> Bar Jejumã idjãpênh ar iba nhym akati kunĩkôt me ar ibĩn puma. Bar kam itĩn rã'ã ne. Nhym kam me arým ar ijã abenmã kum,

—Ga, ar tĩn rã'ãja pumũ. Mrãmri Jeju tĩn ne ar ba. Ta ne ar utãro ba, ane. <sup>12</sup> Me kute ar ibĩn puma bar itĩn rã'ã. Gar kam arým ar ipumũn arým tu amim Jeju markumrêx ne arým kôt atĩn ne ar aba rã'ã: rã'ã ne.

<sup>13</sup> Kam ne me amrêbê: memã kum,

“Ba ne ba tu amim Metĩndjwýnh markumrêx. Ne kam arým memã arênhõ iba.”

Nãm me ã me bakukãmãremã ane nhym me arým 'ã pi'ók no'ók ne. Ar badjwý ne bar tu amim Metĩndjwýnh markumrêx ne kam memã arênhõ iba. Dja te me kute ar ibĩn puma bar tu amim Metĩndjwýnh markumrêx ne mã memã arênh ar o iba.

<sup>14</sup> Nhym be, godja me mrãmri ar ibĩn jabej mýj dja bar kam ikute? Metĩndjwýnh ne arým akubyn Bẽnjadjwýr djwýnh Jejuo tĩn ne. Ta dja Jejukôt akubyn ar badjwý ar ijo tĩn ne ar ijo mõn arým amikabem ar ipumjuw. Ar gamê dja gwaj baro'ã kabem baku'ê. Tãm ne bar tu amim markumrêx.

<sup>15</sup> Akati kunĩkôt me kute ar ibĩn puma. Bar itokry ne ikaprĩre maro iba. Mýj kadjy? Bir, ar akadjy. Bar te itokry kumex nhym Metĩndjwýnh mã kum ar ikaprĩ bar mã memã Kritu jarênhõ iba. Gar kam arým ar ipumũn arým Metĩndjwýnh djukaprĩ: man kam arým akĩ:nhkumrêx. Akĩ:nhkumrêx ne kum,

—Djũnwã, adjukaprĩ:kumrêx. Imã akĩ:nhkumrêx, anhỹro aba. Nhym gwaj babu'ã me krãptĩ: gwaj bapumũn arým kum Metĩndjwýnh kĩnh. Ne kam tu amim markumrêx ne adjwýnhdjwý kĩ:nhkumrêx. Kĩ:nhkumrêx ne arým kum,

—Djũnwã, adjukaprĩ:kumrêx. Imã akĩ:nhkumrêx, anhỹro ba. Dja me krãptĩ: kum amikĩnh jarê nhym Metĩndjwýnhdjwý arým kĩnhkumrêx. Ja kadjy bar itokry o iba.

<sup>16</sup> Dja me krãptĩ: kum amikĩnh jarê. Bar amikukãm ja man mã kam ikĩnh nhym kam arým irerek iwýr bõx kêt. Memã ar idjujarênhkôt bar itokrymê ikaprĩ maro iba. Maro iba: nhym arým ar ibê ar inhĩ kator mex ne. Nhym be, djãm kam ar irerekre? Kati. Te ar ibê ar inhĩ kator mex bar mã ikĩnh ne mã 'ityx ne. Akati kunĩkôt mã 'ityx ne.

<sup>17</sup> Mýj ne bar kuman mã ikĩnh ne mã 'ityx ne? Bir, djãm me kute ar ijo bikênh rã'ã rã'ãmã? Kati. Me kute ar ijo bikênh 'ikrãn ne. Kam dja bar Metĩndjwýnh'ýr tẽn bõx ne ikĩnhkumrêx. Djãm kam ar ikĩnh 'ikrãn ne? Kati. Dja bar kam ikĩnh rã'ã: rã'ã ne. Jakam ar ikaprĩre. Metĩndjwýnhkôt dja bar ikĩnhiti:re. Tãm ne bar kuman mã ikĩnh ne mã 'ityx ne.

<sup>18</sup> Djām gwaj baje mỳjja pumũnhja ne bar kôt ijamak bēn? Me kute ar ijo bikēnh ja nār ar itokry ja nār ar ikaprī ja djām kôt ne bar ijamak bēn? Kati. Mỳjja pumũnh kētkôt ne bar ijamak bēn 'āno dja. Gwaj baje mỳjja pumũnh ja dja ĩ kêt ne. Nhym be, gwaj baje mỳjja pumũnh kêt ne rā'ā: rā'ā ne. Metīndjwýnhkôt ar baban bakĩnh tire ja ne baje omũnh kêt rā'ā. Kàjkwakam ō mỳjja baje omũnh kêt rā'ā. Mỳjja ja ne rā'ā: rā'ā ne. Ar ije mỳjja pumũnh kêt jakôt bar ijamak bēn 'āno dja. Ne kam mā ikĩnh ne mā 'itỳx.

## 5

*Atemā me ĩ ny'ā ujarēnh.*

*Pir 3.21*

<sup>1</sup> Be, gwaj banhī ja kute mrāmri ne kubēkātio kikre pyrāk. Pykakam ar babari gwaj kam nhỹ, banhī kute kubēkātio kikre pyrāk ja kam nhỹ. Ga, me kute tēmbē kubēkātio kikre ngrānhja pumũ. Gwaj badjwý gwaj on ty. Nhym be, arým gwaj batykkam gwaj arým Metīndjwýnh'ýr tēn arým atemā banhī ny. Metīndjwýnh dja gwaj banhī ny nhípēx gwaj kôt ar baba rā'ā: rā'ā ne. Tām ne bar ije markumrēx. Gwaj banhī ny ne kute gwaj banhūrkwā ny pyrāk.

<sup>2</sup> Dja gwaj kàjkwamā tēn arým banhī ny. Kute mrāmri ne me kute kubēkà tũmo pōx ne ny jangjēnh pyrāk dja gwaj banhī ny. On jakam gwaj bamā banhī ny prām. Gwaj banhī ny prāmje kam ama:n kam amakbē bakangāngā. On gwaj banhī ja katyk ne tokry djaje bakangāngā. <sup>3</sup> Gēdja gwaj arým kàjkwakam banhī nyn bakajgo kêt. Ne bakadjwýnhbit ar baba kêt. Gwaj banhī.ĩ.

<sup>4</sup> Jakam gwaj banhī ja, kute kubēkātio kikre pyrāk ja, gwaj kam ar babari bakangāngā. Batokry djaje bakangāngā. Djām on gwaj bamā banhī kangan bakajgo prām, kàjkwakam bakajgo ar baba prām? Kati. Gwaj bamā on kàjkwakam banhī ny prām. Ne kam arým batyk kêt ne banhī nyn batĩn ne ar baba rā'ā: rā'ā ne.

<sup>5</sup> Ja kadjy ne Metīndjwýnh gwaj banhipēx. Gwaj batĩn ne ar baba rā'ā rā'ā kadjy ne gwaj banhipēx. Ga, me kute memā mỳjja rūnh nhōrmān kukām kute mỳjja kryre

nhōrja pumũ. Me amim kryre jamýn arým amiwýr mỳjja rūnh kamnhĩxkumrēx. Gwaj badjwý. Metīndjwýnh arým gwaj bamā Karō jano nhym arým gwaj bajo ba gwaj arým amim,

—Ga, Metīndjwýnh arým kute imā karō janorja pumũ. Ga, arým kute ijo baja pumũ. Mrāmri dja ba kàjkwakam kôt itĩn ne ar iba rā'ā: rā'ā ne, ane. Karō kute gwaj bajo bakam dja gwaj ā amim ane. Ne kam arým baje mrāmri ja markumrēx. Dja gwaj mrāmri kàjkwakam Metīndjwýnhkôt batĩn ne ar baba rā'ā: rā'ā ne. Tām ne gwaj baje mrāmri markumrēx ne amiwýr kamnhĩxkumrēx.

<sup>6</sup> Ar ije itĩn markam 'itỳx rā'ā ne. Kum idjapēnhkam 'itỳx rā'ā. Jakam ne bar arek inhī jakam ar iba. Arek kam ar ibari djām Bēnjadjwýr djwýnh'ýr ar ibōx? Kati. 'Ýr ar ibōx kêt rā'ā. Ja ne bar ije mar. <sup>7</sup> Djām jakam ne bar Bēnjadjwýr djwýnh pumũnhbē ar iba? Kati. Te ar ije omũnh kêt bar tu amim Bēnjadjwýr djwýnh markumrēx ne ar iba. <sup>8</sup> Ar ije markam 'itỳx rā'ā. Nhym be, ba ren ar on Bēnjadjwýr djwýnh'ýr tēn bōx ne kôt ar iban ren ikĩ:nhkumrēx. Ba ren ar on tyn inhīja kangan ren arek Bēnjadjwýr djwýnhkôt ar iba. Ne kam ren ikĩ:nhkumrēx ne.

<sup>9</sup> Kam ne bar arek kum idjapēnh iba. Arek pykakam inhī ja'ā ar iba jabej bar Bēnjadjwýr djwýnhmā idjapēnh ne ije o kĩnh kadjy amima. Nār bar ityk ne kàjkwamā itēm jabej bar Bēnjadjwýr djwýnhmā idjapēnh ne ije o kĩnh kadjy amima. Ar ije o kĩnhmā ne bar kum idjapēnh ar iba.

<sup>10</sup> Mỳkam ne bar ije o kĩnhmā? Bir, dja Kritu kàjkwakam krī djakam gwaj bamā nhỹ. Gwaj kam arým 'ýr bōx ne kabem dja nhym arým gwaj bakukij. Pykakam gwaj ar babari gwaj baba mex jabej bakukij. Nār, gwaj baba punu jabej bakukij. Gwaj kam arým prĩne amikôt kum amijarē nhym kam arým gwaj bakunĩmā o pānh. Apýnh gwaj banhī djari gwaj bamā o pānh. Gwaj baje amijo baba kôt gwaj bamā o pānh. Katāt gwaj baba mex jabej arým gwaj bamā o pānh mex. Nār ate gwaj amijo baba punu jabej arým gwaj bamā o pānh punu.

*Metīndjwýnh kute me kunĩo õbikwao ãm.*

*A Kõ 4.2*

<sup>11</sup> Dja gwaj baje amijo baba kõt gwaj bakunĩmã o pãnh. Kam ne bar Kritu'ýr me 'wýro iba. Me kute Kritu'ýr amijo akẽxmã me 'wýro iba ne me axwe nẽje ar me kukrào iba. Bẽnjadjwýr djwýnh pyma: bar arým kuman arým nẽje ar me kukrào iba. Ne katàt ar amijo iba nhym Metīndjwýnh prĩne kute ar imar. Ar gadjwý ar aje ar imar jabej ne aje amim,

—Mrãmri ne Paur ar katàt kute amijo bakumrẽx, anhýr jabej.

<sup>12</sup> Wãkam ne me we ar ijã,

—Ar wã ne ar ajte ar amã amimex jarẽho ba, ane. Djãm mrãmri me kabẽn? Kati. Wãkam me kwý ta amimexo amran ar amã,

—Ba ne ba Kritu'ã idjujarẽnh mexkumrẽx. Me kum ikĩhkumrẽx, anhýro ba. Djãm mrãmri ne me kabẽn mex? Kati. Nãm me amijo 'ẽx. Djãm Kritu kabẽn kõt me kum me abẽ? Kati. Me jamã dja gar ar ijã ajarẽn memã kum,

—Paur ar kute katàt ar imã arẽnhkumrẽx. Paur ar kute katàt Metīndjwýnh kabẽn marn kõt amijo bakumrẽx, ane. Dja gar ã memã ane nhym me arým pijãm ne.

<sup>13</sup> Djãm mrãmri ne bar we ajbãn ar amã amijarẽ? Nã. Kwãrĩk wãnh rã'ã. Bar we ajbã. Metīndjwýnh kadjy ne bar we ajbã. Nãr, djãm mrãmri ar ikrã mex ne katàt ar amã amijarẽnhkumrẽx? Metīndjwýnh ta ne kute ar imar. Ar aje Metīndjwýnh mar kadjy ne bar katàt ar amã amijarẽnhkumrẽx.

<sup>14</sup> Kritu kum gwaj bajabê:ê. Kum gwaj bajabêkam ne gwaj bakunĩ pãnh ty. Gwaj badjwý bamã Kritu jabê:n arým 'ã memã badjujarẽnh prã:m. Dja me te Kritu'ã gwaj bakangrõnho ba. Kwãrĩk wãnh rã'ã. Gwaj ty. Gwaj bamã batyk pyma kêt. Kritu gwaj bakunĩ pãnh tykkam gwaj badjwý gwaj bamã batyk pyma kêt. <sup>15</sup> Gwaj bakunĩ pãnh tykkam mýj dja gwaj nẽ? Bir, dja gwaj amidjwýnhbit maro babaja krãta. Ne kam Kritu maro baban kõt ar amijo baba. Nãm gwaj bapãnh tyn akubyn tĩn ne. Kam dja gwaj maro baban kõt ar amijo baba.

<sup>16</sup> Arým gwaj bapãnh tykkam djãm kam ar ije me mar punu? Kati. Me kum

Metīndjwýnh kĩnh kêt ja ne me kute me mar punu. Djã ne bar ã me mar punuo ane? Kati. Bar aminhijukri amidjan kam arým ar ije me mar punu kêt. Mrãmri amrêbê ar ije Kritu mar punu. Djãm jakam ar ije mar punu rã'ã? Kati. Bar arým aminhijukri amidjan kam arým ije mar punu kêt.

<sup>17</sup> Bir, mýj ne ar ije me mar on? Bir, dja Kritu meo kra nhym me arým umar djã ny. Amrêbê ne me mýjja tũm kõt ar amijo ba. Ne jakam arým kute mýjja tũmkõt amijo baja arým krãtan arým mýjja nykõt ar amijo ba. Be ga, me arým mrãmri prĩne umar djã nykumrẽxja pumũ. Bar aminhijukri amidjan arým kute meo ny ja ma.

<sup>18</sup> Metīndjwýnh ta ne arým prĩne meo ny. Gwaj badjwý ne gwaj amrêbê Metīndjwýnho bakurê djwýnh nhym ta arým gwaj bajo nyn gwaj bajo õbikwa. Jeju Kritu arým tyn akubyn tĩn gwaj kam tu amim markumrẽx. Nhym kam Metīndjwýnh arým gwaj bajo õbikwa. Gwaj bajo õbikwan arým me'ã gwaj bamã karõ. Gwaj baje memã 'ã badjujarẽnhmã gwaj bamã karõ. Gwaj kam arým memã kum,

—Ga me aje Metīndjwýnho akurê djwýnh. Nhym be, dja ga me tu amim Jeju markumrẽx nhym arým me ajo nyn me ajo õbikwa. Nã gwãm ã memã anhýro baba.

<sup>19</sup> Metīndjwýnh ta ne me kunĩo õbikwao dja. Kritu arým tyn akubyn tĩn ne nhym me arým tu amim markumrẽx nhym kam arým meo õbikwa. Meo õbikwan arým memã axwe kêt jarẽ nhym me arým kum mex ne. Nhym arým ar imã Kritu'ã ujarẽnhja jarẽ. Bar memã 'ã ajarẽn memã kum,

—Dja ga me tu amim Kritu markumrẽx nhym Metīndjwýnh arým me ajo nyn me ajo õbikwakumrẽx, ane. Tãm ne bar memã arẽnho iba.

<sup>20</sup> Kam ne bar Kritu kabẽnkõt memã idjujarẽnh ar iba ne Kritu kukwakam 'ýr ar ajwýro iba. Ar aje Metīndjwýnh'ýr amijo akẽxmã ar ajwýro iban ar amã,

—Dja gar tu amim Kritu markumrẽx nhym Metīndjwýnh arým ar ajo õbikwa, anhýro iba. Bar 'ýr ar ajwýro iba kute mrãmri ne Kritu ta mãn kute amiwýr me 'wýro ba pyrãk.

<sup>21</sup> Kritu amikam axwe 'õ mar kêt ne axwe kêt me:x ne. Nhym be, Metīndjwýnh

arým kum axwe jarẽ. Nhym mỳj axwe'õja? Bir, gwaj ba bajaxwe pro. Nãm kum gwaj bajaxwe pro jarẽ nhym arým kute ta mãn axwe djwýnh pyræk. Nhym kam Metĩndjwýnh arým pãnh gwaj bamã axwe kêt jarẽ. Gwaj tu amim Kritu markumrẽx nhym Metĩndjwýnh arým gwaj bamã axwe kêt jarẽ gwaj arým Metĩndjwýnh jaxwe kêt bajaxwe kêt. Kam dja gar tu amim Kritu markumrẽx nhym Metĩndjwýnh arým ar ajo õbikwakumrẽx.

## 6

<sup>1</sup> Metĩndjwýnh kõt ne bar idjãpênh ar iba. Kam ne bar arým ar amã arẽ. Metĩndjwýnh ne tu kum ar akaprĩ:kumrẽx\* ne ar amã ar ajamak bõ gar arým amim ama. Ar aje amim markam tu amim markumrẽx ne kwãrĩk wãnh 'ã adjukanga kêt. <sup>2</sup> Mỳkam dja gar 'ã adjukanga kêt? Bir, Metĩndjwýnh ne arým gwaj bakukãmãremã kabên ne memã kum, “On jakam ije me amar. Ga me imã amijarẽ ba arým me ama. Imã me akaprĩkam ne ba me ama. Ë, on akati jakam ije me apytãr. Ba me apytãn arým me ajo djuw mex.” Nãm ã Metĩndjwýnh gwaj bakukãmãremã ane. Badjwý kõt ar amã arẽ. Mytja tãmkam Metĩndjwýnh kum ar akaprĩ. Akati jakam kute ar apytãr. On 'yr amijo akẽx. Kwãrĩk wãnh 'ã adjukanga kêt.

*Paur kute apýnh kaprĩ djãri'ã amijarẽnh.  
Kor 1.10*

<sup>3</sup> Ar ba ne bar amijaxwe nêje amijãno dja. Mỳkam ne bar amijãno dja? Bir, ba ren amijãno idjãm kêt ne ren arým ajmã ikute. Nhym kam ren me'õ arým ijã, —Djãm Metĩndjwýnhmã ar àpênh wãkam ar mex? Kati, ar axwe ar ba, ane. Me'õ ren ar ijã anen ren arým Metĩndjwýnh bê amijo akẽx. Me'õ kute Metĩndjwýnh bê amijo akẽx karõ ne bar amijaxwe nêje amijãno dja. <sup>4</sup> Ne ar imrãnh kunĩkõt katãt Metĩndjwýnhmã idjãpênhkumrẽx nhym me kunĩ kute kõt ar imar. Katãt kum ar idjãpênhkam te apýnh ar ikaprĩ djãri ar ijo ba bar kum idjãpênh'ã idjukanga kêt.

\* **6:1** Djãm ar ga ne gar ajaxwe kêt nhym pãnh kum ar akaprĩ Kati. Ar ga ne gar te ajaxwe kêtã nhym arým ta kum ar akaprĩ.

Ne ajte apýnh itokry ma.

Ne ajte imã mỳjja prãm ne inhõ mỳjja kêt.

Ne ajte apýnh mỳjjakam itĩn prãm.

<sup>5</sup> Katãt kum ar idjãpênhkam me ajte mry kã punuo ar ikaprêprêk.

Nhym me ar ibê ijê

nhym me krãptĩ: ar ikam àkrên ar ikam kangao kumex.

Bar apýnh idjãpênh tỳxo prĩne amidjõm ne.

Ne ajte apýnh idjãpênh'ã ino tỳx ne inhõt kryre nhym arým akati.

Bar ajte Metĩndjwýnhmã amijajburo iba.

Katãt kum ar idjãpênhkam bar ã ane.

<sup>6</sup> Ne ajte kam prĩne amijaxwe nêje amijãno dja.

Ne ajte prĩne mỳjja mar mexkumrẽx.

Nhym me ajte ar ijo ajkê bar bit ingykmãn ajte akubyn amijã ingyk nê.

Ne kum ar idjãpênhkam ajte imã me kaprĩ.

Nhym Metĩndjwýnh Karõ ajte ar ijo ba bar mrãmri imã me abêkumrẽx.

<sup>7</sup> Ne ajte katãt memã ikabên jarẽnhkumrẽx nhym Metĩndjwýnh ajte ar ikõt àpênh tỳx.

Kum ar idjãpênhkam bar amijãno djan katãt ar amijo iba. Ga, krãkamngõnh kute kãxo kubêkã jangjênh ne kute kurê djwýnhbê amipytãrja pumũ. Ar badjwý ne bar inhõ kãxo kubêkã jadjar mãn prãbê amijãno djan katãt ar amijo iba. Me kute ar imã ar ijaxwe jarênh karõ ne bar amijãno dja.

<sup>8</sup> Nhym me ajte kum ar ikĩ:nhkumrẽx. Djãm kam ar ije amidjwýnhbit mar ne Metĩndjwýnhmã idjãpênhmã kanga? Kati. Bar mã kum apê.

Nhym me ajte te mebê ar ikurê bar mã kum apê.

Nhym me ajte te ar ikãxã abenmã kum,

—Djãm ar wã mex got? ane bar mã Metĩndjwýnhmã apê.

Nhym kam me ajte te ar ikãxã abenmã kum,

—Me kum ar kĩ:nhkumrẽx, ane bar mã kum apê.

Nhym me ajte te ar ijã,

—Nãm ar ta amijo Metĩndjwýnh maro ba. Nãm ar memã 'êx ne me noo biknoro ba, ane. Nãm me te ar ijã ane bar katãt kum idjãpênhkumrẽx rã'ã.

9 Nhyim me ajte te ar ibê ate krãn ba nhyim Metĩndjwýnh kute ar imarkumrêx. Nhyim ò me jadjwý kute ar imarkumrêx.

Nhyim me ajte kute ar ibĩn pyma. Te ar ibĩn pyma. Ota, ar itĩn rã'ã.

Nhyim me ajte mã ar ikaprêprêk. Ne te ar ikaprêprêk bar ityk kêt.

10 Ne ajte ikaprĩ:ren ikaprĩ japôkmã mã ikĩnh.

Ne ajte ar inhõ mýjja kêt. Te ar inhõ mýjja kêt bar memã Kritu'ã idju-jarênh ar iba nhyim me arým tu amim markumrêx. Me krãptĩ ne me tu amim markumrêx ne arým kôt Kritu nhõ mýjja kume:xo ò mýjja.

Te ar inhõ mýjja kêt bar tu amim Kritu markumrêx ne arým Kritukôt ar inhõ mýjja kunĩ.

11 Krĩrãxbê Kôritukam ar ga ne bar imã ar ajabê:. Kam ne bar prĩne amikôt ar amã amijarênhõ amirĩtkumrêx. 12 Djã nã bãm ar ar abê amiptàn imã ar ajabê kêt got? Ar ga ne gar amã ar ijabê kêt. 13 Ar ije ar ajo ikramãn prãbê bar ar amã ikabên. Ar gadjwý dja gar amipãnh ar imã akabên mex jarên ar amã ar ijabê.

*Me kute Jeju marbitõ aben nhikjê'ã kute memã karõ.*

*Ep 5.7; A Xim 2.4; Xij 4.4; Ped k 2.11*

14 Ga, mry kute jênh bjêr kadjy me kute o aben nhikjêja pumũ. Mry kute aben pyrãk kambit ro'ã àpênh mex. Ar gadjwý ar aje me'õo anhikjê mã me kute amim Jeju marbitõ anhikjê. Kwãrĩk wãnh me'õ kute Jeju mar kêtõ anhikjê kêt ne ro'ã adjãpênh kêt.

Djãm me axwemê me axwe kêt kute aben pyrãk ne ro'ã àpênh mex? Kati. Ga, a'umê akamãtmê ro'ã ba kêtja pumũ. Apýnh ne ba. Ar gadjwý ne gar aje amim Jeju mar. Kam ar amã ajaxwe kĩnh kêt. Me kute Jeju mar kêtja ne me kum axwe kĩnh. Djãm ro'ã ar adjãpênhkam mex? Kati. Kam mex kêt.

15 Djãm Kritumê Berij axikôt kabên? Kati. Ar apýnh kabên. Berij nhidji 'õdjwýbê ne Xatanaj. Me kute amim Jeju mardjwý djãm me kute amijo ba kute me kute Jeju mar kêtja amijo ba pyrãk? Kati. Me kute amim

Jeju mar katàt ar amijo ba. Nhyim be, me kute mar kêtja ate amijo ba. Me apýnh ba.

16 Djãm Metĩndjwýnh nhõ kikretikam me kute kum amijarênh kadjy apýnh mýjjaõ metĩndjwýnh karõ nhipêxja krĩ? Djãm Metĩndjwýnhmã ja mex? Arkati. Me kute kam Metĩndjwýnhmãbit amijarênhmã. Gwaj badjwý. Djãm gwaj baje Metĩndjwýnhmã amijarênh ne jãm mýjjaõ metĩndjwýnh karõ nhipêxmã amijarênhmã? Me kute Jeju mar kêtja kudjwa mýjjaõ metĩndjwýnh karõ nhipêxmã amijarênhmã? Kati. Gwaj baje me kute Jeju mar kêtja kudjwa kêt ne mýjjaõ metĩndjwýnh karõ nhipêxmã amijarênh kêt mã. Ga, Metĩndjwýnh ò kikretikam ýrja pumũ. Gwaj badjwý. Metĩndjwýnh ne gwaj bakam nhý. Metĩndjwýnh tĩn ne ar bakumrêx. Tyk kêtikumrêx. Tãm ne gwaj bakam nhý. Metĩndjwýnh ta ne amrêbê: memã kum,

“Ba dja ba mekôt ar iban mekmê ar mrã. Dja me imã, ‘Me inhõ Metĩndjwýnh’, ane ba meo iba rã'ã ne.”

Nãm ã amrêbê: me bakukãmãremã ane. 17-18 Ne kam ajte,

“Kam, on me me kute imar kêtjamã akãx. Djãm me aje meo anhikjên me ro'ã adjãpênhmã? Kati. Kwãrĩk wãnh. On me memã akãx ne ate ar aba.”

Nãm ã Bẽnjadjwýr djwýnh me bakukãmãremã ane. Ne kam ajte memã kum,

“Kwãrĩk wãnh me axwe kôt ajaxwe kêt. Me axwe kôt ajaxwe kêt kam ba dja ba ibê abãmikumrêx. Ne kam arým ajo ikrakumrêx. Ajo ikra myikumrêx. Ajo ikra nikumrêx.”

Nãm ã Bẽnjadjwýr djwýnh me bakukãmãremã ane. Bẽnjadjwýr djwýnh 'ityxo kubê kumkati ta ne memã ja jarê.

## 7

1 Ga, kute gwaj bamã mýjja mex jarênhja pumũ. Mrãmri ne gwaj bamã kabên pydjĩn arê. Kam dja gwaj on wãnh bajaxwe kunĩ kanga. Baje amidjwýnhbito kĩnh kadjy bajaxwe kunĩ gwaj on wãnh kanga. Bakabên punu kunĩkôt, badjãpênh jaxwe kunĩkôt ne gwaj tu Metĩndjwýnhbê amijo ajkê. Gwaj wãnh kunĩ kangan katàt Metĩndjwýnh kôt ar amijo baba. Gwaj kum bamexo amũ

amikamên prĩne ta mexo bamex. Gwaj bamã umakôt ã kum bamexo batẽmo ane.

*Paur kute memã amikĩnh jarẽnh.*

<sup>2</sup> Dja gar amã ar ijabê. Djã nã bãm ar ar ajõo ajkê? Djã nã bãm ar ar ajõo àpnu? Djã nã bãm ar ar ajõbê mýjja 'õo iprõt? Arkati.

<sup>3</sup> Djãm ar ije ar amã ajaxwe jarẽnhmã ne bar ar amã ja jarê? Kati. Arým bar ar amã,

—Gwaj baro'ã dja gwaj batĩn ne ar baba. Nãr kon ar atyk jabej gwaj baro'ã ty, ane. Nãm bãm ar ã imã ar ajabêo ane. <sup>4</sup> Nãm bãm tu amim ar amex markumrêx ne prĩne ar amã amikôt amijarê. Nãm bãm ar akam ikĩnh ne memã ar akam ikĩnh jarẽnh kumex ne. Nãm te apýnh ikaprĩ djãri iwýr ban bõx ba ar amex djõ'ã akubyn ikĩnh ne amikĩnh ra:x ma.

<sup>5</sup> Nãm bãm ar amrêbê pykabê Mateni'ýr tẽn 'ýr bõx. Nym kam apýnh ar ikaprĩ djãri mã ar iwýr ban bõx bar te ityk djã kêt prãmje. Me kum ar ikurê:n ari ar ijo ba bar arým itĩn prã:m.

<sup>6</sup> Nym be, me Batĩndjwýnh kute me kaprĩo kĩnh ba tãm ne arým akubyn ar ijo kĩnh ne. Arým Xitu ar akurũm bõxkam ne bar akubyn ikĩnh ne. <sup>7</sup> Djãm bõxkambit ar ikĩnh? Kati. Kute ar imã ar ajarẽnh djõ'ã ne bar ajte ikĩnh. Nãm ar imã ar akam amikĩnh jarê. Nãm ar imã,

—Nãm me ar ajo ama: ne kaprĩre ne muwn mã memã kum, “Paur ne ba ar imã kĩnhkumrêx”, anhýro ba. Nãm ã Xitu ar imã ar ajarẽnho ane. Ba kam arým Xitu kĩnh djõ'ã badjwý ar akam ikĩnhkumrêx.

<sup>8</sup> Amrêbê ar ije ar amã pi'òk no'òkkam ne ba amim ingyk ne amiman ar ajã amim,

—Ý, watĩre. Mýkam ne ba arkum pi'òk no'òk ne arým arkum kaprĩ jadjà? ane. Djãm jakam ije amim anhýr rã'ã? Kati. Ije inhõ pi'òko ije ar amã kaprĩ jadjàr ngrirebit. <sup>9</sup> Jakam ne ba ikĩnh ne. Mýkam? Djãm ar akaprĩkam? Kati. Gar akaprĩkam arým akubyn amima. Ba kam arým ikĩnh ne. Ar aje Metĩndjwýnh kabẽn markôt gar arým akaprĩ. Akaprĩn arým akubyn amima. Ga, ar aje akubyn amimarkam ije ar ajo ibikênh kêtja pumũ. Ije pi'òkkam ar amã ikabên'ã no'òko ije ar ajo ibikênh kêtê.

<sup>10</sup> Me kute arým amikam Metĩndjwýnh kabẽn mar ne kôt kaprĩkam ne me

arým amiman wãnh axwemã iren Metĩndjwýnh'ýr amijo akêx. 'Ýr amijo akêx nhym arým me utà. Djãm kute me utarkam me amim ngryk ne kaprĩ? Arkati. Nym be, me kum Metĩndjwýnh kĩnh kêtjamã ne me kabẽn jarê nhym me arým amim ngryk ne amikam kaprĩ. Amikam kaprĩ kajgon wãnh axwemã iren kute Metĩndjwýnh'ýr amijo akêx kêt ne arým akuno. Me biknor tokry djãkam akuno.

<sup>11</sup> Nym be, amrêbê inhõ pi'òk ar awýr bõx ja ne gar amim arẽn aman arým amima. Amiman arým amijo mex prãm ne amijo mex ngry'ã ar ano kator me:x ne arým abenbê ar ajaxwe kurê. Abenbê ar ajaxwe kurên arým ar amã ajaxwe puma:. Ne kam ijo ama:n arým inêje mã memã akabên. Ne kam me'õ jaxwe jabe:j ne axwemã akatorcumrêx. Ar Metĩndjwýnh kabẽn kôt akaprĩkumrêxja pumũ. Ne kam arým ar amexo amirĩtkumrêx. Õbê ne ba ar amã apýnh mýjja kwý jarê. Gar arým jakam mýjja kunikôt imã amimexo amirĩtkumrêx ba arým ar ama.

<sup>12</sup> Ba amrêbê ar amã pi'òk no'òk ne. Me'õ jaxwe ne ba kuman pi'òkkam arým ar amã arê. Nãm ar ajo ajkê ba kuman pi'òkkam arým ar amã arê gar arým ama. Djãm ar aje jabit marmã ne ba ar amã arê? Kati. Ar aje badjwý imarmã. Ba ar ajã ino tỳ:x. Tãm ne ar aje marmã ne ba ar amã arê. Mrãmri ne ba ar ajã ino tỳxkumrêx. Metĩndjwýnh ta ne kute imar. <sup>13</sup> Ar aje ar imar ne akubyn ar akĩnhkam bar badjwý ar adjõ'ã akubyn ikĩnh.

Nym Xitudjwý ar awýr bõx ne bit umar punure. Gar kam akunĩ arým aêrbê o kĩnh nhym arým ar akam kĩnhkumrêx. Ne kam arým amrê tẽn iwýr bõx ne imã ar ajã ajarê bar badjwý arým ô'ã ikĩnh tire. <sup>14</sup> Nãm bãm Xitumã ar amextire jarê. Djãm kam ikabên kajgon arým kam ipijãm ne? Kati. Ije amrêbê ar amã ikabên kunĩ jarẽnhja ba ar akõnh kudji. Ije Xitumã ar amex jarẽnhdjwý ba ar amex kõnh kum arê. Nym kam ta ar awýr bõx ne arým ta ar amex pumũnhkumrêx.

<sup>15</sup> Ne kam ta ajte akubyn jakam bõx ne akubyn amijo tẽn ar ama:ro nhý. Nãm ar awýr bõx gar akunĩ aje kabẽn maro

akumex. Nã gãm ar atertet ne kum akabên mexbit jarê. Nãm akubyn amijo tẽn ar amaro nhÿn arÿm amybyÿm kum ar ajabê:ê.  
 16 Kam ne ba arÿm ate ikrãn amim ar amexbit man arÿm ar akam ikĩnhkumrêx.

## 8

*Kute me ôdjãnh'ã memã karô.*

*Kar 11.29; Rô 15.25; Kô k 16.1; Xim k 6.18*

1 Kam, akmere, àpnhÿre ar, ba ar amã pykabê Matenikam me arê. Ga, Matenikam apÿnh me kute amim Jeju mar ne kôt ar aben pydjio ba djãri ne me ukaprĩkumrêxja pumũ. Djãm me ta ne me ukaprĩ? Kati. Metĩndjwÿnh ta ne kum me kaprĩ ra:xi nhym me arÿm kuman arÿm ô'ã kum me kaprĩkumrêx. 2 Nãm me te amikam tokry ne kaprĩ kumex man arÿm apôkmã amikam kĩnh kati ma. Nãm me te ô mÿjja ngrire ne memã mÿjja nhôr prã:m. Nãm me tu ôdjãnhiti:re ne memã mÿjja kumex ngã.

3 Be, apÿnh me àpênh djã kôt ne me kute apÿnh pi'ôk kaprĩ jamÿnh. Me kwÿ ô pi'ôk kaprĩ rax nhym me kwÿ ô ngrire. Djãm Matenikam me ô pi'ôk kaprĩ rax? Kati, me ô ngrire. Nãm te me ô pi'ôk kaprĩ ngriren memã kumex ngã. Ba ne ba omũ. Me ta ne me memã kungã.

4 Nã bãm bit akubyn memã nênen memã kum,

—Kati. Ar anhô pi'ôk kaprĩ ngrire. Kôt dja gar memã ngrirebit ngã, ane. Nhym ar imã,

—Kati. Djeruxarêkam Jeju nhô me ja ne me ô mÿjja kêt ne kum prãm. Bar kam imã me kaprĩ. Ar ba dja bar memã kumex ngã, ane.

5 Bar kam me kute memã pi'ôk kaprĩ nhôrkam ama. Nhym kam me ta kumrêx ar ijaêrbê Metĩndjwÿnhmã amingãn amim,

—Ba katãt Bênjadjwÿr djwÿnh kabên man kôt amijo iba mex, ane. Ne kam amim,

—Ba Paur kabên man kôt amijo iba mex, ane. Metĩndjwÿnh kabênkôt ne me ã ane. Ne kam me kadjy ar imã pi'ôk kaprĩ ngã. 6 Matenikam me ã ane bar kam Kôrituwãkam ar abaja'ã Xitumã karô. Ta ne amrêbê ar awÿr bôx ne ar amã arê. Gar kam arÿm memã pi'ôk kaprĩo atommo krax. Nhym kam jakam ar iwÿr bôx. Kam ne bar ar ajã Xitumã karôn kum,

—Dja ga Kôritukam memã arê gê me mrãmri ukaprĩkumrêx ne pi'ôk kaprĩo atomo tẽn inomã mênhkumrêx, ane.

7 Akmere àpnhÿre ar, gar arÿm amex ne arÿm tu amim Metĩndjwÿnh markumrêxo aba. Ne aje kabên jarênh me:xkumrêx. Ne aje kôt mÿjja kume:x mar. Ne mrãmri akabênkumrêx ne amã ar ijabê:kumrêx. ã amexo ane. Nhym be, dja gar mekam adjukaprĩdjwÿ ne me kadjy pi'ôk kaprĩo atomkumrêx.

8 Djãm ar ba ne bar amirax pumũnh nhirãm ar amã,

—Ar iraxja man ar ikabên kôt memã o atomkumrêx, anhÿro iba. Kati. Nã bãm ã ar amã anhÿr kêt. Matenikam me ja kumrêx ne me memã o atomo tẽn inomã kumê. Ar gadjwÿ ar aje ar ikabên mar ne aje memã o atomo atêm ne inomã mênhmã. Djãm mrãmri ne gar amã ar ijabêkumrêx? Ar amã ar ijabêkam dja gar o atomkumrêx.

9 Bênjadjwÿr djwÿnhbê Jeju Kritu ta ne tu ukaprĩkumrêx. Tãm ne gar arÿm aje mar. Nãm ô mÿjja kumex. Mÿjja kunĩ ne ô mÿjja. Nãm te ô mÿjja kunĩn arÿm ar akadjy ô mÿjja kêt. Gar kam arÿm mÿjja kumexo anhô.

10 Ba kam arÿm ja man ar amã arê. Be, amũ amex ja'ã ne gar akumrêx aje memã pi'ôk kaprĩ nhôr prãm ne arÿm o atommo krax ne. 11 Jakam dja gar o atomo tẽn inomã mênhkumrêx. Djãm ar aje memã ôr prãm ne o atommo krax ne katêri krã'yrcam mex got. Kati. Gar amã memã ôr prãm ne ajte o atomo tẽn inomã mênhkumrêx. Kambit arÿm mex. Ar aje apÿnh adjãpênh pãnh pi'ôk kaprĩ jamÿnh kôt dja gar memã ikjê rên memã o atom.

12 Be, me kute memã ôr prãm kumrêxja ne Metĩndjwÿnh kute me mar ne arÿm mekam kĩnh. Djãm me'ô nhô mÿjja kêt kam dja Metĩndjwÿnh memã kum, “Memã angã”, ane? Kati. Me ô mÿjja rax gêdja 'ã akren pi'ôk kaprĩ rax ngã. Nhym be, me ô mÿjja ngrire dja 'ã akren pi'ôk kaprĩ ngriren kum kungã.

13 Djãm ar aje memã ôr nhym me kum prãm kêt gar ajte me pãnh anhô mÿjja kêt mã ne ar amã prãmmã? Djãm ja kadjy ne ba ar amã arê? Kati. Gêdja ar anhô mÿjja nhym amũ me ô mÿjja nhym kam ar ajô'ã katãm kêt. Gamê amũ me wãmê gêdja ar

anhõ mỳjjao aben pyræk. Ja kadjy ne ba ar amã ikabên. <sup>14</sup> Jakam arým ar anhõ mỳjja kumexkam ar aje memã kwỳ nhõr nhym memã prãm kêt mã. Nhym kam ajmãkam gar me pãnh amã prãm jabej nhym me õ mỳjja kumex jabej. Ne kam arým amipãnh ar amã mỳjja ngã. Gar kam anhõ mỳjjao aben pyræk. <sup>15</sup> Me bakukãmãre kute djwỳbê mỳj ne jao atomo bakam ne me ã ane. Amrêbê: ne me'ã memã kum,  
 “Nãm me djwỳo atom kumex nhym me mãnhkutã ne. Ne djwỳ'ã kàtãm kêtne. Nhym me jadjwỳ djwỳ ngrireo atom nhym me mãnhkutã ne. Ne me'ã 'ã kàtãm kêt ne.”

Nãm me ã me bakukãmãremã ane nhym me arým 'ã pi'òk no'òk ne. Ga, me kunĩ õ djwỳ nhym me'õ'ã djwỳ'ã kàtãm kêtja pumũ.

*Kute me'yr Xitu ar anor kadjy.*

<sup>16</sup> Be, Metĩndjwỳnh ne Xitumã amak bõ nhym kute ar amarkumrêx. Kute ba ije ar amar pyræk ne ã ar amaro ane. Ba kam Metĩndjwỳnhmã amikĩnh jarê. <sup>17</sup> Bar Xitumã ar ajã karõn kum,

—Dja ga memã arê gê me pi'òk kaprĩo atomo tẽn inomã mẽnkhkumrêx, ane.

Nhym ar imã,

—Be, mrãmri. Dja ba ã memã ane, ane. Ne kam ta kadjy ar awỳr tẽn prãm kumrêx. Ne kam arým kute ar awỳr pi'òko tẽn ne kute o bõxmã gar aje omũnhmã.

<sup>18</sup> Bar ar ajã Xitumã karõn kam kõt ije gwaj bakamyja 'òdjwỳ janormã. Gwaj bakamy jamê Xitu ar ar awỳr tẽn mã. Ar ikamy ja ne àpênh mexkumrêx. Kute Kritu'ã ujarênh ny jarênhkam àpênh mexkumrêx. Me kute amim Jeju mar kunĩ apỳnh kõt ar aben pydjio ba djari kunĩ ne me abenmã mex jarê. <sup>19</sup> Me kute Jeju mar ta ne me amijo utàn ar imã,

—Gwaj bakamy ja dja ar ikabên kõt ar akõt pi'òk kaprĩo tẽn memã kungã, ane. Gwaj bakamy ja ne bar kuman kumrêx Xitu kõt ar awỳr ano. Dja ar bõx gar me kadjy pi'òk kaprĩo atom inomã mẽnkhkumrêx. Ar badjwỳ dja bar ã ar awỳr tẽn bõx gar ar imã pi'òk kaprĩ ngã bar Xitumê ro'ã arým Djeruxarê'yr o tẽn. 'Yr o tẽn o bõx ne iro'ã memã kungã. Me ar ikõt Metĩndjwỳnh raxmã kator kadjy dja bar ã o

ane. Ar aje memã õr prãm nhym me kute jadjwỳ mar kadjy dja bar ã o ane.

<sup>20</sup> Godja bar memã pi'òk kaprĩ kumexo tẽn memã kungã. Nhym kam me ar ikõt gwaj bakamy tẽnja pumũn ar ijã ar idjãkĩnhĩ nhõr kêt. <sup>21</sup> Dja bar iro'ã katàt memã o tẽn o bõx. Metĩndjwỳnh dja katàt ar ije amijo ibakõt ar ipumũ. Nhym pykakam me ar badjwỳ dja me katàt ar ije amijo ibakõt ar ipumũ.

<sup>22</sup> Kam gwaj bakamy ja Xitu kõt ar awỳr tẽn mã. Dja bar kam gwaj bakamy 'òdjwỳ jano nhym arkõt tẽn. Gwaj bakamy jadjwỳ ne mexkumrêx. Metĩndjwỳnhmã àpênh kunĩkõt gwaj bakamy ja mrãmri kum ukanga kêt kumrêx ne kum àpênhkumrêx bar arým amim omũ. Nhym tu amim ar amarkumrêx. Kam ne ar akadjy àpênh prãm kumrêx. Gwaj bakamy jadjwỳ dja arkõt ar awỳr tẽn.

<sup>23</sup> Nhym Xitudjwỳ. Be, tãmjamê ne bar iro'ã apê. Ne kam arým ar iro'ã ar akam idjãpênhmã. Nhym gwaj bakamy ar jadjwỳ, apỳnh me kute amim Jeju mar ne kõt ar aben pydjio ba djari ne me ar ano. Nhym kam ar arým me kabên kõt ar awỳr tẽn mã. Kute memã Kritu raxo amirĩt kadjy ar awỳr tẽn mã.

<sup>24</sup> Kam dja gar pi'òk kaprĩo atomo tẽn inomã mẽnkhkumrêx. Nhym ar arým o ar amarkumrêx. Ar amã ar abêja markumrêx. Nã bãm ar mã memã ar ajarênho iba. Ar akam ar ikĩnh jarênho iba. Dja gar pi'òk kaprĩo atomo tẽn inomã mẽnkhkumrêx gê ar pi'òk kaprĩ pumũnhkumrêx. Kam dja ar abenmã kum,

—Mrãmri Paur kabênkumrêx, ane. Kam gêdja ar akubyn õ pykakam bõx. Bõx ne apỳnh me kute amim Jeju mar ne kõt ar aben pydjio ba djari memã ar ajarênho ba. Ne memã kum,

—Mrãmri ne me òdjãnhkumrêx. Nãm me arým pi'òk kaprĩo atom. Djeruxarêkam me kute Jeju marja kadjy ne me arým pi'òk kaprĩo atomkumrêx, ane. Dja ar ã ar ajarênho ane.

## 9

<sup>1-2</sup> Djãm ar aje amijã pi'òk kaprĩ nêmã ne ba ajte ar amã arê? Kati. Ar aje pi'òk kaprĩo atommã ne ba ar amã arê. Ar ga ne gar



aje Jeju nhõ me jamã o atom prãmkuvrẽx. Arým ba ar apumũn Matenikam me jamã ar ajarẽnho iba. Nã bãm memã kum,

—Onj, pykabê Akajakam krĩraxbê Kôritukam me ja ne me arým kute memã õr prãmkuvrẽx. Amũ amex ja'ã me kute memã õr prãmkuvrẽx. Nã bãm ã ar ajã memã anhỹro iba nhym kam me ar akudjwa kute memã õ pi'ok kaprĩ nhõr prãmkuvrẽx.

<sup>3</sup> Kam, ar aje pi'ok kaprĩo atomo atẽm ne inomã mẽnh kadjy ije ar awýr gwaj bakamy ar anormã. Ar ga ne gar imã,

—Dja bar o atomo tẽn inomã mẽnhkuvrẽx, ane. Kam dja gar o atomo tẽn inomã mẽnhkuvrẽx nhym kam ikabẽn dja kajgo kêt, Matenikam me jamã ikabẽn ja dja kajgo kêt. Nok ba ren ikabẽn kajgo. Ije memã kum,

—Kôritukam me ja kute õr prã:m, anhỹrkam gar ren katẽri pi'ok kaprĩo atom krãta ba ren arým ikabẽn kajgo.

<sup>4</sup> Dja ba ar awýr tẽ nhym Matenikam ar ja'õ ikõt ar awýr tẽm ne ar awýr bõx jabej. Kam bar ren ar awýr bõx ga ren ar arým pi'ok kaprĩ katẽri o atom krãta nhym ren Matenikam ar jamẽ ba ren ar ar apumũn ren arým ar akam ren ar ipijãm ne. Ga ren ar gadjwý kam apijãm ne. Ba ren ar amim,

—Nã bãm ar bit tỳx'ã me kamnhĩxkuvrẽx nhym meo mõn tu krãta. Bar kam arým ipijãm, ane.

<sup>5</sup> Gwaj bapijãm karõ ne bar abenmã kum,

—Gwaj amikukãm bakamy ar ano, ane. Ne kam arkum,

—Dja gar me'ýr atẽmkuvrẽx ne me'ýr bõx nhym kam me arým ar ikukãm pi'ok kaprĩo atomo tẽn inomã mẽnhkuvrẽx. Nã bãm ar ã arkum ane. Dja ar ikabẽn ja man ar awýr bõx ne ar amã arẽ. Arým ne ba amrẽbê ar amã arẽ. Ar aje o atomo atẽm ne inomã mẽnhmã ba ar amã arẽ. Djãm me kute pi'ok kaprĩ'ã ngryk ne amim,

—Je tõ, mýkam ne me ibê pi'ok kaprĩ jamýnho ba, anhỹrkam mex? Kati. Kam mex kêtkuvrẽx. Dja gar o atomo tẽn inomã mẽnhkuvrẽx bar arým ar awýr bõx gar arým anhõdjãnh ne akĩnhkuvrẽx. Ne kam arým me kadjy ar imã angã. Kam dja

bar arým Djeruxarẽmã o tẽn o bõx ne arým memã kungã.

*Me kĩnh ne kute memã mýjja nhõr raxmã. Kõ k 16.2; Xim k 6.18; Idja 13.16*

<sup>6</sup> Ba ar amã arẽ gar ama. Godja me 'y ngrẽre ne kren kam djwý ngrẽre ne o atom. Nãr, godja me 'y kumex ne kren kam djwý kumex ne o atom. Tãm dja gar anhõ pi'ok kaprĩ'ã ama. <sup>7</sup> Djã gãm ar abenã ar anhõ pi'ok kaprĩ jakre kuvrẽx ne amim,

—Be, kõt dja ba memã amikutã kwý ngã, anen kam memã angã. Kwãrĩk wãnh 'ã maje amim,

—Dja ba memã kwý ngã nhym ibê kêt ba ajmã nẽ, anhỹr kêt. Nãr, kwãrĩk wãnh 'ã maje amim,

—Gê me imã 'ã àpnẽnh tỳxmã ba kam memã kwý ngã, anhỹr kêt. Mýkam? Bir, dja me õdjãnh ne kĩnh ne memã mýjja ngã nhym Metĩndjwýnh arým kum me kĩnhkuvrẽx. Tãm dja gar ama.

<sup>8</sup> Djãm Metĩndjwýnh õdjý got ar abê mýjja 'õ nẽmã? Kati. Dja ar amã mýjja kunĩ ngã. Djãm kute ar amã mýjja ngrẽre nhõrmã? Kati. Mýjja kumex dja tu ar amã kungã gar arým akĩnhkuvrẽx. Ar gadjwý dja gar akati kunĩkõt mekam adjukaprĩkuvrẽx.

<sup>9</sup> Ikabẽnja kõt ne me amrẽbê: memã arẽn memã kum,

“Arým ne amikutã me õ mýjja kêtãmã õ mýjja ngrã. Nãm katãt amijo bakuvrẽx rã'ã: rã'ã ne.”

Nãm me amrẽbê ã me bakukãmãremã ane nhym me arým 'ã pi'ok no'ok ne.

<sup>10</sup> Ga, me kute pur kreõ mõrja pumũ. Metĩndjwýnh ne me kute kre kadjy kute memã 'y nhõr. Ne kam kute memã djwý nhõr. Me õ kwý krẽn djã'ã kute memã õr. Mýj'ã ne ba ar amã ja jarẽ. Bir, ar aje memã mýjja nhõr'ã ne ba ar amã ja jarẽ. Metĩndjwýnh ta dja ar apumũ. Dja gar me õ mýjja kêtãmã amikutã anhõ mýjja kwý ngã nhym arým ar apumũn ar amã mýjja kumex ngã. Ar aje memã mýjja nhõr jakrenh mex ne ar amã kungã. Ga, me kute mýjja 'y kumex ne kren arým õ djwý kumex ne kute o atomja pumũ. Ar gadjwý dja gar memã mýjja kumex ngã. Nhym Metĩndjwýnh arým pãnh ar amã

mýjja kumex ngã gar arým katàt ar amijo aban kum amexkumrêx ne.

<sup>11</sup> Ar anhôdjànkhkam mýj dja Metĩndjwýnh ar amã nê? Bir, dja mã ar amã mýjja kumex ngã gar mã amikutã memã anhô mýjja kwý ngã. Anhôdjànkh ne mã memã angã. Dja gar ar imã amikutã ar anhô pi'ók kaprĩ kwý ngã bar kubyn arým memã ar anhô pi'ók kaprĩ tẽn memã kungã. Dja me ar anhô pi'ók kaprĩ byn arým Metĩndjwýnhmã amikĩnh jarê. Gwaj badjô'ã kum amikĩnh jarê.

<sup>12</sup> Dja gar Jeju nhõ me jamã angã nhym me arým o amikĩnh. Djãm me o amikĩnhbit? Kati. Dja me kĩnh ne ar adjô'ã Metĩndjwýnhmã amikĩnh jarênho kumex. <sup>13</sup> Ne kam ar amarkumrêx ne arým Metĩndjwýnhmã kum,

—Mrãmri ne me kute Kritu'ã ujarênkh ny markumrêx ne arým akabên kôt ôdjànhtire. Ôdjànhtire ne arým amikutã ar imã õ mýjja kwý ngã arým amũ me kum prãm kunĩmã kwý ngã. Bar kam arým amã amextire jarê, ane. Ar aje memã pi'ók kaprĩ nhõrkam dja me ã Metĩndjwýnhmã ane.

<sup>14</sup> Ar aje memã pi'ók kaprĩ nhõrkam dja me kum ar ajabên arým ar akadjy Metĩndjwýnhmã kabên ne kum,

—E kum, Djünwã, me kĩnh djà rax ne ga memã angã nhym me arým adjô'ã ar imã pi'ók kaprĩ jano. Bar kam amã amextire jarê, ane. Dja me ã Metĩndjwýnhmã ajã ane.

<sup>15</sup> Mýj kĩnh djàja ne Metĩndjwýnh memã kungã? Bir, Kraja ne arým memã kungã. Nãm gwaj bakunĩmã kungã. Kra ra:xi. Mýj me'õ ne kute prĩne 'ã ujarênkh mex kadjy 'ýr bõx. Arkati. Kra ra:x ne gwaj bamã kungã gwaj kam kum amikĩnh jarê.

## 10

### *Mrãmri ne Kritu kute Paur janorkumrêx.*

<sup>1</sup> Ga, Kritu kabôt kati ne kute memã prĩ mex ne ar meo baja pumũ. Ja ne ba kuman arým ar amã ikabên mex jarê. Ar gadjwý dja gar Kritu man badjwý ikabên ma. Ba ibê Paur ikabên ma. Wãkam me'õ ar memã kum,

—Paur ne amybým kute týx pyrãk ne me ýtãri 'ýr bõxkam kum me uma:, ane. Djãm mrãmri me kabên? Kati. <sup>2</sup> Dja gar on ikabên

ma. Got ba ren ar awýr bõx ne tu ar amã ibên tý:x ne. Nã bãm anhýr djwýnhràmm amim,

—Dja ba wãkam bõx ne ar kwýmã ibên týx jabej, ane. Ar akwý aje amim,

—Paur ne amidjwýnhbito kĩnh ne axwe ar ba, anhýro abakam ba ibõx ne ije ar akwýmã ibên týx karõ ne ba ar amã,

—Dja gar on ikabên ma, ane. <sup>3-5</sup> Ga, me kurê djwýnh me'ýr bõxja pumũ. Me'ýr bõx nhym me arým ãbêr djã jamýn o me'ýr prõt ne arým aminêje me aê. Pykakam ne me ã aminêje meo ane. Djã ne bãm ar ã me kudjwa ane. Kati. Nã bãm ar ije pykakam me ãbêr djã jamýnh kêt. Metĩndjwýnh ne tý:x. Bar týxo itýx ne me nêje ikabêno me ity nhym me arým anhikrê.

Ga, me kurê djwýnh kwý kute aminêje kikre tý:x nhípêxja pumũ. Nhym be, me týxo me ja jakre ne me arým me'ã kikre kate. Ne kam arým pardja'ã me pa 'amýn meo ban meo bõx nhym kam me arým memã ãpênkh ar ba.

Me kwý jadjwý ne me kute me bakurê djwýnh pyrãk. Me 'êxnhĩ. Metĩndjwýnh ne kute gwaj bamã amijã ujarênkh pydji baje mar pydjimã nhym me arým 'êx ne ta amijo Metĩndjwýnh mar mex ne arĩk kupa'ã memã 'ã ujarênkh punu. Nhym kam me arým me ma:ro ba. Nhym me Metĩndjwýnh kupa'ã apýnh mýjja rũnh jarên mebê Metĩndjwýnh kabênkumrêx kurên arým me noo akno. Nãm me memã 'êx ba. Me kabên 'êxnhĩ ne kute mrãmri ne me õ kikre týx pyrãk. Bar kam ikabêno me ity nhym me arým ar imã rerekre. Ar imã rerekre nhym me arým katàt Kritu'ã ujarênkh man katàt kabên kôt ar amijo ba. Kam ar ije mrãmri ne me kute me pardja'ã me pa 'amýnh ne me meo ban meo bõx pyrãk nhym me arým Kritu kôt amijo ba.

<sup>6</sup> Ar gadjwý dja gar prĩne Kritu kabên kôt amijo aba mex ba arým bõx. Bõx nhym ar ajõ ate aje ar amijo aba prãm rã'ã ba arým ar amã ibên týx gar arým pãnh atokry.

<sup>7</sup> Ar akwý ne gar abenmã,

—Djã ne Kritu Paur jano? Kati, anhýro aba. Ba ar amã arê gar ama. Djãm gwaj baje me krãkãbit pumũnh ne kam arým amim, “Tãmwã ne mex”, ane nãr, “Tãmwã ne mex kêt”, ane. Djãm gwaj baje me

krākàbit pumũho ne arým prĩne me mar mex? Kati. Djãm mrãmri Kritu ar ajo bakumrẽx gar arým ama. Aje mrãmri markumrẽx jabej ar badjwý ar ima. Djãm Kritu kute ar ijo ba kêt got? Ar badjwý mrãmri Kritu kute ar ijo bakumrẽx. Gwaj ba ne Kritu kute gwaj bajo bakumrẽx. Gwaj baje aben pyræk. Tãm dja gar ama.

<sup>8</sup> Ba ren ar amã ar irax jarẽnh kume:x. Djã ne ba ren kam amikam ipijãm? Kati. Mrãmri ne Bẽnjadjwýr djwýnh ar ba ar ijã irax mẽnkhkumrẽx. Ar akadju ar ijã ar irax mẽnkhkumrẽx. Djãm ar ije ar amã ibẽn týt kadju ne ar ijã rax mẽ? Kati. Bar Kritu'ã ar amã ajarẽ gar mar mexo amũ amikamẽn mar rax. Ja kadju ne Bẽnjadjwýr djwýnh ar ijã rax mẽ.

<sup>9</sup> Ba ren ajte ar amã amirax jarẽnh kumex. Nhyr be, kati. Me kute ar amã,

—Paur ne ar amã pi'òk no'òko kute ar ajaer prãm, anhýr. Djãm mrãmri? Kati. Ije ar ajaer prãm kêt. <sup>10</sup> Me kwý ta ne me arĩk ijã kabẽn ne ar amã,

—Paur ne pi'òkkambit we kabẽnkumrẽx ne týt:x. Djãm mrãmri ne týt:kumrẽx? Kati. Dja ta anhýtãri ar awýr bõx ne arým rerekren kabẽn punure gar amã kabẽn kĩnh kêt, ane. Nãm me kwý ã ijã ar amã ane.

<sup>11</sup> Gora gẽ wãkam me'õ ar ajte ikabẽn ma. Amybým ar ikabẽn kajgo kêt. Pi'òkkam ar amã ar ikabẽnkumrẽx. Dja ba wãkam ar awýr bõx ne wãkamdjwý itýt:kumrẽx. Ar ije pi'òk no'òkkam 'itýt kõt itýt:kumrẽx.

<sup>12</sup> Me kwý ta ne me amiraxo àmra ba. Me kum me kĩnhmã ne me ta amijo àmra ba. Djãm ar ije amijo me uræk? Kati. Djãm ar ije me'ã amijakreo iba? Kati. Nhyr be, me ta ne me amirax jabej abenã amijakreo ban amim,

—Irax kute tãmwã rax pyræk, anhýro ba. Nãr,

—Ba ne ba iraxo tãmwã jakre, anhýro ba. Djãm kam me krã mex? Kati. Me krã punu.

<sup>13</sup> Nhyr be, kati. Metĩndjwýnh ne ar imã idjãpênh djã'ã karõ bar Kritu'ã memã idjujarẽnh ar iba. Djã ne bar kam amijo me'õ nhõ àpênh djã pytàn 'ã ar amijo amra? Kati. Metĩndjwýnh ta ne ar imã ar idjãpênh djã'ã karõ. Kabẽn kõt ne bar memã Kritu jarẽnh 'ýr meo akẽxo iba. Kute ar imã ar

idjãpênh djã jakre kõt ne bar idjãpênh tẽ:n kam arým ar gadjwý ar awýr bõx ne arým ar amã arẽ. Ar ba ne bar ar amã Kritu jarẽnh arým ar gadjwý 'ýr ar ajo akẽx ne. Ar ije Kritu'ýr ar ajo akẽxkam ne bar iraxja.

<sup>14</sup> Bar ren ar awýr ibõx kêt ne ren arĩk ar amã amijarẽnh kajgo. Nhyr be, kati. Arým ne bar ar gadjwý ar awýr bõx ne ije kãj bê ar amã Kritu'ã ujarẽnh ny jarẽnhkumrẽx. Kam ne bar ar akadju irax.

<sup>15</sup> Pyka 'õdjwýkam dja me'õ Metĩndjwýnhmã apên arým Kritu'ýr meo akẽx. Djã ne bar kam me kwý kudjwa õ pykakam õ me ja'ýr bõx ne õ àpênh djã'ã amimẽn arĩk memã kum,

—Ba ne ba Kritu'ýr ar ajo akẽx ne. Kam ne ba ar akadju irax, anhýro iba? Kati. Ar ije ã memã anhýr prãm kêt. Adjým. Dja ba ajte akubyn ar awýr bõx ne ajte ar amã Kritu kabẽn jarẽ. Gar kam arým amim Kritu mar mexo amũ amikamẽnho tẽ:n arým mar mexkumrẽx. Nhyr kam ar abu'ã me krãptĩ arým ar adjõ'ã ajte 'ýr amijo akẽx ne.

<sup>16</sup> Dja gar ajte ar ikõt o kangõ bar ajte amũ ar anhjukri me jamã arẽnh tẽ. Amũ memã Kritu'ã ujarẽnh ny jarẽnh tẽ. Ja ne bar kam ama. Djãm ar ije me kwý kudjwa me'õ djãpênh djã'ã amimẽn ne arĩk me àpênh proo idjãmra prãm? Kati.

<sup>17</sup> Amrêbê: me kute me bakukãmãremã arẽnh kõt bar amijo iba. Nãm me memã kum,

“Djãm amijo adjãmra prãm? Kwãrĩk wãnh amijo adjãmra kêt.

Dja ga Bẽnjadjwýr djwýnho amra.” Nãm me ã memã ane bar kabẽn man kõt ar amijo iban amijo idjãmra kêt ne Bẽnjadjwýr djwýnho amra. <sup>18</sup> Djãm me'õ ta kute amijo rax ne kute memã amijarẽnhkam Metĩndjwýnh kute 'ã memã kum, “Ã. Mrãmri ne raxkumrẽx”, anhýr? Kati. Metĩndjwýnh ta kute me'õ'ã rax mẽnkhkambit kute 'ã memã kum, “Mrãmri ne raxkumrẽx”, anhýr.

## 11

*Me 'êx ne ta kute amijo Jeju kute anor pyræk.*

*Mat 7.15; Rô 16.17; Kor 2.8; A Ped 2.1*

<sup>1</sup> Ba ije ar amã amijarênhkam kute ibên kati pyrâk. Ar arek nhÿn ikabên ma. Nã, dja gar arek ikabên maro nhÿ. <sup>2</sup> Nã bãm ar ajã ino tÿ:x kute Metïndjwÿnh ò me ja'ã no tÿxja pyrâk. Dja gar katàt Kritu kôtbít amijo aban ajaxwe kêt. Kwãrïk wãnh me kum Metïndjwÿnh kïnh kêt kukràdjàjakôt amijo aba kêt. Mekôt ar aje amijo aba kêt kadjy ne ba ar ajã ino tÿx ne.

Ga, me bãm, me nã kra ni'ã no tÿxja pumũ. Me my kute Ar kubê kupênh kêt kadjy kra'ã no tÿxja pumũ. Nhyam kam arÿm abatàn nhym nhym mjên pydji 'ÿr mörkumrêx nhym krô'ã mjên kêtumrêx.

Badjwÿ. Ba arÿm Kritumã ar ajarên kum, —Kôritukam ar ja dja ar katàt akôtbít amijo ban me kum akïnh kêt kukràdjaja kôt amijo ba kêt. Nã bãm ã kum ar ajarênho anen arÿm ar ajã ino tÿx ne. Dja gar katàt Kritu kôtbít amijo aban ajaxwe kêt. Kwãrïk wãnh me kum Metïndjwÿnh kïnh kêtja kôt amijo aba kêt. Mekôt amijo aba kêt kadjy ba ar ajã ino tÿx ne.

<sup>3</sup> Me kute ar anoo biknor karô ne ba ar akam axwe idjumar. Ar aje katàt Kritu pydji kôt amijo aban ajaxwe kêt mã. Godja me arïk kupa'ã ar amã mÿjja kwÿ jarê gar aman arÿm Kritu kupa'ã amijo aban ajaxwe. Nãm ã kangã no tÿ:xkam kute me bakwatynh Ewamã 'èx ne noo biknoro ane. Me kute ar gadjwÿ ar anoo biknor karô ne ba ar akam axwe idjumar.

<sup>4</sup> Godja me ar awÿr bôx ne ije ar amã Jeju'ã ujarên ny jarên kupa'ã ar amã atemã Jeju 'òdjwÿ'ã ujarên jabej. Djã nã gãm ar me kanga? Kati. Nã gãm ar tu amã me kïnh ne arek me kabên maro akrï. Djã nã gãm ar me kôt Metïndjwÿnh Karô maro aba? Kati. Atemã me karô punu ne gar me kôt maro aba. Djãm Kritu'ã ujarên ny ne gar amim maro aba? Kati. Atemã mÿjja punu'ã ujarên ny ne gar maro aba. Nãm me ar amã kupa'ã arê gar amã me kïnh ne arek me kabên maro akrï.

<sup>5</sup> Me kwÿ ta amijo 'èx ne ar amã,

—Kritu ne ijano ba ar amã arênho iba, ane. Ta ne ar amijo raxo ba. Djãm mrãmri ne we ar ja ikurãm rax? Kati. <sup>6</sup> Nãm me ijã,

—Paur ne kabên tô, anhÿro ba. Kwãrïk wãnh rã'ã. Ikabên tô. Djã ne ba Kritu'ã ajarên ikabên tô? Kati. Ar ga ne gar

prïne katàt 'ã idjujarênha ma, ikabên amirïtkumrêxja ma.

<sup>7</sup> Nã bãm ar amã ujarên ny jarên pãnh ije amim ar abê pi'òk kaprï jamÿnh kêt. Djãm kam ne gar arÿm ijo kajgo? Ije amim ar abê pi'òk kaprï jamÿnh kêt kam ne ije amijo me kajgo pyrâk. Mÿkam ne ba ã amijo ane? Bir, ije ar ajo raxmã ne ba ije amijo me kajgo pyrâk. Djãm kam ne gar amim,

—Paur kajgon axwe, ane. Kwãrïk wãnh gar amim anhÿr kêt.

<sup>8</sup> Djãm ba ne ba ar amã amijo a'uw? Kati. Amũ me ja ne ba me ku'uw, ne apÿnh me ò pykakam mrãn bôx ne me kute amim Jeju mar ne kôt ar aben pydjio ba djãri me ku'uwn memã kum,

—Ar ikôt o kangô ba Kôritukam memã arê. Nã bãm ã memã ane nhym me arÿm imã pi'òk kaprï ngã ba amÿ. Ne kam ar akam bôx ne ar amã Kritu kabên jarê. Ne kam ba inhô mÿjjao pãnh ne. Amũ me'ò nhô pi'òk kaprïo inhô mÿjjao pãnh. Ije ar amã idjã'wÿr kêt kadjy ne ba inhô mÿjjao pãnh ne ar akam idjapênh ar iba. Ar amã arênho iba.

<sup>9</sup> Ne kam ar akam ar iba nhym kam prãm iwÿr bôx. Djã nã bãm ar ajô 'uw? Kati. Mateni kurũm gwaj bakamy ar bôx. Ne kam ar ta arÿm ijo djuw mex. Inhô mÿjja ibê kêt nhym ar arÿm imã kunï ngã. Ar akam idjapênh kunïkôt ije pãnh ar abê pi'òk kaprï jamÿnh kêt. Dja ba rã'ãn ar abê amÿnh kêtumrêx ne.

<sup>10</sup> Mrãmri ne Kritu kabên katàtkumrêx. Badjwÿ kôt katàt ar amã ikabên jarênhkumrêx. Pykabê Akajakam ar abê Kôritu ar, ije idjapênh pãnh ar abê pi'òk kaprï jamÿnh kêt. Ije amÿnh kêt'ã dja ba ar amã amijarênho iba rã'ã. Dja gar ajô ije amijarên jabê adjaptar kêtumrêx. <sup>11</sup> Ije idjapênh pãnh ar abê pi'òk kaprï jamÿnh prãm kêt. Ja'ã ne ba ije ar amã amijarên prãm ne arÿm ar amã amijarê. Mÿkam? Djãm imã ar ajabê kêt kam? Kati. Imã ar ajabêkam ne ba arÿm ar amã amijã arê. Metïndjwÿnh kute imar.

<sup>12</sup> Ne ba ren ar abê pi'òk kaprï jamÿ nhym ren me'ò ikaxã ar amã,

—Be, djãm ar bajbit ne bar ar abê pi'òk kaprï jamÿ? Ga, Paurdjwÿ kute ar abê pi'òk kaprï jamÿnh ar o bawã pumũ. Ar ije aben

pyràkja pumũ, ane. Ar kute ijã, “Ar ije aben pyràk”, anhÿr karõ dja ba irã'ãn idjàpênh pãnh ar abê pi'òk kaprĩ jamÿnh kêt rã'ã ne.

<sup>13</sup> Djãm mrãmri ne bar ije aben pyràk? Djãm mrãmri ne Kritu ar ano kute mrãmri kute ijanorja pyràk nhym ar 'ã ujarênh ar ba? Arkati. Nãm ar ar anoo biknoro ba. Nãm ar ta memã 'êx ne memã,

—Kritu ne ijano ba 'ã idjujarênh ar iba, ane. <sup>14</sup> Djã ne ba amim,

—E kum, mÿkam ne ar me noo biknoro ba, ane? Kati.

Ga, me axwe nhõ bënjadjwÿrbê Xatana-djwÿ kute me noo biknorja pumũ. Nãm amijo Metĩndjwÿnh kadjy mrãnh djwÿnh pyràk ne me noo biknoro ba. <sup>15</sup> Kam õ àpênhdjwÿ ar õ bënjadjwÿrbê Xatanaj kudjwa memã 'êx ne amijo Metĩndjwÿnh nhõ àpênh pyràk. Ar ta arĩk ar amã,

—Dja gar ikabênh man kam mrãmri katàt ar amijo abakumrêx, anhÿro ba. Kam ar kute aminhinomã amimênhkam dja Metĩndjwÿnh ar 'êxnhĩ kôt arkum o pãnh katàt nhym ar arÿm me biknor tokry djàkam akuno.

*Apÿnh amikaprĩ djãri Paur kute 'ã amijarênh.*

<sup>16</sup> Ba ajte ar amã arê gar ama. Kwãrĩk wãnh amim,

—Paur ne amimex jarênh ba. Ga, bën katikumrêxja pumũ, anhÿr kêt. Nàr gar aje ijã amim anhÿr jabej arek nhÿn ikabênh ma. Ba ajte ar amã amimex jarê gar ama.

<sup>17</sup> Ije ar amã amimex jarênh ja ne kute Bënjadjwÿr djwÿnh kabênh pyràk kêt. Ne kute ar amã ibênh kati pyràk ne ar amã amijarê. <sup>18</sup> Me krãptĩ ne ar amã amijo àmra prã:m. Me kute amidjwÿnhbito kĩnh kadjy amijo àmra prã:m. Ba ne ba bir amimex kôt ar amã amijarênh amirĩtkumrêx gar badjwÿ ima.

<sup>19</sup> Me kwÿ ne me mrãmri bën katikumrêx. Nãm me ar awÿr bõx ne ar amã amijarê gar arek me kabênh maro akrĩ. We ar akrã mex ne kam arek me bën kati maro akrĩ.

<sup>20</sup> Dja me'õ bën kati ar akwÿ apa 'amÿn amiwÿr ar ajo akêx gar arÿm kôt ar amijo aba. Ne kam ate akrã arek me'õja kabênh maro akrĩ. Dja me'õ bën katikôt ar akwÿ anoo aknon ar abê mÿjjao prõt, gar kam ate

akrã arek me'õja kabênh maro akrĩ. Me'õ ta dja ar akam amijo ra:x nàr ar akwÿ nobê tak ne. Gar kam ate akrã arek kabênh maro akrĩ.

<sup>21</sup> Ba ren badjwÿ ar amã ibênh tÿx gar ren ikabênh ma. Nhym be, kati. Ba ne ba ar amã ibênh tÿx kêt. Ba akrãnmã ar akam ar iba gar kam arÿm amim, “Paur rerekre ne kajgo”, anhÿro aba. Nhym be, kati. Irerekre ne ikajgo kêt.

Me ta ne me amijã, “Jeju ne ijano ba bõx”, anhÿro ba. Me amijo amra:n arĩk ar amã, “Ba ne ba iraxkumrêx.” Nãm me ã ar amã anhÿr ar o ba. Ba badjwÿ jakam ar amã amimex jarê gar ama. Nã bãm ije ibênh kati pyràk ne ar amã amirax jarê gar ama.

<sup>22</sup> Djãm ar wãbêbit ne ebraga. Badjwÿ. Djãm ar wãbêbit ne idjaer. Badjwÿ ibê idjaer. Djãm ar wãbêbit ne Abraão tàmdjwÿ. Badjwÿ ibê Abraão tàmdjwÿ. <sup>23</sup> Djãm ar wãbêbit ne Kritu nhõ àpênh. Badjwÿ ibê Kritu nhõ àpênhkumrêx ne o ar akrenh mex. Nã bãm ije ar amã ibênh kati pyràk ne ar amã amirax jarê. Nã bãm kum idjàpênh tÿxo ar akrenh mex ne.

Me kute mry kã punuo ikaprêprêk kume:xi. Ba te ije itak'ã akremã.

Ne kute ajte ibê ijê krãptĩ ar akrenh mex ne.

Ne ajte bit kute ibĩnmã ijo baja krãptĩ: ba ityk puma ar iba. Ga, ibê Kritu nhõ àpênhkumrêxja pumũ.

<sup>24</sup> Kamã ne apÿnh mebê idjaer djãri ajte mry kã punuo ikaprêprêk kumex. Nãm me ikaprêprêk nhym kam me ajte ikaprêprêk nhym kam me ajte ikaprêprêk nhym kam me ajte ikaprêprêk nhym kam me ajte ikaprêprêk. Me kute ikaprêprêk kunĩkôt ne me kute mrykã punuo itak'ã akre krãptĩ: kute 39 pyràk.

<sup>25</sup> Nhym kam me ajte kôo ititik ne. Nhym kam me ajte kôo ititik ne. Nhym kam me ajte kôo ititik ne.

Nhym kam me ajte kute ibĩnmã kêno ititi:k ne. Ga, ibê Kritu nhõ àpênhkumrêxja pumũ.

Ba kãkamdjwÿ, kã rũnhkam ngô raxbê pyka kêt kam iba nhym ijã kã ja wadjã. Ne ajte ijã ja wadjã. Ne ajte ijã ja wadjã.

Ba ajte ngô raxkam wadjà ne pĩ'ã wajê:t ne ar iba:.. Nhyim ijã akamât ne akati ba wabi.

<sup>26</sup> Nã bãm ar imrãnh kume:x ne. Nhyim kam ajte apỹnh ngô rũnh djàrikam idjãr pyma: ne.

Nhyim apỹnh me àkĩnhĩ kute ijaêrbê ijo tỹm ne ijo bikênh pyma:.

Nhyim apỹnh mebê idjaerdjwý kute ijo bikênh pyma:.

Nhyim me bajtemdjwý kute ijo bikênh pyma:.

Apỹnh krĩrax djàrikam ar iba ne apỹnh kapôt kukrit djàrikam ar iba ne ngô raxbê pyka kêt kam ar iba. Ja kunĩkôt ne mýjja kute ijo bikênh pyma: ne.

Nhyim me 'êx ne kute amijo Jeju mardjwý kute ijo bikênh pyma:.. Ga, ibê Kritu nhõ àpênhkumrêxja pumũ.

<sup>27</sup> Nã bãm idjãpênh pytĩdjwýo iku'ên o amidjôm me:x ne.

Ne ajte inhôt kêt krãptĩ:.

Prãmmê kôrkam ne ba ajte ar iba.

Ije ajte amijajbur kumex.

Ajte imã kryn ikà kêt ne ar iba.

<sup>28</sup> Ikà krãkà'ã mýjja ne ja.

Ba kam me kute amim Jeju marja ma:ro ikrĩ. Apỹnh me kute amim Jeju mar ne kôt ar aben pydjio ba djãri ne ba kunĩkôt me ma:ro ikrĩ. Ne me kwý'ã àpnhĩx ne, ne akati kunĩkôt mekam idjumar punu:re.

<sup>29</sup> Dja mekam me'õ rerekre. Djãm kôt irerek kêt got? Kôt badjwý irerekre.

Dja me Metĩndjwýnhbê me'õo akêx. Djãm o ingyryk kêt got? O ingyrykkumrêx. Nã bãm me ma:ro ikrĩ. Ga, Kritumã idjãpênhkumrêxja pumũ.

<sup>30</sup> Me kwý ta kute amijã,

—Kritu ne ijano ba bôx, anhỹro baja djãm mrãmri ar kum àpênhkumrêx. Kon. Ga, Kritumã idjãpênhho ije me akrenh mexja pumũ. Dja ba ar amã amimex'ã idjujarênh prãm jabej arým ar amã apỹnh itokry djãri, apỹnh ikaprĩ djãri'ã ar amã ajarê. Kunĩ kôt irerekre. Ba ar amã irerekredjwý 'ã ajarê gar ama.

<sup>31</sup> Bênjadjwýr djwýnhbê Jeju Tĩndjwýnh kute imar. Jeju Bãm, mexti:re rã'ã: rã'ã ne. Tãmja ne kute imar. Ije amimex jarênh ne ijêxnhĩ kêt kôt kute imar.

<sup>32</sup> Ba ajte ar amã irerekre jarê gar ama. Krĩraxbê Tamagu nhõ bênjadjwýrja bit kute ipa 'amýnhmã. Bênjadjwýr rax Areta ne Tamagu nhõ bênjadjwýr jamã nhỹ. Tamagu nhõ bênjadjwýr õ krãkamngônhamã ijarê. Nhyim krĩrax bu'ã pyka tỳx nhipêx apỹnh ajkwa krekre djãri. 'Ã ikator nhyim me kute ipa 'amýnh kadjy nãrãm ne me ibê kre kunĩ pytà. <sup>33</sup> Nhyim me kute amim Jeju mar arým djudjêdjêo kaxnokai jakã 'ãpren kam inhỹr. Ne kam kýjrũm krĩrax nêje pyka tỳxja burũm imê. Kre krã'yrykôt burũm imên arým ijo ruw. Ba arým pykabê djan mã mebê ikaton iprôt ne. Be, djãm kam 'itỳx got? Kati. Ba ne ba irere:kre. Nhyim be, Metĩndjwýnhbit tỳ:x ne arým ipytã.

## 12

*Kute kãjkwa pumũnh'ã amijarênh.*

<sup>1</sup> Djãm ije amikôt ar amã amijarênhho iban kôt iraxmã? Kati. Kwãrĩk wãnh rã'ã. Ba ar amã mýjja'ã ajarê. Me kute mýjja pumũnh kêtja ba arým omũ. Dja ba ar amã 'ã ajarê. Bênjadjwýr djwýnh kute amrêbê memã mýjja jarênh kêt. Arým ne imã arê. Nãm imã arê ba arým kuma. Dja ba ar amã 'ã ajarê gar ama.

<sup>2</sup> Ba amipumũ. Ije amim Kritu markam amipumũ. Nhyim kam Metĩndjwýnh arým amiwýr ijo àbiro tẽ ba amipumũnhho tẽ. Nãm kãjkwa jan iby jan amũ ja. 'Yr ne ijo wabi, amiwýr ijo wabi ba arým amipumũ. Bãrãm inhĩtã got ijo wabi nãr kon ikadjwýnhbit got o wabi. Kon, ije mar kêt. Metĩndjwýnh ta ne kute mar. Ba ije amipumũnhja'ã arým amex krãptĩ apêx. Amexbê 14 ne ijukri ajmã 'ã akre kute ne ijã apêx. <sup>3</sup> Bãrãm inhĩtã got ijo wabi nãr kon ikadjwýnhbit got o wabi. Kon. Ije mar kêt.

<sup>4</sup> Nã bãm amipumũnhho tẽ nhyim Metĩndjwýnh amiwýr õ kãjkwa djwýnhmã ijo wabi. Kãjkwa djwýnh ne me:xkumrêx. Kam mýjja punu kêt kumrêx. Metĩndjwýnh õ kãjkwa djwýnhmã ijo wabi ba amipumũ. Ne kam arým kam me kabên ma. Me kabên mexkumrêx. Punu kêt kumrêx. Ba kam te ije me kabên jarênhmã. Mexti:rekam te ije arênhmã. Pykakam me babêngôkre kabên'yry bôx kêt. Nhyim ta ibê uma, ije arênh kêt mã.

<sup>5</sup> Be, tãm ne ja. Ije amipumũnhja'ã dja ba ar amã amikôt amijarê. Djãm ba ije ar amã amimex jarẽnhmã? Kati. Ba irerek mexi. Kam ne ba ar amã amikôt amijarê. <sup>6</sup> Nãr, ba ren ar amã amimex jarê djã ne ba ren ibẽn kati? Kati. Ba ren ibẽn kati kêtikumrêx ne kam mrãmri ar amã amimex jarê. Ne ren katàt amimex kôt ar amã amijarẽnhkumrêx nhym ren me'õ arým ren ijo amra: ne. Nhym be, kati. Irerekre'ã dja ba ar amã amijarê gar kam arým aje ipumũnh kôt ne aje ikabẽn mar kôt imar katàt.

<sup>7</sup> Ga, kute imã apÿnh mÿjja pumũnh kêtjao amirĩtja pumũ. Nãm imã mÿjja rũho amirĩt. Ba ren kam 'ã amijo amra. Nhym be, kati. Kam amijo idjãmra kêt kadjy itokry djã ja iwÿr bõx. Mrãmri itokry djã ja ne kute mrÿnhĩ arek me ikam ku'ê nhym me tokry pyrãk. Xatanaj imã itokry djã ja jano nhym iwÿr bõx ba arým itokry. <sup>8</sup> Kam, kute kubê ipytãr kadjy ba te Metĩndjwÿnhmã amijo a'uw. Ne ajte te kum amijo a'uw. Ne ajte te kum amijo a'uw.

<sup>9</sup> Nhym arým imã,

—Kati. Dja ga atokryja mar rã'ã ne. Be ga, me tokry ne kaprĩrekam rerekreja pumũ. Me te rerekre ba idjukaprĩn itÿx puroo memã tÿx jangij. Gadjwÿ dja ba ajo djuw mex. Dja ga te atokry ne arerekre ba dja ba ajo djuw mex ga arým atÿx.

Nãm ã Metĩndjwÿnh imã ane. Kam ba itokry ne irerekre rã'ã. Tãm ne ba ije ar amã arẽnh prãm. Irerekre dja ba ar amã arẽ, me kunĩmã irerekre jarê. Kritu tÿxo itÿx kadjy ije memã irerekre kôt amijarẽnh prãm.

<sup>10</sup> Kam Kritumã idjãpênhkam mã ne ikute? Bir, apÿnh irerek djãri ne iwÿr ban bõx. Nhym apÿnh me kwÿ imã akij. Nhym apÿnh itokry djãri iwÿr ban bõx. Nhym apÿnh me kwÿ ijo ajkê. Nhym apÿnh mÿjja puma djãri ikam apõx. Te apÿnh mÿjja ikam apõx ne te irerekre ba kunĩkôt ikĩnh. Mÿkam? Bir, dja ba ba irerekre nhym Kritu arým imã tÿx jadjà ba arým itÿx ne.

*Me kute kupa'ã Paur mar.*

<sup>11</sup> Ije amimex kôt ar amã amijarẽnhkam kute ibẽn kati pyrãk. Mÿkam ne ba amimex jarê? Bir, ar aje ikupa'ã ijarẽnhkam. Ar ga ne gar ikupa'ã abenmã kum,

—Djãm Kritu ne Paur jano nhym 'ã ujarẽnh tẽ? Kati. Kute anor kêt, ane. Ba kam amã amimex kôt amijarê. Ba amimex kôt amijarẽnh kute ibẽn kati pyrãk. Ar ga ne ga ren ar abenmã kum,

—Mrãmri ne Kritu kute Paur janorkumrêx nhym gwaj bamã 'ã ujarẽnh ar ba, ane. Ga ren ar anen ba ren amimex kôt ar amã amijarẽnh kêt. Ar akam me'õ ar ta arĩk amijo 'êx ne kute ar amã,

—Kritu ne ijano ba ar amã idjujarẽnh ar iba, anhÿr ne ta amijo raxo ba. Djãm mrãmri ne ba we ar wã katëri irax? Kati. Ba ne ba ar wãmê ije aben pyrãk ne ar katëri itêm kêtikumrêx. Ne kam djãm ba ne ba irax? Kati. Ba ne ba ikajgo. Nhym be, mrãmri ne Kritu ijano ba 'ã idjujarẽnh ar iba.

<sup>12</sup> Amrêbê ne ba arek akrãnmã ar akam mÿjja pumũnh kêt nhipêxo iba. Ne apÿnh me punu djãri meo mex gar omũn arým Kritu raxmã akato. Ba ar akam mÿjja rũnh nhipêxo iba gar amim,

—Mrãmri ne Kritu kute Paur janorkumrêx. Ga, Kritu kute anor kôt kute mÿjja nhipêxja pumũ. Nã gãm ar amrêbê ã amim ane. Mÿkam ne gar jakam arým amim,

—Kati. Kritu kute Paur janor kêt, ane?

<sup>13</sup> Mÿkam ne gar jakam arým amã ikĩnh kêt ne? Nã gãm ar amim,

—Be, Paur kum me ikĩnh kêt. Nãm kum me wãbit kĩnh. Kum apÿnh me kute amim Jeju mar wãbit kĩnh. Kum apÿnh kôt me ar aben pydjio ba djãri wãbit kĩnh ne arým àpênh pãnh mebê pi'ók kaprĩ jamÿ. Nhym be, gwaj bajbit ne kute gwaj babê pi'ók kaprĩ jamÿnh kêt. Nã gãm ar ã amim ane. Djãm mrãmri imã me wãbit kĩnh? Kati. Imã ar gadjwÿ kĩnh. Imã ar akĩnh aben pyrãk. Kwãrĩk wãnh gar ikam angryk kêt.

<sup>14</sup> Ota, jakam ba arým ar awÿr itëmmã. Arým ne ba ar akam tẽn ajte ar akam tẽ. Ne jakam ajte ar akam itëmmã. Dja ba ar akam tẽn bõx ne ajte idjãpênh pãnh ar abê pi'ók kaprĩ byr kêt. Djãm ar anhõ mÿjja ne ba abej ne ar akam itëmmã? Kati. Imã ar anhõ mÿjja prãm kêt. Ar aje amim Jeju mar raxmã ne ba ar akam itëmmã. Ja ne ba imã kĩnh. Djãm me kra ne kute bãm kadjy mÿjjao atom ne adjwÿr? Kati. Bãm ne kute kra kadjy mÿjjao atom.

<sup>15</sup> Ba ije ar abãm pyræk dja ba ar akadjy apê:n prĩne ibê inhĩ kato. Ne kam ikaprĩ kêt. Ikĩnhbit. Ar ga dja gar te amã ikĩnh ngrire. Ba dja ba kãjmã imã ar akĩnh kamênho tẽn mã ar akadjy apê. <sup>16</sup> Be, ar ga ne gar ima. Idjãpênh pãnh ije ar abê pi'òk kaprĩ jamýnh kêtja ma. Nnym be, ar akam me'ò arĩk ar amã,

—Djãm me kum prãmja kadjy ne Paur kute ar abê pi'òk kaprĩ jamýnh? Kati. Paur no týxtikam ne arĩk ar amã 'êx ne ar anoo akno. Nãm arým ar anhõ pi'òk kaprĩo aminhõ, anhýro ba.

<sup>17</sup> Be, amrêbê ba ar awýr ar ja jano nnym ar awýr bõx. Ne kam arým ar abê pi'òk kaprĩ byn arým imã o bõx. Djãm kam ne ba arým o aminhõ? Kati. <sup>18</sup> Nã bãm ar ajã Xitumã karõ. Gwaj bakamy jadjwý ba arkõt ano nnym ikabên kõt ar arým ar awýr tẽn bõx. Djãm Xitu kute ar anhõ pi'òk kaprĩo aminhõ? Djã ne atemã ibê kabên djĩn atemã ibê amijo tẽ? Kati. Ar ije imrãnh katãto aben pyræk gar arým ama.

<sup>19</sup> Ar akwý ne gar aje abenmã kum,

—Be, Paur ar mrãmri gwaj bajo ajkê. Ga, ar kute aminêje gwaj bamã amijã àprãrja ma, ane. Djã ne bar ar ajõo ajkê got bar ar amã amijã aprã? Arkati. Bar tu amim Kritu markumrêx ne ar amã amijarê nnym Metĩndjwýnh ta kute ar imar. Akmere àpnhĩre ar, djãm ar ije amijo djuw mex kadjy ne bar ar akam apê? Kati. Ar gajbit bar ije ar ajo djuw mex kadjy ar akam apê. Ar ije ar amã arênh gar aje Kritu mar raxmã. Ja kadjy bar ar akam apê.

<sup>20</sup> Imã ar ajaxwe kêt prãm. Nok ren ar ajaxwe ba ren ar awýr bõx. Ar amã ne ba ikabên mexobit ikabên prãm. Ikabên ja ne gar amã kĩnh. Ne ba ren ar awýr bõx ne ren ar amã ibên týx ne. Ar amã ibên týx karõ ba amikukãm pi'òkkam ar amã ikabên. Ga ren ar aje akabêno aben japanh prãm ba ren ar awýr bõx ne ren ar amã ibên týx ne. Ga ren ar aje aben nhõ mýjja'ã angyræk prãm nãr ren ar aje abenkam adjãkrê prãm ba ren ar amã ibên týx ne. Nãr ga ren ar abenmã adjãkjêr prãm nãr ren abenã akabên punu ba ren ar amã ibên týx ne. Nãr ren ar aje aben kãxã abenbê aben kurê prãm nãr ren abên kati prãm nãr ren abenmã adjãkjêro

abikarêr prãm ba ren ar amã ibên týx ne. Ar awýr ibõx gar akrãptĩ ajaxwe ja'õ karõ ne ba pi'òkkam amikukãm ar amã ikabên ne.

<sup>21</sup> Ga ren ar akwý ajaxwe prãm rã'ã. Nãr ren akwý ar aprõ djwýnh kupa'ã akurê aba prãm rã'ã. Nãr akwý amjên djwýnh kupa'ã akurê aba prãm rã'ã. Nãr ren akwý aje apijãm kêtikam adjãpênh punu prãm rã'ã. Amrêbê ar akwý ã ajaxweo ane ba ar amã pi'òk no'òk ne. Ar amikam akaprĩren wãnh ajaxwemã anhirer ne aje akubyn Metĩndjwýnh'ýr amijo akêx kêt karõ ne ba amikukãm pi'òkkam ar amã ikabên ne. Ba ren ar akam bõx nnym ren Metĩndjwýnh ar akam imã irerek jadjã ba ren ar akrãptĩkam imýr rax. Ar akam imýr rax karõ ne ba amikukãm ar amã ikabên ne.

## 13

*Kute me kwýbê axwe puma.*

<sup>1</sup> Jakam ba arým ar awýr itẽmmã. Arým ba ar akam tẽn ajte ar akam tẽ. Ne jakam ajte ar akam itẽmmã. Be, amrêbê: Metĩndjwýnh me bakukãmãremã kum, “Dja me'ò amijarênh jabej. Gê ar amãnhkrut nãr ar amãnhkrut ne ikjêkêt kabên kõt memã arê. Ar kute kabên mar kõt arê nnym me arým kuma.

Ar axikõt kabênkam dja me ar kabên man arým abenmã kum,

‘Mrãmri me'õja kute amijarênh nnym ar kute kabên kõt arênhkumrêx’, ane.

Dja me ã abenmã ane.”

Nãm ã Metĩndjwýnh me bakukãmãremã ane. Ja dja gar amijã ama. <sup>2</sup> Be, õbê ne ba ar awýr bõx. Ne kam ajte ar awýr bõx ne ar abê ajaxwe puma. Jakam ba ajte ar akãxã pi'òkkam ar abê uma. Ja dja gar amijã aman ikabên mar pydji. Amrêbê ar akwý ajaxwe jabej nãr ajbir ar akwýdjwý axwe jabej djãm ije ar amã iprĩmã? Kati. Dja ba bõx ne ar amã iprĩ kêt ne tu itýx.

<sup>3</sup> Gar akwý ijã,

—Goja mrãmri Paur Kritu kabêno kabênkumrêx jabej bar goja kabênkumrêxmã ikato, anhýro aba. Ar aje ijã anhýrkam dja ba bõx ne itýx. Djãm Kritu ar akam àpênhkam rerekre? Kati. Ar akam tý:xi.

<sup>4</sup> Mrãmri me kute pĩte'y'ã nhõrkam memã



amijo rerekre. Nãm te memã amijo rerekren jakam Metĩndjwýnh 'itỳxkõt tĩn ne ar ba. Ar badjwý ne bar kõt amijo irerekre. Ne te amijo irerekre dja bar bõx ne Kritu kõt itĩn ne ar iban Metĩndjwýnh 'itỳxo ar akam itĩn ne ar iba.

<sup>5</sup> Djãm bajbit ne gar aje imexkõt imã akatormã? Ar gadjwý dja gar amima:ro tẽn amim akatorkumrẽx ne amim,

—Djãm mrãmri ije tu amim Kritu markumrẽx? ane. Dja ga ã amikukjêro anen kam mrãmri ar aje tu amim markumrẽx jabej amim,

—Nã ije mrãmri tu amim Kritu markumrẽx, anen kam arým ja markumrẽx. Aje tu amim markumrẽxja markumrẽx. Ja dja gar amim akatorkam ama. Kritu ne mrãmri ar akam ýrkumrẽx. Djãm ar aje amikam ja mar kêt? Nãr kon, ar ajõ ga mrãmri amijo ajêx ne amijo Jeju mar jabej nhym kam mrãmri ar akam ýr kêt.

<sup>6</sup> Dja gar amiman arým ar badjwý ar iman amim,

—Mrãmri ne Paur ar kute Kritu markumrẽx, ane. Ar aje amim ja jarênh ne ba kam ama.

<sup>7</sup> Jakam ne bar Metĩndjwýnhmã ar ajo a'uw ne kum,

—Dja ga meo djuw mex gê me axwe'õ kêt, ane. Mýj kadjy dja gar ajaxwe kêt? Djãm me kute ar akõt ar imar ne kute ar imã mex jarênh kadjy? Kati. Godja me te ar ijã, “Paur ar ta ne amijo 'êx ne amijo Jeju maro ba”, anhýr rã'ã jabej. Kwãrĩk wãnh rã'ã. Ar ba dja bar we amijo ijêx ne. Ar ga dja gar katàt ar amijo aban ajaxwe kêt. Ar ajaxwe kêt mã ne bar ar ajo Metĩndjwýnhmã a'uw.

<sup>8</sup> Djãm bar Metĩndjwýnh kabên katàt kupa'ã amijo iba nhym kam arým kabên katàt kêt? Kati. Metĩndjwýnh ta kabên katàt rã'ã: rã'ã ne. Nhym be, kati. Bar katàt kabên kõtbit amijo iba prãm kumrẽx. Nhym kam me arým ar ikõt Metĩndjwýnh kabên katàtkumrẽxmã kato.

<sup>9</sup> Dja bar te memãbit irerekre. Kwãrĩk wãnh rã'ã. Ar ga dja gar Metĩndjwýnh kabên kõt katàt ar amijo aban arým atýx. Kõt atýxkam ar ikĩnhkumrẽx. Prĩne ar amex ja ne ar imã kĩnhkumrẽx.

<sup>10</sup> Mýj kadjy ne ba ar akàxã pi'òkkam ã amikukãm ar amã ikabêno ane? Bir, ba ren ar awýr bõx ne ren ar amã ibên týx. Bẽnjadjwýr djwýnh kute ijã rax mẽn kõt ba ren ar amã ibên týx. Ar amã ibên týx karõ ne ba ar akàxã ã amikukãm ar amã ikabêno ane. Djãm ije ar ajo ibikênh kadjy ne ijã rax mẽ? Kati. Dja ba ar amã arê gar amim Jeju mar mexo amũ amikamên arým mar rax ne. Ja kadjy ne ijã rax mẽ.

*Kute memã amikabên mex jarênh ino rer.*

<sup>11</sup> Akmere àpnhĩre ar, ikabêno ino rer ne ja. Dja gar adjumar mex ne prĩne Metĩndjwýnhmã amex. Ne prĩne amijã ikabênja ma. Ne axikõt ar akabên ne abenmã akabên mexo akabên. Dja gar amijo ane nhym Metĩndjwýnh arým ar amê amijo kajkep. Kubê ne me kum aben jabê djã krõ krax. Kubê ne me umar mex djã krõ krax. Tãm gêdja ar amê amijo kajkep.

<sup>12</sup> Dja gar amã aben jabêo amirĩt kadjy aben pa krij ne aben tatak. <sup>13</sup> Amrê jakam Jeju nhõ me ja kunĩ ne me amũ ar amã kabên mex jarê.

<sup>14</sup> Gê Bẽnjadjwýr djwýnhbê Jeju Kritu tu kum ar akunĩ kaprĩn\* ar ajo ba. Gê Metĩndjwýnh kum ar akunĩ jabên ar ajo ba. Gê Metĩndjwýnh Karõ ar akunĩ mẽ amijo kajkep ne ar ajo ba. Tãm ne ja.

\* **13:14** Djãm ar ga ne gar adjukaprĩ nhym pãnh arým kum ar akaprĩ Kati. Ta ne tu kum ar akaprĩkumrẽx.

## Paur kute Garaxakam me jamã pi'ôk no'ôk ne ja.

Paur ne pykabê Garaxakam me jamã pi'ôk no'ôk ne. Nãm arým pyka kunĩ'yr mrãnhkôt me'yr bôx ne memã Jeju jarê nhyim me kwý arým tu amim markumrêx ne 'ã abeno akprô. Nhyim kam Paur arým mã me jadjwý'yr tẽ nhyim tekrekam mebê idjaer kwý me'yr bôx ne memã kum,

—Djãm ar aje tu amim Jeju markam-bit Metĩndjwýnh kute ar apytãr? Kati, dja gar prĩne Mõjdjê kukràdjãdjwý kôt ar amijo aban kam arým Metĩndjwýnhmã amex, ane.

Nhyim kam Paur memã kum,

—Arkati. Mrãmri ne me tu amim Jeju markumrêx nhyim Metĩndjwýnh arým memã axwe kêt jarê nhyim me arým kum mex. Me ta ne me mýjja kukràdjãkôt amijo bakôt Metĩndjwýnhmã mex kêt. Mrãmri ne me tu amim markumrêx nhyim Metĩndjwýnh ukaprĩkôt arým memã axwe kêt jarê, ane.

Djã nãm ã Abraão Mõjdjê kukràdjãkôt amijo bao ane nhyim Metĩndjwýnh arým kum axwe kêt jarê? Kati, nãm tu Metĩndjwýnh markumrêx ne arým Metĩndjwýnhmã mex. Nhyim amũ tũmrãm Mõjdjê katon memã kukràdjã jarê. Bir be, gwaj badjwý tu amim Jeju markumrêx ne arým kênhkam ar baba. Gwaj bajaxwe kute gwaj bate djê pyrãk ne gwaj babê Metĩndjwýnh kurê. Nhyim Metĩndjwýnh arým bajaxwebê bapytã. Arým ne gwaj bate djê apêx. Mýkam dja gwaj akubyn Mõjdjê kukràdjã tũmo amite djê ar o baba? Kati, Jeju kute gwaj bajãpre bõnhkam gwaj kênhkam ar babakam gwaj Jeju kukràdjã ny kôt amijo baba rã'ã. Nãm ã Paur memã anen ajte memã Jeju kute anor kôt memã amijarê. Tãm ne ja.

<sup>1</sup> Ba ne ba ibê Paur. Djãm pykakam me'õ kajgo ne ijano? Nãr, djãm Metĩndjwýnh ne me'õ kajgomã ijã karõ nhyim ijano? Kati. Jeju Kritumẽ Bãmbê Metĩndjwýnh ijano ba arkum idjãpênh iba. Jeju Kritu arým ty

nhyim Bãm akubyn o tĩn ne. <sup>2</sup> Jeju kukwakam bakamydjwý ikôt dja bar wãm ar amã ikabên mex jarê. Pi'ôk no'ôkkam ar amã arê. Pykabê Garaxakam apýnh ar aje amim Jeju mar ne kôt ar aben pydjio aba djãri ne ba ar amã ikabên mex jarê.

<sup>3</sup> Metĩndjwýnhbê ne me Babãm. Ne Bẽnjadjwýr djwýnhbê ne Jeju Kritu. Gê ar tu kum ar akaprĩn\* ar ajo ba gar adju-mar mex rã'ã ne. <sup>4</sup> Jeju Kritu ne gwaj bakadjy amingã. Nãm gwaj bajaxwe pãnh ty. Me kum Metĩndjwýnh kĩnh kêtja ne me axwe:. Mekôt bajaxwe kêt kadjy gwaj bapãnh ty. Kute kubê gwaj bapytãr kadjy gwaj bapãnh ty. Me Babãmbê Metĩndjwýnh kute kum 'ã karõ kôt ne gwaj bapãnh ty. <sup>5</sup> Metĩndjwýnh ne ra:x ne uma:. Gê me aben djô'ã memã Metĩndjwýnh rax jarênh rã'ã: rã'ã ne. Mrãmri, tãm ne ja.

*Me memã Kritu kupa'ã ujarênh nhyim mebê uma.*

*Mat 7.15; Ep 4.14; Kor 2.8; A Ped 2.1*

<sup>6</sup> E kum, djãm ar ga ne gar ajaxwe kêt nhyim Metĩndjwýnh pãnh kum ar akaprĩn amiwýr ar ajuw ne ar ajo ba? Kati. Ar ga ne gar ajaxwe: nhyim ta kum ar akaprĩ. Kritu ar ajaxwe pãnh ty nhyim kam Metĩndjwýnh ta kum ar akaprĩn amiwýr ar ajuw ne ar ajo ba. Nhyim kam wãnh me kwý ar awýr bôx ne arým 'êx ne ar amã we Kritu'ã ujarênh ny 'õdjwý jarê. Me wãnh ar amã arê gar arým ijaêrbê me'yr amijo akêx ne mekôt amijo abao dja. <sup>7</sup> I:je. Djãm mrãmri ne me ar amã Kritu'ã ujarênh ny jarê? Kati. Nãm me arĩk ar anoo biknoro ba. Kritu kupa'ã ne me ar amã arênh o ba.

<sup>8</sup> Arým ne bar kãj bê ar amã arê, katãt Kritu'ã ujarênh nykumrêx jarê gar arým amim ama. Nhyim be, godja ar ijõ akubyn ar awýr bôx ne ar amã Kritu kupa'ã ajte ujarênh ny 'õdjwý jarênh jabej gê Metĩndjwýnh on pãnh o akno gê biknor rã'ã rã'ã ne. Nãr, godja kãjkwakam kadjy mrãnh djwýnh 'õ ar awýr bôx ne ar amã kupa'ã ujarênh ny 'õdjwý jarênh jabej gê Metĩndjwýnh on pãnh o akno gê biknor rã'ã: rã'ã ne. <sup>9</sup> Bar ajte jakam ar amã arê gar ama. Arým ne bar katãt ar amã

\* **1:3** Djãm ar ga ne gar adjukaprĩ nhyim ar pãnh arým kum ar akaprĩ Kati. Ar ta ne ar tu kum ar akaprĩkumrêx.

Kritu'ã ujarënh nykumrëx jarë gar amim ama. Nhyim be, godja me'õ ar awÿr bõx ne ar amã Kritu kupa'ã ajte ujarënh ny 'õdjwÿ jarënh jabej gë Metïndjwÿnh on pãnh o akno gë biknor rã'ã: rã'ã ne.

<sup>10</sup> Djãm me kum ikĩnhmã ne ba abej ar iba? Kati. Metïndjwÿnh kum ikĩnh ne ba abej. Djãm ije meo kĩnh prãm got? Kati. Ne ba ren meo kĩnh prãm ba ren ibë Metïndjwÿnh nhõ àpënhkumrëx kët.

### *Jeju ta ne Paurmã amijarë.*

#### *A Kõ 1.12; Tex k 2.4*

<sup>11</sup> Akmere, àpnhïre ar, ba ar amã arë. Ije kàj bê ar amã Kritu'ã ujarënh ny jarënhja djãm me'õ ta ne amim ujarënh'ã karõn imã arë? Kati. <sup>12</sup> Djãm me kute aben djõ'ã ujarënh ar baja ne me'õ imã arë ba o iba? Kati. Nãr, djãm me'õ kute prïne ujarënh marja ne imã arë ba kuma? Kati. Jeju Kritu ta ne imã ujarënh ny jarë ba maro iba. Tãm ne ba jakam pi'õkkam wãm pykabë Garaxakam ar amã arë.

<sup>13</sup> Arÿm ne me ar amã ijã ajarë gar ama. Amrëbë ne ba mebë idjaer kukràdjã kõt ar amijo iban Metïndjwÿnh nhõ me ja kute amim Jeju maro ibikënh kumex. Ne kam me kute amim Jeju mar kët kadjy mebë Jeju kurën abenbë me ngrãnhõ iba. <sup>14</sup> Ne mebë idjaermë ro'ã ijabatãnhja ije me kukràdjã maro me akrenh mexo tã. Ne me ikukãmãre kukràdjã tũm'ã ino tÿ:x ne o iba.

<sup>15</sup> Nhyim kam Metïndjwÿnh ta arÿm kum ikĩnh ne kum ikaprï. Djãm ba ne ba imã kĩnh nhyim kum ikaprï? Kati. Ta ne tu kum ikaprïn arÿm amiwÿr ijuw ne ijo ba. Adjãkamã inã tikkrekam ijëtri ne Metïndjwÿnh amijo ipytã.

<sup>16</sup> Ije kàj bê me bajtemmã 'ã idjujarënh kadjy arÿm imã Krao amirït. Kute imã Krao amirïtkam djã nã bãm o me'õ kumrëx ma nhyim arÿm imã arë ba õ'ã memã arënhõ iba? Kati. Kritu ta ne imã arë. <sup>17</sup> Nãr, djã ne ba krïraxbë Djeruxarë kumrëxmã tën bõx? Nãm Jeju ar ja kumrëx janon kam badjwÿ ijano ba kum idjãpënh ar iba. Djã nã bãm Jeju kute ar anor ja kumrëx'ÿr Djeruxarëmã tën bõx nhyim ar imã kabën'õ jarë ba memã arënhõ iba? Kati. Ar'ÿr Djeruxarëkam itëm kët. Ate ne ba pykabë Arabijkam tã. Ba kam ajte akubyn krïraxbë

Tamagumã akëx. Kritu ta ne imã kabën jarë ba memã arënhõ iba. Tãm ne ba jakam pi'õkkam wãm pykabë Garaxakam ar amã arë.

<sup>18</sup> Nhyim kam ijã amex amãnhkrut ne ikjêkët apëx. Kambit ne ba arÿm Djeruxarë'ÿr tã. Ije Pedru pumũnhmã 'ÿr tã. Ne kam Pedru'ÿr bõx ne ar iro'ã nhÿ. Ar iro'ã nhÿ: nhyim ar ijã akatibë 15bit apëx ne. Djã ne ba kam idjãm 'iry got Pedru imã me kabën 'õ jarë ba memã arënhõ iba? Kati. <sup>19</sup> Djã ne ba kam Jeju kute ar anorja 'õdjwÿ pumũ? Kati. Ije ar 'õ pumũnh kët. Bënjadjwÿr djwÿnh kamy axikõt katorja ne kubë Xijagu. Xijagubit ne ba omũ.

<sup>20</sup> Djã nã bãm ar amã ijëx? Kati. Metïndjwÿnh kute imarkam ne ba mrãmri ar amã ikabënkumrëx.

<sup>21</sup> Ne kam Djeruxarë kurũm ikaton tã. Të:n kajõnhkõt pykabë Xirijmë Xirxij'ÿr tã. Të:n kam arÿm kam bõx.

<sup>22</sup> Nhyim Djeruxarë bu'ã pykabë Djudëjakam apÿnh me kute amim Jeju mar ne kõt ar aben pydjio ba djãri me kute ipumũnh kët rã'ã. <sup>23</sup> Nhyim be, me kwÿ ne me amũ memã ijarën memã kum,

—Paur kute me bajo bikënhõ ba ja ne arÿm jakam kàj bê Kritu'ã memã ujarënh ar ba. Me kute Kritu kõt amijo bamã memã 'ã ujarënh ar ba. Me kute Kritu mar kët kadjy ne Paur amrëbë mebë Kritu kurëo ba. Ne jakam arÿm 'ã memã ujarënh ar ba. Nãm me ã ijarënhõ ane. <sup>24</sup> Nhyim me arÿm jabit man ikam Metïndjwÿnhmã mextire jarënhõ kumex. Be, djãm kam ne me'õ ikabën'ã imã karõ ba memã arënhõ iba? Kati. Kritubit ne imã arë ba arÿm pi'õkkam wãm pykabë Garaxakam ar amã arë.

## 2

### *Pedru ar kute Paur kabën'ã aben mar.* *Kar 15.4*

<sup>1</sup> Nã bãm ar iba: nhyim kam ijã amexbë 14 apëx. Ba kam Banabekõt Djeruxarëmã tã. Xitudjwÿ ne ba o tã. <sup>2</sup> Metïndjwÿnh ta ne imã 'ã karõ ba kabën kõt 'ÿr tã. 'ÿr tã:n kam arÿm 'ÿr bõx. Ne kam me krãptï kãxã me rũnh kumrëxmë ro'ã akuprõ. Me kute amim Jeju mar rũnhmë ro'ã akuprõ. Memãbit ar rũnh pyrãkjamë ro'ã akuprõ. Ne kam memã arë. Ije me bajtemmã

Kritu'ã idjujarênh ny jarênh ibaja ne ba memã arê. Ne ba ren Djeruxarêkam me krãptĩ kumrêxmã arênh ren kam te memã arê nhym ren me kute imar kêt ne. Nhym be, kati. Me krãptĩ kàxã ne ba me rũnh kumrêxmã arê.

<sup>3-4</sup> Nhym Xitubê me bajtembê kreguja ikôt dja. Me ja ne me kute Môjdjê kukràdjã kôt amijo ba kêt ne my nhinhu kà tã. Nãm Xitu ikôt dja. Nhym me ta kute amijo 'êx ne kute amijo Jeju mar mexja ne me arým apdjun mekôt wadjã. Bar Kritu Jeju kabênh kôt idjumar mex ne ar ibamã nhym me amim,

—Paur ar kute Môjdjê kukràdjã kôt amijo ba katãt jabej ba ar omũ. Gêdja ar kôt amijo ba kêt ba me kukràdjã'ã arkum apnê, ane. Ga, me ta te: kute Môjdjê kukràdjã kôt amijo ba mexja pumũ. Ne te: Metĩndjwýnhmã amijo mexo ban umar punu. Ar idjumar punu ja kadjy ne me ã amim ar ijã ane. Ne kam te: kute Xitu my kà krã'ymã memã 'ã apnê. Djã ne me kute amim Jeju markam me rũnh ja ne mekôt kabênh dji? Kati. Me mekôt kabênh djir kêt ne kute,

—Gê ar Môjdjê kukràdjã kôt amijo tẽn on Xitumã my kã ta, anhÿr kêtumrêx.

<sup>5</sup> Djãm ar ba ne bar me ta kute amijo Jeju mar mexja kabênh kôt Xitu my kã krãta? Kati. Bar me kabênh kôt Môjdjê kukràdjã kôt amijo itêm kêtumrêx. Mÿkam? Bir, ne ba ren ar mekôt amijo tẽn my kã krãta gar ren ikôt Môjdjê kukràdjã maro aban kôt ar amijo aba. Ne kam ren arým Kritu kabênh katãt mar kêt ne kôt amijo aba kêt. Amrêbê ne bar ar amã katãt Kritu'ã ujarênh ny jarê gar kôt ar amijo aba. Kôt amijo aba rã'ã kadjy ne bar me ja kôt amijo iba kêtumrêx.

<sup>6</sup> Nhym be, memãbit ar kute rũnh pyrãk ja, me kute ar'ã abenmã kum,

—Amrêbê ne ar gwaj bamã wan gwaj bajo ba. Gwaj bamã ne ar raxkumrêx, anhÿrja. Djãm me kute ar rũnh'ã abenmã anhÿrkam djãm imã ar uma? Kati. Memãbit ne ar kute rũnh pyrãk. Nhym be, Metĩndjwýnhmã ne ar ngri:ren kajgo. Bir be, Kritu ne imã kabênh jarê. Djãm ijukri ne ar rũnh imã mÿjja 'ôdjwý jarê ba kam memã arênh ibaja? Kati. Ar kute ijukri imã mÿjja'ô jarênh kêtumrêx. <sup>7</sup> Ne kam ar ipa krij ne

ar itatakbit. Arým ne ar kute imar ne ar abenmã kum,

—Be, mrãmri ne Metĩndjwýnh Paurmã kum, “Ga dja ga me bajtemmã Kritu'ã ujarênh ny jarê”, anhÿrkumrêx. Nãm ar ã abenmã ane.

<sup>8</sup> Metĩndjwýnh ne mebê idjaermã Pedru jano nhym arým memã Kritu'ã ajarê. Ga, me krãptĩ: arým kute tu amim markumrêxja pumũ. Metĩndjwýnh ajte badjwý ijano ba me bajtemmã 'ã ajarê. Ga, me jadjwý krãptĩ tu kute amim markumrêxja pumũ. <sup>9</sup> Xijagumê Pedrubê Xepamê Djuãomê ne ar kumrêx tũm. Ar memãbit rũnh. Ar ja ne ar amim,

—Mrãmri ne Metĩndjwýnh ta kum Paur kapri:kumrêx nhym mrãmri arým kôt kum ãpênhkumrêx, ane. Nãm ar anen arým Banabemê bamê ar ipa krij ne ar itatak ne ar imã,

—Mrãmri ar ga dja gar me bajtem'ÿr mrãn memã 'ã ajarê. Nhym be, ar ba dja bar mebê idjaer'ÿr mrãn memã 'ã ajarê, ane. <sup>10</sup> Ne kam ar imã,

—Dja gar ar ikam me ò mÿjja kêt mar rã'ã, ane. Jabit ne ar ar imã arê. Ba kam arým ar kuman amũ memã me arênh ibaja nhym me arým memã mÿjjao atomo ba. Nã bãm ã Djeruxarêkam me maro anen arým pi'òkkam wãm pykabê Garaxakam ar amã arê.

### *Paur Pedrumã kabênh ne.*

<sup>11</sup> Bar kam krĩraxbê ãxikimã tẽn bõx ne kam dja. Nhym kam Pedru nĩnh tẽn kam ãxikimã ar iwÿr bõx. Ba kam arým kuka kõnh kum ikabênh ne. Arým Metĩndjwýnh kabênh kupa'ã kute amijo tẽmkam ne ba kum ikabênh ne.

<sup>12</sup> Mÿkam? Bir, amrêbê ne Pedru tu me bajtemmê ro'ã àkuro krĩ. Ar ba ne bar me bajtemmê ro'ã idjakuro nhÿ nhym Pedru mekmê ro'ã àkuro nhÿ. Nhym kam me kwÿ Môjdjê kukràdjã'ã no tÿxja arým bõx. Xijagu kurũm ne me bõx. Me ja ne me memã kum,

—Dja me me bajtemmê ro'ã àkuro krĩn arým Môjdjê kukràdjã kupa'ã amijo tẽ. Nãm me ã memã anhÿro ba. Me ja bõx nhym Pedru arým me omũ. Ne kam arým me bajtemmê ro'ã ò kwÿ krênh krãtan arým ate nhÿ. Me Môjdjê kukràdjã'ã no tÿxja, me

my kà rênhneja, kute 'ã kum kabên karõ ne Pedru ate nhỹ. Me ja kute kum,

—Kwãrĩk wãnh me bajtemmẽ ro'ã adjàkur kêt. Abê mebê idjaer. Môjdjê ne me bamã, “Kwãrĩk wãnh me bajtemmẽ ro'ã adjàkur kêt”, ane ga kam me ro'ã adjàkuro akrĩ, anhỹr karõ ne Pedru ate nhỹ.

<sup>13</sup> Nhyam kam ar ikam mebê idjaer kunĩ Pedru kôt amijo mõn ate ar ibê nhỹ. Nhyam kam Banabedjwỹ arỹm rerekre ne me umaje kôt amijo tẽn ate me bajtembê amijo tẽn ate ar ibê nhỹ.

<sup>14</sup> Ba kam me omũ. Kritu'ã ujarênh ny ne katàtkumrêx nhyam me arỹm kupa'ã amijo mõ ba arỹm me omũn arỹm Pedrumã ikabên ne. Me kunĩ nhípõkri ne ba 'ã kum ikabên ne kum,

—E kum, ga ne ga arỹm me bajtem kôt ar amijo aban ajte. Ga arỹm mebê idjaer kukràdjábê amijo akêx ne arỹm me bajtem kôt ar amijo aba. Mýkam ne ga arỹm jakam ajte mebê idjaer kukràdjà kôt me kute amijo ba'ã me bajtemmã karõo dja? Nã bãm ã Pedrumã ikabêno ane.

<sup>15</sup> Ne kam ajte Pedru arkum,

—Mrãmri me bakukãmãkjê kôt ne gu me babê idjaerkumrêx. Me baje me bajtem'ã abenmã kum, “Me axwe”, anhỹro baba. Djãm me baje me wã kôt amijo baba got? Arkati. Me ba ne gu me babê idjaerkumrêx. <sup>16</sup> Djãm kam me kute Môjdjê kukràdjà kôt amijo bakam ne me mrãmri axwe kêt? Kati. Me kute kukràdjà kôt amijo baja ne me te axwe kêt prãmje. Nhyam be, me tu kute amim Jeju Kritu markumrêx. Nhyam kambit arỹm memã axwe kêt jarê nhyam me kum axwe kêt. Tãm ne gwaj amrêbê kuma. Me bajtemja ne me tu amim Kritu markumrêx. Gwaj badjwỹ ne gwaj bajaxwe kêt kadjy tu amim Kritu Jeju markumrêx. Djãm gwaj bajaxwe kêt kadjy ne gwaj baje Môjdjê kukràdjà marn kôt ar amijo baba? Kati. Kadjy ne gwaj tu amim Kritu markumrêx. Djãm pykakam me'õ ta axwe kêt prãm? Arkati. Me'õ ta kute Môjdjê kukràdjà marn kute kôt amijo bakam te: axwe kêt prãmje. Nã bãm ã Pedru arkum ane.

<sup>17</sup> Ne kam ajte arkum,

—Me'õ ta ne te axwe kêt prãmje. Nhyam be, dja gwaj tu amim Kritu markumrêx

ne arỹm bajaxwe kêt. Ne kam amim Kritu maro tẽ nhyam arỹm gwaj bamã bajaxweo amirĩto tẽ gwaj arỹm amima. Gwaj baje amimarkam djãm gwaj baje me kwỹ kudjwa amim, “Ije amim Kritu kabên markôt ne ba ijaxwe”, anhỹr mã? Arkati. Kritu kute me axwe'ã memã àpnênh kêt. Kabênkôt me'õ axwe prãm kêtikumrêx. <sup>18</sup> Be, amrêbê ne gwaj te: Môjdjê kukràdjà kôt bajaxwe kêt prãmje bajaxwe rã'ã ne. Nhyam be, jakam ba arỹm kubê amijo akêx. Kubê ije amijo akêxkam ba ren ar akudjwa ren akubyn Môjdjê kukràdjà'ỹr amijo akêx ne ren amim,

—Ba Môjdjê kukràdjà man kôt ar amijo iban arỹm ijaxwe kêt, anhỹro iba. Djãm kam ba ren mrãmri ijaxwe kêt? Arkati. Akubyn ije 'ỹr amijo akêxkam ba ren arỹm Metĩndjwỹnh kabên mar kêt ne kam ren kam amikrà ar o iba.

<sup>19</sup> Amrêbê ne ba amim,

—Ba Môjdjê kukràdjà man kôt ar amijo iban arỹm ijaxwe kêt, anhỹro iba. Djãm kam mrãmri ijaxwe kêt? Kati. Ijaxwe rã'ã. Ne kam arỹm Môjdjê kukràdjà ma. Amrêbê ne Môjdjê memã kum, “Dja me axwe arỹm pãnh ty”, ane. Tãm ne ba kuman kam ijaxwe man kam arỹm amim,

—Kati. Dja ba Môjdjê kukràdjà man kôt ar amijo iban te ijaxwe kêt prãmje, ane. Kam ne ba arỹm Môjdjê kukràdjà kôt ar amijo iba kêt. Ga, me arỹm tykkam kute kôt amijo ba kêtja pumũ. Badjwỹ ije me tyk pyræk. Ne kam arỹm Metĩndjwỹnh kadjy itĩn ne ar iba.

<sup>20</sup> Ba ne ba Kritumẽ ro'ã pĩte'ykam ty. Ne kam ba itĩn ne ar iba kêt. Kritu ta ne ikam tĩn ne ar ba. Nã bãm ã amimaro ane. Ne kam inhĩ jakam itĩn ne ar iba jakam ne ba tu amim Metĩndjwỹnh kra markumrêx ar o iba. Ta ne kum ijabên ijaxwe pãnh ty. <sup>21</sup> Nãm Kritu ã kum ikaprĩ o ane. Djã nã bãm kubê ate ikrãn Môjdjê kukràdjàbit mar 'ãno dja? Djã nã bãm ijaxwe kêt mã kukràdjàbit man o Kritubê aptà? Kati. Ne ren me Môjdjê kukràdjà kôt ren axwe kêt nhyam ren kam Kritu me axwe pãnh tykja ren kajgokumrêx. Nhyam be, kati. Kritu kôtbit ne me axwe kêt. Nã bãm ã Pedru arkum anen ajte pi'õkkam wãm pykabê Garaxakam ar amã arẽ.

## 3

*Me ta kute amijo mex kêt.*

*Ep 2.8; Pir 3.9; A Xim 1.9; Xit 3.5*

<sup>1</sup> Ar abê Garaxa ar, ar ano rere:kre. Mÿj me'õ ne ar amã 'êx ne ar anoo akno? Ë, Metĩndjwÿnh kabên katàtkumrêx. Kabên kôt ar aje amijo aba kêt kadjy ne me ar anoo akno. Arÿm ne ba prĩne ar amã Kritu pĩte'y'ã jêt'ã ajarê gar prĩne ama. Nhy m kam me ar anoo akno. Ar ano rere:kre.

<sup>2</sup> Dja gar ar imã arê ba kuma. Djã nã gã m ar Mõjdjê kukràdjã man kôt ar amijo aban kôt we ajaxwe kêt? Djã nã gã m we ar ajaxwe kêt nhy m Metĩndjwÿnh Karõ arÿm ar awÿr bõx ne ar ajo ba? Dja gar imã arê ba kuma. Kati. Nã gã m ar Kritu'ã idjujarênh man tu amim Kritu markumrêx nhy m Karõ arÿm ar awÿr bõx. <sup>3</sup> Nã gã m ar Metĩndjwÿnh Karõkôt amijo abamo krax. Djã nã gã m jakam Mõjdjê kukràdjã man kôt ar amijo aban aje kôt ga: we amijo amexmã.

<sup>4</sup> Amrêbê ar aje Kritu mar'ã ne me ar ajo bikênh ba gar arÿm kadjy atokry kumex ma. Godja gar jakam kubê amijo akêx ne 'ã adjukanga jabej nhy m arÿm kadjy ar atokry ja arÿm kajgo. Nhy m be, kati. Ar aje mrãmri tu amim Kritu markumrêx rã'ã jabej arÿm atokryja kajgo kêt. <sup>5</sup> Djã nã gã m ar Mõjdjê kukràdjã man kôt ar amijo aban kôt we ajaxwe kêt nhy m kam Metĩndjwÿnh arÿm ar amã Karõ jano nhy m kam ar akam mÿjja pumũnh kêt nhipêx, ar akam apÿnh me punuo mex? Kati. Nã gã m ar Kritu'ã idjujarênh man tu amim markumrêx nhy m arÿm kôt ar amã Karõ jano nhy m kam arÿm ar akam apÿnh mÿjja pumũnh kêt nhipêx.

<sup>6</sup> Me bakukãmãre Abraãodjwÿ ne “tu amim Metĩndjwÿnh markumrêx nhy m arÿm tu kum axwe kêt jarê.”

<sup>7</sup> Kam, me kute tu amim Kritu markumrêx, me ja kunĩ kute mrãmri ne Abraão tãmdjwÿ pyrãk. Tãm dja gar ama. <sup>8</sup> Amrêbê: ne Metĩndjwÿnh amim,

“Dja me bajtem tu amim Kritu markumrêx ba kam tu memã axwe kêt jarê nhy m me arÿm axwe kêt.”

Nãm ã amim anen kam kãj bê Abraãomã tãm jarê. Nhy m me arÿm 'ã pi'õk no'õk ne. Mrãmri ne me kute tu amim Kritu

markumrêx nhy m kute tu memã axwe kêt jarênh. Ja 'ã ne Abraãomã kum,

“Ga tu amim ikamnhĩxkumrêx. Ba kam arÿm imã akapri. Dja atãmdjwÿ akôt tu amim imarkumrêx. Ba kam arÿm imã me kapri. Dja apÿnh me ba djãkam me bajtemdjwÿ akôt tu amim imarkumrêx. Ba kam arÿm imã me adjwÿnhdjwÿ kapri”, ane.

<sup>9</sup> Ga, me kute tu amim Kritu markumrêxja Metĩndjwÿnh arÿm kum me kaprija pumũ. Abraão tu amim kamnhĩxkumrêx nhy m me kute kôt tu amim markumrêxja Metĩndjwÿnh arÿm kum me kapri.

<sup>10</sup> Be, me kute amim,

—Dja ba Mõjdjê kukràdjã man kôt ar amijo iban arÿm ijaxwe kêt, anhÿro baja. Me ja kunĩ'ã ne Metĩndjwÿnh arÿm amim,

—Me wã dja ba me kanga nhy m me arÿm me biknor tokry djãkam akuno, ane. Mÿkam dja me kanga? Bir, amrêbê Metĩndjwÿnh me bakukãmãremã kum,

“Ga, Mõjdjê kukràdjã'ã pi'õk no'õkja pumũ. Godja me mar kêt ne katàt kunĩ:kôt amijo ba kêt jabej ba dja ba pãnh me kanga nhy m me arÿm me biknor tokry djãkam akuno.”

Nãm Metĩndjwÿnh ã me bakukãmãremã ane. Me bit kute kukràdjã kunĩkôt amijo baja, djãm kôt me axwe kêt mã? Kati. Nãm me te kute kukràdjã kunĩkôt amijo ba ne kam axwe rã'ã. Kam Metĩndjwÿnh ta kabênkôt dja me ja kunĩ akuno. <sup>11</sup> Nhy m kam me ajte me bakukãmãremã kum,

“Metĩndjwÿnh kute memã axwe kêt jarênh nhy m me arÿm kum mexja dja me tu amikajmã'ã markumrêx ne arÿm tĩn ne ar ba”, ane.

Ga, Metĩndjwÿnh kute memã axwe kêt jarênhja pumũ. Me kute tu amim markumrêx kambit ne kute memã axwe kêt jarênh. Kam me kute Mõjdjê kukràdjã marn kôt amijo baja te: axwe kêt prãmje.

<sup>12</sup> Nhy m kam ajte pi'õkkam memã kum, “Me kute Mõjdjê kukràdjã marn kôt amijo baja gê me prĩne kunĩkôt amijo ba mex”, ane.

Djãm pi'õkkam kabên jakam ne memã, me kute tu amim Metĩndjwÿnh markumrêx jarê? Kati. Kute arênh kêtumrêx. Nãm memã, kôt me kute amijo babit jarê.

<sup>13</sup> Nhyr be, Metĩndjwýnh ne memã Kritu jarẽ. Kritu arým pĩte'y'ã gwaj bajaxweo pãnh. Amrẽbẽ ne Metĩndjwýnh memã kum,

—Godja me Mõjdjẽ kukràdjã mar kêt ne katãt kukràdjã kunĩ: kõt amijo ba kêt, ba dja ba pãnh me kanga nhyr me arým me biknor tokry djãkam akuno, ane. Tãm ne Metĩndjwýnh amrẽbẽ arẽ. Kam gwaj ba ne gwaj kõt amijo baba kêt ne bajaxwe:. Ga, gwaj bajaxwe pãnh Metĩndjwýnh bit kute gwaj bakangaja pumũ.

Nhyr be, kati. Jakam Kritu arým gwaj bajaxweo pãnh. Gwaj bakadjy ne Kritu ta mãn axwe djwýnh pyrãk ne pĩte'ykam wajêt. Nhyr kam Metĩndjwýnh arým kute kanga pyrãk nhyr me biknor tokry djãkam biknor pyrãk. Nãm ã anen pĩte'ykam wajêt ne arým gwaj bajaxweo pãnh. Amrẽbẽ: ne Mõjdjẽ me bakukãmãremã kum,

“Me pĩ'ã me anhõ nhyr me arij. Nhyr kam Metĩndjwýnh arým me kanga nhyr me arým me biknor tokry djãkam akuno”, ane.

Ga, Kritu pĩte'ykam jẽtkam Metĩndjwýnh kute kanga pyrãkja pumũ.

<sup>14</sup> Kam, Jeju Kritu arým gwaj bajaxweo pãnh. Nhyr kam Metĩndjwýnh arým me bajtemo djuw mex ne arým memã axwe kêt jarẽ. Tãm ne Abraãomã arẽ. Gwaj tu amim Kritu markumrẽx, nhyr Metĩndjwýnh Karõ arým gwaj bawýr bõx. Amrẽbẽ kute gwaj bamã Karõ jarẽnhja arým gwaj bawýr bõx. Ja kadjy ne Kritu gwaj bajaxweo pãnh.

*Metĩndjwýnh ne Abraãomã kabẽn pýnh ne arẽ.*

### *Idja 6.13*

<sup>15</sup> Akmere, àpnhĩre ar, ba ar amã pykakam me kukràdjã'õ jarẽ gar ama. Godja me'õ ar tu abenmã mýjja'õ jarẽnhkumrẽx. Nhyr me rũnh arým 'ã pi'õk no'õkkumrẽx. Djãm kam ajte me'õ kute ijukri kabẽn 'õ jarẽnhmã? Nãr, djãm kam kute kabẽn 'õo bingrãnhmã? Arkati. Arým ne me tu 'ã pi'õk no'õk mãmđji. <sup>16</sup> Abraãomã ne Metĩndjwýnh apýnh mýjja jarẽn kam kum kabẽn pýnh ne arẽn kum,

—Dja ba ajo djuw mex ne atãmdjwýo djuw mex, ane. Djãm kute kabẽn jao bingrãnhmã? Kati. Djãm tãmdjwý krãptĩ'ã ne

kum, “Dja ba atãmdjwýo djuw mex”, ane? Kati. Tãmdjwý pydji'ã ne kum arẽ. Tãmdjwý ja ne kubẽ Kritu.

<sup>17</sup> Metĩndjwýnh ne amrẽbẽ: tu Abraãomã tãmdjwýbẽ Krituja jarẽnhkumrẽx. Nhyr kam tũ:mrãm, arým kute kum arẽnh'ã amexbẽ 430 apẽxkam Mõjdjẽmã kukràdjã jarẽ. Djã ne kute Mõjdjẽmã me kukràdjã jarẽho kabẽn tũm japa? Djã ne kute amrẽbẽ: Abraãomã tãmdjwýbẽ Kritu jarẽnhja arým arẽnh kajgo? Arkati. Kute amrẽbẽ: Abraãomã arẽnh kute mar týtã rã'ã ne.

<sup>18</sup> Djã ne me kute Mõjdjẽ kukràdjã marn kõt amijo bakam axwe kêt ne ajte kute amim Kritu markam axwe kêt? Kati. Nhyr be, arým ne Metĩndjwýnh mrãmri tu Abraãomã tãmdjwý Kritu jarẽnhkumrẽx nhyr amim tu markumrẽx nhyr arým kum axwe kêt jarẽ.

<sup>19-20</sup> Nhyr be, mýj kadjy ne Metĩndjwýnh Mõjdjẽmã kukràdjã jarẽ? Bir, me kute amijaxwe mar ne kute kõt amim kator kadjy. Ja kadjy ne Mõjdjẽmã kukràdjã jarẽ. Me aben djõ'ã abenmã arẽho mõ:. Abenmã arẽho mõr tãmtã arým tũmrãm Abraão tãmdjwý Kritu'ýt o bõx. Me bakamingrãnyrekam Kritu arým katon ar ba. Nhyr kam me tu amim markumrẽx nhyr Metĩndjwýnh arým memã axwe kêt jarẽ. Metĩndjwýnh ne Mõjdjẽmã kukràdjã jarẽ. Kadjy mrãnh djwýnh kumrẽxmã ne arẽ nhyr arým amũ Mõjdjẽmã arẽ nhyr amũ memã arẽ. Nhyr kam me krãptĩ amipãnh Mõjdjẽmã amijarẽ nhyr amũ Metĩndjwýnhmã me arẽ. Nhyr be, djã nãm Metĩndjwýnh me'õmã Kritu jarẽ nhyr arým amũ Abraãomã arẽ? Kati. Metĩndjwýnh pydji ne tu Abraão kuka kõnh djan kum tãmdjwýbẽ Kritu jarẽ.

<sup>21</sup> Metĩndjwýnh ne Abraãomã apýnh mýjja mex jarẽn kum tãmdjwýbẽ Kritukõt axwe kêt jarẽ. Djã ne kam amikabẽn jao aknon kam memã kum,

—Dja ga me Mõjdjẽ kukràdjã man kõt ar amijo aba. Ba kam arým me amã axwe kêt jarẽ, ane? Kati. Dja me Mõjdjẽ kukràdjã man kõt ar amijo ban arým te axwe kêt prãmje ne Metĩndjwýnhkõt tĩn ne ar ba kêt. Ne ren me Mõjdjẽ kukràdjã'õ man kõt ar amijo ban ren kam axwe kêt ne

ren kam Metĩndjwỳnh kôt tĩn ne ar ba nhym Metĩndjwỳnh ren kam memã kum,

—Dja ga me Mõjdjê kukràdjà man kôt ar amijo aban kam ajaxwe kêt, ane.

<sup>22</sup> Nhym be, kati. Me'õ ta te axwe kêt prãmje. Metĩndjwỳnh ne pi'òkkam me kunĩ kupãnhã memã axwe jarẽ. Mỳj kadjy ne me kunĩmã axwe jarẽ? Bir, me kute tu amim Jeju Kritu markumrẽx kadjy. Dja me tu amim markumrẽx nhym Metĩndjwỳnh arỳm memã axwe kêt jarẽ. Tãm ne amrêbê: me bakukãmãremã arẽnh pydji.

<sup>23</sup> Nhym be, amrêbê me bakukãmãre kute tu amim Kritu markumrẽx kêtri ne me Mõjdjê kukràdjækôt ar amijo ba. Me ta te: katormã ar amijo ba. Me kute mrãmri ne mebê ijêkam me ta te: katormã amijo ba pyrãk. Gwaj badjwỳ te bakatormã ari amijo baba. Nhym kam tũmrãm me arỳm gwaj bamã Kritu'ã ajarẽ, gwaj arỳm tu amim markumrẽx ne arỳm bakato. Bakaton arỳm gwaj ba ar baban bakĩnhkumrẽx.

<sup>24</sup> Kam, Mõjdjê kukràdjà ne kute me kra prĩre pumũnh djwỳnh pyrãk. Me bakukãmãre ne me kute me kra prĩre pyrãk. Ne kam me omũnh djwỳnh kôt ar amijo ba, Mõjdjê kukràdjà kôt ar amijo ba nhym mebê tỳ:xi. Me kute aben djô'ã kôt amijo ba tãmtã nhym kam tũmrãm arỳm Kritu me'yr bõx. Gwaj bawỳr bõx gwaj arỳm tu amim markumrẽx nhym arỳm tu gwaj bamã axwe kêt jarẽ. <sup>25</sup> Gwaj arỳm tu amim Kritu markumrẽx. Djãm kam gwaj baje akubyn Mõjdjê kukràdjà 'yr amijo akẽx prãm? Kati. Arỳm me abatãnhkam djãm akubyn kute amipumũnh djwỳnh prãm? Kati. Gwaj badjwỳ ne gwaj akubyn baje Mõjdjê kukràdjà mar prãm kêt. Kritu ne gwaj tu amim markumrẽx.

*Mebê Metĩndjwỳnh kra'ã ujarẽnh.*

*Dju r 1.12; Rõ 8.14; Ep 1.5*

<sup>26</sup> Ar akunĩ ne gar arỳm abê Metĩndjwỳnh kra. Gar arỳm tu amim Kritu markumrẽx ne arỳm abê Metĩndjwỳnh kra. <sup>27</sup> Me kute ngõmã ar ajadjãr kunĩja, mỳj'ã ne ngõmã ar ajadjãrja amijakre? Bir, Kritumẽ ne gar atypdji. 'Ã ne amijakre. Gar kam arỳm aje Kritu pyrãk. Kritubê Metĩndjwỳnh Kra. Ar gadjwỳ ne gar Kritu kôt abê Metĩndjwỳnh kra.

<sup>28</sup> Djãm kam dja gar ajõ aben mỳr jabej memã kum, “Ibê idjaer”, ane? Nàr, “Ibê me bajtembê kregu”, ane? Nàr, gar ajõ aben mỳr jabej memã kum,

—Nãm me ipa 'amỳ ba me kabẽnkôt kajgo ari idjãpẽnh tỳxo iban idjumar punu, ane? Nàr,

—Me kute ipa 'amỳnh kêt ba arek mekôt ar iban idjumar mex, ane? Nàr gar ajõ aben mỳr jabej memã kum, “Imy”, ane, nàr, “Ini”, ane? Djãm aje amim Kritu markam aje aben mỳr jabej ã abenmã anhỹro abamã? Kati. Ar aje amim Kritu markam ne ar akunĩ abeno anhõbikwan apydji:i. <sup>29</sup> Ne, ar abê Kritu nhõbikwakam Metĩndjwỳnh arỳm ar ajo Abraão tãmdjwỳ. Kute ar anhingêt Abraõomã kabẽn pỳnh ne arẽnhja kunĩ ne ajte ar amãdjwỳ arẽ. Dja gar arỳm Abãm nhõ mỳjjao aminhõ. Metĩndjwỳnh nhõ mỳjjao aminhõ.

## 4

*Metĩndjwỳnh gwaj bajo kra.*

<sup>1</sup> Jakam ne ba ar amã arẽ, me abê Garaxakam me jamã arẽ, gar ama. Me kra prĩre ne me kute bãm nhõ nèkrẽx kunĩõ bamã te o ane. Prĩrekam kute o ba kêt rã'ã. Nãm me kute bãm nhõ àpẽnh kajgo pyrãk ne kajgo: ne. <sup>2</sup> Nhym kam me omũnh djwỳnh me prĩre jamã mrãnh mex'ã karõn me omũho ba nhym me kam kôt amijo ba. Nãm me prĩre pumũnh djwỳnh meo ba: nhym me arỳm abatãnh ne. Nhym me bãm kute õ akati jarẽnhja arỳm bõx nhym kam me arỳm bãm nhõ nèkrẽxo aminhõn o ba.

<sup>3</sup> Gwaj badjwỳ Kritu bõx kêtri ne gwaj baje me prĩre pyrãk. Gwaj baje me àpẽnh kajgo pyrãk ne gwaj bakajgo: ar baba. Nhym me kute gwaj bamã pykakam me kukràdjà jarẽnh gwaj ajbit maro baba. Kute mrãmri ne me prĩre pumũnh djwỳnh me prĩremã mrãnh mex'ã karõo ba nhym me kute kôt amijo baja pyrãk. Gwaj badjwỳ gwaj pykakam me kukràdjækôtbit amijo baba.

<sup>4</sup> Nhym be, kam arỳm õ akati bõx nhym Metĩndjwỳnh arỳm pykamã Kra jano nhym me'õ nire kurũm kato. Katon arỳm Mõjdjê kukràdjà man kôt ar amijo ba. <sup>5</sup> Mỳj kadjy ne Mõjdjê kukràdjà man kôt ar amijo ba? Bir, kute gwaj bajaxweo pãnh kadjy. Gwaj



te Môjdjê kukràdjàkòtbit amijo baban mã bajaxwe:. Nhyim Kra arým gwaj bajaxweo pãnh nhyim kam Metĩndjwýnh arým gwaj bajo kra. Ja kadjy ne Kra arým ruw ne Môjdjê kukràdjà man kòt ar amijo ba.

<sup>6</sup> Kute gwaj bajo krakam ne arým gwaj bamã Kra Karõ jano nhyim arým gwaj bakam nhÿn gwaj bajo ba. Gwaj kam amikam Karõ ma nhyim arým gwaj bakad-jwýnhbê Metĩndjwýnhmã kum, “Aba, Aba”, anhÿro nhÿ. Me kabên djwýnhkam kum, “Aba, Aba”, anhÿro nhÿ. Me bakabênkam ne Karõ ren arên ren kum, “Djũnwã, Djũnwã”, anhÿro nhÿ. <sup>7</sup> Ga, me kute me pa 'amýnh nhyim me memã àpênh kajgo ar baja pumũ. Amrêbê ar gadjwý ne gar Môjdjê kukràdjà man kòt amijo aba kajgo. Ne jakam arým Môjdjê kukràdjà kòt amijo aba kêt. Kritu ar akadjy ty nhyim Metĩndjwýnh kute ar ajo krakam. Dja ar amã õ mÿjja ngã gar o aba.

*Me kute akubyn me kukràdjào ba prãm.  
A Kò 11.3; Kor 2.16; Ped k 1.14*

<sup>8</sup> Be, ar abê me bajtem ne gar amrêbê ar aje Metĩndjwýnhkumrêx mar kêt ne kòt amijo aba kêt. Apÿnh mÿjjao metĩndjwýnh karõ nhípêxjamã ne gar adjapênh tÿx kajgoo aba. Djãm mrãmri ne kubê Metĩndjwýnhkumrêx? Arkati. Gar o aban aje mrãmri ne me pa 'amýnh nhyim me memã àpênh tÿx kajgoo ba ne te apòx prãmje ja pyrãk.

<sup>9</sup> Nhyim be, jakam ne gar arým aje Metĩndjwýnhkumrêx mar. Djãm ar ga ne gar amim mar? Kati. Ta kumrêx ne kute ar amarn arým ar amã amijo amirĩt gar kam kòt arým amim maro aba. Arým ar aje Metĩndjwýnhkumrêx mar jakam mÿkam ne aje akubyn me kum Metĩndjwýnh kĩnh kêtja kukràdjà marn kòt amijo aba prãm? Gar me kukràdjà kòt ar amijo aban te ajaxwe kêt prãmje. Kam ar arerekre. Me kukràdjà kajgo. Dja gar kòt ar amijo aban arým aje mrãmri ne me pa 'amýnh nhyim me memã àpênh kajgo ba pyrãk.

<sup>10</sup> Ar aje mÿjja kajgo kadjy adjapênh tÿx prãmkam ne gar apÿnh akati krãptĩkam me kukràdjà man arým abenmã kum,

—Akati ja dja gwaj 'ã bano tÿx ne Môjdjê kukràdjà kòt bamex, anen ajte apÿnh mytyrwý'ã abenmã kum,

—Mytyrwý ja dja gwaj 'ã bano tÿx ne me kukràdjà kòt bamex, anen ajte abenmã kum,

—Dja gwaj bàygogo djê pan ajte Môjdjê kòt akati ja ma, anen ajte abenmã kum,

—Dja gwaj amex ja'ã bano tÿx ne Môjdjê kukràdjà kòt bamex, ane. Djì:jàk. Djãm me kukràdjà kajgoja krãre got? Djãm ar aje ã amijo anhÿrkam Metĩndjwýnh kute ar amã ajaxwe kêt jarênh gar kum amex got?

<sup>11</sup> Amrêbê ba me abê Garaxakam Kritu jarênho iban idjapênh kume:x. Ar akam idjapênh kajgo gar aje Kritu mar kajgo karõ ne ba ar ajã idjãpnhix ne axwe idjumar ne.

<sup>12</sup> Akmere, àpnhĩre ar, on ar ikudjwa. Ba ne ba ije ar apyrãk. Djãm ba ne gar ijo ajkê, ba ar amã ikabên? Kati. <sup>13</sup> Nhyim be, amrêbê ije ar amã Kritu'ã ujarênh ny jarênh kutewa. Kamã ne ba ikanên ar amã Kritu'ã ajarê gar ama. <sup>14</sup> Nãm itokry te ijo ba djãm kam ne gar amã ikurên ikanga? Kati. Nã gãm ar prĩne imar mex. Nã gãm ar ijo Metĩndjwýnh kadjy mrãnh djwýnh pyrãk nãr ijo Kritu Jeju pyrãk ne ar amã ikĩ:nh ne. <sup>15</sup> Ba ino kanê: gar te aje ikadjy ano kadjar ne pãnh imã ano jadjar ba ikanê kêt mã. Ba ne ba 'ã ar apumũn arým ar amã arê. Ar amã ikĩnh. Mÿj ne gar arým jakam amijon? <sup>16</sup> Djãm ije katãt ar amã Metĩndjwýnh kabên jarênhkam gar arým ijo akurê djwýnh?

<sup>17</sup> Be, wãkam me'õ ar kute amiwÿr ar ajo akêxmã àpênh kume:xo ba. Djãm me kute ar ajo mex kadjy? Kati. Me kute ar abê ikurêmã. Dja me ar abê ikurê gar kam arým mekòt ar amijo aban arým me kukràdjà'ã ano tÿx ne ar o aba. Ja kadjy ne me ar abê ar ikurêo ba.

<sup>18</sup> Ne ren me kute ar ajo mexmã àpênh kumex ne ren kam mrãmri mexkumrêx. Ar akam idjãmkam ne me ren ar ajo mexmã àpênh kumex ne ren ajbubê itÿmkamdjwÿ ren ar ajo mexmã àpênh kumex ne kam ren mrãmri mexkumrêx. Nhyim be, kati. Me kute ar abê ikurê kadjy ne me àpênh kumex.

<sup>19</sup> Ba ne ba imã ar ajabê:ê kute mrãmri ne me kum kra prĩre jabêja pyrãk. Ije me'õ nire kra àkam umar punure pyrãk ne ar

akam idjumar punu:re. Me'õja amijo 'êx ne Kritu kupa'ã ar amã arê ba ar ama:ro iba. Nok gar ren kabên man Kritu kupa'ã amijo tẽ. Ga, me prĩre kute nã tikkrekam aminhipêxo baja pumũ. Nãm aminhipêxo ba:n arým prĩne aminhipêx nhinomã kumẽ. Ar gadjwý. Dja gar prĩne Kritu kôt amexo amũ amikamênho tẽ. Amikamênho tẽ:n kam arým prĩne Kritu mexo amex. Tãm ne ba imã kĩnh. Nã bãm ar ama:ro iba. <sup>20</sup> Ar awýr ibõx prãmkam ne ba dja. Ne ba ren inhýtã ar awýr bõx. Djã ne ba ren kam ar amã ibên týt? Kati. Kam ne ba ren ar amã ibên rerebito ikabên. Nhy m be, kati. Amybým ne ba axwe ar akam idjumar ne.

*Agaremẽ Xara'ã ujarênh.*

<sup>21</sup> Dja gar jakam imã arê. Ar aje Mõjdjê kukràdjã marn kôt amijo aba prãmja mýkam ne gar amikadja kukràdjã kunĩ mar kêt? <sup>22</sup> Ba ar amã kukràdjã jarê gar ama. Mõjdjê ne kute 'ã pi'ók no'ókkam memã Abraão kra amãnhkrut'ã ajarê. Kra ja ne Abraão õ àpênh kajgobê Agaremã kudji. Agare ne kubê me pardja. Nãm Abraãomã àpênh kajgobit ar ban umar punure. Õ àpênh kajgo jamã ne kra ja dji. Nhy m be, prõ djwýnhbê Xaramã ne kra djwýnhja dji. Prõ ja ne kubê me pardja kêt ne ta arek mekôt ar ban umar mex.

<sup>23</sup> Nhy m kam Abraão ta ne Xara kute kum arênhkôt me pardjajamã kra ja dji nhy m kumrêx ruw. Nhy m be prõ djwýnhmã kute kra djwýnh djirja ne Metĩndjwýnh kabênkôt. Metĩndjwýnh ta kute kum kra jarênh kôt ne Abraão arým prõbê Xaramã kudji. Kute kum, "Dja akra'õ amirĩt", anhýr kôt arým kum kudji. Xara kubê me pardja kêt ne ta arek mekôt ar ban umar mexkumrêxjamã ne kudji nhy m kam ruw.

<sup>24</sup> Mýkam ne ba ar amã ar nire abenkôt kra rwýkja'ã ajarê? Mýj'ã ne ar nireja amijakre? Bir, ar amãnhkrut Metĩndjwýnh kabên amãnhkrut'ã amijakre.

Ba ar amã kabên jarê gar ama. Metĩndjwýnh kute Abraãomã kabên jarênhkam ne kum Kritu jarê. Kritu'ã ne Xara amijakre. Nhy m be, Mõjdjê kukràdjã'ã ne Agare amijakre. Be, kabên amãnhkrut ne ja. 'Ã ne ar nire amãnhkrut

amijakre. Metĩndjwýnh ne krãnhbê Xinajkam Mõjdjêmã me kukràdjã jarê. Me kukràdjã kôt ne me àpênh týt kajgobit ar ban te axwe kêt prãmje. Krãnhbê Xinaj'ã ne Agare amijakre. Agare ne kubê me pardja ne Abraãomã àpênh týt kajgobit ar ba. <sup>25</sup> Agare'ã ne krãnhbê Xinaj amijakre. Pykabê Arabijkam ne krãnhbê Xinaj. Nhy m kam Xinaj'ã ne pykakam krĩrãxbê Djeruxarêja amijakre. Djeruxarê jakam me ar ba ne me kute Mõjdjê kukràdjãbit mar. Me kute Mõjdjê kukràdjãbit mar ne me àpênh týt kajgobit ar ban te axwe kêt prãmje.

<sup>26</sup> Nhy m be, me kute amim Kritu mar ne me kàjkwakam Djeruxarêkam ar ba. Me ja ne me kute Mõjdjê kukràdjã marn kute kôt amijo baja kangan Kritubit kôt ar amijo ba. Kôt ar amijo ban kubê me pardja kêt ne ta arým arek mekôt ar ban umar mex ne. Kàjkwakam Djeruxarê ne kute me banã pyrãk.

<sup>27</sup> Ga, Metĩndjwýnh amrêbê: kute me bakukãmãremã kabên jarênh nhy m me arým kute 'ã pi'ók no'ókja pumũ. Nãm Metĩndjwýnh tu krĩrãxbê Djeruxarêmã kabên jarê. Nãm tu kum,

"Ga te akra prãmje ne akra kêt kumrêxja on akĩnh. Aje akra à mar kêtja on tu adjãmra týt kaba.

Djãm mrãmri akra kêt ne ar abamã, amjên kute akangakam akra kêt ne ar abamã? Kati. Dja me arým mjênja te akurãm kra krãptĩ ga dja ga akra krãptĩo me akrenh mex ne."

Nãm ã kàjkwakam krĩrãxbê Djeruxarêjamã ane. Ga, kàjkwakam krĩrãxbê Djeruxarê kute mrãmri ne gwaj bakunĩ nã pyrãkja pumũ. Arým gwaj bakrãptĩn tu amim Kritu markumrêx nhy m Metĩndjwýnh arým tu gwaj bamã axwe kêt jarê.

<sup>28</sup> Ga, Metĩndjwýnh kute Abraãomã kum, "Dja akra amirĩt", anhýrja pumũ. Nhy m kam kute kum arênh kôt arým Idjak kato. Ar gadjwý ne gar aje Idjak pyrãk. Mýkam? Bir, Metĩndjwýnh ne ar amã,

—Dja gar tu amim Kritu markumrêx. Ba kam arým ar amã axwe kêt jarên arým ar ajo ikra, ane. Gar kam arým tu amim markumrêx nhy m kute ar amã arênh kôt

arým ar ajo kra. Kute Abraãomã arênh kôt ne arým kra Idjak kato. Ar gadjwý kute ar amã arênh kôt ne arým ar amã axwe kêt jarên arým ar ajo kra.

<sup>29</sup> Nhyim be, amrêbê: Imaêr kum Idjak kurêo ba. Metĩndjwýnh Karô kabên kôt ne Abraão arým kra Idjak dji nhyim katon ar ba nhyim Imaêr kum kurêo ba. Abraão ta ne Imaêr dji nhyim arým kum kamybê Idjak kurêo ba. Nãm ã akati jakam me kum gwaj bakurêo ane. Me kute amim,

—Dja ba Môjdjê kukràdjà man kôt ar amijo iban arým ijaxwe kêt, anhýro baja. Me ja ne me kum gwaj bakurê. Kum gwaj baje amim Kritu marja kurêo ba. Gwaj baje amim Kritu mar ne gwaj amim,

—Dja ba tu amim Kritu markumrêx nhyim Metĩndjwýnh arým imã ijaxwe kêt jarê, anhýro baba. Gwaj anhýro baba nhyim me arým kum gwaj bakurêo ba.

<sup>30</sup> Nhyim kam mýj ne amrêbê: me bakukãmãre arê nhyim me'ã pi'òk no'òk ne? Bir, Xarabê me pardja kêtja ne Agare'ã Abraãomã kabên ne kum,

“Djãm gu banhõ àpênh kajgo kraja kute ikra kôt anhõ mýjjao aminhõmã? Amýrbê kute o aminhõmã?

Kati. Ikrabit dja anhõ mýjjao aminhõ. On ikra nêje bõm Agaremê kra ar amê.”

Nãm ã Xara Abraãomã ane. <sup>31</sup> Ar tãm 'ã dja gwaj amijakren amima. Me kute amim,

—Ba Môjdjê kukràdjà man kôt ar amijo iban ijaxwe kêt, anhýrja ne me te axwe kêt prãmje. Nãm me me pardja kra'ã amijakre ne àpênh kajgo ar ba. Dja me Metĩndjwýnh nhõ mýjjao aminhõ kêt ne axwe rã'ã. Nhyim be, gwaj ba ne gwaj tu amim Kritu markumrêx nhyim Metĩndjwýnh arým tu gwaj bamã axwe kêt jarê gwaj arým kum bajaxwe kêt. Gwaj ba ne gwaj me pardja kêt kra'ã amijakre ne kam Metĩndjwýnh nhõ mýjjao aminhõ.

## 5

*Pykakam me kute kukràdjà kajgo kôt amijo ba nêje me akre.*

*Rô 3.21; Kor 2.20*

<sup>1</sup> Gwaj ba: arek mekôt ar baban badjumar mex kadjy ne Kritu arým gwaj bapytà. Ga, mryti kute jênh pytĩ tur ne kute o

baja pumũ. Gwaj badjwý amrêbê: gwaj pykakam me kukràdjà kôt badjapênh týt kajgobit ar baba. Kam ne gwaj badjumar punu:re. Nhyim Kritu arým gwaj bapytà gwaj arým me kukràdjà kôt badjapênh kêt. Gwaj ba ne gwaj Kritukôt arek ar baban badjumar mex. Arým Kritu kôt badjumar mexkam kwãrĩk wãnh Môjdjê kukràdjà'yr amijo akêx kêt ne kôt amijo aba kêt. Dja ga kôt ar amijo aban arým akaprĩ:re kute mrãmri ne mry jênh pytĩkam kaprĩ pyræk. Gê me te: kukràdjà'ã ar amã karô gar arek mebê dja. Kritu kôt dja gar adjãm týt.

<sup>2</sup> Ba ibê Paur ne ba me abê Garaxamã arê. Godja gar aje memã kum,

—Ajrã. Môjdjê kukràdjà kôt imy nhinhu kà krãta. Dja ba kôt ijaxwe kêt, anhýr jabej nhyim me amy kà nhinhu krãta gar kam arým aje Kritu mar kajgo. <sup>3</sup> Ba ajte mrãmri me kunĩmã arênhkumrêx. Metĩndjwýnh ne arým me my kà rênhamã kute prĩne Môjdjê kukràdjà kunĩ kôt amijo bamã memã arê.

<sup>4</sup> Ar ajõ ar aje amim,

—Ba Môjdjê kukràdjà man kôt ar amijo iban arým ijaxwe kêt, anhýr. Ar aje amim anhýrkam aje Kritu mar kajgo. Nhyim kam Metĩndjwýnh kum ar akaprĩ kêt ne arým ar amã axwe jarê. Ar ga ne gar Kritu bê amijo akêx.

<sup>5</sup> Nhyim be, gwaj ba ne gwaj arým tu amim Kritu markumrêx. Nhyim kam Metĩndjwýnh arým Karô kôt gwaj bajo mex. Dja Karô gwaj bajo ban arým gwaj bajo mex gwaj kam bakunĩ bajaxwe kêt. Tãm ne gwaj tu amiwýr kamnhĩxkumrêx. <sup>6</sup> Be, Kritu kôt gwaj baje amijo babakam djãm Metĩndjwýnh kute gwaj bamy kà rênh mar? Nàr djãm kute gwaj bamy kà tã mar? Kati. Ja ne kum kajgokumrêx. Nhyim be, gwaj baje tu amim Kritu markumrêxkam. Kam-bit ne gwaj mrãmri kum bakajgo kêtumrêx ne kum bajaxwe kêt. Ne baje tu amim markumrêxkam arým bamã me abêkumrêx.

<sup>7</sup> Amrêbê ne gar aje mrãmri ne me rer djwýnh prõt mex pyræk. Ne katàt Kritu kôt ar amijo aban 'ã adjukanga kêtumrêx. Mýj me'õ ne ar abê aptà? Gar kabên katàt man kôt ar amijo aba nhyim ar abê aptà? <sup>8</sup> Djãm Metĩndjwýnh kute amiwýr ar ajwýr djwýnh ta ne ar abê aptà? Djãm ta ne Môjdjê

kukràdjà'ã ar amã karõn o ar abê aptã? Kati. Atemã me'õ.

<sup>9</sup> Ga, me kute djwýkam igot djà kryre rênha pumũ. Nhyam kam arým djwý djôm mē amrà. Ar gadjwý ne me ngrêre ar amã 'ã karõo dja. Dja me arek ar amã 'ã karõo dja: nhyam me kabên ar anhi kunĩ mē amrà arým me'ýr ar ajo akêx gar arým mekôt ar amijo aba. <sup>10</sup> Nhyam be, arým ne gar aje ikabên ja markam ba tu amim ar akamnhĩxkumrêx ne amim,

—Kati. Jakam dja ar ikabên man Kritu kôtbit amijo ba, ane. Nhyam be, me'õ ja kute Môjdjê kukràdjà'ã ar amã karõn ar amã kaprĩ jadjarja gêdja Metĩndjwýnh arým kum axwe pãnh jarê.

<sup>11</sup> Nhyam me we ar amã,

—Paurdjwý ne me my kà rênh'ã memã àpnênho ba, anhýro ba. Djãm mrãmri me kabên? Kati. Ba ne ba kàj bê memã kum,

—Kritu ne pĩte'ykam ty. Dja ga me tu amim markumrêx, nhyam Metĩndjwýnh arým tu me amã axwe kêt jarê ga me kum ajaxwe kêt, anhýro iba. Ne ba ren iby ajte memã kum,

—Gê me me amy kà rênh gê kam arým Metĩndjwýnh me amã axwe kêt jarê, anhýro iba nhyam ren me kum ikurê kêt. Nhyam be, kati. Nã bãm memã kum,

—Kritu ne pĩte'ykam ty. Dja ga me tu amim markumrêx nhyam Metĩndjwýnh arým tu me amã axwe kêt jarê, anhýro iba. Jabit ne ba memã arê. Ne kam ije me my kà rênh'ã memã karõ kêt. Kam ne me arým ijo bikênho ba. <sup>12</sup> Be, me kute ar amy kà rênh'ã ar amã karõn ar amã kaprĩ jadjarja ren ta ã amijo bikênho ane.

*Me kute Metĩndjwýnh Karõ mar'ã memã karõ.*

*Idja 13.3; Ped k 1.22; Dju k 3.11*

<sup>13</sup> Kam, akmere àpnhĩre ar, djãm ar aje Môjdjê kukràdjà marn kôt amijo aban ar akaprĩmã ne Metĩndjwýnh amiwýr ar ajuw ne ar ajo ba? Kati. Ar adjumar mex ne arek mekôt ar abamã. Ja kadjy ne Metĩndjwýnh amiwýr ar ajo akêx. Ar aje Môjdjê kukràdjà kôt amijo aba kêt ne arek mekôt ar abakam djãm kam arým tu ajaxwemã? Djãm aje amidjwýnhbito kĩnh kadjy tu ajaxwemã? Kati. Kwãrĩk wãnh ajaxwe kêt. Arým aje

Môjdjê kukràdjà mar kêt ne arek mekôt ar abakam dja gar amã aben jabên abenmã apê.

<sup>14</sup> Mýkam? Bir, Metĩndjwýnh ne memã kum,

“Me amã amibu'ã me ja jabê. Kute mrãmri ne ga me amã amijabêja pyrãk dja ga me ã amã amibu'ã me ja jabêo ane”, ane.

Dja gar Metĩndjwýnh kabênja pydjibit man kôt ar amijo aban arým Môjdjê kukràdjà kunĩ man kôt amijo aba. Mrãmri ar amã me abêkam ne gar tu Metĩndjwýnhmã amexkumrêx.

<sup>15</sup> Nãr kon dja gar amã aben kurêo aba mýj dja kam akute? Ga, ropre kute aben kamjãnh ne kute abeno apêxo baja pumũ. Ar gadjwý dja gar amã aben kurê tãmtã ã arým aben bê akunĩ ajmã.

<sup>16</sup> Gwaj ba, bamã amidjwýnhbito kĩnh prãm ne kôt arým bajaxwe prãm. Nhyam be, dja gar amim Metĩndjwýnh Karõ man mã kôt ar amijo aban kam arým kôt ajmã akute kêt ne katãt amijo aba.

<sup>17</sup> Djãm ar ga ne gar Metĩndjwýnhmã ajaxwe kêt? Kati. Gwaj ba ne gwaj bajaxwe prãm ne amim, “Ba amidjwýnhbito kĩnh”, anhýro baba. Nhyam kam Metĩndjwýnh Karõ mã gwaj bamã,

—Kati. Kwãrĩk wãnh, anen ã akubyn gwaj banêo ane. Karõ mã akubyn gwaj banê gwaj ba bajaxwemã mã amim, “Ba amidjwýnhbito kĩnh”, anhýro baba. Gwaj mã bakabêno Metĩndjwýnh Karõ japanho baba. Nhyam ta mã akubyn gwaj banêo ba. Kam ar ga ne gar te ga: ajaxwe kêt prãmje.

<sup>18</sup> Nhyam be, ar ga dja gar amim Metĩndjwýnh Karõ man mã kôt ar amijo aba nhyam kam ta arým katãt ar ajo ba. Dja gar amim Karõ maro aba:n arým amã Môjdjê kukràdjà maro aba prãm kêtumrêx.

*Me kute amidjwýnhbito kĩnh prãm kam apýnh axwe djãri 'ã ujarênh ne ja.*

<sup>19</sup> Me kute amidjwýnhbito kĩnh prãm kam ne me apýnh mýjjao ban kôt axwe. Me kute apýnh mýjjao baja ne me kunĩ kute mar.

Nãm me me bêt prõo akĩ, mjêno akĩ.

Ne ajte ari prõ, mjên kupa'ã kurê ba.

Ne ajte kute abenbê me kupênho amijo àpnuo ba.

Ne ajte amijo àpnu me:x ne.

Me kute amidjwýnho kính prāmcam kute mýjjao ba ne ja.

<sup>20</sup> Ne ajte mýjjao metĩndjwýnh karō nhípêxmā amijarēho ba.

Ne ajte ta apýnh mýjja maro amiptàn arým amijo wajangao ba.

Ne ajte kum me kurêo ba.

Ne ajte axikôt kabēn kêt ne abenā kabēn ba.

Ne ajte me ò mýjja pro'ā ngryk ba.

Ne ajte kute amijā ngryk nê kêt ne tu ngryk ba.

Ne ajte kute amidjwýnhbit markam amijo rax pytāro ba.

Ne ajte kute amiwýr meo akēx prāmje aben bê me kurêo ba.

Ne ajte apýnh mýj kukràdjaja'ā no tỳx ne kam mýr jabej apýnh me kwý djāri kôt bikprōnh ba.

Me kute amidjwýnhbito kính prāmcam kute mýjjao ba ne ja.

<sup>21</sup> Ne ajte te kute me urāk prāmje ngryk ba. Ne ajte aben paro ba.

Ne ajte kadjwati kangôkam\* bibānh ba.

Ne ajte apýnh mýjja punukam aben tỳx jabejo ba.

Be, apýnh mýjja kute ja pyrāk rā'ā. Me kute amidjwýnhbito kính prāmcam kute mýjjao ba ne ja. Dja Metĩndjwýnh ĩ ò me ja kunĩ ba. Djām kam kute me jao bamā? Me kute mýjja jao ba, djām kute meo bamā? Kati. Dja me ja wānh me biknor tokry djākam akuno. Tām ne ba amrêbê ar amā arēn ajte jakam ar amā arē.

*Metĩndjwýnh Karō kute meo bakam me kute amijo ba mex.*

<sup>22</sup> Nhym be, dja Metĩndjwýnh Karō ta ar ajo ba.

Gar arým ô'ā amā me abê.

Ne ajte akĩhtire.

Ne ajte adjumar mex.

Ne ajte memā ano kator kêt ne amijamār 'iry.

Dja Karō ta ar ajo ba gar ajte ô'ā memā aprĩ. Ne ajte anhōdjānh.

Ne ajte katāt Metĩndjwýnh kabēn man kôt ar amijo aban 'ā adjukanga kêt.

<sup>23</sup> Ne ajte akabôt katin ar aba.

\* **5:21** Mýjja me kute o kōm ne kôt bibānh kunĩja, kadjwati kangômē uba kangômē, mýjja kangô kunĩ ne me kum kadjwati kangô jarē.

Ne ajte amijaxwe kêt kadjy amijāno dja.

Dja Karō ta ar ajo ba gar arým ā amijo anen kam Metĩndjwýnh kôt amijo aba mexkumrēx nhym arým ar akam kínhkumrēx ne ar amā ar akatāt kumrēx jarē.

<sup>24</sup> Kritu kute gwaj bajo aminhōkam gwaj arým bamā bajaxwe prām kêt. Baje amidjwýnhbito kính kadjy bajaxwe prām kêt. Baje mebê me kupēnh prām kêt ne bamā mýjja punu prām kêt. Baje mrāmri ne Kritumē ro'ā aktā banhikra, baparmo i'ék pyrāk. Gwaj ā amimaro ane.

<sup>25</sup> Mrāmri Karō kute gwaj bajo ba jabej gwaj mā Karō man prĩne kôt amijo baba mex. <sup>26</sup> Kwārĩk wānh gwaj bakajgokam arĩk amijo badjāmra ar baba kêt. Dja gwaj amijo badjāmra ar baba:n arým abenmā aben kurê'uko baba. Ne aben rax mýr jabej aben kam bangryko baba.

## 6

*Me kum me kunĩ kaprĩā kute memā karō.*

<sup>1</sup> Akmere àpnĩre ar, godja me'ō arým axwe nhym me arým kute kôt omũnh jabej. Ar ga aje amim Metĩndjwýnh Karō maro abaja dja gar me'ōmā aprĩren akubyn Metĩndjwýnh'ýr o akēx. Ne amiman amim,

—Ÿ, watĩre. Nok ba ren akati 'ōkam Metĩndjwýnh maro aknon ren ā kudjwa ijaxweo anhýr jabej, ane. Dja gar ā amimaro anen ajaxwe nêje amijāno djan arým me'ōjamā aprĩren akubyn 'ýr o akēx jabej.

<sup>2</sup> Ga, me kute jēnh pytĩo baja pumũ. Nhym me arým 'ýr bōx ne arým kum kaprĩn kôt o kangō. Ar gadjwý dja gar aben maro aba nhym me'ō amikam kaprĩre. Ar amā kaprĩn kum kaprĩ kwý ngri. Dja gar ā anen arým aje Kritu kukràdjā marn kôt amijo aba mexkumrēx.

<sup>3</sup> Nhym be, godja ajō katāt aje amijo aba kêt kam mā amim,

—Djām ba ijaxwe? Kati. Ijaxwe'ō kêt kumrēx, 'itỳx, anhýro aba jabej. Djām mrāmri ne akabēn? Kati. Ga ne ga amim ajēx ne aminoo abiknoro aba.

<sup>4</sup> Ar akunĩ apýnh anhĩ djāri gar mrāmri katāt aje amijo aba jabej ga: amikabi. Ne

kam mrāmri katàt aje amijo abakam ga amikam akĩnh. Nhyim be, djã ne aje amim,

—Ba ne ba ije katàt amijo ibao tãmwã jakrenh, anhÿro abakam djãm mrāmri akatàt? Kati. Ar aje ã amim anhÿro abakam akatàt kêtukumrêx. <sup>5</sup> Nhyim be, ar akunĩ apÿnh anhĩ djãri dja gar goja mrāmri akatàtkumrêx jabej katàt amijo aba.

<sup>6</sup> Be, dja Metĩndjwÿnh kabên jarênh djwÿnh ar amã kabên jarênh ku'ê, ar amikutã kum ar anhõ mÿjja mex kwÿ ngã. Kum angã gê ar akôt o amikĩnh.

<sup>7</sup> Djãm me kute Metĩndjwÿnh'ã abenmã kum,

—Djãm mrāmri dja Metĩndjwÿnh memã axwe pãnh jarê? Kati. Kabên kajgo. Me àkĩnhĩkam pãnh kêt. Me 'êxnhĩkam pãnh kêt. Me axwe kunĩkam pãnh kêt, anhÿr? Djãm me kute anhÿrkam mrāmri me kabênkumrêx? Kati. Kwãrĩk wãnh amim ajêx ne aminoo abiknor kêt. Ga, mrÿnhĩ 'y, akrô 'y, akaôk 'y, 'ê 'ôdjwÿ 'yja pumũ. Djã ne ren me 'y ja kren ren kôt djwÿ mex jamÿ? Kati. Me kute 'y mexbit krekam kute kôt djwÿ mex jamÿnh.

<sup>8</sup> Gwaj badjwÿ. Godja gwaj amidjwÿnhbito kĩnh kadjy bajaxwe jabej, badjãkĩnhõ baba jabej, bakabên punuo baba jabej. Metĩndjwÿnh dja pãnh gwaj bamã mÿjja punu ngã gwaj arÿm bakaprĩ:re. Dja gwaj baje me kute mrÿnhĩ 'y kren arÿm kaprĩ pyrãk. Nãr, godja gwaj amim Metĩndjwÿnh Karõ man katàt kôt ar amijo baba, Metĩndjwÿnh Karõ dja arÿm gwaj bamã o pãnh. Pãnh dja gwaj arÿm kôt batĩn ne ar baba rã'ã: rã'ã ne.

<sup>9</sup> Kam dja gar adjukaprĩn katàt aje amijo aba'ã adjukanga kêt. Dja gar ã anen ï arÿm amim akĩnh djã byn akĩnhkumrêx. Kute mrāmri ne me kute bàygogo djê parkam me kĩnh pyrãk. <sup>10</sup> Pykakam mekôt ar abari dja gar amã me kunĩ kaprĩ. Dja gar me kute amim Jeju marja kumrêx aman amã me kaprĩn kam amã me kunĩ kaprĩ.

*Metĩndjwÿnh kute meo nykambit kĩnh.*

<sup>11</sup> Ga, ba inhikrakam ije ar amã pi'ôk no'ôkkam ije no'ôk rũnhja pumũ.

<sup>12</sup> Me ar amy kã rênh'ã ar amã àpnênh ba. Dja gar me kabên kôt ar amy kã rênh amũ me ja arÿm me'ã abenmã kum,

—Be, me Mòjdjê kukràdjã'ã no tÿxkumrêx. Me mexkumrêx, ane. Ja kadjy ne me ar amy kã rênh'ã ar amã apnê. Ne ren 'ã ar amã àpnênh kêt nhyim ren me 'ã kum me kurêo ba. Nhyim ren me Kritu pĩte'ykam jêtbit'ã ar amã ajarê nhyim ren me 'ã kum me kurêo ba. Nhyim be, kati. Nãm me ar amy kã rênh'ã ar amã àpnênh ba nhyim me arÿm kum me kĩnh. <sup>13</sup> Djãm me arÿm my kã rênhkam kute mrāmri Mòjdjê kukràdjã marn kôt amijo bakumrêx? Kati. Ne kam mÿj kadjy ne me ar amy kã rênh'ã ar amã apnê? Bir, dja me amiwÿr ar ajo akêx ne 'ã amidjwÿnhbito amran memã kum,

—Be, arÿm ar me bakukràdjã kôt ba mexkumrêx. Ba ne ba 'ÿr aro akêx, ane. Ja kadjy ne me ar amy kã rênh'ã ar amã àpnênh ba.

<sup>14</sup> Nhyim be, djã ne ba ba: amijo idjãmra prãm? Kati. Bẽnjadjwÿr djwÿnhbê Jeju Kritu ne ba o idjãmra prãm. Kute gwaj bajaxweo pãnh kadjy ne arÿm pĩte'ykam ty. Tãm ne ba o amra. Pĩte'ykam tykkam Metĩndjwÿnh arÿm imã ijaxwe kêt jarê. Kam, me kum Metĩndjwÿnh kĩnh kêt kukràdjã ba arÿm kanga. Ga, me arÿm tykkam kum mÿjja kĩnh kêtja pumũ. Badjwÿ imã me kukràdjã kĩnh kêt. Me kum Metĩndjwÿnh kĩnh kêt kukràdjã imã kĩnh kêt. Ba Kritumê ro'ã pĩte'ykam arÿm ityk pyrãk ne imã me kukràdjã kĩnh kêt.

<sup>15</sup> Be, arÿm gwaj baje tu amim Jeju Kritu markam djãm Metĩndjwÿnh kute gwaj bamy kã rênh mar nãr djãm kute gwaj bamy kã tã mar? Kati. Mÿjja ja ne arÿm kum kajgokumrêx. Nhyim be, gwaj arÿm tu amim markumrêx nhyim arÿm gwaj bajo ny ne. Tãm ne Metĩndjwÿnh kute markumrêx. <sup>16</sup> Me kute ikukràdjã jakôt amijo baja gê Metĩndjwÿnh kum me kaprĩ gê me umar mexkumrêx. Metĩndjwÿnh nhõ mebê idjaerkumrêxja gê kum me kaprĩ gê me umar mexkumrêx.

<sup>17</sup> Jakam dja gar aminhijukri amidjan ajõ ajte imã ikaprĩ jadjãr kêt. Kute mrāmri ne me kute Bẽnjadjwÿr djwÿnh Jejuo bikênhkam apÿnh kã rã kumex pyrãk ne ikã rã kumex. Jejukôt ne ba ikã rã kumex. Kam kwãrĩk wãnh ajte imã ikaprĩ jadjãr kêt.

<sup>18</sup> Gê Běnjadjwyr djwýnhbê Jēju tu kum ar akaprĩ.\* Tãm ne ja.

---

\* **6:18** Djãm ar ga ne gar adjukaprĩ nhym pãnh arým kum ar akaprĩ Kati. Ta ne tu kum ar akaprĩkumrêx.

## Paur kute Epexukam me jamã pi'ôk no'ôk ne ja.

Paur ne krĩraxbê Epexukam me jamã pi'ôk no'ôk ne. Nãm me Paurbê ijê nhym mebê ijê djakam ãmkam ne memã pi'ôk no'ôk ne. Kute meo tỳx ne meo kĩnhmã ne memã pi'ôk no'ôk ne. Ne memã Metĩndjwỳnh kute mỳjja kunĩ'ã karõo amirĩt ne. Metĩndjwỳnh kute pyka nhipêx kêttri ne gwaj bajã amim karõ ne kam jakam arỳm Jejukôt gwaj bapytàro tẽn kam amũ 'õkam dja bajaxwe kunĩo apêx. Be, pykabê ar babari dja Xatanajmê õ me karõ punumê gwaj bawỳr prõt. Be, gwaj baje Jeju mar kunĩ dja gwaj tu Xatanajmã baku'ê tỳx ne amijo aptàn o apa. Kam ne Paur apỳnh memã 'ã karõ, me kute katàt amijo ba'ã memã karõ.

Metĩndjwỳnh ne Kritukôt mỳjja kunĩ o ba. Ne Kritukôt mỳjja kunĩ 'y ne o ban kam ajte kôt gwaj bapytà. Ne kôt gwaj bajo kĩnh. Be, Kritu ne gwaj baje Jeju mar kunĩmã bẽnjadjwỳr. Kute gwaj bajo djuw mexo baja pumũ. Nãm ã Paur memã o amirĩto ane.

<sup>1</sup> Ba ne ba ibê Paur. Metĩndjwỳnh ne Jeju Kritumã ijã karõ nhym arỳm ijano ba memã 'ã idjugarênh ar iba.

Krĩraxbê Epexukam Jeju kute ar ajo õ me ja ne ba pi'ôk kôt ar amã ikabên. Gar aje arek Kritu Jeju kôt ar amijo aban 'ã adjukanga kêtja ba pi'ôk no'ôkkam ar amã ikabên.

<sup>2</sup> Metĩndjwỳnhbê ne me Babãm. Ne Bẽnjadjwỳr djwỳnhbê ne Jeju Kritu. Gê ar tu kum ar akaprĩn\* ar ajo ba gar adjumar mex rã'ã ne.

*Mỳjja kunĩ kêttri Metĩndjwỳnh kute amijo me utàr.*

*Rõ 8.29; Tex k 1.4; A Tex 2.13; Ped k 1.2*

<sup>3</sup> Be, Metĩndjwỳnh ne ukaprĩ:kumrêx. Kute Bẽnjadjwỳr djwỳnhbê Jeju Krituo ba nhym kute o Bãm. Metĩndjwỳnh ta ne gwaj bajo djuw mex. Gwaj tu amim Kritu markumrêx nhym prĩne kàjkwakam õ mỳjja kunĩo gwaj bajo djuw mex. <sup>4</sup> Ga, kute

amijo gwaj bapytàrja pumũ. Mỳjja kunĩmê me kunĩ kator kêttri ne amijo gwaj bapytàn amim,

—Be, me wã dja me tu amim Kritu markumrêx ba arỳm meo inhõkumrêx nhym me arỳm imã axwe kêtumrêx. Nãm ã kum gwaj bajabêkam gwaj bajã amim ane. <sup>5</sup> Amrêbê me kunĩ kêttri, mỳjja kunĩ kêttri ne ta kum gwaj bakĩnhkumrêx ne amijo gwaj bapytà. Ne kam tu amim gwaj bajã karõkumrêx ne amim,

—Me wã dja me tu amim Jeju Kritu markumrêx ba arỳm meo ikrakumrêx, ane. <sup>6</sup> Metĩndjwỳnh tu kum gwaj bakaprĩ:kumrêx. Nãm kum Kra jabêkumrêx, ne Krakôt kum gwaj badjwỳ kaprĩ:kumrêx. Dja gwaj kam bakunĩ: kum,

—E kum, djãm adjukaprĩ ngri: got? Adjukaprĩ ra:xi. Amexti:re. Me imã akĩnhkumrêx, anhỹro baba. Gwaj baje ã kum anhỹro baba kadjy ne arỳm amijo gwaj bapytà.

<sup>7</sup> Nãm Krakôt kum gwaj bakaprĩ:kumrêx. Kra ne amikamrõo gwaj bajaxweo pãnh. Nhym kam arỳm gwaj bajaxweo maro aknon bakam ngryk kêt ne. Nãm ukaprĩ:kumrêxkôt ã gwaj bajaxweo ane. <sup>8</sup> Kute prĩne mỳjja kunĩ mar. Kute amikukãm mỳjja kunĩmê me kunĩ'ã amim karõ. Ne kam gwaj badjwỳ, kute amim gwaj bajã karõ kôt arỳm kum gwaj bakaprĩ:kumrêx.

<sup>9</sup> Ta ne amrêbê: kute mỳjja kunĩ markôt arỳm amim kabên'ã karõ. Ta ne kum kabên kĩnh ne arỳm amim kabên'ã karõ ne kam memã arênh kêt 'ãtũm. Ne kam ajte ta arỳm jakam gwaj bamã kabênja jarê. <sup>10</sup> Nãm jakam gwaj bamã,

—Dja ã me kunĩ kute aminhinomã amimênh djã nhõ akati bõx ba kam Kritu'ã me kunĩmê mỳjja kunĩo akuprõ. Kàjkwakam mỳjja nàr pykakam mỳjja dja ba Kritu'ã kunĩo akuprõ nhym arỳm kunĩo ba, ane. Amrêbê kute kabên jarênh kêt ja ne jakam arỳm gwaj bamã arê.

<sup>11</sup> Amrêbê mỳjja kunĩ kêttri, me kêttri ne amijo me ibê idjaer pytà. Nãm tu me ijã amim karõkumrêx ne amim,

\* **1:2** Djãm ar ga ne gar adjukaprĩ nhym ar pãnh arỳm kum ar akaprĩ Kati. Ar ta ne ar tu kum ar akaprĩkumrêx.



—Be, me wã dja ba memã amakbô nhym me arým tu amim Kritu markumrêx ba kam arým meo aminhõ. Nãm ã me ijã amim ane. Ta ne kute amim mýjja kunĩmẽ me kunĩ'ã karõ. Kute amim 'ã karõ kõt ne mrãmri kute o apõxkumrêx ne kute o bakumrêx. Djãm me ibê idjaerbit ne amijo me ipytã? Kati. Mýjja kunĩ:. Kute amim mýjja kunĩ'ã karõ kõt arým mrãmri kute o apõx ne o bakumrêx.

<sup>12</sup> Mýj kadjy ne amijo me ibê idjaer pytã? Bir, ba me ikumrêx ne ba me tu amim Kritu markumrêx ne kõt ar amijo iba. Me kunĩ dja me me ijã abenmã kum,

—Ga, me kute Kritukõt katãt ar amijo baja pumũ. Kritu mexti:rekumrêx. Me bamã kĩnhkumrêx, anhÿro ba. Ja kadjy ne amijo me ipytã. <sup>13</sup> Me ibê idjaer kumrêx ne ba me tu amim markumrêx. Nhym kam me arým me abajtemmã Kritu'ã ujarẽnh ny katãtkumrêxja jarẽ ga me aman tu amim markumrêx. Nhym kam Metĩndjwýnh arým me ajaxwebê me apytãn kam me amã Karõ jano.

Amrêbê Kritu kute me bamã Karõ jarẽnhja ne me amã ano nhym arým me ajo ba. Ga, me kute mýjja'ã aminhidji janhõr nhym arým amirĩtkumrêxja pumũ. Me badjwý Metĩndjwýnh arým me bamã Karõ jano nhym arým me bajo ba. Me bajo ba gu me arým amim,

—Mrãmri ne Metĩndjwýnh arým ijo krakumrêx. Ga, arým kute imã Karõ janor nhym kute ijo bakumrêxja pumũ, ane. Karõ ne me bajo ba gu me ã amim ane. Kam, gu me baje mrãmri ja markumrêx. Arým Metĩndjwýnh kute me bajo kraja ne gu me baje mrãmri markumrêx.

<sup>14</sup> Ga, me kute memã mýjja rũnh nhõrmãn kam kukãm kute memã mýjja kryre nhõrja pumũ. Me amim kryre jamýn arým amiwýr rũnhja kamnhĩxkumrêx.

Me badjwý Metĩndjwýnh arým me bamã Karõ jano nhym arým me bajo ba gu me arým amim,

—Ga, Metĩndjwýnh arým kute imã Karõ janorja pumũ. Ga, kute ijo baja pumũ. Mrãmri dja ba kãjkwakam kõt itĩn ne ar iba rã'ã: rã'ã ne, ane. Karõ ne me bajo ba gu me ã amim anen kam arým baje mrãmri ja markumrêx. Mrãmri kãjkwakam

Metĩndjwýnhkõt batĩn ne ar baba rã'ã: rã'ãja baje mrãmri markumrêx ne amiwýr kamnhĩxkumrêx. Dja gu me Metĩndjwýnh kõt batĩnmãja maro baba: nhym Kritu arým bõx ne amikõt me bajo mõ. Metĩndjwýnh kute amijo me bapytãrjao mõ. Dja amikõt me bajo mõ nhym me kunĩ arým abenmã kum,

—Metĩndjwýnh me:xkumrêx. Me bamã kĩnhkumrêx, ane.

*Kute Metĩndjwýnhmã meo à'wýr.*

*Kor 1.9; Pir 1.9; Tex k 5.23; Idja 13.20*

<sup>15-16</sup> Kam ne ba mã Metĩndjwýnhmã ar akam amikĩnh jarẽho iba. Ar ga ne gar arým tu amim Bẽnjadjwýr djwýnh Jeju markumrêx ne kam amã Jeju nhõ me ja kunĩ jabê:. Nhym kam me arým imã ar ajarẽ ba ar aman mã Metĩndjwýnhmã ar akam amikĩnh jarẽho iban kam mã kum ar ajo a'uwn kum,

<sup>17</sup> —Metĩndjwýnh, ga ne ga Bẽnjadjwýr djwýnhbê Jeju Krituo aba. Djũnwã, amexi:re. Dja ga Akarõo aro aba gẽ ar arým ô'ã katãt akabẽn markumrêx nhym arým arkum Akrao amirĩtkumrêx gẽ ar mar mexkumrêx. <sup>18</sup> Anhõ me ja dja me arým kãjkwakam anhõ mýjja mexti:rekumrêxo aminhõ. Mýjja ja kadjy ne ga amiwýr ar 'wýr ne aro aba. Dja ga arkum anhõ mýjjao amirĩt gẽ ar prĩne mexti:rekõt kuman amiwýr kamnhĩxkumrêx. <sup>19</sup> Me kute tu amim amarkumrêxja dja ga memã tỳx jadjã. Aje memã tỳx jadjãr kadjy ajitý:xi. Me kadjy ajitýxo abê kumkati. Mýj ne ga aje meo tỳx kadjy ajitýxkam kute? Tãm dja ga arkum o amirĩt, gẽ ar prĩne kuma. Anhõ mýjja ja dja ga arkum o amirĩt gẽ ar kuma. Nã bãm ã ar akadjy Metĩndjwýnh 'wýro ane.

Metĩndjwýnh ne 'itý:xi. <sup>20</sup> Ga, Kritu arým tykkam Metĩndjwýnh 'itýxo kam àpẽnhja pumũ. 'Itýxo kam àpẽnhõ kute akubyn o tĩnja pumũ. Nãm ajte kãjkwã djwýnhkam o wabĩn aminhikõ'ã ýr. Raxo kute me rũnh jakrenh mex kadjy amidjubõk'ãnh ýr.

<sup>21</sup> Kýjrũm, me rũnh kunĩ nhiby ýr. Nhym arým rax ne tỳxo me akrenh me:x ne. Nhym pa:rbê memã ýr djwýnh kunĩmẽ me rũnh kunĩmẽ me 'itýx kunĩmẽ me bẽnjadjwýr kunĩmẽ ne me kum ngri:re. Jakam me bakam me rũnh kunĩ ne me kum

ngri:re, nàr amrê pyka ny mōrkam me rūnh kunī ne me kum ngri:re. Me kunī ne me kum ngri:ren kajgo:.

<sup>22</sup> Pa:rbê me kunī kum kajgo me:xi. Metīndjwýnh arým me rūnh kunī kadjy Jeju'ã ra:x mẽ. Ne ò me kute amim Jeju marja kunī kadjy 'ã rax mẽ nhym arým meo ba. Kute meo bakam arým kute me krã pyræk.

<sup>23</sup> Ga, me bakrãja pumũ. Me bakrãkam ne gu me badjumar nhym kam kukwakam amũ me banhĩ amingrêk ne ar me bajo ba. Me bakrãkam gu me badjumar ne arým me banhikrao badjãpênh nàr me baparkam bamrãnh. Me bakrã amũ me bakukràdjã kunī ngrêk ne me bajo ba. Kritudjwý kute me bakrã pyræk ne me bakunĩo ba, me babê ò me ja kute ta ĩ pyrækjao ba, me bangrêk ne me bajo ba, me baje amim mar kunĩjao tuknĩn ar bajo ba. Ta ne kute amiraxo pykamẽ kãjkwamẽ mýjja kunĩo tuknĩn ar o ba kute me badjwý me bajo ba.

## 2

*Metīndjwýnh kute akubyn Krituo tĩnkôt ò me jadjwýo tĩn.*

*Kô k 6.11; Xit 3.3*

<sup>1</sup> Nhym be, ar ga ne gar amrêbê ajamakkre kêt kute me tyk amakkre kêt pyræk ne ar aba. Gar Metīndjwýnh kabênkam amikràò aban mekôt ajaxwe. <sup>2</sup> Me kum Metīndjwýnh kĩnh kêtja kukràdjã kôt ne gar amijo aba. Gwaj banhiby me karõ punu nhõ bēnjadjwýr kukràdjã kôtdjwý ne gar amijo aba. Me karõ nhõ bēnjadjwýrja tãm ne jakam me amakkre kêt prãmja ba. <sup>3</sup> Amrêbê gwaj bakunĩdjwý ne gwaj mekôt amidjwýnhbito kĩnho baban arým bajaxwe:. Djãm me'ò ne gwaj bajo axwe gwaj bajaxwe? Kati. Gwaj ba ne gwaj bamã bajaxwe prãm ne amim 'ã karõn arým kôt bajaxwe. Amrêbê gwaj bajaxwekam ne Metīndjwýnh gwaj bakam ngryk ne. Me axwe kunĩmẽ gwaj bakam ngry:k ne.

<sup>4</sup> Djãm gwaj bakam ngryk rã'ãmã? Kati. Metīndjwýnh kum gwaj bakaprĩ:kumrêx ne kum gwaj bajabê:. <sup>5</sup> Gwaj bajaxwekam ne gwaj bajamakkre kêt kute mrãmri ne me tyk amakkre kêt pyræk. Gwaj kam tu amim

Kritu markumrêx ne kam mrãmri ne baje me tyk ne akubyn tĩn pyræk. Metīndjwýnh ne jakam Kritumẽ ro'ã akubyn gwaj badjwý gwaj bajo tĩn ne. Ta ne tu kum ar akaprĩn arým ar apytã.

<sup>6</sup> Metīndjwýnh ne jakam Kritumẽ ro'ã akubyn gwaj badjwý gwaj bajo tĩn. Gwaj kam arým bajamak mex ne ar baba nyo ar baba. Kritumẽ ro'ã ar baban ar baba rã'ã: rã'ã ne kute mrãmri ne jakam on kãjkwakam Kritumẽ ro'ã ar baba pyræk.

<sup>7</sup> Mýj kadjy ne gwaj Kritumẽ ro'ã ar baba? Bir, Metīndjwýnh gwaj bakam ukaprĩkumrêx. Kute me kunĩmã gwaj bakam ukaprĩo amirĩt kadjy ne gwaj Kritumẽ ro'ã ar baba. Gwaj tu amim Kritu Jeju markumrêx nhym kam gwaj bakam òdjãnhkumrêx. Ukaprĩ:kumrêx kôt ne gwaj bakam òdjãnhkumrêx. Amrê amex mōr jakam ne amũ nĩ:jkamdjwý dja memã gwaj bakam ukaprĩjao amirĩt rã'ã: rã'ã rã'ã.

<sup>8</sup> Be, Metīndjwýnh ta ne kum ar akaprĩ. Ar ga ne gar amex kêtumrêx, nhym ta kum ar akaprĩn ar amã Kritu jano nhym ty. Gar kam tu amim markumrêx, nhym arým kôt amim apytã. Djãm ar amex ne ar adjukaprĩ gar ga: amipytã? Kati. Metīndjwýnh ta ne kum ar akaprĩn ar amã Kritu janon kam ta amim ar apytã. <sup>9</sup> Djãm we kute ar amã,

—Be, ga ne ga amex ne adjukaprĩkumrêx, anhýr, ne kam we kôt kute amim ar apytãr? Arkati. Nãm ren ã ar ajõmã ane, gar ren arĩk ga amimexo adjãmra ar aba.

<sup>10</sup> Nhym be, kati. Metīndjwýnh ta ne gwaj bajo mex gwaj kam arým badjukaprĩ. Kritu Jeju tyn arým akubyn tĩn nhym kôt arým gwaj bajo ny. Metīndjwýnh ta ne gwaj bajo ny gwaj aminhjukri amidjan kam arým bamã me kaprĩo baba. Ar adjukaprĩ ja ne Metīndjwýnh amim 'ã karõ. Gwaj bakêtri amim 'ã karõ. Ne kam tũmrãm arým gwaj bajo ny gwaj arým kôt bamã me kaprĩo baba.

*Mebê idjaermẽ me bajtem arým Kritu kôt abeno òbikwa.*

<sup>11</sup> Be, amrêbê ne ba me imã me akurêo iba. Ga me abajtemkam ne ba me ibê idjaerkam imã me akurêo iba. Ba me me ajã memã kum,

—Me wã ne me my nhinhu kà rênh kêt. Metĩndjwýnh kum me kĩnh kêt. Me ba ne ba me imy kà rênh. NhyM Metĩndjwýnh kum me ikĩnhkumrêx, ane. Djãm mrãmri me kute me imy kà rênhkam arým me imex? Kati. Me imy kàbit rênh.

<sup>12</sup> Me abajtemkam ne ga me amrêbê aje Kritu mar kêtukumrêx ne ate amijo aba. Ba me ibê idjaer ne ba me ari me ajo kuba-jtemo iba. Metĩndjwýnh ne amrêbê: kute me ipytàr'ã me imã,

—Me kute tu amim ikra markumrêx dja ba amim me utà, ane. Ne kam 'ã me imã apýnh mýjja jarênh mãmđji ba me maro iba. Djãm me abajtemmã ne Metĩndjwýnh mýjja ja jarê? Kati. Kute me amã arênh kêt ga me aje mar kêt. Kam ne ga me Metĩndjwýnhkôt atĩn kadjy kêt ne aje amiwýr atĩn kamnhĩx kêt ne aje mekôt Metĩndjwýnh mar kêt. Ne kam ate kubê amijo aba. Tãm dja ga me nhýn ama ne mar rã'ã ne.

<sup>13</sup> Metĩndjwýnh bê ne ga me amrêbê ate ar amijo aba. NhyM be, jakam ne arým Kritu Jeju kamrô me bakadjy prôt ne nhyM me bapãnh ty. Ga me kam kôt ar amijo aba nhyM arým ar me ajo ba.

<sup>14</sup> Ta ne me bamã,

—Me abeno anhõbikwa, ane. Nãm ã me bamã ane, gu me arým abeno banhõbikwa. Me abajtemmê me ibê idjaermê ne gu me bamã aben kurê. Me bamã aben kurêja ne kute mrãmri ne gu me baje aben nêje ka'ê pyræk. Gu me kam Jeju kabênkôt arým abeno banhõbikwa nhyM kute mrãmri ne aben nêje ka'ê ngrãnh pyræk.

<sup>15</sup> Môđđê kute Metĩndjwýnh kukwakam mebê idjaermã 'ã karõkam kukràđđja ne Kritu arým o kajgo. Pĩte'y'ã tyko arým o kajgon arým ajte mar kêt. Mýj kadjy ne o kajgo? Bir, nãm o kajgon arým amiwýr me bajo akêx. Amiwýr me bajo akêx gu me arým abeno banhõbikwa. Ga, kute me bajo nyja pumũ. Gu me arým baje mrãmri banhĩ tipđji pyræk. Ja kadjy ne Môđđê kukràđđjo kajgo. <sup>16</sup> Kritu pĩte'y'ã tyko ne me bajo aben pyđjin kam Metĩndjwýnh'ýr me bajo akêx ne. Gu me kam arým o banhõbikwan kam bamã aben kurê kêt.

<sup>17</sup> Kritu arým me abajtem'ýr bõx. Metĩndjwýnh bê amijo akre raxkam arým me awýr bõx. Me awýr bõx ne arým kàj bê

me amã kabên jarê. Me aje Metĩndjwýnho anhõbikwa kadjy ne me amã kabên jarê. Ajte me aje me ijo anhõbikwa kadjy ne me amã kabên jarê. Ne, me ibê idjaer ije Metĩndjwýnh kôt amijo ibakam Kritu arým me iwýr bõx ne kàj bê me imã kabên jarê. Me ije Metĩndjwýnho inhõbikwa kadjy ne me imã kabên jarê. Ne me ije ajte me ajo inhõbikwa kadjy me imã kabên jarê.

<sup>18</sup> Djãm apýnh me Babãm'ýr me bapry? Kati. Arým ne me Babãm'ýr me bapry pyđji. Metĩndjwýnh Karõ pyđji. Me ibê idjaermê me abajtemmê ne gu me Karõ pyđji kôt me Babãm'ýr bõx.

<sup>19</sup> Kam ne ga me arým abajtem kêt ne me akátãm kêt. Metĩndjwýnh ne arým me ajo õ me ja ne me ajo õbikwa. Me ibê õ me tũmmê ro'ã me ajo õbikwa.

<sup>20</sup> Gu me kam arým baro'ã babê Metĩndjwýnh nhõ keno kikreti pyræk. Kritu ne ar ijano bar me awýr bõx ne me amã arê. Ar ba ne bar Metĩndjwýnh kukwakam me amã arê, ga me kabên ma. Ar ba ne bar ije mrãmri ne kikreti kadjy pyka mã: par krax ku'ê pyræk. Jeju Kritu kute mrãmri ne kikre par krax kadjy kum kajpar đđa djwýnh pyræk.

<sup>21</sup> Kum kajpar đđa djwýnh kõnh ne me prĩne kên jadjwýr mexo mõ:. Kõnh ne me aben nHITEPã adjwýr mexo mõ. Ne kam aben nhiby kên jadjwýr mexo mõ: nhyM Metĩndjwýnh nhõ kikreti arým abatãnh mõ. Metĩndjwýnh Karõđđwý ã me bajo anen Bẽnjadjwýr djwýnhbê Jeju Kritu kôt me bapymýr mexo mõ. Metĩndjwýnh me ibê idjaero õbikwan kam me abajtemo õbikwa gu me arým Jeju kôt đđan arým batypđjin đđa. Batypđjin đđan arým Metĩndjwýnhmã bamexkumrêx ne.

<sup>22</sup> Djãm me ibê idjaerbit ne me ijo õbikwa? Kati. Me abajtemđjwý. Gu me kam arým baro'ã babê Metĩndjwýnh nhõ keno kikreti pyræk. Metĩndjwýnh ne me bamã Karõ jano. Kute me bamê amijo kajkep kadjy ne me bamã ano.

### 3

*Metĩndjwýnh kute me bajtem'ýr Paur janor.*

<sup>1</sup> Metĩndjwýnh kute me amã Karõ janorkam ne ba arým kum me ajo a'uw. Me abajtemo ne ba kum a'uw ne me amã ne ba Jeju Kritu'ã idjujarēnh ar iba nhym me arým 'ã kum ikurēn idjuwpre. Ba ibē Paur ne me arým idjuwpre.

<sup>2</sup> Me ga ne ga me arým ama. Metĩndjwýnh ta ne kute imã me ajã karõ ga me arým ama. Nãm imã,

—Arým imã me bajtemdjwý kaprĩ. Ga dja ga memã 'ã adjujarēnh djwýnh, ane. Tãm ne ga me aje mar jabej ba ajte akubyn me amã arē. <sup>3</sup> Kum me abajtem kaprĩmã ne kute amrēbē arēnh kēt. Ne kam jakam ba imã arým arē ba arým me amã 'ã pi'òk no'òk ngrire ga me arým omũn aman <sup>4</sup> badjwý ima. Metĩndjwýnh kute Kritu'ã mýjja jarēnh kēt ba ije prĩne marja dja ga me ama.

<sup>5</sup> Nãm amrēbē kute memã arēnh kēt nhym pykakam me kra'õ kute mar kēt. Me kute aben djõ'ã mar kēt. Nhym kam Metĩndjwýnh Karõ arým jakam ar imã arē bar arým jakam kuma. Kritu ne ar ijano bar ibē õ àpēnhkumrēx ne kukwakam idjujarēnh ar iba. Nãm ar imã arē bar jakam arým kuma.

<sup>6</sup> Kute mýjja jarēnh kētja arým ar imã arēn ar imã,

—Djãm me bajtemmē me abē idjaermē arek apýnh ar abamã got? Arkati. Dja ga me akunĩ tu amim Kritu'ã ujarēnh ny markumrēx ne arým aro'ã kõt ar aba. Ne kam arým aro'ã Metĩndjwýnh nhõ mýjjao aminhõn aro'ã kõt ar aban kam aje anhĩ tipdji pyræk. Ne kam Metĩndjwýnh kute amrēbē: memã mýjja jarēnh mãmdjija me aro'ã amim aby. Me abē idjaermē me abajtemmē dja ga me tu amim Kritu markumrēx ne arým me aro'ã amim aby, ane. Tãm ne ar imã arē ba arým kuma.

<sup>7</sup> Metĩndjwýnh ta ne 'ityxkõt ijo ban tu kum ikaprĩ.\* Ne kam arým imã me'ã karõ ba memã Kritu'ã kabēn nyja'ã idjujarēnh ar iba.

<sup>8</sup> Metĩndjwýnh nhõ me ja kunĩ ne me kute rũnho ijakrenh mex. Ba kam bajbit ikajgo me:x ne. Nã bãm te ikajgo: nhym Metĩndjwýnh ta arým tu kum ikaprĩn kam arým imã idjapēnh djã'ã karõ. Ta ne imã,

—Ga dja ga me bajtemmã kãj bê Kritu'ã adjujarēnh ar aba, ane. Kritu ne memã kĩnh djã rũ:nh ngã, krãptĩ: ngã. Me te: kute kĩnh djã'ã ujarēnh inomã mēnhmã. Kritu kõt me kĩnh djã ja'ã ne ba idjujarēnh ar iba.

<sup>9</sup> Kum ikaprĩkam ne imã,

—Ije memã ikabēn jarēnh kētja dja ba amã arē ga arým prĩne ama. Ije amim me bajtem pytãrmã. Tãm dja ga aman me kunĩmã arēnhõ amirĩto aba. Nãm ã imã ane. Metĩndjwýnh ta ne Krituo mýjja kunĩ nhipēx. Adjãkamã kute Jeju Krituo mýjja kunĩ nhipēx ne kute me abajtem pytãr'ã amim karõn kute me bakukãmãremã arēnh kēt tãm ne imã arē.

<sup>10-11</sup> Mýkam ne kute amrēbē me bakukãmãremã me apytãr jarēnh kēt? Bir ga, Kritu kute ajbir pykakam abenã me bamēnhja pumũ. Kam ne me kãjkwakam aparmã abenã me bapumũnho nhỹ. Kãjkwakam me bēnjadjwýrmē me rũnhmē ne me jakam me bapumũnho nhỹ. Me baje amim Jeju mar kunĩja pumũnho nhỹn arým me bakõt Metĩndjwýnh raxmã kato. Me kute me bakõt Metĩndjwýnh raxmã kator kadjy ne Metĩndjwýnh kute amrēbē me bakukãmãremã arēnh kēt. Memã kute me abajtem pytãr ne kute abenã me bamēnhja kute arēnh kēt.

Nãm me me bapumũnho nhỹn me bajã abenmã kum,

—Be, djãm mrãmri ne djãm Metĩndjwýnh kute prĩne abenã me mēnh mar mexkumrēx. Nãm mýjja kunĩ kētri amim me'ã karõkumrēx. Djãm kabēno kute amikapêr kãr? Kati. Nãm Bēnjadjwýr djwýnhbē Jeju Kritu'yr meo akēx nhym tu kute ar meo bakumrēx. Djãm Metĩndjwýnh no kēt got? Ga, prĩne kute aben ã me mēnh mar mexkumrēxja pumũ. Ga, me kute abeno õbikwa mexkumrēxja pumũ, ane. Nãm me me bapumũnho nhỹn ã abenmã ane. Me kute kãjkwakam ã abenmã anhỹr kadjy ne Metĩndjwýnh kute amrēbē me bakukãmãremã arēnh kēt. Kute memã me abajtem pytãr ne kute aben ã me bamēnhja jarēnh kēt.

<sup>12</sup> Metĩndjwýnh ne uma:. Kam dja me kute Kritu mar kētja kum uma:. Me badjwý gu me ren baje Kritu mar kēt

\* 3:7 Djãm Paur ta axwe kēt nhym pãnh kum kaprĩ Kati. Paur te axwe kētmã nhym ta arým tu kum kaprĩ.

ne ren bamã Metĩndjwýnh pýma: ne. Nhym be, kati. Arym ne gu me tu amim me banhõ Bẽnjadjwýr djwýnhbê Jeju Kritu markumrêx ne arým batĩn prãm kêt. Ne kam arým Metĩndjwýnh pymatio banhõbikwakumrêx ne kum amijarênhõ baba.

<sup>13</sup> Kam kwãrĩk wãnh amim mar rerekre kêt. Me amextire kadjy ne ba Metĩndjwýnhmã apê. Nhym kam me arým 'ã kum ikurên ijo bikênhõ ba. Gê me te ijo bikênhõ ba kwãrĩk wãnh kam amim mar rerekre kêt. Dja ga me tu amim Jeju mar tỳxkumrêx.

*Kute meo Metĩndjwýnhmã à'wýr.*

<sup>14</sup> Me akĩnh kadjy ne ba arým ikõnkrãõ nhýn Bẽnjadjwýr djwýnhbê Jeju Kritu Bãmmã me ajarê. <sup>15</sup> Ta ne me kute amim Jeju mar kunõ kra. Kãjkwakam me kute amim Jeju marmê pykakam me kute amim Jeju marmê ne me kunõ kra. Ba arým kum me ajo a'uw. Nã bãm kum,

<sup>16-17</sup> —Djũnwã, ara:x ne adjukaprĩti:rekõt dja ga memã tỳx jadjã. Gê Akarõ me umar djãkam memã tỳx jadjã gê me kõt tỳ:x ne mrãmri tu amim Kritu markumrêx. Nhym kam Kritu arým mrãmri tu me kadjwýnhbê ýrkumrêx. Nhym kam me arým ô'ã kute mrãmri ne pidjõ pykakam arê jabjêkam ku'ê tỳx pyrãk. Kam dja me mar tỳxkumrêx. Mýj dja me kuma? Bir, Kritu mrãmri kum me abê:kumrêx. Tãm dja me mar tỳxkumrêx. Ne kam ô'ã mrãmri me kum me abê:kumrêx ne.

<sup>18</sup> Dja me kum me abêkumrêx ne kam arým prĩne kuma. Mýj dja me kuma? Bir, Kritu ta kum me abê:kumrêx. Ja dja me prĩne kuma. Kritu nhõ me ja kunĩ dja me prĩne kuma. Mýj ne Kritu kum me abêkam kute? Kum me abê ja ne kute mýjja jabatã:nh pyrãk. Mýjja jabatãnh ne kum me abê ja'ã amijakre. Me te kute kãjkwã nãr kon, pyka'ã akremãja pumũ. ã abata:nh ane nhym me te aktã irê'ýr bõx ne 'ã akremã. Nãr kon, me te 'ênhõt nãr krax'ýr bõx ne 'ã akremã. Nãr kon, me te 'ã àbir nãr aparmã rwýk ne 'ã akremã.

<sup>19</sup> Nãm ã Kritu kum me abê ra:xõ ane. 'ã akre'ýr me bõx kê:tkumrêx. Me kute mar mex kê:tkumrêx. Kritu kum me abê:ê. Kum me abêõ me rer me:x ne. Dja kum me abê

rã'ã: rã'ã ne. Nhym be, Djũnwã, dja ga memã akren memã arê gê me kuma. Dja me prĩne Kritu kum me abêja ma ga kam arým araxõ me kadjwýnhbê nhý. Ne kam me ĩ pýnhkõt meo tuknĩn prĩne meo aba mex. Nhym kam me prĩne araxmã katon arým prĩne amikam ama. Nã bãm ã me Babãmmã ajarênhõ ane.

<sup>20</sup> Metĩndjwýnh ne ra:xi. Me'õ ne kute raxõ têt kêtumrêx. Kute mýjja kunĩ nhipêx mar. Mýjja 'õ kubê tỳx kêtumrêx. Djãm me baje kum mýjja ra:xõ badjã'wýr nhym te kute me bakadjy ipêxmã nhym kubê tỳxmã? Kati. Kubê tỳx kêt. Nãr, djãm me baje amim mýjja ra:x'õ'ã karõ nhym te kute me bamã ipêx mã? Arkati. Me bamãbit ne kute mýjja rũnh pyrãk. Nhym be, kumã ne mýjja kunĩ kry:re. Kute mýjja kunĩ nhipêx kadjy umaro, tỳxõ kute me bajakrenh me:xi. Djãm gu me baje kum mýjja rax'õ jarênh nhym te kute umaje ne ipêx kêtã. Kati. Tỳxõ me bakadjwýnhbê ýrkam dja arým mýjja rũnh nhipêx ne. <sup>21</sup> Gu me kam kum,

—Me ije amim Jeju mar kunĩ ne ba me amã, “Ara:x ne apýma:kumrêx”, anhýro iba. Dja ba me aben djõ'ã amã arax jarênh rã'ã: rã'ã ne, ane. Gu me ã kum ane.

## 4

*Me kum aben jabê'ã kute memã karõ.  
Rõ 15.5; Pir 2.1; Ped k 3.8*

<sup>1</sup> Ë, Bẽnjadjwýr djwýnhmã ne ba apê nhym me 'ã kum ikurên idjuwpre. Ba kam arým ar amã 'ã karõ. Katãt ar aje amijo aba kadjy ne Metĩndjwýnh arým amiwýr ar ajuw ne ar ajo ba. Kam dja gar katãt ar amijo aba nhym Metĩndjwýnh arým ar akam kĩnhkumrêx.

<sup>2</sup> Dja gar kum amijo angri. Kwãrĩk wãnh amijo adjãmra kêt ne akrãnmã ar amijo aba. Kwãrĩk wãnh memã bêt kêt ne memã aprĩren memã akabên. Gê me'õ ar ajõõ bikênh jabej akubyn amijã angryk nê. Ar amã aben jabêkõt amijã angryk nê ne.

<sup>3</sup> Metĩndjwýnh Karõ kute abenã ar amênh gar aje abeno anhõbikwakam aje mrãmri ne me ĩ pydji pyrãk. Kam amã aben jabên abenmã akabên mex jarê. Abenmã akabên mex ry typydji 'ãno djan aben nêje aben pumũ.

<sup>4</sup> Gwaj baje mrāmri ne me ĩ pydji pyrāk ne ren kam axikôt bakabên. Metĩndjwýnh Karō pydji kute gwaj bajo ba gwaj ren axikôt bakabên. Kute amiwýr gwaj bajwýr ne gwaj bajo bakam gwaj bakunĩ amiwýr me'õ pydji kamnhĩxkumrêxo baba. <sup>5</sup> Bēnjadjwýr djwýnh pydji:. Gwaj bakunĩ baje tu amim Jeju pydji: markumrêx ne pydji kôt ar amijo baba nhym me arým ngômã gwaj bajangij. <sup>6</sup> Nhym me Batĩndjwýnh pydji kubê ne gwaj bakunĩ Bãm djwýnh ne gwaj bakunĩmã Bēnjadjwýr djwýnh. Nãm gwaj bakunĩo ban bakunĩ mẽ amijo kajkep. Ga, gwaj baje mrāmri ne me ĩ pydji pyrākja pumũ.

<sup>7</sup> Nhym be, ajtekam gwaj banhĩ pýnhkôt apýnh gwaj badjápênh djà. Kritu ta kum gwaj bakaprĩn gwaj banhĩ pýnhkôt arým amim gwaj bajã karō. Amim gwaj bajã karōn arým gwaj bakunĩmã gwaj badjápênh djà'ã karō. Gwaj kam banhĩ pýnhkôt arým apýnh badjápênh djà maro baba. Gwaj badjápênh djà'ã ne Metĩndjwýnh gwaj bakĩnh djà jarē.

<sup>8</sup> Amrēbê: gwaj bakêtri ne Metĩndjwýnh me bakukãmãremã kum, “Nãm kàjkwamã wabin amim me uwpre tũm krãptĩja pytãn meo mõ.

Ne kam pykakam me jamã me kĩnh djà ngã”, ane.

Ga, Metĩndjwýnh kute Kritu kàjkwamã àbir jarēnhja pumũn kam kute memã kĩnh djà nhõrja pumũ.

<sup>9</sup> Mýj ne kàjkwamã àbir kētri nē? Bir, nãm ruw. Nãm apa:rmã pykamã ruw ne pyka mã: nõ. <sup>10</sup> Nõ:n kam ta ajte wabi. Kàjkwa kunĩ mýrbê kàjkwa djwýnhmã wabin kam nhỹ. Kute mýjja kunĩ mẽ amijo kajkep kadjy kam nhỹ. Kute kàjkwamẽ pykamẽ amijo kajkep ne o ba kadjy kam nhỹ.

<sup>11</sup> Ga, Kritu àbirkam kute memã me kĩnh djà nhõrja pumũ. Tãm ne Metĩndjwýnh me bakukãmãremã arē. Mýj'ã ne kute memã kĩnh djà nhõrja amijakre? Bir, kute memã apýnh àpênh djà nhõr'ã ne amijakre. Kritu ne arým gwaj bamã apýnh badjápênh djàri'ã ajarē gwaj maro baba. Ar ije 'ã idjujarēnhmã ne ar ikwýmã 'ã karōn ar ijano. Bar kam ije omũnhkôt memã 'ã idjujarēnh ar iba. Nhym kam

ajte gwaj bakwýmã apýnh kabên jarē gwaj maro baba ne arým kukwakam amũ memã kabên jarēho baba. Nhym kam ajte gwaj bakwýmã bakabên mex'ã karō gwaj me kute Jeju mar kêtjamã arēho baba. Nhym kam me arým amim Jeju maro ba. Nhym kam ajte gwaj bakwýmã me kute Jeju marjao djuw mexo ba'ã karō. Gwaj meo djuw mexo baba nhym kam me tu amim Jeju mar týxkumrêx ne 'ã ukanga kêt ne ar ba. Nhym kam ajte gwaj bakwýmã memã kukràdjã'ã badjujarēnh'ã karō gwaj memã 'ã badjujarēho baba. Kritu kute gwaj bakĩnh djà'ã gwaj bamã apýnh badjápênh djà nhõr ne ja.

<sup>12</sup> Dja gwaj apýnh badjápênh djàjakam apê:, Jeju nhõ me ja prĩne kum mex kadjy apê: nhym kam me adjwýnhdjwý Metĩndjwýnhmã àpênh ar ba. Gwaj me kadjy badjápênh ar baba nhym me kunĩ arým Kritu mar mexo amũ amikamēn arým amim mar ra:x ne. Me kute Kritu mẽ ĩ pydji pyrāk ja arým amim mar ra:x ne. <sup>13</sup> Djãm kam dja gwaj Metĩndjwýnh Kra mar punun kam bakabên kajgo'õ mýr jabej abenmã bakabên ar baba? Kati. Dja gwaj Kra'ã bakabên pydjibit man axikôt arēn tu amim markumrêx. Ne kam baje me prĩre pyrāk kêt ne Kritu mar rerekre kêt ne bajabatãnhkumrêx. Ne kam prĩne amim kuman arým amim mar ra:xkumrêx.

<sup>14</sup> Djãm gwaj bano rerekre kute me prĩre no rerekre pyrāk rã'ãmã? Nhym apýnh me 'êxnhĩ mrãn bõx ne no týxtikam ari gwaj banoo biknoro bamã? Me kute ari apýnh me kukràdjã jarēho kute kôk, kute ngô djàkà ari mýjja japĩn pyrāk. Djãm gwaj baje jãm Kritukôt bakabên djir ne ajte jãm me kukràdjã punukôt bakabên djir ne ari: bakabên jadjwýro babamã? Kati.

<sup>15</sup> Gwaj ba dja gwaj bamã aben jabên bakabên katãtbit jarēn arým kàjmã Kri-tumã aben kamēho tē. Baje mar mexo, kum bamexo kàjmã aben kamēho tē. Ga, gwaj bakrãja pumũ. Gwaj bakrãkam badjumar ne kam amũ banhikrao apê nãr baparkam mrã. Gwaj bakrã ne amũ gwaj bakukràdjã kunĩ ngrêk ne gwaj bajo ba. Gwaj bakrã kumrêx umar nhym kam ô'ã amũ gwaj bakukràdjã kunĩ apê. Kritudjwý

ne kute gwaj bakrã pyrãk ne gwaj bakunõ ba gwaj kukwakam apÿnh kum badjãpênh djãri kum badjãpênh ar baba.

<sup>16</sup> Ga, gwaj bapar, bate, bapa, banhikra, bano, banhijãkre, bakukràdjã kunĩ, kunĩ apÿnh gwaj bakudjêkkôt kute aben jamÿnh tÿx, kute abenmã tÿx jangjênh mex. Ne ren gwaj bakudjêk kêt gwaj ren bakukràdjã kunĩ ren aben bê ajka'u gwaj ren kam kãmã baku'ê kêt. Kritudjwÿ ne ã ane. Nãm gwaj bakrãptiõ õbikwa gwaj banhĩ pÿnhkôt apÿnh kum badjãpênh djãri. Gwaj kam baje aben jamÿnh tÿx mãn prãbê abeno banhõbikwan baro'ã Kri-tumã apê. Te apÿnh kum badjãpênh djãri gwaj baro'ã kum badjãpênh ar baban o abenmã tÿx jangjênh baba. Kute gwaj bamã badjãpênh djã'ã ujarênh kôt gwaj kum badjãpênh ar baba. Gwaj bamã aben jabêo ro'ã aben kamênh mõ. Gwaj baje mar mexo, kum bamexo aben kamênh mõ.

*Me kute me kukràdjã punu kôt amijo ba kêtã.*

*Kor 3.5; Ped k 4.7*

<sup>17</sup> Ije ar amã ja jarênhkam djãm ar aje arek amijo aba tũm kôt amijo aba rã'ãmã? Amrêbê ne gar ate Metĩndjwÿnh bê ar amijo aban me bajtem kukràdjã punu kôt ar amijo aba. Djãm aje arek me kukràdjã punu kôt amijo aba rã'ãmã? Kati. Tãm ne ba ar abê uma:. Me wã ne me amim mÿjja kajgobit'ã karõo ba.

<sup>18</sup> Nãm me tu amakkre kêt-kumrêx. Nhym me te kute memã mÿjja mex'ã karõ nhym me kute mar kêt-kumrêx. Mÿjja'ã me kabên kute amijakreja ne me kute mar kêt-kumrêx. Kam ne me arÿm umar djãkam mÿjja punubit man arĩk ar ba. Arĩk ar ba kute mrãmri ne akamãt kô tykkam me arĩk ar baja pyrãk. Nãm me Metĩndjwÿnhbê: amijo ban kam kôt tĩn ne ar baja mar kêt-kumrêx.

<sup>19</sup> Nhym ren me me akre ren me amimaro tẽn ren arÿm amim ngryk ne. Nhym be, kati. Me ja ne me kute amimar kêt-kumrêx ne kam kute kurêbit mar ne aben bê me kupênh ra:x ne mÿjja punu kunĩ nhipeõo ban ajbit mar prã:m ne.

\* **4:30** Ga, me kute mÿjja'ã aminhidji janhôr nhym arÿm amirĩtkumrêxja pumũ. Ar gadjwÿ Metĩndjwÿnh arÿm ar amã Karõ jano nhym ar ajo ba gar arÿm amim, "Mrãmri ne arÿm ijo krakumrêx. Ga, arÿm kute imã Karõ janor nhym kute ijo baja pumũ", ane.

<sup>20</sup> Nhym be, Kritu. Djã ne gwaj bamã,

—Ajrã mekôt ã amijo ane, ane? Arkati.

<sup>21</sup> Arÿm ne gar mrãmri Jeju kabên katãt kôt ama. Nãm amã, "Kwãrĩk wãnh", ane. Nãr ar akwÿ aje mar kajgo jabej ba ajte ar amã tãm jarê.

<sup>22</sup> Amrêbê ne gar me kum Metĩndjwÿnh kĩnh kêtja kukràdjã kôt ar amijo aba. Aje kangamã. Me kukràdjã kôt ne me kum mÿjja punu prãm ne amim 'êx ne amim, "Ajrã, kam amexkumrêx", anhÿro ba. Aje me kukràdjã ja kangamã.

<sup>23</sup> Adjumar djã ny kadjy aje amimarmã.

<sup>24</sup> Ne amrãnh nymã ne mrãmri Metĩndjwÿnh katãtkôt katãt aje amijo abamã ne mexo amexmã.

<sup>25</sup> Kam memã ajêxo abaja tu wãnh kangakumrêx ne abu'ã me kunĩmã akabên katãtbit jarê. Mÿkam? Bir, Kritu amikôt gwaj bakunõ ba gwaj baje kumê banhĩ pydji pyrãk. Kam dja gwaj memã bakabên katãt jarê.

<sup>26</sup> Godja ga angryk jabej kwãrĩk wãnh kam ajaxwe kêt. Kwãrĩk wãnh angryk'ã akamãt kêt ne angryk 'iry kêt. <sup>27</sup> Ajaxwe kêt gê Xatanaj akam ãm kêt.

<sup>28</sup> Kwãrĩk wãnh ar ajõ adjãkĩnhĩ ajte mÿjja 'õo adjãkĩnh kêt-kumrêx. Ga dja ga adjãpênh tÿx ne anhikrao katãt mÿjja kupênh mex. Ne kam adjãpênh pãnh arÿm amim anhõ mÿjja jamÿ. Ne kam arÿm amikutã me õ mÿjja kêtjamã kwÿ ngã.

*Me kabên mex'ã kute memã karõ.*

<sup>29</sup> Kwãrĩk wãnh akabên punu'õ jarênh kêt. Memã akabên mexbit jarê gê me kuman mex. Gê me mexo amũ amikamên arÿm mexkumrêx.

<sup>30</sup> Kwãrĩk wãnh Metĩndjwÿnh Karõmã kaprĩ jadjãr kêt. Metĩndjwÿnh ne arÿm ar amã ano nhym amim ar ajo ba. Nhym o kute mrãmri ne arÿm ar ajã kute aminhidji nhôr pyrãk.\* Dja Karõ arek amim ar ajo ba: nhym kam Jeju arÿm bõx. Bõx ne amikôt ar ajo mõ.

<sup>31</sup> Dja gar wãnh angryk, kam amadjãkam atokryja wãnh kanga. Ne wãnh mekam adjãkrêmê angrykmê akabên punumê wãnh kangakumrêx. Ar aje meo abikênh'ã

amim karōja kunī dja ga wānh kangakumrēx.

<sup>32</sup> Ar ga dja gar amā aben kaprīn abenmā abēn rerek ne aben jaxwe maro aknon abenkam angryk kêt. Mỳkam? Bir ga, Metīndjwỳnh arỳm Kritu tykkôt kute ar ajaxwe maro biknor ne ar akam ngryk kêtja pumũ. Kam dja gar aben jaxwe maro aknon abenkam angryk kêt.

## 5

<sup>1</sup> Ga, me bām kum kra jabê nhym kute bām kôt amijo baja pumũ. Nām kute amim,

—Ba djūnwā kudjwa, ba djūnwā kudjwa, anhỹro ba. Metīndjwỳnh kum ar ajabēkam dja gar kôt ar amijo aban kudjwa amā me abēo aba. <sup>2</sup> Ga, Kritu kum gwaj bajabē:ja pumũ. Ne kam arỳm gwaj bajaxwe pānh Metīndjwỳnhmā amingā nhym me kam kubī nhym arỳm gwaj bajaxwe pānh ty. Kritu kute mrāmri ne mry bīn pyrāk, me kute amrēbê me axwe pānh kute Metīndjwỳnhmā mry par pyrāk. Me kum mry pan kubô nhym arỳm ardjānh bān kīnh ne. Dja gar Kritu kudjwa ā amā me abēo ane nhym arỳm akam kīnhkumrēx ne.

*Apỳnh me axwe djāri nēje kute me kukrà.*

*A Xim 2.4; Xij 4.4; Dju k 1.6, 2.15*

<sup>3</sup> Nhym be, me mjēn djwỳnh nār prō djwỳnh kupa'ā kurē ba. Nār me àpēnh punu:re kunī nhym me arỳm mekam pijām ne. Nār me kute mỳjjao atom rūnh prā:m. Kwārīk wānh ar ajō amijo anhỹr kêtikumrēx gē me ajarēnh kêtikumrēx. Djām Jeju nhō me ja kute ā amijo anhỹrkam mex got?

<sup>4</sup> Nār, me kabēnkamdjwỳ. Ar amy aje me nire kukràdjā'ā me aprỳ nhym me ar akam pijām. Nhym ar anire aje me my kukràdjā'ā me aprỳ nhym me ar akam pijām. Nār, ar abixaêrkôt ar akabēn kajgo. Nār me keket kadjy ar amy me ni'ā abēno ajkē nhym ar ani amipānh me my'ā abēno ajkē. Ar akabēn ja ne mex kêt. Kwārīk wānh memā arēnh kêt. Atemā dja gar memā Metīndjwỳnhkam amikīnh jarē.

<sup>5</sup> Nhym be, me mjēn djwỳnh nār prō djwỳnh kupa'ā kurē ba. Nār, me àpēnh punu:re nhym me mekam pijām ne. Nār, me kute mỳjjao atom rūnh prā:m. Me ja ne me mrāmri ne me kute mỳjjao metīndjwỳnh

karō nhipēxmā amijarēho ba pyrāk. Djām me ja Metīndjwỳnh kute meo bamā? Djām Kritumē Metīndjwỳnh ar me kunīmā Bēnjadjwỳrkam djām ar kute meo bamā? Nār, djām ar kute me jamā ar ō mỳjja nhōrmā? Arkati. Ja ne gar aje amrēbê mar. <sup>6</sup> Ar aje markam kwārīk wānh me'ō ajte kabēn kajgoo arīk ar amā,

—Ajrā. Ā ajaxweo ane. Dja Metīndjwỳnh ajmā ajo kêtikumrēx, anhỹr kêt. Kwārīk wānh ō anoo biknor kêt. Me amakkre kêt prām kute ā axweo anhỹr prām kam ne Metīndjwỳnh arỳm mekam ngry:k ne. <sup>7</sup> Kam kwārīk wānh mekôt ā ar ajaxweo anhỹr kêt.

<sup>8</sup> Mỳkam? Bir, amrēbê ne gar ajaxwe:n aje akamāt kô tykkam me ar baja pyrāk. Nhym be, jakam ne gar arỳm Bēnjadjwỳr djwỳnh kôt ar amijo aban arỳm aje a'uri me ar baja pyrāk. Bēnjadjwỳr djwỳnh kute ar ajo krakam dja gar ajmā akute kêt ne katāt ar amijo aba. Dja gar aje mrāmri ne me a'uri ar baja pyrāk. <sup>9</sup> Metīndjwỳnh Karō dja meo ba nhym kam me ō'ā ukaprikumrēx ne katāt kute kabēn jarēnhkumrēx ne 'ēxnhī kêtikumrēx.

<sup>10</sup> Dja gar Bēnjadjwỳr djwỳnhho kīnh, mỳj akabēnkôt, aje mỳjo abakôt aje Bēnjadjwỳro kīnh jabej amikabi. <sup>11</sup> Ne kwārīk wānh me axwe kôt ajaxwe kêt. Me axwe ne me kute akamāt kô tykkam me àpēnh punu pyrāk. Djām me àpēnh punu djō'ā mỳjja mex got? Arkati. Kwārīk wānh me axwe kôt ar ajaxwe kêt. Ar ga dja gar me axwe nēje me kukrà.

<sup>12</sup> Mỳkam dja gar me axwe kôt ajaxwe kêt? Bir, me me kàxā apdjun ba punukumrēx. Gwaj ren abenmā me arēn ren bapijā:m ne. <sup>13</sup> Me axwe ne me apdjun àpēnh punuo ba: nhym me arỳm memā Metīndjwỳnh kabēn jarē. Nhym kam me arỳm amijaxwe ma. Me kute memā arēnh nhym me kute amimar kute mrāmri ne me kute memā mỳjja kurwỳkam mỳjja kunī kum amirīt pyrāk. <sup>14</sup> Me kute memā Metīndjwỳnh kabēn jarēnhkambit ne me arỳm kute amijaxwe kunī mar. Amrēbê: ne me me bakukāmāremā me kute amijaxwe mar'ā ajarē. Me memā kum,



“Kute mrāmri ne me ōto nōrkam kute me kabēn mar kêt pyrāk ne ga aje Metīndjwýnh mar kêt.

On ano tỳx ne amim kabēn ma kute mrāmri ne me krā apōx ne no tỳxkam amak mex pyrāk.

Aje kabēn mar kêt kute mrāmri ne me tyk kute me kabēn mar kêt pyrāk. On kabēn man kôt ar amijo aba kute mrāmri ne me tyk ne akubyn tīn ne ar ba pyrāk.

Dja ga kabēn ma nhym Kritu arỳm prīne amā arē ga prīne amima.

Kute mrāmri ne me kute memā pōk ne o kute pry kurwý nhym kam me kute prīne rīt mex pyrāk”, ane.

Mrāmri ne me kute me bakukāmāremā arēnhkumrēx. Mrāmri ne Metīndjwýnh kute memā arēnh ne kute me axwe kunīo amirītmā.

<sup>15</sup> Kam dja gar amijā ano tỳx ne katāt ar amijo aban ajmā akute kêt. Djām ano kêt mā? Kati. Dja gar akrā mex ne amijā ano tỳ:x ne katāt ar amijo aba. <sup>16</sup> Ar abu'ā me axwe kunīja dja gar me'ā ano tỳ:x. Nhym kam ar aje memā Metīndjwýnh kabēn jarēnh djā ar awýr bōx gar arỳm memā arē. Akati jakam me axwe krāptīkam dja gar ā memā ane.

<sup>17</sup> Kam kwārīk wānh ar akrā punu kêt. Dja gar amijo Bēnjadjwýr djwýnh man kum, —Mýj dja ba nē ga kam arỳm ikam akīnhkumrēx jabej? ane. Dja gar ā kum anen arỳm prīne amijo Bēnjadjwýr djwýnh markumrēx.

<sup>18</sup> Kwārīk wānh kadjwati kangōkam\* ar abibānh kêt. Kam ne me arỳm amijo ajkēn punu mex ne. Ar ga dja gar Metīndjwýnh Karō mar tỳx ne 'ā adjukanga kêt gē ar anhī pýnhkôt raxo ar akadjwýnhbē nhýn ar ajo ba mex.

<sup>19</sup> Dja gar mar tỳx ne abenmā mebē idjaer nhō me ngrer tūm jarē, me ngrerkôt Bēnjadjwýr djwýnhmā mextire jarē. Metīndjwýnh'ā me ngrerja kunī jarē. Djām ate akrān ajajkwa kajgokambit aje Bēnjadjwýr djwýnhmā me ngrer jarēnhmā? Kati. Dja gar amikam me ngrerkam

kabēnja markumrēx ne angrerkôt kum arēnhkumrēx.

<sup>20</sup> Dja gar Karō mar tỳx ne mā Metīndjwýnhmā, me Babāmmā amikīnh jarē. Mýjja kunīkôt kum amikīnh jarē. Djām ar adjumar mexkambit dja gar kum amikīnh jarē? Kati. Ar adjumar punukamdjwý dja gar kum,

—Djūnwā, te idjumar punu ga mā ijo djuw mex ne mā ijo kīnh. Bēnjadjwýr djwýnhbē Jeju Kritu ba tu amim markumrēx ne arỳm amā amikīnh jarē, ane. Dja gar akati kunīkôt ā kum amikīnh jarēho ane.

<sup>21</sup> Dja gar akrānmā aben kabēn man kôt ar amijo aba. Ar aje Metīndjwýnh pyma markam dja gar ā amijo abao ane.

*Prōmē mjēnmē abenā memā karō.*

*Kō k 11.3; Kor 3.18; Ped k 3.1*

<sup>22</sup> Me aniremā ne ba ikabēn jarē. Dja gar amjēn kabēn man akrānmā kôt ar amijo aba. Aje mrāmri ne Bēnjadjwýr djwýnh kôt ar amijo aba pyrāk dja gar ā amjēn kôt amijo abao ane. <sup>23</sup> Mýkam? Bir, ar amjēn ne ar ajo ba kute mrāmri ne me krākam umar ne o kute amingrēk ne ba pyrāk. Me krākam ne me umar ne kam amū ikrao apē nār parkam mrā. Me krā ne amū me kukrādja kunī ngrēk ne meo ba. Nām Kritudjwý ā me kute amim marja kunīo ane. Ta ne kute me krā pyrāk ne meo ba. Ne kam arỳm me utān meo ba. Ō me kunī ne me kute ta ī pyrāk nhym me utān meo ba. <sup>24</sup> Nhym kam Kritu nhō me kute amim mar kunīja akrānmā kabēn man kôt amijo ba. Dja me aniredjwý ā amjēn kabēn kunī mar ne kôt amijo abao ane.

<sup>25</sup> Me amymādjwý ne ba ikabēn jarē. Dja gar amā aprō jabē: kute Kritu kum ō me kute amim marja kunī jabē pyrāk. Ga, Kritu arỳm me kadjy tykja pumū.

<sup>26</sup> Mýj kadjy ne me kadjy ty? Bir, prīne kute meo mex kadjy. Kute mrāmri ne me kute ngōo kubēkà pōnh nhym prīne mex pyrāk. Mrāmri ne kabēn kute ngō pyrāk ne prīne meo mex. Kritu memā kabēn jarē nhym me amim kuman arỳm Metīndjwýnh mexo mex. Ja kadjy ne Kritu me kadjy

\* **5:18** Mýjja me kute o kōm ne kôt bibānh kunīja, kadjwati kangōmē uba kangōmē, mýjja kangō kunī ne me kum kadjwati kangō jarē.

ty. <sup>27</sup> Ō me kute amim marja kunĩ prĩne kum me:xkumrēx nhym me arým kum me kĩ:nhkumrēx nhym kam kute amikabem me umjýr ne kute ar meo ba kadjy. Ja kadjy ne Kritu me kadjy ty. Dja ō me ja kute ta ĩ pyrækja prĩne mexkumrēx ne axwe kêtikumrēx kute mrāmri ne me kà mjô kêtikumrēx ne ngrā kêtikumrēx nhym mýjja 'ō kute meo bikēnh kêtikumrēx pyræk. Dja me Metĩndjwýnh mexo mex ne kum punu kêtikumrēx nhym arým meo ba. Ja kadjy ne Kritu me kadjy ty. Be, djām kum ō me ja jabê ngri: got?

<sup>28</sup> Bir be, me mydjwý dja me ā kum prō jabêo ane. Kum prō jabêo kute mrāmri ne me kum aminhĩ jabêja pyræk. Me kum prō jabêja ne me kum aminhĩ jabê. <sup>29</sup> Djā nām me'ō kum aminhĩ kurê? Kati. Me kum aminhĩ jabê ne ō kwý krēnmē kubēkāmē mýjja kunĩo aminhĩo djuw mex.

Nām ā Bēnjadjwýr djwýnh me baje Kritu mar djwýnho djuw mexo ane. <sup>30</sup> Me banhĩ pýnhkôt ne gu me baje Kritumē banhĩ typdji pyræk. Baje Kritu pa pyræk, no pyræk, par pyræk. Baje ta kukrãdjã kunĩ pyrækkam ne Kritu amim me bajo djuw mex.

Dja ā me amim prōdjwýo djuw mexo ane. <sup>31</sup> Amrēbê: ne me bakukāmãre 'ā memã kum, “Kamã dja me my prō kadjy arým bāmmē nã arkum iren kam arým prōbit'ā ngrã ne.

Nhym kam ar ĩ abenã tým ne kam kute ĩ typdji pyræk.”

Nām me bakukāmãre ā memã ane.

<sup>32</sup> Be, ije ar amã kukrãdjã jarēnhja ne me kute prĩne mar mex kêtikumrēx, mebê týt. Kritumē me bamē ō me kute amim marja kunĩ'ā ne ba ikabēn ja jarē.

<sup>33</sup> Kam ne ba ar amã aprō jabêkumrēxmã ar amã 'ā karō. Kute mrāmri ne ar amã amijabê pyræk ne ar amã aprō jabēn aje o djuw mexmã. Nhym ar anireja, ar amjēn ne ar ajo ba. Kam ar aje amijã marmã ne ba ar amã 'ā karō. Tãm ne ja.

## 6

*Bāmmē kramē abenã memã karō.*

*Kor 3.20*

<sup>1</sup> Jakam ne ba me aprĩremã 'ā karō. Bēnjadjwýr djwýnh kabēnkôt dja gar

abāmmē anã kabēn man ar kabēn kôt ar amijo aba. Ja ne mex. <sup>2-3</sup> Mýkam? Bir, amrēbê: Metĩndjwýnh me bakukāmãremã kum,

“Me amã abāmmē anã jabēn ar kabēn ma.” Nām ā memã anen kam kôt memã mýjja mex jarēn memã kum,

“Kam arým adjumar mex ne kribēm pykakam ar aba”, ane.

Metĩndjwýnh kute memã 'ā karōkôt kukrãdjã ne ja. Kukrãdjã kumrēx kute kôt memã mýjja mex jarēnh ne ja. Kam dja gar mar týt ne.

<sup>4</sup> Ne ar amy, ar ajabatãnhwãdjwý, ar amã ne ba 'ā karō. Kwãrĩk wãnh akra arkum amikurê'uk kêt. Ari arkum adjãkrêo kum amikurê'uk kêt. Ar ga dja gar akumrēx amijã Bēnjadjwýr djwýnh kabēn man arým katãt kôt ar amijo aba. Ne kam kôt axwe nêje ar akren kam mrãnh mex'ã arkum karō. Dja gar ā akra aro ane gē ar akôt Metĩndjwýnh kôt ar amijo ba.

*Bēnjadjwýrmē ō àpēnhmē abenã memã karō.*

*Kor 3.22; Xim k 6.1; Xit 2.9; Ped k 2.18*

<sup>5</sup> Ar akwý ne me arým amim ar apa 'amý gar memã adjãpēnh týt kajgo ar aba. Ar amã ne ba ikabēn. Dja gar pykakam ar anhō bēnjadjwýr kabēn ma. Ar anhō bēnjadjwýr raxmē uma dja gar aman kum adjãpēnh katãt. Kute mrāmri ne Kritumã ar adjãpēnh pyræk dja gar ā kum adjãpēnho ane. <sup>6</sup> Djām ar aje anhō bēnjadjwýr ýtãbit kum adjãpēnh katãtmã? Kati. Ar amã kãxkamdjwý dja gar amim,

—Kati, Kritumã ne ba apê. Kam dja ba Metĩndjwýnh kabēn kôt mrāmri pykakam inhō Bēnjadjwýrmã idjãpēnh katãtkumrēx.

<sup>7</sup> Dja ba kabēn man kum idjãpēnhkam ikĩnh. Nã bãm kute pykakam memã idjãpēnh pyræk. Nhym be, kati. Kãjkwakam Bēnjadjwýr djwýnhmã ne ba apê, ane. Dja gar ā amim anen kam kum adjãpēnhkam akĩnh.

<sup>8</sup> Mýkam? Bir, ar akwý apa 'amýnh aje me kabēn kôt adjãpēnh týt kajgo ar aba. Bēnjadjwýr djwýnh Jeju kute aparmã ar adjãpēnh pumũnh. Ar adjãpēnh mex kôt dja ar amã o pãnh mex. Nãr ar akwý apa 'amýnh kêtã ne ar ga gar adjãpēnh ar aba. Me kute ar amã o pãnh kadjy gar adjãpēnh

ar aba. Bēnjadjwȳr djwȳnh kute ar adjâpēnh pumūnh. Ar adjâpēnh mex kôt dja ĩ ar amā o pānh mex. Me akunī adjâpēnh mex kôt dja ta amā o pānh mex. Tām ne gar amrēbē ama.

<sup>9</sup> Ne bēnjadjwȳr ar, ar aje amim me pa 'amȳnh nhym me ar amā âpēnh kajgo ar bawā ar amā ne ba ikabēn. Dja gar ije ajbir ar anhô âpēnhmā ikabēn jarēnhja ma. Ikabēn kôt ar gadjwȳ ar anhô âpēnhmā amex. Kwārĭk wānh aje meo abikēnhmā me kangrōnhō aba kêt. Djām bēnjadjwȳr'ā apydji? Kati. Ar gadjwȳ ne kâjkwakam ar anhô Bēnjadjwȳr djwȳnh. Tām ne ba ar amā arē gar amrēbē aje mar. Ta ne kum me'ō pyma kêt kumrēx.

*Metĭndjwȳnh nhō kàxo kubēkà'ā ujarēnh.  
Rô 16.20; Tex k 5.8; Xij 4.7; Ped k 5.8*

<sup>10</sup> Akmere âpnhĭre ar, ije ar amā arēnhō ino rer kadjy ne ja. Bēnjadjwȳr djwȳnh tȳ:xi. Atȳx kadjy gora amim maro aba nhym arȳm ar amā atȳx jadjà. <sup>11</sup> Me karō punu nhō bēnjadjwȳr kute gwaj bamā 'êx ne gwaj banoo biknor prām kumrēx. Dja gar amijā ano tȳx ne arek kubē dja nhym arȳm ar anoo biknor kêt. Arek kubē ar adjām ne aje kangōnh kadjy dja gar aminēje Metĭndjwȳnh nhō kàxo kubēkà jangjê, kute gwaj bamā kàxo kubēkà nhōr kunĭja aminēje angjê.

<sup>12</sup> Mȳkam dja gar angjê? Bir, djām me ĩ, gwaj baje me omūnhja ne gwaj baje aminēje me kangōnhmā? Kati. Me karō punu pumūnh kêtja. Apȳnh me axwe nhō bēnjadjwȳr ja ne gwaj baje aminēje me kangōnhmā. Apȳnh me karō punu, me rūnh 'itȳx ja ne gwaj baje aminēje me kangōnhmā. Pykakam me axwe prāmja ne me kute mrāmri ne akamât kô tykkam me mrānh punuja pyrāk. Me ja nhō bēnjadjwȳr ne gwaj baje aminēje kangōnhmā. Kâjkwakam me karō jaxwe ar baja. Me karō punu ja ne gwaj baje aminēje me kangōnhmā. <sup>13</sup> Kam, dja gar aminēje Metĭndjwȳnh nhō kàxo kubēkà kunĭ jangjê. Dja aje me kangōnh nhō akati awȳr bōx ga mebē atȳx ne me kangōnhō dja. Ne kam arȳm meo apan me kujate. Kam dja ga arek mebē adjām tȳx rā'ā.

<sup>14</sup> Be, mȳj dja mebē ar anhô kàxo kubēkàja kute gar aminēje angij? Bir, ajēxnhĭ kêt ne akabēnkumrēx. Ajēxnhĭ kêt kadjy ne ar anhô kàxo apre djà. Ga, krākamngōnh kàxo pre djào kute kà janēnh tȳxja pumū. Kute o kàxo kubēkàja kunĭ janēnh tȳx nhym arȳm 'ā rorok kêt. Ar gadjwȳ ar aje apre djào amikrax pre măn prabē ajēxnhĭ kêt ne akabēnkumrēx. Akabēn kajgo kêt ne arek me karō punu kangōnhō dja. Nhym kam me te kute Metĭndjwȳnhbē ar ajo akēxmā.

Metĭndjwȳnh kabēnkôt dja gar katât ar amijo aban ajaxwe kêt. Akatât jabē ne anhô kàxo anhinôkà. Ga, krākamngōnh kute kurê djwȳnhbē amipytâr kadjy kute kàxo inôkà jangjēnhja pumū. Ar gadjwȳ ar aje kàxo ar anhinôkà jadjâr măn prabē ajaxwe kêt ne Metĭndjwȳnhmā akatât. Ne arȳm me karō punubē amipytân aminēje kangōnhō dja.

<sup>15</sup> Ar prĭne 'ā ujarēnh nyja ma. Aje 'ā ujarēnh ny mar jabē ne ar aparkà tȳx. Ga, krākamngōnh kute parkà tȳx jangjēnhja pumū. Kurê djwȳnh'ȳr prôt ne kute amiparo bikēnh kêt kadjy ne kute parkà tȳx jangjēnh. Ar gadjwȳ ar aje ar aparkà tȳx jadjâr măn prabē dja gar Kritu'ā ujarēnh ny kôt adjumar mexja prĭne aman arȳm me'ȳr mrān memā arē. Dja gar memā arēn arȳm o aminēje me karō punu kangōnhō dja nhym me te: kute Metĭndjwȳnhbē ar ajo akēxmā.

<sup>16</sup> Dja gar kam tu amim Metĭndjwȳnh markumrēx. Aje tu amim markumrēx jabē ne ar anhô kàxo kruwbē âptâr djà. Ga, krākamngōnh kute kruwbē âptâr kadjy kute amȳnhja pumū. Ar gadjwȳ ar aje anhô kruwbē âptâr djà byr măn prabē tu amim Metĭndjwȳnh markumrēx. Tu amim markumrēx ne arȳm arek me karō jaxwe nhō kruwbē adjâptâro dja. Aje tu amim markumrēx jao dja ga ô kuwyo kruw kunĭbē aptân mā pa. Me kabēn punu, apȳnh me kaprĭ djâri, apȳnh me tokry djâri ne kubē me karō jaxwe nhō kuwyo kruwja. Ar aje tu amim markumrēxjao dja gar mā pa. Nhym me te: kute Metĭndjwȳnhbē ar ajo akēxmā.

<sup>17</sup> Mrāmri ne Metĭndjwȳnh arȳm kute amim ar apytâr kumrēx. Ja dja gar tu

amim markumrêx. Jabê ne ngônho ar akrâdjê. Ga, krâkamngôn kute amikrâ pytâr kadjy kute ngônho krâdjê turja pumû. Ar gadjwý ar aje ngônho akrâdjê tur mân prâbê tu amim ja markumrêx. Mrâmri Metîndjwýnh arým kute amim ar apytârkumrêxja markumrêx. Ne kam arek me karõ punu kangônho dja nhym me arým te kute Metîndjwýnhbê ar ajo akêxmã.

Dja gar ajte prîne Metîndjwýnh Karõ kabên man memã arê. Aje kabên mar jabê ne ar anhõ kâxdjwa kajgo. Ga, krâkamngôn kute kurê djwýnho àpanh kadjy kute õ kâxdjwa kajgo jamýnhja pumû. Ar gadjwý ar aje ar anhõ kâxdjwa kajgo byr mân prâbê prîne Metîndjwýnh Karõ kabên man memã arê. Ne arým me karõ punu kangônho dja nhym me arým te kute Metîndjwýnhbê ar ajo akêxmã.

<sup>18</sup> Dja gar kam Metîndjwýnhmã akabêno aba. Kum mýjja kunõ a'wý. Akati kunîkõt kum ar akabên jarê. Aje Metîndjwýnh Karõ mar'ã ar amã djukanga kêt gê prîne ar ajo ba mex. Prîne kute ar ajo ba mexkam mã Metîndjwýnhmã akabên jarê. Kum Jeju nhõ me ja kunõ a'wý. Ar ano týx ne amã djukanga kêt ne meo a'wý.

<sup>19</sup> Badjwý kum ijo a'wý gê ijamak'ýr kabêno bõx ba gop imã me uma kêt ne memã kabên jarê. Me krâptî kute Kritu'ã ujarênh ny mar kêt rã'ã. Ba gop me kunĩmã arênhõ amirîtkumrêx gê 'ã ujarênh ny memã amirîtkumrêx. <sup>20</sup> Ba ne ba Bênjadjwýr djwýnh kabênkõt memã 'ã ujarênh ny jarênhõ iba nhym me arým kâxirâx jao idjuwpre. Dja gar kum ijo a'wý gê me te arým idjuwpre ba gop imã me uma kêt ne memã arênhkumrêx ne gop mrâmri kabênkõt ibê 'ã idjujarênh djwýnhkumrêx ne memã arênhkumrêx.

<sup>21-22</sup> Xikiku ne ba arým ar amã ano. Imã gwaj bakamy Xikiku jabêkumrêx nhym Bênjadjwýr djwýnhmã àpênh katâtkumrêx ne 'ã ukanga kêtumrêx. Ba arým ar amã ano. Gêdja ar awýr bõx ne arým ijã ar amã ajarê. Mýjja kunĩ'ã ar amã ajarê gar arým iman arým ikam adjumar punu kêt ne akĩnh.

<sup>23</sup> Metîndjwýnhbê ne me Babãm. Ne Bênjadjwýr djwýnhbê ne Jeju Kritu. Gê ar ar aje abeno akamywão djuw mex gar adjumar mex ne amã aben jabêkumrêx ne tu amim ar markumrêx. <sup>24</sup> Ar amã Bênjadjwýr djwýnhbê Jeju Kritu jabêkumrêx ne 'ã adjukanga kêtja gê ar tu kum ar akaprîkumrêx.\* Tãm ne ja.

\* **6:24** Djãm ar ga ne gar adjukaprî nhym ar pãnh arým kum ar akaprî Kati. Ar ta ne ar tu kum ar akaprîkumrêx.

## Paur kute Pirpukam me jamã pi'ôk no'ôk ne ja.

Krĩraxbê Pirpukam ne Paur memã Jeju jarê nhyim kam me kwý arým tu amim markumrêx. Paur kum ar kĩnhkumrêx nhyim ar jadjwý amipãnh kum Paur kĩnhkumrêx nhyim kam Paur ar kurũm tẽn atemã krĩrax 'ôkam bõx. Bõx nhyim me ja kum Metĩndjwýnh kabẽn mar prãm kêt ne kam Paur pa 'amýn o tẽn mekbê ijê djakam kumê. Nhyim arĩk kaprĩre ne mekbê ijê djakam dja, prãmkam dja. Nhyim kam krĩraxbê Pirpukam Paur nhõbikwaja kum kĩnh djà jano, kôt kum õ kwý krẽn djà jano, nàr kon kum pi'ôk kaprĩ jano nhyim kubyn kĩnhkumrêx. Paur kute amikajmãtã arkum Jeju jarênhja ta ne kôt kum mýjja jano, Epaprodjikôt ne kum kĩnh djà jano. Nhyim 'ýr o bõx. 'Ýr o bõx nhyim kubyn kam kĩnhkumrêx ne akubyn arkum,

—Ota ba arým kubyn arým ikĩnhkumrêx ne, ane. Nhyim kute kôt kum kĩnh djào bõxja, Epaprodjija ate kanê ne kam arým mexkumrêx ne kam õ pykamã tẽmmã, nhyim Paur kute kôt arkum pi'ôk no'ôk janormã. Kute arkum pi'ôk no'ôk ne kôt anor ne ja.

Ë, Paur kute arkum pi'ôk no'ôk ne ja.

*Paur kute Metĩndjwýnhmã ar arênh.*

*Ep 1.15*

<sup>1</sup> Ba ibê Paurmê Ximoximê ne bar ar amã pi'ôk no'ôk ne. Ar ibê Jeju Kritu nhõ àpênh ne bar ar amã pi'ôk no'ôk ne. Ë, krĩraxbê Pirpukam Kritu Jeju nhõ me ja, õ me mextire jamã ne bar pi'ôk no'ôk ne. Ar aje Jeju nhõ me jao aba djwýnhwãmê atãri àpênhwãmê, ar akunĩmã ne bar pi'ôk no'ôk ne.

<sup>2</sup> Gê Metĩndjwýnh ar ajo djuw mex, Metĩndjwýnhbê gwaj Babãmmê krabê Bẽnjadjwýr Jeju Kritu ar ukaprĩkôt ar ajo djuw mex ne ar ar ajo ba ne ar amã umar mex jarê gar adjumar mex ne ar aba.

<sup>3</sup> Ota ba inhõ Metĩndjwýnhmã amikĩnh jarê. Nã bãm mã ar aman ar amar rã'ã. Nã bãm ar akam ikĩnh ne ije ar amar kunĩkôt kum amikĩnh jarê. <sup>4</sup> Djã nã bãm

ar akam ikaprĩ? Kati, nã bãm ikĩnhkumrêx ne ije kum ar akunĩo idjà'wýr katã kum amikĩnh jarê. <sup>5</sup> Mýkam ne ba ikĩnhkumrêx ne ar ajo a'uw? Bir, ar ikôt adjapênhkam. Kra:x kurũm ne gar ikôt apê ne memã Jeju kukràdjà ny'ã adjujarênh atêm rã'ã ne kam kôt ijo djuw mex ba kam itýxkumrêx ne memã Jeju'ã idjujarênh tẽ.

<sup>6</sup> Kam ne ba ar akam ikĩnh ne. Arým ba kuma. Metĩndjwýnh ta ne arým ar ajo mexmo krax ne. Dja ar ajo mexo tẽn o tẽn o tẽn rã'ãn arým inomã kumê gar akunĩ amextire. ã kute ar ajo anhýrmã ne ba amikajmã'ã kuma. Mýj akatikam dja inomã kumê? Bir, akubyn Jeju Kritu bõx nhõ akatikam.

<sup>7</sup> Be, kôt ne ba ije ar akunĩo ijamakja. Bir, mrãmri. Mýkam? Bir, imã ar akĩnhkumrêxkam. Ar akunĩ ne gar ikôt ar adjapênh aba. Metĩndjwýnh kute imã idjapênh jarênhja ne gar ikôt kum adjapênh ar aba. Djãm mekbê ijê djakam idjãm kambit ne gar adjapênh ar aba? Kati, irãri ar ibaridjwý ne gar ikôt adjapênh ar aba. Irãri ar ibari ije Jeju kukràdjà ny'ã idjujarênh nhyim me kute aprýo ba, ba prĩne kôt memã 'ã idjujarênh ne ije memã kum,

—Mrãmri ne ba ije me amã kôt Jeju'ã idjujarênh ar o ibaja, anhýrja, be, nã gãm ar ã ikôt Jeju'ã adjujarênh ane. Kam ne ba imã ar akĩnhkumrêx ne. <sup>8</sup> Imã ar akĩnhkôt ne ijamak inhõ djakam tokry ne. Mrãmri ne ba kôt ar amã arê. Metĩndjwýnh kute prĩne me kadjwýnhbê me omũnhkôt arým ikadjwýnhbê ipumũ, ije ar ajo ijamakkôt ipumũ. Imã ar akĩnh raxi. Kute Jeju Kritu kute kum ar akĩnh pyrãk. Aben kôt ne bar ã ar amaro ane.

<sup>9</sup> Nã bãm Metĩndjwýnhmã ar ajo a'uw. Ar amã aben jabêo amõr rã'ã o amõr rã'ãn arým ar amã aben jabê rax kadjy. Kadjy ne ba Metĩndjwýnhmã ar ajo a'uw. Be, dja gar amã aben jabêo atêm rã'ãn kam arým kôt prĩne mýjja pumũnh mex ne kôt akrã kre mex. <sup>10</sup> Gar kam amim mýjja kabin mýjja mexbito amiptà. Nhyim mũm mýjja punu nõ gar katàt mýjja mexbito amiptàn kam amextire ne ajmã akute kêt ne ar aba rã'ã nhyim arým akubyn Kritu bõx. <sup>11</sup> Nã, gar kam amextire. Jeju Kritu kute katàt me krã pymjýr djwýnh tãm gédja katàt ar amã

ar akrã pumjuw gar katàt mrã. Nnym me kam ar apumũn kam kôt Metĩndjwýnhmã rax jarẽn kum mex jarẽ. Tãm ne ja.

*Paur tyko nàr tĩno kute Jeju raxo amirĩtmã.*

*Kor 1.24; A Xim 2.9*

<sup>12</sup> Akmere ar, àpnhĩre ar, ě, ba ar amã arẽ. Djã nãm me ibê ijẽn kam Jeju'ã me ujarẽnh nyja mekbê krãta? Kati, nãm me mã Jeju jarẽ, arẽnh ry typydji nnym me kunĩ kuma, me kute arẽnh bàptàr kêt. <sup>13</sup> Nnym kam bẽnjadjwýrbê Xedja nhõ krãkamngõnhre kunĩ kuma, mete mekbê ijê djakam imẽnhkôt kuma. Nã bãm Kritu'ã idjujarẽnh tẽ nnym me mekbê ijê djakam imẽ nnym me kunĩ kôt kuma. <sup>14</sup> Nnym gwaj baje abeno bakamy kwý rax ne mekbê ijê djakam idjãmkôt ipumũn kam Bẽnjadjwýr kanàrràm kum me uma kêtumrẽx ne irãri ar tu memã Metĩndjwýnh kabẽn jarẽnh ar o ba.

<sup>15-17</sup> Nnym bep apýnh ne me kwý kute amijo rũnh prãmkam Jeju'ã pydjĩn 'ã ujarẽnh mör prãme memã Jeju jarẽho ba. Kum ikĩnh kêt ne 'ã pydji prãme ne arĩk ajkwakambit we memã Kritu jarẽnh ar o ba. Ikaprĩ rax kadjy, mekbê ijê djakam idjãmkam ikaprĩ rax kadjy ne me arĩk Jeju'ã ujarẽnh ny jarẽnh kajgo ar ba.

Nnym bep ate ne me kute mrãmri ukaprĩkôt ar memã Jeju jarẽho ba. Me ja ne me kum ijabẽn arým prĩne ipumũ. Metĩndjwýnh kute imã idjãpẽn jarẽnh ba ije tu katàt arẽnhkumrẽx nnym kôt me kute ibê ijê kôt ipumũn kum ijabẽn kam ikudjwa memã Jeju jarẽho ba. Nnym bep ate ne me kwý arĩk Kritu'ã ujarẽnh kajgoo ba.

<sup>18</sup> Kwãrĩk rã'ã gẽ me tu ar amẽ arek 'ã ujarẽnh ba. Dja me kum Jeju jabẽn 'ã ujarẽnh mexja mrãmri rã'ã. Nnym me kute 'ã pydji prãme Jeju jarẽnh kajgojadjwý mrãmri rã'ã. Mrãmri gẽdja me amẽ ar 'ã ujarẽnh ba. Gẽ kam me kunĩ Kritu'ã ujarẽnhja ma. Ba kam arým ikĩnhkumrẽx. Gẽdja ba mã ikĩnh rã'ã ne. <sup>19</sup> Jeju Kritu Karõ gẽdja ijo ba rã'ãn ikadjy me ngrẽk nnym me kam ikaba. Nnym adjwýnhdjwý mrãmri ar aje Metĩndjwýnhmã ijo adjà'wýro gẽdja me arým bõm imẽ. Ja ne ba arým prĩne kuma. Kam dja ba ikĩnh rã'ã ne.

<sup>20</sup> Gora ba imã me uma kêt ne idjãm tỳx ne Kritu'ã ajarẽ. Gora ba ã anhýr jabej kam memã Kritu raxo amirĩt ne amikam ipijãm kêt. Ije Kritu raxo amirĩt prã:mã. Itĩn rã'ã nàr kon mete ibĩn jabej o ne ba ije Krituo rax prãm, o ne ba ije memã o amirĩt nnym me arým kôt kute kum katormã. Amrẽbê ne ba memã Kritu raxo amirĩt rã'ã. Gora ba jakam djwý ã o ane. Tãm ne ba amim kamnhĩx ne aminhõkre kadjwýnhbê maro nõ.

<sup>21</sup> Ikĩnh djãbê ne Kritu. Ajbit dja ba kuman o amikĩnh. Djãm ityk nhijukri ikaprĩ? Kati, ityk nhijukri dja ba ikĩho itĩnja jakrenh mex ne. Ityk nhijukri dja ba arým Kritubê ikĩnh djã pumũn kam ikĩnhkumrẽx ne.

<sup>22</sup> Nnym bep dja ba arek itĩn jabej kam Kritumã apê ne memã 'ã ajarẽ nnym me krãptĩ arým amikajmã'ã Jeju ma. Jadjwý ne mexkumrẽx. Ije, nã bãm te ari mýjja ma. <sup>23-24</sup> Nãm te mýjja 'õ imã pydji prãme. Nã bãm ityk ne Kritumẽ ro'ã iban inhýtã ije aben pumũnhmã kuman jãm itĩnkam ije Kritumã idjãpẽnja ma. Ije, nã bãm te ari mýjja ma. Dja ba tyn arým mrãmri imexo, ikĩho itĩnja jakrenh mex ne. Tãm ne ba imã kĩnhkumrẽx ne. Nnym bep dja ba itĩn ne kam ar amãdjwý kĩnh jadjãn ar amã arẽnh nhinom kumẽ.

<sup>25</sup> Nã, dja ba itĩn ne kam ar amã Metĩndjwýnh kabẽn jarẽho tẽn inom kumẽ. Tãm ne ba arým prĩne kuma. Itĩn ne arek ar ar akam iba rã'ã, ar aje amim Jeju mar rax ne o atẽm ne kôt akĩnh kadjy. Ja ne ba arým kuma. <sup>26</sup> Bir be, dja ba arým ar awýr ibõxjakam gar arým ipumũn kam arým ikôt Kritu Jejumã mex jarẽ. Kute ipytãrkôt ipumũn kam akĩnh rax ne kam arým akunĩ kikrepdjitã Kritu Jejumã rax jarẽ.

*Ar te tokry Jeju'ã ukanga kêtã.*

*Ruk 6.22; Xij 1.12*

<sup>27</sup> Ě, ar ikabẽn ma. Gar arým Kritu'ã ujarẽnh nyja ma. Gora kôt ar amijo aba. Dja ba ar awýr itẽm ne ibõx ne ije inhýtã ar apumũnh jabej arým ikĩnhkumrẽx. Ar aje kôt amijo abakam ikĩnhkumrẽx. Nàr kon, mekbê ijê djakam idjãm rã'ã jabej nnym arým iwýr ar ajã ujarẽnh bõx jabej dja ba kuman ikĩnhkumrẽx. Gar atypydjin

adjām tỳx ne axikôt akabên ne ar memã Jeju kukràdjà ny'ã adjujarênh aban aro'ã aje o angryk ne aje akabêno me unênhkam. Me kute Metĩndjwýnh Kabên japrýja dja gar akabêno me unê. Ja dja ba kôt kuman arým ikĩnhkumrêx ne.

<sup>28</sup> Kwãrĩk wãnh me kute ar ajaprýwã ne mũm kute Metĩndjwýnh akêx ne kute aprýwã kwãrĩk wãnh gar amã me uma kêt. Ate gêdja me wãnh ar axwe ba. Gwaj mrãmri tu katàt Metĩndjwýnhmã badjápênh mex ne. Nhym kam kôt me ar amã katon kam amijã,

—Bep djãm mrãmri ne Metĩndjwýnh ar wã pytà. Nhym bep ba ne ba ije mar kêt kam kute ipytàr kêt kumrêx. Dja ba tu ibiknorkumrêx. Bep djãm mrãmri ne ar ja arým mrãmri Metĩndjwýnh aminhõ. Kam ne kute ar utàrja, ane. Dja me ar apumũn kam ã ane.

<sup>29</sup> Arým ne Metĩndjwýnh Kritu kadjy amim ar ajã karõ. Ga kam ar arým amikajmãtã Kritu ma. Djãm ja'ãbit ne amim karõ? Kati, mýjja 'õdjwý. Ë, aje Kritukôt amijo abakam ar atokrymãdjwý. <sup>30</sup> Dja gar ikudjwa Kritukôt djan o angryk nhym me arým jãm ar ajo akêx ne ar amã tokry jadjã ga kam ar ikudjwa aje Kritukôt amijo abakam te atokryn te akaprĩn mã kôt ajkamê. Wãkam idjãm kam ne ba ã ane gar kôt ipumũ. Jakam idjãm kamdjwý ne ba Krituo ingyk ne memã ikabên gar ijã ujarênh ma. Tãm ne gar gadjwý arým kôt adjãm ne aje o angryk ne atokryo aben pyrãk kadjy ne Metĩndjwýnh ar ajã amim karõ. Tãm ne ja.

## 2

*Ar kute Kritu kudjwa amijo kàtãmmã.*

*Ep 4.1; A Kõ 8.9*

<sup>1</sup> Akmere ar, àpnhĩre ar, gora axikôt akabên ne akabêno ikĩnh. Be, ga arým Kritu kute ar amã tỳx jangjênhwã pumũ. Ne ajte kum ar ajabên kam ar akaprĩkam kute ar amã kĩnh jadjãrwã pumũ. Metĩndjwýnh Karõdjwý kute ar ajo õbikwan kute ar ar ajo bawã pumũ. Gar kôt aje abeno anhõbikwan

kam amã aben kaprĩ. <sup>2</sup> Be, ã kute ar ajo anhyr wãkam dja gar kôt axikôt akabên ne akabêno ikĩnh. Kam dja ba arým kãjmã amũ ikĩnh ajkamê. Dja gar akabên'ã kabên ne ar amã aben jabêo aben pyrãk ne axikôt akabên ne abenmã kum,

—Gwaj atemã bakabên kêt ne kam gwaj badjápênh aben pyrãk ne gwaj bakabêno aben pyrãk, ane. O dja gar amũ kãjmã ikĩnh kamênhõ mõ.

<sup>3</sup> Kwãrĩk wãnh gar amikadjwýnhbê amijo abênjadjwýr ne ar meo aba kêt. Kwãrĩk wãnh gar amijo arax prãm kêt. Dja gar tu amikam apijãm ne amijo angrire ne amijo akatãm. Kwãrĩk wãnh gar amikadjwýnhbê amijo abênjadjwýr kêt. Nhym bep amũ me ja'ãbit dja gar aminêje me'ã bênjadjwýr rên kãjmã me kamênhõ tẽ. <sup>4</sup> Kwãrĩk wãnh gar gajbit amimar ne ar amijo aba kêt. Kwãrĩk wãnh gar amijo adjaptàr ne ar mebê mýjja jao anhyro aba kêt. Dja gar amũ me jadjwý ma.

<sup>5</sup> Be, Kritu Jeju kute amijo ngrija pumũ. Kute mrãmri amijo ngri mex ne kute amijo kãtãmja pumũ. Kudjwa dja gar ã amijo ane.

<sup>6</sup> Nã, Kritu raxmê Metĩndjwýnh raxo aben pyrãk. Kute aben pyrãk. Dji Kritu kubê Metĩndjwýnhkêt. Nãm ren Kritu ren amirax pumũnh japkrem ren arek ar ba.

<sup>7</sup> Nhym bep kati, nãm te rax ne, te kãjkwakam õ mýjja mex ne tu me bakadjy amikangan ruw. Tu amikunĩ kangan amijo ngrin me bawýr ruw. Ne kam ar memã àpênh ba. Nãm tu amijo kubêngõkre.\*

<sup>8</sup> Ne kam ã kute me babêngõkre nhĩja pyrãk. Axikôtõ. Nãm amijo ngrire ne amak mex ne akrãnmã Bãm kabênkôt mrã. Akrãnmã Bãm kabênkôt mrãnh rã'ã nhym me kubĩ. Djã nãm me bĩn ka-jgo? E kum kati, pĩte'y tokry tỳxkam ne me kubĩ.

<sup>9</sup> Kam ne Metĩndjwýnh raxo kãjmã kamên kam kum idji mex jarê, idjibê kumkati ne kum arê, idji rax ne kum

\* **2:7** Kritu ne amijo kubêngõkre kute mrãmri ne apýnh me õ pyka djãri kunĩkôt me kunĩ: bêngõkreja pyrãk. Kubê kã jakamê me kakràtykmê me babêngõkremê ne me kunĩ: bêngõkre. Me kamrômê me kukràdjã kunĩ kubêngõkre aben pyrãk. Jakam dja ga Karõ 17.26 jarêh ama.

arē. Kàjmã kute raxo amũ mỳjja kunĩ jakrenh, o kute mỳjja jakrenh mexi.

<sup>10</sup> Dja me Jeju nhidji man kam arỳm umaje ibô, pijàm djàje ibô. Mỳjja kunĩ dja idji raxkôt kuman kam arỳm umaje ibôn anhikrên 'ô kabên kêt-kumrêx. Kàjkwakam kadjy mrãnh djwỳnhmẽ pykakam me kunĩmẽ, pyka kadjwỳnhbê me karômẽ mỳjja kunĩ.

<sup>11</sup> Be, me kunĩ dja me abenmã,

—Nã, Jeju Kritu, ajbit ne Bẽnjadwỳr djwỳnh, ane. Dja me ane nhym kam Metĩndjwỳnhbê Bãmdjwỳ dja ô'ã memã rax nhym me Bãmmãdjwỳ kàjmã rax jarêno tẽ.

Be, dja gar ã Jeju Kritu'ã amijakreo ane.

<sup>12</sup> Jeju ne amak mex ne Bãm kabênkôt ar amijo ba. Kam dja gar gadjwỳ, akmere ar, àpnhĩre ar, ajamak mex ne kabênkôt ar amijo aba. Be, gora ar ikamã ajamak mexwã kwãrĩk wãnh rã'ã. Gar itekre kamã mỳjja punu wã 'ô nhipêx kêt. Nã gãm ar ikam ajamak mex ne prĩne Metĩndjwỳnh kabênkôt ar amijo aba. Gora ar aje Metĩndjwỳnh kabênkôt amijo abawã rã'ã. Gora Metĩndjwỳnh kute ar apytàr ne kute ar ar ajo bakam gora ar mã ajamak mex ne kôt amijo aba rã'ã. Ne kum adjàpênh rã'ã ne. Dja gar amã Metĩndjwỳnh pyman kam apijàm ne kam kum adjàpênh rã'ãn kôt ar amijo aba rã'ã ne.

<sup>13</sup> Nhym mỳj me'ô ne ar angrêk gar kabênkôt ar amijo aban kum adjàpênh prãm ne kum adjàpênh ar aba? Bir, Metĩndjwỳnh. Metĩndjwỳnh ta ne ar amã arê gar kabênkôt ar amijo aban kum adjàpênh prãm ne kum adjàpênh ar aba.

<sup>14</sup> Kwãrĩk wãnh gar aben prĩkam mỳjja japrỳ kêt ne akabêno aben japanh kêt. Dja gar tu abenkam akabên mex. <sup>15</sup> Mỳkam? Bir, ar ajaxwe kêt ne ajmã akute kêt ne arek ar abamã. Ar abê Metĩndjwỳnh krakumrêxkam memã katàt amrãnhmã. Gora memã katàt mrã gẽ me axweja, me arĩk ar baja ar apumũ. Katàt ar amrãnhkam ne gar aje ngônhpôkti nhirã pyrãk, aje akamàt kô tykkam ngônhpôkti kute memã irãja pyrãk. Nhym bep me axweja, me arĩk ar baja ne me kute akamàt kô tyk pyrãk.

<sup>16</sup> Dja gar aje ngônhpôkti pyrãk ne aje mã memã Metĩndjwỳnh kabên jarênh nhym

me kute amim mar ne tĩn rã'ã rã'ã rã'ãmã. Dja gar ã amijo anhỳr ar o aba ba kam ar akam ikĩnh. Kritu akubyn bôx ne kute me bakabin kam kute ar amexmã apôxkam dja ba ar akam ikĩnh ne ar ajo idjãmra iba ne kam aminhökre kadjwỳnhbê,

—Be, djã nã bãm te arkam idjapênh rax? Djã nã bãm te arkum Jeju jarêno iba? Djã nã bãm arkum arênh kajgo? Kati, nãm ar amikajmãtã Jeju markumrêx. Ba kam idjapênh kajgo kêt, ane.

<sup>17</sup> Birãm djãm me ibĩ. Kon ne. Dja me te ibĩ ba mã ikĩnh. Nhym Metĩndjwỳnhdjwỳ mã ikam kĩnh. Mỳkam? Bir, dja mete ibĩn jabej ibĩ nhym Metĩndjwỳnh mrãmri ikam kĩnhkumrêx. Kute mrãmri ne me kute amrêbê Metĩndjwỳnhmã mry par ne kute kum bôr nhym kam mekam kĩnhja pyrãk. Dja ã ikam kĩnh ane. Ar gadjwỳ, dja gar amim Metĩndjwỳnh kamnhĩx. Kam gêdja Metĩndjwỳnh ar akamdjwỳ kĩnhkumrêx. Kute mrãmri ne me kute Metĩndjwỳnhmã mry nhiby uba kangô runh nhym kam mekam kĩnhja pyrãk. Kute tãm pyrãk. Dja ã itykkam gwaj bakam kĩnh ane. Bir, mrãmri, kwãrĩk wãnh ibĩn rã'ã ba tu ikĩnh ne. Gwaj bakunĩ baro'ã bakĩnh ne. <sup>18</sup> Gar gadjwỳ ã ikôt akĩnh ane gwaj baro'ã bakĩnh.

### *Ximoxi'ã ujarênh.*

<sup>19</sup> Adjỳm, dja ba ĩ wãm ar awỳr Ximoxi jano. Ije ar awỳr anormã tu amijã Bẽnjadwỳr Jeju kamnhĩxkumrêx. Dja ar akam bôx ne akubyn iwỳr tẽn bôx ne kam imã ar ajarê. Kute imã ar ajarênh mexo dja imã ikĩnh jadjã, ba kam ajte ikĩnh ne.

<sup>20</sup> Ximoxi ne mexkumrêx. Nhỳnh ne atemã me'ô ne ba ije wãm ar awỳr anormã? Kati, Ximoxi pydjii. Ajbit ne ikôt mrãmri ar ajo djuw mex ne. <sup>21</sup> Me kunĩ ne me amidjwỳnhbit ma, ne kam Jeju Kritu mar kêt ne.

<sup>22</sup> Nhym bep ate ne Ximoxi. Gar arỳm mexmã akato. Nãm ikôt àpênh mexkumrêx. Kute me kra bãmkôt àpênh mexja pyrãk. Nãm ã ikôt memã Jeju'ã ujarênh ny jarêno tẽmo ane. <sup>23</sup> Be, tãm ne ba ije ar awỳr anormã tu kamnhĩxkumrêx. Dja ba amima, itĩn jabej nãr kon ityk jabej, dja ba amiman kam on ar awỳr ano nhym wãm tẽ.



<sup>24</sup> Adjÿm, dja ba badjwÿ ï wãm ar awÿr tãn bôx. Nã bãm itemmã tu amijã Bãnjadjwÿr djwÿnh kamnhÿxkumrëx.

<sup>25</sup> Mrãmri dja ba akubyn ar awÿr ikamy Epaprodji jano. Nã gãm ar iwÿr ano nhym iwÿr bôx ne ikôt àpênh ar ba. Bar kam iro'ã ar ije Jejuo ingyryk ne memã ikabën iba. Tãm ne gar iwÿr ano nhym iwÿr bôx ne kam ar akàxã ijo djuw mex ar o ba, ba kam ije arÿm akubyn ar awÿr anormã.

<sup>26-27</sup> Nãm ar ajo ama: ne. Ba kam ije akubyn ar awÿr anormã. Mrãmri ne arÿm kanê tÿx ne tyk 'ÿr. Tyk 'ÿr nhym Metïndjwÿnh kum kaprïn arÿm o mex ne. Kum tãmja kaprïn kum badjwÿ ikaprï. Ikaprï nhÿby ajte ikaprï karõ ne kanêbê utã, Epaprodji pytà, nhym arÿm mexkumrëx ne ar ajo aman kam,

—ÿ, arÿm ne ar ikanêkôt iman arÿm ikam umar punu, anen kam ar akôt umar punu.

<sup>28</sup> Kam ne ba ije akubyn ar awÿr anor prãm kumrëx, gë ar awÿr tãn bôx gar omÿn kam ajte akïnhkumrëx. Ar akïnhkumrëx ba badjwÿ arÿm ikaprï apêx. <sup>29</sup> Bir be, kam dja ar awÿr bôx gar amiwÿr o wadjã, ne akïnhkumrëx ne Bãnjadjwÿr kôpdji'ã kum akabën mex jarë. Dja gar ã o ane, me'õ kute Epaprodji pyrãk dja gar ã o ane, kãjmã kamênho tã. <sup>30</sup> Be, tu amiwÿr o wadjãn kum akabën mex jarë. Djã nã gãm ar omÿ, Kritumã àpênh ar bakam ren tykja pumÿ? Nãm ikôt ar àpênh ba. Gar te ikôt adjãpênh prãm nhym kam ta ar akàxã ikôt àpênh ar ba. Kute amikam tyk mar kêt ne tu ikôt ar àpênh ba.

### 3

#### *Paur kute amikukràdjã tÿm kunï kanga.*

<sup>1</sup> Ë, akmere ar, àpnhÿre ar, gora ar ajte ikabën ma. Gora ar akïnh. Gora ar gwaj banhõ Bãnjadjwÿrwã kôt akïnh.

Ë, ba ajte ar amã mÿjja 'õdjwÿ jarë, õbê ije ar amã 'ã pi'ók no'ókja dja ba ajte ar amã arë. Djã nã bãm ije ajte akubyn ar amã arënhbê imã idjukanga? Kati, me kute ar anoo biknorbê dja ba ajte akubyn ar amã arë. <sup>2</sup> Ë, gora ar aminêje me omÿ. Me axwe, me arïk ar bawã ar aminêje me omÿ. Me wã ne me mÿjja punubit nhipëx ne memã

me kute me mykã jakàrmãbit arënh ar o ba. Nãm me 'ëx ne we ar memã,

—Djãm me aje amim Jeju mar ne kam tu aje mar kajgomã. Bep kati, dja ga me amim ama nhym me me amy nhinhu kàdjwÿ rë. Metïndjwÿnh ne kum me my nhinhu kà rênhbit kïnh ne meo kra, bep me mykã tã ne kute meo kra kêt, anhÿr ar o ba. Nãm me 'ëx. Me 'ëxnhÿ ne me ar 'ëx ba. Bir, nhÿnh me jabê ne Metïndjwÿnh krakumrëx? Gwaj ba.

<sup>3</sup> Gwaj ba ne gwaj mrãmri babê Metïndjwÿnh krakumrëx. Gwaj baje Metïndjwÿnh mar ne kum rax jarënh nhym Metïndjwÿnh Karõ kute gwaj bajo ba nhym Kritu Jeju kute gwaj bapytãr gwaj baje kam kamnhÿxbê ar baba. Kam ne gwaj babê Metïndjwÿnh krakumrëx. Djãm gwaj ba ne gwaj ajmã amijon amiptàn ar amijo badjãmra baba? Kati, Kritu Jeju ne gwaj bapytã gwaj kam Kritukam bakïnhkumrëx ne o ar badjãmra baba.

<sup>4</sup> Djori me'õwã amikukãmãreo amran we, —Ba inhingët kôpdji'ã Metïndjwÿnhmã imex, anhÿr ar o ba? Nãr kon ajmã amijon amijo àmra ba? Bir be, ba ren amijo idjãmra prãm ne ren badjwÿ ren amikukãmãreo amran ren amimexo idjãmra iba. Djãm ikatãm, djãm iprÿ kãtã got ba? Arkati, inhingët kute imã mÿjja rero kute me ja kunï rer. Gora ima.

<sup>5</sup> Ë, ijã pi'ók kamrëk pydji nhym me imykã krãta. Ibê idjaerkumrëx nhym inhingët bê Bãnjamïn. Djãm ibajtem got? Kati, inãmê ibãm amê Ar kubê idjaer djwÿnhÿ. Ibê mekbê pardjêu 'õ ne ba prïne Môjdjê kukràdjãkôt amijo iba mextire. <sup>6</sup> Nã bãm imã Môjdjê kukràdjã kïnhkumrëx ne o ingyryk ne meo ajkê, me kute amim Jeju marjao ibikënh mex ne. Nã bãm prïne Môjdjê kukràdjãkôt amijo iba. Nhÿnh ne me'õ ijã,

—Kati, nãm Môjdjê kukràdjã 'õo akno, ane? Kati, nã bãm prïne kôt amijo iba. <sup>7</sup> Bir be, amrëbê mÿjja ja kunï imã mex ba kanàrrãm amijo iba.

Nhym bep kati, jakam arÿm imã punun imã kajgo. Ba arÿm kanga. Kritubit ne ikadj mex, ba kam kanàrrãm ar amijo iba. <sup>8</sup> Djãm Môjdjê kukràdjãmê me ikukãmãre jabit imã kajgo? Kati, mÿjja kunï ne imã

kajgo mexi. Nhyim ije inhõ Bēnjadjwýrbê Kritu Jeju marmã, ajbit pydji ne imã mex, imã kñh, ba kôtbít ijamak bēn. Bir be, Kritu kadjy ne ba mýjja kunĩ kanga. Nã bãm ikukràdjã tũm kunõ mñn ne tu bõm kumē, ije ajbitõ aminhõ kadjy.

<sup>9</sup> Ije Krituo aminhõn kam kôt idjãm ne kôt ibamã ne ba mýjja kunĩ kanga. Ta ne imã ijaxwe kêt jarē ba kam kum imexkumrēx. Djãm Mõjdjê kukràdjãkôt ije ar amijo ibakam imexkumrēx? Kati, Kritukôt ne ba imex. Nã bãm amikajmã'ã Kritu ma nhyim Metĩndjwýnh imã ijaxwe kêt jarē ba kam kum imex ne. Nãm me ã amikajmãtã Kritu maro ane nhyim arým Metĩndjwýnh memã axwe kêt jarēnho ane.

<sup>10-11</sup> Bir be, ije Kritu mar ne kôt ar amijo ibamã ne ba mýjja kunĩ kanga. Mýkam ne ba mýjja kunĩ kanga? Bir, ije prĩne Kritu mar nhyim kute ta týxo ijo týx, týxja tãm kute akubyn amitĩn jao itýxmã ba kudjwa tokryo itokryn 'ã ingrà týx rã'ã nhyim me kute Jeju kudjwa ibĩn jabej ba kanga kêt ne kam ije ityk nhijukri akubyn itĩn ne ikator kadjy amim kamnhĩxbê ar amijo iba.

<sup>12</sup> Djãm arým imexo imexkumrēx? Djãm arým imex ne ijaxwe 'õ kêtumrēx? Kati, ãm ije amijo itēm rã'ã. Tũmrãm gēdja Metĩndjwýnh ijã mex mẽ ba kam mrãmri imexkumrēx. Kadjy ne Kritu Jeju ipytãn ijã amim karõ.

<sup>13-14</sup> Ê, akmere ar, àpnhĩre ar, kraxje ijaxwe apēx kêt rã'ã. ãm ije amijo itēm rã'ãã. Ne kam mýjja pydji'ã ino týx. Mýjja tũm, ije amijo iba tũmja ne ba tu wãnh kum inhire. Tu wãnh kum inhiren mar kêt ne amikukãmbit maro tē.

Kute me kute aben rerkam prõt týx ne kam amim kñh djã jamýnhja pyrãk. Nãm me amikukãm 'ýr prõt ne prõt týx ne tyk djã kêt ne arým 'ý:r tē. Me kute me týxmē me tyk djã kêt nhõ nēkrēx jamýnhmã. Me kute amim amýnhmã ne me katãt 'ýr prõt ne. Me prõtãkôt ari ar rĩt kêt ne ate krãn mũm rĩt ne mũm rĩt kêt. Ajbit ne me kuman tu 'ýr prõt ne.

Bir be, nã bãm ã ane. Nã bãm ã amijo anen 'ýr amijo itēm rã'ãn 'ã inopdji ne. Metĩndjwýnh kute ijã amim karõkôt ne ba amijo tē. Metĩndjwýnh ikam kñh ne kute imã ikñh djã nhõr ba ije amim amýnhmã

ne ba kôt amijo tē. Bir be, nã bãm ajbit ma. Ije kôt amijo iba nhyim ikam kñh ne kute imã ikñh djã nhõrmã ne ba kadjy amijo itēm rã'ãn 'ã inopdji ne.

Mýj nēkrēx nã, mýj ikñh djã ne ba ije amim byrmã? Bir, Metĩndjwýnh kute kãjkwamã me bajwýr gu me 'ýr bamõr ne õ kãjkwakam mýjja mextikam ar babamã, tãm. Kritu Jejukôt dja gu me kãjkwamã wadjã. Mýj me'õkôt? Bir, Kritu Jeju pydjikôt dja ba kãjkwamã wadjã. Kadjy ne ba amijo itēm rã'ãn 'ã inopdji ne. Metĩndjwýnh ikam kñh ne kute imã ikñh djã nhõr kadjy.

<sup>15</sup> Gwaj baje amim Jeju mar tũm ne kôt arým bamexja, dja gwaj arek kôt amijo bamõr rã'ã. Metĩndjwýnhmã bajaxwe kêt kadjy arek amijo batēm rã'ã. Nã, gwaj o ane, ã axikôt maro ane. Dja gar akwý ate anhõ kre kadjwýnhbê,

—Kê, waj. Ije Metĩndjwýnhkôt ar ije amijo iba prãm kêtumrēx. Mýj kadjy gēdja bar mýjja wãkôt ar amikangõnho iba? anhýr jabej, nhyim Metĩndjwýnh arým ar amã kabēn 'õ jarē gar arým aman kam kôt amim akato.

<sup>16</sup> Ê, ja dja gar ama. Arým ne gwaj kôt amijo batēmo ane. Gwaj arek bamõr rã'ã. Metĩndjwýnh kute gwaj bajo mõr gwaj arek kôt bamõr ne atemã mũm bajõ bamãt kêt ne tu arek katãt kôt amijo batēm nhyim tũmrãm Metĩndjwýnh kute gwaj bajã mex mẽnh gwaj bamextire ne bajaxwe kêtumrēxmã.

<sup>17</sup> Akmere ar, àpnhĩre ar, ar aro'ã ijã amijakren ikôt amijo tē. Ê, ar ipumũ. Ar akajmãtã katãt imrãnhja pumũ. Dja gar ipumũn kam katãt ã ikudjwa ar amijo anhýr ar o aba. Arým ar kwý kute ikõpdji'ã ikôt ar amijo ba. Dja gar ar kudjwa ama.

<sup>18</sup> Nhyim bep ate ne me kwý kum Kritu kurê. Nãm me arĩk ar ba ne kute Kritu me bakunĩ kadjy pĩte'ykam tykja mar prãm kêtumrēx ne kum kurê. Arým ne ba ar amã me ja jarēnh krãptĩ ne kam ajbir ajte akubyn ar amã arē, imýrkam ne ba ar amã arē. <sup>19</sup> Me ja dja me tu biknorkumrēx. Djã nãm me kum Metĩndjwýnh kñh got? Kati, nãm me arĩk ar ban kam kum axwebit kñh ne. Djã nãm me pijãm ne? Nãm me ren axwekam pijãm ne ar ba. Bep kati, nãm me pijãm kêt ne ar ban ajte ta amijo àmra ba.

Djã nãm me kàjkwakam mỳjja ma? Kati, nãm me pyka jakam mỳjjabit mar ar o ba.

<sup>20</sup> Bep ate ne gwaj ba. Gwaj banhõ pykakumrëxbê ne kàjkwa, Metĩndjwỳnh nhõ kàjkwa. Kurũm dja Bẽnjadjwỳr Jeju Kritu kubê me bapytår djwỳnhja bõx. Tãm ne gwaj kõtbit bajamak bẽn ne amår ar o baba.

<sup>21</sup> Dja bõx ne kam me bajo ny, me banhĩ punuja, tyk prãmja dja o ny gu me kam banhĩ kute ta ĩ mextire, ĩ kadjwỳnh ajmã kute kêt, ĩ mextire pyræk. Mỳjo dja me banhĩo ny? Djãm Jeju Kritu rerek got. Tỳxi. Ta tỳxo. Dja amityxo amijo aptån kam amikõt mỳjja kunĩ mẽn kam mỳjja kunĩ nhõ bẽnjadjwỳr. Ta tỳx tãmõ dja me banhĩo ny.

#### 4

*Kute arkum amijo ba mexmã 'ã karõ.  
Ep 4.3; Pir 2.2; Kor 3.15; Xij 3.17*

<sup>1</sup> Be, akmere ar, àpnhĩre ar, kam dja gar ã Bẽnjadjwỳrkõt amijo aban 'ã angrà tỳxo ane. Djãm imã ar akĩnh ngri. Axwe imã ar akĩnh, ije ar ajo ijamak tỳxkam ne ba ar amã ikabẽn jarẽn ar amã pi'òk no'òk ne. Ar ajo dja ba amikĩnh ar o iba. Ar ga dja ba ar ajo idjãmra mõ, imã ar akĩnh raxkam, akmere ar, àpnhĩre ar. Ar Jeju 'ã angrà tỳx ne kõt aje amijo abamã ne ba ã ar amã pi'òk no'òko ane.

<sup>2</sup> Ë, àpnhĩre ar, Ebodjijmẽ Xĩxiki, ba ar amã ikabẽn jarẽ. Kwārĩk wãnh akabẽno aben japanh kêt. Ar abê Bẽnjadjwỳr djwỳnh krakam on ar aje aben pyræk ne aro'ã axikõt akabẽn. <sup>3</sup> Gadjwỳ, akmere, ikõt adjàpênh djwỳnhkumrëx, dja ga arkum akabẽn jarẽ gẽ on ar kute aben pyræk ne kabẽno aben japanh kêt. Nãm ar ikõt àpênh ar ban memã Jeju'ã ujarênh ny jarênh ar o ba. Ne kam Kremëxidjwỳkõt àpênh ar ba. Kremëximẽ me ikõt àpênh kunĩmẽ, me tãm ne me arỳm Metĩndjwỳnh me tĩn rã'ã rã'ãmã arỳm pi'òk no'òkkam amim me idji janhõ. Nhym bep ar nire kute ar ikõt àpênhja ne ajmån ar arỳm ajbir kabẽno aben japa. Mỳkam? Arkumã dja ga akabẽn jarẽ.

<sup>4</sup> Be, on tu ar akĩnh ry typydji, ar abê Bẽnjadjwỳr djwỳnh krakam on tu ar akĩnh ry typydji. Ba ajte ar amã arẽ,

—Ar akĩnhkumrëx. <sup>5</sup> Gora me kunĩmã ar adjukaprĩ. Bẽnjadjwỳr arỳm akubyn bõx

'yrkam dja gar me kunĩmã adjukaprĩ gẽ me kunĩ ar adjukaprĩkõt ar ama.

<sup>6</sup> Kwārĩk wãnh gar mỳjjakam adjumar punu kêt. Tu Metĩndjwỳnhmã akabẽn ne prĩne kum amijarẽn mỳjjao a'wỳ. Ne mỳjjao adjà'wỳr katã kum amikĩnh jarẽ. Kute ar amã mỳjja kunĩ nhõrkam kum amikĩnh jarẽn kum õdjãnh jarẽ. Æ kum amijarẽno ane. <sup>7</sup> Dja gar ane nhym kam Metĩndjwỳnh ar amã umar mex djã jarẽ gar kam adjumar mexkumrëx ne ar aba. Djãm tãwã nhõ me umar mex djã punu got. Tãmwã ne õ me umar mex djã ra:xi. Nãm me te kute mar ne kute kraxkõt omũnhmã. Kritu Jejukõt dja gar adjumar mexkumrëx. Õ me umar mex djãjao dja prĩne ar anẽje aptã. Nhym me umar punu 'õ ar amã àr prãm kêtumrëx, amadjãmã àr kêtumrëx ne ar anhõkre kadjwỳnhbê àr kêtumrëx.

<sup>8</sup> Be, akmere ar, àpnhĩre ar, ba ajte ar amã mỳjja jarẽ. Godja mỳjja mextire, nàr mỳjja ajmã kute kêt ne kĩnhkumrëx jabej gora ar ajbit ma. Kwārĩk wãnh gar mỳjja punu 'õ mar kêt. Bep mỳjja me kute arênh ne 'èxnhĩ kêt 'õ, me kute katàt kabẽn jadjwỳr 'õ, mỳjja mex me kute kõt amijo ba 'õ, me kabẽn mex me kute o aben nhikjê kêt 'õ, mỳjja mex me kute omũnh ne kĩnhkumrëx 'õ, mỳjja mextire me kute kikre kunĩkõt mar ne kute o ýrja 'õ, mỳjja ja dja gar mar o aba.

<sup>9</sup> Ije ar amã ikabẽn jarênh gar aje ikabẽn mar ne ikabẽnkõt aje amijo aba ne ije amijo iba gar aje ije amijo ibakõt ipumũnh gora ar ã ikudjwa amijo ane nhym kam Metĩndjwỳnh ar amã umar mex jarẽn prĩne ar ar ajo ba. Tãm ne ja.

<sup>10</sup> Be, nã bãm ikĩnh ra:x ne. Ne Bẽnjadjwỳrmã amikĩnh jarẽ. Nã gãm ar ajte ijo djuw mex ba kam ikĩnhkumrëx ne. Ar aje ijo djuw mex kêt ne kam ajbir ajte ijo djuw mex. Ar atãri ar iba ga ren ar ijo djuw mex rã'ã. Nhym bep amybỳm ne ba ar iba gar ijo djuw mex kêt. Djã nã gãm ar ijo aknon ijo djuw mex kêt. Arkati, nã gãm ar aje imar rã'ã ne te jãnh gar aje ijo djuw mex prãmẽ.

*Kute arkum arkam amikĩnh jarênh.*

11-12 Djām imã prãm nàr inhõ mỳjja kêt kam ne ba ije ar amã amijarēnhja? Kati, ikĩnhkumrēx. Ba arỳm amikam ajkam aman arỳm tu ate ikrã. Ē, godja inhõ mỳjja kêt kam nàr kon inhõ mỳjja krãptĩkam ba tu kam ikĩnhkumrēx ne ar iba. Godja mỳjja punu arỳm iwỳr bõx ba tu ikĩnhkumrēx. Nym mỳjja mexdjwỳ arỳm iwỳr bõx ba arỳm ikĩnhkumrēx. Mỳjja punu nàr mỳjja mex iwỳr ban bõx katã ba tu ikĩnhkumrēx ne ar iba. Imã prãm nàr ijajne jabej, inhõ nêkrêx krãptĩ nàr inhõ nêkrêx kêt jabej ba tu ikĩnhkumrēx ne ar iba. Ja ne ba arỳm ije mar tỳx. 13 Kritu ta ne ijo tỳx nym mỳjja kunĩ iwỳr ban bõx katã ba tu ate ikrãn ikĩnhkumrēx ne ar iba.

14 Bep mrãmri ne gar adjukaprĩkumrēx. Nã gãm ar itokry pumũn kam anhdjãnhkõt imã mỳjja jano. Mrãmri ne gar amexkumrēx.

15 Amrêbê ije pykabê Matenikam memã Jeju'ã idjujarēnh ny jarēnhmo krax ne kam kurũm itēm kam ne gar gajbit ikõt apê ne imã mỳjja kwỳ jano. Atemã me kute Jejukõt aben pydji 'õ kute imã mỳjja janor kêt. Ar gajbit ne gar imã mỳjja jano. Be, gar aje imar rã'ãja pumũ. Krĩbê Pirpukam ar aje amim Jeju mar ne kõt ar aben pydjio baja, ar gajbit ne gar imã pi'ok kaprĩre jano ba amim kuby. 16 Ne ajte krĩbê Texarõnikakam idjãm rã'ãkam inhõ pi'ok kaprĩre kêt. Gar imã kwỳ jano, ne ajte ano.

17 Djãm ar aje ajte imã pi'ok kaprĩre nhõrmã ne ba ajte ar amã ane? Kati, Metĩndjwỳnh ar akam kĩnh ne kute ar adjukaprĩo pãnh gar akĩnh raxmã.

18 Nã, mrãmri ar aje imã anorja kunĩ arỳm iwỳr bõx ne imãnhkutãn kwỳ ijakre. Gar aje Epaprodjikõt imã anor nym kute imã o bõxja imã kungã nym arỳm inhõ mỳjja krãptĩ ne. Ar aje imã õrja kute Metĩndjwỳnh nhõ mry pyrãk, kute õ mry kudjyre pyrãk. Me kute Metĩndjwỳnhmã mry par ne kute kum bõr nym kum kĩnh ne mekam kĩnhja. Kute tãm pyrãk. Nã gãm ar imã mỳjja ngã nym kam Metĩndjwỳnh ar akam kĩnhkumrēx. 19 Kam dja ar amã mỳjja ngã nym ar amãnhkutã ne.

Djãm inhõ Metĩndjwỳnh õ nêkrêx kêt got. Arkati, kãjkwakam õ mỳjja krãptĩti: kute

kanhêtire pyrãk. Dja ar amã kwỳ ngã, Kritu Jeju djõ'ã ar amã kwỳ ngã nym kam ar anhõ mỳjja ar amãnhkutã. Nhyňh ne Metĩndjwỳnh ar amã mỳjja 'õ nhõr kêt? Kati, dja ar amãnhkutã kungã nym rã'ãn kumex.

20 Gê me kunĩ me banhõ Metĩndjwỳnhmã rax jarẽ, Metĩndjwỳnhbê me Babãmmã rax jarẽ. Kum rax jarēnh rã'ã rã'ã. Gê me ã ane. Tãm ne ja.

21 Nã bãm ar ajo ama, wãnh, Kritu Jejukõt ar abê Metĩndjwỳnh nhõ ar amexja ne ba ar akunĩo ama ne. Wãnh ar abenmã ijarẽ. Nym jakamdjwỳ ar kute Jejukõt abeno kamy ar ajo amak rã'ãn ar amã amijarẽ.

22 Jakam, Metĩndjwỳnh nhõ me mex kunĩ ne ar ar ajo amak rã'ãn ar amã amijarẽ. Nym bẽnjadjwỳr Xedja nhũrkwãkam me jadjwỳ ar ajo amak tỳ:x ne.

23 Gê gwaj banhõ Bẽnjadjwỳr Jeju Kritu ukaprĩkõt prĩne ar akunĩo djuw mex. Tãm ne ja.

## Paur kute Korxikam me jamã pi'òk no'òk ne ja.

Me'õ nhidjibê Epapraj ne arým Paurkôt Jejuo aminhõ. Ne kam akubyn õ pykabê Korximã tèn kam memã ar Jeju'ã ujarènh ba. Nhyr mekam kwý arým tu amim Jeju markumrêx ne kôt aben pydji. Nhyr kam Epapraj Paur'ýr tèn bõx. Mekbê ijê djâkam Paur ãm rã'ã nhyr Epapraj 'ýr bõx ne kam õ pykabê Korxikam ar ja Paurmã ar arènhõ nhý. Nhyr kam tu Paur kute ar omũnh kêt kam tu kum ar kĩnhkumrêx. Kute ar omũnhmã pràbê tu kum ar kĩnhkumrêx ne kam arkum pi'òk no'òk ne. Nhyr bep Korxikam me kwý ne me Metĩndjwýnh kabèn kupa'ã ar memã arènhõ ba. Nãm me 'èx ne we,

—Me mykà rênhbit ne Metĩndjwýnh kum me kĩnh ne meo kra. Ne ajte memã 'èx ne we,

—Metĩndjwýnh kadjy mrãnh djwýnhmã akabèn. Djãm abènjadjwýr got ga katàt Metĩndjwýnhmã amijarê? Dja ga kadjy mrãnh djwýnh kumrêxmã amijarê gè amũ kum ajarê, ane. Kati, nãm me memã 'èx. Nhyr me kute mýjja krènmã nhyr me mebê mýjja pyman memã kum,

—È, kwãrĩk wãnh ja krèn kêt, ane.

Kam ne Paur arkum,

—Kwãrĩk wãnh atemã me kabènwã mar kêt. Nhyr bep Kritu ne kabèn mekumrêx. Tãm gèdja gar 'ãno djan kabèn ma. Kritu ajbit kute me utàr. Kwãrĩk wãnh kadjy mrãnh djwýnhmã akabènwã wãm nõ. Kritu pydji ne kute me utàr. Kwãrĩk wãnh atemã 'õ jabej kêt. Ajbit ne Metĩndjwýnh djwýnhĩ ne mýjja kunĩ 'y ne kute me utàr. Nà, nhyr Jeju Bãmbê Metĩndjwýnh tãm ne amiwýr me bajo bõx. Kra kukwakam amiwýr me bajo bõx ne me bajo õbikwakumrêx. Nãm ã Paur arkum pi'òk no'òko anen kam arkum ano. Tãm ne ja.

1-2 Ba ibê Paurmê gwaj bakamy Ximoximê ne bar ar amã pi'òk no'òk ne. Ibê Paur, Metĩndjwýnh kute ijã amim karõ nhyr Jeju Kritu kute ijanor ba itèm, ba, ba ne ba ar amã pi'òk no'òk ne. Krĩrãx bê Korxikam Kritu nhõ me ja, õ me mextire ja, ar aje

amim Kritu markumrêx ne 'ã angrã týt ne Kritukôt aje abeno akamyja, ar amã ne ba pi'òk no'òk ne.

Gê Metĩndjwýnh ar ajo djuw mex, Metĩndjwýnhbê me Babãmmê krabê Bènjadjwýr Jeju Kritu ar ukaprĩkôt ar ajo djuw mex ne ar ar ajo ba, ne ar amã umar mex jarê gar adjumar mex ne ar aba.

*Paur kute Metĩndjwýnhmã arkam amikĩnh jarènh.*

3 Bar ije Metĩndjwýnhmã ar ajo idjà'wýrkôt mã kum ar akam amikĩnh jarê. Bãmbê Metĩndjwýnh, gwaj banhõ Bènjadjwýr Jeju Kritu Bãmbê Metĩndjwýnh kumã ne bar amikĩnh jarê. 4 Mýkam ne bar kum ar akam ikĩnh jarê? Bir, nã gãm ar tu amim Kritu Jeju markumrêx ne kam kôt amã me jadjwý jabêkumrêx, amã õ me ja, õ me mextire ja jabêkumrêx bar arým kuman kam ikĩnhkumrêx.

5 Be, kute ar amã mýjja mex djir ne gar kam ama. Metĩndjwýnh kute kãjkwakam ar amã mýjja mex djir ne katàt ar amã arènh, mýjja mex tãm ne gar aman tu amim kamnhĩxkumrêx ne kam kam ama. Ar aje mýjja mekum amakkam ne gar tu amim Jeju markumrêx ne kam kôt amã õ me ja jabêkumrêx. Bir be, nã gãm ar Jeju'ã ujarènh nyja man tu amim kamnhĩxkumrêx. Jeju'ã ujarènhja ne katàt nõ. Kabèn punu kêt. Kabèn 'èxnhĩ kêt. Kam ne katàt nõ.

6-7 Be, Jeju'ã ujarènh ny arým wãkam ar awýr bõxwã pumũ. Nãm me pyka kunĩkôt Jeju'ã ujarènhõ ajmã. Arým ne me o ajmã nhyr me ar akudjwa arým kuman arým kum mýjja mexbit kĩnh ne ar o ba. Nãm me mýjja mexbit ma. Be, nãm ã wãkamdjwý ar amã arènhõ ane. Gar arým ã mýjja mexbit maro ane. Krax kurũm ar aje mar totokbê ne gar ã amijo ane.

Epapraj ne ar amã Metĩndjwýnh jarènhõ tẽ gar arým kôt maro tẽ. Nà, Epapraj ne ar amã Metĩndjwýnh djukaprĩ jarê. Metĩndjwýnh ne ukaprĩkôt ar ajo djuw mex. Nhyr Epapraj ar amã ukaprĩ jarê gar kam arým tu amim markumrêx. Nã gãm ar anhõkre kadjwýnhbê,

—Nà, mrãmri ne arým Metĩndjwýnh djukaprĩkumrêx ne ja, ane. Nà, Epapraj ne

ar amã arẽ gar maro tẽ. Ar imã Epapraj kĩ:nhkumrẽx. Nãm ar ikõt àpênh ar ba. Mrãmri Kritu nhõ àpênhkumrẽx ne kum àpênh ar ba ne kute kanga kêtumrẽx. Nãm wãm ar akam bôx ne ar ikôpdji'ã ar àpênh ba.

<sup>8</sup> Be, Epapraj, ta ne ar imã ar amex jarên ar imã,

—Ota arkum aben jabêkumrẽx. Metĩndjwýnh ar gwaj bajo bajabê ne arým gwaj bapytà nhym Kra arým ar gwaj bajo ba. Bãm kum Kra kĩnhkumrẽx ja ta ne arým ar gwaj bajo ba.

<sup>9</sup> Bir be, kam ne bar mã kum ar ajo a'uw. Epapraj kute ar ajarênh bar ije mar totokbê ne bar Metĩndjwýnh mã ar ajo idjà'wýr ry typydji. Nã bãm ar kum ar ajã,

—Dja ga prĩne arkum 'ã karõ gê ar kuman akabênkõt ar amijo ba. Dja ga Akarõo prĩne ar no bõ, Akarõo ar no bõ gê ar prĩne akukràdjã ma. Nã bãm ar ã kum ar ajo idjà'wýro ane.

<sup>10</sup> Bir be, dja Metĩndjwýnh prĩne ar amã ar adjàpênh'ã karõn ar ano bõn ar amã amikukràdjã jarẽ gar kam arým mã kõt amijo aba mextire gê Bẽnjadjwýr ar akam kĩnhkumrẽx. Ga kam ar amã mýjja mexbit kĩnh ne ar o aban ajte Metĩndjwýnh maro tẽ:n amũ maro ajkamên mar rax ne.

<sup>11</sup> Gêdja Metĩndjwýnh prĩne ar ajo tỳx. Djãm uma ngri got. Uma raxo kute mýjja kunĩ jakrenh. Ta tỳxo godja prĩne ar ajo tỳx ne, ta mexo prĩne ar ajo mex ne. Ga kam ar akràn mã amijo aba. Kwãrĩk wãnh gê te mýjja punu ar akam apõx nãr kon ar akaprĩ ar akam apõx gar mã Jejukõt ajkamên tu akràn mã amijo aban angryk kêt ne tu akĩnhkumrẽx. <sup>12</sup> Ne tu Jeju Bãmbê Metĩndjwýnh mã amikĩnh jarẽ.

Bir, mýkam? Bir, arým ne gwaj bajo mex. Gwaj bamex nhym kute õ me mextire jamẽ ro'ã gwaj bamã mýjja nhõrmã. Kute õ me jamã mýjja mextire djir ja tãm gêdja gwaj baro'ã gwaj bamã kungrã. Õ pykakam a'ubit, õ pykakam me axwe 'õ kêt, mýjja punu 'õ kêt tãm'ýr dja gwaj bõx nhym kute gwaj bamã mýjja ngrãnh ne kam ar kute gwaj bajo bamã. Kadjy ne gwaj bajo mex ne.

<sup>13</sup> Be, arým ne mrãmri tu gwaj bapytàrkumrẽx. Amrêbê ne Xatanaj ar gwaj bajo ba gwaj kam bamã bajaxwebit kĩnh ne ar o baba nhym kam kute mrãmri akamàt kô tykkam kute ar gwaj bajo ba pyrãk. Nhym arým Metĩndjwýnh kubê gwaj bapytà nhym arým wãnh ar ba. Arým tu Xatanajbê gwaj bapytàrkumrẽx. Xatanaj kute àtykri ar gwaj bajo bajabê ne arým gwaj bapytà nhym Kra arým ar gwaj bajo ba. Bãm kum Kra kĩnhkumrẽx ja ta ne arým ar gwaj bajo ba.

<sup>14</sup> Nã, Bãm ta Xatanajbê gwaj bapa 'amý. Amrêbê Xatanaj ajbit ar gwaj bajo ba nhym kam Bãm kubê gwaj bapa 'amýn gwaj bajo katon gwaj bajaxwe tu o aknon gwaj bajo ba. Kra tyk ne kamrõ bikapĩnkõt ne Bãm gwaj bapytàn gwaj bajaxweo aknon tu mar kêt ne.

*Kritu kute raxo katàt me kunĩ jakrenh.*

*Dju r 1.1; Kar 10.36; Kor 2.9; Idja 1.2*

<sup>15</sup> Nã, kra ta ne memã Bãmo amirĩt ne. Djãm me kute noo Metĩndjwýnh pumũnh got. Me kute noo omũnh kêt. Nhym kam kra ta memã Bãmbê Metĩndjwýnh amirĩt ne. Amẽ ar kute aben pyrãk. Ar amẽ tãmý. Nhym kam kra ta memã Bãmo amirĩt ne. Ne kam ajte kubê Metĩndjwýnh Krakam ta ne õ mýjja kunĩ djwýnh, mýjja kunĩ nhõ bẽnjadjwýr.

<sup>16</sup> Ta ne kute mýjja kunĩ 'yr djwýnh. Bãm kabênkõt ne mýjja kunĩ 'y. Kãjkwamẽ pykakam mýjja ja kunĩ 'y. Mýjja me kute noo omũnhjamẽ mýjja me kute noo omũnh kêtjamẽ, tãm ne kunĩ 'y. Me karõ nhõ bẽnjadjwýrmẽ kadjy mrãnh djwýnh nhõ bẽnjadjwýrmẽ mebêngõkre\* nhõ bẽnjadjwýr rũnhmẽ bẽnjadjwýr krymẽ mýjja kunĩ ne amim ipêx ne. Bãm kabênkõt amim ku'y. Nãm prĩne amim mýjja kunĩ 'y, prĩne o atom, kam ne õ mýjja kunĩ djwýnh, ta õ mýjja djwýnh.

<sup>17</sup> Adjãkam, mýjja kator kêttri ne Jeju ar tĩn ne ba. Djãm pykabê mýjja ta ar ba? Kati, ta ne kute mýjjao ba djwýnh ne kam kute mýjja 'õ kanga kêtumrẽx. Kute mýjja kunĩ 'yrkam ne kute mýjja 'õ kanga kêt. Kra ta

\* **1:16** Apýnh me õ pyka djãri kunĩkõt ne me kunĩ bêngõkre. Kubêkã jakamẽ me kakrãtykmẽ me babêngõkremẽ ne me kunĩ: bêngõkre.

ne ar mỳjjao ba. Nhyam mrāmri mỳjja tu kunĩ rã'ã: rã'ã.

<sup>18</sup> Nhyam ajte Krabê Jeju ta ne ò me ja kadjy bēnjadjwỳr. Me kute amim Jeju mar ne kòt amijo baja me tām ne me kute Jeju nhĩ pyrāk. Nhyam bep Jeju ne kute krā pyrāk. Jeju ne kam ò me ja kadjy bēnjadjwỳr. Ta ne kutewa ne kam amikòt mỳjja kunĩ apòxo tē. Ne kubê Metĩndjwỳnh krakam kumrēx me tyk kurũm tĩn ne kato. Kam ne ajbit pydji raxo kute mỳjja kunĩ jakrenh, raxo mỳjja kunĩmã wa.

<sup>19</sup> Kubê Metĩndjwỳnh djwỳnhĩ. Apỳnh Ar kubê Metĩndjwỳnh djwỳnhĩ. Kra kubê Metĩndjwỳnh djwỳnhkumrēx. Metĩndjwỳnh ne Kramē kute aben pyrāk'ã amim karō nhyam kam Kradjwỳ kubê Metĩndjwỳnh djwỳnhĩ. Ar amē kubê Metĩndjwỳnh djwỳnhĩ.

<sup>20</sup> Bir be, Metĩndjwỳnh ta ne amim Kra'ã karō, krakòt kute amim mỳjja kunĩ òbikwamã, pykakam mỳjja nār kàjkwakam mỳjja, kunĩ kute o òbikwamã. Mỳjkòt? Krakòt, kra ne me kadjy pĩte'ykam tyn kamrò ajkapĩ nhyam kam kòt Bām memã kabēn mex jarē nhyam me arỳm umar mexbit ma.

*Metĩndjwỳnh kute meo òbikwa.*

<sup>21</sup> Amrēbē ne gar Metĩndjwỳnh akurē djwỳnh. Ar aje ajaxwekòtbit ajamak bēn ne aje mỳjja jaxwebit ar o abakam ne gar o akurē djwỳnh. <sup>22</sup> Nhyam bep ajbir ne Metĩndjwỳnh ar ajo òbikwa. Nã gãm ar te amã kurē nhyam Metĩndjwỳnh tu ar ajo òbikwakumrēx. Kra ne me kadjy amijo kubēngòkren ruwn kam ty. Nhyam kam kòt Metĩndjwỳnh ar ajo òbikwakumrēx. Mỳj kadjy ne ar ajo òbikwa? Bir, kute amiwỳr ar ajo bõx, gar kabem aku'ēmã. Ar mrāmri Metĩndjwỳnh mexo amextire ne ajmã akute kêt ne ar aba ne ar akam mỳjja punu 'ò kêtumrēx ne kabem aku'ēmã. Kadjy ne Metĩndjwỳnh ar ajo òbikwa, godja gar arek o tēn kanga kêt jabej. <sup>23</sup> Godja gar arek aje Jeju 'ã angràn mrāmri adjām tỳx ne aje kanga kêt jabej ne kam ajte amijã kamnhĩxbē kam amak ar o aban kanga kêt jabej. Nã gãm ar arỳm Jeju'ã ujarēnh nyja man kam amim kamnhĩx ne kam kam ama. Godja gar mrāmri arek kòt amijo atēm

rã'ã ne aje kanga kêt jabej ne kam mrāmri arỳm 'ỳr bõx. Djām ar gajbit ne gar Jeju'ã ujarēnh ma? Kati, pyka kunĩkòt ne Jeju'ã ujarēnh mekòt ajmã. Ba ibê Paur ne ba memã Jeju kukràdjà ny'ã idjujarēnh mō. Idjapēnh ne ja. Kam ne ba kàjbē memã 'ã idjujarēnh mō.

*Paur me kadjy àpēnh.*

<sup>24</sup> 'ã idjujarēnh mō nhyam me arỳm kòt ijo ajkē ba itokry ne. Djām kòt ikapri? Arkati, ikĩnhkumrēx. Me akadjy ne ba itokry ne kam ikĩnh ne. Mete Krituo bikēnh nhyam tokryja 'ã ne me ijakre. Ba kam ba itokrykòt mete inhĩo bikēnh ba, ba itokryjakòt ne ba Kritu tokry nhinomã rēnh tē. Jeju nhĩ kadjy, mete amim Jeju mar ne kute Jeju nhĩ pyrākja, me kadjy ne ba itokryja. <sup>25</sup> Ne me akadjy idjapēnhja. Metĩndjwỳnh ne me akadjy idjan imã idjapēnh jarē. Ba kam me amã idjapēnh ar iba. Mỳj idjapēnh nã? Bir, ije me kunĩmã prĩne Metĩndjwỳnh kabēn'ã idjujarēnh itēm nhyam me kunĩ kute marmã.

<sup>26</sup> Amrēbē ne me kunĩbē Kritu apdju ne. Nãm me bakukãmãre amikam kra jadjwỳro tēm tãmtã: nhyam bipdjur rã'ã. Nhyam kam ajbir Metĩndjwỳnh arỳm memã o amirĩt, ta ò me mextire jamābit o amirĩt ne. Kute amim me ja'ã karòkòt ne memābit o amirĩt ne. <sup>27</sup> Amrēbē ne amim 'ã karō ne kam mebē udju: ne. Ne arỳm jakam memã o kato, ò me mextire jamābit ne o amirĩt ne. Mỳj ne mekbē udju ne ajbir memã o amirĩt ne? Bir, Kritu me bakadjwỳnhbē 'ỳrja. Tām ne gu me ò mỳjja mex'ã amim kamnhĩx ne. Kritu me bakadjwỳnhbē 'ỳrkam ne myt kunĩkòt mã me bamã mỳjja mex ngã ba me ikĩnhkumrēx. Mã ne mỳjja mexja kute? Bir, mỳjja mex ja ne apēx prãm kêtumrēx. Mỳjja mex ja ne mexo kute mỳjja kunĩ jakrenh, kute me kute ò nēkrēxo amimexja kunĩ jakrenh mex ne. Dja mã amirĩt rã'ã ne. Djām me kwỳmã ne o amirĩt ne? Kati, pyka kunĩkòt ne ò me jamã o amirĩt ne.

<sup>28</sup> Bir be, kam ne bar mã me kunĩmã Kritu'ã ajarē. Ar ikrã mexkòt, ar ikabēn mexo ne bar me kunĩmã tĩn jangijn me kunĩmã Metĩndjwỳnh kabēn jarē. Ar ije Metĩndjwỳnhmã meo imør ne kum me òrmã. Me kunĩ arỳm kute Kritu mar mex

ne kute inomã mēnh, me tãm ne bar ije Metĩndjwýnhmã meo imõr ne kum me õrmã. <sup>29</sup> Kadjy ne ba idjãpēnhkam ityk djã kêt ne. Djãm Kritu rerek got. Axwe týx ne ta týxo ijo tý:x ba kam me kadjy idjãpēnh ra:x ne.

## 2

*Kritu ajbit rax nhym me kute ja mar kadjy ne Paur djãpēnh raxja.*

<sup>1</sup> Ę, ba ar amã arē, gar ama. Gora ar amã idjãpēnh raxjakõt ima. Krĩraxbē Raodjikam ar jamē apýnh krĩ rũnh djãri me jamē me aje te ipumũnh kêt ba akrãnmã ar me akunĩmã idjãpēnh ibaja pumũ.

<sup>2</sup> Mýj kadjy ne idjãpēnh raxja? Ije ar amã týx jangjēnh gar ajte atýxmã. Ne ajte ar amã aben jabēn axikõt akabēn ne ar abamã. Ga kam ar aje mrãmri Kritu markumrēxmã, Metĩndjwýnh kute prĩne mekbē o bipdjurja ar aje mar ne aje katãt kõt mar ar o abamã. Mýj ne mekbē o apdju? Kritu. Kritu mekbē bipdjur ne gar aje marmã. Me kute Kritu mar rax ne kute mrãmri me õ nēkrēx rũnh pyrãk. Dja gar ã Kritu mar rũho ane. Kadjy ne idjãpēnh raxja.

<sup>3</sup> Nã, Kritu pydji ne kute amikadjy memã no mex jangjēnh djwýnh. Ajbit kute memã Bãmmē ar kukrãdjão amirĩt, kukrãdjã bipdjurjao amirĩt nhym kõt me arým õ mýjja mex maro tē, õ mýjja mex maro tēn kam kõt no mex. Nhym kam apýnh me kute Metĩndjwýnh nhõ mýjja mar djãri mrãmri kute õ nēkrēx mextire ja pyrãk. Be, ga Kritu pydji kute amikadjy memã no mex jangjēnh nhym me no mex ne kute õ mýjja marja pumũ. <sup>4</sup> Atemã 'õ kêt. Ta pydji ne kute Bãmo amirĩt. Ę, me'õ kute ar anoo biknor karõ ne ba ar amã katãt 'ã ajarē. Me 'êx ne kute kabēn punuo amikabēn mex ne o kute ar anoo biknor karõ ne ba ar amã ane.

<sup>5</sup> Nãm te jãnh prãme ba amybymbit imã ar akĩnh ne ar amar rã'ã. Arým ne ba ar aman kam ikĩnhkumrēx ne. Nã gãm ar amim Kritu markumrēx ne 'ã angrã týx ne amã me uma kêt ne kanga kêtumrēx ne 'ãno dja, ne akrãnmã aben mē ar aba. Ba kuman kam ikĩnhkumrēx ne.

*Ar kute Kritubit mar kadjy.*

<sup>6</sup> Bir be, ar aje Kritu Jejuo anhõ Bēnjadjwýrkam ã kõt amijo abao ane, anhõ Bēnjadjwýr Jejukõt ã amijo abao ane. <sup>7</sup> Dja gar ã amũ Kritu maro abikamēnhõ atēm kute mrãmri ne pĩ abatãnh kadjy kute pykamã arē ngjēnh ne kute pyka 'amýnh týxja pyrãk. Dja gar ã amũ Kritu maro abikamēnhõ atēmo ane, ne ã Kritu 'amýnh týx ne 'ãno adjãmo ane. Ne amrēbē ar aje amim Kritu marja arek o tē. Me kute ar amã arēnhkõt dja gar arek o anhýro tē. Dja gar ã o anhýro atēm rã'ãn prĩne mar týx ne. Ne kam Metĩndjwýnhmã amikĩnh jarē, ne kum amikĩnh jarēnh 'ãno dja.

<sup>8</sup> Dja gar aminēje me kabēn punuwã pumũ. Dja me kabēn punu 'êx ne amijo kabēn mex ne mõn ar anoo akno. Djãm me kabēn punuja kabēn katãt got, kabēn mex got? Kati, me kabēn kajgo mexi. Me ta ne me ar abenmã 'êx ban amũ abenmã arēnhõ mõr tãmtã nhym ĩ kamingrãny amũ abenmã arēnhõ mõ. Djãm Metĩndjwýnh kabēnkõt ne wã? Kati, me ta kukrãdjãkõt ne me kabēn kajgowã. Nhym bep atemã ne Kritu kabēn katãtã. Mrãmri katãt arē.

<sup>9</sup> Kubē Metĩndjwýnh djwýnhkumrēx. Amijo kubēngõkren me bawýr pykamã ruw. Kubēngõkrekam ne kubē Metĩndjwýnhkumrēx. Ām Metĩndjwýnh djwýnhĩ. Ta ne kubē Kritu. <sup>10</sup> Ne ta gwaj bakadjwýnhbē nhýn gwaj bamã umar mexti:re jarē. Gwaj bamã umar mextire jarē gwaj kam bakĩnhkumrēx. Mã ne gwaj bakĩnh kute? Bir, mrãmri me kute õ nēkrēx rũ:nhkam kĩnhja pyrãk. Dja gwaj Jejukam bakĩnhõ bamã nēkrēx kĩnhja jakrenh mex ne. Ę, mrãmri ne Kritu raxo kute me bēnjadjwýr rũnhmē me bēnjadjwýr kry kute meo baja kunĩ jakrenh. Ta ne umar mexo ar gwaj bajo ban gwaj bajo kĩnhõ ba, gwaj bamã kĩnh jangjēnhõ ba.

<sup>11</sup> Arým gwaj baje Krituo aminhõkam ne gwaj atemã bakukrãdjã. Gwaj bakukrãdjã tũm, gwaj bajaxweja ne gwaj arým tu wãnh kangan kum banhire. Ne kam gwaj bamex kute mrãmri ne mekbē idjaer kute me my nhinhu kã rēnh nhym me kam mex ne kĩnhja pyrãk. Me bajtem kute Metĩndjwýnh nhõ me ja mar kadjy ne me me my nhinhu kã rē. Nãm me me my nhinhu kã rēn mũm



kurën kam kïnh nhym Kritudjwý arým gwaj bamã gwaj bakukràdjà tùmja mùm ã rënho ane gwaj kam ã badjwý ã bamexo ane nhym Metïndjwýnh arým gwaj bakam kïnh ne.

<sup>12</sup> Jeju akubyn tïn ne me tyk krã kurüm kator'a ne ngônhmã gwaj bajangjênha amijakre. Ngônhmã gwaj bajangjênho ne kute Jeju tyk ne pykakam ir pyrãk. Nãm me ã ngônhmã gwaj bajangjênho ane. Ngônhmã gwaj bakrã jangjên, gwaj kam akubyn bakrã apôx ne kute Jeju kênkre kurüm akubyn tïn ne kator pyrãk. Metïndjwýnh ta ne týxo akubyn Krituo tïn, me tyk kurüm Krituo kato. Gwaj kam arým tu amim kamnhïxkumrëx nhym kam ngô kurüm me bakator kute gwaj badjwý akubyn batïn pyrãk, kute ta týxo Kritumë ro'ã gwaj bajo tïn pyrãk. Kam dja gwaj bakukràdjà nykôbit amijo baba.

<sup>13</sup> Bir be, amrëbê ne gwaj baje batyk pyrãk ne ar baba. Nã gwaj bajaxwekumrëx ne mùm amikukràdjà tùm rënho kêt kam kute me batyk pyrãk. Nhym bep ajbir ne Metïndjwýnh gwaj bajaxwe kunïo biknorkumrëx. Nhym kam kute Kritumë ro'ã gwaj bajo tïn pyrãk.

<sup>14</sup> Arým ne Metïndjwýnh Môjdjê kukràdjào apêx. Môjdjê kute memã “Kwãrïk wãnh” anhÿr ne 'ã pi'ók no'ókja arým o apêx. Nã gwaj te kukràdjækôt amijo babamãnh ãm mã bajamakkre kêt. Nhym kam Metïndjwýnh ôkre kadjwýnhbê,

—Ikra tykkôt, mete pïte'ykam kum o i'èk nhym tykkôt dja me tu amim ikamnhïxkumrëx ba kam me'ã mex rë. Nãm me te Môjdjê kukràdjækôt te o anen mar kêt kumrëx ne, ane. Nãm ã Metïndjwýnh o anen ã Môjdjê kukràdjào apêxo ane.

<sup>15</sup> Be, Kritu tykkôt ne Metïndjwýnh me karô punu rûnhjadjwýo ajkë, me karô punu nhô bënjadjwýrmë, me tãm ne Metïndjwýnh meo ajkë. Nãm me amipardja'ã me pa 'amýn kam meo kurwýko ban meo bôx. Me ipôkri ne me meo kurwýko ban meo bôx ne kam prïne mekbê àbêr djà kunïo apdjun kam memã me uma ngrãnh mex ne. Nhym me kunï kôt omün arým kôt kuma. Nãm ã Kritu tykkôt ã Metïndjwýnh me karô punu rûnho bikënho ane.

<sup>16</sup> Metïndjwýnh kute me karô punu rûnho bikënho kam kwãrïk wãnh ô kukràdjaja mar kêt. Nãm me Môjdjê kukràdjà kupa'ã mekbê mýjja pýma ar o ba ne memã amijangri'ã apnê. Bir be, kukràdjà kakritja dja gar mar kêt. Metïndjwýnh arým kute mýjja tùmjao apêxkam dja gar mar kêt. Kwãrïk wãnh ga arïk ar adjakur abakam gê me'ô adjakur mÿr jabej ar amã kabën 'ô jarënh kêt, nãr kon, mýjjao akôm mÿr jabej gê me'ô ar amã kabën 'ô jarënh kêt. Nãr kon, me rer mex 'ôkam, mytyrwý 'ôkam, akati 'ôkam, me rer mexo mörkam, mekôt ar aje amijo anhÿr kêt kam, kwãrïk wãnh gê me kam ar amã kabën 'ô jarënh kêt. Kwãrïk wãnh mýjja kukràdjà ja mÿr jabej gê me'ô ar amã àkrê kêt.

<sup>17</sup> Kritu bôx këttri ne me kukràdjà ja arïk kam ar ba. Nãm me Kritu kutêp ar kukràdjà jabito ba. Kajmã'ã ari o ba nhym kam bôx ne arým o ajngra, kukràdjà tùmja tu mùm kumë.

<sup>18</sup> Kwãrïk wãnh me 'êx ne kute amijo pijàm ne arïk Metïndjwýnh kadjy mrãnh djwýnhmã kabënja wãnh nô. Nãm me kum mýjja ja kïnh ne 'ã ar amã apnê, ar aje me kudjwamã. Nãm we me,

—Dja gar me ikudjwa kadjy mrãnh djwýnhmã amijarën kum rax jarë nhym arým Metïndjwýnh kum ar akïnh. Dja ga ar o anhÿr kêt nhym arým kum ar akïnh kêt. Djãm abënjadjwýr got ga tu Metïndjwýnhmã akabën, ane. Kati, nãm me 'êx. Kwãrïk wãnh wãm nô gê me ja ar anoo biknor kêt.

Nãm we me biptirkam mýjja pytiro ikwãn we ar amã kôt 'ã ujarënh ba. Kati, nãm me 'êx. Me ja ne me kajgo mex ne kam we ar amã mýjja jarënho ban we amijo àmra ba. Kati, nãm arïk ar ta amijo 'êx ne amijaxwekôt amiman kam we amijo àmra ba. Kati, nãm me 'êx. <sup>19</sup> Ne arým Kritumã iren 'amýnh kêt.

Kritubê Metïndjwýnh djwýnhkumrëx. Ta ne wýnhï. Kute ta krã pyrãk. Me baje Kritu mar ne gu me baje í pyrãk. Nhym bep Kritu ta ne kute krã pyrãk nhym me kum iren 'amýnh kêt. Nã gu me bakukràdjari ajkanhök ne kam tu batypydji. Apýnh kêtê. Me bakukràdjãmë me bakudjék kunïo aben pydjïn me bakrãmã kumë.

Nām ã Kritu ta kubê krâkam ta ïo djuw mexo tẽ, me bajo djuw mexo tẽmo ane. Kritu ne ta õ me jamã bẽnjadjwÿr ne kam amim meo atom ne meo djuw mex. Te apÿnh me ba djari baba nhym tu amim me bajo atom, me bajo aben pydji gu me batypydjin aben mẽ ar baban kam kôt bamã aben jabên kam baro'ã Kritu maro tẽ. Metĩndjwÿnh ne amim me bajã karõ gu me kam kãjmã kôt ã maro batẽmo ane.

<sup>20</sup> Arÿm ne gar Kritumẽ ro'ã ty nhym arÿm ar amã mÿjja kukràdjã kakritja mÿm kumẽ. Kritu kute ar amã mÿjjao apêx gar kam mã ajte amã akukràdjã kakrit kĩnh. Mÿkam ne gar akubyn mã amã pyka jakam me kukràdjã jabit kĩnh ne kôt ar amijo aba? Nãm we me,

<sup>21</sup> —Kwãrĩk wãnh byr kêt,

—Kwãrĩk wãnh kakinh kêt,

—Kwãrĩk wãnh kupênh kêt, ã we anhÿr ar ba gar kôt amijo aba.

<sup>22</sup> Djãm Metĩndjwÿnh kukràdjã ne ja ne me we ar “Kwãrĩk wãnh” ar o ban mekbê mÿjja puma ar o ba? Kati, me ne me ane. Kukràdjã tÿm, kukràdjã kakritja arÿm kêt. Metĩndjwÿnh arÿm kukràdjã tÿmjao apêx gu me arÿm kôt amijo baba kêt. Mrãmri kute me badjàkur djã pyrãk. Tebê dja me batikrekam apêx ne me banhĩ'ã apêx ne me bakràkà'ã mrã. Nãm ã kukràdjã kakrit, kukràdjã tÿmja apêxo ane.

<sup>23</sup> Me kute mebê mÿjja pymaja ne me 'êx ne kabên mex ne. Bep kati, nãm me tu ar mÿjjamã amijarêho ba, mÿjjao Metĩndjwÿnh ne ar kum amijarêho ban 'ã memã apnê nhym me kudjwa. Nãm we me 'êx ne we ar amijo pijãmo ban ar ta aminhĩ djwÿnho bikêho ba. Me ta kute we amibê axwe rênhmã prĩne amijo bikêho ba. Metĩndjwÿnh kute memã ja jarênh kêt. Me ta ne me arĩk ta kute amijaxwe bĩnmã apÿnh amijo ba djari amijo ba. Nãm me amititik ne kam amijo bikênh mexo ba. Kati, ãm kajgo mexi. Nãm me te aminhĩ djwÿnhja te o ane nhym ãm mã axwe. Djã nãm me amibê axwe kurê? Kati, nãm me te o anen mã axwe.

\* **3:4** Apÿnh me õ pyka djari kunĩkôt ne me kunĩ bẽngõkre. Kubekã jakamẽ me kakràtykmẽ me babẽngõkremẽ ne me kunĩ: bẽngõkre.

### 3

*Ar kute katàt amijo bamã arkum 'ã karõ.*

<sup>1</sup> Gora ar Kritumẽ ro'ã arÿm akubyn atĩnkam, ngõ kurũm ar ajapõx kute akubyn atĩn pyrãk, kam dja gar kãjkwakambit mÿjja jabej ajkam ama. Kam ne Kritu nhÿ, Metĩndjwÿnh djubõk'ãnh nhÿ. <sup>2</sup> Dja gar kãjkwakam mÿjjakõtbit ajamak bẽn. Kwãrĩk wãnh pykakam mÿjja mar kêt.

<sup>3</sup> Kute Kritumẽ ro'ã arÿm atyk pyrãk. Djãm me tykkam kute pyka jakam mÿjja mar got. Bir be, arÿm Kritumẽ ro'ã ar atyk ne ro'ã akubyn atĩnkam, dja gar jakam, pyka jakam, Kritumẽ atypydjin ari ar aba. Nhym kam Kritu kadjwÿnhbê, Metĩndjwÿnh ar ajo bipdjur mex ne, kute apytàr mex kadjy. Kam dja gar kãjkwakam mÿjjabit ma. <sup>4</sup> Be, Kritumẽ ne gar atypydjin ar aban kam tu atĩnkumrêx ne. Gêdja Kritu akubyn raxo amirĩt ne kam abẽngõkredjwÿ\* arÿm araxo amirĩt.

<sup>5</sup> Bir be, kam dja gar arĩk abawã tu krã'yrkumrêx gê on wãnh nõ. Kwãrĩk wãnh gar krõ'ã aprõ kêt, nhym me nijadjwÿ krõ'ã mjên kêt. Ar aprõ prãm, nhym me ni mjên prãmja kwãrĩk wãnh nõ. Gê me my prõ prãm ne kurê ar ba, nhym me ni ar mjên prãm ne kurê ba kwãrĩk wãnh nõ. Me kum mÿjja punubit prãmja kwãrĩk wãnh nõ. Ne me kum nêkrêxbit prãmja kwãrĩk wãnh nõ. Nãm me kum nêkrêxbit kĩnh ne kam kôtbit amak bẽn ne kam kum Metĩndjwÿnhja mar prãm kêtumrêx. Me kute mÿjjao Metĩndjwÿnh karõ nhipêx ne kute we kum ar amijarêho baja tãm ne Metĩndjwÿnh kum kĩnh kêtumrêx. Nhym me kum nêkrêxbit prãmjadjwÿ kum kĩnh kêtumrêx. Amẽ punu nhym kam kum kĩnh kêtõ aben pyrãk ne. Kam ne ba ar amã,

—Tãm gêdja on wãnh nõ, ane.

<sup>6</sup> Mÿjja ja kunĩkôt ne Metĩndjwÿnh mekam ngry:k ne. Godja me kute mÿjja jao ban kam kute Metĩndjwÿnhkôt amijo ba kêtumrêxja, me tãm gêdja Metĩndjwÿnh mekam ngryk ne ï memã o pãnh. <sup>7</sup> Nhym bep amrêbê ne gar gadjwÿ ã amijo aba punuo anen ajbit ma.

<sup>8</sup> Bep jakam dja gar on mỳjja ja kunĩ kanga. Kwārĩk wānh gar angryk kêt ne memã adjàkjêr kêt ne aje amipānhmã mar kêt ne me kāmex jarēnh kêt ne ajajkwakam akabēn punu 'õ jarēnh kêt. Me my kute me nire kukràdjà'ã me aprỳja dja kêt. Nhy m me niredjwỳ kute me my kukràdjà'ã me aprỳjadjwỳ dja kêt kumrēx.

<sup>9-10</sup> Kwārĩk wānh gar akukràdjà tũm jakôt abenmã ajêxnhĩ kêt. Arỳm ne gar akukràdjà tũmja mũm kunĩ mẽ. Ar aje akukràdjà tũmkôt aje abenmã ajêx aba ja ne gar arỳm nhĩ'ãm kunĩ mẽ. Pānh ne gar akukràdjà nykôt mỳjja mexbit ma. Metĩndjwỳnh kute ar ajo ny nhipêx djwỳnh ne ar ajo nyo tẽ, ar aje Metĩndjwỳnh mex pyrək kadjy ne ar ajo nyo tẽ, prĩne ar aje Metĩndjwỳnh markumrēxmã ne ar ajo nyo tẽ.

<sup>11</sup> Metĩndjwỳnh kute meo nykam ne me arỳm abenmã kre rax kêt ne tu arỳm abenã tỳm ne typydji. Arỳm Kritukôt me apỳnh ba djari kute abeno kurê djwỳnh kêtê ne kam arỳm tu abeno kamyn abeno õbikwa. Me bajtemmẽ mebê idjaermẽ, me tãm ne Metĩndjwỳnh arỳm meo aben pydji. Ne ajte me my nhinhu kà rēnhmẽ me mykà tãmẽ, me tãm ne Metĩndjwỳnh ajte meo aben pydji. Me kute arỳm me krõrmẽ me krõr kêt apỳnh õ pykakam ba djari bajamẽ, me tãm ne Metĩndjwỳnh arỳm meo aben pydji. Me kute me pa 'amỳnh nhy m me memã àpēnh kajgo ar bajamẽ me kute memã o pānh kadjy àpēnhjamẽ, me tãm ne arỳm Metĩndjwỳnh meo aben pydji. Nà, ne arỳm memã me kute abeno kurê djwỳnhja arỳm o ajngrà. Kritukôt ne me aben pydji ne kam kute Kritubit mar, arỳm ajbit kute amikajmātã mar. Djã nãm kum me'õ kĩnh kêt ne? Kati, nãm kum me kunĩ kĩnh ne me 'ãno dja. Nãm me 'ãno ãmo aben pyrək ne.

<sup>12</sup> Ga Metĩndjwỳnh kute amijo ar apytàr ne arỳm kute amim ar ajo bikjêr ne kam kute ar ajo mex ne kum ar ajabêkumrēxja pumũ. Kam gêdja gar tu amim akukràdjà ny man kôt amijo aba. Gora ar amã me kaprĩ ne adjukaprĩ ne ar meo aba. Kwārĩk wānh ar ajõ apydji arax prãme ari aba kêt. Dja gar memã aprĩ mex ne ar meo aba. Tu akabôt katin akrānmã ar meo aba. Be,

mỳjja mex ja dja gar ã maro anen kam tu kôt amijo aba.

<sup>13</sup> Gêdja me'õ ari kute anoknoro ba jabej kwārĩk wānh ga kum adjàkrê kêt ne mã kum akabēn mex jarē. Dja gar ã anen ar abeno aba. Dja gar abenkam amikrà rax jabej nàr kon amikrà ngri jabej tu o aknon abenkam angryk kêt. Gar Bēnjadjwỳr djwỳnh arỳm ar aje kam amikràja tu o biknorkumrēx ne ar akam ngryk kêtja pumũ. Dja gar ã anen ar aje abenkam amikràja tu o abiknorkumrēx ne abenkam angryk kêt.

<sup>14</sup> Gora ar mỳjja ja kunĩkôt amijo aban kam ajte iby amã aben jabê. Gora ikabēn ja ma. Ar amã aben jabēn ar abeno aba. Ar atypydji djà ne ja. Ar amã aben jabēn kam atypydjin kam amexkumrēx. <sup>15</sup> Djãm ar aje abeno ajtemmã ne Metĩndjwỳnh amiwỳr ar ajuw? Kati, gar atypydjin aben kam adjumar mex kadjy ne amiwỳr ar ajuw. Bir be, kam dja gar adjumar mexbit ma. Kritu ta umar mextire jao dja ar amã umar mextire jadjà ne o aben nêje me akukrà. Dja ta õ me umar mex djào prĩne ar ajaên kam o aben nêje ar ajakre. Ë, gora ar Metĩndjwỳnhmã amikĩnh jarē.

<sup>16</sup> Gora ar prĩne ajamakkrekam Kritu kabēn kunĩ nhôn kôt ar amijo aba. Ne akabēn mexo abenmã Metĩndjwỳnh kukràdjà jarēn o abenmã tĩn jadjà. Ne Metĩndjwỳnh'ã angrer aba. Mebê idjaer nhõ me ngrer tũm jarēn kam ajte Metĩndjwỳnh Karõ kute ar amã me ngrer ny jarēnhjadjwỳ jarē. Ne Metĩndjwỳnhmã ar amikĩnh jarē, angrerkôt kum akadjwỳnhbê akĩnh jarē.

<sup>17</sup> Dja gar Bēnjadjwỳr Jejukôt amijo aban Jeju Bãmbê Metĩndjwỳnhmã amikĩnh jarē. Djãm ar akātàm, djãm ar anhõ bēnjadjwỳr kêt dja gar adjàpēnh punun akabēn punu? Kati, ar abê Bēnjadjwỳr Jeju nhõ àpēnhkam dja gar adjàpēnh mexkumrēx ne akabēn mex ne. Ar abê Bēnjadjwỳr Jeju nhõ àpēnhkam dja gar anhõ bēnjadjwỳrkôt amiman kôt akabēn mexkumrēx ne kôt adjàpēnh mexkumrēx ne mỳjja kunĩkôt Jeju Bãmbê Metĩndjwỳnhmã amikĩnh jarē. Kritukôt kum amikĩnh jarē.

<sup>18</sup> Ë, ar apa, ar anire, arỳm ar amjēnja dja gar amjēn kabēn man kôt amijo aba. Bēnjadjwỳr djwỳnh kute ar amã ã anhỳrkam

dja gar ã amjên kabên mar ne kôt amijo abao ane nhym kam mexkumrêx ne.

<sup>19</sup> Ë, ar apa, ar amy, ar amã aprõ jabên kum akabên djà jarênh kêt ne kum akabên mexbit jarê.

<sup>20</sup> Ar apa, ar aprĩre, gora ar ar anãmẽ ar abãm ar kabên man ar kabênkôt amijo aba. Ar kute ar amã kabên jarênhjakôt amijo aba ne o abiknor kêt. Nhym kam Bënjadwýr djwýnh ar akam kĩnhkumrêx ne.

<sup>21</sup> Ë, ar apa, ar ajabatànha, kwãrĩk wãnh gar akra arkum akabên kêt ne arkum ngryk jadjàr kêt. Arkum akabên mexbit jarê. Dja gar arkum adjàkrê nhym ar arým kaprĩ ne katàt mrãnhja kanga.

<sup>22</sup> Ë, ar apa, memã ar adjàpênh kajgo ar abawã, me kute ar ajo pãnh ne amim ar apa 'amýnh gar memã adjàpênh kajgo ar abawã gora ar pyka jakam ar apa 'amýnh djwýnhja kabên ma. Kute mýjja ar amã arênh kunĩkôt dja gar kabên man kôt amijo aba. Djãm me kute ar apumũnho ku'ékambit got gar memã adjàpênh mex ne, nhym we me ar akam kĩnhmã? Kati, me kàxãdjwý dja gar tu adjàpênh katàt ne. Ar amã Bënjadwýr Jeju kĩnh ne amã umakam dja gar tu kum adjàpênh katàt ne.

<sup>23</sup> Gora tu ar adjàpênhkumrêx. Kwãrĩk wãnh gar adjàpênh punu kêt. Dja gar tu adjàpênh kunĩ amã kĩnh ne kupênho tẽ. Ne tu adjàpênh mexkumrêx ne katàt adjàpênh tẽ. Djãm pykabê mebêngôkre 'õbitmã ne gar apê? Kati, kàjkwa kam ar anhõ Bënjadwýrmã ne gar apê. Kam ne ba ar amã katàt ar adjàpênh'ã karõ, ar aje katàt adjàpênhwão atëmmã ne ba ar amã adjàpênh'ã karõ.

<sup>24</sup> Gora ar ama. Bënjadwýr djwýnh ta dja ar amã o pãnh. Kute õ me jamã mýjja mex-tire djirja dja ar amã kungã gar amim aby. Bir be, Bënjadwýr Kritumã ar adjàpênhja man kam kôt kute ar apa 'amýnh djwýnhmã adjàpênh ar aba.

<sup>25</sup> Bep apýnh me axwe djàri gêdja Metĩndjwýnh memã axwe pãnh jarênho tẽ. Amrêbê tĩnri axweri gêdja Metĩndjwýnh kôt kum o pãnh ne, tĩnri axwekam dja memã o pãnh aben pyrãk ne. Djã nãm we,

—Ije bep tãmja ne õbikwa krãptĩ ne kam bënjadwýr rax. Kwãrĩk wãnh kum pãnh

jarênh kêt. Ba 'uwtĩjamã pãnh jarê, anhýr got? Kati, nãm tu memã pãnh jarênho aben pyrãk ne. Ne me axwekam katàt memã o pãnh.

## 4

*Me bënjadwýr kute õ àpênho ba katàtmã.*

<sup>1</sup> Ë, ar apa, ar aje meo pãnh ne amim me pa 'amýnh nhym me ar amã àpênh kajgo ar bawã, ar amã ne ba ikabên. Gora ar anhõ àpênhmã akabên mex jarên meo aba katàt. Ë, ar gadjwý ne gar kàjkwakam anhõ Bënjadwýr. Gora ar ama. Tãm ne ja.

<sup>2</sup> Ë, ar apa, gora ar akupãnhã Metĩndjwýnhmã akabên 'ãno dja. Gora ar Metĩndjwýnhmã amijarênhkam amã adjukanga kêt ne aje kum amijarênh ar o abakôt aje mýjja'ã 'wýrja tãm dja gar kam ama. Ne kum ar akabênkôt kum amikĩnhdjwý jarênh 'ãno dja.

<sup>3</sup> Kum ar akabênkôt ar badjwý kum ar ijo a'wý gê Metĩndjwýnh mýjja kute ar ibê àptàrjao ajngrà bar tu memã Metĩndjwýnh kabên jarê, memã Kritu jarê. Nãm mekbê apdju bar kam ije memã o amirĩtmã. Kam ne ba mekbê ijê djakam idjãmja. Nã bãm ije memã Kritu jarênho itëm katikôt nhym me mekbê ijê djakam imê. <sup>4</sup> Bir be, kam gêdja gar kum ijo a'wý, ije memã arênh ne ije katàt memã o amirĩtmã. Ije Jeju mekbê bipdjurja memã arênh ne ije memã mã o amirĩt nhym me kute katàt marmã. Nã, kadjy ne Metĩndjwýnh amim idja, ije prĩne memã o amirĩtmã. Tãm ne ja.

<sup>5</sup> Be, me kàtãm kadjy, me kute Jeju mar kêtja, kadjy dja gar akrànãm amijo aba mextire ne memã akabên mexbit jarê. Gêdja aje Jeju'ã adjujarênh djà awýr bõx ga kam mekmã Jeju jarê.

<sup>6</sup> Gora akrànãm memã adjujarênho akrĩ gê me ar amã,

—E kum goja ajte adjujarênho nhý. Ga nã gãm akabên mar prãmre, ane. Gêdja me kute mýjja 'õ mar prãm jabej akukij ga kam memã katàt 'ã adjujarênho nhý. Be, tãm ne ja.

*Apýnh õbikwamã kute kabên janor.*

<sup>7</sup> Ota me bakamy Xikiku dja ar amã prĩne ijarê. Gwaj bamã Xikiku jabêkumrêx tãm

dja ar amã ijarẽ. Nã, nãm ikõt àpênh mexkumrẽx ne àpênh kanga kêtumrẽx. Bẽnjadwÿr nhõ àpênhkumrẽx ne ja. Nãm ar ikõt kum àpênh ar ba. Ta dja pñine ar amã ijarẽ. <sup>8</sup> Kadjy dja ba ar awÿr ano, kute ar amã ar ijarẽnh gar aje ar imar nhym kute ar amã kñnh jadjàr gar ajte atÿx ne akñnhmã. Kadjy dja ba ar awÿr ano. <sup>9</sup> Gwaj bakamy Ônemudwÿ dja ba ano, wãm ar ro'ã ar ano. Gwaj bamã Ônemu jabêkumrẽx, tãm dja ba ano. Nãm amim Kritu markumrẽx ne kanga kêt. Ar ajõ 'õ. Be, ar ta dja ar ar amã jakam mÿjja kunĩ jarẽ.

<sup>10</sup> Gwaj bakamy Arxakumẽ ar iro'ã mekbê ijê djakam dja. Ne ar ajo aman wãm ar amã amijarẽ. Nhym Makudwÿy kubê Banabe tàmdwÿyja adjwÿnyhdwÿy ar ajo aman wãm ar amã amijarẽ. Ë, arÿm ne ba ar amã 'ã karõ. Dja ar awÿr tẽn bõx gar amiwÿr o wadjàn kum akabên mex jarẽ. <sup>11</sup> Jejuw, mete kum Juxu jarẽnhja adjwÿnyhdwÿy ar ajo aman wãm ar amã amijarẽ. Be, Arxakumẽ Makumẽ Jejuw ar ajbit ne Ar kubê idjaer ne kute amim Jeju mar ne ar ikõt àpênh ar ba. Ar kute mekmã Jeju jarẽnh nhym me kute amikajmãtã Jeju mar nhym Metĩndwÿnyh kute ar meo bamã ne ar ikõt àpênh ba. Nãm ar ikõt àpênh mexkumrẽxo ikñnh ne.

<sup>12</sup> Epapraj, ar ajõ 'õ ne kubê Kritu Jeju nhõ àpênh ne ar ajo aman wãm ar amã amijarẽ. Nãm Metĩndwÿnyhmã ar ajo à'wÿr 'ãno dja. Tyk djà kêt ne ar ajo à'wÿro ban kum,

—Ga dja ga aro tÿx gẽ ar ajã ngrà tÿx ne akanga kêt ne amar mex nhinomã kurẽ. Ga dja ga arkum 'ã karõ gẽ ar kõt mrã, aje amim ar'ã karõkõt mrã. Nãm ã kum ar ajo à'wÿro ane. <sup>13</sup> Be, ba ne ba inoo Epapraj pumün kõt ar amã 'ã pi'òk no'òk ne. Mrãmri ne ar ajã àpnhix ne. Krĩraxe Raodjikam ar jamẽ krĩraxe Ijeporikam ar jamẽ me akunĩ'ã ne àpnhix ne. Ba ne ba arÿm omün ar amã 'ã pi'òk no'òk ne.

<sup>14</sup> Rukabê me kane djwÿnyh gwaj bamã kñnhkumrẽxjamẽ Temanhmẽ ar ar ajo aman wãm ar amã amijarẽ.

<sup>15</sup> Nã bãm Raodjikam gwaj baje abeno bakamyo ama ne. Gora arkum ijarẽ. Nĩpa

nhürkwākam ar kute Jejukõt aben pydjwãmẽ Nĩpa bẽngòkremẽ ne ba o ama ne. Ar wãmãdjwÿy ijarẽ.

<sup>16</sup> Ë, ije ar amã pi'òk no'òk nhõrwã gar omũ:n omũnh pan kam amũ krĩraxe Raodjikam ar kute Jejukõt aben pydjwãmã angã gẽ kam ar amipãnh ar amã wã ngã. Dja ba ije wãm ar amã pi'òk no'òk nhõrwã gar ga wã pumün amũ ar wãmã angã gẽ Raodjikam ar wã amrẽ amipãnh ar amã wã ngã. Gar aprakamã omũ.

<sup>17</sup> Ë, Akipumã kum,

—Gora Bẽnjadwÿr kute amã adjapênh jarẽnhja on o tẽn inomã amẽ, ane.

<sup>18</sup> Ba ibê Paur ne ba wãm ar amã ikabên ne. Nhym bep ngrire ja ne ba ba inhikrao ipêx ne. Nã bãm ar ajo aman kam wãm ar amã amijarẽ. Gora mekbê ijê djakam idjãmja man o abiknor kêt. Gẽ Metĩndwÿnyh ukaprĩkõt ar ajo djuw mex. Tãm ne ja.

## **Paur Kute Texarônikakam me jamã pi'ôk kumrêx no'ôk ne ja.**

Paurmê ikjêbê Xira krî nhidjibê Pir-pukam bôx ne mekmã Jeju jarê. Nhyim me kwý kum Jeju'ã ujarênh mar prãm kêt ne prîne aro ajkên kam Ar kubê ijê. Nhyim akati nhyim me ajte bôm ar kumê nhyim ar mã me kurûm tẽ. Mã me kurûm tẽn kam krîbê Texarônikakam bôx ne ajte mekmã Jeju jarê. Nhyim me kwý rax ne tu Jejuo aminhõ. Nhyim kam mekbê idjaer ajte mekmã ar kurêtuw. Nhyim kam Paur krîbê Texarônika kurûm tẽ. Tẽn atemã krî 'ôkam bôx. Nhyim Texarônikakam ar kute Jejuo aminhõja arek abeno bikprônho dja. Nhyim Paur ar kurûm tẽn aro aman te akubyn ar'ÿr tẽn prãme ne kam Ximoxi ar'ÿr ano. Texarônikakam ar kute Jejuo aminhõja kute arek Jeju kabênkôt ar amijo ba rã'ã jabej kute ar omûnhmã ar'ÿr ano.

Nhyim Ximoxi ar'ÿr tẽn bôx ne ar omûn kam akubyn Paur'ÿr tẽn. Akubyn tẽn bôx ne Paurmã ar arê,

—Ăm arkum Jeju kînhkumrêx. Onîj ar arek Jeju kabênkôt ar amijo ba, ane. Nhyim kam Paur kuman kam kînhkumrêx ne arkum pi'ôk no'ôk. Mÿj'ã ne Paur pi'ôk no'ôk? Bir, Paur kurê djwýnh ne Paur'ã kabên ne. Nãm me,

—Paur ne me amã 'êx. Nãm me amã akubyn tẽmmã amijarê. Nãm 'êx. Nãm arîk ar ba. Me bôx kêtja pumû, ane. Nãm ã Paur kurê djwýnh 'ã kabên ane. Nhyim Texarônikakam ar ja arÿm me tyk jabej Paur kukij. Ne kam ajte Jeju akubyn bôx jabej kukij nhyim Paur ja kunî'ã pi'ôk no'ôk ne. Tãm ne ja.

<sup>1</sup> Ba ibê Paur ne ba ar amã pi'ôk no'ôk ne. Xiramê Ximoximê ne bar ar amã pi'ôk no'ôk ne. Krîraxbê Texarônikakam ar aje amim Jeju mar ne kôt aben pydjiwãmã ne bar pi'ôk no'ôk ne. Metîndjwýnhbê ar Babãm ne kam krabê Bênjadjwÿr Jeju Kritu arkôt ne gar aben pydji, ar amã ne bar pi'ôk no'ôk ne.

Gê Metîndjwýnh ar ajo djuw mex, Metîndjwýnhbê gwaj Babãmmê Bênjadjwÿr

Jeju Kritu ar ukaprîkôt ar ajo djuw mex ne ar ar ajo ba ne ar amã umar mex jarê gar adjumar mex ne ar aba.

*Paur kute Metîndjwýnhmã arkam amikînh jarênh.*

<sup>2</sup> Nã bãm ar Metîndjwýnhmã ar akam ikînhkumrêx jarê ne kum ar ajarênh 'ãno dja. <sup>3</sup> Mÿkam ne bar ar akam ikînh? Bir, ar aje tu amim Jeju markumrêx ne arÿm kôt aje amijo abakam ne bar ikînhkumrêx. Ne ajte ar amã Metîndjwýnh jabêkôt arÿm kum adjapênh raxkamdjwÿ ne bar ikînhkumrêx. Ne ajte ar aje arÿm Jeju Kritu jabej mã adjumarkamdjwÿ ne bar ikînhkumrêx. Gwaj banhõ Bênjadjwÿr Jeju Kritu akubyn bôxmã ar aje mã abej ajkam amakkamdjwÿ ne bar ikînhkumrêx. Kam ne bar ar akam ikînhkumrêx ne gwaj Babãmmã ar ajarê, gwaj banhõ Metîndjwýnhbê gwaj Babãmmã ar ajarê.

<sup>4</sup> Akmere ar, àpnhîre ar, mrãmri ne arÿm Metîndjwýnh kum ar ajabêkôt arÿm amijo ar apytã. Kute ar ajo kra kadjy amijo ar apytã bar arÿm kuma.

<sup>5</sup> Djãm Jeju'ã ar amã idjujarênh nyja kabên kajgo got? Kati. Mrãmri ne ba ar amã Jeju'ã idjujarênhkumrêx ne. Ăm Metîndjwýnh puma kôt ne bar mã ar amã Jeju kabên jarê. Djãm ar ba ne bar ar amã ikabên jarê? Kati, ãm Metîndjwýnh Karõ kabênkôt ne bar ar amã ikabên jarê. Ăm Metîndjwýnh kabênja ne kajgo kêt. Ăm 'êxnhî kêt. Tãm ne bar mã kuman ar amã arê.

Nã bãm ar ar akam imexkumrêx ne akrãnmã ar ar ajo iba. Gar arÿm prîne ar ipumûn tu amim ar ikabên markumrêx. <sup>6</sup> Ar ikabên man ar ijã amijakren Bênjadjwÿr Jeju'ãdjwÿ arÿm amijakre. Ar ijã amijakren mã ar ikôt amijo aba. Nhyim kam me ar ajo ajkê. Ar aje Jeju markam ne me ar ajo ajkê. Nãm me te ar ajo ajkê gar mã ajamako ar ikabên mar tÿx mex ne. Ne tu ate akrãn tu akînhkumrêx ne. Nã gãm ar Metîndjwýnh Karõ kabênkôt tu akînhkumrêx ne mã ar ikabên ma.

<sup>7</sup> Nhyim arÿm Akajakam ar kute amim Jeju marjamê Matenikam ar kute amim Jeju marja me kunî arÿm ar apumû, ar aje Jejukôt ar amijo aba pumûn arÿm ar

ajã amijakren kute ar apyràk ne ar ba.  
<sup>8</sup> Ë, ar ga ne gar memã Jeju'ã ajarë nhym Akajakam ar jamë Matenikam ar jamë ne me arým kunĩ Bënjadjwÿr Jeju'ã adjujarënh ma. Djãm me ajbit ne me kuma? Kati, nã gãm ar me kunĩmã arë nhym me arým kuman kam arým amũ abenmã arë. Nhym me arým prĩne kuma. Nã gãm ar aje amim Metĩndjwÿnh marja memã amijarë nhym me arým prĩne kuma ne kam amũ aben djô'ã abenmã ar ajarë. Nhym kam pyka kunĩkôt me arým ar ajarënhbit ma. Kam ne bar ije arým memã ar ajarënh kêt.

<sup>9</sup> Me ja ta ne me ar imã ar ajarë. Me ja ta ne me ar imã,

—Be, onĩj Texarônikakam ar ja ne arkum ar akĩnhkumrêx. Be, ga ar abôxkam ar kute ar amã kabën mexbit jarënhja ma, ane. Ne ajte ar imã,

—Be, Texarônikakam ar ja ne ar arým mÿjjao we Metĩndjwÿnh karô nhipêxja kangar arým Metĩndjwÿnhkumrêx, Metĩndjwÿnh tĩnjao aminhõ. Ar kute amikadjy kum àpênhmã ne ar o aminhõ, <sup>10</sup> ne arým krakam amako dja. Metĩndjwÿnh kra ne ar arým amiwÿr kam amako dja, ane.

Nãm me ã ar ajarënhõ ane. Mrãmri ne gar Metĩndjwÿnh krabê Jejukam ama. Tãm ne tykkam Bãm ajte akubyn o tĩn ne. Tãm dja ajte kãjkwa kurũm bõx. Tãm ne gar kam ama. Tãm ne kubê gwaj bapytãr djwÿnh ne Metĩndjwÿnh ngrykbê gwaj bapytã. Godja Metĩndjwÿnh me axwekam ngryk ne. Bãm ngrykbê godja Jeju arým gwaj bapytã. Tãm ne bõxmã gwaj kam ama.

## 2

*Paur arkam àpênh mex.*

*A Kô 1.12*

<sup>1</sup> Akmere ar, àpnhĩre ar, wãnh ar ar akam idjãm ne kajgo kêtumrêx. Gar arým ama.

<sup>2</sup> Ar awÿr ar imõr kêttri ne me Pirpukam prĩne ar ijo ajkën ar imã kabën punu jarë. Gar arým ama. Nãm me ja te ar ijo ajkê bar ar amã Metĩndjwÿnh'ã idjujarënh ny jarënh rã'ã ne. Metĩndjwÿnh ne ar imã tÿx jadjã bar itĩn prãm kêt ne tu ar amã arë. Nãm me

te Metĩndjwÿnh'ã ar amã ar idjujarënhkôt kum ar ikurê bar mã ar amã arë.

<sup>3</sup> Nã bãm ar ar amã,

—On ar tu amim Jeju markumrêx, ane.

Djãm kupa'ã ne bar ar amã arë?

Nàr djãm mÿjja 'õ prãme ne bar ar amã arë?

Nàr djã nã bãm ar ar amã ijêx? <sup>4</sup> Arkati, Metĩndjwÿnh ta ne ar ijano bar tẽ. Nãm ar imã,

—Gora ar memã Jeju kukràdjã ny'ã ajarë, ane. Nãm ã Metĩndjwÿnh ar imã ane bar kabënkôt me akunĩmã 'ã idjujarënh mõ.

Djãm me abêngôkre\* amã ikĩnh kadjy ne ba me amã Metĩndjwÿnh'ã idjujarënh mõ? Kati, Metĩndjwÿnh ta ar ikam kĩnh kadjy ne bar me amã 'ã idjujarënh mõ ne kum ar idjãpênh iba. Tãm ne kute prĩne ar ikabi. Kum ar idjãpênhkôt ne arým ar ipumũ.

<sup>5</sup> Djã nã bãm ar ar amã ijêx ne ar atãri ar amã,

—Bep ar amexkumrêx, anen kam ar akãxã ar ajã ikabën ne? Arkati. Arým ne gar imex pumũ.

Nàr djã nã bãm ar arĩk ar amã ijêx ne pi'òk kaprĩre prãme ar amã ikabën jarë? Kati, Metĩndjwÿnh ta ne prĩne ar ikadjwÿnhbê ar ipumũ.

<sup>6</sup> Nàr djãm wãkam ar aje ar imã ar imex jarënhmã ne bar tẽ? Kati, Kritu kute ar ijanorkôt ne bar tẽ.

Nàr djãm atemã me ja'õ kute ar imã ar imex jarënhmã ne bar tẽ? Kati, Metĩndjwÿnh ta ne kute prĩne ar ipumũnh.

<sup>7</sup> Kritu kute ar ijanor pumũnh nhirãm ne bar ren ar amã,

—Amrê ar ar imã mÿjja ngã,

—Gop ar ar imã apê, ane ne ren arým ikabëno ar akaty.

Nhym bep kati, ã ar ije anhÿr kêtê. Nã bãm ar akrãnmã ar ajo iba. Mrãmri ne me nire kute amim kra karàkam o djuw mex pyràk. Nã bãm ã ar ar ajo ibao ane.

<sup>8</sup> Ar imã ar akĩnh raxi. Kam ne bar prĩne arým ar amã Metĩndjwÿnh kukràdjã ny'ã ajarë ne ar itĩn prãm kêtumrêx ne. Djẽ ne ren me'õ kute ar ibĩn prãm bar kam ren tu ate ikrãn mã ar amã Metĩndjwÿnh'ã ajarë

\* **2:4** Apÿnh me õ pyka djãri kunĩkôt ne me kunĩ bêngôkre. Kubêkã jakamë me kakràtykmë me babêngôkremë ne me kunĩ: bêngôkre.

nhym kam me ren ar ibî. Nã bãm ã imã ar akînh rax ane.

<sup>9</sup> Akmere ar, àpnhîre ar, ar akam ar idjãm kam ar idjâpênh raxja gar omû. Arn-gro'ãmê akamâtkammê ar idjâpênhja pumû. Bir mÿkam? Ar ije pi'ôk kaprîre'ã ar ajwÿr kêt kadjy. Ar ije kâj bê ar amã Metîndjwÿnh kukràdjâ ny'ã idjujarênhho iku'êkam ije pi'ôk kaprîre'ã ar ajwÿr kêt kadjy.

<sup>10</sup> Nã bãm ar akrân mã: ar ar ajo iba. Nã bãm ar ar ajo iba mexkumrêx ne ar ar ajo iba. Ar aje Jeju marja, ar ga ne bar akrân mã ar ar ajo iban ijaxwe kêt kumrêx ne. Ar imrân mexkumrêx. Nã bãm ar katât amijo iba. Gar arÿm ar ipumû. Metîndjwÿnhdjwÿ ne arÿm prîne ar ipumû.

<sup>11-12</sup> Nã bãm ar ar akunî: o ikrakumrêx ne ar ar ajo iba, ne ar akunî mã ikabên jarên ar amã,

—Kwârîk wãnh Metîndjwÿnh kanga kêt. Gora ar 'ã angrã tÿx, ane.

Ne kam ajte me kaprî mã kum,

—Kwârîk wãnh akaprî kêt. Metîndjwÿnh dja ajo kînh, ane.

Ne kam ajte ar amã,

—Gora ar mã Metîndjwÿnh kabênkôt ar amijo aba rã'ã ne, ane.

Ar aje ã anhÿr kam godja Metîndjwÿnh ar akam kînhkumrêx. Metîndjwÿnh ne ar kute gwaj bajo ba djwÿnh. Tãm ne amiwÿr gwaj bajuw. Tãm ne kute ar gwaj bapytâr ne ar kute gwaj bajo bamã amiwÿr gwaj bajuw. Gwaj bamextire ne ò pyka mexti:re, ò pyka ra:xkam ar babamã ne amiwÿr gwaj bajuw. Kadjy dja gar katât amijo aba, Metîndjwÿnh ar akam kînh kadjy.

### *Akubyn kute arkam amikînh jarênh.*

<sup>13</sup> Arÿm ne bar ar amã Metîndjwÿnh kabên jarê gar arÿm ama. Kam ne bar mã ar akam ikînhkumrêx ne Metîndjwÿnh mã amikînh jarê. Djã nã gãm ar mar kajgo got? Kati, nã gãm ar tu markumrêx. Nã gãm ar anhôkre kadjwÿnhbê,

—Djãm mebêngôkre kabên got? Kati, Metîndjwÿnh kabên ne ja, ane. Kôt ne gar arê. Metîndjwÿnh kabênkumrêx ne ja. Metîndjwÿnh ne arÿm ta kabêno katât ar akrã dja, kam ne gar arÿm amrân mexkumrêx mō.

<sup>14</sup> Ê, akmere ar, àpnhîre ar, djãm wãnh Texarônikakam, ar anhô krôkambit ne me ar ar ajo bikênhho ba? Kati, mekbê idjaerkamdjwÿ ne me ò krôkam me ar ar o bikênhho ba, pykabê Djudêjakam. Mekbê idjaer kwÿ ne ar arÿm Kritu Jejukôt aben pydji. Nhym me kute Jeju mar kêt ar aro bikênhho ba. Gar ar anhô krôkam me kute ar ajo bikênhja pumû. Aprakamã ar aje amim Metîndjwÿnh marja ne me arîk ar me ajo bikênhho ba.

<sup>15</sup> Amrêbê ne mekbê idjaer ta ar Metîndjwÿnh kabên jarênh djwÿnh paro ban kam arÿm Bênjadjwÿr Jeju bîn kam arÿm ar badjwÿ ar ijo kurê djwÿnh ne. Arÿm o Metîndjwÿnh mã ngryk jadjàn me kunîkam amikrà ar o ba.

<sup>16</sup> Mã ne mekbê idjaer mekam amikrà on? Bir, nã bãm ar ije me bajtem, me jamã Metîndjwÿnh kabên jarênhho itêm nhym kute me utârmã nhym mekbê idjaer mã: ar ikukrà ar o ba. Godja me ã anen arek Metîndjwÿnh mã ngryk jadjaro tē:n kam arÿm Metîndjwÿnh mã ngryk jadjâr mex ne. Nhym kam arÿm Metîndjwÿnh prîne me axwe pãnh meo ajkê.

### *Kute aro amak'ã kute arkum amijarênh.*

<sup>17</sup> Akmere ar, àpnhîre ar, nã bãm ar ar akurûm itêm ngrîre ne ar ajo ama: ne. Ne kam ar ije me 'uwitî tÿm pyrâk. Nã bãm ar ar ajo aman iba. Ne te ije inhÿtã ar apumûnh prãme. <sup>18</sup> Ne te akubyn ar awÿr imôr prãme. Ibê Paur ne ba te akubyn ar awÿr itêm mã ikràn ikràn ikrà nhym Xatanaj mã: ar ikukrà.

<sup>19-20</sup> Ê, Bênjadjwÿr Jeju akubyn bôxkam, kuka kônh gwaj badjãm kam, nhym dja bar mex jarê? Ar ga. Ar ga dja bar ar amex jarê ne kum,

—Be, ar ja ne ar mexkumrêx ne ar ba. Arÿm amar tÿx ne, ane. Be, ar ga dja bar ar ajo idjãmra mō. Ar ije kum ar ajarênh mã ne bar kam ama ne. Mÿjbê ne ar ikînh djâ? Ar ga. Texarônikakam ar ga ne gar abê ar ikînh djâ. Nhym Metîndjwÿnhdjwÿ dja ar imã ar amex jarê bar kam ikînhkumrêx ne.

## 3

<sup>1-2</sup> Nã bãm axwe ar akam idjumar ne kam inhôkre kadjwÿnhbê amim,



—Birâm ijamak dja ibî, ane. Kam ne ba ar awÿr Ximoxi janon kam ate: krîbê Atênakam dja. Gwaj bakamy Ximoxi ar ikôt Metîndjwÿnhmâ àpênh ba. Tãm ne bar ar awÿr ano. Kute memâ Kritu'ã ujarênh ny jarênho baja tãm ne bar ar awÿr ano. Kute ar amã tÿx jadjâr ne kute ar amã kabên jarênhmâ ne kute ar amã,

—Arÿm ne gar tu Jeju markumrêx ne. Gora ar 'ã angrà tÿx, anhÿrmâ ne bar ar awÿr ano nhym tẽ. <sup>3</sup> Birâm me kute ar ajo bikênh gar arÿm aje Jeju kanga karô ne bar ar awÿr Ximoxi jano nhym tẽ, kute ar amã tÿx jadjârmâ ar awÿr ano nhym tẽ.

Be, mrâmri godja me arîk ar ba gwaj bajo ajkê. Arÿm ne Metîndjwÿnh gwaj bajã amim karô. Me arîk ar ba kute me baje Jeju maro bikênhmâ ne amim me bajã karô, me kute me bajo bikênh gu me Jeju'ã bangrà rã'ã jabej amim me bajã karô. Gar arÿm ama.

<sup>4</sup> Ar akam ar idjâmkam ne bar arÿm ar amã arê. Anhÿr djwÿnhrà m ne bar ar amã arên ar amã,

—Gora ar ar ikabên ma. Godja me ar ar ajo bikênh ba, ane. Be, kôtô. Nã bãm tu kôn timer kumrêx gar arÿm ama.

<sup>5</sup> Kam ne ba ar awÿr Ximoxi jano. Ije ar amar prãm kute ibîn kajgo ne ba ar awÿr ano, ije marmã. Ar aje Jeju kanga kêt jabej ne ba ar awÿr ano. Ar 'ã angrà rã'ã jabej ne ba ar awÿr ano. Nã bãm inhökre kadjwÿnhbê amim,

—Birâm arÿm godja Xatanaj arkum ar kute Jeju kangamã arkum 'ã apnê nhym arÿm ar kanga. Nhym arÿm ar idjâpênh, ar ije arkum arênhja arÿm kajgo, ane. Nã bãm ã amim ikabên jarênho ane.

### *Ximoxi kute ar mex jarênh.*

<sup>6</sup> Nhym bep kati. Nã bãm ar ar awÿr Ximoxi jano nhym ar awÿr tèn ar akurÿm tèn bôx ne arÿm ar imã ar ajarênh mextire ne. Bar kam ikînhkumrêx ne. Nã gãm ar tu aje Jeju markumrêx ne 'ã angrà tÿx nhym omÿn bôx ne ar imã arê bar ikînhkumrêx. Nhym ajte ar amã me abê jarê. Nãm ar imã,

—Onîj ar ar ajo ama ne. Ar kute ar apumÿnh prãmã. Ar kute ar apumÿnh prãm gar gadjwÿ aje ar omÿnh prãm kute aben pyrâk, ane. Be, nãm Ximoxi ã ar ajã ar imã anen ã ar ajarênho ane.

<sup>7</sup> Be, akmere ar, àpnhîre ar, ar aje Jeju mar tÿx ne mã 'ã angrà rã'ãja ne omÿn akubyn bôx ne ar imã arê. O ar imã ar ikînh jadjâ. Nãm me ja ar ijo ajkê. Ar ijo ajkê bar idjumar punure ne kam irerekre. Nhym bep ar ga ne gar ar imã kînh jadjâ. <sup>8</sup> Jakam ne bar arÿm ajte itÿxkumrêx ne. Ar aje Bênjadjwÿr mar ne 'ã angrà tÿx rã'ãkôt ne bar arÿm ajte 'itÿx ne.

<sup>9</sup> Jakam dja bar Metîndjwÿnhmâ ar akam ikînh jarê. Mÿjkôt ne bar ikînh? Bir, ar akam. Ar aje mar ne 'ã angrà tÿxkam ne bar ikînhkumrêx ne kam gwaj Batîndjwÿnhmâ amikînh jarê. <sup>10</sup> Akamât kunîkôt arngro kunîkôt ne bar amikadji Metîndjwÿnh ma:ro iku'ê. Ar awÿr ar itêm, gwaj baje aben nhÿtã aben pumÿnh bar ije ôbê ar amã Metîndjwÿnh kabên jarênho ino rer kêtja jarênh gar aje prîne amim marmã. Kam ne bar amikadji Metîndjwÿnh ma:rbito kuma.

<sup>11</sup> Gora gê gwaj Babãmbê Metîndjwÿnhmê gwaj banhô Bênjadjwÿrbê Jeju, gora gê ar ar ijano bar kam wãm ar awÿr tẽ.

<sup>12</sup> Mrâmri ne gar arÿm amã aben jabên ar aba. Gê Bênjadjwÿr abenã ar amã karô gar amã aben jabê rax. Amã aben jabê rax ne ar abeno aba. Ne ar amã me kunî jabê, ar amã me kunî jabê rax ne ar aba, ar amã me abê raxo kute ar imã ar ajabê ja pyrâk. <sup>13</sup> Kam dja Metîndjwÿnh arÿm ar ajo tÿx ne, gar arÿm 'ã angrà tÿx ne. Nhym kam Jeju akubyn bôxkam gar ajaxwe kêt kam amextire ne ar aba. Gwaj banhô Bênjadjwÿr Jeju dja ô me ja kunîo bôx. Ô me ja kunîo bôx gu me bajaxwe kêt kam me Babãmbê Metîndjwÿnh kabem bakumex. Gu me baje Jeju mar bakunî ajmã bakute kêt ne Metîndjwÿnh mexo bamexkumrêx ne dja, me Babãm kuka kôn timer dja.

## 4

*Me kute katàt amijo bao Metîndjwÿnh kînhmã.*

*Rô 12.9, 13.13; Kor 3.5*

<sup>1</sup> Be, akmere ar, àpnhîre ar, bar prîne arÿm ar amã arê gar arÿm ama. Ar aje Metîndjwÿnh kabênkôt ar amijo aba nhym ar akam kînh kadji ne gar arÿm ama. Mrâmri ne gar arÿm ã anhÿr ar aba. Ba kam

ar ije ajte ar amã arênhmã. Bênjadjwÿr Jeju djô'ã ajte ije ar amã arênhmã.

—Arek ar Metîndjwÿnh kabênkôt ar amijo aba rã'ã ne. <sup>2</sup> Amrêbê ne bar ar amã ikabên jarê ga arÿm ar ama. Bênjadjwÿr Jeju kabênkôt ar amã ikabên jarê gar arÿm prîne ama.

<sup>3</sup> Metîndjwÿnh ne arÿm ar ajã amim karô. Ar Metîndjwÿnh mexo amextire ne ar aba ne ajaxwe kêt ne ar abamã ne ar ajã amim karô. Kam dja gar aprô prãm kêt ne abenbê prôo adjäkînh kêt ne amextire ne ar aba. Nym me nidjwÿ mjên prãm kêt gar arek ar aba.

<sup>4-5</sup> Kam dja gar aprô djwÿnh'ÿrbit tu abakumrêx ne ar o aba ne amexkumrêx. Nym bep me kâtãm, me kute Metîndjwÿnh mar kêt me tãm ne me prô prãm kam, kurêkam tu arîk prô'ÿr ba. Nym bep kati, kwârîk wãnh mekmã nõ. Nym bep ar ga dja gar aprô djwÿnh'ÿrbit aban 'ã apÿnh ne. Kwârîk wãnh gar krô'ã meo aprô kêt. Kwârîk wãnh gar krô'ã meo amjên kêt. Ne kam arîk ar aba kêt. <sup>6</sup> Kwârîk wãnh akamykam amikrà ar o aba kêt ne kubê prôo adjäkînh kêt. Mÿkam? Bir, Bênjadjwÿr Jeju godja mÿjja ja kunõ pãnh ne. Ê, kute o pãnh kêtri ne bar anhÿr djwÿnh'rãm arÿm prîne ar amã arê gar ama.

<sup>7</sup> Be, djãm gwaj arîk ar baba kadjy ne Metîndjwÿnh amiwÿr gwaj bajuw? Kati. Arkati, gwaj bamextire ne katât bamrãnh kadjy. Katât me bamrãnh ne baje abenbê prôo badjäkînh kêt kadjy ne Metîndjwÿnh amiwÿr gwaj bajuw.

<sup>8</sup> Dja me'õ kabên ja mar prãm kêt djãm mebêngôkre kabên dja me'õ mar prãm kêt ne? Kati, Metîndjwÿnh kabên dja mar prãm kêt. Metîndjwÿnh ta kute ar amã ta Karô mex janor tãm dja me'õ mar prãm kêt.

<sup>9</sup> Nã gãm ar amã aben jabê. Ar aje Jeju marja ne gar amã aben jabê. Metîndjwÿnh ne ar amã arê gar kam amã aben jabê. Kam dja ba ar amã 'ã pi'òk no'òk kêt ne. <sup>10</sup> Nã gãm ar amã aben jabê, Matenikam ar kute Jejukôt abeno kamy kunîmê ne gar amã aben jabê. Kam dja ba ar amã,

—Akmere ar, àpnhîre ar, gora arek ar ã anhÿr ar aba rã'ã ne, ane.

<sup>11</sup> Ba ajte ar amã arê,

—Gora ar abenkam akabôt katin ar aba. Adjàkrê kêt ne ar aba. Kwârîk wãnh kikrekôt môr ne mÿjja pumûnh ne mÿjja mar ne arêho aba kêt. Gora anhikrao adjàpênh aba. Tãm ne ba arÿm amrêbê ar amã arê. <sup>12</sup> Bir, mÿj kadjy dja gar ar adjàpênh aba? Bir, me kâtãm kum ar akînh kadjy. Kadjy dja gar ã ane. Mÿkam ne gar akwÿ ar adjàpênh kêt ne aba? Ar apê ne ate amim mÿjja by ne me 'wÿr kêt.

*Jeju akubyn bôxmã.*

*Kô k 15.51*

<sup>13</sup> Ê, akmere ar, àpnhîre ar, ba ajte ar amã arê, ar aje prîne mar kadjy. Me arÿm tyk tûmjã dja ba ar amã arê gar ama, ar akaprî kêt kadjy. Nym bep me kute Jejukam amak kêtja dja me mrãmri kaprî. Me ja'õ dja ty nym me ja tu kaprîkumrêx, tyk nhijukri Jeju'ÿr bôx kêt kam. Nym bep gu me ba dja gu me ã bakaprî anhÿr kêt kumrêx ne.

<sup>14</sup> Jeju tyk ne akubyn tîn. Tãm ne gu me arÿm tu amim kamnhîxkumrêx ne. Dja me tyk ã Jejukôt akubyn tîn ane. Tãm dja gu me kuman tu amim kamnhîxkumrêx ne. Mrãmri godja Metîndjwÿnh me tyk tûmjã Jejumê ro'ã meo mō, me kute amim Jeju mar tyk tûmjã dja Jejumê ro'ã meo mō. Me kute tu amim Jeju markumrêxja, me tyk tûmjã, me tãm godja Metîndjwÿnh Jejumê ro'ã meo mō.

<sup>15</sup> Ê, Bênjadjwÿr ne ar imã arê bar ô'ã prîne ar amã arê, katât ar amã arê. Gu me batînja dja gu me me tykmã wa kêt. Bênjadjwÿr akubyn bôxkam dja gu me batînrã'ãja me tykmã wa kêt.

<sup>16</sup> Bênjadjwÿr ta dja kàjkwa kurûm ruw ne kàj bê me bamã akij ne amiwÿr me bajuw. Kadjy mrãnh djwÿnh nhõ bênjadjwÿrmê dja ar me bamã akij ne Metîndjwÿnh nhõ mÿjja kute poti nhôkre pyræk kakô. Nym kam me kute amim Kritu mar tyk tûmjã, me kumrêx tyk ne pykakam nôrja dja me kumrêx pyka kurûm katon wabi. Dja me akubyn tîn ne katon wabi.

<sup>17</sup> Gu me batînrã'ãjamê dja gu me baro'ã wabi. Me batînrã'ãjamê dja gu me babaja dja gu me batînrã'ãjamê dja gu me kumrêx tyk ne pykakam nôrja dja me kumrêx akubyn tîn ne kam me batînrã'ãjamê abenã bôx. Gu me arÿm baro'ã Bênjadjwÿr'ÿr wabi.

Metĩndjwýnh godja me baro'ã me babyn Bẽnjadjwýr'ýr me bajo wabi. Kakrãkam dja me babyn Bẽnjadjwýr'ýr me bajo wabi. Gu me kam Bẽnjadjwýr Jeju kajpa, kôk djãbêrkam dja gu me kajpa nhym kam kajkwamã me bajo mō. Gu me kam kôt ar baba. Ar baba rã'ã: ne. Dja gu me Bẽnjadjwýrkôt ar babao ino rer kêt mex ne ar baba. Ar baba rã'ã ar baba.

<sup>18</sup> Kam dja gar abenmã ikabên ja jarênho aban o ar akaprîbê abenmã kĩnh jadjã.

## 5

*Meo bikênhdjã nhõ akati'ã ujarênh.*

*Mat 24.29; Mak 13.26; Ruk 21.25, A Ped 3.10*

<sup>1</sup> Ê, akmere ar, àpnhĩre ar, mýj kadjy dja ba ar amã 'ã pi'ók no'ók ne? Mýj mytyrwý 'ókam nàr mýj akati 'ókam dja meo bikênh djã nhõ akati me'ýr bôxmã ne ba ije 'ã ar amã pi'ók no'ók mã? <sup>2</sup> Godja me aêrbê Bẽnjadjwýr Jeju kute meo bikênh djã nhõ akati me'ýr bôx. Arým ne gar prĩne ama. Me aêrbê. Akamãtkam me àkĩnhĩ me aêrbê me ũrkwãmã ngjêx ne kute mekbê mýjjao àkĩnho ba. Dja meo bikênh djã nhõ akati ã me aêrbê me'ýr bôx ane.

<sup>3</sup> Kute me nire kra àn tokrykam kute kubê amijo bipdjur kêt ne kubê prôt kêtja pyrãk. Mrãmri godja meo bikênh djã arým ã me'ýr bôxkumrêx o ane, nhym me kubê amijo bipdjur kêtumrêx. Dja me abenmã,

—Be, arým ne gu me badjumar mexkumrêx ne ar baba. Godja mýjja'õ ajmã me bajo kêtumrêx ne, ane. Me kute abenmã arênh rã'ã nhym me aêrbê meo bikênh djã nhõ akati me'ýr bôx, Bẽnjadjwýr kute meo bikênh djã nhõ akati me'ýr bôx. Godja me'ýr bôx nhym me kubê amijo bipdjur kêtumrêx ne 'õ kubê kator kêtumrêx.

<sup>4</sup> Nhym bep kati, akmere ar, àpnhĩre ar, djãm àtykri ar amrãnh got meo bikênh djã nhõ akati ar ajaêrbê ar awýr bôxmã. Kute me àkĩnhĩ me aêrbê me ũrkwã'ýr mrãnh ne ngjêx pyrãk. Nhym bep kati, djãm ar ajaêrbê ar awýr bôx kêtumrêx ne. Me mũ ja'ýrbit dja bôx. Me arík ar ba'ýr dja bôx.

<sup>5</sup> Nhym bep kati, ar ga ne gar a'ukam mrã, ne arngro'ã mrã. Nã gãm ar Metĩndjwýnh kabênkôt ar amijo aban kam

kute a'uri ar amrãnh pyrãk. Gwaj ba ne gwaj akamãtkam baba kêtumrêx, àtykri baba kêtumrêx. Nhym bep me arík ba ne me kute àtykri me ba pyrãk.

<sup>6</sup> Kam dja gwaj a'ukam bamrãnhja, arngro'ã bamrãnhja 'ã bano týx rã'ã ne babibãnh kêt ne ar baba. Nhym bep me arík ar baja, àtykri ar baja dja me wãnh arík ar ba. Nhym bep gwaj ba dja gwaj ã anhýr kêtumrêx ne ar baba. <sup>7</sup> Nhym bep me Jejubê jãm krãja ne kute arík akamãtkam me ba pyrãk. Nhym me arík ar badjwý ne me kute me bibãnhkam arík akamãt kô tykkam ba pyrãk.

<sup>8</sup> Nhym bep kati, a'uri gwaj bamrãnhja dja gwaj bajaxwe kêtumrêx ne ar baba. Ê, dja gwaj amijã bano týx. Xatanaj ne kute gwaj bajaxwe'ã gwaj bamã àpnênh prãmumrêx. Kam dja gwaj amim Jeju mar 'ãno djan arek bamã me abê. Kute mrãmri ne me kute ngônho kubêkã jangjênh nhym me te kute me'ã kamjýrja pyrãk. Dja gwaj ã baje amim Jeju mar 'ãno badjãm ne bamã me abêo ane. Nhym kam Xatanaj te gwaj bajaxwe'ã gwaj bamã apnê. Gwaj Jeju 'ãno djan amiwýr kam ama. Kute mrãmri ne me kute ngônho krãdjê tur nhym me te kute kôo me ikwýr kajgo ja pyrãk. Dja gwaj ã baje Jeju 'ãno badjãm ne amiwýr kam amako ane nhym kam Xatanaj te gwaj bajaxwe'ã gwaj bamã apnê.

<sup>9</sup> Djãm Metĩndjwýnh me bakam ngryk ne kute me bajo bikênh kadjy ne amijo me bapytàn amim me bajã karõ? Kati, kute me bapytãmã ne me bajo amiptã. Me banhõ Bẽnjadjwýr Jeju Kritu ta ne me bapytàn ar me bajo ba.

<sup>10</sup> Ta ne me bapãnh tyn ajte me bakadjy tĩn ne. Gu me kôt bakunĩ batĩn ne. Dja gu me arým batyk jabej nàr kon batĩn rã'ã jabej mrãmri dja gu me bakunĩ ajte Jejukôt batĩnkumrêx ne. <sup>11</sup> Me akubyn tĩn dja gar mã abenmã arê. Ne mã o abenmã kĩnh jangij ne o abenmã týx jangij. Arým ne gar ã ane. Jakam dja gar mã ã anhýr atêm rã'ã.

*Akubyn ajte arkum 'ã karõ.*

*Gar 6.6; Xim k 5.17*

<sup>12</sup> Ê, akmere ar, àpnhĩre ar, dja gar prĩne ar kute Jeju nhõ me jao ba djwýnh kabên ma. Ar ja ne ar prĩne ar ar ajo djuw mexo

ba, Bênjadjwÿr Jeju kabênkôt ar ar ajo djuw mexo ban ar amã àpênh ar ba, ne ar ar akreo ba. Kam dja gar prïne ar kabên ma. <sup>13</sup> Gora ar prïne ar kabênja man amã ar abên amã ar kînh. Ar akrânãmã ar amã àpênhkam dja gar amã ar kînhkumrêx ne ar aba. Gora ar akunĩ abenmã adjàkrê kêt ne amã aben jabên ar aba.

<sup>14</sup> Ê, akmere ar, àpnhîre ar, ba ajte ar ar amã ikabên jarê. Godja me kum ukanga gar mekmã kum,

—On adjàpênh ar aba. On mÿjja kupê, ane.

Godja me kaprĩ gar memã kînh jangjê. Godja me kute amim Jeju mar rerek gar mekmã kum,

—On amim Jeju mar mex ne 'ã angrà tÿx, ane.

Gora ar akunĩ abenmã akabên mexbit jarên abenmã adjàkrê kêt ne ar abeno aba.

<sup>15</sup> Godja me'ô ar ar ajôkam ar amikrào ba ga amipãnh o abikênh kêt ne. Tu ate akrân ar aba. Godja gar abenkam adjukaprîn ar aban me kunĩkam adjukaprîn ar aba.

<sup>16</sup> Gora ar akînh rã'ã rã'ã.

<sup>17</sup> Gora ar Metĩndjwÿnhmã akabên 'ãno dja.

<sup>18</sup> Gora ar myt kunĩkôt Metĩndjwÿnhmã kum,

—Aje imã mÿjja janorja ne mexkumrêx. Ba akam ikînhkumrêx, ane. Adjumar mexkam nâr apunukam nâr abikênhkam nâr mÿjja kute ajo bikênhkam dja gar kum ã amijarênh o ane ne 'ãno dja. Ar aje mÿjja kunĩkam akînh ne aje kum amijarênhmã ne Metĩndjwÿnh ar ajã amim karô. Nãm ã ar aje Kritu Jeju mar'ã amim karôo ane.

<sup>19-20</sup> Dja me'ô Metĩndjwÿnh Karôkôt ar amã mÿjja'ô jarê gar aprÿ kêt. Kwãrîk wãnh Metĩndjwÿnh Karô ar amã kabên'ô jarê gar ate akrã kêt. Dja gar ate akrã nhym arÿm Metĩndjwÿnh Karô ar amã kabên kêt ne. <sup>21</sup> Dja gar prïne me kunĩ kabên kabi. Dja me'ô kabên mex jabej gar tu kabên markumrêx ne kabênkôt ar amijo aba. Dja me'ô kabên punu gar tu ate akrã.

<sup>22</sup> Be, gora ar rûm apÿnh mÿjja punu djari kunĩmã akre rax.

<sup>23</sup> Gê Metĩndjwÿnh ta kute me bamã umar mex jarênh djwÿnh prïne amim ar amã mex jadjà gar kam ta mexo amexkumrêx ne ar aba. Me akunĩ dja gar anhĩ pÿnhkôt amexo

tuknîn ar aba. Dja me banhô Bênjadjwÿr Jeju Kritu akubyn tẽ gu me bamextire ne ar baba. Gu me bajaxwe kêt ne ar baba. Ajmã bakute kêt ne ar baba. Badjumar djãmê banhîmê bakarômê ajmã bakute kêt ne ar baba. <sup>24</sup> Metĩndjwÿnh ta ne amiwÿr ar ajuw, ta godja ar amã mex jadjà. Mrãmri godja ar amã mex jadjà. Metĩndjwÿnh ne kabênkumrêx. Mrãmri dja ar amã mex jadjà gar amexkumrêx ne ar aba.

<sup>25</sup> Ê, akmere ar, àpnhîre ar, ar badjwÿ dja gar Metĩndjwÿnhmã ar ijarê.

<sup>26</sup> Ar aje Jejukôt abeno akamy dja gar idjô'ã aben pa krij.

<sup>27</sup> Ba ar amã arê, Bênjadjwÿr kabênkôt ar amã arê. Ije ar amã pi'ôk no'ôkja dja gar akamy kunĩmã arê.

<sup>28</sup> Gê gwaj banhô Bênjadjwÿr Jeju Kritu ukaprĩkôt prïne ar ajo djuw mex. Tãm ne ja.

## Paur kute Texarônikakam me jamã atãri pi'ôk no'ôk ne ja.

Arÿm ne Paur Texarônikakam ar jamã pi'ôk no'ôk ne. Nhyr arÿm mã me'ô ar'ÿr o tẽ nhyr ar arÿm omÿn kam amipãnh Paurmã pi'ôk no'ôk ne kum amijarẽ. Texarônikakam ar kwÿ kum ukanga rã'ã. Nhyr ar kwÿ meo bikẽnh djã nhõ akati kupa'ã arẽn memã kum,

—Arÿm ne me bawÿr bõx. Mã dja gu me nẽ? Paur ne arÿm arẽ, anhyro kumex. Nhyr kam ar abej Paur kuki:j.

Nhyr ar kwÿ ajte amikam umar punu ne Paurmã kum,

—Birãm dja ba Metĩndjwÿnh'ÿr ibõx kêt jabej, ane. Nãm ar ã Paurmã amijarẽnho ane nhyr kam Paur omÿn ajte arkum pi'ôk no'ôk ne. Ar kute Texarônikakam Jeju marjamã ajte pi'ôk no'ôk ne arkum tÿx jadjà. Nãm ar axwe amikam umarjamã kum,

—Kwãrĩk wãnh gar amikam adjumar punu kêt. Metĩndjwÿnh ta ne ar amã tÿx jadjà gar 'ã angrã tÿx ne. Nhyr me te ar ajo ajkẽ. Adjÿm, dja Metĩndjwÿnh ar ajo ngryk ne meo ajkẽ. Metĩndjwÿnh kute meo bikẽnh djã nhõ akati kraxje bõx kêt rã'ã. Dja ï bõx. Nhyr bep ar ga ne Metĩndjwÿnh amijo ar apytã, kute ar apytãrmã ne amijo ar apytã. Kam dja gar mã 'ã angrã tÿx ne, ane.

Ne kam ajte arkum ukangajamã àpẽnh'ã apnẽ. Nãm ã Paur arkum pi'ôk no'ôko anen arkum ano. Gwaj 'ÿr Paur kabẽn ma.

<sup>1</sup> Ba ibẽ Paur ne ba ar amã pi'ôk no'ôk ne. Xiramẽ Ximoximẽ ne bar ar amã pi'ôk no'ôk ne. Ar aje krĩbẽ Texarônikakam amim Jeju mar ne kõt aben pydjijamã ne bar pi'ôk no'ôk ne. Metĩndjwÿnhbẽ gwaj Babãmmẽ krabẽ Bẽnjadjwÿr Jeju Kritu arkõt ne gar aben pydji. Ar amã ne bar pi'ôk no'ôk ne.

<sup>2</sup> Gẽ Metĩndjwÿnh ar ajo djuw mex, Bẽnjadjwÿr Jeju Kritumẽ Bãmbẽ Metĩndjwÿnh ar ukaprĩkõt ar ajo djuw mex ne ar ar ajo ba ne ar amã umar mex jarẽ, gar adjumar mex ne ar aba.

*Paur kute Metĩndjwÿnhmã arkam amikĩnh jarẽnh.*

<sup>3</sup> Mrãmri ne bar mã Metĩndjwÿnhmã ar akam ikĩnh jarẽ, akmere ar, àpnhĩre ar. Nã gãm ar arÿm Jeju mar tÿxo tẽn kam arÿm akunĩ amã aben jabẽ rax tẽ. Kam ne bar mrãmri Metĩndjwÿnhmã ar akam ikĩnh jarẽ.

<sup>4</sup> Kam ne bar ar ajo amra. Apÿnh pyka djãri ne bar mekmã ar ajo amra. Me kute Metĩndjwÿnhkõt aben pydjijamã ne bar ar ajo amra. Me te kute ar ar ajo bikẽnho ban ar ajapryõ ba gar aje mã tu Jeju mar tÿxkumrẽx ne mã 'ã angrã tÿx. Tãm ne bar mã memã arẽ.

<sup>5</sup> Be, arÿm ne me kute Jeju mar kêtja ar ajo ajkẽ. Arÿm ar amã Metĩndjwÿnh jabẽkam ar ajo ajkẽ. Bir, mÿj kadjy? Mÿjja kute gwaj bajo bikẽnh gwaj bakaprĩkõt godja Metĩndjwÿnh amim gwaj bakabi ne amim gwaj bajo mex ne. Gwaj bamex ne Metĩndjwÿnh kute õ me ja ar o ba'ÿr babõx ne kam kam ar baba kadjy. Be, ga Metĩndjwÿnh kute katãt memã o pãnhja pumũ.

<sup>6</sup> Djã nãm Metĩndjwÿnh kupa'ã memã o pãnh? Arkati. Nãm katãt kute memã o pãnhmã amim 'ã karõ. Godja Metĩndjwÿnh me kute ar ajo bikẽnhjao ajkẽ <sup>7-8</sup> gar kam arÿm ajo bikẽnhja arÿm adjumar mexkumrẽx ne atyk djã kêt ne. Ar badjwÿ dja bar idjumar mexkumrẽx ne ityk djã kêt.

Mÿj akatikam? Bir, Jeju kãjkwa kurũm kute amijo amirĩtkam. Kuwy põk jabatãnhmẽ kadjy mrãnh djwÿnh pymamẽ, tãm dja Jeju amikõt o mõ. Kute ar apãnh meo bikẽnhmã dja bõx. Me kute Metĩndjwÿnh mar kêtõ bikẽnhmã dja bõx. Me kute Jeju kabẽn mar prãm kêtja, gwaj banhõ Bẽnjadjwÿr Jeju'ã ujarẽnh ny mar prãm kêtja kute meo bikẽnhmã dja bõx.

<sup>9</sup> Dja prĩne ar apãnh meo ajkẽ nhyr me biknor rã'ã: ne. Tu biknorkumrẽx. Godja Bẽnjadjwÿr tu abenbẽ me bajo bikjêrkumrẽx nhyr me wãnh ba djãkam tu wãnh bakumrẽx ne Metĩndjwÿnh'ÿr bõx kêtumrẽx. Ne kam Bẽnjadjwÿr pumũnh kêtumrẽx ne mex pumũnh kêtumrẽx ne uma pumũnh kêtumrẽx ne tÿx pumũnh kêtumrẽx.

<sup>10</sup> Be, dja Jeju ï bõx. Akubyn me'ÿr bõx nhyr ta õ me ja kunĩ dja me kum mextire jarẽn kum uma jarẽn kum tÿx jarẽ. Me kute

amim Jeju mar kunĩ dja me uma pumũn ari aben pumũn kam kĩnhkumrẽx ne Jejumã mextire jarẽn kum uma jarẽ. Ar gadjwỳ dja gar me kudjwa Jejumã mextire jarẽ. Jeju'ã ar idjujarẽnhja ne gar tu markumrẽx ne. Kam dja gar me kudjwa kum mex jarẽ.

<sup>11</sup> Kadjy ne bar mã gwaj banhõ Metĩndjwỳnhmã ar ajarẽn ar akadjy Metĩndjwỳnh 'uw ne kum ikabẽn. Metĩndjwỳnh ne arỳm amiwỳr ar ajuw. Kam ne bar kum,

—Ga aje amiwỳr ar 'wỳr djwỳnh dja ga amikadjy katàt ar krã dja. Ota ar ja katàt mrãnh prãm kumrẽx. Ota ar arỳm tu amim Jeju markumrẽx ne kam kum mỳjja mexbit kĩnh ne ar o ba. Abẽ mỳjja 'õ bipdjur kêt kõt dja ga katàt ar krã dja. Atỳxkõt dja ga ã aro ane. Nã bãm ar ã Metĩndjwỳnhmã ar ajarẽho ane.

<sup>12</sup> Ar aje Jeju marja godja Metĩndjwỳnh katàt ar akrã pumjuw nhym kam me ja ar apumũn arỳm Jejumã mextire jarẽ. Ar amex pumũnh nhirãm mã Jeju jarẽho ba. Nhym gwaj banhõ Bẽnjadjwỳr Jeju Kritudjwỳ dja ar amexkõt ar apumũn arỳm ar akam kĩnh ne ta dja ar amã ar amex jarẽ. Gwaj banhõ Metĩndjwỳnh djukaprĩkumrẽx, nhym Bẽnjadjwỳr Jeju Kritudjwỳ ukaprĩkumrẽx. Ar ukaprĩkõt dja ar katàt ar akrã dja.

## 2

### *Kute me'õ ar axwe baja katormã arẽnh.*

<sup>1-2</sup> Akmere ar, àpnhĩre ar, Bẽnjadjwỳr Jeju Kritu akubyn bõx gwaj baje 'ã aben pydjimã, kam dja gar axwe amikam adjumar kêt ne ar aba. Kwãrĩk wãnh gar arĩk abenmã ajẽx ne,

—Arỳm ne gwaj bajo bikẽn dja nhõ akati gwaj bawỳr bõx, anhỳr kêt ne kam adjumar punu kêt. Godja me'õ arĩk 'ẽx ne,

—Arỳm ne gwaj bajo bikẽn dja nhõ akati gwaj bawỳr bõx, ane. Nãr kon arĩk 'ẽx ne,

—Arỳm ne gwaj bawỳr bõx. Metĩndjwỳnh Karõkõt ne ba kuman kam ar amã ikabẽn jarẽ. Nãr kon ijã,

—Arỳm ne Paur gwaj bamã pi'õk no'õk ne. Arỳm ne gwaj bajo bikẽn dja nhõ akati gwaj bawỳr bõx, ane. Kati, dja gar tu ate akrã ar aba. Nãm me 'ẽx ar ba.

<sup>3</sup> Kwãrĩk wãnh me'õ arĩk ar amã 'ẽx ne ar amã kabẽn jarẽ gar kõtbit ajamak bẽn kêt. Dja gar tu ate akrã ar aba.

Ë, meo bikẽn dja nhõ akati bõx djwỳnhhrãm godja me kato, ne amibẽ Metĩndjwỳnh kurẽn axwebit ma. Nhym kam gormã me'õ katon kam me kadjy bẽnjadjwỳr ne kam ar axwe ban ì axweo amijo amirĩt mex ne. Godja axweo amijo amirĩt kumrẽx nhym kam atãri arỳm meo bikẽn dja me'yr bõx. Kam godja me'õ ar axwe baja tu biknorkumrẽx ne. Arỳm ne Metĩndjwỳnh me'õ jaxweja tu biknorkumrẽxmã amim 'ã karõ.

<sup>4</sup> Be, dja me'õ ar axwe baja arĩk 'ẽx ne amijo Metĩndjwỳnh. Godja me kute mỳjja metĩndjwỳnhja kunĩ kum kurẽn mekbẽ o akabẽ, ne me kute mỳjja karõ nhipẽx ne kum, “Me Itĩndjwỳnh”, anhỳr kajgoja kunõ akabẽ. Ne kam ta amijã bẽnjadjwỳr rax mẽ. Ne kam Metĩndjwỳnh nhõ kikremã wadjàn nhỳn kam mekmã kum,

—Ibẽ ne Metĩndjwỳnh, ane. Nãm arĩk 'ẽx ne amijo Metĩndjwỳnh. Axwekam arĩk 'ẽx ne mekmã amijo Metĩndjwỳnhho nhỹ.

<sup>5</sup> Djãm arỳm ne gar ikabẽno akno? Ar akam idjãm kam ne ba arỳm bẽnjadjwỳr ar axwe baja ar amã arẽ gar arỳm ama.

<sup>6</sup> Ë, kraxje bẽnjadjwỳr ar axwe baja nhõ akati 'yr bõx kêt. Gẽdja õ akati 'yr bõx nhym arỳm axweo amijo amirĩt ne. Nhym bep mỳjja ne mã me banẽje bẽnjadjwỳr ar axwe baja kukrà, me baje Jeju mar nẽje kukrà. Arỳm ne gar mỳjja ja ma.

<sup>7</sup> Mrãmri ne me arỳm bẽnjadjwỳr ar axwe bajakõt axwebit ma. Axweo kute amijo amirĩt kêt rã'ãkam ne me kukãm axwemãbit amima. Nhym bep kute me banẽje kukrà djwỳnhja dja me banẽje kukrà dja:n kam mã tẽ. <sup>8</sup> Mã tẽ nhym kam arỳm axweo memã amijo amirĩt. Nhym kam Bẽnjadjwỳr Jeju bõx. Bõx ne kam axwe pãnh akõro pyka mẽ o amrà. Umao dja bõx ne o kubĩ, prĩne o akno.

<sup>9</sup> Ë, godja bẽnjadjwỳr ar axwe baja Xatanaj kabẽnkõt bõx ne kam ar ro'ã ar ba. Xatanajmẽ dja ar ar ba nhym kam bẽnjadjwỳr ar axwe baja ar mekmã amimao ba, ar mekmã amimao pôxo ba. Ne kam mekmã mỳjja pumũnh kêt nhipẽx

ar o ba. Kute o me noo biknormã ar mỳjja pumũnh kêt nhipẽxo ba. Nãm ar mekmã 'ẽx ba.

<sup>10</sup> Dja prĩne mỳjja punu kunĩo me noo akno nhym me kuma. Dja me jamã 'ẽx nhym kute mrãmri pyrãk, nhym me kõtbit amak bẽn ne, ajbit ma. Metĩndjwỳnh kute me jao biknor'ã amim karõja, me tãm. Metĩndjwỳnh kute katãt memã amikabẽn jarẽnh nhym me kute mar prãm kêtja, me tãm. Me tãm ne me kum Metĩndjwỳnh kabẽn mar prãm kêtikumrẽx ne kum kĩnh kêtikumrẽx nhym te Metĩndjwỳnh kute me utãrmã. Kam dja me tu biknorkumrẽx ne. <sup>11</sup> Nãm Metĩndjwỳnh katãt mekmã amikabẽn jarẽ nhym me mar prãm kêt ne kum 'ẽxnhĩbit kĩnh ne. 'Èxnhĩbit mar prãm nhym kam me kute 'ẽxnhĩbit mar kadjy me kanga. Me kute 'ẽxnhĩbit marmã me kanga. <sup>12</sup> Mỳkam? Bir, nãm te Metĩndjwỳnh mekmã amikabẽn katãt arẽ, nhym me kum axwebit kĩnh ne. Kam dja Metĩndjwỳnh me jamã axwe pãnh jarẽn me biknor djã'ỳr me ano.

*Me kute Metĩndjwỳnh kukràdjã'ã ngrã tỳxmã kute arẽnh.*

<sup>13</sup> Akmere ar, àpnhĩre ar, nhym bep ar ga ne gar atemã. Ar ga ne Bẽnjadjwỳr Jeju kum ar ajabẽ:kumrẽx. Metĩndjwỳnh ne amijo ar apytã, kute ar apytãrmã ne amijo ar apytã. Amrẽbẽ mỳjja kêttri ne amijo ar apytã, ar aje tu Metĩndjwỳnh kute katãt amikabẽn jarẽnh markumrẽx nhym Metĩndjwỳnh Karõ kute katãt ar akrã djar kadjy ne amijo ar apytã. Kam ne bar mã Metĩndjwỳnhmã ar akam ikĩnh jarẽ.

<sup>14</sup> Kadjy ne amiwỳr ar ajuw. Ar amã idjujarẽnh kõt, Jeju'ã idjujarẽnh nykõt ne amiwỳr ar ajuw. Gwaj banhõ Bẽnjadjwỳr Jeju Křitu ne kute umao, mexo, raxo mỳjja kunĩ jakrenh gwaj kõt badjwỳ ã baje anhỹrmã ne amiwỳr gwaj bajuw.

<sup>15</sup> Ë, akmere ar, àpnhĩre ar, kam dja gar 'ã angrã tỳx ne. Ar ije ar amã prĩne Metĩndjwỳnh kukràdjã jarẽnhja dja gar ajamako mar tỳx mex ne. Ar ije pi'õk no'õkkam ar amã arẽnh ne ije ijajkwakam ar amã arẽnhja tãm dja gar ajamako mar tỳx mex ne mã ama.

<sup>16-17</sup> Be, gwaj banhõ Bẽnjadjwỳr Jeju Křitu ne kum gwaj bajabẽkumrẽx. Nhym Metĩndjwỳnhbẽ gwaj Babãmdjwỳ kum gwaj bajabẽkumrẽx. Nãm tu kum gwaj bakaprĩn gwaj bamã tỳx jadjãr rã'ã: rã'ã ne. Gwaj kam batỳxo ino rer kêt rã'ã ne. Nhym kam arỳm gwaj bamã mỳjja mex jarẽ gwaj kam amim kamnhĩxbẽ ar kadjy baba.

Gẽ Metĩndjwỳnhmẽ krabẽ Jeju Křitu ar prĩne ar amã kĩnh jadjãn ar amã tỳx jadjã. Gar kam arỳm akabẽn mexkumrẽx ne ar aban apỳnh mỳjja mex djãribit kupẽ.

### 3

*Ar kute Metĩndjwỳnhmã Pauro à'wỳrmã kute arẽnh.*

<sup>1</sup> Ë, akmere ar, àpnhĩre ar, Metĩndjwỳnhmã ar ijarẽ gẽ Bẽnjadjwỳr djwỳnh'ã ar idjujarẽnhja pyka kunĩkõt ajmã gẽ me kuman tu amim Jeju kamnhĩxkumrẽx gẽ me kum mextire jarẽ. Gora gẽ me kute me apyrãk ne ar ba. Ar ga ne gar Metĩndjwỳnh'ã ar idjujarẽnhja man tu amim Metĩndjwỳnh markumrẽx ne. Nhym kam ar akam me ja ar apumũnh nhirãm ar akõt Metĩndjwỳnhmã mextire jarẽ. Gora gẽ Bẽnjadjwỳr'ã ar idjujarẽnhja ã pyka kunĩkõt bimãnh ane.

<sup>2</sup> Gora ar ajte Metĩndjwỳnhmã ar ijarẽ gẽ on me axwemẽ me kabẽn punubẽ ar ipytã gẽ me ar ibĩn kêt. Djã nãm me kunĩ Jeju ma got me ar imã kabẽn mex ne? Kati, kam dja gar ajte Metĩndjwỳnhmã ar ijarẽ.

<sup>3</sup> Nhym bep ar ga. Ar ga dja Bẽnjadjwỳr ar amã tỳx jadjãn ar anẽje axwe djwỳnhbẽ Xatanaj kukrà. Mrãmri dja ã ane. Arỳm ne ar amã arẽ. Djãm Metĩndjwỳnh kabẽn krãptĩ got? Kati, Metĩndjwỳnh ne kabẽnkumrẽx. Mrãmri ne arỳm ar amã arẽ, mrãmri dja ar amã tỳx jadjãn ar anẽje axwe djwỳnh kukrà.

<sup>4</sup> Arỳm ne bar ar akam ikĩnhkumrẽx. Ar aje Bẽnjadjwỳr djwỳnh kabẽn mar ne kõt ar amijo abakam ne bar arỳm ikĩnhkumrẽx. Amrẽbẽ ne gar amikam ar ikabẽn man arỳm kõt ar amijo aba. Mrãmri dja gar arek ã anhỹr rã'ãn tu ar ikabẽn man kõt ar amijo aba. Arỳm ne bar prĩne ar amã ikato. Kam ne bar ar akam ikĩnhkumrẽx.

<sup>5</sup> Gẽ Bẽnjadjwỳr ta ar amã Metĩndjwỳnh jabẽ kadjy ar amã arẽ. Gar kam amã

Metĩndjwýnh jabêkumrêx. Gê ta ajte ar amã arê, gar aje 'ãno adjãm ne aje kanga kêt kadjy ar amã arê. Gar kam aje Kritu pyrãk gê me te ar ajo ajkê gar kanga kêtikumrêx.

*Arkum ukanga nêje kute ar akre.*

*Ep 4.28; Tex k 4.11*

<sup>6</sup> Ë, akmere ar, àpnhĩre ar, Bẽnjadjwýr Jeju Kritu kabênkõt dja bar ar amã ikabên 'õ jarê. Dja ar aje Jejukõt abeno akamy kwý kum ukangan àpênh prãm kêt jabej gar rùm arkum akre rax. Ar kute ar ikabên mar kêt kam dja gar rùm arkum akre rax.

<sup>7</sup> Arým ar aje mar. Ar aje ar ijã amijakre ne ar idjápênho adjápênhmã, arým ne gar ama. Djãm ar akam ar idjãm kam ar idjápênh kêt ne ar iba. Arkati. <sup>8</sup> Ar ar idjápênh ra:xja pumũ. Nã bãm ar prĩne mýjja kupê. Arngro'ã akamãtkam ar idjápênh iba. Nã bãm ar amim apê. Ar ije pi'ók kaprĩre'ã ar ajwýr kêt kadjy. Nhýnh ne me'õ kute ar ijo djuw mex'õ bar ije kum o pãnh kêt? Arkati.

<sup>9</sup> Nã bãm ar ã ane. Ar aje ar ijã amijakren ar ikõt amijo abamã. Jeju Kritu kute ar ijanor pumũnh nhirãm ren ate ikrãn arek ikrĩ nhym me ren ijo djuw mex kajgo nhym ren mrãmri kõt. Nhym bep kati, ar ba ne bar idjápênhbit iba, ar aje ar idjápênhkõt ar ipumũnh ne aje ar ijã amijakremã. <sup>10</sup> Ar akam ar idjãm kam ne bar arým ar amã,

—Godja me'õ àpênh prãm kêt kwãrĩk wãnh gar kum õ kwý krên djã nhõr kêt, ane.

<sup>11</sup> Ar akam ar akwý ne ar àpênh prãm kêtikumrêx ne ar ba bar arým kuma. Nãm ar mýjja kupênh kêt ne kam kikre kabe'ã kabên prãm kadjybit ar ba. <sup>12</sup> Ë, ar prĩne ikabên ma. Bẽnjadjwýr Jeju Kritu kabênkõt ne bar arkum ukangajamã ikabên jarê ne àpênh'ã arkum apnê ne arkum,

—Dja gar akrãnmã adjápênh ar aba. Ar anhõ kwý krên kadjy adjápênh ar aba, ane.

<sup>13</sup> Be, akmere ar, àpnhĩre ar, ar akunĩ dja gar amrãnh mexja kanga kêt. Ar akunĩ dja gar amrãnh mexkumrêx ne.

<sup>14</sup> Godja me'õ ar ikabênja mar prãm kêt, ar ije ar amã 'ã pi'ók no'ókja mar prãm kêt gar 'ãno djan omũn kum akre rax. Kute on amim kator ne pijãm kadjy. Kadjy dja gar 'ã ano tỳx ne 'ãno djan omũ. <sup>15</sup> Djãm ar aje o akurê djwýnhmã? Kati, ar aje o akamykam

dja gar abên djãnh no katio bit kum akabên ne kum,

—On tu Metĩndjwýnh kabên markumrêx ne kõt ar amijo aba, ane. Dja gar ã kum ane.

*Kabên jarêho ino rer.*

<sup>16</sup> Gê Bẽnjadjwýr kute memã umar mex jarênh djwýnh ta ar amã umar mex jarê gar mã adjumar mexbit man o aba gê te mýjja ar ajo ajkê gar mã adjumar mex ne ar aba. Gê Bẽnjadjwýr amimê ar ar ajo ba.

<sup>17</sup> Aje, ibê Paur ne ba ar amã pi'ók no'ók ne. Ë, ba ne ba inhikrao pi'ók no'ók ja ngrire no'ók ne o ino re. Ije memã pi'ók no'ók kunĩkõt ne ba ã pi'ók no'ók kryre o ane.

<sup>18</sup> Gê gwaj banhõ Bẽnjadjwýr Jeju Kritu prĩne ukaprĩkõt ar ajo djuw mex. Tãm ne ja.



## Paur kute Ximoximã pi'ôk kumrêx no'ôk ne ja.

Paur ne krabê Ximoximã pi'ôk no'ôk ne. Mýjkôt ne o kra? Jejukôt. Kute kum arênh nym kute tu amim markumrêxkôt ne o kra. Nym kam arkum aben kînhkumrêx ne.

Nym kam Paur kumrêx ne krîrâxbê Epexukam bôx ne kam ar memã Metîndjwýnh'ã ujarênh ba ne kam tẽ. Nym kam Ximoxidjwý arým kam bôx. Kam tẽn bôx ne kam ar kam memã 'ã ujarênh ba, memã Jeju jarênh ba. Nym me kwý arým prîne amikajmãtã Jeju ma. Nym bep ar kwý ne ar arîk 'êx ne kute amijo Jeju mar. Ar kute mar kêtumrêx ne arîk 'êx ne memã mýjja jarê. Nãm we ar,

—Kwârîk wãnh abenwýr mör kêt, ane. Ne,

—Mrywã kur kêt, ane. Nãm ar ã kupa'ã me akre ar o bao ane. Ar ja 'ã ne Paur Ximoximã kum,

—Dja ga akabêno ar ity gê ar anhikrê, ane. Ne kam ajte me kute amim Jeju mar'ã kum karõ ne kum,

—Ê, Jeju nhõ me jao ba djwýnhmẽ me atãri àpênhjamẽ gêdja ar katàt mrãn memã Metîndjwýnh'ã ajarê, ane. Ne kam Ximoximãdjwý kum,

—Ê, gadjwý, gadjwý dja ga katàt mrãn Metîndjwýnh kabênkôt prîne memã arê, ane.

Ne kam ajte me'ã kum karõ, me Metîndjwýnh kabênkôt katàt mrãnhmã, me mymẽ me niremẽ me ari memã àpênh kajgo ar bajamẽ me 'uwtîmẽ, me kunĩ. Me kunĩ ne me Metîndjwýnh kabênkôt katàt mrãnhmã ajte Ximoximã me'ã karõ. Ne kam me'ã kum pi'ôk no'ôk ne kum ano. Tãm ne ja.

1-2 Akmere Ximoxi, ba ibê Paur ne ba amã pi'ôk no'ôk ne. Ximoxi, ikra djwýnh, amã ne ba pi'ôk no'ôk ne. Ije amã Jeju jarênh ga tu aje amim markumrêx kôt ne ba arým ajo ikrakumrêx ne. Ba ibê Paur, ne ba amã pi'ôk no'ôk ne. Djãm ba ne ba Jejumã idjapênh? Kati, Metîndjwýnhmẽ Kritu Jeju ar ta ne ar imã idjapênh jarênh ijano, ije

memã 'ã idjujarênhmã ijano. Metîndjwýnh, kute gu bapytâr djwýnhjamẽ Kritu Jeju gu baje amiwýr kam amakjamẽ, ar ta ne ar imã kabên jarê ba kam arkum idjapênh iba.

Be, gê Metîndjwýnh ajo djuw mex. Kritu Jeju gu banhõ Bênjadjwýrmẽ Bãmbê Metîndjwýnh ar ukaprîkôt ajo djuw mex ne ar ajo ba. Gê arkum akaprî ne amã umar mex jarê, ga kam adjumar mex ne ar aba.

*Kute Metîndjwýnh kabên jarênh djwýnh 'êxnhî bôxmã arênh.*

*Rô 16.17; Xim k 6.3; Xit 1.10*

<sup>3</sup> Ê, dja ga arek Epexukam djan nêje ar kukrà. Wãnh ne ar kwý arîk kupa'ã ar memã arênh ba, Metîndjwýnh kabên kupa'ã ar memã arênh ba. Dja ga nêje akabêno ar ity. Nã bãm itêm kutã, pykabê Matenimã itêm kutã amã ikabên jarênh kam arým ajbir ajte ar'ã amã pi'ôk no'ôk ne ano.

<sup>4</sup> Dja ga arkum,

—Kwârîk wãnh ar me tûmre'ã ujarênh kajgomẽ me akukãmãre nhidji me kute tûmrãm abenmã arênhja kwârîk on wãnh nõ. Kôt ne me abenmã kabên ar ban kam me kute amim Metîndjwýnh mar ne 'ãno ãm kêt. Tãm dja on wãnh nõ, ane.

<sup>5</sup> Akmere Ximoxi, mýj kadjy ne ba amã ikabên ja jarê? Bir, me kum aben jabê kadjy. Godja me ôkre kadjwýnhbê axwe 'õ nõr kêt ne kute amikam axwe 'õ mar kêt kam arým kôt kum aben jabê. Ne kam ajte me kute mrãmri amim Jeju markumrêx kôt ne me kum aben jabê. Kadjy ne ba amã ikabên ja jarê.

<sup>6</sup> Bir be, me kwý arým kute ja mar prãm kêt kam arým kabên kajgoo kumex, ne abenkam kangao kumex. Jabit ne me kuma. <sup>7</sup> Djãm me ja kute mýjja mar got. Kute Môjdjê kukràdjã mar kêtjakam kukràdjã kupa'ã ar memã arênh ba. Ar ta ne ar amijo memã mýjja'ã ujarênh djwýnh ne. Ne kute memã,

—Mrãmri ne ba ije me amã arênhja. Kôt ne ba me amã arê, anhýr ar o ba. Bep kati, ar kute ta amikabên mar kêt ne Môjdjê kukràdjã mar kêt.

<sup>8</sup> Be, Môjdjê kukràdjã ne mexkumrêx. Gu arým kuma. Ne ren ar kuman kôt ar amijo ba nym arým rãn mexkumrêx.

Nhym bep kati, ar ja kute mar kêt ne ar kupa'ã memã arênh ar o ba.

<sup>9</sup> Be, nhÿnh me jamã ne Môj djê kukràdjàja? Djãm me kute katàt amijo bajamã? Kati, me kute axweo amiptàrjamẽ, me amakkre kêtjamẽ, me kute Metĩndjwÿnh mar prãm kêtjamẽ, me axwejamẽ, me kute mÿjja punubit mar prãmjamẽ, me kute Metĩndjwÿnh japrÿjamẽ, me kute nãmẽ bãm ar parjamẽ, me kute me parjamẽ <sup>10</sup> me prõ nãr mjên prãmjamẽ, me my ta kute aben nĩho bajamẽ, me kute mekbê krao àkĩnhjamẽ, me 'èxnhĩjamẽ, me kute me kà mex jarênhjamẽ, nãr me kute mÿjjao amiptàr, Metĩndjwÿnh kute katàt memã amikukràdjà jarênh ne mekbê mÿjja puma nhym me kute o amiptàrjamẽ. Me ja kunĩ kadjy ne Môj djê kukràdjàja. Gu arÿm kuma.

<sup>11</sup> Nã, Metĩndjwÿnh amikabên nykôt katàt memã amikukràdjà jarê. Djãm kabên ny punu got. Axwe mextire. Metĩndjwÿnh ne mexo, umao me rer mex ne. Nhym kabên nydjwÿ ã mexo, umao ane. Nhym kam ta, Metĩndjwÿnh kĩntire ta ne imã amijã ujarênh ny jarên ijano ba kam ô'ã memã arênh tẽ, memã 'ã idjujarênh tẽ.

*Kritu kum Paur kaprĩ ne kute àpênh 'ã mênh.*

<sup>12</sup> Ë, akmere, mrãmri ne Kritu Jeju gu banhõ Bẽnjadwÿr amim idja. Kum idjapênhmã ne amim idja. Nãm amikajmã'ã ima, ije 'ã ingrà tÿx ne kanga kêt mã kôt tu iman amim idjan imã idjapênh jarê.

—Dja ga imã apê, ane. Ne kam kadjy imã tÿx jadjà ba kam kum idjapênh mex ar iban kôt kum amikĩnh jarê. Mrãmri ne Kritu Jeju imã mexkumrêx ba kam kum amikĩnh jarê.

<sup>13</sup> Amrêbê ne ba Jeju japrÿ ar o iban arĩk ùno iban Jeju nhõ me jao ibikênhõ iba. Nã bãm te Jejukam ijaxwe nhym tu kum ikaprĩn kam amim idja. Nã, mrãmri ne tu kum ikaprĩ. Kraxje ije amikajmã'ã Jeju mar kêt kam ije amimar kêt nhym bi kum ikaprĩ. <sup>14</sup> Nãm gu banhõ Bẽnjadwÿr tu ukaprĩkôt kum ikaprĩ raxkumrêx ne prĩne ijo djuw mex. Djãm ukaprĩ kêt got. Kum ikaprĩ rax ba arÿm jakam ije amikajmã'ã amim markumrêx. Ije amikajmã'ã Kritu Jeju markumrêx ne imã abê:kumrêx.

<sup>15</sup> Ë, mrãmri ne me abenmã kum,

—Kritu Jeju arÿm pykamã ruw, kute me axwe pytãrmã ne ruw, ane. Mrãmri ne me abenmã arê. Kabên ja dja me tu markumrêx ne amijamakkrekam kunhõ. Be, kute me axwe pytãrmã ne pykamã ruw.

Ba ne ba ijaxweo me axwe kunĩ jakre. <sup>16</sup> Te ijaxwe rax nhym bi kum ikaprĩ rax ne. Jeju Kritu kute akrãnmã meo tẽm nhym me kute mar kadjy. Te ijaxwe raxo ije me kunĩ jakrenh nhym mã Jeju kute akrãnmã prĩ'ã ijo tẽmja pumũ. Mÿkam? Godja me'õ kute ijaxwe pyrãk ne kute Jeju japrÿ jabej dja ikôpdji'ã ã ikudjwa anen tu amim Jeju kamnhĩxkumrêx ne kam ikudjwa tyk nhi-jukri tĩn rã'ã rã'ã kadjy. Kadjy ne Jeju kum ikaprĩn akrãnmã prĩ'ã ijo tẽ. Kam ne ba amã,

—Jeju kute me axwe pytãrmã ne pykamã ruw, ane.

<sup>17</sup> Be, Metĩndjwÿnh djukaprĩja pumũ. Kumã dja me rax jarê. Djãm bẽnjadwÿr ngri got. Dja memã Bẽnjadwÿr rax rã'ã: rã'ã Bẽnjadwÿr rax. Dja tyk kêt kumrêx ne. Me kute noo omũnh kêt kumrêx ne. Kubê Metĩndjwÿnh pydji. Atemã 'õ kêt kumrêx. Kumã dja me rax jarên kum uma jarên mex jarê. Dja me kum arênh rã'ã: rã'ã ne. Mrãmri. Tãm ne ja.

<sup>18</sup> Ë, ikra Ximoxi, akmere, ba arÿm amã ikabên jarê. Gora ikabên ja ma. Amrêbê ne me Metĩndjwÿnh kabên jarênh djwÿnh adjapênhmã akabin prĩne adjapênh'ã amã karõ. Kôt ne ba amã ikabên ja jarê. Ë, dja ga ar ikabên ja man kôt atÿx ne. Ë, ba me abenwÿr prõt'ã atÿx jakre. Ë, gora atÿx. Gora atÿx ne amã me uma kêt ne kãj bê memã Metĩndjwÿnh kabên jarê gê me amikajmãtã kuma. Kute me tÿx kum me uma kêt ne tu kute abenwÿr prõtja pyrãk.

<sup>19</sup> Nã, dja ga ã anen Jeju'ã angrã tÿx ne amim mÿjja mexbit man kôt amijo aban kam amikam ajaxwe 'õ mar kêt kumrêx ne ar aba.

Nhym bep me kwÿ ne me arÿm Jeju'ã ngrã tÿx kêt ne kôt amijo ba kêt ne kam arÿm kangan amijo ajkê. <sup>20</sup> Be, Imenemê Arexãrimê ne ar arÿm Jeju kangan amijo ajkê. Arÿm ne ar amijo ajkê. Kam ne ba arÿm Xatanajmã ar kanga, ar kute Jeju japrÿ kêt kadjy ne ba arÿm kum ar kanga.

## 2

<sup>1</sup> Be, akmere, ba amã arê ga aman amũ idjô'ã memã arê. Dja me Metĩndjwýnhmã mã kabên ne kum me kunĩ jarê. Mã ne mete Metĩndjwýnhmã kabên kute? Dja me kum aben jarên kum abeno a'uw. Ne kam jãm meo akêx ne me jadjwý kum meo a'uw. Ne kôt kum ôdjãnh jarên kum amikĩnh jarê. <sup>2</sup> Nà, dja gu me kum pykakam me bēnjadjwýr rũnhjao a'uw ne kam ajte me bēnjadjwýr kry kute meo ba jadjwýo a'uw.

Mýkam? Bir, me kute akrãnmã me bajo ba gu me badjumar mex ne ar baba kadjy. Kam dja gu me Metĩndjwýnh kabēnkôt ar baba ne kôt ar amijo baba katàt ne. <sup>3</sup> Be, me ã kute Metĩndjwýnhmã kabēno anhýrkam mexkumrêx. Kam dja Metĩndjwýnh mekam kĩnhkumrêx. Metĩndjwýnh kubê me bapytàr djwýnh dja mekam kĩnhkumrêx.

<sup>4</sup> Nà, kute me kunĩ pytãr prãm kumrêx. Nãm arým memã katàt kabên nhym me kute tu markumrêxmã. <sup>5</sup> Nà, Metĩndjwýnh pydjii ne kam ajte kute Bãm'ã me bamēnh djwýnh pydjii, kubēngôkre,\* kubê ne Kritu Jeju. Me bajaxwekam ne gu me Metĩndjwýnh'ýr babôx kêt ne. Nhym kam kra ta amijo kubēngôkren me bawýr bôx ne kam Bãm'ýr me bajo bôx. Gu me kam arkôt baba. Kute Bãm'ýr me bajo bôx djwýnh pydjii. Atemã 'ô kêt, kubēngôkre, kubê ne Kritu Jeju.

<sup>6</sup> Jeju ta, kute memã amikangan me kunĩ pãnh tyk, tãm ne amrêbê Metĩndjwýnh 'ã akati jakre nhym arým 'ýr bôx nhym kam arým amijo aptàn memã amikangan me kunĩ pãnh ty, me kunĩ kute mar kadjy. Me kunĩ kute,

—Mrãmri Metĩndjwýnh kum me bajabên kute me bapytãrmã, anhýr kadjy. Kadjy ne ty.

<sup>7</sup> Kam ne Metĩndjwýnh ijano ba tẽ. Ba ikumrêx itēm ne ije memã Metĩndjwýnh kute me utàr jarēnhmã. Jeju kute ijanorkôt ne ba me bajtemdjwý'ýr tēn bôx ne memã kàj bê Metĩndjwýnh'ã ajarê. Nã bãm memã Metĩndjwýnh kabēn katàtja, 'êxnhĩ kêtja jarē nhym me amikajmã'ã kuma. Kadjy ne

ijano ba tẽ. Mrãmri ne ikabēnja. Ijêxnhĩ kêt kumrêx.

<sup>8</sup> Ije, ije ar amã Metĩndjwýnh jarēnh gar aje kum akabēnmã ba ate o akno. Ba akubyn ar amã arê gar ama.

Dja pyka kunĩkôt mete abeno bikprõnhkam me my Metĩndjwýnhmã kabên. Dja me prĩne Metĩndjwýnhmã amijarê. Me mexo mexkumrêx, me kute mýjja punu 'ô mar prãm kêt, me ja dja me kum kabên. Nhym bep me ngryknhĩ, me kute kabēno aben japanh, me tãm dja me kum kabên kêt ne.

*Me nire kute akrãnmã amijo bamã.*

*Kô k 14.34; Xit 2.3; Ped k 3.1*

<sup>9-10</sup> Nhym me niredjwý. Dja me nire kute Jeju marja akrãnmã amijo ba mexkumrêx, kwãrĩk wãnh amimex ne me my nokam mrãnh kêt. Dja ga me apijãm ne ar aba. Mýkam dja ga me akrãkãbito mex? Nã gãm me amikakrwýnhmē akunhērmē angãmē kubēkà mexmē o amimex ne ar aba. Me akrãkãbit ne mex. Me my nomã amrãnh kadjybit aje amikrã ngrãnh, amikakrwýnh, ne amimex, ja ne punu. Bep kati, me nire kute,

—Ba ije Jeju mar, anhýrja dja apýnh kabên mexo amiptàn o amimex.

<sup>11</sup> Me kute Metĩndjwýnhkôt abeno bikprõnhkam dja me nire anhikrên nhýn Metĩndjwýnh kabēn maro nhý. Akrãnmã dja me Jeju nhõ me jao ba djwýnh kabēn maro nhýn amijamakkrekam kunhõ. <sup>12</sup> Kwãrĩk wãnh me nire dja me me my jakre kêt ne me mymã kabēn jarēnh kêt ne. Nhym bep me my gēdja me me niremē me mymē me akre nhym me nire anhikrên me kabēn maro nhý.

<sup>13</sup> Mýkam? Bir, Metĩndjwýnh ne mybê Adão kumrêx nhipêx ne kam atãri nibê Ewa nhipêx ne. <sup>14</sup> Be djãm Xatanaj ne Adão noo akno? Kati, nija ne noo akno. Nhym kam nija arým Metĩndjwýnhkam amikrã. Be, kam ne ba amã,

—Kwãrĩk wãnh me nire dja me me my jakre kêt, ane.

<sup>15</sup> Nija ne te Metĩndjwýnhkam amikrã nhym mã Metĩndjwýnh kum me nire

\* **2:5** Kritu ne amijo kubēngôkre kute mrãmri ne apýnh me ô pyka djãri kunĩkôt me kunĩ: bēngôkreja pyrãk. Kubê kà jakamē me kakrãtykmē me babēngôkremē ne me kunĩ: bēngôkre. Me kamrômē me kukrãdjã kunĩ kubēngôkreo aben pyrãk. Jakam dja ga Karõ 17.26 jarēn ama.

jabêkumrêx ne me kra bixadjwÿr kutã me utà. Me nire kute Jeju marja gêdja me Jeju 'ãno dja ne mã kum me abêkumrêx ne kute mÿjja punu 'õ mar prãm kêtkam gêdja mexo mexkumrêx ne mã me my nomã mrãnh kêt. Godja me ã kute anhÿr jabej nhym Metïndjwÿnh me kra bixadjwÿr kutã me utà nhym me kra me bïn kêt ne.

### 3

*Kute ar kute Jeju nhõ me jao ba djwÿnhmã 'ã karõ.*

*Xit 1.6*

<sup>1</sup> Be mrãmri ne me abenmã kum, —Gêdja me'õ kute meo ba prãm jabej, kute Jeju nhõ me jao ba prãm jabej, mrãmri mexkumrêx. Nà, mrãmri mexkumrêx. Nà, kôt ne me kute arênhja.

<sup>2</sup> Be, mã gêdja Jeju nhõ me jao ba djwÿnh kute? Me axwe kêt ne kute amijo ba mex-tire nhym kam me me'ã kabên kêtja, me prõ pÿnh, me bixaêr punu kêt, me kute amipnênh ne ar ba, me kabôt kati, me kute meo djuw mex prãm, me kute memã Metïndjwÿnh'ã ujarênh prãm, me ja gêdja me Jeju nhõ me jao ba.

<sup>3</sup> Kwãrik wãnh me kum kadjwati kangô\* djãnh, me àkrê, me kute kabêno me apanh prãmja, me kute pi'ók kapribit mar ne kute amim o àptàrja, kwãrik wãnh me ja gêdja me meo ba kêt ne. Bep kati, me ukaprimê, me kute umar mex marja dja me Jeju nhõ me jao ba.

<sup>4</sup> Dja me'õ meo ba prãm jabej dja kumrêx amim prômê kra jakre, ne arkum mrãnh mex-tire gê ar omün kam adjwÿnhdjwÿ kôt mrãnh mexkumrêx. Dja amim ar jao ba mex nhym kra amakkre mex ne kabênkôt ar amijo ba nhym kam arÿm kôt Jeju nhõ me jao ba. <sup>5</sup> Nok ren me'õja ar meo ban kam prômê kra jakre kêtkumrêx ne kam Metïndjwÿnh nhõ me jabit me akre, mã gêdja on? Mã gêdja kam nê? Ije, mÿkam ne prômê kraja ar o ba mex kêt nhym kra jaxwe rã'ã? Ije kum bep nãm ren amim prômê krawã kumrêx jakren kam ren kôt Metïndjwÿnh nhõ me ja jakre.

Mÿkam ne prômê krawã ar o ba kêt ne kam Metïndjwÿnh nhõ me jabit ar o ba?

<sup>6</sup> Kwãrik wãnh me'õ ajbir kute Jejuo aminhõ ny'õ'ã Jeju nhõ me jao ba djwÿnh mênh kêt. Mÿkam? Bir, kute amiraxo àmra nhym kam ren Metïndjwÿnh kute o bikênh karõ dja me kute Jejuo aminhõ ny'õ'ã meo ba djwÿnh mênh kêt. Ne ren amiraxo amra nhym ren Metïndjwÿnh o ajkê. Mrãmri kute Xatanajo bikênhja pyrãk. Xatanaj kute amiraxo àmra nhym kam Metïndjwÿnh kute prïne o bikênhja pyrãk. Ne ren me'õ ajbir kute Jejuo aminhõ ne ren meo ban ren amijo amra, Xatanajkôt amijo amra nhym ren Metïndjwÿnh adjwÿnhdjwÿ o ajkê.

<sup>7</sup> Nhym bep kati, Jeju nhõ me jao ba djwÿnh dja amijo ba mex-tire nhym kam me kâtãmdjwÿ kum kïnh ne kum mex jarê. Nãm ren arïk ar ba nhym kam me kâtãm rãn 'ã kabên ne. 'Ã kabên nhym kam rãn Xatanaj ikôta, Xatanaj meo ba djwÿnhja nhikôta.

<sup>8</sup> Nhym Jeju nhõ me jao ba djwÿnh jatãri me àpênhjadjwÿ dja me katãt mrã gê me me'ã kabên kêt. Dja me kabên mexmê me kabên punuo aben nhikjê kêt. Dja me kum kadjwati kangô† djãnh kêt. Kwãrik wãnh gê me pi'ók kapri prãmebit me noo biknor prãm kêt. <sup>9</sup> Dja me amim Metïndjwÿnh kukràdjã markumrêx ne 'ã ngrã tÿx ne. Metïndjwÿnh kute me bamãbit amikukràdjão amirïtja, kukràdjã tãmbit dja me 'ã ngrã tÿx ne maro ba ne mÿjja mexbit mar ar o ba. Mÿjja mexbit mar ar o ban kam amikam axwe 'õ mar kêt. Kadjy dja me Metïndjwÿnh kukràdjã'ã ngrã tÿx ne ar o ba. <sup>10</sup> Dja me Jeju nhõ me jao ba djwÿnh jatãri me àpênhja kumrêx kabi nhym me kabên mex ne kam ar kôt àpênh ba. Godja me mrãmri mexkumrêx jabej ne kam arÿm àpênh ar ba.

<sup>11</sup> Nhym Jeju nhõ me jao ba djwÿnh jatãri me àpênh prõjadjwÿ. Me adjwÿnhdjwÿ dja me katãt mrã gê me me'ã kabên kêt. Dja me me kà mex jarênh prãm kêt. Dja me bixaêr punu kêt ne ar ba. Dja me prïne mrãnh mex-tiren kabên pÿnh ne arê. Dja ã Jeju nhõ

\* **3:3** Mÿjja me kute o kôm ne kôt bibãnh kunja, kadjwati kangômê uba kangômê, mÿjja kangô kunï ne me kum kadjwati kangô jarê. † **3:8** Mÿjja me kute o kôm ne kôt bibãnh kunja, kadjwati kangômê uba kangômê, mÿjja kangô kunï ne me kum kadjwati kangô jarê.

me jao ba djwýnh jatãri me àpênh prõja ã ane.

<sup>12</sup> Be, Jeju nhõ me jao ba djwýnh jatãri me àpênh gêdja me prõ pýnh ne. Dja me õ kikre kumrêxkam amim ar ja jakren arkum mrãnh mexkumrêx gê ar omûn kam ad-jwýnhdjwý kôt mrãnh mexkumrêx. Dja me amim krao ba mexkumrêx gê ar kabên mexkumrêx ne ar ba. <sup>13</sup> Godja me atãri me àpênhja mrãmri àpênh mex ne kam arým memã amimexo amirít nhym me kâtãmja arým me mex pumûn kam kum me kïnh. Gêdja mekam amikam pijãm kêt ne kãjmã djan tu memã Jeju'ã ajarê. Me kute amim Kritu Jeju mar tũmkam tu memã 'ã ajarê. Bir be, dja ã Jeju nhõ me jao ba djwýnhmê atãri me àpênhmê ã ane.

<sup>14</sup> Be, nã bãm amã ikabên'ã pi'òk no'òk ne amikukãm ano. Dja ba ã wãm kôt tẽ. Nã bãm amim itẽm djã ma. <sup>15</sup> Nãr kon birãm dja ba amikrà ga prĩne omûn kam kôt memã arẽ, me kute mar kadjy. Metĩndjwýnh kra kunĩ kute kôt ar amijo ba mar kadjy. Kadjy ne ba amã pi'òk no'òk jano. Apýnh pyka kunĩkôt ne me bakwý arým amijo Jeju pytã nhym Metĩndjwýnh arým kôt me bajo kra. Gu me kôt arým apýnh banhõ pyka djãri kam aprakamã kôt aben pydji, Metĩndjwýnh tĩnjakôt mã pyka kunĩkôt aben pydji. Ne me kâtãmmã Metĩndjwýnh kabên jarẽnh ar o baba, Metĩndjwýnh 'êxnhĩ kêt ne kute katãt kabên jarẽnhja memã arẽnh ar o baba.

<sup>16</sup> Bir be, djãm mýjja kakrit, djãm mýjja prĩre, djãm mýjjao bikẽnh ne gu me arým amim kuman kam amim kamnhĩxbê ar baba? Djãm mýjja ngri: got me tebê kute mar ne ate krãmã? Mrãmri ne Jeju ra:xi.

Nãm amijo kubêngòkren† kato.

Nhym Metĩndjwýnh Karõ kabin axwe kêt mã katon kôt memã arẽ.

Nhym kadjy mrãnh djwýnhdjwý arek omûnh ar o ba.

Nhym me apýnh me õ pyka djãri kãj bê memã 'ã ujarẽnhõ ajmã.

Nhym me kam pyka kunĩkôt tu amim markumrêx ne.

Nhym kam Metĩndjwýnh kãjkwamã o wabi, õ kãjkwa mextiremã o wabi. Õ kãjkwa mexo kute pykabê mýjja kunĩ jakrenhjamã o wabi.

Nãm ã Jeju raxo ane.

## 4

### *Kubê me kabên 'êxnhĩ pyma.*

<sup>1</sup> Be, akmere. Anhýr djwýnhrà m Metĩndjwýnh Karõ arým prĩne me bamã arẽ, ne,

—Pyka kute o ino rer 'ýrkam dja me kwý amibê Jeju kangan ate amijo ba. Arým kum kïnh kêt ne kam ate me karõ 'êxnhĩja kabên ma, me karõ djujarẽnh punubit man kôt amijo ba, ane.

<sup>2</sup> Nã, mrãmri me kwý dja me me karõ djõ'ã me akre. Me ajkwao bit kute Jeju mar ne 'êxja, me tãm ne me òkre kadjwýnhbê kute mýjja punubit markam pijãm kêt mex ne arĩk 'êx ba ne me karõ 'êxnhĩ djõ'ã me akre ne memã kum,

<sup>3</sup> —Kwãrĩk wãnh abenwýr mör kêt. Dja ga me tu akuprýkumrêx ne ar aba, ane. Ne ajte mry'õ nãr me àkur djã'õ mekbê uman memã,

—Kwãrĩk wãnh krẽn kêt, ãm omũ, ane. Nhym bep kati, Metĩndjwýnh ta ne me bamã mry, me badjãkur djã nhipêx, me baje 'ã kum amikĩnh jarẽnh ne krẽn kadjy ne me bamã ipêx. Me baje amim Jeju markumrêx ne kam kôt baje mýjja marja, me bamã ne Metĩndjwýnh me banhõ kwý krẽn djã'ã apýnh mýjja nhipêx.

<sup>4</sup> Be, mýjja kunĩ Metĩndjwýnh kute ipêxja ne mexkumrêx. Djãm mete mry nãr djwý'õ kanga kadjy ne Metĩndjwýnh ipêx? Arkati, me kute Metĩndjwýnhmã 'ã amikĩnh jarẽnh ne tu kute amim byr ne krẽnmã ne ipêx. <sup>5</sup> Metĩndjwýnh kabênkôt arým mrymẽ apýnh me badjãkur djã mexkumrêx. Mýjja kunĩ ne arým mexkumrêx. Gu me arým 'ã kum amikĩnh jarẽ nhym arým mexkumrêx.

<sup>6</sup> Akmere, dja ga memã arẽ, me kute Jekukôt abeno kamymã ikabên ja jarẽ. Godja ga memã ikabên ja jarẽnh arým mrãmri abê Kritu Jeju nhõ àpênhkumrêx. Nã,

† 3:16 Kritu ne amijo kubêngòkre kute mrãmri ne apýnh me õ pyka djãri kunĩkôt me kunĩ: bêngòkreja pyrãk. Kubê kã jakamẽ me kakrãtykmẽ me babêngòkremẽ ne me kunĩ: bêngòkre. Me kamrômẽ me kukrãdjã kunĩ kubêngòkreo aben pyrãk. Jakam dja ga Karõ 17.26 jarẽnh ama.

Metĩndjwýnh kabēn ne gu baje tu amim markumrêxja, kôt dja ga arek amijo tēn amijo tēn kam atýxkumrêx. Jeju kukràdjà mexkumrêx, tām ne ga arým kôt amijo tē. Dja ga arek kôt amijo tēn amijo tēn arým atýxkumrêx. Atýx ne arým Kritu Jejumã adjàpēnh mex ne.

<sup>7</sup> Nhyim bep me tūmre'ã ujarēnh kajgoja dja wānh nō. Tām ne punu. Kati, dja ga prĩne Metĩndjwýnh kukràdjàkôt amijo tē. Katàt amrānh kadjy dja ga arek amijo tēn arek amijo tēn kam amityxmã amijakre. Djām akrākà'ã ne ba amã ane? Kati, akad-jwýnhbē atýx'a ne ba amã ane.

<sup>8</sup> Mrāmri ne me ĩkrākà týx kadjybit amijo djuw mex. Ja ne kàjbē mex. Nhyim bep me kadjwýnhbē me týxja mete Metĩndjwýnh kukràdjàkôt amijo tēm kam týx, ja ne mrāmri mexkumrêx, tūmrām mexkumrêx. Pyka jakam gu badjumar mex ne ar baba kadjy mex. Ne kam ajte batyk nhijukri akubyn batĩnkam kadjy mexkumrêx. Kadjy ne ba amã,

—Metĩndjwýnh kukràdjàkôt amijo tēn kam kôt atýx, kôt amex, ane.

<sup>9</sup> Mrāmri ne kabēnja nhyim me abenmã arē. Kabēn ja dja me tu markumrêx ne amijamakkrekam nhōrkumrêx. <sup>10</sup> Metĩndjwýnh kute me kunĩ pytār djwýnh, bep me baje amikajmātã marja ne mrāmri kubē me bapytār djwý:nhkumrêx. Mrāmri ne gu me amim Metĩndjwýnh kamnhĩxbē ar baba, Metĩndjwýnh tĩnja kamnhĩxbē ar baba. Kam ne gu amikukãm kuman kam badjapēnh rax ne memã arēnh tē, batyk djà kēt ne memã arēnh tē.

*Metĩndjwýnhmã àpēnhkumrêxmã kum 'ã karō.*

<sup>11</sup> Be, akmere, dja ga apijām kēt ne tu memã ikabēn ja jarēn memã Metĩndjwýnh kukràdjà jarē. <sup>12</sup> Kwārĩk wānh gē me amã,

—Ÿgē, e kum djām ajabatānh ne ga ar me akreo aba, anhýr kēt. Bep kati, dja ga te ajbir ajabatānh ne mã katàt mrã gē me ajã amijakre, me kute amim Jeju marja ajã amijakre. Kadjy dja ga akabēn mexbit jarēnh ar o aban amrānh mex ne amã me abēn amim Jeju markumrêx ne 'ã angrà týx ne aprō prām kēt ne ar aba. Dja ga ã ane

nhyim me ajã amijakren ã akudjwa amijo anhýro bao ane.

<sup>13</sup> Dja ga kaj bē memã Metĩndjwýnh kabēn jarēn memã Metĩndjwýnh kabēno amirĩt ne memã kukràdjà jarē. Ja dja ga 'ãno adjām rã'ã ba awýr bōx. Ba ibē Paur dja ba awýr bōx.

<sup>14</sup> Amrēbē ne me kute Metĩndjwýnh kabēn jarēnh djwýnh arým Metĩndjwýnhmã adjan amã,

—Ē, Metĩndjwýnh ne arým amijo apytà ga kum adjapēnhmã. Ta dja amã týx jadjà ga kam atýx ne ar kum adjapēnh aba, ane. Nhyim kutã Jeju nhō me jao ba djwýnh akrã'ã ikra jadjuw, ga kam Metĩndjwýnhmã adjapēnh ar aba. Kwārĩk wānh Metĩndjwýnh kute amim adjarwāo abiknor kēt. Memã Metĩndjwýnh kukràdjà jarēnh 'ãno dja ne mã memã 'ã adjujarēnh aba.

<sup>15</sup> Be, dja ga ikabēnja tu markumrêx ne amijamakkrekam anhōn kôt amijo mō. Dja ga ã amijo atēmo anen arým amrānh mexkumrêxo tēn o tē nhyim me kunĩ arým amrānh mexkôt apumün kôt amã kato. <sup>16</sup> Ē, ajaxwebē amipnēn amrānh katàt kadjybit amima. Gora memã Metĩndjwýnh kabēn jarē. Gora memã arēnh 'ãno dja. Godja ga anen arým amiptàn kam o me jadjwý pytà, me kute akabēn maro ýrjadjwý pytà. Tām ne ja.

## 5

*Mebēngētemē me 'uwtĩ'ã kum karō.*

*A Xim 2.24*

<sup>1</sup> Ē, godja me kute amim Jeju marwã 'ō, mebēngētte 'ō, me'ōkam amikrà, kwārĩk wānh ga kum abēn týx kēt ne akrānmã kum akabēn ne kum,

—Kwārĩk wānh ga ã anhýr kēt, ane. Mrāmri ne me kra djwýnh kute bāmã kabēnja pyrāk, akrānmã kum akabēn. Dja ga me kraremē me nōr nyreo akamyn me adjwýnhdjwýmã akabēn mex jarē. <sup>2</sup> Dja ga mebēngēxteo anān me adjwýnhdjwýmã akrānmã akabēn. Dja ga me kra pýnhmē me kurerero akanikwýnhkumrêx ne memãdjwý katàt akabēn jarēn mekam apijām ne meo akanikwýnhkumrêx. Dja ga ã me kute amim Jeju mar kunĩmã akabēn jarēnh ane.

<sup>3</sup> Ë, akmere, ba amã me 'uwtĩ'ã karõ, ga amũ idjõ'ã memã arẽ. Me kute amim Jeju marwã kute akrãnmã mebê mjên tykjao djuw mexmã. Me kute amim Jeju marwã dja me me 'uwtĩbito djuw mex. <sup>4</sup> Nhym bep djãm me'õbê mjên ty nhym arým kra nãr kon tãmdjwý 'õ arým ta amim o djuw mex ne. Me'õ kra 'õ nã kute amim o djuw mex nhym abatãnh ne arým amipãnh amim não djuw mex ne. Ne me'õ tãmdjwý 'õ kwatynh 'õ amim tãmdjwýo djuw mex ne. O djuw mex nhym abatãnh ne kam amipãnh kwatynho djuw mex ne. Me kute mrãmri Metĩndjwýnh mar jabej dja ã õ kikre kumrêxkam amim me 'uwtĩo djuw mexo anen kam atãri amũ me jadjwý o djuw mex ne. Kam ne Metĩndjwýnh arým mekam kĩnhkumrêx ne.

<sup>5-6</sup> Ate gêdja me'õbê mjên ty nhym arĩk ar ba. Nãm amidjwýnhbit amiman ar amijo ba. Ne kam kute me'õ tyk pyrãk. Tĩnri kute me'õ tyk pyrãk, kute Metĩndjwýnh mar kêt kam, arĩk ar bakam. 'Uwtĩ kajgo ne wã. Kwãrĩk wãnh me wã. Me tãm dja gar aje Jeju marwã o djuw mex kêt. Nhym bep atemã me'õ mjên kubê tyk nhym kam ate: ar ba ne kam amijã Metĩndjwýnh kamnhĩxkumrêx ne kam kum kabên ne kum amijo a'awn kam ajte jãm me jao akêx ne ajte kum meo a'uw. Akamãtkammê a'urimê kum kabên 'ãno dja. Me'õ tãm ne mrãmri 'uwtĩkumrêx. Tãmbit dja gar aje Jeju marwã o djuw mex ne.

<sup>7</sup> Dja ga memã ikabên ja jarê gê me'õ kra nãr kon me'õ tãmdjwý õbikwa 'uwtĩo djuw mex. Dja o djuw mex gê me 'ã kabên kêt. <sup>8</sup> Godja me kute amim Jeju mar 'õ ta ùrkwã djwýnhkam amim me jao djuw mex kêt ne kam arým mrãmri axwen arým Jeju kabên kanga, ne kute axweo me kãtãmja, me kute Jeju mar kêtja jakrenh mex ne.

<sup>9</sup> Ë, ba amã me 'uwtĩ nhõ pi'õk'ã karõ. Dja ga me 'uwtĩ nhidji pi'õk no'õkkam anhõ, me kute amim Jeju marwã kute kôt meo djuw mex kadjy. Ë, kwãrĩk wãnh me abatãnh nybê mjên tykwã kwãrĩk wãnh me 'uwtĩkôt pi'õk no'õkkam idji nhõr kêt. Kubê mjên tyk bêngêxtebit dja ga idji nhõ gê me kute amim Jeju mar meo djuw mex.

Djãm ori arým 'ã amex 60 apêx jabej? Djãm ori mjên tĩnri krõ'ã mjên kêt nhym

kam kubê mjên tyk nhjukri me kute krõ'ã o prõ kêt jabej? <sup>10</sup> Djori kum mýjja mexbit kĩnh ne ar o ba nhym me kunĩ arým kôt omũn abenmã arênh jabej? Djori amikõpdji'ã kra jakreo tẽ nhym kudjwa mexkumrêx jabej? Djori õbikwa kêt kam meo djuw mex jabej? Djori prĩne Metĩndjwýnh nhõ me wão djuw mex ne memã õdjãnh jabej? Djori kum me umar punu kaprĩ jabej? Djori kute mýjja mexo amiptãrkôt kute mýjja mexbit mar jabej? Djãm ori ã kute anhýr jabej mrãmri mexkumrêx, me 'uwtĩkôt pi'õk no'õkkam idji nhõ, me kute amim Jeju marja kunĩ kute me 'uwtĩ jao djuw mex kadjy.

<sup>11-12</sup> Nhym bep kwãrĩk wãnh ar abatãnh nybê mjên tykja kwãrĩk wãnh pi'õk no'õkkam me 'uwtĩ ro'ã idji nhõr kêt. Mýkam? Bir, ar 'uwtĩja kute õbê,

—Ba ikuprý gê me'õ iwýr mõr kêt kumrêx. Ba tu Kritumã idjãpênbit, anhýrja tu o aknon ajte kum me my kĩnh nhym me'õ ýr mõr prãme kum Kritu kĩnh kêt ne kubê amijo akêx nhym me arým 'ã kabên ne.

<sup>13</sup> Nhym ar kam kum ukangabit ma ne kam kikremã ipõko tẽ. Djãm arkum ukangabit? Kati, nãm ar kabên prãmdjwý, ne me'ã kabên tẽ, me pijãm djãbit, mýjja punubit jarênhõ tẽ.

<sup>14</sup> Kam ne ba memã kum,

—Dja ar abatãnh nybê mjên tyk ajte mjên ne kam amim kra mý ne kramê mjêno djuw mex ne akrãnmã ãpên ar ba. Be, nã bãm ã ar abatãnh nybê mjên tykjamã ane. Mýkam? Bir, me bakurê djwýnh kute me bajã kabên kêt kadjy. <sup>15</sup> Bir be, Ar kubê mjên tyk kwý arým Jeju kangan Xatanajkôt amijo ba. Kam ne ba amã arẽ.

<sup>16</sup> Nhym bep me kute amim Jeju mar ni 'õ nãr my 'õ õbikwabê mjên tyk jabej ta dja amim õbikwa 'uwtĩo djuw mex. Nhym ate me kute Jejukôt aben pydjija gêdja me'õ 'uwtĩkumrêx ne ate: ar bajao djuw mex ne.

*Me kute kãjmã meo ba djwýnh kamênhmã.*

<sup>17</sup> Ë, me jadjwý. Jeju nhõ me jao ba djwýnh kute prĩne meo baja, ar tãm dja me kãjmã me kamê. Jeju nhõ me jao ba djwýnh kute memã Metĩndjwýnh kabên jarênh ne kute memã o amirĩtkam ãpên rax. Me tãm dja me mrãmri kãjmã me kamên memã o

pãnh mex ne. Ar kute memã Metĩndjwýnh kabẽn jarẽnh pãnh.

18 Kam ne Metĩndjwýnh kabẽn'ã pi'òk no'òkkam memã,

—Mryti kute amã àpênh ar ba ne kute amã bàygogo 'ykà ka'uko ipòko ãmja kwãrĩk wãnh inhu djuwpre kêt gẽ ta àpênh pãnh àkur tẽ. Nãm mryti'ã Metĩndjwýnh nhõ me jao ba djwýnh jakren àkur'ã kum pãnh jakre. Jeju nhõ me jao ba djwýnhmã me kute o pãnhmã. Ne ajte Metĩndjwýnh kabẽnkam ne,

—Me àpênh ne pãnh, ane. Me àpênh me mãnhkutã tãm gẽdja memã o pãnh, ane. Kam ne ba amã,

—Dja me Jeju nhõ me jao ba djwýnhmã o pãnh mex, ane.

19 Ë, mýjja 'òdjwý dja ba amã arẽ. Gẽdja me Jeju nhõ me jao ba djwýnh'ã kabẽn ne arĩk me kàtãm jarẽ ga tu ate akrã. Djãm me 'èxnhĩ kêt got. Nhyim bep me'ò ar amãnhkrut nàr kon amãnhkrut ne ikjê kêt ne mrãmri kute noo axwekòt omũnh ne axikòt arẽnh ga kam arým tu 'ýr tẽn kum akabẽn jarẽ gẽ amim kato. 20 Godja mrãmri Jeju nhõ me jao ba djwýnh kute mekam axwe jabej dja ga tu me kute amim Jeju mar nhipòkri kum abẽn tỳx, me kute maro ýrja tĩn prãm ne axwe kêt kadjy.

21 Ë, ba amã mýjja 'òdjwý jarẽ. Dja ga tu memã akabẽno aben pyræk. Dja ga tu me kunĩmã axikòt akabẽn.

Ë, Metĩndjwýnhmẽ Kritu Jejumẽ Metĩndjwýnh kute amijo kadjy mrãnh djwýnh pytàr ja, ar kute ikabẽn mar ne ikòt kabẽnkam ne ba mrãmri tu amã ikabẽn jarẽ.

Ë, gora ikabẽn ja ma. Ikabẽn kunĩ ma, prĩne ikabẽn ja ma. Ë, dja ga me kunĩmã akabẽno aben pyræk. Kwãrĩk wãnh me umaje anhõkre kadjwýnhbê amim,

—Be, inhõbikwa ne ja. Ba kum ikabẽn kêt, anhýr kêt. Dja te anhõbikwa, ga tu kum akabẽn jarẽ, apijãm kêt ne tu kum akabẽn jarẽ.

Nàr kon, kwãrĩk wãnh anhõkre kadjwýnhbê amim,

—Be, tãwã ne õbikwa krãptĩ. Ba kum ikabẽn kêt, anhýr kêt. Dja te õbikwa krãptĩ ga tu kum akabẽn jarẽ, amã me uma kêt ne

tu kum akabẽn jarẽ. Dja ga tu me kunĩmã akabẽno aben pyræk.

22 Ë, kwãrĩk wãnh ga arĩk aje me kabi kêt kam Metĩndjwýnhmã me umjýr kêt, kum àpênh kadjy kum me umjýr ne 'ã anhkra jadjwýr kêt. Dja ga anen ano katon tu mar kêt ne Metĩndjwýnhmã me'ò dja nhym arým mekam amikrão ba jabej ga kam ga mãn kute ajaxwe pyræk. Kwãrĩk wãnh ã anhýr kêt ne mekòt ajaxwe kêt. Ga dja ga tu katàt mrã.

23 Ë, atikkrekam akanê prãm kam ne ga akanê prãm ne. Kadjy dja ga uba kangò kwý ikò. Uba kangòmẽ ngòmẽ apýnh dja ga o akòmo tẽ.

24 Ë, me kwý ne me axwekam amirĩtkumrêx. Nhyim me kunĩ kòt omũn arẽnhò kumex. Nhyim kam me memã axwe pãnh jarẽ. Nhyim bep me kwý ne me axwekam amirĩt kêt ne. Metĩndjwýnh gẽdja tũmrãm memã o amirĩt ne memã kum katon memã pãnh jarẽ nhym me kam kòt omũ. 25 Nhyim me mexdjwý ne me amirĩt ne. Nhyim me abenmã me arẽ. Nhyim me kwý apdju ne. Djãm mrãmri tu bipdjurkumrêx? Kati, Metĩndjwýnh gẽdja tũmrãm memã me mexo amirĩt ne, nhym me arým kòt omũ.

## 6

*Me ò àpênh kajgoja'ã kum karõ.*

*Ep 6.5; Kor 3.22; Xit 2.9; Ped k 2.18*

1 Ë, akmere, dja ga me memã àpênh kajgo ar bawã, me kute meo pãnh ne amim me pa 'amýnh nhym me memã àpênh kajgo ar ba ne kute amim Jeju mar wãdjwýmã arẽ gẽ me ò bẽnjadjwýr kabẽn kòt amijo ban prĩne kabẽn ma. Mýkam? Bir, me kàtãm kute Metĩndjwýnh japrý kêt kadjy, ne kute Metĩndjwýnh kukràdjãdjwý japrý kêt kadjy. 2 Dja ga ajte me memã àpênh kajgo ar bawãmã kum,

—Ë, djori ar anhõ bẽnjadjwýrwã ar akudjwa kute Jeju mar jabej kwãrĩk wãnh gar amã kurê kêt. Djãm ar aje Jejukòt abeno akamykam amã kurêmã got. Arkati. Dja gar tu kum adjàpênh mextire ne ar aba. Mýkam? Bir, ar akamýmã ne gar apê. Kute Jeju mar 'ò, Metĩndjwýnh kum abê 'ò, kumã ne gar apê. Kam dja gar kum adjàpênh



mextire ne ar aba, ane. ã me pardjamã ane.

Ë, gora prĩne memã ikabẽn ja jarẽn ikabẽn jao amirĩto aba.

*Nêkrêxkõtbit me umarja ne me umar mex kêtikumrêx.*

<sup>3-4</sup> Godja me'õ atemã kabẽn 'õ jarẽnho ku'ê prãm jabej arým amijo ajkẽn kam Bẽnjadwýr Jeju Kritu kabẽn mexja kubê kĩnh no kati ne kam kõt kabẽn kêt ne. Ne ajte Metĩndwýnh kute katàt gu bakrà pymjýr'ã ujarẽnha kubê kĩnh no kati ne kam kõt kabẽn kêt ne. Mrãmri ne 'êx ne amiraxbito amran kam kute mýjja mar kêt mexi. Nãm ajbãn ajmãn me kukràdjà kajgo mex mýr jabej memã akij. Ne kam kabẽnno me apanhbit mar prãm. ã me kute anhýr ne punu. Nãm me ã anhýr ban kam mýjja kukràdjà'ã ngryk ne abenbê meo bikjêro ban aben japrý ne aben kamnhĩx ar o ban <sup>5</sup> mã kabẽnno aben japanh ar o ba. Mýjwã ne arým me ja djumar djà ajmã o nhym me arým katàt kabẽnkumrêxja mar kêt. Nãm me nêkrêx prãme 'êx ne we,

—Be, ba amijo Jeju mar gê inhõ nêkrêx kumex ba kam amimexkumrêx ne, ane. Nãm me ã nêkrêx prãme amim 'ã karõo ane. Kam ne me abenkam axwe ar baja.

<sup>6</sup> Mýjkõt ne me umar mex ne amimex ar o ba? Bir, me kute Metĩndwýnh kukràdjàkõt amijo ba ne nêkrêx jabej umar kêt kam ne me umar mex ne ba. Ne amidjumar mexwão amimex ar o ba. <sup>7</sup> Mýj ne gu me banã tikkre kurũm amýn o axidjuw? Kati, nã gu me banhýkam axidjuw. Me batykkamdjwý, mýj ne gu me amýn o banhikwãn ty? Kati, nãm gu me banhýkam banhikwãn ty.

<sup>8</sup> Bir be, dja me banhõ kwý krẽn djãmẽ me banhõ kubêkà jabej, mrãmri, me bamãnhkutã. Kam dja gu me badjumar mex ne atemã mýjja 'õ jabej kêt. Metĩndwýnh dja me bajo djuw mex ne. <sup>9</sup> Nhym bep me kute amim nêkrêx nàr pi'òk kaprĩo àptàr ne kute o amimexja dja me amijo ajkẽ. Nãm me nêkrêx prãme ar axwe ba ne kam te kum nêkrêx prãm kêt mã ne mã nêkrêxbit ma. Ne kum mýjja kakritmẽ mýjja punubit kĩnh ne kõt arým amijo ajkẽ ne kam arým tu biknorkumrêx ne.

<sup>10</sup> Bir be, nãm me ã kum nêkrêx nàr pi'òk kaprĩbit kĩnh ne ã amijo ane. Ne arým amijo bikẽn mex ne. Mýkam? Bir, nãm me kum nêkrêxbit kĩnh ne kam ajbit man kam kõt apýnh axwe djari kunĩkõt amijo ba. Memã nêkrêx prãm kwý ne me arým Jeju mar kangan kam arým amijo ajkẽ, kaprĩo prĩne amijo ajkẽ.

*Akubyn Ximoximã kute katàt amijo bamã 'ã karõ.*

<sup>11</sup> Nhym bep ga, akmere, ga abê Metĩndwýnh nhõ àpênhkam dja ga mýjja ja kunĩmã akre rax ne. Katàt amrãnh kadjy mýjja jamã akre rax. Katàt amrãnh ne aje Metĩndwýnh kukràdjàkõt amijo aban aje amim Jeju kamnhĩxbê ar aban amã me abên aje akrãnmã amijo atêm, kam dja me ajo ajkẽ ga mã aje akrãnmã amijo atêm ne anhĩ djuwbôn ar abamã, tãm dja ga ama.

<sup>12</sup> Me kute amim Jeju mar ne kõt amijo tēm ne kute me kute aben rer pyrãk. Me kute aben rerkam ne me tỳx ne prõtobit prõt ne mebê apõx. Kam dja ga 'ã amijakren ã atỳxo anen mã Jejukõt amijo tẽ, kute me prõtja pyrãk. Gora ga ã anen kam atyk nhijukri atĩn rã'ã rã'ã rã'ã 'ýr tu abõxkumrêxmã. Kadjy ne Metĩndwýnh amiwýr ajuw. Kadjy ne ga me ipõkri memã katàt amijarẽn mex ne. Nã gãm memã kum,

—Be, arým ne ba tu amikajmã'ã Jeju markumrêx, ane. Nã gãm ane, nhym me apumũ. Kam ne ba amã,

—Arek amijo tẽn kam atyk nhijukri atĩn rã'ã rã'ã rã'ã 'ýr tu abõxkumrêx, ane.

<sup>13</sup> Ë, Metĩndwýnhmẽ Jeju Kritu ar kute ikabẽn mar ne ikõt kabẽnkam ne ba amã ikabẽn jarẽ. Metĩndwýnh ne mýjja kunõ tĩn djwýnh. Ta ne kute ikabẽn mar ne ikõt kabẽn. Kam ne ba amã ikabẽn jarẽ. Nhym Kritu Jejudjwý kute katàt amijarẽn mexja, kute bẽnjadwýrbê Põxu Piratu kabem katàt amijarẽn mexja. Ar kute ikabẽn mar ne ikõt kabẽnkam ne ba amã ikabẽn jarẽ ne amã,

<sup>14</sup> —Ë, gora prĩne ikabẽn man kõt amijo aban kudjar kêt ne amrãnh mextire gê me ajã kabẽn kêt. Dja ga mã ã anhýro aba rã'ã nhym arým Jeju Kritu gu banhõ Bẽnjadwýr kato. <sup>15</sup> Dja õ akati arým

'ÿr bôx nhym Metĩndjwýnh dja kum arê nhym arým bôx. Nà, Metĩndjwýnh ta pydji ne memã Bēnjadjwýr rax ne meo ba. Atemã 'õ kêt. Metĩndjwýnh umar mex ne kĩnhkumrêx tãm ne Bēnjadjwýr raxbê kumkatiti:. Kute bēnjadjwýr raxo pykabê me bēnjadjwýrja kunĩ jakrenh mexi. Kam ne kubê Bēnjadjwýr raxbê kumkatiti: ne meo ba. <sup>16</sup> Ajbit pydji ne tyk prãm kêt kumrêx, tĩn rã'ã: tĩn djwýnh. Ne irãkam ar ba, arngrokam ar ba. Nãm kam axwe 'õ kêt. Kam gēdja me tēp kêt kumrêx. Nhýnh got me'õ arým noo omũ? Arkati. Me'õ kute noo omũnh kêt kumrêx. Dja tũmrãm omũnh kêt rã'ã. Kumã dja me uma jarēnh rã'ã: rã'ã. Tãm dja me kàjmã kamēnh rã'ã rã'ã. Gēdja memã Bēnjadjwýr ne meo ba rã'ã rã'ã. Mrãmri.

<sup>17</sup> Ē, me pykakam õ nêkrêx kumexmã dja ga,

—Amijo arax kêt. Djãm nêkrêx kute me apytãrmã ne ga me nêkrêx kanãrrãm ar aba? Kati, kwãrĩk wãnh. Nêkrêx ne kajgo ne me abê biknor prãm. Kati, dja ga me Metĩndjwýnh kanãrrãm ar aba. Metĩndjwýnh ta ne kute òdjãnhkôt me bamã mýjja kunĩ nhõr, o kute me bakĩnh kadjy, ta kanãrrãm dja ga me ar aba, ane. <sup>18</sup> Gora me akabēn mexbit jarē ne mekam adjukaprĩn ar meo aba, ne memã anhõdjãnh ne memã anhõ mýjja ngrã, ane.

<sup>19</sup> Dja ga ã me õ nêkrêx krãptĩjamã arēnhõ ane gē me ã anen kam arým amityk nhi-jukri kadjy atemã kàjkwakam nêkrêxo aptã. Nêkrêx tãm ne mekbê biknor prãm kêt ne memã nõr rã'ã. Dja me kam arým 'ÿr bôx, mrãmri tu amitĩnkumrêx ja'ÿr bôx.

<sup>20</sup> Ē, Ximoxi, Metĩndjwýnh kute amã kukrãdjã rerja gora prĩne omũ. Gora 'ãno djan omũnh týx. Me kabēn kajgo, me kabēn tũm dja wãnh nõ. Rũm kum akre rax. Nhym me 'êxri amijo kute mýjja mar ne kam mýr jabej abenkam kangati dja adjwýnhdjwý wãnh nõ. <sup>21</sup> Mrãmri ne me kwý kupa'ã,

—Ije mýjja mar, anen kam ajbit mar ar o ba ne kam amibê arým Jeju mar kanga ne. Gē Metĩndjwýnh ukaprĩkôt prĩne ajo djuw mex. Tãm ne ja.

## Paur kute Ximoximã atãri pi'ôk no'ôk ne ja.

Paur ne ajte Ximoximã pi'ôk no'ôk ne. KrĩrAXBê Rômakam ne me Paurbê ijê nhym mekbê ijê djakam dja. Nãm amijamãro dja. Me kute bĩnmã amijamãro dja. Ne kam krabê Ximoximã pi'ôk no'ôk ne. Jejukôt ne Paur Ximoxio kra. Nhym Ximoxi krĩrAXBê Epexukam djan memã Metĩndjwýnh kabên'ã ujarênhô dja. Nhym Paur mete bĩn kutã kum pi'ôk no'ôk ne kum,

—Arým ityk 'ýr. Arým ne ba amijo rãm ne ja. Gop arek memã Metĩndjwýnh kabêno amirĩto aku'ê. Ba ije amã arênhja dja ga amũ idjô'ã memã arê. Gora atýx ne, ane. Ne ajte kum,

—Amrê Rôma'ýr tẽn ipumũ, ane. Nãm ã Paur Ximoximã ane. Paur kute kum týx jadjàr nhym Ximoxi týx ne katàt kute memã Metĩndjwýnh'ã ujarênh ne kute memã Metĩndjwýnh kabên jarênhmã. Nhym me 'êx ne kute amijo Jeju nhô me jao ba djwýnhja ne me Metĩndjwýnh kabên kupa'ã ar memã arênhô ba. Nhym bep Ximoxi gêdja katàt memã arê. Kadjy ne Paur kum pi'ôk no'ôk ne ano.

1-2 Akmere Ximoxi, ba ibê Paur ne ba amã pi'ôk no'ôk ne. Imã akĩ:nhkumrêx, akmere, ba kam ajo ikra. Ba ibê Paur, ibê Jeju Kritu nhô àpênh ne ba amã pi'ôk no'ôk ne. Metĩndjwýnh ta ne imã arên ijano, ije memã arênhmã ijano. Metĩndjwýnh ne arým me bamã kabên pydjín arê, me baje arým amim Kritu Jeju markumrêxkam ne kute me bajo tĩnmã me bamã kabên pydjín arê, gu me batĩn rã'ã rã'ãmã. Ba kam ô'ã memã arênhô tẽ.

Gê Metĩndjwýnh ajo djuw mex. Kritu Jeju gu banhô Bẽnjadjwýrmẽ Bãmbê Metĩndjwýnh ar ukaprĩkôt ajo djuw mex ne ar ajo ba. Gê arkum akaprĩ ne amã umar mex jarê, ga kam adjumar mex ne ar aba.

<sup>3</sup> Ë, nã bãm aman kam mã Metĩndjwýnhmã amikĩnh jarê. Metĩndjwýnh ta, kumã ne ba amikĩnh jarên kum ajarê. Kumã ne ba idjapênh. Ije amikam ijaxwe 'ô mar kêt ne kum idjapênh iba. Me bakukãmãre ne ã

Metĩndjwýnhmã àpênh ar bao ane ba kam badjwý ã kum idjapênh ar ibao ane.

<sup>4</sup> Abenbê gu babikjêr kutã amýrkam ije amar rã'ã. Akamàtkammẽ a'urimẽ ba aman kam te ije apumũnh prãme. Dja ba apumũn kam arým ikĩnhkumrêx ne. <sup>5</sup> Ba ije prĩne amar. Ga ne ga ajte akabêno aben nhikjê kêt ne tu amim Jeju markumrêx ba arým ama. Akwatynh Roxdjimẽ anã Juniximẽ ne ar ã akajmãtã amim Jeju kamnhĩxo ane. Ga kam gadjwý ar kôpdji'ã tu amikajmã'ã Jeju markumrêx. Ba kam arým amã ikator mex ne.

*Tu kum me uma kêtã 'ã karô.*

<sup>6</sup> Kam ne ba ije amã ikabên jarênhmã. Aje amimar kadjy ne ba akubyn amã arê. Ë, ije ajã aminhikra djirkam Metĩndjwýnh kute amã mýjja rerja dja ga tu markumrêx ne ar o aban on ajte atýx ne kum adjapênh týx ne. Tu amã me uma kêt ne memã Jeju jarê. <sup>7</sup> Djãm me batĩn prãm ne ar babamã got Metĩndjwýnh me bawýr ta Karô jano. Arkati, me batýx ne ar baban bamã aben jabên baje amipnênh ne ar babamã. Nãm ã Metĩndjwýnh Karô me bajo ane.

<sup>8</sup> Kam dja ga apijãm kêt ne tu memã Jeju'ã ajarên ajte badjwý ikam apijãm kêt ne. Nã bãm Kritu'ã idjujarênh ny jarênhô tẽ nhym me mekbê ijê djakam imẽ. Kam dja ga ikam apijãm kêt ne. Nhym bep kati, dja ga tu atýx ne memã Jeju'ã ajarê nhym me kum Jeju kurêkam kôt kum akurên akam ngryk ne ajo ajkê ga kam ikudjwa atokry. Kwãrĩk wãnh rã'ã Metĩndjwýnh dja on amã týx jadjà, atokry katikôt amã týx jadjà ga kam atýx ne ar aba.

<sup>9</sup> Nã, Metĩndjwýnh ta, kute me bapytàr djwýnh dja amã týx jadjà. Nãm me bapytàn amiwýr me bajuw, me bamextire ne ar baba kadjy ne amiwýr me bajuw. Mã ne gu me nê nhym Metĩndjwýnh kôt me bapytà? Djãm me bamex ne ar babakôt ne me bapytà? Arkati, ta ne tu me bajã amim karô, ukaprĩkôt ne tu me bajã amim karôn kam amiwýr me bajuwn me bapytà. Me baje tu amim Kritu Jeju markumrêxkam me bapytà. Amrêbê:, kute pyka nhípêx kêttri ne Metĩndjwýnh ukaprĩkôt me bajã amim karô, Jeju Kritu kute me bapytãrmã ne amim me bajã karô. <sup>10</sup> Amrêbê ne

me bajã amim karõn kam ajbir me bamã o amirõt. Kritu Jeju, me bapytãr djwýnh arým me bawýr tẽn bõx ne me bamã Metĩndjwýnh djukaprĩo amirõt. Arým ne bõx ne me bamã me batyko apêx gu me tu batĩnkumrêx, me batyk nhijukri batĩn rã'ã:n amũ ijukri batyk kêtumrêx ne. Be, Metĩndjwýnh ukaprĩja pumũ. Nhyim me Jeju'ã gwaj badjujarênh nykõt arým kuma.

<sup>11</sup> Kam ne Metĩndjwýnh ijano. Kum idjãpênh ne me kunĩmã kãj bê Jeju'ã idjujarênhmã ijano ba tẽn. Ije me kunĩmã kukrãdjã ny jarênh nhyim me kute marmã. Kadjy ne ijano ba tẽn. <sup>12</sup> Nã bãm tẽn memã arẽ nhyim me kam ijo ajkẽ. Jeju'ã idjujarênhkõt ijo ajkẽ ba itokry. Djã nã bãm kam ipijãm? Arkati, arým ne ba tu amim Jeju kamnhĩxkumrêx ne kam arým prĩne amim àtãri. Gêdja prĩne ije Jejumã amikangakam prĩne ijo djuw mex ne ijãno dja. Ne ijãno ãm rã'ã: nhyim õ akati arým 'ýr bõx nhyim akubyn me bawýr bõx. Tãm ne ba mar tỳx ne amijã kamnhĩx ne.

<sup>13</sup> Gora ije amã katãt ikabênh jarênhja amijamakkrekam anhõn 'ãno djan ikõpdji'ã kõt ar amijo aba. Ne aje arým amikajmã'ã Kritu Jeju marja 'ãno djan kõt tu amã me kunĩ jabê ne. <sup>14</sup> Ë, Metĩndjwýnh kute katãt memã kabênh jarênhja ga aje kõt ar amijo abaja gora mã kõt ar amijo aba rã'ã. Nhyim Metĩndjwýnh Karõ kute me bakam krĩja dja ajo tỳx ga kam kõt ar amijo aba.

<sup>15</sup> Pykabê Adjikkam me kunĩ ne me ikan-gan mõ, me umaje mõ ga arým ama. Nhyim Pijerumẽ Emodjedjwý mekõt ikanga.

<sup>16</sup> Nhyim bep ate ne Nexipõr. Tãm ne imã kĩnh jadjãr mexkumrêx. Ne ajte imã kĩnh jadjã. Nãm imã kĩnh jangjênh krãptĩ ne. Me kute ibê ijekam pijãm kêt ne. Kum me uma kêt ne. Gê pãnh Bẽnjadjwýr Jeju kum kaprĩ. Kum Nexipõrmẽ õbikwa kunĩ ar kaprĩ. <sup>17</sup> Nãm krĩraxbê Rõmakam ajbir bõx ne prĩ:ne ijabej. Ijabej tẽn ijabej tẽn ijabej tẽn kam imã kato. <sup>18</sup> Amrêbê krĩraxbê Epexukamdjwý ikõt àpênhja ga arým aje mar mex. Nãm apýnh mýjja kupên o ikõt kangõ. Gê Bẽnjadjwýr Jeju kum kaprĩ, Bẽnjadjwýr akubyn bõxkam kum kaprĩ. Tãm ne ja.

## 2

*Ãm tỳx ne rerek kêtã kute arênh.*

<sup>1</sup> Be, akmere Ximoxi, gora atỳx. Kritu Jeju ta ukaprĩkõt dja ajo djuw mex ne ajo tỳx ga kam atỳx ne ar aba. <sup>2</sup> Ë, gop ikabênh ma. Ba ije me ipõkri memã ikabênh jarênh nhyim me krãptĩ kute mar ga gadjwý aje marja tãm dja ga amidjõ'ã me kwýmã arẽ. Me mrãmri kabênkumrêxmã dja ga arẽ. Me kute amim Jeju mar 'ãno ãmmãbit dja ga arẽ nhyim kam me akõpdji'ã amũ aben nhijuk'ã memã arênhõ tẽn.

<sup>3</sup> Ë, me krãkamngõnhreja pumũn me'ã amijakre. Dja ga abê krãkamngõnh prãbê te atokryn mã Kritu Jejukõt ajkamẽ. <sup>4</sup> Ë, me krãkamngõnhre ba kutã kute amijangri tỳx ne kute tu mýjja mar kêt ne mũm mrãnhbit kute marja pumũ. Jabit ne me kute mar ne ba. Me kute atemã mýjja kajgo mar kêt ne tu ba, me õ bẽnjadjwýr kute memã kabênh mex jarênh ne mekam kĩnh kadjy. Gad-jwý dja ga ã amijo anhýr ar o aban anhõ Bẽnjadjwýr Jeju Kritu kabênkõt amrãnhbit aje mar nhyim kõt kute apumũnh ne akam kĩnh kadjy.

<sup>5</sup> Ë, dja ga me kute aben rerdjwý pumũn me'ã amijakre. Gadjwý dja ga ã anen Kritu Jeju kukrãdjãkõtbit ar amijo aba. Me kute aben rerkam dja me mrãnh tỳx'õ pydjĩn me bakukrãdjã tũnkõt me kure. Nhyim kam me kumãbit kĩnh djã ngã. Be, gadjwý dja ga ã anen Kritu Jeju kukrãdjãkõtbit ar amijo aban kam kãjkwamã 'ýr bõx.

<sup>6</sup> Ë, dja ga ajte me õ pur djwýnh kam àpênh rax pumũn me'ã amijakre. Nãm me õ pur djwýnh amim pur jadjuw n arým kam djwý kre nhyim arým abatãnh ne. Nhyim me õ pur djwýnh kumrêx kam djwý krên arým kĩnh ne. Dja ga 'ã amijakren adjãpênh rax ne. Nhyim kam Metĩndjwýnh amã o pãnh ne. <sup>7</sup> Ë, dja ga ikabênja mar ar o aba. Nhyim kam tũmrãm dja Bẽnjadjwýr djwýnh arým ano bõ ga kam arým mýjja kunĩ ma.

<sup>8</sup> Ë, Jeju Kritu dja ga omũ. Bẽnjadjwýr raxbê Dawi tãmdjwý 'õ. Ga tyk ne akubyn tĩn ne katorja pumũ. Kukrãdjã ny'ã ne ba ar idjujarênh ibaja, <sup>9</sup> Jeju kukrãdjã ny'ã ar idjujarênh ibakõt ne me kum ikurên ijo ajkẽ ba itokry ga me kute idjuwpreja

pumũ. Nãm me ijo ijaxwen idjuwpre ba nõ. Ë, djã nãm me idjuwpre o mebê Metĩndjwýnh kabēnbê aptà? Kati, dja me 'ã ujarēnh tēm rã'ã ne amũ abendjô'ã pyka kunĩkôt abenmã arē. <sup>10</sup> Kam ne ba te itokryn Metĩndjwýnh 'ãno djan tu ate ikrã. Mýj kadjy? Bir, Metĩndjwýnh nhõ me ja kadjy, Metĩndjwýnh kute amijo me utãrja kadjy. Me jadjwý Kritu Jeju kute me utãr nhym me kôt õ kãjkwa mextirekam ar ba rã'ã: rã'ãmã. Õ kãjkwa mextire, kam mýjja punu kêt, prĩne mexo kute pykabê mýjja ja jakrenh, õ kãjkwa mextire jakam me ar ba rã'ã rã'ãmã. Kam ne ba te itokryja. Me jadjwý kute amim Jeju mar nhym kute me utãrmã.

<sup>11</sup> Mrãmri ne me abenmã,

—Dja gu me Jejukôt batyk jabej kôt ajte batĩn.

<sup>12</sup> —Dja me te me bajo ajkē gu me te batokryn mã Jeju 'ãno djan kam pãnh batyk nhijukri akubyn batĩn ne babēnjadjwýr ne ar meo baba.

—Dja gu me amikatin jãm Jejubê bakrã nhym adjwýnhdjwý me babê amikatin jãm me babê krã.

<sup>13</sup> —Dja gu me amrēbê baje amijo Jeju pytãrkam me krãptĩjakôt bajaxwe nhym kam Jeju dja me bamar rã'ã ne. Me ba dja gu me amibê kanga nhym bep ta gēdja me bamar rã'ã ne, me bakanga kêt ne. Mýkam? Bir, ta ne kabēnkumrēx. Kabēn pydji ne me bakadjy arē. Gēdja atemã ajte amibê kabēn 'õ jarēnh kêt ne. Kam dja amibê me bakanga kêt ne.

Ë, mrãmri ne me ã abenmã kabēnwã jarēho ane.

*Kute memã Metĩndjwýnh kabēn jarēnhmã.*

<sup>14</sup> Wãnh dja ga ajte akubyn memã tãm jarē gē me ajte kuma. Ne ajte memã kum,

—Ë, kwãrĩk wãnh me akabēn kukrãdjã mýr jabej abenmã adjãkrē kêt ne akabēno aben japanh kêt, ane. Dja ga memã wã jarē, kãj bē memã akabēn jarē. Metĩndjwýnh kute akabēn mar ne akôt kabēnkam memã akabēn jarē gē me kuma. Djã nãm me ari abenã atom bakam mex got? Kati, nãm me mýjja man nhýnh kabēn ja'õ mýr jabej ajmãn ar abeno bikēnh o ba.

<sup>15</sup> Ë, gora Metĩndjwýnhmã adjãpēnhkam atýx. Prĩne katãt Metĩndjwýnh kabēn'ã memã adjujarēnh ar aban memã arē. Metĩndjwýnh kabēn ne katãt. Kam dja ga katãt memã 'ã ajarē. Metĩndjwýnh akam kĩnh ne kute amã,

—Amexkumrēx. Ba akam ikĩnhkumrēx, anhýr kadjy. Kadjy dja ga adjãpēnhkam atýx ne kam amikam apijãm kêt ne.

<sup>16</sup> Kwãrĩk wãnh me kabēn kajgo kwãrĩk wãnh nõ. Me kabēno kute aben japanh kwãrĩk wãnh nõ. Rũm kum akãx. Wã, me kabēn wão dja me Metĩndjwýnhbē amiptãr mex ne. Kubê o amiptãro mõn o mõn o mõn ã kubê o amiptãr mex ne arým o amipunu mex ne. <sup>17</sup> Me kabēn punu wã kute wajre pyrãk. Ga wajre kute amũ me ã kuro baja pumũ. Nhym me ujarēnh punuja ã prĩne meo bikēho ane. Me ja 'õ nhidjibē ne Imene. 'Õdjwý ne Pireto.

<sup>18</sup> Nãm ar amibê Metĩndjwýnh kabēn kanga, Metĩndjwýnh kute katãt memã kabēn jarēnh ja kangan kabēn punuo amũ Jeju nēje meo akēxo tēn memã kum,

—Arým apēx. Arým Metĩndjwýnh kute akubyn meo tĩn djã arým apēx, ane. Nãm ã ar memã 'ēxo anen me kwýo ajkē, me kute amim Jeju mar kwýo ajkē.

<sup>19</sup> Nhym bep ate ne Metĩndjwýnh kabēn. Metĩndjwýnh kabēn ne mrãmri kabēnkumrēx. Kute kēn pyrãk, kēn nhýr týxja pyrãk. Nãm me te kute kēn nhikô 'yrmã. Nãm ã Metĩndjwýnh kabēndjwý ane nhym me te kute kabēn nhikô'yrmã. Nhym Metĩndjwýnh kabēn ne memã kum,

—Bēnjadjwýr djwýnh ne ta õ me ja prĩne arým me àtãri ne prĩne arým mekam ama, ane. Ne ajte,

—Gora gē me kute “Ije Bēnjadjwýr Jeju mar” anhýrja me on mýjja punu kanga, ane. Nãm ã Metĩndjwýnh kabēn'ã pi'õk no'õk ane. Nhýnh ne me'õ ne kute kabēn nhikô'yrmã.

<sup>20</sup> Ë, me'õ bēnjadjwýr nhũrkwãkam ne ngõnh apýnh kute abeno djãri kumex. Kwý ne adjēnh nhym bep kwý ne kajgo. Mexja ne kēn karýro ipēx ne kwý kryt jakao ipēx. Nhym bep kajgoja ne ngõkraxmē ngyo ipēx. Tãm ne mýjja kajgo kadjy. Nhym bep mexja ne mýjja mex kadjybit.

<sup>21</sup> Nhyim me prĩne ngõnh ku'õ nhyim kam akan kam mexkumrêx, mýjja mexkumrêx kadjybit ku'ê. Be, gu me badjwý ngõnh'ã amijakren prĩne amijaxwe, mýjja punu kangan kam bamexkumrêx, mýjja mex kadjybit bamextire. Nhyim kam me banhõ Bẽnjadjwýr dja arým amim me bapumjuw, kum me badjapênh kadjybit amim me bapumjuw. Gu me kam apýnh badjapênh djãri badjapênhõ baku'ê.

<sup>22</sup> Nãm me abatãnh nyre kum mýjja punu prãmkumrêx. Rũm kum akãx ne kubê amiptã. Gê arĩk wãnh me kute mýjja punuo bawã arĩk wãnh memã nõ. Nhyim bep kati, ga dja ga katãt amrãnh'ã anopdji. Katãt amrãnh ne aje amim Jeju kamnhĩxbê ar aban amã me abên mekam angryk kêt ne adjumar mex ne ar aba, be, mýjja ja dja ga 'ãno djan 'ã anopdji ne. Kam gêdja ga ã amijo anhýro tẽ. Me jamẽ ro'ã ã amijo anhýro tẽ. Me õkre kadjwýnhbê axwe'õ nõr kêt ne kute Metĩndjwýnhmã amijo a'wýrjamẽ ro'ã dja ga ã amijo anhýr o tẽ. Nhyim arĩk wãnh mýjja punuwã wãm nõ.

<sup>23</sup> Kwãrĩk wãnh me kute abenã atomwã kwãrĩk wãm nõ. Tãm ne kajgokumrêx. Tãm gêdja wãm nõ. Djãm kôt mete mýjja mar got. Kôt ne me kum aben kurên kam aben japrýn abenmã àkrê.

<sup>24</sup> Bep kati, ga abê Bẽnjadjwýr djwýnh nhõ àpênhkam kwãrĩk wãnh akabêno me apanh kêt. Bẽnjadjwýr nhõ àpênh ne me me kunĩkam ukaprĩ ne prĩne memã Metĩndjwýnh kabên'ã ujarênh mex ne, ngryk kêt ne memã 'ã ajarê. Nãm ã Bẽnjadjwýr nhõ àpênh ã meo ane.

<sup>25</sup> Abê Bẽnjadjwýr nhõ àpênhkam dja ga ã o anen kam akrãnmã akurê djwýnhmã akabên ne tu kum akabên mex jarê. Birãm Metĩndjwýnh dja amikadjy me ja ngrêk nhyim me arým amikam ajkam aman wãnh axwemã iren 'ýr amijo akêx ne arým Metĩndjwýnh kute katãt memã kabên ja arým kum kato. <sup>26</sup> Arým Metĩndjwýnh kute katãt memã kabên jarênh ja man arým amim kato. Xatanaj ne me ja pa 'amýn amiwýr meo mõn ar meo ba nhyim me kam ar kum àpênh ba. Birãm Metĩndjwýnh dja amikadjy akabêno me ngrêk nhyim me

arým amim katon Xatanaj kangan kubê amiptãn arým jãm Jejuo amijakre. Kadjy ne ba amã,

—Akrãnmã memã akabên jarê, ane.

### 3

*Pyka kute o ino rer 'ýr me axwe raxmã kute arênh.*

*Xim k 4.1; Djuda 18*

<sup>1</sup> Ê, prĩne ikabên ma. Adjým, dja ã me umar punu djã kato. Pyka kute o ino rer 'ýrkam dja ã me umar punu djã kato. Mýkam dja me umar punu? Bir, me axwe raxkam. Ije, mã ne me kukràdjã kute?

Je kum dja ã me apýnh amijo ba. <sup>2</sup> Dja me õdjýn kam amidjwýnhbit man memã mýjja nhõr kêtumrêx. Dja me kum nêkrêxmẽ pi'ók kaprĩbit prãmkumrêx. Dja me amiraxbito amra. Dja me õkre kadjwýnhbê amim,

—Ba ne ba imexmẽ iraxo me akrenh mex ne, ane. Dja me ar me ũno ba. Dja me nãmẽ bãm kabên mar kêtumrêx. Dja Metĩndjwýnh kute memã mýjja nhõrja kunĩ kubê kĩnh no kati. Dja me Metĩndjwýnhbê amiptãr mex ne.

<sup>3</sup> Dja me kum aben kĩnh kêtumrêx. Dja me ukaprĩ kêtumrêx ne kum aben kurêkumrêx. Dja me aben kã mex jarê. Dja me amipnên ar ba kêt ne tu arĩk ar ba. Dja me àkrêkumrêx. Dja me kum mýjja punubit kĩnh ne kam kum mýjja mex kurêkumrêx.

<sup>4</sup> Dja me kurê djwýnhmã õbikwa kanga. Dja me amakkre kêt. Dja me arĩk ta amijã bẽnjadjwýr rênh ar o ba. Dja me amidjwýnhbit o kĩnh ne kum Metĩndjwýnh kĩnh kêtumrêx. <sup>5</sup> Dja me 'êx ne mekôt Metĩndjwýnhmã ngrero krĩ. Ajkwakambit ne kute Jeju mar. Nhyim bep kati, amikadjwýnhbê kute amikam Jeju mar kêt ne kute uma mar kêtumrêx. Ê, kwãrĩk wãnh me ja kôt amrãnh kêt ne rũm memã akre rax.

<sup>6-7</sup> Ê, me arĩk baja ne me kwý me nire'ýr wangij ne atemã memã kabên jarê. Me nire ja ne me no kêt ne axwebit ma ne kum mýjja punubit prãmkumrêx ne arĩk mýjja punu jabej mrã. Te kute mýjja marmã ne Metĩndjwýnh katãt kabênja mar kêtumrêx. Be, me nire punu jamã ne me atemã kabên

jarë nhym me prĩne me kabën man kôt ar amijo ba.

<sup>8</sup> Me ja, me kute Metĩndjwýnh kupa'ã memã 'ã ujarënhja ne me kute mýjja punubit mar. Djãm me kute amim Jeju mar got. Arkati, nãm me kum Metĩndjwýnh katàt kabënja kurêkumrêx ne kam me kute Mõjdjê kurê djwýnh pyræk. Me kute me bakukãmãrebê Mõjdjê kurê djwýnh ja pyræk. Ar idjibê ne Djanimê Djãmbri ar. Ar tãm ne ar kabëno Mõjdjê japanho ba. Nhym me kute Metĩndjwýnh kupa'ã memã 'ã ujarënhjadjwý ã kabëno Metĩndjwýnh kabën katàtja japanho ane, ne Metĩndjwýnh kabëno mýjja kajgo ar o ba.

<sup>9</sup> Bep kati, dja me punuja amijo mrãnh 'ijabjê kêt nhym me memã apôx, me axwemê me bibãnhmê me arĩk bajamã apôx. Me kute Djanimê Djãmbri arkum katorja pyræk. Dja ã me memã apôxo ane nhym me kunĩ me axwe kôt me omũ.

*Metĩndjwýnh kabën jarënh'ã ukanga kêt mã kute arënh.*

<sup>10</sup> Nhym bep ga ne ga arým iman ikôt ar amijo aba. Ije memã Metĩndjwýnh kabëno amirĩt ne ije kôt ar amijo iba ne ije Metĩndjwýnho amiptàr kadjy idjãpênhõ ije amirĩt ga arým kôt prĩne ipumũn arým prĩne idjãtãri. Ije amikajmãtã Jeju mar ne 'ã ingrà tỳx ne akrãnmã ije meo iba ne imã me abê ne ije Jeju 'ãno idjãm ne ije kanga kêt ga arým kôt ipumũ. <sup>11</sup> Me kute ijo bikënh ga ga arým itokrykôt ipumũ. Krĩraxbê Æxikimê krĩrax 'õbê Ikõnimê krĩrax 'õbê Rixamê kam me kute ijo bikënhkôt ga arým ga ipumũ. Nãm me prĩne ijo ajkê ba itokry: ne. Nhym bep Bënjadjwýr Jeju ne mýjja kunĩbê ipytã.

<sup>12</sup> Bir be, mrãmri ne me kute Kritu Jejukôt amijo ban katàt mrãnh prãmja mrãmri dja me kàtãm arým me jao ajkê.

<sup>13</sup> Ë, me axwemê me 'êxnhĩmê gêdja me ĩ punu raxo mör purokam ĩ punu rax mex ne. Dja me memã 'êx ne me noo akno nhym me kam amipãnh me jamã 'êx ne me noo biknor mex ne.

<sup>14</sup> Nhym bep ga. Ga dja ga mã kôt amijo aba. Ar ije amã Metĩndjwýnh kabën jarënh ga arým ga prĩne aje amim mar dja ga arek 'ãno djan kôt ar amijo aba. Ar ba ar ije amã arënhja ga arým ar ipumũ. <sup>15</sup> Aprĩrekam ga

arým Metĩndjwýnh kabën maro tẽ. Maro tẽn o atẽm rã'ãn arým ajabatãnh ne arým prĩne ama. Metĩndjwýnh kabën mexkumrêx kute ano bõnh ga arým aje tu amikajmãtã Kritu Jeju markumrêx nhym arým kute apytãrja tãm ne ga arým prĩne o tẽn arým prĩne ama.

<sup>16</sup> Be, Metĩndjwýnh ne me bakukãmãremã arë nhym me kabën'ã pi'òk no'òk ne, kôt pi'òk no'òk ne. Pi'òk no'òkja kunĩ ne kubê me banhõ Metĩndjwýnh kabënja. Mýj kadjy ne Metĩndjwýnh kabënja? Bir, kute katàt memã Metĩndjwýnh kukràdjã jarënh kadjy, kute me axwe nêje me akre kadjy, kôt me kute amũ aminhijuk'ã amidjar kadjy, kute katàt me krã pymjýr nhym me kute katàt mrãnhõ amũ amikamënhõ mör kadjy. Be, kadjy ne Metĩndjwýnh kabënja. <sup>17</sup> Nã, Metĩndjwýnh ta kabëno dja prĩne õ àpênhõ tỳx ne, prĩne o mex gê me kum apýnh mýjja mex djãribit kĩnh ne ar o ba. Be, dja ã Metĩndjwýnh Kabëno meo ane.

## 4

<sup>1</sup> Ë, Kritu Jeju dja akubyn me bawýr bõx ne ar me bajo ba, umao ar me bajo ba. Dja bõx ne me kunĩ jaxwekam memã pãnh jarë, me tĩnmê me tykmê me axwekam memã pãnh jarë. Kam ne ba Jeju Kritu kabënkôt, Metĩndjwýnh kabënkôt amã ikabën jarë. Ne amã,

—Ë, gora memã Metĩndjwýnh kabën jarë. <sup>2</sup> Gora prĩne memã Metĩndjwýnh kabën kôt kãj bê memã arë gê me kuma. Gora 'ãno dja. Dja me kute mar prãm jabej ga memã arë. Nhym bep djãm me kute mar prãm kêt jabej ga kam ga mã akubyn mekmã arë.

Gora Metĩndjwýnh kabëno me ngrêk. Dja me'õ kute Metĩndjwýnh mar kêt jabej ga kum Metĩndjwýnh kabën jarë gê Metĩndjwýnh kute katàt kabën jadjwýrkôt amim kuman 'ýr amijo akêx.

Gora me axwe nêje me akre. Dja me axwe jabej ga memã akabën 'õ jarë gê me axwe kêt.

Gora memã tỳx jadjã. Dja me'õ kute Jeju mar rerek jabej ga kum tỳx jadjã gê 'ã ngrã tỳx.

Dja ga ã me 'ãno adjãmo anen kanga kêt mex ne akrãnmã memã Metĩndjwýnh kabën'ã ajarë.

<sup>3</sup> Dja ì me kute memã mỳjja kupa'ã arēnh djwỳnh bõx ne kam Metĩndjwỳnh kupa'ã ar memã arēnho ba. Nhy m mã me mỳjja punu mar prãm ne. Nhy m te Jeju nhõ me jao ba djwỳnh te katat memã arē nhy m me mar prãm kêt kumrēx ne. Ne kam me kute kupa'ã memã arēnho bajabit ma ne amim me punubito atom nhy m me kumex ne kam atemã memã kabēn punu jarē. Me kute me kabēn punu mar prãm kam ne me me kabēn punubit ma. <sup>4</sup> Nãm me Metĩndjwỳnh kute katat kabēn jarēnhja mar prãm kêt kumrēx ne jãm kubē krã. Ne kam me tũmre'ã ujarēnh kajgobit mar prãm ne.

<sup>5</sup> Nhy m bep ga. Ga dja ga mỳjja kunĩkam ano tỳx ne katat o tē. Djãm me te ajo ajkē ga tu ate akrãn ar amijo aba rã'ãn mã kam amirĩt ne. Gora adjapēnh 'ãno dja. Mỳj adjapēnh gēdja ga 'ãno dja? Ije kum me kute Jeju mar kêtjamã kukrãdjã ny'ã adjujarēnh gēdja ga 'ãno dja. Dja ga mã kam apē, prĩne memã Metĩndjwỳnh kabēno amirĩt ne katat memã mỳjja jarēnh mexkumrēx.

<sup>6</sup> Ē, arỳm me kute ibĩn 'ỳr. Arỳm itēm 'ỳr. Arỳm ne itēm djã ijo rãm ne jao tē. Ityk'ã, me kute ijo Metĩndjwỳnh nhõ mry ne ibĩn ba ityk'ã ne ba arỳm itēm 'ỳr jarē. Arỳm ne ba amikam kô krãn mexo tēn kam amã itēm djã jarē. Arỳm ne ityk djã ijo rãm ne jao tē.

<sup>7</sup> Nã bã m Jejumã idjapēnho mrãmri ne me kute me prõt tỳxmã mỳjja janhõr nhy m me kumrēx 'ỳr mrãnh ne bõx ne kute amỳnhja pyrãk. Nã bã m ã amikam itỳxo anen Jejumã idjapēnhkõt ajbit ma. Nã bã m ã Jejumã idjapēnh anen kam arỳm o ino rer djã'ỳr arỳm ibõx tē. Nã bã m ã 'itỳx anen amijo tēn aminhinomã amimēn arỳm itēm mã. Nã bã m ije Jeju kanga kêt ne katat memã mỳjja jarēn arỳm itēm mã.

<sup>8</sup> Nhy m kam Bēnjadjwỳr Jeju kute katat memã o pãnh djwỳnhja tãm dja imã o pãnh. Dja katat imã o pãnh mextire. Arỳm ne ikutēp kudji. Dja imã,

—Akmere, amrē tēn amim aby. Ba arỳm amã ajaxwe kêt jarē ga arỳm imã amexkumrēx. Ne kam on amim aby, ane. Kute memã o pãnh nhõ akatikam dja imã kungã. Djãm bajbit dja imã kungã? Kati, me kute kam amakja, me kum kĩnhja kunĩmã gēdja kungã, me kunĩmã o pãnh ne.

*Kurē djwỳnh amiwỳr o bõx nhy m ate kuka kõnh dja.*

<sup>9</sup> Akmere, gora amrē amibēx ne on iwỳr bõx. <sup>10</sup> Nhy m Demaj. Demaj ne kum me kãtãm kukrãdjã punujabit kĩnh, me kute Metĩndjwỳnho kurē djwỳnh kukrãdjã punu jabit ne kum kĩnh ne ar o ban arỳm ikan gan imã iren mã tē, pykabē Texarõnika'ỳr tē. Nhy m Krexēxi arỳm pykabē Garaxa'ỳr tē. Nhy m Xitu pykabē Damaxa'ỳr tē. <sup>11</sup> Rukabit ne ikuri dja. Maku dja ga aprõn amrē iwỳr o tē. Nãm ikõt apēnh mexkumrēx. Tãm gēdja ga amrē o tē. <sup>12</sup> Xikiku ne ba pykabē Epexu'ỳr ano.

<sup>13</sup> Ē, iwỳr atēm kam dja ga amrē imã inhinõkã rytiwão tē. Wãnh ne ba gu bakamybē Kapukam kum inhire, krĩraxbē Krõwadjikam ne ba kum inhire. Gora amrē imã o tē. Pi'õk no'õk ngriwãmē no'õk raxwãmē amrē imã o tē. Pi'õk no'õktiwã ne ba imã kĩnhĩ. Gora aman amrē imã abyn o tē.

<sup>14</sup> Ē, Arexãri kute ngõnh nhipēx djwỳnhja ne prĩne ijo ajkē. Metĩndjwỳnh ta dja kum axweo pãnh. <sup>15</sup> Gadjwỳ dja ga aminēje tãwã pumũ. Nãm kabēno ar ijapa ne. Nãm kabēno ar ijapa: ba te kum ikabēn mex jarē ne te akre nhy m mã kabēno ar ijapan kam prĩne kabēno ijo ajkē. Kam ne ba amã,

—Gora aminēje tãwã pumũ, ane. Kam ne ba amã ane.

<sup>16</sup> Me kute amiwỳr ijo bõx kutewakam nhỹnh ne inhõbikwa 'õ ikuri dja? Me kute amiwỳr ijo bõx ne we ijaxwe jabej ikukjēro 'ỳr kutewakam? Ba we ijaxweo ije amiptar kadjy narãm me kute bit ibĩnmã amiwỳr ijo bõx ne we ijaxwe jabej ikukjēro nhỹ. Nhy m nhỹnh ne inhõbikwa 'õ ikuri dja? Kati, nãm ar kunĩ ikangan mã prõt ne, mã ipymaje prõt ne. Gora gē inhõbikwa ipymaje prõt wã gora gē Metĩndjwỳnh arkum o pãnh kêt ne arkam ujakrãnh no kati, arkam ukapri.

<sup>17</sup> Nã, me ne me ipymaje prõt ne. Nhy m bep kati, Bēnjadjwỳr ne ikõt djan imã tỳx jadjã ba tu kanarrãm kãj bē memã Metĩndjwỳnh jarē, prĩne kunĩ'ã ajarē nhy m me bajtem kunĩ arỳm kuma. Djãm me kute ikukjērkam uma ngri got. Nãm me kubē rop prãbē uma:kumrēx. Nhy m bep Metĩndjwỳnhbit ne mebē ipytã.



<sup>18</sup> Nhỹnh ne mỳjja punu 'õ ne kute ijo bikẽnhmã? Kati, Metĩndjwỹnh ta gẽdja inẽje jãm mỳjja punu dji. Metĩndjwỹnh ta ne kute ipytãr ta gẽdja ipytãn ijo tẽn õ pykakam ijo bõx, mõr djãmã ijo bõx ba kam kõt imexkumrẽx ne ar iba. Gora gẽ me kunĩ Metĩndjwỹnhmã kãjmã rax jarẽ. Me kunĩ dja me kãjmã kum rax jarẽnhõ tẽ. O tẽm rã'ã rã'ã rã'ã ne. Gora gẽ me mrãmri o anhỹro tẽ.

<sup>19</sup> Dja ga Prixiramẽ Akwire arkum ijarẽ, ne ajte Nexipõrmẽ prõmẽ kramẽ arkum ijarẽ, ar kupãnhtã arkum ijarẽ. <sup>20</sup> Ë, Eraxu ne krĩraxbẽ Kõritukam arek dja. Nhym Krõpimu kanẽ, pykabẽ Miretukam kanẽ ba kam kum inhiren amrẽ tẽ.

Amrẽ amibẽx ne na tỹm djwỹnhrà m iwỳr bõx.

<sup>21</sup> Juburmẽ Prudẽximẽ Rinumẽ Kraõdjamẽ me kute Jejukõt abeno kamy kunĩ ne me wãm amã amijarẽ. <sup>22</sup> Gẽ Bẽnjadjwỳr Jeju prĩne ajo ba nhym Metĩndjwỹnhdjwỳ ukaprikõt prĩne me akunĩõ djuw mex. Tã ne ja.

## Paur kute Xitumã pi'ôk no'ôk ne ja.

Paur ne Xitu kaxã djan kum pi'ôk no'ôk ne. Arým ne Xituo kra ne kum pi'ôk no'ôk ne. Arým ne pykabê Kretakam Xitumã ire nhym kam kam dja. Nhym kam Paur kum pi'ôk no'ôk ne Artemanhkôt ano. Mýj'ã ne Paur pi'ôk no'ôk ne?

Bir, Xitu kute prïne memã Metĩndjwýnh kabēno amirīt ne kute memã kabēn jarēnhmã. Kute me kabēn punu kabēno me itymã, ne kute Jeju nhõ me jao ba djwýnh kum àpēnh kadjy me umjýrmã. Kadjy ne Paur Xitumã pi'ôk no'ôk ne. Ne kam ajte amiwýr Xitu 'uw. Tãm ne ja.

<sup>1-4</sup> Akmere Xitu, ba, ibê Paur ne ba amã pi'ôk no'ôk ne. Xitu, abê ikra djwýnh, amã ne ba pi'ôk no'ôk ne. Ga ne ga ikôt tu amim Jeju kamnhĩxkumrēx, kam ne ba ajo ikra.

Ba ibê Paur, ibê Metĩndjwýnh nhõ àpēnh. Jeju Kritu ta ne ijano ba tē. Nã, Metĩndjwýnh kubê me bapytàr djwýnh ne ijano, ije memã Jeju jarēnh kadjy ijano ne imã,

—On kàj bê ijã adjujarēnh tē, ane. Ije memã Jeju jarēnh nhym me kute mar ne kam kute tu amim kamnhĩxkumrēxmã. Arým ne Metĩndjwýnh amijo me kwý pytà. Me ja kute tu amim Jeju markumrēxmã, ne kam arým kôt katàt mrānhmã. Metĩndjwýnh kabēn katàtja, 'èxnhĩ kêtja tãm ne me kute mar ne kam arým kôt katàt mrānhmã. Nã, kadjy ne Jeju ijano, ije memã Jeju jarēnh nhym me kute amim kamnhĩxkumrēxmã. Mýj ne me kute tu amim kamnhĩxkumrēxmã? Bir, me batyk nhjukri amũ me batĩn rã'ã rã'ã rã'ãn batyk kêtumrēxmã. Metĩndjwýnh 'èxnhĩ kêtumrēxja tãm ne me bamã arē. Amrēbê ne kute pyka nhipēx kētri arým kabēn pydji jarēn me bajã amim karõ. Me batyk nhjukri batĩn rã'ãmã ne me bajã amim karõ. Ne kam ajbir ne arým me bamã me batĩnjao amirīt ne. Ar idjujarēnhkôt o amirīt ne. Arým kute aminhõ akati jarēnh

\* **1:7** Mýjja me kute o kôm ne kôt bibānh kunĵja, kadjwati kangômē uba kangômē, mýjja kangô kunĵ ne me kum kadjwati kangô jarē.

djakam me bamã o amirīt ne. Ba ne ba memã 'ã ajarē nhym arým amirīt ne.

Be, akmere, gē Metĩndjwýnh ajo djuw mex, Jeju Kritu kubê me bapytàr djwýnhmē Bãmbê Metĩndjwýnh ar ukaprĵkôt ajo djuw mex ne ar ajo ba, ne amã adjumar mex jarē ga kam adjumar mex ne ar aba.

*Xitu kute Jeju nhõ me jao ba djwýnh pymjýrmã.*

*Xim k 3.1*

<sup>5</sup> Mýj kadjy ne ba pykabê Kretakam amã inhire? Bir, aje mýjja inomã mēnhmã, ije kum o krax ne ije inomã mēnh kêtja aje ikudjwa inomã mēnhmã ne ba kadjy amã inhire. Ne kam ajte aje Jeju nhõ me jao ba djwýnh kum àpēnh kadjy me umjýrmã ne ba kadjy amã inhire. Krĵ kunĵkôt aje me'ã Jeju nhõ me jao ba djwýnh rēnhmã, ije amã 'ã karõkôt.

<sup>6</sup> Bir, mýj me'õ Ar kubê dja Jeju nhõ me jao ba djwýnh? Bir, me axwe kētmē, me prõ pýnhmē, me ja gēdja me Jeju nhõ me jao ba. Nhym me kradjwý tu kute amim Jeju markumrēx ne me bãm kabēnkôt mrānhmã. Nhym me ja bep bãmbit ne kabēn mexkumrēx nhym kam kraja arĵk ar ba, amakkre kêt, kute bãm kabēn mar kêt nhym me kam kum kĵnh kêt ne ar'ã kabēn ba. Kwārĵk wānh ga me bãm ja'ã Jeju nhõ me jao ba djwýnh rēnh kêt. Djãm me kraja kabēn mex got ga aje me bãm'ã meo ba djwýnh rēnhmã.

<sup>7</sup> Nã, me axwe kētbit dja me kubê Jeju nhõ me jao ba djwýnh. Mýkam dja ga me ja'ãbit meo ba djwýnh rē? Bir, me kabēn mexbit dja me Metĩndjwýnhmã apē. Djãm me kabēn punu Metĩndjwýnhmã àpēnh got. Kwārĵk wānh me amakkre kêt, me ngryknhĩ, me kum kadjwati kangôbit\* djānh, me àkrē, me kute pi'ôk kaprĵbit prāme me noo biknoro baja, kwārĵk wānh me ja'ã Jeju nhõ me jao ba djwýnh rēnh kêt.

<sup>8</sup> Nhym bep me kute meo djuw mex prām, me kum mýjja mexbit kĵnh, me kute amipnēnh ne ar ba, me katàt mrānh, me mrāmri mexo mexkumrēx, me axwe nēje kute amijāno ām, me ajbit dja ga me'ã Jeju nhõ me jao ba djwýnh rē. <sup>9</sup> Dja Jeju nhõ

me jao ba djwýnh kum Metĩndjwýnh kabĕn kĩnh ne kôt ar amijo ba. Metĩndjwýnh kabĕn 'ĕxnhĩ kĕtja, ar ije prĩne memã arĕnhja, tãm dja me kôt ar amijo ba. Me kute prĩne memã Metĩndjwýnh kabĕn jarĕnh mextire ne o kute memã tỳx jangjĕnh ne o kute me kĩnhmã. Nà, dja Jeju nhõ me jao ba djwýnh prĩne mekmã Metĩndjwýnh kabĕn jarĕn kam me kabĕn punu nĕje me akre. Me kum Metĩndjwýnh kabĕn mar prãm kĕt ne kute kabĕno me bajapanhja dja Jeju nhõ me jao ba djwýnh me kabĕn punu nĕje me akre gĕ me kuma.

<sup>10-11</sup> Bir, me amakre kĕt ne me kumex ne kabĕn kajgoo ar me noo biknoro ba. Nãm we me,

—Djãm me aje amim Jeju mar ne kam tu aje mar kajgomã? Kati, dja ga me amim ama nhym me kam me amy nhinhu kàdjwý rĕ, ane.

Nãm ã me noo biknoro ane. Nà, me ja dja Jeju nhõ me jao ba djwýnh kabĕno me unĕ gĕ me anhikrĕ. Nãm me apýnh kikrekam me kunĩ noo aknon meo ajkĕ. Mýjo ne me meo ajkĕ? Me kute Metĩndjwýnh kupa'ã mekmã arĕnhkam ne me meo ajkĕ. Mýj kadjy ne me Metĩndjwýnh kupa'ã mekmã arĕnh ar o ba? Bir, me kute me noo biknor ne me õ pi'ok kaprĩreo prõt kadjy ne me Metĩndjwýnh kupa'ã mekmã arĕnh ar o ba. Kam dja Jeju nhõ me jao ba djwýnh akubyn kabĕno me ity nhym me arým anhikrĕ.

<sup>12</sup> Bep Kretakam me'õ kute memã kabĕn jarĕnh djwýnh'õ ne ta õ me wýnh'ã kabĕn ne,

—Kretakam me kra ne mrãmri 'ĕxnhĩkumrĕx, axwekumrĕx, kum ukan-gakumrĕx, àkurbit kute mar. Nãm ã me'ã kabĕn ane.

<sup>13</sup> Nà, mrãmri ne ã ane. Kam dja ga memã akabĕn jarĕ, tu memã abĕn tỳx, me kute mrãmri amim Jeju mar ne 'ã ngrã tỳx kadjy. <sup>14</sup> Dja ga memã abĕn tỳx nhym me arým wãnh kabĕn kakrit marmã ire, mekbĕ idjaer kukãmãre'ã ujarĕnh kajgojamã ire. Me kabĕn punuja ne me kum Metĩndjwýnh kabĕnkumrĕxja kurĕn kam ta amimarkôt kabĕno mekbĕ mýjja pyma ar o ba nhym

\* <sup>2:3</sup> Mýjja me kute o kôm ne kôt bibãnh kunĩja, kadjwati kangômĕ uba kangômĕ, mýjja kangô kunĩ ne me kum kadjwati kangô jarĕ.

me kabĕn man kôt amijo ba. Dja ga memã abĕn tỳx gĕ me on kôt amijo baja krãta.

<sup>15</sup> Me axwe kĕtmã ne mýjja kunĩ mexkumrĕx. Nhym bep me axweo kute amiptarja, me kute Jeju mar kĕtja, me tãm ne mebĕ mýjja kunĩ punu. Be, djãm me ja mex got. Nãm me ôkre kadjwýnhbĕ mýjja punubit man mýjja punu'ãbit amim karõ.

<sup>16</sup> Nãm we me ajkwakambit,

—Ije Metĩndjwýnh mar, anhýr ar o ban kam arĩk ar ba. Nãm me axwe, me amakre kĕt, ne te kute mýjja mex marmã mýjja punubit ma. Djãm ã me kute amim Metĩndjwýnh mar kute anhýr.

## 2

*Xitu kute mebĕngĕttemĕ me kunĩmã Metĩndjwýnh kabĕn jarĕnhmã.*

<sup>1</sup> Nhym bep ga, akmere, dja ga me kupãnhã me kute amim Jeju marwãmã Metĩndjwýnh kukràdjã'ã prĩne adjujarĕnh ar aba.

<sup>2</sup> Dja ga mebĕngĕttemã,

—Gora ar abixaêr punu kĕt ne ar aba. Ne akabôt katin ar aba, ne amipnĕn ar aba. Gora ar tu amim Jeju markumrĕx ne amibĕ kanga kĕt ne mã kôt ajkamĕ. Ne kam mã amã aben jabĕ, ane. Dja ga ã mebĕngĕttemã ane.

<sup>3</sup> Ne kam ajte mebĕngĕttemã kum,

—Gora ar amrãnh mexkumrĕx ne ar aba. Metĩndjwýnh mex'ã amijakren kôt ar amijo aba, ane. Kwãrĩk wãnh aben japrý kĕt ne amã kadjwati kangô\* djãnh kĕt, ane. Dja gar mekmã mýjja mexbit jarĕnh ar o aba, ane. <sup>4-5</sup> Nà, akmere, dja ga mebĕngĕttemã kum,

—Ē, tynhwa ar, dja gar amũ idjõ'ã me kra pýnh jakre gĕ me ar ajã amijakren me akudjwa kum mjĕn jabĕn kum kra jabĕn amipnĕn ar ban mjĕn prãm kĕt ne ar ban õbikwao djuw mex ne ukaprĩkumrĕx ne mjĕn kabĕn ma, ane. Mýkam? Bir, dja me kãtãm te kute me amrãnh punu 'õ pumũnh ne kute ar akôt Metĩndjwýnh kabĕn japrýmã te me ajabej ajkam aman kam tu ate krã, ane.

Dja ã mebĕngĕttemã me kra pýnh jakreo ane.

<sup>6</sup> Akmere, dja ga me kraremãdjwý akabên jarê gê me amipnên ar ba. <sup>7</sup> Ga dja ga katàt mrã gê me krare apumün kam akôt ar amijo ba. Dja ga katàt memã Metĩndjwýnh kabên jarênh mextire ne abixaêr kêt. <sup>8</sup> Dja ga memã arên mã memã akabên mextire jarê gê me te kabêno kute ajapanhmã, me kum akuré ar o baja te akabên punu jabej umar ar ban arým pijàm ne ate krãn ar ba.

<sup>9</sup> Dja ga me memã àpênh kajgo ar ba jamãdjwý akabên jarê. Me kute meo pãnh ne amim me pa 'amýnh nhym me memã àpênh kajgo ar bajamã akabên jarê. Dja ga memã kum,

—Gora me anhõ bēnjadjwýr kabên ma. Dja gar prĩne me kabên man me kabēnkôt ar amijo aba ne memã adjàpēnh mex ar aba gê me ar akam kĩnh, ane. Kwārĩk wãnh me anhõ bēnjadjwýr pãnh akabên kêt ne akabēno apanh kêt, ane.

<sup>10</sup> Kwārĩk wãnh mekbê adjakĩnh kêt, ane. Dja gar katàt memã apê gê me kàtàm ar adjàpēnh mexkumrēxkôt ar apumün kam arým kum Metĩndjwýnh kĩnh, Metĩndjwýnh kubê me bapytår djwýnhja kum kĩnh, ne kum Metĩndjwýnh kabēndjwý kĩnh ne. Dja ga ã me memã àpēnh kajgo ar bajamã akabên jarēho ane.

<sup>11</sup> Mýkam dja gu me katàt mrã? Bir, Metĩndjwýnh ne arým me kunĩ kadjy ukaprĩo kato. Kute me bakunĩ pytår kadjy ne ukaprĩo kato. <sup>12</sup> Nã gu me prĩne ukaprĩja man kam arým pãnh arĩk ar babaja kanga. Ne mýjja punu, me kute Jeju mar kêt kute mýjja punuo amikĩnhja tu arým kangakumrēx nhym wãnh nõ. Gu me kam on pyka jakam amipnên ar baban katàt mrã ne Metĩndjwýnh kabēnkôt akràn mã ar amijo baba. Dja gu me prĩne amim Metĩndjwýnh djukaprĩ man kam ã kôt amijo ane.

<sup>13</sup> Ne akràn mã ar amijo bababê amiwýr Jeju kamnhĩx, akubyn rwýk djà amiwýrkam amako tē. Me banhõ Metĩndjwýnh, me bapytår djwýnhbê Jeju Kritu tãm dja me bajaêrbê kato, ta raxo kubê kumkatio me bawýr kato. Djãm ngri got. Raxo, mexo kubê kumkatiti. Nhýnh ne me'õ mexo, raxo, umao kumãnhkutã? Dja me bawýr kato gu me

arým bakĩnhkumrēx. Me bakĩnh djà ne ja. Tãm ne gu me amiwýrkam amak ar o baba.

<sup>14</sup> Be, Jeju Kritu ta ne me bajaxwe pãnh tyk kadjy memã amikanga, kute me bajaxwe kunĩbê me bapytår ne kute amim me bajo mexmã ne mekmã amikanga. Kute amim me bajo mex ne kute me bajo õ me wýnhkumrēx ne kute ar me bajo bamã ne mekmã amikanga. Kute me bajo õ me wýnh gu me kam bamã mýjja mexbit kĩnh ne arek ar o babamã.

<sup>15</sup> Bir be, ikabên ja dja ga prĩne me kupãnh tã me kute amim Jeju marwãmã arê, memã kôt arê. Me kaprĩjamã kĩnh jangjê gê me kaprĩ kêt. Gora atýx ne me axwe nēje me akren memã abên týx gê me arek ar ba. Kwārĩk wãnh gê me ajã kabên kêt.

### 3

*Kute Metĩndjwýnh djukaprĩ marn kute katàt amijo bamã.*

*Ep 4.2; Pir 2.3; Kor 3.12*

<sup>1</sup> Gora me kute amim Jeju marwãmã akabên jarê gê me on akabên ma. Dja ga memã kum,

—Gora me me bēnjadjwýrmē meo ba djwýnh kabên man me kabēnkôt ar amijo aba. Dja me me amã me adjàpēnhkumrēx jarê ga me kam kubê amikati kêtumrēx ne tu 'ýr tē. Nhym bep djãm me me amã mýjja punu'ã apnê ga me ate akrã. <sup>2</sup> Kwārĩk wãnh ga me abenã akabên kêt, ane. Gora me akabôt katin amã aben kaprĩn akràn mã aben mã akabên jarê, ane. Dja ga ã ajte memã akabên jarēho ane gê meo biknor kêt.

<sup>3</sup> Amrêbê ne gu me badjwý bano kêtumrēx ne bajamakkre kêtumrēx nhym me arĩk me banoo biknoro ba. Nã, amrêbê ne gu me arĩk ar babari bamã mýjja punu kunĩ kĩnh ne. Ne te baje bajaxwemã banhirer ne arek ar babamã mã bamã bajaxwe kĩnh ne. Me bajaxwen abenã bakabên ne aben nhõ mýjja'ã bangryk ar baba. Nhym me kum me bakurê: gu me badjwý amipãnh bamã me kurê.

<sup>4-5</sup> Nhym bep ajbir ne Metĩndjwýnhbê me bapytår djwýnh ukaprĩo kato ne kum me bajabêkumrēx. Nã gu me te bamã bajaxwebit kĩnh nhym Metĩndjwýnh tu

ukaprîkôt me bapytà. Kum me bajabên kam me bapytà. Djâm me bamrânh mexkôt ne gu me amiptà? Arkati, ta ne ukaprîkôt me bapytà. Nâm me ngôo amingrã ku'ôn kam arým akubyn mexkumrêx. Nhym Metîndjwýnh Karôdjwý ã me bajo nyo ane, ã me bajo mexo ane. Nâm me bajo ny ne me babê me bajaxwe krãta gu me kam baje babixadjwýr ny pyrãk ne bakabên punu mar kêt ne bakabên mexbit ma. Nhym kam Metîndjwýnh Karô mã me bajo mexo tēm rã'ã ne. <sup>6</sup> Ukaprîkôt ne me bawýr Karô jano, kute me bajo djuw mexmã. Jeju Kritu kubê me bapytàr djwýnh djô'ã ne me bawýr ano. Djâm ôdjý got me babê Karô nê? Kati, mrãmri ne ôdjãnhkumrêx ne me bamã ta Karô jano ne prîne o me banhipêx ne ar me bajo ba.

<sup>7</sup> Be, djâm Metîndjwýnh djukaprî ngri got. Nâm ukaprîkôt me bamã me bajaxwe kêt jarê. Gu me bamex ne batyk nhijukri batîn rã'ã: rã'ãn ar baba kadjy ne me bamã me bajaxwe kêt jarê. Nâm amũ me batîn rã'ã: rã'ã rã'ãmã arê gu me amiwýr kamnhîxbê ar baba. Adjým, dja me bamã kungã.

<sup>8</sup> Mrãmri ne ikabênja. Ikabênkumrêx. Dja ga memã prîne idjô'ã ikabênja kôt arê gê me kute amim Metîndjwýnh marja kum mýjja mexbit kînh ne ar o ba. Kam ne mexkumrêx, me kunĩmã mexkumrêx.

<sup>9</sup> Kwãrîk wãnh me abenkam kangatija wãnh nõ. Tãm ne kajgo mexi. Kwãrîk wãm nõ. Kwãrîk wãnh me bakukãmã nhidjikôt me àkrêja wãnh nõ. Nhym me kute kabêno aben japanh ne me kute abenmã àkrêjadjwý kunĩ dja wãnh nõ. Môj djê kukràdjã tũm'ã ne me ã abenmã ane. Tãm ne kajgo mexi. Punure. Tãm dja wãnh nõ.

<sup>10</sup> Dja me'õ kabêno kute abenbê meo bikjêr jabej ga nêje kukrà. Dja ate krã ga ajte kum akabên jarê. Godja mã ate krã jabej ga kam arým tu kangakumrêx. Arým ne ga te kabên punu nêje te o ane nhym mã kum kabên punu kînh. <sup>11</sup> Arým ne ga kôt kum akato. Mrãmri ne me'õ ja punukumrêx. Atemã kabên. Kum axwe kînhkam ne ga arým kum akato. Nâm kabêno amijo amirît. Mrãmri dja ga tu kangakumrêx. Tãm ne ja.

<sup>12-13</sup> Be, dja ba awýr Artemanh nàr kon Xikiku jano gê awýr tèn bôx ga kam tebê mã amrê iwýr tẽ. Krîrãxbê Nikoporikam dja gu abenwýr bôx. Kam dja ba na tým kam arek akam amako dja. Nînh iwýr atêm kêtri dja ga Djenajmê Apôr aro tèn amũ ar kujate. Djenajbê ne me kadjy kabên jarênh djwýnh, ar ja. Dja ga prîne aro djuw mex ne aro tèn amũ ar kujate gê ar tēm mex ne ýkam tēm kêt. Ga kam amrê iwýr tẽ.

<sup>14</sup> Be, gora gê gu banhôbikwa kute Jeju marwã, mýjja mexbit ma ne kum ajbit kînh. Mýkam? Bîr, gu banhôbikwa kute me 'uwtîo djuw mex ne mekam kum ukanga kêt ne kute akrãnmã ar meo djuw mexo bamã.

<sup>15</sup> Ar ja, arkam idjãm ja kunĩ ne ar kute ajo amak rã'ãn kam wãm amã amijarê. Badjwý ne ba ar wão ama ne. Ar wã kute Jeju mar ne kum gu bakînhkam ne ba aro ama ne. Arkum ijarê.

Gê Metîndjwýnh ukaprîkôt ar akunĩo djuw mex. Tãm ne ja.

*Kabên o ino rer.*

## Paur kute Piremōmã pi'ôk no'ôk ne ja.

Paur ne kamybê Piremōmã pi'ôk no'ôk ne. Jejukôt ne ar abeno kamy. NhyM Piremō nhõ kubê kra 'õ, me pardja 'õ kum àpênh kajgo ar baja arým mã kubê tẽ. Birãm kubê pi'ôk kaprĩreo akĩn mã kubê o tẽ. Ne kam pyka 'õkam bõx. Pyka 'õkam Paur memã Metĩndjwýnh'ã ujarênh ar bakam bõx nhyM kam Paur Jeju'ã ujarênh ku'ê. Mekbê ijê djakam ãm rã'ãkam ne 'ã ujarênh ku'ê. NhyM kubê kraja kuman kam tu amim Jeju markumrêx, tu amim kamnhĩxkumrêx ne. NhyM kam Paur arým o kra. Kum abêkumrêx ne, ne kam te kute nêman ajte Piremōmã ano. 'Ã pi'ôk no'ôk ne Piremōmã ano nhyM Xikiku õ pi'ôk no'ôko tẽ. NhyM kam kum,

—Kwãrĩk wãnh, ga kam angryk kêt. Tu amã abê. Jejukôt dja gar tu abeno akamy ne amã aben jabê, ane. Nãm ã Paur Piremōmã pi'ôk no'ôko ane. Tãm ne ja.

1-2 Piremō, amã ne ba pi'ôk no'ôk ne. Ba, ibê Paur ne ba amã pi'ôk no'ôk ne. Gu bakamy Ximoximê ne bar amã pi'ôk no'ôk ne. Piremō, ga ne ga ar ikôt Metĩndjwýnhmã adjápênh ar aba bar imã akĩnhkumrêx ne amã pi'ôk no'ôk ne. Gamê gwaj bakanikwýnh Apijmê Akipu gwaj bakôt àpênhjamê ar aje amim Jeju mar ne kôt anhũrkwãkam aben pydjijamê, ar amã ne bar pi'ôk no'ôk ne. Ba, ibê Paur, Jeju Kritu'ã idjujarênh ibakam me kute ibê ijêja, ba ne ba ar amã pi'ôk no'ôk ne.

<sup>3</sup> Gê Metĩndjwýnh ajo djuw mex, Metĩndjwýnhbê me Babãmmê krabê Bênjadjwýr Jeju Kritu ar ukaprĩkôt ajo djuw mex ne ar ajo ba ne amã umar mex jarê ga adjumar mex ne ar aba.

*Paur kute Metĩndjwýnhmã amikĩnh jarênh.*

<sup>4</sup> Mrãmri ne ba akam ikĩnhkumrêx ne kam ije inhõ Metĩndjwýnhmã amijarênh katã kum ajarênh rã'ã. Nãm bãm kum,

—Ota ba Piremōkam ikĩnhkumrêx, ane. Nãm bãm ã kum akam ikĩnh jarênh anen kôt kum mex tire jarê. <sup>5</sup> Mýkam ne ba akam ikĩnh ne? Bir, amã me abêkam, amã

Metĩndjwýnh nhõ me ja kunĩ jabêkam ne ba akam ikĩnhkumrêx ne. Ne ajte aje tu amim Jeju kamnhĩxkumrêx, tãm ne me iwýr arênhõ bõx. Kam ne ba akam ikĩnhkumrêx ne. <sup>6</sup> Be, nãm bãm Metĩndjwýnhmã ajarê ne kum,

—Arým ne Piremō amikajmã'ã Jeju ma. Kam dja ga kum òdjãnhmê kum me abê jarê gê memã òdjãnh ne kum me abê, ane. Nãm bãm ã Metĩndjwýnhmã ajarênhõ ane.

Nã, akmere, dja me akabên mex man anhõdjãnh pumũn arým akôt Kritu ma, Kritu nhõdjãnhmê ukaprĩ ma. Nãm ukaprĩkôt apýnh mýjja mex djario me bakĩnh ne arým gadjwý ajo kĩnh ne, gê me gop apumũn kam arým akôt Kritumã kato.

<sup>7</sup> Nãm, nãm me imã ajarê ba kam ikĩnhkumrêx ne kam ajte itý:xkumrêx ne. Amã me abêkam, amã me kute Jejukôt abeno kamy jabêkam ne ba ikĩnhkumrêx ne kam itý:xkumrêx. Ga, akmere, nãm gãm Metĩndjwýnh nhõ me mexja prĩne meo djuw mex ne meo kĩnh ne. Ba kuman kam ikĩnhkumrêx ne.

*Ônemu nêje kum kabên.*

<sup>8-10</sup> Amã me abêkam ne ba mýjja'ã ama. Ba ikrabê Ônemu'ã ama. Me kute ibê ijê rã'ãkam ne Ônemu iwýr bõx ba kam o ikra. Nãm bãm kum Jeju jarê nhyM tu amim markumrêx ba kam o ikra.

Ibê Kritu nhõ àpênhkam ren amã ibên týt ne. Ne ren amã,

—Kwãrĩk wãnh arek ikuri dja, ane. NhyM ren arým tu mrãmri dja.

NhyM bep kati, imã ajabêkam ne ba tu 'ã ama. Ba ibê Paur, ibêngêttekam amã ikaprĩ jabej, nhyM me kute Kritu Jeju'ã idjujarênh ibakam ibê ijê ga amã ikaprĩ jabej ne ba tu 'ã ama.

<sup>11</sup> Nãm amrêbê akam punu ne kam ajbir amã mexkumrêx, ne badjwý imã mexkumrêx ne.

<sup>12</sup> Ba arým ije akubyn awýr anormã. Imã abêkumrêx tãm ne ba ije amã anormã. Godja ba akubyn amã anon kam o ama: ne.

<sup>13</sup> Nãm bãm te ije o aminhõ prãme nhyM arek ikuri ãm ne kute akãxã ijo djuw mexmã. Ije Jeju kukràdjã ny'ã idjujarênh ibakam ne me ibê ijê ba mebê ijê djakam dja nhyM

Ōnemu kute akàxã imã àpênhmã ba te ije o aminhõ prãme.

<sup>14</sup> Nhyim bep kati, nã bãm inhõkre kad-jwýnhbê amim,

—Kati, ba dja ba ã anhÿr kêt ne. Ga dja ga amã ikaprĩ jabej arÿm imã nê gê arek ikuri dja. Aje amimarkôt dja ga amã ikaprĩ jabej arÿm imã nê gê kam ikuri dja, ane.

<sup>15</sup> Amrêbê ne mã abê tēm ngrire ne kam arÿm akubyn awÿr tēm mã. Kon ne, birãm arÿm akubyn tu awÿr bõxkumrêx ne arek wãnh akuri ãm rã'ã: rã'ãmã arÿm wãm tēm mã. <sup>16</sup> Djãm aje o me bajtem'õ pyrãk nhym amã àpênh kajgo ar bamã ne akubyn awÿr tēm mã? Kati, arÿm ar aje Kritukôt abeno akamymã. Arÿm kubê akamy. Akamy, gu arÿm bamã kĩnhkumrêxja tãm ne awÿr tēm mã. Mrãmri imã kĩnh raxi. Nhyim bep ga dja ga amã kĩnh raxo ijakre. Amã àpênhkam ne gar arÿm ajbir Bēnjadjwÿr Je-jukôt abeno akamykam dja ga amã kĩnh raxo ijakre.

<sup>17</sup> Be, kam dja akubyn awÿr bõx ga amiwÿr o wadjàn kum akabēn mex jarē. Gu baro'ã badjapēnh ne abeno banhõbikwakam baje aben pyrãk jabej dja ikàxã awÿr bõx ga o ipyrãk ne kutã aprõt ne pa 'amÿn amiwÿr o wadjàn kam kum akabēn mex jarē.

<sup>18</sup> Djori ajo ajkê? Nàr kon, djori abê mÿjjao akĩ? Kute ajo bikēnh jabej amrê imã 'ã pi'òk no'òk ba kam amã o pãnh. <sup>19</sup> Ê, gop ije inhikrao pi'òk no'òkja pumũ, ba ibê Paur dja ba amã o pãnh. Kwãrĩk wãnh, ga dja ga àkĩnhĩ pãnh kum arēnh kêt.

Gora ijã mãn amijakren ikudjwa pãnh jarēnh kêt, àkĩnhĩ pãnh kum arēnh kêt, tu ate akrã. Ga ije amã Jeju jarēnh ne ije amã pãnh jarēnh kêtja pumũ. Nã ba ren amã Jeju jarēnh kêt ga ren amim mar kêt ne tu abiknorkumrêx ne. Bep kati, nã bãm amã arē ga ama ba kam ije amã pãnh jarēnh kêt. Gora aje ipyrãk ne tu àkĩnhĩ pãnhja mar kêtumrêx. Ōnemu kute ajo bikēnh tũmja tu o pãnh mar kêt.

<sup>20</sup> Nà, akmere, gora ã anen kum akabēn mex jarē gu banhõ Bēnjadjwÿr kabēnkôt tu kum akabēn mex jarē. Kum akabēn mex jarēn o ikĩnh, akmere. Gu baje Kritukôt

abeno bakamykam gop ijo kĩnh, akmere.

<sup>21</sup> Be, nã bãm inhõkre kadjwýnhbê amim,

—Dja tu ikabēn man kôt amijo ba. Dja ikabēn man kam o djuw mexo ikabēn jakre, ane. Nã bãm ã amim anen kam amã pi'òk no'òk ne.

<sup>22</sup> Ê, ajte mÿjja 'õdjwÿ. Ba wãm awÿr itēm ne ibõx jabej on ikutēp imã kikre kre kapõ ne kikre kadjwýnhbê inhikwã djãwã kapĩ. Godja Metĩndjwýnh wãm awÿr ijano ba kam awÿr tēn bõx. Kadja dja ga Metĩndjwýnhmã ijo a'uw nhym kam arÿm awÿr ijano. Me kute ikadjãr ba kam wãm awÿr itēm mã. Kam ne ba amijã Metĩndjwýnh kamnhĩxbê nõ.

<sup>23</sup> Epapraj ne kute ajo amak ne kute ajarēnh rã'ã. Adjwýnhdjwÿ ne me kubê ijê. Nãm Kritu Jeju'ã ujarēnh ar ba nhym kam me kubê ijê nhym iro'ã mebê ijê djãkam dja. <sup>24</sup> Makumē Arxakumē Temanhmē Rukamē ar adjwýnhdjwÿ kute ajo amak ne kute ajarēnh rã'ã. Ar ja ne ar ikôt àpēnh ar ba.

<sup>25</sup> Gê Bēnjadjwÿr Jeju Kritu ukaprĩkôt prĩne ajo djuw mex. Tãm ne ja.

## Mekbê idjaer kute amikajmã'ã Jeju mar nhõ pi'ôk no'ôk ne ja.

Me'õ ne Jeju'ã pi'ôk no'ôk ne kam mekbê idjaer kute amikajmã'ã Jeju markumrêx jamã ano, ar kute mrãmri Jeju'ã ngràkumrêxmã. Mekbê idjaer kwý ne ar amikajmã'ã Jeju man kam arým kute ari mýjjakôt akêxmã. Nãm ar abenmã,

—Gwaj akubyn Môjdjê kukràdjà tùmjakôt amijo baba.

Ne ajte,

—Gwaj akubyn Metĩndjwýnhmã mry bôn kamrô kapĩ. Birãm Jeju kamrô me bajaxweo bingrànñ mãmnhkutã kêt, gwaj akubyn mry kamrôdjwý me bajaxwe pãnh ajte Metĩndjwýnhmã kungã ane. Kam ne me'õ arkum pi'ôk no'ôk ne arkum,

—Kati, Jeju pydji kute me bajaxweo bingrànñ djwýnh. Kwãrĩk wãnh atemã ibej mýjja 'õ jabej kêt. Jeju kamrô pydji ne me bajaxwe mãmnhkutã. Kwãrĩk wãnh Jeju kamrô nhibej mry kamrô nhõr kêt, ane. Nãm ã anen kam arkum Jeju mex jarẽ. Jejubê ne Metĩndjwýnh kra. Jeju ne mýjja kunĩ kurãm mexkumrêx. Ne kadjy mrãnh djwýnh kurãm raxi. Ne Môjdjê kurãm raxi. Ne me kute me kadjy Metĩndjwýnh mar djwýnhja kurãm raxi. Jeju kamrô ne mry kamrô kurãm mexkumrêx ne kam kute o me axweo bingrànñ kadjy mexkumrêx. Nhy m Jeju kukràdjà nyja ne Môjdjê kukràdjà tùm jakàjbê bõx ne kurãm mexkumrêx. Kam gêdja me mrãmri Jeju'ã ngràkumrêx ne mã 'amýn kanga kêtumrêx ne mã kôt ajkamên õ pykakam bõx, kàjkwakam õ pykakam bõx.

*Metĩndjwýnh kra kute raxo kadjy mrãnh djwýnh jakrenh.*

*Kor 1.15*

<sup>1</sup> Amrêbê ne Metĩndjwýnh me bakukãmãremã kabên. Me kute kabên jarênñ djwýnhkôt ne memã kabên, ne apýnh mýjja djari kôt memã amijo amirĩto tẽ. Nãm memã kabên tẽm tãmã ã amũ kamingrãnymã kabên ba. <sup>2</sup> Nhy m bep ajbir ne Krakôtbit me

bamã kabên ne. Ajbir ne akati kute o ino rerkambit Krakôt me bamã kabên ne me bamã amijo amirĩt ne.

Bir be, arým kute Kramã mýjja kunĩ kangaja pumũ. Nhy m kam Kra arým pykamê kàjkwamê mýjja kunĩ 'y. Metĩndjwýnh djõ'ã ne mýjja kunĩ 'y. <sup>3</sup> Nãm Metĩndjwýnh jadjênho adjênñ ne. Kubê Metĩndjwýnh tãm. Ar kute aben pyrãk. Nãm 'ityxkumrêx ne kam ta amikabênkôt mýjja pumũnh 'ãno dja. Kute mýjja kunĩ nhipêxja pumũnh 'ãno dja. Djãm kabên ngri got. Nãm ta amikabên pymao mýjja kunĩ pytàn 'ãno djan ar o ba.

Bir be, tãwã ne me babê me bajaxweo pôx ne me bajo mex ne kam arým mã tẽ, mã kàjkwamã tẽn kam nhỹ, Metĩndjwýnh djubôk'ãnh nhỹ. Metĩndjwýnh kubê kumkati djubôk'ãnh nhỹ. Djãm me kãtãm ne me me bẽnjadjwýr rũnh djubôk'ãnh krĩ? Kati, ãm me bẽnjadjwýr rũnhbit. Me bẽnjadjwýr rũnh ne me me ubôk'ãnh krĩ.

<sup>4</sup> Nã, kra ne ra:xi. Raxo kute kadjy mrãnh djwýnh jakrenh mexi. Ne umaodjwý kute kadjy mrãnh djwýnh jakrenh. Bãm ne 'ã bẽnjadjwýr mẽ nhy m uma: ne. <sup>5</sup> Nhýnh ne Metĩndjwýnh kadjy mrãnh djwýnh 'õmã kum,

“Mrãmri abê ikrakumrêx. Jakam ne ba arým ajo ikrakumrêx ga amipãnh ijo Abãm kumrêx”, ane got.

Kati, kramãbit ne ã kabên ane. Nãr kon, nhýnh ne Metĩndjwýnh kadjy mrãnh djwýnh 'õ'ã memã kum,

“Dja ba o ikra nhy m ijo Bãm”, ane got.

Kati, Kra'ãbit ne ã kabên ane. <sup>6</sup> Ne kam ajte, kute pykamã kra janorkam memã kum,

“Gora gê ikadjy mrãnh djwýnh kunĩ ikramã rax jarẽ”, ane.

Be, kubê Metĩndjwýnh krakam arým kum mýjja kunĩ re nhy m rax ne.

<sup>7</sup> Nhy m bep kadjy mrãnh djwýnh'ãbit ne, “Nã bãm amikadjy mrãnh djwýnh nhipêx nhy m kute kôkmê kuwy pyrãk.

Akrãnãmã imã mrãnh ne ikadjy àpênãmã”, ane.

<sup>8</sup> Nhy m bep Kramãbit ne kum,

“Be, Metĩndjwýnh, mrãmri dja ga meo aba rã'ã rã'ã ne.

Nã gãm katãt meo aban amã mýjja mexbit kĩnh ne katãt amijo aba ne amã mýjja punu kurê.



Kam ne ba ibê anhõ Metĩndjwýnh ne amijo apytàn arax kadjy adja. Ga kam akĩnhkumrêx ne. Nã gãm araxmê akĩnho anhõbikwa kunĩ jakrenh mex ne”, ane.

Nãm ã Kramã ane ne kam ajte kum,

<sup>10</sup> “Ga, Bẽnjadjwýr, ga ne ga krax kurũm pyka nhipêx ne anhkrao kàjkwa nhipêx.

<sup>11-12</sup> Dja ĩ apêx. Nhyr bep kati, gajbit dja ga arã'ã: rã'ã rã'ã.

Nhyr bep kati, dja ĩ kute kubêkà pyræk ne tũm ne.

Mrãmri ne me kute kubêkà, mýjja tũm, inòkà tũm nhyr me kute krãn o mrãnh ne 'ê'ã rênhja pyræk. Dja ga ĩ ã kàjkwamê pyka tũm krãn o atêm ne mênho ane. Ne kam arým pãnh ny nhõ.

Nhyr bep ga dja ga tũmrãm arã'ã rã'ã ne. Ga adjwýnh tãmo dja ga amũ arã'ã: rã'ã ne. Dja ga atemã kêtumrêx”, ane.

Bir be, nãm ã Kramã ane.

<sup>13</sup> Nhyrnh got kadjy mrãnh djwýnh 'õmã kum,

“Amrê idjubõk'ãnh nhỹ, abẽnjadjwýr raxkam idjubõk'ãnh nhỹ.

Ikutêp nhỹ ba 'ýr amrê awýr akurê djwýnhmo mõ ga kwý o apardjan kwýnhimex”, ane.

Djãm kute kadjy mrãnh djwýnhmã ã anhýr got? Arkati, Kramãbit ne ã kabên ane.

<sup>14</sup> Nhyr bep kadjy mrãnh djwýnh ne Metĩndjwýnh nhõ àpênh kajgo. Djãm

mebêngõkre got\* amirĩt ne? Kati, me kute noo omũnh kêt nhyr Metĩndjwýnh me bakadjy ano. Me ba ba, Metĩndjwýnh kute me bapytàr ne kute ar me bajo bamã, me bawýr ne anoro dja, kute me bapumũnh ne kute me bajãno ãmmã ne me bawýr ano.

## 2

*Me kute Metĩndjwýnh kabên mar 'ãno ãmmã.*

<sup>1</sup> Bir be, kam, Metĩndjwýnh kute me bamã krabê kumkati janorkam dja gwaj tu amĩjamakkrekam nhõrkumrêx. Me kute gwaj bamã katàt arênh gwaj baje marja tãm dja gwaj tu amĩjamakkrekam nhõrkumrêx ne

\* **1:14** Apýnh me õ pyka djari kunĩkõt ne me kunĩ bêngõkre. Kubêkà jakamê me kakrãtykmê me babêngõkremê ne me kunĩ: bêngõkre.

'amýnh tỳx, gwaj baje o babiknor karõ. Dja gwaj ate ar bakrãn baban kam ĩ o babiknor mex ne, o babiknor mexo tẽ.

<sup>2</sup> Amrêbê ne kadjy mrãnh djwýnh memã Mõjdjê kukràdjã jarê, me kute kõt amijo bamã. Nhyr me'õ kõt kute amijo ba kêt nar kon kubê binhirênh katã nhyr kam arým kum o pãnh ne. Katàt kum o pãnh ne. <sup>3</sup> Bir be, dja gwaj badjwý ate bakrãn ar baba djãm kute gwaj bamã o pãnh kêtãm? E kum kati, gêdja gwaj bamãdjwý o pãnh ne. Amrêbê ne Metĩndjwýnh memã kukràdjãbit jarê. Nhyr me ate krãn ar ba nhyr arým memã o pãnh ne. Nhyr bep ajbir, ajbir ne me bamã kra ngã, krabê me bapytàr djwýnh me bamã kungã. Djãm ate gwaj bakrãjamã kute o pãnh kêtãm? E kum kati ne. Dja gwaj bamãdjwý o pãnh ne. Bẽnjadjwýr ta ne kumrêx memã amijarê, kute me utarmã amijarê. Nhyr kam kute ar meo baja, me kõt baja ne me kuman kam õ'ã gwaj bamã kõt arê, kabêno kabên ne gwaj bamã arê.

<sup>4</sup> Nhyr Metĩndjwýnhdjwý kõt mýjja kwýo amirĩt, me kute kõt kum kator kadjy ne uma apõx ne o mýjja 'yro ba, apýnh mýjja pumũnh kêt 'yro ba, me kõt baja ne me uma proo mýjja 'yro ba. Nãm me me akrymê me kanêo mex, me tyk kwýo tĩn, bõm me nêje me karõ rê, ã ar meo anhýro ba. Nhyr kam Metĩndjwýnh ajte kõt memã ta Karõ jano, apýnh àpênh djari ne kadjy tu ukabikõt memã kungrà. Nãm ã Metĩndjwýnh kute meo bao ane, me kute Jejumã kator kadjy.

*Jeju amijo kubêngõkren kute me bapyræk.*

<sup>5</sup> Djãm kadjy mrãnh djwýnh Metĩndjwýnh kute amim umjýr got? Kute ar pykao ba kadjy, kute amim umjýr got? Ije ar amã pyka ny jarênhja tãm, djãm kute ar o bamã? Kati, Jejubit ne kute ar pykao ba kadjy Metĩndjwýnh amim kudja. Kute mýjja kunõ ba kadjy ne amim kudja. <sup>6</sup> 'Ã ne me'õ Metĩndjwýnh kabênkam,

“Ë, Metĩndjwýnh, djãm me ibêngõkre imex got ga aje me imar rã'ãmã? Mýkam ne ga me ikakritjao djuw mex ne?

<sup>7</sup> Nã gãm o kàtãm, akadjy mrãnh djwýnh kòpdji'ã o kàtãm. O kàtãm 'iry kêt

ga ajte umamê raxo utà <sup>8</sup> nhym ajte mrãmri bënjadwÿr rax ne mÿjja kunĩ ba”, ane.

Nãm ã Metĩndwÿnh kabēnkam ane. Ga kute mÿjja kunĩ baja pumũ. Nhÿnh ne mÿjja'õ kubê 'ã kàtàm ne? Kati. Djãm me babēngôkre'ã ne kabēnja? E kum kati, Jeju'ã ne ã ane. Mebēngôkre kute mÿjja kunĩ ba kêtja pumũ.

<sup>9</sup> Nhym bep Jeju'ã ne ã ane. Mrãmri ne kadja mrãnh djwÿnh kuràm kàtàm 'ikrãn mex ne, nhym Metĩndwÿnh ajte 'ã raxmê umamê kumê. Nãm me bapãnh ty nhym kam pãnh Metĩndwÿnh 'ã kute raxmê umamê mēnho ane. Metĩndwÿnh me bakam ukaprĩ kôt ne amim kra'ã karõ nhym kam me bapãnh ty, me bakunĩ pãnh ty. Djã nãm tyk kadja tokry kêt ne ty? Kati, nãm tyk kadja tokry: ne. Nhym kam pãnh Bãmja 'ã umamê ra:xmê kumê.

<sup>10</sup> Djãm Metĩndwÿnh kute kra tokry'ã amim karõja punu got? Kati, mrãmri katàt. Metĩndwÿnh kute mÿjja kunĩ 'yr ne kute ar o baja tãm ne krabê Jeju'ã amim karõ, kute tokry maro tēm ne inomã mēnh ne kam mrãmri kubê me bapytãr djwÿnhkumrēxmã. Tokrykôtbit ne me bapytã. O ne Metĩndwÿnh me bakrãptĩ pytàn me bajo kra, kute õ kàjkwa mextiremã me bajo tēm gu me kramē baro'ã arkam babamã. Jeju ne me bamã wan me bamã pryõ mōn kàjkwamã wadjã. Dja gu me ì kôt pry'ã mōn wadjã.

<sup>11</sup> Bir be, ta Bãm ne kubê me Babãm pydji. Ta, kute me bajo mex ar o bajamē gu me bamē ne gu meo Babãm pydji. Kam ne me bajo kamy. Me bakam pijãm kêt ne tu me bajo kamy. <sup>12</sup> Nãm Bãmmã kum, “Dja ba ikamyremē ikanikwÿnhremã ajo amirĩt.

Me kute aben pydji nhipôkri dja ba memã amex jarē”, ane.

<sup>13</sup> Ne kam ajte, “Metĩndwÿnh kanàrràm dja ba ar amijo iba”, ane.

Ne kam ajte, “Ota ba dja. Metĩndwÿnh kute imã ikra nhôrjamē ro'ã ne bar dja”, ane.

Nãm ã Jeju gwaj bajo õbikwao ane. <sup>14</sup> Bir be, Metĩndwÿnh krabê ne gu me babaja. Ga me banhãja pumũ. Me barerek, me bakatyk, me bakanē, me batokryja pumũ. Kam ne Jeju amijo kubēngôkren\* kute me bapyràkã. Ne kam amitykkôt Xatanajo ajkē. Xatanaj kute memã tyk jarēnh nhym me kabēnkôt tykja tãm ne prĩne o ajkē. Kadja ne amijo kubēngôkren ty.

<sup>15</sup> Ta amitykkôt Xatanajo ajkēn kubê me bakaba. Nã gu me bamã batyk puma: ne. Me batĩnri bamã batyk puma: ne. Nhym kam Jeju ne me bakadja tyn kam o me bamã me batyk pumajao ajngrã, gu me arÿm bamã uma kêt ne.

<sup>16</sup> Djã nãm amijo kadja mrãnh djwÿnh ne ruw ne me utà? Kati, nãm amijo kubēngôkren ruw. Nãm amijo Abraão tàmdjwÿ 'õn ruwn me utà.

<sup>17</sup> Kam ne me bajo kamykumrēx ne kam kamymē kute aben pyrãk. Nãm me banhõ ì, ne kam me bakôt tokry, me bakôt mÿjja maro ba, me bakôt muw, me bakôt kĩnh. Bir be, nãm prĩne kute kamy bēngôkre pyrãk, kute me bapyràk ne kam arÿm kubê Metĩndwÿnh mar djwÿnh nhõ bënjadwÿr rax djukaprĩkumrēx ne Metĩndwÿnhmã àpēnhkumrēx ar ban kute kanga kêt. Nãm me bakadja Metĩndwÿnhmã amijarē, me bajaxwe pãnh tyk jarē, nhym arÿm me bajaxweo ajngràn me bajaxweo akno.

<sup>18</sup> Djãm me banhõ Metĩndwÿnh mar djwÿnh nhõ bënjadwÿr kute gwaj bamar kêt, kute gwaj batokry mar kêt? Kati, kute gwaj bamar. Xatanaj kute gwaj bajo baja mar. Djãm kute adjwÿnhdjwÿmã mÿjja jarēnh kêt, axwe'ã àpnēnh kêt. Pykabē ar baridjwÿ ne kum axwe'ã apnē nhym adjwÿnhdjwÿ tokry: ne. Kute tokrydjwÿ mar. Kute mÿjja kunĩ mar. Kam dja gwaj bakam ukaprĩ: ne gwaj bawÿr prõt ne kubê gwaj bapytã. Xatanaj kute gwaj bamã axwe'ã àpnēnhkam dja gwaj bawÿr prõt ne kubê gwaj bapytã.

### 3

*Jeju kute raxo Môjdjê jakrenh.*

\* **2:14** Kritu ne amijo kubēngôkre kute mrãmri ne apÿnh me õ pyka djari kunĩkôt me kunĩ: bēngôkreja pyrãk. Kubē kã jakamē me kakrãtykmē me babēngôkremē ne me kunĩ: bēngôkre. Me kamrômē me kukràdjã kunĩ kubēngôkreo aben pyrãk. Jakam dja ga Karõ 17.26 jarēn ama.

1 Nà, akmere ar, àpnhîre ar, ar abê Metîndjwýnh nhõ me mextireja, Metîndjwýnh kute kâjkwa kadjy gwaj baro'ã amijo gwaj bapytâr, on ar Jejukôt ajamak bën. Ê, dja ba ar amã Jeju rax jarê. Arým ne Metîndjwýnh me bawÿr Krabê Jeju jano, me bakadjy ano nhym bõx. Ne kam mrãmri ne kubê me banhõ Metîndjwýnh mar djwýnh nhõ bënjadjwÿr rax. Tãm ne gwaj tu amim kamnhîxkumrêx ne kam memã arênh ar o baba. <sup>2</sup> Nhym kam Jeju bõx ne kum àpênhkumrêx ar ba. Metîndjwýnh kute anorjamã àpênh ar ba ne kanga kêtumrêx. Kute Môjdjê pyrâk. Môjdjêdjwÿ ne prîne kute anor djwýnhjamã àpênh ar ba ne Metîndjwýnh nhõ me jao ban meo djuw mexkumrêx ne kute me kanga kêtumrêx.

<sup>3</sup> Nhym bep Jeju ne Môjdjê kuràm rax ne. Kam dja me mã abenmã Jeju pymamê rax jarênh ar o ba. Ga me kute amim kikreja pumû. Kikre nhipêx djwýnh ne raxo, tÿxo kikre jakre. Nãm ã Jeju kute kikre nhipêx ar o ba prâbê Môjdjê nhipêxo ane ne kam raxo Môjdjê jakrenh mex ne. <sup>4</sup> Nhÿnh ne kikre 'õ ta kute aminhipêx got? Kati, kikre 'yr djwýnh ta ne ikrao kikre 'y. Bir be, nãm ã Metîndjwýnh mÿjja kunî 'yro ane. Nà, mÿjja kunî nhipêx djwýnhbê ne Metîndjwýnh. Ta ne Môjdjêdjwÿ nhipêx ne.

<sup>5</sup> Mrãmri ne Môjdjê prîne Metîndjwýnh nhõ me ja kunîo ban meo djuw mexkumrêx ne kute me kanga kêt ne memã Metîndjwýnh kute amû tûmràm amikukràdjào amirîtja kajmã'ã memã arênh ba. Kubê Metîndjwýnh nhõ àpênh. Õ àpênh kajgo.

<sup>6</sup> Nhym bep Kritu kubê Metîndjwýnh kra. Kubê Metîndjwýnh kra ne ta õ me jao ban prîne meo djuw mexo ban kute me kanga kêtumrêx. Ê, gwaj ba ne gwaj babê ta õ me ja. Nhym Metîndjwýnh arým gwaj bamã mÿjja mex dji. Gwaj batîn prâm kêt ne baje amim kamnhîxbê mÿjja mexja kam amak ne kam bakînh rã'ã jabejmã. Dja gwaj o anhÿro bamõr ne inomã mênh jabej babê ta õ me ja.

*Me amakkre kêt ne ar ba nêje memã kabên.*

*Kô k 10.1; Djuda 5*

<sup>7-8</sup> Kam ne Metîndjwýnh Karõ memã kum,

“On me akati jakam on aje Metîndjwýnh kabên mar jabej gê on wãm aja-makkre kêt on wãm nõ.

Amrêbê ne me akukãmãre amakkre kêtumrêx ne kapôt kukritkam jãm Metîndjwýnh akêx ne 'ã kabên ne. Me kute ngryk jabejmã ne me,

‘Kati, Metîndjwýnh dja me bajo bikênh kêt. Dja gu me te kam amikrà ar o baba nhym me bajo bikênh kêt. Kute me bajo krakam dja tu ate krã’, ã ar anhÿr ba.

Nãm me ã me kute Metîndjwýnh ngryk jabejmã ã ane.”

Nãm ã Metîndjwýnh ane ne kam ajte memã kum,

<sup>9</sup> “Nà, wãnh ne me akukãmãre kute amim ikakinmã, kute ingryk jabejmã ar ikam amikrà:o ba. Nã bãm te me nokam memã mÿjja kwÿo amirît ar o iba nhym me ãm ate kute we ingryk jabejmã ar we ã anhÿr ba. Me kute we ingryk jabejmã 'ã amexbê 40.

<sup>10</sup> Kam ne ba me jakam ingry:ky ne memã kum,

‘Mrãmri ne me ja ajte ikam amikràn ibê binhirênh mõ. Ne ikabên mar prâm kêtumrêx’, ane.

<sup>11</sup> Kam ne ba ingry:ky ne mrãmri ikabên pydjîn arê. Nã bãm memã kum,

‘Aj, me ja dja me inhõ pyka'ÿr bõx kêtumrêx ne ikôt me tyk djà kêt djàkam tyk djà kêt kêtumrêx’, ane.”

Nãm ã Metîndjwýnh kabên ane.

<sup>12</sup> Ê, akmere ar, àpnhîre ar, kam ne ba ar amã, gora ar amijãno dja. Ar akadjwýnhbê ajaxwe 'õ, apunu 'õ ar akam kator ga kam arým ar aje amim Jeju kamnhîx kêt ne aje Metîndjwýnh tînja kanga karõ dja gar mrãmri amijãno dja. <sup>13</sup> Kwãrîk wãnh gar amikam ajamak kêt kati kêt. Dja gar akati kunîkôt abenmã akabên ne o abenmã tÿx jadjà. On akati jakam, Metîndjwýnh kute ar amã,

—On jakam, anhÿr ja ma. Metîndjwýnh kute me amakkre kêtõ tÿm kêttri. Gêdja mÿjja punu 'êxri kute mex pyrâk ne arým ar anoo akno. Kute ar anoo biknor gar ajamakkre kêt karõ dja gar on abenmã tÿx jadjà.

<sup>14</sup> Gwaj bakunĩ baro'ã babê Kritu nhõ me ja dja gwaj 'ã bangrà tỳx. Amrêbê gwaj baje amim kamnhĩx nyrekam batỳxja dja gwaj o batêm rã'ã o tẽn o tẽn o tẽn inomã kumê. Gwaj gop mrãmri ã o anhỳr jabej kam arỳm babê Metĩndjwỳnh nhõ me jakumrêx.

<sup>15</sup> Bir be, on dja gar ã amijo ane. Ga Metĩndjwỳnh Kabên kute,

“On me akati jakam on aje Metĩndjwỳnh kabên mar jabej gê on wãm ajamakkre kêt on wãm nõ.

Amrêbê ne me akukãmãre amakkre kêtumrêx ne kapôt kukritkam jãm Metĩndjwỳnh akêx ne 'ã kabên ne”, anhỳrja pumũ.

<sup>16</sup> Nhỹnh me ja ne me Metĩndjwỳnh kabên mar kajgon kam jãm o akêx ne? Je kum Mõjdjê kute pykabê Edjitu kurũm meo kator ne kute meo baja kunĩ, me tãm.

<sup>17</sup> Nhym nhỹnh me ja ne Metĩndjwỳnh mekam ngryk ne? Mekam ngryko tēm rã'ã'ã amex krãptĩbê 40? Je kum, me tãm, me kute Metĩndjwỳnhkam amikrão ba ne kam wãnh kapôt kukritkam apỳnh rôrøk ban wãnh tyko ikwã, me tãm.

<sup>18</sup> Nhym nhỹnh me ja'ã ne Metĩndjwỳnh memã kabên pydjın arê ne memã kum,

“Aj, me ja dja me inhõ pyka'ỳr bõx kêtumrêx ne ikõt me tyk djà kêt djakam tyk djà kêt kêtumrêx”, ane.

E kum me tãm, me kute Metĩndjwỳnh kabên mar kêt ne ar baja, me'ã ne ane. <sup>19</sup> Bir be, ga me kute amim Metĩndjwỳnh mar prãm kêtumrêx 'ỳr bõx kêtja pumũ.

## 4

*Metĩndjwỳnh memã me tyk djà kêt djà jarê.*

<sup>1</sup> Ë, gwaj amijãno dja. Gwaj bajõ 'ỳr babõx kêt karõ dja gwaj amijãno dja. Metĩndjwỳnh kute õ pyka'ỳr memã krãn kute memã tyk djà kêt djà jarênhja tãm ne gwaj bamã nõr rã'ãã. Kam dja gwaj amijãno dja, gwaj bajõ 'ỳr babõx kêt karõ. <sup>2</sup> Ë, 'ã ujarênhja, 'ã ujarênh mexkumrêxja ne arỳm gwaj bawỳrdjwỳ bõx, gwaj arỳm me kudjwa kuma. Me bakukãmãre kumrêx 'ỳr bõx nhym me kuma. Nãm me mar kajgokumrêx ne. Djã nãm me kuman amikajmã'ã tu kamnhĩxkumrêx? Kati, nãm me

ãm mar kajgon ate krã. <sup>3</sup> Nhym bep gwaj ba ne gwaj baje tu amim markumrêx ne baje amijã kamnhĩxkumrêxja, gwaj ba dja gwaj 'ỳr babõxkumrêx ne kam kam batyk djà kêt ne. Nhym bep me amakkre kêt'ã ne Metĩndjwỳnh memã kum,

“Nã bãm ingy:k ne mrãmri ikabên pydjın arên memã kum,

'Aj, me kute ikabên mar kêtja dja me inhõ pyka'ỳr bõx kêtumrêx ne ikõt me tyk djà kêt djakam tyk djà kêt kêtumrêx', ane.”

Djãm kam me tyk djà kêt djà kêt got me 'ỳr bõx kêtãm. Je kum amrêbê ne Metĩndjwỳnh pyka nhípêxo tẽn inomã kumên kam me kukãm tyk djà kêtmo krax ne te memã tyk djà kêt djà jarên te mekam ama.

<sup>4</sup> Be, Metĩndjwỳnh kabênkam ne pi'øk rãrãr'ã memã,

“Nãm pi'øk tyk to ino rerkam ãpênhõ ino ren kam pi'øk rãrãrkam tyk djà kêt nõ”, ane.

<sup>5</sup> Ne kam ajte me tyk djà kêt djà jarê, ne,

“Aj, me ja dja me inhõ pyka'ỳr bõx kêtumrêx ne ikõt me tyk djà kêt djakam tyk djà kêt kêtumrêx”, ane.

<sup>6</sup> Me bakukãmãre kumrêx kute 'ã ujarênh mar kajgoja me tãm ne me 'ỳr bõx kêtumrêx, me kute amim Metĩndjwỳnh mar kêtumrêx. Tãm, me tyk djà kêt djà, ne arek me ja kadjy nõr rã'ã, atemã me ja kadjy nõr rã'ã. <sup>7</sup> Kam ne Metĩndjwỳnh ajte akati 'õ jarê ne memã,

“Akati jakam on ajamakkre kêtãm on wãm nõ ga me ikabên man kam ikõt atyk djà kêt djà'ỳr bõx.”

Nãm amũ tũmrãm Dawimã kabên nhym ô'ã memã arê, ajbir ije me amã arênhja tãm, ne memã,

“On me akati jakam on aje Metĩndjwỳnh kabên mar jabej gê on wãm me ajamakkre kêt on wãm nõ”, ane.

<sup>8</sup> Bir be, nãm ren Djodjuwe ren me tyk djà kêt djà'ỳr meo bõx nhym ren Metĩndjwỳnh ren ajte tũmrãm akati 'õ jarênh kêtumrêx, me tyk djà kêt djà kadjy akati 'õ jarênh kêtumrêx.

<sup>9</sup> Nhym bep kati, 'ỳr kute meo bõx kêtumrêx memã nõr rã'ã. Metĩndjwỳnh nhõ me ja kadjy, kadjy ne nõr rã'ãã, gwaj bamã nõr rã'ãã. Kute pi'øk rãrãrkam Metĩndjwỳnh

kôkam kôto nôr ja pyrâk. Dja gwaj ã kudjwao ane. <sup>10</sup> Kôt dja gwaj badjâpênh jakân kam Metîndjwýnh kudjwa bakôkam kôto banhikwã. <sup>11</sup> Ajrã, gora gwaj batýx ne kudjwa 'ýr bôx ne kudjwa bakôkam kôto nõ. Gwaj bajõ baje me bakukãmãre'ã amijakren bajamakkre kêt ne arîk ar baban 'ýr babôx kêt karõ ne ba ar amã,

—Gora gwaj batýx ne kudjwa 'ýr bôx, ane.

<sup>12</sup> Djãm Metîndjwýnh kabên kajgo got. Kabên kute mýjja tîn ne àdjôn timerâk. Dji tînkêt. Dji kute mýjja kyxkêt. Ga mrãmri me kute kàx aktã irêkôt prîne wa ngràn timerâk kute mýjja kyx týxja pumũ.

Nãm ã Metîndjwýnh kabên kute kàx pyrâk ne wa mexo kàx jakrenh mexo ane. Mrãmri me kute kàx djwa mexo mrymã ukabêr ne kute o mry toprik ne kute amũ katàt o 'i jakâr nhym kre kamrêk ne ikwã nhym 'i kanhînja amirît mex ne ikwãja pyrâk.

Nãm ã Metîndjwýnh kàx'ã amikabên jakreo ane ne kabêno ã gwaj bajo ane. Nãm ta kabêno gwaj bakadjwýnhbê prôt ne gwaj badjumar djã'ã kurên gwaj bakamũho ane. Ne kam gwaj banhôkre kadjwýnhbê baje amim mýjja'ã karõja, baje mýjja mar ar o babajao amirît ne mýjja kabi. Gwaj Metîndjwýnh kabên mar ar o baba nhym Metîndjwýnh gwaj badjumar djãkam gwaj bamã kabên ne,

—Mexkumrêx, ikabênkôt ne ga amijo aba, ane.

Nâr kon,

—Ë, nã gãm aje ikabênkôt amijo aba kêt, ane.

Nãm ã Metîndjwýnh Kabên kute kàx pyrâk ne gwaj bakadjwýnhbê: prôto ane.

<sup>13</sup> Bir be, nhýnh ne mýjja 'õ Metîndjwýnhbê apdju? Arkati, kute mýjja nhîpêx kunî ne amirîtkumrêx ne nõ. Irãri kum nõ. Noo kute mýjja kunî pytâr. Kumã dja gu me amijarê, kubê mýjja 'õ biknor kêtumrêx.

*Metîndjwýnh mar djwýnh nhõ bënjadjwýr rax'ã ujarênh.*

<sup>14</sup> Ije ar amã arênh ja ma. Ije õbê ar amã Jeju rax'ã idjujarênhja dja ba akubyn ar amã arê. Gora gwaj baje amim Jeju mar ne 'ã ar memã badjujarênh babaja gora gwaj

'ã bangrà týx. Ga gwaj banhõ Metîndjwýnh mar djwýnh nhõ bënjadjwýr ra:xja pumũ. Nãm kàjkwamã wadjân amũ kajôn timerâk katon kam ýtã Metîndjwýnh'ýr bôx. Kubê ne Jeju. Kubê ne Metîndjwýnh kra.

<sup>15</sup> Gwaj banhõ Metîndjwýnh mar djwýnh nhõ bënjadjwýr rax djukaprîkumrêx. Djãm kute gwaj barerek mar kêt got? Kati, nãm te Xatanaj axwe'ã kum apnê nhym ãm tu ate krã. Gwaj apýnh bajaxwe djãri kute 'ã gwaj bamã àpnênh, 'ã ne kum apnê nhym ãm tu ate krãn axwe kêtumrêx ne.

<sup>16</sup> Bir be, gora gwaj amikam bapijãm kêt ne tu Metîndjwýnhmã amijarê. Õdjãnhkumrêx gwaj kam tu kum amijarê. Dja gwaj bakam ukaprîkumrêx. Gêdja mýjja kute ar gwaj bajo baja, gwaj bajaxwe, gwaj barerek, gwaj bakaprî, gwaj batîn prãm kute ar gwaj bajo baja, kam dja gwaj tu bapijãm kêt ne Metîndjwýnhmã amijã ajarê nhym kam ta ukaprîkôt prîne gwaj bajo djuw mexkumrêx ne.

## 5

<sup>1</sup> Ë, Metîndjwýnh kute amim me kadjy Metîndjwýnh mar djwýnh nhõ bënjadjwýr rax, bënjadjwýr bêngôkre 'õ\* djarmãja pumũ. Kute amim 'õ djar kadjy ne amijo me bajõ, me babêngôkre 'õ pytàn amim kudja, nhym kam ta, me kadjy Metîndjwýnh mar djwýnh ta ne me ô'ã Metîndjwýnh ma. Nhym me kâtãmja amijaxwe pãnh me kadjy Metîndjwýnh mar djwýnhjamã mryo mrãn kungã nhym me axwe pãnh Metîndjwýnhmã kubô, me ô'ã kubô. Nhym kam Metîndjwýnh me ja jaxweo ajngràn tu o akno. Nãm ã me kadjy Metîndjwýnh mar djwýnh memã Metîndjwýnh maro ane.

<sup>2</sup> Djã nãm me no kêtja, me kute Metîndjwýnhbê ikô màtjamã àkrêmã got? Kati, adjwýnhdjwý axwe prãm kam mekam ukaprînh memã àkrê kêt ne tu memã kabên rerek jarê. <sup>3</sup> Ne ta me kudjwa axwe prãm kam adjwýnhdjwý ta amijaxwe pãnh kum mry bô. Djã nãm me ajbit axwe pãnh kum mry bô? Kati, ta, adjwýnhdjwý amijaxwe pãnh kum mry bô.

<sup>4</sup> Djã nãm me kadjy Metîndjwýnh mar djwýnh nhõ bënjadjwýr ta amijã bënjadjwýr

\* 5:1 Apýnh me õ pyka djãri kunîkôt ne me kunî bêngôkre.

rê got, ta o amiptàn amijã me kadjy Metĩndjwýnh mar djwýnh nhõ bēnjadjwýr rê got? Kati, Metĩndjwýnhbit ne amijo utàn amim 'ã bēnjadjwýr rê ne amim umjuw. Ga Metĩndjwýnh ajbit kute Arão'ã me kadjy Metĩndjwýnh mar djwýnh nhõ bēnjadjwýr mēnhja pumũ. Metĩndjwýnhbit ne me'ã bēnjadjwýr rê.

<sup>5</sup> Bir be, nãm ã Kritudjwý o ane. Ta kute amijo rax ne kute o amiptàr ne amijã me kadjy Metĩndjwýnh mar djwýnh nhõ bēnjadjwýr rax mēnh kētkumrēx. Nhym bep kati, Metĩndjwýnh ta ne amim kudjan kum, “Mrãmri abē ikrakumrēx. Jakam ne ba arým ajo ikrakumrēx ga amipãnh ijo Abãmkumrēx”, ane.

Nãm ã Metĩndjwýnh nhõ pi'òk no'òkkam ã kum ane. <sup>6</sup> Ne kam ajte kum,

“Abē me kadjy Metĩndjwýnh mar djwýnh rã'ã rã'ã rã'ã ne. Merkixatek ne aka-jmã'ã Metĩndjwýnh mar djwýnh.

Ga kam Merkixatek nhijuk'ã gadjwý abē me kadjy Metĩndjwýnh mar djwýnh”, ane.

<sup>7</sup> Mrãmri ne Jeju me kuràm me kadjy Metĩndjwýnh mar djwýnh mexkumrēx. Kute amijo kubēngòkren† pykakam ar bari Metĩndjwýnhmã kabēn ne amijo a'uw. Kàj bē kum kabēn ne amra. Metĩndjwýnh pydji kute tykbē utàr kadjy nàrà m kum kabēnkam muw. Nhym Metĩndjwýnh arým kabēn ma, Jeju jaxwe kêt ne kute Metĩndjwýnh kabēn mar ne kôt ar amijo bakam Metĩndjwýnh arým kabēn ma.

<sup>8</sup> Be, djã nãm kubē Metĩndjwýnh Krakam kute tokrymē kaprĩ mar kêt got? Kati, nãm te kubē Metĩndjwýnh kra, te axwe kêt ne mã tokry man kaprĩ ma. Nãm tokry katikôt Bãm kabēn man kôt ar amijo ba. Te tokryn mã Bãm kabēn mar 'ãno dja. Kam ne kute kabēnkôt ar amijo baja mar mexkumrēx. <sup>9</sup> Ne kam arým mrãmri tokry ino re. Tokry ino ren kam arým kubē me utàr djwýnhkumrēx ne. Me kute Jeju kabēn mar ne kute kôt ar amijo ba, me ja ne me utàn kam kute ar meo ba rã'ã rã'ã rã'ãmã.

<sup>10</sup> Be, kute me utàrkumrēx ne kute meo ba rã'ã rã'ã nhym kam kôt Metĩndjwýnh kum,

“Abē me kadjy Metĩndjwýnh mar djwýnh nhõ bēnjadjwýr rax. Merkixatek nhijuk'ã gadjwý abē me kadjy Metĩndjwýnh mar djwýnh nhõ bēnjadjwýr rax”, ane.

Nãm ã Metĩndjwýnh kute amim arkam ã kum ane.

*Me abatành kute me prĩre pyrãk.*

*Kô k 3.1; Ep 4.14*

<sup>11</sup> Nã bã m bit ar ije ar amã Merkixatek jarēnhmãn kam ajte akubyn ar amã arēnh kêt. Nã bã m ren ar ar amã kunĩ jarē ga ren ar mar kētkumrēx ne, ar ajamakkre kētkam, ar ajamak'ã tomkam. Dja gar on amijamak'ã tom tan gop mýjja ma. <sup>12</sup> Nã gã m ar amrēbē memã Metĩndjwýnh kabēn'ã adjujarēnhmãn ajte mar kêt ne.

Nhym bep kati, me'õ gēdja akubyn ar amã Metĩndjwýnh kukràdjã kraxkôt arē. Nã gã m ar aje me bixadjwýr ny pyrãk. Me bixadjwýr ny ne me kute kã kaôrbit mar ne kute me òkumrēx kur kêt. Gar gadjwý aje mýjja mar kêt rã'ãkam aje me bixadjwýr ny pyrãk. <sup>13</sup> Ar aje mýjja mar kētkam aje me prĩre pyrãk. Ar aje kã kaôr rã'ã. Nhym bē ne ga gop ar ajabatànhkam aje gop mýjja mar. Ar aje Metĩndjwýnh kabēn katàtja o amipràk kêt rã'ã.

<sup>14</sup> Bep ate ne me abatành. Me abatành ne me kute me òkumrēx kur. Nã gã m ar ren Metĩndjwýnh kabēn maro tēn ren o amipràk ne ren arek maro tēn o tēn o tēn ren marja amũ o abikamēnho tēn kam ren aje me abatành pyrãk ne kam ren prĩne ren mýjja kabi, prĩne mýjja punumē mýjja mexmē prĩne ren kabin mýjja man kam ren aje me abatành pyrãk.

## 6

<sup>1-3</sup> Gwaj Kritukôt babikamēnhmo kraxkam arým Kritu kukràdjã kwý ma. Nãm me Kritu kukràdjã kraxbit gwaj bamã arē gwaj kuma. Mýj kukràdjã krax ne gwaj arým kuma?

Me batyk kadjy bamã bajaxwe kĩnhja wãnh kum banhírer ne kam baje amikajmãtã Metĩndjwýnh mar ja. Nhym

† **5:7** Kritu ne amijo kubēngòkre kute mrãmri ne apýnh me õ pyka djãri kunĩkôt me kunĩ: bēngòkreja pyrãk. Kubē kã jakamē me kakràtykmē me babēngòkremē ne me kunĩ: bēngòkre. Me kamrômē me kukràdjã kunĩ kubēngòkre aben pyrãk. Jakam dja ga Karõ 17.26 jarēn ama.

ajte me kute ngômã me bajangjênh'ã ujarênhjadjwÿ. Ne kam ajte me kute Metîndjwÿnhmã me bapymjÿr gu me kum badjâpênh kadjy me kute me bajã ikra jadjwÿr ja. Ne kam ajte me batyk ne akubyn batîn ne bakator nhym Metîndjwÿnh kute me bamã bajaxwe pãnh jarênhmã ne kute me jamã me tîn rã'ã rã'ãmã arênh ne ate me jamã me biknor rã'ã rã'ã jarênh ja. Ja ne mar tûm, kukràdjà krax.

Djãm ajbit ne gwaj baje marmã? Kati, kwÿ rax ne gwaj baje mar kêt rã'ã. Gwaj on ajte amÿ ijukri on mÿjja 'odjwÿ man gop amÿ maro babikamênhomõ. Nã gãm ar te o anen te aje kãjmã mar kamênhmãn kam mã akubyn ama, akubyn kraxbit maro mõ.

Nhym bep kati, dja gwaj on amÿ ijukri on mÿjja 'odjwÿ ma. Gwaj baje mÿjja marmã ne Metîndjwÿnh amim gwaj bajã karõ, gwaj on kuma, kute gwaj bamã no mex jadjâr jabej dja gwaj on ã o ane.

*Me kute Metîndjwÿnhbê amijo akêx karõ memã kabên.  
Idja 10.26*

<sup>4</sup> Nhym bep ate ne me kute Jeju kangaja. Tô mã dja me me on akubyn Metîndjwÿnh'ÿr meo akêxmã? Kati, gêdja me te meo ane. Arÿm ne Metîndjwÿnh me ja no bõnh pydji nhym me arÿm amim kuma. Jeju kute me utãrmã kãjkwa kurÿm bõxja ne me arÿm amim kuma. Nhym Metîndjwÿnh ta memã Karõja ngrà nhym meo ba. <sup>5</sup> Nhym me kam arÿm mrãmri Metîndjwÿnh Kabên mexkumrêxmã kato. Ne arÿm amim mÿjja puma kwÿ pumÿ. Jeju akati 'õkam akubyn bõx ne kute meo ba kajmã'ã mÿjja pymaja kwÿ pumÿ. Omÿnh kajgon kam ate amibê kanga, amibê kurê ar o ba.

<sup>6</sup> Be, me ja, me kute bit amim Jeju marmãn ajte jãm kute kubê amijo akêx ne kangaja, djãm me kute akubyn Metîndjwÿnh'ÿr meo akêxmã? Arkati, gêdja me te meo ane, dja me te akubyn 'ÿr kute meo akêxmã te meo ane. Mÿkam? Bir, me kute Jeju kangaja ne me o ajkê. Nãm kute mrãmri ne me kute Metîndjwÿnh krao bikênh ne kute akubyn pîte'y'ã nhõrkam o bikênhja pyrãk. Nhym kam me kâtãm Jeju japryõ kumex.

<sup>7</sup> Ë, gop ar pyka mexja pumÿ. Na ne pyka jakam bixadjwÿr krãptî ne kam amÿ pyka ja mã prõt ne. Nhym me kam kam mÿjja kren prîne 'ã karên o djuw mex nhym kam ingrõt ne abatãnh. Õ wÿnh kute krên ne tÿxmã ne ingrõt ne ôn kumex. Pyka mex ne ja. Pyka mex ja ne Metîndjwÿnh arÿm kum kînh ne õkre kadjwÿnhbê amim,

—Pyka ja ne mexkumrêx. Ba kum kînh jadjà ne kum djwÿ jarê gê mã arek kam djwÿ nhingrõt ne ôn kumex, ane.

<sup>8</sup> Nhym bep ate ne pyka punu. Nãm te na axidjuw nhym me te karê nhym mã mrÿnhîmê mjêxêtte nhîbit apõx ne kumex. Pyka kajgo mexi. Me te kam mÿjja nhingrõt jabej, djwÿ nhingrõt jabej ne kam õkre kadjwÿnhbê amim,

—Axuk wãnh nõre. Ba tu kanga gê wãnh nõre. Mÿj kadjy dja ba prîne karên 'ãno dja? Gê me'õ tu kum adjà gê prîne xêt. Kê, ane.

Dja ã Metîndjwÿnh me kute akubyn kubê akêxjamã anen kuwyo imõkam me kurê.

<sup>9</sup> E kum ar ga, akmere ar, àpnhîre ar, ar imã ar akînhja, djãm ar amã ne bar ikabên ja jarênhomõ iba? Kati, arÿm ne bar ar amexkõt ar ama. Ar ga ne gar tu amim Jeju markumrêx nhym arÿm ar apytã. Ga kam ar aje pyka mexja pyrãk.

<sup>10</sup> Djãm Metîndjwÿnh punu got. Djãm kute ar amar kêt got. Kati, dja katãt ar adjâpênh man o biknor kêt ne. Nã gãm ar amã Metîndjwÿnh kînhkumrêx ne kam ô'ã õ me mex jadjwÿo djuw mex ar o aba. Ne arek ar o aba rã'ã ne. Kam dja Metîndjwÿnhdjwÿ ar amar rã'ã ne.

<sup>11</sup> Bir be, gora ar 'ãno dja. Nã bãm ar inhõkre kadjwÿnhbê,

—Gora gê ar ï pÿnhkõt kum Jejuwã kînh ne kam kînh rã'ã rã'ãn kõt ar amijo ban inomã kumê, ane.

Nã, dja gar ã anen inomã amên kam arÿm 'ÿr bõx. Ar aje amim kam amakja ne aje amim kamnhîxja arÿm 'ÿr bõx.

<sup>12</sup> Nã, gora ar amã adjukanga kêt ne 'ãno djan inomã amên kam 'ÿr bõx. Kwãrîk wãnh ar amã adjukanga kêt. Ë, me kute amim Jeju mar ne kute akrãnmã arek amiwÿr kam amakja, me tãmbit dja me 'ÿr bõx. Mÿjja mex, Metîndjwÿnh kute 'ã memã katãt kabên pydjîn arênhja'ÿr dja me

bôx. Bir be, gora on ar ja'ã amijakren me kudjwa mÿjja ja kunî 'ÿr bôx.

*Metîndjwÿnh kute Abraãomã tàmdjwÿ jarênh mãmджи.*

13-16 Ar me bakukãmãrebê Abraãoja pumû. Amrêbê Metîndjwÿnh Abraãomã kabên pydjîn arê. Nãm kum,

“Ë, mrãmri dja ba ajo kînh ne amã atàm djwÿ krãptî ngã nhym aptàn kumex.

Ba ibê Metîndjwÿnh ne ba amã ikabên. Mrãmri ne ikabênja”, ane.

Be, Metîndjwÿnh kute Abraãomã kabên pydjîn arênh ne ja. Nãm Abraão akràn mã arek amiwÿr kam aman kam 'ÿr bôx. Metîndjwÿnh kute kum kabên pydjîn arênhja 'ÿr bôx ne arÿm kran arÿm tàmdjwÿ.

Me babêngôkre baje memã bakabên pÿnh ne arênh kadjy ne atemã me'ô'ÿr mrã. Me'ô kute raxo me bajakrenh ne kute me bakabên marmã 'ÿr tèn kum arê, kute adjwÿnhdjwÿ me bakabên mar ne kute ar o bamã. Gu me kum bajêx karô, kum bajêx nhym kute o ngrykmã ajte atemã me'ô'ÿr mrãn kum me bakabên ja jarê.

Nhym bep Metîndjwÿnh kute Abraãomã kabên pydjîn arênhkam nhÿnh ne atemã me'ô Metîndjwÿnh kuràm rax got kute adjwÿnhdjwÿ kabên marmã? Kati, Metîndjwÿnhbê kumkati pydjii. Kam ne ta tu aminhidji jarên Abraãomã kabên pydjîn arên kum,

“Ë, mrãmri dja ba ajo kînh ne amã atàm djwÿ krãptî ngã nhym aptàn kumex. Ba ibê Metîndjwÿnh ne ba amã ikabên. Mrãmri ne ikabênja”, ane.

17 Nãm kabên pydjîn arên kam ta aminhidji jarê. Nãm arÿm 'ã amim karôn kôt kabên pydjîn arê. Nãm akubyn atemã kabên 'ô jarênh kêt kumrêx. Nãm ta arÿm amim pry pydji jarê. Ne kam me kute prîne amim mar tÿxmã, Metîndjwÿnh kute memã kabên pydji jarênh nhym me kute amim mar tÿxjamã ne kabên pydjîn arên kam ta memã aminhidji jarê.

18 Bir be, kumrêx ne kabên pydjîn arên kam adjwÿnhdjwÿ ta aminhidji jarên memã,

—Ba ibê Metîndjwÿnh dja ba ajo kînh, ane.

Dja akubyn atemã kabên 'ô jarênh kêt kumrêx ne. Dja 'êxnhî kêt kumrêx. Djãm Metîndjwÿnh kabênkam 'êxnhîn kute akubyn memã kabên 'ô jarênhmã got. Arkati. Kam dja gar ja man kam ajte atÿxkumrêx, ajte akînhkumrêx. Atÿx ne tu amim kamnhîxkumrêx ne mã kam ama. Metîndjwÿnh arÿm gwaj bakukãm gwaj bamã mÿjja mex jarê gwaj mã kam ama. Kute gwaj bapytarmã ne gwaj arÿm 'ÿr baprôt nhym arÿm gwaj bapytàn gwaj bamã mÿjja mex jarê, kàjkwa jarê.

19 Gora gwaj kam batÿx ne tu amim kamnhîxkumrêx ne mã kam ama. Mrãmri dja gwaj 'ÿr bôx. Kam ne gwaj bakadjwÿnhbê badjumar mex ne baku'ê tÿx ne. Mrãmri ne me kute ngômã kên rênh nhym kà arek arij tÿx nhym ngô kute o ba kêt ja pyræk. Dja gwaj ã bakadjwÿnhbê badjumar mex ne batÿxo ane. Gwaj baje amim Metîndjwÿnh kabên kamnhîx ar o babakam dja gwaj ã bakadjwÿnhbê badjumar mex ne batÿxo ane.

Metîndjwÿnh nhô kikreti ja ma. Kadjwÿnhbê Metîndjwÿnh nhô mÿjja nêje kubêkàti wajêt. Nhym me kadjy Metîndjwÿnh mar djwÿnh nhô bënjadjwÿr raxbit 'ÿr ngjênh.

20 Nhym bep Jeju ne ta kàjkwakam ùrkwãti djwÿnhjamã wadjà. Me bakukãm ne 'ÿr wabin kum wadjà. Kute me banhirãr ne me bajo djwÿ mex ne me bakadjy Metîndjwÿnhmã kabên mã. Dji kubê Metîndjwÿnh mar djwÿnh djwÿnhkêt. Kubê Metîndjwÿnh mar djwÿnh nhô bënjadjwÿr rax dja rã'ã rã'ã ne. Merkixatek ne kajmã'ã Metîndjwÿnh mar djwÿnh nhym kam Jeju ijuk'ã kubê Metîndjwÿnh mar djwÿnh ne me bakadjy Metîndjwÿnhmã kabên ne.

## 7

*Jeju kute raxo Merkixatek jakrenh.*

1-3 Be, mÿj me'ôbê ne Merkixatekja? Nãm krîbê Xarêkam me ja nhô bënjadjwÿr ne adjwÿnhdjwÿ kubê Metîndjwÿnh pymao kubê kumkati mar djwÿnh. Idji kutewa ne katât me mrãnh nhô bënjadjwÿr, Merkixatek. Idji jatãri jadjwÿ ne me umar mex nhô bënjadjwÿr. Krî nhidjibê ne Xarê. Me umar mex ne ar bakam ne me tu 'ã kum



idji. Me ò bēnjadjwýrjamã, Merkixatekmã ne me me umar mex nhõ bēnjadjwýr ane.

Ije nhym mã ne bãmmē nã ar kute? Kati, e kum bep me kute bãmmē nã noo ar omũnh kêtumrêx ne me kute ar arēnh kêtê. Kon ne. Ingêtmē kwatynhmē me kute omũnh kêt mexi. Me kute rwýkkôt mar kêt, nã 'õ kurũm rwýkkôt mar kêt ne ajte kute tyk djà kôt mar kêtumrêx. Nãm tu nhĩ'anh tē. Kute Metĩndjwýnh Kra pyræk ne me kadjy Metĩndjwýnh mar djwýnh rã'ã rã'ã ne.

Be, ta ne Abraão kutã tēn kajpan kum kabēn jarēnh kĩnhkumrêx ne. Abraão arým mýj bēnjadjwýrja ar'ýr prõt ne ar kubĩn kam akubyn tē nhym Merkixatek kutã tēn kajpan o kĩnh ne.

Nhym kam kum mýjja kwýo ajkij. Kute mýjja kwýo mörjao ajkij nhym mã o mō. Abraão ò mýjja kunĩ kryre ne kurēn aben kadjy kum kungã. Merkixatekmã apýnh aben kadjy o pôxo tēn kum kungã nhym abenã rēnhkam arým rax nhym kam mã o mō.

<sup>4</sup> Bir be, me Merkixatek raxja pumũ. Te Abraão bēnjadjwýr rax ne kute nêkrêx pytarja tu kute kum kwý o bikjêrja pumũ. Djãm Merkixatek ngri got.

<sup>5</sup> Atũmã ne mekbê Rewi me ò mýjja jamýnho ba. Mōjdjê ne kukràdjækôt mekbê idjaermã kum,

—Gora me amũ anhõ mýjja wã kwýo ajkjen amũ mekbê Rewibê me kadjy Metĩndjwýnh mar djwýnhmã angã, amũ amikutã memã kwý ngã gē me ta ò nêkrêxkôt amim amý, ane. Nhym me kam ã anen ò mýjja kwýo ajkijn kam amũ amikutã mekbê Rewimã òro tē, me ta ò krókam me jamã kungã nhym me amim amý. Amē kubê Abraão tãmdjwý nhym mekbê Rewi kute amim amýnhja tãm ne kubê ò nêkrêx.

<sup>6</sup> Nhym bep atemã ne Merkixatek. Mekbê Rewi 'õ kêtê. Nãm te kubê mekbê Rewi kêt ne kam tu Abraãobê nêkrêx kwýo ajkijn kum kĩnh jadjã. Metĩndjwýnh arým Abraãomã kabēn pydjín arēn kum mýjja mex jarē nhym Merkixatek arým kuman kam kôt Abraãoo kĩnh ne. <sup>7</sup> Be, mrãmri ne me'õ kute meo kĩnhja ne raxo tãmja jakre. Me rũnh ne me meo kĩnh.

Kam ne ba ar amã,

—Me Merkixatek raxja pumũ.

<sup>8</sup> Mekbê Rewibê Metĩndjwýnh mar djwýnh ne me ò nêkrêxo ba. O ban kêt nhym me pãnh kamingrãny amũ ijuk'ã ajte Metĩndjwýnhmã àpēnh ba nhym me ajte memã òro ba. Nhym bep Merkixatek pydji ne tĩn rã'ã rã'ã ne kubê ò mýjja mō. Ga me Metĩndjwýnh nhõ pi'ók no'ókkam Merkixatek'ã kute tĩn rã'ã: rã'ã, anhýrja pumũ. Be, Merkixatek raxja pumũ.

<sup>9-10</sup> Nhym kam Merkixatek Abraão kutã tēn kajpa nhym kum ò mýjja kwýo ajkij nhym mã o mō. Nhym kam Rewidjwý kute kum òr pyræk. Rewibê ne Abraão tãmdjwý. Rewi ne ingêt kukãmãrebê Abraão ngrekam nör rã'ã, kraxje kadjy kute Rewi bãm djir kêt, ngrekam nör rã'ãkam ne Abraão Merkixatekmã ò mýjja kwýo ajkij. Nhym kam Rewidjwý kute kum òr pyræk. Nhym kam amũ atũmã Rewi wajêt ne ruw ne kam amũ abatãnh nhym kam tãmdjwý amim mýjja jamýnho ba, ò nêkrêxkôt me ò mýjja jamýnho ba. Nhym bep Merkixatek mekbê Rewi kajmã'ã nêkrêxo mō, Abraão nhõ mýjja mō.

<sup>11</sup> Arão kôpdji'ã mekbê Rewibê me kadjy Metĩndjwýnh mar djwýnhja ne memã Mōjdjê kukràdjã jarēnh tē. Arão ne kubê me kadjy Metĩndjwýnh mar djwýnho kutewa nhym kam tãmdjwý mekbê Rewija amũ aben nhijuk'ã kubê Metĩndjwýnh mar djwýnh ne Arão kôpdji'ã memã Mōjdjê kukràdjã jarēn me kadjy Metĩndjwýnh ma. Nhym me te: kôt kute amijo ba mexmã. Nhym kam atemã me kadjy Metĩndjwýnh mar djwýnh 'õ ne kato. Atemã. Arãokôt kêtê. Merkixatekkôt ne kato. Nãm ren me mekbê Rewikôt mex nhym ren atemã ny 'õ kator kêtumrêx ne. Nãm me te: amimex ne te: axwe kêt nhym kam kadjy nyja kato.

<sup>12</sup> Bir be, atemã ne me kadjy Metĩndjwýnh mar djwýnh ny 'õ kato nhym kukràdjãdjwý ne kôt atemã. <sup>13</sup> Gwaj banhõ Bēnjadjwýr'ã ne idjujarēnhja. ã mũm me ja kurũm ne kato. ãm atemã. Djãm me ja 'õ kubê me kadjy Metĩndjwýnh mar djwýnh got? Ne kute Metĩndjwýnh nhõ ngõnho ki'ã kum mry bõr got. Arkati.

14 Mekbê Djuda kurūm ne kato. Me ja, mekbê Djuda ne me Metīndjwýnhmã àpênh kêtumrêx. Nym me kunī arým kôt omū. Djã nãm Môjdjê me jamã kum,

—Me ga dja ga me abê me kadjy Metīndjwýnh mar djwýnh, ane got? Kati, mekbê Rewimābit ne arê.

15 Be, arým kute amirīt tēmja pumū. Atemã me kadjy Metīndjwýnh mar djwýnh 'õ ne kato. Mekbê Rewi kurūm kator kêtê. Ne kam kute Merkixatek pyræk.

16 Mýjkôt ne kubê me kadjy Metīndjwýnh mar djwýnh? Djã nãm mebêngôkre ta Môjdjê kukràdjãkôt kute amū aben nhijuk'ã abenmã rero tēn kam Jeju'ýr bôx ne kum kure nym kam arým kubê me kadjy Metīndjwýnh mar djwýnh? Djãm mekbê Rewi 'õ? Kati. Bir, mýjkôt? Mýjja týxumrêx kôt. Ta tu tīn rã'ã:n kute tīn o ino rer kêtumrêx. Kam ne Metīndjwýnh 'ã me kadjy Metīndjwýnh mar djwýnh nhõ bēnjadjwýr mē. 17 Metīndjwýnh nhõ pi'ók no'ókkam kute,

“Abê me kadjy Metīndjwýnh mar djwýnh rã'ã rã'ã rã'ã ne. Merkixatek ne aka-jmã'ã Metīndjwýnh mar djwýnh.

Ga kam Merkixatek nhijuk'ã gadjwý abê me kadjy Metīndjwýnh mar djwýnh”, anhýrja pumū.

18 Be, Môjdjê kukràdjã tūmkôt mekbê Rewi kute aben nhijuk'ã abenmã Metīndjwýnh mar djwýnh rerja ne arým tūm ne wãnh nõ. Arým kajgo mexi. Kute me utàr kêt. Kam ne Metīndjwýnh wãnh kudji nym nõ.

19 Môjdjê kukràdjã kute mýjjao mex kêt. Nãm me te: kute kôt amijo ba ne te: kôt kute amijo mexmã. Nym bep ajbir ne Metīndjwýnh me bawýr mýjja mex jano, Jeju jano. Tãm ne gwaj kamnhĩxbê ar baban kôt Metīndjwýnh'ýr bôx. Nym prīne raxo, mexo Môjdjê kukràdjã tūm jakre. Kôtbit ne gwaj Metīndjwýnh'ýr bôx.

20-21 Be, gwaj banhõ Metīndjwýnh mar djwýnh ny, mextireja pumū. Kumã ne Metīndjwýnh kabēn pydjīn arê. Bep me ja, me kadjy Metīndjwýnh mar djwýnh tūmja ne Metīndjwýnh amim me umýr kajgon kute memã kabēn pýnh jarēnh kêt. Nym bep ate ne Jeju. Metīndjwýnh kute amim arkam kum kabēn pydjīn arēn kum,

“Ba ibê Bēnjadjwýr ne ba arým amã ikabēn pydjīn arê. Dja ba atemã ikabēn 'õ jarēnh kêt.

Ga dja ga abê me kadjy Metīndjwýnh mar djwýnh rã'ã: rã'ã ne”, ane.

22 Be, Jeju kukràdjã nyja mexo kute tūm jakrenh mexi. Nym Metīndjwýnh kute kukràdjã nykôt me bamã mýjja mex jarēnhja dja mrāmri me bawýr bôx. Jeju ta dja Metīndjwýnh kabēnkôt mýjja mex nēje omūnh 'ãno djan me bamã kungã.

23 Nà, Jeju mexo kute me kadjy Metīndjwýnh mar djwýnh tūm jakrenhja pumū.

Ë, mýjja 'õdjwý. Me ja ne me krãptī. Nãm me aben nhijuk'ã tyk tē. Te kute àpênh 'ãno ãm rã'ãmãn mã aben nhijuk'ã kubêngētte ne tyk tē.

24 Nym bep Jeju pydji ne mã: tīn rã'ã rã'ãn kam mã kubê me kadjy Metīndjwýnh mar djwýnh rã'ã rã'ãn atemã amidjõ'ã me'õmã rer kêtumrêx. 25 Ajbit ne tīn rã'ã rã'ãkam arek Metīndjwýnhmã me banēje kabēn ne me bajo à'wýr ar ba 'ãno dja. Nãm me bapytàn ar me bajo ba. Nhýnh me baja? Bir me baje tu amim Jeju kamnhĩxkôt baje Metīndjwýnh'ýr amijo akēxja, me batãm ne ar me bapytàn me bajo ba. Gēdjãm ar me bajo ba rã'ã ne. Gēdja me bapytār rã'ã: ne, rã'ã rã'ã.

26 Bir be, me kadjy Metīndjwýnh mar djwýnh nhõ bēnjadjwýr rax ã kute anhýr ne gwaj bamãnhkutã. Nãm mexo uma. Kute axwe 'õ mar kêtumrêx. Punu 'õ kam nōr kêtumrêx. Nãm mūm mexo amiptà nym ate me axwe wãnh ar ba nym Metīndjwýnh o rax ne kàjkwamã amiwýr o wabin kàjkwa nhiby ýr nym kam ar ro'ã ar ba.

27 Nà, atemã. Kute me kadjy Metīndjwýnh mar djwýnh nhõ bēnjadjwýr tūmja pyræk kêt. Djãm kute Metīndjwýnh mar djwýnh nhõ bēnjadjwýr tūm kudjwa myt kunīkôt ta amijaxwe pãnh Metīndjwýnhmã mry par ne bōr ne òr got. Me tãm ne me kumrêx amijaxwe pãnh kum mry pan kubôn kungãn kam atãri me kunī jaxwe pãnh kum mry pan kubôn kungã. Djã nãm ã Jeju me kudjwa ane got? Arkati, nãm ta Metīndjwýnhmã me axwe pãnh tyk pydji. Nãm me axwe pãnh Metīndjwýnhmã

amikanga pydji nhym tûmràm dja ajte memã tyk kêt ne.

<sup>28</sup> Mòjdjê kukràdjàkòt ne me axwe prãm nhym me amim me umjuw. Nhym bep tûmràm, Mòjdjê kukràdjà arým tûmkam ne Metĩndjwýnh amim krao katon amim kudja. Nhym kam prĩne Metĩndjwýnh kabènkòt amijo ba. Axwe prãm kètkumrèx. Dja amũ tûmràm axwe 'ò kètkumrèx rã'ã rã'ã, tãm ne amim kudjan kam kum kabèn pydjìn arè. Ne kam adjwýnhdjwý aminhidji jarèn kum,

—Ba ne ba amijo apytàn amim adja. Ga abè imar djwýnh nhõ bènjadjwýr rax, ane. Be, nãm ã anen kam amim Kra dja.

## 8

*Me kadjy Metĩndjwýnh mar djwýnh nhõ bènjadjwýr ny ne Jeju.*

<sup>1</sup> Bir be, ije ar amã arènh ja ma. Arým gwaj banhõ Metĩndjwýnh mar djwýnh nhõ bènjadjwýr rax ã kute anhyrja pumũ. Nãm kàjkwakam Metĩndjwýnhbè kumkati krĩ djàtikam ubòk'ành ikò'ã nhỹ, kubè bènjadjwýr raxkam ubòk'ành nhỹ. <sup>2</sup> Kubè Metĩndjwýnh mar djwýnh nhõ bènjadjwýr ne kam Metĩndjwýnh nhürkwãti kadjwýnhbè kumoka'èkam àpènh ar ba. Ürkwãti djwýnhkam àpènh ar ba. Djãm me ikrao ne me kum kikre got? Kati, Bènjadjwýr djwýnh ta ne amim kikre nhym kàjkwakam dja. Ürkwã djwýnh ne ja. Nhym kadjwýnhbè kumoka'èkam Metĩndjwýnh nhõ mýjja nèje kubèkàti wajèt. 'Yr ne arým wadjàn kam kam àpènh ar ba.

<sup>3</sup> Me kadjy Metĩndjwýnh mar djwýnh nhõ bènjadjwýr rax kunĩ ne Metĩndjwýnhmã mry bôn kum kungãn kòt kum kĩnh djà ngã. Kadjy ne amim me umjuw. Nhym gwaj banhõ Metĩndjwýnh mar djwýnhdjwý mýj ne kum kungã? Kati, ãm ta ne kum amingã.

<sup>4</sup> Nãm ren jakam, pyka jakam ar ban ren kubè me kadjy Metĩndjwýnh mar djwýnh kètkumrèx ne. Ga me kadjy Metĩndjwýnh mar djwýnh kumex ne kute Mòjdjê kukràdjàkòt Metĩndjwýnhmã kĩnh djà nhõr rã'ãja pumũ. Kam ne ren jakam ar ban ren arým kubè me kadjy Metĩndjwýnh mar djwýnh kêt.

<sup>5</sup> Pyka jakam Metĩndjwýnh nhõ kikreja ne kàjkwakam ürkwãti djwýnhja'ã amijakre nhym me kam kam àpènh ar ba. Ó'ã ne pykabè ò kikreja. Nãm Mòjdjê kute kikre nhipèxmã nhym kam Metĩndjwýnh prĩne kòt kum 'ã karõ, kute kum 'ã karõ nhym kute kòt kum ipèxmã. Kute kàjkwakam ürkwãti ja'ã akren kute kòt kum ipèxmã ne kum 'ã karõn kum,

“Gora prĩne inhürkwãti djwýnh'ã akren imã ipèx, ane.

Krãnhre'ã ije amã akrejakòt dja ga ipèx”, ane.

Be, mýjja kàjbè mex ne ja. Kàjkwakam ürkwã djwýnh ne mexkumrèx, nhym bep ja, pykabè ja ne ô'ã. Ó'ã ne kam kàjbè mex.

Nhym bep ürkwã djwýnh ne mrãmri wýnh, mextire. <sup>6</sup> Nhym àpènhdjwý mextire. Metĩndjwýnh ne kum àpènh ny jarè nhym àpènhja prĩne mexo kute me kadjy Metĩndjwýnh mar djwýnh tûm djàpènh tûm jakrenh. Nhym kukràdjà nydjwý prĩne mexo kute tûm jakrenh. O ne Jeju Metĩndjwýnh'yr mebèngòkreo bòx. Nhym Metĩndjwýnh me bamã kabèn pydjìn arèn kam me bamã mýjja mex jarè. Mýjja mexja ne mexo tûmja jakrenh mex ne. Kòt kukràdjà nydjwý mexo tûmja jakrenh mex ne.

<sup>7</sup> Nãm ren Mòjdjê kukràdjà ajmã kute kêt nhym ren ajte kukràdjà ny kator kètkumrèx ne. Nãm ren kutewaja mex nhym ren ijukri ny 'ò kator kètkumrèx ne.

<sup>8</sup> Nhym bep kati, nãm kukràdjà tûmja kute me utàr kêt nhym kam pãnh Metĩndjwýnh kukràdjà ny kute me utàrja pãnh o kato. Nãm mekam kĩnh kêt ne memã kum,

“Adjým, amũ akati 'òkam dja ba mekbè idjaer kunĩmã atemã ikabèn ny 'ò jarènh mãm dji, atemã kukràdjà ny 'ò.

Nà, Djuda aben nhijuk'ã tàmdjwýjamã gèdja ba atemã kukràdjà ny 'ò jarè. Ba ibè Bènjadjwýr ne ba me amã ikabèn ne.

<sup>9</sup> Ate ne nyja. Ate ne tûm, ije me akukãmãremã arènhja, tãm ne tûm.

Amrèbè ne ba me akukãmãre pa 'ãbyn pykabè Edjitu kurùm meo ikaton kam ar meo iban memã ikukràdjà ja jarè.

Nhym be nãm me ikabên mar prãm kêt ne arîk ar ba. Ba kam amipãnh tu me kanga.

Ibê Bẽnjadjwÿr ne ba me amã ikabên ne.

<sup>10</sup> Bep jakam dja ba mekbê idjaermã ikukràdjà ny jarê. Amũ akati 'òkam dja ba memã ny 'õ jarê.

Ba ibê Bẽnjadjwÿr ne ba me amã ikabên ne. Me òkre kadjwÿnhbê dja ba ikukràdjà jao adjàn me ajamak krekre'ãdjwÿ pi'òk no'òk ne.

Ne kam meo inhõ me jakumrêx nhym me amipãnh Metĩndjwÿnho ipytàn kam amim ijo Metĩndjwÿnhkumrêx.

<sup>11</sup> Djãm me òbikwamê kute abenmã kum, nàr me kamy kute abenmã kum, 'On amim Bẽnjadjwÿr djwÿnh ma', anhÿrmã.

Kati, me kunĩ dja arÿm amim ima. Me kàtammê me rũnhmê me kunĩ dja me amim ima.

<sup>12</sup> Ba kam me kute ikam amikràjakam idjukapri ne kam me ikam axweja tu o akno", ane.

Nãm ã Metĩndjwÿnh kukràdjà ny'ã ujarênh ane. <sup>13</sup> Kute kukràdjà ny jarênhkam arÿm òbê jao tũm ne. Be, ga mÿjja arÿm tũm tẽm ne arÿm biknor 'ÿrja pumũ.

## 9

*Kute pykakam Metĩndjwÿnh nhõ kikreti jarênh.*

<sup>1</sup> Amrêbê ne Metĩndjwÿnh prĩne kukràdjà tũmja, kukràdjà kutewaja'ã memã karõ, kôt me kute ar amijo ba ne kum kabên ne kum àpênh kadjy. Nãm me pykabê kum kikren kam kam kum kabêno ku'ê.

<sup>2</sup> Nãm me kubêkãmê mrykãmê pĩponho kikren ajkwa krekre'ã kubêkà nhõ. Kikrebê kumkati ne ja. Kam ne ngônhpòktimê pĩponh ku'ê. Nhym djwÿ me kute Metĩndjwÿnhmã òr ne pĩponhkam adjwÿrjadjwÿ ikwã. Apÿnh mÿjja ku'ê djari ne ja.

<sup>3</sup> Kadjwÿnhbê ne kumoka'ê. Nhym kam nêje kubêkà wajêt. <sup>4</sup> Kam ne kên karÿro kikre kudjÿ djà bôr djãmê kên karÿro pĩo rara krākà djamê ku'ê. Nhym kên karÿrreo pĩo rara krākà dja kam ne ngôn dja. Kên karÿro ngônkam djwÿ nhidjibê "Mÿj ne ja" nÿt ne dja. Nhym kam

kam Arão nhõ kô me aêrbê ingrõt ne ôja nõ. Nhym kam kamdjwÿ Metĩndjwÿnh kute amikabên'ã kên no'òkja amê nõ.

<sup>5</sup> Nhym kên karÿro pĩo rara krākà dya'ã Metĩndjwÿnh kadjy mrãnh djwÿnh amê ar karõ kàjbê prêkja aben kutã dja. Metĩndjwÿnhbê kumkatiti:, Metĩndjwÿnh pymati, Metĩndjwÿnh mexo tuknĩ kadjy mrãnh djwÿnh karõ nhipêx ja dja. Pĩo rara 'ã ijê djà'ã dja. 'Ã ijê djà ja ne me kadjy Metĩndjwÿnh mar djwÿnh nhõ bẽnjadjwÿr mry kamrõo kaprêprêk nhym Metĩndjwÿnh apÿnh me axwe djari tu o akno. Aj, djãm on ije ar amã prĩne ja jarênhmã got. Ba ar amã mÿjja 'òdjwÿ jarê.

<sup>6</sup> Be, nãm ã Metĩndjwÿnh nhõ kikrekam apÿnh mÿjja ku'ê djari ku'ê ane. Nhym me kadjy Metĩndjwÿnh mar djwÿnh kàtàm myt kunĩkôt kikrebê kumkatikam wangij ne kam kam àpênh ar ba.

<sup>7</sup> Nhym bep me kadjy Metĩndjwÿnh mar djwÿnh nhõ bẽnjadjwÿr rax pydji ne kadjwÿnhbê kumoka'êjamã wangij. Djãm myt kunĩkôt? Arkati, kum ngorekambit. 'ÿr ngjênh nhõ akati apòxkambit ne 'ÿr ngjênh pÿnh ne. Nhym ajte kum ngore nhym ajte 'ÿr wadjà. Akati pÿnhkambit. Djã nãm ÿkam 'ÿr wangij? Kati, mry kamrõ ne 'ÿr o wangijn Metĩndjwÿnhmã kungã. Ta amijaxwemê me kàtàmja jaxwe pãnh ne kum kungã. Me kute mar kêt ne kute Metĩndjwÿnhkam amikrào ba pãnh ne me ò'ã o mrãn o wangijn kum kungã.

<sup>8</sup> Jakôt ne Metĩndjwÿnh Karõ memã o amirĩt, me kute me kàtàm Metĩndjwÿnh'ÿr ngjênh kêt kôt mar kadjy. Metĩndjwÿnh nhõ kikrebê kumkati ãm rã'ã nhym me kute kukràdjà tũmjao ba rã'ari ne me kàtàmja Metĩndjwÿnh'ÿr ngjênh kêtumrêx, kumoka'êjamã ngjênh kêtumrêx. Me kàtàmja kraxje 'ÿr ngjênh kêt.

<sup>9</sup> Be, pykabê Metĩndjwÿnh nhõ kikremê kôt kukràdjà tũmja ne Kritu kukràdjà djwÿnh'ã amijakre nhym me Kritu kajmã'ã ar o ba. Kukràdjà tũmja ne me ï krākàbito mex. Nãm me kukràdjà tũmkôt te Metĩndjwÿnhmã mry bôn kum kungã te kum kĩnh djà ngãn mã amikam kute axwe mar rã'ã. Me kute kum mry nhõr djwÿnhja te kum mry bôn kum kungã kadjwÿnhbê

mex kêt rã'ã ne. <sup>10</sup> Kukràdjà tũmkôt ne me me ò kwý krên djãmẽ mýjjao kôm dj'àã memã karõn mekbê uma. Ne kam ajte me kute apýnh amiku'õnh djàri memã 'ã karõ, me kute kôt amijo bamã. Apýnh kukràdjà ja ne me ì krākàbito mex. Metĩndjwýnh kute mýjja kunõ ny kajmã'ã ne memã kukràdjà tũmja'ã karõ nhym me ar o ba.

*Kritu kamrô'ã ujarēnh.  
Xim k 2.5; Idja 8.6, 12.24*

<sup>11</sup> Nhym arým Kritu bõx ne arým kukràdjà ny, kukràdjà mexo kato. Ne kute kukràdjà nyo kator kadjy kubê me kadjy Metĩndjwýnh mar djwýnh nhõ bēnjadjwýr rax ne arým Metĩndjwýnh nhũrkwã djwýnhmã wadjà. Metĩndjwýnh nhũrkwãti prĩne kute raxo, mexo pykabê ja jakrenh mexjamã wadjà. Mebēngõkre kute ipêx kêt. Me banhõ pykabê mýjja, pĩ, bõ, bànhõr jao kikre nhipêx kêt.

<sup>12</sup> Be, tãm, Metĩndjwýnh nhũrkwã djwýnhbê kumkatimã wadjàn kam amũ kadjwýnhbê kumoka'è'ýr àr pydji. Djã nãm 'ýr wangij ne akubyn apõx ne 'ýr ngiēnh krãptĩ got? Kati, nãm 'ýr àr pydji. Djãm mokaàk kamrô nàr mryti jabatàn nyre kamrô ne o wadjà, kute Metĩndjwýnhmã õrmã? Arkati, nãm ta amikamrõo wadjà. Ne o me bapytà. Me bapytàrkumrēx. Gu me batĩn rã'ã rã'ã ne baje o ino rer kêt kadjy.

<sup>13</sup> Amrēbê kukràdjà tũmkôt ne me mry kamrõo me kamĩ, me akubyn mex kadjy. Nãm me Metĩndjwýnhkam amikràn kam punu. Nhym kam Metĩndjwýnh mar djwýnh mryti djũmre kamrõmẽ mokaàk kamrõo me kamĩ. Ne mryti jabatàn nyre, kaãnhre bĩn kum adjàn kam prà byn o me punu kaprēprēk. Nhym me kam akubyn mex.

<sup>14</sup> Be, ga mry kamrô kute kàjbê meo mexja pumũ. Bep Kritu kamrô ne mrãmri meo mexkumrēx. Metĩndjwýnh Karõ tĩn o ino rer kêtja tãm ne Krituo ban o tỳx nhym kam kôt Metĩndjwýnhmã amingã. Djãm punu ne me kubĩ? Kati, nãm mexo mextire, ajmã kute kêt ne ta Metĩndjwýnhmã amingãn kam kamrô ajkapĩ. Ta kamrô ne prĩne me bajo mex. Me batyk ne baje Metĩndjwýnhmã bakre rax ne nĩjar baba kadjy ne gu me bamã

bajaxwe kĩnh ne o baba. Nhym kam ta kamrõo prĩne me bakadjwýnhbê me bajo mex gu me kam arým bakadjwýnhbê bapijàm kêt ne amikam bajaxwe'õ mar kêt ne Metĩndjwýnhmã badjapēnh ar baba, Metĩndjwýnh tĩnjamã apê.

<sup>15</sup> Kadjy, Kritu kamrô prĩne kute me bajo mex gu me Metĩndjwýnhmã badjapēnh kadjy ne Kritu kukràdjà nyo kato. Metĩndjwýnh kute amiwýr me bajwýr ne kute me bamã kabēn pydjin arēnh ne kute me bamã mýjja mex jarēnh gu me 'ýr babõxmã. Nhym me banhõ mýjja mexja dja rã'ã rã'ãn o ino rer kêtumrēx. Mrãmri dja Kritu ã memã o ane. Kadjy ne arým me axwe pãnh ty. Me kute kukràdjà tũmja ar o bari ne me Metĩndjwýnhkam axwe nhym kam arým Jeju amityko o pãnh ne.

<sup>16-17</sup> Bir be, nãm tykkõtbit o pãnh. Nhym kam ajte mýjja tykkõtbit ne mýjja amirĩt. Ga me õbikwa tyk kutã kute abenmã ò mýjja'ã karõja pumũ. Òbikwaja tyk kutã õbikwamã ò mýjja'ã karõ ne,

—Godja ba ty ga kam inhõ mýjja jao mõ.

Ne kam kum ò mýjja nhidji jarēn kum,

—Tãm dja ga o tē, ane.

Gêdja kute kum 'ã karõja ty nhym kam õbikwaja amũ ajte kudjwa ô'ã ar o ba. Me tykkambit ne me ajmãn aben nhõ mýjja jamýn mã amũ abendjõ'ã o ba. Me tĩn rã'ãkam ne me kute aben nhõ mýjja jamýnh kêt. Me tykkambit ne me kute me ò mýjja kajgo jamýnh. Bir be, me tykkõtbit ne mýjja amirĩt. Nhym kukràdjà tũmjadjwý ajte tãm ne.

<sup>18</sup> Nãm me kute kukràdjà tũm kutewaja o bao kurê'ukmã ne Mõjdjê mry kamrõo me kamĩ. Mýjja tyk ne kamrõ bikapĩnkõtbit ne mýjjao mex djà.

<sup>19</sup> Nãm Mõjdjê memã Metĩndjwýnh kabēn kukràdjà kunĩ'ã ujarēnh kumrēx arē. Metĩndjwýnh kute mekbê mýjja pymaja memã arēho djan memã kunĩ jarēnh pan kam mry kamrô by, mryti jabatàn nyremẽ mokaàk kamrõ run kam iby ngõ run kam pi'õ nhikwýr ne kadjat kamrēk jakritare jao krax 'ãpren kam pi'õja mry kamrõmã adjàn kam o me kaprēprēk. Metĩndjwýnh kabēn kukràdjà'ã pi'õk no'õkja

kumrêx ne kamîn kam mebêngôkrejadjwý kamĩ. <sup>20</sup> Me kamîn kam mekmã kum,

“Be, Metĩndjwýnh kute me amã amikukràdjà jarènh mãmđji ga me aje kôt amijo aba kadjy kamrô ne ja. Gora me 'ãno dja”, ane.

<sup>21</sup> Ne kam ajte Metĩndjwýnh nhõ kikre kamĩ. Nãm kapõtã kukràdjaja kumrêx kamîn kam kikre kadjwýnhbêja'ýr o wadjàn kam adjwýnhdjwý o kamĩ, kukràdjaja kunĩ kamĩ. <sup>22</sup> Bir be, Mõdjê kukràdjakôt ne me mry kamrôobit mýjjao mexo ba. Kamrô kapĩnkôtbit ne apýnh me axwe djari Metĩndjwýnh tu me axweo aknon mar kêtikumrêx ne.

<sup>23</sup> Bir be, pykabê Metĩndjwýnh nhõ kikremê õ kikrekam kukràdjaja ne kàjkwakam mýjja djwýnh'ã amijakre. Kam ne Mõdjê mry kamrôobit ã mýjjao mexo ane. Nhy m bep kàjkwakam mýjja djwýnh:kad jy ne me mýjja mexbit kum kubĩn kungã. Kàjkwakam mýjja djwýnhja kadjy ne me mýjja mexbit kum kubĩn kungã. Mýjja mexo kute pykabê mýjja ja jakrenh. Mýj ne mex nhy m me Metĩndjwýnhmã kubĩn kungã? Je kum Jeju. Jejubit ne mexkumrêx ne kam Metĩndjwýnhmã amingã nhy m me kubĩ.

<sup>24</sup> Djã nãm me Metĩndjwýnhmã kikre nhy m kam Kritu kadjwýnhbê kumoka'êja'ýr wadjà? Kàjkwakam õ kikre djwýnhja'ã kute amijakre djãm kumã ne wadjà? Kati, nãm tu kàjkwamã wadjà. Kum wadjàn arým Metĩndjwýnh kabem djan kum me bajarènh o djan me banêje kukrà o dja.

<sup>25</sup> Djã nãm Metĩndjwýnhmã aminhõr krãptĩ? Kute pykabê Metĩndjwýnh mar djwýnh nhõ bẽnjadjwýr rax kikremã ngjêx krãptĩja pyrãk? Kum ngore kunĩkôt kute mry kamrôobito mrãnh ne Metĩndjwýnh nhõ kikre kadjwýnhbê kumoka'êmã o ngjêxja pyrãk? <sup>26</sup> Arkati, nãm ren kum aminhõr krãptĩn ren arým tokry krãptĩ. Ren pyka nhípêx totokbê ren arým apýnh tokry krãptĩ. Bep kati, arým pyka kute o ino rerkam arým kator ne kute mekbê axweo apêxmã kute Metĩndjwýnhmã aminhõr mãmđji.

<sup>27</sup> Ga Metĩndjwýnh kute me kunĩ'ã amim karõja pumũ. Me kunĩ dja me tyk pydji

nhy m ijukri dja Metĩndjwýnh memã axwe pãnh jarê.

<sup>28</sup> Bir be, nãm ã Kritudjwý tyk pydjio ane. Kute Metĩndjwýnhmã aminhõr nhy m me kute bĩn mãmđji. Nãm amijã me krãptĩ jaxwe mẽn kam me pãnh Metĩndjwýnhmã amingã nhy m me kubĩ. Dja ajte me bawýr kato. Djãm kute axweo pãnhmã? Kati, kute õ me ja pytãr ne kute meo mõrmã. Pykabê me kute abej ajkam amakja pytãr ne ar meo bamã dja ajte kato.

## 10

### *Kritu pĩte'ykam tyk pydji.*

<sup>1</sup> Bir be, Mõdjê kukràdjà ne mýjja mex-tireja kukãm bõx. Kubê wýnh kêt. Mýjja mex-tire bõx kêttri ne Metĩndjwýnh Mõdjê kukràdjajao kato. Nãm mýjja mex djwýnh'ã amijakre kajgo. Kam kute meo mex kêt. Metĩndjwýnh kute me axweo bingrãnh kadjy ne me kum mry pan kubõn kungã. O anhýro ba tãmtã: ĩ arek amũ namê amex kunĩkôt o anhýro tẽ. Nãm me te mry pan kamrô kapĩn te kute o amikam axweo apêx ne mexmã te o amijo ane. Me kute Metĩndjwýnh'ýr bikamènh prãmja ne me te amijaxwe kêt mãm amijo ane. <sup>2</sup> Nãm ren me kute Metĩndjwýnhkôt amijo ba prãmja mry kamrôo ren amikam axweo apêx ne ren mrãmri amikam axwe'õ mar kêtikumrêx ne ren tu mry par krãta.

<sup>3-4</sup> Nhy m bep kati, nãm me te o amijaxweo ane. Mryti djũmre kamrômẽ mokaak kamrôo mrãmri me kute amijaxweo apêx kêt. Nãm me te o amijo anen mã axwe. Mry kamrô kute memã axweo apêx kêt. Nãm tu amex kunĩkôt memã axweo amirĩto tẽ.

<sup>5-6</sup> Kam ne Kritu pykamã rwýk kutã Bãm mãm kum,

“Nã gãm arým amã mry kamrô kapĩnmẽ me kute amã djwý nhõrja kĩnh kêt.

Nhy m me kute amijaxweo apêx kadjy nãrãm kute mry par ne rã'ã ngõnh o kikam rẽnh ne kute kum angjẽnh ne kute amã õrja tãm ne ga arým abê kĩnh no kati.

Ne kam aje ijo inhĩmã ijã amim karõ.

<sup>7</sup> Ba kam amã,

‘Metĩndjwýnh, ota ba dja. Aje amim ijã karõkôt ne ba jãnh dja. Amrêbê anhõ

pi'ôk no'ôkkam aje ijarênhkôt ne ba jânh dja', ane."

Nâm ã Kritu Bâmmã ane. <sup>8</sup> Nâm kum, "Mry kamrô kapînmê me kute amã djwý nhôrjamê me kute amim axweo apêx kadjy nâràm mry par ne kute ngônho kikam rã'ã rênh ne kute kum angjênh ne kute amã ôrja tãm ne ga amã kînh kêt ne abê kînh no kati", ane.

Djã nãm me kupa'ã ar o ba? Kati, mrãmri ne Môjdjê memã kôt 'ã karô nhym me kute kôt ar o ban kute Metîndjwýnhmã mry par ne kute ôro ba. Nhym Kritu Bâmmã kum, "Ga abê kînh no kati", ane.

<sup>9</sup> Nâm kum kabên ja kumrêx jarên kam atãri kum, "Metîndjwýnh, ota ba dja. Aje amim ijã karôkôt ne ba jânh dja", ane.

Bir be, nãm me kute mry par ne kum ôrja arým o apêx. Kute pãnh nyjao katormã ne arým tûmjao apêx. <sup>10</sup> Metîndjwýnh kute 'ã amim karôkôt ne Jeju Kritu tên ruwn ta Metîndjwýnhmã amidjwýnh ngã nhym me kubî. Nãm kute kum aminhôrkam me bîn mãmджи. O ne prîne me bajo mex, prîne me bajo mexo mexkumrêx ne.

<sup>11</sup> Me ï pýnhkôt me kadjy Metîndjwýnh mar djwýnh aben nhjuk'ã myt kunîkôt ngônho ki kabem ku'ên mry kupê. Nãm me kute Metîndjwýnhmã mry par ne bôr ne kum ôrmã bôro ku'ê. Nhym akati nhym tãm ne. Nhym akati nhym ajte tãm ne. Nãm memã axweo apêx kêtumrêx ne.

<sup>12</sup> Nhym bep ate ne Kritu Metîndjwýnhmã mýjja pydji ngã. Nãm kum amingã nhym me bîn pydji. Nãm amijã me axwe mê nhym me kam bîn pydji. Nãm me kubî nhym kam tu amijã me axweo apêxkumrêx. Jakôt ne Metîndjwýnh djubôk'ãnh nhỹ, kubê bënjadjwýr raxkam ubôk'ãnh nhỹ. <sup>13</sup> Ne kam arek kam amako nhỹ. Metîndjwýnh kute kurê djwýnho bikênh mex nhym me kam umaje kuka kôn timereto ku'ên kam tu mýrbê rôrôk nhym kute kwý o pardjan kwý nhimex, ja ne kam amako nhỹ.

<sup>14</sup> Bir be, kute Metîndjwýnhmã aminhôr pydjijakôt arým mrãmri tu me'ã mex mênhkumrêx nhym me mrãmri mex rã'ã rã'ã rã'ã. Kute me bajo mex ne kute me bajaxwe kêtô têmja, me bajã ne tu mex

mênhkumrêx. <sup>15-16</sup> Nhym Metîndjwýnh Karôdjwý kôt arê,

"Bep jakam dja ba memã ikukràdjã ny jarê. Amũ akati 'ôkam dja ba memã ny'ô jarênh mãmджи.

Ba ibê Bënjadjwýr ne ba me amã ikabên ne. Me ôkre kadjwýnhbê dja ba ikukràdjãjao adjàn kunhò. Ne me amak krekrekamdjwý kunhò", ane.

Nãm kabên ja kumrêx jarên kam atãri memã kum,

<sup>17</sup> "Apýnh me ikam ajaxwe djãri, me aje ikam amikrà ar o abajadjwý gêdja ba tu mar krãtan o akno."

<sup>18</sup> Bir be, mrãmri ne Metîndjwýnh arým o akno. Kam ne me kute amijaxwe pãnh Metîndjwýnhmã mry par ne kum ôrja arým apêx. Arým kêt. Arým Metîndjwýnh kute kam me axweja kunõ biknorjakam ajte we amijaxwe pãnh mry par ne ar Metîndjwýnhmã ôro ba. Kati, arým kêt.

*Me kute Kritu mar'ã ukanga kêtã.  
Ep 3.11*

<sup>19</sup> Ê, akmere ar, àpnhîre ar, mrãmri dja gwaj tu bapijãm kêt ne Metîndjwýnh nhõ kikre kadjwýnhbê kumoka'êmã wangij ne Metîndjwýnh 'ýr bôx ne tu kum amijarê. Mýjkôt dja gwaj bapijãm kêt ne tu 'ýr wangij? Jejukôt. Gwaj bakadjy tyk ne kamrô bikapînkôt dja gwaj bapijãm kêt ne Metîndjwýnh'ýr bôx ne tu kum amijarê ne kum bakabên.

<sup>20</sup> Pykabê Metîndjwýnh nhõ kikre kadjwýnhbê kumoka'ê nêje, Metîndjwýnh krî djã nêje ne kubêkati wajêt nhym me 'ýr ngjênh kêtumrêx. Nhym bep ajbir Jeju ne me bakadjy Metîndjwýnh'ã kutan 'ýr pry ny dji. Pry kubê Jeju. Kute Metîndjwýnhmã ta aminhôr nhym me kute bîn nhym ajte tînkôt ne gwaj tu Metîndjwýnh'ýr mrãn bôx ne wangij ne tu kum bakabên.

<sup>21</sup> Be, gwaj banhõ Metîndjwýnh mar djwýnh nhõ bënjadjwýr raxkumrêx. Nãm prîne Metîndjwýnh nhõ me jao ban meo djuw mex ar o ba.

<sup>22</sup> Gora gwaj kam tu Metîndjwýnh'ýr mrãn bôx ne tu kum bakabên, on batîri 'ýr mrãn bôx ne kum bakabên. Amrêbê ne Môjdjê Metîndjwýnh kukràdjãkôt kute meo mex kadjy mry kamrô me kamî nhym me

kam akubyn mex ne. Ne kam ajte me kute amijo mex kadjy ngô mexkambit djuwn o jãm amijã ngrã rë. Gwaj baje tu amim Jeju kamnhĩxkam dja gwaj Metĩndjwýnh kadjy bamex. Jeju ne gwaj bajo mex. ã gwaj bamex tanhĩrkam dja gwaj Metĩndjwýnh'ýr mrãn bôx ne tu kum bakabën, on batĩnri 'ýr mrãn bôx ne kum bakabën. Kwãrĩk wãnh gar ajô anhôkre kadjwýnhbë amim,

—Djãm Metĩndjwýnh imã mex? anhýr kêt. Dja gwaj tu amim kamnhĩxkumrëx ne katãt bakabënkam tu 'ýr mrãn kum bakabën. Pykabë gwaj ar babari dja gwaj ã o ane.

<sup>23</sup> Gora gwaj mã 'ãno dja. Metĩndjwýnh kute gwaj bamã mýjja mex jarënh gwaj baje tu amiwýr kamnhĩxbë ar babaja ne gwaj arým memã arë nhym me kuma. Gwaj gop mã 'ãno djan gop arek amiwýr kamnhĩxbë ar baba. Kwãrĩk wãnh gwaj 'ã badjukanga kêt. Metĩndjwýnh ne arým gwaj bamã kabën pydjín arë. Mrãmri ne kabënkumrëx. 'Ëxnhĩ kêtumrëx ne kute gwaj bakanga kêtumrëx. Kam dja gwaj amiwýr kamnhĩx týxbë ar baba.

<sup>24</sup> Gora gwaj aben ma ne amidjwýnhbit mar kêt. Dja gwaj bamã aben jabëmãbit abenmã karô ne ajte bamã mýjja mexbit kính ne baje o baba'ã abenmã karô.

<sup>25</sup> Gora gwaj abeno babikprõnh rã'ã. Nhym bep me kwý ne me arým kum abeno bikprõnh kanga. Nhym bep kati, gwaj ba dja gwaj o anhýr kêtumrëx. Gwaj ba dja gwaj abenmã týx jangij, mã Jejukôt gwaj babikamënh rã'ã kadjy. Metĩndjwýnh nhô akati arým o rãm ne ja. Kam gëdja gwaj mã abenmã týx jangjênh ar o baba.

<sup>26</sup> Me kute me bamã Metĩndjwýnh kabën 'ëxnhĩ kêt jarënhja ne gu me baje amim marmãn ate mã bamã bajaxwebit kính ne, nhýnh ne mýjja 'õ ajte me bajaxwe pãnh tykmã got gu me bamã bajaxwebit kính ne. Arkati, Jeju pydji ne me bajaxwe pãnh ty. Atemã mýjja 'õ kêtumrëx. Mýjja 'õ kute me bajaxwe pãnh tyk ne kute me bamã me bajaxweo bingrãnh kêt. <sup>27</sup> Nhym bep ãm mýjja ti, mýjja punuti, mýjja py-mati: wã pydji ne me jamã nõ. Me kum Metĩndjwýnh kurëjamã ne nõ. Memã gëdja axwe pãnh jarë ne kam kuwy pôktijamã me kurë. Kumã dja me kurë nhym me prĩne

xêr. Me kajmã'ã ne nõ. Kumã dja me kurë. Djãm uma ngri? Gora ar amikam ajkam ama.

<sup>28</sup> Ë, amrëbë me'õ kute Môjdjê kukràdjãkôt amijo ba këtja nhym me'õ axwekôt omũ. Birãm me'õ amãnhkrut nãr kon amãnhkrut ne ikjêkêt me'õ jaxwekôt arým noo omũn arë nhym me arým pãnh kubĩ, kum kaprĩ kêt ne tu kubĩ, axwe pãnh.

<sup>29</sup> Bir be, kam dja me'õ kute Metĩndjwýnh kra japrýkam mrãmri arým o bikënh rax ne. Me kute Môjdjê kukràdjão bikënhkam ne me kute tu bĩn kajgomã. Bep me kute Metĩndjwýnh krao bikënhkam dja pãnh rax. Pãnh raxo prĩne kute Môjdjê kukràdjãkôt me kute me bĩn kajgoja jakrenh mex ne.

Nãm me Metĩndjwýnh kra japrý ne kam ajte Metĩndjwýnh kukràdjã ny kadjy kamrôjao mýjja punu, Metĩndjwýnh kute memã kukràdjã ny jarënh mãmdji kadjy kamrô jao mýjja punu. Kra ne tyn amikamrô kapĩ gu me kam arým Metĩndjwýnh kukràdjã nykôt amijo baba. Kamrô jao ne me mýjja punu, o mýjja kakrit ne kubë kanga. Jeju kute kamrô kapĩnkôt ne Metĩndjwýnh memã me axweo ajngrã ne meo mex nhym be nãm me tu kamrô jao mýjja kakrit ne kanga.

Ne kam ajte Metĩndjwýnh Karô japrýn kum ngryk jadjã. Metĩndjwýnh Karô me bakam ukaprĩja, gu me baje te kam amikrà ar o baba nhym mã me bakam ukaprĩ, ja tãm ne me aprý. Djãm ja pãnh kêt got? Mrãmri gëdja prĩne Metĩndjwýnh me jao bikënh mex ne. <sup>30</sup> Nhýnh me'õja kute memã kum,

“Bajbit dja ba memã amijo pãnh ne. Ba dja ba me axwe pãnh meo ajkë”, anhýrja ne gwaj arým mar mexkumrëx. Nhym ta ajte memã kum, “Bënjadjwýr djwýnh ta dja õ me jamã pãnh jarë”, ane.

<sup>31</sup> Metĩndjwýnh tĩn ne ar ba tãm dja pao meo bikënh mex ne. Kute pao meo pãnh ja tãm ne uma:kumrëx. Djãm mýjja wã pyma ngri got.

<sup>32</sup> Ë, amrëbë Metĩndjwýnh kute ar ano bõnh totokbë ja gora ar ama. Nãm me te ar ajo bikënh ba gar mã 'ã angrã týx ne, ne te atokryn mã 'ã angrã týx ne. <sup>33</sup> Nãm me me ipôkri ar ajaprýn ar akamjêro ba. Nãm ã me



ar akwÿo ane gar anhitepato ar kuri aku'ên ar omũnho aku'ên kam ar ô'ã akà djàn akaprĩn ar omũnho aku'ê. <sup>34</sup> Nhyim me ajte ar akwÿbê ijê gar ar ô'ã arerek ne akaprĩn ar omũnho aku'ê. Nhyim me te ar anhõ nèkrêxo prõt gar kam mã akĩnh. Mrãmri arÿm kàjkwakam anhõ mÿjja mextirekõt ajamak bẽn kam tu ate akrã. Kàjkwakam anhõ mÿjja me:xkumrêx. Mexo kute pykabê ja jakrenh mexi. Tãm gêdja rã'ã rã'ã rã'ã. Nhyim me te pykabê mÿjja jao ar ajo ajkê, gar kam kãjmã mÿjja ja man mã akĩnh.

<sup>35</sup> Bir be, gora ar amã me uma kêt ne atÿx ne kõt amijo aba rã'ã. Kwãrĩk wãnh gar amã kanga kêt. Mrãmri dja Metĩndjwÿnh pãnh ar amã mÿjja mextire ngã. <sup>36</sup> Dja gar arek akrãnmã amijo aba 'ãno dja. Metĩndjwÿnh kute ar ajã amim karõ ne kute ar amã mÿjja jarênhja kõt dja gar amijo mõi. Dja gar 'ãno djan akrãnmã o amõr rã'ãn arÿm kõt 'ÿr bõx. Kute me bamã kabên pydji jarênh ne kute me bamã mÿjja mex jarênhja 'ÿr bõx. 'ÿr bõx ne amim aby. <sup>37</sup> Metĩndjwÿnh kabênkam ne krabê Jeju akubyn me bawÿr bõx'ã,

“Adjÿm ngrire, dja ï me awÿr tẽn bõx. Amrêbê ne tẽmmã krà ne kam arÿm amrê tẽn 'ÿr. Dja tebê amikrà kêt ne.

<sup>38</sup> Me kute amikajmã'ã imar ba arÿm ije memã axwe kêt jarênh nhyim me katat mrãnhja dja me mã imar rã'ãn ar ikõt ba.

Gêdja me'õ me umaje akubyn ibê akêx ba kam arÿm ibê kĩnh no kati”, ane.

Nãm ã Metĩndjwÿnh ane. <sup>39</sup> Nhyim bep gwaj ba ne gwaj baje ã anhÿr kêtumrêx. Djãm gwaj bamã me uman baje kubê amijo akêx ne kam tu babiknorkumrêxmã? Arkati, gwaj ba ne gwaj tu amikajmã'ã markumrêx nhyim arÿm Metĩndjwÿnh gwaj bapytàn ar gwaj bajo ba.

## 11

*Me tũmre kute amikajmã'tã Metĩndjwÿnh mar.*

<sup>1</sup> Ije, mÿjbê ne me kute amikajmã'ã mÿjja mar? Mã ne kute? Bir, me baje amikajmã'ã mÿjja markam ne gu me tu amim kamnhĩxkumrêx ne amiwÿr kam amakbê

ar baba. Ne tu amim markumrêx ne banhõkre kadjwÿnhbê amim,

—Nà, mrãmri dja iwÿr bõxkumrêx, ane. Ne kam ajte me baje banoo mÿjja pumũnh kêt kam tu amim markumrêx ne banhõkre kadjwÿnhbê amim,

—Nà, mrãmri dja ba ï amũ akati 'õkam omũ, ane. Nã gu me ã amikadjwÿnhbê amikajmã'ã mÿjja maro ane. <sup>2</sup> Nãm ã amrêbê me bakukãmãre tu amikajmã'ã Metĩndjwÿnh maro ane nhyim arÿm mekam kĩnh ne.

<sup>3</sup> Nã gu me badjwÿ ã amikajmã'ã Metĩndjwÿnh kute pyka nhipêxkõt maro ane. Nãm kabêno pyka nhipêx nhyim kato. Me kute noo mÿjja pumũnh kêtõ ne pyka nhipêx. Nhyim arÿm apõx ne amirĩt gu me arÿm kõt omũ. Ne kam amikajmã'ã kute pyka nhipêxkõt kuma, amikajmã'tã arênh ma.

<sup>4</sup> Nãm ã Abeu amikajmã'ã Metĩndjwÿnh maro anen kam õ krit bĩn kugan kum kungã. Nãm kum mÿjja mex ngã. Mexo kute kamybê Kaĩ nhõ mÿjja ja jakrenh. Nhyim kam kam kĩnh ne. Ne kum,

—Ga ne ga ajaxwe kêtumrêx. Aje imã õrja ne ba imã kĩnhkumrêx, ane.

Be, nãm tu amikajmã'ã Metĩndjwÿnh ma. Amrêbê ne ty. Nãm te tyn mã me bamã mÿjja jarê. Tĩn mãn prãbê mã me bamã arê ne,

—Dja ga me ã ikudjwa amim Metĩndjwÿnh maro ane.

<sup>5</sup> Nãm ã Enokidjwÿ amikajmã'ã Metĩndjwÿnh maro anen kam tyk kêt. Nãm Metĩndjwÿnh tu tĩn rã'ão wabi. Nhyim me te noo abej aprã. Nhyim kêtumrêx, Metĩndjwÿnh kute tu tĩno àbirkam. Kute o àbir kêtõri ne 'ã memã kum,

—Tãmjakam ne ba ikĩnhkumrêx, ane.

Nãm ã Metĩndjwÿnh ane. <sup>6</sup> Bir be, nhÿnh ne me'õ amikajmã'ã Metĩndjwÿnh mar kêt nhyim we kam kĩnh? Kati, me kute amikajmã'ã Metĩndjwÿnh marbit ne mekam kĩnh ne kum me kĩnh. Godja me'õ Metĩndjwÿnh'ÿr bõx prãm jabej gora amikajmã'ã Metĩndjwÿnh ma. Metĩndjwÿnh ne tĩn ne ar ban kam mekam ukaprĩkumrêx ar ba, me kute Metĩndjwÿnh mar prãm ne kute abejja mekam ne ukaprĩ. Ja dja me amikajmã'ã kuman kam kõt Metĩndjwÿnh'ÿr bõx.

<sup>7</sup>Nãm ã Nôwedjwý amikajmã'ã Metĩndjwýnhaptàn kumex ne kute mrãmri kàjkwakam maro ane. Metĩndjwýnh ne kum tĩn jadjã. Anhÿr djwýnhrà m kute amirĩt kētri ne kum ngô tãm jarē. Nhym kam Nôwe umaje kã rax nhipêx ne kam kum prômē kramē upãnhmē aro wadjàn ar utàn ar aro ba. Nhym ate me kum mã axwe kĩnhja ne me tu ate krãn ar ban kam tu biknorkumrēx ne. Nhym bep Nôwe pydji ne amikajmã'ã kuma nhym Metĩndjwýnh arým kum axwe kēt jarē.

<sup>8</sup> Nãm ã Abraãodjwý amikajmã'ã Metĩndjwýnh maro ane. Nãm Metĩndjwýnh atemã kum pyka ny jarēn 'ÿr ano nhym tē. Nãm kum kabēn pydjin arēn kum,

—Dja ba amã kungã ga tu o anhō pykakumrēx ne kam kam ar aba, ane.

Nhym kabēn man kam tu 'ÿr tē, kute amikajmã'ã pyka pumũnh kēt 'ÿr ne tu tē. <sup>9</sup> Nãm tu amikajmã'ã Metĩndjwýnh ma. Amikajmã'ã kuman pyka nyja kam ar ba. Metĩndjwýnh kute kum pyka jarēnh ja kam ar ba. Me bajtem nhō pykakam ar ba. Nãm mrykào kikrekam ar ba. Krabē Idjakmē tãmdjwýbē Djakomē ro'ã mrykào kikrekam ar ba. Metĩndjwýnh kute Idjakmē Djako ar adjwýnhdjwýmã kute pyka jarēnhjamē ro'ã mrykào kikrekam ar ba. <sup>10</sup> Mÿkam ne Abraão mrykào kikrekambit ar ba? Bir, kÿjrũm Metĩndjwýnh kute amim krĩ mex'ã karõn kute prĩne ipêxja kamnhĩxbē ne pykabē mrykào kire jakam ar ba. Krĩ mex rã'ã rã'ã, krĩ mör ne tũm ne rōrōk kēt, tãm ne amim kamnhĩxbē ar ban mar ar o ba.

<sup>11-12</sup> Nãm ã Xaramē mjēnbē Abraãodjwý amikajmã'ã Metĩndjwýnh maro ane. Nãm ar te kra prãme ar ba nhym arým Xara bēngēxte. Te kubēngēxte nhym kam kra wajēt ne ruw nhym amim kumý. Metĩndjwýnh arým kum kabēn pydjin arēn kum kra jarē nhym kam Xara amikajmã'ã kuman kam,

—Metĩndjwýnh ne kabēnkumrēx, ane.

Nhym kam kute kum kra jarēnhja wajēt ne ruw nhym kumý. Te kubēngēxte ne amim kra mý. Kam ne Abraão pydji kurũm me kamingrãny apōx ne kumex. Arým kubēngētte kute amikam kō krãn mexo tēmkam ne kra dji. Nhym amũ aben nhijuk'ã kam tãmdjwý aptàn kumex. Tãwã pydji kurũm ne me krãptĩ apōx ne kam kam

kanhētire pyrãk. Ne kute ngô rax mÿrri pykati ngrã ja pyrãk. Pykati ngrã tãm ne me o itun te kute abenã akremã nhym krãptĩ: anen amũ ajkamē nhym me te o ane. Nãm ã kam tãmdjwý amũ aptàn ne kumex o ane.

<sup>13</sup> Ije ar amã ar tũmre jarēnhja ne ar kunĩ amikajmã'ã Metĩndjwýnh mar rã'ãn ty. Metĩndjwýnh kute kabēn pÿnho memã mÿjja jarēnhja, kabēn ja jarēnh ja ne ar kraxje kute amim byr kēt ne ty. Nãm ar kute amybym noo omũnhmãn prãbē amikukãm kuman tu amikam kĩnhkumrēx. Ne memã kum,

—Me bajtemkam ne bar iba. Me ò pyka prokam ne bar iba. Pyka ja ne inhō pyka djwýnh kētkumrēx, ane.

<sup>14</sup> Me ja ne me kute ò pyka jabej rã'ã, kute kàjkwakam ò pyka djwýnhja jabej rã'ã kam ã kabēn ane. <sup>15</sup> Nãm ren ar ò pyka kurũm kator ja tēn o aman arým ren mã ajte akubyn 'ÿr tē. <sup>16</sup> Nhym bep kati, kàjkwakam ar ò pyka mextire ja ne ar o aman kam 'ÿr tēm prãmã ne kam ã kabēn jarēnh o ane. Kam ne Metĩndjwýnh kum ar kĩnhkumrēx. Nhym ar kute Metĩndjwýnhmã kum,

—Ar imã akĩnhkumrēx. Apydji ne ga abē ar itĩn djwýnh, anhÿrkam djãm kam Metĩndjwýnh jãm Ar kubē krãmã got, arkam pijãmmã got. E kum kati, kum ar kĩnh raxkam ne ar kutēp krĩ mex nhipêx ne.

<sup>17-18</sup> Nãm ã Abraão amikajmã'ã Metĩndjwýnh maro ane. Nãm Metĩndjwýnh Abraão kute Metĩndjwýnhkôt ar amijo ba jabej kabin kra'ã ku'uw. Nhym bit kute krabē Idjak bĩnmã, kute bĩn ne kum òrmã bit kute bĩnmã. Amrēbē Metĩndjwýnh kute kum kra pydji jarēnh ja ne bit kute kum bĩnmã. Kra ja'ã, kra pydji ja'ã ne Metĩndjwýnh kute kum,

“Akra bē Idjak ja gēdja amũ aben nhijuk'ã kam tãmdjwý krãptĩkumrēx”, anhÿrja. Kra ja ne Metĩndjwýnh kum arē nhym kam bit kute bĩn ne kum òrmã. <sup>19</sup> Nãm òkre kadjwýnhbē amim,

—Metĩndjwýnh dja akubyn imã o tĩn, ane. Ne kam bit kute bĩnmã nhym kam Metĩndjwýnh nēje kukrãn akubyn kum nē ne kam mrãmri kute akubyn o tĩn pyrãk.

<sup>20</sup> Nãm ã Idjakdjwý amikajmã'ã Metĩndjwýnh maro ane. Ne kam krabē

Djakomê Ixau arkum kînh djà jarê, ar kukâm ne arkum kînh djà jarê. Ar ò mỳjja kute amirît kêtri ne ar kukâm amũ arkum kînh djà jarê.

<sup>21</sup> Nãm ã Djakodjwỳ amikajmã'ã Metîndjwỳnh maro ane. Nãm amũ krabê Jôdjekam kra amê aro kînh. Arỳm kubêngêtte, arỳm bikati mex ne kam môn amikakêkôt kajpar djà djan kam Metîndjwỳnhmã rax jarên kam tàmdjwỳjamã kum,

—Gêdja Metîndjwỳnh ar ajo kînh, ane. Nãm ã arkum ane.

<sup>22</sup> Nãm ã Jôdjedjwỳ amikajmã'ã Metîndjwỳnh maro ane. Tyk kutã ne amũ anhỳr djwỳnhrà m mekbê idjaer pykabê Edjitukurũm katormã arê. Ne prîne memã ta amiji'ã karô, me kute 'io mormã ne memã 'ã karô, me kute 'io mör ne kute ò pyka djwỳnhkam adjärmã, Metîndjwỳnh kute kum pyka jarênjakam kute adjärmã.

<sup>23</sup> Nãm ã Môjdjê nãmê bãmdjwỳ amikajmã'ã Metîndjwỳnh maro ane. Nãm ar rwỳk totokbê o apdju. Bënjadjwỳr raxbê Parao ne me kra my apôx nhym me kute me parmã arê. Nhym arkum bënjadjwỳr rax kabên pyma kêt mex ne tu o apdju, ar kute bîn kêt ne tu o apdju. Nãm ar kra mextire pumũn kam Metîndjwỳnh kanàrràm tu o apdju. Nhym o bipdjur'ã mytyrwỳ amãnhkrut ne ikjêkêt nhym kam ar têtêktikam kunhò.

<sup>24</sup> Nãm ã Môjdjêdjwỳ amikajmã'ã Metîndjwỳnh maro anen kam arỳm abatàn ne kam krô'ã nãja kanga. Parao kra kute amim prîrũm mỳnhja tãm ne nã kanga.

<sup>25</sup> Nãm,

—Kwãrîk wãnh ba ijaxwejao amikînh kêt. Kwãrîk wãnh wãm memã nõ. Godja ba arîk ar ibaja kwỳ ngrire ne o amikînh? Kati, gêdjãm wãm kunĩ nõ. Ba gêdja ba Metîndjwỳnh nhò me jakôt itokry, ane. <sup>26</sup> Môjdjê ne Kritu kajmã'ã tokry, Bënjadjwỳrbê kumkati kajmã'ã tokry. Nhym amũ tũmràm Kritu bôx ne adjwỳnhdjwỳ kôt kudjwa tokry. Nãm me kum kurên aprỳn prîne o ajkê nhym tokry rax ne. Nhym Môjdjêdjwỳ Kritu kajmã'ã kàjbê ã tokry ane.

Nãm,

—Kwãrîk wãnh me kum ikurên wãnh ijapry kwãrîk wãnh rã'ã. Ba gêdja ba

Bënjadjwỳrbê kumkati kajmã'ã itokry, nhym bep ate gêdja Edjitukam nêkrêx kumexja wãnh memã nõ. Nhym bep ba dja ba Bënjadjwỳrbê kumkati kajmã'ã itokry. Tãmbit ne ba imã kînh, ajbit ne imã mex, ane. Nãm amũ amikukãm Metîndjwỳnh kute kum pãnh mỳjja mextire nhormã amikukãm kuman kamnhîxbê ar ban kam ã o ane.

<sup>27</sup> Nãm ã amikajmã'ã Metîndjwỳnh maro anen kam kum bënjadjwỳr rax pyma kêt mex ne pykabê Edjitu kurũm kato. Bënjadjwỳr rax te kam ngry:k. Nhym kam kum uma kêt mex ne tu kurũm tẽ. Kute noo amim Metîndjwỳnh pumũnh pyrãk. Metîndjwỳnh pumũnh kêtja ne kute noo omũnhmãn prãbê akrãnmã amijo ba rã'ã ne akubyn akêx kêtumrêx ne.

<sup>28</sup> Nãm ã amikajmã'ã Metîndjwỳnh maro anen kam Metîndjwỳnh me irôbê mrãnh nhò akati man kam me kute kamrôo kikre'ã ijê djà kamĩnmã memã arê. Metîndjwỳnh kadjy mrãnh djwỳnh kute me imexmã me irôbê mör ne kute mekbê idjaer kutewa par kêt kadjy. Nãm tu amikajmã'ã kuman kam me kute kamrôo kikre 'ã ijê djà djymã memã arê nhym me o amiptaro ba.

<sup>29</sup> Nãm ã mekbê idjaerdjwỳ amikajmã'ã Metîndjwỳnh maro anen ngò rax nhidjibê Kamrêk'ỳr bôx nhym tu memã ngò ngrã rê nhym me kam 'ã mörn rê. Mrãmri ne kute atỳxkam pyka ngrã ja pyrãk, nhym me kam mörn 'ã rê. Nhym mekbê Edjitu mekôt me kudjwa bit 'ã rêrmã mõ nhym tu ngò meo ajkamuw ne me imex ne.

<sup>30</sup> Nãm ã mekbê idjaer amikajmã'ã Metîndjwỳnh maro anen krîrãxbê Djeriko nêje pyka tỳx nhipôkjamã ipôko dja. Nãm me Metîndjwỳnh kabên man kam kabênkôt krĩmã ipôko dja. Nhym akati nhym me ajte tãm ne. Nãm me ã kum ipôko anhỳro dja nhym me'ã akati amãnhkrut ne amãnhkrut ne ikjêkêt nhym arỳm nêje pyka tỳxja te tỳx ne tu ajkaten rôrôk ne kumex. Nhym kam 'ãnh mekbê idjaer kurê djwỳnhja'ỳr wadjàn me'ỳr prôt ne.

<sup>31</sup> Nãm ã me kupry 'ôbê Rabe amikajmã'ã Metîndjwỳnh maro anen kam amiwỳr mekbê idjaer àpkãro mrãnh djwỳnh wadjàn arkum kabên mex jarên ar udju ne.

Kam ne mekbê idjaer me kute Metĩndjwýnh kabĕn mar prãm kĕtja kunĩ nhimex ne kam kute Rabe ar bĩn kĕt nhym ar ajbit me kurãm tĩn ne.

<sup>32</sup> Bir be, djãm arek ar amã me'ã idju-jarĕnh itĕmmã? Nãr kon, birãm aje. Dja ba Djidjiãomĕ Barakimĕ Xãããomĕ Djetemĕ Dawimĕ Xamuwemĕ Metĩndjwýnh kabĕn jarĕnh djwýnhmĕ me ja kunĩ'ã idjujarĕnh tĕ nhym arým ijã akamãt ne.

<sup>33</sup> Nãm me amikajmã'ã Metĩndjwýnh man kam kurĕ djwýnh'ýr prõt nhym Metĩndjwýnh memã me kurĕ djwýnh rerek mex ne, nhym me mekbê pyka pytã. Nãm me katãt meo ba nhym kam Metĩndjwýnh kabĕn pýnho memã mýjja mextire jarĕ. Nãm me Metĩndjwýnh kanãrrãm kum rop djãkrĕbĕ rijão puma kĕtkumrĕx ne. Rop kute krĕnmã ne me rop nhũrkwãkam kumĕ nhym Metĩndjwýnh rop jajkwa ajmã o nhym ajkwa põt ne krĕn kĕtkumrĕx ne.

<sup>34</sup> Nãm me Metĩndjwýnh kanãrrãm kum kuwy puma kĕt mex ne. Me kute kuwymã ar rĕnh nhym ar xĕt kadjy nãrãm ne me kuwy pोक jabatãnhmã ar kurĕ nhym Metĩndjwýnh ar'ã kuwy bĩn ar utã. Nãm me Metĩndjwýnh kanãrrãm ar ba nhym me bit kute pao me imexmã nhym Metĩndjwýnh me utã. Nãm me Metĩndjwýnh kanãrrãm ar ban katyk mex ne ar ba nhym Metĩndjwýnh akubyn meo týx. Nãm me abenwýr prõtka Metĩndjwýnh kanãrrãm ar ban kam amijo aptãn kãjbĕ kurĕ djwýnh rĕ nhym me bajtemja me umaje prõt. <sup>35</sup> Nhym me niredjwý amikajmã'ã Metĩndjwýnh ma nhym akubyn memã õbikwa kwýo tĩn.

Nhym be nãm me kwý amikajmã'ã Metĩndjwýnh ma nhym me me kupa. Nãm me te memã kum,

—On me Metĩndjwýnh kanga ba me me apar kĕt. Dja ga me mã 'ã angrã ba kam me prĩne me ajo ajkĕ, ane. Te memã ane nhym me amibĕ kanga kĕtkumrĕx ne 'ãno dja. Metĩndjwýnh kute akubyn meo tĩn nhym me õ pyka mextirekam ar bamã ne me kanga kĕtkumrĕx nhym me prĩne meo ajkĕn me par punu nhym me tokry:n ty.

<sup>36</sup> Nãm me me kwý japrýn me'ã keket ne kam me kaprĕprĕ:k ne prĩne mrykão me kã noxnox nhym kam mrykãkõt me kamrõ

kukrykry ne. Nãm me me kwý djuwpren mekbê ijĕ djãkam me kurĕ. <sup>37</sup> Nãm me kĕno me kwý titik ne me kupa. Nãm me pĩ kokjĕr djão, kãxkakjĕro me kwý jakãn me kupa. Ne kãxdjwa kajgoo me kwý pa. Nhym me amim mrykĩ'ãtomti, mokaãk kão kubĕkãn kayn angij. Me õ mýjja kĕtkam me õ nĕkrĕx kĕtkam ne me ar ba. Nhym me prĩne meo ajkĕ nhym me tokryn kaprĩre ne ba. <sup>38</sup> Nãm me kapõt kukritkam ar ba, krãnhrekam ar ba, kĕnkrekam ar ba, pyka krekam ar ba. ãm me mexkumrĕx. Pykabĕ me ja ne me mexo me ja tĕp kĕtkumrĕx ne.

<sup>39</sup> Bir be, me ja kunĩ ne me amikajmã'ã Metĩndjwýnh ma. Nhym kam Metĩndjwýnh ne me jamã,

—Mrãmri me amexkumrĕx. Nã bãm me akam ikĩnhkumrĕx, ane.

Nhym bep kraxje me tũmre ja kute byr kĕt rã'ã. Metĩndjwýnh kute kabĕn pýnho memã mýjja jarĕnhja ne me kute amim byr kĕt rã'ã. <sup>40</sup> Adjým, Metĩndjwýnh ne arým me bakadjy amim mýjja mex'ã karõ. Me bakunĩ kadjy ne prĩne amim mýjja'ã karõ mextire. Djã nãm kute me tũmrebit pytãrmã? Kati, arým ne me bajãdjwý amim karõ. Nhym kam mexkumrĕx. Mexo kute me tũmre pytãrja jakrenh mexi. Kute me tũmre jamĕ ro'ã kute me bajo mexmã. Gu me batipydjın bamexo bamexkumrĕxmã ne amim me bajã karõ. Be, tãm ne ja.

## 12

*Metĩndjwýnh kra kunĩmã uwĕk màt.*

<sup>1-2</sup> Be, me kume:xja pumũ. Me kute amikajmã'ã Metĩndjwýnh marja me tãm ne me krãptĩ. Me tãm ne ne me bamã ipok ne me banhirãn kumex. Kam dja gwaj me ja kudjwa Jeju 'ãno djan kanga kĕt. Ĕ, mrãmri ne me kute aben rerka mýjja kute me kukrã nhym me kute o poux ne amikõt rĕnh ne kajkrit ne prõt mex ja pyrãk. Dja gwaj ã mýjja kute gwaj bakukrãja jãm aminĕje kunĩ rĕnho ane. Gwaj bajaxwe kute gwaj bajamýnh týxja jãm aminĕje kurĕn kurĕn kam arým mrãmri bajaxwe kĕtkam katãt ar amijo baba mexkumrĕx ne. Gora gwaj 'ã badjukanga kĕt ne mrãmri katãt amijo tĕn inomã kumĕ. Kute mrãmri ne me kute aben rerka amikukãm mýjja pumũnh ne

kam kambit no pymjÿr tÿx mex ne atemã mÿjja 'õ pumũnh kêt ne 'ÿr prõtja pyrãk.

Dja gwaj ã o anen amikukãm Jejubit man kõtbit bajamak bën ne baje ibej atemã mÿjja 'õ mar kêt ne Jeju'ÿrbit baprõt ane.

Jeju ta ne gwaj bajamak bõ gwaj tu amim mar kumrêx. Nym ajte gwaj bajamak bõnho tẽ gwaj arÿm amim mar rax ne. Tãm dja gwaj 'ãno djan kanga kêt ne. Nãm amũ amikukãm kĩnh djã man kam mete pĩte'ykam bĩnja kum uma kêt kumrêx. Djãm me pĩte'ykam arikkam pijãm ngri got. Nãm amikam pijãm mar kêt ne tu ate krãn arek amijo tẽ. Kam ne Metĩndjwÿnh arÿm 'ã bënjadwÿr rax mẽ nym Metĩndjwÿnh krĩ djatikam ubõk'ãnh ikõ'ã nhÿ.

<sup>3</sup> Gora ar amikam Jeju man amikam arerek kêt. Me axwe ne me kum kurên prĩne o ajkẽ nym kam tu arek dja, tu ate krãn dja. Gora ar aman kudjwa arek o tẽn amikam arerek ne akaprĩ kêt ne arek kõt o tẽ. <sup>4</sup> Djã nã gãm ar Jeju kudjwa akamrõ ajkapĩn ty got? Kati, ar ajaxwebê aku'ê tÿxkam kraxje ajõ akamrõ bikapĩn kêt. Kraxje me kute ar ajõ bĩn kêt rã'ã.

<sup>5</sup> Djãm arÿm ne gar Metĩndjwÿnh kabënja o akno? Arÿm kute ar ajo kran kam kute ar amã tÿx jadjãrmã ja. Djã nã gãm ar o akno? Nãm ar amã,

“Ë, akmere, gêdja Bënjadwÿr amã uwêk màt kwãrĩk wãnh ga aprÿ kêt ne kam amikati kêt. Gêdja amã bën tÿx ga akaprĩ kêt. Mÿkam?”

<sup>6</sup> Bir, kum me abêjamã ne uwêk màt. Ne kute meo krajadwÿ kunĩmã uwêk màt ne, me katàt mrãnh kadjy”, ane.

<sup>7</sup> Bir be, Metĩndjwÿnh kute ar amã uwêk màtkam dja gar tu arek dja. Kõt ne Metĩndjwÿnh kute ar ajo kra. Nhÿnh ne me prĩre 'õ bãm kute kum uwêk màt kêt? <sup>8</sup> Bir be, Metĩndjwÿnhdjwÿ kute kra kunĩmã uwêk màtja pumũ. Me katàt mrãnh kadjy ne kramã uwêk màt. Mÿj me ne Metĩndjwÿnh memã uwêk màt? Kute me bajo kra djwÿnhja. Nãm ren kute gajbit amã uwêk màt kêt ga ren abê kra djwÿnh kêt kumrêx ne ren kam abê krõ'ã me kute adjir pyrãk.

<sup>9</sup> Ga me babãm bêngõkre kute me bamã uwêk màt gu me bapijãm djaje banhibõn bakrĩn amikam baje kabën maro bakrĩja

pumũ. Bir be, gwaj pykabê gwaj babãmja kurãm kãjkwakam Babãmja kabën maro nhÿ, gwaj badjumar mex ne ar baba kadjy, amikam kabën maro nhÿ. <sup>10</sup> Pykabê gwaj babãm bêngõkre kute gwaj baprĩrerũm gwaj bamã uwêk màt. Me ta kute amimarkõt ne gwaj bamã uwêk màt ne. Nym bep Metĩndjwÿnh ne gwaj bamex kadjybit gwaj bamã uwêk màt ne. Ta mexo mexkumrêx kõt gwaj bamex kadjy.

<sup>11</sup> Djãm me kute memã uwêk màtkam tokry ngri got. Kam ne me tokry:n kam kaprĩre ne. Nym bep amũ atũmã gêdja arÿm umar mex ne katàt mrã. Arÿm kute mar ne kõt amijo tẽmkam gêdja umar mex ne katàt mrã.

<sup>12</sup> Bir be, kam dja gar on ajte amikam atÿx ne arek kõt amijo tẽ. Kute mrãmri ne me krĩ'ÿr mrãnh ne katyk me:x ne mrãnh ne kõno birênh mrãnh ne kute krĩõ rãm ne jao mrãnh ne arÿm ajte ãmẽ ikra àdjõnh ne arÿm ajte mrãnh tÿx ne arÿm arek mrãnh ja pyrãk. Dja gar ã amikam atÿx ne arek kõt amijo atẽm o ane. <sup>13</sup> Nã, dja gar kõt amijo tẽn katàt amiprywã djin arek 'ã mõ, katàt ar abenkõt amrãnh kadjy. Gar aje Jeju mar tũmwã arek me kute amim Jeju mar rerekwãmã mõn amõr mexo mõ gẽ me arek ar akõt mõ. Ar akõt mõn 'õ abenbê màt kêt. Me kute amim Jeju mar rerek ne me kute mrãmri ne me mex mã ba nym me par tãtãk mekõt 'ok ba pyrãk. Gêdja kute mar rerekrewã ar akõt tẽm rerekre ne tẽ:n kam arÿm amũ tẽm tÿx ne arÿm amũ mrãnh mex, arÿm Jeju mar tÿx ne.

#### *Me kute axwebê amijãno ãmmã.*

<sup>14</sup> Gora ar amũ me wã kunĩmã akabën mexbit jarên angryk kêt, gar kam adjumar mex ne ar aba. Gora ar Metĩndjwÿnh mexo amexkumrêx. Kam dja gar Metĩndjwÿnh pumũ. Dja gar Metĩndjwÿnh mexo amex kêt ne Bënjadwÿr'ÿr abõx ne omũnh kêt kumrêx ne.

<sup>15</sup> Ë, Metĩndjwÿnh ne ukaprĩkõt me utã. Gora ar amijãno dja, ar ajõ Metĩndjwÿnh djukaprĩjabê jãm akrãn 'ÿr abõx kêt karõ. Gora ar amijãno dja. Dja gar ajõ ajaxwemo krax ne kam aje mÿjja djÿ pyrãk, aje akrõre djÿ pyrãk. Kute mrãmri ne me kute akrõo tep ka'õnh nym kute prĩne ngõ jaer ne kute tep nhimexo ba ja pyrãk. Gora ar amijãno

dja. Dja me'õ axwemo krax ne kam amikôt me akrãptĩmã axwe jangij. Gora ar amijãno dja.

16-17 Ne ajte ar ajõ aprõ prãm karõ nhym me niredjwý 'õ mjên prãm karõ gora ar amijãno dja. Kwãrĩk wãnh ar ajõ abê Ixau kêt. Gora ar amijãno dja. Ixau ne pykabê mýjja kakritjabit kum kĩnh ne kam kýjrũm mýjja mextire ja kum kĩnh kêtumrêx. Ixau ne kutewa nhym kam kôt bãm kute Metĩndjwýnhmã kum,

—Dja ga o rax ne o kĩnh, anhýr kadjy nàrànm kute kum õ nèkrêx kunĩ rer kadjy nàrànm bit 'ã no tỳx.

Nhym Ixau kute àkurbit mar ne kam kamyjamã õ kwý krên djã pydji pãnh mýjja kunĩ kanga. Nhym kam tũmrãm kum kĩnh ne kam te 'ã o ane. Nhym bãmjã nê ne. Nhym amim ngryk ne te mýrkam 'ã bãmo ane. Nhym tu ate krã. Ja ne gar arým ama. Gora ar amijãno dja.

18 Ë, ate ne Metĩndjwýnh amrêbê me bakukãmãremã kukràdjã tũmjao kato nhym bep ate ne ajbir me aga akamin-grãnydjwýmã kukràdjã nyo kato.

Amrêbê ne me bakukãmãre krãnhbê Xinaj'ýr mõn bõx. Nhym põ:ko nhý nhym kũm kakrãtyk ne kum ipõk nhym kam kam akamãt kô ty:k ne. Nhym nadjwý kam krar ne adjêho dja. 19 Nhym potidjwý kakõr tỳx ne, nhym Metĩndjwýnhdjwý õkreti:rekam kabên. Nhym me kuman kam umaje amra:n kum,

—Kwãrĩk wãnh ga ajte me imã akabên kêt, ane. 20 Nhym Metĩndjwýnh arým memã, “Kwãrĩk wãnh me krãnh kupênh kêt. Dja ga me abêngõkre 'õ nàr mry 'õ krãnhreja kupê ga me arým keno titik ne abĩ”, ane.

Nhym me kuman kam umaje àmrao kumex. Te ku'ê tỳxmã. 21 Nhym Mõjdjêdjwý omũn kam,

“Ije kum bep imã uma. Nã bãm umaje itertet ne”, ane.

Djãm uma ngri: got. Nãm ã pykabê Metĩndjwýnh nhõ krãnh ane. 'Ýr ne me bakukãmãre bõx.

22 Nhym bep ajbir ne Metĩndjwýnh me akamingrãnymã kukràdjã nyo kato ga kam ar krãnhbê Xijão, Metĩndjwýnh nhõ pyka'ýr mõn bõx. Kàjkwakam õ pykabê Djeruxar'ýr

bõx. Kam ne Metĩndjwýnh tĩn ne ar ba, nhym kadjy mrãnh djwýnhdjwý kamã ar ba. Kadjy mrãnh djwýnh krãptĩ:. Me'ã akre kubê 1.000.000 krãptĩ:. Nãm me'ã akre kute pi'õ pyrãk ne kĩnh tire ne kute Metĩndjwýnhmã rax jarênhmã ar aben pydjin ba.

23 Kamãdjwý ne Metĩndjwýnh nhõ me ja kunĩ aben pydji. Metĩndjwýnh nhõ me ja kumrêx kute amikajmã'ã marja ne me aben pydji. Amrêbê kute kàjkwakam pi'õk no'õkkam me idji janhõrja tãm ne arým kamã 'ã aben pydji. 'Ýr ne gar bõx. Bênjadjwýr rax kute me kunĩmã pãnh jarênh djwýnh kubê ne Metĩndjwýnh, 'ýr ne ga me bõx. Ne ajte me karõ, me pykakam ar bari katãt mrãnh nhym Metĩndjwýnh kute me'ã mex rênh, me ja karõ'ýr ne gar bõx.

24 Be, Jeju'ýr ne gar bõx. Jeju kute me bamã kukràdjã ny jarênh mãmdji ne kute o kator, ne kute ta kamrõ bikapĩnkôt me bajo mex, 'ýr ne gar bõx. Jeju kamrõ kute mexo Abeu kamrõ jakrenh mexi. Amrêbê ne me bakukãmãrebê Abeu tyn kamrõ ajkapĩ nhym me omũn kam pãnhbit jarê,

—Gora gê on o pãnh, ane.

Nhym bep me kute Jeju kamrõ markam ne me,

—Metĩndjwýnh ne Jeju kamrõkôt tu me bajaxweo akno, ane.

Be, Jeju mextire'ýr ne gar bõx.

25 Bir be, kam ne ba ar amã,

—Gora ar amijãno dja gê Metĩndjwýnh ar amã kabêno dja. Kwãrĩk wãnh ar ajõ kabênbê jãm akrã kêt. Gora ar ama.

Ë, amrêbê Mõjdjê kute pykabê memã kabên jarênhkam me'õ kabênbê jãm krãn ar ba djãm kute kum o pãnh kêtãmã? Kati, Metĩndjwýnh ne prĩne memã o pãnh. Nhym bep ajbir ne Metĩndjwýnh kàjkwa kurũm me bamã kabên jarê. Nhym mexo amrêbê pykabê kabên ja jakrenh mex ne. Be djãm gwaj badjwý kabênbê jãm bakrã djãm kute gwaj bamãdjwý o pãnh kêtãmã? Arkati, dja prĩne gwaj bamãdjwý o pãnh. Me kute Metĩndjwýnh kabên marbê jãm krãja gêdja meo bikênh mex ne, ne kam me kute Mõjdjê kabên marbê jãm krã ja pãnh akrenh mex ne.

<sup>26</sup> Amrêbê ne kabêno pykabit karngör kajgo nhyr tertet. Nhyr bep ajbir ne kabên pydjîn arên memã,

“Djãm pykabit ne ba ije karngörmã? Dja ba ï ajte kãkwadjwý karngör”, ane.

<sup>27</sup> Be, kute “Dja ba ajte” anhyrja ma. Metîndjwýnh kute mýjja kunî nhípêx ja gêdja ajte karngör nhyr tu apôx ne rôrok ne kunî akuno. Nhyr bep mýjja jarij týxjabit dja arek arij. Tãm ne rôrok prãm kêtumrêx.

<sup>28</sup> Be, Metîndjwýnh nhõ mýjja dja rôrok prãm kêt kumrêx. Metîndjwýnh kute õ pykakam ar me bajo baja gêdja tým prãm kêtumrêx ne arek gwaj bamã nõr rã'ã rã'ã ne. Tãm ne me bamã arê gwaj tu 'ýr babôxkumrêx. Kadjy, Metîndjwýnh kute õ pykakam ar me bajo baja tým prãm kêt tãm ne gwaj bamã nõr rã'ã, kadjy dja gwaj bakînhkumrêx ne ar baban kum amikînh jarê. Kum amikînh jarên kum rax jarên kam kum badjãpênh mextire gê gwaj bakam kînhkumrêx. Gora gwaj kam bapijãm ne bamã uma. <sup>29</sup> Djãm uma ngri got. Dja prîne meo apêx. Kute mrãmri ne kuwy pôkti kute prîne mýjja bôr ne o apêx ja pyrãk. Dja ã Metîndjwýnh meo apêxo ane.

## 13

*Kute memã 'ã karõo ino rer.  
Kor 1.10; Tex k 4.1; Ped k 2.11*

<sup>1</sup> Gora ar abeno akamyn mã amã aben jabê rã'ã. <sup>2</sup> Gora ar me bajtemwã man anhyrkwãmã amiwýr meo wangjê ne mekam adjukaprî. Nãm me kwý ã anen aminhyrkwãmã kadjy mrãnh djwýnh kwýo wangij ne o djuw mex. Kute kraxkôt mar kêt ne tu o djuw mex. <sup>3</sup> Ê, gora ar mekbê ijê djakam ar ku'êja ma. Dja gar gadjwý aje ar ro'ã mekbê ijê djakam aku'ê mãn prãbê ar ô'ã atokryn akã djãn akaprîr ar aba. Kwãrîk wãnh gar ate akrã kêt. Dja gar ã arkôt ane. Me kute prîne aro bikênh nhyr ar tokryjadjwý gora ar ar ama. Dja gar ar ô'ã akã djãn atokry ne. Be, tãm ne ja. Gêdja ba ajte ar amã mýjja 'õdjwý jarê.

<sup>4</sup> Me abenwýr bakam ne mrãmri mýjja mexkumrêx. Dja gar aprõ'ýr aban kam aprõ djwý:nh'ýrbit mrã. Nhyr me niredjwý mjên djwýnhbit ma. Me kwý ne me me

prõ prokam no kêt ne. Nhyr bep ar ga. Ar ga dja gar akunî me prõ prokam apijãm ne aprõ pýnh ne. Kwãrîk wãnh ga ar krõ'ã aprõ kêt, gê me nija krõ'ã mjên kêt. Me prõ prãm, me mjên prãmja dja Metîndjwýnh memã pãnh jarê. Me kute me'õbê prõ nãr mjêno àkînh jamãdjwý pãnh jarê.

<sup>5</sup> Kwãrîk wãnh gar pi'ók kaprî prãmebit ar aba kêt. Dja te ar anhõ mýjja ngrire gar tu o amikînh. Mýkam? Bir, Metîndjwýnh ta dja ar ajo djuw mex. Arym ne ar amã,

“Dja ba me akurüm itêm kêtumrêx.

Dja ba me akanga kêtumrêx.

Dja ba me ajo iba rã'ã rã'ã ne”, ane.

Ga Metîndjwýnh kute ar gwaj bajo ba rã'ãja pumü. <sup>6</sup> Bir be, kam dja gwaj batýx ne banhõkre kadjwýnhbê amim,

“Metîndjwýnh ta ne kute ijo ba djwýnh.

Kam dja ba itîn prãm kêt.

Mã ne me kute ijomã”? ane.

Dja gwaj ã amim ane.

<sup>7</sup> Ê, gora ar kute ar ajo ba djwýnh ma, ar kute ar amã Metîndjwýnh kabên jarênhja dja gar ama. Ar kute kôt amijo ba mex rã'ãn ar ty. Ga ar kute amikajmã'ã Jeju mar ne 'ã ngrã týx ja pumü. Ar ta ne ar arým ty. Ar ja dja gar amikam ar aman kam ar'ã amijakren ar aba. <sup>8</sup> Nã, nãm ar amikajmã'ã Jeju ma. Jeju Kritu pydji. Atemã kêt. Amrêbê tãmý ne ajbir ajte tãm ne. Tãm gêdja rã'ã rã'ã rã'ã ne. <sup>9</sup> Kwãrîk wãnh me kute apýnh mýjja'ã ujarênh nyo ar anoo biknor ar o baja kwãrîk wãnh o ar anoo biknor kêt. Metîndjwýnh ta ne ukaprîkôt gwaj bajo týx gwaj katãt mrã. Kam ne mexkumrêx. Bep ate ne me ta kukrãdjãkôt mekbê me àkur djã puma. Kam ne punure. Nãm me te o anen arîk ar ba.

<sup>10</sup> Ate ne me bakukrãdjã ny. Kritu ta ne Bãmmã me bakadjy amingã nhyr me kubî. Nhyr me bajaxwe pãnh ty. Nhyr bep me kute kukrãdjã tûm ar o ba rã'ãja, me Metîndjwýnh nhõ kikrekam àpênh ja kute Jeju me bamã tykja mar kêtumrêx, ne Jeju nhõ kukrãdjã nyja mar kêtumrêx. Nhyr Metîndjwýnh kute me ja jaxweo biknor kêt ne kute meo kra kêtumrêx.

<sup>11</sup> Kukrãdjã tûmkôt ne me kadjy Metîndjwýnh mar djwýnh nhõ bënjadjwýr rax mry pan kamrõo atom ne o tẽ.

Metĩndjwýnh nhõ kıkre kadjwýnhbê kumoka'émã o tẽn o wadjà. Me axwe pãnh ne kum kungã. Metĩndjwýnh kute omũnh ne me axwekam ngryk kêt kadjy. Nhyr bep mry nhĩa ne me atykmã kum angij nhyr prĩne xêr. <sup>12</sup> Kôt ne Jeju atykmã tokryn ã tyk ane. Ta kamrôo kute prĩne me bajo mex kadjy. <sup>13</sup> Kam dja gwaj atykmã jêt djaja'ýr tẽ. Kôt gwaj batokry nhyr me kute kôt gwaj bajapry gwaj kudjwa bapijãmmã.

<sup>14</sup> Djãm pyka jakam ne gwaj banhõ pyka? Kati, nhyr bep amrẽ mör rĩnã ne gwaj kam ama nhyr rã'ã rã'ã rã'ãmã. Kam dja me gwaj bajapry gwaj ate bakrã. Kwãrĩk wãnh rã'ã. Mrãmri dja tu ã ane. Kýjrũm ne gwaj banhõ pykakumrẽx, gwaj banhõ krĩrax djwýnh. <sup>15</sup> Bir be, gwaj banhõ pyka gwaj bamã nõr nĩkam amakbê mã Metĩndjwýnhmã mex jarẽnh rã'ã ne. Gwaj baje amikajmã'ã Jeju markam dja gwaj ã Metĩndjwýnhmã anhýr ar baba rã'ã ne. Gwaj baje Metĩndjwýnhõ aminhõn baje idji jarẽnh ar o babaja dja gwaj õ ane. Kam dja Metĩndjwýnh gwaj bakam kĩnhkumrẽx nhyr kam mrãmri kute amrẽbê mete Metĩndjwýnhmã mry par ne kum õr nhyr mekam kĩnhkumrẽx ja pyrãk.

<sup>16</sup> Gora ar abenkam adjukaprĩn aben man ar abeno aban anhõdjãnhkôt abenmã mýjja ngã. Gora ar mã aman 'ãno dja. Gêdja gar ane nhyr arým ar akam kĩnh. Kute amrẽbê mete mry par ne kum õr nhyr mekam kĩnh ja pyrãk.

<sup>17</sup> Ar kute Metĩndjwýnhkôt ar ajo ba djwýnhja gop ar kabẽnkôt amijo aba. Dja ar ar amã mýjja'õ jarẽ gar tu abẽn kêt ne akrãnmã kôt aba. Nãm ar prĩne Metĩndjwýnh kabẽno ar ajo djuw mex ne ar ajã ukanga kêtumrẽx. Mýkam dja gar arkôt amijo aba? Bir, Metĩndjwýnh kute ar kukjêr nhyr ar kute kum amikôt amijarẽnhmã. Kam dja gar arkôt amijo aba nhyr kam ar kĩnhkumrẽx ne. Ar kĩnhkumrẽx ne amikôt kum amijarẽ. Dja gar ã aro anhýr kêt nhyr kam ar kum amijarẽnhkam kaprĩre ne. Gar gadjwý axwe amikam adjumar. Be, tãm ne ja.

<sup>18</sup> Gop ar Metĩndjwýnhmã ar ijarẽnh rã'ã. Ar ije amikam ijaxwe 'õ mar kêt ne ije kôt amijo iba prãmã, Jeju kute imã kukràdjã

jarẽnh kunĩkôt ije amijo iba prãm kam gêdja gar kum ar ijarẽnh 'ãno dja. <sup>19</sup> Gora ar on kum ar ijo a'wý. Dja gar kum ar ijo a'wý bar amikrà kêt ne on arým wãm ar awýr bõx.

<sup>20-21</sup> Gê Metĩndjwýnh ar amã mex jangjê ga kam ar apýnh mýjja mex djari kunõ amiptàn ar o aba. Metĩndjwýnh kute memã umar mex jarẽnh djwýnh ta gêdja ar amã o ane. Gar kam kabẽnkôt akabẽn ne kôt ar amijo aba. Kute ar ajã amim karõkôt ar amijo aba. Metĩndjwýnh gêdja ar angrêk gar kôt amijo aba mextire. Nhyr kam ar akam kĩnhkumrẽx. Jeju Kiritu ta gêdja ar ajo týt gar kôt amijo aba. Tãm ne kubê me bapumũnh djwýnhbê kumkati. Metĩndjwýnh ne me tyk kurũm akubyn Bẽnjadjwýr Jejuo tĩn ne o kato. Nhyr kam kubê me bapumũnh djwýnhbê kumkaticam prĩne me bapumũnh 'ãno dja. Mrãmri ne kute mrykĩ'ãtomti pumũnh djwýnh kute prĩne amim o djuw mexkôt kute omũnh ja pyrãk. Nãm ã me bajo mrykĩ'ãtomtin prĩne me bajo djuw mexo ãmo ane. Mýjkôt ne kubê me bapumũnh djwýnhbê kumkati ne raxo kute me omũnh djwýnh kunĩ jakrenh? Bir, kute Metĩndjwýnhmã aminhõr nhyr me kute bĩn nhyr kamrô bikapĩnkôt. Be, kamrô bikapĩnkôt ne ajte me bamã kukràdjã ny jarẽnh mãmdji ne o kato. Jeju nhõ kukràdjã nyja dja rã'ã rã'ã rã'ã ne. Ë, gora gê me Kiritumã kum kubê kumkatiti:, umati, mexo tuknĩ jarẽnh rã'ã rã'ã rã'ã ne. Tãm ne ja.

<sup>22</sup> Ë, akmere ar, àpnhĩre ar, gora ar pi'òk no'òkkam ikabẽn ja ma. Tu akrãnmã maro tẽn inomã amẽ. Ije pi'òk no'òko ar amã týt jangjênh kadjy ne ba ar amã pi'òk no'òk ne. Ije ar amã pi'òk no'òk krãne.

<sup>23</sup> Ë, ba ar amã arẽ gar ama. Nãm me gwaj bakamy Ximoxi mekbê ijê djãrũm kaba nhyr amrẽ tẽmmã. Gêdja on bõx jabej bar iro'ã wãm tẽn bõx ne ar apumũ.

<sup>24</sup> Nã bãm ar akunõ ama ne. Gora ar ar kute ar ajo ba djwýnhwãmã ar ijarẽ. Ne Metĩndjwýnh nhõ me mextire wãmãdjwý ar ijarẽ. Nhyr pykabê Itarijkam me kute Jejukôt abeno kamyja ne me ar ajo ama:n ar amã amijarẽ.

<sup>25</sup> Gê Metĩndjwýnh ukaprĩkôt ar akunõ djuw mex. Tãm ne ja.



## Xijagu kute memã pi'ôk no'ôk ne ja.

Jeju kamy'ôbê ne Xijagu. Nãm ar aben djakam nõ nhym Jeju kumrêx kato nhym tũmrãm Xijagudjwý Marij kurũm kato. Kute amim Jeju mar kêt ne kam tũmrãm arým tu amim mar kumrêx. Birãm Jeju akubyn tĩnkôt ne tu amim kuma. Ne kam Jeju nhõ me jao ba. Ne kam mebê idjaer kute amim Jeju marjamã pi'ôk no'ôk ne. Nãm prĩne memã 'ã karõ ne memã kum,

—Djã nã gãm ar amim Jeju man kam tu arĩk ar abamã? Kati, dja gar amim Jeju man kam adjapênh mexo memã amijo amirĩt ne. Pidjõ ne rõrõk ne bario amirĩt ne. Pidjõ mex ne bari mexo amirĩt nhym be mýjja punu ne bari punuo amirĩt. Dja gar ja man adjapênh mexo memã amijo amirĩt ne.

Kwãrĩk wãnh me kute abenã kabên, me kute amimexo àmra, me prõ prãm, me kum nèkrêxbit kĩnh, kwãrĩk wãnh memã wãm nõ. Dja gar mekam adjukaprĩo aben pyrãk. Kwãrĩk wãnh ar amã me ja kurên amã me ja jabê ne meo aba kêt. Ar ga ar aje Jeju markam dja gar apýnh adjapênh mexo memã amijo amirĩt. Ne Jejumã amingã nhym arým ar ajo tỳx gar kam apýnh adjapênh mex ar o aba. Nãm ã Xijagu memã ane.

<sup>1</sup> Ba ibê Xijagu. Ibê Metĩndjwýnh nhõ àpênh ne ibê Bẽnjadjwýr djwýnhbê Jeju Kritu nhõ àpênh. Apýnh me aba djari abenã akrekam me aba djabê 12. Me abê idjaer aje amim Jeju mar. Apýnh me õ pyka'ýr me abimãnhwã, me amã ne ba ikabên mextire jarên 'ã pi'ôk no'ôk ne. Dja gar inhõ pi'ôkja jarên amijã ikabênja ma.

*Apýnh me kaprĩ djari kute meo ba.  
Ruk 6.22; Kor 1.11; Idja 12.3; Xij 5.7*

<sup>2</sup> Akmere, àpnhĩre ar, godja te apýnh ar akaprĩ djari ar ajo ba, ar akanê, nãr ar anhõ mýjja kêt, nãr ar abê anhõbikwa'õ tyk, nãr me kute ar ajo bikênho ba, godja te apýnh ar akaprĩ djari ar ajo ba. Dja gar kam amim,

—Kati. Kwãrĩk wãnh ba kam ikaprĩ kêt. Dja ba kam ikĩnhkumrêx, ane. <sup>3</sup> Mýkam dja

gar kam akĩnh? Bir, dja apýnh ar akaprĩ djari ar ajo ba gar arým amim Metĩndjwýnh mar tỳxo aban 'ã adjukanga kêt. <sup>4</sup> 'Ã adjukanga kêt ne arým amim mar tỳxo amũ amikamên arým amim mar tỳ:x ne. Ne kam arým prĩne kum amexkumrêx ne akajgo kêtumrêx. Ja ne gar arým aje mar. Kam dja gar akaprĩkam akĩnh.

<sup>5</sup> Ne ar ajamak mexdjwý. Godja gar ajõ ajamak mex kêt jabej ajamak bõho Metĩndjwýnhmã a'uw. Djãm kute 'ã ar amã àkjêrmã? Kati. Dja gar tu kum amijo a'uw. Metĩndjwýnh ne kute me kunĩmã amak bõho ba. Kum amijo a'uw nhym arým ar amã ajamak bõ. Dja õdjãnh ne arým ar amã ajamak bõ gar arým kôt ajamak mextirekumrêx.

<sup>6</sup> Dja gar amijo a'uw ne arým tu amim kamnhĩxkumrêx. Kute ar amã õr kadjy tu amim kamnhĩxkumrêx nhym arým ar amã kungã. Kwãrĩk wãnh amim,

—Kon, dja imã õr jabej. Nãr kon, dja imã õr kêt jabej, anhýr kêt. Mýkam? Bir, aje tu amim kamnhĩxkumrêx kêtam. Me kute tu amim kamnhĩxkumrêx kêtam ne me kute mrãmri ne ngõ pyrãk. Me kute kõk djábêrkam ngõ djakà ari: amijadjwýr pyrãk, kute ari: amijapĩn pyrãk. <sup>7</sup> Djãm me kute tu amim kamnhĩxkumrêx kêtam Bẽnjadjwýr djwýnh kute memã mýjja 'õ nhõrmã got? Arkati. <sup>8</sup> Me kute jãm Metĩndjwýnh kôt amikabên jadjwýr ne ajte jãm mýjja punu kôt amikabên jadjwýr ari: amikabên jadjuw. Ne kam arĩk ba rã'ã. Kwãrĩk wãnh me kudjwa amim Metĩndjwýnh kamnhĩx rerekre kêt. Dja gar tu amim kamnhĩx tỳxkumrêx.

<sup>9</sup> Be, Jeju kukwakam gwaj baje me'õo bakamy'õja dja kajgo jabej djãm Metĩndjwýnh nokrekam ne kajgo? Kati. Nokrekam rax. Gê amiraxja man arým kĩnhkumrêx.

<sup>10</sup> Nhym be, ar 'õ nhõ nèkrêx rax jabej. Djãm Metĩndjwýnh nokrekam rax? Kati. Metĩndjwýnh nokrekam kajgo mexi. Gê te kute amikajgo markam amikam kĩnh. Me õ nèkrêx rũnh kute rũnh pyrãk. Dja me mrãnhbê kêt ne. Ga, bõ rã mex tãmkam mjõn rõrõkja pumũ. Dja ã me õ nèkrêx rũnh mrãnhbê kêtõ ane. <sup>11</sup> Bõ'ã arngro tỳx apõx ne kõk kangro wabê nhym totokbê bõ arým

ngrà nhym rã arým rôrôk ne. Nhym kam me arým kum kĩnh kêt ne. Me ò nèkrêx rũnhdjwý dja me ò mýjja krãptĩ jabej katikôt arým ã amijaêrbê kêtô ane.

<sup>12</sup> Dja te apýnh ar akaprĩ djari ar ajo ba, akanê, nàr anhõ mýjja kêt, nàr ar abê anhõbikwa'õ tyk, nàr me ar ajo bikênho ba. Godja te apýnh ar akaprĩ djari ar ajo ba gar amim Jeju mar týx rã'ã ne 'ã adjukanga kêt. Kam dja gar akĩnhkumrêx. Ne kam inomã akaprĩ mẽ nhym Metĩndjwýnh arým ar amã akĩnh djà ngã. Amrêbê ne me kum abêkumrêx jamã kum,

—Dja te ar akaprĩ djà kumex ar awýr bõx gar imar týx rã'ãn kam arým ikôt atĩn ne ar aba rã'ã: rã'ã ne, ane. Ga, me kute memã me bẽnjadjwýr krãdjê nhõrkam me kĩnhja pumũ. Ar gadjwý dja gar amim Jeju mar týx rã'ã. Te ar akaprĩ djà ar ajo ba gar mar týx rã'ã nhym kam arým ar amã akĩnh djà ngã gar kôt atĩn ne ar aba rã'ã: rã'ã ne.

<sup>13</sup> Ne kam godja me ar ajaxwe'ã ar amã àpnênh jabej, kwãrĩk wãnh gar arĩk amim,

—Metĩndjwýnh ne ijaxwe'ã imã àpnênho dja ba kam kôt ijaxwe, anhýr kêt. Djãm me kute axwe'ã Metĩndjwýnhmã àpnênh prãm? Kati. Me te kute o anhýr prãmje. Metĩndjwýnhdjwý kute gwaj bajaxwe'ã bamã àpnênh prãm kêtumrêx. <sup>14</sup> Gwaj ba ne gwaj bamã bajaxwe prãm kam bajaxwe'ã amim apnên amim, “Ba 'ýr on kam ajmã ikute jabej”, ane. <sup>15</sup> Bamã bajaxwe prãm tẽ:n arým ajmã bakuten arým bajaxwekumrêx. Bajaxwe tẽ:n kam arým bajaxwe rax ne. Bajaxwe rax ne kam arým ty.

<sup>16</sup> Akmere, àpnhĩre ar, kwãrĩk wãnh me ar anoo biknor kêt. Imã ar ajabêkam ne ba ar amã ikabên ja jarê. <sup>17</sup> Metĩndjwýnh ne mex ry typdjín kute axweo amikapêr kàr kêtumrêx. Ga, kute kãjkwakam mýjja nhirã kunĩ nhípêx nhym mexkumrêxja pumũ. Nhym kam amrê kute gwaj bamã mýjja kunĩ nhõrjadjwý mexbit. Kute gwaj bamã bakĩnh djà kunĩ nhõrja prĩne mexbit. Metĩndjwýnh mex ry typdji.

<sup>18</sup> Ta kute amijo gwaj bapytàr kôt ne arým gwaj bajo kra. Kute gwaj bamã kabên katàtkumrêx jarênh kôt arým kute gwaj bajo kra. Kute mrãmri ne me kute

bàygogo ja kumrêx djê pyrãk Metĩndjwýnh gwaj bakumrêx gwaj bajo kra, ò me ja kunĩ kukãm gwaj bajo kra. Ne kam arým gwaj bamã amak bõ gwaj arým badjumar djà ny.

*Me kute Metĩndjwýnh kabên mar kajgo nêje kute me akre.*

<sup>19</sup> Akmere, àpnhĩre ar, imã ar ajabêkam ne ba ar amã ikabên jarê. Dja gar ikabên 'ãno djan ama. Dja me amã amijarênh prãm ar ga dja gar aje me mar prãm. Ne amijã akabên nèn angryk tõ. <sup>20</sup> Mýkam? Bir, djãm gwaj bangrykkam katàt ar amijo baba? Kati. Metĩndjwýnhmã katàt baje amijo baba kêtumrêx.

<sup>21</sup> Kam, dja gar wãnh aje mýjja punuo aba prãm kunija kanga. Ar ajaxwe kunija dja gar kanga. Godja me ar amã Metĩndjwýnh kabên jarê, kabên kute ar apytàrja jarê nhym ar amã wadjà gar akabôt katin tu amim markumrêxo aba. <sup>22</sup> Kute memã me mex'ã karõkam kabên djãm ar aje mar kajgomãbit? Kati. Dja gar tu amim markumrêx ne mrãmri katàt kôt amijo abakumrêx. Ar aje mar kajgoo abakam gar amim ajêx ne aminoo abiknoro aba.

<sup>23-24</sup> Be ga, me kute ixekam amikarõ pumũnh ne apõx ne mã mrãnhja pumũ. Ne kam mõrbê amikarõo biknorja pumũ. Ar ajõ aje kabên mar kajgokam ar aje me urãk. Ar aje kabênkôt amijo aba kêtumrêx tẽmbê kabêno akno. <sup>25</sup> Nhym be, me kwý arým kabên pumũ. Metĩndjwýnh ne pi'õkkam prĩne katàt me kute amijo ba'ã memã karõ mex nhym me kute kabên kôt amijo bakam me ta ne me ar ban umar mex. Me kwý kabên ja pumũnhõ ban 'ã ukanga kêt ne tu markumrêx ne o biknor kêt. Nhym kam Metĩndjwýnh arým memã týx jangijín o djuw mex nhym me umar mexkumrêx.

<sup>26</sup> Ga, me kute mry'ãkrĩo mrãnhmã kute krãdjê djào õto pynênhja pumũ. Me kute amijã kabên né ne me kute mrãmri ne mry'ãkrĩ nhõto pynênh ne kute o mrãnh mex pyrãk. Nãm me mrãmri kute amim Jeju markumrêx. Nhym be, me kute amijã kabên'ã ma kêt ne tu kabên ba. Djãm me kute amim Jeju markumrêx? Kati. Me ta ne me amim 'êx ne ta aminoo akno.

<sup>27</sup> Gwaj baje mrãmri Metĩndjwýnh, me Babãm djwýnh markumrêxkam mýj ne

gwaj kam bakute? Bir, gwaj kam me 'uwŕimē me bixangrio djuw mexo baba. Me ō mỳjja kētkam meo djuw mexo baba. Gwaj ajte Metīndjwỳnhmā amijangri tỳx ne me kum kīnh kētja jaxwe kōt bajaxwe kēt.

## 2

*Me kum me ō mỳjja kētja kīnh'ā kute memā karō.*

<sup>1</sup> Akmere, àpnhīre ar, Bēnjadjwỳr djwỳnh Jeju Kritu mexo umati: ga me tu amim markumrēxo aba. Djām kam ar amā me rūnhbit kīnhmā? Nhyim me ō mỳjja kētja djām ar amā me kīnh kētmā? Kati. Dja gar amā me kunī kīnho aben pyrāk. Nhyim be, djām mrāmri arỳm ar amā me kunī kīnho aben pyrāk? Kati. Nā gām ar amā me rūnh, me umabit kīnh. Ne kam amā me ō mỳjja kētja kīnh kēt.

<sup>2</sup> Gar abikprōnh djākam akuprō nhyim me'ō rax bōx. Kute ō kēn karỳro ikrakam ràx jangjēnh, aben nhiby angjēnh. Kute ō kubēkà mex jangjēnh. Kute prīne o amijo mex ne arỳm bōx gar omũ. Nhyim kam me'ō nhō mỳjja kētja bōx. Ō kubēkà apỳnh bikadjōnhja bōx. <sup>3</sup> Ar amā me'ō nhō kubēkà mex ja pyman kum,

—Ota, me krī djà mex. Jakam dja ga nhỹ, ane. Ne kam me'ō nhō mỳjja kētjamā kum,

—Wānh dja ga dja nār iparbē dja ga pykakam nhỹ, ane. <sup>4</sup> Djā nā gām ar amā me kīnho aben pyrāk? Kati. Nā gām arīk amim me'ā karō punun amijo me utār punu.

<sup>5</sup> Akmere, àpnhīre ar, imā ar ajabēkam ne ba ar amā ikabēn jarē. Dja gar amim ikabēn ja ma. Mỳj xēja ne Metīndjwỳnh amijo me utà? Djām me rūnhbit, me umabit? Kati. Pykakam me kute me'ā, “Me bikēnh”, anhỹrja, me ō mỳjja kēt ja ne Metīndjwỳnh amijo me utà. Nhyim kam me arỳm tu amim mar tỳxkumrēx nhyim kam kute amikōt meo bamā memā arē. Me kum abējamā ne arē. <sup>6</sup> Nām te amijo me ō mỳjja kētja pytà gar amā me kīnh kēt nhyim kam me arỳm pijām ne. Bir, mỳj xēja ne ar ajo bikēnho ban ar apa 'amỳn me axwe pānh jarēnh djà'ỳr ar ajo mrā? Djām me ō mỳjja kētja ne me 'ỳr ar ajo mrā? Kati. Me rūnh ne me 'ỳr ar ajo mrā.

<sup>7</sup> Metīndjwỳnh kute ar ajo ba ar, dja gar ikabēnja ma. Mỳj xēja ne Metīndjwỳnh japrỳo ba? Djām me ō mỳjja kēt ja? Kati. Me rūnh ne me aprỳo ba. Metīndjwỳnh ne mexti:rekumrēx nhyim me aprỳo ba.

<sup>8</sup> Metīndjwỳnh ne arỳm me bakukāmāremā 'ā karōn memā kum,

“Me amā amibu'ā me ja jabē. Kute mrāmri ne ga me amā amijabēja pyrāk dja ga me ā amā amibu'ā me ja jabēo ane.”

Nām ā me bakukāmāremā ane nhyim me arỳm 'ā pi'ōk no'ōk ne. Kabēn kukràdjà ja ne mexo kute kukràdjà kunī jakrenh. Dja gar kabēn ja mar tỳx ne amā amibu'ā me kunī jabē. Ne kam arỳm amexkumrēx. <sup>9</sup> Godja gar amā me ō mỳjja kētja kīnh kēt ne amā me rūnhbit kīnh jabej. Djām kam amā abu'ā me kunī jabēkumrēx? Djām Metīndjwỳnh kukràdjàja kōt amā me abēkumrēx? Kati. Gar kam amikràn arỳm ajaxwe.

<sup>10</sup> Be, Metīndjwỳnh me kute katàt amijo ba'ā kute memā karōkōt apỳnh kukràdjà. Dja gar kam kukràdjà kunī mar tỳx ne kōt ar amijo aba. Ne kam kukràdjà pydjibit mar kēt ne kōt amijo aba kēt. Djām kam ajaxwe ngri got? Kati. Aje ja pydjibit mar kētkam ajaxwe rax kute mrāmri ne aje kukràdjà kunī mar kētkam ajaxwe rax pyrāk.

<sup>11</sup> Ga, Metīndjwỳnh kute me bakukāmāremā kum,

“Kwārīk wānh abenbē prō, mjēno adjākīnh kēt”, anhỹrja ma.

Ne ajte kute me bakukāmāremā kum,

“Kwārīk wānh me par kēt”, anhỹrja ma.

Godja ga kukràdjà kōt mebē prō'ỳr amrānh kēt ne kam me'ōnh bīn arỳm o ajaxwe. Te mebē prō'ỳr amrānh kēt ne arỳm ajaxwe. Aje me'ōnh bīnkam ga kukràdjà mar kēt ne arỳm kam ajaxwe.

<sup>12</sup> Metīndjwỳnh ne pi'ōkkam prīne me kute katàt amijo ba'ā memā karō mex. Nhyim kam me kwỳ arỳm kute markumrēx nhyim Metīndjwỳnh arỳm memā tỳx jangij. Nhyim kam arỳm katàt kabēn kōt ar amijo ban umar mex ne ta arek mekōt ar ba. Dja gwaj kabēn ja man kōt ar amijo baba. Gēdja ĩ Metīndjwỳnh gwaj bakukjēro nhỹn gwaj bamā,

—Djã ne ga ikabën ja markumrêx ne kôt ar amijo aba? ane gwaj amikôt kum amijarê. Godja gwaj kukràdjà kôt amijo baba kêt nhyr arým gwaj bamã axwe jarê. Kute ren gwaj bamã axwe jarênh karô dja gwaj kukràdjà kôt amijo baba mex.

<sup>13</sup> Nâr, dja gwaj bajô bamã me kaprî kêt nhyr Metîndjwýnh arým amipãnh kum gwaj bakaprî kêt ne tu katât gwaj bamã bajaxwe pãnh jarênhkumrêx. Nâr, dja gwaj badjukaprîkumrêx ne kam arým bamã Metîndjwýnh pyma kêt ne arým bakînhkumrêx.

*Djãm me kum me kaprî kêtja Metîndjwýnh kute me utâr?*

<sup>14</sup> Akmere, àpnhîre ar, dja gwaj bamã me kaprî kêt ne atekam ajte memã kum,

—Ba ne ba tu amim Metîndjwýnh markumrêx, anhÿro baba. Djãm kam Metîndjwýnh kute amim gwaj bapytâr ne kute ar gwaj bajo bamã? Djãm gwaj bajajkwa kajgokam bakabënbit ne kam bamã me kaprî kêt nhyr arým kute amim gwaj bapytâr ne kute ar gwaj bajo bamã? Kati.

<sup>15</sup> Godja gwaj baje me'ôo bakamy nâr o bakanikwýnh, ô kubêkà kêt ne kum prãm.

<sup>16</sup> Gwaj kam kum mÿjja'ô nhôr kêt ne kum,

—Gora gê Metîndjwýnh ajo djuw mex ga adjumar mex ne amã kry kêt ne ajajne, ane. Djãm ja ne mex? Kati. Gwaj baje kum mÿjja'ô nhôr kêt kam ne kajgo.

<sup>17</sup> Mÿj ne gwaj baje kam mar? Bir, dja gwaj bamã me kaprî kêt ne kam memã kum,

—Ba ne ba tu amim Metîndjwýnh markumrêx, ane. Djãm mrãmri bakabën? Kati. Ga, me arým tykkam kute amingrêk kêt ne kajgoja pumû. Gwaj badjwÿ bamã me kaprî kêt kam bakajgo.

<sup>18</sup> Godja me'ô amã,

—Ë, ga ne ga we aje Metîndjwýnh mar. Ba ne ba imã me kaprî ije memã mÿjja nhôro iba. Goja gu baje tu amim Metîndjwýnh markumrêx jabej aben kabi. Ga amã me kaprî kêt kam dja ba te apumûn amim, “Kon. Kute Metîndjwýnh mar kêt pyrâk”, ane. Bajbit dja ba imã me kaprî ije memã mÿjja nhôro iba ga arým ipumûn ijã amim, “Be, djãm mrãmri tu kute amim

Metîndjwýnh markumrêx. Ga, ukaprînh kute memã mÿjja nhôrja pumû”, ane. Ga kam arým ipumû. Ba tu ije amim Metîndjwýnh markumrêxja pumû. Dja ã me'ô amã ane.

<sup>19</sup> Be, ga ne ga we aje Metîndjwýnh rax markam memã kum,

—Metîndjwýnh pydjibit. 'Ôdjwÿ kêt kumrêx, anhÿro aba. Be, mrãmri. Djãm gajbit aje Metîndjwýnh rax mar? Kati. Xatanaj nhô me karô punudjwÿ kute Metîndjwýnh rax mar ne kam ajte kum me kaprî kêt ba. Ne kute rax markam abenmã kum,

—Metîndjwýnh pydjibit. 'Ôdjwÿ kêt kumrêx, anhÿro ba. Ne kam tu umaje terte:t.

<sup>20</sup> Kê, ano kêt, mÿkam ne ba te ar amã,

—Dja ga memã kum, “Ba ne ba tu amim Metîndjwýnh markumrêx”, anhÿro aban amã me kaprî kêt ga mrãmri akajgokumrêx. Ga, me arým tykkam kute amingrêk kêt ne kajgo nhôrja pumû. Gadjwÿ ne ga ã akajgoo ane. Mÿkam ne ba te ar amã ja jarê gar imar kêt?

<sup>21</sup> Dja gar me bakukãmãre Abraão man kôt ije ar amã arênhja ma. Djãm Abraão kute amim Metîndjwýnh mar kajgo? Kati. Nãm tu amim markumrêx ne kam kabën kôt amijo tẽ. Nãm kabën kôt Metîndjwýnh nhô kikum kra Idjak djin bit kute bîn 'ÿr. Nhyr Metîndjwýnh Abraão pumûn arým amim,

—Mrãmri ne Abraão imã axwe kêt ne mex, ane.

<sup>22</sup> Ga, Abraão kute tu amim markumrêx ne kam kute kabën kôt amijo tẽmja pumû. Nãm kabën kôt amijo tẽn kam arým tu amim Metîndjwýnh mar mexkumrêx ne.

<sup>23</sup> Kam ne me aben djô'ã Abraão jarê:n arênhô môr tâmtã nhyr kam arým Môjdjê katon arým abatãnh ne. Ne kam arým me bakukãmãremã kum,

“Abraão ne tu amim Metîndjwýnh markumrêx nhyr arým kum axwe kêt jarê nhyr arým kum mex”, ane.

Ne kam pi'ôkkam no'ôk ne. Be, mrãmri ne kôt arênhkumrêx. Nãm arê nhyr me aben djô'ã abenmã kum,

—Mrãmri ne Metîndjwýnh Abraão òbikwakumrêx, ane.

24 Ga, me kute tu amim markumrêx ne kam kute kabênkôt amijo bakam Metîndjwýnh arým kute memã axwe kêt jarênhja pumũ. Djãm me kute mar kajgokam Metîndjwýnh kute memã axwe kêt jarênh? Kati.

25 Me'õ nire kuprý Rabedjwý. Djãm Rabe kute Metîndjwýnh mar kajgo? Kati. Nãm tu amim markumrêx ne kabên kôt amijo tẽ. Nhyim kam arým kum axwe kêt jarẽ. Nhyim Djodjuwe kute ar anorjadjwý Rabe kum ar kaprîn arým arkum aminhũrkwã jarẽ. Arkum arên arým ar kurê djwýnhbê arkum atemã pry 'õ jarẽ. Nhyim kam ar umar mex ne akubyn 'ã mõn bõx. Nãm ã Rabe kum ar kaprîo ane nhyim Metîndjwýnh arým kum axwe kêt jarẽ.

26 Be, tãm ne ja. Me tyk arým karõ biknorkam kute amingrêk kêtumrêx ne arým kajgo. Gwaj badjwý. Gwaj baje Metîndjwýnh kabên mar kajgon kôt amijo baba kêtumrêx ne kam baje memã kum,

—Ba ne ba tu amim Metîndjwýnh markumrêx, anhỹrkam arým bakajgo. Bakajgo kute mrãmri ne me tyk kajgo pyræk.

### 3

#### *Me õto djujabê kêt'ã ujarênh.*

1 Akmere, àpnhĩre ar, ar akrãptĩ ne gar aje amijo memã kukràdjã'ã adjujarênh djwýnh prãm. Djãm kam mex? Kati.

Mýkam ne mex kêt? Bir, gwaj bakunĩ bakabên kwý kajgo. Gwaj bakabên kajgokam bamex kêt. Ga ren ar abê memã ujarênh djwýnh kêt ne ren akabên kajgo ren gajbit amex kêt. Me krãptĩmã adjujarênh kêtumrêx ga ren gajbit amex kêt. Nhyim be, kati. Ar akabên kajgo'ã memã adjujarênhkam me krãptĩ arým ar akabên man arým ar adjõ'ã mex kêt. Nhyim kam Metîndjwýnh arým pãnh ar amã ajaxwe rax jarẽ. 2 Me bakunĩ bakupãnhã bakabên kajgo kumex. Godja ren me'õ kabên kajgo kêtumrêx jabej ren prĩne kute katàt amijo ba kadjy mex.

3 Ga, me kute mry'ãkrĩo mrãnhja pumũ. Nãm me kute krã djên ajkwa katikôt kàxiràx jadjuw ne ari o krã kukênho mrã.

Ga, te mry rũnh nhyim me kute ajkwakôt ar krã kukênho mrãnhja pumũ.

4 Ga, me kute tekrekam no'i kryreo kà rũho baja pumũ. Nãm te kà rũnh nhyim te kôk djábêr tỳx nhyim me tekrekam no'i kryreo unênh ne o krã kukênho o baja pumũ.

5 Me banhõto kute kà tekrekam no'i pyræk. Me banhõto te kryre gu me o mýjja rũho amra. Nhyim kuwy kryredjwý. Ga, te bà rũnh nhyim me kute kuwy kryreo kunĩmã angjênhja pumũ.

6 Me banhõto ne kute kuwy pyræk, kute bãmã angjênh pyræk. Apýnh me axwe djari kunĩkôt ne gu me banhõto arên arým ipêx. Me banhĩ katikôt ne me banhõto ikwã. Ne kam kute prĩne me bajo punu prãm. Me banhõto bakabênja ne tu apýnh mýjja kunĩo tuknĩn o punu. Kute mrãmri ne kuwy kryre kute bãmã angjênh nhyim mýjja kunĩ xêtja pyræk. Me axwe nhõ bẽnjadjwýr ja ne kute me banhõto krĩ djwýnh.

7 Me kute mýjja krãptĩ djujabê. Mry, àk, kwênh, mry ngãngão mrãnh, ngõnhkam mýjja, mýjja krãptĩja ne me kute ujabê.

8 Nhyim be, me banhõto bakabênja pydjibit ne kute mrãmri ne mry djujabê prãm kêt pyræk. Me banhõto bakabênkam bajamakkre kêt ne bajaxwekumrêx. Me banhõto bakabên kute me parkumrêx, kute mrãmri ne udjy rũnh kute me par pyræk.

9 Me banhõto ne gu me baje Metîndjwýnh, me Babãm djwýnhmã mex-tire jarênh ne atekam aje o baje abenmã bakabên punu jarênh. Kute amipyræk ne Metîndjwýnh me banhipêx. Kute me bajo amipyræk ne me banhipêxkam ne gu me baje abenmã bakabên punu jarênh. 10 Ne kam bajajkwakôt memã bakabên mexmẽ bakabên punuo aben nhikjên memã arẽ. Akmere, àpnhĩre ar, gu me ren ã memã anhỹr kêtumrêx.

11 Djãm inore 'õkôt ngõ djãnhmẽ ngõ djy kute aben nhikjên apõx? 12 Nàr, djãm pidjõbê pigêre'ã oriwêre djõ arij? Kati. Nàr, djãm akrõ'ã pigêre djõ arij? Kati. Ne ngõ nhinore'õkam kadjwanhĩ ne arým akryja djãm kam ngõ djãnh apõx? Arkati. Axikôtbit mýjja apõx. Kwãrĩk wãnh gu me

memã bakabên mexmẽ bakabên punuo aben nhikjên memã arênh kêt.

*Me krã mex'ã ujarênh.*

*Gar 5.16*

<sup>13</sup> Ar ajõ we akrã mex ne we aje me kukràdjà kunĩ mar. Goja mrãmri akabênkumrêx jabej on katàt amijo aban amijo adjàmra kêt. Ne kam arým akrã mex. Kam dja me arým apumũ. Akrã mexkõt apumũ. <sup>14</sup> Nhyim be, ga ne ga anhõkre kad-jwýnhbê angryk. Me'õ nhõ mýjja'ã angryk. Ne arax mýr jabej akadjwýnhbê adjàkrê. Ne kam 'ã amijo amra. Djãm ja ne mex? Djã ne ga katàt ar amijo aba? Kati. Ga ne ga ate amijo aba. Kam kwãrĩk wãnh 'ã amijo adjàmra kêt ne arĩk amim ajêx kêt.

<sup>15</sup> Djãm akrã mex ne ja? Djãm kàjkwakam Metĩndjwýnh we kute amã ja jarênh? Kati, atemã. Pykakam me ar ba ne me kute amã wã jarênh. Me kum Metĩndjwýnh kĩnh kêtja kõt akabên ne ja. Xatanaj ne kute amã wã jarênh. <sup>16</sup> Mýkam? Bir, me'õ nhõ mýjja'ã angrykkam ne arax mýr jabej adjàkrêkam ne ga akangati. Akangatimẽ apýnh me axwe djàrimẽ akam apõx.

<sup>17</sup> Nhyim be, kàjkwakam Metĩndjwýnh kute gwaj bamã bakrã mex jadjàr gwaj bakabên mexkam

gwaj baje amikam bajaxwe'õ mar kêt.

Ne badjumar mex prãm.

Ne memã baprĩn memã bakabên.

Ne bajamak mex.

Ne badjukaprĩkumrêx ne baje mrãmri ne pidjõ djõ mex ne õ kumex pyrãk.

Ne bamã me õ mýjja kêtme me rũnh jabêo aben pyrãk.

Ne bajêxnhĩ kêt ne mrãmri tu amim Jeju markumrêx.

<sup>18</sup> Me kute aben nêje me kukrà ne akrãnmã memã arênhõ ba ja ne me memã arênhõ ba nhyim me arým ajmã kute kêt ne katàt ar amijo ba. Me kute mrãmri ne pidjõ djõ mex ne õ kumex pyrãk.

#### 4

*Me kute amidjwýnhbito kĩnhja ne Metĩndjwýnhmã à'wýr punu.*

<sup>1</sup> Mýj ne ga me aman arým abenwýr aprõt ne aben tako aba? Bir, me aje amim

'ã karõ djãkam amã apýnh me'õ nhõ mýjja pro prãm ne 'ã angryk aba. Ne kam ã abeno anhýro aba. <sup>2</sup> Me amã mýjja kĩnh ne aje bit byrmã nhyim me me abê aptã ga me byr kêt. Byr kêt ne arým me kupa. Aje 'ã angryk ne te aje byr prãmje. Ne kam aje 'ã aben tak ne abenwýr aprõt ne kam aje byr kêt rã'ã ne. Mýkam ne ga me aje byr kêt? Bir, me aje Metĩndjwýnhmã o adjà'wýr kêtgam.

<sup>3</sup> Nàr, me aje Metĩndjwýnhmã o adjà'wýr jabej nhyim kute me amã õr kêt. Mýkam? Bir, me aje o adjà'wýr punukam. Mýj ne aje o adjà'wýr punu on? Bir, me aje bit byrmã ne aje bit o amidjwýnhbito kĩnh prãm. Aje amidjwýnhbito kĩnh prãmkam aje mýjjao Metĩndjwýnhmã adjà'wýr punukumrêx.

<sup>4</sup> Metĩndjwýnh ne arým kute ar ajo õ me jakam ga ren ar amã Metĩndjwýnh kĩnhkumrêx. Nhyim be, kati. Me kum Metĩndjwýnh kĩnh kêt kukràdjà punuja ne gar amã kĩnh rã'ã. Aje mrãmri ne me kum prõ djwýnh kĩnh ne kam jãm kum krõ'ã prõ kĩnh pyrãk. Nàr, aje mrãmri ne me kum mjên djwýnh kĩnh ne kam jãm kum krõ'ã mjên kĩnh pyrãk. Amã Metĩndjwýnh kĩnh ne kam jãm amã me kum Metĩndjwýnh kĩnh kêt kukràdjà punuja kĩnh. Nã gãm ar kam ari akabêno aben nhikjê. Dja gar amã me kukràdjà punu kĩnh rã'ãn arým amijo Metĩndjwýnh kurê djwýnh.

<sup>5</sup> Amrêbê: ne me memã kum,

—Metĩndjwýnh Karõ kute me bakad-jwýnhbê amijo kajkep ne te arek kum me bajo ba prãmje. Te arek kum me bajo ba prãmkam arým ngryk 'ýr.

Nãm me ã me bakukãmãremã ane nhyim me arým 'ã pi'õk no'õk ne. Djãm me kabên kajgo got? <sup>6</sup> Ajmã gwaj bakuten bajaxwe prãm. Nhyim be, Metĩndjwýnh ne kum gwaj bakaprĩn gwaj bajaxwe kêt kadjy gwaj bamã týx jangij gwaj ajmã bakute kêt. Amrêbê: ne ujarênh djwýnh me bakukãmãremã kum,

“Me kute amijo àmra prãmja Metĩndjwýnh arým mebê aptã.

Nhyim be, me kute amijo ngriren amijo kàtãmja Metĩndjwýnh tu kum me kaprĩ.”

Nām ã me bakukãmãremã ane nhym me arým 'ã pi'ók no'ók ne. Ga, kum me bakaprïja pumũ.

<sup>7</sup> Kum gwaj bakaprïkam dja gar akrãnmã Metïndjwýnh kabën man kôt ar amijo aba. Ar Xatanajbê aptà nhym arým ar abê prôt ne. <sup>8</sup> Dja gar Metïndjwýnh man kôt amijo ajkamê nhym arým amipãnh ar aman ar awýr amijo ajkamê. Ar ajaxweja, on ajaxwe krãtan amex kute mrãmri ne me aminhikra punu põnh nhym arým mex pyrãk. Ar aje amijo Metïndjwýnh mar ne jãm ajaxwe prãmja, on aje amim ajaxwe'ã karõja krãtan adjumar djã mex ne. <sup>9</sup> Ajaxwe prãmkam on adjumar punun on muwn kôt amra. On akeket krãtan muwn on akïnh krãtan adjumar punu:re ne. ã ajaxwe prãmkam amijo ane. <sup>10</sup> Dja gar Bënjadjwýr djwýnh rax man arým amijo angrin amijo akåtãm. Nhym kam arým kãjmã akamê.

<sup>11</sup> Akmere, àpnhïre ar, kwãrïk wãnh abenã akabën punu kêt. Metïndjwýnh ne arým gwaj bamã kukrãdjã jarën gwaj bamã,

“Djã gãm me amã aben jabê”, ane.

Kute gwaj bamã kabën ja jarënhkam gar atekam akamy'ã akabën punu jarën 'ã axwe nhô. Mýj ne gar arým aman ã akamy'ã akabën punuo ane? Bir, gar amim,

—Metïndjwýnh kukrãdjã ja ne mex kêt, anen arým akamy'ã ar akabën punu. Ne kam arým o Metïndjwýnh kabën'ã punu jarën arým mar kêt ne kôt amijo aba kêt. Ne aje Metïndjwýnh kukrãdjã'ã punu jarënhbit.

<sup>12</sup> Djãm we ar abê mýjja ne gar amibu'ã me'ã axwe janhôro aba? Metïndjwýnh pydji ne arým me kute katåt amijo ba'ã memã karõ nhym me arým kabën ma. Ta dja me utår jabej nàr meo biknor jabej nhym me arým me biknor tokry djãkam biknor jabej. Atemã me'õ kute meo anhýr kêtumrëx. Kam ar ga akajgon kam me'ã axwe janhôr ar o aba.

*Me amikukãm amijo àmra ne kute amijarënh nêje kute me akre.*

<sup>13</sup> Ar aje amijo adjãmratija, ikabën 'ãno djan ama. Aje Metïndjwýnh mar kêt ne amijo adjãmrakam ga we memã kum,

—On ne nàr kryrãm dja ba krï wãmã tën bõx ne ije amim pi'ók kaprï kumexo atommã. Be, dja ba kam pi'ók kaprï pãnh mebê mýjja jamýn amũ memã õro ikrï. Ne o ikrï:n arým pãnh inhõ pi'ók kaprï kumexo atom. Ne o ikrï: nhym arým ijã amexmê na apêx. Ba kam arým akubyn tẽ, ane. Gar aje memã ã amijo adjãmrao anhýrja gora ikabën 'ãno djan ama. <sup>14</sup> Dja ar ajã akati nhym mýjja ajmã ar ajo gar aje mar kêtumrëx. Atïn tẽ:n atïn nhitep djã ne kute mrãmri ne kakũm ba pyrãk. Kakũm ba:n kam arým me aêrbê kêt ne tu kãjkwa mẽ bimirãkumrëx ne. Nãm ã atïn tẽ:n me aêrbê tu akêto ane.

<sup>15</sup> Kwãrïk wãnh ã memã amijo adjãmrao anhýr kêt. Ga ren ar Metïndjwýnh man ren memã kum,

—Metïndjwýnh kute amim ijã karõ kôt dja ba itïn ne ar iba rã'ã jabej. Ba kam arým krï 'õkam itëm jabej. Nàr atemã idjãpênh jabej, ane. Ga ren ar ã memã anen arým ar amex.

<sup>16</sup> Nhym be, kati. Gar Metïndjwýnh mar kêt ne amikam akïnh kadjy amijo amra. Aje ã amijo adjãmrao anhýrkam ne ajaxwe.

<sup>17</sup> Metïndjwýnh ne arým ar amã amrãnh mex'ã karõ gar arým aje mar. Dja ga mar kajgon kôt amijo aba kêt ne arým ajaxwe.

## 5

*Me õ nêkrêx rũnh kute amidjwýnhbit mar. Mat 13.22; Ruk 12.15; Xim k 6.6; Ap 18.15*

<sup>1</sup> Me rũnhmã ne ba memã kum,

—Ë, me anhõ nêkrêx rũnh, ba me amã arê. Dja apýnh me akaprï djãri me awýr bõxumrëx. Me akaprï ra:x kukãm dja ga me on muwn amra:.

<sup>2</sup> Mýkam? Bir, dja me anhõ nêkrêx rax arým me abê rerekre ne. Te me anhõ kubêkã mex nhym kãpotire arým prïne me abê apõk ne. <sup>3</sup> Dja prïne me abê anhõ mýjja 'õk ne me abê amijo ajkê. Me anhõ kën karýrmê anhõ kryt jaka dja prïne me abê punure. Nhym me kunï arým me anhõ mýjja punu pumũn me ajã abenmã kum, “Be, omũ. Djãm tãmwã mex got”? ane. Nhym kam Metïndjwýnh arým me amã ajaxwe pãnh jarë ga me atokry:. Atokry kute mrãmri ne kuwy'ã me xêtkam me tokry pyrãk. Be, mýj kadjy ne ga me amim

anhõ nêkrêx rûnho atom nhym kumex? Djãm we me aje amijo rûnhmã? Kati. Me kute aminhinomã amimênh djà nhõ akatikam dja Metĩndjwýnh me amã ajaxwe pãnh jarê ga me atokry:.

<sup>4</sup> Ê, akubyn amijo tẽn amima. Ga me ajêx ne anhõ àpênhmã kum, “Dja gar inhõ bàygogo djê pa ba kam ar amã o pãnh”, anhÿro aba. Nhym me ê pa, ga me ate kam arým memã o pãnh kêt. Tãm dja ga me akubyn amijo tẽn ama. Djãm Metĩndjwýnh kute me amar kêt got? Kati. Ê, me kute me amã ê kajgoja kum amijo akij ne kum, “Dja ga ijo angyk”, ane nhym arým me kuma. Metĩndjwýnh ne me krãptĩ:o ban memã Bẽnjadwýr djwýnh. Uma:kumrêx ne arým me kute kum amijo àkjêrja ma.

<sup>5</sup> Me ga ne ga me prĩne amijo djuw mexo aban abixaêr tÿ:xo aba. Aje mrãmri ne mry nhĩptĩ kute ate krãn àkurbit mar nhym me kute myt tãmkam par pyræk. On dja Metĩndjwýnh me ajaxweo pãnh ne. <sup>6</sup> Ga me arým aje me kute katåt amijo bakumrêxmã axwe jarênh ne aje me par nhym me kute aminêje me abê àptår kêtumrêx. Tãm dja ga me akubyn amijo tẽn ama. Nã bãm ã me nêkrêx rûnh kute Metĩndjwýnh mar kêtumrêx memã ane.

*Me kute amiwýr Bẽnjadwýr djwýnh jamãr 'iryãm.*

<sup>7</sup> Nhym be, akmere, àpnhĩre ar, gwaj baje Metĩndjwýnh markam me kute gwaj bajo bikênhkam, mÿj dja gwaj amim arên kuma? Bir, dja gwaj amim,

—Bẽnjadwýr djwýnh dja bõx ba kõt dja, ane. Bẽnjadwýr djwýnh bõx gwaj kõt baku'êja dja gwaj kuma. Ne kam akrãnmã amiwýr amãr 'iry:n ã badjukanga kêt. Ga, pur kre djwýnh kute pur kreja pumũ. Ne kam djwý mex jamãr 'iry:ja pumũ. Nhym kam kum ngo nhym arým na bixadjwýr mex ne. Nhym kam djwý arým apõx ne 'y tÿx ne. <sup>8</sup> Dja gar kudjwa akrãnmã amiwýr Bẽnjadwýr djwýnh jamãr 'iry:n ã adjukanga kêt. Mÿkam? Bir, arým bõx 'ÿr gwaj kõt baku'ê 'ÿr.

<sup>9</sup> Kwãrĩk wãnh abên prĩkam abenã akabên kêt. Mÿkam? Bir, Metĩndjwýnh kute pãnh ar amã ajaxwe jarênh karõ. Kwãrĩk wãnh

abenã anhÿr kêt. Memã axwe pãnh jarênh djwýnh arým bõx 'ÿr.

<sup>10</sup> Ga, me bakukãmãreja ma. Metĩndjwýnh kukwakam ujarênh djwýnhja ma. Bẽnjadwýr djwýnh kukwakam ne me memã ujarênh ar ba nhym me 'ã ari meo bikênhho ba nhym me amitokry maro ba. Nãm me te meo anhÿro ba nhym me akrãnmã amiwýr Metĩndjwýnh jamãr 'iry:n ã ukanga kêt. Dja gar me kudjwa ã amiwýr amãr 'iry:o ane.

<sup>11</sup> Nãm me te meo anhÿro ban te mebê Metĩndjwýnh kurêo ba nhym me Metĩndjwýnh'ã ukanga kêtumrêx. Me ja ne me kĩnhkumrêx. Ja ne gar aje arým mar. Arým ne gar Djo'ã ujarênh ma. Me bakukãmãre Djo te amitokry kumex maro ban amim Bẽnjadwýr djwýnh mar'ã ukanga kêtumrêx. Ne kam arým tokry mar'ã aminhinomã amimê nhym Bẽnjadwýr djwýnh arým o djuw me:xkumrêx. Tãm dja gar ama. Ga, Bẽnjadwýr djwýnh kum me kaprĩ:kumrêxja pumũ.

<sup>12</sup> Akmere, àpnhĩre ar, ar aje memã akabên jarênh nhym me kute amar pydji kadji djãm aje kam kõt Metĩndjwýnh nãr õ mÿjja'õ jarênhmã? Kati. Kwãrĩk wãnh aje memã akabên pydjin arênhkõt memã kãjkwa jarênh kêt. Kwãrĩk wãnh aje memã akabên pydjin arênhkõt memã pyka jarênh kêt. Memã ar akabên pÿnhbit ne arê. Aje mrãmri mÿjjao anhÿrmã. Kambit memã kum, “Nã. Dja ba ã o ane”, ane. Nãr, aje mÿjjao anhÿr kêtumã. Kambit memã kum, “Kati. Dja ba o anhÿr kêt”, ane. Jabit memã arê. Memã akabên pÿnhbit ne arê. Kwãrĩk wãnh memã akabên jarê ne me kute ar amar pydji kadji kõt memã apÿnh mÿjja jarê kêt. Metĩndjwýnh ren ar amã ar ajaxwe jarê.

*Me kute aben mar ne Metĩndjwýnhmã abeno à'wýr.*

<sup>13</sup> Dja gar ajõ akaprĩ jabej Metĩndjwýnhmã amijo a'wý. Nãr, ar ajõ akĩnhkumrêx jabej angyrkam kum amikĩnh jarê.

<sup>14</sup> Djã ne ar akam me'õ kanê? Gê amiwýr me kute Jeju nhõ me jao ba djwýnh 'wýn amiwýr aro bõx. Gê ar Metĩndjwýnhmã o a'wýn arým Bẽnjadwýr djwýnh kukwakam kangõo kungrã. Kangõo



kute rōnykangō pyrəkjao kungrà. <sup>15</sup> Ne Bēnjadjwyr djwýnh kute me'ō kanêjao mexmã tu amim kamnhĩxkumrēx ne kum o a'wý nhym arým ar kabēnkôt o mex ne kum tỳx jadjà. Amrēbê kute àpēnh jaxweo ba jabej dja arým axwe maro aknon kam ngryk kêt ne.

<sup>16</sup> Dja gar ajaxwe'ōkam akaprīn 'ã abenmã amikôt amijarē. Ne kam Metīndjwýnhmã abeno a'wý nhym arým ar ajo mex. Godja gwaj bajaxwe kêt jabej ne kum badjà'wýr jabej. Ne badjà'wýr'ã batỳx ne 'ã badjukanga kêt jabej nhym kam Metīndjwýnh arým gwaj bakabēn kôt àpēnh rax.

<sup>17</sup> Be, djām Erijbê wajanga? Kati. Erij umar kute mrāmri ne gwaj badjumar pyrək. Ne kam Metīndjwýnhmã kàjkwa ngrà'ã à'wýr tỳxkumrēx. Nhym arým kôt namē amexkam kàjkwa ngràbit. Ne ajte namē amexkam kàjkwa ngrà ne. Ne ajte namē amexkam tãm ne. Ne ajte nakam kàjkwa ngrà ne. <sup>18</sup> Ne kam ajte kum na'ã a'uw nhym kabēn kôt ajte na axidjuw. Axidjuw nhym kam djwý ajte ingrôt. Dja gwaj ã Metīndjwýnhmã badjà'wýro ane nhym ã gwaj bakabēnkôt àpēnh raxo ane.

<sup>19</sup> Akmere, àpnhĩre ar, gédja ar akam me'ō Metīndjwýnh kabēn katàtja bê ate amijo ba jabej. Nhym me'ō akubyn Metīndjwýnh'ýr o akēx jabej. <sup>20</sup> Mýj dja kute arým 'ýr o akēxkam kuma? Bir, me'ō kute akubyn 'ýr o akēxja ne axwebê utà nhym Metīndjwýnh arým me biknor tokry djàbê utàn kam kum apýnh axwe djàri krãptĩ akno.

## Pedru kute memã pi'ôk kumrêx no'ôk ne ja.

Jejukôt ba djwýnhbê Pedru ne mebê idjaer kute amim Jeju marjamã pi'ôk no'ôk ne. Ar ja ne ar apýnh pykakôt ajmã nhym me Jejukôt aro ajkê ne. Nhym kam Pedru kute aro týx ne o kïnhmã arkum pi'ôk no'ôk ne. Ne arkum,

—Mrãmri ne gwaj pykajabê babari Jejukôt batokry. Te batokry gwaj Jeju'ã bangrà týx. Arým gwaj bakutêp gwaj bakïnh djã dji. Gwaj Jeju'ã amijakren kudjwa te batokryn tu amikajmãtã Jeju kamnhïx ne bakïnh. Nãm ã Pedru arkum ane.

<sup>1</sup> Ibê Pedru. Jeju Kritu ne ijano ba memã 'ã idjujarênh ar iba. Ba ne ba pi'ôk no'ôkkam ar amã ikabên jarê. Amrêbê gar apýnh me õ pykakôt aben bê abingrãnhja nhym me kute ar ajo me bajtemo baja ba ar amã ikabên. Pykabê Põtukam, Garaxakam Kapadôkam, Adjijkam, Bixinijkam, ar aben bê abingrãnhja, ba ar amã ikabên jarê.

<sup>2</sup> Metïndjwýnh, me Babãm djwýnh arým amijo ar apytã. Amrêbê: mýjja kunï kator kêttri amijo ar apytã. Kute prïne amikukãm mýjja kunï markam amijo ar apytã. Karõ ne ar ajo mexo ba gar arým kôt amextiren ajmã akute kêt ne ar aba. Ne kam katãt Jeju Kritu kabên man kôt ar amijo aba. Amrêbê: ne me bakukãmãre mry kamrõo me kaprêk nhym Metïndjwýnh arým me axwe maro aknon mekam ngryk kêt ne. Jakamdjwý arým Kritu pïte'ykam ty nhym kamrõ prõt. Kam ne Metïndjwýnh arým ar ajaxwe maro aknon ar akam ngryk kêt.

Gê tu kum ar akaprï:kumrêx\* gar adjumar mexo amũ amikamên arým adjumar mexkumrêx ne.

*Mýj ne me kute amiwýr kamnhïxmã?  
Rô 8.29; Ep 1.4; A Xim 1.9; Ped k 2.9*

<sup>3</sup> Ba Metïndjwýnhmã mextire jarê. Metïndjwýnh ne ra:xkumrêx. Kubê Bênjadjwýr djwýnhbê Jeju Kritu Bãm. Ta ne ukaprï ra:xi. Ukaprï raxkôt ne arým gwaj bamã amak bô. Ga, me nã kurũm apôxkam

me umar djã nyja pumũ. Metïndjwýnhdjwý ne gwaj bajamak bô gwaj arým badjumar djã nyn kam bamã katãt amijo baba prã:m ne bamã Metïndjwýnh kï:nhkumrêx. Jeju Kritu tyk ne akubyn tïnkam ne arým gwaj bamã bajamak bô gwaj arým badjumar djã ny. Kute gwaj bamã bajamak bônhkam gwaj tu 'ýr babôxmã kamnhïxkumrêx. Dja gwaj 'ýr bôx ne kôt ar baba rã'ã: rã'ã ne. <sup>4</sup> Nhym kam arým gwaj bamã mýjja mexti:re ngã, gwaj bamã mýjja kume:x ngã. Djãm mýjja rerekmã? Kati. Djãm punumã? Kati. Mýjja mex rã'ã: rã'ã ne. Kãjkwa djwýnhkam ne arým ar amã kudji.

<sup>5</sup> 'Itýxo Metïndjwýnh kute mã amim ar apytãr mex ne ar ajo ba. Gar tu amim markumrêx nhym kute mã 'itýxo ar apytãr mex ne ar ajo ba. Dja mã amim ar ajo ba: nhym me kute aminhinomã amimênh djã nhõ akati arým bôx. Bôx nhym arým prïne amimex kôt ar ajo mexkumrêx.

<sup>6</sup> Jakam godja gar apýnh mýjjakam akaprï jabej. Me kum ar akurê nãr akanê nãr anhõbikwa'õ abê tyk nãr mýjja 'õdjwýkam akaprï jabej. On dja akaprï kêt ne. Dja te akaprïnh akïnhhti:re. Mýkam? Bir, dja gar Metïndjwýnhkôt amexti:rekumrêx. Ja ne gar amiwýr kam ama. Kam ne gar akïnhhti:re. Akaprï japôkmã akïnhhti:re.

<sup>7</sup> Ga, kën karýrkam punu kunï kator kadjy me kute kuwykam adjwýrja pumũ. Nhym kam arým mexkumrêx. Ar gadjwý dja me kum ar akurê nãr akanê nãr anhõbikwa'õ abê tyk nãr mýjja 'õdjwýkam akaprï jabej. Kam dja gar amim Metïndjwýnh man amim maro amũ amikamên arým mar rax ne. Aje Metïndjwýnh mar raxkam akïnhkumrêx. Kam akïnhõ kën karýrkam me kïnhja jakrenh me:x ne. Kën karýr dja on akuno. Nhym be, ar ga dja gar tu amim Jeju Kritu mar raxkumrêx nhym akubyn bôx ne apumũn ar ajã amim,

—Be, inhõ me wã mex djõ'ã ne me mã imex jarên irax jarê ba kam arým ikïnhkumrêx, ane. Dja ã ar amex djõ'ã ane.

<sup>8</sup> Ar ga ne gar omũnh kêt. Te aje omũnh kêt ne amã abê:kumrêx. Te jakam aje omũnh kêt ne aje tu amim markumrêxkam arým akï:nhkumrêx ne te: aje akïnh'ã memã

\* 1:2 Djãm ar ga ne gar adjukaprï nhym pãnh arým kum ar akaprï Kati. Ta ne tu kum ar akaprïkumrêx.

amijarênh mex prâmje. <sup>9</sup> Metîndjwýnh kute ar apytârmã gar tu amim Kritu markumrêx nhym arým ar apytã gar kam arým akî:nhkumrêx.

<sup>10</sup> Djãm amrêbê: ne Metîndjwýnh kukwakam kabên jarênh djwýnh kute gwaj bapytâr mar? Mýjjao Metîndjwýnh kute gwaj bapytârmã djãm me kute mar? Kati. Nãm me memã kum,

—Metîndjwýnh ta dja ï tu kum me kaprîkumrêx, anhÿro ba. Jabit ne me arê. Ne kam te: kute amikukãm gwaj bapytâr mar mex prâmje. Nãm me te: kute marmã prîne pi'ôkkôt abenã Metîndjwýnh kabên jarên abenmã kum,

<sup>11</sup> —Je tô, mýj xêja ne Metîndjwýnh ta tu mekam ukaprîkumrêx? Mýj dja me utâr on? Nhÿnh amex jakam dja ã meo ane? Nãm me ã amim ane. Nhym Kritu Karô me kadjwýnhbê amijo kajkep ne memã Kritu'ã ajarê. Nãm memã kum,

—Dja tokryn kam ï arým raxkumrêx. Nãm ã Karô memã ane nhym me te: kute amikukãm gwaj bapytâr mar mex prâmje. Mýjjao kute gwaj bapytâr ja te kute mar mex prâmje.

<sup>12</sup> Nhym kam Metîndjwýnh arým memã kum,

—Djãm me ajã ne ba ikabên ja jarê ga me te: aje mar mexmã? Kati. Tû:mrãm me akamingrãnyre'ã ne ba ikabên jarê, ane. Metîndjwýnh memã ane nhym kam 'âtũmkam ujarênh djwýnh ar arým kaj bê ar amã Kritu'ã ujarênh ny jarê. Kute kajkwa kurũm memã Metîndjwýnh Karô janorkôt me ar amã arê gar gajbit arým ama. Kadjy mrãnh djwýnhdjwý te kute mar prâmje gar gajbit arým ama.

*Me mexti:ren axwe kêt ne ar ba'ã kute memã karô.*

*Ep 4.1; Kor 1.10; Tex k 2.10; Xit 2.14*

<sup>13</sup> Ar aje markam dja gar ano tÿx ne ajamak mex ne ajaxwe kêt kadjy amijãno djan mrãmri akînh djãkam amakkumrêx. Kwãrîk wãnh kam amak katêri 'ã adjukanga kêt. Dja Jeju Kritu bôx ne arým memã amijo amirît ne arým ar amã akînh djã nhôrkumrêx. <sup>14</sup> Ga, me prîne kute nã kabên mar ne kôt kute amijo baja pumũ. Ar gadjwý dja gar Metîndjwýnh kabên man kôt

ar amijo aba. Amrêbê ne gar ajamakkre kêt ne amã mýjja punu kînh. Kwãrîk wãnh akubyn amã kînh kêt. <sup>15</sup> Metîndjwýnh ne mexti:ren axwe kêtumrêx. Ar ga dja gar Metîndjwýnhkôt amextiren ajaxwe kêt ne ar aba. Amrãnh kunîkôt ajmã akute kêt ne ar aba. Metîndjwýnh ta ne amiwÿr ar ajuw ne ar ajo ba. <sup>16</sup> Amrêbê: ne me bakukãmãremã kum,

“Ba ne ba imexti:ren ijaxwe kêtumrêx ne ar iba.

Dja gar ikudjwa amextiren ajaxwe kêt ne ar aba.”

Nãm ã me bakukãmãremã ane nhym me arým 'ã pi'ôk no'ôk. Kam dja gar amexti:ren ajaxwe kêt ne ar aba.

<sup>17</sup> Kajkwakam me Babãm djwýnhmã ne gar amijo a'uw. Ta ne kute me kunî axwe markam kute memã axwe pãnh jarênh. Me kute axwekôt amijo badjari 'ãnh dja memã pãnh jarênho tẽ. Dja katãt me kunîmã pãnh jarê. Ar gadjwý kute ar amã ajaxwe pãnh jarênh karô amijãno djan ar aba. Ga, me me bajtem nhô pykakam ar bakam amijãno ãm ne katãt kute amijo baja pumũ. Ar gadjwý pykakam ar abari amã Metîndjwýnh pyman amijãno dja. Ajaxwe kêt kadjy amijãno djan katãt ar amijo aba.

<sup>18</sup> Amrêbê ne gar te ajaxwe kêtumã ar akukãmãkjê kukradjã kôt amijo aba kajgo:n ajaxwe rã'ã. Nhym kam Kritu arým ar ajaxweo pãnh nhym kam Metîndjwýnh arým tu ar amã axwe kêt jarê gar kum ajaxwe kêt. Djãm kryt jakao nãr kên karÿro ne ar ajaxweo pãnh? Kati.

<sup>19</sup> Metîndjwýnh ne kum kra kî:nh. Nãm te kum kînh ne arým pykamã ano nhym arým amikamrô ar ajaxweo pãnh. Ga, me bakukãmãre kute mrykî'ãtomti par ne kute Metîndjwýnhmã bôrja pumũ. Mry punu kêt ne prîne kã mex ne me kupa. Kritudjwý ajmã kute kêt ne axwe kêtumrêx ne arým ar ajaxweo pãnh. Pite'ykam ne kamrô prôt ne arým tyn kam arým o ar ajaxweo pãnh. Kam dja gar amijãno djan katãt ar amijo aba.

<sup>20</sup> Mrãmri ne Metîndjwýnh amim Kritu'ã karôkumrêx. Amim tyk'ã karôkumrêx. Pykamẽ kajkwamẽ mýjja kunî kêttri ne amim 'ã karôkumrêx. Ne kam 'âtũmkam arým ar akadjy Krituo amirît ne. Mýjja kunî

kute aminhinomã amimênh djà nhõ akati jakam arým o amirît ne. <sup>21</sup> Nãm ar akadjy o amirît gar aje kôt tu amim Metïndjwýnh markumrêx. Nãm o amirît nhym ty nhym akubyn o tïn ne amiraxo o rax nhym arým ra:x ne uma:kumrêx. Mýj kadjy? Bir, gar aje tu amim Metïndjwýnh markumrêx ne aje amiwýr kôt atïn kamnhĩxmã. Ja kadjy ne akubyn Krituo tïn nhym arým ra:xkumrêx.

<sup>22</sup> Jakam ne gar arým kabên katàt man kôt ar amijo aban arým ajmã akute kêt ne ar aban arým mrãmri amã me abê katàtkumrêx. Jeju kukwakam me bakamyja amã me abê katàtkumrêx. Kam, dja gar ã anen amim ajaxwe'õ'ã karõ kêtumrêx ne arým ar amã aben jabê:

<sup>23</sup> Ga, te bàygogo 'y mex ne punu prãmja pumũ. Nhym me bàygogo 'y mex kre nhym arým ingrõtja pumũ. Ar gadjwý ne me ar amã Metïndjwýnh kabên jarê, Metïndjwýnh kabên kute mýjja 'y pyræk ne me ar amã arê. Nhym me kute ar amã arênhja ne kute me àkre pyræk. Djãm Metïndjwýnh kabên punu prãm? Kati. Mex rã'ã: rã'ã. Tãm ne me ar amã arê gar aman arým tu amim Metïndjwýnh markumrêx. Nã gãm ar mýjja nhingrõt mãn pràbê tu amim markumrêx. Nhym kam arým ar amã ajamak bô gar arým adjumar djà ny kute mrãmri ne me prïre bixadjwýr nykam umar djà ny pyræk. Ne kam arým amã Metïndjwýnh kĩ:nh ne aje mar prã:m ne aje katàt amijo aba prã:m ne. Metïndjwýnh ne amikabên pýnh ne arê. Djãm kute atemã kabên 'õ jarênhmã ne kute o kabên tũm japanh ne o biknormã? Arkati. Kute amikabêno biknor kêtumrêx. <sup>24</sup> Ikabênja kôt ne me amrêbê: me bakukãmãremã kabên jarên memã kum,

“Ga, bõja pumũ. Bõ tïn 'ikrãne ne arým mjô. Me badjwý ne gu me bakunĩ batïn ne ar baba 'ikrãne.

Ga, pidjôrã mexkumrêxja pumũ. Pidjôrã mex 'ikrãne ne arým rôrôk ne. Me badjwý ne gu me bamex 'ikrãne.

<sup>25</sup> Nhym be, Metïndjwýnh ne amikabên pýnh ne arê. Djãm kute iby atemã kabên 'õ jarênh ne kute o kabên tũm

japanh ne o biknormã? Arkati. Kute mar týt rã'ã: rã'ã ne.”†

Nãm me ã me bakukãmãremã ane. Kam ne gwaj kabên mar pýnh. Amrêbê ne me kàj bê ar amã Kritu'ã ujarênh ny jarê. Kabên pydjïn arê gar mar pydji.

## 2

<sup>1</sup> Me kute ar amã Kritu'ã ujarênh ny jarênh ar aje mar pydjïkam

on wãnh me kàxã akabên punu kanga.

Aje memã ajêxkôt me noo abiknor on wãnh kanga.

On wãnh ajêx ne aje amijo Jeju mar mexja kanga.

Me'õ nhõ mýjja'ã angyrk on wãnh kanga.

Akabên punu kunĩ on wãnh kanga.

<sup>2</sup> Metïndjwýnh kabên kute me kà kangô pyræk dja ga amã kïnh. Aje me prïre rwýk ny pyræk kute kum kà djãnh pyræk ã amã kabên kïnh ane. Ne kabên maro tẽ:n maro amũ amikamên mar ra:x ne. <sup>3</sup> Aje arým amim Bënjadjwýr djwýnh mex kakinhkam dja ga ã amã kabên kïnh ane.

### *Kute Kritu'ã kên jakre.*

<sup>4</sup> Kritu ne kute kên pyræk. Nhym be, kên ne tïn ne ar ba kêt. Nhym be, Kritubit ne tïn ne ar ba. Kute kên pyræk gar arým 'yr bôx. Nhym me kwý arým kanga. Nhym be, Metïndjwýnh ta arým amijo utà. Kute o me utàr kadjy arým amijo utà. Kum kĩ:nhkumrêx kute mrãmri ne me kum kên pãnh rax kïnh pyræk.

<sup>5</sup> Ar gadjwý ne gar aje apýnh kên pyræk. Nhym be, kên ne tïn ne ar ba kêt. Ar gajbit ne gar atïn ne ar aba. Aje apýnh kên pyræk. Ga, me bakukãmãre kute kênno Metïndjwýnh nhõ kikreti nhipêxja pumũ. Ar gadjwý ne Metïndjwýnh arým ar ajo kran ar amã Karõ jano nhym kam arým ar akam nhýn ar ajo ba. Gar kam arým abeno anhõbikwa mexo mõ. Nãm ar ajo kute mrãmri ne kênno kikreti nhipêxo mör pyræk. Ne kam ajte amim ar apumjuw, kute ar ajo me kadjy Metïndjwýnh mar djwýnhmã ne ar apumjuw. Ga, me kadjy Metïndjwýnh mar djwýnh kute Metïndjwýnh nhõ kikretikam kum mry bôr nhym kum kïnhja pumũ.

† 1:25 Kute amikabên jarênh ne o biknor kêtumrêx. Kute apýnh mýjja jarênh kôt dja mýjja kunĩ apôx mexkumrêx.

Ar gadjwÿ Karõ kute ar ajo bakam ne gar kum apÿnh kÿnh djà nhõro aba nhym kum kÿnh. Ar aje tu amim Jeju Kritu markam ne kum kÿnh. <sup>6</sup> Be, nhym kam Metÿndjwÿnh kën'ã Kritu jakre. Kën pãnh raxja, me kum kÿnhja'ã ne akren me bakukãmãremã kum, “Ota ba krÿrãxbê Xijãokam kënno kikremo kajpa nhym dja. Kën mexkumrêx, kën pãnh rax ne ba amijo utàn kudja. Me kute tu amim kënja markumrêx dja me pijàm kadjy kêtumrêx.”

Nãm Metÿndjwÿnh ã Kritu'ã me bakukãmãremã ane nhym me arÿm 'ã pi'òk no'òk ne. <sup>7</sup> Ar ga ne gar arÿm tu amim Kritu markumrêx ne arÿm amã kÿnh. Amã kÿnh kute mrãmri ne me kum kën pãnh rax kÿnh pyrãk.

Nhym be, me amakkre kêtja ne me kute amim Kritu mar kêt ne kanga. Nhym be, Metÿndjwÿnh ta arÿm kàjmã kum rax kamê nhym arÿm ra:x. Kritu'ã ne amrêbê me bakukãmãre memã ajarê. Nãm me memã kum,

“E kum kën ja ne me kute kikreo ãm djwÿnhja kute kikremã armã te omÿn kam bõm kumê.

Kën ja ne arÿm kute kikremo kajpar, kum kajpar tÿxi”, ane.

Be ga, me bakukãmãre kute amrêbê: memã anhÿr kôt me arÿm kute Kritu kangaja pumÿ. Nhym kam Metÿndjwÿnh arÿm kàjmã kum rax kamê nhym arÿm ra:x ne. <sup>8</sup> Nãm me memã kum,

“Kën ne kute me par tok nhym kam me rôròk prãmumrêx”, ane.

Me amakkre kêt ne me kute me rôròkja pyrãk. Nãm me kute amim Kritu mar kêt ne kam arÿm me biknor tokry djãkam akuno. Metÿndjwÿnh kute amrêbê: me'ã amim karõ kôt dja me arÿm akuno.

<sup>9</sup> Nhym be, ar ga ne Metÿndjwÿnh arÿm amijo ar apytà. Ar ga ne gar aje mrãmri ne me kadjy Metÿndjwÿnh mar djwÿnh rÿnh pyrãk. Nhym Bënjadjwÿr djwÿnh ne ar ajo ba. Ar abê Metÿndjwÿnh nhõ me wÿnhkumrêx nhym arÿm amim ar ajo ba. Ar gajbit ne amim ar ajo ba. Amrêbê ne gar ajaxwe: ne aje mrãmri ne me akamàt kô tykkam rôròk baja pyrãk. Gar ari ajaxweo aba nhym Metÿndjwÿnh arÿm amiwÿr ar ajuw ne ar ajo ba. Jakam ar aje mrãmri ne me irãkam katàt ba pyrãk ne katàt

Metÿndjwÿnh kôt ar amijo aba. Ne kam arÿm memã ra:xmê mextire 'ã adjujarênh ar aba. <sup>10</sup> Amrêbê ne gar ate me kajgo kôt ar aba. Nhym Metÿndjwÿnh arÿm jakam ar ajo kran amikôt ar ajo ba. Amrêbê ne kum ar akaprÿ kêt. Ne kam arÿm jakam kum ar akaprÿ.

<sup>11</sup> Ga, me me bajtem nhõ pykakam ar baja pumÿ. Djãm me kute amikukràdjã kangan me bajtem kukràdjã marn kôt amijo ba prãm? Kati. Ar gadjwÿ ne gar me kum Metÿndjwÿnh kÿnh kêtja mē ro'ã ar aba. Me kum amidjwÿnhbito kÿnh prãmumrêx axwe:. Me axwe kôt ar ajaxwe puma:. Djãm ar aje Metÿndjwÿnh kukràdjã kangan me axwe kukràdjã 'amÿnh ne kôt ajaxwemã? Kati. Kwãrÿk wãnh. Dja gar Metÿndjwÿnhmã amijangri tÿx.

<sup>12</sup> Me kute Metÿndjwÿnh mar kêtjamê ro'ã ar abakam dja gar katàt ar amijo aba. Nhym kam me ar apumÿn arÿm ar ajã 'êx jabej ne arÿk ar ajã kute,

—Ga, me axweja pumÿ, anhÿr jabej. Kwãrÿk wãnh rã'ã. Ar ga dja gar memã katàt ar amijo aban adjukaprÿ. Katàt ar amijo aba: nhym kam Kritu arÿm bõx. Bõx nhym me arÿm amiman Metÿndjwÿnhmã kum,

—Mrãmri amexkumrêx. Me kute amim amarja katàt ar amijo ban ukaprÿ. Ba kam gadjwÿ amex ma. Mrãmri amexkumrêx, ane. Dja me ar akatàt pumÿn arÿm ã Metÿndjwÿnhmã ane.

*Me kute me bënjadjwÿr kabên marmã.*

*Rô 13.1; Xit 3.1*

<sup>13</sup> Ba ar amã arê gar ama. Dja gar pykakam me bënjadjwÿr kabên kunÿ ma. Mÿkam? Bir, gar arÿm kàjkwakam anhõ Bënjadjwÿr djwÿnh kabên maro aba. Ta ne arÿm ar amã me'ã karõn ar amã,

—Pykakam ar anhõ bënjadjwÿr kabên ma, ane. Kute ar amã anhÿrkam ar aje pykakam anhõ bënjadjwÿrdjwÿ kabên marmã. Bënjadjwÿr raxo kute me bënjadjwÿr kunÿ jakrenhja dja gar kabên ma. <sup>14</sup> Nãr me bënjadjwÿr kute atãri ar amã ÿr ja dja gar kabên ma.

Metÿndjwÿnh ta ne ar amã me bënjadjwÿr jano. Ta ne ar amã aje me kabên marmã arê. Mÿj kadjy ne ar amã me arê? Bir,

dja me bēnjadjwyr me axweo bikēho ba. Nār, dja me katāt kute amijo bajamā mex jarēho ba. Me kute ā meo anhȳr kadjy ne ar amā me bēnjadjwyr jarē. Kam, dja gar me bēnjadjwyr kabēn man katāt ar amijo aba. <sup>15</sup> Katāt ar amijo aba nhym kam me kwȳ ar ajā kabēn kajgo kumex jarē. Me bēn kati dja me ā ar ajā ane. Kwārīk wānh rā'ā. Ar ga dja gar arek katāt ar amijo aban 'ā adjukanga kêt. Nhym kam amū me krāptī arȳm ar amexkôt ar apumūn arȳm me kabēn kajgoja mar kêt. Nhym kam me arȳm anhikrēn arek dja. Dja gar aje katāt amijo abao ā me kabēn kajgoja nhityo ane. Metīndjwȳnh kute ar amā 'ā karō kôt dja gar ā ane.

<sup>16</sup> Amrēbē ne gar te ajaxwe kētmā ne ajaxwe rā'ā. Jakam ne Kritu arȳm ar ajaxwebē ar apytàn arȳm ar amā tȳx jangij. Ar ajaxwebē ar atȳxkam ar ga ne gar arek mekôt ar aban adjumar mex. Arek mekôt ar abakam kwārīk wānh arīk ar aba kêt. Ga, me kwȳ kute,

—Ba ne ba arek mekôt ar iban idjumar mex, anhȳrja pumū. Nām me anen kam arīk ar ban axwe:. Ne kam me kute mrāmri ne me kute kubēkà mex jangjēnh ne kadjwȳnhbē punu rā'ā pyrāk. Kwārīk wānh ā amijo anhȳr kêt. Ar ga dja gar abē Metīndjwȳnh nhō àpēnhkumrēx ne kum adjapēnh tȳx ne katāt kabēn man kôt ar amijo aba.

<sup>17</sup> Me kunī ar aje kàjmā memā rax kamēnh kadjy dja gar amima. Jeju kukwakam ar aje meo akamyja ar amā me abē. Amā Metīndjwȳnh rax pyman bēnjadjwyr raxja kàjmā kum rax kamē.

<sup>18</sup> Me kute ar ajō ar apa 'amȳnh gar memā adjapēnh kajgo ar aba ar, ar amā ne ba ikabēn jarē. Dja gar akrānmā pykakam ar ajo ba djwȳnhmā adjapēnh katāt ne rax ma. Djām ar ajo ba djwȳnh mex ne kabôt katikambit dja gar kabēn kôt kum adjapēnh katāt? Kati. Àkrē prām kamdjwȳ kum adjapēnh katāt.

<sup>19</sup> Mȳj dja gar nēn kam arȳm Metīndjwȳnh kīnh nhym ar amā mex jarē? Bir, dja gar katāt Metīndjwȳnh kabēn man kôt ar amijo aba. Nhym kôt me arȳm ar ajo ajkē gar kôt

arȳm atokry ne akaprī ma. Kam dja gar Metīndjwȳnh kīnh nhym arȳm ar amā mex jarē.

<sup>20</sup> Godja gar ajaxwe nhym me pānh ar ajo bikēnh jabej gar kam akrānmā amītokry mar jabej. Djām kam gar arȳm Metīndjwȳnh kīnh nhym kute ar amā mex jarēnhmā? Kati. Nhym be, godja gar katāt ar amijo aba nhym me arȳm kôt ar ajo bikēnh jabej gar kam akrānmā atokry mar jabej. Katāt ar aje amijo abakambit dja gar arȳm Metīndjwȳnh kīnh nhym ar amā amex jarē. <sup>21</sup> Katāt ar aje amijo abakôt me kute ar ajo bikēnh gar kôt atokry. Ja kadjy ne Metīndjwȳnh amīwȳr ar ajuw ne ar ajo ba. Ga, Kritudjwȳ gwaj bakadjy tokryja pumū. Gwaj baje kudjwa katāt amijo baban kôt batokry kadjy ne gwaj bakadjy tokry.

<sup>22</sup> “Djā nām Kritu axwe? Kati. Djā nām memā 'ēx ne me noo akno? Kati.”\*

<sup>23</sup> Me kum àkjēr kam djā nām amipānh memā akij? Kati. Tokrykam djā nām me kangrō? Kati. Nām Metīndjwȳnhmā amījarē. Kute katāt memā axwe pānh jarēnh djwȳnhkumrēx jamā ne amījarē. <sup>24</sup> Kritu ta ne pīte'ykam gwaj bajaxweo pānh. Mȳj kadjy ne gwaj bajaxweo pānh? Bir, gwaj bamā bajaxwe prām kêt kadjy.

Ga, me tyk kum axwe prām kêtja pumū. Gwaj badjwȳ arȳm batykmān prābē bamā bajaxwe prām kêt ne ar baban baje kabēn marn kôt baje amijo baba prām. Ja kadjy ne arȳm gwaj bajaxweo pānh. Mry kà punuo ne me prīne ôm nhym kam Metīndjwȳnh arȳm kôt gwaj bajo mex gwaj kam ā bamā bajaxwe prām kēto ane. <sup>25</sup> Ga, mryo ba djwȳnh kêt kam mrykī'ātomtī arȳm no biknor ne ate ar baja pumū. Ar gadjwȳ ne gar ate ar aba. Nhym be, jakam gar arȳm ajo ba djwȳnh Jeju'ȳr amijo akēx ne kôt ar amijo aba nhym arȳm ar apytāro ba.

### 3

*Kute prōmē mjēnmā abenā karō.*

*Xit 2.2; Xim k 2.9, 3.11*

<sup>1</sup> Ē, ar apa, arȳm ar amjēnwā, ar amā ne ba ikabēn ne. Dja gar akrānmā amjēn

\* 2:22 Amrēbē ne Metīndjwȳnh kukwakam kabēn jarēnh djwȳnhbē Idjaij ja jarē nhym kam Pedru kôt arē.

kabên maro aba. Ar ajô amjên kute amim Metîndjwýnh kabên mar prâm kêt jabej ga dja ga katàt kabên kôt ar amijo aban ì arým 'ÿr o akêx ne. <sup>2</sup> Godja te amim Metîndjwýnh kabên mar kêt ne arým apumû. Katàt aje amijo aban amã Metîndjwýnh rax pymakôt arým apumû. Ne kam amex kôt arým Metîndjwýnh'ÿr amijo akêx ne tu amim markumrêx.

<sup>3</sup> Be, mÿj dja ga amexkam akute nhym me kum akînh ne? Djâm akunhêrkam nâr djâm akî prîne mex nâr djâm apÿnh anhô kên karÿrkam nâr djâm aje akà mex jangjênhkam? Djâm akunhêr jabit ne arým kôt amex? Kati.

<sup>4</sup> Bir, mÿj dja ga ga amexkam akute nhym me kum akînh ne? Bir, dja ga anhökre kad-jwýnhbê akabên mexbit man memã aprîren akrànãmã memã abên rereko aba nhym me arým kum akînhkumrêx. Nhym kam Metîndjwýnhdjwÿ kum akî:nhkumrêx kute mrâmri ne me kum ô mÿjja pãnh ra:x kînh pyrâk.

<sup>5</sup> Amrêbê ne me bakukãmãre nire kwÿ mextiren axwe kêt ne ar ba. Ne Metîndjwýnh kanàrrãm ar ban arým kabên mexbit jarên akrànãmã mjên kabên maro ba. <sup>6</sup> Ga, Xara kute Abraão kabên marja pumû. Nãm katàt kôt ar amijo ban kum rax jarên ar o ba. Ar aje Xara tãmdjwÿ pyrâk dja gar kudjwa amjên kabên man arým atîn prâm kêt.

<sup>7</sup> Ê, ar apa, arým ar aprōwã, ar amãdjwÿ ne ba ikabên ne. Kwãrîk wãnh amid-jwýnhbit maro aba kêt ne prîne amim aprō maro aba. Ajitÿxo aje aprō jakrenhkam kum aprî:ren amã abê. Djâm amã aprō jabê kêt nhym Metîndjwýnh kute amarmã? Aje kum amijo adjà'wÿr nhym kute amarmã? Kati. Dja ga amã abê kêt nhym Metîndjwýnh arým amar kêt. Nhym be dja ga amã aprō jabê nhym arým akabên ma. Djâm apydji ne Metîndjwýnhkôt atîn ne ar abamã? Kati. Metîndjwýnh djukaprîkôt ne ga aprômê kôt ar atîn ne ar abamã.

*Me kute katàt amijo bamã.*

*Ep 4.1; Kor 1.10; Tex k 4.1; Ped k 2.12*

<sup>8</sup> Jakam ne ba ar akunîmã ikabên. Gora ar akunî axikôt abenmã akabên jarê. Kwãrîk wãnh amidjwýnhbit maro aba kêt.

Dja gar aben maro aba. Kute me kamy kum kamy jabê pyrâk dja gar ã amã aben jabêo ane. Ar amã aben kaprîn amijo angrin akâtãm ne ar abeno aba.

<sup>9</sup> Kwãrîk wãnh me'ô ar ajo ajkê gar amipãnh o abikênh kêt. Nâr, kwãrîk wãnh me'ô ar amã akij gar amipãnh kum adjàkjêr kêt. Ate dja gar kum akabên mex jarên o djuw mex. Ar aje ã abenmã anhÿr kadjy ne Metîndjwýnh amiwÿr ar ajuw ne ar ajo ba. Ja dja gar aman ikabên kôt amijo ane nhym Metîndjwýnh ì arým ar amã akînh djà ngãn ar ajo djuw mex. <sup>10</sup> Amrêbê: ne me bakukãmãre memã kum,

“Ar adjumar mex ne atîn 'iryne ar abamã djâm ar amã ja kînh? Mÿj dja gar kadjy amijon?

Bir, kwãrîk wãnh akabên punu'ô jarên kêt. Aje me noo abiknor kadjy, kwãrîk wãnh memã ajêx kêt.

<sup>11</sup> Godja me arîk ar ban axwe on memã akàx. Ar ga dja gar ajaxwe kêt ne amã me kaprî.

Ar akunî abenkam adjumar mex kadjy dja gar aben nêje aben jakren akabôt katin ar aba ne 'ã adjukanga kêt.

<sup>12</sup> Mÿkam dja gar abenkam adjumar mex? Bir, Bênjadjwÿr djwýnh kute katàt me kute amijo baja pumÿnh.

Ne kam me kute kum amijo à'wÿrkam arým kute me kabên marn kam kute me kabên kôt memã ipêx.

Nhym be, me axweja ne Metîndjwýnh arým mekam no kà nhàn ngryk ne arým mebê aptà”, ane.

Me kute amrêbê: me bakukãmãremã anhÿrkam dja gar ã amexo ane.

<sup>13</sup> Ar amex prãm kam djâm me kute ar ajo bikênh prãm? Kati. <sup>14</sup> Nâr gar katàt ar amijo aba nhym me kôt ar ajo bikênh jabej gar arým atokry. Atokry japôkmã akînh. Akînh ja dja gar ama. Kwãrîk wãnh kam ar amã me uma kêt ne atîn prâm kêt.

<sup>15</sup> Ne ate Bênjadjwÿr djwýnh, Metîndjwýnh ma. Ne mexo umatija ma. Ne ano tÿx. Amikôt aje memã amijarên kadjy ano tÿx. Dja me abej akukij ne amã,

—Mÿj ne ga aman arým, “Dja ba Metîndjwýnh kôt itîn ne ar iba rã'ã: rã'ã ne”, anhÿro aba? Mÿj ne ga ama? ane. Dja me

ã abej akukjêro ane ga kam amikôt memã amijarên memã kum,

—Kritu ikadju ty. Ba arým tu amim markumrêx. Kam dja ba Metîndjwýnh kôt itîn ne ar iba rã'ã: rã'ã ne, ane. Kwãrîk wãnh memã bêx kêt. Metîndjwýnh mexo uma dja gar aman memã aprîren memã amijarê.

<sup>16</sup> Dja gar katàt ar amijo aban amikam ajaxwe'ô mar kêt nhym me arým ar ajã 'êx ne memã kum,

—Djãm tãmwã katàt kute amijo ba got? Kati, axwe, anhÿro ba. Kwãrîk wãnh rã'ã. Dja te me ar ajã anhÿro ba, ar ga dja gar katàt amijo aba rã'ã. Ne katàt amijo aba tãmtã: nhym kam me arým ar akatàtkumrêx kôt ar apumûn arým amikam pijàm ne. Me amikam pijãmmã dja gar katàt amijo ar aba rã'ã.

<sup>17</sup> Mÿkam ne me ar ajã kabên punu? Bir, godja Metîndjwýnh ar atokry'ã amim karô jabej. Kute ar ajã amim karô kôt ne me ar ajã kabên punu gar arým atokry. Ajaxwe kêt ne atokry. Ne te atokry ne Metîndjwýnhmãbit amexkumrêx. Nhym be, me kwÿ axwekumrêx nhym Metîndjwýnh arým memã axwe jarê nhym me arým tokry:. Nhym be, ga te ajaxwe kêt ne atokry, ja ne mex.

<sup>18</sup> Be ga, Kritudjwÿ tokryja pumû. Gwaj bajaxwekôt tokry. Gwaj bajaxwekumrêx nhym ta axwe kêtumrêx ne arým gwaj bajaxwe pãnh tokry. Kute Metîndjwýnh'ÿr gwaj bajo akêx kadju tokry. Nãm me kubî. Kritu nhîkumrêx nhym me kubî. Nhym kam Metîndjwýnh Karô akubyn o tîn ne.

<sup>19</sup> Amrêbê: Nôwe me bakukãmãremê ro'ã ar bakam ne ngô me imex nhym me arým ty. Nhym kam Metîndjwýnh arým me karôbê ijê. Me tîn ne ar bari ne Metîndjwýnh arým Nôwemã Karô jano nhym arým kum arê. Kum arê nhym kuman arým kãj bê me akren memã kum,

—Ar ajaxwe:. On wãnh ajaxwemã anhire. Nãm ã memã anhÿro ba. Kute kà raxo ãmri ne ã memã anhÿro ba.

<sup>20</sup> Nôwe te memã ane nhym me axwe rã'ã ne. Nhym kam Metîndjwýnh ngryk tô:n te me kute amijaxwe krã'ÿrmã kam ama:. Nhym kam ngô arým me imex nhym me arým ty. Nhym kam Metîndjwýnh arým me

karôbê ijê. Nhym be, me ngrêrebit arým amim kabên ma. Ar kubê 8bit arým amim kabên man arým wãnh axwemã ire. Ne kam arým kãmã wadjàn kam tyk kêt. Ga, ar kute amim Metîndjwýnh mar ne arým kàkam ÿrja pumû. Kam Metîndjwýnh arým ngôkam ar utàn ar aro ba.

<sup>21</sup> Gwaj badjwÿ ne gwaj tu amim Kritu markumrêx nhym me arým ngômã gwaj bajangij. Mÿj'ã ne ngô kurûm bajapôxja amijakre? Bir, Jejumê ro'ã akubyn batîn'ã ne amijakre. Gwaj Jejumê ro'ã akubyn batînkam ne gwaj arým Jejukôt katàt ar amijo baba. Djãm mÿjja punu'ô gwaj banh'ã atom nhym me gwaj bajã ku'ô? Kati Gwaj katàt ar amijo baban arým amim,

—Metîndjwýnh ne katàt ije amijo ibakôt kute imar, anen arým bakînhkumrêx ne. Ja'ã ne ngô kurûm bajapôxja amijakre.

<sup>22</sup> Mrãmri ne Jeju akubyn tîn kàjkwamã wabin arým Metîndjwýnh djubôk'ãnh nhÿ. Bênjadjwÿr rax ne memã nhÿ ne kute raxo, umao mÿjja kunî, me kunî jakrenh. Kute kadju mrãnh djwýnhmê me bênjadjwÿrmê me 'itÿx kunî jakrenh mex ne kabêno me anoro nhÿ.

## 4

*Me kute katàt Metîndjwýnh kabên kôt amijo ba'ã kute memã karô.*

*Ep 4.17; Kor 3.5*

<sup>1</sup> Kritu nhîkumrêx ne arým gwaj bapãnh tokry. Ar aje ja markam dja gar amikukãm mã amim,

—Badjwÿ dja ba kudjwa itokry, ane. Dja gar ã amim ane. Mÿkam? Bir, dja gwaj kudjwa batokryn arým amim Metîndjwýnh mar tÿx ne kam arým bajaxwe prãm kêtumrêx <sup>2</sup> ne bamã mÿjja punu kînh kêt. Djãm me axwe kôt dja gwaj amidjwýnhbito kînh kadju amima, bamã mÿjja punu kînh kadju amima? Kati:. Arým Kritu kudjwa batokrykam dja gwaj Metîndjwýnh kabên man kôt amijo baba kadju amima.

<sup>3</sup> Amrêbê me kute Metîndjwýnh mar kêtja kôt gar amijo aban aprô djwýnh kupa'ã nãr amjên djwýnh kupa'ã akurê aba. Ne amã



mýjja punu kînh. Ne kadjwati kangôkam\* ajajbã. Ne me torkam abixaêr punu. Ne kadjwati kangôkam aben tÿx jabej. Ne mýjja metîndjwÿnh karô nhipêxmã amijarêho aba. Ja ne punu:re. NhyM Metîndjwÿnh ar akam ngryk. Gar kam arÿm Metîndjwÿnh'ÿr amijo akêx ne tu amim markumrêx.

<sup>4</sup>NhyM kam me amakkre kêt arÿm ar ajã kabê:n. Me kute axweo ba tÿx rã'âkam ar ajã kabên ne. Me abenmã kum,

—Je tô, mÿkam ne me arÿm gwaj bakôt bixaêr kêt? anen kam arîk abenmã kum,

—Nãm gwaj ba kôt ar ba kêt. Axwe. Nãm me ã abenmã ar ajã ane.

<sup>5</sup> Me wã dja me ï prîne amijaxwe kôt Metîndjwÿnhmã amijarê nhyM arÿm memã axwe pãnh jarê. Kute memã axwe pãnh jarênh kadjy arÿm memã dja. Me tînmê me tykmê arÿm memã dja. <sup>6</sup> Ê, me arÿm tykja me tînrî ne me memã Kritu'ã ajarê. Mÿj kadjy? Bir, me tînrî, pykakam ar bari kute amijaxwe mar ne kam arÿm tykkam Metîndjwÿnhkôt tîn ne ar ba kadjy ne me memã arê.

<sup>7</sup> Me kunî kute aminhinomã amimênh djã nhô akati bôx 'ÿr. Kam dja gar akrã mex kadjy amiman ajaxwe kêt kadjy amijãno djan kum akabêno aba.

<sup>8</sup> Ar aje Metîndjwÿnhmã akabênkam amex. NhyM be, ar amã aben jabêkam gar arÿm ar amexo amÿ amikamên arÿm ar amexti:re. Kam ar amã aben jabê:. Dja gar amã aben jabên arÿm aben jaxwe krãpti aknon mar kêt ne.

<sup>9</sup> Dja gar abenmã anhûrkwã jarênh abenkam aku. Kwãrîk wãnh aben kãxã ar anhô mýjja'ã maje amim,

—Mÿj kadjy dja ba kum inhô mýjja jarê? anhÿr kêt. <sup>10-11</sup> Metîndjwÿnh Karô ne ar amã adjapênh djã'ã karô. Apÿnh ar anhî djãri ar amã 'ã karô gar apÿnh adjapênh djã maro aba.

Ar ajô aje memã kabên jarênh'ã kute ar amã karôja, Metîndjwÿnh kabênkumrêx dja gar memã arê. Kwãrîk wãnh memã kabên kajgo'ô jarênh kêt.

Ne ajte kute ar ajômã aje meo djuw mex'ã karôja dja gar memã mýjja nhôro

\* **4:3** Mýjja me kute o kôm ne kôt bibãnh kunîja, kadjwati kangômê uba kangômê, mýjja kangô kunî ne me kum kadjwati kangô jarê.

aba ne me kadjy adjapênhkumrêx. Aje meo djuw mex kadjy Metîndjwÿnh arÿm ar amã tÿx jadjã. Dja gar arerek kêt ne meo djuw mexo aba. Metîndjwÿnh ne ukaprî:kumrêx. Ar gadjwÿ dja gar adjukaprîkumrêx ne ar adjapênh djã'ã adjukanga kêt ne memã adjapênh ar aba. Memã adjapênh kunîkôt dja me arÿm Metîndjwÿnhmã mextire jarê. Ne kum,

—Ga ne ga adjukaprî:kumrêx. Akabênkôt ne Jeju Kritu bôx. Ba arÿm tu amim markumrêx, ane. Metîndjwÿnh ne ra:x ne kute me kunîo ba djwÿnh. Rax rã'ã: rã'ã ne. Ne ren me kunî kum rax jarê. Mrãmri. Tãm ne ja.

*Me kum me kute amim Kritu marja kurê. Mat 10.16; Dju r 16.1; Pir 1.29; Idja 12.3*

<sup>12</sup> Akmere, àpnhîre ar, ba ar amã arê gar ama. Ga, me kute kuwykam kên karÿr jadjwÿrja pumÿ. Me adjuw nhyM ôr ne xêr nhyM mýjja punu kunî apôx. Ar gadjwÿ dja ar akaprî djã ar ajo ba gar atokry: ne. Birãm ar amãbit ne kute me kute amim Jeju marja tokry prãm kêt pyrãk. Gar kam amim,

—Je tô ba ne ba ije amim Jeju maro iba nhyM itokry ja ijo ba. Mÿkam? ane. Kwãrîk wãnh amim ja jarênh kêt. <sup>13</sup> Be ga, Kritu tokryja pumÿ. Me kute amim Kritu mar krãptîdjwÿ kôt tokry. Ar gadjwÿ dja gar kôt atokry. Kwãrîk wãnh kam akaprî kêt. Dja Kritu me:xkumrêx ne uma:n arÿm bôx. Godja jakam kôt atokry jabej dja gar bôxkam akînhhti:rekumrêx.

<sup>14</sup> Ar aje amim Kritu mar nhyM me arÿm kam kum ar akurê. Djãm kam ar akaprî got? Ga, Metîndjwÿnh Karô ar amê amijo kajkepja pumÿ. Karô ra:xkumrêx ar amê amijo kajkep. Kam te me kum ar akurê gar akînhkumrêx. Me ta ne me Kritu'ã kabên punu. NhyM be, ar ga ne gar kum mextire jarê.

<sup>15</sup> NhyM be, dja ar ajô aje me par nhyM me kôt ajo ajkê ga atokry. Nâr, adjãkînhî nhyM me kôt ajo ajkê ga atokry. Nâr aje amim me kukjêr prãm nhyM me kute amã amijarênh ga aje amÿ memã me arênh prãm. NhyM me arÿm kôt ajo ajkê ga atokry. Nâr ajaxwe 'ô nhyM me kôt ajo

ajkê ga atokry. Djâm kam akînh? Kati. Ajaxwekam akaprîkumrêx. Kwârîk wânh â amijo anhÿr kêt.

<sup>16</sup> Nhym be, aje mrâmri amim Kritu markumrêx nhym me arÿm kôt ajo ajkê ga atokry. Kwârîk wânh kam apijâm kêt. Dja ga kam Metîndjwÿnhmã rax jarên kum,

—Djünwã, ije amim Kritu markam ne me ijo ajkê ba itokry. Ba kam ikînhkumrêx, ane.

<sup>17</sup> Apÿnh gwaj baje marja Metîndjwÿnh kute gwaj bajaxwe jabej amim gwaj bakukjêrmã. Ô akati gwaj bawÿr bôx 'ÿr. Gwaj bajo dja amim me kukjêrmo krax. Gwaj bajo kute memo kraxkam mÿj dja ï arÿm me amakkre kêt kam nê? Bir, dja me axwe jabej amim me kukij nhym me arÿm amijaxwe kôt kum amijarê. Nhym kam arÿm memã pãnh rax jarê. Me kute Kritu'ã ujarênh ny mar kêt pãnh tokry rax jarê. <sup>18</sup> Amrêbê: ne me bakukãmãre ije ar amã arênhja kôt memã kum,

“Metîndjwÿnh kute me katât kute amijo baja pytâr ne tô, kam àpênh rax.

Nhym kam mã dja me axwemê me kute Metîndjwÿnhbê amijo akêxja mekam nê?

Bir, mrâmri dja memã pãnh jarê nhym me axwe pãnh tokrykumrêx.”

Nãm me bakukãmãre ã memã ane.

<sup>19</sup> Tãm ne ja. Metîndjwÿnh kute ar ajã amim karô kôt dja gar katât ar amijo aban ajmã akute kêt ne ar aba. Ne te katât amijo aban arÿm atokry jabej. Kum amijarê gê ta ar atokrykam ar apytã. Metîndjwÿnh kute ar anhipêx djwÿnh kute ar amarkumrêx ne ar ajã ukanga kêt kumrêx. Kum amijarê gê ta ar ajo ba.

## 5

### *Kute meo ba djwÿnhmã àpênh'ã karô.*

<sup>1</sup> Ar akam ar abê Jeju nhô me jao aba djwÿnhwã ba ar amã ikabên jarên ar adjápênh djã ã ar amã karô. Dja gar ikabên ma. Ota, badjwÿ ibê Jeju nhô me jao iba djwÿnh. Ba ne ba Kritu tokrykôt omü. Dja ba ajte omü. Djâm rerekren kajgo ba omü? Kati. Dja ra:x ne uma: ba arÿm omün kôt ar iba.

<sup>2</sup> Ga, me kute me ô krito djuw mex nhym memã abatãnhja pumü. Ar gadjwÿ dja gar

wãkam me kute amim Jeju marmã arênhô aba. Memã Metîndjwÿnh kabên jarênhô aba gê me mar mexo amü amikamên mar rax ne. Djâm me'ô ne kute ar amã ar aje meo aba'ã àpnênh tÿx gar amã uman kabên kôt ar aje me omünho abamã? Kati. Ar ga dja gar amã me omünh kînh ne meo aba. Djâm ar aje pi'ôk kaprîbit mar ne aje amim o adjaptâr kadjy meo abamã? Kati. Ar amã me kînhkam dja gar me o aba. <sup>3</sup> Djâm ar aje amiraxo adjãmran Metîndjwÿnh nhô me ja janoro abamã? Kati.

Ga, mrykî'ätomtio ba djwÿnh ô krit kukãm katât baja pumü. Katât ba nhym ô krit arÿm kôt katât amijo ba. Ar gadjwÿ dja gar Metîndjwÿnh nhô me ja kukãm katât ar amijo aba gê me ajã amim, “Ba gêt kudjwa”, anen arÿm ar akudjwa katât ar amijo ba.

<sup>4</sup> Ga, me kute aben rer djãja pumü. Kam me'ô kute me kunÿ rerja dja kînh djã'ã arÿm amim krãdjê byn kutu. Pi'ôo krãdjê tu. Nhym kam pi'ôo krãdjê tẽmbê punu. Ar gadjwÿ dja gar katât ô me ja kukãm amijo aba mex ne arÿm amim akînh djã by. Ô me jao ba djwÿnh djwÿnh dja bôx. Jeju dja bôx ne arÿm ar amã ar akînh djã mexti:re ngã gar arÿm amim aby. Djâm ar akînh djã rerekmã? Djâm punumã? Arkati. Kute ar amã ar akînh djã nhôr ja dja mex rã'ã: rã'ã ne.

<sup>5</sup> Ar ajabatãnh nyredjwÿ, ba ar amã ikabên jarê. Dja gar mebêngêt kabên ma. Arÿm me abatãnhkam dja gar me kabên man kôt ar amijo aban amim,

—Djâm ije iraxo me akrenh? Kati. Ika-jgo, anen abenmã amijo angrin akajgo. Mÿkam? Bir, amrêbê: me bakukãmãre memã kum,

“Me amijo àmra prãmja Metîndjwÿnh arÿm mebê aptã.

Nhym be, me kute amijo kajgo dja Metîndjwÿnh tu mekam ukaprîkumrêx”, ane.

<sup>6</sup> Metîndjwÿnh 'itÿxo kubê kumkati dja gar rax man kam arÿm amijo akajgo. Amijo akajgo: nhym ï akati 'ôkam arÿm kãmã ar akamên ar ajo rax ne. <sup>7</sup> Dja gar rax ma:n kum ar adjumar punu djã kunÿ jarênhô aba. Kute ar amar ne ar ajo djuw mexo ÿrkam ã kum anhÿro abao ane.

<sup>8</sup> Ar ano mex ne amijã ano tỳx ne aminêje rīt. Ga, rop jamrexe kàr ar baja pumũ. Nãm kute mry'õ krēmã abej ar ba. Akurê djwỳnhbê Xatanajdjwỳ ne 'itỳ:x ne àkrê: ne kabēn 'itỳ:x ne me abej ar ba. Kute me'õbê Jeju kurēmã nhym 'ã ukangamã ne abej ar ba. <sup>9</sup> Dja gar tu amim Metĩndjwỳnh mar tỳxkumrêx ne 'ã adjukanga kêt ne o arỳm Xatanajbê aptàn arek kubê dja. Xatanaj ar abê Jeju kurê prãm ne ajte pyka kunĩkôt me bakamydjwỳbê kurê prãm. Jeju kukwakam ar aje meo akamyjabê kurê prãm nhym me ar akudjwa arỳm tokry. Ja dja gar aman kubê aptà.

<sup>10</sup> Metĩndjwỳnh ta ne tu kum me kaprĩ:kumrêx\* ne prĩne kute me kunĩo djuw me:xkumrêx. Ta ne Kritu djàpēnhkôt amiwỳr ar ajuw ne ar ajo ba. Dja gar õ kàjkwakam kôt atĩn ne ar aba rã'ã: rã'ã ne. Ja kadjy ne amiwỳr ar ajuw. Be, ar atokry kàjbê 'irykam dja prĩne ar ajo mex. Ta dja akubyn ar amã tỳx jadjà gar kôt adjãm tỳx ne 'ã ar adjukanga kêt kumrêx. <sup>11</sup> Gê me kunĩ kum mex jarēnh rã'ã: rã'ã ne. Gê me kunĩmã rax rã'ã: rã'ã ne. Tãm ne ja.

<sup>12</sup> Ije ar amã ikabēn jarēnh ja ne ba Xibanumã arē nhym arỳm 'ã pi'òk no'òk gar arỳm amim arē. Me bakamybê Xibanu ne tu amim Jeju markumrêx ne 'ã ukanga kêt kumrêx. Ba ar amã ikabēn jarēnh 'ikrãn nhym 'ã pi'òk no'òk ne. Ar akĩnhmã ne ba ar amã arē. Ba ar amã mrãmri Metĩndjwỳnh ta tu kum ar akaprĩkumrêx jarē. Kam dja gar tu amim markumrêx ne 'ã adjukanga kêt kumrêx.

<sup>13</sup> Krĩraxbê Babirõnijkam me kute amim Jeju mar ne ar aben pydjio baja ne me ar amã kabēn mex jarē. Metĩndjwỳnh kute meo ba kadjy arỳm amijo me utà. Ar gadjwỳ arỳm amijo ar apytà. Makôdjwỳ ar amã kabēn mex jarē. Tãm ne mã ikôt ajkamēn arỳm kute ikra pyràk.

<sup>14</sup> Dja gar abenwỳr bôx ne abenmã akabēn mex jarēn aben pa krij. Ar amã aben jabêkam aben pa krijn aben tatak ne.

Gê ar aje amim Kritu Jeju mar kunĩwã umar mex. Tãm ne ja.

\* **5:10** Djãm me ba ne gu me badjukaprĩ nhym pãnh kum me bakaprĩ Kati. Me ba ne gu me badjukaprĩ kêt. Ta ne kum me bakaprĩkumrêx.

## Pedru kute memã atãri pi'ôk no'ôk ne ja.

Jejukôt ba djwýnhbê Pedru ajte arkum pi'ôk no'ôk ne. Tyk kêtri ne arkum pi'ôk no'ôk ne. Tekrekam Metĩndjwýnh kabên jarênh djwýnh 'êxnhĩ bôxmã ne arkum arê ne kam arkum,

—Dja gar Jeju'ãbit angràn amũ aje maro amikamênh kadjy katàt ar amijo aba. Akati 'ôkam dja Jeju akubyn bôx ne pyka jao apêx. Kam dja ar amã pyka jakam kukràdjã kĩnh rax kêt. Dja ï apêx gwaj Jeju akubyn bôx kamnhĩxbê ar baba. Nãm ã Pedru arkum ane.

<sup>1</sup> Ba ibê Ximão Pedru. Jeju Kritu ne ijano ba 'ã idjujarênh ar iba. Ba ne ba ar amã ikabên ne. Gwaj Batĩndjwýnhmê gwaj bapytàr djwýnh ar ta ne ar arým gwaj bamã axwe kêt jarê. Jeju Kritubê ne gwaj bapytàr djwýnh. Ar ta ne ar gwaj bamã axwe kêt jarê gwaj arým tu amim markumrêx ne bamã kĩnhkumrêx. Ar amã ne ba ikabên jarê.

<sup>2</sup> Gê Metĩndjwýnh tu kum ar akaprĩ:kumrêx\* gar adjumar mexo amũ amikamên arým adjumar mexkumrêx ne.

*Me ba mex'ã kute memã karõ.  
Kô k 1.4*

<sup>3</sup> Metĩndjwýnh ne mexo uma:n prĩne mex ne axwe kêtumrêx. Arým amiwýr gwaj bajuw gwaj tu amim markumrêx nhym 'ityxkôt arým gwaj bamã Karõ jano. Ne gwaj bamã kabên jarê gwaj arým bamã kĩnh ne kôt ar amijo baban kam arým kôt batĩn ne ar baba rã'ã: rã'ã ne. Gwaj kam bajaxwe kangan bamex prãm. <sup>4</sup> Kôt ne kute gwaj bamã mýjja jarênh mãmdji. Kute gwaj bamã mýjja mexti:rekumrêx jarênh. Dja gwaj amiwýr mýjjakam amakbê ta mexo bamex. Ja kadjy ne gwaj bamã mýjja mexti:re jarê. Me kum Metĩndjwýnh kĩnh kêtja ne me mýjja punu kumexo ba. Me 'êxnhĩ. Me kum me kurê. Me ari prõ, mjên kupa'ã kurê ba. Me mýjja punu kumex jao ba. Gwaj ba dja gwaj bamã mýjja punu kĩnh kêt ne tu kangakumrêx. Ja kadjy

ne Metĩndjwýnh gwaj bamã mýjja mextire jarênh mãmdji.

<sup>5</sup> Kute gwaj bamã mýjja nhõrmã arênhkam

dja gar amikrà kêt ne amex. Arým ar aje tu amim Metĩndjwýnh markumrêxkam dja gar amex.

Amex ne ajte Metĩndjwýnh mar mexo amũ amikamên mar rax ne.

<sup>6</sup> Metĩndjwýnh mar rax ne ajte ajaxwe kêt kadjy amijãno dja.

Ajaxwe kêt kadjy amijãno djan ajte Metĩndjwýnh kôt ar amijo aba.

Kôt ar amijo aba'ã adjukanga kêt.

'Ã adjukanga kêt ne ajte mex kôt amex.

<sup>7</sup> Mex kôt amex ne ajte Jeju kukwakam akamy arkam adjukaprĩ. Arkam adjukaprĩ kute me axikôt apôx abenkam ukaprĩ pyrãk.

Arkam adjukaprĩn ajte amã me kunĩ jabê.

<sup>8</sup> Dja gar ã aba mexo anen aba mexo amũ amikamên aba me:xkumrêx. Ga, pidjô ô me:xkumrêxja pumũ. Nhym me kum kĩ:nhkumrêx. Ne kam kam kaprĩ kêtumrêx. Ar gadjwý dja gar aba me:xkumrêx ne aka-jgo kêtumrêx nhym Bênjadjwýr djwýnhbê Jeju Kritu arým kum akĩnhkumrêx ne akam kaprĩ kêtumrêx.

<sup>9</sup> Nhym be, godja gar ajõ aba mex kêt ne aba punu jabej. Aje mrãmri ne me no rã kute amybým mýjja pumũnh kêt pyrãk ne aje mar rerekre. Metĩndjwýnh ne arým ar ajaxwe tũm maro aknon akam ngryk kêt. Nhym be, ar ga ne gar arým jao ajamak kêt katin arým mar kêt ne.

<sup>10</sup> Kam, akmere, àpnhĩre ar, amibêx ne markumrêx. Djãm mrãmri ne Metĩndjwýnh amijo ar apytàn amiwýr ar ajuw ne ar ajo bakumrêx? Ja dja gar amibêx ne markumrêx. Ne kam arým amim,

—Nà. Mrãmri ne Metĩndjwýnh arým amijo ipytàn ijo bakumrêx, ane. Dja gar ije ar amã arênhja kôt amijo aba mex ne kam Metĩndjwýnhbê amijo akêx kêtumrêx.

<sup>11</sup> Dja gar aba mexo ane nhym kam arým Bênjadjwýr djwýnhbê Jeju Kritu bôx. Kubê ne gwaj bapytàr djwýnh. Dja bôx ne õ kãjkwamã ar ajo mõn ar ajo bôx ne arým ar amã,

\* **1:2** Djãm ar ga ne gar adjukaprĩ nhym pãnh arým kum ar akaprĩ Kati. Ta ne tu kum ar akaprĩkumrêx.

—Aj. On amrê wadjà. Ota, ar anhô mýjja mexti:rekumrêx. Ba dja ba ar ajo iba. Jakam dja ba me kunĩ:o iba rã'ã: rã'ã ne, ane. Dja gar pykakam aba mexo ane nhym arým ar ajo bôx ne ã ar amã ane.

*Metĩndjwýnh kabên pýnh ne kute memã arênh.*

*Ep 4.1; Kor 1.10; Ped k 1.15; Ap 3.4*

<sup>12</sup> Kam dja ba ije ar amã ar aba mex ja'ã karô 'ãno dja. Arým ne ba ar amã tãm jarê gar arým aman arým kôt amijo aba mex. Kwãrĩk wãnh rã'ã. Dja ba ajte ar amã tãm jarên ajte ar amã tãm jarê gar arým mar tỳx ne. Ne kam aba mex'ã adjukanga kêt.

<sup>13</sup> Nã bãm amim,

—Pykakam itĩn ne ar ibari dja ba mã arkum arê gê ar mar tỳx. Tãm ne mexkumrêx. Nã bãm ã amim anen kam arým mã ar amã arê. <sup>14</sup> Mrãmri ityk arým ijo rãm ne ja. Bẽnjadjwýr djwýnhbê Jeju Kritu ne imã arê ba arým kuma. Ga, kubêkatio kikreja pumũ. Nãm me kungràn arým mã tẽ. Badjwý dja ba ty nhym inhĩ wãnh nõ. <sup>15</sup> Itĩnri dja ba ar amã karô 'ãno dja. Ar aba mex'ã ar amã karô 'ãno dja. Dja ba ty gar mã aba mex ne mar tỳx ne arým 'ã adjukanga kêtumrêx.

<sup>16</sup> Gwaj banhô Bẽnjadjwýr djwýnhbê Jeju Kritu arým bôx ne 'itỳkkôt mýjja pumũnh kêt nhipêxo ba. Bar memã 'ã idjujarênh ar iba. Djãm me kabên kajgokôt ne bar amijo iban arým ar amã me ujarênh kajgo jarê? Kati. Djã ne me ta amim,

—Ba dja ba memã 'ã ajarên prĩne idjujarênh irô mex gê me idjujarênh ma? Dja me kuman aben djô'ã amũ abenmã arênh ba, ane. Djã ne me ã amim anen 'êx ne arým amũ imã arê ba me ujarênh kajgoja man arým me ô'ã amũ ar amã arê? Kati. Ar ba ne bar Jeju pumũnhkumrêx ne kam kôt ar amã 'ã ajarê. Jejubê ne Bẽnjadjwýrbê kumkatibê Kritu ne me kunĩ, mýjja kunĩo ba. Bar omũn arým ar amã tãmja'ã ajarê.

<sup>17-18</sup> Amrêbê ne bar Jeju pumũ. Metĩndjwýnh nhô krãnhkam ne bar djan arým kam Metĩndjwýnh kabên ma. Jejumê ro'ã ne bar djan arým kuma. Kakrã jadjênh tỳ:x ne me:xkumrêx ne arým Jeju kuno bar omũ. Nhym kam Metĩndjwýnh arým kàjkwa kurũm Jeju'ã ar imã kabên jarê. Kakrã

jadjênh tỳ:x kurũm ne ar imã 'ã kabên jarên kam,

—Ikra ne wã. Imã abê:kumrêx. Ba kam kam ikĩnhkumrêx. Nãm ã Jeju'ã ane bar arým kabên ma. Ga, Metĩndjwýnh, me Babãm ta kute kum rax jarênhja pumũ. Kum kĩ:nh jarênhja pumũ bar arým kuma.

<sup>19</sup> Be, nã bãm ar Jeju pumũn Metĩndjwýnh kabên ma. Nhym be, amrêbê ne me bakukãmãre Metĩndjwýnh kukwakam kabên jarê. Metĩndjwýnh ne kabên pýnh ne arê gwaj mar pýnh. Dja gwaj on Metĩndjwýnh kabên mar 'ãno dja.

Ga, ngôn h pòk kryre kute akamàt kô tyk kurwýja pumũ. Me'õ ne o akamàt kurwý ne arým amim kam mýjja pumũnh ba. Metĩndjwýnh kabêndjwý dja gwaj mar 'ãno djan arým mýjja mar kêt maro tẽ. Arým mýjja kute apòxmã maro tẽ. Dja gwaj mar 'ãno badjãmo tẽ:n arým mýjja'yr o bôx ne arým prĩne mýjja pumũnh mex ne.

Ga, umajýrti noti kãjmã mrãnhja pumũ. Kãjmã mrã nhym me arým abenmã kum, “Arým akati 'yr”, ane. Nhym kam akati ban arým akati nhym kam me arým mýjja kunĩ pumũnh mex ne. Gwaj badjwý dja gwaj Metĩndjwýnh kabên mar 'ãno badjãmo mō:n arým Kritu'yr o babôxkumrêx. Nhym kam arým akubyn bôx gwaj arým prĩne omũnh mex nhym arým me:xkumrêx ne dja. Gwaj kam prĩne mýjja kunĩ pumũnh mexkumrêx.

<sup>20-21</sup> Amrêbê: me bakukãmãre Metĩndjwýnh kukwakam kabên jarê nhym me 'ã pi'ók no'ók ne. Djãm kabên jarênh djwýnh ta ne amikabên man o Metĩndjwýnh kabên ne arê? Kati. Metĩndjwýnh Karô ta ne ngrêk nhym kam kabên man Metĩndjwýnh kabên kô:t arê. Karôkôt kute arênhkam djãm gwaj baje pi'ókkam kabên jarênh kajgo ne tu kabên mar, tu mýjja'ã kute kabên jarênhja mar? Kati. Gwaj ba baje tu mar kêt. Dja gwaj Karô kumrêx ma nhym arým gwaj bajamak bô gwaj kam pi'ókkam kabên jarê. Ne kam arým kôt kuma.

## 2

*Me ta kute amijo 'êx ne kute Metĩndjwýnh kabên jarênh.*

*Djuda 3*

1 Nhym be, me bakukãmãre kwỳ ne me arỳm amijo 'êx ne memã kum,

—Metĩndjwỳnh kukwakam ne ba ar amã arẽ, anhỹro ba ne arỳm Metĩndjwỳnh kupa'ã memã mỳjja kwỳ'ã ujarẽnh ar ba. Ar akamdjwỳ dja me kwỳ ta amijo Metĩndjwỳnh mar mex ne ate kupa'ã ar amã mỳjja kwỳ'ã ujarẽnh ar ba. Dja me 'êx ne kraxkam ujarẽnh mexkumrẽx. Ne ujarẽnhõ tẽ:n kam arỳm 'ênhôtka kupa'ã ajarẽ:n kam arỳm me akwỳ noo akno. Ne arỳm Metĩndjwỳnh bê ar ajo akẽx. Dja me ajte Bẽnjadjwỳr djwỳnh'ã memã kum,

—Djãm mrãmri ne Jeju me axweo pãnhkumrẽx? Kati. Nãm me 'êx, anhỹro ba. Anhỹro ba:n arỳm me aêrbê tyn arỳm me biknor tokry djakam akuno.

2 Me 'êxnhĩ ja ne me prõ prãm, mjên prãm ar ba. Dja me krãptĩ me 'êxnhĩ man me kôt prõ prãm, mjên prãm ar ba. Nhym me kâtãm me omũn arỳm abenmã kum,

—Be, djãm me kute amim Jeju mar wãkam me mex got? Me axwe, anhỹro ba.

3 Me kute Metĩndjwỳnh'ã 'êxja dja me amim mỳjja rũnhõ atom prãm ne Metĩndjwỳnh kupa'ã ar amã mỳjja kwỳ jarẽn arỳm ar anoo akno. Ga, me kute memã nêkrẽx nhõr ne pãnh pi'òk kaprĩ jamỳnhja pumũ. Ar gadjwỳ dja me ar ajo õ nêkrẽx pyrãk ne ar anoo aknon arỳm ar abê pi'òk kaprĩ jamỳ. Djãm Metĩndjwỳnh ate krãn ar ban kute me mar kêt? Djã nãm õtdjwan me omũnh kêt? Kati. Dja me aêrbê mrãmri memã axwe pãnh jarẽnhkumrẽx nhym me arỳm me biknor tokry djakam akuno.

4 Djãm me axwe kajgo? Djãm pãnh kêt? Kati. Metĩndjwỳnh kute memã axweo pãnhkumrẽx. Nhym kadjy mrãnh djwỳnhdjwỳ, djãm kute memã axweo pãnh kêt? Kati. Pãnh ne arỳm apa:rmã me biknor tokry djakam me kumẽ. Ne kam akamãt kô tykkam mebê ijê, mrãmri me kute kàxirãxo me 'ãprekam me kute mebê ijê tỳx pyrãk. Dja 'ãtũm nhym memã axwe pãnh jarẽnh nhõ akati arỳm bõx. Kute kam memã axwe pãnh jarẽnh kadjy Metĩndjwỳnh arỳm mebê ijê. Dja memã axwe pãnh jarẽ.

5 Me bakukãmãre Nõwe bu'ã me jadjwỳ, djãm me axwe kajgo? Kati. Me axwe kajgo kêt. Pãnh. Nõwe te kàj bê me kute katãt amijo ba'ã memã karõo ba nhym me axwe rã'ã ne. Memã 'ã karõo ba: nhym arỳm me'ã ngõ tãm ne me kunĩ nhimex ne. Nhym be, Nõwemẽ Ar kubê 7bit ne Metĩndjwỳnh ngõ tãmbe ar utã.

6 Krĩraxbê Xõtõmamẽ Gomorakamdjwỳ djãm me axwe kajgo? Kati. Kajgo kêt. Pãnhkumrẽx. Arỳm ne Metĩndjwỳnh memã axweo pãnh nhym me kunĩ arỳm xêr nhym arỳm mỳjja prãbit nõ. Mỳj kadjy? Bir, jakam me amakkre kêt kunĩ kute mar ne kum Metĩndjwỳnh pymamã. Ja kadjy ne ã memã axweo pãnhõ ane.

7 Ne kam me'õbê Rodjwỳ. Ro axwe kêt nhym Metĩndjwỳnh arỳm utã. Xõtõmakam ne me ari prõ, mjên kupa'ã kurẽ ban axweti ba. Nhym Ro axwe kêt ne arỳm mekam pijãm ne kaprĩre ne. 8 Ne me axwe kêt me omũn ne me maro ba. Ne kam me õ'ã akati kunĩkôt kadjwỳnhbê tokry. Nhym kam Metĩndjwỳnh arỳm Ro pytãn arỳm me axwe kunĩ ga.

9 Ga, Metĩndjwỳnh kute Ro pytãn mar mexkumrẽxja pumũ. Me kute Metĩndjwỳnh mar ne kôt kute amijo badjwỳ ne Metĩndjwỳnh kute me utãn mar mexkumrẽx. Kute kaprĩbê me utãn mar mexkumrẽx. Me axwedjwỳ Metĩndjwỳnh kute mebê ijê mar. Mỳj kadjy dja mebê ijê? Bir, dja ã memã axwe pãnh jarẽ. Kute memã axwe pãnh jarẽnh kadjy dja mebê ijê.

10 Me kute Metĩndjwỳnh'ã 'êxja ne me kum amidjwỳnhbito kĩnh prãm. Ne kam kum mỳjja punu kĩnh. Me ja ne ba ar amã arẽnh 'ãno dja. Metĩndjwỳnh dja mebê ijê. Me kum me rũnh kunĩ kurên kum me uma kêt. Me amakkre kêt ne amijo àmra prãm ne tĩn prãm kêt ne tu me rũnh'ã kabên punu. Me kwỳ ne me te uma nhym me 'êxnhĩja tu me'ã kabên punu. 11 Nhym be, Metĩndjwỳnh kadjy mrãnh djwỳnh umaro 'itỳxo kute me 'êxnhĩja jakrenh mex. Nãm me te 'itỳx djãm me kute Metĩndjwỳnhmã kum, “Me axwekumrẽx”, anhỹr mã? Kati.

12 Nhym be, me 'êxnhĩja ne me kute mry pyrãk. Mỳj kadjy ne mry ar ba? Bir,

me kute par ne kute kur kadjy. Me kute Metĩndjwỳnh'ã 'êxjadjwỳ. Mỳj kadjy ne me ar ba? Bir, dja Metĩndjwỳnh ĩ meo akno nhym me arỳm me biknor tokry djakam akuno. Me kute mry pyrãk ne kute me mar kêt kam tu me'ã kabên punu.

<sup>13</sup> Me 'êxnhĩja ne me Metĩndjwỳnh kabên kupa'ã memã arênho ba. Kam, dja Metĩndjwỳnh memã axweo pãnh nhym me tokry:. Nãm me pijãm kêt ne a'uri axwe ban õ kwỳ krên kôt o ikõn kam ajbãn kurê ban kam we kĩnhkumrêx. Be, me ja ne me ar amã amibên amijo amran arỳm ar aro'ã krĩn aku. Ar aro'ã akun ar amã 'êx ne ar anoo biknoro ba. Ga, me kã mexkam mỳjja 'òk, me ngrã 'ã arikkam punuja pumũ. Ar gadjwỳ ne me punuo ar apunu.

<sup>14</sup> Nãm me mebê prõ nàr mjêno àkĩnh kadjy ari no prõt ne kum axwe prãm. Nhym me kwỳ kute amim Jeju mar rerekre nhym me arĩk memã 'êx ne me noo aknon arỳm amiwỳr meo akêx nhym me mekôt axwe. Nãm me kute amim mỳjja rũnho atom kadjy no mextire ne Xatanaj man kôt ar amijo ba. Me kute mrãmri ne me tãmdjwỳ kute ingêt kôt amijo ba pyrãk. Metĩndjwỳnh ne amrêbê: me'ã amim,

—Me wã dja ba me kanga nhym me arỳm me biknor tokry djakam akuno, ane.

<sup>15</sup> Nãm me tu Metĩndjwỳnh nhõ pry kangakumrêx ne arỳm me bakukãmãre Barãoja kôt ar amijo ba. Bedjo kute Barão djirja kôt ar amijo ba. Me'õ ne Barãomã kum,

—Dja ga Metĩndjwỳnhbê mebê idjaer kurên kum, “Dja ga mebê idjaero ajkê”, ane. Ota, pãnh nêkrêx kumex. Nãm me ã Barãomã ane nhym arỳm kum nêkrêx kĩnh ne me kabên kôt me'ỳr tẽ. <sup>16</sup> Me'ỳr tẽ: nhym Metĩndjwỳnh arỳm õ mrymã me kabên jadja nhym mry arỳm Barãomã kabên ne. Bibãnh ne axwe ja nêje kum kabên nhym arỳm Metĩndjwỳnhbê me kurê kêt ne.

<sup>17</sup> Be, me kute Metĩndjwỳnh'ã 'êxja ne me kabên kajgo jarênh kumex. Ga, ngômkwatikam arỳm ngô ngrãja pumũ. Me kum kôr ne 'ỳr bõx nhym kam ngô kêt ne kre kajgo. Nhym me arỳm kam kaprĩ:re. Ar gadjwỳ dja me 'êxnhĩ Metĩndjwỳnh kupa'ã ar amã mỳjja kwỳ jarê: gar aman arỳm akaprĩ:re. Ga, kakũm kôk djãbêr tỳxkam

arĩk baja pumũ. Djãm Metĩndjwỳnh ne me 'êxnhõ ba? Kati. Mỳj kukràdjã punu kôt ne me ta arĩk ba. Kute kakũm arĩk ba pyrãk. Kam ne me mekam kaprĩre. Metĩndjwỳnh dja tu akamãt kô tykkam me rênhkumrêx nhym me arek kam ar ba rã'ã: rã'ã ne. Arỳm ne me kadjy akamãt kô tyk dji.

<sup>18</sup> Nãm me amijo 'êx ne amijo amran mã memã kum,

—Ba ne ba ikabên katãtkumrêx, anhỹro ba. Nhym me kute amidjwỳnho kĩnh prãm arỳm mekôt axwe prãm. Nhym me 'êxnhĩja me kute amidjwỳnho kĩnh'ã memã àpnêho ba. Ne memã kum,

—Ajrã. Amidjwỳnho kĩnho aba. Dja ga ikõn kam ajbãn akurê aban abixaêr tỳ:x ne arỳm akĩ:nhkumrêx, ane. Me ã memã anhỹro ba. Metĩndjwỳnh ajbir amiwỳr meo akêxo mõ nhym me 'êxnhĩja arỳm memã 'êx nhym me arỳm me maro ba. Ne kam arỳm Metĩndjwỳnh bê amijo akêx ne me 'êxnhĩ kôt amijo mõ.

<sup>19</sup> Xatanaj kute me 'êxnhĩja pa 'amỳnh tỳx ne amipunu kôt ar meo ba. Nhym kam me 'êx ne memã kum,

—Ikabênkôt dja ga amidjwỳnho kĩnho aba. Djãm aje amidjwỳnho kĩnh nhym Metĩndjwỳnh akam ngrykmã? Arkati. Dja ga amidjwỳnho kĩnh ne arỳm akĩnhbit, ane. Me kute Metĩndjwỳnh'ã 'êxja ne me ã memã anhỹro ba. Ba ar amã arê gar ama. Ga, me kute me pa 'amỳnh nhym me arỳm kum àpênh kajgo ne kaprĩ baja pumũ. Me kaprĩ ba:n te kute kubê amijo pôxmã. Me axwedjwỳ ne me axwe rã'ãn te ta axwe kêt mã. Me kute mrãmri ne me pa 'amỳnh tỳx nhym me te kute amijo pôx prãmjeja pyrãk.

<sup>20</sup> Bir, godja me'õ jaxweja arỳm kute amim Bẽnjadjwỳr djwỳnhbê Jeju Kritu marn 'ỳr akêx, gwaj bapytãr djwỳnhja'ỳr akêx ne me kum Metĩndjwỳnh kĩnh kêt djãpênh punujabê amiptã. Ne kam akubyn me axwe'ỳr akêx ne ajte mekôt axwe jabej, mrãmri akubyn mekôt axwekam arỳm axwe ra:x.

<sup>21</sup> Be, katãt Metĩndjwỳnh kabên kôt kute amijo baja ne me'õja arỳm kute mar mex. Ne ren mar kêt ne ren kãjbê axwe. Nhym be, kati. Arỳm ne mar mex. Nãm te mar mex ne arỳm kubê amijo akêx. Kam ne arỳm axwe ra:x ne. Metĩndjwỳnh me

kute katàt amijo ba'ã kute memã karökôt kabënja ne arým mar mex ne arým kubê amijo akêx ne arým axwe ra:x ne.

<sup>22</sup> Amrêbê: me bakukãmãre kabën kôt ne me'ôja arým ã amijo akêxo ane. Me bakukãmãre memã kum,

“Ropre ne arým õ jaïn. Ne kam akubyn kukrê. Nhyr me te angrô jamydjwý ku'õ nhyr akubyn ngykam amirê.”

Nãm me bakukãmãre ã me kute Metĩndjwýnh markam kute kubê amijo akêx'ã ã memã ane.

### 3

*Bẽnjadjwýr djwýnh bõx djà nhõ akati'ã ujarênh.*

<sup>1-2</sup> Akmere, àpnhĩre ar, imã ar ajabê. Amrêbê ne ba ar amã Bẽnjadjwýr djwýnh akubyn bõxmã arê. Pi'òkkam ba ar amã arê. Ne kam pi'òk jakam ba ajte ar amã arê. Ar aje mar týt rá'ã kadjy. Ije ar amã arênhkam ba akubyn ar ajo tèn me bakukãmãre kabën'ýr ar ajo bõx. Me bakukãmãre kwý ne mebê Metĩndjwýnh kukwakam kabën jarênh djwýnhkumrêx ne kukwakam memã kabën jarê. Bẽnjadjwýr djwýnh akubyn bõxmã arê ba ajte jakam ar amã arê. Bẽnjadjwýr djwýnh, gwaj bapytàr djwýnh ne ar ijano bar memã 'ã idjujarênh ar iba. Dja gar ajte ar badjwý ar ima. Ar ije amrêbê Bẽnjadjwýr djwýnh kukwakam ar amã katàt aje amijo aba'ã karõja dja gar ajte ama. Ar aje Bẽnjadjwýr djwýnh akubyn bõxmã mar týt rá'ã kadjy ba 'ýr ar ajo bõx ne ajte ar amã arê. Ba ar amex man ã ar amã arêho ane.

<sup>3</sup> Dja Bẽnjadjwýr djwýnh akubyn bõx 'ýr nhyr me arým gwaj bajaprý:. Ja kumrêx ba ar amã arê. Dja me mýjja punubit'ã amim karõn kum axwe prá:m ar ban arým gwaj bajaprýo ban <sup>4</sup> gwaj bamã,

—Je tô nhýnh? Djãm kute aminhõ akati jarênhja on bõxmã got? Adjãkamã mýjja kunĩ kute aminhipêx kraxkôt kute amijo mör tãmtã rá'ã. Me bakukãmãre kêt mýrbê mýjja tãm rá'ã. Djãm on õ akati bõxmã got? ane. Dja me ã gwaj bajaprýo ane.

<sup>5</sup> Djãm mrãmri ne we mýjja kunĩ rá'ã nhyr we Jeju akubyn bõx kêtãmã? Kati. Ga,

adjãkamã Metĩndjwýnh kabën kôt kãjkwa katorja pumũ. Nhyr kam ajte kabën kôt pyka ngó kurũm katon ngó kôt aminhipêx.

<sup>6</sup> Nhyr kam kabênkôt ajte ngó pykao ajkamuwñ o aknon prĩne o ajkê. Ja ne me kute mar prám kêtikumrêx. Ne kam we mýjja kunĩ rá'ã jarê. We Jeju akubyn bõx kêt jarê. Kati. Metĩndjwýnh kabênkôt dja Jeju akubyn bõxikumrêx.

<sup>7</sup> Nhyr be, jakam Metĩndjwýnh ta amik-abênkôt amim kãjkwamê pyka'ã ma. Dja kabênkôt xêr. Metĩndjwýnh dja ã memã axweo pãnh. Me kum Metĩndjwýnh kĩnh kêtjamã axweo pãnh. Nhyr kam me arým me biknor tokry djãkam akuno. Kamã, dja kãjkwamê pyka xêr.

<sup>8-9</sup> Me kwý ne me amim,

—Bẽnjadjwýr djwýnh akubyn bõxmã amijarênh kam ate ari amikrào ba. Nãm me ã amim ane. Djãm mrãmri ne Bẽnjadjwýr djwýnh amikrào ba? Kati. Akmere, àpnhĩre ar, ba ar amã mýjja jarê. Dja gar amim markumrêx. Dja kãjkwakam Bẽnjadjwýr djwýnh'ã akati pydjibit apêx. 'ã akati pydji apêx ja ne kute gwaj bajã amex krãptĩ: arým apêx pyrãk. Ba ajte ar amã arê. Dja gwaj bajã amex krãptĩ:o kute 1.000 pyrãk apêx. Gwaj bajã amex krãptĩ ja ne kute Bẽnjadjwýr djwýnh'ã akati pydjibit apêx pyrãk. Bẽnjadjwýr djwýnh ne kute amikrào ba kêt. Kabên pydji ne arê. Amikabên kôt dja bõxikumrêx. Mýkam ne amrêbê bõx kêt? Bir, nãm ngryk tôn amiwýr me amãr 'iryñ amim,

—Djãm me'õ biknor ba kam ikĩnhmã? Kati. Me kunĩ amikam kaprĩren wãnh amijaxwemã irern kute iwýr amijo akêxkambit dja ba ikĩnhikumrêx. Nãm ã amim anen amiwýr me amãr 'iry. Kam ne amrêbê bõx kêt. Nhyr be, dja mrãmri akubyn bõxikumrêx.

<sup>10</sup> Dja te amiwýr me amãr 'iryñ arým gwaj bajaêrbê bõxikumrêx. Bẽnjadjwýr djwýnh bõx djà nhõ akati dja me'ýr bõx kute mrãmri ne akamãtkam me àkĩnhĩ me aêrbê bõx pyrãk. Dja me'ýr bõx nhyr kãjkwakam mýjja arým kêt ne, kãjkwakam mýjja kunĩ: kêt ne. Dja mýjja rãrãk týt:x ne arým kãjkwa nhĩ'ãm tèn akuno. Pykadjwý dja arým xêr. Pykakam me kute mýjja



nhipêxdjwý dja xêr. Mýjjao pyka kute aminhipêx djadjwý dja kunĩ xêr. Dja kuwy kangro tỳ:x nhym arým mýjja kunĩ: xêr nhym arým kêt ne.

<sup>11</sup> Ga, mýjja kunĩ kêt mãja ma. Ar aje ja markam mýj dja gar on jakam amijon? Bir, dja gar on Metĩndjwýnh kabên man kôt ar amijo aban amextiren ajaxwe kêt. Kwãrĩk wãnh me kum Metĩndjwýnh kĩnh kêtja kukràdja kôt amijo aba kêt. <sup>12</sup> Dja gar amiwýr kam aman mã amim,

—Gê Metĩndjwýnh nhõ akati on bõx, ane. Metĩndjwýnh nhõ akatikam dja kàjkwa pòk tỳx ne arým xêr. Nhym mýjjao kàjkwa nhipêxjadwý dja arým kunĩ ôr, kangro tỳ:x ne arým ôr.

<sup>13</sup> Nhym be, gwaj ba mýj ne gwaj amiwýr kam ama? Bir, gwaj amiwýr kàjkwa nykam ama. Gwaj amiwýr pyka nykam ama. Metĩndjwýnh kute gwaj bamã kabên pydjín arênhja gwaj kam ama. Pyka arým nykam djãm kam me axwe'õ ar ba? Arkatĩ. Me axwe kêtbit dja me kam ar ba.

<sup>14</sup> Mýkam ne ba ar amã ja jarê? Bir, dja bõx gar ajaxwe kêt nhym arým ar apumũ. Ar ajaxwe kêt kôt ar apumũ gar arým adjumar mex. Nàr, dja bõx gar ajaxwe nhym arým ar apumũ. Ar ajaxwe kôt ar apumũ gar arým adjumar punu. Kam dja gar ajaxwe kêt kadjy amijãno dja. Nhym bõx gar prĩne kum amex kute mrãmri ne kubêkà'ã ngrã kêt kumrêx prĩne memã mex pyræk.

<sup>15</sup> Kam, kwãrĩk wãnh mekôt amim,

—Bênjadwýr djwýnh akubyn bõxmã amijarên ate amikrào ba, anhýr kêt. Dja gar amim,

—Bênjadwýr djwýnh kute me utàr prã:m. Kam ne ngryk tòn amiwýr me amãr 'iry. Kam ne bõx kêt rã'ã, ane. Dja gar ã amim ane.

Nãm ã gwaj bakamy Paurdjwý ar amã ane. Metĩndjwýnh kute kum amak bõnhkôt ar amã ane. Kute pi'òk no'òkkôt ã ar amã ane. <sup>16</sup> Õ pi'òk kunĩkôt ne mýjja ja'ã memã pi'òk no'òk ne. Kam kabên kwý ne me kute marbê mebê tỳxi. Nhym kam me kwý amak mex kêtja kute amim Metĩndjwýnh mar kêt kam memã kupa'ã arên prĩne o ajkê. Ne kam Paur kabên kupa'ã ta memã

amikabên jarê. Nãm me ã Metĩndjwýnh kabên'ã pi'òk no'òkja kunĩ jarênho ane. Nãm me kupa'ã arên arým prĩne o ajkên Metĩndjwýnh kabên kupa'ã ta memã amikabên jarê. Dja me kupa'ã arênho ba:n arým me biknor tokry djækam akuno.

<sup>17</sup> Kam, akmere, àpnhĩre ar, ar aje arým ikabên ja markam amijã ano tỳx. Nok ga ren ar me axwe kôt ar amijo aban ren mekôt ajaxwe. Metĩndjwýnh kupa'ã ne me amijo ba. Ar ga ne gar tu amim Metĩndjwýnh kabên markumrêx. Nok ga ren ar me kabên man ren kupa'ã amijo aba. <sup>18</sup> Dja gar Bênjadwýr djwýnhbê Jeju Kritu mexo amex tẽ. Kubê ne gwaj bapytãr djwýnh. Dja gar mexo amex tẽn amũ o amikamên arým amexkumrêx. Ne mar mexo tẽn amũ o amikamên arým mar rax ne. Gê me jakam kum rax jarên kum rax jarênh rã'ã: rã'ã ne. Tãm ne ja.

## Djuão kute memã pi'ôk kumrêx no'ôk ne ja.

Jejukôt ba djwýnhbê Djuão ne me kute Jeju marmã pi'ôk no'ôk ne. Arým kubêngê:tte ne arkum pi'ôk no'ôk ne kum ar abên kam kum,

—Ikra ar, akmere ar, àpnhîre ar, Metîndjwýnh ne amijo ĩ ne me bawýr ruw. Kubê ne Jeju. Arým gwaj baje Jeju markam Bãmdjwý ma. Metîndjwýnh kumrêx ne kum gwaj bajabê gwaj kam amipãnh bamã abê ne kam bamã kradjwý jabê, baje abeno bakamykam bamã aben jabê ne kam Metîndjwýnh kabên kôt ar amijo baba, bamã abêkam. Nhym Metîndjwýnh arým Jeju kôt gwaj bajaxwe kunĩ maro akno. Kam dja gwaj kum amijarê nhym arým gwaj bamar krâta. Nãm ã Djuão kute arkum 'ã karôo ane.

*Kabên kute mýjja kunĩmã tĩn jangjênhja'ã ujarênh.*

*Dju k 5.11; Ap 1.18*

<sup>1</sup> Be, amrêbê ne me'ô nhidjibê Kabên, kute mýjja kunĩmã tĩn jangjênhja, mýjja kunĩ kêttri Kabênja. Kabênja ar imã kabên jarê bar kabênkôt kuman inoo omũ. Ne arým prĩne omũnh mex ne ar inhikrao kupê. Tãm ne bar memã 'ã idjujarênh ar iba. <sup>2</sup> Tãmja, kute mýjja kunĩmã tĩn jangjênhja ne pykakam bôx ne amijo amirĩt bar arým omũn kam 'ã ar amã amijarê. Metîndjwýnhkôt me tĩn rã'ã: rã'ã kadjy ne me'ôja kute memã tĩn jangjênh. Ja ne bar ar amã arê. Ta ne me Babãm djwýnhmê ro'ã ar ban kam arým pykakam ar imã amijo amirĩt. <sup>3</sup> Bar ije omũnh ne mar kôt ar amã arê. Gwaj ba baje abeno banhôbikwa kadjy ar amã arê. Gwaj baje abeno banhôbikwakam mrãmri ne baje me Babãm djwýnhmê Kra Jeju Kritu aro banhôbikwa. <sup>4</sup> Mýj kadjy ne ba ja'ã ar amã pi'ôk no'ôk ne? Bir, dja gar omũn aman arým mrãmri akĩho akĩnhkumrêx. Ja kadjy ne ba 'ã ar amã pi'ôk no'ôk ne.

*Me kute katàt amijo ba.*

*Dju r 8.12; Ep 5.8; Tex k 5.5*

<sup>5</sup> Ga, akamàt kô tykkam me kute mýjja pumũnh kêt ne mrãnh punuja pumũ. Nhym me memã pry kurwý nhym me arým irãkam katàt ba. Me axwedjwý ne me mrãnh punu nhym me arým memã Metîndjwýnh kabên jarê. Nhym kam me arým amim kuman kabênkôt katàt amijo ba kute mrãmri ne me irãkam katàt baja pyrãk. Metîndjwýnhdjwý djãm mrãnh punun axwe? Arkati. Katàt amijo ban axwe kêtumrêx. Tãm ne Metîndjwýnh ar imã arê bar arým kuman arým ar amã arê.

<sup>6</sup> Gwaj badjwý godja gwaj memã kum, “Metîndjwýnh ne ijo ôbikwan ijo ba”, ane. Ne atekam akamàt kô tykkam bamrãnh punumãn prãbê amim Metîndjwýnh kabên mar kêt ne bamrãnh punun bajaxwe. Djãm kam mrãmri bakabênkumrêx? Kati. Nã gwãm amijo bajêx ne katàt bakabên kêtumrêx. Metîndjwýnh kute gwaj bajo ôbikwa kêt ne kute gwaj bajo ba kêt.

<sup>7</sup> Metîndjwýnh ne katàt ar amijo ban axwe kêtumrêx. Nãm kute mrãmri ne me irãkam katàt ba pyrãk. Dja gwaj kudjwa kabên kôt katàt amijo baban bamã bajaxwe prãm kêt ne kam arým mrãmri bajêx kêt. Nhym kam Metîndjwýnh mrãmri gwaj bajo ôbikwakumrêx ne kute gwaj bajo bakumrêx. Ne kam arým prĩne gwaj bajo mex. Kra Jeju Kritu kamrôkôt gwaj bajo mex.\* Kute mrãmri ne me kute mýjja punu põnh nhym arým prĩne mex pyrãk. Dja ã gwaj bajo mexo ane.

*Me kute amijaxwe kôt Metîndjwýnhmã amijarênh.*

<sup>8</sup> Godja gwaj baje amim,

—Djãm ijaxwe? Kati. Ijaxwe kêtumrêx, anhýr jabej, ne kam arĩk amim bajêx ne bakabên katàt kêtumrêx. <sup>9</sup> Nàr godja gwaj tu bajaxwe kôt kum amijarê nhym Metîndjwýnh arým gwaj bajaxwe maro aknon gwaj bakam ngryk kêt ne prĩne gwaj bajo mex. Mrãmri ne kabên kajgo kêt ne katàt kute amijo bakumrêx. Kam dja prĩne gwaj bajo mex gwaj arým kum bajaxwe kêt. <sup>10</sup> Djãm gwaj ba ne gwaj bajaxwe

\* 1:7 Dja jãm gwaj bajaxwe man jãm bajaxwe pãnh kamrô prõtja man kam prĩne gwaj bajo mex.

kêt? Kati. Metĩndjwýnh ne arým memã kum, “Me kunĩ kupãnhã axwe”, ane. Kam, godja gwaj baje memã kum, “Kati, ijaxwe'õ kêt”, anhÿr jabej ne arým Metĩndjwýnh kute me'õ 'êxnhĩ pyrãk. Ne arým baje amim, “Metĩndjwýnh 'êxnhĩ”, anhÿr pyrãk. Ne kam baje Metĩndjwýnh kabẽn mar kêt kumrêx.

## 2

*Me nêje Metĩndjwýnhmã kabẽn djwýnh'ã ujarẽnh.*

*Xim k 2.5; Idja 4.14, 9.11*

<sup>1</sup> Akmere, àpnhĩre ar, mÿkam ne ba ar amã ikabẽn ja'ã pi'ók no'ók ne? Bir, ar ajaxwe kêt kadjy. Godja gwaj bajõ arým bajaxwe jabej. Mÿj dja gwaj amim arẽn kuma? Bir, dja gwaj amim,

—Kàjkwakam ne me'õ dja. Jeju Kritu ne dja. Axwe kêt kumrêx. Ta dja inêje Metĩndjwýnhmã kabẽn dja. Ta dja inêje kum kabẽn nhym arým ijaxwe maro aknon ikam ngryk kêt, ane. Dja gwaj ã bajõ bajaxwe jabej amim ane. <sup>2</sup> Jejubê ne gwaj bakam ngryko apêx djwýnh. Metĩndjwýnh ne gwaj bajaxwekam ngryk nhym Jeju kute gwaj bajaxweo pãnh kadjy arým ty. Ne kam tyk jakam arým gwaj bajaxweo pãnh nhym kam arým gwaj bakam ngryk kêt. Djãm gwaj bajbit? Kati. Me kunĩ. Apÿnh pykakam me ba djãri me kunĩ jaxwe nhym Jejubê mekam ngryko apêx djwýnh.

<sup>3</sup> Djãm mrãmri ne gwaj baje amim Jeju markumrêx? Mÿj dja gwaj ja mar on? Bir, dja gwaj me kute katãt amijo ba'ã kute memã karõkõt kabẽnja markumrêx ne kõt ar amijo baba. Ne kam arým amim,

—Be ga, ije kabẽn markumrêx ne kõt amijo ibaja pumũ. Mrãmri ije amim Jeju markumrêx, ane. Gwaj kam arým ja ma. Gwaj baje amim Jeju markumrêxja ma. <sup>4</sup> Jeju ne me kute katãt amijo ba'ã memã karõn memã arẽ. Godja gwaj kabẽn mar kêt ne kõt amijo baba kêt jabej ne memã kum, “Ba ije amim Jeju mar”, anhÿr jabej. Ne kam bajêx ne bakabẽn katãt kêt.

<sup>5</sup> Nãr, godja gwaj kabẽn man kõt amijo baba jabej arým mrãmri bamã Metĩndjwýnh jabêkumrêx. Ne bamã abêo amũ amikamênho mõn kam arým amim,

—Mrãmri ne Metĩndjwýnh kute amikõt ijo bakumrêx. Ga, imã abêkumrêxja pumũ, ane. Gwaj kam arým ja markumrêx. Metĩndjwýnh kute amikõt gwaj bajo baja markumrêx. <sup>6</sup> Me kute,

—Ba ne ba ije Jeju 'amýnh tÿx ne 'ã idjukanga kêt, anhÿrja ren katãt amijo ba kute ta katãt amijo ba pyrãk.

*Me kum kamy jabêmã.*

*Dju r 13.34, 15.12; Dju k 3.14*

<sup>7</sup> Akmere, àpnhĩre ar, imã ar ajabê. Ije ar amã katãt aje amijo aba'ã karõkam djã ne ba me kabẽn ny'õ jarê? Kati. Me kabẽn tÿm ne ba arẽ. Ar aje Jeju kõt amijo abikamênh krax djãkam me kute ar amã kabẽn jarênh ja ne ba ar amã arẽ. <sup>8</sup> Ne kam ajte pi'ók jakam katãt aje amijo aba'ã ar amã karõ. Kute mrãmri ne ikabẽn ny pyrãk ne ba ar amã arẽ. Jeju kumrêx kute kabẽn ja mar tÿx ne kõt ar amijo ba. Gar arým kudjwa kõt ar amijo aba. Nhym kam kabẽn ar amã kute mrãmri ne ny pyrãk. Gar kõt ar amijo aba nhym kam me arým Jeju mex man ar gadjwÿ ar amex ma. Ne kam ar ajã amim, “Mrãmri ne ar kabênkumrêx”, ane. Mÿkam? Bir, gar arým me kukràdjã punu kanga. Me kukràdjã punu kute akamãt kó tyk pyrãk arým kanga. Ne kam arým Metĩndjwýnh kukràdjã ny ma. Kukràdjã ny kõt gar katãt ar amijo aba kute mrãmri ne irãkam me katãt baja pyrãk. Nhym kam me arým ar ama.

<sup>9</sup> Dja me'õ memã kum,

—Ba ne ba Metĩndjwýnh kabênkõt katãt ar amijo iba kute mrãmri ne me irãkam katãt baja pyrãk, ane. Ne atekam kum kamy kurê. Gwaj baje Jeju kabênkõt o bakamyja kurê. Djãm mrãmri ne katãt kute amijo bakumrêx? Kati. Axwen kute amijo ba punu rã'ã kute mrãmri ne me akamãt kó tykkam ba punu pyrãk.

<sup>10</sup> Nhym be, me'õ kum kamy jabêja ne mrãmri Metĩndjwýnh kabênkõt katãt kute amijo bakumrêx. Katãt kute amijo ba kute mrãmri ne me irãkam katãt ba nhym mÿjja'õ kute me par tok kêt pyrãk.

<sup>11</sup> Nhym be, me kum kamy kurêja ne arým amim 'êx ne aminoo aknon kute katãt kute amijo baja mar kêt kumrêx. Kute

mrãmri ne me'õ akamàt kô tykkam no bi-knor ne kute amipry mar kêt pyræk. Mýkam ne kute katàt kute amijo baja mar kêt? Bir ga, me akamàt kô tykkam baja te rîtmãja pumũ. Nhym nokam akamàt kô tykbit. Me kum kamy kurêdjwý ne me amakkre kêt ne kam kute katàt kute amijo baja mar kêt.

<sup>12</sup> Ar aprîre, akmere, àpnhîre ar, mýkam ne ba ã ar amã ikabên jarênho ane? Bir, gar ajaxwe nhym Jeju arým ar ajaxwe pãnh ty. Nhym kam Metîndjwýnh arým Jeju man arým ar ajaxwe maro aknon ar akam ngryk kêt ne. Kam ne ba pi'òkkam ã ar amã arênho ane.

<sup>13</sup> Ar akra krãptî, ar amã ne ba pi'òk no'òkkam ikabên jarê. Mýkam? Bir, Kritu ne mýjja kunî kêttri ar ba. Ar aje Kritu markam ne ba ar amã ikabên jarê.

Ar ajabatàn nymã ne ba pi'òk no'òkkam ikabên jarê. Mýkam? Bir, Xatanaj ar ajaxwemã te kute amiwýr ar ajo akêxmã gar arým mar kêt ne arým o apa. Kam ne ba ar amã arê.

Ar aprîre, ar amã ne ba pi'òk no'òkkam ikabên jarê. Mýkam? Bir, ar aje me Babãm djwýnh markam ne ba ar amã arê.

<sup>14</sup> Ar akra krãptî, ba ne ba pi'òk no'òkkam ar amã ikabên jarê. Mýkam? Bir, Kritu mýjja kunî kêttri ar baja ar aje markam ne ba ar amã arê.

Ar ajabatàn ny, ba ne ba pi'òk no'òkkam ar amã ikabên jarê. Mýkam? Bir, Xatanaj ar ajaxwemã te kute amiwýr ar ajo akêxmã gar arým kubê atýx ne Metîndjwýnh kabên mar týt ne 'amýnh týt. Ne kam 'ã adjukanga kêt ne arým Xatanajo apa. Kam ne ba ar amã ikabên jarê.

*Me kum Metîndjwýnh kînh kêtja kukràdjà punu'ã ujarênh.*

<sup>15</sup> Me kum Metîndjwýnh kînh kêtja kukràdjà punu, me õ mýjja punudjwý, kwãrîk wãnh ar amã kînh kêt. Me kum me kukràdjà punu kînhja kum Metîndjwýnh jabê kêt kumrêx. <sup>16</sup> Mýkam ne me kum abê kêt? Bir, djãm me Babãm djwýnh kute memã kukràdjà punu jarênh? Kati. Me kum Metîndjwýnh kînh kêtja ne me kute

memã kukràdjà punu jarênh. Me axwe kadjy ne me kute memã arênh ne memã kum,

—Dja ga amidjwýnhbito kînh, anhýro ba. Me axwe kadjy ne me ajte memã kum,

—Dja ga amim mýjja pumũnh týt, anhýro ba. Me axwe kadjy ne me ajte memã kum,

—Dja ga amibên amijo adjãmra, anhýro ba. Me kukràdjà punu ja ne me kum Metîndjwýnh kînh kêtja memã arênho ba.

<sup>17</sup> Dja me kum Metîndjwýnh kînh kêt kukràdjà punuja ï apêx ne me kum mýjja punu kînhdjwý ï apêx. Nhym be, me kute Metîndjwýnh kabên mar ne kôt kute amijo ba rã'ãja ne me Metîndjwýnh kôt tîn ne ar ba rã'ã: rã'ã ne. Kam kwãrîk wãnh ar amã me kukràdjà punu kînh kêt.

*Kritu kurê djwýnh'ã ujarênh.*

<sup>18</sup> Be, arým ijabatàn mexkam ba ar amã ikabên jarê. Dja gar amim ikabênja ma. Arým akati bôx 'ýr. Arým mýjja kunî kute pykakôt amingràn nhym me kunî kute aminhinomã amimênh 'ýr. Dja akati bôx nhym Kritu kurê djwýnh rax arým amirît gwaj arým omũ. Kritu kurê djwýnh rax ja ne me arým ar amã 'ã ajarê. Nhym kute amirît kukãm arým ajbir jakam kurê djwýnh kumex ne amirît ne. Kumex amirît nhym me arým gwaj bamã me arê gwaj kam kôt amim,

—Mrãmri arým gwaj bawýr õ akati bôx 'ýr. Ga, kukãm kurê djwýnh kumex arým amirîtja pumũ, ane. Gwaj kam arým ja markumrêx. Ne amiwýr akatija markumrêx. Ne amiwýr me kunî kute aminhinomã amimênh nhõ akatija markumrêx.

<sup>19</sup> Amrêbê ne Kritu kurê djwýnhja gwaj baje amim Jeju marjamê ro'ã krî. Nhym be, arým ne me Kritu bê amijo akêx ne ate ar ban gwaj baro'ã krî kanga. Gwaj kam arým memã bakaton abenmã kum,

—Be, Kritu kurê djwýnh ne wã, ane. Gwaj baro'ã me krîkam djãm mrãmri me kute gwaj bakôt amim Jeju markumrêx? Kati. Me ren markumrêx ne ren Jeju bê amijo akêx kêt ne ren kator kêt. Nhym be, kati. Me kute Jeju mar kêt'ã kute amijo amirît kadjy ne me arým kato.

<sup>20</sup> Be, Kritu kurê djwýnh dja ar amã 'êx ba. Dja me te ar amã 'êx gar me mar prãm kêtkumrêx. Mýkam ne ar aje me mar kêt? Bir, Kritu mextire ne axwe kêtkumrêx ne arým ar amã Karõ jano nhym arým ar ajo ba. Kute ar ajo bakam ar aje me kabên katàt kunĩ mar ne aje Kritu kurê djwýnhja mar prãm kêt. <sup>21</sup> Djãm ar aje me kabên katàt mar kêtkam ne ba ar amã pi'ók ja no'ók ne? Kati. Ar aje me kabên katàt markam ne ba ar amã no'ók ne. Be, me kute memã 'êx bakam ne me kute me kabên katàtkôt arênh kêtkumrêx. Ja ne gar arým aje mar.

<sup>22</sup> Nhym mýj me'õ ne 'êxnhĩkumrêx? Bir, me 'êxnhĩ ne me memã kum,

—Djãm Jeju'ã ne Metĩndjwýnh kute me banhõ Běnjadjwýrbê kumkati mēnh got? Djãm Jejubê Kritu got? Kati. Atemã. Nãm me ã memã anhỹro ba. Me ja ne me 'êxnhĩkumrêx. Me kute Bãm japrýn Kra japrý. Me ja ne me kubê Kritu kurê djwýnhkumrêx. <sup>23</sup> Me kute Kra mar kêtja ne me kute Bãm mar kêtkumrêx. Me kute tu amim Kra markumrêxja ne me kute tu amim Bãmdjwý markumrêx.

<sup>24</sup> Me kute amrêbê ar amã kukràdjã jarēnh dja gar 'amýnh tỳx ne tu amim markumrêx ne 'ã adjukanga kêt. Ar aje Jejukôt amijo abikamēnh krax djakam me kute ar amã kukràdjã jarēnhja dja gar 'ã adjukanga kêt. Godja gar 'ã adjukanga kêt jabej ne kam Kramē Bãmdjwý 'ã adjukanga kêt. <sup>25</sup> Nhym kam Bãm gwaj bamã,

—Dja gar ikôt atĩn ne ar aba rã'ã: rã'ã ne, ane. Mrãmri ne gwaj bamã ja jarēnhkumrêx. Kabên pydjın arê.

<sup>26</sup> Be, Kritu kurê djwýnh kute Metĩndjwýnhbê gwaj bajo akêx prãm. Mekôt bajaxwemã kubê gwaj bajo akêx prãm. Me'ã ne ba ije ar amã pi'ók no'ókja. <sup>27</sup> Dja me te: kute ar ajo akêxmã ar ajo ane. Mýkam? Bir, Metĩndjwýnh kute ar amã Karõ janor nhym kute ar ajamýnh tỳx ne ar ajo bakam. Karõ kute ar ajo bakam djãm atemã me'õ kute ar amã, “Ota, me'õ 'êxnhĩ”, anhỹrmã? Kati. Karõja ta dja ar amã me 'êxnhĩ jarē. Ta ne kute ar amã mýjja kunĩ, me kukràdjã kunĩ jarēnh ne katàt kute ar amã arēnhkumrêx. 'Êxnhĩ kêtkumrêx. Amrêbê kute ar amã kukràdjã jarēnh kôt

dja gar mã Kritu 'amýnh tỳxkumrêx ne tu amim markumrêx ne 'ã adjukanga kêt. Nhym kam me te: ar amã 'êx ne kute ar ajo akêxmã.

### *Metĩndjwýnh kra ar'ã ujarēnh.*

<sup>28</sup> Be, arým ijabatānh mexkam ne ba ar amã ikabên jarē. Dja gar amim ikabēnja ma. Dja gar amim Kritu 'amýnh tỳx ne 'ã adjukanga kêt. Gwaj amim 'amýnh tỳx ne 'ã badjukanga kêt nhym arým gwaj bamã amijo amirĩt. Gwaj bamã amijo amirĩt gwaj kam arým bamã uma kêt ne bapijām kêt ne dja.

<sup>29</sup> Gar arým aje Jeju katàt kute amijo baja mar. Me katàt kute amijo baja kunĩdjwý Metĩndjwýnh arým meo kra nhym me umar djã ny. Jadjwý gar arým aje mar.

## 3

<sup>1</sup> Me Babãm djwýnh ta ne arým gwaj bamã, “Ikra ar”, ane. Djãm kam kum gwaj bajabê ngri? Kum gwaj bajabê:kumrêx. Nhym be, gwaj babê Metĩndjwýnh krakam me kute gwaj bamar kêt. Me kum Metĩndjwýnh kĩnh kêtja kute gwaj bamar kêt. Mýkam? Bir, me kute Jeju mar kêtkam ne me kute gwaj bamar kêt. <sup>2</sup> Akmere, àpnhĩre ar, jakam gwaj babê Metĩndjwýnh krakumrêx. Ne kam mýj dja gwaj ĩ bakute? Kon. Kraxje kute gwaj bamã o amirĩt kêt rã'ã gwaj baje mar kêt rã'ã. Nhym be, Jeju dja ĩ gwaj bamã amijo amirĩt gwaj arým prĩne mexkôt omũ. Nhym kam ta amikôt gwaj badjwý gwaj bajo mex gwaj arým baje Jeju pyrāk. Ja ne gwaj baje markumrêx ne amim,

—Nà. Dja ijo mex ba arým ije Jeju pyrāk, ane. <sup>3</sup> Gwaj bawýr Jeju bôxkam amakbê bamã bamex prã:m. Gwaj bamã bamex kute ta mex pyrāk prã:m. Ne kam kam amak djêje amijo mexo tē.

<sup>4</sup> Nhym be, me axwe ne me Metĩndjwýnh kukràdjã mar kêt ne kam amikrà ar o ba. Metĩndjwýnh te memã kum, “Kwãrĩk wānh ajaxwe kêt”, ane nhym me arým kam amikrà ar o ban tu axwe. <sup>5</sup> Mýj kadjy ne Kritu ruw ne nã kurũm katon ar ba? Bir, kute gwaj bamã bajaxweo apêx kadjy ne katon ar ba. Ja ne gar arým aje markumrêx ne amim,

—Kute imã ijaxweo apêx kadjy ne Jeju katon ar ba, ane. Djãm ta axwe'ô? Arkati. <sup>6</sup> Me kute amim Jeju mar tÿxo ban 'ã ukanga kêtja ne me mã kum axwe prãm kêt. Nhyim be, me mã kum axwe prãm kute amim Jeju mar kêt.

<sup>7</sup> Akmere, àpnhĩre ar, me kute me axwe'ã 'êx ne ar amã, “Me axwe kêt”, anhÿrkam kwãrĩk wãnh gê me'ô o ar anoo biknor kêt. Djãm me axwe mex? Kati. Me katàt kute amijo babit ne me mex. Jeju kôt me mex.

<sup>8</sup> Nhyim be, me kute arek axweo ba prãmja ne Xatanaj meo ba. Mÿkam? Bir, Xatanaj adjakamã axwe krax ne kute arek axweo ba prãm. Kam ne arÿm me kute arek axweo ba prãmja Xatanaj kute meo ba. Metĩndjwÿnh Kra kute Xatanajo àpanh kadjy ne kato. Dja o apa nhyim arÿm meo ba kêt nhyim me arÿm axwe kêt. Ja kadjy ne nã kurÿm katon ar ba. <sup>9</sup> Metĩndjwÿnh kute meo krakam ne me arÿm umar djã ny. Kam ne me arek kute axweo ba prãm kêt. Metĩndjwÿnh Karõ\* kute mÿjja 'y pyrãk ne memã wadjàn me kadjwÿnhbê nhÿ, me axwebê àptàro nhÿ. Kam ne me te kute arek axweo bamã. Metĩndjwÿnh kute meo krakam ne me te arek axweo bamã.

<sup>10</sup> Mÿj xêbê ne Metĩndjwÿnh kra ar? Bir, Metĩndjwÿnh kra ne me kum axwe prãm kêt ne kum kamy jabê. Kum gwaj baje Jeju kabênkôt o bakamyja jabê. Kum kamy jabê gwaj arÿm kôt memã bakaton me omÿ. Me jabê ne Metĩndjwÿnh kra ar. Ja ne gwaj omÿ. Mÿj xêjabê ne Xatanaj kra ar? Bir, Xatanaj kra ne me kum axwe prãm ne kum gwaj bakamy jabê kêt gwaj kam arÿm kôt memã bakaton me omÿ. Me jabê ne Xatanaj kra ar.

*Me kum aben jabê'ã kute memã karõ.*

<sup>11</sup> Ba ar amã arê gar ama. Metĩndjwÿnh ne memã kum,

—Dja ga me amã aben jabê, ane. Ja ne gar aje amim Jeju marmo kraxkam aje mar ne mar rã'ã. <sup>12</sup> Be, me bakukãmãre Kaĩ ne arÿm kamy bĩ. Kwãrĩk wãnh gar Kaĩ kôt ã amijo anhÿr kêt. Xatanaj ne Kaĩo ba nhyim arÿm kamy bĩ. Mÿkam ne kamy bĩ? Bir,

ta àpênh jaxwe prãmkam nhyim kamy katàt kute amijo ba prãmkam.

<sup>13</sup> Bir, akmere, àpnhĩre ar, godja me kum Metĩndjwÿnh kĩnh kêtja kum ar akurê jabej. Kwãrĩk wãnh ar amim,

—Je tô mÿkam ne me ã ijo ane? anhÿr kêt.

<sup>14</sup> Amrêbê gwaj bajaxwekam ne gwaj me biknor tokry djakam bamõrmã. Djãm jakam kam gwaj bamõrmã? Kati. Jakam ne gwaj arÿm Metĩndjwÿnhkôt batĩn ne ar baba rã'ã: rã'ã ne. Mÿjkôt dja gwaj ja markumrêx, ne amim,

—Mrãmri ne arÿm Metĩndjwÿnhkôt itĩn ne ar iba rã'ã: rã'ã ne, ane. Bir, gwaj arÿm mrãmri bamã bakamy jabêkumrêxkôt. Dja gwaj bamã bakamy jabêkumrêx ne arÿm amim,

—Mrãmri dja ba arÿm Metĩndjwÿnhkôt itĩn ne ar iba rã'ã: rã'ã ne. Ga, arÿm imã ikamy jabêkumrêxja pumÿ, ane. Gwaj kam arÿm ja markumrêx. Ne kam kôt batĩn ne ar baba rã'ã: rã'ãja markumrêx. Nhyim be, me kum kamy jabê kêtja ne me me biknor tokry djakam mõrmã rã'ã. <sup>15</sup> Me kum kamy kurê kunĩ ne me kute me par djwÿnh pyrãk. Ne kam me par djwÿnh dja Metĩndjwÿnhkôt tĩn ne ar ba kêt. Ja ne gar arÿm aje mar.

<sup>16</sup> Nhyim be, Jeju mrãmri kum gwaj ba-jabêkumrêxkam arÿm gwaj bapãnh ty. Gwaj ren bamã aben jabê kute Jeju kum gwaj bajabê ne gwaj bapãnh tyk pyrãk. Nhyim me ren arÿm kute gwaj bakamy'õnh bĩnmã. Gwaj ren bamã bakamy jabêkumrêxkam ren arÿm memã kum,

—Ba dja ga me ibĩ gê ikamy tĩn ne, ane. Gwaj ren bamã abêkumrêxkam gwaj ren ã memã ane. <sup>17</sup> Nhyim be, me'ô nhõ mÿjja nhyim kamy nhõ mÿjja kêt. Nhyim arÿm omÿ. Omÿnho nhÿ:n kam arÿm amim,

—Je, djãm ije amikutã kum inhõ mÿjja kwÿ nhõrmã? Kati. Dja ba kum õr kêt, ane. Djãm tãmwã ne Metĩndjwÿnh kôt kum kamy jabê got? Kati.

<sup>18</sup> Be, arÿm ijabatãnh mexkam ne ba ar amã ikabên jarê. Dja gar amim ikabên ma. Kwãrĩk wãnh gwaj bajajkwa kajgokam-bit memã, “Imã me abêkumrêx”, anhÿr kêt. Gwaj bakabên kwÿ kajgokumrêx.

\* **3:9** Metĩndjwÿnh Karõ ne kabêno memã amak bô nhyim me umar djã nyn arÿm kum axwe prãm kêt. Dja ga 'ã Ped k 1.23, Xij 1.18, Mat 13.3-23, Dju r 1.13, 3.5 jarên ama.

Ate dja gwaj bamã aben jabêkumrêx ne abenmã mỳjja ngãn abenmã apê. <sup>19</sup> Dja gwaj bamã me abêkumrêx ne kam arỳm markumrêx. Metĩndjwỳnh arỳm kute gwaj bajo aminhökumrêx markumrêx. Ne kam arỳm amim,

—Mrãmri ne Metĩndjwỳnh arỳm ijo aminhökumrêx, ane. Ne kam ja markumrêx ne ate bakrãn badjumar mex ne ar baba.

<sup>20</sup> Nhyim be, godja gwaj banhökre kad-jwỳnhbê amiman amim,

—Djãm mrãmri Metĩndjwỳnh kabên kôt imã me abêkumrêx? Kati. Imã me abê rerekre, ane. Gwaj amiman arỳm badjumar punu. Ne kam ajte amim,

—Metĩndjwỳnh ne kute mỳjja kunĩ mar ne kute inhökre kadjwỳnhbê ikabên mar mexkumrêx. Ta dja imã tỳx jadjà, ba arỳm imã me abêkumrêx, ane. Dja gwaj ã Metĩndjwỳnh'ã amim anen arỳm amikam badjumar punu kêt ne.

<sup>21</sup> Nàr atekam baje banhökre kadjwỳnhbê amim bakabên markam amim,

—Kati. Metĩndjwỳnh kabênkôt imã me abêkumrêx, anhỳr jabej ne arỳm bamã Metĩndjwỳnh pyma kêt. <sup>22</sup> Ne kam tu kute gwaj bamã mỳjja nhipêxo kum a'uw nhyim arỳm gwaj bamã ipêx. Mỳkam? Bir, gwaj baje kabên mar ne kôt amijo baba nhyim gwaj bakam kĩnhkam dja arỳm gwaj bamã ipêx. <sup>23</sup> Metĩndjwỳnh ne gwaj bamã,

—Dja gar tu amim Ikra Jeju Kritu markumrêx ne ar amã aben jabê, ane. Gwaj kabên ja man kôt ar amijo baba. Tãm ne ja.

<sup>24</sup> Dja gwaj Metĩndjwỳnh kute abenã gwaj bamã karõja man kam kabên kôt ar amijo baba. Ne kam arỳm Metĩndjwỳnh kôt ar baba. Nhyim kam arỳm gwaj bakad-jwỳnhbê amijo kajkep. Djãm mrãmri ne Metĩndjwỳnh gwaj bakad-jwỳnhbê mã amijo kajkep kumrêx? Mỳjkôt ne gwaj ja ma? Bir, Metĩndjwỳnh ne gwaj bamã Karõ jano. Karõ ta dja gwaj bamã,

—Arỳm ne Metĩndjwỳnh akadjwỳnhbê amẽ amijo kajkep, ane. Kam dja gwaj ja markumrêx, Metĩndjwỳnh gwaj bakad-jwỳnhbê amijo kajkepja markumrêx.

## 4

*Me kute me mex jabej me kabimã.*

*A Dju 7*

<sup>1</sup> Akmere, àpnhĩre ar, imã ar ajabêkam ne ba ar amã ikabên. Dja gar amim ikabênja ma. Dja me ar awỳr bôx jabej ne ar amã,

—Metĩndjwỳnh kukwakam ne ba ar amã 'ã ajarê, anhỳr jabej. Kumrêx dja gar amim me kabin me mrãmri Metĩndjwỳnh kabên kôt kabên katãtmã akato. Mỳkam? Bir, me ta kute amijo Metĩndjwỳnh kukwakam ujarênh djwỳnh ne amijo 'êx baja ne krãptĩ. Ne kam arỳm pyka kunĩkôt apôx ne ar ba. Kam dja gar amim me kabi.

<sup>2</sup> Mỳj dja gwaj amim me kabin memã bajapôx on? Bir, dja gwaj me kabên ma nhyim me memã kum,

—Be, mrãmri ne Jeju Kritu kàjkwa kurũm ruw ne nã kurũm katon ar ba, ane. Godja me ã memã anhỳro ba jabej. Me wã dja gwaj me markumrêx. Nãm me amijo 'êx kêt ne mrãmri Metĩndjwỳnh kabên kôt kabênkumrêx.

<sup>3</sup> Nhyim be, me kute memã anhỳr kêt ne ate memã kum,

—Be, kati. Nhỳnh ne Jeju Kritu kàjkwa kurũm ruw ne nã kurũm katon ar ba? Kati, anhỳro ba. Me kute memã ja jarênh ba ne me amijo 'êx ne Metĩndjwỳnh kabên kôt kabên kêt. Kritu kurê djwỳnh'õ ne ja. Ja ne me arỳm ar amã arê. Kritu kurê djwỳnh rax bôxmã arê. Bôx kukãm ne kurê djwỳnh kwỳ arỳm jakam katon mekôt ar ba.

<sup>4</sup> Akmere, àpnhĩre ar, Metĩndjwỳnh kôt gar arỳm akabên aba. Gar arỳm kam kurê djwỳnh apa. Mỳjkôt ne gar o apa? Bir, Jeju ar akam ãrkôt. Jeju ne ar ajo ban tỳxo kute pykakam kurê djwỳnh kunĩ jakrenh mexi.\* Gar kam kukwakam arỳm meo apa. <sup>5</sup> Me kum Metĩndjwỳnh kĩnh kêtja kôt ne Kritu kurê djwỳnh amijo ba. Ne kam me kabên kôt kabên. Nhyim kam me kum Metĩndjwỳnh kĩnh kêtja arỳm kum Kritu kurê djwỳnh kĩnh ne me kabên maro ba.

<sup>6</sup> Nhyim be, ar ba ne bar ije memã Metĩndjwỳnh kabên jarênhkam mrãmri memã kabên jarênhkumrêx. Me kute ar

\* 4:4 Djãm pykakambit kurê djwỳnh nhyim tỳxo kute akrenh Kati, kàjkwakamdjwỳ. Jeju ne tỳxo kute kurê djwỳnh kunĩ jakrenh mexi. Epedju 1.21-22 dja gar arên kôt ama.

ikabên markumrêxja gwaj arým me'ã abenmã,

—Mrãmri kute Metĩndjwýnh markumrêx. Ga, kute Metĩndjwýnh kabên markumrêxja pumũ. Mrãmri kabênkumrêx, ane. Nhyim be, me kute ar ikabên mar kêtja gwaj arým me'ã abenmã kum,

—Kati. Kute Metĩndjwýnh mar kêt. Ga, kute Metĩndjwýnh kabên mar kêtja pumũ. 'Êxnhĩkumrêx, ane. Gwaj ã amim me kabio anen arým memã bajapôx ne arým me kuma. Me kabênkumrêx jabej nàr me 'êxnhĩ jabej arým memã bajapôx ne me kuma.

*Me kum aben jabêmã.*

*Mat 22.39; Dju r 13.34; Gar 5.14; Ped k 1.22*

<sup>7</sup> Akmere, àpnhĩre ar, imã ar ajabêkam ne ba ar amã ikabên. Me kute amim Metĩndjwýnh markôt ne me kum aben jabê. Kam gwaj bamã aben jabê. Mýj xêbê ne Metĩndjwýnh kra ar? Bir me kum me abêbit ne mebê Metĩndjwýnh kra. Metĩndjwýnh kra ne me umar djà ny. Me kum me abêbit ne me kute Metĩndjwýnh mar. <sup>8</sup> Ta kum me abê nhyim kam me arým kôt kum aben jabê. Kam, me kum me abê kêt kute Metĩndjwýnh mar kêt.

<sup>9</sup> Metĩndjwýnh kum gwaj bajabê. Mýjkôt ne gwaj baje ja mar. Bir, nãm arým gwaj bawýr Kra djwýnh jano. Kra pydji jano nhyim pykakam bôx. Gwaj kôt batĩn ne ar baba rá'ã: rá'ã kadjy. Kam ne gwaj baje Metĩndjwýnh kum gwaj bajabêja markumrêx ne amim,

—Nà. Metĩndjwýnh kum ijabê:kumrêx, ane. <sup>10</sup> Mrãmri kum gwaj bajabêkumrêx. Djãm gwaj ba bamã Metĩndjwýnh jabê? Kati. Ta ne kum gwaj bajabê. Kum gwaj bajabên kam arým Kra jano nhyim nã kurũm katon ar ba. Gwaj bajaxwe: nhyim Metĩndjwýnh gwaj bajaxwekam ngryk. Nhyim Kra arým gwaj bajaxweo pãnh ne Metĩndjwýnhmã gwaj bakam ngryko apêx, gwaj bakam Metĩndjwýnh ngryko apêx.

<sup>11</sup> Metĩndjwýnh kute ã kum gwaj bajabêo anhýrkam gwaj ren kudjwa bamã aben jabê. Akmere, àpnhĩre ar, imã ar ajabêkam ne ba ar amã ikabên. Dja gar amim ikabênja ma. <sup>12</sup> Djãm me'õ ne arým kàjkwakam Metĩndjwýnh pumũ? Kati. Me'õ

ne kute omũnh kêtikumrêx. Kwãrĩk wãnh gwaj omũnh kêt. Godja gwaj bamã aben jabê nhyim Metĩndjwýnh arým gwaj bakadjwýnhbê mã amijo kajkep. Gwaj kam bamã Metĩndjwýnh jabê týxo amũ amikamênho mõn bamã abê tý:x ne.

<sup>13</sup> Metĩndjwýnh ne arým gwaj bamã Karõ jano nhyim arým ar gwaj bajo ba. Gwaj kam baje Metĩndjwýnh kute ar gwaj bajo ban gwaj bakadjwýnhbê amijo kajkepja markumrêx ne amim,

—Nà. Kute ar ijo ban ikadjwýnhbê amijo kajkepikumrêx, ane. <sup>14</sup> Ar ba ne bar arým Kra pumũnho iba. Mrãmri ne me Babãm djwýnh arým Kra jano nhyim bôx. Kute pykakam me axwe kunĩ pytãrmã ne me'ýr bôx. <sup>15</sup> Me kute memã kum,

—Mrãmri Jejubê Metĩndjwýnh Krakumrêx, anhýro baja. Me ja ne me kute amim maro ba. Nhyim Metĩndjwýnh mrãmri me kadjwýnhbê mã amijo kajkep ne amikôt ar meo ba.

<sup>16</sup> Metĩndjwýnh kum gwaj bajabê gwaj arým tu amim markumrêx ne amim,

—Mrãmri, kum ijabêkumrêx, ane.

Me kum aben jabê japôx djabê ne Metĩndjwýnh. Ta ne kum me abê nhyim kam me kôt arým kum aben jabê. Metĩndjwýnhkam me kum aben jabê japôx djakam ne me mã kum aben jabê. Ne kam me mã kum aben jabêja Metĩndjwýnh amikôt ar meo ban me kadjwýnhbê mã amijo kajkep.

<sup>17</sup> Dja Metĩndjwýnh ã gwaj bajo ane gwaj kam kôt bamã abê týxo amũ amikamênho mõ. Gwaj kam arým bamã abê tý:x ne. Nhyim kam Metĩndjwýnh nhõ akati arým bôx. Kute memã axwe pãnh jarênh djà nhõ akati bôx. Gwaj kam bajbit bamã uma kêt ne dja. Mýkam? Bir, pykakam gwaj ar babari gwaj bamã abêkam. Gwaj bamã abê kute ta kum gwaj bajabê pyrãk. Kam dja gwaj bamã uma kêt ne dja. <sup>18</sup> Ga, me prĩne kum me abêkumrêxkam arým kum me uma kêtikumrêxja pumũ. Mýkam? Bir, me kute meo bikênh karõ ne me kum me uma. Me kum me umakam ne me prĩne kum me abê mex kêt rá'ã.

<sup>19</sup> Mýkam ne gwaj bamã Metĩndjwýnh jabê? Bir, ta kumrêx ne kum gwaj bajabê gwaj kam arým bamã abê. <sup>20</sup> Nhyim kam



gwaj baje Jeju kabênkôt me'ôo bakamyja, gwaj bajô jâm bamã kurên jâm memã kum, “Imã Metîndjwýnh jabêkumrêx”, ane. Kati. Nã gwãm bajêx. Gwaj baje bakamy pumûnhkam ne gwaj bamã kurêkam te bamã Metîndjwýnh pumûnh kêtja jabêmã.

<sup>21</sup> Metîndjwýnh arým gwaj bamã 'ã karôn gwaj bamã,

—Djãm ar amã ijabê? Dja gar amã akamydjwý jabê, ane. Kam dja gwaj bamã bakamy jabêkumrêx.

## 5

*Me kute tu amim Metîndjwýnh Kra markumrêx'ã ujarênh.*

<sup>1</sup> Mýj xêbê ne Metîndjwýnh krakumrêx? Bir, me kwý ĩ pýnhkôt kute mã amim,

—Mrãmri ne Jejubê Kritu. Mrãmri ne Metîndjwýnh Jeju'ã me banhô Bênjadjwýrbê kumkati mênhkumrêx, anhýrja. Me kute mã amim anhýr ne tu kute amim markumrêx ja ne mebê Metîndjwýnh krakumrêx ne umar djã ny. Ne kam mebê Metîndjwýnh krakam me kum Metîndjwýnh jabê. Djãm Metîndjwýnhbit me kum abê? Kati. Amibu'ã mebê Metîndjwýnh kradjwý ne me arým kum me abê.

<sup>2</sup> Djãm mrãmri ne gwaj bamã amibu'ã Metîndjwýnh kra ar abêkumrêx? Mýj kôt dja gwaj arým ja markumrêx? Bir, dja gwaj bamã Metîndjwýnh jabên kabên man kôt ar amijo baba. Ne kam kôt arým bamã kra ar abêja markumrêx ne arým amim,

—Nã. Imã Metîndjwýnh kra ar abêkumrêx, ane.

<sup>3</sup> Dja gwaj kute me kute katàt amijo ba'ã memã karökôt kabênja man kôt ar amijo baban kam arým bamã Metîndjwýnh jabêkumrêx. Djãm gwaj baje kabên mar ne te kôt amijo babamã? Kati. Gwaj kôt amijo babaja babê tÿx kêt. <sup>4</sup> Mýkam? Bir, me kum Metîndjwýnh kïnh kêtja te gwaj bamã amikukràdjã jarê gwaj bamã me kukràdjã kïnh kêt. Metîndjwýnh ne arým gwaj bajo kra gwaj arým badjumar djã ny. Kam gwaj bamã me kukràdjã kïnh kêt ne kôt amijo baba kêt. Ne tu amim Metîndjwýnh markumrêx ne arým me kukràdjã kôt amijo baba kêt.

<sup>5</sup> Mýj xêja ne me kute me kukràdjã mar kêt ne kôt amijo ba kêt? Bir, me kute tu amim Jeju markumrêxbit. Me kute mã amim,

—Mrãmri Jejubê Metîndjwýnh Krakumrêx, anhýro ba. Me jabit ne me kute me kukràdjã mar kêt ne kôt amijo ba kêt.

*Metîndjwýnh kute memã Krao amirît.*  
*Dju r 5.31*

<sup>6</sup> Ne kam mýj ne Metîndjwýnh arým gwaj bamã Kra jarênh amirît on? Bir, Kra Jeju Kritu bôx ne nã kurûm kato. Ne kam arým abatânh ne. Nym Metîndjwýnh kute arênh amirît kadjy Djuão arým ngômã adjã. Ngômã adjã nym kam tûmrâm arým kamrô prôt ne arým ty. Djãm ngômã adjarkambit Metîndjwýnh gwaj bamã Kra jarênh amirît? Kati. Kamrô prôt ne tykkamdjwý kute o amirît. Nym kam Metîndjwýnh Karôdjwý ajte Kra'ã amijarênh amirît. Karô mrãmri katàt kute kabên jarênhkumrêx.

<sup>7</sup> Be, Metîndjwýnh arým Kra jarênh amirîto amãnhkrut ne ikjêkêt. <sup>8</sup> Karökôt o amirît. Ngômã adjarkam o amirît. Kamrô prôt nym tykkam o amirît. Kunîkôt ne Metîndjwýnh kabên pydji.

<sup>9</sup> Pykakam me kute mrãmri gwaj bamã mýjja'ã amijarênh amirîtkam gwaj abenmã kum, “Mrãmri ne amijarênhkumrêx”, ane. Nym be, Metîndjwýnh kute Kra'ã amijarênh amirîtkam kabên katato kute me kunî jakrenh. Kam me kunî ren abenmã kum,

—Mrãmri Jejubê Metîndjwýnh Krakumrêx, ane. <sup>10</sup> Me kute tu amim Metîndjwýnh Kra markumrêx ne me amim,

—Mrãmri ne Jejubê Metîndjwýnh Krakumrêx, anen amikadjwýnhbê markumrêx. Nym be, me kute amim Metîndjwýnh mar kêt ne me Jejuo me'ô 'êxnhĩ pyrâk. Mýkam? Bir, mrãmri Metîndjwýnh kute Kra'ã amijarênh amirîtkumrêx nym me kute amim mar kêt kam ne me o me'ô 'êxnhĩ pyrâk. <sup>11</sup> Nym Metîndjwýnh arým amijarênh amirît ne memã kum,

—Me kute tu amim ikra markumrêx arým ikôt tïn ne ar ba rã'ã: rã'ã ne, ane.

<sup>12</sup> Me kute Krao aminhõja ne kôt tïn ne ar ba

rã'ã: rã'ã nhym me kute Metĩndjwýnh Krao aminhõ kêtja kôt tĩn kêtumrêx ne.

<sup>13</sup> Ar aje tu amim Metĩndjwýnh Kra markumrêx ar. Ar amã ne ba ikabên ja'ã pi'ók no'ók ne. Mýj kadjy? Bir, ar aje pi'ókkam ikabên jarēnh ne mar kadjy. Dja gar aman tu amikukãm kôt atĩn markumrêx. Metĩndjwýnhkôt atĩn ne ar aba rã'ã: rã'ãja markumrêx ne amim,

—Nà. Dja ba kôt itĩn ne ar iba rã'ã: rã'ã ne, ane. Dja gar pi'ókkam ikabên jarēn aman kam arým tu amikukãm ja markumrêx. Metĩndjwýnhkôt atĩn ne ar aba rã'ã: rã'ãja markumrêx.

<sup>14</sup> Dja gwaj ja man arým Metĩndjwýnhmã mýjjao a'uw. Ta kute amim gwaj bajã karõ kôt o a'uw ne kum,

—Aje ijã amim karõ kôt dja ga ã imã mýjjao ane, ane. Dja gwaj ã kum ane nhym arým gwaj bama. Ja ne gwaj baje markumrêx. <sup>15</sup> Kute gwaj bamarkumrêx dja gwaj kuman arým amim,

—Mrãmri dja kôt ã imã mýjjao ane, ane. Dja gwaj amim anen arým kute gwaj bamã mýjjao anhÿr kadjy baje amimarkumrêx ne amiwÿr baje mýjjao badjà'wÿrja markumrêx.

### *Me axwe'ã ujarēnh.*

<sup>16-17</sup> Apÿnh me axwe djàri kunĩkôt ne me axwe. Ne kam kwý pãnh tyk kêt. Nhym be, atemã me axwe'õ pãnh dja arým ty. Godja me'õ me kute Jeju kôt abeno kamy 'õ pumũ, axwe kôt omũ. Gêdja o Metĩndjwýnhmã a'uw ne kum,

—Djũnwã, amã ikamy kaprĩ. Kwãrĩk wãnh kum axweo pãnh kêt, ane. Dja ã kamyo Metĩndjwýnhmã à'wÿro ane. Nhym arým kum axweo pãnh kêt nhym tyk kêt ne tĩn ne. Nàr me axwe 'ókôt. Kôt me tykkumrêxja. Djãm o kute Metĩndjwýnhmã à'wÿrmã? Kati. Dja mrãmri kôt ty.

<sup>18</sup> Metĩndjwýnh kute memã amak bõnh nhym me umar djà nyja kunĩ kum axwe prãm kêt. Jadjwÿ ne gwaj markumrêx ne amim,

—Nà. Me umar djà ny kunĩ kum axwe prãm kêt, ane. Nãm me amijaxwe kêt kadjy amijãno djan kum axwe prãm kêt. Nhym kam Xatanaj te kute amiwÿr meo akēx nhym me ro'ã axwemã.

<sup>19</sup> Metĩndjwýnh ne arým gwaj bajo kra. Nhym be, Xatanaj arým amikôt me kum Metĩndjwýnh kĩnh kêtja kunĩ ar o ba. Ja ne gwaj baje markumrêx ne amim,

—Nà. Metĩndjwýnh ne arým ijo kra. Nhym be, Xatanaj arým amikôt me kum Metĩndjwýnh kĩnh kêtja kunĩ ar o ba, ane.

<sup>20</sup> Metĩndjwýnh Kra ne arým bõx. Katàt kabēn ne katàt kute amijo bakumrêx. Ne kam gwaj baje Kra katàtkumrêxkôt mar kadjy arým gwaj bamã bajamak bõ. Ja ne gwaj baje markumrêx ne amim,

—Nà. Arým ne Kra bõx ne imã ijamak bõ. Ije ta katàtkumrêx mar kadjy arým imã ijamak bõ, ane. Nhym kam Kra Jeju Kritu arým amim gwaj bapytà. Katàtkumrêxja arým amim gwaj bapytà. Mrãmri kubê Metĩndjwýnhkumrêx. Gwaj kôt batĩn ne ar baba rã'ã: rã'ã ne. Jadjwÿ ne gwaj baje arým tu amim markumrêx.

<sup>21</sup> Akmere, àpnhĩre ar, mýjjao metĩndjwýnh karõ nhipêx me kute kum amijarēnhja ne kumex. Dja gar amijãno dja. Mýjjao metĩndjwýnh karõ nhipêx'ÿr aje amijo akēx kêt kadjy amijãno dja. Tãm ne ja.

## Djuão kute atãri pi'òk no'òk ne ja.

Jejukòt ba djwýnhbê Djuão ne òbikwa nimê kra arkum pi'òk no'òk ne. Jeju kòt ne o kanikwýnh ne arkum pi'òk no'òk ne. Kute o týx ne kute kum me 'èxnhĩ bôxmã arènhmã ne pi'òk no'òk ne. Me 'èxnhĩ kute Metíndjwýnh kabên kêt jarènh ne kute me noo biknormã bôxmã.

Nãm kum,

—Kwãrĩk wãnh me ja mar kêt ne mekòt amijo aba kêt. Dja ga amijã ano týx ne me jamã kre rax. Nãm ã Djuão òbikwa nimê arkum ane.

<sup>1</sup> Ba ibê Djuão. Ibê Jeju nhõ me jao iba djwýnh'õ ne ba ar amã pi'òk no'òk ne. Nã àpnhĩre, Metíndjwýnh ne amijo apytã. Ba kam akramê ar amã pi'òk no'òk ne. Mrãmri imã ar ajabêkumrêx. Djãm bajbit? Kati. Me kunĩ kute Metíndjwýnh kabên katàtkumrêxja mar ja ne me adjwýnhdjwý kum ar ajabê. <sup>2</sup> Metíndjwýnh kabên katàtkumrêx. Gwaj baje bakadjwýnhbê mar týx rã'ã ne baje o bajamak kêt kati prãm kêtumrêx.

<sup>3</sup> Me Babãmbê ne Metíndjwýnh. Krabê ne Bènjadjwýr djwýnhbê Jeju Kritu. Gê ar tu kum ar akaprĩkumrêx\* gar adjumar mex rã'ã. Ar katàt kute kabên jarènhkumrêx ne kum ar ajabêkumrêx. Gê ar amê amijo kajkep.

*Me kum aben jabê'ã kute memã karõ.*

<sup>4</sup> Nã àpnhĩre, akra kwý ne kòt ar amijo ba ba omũn ikĩnhkumrêx. Nãm ar kute Metíndjwýnh kabên katàt markumrêx ne kòt ar amijo ba ba kòt ar omũ. Me Babãm ta ne 'ã gwaj bamã karõ. Kòt amijo baba'ã gwaj bamã karõ nhym ar arým kuma. Ne kam arým mrãmri kòt amijo bakumrêx ba kòt ar omũn arým ikĩnhti:re.

<sup>5</sup> Ne kam àpnhĩre ar, jakam ajte ar amã arê. Djãm me kabên ny ne ba ar amã arê? Kati. Gwaj baje amim Jeju mar kraxkam baje kabên marja tãm dja ba akubyn ar

amã arê. Gwaj bamã aben jabêmã. Ja dja ba ajte ar amã arê.

<sup>6</sup> Mýj dja gwaj nèn bamã aben jabê? Bir, dja gwaj Metíndjwýnh kabên man kòt ar amijo baban arým bamã aben jabê. Mýj ne kabènkam kute? Bir, tãm ne gar aje amim Jeju mar kraxkam arým ama. Ar amã aben jabê ryti pydjimã. Ja ne gar ama ba ajte ar amã arê.

*Me amijã no týxmã, me 'èxnhĩ kute me noo biknor kêt kadjy.*

*Dju k 4.1*

<sup>7</sup> Be, arým me 'èxnhĩ krãptĩ ar ba. Nãm me memã kum,

—Djãm mrãmri ne Metíndjwýnh Jeju Kritu jano nhym pykamã bõx ne nã kurũm katon ar ba? Kati, nãm me 'èx, anhýro ba. Me kute ã memã anhýro bakam mrãmri 'èxnhĩkumrêx. Mebê Kritu kurê djwýnh.

<sup>8</sup> Dja gar aminêje me 'ãno dja. Me kute ar anoo biknor karõ me 'ãno dja. Ga wãkam arým Kritumã adjapènh 'ãtũm. Nhym Metíndjwýnh arým ar amã akĩnh djã jarê. Dja ar amã kungã. Nãr, godja gar aminêje me 'ãno adjãm kêt jabej, nhym me arým ar anoo biknor jabej. Nhym kam Metíndjwýnh arým ar amã òr kêt. <sup>9</sup> Me kute Metíndjwýnh kabên mar kêt ne kam amikrà ar o ban ajte kute arek Kritu kabên kòt amijo ba kêtja ne Metíndjwýnh kute meo ba kêtumrêx. Nhym be, me kute arek Kritu kabên kòt amijo baja me Babãmbê Metíndjwýnh kute meo ba nhym ajte Kradjwý kute meo ba.

<sup>10</sup> Godja me'õ bõx ne 'èx ne Kritu kupa'ã ar amã ajarê kwãrĩk wãnh kum aminhũrkwã jarènh kêt. Ne kwãrĩk wãnh pa kjènh kêt. 'Èx ne kupa'ã ar amã 'ã ujarènhkam dja gar pa kjènh kêt. <sup>11</sup> Dja gar pa krij nhym me arým ar ajã,

—Arým ne ar amijã kumê. Ga, ar kòt bawã pumũ, ane. Gar kam arým kòt ar gadjwý Kritu'ã ajêx pyrãk.

<sup>12</sup> Nã bãm bit pi'òkjakam ar amã ikabên kumex jarènh prãm. Ba kam amim,

—Kati. Kwãrĩk wãnh ba pi'òkkam ikabên kunĩ jarènh kêt. Dja ba tèn arkam bõx ne ijajkwao arkum arê, ane. Dja

\* **1:3** Djãm ar ga ne gar adjukaprĩ nhym ar pãnh arým kum ar akaprĩ Kati. Ar ta ne ar tu kum ar akaprĩkumrêx.

ba ar amã ane gwaj kam arým abenkam  
bakĩnhkumrẽx. Ja kadjy ne ba amima.

<sup>13</sup> Akanikwýnhkam kradjwý amã amik-  
abẽn mex jarẽ. Metĩndjwýnh kute amijo  
akanikwýnh pytàr tãm kra ne amã amybým  
amikabẽn mex jarẽ. Tãm ne ja.

## Djuão kute pi'ôko ino rer no'ôk ne ja.

Jejukôt ba djwýnhbê Djuão ne òbikwa myjamã pi'ôk no'ôk ne. Òbikwaja ne ar apýnh pyka djari memã Jeju'ã ujarênh tēmja amiwýr aro wadjà ne arkum kabên mex jarê ne arkum mýjja ngã ne ar kujate nhym ar tē. Kute arek o anhýr rã'amã ne kute kubê me'ô jaxwe pymamã ne kum pi'ôk no'ôk ne.

<sup>1</sup> Akmere, Gaju. Ba ibê Djuão ne ba amã pi'ôk no'ôk ne. Ibê Jeju nhõ me jao iba djwýnh'õ ne ba amã pi'ôk no'ôkkam ikabên jarê. Metíndjwýnh kabên katàtkôt imã ajabê.

<sup>2</sup> Akmere, Metíndjwýnhmã arým amexkumrêx ba arým ama. Ne kam Metíndjwýnhmã ajo a'uw ga amex kôt adjumar mex. Adjà kêt djwýo ane. Ga adjumar mex ne adjà kêtja ne ba imã kínhkumrêx. <sup>3</sup> Be, Jeju kukwakam gwaj bakamy ar arým nính iwýr bõx ne imã ajarê. Nãm ar imã,

—Be, Onīj Gaju kute Metíndjwýnh kabên katàt markumrêx ne kabên kôt kute amijo ba mexkumrêx, ane. Ba ar kute ajarênhja man ikínhkumrêx. <sup>4</sup> Nã bãm memã Jeju'ã idjujarênh nhym me kute ikabênkôt Jejuo aminhõ. Ba kam mã itēm nhym me nính imã me'ã ujarênh ne kute imã,

—Onīj ar kute akabên kôt Jejuo aminhõja Metíndjwýnh kabên man kôt kute katàt amijo bakumrêx, anhýr. Me kute ã imã anhýrkam ikí:nhkumrêx.

*Gaju kute meo djuw mexkam Djuão kute amikính jarênh.*

<sup>5</sup> Akmere Gaju, Jeju kukwakam gu bakamy kwý ne awýr bõx, ga anhõdjàn ne aro djuw mex. Nã gãm te ar nokre pumũnh kêt ne tu aro djuw mex. Ne kam Metíndjwýnh kabên kôt amijo abakumrêx. Aje me bakamy djuw mex kuníkôt ne ga kabên man kôt amijo aba mexkumrêx.

<sup>6</sup> Gwaj bakamyja kwý arým nính ar iwýr bõx ne ar imã ajã ajarênh ajte me kute Jeju mar kuníjamã ajã ajarênh memã kum,

—Onīj Gaju kum ar ijabê:n òdjàn ne ar ijo djuw mex, ane, ba arým ar kuman ajte ama. Dja ar ajte awýr bõx ga amũ ajte ar mör kadjy arkum mýjja'õ ngã. Arkum djwý, pi'ôk kaprĩ ngã. Metíndjwýnh kabênkôt arkum angã.

<sup>7</sup> Mýkam dja ga ã arkum òro ane? Bir, ar Jeju'ã ujarênh kadjy mörkam. Nhym be, jakam me kute Jeju mar kêt kwý bit kute gwaj bakamyjamã õ mýjja nhõrmã nhym ar kute amim byr kêt. Me kute Jeju mar kêt kam gwaj bakamy ar kute mebê byr kêt. Ne kam arým mã mõ. <sup>8</sup> Mýj xêja dja gwaj bakamy arkum mýjja ngã? Djãm me kute Jeju mar kêt? Kati. Me kute amim Jeju mar dja gwaj bakamy arkum mýjja ngã nhym ar arým tē. Jeju kabên katàt jarênh kadjy tē. Gwaj ba dja gwaj arkum mýjja ngã. Ne kam arým ar ro'ã apê.

*Djoti kute amijo bēnjadjwýr rax prãm.*

<sup>9</sup> Amrêbê ne ba wãm ar aje amim Jeju marjamã pi'ôk no'ôk ne. Gar arým inhõ pi'ôk jarênh ikabên ma. Nhym be, wãkam Djoti kute ikabên mar prãm kêt. Djoti ta ne amijo bēnjadjwýr rax prãm. Me kute amim Jeju markam ta amijo bēnjadjwýr rax prãm. Bēnjadjwýr rax prãmje ne kute ikabên mar prãm kêt kumrêx.

<sup>10</sup> Dja ba ar akam itēm ne ibõx jabej ne arým ar amã Djoti jarê. Nãm ikãxã kabên punure jarênh ba. Amrêbê jakam gwaj bakamy kwý wãm ar awýr tēn ar akam bõx. Ar kute ar amã Metíndjwýnh kabên jarênh kadjy ar akam bõx. Nhym kam Djoti kute ar pa kjênh kêt ne arkum aminhürkwã jarênh kêt. Gar akwý ar aje arkum aminhürkwã jarênh prãm nhym Djoti arým ar abê aptàn ar amã,

—Aje, jakam dja gar ar ikôt abikprõnh kêt, ane. Ne ar aje amim Jeju mar bikprõnh djã nêje ar ajano.

<sup>11</sup> Akmere, kwãrĩk wãnh me axwe'ã amijakre kêt. Me mex'ã dja ga amijakre. Me mex ne me Metíndjwýnh kôt ar amijo ba. Nhym me axwe kute Metíndjwýnh mar kêt kumrêx. <sup>12</sup> Be, me kunĩ ne me me bakamy Temexu mex jarê. Nãm me 'ã abenmã kum,

—Metíndjwýnh kabên katàt kôt ne Temexu amijo ba gwaj arým omũ, ane.

Ar badjwỳ ne bar Temexu mex jarẽ ga ar ijêxnhĩ kêt kôt aje arỳm ar imar.

<sup>13</sup> Nã bãm bit ije amã ikabẽn kumex jarẽn prãm. Ne kam ije pi'òkkam amã arẽn prãm kêt. <sup>14</sup> Ije amikrà kêt ne awỳr itẽmmã. Dja ba awỳr bôx gu banhýtãri abenmã bakabẽn jarẽ. Ja kadjy ne ba amima.

<sup>15</sup> Gê Metĩndjwỳnh ajo djuw mex ga adju-mar mex rã'ã. Be, jakam gu banhõbikwa ar arỳm amã kabẽn mex jarẽ ba kuman arỳm pi'òk jakam wãm amã arẽ. Ga apỳnh aje gu banhõbikwa nhidji mar kôt arkum ar idji jarẽn arkum ikabẽn mex jarẽ. Tãm ne ja.

## Djuda kute memã pi'ôk no'ôk ne ja.

Jeju kamy 'ôbê ne Djuda. Nãm ar aben djâkam nõ. Jeju kumrêx kato nhym tũmrãm Xijagumê Djudadjwý Marij kurũm kato. Kute amim Jeju mar kêt ne kam tũmrãm tu amim markumrêx. Birãm Jeju akubyn tĩn kôt ne tu amim kuma. Ne kam Jeju nhõ me jao ba. Ne kam arkum pi'ôk no'ôk ne. Nãm Ar kubê me 'êxnhĩ puma. Me 'êxnhĩ amijo Metĩndjwýnh kabên jarênh djwýnh ne me kute Jeju marmê abenkam bikâr ne ate ajte memã 'êx ban arĩk ar ban memã mýjja punu'ã àpnênh ba. Nhym kam Djuda arkum,

—Kati, Metĩndjwýnh amrêbê kute me axwemã o pãnhja pumũ. Dja ĩ prĩne me jadjwýo bikênh mex ne. Be, ar ga dja gar Jeju'ã angrã tỳx nhym Metĩndjwýnh dja ar arôrôkbê ar akukrà gar aku'ê tỳx. Nãm ã Djuda arkum ane.

<sup>1</sup> Ba ibê Djuda. Ibê Jeju Kritu nhõ àpênh. Ibê Xijagu kamy. Ba ne ba pi'ôk no'ôkka ar amã ikabên jarê. Metĩndjwýnh, me Babãm arým amijo ar apytàn amimexo ar ajo mex nhym Jeju Kritu amim ar apytâr mex ne ar ajo ba.

<sup>2</sup> Gê Metĩndjwýnh tu kum ar akaprĩ:kumrêx\* ne kum ar ajabê:kumrêx gar adjumar mexo amũ amikamên arým adjumar mexkumrêx ne.

*Me kute axwe'ã memã àpnênh.*

*A Ped 2.1*

<sup>3</sup> Akmere, àpnhĩre ar, Metĩndjwýnh ne kute Krituo me bakunĩ pytâr. Nãm bãm amibêx ne bit ije ar amã 'ã pi'ôk no'ôko inhỹrmã. Ba nhỹn arým me kute ar anoo biknor prãmja man amim,

—Kati. Dja ba arkum me kute ar noo biknor jarê. Ne arkum, “Wãnh ne me ar akwý anoo biknoro ba. Kritu ne gwaj bamã amijã ujarênh pydjĩn arê gwaj babê Kritu nhõ me ja baje mar pydjimã nhym me arým 'êx. Ne kam ta amijo Kritu mar mex ne arĩk kupa'ã ar amã 'ã ujarênh punun ar

anoo biknoro ba. Me kute ar anoo biknoro baja dja gar me 'ãno djan mã akabêno me ity gê me anhikrê.” Nãm bãm ã amikabên maro anen arým ar amã arê.

<sup>4</sup> Me kute ar anoo biknorja ne me kum Metĩndjwýnh kĩnh kêt ne amipdjur mex ne ar akôt wangijn ar amê akã. Nãm me amakkre kêt ne ar amã,

—Ar rã'ãn aben prõ, aben mjên kupê. Gêdja Metĩndjwýnh ate krã. Arým ne tu kum ar akaprĩn ar amã ajaxwe kêt jarênhkumrêx. Nãm me ã ar amã ane. Ne kam arým Bênjadjwýr djwýnh japrý. Kubê ne Metĩndjwýnh. Nãm me Metĩndjwýnh pydji japrý. Ne ajte Bênjadjwýr djwýnh bê Kritu japrýn ar'ã memã kum,

—Djãm mrãmri ne Kritu ar ba? Kati. Nãm me 'êx, ane. Amrêbê me kêttri ne Metĩndjwýnh arým me ja'ã amim karõ. Me biknor tokry djãmã kute me anormã ne me'ã amim karõ.

*Apýnh me tũmre djãri jaxwe'ã ujarênh.*

*Mat 7.21; A Ped 2.3; Dju k 3.6*

<sup>5</sup> Ba ar amã me kwý biknor'ã ajarê gar ama. Gar te arým aje me'ã ujarênh mar ba ajte ar amã me'ã ajarê gar ama.

Be, Bênjadjwýr djwýnh arým pykabê Edjitu kurũm mebê idjaero katon me utã. Ne kam arým me amakkre kêtõ akno. Me kute amim mar kêtjao akno.

<sup>6</sup> Nhym Metĩndjwýnh kadjy mrãnh djwýnh jaxwedjwý arým àpênh djã kanga. Nãm me amijo àmra ban àpênh djã kanga nhym pãnh arým me biknor tokry djâkam me kumên arým akamãt kô tykkam mebê ijê. Nãm mebê ijê tỳx kute mrãmri ne me kute kãxirãxo me uwprekam kute mebê ijê tỳxja pyrãk. Õ akati rax me'ýr bõx kadjy mebê ijê. 'Ãtũm nhym Metĩndjwýnh kute memã axwe pãnh jarênh djã nhõ akati me'ýr bõx kadjy.

<sup>7</sup> Krĩraxbê Xôtõmamê Gomoramê bu'ã krĩdjwý, kam me axwe ne me prõ djwýnh, mjên djwýnh kupa'ã ari abeno ngjêxo ba. Metĩndjwýnh kute me ipêx kupa'ã ne me my ta kute abeno ngjêx prãmikumrêx nhym me niredjwý ta kute aben kupênhõ ikwã prãmikumrêx. Me baje amikajmãtã me mar

\* **1:2** Djãm ar ga ne gar adjukaprĩ nhym pãnh arým kum ar akaprĩ Kati. Ar ga ne gar adjukaprĩ kêt. Ta ne tu kum ar akaprĩkumrêx.

kadjy ne Metĩndjwỳnh arỳm memã axweo pãnh. Kuwyo memã o pãnh nhym kam kuwyo meo ajkamuw nhym me mrãmri arỳm biknorkumrẽx.

<sup>8</sup> Me kute me anoo biknor prãmja ne me me ja kôt axwe. Nãm me biptiro ikwãn arỳm amijo àpnun amibu'ã meo àpnu. Ne kum me bẽnjadjwỳr kurẽn kàjkwakam me rũnh'ã kabẽn punu.

<sup>9</sup> Be, Mĩgeubê ne Metĩndjwỳnh kadjy mrãnh djwỳnh raxja. Djã ne Mĩgeu Xatana-jmã kabẽn punu jarẽ? Kati. Amrêbê: ne me bakukãmãre Mõdjê arỳm ty nhym kam Mĩgeumê Xatanaj ar Mõdjê nhĩ'ã aben maro dja. Djã ne kam Mĩgeu tu kum kabẽn punu jarẽ? Kati. Nãm kum,

—Gê Metĩndjwỳnh ta amã akij, ane. Jabit ne arê.

<sup>10</sup> Nhym be, me kute ar anoo biknor prãmja ne me tu mỳjja'ã kabẽn punu ba. Me kute me mar kêt kam ne me tu me'ã kabẽn punu ba. Nãm me mry djumar djào umar. Mry kute amidjwỳnhbit mar ne tu ar ba. Nhym me mry kôt kute amidjwỳnhbit mar ne tu ar ban arỳm kôt amijo àpnu.

<sup>11</sup> Ý watĩre, Metĩndjwỳnh dja me biknor tokry djakam me kurê. Amrêbê: ne me bakukãmãre Kaĩ axwe:. Nhym me kute ar anoo biknor prãmjadjwỳ ne me Kaĩ kôt ar amijo ba. Amrêbê: ne me bakukãmãre Barão kum nêkrẽx prãmje tu me noo aknon meo ajkê. Me kute ar anoo biknor prãmjadjwỳ ne me Barão kôt kum nêkrẽx prã:m ne ar anoo biknoro ba. Amrêbê: me bakukãmãre Kore ne kute amijo rax prã:m ne arỳm bẽnjadjwỳr'ã kabẽn punu ba. 'Ã kabẽn punu ba:n kam arỳm akuno. Me kute ar anoo biknor prãmjadjwỳ ne me Metĩndjwỳnh'ã kabẽn punu ba. Dja me 'ã kabẽn punu ba:n ì arỳm Kore kôt me biknor tokry djakam akuno. Metĩndjwỳnh'ã kabẽn punukôt arỳm akuno.

*Me kute me noo biknorja me ro'ã bikàr.*

*A Ped 2.13*

<sup>12</sup> Ar amã aben jabêkam gar aro'ã ar anhõ kwỳ krẽno akrĩ. Nhym me kute ar anoo biknorjadjwỳ ne me pijàm kêt ne arỳm ar aro'ã aku. Ar akĩnhkumrẽxo akrĩ nhym me arỳm amipunuo ar ajo àpnu. Ga, me kà mexkam ngrã kute o punuja pumũ. Me

kute ar anoo biknordjwỳ ne me ã ar ajo àpnuo ane. Amipunuo ã me ajo àpnuo ane. Nhym me te: me kabẽn mex jabej mekam ama:n arỳm kaprĩre ne. Ga, kôk djabêrkam kakrã kakrãtyk ba kajgoja pumũ. Nhym me te: na bixadjwỳrkam aman kam arỳm kaprĩre ne. Me kute ar anoo biknordjwỳ ne gar ã mekam akaprĩo ane. Nãm me kajgo kute mrãmri ne pidjô kunĩ ô kumexkam ja pydji ô kêt ne ãm pyrãk. Pidjô tu tykkumrẽx nhym me arỳm kraxmê arêmê ro'ã kaba. Nãm me kute urãk ne tu kajgokumrẽx. Dja me arỳm me biknor tokry djakam akuno.

<sup>13</sup> Nãm me ta ar ba kute mrãmri ne ngô djàkrêkam ngô djakà ari aben pymjỳr pyrãk. Ga, ngô djàkrê apêx nhym arỳm akàxkam mỳjja punu kumexja pumũ. Nãm me kabẽn punu jarẽnho ku'ên o ino re nhym me arỳm pijàm ne, kabẽn punukam pijàm ne. Me kute ar anoo biknor prãmja ne me arĩk ba nhym me te: kute mekôt katàt amijo bamã. Me kute mrãmri ne kanhêtire arĩk ba pyrãk nhym me te: kute omũnh mex ne kute 'ã amimrãnh jakremã. Metĩndjwỳnh ne arỳm amim me axweja pãnh'ã karôkumrẽx. Akamàt kô tyk pytĩkam dja me kurê. Dja kam akamàt kô tyk rã'ã nhym me kator kêt kumrẽx.

<sup>14-15</sup> Adão ar amikam kra jadjuw nhym arỳm abatãnh ne. Abatãnh ne arỳm amikam kra jadjuw. Kra jadjuw nhym arỳm abatãnh ne. Abatãnh ne arỳm amikam kra jadjuw. Ne amũ aben nhijuk'ã kra jadjwỳro tẽ. Adjwỳro tẽ:. Adjwỳro tẽm tãmtã kam arỳm 7'ỳr o bôx. Aben nhijuk'ã krakam kra'ã akren arỳm 7'ỳr o bôx. 7'ỳr o bôx nhym me arỳm krajamã Enoki jarẽ. Enoki ajte me kute me noo biknorja'ã memã kum,

—Ë, Bẽnjadjwỳr djwỳnh dja Metĩndjwỳnh nhõ me ja krãptĩ: kubê 10.000mê ro'ã bôx. Ne kam arỳm me kum Metĩndjwỳnh kĩnh kêtja kunĩmã axwe pãnh jarẽ. Apỳnh me àpênh jaxwe djari pãnh memã arê. Metĩndjwỳnh'ã kabẽn punuja kunĩ pãnh memã arê nhym me arỳm amijaxwe ma. Nãm ã me bakukãmãre Enoki memã ane.

<sup>16</sup> Me kute me anoo biknor prãmja ne me bẽn prĩkam kabẽn ban apỳnh mỳjja'ã kabẽn punu prã:m. Me kute amidjwỳnhbit markam ne me kum apỳnh mỳjja punu



prām ne kôt ar amijo ban amijo àmrati ba. Ne kam me ò nêkrêx kumex pumün amim,

—Ba gêt tãmwã kôt ar amijo iba. Ne kam arým inhõ mýjja kumex ne kôt irax. Nãm me ã amim anen kam kum me ò nêkrêx ngrireja kĩnh kêtumrêx. Me kum me ò nêkrêx kumexjabit kĩho ba.

*Me kute Jeju markumrêx djàpênh'ã memã karõ.*

<sup>17</sup> Akmere, àpnhĩre ar, ar ga dja gar atemã amijo tẽ. Bẽnjadwýr djwýnhbê Jeju Kritu kute ar anorja dja gar ar kabên mar týx.

<sup>18</sup> Nãm ar arým me'ã ar amã ajarẽ. Me kute ar anoo biknor prãmja'ã ajarẽ. Nãm ar ar amã,

—Dja Jeju bõx 'ýr nhym me arým gwaj bajaprý:o ba. Dja me amidjwýnhbit man kum mýjja punu prãm ne kôt ar amijo ba, ane.

Kritu kute ar anorja ne ar ã ar amã ane. Dja gar ar kabên mar týx. <sup>19</sup> Me kute ar anoo biknor prãm ja ne me abenbê me kurêo ba. Ne pykakam mýjjakôtbit amijo ba. Nhym Metĩndjwýnh Karõ kute meo ba kêtumrêx.

<sup>20</sup> Akmere, àpnhĩre ar, ar ga dja gar atemã amijo tẽ. Kritu kabên mexkumrêx. Tãm dja gar tu amim markumrêx ne amim kabên maro tẽ:n amũ maro amikamên mar rax ne. Metĩndjwýnh Karõ dja gar aman Metĩndjwýnhmã akabên aba nhym Karõ arým ar akôt o kangõ.

<sup>21</sup> Metĩndjwýnh kum gwaj bajabê. Ar gadjwý dja gar amã abê rã'ã ne 'ã adjukanga kêt. Ne Bẽnjadwýr djwýnhbê Jeju Kritu jabej ajkam ama. Ta dja bõx ne kum gwaj bakaprĩkumrêx gwaj kôt batĩn ne ar baba rã'ã: rã'ã ne.

<sup>22</sup> Me kwý kute amim Jeju mar kêtja dja gar amã me kaprĩn 'ýr me o akêxo tẽ gê me tu amim markumrêx. <sup>23</sup> Nàr, dja gar ano katon me axwebê me kwýo akêx. Me kwý kute amijo punu mexja. Me ja on biknor karõ dja gar memã ano katon me axwebê meo akêx. Kute mrãmri ne me'õ kuwykam ãm nhym me kum kaprĩn kam no kator ne kute pa 'amýnh ne bõm mênh pyræk. Dja gar me punu kôt ar apunu'õ pymaje amijã ano týx ne.

<sup>24</sup> Metĩndjwýnh ne kute amim ar apytàr mexkumrêx gar kam ajmã akute kêt ne

katàt ar amijo aba rã'ã ne. Metĩndjwýnh ra:x nhym me kum uma:. Dja amimexo ar ajo mex gar arým ajaxwe kêt. Nhym kam arým amikabem ar apumjuwn arým prĩne ar ajo kĩ:nhkumrêx. <sup>25</sup> Me Batĩndjwýnhbê ne me bapytàr djwýnh. Pydji kute mýjja kunĩ mar ne krã me:xkumrêx. Ba kum,

—Mrãmri ame:xkumrêx ne apyma:kumrêx. Araxo abê kumkatikumrêx. Me kunĩ:mã Abẽnjadwýr djwýnhkumrêx. Ajitý:xkumrêx. Amexmẽ apymamẽ abẽnjadwýrmẽ atýxmẽ ne ga aje 'ã aminhinomã amimênh kêtumrêx, ane. Gê me kunĩ ã Metĩndjwýnhmã ane. Tãm ne ja.

## Mýjja apôx kêtri kukâm 'ã ujarênh ne ja.

Bênjadwýr Jeju Kritu ne Djuãomã, ò àpênhbê Djuãomã mýjjao amirít. Me kute Jeju mar kêtja ne me me kute amim Jeju marjao bikênh ar o ba. Nhyr kam Jeju kute ò me jao tỳx nhyr me akubyn tỳx ne kute kanga kêt kadjy Djuãomã mýjjao amirít. Te me kute meo bikênhkam mã Jeju'ã ngràn kute kanga kêt mã kum o amirít. Anhýr djwýnhràr kum o amirít, abentã kum o amirító tẽ, mýjja'ã akreo tẽ. Ò me jabit kute mýjja mar nhyr me kâtambê bipdjurmã ne apýnh mýjja djari'ã mýjja jakre. Bir, nhyr mýj ne Djuão omũ?

Metíndjwýnh kute me axwemã o pãnh ne tu kute mýjja jaxwe kunĩ kuwo imòkam rênh nhyr apêxmã. Nhyr kute Xatana-djwý bñ nhyr kêt nhyr kam pyka ajte nyn tu mexkumrêxmã ne kum o amirít. Ne kum kàjkwadwý jakre. Metíndjwýnh kute ò me jao kñhmã, me 'ã ngrà tỳx ne kute kanga kêtja, me tãm ne kute meo kñh nhyr me kàjkwakam ò pykakam kñhkumrêx ne ar ba rã'ã rã'ãmã. Kam ne me mexbit ar ban kam kanê kêt ne tyk kêt ne mýr kêt. Mýjja punu 'ýr àr kêt kam. Ja kunĩ ne kum o amirít, apôx djwýnhràr kum o amirít. Nhyr Djuão me kadjy omũ. Mýjja apôx kêtri ne anhýr djwýnhràr omũn memã arẽ. Tãm ne ja.

*Me kute pi'òkjakôt amijo baja dja me kñh.*

<sup>1</sup> Jeju Kritu kute mýjjao amirít ne ja. Metíndjwýnh ta ne Jejumã arẽ nhyr kam amidjó'ã ajte kute ò àpênhamã o amirítmã, nhyr kam me kute marmã. Apýnh mýjja djari dja ì apôx, amikrà kêt ne apôx nhyr anhýr djwýnhràr arým kute memã o amirítmã. Imã ne arým o amirít ba kam ije me amã arênhmã. Ba ibê Djuão ne ba Metíndjwýnhmã idjápênh, imã ne o amirít ba ije me amã arênhmã. Nãm iwýr kadjy mrãnh djwýnh jano nhyr kam imã mýjja kunĩ jakre ba kam kôt omũ. <sup>2</sup> Ije arým kunĩ pumũnhkam dja ba prĩne me amã kunĩ jarẽ. Metíndjwýnh kabên ne ba arým ije me

amã arênhmã. Jeju Kritu kute katàt kabên jarênh tãm dja ba me amã arẽ.

<sup>3</sup> Metíndjwýnh kute anhýr djwýnhràr mýjja'ã memã ujarênh ja gédja me'ò memã arẽ nhyr kute arênh djwýnh tãm gédja arým Metíndjwýnh kum kñh jadjã. Nhyr me kute mar ne kôt amijo bajadjwý gédja Metíndjwýnh memã kñh jadjã. Dja amẽ aro kñh, me kute 'ã ujarênh djwýnh kñh ne kam ajte me kute maro ýr jadjwýo kñh. Bir, arým 'ýr. Arým Metíndjwýnh kute memã mýjja anhýr djwýnhràr arênh ja arým apôx 'ýr.

*Djuão apýnh me kute Jeju'ã abeno bikprôn djari kubê 7mã kabên.*

<sup>4</sup> Ba ibê Djuão ne ba ar amã pi'òk no'òk ne. Ar ajte amim Jeju mar ne apýnh ajte kôt aben pydjija, ar amã ne ba pi'òk no'òk ne. Pykabê Adjikkam apýnh krĩ rũnhkôt ar ajte 'ã abeno abikprônho 7ja me amã ne ba pi'òk no'òk ne.

Gê Metíndjwýnh ukapríkôt me ajo djuw mex ne ar me ajo ba ne me amã umar mex jarẽ ga me adjumar mex ne ar aba. Metíndjwýnh ta ne tñn ne ar ba, amrêbê adjakamã tñn ne ar ba. Dja mrãmri tñn rã'ã rã'ã. Tãm dja ukapríkôt me ajo djuw mex ne me amã umar mex jarẽ.

Nhyr Metíndjwýnh Karõ kute amijo 7 ne Metíndjwýnh krĩ djã kônkh ku'ê tãm gédja adjwýnhdjwý me ajo djuw mex ne me amã umar mex jarên ar me ajo ba.

<sup>5</sup> Nhyr Jeju Kritudjwý dja me ajo djuw mex ne me amã umar mex jarẽ. Jeju Kritu ta kute mrãmri katàt memã Metíndjwýnh kabêno amirít djwýnh ne kumrêx tyk ne akubyn tñn ne kator gédja Metíndjwýnhmẽ Metíndjwýnh Karõmẽ kudjwa me ajo djuw mex. Jeju ne bênjadwýro kute me bênjadwýr kunĩ jakrenh ne pyka kuníkôt me ò bênjadwýro ba. Tãm dja Metíndjwýnhmẽ Metíndjwýnh Karõmẽ kudjwa me ajo djuw mex ne me amã umar mex jarẽ.

Jeju Kritu ta ne kum me bajabêkumrêx ne amikamrôo me bajaxweo ajngrà. <sup>6</sup> Ne kam ajte ta ar me bajo ban kam Bãmmã me bapumjuw gu me kam babê me kadjy Metíndjwýnh mar djwýnh ne Bãmmã badjápênh ar baba. Kumã, Jeju Kritu

tämmã gora gê me kàjmã kum rax jarënh rã'ã rã'ã. Gêdja umao ar me bajo ba rã'ã rã'ã. Mrãmri. Tãm ne ja.

<sup>7</sup> Ori, amrë tẽ. Kakrãkôt ne amrë tẽ. Me kunĩ dja me omũ. Me kute Jeju kanhwýr djwýnhjadjwý dja me omũ, prĩne Jeju pumũ.

Nhym apýnh pyka djãri dja me kunĩ omũn amra, Jeju pymaje àmrao kumex. Mrãmri dja me kunĩ omũn amim ngryk ne àmrao kumex. Be, tãm ne ja.

<sup>8</sup> Bënjadjwýrbê Metĩndjwýnh ne memã kum,

—Ba ibê mýjja kunĩ krax ne ajte ibê mýjja kunĩ ênhôt, ane.

Nãm ã Metĩndjwýnh tỳxo kubê kumkati ane. Metĩndjwýnh, ta ne tĩn ne ar ba, amrëbê adjakamã tĩn ne ar ba. Dja mrãmri tĩn rã'ã rã'ã. Ajbit ne umao mýjja kunĩ pytà.

### *Jeju Djuãomã amijo amirĩt.*

<sup>9</sup> Nã, ba ibê me akamy Djuão. Nãm me Jejukôt me akudjwa ijo ajkẽ ba itokry. Mrãmri ne Jeju me baro'ã me bapytãn ar me bajo ba. Ba kam me akudjwa mã Jeju'ã ingrã tỳx ne 'ãno djan ije kanga kêt. Ba ne ba apêxtibê Paximukam ar ba. Na bãm memã Metĩndjwýnh Kabën jarën memã Jeju'ã idjujarënh iba. Nhym kam me ja ngryk ne kam imã,

—Kwãrĩk wãnh mýjja wã jarënh kêt, ane. Ne kam ipa 'amýn kam ijo tẽn apêxti jakam imẽ ba kam kam ar iba.

<sup>10</sup> Be, pi'ók kamrëkkam, Bënjadjwýr nhõ akatijakam ne ba arek maro nhỹ nhym Metĩndjwýnh Karõ ar ijo ba. Ba kam me'õ kabën ma. Me'õ kabën tỳx kute poti kakôr tỳx pyrãk. Ikôt ne imã kabën ne. Ne imã,

<sup>11</sup> —Ba ibê mýjja kunĩ krax ne ajte ibê mýjja kunĩ ênhôt. Ba ren ije kãjkwamẽ pykamẽ omũnh 'ãno idjãm kêt nhym ren amrëbê amijo ajkẽ nhym ren mýjja kunĩ kêt ne. Ë, amrë tẽn mýjja pumũn 'ã pi'ók no'ók, ane. 'ã pi'ók no'ók ne kam memã ano. Me kute amim Jeju mar ne apýnh kute kôt aben pydji, me jamã dja ga ano. Me kute apýnh krĩ rũnhkôt 'ã aben pydjibê 7, ar kute Epexukam 'ã aben pydjijamẽ, ar kute Emĩnakam 'ã aben pydjijamẽ, ar kute

Pegamukam 'ã aben pydjijamẽ, ar kute Xijirakam 'ã aben pydjijamẽ, ar kute Xadjikam 'ã aben pydjijamẽ, ar kute Pirapijkam 'ã aben pydjijamẽ, ar kute Raodjikam 'ã aben pydjijamẽ, mekmã dja ga aje mýjja pumũnhja'ã pi'ók no'ók ne ano, ane. Nãm ã imã kabën ane.

<sup>12</sup> Ba kam 'ýr akẽx. Ije mýj me'õ kute imã kabënja pumũnhmã 'ýr akẽx nhym ngõnhpõkti kubê 7 ne ku'ê ba omũ. Kën karýro ngõnhpõkti.

<sup>13</sup> Nhym kam ipõkri dja. Kute me'õ my pyrãk ne dja. Nãm kubêkã ryti jadjãn o dja. Kubêkã rytija ne parkõn 'ãnh itep nhym 'ã dja. Ne kën karýro amirunh pren 'ã dja. <sup>14</sup> Ne kĩ jaka: kute àk kaka jaka ja pyrãk. Kute kadjãt nhĩ jaka pyrãk. Nhym no põkja kute kuwy põk pyrãk. <sup>15</sup> Ne par jadjënh. Kute ngõnh nhipex djakam me kute 'ã ngrão põx nhym adjënh pyrãk. Nhym õkrekam krikrit kute ngõ rãrãkti: pyrãk. <sup>16</sup> Ne ubõkjao kanhêtireo 7 ne 'amýn o dja nhym kam aktã kãx djwa mextire ajkwa krekre kurũm kato. Ne nokre jadjënh kute kãjkwa nhipekri myt mrãnhkam adjënh ja pyrãk.

<sup>17</sup> Ba omũn kam itu mýrbê tỳm kute ityk pyrãk ne itu mýrbê tỳm ne nõ, itĩn prãme. Nhym kam ta ijã ikra dji, ubõko ijã ikra djin kam imã,

—Kwãrĩk wãnh atĩn prãm kêt. Ba ibê mýjja kunĩ krax ne kam ajte ibê mýjja kunĩ ênhôt. <sup>18</sup> Bajbit ne ba ije amitĩn mar. Arým ne ba ty ne kam arým ajte itĩn ne. Amrë ipumũ. Ba dja ba itĩn rã'ã rã'ã. Ba ne ba ikabëno me tyk kadjy me anor djwýnh ne kam ajte ikabëno me tyk nhõ pyka'ýr me anor djwýnh.

<sup>19</sup> Aj, dja ga on 'ã pi'ók no'ók, aje omũnhja'ã pi'ók no'ók ne. Arým kator ga aje omũnhjamẽ mýjja kraxje kator kêt rã'ãmẽ. Amẽ dja ga 'ã pi'ók no'ók ne. <sup>20</sup> Mýkam ne ba kanhêtireo 7 idjubõko 'amýn o dja ga omũ? Ne kën karýro ngõnhpõktio 7jadjwý, mýj ne ja? Bir, ba amã arẽ ga ama. Ë, ngõnhpõktio 7ja ne kubê apýnh krĩ djãri me kute amim imar ne kute ikôt aben pydji 'ã akre kubê 7. Apýnh krĩkam me kute ikôt aben pydji'ã akre kubê 7 ne ja. Nhym kanhêtireo 7ja ne kubê apýnh krĩ djãri me kute ijã abeno

bikprônhja kadjy mrãnh djwýnh ta ne 'ã akre, ane.

Nãm ã Jeju imã kabên ane ba kuma.

## 2

*Epexukam ar ja arým kum Metĩndjwýnh kĩnh ngrire.*

<sup>1</sup> Nhym kam ajte imã,

—Ë, ar kute krĩraxbê Epexukam amim imar ne kute ikôt aben pydjija kadjy mrãnh djwýnhjamã dja ga pi'ók no'ók ne. Dja ga arkum ikabên jarê. Ba ibê Bẽnjadjwýr Jeju dja ga arkum ikabên jarên arkum, “Ë, ba ije idjubôko kanhêtireo 7 ne 'amýnhja, ne ba kên karýro ngônhpôktio 7kam imrãnhja, ba. Ba ne ba ar amã ikabên ne.

<sup>2</sup> Gar ikabênkôt ar amijo aba ba arým omũ. Ar adjápênh rax, ar aje ijãno adjãm ne aje ikanga kêt ba arým omũn kam ikĩnhkumrêx. Nã gãm ar abê me axwe kĩnh no kati ba arým omũ. Nhym me wã we kute 'Jeju kute ar ijanor' anhýrja gar te kabên mex jabej kam aman kam arým prĩne mekmã akato. Me wã ne me 'êxnĩkumrêx. Me tãm ne gar arým mekmã akaton abê me kĩnh no kati. <sup>3</sup> Nã gãm ar ijãno djan amibê ijo abiknor kêtumrêx ne. Nãm me ikôt ar ajo ajkê gar tu ate akrãn aje amibê ikanga kêt ba arým omũn kam ikĩnhkumrêx ne.

<sup>4</sup> Bep mýjja pydji ne ba omũn ikaprĩre. Amrêbê ar aje amim ijo amirĩt totokbê ne gar amã ijabê ne jakam arým amã ikĩnh ngrire. <sup>5</sup> Gop ar amim akaton wãnh ajaxwemã anhiren iwýr amijo akêx. Nã gãm ar ibê amiptâr mex ne. On ar ajte akubyn amã ijabên kam ajte akubyn imã apê kute amrêbê imã ar adjápênh ja pyrãk. Dja gar ã anhýr kêt ba wãm ar awýr tẽn kam ar abê ngônhpôktiwã kaba nhym arým ãm djã kaprý.

<sup>6</sup> Nhym bep me punubê Nikôrij, me tãm, me kabên punu ar baja. Me tãm ne gar me kabên punukam amã me kurêkumrêx. Mrãmri, kam ne mexkumrêx. Mrãmri ne gar amã me kabên punuja kurêkumrêx. Kam ne mexkumrêx. Badjwý ne ba imã mekbê Nikôrij me kabên punukam imã me kurêkumrêx.

<sup>7</sup> Gora ar ajamak mex jabej on ama. Metĩndjwýnh Karô ne ar kute amim imar ne apýnh kute ikôt aben pydjijamã kabên. Gora ar prĩne kabên ja ma. Ë, ar me kurãm atýx ne aje ijãno adjãm, ar gajbit dja ba ar amã pidjô kute meo tĩnja jarê gar gajbit ku. Pidjô kute meo tĩnja ne Metĩndjwýnh nhô pykakam dja, kãjkwakam Metĩndjwýnh nhô pyka mexkumrêxkam. Tãm dja gar ku”, ane. Nãm ã Jeju imã kabên ane. Ba ibê Djuão ne ba kuman ar amã arê.

*Emĩnakam ar ja tokry.*

<sup>8</sup> Nhym kam Jeju ta ajte imã,

—Ë, krĩraxbê Emĩnakam ar kute amim imar ne kute ikôt aben pydjija kadjy mrãnh djwýnhjamã dja ga pi'ók no'ók ne. Dja ga arkum ikabên jarê. Ba ibê Bẽnjadjwýr Jeju dja ga arkum ikabên jarên arkum, “Ë, ba ibê mýjja kunĩ krax ne kam ajte ibê mýjja kunĩ 'ênhôt. Ba ne ba tyn kam ajte itĩn ne. Ba ne ba ar amã ikabên ne.

<sup>9</sup> Me kute ar ajo bikênhja ne ba arým omũ. Ar anhô mýjja kêt, anhô nêkrêx kêtja ne ba arým omũ. Nhym bep kati, nĩjar anhô nêkrêx kumex. Mrãmri pykakam ar abakam arým anhô mýjja kêt nhym bep kãjkwakam anhô mýjja kumex. Nhym me kwý ta amijo Metĩndjwýnh kra, amijo mekbê idjaer ne ar ajaprý ar o ba, ba arým omũ. Djãm mekbê Metĩndjwýnh kra? Kati, Xatanaj nhô ãpênh ne wã ne kam mã kôt ar aben pydjio ba. <sup>10</sup> Kwãrĩk wãnh gar amã me uma kêt. Gora ar atýx. Dja me ĩ ar ajo ajkê ga ar atokry. Gora ar atĩn prãm kêt. Ë, godja me ĩ Xatanajbê me axwe nhô bẽnjadjwýr kabênkôt mekbê ijê djãkam ar akwý rê, ar aje ikanga jabej. Be, akati kunĩkôt dja me ar ajo ajkê gar atokry. Nhym kam arým me kute ar ajo bikênh'ã akatibê 10 nhym kam me arým ar ajo bikênh kêt ne. Gora ar ijã angrã týx ne ijãno dja. Godja me te ar apa gar ijãno dja ba kam pãnh ar ajo tĩn gar atĩn rã'ã rã'ã.

<sup>11</sup> Gora ar ajamak mex jabej, on ama. Metĩndjwýnh Karô ne ar kute amim imar ne apýnh kute ikôt aben pydjijamã kabên. Gora ar prĩne kabên ja ma. Ë, ar me kurãm atýx ne aje ijãno adjãmja, ar gajbit dja gar atyk nhijukri ajte atyk kêtumrêx. Arkati”,

ane. Nãm ã Jeju imã kabên ane. Ba ibê Djuão ne ba kuman ar amã arê.

*Pegamukam ar ja kwý prô prãm.*

<sup>12</sup> Nhym kam Jeju ta ajte imã,

—Ë, ar kute krîraxbê Pegamukam amim imar ne kute ikôt aben pydjija kadjy mrãnh djwýnhjamã dja ga pi'ók no'ók ne. Dja ga arkum ikabên jarê. Ba ibê Bënjadjwýr Jeju dja ga arkum ikabên jarên arkum, “Ë, ba ne ba ar amã ikabên. Ba ijajkwa krekre kurũm aktã kàx djwa mextire kator djwýnh, ba ne ba ar amã ikabên ne.

<sup>13</sup> Xatanaj kute meo ba djãkam ne gar te ar aban amex rá'ã ba arým ar apumũ. Be, nã gãm ar ijã angrã týx ne aje amibê ikanga kêt. Djã nã gãm ar me kudjwa aminêje memã kum, ‘Jakam arým ije amim Jeju mar kêt. Arým imã kïnh kêt’, ane? Kati, ar aje ã memã anhÿr kêtumrêx. Nhym me arým ar anhõbikwa Æxipanh bï gar mã amã ikïnh ne aje ikanga kêtumrêx ne. Nã, Æxipanhdjwý kum me uma kêt ne tu memã ijarênh 'ãno dja nhym me kubï, wãkam, Xatanaj mõr djã wãkam. Nãm me te kubï gar mã amã ikïnh ne. Ba arým omũn ar akam ikïnh ne.

<sup>14</sup> Bep me kute me kabên punukôt amijo ba ja tãm ne ba imã me kïnh kêt. Ar akwý ne gar me bakukãmãre 'õbê Barãokôt ar amijo aba. Djãm Barão mex got. Nãm mekbê idjaer kurê djwýnhbê Barakimã mekbê idjaer'ã karõ. Kute mekbê idjaer o bikênhmã ne mýjja punu'ã kum karõ. Mekbê idjaer kute mry punu krênãmã, me kute mýjjao Metïndjwýnh karõ nhípêxjamã mry nhõr ja kute krên ne amijo bikênhmã. Ne ajte me kute abenbê prõo àkïnh ne arïk prõ prãmõ kumexmã. Me kute ã amijo bikênho anhÿrmã ne me'ã kum karõ. Nhym kam ô'ã Baraki mekbê idjaero bikênh o ba. <sup>15</sup> Nhym ar akamdjwý mekbê Nikõrij ã kabên ane, ã memã 'ã karõo ane. Nhym ar akwý kabên punu jakôt ar amijo ba.

<sup>16</sup> On ar amim akaton wãnh ajaxwemã anhiren iwýr amijo akêx. Dja gar amim akator kêt ba ar awýr bõx ne me kabên punuja'ýr iprõt ne. Ijajkwa krekre kurũm aktã kàxdjwa mextire katorjao dja ba me'ýr iprõt ne.

<sup>17</sup> Gora ar ajamak mex jabej on ama. Metïndjwýnh Karõ ne ar kute amim imar ne apýnh kute ikôt aben pydjijamã kabên. Gora ar prïne kabên ja ma. Ë, ar me kurãm atýx ne aje ijãno adjãmja, ar gajbit dja ba ar amã djwýbê mýj ne ja ngã, djwýo bipdjurja ngã gar krê. Ba kam ajte ar atýxmãbit apýnh kên mêre, kên jaka ngã. Ne kam ajte ar amã kên ja no'ók, apýnh ar anhidji ny'ã kên no'ók ne kungã gar kam omũ. Atemã me ja kute ar anhidji nyja mar kêt. Ar gajbit, ar atýxbit, ije apýnh ar amã kên nhõrja, ar gajbit dja gar apýnh aminhidji nyja ma”, ane. Nãm ã Jeju imã kabên ane. Ba ibê Djuão ne ba kuman ar amã arê.

*Xijxirakam Djedjabeu ar noo akno.*

<sup>18</sup> Nhym kam Jeju ta ajte imã,

—Ë, ar kute krîraxbê Xijxirakam amim imar ne kute ikôt aben pydjija kadjy mrãnh djwýnhjamã dja ga pi'ók no'ók ne. Dja ga arkum ikabên jarê. Ba ibê Bënjadjwýr Jeju dja ga arkum ikabên jarên arkum, “Ba ne ba ar amã ikabên ne. Ë, ba, ibê ne Metïndjwýnh kra ne ino pøk kute kuwy pøk pyrãk, ne ipar jadjênh kute ngõnh nhípêx djãkam me kute 'ã ngrão pôx nhym adjênh pyrãk, ba ne ba ar amã ikabên ne.

<sup>19</sup> Gar kôt amijo aba, ba arým omũn kam ikïnhkumrêx. Gar amã aben jabên amã Metïndjwýnh jabê ba arým omũ. Gar tu amim imarkumrêx ne ijã angrã týx ba arým omũ. Ar adjápênh rax ba arým omũ. Nã gãm ar ijãno djan amibê ikanga kêtumrêx ba arým omũ. Nã gãm ar ikôt amijo aba. Amrêbê ne gar ikôt amijo aba ngrire ne kam amijo tèn amijo tèn arým ikôt amijo amõr mex ne.

<sup>20</sup> Nhym bep mýjja pydji ne ba omũn ikaprïre. Nã gãm ar amã me'õ nibê Djedjabeu kïnh. Nãm we amijo Metïndjwýnh kabên jarênh djwýnh ne kam mýjja punu'ã inhõ àpênhmã karõn 'ã arkum apné. Inhõ àpênh kute abenbê prõo àkïnh ne ar prõ prãm ba ne kam kute amijo bikênhmã.

Ne kam ajte ar kute mry punu krênãm, me kute mýjjao we Metïndjwýnh karõ nhípêxjamã kute mry nhõr nhym ar kute krên ne o kute amijo bikênhmã. Nãm ã Djedjabeu inhõ àpênhmã mýjja punu'ã

karõo ane, ne ã 'ã arkum àpnêho ane. <sup>21</sup> Nã bãm te amiwýr kam ama. Kute amim kator ne wãnh axwemã irern iwýr amijo akêxmã te amiwýr kam ama nhym kute mjên prãm ja kanga kêt ne amim kator kêtikumrêx. Kum axwe kïnh rã'ã:

<sup>22</sup> Ë, dja ba nija'ýr bôx ne kam nôr djâkam kumê, nôr djâ tãm kam dja ba kumên kam prïne o ajkê. Me my kute nïnhjamê ro'ã dja ba prïne meo ajkê. Dja me kum axwe kïnh rã'ã ne nija kanga kêt ne iwýr amijo akêx kêt, ba kam prïne meo ajkê nhym me kam tokry. <sup>23</sup> Ne ni krajadjwý pyka mẽ o amrà. Apýnh ar aje amim imar ne ikôt aben pydjija kunï aje imã akator kadjy. Ba ije ar ajamakkre kadjwýnhbêmê anhôkre kadjwýnhbê aje mýjja mex nâr mýjja punu'ã amim karõ jabej ije ar akamũnh ne kôt ije ar anhï pýnhkôt ar amã o pãnh djwýnh. Gar kôt aje imã akator kadjy dja ba ni krajadjwý pyka mẽ o amrà.

<sup>24</sup> Bep ar aje me kabên punukôt amijo aba kêtjamã, wãkam, Xijxirakam ar aje me kabên punu kôt amijo aba kêtjamã dja ba ajte ikabên 'õ jarênh kêt. Mrãmri ne ar aje ikôt amijo aba ne ar aje Xatanaj kukràdjâ mar prãm kêt kam amexkumrêx. Nhym me ate we kute Xatanaj kukràdjâ bipdjurja marmã we, 'Mexkumrêx gu me kuma', anhýrja djâm me mex got. Axwe punu gar kôt amijo aba kêt kam amexkumrêx. <sup>25</sup> Gora ar mã ikôt ar amijo aban ijã angrã tỳx rã'ã: ba akubyn bôx.

<sup>26-28</sup> Ë, ar me kuràm atỳx ne aje ijãno adjãmja, ar aje ikabên mar ne aje ikôt amijo aba rã'ãn aje o atêm ne o atêm ne arým aje inomã mênhja, ar ajã dja ba bënjadjwýr rë gar kam inhijuk'ã meo aba.

'Apýnh me ba djâri dja gar meo aba, ar apymao meo aban meo aba tỳx ne. Meo aba tỳx ne, nhym me'õ axwe gar kam prïne o ajkê, me kute kàxo àbêr djào kute ngyo ngônhtoty ne prïne ka'êkja pyrãk. Dja gar ã meo aba tỳxo ane.'

Be, Ibãmbê Metïndjwýnh ne ijã bënjadjwýr mẽ. Dja ba kam amidjô'ã ar ajã kurê gar kam ikabênkôt meo aba. Dja ba kam ajte ar akïnh djâ kadjy ar amã umajýrtiredjwý ngã, akati maktã umajýrtire ja ngã.

<sup>29</sup> Gora ar ajamak mex jabej on ama. Metïndjwýnh Karõ ne ar kute amim imar ne apýnh kute ikôt aben pydjijamã kabên ne. Gora ar prïne kabên ja ma", ane. Nãm ã Jeju imã kabên ane. Ba ibê Djuão ne ba kuman ar amã arê.

### 3

#### *Xadjikam ar ja kute me tyk pyrãk.*

<sup>1</sup> Nhym kam Jeju ta ajte imã,

—Ë, ar kute krïraxbê Xadjikam amim imar ne kute ikôt aben pydjija kadjy mrãnh djwýnhjamã dja ga pi'ók no'ók ne. Dja ga arkum ikabên jarê. Ba ibê Bënjadjwýr Jeju dja ga arkum ikabên jarên arkum, "Ë, ba ne ba ar amã ikabên. Ba ije Metïndjwýnh Karõ kute amijo 7 ije amýnhja, ne ije kanhêtireo 7 ne amýnhja, ba. Ba ne ba ar amã ikabên ne.

Nãm me we ar amex jarê. Bep kati, ar ajaxwekam kute ar atyk pyrãk. Ba arým ar apumũ. <sup>2</sup> On ar ano mex, atïn rã'ãri, ne akubyn amijo tỳx, amijo mex, ar atyk kêttri. Nã gãm ar amijo aba punu ba te ar apumũ, te ar aje kôt amijo aba jabej te ar apumũ ne kam ar amã, 'Ë, Ibãmbê Metïndjwýnhmã ar amex kêtikumrêx', ane.

<sup>3</sup> Gop ar ajkam ama. Amrêbê me kute ar amã arênh gar arým aje markumrêx tãm dja gar tu markumrêx ne kôt amijo aba. Kôt amijo aban on wãnh ajaxwemã anhiren iwýr amijo akêx. Dja gar amim akator kêt ba kam ar ajaêrbê ar awýr bôx. Kute me àkïnhï me aêrbê kute mýjjao àkïnh ne kute mebê mýjja jamýnh ja pyrãk. Dja ba ã ar ajaêrbê ar awýr ibôxo ane. Dja gar ibôx djâkôt imar kêtikumrêx ba ar ajaêrbê bôx.

<sup>4</sup> Bep krïbê Xadjiwãkam ar angrêre ne gar amrãnh mexkumrêx rã'ã. Ne kam ar angrêre amrãnh mexkumrêx kute mrãmri ne me kute kubêkà mex, 'ã ngrã kêt kute angjênh ne 'ã mrãnhja pyrãk. Nã gãm ar ã amexo ane. Ar ga dja gar ikôt mrãnh ikudjwa kubêkà jaka jangij ne 'ã mrã. Nã gãm ar amrãnh mexkumrêx. Nhym kam kubêkà jaka kadjy ar amex. Tãm dja gar angij, amrãnh mex pãnh angijn 'ã mrã.

<sup>5</sup> Be, ar me kuràm atỳx ne aje ijãno adjãmjabit dja gar ã kubêkà jaka jangjênh ne 'ã amrãho ane. Ba kam pi'ók no'ókkam anhidji jarijwã o ibingrãnh kêt, me tïn

rã'ã rã'ã'ã pi'ók no'ókkam ar anhidjio ibin-gràn h kêt ne. Ne kam ajte dja ba Ibãmmã inhýtã ar ajarê, Ibãmmê Ibãm kadjy mrãnh djwýnhmê arkum inhýtã tu kàj bê ar ajarê ne kum, 'Be, inhô me ja ne me ja.' Be, dja ba ã kum ane.

<sup>6</sup> Gora ar ajamak mex jabej on ama. Metíndjwýnh Karô ne ar kute amim imar ne apýnh kute ikôt aben pydjijamã kabên ne. Gora ar prîne kabên ja ma", ane. Nãm ã Jeju imã kabên ane. Ba ibê Djuão ne ba kuman ar amã arê.

*Pirapijkam ar Metíndjwýnh kabênkôt amijo ba.*

<sup>7</sup> Nhyam kam Jeju ta ajte imã,

—Ë, ar kute krîraxbê Pirapijkam amim imar ne kute ikôt aben pydjija kadjy mrãnh djwýnhjamã dja ga pi'ók no'ók ne. Dja ga arkum ikabên jarê. Ba ibê Bênjadjwýr Jeju dja ga arkum ikabên jarên arkum, "Ë, ba ne ba ar amã ikabên. Ba imexo ipyma ne mrãmri ikabênkumrêx ne ijêxnhî kêtumrêx ne kam ar amã, 'Ba ne ba ije in-hingêt kukãmã Dawi nhürkwákam o kajkep djwýnh. Ba kikre'ã kuta nhyam mýj me'ô godja 'ã ijê? Ba 'ã ijê nhyam mýj me'ô godja 'ã kuta?'

<sup>8</sup> Bir be, gar ikôt amijo aba ba arým omũ. Djã nã gãm ar atýx kumrêx? Kati, kàjbê ar atýx ba arým ar apumũ. Nã gãm ar te atýx ngriren mã ikabênkôt ar amijo aban aje ikanga kêtumrêx ba kam ar amã, 'Ba gêdja ba ar amã kikre'ã kuta. Mýj me'ô gêdja ar abê 'ã ijê? Ba dja ba ar ajo iba. Mýj me'ô dja inê?' ane.

<sup>9</sup> Ë, Xatanaj nhô àpên h 'êxnhîja, kute kôt ar aben pydjio ba, ne me 'êx ne amijo Metíndjwýnh kra, kute amijo mekbê idjaer, djãm mekbê idjaer djwýnh got, me ja me tãm gêdja ba ar awýr me pa 'amýn meo môn ar akuka kôn h me umjuw nhyam me kam pijàm djaje ar akuka kôn h ibôn krîn ar amã arax jarên kam tu ar amarkumrêx. Imã ar ajabêkam kôt me kute mar ne kute ar ajã, 'Jeju kum ar abêja pumũ', anhýr kadjy dja ba ã meo ane.

<sup>10</sup> Ije ar amã, 'Dja me te ar ajo ajkê gora gar mã ijã angrã týx ne ijãno djan ikanga kêt', anhýrkôt ne gar amijo aba. Nhyam me te ar ajo ajkê gar mrãmri ijãno djan ikanga

kêt. Kam dja ba ar apytã. Ije me kunõ ibikên h kam dja ba arým ar apytã. Dja ba pyka kuníkôt ije me kabi kadjy meo ajkê. Dja ba apýnh pyka djari me kuní kabi, me kute imã kator kadjy me kabin meo ajkê. Nhyam bep ar amexbit dja ba ar apytã.

<sup>11</sup> Arým ibôx 'ýr. Gora ar arek ikabênkôt ar amijo aba rã'ã: ba kam ar amã o pãnh, ar amã ar akîn h djã ngã. Kwârîk wãnh me'ô ar abê ikurê kêt. Dja me'ô ar anoo aknon ar abê ikurê gar kam akîn h djã býr kêt ne. Dja gar arek amijo aban arým ikam amim akîn h djã by.

<sup>12</sup> Ë, ar me kurãm atýx ne aje ijãno adjãm, ar gajbit dja ba amim ar apumjuw, Ibãmbê Metíndjwýnh nhürkwátikam ar apumjuw gar aku'ê rã'ã rã'ã, kute Metíndjwýnh nhürkwátikam par pyrãk ne aku'ê, Metíndjwýnh kuka kôn h aku'ê rã'ã rã'ãn akator kêt. Ba dja ba ar ajã Ibãmbê Metíndjwýnh nhidji no'ók, ne kam ajte ar ajã krî nhidji no'ók, Ibãmbê Metíndjwýnh nhô krî mex nhidji dja ba ar ajã no'ók ne. Krî mexja, Djeruxarê nyja, Ibãmbê Metíndjwýnh kurũm rwýkja, kàjkwa kurũm rwýk, ja tãm nhidji dja ba ar ajã no'ók ne. Ne kam ajte ba aminhidji ny ar ajã no'ók ne, ar atýx ne aje ijãno adjãmja'ã aminhidji no'ók ne.

<sup>13</sup> Gora ar ajamak mex jabej on ama. Metíndjwýnh Karô ne ar kute amim imar ne apýnh kute ikôt aben pydjijamã kabên. Gora prîne kabên ja ma", ane. Nãm ã Jeju imã kabên ane. Ba ibê Djuão ne ba kuman ar amã arê.

*Raodjikam ar kute ngô kàjbê kangro pyrãk.*

<sup>14</sup> Nhyam kam Jeju ta ajte imã,

—Ë, ar kute krîraxbê Raodjikam amim imar ne kute ikôt aben pydjija kadjy mrãnh djwýnhjamã dja ga pi'ók no'ók ne. Dja ga arkum ikabên jarê. Ba ibê Bênjadjwýr Jeju dja ga arkum ikabên jarên arkum, "Ë, ba ne ba ar amã ikabên. Ba, ibê ne Mrãmri. Ba ije mrãmri katàt memã Metíndjwýnh kabêno amirît djwýnh ne ba mrãmri ikabênkumrêx. Metíndjwýnh kabênkôt ne ba ibê mýjja kuní nhípêx djwýnh.

<sup>15</sup> Gar ar aba ba arým ar apumũ. Djãm we ar amã ikurê nãr kon djãm we ar amã ijabê.

Arkati. Nã gãm ar amã ikurê kêt ne kam ajte amã ijabê kêt. Ar aje ngô kàjbê kangro pyræk, ajakry kêt ne kam ajte akangro kêt. Gop on ar ajakry nàr kon on akangro rax. Ba gop kôt kuma, ar apunu ma nàr kon ar amex ma. <sup>16</sup> Nhym bep kati, ar kàjbê akangrokam ije ar amar mex kêt. Kam dja ba ar ajo aptô. Ar ajakry kêt ne ar akangro kêt ne aje ngô kangro kajgo pyrækkam.

<sup>17</sup> Nã gãm we ar, 'Arým ne inhõ nêkrêx kumex. Nã bãm pñine inhõ mýjja aptã nhym kam kumex. Arým inhõ mýjja kunĩ bikàr ne ibê 'õ'ã kàtàm kêt.'

Kê, djãm ar aje amimar got. Nã gãm ar pñine amijo ajkê. Ne akaprĩ mex ne. Ne abikênh mex ne. Ar ano rã ne anhõ kubêkà kêt kam tu irãri ar abajakam. Djãm ar aje amimar kêt? <sup>18</sup> Kam dja ba ar amã mýjja jarên ar amã, 'Ë, on kên karýr mextireja, ngôn nhípêx djækam me kute 'a ngrão pòx nhym mextire ja dja gar 'ã ijwý ba ar amã kungã gar abyn arým amimex, arým abikênh kêt. Ne kam ajte ar kubêkà jaka'ã ijwý ba ar amã kungã gar kam arým angjê. Angjên irãri ar aba kêt kam apijàm kêt. Ne kam ajte ar anokam pidjý'ã ijwý ba ar amã kungã gar arým o amino dý ne arým ano mex.'

<sup>19</sup> Me axwe nêje ne ba memã ibên týt ne imã me kñhja ne ba memã uwêk màt ne. Kam dja gar on amim akaton wãnh ajaxwemã anhiren akubyn iwýr amijo akêx.

<sup>20</sup> Ë, gop ar ikabên ma. Ota ba arým ar awýr bôx ne kikre kabem dja. Ar ajõ imã kikre'ã ta. Ba wãm awýr wadjã gu baro'ã aben kuka kôn nhõ vanhõ kwý krêno nhý ga arým akĩ:nhkumrêx. Gop ar ajõ aje ikabên mar jabej, on kikre'ã ta." Nãm ã Jeju me kunĩmã kabên ane. Me kute Jejuo aminhõmã ne ã kabên jarênho ane ne kam ajte memã kum,

<sup>21</sup> "Ë, me me kurãm atýt ne aje ijãno adjãmja, me gajbit dja ba me amã arê ga me ikrĩ djækam inhikô'ã nhý. Me ga dja gu me ar meo baban bakabêno me ano. Me me bamã ãpênhmã dja gu me bakabêno me anor ar o baba. Ga ba itýt ne ije Ibãm 'ãno idjãm ne ije amijo imrãnh rã'ãn ije aminhinomã amimênhja pumũ. Ije kanga kêt ne ije aminhinomã amimênh ne kam Ibãm

nhikô'ã inhýr ne ije ikabêno me anorja pumũ. Dja ga me ã ikudjwa atýt ne ijãno adjãmno ane.

<sup>22</sup> Gora me ajamak mex jabej on ama. Metĩndjwýnh Karõ ne mete amim imar ne apýnh kute ikôt aben pydjijamã kabên. Gora pñine kabên ja ma", ane. Nãm ã Jeju imã kabên anen kam o ino re. Ba ibê Djuão ne ba kuman me amã arê.

## 4

### *Metĩndjwýnh krĩ djatikam nhý.*

<sup>1</sup> Nhym kam ijukri atemã mýjja kato ba omũ. Kàjkwakam kikre'ã 'yr ne dja ba omũ. Nhym kam ajte me'õ imã kabên ne, õbê kute imã kabênja, kabên kute poti kakôr týt pyræk, ta ajte imã kabên ne imã,

—Amrê tẽ ba amã mýjja jakre, mýjja kraxje kator kêt dja ba anhýr djwýnhrà mãm o amirĩt ga anoo anhýtã omũ nhym bep tũmrãm dja amirĩt ne, ane. Nãm ã imã ane.

<sup>2</sup> ã imã anhýrmẽ ro'ã Metĩndjwýnh Karõ iwýr ruw ne mã ijo tẽn ijo wabi. Nhym nĩjar kàjkwakam bẽnjadjwýr krĩ djã rax dja nhym kam arým me'õ kam nhý. <sup>3</sup> Me'õ ýrja ne adjênho tuknĩ. Kute kên ngrãngrãmẽ kên kamrêk kakrãtyk, o me ikrakam ràx ne o òkredjê karýr jadjên týt ja pyræk. Nãm ã me'õ ýrja jadjên kute kên ja jadjênja pyræk ne nhý. Nhym kam djwýngwýnh tĩre ne krĩ djãmã ipòk ne wajêt ne kam adjwýnhdjwý adjên. Kute atemã kên ngrãngrã 'õdjwý jadjên týt ja pyræk. Nãm ã djwýngwýnh tĩre adjên ã anen krĩ djã raxmã ipòk ne.

<sup>4</sup> Nhym krĩ djã raxjamã me krĩ djã kryre ipòk ne. Apýnh me krĩ djã kryre ku'ê djãri 'ã akrekam kubê 24. Nhym mebêngêtte kam krĩ. Kubêkà jaka jangij ne kam kam krĩ. Ne kên karýro krãdjê, bẽnjadjwýr krãdjê ne me kutu.

<sup>5</sup> Nhym krĩ djã raxja kurũm adjênho amikurwý ne kam krako dja. Kabên mẽ adjên mẽ krakmẽ o akà. Nhym krĩ djã rax kabem ne ngôn hpòktio 7 ne pôko ku'ê. Ngôn hpòktija kubê Metĩndjwýnh Karõ kute amijo 7ja. <sup>6</sup> Nhym ajte krĩ djã rax kabem ne mýjja karýr kute imõti pyræk ne nõ. Kute ixeo imõti pyræk ne nõ. Karýr kute kryt karýr pyræk ne nõ.



Nhym mýjja tîn amãnhkrut ne amãnhkrut ne krî djà raxmã ipôk ne, nhym ipôkri krî djà rax dja. Nhym mýjja tînja kute krî djãmã ipôkja îkam no kumex, ibũmkam non ôngãkkam no. <sup>7</sup> Nhym mýjja tîn kute-waja kute rop djãkrêbê rijão pyrãk, atãri ja kute mryti kra pyrãk, atãri ja nokre kute mebêngôkre\* nokre pyrãk nhym kute katêja kute ãkkajkritti tor pyrãk. <sup>8</sup> Nhym apýnh mýjja tîn djãri ara kumex. Ar î pýnhkôt ara kubê 6'ã kabên. Nhym arakam no kumex. Ara nhibũmkam no. Ara nhôkrekam no.

Ne ar ngrer ba. Ngrer ba rã'ã rã'ã. Kute ngrero ino rer kêtukumrêx. A'urimê akamãtmê kam ar ngrer ba rã'ã rã'ã. Nãm ar,

—Mex, mex, mex. Metîndjwýnh ne mexo umakumrêx. Nãm Bênjadjwýr raxkumrêx. Týxo kubê kumkati. Nãm tîn ne ar ba, amrêbê adjãkamã tîn ne ar ba. Dja mrãmri tîn rã'ã rã'ã.

Nãm ã ar ngrero ane, ã kute kum mex jarêho ane. <sup>9-10</sup> Mýjja tîn amãnhkrut ne amãnhkrutja ã kute krî djà raxkam ýrjamã mexmê umamê raxmê amikînh jarêho ane. Metîndjwýnh tîn ne ar ba rã'ã rã'ãjamã arê. Ar kute kum arênh kunîkôt ne mebêngêtte kubê 24ja tu mýrbê rôrôk ne. Krî djà raxkam ýrja kabem, pijãm djãje tu mýrbê rôrôk ne. Mrãmri ne Metîndjwýnh týxkumrêx ne tîn rã'ã: rã'ã. Kam ne kuka kônh mebêngêtte kubê 24ja pijãm djãje tu mýrbê rôrôk ne. Ne kam tu kabem krãdjê mexjamã ire. Tu kabem krãdjê mexjamã ire nhym wãnh ikwã. Nhym me kam kum mex jarê. Kum mex jarê ne kum,

<sup>11</sup> —Me inhô Bênjadjwýr, me Itîn djwýnh, gajbit ne ba me amã amextire jarên amã apymamê arax jarên amã atýx jarê.

Mýj me'ômê ne gar aje aben pyrãk? Kati, apydji.

Gajbit ne ga mýjja kunî 'y.

Gajbit ne ga tu amim mýjja kunî'ã karô nhym arým tîn ne apôx. Ga ne ga mýjja nhipêx nhym apôx, ane.

Nãm ã mebêngêtte kubê 24ja Metîndjwýnhmã mextire jarêho ane.

\* **4:7** Apýnh me ô pyka djãri kunîkôt ne me kunî bêngôkre. Kubêkã jakamê me kakrãtykmê me babêngôkremê ne me kunî: bêngôkre.

## 5

*Mrykî'ãtomti jabatãnh nyre kute pi'ôk byr.*

<sup>1</sup> Nhym kam krî djà raxkam ýrja ubôko pi'ôk no'ôk byn o nhý ba omũ. Nãm prîne pi'ôk no'ôko tuknî. Ôkremê ibũmmê prîne no'ôk. Ne kam krãkã'ã tom krîo tẽ. Abenmã mênh'ã tom krîo tẽ. 'A tom'ã akre kubê 7. Me'ô kute 'ãpre bônh ne omũnh kêt kadjy. <sup>2</sup> Nhym kam kadjy mrãnh djwýnh týxkumrêx ne katon kãj bê memã kabên ne memã kum,

—Mýj me'ô ne mexkumrêx ne kam kute pi'ôk no'ôkja'ã 'yrmã? Kute 'ã oy djã rênhmã? ane. <sup>3</sup> Nãm ã anen kam te me'ô mex jabej me kabi. Kute pi'ôk no'ôk'ã oy djã rênh ne omũnhmã. Nãm kãjkwakammê pykakammê pyka kadjwýnhbê me jamê te kadjy me kabi. Ne me'ômã kator kêtukumrêx.

<sup>4</sup> Kam ne ba arým muw. Me'ô mexkumrêx kute pi'ôk no'ôk'ã 'yr ne omũnh 'ô kêtka ne ba arým imýro dja.

<sup>5</sup> Nhym kam mebêngêtte 'ô imã,

—Amýr kêt. Ê, Djuda nhũrkwãkam me'ô, Dawi tãmdjwý 'ô dja pi'ôk no'ôk'ã kuta. Týxkumrêx, umakumrêx. Kute rop djãkrêbê rijão pyrãk. Tãm, ajbit, ne týxkumrêx ne meo apan kam kute pi'ôk no'ôk'ã oy djãbê 7 rênh ne kute pi'ôk no'ôk'ã 'yr ne kute omũnhmã.

Nãm ã imã ane ba kam kuma.

<sup>6</sup> Nhym kam Metîndjwýnh krî djãti nhipôkri Mrykî'ãtomti jabatãnh nyja dja ba omũ. Nhym kam kute me kute Mrykî'ãtomti jabatãnh nyja bîn nhym ajte akubyn tîn pyrãk. Nhym mýjja tîn amãnhkrut ne amãnhkrutjamê mebêngêttêmê Metîndjwýnh krî djãtikam Mrykî'ãtomti jabatãnh ny djãmjamã ipôk ne dja. Nhym Mrykî'ãtomti bãrio 7 ne kam noo 7. Noo 7ja kubê Metîndjwýnh Karô kute amijo 7, tãm ne pyka kunîkôt ar mrã. <sup>7</sup> Nhym kam Mrykî'ãtomti jabatãnh nyja tẽn kubê pi'ôk no'ôk by. Krî djãtikam ýrja ne ubôko kum kungã nhym kubê kuby.

<sup>8</sup> Nhym byrmê ro'ã mýjja tîn amãnhkrut ne amãnhkrutmê mebêngêtte kubê 24jamê kabem tu mýrbê rôrôk ne. Apýnh ô pîjãbãre. Atemã pîjãbãre djê krãptî. Ne apýnh ô

ngôn. Kên karyro ngôn. Ngôn ja ne ipun dja. Kikre kudjy dja ne kam ipu ne. Mýjbê ne kikre kudjy dja? Me kabên. Metîndjwýnh nhô me ja kute kum kabên'ã ne kikre kudjy dja amijakre.

<sup>9-10</sup> Be, mebêngêtte nhô pîjâbàremê ngôn ipujamê ne me amýn kam ngrer ba. Ngrer ny ne me arênho ba, ne,

—Gajbit apydji ne ga amex ne aje pi'ók no'ók byrmã. Ga dja ga pi'ók no'ók byn 'ã ta. Arým ne me abî ga kam arým akamrôo meo pãnh ne me pa 'amýn me utàn Metîndjwýnh'ýr meo tẽ. Nã gãm me kwý ra:x ne me utà.

Apýnh mebêngôkre ba djari, apýnh amyn-gràri me ba djari, apýnh me kabên djari, apýnh me õ pyka djari kunîkôt ne ga me kwý pytàn Abãmmã me umjuw.

Nhym me kam kubê me kadji Metîndjwýnh mar djwýnh ne me banhô Metîndjwýnhma àpênh ba. Dja me Metîndjwýnh djô'ã prîne pykabê me ja o ba, ane.

Nãm ã mebêngêtte ar ngrer ba ane.

<sup>11</sup> Ba kam ajte omün kam me kanga ma, kadji mrãnh djwýnh kanga ma. Me krãptî kute pi'ô pyrãk. Kubê 1.000.000 krãptî. Me'ã akre krãptî: ne ba omün kuma. Djãm me krãre got. Nãm me krî djàtimê mýjja tînmê mebêngêttemê kum ipók ne. Ne kàj bê kabêno kumex, ne,

<sup>12</sup>—Mrãmri ne ga gajbit amex. Mýj me'õ got kute apyrãk?

Gajbit ne ga amexo me kunî jakre nhym me abî. Abê mrykî'ãtomti jabatàn ny pràbê abî.

Nhym kam Metîndjwýnh arým ajã bënjadwýr rax mẽ. Nhym kam apýnh me pyka djari kute õ nèkrêx amã kumex ga aje ar o abamã.

Ga gajbit ano mex ne atýx. Gêdja me amim ajarên ajo rax ne kãjmã akamên abenmã araxo amirît, ane.

Nãm ã kadji mrãnh djwýnh kabên ane.

<sup>13</sup> Nhym kam mýjja kunî kabên ne. Nhýnh ne mýjja 'õ kabên kêt ne? Kati, kàjkwakam mýjjamê pykakam mýjjamê pyka kadwýnhbê mýjjamê ngô raxbê pyka kêtka mýjjamê kunî ne ro'ã kabên ne,

—Gora gê me abenmã krî djàtikam ýrjamê Mrykî'ãtomti jabatàn nymê ar arê ne abenmã ar raxo amirît ne kãjmã ar kamê. Ar ajbit ne ar týx.

Gora gê me abenmã ar arê. Arkum rax jarênh rã'ã rã'ã ne.

Nãm ã mýjja kunî kabên ane ba kuma.

<sup>14</sup> Nhym kam mýjja tîn amãnhkrut ne amãnhkrutja kôt kabên ne,

—Mrãmri godja ã ane.

Nhym mebêngêtte kôt tu mýrbê rôrôk ne adjwýnhdjwý kum rax jarê.

## 6

### *Kute pi'ók no'ók'ã o y djà rênh.*

<sup>1</sup> Ba ibê Djuão ne ba arek omünho dja. Nhym kam Mrykî'ãtomti jabatàn nyja pi'ók no'ók'ã oy djà ta ba omü. Nhym kam mýjja tîn amãnhkrut ne amãnhkrut kumrêxja imã kabên. Kabên kute na krak pyrãk ba kuma. Nhym imã,

—Amrê tẽ, ane.

<sup>2</sup> Ba 'ýr tẽn omü nhym kawaru jakaja dja. Nhym me'õ 'ã nhý. Ó djudjê jamýn o nhý. Nhym me kum bënjadwýr krãdjê tu. Nhym kutun o nhý ne kam 'ã kawaru'ã tẽ. Kute me kunî 'ã amijo àptàr ne me'ýr prôt ne kute me par ne kute mekbê pyka pytãrmã ne tẽ.

<sup>3</sup> Nhym kam Mrykî'ãtomti abatàn nyja ajte pi'ók no'ók 'ã oy djà nwhitepã ja'ã kuta. Nhym kam mýjja tîn ja jatãrija imã kabên ba kuma. Nhym imã,

—Amrê tẽ, ane.

<sup>4</sup> Ba 'ýr tẽn omü nhym kawaru 'õ ajte dja. Kawaru kamrêk. Nhym me'õ 'ã nhý. Pyka kunîkôt me kute abenwýr prôt ne aben par kadji. Kadji ne me'õja kawaru'ã nhý. Nhym me arým kum kãxdjwa kajgo ngã, kãxdjwa kajgo jabatàn, rytire ne me kadji kum kungã.

<sup>5</sup> Nhym kam Mrykî'ãtomti jabatàn nyja ajte pi'ók no'ók'ã oy djà nwhitepã ja'ã kuta. Nhym kam mýjja tîn ja jatãrijadwý imã kabên ba kuma. Nhym imã,

—Amrê tẽ, ane.

Ba 'ýr tẽn omü nhym kawaru tykja ajte dja. Nhym me'õja 'ã nhý. Mýjja pytî'ã akre djà mýn o nhý. <sup>6</sup> Nhym mýjja tîn

amãnhkrut ne amãnhkrutja kurũm me'õ kabẽn ba kuma. Nãm,

—Ë, arým ne mekbê djwý kêt. Prãmkam ne me ar ba. Ota djwýbê trigu'ã akre pydji pãnh raxi. Pãnh me àpênh rã'ã nhym akamàt. Ne kam ajte djwý 'õbê xebada'ã akre amãnhkrut ne ikjêkêt adjwýnhdjwý pãnh rax. Pãnh me àpênh rã'ã nhym akamàt. Djwý kêtka, djwý kairekam. Nhym bep pidjõbê uba kangõmẽ mýjja kute rõny kangõ pyræk ja dja o bikênh kêt. Tãm dja kumex. O ne me ajne kêt. Kwãrĩk wãnh tãm mãn o bikênh kêt, ane. Nãm ã me'õ kabẽn ane.

<sup>7</sup> Nhym kam Mrykĩ'ãtomti jabatãnh nyja ajte pi'õk no'õk'ã oy djã nHITEPã ja'ã kuta. Nhym kam mýjja tĩn amãnhkrut ne amãnhkrut kute o ino rerja imã kabẽn ba kuma. Nhym imã,

—Amrẽ tẽ, ane.

<sup>8</sup> Ba 'ÿr tẽn omũ nhym kawaru rãrãrja ajte dja. Nhym me'õja 'ã nhỹ. Me'õ nhidjibê ne Tykre. Me tyk'ã amijakre. Nhym mýjja kute katẽn tẽmja. Me tyk nhõ pykamã me mrãnh kadjy ja ta ne kute katẽn tẽmja. Ar kute pyka kunĩkõt me kwý rax ne me parmã. Me kute abenwýr prõt ne aben par nhym djwý kêtka prãm kute me par nhym me kanêdjwý kute me par nhym pykakam mry djãkrêdjwý kute me par kadjy. Kadjy ne ar tẽ. Kam dja me kwý rax ne ty.

<sup>9</sup> Nhym kam Mrykĩ'ãtomti jabatãnh nyja ajte pi'õk no'õk'ã oy djã nHITEPã ja'ã kuta. Nhym kam kikre kudjý djã bõr djã krakri me karõ kumex. Mýj me karõ? Bir, me kute memã Metĩndjwýnh kabẽn jarẽnho ba nhym kam me kute me par, me tãm karõ ne kumex. Nãm me tĩn prãm kêt mex ne tu mekmã Metĩndjwýnh kabẽn jarẽ nhym kam me me kupa. Me tãm karõ ne kumex ba omũ. <sup>10</sup> Nhym me kãj bê kabẽn ne kum,

—Bẽnjadjwýr Pymati, gajbit amexo apyma ne katãt aje mekmã kabẽn jarẽn djwýnh, mã dja mytyrwý kute ga me ijo angryk ne pykakam me jao ajkẽ, me kute me ipar pãnh meo ajkẽ? ane. Nãm ã kikre kudjý djã bõr djã krakri me karõ ã kum kabẽn ane. <sup>11</sup> Nhym kam me'õ mekmã kubêkã jaka ngã ne memã kum,

—Ë, me arek atyk djã kêtõ akrĩ ngrire. Atyk djã kêt ngrire gẽ me me anhõbikwa paro tẽn inomã kumẽ. Me akõt me Metĩndjwýnhmã àpênh, me akamy paro tẽn inomã kumẽ, ane. Nãm ã me'õ me karõmã ane.

<sup>12</sup> Nhym kam Mrykĩ'ãtomti jabatãnh nyja ajte pi'õk no'õk'ã oy djã nHITEPã ja'ã kuta ba omũ. Nhym kam pyka kunĩ amingrêk ne. Amingrêk tỳ:x ne. Nhym kam mytjadjwý kakrãtyk ne wajêt. Nãm kute kubêkã pytĩ, kakrãtyk pyræk. Nhym mytyrwýjadjwý no tĩn, no kamrêk tỳx ne. Kute kamrõ pyræk. <sup>13</sup> Nhym kanhêtire jadjwý kãjkwa kurũm rõrõk ne. Pykakam rõrõk ne. Kute kõk djãbêr tỳx kute pidjõ ngrãngrã ka'urja pyræk. Nãm ã kanhêtire rõrõk ane. <sup>14</sup> Nhym kam kãjkwa ajmã nẽn nhĩ'ãm tẽn akuno. Nãm tu amijarõx ne kute me kute kupip jarõx pyræk, nhym kam krãnh kunĩ amũ ajkamẽn krĩ. Nhym apêxtidjwý kunĩ amũ ajkamẽn ikwã. Nãm krãnh amũ krĩ djãmã kre rũnh ne krĩ. Nhym apêxtidjwý ikwã djãmã kre rũnh ne ikwã.

<sup>15</sup> Nhym kam apýnh me ba djãri kam bẽnjadjwýr rũnhmẽ me kute meo ba djwýnhmẽ me krãkamngõnh nhõ bẽnjadjwýrmẽ me õ nèkrêx kumexjamẽ me àprãrmẽ me kunĩ, me kute me pa 'amýnh nhym memã àpênh kajgo ar bajamẽ me kute memã o pãnh kadjy àpênhjamẽ me kunĩ ne me amijo apdju. Me tĩn prãme amijo apdju. Nãm me kẽnkrekam amijo apdjun krãnhkam kẽn krakri amijo apdju. <sup>16</sup> Ne kam krãnhremã kabẽn ne kẽnãmã kabẽn ne kum,

—On me inhiby arõrõk ne me ijo apdju, me ipro. Krĩ djãtikam ýrjabê me ijo apdju ba me nokre pumũnh kêt. Mrykĩ'ãtomti jabatãnh nyjamẽ ar ngrýkbê me ijo apdju. <sup>17</sup> Arým ne ar ngrýk nhõ akati me iwýr bõx. Mrãmri ne ar ngrýkkumrêx. Mýj me'õ ne arkum ãmmã? ane. Nãm ã me kabẽn ane.

## 7

*Ar kute mebê 144.000 kuka'ã idji janhõr.*

<sup>1</sup> Nhym kam ijukri kadjy mrãnh djwýnh amãnhkrut ne amãnhkrut ne ku'ẽ ba omũ. Nãm ar apýnh ku'ẽ djãkam ku'ẽ. Nhym ja kãjkwa krax 'ãnh dja nhym ja kãjkwa nhõt 'ãnh dja nhym ar ja aktã kãjkwa nhirê'ãnh

dja ba omũ. Mýj kadjy ne ar ku'ê? Apýnh ar ku'ê djari kute kôkbê àptarmã. Pykakam àbêr kêt ne ngô raxbê pyka kêt kam àbêr kêt ne bàkam àbêr kêt kadjy. Kadjy ne ar ku'ê.

<sup>2</sup> Nhyam kam kadjy mrãnh djwýnh 'õ tẽ ba omũ. Kàjkwa krax kurũm ne kato ba omũ. Nãm ikrakam ràxo pi'òk no'òk djà byn o tẽ. O kute Metĩndjwýnh nhõ àpênh'ã idji janhôr kadjy, Metĩndjwýnh tĩnja nhõ àpênh'ã idji janhôr kadjy. Nãm kubyn o tẽn kam kàj bê arkum kabên. Metĩndjwýnh kadjy mrãnh djwýnh amãnhkrut ne amãnhkrutjamã kabên. Ar ja kute Metĩndjwýnh kabênkôt pykamẽ ngô raxbê pyka kêtõ bikênhmã. Ar kumã ne kàj bê kabên ne arkum,

<sup>3</sup> —Adjým, bar Metĩndjwýnh nhõ àpênh'ã idji janhômã, bar me banhõ Metĩndjwýnh nhõ àpênh'ã idji janhô gar kam pykamẽ ngô raxmẽ bàõ ajkê. Me kuka'ã dja bar me idji janhô, Metĩndjwýnh nhõ àpênh tamirít gar aje meo abikênh kêt kadjy. Gar kam arým pykao ajkê, ane. Nãm ã kadjy mrãnh djwýnh arkum ane.

<sup>4</sup> Nhyam ar me kwý krãptĩ kuka'ã idji janhô ba omũ. Me krãptĩ kubê 144.000 ne ar kuka'ã idji janhô. Nãm mekbê idjaer apýnh idji djari me kwý'ã idji janhô ba omũ.

<sup>5-8</sup> Mekbê Djudakam me kwý kubê 12.000.

Ne mekbê Rubênkam me kwý kubê 12.000.

Ne mekbê Gadjikam me kwý kubê 12.000.

Ne mekbê Axerkam me kwý kubê 12.000.

Ne mekbê Naptarkam me kwý kubê 12.000.

Ne mekbê Manaxekam me kwý kubê 12.000.

Ne mekbê Ximiãokam me kwý kubê 12.000.

Ne mekbê Rewikam me kwý kubê 12.000.

Ne mekbê Ixakakam me kwý kubê 12.000.

Ne mekbê Djeburõkam me kwý kubê 12.000.

Ne mekbê Jõdjekam me kwý kubê 12.000.

Ne mekbê Bẽnjamĩnkam me kwý kubê 12.000.

Be, nãm me abenã rôrõkkam 'ã akre kubê 144.000.

*Me krãptĩ: kubêkà jaka jangij.*

<sup>9-10</sup> Nhyam kam ijukri, be, me krãptĩ: ne me kumex ba me omũ. Axwe me krãptĩ. Nãm me te kute me'ã akremã. Djãm me krãre got. Nãm me kute pi'õ pyrãk ne kumex. Mýj xê ne kumex? Bir, apýnh mebêngõkre ba djari, apýnh amyngrãri me ba djari, apýnh me õ pyka djari, apýnh me kabên djari kunĩkôt ne me kwý Metĩndjwýnhõ aminhõn krĩ djãti kabem abenã rôrõk ne kumex ne Mrykĩ'ãtomti jabatãnh ny kabem kumex. Nãm me kubêkà jaka jangij ne o kumex ne bõ byn o kumex ne kam kàj bê kabên ne,

—Be, mrãmri ne me banhõ Metĩndjwýnh, ajbit kubê me bapytãr djwýnh. Tãm, krĩ djatikam krĩja, tãm.

Ne Mrykĩ'ãtomti jabatãnh nyja, tãm. Ar kubê ne me bapytãr djwýnh. Ar tãm ne ar ja, ane.

Nãm ã me krãptĩ kabên ane. <sup>11</sup> Nhyam kadjy mrãnh djwýnh kunĩ krĩ djãtimã ipõk ne kumex. Krĩ djãtimẽ mebêngëttemẽ mýjja tĩn amãnhkrut ne amãnhkrutjamẽ ne kadjy mrãnh djwýnh arkum ipõk ne tu mýrbê rôrõk ne kumex. Ne kam Metĩndjwýnhmã rax jarẽ ne kum,

<sup>12</sup> —Mrãmri. Kôt ne me ane. Gajbit ne ga mekmã amexo amiptã ba me abenmã amex jarẽho iba ne abenmã araxo amirít ne ano mex jarẽn kam amã amikĩnh jarẽn abenmã araxmẽ apyma jarẽn abenmã abẽnjadjwýr rax jarẽn abenmã mýjja 'õ abê bipdjur kêt kumrêx jarẽ.

Gora gẽ me kunĩ amã ja jarẽnh rã'ã rã'ã. Mrãmri. Godja ã ane.

Nãm ã kadjy mrãnh djwýnh ane, pijãm djãje tu mýrbê rôrõk ne ã kabên ane. <sup>13</sup> Nhyam kam arkubêngët'õ imã,

—Mýj xê ne kute kubêkà jaka jangjênh ne o kumexja? Mýj xê nã? Mýj kurũm ne me mõ? ane.

<sup>14</sup> Ba kam kum,

—Gêt kon, kubêngët. Gajbit aje mar, ane.

Nhyam kam imã,

—Me ja ne me prĩne meo ajkê. Nãm me prĩne me jao ajkê, meo bikênh rax ne. Nhyam me ja katon kam nĩnh mõn bõx. Arým ne me õ kubêkà põ nhyam kam aka

ne. Mýjo ne me kupõ nhym aka? Bir, Mrykĩ'ãtomti jabatàn ny kamrôo ne me kupõ nhym aka, ane.

Metĩndjwýnh kute memã axweo bin-gràn'h'ã ne kubèkà põnh nhym aka jakre.

<sup>15</sup> —Kam ne me Metĩndjwýnh krĩ djàti kabem kumex ne kam kum apê. Akatikam kum apê ne akamàtkam kum apê. Metĩndjwýnh nhũrkwãtikam ne me kum apê nhym bep krĩ djatikam ýrja dja umao me utàn ar meo ba. Ar me utàr mex ne meo ba.

<sup>16</sup> Kam dja me kum prãm kêtumrêx ne kum kôr kêtumrêx, nhym arngrod-jwý dja me bĩn kêtumrêx, nàr kon atemã mýjja kangro 'õdjwý me bĩn kêtumrêx. Mýkam?

<sup>17</sup> Bir, Mrykĩ'ãtomti jabatàn ny krĩ djàti nhipòkri ýrja, tãm dja ar me utàn meo ba. Kute mrãmri ne mrykĩ'ãtomtio ba djwýnh kute õ mryo ba ja pyræk.

Ne ngò kute meo tĩn kator djà'ýr dja meo mõ.

Nhym Metĩndjwýnh ta dja me kunĩ no kangò ku'õn memã no kangòo apêx nhym kam me mýr kêtumrêx, ane.

Nãm ã arkubêngètte 'õ imã kabèn mex jarènho ane.

## 8

### *Kute o y djà kute o ino rer'ã 'yr.*

<sup>1</sup> Nhym kam Mrykĩ'ãtomti jabatàn ny ajte pi'ók no'òk'ã oy djà kute o ino rer'ã kuta nhym kam kàjkwakam mýjja kunĩ anhikrè ne, nhym myt kwýr ngrire. <sup>2</sup> Nhym kam kadjy mrãnh djwýnh kubê 7, Metĩndjwýnh kabem ku'è djwýnh, ar ja ne ar ku'è ba ar omũ. Nhym kam Metĩndjwýnh arkum poti ngã. Poti kubê 7 ne apýnh arkum kungã nhym ar amý.

<sup>3-4</sup> Nhym kam kadjy mrãnh djwýnh 'õ kèn karýro ngòn ngrire byn o tèn o dja, kikre kudjý djà bôr djà'ýr ne o tèn o dja. Nhym kam me'õ kikre kudjý djà kwý rax ne kum kungã. Kute me kabènmẽ kikre kudjý djào bikàrmã ne kum kungã. Metĩndjwýnh nhõ me mexja kunĩ kute kum amijarènhmẽ kikre kudjý djà bikàr ne xèt

\* **8:9** Apýnh me õ pyka djari kunìkòt ne me kunì bêngòkre. Kubèkà jakamẽ me kakràtykmẽ me babêngòkremẽ ne me kunì: bêngòkre.

ne Metĩndjwýnh'ýr bôx kadjy. Krĩ djàti kabem ne kikre kudjý djà bôr djà dja. Kèn karýro ne adjènh ne dja. Kam ne kadjy mrãnh djwýnh kikre kudjý djàmã adjà nhym xêr nhym kam kudjýmẽ me kabèn ro'ã Metĩndjwýnh'ýr bôx. Kũmmẽ õ me ja kabènmẽ Metĩndjwýnh'ýr wabin 'ýr bôx.

<sup>5</sup> Nhym kam kadjy mrãnh djwýnh kikre kudjý djà kadjy ngòn byn kam kam kuwy mẽ. Kikre kudjý djà bôr djakam kuwy byn kam kikre kudjý djà kadjy ngònkam kumèn kam pykakam kumẽ, o pyka kòpènàt ne. O pyka kòpènàt nhym kam arým na krar ne rãræk ne adjènh nhym pykadjwý amingræk ne, tertet ne.

### *Potibê 7'ã ujarènh.*

<sup>6</sup> Nhym kam kadjy mrãnh djwýnh kubê 7ja kute apýnh õ poti kubê 7 kakòrmã.

<sup>7</sup> Nhym kam kadjy mrãnh djwýnh kutewa poti kakò. Nhym kam namê'ymẽ kuwy rôròk ne. Kamròmẽ akàn rôròk ne. Tu tỹmkumrêx ne. Nhym kam pyka kwý ra:x ne prĩne xêr. Pykamẽ bà nokà 'ýr 'ãnh ne xèt o ino re. Nhym bep bõ kunĩ ne prĩne xêr. Nhýnh ne bõre 'õ xèt kêt.

<sup>8</sup> Nhym kam atãri kadjy mrãnh djwýnhja õ poti kakò nhym kam atãri mýjja kute krãnhre jabatàn pyræk ne pòr ne mõn nox ne, ngò kòpènàt ne. <sup>9</sup> Ngò raxbê pyka kêtumrêx nox nhym kam ngò kwý ra:x ne kamrô, ngò nhikjèbit ne kamrô nhym ngòkam mýjja ar baja arým kwý rax ne ty, ngò ipòkri 'ýr ne tyk o ino re. Nhym kà rũnhjadjwý amijo ajkèn wangij, kà kute katè 'ýr ne ngjèxo ino re. Nhym kam mebêngòkre\* ar kàkam bajadjwý arým kòt ty.

<sup>10</sup> Nhym kam atãri kadjy mrãnh djwýnhja poti kakò. Poti kakò nhym kam kanhêtidjwý tỹm, kanhêtireti: ne tỹm. Pòkti: ne tỹm. Nãm kute me kute bô 'õ ngrãmã angjènh nhym pòk rũnh ja pyræk. Kàjkwa kurũm ne mõn tỹm. Ngò binhirènh kwýkam rôròk ne inore kwýkamdjwý rôròk ne. Ngò nhino kunìkam ne tỹm. Nhym ngò kwý rax ne mex rã'ã. <sup>11</sup> Kanhêtire nhidjibê ne ý. Nhym kam idjikòt ngò nhikjè ne ýkumrêx

ne. Nhym kam me kwý kräptñ ty. Ngô djý ne me o ikôn arým tyko kumex.

<sup>12</sup> Nhym kam atãri kadjy mrãnh djwýnhja ð poti kakô nhym kam mytdjwý kwý rax ne ajmã nën kam akamãt kô tyk ne, no nhikjêkambit ne akamãt kô tyk ne. Ne kam kãjbê pyka kurwý. Kurwý ngrire nhym mytyrwýmê kanhêtiredjwý kôt ã ane. Akatikam myt kãjbê irã nhym kam akamãt kô tyk ne. Nhym akamãtkamdjwý mytyrwýmê kanhêtire kãjbê irã nhym kam akamãt kô ty:k ne.

<sup>13</sup> Ba kam omũho dja nhym kam ãkkajkrittí kýjrũm ton mō. Kãjkwa tã mō ba omũ. Nhym kãj bê memã kabên, ne,

—Watĩre, watĩre, watĩre. Pykakam me ar baja watĩre. Arým ne kadjy mrãnh djwýnh kute katê amãnhkrut ne ikjêkêt kute poti kakôr 'yr, ane.

## 9

<sup>1</sup> Nhym kam atãri kadjy mrãnh djwýnh ð poti kakô nhym kam kãjkwa kurũm kanhêtire tým. Pykamã tẽn tým nhym me kum kam o kajkep djã ngã. Mýjkam o kajkep djã nã? Bir, kre ry typydjikam o kajkep djã. Kre krã'yr kêt, kre o ino rer kêt, kre ry typydjikam o kajkep djã ne me kum kungã.

<sup>2</sup> Nhym kam kam o kajkep ne 'ã kuta nhym kurũm kuwy kũm katon mō. Kre ryti kurũm ne kuwy kũm kato. Kute kikatire kũm pyrãk nhym kam kũmja kãjkwamê mytmê prĩne o akno nhym akamãt kô tyk ne.

<sup>3</sup> Nhym kam kũmja kurũm krytkanhê bixadjwýro kumex. Pykamã ne bixadjwýro kumex. Ne kam àkrê. Àkrê:kumrêx ne. Kute me kamjýrmã ne bixadjwýro kumex. Kute mrãmri ne pykabê makre kute me kamjýr nhym tokryja pyrãk. <sup>4</sup> Nhym kadjy mrãnh djwýnh krytkanhêmã kum,

—Kwãrĩk wãnh pykakam bõreo abikênh kêt, mýjja nhingrõto abikênh kêt, pĩo abikênh kêt. Me ajbit dja ga meo ajkê. Me kuka'ã idji kêtja, Metĩndjwýnh kute me kuka'ã idji kêtja, me tãmbit dja ga meo ajkê, ane.

<sup>5</sup> Nã, mrãmri ne krytkanhêja kute me kamjýr ne kute me kamjêro ba kajgomã. Kute me par kêtê. Nãm me kamjuw

nhym me tokry pymaje àmra ba'ã mytyrwý amãnhkrut ne amãnhkrut ne ikjêkêt. Nhym tokry: ne. Kute makre kute me kamjýr nhym tokryja pyrãk. <sup>6</sup> Nhym kam arým me te tyk prãme, krytkanhê kute me kamjýr ar o bakam te tyk prãme, te amitykkam ama ne, ne tyk kêtikumrêx ne.

<sup>7</sup> Mã ne krytkanhê kute? Djãm axwe uma? Nã, axwe uma. Nãm kute mrãmri ne me kute kawaru'ã aben par kadjy kute ngõho kubêkã kawarumã angjênh nhym kam uma ja pyrãk. Nhym krytkanhê mýjja kute me bënjadjwýr krãdjê pyrãkja tu. Kên karýro krãdjê ne kutu. Nãm krytkanhê no kre kute mebêngõkre nokre pyrãk. <sup>8</sup> Nhym kĩdjwý kute me nire kĩ pyrãk nhym wa kute rop djãkrêbê rijão djwa pyrãk. <sup>9</sup> Nhym ðkôt kã kute tepkã pyrãk, ngõho ne õngãkkã. Ne ara rãrãk týx ne. Kute mrãmri ne me kute abeno bakam kawarumê kãmranhtýx rãrãkja pyrãk.

<sup>10</sup> Nhym tey kute makre tey pyrãk. O kute me kamjýr ar o ba. Dja kute me kamjýr ar o ba'ã mytyrwý amãnhkrut ne amãnhkrut ne ikjêkêt, nhym tokry: ne.

<sup>11</sup> Krytkanhê nhõ bënjadjwýrbê ne kadjy mrãnh djwýnh, kre ry typydjikam kadjy mrãnh djwýnh. Idjibê ne O bikênh djwýnh, mekbê idjaer ne me ta kabênkam kum Abadõ jarê, nhym mekbê kregu kabênkam kum Apõri jarê. Nhym bep me babêngõkre kabênkam ne O bikênh djwýnh.

<sup>12</sup> Be, watĩre kutewa ne arým apêx. ãkkajkrittire kute memã “Watĩre” jarênhja kutewa arým apêx. Nhym bep watĩre amãnhkrut ne me'yr bõx kêt rã'ã.

<sup>13</sup> Nhym kam atãri kadjy mrãnh djwýnhja ð poti kakô nhym kam me'õ kabên ba kuma. Kikre kudjý djã bõr djã kurũm ne kabên. Kên karýro kikre kudjý djã bõr djã Metĩndjwýnh kabem ãmja, kurũm, anhã kurũm ne kabên kato ba kuma.

<sup>14</sup> Nhym kum, kadjy mrãnh djwýnh kute poti kakõrmã kum,

—On arkum anhire, kadjy mrãnh djwýnho amãnhkrut ne o amãnhkrut djuwprewã on arkum 'ãpre bõ gê ar wãm tẽ. Ngõ raxbê Jupraxikam me kute ar uwpre nhym ar ikwãwã, on arkum 'ãpre bõ gê ar wãm tẽ, ane.

<sup>15</sup> Nhyam kam arkum 'äpre bô nhyam kam ar mã mõ. Ar kute me imexmã ne ar mõ. Ar kute me kwý rax ne me imexmã. Ar kute me imexo tẽm ne me kuto katẽ 'ýr me paro krã'ymã. Kadjy ne me ar uwpre nhyam ar ikwã. Ar õ akati ar'ýr bôx nhyam ar kute me imexmã katon mõ. Arým ne ar õ amexmẽ ar õ mytyrwýmẽ ar õ akatimẽ ar õ myt arým ar'ýr bôx. <sup>16</sup> Nhyam ar õ krãkamngôn timer kumex. Krãkamngôn timer kawaru'ã krĩa ne kume:x kute pi'ô pyrãk. Nãm 'ã akre kubẽ 200.000.000. Me'õ ne 'ã akren imã arẽ ba kuma.

<sup>17</sup> Be, Metĩndjwýnh ne imã ar õ krãkamngôn timer jakre ba omũ. Ba kawarumẽ krãkamngôn timer pumũ. Kawaru kumex nhyam 'ã krãkamngôn timer kumex. Tãm ne ba omũ. Nhyam krãkamngôn timer aminhõkõt nẽje ngõnho inõkã jangij ne o kumex. Ngõnho inõkã kamrẽkmẽ ngrãngrã kakrãtykmẽ ngrãngrã kute mãn tu pyrãk. Nhyam krãkamngôn timer nhõ kawaru ja ne krã rũnh'ã kabẽn. Krã kute rop djãkrẽbẽ rijão krã pyrãk. Ne ajkwa kurũm kuwymẽ kũmmẽ kẽn ngrãngrã pôkmẽ apõxo kumex. <sup>18</sup> Apõxo kumex ne kam me kupa. Be, kuwymẽ kũmmẽ kẽn ngrãngrã pôko ne me kwý rax ne me kubĩ. Me kuto katẽ 'ýr ne me tyko ino re. <sup>19</sup> Kawaruja ne àkrẽkumrẽx. Ajkwakõt ne àkrẽ, amymẽ kõt. Aktã àkrẽ djãkõt ne me kupa. Amy kute kangã pyrãk. Amy kubẽ kangã krãdjwý o me kamjã.

<sup>20</sup> Nhyam me'ã kãtãmja, mýjja kute me imex kurãm me tĩnja, djã nãm me ja amim katon wãnh axwemã iren Metĩndjwýnh'ýr amijo akẽx got. Arkati, me ja ne me kute amim mýjja punu nhipẽxjamã irer prãm kêtikumrẽx. Nãm me mã ar me karõ punumẽ mýjjao metĩndjwýnh karõ nhipẽxmẽ arkum amijarẽnho ba, arkum rax jarẽnho ba. Be, nãm me kẽn karýro, kryt jakao, ngõn timer ngrãngrão, kẽn timer, pĩo metĩndjwýnh karõ nhipẽx ar o ba nhyam rĩt kêt ne umar kêt ne mrãnh kêt ne. Ja ne me kum amijarẽn ar o ba, kum rax jarẽn ar o ba. Me kute kum irer prãm kêtikumrẽx.

<sup>21</sup> Ne kam ajte me kute me parmẽ me udjymẽ me prõ prãmmẽ me mjẽn prãmmẽ me àkĩnhĩmẽ, ja ne me kute kum irer prãm kêtikumrẽx. Me kute kum irer ne Metĩndjwýnh'ýr amijo akẽxmã kute mar

kêtikumrẽx. Me axwebit ne me kum kĩnh. Nãm te Metĩndjwýnh kute mekmã uwẽk mãtmã.

## 10

*Kadjy mrãnh djwýnh kute pi'õk byr ne ãm.*

<sup>1</sup> Nhyam kam kadjy mrãnh djwýnh 'õ, tỳxikumrẽx ne ruw. Kãjkwa kurũm ne tẽn ruw ba omũ. Nãm kakrão prĩne amikunon kam djwýngwýnh timer tu. Nokre kute myt pyrãk, ne te kute kuwy pôko krĩkam kãjmã pôk ku'ẽn pôk jabjẽ ja pyrãk.

<sup>2</sup> Ne kam pi'õk no'õk ngrire byn o dja. Pi'õk no'õk arým koxen kubyn o dja. Ne kam te djubõk ngõ raxbẽ pyka kêt'ã djan te djuge atýxã dja. <sup>3</sup> Nãm te ajkij ne djan kam kãj bẽ kabẽn. Kãj bẽ kabẽn kute rop djãkrẽbẽ rijão kãr tỳxja pyrãk. Kabẽn nhyam kutã na krikrit ne. Nãm amipãnh kum kabẽn. Krikrit 'ã akre kubẽ 7.

<sup>4</sup> Na krikrit 'ã akre kubẽ 7 ne kabẽn, ba kam bit ije 'ã pi'õk no'õkmã nhyam kãjkwa kurũm me'õ imã kabẽn ba kuma. Nãm imã, —Kwãrĩk wãnh. Tu udju. Na krikritkam kabẽn'ã akre kubẽ 7 dja ga tu udju. Kwãrĩk wãnh 'ã pi'õk no'õk kêt, ane. Ba arým kuma.

<sup>5</sup> Nhyam kam kadjy mrãnh djwýnh ije omũnh tũmja, ngõ raxmẽ pykamẽ kam te bikjẽr ne ãmja, tãm ne kãjmã kãjkwamã ubõkja bẽn <sup>6-7</sup> mekmã kabẽn pydjĩn arẽn memã kum,

—Mrãmri godja mýjja amikrã kêtikumrẽx. Godja kadjy mrãnh djwýnh kute katẽ õ poti kakõ nhyam tebẽ mýjja kato. Metĩndjwýnh kute amrẽbẽ õ àpẽn timer, kabẽn jarẽn timer djwýnh timer arẽn timer dja on tebẽ kato, kute amitõ kêtẽ. Poti kakõ timer ro'ã dja mýjja bipdjur arým kato. Amrẽbẽ Metĩndjwýnh kute mekbẽ mýjjao bipdjurja ne on kute memã o katormã, ane. Nãm ã kadjy mrãnh djwýnh mekmã ane. Metĩndjwýnh ne kabẽn timer kumrẽx. Kõt dja mýjjao kato. Kam ne kadjy mrãnh djwýnh ubõko kãjmã Metĩndjwýnh jakren 'ã mekmã ujarẽn timer ku'ẽn mekmã kum,

—Metĩndjwýnh ne tĩn o ino rer kêtikumrẽx. Tĩn, tĩn rã'ã rã'ã. Ta ne kãjkwa nhipẽx ne kãjkwakam mýjja ar baja nhipẽx ne. Ne pykadjwý nhipẽx ne pykakam mýjja ar bajadjwý nhipẽx ne. Ne ngõ raxbẽ pyka

kêtdjwý nhípêx ne ngôkam mýjja ar bajadjwý nhípêx ne. Tãm dja amitô kêt ne on memã o kato, ane.

<sup>8</sup> Nhym kam kàjkwa kurũm kute imã kabên jarênh tũmja ajte imã kabên ne imã,

—Ajrã, on 'ýr tèn kute pi'ôk koxen o ãmwã by. Kadjy mrãnh djwýnh ngô rax nhípôkri te nhikjê djãm ne atýxã te nhikjê djãmwã ne kubyn o dja. 'Ýr tèn kubê aby, ane.

<sup>9</sup> Ba kam 'ýr tèn 'ã ku'uw ne kum,

—Imã pi'ôk no'ôk ngrire ngã, ane.

Nhym kam imã,

—Mĩ, amim abyn krê. Gora kunĩ krê. Atik kadjwýnhbê dja ý nhym bep ajajkwakam godja ànhkumrêx. Ành kute menh djành pyrãk. Mĩ, ane.

<sup>10</sup> Ba kam ikra kurũm kubê kaba. Pi'ôk no'ôk ngrire ne ba kubyn kukrê. Nhym kam ijajkwakambit ànhkumrêx, ành kute menh djành pyrãk. Nhym amũ itik kremã tým ne arým ý: ne. <sup>11</sup> Nhym kam imã,

—Be, dja ga ajte anhýr djwýnhràmemã Metĩndjwýnh kabên jarê. Kute apýnh me õ pyka djari, apýnh me ba djari, apýnh me kabên djari, apýnh me bënjadjwýr djari krãptĩkôt kute meo bikênhmã mekmã arê, ane. Nãm ã kadjy mrãnh djwýnh imã ane.

## 11

*Metĩndjwýnh nhõ àpênh amãnhkrut ar ujarênh ba.*

<sup>1</sup> Nhym kam me imã kô ngã, ije ùrkwãti'ã akre kadjy ne me imã kungã. Kute me àbêr djà pyrãk. Nãm me imã kungã nhym kam Metĩndjwýnh imã,

—Apa, on 'ýr tèn inhũrkwãti'ã akre, ane. Dja ga inhũrkwã'ã akren kam kikre kudjý djà bôr djà'ã akren kam me kute imã rax jarênhô bajadjwý 'ã akre.

<sup>2</sup> Nhym bep inhũrkwãti kre kênhbít dja wãnh 'ã akre kêt ne. Mýkam? Bir, arým ne me me bajtemmã kanga. Nhym kam me kute mekbê idjaer nhõ krĩ mexbê Djeruxarêo bikênhmã, õ krĩ mexo mexkumrêxbê Djeruxarê kute o bikênhmã. Kikre kunĩkôt dja me bajtem mrãnh prĩne kikreo ajkên kikre ngràn kam kôt inhũrkwãti kre kênhjao ajkê. Dja me kute o bikênh'ã na tým amãnhkrut ne ikjêkêt

ne kam ajte 'ã amex. Kam dja ba inhõ àpênh jano.

<sup>3-4</sup> Ba ne ba inhõ pyka djwýnh ne kam inhõ àpênh amãnhkrut kute pĩbê oriwêre amãnhkrut ikabem ku'êja pyrãk, ne kam ajte kute ngônhpôkti amãnhkrut ikabem ku'êja pyrãk, ar tãm dja ba ar ano, ar kute memã ikabêno amirĩtmã. Dja ar kubêkã kaprĩre jadjàn kam ikabên'ã ujarênh ar ba. 'Ã ujarênh ar ba'ã akati krãptĩ, kubê 1.260. 'Ã na tým amãnhkrut ne ikjêkêt ne kam ajte 'ã amex. Godja ã ar ikabên'ã ujarênh ane, ane. Nãm ã Metĩndjwýnh imã ane.

<sup>5</sup> Godja me'õ kute aro bikênhmã nhym kuwy pòk ar ajkwa krekrekôt katon me'õnh bã, prĩne ar kurê djwýnhja 'õ ga. Be, godja me'õ aro kurê djwýnh prãm nhym ar arým ã o bikênhô ane, prĩne kuga. <sup>6</sup> Nhym ar ta kabênkôt Metĩndjwýnh kàjkwa'ã ijê nhym na rwýk kêtumrêx. Ar Metĩndjwýnh kabên'ã ujarênh bari godja na rwýk kêtumrêx ne. Nhym kam ajte ar ta kabênkôt nhym ajte ngô kamrô. Nhym ar kabênkôt apýnh mýjja kute meo bikênh djari apôx ne pykao ajkê. Apýnh kute pykao bikênhmã mýjja apôx tẽ, aben nHITEPã mýjja apôx tẽ.

<sup>7</sup> Nhym kam ar Metĩndjwýnh kabêno amirĩto tẽ:n kam o amirĩt pa. O amirĩt pa nhym kam mrydjwaryre dja amim ar kurêtuw. Mrydjwaryre kre ry typydji kurũm katorja dja ar'ýr prôt ne týxo ar akrenh mex ne kam ar kubĩ.

<sup>8</sup> Nhym kam ar tyn nõ. Kikre nhípôkri dja ar tyn nõ. Krĩrax jabatãnhkam kikre nhípôkri nõ. Mýj krĩrax jabatãnh? Bir, kam ne me ar õ Bënjadjwýr pĩte'ykam kunhõ tãm. Kumã ne me idjibê Xôtômamê Edjitu jarê. Nãm me axwekumrêx ne Xôtômakam me ja jaxwe'ã amijakren kam ajte Edjitukam me ja jamakre kêt'ã amijakre nhym kam me krĩrax jamã idjibê Xôtômamê Edjitu jarê. Kam ne ar kute Metĩndjwýnh kabêno amirĩt djwýnh tyn nõ.

<sup>9</sup> Kam dja me kunĩ omũ. Apýnh me õ pyka djari, apýnh mebêngôkre ba djari, apýnh amynggrãri me ba djari, apýnh me kabên djari kunĩkôt dja me ar omũnhô kumex. Ar tykja pumũnhô kumex'ã akati



amãnhkrut ne ikjêkêt ne 'ã mêdjij. Nhym me abenmã,

—Kwãrîk wãnh ar adjàr kêt. Axuk wãnh ar nôre, ane. <sup>10</sup> Nhym kam pykakam me ar baja kînhkumrêx. Ar tyk ne nôrkam ar omün kînhkumrêx ne kam toro kumex ne kam abenmã nèkrêx ngã. Mýkam ne me ar tykkam kînhkumrêx? Bir, ar kute Metîndjwýnh kabên jarênh djwýnh ja ne ar pykakam me ar baja prîne ar meo bikênh ba. Kam ne me ar tykkam kînhkumrêx.

<sup>11</sup> Nhym ar tyk ne nôr'ã akati amãnhkrut ne ikjêkêt ne 'ã mêdjij nhym kam Metîndjwýnh ar akô, ar tîn kadjy ne ar akô nhym Metîndjwýnh djâkôr arkum wadjâ nhym arým ar ajte tîn ne ekrux ne kâjmã dja. Nhym kam me ar omün kam kum ar uma: ne. Kum ar uma tÿxkumrêx ne.

<sup>12</sup> Nhym kam kâjkwa kurüm me'õ kabên. Kâj bê kabên ne arkum,

—Apa, on ar amrê tẽ, ane.

Nãm ã arkum ane nhym ar kuma. Kuman kam tu kâjmã tẽ. Mã tẽn wabi. Kakrâkam ne ar tẽ. Nhym ar kurê djwýnh arek ar omünho kumex.

<sup>13</sup> Ar omünho kumex katikôt nhym pyka tertet ne. Tu tertet tÿx nhym kam kikre kwý ajkaten rôrôk ne me kwý rax ne me imex ne. Me kwý rax'ã akre kubê 7.000 ne me imex ne. Nhym me tyk kêtja, pyka tertet kute me par kêtja, me tãm ne me tîn prâmkam Metîndjwýnhmã rax jarên kum tÿx jarê. Metîndjwýnh nhõ kâjkwa djwýnhmã ne me kum rax jarê.

<sup>14</sup> Be, watîre nwhitepã watîre 'õ ne ja. Ota watîre kute katê rã'ã. Arým me'ÿr bôx 'ÿr.

*Kadjy mrãnh djwýnh kute katê kute õ poti kakôr.*

<sup>15</sup> Nhym kam kadjy mrãnh djwýnh kute katê õ poti kakô nhym kam kâjkwakam me kabên. Kâj bê kabên ne. Jejumê Bãm'ã ne me abenmã kum,

—Bãmbê me banhõ Bënjadjwýr ne krabê Kritu kute me bawýr anor, ar tãm ne ar arým pyka kunîkôt ar meo ba. Dja ar meo ba rã'ã rã'ã: ne, ane.

Nãm ã kâjkwakam me kabên ane.

<sup>16</sup> Nhym kam mebêngêt kubê 24 tu mÿrbê rôrôk ne. Metîndjwýnh kabem bënjadjwýr krî djâkam krîja me tãm ne me tu mÿrbê rôrôk ne Metîndjwýnhmã rax jarên kum,

<sup>17</sup> —Bënjadjwýr, Metîndjwýnh, atÿxo abê kumkati. Ga amrêbê: adjâkamã atîn ne ar aban mã atîn rã'ã.

Amã ne ba me amikînh jarê. Arým ne ga apymao amijo amirît mex ne aje ar meo abamo kraxmã.

<sup>18</sup> Apÿnh me ba djâri ne me ngryk ar ba, ga gadjwý arým angryk kato. Arým me tyk ne pykakam ikwãja nhõ akati me'ÿr bôx. Arým aje me tyk ne pykakam ikwãjao akator ne kam aje memã pãnh jarênhmã.

Nhym anhõ àpênhdjwý arým õ akati me'ÿr bôx. Anhõ àpênhmê akabên jarênh djwýnhmê anhõ me mextire jamê me kum apymaja kunîmê me kâtâmmê me rûnhmê. Arým me ja nhõ akatidjwý me'ÿr bôx, ga aje memã o pãnh nhym me kînhmã.

Nhym bep me axwe kute pykao bikênh djwýnhdjwý arým õ akati me'ÿr bôx. Ga aje me jao abikênhmã, ane.

<sup>19</sup> Nhym kam kâjkwakam Metîndjwýnh nhûrkwãti amijã kuta. Amijã kuta nhym kam pïo rara kên karÿro krâkà dÿjja, kam ne Metîndjwýnh kabên'ã kên no'ók nõ, pïo rara tãm ne amirît ne. Metîndjwýnh nhûrkwãtikam ne amirît ne. Nhym kam na adjênh ne rãrâk ne krak nhym pykadjwý tertet ne. Nhym namê'y rôrô:ko kumex.

## 12

*Me'õ niremê atemã mry kaàk'ã ujarênh.*

<sup>1</sup> Nhym kam mýjja pumünh kêt 'õ kâjkwakam kato. Mýjja rax 'õ ne kato. Me'õ ni ne myt jadjàn o dja. Ne mytyrwý'ã djan o dja. Ne kanhêtireo krâ djên kutu. Kanhêtire kubê 12 ne o krâ djên kutun o dja. <sup>2</sup> Arým tujarô tÿx. Arým kra rwýk 'ÿr ne kam kra àn tokry nhym amra.

<sup>3</sup> Nhym kam ajte mýjja pumünh kêt 'õdjwý kâjkwakam ajte kato. Ë, atemã mry kaàk kamrêk ne kato. Ti:re ane. Krâ kubê 7 ne kam kam bàri kubê 10. Ne krâ kunîkam me bënjadjwýr krâ djê tu. <sup>4</sup> Ne amyó kanhêtire kute katê 'ÿr ja kanhên bjêro mõ. Kâjkwakam kanhêtire bjêro mõn pykakam kumê. Ne kam ni kabem kra kadjy dja. Mýj kadjy? Bir, nija kra rwýk ne kam amako dja. Ni kra rwýk nhym on kute krênmã ne kam amako dja. Te kam ama.

5 Nhyim kam kra my ruw. Kute ar meo ban kabêno kute me anormã ne ruw. Apýnh me ba djari kunĩ dja ar meo ban kabêno me anon ar me axwemã bẽn tỳx ba. Djãm kute akrãnmã ar me axweo bamã? Kati, dja kàxo àbêr djào ar meo ba. Tãm. Tãm ne arým ruw nhyim arým Metĩndjwýnh amim kumỳ. Tu amim mýnhkumrẽx ne amiwýr o tẽ. Krĩ djati'ýr o tẽ.

6 Nhyim bep nãja ne katon prõt ne kapôt kukritmã kato. Nhyim Metĩndjwýnh arým kapôt kukritkam kutêp kum kikre. Kute o djuw mexmã ne arým kum kikre. Ne kam kam o djuw mex aro ba. Kute o djuw mex'ã akati kubê 1.260. Amex amãnhkrut ne ikjêkêt nhyim ajte 'ã na tỳm nhyim kam arek aro djuw mexo ba.

7 Nhyim kam kàjkwakam me abenwýr prõt. Mĩgeumẽ kadjy mrãnh djwýnhmẽ mry kaàkmẽ kadjy mrãnh djwýnhmẽ ar abenwýr prõt.

8 Nhyim bep kati, Mĩgeu ne ar tỳxkumrẽx nhyim te mry kaàkja kute ar parmã. Nhyim bep Mĩgeu ne ar tỳxo mry kaàkja jakre ne kàjbê me kumẽ. Nhyim kam kàjkwakam me ajte mrãnh kêtumrẽx. 9 Be, mry kaàk jabatànhtija ne me arým bõm kumẽ. Tãm, kangã tũmja kute me kàmex jarẽnh djwýnh, idjibê Xatanaj, kute me kunĩ noo biknor djwýnh, tãm. Tãm ne me bõm kumẽ, pykamã kumẽ, kadjy mrãnh djwýnhmẽ ro'ã ne me bõm ar kumẽ.

10 Nhyim kam kàjkwakam me'õ kabẽn ba kuma. Kàj bê kabẽn ne,  
—Ota arým me banhõ Metĩndjwýnh me utã. Arým ne umao me utãr mex ne. Djãm me banhõ Metĩndjwýnh rerek got. Dja prĩne umao me utãn ar meo ba. Nhyim Kritudjwý Metĩndjwýnh kute amikôt arja dja kabẽnkôt ar meo ba.

Ga arým me kute bõm mẽnhja pumũ. Kute me bakamy kàmex jarẽnh djwýnhja ne me arým bõm kumẽ. Nãm mã me banhõ Metĩndjwýnh jamakmã me'ã kabẽn ne te me banhõ Metĩndjwýnhbê me bakamy kurê. Nãm te kubê me bakamy kurê rã'ã nhyim akamãt ne akati nhyim

ajte kubê kurê rã'ã nhyim akamãt ne akati nhyim ajte tãm rã'ã ne.

11 Nhyim me bakamy tu kum ãm tỳx ne 'êxnhĩmã katon bõm kumẽ. Mýj kanàrrãm ne me bakamy kum ãm tỳx ne? Jeju ne mrykĩ'ãtomti jabatànhty'ã amijakren ty ne kamrõo meo pãnh. Kanàrrãm ne me tu kum ãm tỳx ne.

Xatanaj ne kute Jeju nhõ me ja par nhyim me kute umaje Jeju kangamã. Nãm te me kupa. Nhyim me Metĩndjwýnh kanàrrãm tu ate krãn Jeju'ã ngrã rã'ãn kàj bê memã Jeju'ã ajarê. Me tĩn prãm kêtumrẽx. Nãm me ã anen kam prĩne amim Xatanaj pyma ngrã ne kàjkwa kurũm bõm kumẽ.

12 Ë, kàjkwa, on akĩnhkumrẽx. Gê mebêngôkre\* akam ar bajadjwý akôt kĩnhkumrẽx.

Nhyim bep pykabê me ar bajamẽ ngõ raxkam me ar bajamẽ ne arým me kaprĩ 'ýr. Watĩre. Mýkam?

Bir, Xatanaj, kute me kàmex jarẽnh djwýnh, arým wãm me awýr ruw. Arým ngry:k ne wãm me awýr ruw. Arým ne tyk nhõ akatio rãm ne jan arým amima. Arým amiman kam ngry:k ne, ane.

Nãm me ã kàjkwa kurũm kabẽn ane.

13 Nhyim me arým bõm kumẽ nhyim arým mry kaàkja pykakam bõx. Bõx ne kam ni'ýr prõt ne. Kurũm kra my rwýkja'ýr prõt ne.

14 Nhyim kam àkkajkritti jara ne nija pakam apôx. Xatanaj nhidji amãnhkrut ne ikjêkêt. Idjibê kangã ne idji 'õdjwýbê mry kaàkja. Nhyim àkkajkritti jara nija pakam apôx, kangãbê tor ne kapôt kukritkam tẽm ne bõx nhyim Metĩndjwýnh kute o djuw mexmã. Kute o djuw mex 'ã amex amãnhkrut ne ikjêkêt ne kam ajte 'ã na pydji. Kadjy ne pakam ara apôx.

15 Nhyim mry kaàkbê kangãja kute nija bĩnmã aéro tẽn aby'ã ngõ kapĩ. Ngõ rax ne ajkwa krekre kurũm ajkapĩ. Kute 'ã ngõ tãm nhyim ngõ kute mã o mõr ne bĩnmã. 16 Nhyim bep kati, pyka ne nio õbikwan ngõmã ajkij nhyim kam ngõ wadjàn ngrã. Mry kaàk jajkwa krekre kurũm ngõja

\* 12:12 Apýnh me õ pyka djari kunĩkôt ne me kunĩ bêngôkre.

wadjàn ngrà. <sup>17-18</sup> Nhyam kam mry kaàk nijakam ngrý:k ne kam ãm ajbir tèn dja. Kute ni kra parmã ne dja. Mýj ni kra nã? Bir, me kute Metĩndjwýnh kabèn mar ne kôt amijo baja, ne kute mekbê amipdjur kêt ne Jejukam pijàm kêt ne tu kute memã arènhja, me tãm ne mry kaàk kute me'ýr prôt ne me parmã ajbir tèn dja, ngô rax mýrri dja, mekam amako dja.

## 13

### *Ngô rax kurũm mry'õ kator.*

<sup>1</sup> Nhyam kam ngô rax kurũm mry 'õ kato ba omũ. Nãm bàri kubê 10 ne krã kubê 7. Ne apýnh bàri djari bènjadjwýr krãdjê tu. Nhyam kam krã kunĩ'ã idji arij ne idjio Metĩndjwýnh djũn ne. <sup>2</sup> Nhyam mryja kute rop krori pyrãk nhyam parja kute mrybê uxu par pyrãk, parkop jabjêti. Nhyam bep ajkwa krekreja ne kute rop djàkrêbê rijão jajkwa krekre pyrãk. Nhyam kam mry kaàk mryjamã kum,

—Ikabènkôt dja ga meo aban ipymao apyman inhýr djakam memã nhý, ane. Nãm ã kum ane. <sup>3</sup> Nhyam mry krã 'õ ne tyn nõn kam ajte me aèrbê tĩn ne. Kute mrãmri ne me kute me par punukam me akubyn tĩnja pyrãk.

Nhyam kam me kunĩ, pyka kunĩkôt ari ar aben pumũn kam mry kabènkôt ar ban mã kôt ajkamẽ. <sup>4</sup> Mry kaàk kute mrymã kum,

—Ga dja ga ipymao apyman inhýr djakam nhýn idjõ'ã meo aba, anhýrja ne me mry kaàkmẽ arkum amijarènh ba. Nãm me mrymã amijarèn kum rax jarèn kam abenmã kum,

—Mýj me'õ ne mrymẽ ar kute raxo aben pyrãk ne ar abenwýr prôt nhyam kutã kum ãmmã? Arkati, ane. Nãm ã me abenmã ane.

<sup>5</sup> Nhyam kam mryja kabèn punubit jarènh ar o ba. Mry kaàk djõ'ã ne mryja kabèn punu ar ba. Nãm amijo rax ne ar Metĩndjwýnh japry o ba. Nãm ar meo ba, mry kaàk djõ'ã meo ba'ã amex amãnhkrut ne ikjêkêt ne naja kuto katẽ. Ne kam mytyrwý 'ã akrebê 42. <sup>6</sup> Nãm ar meo ban Metĩndjwýnh japry o ba. Nãm prĩne Metĩndjwýnh djũn ne idji japry ne kam ũrkwãbê kàjkwa djũn ne me kàjkwakam ar

bajadjwý djũn ne. Djãm mry kabèn mex got.

<sup>7</sup> Nhyam kam mry kaàk mrymã kabèn nhyam kam kabènkôt Metĩndjwýnh nhõ me ja'ýr prôt ne. 'Ýr prôt ne me kwý pan kàjbê me kumẽ. Ne kam kabènkôt, umakôt ar me kunĩo ba ne kabèno me ano. Apýnh mebèngôkre ba djari, apýnh amyngràri me ba djari, apýnh me õ pyka djari, apýnh me kabèn djari kunĩkôt ne ar meo ba. Mry ne amijo aptàn Metĩndjwýnh nhõ me jao ajkèn kam me kunĩo ba. <sup>8</sup> Nhyam kam pykabê me ja kunĩ dja me mrymã amijarènh ba ne kum rax jarẽ.

Nhyam bep me kwý, Jeju nhõ pi'ók no'òkkam me idji arijja, me ajbit dja me kum mry kĩnh kêt ne kum rax jarènh kêt ne. Jejubê Mrykĩ'ãtomti jabatàn nyja ne õ pi'ók no'ók. Kute pyka nhipêx kêttri ne Metĩndjwýnh arým amim me kute Jeju bĩn'ã karõ, me kute Jejuo mrykĩ'ãtomtin kute bĩnmã amim 'ã karõ ne arým anhýr djwýnhràk kuma. Be, Jeju kubê Mrykĩ'ãtomti jabatàn nyja ne õ pi'ók no'ók, me tĩn rã'ã rã'ã'ã pi'ók no'ók. Nhyam me tĩn rã'ã rã'ã kady pi'ók no'òkkam me idji arijja me tãm dja me mrymã rax jarènh kêt. Nhyam bep me idji'ã no'ók kêtja, me kunĩ dja me kum mry kĩnh ne kum rax jarèn kum amijarènh o ba.

<sup>9</sup> Gora me ajamak mex jabej on ama.

<sup>10</sup> Ë, dja me me kwýo rôrôk ne meo mrãn mekbê ijê.

Ne kam tu me kwý pa, kàxdjwa kajgoo tu me kupa.

Nhýnh me ja dja me meo rôrôk ne mekbê ijê ne kàxdjwa kajgoo me kwý pa?

Bir, Metĩndjwýnh kute amim me'ã karõja, me tãm dja me mekbê ijê ne me kwý pa.

Kam dja Metĩndjwýnh nhõ me ja kute tu amim Jeju markumrêx ne mã 'ã ngrà tỳx ne 'ãno ãm ne kute kanga kêt mã.

### *Mry 'õdjwý pyka kurũm kator.*

<sup>11</sup> Nhyam kam mry 'õ kato, mry kute katẽ pyka kurũm kato, ba omũ. Nãm bàri amãnhkrut kute mrykĩ'ãtomti jabatàn ny bàri pyrãk. Ne kabèn kute mry kaàk kabèn pyrãk. <sup>12</sup> Ne kam mry kaàk jatãri mryja

djô'ã umakôt ar meo ba. Ne kam me kunĩmã, pykabê me ja kunĩmã kum,

—On me mry kaàk jatãri mryjamã ami-jarênh o aba ne kum rax jarê. Mry krã 'õ tyk ne nõr ne kam ajte akubyn tĩnja on kum akabên ne kum rax jarê, ane. Ajrã, ane. Nãm ã mry kute katê mry kaàk jatãri mry ja'ã mekmã karõo ane.

<sup>13</sup> Ne kam mýjja pumũnh kêt kwý nhipê:x ne. Kwý rax ne ipêx ne. Nãm me ipôkri kuwyo ruw, kàjkwa kurũm pykamã kuwyo ruw. <sup>14</sup> Be, mýjja pumũnh kêtõ ne me noo akno. Nãm pykabê me kunĩ noo akno. Mry kaàk jatãri mryja kabênkôt ne mýjja pumũnh kêt kwý nhipêx ne, tãri ãmkambit ne mýjja pumũnh kêt kwý nhipêx ne. Ne kam mekmã kum, pyka kunĩkôt mekmã kum,

—On me mry kaàk jatãri mry ja karõ nhipêx. Mry me kute te kàxdjwa kajgoo krã jayr nhy m mã tĩn karõ dja ga me ipêx, ane. Ajrã, ane. Nãm ã mry kute katê mekmã ane.

<sup>15</sup> Nhy m kam me ipêx ne. Nhy m mry kute katêja mry karõ jakõ, mry kaàk jatãri mryja karõ jakõ nhy m arým tĩn ne arým akõn kabên ne. Nãm kabên ne memã me kwý'ã apnên mekmã kum,

—Tãmja kute imã amijarênh kêt ne kute imã rax jarênh prãm kêt. On dja ga me abĩ, ane. Nãm ã mry kaàk jatãri mryja karõ mekmã ane nhy m me kabênkôt arým me kwý pa.

<sup>16</sup> Nhy m kam mry kute katêja ne me kunĩ'ã idji janhõ. Nãm me ikra'ã idji janhõn me kuka'ã idji janhõ, mry kaàk jatãri mryja nhõ me ja kute amirĩt kadjy. Nhy m me kwý te kubê amikati, kute me'ã idji janhõr pymaje te kubê amikati nhy m tu me'ã idji janhõ. Nhýnh me ja'ã ne idji janhõ? Bir, me kunĩ, me kàtammê me bẽnjadjwýrmê me õ nêkrêx krãptĩmê me õ nêkrêx kêtme me memã ãpênh kajgo ar bajamê me kute memã o pãnh kadjy ãpênhjamê. Me ja kunĩ'ã ne idji janhõ. Nhýnh ne me 'õ kukamê ikra'ã idji kêt ne. Me kunĩ.

<sup>17</sup> Dja me'õ'ã idji jêt prãm kêt nhy m me arým kum mýjja nhõr kêtumrêx, nhy m ta kute mýjja byr kêtumrêx, te kute amim mýjja byrmã. Me'ã idjikõtbit ne me kute amim mýjja byr. Mýj idji nã? Bir, mry

kaàk jatãri mryja ne me kwý'ã idjin kwý'ã numeru janhõ.

<sup>18</sup> Be, me no mexbit godja me kuma. Ê, gora me ano mex jabej on mry'ã numeru pumũ. Numeru ja kute me idji pyrãk. Nãm 666. Be, mry'ã numeru ne ja.

## 14

### *Bàygogomê uba kadjy kàx byr.*

<sup>1</sup> Nã bãm arek omũnho dja nhy m kam Mrykĩ'ãtomti jabatãnh nyja dja, ba omũ. Krãnhrebê Xijãokam ne dja. Nhy m kam kêt me krãptĩ ku'ê. Me krãptĩ kubê 144.000, me tãm ne me kumex. Nhy m Mrykĩ'ãtomti jabatãnh ny nhidjija me kuka'ã arij ne Bãm nhidjijadjwý me kuka'ã arij. Me tãm ne me Mrykĩ'ãtomti jabatãnh ny kêt kumex.

<sup>2</sup> Ba kam kàjkwakam me ngrer ma. Kute ngõ rãrãkti pyrãk, kute na krak pyrãk. Nã, nãm me ngrer mexkumrêx. Nãm me kute pĩjãbàrekam me ngrer pyrãk ba maro dja.

<sup>3</sup> Nhy m me krãptĩja ngrer ny jarê. Nãm krĩ djatikam ýrjamê mýjja tĩn amãnhkrut ne amãnhkrutjamê mebêngëttemê, me tãm ne me kabem ku'ên ngre. Ngrer ny ne me arê. Mýj me ngrer nã? Me ajbit ngrer. Atemã. Me'õ kute arênh kêt. Amũ me'õ kute mar ne arênh kadjy kêt. Me ajbit ngrer, me krãptĩ kubê 144.000, Metĩndjwýnh kute me utãr ne meo mõrja, pyka kurũm meo mõrja, me ajbit ngrer, me ajbit ne me kute mar ne arênh.

<sup>4</sup> Nãm me mexo amiptãn kabõt katin ar ba. Nãm me kute axwe 'õ mar kêt kam mexkumrêx kute mrãmri ne me kute krõ'ã meo prõ kêt kam mex ja pyrãk. Nãm me ã axwemã irero ane. Nãm me mã Mrykĩ'ãtomti jabatãnh ny kêt ajkamên mã kêt mõ. Mrykĩ'ãtomti jabatãnh nyja abenbê meo ajkij ne meo mõ. Kamrõo ne me utãn meo mõn Metĩndjwýnhmã me kungã. Me ja ne me kutewa nhy m Bãmmã meo mõn kum me kanga. Dja ã ajte me kwý rax ne kum me kungã. Bãmmê ar ro'ã kute meo aminhõn kute ar meo bamã. <sup>5</sup> Nhy m me 'êxnhĩ kêtumrêx. Nãm me axwe kêt kam mextire ne ar ba. Ajmã kute kêt.

<sup>6</sup> Nhy m kam kadjy mrãnh djwýnh 'õ kã:jmã ton tẽ. Kàjkwa tã: tẽ. Mýj kadjy ne ton tẽ? Bir, kute me kunĩmã kabên mex jarênhmã. Kute me kunĩ pykabê ar bajamã

arënhmã, apÿnh mebêngôkre ba djari, apÿnh amynggrari me ba djari, apÿnh me kabën djari, apÿnh me ô pyka djari kunîkôt ne kute mekmã arënhmã. Kabën mexja ne mex rã'ã rã'ã. Mekmã tûmrãm mex ne kam o ino rer kêtumrëx. <sup>7</sup> Nhyim kam kadjy mrãnh djwÿnhja ne kàj bê kabën ne memã kum,

—On me amã Metïndjwÿnh pyman kum rax jarë, kute katàt memã axweo pãnh ne kute meo bikënhkam. Arÿm ne ô akati bôx. Arÿm kute memã axwe pãnh jarënhmã. Dja memã axweo pãnh. Djãm uma ngri got. On me kum rax jarë, kute kàjkwamë pykamë ngô raxbê pyka kêtme inoremë kute ipêx djwÿnhmã rax jarë, ane.

<sup>8</sup> Nhyim kam kadjy mrãnh djwÿnh 'ôdjwÿ kutewa kôt tën memã kum,

—Metïndjwÿnh dja krïraxbê Babirônijkam me jao ajkë. Arÿm kute meo mör djã kaprãrmã. Arÿm 'ÿr. Krïraxbê Babirônij, krï jabatãnh tãm ne Metïndjwÿnh arÿm kute o bikënhmã. Kute pyka më meo bimirãmã. Kam ne me axwekumrëx. Me axwebit ne me ar kam ba. Ne kam pyka kunîkôt me axwemã me prëk ne. Nhyim kam me ô'ã pyka kunîkôt axwe. Ne kam kute me'ô kuprÿ, kurëti'ô kute amiwÿr me 'wÿr nhyim me kute 'ã aben japanh ne kam kôt axwe, kôt kurëti ar ba pyrãk. Nãm ã krïraxbê Babirônij ã pyka kunîkôt memã ane. Kute mrãmri ne me kute kadjwati kangô\* kôm ne bibãnh ne axwebit kute mar ja pyrãk. Kam ne Metïndjwÿnh mekam ngryk ne kute prïne meo bikënhmã.

<sup>9-10</sup> Nhyim kam kadjy mrãnh djwÿnh 'ôdjwÿ kadjy mrãnh djwÿnh ar kutewakôt tën kàj bê memã arën memã kum,

—Ë, me ikra'ã mry nhidjija ne me kuka'ã mry nhidjija kute mryo Metïndjwÿnh ne mry karôo Metïndjwÿnh ne arkum amijarënh o ban kum rax jarënh o baja me tãm gëdja Metïndjwÿnh mekam ngryk ne prïne meo ajkë. Djãm ngryk rerek got kàjbê meo ajkë. Dja prïne meo bikënh mex ne. Arÿm ne ngry:k ne. Mÿj me'ô gëdja kubê amijo apdju? Be djãm me kunïo ajkë.

Be, dja Metïndjwÿnh me ja, me kum mrymë mry karô kïnhja kuwykam me

\* **14:8** Mýjja me kute o kôm ne kôt bibãnh kunïja, kadjwati kangômë uba kangômë, mýjja kangô kunï ne me kum kadjwati kangô jarë.

kurë. Kuwymë kën ngrãngrã pôkkam me kurë nhyim me kam àmnhirëho kumex. Mrykï'ãtomti jabatãnh nymë kadjy mrãnh djwÿnh ar nokrekam dja me àmnhirëho kumex. <sup>11</sup> Nhyim kuwy kûmjã mã wabi, kute o ino rer kêtumrëx. Kuwy kute me kamjërja kûm rã'ã rã'ã. Nhyim me arek àmnhirëho kumex rã'ã: rã'ã. Djãm me tyk djã kêtme? Arkati. Djãm akamãtkam nar kon akatikam dja me tyk djã kêt? Arkati. Dja me arek àmnhirëho kumex. Be, dja ã Metïndjwÿnh meo bikëho ane. Me kute mrymë mry karômë o Metïndjwÿnh ne arkum amijarënh o ba ne kute arkum rax jarënh ar o ba ne 'ã idjija, me ja dja Metïndjwÿnh prïne ã meo bikëho ane. Nãm ã kadjy mrãnh djwÿnh kabën ane.

<sup>12</sup> Kam godja Metïndjwÿnh nhö me ja, me kute Metïndjwÿnh kabënkôt ar amijo baja, me kute tu amim Jeju markumrëxja, me ja dja me mã 'ã ngrã tÿx ne 'ãno djan kanga kêtumrëx.

<sup>13</sup> Nhyim kam kàjkwa kurûm me'ô imã kabën ba kuma. Nãm imã,

—On 'ã pi'ôk no'ôk. Ë, me kute Bënjadjwÿr 'ãno ãm nhyim mete me par ja dja me kïnhkumrëx. Bënjadjwÿr kadjy me tykja dja me arÿm kàjkwakam Jeju'ÿr bôx ne kam kïnhkumrëx. Metïndjwÿnh kute memã kïnh jadjãr kadjy ne arÿm me ô akati me'ÿr bôx. Dja Metïndjwÿnh mã memã kïnh jadjãr rax ne, ane.

Nhyim kam Metïndjwÿnh Karô imã,

—Nà, mrãmri. Mrãmri ne arÿm me àpënh raxkam katyk. Me àbirkam dja me arÿm kàjkwakam tyk djã kêt ne. Nãm me Jeju'ã ngrã tÿx ne mã kum apê. Nhyim Metïndjwÿnh me omün arÿm kute pãnh memã kïnh jadjãr raxmã, ane. Nãm ã Metïndjwÿnh Karô imã ane.

<sup>14</sup> Ja ne arÿm apêx ba kam ajte mýjja 'ô pumü. Nhyim kakrã jaka ajte kato. Kato nhyim kam kam me'ô nhÿ. Kute me'ô my pyrãk ne bënjadjwÿr krãdjê tun o nhÿ. Kën karÿro krãdjê ne kutu. Ne kam kàx nhibôti ne kubyn o nhÿ. Wa mexkumrëx.

<sup>15</sup> Nhyim kam kadjy mrãnh djwÿnh 'ô Metïndjwÿnh nhürkwãti kurûm kato. Katon

kum kàj bê kabên, kakrâkam ýrjamã kabên ne kum,

—On aparmã anhõ kàxwã o abên o bàygogo jakàn o atom. Arým ne õ akati 'ýr bôx. Arým ne ngrà tē. Arým ne pykabê me ja nhõ akati me'ýr bôx. Kute bàygogo ngrà nhym me kute o atom nhõ akati pyrâk, ane.

<sup>16</sup> Nhym kam kabênkôt pykamã kàxo abên o akáro tēn kam o atom. Nãm ã kakrâkam ýrja me'ã bàygogo jakreo ane.

<sup>17</sup> Nhym kam kadjy mrãnh djwýnh 'õdjwý Metĩndjwýnh nhũrkwãti kurũm kato. Kàjkwakam Metĩndjwýnh nhũrkwãti kurũm kato. Ne adjwýnhdjwý õ kàx nhibôti. Wa mexkumrêx.

<sup>18</sup> Nhym kam ajte kadjy mrãnh djwýnh 'õdjwý, õ kuwy djwýnh kikre kudjý djà bôr djà kurũm kato. Katon kam kàj bê kum kabên. Kadjy mrãnh djwýnh kute kàxdjwa mex byr ne o âmjamã kabên ne kum,

—On aparmã anhõ kàxo abên pidjôbê uba djô jakàn o atom. Arým ne tuk ne kumex. Nã, í'ík pytíja pumũ. Arým ne pykabê me ja nhõ akati me'ýr bôx. Kute pidjô tuk nhym me kute o atom nhõ akati pyrâk. Nãm ã kum ane. Nãm me axwe'ã pidjô tuk nhym me kute o atom nhõ akati jakre. Metĩndjwýnh arým me axwekam ngryk ne prĩne kute meo bikēnhmã. 'Ã ne pidjô tuk jakre.

<sup>19-20</sup> Nhym kam kabênkôt tu pykamã kàxo abên o pidjô krô jakáro tēn kam ôjao atom ne kam pidjô kangôo pôx djâkam kumex ne. Metĩndjwýnh nhõ djwýmē pidjô kangôo pôx djà raxi. Kam ne kumex ne, kute kangôo pôxmã. Metĩndjwýnh mekam ngryk ne prĩne kute meo bikēnh'ã ne djwý pynēnh djâkam me kute pidjô kumex nhym prĩne kute anēnh jakre. Atykmã ne pidjô kangôo pôx djà dja.

Nhym me kam kumex ne, nhym kam prĩne anê nhym kam me kamrô prô:to ne. Pidjô kangôo pôx djà kurũm me kamrô prôto nõ. Djãm me kamrô ngri got. Axwe me kamrô rax ne prô:to nõn kam tàm ne. Kute ngô pyrâk ne kam ã ubým ane. Kawaru jajkwa krekrekam kàxirãx 'ãnh ne ubým itep ne. Me kamrô tàm mör ry'ã akre kubê 300 kiometu. Nhýnh me ja kamrô nã? Bir, me kum Metĩndjwýnh kĩnh kêtja,

me axweja. Dja ã Metĩndjwýnh me axweo bikēnho ane, me imexo ane.

## 15

*Me kute apýnh meo bikēnh djãri amýnh ne o ku'ê.*

<sup>1</sup> Nhym kam mýjja pumũnh kêt 'õdjwý kàjkwakam kato ba omũ. Nãm ã tire ane ne ã uma ane. Kadjy mrãnh djwýnh kubê 7 ne apýnh mýjjao kute meo bikēnh djãri amýn o ku'ê. Apýnh mýjjao kute meo bikēnh djãri ja godja Metĩndjwýnh aben nwhitepã meo bikēnho tēn kam 'õo ino re. Ne arým ngryko ino re.

<sup>2</sup> Ba arek omũnh dja nhym mýjja kute imôti pyrâk, kute ixeo imôti pyrâk kato ba omũ. Ixemē kuwymē akã. Nhym mýrri me ku'ê. Mýj me nã? Bir, me kum mrymē mry karõ kĩnh kêt ne kute arkum mex jarēnh kêtumrêx nhym te mry kute meo aminhõn me'ã idji janhõrmã, te me'ã idjimē numeru janhõrmã. Me ja ne me ixeo imôti mýrri kumex. Metĩndjwýnh nhõ pĩjãbare ne me amýn o kumex. Me kam Metĩndjwýnhmã ngrer kadjy. <sup>3</sup> Mõjdjê kubê Metĩndjwýnh nhõ ãpēnhjamē Mrykĩ'ãtomti jabatãnh nymē ar ngrer ne me arē.

—Bēnjadjwýr, Metĩndjwýnh, atýxo abê kumkati.

Mrãmri ne ga araxo mýjja kunĩ nhipêx nhym akôt rax ne uma ne.

Ga ne ga abê pyka kunĩkôt me kunĩ nhõ Bēnjadjwýr rax ne ar meo aba mex-tire ne ar meo aba.

Nã gãm memã akabēn pýnh ne arē ne katàt memã akabēn jadjuw.

<sup>4</sup> Nã, Bēnjadjwýr, nhýnh ne me'õ kum apyma kêt got.

Nhýnh ne me'õ amã amextire jarēnh kêt got. Me kunĩ dja me kum apyman abenmã arax jarē.

Gajbit ne ga amexo apyma.

Nhym kam pyka kunĩkôt me kunĩ dja me awýr ban bôx ne amã rax jarēnh kumex.

Nã gãm prĩne memã o pãnh, katàt memã o pãnh.

Nhym me kunĩ arým omũn kam amã rax jarē, ane.

Nãm ã me ngrer ane. <sup>5</sup> Nhym kam ijukri Metĩndjwýnh nhũrkwãti amijã kutan

dja. Kàjkwakam Metĩndjwýnh nhũrkwãti amijã kutan dja ba omũ. Nhyam kad-jwýnhbê Metĩndjwýnh nhõ kumoka'ê mex-tire jadjwý amijã kutan dja. <sup>6</sup> Nhyam kam Metĩndjwýnh nhũrkwãti kurũm kadjy mrãnh djwýnh kubê 7ja apôx. Nãm apýnh mýjjao kute meo bikênh djari kubê 7ja me kadjy amýn o ku'ê. Kubêkà jaka, kubêkà jadjênh ne angij ne o ku'ê. Ne kên karýro amirunh pren 'ã ku'ê.

<sup>7</sup> Nhyam kam mýjja tĩn amãnhkrut ne amãnhkrut 'õ ne arkum ngõnh ngã. Kadjy mrãnh djwýnh kubê 7jamã apýnh kungã. Kên karýro ngõnh kubê 7 ne arkum kungã. Ngõnh ipu ne arkum kungã. Mýj ne kam ipu? Bir, Metĩndjwýnh ngryk ne kam ipu. Metĩndjwýnh ta tĩn ne ar ba rã'ã rã'ã ne kute o ino rer kêt, tãm ngryk ne ngõnhkam ipu. Tãm ne arkum kungã.

<sup>8</sup> Nhyam kam Metĩndjwýnh kũm prĩne ũrkwãti kre jaê. Mýj kũm nã? Bir, Metĩndjwýnh raxmê mexmê tỳxmê uma kam kũm. Tãm ne prĩne ũrkwãti kre jaê. Nhyam me te Metĩndjwýnh nhũrkwãtimã ngjênhmã. Nhyam arým Metĩndjwýnh kũm mebê aptà. Nhyam kadjy mrãnh djwýnh kubê 7 ne apýnh mýjjao kute meo bikênh djari kubê 7ja me'ã kapĩno ku'ê, aben nhitepã me'ã kapĩno ku'ê. Nhyam me'ã kapĩn pa nhyam me arým Metĩndjwýnh nhũrkwãtimã wangij.

## 16

*Me kute ngõnhbê 7kam Metĩndjwýnh ngryk me'ã kapĩ.*

<sup>1</sup> Nhyam kam Metĩndjwýnh nhũrkwãti kurũm me'õ kabên. Kàj bê kabên ne kadjy mrãnh djwýnh kubê 7mã kum,

—On o tẽn pykakam kapĩ. Ngõnhbê 7kam Metĩndjwýnh ngryk ipuwã on kapĩ, ane.

<sup>2</sup> Nhyam kam kadjy mrãnh djwýnh kutewa o tẽn pykakam kapĩ. Nhyam kam kuwê me'ã apôx. Kuwê punure. Tokry:. Nhýnh me ja'ã ne apôx? Bir, mry kute me'ã idji janhôr nhyam me kute mry karõmã rax jarênhja, me tãm ne kuwê me'ã apôx.

<sup>3</sup> Nhyam kam atãri kadjy mrãnh djwýnhja Metĩndjwýnh ngryk 'õdjwý kapĩ. Ngõ raxbê pyka kêt kam ne kapĩ nhyam arým ngõ ta tu kamrõ, kute me'õ tyk kamrõ pyrãk. Nhyam

kam ngõkam mýjja ar baja kunĩ ty. Tu tykkumrêx.

<sup>4</sup> Nhyam kam atãri kadjy mrãnh djwýnhja Metĩndjwýnh ngryk 'õdjwý kapĩ. Ngõ bix-abjêrmê inorekam ne kapĩ. Nhyam arým ngõ ta tu kamrõ. <sup>5</sup> Nhyam kam kadjy mrãnh djwýnh kute ngõ pumũnh djwýnh kabên, ba kuma. Nãm Metĩndjwýnhmã kum,

—Be, mrãmri. Ga ne ga amexo apyma ne amrêbê: adjakamã atĩn ne ar aban mã atĩn rã'ã, mrãmri.

Nã gãm katat memã o pãnh ne, ane.

<sup>6</sup> Nãm me anhõ me mexja nhimex ne, ne akabên jarênh djwýnhjadjwý nhimex ne, ne me ja kamrõ kapĩ: no kumex.

Ga arým meo angryk ne kam pãnh ngõ kamrõ memã angã, me kute o kõmmã.

Mrãmri ne pãnh mexkumrêx, ane.

Nãm ã ngõ pumũnh djwýnh Metĩndjwýnhmã ane.

<sup>7</sup> Nhyam kam kikkre kudjý djã bõr djãdjwý kabên ne, ne kum,

—Nã, mrãmri, Bẽnjadjwýr, Metĩndjwýnh atýxo abê kumkati.

Ga ne ga akabên pydjín arên arým prĩne katat memã o pãnh ne, ane.

Nãm ã kikkre kudjý djã bõr djã kabên ane.

<sup>8</sup> Nhyam kam atãri kadjy mrãnh djwýnhja Metĩndjwýnh ngryk 'õdjwý kapĩ. Myt'ã ne kapĩ nhyam kam myt pôr ne prĩne me kuga.

<sup>9</sup> Arngro tỳxkumrêx ne prĩne me kuga. Te me kuga nhyam me mã Metĩndjwýnh japry. Metĩndjwýnh kute apýnh mýjja kute meo bikênhmã me'ýr anorja tãm ne me aprý. Mã aprý. Me kute amim kator kêt ne wãnh axwemã irer kêt kumrêx. Kute kum mex jarênh kêt kumrêx.

<sup>10</sup> Nhyam kam atãri kadjy mrãnh djwýnh ja Metĩndjwýnh ngryk 'õdjwý kapĩ. Mry krĩ djakam kapĩ nhyam arým õ me ja'ã akamãt kô tyk ne. Akamãt kô tyk prĩne meo ajkamuw. Nhyam kam me tokry djaje tu amnhirênhõ kumex. <sup>11</sup> Amnhirênhbê Metĩndjwýnh japryõ kumex. Kàjkwakam Metĩndjwýnh ne me ũn ne. Me tokry djaje, kuwê mýjja tokry djaje ne me Metĩndjwýnh djũno kumex ne amim kator ne kute wãnh axwemã irern 'ýr amijo akêx kêt kumrêx.

12 Nhyam kam atãri kadjy mrãnh djwýnhja Metĩndjwýnh ngryk 'odjwý kapĩ. Ngõ raxbê Jupraxikam ne kapĩ nhyam kam tu ngõ ngrà, me kam tẽm kadjy. Kãjkwa krax kurũm me bẽnjadjwýr tẽm ne ngõ'ã rêr, kadjy ne ngrà. 13 Nhyam kam karõ amãnhkrut ne ikjêkêt ne apôx ba omũ. Karõ punu kute bri ponhti pyrãk ne apôx ba omũ. Mry kaãk jajkwa krekremẽ mry jajkwa krekremẽ ar kabẽn jarẽnh djwýnh 'ẽxnhĩa jajkwa krekremẽ ar ja jajkwa krekre kurũm ne bri apôx, ba omũ.

14 Ar karõ punu kute amijo brija ne Ar kubê Xatanaj nhõ àpẽnh ne kam kute mýjja pumũnh kêt kwý nhípẽxmã. Ne kam mã me bẽnjadjwýr rũnh'ýr ba. Pyka kunĩkõt me bẽnjadjwýr rũnh kunĩ'ýr ban meo akprõ. Me me'ýr prõt kadjy ne meo akprõ. Metĩndjwýnh týxo kubê kumkati ngryk nhõ akatikam, õ akati pymakam dja me me'ýr prõt ar ba.

15 Me abenwýr prõt kadjy ne me abenwýr mõn aben tẽpo mõ nhyam Jeju imã kabẽn ne. Ne imã,

—Ë, on me ikabẽn ma. Dja ba me aêrbê me'ýr bõx. Kute me àkĩnhĩ me aêrbê me ũrkwãmã ngjẽx ne mekbê àkĩnh ba pyrãk. Dja ba ã me aêrbê me'ýr ibõx ane. Nhyam bep me õt kêt ne no týx ne kute ikam amako krĩa dja me kĩnhkumrẽx. Me tãm dja me kute me mrãnhmã kute kubêkà jangjẽnh ne mrãnh djakam amako krĩa pyrãk. Nhyam bep me ate krãja dja me kute me õt mýrri me ban bõx nhyam me kute kubêkà jangjẽnh kêt ne pijãmkam mrãnh pyrãk. Dja me ã kute ikam amak kêtja pijãm ane, ibõxkam ã pijãm ane. Nãm ã Jeju Kritu memã amibõx djà jarẽnh ane.

16 Nhyam kam ar karõ punu kute amijo brija me bẽnjadjwýr rũnh akprõ. Me kute me'ýr prõt kadjy ne meo akprõ. Me kute abeno bikprõnh djà nhidjibê Amadõ. Mekbê idjaer kabẽnkam ne Amadõ. Kam ne me bẽnjadjwýr rũnh abeno akprõ.

17 Nhyam kam kadjy mrãnh djwýnh kute katẽ ne Metĩndjwýnh ngryko ino rer kapĩ. Kõk djãbêrkam ne kapĩ nhyam kam Metĩndjwýnh krĩ djãti kurũm me'õ kabẽn.

Metĩndjwýnh nhũrkwãtikam krĩ djãti kurũm ne kabẽn ne. Kãj bẽ kabẽn ne,

—Anũ, o ino rer ne arým ja, ane.

18 Nhyam kam na adjẽnhmẽ krakmẽ rãrãkmẽ. Nhyam kam pykadjwý tertet tý:x ne. Nãm amingrẽk týx ne. Me bakrax kurũm me bakukãmãre aben nhitepã bixadjwýr tẽm ja'õ kute pyka kute amingrẽk ja'õ pumũnh kêtikumrẽx. Nãm tertet tý:x ne.\*

19 Nhyam kam krĩrax jabatãnhbê Babirõnijkam pyka ajkij nhyam kikre kunĩ rôrõk ne ajkaten amingrãn kumex. Babirõnijkam pyka amikokij ne arým amãnhkrut ne ikjêkêt ne ikwã. Nhyam pyka kunĩkõt djwý krĩrax rôrõko kumex nhyam kikre prĩne amikaten kumex. Be, mrãmri ne Metĩndjwýnh Babirõnij jabatãnhja mar ar o ban kam arým o ajkẽ, prĩne kum axweo pãnh ne. Nãm tu mekam ngryk týx ne. Mýj me'õ gẽdja kubê amijo apdju? Be, dja me kunĩo ajkẽ, prĩne meo ajkẽ. Djãm Metĩndjwýnh me axwekam ngryk kêt got.

20 Nhyam kam apẽxti kunĩ nhĩ'ãm mrãn akuno. Nhyam krãnhdjwý kunĩ tu akuno.

21 Nhyam kam namê'y me'ã rôrõko kumex. Kãjkwa kurũm ne me'ã rôrõk ne. Axwe abatãnh, axwe utĩ. Utĩkam 'ã akre kute 40 kiru pyrãk. Djãm kam got me axwe kangan kam Metĩndjwýnhmã rax jarẽ? Arkati, nãm tu me Metĩndjwýnh djũno kumex. Namê'y kute meo bikẽnhkam tu Metĩndjwýnh djũno kumex. Djãm namê'y rôrõk kajgo got? Kati, nãm meo bikẽnh rax ne.

## 17

### *Me'õ kuprý kurẽti mry'ã ýr.*

1 Nhyam kam kadjy mrãnh djwýnh kubê 7 kute ngõnhbê 7 jamýnhja 'õ ne imã,

—Apa, amrẽ tẽ, ba amã mýjja jakre ga omũ. Me'õ kuprý ne ja. Tãmja ne ngõ kunĩ'ã krĩ, ane. Tãmja ne me kunĩ abenmã arẽ. Me kunĩ arým abenmã kurẽ jarẽ. Nhyam Metĩndjwýnh arým axwe man kute o bikẽnhmã. Krĩraxbê Babirõnij ne me'õ kuprý kurẽ'ã amijakre. Krĩrax jakam ne mýjja punu ne kam kute me'õ kuprý kurẽti pyrãk.

\* 16:18 Djãm pyka kute amingrẽk kêt Arkati. Pyka kute amingrẽk.



<sup>2</sup> Nhyim apýnh pyka djàri me ò bēnjadjwýr rŭnh 'ýr bao ku'è. 'Á aben japa. Nhyim pyka kuníkôt me kunī 'ýr ban kam kumex. Me'ò nija ta ne memã kadjwati kangô\* ngã nhyim me o ikôn ajbãñ kam kurēo kumex.

Nãm ã kadjy mrãnh djwýnh imã ane.

<sup>3</sup> Á imã anen kam mã ikarõo tē. Kapôt kukritmã ne ikarõo tēn o bôx. Ba kam me'ò kuprý kurētija pumũ. Nhyim mry kamrêk'ã nhỹ. Nhyim mryja'ã idjio tuknī. 'Á idjijao ne prĩne Metĩndjwýnh japrýn ũn ne. Nhyim mry krãbê 7 ne bàribê 10.

<sup>4</sup> Nhyim me'ò kuprý kurētija kubêkã kamrêkmē tyk jadjàn o nhỹ. Kunhêr krãptī. Kēn karýrmē kēn mextemē angã krã kute ngãp jadjēnh pyrãk. O ne amikunhêr. Ne ngõnhkrã byn o nhỹ. Kēn karýro ngõnhkrãkam mýjja kroo ipu ne kubyn o nhỹ. Mjēn prãmmē kurēmē ja ne kam o ipun 'ã kubyn o nhỹ. <sup>5</sup> Ne kuka'ã idji. Mýj idji nã? Bir, mýjja bipdjur. Bir,

—Krĩrax jabatãnhbê Babirõnijkam ne me kuprý kurēti kator kutewa nhyim kam me ô'ã pyka kuníkôt punu ar ba, arĩk ar ba.

Nãm ã kuka'ã idji ane.

<sup>6</sup> Me'ò kuprý kurētija tu ajbã. Kamrô ne o ikôn kam ajbã. Nãm prĩne Metĩndjwýnh nhõ me mexja kwý nhimex ne, prĩne me kute tu amim Jeju markumrêx ne mã kôt bikamēnh nhyim me te kute me par nhyim me mã kôt bikamēnhja ne prĩne me imex ne me kamrô kapĩn o ikôn kam ajbã. Be, nija ne ba omũn kam kam ino tyn djan te ije omũnhmã ne kam,

—Tô mýj nã? ane.

<sup>7</sup> Nhyim kam kadjy mrãnh djwýnh imã,

—Mýkam ne ga kam ano tyn dja? ane.

Ë, ba mýjja bipdjurja amã arē ga ama. Ba amã nija jarē, krĩrax kute ni jaxweti'ã amijakreja amã arē ga ama, ne ajte mry kute turja jarē. Mry krãbê 7 ne bàribê 10, tãm dja ba amã arē, ga ama.

<sup>8</sup> Mry aje omũnhja ne amrêbê tĩn ne ar ba. Ne kam tu akuno. Dja ajte kato. Kre ry typydjikurũm ajte katon ar mrã. Ar mrãñ kam tu biknorkumrêx ne. Nhyim pykabê me ja te omũn kam abenkam no

tyn kumex. Me kute Jeju mar kêtja dja me te kute mry marmãñ kam abenkam no tyn kumex ne abenmã,

—Mýj mry got ja? Nãm tĩn ne ar ban akunon kam ajte akubyn kato, anhýro kumex.

Djã nãm Metĩndjwýnh me ja tĩn rã'ã rã'ã'ã pi'òk no'òk got me kôt mry ma? Kati, pyka nhipêx kêttri kute me ja tĩn rã'ã rã'ã'ã pi'òk no'òk kêt. Kam dja me mry mar kêtumrêx ne. Kam ne me mry tĩn ne biknor ne ajte akubyn katorja pumũñ kam abenkam no tyn kumex.

<sup>9</sup> Ë, me no mexbit dja me kuma, me kute mýjja marbit dja me kuma. Ë, mry krãbê 7 kubê mýjja amãnhkrut. Krã kubê krãnhre ne krĩ. 'Á ne nija krĩ. Adjwýnhdjwý krãbê bēnjadjwýr rŭnhbê 7. <sup>10</sup> Bēnjadjwýrbê 5 ne arým kêt mexi. Nhyim bep pydji ne tĩn ne ar ba rã'ã, nhyim bep ikjêja ne kator kêt rã'ã. Dja katon kam ar meo ba ngrire. <sup>11</sup> Be, mryja amrêbê tĩn ne ar ban arým biknorja, tãm ne kubê bēnjadjwýr rax'õ, bēnjadjwýr rŭnhbê 7 ja'õ, ne arkôt akuno.

<sup>12</sup> Nhyim bep bàribê 10, aje omũnhja kubêdjwý bēnjadjwýr rŭnhbê 10. Kraxje mete ar'ã bēnjadjwýr mēnh nhyim ar kute ar meo ba kêt. Adjým, tũmrãm, dja me ar'ã bēnjadjwýr mē nhyim ar meo ba. Mrymē ar aprakamã ar ar meo ba. Dja ar ro'ã ar meo ba ngrire.

<sup>13</sup> Be, bēnjadjwýr rŭnhja godja ar abenkôt kabēn ne tu mry kabēnkôt ar meo ba. Nhyim mryja pydji ne bēnjadjwýr raxo ar akren ar meo ba. <sup>14</sup> Nhyim kam bēnjadjwýr rŭnhja dja Mrykĩ'ãtomti jabatãnh ny'ýr prõt ne. Ar kunī dja ar'ýr prõt ne.

Nhyim bep Mrykĩ'ãtomti jabatãnh ny ta dja amijo aptãn pyka mē aro amrã. Djãm Mrykĩ'ãtomti jabatãnh ny bēnjadjwýr ngrĩ got. Arkati. Bēnjadjwýr raxbê kumkatiti:. Kute bēnjadjwýr raxo pykabê me bēnjadjwýrja kunī jakrenh mexi. Kam ne kubê Bēnjadjwýr raxbê kumkatiti:. Kam dja ò me jamē prĩne pyka mē ar bēnjadjwýrbê 10jao amrã. Ò me ja, Metĩndjwýnh kute amiwýr me 'wýr ne kute amijo me utãrja nhyim me tu kute amim

\* **17:2** Mýjja me kute o kôm ne kôt bibãnh kunĩja, kadjwati kangômē uba kangômē, mýjja kangô kunī ne me kum kadjwati kangô jarē.

markumrêx ne mã kôt bikamênh ne kute kanga kêt, me tãm dja me Mrykí'átomti jabatàn nhokôt môn kurê djwýnhjao ajkê.

Nãm ã kadjy mrãnh djwýnh imã ane. Æ imã 'ã ujarênh ane. <sup>15</sup> Ne kam arek imã kabêno dja ne imã,

—Ë, apýnh ngô ikwãja, 'ã me'ô kuprý kurêti krí ga aje omũnhwã, ngôja ne kute me urak. Me'ã ne ngôja amijakre. Apýnh me ô pyka djari, apýnh me ba djari, apýnh mebêngôkre ba djari, apýnh amyngràri me ba djari, apýnh me kabên djari kuníkôt me ja'ã ne ngôja amijakre.

<sup>16</sup> Ne aje bàribê 10 pumũnhwãmê mry'ã ýr ga aje omũnhwãmê ar tãm dja Ar kubê ni kuprý kurêti ja kính no kati ne arkum kurêkumrêx ne kam o ajkê. O ajkên príne kunhêrmê ô kubêkà mexja kubê kuní by nhym tu irãri nõ. Nhym kam ar í kwý krê, me'ô kuprý nhí kwý krên kam 'ã kátàm kuwykam kumê nhym príne xêr.

<sup>17</sup> Mrãmri dja ar ã o ane. Mýkam? Bir, Metíndjwýnh ne kadjy ar ngrêk ne, bënjadjwýrbê 10ja ar ngrêk ne. Metíndjwýnh ta ne arým amim 'ã karô ne kam ar kadjwýnhbê arkum arê. Nhym kam kôt ar bënjadjwýrbê 10ja ôkre kadjwýnhbê amim 'ã karôn o ajkê. Nãm ar axikôt kabên ne mrymã kum,

—Gajbit dja ga apydjin abënjadjwýr rax ne ar meo aba. Nhym be nija gêdja wãm nõ, ane. Nãm Metíndjwýnh anhýr djwýnhram tu kôn nhokum arkum irkumrêx nhym kam ar kôt o tên o tên inomã kumê. Ar kute amimar kêt ne ar Metíndjwýnh kabênkôt tê.

<sup>18</sup> Nhym krírax jabatàn nhokôt Babirônij ne me'ô kuprý kurêti ga aje omũnh wã'ã amijakre. Kríraxja ne pyka kuníkôt me kadjy bënjadjwýr nhym bënjadjwýr kuní 'ýr ba: o ku'ê, 'ýr ô nêkrêxo bao ku'ê, nhym kam kríraxbê Babirônij raxo bënjadjwýr ja jakre ne kam meo ba, ane. Tãm ne me arým o ajkê, ane. Be, nãm ã kadjy mrãnh djwýnh imã 'ã ujarênh anen imã arênho tên inomã kumê.

## 18

*Kute pyka mẽ Babirônijo bimràk.*

\* **18:3** Mýjja me kute o kôm ne kôt bibãnh kuníja, kadjwati kangômê uba kangômê, mýjja kangô kuní ne me kum kadjwati kangô jarê.

<sup>1</sup> Ba arek omũnh dja nhym kam kadjy mrãnh djwýnh 'ô kàjkwa kurũm tên ruw. Kute bënjadjwýr rax pyrak ne adjênho príne pyka kurwý. <sup>2</sup> Ne kam kãj bê kabên ne,

—Ë, arým ne kêt ne. Kríraxbê Babirônij, krí jabatàn nhokôt ne Metíndjwýnh príne o ajkên pyka mẽ meo amrà nhym arým kêt ne.

Arým ne Xatanaj nhô àpênho punu 'ýr bôx ne kam kam ar ba. Nhym kam apýnh me karô punu djari kam ar ba. Nhym apýnh àk punu djari kunídjwý me kum kurêja kam ar ba.

<sup>3</sup> Mrãmri ne Metíndjwýnh arým príne pyka mẽ meo amrà nhym kam kam ar ba. Mýkam?

Bir, axwe pãnh. Babirônijkam ne me axwebit ar ba. Kam ne me axwe'ã bit abenmã karô.

Kute me'ô kuprý kurêti 'ô kute amijã memã àpnên nhym me tu 'ýr ba ar ba nhym kute memã kadjwati kangô\* nhôr nhym me kute o kôm ne bibãnh ne kurê ar ba pyrak.

Nãm me ã pyka kuníkôt kum kríraxbê Babirônij kính ane. Pyka kuníkôt ne me bënjadjwýr kuní kum kính ne 'ýr bao ku'ê kute me'ô kuprý kurêti'ã me kute aben japanh pyrak nhym pyka kuníkôt me kute nêkrêxo ba djwýnh Babirônij'ýr ô nêkrêxo bao ku'ê ne arým pãnh ô pi'ôk kaprî rax ne.

Babirônij axwe kum nêkrêx prãm kute me'ô mjên prãm pyrak nhym me kute nêkrêxo ba djwýnh kôt ô pi'ôk kaprî rũnhkumrêx ne. Djãm Babirônij mex got. Axwe punu, ane.

Nãm ã kadjy mrãnh djwýnh kabên ane. <sup>4</sup> Nhym kam kàjkwa kurũm me'ôdjwý kabên ne memã kum,

—Apa, inhô me ja, on me me kurũm akato. Mekôt me ajaxwe ba ije mekôt me ajo ibikên karô on me akato, ane.

<sup>5</sup> Be, nãm Babirônij aben nHITEPã axwe tên arým kàjkwa 'ýr itep ne. Nhym Metíndjwýnh kute axweo biknor kêtumrêx. Nãm kuman o nhý, ane.

<sup>6</sup> Gora me amipãnh. Krĩraxbê Babirônij kute me ajo bikênh 'ãnh dja ga me amipãnh o abikênh o itep ne, o aben pyrãk ne.

Kati, me amipãnh o abikênh o amãnhkrut. Djãm krĩraxbê Babirônij kute me ajo bikênh ngri got. Axwe kute me ajo bikênh raxi, kam dja ga me amipãnh o abikênh o amãnhkrut ne.

Nãm mýjja djýo me akôm ne. Kam dja ga me amipãnh mýjja djýo kômo amãnhkrut ne, ane.

Nãm mýjja djýo kôm'ã kute meo bikênh jakre,

—Kam dja ga me amipãnh mýjja djýo kômo amãnhkrut ne, ane.

<sup>7</sup> Krĩraxbê Babirônij ajbit ne raxo amiptàn ò nèkrêx kumex. Kam dja ga me me kaprĩmê me tokrymê o amipãnh, kute ò nèkrêx kumexja 'ãnh o itep ne.

Nãm krĩraxbê Babirônij ôkre kadjwýnhbê amim,

“Ota ba arek ibênjadwýrkumrêx ne nhý. Mýkam dja ba ikaprĩ?

Djãm imjên ibê tyk got ba ikaprĩ?

Djãm ibixangri dja ba ibên kêt mex ne nhý? Kati, ibixangri kêt. Kam dja ba ikaprĩ kêtikumrêx”, ane.

Nãm ã krĩraxbê Babirônij ni'ã amijakreo ane.

<sup>8</sup> Nãm ã amim ane ne kam nhý. Kam dja têbê apýnh mýjjao kute meo bikênh djàri 'ýr bôx.

Myt tãm kam dja o bikênh djàja kunĩ abenã rôrôk ne arým 'ýr bôx.

Gêdja tyk 'ýr bôx ne bixangri 'ýr bôx ne kum prãm 'ýr bôx.

Têbê dja o bikênh djà ja kunĩ 'ýr bôx. Nhy kam me kuwykam kumê nhy xêr.

Bênjadwýrbê Metĩndwýnh ne týxikumrêx ne kum axwe pãnh jarê nhy arým 'ýr bôx.

Nãm ã kabên ane.

<sup>9</sup> Pyka kunĩkôt dja me bênjadwýr àmrao kumex. Me bênjadwýrja kum nija kĩnh ne 'ýr bao ku'êkam kute me me'ô kuprý kurêti'ýr me bao ku'ê ja pyrãk. Kam dja me abej àmrao kumex. Me kute kukwakam amim nèkrêxo àptàr o bakam. Dja krĩrax pôr ne kùm ty:k ne. Nhy me bênjadwýr abej àmrao kumex, <sup>10</sup> omũho kumex.

Krĩrax kaprĩmê tokry pymaje ne me nĩjar djan omũho kumex ne kam abenmã kum, —Watĩre, Babirônij. Krĩrax jabatãnh, krĩrax puma, watĩre.

Nãm tebê Metĩndwýnh prĩne ajo ajkê ga nõ, ane.

<sup>11</sup> Nhy me pyka kunĩkôt kute nèkrêxo ba djwýnhjadwý àmrao kumex ne kaprĩ:re. Nhy tu wãnh nèkrêx nõ. Mý me'ô godja me kute nèkrêxo ba djwýnhbê nèkrêx byn pãnh pi'ôk kaprĩ ngã? Arkati. Babirônij ne ipêxri me kute nèkrêxo ba djwýnh kute kum nèkrêx rero bajamã o pãnh ne.

Nhy arým xêr nhy kam <sup>12</sup> me'ô kute mekbê apýnh me kunhêr djàri byr kêtikumrêx, me ò kên karýrmê kryt jakamê kên jadjênhmê angà krã kute ngáp jadjênh pyrãkmê kubêkà jakamê kubêkà tykmê atemã kubêkà mêrebê xêdamê kubêkà kamrêkmê apýnh pĩ kudjý djàrimê apýnh mrybê erpãxi djwao mýjja nhipêx djàrimê apýnh pĩ pãnh raxo mýjja nhipêx djàrimê atemã ngônhbê brôdjimê ngônh tykmê atemã kênbê mamoremê <sup>13</sup> mýjja djãnhbê kaneramê me krã ngrãnh djãmê kikre kudjý djãmê me kudjý djàbê miramê me kudjý djà 'ômê uba kangômê atemã röny kangô 'ômê atemã djwý djôm 'ômê djwýbê trigumê me ò kritbê mrytimê mrykĩ'ãtomtimê kawarumê pĩo kãmranhtýxmê me memã àpênh kajgo ar ba, me kute meo pãnh ne amim me pa 'amýnh nhy me memã àpênh kajgo ar bajamê. Nã, mebêngôkredjwý.

Ja kunĩ ne Babirônij tĩri amim amýn pãnh memã pi'ôk kaprĩ ngã nhy kam ajbir kêt ne. Mý me'ô godja amim amýn kam pãnh mekmã pi'ôk kaprĩre ngã. Arkati.

<sup>14</sup> Nhy me kute nèkrêxo ba djwýnh Babirônijmã kum,

—Be, apýnh me amã mýjja mex kĩnhja ne arým me abê kêtikumrêx. Me anhô nèkrêxmê me akunhêr kunĩ ne arým tu bĩknorkumrêx. Dja ga ajte omũnh kêtikumrêx, ane. Nãm ã me kute nèkrêxo ba djwýnh kum ane.

<sup>15</sup> Ne nĩjar djan omũho kumex. Krĩrax kaprĩmê tokry pymaje nĩjar djan omũho kumex. Kukwakam ò nèkrêx rax ne mekbê kêt nhy me kam o aman kam abej àmrao kumex ne kam kaprĩ:ren abenmã kum,

16 —Watîre, Babirônij, krîrax jabatàn, watîre. Tãm ne arým kêtumrêx.

Nãm ipêxri kubêkà mexbit jangij ne o mrã. Kubêkà jakamê kakrãtykmê kamrêkmê. Nãm kunhêr pãnh raxobit amikunhêr, kên karýrmê kên jadjênhmê angà krã kute ngáp jadjên pyrãkmê. Ý, tãm ne arým kêt ne.

17 Nêkrêxja ne arým pyka mẽ amrà. Amikrà kêt ne arým pyka mẽ amrà. Kàxdjàkênh ipôk pydjikam, ane.

Nãm ã me kute nêkrêxo ba djwýnh kaprîkam abenmã ane.

Nhym kam me ngô raxkam kàkam ar bajadjwý kaprî. Me kute ngô raxbê pyka kêt kam kà raxo ba djwýnhmê me kàtàm kàkam ar bajamê me kute kào ba djwýnh nhô àpênhmê me kute ngôkôt nêkrêxo bajamê. Me ja kunî ne me kaprîn nîjar kumex ne àmrao kumex. <sup>18</sup> Krîrax pòk ne kùm tyk pymaje ne me nîjar omũho kumex, abej àmrao kumex ne kàj bê abenmã kum,

—Krîrax jabatànha pydjii. Nhýnh ne 'ômê kute aben pyrãk? ane. Nãm ã me kà raxkam ar baja abenmã ane. <sup>19</sup> Ne kam kaprîkam pykao amikrà kaprêprêk ne krîrax jabej amran kam kaprî:re ne kum,

—Watîre, Babirônij, krîrax jabatàn, watîre. Akukwakam ne ba me ikunî inhô nêkrêx rũnh ne. Nã bãm me kàkam awýr mýjjao iban o bôx ga pãnh me imã mýjja ngã. Ba me ikunî akukwakam inhô nêkrêx rũnh ne.

Ga tebê arým pyka mẽ amrà. Jakam dja ba me arîk ar iba, ane.

Nãm ã me ngô raxbê pyka kêt kam kà raxkam ar baja krîraxo aman ã kum ane. Nhym kam atemã me'ô kabên.

<sup>20</sup> —Be, kàjkwa, on akînh. Arým ne Metîndjwýnh o ajkê. Me gadjwý, Metîndjwýnh nhô me gamê Jeju kute me anorjamê Metîndjwýnh kabên jarênh djwýnhmê on me akînh. Metîndjwýnh arým me apãnh Babirônijo ajkê. Kam dja ga me tu akînhkumrêx.

<sup>21</sup> Nhym kam kadjy mrãnh djwýnh týxkumrêx 'ô kên by. Kên rax, kên jabatàn. O ne mekbê idjaer bày ngãn ôm ne. Tãm ne

kumýn o ngô rax kôpênàt ne. Ne mekmã kum,

—Dja ã Metîndjwýnh krîrax jabatànhebê Babirônijo bikênho ane, kôpênàto bê o ane. Gêdja tu biknorkumrêx ne ajte kator kêtumrêx.

<sup>22</sup> Godja ajte me'ô me akam ngrer kêtumrêx. Atemã pîjãbàremê pomê ngônho potimê. Ja kunîkam ngrer dja ajte me akam kator kêtumrêx. Nhýnh ne me'ô môn ajte me akam ngrero dja? Arkati.

Nhym me apýnh ê mex djari 'ô ajte me akam kator kêtumrêx. Nhýnh ne me ê mex 'ô me akam dja? Arkati.

Nhym me ni'ô me akam djwý ka'uko ýr kêtumrêx. Nhýnh ne me ni'ô djwý ka'uko nhý got ga me ajte marmã?

<sup>23</sup> Nhym ngônhpôkdjwý me akurwý kêtumrêx. Nhýnh ne me akam ngôn pòk 'ô godja me akurwý?

Ne me keketdjwý mar kêt ne. Nhýnh ne me'ô ajbir abenwýr mór ny got kînhkumrêx ne kute abenmã kabên ne keketmã? Arým kêtumrêx.

Me akam me kute nêkrêxo ba djwýnh ne pyka kunîkôt me kuràm ô nêkrêx rũnh ne.

Ga arým apýnh me ba djari me kunî noo akuno. Nã gãm adjukaneo me noo akuno nhym arým pãnh Metîndjwýnh prîne ajo ajkê, ane.

Nãm ã kadjy mrãnh djwýnh ane.

<sup>24</sup> Be, Babirônij ne Metîndjwýnh kabên jarênh djwýnhmê Metîndjwýnh nhô me mexja par ar o ba. Babirônij kabênkôt ne me pyka kunîkôt me par ar o ba. Kam ne Metîndjwýnh meo ngryk ne me pãnh prîne Babirônijo ajkên pyka mẽ o amrà.

## 19

### *Me kute Metîndjwýnhmã mex jarênh.*

<sup>1</sup> Nhym kam mýjja kute me krãptî kanga pyrãk ba kuma. Kàjkwakam ne me krãptî kabên ne, ne,

—On me Metîndjwýnhmã mex jarê. Me banhô Metîndjwýnh, ajbit ne kubê me bapytâr djwýnh, gu me kam abenmã mex jarênh abenmã bënjadjwýr rax jarê.

<sup>2</sup> Ta ne kabên pýnh ne katàt memã axwe pãnh jarê. Mrãmri ne arým kum pãnh jarê. Me'ô kuprý kurêtija, tãmja pydji ne rax ne pyka kuníkôt me'ã axwe rê nhym me kôt axwen arík ar ba, tãm. Kumã ne Metĩndjwýnh pãnh jarê.

Arým ne kam ngryk ne o ajkê. Nãm ô àpênho ngryk ne kam me pãnh o ajkê, kute ô àpênh par ne kamrô kapĩnkam ngryk ne kam me pãnh me'ô kuprý kurêtijao ajkê. Mrãmri, ane.

Nãm ã kàjkwakam me krãptĩ ane.

<sup>3</sup> Ne kam ajte kàj bê kabên ne,

—On me Metĩndjwýnhmã mex jarê.

Krĩrax jabatànhbê Babirônij ne mã pôr ne kũm tyk rã'ã rã'ã. Àtyk kêtukumrêx, ane.

Nãm ã kàjkwakam me krãptĩ ane.

<sup>4</sup> Nhym kam mebêngêtbê 24mê mýjja tĩn amãnhkrut ne amãnhkrut ne tu mýrbê rôrôk ne Metĩndjwýnhmã rax jarê. Metĩndjwýnh krĩ djàtikam ýrjamã rax jarên kum,

—Mrãmri godja ga ã o ane, ane.

Ne kam ajte abenmã kum,

—Gu me on Metĩndjwýnhmã rax jarê, ane.

<sup>5</sup> Nhym kam krĩ djàti kurũm me'ô kabên ne,

—Ë, me akunĩ, me abê Metĩndjwýnh nhõ àpênh, me amã umaja, me abênjadjwýrmê me akàtammê me akunĩ on me me banhõ Metĩndjwýnhmã mex jarê, ane.

<sup>6</sup> Nhym kam mýjja kute me krãptĩ kangao kumex pyræk ba kuma. Kute ngô rãræk pyræk, kute na krikrit tỳx pyræk. Nhym me krãptĩja kabên ne,

—On me Metĩndjwýnhmã mex jarê. Bênjadjwýr djwýnh me banhõ Metĩndjwýnh tỳxo kubê kumkati, ta ne bênjadjwýr rax ne mrãmri ar meo bakumrêx, kumã dja ga me mex jarê, ane.

<sup>7</sup> Ë, gu me on bakĩnhkumrêx. Me kute abenã ar mênh kadjy bakĩnhkumrêx. Gu me abenmã raxmê mex jarê. Arým ne ô akati 'ýr bôx. Arým ne me kute Mrykĩ'átomti jabatành nymê prômê abenã ar mênhmã, kam dja gu me bakĩnhkumrêx.

Arým ne nija amimex ne. <sup>8</sup> Arým ne kadjy kum kubêkà ngã nhym arým adjà. Kubêkà mexkumrêx, kubêkà jadjênh, kubêkà ajmã kute kêtukumrêx, ane.

Nãm ã me krãptĩ memã ane. Nãm Metĩndjwýnh kute ô me mexjamã axwe kêt jarênh nhym me katàt mrãnh'ã kubêkà mex jakre ne ta ô me ja'ã prõ jakre.

<sup>9</sup> Nhym kam kadjy mrãnh djwýnh imã,

—On 'ã pi'òk no'òk. Arým ne me kute Mrykĩ'átomti jabatành nymê prômê abenã ar mênhmã, nhym me arým kute kadjy djwý djarmã. Arým kadjy mry kumex ne. Nhym arým memã kabên. Me Mrykĩ'átomti jabatành nymê ro'ã ô kwý krên rax kadjy memã kabên ne. Me ajbit dja me kĩnhkumrêx. Me Mrykĩ'átomti jabatành nykôt ô kwý krênja, me ajbit dja me kĩnhkumrêx. On 'ã pi'òk no'òk, ane. Nãm ã kadjy mrãnh djwýnh imã ane. Ne kam ajte imã,

—Ë, mrãmri ne Metĩndjwýnh arým kabên pydjín arê, ane.

<sup>10</sup> Ba kuman kam kabem itu mýrbê tỳm ne bit ije kum rax jarênhmã, bit ije kadjy mrãnh djwýnhmã rax jarênhmã nhym imã,

—Kati, kwãrĩk wãnh. Badjwý ne ba Metĩndjwýnhmã idjápênh, akamymê ar akôt Metĩndjwýnhmã idjápênh. Akamymê ar atỳxkumrêx me aje mekmã Jeju'ã adjujarênhakôt ne ba kum idjápênh. Badjwý ne ba ar akôt kum apê. Kam dja ga Metĩndjwýnhmãbit rax jarê, ane.

Be, me akajmãtã ne Metĩndjwýnh kabên jarênh djwýnh ô'ã memã Jejubit'ã ujarênh ar ba. Ga me kam gadjwý ijuk'ã Jejubit'ã adjujarênh ar aba. Kumãbit ne me kute rax jarênh ar o bamã, ane. Nãm ã kadjy mrãnh djwýnh imã ane.

*Me'ô kawaru jaka'ã ýr.*

<sup>11</sup> Nhym kam kàjkwa ajkij nhym kawaru jakaja dja. Nhym me'ô 'ã nhỹ. Me'ô nhidjibê Kabênkumrêx, ne ajte idji 'òbê Katàt kabên ne 'ã nhỹ. Nãm katàt memã axwe pãnh jarên kôt me'ýr prõt ne. <sup>12</sup> No pòk kute kuwy pòk pyræk ne kam bênjadjwýr rax krãdjê tu. Krãdjê krãptĩ ne kutu. Ne ta idji 'ã wajêt. Nhym me kute idjija pumũnh kêt, ajbit ne kute aminhidji pumũnh. <sup>13</sup> Ne

õ kubêkà kute kamrôkam irja jadjà. Nhyr me kum idji jarê. Idjibê Metîndjwýnh Kabên. Tãm ne me kum arê.

14 Nhyr kàjkwakam Metîndjwýnh nhõ krâkamngôn timer krâptî kôt mõ. Ne kam kubêkà mexkumrêx, kubêkà jaka, kubêkà ajmã kute kêt jangij ne 'ã mõ. Kawaru jaka'ã ne me krînh kôt mõ. 15-16 Nhyr Bênjadjwýr jajkwa krekre kurûm kâxdjwa kajgo kato. Kâxdjwa kajgo djwa mexkumrêx ne kato. Nhyr kubêkà'ã idjin kjê'ã idji. Idjibê

Bênjadjwýr raxbê kumkatiti:

Kute bênjadjwýr raxo pykabê me bênjadjwýrja kunî jakren timer mexi.

Kam ne kubê Bênjadjwýr raxbê kumkatiti: Ne kam kâxdjwa kajgo djwa mexjao dja apýnh timer ba djari meo ajkê. Meo ajkên kam ar meo ba, timer kum âpênhmã dja kabêno timer anor ar o ba. Kabêno timer anon timer axwemã bèn tỳx ar ba. Djãm kute akrân timer ar timer axweo bamã? Kati, dja kâxo âbêr djào ar mekam ngryk ban mekam ngryk mex timer. Godja Metîndjwýnh ngryk janên timer djâkam timer kurê timer prîne timer anê nhyr timer me kamrô prôt timer. Djãm Metîndjwýnh tỳxo kubê kumkati ngryk ngri got? Nãm ar meo ban î mekam ngryk mex timer.

17-18 Nhyr kam kadjy mrân timer djwýnh pydjî timer dja, ba omû. Arngro tỳx timer ne dja. Ne kam kâj bê âkmã kabên timer. Âk kâjkwa tâ timer ne mrân timer kunî timer kabên timer, timer kum,

—Me apa. Amrê timer aben pydjî. Arým timer ne Metîndjwýnh timer amã timer anhõ kwý krên timer djâ timer rax timer ne o atom timer, timer aje krên timer ne aja-jnemã. Ê, bênjadjwýr nhîmê krâkamngôn timer nhõ bênjadjwýr nhîmê timer âprâr nhîmê timer kawaru nhîmê 'ã krâkamngôn timer krîja nhîmê timer me kute timer pa 'amýnh timer nhyr timer me memã âpên timer kajgo ar baja nhîmê timer me kute memã o pânh timer kadjy âpên timer nhîmê timer me bênjadjwýr nhîmê timer kâtâm nhîmê timer kunî nhî timer dja ga timer me krên aja timer, ane. Nãm ã kadjy mrân timer djwýnh âkmã kabên timer ane.

19 Nhyr kam mry kute meo bajamê õ krâkamngôn timer me bênjadjwýr rûnhmê arým akuprõ. Me kute Jeju kawaru jaka'ã ýrja 'ýr prôt timer ne timer me akuprõ. Nhyr arým kutã Jejudjwý õ krâkamngôn timer hreo akuprõ.

20 Ne kam amijo aptân ar pa 'amýn timer kuwyo imôtikam ar kumê. Nãm mrymê kabên jarên timer djwýnh 'êxnhîja ro'ã ar pa 'amýn aro tèn timer kuwyo imôtikam ar kumê. Kabên jarên timer djwýnh 'êxnhîja timer ta kute mýjja pumûnh kêt kwý nhîpêx, kute mry djô'ã kabên timer kôt mýjja pumûnh kêt kwý nhîpêx timer ne o kute timer me noo biknor. Nhýnh timer me ja timer ne timer noo akuno? Bir, me'ã mry nhidji jari timer ne kute mry karômã amijarên timer ne kute kum rax jarên timer, timer me tãm timer ne kabên jarên timer djwýnh 'êxnhîja timer me noo akno. Kam timer ne Bênjadjwýr Jeju mrymê kabên jarên timer djwýnh 'êxnhîja ar ro'ã ar pa 'amýn aro tèn timer kam kuwyo imôtikam ar kumê. Ar tîn timer ne ar pa 'amýn aro tèn timer kuwyo imôtikam ar kumê. Kuwymê kên ngrân timer grã pôkkam ar kumê.

21 Ne kam timer me kôt môrja nhîmex timer. Jeju kawaru'ã ýrja tãm timer ne ajkwa krekre kurûm kâxdjwa kajgo kator timer me imex timer. O timer ne pyka kunî timer kôt timer me bênjadjwýr timer me ar õ krâkamngôn timer ro'ã timer me imex timer. Me imex nhyr âk kunî timer me kwý krê timer meo aja timer.

## 20

### *Xatanaj djuwpre'ã amex kubê 1.000.*

1 Nhyr kam kadjy mrân timer djwýnh 'õ kâjkwa kurûm tèn ruw timer ba omû. Ikrakam timer ne kam o kajkep djâ timer byn o tèn o ruw. Mýj kam o kajkep djâ timer nã? Bir, kre ry typydjikam o kajkep djâ timer ne kubyn o tèn o ruw. Kâxîrâxtîmê timer ne kubyn o ruw.

2 Ne kam mry kaâkjao tým, kubê timer ne Kangã tûm, kute timer me kâmex jarên timer djwýnh. Xatanaj tãm timer ne o tým timer ne kâxîrâxtîo uwpre. Djãm uwpre'ã amex pydjî timer got. 'Ã amex krâptî. 'Ã amexbê 1.000. 3 Nãm tu kre ry typydjikam kumên 'ã ijên timer kam o kajkep timer ne prîne 'ã ijê djào amrã, mýjja kute tom pyrâk o prîne oy.

Be, Xatanaj kute ajte pyka kunî timer kôt timer me noo biknorbê timer ne kre timer kumên 'ã ijê. Godja 'ã amexbê 1.000 apêx nhyr kam ajte kadjy mrân timer djwýnh 'ã kutan kaba nhyr ar ba ngrîre. Tãm timer ne ja. Be, ba kam ajte mýjja 'õdjwý pumû.

4-5 Be, timer me krî djâ timer idjwý timer ne kumex timer ba omû. Nhyr timer me kam krî. Metîndjwýnh timer ne arým timer me jamã timer kum,

—Me ga dja ga me memã axwe pãnh jarẽ, ane.

Me karõdjwý ne ba omũ. Mýj me karõ nã? Bir, me kute memã Jeju'ã ujarẽnh ar ban Metĩndjwýnh kabẽn'ã ujarẽnh ar ba nhym me kute me mut krãkãr nhym me tyk karõ ne ba omũ. Me kute mrymẽ mry karõ arkum rax jarẽnh kêt, kute aro Metĩndjwýnh ne arkum amijarẽnh kêt nhym mry te kute me'ã aminhidji janhôr prãmja, te kute me kuka'ã nãr me ikra'ã aminhidji janhôr prãmja, nhym me kubê bikẽnh nhym kam me kute me par karõ ne ba omũ. Me tãm dja me akubyn tĩn ne kam Kritumẽ ro'ã ar meo ba. Ar meo ba'ã amex krãptĩ ne. 'Ã amexbê 1.000. Me tyk ne akubyn tĩn kutewa ne ja. Nhym bep me kãtãm tykja, me tãm dja me'ã amexbê 1.000 nhym me akubyn tĩn ne.

<sup>6</sup> Nhym bep me tyk ne akubyn tĩn kute-waja dja me kĩnhkumrẽx. Arým mexo me akrenh me:x ne. Dja me ajte ty? Arkati. Dja me ajte tyk kêtikumrẽx, ne kam Metĩndjwýnhmẽ Kritu arkum apê, mebê me kadjy Metĩndjwýnh mar djwýnh ne arkum àpẽnh ba. Ne kam ar ro'ã ar meo ba. Ar meo ba'ã amex krãptĩ. 'Ã amexbê 1.000.

*Kute kuwyo imôtikam Xatanaj mẽnh.*

<sup>7</sup> Nhym kam amexbê 1.000 apêx nhym kam kadjy mrãnh djwýnh Xatanaj'ã kuta. Kubê ijêja'ã kutan me kadjy kaba. <sup>8</sup> Nhym arým kato, pyka kunĩkôt ajte kute me noo biknormã kato. Dja kãjkwa kraxkam me jamẽ kãjkwa nhôtkam me jamẽ aktã kãjkwa nhirê'ãnh me jamẽ mekbê Kokmẽ mekbê Makokmẽ me kunĩ 'ýr bôx ne memã kabẽn jarẽn me noo aknon meo akprõ. Kute Metĩndjwýnh nhõ me ja'ýr prõt ne kute me par kadjy nãrãm meo akprõ nhym me kumex. Nãm me kute ngô rax mýrri pykati ngrã ja pyrãk. Pykati ngrã tãm ne me o itun te kute abenã akremã nhym krãptĩ: anen amũ ajkamẽ nhym me te o ane. Nãm ã krãkamngõnhre kumex o ane.

<sup>9</sup> Ne kam prĩne me kadjy pyka jaên kam me'ýr mõn Metĩndjwýnh nhõ me mexjamã ipòk ne, krĩ mexmã ipòk ne. Metĩndjwýnh kum krĩrax kĩnhkumrẽxja tãm ne me kum ipòk ne. Nhym kam kãjkwa kurũm kuwy ruw ne prĩne me kuga nhym me prĩne xêr.

<sup>10</sup> Nhym kam Metĩndjwýnh bõm 'êxnhĩja mẽ, kute me noo biknor djwýnhja kuwyo imôtikam kumẽ. Kuwymẽ kẽn ngrãngrã pòkkam kumẽ. Kam ne õbê mrymẽ kabẽn jarẽnh djwýnh 'êxnhĩja mẽ. Ne kam ajbir kam Xatanaj mẽ. Kam ne Metĩndjwýnh prĩne aro bikẽnh rax ne. Nhym ar tokry: ne àmnhirẽnh ar ba. Àmnhirẽnh ar ba rã'ã rã'ã. Àmnhirẽnh ar ba: nhym 'ã akamãt ne tãmkam 'ã akati. Dja o ino rer kêtikumrẽx ne.

*Metĩndjwýnh kute me tykmã pãnh jarẽnh.*

<sup>11</sup> Nhym kam krĩ djãti jaka dja nhym kam me'õ nhỹ ba omũ. Nhym kam umaje pykamẽ kãjkwa prõt ne nhĩ'ãm tẽn akuno.

<sup>12</sup> Nhym kam me tyk kabem kumex. Me tyk kunĩ, me bẽnjadjwýrmẽ me kãtãmẽ krĩ djãti kabem kumex. Nhym kam pi'òk no'òk'ã kurê.

Ne kam ajte pi'òk no'òk 'õdjwý'ã kuta. Metĩndjwýnh kute me tĩn rã'ã rã'ã'ã no'òkja pi'òk tãm ne 'ã kuta.

Nhym bep ate ne kute pi'òk no'òk kumrẽx'ã rẽnhja. Pi'òk jakôt ne Metĩndjwýnh memã axwe pãnh jarẽ. Me tĩnri axwe'ã pi'òk no'òk ja ne Metĩndjwýnh 'ã kurên kam mekmã axwe pãnh jarẽho nhỹ, me tykmã pãnh jarẽho nhỹ.

<sup>13</sup> Nhym kam ngô raxbê pyka kêtjadjwý Metĩndjwýnhmã me tyk kanga. Ngô kute me imexja tãm ne kum me kanga. Nhym apýnh mýjja kute me par djãri Metĩndjwýnhmã ajte me kanga. Nhym me tyk nhõ pyka Metĩndjwýnhmã ajte me kanga. Kum me kanga nhym me tyk kunĩ krĩ djãti kabem kumex. Nhym mekmã pãnh jarẽho nhỹ. Me tĩnri kute amijo bakôt ne memã pãnh jarẽho nhỹ.

<sup>14-15</sup> Mekmã pãnh jarẽnh pan kam ate apýnh mýjja kute me par djãri mekam o pòx ne kuwyo imôtikam kurê ne ajte me tyk nhõ pykadjwý kuwyo imôtikam kumẽ nhym arým me tyk nhõ pykaja kêt ne. Nhym bep mýjja kute me parja gêdja ajte akubyn me par kêtikumrẽx ne. Arým me tyk kêt. Mýjja kute me parja arým kêt.

Nhym me idji'ã no'òk kêtja, Metĩndjwýnh kute me tĩn ne ar ba rã'ã rã'ã kadjy idji'ã no'òk kêtja, me tãm ne Metĩndjwýnh kuwyo imôtikam me kurê. Me tyk nhijukri tyk ne ja.

## 21

*Metĩndjwýnh nhõ Djeruxarẽ ny.*

<sup>1</sup> Nhyam kam kàjkwamẽ pyka arým ny ba omũ. Nhyam bep kàjkwa tũmmẽ pyka tũm ne arým nhĩ'ãm tẽn akuno. Nhyam ngõ raxbê pyka kêt djwý arým kêt.

<sup>2</sup> Nhyam kam krĩrax mextire ruw ba omũ. Krĩraxbê Djeruxarẽ arým ny ne ruw. Kàjkwa kurũm ruw. Metĩndjwýnh kurũm ne ruw ba omũ. Djeruxarẽ arým mexkumrẽx. Kute me mjên 'yr ba kadjy kute amimex pyræk, me kute mjên kadjy amimex ne kute kubêkà mex jangjênh ne mrãnh nhyam me kute abenã me rênh pyræk.

<sup>3</sup> Nhyam kam krĩ djãti kurũm me'õ kabên. Kàj bê kabên ne memã kum,  
—Ë, arým ne Metĩndjwýnh pykakam me ja'yr bõx ne kam mekam ar bamã.  
Dja mekam ar ba ne kam meo aminhõkumrẽx ne.  
Nà, Metĩndjwýnh ta dja mekam djan <sup>4</sup> kam me kunĩmã no kangõ kukõn mekmã o apêx.

Nhyam kam me arým tyk kêt kumrẽx ne.

Ne kaprĩ kêt kumrẽx ne.

Ne mýr kêt kumrẽx ne.

Ne tokry kêt kumrẽx ne. Mýkam?

Mýjja kunĩ tũmja arým nhĩ'ãm tẽn ne bi-knorkam ne arým kêt ne, ane.

Nãm ã krĩ djãti kurũm kabên ane.

<sup>5</sup> Nhyam kam krĩ djãtikam ýrja ne kabên ne,

—Ë, arým ne ba mýjja kunĩo ny, ane.

Ne kam ajte,

—On 'ã pi'ók no'ók. Mrãmri ne kabênja.  
Djãm kabên kajgo? Arkati,  
kabênkumrẽx, ane.

<sup>6</sup> Ne kam imã,

—Anũ. Arým ne ba o ino re.

Ba ibê mýjja kunĩ krax ne ajte ibê mýjja kunĩ 'ênhõt.

Ba ne ba adjakamã itũm ne kam ije mýjja nhipêxo itẽm ne ije inomã mênh, ba.

Djori me'õ kum kõr ba kum ngõ ngã gẽ o ikõ. Ngõ tĩn dja ba tu kum kajgo ngã gẽ o ikõ. Mýj ngõ tĩn nã? Bir, ngõ kute meo tĩnja dja ba kum kungã.

<sup>7</sup> Me me kurãm tỳx ne kute ijãno ãm jamãbit dja ba mýjja mex kunĩ ngã ne kam tu meo ikrakumrẽx nhyam me imã, “Me inhõ Metĩndjwýnh”, ane.

<sup>8</sup> Nhyam bep me kute bit ijo aminhõmãn kute amikam me kabên pymaje ikangaja,

ne kam ajte me kute amim imar kêtja,

me kute axweo amiptarja,

me kute me par prãmja,

me prõ prãmja, me mjên prãmja,

me udjy,\*

me kute mýjjao Metĩndjwýnh karõ nhipêx ne kute we kum ar amijarênho baja,

me 'êxnhĩ kunĩ,

me arĩk ar ba kunĩ dja me iwýr bõx kêt kumrẽx ne.

Me ja kunĩ dja ba kuwyo imõtikam me kurẽ.

Kuwymẽ kên ngrãngrã põkkam me

kurẽ. Me tyk nhijukri ajte tyk ne ja.

<sup>9</sup> Nhyam kam kadjy mrãnh djwýnh 'õ kato ba omũ. Kadjy mrãnh djwýnhbê <sup>7</sup> ne apýnh mýjjao kute meo bikênh djãri Metĩndjwýnh ngryko ino rero ngõnho ipu kute amýnh ne o ku'ê ja 'õ ne iwýr tẽn imã,

—Apa, amrẽ tẽ ba on amã akre ga omũ. Mrykĩ'ãtomti jabatãnh ny prõ dja ba amã akre. Me arým kute abenã ar mênhja dja ba amã akre, ane. <sup>10</sup> ã imã anen kam ikarõo tẽn. Krãnh jabatãnh, krãnh prêkti'ýr ikarõo tẽn ijo bõx.

Nhyam kam krĩrax mextire ruw ba omũ. Prõ ne rwýkja. Krĩraxbê Djeruxarẽ arým ruw. Kàjkwa kurũm, Metĩndjwýnh kurũm ruw ba omũ. <sup>11</sup> Nhyam aparmã adjênh tẽn. Metĩndjwýnh jadjênh ne adjênh ne. Ne kam karýr kute kên pãnh rax, kên ngrãngrã jadjênh tỳxja pyræk. Ne ajte karý:r kute krytyrãnh karýrja pyræk. Nãm ã krĩrax jadjênh anen ruw.

<sup>12</sup> Nhyam kikre bu'ã apýnh kên djãri aben nhiby adjwýro tẽn nhyam ã prêktire anen ã utĩ ane. Nhyam kam ajkwa krekrebê <sup>12</sup>. Nhyam kam apýnh ajkwa krekre djãri kadjy mrãnh djwýnh 'ã ku'ê. Nhyam ajkwa krekre'ã idji arij. Apýnh mekbê idjaer nhingêt kukãmãre nhidji djãri ajkwa krekre 'ã idji arij. Idjibê <sup>12</sup> ne apýnh kre'ã arij.

\* **21:8** Me kute apýnh mýjja mar, namẽ mry kaàkmẽ me karõmẽ, me tãm ne me amijo wajangao ba. Nhyam me karõ punu ne me kute me jakõt me noo biknor prãm kumrẽx. 'Ã dja gar, A Tex 2.9, Apôx 13.13, Karõ 8.9-24, 13.6-12, 19.13-19 jarẽ.



13 Nãm kàjkwa krax 'anhã ajkwa krekre amãnhkrut ne ikjêkêt. Ne kàjkwa nhôt'anhã ajkwa krekre amãnhkrut ne ikjêkêt. Ne kàjkwa nhirê'anhã aktã ajkwa krekre amãnhkrut ne ikjêkêt.

14 NhyM kikre bu'ã apýnh kên djàri aben nhiby adjwýro tẽmja krakri ne kênpotibê 12 ikwã. Kênpoti'ã ne Mrykĩ'ãtomti jabatãnh ny kute ar anorbê 12ja idji arij.

15 NhyM kadjy mrãnh djwýnh kute imã kabẽnja àbêr djã byn o dja. Kên karýro àbêr djã. O kute krĩrax'ã akremã. Kute krĩraxmẽ ajkwa krekremẽ bu'ã apýnh kên djàri aben nhiby adjwýro tẽmjamẽ kute 'ã akremã.

16 NhyM krĩrax pomẽ rymẽ kute aben pyrãk. NhyM pokôt 'ã akren anhãkôt 'ã akren prêkkôt 'ã akre. NhyM kunĩ'ã akre kute aben pyrãk. Ne 'õ aben japanh kêtumrêx. Àbêr djão ne 'ã akreo tẽ. 'Ã akrebê 2.200 kiometu.

17 Nãm kikre'ã akren kam atãri kikre bu'ã kẽnja'ã akre. Prêk'ã akrebê 64 metu. Me baje mýjja 'ã akrekôt ne kadjy mrãnh djwýnh kikremẽ kikre bu'ã kẽnjamẽ 'ã akre.

18 NhyM bu'ã kẽnja ne ngrãngrã kute bõre ngrãngrã pyrãk o ne ipêx ne. NhyM bep krĩraxja ne kryt karýro ipêx ne. Kryt karýrobit, atemã mýjja 'õmẽ o bikãr kêt. NhyM krytja karý:r kute ixè jadjênh pyrãk.

19-20 NhyM kam kikre bu'ã kẽnja krakri kênpotikam apýnh kên djàri kumex. Kên pãnh raxbit. Kikre bu'ã kẽnja kĩnh kadjy.

Kên kutewa ne ngrãngrã kute bõre ngrãngrã ja pyrãk.

Ne atãri ja ngrãngrã týt kute kwênh ngrãngrã ngwýnh ja pyrãk.

Ne atãri ja kãjbê rãrãr kamrêk kute kôkanê ngwýnh rãrãr kamrêk ja pyrãk.

Ne atãri ja ngrãngrã kute krwýnh ngwýnh ngrãngrã ja pyrãk.

Ne atãri ja kajngãr kute ngãnhtey nhy kajngãr ja pyrãk.

Ne atãri ja kamrêk kute tyrti tekã kamrêkti, tekã kamrêk ja pyrãk.

Ne atãri ja kãjbê rãrãr kute mutêkre ngwýnh rãrãr ja pyrãk.

Ne atãri ja kãjbê ngrãngrã kute kôtkaak ngwýnh kãjbê ngrãngrã ja pyrãk.

Ne atãri ja ngrãngrã kute bày'yre ngrãngrã ja pyrãk.

Ne atãri ja kãjbê ngrãngrã kute krãkamkãxte ngwýnh kãjbê ngrãngrã ja pyrãk.

Ne atãri ja ngrãngrã týt kute atorti ngrekã ngrãngrã ja pyrãk.

NhyM bep kute katẽ ja ne rãrãr kute kênnetojre ngwýnh rãrãr ja pyrãk.

Be, kikre bu'ã kên krakri apýnh kênpoti djàri ne ja.

21 NhyM bep kikre bu'ã kẽnja ajkwa krekrebê 12ja ne angã krã. Angã krãti:, angã krãtio ne kikre bu'ã kẽnja ajkwa krekre kunĩo 'ã ijê djã, tãm ne kute ngãp jadjênh pyrãk. Apýnh ajkwa krekre djàri ne kadjy angã krã'ã akren o ipêx ne, angã krã pýnho. Be, kikre bu'ã kên jajkwa krekre ne ja.

NhyM bep krĩkam pryjadjwý kryt karýro pry. Kryt karýrobit, atemã mýjja 'õmẽ o bikãr kêt. Karý:r kajgon kam apôkmã rĩt, kute ngõnh karýr apôkmã rĩt ja pyrãk.

22 Djãm krĩrax jakam Metĩndjwýnh nhõ kikreti? Kati, arým ne bõx ne me bakam ar mrã. Bẽnjadjwýr Metĩndjwýnh týtõ kubê kumkatimẽ krabê Mrykĩ'ãtomti jabatãnh nyja ar tãm ne arým ar bõx ne me bakam ar mrã. Arým ne ar ro'ã me bawýr ruw ne me bakam ar mrã. Djãm me kute kum kabên kadjy ne mete kum kikremã? Kati, arým ne ar bõx ne me bakam ar mrã. Mýt kadjy dja me kum kikre? Djãm kàjkwakam ar ba rã'ã ne mete kum kikren kam kum kabênmã?

23 Djori kam mytmẽ mytyrwý kute me kurwýmã? Kati, Metĩndjwýnh ta adjênho dja me kurwý. Krabê Mrykĩ'ãtomti jabatãnh ny jadjwýbê ne me kurwý djwýnh. 24 Be, ar irã jakam godja apýnh me ba djàri kunĩ kam mrã, mrãnh mextire. NhyM pyka kunĩkôt bẽnjadjwýr krĩraxmã õ mýjja mex kunĩo wangijn o krĩrax kĩnh ne.

25 NhyM krĩ bu'ã kên jajkwa krekredjwý 'ã ijê kêtumrêx ne. Djãm akamãt kadjy dja me ajkwa krekre'ã ijê? Kati, akamãt kêtumrêx, a'u ry typydji. Kam godja ajkwa krekre'ã ijê kêtumrêx ne. 26 NhyM apýnh me ba djàrikam me ja õ mýjja mexo wangijn o krĩrax kĩnh ne. NhyM me rũnh krĩraxmã wangijn nhyM krĩrax ô'ã kĩnhkumrêx ne.

<sup>27</sup> Nhyam bep mýjja punu 'õ dja kum àr kêt-kumrêx ne. Me pijàm kêt-mê me 'êxnhîmê me ja 'õ dja kum àr kêt-kumrêx ne. Nhyam bep Mrykî'âtomti jabatàn ny kute õ pi'òk no'òkkam me tîn rã'ã rã'ã'ã idji janhôrjabit dja me kum wangij.

## 22

*Ngô kute meo tîn.*

<sup>1</sup> Nhyam kam kadjy mrãnh djwýnh imã ngô kute meo tîn pakrax jakre. Ngô kute meo tîn ne prôto nõ ba omũ. Metîndjwýnhmê Mrykî'âtomti jabatàn nyre ar krî djâti kurũm ne prôto nõ. Karý:rkumrêx. Karýr kute krytyrãnh pyrãk. <sup>2</sup> Nãm pry nhôkre djãkôt prôto nõ. Krîraxkam pry nhôkre djãkôt prôto nõ nhyam aktã nokã'ã pidjô kute meo tînja dja.

Pidjô bàri amãnhkrut ne mytyrwý kunî kôt aben pãnh ô kadjy aktã ngô nhijên o dja. Aktã ne ngô jakã'ã ngô nhijên o dja. Be, pidjô ja ne ar mytyrwý kunîkôt ôo kute aben japanho ãm kadjy dja. Nãm apýnh mytyrwý djãri'ã pidjô jakren o 12. Mytyrwý kunî kôt ôn bikaprãr kêt-kumrêx kadjy 'ã akre. Nhyam bep pidjô 'ôja ne kubê me umar mex djã, pyka kunî kôt kute meo mex nhyam me umar mex ne kanê kêt-mã.

<sup>3</sup> Djãm krî jakam mýjja kute meo bikênhmã? Kati, krî ja gédja tu kam me mex ryti pydji. Nhyam mýjja kute meo bikênh dja 'ýr àr kêt-kumrêx. Metîndjwýnhmê Mrykî'âtomti jabatàn ny dja kam ar meo ban meo djuw mex o ba. Nhyam õ àpênhdjwý kum àpênh mexkumrêx ne. <sup>4</sup> Ne kam Metîndjwýnh nokre pumũ nhyam kam me kuka'ã Metîndjwýnh aminhidji janhô nhyam me 'ã ar ba.

<sup>5</sup> Nhyam kam kam akamãt kêt-kumrêx ne. Nhyam kam ngônhpôkti kêt-kumrêx ne. Nhyam arngro kêt-kumrêx ne. Mýj kadjy dja ngônhpôktimê arngromê? Bênjadjwýrbê Metîndjwýnh dja me kurwý. Nhyam Metîndjwýnh nhô me ja dja ar meo ba rã'ã: ar meo ba.

<sup>6</sup> Nhyam kam kadjy mrãnh djwýnh imã,

—Ë, mrãmri ne kabênja. Djãm kabên kajgo? Arkati. Kabênkumrêx. Amrêbê Bênjadjwýrbê Metîndjwýnh ne me kute kabên jarênh djwýnhmã ta Karõ jano nhyam

me kam ô'ã memã kabêno amirît ne. Nhyam kam ajbir jakam ta arým ajte kadjy mrãnh djwýnh jano. Kute õ àpênhmã mýjja kator 'ýr jao amirîtmã ne ano. Kute mýjja kator kêtja anhýr djwýnhràmm mekmã o amirît kadjy ne ano. Arým kator 'ýr, ane. Nãm ã kadjy mrãnh djwýnh imã ane.

*Jeju bôx 'ýr arê.*

<sup>7</sup> Nhyam Jejudjwý arým me bamã,

—Ë, arým ne ba akubyn me awýr ibôx 'ýr, ane. Ë, me'õ kute prîne ikabênkôt amijo ba jabej dja kînhkumrêx. Metîndjwýnh kute anhýr djwýnhràmm memã mýjjao kator'ã ujarênh ga aje 'ã pi'òk no'òk nhyam me kute amim mar ne kôt amijo ba jabej, be, me tãm dja me kînhkumrêx ne, ane.

Nãm ã Jeju me bamã ane.

<sup>8</sup> Ba, ba ibê Djuão ne ba arým prîne omũ. Nãm bãm mýjja ja kunî pumũn kuma. Ne kam mýjja kunî pumũn mar pan kam kabem itu mýrbê tým. Kadjy mrãnh djwýnh kute imã mýjja 'ã karõ kabem itu mýrbê tým ne bit ije kum rax jarênhmã. <sup>9</sup> Nhyam kam imã,

—Kati, kwãrîk wãnh. Badjwý ne ba Metîndjwýnhmã idjãpênh, akamybê Metîndjwýnh kabên jarênh djwýnhmê ar akôt Metîndjwýnhmã idjãpênh. Me akunî aje pi'òk no'òkkôt, ajbir aje Metîndjwýnh kabên'ã pi'òk no'òk jakôt amijo abajamê ne gu me baro'ã Metîndjwýnhmã badjãpênh. Kam dja ga Metîndjwýnhmãbit rax jarê, ane.

<sup>10</sup> Ne kam ajte imã,

—Gora udjur kêt. Metîndjwýnh kute anhýr djwýnhràmm memã mýjjao kator'ã ujarênh ga aje 'ã pi'òk no'òkja kwãrîk wãnh udjur kêt. Arým 'ýr. Mýjja ja kunî arým kator 'ýr. <sup>11</sup> Kwãrîk wãnh me axwe wãnh axwe ar ba rã'ã. Nhyam me arîk ar badjwý tu wãnh arîk ar ba rã'ã. Kute amimarkôt arîk ar wãnh ba. Gê me kute katãt amijo badjwý katãt amijo ba rã'ã, katãt amijo ba ry typydji. Nhyam Metîndjwýnh nhô me mex jadjwý mex rã'ã, mex ry typydji.

<sup>12</sup> Ë, arým ne Jeju me bamã kabên jarê. Gora me kabên ma. Nãm,

—Ë, arým ne ba akubyn me awýr ibôx 'ýr. Dja ba bôx ne kam me amã pãnh jarê. Me aje amijo abakôt me amã pãnh jarê. Me ajaxwemê me amrãnh mexmê kôt me amã

pãnh jarë. Ë, me ajaxwe dja ba me ajo ajkë nhym bep me mexmë gêdja ba me iro'ã ar iba. <sup>13</sup> Ba ibê mýjja kunĩ krax ne ajte ibê mýjja kunĩ 'ênhôt. Ba ne ba adjàkamã itũm ne kam ije mýjja nhipêxo itēm ne ije inomã mēnh. Ba ren ije kàjkwamë pykamë omũnh 'ãno idjãm kêt nhym ren amrëbê amijo ajkë nhym ren mýjja kunĩ kêt ne, ane.

<sup>14</sup> Be, Metĩndjwýnh nhõ me mexja, me axwe kêtja dja me kĩnhkumrëx ne. Me tãm dja me kute kubëkà'ã ngrã o pôxkam aka pyræk. Dja me axwe kêt ã mextire ne ã kĩnh ane. Me jabit, Metĩndjwýnh nhõ me mexja dja me pidjõ kute meo tĩn ku ne krĩrax bu'ã kēn jajkwa krekrekõt wangij ne kam Metĩndjwýnh nhõ krĩraxkam ar ba.

<sup>15</sup> Nhym bep me kute ropre pyræk ne arĩk ar bajamë me udjymë me prõ prãmmë me mjēn prãmmë me kute me par prãmmë me kute mýjjao Metĩndjwýnh karõ nhipêx ne kute we kum amijarēho bajamë me 'êxnhĩmë me kabēn krãptĩjamë, me tãm gêdja me kum ngjēnh kêtumrëx ne.

Nhym kam Jeju ajte me bamã,

<sup>16</sup> —Ba ibê Jeju ne ba me amã ikadjy mrãnh djwýnh jano. Kute apýnh me aje ikõt aben pydji djari me amã katat mýjja ja jarēnhmã. Ba ne ba ibê Dawi tãmdjwýkumrëx ne ãm djakam dja. Ba ne ba Dawi nhipêx ne. Ba ne ba ije akati maktã umajýrtire pyræk ne inhirækumrëx, ane. Nãm ã Jeju me bamã ane.

<sup>17</sup> Nhym Metĩndjwýnh Karõmë Mrykĩ'ãtomti jabatãnh ny prõmë ar Jejumã kum,

—On amrë tē, ane. Jeju nhõ me jabê Mrykĩ'ãtomti prõ ne kum,

—On amrë tē, ane.

Godja ga me Jeju'ã idjujarēnhja man kam gadjwý kum,

—On amrë tē, ane.

Nhym Jeju memã kum,

—Gê kam me'õ kum kôr jabej on amrë iwýr tēn ngô tĩno ikõ. Tu kajgoo ikõ, pãnh kêt. Amã ngô kute meo tĩnja kĩnh jabej tu kajgoo ikõ, ane. Nãm ã Jeju kabēn ane.

<sup>18</sup> Ë, ibê Djuaõ ne ba ije me amã ikabēn jarēnhmã.

—Me apa, me ikabēn ma. Gora me aje ja mar jabej, Metĩndjwýnh kute anhýr djwýnhràmmemã mýjjao kator'ã ujarēnh ba ije 'ã pi'òk no'òkja aje mar jabej gora me ikabēn ma. Dja ga me ajõ ijukri adjan atemã akabēn 'õ jarēn arým Metĩndjwýnh kabēno ajkë nhym arým pãnh me ajõo ajkë. Apýnh ije meo bikēnh djari'ã pi'òk no'òk jao dja me ajõo ajkë. <sup>19</sup> Ba ibê Djuaõ ne ba ajte ije me amã ikabēn jarēnhmã,

—Godja ba ije anhýr djwýnhràmmemã Metĩndjwýnh kute me amã mýjjao kator'ã pi'òk no'òk ja ga me ajõ kabēn 'õo ajngrã nhym arým Metĩndjwýnh abê mýjja nē. Abê pidjõ kute meo tĩnja nēn abê õ krĩrax mextireja nē ne ije me amã mýjja mex jarēnh ne ije 'ã pi'òk no'òk ja tãm dja me ajõbê nē, ane.

Be, me ikabēn ja ma. Ë, gêdja Jejudjwý me amã kabēn jarē,

<sup>20</sup> —Ba ibê Jeju, ije katat me amã mýjja kunĩ jarēnh ne ba me amã, “Mrãmri ne ba arým me awýr ibõx 'ýr”, ane.

Dja gu me,

—Nà, Bēnjadjwýr Jeju, mrãmri. On amrë tē, ane.

<sup>21</sup> Gê me banhõ Bēnjadjwýr Jeju ukaprĩkõt prĩne me bajo djuw mex. Mrãmri. Tãm ne ja.